



Tnúhu ní cáhá<sup>n</sup> yă  
ndiöxí xito cùu uú

Peñoles Mixtec New Testament 2002 Edition

## Contents

|  |     |
|--|-----|
| TNÚHU NÍ CHÍDÓ TNÚNÍ TÉ MÀTEÚ  | 1   |
| TNÚHU NÍ CHÍDÓ TNÚNÍ TÉ MĂCÚ   | 80  |
| TNÚHU NÍ CHÍDÓ TNÚNÍ TÉ LÛCĂ   | 128 |
| TNÚHU NÍ CHÍDÓ TNÚNÍ TÉ JUĂĂ   | 203 |
| NCHAA NÀCUĂA NÍ QUIDE CUE TÉE NÍ TÁÚCHÍÚ <sup>n</sup> JÈSÚS DACUÀHA ÑAHA           | 254 |
| XII ÑÁYIU TNÚHU-GĂ   |     |
| TUTÚ NÍ CADÚHA TÉ PĂBLÚ QUÍHÍ <sup>n</sup> NDAHA ÑÁYIU ÑUÚ RÒMĂ                    | 322 |
| TUTÚ DÍHNA NUU NÏ CADÚHA TÉ PĂBLÚ QUÍHÍ <sup>n</sup> NDAHA ÑÁYIU ÑUÚ<br>CÒRINTÚ    | 353 |
| TUTÚ CÚÚ ÛÚ NÍ CADÚHA TÉ PĂBLÚ QUÍHÍ <sup>n</sup> NDAHA ÑÁYIU ÑUÚ<br>CÒRINTÚ       | 385 |
| TUTÚ NÍ CADÚHA TÉ PĂBLÚ QUÍHÍ <sup>n</sup> NDAHA ÑÁYIU DISTRÌTÚ GĂLACIĂ            | 405 |
| TUTÚ NÍ CADÚHA TÉ PĂBLÚ QUÍHÍ <sup>n</sup> NDAHA ÑÁYIU ÑUÚ ÉFESÚ                   | 416 |
| TUTÚ NÍ CADÚHA TÉ PĂBLÚ QUÍHÍ <sup>n</sup> NDAHA ÑÁYIU ÑUÚ FÌLIPÚ                  | 427 |
| TUTÚ NÍ CADÚHA TÉ PĂBLÚ QUÍHÍ <sup>n</sup> NDAHA ÑÁYIU ÑUÚ CÒLOSĂ                  | 434 |
| TUTÚ DÍHNA NUU NÏ CADÚHA TÉ PĂBLÚ QUÍHÍ <sup>n</sup> NDAHA ÑÁYIU ÑUÚ<br>TESĂLÓNICĂ | 441 |
| TUTÚ CÚÚ ÛÚ NÍ CADÚHA TÉ PĂBLÚ QUÍHÍ <sup>n</sup> NDAHA ÑÁYIU ÑUÚ<br>TESĂLÓNICĂ    | 447 |
| TUTÚ DÍHNA NUU NÏ CADÚHA TÉ PĂBLÚ QUÍHÍ <sup>n</sup> NDAHA TÉ TIMÛTEÚ              | 451 |
| TUTÚ CÚÚ ÛÚ NÍ CADÚHA TÉ PĂBLÚ QUÍHÍ <sup>n</sup> NDAHA TÉ TIMÛTEÚ                 | 460 |
| TUTÚ NÍ CADÚHA TÉ PĂBLÚ QUÍHÍ <sup>n</sup> NDAHA TÉ TÌTÚ                           | 466 |
| TUTÚ NÍ CADÚHA TÉ PĂBLÚ QUÍHÍ <sup>n</sup> NDAHA TÉ FILEMÓN                        | 470 |
| TUTÚ QUÍHÍ <sup>n</sup> NDAHA CUE ÑÁYIU HÈBREÚ                                     | 472 |
| TUTÚ NÍ CADÚHA TÉ SÀNTIAÚ  | 497 |
| TUTÚ DÍHNA NUU NÏ CADÚHA TÉ PÈLÚ   | 504 |
| TUTÚ CÚÚ ÛÚ NÍ CADÚHA TÉ PÈLÚ  | 513 |
| TUTÚ DÍHNA NÍ CADÚHA TÉ JUĂĂ   | 519 |
| TUTÚ CÚÚ ÛÚ NÍ CADÚHA TÉ JUĂĂ  | 526 |
| TUTÚ CÚÚ ÛNÍ NÍ CADÚHA TÉ JUĂĂ   | 527 |
| TUTÚ NÍ CADÚHA TÉ JÛDÁS  | 529 |
| NCHAA SĂ NÏ XINÍ TÉ JUĂĂ NDHH NCHAA SĂ NÏ TECÚ DÓHO-DÉ                             | 532 |



## **Tnúhu ní cáhá<sup>n</sup> yă ndiöxí xito cùu uú**

**New Testament in Mixtec, Peñoles (MX:mil:Mixtec, Peñoles)**

Language: Mixtec, Peñoles

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### **Copyright and Permission to Copy**

Copyright © 2002 Wycliffe Bible Translators, Inc.

Copyright © 2002 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

a2c4729f-3291-569b-8f84-0165575cf9bb

ISBN: 978-1-5313-0419-5

## TNÚHU NÍ CHÍDÓ TNUNÍ TÉ MÀTEÚ

**Nchaa cue téé ní xíndecu  
ndéé sanaha cùtnàhá vátá  
quíxí-gã Xítohó Jesucristú**

(Lc. 3:23-38)

**1** Te ñaní tnáhá Xítohó Jesucristú ní cuu ndíi Dàvíí ndíhi ndíi Àbrahám, cue téé ní xíndecu ndéé sanaha vihi-gá ñuyú-a. Te duha ndùu cuendá dava-gá cue téé ní cuu ñaní tnáhá-gã ní xíndecu ndéé sanaha.

<sup>2</sup>Ndíi Àbrahám ní xóo ìí<sup>n</sup> déhe ndíi, te ndíi-á<sup>n</sup> ní xínani ndíi Isàác. Te déhe ndíi Isàác-á<sup>n</sup> ní cuu ndíi Jàcób, te déhe ndíi Jàcób-á<sup>n</sup> ní cuu ndíi Jùdá, te diu-ni ndíi Jàcób-á<sup>n</sup> ní cuu tãtá dava-gá cue ñaní ndíi Jùdá-á<sup>n</sup>. <sup>3</sup>Te déhe ndíi Jùdá-á<sup>n</sup> ndíhi ñadìhí ndíi, ndíi Tàmár ní cuu ndíi Fàrés ndíhi ndíi Zàrá. Te déhe ndíi Fàrés-á<sup>n</sup> ní cuu ndíi Èsróm, te déhe ndíi Èsróm-á<sup>n</sup> ní cuu ndíi Àrám. <sup>4</sup>Te déhe ndíi Àrám-á<sup>n</sup> ní cuu ndíi Aminàdáb, te déhe ndíi Aminàdáb-á<sup>n</sup> ní cuu ndíi Nàsón, te déhe ndíi Nàsón-á<sup>n</sup> ní cuu ndíi Sàlmón. <sup>5</sup>Te ñadìhí ndíi Sàlmón-á<sup>n</sup> ní xínani-a<sup>n</sup> Ràháb, te ní xóo ìí<sup>n</sup> déhe-yu ní xínani-dě Bòóz. Te ñadìhí ndíi Bòóz-á<sup>n</sup> ní xínani-a<sup>n</sup> Rüt, te ní xóo ìí<sup>n</sup> déhe-yu ní xínani-dě Òbéd, te déhe ndíi Òbéd-á<sup>n</sup> ní cuu ndíi Isàí. <sup>6</sup>Te déhe ndíi Isàí-á<sup>n</sup> ní cuu ndíi Dàvíí téé ní xíndaha ñàha xii cue ñáyiu isràél. Te déhe ndíi Dàvíí-á<sup>n</sup> ndíhi ñadìhí ndíi ní cuu ndíi Salòmón. Te díhna-gá ndíi Ùriás ní cãndeca ndíi ñadìhí-á<sup>n</sup> te dàtnùní ní naquehe<sup>n</sup> ñaha ndíi Dàvíí-á<sup>n</sup>.

<sup>7</sup>Te déhe ndíi Salòmón ní cuu ndíi Ròboám, te déhe ndíi Ròboám-á<sup>n</sup> ní cuu ndíi Àbiás, te déhe ndíi Àbiás-á<sup>n</sup> ní cuu ndíi Àsá. <sup>8</sup>Te déhe ndíi Àsá-á<sup>n</sup> ní cuu ndíi Josáfát, te déhe ndíi Josáfát-á<sup>n</sup> ní cuu ndíi Jòrám, te déhe ndíi Jòrám-á<sup>n</sup> ní

cuu ndíi Ùziás. <sup>9</sup>Te déhe ndíi Ùziás-á<sup>n</sup> ní cuu ndíi Jòtám, te déhe ndíi Jòtám-á<sup>n</sup> ní cuu ndíi Àcáz, te déhe ndíi Àcáz-á<sup>n</sup> ní cuu ndíi Ezèquiás. <sup>10</sup>Te déhe ndíi Ezèquiás-á<sup>n</sup> ní cuu ndíi Manàsés, te déhe ndíi Manàsés-á<sup>n</sup> ní cuu ndíi Àmón, te déhe ndíi Àmón-á<sup>n</sup> ní cuu ndíi Jòsiás. <sup>11</sup>Te déhe ndíi Jòsiás-á<sup>n</sup> ní cuu ndíi Jecòniás. Te diu-ni ndíi Jòsiás-á<sup>n</sup> ní cuu tãtá nchaa dava-gá cue ñaní ndíi Jecòniás-á<sup>n</sup>. Te dàvá-á<sup>n</sup> ní quide yica cuè téé ñuú Babiloniá ndécá-güedě ñáyiu isràél cuáhá<sup>n</sup> ñuú-güedé cuendá yàcá<sup>n</sup> cundecú-yu.

<sup>12</sup>Te sátá ní yáha duca<sup>n</sup> ní cuu, te ndíi Jecòniás ní xóo ìí<sup>n</sup> déhe ndíi ndíhi ñadìhí ndíi, te téé-á<sup>n</sup> ní xínani-dě Salàtiél. Te déhe ndíi Salàtiél-á<sup>n</sup> ní cuu ndíi Zorobàbél. <sup>13</sup>Te déhe ndíi Zorobàbél-á<sup>n</sup> ní cuu ndíi Àbiúd, te déhe ndíi Àbiúd-á<sup>n</sup> ní cuu ndíi Eliàquím, te déhe ndíi Eliàquím-á<sup>n</sup> ní cuu ndíi Àzór. <sup>14</sup>Te déhe ndíi Àzór-á<sup>n</sup> ní cuu ndíi Sàdóc, te déhe ndíi Sàdóc-á<sup>n</sup> ní cuu ndíi Àquím, te déhe ndíi Àquím-á<sup>n</sup> ní cuu ndíi Èliúd. <sup>15</sup>Te déhe ndíi Èliúd-á<sup>n</sup> ní cuu ndíi Eleàzár, te déhe ndíi Eleàzár-á<sup>n</sup> ní cuu ndíi Mátán, te déhe ndíi Mátán-á<sup>n</sup> ní cuu ndíi Jàcób. <sup>16</sup>Te déhe ndíi Jàcób-á<sup>n</sup> ní cuu ndíi Chèé téé ní cuu yìi tá Màriá xíchí ní cuu ñaná Jèsús Yáá ní tendaha Dütú Ndiõxí ní quixi ñuyú-a.

<sup>17</sup>Te sa ní cuu úxúú tnáhá cue téé cùu ñaní tnáhá ndíi Àbrahám ndécú dàvá-á<sup>n</sup>, te dàtnùní ní cacu ndíi Dàvíí diu-ni ñaní tnáhá ndíi. Te núú tnáhá méé ndíi Àbrahám ndíhi ndíi Dàvíí ní cuu úxícúmí tnáhá-güedé. Te duca<sup>n</sup> te sa ní xínu úxícúmí-gã tucu-güedé ní cacu, te dàtnùní ní tñii ñaha cuè téé ñuú Babiloniá xii ñáyiu isràél ndécá ñaha-güedé xíi-yu cuáhá<sup>n</sup> ñuú-güedé cuendá yàcá<sup>n</sup> cundecú-yu. Te sátá ní yáha sá dúcá<sup>n</sup> ní cuu, te ní cacu úxúú tucu cue téé ní cuu ñaní tnáhá ndíi Àbrahám ndíhi ndíi Dàvíí, te dàt-

nùnì ní cacu Xítohó Jesucristú ñuyíú-a. Te núú tnàhá mée-gã ní cuu úxícúmí tnàhá-güedé.

### Ní cacu Jèsús

(Lc. 2:1-7)

<sup>18</sup>Te duha ní cuu cútñàhá ní cacu Xítohó Jesucristú, chi dàvá-á<sup>n</sup> nǐ xín-decu ì<sup>n</sup> xíchí cuéchí nǐ xínani Màriá. Te xíchí-á<sup>n</sup> sa ní cundáá tnúhu sá tnándaha-xi ndihi ì<sup>n</sup> téé nani Cheé. Te cùmání-gã tnándaha-xi ndihi téé-á<sup>n</sup> te Espíritú Yá Ndiöxí ní quide ní ngúhu<sup>n</sup> déhe-xi. <sup>19</sup>Te té Chèé téé cuíní candeca ñaha xii xíchí-á<sup>n</sup> nǐ cutnùnì iní-dé sá ñúhú déhe-xi. Te cùu-dé ì<sup>n</sup> téé quide ndáá, núu xiá<sup>n</sup> duu<sup>n</sup> duu<sup>n</sup> ní sani iní-dé sá vǎ tnándaha-gá-dé ndihi-xi, te dìcò-ni sá ñà túú ní cǎhá<sup>n</sup>-dé chi ní cuíní-dé sá vǎ cǎhá<sup>n</sup> cuèhé cǎhá<sup>n</sup> duha ñáyiú cuèndá-xi. <sup>20</sup>Te sátá dúcá<sup>n</sup> nǐ sani iní-dé te ní ngáva-dé ní xídí-dé, te núú sàní-dé ní sáhá<sup>n</sup> ì<sup>n</sup> espíritú xínú cuèchi núú Yá Ndiöxí ní xáha<sup>n</sup>-xi xii-dé:

—Yòhó té Chèé téé cùu ñanì tnàhá ndii Dàvií, yúhú cǎchí tnúhu-í xii-n sǎ ñà túú nǎ canì iní-n, tnándaha nahi-ni-n ndihi tá Màriá cuèí ñuhu déhe-xi, chi mee Espíritú Yá Ndiöxí ní quide-xi duca<sup>n</sup> nǐ ngúhu<sup>n</sup> déhe-xi. <sup>21</sup>Te na càcu déhe-xi-á<sup>n</sup> te danàni-n-dé Jèsús. Te duca<sup>n</sup> cùnani-dé, chi téé-á<sup>n</sup> cada-dé cuèndá sá vǎ cùndècu-gá cue ñanì tnàhá-dé ñáyiú isràèl ichi cuèhé ichi duha —duha ní xáha<sup>n</sup> espíritú-á<sup>n</sup> xii té Chèé-á<sup>n</sup> nǔú sàní-dé.

<sup>22</sup>Te duca<sup>n</sup> nǐ cuu chi ní quee ndáá-xi nàcuáa ní xáha<sup>n</sup> Yá Ndiöxí xii ì<sup>n</sup> téé ní cǎhá<sup>n</sup> tnúhu-gá ndéé sanaha. Te téé-á<sup>n</sup> nǐ chídó tnùnì-dé núú tütú-gá nàcuáa ní xáha<sup>n</sup>-gǎ xii-dé, te duha ní xáha<sup>n</sup>-gǎ:

<sup>23</sup>Cundecu ì<sup>n</sup> xíchí cuéchí ndèé cuèé-gá. Te òré ndécú íi-xi vátá nihí-gá yii-xi te ngúhu<sup>n</sup> déhe-xi.

Te òré ná cǎcú déhe-xi te danàni ñahá-yu Emànuél.

Duha ní xáha<sup>n</sup>-gǎ xii téé-á<sup>n</sup> nǐ chídó tnùnì-dé núú tütú-gá. Te tnúhu Emànuél-á<sup>n</sup> quèé-xí: Yá Ndiöxí ndécú ndihi-o. Núu xiá<sup>n</sup> duca<sup>n</sup> nǐ cuu vitna.

<sup>24</sup>Te òré ní ndiquíú iní té Chèé-á<sup>n</sup> te ní quide-dé nàcuáa ní xáha<sup>n</sup> espíritú-á<sup>n</sup> xii-dé chi ní tnándaha-dé ndihi tá Màriá. <sup>25</sup>Dico ndi dǐ<sup>n</sup> nǐ xíndecú-yu ndéé ní sáá nduu ní cacu déhe-xi. Te òré ní cacu déhe-xi-á<sup>n</sup> te ní dánánì ñaha-dé Jèsús.

### Cue téé cuángoto ñaha xii Jèsús

**2** Te Jèsús ní cacu-gá ì<sup>n</sup> ñuú nánì Bèlén, te ñuú-á<sup>n</sup> yíndèhu-xi distritú Jùdeá. Te dàvá-á<sup>n</sup> cùnùu té Hèrodés yíndàha-dé ñáyiú. Te ñuú Jerusalén ní quexio cue téé véxi ndàa xio nàcuáa quène nchíanchii, cue téé túha dàcuaha cuendá nchaa sá ndéé andiú. <sup>2</sup>Te ndùcu tnúhu-güedé núú ñáyiú ñuú-á<sup>n</sup>, te xáha<sup>n</sup>-güedé:

—¿Vá cùndèe iní-ndó cǎchí tnúhu-ndo ndéé ndécú tée quíndaha ñaha xii ñáyiú isràèl-á<sup>n</sup>? Chi ní xiní-ndí ní quene chódíní-dé ndàa xio nàcuáa quène nchíanchii, núu xiá<sup>n</sup> véxi-ndí chi cuíní-ndí quiní-ndí-dé te chiñuhu-ndí-dé —cǎchí-güedé xáha<sup>n</sup>-güedé xii-yu.

<sup>3</sup>Te òré ní nihí tée cùnùu nani Herodés tnúhu sá ndúcú tnúhu cue téé-á<sup>n</sup> ndéé ndécú tée quíndaha ñaha xii ñáyiú isràèl, te ñǎ túú tnàhí ní cùu váha iní-dé, te diu-ni duca<sup>n</sup> ñà túú ní cùu váha iní tnàhá nchaa ñáyiú ñuú-á<sup>n</sup>. <sup>4</sup>Te ní cana-dé cue téé cùu dútú cùnùu, ndihi cue téé dàcuaha ñaha xii ñáyiú nchaa tnúhu ní chídó tnùnì ndii Moisés, te ní xícá<sup>n</sup> tnúhú-dé núú-güedé nǔu xíní-güedé ndéé cacu Cristú téé tendaha Yá Ndiöxí quixi ñuyíú-a. <sup>5</sup>Te ní xáha<sup>n</sup>-güedé xii-dé:

—Ì<sup>n</sup> ñuú yíndèhu distritú Jùdeá cacu-dé, te ñuú-á<sup>n</sup> nánì-xí Bèlén, chi quee ndáá-xi nàcuáa ní xáha<sup>n</sup> Yá Ndiöxí xii ì<sup>n</sup> téé ní xóo cǎhá<sup>n</sup> tnúhu-gá ndéé

sanaha. Te duha ndüu tnúhu ní chídó tnùnì-dé núú tütú-gá:

<sup>6</sup> Nnúú Bèlén cúú-xí ìí<sup>n</sup> ñuú líhli yìndehu distritú Jùdeá, te ío-gá cúnùu-xi dacúxí òáva-gá ñuú cúnùu yìndehu distritú-á<sup>n</sup>,

chi diu ñuú-á<sup>n</sup> quee ìí<sup>n</sup> téé ío cùnùu.

Te téé cunuu-á<sup>n</sup> quindaha-dě ñáyiú cùu cuendá-í ñáyiú isràèl.

Duha ní xáha<sup>n</sup>-gá xii téé ní xóo cáhá<sup>n</sup> tnúhu-gá, te duca<sup>n</sup> ní chídó tnùnì-dé núú tütú-gá —càchí-güedé xáha<sup>n</sup>-güedě xii té Hèrodés.

<sup>7</sup> Te sáta dúcá<sup>n</sup> te té Hèrodés dayuhu ní cana-dé cue téé ndücu tnúhu núu ndéé ní cacu téé quindaha ñaha xii ñáyiú isràèl, te ní xícá<sup>n</sup> tnúhú-dě núú-güedě ná nduu cùu-xi nduu díhna nuu ní xiní-güedé chódíní. <sup>8</sup> Te sáta dúcá<sup>n</sup> te ní xáha<sup>n</sup>-dě xii-güedé:

—Chí cuàhá<sup>n</sup> ñuú Bèlén te nducu tnúhu váha-ndo nùu ndéé ní cacu téé duca<sup>n</sup> quindaha ñaha xii ñáyiú isràèl. Te òré ná nànhí-ndó-dě te quixi-ndo càchí tnúhu-ndo cuendá quíhí-í tnàhá-í chiñuhu-í-dé —càchí-dé xáha<sup>n</sup>-dě xii-güedé.

<sup>9</sup> Te sáta dúcá<sup>n</sup> ní xáha<sup>n</sup> tē Hèrodés-á<sup>n</sup> te ní xica-güedé cuáhá<sup>n</sup>-güedé. Te chódíní ní xiní-güedé ní quene ndàa xio nacuáa quène nchícanhii-á<sup>n</sup> yòdo nuu-di núú-güedě cuáhá<sup>n</sup>. Te ní ngüíñí chódíní-á<sup>n</sup>, te núú ní ngüíñí-di-á<sup>n</sup> yíndáá núú ndécú Jèsús. <sup>10</sup> Te òré ní xiní cue téé-á<sup>n</sup> ní ngüíñí chódíní-á<sup>n</sup> nùu yíndáá ndécú-gá, te ní cudíí víhí ìní-güedé. <sup>11</sup> Te duca<sup>n</sup> te ní quexìo-güedé ndéé núú cáá vèhe ndecu Jèsús. Te òré cuánguihu-güedé xití vehe te ní xiní-güedé Jèsús ndécú-gá ndihi náná-gá Màriá. Te ní ngüíñí xití-güedě, te ní ngüíta-güedé ní cachí-güedé sá ìo càhnu cuu Jèsús. Te dàtnùnì ní nacaá<sup>n</sup>-güedé càjá xínehe-güedé, te ní tava-güedé díhú<sup>n</sup> cuáá<sup>n</sup>, ndihi dúsa sá ìo váha sàhá<sup>n</sup> tnámí nàni insiensú,

ndihi yúcu sá nání mirrá ní taxi ndecu-güedé núú Jèsús cuendá cuu-xi ìí<sup>n</sup> táhú sá cúú-xí-gá. <sup>12</sup> Te Yá Ndiòxí ní cáhá<sup>n</sup>-gá núú sàni-güedé, te xáha<sup>n</sup>-gá xii-güedé sá vā náyáha-gá-güedé cáhá<sup>n</sup> ndihi-güedé té Hèrodés. Núu xíá<sup>n</sup> cue téé-á<sup>n</sup> cuánuhú-güedé ingá ichi, te ñá túú-gá ní náyáha-güedé núú ndécú té Hèrodés.

### **Cuáhá<sup>n</sup>-yu ndihi Jèsús nàció<sup>n</sup> Ègiptú**

<sup>13</sup> Te sáta ní yáha cuánuhú cue téé ní sángoto ñaha xii Jèsús, te ní quexìo ìí<sup>n</sup> espíritú xínú cuèchi núú Yá Ndiòxí núú sàni té Chèè, te xáha<sup>n</sup>-xi xii-dé:

—Véxi-í càchí tnúhu-í xii-n sá ndacóo-n, te ndee-n ñuú-a ndihi Jèsús, ndihi náná-gá cunu-ndo quíhí<sup>n</sup>-ndó nàció<sup>n</sup> Ègiptú, chi té Hèrodés tendaha-dě cue téé quixi nanducu ñaha xii Jèsús cuendá cahni ñaha-güedě. Te yàcá<sup>n</sup> cundecu-ndo ndéé cachí tnúhu-í xii-n ndüu ndixi-ndo —cachí espíritú-á<sup>n</sup> xáha<sup>n</sup>-xi xii té Chèè núú sàni-dé.

<sup>14</sup> Te té Chèè-á<sup>n</sup> ní ndacóo-dé, te niú ní xica-dé ndihi tá Màriá ndécá-yu Jèsús cuáhá<sup>n</sup> nàció<sup>n</sup> Ègiptú. <sup>15</sup> Te nàció<sup>n</sup> Ègiptú-á<sup>n</sup> ndécú-yu ní xíhí té Hèrodés. Te duca<sup>n</sup> ní cuu chi ní quee ndáá-xi nàcuáa ní cachí ìí<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha ní quide-dé núú-gá ní cáhá<sup>n</sup>-dé yuhu-gá, te duha ní xáha<sup>n</sup>-gá ní cáhá<sup>n</sup>-dé: “Nàció<sup>n</sup> Ègiptú ndécú Dèhe-í ní cùu, te ní xáha<sup>n</sup>-í xii-dé sá ndéé-dě ñuú-á<sup>n</sup> vā cündècu-gá-dé”, duha ní xáha<sup>n</sup>-gá xii téé ní cáhá<sup>n</sup> tnúhu-gá ní quide-dé núú-gá.

### **Té Hèrodés ní táuchíú<sup>n</sup>-dě cahni-güedé cue landú**

<sup>16</sup> Te cue téé ní sángoto ñaha xii Jèsús ní dándàhú-güedé té Hèrodés, chi ñá túú ní náyáha-güedé cúñaha-güedé sá ní naníhí-güedě Jèsús. Te sáta ní cutnùnì ìní té Hèrodés sá ní dándàhú ñáhá-güedě xii-dé te ní cudéé<sup>n</sup> víhí-dě, te

ní tendaha-dě cue tée cuáhá<sup>n</sup> ñúú Bèlén, ndihi nchaa dava-gá ñúú cáá yàtni xíá<sup>n</sup> cuendá cahni-güedé mee-ni cuè landú tée. Te ndéé cue landú íchí ñi cacu, ndihi ndéé cue landú sa ní nút nahá úú cuíá-xi nchaa-güexi cahni-güedé ní xáha<sup>n</sup>-dě. Te duca<sup>n</sup> ñi quide-dé chi ní quide cuendá-dé nàcuáa ndùu tnúhu ní xáha<sup>n</sup> cuè tée ní sángoto ñaha xii Jesús nduu ñi xini-güedé chódíní, núu xíá<sup>n</sup> duca<sup>n</sup> ñi táúchíú<sup>n</sup>-dě ní quide cue tée-á<sup>n</sup>.

<sup>17</sup> Te duca<sup>n</sup> ñi cuu chi ní quee ndáá-xi nàcuáa ní cachí ndí Jeremiás tée ní xóo cáhá<sup>n</sup> tnúhu Yá Ndiöxí ndéé sanaha, te duha ní cachí ndí:

<sup>18</sup> Ní tecú ndáhí v́hí ñáyiú ñúú Rámá sá ndíhú iní-yu,

te ñáyiú xíndáhyú-á<sup>n</sup> cúú-yu ñaní tnáhá tã Ràquél, te ndáhyú-yu cuendá sá ñi xíhí déhe-yu.

Te ñáyiú-á<sup>n</sup> ñà túú ní cuíní-yu dàñá-yu sá ndíhú iní-yu cuendá sá ñi xíhí déhe-yu.

Duha ní cachí ndí Jeremiás.

<sup>19</sup> Te sátá ñi xíhí té Hèrodés te ní sáhá<sup>n</sup> tucu espíritú xínú cuèchi núú Yá Ndiöxí núú sání té Chèé òré ndécú-dě nàció<sup>n</sup> Ègíptú, te ní xáha<sup>n</sup>-xi xii-dé:

<sup>20</sup> —Véxi tucu-í cächí tnúhu-í xii-n sã ndácóo-n, te núhú-n ndihi Jesús ndihi ñáná-gã ñúú cue ñaní tnáhã-n ñáyiú is-ràél cundecu-ndo, chi sa ní xíhí cue tée cuíní cahni ñaha xii Jesús ní cùu —cachí espíritú-á<sup>n</sup> xáha<sup>n</sup>-xi xii té Chèé núú sání-dé.

<sup>21</sup> Te té Chèé-á<sup>n</sup> ñi ndacóo-dé, te ní ndee-dé ndihi Jèsús ndihi ñáná-gã cuánuhú-yu ñúú cue ñáyiú is-ràél ñáyiú cùu ñaní tnáhã-yu. <sup>22</sup> Te té Chèé ní níhí-dě tnúhu sá tã Arquèlaú ní nucúnutñi-dé núú tãtã-dě té Hèrodés distritú Jùdeá yíndaha-dé ñáyiú. Te ní yùhú té Chèé-á<sup>n</sup>, te ñà túú ní cuíní-dé quíhí<sup>n</sup>-dé cundecu-dé distritú-á<sup>n</sup>. Te Yá Ndiöxí ní cáhá<sup>n</sup>-gá núú sání-dé, te ní xáha<sup>n</sup>-gã xii-dé sá quíhí<sup>n</sup>-dé distritú

Galileá, núu xíá<sup>n</sup> yàcá<sup>n</sup> cuáhá<sup>n</sup>-yu. <sup>23</sup> Te òré ní quexió-yu distritú Galileá, te ní sáhá<sup>n</sup>-yu ñi<sup>n</sup> ñúú nání Nàzarét ní xíndecú-yu. Te duca<sup>n</sup> ñi cuu chi ní quee ndáá-xi nàcuáa ní cachí cue tée ní xóo cáhá<sup>n</sup> tnúhu Yá Ndiöxí ndéé sanaha sá Jèsús cuu-gá tée ñúú Nazarét.

### Té Juàá tée dàcuandute ñaha xii ñáyiú cáhá<sup>n</sup>-dé tnúhu Yá Ndiöxí xití yucu

*(Mr. 1:1-8; Lc. 3:1-9, 15-17; Jn. 1:19-28)*

**3** Te ní xica nduu sá dúcá<sup>n</sup> ñi cuu, te tée nani Juaá tée dacuandute ñaha xii ñáyiú ní quexio-dé yucu distritú Jùdeá cáhá<sup>n</sup>-dé tnúhu Yá Ndiöxí núú ñáyiú xití yucu-á<sup>n</sup>. <sup>2</sup> Te xáha<sup>n</sup>-dě xii-yu:

—Chí dándixi túu iní sá ñà túú quide váha-ndo ndècu-ndo, te dañà-ndo nchàa ichi cuehé ichi duha, chi sa ní cuy-atni nduu ndíhu ndaha ñaha Yá Ndiöxí xii-ndo —cächí-dé xáha<sup>n</sup>-dě xii-yu.

<sup>3</sup> Te diu cuendá té Juàá-á<sup>n</sup> ñi chídó tnùní ndí Chàíá tée ní xóo cáhá<sup>n</sup> tnúhu Yá Ndiöxí ndéé sanaha, te duha ndùu tnúhu ní chídó tnùní ndí cuendá-dé:

Tècú cáhá<sup>n</sup> níhi ñi<sup>n</sup> tée yìhi xití yucu, te cächí-dé:

“Chí dãnã nchàa ichi cuehé ichi duha ndècu-ndo, te tñi-ndo ìchi váha, Te duca<sup>n</sup> càda-ndo cuendá cundecu túha-ndo chi véxi Yaá ío cùnùu”, duha quesaha tée-á<sup>n</sup>.

Duha ndùu tnúhu ní chídó tnùní ndí Chàíá-á<sup>n</sup> cuendá té Juàá.

<sup>4</sup> Te té Juàá-á<sup>n</sup> ñi xóo cuihnu-dé dóo idi caméyu, te ñi<sup>n</sup> ñi<sup>n</sup> ní cuu pañú xití-dé, te ní xóo caxi-dé tíca langóstá ndihi ndudí ñúñú cuéché. <sup>5</sup> Te ñáyiú ñúú Jerusalén, ndihi ñáyiú nchaa ñúú yíndèhu distritú Jùdeá, ndihi ñáyiú nchaa ñúú cáá yàtni yúte Jòrdán ní sáhá<sup>n</sup>-yu ní xíndedóho-yu nàcuáa ní cáhá<sup>n</sup> té Juàá. <sup>6</sup> Te ní nguíta-yu ní náhmá-yu nchaa cuéchi-yu núú Yá Ndiöxí. Te òré duca<sup>n</sup> ñi náhmá-yu te

ní dácuañdute ñaha té Juàá xí-yu yúte Jòrdán.

<sup>7</sup>Te vài cue tée cùu fariséú ndìhi cue tée cùu saducéú cuáhá<sup>n</sup>-güedé núú ndécú tẽ Juàá cuíní-güedé dácuañdute ñaha-dé xii-güedé. Te òré ní quexio-güedé núú ndécú-dẽ, te ní xáha<sup>n</sup>-dẽ xii-güedé:

—¡Nchaa nchòhó cúú-ndó dàtná ìí<sup>n</sup> cóó dèé<sup>n</sup> chi ío cuihna iní-ndó! ¿Te nása ní cuu núu tñhá nchòhó ndúcú-ndó nàcuáa cada-ndo cãcu nihnu-ndo nũú tñndòho cahnu vihi ta cuyatni ñaha xii-ndo véxi-í? <sup>8</sup>Te chí cádá vãha vitna cundecu-ndo cuendá duca<sup>n</sup> cùnnumí sá ní dãná-ndó nchàa ichi cuehé ichi duha ndècu-ndo. <sup>9</sup>Te vá càchí-ndó sã ìo cãhnu cuu-ndo cuendá sá cúú-ndó ñàní tñhá ndíi Àbrahám. Chi cuèi ndéé yúú te ndacu Yá Ndiòxí ndada-gá ñáyiu te cuú-yu ñàní tñhá ndíi Àbrahám. <sup>10</sup>Te caá chi ndècu túha-xi sá quèhndé-xi nchaa yutnu sá dúcá<sup>n</sup> ñà túú càváha sávidí-xi-á<sup>n</sup>, chi nchaa yutnu-á<sup>n</sup> tẽhndé-xi te cuángée-xi núú ñùhú càyú-xi. Te duha sãtnáhá-xi ndoho nchaa ñáyiu ñà túú quide váha-á<sup>n</sup> chi nchaa ñáyiu ñà túú quide váha cùú-yu dàtná nchaa yutnu sá ñà túú càváha sávidí-xi. <sup>11</sup>Te na càchí tñùhu ndáá-í xii-ndo sã yùhú dácuañdute-í mee-ni ñáyiu ní dãná nchàa ichi cuehé ichi duha. Dico nchicú<sup>n</sup> tucu ìngá tée véxi, te tée-á<sup>n</sup> taxi-dé Espíritú Yá Ndiòxí cundecu ndìhi-ndo. Te cùu-xi datná ìí<sup>n</sup> ñùhú, chi ndada ndoo ndada nine-xi iní-ndó. Te tée-á<sup>n</sup> ìo-gá cùnùu-dé dàcúúxí yùhú, chi yùhú cùú-í ìí<sup>n</sup> tée duu<sup>n</sup> duu<sup>n</sup> ñà túú tàú cuita nehe ní chàú-dé dico quide-í chiù<sup>n</sup>-dé. <sup>12</sup>Te tée-á<sup>n</sup> sa véxi túha-dé sá cádá ðí<sup>n</sup> ñaha-dé xii-o dàtná quidé ñáyiu ndàda ndoo triú, chi ñáyiu-á<sup>n</sup> sa nèhe túha-ná-yu yaxí<sup>n</sup>-yu òré nãñani cuendá ndada ndoó-yu. Te òré ndádá ndòó-yu triú-á<sup>n</sup> te dàquee ðí<sup>n</sup>-yu mihi-xi, te

tàxúha-yu mee-nã triú-á<sup>n</sup> te sàhmí-yu mihi-xi-á<sup>n</sup>. Te dàtná quidé-yu mihi triú-á<sup>n</sup> duca<sup>n</sup> sãtnahá-xi cada ñaha tée-á<sup>n</sup> xii nchaa ñáyiu ñà túú quide váha, chi daquihí<sup>n</sup> ñáhá-dẽ xí-yu núú ñùhú núú càyú, te ñuhú-á<sup>n</sup> ñà túú tñàhí ndàhvã —càchí-dé xãha<sup>n</sup>-dẽ xii-güedé.

### Sàndute Jesús

(Mr. 1:9-11; Lc. 3:21-22)

<sup>13</sup>Te Jèsús ní quee-gá distritú Galileá cuáhá<sup>n</sup>-gá yúte Jòrdán núú ndécú tẽ Juàá cuendá dácuañdute ñaha-dé xii-gá. <sup>14</sup>Te òré ní quexio Jesús núú ndécú tẽ Juàá, te ñà cuíní-dé dácuañdute ñaha-dé xii-gá ní cùu, te ní xáha<sup>n</sup>-dẽ xii-gá:

—Yúhú tàú-í sá dácuañdute ñaha-n xii-í, te ñà díú dà yúhú dácuañdute ñaha-í xii-n —càchí-dé xãha<sup>n</sup>-dẽ xii-gá.

<sup>15</sup>Te Jèsús ní xáha<sup>n</sup>-gã xii-dé:

—Quehe<sup>n</sup> dañá, chi dacuítí<sup>n</sup> xini ñuhu-xi duca<sup>n</sup> cada-o nacuáa cundáá-ó nũú Yá Ndiòxí —càchí-gá xãha<sup>n</sup>-gã xii-dé.

Te té Juàá-á<sup>n</sup> ñí sáhá<sup>n</sup> uu<sup>n</sup>-dé tñùhu ní xáha<sup>n</sup> Jèsús xii-dé. <sup>16</sup>Te ní dácuañdute-dé Jèsús. Te òré ní nene-gá xití ndute te ní xiní-gá nchí andiu, te ní quee Espíritú Yá Ndiòxí véxi cuu<sup>n</sup>-xi ngúndecu ndìhi ñaha-xi xii-gá, te dàtná cáá ìí<sup>n</sup> lómá cáá Espíritú-á<sup>n</sup> véxi cuu<sup>n</sup>-xi. <sup>17</sup>Te òré-á<sup>n</sup> ní tecú ní cáhá<sup>n</sup> Yá Ndiòxí ndéé andiu, te xãha<sup>n</sup>-gã xii Jèsús:

—Yòhó cúú-n Dèhe-í tée ío cùu iní-í te ío cùdí iní ñáhà-í xii-n —càchí-gá xãha<sup>n</sup>-gã xii Jèsús.

### Sácuíhná quidé yìca-xi cada Jesús sá ñà túú tàú-gá cada-gá ní cùu

(Mr. 1:12-13; Lc. 4:1-13)

**4** Te Espíritú Yá Ndiòxí ndécá-xi Jèsús cuáhá<sup>n</sup> ìí<sup>n</sup> xití yucu cuendá yàcá<sup>n</sup> cundecu tnaa-gá, te yàcá<sup>n</sup> quexio sácuíhná coto ndéé ñáhá-xí xii-gá te núu ndisa sá vã cádá-gã ìí<sup>n</sup> sá ñà túú tàú-gá cada-gá.



<sup>2</sup>Te Jèsús ñá ní xèxi-gá údico nduu údico niú, te duca<sup>n</sup> te dǎtnùní ní xícá<sup>n</sup> iní-gá caxi-gá. <sup>3</sup>Te sátá dúcá<sup>n</sup> te ní quexio sácufhná quidé yìca-xi cada Jesús ì<sup>n</sup> sá ñà túú tàú-gá cada-gá, te xǎha<sup>n</sup>-xi xii-gá:

—Te núu ndisa sá cúu-n Dèhe Yá Ndiòxí te cúñaha xii yúú-a na ndùu-xi paá —càchí-xi xǎha<sup>n</sup>-xi xii-gá.

<sup>4</sup>Te Jèsús ní xǎha<sup>n</sup>-gǎ xii-xi:

—Núú tǔtú Yá Ndiòxí càchí-xi: “Ñá dǔú mèe-ni paá candeca-xi iní ñáyiu ñuyúú, chi tñàhá nchaa tñúhu càhá<sup>n</sup> Yá Ndiòxí candeca-xi iní-yu”, duha càchí-xi núú tǔtú-gá —càchí-gá xǎha<sup>n</sup>-gǎ xii-xi.

<sup>5</sup>Te dǎtnùní sácufhná-ǎ<sup>n</sup> ndécá ñàha-xi xii-gá cuáhá<sup>n</sup> ñúú Jerusalén, te yàcá<sup>n</sup> ní xǎha<sup>n</sup>-xi xii-gá cuásaá-gá díquí vèññu cǎhnu sá ìo cùnno núú ñáyiu isràél, <sup>6</sup>te dǎtnùní ní xǎha<sup>n</sup> tǔcu-xi xii-gá:

—Te núu ndisa cùu-n Déhe Yá Ndiòxí te cuandèe ndava núú ñúhú cuendá quee ndáá-xi nàcuáa càhá<sup>n</sup>-xi núú tǔtú-gá núú càchí-xi: “Yá Ndiòxí tendaha-gǎ cue espíritú xínú cuèchi núú-gǎ quixi-xi cuendá coto ñaha-xi xii-n, te núú ndáhá-xí cǎundodo-n cuendá sá vǎ dǎnícuehé yúú sǎhá<sup>n</sup>”, duha càchí-xi núú tǔtú-gá —càchí sácufhná-ǎ<sup>n</sup> xǎha<sup>n</sup>-xi xii Jesús.

<sup>7</sup>Te Jèsús ní xǎha<sup>n</sup>-gǎ xii-xi:

—Te càchí tucu-xi núú tǔtú Yá Ndiòxí: “Vá cání iní-n còto ndeé-n Dǔtú Ndiòxí Yá cúú Ndiòxí-n cuendá-ni sá cuíní-n sǎ dácǎcu nihnu ñaha-gǎ xii-n ì<sup>n</sup> sá sání iní-n càda-n”, duha càchí-xi núú tǔtú-gá —càchí-gá xǎha<sup>n</sup>-gǎ xii-xi.

<sup>8</sup>Te sácufhná ndécá tǔcu-xi Jesús cuáhá<sup>n</sup> ì<sup>n</sup> núú tñdúú dǔcú<sup>n</sup>, te uu<sup>n</sup>ni ní dǎnèhé núú ñáhá-xí xii-gá nchaandi túhú nàció<sup>n</sup> cáá ñúyúú, ndihhi nchaa sá vǎha ìo ì<sup>n</sup> ì<sup>n</sup> nàció<sup>n</sup>-ǎ<sup>n</sup>. <sup>9</sup>Te ní xǎha<sup>n</sup>-xi xii-gá:

—Te núu yòhó ngüñí xítí-n nùù-í chiñuhu ñaha-n xii-í ñá, te taxi cuendá-í

nchaa sá ní dǎnèhé ñáhà-í-a cuu cuendá-n —càchí-xi xǎha<sup>n</sup>-xi xii-gá.

<sup>10</sup>Te Jèsús ní xǎha<sup>n</sup>-gǎ xii-xi:

—Xocuñí yòhó sácufhná núú ndécú-í-a, chi vǎ cúú càda-í nàcuáa càchí-n, chi núú tǔtú Yá Ndiòxí càchí-xi: “Chiñuhu-ndo Dǔtú Ndiòxí Yá cúú Ndiòxí-ndó, te diu-ni-gá cada-ndo nchaa nacuáa càhá<sup>n</sup>-gǎ”, duha càchí-xi núú tǔtú-gá —càchí-gá xǎha<sup>n</sup>-gǎ xii-xi.

<sup>11</sup>Te dǎtnùní sácufhná ní dǎñá-xí Jesús ní xica-xi cuáhá<sup>n</sup>-xi. Te sátá dúcá<sup>n</sup> te ní quexio cue espíritú xínú cuèchi núú Yá Ndiòxí ní xinu cuechi-xi núú Jèsús.

**Distritú Galileá ní chisaha Jèsús chiù<sup>n</sup> ní táhú Tǎtá-gǎ Dútú Ndiòxí cada-gá**

(Mr. 1:14-15; Lc. 4:14-15)

<sup>12</sup>Te òré ní ñihí Jèsús tñúhu sá ní ngava té Juáá tée dàcuandute ñaha xii ñáyiu vecaá, te ní xica-gá cuáhá<sup>n</sup>-gǎ distritú Galileá. <sup>13</sup>Te ni ñà túú ní xíndecu-gá ñúú Nazàrét, chi ní yáha-gá cuáhá<sup>n</sup>-gǎ ndeé ñúú Capèrnaúm yàcá<sup>n</sup> ní xíndecu-gá, te ñúú-ǎ<sup>n</sup> cáá yàtni yuhu lagúná, te yatni xía<sup>n</sup> cáá ñùhu nani Zabulón, ndihhi ñuhu nàni Neftalí. <sup>14</sup>Te duca<sup>n</sup> ní cuu chi ní quee ndáá-xi nàcuáa ní chídó tñùní ndí Chàíá tée ní xóo càhá<sup>n</sup> tñúhu Yá Ndiòxí ndeé sanaha núú tǔtú-gá núú càchí-xi:

<sup>15</sup>Ñuhu nàni Zabulón, ndihhi ñuhu nàni Neftalí, ñuhu-ǎ<sup>n</sup> yíndèhu-xi distritú Galileá,

te xía<sup>n</sup> xíndecu cue ñáyiu ñá túú cùu ñáyiu isràél,

te cǎa-xi yatni yuhu lagúná te ndàa ingá xio yúte Jòrdán cúú-xí.

<sup>16</sup>Te cue ñáyiu-ǎ<sup>n</sup> ndécú-yu ì<sup>n</sup> núú nées chi ndécú-yu ichi cuèhé ichi duha, te sáá nduu te cada iní-ndó sǎ ñáyiu-ǎ<sup>n</sup> queé-yu núú dító chi vǎ cúndècu-gá-yu ichi cuèhé ichi duha.

Te diu-ni ñáyiu-ǎ<sup>n</sup> cúú-yu ñáyiu ta xíta nihnu duu<sup>n</sup> cuáhá<sup>n</sup>,

dico sáá nduu te vá cuíta nihnu-gá-yu.  
Duha ní chídó tnùní ndíi núú tütú-gá.

<sup>17</sup>Te dàvá-á<sup>n</sup> ní nguíta Jèsús ní dánhé-gá ñáyi, te ní xáha<sup>n</sup>-gá xií-yu:

—Chí dándixi túu iní sá ñà túú quide váha-ndo ndècu-ndo te daña-ndo nchàa ichi cuehé ichi duha, chi sa ní cuy-atni nduu ndíhu ndaha ñaha Yá Ndiöxi xii-ndo —càchí-gá xáha<sup>n</sup>-gá xií-yu.

**Jèsús càhá<sup>n</sup>-gá cúmi  
tnàhá cue téé tñi chácá**

(Mr. 1:16-20; Lc. 5:1-11)

<sup>18</sup>Te Jèsús ñúhú-gá ichi cuáhá<sup>n</sup>-gá tá yáha-gá yuhu làgúná Galileá, te ní xiní-gá úú tnàhá cue téé xídáquèe-güedé ñunu-güedé xití ndute tñi-güedé chácá, chi quití tñàhí-á<sup>n</sup> cúú chiu<sup>n</sup>-güedé tñí-güedé-di. Te ñ<sup>n</sup>-dé nání-dé Xímú, àdi Pelú chi úú ñú-dé, te ñaní-dé cúú ñngá téé ndíhi-dé te téé-á<sup>n</sup> nání-dé Ndríxi. <sup>19</sup>Te Jèsús ní xáha<sup>n</sup>-gá xii-güedé:

—Chí dáñá chiu<sup>n</sup> quide-ndo-á<sup>n</sup> te quixi-ndo chitnahá ñáhá-ndó xii-í, te taxi-í ñngá núú chiu<sup>n</sup> cada-ndo chi quíhí<sup>n</sup>-ndó dàcáhá<sup>n</sup>-ndó ñáyi cuendá tuha ñáhá-yu xii-í —càchí-gá xáha<sup>n</sup>-gá xii-güedé.

<sup>20</sup>Te òré-ni-á<sup>n</sup> ní dáñá cuè téé-á<sup>n</sup> ñunu-güedé, te ní tuha-güedé Jèsús.

<sup>21</sup>Te ní xica tucu Jèsús cuáhá<sup>n</sup>-gá luha-gá, te ní xiní tucu-gá úú-gá tnàhá cue téé tñi chácá. Te ñ<sup>n</sup> téé-á<sup>n</sup> nání-dé Jàcobó, te ñaní-dé cúú ñngá téé ndíhi-dé te téé-á<sup>n</sup> nání-dé Juáá, te ndi ndúú-güedé cúú-güedé déhe té Zebèdeú. Te xixínucóo-güedé ndíhi tātá-güedé xití bàrcú xinatícu-güedé ñunu-güedé, te Jèsús ní cana ñaha-gá xii-güedé.

<sup>22</sup>Te òré-ni-á<sup>n</sup> ní dándóo-güedé bàrcú-güedé, ndíhi tātá-güedé, te ní tuha ñaha-güedé xii-gá.

**Jèsús dánhé-gá cuéhé víhí ñáyi**

(Lc. 6:17-19)

<sup>23</sup>Te Jèsús tá xica ndodo-gá nihí distritú Galileá cuáhá<sup>n</sup> tá dánhé-gá ñáyi tnúhu váha tnúhu sá sánú ichi ñaha xií-yu nàcuáa ndíhu ndaha ñaha Yá Ndiöxi xií-yu. Te ndi tnahá ñ<sup>n</sup> ñúú sáa-gá te duca<sup>n</sup> cuànguñhu-gá xití veñúhu dánhé-gá ñáyi tnúhu-á<sup>n</sup>. Te ndi dí<sup>n</sup> ndi dí<sup>n</sup> núú cuéhé tnahá ñ<sup>n</sup> ñáyi dico nchaa-ní-yu ta quide tátna-gá cuáhá<sup>n</sup>. <sup>24</sup>Te ndéé nchaa ñáyi yin-dehu distritú Siriá ní níhí-yu tnúhu nchaa nàcuáa quide Jesús. Te ní queé-yu ñúú-yu te ndécá-yu nchaa ñáyi tnàhá ndi dí<sup>n</sup> núú cuéhé cuáhá<sup>n</sup> núú ndécú Jèsús. Te cuéi ñáyi xiyíhí, ndíhi ñáyi ñá túú-gá càndá nihnu, ndíhi ñáyi yíhi ñaha espíritú cündíhi yucu ñávàha ndécá-yu cuáhá<sup>n</sup> núú-gá, te ncháa-yu ní quide tátna ñaha-gá xií-yu. <sup>25</sup>Te ío vai ñáyi ní chinchícú<sup>n</sup> ñáhá xii Jesús, chi ní chinchícú<sup>n</sup> ñáhá ñáyi distritú Galileá, ndíhi ñáyi nchaa ñúú xindáa Dècápolis, ndíhi ñáyi ñúú Jerusalén, ndíhi cue ñáyi nchaa ñúú yíndèhu distritú Jùdeá, ndíhi ñáyi xíndecu yatni yúte Jòrdán ndàa xio quene nchícanhii.

**Jèsús núcòo-gá ñ<sup>n</sup> núú  
tíndúú dánhé-gá ñáyi**

**5** Te sáta ní xiní Jèsús sá cuéhé víhí ñáyi nchícú<sup>n</sup> ñáhá xii-gá, te ní xica-gá cuásaá-gá ñ<sup>n</sup> núú tíndúú te xía<sup>n</sup> ní ngóo-gá, te cue téé xica cuu ndíhi-gá ní nadúcú<sup>n</sup> ndèé ñáhá-güedé xii-gá. <sup>2</sup>Te ní nguíta-gá dánhé ñáhá-gá xii-güedé ndíhi cue ñáyi-á<sup>n</sup>, te xáha<sup>n</sup>-gá:

**Cuendá ñáyi ío váha táhú-xi**

(Lc. 6:20-23)

<sup>3</sup>—Váha táhú nchaa ñáyi cùtnuní iní-xi sá ío-gá cúmáñi-yu cudíu-yu núú Yá Ndiöxi, chi ñáyi-á<sup>n</sup> nduu táhú-yu ndíhu ndaha ñaha-gá xií-yu.

<sup>4</sup>Váha táhú nchaa ñáyiú ndàhyú sá ndihú iní-yu, chi Yá Ndiòxí cuañaha-gã tnúhu ndee iní cundecu ndihí-yu.

<sup>5</sup>Váha táhú nchaa ñáyiú ndàhú iní-xi, chi ñáyiú-á<sup>n</sup> nduu táhú-yu cundecú-yu ì<sup>n</sup> xichi núú cuañaha Yá Ndiòxí xií-yu.

<sup>6</sup>Váha táhú nchaa ñáyiú ío cuini cada nchaa nàcuáa càhá<sup>n</sup> Yá Ndiòxí, chi ñáyiú-á<sup>n</sup> ío nduu vétú iní-yu.

<sup>7</sup>Váha táhú nchaa ñáyiú cundahú iní tnàha ñáyiú-xi, chi ñáyiú-á<sup>n</sup> diu-ni duca<sup>n</sup> càda ñaha Yá Ndiòxí xií-yu cundàhú iní ñáhá-gã.

<sup>8</sup>Váha táhú nchaa ñáyiú ní nduu ndoo ní nduu nine iní-xi, chi cue ñáyiú-á<sup>n</sup> nduu táhú-yu cundecú-yu ndihi Yá Ndiòxí.

<sup>9</sup>Váha táhú nchaa ñáyiú càhá<sup>n</sup> dóho tnàha ñáyiú-xi nàcuáa cundecu ndihi váha tnàhá-yu, chi cùnuni sá ñáyiú-á<sup>n</sup> cuú-yu déhe Yá Ndiòxí.

<sup>10</sup>Váha táhú nchaa ñáyiú ío ndòho ndecu ñuyíú-a sá cuendá sá quidé-yu nàcuáa càhá<sup>n</sup> Yá Ndiòxí, chi ñáyiú-á<sup>n</sup> nduu táhú-yu ndíhu ndaha ñàha-gá xií-yu.

<sup>11</sup>Te cùu-ndo ñáyiú ío váha táhú-xi te núu na cùcuèhé ñáhá ñáyiú, àdi cada úhú ñáhã-yu xii-ndo, àdi dacao díquí ñáhã-yu nándi cuéchi neñúú xii-ndo sá cuendá-í. <sup>12</sup>Te òré duca<sup>n</sup> na càda ñáhã-yu xii-ndo te cudíí vñí-ní iní-ndó cùndecu-ndo, chi ío váha càa sá ndécú àndiu nduu táhú-ndó cùndecu ndihi-ndo nduu na saá-ndó yàcá<sup>n</sup> cundecu-ndo, chi diu-ni duca<sup>n</sup> ní xóo cada ñaha cuè ñaní tnáhã-yu xii cue téé ní xóo càhá<sup>n</sup> tnúhu Yá Ndiòxí ní xíndecu ndéé sanaha.

### **Cuendá ñíí ndihi cuendá ñuhú**

(Mr. 9:50; Lc. 14:34-35)

<sup>13</sup>Te nchòhó cada iní-ndó sá cúu-ndó dàtná ñíí cuendá ñuyíú-a. Te ñíí chi nándíhi-xi dico núu na ndúu víxi<sup>n</sup>-xi, te ñá túú-gã nándíhi-xi chi dāngoyo-ná-ó, te yãha ñáyiú xēnihnú-yu. Te duca<sup>n</sup>

sátnahá-xi cùu nchòhó chi cùu-ndo datná ñíí váha te núu na càda váha-ndo, te núu vá càdá váha-ndo te quee tíhú-ndó.

<sup>14</sup>Te nchòhó cada iní-ndó sá cúu-ndó dàtná ì<sup>n</sup> sá dáyèhé ndécú ñuyíú-a, chi sànu ichi-ndo ñáyiú ichi váha. Te nchòhó xini-ndó sá núu ì<sup>n</sup> ñuu cáá ì<sup>n</sup> núú tìndúú te vá cúú càchí-ó sá nguivãha-xi. <sup>15</sup>Te ñá túú xini-ó ì<sup>n</sup> ñáyiú teñuhú-yu ì<sup>n</sup> lintérmá te chivãha-yu xití ì<sup>n</sup> càjá, chi tàxi ndecú-yu núu ñnu cuendá cutnùni núú nchaa ñáyiú ndècu vehe. <sup>16</sup>Te duca<sup>n</sup> càda nchòhó cada váha-ndo dàtná quidé ì<sup>n</sup> ñuhú dáyèhe-xi núú ñáyiú, te duca<sup>n</sup> quini ñáyiú nàcuáa quide-ndo ndecu-ndo, te tnàhá-yu càchí-yu sá ío càhnu cuu Dútú Ndiòxí Yaá cúú Tãtã-ndó ndècu andiu chi quini-yu sá quidé váha-ndo ndècu-ndo.

### **Cuendá tnúhu ní chídó tnùni ndíi Moisés**

<sup>17</sup>Te vá cáni iní-ndó sá yùhú véxi-í xocani-í tnúhu ní chídó tnùni ndíi Moisés, te ni vá cáni iní-ndó sá véxi-í xocani-í tnúhu ní chídó tnùni cue téé ní xóo càhá<sup>n</sup> tnúhu Yá Ndiòxí ndéé sanaha, chi yùhú véxi-í sá càdá-í nàcuáa càhá<sup>n</sup> nchaa tnúhu-á<sup>n</sup>. <sup>18</sup>Te na càchí tnúhu ndáá-í xii-ndo sá tnúhu ní chídó tnùni ndíi Moisés ío ndáá càhá<sup>n</sup>-xi, chi dacuití cùu nchaa nàcuáa càhá<sup>n</sup>-xi. Te yáchí-gá naa andiu ndihi ñuyíú dàcúúxí sá quée càva ì<sup>n</sup> tnúhu-á<sup>n</sup>. <sup>19</sup>Núu xíã<sup>n</sup> nchaa ñáyiú na càchí sá dáva tnúhu ní chídó tnùni ndíi Moisés ñá túú xini ñuhu-xi chi ñá túú cùnuu-xi, te ñáyiú-á<sup>n</sup> diu-ni duca<sup>n</sup> dānehé-yu nchaa dava-gá tnàha ñáyiú-yu, te sá dúcá<sup>n</sup> quidé-yu te vá cùnùu vihí-yu núu ndécú Yá Ndiòxí táxi tnùni-gá, chi cuú-yu dàtná ì<sup>n</sup> ñáyiú nchicú<sup>n</sup> cuií-nã. Dico nchaa ñáyiú nchicú<sup>n</sup> nihnu quide nchaa nàcuáa càhá<sup>n</sup> nchaa tnúhu-á<sup>n</sup>, te diu-ni

duca<sup>n</sup> dānehé-yu nchaa dava-gá tnàha ñáyiú-yu, te ñáyiú-á<sup>n</sup> ïo cumùú-yu núú ndécú Yă Ndiöxí táxí tnùnì-gá. <sup>20</sup>Te na càchí tnúhu-í xii-ndo sã ïo xìnì ñuhu-xi cada-ndo nchaa nacuaá càhá<sup>n</sup> Yă Ndiöxí, te vã cadá-ndó dàtná xĩquide cue tée dānehé ñáhá xii ñáyiú nchaa tnúhu ní chídó tnùnì ndíi Moisés, ndihì dàtná xĩquide cue tée cùu fariséú, chi núu na càda-ndo datná xĩquide cue tée-á<sup>n</sup> ñá, te vã ndúú tãhú-ndó ndihu ndaha ñàha Yă Ndiöxí xii-ndo.

**Jèsús càhá<sup>n</sup>-gá cuendá ñáyiú cudéé<sup>n</sup>**

*(Lc. 12:57-59)*

<sup>21</sup>Te nchòhó sa xìnì-ndó sã ncháá ñáyiú ní cuu ñanì tnáhá-ndó ñí xín-decu ndéé sanaha ñí ñihí-yu tnúhu sã vã cúú càhni-yu tnàha ñáyiú-yu, chi núu duca<sup>n</sup> na càdá-yu te nacháhu-yu cuéchi-yu. <sup>22</sup>Dico vitna na càchí tnúhu-í xii-ndo sã núu ndédani càa-ndo na cudéé<sup>n</sup>-ndó núú tnàha ñáyiú-ndo, te nacháhu-ndo sã dúcá<sup>n</sup> quide-ndo, àdi núu na cùcuèhé-ndó-yu te núú chítú núú tàcá cundáá cuéchi-ndo te núu duca<sup>n</sup> na càda-ndo, àdi núu nà cúu-ndo tnàha ñáyiú-ndo ì<sup>n</sup> tnúhu vée vihi, te cucuéchi vihi xii-ndo chi quíhí<sup>n</sup>-ndó núú ùhú núú ndàhú.

<sup>23</sup>Te xíã<sup>n</sup> núu nchòhó òré ndécú ndihì-ndo ì<sup>n</sup> sã cuinì-ndó cuàha-ndo Yă Ndiöxí nduu tãhú-gã, te òré cuáhá<sup>n</sup>-ndó cuãnaha-ndo xii-gá, te òré ní quexio-ndo núú dúcá<sup>n</sup> cuãnaha-ndo xii-gá sã ndúú tãhú-gã, te ní ndacu iní-ndó sã ndécú ñáyiú ñá túú cùu váha iní ñáhá xii-ndo cuendá ì<sup>n</sup> sã ñí cumánì núú tnáhá-ndó. <sup>24</sup>Te dāndóo-ndo sã dúcá<sup>n</sup> nèhe-ndo cuáhá<sup>n</sup> nduu tãhú Yă Ndiöxí, te díhna-gá quíhí<sup>n</sup>-ndó nàcahá<sup>n</sup> cáhnú iní tnáhá-ndó ndihì ñáyiú ñá túú cùu váha iní ñáhá xii-ndo-á<sup>n</sup>, te dàtnùnì duca<sup>n</sup> te

quíhí<sup>n</sup>-ndó cuàha-ndo Yă Ndiöxí sã ndúú tãhú-gã.

<sup>25</sup>Te núu ïó ì<sup>n</sup>-ndo ñí sáhá<sup>n</sup> ñáyiú núú tée cùchiu<sup>n</sup> ní sacá<sup>n</sup> cuéchi-yu cuendá-ndó cuendá ì<sup>n</sup> sã ñí quide-ndo, te òré ní nanihí tnáhá-ndó ndihí-yu cuáhá<sup>n</sup>-ndó núú tée cùchiu<sup>n</sup>-á<sup>n</sup>, te nacáhá<sup>n</sup> cáhnú iní tnáhá-ndó ndihí-yu cuendá sã vã cuàha cuendá ñáhá-gã-yu xii-ndo núú tẽ cùchiu<sup>n</sup>, chi núu duca<sup>n</sup> na càdá-yu te tée cùchiu<sup>n</sup>-á<sup>n</sup> cuàha cuendá ñáhá-dẽ xii-ndo núú cuè tée cùu poleciá, te cue tée-á<sup>n</sup> chihi ñaha-güedẽ vecaá xii-ndo. <sup>26</sup>Te na càchí tnúhu ndáá-í xii-ndo sã vã càcu-ndo te núu na ngàva-ndo vecaá ndéé nacháhu-ndo nchaa sã tàú-ndó.

**Cuendá cue ñáyiú ñá túú quide váha**

<sup>27</sup>Te nchòhó sa xìnì-ndó nàcuáa ndúu tnúhu ní cáhá<sup>n</sup> cue tée ní xíndecu ndéé sanaha, te duha ní cachí-güedé: “Nchaa cue tée vã cúú càhá<sup>n</sup> ndihì-güedé ñadihí te núu ñá díú ñadihí-güedé cúú-yu, te diu-ni duca<sup>n</sup> tùcu nchaa cue ñáyiú ñihí vã cúú càhá<sup>n</sup> ndihí-yu tée te núu ñá díú yí-yu cùu-güedé”, duha ní cachi-güedé. <sup>28</sup>Dico yúhú càchí tnúhu-í xii-ndo sã ndēda-ni càa cue tée na cūndehe ì<sup>n</sup> ñadihí te núu na càni iní-güedé cundecu díí iní-güedé ndihí-yu te cada iní-ndó sã dàtná sã sà ní cáhá<sup>n</sup> ndihì ñaha-güedé xí-yu sã dúcá<sup>n</sup> ñí sani iní-güedé.

<sup>29</sup>Te núu ì<sup>n</sup> xio tinùu-ndo quide-xi quide-ndo nāndi sã cuèhé sã dúhá te tava-ndo, chi váha-gá sã ná cuíta te ñá díú ñihí ní ndúú yiqui cuñú-ndó quíhí<sup>n</sup>-xi núú ùhú núú ndàhú. <sup>30</sup>Te núu ì<sup>n</sup> xio ndaha-ndo quide-xi quide-ndo nāndi sã cuèhé sã dúhá te quehdé-ndó, chi váha-gá sã ná cuíta ì<sup>n</sup> xio ndaha-ndo te ñá díú sã ñihí ní ndúú yiqui cuñú-ndó quíhí<sup>n</sup>-xi núú ùhú núú ndàhú.

**Jèsús càhá<sup>n</sup>-gá cuendá  
cue ñáyiú dàña tnaha**

(Mt. 19:9; Mr. 10:11-12; Lc. 16:18)

<sup>31</sup>Te nchòhó sa nàha tucu-ndo nacuaáa ní cáhá<sup>n</sup> tucu cue téé ní xíndecu ndéé sanaha, te duha ní cachí-güedé: “Te núu ì<sup>n</sup> téé na dàña tnaha-dé ndihi ñadhí-dé, te xini ñuhu-xi cadúha-dé ì<sup>n</sup> tutú cuañaha-dé núú càhá<sup>n</sup>-xi sá ní dáñá ñàha-dé”, duha ní cachí-güedé. <sup>32</sup>Dico yúhú càchí tnúhu-í xii-ndo sã cúú dàña ì<sup>n</sup> téé ñadhí-dé, te núu cùnuní ndáá iní-dé sá càhá<sup>n</sup> ndihi-a<sup>n</sup> ingá téé. Dico núú ñá túú dùca<sup>n</sup> quide-a<sup>n</sup> te ñá túú ndúu vâha-xi daña ñàha-dé. Te núu ñá túú dùca<sup>n</sup> quide ñadhí-dé, te cada iní-ó sã méé-dé ní sanu ichi ñaha-dé xii-a<sup>n</sup> cáhá<sup>n</sup> ndihi-a<sup>n</sup> ingá téé te núu na dàña ñàha-dé. Te téé na nàquehe<sup>n</sup> ñaha xii ñaha ní dáñá ñàha yí-xi-á<sup>n</sup>, te ñu-ni ñá túú ní quide vâha-dé sá dúcá<sup>n</sup> ní naquehe<sup>n</sup>-dé ñàha-á<sup>n</sup>.

**Ñáyiú càcunehe ñaha xii Yá Ndiöxí  
cuendá cutnùní iní tnaha  
ñáyiú-yu sá ndáá cadá-yu  
ì<sup>n</sup> sá sání iní-yu cadá-yu**

<sup>33</sup>Te sa nàha tucu-ndo nacuaáa ní cáhá<sup>n</sup> tucu cue téé ní xíndecu ndéé sanaha, chi cue téé-á<sup>n</sup> ní cachí-güedé: “Te núu càcunehe-ndo Yá Ndiöxí núú tnàha ñáyiú-ndo nàcuáa cutnùní iní-yu sá ndáá cada-ndo ì<sup>n</sup> sá sání iní-ndo càda-ndo, te cada-ndo”, duha ní cáhá<sup>n</sup> dóho tnàha-güedé. <sup>34</sup>Dico yúhú càchí tnúhu-í xii-ndo sã ñà túú nã cacunehe-ndo sã ndáá cada-ndo ì<sup>n</sup> sá sání iní-ndo càda-ndo. Te ni vã cácu nèhe-ndo andiu chi yàcá<sup>n</sup> cúú-xí núú núcõo Yá Ndiöxí táxí tnùní-gá. <sup>35</sup>Te ni vã cácu nèhe-ndo ñuyíú-a, chi tnàhã ñuyíú-a ndècu-gá, te ni vã cácu nèhe-ndo ñuú Jerusalén chi ñuú-á<sup>n</sup> cúú cuendá-gá, te ñu-gá cúú-gã Yaá ío cùnuu. <sup>36</sup>Te ni vã cácu

nèhe-ndo díquí-ndó chi nàha-ndo sá ní ì<sup>n</sup> idi díquí-ndó ñã ndácú-ndó ndàda cuixí<sup>n</sup>-ndó àdi ndada tnuu-ndo. <sup>37</sup>Te vâha-gá sá núu ì<sup>n</sup> sá sání iní-ndo càda-ndo, te cachí-ni-ndo: “Cuu cada-ndí, àdi vã cúú càda-ndí”, cachí-ni-ndo. Chi nchaa dava-gá sã chídó-ndó càhá<sup>n</sup>-ndó òré duca<sup>n</sup> sàni iní-ndo càda-ndo ì<sup>n</sup> sá cadá-ndó cùu-xi sá dácàhu iní ñàhá yùcu ñávâha.

**Cuendá ñáyiú nàchinaa sá  
quidé ñàha tnaha ñáyiú-xi**

(Lc. 6:29-30)

<sup>38</sup>Te sa nàha tucu-ndo nacuaáa ní cáhá<sup>n</sup> tucu cue téé ní xíndecu ndéé sanaha, chi cue téé-á<sup>n</sup> ní cachí-güedé: “Ñáyiú na càda ñaha tnaha ñáyiú-xi ì<sup>n</sup> sá ñà túú vâha, te nanchòcáva-yu nachinaá-yu sá ní quide ñaha tnàha ñáyiú-yu”, duha ní cachí-güedé. <sup>39</sup>Dico yúhú càchí tnúhu-í xii-ndo sã ñà túú nã cada-ndo nchàa cue ñáyiú cuihna iní-xi te núu quide ñàhá-yu ì<sup>n</sup> sá ñà túú vâha xii-ndo. Te núu ní canihá-yu ì<sup>n</sup> xito te cuiní tucú-yu canihá-yu ingá xito te daña-ndo na canihá-yu. <sup>40</sup>Àdi ní sacá<sup>n</sup> cuéchi-yu núú cuè téé cùchiu<sup>n</sup> cuendá-ndó, te cuiní-yu quendeé-yu dúhnú-ndó te daña-ndo na canehé-yu quíhí<sup>n</sup>, te tnàhá-ni dóó ndíxí ndòdo-ndo daña-ndo na canehé-yu quíhí<sup>n</sup>. <sup>41</sup>Te núu quide yicá-yu caca-ndo dàtná úú kilómetrú cuido-ndo ndàchiú<sup>n</sup>-yu ña, te chido-ndo úú-gá tucu kilómetrú cuido-ndo ndàchiú<sup>n</sup>-yu. <sup>42</sup>Te núu ío ì<sup>n</sup> sá xicá<sup>n</sup>-yu núú-ndó te cuañaha-ndo, àdi ío ì<sup>n</sup> sá sánúu-yu núú-ndó te cuañaha ñu-ndo.

**Cuu iní-ó nchàa ñáyiú  
cùu úhú iní ñàhá xii-o**

(Lc. 6:27-28, 32-36)

<sup>43</sup>Te sa nàha tucu-ndo nacuaáa ní cachí tucu cue téé ní xíndecu ndéé sanaha, chi cue téé-á<sup>n</sup> ní cachí-güedé:

“Cuu iní-ndó cuè ñáyi ndècu ndihi váha-ndo, te cuu úhú iní-ndó cuè ñáyi cùu úhú iní ñáhá xii-ndo”, duha ní cachí-güedé. <sup>44</sup>Dico yúhú càchí tnúhu-í xii-ndo sá cùú iní-ndó cuè ñáyi cùu úhú iní ñáhá xii-ndo, te cáhá<sup>n</sup> váha-ndo cuèndá cue ñáyi cáhá<sup>n</sup> úhú ñáhá xii-ndo, te cada-ndo sá váha sá cùú-xí cuè ñáyi cùu úhú iní ñáhá xii-ndo, te cáhá<sup>n</sup> ndihi-ndo Yá Ndiöxí cuèndá cue ñáyi xicuèhé ñáhá xii-ndo, ndihi cuèndá cue ñáyi quide úhú ñáhá xii-ndo. <sup>45</sup>Te núu na càda-ndo nchaa nacuaá cáhá<sup>n</sup>-í-a, te duca<sup>n</sup> te cutnùní sá cùú-ndó dèhe Tātá-ndó Dütú Ndiöxí Yaá ndécú àndiu. Te diu-gá cùú-gá Yaá quidé quène nchíanchii, te diu-ni-gá cùú-gá Yaá dácùu<sup>n</sup> dáu ñuyíú-a, te duca<sup>n</sup> quide-gá cuèndá cuu-xi sá váha sá cùú-xí cuè ñáyi quide váha, ndihi sá cùú-xí cuè ñáyi ñá túú quide váha. <sup>46</sup>Te núu nchòhó ná cùú iní-ndó mèe-ni ñáyi na cùu iní ñáhá xii-ndo, te vá càchí-ndó sá Yá Ndiöxí taxi-gá sá ndúú tǎhú-ndó sá dúcá<sup>n</sup> quide-ndo, chi cuèi cue tée cui-hna iní-xi quide cobrá ñáhá xii cue ñáyi cuèndá impuèstú duca<sup>n</sup> xiquide-güedé. <sup>47</sup>Te núu mee-ni ñáyi ndècu ndihi váha-ndo io váha cáhá<sup>n</sup> ndihi-ndó-yu, te vá càchí-ndó sá io váha quide-ndo sá dúcá<sup>n</sup> quide-ndo, chi cuèi ndéé nchaa ñáyi ñá túú xiní dana cuèndá Yá Ndiöxí duca<sup>n</sup> xiquide-yu. <sup>48</sup>Te duha nduu tnúhu cáhá<sup>n</sup>-í cuèndá sá nchòhó cada ndáá-ndó cùndecu-ndo datná quidé ndáá méé Tātá-ndó Dütú Ndiöxí Yaá ndécú àndiu —duha ní dánèhé ñáhá Jèsús xii cue tée xica cuu ndihi-gá ndihi nchaa ñáyi.

**Jèsús dánèhé-gá ñáyi  
nàcuáa cadá-yu sá váha**

**6** Te Jèsús ndécú-ní-gá dánèhé-gá cue tée xica cuu ndihi-gá ndihi nchaa ñáyi, te xáhá<sup>n</sup>-gá:

—Te òré quidé-ndó sá váha te vá cadá-ndó núú ñáyi cuèndá-ni sá

cuiní-ndó cáhá<sup>n</sup> váha-yu cuèndá-ndó, chi núu núú ñáyi duca<sup>n</sup> na càda-ndo te Dütú Ndiöxí Yaá cùú Tātá-ndó vá táxi-gá sá ndúú tǎhú-ndó. <sup>2</sup>Te xíá<sup>n</sup> núu nchòhó òré chindèe-ndo ñáyi ndàhú, te vá cūñaha-ndo xii cue ñáyi sá chindèe-ndo cue ñáyi ndàhú-á<sup>n</sup> datná xiquide cue ñáyi dandahú méé-xí sá quidé ndáá te ñá ndáá sá quidé ndáá-yu, chi ñáyi-á<sup>n</sup> duca<sup>n</sup> xiquide-yu òré sáhá<sup>n</sup>-yu veñúhu, chi dātécú tnúhu-yu nchaa ñáyi òré duca<sup>n</sup> chindeé-yu ñáyi ndàhú. Te diu-ni duca<sup>n</sup> quidé-yu xáhá<sup>n</sup>-yu xii cue ñáyi sá chindèe-yu cue ñáyi ndàhú-á<sup>n</sup> nchaa núú xicá cùú-yu, te duca<sup>n</sup> xiquide-yu cuèndá cuiní-yu cáhá<sup>n</sup> váha ñáyi cuèndá-yu. Te yúhú na càchí tnúhu ndáá-í xii-ndo sá ñá túú ná nduu tǎhú ñáyi-á<sup>n</sup> núú Yá Ndiöxí sá dúcá<sup>n</sup> quidé-yu chi mee-ni núú tnàha ñáyi-yu cùdiú-yu. <sup>3</sup>Te nchòhó òré chindèe-ndo ñáyi ndàhú, te cuèi ñáyi ío-gá váha ndècu ndihi-ndo dico vá cūñaha-ndo sá dúcá<sup>n</sup> chindee-ndo cue ñáyi ndàhú-á<sup>n</sup>, te ni cuèi dava-gá ñáyi vá cūñaha-ndo. <sup>4</sup>Chi váha-gá sá iní méé-ní-ndó ná cùhu<sup>n</sup> sá dúcá<sup>n</sup> chindee-ndo cue ñáyi ndàhú-á<sup>n</sup>. Te núu duca<sup>n</sup> na càda-ndo ña, te Dütú Ndiöxí Yaá cùú Tātá-ndó tàxi-gá sá ndúú tǎhú-ndó chi diu-ni mee-gá ndéhé-gá nàcuáa quide-ndo ndecu-ndo.

**Jèsús dánèhé-gá ñáyi nàcuáa  
cáhá<sup>n</sup> ndihí-yu Yá Ndiöxí**

(Lc. 11:2-4)

<sup>5</sup>Te nchòhó òré cáhá<sup>n</sup> ndihi-ndo Yá Ndiöxí, te vá cadá-ndó datná xiquide cue ñáyi dandahú méé-xí càchí sá quidé ndáá te ñá ndáá sá quidé ndáá-yu, chi ñáyi-á<sup>n</sup> tnàhá iní-yu cunutnii-yu cáhá<sup>n</sup> ndihí-yu Yá Ndiöxí òré yíhí-yu veñúhu. Te diu-ni duca<sup>n</sup> xiquide-yu nchaa núú xicá cùú-yu, te duca<sup>n</sup> quidé-yu cuèndá sá cuiní-yu quini ñáyi nàcuáa xiquide-yu. Te na càchí tnúhu ndáá-í xii-ndo sá

ñà túú nă nduu táhú ñáyiú-á<sup>n</sup> núú Yá Ndiöxí sá dúcá<sup>n</sup> quidé-yu chi mee-ni núú tnàha ñáyiú-yu cùdíú-yu. <sup>6</sup>Te nchòhó òré cuíní-ndó cǎhá<sup>n</sup> ndihi-ndo Yá Ndiöxí, te ndíhu ndedí nihnu-ndo xítí vehe-ndo, chi diu-gá cúú Tǎtá-ndó te ndècu ndihi ñaha-gá xii-ndo, te diu-ni mee-gǎ ndéhé ñaha-gá xii-ndo nàcuáa quide-ndo, te núu duca<sup>n</sup> na càda-ndo te taxi-gá sá ndúú tǎhú-ndó.

<sup>7</sup>Te òré cǎhá<sup>n</sup> ndihi-ndo Yá Ndiöxí te vǎ sùúní cuèndá-ni dacǎá-ndó tnúhu cǎhá<sup>n</sup> ndihi-ndo-gǎ dàtnǎ xǐquide cue ñáyiú ñǎ túú xíní tnúhu-gǎ, chi ñáyiú-á<sup>n</sup> sání iní-yu sá tédòho ñaha vihi-gǎ Yá Ndiöxí xíí-yu sá dúcá<sup>n</sup> sùúní dàcaá-yu tnúhu cǎhá<sup>n</sup> ndihi ñahá-yu xii-gǎ dico ñahá. <sup>8</sup>Dico nchòhó, vǎ cǎdá-ndó dàtnǎ xǐquide cue ñáyiú-á<sup>n</sup>, chi mee Tǎtá-ndó Dútú Ndiöxí sa nàha-gǎ ná cúú nchàa sá xíní ñùhu-ndo cuéí òré vátá cǎcǎ<sup>n</sup>-gǎ-ndó núú-gǎ. <sup>9</sup>Te duha cǎhá<sup>n</sup>-ndó òré cǎhá<sup>n</sup> ndihi-ndo Yá Ndiöxí:

Yòhó Tǎtá-ndí Dútú Ndiöxí Yaá ndécú àndíu,

nchaa ñáyiú na cǎhá<sup>n</sup>-yu sá cúú-n Yáá ío yíñùhu.

<sup>10</sup>Te xicǎ<sup>n</sup> táhú-ndí núú-n sǎ ná sǎá nduu ndíhu ndàhá-n-yu.

Te cada-n dàtnǎ cǎchí iní-n ñùyíú-a dàtnǎ quidé-n àndíu.

<sup>11</sup>Te xicǎ<sup>n</sup> táhú-ndí núú-n sǎ táxí-n sǎ còhó-ndí sǎ cǎxí-ndí ìí<sup>n</sup> nduu ìí<sup>n</sup> nduu.

<sup>12</sup>Te cada cǎhnu iní-n nchàa yícá cuèchi-ndí, chi tnàhá nchúhú quidé cǎhnu iní-ndí nchaa sá quidé ñaha tnaha ñáyiú-ndí.

<sup>13</sup>Te vǎ dáñá-n dàcǎhá<sup>n</sup> ñahá yècu ñávǎha xii-ndí cada-ndí sǎ ñà túú vǎha, chi coto ñaha-n xii-ndí cuèndá sǎ vǎ dúcá<sup>n</sup> càda ñaha-xi.

Te diu-n cùu-n Yaá ío cùnuu nchaa nduu nchaa quíú, te ío cǎhnu cuu-n, te

diu-ni-n quèndaha ñaha-n xii-ndí ni caa ni quíhí<sup>n</sup>. Te duca<sup>n</sup> na cùnduu. Duha dǎnehé ñahà-í xii-ndo cǎhá<sup>n</sup> ndihi-ndo Yá Ndiöxí.

<sup>14</sup>Te núu nchòhó quidé cǎhnu iní-ndó nchàa sá quidé ñaha tnaha ñáyiú-ndo, te duca<sup>n</sup> te Tǎtá-ndó Dútú Ndiöxí Yaá ndécú àndíu cada cǎhnu iní-gǎ nchaa sǎ ñà túú vǎha quide-ndo tucu. <sup>15</sup>Dico núu nchòhó vǎ cǎdá cǎhnu iní-ndó nchàa sá quidé ñaha tnaha ñáyiú-ndo ña, te ni Dútú Ndiöxí Yaá cúú Tǎtá-ndó vǎ cǎdá cǎhnu iní-gǎ nchaa sǎ quidé-ndó tucu.

### **Cuèndá ñáyiú ñǎ túú tnàhí ná xéxí ǎma cǎhá<sup>n</sup> ndihí-yu Yá Ndiöxí**

<sup>16</sup>Te nchòhó, nduu ñà túú tnàhí ná xéxí-ndó cǎhá<sup>n</sup> ndihi-ndo Yá Ndiöxí, te vǎ cùndyí-ndó dàtnǎ xǐquide nchaa ñáyiú dǎndahú méé-xí cǎchí sá quidé ndǎá te ñà ndǎá sá quidé ndǎá-yu, chi ñáyiú-á<sup>n</sup> duca<sup>n</sup> xǐquidé-yu cuèndá sá cuíní-yu cutnùní iní ñáyiú sá ñà túú tnàhí ná xéxí-yu cǎhá<sup>n</sup> ndihí-yu Yá Ndiöxí. Te yúhú cǎchí tnúhu-í xii-ndo sǎ sǎ dúcá<sup>n</sup> quidé-yu te ñà túú nǎ chindee ñaha-xi xíí-yu cuèndá níhí-yu ìí<sup>n</sup> sǎ ndúú tǎhú-yu núú Yá Ndiöxí. <sup>17</sup>Dico nchòhó, nduu duca<sup>n</sup> quide-ndo ñà túú tnàhí ná xéxí-ndó cǎhá<sup>n</sup> ndihi-ndo Yá Ndiöxí, te vǎha vǎha naquete-ndo núú-ndó, te vǎha vǎha chihi-ndo cǎcǎ <sup>18</sup>cuèndá sǎ vǎ cùtnùní iní ñáyiú sǎ ñà túú nǎ xéxí-ndó nduu duca<sup>n</sup> cǎhá<sup>n</sup> ndihi-ndo Yá Ndiöxí. Te Dútú Ndiöxí Yaá cúú Tǎtá-ndó ndècu ndihi-ndo diu-ni mee-gǎ ndéhé-gǎ nàcuáa quide-ndo ndecu-ndo, te diu-gǎ taxi-gǎ sǎ ndúú tǎhú-ndó.

### **Cuèndá nchaa sǎ vǎha nduu táhú-ó (Lc. 12:33-34)**

<sup>19</sup>Te vǎ cǎní iní-ndó cùu-ndo ñáyiú cuica nǎndí sǎ cùndècu ndihi-ndo ñuyíú-a chi vǎ cúdii-xi, chi dava quee tíquidi, te dava caxi cudí ñùhu, àdi quíhu ñadúhú vehe-ndo te duhu-güedě.

<sup>20</sup>Te váha-gá chí ndúcu nàcuáa cada-ndo cuendá duca<sup>n</sup> ngündecu sá ndúú tǎhú-ndó àndiu, te xǎ<sup>n</sup> cudí-xi cundecu ndíhi-ndo nì caa nì quíh<sup>n</sup>, chí yàcá<sup>n</sup> vá quée-gǎ tíquidi, te ni vǎ cáxi-gǎ cudi ñuhu, te ni vǎ quíní-gǎ-ndó ñàdúhú duhu-güedě ndachü<sup>n</sup>-ndo. <sup>21</sup>Te núu cùu-ndo ñáyu cuica ndècu ñuyú-a, te diu-ni nchaa sá ndécú ndíhi-ndo ñuyú-a ñuhu iní-ndó. Àdi cuu-ndo ñáyu quide nacuáa ngündecu sá ndúú tǎhú-ndó àndiu, te diu-ni sá ndúú tǎhú-ndó ndècu andiu-á<sup>n</sup> ñúhú iní-ndó.

**Núú-ó cùu-xi datná ñ<sup>n</sup> ñuhú**

(Lc. 11:34-36)

<sup>22</sup>Te cada iní-ndó sǎ nǔú-ndó cùu-xi datná ñ<sup>n</sup> ñuhú. Te núu núú-ndó cǎváha te cùtnuní iní-ndó nǎ cúú sǎ ndécú nǔú-ndó. <sup>23</sup>Dico núu cùhú núú-ndó ñà túú cùtnuní cundehe-ndo ña, te ñà túú cùtnuní iní-ndó nǎ cúú sǎ ndécú nǔú-ndó. Te sá dúcá<sup>n</sup> cùhú núú-ndó te cada iní-ndó sǎ ndécú-ndó dàtná ñ<sup>n</sup> núú néé. Te duha ndüu tnúhu cǎhá<sup>n</sup>-í chí núu sàni váha iní-ndó cuendá Yǎ Ndiöxí ñá, te cùu vii cuu váha iní-ndó ndècu-ndo. Á<sup>n</sup> te núu ñá túú sàni váha iní-ndó cuendá-gǎ ñá, te ñá túú tnǎhí cùu váha iní-ndó ndècu-ndo. Te sá dúcá<sup>n</sup> ñà túú sàni váha iní-ndó cuendá-gǎ te cada iní-ndó sǎ ndécú-ndó dàtná ñ<sup>n</sup> núú néé.

**Vá ndácú ñ<sup>n</sup> téé cunu  
cuechi-dě núú úú pàtróó<sup>n</sup>**

(Lc. 16:13)

<sup>24</sup>Te ni ñ<sup>n</sup> téé xínu cuechi vá ndácú-dě cunu cuechi-dě núú úú pàtróó<sup>n</sup>, chí téé-á<sup>n</sup> cuu váha iní-dé núú ñ<sup>n</sup> pàtróó<sup>n</sup>-dě te tñi-dé nchaa tnúhu cǎhá<sup>n</sup> pàtróó<sup>n</sup> téé cùu váha iní-dé núú-xi-á<sup>n</sup>. Te núú ñngá tucu pàtróó<sup>n</sup>-dě vá cúú váha iní-dé, te ni vǎ tñí-dě tnúhu cǎhá<sup>n</sup> ñngá téé-á<sup>n</sup>. Te duca<sup>n</sup> sǎtnahá-xi cùu nchóhó chí vá ndácú-ndó

cùu cuechi-ndo núú Yǎ Ndiöxí te cuhu<sup>n</sup> iní-ndó nchaa sá íó ñuyú-a.

**Yǎ Ndiöxí xító-gǎ  
nchaa ñáyu cùu déhe-gǎ**

(Lc. 12:22-31)

<sup>25</sup>Te na cǎchí tnúhu-í xii-ndo sǎ vǎ ío cani iní-ndó nǔu nása níhí-ndó sǎ cóhó sǎ cáxi-ndó, te ni vǎ ío cani iní-ndó nǔu nása níhí-ndó dǒó cuihnu-ndo, chí cùnuu-gǎ méé-ndó dàcúúxí sǎ nchító-ndó, te duca<sup>n</sup> cùnuu-gǎ yiqui cùñú-ndó dàcúúxí dǒó sácúihnu-ndo. <sup>26</sup>Te chí cǎdá cuendá sá ncháá quiti ndava ñá túú tnǎhí ná xítú-güedi, te ni ñà túú ndèè cuáhá<sup>n</sup>-güedi nàtahu-güedi, te ni ñà túú ndèè cáá yàcá-güedi, chí mee Tǎtá-ó Dütú Ndiöxí Yaá ndécú àndiu xito ñaha-gǎ xii-güedi níhí-güedi sá xéxi-güedi. Te núu cue quiti-á<sup>n</sup> duca<sup>n</sup> xito ñaha-gǎ xii-güedi, ꞑte uu<sup>n</sup>-gǎ xító ñaha-gǎ xii nchòhó, chí nchòhó ío-gǎ cúnüu-ndo dacúúxí cuè quiti-á<sup>n</sup>! <sup>27</sup>Te cuèi nándi sá sání vihi iní-ndó ndècu-ndo, dico ñá ndácú-ndó cǎda-ndo nacuáa cuehnu-ndo cuédicó ñ<sup>n</sup> yiqui-gǎ.

<sup>28</sup>Te vá ío cani iní-ndó nǔu nása níhí-ndó dǒó cuihnu-ndo. Te chí cǎdá cuendá nàcuáa sǎhnu nchaa itá íó yucu, chí nchaa itá-á<sup>n</sup> ñà túú quide chiu<sup>n</sup>-xi, te ni ñà túú quèhe<sup>n</sup>-xi idi. <sup>29</sup>Te na cǎchí tnúhu-í xii-ndo sǎ ndíi Salómón cuèi ío vii ní xínduu dǒó nǐ xóo cuihnu ndíi, dico ñá túú nǔtnahá-xi nàcuáa cǎa nchaa itá, chí ío-gǎ vii cǎa nchaa itá. <sup>30</sup>Te nchaa itá íó yucu tnaa-ni cùdí-xi, te yìchí-xi te sǎhmi ñáyu. Te cuèi duca<sup>n</sup> dico mee Yǎ Ndiöxí quidé-gǎ ío vii sácúnduu-xi. Te núu nchaa itá-á<sup>n</sup> duca<sup>n</sup> quide-gǎ xító-gǎ sácúnduu vii-xi, te xǎ<sup>n</sup> cùtnuní sá ío-gǎ coto ñaha-gǎ xii-ndo, dícó-ni sá ñà túú sàndáá váha iní-ndó-gǎ. <sup>31</sup>Te xǎ<sup>n</sup> nǔu ñá túú xini ñuhu vihi-xi cani iní-ndó nǔu nása níhí-ndó sǎ cóhó sǎ cáxi-ndó, àdi nása níhí-ndó dǒó



cuihnu-ndo. <sup>32</sup>Chi nchaa ñáyiú ñá túú xíní nàcuáa càhá<sup>n</sup> tnúhu Yá Ndiöxí mee-ni nchàa xíá<sup>n</sup> ñúhú iní-yu. Dico nchòhó chi mee Tátá-ndó Dütú Ndiöxí sa ñaha-gá ná cúú sá xíní ñúhu-ndo. <sup>33</sup>Te xíá<sup>n</sup> núu ío xíní ñúhu-xi sá cúhú<sup>n</sup> iní-ndó sá Yá Ndiöxí yíndàha ñaha-gá xii-ndo, te duca<sup>n</sup> càda-ndo nchaa nacuáa cuíní-gá, te duca<sup>n</sup> te taxi-gá nchaa sá xíní ñúhu-ndo. <sup>34</sup>Núu xíá<sup>n</sup> vá ío caní iní-ndó ñasa cundecu-ndo ndúu tneé, chi caní iní-ndó nàcuáa cada-ndo cundecu-ndo vitna, chi nduu tnèé-á<sup>n</sup> te dré-ná te cut-núni núu nása cada-ndo cundecu-ndo. Chi nchòhó sa ñaha-ndo sá ío titní núú sá quidé-xí ì<sup>n</sup> nduu ì<sup>n</sup> nduu —duha ní dánèhé ñáhá Jèsús xii cue téé xica cuu ndíhi-gá ndíhi nchaa ñáyiú.

**Vá càhá<sup>n</sup> cuèhé-ó  
cuèndá tnàha ñáyiú-ó**

(Lc. 6:37-38, 41-42)

**7** Te Jèsús ndèccu-ni-gá dánèhé-gá cue téé xica cuu ndíhi-gá ndíhi nchaa ñáyiú, te xàha<sup>n</sup>-gá:

—Vá càhá<sup>n</sup> cuèhé-ndó cuèndá tnàha ñáyiú-ndo, te duca<sup>n</sup> te Yá Ndiöxí ñá túú ná tnúhu cúñaha-gá xii-ndo. <sup>2</sup>Chi núu na càhá<sup>n</sup> cuèhé-ndó cuèndá tnàha ñáyiú-ndo, te Yá Ndiöxí ío ì<sup>n</sup> sá cádá ñàha-gá xii-ndo. Te núu nchòhó ná càhá<sup>n</sup> cuèhé víhí-ndó cuèndá tnàha ñáyiú-ndo te Yá Ndiöxí ío-gá dandòho ñaha-gá xii-ndo. <sup>3</sup>Te ná cuèndá ndéhé-ndó ì<sup>n</sup> sá ñà túú vâha quide tnaha ñáyiú-ndo te mee-ndo víhi-gá quidé-ndó-í? Te sá dúcá<sup>n</sup> quide-ndo te cada iní-ndó sá ndéhé-ndó dàtná ì<sup>n</sup> mihi líhli ñúhu núú tnàha ñáyiú-ndo te mee-ndo ñúhu ì<sup>n</sup> mihi cahnu-gá núú-ndó te ñá túú quide cuendá-ndó. <sup>4</sup>Te núu na nàcanu ichi-ndo tnaha ñáyiú-ndo cuèndá sá ñà túú quide váha-yu ndécú-yu, te mee-ndo víhi-gá quidé-ndó ñá, te cada iní-ndó sá xàha<sup>n</sup>-ndo xii tnaha ñáyiú-ndo sá nátava-ndo mihi líhli ñúhu

núú-yu sá dúcá<sup>n</sup> quide-ndo, te mihi càhnu ñúhu núú méé-ndó ñà túú quide cuendá-ndó. <sup>5</sup>Te sá dúcá<sup>n</sup> quide-ndo te ío dândahú-ndó mèe-ndo sá quidé ndáá-ndó te ñà ndáá sá quidé ndáá-ndó, te xíní ñúhu-xi díhna-gá daña-ndo nchàa sá ñà túú vâha quide-ndo, te dàtnúni duca<sup>n</sup> te cuu nacanú ichi-ndo tnàha ñáyiú-ndo cuèndá nchaa sá ñà túú vâha quidé-yu.

<sup>6</sup>Te nchaa ñáyiú ío sàá iní-xi, te vá cádá yica-ndó-yu cundedóho-yu tnúhu Yá Ndiöxí, chi núu na càda yica-ndó-yu te ngóo-yu cuu úhú iní ñáhâ-yu xii-ndo. Te ñáyiú-á<sup>n</sup> cúú-yu dàtná iná chi quití-á<sup>n</sup> núu na cuñaha-o ì<sup>n</sup> sá cuñaha-o, te núu ñá túú cùtnuní iní-dí ná cúú xíá<sup>n</sup> te tní ñaha-dí xii-o. Te cùu tucú-yu dàtná cùchí chi quití-á<sup>n</sup> núu na chùcu-o núú-dí yúú vâha sá ío víi càa nani pérá, te dícò-ni cùnu sáhá-dí chi ñá túú cùtnuní iní-dí sá cúú-xí yúú vâha.

**Cácá<sup>n</sup>-ó núú Yá Ndiöxí núu ná cuíní-ó**

(Lc. 11:9-13; 6:31)

<sup>7</sup>Te na càchí tnúhu-í xii-ndo sá cãcá<sup>n</sup>-ndó núú Yá Ndiöxí te núu ná cuíní-ndó te taxi-gá, te vá dáñá ndéé-ndó cãcá<sup>n</sup>-ndó núú-gá núu ná cuíní-ndó te duca<sup>n</sup> te níhí-ndó. Te cada iní-ndó sá ní quexìo-ndo vehe ì<sup>n</sup> tnaha ñáyiú-ndo te ní cáhá<sup>n</sup>-ndó, te ñáyiú-á<sup>n</sup> ní tedóho ñáhâ-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yá Ndiöxí tedóho ñaha-gá xii-ndo, te taxi-gá sá ná càcá<sup>n</sup>-ndó núú-gá. <sup>8</sup>Chi nchaa ñáyiú duca<sup>n</sup> xiquide, te Yá Ndiöxí tedóho ñaha-gá xii-yu te níhí-yu sá cuíní-yu. Te díu-ni duca<sup>n</sup> tùcu nchaa ñáyiú na càcá<sup>n</sup> núú-gá ì<sup>n</sup> sá cuíní-yu, chi sãñaha-gá sá xicá<sup>n</sup>-yu núú-gá. Te díu-ni duca<sup>n</sup> tùcu nchaa ñáyiú ñá túú dàña ndéé xicá<sup>n</sup> núú Yá Ndiöxí sá cuíní-yu chi níhí-yu.

<sup>9</sup>Te nchòhó cue téé cùu tátá, ñá túú cùndee iní-ndó cuñaha-ndo xii cue déhe-ndo ì<sup>n</sup> yúú caxi-güexi

òré xìcá<sup>n</sup>-güexi ìí<sup>n</sup> pàá núú-ndó caxi-güexi. <sup>10</sup>Te ni ñà túú cùndee iní-ndó cuñaha-ndo ìí<sup>n</sup> cóó caxi-güexi òré xìcá<sup>n</sup>-güexi ìí<sup>n</sup> chácá núú-ndó caxi-güexi. <sup>11</sup>Te nchòhó cuèi ndéé dau-na sàá iní-ndó dico sàha-ndo cuè déhe-ndo sà vâha xèxi-güexi oré ná cúú sà xìcá<sup>n</sup>-güexi núú-ndó caxi-güexi. Te núu nchòhó duca<sup>n</sup> quide-ndo, ÿte uu<sup>n</sup>-gá duca<sup>n</sup> quide Tátá-ndó Dúttú Ndiòxí Yáá ndécú àndiu, chi taxi-gá sá vâha sá cúú-xí-ndó te núu na càcá<sup>n</sup>-ndó núú-gá!

<sup>12</sup>Te nchaa sá vâha cuíní-ndó càda tnaha ñáyiu-ndo, te cada-ndo tnàhá-ndó ndìhí-yu, chi duca<sup>n</sup> sànu ichi ñaha tnúhu ní chídó tnùní ndíi Moisés, te diu-ni duca<sup>n</sup> sànu ichi ñaha tucu nchaa tnúhu ní chídó tnùní cue téé ní xóó cáhá<sup>n</sup> tnúhu Yá Ndiòxí ndéé sanaha.

### Yuyèhe cuiñi

(Lc. 13:24)

<sup>13-14</sup>Te xini ñuhu-xi nducu-ndo nacuáa cada-ndo tnìi-ndo ichi Yá Ndiòxí. Te ichi-gá-á<sup>n</sup> cúú-xí dàtná ìí<sup>n</sup> ichi cuiñi, àdi datná ìí<sup>n</sup> yuyèhe cuiñi. Te duha càhá<sup>n</sup>-í chi ío úhú xínu iní-ndó tnìi-ndo ichi Yá Ndiòxí, te sacú-ni nchòhó cue ñáyiu ndècu ñuyúí-a tnìi-ndo ìchi-gá. Te nchaa ñáyiu ndècu ichi cuehé ichi duha ta xíta nihnú-yu cuáhá<sup>n</sup>. Te ichi ndécú-yu-á<sup>n</sup> cada iní-ndó sá cúú-xí ìí<sup>n</sup> ichi cahnu ichi quehé<sup>n</sup>, àdi ìí<sup>n</sup> yuyèhe quehé<sup>n</sup>. Te duha càhá<sup>n</sup>-í chi ío vâi ñáyiu ndécú-yu ichi-á<sup>n</sup>.

### Ndi díí<sup>n</sup> núú yutnu xìní-ó nã yutnu cùu-xi cuendá sá sãvidí-xi

(Lc. 6:43-44)

<sup>15</sup>Te càchí tnúhu-í xii-ndo sã ño quíhi iní-ndó cùndecu-ndo cuendá sá vã dándàhú ñáhá cuè téé càchí sá càhá<sup>n</sup> tnúhu Yá Ndiòxí te ñà ndáá sá càhá<sup>n</sup>-güedé tnúhu-gá. Chi cue téé-á<sup>n</sup> sànuu sá quidé-güedé dàtná quidé mbéé

quiti ío vâha iní-xi, dico ñà ndáá chi ñà túú ñùhu vâha iní-güedé, chi quide-güedé dàtná quidé quiti déé<sup>n</sup> quiti nani yíhí. <sup>16</sup>Te òré quexìo-güedé núú ndécú-ndó te cada cuendá-ndó nàcuáa quide-güedé cuendá duca<sup>n</sup> cùt-nuní iní-ndó nã ñáyiu cùu-güedé. Te nchòhó xìní-ndó sã ñà túú cùu<sup>n</sup> ndéhé yoho yàha stilé tnu ìñu, te ni ñà túú xìní-ndó cùu<sup>n</sup> ngúxí ìí<sup>n</sup> tnu ìñu. <sup>17-18</sup>Te xìní tucu-ndo sá ncháá yùtnu vâha cùu<sup>n</sup> sãvidí vâha, te nchaa yutnu vâha-á<sup>n</sup> ñà túú cùu<sup>n</sup> sãvidí sá ñà túú vâha. Te nchaa yutnu sã ñà túú vâha ñà túú cùu<sup>n</sup> sãvidí vâha, chi mee-ni sãvidí sá ñà túú vâha cùu<sup>n</sup>. <sup>19</sup>Te nchaa yutnu sã ñà túú cùu<sup>n</sup> sãvidí vâha xèhndé-güedé, te cuánguee-xi núú ñùhú càyú-xi. Te duca<sup>n</sup> sãtnahá-xi yâha nchaa cue téé dándahú ñáhá càchí sá càhá<sup>n</sup> tnúhu Yá Ndiòxí te ñà ndáá sá càhá<sup>n</sup>-güedé tnúhu-gá, chi quíhí<sup>n</sup>-güedé núú ñùhú núú càyú. <sup>20</sup>Te nchòhó cutnùní iní-ndó nã ñáyiu cùu cue téé-á<sup>n</sup> cuendá nchaa sá quidé-güedé.

### Ñà ncháá ñáyiu ngúndecú-yu núú ndécú Yá Ndiòxí táxí tnùní-gá

(Lc. 13:25-27)

<sup>21</sup>Te na càchí tnúhu-í xii-ndo sã ño vâi ñáyiu cachí-yu sá yùhú cùu-í Xítóhó-yu, dico ñà ncháá-yu nduu táhú-yu cundecú-yu núú ndécú Tátá-í Dúttú Ndiòxí táxí tnùní-gá, chi mee-ni ncháa ñáyiu na càda nchaa nacuáa càhá<sup>n</sup>-gá ñáyiu-á<sup>n</sup> nduu táhú-yu cundecú-yu núú ndécú-gã táxí tnùní-gá. <sup>22</sup>Te na sàá nduu càda ndáá Yá Ndiòxí cuéchi nchaa ñáyiu, te vâi-yu cùñàhá-yu xii-í: “Yòhó Xítóhó Jesucristú nchúhú cúú-ndí ñáyiu ní cáhá<sup>n</sup> tnúhu-n nàcuáa ní cachí-n, te diu-ni-n ñi cacunehe-ndí te ní sándáá iní ñáhá ncháa espíritu cùndíhi yucu ñávâha xii-ndí ní quee-xi yiqui cùnú ñáyiu, te diu-ni yòhó ní chindee ñàha-n xii-ndí ní ndacu-ndí ní quide-ndí titní núú sã vã yòo tnàhí

ndàcu cada”, duha cùñàhá-yu xii-í dâvâ-á<sup>n</sup>. <sup>23</sup> Dico yúhú cùñaha-ĩ xii-yu: “Ná túú tñàhí xini ñàhá-í xii nchòhó nũ ndéé ñáyiú cùu-ndo, te chí xócuñí nchaa nchòhó ñáyiú quide nchaa sá cuèhé sá dúhá nũ ndécù-í-a”, duha cùñaha-ĩ xii-yu.

**Ì<sup>n</sup> vehe ndècu cimientú-xi ndihi  
ì<sup>n</sup> vehe ñá túú cìmièntú-xi**

(Mr. 1:22; Lc. 6:47-49)

<sup>24</sup> Te nchaa ñáyiú sàcúndedóho tñúhu càhá<sup>n</sup>-í te núu na tñí-yu, te ñáyiú-á<sup>n</sup> cùu-yu dàtná ì<sup>n</sup> téé ío váha cùtnuní iní-xi. Chi téé-á<sup>n</sup> ní dácáá-dé ì<sup>n</sup> vehe, dico díhna-gá ní xete-dé ndéé ní tnahá-dé yúú cáxí<sup>n</sup> te dàtnuní ní tava-dé cimientú-xi. <sup>25</sup> Te òré ní cuu<sup>n</sup> dáú te ní ndee ndute ñuhu, te ní dándáá-xí ndéé núú cáá vèhe-á<sup>n</sup>, dico ñá túú ní ndàcu-xi cuido-xi. Te ní quene tucu táchí ñíhi dico ñá túú ní ndàcu-xi cuido-xi vehe-á<sup>n</sup>, te duca<sup>n</sup> chí téé ní dácáá vèhe-á<sup>n</sup> ní tava-dé cimientú-xi núú yúú cáxí<sup>n</sup>. Duha sãtnahá-xi cùu nchaa ñáyiú tñí tñúhu càhá<sup>n</sup>-í. <sup>26</sup> Dico nchaa ñáyiú sàcúndedóho tñúhu càhá<sup>n</sup>-í te ñá túú cuñí-yu tñí-yu, ñáyiú-á<sup>n</sup> cùu-yu dàtná ì<sup>n</sup> téé ñá túú tñàhí cùtnuní iní-xi. Chi téé-á<sup>n</sup> ní dácáá-dé ì<sup>n</sup> vehe núú yúú mèe-ni ñuhu cùchí. <sup>27</sup> Te òré ní cuu<sup>n</sup> dáú te ní ndee ndute ñuhu, te ní dándáá-xí ndéé núú cáá vèhe-á<sup>n</sup>, te ní quene táchí ñíhi te íí-ni ní xido-xi vehe-á<sup>n</sup> cuendá sá nũ ñuhu cùchí ní sáá. Duha sãtnahá-xi cùu nchaa ñáyiú sàcúndedóho tñúhu càhá<sup>n</sup>-í te ñá túú cuñí-yu tñí-yu —duha ní dánèhé ñáhá Jèsús xii cue téé xica cuu ndihi-gá ndihi nchaa ñáyiú.

<sup>28</sup> Te òré ní ndihi Jèsús sá dúcá<sup>n</sup> ní cáhá<sup>n</sup>-gá, te nchaa ñáyiú ní xíndedóho nchaa tñúhu ní cáhá<sup>n</sup>-gá ío ní cuñúhu-yu nàcuáa ní dánèhé ñáhá-gá xii-yu. <sup>29</sup> Chi ní cáhá<sup>n</sup>-gá dàtná càhá<sup>n</sup> cue téé cùnuu, te cùnuu ndisa-gá, te ñá túú ní cáhá<sup>n</sup>-gá dàtná càhá<sup>n</sup> nchaa cue téé dàcuaha ñaha

xii ñáyiú nchaa tñúhu ní chídó tñuní ndii Moisés.

**Jèsús quidé tãtna-gá ì<sup>n</sup> téé  
tñàhá cuèhé sã dátèhyú  
nihnu-xi yiqui cùñú-ó**

(Mr. 1:40-45; Lc. 5:12-16)

**8** Te Jèsús ní xica-gá cuánuu-gá ñí tñúú nũ dúcá<sup>n</sup> ní xíndecu-gá ní dánèhé-gá ñáyiú-á<sup>n</sup>, te cuèhé víhí ñáyiú nchicú<sup>n</sup> ñáhá xii-gá cuánuu. <sup>2</sup> Te ní quexio ì<sup>n</sup> téé tñàhá cuèhé sã dátèhyú nihnu-xi yiqui cùñú-ó nũ Jèsús, te ní ngúñí xítí-dé núú-gã, te xãha<sup>n</sup>-dè xii-gã: —Mèstrú, véxi-í càhá<sup>n</sup> ndàhú-í núú-n nũ vá cùndèe iní-n càda tãtna ñaha-n xii-í, chí cùtnuní iní-í sã ndácú-n —càchí-dé xãha<sup>n</sup>-dè xii-gã.

<sup>3</sup> Te Jèsús ní dácáá-gá ndaha-gá ní tendaha ñaha-gá xii-dé, te xãha<sup>n</sup>-gã:

—Cuu cada tãtna ñaha-ĩ xii-n, te vitna ndúha-n —càchí-gá xãha<sup>n</sup>-gã xii-dé.

Te òré-ni-á<sup>n</sup> ní xócuñí cuèhé tñàhá-dé.

<sup>4</sup> Te Jèsús ní xãha<sup>n</sup> tucu-gá xii-dé:

—Te vitna cuanùhú te vá yõ ì<sup>n</sup> cùñaha-n sã yùhú ní quide tãtna ñaha-ĩ xii-n, núú dütú-ni cuhá<sup>n</sup> cuendá sá ná quini ñáhá-dé xii-n sã ní ndúha-n, te cuñaha-n sã ndúú tãhú Yã Ndiõxí dàtná ní cachí ndii Moisés. Te duca<sup>n</sup> càda-n cuendá cutnuni iní ñáyiú sá ní ndúha-n —càchí-gá xãha<sup>n</sup>-gã xii téé ní quide tãtna-gá-á<sup>n</sup>.

**Jèsús quidé tãtna-gá ì<sup>n</sup> téé xinu  
cuechi núú ì<sup>n</sup> téé cùu capitá<sup>n</sup>**

(Lc. 7:1-10)

<sup>5</sup> Te Jèsús ní xica-gá cuáhá<sup>n</sup>-gá ñuú Capernaúm. Te òré cuánguihu-gá ñuú-á<sup>n</sup> te ní quexio ì<sup>n</sup> téé cùu capitá<sup>n</sup> càhá<sup>n</sup> ndàhú-dé núú-gã, <sup>6</sup> te xãha<sup>n</sup>-dè xii-gã:

—Mèstrú, véxi-í càhá<sup>n</sup> ndàhú-í núú-n nũ vá cùndèe iní-n càda tãtna-n ì<sup>n</sup> téé xinu cuechi núú-í, chí cùhú-dé te càhú víhí tñàhá-dé, te ío ndòho-dé te ní ñá

cúndèe-gá-dé candá nihnu-dé —càchí-dé xáha<sup>n</sup>-dë xii-gá.

<sup>7</sup>Te Jèsús ní xáha<sup>n</sup>-gã xii-dé:

—Te na quíhí<sup>n</sup>-ó cada tátna-í-dé —càchí-gá xáha<sup>n</sup>-gã xii-dé.

<sup>8</sup>Te tée cùu capitá<sup>n</sup>-á<sup>n</sup> ní xáha<sup>n</sup>-dë xii-gá:

—Mèstrú, ñá túú tàù-í sá quíhu-n ndèé xití vehe-í, chí cùu-í ì<sup>n</sup> tée cùtèxínu sá cùú-xí-n, te cáhá<sup>n</sup>-ni sá ndúha tée xínu cuechi núú-í te ndúha-dé. <sup>9</sup>Chí yúhú ndècu cue tée tàxi tnuní ñáhá xii-í, te duca<sup>n</sup> yúhú tucu ndècu cue sandadú táxi tnuní-í. Te òré xáha<sup>n</sup>-í xii ì<sup>n</sup>-dé quíhí<sup>n</sup>-dé ì<sup>n</sup> chiù<sup>n</sup> te cuáhá<sup>n</sup>-dé, te òré xáha<sup>n</sup>-í xii ingá-dé quixi-dé te véxi-dé, te òré xáha<sup>n</sup>-í xii ì<sup>n</sup> tée xínu cuechi núú-í cada-dé ì<sup>n</sup> chiù<sup>n</sup> te quide-dé. Núu xíá<sup>n</sup> yòhó cáhá<sup>n</sup>-ni sá ndúha tée xínu cuechi núú-í te ndúha-dé —càchí-dé xáha<sup>n</sup>-dë xii Jèsús.

<sup>10</sup>Te Jèsús ío ní cuñúhu-gá sá dúcá<sup>n</sup> ní cáhá<sup>n</sup> tée cùu capitá<sup>n</sup>-á<sup>n</sup>, te ní xáha<sup>n</sup>-gã xii nchaa ñáyiú nchícú<sup>n</sup> ñáhá xii-gá:

—Na càchí tnúhu ndáá-í xii-ndo sã vátá quíní-gá-í ni ì<sup>n</sup> ñáyiú israhél, ñáyiú súúni ïo váha sàndáá iní ñáhá xii Yá Ndiòxí dàtná sàndáá iní ñáhá tée-a xii-gá. <sup>11</sup>Te na càchí tnúhu ndáá tucu-í xii-ndo sã ïo cuéhé ñáyiú quixi ndàa xio nacúáa quène nchíanchii, te diu-ni duca<sup>n</sup> ïo cuéhé tucu-yu quixi ndàa xio nacúáa quée tucu nchíanchii. Te nchaa ñáyiú-á<sup>n</sup> naníhí tnáhã-yu ndihi té Àbrahám, ndihi té Isàác, ndihi té Jàcób núú ndécú Yá Ndiòxí táxi tnuní-gá te yàcá<sup>n</sup> cundecu ndihi ñáhá-yu xii-güedé. <sup>12</sup>Te nchaa ñáyiú tàù nduu táhú cundecu núú ndécú Yá Ndiòxí táxi tnuní-gá ní cùu, ñáyiú-á<sup>n</sup> quee tñhú-yu, chí quíhí<sup>n</sup>-yu ì<sup>n</sup> xichi núú néé nñú ïo ndohó-yu cundecú-yu, te yàcá<sup>n</sup> ío ndáhí-yu, te dicó rúhñú-nã cuu núhu-yu sá sàtú iní-yu cuèndá sá ndóhò-yu —càchí-gá xáha<sup>n</sup>-gã xií-yu.

<sup>13</sup>Te Jèsús ní xáha<sup>n</sup> tucu-gá xii tée cùu capitá<sup>n</sup>-á<sup>n</sup>:

—Yòhó tée ndècu ndihi tée cùhú cuanùhú vehe-n vitna chí ndúha-dé chí ní sàndáá iní-n Yá Ndiòxí —càchí-gá xáha<sup>n</sup>-gã xii-dé.

Te diu-ni òré duca<sup>n</sup> ní xáha<sup>n</sup> Jèsús xii tée cùu capitá<sup>n</sup>-á<sup>n</sup> ní ndúha tée xínu cuechi núú-dë.

### **Jèsús quidé tátna-gá nãná ñadìhí té Pèlú**

(Mr. 1:29-31; Lc. 4:38-39)

<sup>14</sup>Te Jèsús ní xica-gá cuáhá<sup>n</sup>-gá vehe té Pèlú, te òré ní quexio-gá vehe-dé te ní xiní-gá cáá nãná ñadìhí-dé cùhú-a<sup>n</sup> ñúhu vihi-a<sup>n</sup> cahni. <sup>15</sup>Te Jèsús ní tnuí-gá ndaha ñaha cùhú-á<sup>n</sup>, te òré-ni-á<sup>n</sup> ní nchíco-a<sup>n</sup> cahni te ní ndacóo-a<sup>n</sup> ní xínu cuechi-a<sup>n</sup> nñú-güedé ndihi-gá.

### **Jèsús quidé tátna-gá vai ñáyiú cùhú**

(Mr. 1:32-34; Lc. 4:40-41)

<sup>16</sup>Te òré ní dáhu nchíanchii te ní quexio ñáyiú núú ndécú Jèsús, te ndècá-yu vai ñáyiú yìhi ñaha espíritú cúndìhi yucu ñávãha ní sáá núú-gã te ndèca tucú-yu vai ñáyiú tnáhã dava-gá núú cuéhé. Te ì<sup>n</sup>-ni tnúhu ní cáhá<sup>n</sup> Jèsús ní tenàá-gá nchaa espíritú cúndìhi yucu ñávãha yìhi ñaha xii nchaa ñáyiú-á<sup>n</sup>, te ní quee-xi yiqui cùñú-yu cuáhá<sup>n</sup>-xi. Te tnáhã nchaa dava-gá ñáyiú cùhú-á<sup>n</sup> ní quide tátna-gá. <sup>17</sup>Te duca<sup>n</sup> ní cuu chí ní quee ndáá-xi nàcuáa ní cáhá<sup>n</sup> ndíi Chàíá tée ní xóo cáhá<sup>n</sup> tnúhu Yá Ndiòxí ndéé sanaha, te duha ní cachí ndíi: “Mee-gã cada tátna ñaha-gã xii-o, chí diu-gá xocàni-gá nchaa sá quidé ùhú yiqui cùñú-ó”, duha ní cachí ndíi.

### **Ñáyiú cuíní tuha ñaha xii Jèsús**

(Lc. 9:57-62)

<sup>18</sup>Te òré ní xiní Jèsús sá ïo cuéhé ñáyiú xixúcu núú ndécú-gã, te ní xáha<sup>n</sup>-gã xii cue tée xica cuu ndihi-gá

sá quëe-gá ndihi-güedé bàrcú cuëndá téhndé-gá ndihi-güedé ndàa ingá xio yuhu làgúná. <sup>19</sup> Te mei òré-á<sup>n</sup> nǐ quexio ìí<sup>n</sup> tée dàcuaha ñaha xii cue ñáyiú nchaa tnúhu ní chídó tnùnǐ ndíi Moisés, te xáha<sup>n</sup>-dë xii-gá:

—Mèstrú, cuíní-í canchicú<sup>n</sup> ñáhà-í xii-n ndëni ní cuu na quíhí<sup>n</sup>-n —càchí-dé xáha<sup>n</sup>-dë xii-gá.

<sup>20</sup> Te Jèsús ní xáha<sup>n</sup>-gǎ xii-dé:

—Nchaa ñúcuíi chí ndëcu yaú cúú vèhe-güedi saqufhi-güedi, te nchaa cue quiti ndàva caa tacá-güedi diquí yutnu. Dico yúhú Téee cùu ñaní tnáhá-ndó nchàa-ndo chí ñá túú ndëé cáá vèhe-í ñuyúú-a ndetatú-í —càchí-gá xáha<sup>n</sup>-gǎ xii-dé.

<sup>21</sup> Te ìí<sup>n</sup> téee ní chitnahá ñáhá xii Jèsús ní xáha<sup>n</sup>-dë xii-gá:

—Jèsús, daña na nùhú-í cundetu-í cuú tǎtà-í te chindúxi-í-dé dàtnùnǐ quixi-í chitnahá ñáhá dùca<sup>n</sup>-ná-í xii-n —càchí-dé xáha<sup>n</sup>-dë xii-gá.

<sup>22</sup> Te Jèsús ní xáha<sup>n</sup>-gǎ xii-dé:

—Daña ñáyiú ñá túú sàndáá ìní ñáhá xii-í ná chindúxi tnàha meé-yu, chí ñáyiú-á<sup>n</sup> cúú-yu dàtná ñáyiú ní xíhí cuéi ndëcu-ní-yu núú ñuyúú-a, te yòhó canchicú<sup>n</sup> ñáhá-ní xii-í —càchí-gá xáha<sup>n</sup>-gǎ xii-dé.

### **Jèsús ngání-gǎ táchí ndihi ndute làgúná**

(Mr. 4:35-41; Lc. 8:22-25)

<sup>23</sup> Te sáta dúcá<sup>n</sup> te Jèsús cuánguee-gǎ bàrcú ndihi cue téee xica cuu ndihi-gá, te ní xica bàrcú-á<sup>n</sup> cuáhá<sup>n</sup>-xi. <sup>24</sup> Te ñíni ñùhu bàrcú-á<sup>n</sup> ichi cuáhá<sup>n</sup>-xi núú ndute ní xídí Jèsús, te ní ngúíta-xi níhi vìhi quene táchí, te ta nàdachitú-xi ndute xití bàrcú cuáhá<sup>n</sup>. <sup>25</sup> Te cue téee xica cuu ndihi-gá cuáhá<sup>n</sup>-güedé núú cáá-gǎ xídí-gá, te xáha<sup>n</sup>-güedë xii-gá:

—;Mèstrú, ndiquíú ìní chí dàcácu ñaha-n xii-o chí quée naa-o cuíní-xi! —càchí-güedé xáha<sup>n</sup>-güedë xii-gá.

<sup>26</sup> Te Jèsús ní xáha<sup>n</sup>-gǎ xii-güedé:

—;Ná cuëndá ndéee duca<sup>n</sup> ìo yùhú-ndó? ;Náa ñá túú sàndáá ìní ñáhá ndisa-ndo xii-í-á<sup>n</sup>? —càchí-gá xáha<sup>n</sup>-gǎ xii-güedé.

Te Jèsús ní ndacóo-gá te ní tenáá-gá táchí-á<sup>n</sup> ndihi ndute-á<sup>n</sup>, te ní ngúíñí táchí-á<sup>n</sup> te ní nucúndecu nahi-ñá ndute làgúná-á<sup>n</sup>. <sup>27</sup> Te nchaa cue téee ñùhu xití bàrcú-á<sup>n</sup> nǐ cuñùhu-güedé sá dúcá<sup>n</sup> nǐ quide-gá ní xiní-güedé, te ní xítñaha-güedé:

—;Te ná téee cùu téee-a núu duha ní cáhá<sup>n</sup>-ni-dé te ní ngúíñí táchí te ní nucúndecu nahi-ni ndüte làgúná-a-í? —càchí-güedé xítñaha-güedé.

### **Cue téee ñúú Gàdará cue téee yìhi ñaha espíritú cúndìhi yucu ñávàha**

(Mr. 5:1-20; Lc. 8:26-39)

<sup>28</sup> Te òré ní quèxio Jèsús ndàa ingá xio yuhu làgúná yucu cue téee ñúú Gàdará, te úú tnáhá cue téee quide vehe núú yíndüxi ndíyi ní quèe-güedé cuáhá<sup>n</sup>-güedé núú ndécú Jèsús, te ndi ndüü-güedé yíhí ñaha espíritú cúndìhi yucu ñávàha xii-güedé, te ìo màñá-güedé chí vá yòo tnáhí dàña-güedé yáha yatni núú ndécú-güedë. <sup>29</sup> Te cue espíritú yíhí ñaha xii-güedé-á<sup>n</sup> nǐ quide-xi níhi ní cáhá<sup>n</sup>-güedé, te xáha<sup>n</sup>-güedë xii-gá:

—;Ná cuëndá véxi-ò Jèsús Déhe Dútú Ndióxi chidáca ñáhá-n xii-ndí? ;Á<sup>n</sup> sàma véxi-n dàndoho ñaha-n xii-ndí? Te vátá sàá-gá nduu dùca<sup>n</sup> cada-n —càchí-güedé xáha<sup>n</sup>-güedë xii-gá.

<sup>30</sup> Te yatni xíá<sup>n</sup> xíxica cuu vai cuchí xíxexi-güedi. <sup>31</sup> Te cue espíritú cúndìhi yucu ñávàha yìhi ñaha xii cue téee-á<sup>n</sup> ní cáhá<sup>n</sup> ndàhú-xi núú Jèsús, te xáha<sup>n</sup>-xi:

—Te núu vá dàñá-gǎ-n quíhi-ndí yiqui cùnú cue téee-a, te càhá<sup>n</sup> ndàhú-ndí núú-n sǎ dàña-n na quíhí<sup>n</sup>-ndí quíhu-ndí yiqui cùnú nchaa cùchí-á<sup>n</sup> —càchí cue espíritú-á<sup>n</sup> xáha<sup>n</sup>-xi xii-gá.

<sup>32</sup>Te Jèsús ní xáha<sup>n</sup>-gǎ xii cue espíritú cündìhi yucu ñávàha-á<sup>n</sup>:

—Chí táquèe yiqui cuñú cue téé-á<sup>n</sup> te quíhí<sup>n</sup>-ndó nũu ndéè ichi quíhí<sup>n</sup>-ndó — cǎchí-gǎ xǎha<sup>n</sup>-gǎ xii nchaa espíritú-á<sup>n</sup>.

Te cue espíritú cündìhi yucu ñávàha-á<sup>n</sup> ní quee-xi yiqui cuñú cue téé-á<sup>n</sup>, te cuáhá<sup>n</sup>-xi cuánguihu-xi nchaa cùchí-á<sup>n</sup>. Te cue quiti-á<sup>n</sup> ní xinu-güedi duha ní quee-güedi ndàa núú dèhvá yuhu làgúná-á<sup>n</sup>, te ní ngauniñu-güedi xití ndute, te ní ndìhi-güedi ní cǎhá.

<sup>33</sup>Te cue téé xito ñaha xii nchaa cùchí-á<sup>n</sup> ní yùhú-güedé te ní xinu-güedé, te ní sǎhá<sup>n</sup>-güedé ní cani-güedé cuèndú núú cuè ñáyiu ndècu xití ñuú nchaa nàcuáa ní cuu cuèndá cue téé ní xíhi ñaha nchàa espíritú cündìhi yucu ñávàha-á<sup>n</sup>. <sup>34</sup>Te nchaa ñáyiu ñuú-á<sup>n</sup> ní quee-yu cuáhá<sup>n</sup>-yu núú ndécú Jèsús. Te òré ní quexió-yu núú ndécú-gǎ te ní cǎhá<sup>n</sup> ndàhú-yu núú-gǎ sá ná quèe-gǎ yucu ñuú-yu núhú-gǎ.

**Jèsús quidé tǎtna-gǎ ì<sup>n</sup> téé cùhú ñá cúú-gǎ candá nihnu**

(Mr. 2:1-12; Lc. 5:17-26)

**9**Te sǎtá dúcá<sup>n</sup> ní cuu te Jèsús cuánde-gǎ bàrcú cuáhá<sup>n</sup>-gǎ ní natehndé-gǎ ndàa ingá xio yuhu làgúná. Te xǎ<sup>n</sup> ní ndexió-gǎ ñuú núú quidé ñuú-gǎ. <sup>2</sup>Te xǎ<sup>n</sup> ndécú-gǎ ní quexió cue téé nchido-güedé ì<sup>n</sup> téé cùhú ñá cúú-gǎ candá nihnu ñũhu-dé xító, te Jèsús ní cutnùnì iní-gǎ sá sàndáá ndisa iní ñáhá-güedé xii-gǎ nũu ní xáha<sup>n</sup>-gǎ xii téé cùhú-á<sup>n</sup>:

—Yòhó téé cùhú vá ndìhú-gǎ iní-n, chi sa ní quide càhnu iní-í nchaa cuéchi-n — cǎchí-gǎ xǎha<sup>n</sup>-gǎ xii-dé.

<sup>3</sup>Te sá dúcá<sup>n</sup> ní cǎhá<sup>n</sup>-gǎ nũu xǎ<sup>n</sup> cue téé dàcuaha ñaha xii ñáyiu nchaa tñúhu ní chídó tñùnì ndí Moisés ní sani iní-güedé: “Téé-a cǎhá<sup>n</sup> cuèhé-dé cuèndá Yǎ Ndiöxí”, duha ní sani iní-güedé.

<sup>4</sup>Te Jèsús ní cutnùnì iní-gǎ nàcuáa sàni iní-güedé nũu ní xáha<sup>n</sup>-gǎ xii-güedé:

—¿Ná cuèndá duca<sup>n</sup> sàni cuéhé sání dùha iní-ndó? <sup>5</sup>Te sá dúhá ní xáha<sup>n</sup>-í xii téé cùhú-a sá ní quide càhnu iní-í nchaa yícá cuéchi-dé, te xǎ<sup>n</sup> nchòhó ñá túú cutnùnì iní-ndó nũu ndáá cǎhá<sup>n</sup>-í àdi ñá ndàá. Dico núu cúu-í-dé sá ndácóo-dé te caca-dé, te cutnùnì ndáá iní-ndó nũu ndáá cǎhá<sup>n</sup>-í àdi ñá ndàá, chí cundehe nũu-ndó nàcuáa cada-í. <sup>6</sup>Te vitna na càda-í nàcuáa cutnùnì iní-ndó nchàa-ndo sá yǎhú Téé cùu ñani tñáhá-ndó nchàa-ndo ndecu ndìhi-í tñúhu ndee ìní ñuyíú-a sá cáda càhnu iní-í nchaa cuéchi ñáyiu —cǎchí-gǎ xǎha<sup>n</sup>-gǎ xii-güedé.

Te sǎtá dúcá<sup>n</sup> te ní xáha<sup>n</sup>-gǎ xii téé cùhú-á<sup>n</sup>:

—Ndacóo, te ndocani-n xító ñũhu-n véxi-á<sup>n</sup> te núhú-n vèhe-n —cachí-gǎ xǎha<sup>n</sup>-gǎ xii-dé.

<sup>7</sup>Te òré-ni-á<sup>n</sup> ní ndúha téé cùhú-á<sup>n</sup> te ní ndacóo-dé te ní ndocani-dé xító ñũhu-dé ní quexió-á<sup>n</sup> te ní xica-dé cuánuhú-dé vehe-dé. <sup>8</sup>Te nchaa ñáyiu xĩndecu-á<sup>n</sup> ìo ní cuñúhu-yu sá dúcá<sup>n</sup> ní quide Jèsús ní xiní-yu, te ní cachí-yu sá ìo càhnu cuu Yǎ Ndiöxí cuèndá sá ní sǎñaha-gǎ xii Jèsús tñúhu ndee ìní cada-gǎ nchaa sá vǎ yòo tñàhì ndàcu cada.

**Jèsús cǎhá<sup>n</sup>-gǎ ì<sup>n</sup> téé nàni Mateú chitnahá ñáhá-dé xii-gǎ**

(Mr. 2:13-17; Lc. 5:27-32)

<sup>9</sup>Te Jèsús ní nucúhu<sup>n</sup> tucu-gǎ ichi cuáhá<sup>n</sup>-gǎ, te ichi ñũhu-gǎ ní xiní-gǎ núcòo ì<sup>n</sup> téé nàni Mateú quidé còbrá-dé ñáyiu chí cobràdór impuèstú cúú-dé, te ní xáha<sup>n</sup>-gǎ xii-dé:

—Màtéú, néhé chitnahá ñáhá-n xii-í —cǎchí-gǎ xǎha<sup>n</sup>-gǎ xii-dé.

Te té Màtéú-á<sup>n</sup> ní ndacuñí-dé ní chitnahá ñáhá-dé xii-gǎ.

<sup>10</sup>Te ìí<sup>n</sup> xito ndècu Jesús ìí<sup>n</sup> vehe, te yìhi-gá mèsá ndìhi cue tée xica cuu ndìhi-gá xéxí ndìhi ñaha-gá xii-güedé. Te tnàhá cue tée cuihna ìní-xi quide cobra ñáhá xii ñáyiú cuèndá impuèstú yíhí ndìhi-gá mèsá, te tnàhá tucu dava-gá cue tée ndècu ichi cuehé ichi duha yìhi ndìhi-gá mèsá. <sup>11</sup>Te sá ní xíní cue tée cùu farisèú xéxí Jèsús ndìhi nchaa cue tée-á<sup>n</sup>, te ní xícá<sup>n</sup> tnúhú-güedé núú cuè tée xica cuu ndìhi-gá, te xàha<sup>n</sup>-güedé:

—¿Ná cuèndá duca<sup>n</sup> quide tée cùu mestrú-ndó xèxi-dé ndìhi cue tée cuihna ìní-xi quide cobra ñáhá xii ñáyiú cuèndá impuèstú, ndìhi nchaa dava-gá cue tée ndècu ichi cuehé ichi duha-i? —càchí-güedé xàha<sup>n</sup>-güedé.

<sup>12-13</sup>Te Jèsús ní tecú dóho-gá nàcuáa ndùu tnúhu ní xàha<sup>n</sup>-güedé xii cue tée xica cuu ndìhi-gá, núú ní xàha<sup>n</sup>-gá xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í cáhá<sup>n</sup>-í ñáyiú cùtnuní ìní-xi sá ndécú cuèchi-xi cuèndá dàñá-yu nchaa sá cuehé sá dúhá quidé-yu, te ñá túú véxi-í cáhá<sup>n</sup>-í ñáyiú càchí sá ñá túú ndècu cuèchi-xi. Te chí cádá cuèndá váha nàcuáa cáhá<sup>n</sup> Yá Ndiöxí núú tütú-gá núú càchí-xi: “Yúhú cuèní-í sá cùndàhú ìní-ndó cuè tnaha ñáyiú-ndo, te ñá díú mèe-ni sá cáhni-ndó quiti nduu táhú-í”, duha càchí-gá núú tütú-gá —càchí Jèsús xàha<sup>n</sup>-gá xii-güedé.

**Cue tée ndècu tnúhu núú Jèsús  
cuèndá ñáyiú ñá túú tnàhí ná xéxí  
áma cáhá<sup>n</sup> ndìhí-yu Yá Ndiöxí**

(Mr. 2:18-22; Lc. 5:33-39)

<sup>14</sup>Te cue tée xica cuu ndìhi té Juáá tée dàcuandute ñaha xii ñáyiú ní sáhá<sup>n</sup>-güedé núú ndécú Jèsús, te xicá<sup>n</sup> tnúhú-güedé núú-gá, te xàha<sup>n</sup>-güedé:

—Cuèní-ndí cachí tnúhu-n ná cuèndá nchúhú, ndìhi cue tée cùu farisèú ñá túú

tnàhí ná xéxí-ndí áma cáhá<sup>n</sup> ndìhi-ndí Yá Ndiöxí, te cue tée xica cuu ndìhi-n ñá túú duca<sup>n</sup> quide-güedé —càchí-güedé xàha<sup>n</sup>-güedé xii-gá.

<sup>15</sup>Te Jèsús ní xàha<sup>n</sup>-gá xii-güedé:

—Nchòhó xini-ndó sá vā cùú cùñaha-o xii ñáyiú ñùhu vico tnándaha sá vā cùú càxí-yu nini ndècu ndìhi ñaha tée tnándaha xii-yu, dico sáá nduu vā cùndècu ndìhi ñaha-gá tée tnándaha-á<sup>n</sup> xii-yu, te dàv-á<sup>n</sup> te cahni ìní-yu vā caxí-yu cuèndá sá ndìhú ìní-yu.

<sup>16</sup>Te ni vā yō dāndée luha dóó sáá ìí<sup>n</sup> dóó sa ní cuu tùhú víhí, chi dóó sáá-á<sup>n</sup> nāndiyi-xi te uu<sup>n</sup>-gá ndata-xi dōó sá ní cuu tùhú-á<sup>n</sup>. <sup>17</sup>Te ni vā yō chihhi ndidí sáá xití ìí<sup>n</sup> lamba sa ní cuu tùhú víhí, chi núú yoo duca<sup>n</sup> na càda te ndava lamba sa ní cuu tùhú-á<sup>n</sup> chi ío níhi yóco ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup> te núú duca<sup>n</sup> na càdá-yu, núú xíá<sup>n</sup> xíní ñùhu-xi quée ndidí sáá-á<sup>n</sup> xití ìí<sup>n</sup> lamba saa cuèndá duca<sup>n</sup> ñá túú ná cuu cováha-xi —càchí-gá xàha<sup>n</sup>-gá xii-güedé.

**Cuèndá déhe yoco té Jàirú ndìhi  
cuèndá ìí<sup>n</sup> ñaha ní tnāndéé dóó Jèsús**

(Mr. 5:21-43; Lc. 8:40-56)

<sup>18</sup>Te cáhá<sup>n</sup> dúcá<sup>n</sup>-ní Jèsús ní quexio ìí<sup>n</sup> tée cùnūú núú ndécú-gá, ìí<sup>n</sup> tée tàxi tnuní veñúhu, te ní ngüññí xítí-dé núú-gá cáhá<sup>n</sup> ndàhú-dé, te xàha<sup>n</sup>-dè xii-gá:

—Véxi-í cáhá<sup>n</sup> ndàhú-í núú-n nūu vā cùndèe ìní-n quíhí<sup>n</sup>-ó vèhe-í dandòto-n déhe yoco-í chi ní xíhí-xi tnàvíí, te yúhú cùtnuní ìní-í sá nūu quíhí<sup>n</sup>-n tēndaha-n yiqui cuñú-xi te ndoto-xi —càchí-dé xàha<sup>n</sup>-dè xii-gá.

<sup>19</sup>Te Jèsús ní xica-gá cuáhá<sup>n</sup>-gá ndìhi-dé ndìhi cue tée xica cuu ndìhi-gá.

<sup>20</sup>Te ichi ñùhu-gá cuáhá<sup>n</sup>-gá ní sáhá<sup>n</sup> ìí<sup>n</sup> ñadìhí ní tnāndéé-a<sup>n</sup> yuhu dōó-gá ndàa sātá-gá, te ñaha-á<sup>n</sup> sa ní cuu úxúú cuíá sá cùhú-a<sup>n</sup> ngòyo ñaha ññí xii-a<sup>n</sup>.

<sup>21</sup>Te duca<sup>n</sup> ní quide-a<sup>n</sup> chi ní sani ìní-a<sup>n</sup> sá nūu ndacu-a<sup>n</sup> tnāndéé-a<sup>n</sup> cuèdicó

luha yuhu döó Jèsús te ndúha-a<sup>n</sup> ní sani iní-a<sup>n</sup>. <sup>22</sup> Te Jèsús ní nchócótó-gã ndàa sátá-gã te ní xiní-gã ñadìhí-á<sup>n</sup>, te ní xáha<sup>n</sup>-gã:

—Yòhó ñaha cùhú, vá ndìhú-gá iní-n vitna chi sa ní ndúha-n, chi ní sándáá iní ñáhá-n xii-í —càchí-gá xáha<sup>n</sup>-gã xii-a<sup>n</sup>.

Te òré-ni-á<sup>n</sup> nĩ ndúha ñaha cùhú-á<sup>n</sup>.

<sup>23</sup> Te òré ní quexìo Jèsús vehe tée cùnuu taxi tnuí veñúhu-á<sup>n</sup>, te ní xiní-gã xindáhi víhí ñáyiú, te xindecu mūsicú.

<sup>24</sup> Te ní xáha<sup>n</sup>-gã xii-yu:

—Chí táquèe xití vehe-a, chi xíchí-a ñá túú ní xíhí-xi chi dìcò xidí-xi —càchí-gá xáha<sup>n</sup>-gã xii-yu.

Te ní sácú ndeé ñáhà-yu xii-gá sá dúcá<sup>n</sup> nĩ cáhá<sup>n</sup>-gá, chi sá cúú-xi mèé-yu te ní xíhí ndisa xíchí-á<sup>n</sup>. <sup>25</sup> Te ñáyiú-á<sup>n</sup> nĩ queé-yu te cuánguihu Jèsús núú cándòdo xíchí nĩ xíhí-á<sup>n</sup>, te ní tnií-gá ndaha-xi te òré-ni-á<sup>n</sup> nĩ ndacóo-xi. <sup>26</sup> Te nchaa ñuú cáá yàtni xía<sup>n</sup> nĩ níhí ñáyiú tñúhu ñacuáa ní quide Jèsús.

### **Jèsús quidé tãtna-gá núú úú tnàhá cue tée cuàá**

<sup>27</sup> Te sátá dúcá<sup>n</sup> nĩ cuu te ní xica Jèsús cuánuhú-gá, te ichi ñúhu-gá ní chinchícú<sup>n</sup> ñáhá úú tnàhá cue tée cuàá xii-gá, te níhí càhá<sup>n</sup>-güedé, te xáha<sup>n</sup>-güedé xii-gá:

—Yòhó Jèsús, tée cùu ñaní tnàhá ndíi Dàvíí, cundàhú iní ñáhá xii-ndí —càchí-güedé xáha<sup>n</sup>-güedé xii-gá.

<sup>28</sup> Te òré ní nasáá Jèsús núú quidé vehe-gá, te cue tée cuàá-á<sup>n</sup> nĩ quexìo-güedé ndeé núú-gã, te ní xicá<sup>n</sup> tñúhú-gã núú-güedé, te xáha<sup>n</sup>-gã:

—¿Sándáá iní-ndó sã yùhú ndacu-í cada tãtna-í núú-ndó-á<sup>n</sup>? —càchí-gá xáha<sup>n</sup>-gã xii-güedé.

Te ní xáha<sup>n</sup>-güedé xii-gá:

—Sándáá iní-ndí sá díú yòhó Jèsús ndacu-n càda tãtna-n núú-ndí —càchí-güedé xáha<sup>n</sup>-güedé xii-gá.

<sup>29</sup> Te Jèsús ní dácàá-gá ndaha-gá ní tendaha-gã núú-güedé, te ní xáha<sup>n</sup>-gã xii-güedé:

—Te vitna, ndúha núú-ndó chi ní sándáá iní-ndó sã díú yùhú ndacu-í cada tãtna-í núú-ndó —càchí-gá xáha<sup>n</sup>-gã xii-güedé.

<sup>30</sup> Te òré-ni-á<sup>n</sup> nĩ ndúha núú-güedé, te Jèsús ní cáhá<sup>n</sup> víhí-gã dóho-güedé cuendá sá vã càhá<sup>n</sup>-güedé ñacuáa ní cuu ní ndúha núú-güedé.

<sup>31</sup> Te cue téé-á<sup>n</sup> òré ní ndee-güedé núú ndécú Jèsús, te ní ngúíta-ni-güedé ní cani-güedé cuendú núú ñáyiú ñacuáa ní quide ñaha-gã xii-güedé. Te nchaa dava-gá ñuú cáá yàtni xía<sup>n</sup> nĩ sáhá<sup>n</sup>-güedé ní cani-güedé cuendú núú ñáyiú ñacuáa ní quide ñaha Jèsús xii-güedé.

### **Jèsús quidé tãtna-gá ìì<sup>n</sup> téé ñìhí**

<sup>32</sup> Te íchí nĩ ndee cue téé ní ndúha núú-xi-á<sup>n</sup> núú ndécú Jèsús, te ní quexìo ìì<sup>n</sup> úú ñáyiú ndécá-yu ìì<sup>n</sup> téé ñìhí yíhí ñàha espíritú cündìhi yucu ñávàha. <sup>33</sup> Te Jèsús ní queñuhu-gá espíritú cündìhi yucu ñávàha yíhí ñaha xii téé-á<sup>n</sup>, te òré-ni-á<sup>n</sup> nĩ cuu ní nacáhá<sup>n</sup>-dé. Te nchaa ñáyiú xindecu-á<sup>n</sup> ìo ní cuñúhu-yu, te ní xitnàhá-yu:

—Ñá túú tnàhí xini-ó ìì<sup>n</sup> téé duha cada ñuú nchoo cuè ñáyiú isràél ní cùu —cachí-yu xitnàhá-yu.

<sup>34</sup> Te cue téé cùu fariséú ní ngúíta-güedé xitnàha-güedé:

—Tée-a chi sácúíhná chindèe ñaha-xi xii-dé queñuhu-dé nchaa espíritú yíhí ñàha xii ñáyiú te ñuú-ni sácúíhná-á<sup>n</sup> táxí tñuní-xi nchaa espíritú-á<sup>n</sup> —càchí-güedé xitnàha-güedé.

### **Jèsús cündàhú iní-gá ñáyiú**

<sup>35</sup> Te Jèsús cuáhá<sup>n</sup>-gá nchaa ñuú náhnú ndìhi nchaa ñuú líhli, te ndí tnàhá ìì<sup>n</sup> ìì<sup>n</sup> ñuú sàá-gá te duca<sup>n</sup> cuánguihu-gá ìì<sup>n</sup> ìì<sup>n</sup> veñúhu càa nchaa



ñuú-á<sup>n</sup> dánèhé-gá ñáyiú tnúhu váha, tnúhu sá sánú ichi ñaha xí-yu nàcuáa ndíhu ndaha ñaha Yá Ndióxi xí-yu. Te duca<sup>n</sup>-ni ta quide tátna-gá nchaa ñáyiú cùhú cuáhá<sup>n</sup> cuéi ndi díf<sup>n</sup> ndi díf<sup>n</sup> núú cuéhé tnàhá-yu ìi<sup>n</sup> ìf<sup>n</sup>-yu. <sup>36</sup>Te sá ní xiní Jèsús sá ïo vai ñáyiú nchicú<sup>n</sup> ñáhá xii-gá, te ní cundáhú iní ñáhá-gá xí-yu chi ïo ndíhú iní-yu, te vá yòo nèhe cuendá ñáhá xí-yu, te cùu-yu dàtná cue mbéé cue quiti ñá túú tòli-xi. <sup>37</sup>Te Jèsús ní xáha<sup>n</sup>-gá xii cue tée xica cuu ndihi-gá:

—Nchòhó xiní-ndó sá òré ná sàá nduu cùu nchaa sá xítú ñáyiú te ïo vai cuu. Te na càchí tnúhu ndáá-í xii-ndo sá dàtná ïo vai sá xítú ñáyiú cùu, duca<sup>n</sup> ïo vai ñáyiú cùmání cundedóho tnúhu-í, te ïo sacú ñáyiú dàcuaha ñaha xí-yu. <sup>38</sup>Núu xíá<sup>n</sup> xiní ñùhu-xi cacadá<sup>n</sup>-ndó núú Yá Ndióxi Yaá cúú Xítoho-ndó ndíhí-yu cuendá sá ná dàcahá<sup>n</sup>-gá iní-yu cáhá<sup>n</sup>-yu tnúhu-gá núú nchàa dava-gá tnàha ñáyiú-yu cùmání cundedóho tnúhu-gá —càchí-gá xáha<sup>n</sup>-gá xii-güedé.

**Jèsús sáñaha-gá tnúhu ndee iní xii ndi ùxúú cue tée xica cuu ndihi-gá**

(Mr. 3:13-19; Lc. 6:12-16)

**10** Te Jèsús ní cana-gá ndi ùxúú cue tée xica cuu ndihi-gá, te ní sáñaha-gá xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cündíhi yucu ñávàha yìhi ñaha xii ñáyiú, ndihi cuendá sá cadá tátna-güedé nchaa dava-gá ñáyiú cùhú cuéi nándi núú cuéhé tnàhá-yu.

<sup>2</sup>Te duha xínani ndi ùxúú cue tée-á<sup>n</sup>: tée cùnuu-gá nání-dě Xímú, àdi Pelú chi úú òu-dé, te ñaní-dé cúú tē Ndríxí, te tnàhá tée-á<sup>n</sup> cúú-dě tée xica cuu ndihi Jèsús, ndihi té Jàcobó ndihi ñaní té Jàcobó-á<sup>n</sup> tēe nani Juaá, te ndi ndúú cue tée-á<sup>n</sup> cúú-güedé déhe té Zebèdeú. <sup>3</sup>Te tnàhá té Lipé xíca cùu ndihi-gá, ndihi té Bartolomé, ndihi té Mǎxí, ndihi té Mǎteú

tée cùu cobradór impuèstú ní cùu, ndihi té Jàcobó déhe té Àlfeú, ndihi té Lèbeú tée dānani-güedé Tàdeú, <sup>4</sup>ndihi té Xímú tée ní cündíhi cue tée canānistá, ndihi té Júdás Iscarioté tée ní sáá nduu ní sáha cuendá ñáhá xii Jèsús núú cué tée cùu úhú iní ñáhá xii-gá.

**Jèsús téndàha-gá ndi ùxúú cue tée xica cuu ndihi-gá quíhí<sup>n</sup>-güedé cáhá<sup>n</sup>-güedé tnúhu-gá núú ñáyiú**

(Mr. 6:7-13; Lc. 9:1-6)

<sup>5-6</sup>Te Jèsús ní xáha<sup>n</sup>-gá xii ndi ùxúú cue tée xica cuu ndihi-gá sá quíhí<sup>n</sup>-güedé cáhá<sup>n</sup>-güedé tnúhu-gá núú ñáyiú, te cùmání-gá caca-güedé quíhí<sup>n</sup>-güedé, te ní xáha<sup>n</sup>-gá xii-güedé:

—Na càchí tnúhu-í xii-ndo sá mée-ní ñùú núú xindecu cue ñáyiú isràél quíhí<sup>n</sup>-ndó cáhá<sup>n</sup>-ndó tnúhu-í, te vá quíhí<sup>n</sup>-ndó ni ìi<sup>n</sup> ñuú yíndèhu distritú Sà-mariá, te ni vá quíhí<sup>n</sup>-ndó dàva-gá ñuú núú xindecu ñáyiú ñá túú cùu ñáyiú isràél. Te cue ñáyiú isràél-á<sup>n</sup> cúu-yu dàtná cue mbéé cue quiti ní xíta chi ta xíta nihnú-yu cuáhá<sup>n</sup>. <sup>7</sup>Te cúnaha-ndo xí-yu sá sà ní cuyatni nduu ndíhu ndaha ñaha Yá Ndióxi xí-yu. <sup>8</sup>Te cada tátna-ndo nchàa ñáyiú cùhú cuéi ñáyiú tnàhá cuéhé sá dátèhyú nihnu-xi yiqui cùñú-yu, te queñuhu-ndo nchàa espíritú cündíhi yucu ñávàha yìhi ñaha xii ñáyiú, te dandòto-ndo cue ñáyiú sa ní xíhí, te vá càcá<sup>n</sup>-ndó yáhu-ndo núú ñáyiú òré cada-ndo nchàa chiu<sup>n</sup>-á<sup>n</sup>, chi sa nàha-ndo sá dicó duca<sup>n</sup> ní taxi-í tnúhu ndee iní ndécú ndihi-ndo.

<sup>9</sup>Te vá cánèhe-ndo díhú<sup>n</sup> cuu ichi-ndo, <sup>10</sup>te ni vá cánèhe-ndo ñunu cuhu<sup>n</sup> ndachiu<sup>n</sup>-ndo, te ni vá cánèhe-ndo ingá ichi dóó-ndó nādāma-ndo, te ni vá cánèhe-ndo úú-gá chàu-ndó chi òu-ni chàu yíhí-ndó-á<sup>n</sup> xíá<sup>n</sup>-ni quíhí-ndo, te ni vá cánèhe-ndo tatnu, te duca<sup>n</sup> càda-ndo chi nchòhó sa nàha-ndo sá ncháá ñáyiú quide chiu<sup>n</sup> te

diu-ni cuendá chiú<sup>n</sup> quidé-yu nihí-yu sá xéxi-yu.

<sup>11</sup>Te ndi tnahá ñuú ná quèxio-ndo te nducu-ndo ñáyi cuñnumí iní-ndó sá cúu-yu ñáyi váha, te vehe ñáyi-á<sup>n</sup> cundecu-ndo ndéé sáá nduu ndèe-ndo ñuú-á<sup>n</sup>. <sup>12</sup>Te òré quexio-ndo vehé-yu te cúñaha-ndo xii-yu: “Yá Ndióxi chindèe chitúu ñaha-gá xii-ndo ndècu-ndo”, duha cúñaha-ndo xii-yu. <sup>13</sup>Te núu ní cáhá<sup>n</sup> váha ndihi ñáhá-yu xii-ndo, te cuu-xi sá váha sá cúu-xi-yu cuendá tnúhu ní xáha<sup>n</sup>-ndo-á<sup>n</sup>, dico núu ñá túú ní càhá<sup>n</sup> váha ndihi ñáhá-yu xii-ndo, te cúñaha-ndo xii-yu sá vǎ cúu-xi sǎ váha xii-yu tnúhu ní xáha<sup>n</sup>-ndo-á<sup>n</sup>. <sup>14</sup>Te núu ní sáá-ndó ìi<sup>n</sup> ñuú àdi ìi<sup>n</sup> vehe, te núu ñá túú ní cáhá<sup>n</sup> ndihi ñaha váha-yu xii-ndo te ni ñà túú ní cuini-yu cundedóho-yu tnúhu càhá<sup>n</sup>-ndó te ndee-ndo ñuú-á<sup>n</sup> àdi vehe-á<sup>n</sup>, te naquidi-ndo tíca chúhmá ní tníi sáhá-ndó cuendá ná cùtnuní iní-yu sá ñà túú quide váha-yu. <sup>15</sup>Te na càchí tnúhu ndáá-í xii-ndo sǎ sǎá nduu te ío-gá dandóho ñaha Yá Ndióxi xii ñáyi duca<sup>n</sup> na càda ñaha xii-ndo-á<sup>n</sup> dàcúúxi ñáyi ní xindecu ñuú Sòdomá ndihi ñuú Gòmorrá.

### Ndoho tnahá-ó cundecu-o ichi Xítoho Jesucristú

<sup>16</sup>Te cada iní-ndó sǎ cúu-ndó dàtná cue mbéé cue quití cuáhá<sup>n</sup> núú ío yíhí. Te duca<sup>n</sup> sǎtnahá-xi cùu-ndo chi yúhú tendaha ñaha-í xii-ndo quíhí<sup>n</sup>-ndó núú xindecu cue ñáyi cuihna iní-xi, te ío váha cuáha-ndo cuendá nàcuáa cada-ndo dàtná quidé cǒó, dico cundu váha iní-ndó ñà túú nǎ cada-ndo dàtná quidé lõmá. <sup>17</sup>Te quíhí iní-ndó chi cue ñáyi na cùu úhú iní ñáhá xii-ndo, te cuáha cuendá ñáhá-yu xii-ndo núú cuè téé cùchiu<sup>n</sup>, te caniha-güedé xii-ndo xití veúhu-güedé. <sup>18</sup>Te dava tucu ñáyi cuu úhú iní ñáhá xii-ndo candeca ñáhá-yu xii-ndo quíhí<sup>n</sup> núú

cuè téé cùnuu yindaha nació<sup>n</sup>, àdi núú dàva-gá cue téé cùnuu sá cuendá-í. Te nchòhó nihí-ndó nàcuáa cada-ndo cáhá<sup>n</sup> váha-ndo cuendá-í núú-güedé ndihi núú cuè ñáyi ñá túú cùu ñáyi isràèl. <sup>19-20</sup>Dico òré cuáha cuendá ñáhá-yu xii-ndo núú nchàa cue téé-á<sup>n</sup>, te vǎ cání iní-ndó núu nása cunduu tnúhu cáhá<sup>n</sup>-ndó núú-güedé, chi òré-nǎ te nihí-ndó tnúhu cáhá<sup>n</sup>-ndó. Te ñá díú mèe-ndo cahu iní-ndó tnúhu cáhá<sup>n</sup>-ndó, chi mee Espiritú Yá Ndióxi Yáa cúu Tǎtǎ-ndó dàcahú iní ñáhá-xi xii-ndo nàcuáa cunduu tnúhu cáhá<sup>n</sup>-ndó.

<sup>21</sup>Te dava cue téé cuáha cuendá-güedé ñaní-güedé núú cuè téé cùchiu<sup>n</sup> cuendá cahni ñaha-güedé, te dava cue téé cùu tǎtǎ diu-ni duca<sup>n</sup> càda-güedé déhe-güedé, te diu-ni duca<sup>n</sup> càda ñaha dava cue ñáyi cùu déhe xii tǎtǎ-yu ndihi nǎnǎ-yu, chi cuáha cuendá ñáhá-yu núú cuè téé cùchiu<sup>n</sup> cuendá cahni ñaha-güedé xii-yu. <sup>22</sup>Te nchòhó chi nchaa ñáyi nguíta-yu cuu úhú iní ñáhá-yu xii-ndo sǎ cuendá-í. Te núu na càda ndee-ni iní-ndó càncicú<sup>n</sup> nihnu-ni-ndo ìchi-í cuèi nándi sá ná càda ñáhá-yu xii-ndo ndéé ná sǎá nduu vǎ cundècu-gá-ndó ñuyíú-a ña, te nduu tǎhú-ndó cundecu-ndo ni caa ni quíhí<sup>n</sup> ndihi Yá Ndióxi. <sup>23</sup>Te núu ìi<sup>n</sup> ñuú cuini-güedé tni ñaha-güedé xii-ndo càda úhú ñáhá-güedé sǎ cuendá-í, te cunu-ndo núú-güedé quíhí<sup>n</sup>-ndó ìngá ñuú. Te na càchí tnúhu ndáá-í xii-ndo sǎ cùmání-gǎ quíhí<sup>n</sup>-ndó nchàa dava-gá ñuú núú xindecu ñáyi isràèl cáhá<sup>n</sup>-ndó tnúhu-í, te sa quixi tucu yúhú, Téé cùu ñaní tnahá-ndó nchàa-ndo ñuyíú-a.

<sup>24-25</sup>Te nchòhó xini-ndó sǎ ni ìi<sup>n</sup> téé dàcuaha ñá túú cùnuu-dé dàcúúxi mèstrú-dé, te núu mèstrú téé-á<sup>n</sup> nándi yǎha-dé ndécú-dé te tàú-dé nduu vétú iní-dé te núu tnahá-dé yǎha-dé dàtná yǎha mèstrú-dé-á<sup>n</sup>. Te diu-ni duca<sup>n</sup> sǎtnahá tucu-xi cùu ìi<sup>n</sup> téé xinu cuechi, chi

ñá túú cùnuu-dé dàcúxí pàtróó<sup>n</sup>-dě, te nchaa sá yăha pàtróó<sup>n</sup>-dě-án te tàù-dé nduu vétú iní-dé te núu tnàhá-dé yăha-dé dàtná yăha pàtróó<sup>n</sup>-dě-án. Te núu yúhú Yaá táxí tnùnì ñàhá xii-ndo cachí-yu sá cùu-í sácufhná, te uu<sup>n</sup>-gá duca<sup>n</sup> cùñàhá-yu xii nchòhó cue tée cùndihí-í.

**Vá yùhú-ó cuendá nchaa  
sá cadá ñàha ñáyiu xii-o**

(Lc. 12:2-7)

<sup>26</sup> Te nchòhó vá yùhú-ndó núú ñáyiu. Chi nchaa tnúhu sá cúú yùhu ni cuu vá cúú yùhu-gá, chi nchaa dacuití sá quée túu-xi núú ñáyiu. <sup>27</sup> Te nchaa tnúhu sá càchí tnúhu-í xii-ndo núú méé núú íí<sup>n</sup>-ó, cùu-xi tnúhu sá ndúú yùhu ni cuu datúu-ndo núú cuè ñáyiu cuèi núú chítú núú tàcá. <sup>28</sup> Te xini ñuhu-xi sá vǎ yùhú-ndó cuè ñáyiu cuèi na càhni ñahá-yu xii-ndo, chi diu-ni yiqui cùñú-ndó ndàcú-yu cahní-yu, dico ñá túú nǎgá ndacú-yu cada ñàhá-yu xii-ndo. Te tàù-ndó sǎ Yǎ Ndiòxí yùhú-ndó chi Yaá-á<sup>n</sup> ndacu-gá danàa-gá yiqui cùñú-ndó, te ndacu-gá daquihí<sup>n</sup> ñàhá-gǎ xii-ndo núú ùhú núú ndàhú.

<sup>29</sup> Te nchòhó xini-ndó sǎ ndéé úú tnàhá tǎlaá cùyǎhu-dí núú íí<sup>n</sup>-ní díhú<sup>n</sup>, te ni íí<sup>n</sup>-dí ñá túú xihí cùtexínu-dí chi ndéé núu mee Yǎ Ndiòxí Yaá cúú Tǎtá-ndó ná càchí-gá te xihí-dí. <sup>30</sup> Dico nchòhó chi ío-gá néhé cuendá ñàhá Yǎ Ndiòxí xii-ndo chi ndéé idi díquí-ndó yindehu. <sup>31</sup> Núu xǎ<sup>n</sup> càchí-í sá vǎ yùhú-ndó chi cùnuu-gá-ndó dàcúxí tǎlaá cuèi vǎi vihi-güedi.

**Nchaa ñáyiu datúu  
núú tnàha ñáyiu-xi sá ndécú  
ndihí-yu Xítóhó Jesucristú**

(Lc. 12:8-9)

<sup>32</sup> Te na càchí tnúhu-í xii-ndo sǎ ncháá ñáyiu na datúu núú tnàha

ñáyiu-xi sá ndécú ndihí ñahá-yu xii-í, te duca<sup>n</sup> te tnàhá yúhú datúu-í núú Tǎtá-í Dútú Ndiòxí Yaá ndécú àndiu sá ndécú ndihí-í-yu. <sup>33</sup> Dico nchaa ñáyiu na cùñaha xii tnaha ñáyiu-xi sá ñà túú ndècu ndihí ñahá-yu xii-í, te diu-ni duca<sup>n</sup> càda yúhú tucu chi cùñaha-í xii Tǎtá-í Dútú Ndiòxí Yaá ndécú àndiu sá ñà túú ndècu ndihí-í-yu.

**Ñá túú cùu íí<sup>n</sup>nuu ñáyiu**

(Lc. 12:51-53; 14:26-27)

<sup>34</sup> Te na càchí tnúhu-í xii-ndo sǎ vǎ cání iní-ndó sǎ yùhú véxi-í ñuyíu-a te cuu íí<sup>n</sup>nuu-gǎ ñáyiu cundecú-yu, chi da ngüita-yu vá cúú íí<sup>n</sup>nuu-gá-yu cundecú-yu, te duca<sup>n</sup> chi nchaa ñáyiu vá quindáá iní ñàhá xii-í ñáyiu-á<sup>n</sup> ngóo-yu cuu úhú iní-yu nchaa ñáyiu quindáá iní ñàhá xii-í. <sup>35</sup> Te dava cue tée xǎndecu tǎtá-xi te ngóo-güedé cuu úhú iní-güedé tǎtá-güedé, te diu-ni duca<sup>n</sup> càda cue ñáyiu dǎhí xǎndecu nǎná-xi, chi ngóo-yu cuu úhú iní-yu nǎná-yu, te diu-ni duca<sup>n</sup> càda tucu cue ñáyiu cùu sǎnu, chi ngóo-yu cuu úhú iní-yu nǎná yí-yu. <sup>36</sup> Te ndí mèé-yu vehé-yu ngóo-yu vá cúú íí<sup>n</sup>nuu-gá-yu cundecú-yu.

<sup>37</sup> Te na càchí tnúhu tucu-í xii-ndo sǎ ncháá ñáyiu ío-gá ná cùu iní tǎtá-xi àdi nǎná-xi dàcúxí yùhú, te ñáyiu-á<sup>n</sup> ñà túú tàù-yu cundecu ndihí ñàhá-yu xii-í, te nchaa ñáyiu ío-gá ná cùu iní déhe ducu<sup>n</sup>-xi, àdi déhe yoco-xi dàcúxí yùhú, te diu-ni duca<sup>n</sup> ñà túú tàù-yu cundecu ndihí ñàhá-yu xii-í. <sup>38</sup> Te nchaa ñáyiu vá cǎnchícú<sup>n</sup> nihnu ñaha xii-í cuendá sá yùhú-yu ndohó-yu dàtná ndohó-í ñáyiu-á<sup>n</sup> ñà túú tàù-yu cundecu ndihí ñàhá-yu xii-í. <sup>39</sup> Te cue ñáyiu na yùhú cuú sá cuendá-í te ñáyiu-á<sup>n</sup> cuíta nihnú-yu, dico nchaa ñáyiu vá yùhú cuú sá cuendá-í, te ñáyiu-á<sup>n</sup> nduu táhú-yu cundecú-yu ni caa ni quíhí<sup>n</sup> ndihí Yǎ Ndiòxí.



Tendaha-ĩ ĩĩ<sup>n</sup> tée cáhá<sup>n</sup>-dé tnúhu-ĩ codonũu-dé núu-n, cuendá datúha-dé ñáyiũ cuendá quíndáá iní-yũ tnúhu-n.

Duha ní xáha<sup>n</sup>-gã, te duca<sup>n</sup> nĩ ngódó tnũní núu tũtũ-gá. <sup>11</sup> Te na cãchĩ tnúhu ndáá-ĩ xii-ndo sã nĩ ĩĩ<sup>n</sup> cue tée ñuyú-a ñá túu cũnuu-güedé dàtná cúnũu té Juáá tée dàcuandute ñaha xii ñáyiũ. Te nchaa ñáyiũ sa ta ndĩhu ndaha ñaha Yá Ndiõxĩ vitna cuáhã<sup>n</sup> cúnũu-gá-ni tucú-yũ dàcũxĩ tẽ Juáá cuẽi cũu-yũ ñáyiũ ñá túu cũnuu dàcũxĩ dàva-gá ñáyiũ yĩndaha-gá.

<sup>12</sup> Te ndéé cutnãhá ní ngũíta té Juáá tée dàcuandute ñaha xii ñáyiũ cáhá<sup>n</sup>-dé tnúhu Yá Ndiõxĩ ñuyú-a, ndéé dàvã-ã<sup>n</sup> nĩ ngũíta ñáyiũ cuĩnĩ-yũ sã ndĩhu ndaha ñaha Yá Ndiõxĩ xĩ-yũ te ndũcu ndeé-yũ quidẽ-yũ ñacuáa ndĩhu ndaha ñaha-gá xĩ-yũ. <sup>13</sup> Te nchaa cue tée ní xóo cáhá<sup>n</sup> tnúhu Yá Ndiõxĩ ndéé sanaha nĩ cáhá<sup>n</sup>-güedé sã díu-gã ndĩhu ndaha-gã cue ñáyiũ, te ñũ-ni duca<sup>n</sup> nĩ cáhá<sup>n</sup> tucu ndĩi Moisés ní ngódó tnũní núu tũtũ ndĩi. Te ñũ-ni duca<sup>n</sup> cũnuu nchaa tnúhu-ã<sup>n</sup> cáhá<sup>n</sup>-xi ñacuáa ndĩhu ndaha Yá Ndiõxĩ ñáyiũ ndéé ní sáá nduu nĩ ngũíta té Juáá cáhá<sup>n</sup>-dé tnúhu-gá ñuyú-a. <sup>14</sup> Te na cãchĩ tnúhu-ĩ xii-ndo sã cádá cuendã-ndó, chi núu tũtũ Yá Ndiõxĩ cãchĩ-xi sã ndĩxĩ tẽ Èliás, te ñũ núu tẽ Èliás-ã<sup>n</sup> nĩ quide té Juáá. <sup>15</sup> Te nchaa nchõhõ ñáyiũ ndedõho nchaa tnúhu cáhá<sup>n</sup>-ĩ-a te ío váha chí cuãha cuendã.

<sup>16</sup> Te na cãchĩ tnúhu tucu-ĩ xii-ndo ñacuáa sãtnahã-xi cũu ñáyiũ ndẽcu vitna. Chi ñáyiũ-ã<sup>n</sup> cũu-yũ dàtná cue landú sãcõo núu yãhu dàdiquĩ-güexi te nĩhi cáhá<sup>n</sup>-güexi, te xĩtnãha-güexi ndi mee landú-güexi: <sup>17</sup> “Nĩ tũ-ndĩ yã ndĩhi vĩlu te ñá túu ní cuĩnĩ-ndó càta-ndo. Te ío yica iní ní xita yuhu-ndĩ te ñá túu ní ndãhyú-ndó”, cãchĩ-güexi xĩtnãha-güexi. Te duca<sup>n</sup> sãtnahã-xi cũu ñáyiũ ndẽcu vitna, <sup>18</sup> chi té Juáá ío

ndãhũ ní xóo caxi-dé, te ni ñã túu ní xóo coho-dé ndudĩ ndéhé yoho yãha stilé sã sã ní nduu-xi ndidĩ, te sã dúcã<sup>n</sup> nĩ xóo cada-dé te ní cachĩ-yũ sã nĩ xĩndecu ndihĩ-dé espíritú cũndĩhi yucu ñãvãha. <sup>19</sup> Te sãtã nĩ quexio yúhũ Tée cũu ñanĩ tnãhá-ndó nchãa-ndo, te xèxi-ĩ xihĩ-ĩ quidẽ-ĩ, te cãchĩ-yũ sã yúhũ cũu-ĩ ĩĩ<sup>n</sup> tée xèxi vihi te xihĩ vihi, te cãchĩ tucú-yũ sã cũu-ĩ tée xica cuu ndihĩ cue tée cuihna iní-xi quide cobrá ñãhá xĩ-yũ cuendã impuestú ndihĩ nchaa dava-gã cue tée ndẽcu ichi cuehé ichi duha, duha cãchĩ-yũ. Te ñáyiũ ní tnãhá tnúhu ndihĩ Yá Ndiõxĩ, ñáyiũ-ã<sup>n</sup> quidẽ-yũ sã vãha ñacuáa cutnũní sã mée-gã ío ndẽcu ndihĩ-gã sã xĩnĩ tnũnĩ-gã —cãchĩ-gã xãha<sup>n</sup>-gã xĩ-yũ.

### **Cuendã ñáyiũ dava ñũú ñã túu sãndãá iní tnúhu Xĩtohõ Jesucristú**

*(Lc. 10:13-15)*

<sup>20</sup> Te Jèsús ní ngũíta-gã cáhá<sup>n</sup>-gã dóho nchaa ñáyiũ ñũú núu ío-gã vãi núu sã vã yõo tnãhĩ ndãcu cada ní quide-gã, chi nchaa ñáyiũ ñũú-ã<sup>n</sup> ñã túu cuĩnĩ-yũ ndixi túu iní-yũ sã ñã túu quide váha-yũ ndẽcũ-yũ, te xãha<sup>n</sup>-gã xĩ-yũ:

<sup>21</sup> —¡Ndãhũ nchõhõ cue ñáyiũ ñũú Corazín! ¡Te ndãhũ nchõhõ cue ñáyiũ ñũú Betsaidá! Chi núu dicó ñũú Tĩrũ ndihĩ ñũú Sidón ní quide-ĩ nchaa sã vã yõo tnãhĩ ndãcu cada datná ní quide-ĩ ñũú-ndó-ã nĩ xĩnĩ-ndó ñã, te sã ndéé ama-gã cuihnũ-yũ dóo ndãhũ te cunu cóo-yũ núu yãã cuendã sã ndĩxĩ cuẽchi iní-yũ sã ñã túu quide váha-yũ ni cũu. <sup>22</sup> Dico sáá nduu te ío-gã dandõho ñaha Yá Ndiõxĩ xii-ndo dàcũxĩ ñáyiũ ñũú Tĩrũ ndihĩ ñáyiũ ñũú Sidón. <sup>23</sup> Te nchõhõ cue ñáyiũ ñũú Capernaúm ío quide cahnu-ndo mee-ndo, te quide iní-ndó sã sã cuãndaa-nã-ndó àndũ, dico ñãhá chi núu ùhũ núu ndãhũ nduu táhũ-ndó cũndecu-ndo. Te núu dicó ñũú Sõdomã ní quide-ĩ nchaa sã vã yõo tnãhĩ

ndàcu cada datná ní quide-í ñuú-ndó nǐ xiní-ndó ñá, te ñáyiu-á<sup>n</sup> vǎ náǎ-yu chi cundecu-ní-yu ndéé vitna ni cùu. <sup>24</sup>Te na càchí tnúhu-í xii-ndo sǎ sàá nduu te ío-gá dandòho ñaha Yá Ndiöxí xii-ndo dàcúxí ñáyiu ñuú Sòdomá —càchí-gá xǎha<sup>n</sup>-gǎ xii nchaa ñáyiu ñuú-á<sup>n</sup>.

**Jèsús cuiní-gá sá túhá ñàha ñáyiu xii-gá**

(Lc. 10:21-22)

<sup>25</sup>Te sáta xǎ<sup>n</sup> te Jèsús ní ngúita-gá càhá<sup>n</sup> ndihi-gá Tǎtá-gǎ Dútú Ndiöxí, te xǎha<sup>n</sup>-gǎ:

—Yòhó Tǎtá-í Dútú Ndiöxí, ío chìnuhu ñaha-í xii-n chi diu-n tàxi tnuní-n àndiu ndihi ñuyíu-a, te dànehé-n cuè ñáyiu nchaa tnúhu váha, te diu-ni ñáyiu-á<sup>n</sup> cùu-yu ñáyiu ñá túú cùtnuní iní-xi nchaa tnúhu càhá<sup>n</sup> cue téé càchí sá ío túha, te nchaa tnúhu váha-á<sup>n</sup> ñà túú dàtúu-n nǔú ñáyiu càchí sá ío túha te ío váha sàá díquí-xi. <sup>26</sup>Chi duca<sup>n</sup> cuiní-n cùnduu —cachí-gá xǎha<sup>n</sup>-gǎ xii Tǎtá-gǎ.

<sup>27</sup>Te xǎha<sup>n</sup>-gǎ xii nchaa ñáyiu xǐndecu-á<sup>n</sup>:

—Mee Tǎtá-í Dútú Ndiöxí ní cachí-gá sá cúnúu-í núú nchàandi túhú sá ío. Te vá yòo ì<sup>n</sup>-gá xiní nàcuáa sàni iní yúhú Déhe Dútú Ndiöxí, chi ì<sup>n</sup>dii díí-ni mee-gǎ xiní-gá nàcuáa sàni iní-í, te mee-í xiní-í nàcuáa sàni iní mée-gǎ. Te nchaa ñáyiu càchí iní-í sá quiní-yu nàcuáa sàni iní Tǎtá-í Dútú Ndiöxí te xǐtnúhu-í-yu, te vá yòo ì<sup>n</sup>-gá xiní chi diu-ni ñáyiu duca<sup>n</sup> xǐtnúhu-í-á<sup>n</sup> xiní-yu. <sup>28</sup>Te nchaa nchòhó ñáyiu ñá túú ndècu váha, ñáyiu ñá túú ñihí nàcuáa cada cundecu váha iní-xi quixi-ndo túha ñaha-ndo xii-í nàcuáa duca<sup>n</sup> cùndecu váha iní-ndó. <sup>29</sup>Te cuu vii cuu váha iní-ndó tnìi-ndo nchaa tnúhu càhá<sup>n</sup>-í, te ío dacuàha-ndo, te duca<sup>n</sup> càda-ndo chi yúhú ío càhnu iní-í, te ío ndàhú iní-í. Te núu duca<sup>n</sup> na càda-ndo te ío váha cuu iní-ndó cùndecu-ndo. <sup>30</sup>Te tnìi-ndo nchaa tnúhu

càhá<sup>n</sup>-í chi ñá túú cùu-xi ì<sup>n</sup> sá vèe, chi cada iní-ndó sǎ cùu-xí dàtná ì<sup>n</sup> chiu<sup>n</sup> ñamá —càchí-gá xǎha<sup>n</sup>-gǎ xii-yu.

**Cue téé xica cuu ndihi Jèsús sàhnú-güedé yoco triú nduu ndetátú ñáyiu**

(Mr. 2:23-28; Lc. 6:1-5)

**12** Te ì<sup>n</sup> nduu cùu-xi nduu ndetátú ñáyiu ñuhu Jèsús ichi ndihi cue téé xica cuu ndihi-gǎ, te ta yàha-gá ndihi-güedé ì<sup>n</sup> xichí núú cáá triú te xixíhí-güedé docó nǔu xǎ<sup>n</sup> ní ngúita-güedé sàhnú-güedé yoco triú-á<sup>n</sup>, te ndihi ndaha-güedé quíí-güedé quéé triú-á<sup>n</sup> tá xèxi-güedé cuáhá<sup>n</sup>. <sup>2</sup>Te cue téé cùu fariséu ní xiní-güedé nàcuáa quide cue téé xica cuu ndihi Jèsús, núu ní xǎha<sup>n</sup>-güedé xii-gǎ:

—¿Ná cuendá duca<sup>n</sup> quide cue téé xica cuu ndihi-n sàhnú-güedé yoco triú, te vitna cùu-xi nduu ndetátú-i? Te ñá túú tàu-güedé duca<sup>n</sup> càda-güedé —càchí-güedé xǎha<sup>n</sup>-güedé xii-gǎ.

<sup>3</sup>Te Jèsús ní xǎha<sup>n</sup>-gǎ xii-güedé:

—¿Náa ñá túú dàcuaha-ndo núú tùtú Yǎ Ndiöxí núú càhá<sup>n</sup>-xi nàcuáa ní quide ndíi Dàvíí cùtnàhá ní xíhí ndíi docó ndihi cue téé ní xica cuu ndihi ndíi-á<sup>n</sup>? <sup>4</sup>Chi ndíi-á<sup>n</sup> nǐ quíhu ndíi vehe Yá Ndiöxí ní quehe<sup>n</sup> ndíi pàá ní cuu íí ndécú-á<sup>n</sup> ní xexi ndíi ndihi cue téé ní xica cuu ndihi ndíi, te ñá túú tàu ndíi sá dúcá<sup>n</sup> càda ndíi ndihi cue téé-á<sup>n</sup> ní cùu, chi mee-ni cuè dútú tàu-güedé caxi-güedé pàá-á<sup>n</sup> ní cùu. <sup>5</sup>¿Te náa ñá túú xiní-ndó nàcuáa càhá<sup>n</sup>-xi núú tùtú ndíi Moisés sá nchàá cuè dútú vǎ ndètátú-güedé nduu cùu-xi nduu ndetátú-á<sup>n</sup>? Te ñá díú ì<sup>n</sup> cuéchi cùu-xi sá dúcá<sup>n</sup> ñà túú ndètátú-güedé nduu cùu-xi nduu ndetátú. <sup>6</sup>Te na càchí tnúhu-í xii-ndo sǎ yúhú cùu-í téé ío-gá cúnúu ndecu ndihi-ndo dacúxí vènúhu sá ío cùnuu. <sup>7</sup>Dico nchòhó chi ñá tècú tnùní-ndó nàcuáa càhá<sup>n</sup> Yǎ Ndiöxí núú tùtú-gá núú càchí-xi: “Yúhú cuiní-í sá

cúndàhú iní-ndó cuè tnahá ñáyi-ndo te ñá díú mèe-ni sá cáhni-ndó quiti nduu táhù-í", duha càchí-gá núú tütú-gá. Te núú dicó nchòhó tècú tnùní-ndó ñá, te vá càhá<sup>n</sup> cuèhé-ndó cuèndá nchaa ñáyi ñá túú ndècu cuèchi-xi. <sup>8</sup>Te yúhú Tée cùu ñaní tnáhá-ndó nchaa-ndo, tnáhá-í ndécú ndìhi-í tnúhu ndee iní sá cùu-í nchaa ñáyi nàcuáa cadá-yu nduu ndetátú-ó-á —càchí-gá xáha<sup>n</sup>-gá xii-güedé.

### Ì<sup>n</sup> tée ní yíchí ì<sup>n</sup> xio ndaha-xi

(Mr. 3:1-6; Lc. 6:6-11)

<sup>9</sup>Te Jèsús ní xica-gá cuáhá<sup>n</sup>-gá, te cuánguihu-gá xití ì<sup>n</sup> veñúhu. <sup>10</sup>Te xíá<sup>n</sup> ndécú ì<sup>n</sup> tée ní yíchí ì<sup>n</sup> xio ndaha-dé. Te dava cue tée xíndecu-á<sup>n</sup> ndúcú-güedé nàcuáa cada-güedé cacá<sup>n</sup> cuèchi-güedé cuèndá-gá núú cuè tée cùnuu, te ní xícá<sup>n</sup> tnúhú-güedé núú-gá, te xáha<sup>n</sup>-güedé:

—Cachí tnúhu xii-ndí ñuu cuu cada tátna-o ì<sup>n</sup> tée cùhú nduu cùu-xi nduu ndetátú-ó á<sup>n</sup> ñáhá —càchí-güedé xáha<sup>n</sup>-güedé xii-gá.

<sup>11</sup>Te Jèsús ní xáha<sup>n</sup>-gá xii-güedé:

—Te nchòhó òré ná ngàunihnu ì<sup>n</sup> mbéé-ndó ì<sup>n</sup> déhvá cùnú te nàtava-ndo-di cuéi cùu-xi nduu ndetátú-ó. <sup>12</sup>Te ì<sup>n</sup> ñáyi-íó-gá cùnùú-yu dàcúxí ì<sup>n</sup> mbéé, núú xíá<sup>n</sup> tàú-ó sá cadá-ó sá vâha sá cúú-xí-yu cuèi cùu-xi nduu ndetátú-ó —càchí-gá xáha<sup>n</sup>-gá xii-güedé.

<sup>13</sup>Te dàtnùní ní xáha<sup>n</sup>-gá xii tée cùhú ndaha-xi-á<sup>n</sup>:

—Ndacani ndaha-n —càchí-gá xáha<sup>n</sup>-gá xii-dé.

Te tée-á<sup>n</sup> ñí ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé. <sup>14</sup>Te cue tée cùu fariséu ní ndee-güedé xití veñúhu, te ní ngúíta-güedé ndátnúhu-güedé ñuu nása cada-güedé cahni-güedé Jèsús.

### Nàcuáa sa ndèe tnuní cuèndá Jèsús

<sup>15</sup>Te sátá ñí cutnùní iní Jèsús nàcuáa cuiní-güedé cada ñaha-güedé xii-gá te ní xica-gá cuáhá<sup>n</sup>-gá, te ío vâi ñáyi nchícú<sup>n</sup> ñáhá xii-gá cuáhá<sup>n</sup>, te tnáhá cue ñáyi cùhú nchícú<sup>n</sup> ñáhá xii-gá cuáhá<sup>n</sup>, te ní quide tátna-gá cue ñáyi-á<sup>n</sup>. <sup>16</sup>Te ní xáha<sup>n</sup>-gá xii-yu sá vâ càhá<sup>n</sup>-yu yoo cùu-gá. <sup>17</sup>Te duca<sup>n</sup> ñí cuu chi ní quee ndáá-xi nàcuáa ní xáha<sup>n</sup> Yá Ndióxi xii ndíi Chàíá tée ní xóo cáhá<sup>n</sup> tnúhu-gá ndéé sanaha ñí chídó tnùní ndíi núú tütú-gá, te duha nduu tnúhu ní xáha<sup>n</sup>-gá: <sup>18</sup>Tée-a cùu-dé tée ní sani iní-í sá cúnú cuèchi-dé núú-í,

te ío cùu iní-í-dé, te cùdífí iní-í-dé.

Te yúhú cuñaha-í Espiritú-í cundecu ndíhi-dé,

te diu-dé cùñaha-dé xii nchaa ñáyi ñuyú sá yúhú ío ndáá quidè-í.

<sup>19</sup>Te vá dácàá-dé tnúhu cáhá<sup>n</sup>-dé ndíhi ñáyi, te ni vâ cáná sàa-dé òré cáhá<sup>n</sup>-dé,

te ni vâ yóo níhí tnúhu nása cáhá<sup>n</sup>-dé cuhu<sup>n</sup>-dé ichi.

<sup>20</sup>Te ni ñá túú ná cada-dé cue ñáyi cùu datná ì<sup>n</sup> tnu ndóó sá cuiní-xi tnáhnú, te diu-ni ñáyi-á<sup>n</sup> cúú tucú-yu dàtná ì<sup>n</sup> mèchá càndíí sá ío quène ñúhmá te cuiní-xi ndahvá.

Te duca<sup>n</sup> sàtnahá-xi cùu ñáyi-á<sup>n</sup> chi ñá túú níhí ndéé-yu cundecú-yu sá cúú-xi-í, te mee-ni sá vâha cada ñaha-dé xii-yu,

te diu-ni duca<sup>n</sup> càda-dé ndéé sáá nduu cutnùní iní nchaa ñáyi sá ío ndáá quidé-dé.

<sup>21</sup>Te nchaa ñáyi níhí ñuyú ío cundee cùu cahnu iní ñáhá-yu xii-dé.

Duha ní xáha<sup>n</sup>-gá xii ndíi Chàíá ní chídó tnùní ndíi núú tütú-gá.

**Càchí-güedé sá ndécú ndìhi Jesús  
espíritú cùndìhi yucu ñávãha**

(Mr. 3:20-30; Lc. 11:14-23; 12:10)

<sup>22</sup> Te ní quexìo ìí" úú cue tée núú ndécú Jèsús, te ndèca-güedé ìí" tée ñìhí te cuàá-dé, te yìhi ñaha espíritú cùndìhi yucu ñávãha xii-dé, te Jèsús ní queñuhu-gá espíritú cùndìhi yucu ñávãha yìhi ñaha xii-dé, te òré-ni-á" ní cuu ní nacáhá"-dé te ní ndúha núú-dé.

<sup>23</sup> Te nchaa ñáyiu xíndecu-á" ïo ní cuñúhu-yu sá dúcá" ní quide-gá, te ní xítñhá-yu:

—Váa tée-a cùu-dé ñaní tnáhá ndíi Dàvíí tée tendaha Yá Ndiöxí quixi ñuyíú-a —càchí-yu xítñhá-yu.

<sup>24</sup> Te cue tée cùu fariséú ní tecú dóho-güedé nàcuáa ndùu tnúhu xítñhá-yu, núu xíá" ní xítñaha-güedé:

—Tée-a ndèñuhu-dé nchaa espíritú cùndìhi sácuíhná yíhí ñaha xii ñáyiu, chi ñiu-ni sácuíhná-á" chíndèe ñaha-xi xii-dé te ñiu-ni-xi tàxi tnuní-xi nchaa espíritú-á" —duha ní xítñaha-güedé.

<sup>25</sup> Te Jèsús ní cutnùnì iní-gá nàcuáa ndùu tnúhu ní xítñaha-güedé, núu ní xáha"-gá xii-güedé:

—Te nchòhó ximí-ndó sã ñuu ìí" tée yíndaha ìí" nació" vá cúú ìí"nuu-dé ndìhi cue tée cùndìhi-dé, te vá cùdíi-dé cunuu-dé. Te ñiu-ni duca" sãtnahá tucu-xi cùu tucu cue tée cùchiu" ìí" ñúú, chi núu vá cúú ìí"nuu-güedé cundecu-güedé, te vá cùdíi-güedé cundecu-güedé taxi tnuní-güedé. Te ñiu-ni duca" sãtnahá tucu-xi cùu cue ñáyiu xíndecu ìí"-ni vèhe, chi núu vá cúú ìí"nuú-yu cundecú-yu te vá cùdíi-yu cundecu càhnú-yu. <sup>26</sup> Te núu sácuíhná duca" quide-xi queñuhu-xi cue espíritú cùndìhi-xi yìhi ñaha xii ñáyiu ña, te ñá túú cùu ìí"nuu-xi ndecu-xi te núu duca", te vá cùdíi sácuíhná-á" cundecu-xi taxi tnuní-xi te núu duca" quide-xi. <sup>27</sup> Te

duha càhá"-í chi nchòhó càchí-ndó sã chíndèe ñaha sácuíhná xii-í queñuhu-í nchaa espíritú cùndìhi-xi yìhi ñaha xii ñáyiu. Te núu yúhú quidé cuendá-ndó sã sácuíhná chíndèe ñaha-xi xii-í, te xini ñuhu-xi cada cuendá-ndó yòo chindee ñaha xii cue tée xica cuu ndìhi-ndo queñuhu-güedé nchaa espíritú cùndìhi yucu ñávãha yìhi ñaha xii ñáyiu. Te mee-güedé càchí-güedé sã nchòhó ñá túú càhá" ndáá-ndó sã dúcá" càhá"-ndó.

<sup>28</sup> Dico yúhú chi Espíritú Yá Ndiöxí chíndèe ñaha-xi xii-í queñuhu-í nchaa espíritú cùndìhi sácuíhná yíhí ñaha xii ñáyiu, te sá dúcá" chindee ñaha Espíritú-gá xii-í, xíá" cùtnùnì sá sà ní sáá nduu cuiní-gá ndíhu ndaha ñaha-gá xii-ndo.

<sup>29</sup> Te nchòhó xini-ndó sã cué ñadúhú chi vá ndácú-güedé cuendá-ni quíhu-güedé duhu-güedé vehe ìí" tée ío ndee, chi díhna-gá xini ñuhu-xi tnii-güedé tée-á" dacùtu ñaha-güedé xii-dé dãtnùnì duca" te ndacu-güedé duhu-güedé nchaa sã ndécú ndìhi-dé.

<sup>30</sup> Te nchaa ñáyiu ñá túú cùndìhi ñaha xii-í, te cùu úhú iní ñáhã-yu. Te nchaa ñáyiu ñá túú chindee ñaha xii-í, te dàquee tñhü-yu chiú" quide-í.

<sup>31</sup> Te na càchí tnúhu-í xii-ndo sã ncháá ñáyiu quide nchaa sã cuèhé sã dúhá cuu cada càhnu iní ñáhã Yá Ndiöxí xíí-yu, te ñiu-ni duca" cùu cada cahnu iní-gá nchaa tnúhu cuèhé tnúhu duha càhá"-yu. Dico cue ñáyiu na càhá" úhú cuendá Espíritú-gá, te ñáyiu-á" vã cádá càhnu iní ñáhã tnàhí-gá xíí-yu. <sup>32</sup> Te nchaa ñáyiu na càhá" úhú cuendá yúhú Tée cùu ñaní tnáhã-yu nchaá-yu, te cuu cada càhnu iní ñáhã Yá Ndiöxí xíí-yu. Dico cue ñáyiu na càhá" úhú cuendá Espíritú-gá te vá cádá càhnu iní ñáhã tnàhí-gá xíí-yu cuéi vitna ndècu vívü-yu, te cuéi na cùú-yu.



**Ndi díí<sup>n</sup> nǔú yutnu xìní-ó nǎ yutnu  
cùu-xi cuendá sá sǎvidí-xi**

(Lc. 6:43-45)

<sup>33</sup> Te nchòhó xìní-ndó sǎ ndi díí<sup>n</sup> nǔú yutnu xìní-ó nǎ yutnu cùu-xi cuendá sá sǎvidí-xi, te xìní-ó sǎ ncháá yùtnu váha cùu<sup>n</sup> mee-ni sǎvidí váha, dico nchaa yutnu sá ñà túú váha te cùu<sup>n</sup> mee-ni sǎvidí sá ñà túú váha. Te duha càhá<sup>n</sup>-í cuendá cada cuendá váha-ndo nàcuáa ndi u chiu<sup>n</sup> quide-ndo ì<sup>n</sup> ì<sup>n</sup>-ndo cuendá duca<sup>n</sup> cùtnuní ná ñáiyu cùu-ndo. <sup>34</sup> Dico nchòhó cúú-ndó dàtná ì<sup>n</sup> cóó dǎé<sup>n</sup> chi ío cuihna ìní-ndó, te vá cání ìní-ndó sǎ ndácú-ndó cǎhá<sup>n</sup>-ndó ì<sup>n</sup> tnúhu váha, chi ío cuihna ìní-ndó. Te nchòhó xìní-ndó sǎ ncháá ñáiyu càhá<sup>n</sup>-yu nání véxi ìní-yu. <sup>35</sup> Te nchaa ñáiyu váha ìní-xi càhá<sup>n</sup>-yu tnúhu váha, chi ñi u-ni tnúhu váha-á<sup>n</sup> ñúhú ìní-yu. Te nchaa ñáiyu cuihna ìní-xi càhá<sup>n</sup>-yu tnúhu cuèhé tnúhu duha, chi ñi u-ni tnúhu cuèhé tnúhu duha-á<sup>n</sup> ñúhú ìní-yu. <sup>36</sup> Te na càchí tnúhu-í xii-ndo sǎ ná sàá nduu càda ndáá Yǎ Ndiòxí cuéchi nchaa nchòhó ñáiyu ndècu ñuyíú-a, te nchaa tnúhu cuèhé tnúhu duha càhá<sup>n</sup>-ndó cǎhá<sup>n</sup>-gá sá ñà túú ní quide váha-ndo sǎ dúcá<sup>n</sup> ñí càhá<sup>n</sup>-ndó tnúhu-á<sup>n</sup>. <sup>37</sup> Te nàcuáa ndi u tnúhu ní càhá<sup>n</sup>-ndó ì<sup>n</sup> ì<sup>n</sup>-ndo, te duca<sup>n</sup> cǎhá<sup>n</sup> Yǎ Ndiòxí te núu ndècu cuéchi-ndo àdi ñà túú ndècu cuéchi-ndo. Te núu ñà túú cuéchi-ndo te cácu-ndo, dico núu ndècu cuéchi-ndo te vá cácu-ndo —càchí-gá xǎha<sup>n</sup>-gǎ xii cue tée cùu fariséú-á<sup>n</sup>.

**Cue tée cuiní sá cadá Jèsús ì<sup>n</sup> sá  
vǎ yǎo tnàhí ndàcu cada**

(Mr. 8:12; Lc. 11:29-32)

<sup>38</sup> Te cue tée cùu fariséú, ndi hi cue tée dàcuaha ñaha xii ñáiyu nchaa tnúhu ní chídó tnùní ndí Moisés xǎha<sup>n</sup>-güedé xii Jèsús:

—Mèstrú, cuiní-ndí cada-n ì<sup>n</sup> sá vǎ yǎo tnàhí ndàcu cada cuendá duca<sup>n</sup> cùtnuní ìní-ndí sá Yǎ Ndiòxí chindèe ñaha-gá xii-n —càchí-güedé xǎha<sup>n</sup>-güedé xii-gá.

<sup>39</sup> Te Jèsús ní xáha<sup>n</sup>-gǎ xii-güedé:

—Ñáiyu ndècu ichi cuéhé ichi duha ñà túú cuiní-yu tñi-yu tnúhu càhá<sup>n</sup> Yǎ Ndiòxí, te ñáiyu-á<sup>n</sup> cuiní-yu cada-í ì<sup>n</sup> sá vǎ yǎo tnàhí ndàcu cada nàcuáa cùtnuní ìní-yu núu ndáá sá Yǎ Ndiòxí chindèe ñaha-gá xii-í. Dico yúhú chi ñà túú nǎgá cada-í quini-yu, chi sa ñihí-yu tnúhu nàcuáa ní yáha ndí Jònás tée ní xóo càhá<sup>n</sup> tnúhu Yǎ Ndiòxí ndéé sanaha, te ñi u-ni duca<sup>n</sup> yáha yúhú tucu. <sup>40</sup> Chi ndí Jònás-á<sup>n</sup> ñí xúhu<sup>n</sup> ndí úní nduu úní níu xití ì<sup>n</sup> chácá cǎhnú vèhi nani bal-lená. Te ñi u-ni duca<sup>n</sup> yáha yúhú Tée cùu ñaní tnáhá-ndó nchàa-ndo, chi úní nduu úní níu cuhu<sup>n</sup>-í xití ñuhu. <sup>41</sup> Te na sàá nduu càda ndáá Yǎ Ndiòxí cuéchi nchaa ñáiyu ndècu ñuyíú-a, te dàvá-á<sup>n</sup> cachí nchaa ñáiyu ñuú Ñinivé sá ñà túú ní quide ndáá nchaa ñáiyu ndècu vitna, te duca<sup>n</sup> cǎhá<sup>n</sup>-yu chi mèé-yu ní dàñá-yu ichi cuéhé ichi duha cùtnáhá ní sáhá<sup>n</sup> ndí Jònás ñuú-yu ní càhá<sup>n</sup> ndí tnúhu Yǎ Ndiòxí núu-yu. Dico vitna iha ndècu ndi hi ñaha-ndo xii yúhú, te ñi u-í ío-gá cùnùu-í dàcúxí ndí Jònás. <sup>42</sup> Te nduu càda ndáá Yǎ Ndiòxí cuéchi nchaa ñáiyu, te dàvá-á<sup>n</sup> quini-ndó ì<sup>n</sup> ñadihí ñaha ní xíndaha ì<sup>n</sup> nació<sup>n</sup> cáá ndàa xio datni núu quéné nchíanchii, te ñaha-á<sup>n</sup> ïo xica ñí xíndecu-a<sup>n</sup> te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní càhá<sup>n</sup> ndí Salòmón, chi ndí-á<sup>n</sup> ïo ní sáá sá xini tnùní ndí. Te tnáhá ñaha-á<sup>n</sup> cǎhá<sup>n</sup>-a<sup>n</sup> sá ñà túú ní quide ndáá nchaa ñáiyu ndècu vitna. Dico vitna iha ndècu ndi hi ñaha-ndo xii yúhú, te ñi u-í ío-gá cùnùu-í dàcúxí ndí Salòmón.

**Espíritú cúndihí yucu ñávaha  
sá nánchòcáva xito cùu uú**

(Lc. 11:24-26)

<sup>43</sup>Te òré ná queé ñaha ìí<sup>n</sup> espíritú cúndihí yucu ñávaha xii ìí<sup>n</sup> ñáyíu, te cuáhá<sup>n</sup>-xi ndùcu-xi ìí<sup>n</sup> xichi núú cúndècu-xi te ñá nihí-xi te ní sani iní-xi: <sup>44</sup>“Váha-gá núhú tucu-í núú ní xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xiní-xi sá cáá iní ñáyíu-á<sup>n</sup> dàtná cáá-ná ìí<sup>n</sup> vehe ní natíhú ní nduu víi-ná te vá yòo-gá ndécú. <sup>45</sup>Te sáta dúcá<sup>n</sup> te ní xica-xi cuáhá<sup>n</sup>-xi cuándúcú-xí úsá tñàhà espíritú cúndihí-xi sá nèhé víhí-gá xíquide. Te òré ní nihí-xi cue espíritú-á<sup>n</sup> te ndèca ñaha-xi cuáhá<sup>n</sup> cuèndá ngúndecu ndihí-xi ñáyíu-á<sup>n</sup>. Te ñáyíu-á<sup>n</sup> uu<sup>n</sup>-gá nándi yáha-yu dàcúúxí ndéé díhna. Te diu-ni duca<sup>n</sup> sàtnahá-xi yáha nchaa ñáyíu cuihna iní-xi ndècu ñuyú-u vitna —càchí-gá xàha<sup>n</sup>-gá xii-güedé.

**Cue ñaní Jèsús ndihí náná-gá**

(Mr. 3:31-35; Lc. 8:19-21)

<sup>46</sup>Te càhá<sup>n</sup> dúcá<sup>n</sup>-ní Jèsús ní quexio náná-gá ndihí cue ñaní-gá cuíní-yu cáhá<sup>n</sup> ndihí ñàhá-yu xii-gá, te ní ngúnu tñí-yu ndàa quehé vehe núú ndécú-gá. <sup>47</sup>Te ìí<sup>n</sup> cue ñáyíu xíndecu-á<sup>n</sup> ní xáhá<sup>n</sup>-yu xii-gá:

—Ní quexio náná-n ndihí cue ñaní-n xínutñí-yu quehé, te cuíní-yu cáhá<sup>n</sup> ndihí ñàhá-yu xii-n —càchí ñáyíu-á<sup>n</sup> xáhá<sup>n</sup>-yu xii-gá.

<sup>48</sup>Te ní xáha<sup>n</sup>-gá xii ñáyíu duca<sup>n</sup> xáha<sup>n</sup> xii-gá-á<sup>n</sup>:

—Te cachí tñúhu yóndi-gá ñáyíu cùu datná nánà-í ndihí dàtná cue ñaní-í —càchí-gá xàha<sup>n</sup>-gá xii ñáyíu-á<sup>n</sup>.

<sup>49</sup>Te ní dánèhé ñàhá-gá nchaa cue téé xica cuu ndihí-gá, te ní xáha<sup>n</sup>-gá xii ñáyíu-á<sup>n</sup>:

—Cue téé-a cùu-güedé dàtná nánà-í, ndihí dàtná cue ñaní-í. <sup>50</sup>Te nchaa ñáyíu na càda nchaa nacúaa càhá<sup>n</sup> Tàtà-í Dútú Ndiòxí Yaa ndécú àndíu, te ñáyíu-á<sup>n</sup> cùu-yu dàtná nánà-í, ndihí dàtná cue ñaní-í, ndihí dàtná cue cúha-í —càchí-gá xàha<sup>n</sup>-gá xii ñáyíu duca<sup>n</sup> ní dáyàha tñúhu núú-gá-á<sup>n</sup>.

**Nàcuáa quide téé cuángacá<sup>n</sup> triú**

(Mr. 4:1-9; Lc. 8:4-8)

**13** Te diu-ni nduu-á<sup>n</sup> ní quee Jèsús vehe núú ndécú-gá, te ní xica-gá cuáhá<sup>n</sup>-gá ní ngóo-gá yuhu làgúná. <sup>2</sup>Te ío cuéhé ñáyíu ní tacá núú ndécú-gá. Te sá dúcá<sup>n</sup> ío cuéhé ñáyíu núú ní queé-gá xití ìí<sup>n</sup> bàrcú nútñí xití ndute làgúná-á<sup>n</sup>, te núú xíá<sup>n</sup> ní ngóo-gá, te nchaa ñáyíu-á<sup>n</sup> xíxúcu-yu yuhu làgúná-á<sup>n</sup>. <sup>3</sup>Te Jèsús ní ngüfta-gá ní caní-gá titní cuèndú núu-yu nàcuáa tecú tñúni-yu nchaa nàcuáa ndùu tñúhu-gá, te xàha<sup>n</sup>-gá xii-yu:

—Ìí<sup>n</sup> téé cuángacá<sup>n</sup>-dé triú, <sup>4</sup>te òré ní ngüfta-dé dängoyo-dé triú-á<sup>n</sup>, te dava ní quene ndava ní ngava ndéé ichi, te ní xiní cue tílaa te ní nadatàcá-güedi. <sup>5</sup>Te dava ní ngava ñuhu yadi núú yíhí víhi yúú, te ndihí-ni ní xínu-xi chí ñá túú càvivi ñuhu. <sup>6</sup>Dico òré ní nayahé te ñá túú ní cùndee iní-xi chí ní yíchí-xi, chí ñá túú ní níhí quíhí<sup>n</sup> cùnú yóho-xi. <sup>7</sup>Te dava ní ngava núú yúcu ndíquí<sup>n</sup> tnu ìñu, te ìí<sup>n</sup> nuu-ni ní xínu-xi ndihí tnu ìñu. Te tnu ìñu-á<sup>n</sup> ní sahnu-xi te ní dánáá-xí nhàa triú sá ní xínu-á<sup>n</sup>. <sup>8</sup>Dico dava-gá triú ní ngava núú ndécú ñuhu cocó<sup>n</sup> te xíá<sup>n</sup> ío váha ní cuu, chí núú íí<sup>n</sup>-ní triú-á<sup>n</sup> te dava yoco-xi ní nguíhi ócú úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ìí<sup>n</sup> cièndú triú-xi. <sup>9</sup>Te vitna nchaa nchòhò ñáyíu ní xíndedóho tñúhu ní cáhá<sup>n</sup>-í-a, te ío váha chí cuàha cuèndá —càchí-gá xàha<sup>n</sup>-gá xii-yu.

**Cue tée xica cuu ndihi Jesús ndúcú  
tnúhu-güedé núú-gǎ ná cuendá  
cání-gǎ cuendú núú ñáyiú**

(Mr. 4:10-12; Lc. 8:9-10)

<sup>10</sup>Te cue tée xica cuu ndihi Jesús ní sáhá<sup>n</sup>-güedé ndéé núú-gǎ, te xáha<sup>n</sup>-güedé xii-gǎ:

—Ndúcu tnúhu-ndí núú-n núú ná cuendá duca<sup>n</sup> mée-ni cuendú cání-n núú ñáyiú —càchí-güedé xáha<sup>n</sup>-güedé xii-gǎ.

<sup>11</sup>Te ní xáha<sup>n</sup>-gǎ xii-güedé:

—Nchòhó chí sa càchí tnúhu Yá Ndiòxí xii-ndo ì<sup>n</sup> sá vǎtá quíni-gǎ-ndó, chí càchí tnúhu-gǎ nàcuáa quide-gǎ ndíhu ndaha-gǎ ñáyiú, dico dava-gǎ ñáyiú chí ñá túú nǎ xáha<sup>n</sup>-gǎ xií-yu.

<sup>12</sup>Te nchaa ñáyiú sa tècú tnùnì te uu<sup>n</sup>-gǎ cuita tecú tnùnì-yu quíhí<sup>n</sup>, te nchaa ñáyiú ñá túú tècú tnùnì te uu<sup>n</sup>-gǎ vǎ tècú tnùnì-yu. <sup>13</sup>Te xǎá<sup>n</sup> núú duha cání-í mee-ni cuendú núú-yu, chí cuèi na quíni-yu nchaa nàcuáa cuu dico ní vǎ cútnùnì iní-yu ná cuendá duca<sup>n</sup> cùu, te cuèi na cùndedóho-yu dico ní vǎ tècú tnùnì-yu. <sup>14</sup>Te diu cuendá ñáyiú-á<sup>n</sup> ní xáha<sup>n</sup> Yá Ndiòxí xii ndí Chàíá tée ní xóo cáhá<sup>n</sup> tnúhu-gǎ ndéé sanaha ní chídó tnùnì ndí núú tütú-gǎ núú càchí-xi:

Nchaa nchòhó cùndedóho-ndo tnúhu càhá<sup>n</sup>-í, dico ní vǎ tècú tnùnì-ndó, te cuèi na quíni-ndó nchàa nacuáa cada-xi, dico ní vǎ cútnùnì iní-ndó nǎ cuendá duca<sup>n</sup> quide-xi.

<sup>15</sup>Te duca<sup>n</sup> chí cùu-ndo ñáyiú ío sǎá iní-xi,

te cùu-ndo ñáyiú ñá túú tècú tnùnì tnúhu càhá<sup>n</sup>-í,

te cùu tucu-ndo datná cue ñáyiú cuàá chí ñá túú cuíni-ndó càda cuendá-ndó tnúhu-í,

te ní ñá túú cuíni-ndó cùndedóho-ndo,

te ní ñá túú cuíni-ndó tècú tnùnì-ndó,

te ní ñá túú cuíni-ndó nàtuha ñaha-ndo xii-í cuendá cada càhnu iní-í nchaa

yíca cuèchi-ndo nàcuáa ío váha cuu iní-ndó cùndecu-ndo.

Duha ní xáha<sup>n</sup> Yá Ndiòxí xii ndí Chàíá ní chídó tnùnì ndí núú tütú-gǎ.

<sup>16</sup>Dico nchòhó chí ío váha táhú-ndó chí cùtnùnì iní-ndó nchàa nacuáa quide-í, te cùtnùnì tucu iní-ndó nchàa nacuáa ndúu tnúhu càhá<sup>n</sup>-í. <sup>17</sup>Te na càchí tnúhu ndáá-í xii-ndo sǎ ío vǎi cue tée ní xóo cáhá<sup>n</sup> tnúhu Yá Ndiòxí ndéé sanaha ndíhi nchaa dava-gǎ ñáyiú váha iní-xi ní cuíni-yu cundehé-yu nchaa sǎ ndéhé-ndó vitna quide-í dico ñá túú ní xínì-yu, te ní cuíni tucú-yu cùndedóho-yu nchaa tnúhu ndèdóho-ndo vitna cáhá<sup>n</sup>-í te ñá túú ní xíndedóho-yu.

**Jèsús càhá<sup>n</sup>-gǎ nàcuáa quèe-xi  
cuendá tée cuángacá<sup>n</sup> tríú**

(Mr. 4:13-20; Lc. 8:11-15)

<sup>18</sup>Te vitna cùndedóho váha-ndo na càchí tnúhu-í xii-ndo nàcuáa quèe-xi cuendú tée cuángacá<sup>n</sup> tríú ní caní-í núú-ndó. <sup>19</sup>Te tríú sǎ ní quene ndava ní ngava ndéé ichi, xǎá<sup>n</sup> cúú-xí datná ñáyiú ní xíndedóho tnúhu sǎ càhá<sup>n</sup> nàcuáa ndíhu ndaha ñàha Yá Ndiòxí xií-yu, dico ñá túú ní cuíni-yu tñí-yu, chí sácúíhná cuǎhá<sup>n</sup>-xi nàdatuhú-xi iní-yu cuendá sǎ vǎ cǎnchícú<sup>n</sup> nihnú-yu nàcuáa càhá<sup>n</sup> tnúhu-á<sup>n</sup>. <sup>20</sup>Te tríú sǎ ní ngava ñuhu yadi núú yíhí vǐhi yúú-ǎ<sup>n</sup>, xǎá<sup>n</sup> cúú-xí datná ñáyiú ní xíndedóho tnúhu Yá Ndiòxí te díí iní ní tñí-yu tnúhu-gǎ, <sup>21</sup>dico òré ná nguíta ñáyiú cúcuèhé ñáhǎ-yu xií-yu àdi nándí-gǎ sǎ yǎha-yu sǎ cuendá tnúhu-gǎ, te ñá cùndèe iní-yu chí dàhá-yu tnúhu-gǎ cuendá sǎ ñá túú nihí ndéé-yu. <sup>22</sup>Te tríú sǎ ní ngava núú yúcu ndíquí<sup>n</sup> tnu ìñu-á<sup>n</sup>, xǎá<sup>n</sup> cúú-xí datná ñáyiú ní tecú dóho-xi tnúhu Yá Ndiòxí dico cuèe cuèe ní nacuanaá-yu tnúhu-gǎ, chí cuendá mee-ni sǎ ío ñuyíú-a ñuhu iní-yu, ndíhi cuendá sǎ ío sàni iní-yu cuu cuicá-yu, te mee-ni nchàa

xíã<sup>n</sup> ñúhú iní-yu te ñá túú ñùhu iní-yu tnúhu sá ñí xíndedóho-yu-á<sup>n</sup> nàcuáa cada váha-yu cundecú-yu. <sup>23</sup> Dico triú sá ñí ngava núú ndécú ñùhu coco<sup>n</sup>-á<sup>n</sup>, xíã<sup>n</sup> cúú-xí dàtná ñáyiú ní xíndedóho tnúhu Yá Ndiöxí te quidé-yu nàcuáa cãhá<sup>n</sup> tnúhu-gá. Te cada iní-ndó sã ñáyiú-á<sup>n</sup> cúú-yu dàtná triú sá ñí nguñhi yoco-xi ócú úxí triú-xi, ndihí triú sá ñí nguñhi yoco-xi únídico triú-xi, ndihí triú sá ñí nguñhi yoco-xi ñí ciendú triú-xi. Duca<sup>n</sup> sãtnahá-xi cùú-yu chí ío váha quidé-yu —càchí-gá xãha<sup>n</sup>-gã xii-güedé.

### **Cuendá nchaa cúhú sã ñà túú vãha xínu xití triú**

<sup>24</sup> Te Jèsús ní cani-gá ñí cuendú núú ñáyiú nàcuáa tecú tnùní-yu tnúhu-gá, te xãha<sup>n</sup>-gã xii-yu:

—Te vitna na cãni-í ñí cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyiú. ñí tée ío váha triú ní sacá<sup>n</sup>-dé núú ñúhú-dé. <sup>25</sup> Dico xití niú ní sãhá<sup>n</sup> ñí tée cùu úhú iní ñãhá xii-dé, te ní dãngoyo-dé ndíquí<sup>n</sup> yúcu sã ñà túú vãha núú ñí sacá<sup>n</sup>-dé triú-á<sup>n</sup>. <sup>26</sup> Te òré vitna váha váha ní nguíta-xi quène yoco nchaa triú-á<sup>n</sup>, te ní xínu coyo nchaa yúcu sã ñà túú vãha-á<sup>n</sup>. <sup>27</sup> Te cue tée xínu cuechi núú tée ní sacá<sup>n</sup> triú-á<sup>n</sup> ñí xínũhu ñaha-güedé xii-dé sá dúcá<sup>n</sup> ñí xínu cúhú sã ñà túú vãha-á<sup>n</sup> nũú triú-dé, te xãha<sup>n</sup>-güedé: “Pãtróó<sup>n</sup>, çnása ní cuu núú ní xínu cúhú sã ñà túú vãha núú triú-n, te ío váha càa triú ní sacá<sup>n</sup>-n ní cùu?”; cachí-güedé xãha<sup>n</sup>-güedé. <sup>28</sup> Te tée cùu patróó<sup>n</sup>-güedé-á<sup>n</sup> ñí xãha<sup>n</sup>-dè xii-güedé: “Ñí tée cùu úhú iní ñãhá ñahi xii-í duca<sup>n</sup> ñí quide-dé ní sãhá<sup>n</sup>-dé ní dãngoyo-dé ndíquí<sup>n</sup> cùhú sã ñà túú vãha-á<sup>n</sup> nũú triú-í nũu duca<sup>n</sup> ñí xínu coyo-xi”, cachí-dé xãha<sup>n</sup>-dè xii-güedé. Te cue tée

xínu cuechi núú-dé ní xãha<sup>n</sup>-güedé xii-dé: “Te núu cuini-n te quíhí<sup>n</sup>-ndí tnuhu-ndí nchaa cúhú sã ñà túú vãha ní xínu núú triú-n”, càchí-güedé xãha<sup>n</sup>-güedé xii-dé. <sup>29</sup> Te tée cùu xitohó triú-á<sup>n</sup> ñí xãha<sup>n</sup>-dè xii cue tée xínu cuechi núú-dè-á<sup>n</sup>: “Ñãhá, vá quíhí<sup>n</sup>-ndó tnúhu-ndo, chí òré tnuhu-ndo te tnãhá-ni triú quene chí càa vihi cúhú-ã<sup>n</sup>. <sup>30</sup> Vãha-gá chí dàñá ná cuihnu nahi ndéé ná cùu triú, te dàtnúni nducu-í cue tée quíhí<sup>n</sup>-güedé tnuhu-güedé nchaa cúhú sã ñà túú vãha-á<sup>n</sup>, te dacùtu nuhni-güedé te cahmi-güedé, te dàtnúni nãquehndé-güedé triú nacani-güedé te nataxúha-güedé xití yacá-í”, càchí-dé xãha<sup>n</sup>-dè xii-güedé —duha ní cani Jèsús cuendú núú-yu.

### **Cuendá ndíquí<sup>n</sup> yutnu ñani mostázá**

(Mr. 4:30-32; Lc. 13:18-19)

<sup>31</sup> Te Jèsús ní cani tucu-gá ingá cuendú núú ñáyiú nàcuáa tecú tnùní-yu tnúhu-gá, te xãha<sup>n</sup>-gã xii-yu:

—Na cãni-í ñí cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyiú. ñí tée ní quehe<sup>n</sup>-dé ndíquí<sup>n</sup> yutnu ñani mostázá te nèhe-dé cuáhá<sup>n</sup> ní sacá<sup>n</sup>-dé núú ñúhú-dé. <sup>32</sup> Te ndíquí<sup>n</sup> yutnu-á<sup>n</sup> ño chàhu, dico òré ná xínu-xi te sãhnu-gá-xi dàcúxí nchaa cúhú, te cue quití ndava núú tàchí càdũha-güedi tacá-güedi núú dité-xi —càchí-gá xãha<sup>n</sup>-gã xii-yu.

### **Nàcuáa quide levadurá**

(Lc. 13:20-21)

<sup>33</sup> Te Jèsús ní xãha<sup>n</sup> tucu-gá xii ñáyiú:

—Te na càchí tnúhu tucu-í xii-ndo nàcuáa cada-xi òré ndíhu ndaha ñàha Yá Ndiöxí xii ñáyiú. ñí ñãdihí ní chihi-a<sup>n</sup> levadurá úní arròbá yuchi triú, te levadurá-á<sup>n</sup> ñí quide-xi ní ndaa ñihí yusa<sup>n</sup>-á<sup>n</sup> —càchí-gá xãha<sup>n</sup>-gã xii-yu.

**Mee-ni cuëndú ní cani  
Jèsús núú ñáyiú**

(Mr. 4:33-34)

<sup>34</sup>Te mee-ni cuëndú ní cani Jèsús núú ñáyiú ndi tnahá òré ní dánèhé ñáhá-gǎ xií-yu tnúhu-gǎ. <sup>35</sup>Te duca<sup>n</sup> ní quide-gǎ chi ní quee ndáá-xi nàcuáa ní chídó tnùní ìí<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha núú tùtú-gǎ núú càchí-xi:

Mee-ni cuëndú cani-í núú ñáyiú òré danèhé-í-yu tnúhu-í cuëndá tecú tnùní-yu,

te nchaa tnúhu sá vǎtá yǒo-gǎ cundedóho danèhé-í-yu, te nchaa tnúhu-á<sup>n</sup> ndúú yùhu-xi ndéé cútñàhá ní ngáva ñuyúí.

Duha ní chídó tnùní téé-á<sup>n</sup> núú tùtú-gǎ.

**Jèsús càhá<sup>n</sup>-gǎ nàcuáa quèe-xi  
cuendá cùhú sǎ ñà  
túú vǎha càa xití tríú**

<sup>36</sup>Te Jèsús ní dándácá-gǎ ñáyiú te cuánuhú-gǎ vehe, te cue téé xica cuu ndihi-gǎ ní xáha<sup>n</sup>-güedé xii-gǎ:

—Cachí tnúhu xii-ndí nása quèe-xi cuendá cùhú sǎ ñà túú vǎha càa xití tríú —càchí-güedé xáha<sup>n</sup>-güedé xii-gǎ.

<sup>37</sup>Te Jèsús ní xáha<sup>n</sup>-gǎ xii-güedé:

—Téé càchí-í ní sacá<sup>n</sup> tríú cǎvǎha-á<sup>n</sup> cúú yǐhú Téé cùu ñaní tnáhá-ndó nchàa-ndo. <sup>38</sup>Te nchaa núú ní sacá<sup>n</sup> téé-á<sup>n</sup> tríú cúú-xí ñuyúí. Te tatá vǎha-á<sup>n</sup> cúú-xí cuè ñáyiú yìndaha ñaha Yá Ndiòxí. Te nchaa cúhú sǎ ñà túú vǎha-á<sup>n</sup> cúú-xí ñáyiú yìndaha ñaha sácúíhná.

<sup>39</sup>Te téé ní dǎngoyo ndíquí<sup>n</sup> cùhú sǎ ñà túú vǎha núú tríú-á<sup>n</sup> cúú-dě mee sácúíhná. Te nduu nàtehndé-nǎ tríú-á<sup>n</sup> cúú-xí ndùu ndihi nihnu-ná nchaa sá ìo ñuyúí-a. Te nchaa ñáyiú nàquehndé tríú-á<sup>n</sup> cúú-yu mee-ni cuè espíritú xínú cuèchi núú Yá Ndiòxí. <sup>40</sup>Te dàtná cada cue téé quíhí<sup>n</sup> tnuhu nchaa cúhú sǎ ñà túú vǎha-á<sup>n</sup> dacùtu nuhní-güedé

te cahmi-güedé, duca<sup>n</sup> sǎtnahá-xi yáha nchaa ñáyiú cùndihi yucu ñávǎha na sǎá nduu. <sup>41</sup>Te yúhú Téé cùu ñaní tnáhá-ndó nchaa-ndo tendaha-í nchaa espíritú xínú cuèchi núú-í quíhí<sup>n</sup>-xi nadatàcá-xi nchaa ñáyiú sànu ichi cue tnaha ñáyiú-xi ichi cuèhé ichi duha, ndihi nchaa dava-gǎ ñáyiú ñà túú quide vǎha, te nchaa ñáyiú-á<sup>n</sup> xìndecú-yu nchaa núú ndécú cuè ñáyiú yìndaha-í. <sup>42</sup>Te cue espíritú-á<sup>n</sup> daquíhí<sup>n</sup>-xi cue ñáyiú-á<sup>n</sup> núú ñùhú núú cǎyú, te yàcá<sup>n</sup> ìo ndáhyú-yu te dicó rúhúú-nǎ cuu núhu-yu sá sàtú iní-yu sá ndóhǒ-yu. <sup>43</sup>Te nchaa ñáyiú quide nchaa nacuáa cuíní Tǎtǎ-yu Dútú Ndiòxí, ñáyiú-á<sup>n</sup> ìo cunúú-yu cundecú-yu núú ndécú-gǎ táxí tnùní-gǎ, chi cúú-yu dàtná nchícanchii dayèhé-yu cundecú-yu núú ndécú-gǎ. Te nchaa nchòhó ñáyiú ndèdóho nchaa tnúhu càhá<sup>n</sup>-í-a, te ìo vǎha chí cuǎha cuëndá —càchí-gǎ xáha<sup>n</sup>-gǎ xii-güedé.

**Cuendá ìí<sup>n</sup> sá ìo ndèyáhu**

<sup>44</sup>Te Jèsús xáha<sup>n</sup> tucu-gǎ xii-güedé:

—Na càni tucu-í ingá cuëndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiòxí xii ñáyiú. Ìí<sup>n</sup> téé ní naníhí-dě ìí<sup>n</sup> sá ìo ndèyáhu yìndúxi ìí<sup>n</sup> xichi, te ní nachindúxi tucu-dé ñu-ni núú ní naníhí-dě-á<sup>n</sup>, te ìo ní cudíí iní-dé sá dúcá<sup>n</sup> ní naníhí-dě xǐǎ<sup>n</sup>. Te ní xica-dé cuánuhú-dé te ní nadico-dě nchaa sá ndécú ndihi-dé, te ní nacuaa<sup>n</sup>-dé ñuhu núú dúcá<sup>n</sup> ní naníhí-dě xǐǎ<sup>n</sup>.

**Cuendá ìí<sup>n</sup> sá ìo ndèyáhu nàni pèrlá**

<sup>45</sup>Te na càni tucu-í ingá cuëndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiòxí xii ñáyiú. Ìí<sup>n</sup> téé quide ndáhú ndúcú-dě sá nání pèrlá sá ìo ndèyáhu. <sup>46</sup>Te ní naníhí-dě ñáyiú ndècu ndihi ìí<sup>n</sup> pèrlá sá ìo-gǎ ndèyáhu, te ní xica-dé cuánuhú-dé te ní nadico-dě nchaa sá ndécú ndihi-dé,

te ní sáhá<sup>n</sup>-dé ní saa<sup>n</sup>-dé përlá sá ïo-gá ndèyáhu-á<sup>n</sup>.

### **Cuëndá ñunu tñi-güedé chácá**

<sup>47</sup>Te na càni tucu-í ingá cuëndú núu-ndó nàcuáa tecú tñini-ndó nàcuáa cada-xi òré ndíhu ndaha ñaha Yá Ndiöxí xii ñáyiu. Cue tée tñi chácá ní dàquëe-güedé ñunu-güedé xití ndute lámár tñi-güedé chácá, te dàcá nuu dàcá nihnu chácá cuánguee-güedi xití ñunu-á<sup>n</sup>. <sup>48</sup>Te òré ní cutnìní iní-güedé sá ní chítú ñunu-güedé, te ní natava-güedé ní nene yuhu lámár, te ní ngúíta-güedé nácäxi-güedé nchaa chácá-á<sup>n</sup>. Te nchaa chácá vâha dàquëe-güedé-di xití tídihi, te nchaa chácá nèhé dängoyo-güedé-di. <sup>49</sup>Te dàtná ní quide cue tée-á<sup>n</sup> duca<sup>n</sup> càda cue espíritú xínú cuèchi núú Yá Ndiöxí ná sàà nduu vâ cündècu-gá nchaa sá ïó ñuyú-a, chi cue espíritú-á<sup>n</sup> daquëe di<sup>n</sup>-xi nchaa ñáyiu ní quide vâha tnuú nchaa ñáyiu ñá túú ní quide váha. <sup>50</sup>Te nchaa ñáyiu ñá túú ní quide váha-á<sup>n</sup> daquihí<sup>n</sup> ñáhá-xí xí-yu núú ñùhú núú càyú, te yàcá<sup>n</sup> ïo ndáhyú-yu, te dicó rúhñú-nâ cuu núhu-yu sá sätú iní-yu cuëndá sá ndóhó-yu —cächí-gá xâha<sup>n</sup>-gá xii cue tée xica cuu ndihi-gá.

### **Cuëndá cue tée ndècu ndihi sá ní quee túu díhna ndihi sá ní quee túu saa**

<sup>51</sup>Te Jèsús ní xicá<sup>n</sup> tñuhú-gá núu-güedé, te xâha<sup>n</sup>-gá xii-güedé:

—¿Ní tecú tñini-ndó nàcuáa nduu nchaa tñuhu ní cáhá<sup>n</sup>-í-á<sup>n</sup>? —cächí-gá xâha<sup>n</sup>-gá xii-güedé.

Te ní xâha<sup>n</sup>-güedé xii-gá:

—Ní tecú tñini-ndí —cächí-güedé xâha<sup>n</sup>-güedé xii-gá.

<sup>52</sup>Te ní xâha<sup>n</sup> tùcu Jesús xii-güedé:

—Te núu ïi<sup>n</sup> tée dàcuaha ñaha xii ñáyiu nchaa tñuhu ní chídó tñini ndíi Moisés ná cùtnuní iní-dé nàcuáa quide

Yá Ndiöxí ndíhu ndaha-gá ñáyiu, te tée-á<sup>n</sup> cúu-dé dàtná ïi<sup>n</sup> tée cùu xítóhó vehe. Te tée cùu xítóhó vehe-á<sup>n</sup> ní queñuhu-dé nchaa sá ní quee túu díhna ndècu ndihi-dé, ndihi nchaa sá ní quee túu saa. Te duca<sup>n</sup> sätnahá-xi cùu tée-á<sup>n</sup> te núu na cùtnuní iní-dé nàcuáa quide Yá Ndiöxí ndíhu ndaha-gá ñáyiu —cächí-gá xâha<sup>n</sup>-gá xii-güedé.

### **Jèsús ndécú-gá ñuu núu ní sahnú-gá**

(Mr. 6:1-6; Lc. 4:16-30)

<sup>53</sup>Te sátá ní yâha duca<sup>n</sup> ní cani Jèsús cuëndú núu-güedé, te ní xica-gá cuánuhú-gá. <sup>54</sup>Te ní ndexio-gá ñuu núu cúu ñùú-gá, te cuánguihu-gá xití veñúhu càa ñuu-á<sup>n</sup> te ní ngúíta-gá dánèhé-gá ñáyiu. Te nchaa ñáyiu ndèdóho nchaa tñuhu càhá<sup>n</sup>-gá xicuñúhu-yu, te xitnàhá-yu:

—¿Nása ní cuu núu ïo vâha cùtnuní iní tée-a nàcuáa cunduu tñuhu cáhá<sup>n</sup>-dé, te quide-dé nchaa sá vâ yóo tñahí ndàcu cada-i? <sup>55</sup>Te dicó déhe tée cùu carpinterú ndihi tá Màriá cúu-dé, te ñani-dé cúu tē Jàcobó, ndihi té Chèé, ndihi té Xímú, ndihi té Jüdás. <sup>56</sup>Te cue cùha-dé ndécú ndihi ñahá-yu xii-o ñùú-a. ¿Te nása ní quide-dé ñuu ndéé dàcá<sup>n</sup> ïo vâha cùtnuní iní-dé nàcuáa cunduu tñuhu cáhá<sup>n</sup>-dé-i? —cächí-yu xitnàhá-yu.

<sup>57</sup>Te ñá túú ní cuini-yu cáhá<sup>n</sup> ndihi váha-yu Jèsús, dico mee-gá ní xâha<sup>n</sup>-gá xii-yu:

—Te núu ïi<sup>n</sup> tée càhá<sup>n</sup> tñuhu Yá Ndiöxí ná nàsáá-dé ñuu-dé, te nchaa ñáyiu ñuu-dé-á<sup>n</sup> ndihi nchaa ñáyiu cùu ndimee-dé ñá túú nèhé-yu sá yíñùhu núu-dé, dico cue ñáyiu nchaa dava-gá ñuu chi nèhé-yu sá yíñùhu núu-dé —cächí-gá xâha<sup>n</sup>-gá xii-yu.

<sup>58</sup>Te ñá túú ní quide Jesús titní núu sá vâ yóo tñahí ndàcu cada ñuu-á<sup>n</sup>, chi ñá túú ní cuini-yu quindáá iní ñáhá-yu xii-gá.

**Nàcuáa ní cuu ní xíhí té Juàá tée  
dàcuandute ñaha xii ñáyiú**

(Mr. 6:14-29; Lc. 9:7-9)

**14** Te ñu-ni dàvá-á<sup>n</sup> ní níhí tē Hèrodés tñúhu nchaa nàcuáa quide Jesús, te té Hèrodés-á<sup>n</sup> cúú-dě tée tàxi tñuní distrítú Galiléa. <sup>2</sup>Te ní xáha<sup>n</sup>-dě xii nchaa cue tée ndècu ndíhi-dé:

—Tée dii cuèndú-xi níhí-ó-á<sup>n</sup> cùu-dé té Juàá tée dàcuandute ñaha xii ñáyiú, tée ní xíhí ní cùu te ní ndoto-dé ñúu dàcá<sup>n</sup> ndácú-dě quidé-dě nchaa sá vǎ yǒo tñàhí ndàcu cada —cachí-dé xáha<sup>n</sup>-dě xii-güedé.

<sup>3</sup>Te duca<sup>n</sup> ní cáhá<sup>n</sup> té Hèrodés chi mee-dě ní táuchíú<sup>n</sup>-dě ní tñii ñaha-güedé xii té Juàá, te ní dácútú ñaha-güedé xii-dé, te ní chihi ñaha-güedé vecaá. Te duca<sup>n</sup> ní quide té Hèrodés-á<sup>n</sup> sǎ cuèndá ñaha nàni Herodiás, ñaha ní cándeca ñaní-dé té Lìpé, te ní naquehe<sup>n</sup> ñaha-dě xii-a<sup>n</sup> ndèca ñaha-dé. <sup>4</sup>Te té Juàá ní xáha<sup>n</sup>-dě xii té Hèrodés:

—Ñǎ túú ní quide váha-n dùha ní naquehe<sup>n</sup> ñaha ní cándeca ñaní-n —duha ní xáha<sup>n</sup> tē Juàá xii té Hèrodés.

<sup>5</sup>Te sá dúcá<sup>n</sup> ní xáha<sup>n</sup> tē Juàá-á<sup>n</sup> xii té Hèrodés, te ní cuiní té Hèrodés-á<sup>n</sup> cahni-dé té Juàá-á<sup>n</sup>, dico ñá túú ní cùyii-dé chi ní yùhú-dé núú cuè ñáyiú, chi ncháa-yu ní cutnùní iní-yu sǎ tē Juàá cúú-dě ñi<sup>n</sup> tée càhá<sup>n</sup> tñúhu Yá Ndióxi. <sup>6</sup>Te ñi<sup>n</sup> nduu ní quide té Hèrodés vico vehe-dé ní quide càhnu-dé nduu ní cacu-dé. Te ndècu ñi<sup>n</sup> déhe yoco ñaha nani Herodiás-á<sup>n</sup>, te xíchí-ǎ<sup>n</sup> ní quíhu-xi xití vehe núú cúú vico-á<sup>n</sup> ní xita saha-xi. Te núcóo té Hèrodés ndíhi cue tée ní cáhá<sup>n</sup>-dé ndéhe-güedé, te ío ní cudíí iní-dé nàcuáa ní xita xíchí-ǎ<sup>n</sup>. <sup>7</sup>Te té Hèrodés-á<sup>n</sup> ní cacunehe-dé ndéé Yá Ndióxi nàcuáa cutnùní iní xíchí-ǎ<sup>n</sup> sǎ ndáa cuáñaha-dě ñúu ná cúú sǎ ná càcá<sup>n</sup>-xi núú-dě. <sup>8</sup>Te xíchí-ǎ<sup>n</sup> ní dácáhú

iní ñáhá nǎná-xi xii-xi ná cúú sǎ càcá<sup>n</sup>-xi núú tē Hèrodés, núú xǎ<sup>n</sup> ní xáha<sup>n</sup>-xi xii-dé:

—Cuiní-í quehndé-n díquí tē Juàá tée dàcuandute ñaha xii ñáyiú te taxi-n, dico na cùhu<sup>n</sup> ñi<sup>n</sup> xití cóhó taxi-n —càchí-xi xáha<sup>n</sup>-xi xii-dé.

<sup>9</sup>Te sá dúcá<sup>n</sup> ní xáha<sup>n</sup>-xi, te ní cundiyí té Hèrodés, dico ñá túú ní níhí-dé nása cada-dé, chi ndèdóho ñáyiú òré ní cacunehe-dé Yá Ndióxi sǎ ndáa cuáñaha-dě ñi<sup>n</sup> sǎ ná càcá<sup>n</sup>-xi núú-dě. Te ní quide-dé nàcuáa ní xáha<sup>n</sup>-xi. <sup>10</sup>Chi ní táuchíú<sup>n</sup>-dě ní sáhá<sup>n</sup> cue tée ní xehndé-güedé díquí tē Juàá òré yíhí-dé vecaá. <sup>11</sup>Te ní chihi-güedé díquí-dě ñi<sup>n</sup> xití cóhó te nèhe-güedé cuánuhú ní sáñaha-güedé xii xíchí-ǎ<sup>n</sup>, te xíchí-ǎ<sup>n</sup> ní nacuáñaha-xi xii náná-xi.

<sup>12</sup>Te cue tée xica cuu ndíhi té Juàá-á<sup>n</sup> ní sáhá<sup>n</sup>-güedé ní naquehe<sup>n</sup>-güedé yiqui cùñú-dé ní chindúxi-güedé, te dàtnùní ní sáhá<sup>n</sup>-güedé ní xáha<sup>n</sup>-güedé xii Jèsús nàcuáa ní cuu.

**Jèsús dácàxi-gǎ úhú<sup>n</sup> mǐl cue tée te  
dìi<sup>n</sup> ñáyiú dǐhí ndíhi landú**

(Mr. 6:30-44; Lc. 9:10-17; Jn. 6:1-14)

<sup>13</sup>Te Jèsús ní níhí-gǎ tñúhu nàcuáa ní cuu ní xíhí té Juàá. Te sǎtá xǎ<sup>n</sup> te cuánguee-gǎ ñi<sup>n</sup> bàrcú cuáhá<sup>n</sup>-gǎ ñi<sup>n</sup> xichi núú ñà túú ñáyiú ndècu, dico nchaa ñáyiú xǐndecu nchaa ñuú cáa yàtni xǎ<sup>n</sup> ní níhí-yu tñúhu sǎ cuáhá<sup>n</sup>-gǎ, te ní queé-yu ñuú-yu xica sahá-yu cuáhá<sup>n</sup> núú quidè-yu cuèndá quexio Jesús. <sup>14</sup>Te òré ní quexio Jesús núú cuáhá<sup>n</sup>-gǎ, te ní quene-gǎ bàrcú, te ní xiní-gǎ cuéhé víhí ñáyiú xǐxúcu-yu xǎ<sup>n</sup>, te ní cundàhú iní ñáhá-gǎ xǐi-yu, te ní quide tátna-gǎ nchaa ñáyiú cùhú ndíhí-yu. <sup>15</sup>Te sǎtá ñi<sup>n</sup> cuaa te ní sáhá<sup>n</sup> cue tée xica cuu ndíhi Jesús núú-gǎ, te xáha<sup>n</sup>-güedé xii-gǎ:

—Sa ní cuu dandàca-n nchaa ñáyiú-a chi sa ní cuaa, te na quíhí<sup>n</sup>-yu nchaa ñuú cáa yàtni iha cuaa<sup>n</sup>-yu sǎ cǎxí-yu, chi

núu ndécú-ó iha ñá túu tnàhí ná ió —  
càchí-güedé xáha<sup>n</sup>-güedé xii-gá.

<sup>16</sup> Te Jèsús ní xáha<sup>n</sup>-gá xii-güedé:

—Ñáhá, vá dándàca-í-yu, váha-gá  
mee-ndo chí cuñaha sá ná càxi-yu —  
càchí-gá xáha<sup>n</sup>-gá xii-güedé.

<sup>17</sup> Te ní xáha<sup>n</sup>-güedé xii-gá:

—Ñá túu nágá ndécú ndìhi-ndí,  
chi úhú<sup>n</sup> duha-ná pàá ndìhi úú-nà  
chácá ndécú ndìhi-ndí —càchi-güedé  
xáha<sup>n</sup>-güedé xii-gá.

<sup>18</sup> Te Jèsús ní xáha<sup>n</sup>-gá xii-güedé:

—Chí cánèhe paá-á<sup>n</sup> ndìhi chácá-á<sup>n</sup>  
táquixi iha —cachí-gá xáha<sup>n</sup>-gá  
xii-güedé.

<sup>19</sup> Te Jèsús ní xáha<sup>n</sup>-gá xii nchaá ñáyiu  
sá ná ngóo-yu nchaá-yu núu ìté cuí  
càa xíá<sup>n</sup>, te ní quehe<sup>n</sup>-gá ndi ùhú<sup>n</sup>  
pàá-á<sup>n</sup> ndìhi ndi ndùu chácá-á<sup>n</sup> te ní  
ndacoto-gá andiu, te ní ndacá<sup>n</sup> táhú-gá  
núu Yá Ndiòxí, te dātnùnì ní táhú  
cuèchi-gá pàá-á<sup>n</sup> te ní sáñaha-gá xii cue  
tée xica cuu ndìhi-gá ní dácāññu-güedé  
cue ñáyiu ní xexí-yu. <sup>20</sup> Te nchaá-yu ní  
xexí-yu ní ndahá xití-yu. Te sátá ní túhú  
còhò-yu te ní nadatàcá-güedé nchaá sá  
ní quendóo, te ní chítú ùxúú tnàhá tídihi  
mee-ni sá ní quendóo. <sup>21</sup> Te nchaá ñáyiu  
ní xexi-á<sup>n</sup> ní xínu úhú<sup>n</sup> mīl mee-ni cuè  
tée chi mee-ni cuè téé-á<sup>n</sup> ní quíundehu,  
te ñí<sup>n</sup> cue ñáyiu ñíhí ndìhi cue landú.

### Jèsús xíca-gá núu ndute

(Mr. 6:45-52; Jn. 6:16-21)

<sup>22</sup> Te òré-ni-á<sup>n</sup> ní xáha<sup>n</sup> Jèsús xii cue  
tée xica cuu ndìhi-gá sá quèe-güedé  
bàrcú téhndé-güedé ndàa ingá xio yuhu  
làgúná, te mee-gá quendóo-gá cada ndee  
íní tnàhá-gá ndìhi cue ñáyiu. <sup>23</sup> Te sátá  
ní yáha ní quide ndee íní tnàhá-gá  
ndìhi cue ñáyiu, te medii-gá ní xica-gá  
cuásaá-gá ñí<sup>n</sup> tindúú cáá yàtni xíá<sup>n</sup>  
cuèndá cáhá<sup>n</sup> ndìhi-gá Yá Ndiòxí, te  
diu-ni medii-gá ndécú xíá<sup>n</sup> ní cundiqui<sup>n</sup>.  
<sup>24</sup> Te bàrcú sá ñúhú cuè téé xica cuu

ndìhi-gá-á<sup>n</sup> sa cuáhá<sup>n</sup>-xi ndéé cuádava  
xití làgúná-á<sup>n</sup>, te ñíhi vìhi quene táchí  
ndàa ichi cuáhá<sup>n</sup>-xi, te dācandau ndeé-xi  
ndute nchaá ñíhi-xi. <sup>25</sup> Te tácuñndá  
váhi-gá tá xica Jèsús núu ndute cuáhá<sup>n</sup>  
tá cūyatni-gá bàrcú-á<sup>n</sup>. <sup>26</sup> Te cue tée  
xica cuu ndìhi-gá ní xini ñáhá-güedé  
xii-gá tá xica-gá núu ndute cuáhá<sup>n</sup>, te  
ní yùhú-güedé te ñíhi ní cáhá<sup>n</sup>-güedé te  
xítnàha-güedé:

—jñ<sup>n</sup> àlmá! —càchí-güedé  
xítnàha-güedé.

<sup>27</sup> Te Jèsús ní cáhá<sup>n</sup>-gá, te xáha<sup>n</sup>-gá  
xii-güedé:

—Ñí<sup>n</sup> cunduu-ndo vā yùhú-ndó,  
chi yùhú cūú-í —càchí-gá xáha<sup>n</sup>-gá  
xii-güedé.

<sup>28</sup> Te té Pèlú ní xáha<sup>n</sup>-dē xii-gá:

—Mèstrú, te núu diu-n te tauchù<sup>n</sup> sá  
tnàhá-í ná càca-í núu ndute quixi tnàhá  
ñáhà-í xii-n —càchí-dé xáha<sup>n</sup>-dē xii-gá.

<sup>29</sup> Te Jèsús ní xáha<sup>n</sup>-gá xii-dé:

—Taquixi —cachí-gá xáha<sup>n</sup>-gá xii-dé.

Te té Pèlú ní nuu-dé núu bàrcú, te ní  
ngüíta-dé tá xica-dé núu ndute cuáhá<sup>n</sup>  
cuátnahá ñáhá-dē xii-gá. <sup>30</sup> Te ní cut-  
nùnì iní-dé sá ìo ñíhi xico táchí, te ní  
ngüíta-dé yùhú-dé. Te òré-ni-á<sup>n</sup> tá quèe  
naa-dé xití ndute cuáhá<sup>n</sup> ní cūu, te ñíhi  
ní cáhá<sup>n</sup>-dē xáha<sup>n</sup>-dē xii Jèsús:

—jMèstrú, vá dāñá-n quèe naa-í xití  
ndute! —càchí-dé xáha<sup>n</sup>-dē xii-gá.

<sup>31</sup> Te òré-ni-á<sup>n</sup> ní tñii Jèsús ndaha-dé,  
te ní xáha<sup>n</sup>-gá xii-dé:

—¿Ná cuèndá ñá túu sàndáá ndisa iní  
ñáhá-n xii-í sàni ñí<sup>n</sup> sani úú iní-n-i? —  
càchí-gá xáha<sup>n</sup>-gá xii-dé.

<sup>32</sup> Te òré cuánguee Jèsús ndìhi té Pèlú  
xití bàrcú, te òré-ni-á<sup>n</sup> ní ngüíñí táchí.

<sup>33</sup> Te cue tée ñùhu xití bàrcú-á<sup>n</sup> ní ngüíñí  
xití-güedé núu-gá, te xáha<sup>n</sup>-güedé xii-gá:

—Sá ndàá sá cuítí sá díú yòhó  
cúu-n Dēhe Dútú Ndiòxí —càchí-güedé  
xáha<sup>n</sup>-güedé xii-gá.



**Jèsús quidé tătna-gá ñáyiú cùhú ì<sup>n</sup>  
xichi núú nání Gènesarét**

(Mr. 6:53-56)

<sup>34</sup>Te ní quexìo Jesús ndìhi cue tée xìca cuu ndìhi-gá ndàa ìngá xio yuhu làgúná, te núú ní quexìo-gá ndìhi-güedé-á<sup>n</sup> nání-xí Gènesarét. <sup>35</sup>Te nchaa ñáyiú xìn-decu xíá<sup>n</sup> ní cutnùní ìní-yu sá dfú-gá ní quexìo, te ní dátècú tnúhu-yu nchaa ìava-gá ñáyiú xìn-decu yatni xíá<sup>n</sup> sá ní quexìo-gá. Te ndècá-yu nchaa ñáyiú cùhú ndécú ndìhi-yu cuáhá<sup>n</sup> núú ndécú Jèsús. <sup>36</sup>Te nchaa ñáyiú cùhú-á<sup>n</sup> ní ngúíta-yu càhá<sup>n</sup> ndàhú-yu núú Jèsús sá ná dàna-gá tnàndeé-yu cuèdicó luha yuhu dǒo-gǎ cuendá ndúha-yu, te cue ñáyiú cùhú, ñáyiú ní tnàndeé yuhu dǒo-gǎ ní ndúha-yu.

**Cuendá nchaa sá quidé-xí  
ngündecu cuéchi ñáyiú**

(Mr. 7:1-23)

**15** Te sátá dúcá<sup>n</sup> te ì<sup>n</sup> ũú cue tée cùu fariséú ní quee-güedé ñuú Jerusálén, ndìhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés ní quexìo-güedé núú ndécú Jèsús, te xǎha<sup>n</sup>-güedé xii-gá:

<sup>2</sup>—¿Ná cuendá cue tée xìca cuu ndìhi-n ñá túú nàquete-güedé ndaha-güedé òré caxi-güedé nàcuáa ní cachí cue ñání tnáhá-ó ní xìn-decu ndéé sanaha-i? —càchí-güedé xǎha<sup>n</sup>-güedé xii-gá.

<sup>3</sup>Te Jèsús ní xáha<sup>n</sup>-gǎ xii-güedé:

—Te nchòhó tucu, ¿ná cuendá ñá túú quide-ndo nàcuáa ní cachí Yǎ Ndiǒxí cada-ndo, núú da nàcuáa ta quide cue tée ñuyíú-a quide-ndo-i? <sup>4</sup>Te Yǎ Ndiǒxí càchí-gá núú tütú-gá: “Canehe-ndo sǎ yíñuhu núú tǎtá-ndó ndìhi núú nǎná-ndó”, càchí-gá. Te càchí tucu-gá ìngá xichi núú tütú-gá: “Nchaa ñáyiú na càhá<sup>n</sup> úhú tǎtá-xi àdi náná-xi te

cahni ñaha-güedé xii-yu”, duha càchí-gá núú tütú-gá. <sup>5</sup>Dico nchòhó càchí-ndó sǎ cuè ñáyiú chi cuu cúnàhá-yu xii tǎtá-yu àdi náná-yu: “Vá cúú chindee ñaha-ndí xii-n, chi sá táxí-ndí xii-n ni cùu, xǎ<sup>n</sup> ní nduu cuendá Yǎ Ndiǒxí”, cuu duha cúnaha ñáyiú xii tǎtá-yu àdi náná-yu càchí-ndó. <sup>6</sup>Te càchí-ndó sǎ cuè ñáyiú duca<sup>n</sup> na cúnaha xii tǎtá-xi àdi náná-xi te ñá túú-gǎ tàú-yu chindèé-yu ni tǎtá-yu ni nǎná-yu. Te duca<sup>n</sup> quide-ndo chi ní dáquéé tǎhú-ndó nàcuáa ní cachí Yǎ Ndiǒxí cada-ndo, te mee-ni nàcuáa ta quide cue tée ñuyíú-a véxi nchícú<sup>n</sup> nihnu-ndo quide-ndo. <sup>7</sup>¿Te nchòhó cúú-ndó ñáyiú ío dándahú méé-xí, chi càchí-ndó sǎ quidé ndǎá-ndó te ñá ndǎá sá quidé ndǎá-ndó! Te ní quee ndǎá-xi nàcuáa ní chídó tnùní ndíi Chàíá tée ní xóo càhá<sup>n</sup> tnúhu Yǎ Ndiǒxí ndéé sanaha núú tütú-gá núú càhá<sup>n</sup>-xi nàcuáa ní càhá<sup>n</sup>-gǎ cuendá-ndó, te duha ní cachí-gá:

<sup>8</sup>Ñáyiú-a càchí-yu sá ío càhnu cuu-í dico dicó-ni yuhu càhá<sup>n</sup>-yu, chi duu<sup>n</sup> duu<sup>n</sup> ñá túú ñuhu ìní ñáhǎ-yu xii-í.

<sup>9</sup>Te àú<sup>n</sup> nǎ cuu chìnuhu ñahá-yu xii-í chi ñá túú vèdana ndéé nándíhi-xi, chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sá ní cahu ìní cue ñáyiú ñuyíú-a càhá<sup>n</sup>-yu.

Duha ní chídó tnùní ndíi Chàíá núú tütú Yǎ Ndiǒxí nàcuáa ní càhá<sup>n</sup>-gǎ cuendá-ndó —càchí-gá xǎha<sup>n</sup>-gǎ xii-güedé.

<sup>10</sup>Te ní xáha<sup>n</sup>-gǎ xii cue ñáyiú:

—Chí táquixi ndehe iha, te cundedóho váha-ndo tnúhu na càhá<sup>n</sup>-í, te ío váha cuáha-ndo cuendá. <sup>11</sup>Nchaa sá xéxí-ndó chi ñá túú nǎ quidé-xí ìní-ndó, dico nchaa sá cuèhé sá dúhá sàni ìní-ndó càhá<sup>n</sup>-ndó nchàa xǎ<sup>n</sup> quidé-xí ndècu cuéchi-ndo —càchí-gá xǎha<sup>n</sup>-gǎ xii-yu.

<sup>12</sup>Te cue tée xica cuu ndihi-gá ní sáhá<sup>n</sup>-güedé ndéé núú-gă, te xăha<sup>n</sup>-güedé xii-gá:

—Véxi-ndí cächí tnúhu-ndí xii-n sá cuè tée cùu fariséú nă túú cùu váha iní-güedé cuendá tnúhu ní cáhá<sup>n</sup>-n — cächí-güedé xăha<sup>n</sup>-güedé xii-gá.

<sup>13</sup>Te ní xăha<sup>n</sup>-gă xii-güedé:

—Nchaa năyiu nă túú cùu cuendá Tătà-í Dútú Ndiöxí cuíta nihnú-yu, chi năyiu-á<sup>n</sup> cúŭ-yu dàtná nchaa cùhú să nă túú nàndíhi te tnúhu năyiu. <sup>14</sup>Te vá cádá cuendá-ndó nàcuáa cəhá<sup>n</sup> cue tée-á<sup>n</sup>, chi cùu-güedé dàtná cue năyiu cuàá sácuíta nehe tnàha. Te nchòhó xini-ndó să nŭu ì<sup>n</sup> năyiu cuàá ná cuítá nèhe tucú-yu ingá năyiu cuàá, te ndí ndùú-yu quée-yu déhvä —cächí-gă xăha<sup>n</sup>-gă xii-güedé.

<sup>15</sup>Te té Pèlú ní xăha<sup>n</sup>-dē xii-gá:

—Cächí tnúhu xii-ndí nàcuáa quèe-xi tnúhu ní cáhá<sup>n</sup>-n-ă<sup>n</sup> —cächí-dé xăha<sup>n</sup>-dē xii-gá.

<sup>16</sup>Te Jèsús ní xăha<sup>n</sup>-gă:

—¿Năa tnàhá nchòhó nă túú ní təcú tnùní-ndó nàcuáa ndùu tnúhu ní cáhá<sup>n</sup>-í núú năyiu-ă<sup>n</sup> nă? <sup>17</sup>Nchaa sá xéxi-yu cuánguee-xi xití-yu, te dàtnùní năyăha năha-xi xii-yu. <sup>18</sup>Dico nchaa tnúhu cuèhé tnúhu duha cəhá<sup>n</sup>-yu xíă<sup>n</sup> véxi quene-xi iní-yu, te diu nchaa xíă<sup>n</sup> quídé-xí ndècu cuéchi-yu. <sup>19</sup>Te iní-yu-ă<sup>n</sup> cáci niñnu nchaa sá cuèhé sá dúhá, chi sàni cuèhé sání duha iní-yu, te sàhní-yu tnàha năyíu-yu, te cue tée cəhá<sup>n</sup> ndihi-güedé năyiu dîhí te nă dŭú nădîhí-güedé cúŭ-yu. Te diu-ni duca<sup>n</sup> quide cue năyiu dîhí cəhá<sup>n</sup> ndihí-yu cue tée te nă dŭú yî-yu cùu-güedé, te cuèi tée te cuèi nădîhí mee-ni ìchi dŭí iní cúdŭí iní-yu cundecú-yu, te dùhu ndachiu<sup>n</sup> tnahá-yu, te dàcuandehndé-yu, te cəhá<sup>n</sup> cuèhé-yu cuendá tnàha năyíu-yu. <sup>20</sup>Te nchaa xíă<sup>n</sup> quídé-xí ndècu cuéchi-yu, dico nă dŭú să nă túú ndàhá-yu dàtná ní cachí cue tée ndéé sanaha, chi xíă<sup>n</sup> nă

túú quide-xi cuendá ngúndecu cuéchi-yu —cächí-gă xăha<sup>n</sup>-gă xii-güedé.

**Ë<sup>n</sup> nădîhí năha cùu năní tnàhá năyiu canànea ní sándáá iní-a<sup>n</sup> Jèsús**

(Mr. 7:24-30)

<sup>21</sup>Te Jèsús ní xica-gă cuáhá<sup>n</sup>-gá ní sáa-gă yucu cue tée nŭú Tírú, ndihi yucu cue tée nŭú Sidón. <sup>22</sup>Te ì<sup>n</sup> nădîhí năha cùu năní tnàhá năyiu canànea ndécú yàtní-a<sup>n</sup> xíă<sup>n</sup>, te niñi ta cəhá<sup>n</sup>-a<sup>n</sup> ní quexio núú ndécú Jèsús, te xăha<sup>n</sup>-a<sup>n</sup> xii-gá:

—¿Mèstrú, năní tnàhá ndî Dàvií, cundàhú iní năhá xii-í cada tátna-n dēhe yoco-í! Chi yîhi năha espírítú cundîhi yucu năvăha xii-xi te ío dândoho năha-xi —cachí-a<sup>n</sup> xăha<sup>n</sup> xii-gă.

<sup>23</sup>Dico Jèsús nă túú tnàhí ní cəhá<sup>n</sup>-gă, te cue tée xica cuu ndihi-gá ní sáhá<sup>n</sup>-güedé núú-gă, te xăha<sup>n</sup>-güedé xii-gá:

—Cúñaha xii năha-á<sup>n</sup> ná nùhú-a<sup>n</sup>, chi ío niñi cəhá<sup>n</sup>-a<sup>n</sup> nchícú<sup>n</sup> năhá-á<sup>n</sup> xii-o —cachí-güedé xăha<sup>n</sup>-güedé xii-gă.

<sup>24</sup>Te Jèsús ní xăha<sup>n</sup>-gă xii-güedé:

—Yá Ndiöxí ní tendaha năha-gă xii-í véxi-í mee-ni nŭú núú xindecu cue năyiu isràél, chi năyiu-ă<sup>n</sup> cúŭ-yu dàtná cue mbéé cue quití ní xíta, chi ta xíta niñnu-yu cuáhá<sup>n</sup> —cächí-gă xăha<sup>n</sup>-gă xii-güedé.

<sup>25</sup>Te nădîhí-á<sup>n</sup> ní sáhá<sup>n</sup>-a<sup>n</sup> ndéé núú Jèsús ní ngúñí xítí-á<sup>n</sup>, te xăha<sup>n</sup>-a<sup>n</sup> xii-gá:

—¿Mèstrú, chindee năha xii-í! —cächí-a<sup>n</sup> xăha<sup>n</sup>-a<sup>n</sup> xii-gă.

<sup>26</sup>Te Jèsús ní xăha<sup>n</sup>-gă xii-a<sup>n</sup>:

—Vá cúú chindee-í cue năyiu nă túú cùu năyiu isràél, chi ì<sup>n</sup>-ni cùu-xi núu na quèhe<sup>n</sup>-o paá cúú cuendá cue landú te cuáha-o ìná caxi-dí —cächí-gă xăha<sup>n</sup>-gă xii-a<sup>n</sup>.

<sup>27</sup>Dico năha-á<sup>n</sup> ní xăha<sup>n</sup>-a<sup>n</sup> xii-gá:

—Ndáá cəhá<sup>n</sup>-n, dico cue iná chi nàdatacá-güedí sá ngóyó yùhu cóho xítóhó-güedí —cächí-a<sup>n</sup> xăha<sup>n</sup>-a<sup>n</sup> xii-gă.

<sup>28</sup>Te Jèsús ní xăha<sup>n</sup>-gă xii-a<sup>n</sup>:

—¡Yòhó ñaha cùhú déhe-xi, ío váha sàndáá iní ñáhá-n xii-í! Te na càda-í nàcuáa cuiní-n —càchí-gá xáha<sup>n</sup>-gá xii-a<sup>n</sup>.

Te òré-ni-á<sup>n</sup> ñí ndúha déhe-a<sup>n</sup>.

### Jèsús quidé tātna-gá vai ñáyiu cùhú

<sup>29</sup> Te sátá dúcá<sup>n</sup> ñí cuu te Jèsús ní xica-gá cuáhá<sup>n</sup>-gá ní yáha-gá yuhu làgúná distritú Galileá, te cuásaá-gá ñí tindúú te xíá<sup>n</sup> ñí ngóo-gá. <sup>30</sup> Te xíá<sup>n</sup> núcòo-gá ní quexio cuéhé víhí ñáyiu, te ndécá-yu ñáyiu yacua, ndihi ñáyiu ní yíchí ñí xio ndaha-xi, ndihi ñáyiu cuáá, ndihi ñáyiu ñìhí, te vai dava-gá cue ñáyiu cùhú tñahá dava-gá núú cuéhé ndécá-yu ní quexio núú ndécú-gá. Te ní taxi ndecu ñàhá-yu núú Jèsús te ní quide tātna ñaha-gá xii-yu te ní ndúha-yu. <sup>31</sup> Te nchaá ñáyiu xíndecu-á<sup>n</sup> ño ní cuñúhu-yu sá dúcá<sup>n</sup> ñí xiní-yu ní cuu ní nacáhá<sup>n</sup> nchaá ñáyiu ñìhí, ndihi cuèndá sá ñí ndúha nchaá cue ñáyiu yacua, ndihi cuèndá sá ñí ndúha cue ñáyiu ní yíchí ñí xio ndaha-xi, ndihi cuèndá sá ñí ndúha núú cuè ñáyiu cuáá. Te nchaá-yu ní cachí-yu sá ño càhnu cuu Yá Ndiòxí Yaá cúú Ndiòxí cue ñáyiu isràél.

### Jèsús dácàxi-gá cúmí mĩl cue tée te ñí ñáyiu ñìhí ndihi landú

(Mr. 8:1-10)

<sup>32</sup> Te Jèsús ní cana-gá cue tée xica cuu ndihi-gá, te ní xáha<sup>n</sup>-gá xii-güedé:

—Yúhú cùndàhú iní-í nchaá ñáyiu-a, chi sa ní cuu úní nduu ndècu ndihi ñàhá-yu xii-o ñha, te ñá túú tñahí-gá sá caxí-yu, te ñá túú cuiní-í natendaha-í-yu núhú tñamá-yu vehé-yu, chi ná ndéé cuáhá<sup>n</sup> cuneé-yu docó ichi —càchí-gá xáha<sup>n</sup>-gá xii-güedé.

<sup>33</sup> Te ní xáha<sup>n</sup>-güedé xii-gá:

—¿Te ndèé ñíhí-ó sá cuñaha-o càxi nchaá ñáyiu-a, te ío cuéhé-yu te ñá

túú ñá ño ñha chi cùu-xi xití yucu-i? —càchí-güedé xáha<sup>n</sup>-güedé xii-gá.

<sup>34</sup> Te Jèsús ní xicá<sup>n</sup> tñuhú-gá núú-güedé, te xáha<sup>n</sup>-gá:

—¿Ná daha-gá pàá ndécú ndihi-ndo-i? —cachí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Ndècu ndihi-ndí úsá-gá tñahá pàá ndihi ñí ùú-gá chácá —càchí-güedé xáha<sup>n</sup>-güedé xii-gá.

<sup>35</sup> Te Jèsús ní xáha<sup>n</sup>-gá xii nchaá ñáyiu sá ná ngóo-yu nchaá-yu, te ní ngóo-yu. <sup>36</sup> Te ní quehe<sup>n</sup>-gá ndi úsá pàá-á<sup>n</sup> ndi ñí ùú-gá chácá-á<sup>n</sup>, te ní ndacá<sup>n</sup> táhú-gá núú Yá Ndiòxí, te dāt-nùnì ní táhú cuèchi-gá pàá-á<sup>n</sup> ndihi chácá-á<sup>n</sup> te ní sàñaha-gá xii cue téé xica cuu ndihi-gá ní dácàhñu-güedé nchaá ñáyiu-á<sup>n</sup>. <sup>37</sup> Te nchaá-yu ní xexí-yu ní ndahá xití-yu. Te sátá ñí túhú còhò-yu te ní nadatàcá-güedé nchaá sá ñí quendóo, te ní chítú úsá tñahá tídihi mee-ni sá ñí quendóo-á<sup>n</sup>. <sup>38</sup> Te núú ncháá ñáyiu ní xexi te ní xínu cúmí mĩl mee-ni cuè téé chi diu-ni cue téé-á<sup>n</sup> ñí quíundehu, te ñí cue ñáyiu ñìhí ndihi cue landú. <sup>39</sup> Te sátá dúcá<sup>n</sup> te Jèsús ní dándácá ñàha-gá xii-yu, te cuánguee-gá bàrcú cuáhá<sup>n</sup>-gá yucu cue téé ñúú Màgdalá.

### Cue tée cùu fariséú ndihi cue tée cùu saducéú xáha<sup>n</sup>-güedé xii Jèsús cada-gá ñí sá vǎ yòo tñahí ndàcu cada

(Mr. 8:11-13; Lc. 12:54-56)

**16** Te cue téé cùu fariséú ndihi cue téé cùu saducéú ní sáa-güedé núú ndécú Jèsús xitó ndèé ñàhá-güedé xii-gá, te xáha<sup>n</sup>-güedé sá ná cadá-gá ñí sá vǎ yòo tñahí ndàcu cada cundehe-güedé nàcuáa cutnùnì iní-güedé ñú ndáá sá Yá Ndiòxí ní tendaha ñàha-gá xii-gá véxi-gá ñuyúyú-a. <sup>2</sup> Te Jèsús ní xáha<sup>n</sup>-gá xii-güedé:

—Nchòhó chi òré tá cuáa cuáhá<sup>n</sup> te ndàcoto-ndo andiu, te càchí-ndó: “Ío váha cada-xi tneé chi càa vícò tícuèhé andiu”, duha càchí-ndó. <sup>3</sup> Te òré dátneé

ndácòto tucu-ndo andiu, te cächí-ndó: “Vá cádá vâha-xi nduu vitna chi ticuèhé andiu, te càa vícò”, duha cächí-ndó. ;Dico nchòhó cúu-ndó ñâyiu ío dândahú méé-xí sã quidé ndää te ñã ndää sã quidé ndää-ndó! Te cùtnuní iní-ndó nâcuáa quide-xi andiu, dico ñã tûú cùtnuní iní-ndó nâcuáa quèe-xi nchaa sã quidé Yã Ndiöxí vitna. <sup>4</sup>Dico nchaa nchòhó ñâyiu ndècu ñuyíú vitna ío cuihna iní-ndó, te ñã tûú cuíní-ndó càda ndää-ndó nûú Yã Ndiöxí, te cuíní-ndó càda-í ii<sup>n</sup> sã vã yò tñàhí ndàcu cada dico ñã tûú ñãgá cada-í, chi diu-ni nâcuáa ní quide Yã Ndiöxí ndíi Jònás diu-ni duca<sup>n</sup> càda tucu-gá vitna —cächí-gá xãha<sup>n</sup>-gã xii-güedé.

Te duca<sup>n</sup> te ní xica-gá cuáhã<sup>n</sup>-gã ndihi cue tée xica cuu ndihi-gã.

### **Cuendá cue tée cùu fariséú ndihi cuendá cue tée cùu saducéú**

(Mr. 8:14-21)

<sup>5</sup>Te òré ní quexio ndihi ñaha-gã xii-güedé ndaa ingá xio yuhu làgúná, te ní ndacu iní-güedé sã ní cunaa-güedé canehe-güedé pãá quíhí<sup>n</sup> caxi-güedé. <sup>6</sup>Te Jèsús ní cáhá<sup>n</sup>-gã dóho-güedé, te xãha<sup>n</sup>-gã xii-güedé:

—Na cächí tñúhu-í xii-ndo sã ïo quíhi iní-ndó cùndecu-ndo, te vã cádá cuendá tñàhí-ndo lèvadurá cue tée cùu fariséú ndihi cue tée cùu saducéú —cächí-gã xãha<sup>n</sup>-gã xii-güedé.

<sup>7</sup>Te ní ngüíta-güedé xitnãha-güedé:

—Cuendá sã ñã tûú ní cãnehe-o pãá quixi xíã<sup>n</sup> duha càhá<sup>n</sup>-gã —cächí-güedé xitnãha-güedé.

<sup>8</sup>Te Jèsús ní cutnùní iní-gã nâcuáa ndùu tñúhu xitnãha-güedé, núu ní xãha<sup>n</sup>-gã xii-güedé:

—Nchòhó chi ñã tûú sãndáá iní ñáhã vâha-ndo xii-í nûu xíã<sup>n</sup> da sã ñã tûú ní cãnehe-ndo pãá quixi càhá<sup>n</sup>-ndó. <sup>9</sup>¿Te náa ñã ndácú iní-ndó sã nûú úhú<sup>n</sup>-ni pãá, te ní taxi-í ní dácãhñu-ndo ñ

xexi úhú<sup>n</sup> mĩl cue tée, chi diu-ni cue tée-á<sup>n</sup> ñí quíúndehu, te sátá ñí tûhú cóhó-güedé te ní chítú títñí tídihi mee-ni sã ñí quendóo-ã<sup>n</sup>? Te ñã tècú tñuní-ndó nâcuáa quèe-xi nâcuáa ní quide-í. <sup>10</sup>¿Te náa ñã ndácú tucu iní-ndó sã nûú ùsã-ni pãá te ní taxi-í ní dácãhñu tucu-ndo ñí xexi cúmĩ mĩl cue tée, chi diu-ni cue tée-á<sup>n</sup> ñí quíúndehu, te sátá ñí tûhú cóhó-güedé te ní nadatãcã-ndó nchaa sã ñí quendóo, te ní chítú títñí tídihi mee-ni sã ñí quendóo-ã<sup>n</sup>? <sup>11</sup>Dico nchòhó chi ñã tûú ní quide cuendã-ndó nâcuáa ndùu tñúhu càhá<sup>n</sup>-í òré ní cachí-í sã vã quéhé<sup>n</sup> cuendã-ndó lèvadurá cue tée cùu fariséú ndihi cue tée cùu saducéú, chi ñã díú cuendã pãá ní cãhá<sup>n</sup>-í —cächí-gã xãha<sup>n</sup>-gã xii-güedé.

<sup>12</sup>Te sátá dúcã<sup>n</sup> ñí xãha<sup>n</sup> Jèsús xii cue tée xica cuu ndihi-gã, te ní tecú tñuní-güedé sã xãha<sup>n</sup>-gã xii-güedé sã vã tñí-güedé tñúhu càhá<sup>n</sup> cue tée cùu fariséú ndihi cue tée cùu saducéú, te ñã díú cuendã levadurá sã quíhu yuchi cuãha pãá ní cãhá<sup>n</sup>-gã.

### **Té Pèlú xãha<sup>n</sup>-dẽ xii Jèsús sã díú-gã cúu-gã Cristú**

(Mr. 8:27-30; Lc. 9:18-21)

<sup>13</sup>Te Jèsús ní quexio-gã yucu cue tée ñuú Cèsareá Filipú, te ní xícã<sup>n</sup> tñúhú-gã núú cuè tée xica cuu ndihi-gã, te xãha<sup>n</sup>-gã xii-güedé:

—¿Yoo cùu yúhú Tée cùu ñãní tñáhã-ndó nchãa-ndo cachí cue ñâyiu-va? —cächí-gã xãha<sup>n</sup>-gã xii-güedé.

<sup>14</sup>Te ní xãha<sup>n</sup>-güedé xii-gã:

—Davã-yu cächí-yu sã cúu-n ndíi Juáá tée ní xóo dacuãndute ñaha xii ñâyiu, te davã-yu cächí-yu sã cúu-n tẽ Èliás, te davã-yu cächí-yu sã cúu-n ndíi Jeremías tée ní xóo cáhá<sup>n</sup> tñúhu Yã Ndiöxí ndéé sanaha, àdi cuu-n ingá tée ní xóo cáhá<sup>n</sup> tñúhu-gã ndéé sanaha, duha cächí-yu —cächí-güedé xãha<sup>n</sup>-güedé xii-gã.

<sup>15</sup>Te Jèsús ní xícá<sup>n</sup> tnúhú tùcu-gá núú-güedě, te xáha<sup>n</sup>-gã xii-güedě:

—Te nchòhó, ¿yoo sàni iní-ndó cùu-í-í? —càchí-gá xáha<sup>n</sup>-gã xii-güedě.

<sup>16</sup>Te té Xímú, àdì Pelú chi úú òu-dé, ní xáha<sup>n</sup>-dě xii-gá:

—Yòhó cùú-n Cristú Yaá ní tendaha Yá Ndiòxí véxi ñuyúú-a, te diu Yá Ndiòxí cùú-gá Yaá ndécú nchaa nduu nchaa quúú, te yòhó cùú-n Dèhe-gá —càchí-dé xáha<sup>n</sup>-dě xii-gá.

<sup>17</sup>Te Jèsús ní xáha<sup>n</sup>-gã xii-dé:

—Yòhó té Xímú dèhe té Jònás, ío váha táhú-n chi mee Tàtá-í Dútú Ndiòxí ní dácáhú iní ñáhá-gã xii-n nàcuáa cunduú tnúhu cáhá<sup>n</sup>-n, te ñá díú ì<sup>n</sup> ñáyíu ñuyúú-a duca<sup>n</sup> ni dàcahu iní ñáhá-yu xii-n tnúhu-á<sup>n</sup>. <sup>18</sup>Te yúhú xáha<sup>n</sup>-í Pèlú xii-n, te tnúhu-á<sup>n</sup> quée-xí yúú, chi quèè ndáá-xi nàcuáa nàni-n, chi cuu-n ì<sup>n</sup> téé vá cání ì<sup>n</sup> caní úú iní-xi canu ichi-n cuè ñáyíu nàcuáa cundecu ndihí ñáhá-yu xii-í. Te nchaa ñáyíu cùu cuendá-í vá ndácú yùcu ñávàha dacuítà nihnu ñaha-xi xií-yu. <sup>19</sup>Te yúhú taxi-í tnúhu ndee iní cundecu ndihí-n cuendá cunuu-n núú cuè ñáyíu yìndaha ñaha Yá Ndiòxí, te nchaa sá ná càhá<sup>n</sup>-n sá cùú-xí sá vâha, te diu-ni duca<sup>n</sup> cáhá<sup>n</sup> Yá Ndiòxí, te nchaa sá ná càhá<sup>n</sup>-n sá ñà túú cùu-xi sá vâha, te diu-ni duca<sup>n</sup> cáhá<sup>n</sup> tucu-gá, chi quide-n nacuáa cuíní-gá —càchí-gá xáha<sup>n</sup>-gã xii-dé.

<sup>20</sup>Te sáta dúcá<sup>n</sup> te ní xáha<sup>n</sup> Jèsús xii cue téé xica cuu ndihí-gá sá vâ yò cùñaha-güedě sá díú-gã cùú-gã Cristú Yaá ní tendaha Yá Ndiòxí véxi ñuyúú-a.

**Jèsús càhá<sup>n</sup>-gá sá cáhni  
ñaha-güedě xii-gá**

(Mr. 8:31-9:1; Lc. 9:22-27)

<sup>21</sup>Te ndéé dàvá-á<sup>n</sup> ñí ngúíta Jèsús xáha<sup>n</sup>-gã xii cue téé xica cuu ndihí-gá:

—Dacuítí sá quíhí<sup>n</sup>-í ñuú Jerusalén, te yácá<sup>n</sup> cue téé cùu sacuéhé núú ñáyíu is-ràél, ndihí cue dútú cúnùu, ndihí cue téé

dàcuaha ñaha xii ñáyíu nchaa tnúhu ní chídó tnùní ndíi Moisés, nchaa cue téé-á<sup>n</sup> ìo dandòho ñaha-güedě xii-í, te cahni ñaha-güedě, dico nduu úní sá cùú-í te ndoto-í —càchí-gá xáha<sup>n</sup>-gã xii-güedě.

<sup>22</sup>Te té Pèlú ní cana-dé Jèsús ì<sup>n</sup> xio, te ní ngúíta-dé ténàà ñáhá-dě xii-gá, te xáha<sup>n</sup>-dě:

—¿Sá vâ càchí Ndiòxí sá dúcá<sup>n</sup> ndòho-n chi ñà túú tàu-n sá dúcá<sup>n</sup> ndòho-n! —cachí-dé xáha<sup>n</sup>-dě xii-gá.

<sup>23</sup>Te ndàa sáta Jèsús nútníí té Pèlú òré duca<sup>n</sup> xáha<sup>n</sup>-dě xii-gá núu ní nchócuíhnu-gá, te xáha<sup>n</sup>-gã xii-dé:

—¿Xocuñí yòhó yucu ñávàha núú-í-a chi dicó quidé tnèñu-n! Chi ñà túú sàni iní-ò dàtná sání iní Yá Ndiòxí chi ì<sup>n</sup>-ni sàni iní-ò ndihí dava-gá cue ñáyíu ndècu ñuyúú-a —càchí-gá xáha<sup>n</sup>-gã xii-dé.

<sup>24</sup>Te sáta dúcá<sup>n</sup> te ní xáha<sup>n</sup>-gã xii nchaa cue téé xica cuu ndihí-gá:

—Nchaa ñáyíu cuíní chitnahá ñáhá xii-í, te xini ñuhu-xi dañá-yu vá cáda-gã-yu sá sání iní méé-yu, te ío cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. <sup>25</sup>Te nchaa ñáyíu cuíní sá ñà túú tnàhí ná yáha cundecu ñuyúú-a cuíta nihnú-yu, dico nchaa ñáyíu ñà túú tnàhí yùhú cuèi nándi sá ná yáha-yu cundecú-yu ñuyúú-a sá cuendá-í, te ñáyíu-á<sup>n</sup> naníhí tàhú-yu. <sup>26</sup>Te cuèi nchaandi túhú sá ìo ñuyúú-a na nihí ñáyíu cundecu ndihí-yu, dico núu diu nchaa xíá<sup>n</sup> ná càda cuíta nihnú-yu te ñà túú vèdana nàndíhi-xi sá dúcá<sup>n</sup> ndècu ndihí-yu nchaa xíá<sup>n</sup>. Te ni ì<sup>n</sup> sá ìo ñuyúú-a vá chindèe ñaha-xi xií-yu cuendá naníhí tàhú-yu. <sup>27</sup>Te ndáá quée-xí tnúhu càhá<sup>n</sup>-í, chi na quixi tucu yúhú Téé cùu ñani tnáhá-yu nchaá-yu, te dàvá-á<sup>n</sup> quini-yu sá ìo càhnu cuu-í dàtná càhnu cuu Tàtá-í Dútú Ndiòxí, te quixi-í ndihí cue espíritú xínú cuèchi núú-gã, te dàvá-á<sup>n</sup> cuàha-í nchaa ñáyíu sá ndúú tàhú-yu nàcuáa ndùu sá ñí

quidé-yu ì<sup>n</sup> ì<sup>n</sup>-yu. <sup>28</sup> Te na càchí tnúhu ndáá-í xii-ndo sã ío dava nchòhò ñáyiú ndècu iha vitna vá cùú-ni-ndo, chi cundecu-ni-ndo ndèè quini-ndó quixi tucu yúhú Tée cùu ñaní tnáhá-ndó nchàa-ndo taxi tnumí-í nchaa ñáyiú —càchí-gá xáha<sup>n</sup>-gã xii-güedé.

### Ní nadáma dóó Jèsús ndihi núú-gã

(Mr. 9:2-13; Lc. 9:28-36)

**17** Te núú ìnú nduu sá dúcá<sup>n</sup> ní cáhá<sup>n</sup> Jèsús, te ní xica-gá cuásaá-gá ì<sup>n</sup> yucu dùcú<sup>n</sup>, te ndèca-gá té Pèlú, ndihi té Jàcobó, ndihi té Juàá ñaní té Jàcobó-án cuásaá. Te úní tnàhí-ni cue tée-án ndéca-gã cuásaá. <sup>2</sup> Te yucu-án ndécú-gã ní nadáma núú-gã ndihi dóó-gã, te núú-gã súúni dàtása<sup>n</sup>-xi dàtná quidé-xí núú nchìcanchii, te dóó-gã súúni ní nduu cuixí<sup>n</sup> dàtná cáá ñúhú cuixí<sup>n</sup>. <sup>3</sup> Te òré-ni-án ní xiní-güedé ndíi Moisés ndihi té Èliás nútñi-güedé ndihi-gá ndátnúhu ndihi ñaha-güedé xii-gá. <sup>4</sup> Te té Pèlú ní xáha<sup>n</sup>-dè xii Jèsús:

—Mèstrú, ¡váha ní cuu sá ndécú-ó iha vitna! Te núu cuini-n, te na dàcaa-ndí úní tnàhá vehe tnuvixi<sup>n</sup>, te ì<sup>n</sup> cuu cuendá-n, te ì<sup>n</sup> cuu cuendá té Moisés, te ì<sup>n</sup> cuu cuendá té Èliás —càchí-dé xáha<sup>n</sup>-dè xii-gá.

<sup>5</sup> Te ñini dùca<sup>n</sup> cáhá<sup>n</sup> té Pèlú ní quexìo ì<sup>n</sup> vícò núú ndécú-güedé ní dádàhu ñaha-xi xii-güedé te súúni chàhnchí. Te xití vícò-ã ní tecú ní cáhá<sup>n</sup> Yá Ndiòxí, te xáha<sup>n</sup>-gã xii-güedé:

—Tée-a cùu-dé Déhe-í tée ío cùu iní-í, te ío cùdí iní-í-dé, te cundedóho-ndo nchàa tnúhu càhá<sup>n</sup>-dé —duha ní xáha<sup>n</sup>-gã xii-güedé.

<sup>6</sup> Te sá dúcá<sup>n</sup> ní cáhá<sup>n</sup> Yá Ndiòxí ní tecú dóho cue tée xica cuu ndihi Jèsús te ío ní yúhú-güedé, te ní ngüñí xítí-güedé te ní nuu núú-güedé ndàa núú ñúhú. <sup>7</sup> Te Jèsús cuáhá<sup>n</sup>-gá núú xindecu cue tée xica cuu ndihi-gá, te ní tendaha ñaha-gá, te xáha<sup>n</sup>-gã xii-güedé:

—Chí ndácuñí, vá yúhú-ndó —càchí-gá xáha<sup>n</sup>-gã xii-güedé.

<sup>8</sup> Te òré ní ndanehe núú-güedé, te ñá túú-gã ní xiní-güedé cue tée úú-á<sup>n</sup> chi mee-nã Jèsús. <sup>9</sup> Te òré cuánuu ndíi ñaha Jèsús xii-güedé tindúú-ã<sup>n</sup>, te ní xáha<sup>n</sup>-gã xii-güedé:

—Vá yòo cúnaha-ndo ní ì<sup>n</sup> sá ní xiní-ndó núú ní sáá-ó-á, te cuu cáhá<sup>n</sup>-ndó dico ndéé ná yáha ndoto yúhú Tée cùu ñaní tnáhá-ndó nchàa-ndo sá cùú-í —càchí-gá xáha<sup>n</sup>-gã xii-güedé.

<sup>10</sup> Te cue tée xica cuu ndihi-gá ní xáha<sup>n</sup>-güedé xii-gá:

—Cuini-ndí cachí tnúhu-n ná cuendá cue tée dàcuaha ñaha xii ñáyiú nchaa tnúhu ní chídó tnùnì ndíi Moisés càchí-güedé sá dñha-gá té Èliás quixi, te dàtnùnì quixi Yáá tendaha Yá Ndiòxí quixi ñuyúú-a —càchí-güedé xáha<sup>n</sup>-güedé xii-gá.

<sup>11</sup> Te Jèsús ní xáha<sup>n</sup>-gã xii-güedé:

—Ndáá sá códó núu ì<sup>n</sup> tée quixi-dé te cada-dé dàtná ní quide té Èliás te tée-án cada ndáá-dé nchaa nàcuáa cùu.

<sup>12</sup> Te na càchí tnúhu-í xii-ndo vitna sá sã ní quixi tée ní quide dàtná ní xóo cada té Èliás, te cue ñáyiú ñá túú ní cùtnunì iní-yu sá díú-dé, te ní quide ñàhá-yu xii-dé nchaa nàcuáa ní quixi iní mèè-yu, te diu-ni duca<sup>n</sup> càda ñaha tucú-yu xii yúhú Tée cùu ñaní tnàhá-yu ncháa-yu, chi dandòho ñàhá-yu xii-í —càchí-gá xáha<sup>n</sup>-gã xii-güedé.

<sup>13</sup> Te cue tée xica cuu ndihi-gá ní cut-nùnì iní-güedé sá cuendá ndíi Juàá tée ní xóo dacuàndute ñaha xii ñáyiú ní cáhá<sup>n</sup>-gã.

### Jèsús quidé tãtna-gá ì<sup>n</sup> tée cuechi tnàhá cuéhé xiyíhí

(Mr. 9:14-29; Lc. 9:37-43)

<sup>14</sup> Te Jèsús ní nasáá-gá ndihi cue tée ní sáá ndihi-gá tindúú-ã<sup>n</sup> núú xindecu vãi ñáyiú, te ní quexìo ì<sup>n</sup> tée núú-gã ní ngüñí xítí-dé, te xáha<sup>n</sup>-dè xii-gá:

15—Mèstrú, cundàhú iní déhe-í chi tnàhá-dé cuéhé xiyíhí, te ío dándoho ñaha-xi xii-dé, te ní cuu vai xito daquée ñaha-xi núú ñùhú xii-dé, te ní cuu vai tucu xito dangauñihu ñaha-xi ndute xii-dé. 16 Te sa ndèca-í-dé ní quixi núú cuè té xica cuu ndihi-n dico ñá túú ní ndacu-güedé cada tátna ñaha-güedé xii-dé —càchí-dé xáha<sup>n</sup>-dè xii-gá.

17 Te Jèsús ní xáha<sup>n</sup>-gá xii nchaa ñáyiú xíndecu-á<sup>n</sup>:

—Nchaa nchòhó ñáyiú ndècu ñuyíú-a, ío sáá iní-ndó chi ñá túú cuíní-ndó quíndáá iní-ndó Yá Ndiöxí, te ní cuu vai nduu quide ndee iní-í nchaa sá quídé-ndó. ¿Te ná ndéé ama vá dúcá<sup>n</sup>-gá cada-ndo-i? Te chí cándèca téè cùhú-á<sup>n</sup> táquixi iha —cachí-gá xáha<sup>n</sup>-gá xii-yu.

18 Te Jèsús ní tenáá-gá espíritú cündìhi yucu ñávàha yìhi ñaha xii téé-á<sup>n</sup>, te ní quee ñaha-xi xii-dé, te òré-ni-á<sup>n</sup> ní ndúha-dé.

19 Te sáta dúcá<sup>n</sup> te òré ndécú mèe Jesús ndihi cue téè xica cuu ndihi-gá, te ní xicá<sup>n</sup> tnúhú-güedé núú-gá, te xáha<sup>n</sup>-güedé xii-gá:

—Cachí tnúhu xii-ndí ná cuendá ñá túú ní ndacu-ndí queñuhu-ndí espíritú cündìhi yucu ñávàha yìhi ñaha xii téé-á<sup>n</sup> —càchí-güedé xáha<sup>n</sup>-güedé xii-gá.

20 Te Jèsús ní xáha<sup>n</sup>-gá xii-güedé:

—Te ñá túú ní ndacu-ndo, chi ñá túú sàndáá ndisa iní-ndó Yá Ndiöxí. Te na càchí tnúhu ndáá-í xii-ndo sá ñú nchòhó quíndáá ndisa iní-ndó Yá Ndiöxí cuèdicó luha líí dàtná líhli ndíquí<sup>n</sup> yutnu nàni mostázá, te duca<sup>n</sup> te cuu cúñaha-ndo xii ì<sup>n</sup> tìndúú xocuñí-xi núú ndécú-xí te xocuñí-xi. Te nchaa núú sá vàha ndacu-ndo càda-ndo te núu na quíndáá iní ndisa-ndo Yá Ndiöxí. 21 Te xini ñuhu-xi sá ío cáhá<sup>n</sup> ndihi-ndo-gá te ñá túú tnàhí ná caxi-ndo cáhá<sup>n</sup> ndihi-ndo-gá, te duca<sup>n</sup> te ndacu-ndo queñuhu-ndo espíritú cündìhi yucu ñávàha yìhi ñaha xii ñáyiú, dàtná cúú

espíritú sá yíhí ñaha xii téé-á<sup>n</sup> ní cùu —cachí-gá xáha<sup>n</sup>-gá xii-güedé.

### Jèsús càhá<sup>n</sup> tucu-gá sá cáhni ñaha-güedé xii-gá

(Mr. 9:30-32; Lc. 9:43-45)

22 Te nini xica cuu Jesús ndihi cue téè xica cuu ndihi-gá distritú Galileá, te ní xáha<sup>n</sup>-gá xii-güedé:

—Yúhú Téè cùu ñaní tnàhá-ndó nchaa-ndo sáá ì<sup>n</sup> nduu te cuáha cuendá ñáhá-güedé xii-í núú cuè téè cùu úhú iní ñáhá, 23 te cahni ñaha-güedé xii-í dico nduu úní sá cùú-í te ndoto-í —càchí-gá xáha<sup>n</sup>-gá xii-güedé.

Te sá dúcá<sup>n</sup> ní xáha<sup>n</sup>-gá xii-güedé, te ío ní ndíhú iní-güedé.

### Díhú<sup>n</sup> cuendá veñúhu

24 Te òré ní quexìo Jesús ndihi cue téè xica cuu ndihi-gá ñúú Capèrnaúm, te cue téè quide cobrá díhú<sup>n</sup> cuendá veñúhu ní sáhá<sup>n</sup>-güedé ní cáhá<sup>n</sup> ndihi-güedé té Pèlú, te xáha<sup>n</sup>-güedé:

—¿Cháhu mèstrú-ndó úú díhú<sup>n</sup> sá nání drácmá cuendá veñúhu á<sup>n</sup> ñáhá? —càchí-güedé xáha<sup>n</sup>-güedé xii-dé.

25 Te té Pèlú ní xáha<sup>n</sup>-dè:

—Cháhu-dé —càchí-dé xáha<sup>n</sup>-dè xii-güedé.

Te té Pèlú cuánguihu-dé xití vehe núú ndécú Jèsús, te díhna-gá ní cáhá<sup>n</sup>-gá, te xáha<sup>n</sup>-gá xii-dé:

—Xímú, ¿nása sàni iní-n, ná cúú ñáyiú quide cobrá ñáhá cuè téè yìndaha ñáyiú ndècu ñuyíú-a cuendá nchaa sá ndúú yáhu ñúú-güedé ndihi cuendá nchaa díhú<sup>n</sup> sá ngàútnàha, cue ñáyiú ñúú-güedé á<sup>n</sup> cuè ñáyiú véxi xica quide cobrá-güedé? —càchí-gá xáha<sup>n</sup>-gá xii-dé.

26 Te té Pèlú ní xáha<sup>n</sup>-dè xii-gá:

—Cue ñáyiú véxi xica quide cobrá-güedé —càchí-dé xáha<sup>n</sup>-dè xii-gá.

Te Jèsús ní xáha<sup>n</sup>-gá xii-dé:

—Te núu duca<sup>n</sup> te cue ñáyiú ñúú-güedé ñá túú ñă chăhu-yu te núu duca<sup>n</sup>. <sup>27</sup>Dico cuendá sá vă yõo dasátú-ó iní-xi, te cuahá<sup>n</sup> làgúná te dàquée-n sá tní<sup>n</sup> chácá xití ndute, te chácá díhnanuu na tàva-n te cundehe-n yùhu-dì, chi yìhi ì<sup>n</sup> díhú<sup>n</sup> cuixí<sup>n</sup>. Te díhú<sup>n</sup>-ă<sup>n</sup> canehe-n quíhí<sup>n</sup> cháhu-n cuendá-í ndíhi cuendá-n, chi díhú<sup>n</sup>-ă<sup>n</sup> sa tnahá quéyăhu cuendá-ó ndì ndúú-ó —càchí-gá xăha<sup>n</sup>-gă xii-dé.

**Cue tée ndücu tnúhu núú  
Jèsús yoo ío-gá cúnùu**

(Mr. 9:33-37; Lc. 9:46-48)

**18** Te sátá dúcá<sup>n</sup> te cue tée xìca cuu ndíhi Jesús ní sáhá<sup>n</sup>-güedé núú-gă, te xăha<sup>n</sup>-güedě xii-gá:

—Cachí tnúhu xii-ndí, yoo ío-gá cúnùu núú cuè ñáyiú yindaha ñaha Yá Ndiõxí —càchí-güedé xăha<sup>n</sup>-güedě xii-gá.

<sup>2</sup>Te Jèsús ní cana-gá ì<sup>n</sup> té líhli te ní sanutnî ñaha-gă xii-dé cuádava tnuú-güedé. <sup>3</sup>Te xăha<sup>n</sup>-gă xii-güedé:

—Na càchí tnúhu ndáá-í xii-ndo să nũu vă dáñá-ndó nchàa sá ñà túú văha quide-ndo, te nduu ndàhú iní-ndó dàtná ndàhú iní té líhli-a, te vă ndúú tãhú-ndó ndíhu ndaha ñaha Yá Ndiõxí xii-ndo. <sup>4</sup>Te ñáyiú quide datná quidé tē líhli-a ndàhú iní-yu, te ñá túú quide cahnú-yu mēé-yu, ñáyiú-ă<sup>n</sup> ìo cunùú-yu núú ndécú Yá Ndiõxí táxí tnùní-gá. <sup>5</sup>Te nchaa ñáyiú na quèhe<sup>n</sup> cuendá ì<sup>n</sup> landú dàtná té líhli-a cuendá sá cúú iní ñáhă-yu xii-í ñá, te cada iní-yu sá yùhú ní quehe<sup>n</sup> cuendá-yu —càchí-gá xăha<sup>n</sup>-gă xii-güedé.

**Quihi iní-ó vă cündècu-o  
ichi cuehé ichi duha**

(Mr. 9:42-48; Lc. 17:1-2)

<sup>6</sup>Te Jèsús xăha<sup>n</sup> tucu-gá xii-güedé:

—Te núu ì<sup>n</sup> tée na dàcahá<sup>n</sup>-dé cue ñáyiú sàndáá iní ñáhá xii-í cadă-yu nándi sá cuèhé sá dúhá, te vâha-gá

sá ná dàcutu ndeé-güedé ì<sup>n</sup> yúú yõdó dũcú<sup>n</sup>-dē, te dàquée ñaha-güedě xii-dé xití ndute làmár, te ñá díú să cündècu-dé duca<sup>n</sup> càda-dé. <sup>7</sup>Te ndàhú ní cuu nchaa ñáyiú xîndecu ñuyúú-a, chi coo cue tée dacáhá<sup>n</sup> ñáhá xii-yu cadă-yu nándi sá cuèhé sá dúhá te dacuití să dúcá<sup>n</sup> càda-xi! ;Dico ndàhú ní cuu cue tée duca<sup>n</sup> na dàcahá<sup>n</sup> ñáhá xii-yu cadă-yu nándi sá cuèhé sá dúhá!

<sup>8</sup>Te núu ì<sup>n</sup> xio ndaha-ndo àdi ì<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehndé-ndó ná cuíta, chi vâha-gá sá nánihí tãhú-ndó cuèi na cuíta ì<sup>n</sup> xio ndaha-ndo àdi ì<sup>n</sup> xio sáhá-ndó, te ñá díú să quíhí<sup>n</sup>-ndó ñihíí ní ndúú-ndó nũú ñùhú núú càyú. <sup>9</sup>Te núu ì<sup>n</sup> xio tinùu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chi vâha-gá sá nánihí tãhú-ndó cuèi na cuíta ì<sup>n</sup> xio tinùu-ndo, te ñá díú să ndì ndúú xio núú-ndó quíhí<sup>n</sup>-ndó nũú ñùhú núú càyú.

**Cuendá ì<sup>n</sup> mbéé quiti ní xíta**

(Lc. 15:3-7)

<sup>10</sup>Te vă dáquée tihú-ndó cuè ñáyiú cùu cuendá-í cuèi cùú-yu ñáyiú ío ndàhú iní-xi. Te na càchí tnúhu-í xii-ndo să cuè espíritú xínú cuèchi núú Yá Ndiõxí, cue espíritú néhé cuendá ñáhá xii-yu ñuyúú-a, nchaa-ni nduu nchaa-ni òré ndécú-xí nũú Tàtà-í Dútú Ndiõxí Yá ndécú àndiu. <sup>11</sup>Te duca<sup>n</sup> chi yùhú Tée cùu ñaní tnáhá-ndó nchàa-ndo véxi-í ñuyúú-a dàcácu nihnu-í ñáyiú núú ùhú núú ndàhú, ñáyiú ta xíta nihnu cuáhá<sup>n</sup>.

<sup>12</sup>Te nása sàni iní-ndó cuendá ì<sup>n</sup> tée ndècu ì<sup>n</sup> ciendú mbéé-xi?, chi núu na cuíta ì<sup>n</sup>-dì te dàndóo-dé cúmídícó sãhú<sup>n</sup> cúmí-dì cundecu-dì ì<sup>n</sup> yucu te quíhí<sup>n</sup>-dé cúnúndúcú-dē quiti ní xíta-á<sup>n</sup>. <sup>13</sup>Te núu na nánihí-dē-dì, te nchòhó sa cùtnuní iní-ndó să ío-gá cudíí ìní-dé cuendá quiti ní xíta-á<sup>n</sup> òré naníhí-dē-dì dàcúúxí cúmídícó sãhú<sup>n</sup> cúmí quiti ñá



túú ní xíta-á<sup>n</sup>. <sup>14</sup>Te duca<sup>n</sup> sãtnahá-xi quide Tátá-ó Dütú Ndiöxi Yáá ndécú àndiü, chi cuíní-gá sá vã cuíta ni ì<sup>n</sup> cue ñáyiü cüü cuendá-gá.

**Cada càhnu iní-ó sã quidé  
ñaha tñaha ñáyiü-o**

(Lc. 17:3)

<sup>15</sup>Te núu ì<sup>n</sup> ñáyiü ndècu ndihi-ndo ní quidé-yu ì<sup>n</sup> sá ñà túú tàú-yu cadá-yu sá cúú-xí-ndó, te cãhá<sup>n</sup>-ndó dôho-yu núú méé núú ì<sup>n</sup>-ndó ndihí-yu cuendá sá ná ndixi cuéchi iní-yu sá ñà túú quide váha-yu. Te núu ní tñí-yu tñúhu ní xáha<sup>n</sup>-ndo xí-yu, te ní ndacu-ndo ñí nacanu ichi-ndö-yu. <sup>16</sup>Te núu ñá túú ní cuíní-yu tñí-yu tñúhu xáha<sup>n</sup>-ndo xí-yu, te nducu-ndo ì<sup>n</sup> àdi úú tñàhá cue téé canehe núú-güedé cuendá cundedóho-güedé nàcuáa ndüü tñúhu ndàtñúhu-ndo ndihí-yu. <sup>17</sup>Te tñàhá cue téé-á<sup>n</sup> cãhá<sup>n</sup>-güedé dôho-yu, dico núu ni tñúhu cãhá<sup>n</sup> cue téé-á<sup>n</sup> ñà túú ní cuíní-yu tñí-yu, te dàtúu-ndo núú dàva-gá ñáyiü ndècu ndihi-ndo ichi Xítóhó Jesucristú cuendá cutnùní iní-yu nàcuáa quide ñáyiü-á<sup>n</sup>. Te núu ñáyiü ndècuéchi-á<sup>n</sup> ñà túú ní cuíní-yu tñí-yu tñúhu sá ñí xáha<sup>n</sup> dàva-gá cue ñáyiü ndècu ichi-gá, te cada-ná iní-ndó sã cúú-yu ñáyiü ñà túú ndècu ichi Yá Ndiöxi dàtná cue téé cuihna iní-xi quide cobrá ñáhá xii ñáyiü cuendá impuèstú.

<sup>18</sup>Te na càchí tñúhu ndáá-í xii-ndo sã núu nchòhó ná càchí-ndó sã ndécú cuéchi ñáyiü, te diu-ni duca<sup>n</sup> cãhá<sup>n</sup> Yá Ndiöxi, àdi cachí-ndó sã ñà túú cuéchi-yu te diu-ni duca<sup>n</sup> cãhá<sup>n</sup> tucu-gá, te duca<sup>n</sup> chi nchòhó quidé-ndó nàcuáa cãhá<sup>n</sup>-gá.

<sup>19</sup>Te na càchí tñúhu-í xii-ndo sã núu úú tñàhá-ndó cüü ì<sup>n</sup>nuu-ndo cahá<sup>n</sup> ndihi-ndo Tãtà-í Dütú Ndiöxi Yáá ndécú àndiü xicá<sup>n</sup>-ndó núú-gã núu ná cúú sã cuíní-ndó, te taxi-gá núu ná cúú sã xicá<sup>n</sup>-ndó núú-gã. <sup>20</sup>Te núu

úú tñàhá-ndó àdi úní tñàhá-ndó ñí nataká-ndó ì<sup>n</sup> xichi cuendá sá ñúhú ìní ñáhá-ndó xii-í, te xíá<sup>n</sup> ndécú ndihi ñaha-í xii-ndo —càchí-gá xáha<sup>n</sup>-gã xii-güedé.

<sup>21</sup>Te té Pèlú ní sáhá<sup>n</sup> ndehe yatni-dé núú Jèsús, te xáha<sup>n</sup>-dè xii-gá:

—Mèstrú, cachí tñúhu xii-í ná daha xito cada càhnu iní-í tñaha ñáyiü-í te núu ì<sup>n</sup> sá ná càda ñahá-yu xii-í. ¿Cuèdicó úsá xito-ã<sup>n</sup>? —càchí-dé xáha<sup>n</sup>-dè xii-gá.

<sup>22</sup>Te Jèsús ní xáha<sup>n</sup>-gã xii-dé:

—Yúhú càchí-í sá ñà díú-ní úsá xito cada càhnu iní-n-yu, chi únídico úxí xito ndihi úsá ndihi úsá xito cada càhnu iní-n-yu —càchí-gá xáha<sup>n</sup>-gã xii-dé.

**Cuendá téé ñá túú quide  
cahnu iní tñaha ñáyiü-xi**

<sup>23</sup>Te xáha<sup>n</sup> tucu-gá xii-güedé:

—Na càni-í ì<sup>n</sup> cuendú núú-ndó nàcuáa tecú tñùní-ndó nàcuáa cada-xi òré ndíhu ndaha ñaha Yá Ndiöxi xii ñáyiü. ì<sup>n</sup> téé yìndaha ñaha xii ñáyiü ní sani iní-dé sá cadá ndáá-dé ndihi cue téé xinu cuechi núú-dè cuendá nchaa sá tàú-güedé núú-dè. <sup>24</sup>Te òré sa ní ngúndecu túha-dé te ní quexio ì<sup>n</sup> téé xinu cuechi núú-dè. Te téé-á<sup>n</sup> tàú-dé cuéhé víhí díhú<sup>n</sup> núú-dè, chi tàú-dé úxí míl díhú<sup>n</sup> sã nání tàlentú.

<sup>25</sup>Te téé xinu cuechi-á<sup>n</sup> ñà túú díhú<sup>n</sup> ndécú ndihi-dé nacháhu-dé sá tàú-dé núú patróó<sup>n</sup>-dè-á<sup>n</sup>, núu xíá<sup>n</sup> ní táuchíú<sup>n</sup> tée cüü patróó<sup>n</sup>-dè-á<sup>n</sup> dico ñaha-güedé xii-dé ndihi ñadìhí-dé ndihi cue déhe-dé ndihi nchaa sá ndécú ndihi-dé cuendá nchaá-yu cuú-yu ñáyiü ñà túú tñahí dàhá quee núú chíú<sup>n</sup> patróó<sup>n</sup>-xi, te duca<sup>n</sup> te ndéyáhu sá tàú-dé núú patróó<sup>n</sup>-dè.

<sup>26</sup>Te téé xinu cuechi-á<sup>n</sup> ñí ngüíñí xítí-dé núú patróó<sup>n</sup>-dè, te xáha<sup>n</sup>-dè: “Patróó<sup>n</sup>, cãhá<sup>n</sup> ndàhú-í núú-n sã ño ndee ño càhnu cada iní-n sã dúhá tàú-í núú-n, te ñà túú ñà cani iní-n chi nacháhu-í nchaa sá tàú-í núú-n”, càchí-dé xáha<sup>n</sup>-dè xii

patrón-dě. <sup>27</sup> Te tée cùu patrón-dě-á<sup>n</sup> nĩ cundáhu iní ñáhá-dě xii-dé, te ní quide cãhnu iní ñáhá-dě, te ní dáña ñaha-dé cuánuhú-dé. <sup>28</sup> Te tée xinu cuechi-á<sup>n</sup> nĩ naníhí-dě ì<sup>n</sup> tée xinu cuechi ndíhi-dé ichi cuánuhú-dé, te tée ní naníhí-dě-á<sup>n</sup> tàú-dé sacú-ni díhú<sup>n</sup> nũú-dě chi ì<sup>n</sup> ciendú-ni díhú<sup>n</sup> denariú tàú-dé. Te ní tnií-dé tée tàú nũú-dě-á<sup>n</sup> dácuehné ñáhá-dě xii-dé, te xãha<sup>n</sup>-dë: “Nacháhu sá tàú-n nũú-í<sup>n</sup>”, cãchí-dé xãha<sup>n</sup>-dë. <sup>29</sup> Te tée tàú-á<sup>n</sup> nĩ ngúíñĩ xítí-dě núú tée dii nũú-xi tàú-dé-á<sup>n</sup>, te xãha<sup>n</sup>-dë: “Cãhá<sup>n</sup> ndàhú-í núú-n sã cáda cãhnu iní ñáhá-n xii-í sá tàú-í núú-n, te nacháhu cuè-í nchaa sá tàú-í núú-n”, cãchí-dé xãha<sup>n</sup>-dë. <sup>30</sup> Dico tée dii nũú-xi tàú-dé-á<sup>n</sup> ñà túú ní cuíní-dé cada ndee ìní-dé cundetú-dé nacháhu cuèè tée-á<sup>n</sup> sã tàú-dé, chi ní chihi ñaha-dě vecaá cuendá yàcá<sup>n</sup> quihi-dé ndéé nacháhu-dé nchaa sá tàú-dé. <sup>31</sup> Te dava-gá cue tée xinu cuechi ní xiní-güedé nàcuáa ní quide tée-á<sup>n</sup>, te ní cudéé<sup>n</sup>-güedé núú-dë, te ní sáhá<sup>n</sup>-güedé ní xítñũhu-güedé tée cùu patrón-güedé sá dúcá<sup>n</sup> nĩ quide-dé. <sup>32</sup> Te tée cùu patrón-güedé-á<sup>n</sup> nĩ cana-dé tée duca<sup>n</sup> nĩ quide-á<sup>n</sup>, te ní xãha<sup>n</sup>-dë: “Yòhó cúú-n ì<sup>n</sup> tée ío cuihna ìní-xi xinu cuechi núú-í, chi yúhú ní quide cãhnu iní ñáhà-í xii-n cuendá nchaa sá tàú-n nũú-í òré ní cáhá<sup>n</sup> ndàhú-n. <sup>33</sup> Te tñahá yòhó tàú-n dùca<sup>n</sup> cada-n cada cãhnu iní-n tée xinu cuechi ndíhi-n núú-í cuendá nchaa sá tàú-dé núú-n dàtná ní quide ñaha-í xii-n nĩ quide cãhnu iní-í cuendá nchaa sá tàú-n”, cãchí tée cùu patrón-á<sup>n</sup> xãha<sup>n</sup>-dë xii tée duca<sup>n</sup> nĩ quide-á<sup>n</sup>. <sup>34</sup> Te tée cùu patrón-á<sup>n</sup> nĩ cudéé<sup>n</sup> víhí-dë sá dúcá<sup>n</sup> nĩ quide tée-á<sup>n</sup>, te ní táúchíú<sup>n</sup>-dë dandòho ñaha-güedé xii-dé ndéé nacháhu-dé nchaa sá tàú-dé —duha ní caní Jèsús cuendú núú-güedé.

<sup>35</sup> Te xãha<sup>n</sup> tùcu-gá xii-güedé:

—Dàtná ní quide tée cùu patrón-á<sup>n</sup> nĩ dándòhó-dë tée tàú núú-dë-á<sup>n</sup> duca<sup>n</sup>

càda ñaha Tátà-í Dútú Ndiòxí Yaá ndécú àndiú xii-ndo, te núu vá ní yùhu ní iní-ndó càda cãhnu iní-ndó sã quidé ñaha tñaha ñáyiu-ndo xii-ndo —cachí-gá xãha<sup>n</sup>-gã xii-güedé.

**Jèsús cãhá<sup>n</sup>-gá cuendá cue ñáyiu dàña tñaha**

(Mr. 10:1-12; Lc. 16:18)

**19** Te sátá nĩ yáha duca<sup>n</sup> nĩ cáhá<sup>n</sup> Jèsús, te ní ndee-gá distritú Galileá cuáhá<sup>n</sup>-gá ndaa ingá xio yúte Jòrdán yucu distritú Jùdeá. <sup>2</sup> Te ío cuéhé ñáyiu nchicú<sup>n</sup> ñáhá xii-gá cuáhá<sup>n</sup>, te yàcá<sup>n</sup> ní quide tátna-gá nchaa ñáyiu cùhú.

<sup>3</sup> Te ní quexìo ì<sup>n</sup> úú cue tée cùu fariséú núú ndécú Jèsús xító ndèè ñáhá-güedé xii-gá nũu nása cunduu tñũhu cáhá<sup>n</sup>-gá, te xãha<sup>n</sup>-güedé xii-gá:

—Véxi-ndí xicá<sup>n</sup> tñũhú-ndĩ núú-n, ¿cuu dàña ì<sup>n</sup> tée ñadìhí-dé nũu ndè-dani càa ì<sup>n</sup> sá ñà túú cundáá-yu-á<sup>n</sup>? —cãchí-güedé xãha<sup>n</sup>-güedé xii-gá.

<sup>4</sup> Te Jèsús ní xãha<sup>n</sup>-gã xii-güedé:

—Te nchòhó, ¿náa ñá túú dàcuaha-ndo núú tütú Yã Ndiòxí, te diu núú tütú-gá cãhá<sup>n</sup>-xi sá cùtnahá ní cadúha-gá ñáyiu, te tée ñadìhí ní cadúha-gá-á<sup>n</sup>? <sup>5</sup> Te duha cãchí tucu-xi núú tütú Yã Ndiòxí nàcuáa ní cáhá<sup>n</sup>-gá: “Cue tée na nihí ñadìhí-xi te ñií<sup>n</sup>-ná cada-güedé tátá-güedé ndíhi nãhá-güedé, chi ñadìhí-nã-güedé cuu cuu ndíhi-güedé, te cada iní-ndó sã ì<sup>n</sup>-ná yiqui cùnú cuú-yu cundecú-yu”, duha cãchí Yã Ndiòxí núú tütú-gá. <sup>6</sup> Te xíá<sup>n</sup> nũu cada iní-ndó sã cuè ñáyiu úú-á<sup>n</sup> ì<sup>n</sup>-ná yiqui cùnú cúú-yu, te ñá túú-gá ndi díí<sup>n</sup> ndi díí<sup>n</sup> yiqui cuúú cúú-yu. Núu xíá<sup>n</sup> ñá túú ndiú váha-xi dàña cuè tée ñadìhí-güedé, chi mee Yã Ndiòxí ní cachí-gá sá cúú úú-yu cundecú-yu —cãchí Jèsús xãha<sup>n</sup>-gã xii-güedé.

<sup>7</sup> Te ní xãha<sup>n</sup>-güedé xii Jèsús:

—Te núu duca<sup>n</sup>, ¿te ná cuendá ndíi Moisés ní cachí ndíi sá núu ì<sup>n</sup> tée cuiní-dé dañá-dé ñadìhí-dé, te cuu cadúha-dé ì<sup>n</sup> tutú núu càhá<sup>n</sup>-xi sá ní dǎná-dé ñadìhí-dé, te duca<sup>n</sup> te cuu dañá ñaha-dé ní cachí ndíi vǎ<sup>n</sup>? —càchí-güedé xǎha<sup>n</sup>-güedé xii-gá.

<sup>8</sup>Te Jèsús ní xǎha<sup>n</sup>-gǎ xii-güedé:

—Te duca<sup>n</sup> ní cachí ndíi Moisés sá cúu dàña-ndo ñadìhí-ndó, chi nchòhó ío sǎá iní-ndó, dico ndéé dǐhna chi ní tecú tnúhu nchaa cue tée sá vǎ dǎná-güedé ñadìhí-güedé. <sup>9</sup>Dico yúhú càchí tnúhu-í xii-ndo sǎ núu ì<sup>n</sup> tée na dǎña-dé ñadìhí-dé te naquehe<sup>n</sup>-dé ingá ñadìhí te ío nèhé quidé-dé, te núu ñá díú cuendá sá càhá<sup>n</sup> ndìhi-a<sup>n</sup> ingá tée duca<sup>n</sup> na dàña ñaha-dé. Te sá dúcá<sup>n</sup> cuendá-ni na dàña ì<sup>n</sup> tée ñadìhí-dé, te ì<sup>n</sup>-ni cuéchi cùu-xi ndìhi cuéchi quide tée ndéca ñadìhí te càhá<sup>n</sup> ndìhi-dé ingá ñadìhí —càchí-gǎ xǎha<sup>n</sup>-gǎ xii-güedé.

<sup>10</sup>Te cue tée xica cuu ndìhi-gǎ ní xǎha<sup>n</sup>-güedé xii-gá:

—Te núu duca<sup>n</sup> cùu cuendá cue tée ndìhi ñadìhí-güedé, te váha-gǎ sá vǎ cǎndéca cue tée ñadìhí —càchí-güedé xǎha<sup>n</sup>-güedé xii-gá.

<sup>11</sup>Te Jèsús ní xǎha<sup>n</sup>-gǎ xii-güedé:

—Ñá ncháá ñǎyiu duca<sup>n</sup> ndùu tǎhǔ-yu cundecú-yu, chi mee-ni ñǎyiu ní cachí Yǎ Ndiòxí sá dúcá<sup>n</sup> tnàhí nduu tǎhú cundecu mee. <sup>12</sup>Te ío cue tée duca<sup>n</sup> tnàhí ní nduu tǎhú-güedé ndéé òré ní cacu-güedé sá vǎ cǎndéca-güedé ñadìhí. Te ío cue tée ñá ndácú-güedé candéca-güedé ñadìhí cuendá sá ní quide ñaha dàva-gǎ cue tnàha tée-güedé xii-güedé. Te dava-güedé ñá túú cǎndéca-güedé ñadìhí chi cuiní-güedé sá vǎ dǎná ndéé-güedé cunu cuechi-güedé núu Yǎ Ndiòxí. Te nchaa cue tée duca<sup>n</sup> ní nduu tǎhú nǔú Yǎ Ndiòxí cundecu mee, te váha-ni te núu na cundecu mee-güedé —càchí-gǎ xǎha<sup>n</sup>-gǎ xii-güedé.

### Jèsús xicá<sup>n</sup> tǎhú-gǎ núu Yǎ Ndiòxí cuendá landú

(Mr. 10:13-16; Lc. 18:15-17)

<sup>13</sup>Te ì<sup>n</sup> úú ñǎyiu ndécá-yu landú líhli cuáhá<sup>n</sup> núu Jèsús, chi cuiní-yu sá téndàha ñaha-gǎ xii-güexi, te cǎcá<sup>n</sup> tǎhú-gǎ núu Yǎ Ndiòxí cuendá-güexi. Te cue tée xica cuu ndìhi-gǎ ní ngüíta-güedé ténáá ñáhá-güedé xii-yu, te xǎha<sup>n</sup>-güedé sá vǎ dúcá<sup>n</sup> càdá-yu. <sup>14</sup>Te Jèsús ní xǎha<sup>n</sup>-gǎ xii-güedé:

—Chí dǎná ná quixi nahi cue landú líhli-á<sup>n</sup> nùu-í-a, te vǎ càdí-ndó ìchi-güexi, chi dàtná cúu vǎha iní cue landú líhli-á<sup>n</sup> duca<sup>n</sup> cùu váha iní cue ñǎyiu yindaha ñaha Yǎ Ndiòxí —càchí-gǎ xǎha<sup>n</sup>-gǎ xii-güedé.

<sup>15</sup>Te ní tendaha ñaha-gǎ xii-güexi, te ní xicá<sup>n</sup> tǎhú-gǎ núu Yǎ Ndiòxí cuendá-güexi, te sátá dúcá<sup>n</sup> ní quide-gǎ te ní xica-gǎ cuáhá<sup>n</sup>-gǎ.

### Ì<sup>n</sup> tée cuica càhá<sup>n</sup> ndìhi-dé Jèsús

(Mr. 10:17-31; Lc. 18:18-30)

<sup>16</sup>Te ì<sup>n</sup> tée cuechi ní quexio-dé núu ndécú Jèsús, te xicá<sup>n</sup> tnúhú-dé núu-gǎ, te xǎha<sup>n</sup>-dé xii-gá:

—Yòhó Mèstrú, cùu-n tée ío váha iní-xi, te cuiní-í núu vá cündéé iní-n càchí tnúhu-n nǎ cúú sǎ vǎha cada-í cuendá nduu tǎhú-í cundecu-í ndìhi Yǎ Ndiòxí ní caa ní quíhí<sup>n</sup> —càchí-dé xǎha<sup>n</sup>-dé xii-gá.

<sup>17</sup>Te Jèsús ní xǎha<sup>n</sup>-gǎ xii-dé:

—¿Te cùtnuní iní-n nàcuáa ndùu tnúhu càhá<sup>n</sup>-n sǎ yúhú váha iní-ǎ<sup>n</sup>?, chi ì<sup>n</sup> díi díi-ni Yǎ Ndiòxí ío váha iní-gǎ. Te núu cuiní-n nàníhí tǎhú-n te tñi-n nchàa tnúhu càhá<sup>n</sup> Yǎ Ndiòxí, tnúhu sá sánú ìchi ñaha xii ñǎyiu nàcuáa cada-yu cundecú-yu —càchí-gǎ xǎha<sup>n</sup>-gǎ xii-dé.

<sup>18</sup>Te tée cuechi-ǎ<sup>n</sup> ní xǎha<sup>n</sup>-dé xii-gá:

—¿Te ndéndida càa tnúhu càhá<sup>n</sup> Yǎ Ndiòxí cada-í-í? —càchí-dé xǎha<sup>n</sup>-dé xii-gá.

Te Jèsús ní xáha<sup>n</sup>-gǎ xii-dé:

—Te duha ní cachí Yǎ Ndiǒxí cada ñáiyu: “Vá cáhní-ndó tnàha ñáiyu-ndo, vá càhá<sup>n</sup> ndihi-ndo ñàdihí te núu ñá díú ñàdihí-ndó cùu-yu, te duca<sup>n</sup>-ni nchòhó cue ñáiyu dìhí tucu vá càhá<sup>n</sup> ndihi-ndo tée te núu ñá díú yìi-ndo cuu-güedé, te vá dúhú-ndó sǎ ndécú ndìhi tnaha ñáiyu-ndo, vá dácàcu-ndo cuéchi neñúú sá cúu-xí tnàha ñáiyu-ndo. <sup>19</sup> Te canehe-ndo sǎ yíñùhu núú tǎtá-ndó ndìhi núú nǎná-ndó, te cundàhú iní-ndó tnàha ñáiyu-ndo dàtná cundàhú iní-ndó mèe-ndo”, duha ní cachí Yǎ Ndiǒxí cada ñáiyu —càchí-gǎ xǎha<sup>n</sup>-gǎ xii-dé.

<sup>20</sup> Te tée cuechi-ǎ<sup>n</sup> ní xáha<sup>n</sup>-dè xii-gǎ:

—Nchaa xǎ<sup>n</sup> ní ngüíta-í quidè-í ndéé cútnàhá cúú làndú-í, ¿te vitna nágá cúmǎní cada-í-i? —càchí-dé xǎha<sup>n</sup>-dè xii-gǎ.

<sup>21</sup> Te Jèsús ní xáha<sup>n</sup>-gǎ xii-dé:

—Te núu cuìní-n cùu-n ì<sup>n</sup> tée ío váha cada ndáá, te cuàhá<sup>n</sup> dico-n nchàa sá ndécú ndìhi-n, te díhú<sup>n</sup>-n cuàha táhú-n cuè ñáiyu ndàhú, te duca<sup>n</sup> te nduu táhú-n ngündecu váha-n núú ndécú Yǎ Ndiǒxí táxí tnùní-gǎ. Te sátá ná yàha duca<sup>n</sup> càda-n te quixi-n chìtnahá ñáhá-n xii-í —càchí-gǎ xǎha<sup>n</sup>-gǎ xii-dé.

<sup>22</sup> Te sá dúcá<sup>n</sup> ní xáha<sup>n</sup> Jèsús xii-dé te ío ní cundìyí-dé, chí ío cuica-dè, te ní xica-dé cuáhá<sup>n</sup>-dè.

<sup>23</sup> Te Jèsús ní xáha<sup>n</sup>-gǎ xii cue tée xica cuu ndìhi-gǎ:

—Na càchí tnúhu ndáá-í xii-ndo sǎ ío úhú quíndáá iní ñaha cuè ñáiyu cuica xii Yǎ Ndiǒxí cuendá ndíhu ndaha ñaha-gǎ xii-yu. <sup>24</sup> Te na càchí tnúhu tucu-í xii-ndo sǎ yǎchí-gǎ yáha ì<sup>n</sup> càméyu yaú ì<sup>n</sup> yiqui tìcú dàcúxí sǎ quíndáá iní ì<sup>n</sup> ñáiyu cuica Yǎ Ndiǒxí cuendá ndíhu ndaha ñaha-gǎ xii-yu —càchí-gǎ xǎha<sup>n</sup>-gǎ xii-güedé.

<sup>25</sup> Te sá dúcá<sup>n</sup> ní càhá<sup>n</sup> Jèsús, xǎ<sup>n</sup> ío ní cuñúhu cue tée xica cuu ndìhi-gǎ, te ní ngüíta-güedé xítnàha-güedé:

—¿Yoo nanhí tǎhú te núu duca<sup>n</sup> vǎi<sup>n</sup>? —càchí-güedé xítnàha-güedé.

<sup>26</sup> Te Jèsús ní ndacoto-gǎ núu-güedé, te xáha<sup>n</sup>-gǎ xii-güedé:

—Nchaa ñáiyu ñuyú-a chí vá ndácú-yu ná cadá-yu nàcuáa ndíhu ndaha ñaha Yǎ Ndiǒxí xii-yu, dico mee-gǎ chí ndacu-gǎ ndíhu ndaha ñaha-gǎ xii-yu chí nchaandi túhú sá váha ndàcu-gǎ quidè-gǎ —càchí-gǎ xǎha<sup>n</sup>-gǎ xii-güedé.

<sup>27</sup> Te té Pèlú ní xáha<sup>n</sup>-dè xii-gǎ:

—Nchúhú ní dándö-ndí nchaa sá ndécú ndìhi-ndí, te ní tuha ñaha-ndí xii-n, ¿te ná cúú sǎ nihí-ndí nduu táhú-ndí sá dúcá<sup>n</sup> ní quide-ndí-i? —càchí-dé xǎha<sup>n</sup>-dè xii-gǎ.

<sup>28</sup> Te Jèsús ní xáha<sup>n</sup>-gǎ xii-güedé:

—Na càchí tnúhu ndáá-í xii-ndo sǎ ná sàá nduu, nduu saa nchaa sá ío andiu ndìhi ñuyú-a, te dàvǎ-á<sup>n</sup> cunucóo yúhú Tée cùu ñaní tnáhá-ndó nchàa-ndo ì<sup>n</sup> núú xilé váha, te nchaa ñáiyu quini-yu sá ío càhnu cuu-í, te nchòhó cue tée ní tuha ñaha xii-í tnáhá-ndó cùnucóo-ndo núú ì<sup>n</sup> caa xilé váha ndi ùxúú tnáhá-ndó, te xía<sup>n</sup> cunucóo-ndo càda ndáá-ndó cuéchi ndi ùxúú xichi cue ñáiyu isràél. <sup>29</sup> Te nchaa ñáiyu na dándóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñàdihí-xi, àdi déhe-xi, àdi ñuhu-xi, te núu duca<sup>n</sup> na cadá-yu sá cuendá-í te ío-gǎ cuéhé sǎ cuàhana Yǎ Ndiǒxí cundecu ndihí-yu, te ñá díú-ní xǎ<sup>n</sup> chí tnáhá nduu táhú-yu cundecú-yu ndìhi-gǎ ní caa ní quíhí<sup>n</sup>. <sup>30</sup> Te dava ñáiyu cùnuu ndecu ichi Yǎ Ndiǒxí vitna, ñáiyu-á<sup>n</sup> sǎá nduu te vá ío-gǎ cunúú-yu dàtná cùnúú-yu vitna, te dava ñáiyu nchìcú<sup>n</sup> ñá túú cùnuu vitna, ñáiyu-á<sup>n</sup> sǎá nduu te ío cunúú-yu —càchí-gǎ xǎha<sup>n</sup>-gǎ xii-güedé.

**Cuendá cue tée quide chiu<sup>n</sup>**

**20** Te xáha<sup>n</sup> tucu Jesús xii cue tée xica cuu ndìhi-gǎ:

—Na càni-í ìḡ cuèndú núú-ndó cuèndá tecú tnúni-ndó nàcuáa cada-xi òré ndíhu ndaha ñaha Yá Ndiòxí xii ñáyiú. Ìḡ tée ní xitu-dé yoho yàha stilé, te ìḡ nduu ní quee-dé nehé-ni cuándúcú-dě cue tée cada chiú<sup>n</sup> núú dúcá<sup>n</sup> ní xitu-dé yoho yàha stilé-á<sup>n</sup>. <sup>2</sup>Te òré ní níhí-dě cue tée cada chiú<sup>n</sup>-á<sup>n</sup>, te ní quide ndáá-dé ndihi-güedé sá cháhu ñaha-dě xii-güedé ìḡ díhú<sup>n</sup> denàriú ìḡ nduu. Te sáta dúcá<sup>n</sup> te ní tendaha ñaha-dé xii-güedé cuáhá<sup>n</sup>-güedé cada chiú<sup>n</sup>-güedé núú dúcá<sup>n</sup> ní xitu-dé yoho yàha stilé-á<sup>n</sup>. <sup>3</sup>Te dàtnúni ní xica tucu-dé cuáhá<sup>n</sup>-dé dàtná òré caá íḡ dàtnéé cuándúcú-gă-dé cue tée cada chiú<sup>n</sup> núú ní xitu-dé yoho yàha stilé-á<sup>n</sup>, te ní xiní-dé xínutnî ìḡ úú cue tée núú yáhu te ñá túú nă chiú<sup>n</sup> xíquide-güedé. <sup>4</sup>Te ní xáha<sup>n</sup>-dě xii-güedé: “Ñá túú cùdana cuyáchí-ndó càda-ndo chiú<sup>n</sup>-í te cháhu ñaha-í xii-ndo nàcuáa tàú-xi cunduu-ă<sup>n</sup>”, càchí-dé xáha<sup>n</sup>-dě xii-güedé. Te cue tée-á<sup>n</sup> ní sáha-güedé tnúhu cada chiú<sup>n</sup>-güedé te ní xica-güedé cuáhá<sup>n</sup>-güedé. <sup>5</sup>Te tée ní xitu yoho yàha stilé-á<sup>n</sup> ní xica tucu-dé dàtná òré caúxúú nduu cuándúcú-gă-dé cue tée cada chiú<sup>n</sup>-dē, te ní níhí tucu-dé cue tée cada chiú<sup>n</sup>. Te ní quee tucu-dé dàtná òré caá úní sacuaa, te ðiu-ni ðuca<sup>n</sup> ní quide tucu-dé. <sup>6</sup>Te ní quee tucu-dé dàtná òré caá úhú<sup>n</sup> sacuaa cuándúcú-gă-dé cue tée cada chiú<sup>n</sup>-dē, te ní xiní-dé xínutnî ìḡ úú cue tée ðiu-ni núú yáhu-á<sup>n</sup> te ñá túú nă chiú<sup>n</sup> quide-güedé, te ní xáha<sup>n</sup>-dě xii-güedé: “Sànuu sá nchòhó ní cuu nchàca vitna ñá túú ñihí-ndó chiú<sup>n</sup> cada-ndo”, cachí-dé xáha<sup>n</sup>-dě xii-güedé. <sup>7</sup>Te cue tée-á<sup>n</sup> ní xáha<sup>n</sup>-güedé xii-dé: “Ñá túú ñihí-ndí chiú<sup>n</sup> cada-ndí chi vá yò ndùcu ñaha xii-ndí”, càchí-güedé xáha<sup>n</sup>-güedé xii-dé. Te ní xáha<sup>n</sup>-dě xii-güedé: “Yúhú taxi-í chiú<sup>n</sup> cada-ndo, te quíhí<sup>n</sup>-ndó núú ní xitu-í yoho yàha stilé yàcá<sup>n</sup> cada chiú<sup>n</sup>-ndo, te cháhu

ñaha-í xii-ndo nàcuáa tàú-xi cunduu”, càchí-dé xáha<sup>n</sup>-dě xii-güedé. <sup>8</sup>Te sáta ní dáhu nchíanchii, te tée dii chiú<sup>n</sup>-xi-á<sup>n</sup> ní xáha<sup>n</sup>-dě xii tée tàxi tnuní ñáhá xii cue tée quide chiú<sup>n</sup>-á<sup>n</sup>: “Cúñaha xii nchaa cue tée quide chiú<sup>n</sup>-á<sup>n</sup> ná quíxí-güedé te cháhu-n-güedé, te díhna-gá cue tée nchícú<sup>n</sup> cuif-nă cuánguihu núú chíú<sup>n</sup> ngüíta-n cháhu-n, te ndéé núú ní ndihi-ná cháhu-n cué tée cuánguihu díhna nuu-gă núú chíú<sup>n</sup>”, càchí-dé xáha<sup>n</sup>-dě xii tée tàxi tnuní ñáhá xii cue tée quide chiú<sup>n</sup>-á<sup>n</sup>. <sup>9</sup>Te díhna-gá cue tée cuánguihu caá úhú<sup>n</sup> sacuaa ní quexio-güedé cuèndá cháhu ñaha-dě, te ní cháhu ñaha-dě ìḡ caa díhú<sup>n</sup> denàriú xii ìḡ ìḡ-güedé. <sup>10</sup>Te sáta ní cháhu-dé dava-gá cue tée ní quide chiú<sup>n</sup>. Te ndéé núú ní ndihi-ná ní cháhu-dé cue tée cuánguihu díhna nuu-gă núú chíú<sup>n</sup>. Te cue tée-á<sup>n</sup> ní sani iní-güedé sá vái-gă cháhu ñaha-dě xii-güedé, dico ñáhá chi ìḡ caa-ni díhú<sup>n</sup> denàriú ní cháhu ñaha-dě xii ìḡ ìḡ-güedé. <sup>11</sup>Te cue tée-á<sup>n</sup> ní quehe<sup>n</sup> cuèndá-güedé díhú<sup>n</sup>-güedé dico ñá túú ní quide váha-xi iní-güedé. <sup>12</sup>Te ní xáha<sup>n</sup>-güedé xii tée dii chiú<sup>n</sup>-xi ní quide-güedé: “¿Ñá cuèndá cue tée nchícú<sup>n</sup> cuif-nă cuánguihu núú chíú<sup>n</sup> ìḡ-ni ní cháhu ñaha-n xii-ndí ndihi-güedé, te ìḡ ðii oré duha ní quide chiú<sup>n</sup>-güedé? Te nchúhú nchàca nchaa ní sahní iní-ndí ní quide chiú<sup>n</sup>-ndí, te ní ndoho-ndí cahni, te ìḡ-ni ní cháhu ñaha-n xii-ndí ndihi-güedé”, càchí-güedé xáha<sup>n</sup>-güedé xii tée dii chiú<sup>n</sup>-xi ní quide-güedé. <sup>13</sup>Te tée dii chiú<sup>n</sup>-xi ní quide-güedé-á<sup>n</sup> ní xáha<sup>n</sup>-dě xii ìḡ tée-á<sup>n</sup>: “Yòhó, ñá túú quide-í ìḡ sá ñá túú tàú-í cada-í sá cúú-xí-n, chi ní quide ndáá-ó sá díú-ní ìḡ díhú<sup>n</sup> denàriú cháhu ñaha-í xii-n ìḡ nduu. <sup>14</sup>Te vitna quehe<sup>n</sup> díhú<sup>n</sup> cuèndá nduu-n te núhú-n, chi yúhú cuimí-í sá íḡ-ní cháhu ñaha-í xii-n ndíhi cue tée nchícú<sup>n</sup> cuif-nă cuánguihu núú chíú<sup>n</sup>.”

<sup>15</sup> Chi yúhú cuu-ni cada-í nání cuiní-í ndihi díhú<sup>n</sup>-í, ¿adi dico ñá túú quide váha-xi iní-n sá dúhá cùndahú iní-í cue téé-á<sup>n</sup> duca<sup>n</sup> cháhu-í-güedé?” cächí téé cùu patróó<sup>n</sup>-á<sup>n</sup> xáha<sup>n</sup>-dë xii téé-á<sup>n</sup>. Duha ndüu cuendú cání-í núú-ndó. <sup>16</sup> Te duha càhá<sup>n</sup>-í chi dava ñáyiú cùnüu ndecu ichi Yá Ndiöxí vitna sáá nduu te vá cùnüu vihi-gá-yu dàtná cùnüu-yu vitna, te dava ñáyiú ñá túú cùnüu vitna sáá nduu ïo cùnüu-yu. Te ío cuéhé ñáyiú càhá<sup>n</sup> ñáhá Yá Ndiöxí xii-yu dico sacú-ni-yu nduu táhü-yu cundecú-yu ndihi-gá —cächí-gá xáha<sup>n</sup>-gá xii-güedé.

**Jèsús càhá<sup>n</sup> tucu-gá  
sá cáhní ñaha-güedé xii-gá**

(Mr. 10:32-34; Lc. 18:31-34)

<sup>17</sup> Te ñühu Jesús ichi cuásaá-gá ñúú Jerusálén ndihi cue téé xica cuu ndihi-gá, te ní cana ñaha-gá xii-güedé ní naníhí tnáhá-güedé ndihi-gá, te ta ndàtnühu ndihi ñaha-gá xii-güedé cuáhá<sup>n</sup>, te xáha<sup>n</sup>-gá xii-güedé:

<sup>18</sup> —Vitna ñühu-o ichi cuásaá-ó ñúú Jerusálén, te yàcá<sup>n</sup> cuáha cuendá ñáhá-güedé xii yúhú Téé cùu ñaní tnáhá-ndó nchaa-ndo núú cuè téé cùu dútú cùnüu, ndihi núú cuè téé dàcuaha ñaha xii ñáyiú nchaa tnühu ní chídó tnùní ndíí Moisés. Te diu cue téé-á<sup>n</sup> cüñaha-güedé xii dava-gá cue téé sá cáhní ñaha-güedé xii-í. <sup>19</sup> Te cuáha cuendá ñáhá-güedé xii-í núú cuè téé ñá túú cùu cue téé isràél, te cue téé-á<sup>n</sup> cudíquí ndeé ñáhá-güedé xii-í, te caniha-güedé ndihi ñii, te dàtnüú cata caa ñaha-güedé xii-í núú cùrúxí te núú cùrúxí-á<sup>n</sup> cuú-í, dico nduu úní sá cùú-í te ndoto-í —cächí-gá xáha<sup>n</sup>-gá xii-güedé.

**Náná tē Jàcobó ndihi té Juàá  
cuiní-a<sup>n</sup> sá cùnüu-güedé ndihi Jèsús**

(Mr. 10:35-45)

<sup>20</sup> Te cue déhe té Zebèdeú té Jàcobó ndihi té Juàá ndécá ñaha náná-güedé xii-güedé cuáhá<sup>n</sup> núú ndécú Jèsús, te òré ní quexio-a<sup>n</sup> ndihi-güedé núú ndécú-gá te ní ngüñí xítí-á<sup>n</sup> nùú-gá cuendá cuiní-a<sup>n</sup> ndàtnühu ndihi ñaha-a<sup>n</sup> xii-gá cuendá sá cùú-xí cuè déhe-a<sup>n</sup>. <sup>21</sup> Te cùmání-gá càhá<sup>n</sup>-a<sup>n</sup> te ní xicá<sup>n</sup> tnühu Jèsús núú-a<sup>n</sup>, te xáha<sup>n</sup>-gá:

—¿Ná cuiní-n? —cächí-gá xáha<sup>n</sup>-gá xii-a<sup>n</sup>.

Te ní xáha<sup>n</sup>-a<sup>n</sup> xii-gá:

—Véxi-í càhá<sup>n</sup> ndàhú-í núú-n nùu vá cùndèe iní-n cùnucóo ñ<sup>n</sup> déhe-í-a xio cùha-n, te ingá-dé cùnucóo-dé xio dàtni-n na saá nduu cùnucóo-n nùú táxí tnùní-n —cächí-á<sup>n</sup> xáha<sup>n</sup>-a<sup>n</sup> xii-gá.

<sup>22</sup> Te Jèsús ní xáha<sup>n</sup>-gá xii úú cue téé-á<sup>n</sup>:

—Nchòhó, ñá túú cùtnuní váha iní-ndó nàcuáa ndüu sá xicá<sup>n</sup>-ndó nùú-í. ¿Te náa cundee ñí-ndó dandoho ñaha ñáyiú xii-ndo dàtná dandoho ñahá-yu xii-í, te cundee tucu iní-ndó càhni ñahá-yu xii-ndo dàtná cahni ñahá-yu xii-í-á<sup>n</sup>? —cächí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Cundee ñí-ndí yáha-ndí nchaa nàcuáa càhá<sup>n</sup>-n-á<sup>n</sup> —cächí-güedé xáha<sup>n</sup>-güedé xii-gá.

<sup>23</sup> Te Jèsús ní xáha<sup>n</sup>-gá xii-güedé:

—Ndáá sá cùndèe iní-ndó ndòho-ndo nchaa nacúaa ndòho-í, dico sá dúcá<sup>n</sup> cuiní-ndó sá ñ<sup>n</sup>-ndó cùnucóo-ndo xio cuha-í, te ñ<sup>n</sup>-ndo cùnucóo-ndo xio datni-í, te xíá<sup>n</sup> chi ñá dífú yühú tàù-í cachí-í nùu sá cùú cùnucóo-ndo àdi sá vǎ cùú cùnucóo-ndo, chi mee Tǎtà-í Dútú Ndiöxí cachí-gá te núu ná cùú ñáyiú nduu táhú cùnucóo dñi-í dàvǎ-á<sup>n</sup> —cächí-gá xáha<sup>n</sup>-gá xii-güedé.

<sup>24</sup> Te òré ní níhí ùxí-gá cue tée xica cuu ndihi-gá tnúhu nàcuáa ndúu sá cuíní cue tée úú-án, te ní cudéé<sup>n</sup>-güedé núú cue tée úú-án. <sup>25</sup> Te Jèsús ní cana-gá nchaa cue tée xica cuu ndihi-gá, te ní xáha<sup>n</sup>-gá xii-güedé:

—Nchòhó xìní-ndó sǎ cuè tée yìndaha nació<sup>n</sup> quidé-güedé sá ïo cùnúu-güedé, te nchaa dava-gá cue tée cùnúu ndihi-güedé quidé-güedé tnàhá-güedé sá ïo cùnúu-güedé. <sup>26</sup> Dico nchòhó chí vá dúcá<sup>n</sup> càda-ndo, chí núú dava-ndo cuíní-ndó cùnúu-ndo, te xìní ñuhu-xi cunu cuechi núú tnàhá-ndó te vá cáda-ndó sǎ cùnúu-ndo. <sup>27</sup> Te núú dava-ndo cuíní-ndó quène cáva-ndo, te cuu-ndo dàtná cue ñáyíu ñá túú tnàhí dàñá quee núú chíú<sup>n</sup> pàtróó<sup>n</sup>-xi cunu cuechi núú tnàhá-ndó. <sup>28</sup> Te cada-ndo dàtná quidé yùhú Tée cùu ñaní tnàhá-ndó nchàa-ndo, chí yùhú véxi-í ñuyíú-a dico ñá díú sǎ cúnú cuèchi ñáyíu núú-í chí véxi-í sá cúnú cuèchi-í núú-yu. Te cuú-í ñuyíú-a cuendá vǎi-yu cácu nihnú-yu núú ùhú núú ndàhú —càchí-gá xáha<sup>n</sup>-gá xii-güedé.

**Jèsús quidé tǎtna-gá núú úú  
tnàhá cue tée cuáá**

(Mr. 10:46-52; Lc. 18:35-43)

<sup>29</sup> Te òré ní quee Jèsús ñúú Jericó ndihi cue tée xica cuu ndihi-gá, te cuéhé víhí ñáyíu nchícú<sup>n</sup> ñáhá xii-gá cuáhá<sup>n</sup>. <sup>30</sup> Te yuhu ìchi cuáhá<sup>n</sup>-gá xìnucóó úú tnàhá cue tée cuáá, te cue tée-án ní cut-núú iní-güedé sá Jèsús ñúhú-gǎ ichi-án te ní ngúíta-güedé níhi càhá<sup>n</sup>-güedé, te xáha<sup>n</sup>-güedé xii-gá:

—Yòhó Mèstrú, ñaní tnàhá ndíi Dàvíí, cundàhú iní ñáhá xii-ndí! —càchí-güedé xáha<sup>n</sup>-güedé xii-gá.

<sup>31</sup> Te cue ñáyíu tènáá ñáhǎ-yu xii-güedé, te xǎhǎ<sup>n</sup>-yu sá ná càdí-güedé yuhu-güedé, dico uu<sup>n</sup>-gá níhi ní cáhá<sup>n</sup>-güedé, te xáha<sup>n</sup>-güedé xii-gá:

—Yòhó Mèstrú, ñaní tnàhá ndíi Dàvíí, cundàhú iní ñáhá xii-ndí! —càchí-güedé xáha<sup>n</sup>-güedé xii-gá.

<sup>32</sup> Te ní ngúíñí Jèsús te ní cana ñaha-gǎ xii-güedé, te ní xícá<sup>n</sup> tnúhú-gǎ núú-güedé, te xáha<sup>n</sup>-gǎ:

—¿Ná cuíní-ndó càda ñaha-í xii-ndo-i? —càchí-gá xáha<sup>n</sup>-gǎ xii-güedé.

<sup>33</sup> Te ní xáha<sup>n</sup>-güedé xii-gá:

—Mèstrú, cuíní-ndí sá cáda tǎtna-n núú-ndí cuendá cundehe-ndí —càchí-güedé xáha<sup>n</sup>-güedé xii-gá.

<sup>34</sup> Te Jèsús ní cundàhú iní ñáhá-gǎ xii-güedé, te ní tendaha-gǎ núú-güedé. Te òré-ni ní ndúha núú-güedé, te nchícú<sup>n</sup> ñáhá-güedé xii-gá cuáhá<sup>n</sup>.

**Jèsús cuánguihu-gá ñúú Jerusàlén**

(Mr. 11:1-11; Lc. 19:28-40; Jn. 12:12-19)

**21** Te òré sa ta cùyatni Jèsús ndíi cue tée xica cuu ndihi-gá ñúú Jerusàlén, te ní quexio-gá ndihi-güedé yatni víi-nǎ ñúú Bètfaqé, te xíá<sup>n</sup> cáá yùcu nani Olívú. Te ní ndatnúhu-gá ndíhi úú cue tée xica cuu ndihi-gá, <sup>2</sup> te ní xáha<sup>n</sup>-gǎ xii-güedé:

—Chí cuáhá<sup>n</sup> ñúú cáá yàtni yacá<sup>n</sup>, te òré quexio-ndo yacá<sup>n</sup> te nanihí-ndó ì<sup>n</sup> búrru òhí ndètní-dí ndíhi déhe-dí, te nandaxi-ndo-güèdì te candeca-ndo-güèdì quixi. <sup>3</sup> Te núú ò ñáyíu dàdaha<sup>n</sup> ñaha xii-güedì, te cùñaha-ndo xii-yu sá yùhú Yaá xícá cùu ndíhi-ndo xini ñuhu-í-güedì, te ndíhi-ni natendaha-í-güedì núhú-güedì cùñaha-ndo —càchí-gá xáha<sup>n</sup>-gǎ xii-güedé.

<sup>4</sup> Te duca<sup>n</sup> ní cuu chí ní quee ndáá-xi nàcuáa ní chídó tñúní ì<sup>n</sup> tée ní xóo cáhá<sup>n</sup> tnúhu Yá Ndiòxí ndéé sanaha núú tütú-gá núú càchí-xi:

<sup>5</sup> Chí cùñaha cuè ñáyíu ñúú Sìón ná cáda cuendá-yu, chí véxi tée yìndaha ñaha xii-yu yòdo-dé ì<sup>n</sup> búrru lìhli déhe ì<sup>n</sup> búrru quití sa xido, te cùu-dé ì<sup>n</sup> tée ïo ndàhú iní-xi.

Duha ní chídó tñuní ìí<sup>n</sup> téé ní xóo cáhá<sup>n</sup> tñúhu Yá Ndiòxí ndéé sanaha nǔú tütú-gá.

<sup>6</sup>Te cue téé xica cuu ndihi-gá ní xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gá xii-güedé cada-güedé. <sup>7</sup>Te ní ndexio-güedé ndécá-güedé ìí<sup>n</sup> búrru ðihí ndihi déhe-ðí, te ní sacá<sup>n</sup> ndodo-güedé dóó-güedé sátá-güedé, te ðátnúni cuasaá Jèsús sátá ìí<sup>n</sup>-ðí ní ngódó ñaha-gá xii-ðí. <sup>8</sup>Te ío cuéhé ñáyiú ta sàcá<sup>n</sup>-yu dóó-yu ichi cuáhá<sup>n</sup>-gá cuendá núú dǒó-yu-á<sup>n</sup> yáha-gá ndihi quiti yòdo-gá. Te davá-yu xèhndé-yu ndaha yùtnu núú tá sàcá<sup>n</sup>-yu cuáhá<sup>n</sup>. <sup>9</sup>Te nchaa ñáyiú yòdonuu núú-gá ndihi nchaa ñáyiú nchicú<sup>n</sup> ndàa sátá-gá ní nguíta-yu níhi càhá<sup>n</sup>-yu, te cächí-yu:

—Ío càhnu cuu Yaá cúú ñàni tñáhá ndíi Dàvíí! ;Te Yá Ndiòxí ío na chindee ñaha-gá chi cùu-gá Yaá ní tendaha Yá Ndiòxí véxi quide núú-gá! ;Te ndéé nchaa sá ìò andíu na cächí-xi sá ìo càhnu cuu-gá! —duha cächí-yu.

<sup>10</sup>Te òré cuánguihu Jèsús ñúú Jerusálén, te nchaa ñáyiú ñúú-á<sup>n</sup> ní nguíta-yu xícuáá-yu, te davá-yu ní nguíta-yu xitñàhá-yu:

—¿Yoo cùu téé-á<sup>n</sup>? —cächí-yu xitñàhá-yu.

<sup>11</sup>Te davá-yu xitñàhá-yu:

—Téé-á<sup>n</sup> cúú-dé Jèsús téé càhá<sup>n</sup> tñúhu Yá Ndiòxí, te cùu-dé téé ñúú Nazàrét ñúú yíndèhu ðístrítú Galileá —cächí-yu xitñàhá-yu.

**Jèsús ñá túú tñàhá ìní-gá nàcuáa xiquide ñáyiú xití veñúhu**

(Mr. 11:15-19; Lc. 19:45-48; Jn. 2:13-22)

<sup>12</sup>Te Jèsús cuánguihu-gá xití veñúhu càhnu sá ìo cùnuu, te xití veñúhu-á<sup>n</sup> xíndecu ñáyiú quide ndáhú nádícó-yu, ndihi ñáyiú xísaa<sup>n</sup>, te nchaa<sup>n</sup>-yu ní queñuhu ñaha Jèsús xíí-yu quehé, te ní dándúá-gá mèsá nchaa ñáyiú ðàma

díhú<sup>n</sup>, ndihi nchaa xilé sácóo nchihí ñáyiú ðico lómá xíndecu xití veñúhu-á<sup>n</sup>. <sup>13</sup>Te ní xáha<sup>n</sup>-gá xii-yu:

—Núú tütú Yá Ndiòxí càhá<sup>n</sup>-xi nàcuáa ní càhá<sup>n</sup>-gá, te ní cächí-gá: “Vehe-í cúú-xí núú càhá<sup>n</sup> ndihi ñaha ñáyiú xii-í”, duha ní càhá<sup>n</sup>-gá cächí-xi núú tütú-gá. Dico nchòhó quidé-ndó vehe-gá vehe ñadúhú —cächí-gá xáha<sup>n</sup>-gá xii-yu.

<sup>14</sup>Te xíá<sup>n</sup> ndécú Jèsús ní quexio cue téé cuáá ndihi cue téé yacua, te ní quide tátna ñaha-gá xii-güedé te ní ndúha-güedé. <sup>15</sup>Te cue dútú cùnùu ndihi cue téé ðàcuaha ñaha xii ñáyiú nchaa tñúhu ní chídó tñuní ndíi Moisés ní xiní-güedé ní quide Jèsús sá vǎ yòo tñahí ndàcu cada, te ndédóho tucu-güedé níhi xícáhá<sup>n</sup> cue landú xití veñúhu càhnu sá ìo cùnuu-á<sup>n</sup>, te cächí-güexi: “Ío càhnu cuu Yaá cúú ñàni tñáhá ndíi Dàvíí”, cächí-güexi. Te ní cudéé<sup>n</sup>-güedé, <sup>16</sup>te ní xáha<sup>n</sup>-güedé xii Jèsús:

—¿Ndédóho-n nàcuáa càhá<sup>n</sup> cue landú-á<sup>n</sup> ñǎ? —cächí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gá xii-güedé:

—Ndédóho-í, te nchòhó náa ñá túú ðàcuaha-ndo núú tütú Yá Ndiòxí núú càhá<sup>n</sup>-xi cuendá cue landú-á<sup>n</sup>, te duha cächí-xi:

Yòhó ní quide-n sǎ cuè landú vitna sàdi, ndihi cue dava-gá landú, chiñuhu ñaha-güexi xii-n nàcuáa tàú-xi cunduu.

Duha cächí-xi núú tütú-gá —cächí-gá xáha<sup>n</sup>-gá xii-güedé.

<sup>17</sup>Te xíá<sup>n</sup> ní dándóo ñaha Jèsús xii-güedé, te ní xica-gá cuáhá<sup>n</sup>-gá ñúú Bètaniá, yàcá<sup>n</sup> ní xíndecu-gá niú-á<sup>n</sup>.

**Jèsús xáha<sup>n</sup>-gá xii yutnu ngǔxí sá vǎ cúú<sup>n</sup>-gá sávidí-xi**

(Mr. 11:12-14, 20-26)

<sup>18</sup>Te nduu tñéé-á<sup>n</sup> nehé-ni cuáhá<sup>n</sup> tucu Jèsús ñúú Jerusálén, te ichi ñùhu-gá ní xíhí-gá docó. <sup>19</sup>Te ní xiní-gá ìí<sup>n</sup>



yutnu ngǔxí nǔtnǎ ìí<sup>n</sup> xio yuhu ìchi, te ní xica-gá cuáhá<sup>n</sup> ndéhé-gǎ nǔu ndéé sávidí-xi, dico ñá túú ná ndéé chi mee-ni ndàha-xi ndeé. Te ní xáha<sup>n</sup>-gǎ xii yutnu ngǔxí-á<sup>n</sup>:

—¡Vitna te vá íí<sup>n</sup> ndùu-gá cuu<sup>n</sup> sávidí-n! —càchí-gá xáha<sup>n</sup>-gǎ xii-xi.

Te òré-ni-á<sup>n</sup> ní yíchí yutnu ngǔxí-á<sup>n</sup>.<sup>20</sup> Te sá dúcá<sup>n</sup> ní cuu ní xini cue téé xica cuu ndíhi Jesús, te ío ní cuñúhu-güedé, te ní xicá<sup>n</sup> tnúhú-güedé núú-gǎ, te xáha<sup>n</sup>-güedé:

—¿Ná cuendá ndéé dàcá<sup>n</sup> ío ndíhi ní yíchí yutnu ngǔxí-á<sup>n</sup>-í? —càchí-güedé xáha<sup>n</sup>-güedé xii-gá.

<sup>21</sup> Te Jèsús ní xáha<sup>n</sup>-gǎ xii-güedé:

—Na càchí tnúhu ndáá-í xii-ndo sǎ nǔu nchòhó quíndáá ndisa iní-ndó Yǎ Ndiòxí, te vá cání ìí<sup>n</sup> cani úú iní-ndó, te ñá dǔú-ní sǎ ní quide-í-a ní xini-ndó ndàcu-ndo cada-ndo, chi ndéé tíndúú-a xocuñí-xi núú ndécú-xí te núu cǔñaha-ndo sǎ xocuñí-xi te quíhí<sup>n</sup>-xi quée-xi xití lámár. Te díu duca<sup>n</sup> càda-xi te núu na quíndáá iní-ndó. <sup>22</sup> Te nchaa sá ná càcá<sup>n</sup>-ndó nǔú Yǎ Ndiòxí òré càhá<sup>n</sup> ndíhi-ndo-gǎ te taxi-gá te núu sàndáá ndisa iní-ndó sǎ táxí-gǎ sá xicá<sup>n</sup>-ndó núú-gǎ —càchí-gá xáha<sup>n</sup>-gǎ xii-güedé.

**Jèsús ndécú ndíhi-gá tnúhu ndee iní**

(Mr. 11:27-33; Lc. 20:1-8)

<sup>23</sup> Te Jèsús cuánguihu-gá xití veñúhu càhnu sá ío cǔnuu danehé-gá ñáyíu, te xía<sup>n</sup> ndécú-gǎ ní quexìo cue dútú cǔnùu ndíhi cue téé cùu sacuéhé nǔú ñáyíu isràél, te xáha<sup>n</sup>-güedé xii-gá:

—Cuíni-ndí cachí tnúhu-n xii-ndí nása ndùu tnúhu ndee iní ndécú ndíhi-n núu quide-n nándi sá quidé-n, ¿te yoo duca<sup>n</sup> ní taxi tnúhu ndee iní-á<sup>n</sup> xii-n-í? —càchí-güedé xáha<sup>n</sup>-güedé xii-gá.

<sup>24</sup> Te Jèsús ní xáha<sup>n</sup>-gǎ xii-güedé:

—Yúhú tnàhá-í cuíni-í càcá<sup>n</sup> tnúhu-í ìí<sup>n</sup> sá càcá<sup>n</sup> tnúhu-í núú-ndó, te núu na càchí tnúhu-ndo te cachí tnúhu-í

xii-ndo yòo ní taxi tnúhu ndee iní duha quide-í. <sup>25</sup> Te chí càchí tnúhu xii-í yoo ní táuchíú<sup>n</sup> ní dácúándùte ndí Juàá ñáyíu, ¿Yá Ndiòxí á<sup>n</sup> cuè téé ñuyíú-a ní táuchíú<sup>n</sup> dùca<sup>n</sup> ní quide ndíí?, te chí càchí tnúhu —càchí-gá xáha<sup>n</sup>-gǎ xii-güedé.

Te ní ngúíta-güedé xitnàha-güedé:

—¿Nása cǔñaha-o? Chi núu na cǔñaha-o sǎ Yǎ Ndiòxí ní táuchíú<sup>n</sup> dùca<sup>n</sup> ní quide ndí Juàá ñá, te quesaha-dé: “¿Ná cuendá ñá túú ní sàndáá iní-ndó tnúhu ní càhá<sup>n</sup> ndíí vǎí?””, quesaha-dé. <sup>26</sup> Te núu na cǔñaha-o sǎ cuè ñáyíu ñuyíú-a ní táuchíú<sup>n</sup> dùca<sup>n</sup> ní quide ndí ñá, te cudéé<sup>n</sup> ñáyíu núú-ó, chí nchaá-yu càchí-yu sá Yǎ Ndiòxí ní xáha<sup>n</sup>-gǎ xii ndíí sá càhá<sup>n</sup> ndíí tnúhu-gá núú ñáyíu —càchí-güedé xitnàha-güedé.

<sup>27</sup> Te ní xáha<sup>n</sup>-güedé xii Jèsús:

—Ñá túú xini-ndí yoo ní táuchíú<sup>n</sup> dùca<sup>n</sup> ní dácúándùte ndíí Juàá ñáyíu —càchí-güedé xáha<sup>n</sup>-güedé xii-gá.

Te ní xáha<sup>n</sup>-gǎ xii-güedé:

—Te núu duca<sup>n</sup> te ni yǔhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gá xáha<sup>n</sup>-gǎ xii-güedé.

**Cuendá ìí<sup>n</sup> téé ndíhi úú déhe-dé**

<sup>28</sup> Te Jèsús ní xáha<sup>n</sup> tucu-gá xii-güedé:

—Na càni-í ìí<sup>n</sup> cuendú núú-ndó nàcuáa tecú tnúni-ndó tnúhu càhá<sup>n</sup>-í. Ìí<sup>n</sup> téé ndècu úú déhe-dé, te ní xáha<sup>n</sup>-dè xii déhe-dé téé sacuéhé-gǎ: “Yòhó déhe-í, véxi-í càhá<sup>n</sup> ndàhú-í núú-n nǔu vá cǔndèe iní-n cuánundaha ñaha-n xii-í cada chiù<sup>n</sup>-o núú ní xitu-í yoho yàha stilé”, càchí-dé xáha<sup>n</sup>-dè. <sup>29</sup> Te ní xáha<sup>n</sup> dèhe-dé xii-dé: “Vá quíhí<sup>n</sup>-í cada chiù<sup>n</sup>-í núú chíú<sup>n</sup>-n”, càchí-dé xáha<sup>n</sup>-dè xii tǎtá-dè. Dico cuèé ní nacani iní-dé te ní sáhá<sup>n</sup>-dé ní quide chiù<sup>n</sup>-dé núú chíú<sup>n</sup> tǎtá-dè. <sup>30</sup> Te téé-á<sup>n</sup> ní sáhá<sup>n</sup> tucu-dé ní xáha<sup>n</sup>-dè xii déhe-dé té líhli-gá nǔu vá cǔndèe iní-dé cuánundaha ñaha-dé, te ní xáha<sup>n</sup> dèhe-dé-á<sup>n</sup>

xii-dé: “Cuu cuánundaha ñaha-í xii-n”, cächí-dé xáha<sup>n</sup>-dë. Dico ñá túú ní sáhá<sup>n</sup>-dé cada chiú<sup>n</sup>-dé. <sup>31</sup> Te vitna chí cáhá<sup>n</sup> nõu ndëdacàa cue tée úú-á<sup>n</sup> ní quide-güedé sá cuini tātá-güedë — cächí-gá xáha<sup>n</sup>-gã xii-güedé.

Te ní xáha<sup>n</sup>-güedë xii-gá:

—Tée cùu sacuéhé-gã, tée ní cáhá<sup>n</sup> ndihi-dé díhna —cächí-güedé xáha<sup>n</sup>-güedë xii-gá.

Te Jësús ní xáha<sup>n</sup>-gã xii-güedé:

—Na cächí tnúhu ndáá-í xii-ndo sã ncháá cuè tée cuihna ìní-xi quide cobrá ñáhá xii ñáyiú cuendá impuèstú, ndihi cue ñáyiú ìhí xíndecu ichi dí ìní yáchí-gá ndíhu ndaha ñaha Yá Ndiöxí xii cue tée-á<sup>n</sup> ndihi cue ñáyiú ìhí-á<sup>n</sup> dàcúúxi nchòhó. <sup>32</sup> Chi ndí Juàà tée ní xóo dacuàndute ñaha xii ñáyiú ní cáhá<sup>n</sup> ndí nàcuáa cadá-yu cundecú-yu, dico nchòhó chi ñá túú cuini-ndó quèndáá ìní-ndó nàcuáa ní cáhá<sup>n</sup> ndí, dico cue tée cuihna ìní-xi quide cobrá ñáhá xii ñáyiú cuendá impuèstú, ndihi cue ñáyiú ìhí xíndecu ichi dí ìní, chi sàndáá ìní-güedé ndihí-yu tnúhu ní cáhá<sup>n</sup> ndí. Te nchòhó cuè ndëhe-ndo sá sàndáá ìní cue ñáyiú-á<sup>n</sup> nchaa tnúhu ní cáhá<sup>n</sup> ndí, dico ñá túú cuini-ndó ndixi cuèchi ìní-ndó cuendá nchaa sá cuèhé sá dúhá quide-ndo cuendá tñi-ndo tnúhu ní cáhá<sup>n</sup> ndí —cächí-gá xáha<sup>n</sup>-gã xii-güedé.

### **Cuendá cue tée cuihna ìní-xi**

(Mr. 12:1-12; Lc. 20:9-19)

<sup>33</sup> Te xáha<sup>n</sup> tùcu Jësús xii-güedé:

—Cundedóho-ndo na càni tucu-í ingá cuendú núú-ndó cuendá tecú tnúni-ndó tnúhu cáhá<sup>n</sup>-í. H<sup>n</sup> tée ní nacúxi-dé mee-ni yòho yaha stilé núú ñúhú-dë, te ní chidoco-dë cuendá sá vã cúú dàñú, te ní cadúha-dé núú quíhni-dë ndéhé yoho yaha stilé-á<sup>n</sup> òré ná cùu, te ní cadúha-dé ì<sup>n</sup> xító dùcú<sup>n</sup> núú cáúndòdo cue tée coto nchaa yoho yaha stilé-á<sup>n</sup>.

Te ní sáá ì<sup>n</sup> nduu què-dé quíngaca cuu xica-dë te ní dándòo ndaha-dë sá ní xitu-dé-á<sup>n</sup> xii ì<sup>n</sup> úú cue tée xini tñáhá ndihi-dé cuendá cada chiú<sup>n</sup>-güedé, te ní ndatnúhu-güedé sá òré ná cúú te cuu cuendá dava-güedé, te duca<sup>n</sup> te ní quee-dé cuáhá<sup>n</sup>-dé. <sup>34</sup> Te sáta ní sáá nduu ní cuu ndéhé nchaa yoho yaha stilé sá ní xitu-dé-á<sup>n</sup>, te ní xáha<sup>n</sup>-dë xii ì<sup>n</sup> úú cue tée xinu cuechi núú-dë: “Chí cuáhá<sup>n</sup> cáca<sup>n</sup>-ndó sã cúú cuendá-í núú cuè tée ní dándòo ndàha-í nchaa yoho yaha stilé sá ní xitu-í”, cächí-dé xáha<sup>n</sup>-dë xii-güedé. <sup>35</sup> Te cue tée ní dándòo ndaha-dë nchaa yoho yaha stilé sá ní xitu-dé-á<sup>n</sup> ní tñi-güedé cue tée xinu cuechi núú-dë-á<sup>n</sup>, te ì<sup>n</sup>-dé ní cani-güedé, te ì<sup>n</sup>-dé ní sahni ñaha-güedë, te ingá-dé ní sáñaha-güedé yúú. <sup>36</sup> Te tée ní xitu yoho yaha stilé-á<sup>n</sup> ní tendaha-dë tñi-gá tucu cue tée xinu cuechi núú-dë cuáhá<sup>n</sup>-güedé cuángacá<sup>n</sup>-güedé sá cúú cuendá-dé núú cuè tée ní dándòo ndaha-dë sá ní xitu-dé-á<sup>n</sup>, dico diu-ni duca<sup>n</sup> ní quide ñaha cuè tée-á<sup>n</sup> xii cue tée xinu cuechi núú-dë-á<sup>n</sup>.

<sup>37</sup> Te tée cùu xítóhó nchaa yoho yaha stilé-á<sup>n</sup> ní sani ìní-dé: “Váha-gá nõu tendaha-í déhe-í-a núhú-dé, chí òré quini ñáhá-güedë xii-dé te canehe-güedé sá yíñuhu núú-dë”, duha ní sani ìní-dé. Te ní tendaha-dë déhe-dé cuánuhú-dé. <sup>38</sup> Dico òré ní xini cue tée quide chiú<sup>n</sup>-á<sup>n</sup> dëhe tée cùu xítóhó nchaa yoho yaha stilé-á<sup>n</sup>, te ní xitñaha-güedé: “Tée-á<sup>n</sup> tée véxi nduu táhu ñuhu-a ndihi nchaa sá cáá nõú-xi, dico cahni-o-dë te mee-o nduu táhú-ó sã ndúú táhú-dë”, cächí-güedé xitñaha-güedé. <sup>39</sup> Te ní tñi-güedé tée-á<sup>n</sup> te ndëca ñaha-güedé cuáhá<sup>n</sup> ì<sup>n</sup> xio yuhu ñuhu-á<sup>n</sup>, te ní sahni ñaha-güedë xii-dé —duha cuáhá<sup>n</sup> cuendú ní cani Jësús núú-güedë.

<sup>40</sup> Te ní xáha<sup>n</sup> tùcu Jësús xii-güedé:

—¿Te nchòhó sa cùtnuní iní-ndó năsa cada ñaha xítohó ñuhu-á<sup>n</sup> xii cue tée-á<sup>n</sup> ñă? —càchí-gá xăha<sup>n</sup>-gă xii-güedé.

<sup>41</sup> Te cue tée-á<sup>n</sup> ñă xăha<sup>n</sup>-güedé xii-gá:

—Tée cùu xítohó ñuhu-á<sup>n</sup> ñuhú-dé, te vá cùndàhú iní-dé cue tée cuihna iní-xi-á<sup>n</sup> chi cahni ñaha-dé xii-güedé, te dândó ndaha-dé ñuhu-dé xii cue tée cùtnuní iní-dé cada ndáá cuendá ndi tnahá cúú<sup>n</sup> ndéhe nchaa yoho yàha stílé sá ñă xitu-dé-á<sup>n</sup> te cuăñaha-güedé xii-dé sá cúú cuendá-dé —càchí-güedé xăha<sup>n</sup>-güedé xii-gá.

<sup>42</sup> Te Jèsús ní xăha<sup>n</sup>-gă xii-güedé:

—Te nchòhó, năa ñă túú dàcuaha-ndo núú tütú Yă Ndiòxí núú càchí-xi:

Yúú să ñă dáquéé tñhú cue tée dàcaa vehe, ní cuu-xi yúú cùnùu vitna.

Chi mee Dütú Ndiòxí duca<sup>n</sup> ñă cachí-gá cunduu, te cùu-xi ñă sá ño cùnùhu-o vitna.

Duha càchí-xi núú tütú-gá. <sup>43</sup> Te duha càhá<sup>n</sup>-í chi Yă Ndiòxí cada-gá te vá ñihí-ndó tñhu ndee iní cundecu ndihi-ndo cuendá ndíhu ndaha ñaha-gá xii-ndo, chi tñhu ndee iní-á<sup>n</sup> cundecu ndihi cue ñáyiu cada ndáá cuendá ndíhu ndaha ñaha Yă Ndiòxí xií-yu.

<sup>44</sup> Te yúú să cùnùu-á<sup>n</sup> cúú-xí yùhú, te nchaa ñáyiu ñă túú tñi tñuhu-í cùú-yu dàtná ñă ñáyiu ndùá núú yùú-á<sup>n</sup> te tñàhnú duú<sup>n</sup>-yu, àdi núu na tàú ñáhá-xí xií-yu, te dacàchi duu<sup>n</sup> ñaha-xi —cachí-gá xăha<sup>n</sup>-gă xii-güedé.

<sup>45</sup> Te sá dúcá<sup>n</sup> ndùu cuendú ní cani Jèsús te cue tée cùu dütú cùnùu-á<sup>n</sup>, ndihi cue tée cùu fariséú ní cutnùní iní-güedé sá cuendá-güedé ní càhá<sup>n</sup>-gá.

<sup>46</sup> Te ní cuiní-güedé tñi ñaha-güedé xii-gá òré-á<sup>n</sup> dico ñă túú ní cùyi-güedé, chi ní yùhú-güedé cue ñáyiu, chi ní cutnùní iní-yu sá cúú-gá ñă tée càhá<sup>n</sup> tñuhu Yă Ndiòxí.

## Cuendá ñă vico tñandaha

**22** Te Jèsús ní ngüita tucu-gá cáni-gă ingá cuendú núú-güedé, te xăha<sup>n</sup>-gă:

<sup>2</sup> —Na càni tucu-í ingá cuendú núú-ndó cuendá tecu tñuní-ndó nàcuáa cada-xi òré ndíhu ndaha ñaha Yă Ndiòxí xii ñáyiu. ñă tée yandaha ñaha xii ñáyiu ní quide-dé ñă vico ní dátñandaha-dé déhe ducu<sup>n</sup>-dé. <sup>3</sup> Te ní tendaha-dé cue tée xinu cuechi núú-dé cuáhá<sup>n</sup>-güedé cuángana-güedé cue ñáyiu sa ní càhá<sup>n</sup>-dé cuhu<sup>n</sup> vico, dico ñáyiu-á<sup>n</sup> ñă túú ní cuiní-yu quíhí<sup>n</sup>-yu. <sup>4</sup> Te ní xăha<sup>n</sup> tucu-dé xii dava-gá cue tée xinu cuechi núú-dé: “Quíhí<sup>n</sup>-ndó cññaha-ndo xii cue ñáyiu sa ní càhá<sup>n</sup>-í cuhu<sup>n</sup> vico sá sà ní quide túha-í sá cáxi-yu, te sa ní sahani-í ndicutu ndihi nchaa dava-gá quiti ní dánucuihnu-í, te nchaa sa ní quide túha-í, te na quixí-yu cuhú<sup>n</sup>-yu vico càchí-í cññaha-ndo”, càchí-dé xăha<sup>n</sup>-dé xii cue tée xinu cuechi núú-dé-á<sup>n</sup>.

<sup>5</sup> Dico ní ñă ñáyiu ní càhá<sup>n</sup>-dé-á<sup>n</sup> ñă túú ní cuiní-yu quíhí<sup>n</sup>-yu cuhú<sup>n</sup>-yu vico. Chi ñă-yu ní sáhá<sup>n</sup>-yu ní quide chiú<sup>n</sup>-yu núú ñuhú-yu, te ingá-yu ní sáhá<sup>n</sup>-yu ní nadicó-yu núu nándi cùu ndáhú quidé-yu. <sup>6</sup> Te dava-gá-yu ní tñí-yu dava cue tée xinu cuechi núú tée quide vico-á<sup>n</sup>, te ní canihá-yu ndéé ní sahani ñáhá-yu xii-güedé. <sup>7</sup> Te tée yandaha ñaha xii ñáyiu quide vico-á<sup>n</sup> ní cudéé<sup>n</sup> víhí-dé sá dúcá<sup>n</sup> ñă quide-yu, te ní tendaha-dé cue sandádú-dé ní sáhá<sup>n</sup>-güedé ní sahani-güedé cue ñáyiu duca<sup>n</sup> ñă quide-á<sup>n</sup>, te ní sahani-güedé nchaa vehe càa ñuú-yu. <sup>8</sup> Te sátá dúcá<sup>n</sup> te ní xăha<sup>n</sup>-dé xii dava-gá cue tée xinu cuechi núú-dé: “Nchaa sa ndècu túha, te cue ñáyiu ní càhá<sup>n</sup>-í cuhu<sup>n</sup> vico-a ní cùu ñă túú-gă tàú-yu sá cúhú<sup>n</sup>-yu. <sup>9</sup> Te chí cuáhá<sup>n</sup> ndèni ní cuu te càhá<sup>n</sup>-ndó nchaa ñáyiu na nàñihí-ndó ìchi na quixí-yu cuhú<sup>n</sup>-yu vico-a”, càchí-dé

xáha<sup>n</sup>-dě xii-güedé. <sup>10</sup>Te cue tée xinu cuechi-á<sup>n</sup> nĩ quee-güedé cuáhá<sup>n</sup>-güedé, te ní cáhá<sup>n</sup>-güedé nchaá ñáyiú ní naníhí-güedé ichi, te cuéi ñáyiú váha iní-xi, te cuéi ñáyiú cuihna iní-xi, te ní chítú-yu núú cúú vico-á<sup>n</sup>.

<sup>11</sup>Te sátá dúcá<sup>n</sup> te tée yíndaha ñáyiú quide vico-á<sup>n</sup> nĩ quíhu-dé xití vehe ní xíndéhé-dé cue ñáyiú ñuhu vico-á<sup>n</sup>, te ní xini-dé ñ<sup>n</sup> tée ñùtnahá tnuú-yu te ñá túú càa dóó-dé dàtná cáá dóó níhnú cuè ñáyiú ñuhu vico-á<sup>n</sup>. <sup>12</sup>Te ní xáha<sup>n</sup>-dě xii tée-á<sup>n</sup>: “¿Táta, nása ní cuu cuánguihu-õ iha, te ñá túú càa dóó-n dàtná cáá dóó níhnú cuè ñáyiú ñuhu vico tnándaha-i?”; cächí-dé xáha<sup>n</sup>-dě xii tée-á<sup>n</sup>. Dico tée-á<sup>n</sup> ñà túú ní níhí-dé tnúhu cáhá<sup>n</sup>-dé. <sup>13</sup>Te tée yíndaha ñáyiú quide vico-á<sup>n</sup> nĩ xáha<sup>n</sup>-dě xii cue ñáyiú xinu cuechi núú mèsá: “Chí tníí tée-á<sup>n</sup> te dacùtu-ndo-dé, te queñuhu-ndo-dé ná quíhí<sup>n</sup>-dé cundecu-dé ñ<sup>n</sup> xichi núú neé núú ño ndoho-dé, te yàcá<sup>n</sup> ío ndáhyú-dé te dicó rúhñú-ná cuu núhu-dé sá sàtú iní-dé sá ndóhó-dé”, cächí-dé xáha<sup>n</sup>-dě xii cue ñáyiú xinu cuechi núú mèsá-á<sup>n</sup>. <sup>14</sup>Te duha ndùu cuendú càhá<sup>n</sup>-í chi ío cuéhé ñáyiú càhá<sup>n</sup> ñáhá Yá Ndiõxí xií-yu, dico sacú-ni-yu nduu táhú-yu cundecú-yu ndihí-gá —cächí-gá xáha<sup>n</sup>-gá xii-güedé.

### Cuendá impuèstú

(Mr. 12:13-17; Lc. 20:20-26)

<sup>15</sup>Te cue tée cùu fariséú ní sáhá<sup>n</sup>-güedé ñ<sup>n</sup> xichi ní ndatnúhu-güedé nàcuáa cada-güedé daticánuu-güedé Jèsús núú tnúhu càhá<sup>n</sup>-gá cuendá duca<sup>n</sup> níhí-güedé nàcuáa cada-güedé cacá<sup>n</sup> cuéchi-güedé cuendá-gá. <sup>16</sup>Te ní tendaha-güedé ñ<sup>n</sup> úú cue tée cùndihí-güedé, ndihí cue tée cùndihí té Hèrodés cuáhá<sup>n</sup>-güedé núú ndécú Jèsús. Te òré ní quexìo-güedé núú ndécú-gá, te ní xáha<sup>n</sup>-güedé xii-gá:

—Mèstrú, nihí-ndí tnúhu sá ño ndáá càhá<sup>n</sup>-n, te càhá<sup>n</sup> ndáá-n nàcuáa càhá<sup>n</sup> Yá Ndiõxí cundecu-o ñùyiú-a, te cuéi ndéda-ni càa ñáyiú ñ<sup>n</sup>-ni càhá<sup>n</sup>-n ndihí-yu chi ñá túú quide cuendá-n cuéi ná ñáyiú cùu-yu. <sup>17</sup>Te cächí tnúhu xii-ndí, núu váha-ni quide-ndí sá cháhu-ndí té Cèsár tée ío cùnuu cuendá impuèstú á<sup>n</sup> ñáhá —cächí-güedé xáha<sup>n</sup>-güedé xii-gá.

<sup>18</sup>Dico Jèsús ní cutnùnì iní-gá sá xító ndèé ñáhá-güedé xii-gá, núu ní xáha<sup>n</sup>-gá xii-güedé:

—Nchòhó cue tée dàndahú méé-xí sá quidé ndáá te ñá ndáá sá quidé ndáá-ndó, ¿ná cuendá xító ndèé ñáhá-ndó xii-í? <sup>19</sup>Chí dánèhé ñáhá xii-í ñ<sup>n</sup> díhú<sup>n</sup> sá cháhu-ndo cuendá impuèstú núu nása càa —cächí-gá xáha<sup>n</sup>-gá xii-güedé.

Te ní dánèhé ñáhá-güedé xii-gá ñ<sup>n</sup> díhú<sup>n</sup> sá nánì dènariú. <sup>20</sup>Te òré ní xini-gá díhú<sup>n</sup>-á<sup>n</sup> te ní xicá<sup>n</sup> tnúhú-gá núú-güedé, te xáha<sup>n</sup>-gá:

—Chí cächí tnúhu yoo núú-xi ndèé ndihí yoo ñiú-xi ndèé —cächí-gá xáha<sup>n</sup>-gá xii-güedé.

<sup>21</sup>Te ní xáha<sup>n</sup>-güedé xii-gá:

—Núú tē Cèsár ndèé ndihí ñiú-dé —cächí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gá xii-güedé:

—Te núu duca<sup>n</sup> te chí nàcuáha té Cèsár sá cúú cuendá-dé, te sá cúú cuendá méé Yá Ndiõxí te xíá<sup>n</sup> nàcuáha-ndo-gá —cächí-gá xáha<sup>n</sup>-gá xii-güedé.

<sup>22</sup>Te cue tée-á<sup>n</sup> ío ní cuñúhu-güedé sá dúcá<sup>n</sup> nĩ cáhá<sup>n</sup>-gá, te ní natnii-güedé ichi cuánuhú-güedé.

### Cuendá cue ñáyiú ndoto

(Mr. 12:18-27; Lc. 20:27-40)

<sup>23</sup>Te ñiú-ni nduu-á<sup>n</sup> nĩ quexìo ñ<sup>n</sup> úú cue tée cùu saducéú núú ndécú Jèsús. Te cue tée-á<sup>n</sup> ñà túú sàndáá iní-güedé sá ndótó cuè ñáyiú ní xihí, te ní xáha<sup>n</sup>-güedé xii-gá:

<sup>24</sup>—Mèstrú, ndíi Moisés ní cachí ndíi sá nõu ìí<sup>n</sup> téé ndècu ñadìhí-xi cuú-dé te quendóo ñadìhí-dé, te núu ñá túú dèhe-dé ní xõo ndìhi-a<sup>n</sup> te téé cùu ñaní-dé naquehe<sup>n</sup>-dé ñaha ní quendóo quèè-á<sup>n</sup> cuendá coo dèhe-dé ndìhi-a<sup>n</sup> cuendá ñaní-dé téé ní xíhí-á<sup>n</sup>.  
<sup>25</sup> Te ñuú-ndí-a ní xíndecu úsá tñàhá cue téé mee-ni ndì ñaní-güedé. Te téé díhna ní ñíhí ñadìhí-dé te ñá túú ní cùdì-dé cundecu-dé chí ní xíhí-dé, te ni ìí<sup>n</sup> dèhe-dé ñá túú ní xõo ndìhi ñadìhí-dé-á<sup>n</sup>. Te téé cùu uú ní nàquehe<sup>n</sup>-dé ñaha ní quendóo quèè-á<sup>n</sup>.  
<sup>26</sup> Dico ní xíhí tucu-dé, te ni ìí<sup>n</sup> tucu dèhe-dé ñá túú ní xõo ndìhi ñaha-á<sup>n</sup>, te diu-ni duca<sup>n</sup> ñí yáha téé cùu uní, te ní xínu ndì úsá-güedé ní cándeca ñaha-güedé xii ñaha-á<sup>n</sup> dico diu-ni duca<sup>n</sup> ñí xíhí-güedé. <sup>27</sup> Te ndéé núú ñí ndìhi-ná te ní xíhí tñàhá ñadìhí-á<sup>n</sup>. <sup>28</sup> Te na sáá nduu ndòto-güedé ndìhi ñaha-á<sup>n</sup>, ¿te ndédacàa-güedé ñadìhí-güedé cuu-a<sup>n</sup>-i? Chí ndì úsá-güedé ní cándeca ñaha-güedé xii-a<sup>n</sup> —càchí-güedé xáha<sup>n</sup>-güedé xii-gá.

<sup>29</sup> Te Jèsús ní xáha<sup>n</sup>-gá xii-güedé:

—Ní xíta nchòhó tñúhu càhá<sup>n</sup>-ndó, chí ñá túú xíní-ndó nàcuáa càhá<sup>n</sup> Yá Ndiõxí núú tütú-gá, te ni ñà túú cùtnuní iní-ndó sá díú-gá ndácú-gá quídé-gá nchaandi túhú sá vaha. <sup>30</sup> Te na càchí tñúhu-í xii-ndo sá òré ná sáá nduu ndòto nchaa ñáyíu ní xíhí, te òvára-á<sup>n</sup> vã yõo-gá dasa<sup>n</sup> dèhe yoco-xi chí vá yõo-gá candeca tñaha, chí cuu-ná-yu dàtná cue espíritú xínú cuèchi núú Yá Ndiõxí. <sup>31</sup> ¿Te náa ñá túú quide cuendá-ndó nàcuáa càhá<sup>n</sup> Yá Ndiõxí núú tütú-gá núú càhá<sup>n</sup>-gá cuendá cue ñáyíu ní xíhí-á<sup>n</sup>? Te duha càchí-gá: <sup>32</sup> “Yúhú cùu-í Ndiõxí tè Àbrahám, ndìhi té Isàac, ndìhi té Jàcób”, duha càchí-gá núú tütú-gá. Te cue téé-á<sup>n</sup> chí cuèi ní xíhí-güedé núú ñùyíu-a, dico sá cùu-xí

Yá Ndiõxí chí ndècu vívú-ni-güedé. Chí diu-gá cùu-gá Ndiõxí mee-ni cuè ñáyíu xíndecu vívú, te ñá túú cùu-gá Ndiõxí cue ñáyíu ñá túú ndècu vívú —càchí-gá xáha<sup>n</sup>-gá xii-güedé.

<sup>33</sup> Te sá dúcá<sup>n</sup> ñí càhá<sup>n</sup>-gá ní xíi-gá cue téé-á<sup>n</sup>, te ío ní cuñúhu nchaa ñáyíu cuendá sá ío váha ndùu tñúhu ní càhá<sup>n</sup>-gá.

### Tñúhu sá ìo-gá cúnùu

(Mr. 12:28-34)

<sup>34</sup> Te cue téé cùu fariséu ní xíní-güedé ní sadí Jèsús yuhu cue téé cùu saducéú, chí ñá túú ní ñíhí-gá-güedé tñúhu cúnaha-güedé xii-gá, te cue téé cùu fariséu-á<sup>n</sup> ñí natacá-güedé te cuáhá<sup>n</sup>-güedé núú ndécú Jèsús. <sup>35</sup> Te ìí<sup>n</sup> téé cùu fariséu-á<sup>n</sup> ío váha cùtnuní iní-dé nàcuáa ndùu nchaa tñúhu ní chídó tñuní ndíi Moisés te xito ndéé-dé Jèsús, te xáha<sup>n</sup>-dè xii-gá:

<sup>36</sup>—Mèstrú, cachí tñúhu ndédacàa tñúhu sá ñí chídó tñuní ndíi Moisés ío-gá cúnùu cada-o —cachí-dé xáha<sup>n</sup>-dè xii-gá.

<sup>37</sup> Te Jèsús ní xáha<sup>n</sup>-gá xii-dé:

—Duha càhá<sup>n</sup> tñúhu sá ìo-gá cúnùu: “Cuu iní-ndó Dütú Ndiõxí Yaá cùu Ndiõxí-ndó ñí yuhu ñí iní-ndó, te caní iní-ndó càda-ndo datná cuíní mée-gá, te mee-ni tñúhu váha caní iní-ndó nàcuáa cuu vii cuu váha-ndo núú-gá”, <sup>38</sup> duha càhá<sup>n</sup> tñúhu sá ìo-gá cúnùu. <sup>39</sup> Te duha càhá<sup>n</sup> tucu ingá tñúhu cùu uú sá ío cùnùu, te sa yatni ìí<sup>n</sup>-ni cùu-xi ndìhi tñúhu díhna nuu, te càchí-xi: “Cuu iní-ndó tñaha ñáyíu-ndo dàtná cùu ìní-ndó mée-ndo”, duha càhá<sup>n</sup> tñúhu cùu uú-á<sup>n</sup>. <sup>40</sup> Te cuendá úú tñúhu-a ní cáá nchaa tñúhu ní càhá<sup>n</sup> ndíi Moisés nàcuáa cada ñáyíu, te diu-ni cuendá úú tñúhu-a ní cáá tñúhu ní càhá<sup>n</sup> nchaa cue téé ní xóo càhá<sup>n</sup> tñúhu Yá Ndiõxí ndéé sanaha —càchí-gá xáha<sup>n</sup>-gá xii-güedé.

### Yoo cùu Xítohó Jesucrístú

(Mr. 12:35-37; Lc. 20:41-44)

<sup>41</sup> Te ndècu duca<sup>n</sup>-ni cue tée cùu fariséu núu ndécú Jèsús. <sup>42</sup> Te ní xícá<sup>n</sup> tnúhú-gǎ núu-güedě, te xǎha<sup>n</sup>-gǎ:

—Cuiní-í cachí tnúhu-ndo yòo déhe-xi cùu Crístú Yaá tendaha Yǎ Ndiöxí quixi ñuyíu-a —cächí-gǎ xǎha<sup>n</sup>-gǎ xii-güedě.

Te ní xǎha<sup>n</sup>-güedě xii-gǎ:

—Déhe ndíi Dàvíi cùu Yàá-á<sup>n</sup> — cächí-güedě xǎha<sup>n</sup>-güedě xii-gǎ.

<sup>43</sup> Te Jèsús ní xǎha<sup>n</sup>-gǎ xii-güedě:

—¿Te nása cächí-tu-ndo sǎ déhe ndíi Dàvíi cùu Crístú Yaá tendaha Yǎ Ndiöxí quixi ñuyíu-a, te mee ndíi Dàvíi-á<sup>n</sup> ní dácáhú iní ñáhá Espíritú Yǎ Ndiöxí xii ndíi, te ní cachí ndíi sǎ Crístú Yaá tendaha Yǎ Ndiöxí quixi ñuyíu-a cùu-gǎ Xítohó ndíi? Te duha ní cachí ndíi:

<sup>44</sup> Dútú Ndiöxí ní xǎha<sup>n</sup>-gǎ xii Yaá cùu Xítohó-í:

“Ngóo xio cùha-í, te yúhú cada-í te nchaa sǎ cùu ũhú iní ñáhá xii-n canehe-xi sǎ yíñùhu núu-n.”

Duha ní xǎha<sup>n</sup> Dútú Ndiöxí xii Yaá cùu Xítohó-í, cächí ndíi. <sup>45</sup> ¿Te nása cùu Crístú déhe ndíi Dàvíi, te mee ndíi ní cachí ndíi sǎ cùu-gǎ Xítohó ndíi? —cächí Jèsús xǎha<sup>n</sup>-gǎ xii-güedě.

<sup>46</sup> Te ní ñ<sup>n</sup>-güedě ñǎ túu-gǎ ní ñíhí-güedě tnúhu cùñaha-güedě xii-gǎ. Te ndéé nduu-ǎ<sup>n</sup> ñà túu-gǎ ní cùyíi-güedě ná tnúhu cáca<sup>n</sup> tnúhú-güedě núu-gǎ.

**Jèsús cǎhá<sup>n</sup>-gǎ cuendá cue tée cùu fariséu ndíhi cuendá cue tée dàcuaha ñaha xii ñáyi**

(Mr. 12:38-40; Lc. 11:37-54; 20:45-47)

**23** Te Jèsús ní cǎhá<sup>n</sup> ndodo-gǎ núu nchaa ñáyi, ndíhi núu cuè tée xica cuu ndíhi-gǎ, te xǎha<sup>n</sup>-gǎ:

<sup>2</sup>—Cue tée dàcuaha ñaha xii ñáyi nchaa tnúhu ní chídó tnùní ndíi Moisés, ndíhi cue tée cùu fariséu

ndécú ndíhi-güedě tnúhu ndee iní cǎhá<sup>n</sup>-güedě nchaa tnúhu sǎ ní chídó tnùní ndíi Moisés-á<sup>n</sup>. <sup>3</sup> Te cada-ndo nàcuáa dānehé ñáhá-güedě xii-ndo, dico vá cáda-ndó dàtná xiquide-güedě, chi tucu nduu tnúhu cǎhá<sup>n</sup>-güedě, te tucu quide-güedě. <sup>4</sup> Te quide-güedě dàtná quidé ñáyi dācuído ñ<sup>n</sup> tñaha ñáyi-xi ñ<sup>n</sup> sǎ ïo vée, te mēe-yu ni lùha ñǎ túu cuiní-yu cuidó-yu. Te duca<sup>n</sup> sǎtnahá-xi cùu-güedě chi dānehé ñáhá-güedě xii-ndo nàcuáa cada-ndo, dico mee-güedě chi ni lùha ñǎ túu cuiní-güedě cada-güedě nàcuáa dānehé ñáhá-güedě xii-ndo. <sup>5</sup> Te mee-ni ndūcu-güedě nàcuáa quide-güedě cuendá quini ñáyi sǎ ïo cùu cahnu-güedě. Te ndéé xindá sǎ ndéé ñ<sup>n</sup> ũú tnúhu Yǎ Ndiöxí tneé-güedě ndíhi ndaha-güedě, te tñahá iní-güedě sǎ ïo-gǎ cunduu quèhé<sup>n</sup> xindá-á<sup>n</sup> dācúúxí xindá dava-gǎ ñáyi. Te tñahá tucu iní-güedě sǎ ïo-gǎ cunduu nāni núu dōó sácuiñnu-güedě dācúúxí dōó sácuiñnu dava-gǎ-yu. <sup>6</sup> Te ndi tñahá òrē sácōo vico, òrē quíhu-güedě mēsá caxi-güedě te ïo-gǎ cúdǐ iní-güedě cunucóo-güedě núu xilé núu sácōo cue tée cūnuu-gǎ, te diu-ni duca<sup>n</sup> quide tucu-güedě cuēi xití veñúhu. <sup>7</sup> Te nchaa núu xícá cùu-güedě cuiní-güedě sǎ ndíhi tnúhu yíñùhu cǎhá<sup>n</sup> ndíhi ñaha ñáyi xii-güedě, te cuiní tucu-güedě sǎ cūñahá-yu xii-güedě mèstrú.

<sup>8</sup> Dico nchòhó vá cūñaha-ndo xii ñáyi sǎ cūñahá-yu mèstrú xii-ndo, chi nchòhó ñ<sup>n</sup>-ni cùu-ndo ndecu-ndo, chi duca<sup>n</sup> ñ<sup>n</sup>dii-ni yúhú Yaá ní tendaha Yǎ Ndiöxí véxi ñuyíu-a cùu-í Mèstrú ndécú ndíhi ñaha-í xii-ndo. <sup>9</sup> Te ñ<sup>n</sup>dii-ni Dútú Ndiöxí Yaá ndécú àndiū cuu-gǎ Tǎtá-ndó, núu xǎ<sup>n</sup> vá cǎhá<sup>n</sup>-ndó sǎ dāva cue tée ñuyíu-a cùu-güedě tǎtá-ndó. <sup>10</sup> Te ni vǎ cání iní-ndó càda-ndo nàcuáa cǎhá<sup>n</sup> ñáyi sǎ cúnū-ndo, chi ñ<sup>n</sup>dii-ni yúhú Crístú Yaá ní tendaha Yǎ Ndiöxí

véxi ñuyú-a cùnuu-í. <sup>11</sup> Te ñáyiú ío-gá cùnùu ndecu ndíhi-ndo, ñáyiú-á<sup>n</sup> cúú-yu ñáyiú xínu cuechi núú-ndó. <sup>12</sup> Te nchaa ñáyiú quide cahnu mee-xi ñáyiú-á<sup>n</sup> vǎ cúú-yu ñáyiú cùnùu, te nchaa ñáyiú ñá túú quide cahnu mee-xi ñáyiú-á<sup>n</sup> cunùú-yu.

<sup>13</sup> Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséu, cùu-ndo cue tée ío dándahú méé-xí sǎ quidé ndǎá te ñá ndǎá sǎ quidé ndǎá-ndó, te ndǎhú ní cuu-ndo chi sǎdí-ndó ìchi ñáyiú ñá dǎñá-ndó ndíhu ndaha ñaha Yá Ndiòxí xíi-yu, te ni mée-ndo ñá túú quide-ndo nacuáa ndíhu ndaha ñaha-gǎ xii-ndo, te ni dàva-gǎ cue ñáyiú cuíní sǎ ndíhu ndaha ñaha-gǎ xíi-yu ñá dǎñá-ndó.

<sup>14</sup> Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséu, cúú-ndó cuè tée ío dándahú méé-xí sǎ quidé ndǎá te ñá ndǎá sǎ quidé ndǎá-ndó, te ndǎhú ní cuu-ndo chi quèndeé-ndó vèhe cue ñáyiú quèé, te ío naha càhá<sup>n</sup> ndíhi-ndo Yá Ndiòxí cuèndá cuíní-ndó sǎ vǎ yòo cutnùní iní-xi nàcuáa quide-ndo. Te sǎ dúcǎ<sup>n</sup> quide-ndo te ío-gǎ ndoho-ndo nùú ùhú núú ndǎhú dàcúúxí dàva-gǎ ñáyiú.

<sup>15</sup> Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséu, cúú-ndó cuè tée ío dándahú méé-xí sǎ quidé ndǎá te ñá ndǎá sǎ quidé ndǎá-ndó, te ndǎhú ní cuu-ndo chi sǎhni iní-ndó cuǎhá<sup>n</sup>-ndó ndèni ní cuu dàcahá<sup>n</sup>-ndó ñáyiú cuèndá cuíní-ndó tníi-yu ichi ndècu-ndo. Te òré ná xínu iní-yu tníi-yu ichi ndècu-ndo-á<sup>n</sup> te uu<sup>n</sup>-gǎ cuíta nihnú-yu dàcúúxí mée-ndo.

<sup>16</sup> Te nchòhó cúú-ndó dàtnǎ cue ñáyiú cuáá, chi ñá cùnùní iní-ndó nàcuáa canu ichi-ndo ñáyiú, te ndǎhú ní cuu-ndo chi càchí-ndó: “H<sup>n</sup> ñáyiú na càcunehe

veñúhu càhnu sǎ ío cùnùu oré cuíní-yu cutnùní iní tnàha ñáyiú-yu sǎ ndǎá cadǎ-yu ñ<sup>n</sup> sǎ sǎní iní-yu cadǎ-yu, te vǎ cúú cuèchi xíi-yu cuèi vǎ cadǎ-yu. Dico núu na càcu nehé-yu díhú<sup>n</sup> cuáá<sup>n</sup> yíhí xítí veñúhu-á<sup>n</sup> te cuu cuèchi xíi-yu te núu vǎ cadǎ-yu sǎ ñí cachí-yu cadǎ-yu”, duha càchí-ndó.

<sup>17</sup> ;Nchòhó cúú-ndó cuè tée ío ñíi díquí-xi, te cùu-ndo datná cue ñáyiú cuáá chi ñá tècú tnùní-ndó! Te vǎ càchí-ndó sǎ ío-gǎ cùnùu díhú<sup>n</sup> cuáá<sup>n</sup> dàcúúxí veñúhu, chi diu cuèndá veñúhu-á<sup>n</sup> ñí cuu íí díhú<sup>n</sup> cuáá<sup>n</sup>-á<sup>n</sup>.

<sup>18</sup> Te càchí tucu-ndo: “H<sup>n</sup> ñáyiú na càcunehe xító núú sácòdó sǎ ndúú tǎhú Yá Ndiòxí òré cuíní-yu cutnùní iní tnàha ñáyiú-yu sǎ ndǎá cadǎ-yu ñ<sup>n</sup> sǎ sǎní iní-yu cadǎ-yu, te vǎ cúú cuèchi xíi-yu cuèi vǎ cadǎ-yu, dico núu na càcu nehé-yu sǎ ndúú tǎhú Yá Ndiòxí yódó nùú xító-á<sup>n</sup> te cuu cuèchi xíi-yu te núu vǎ cadǎ-yu sǎ ñí sani iní-yu cadǎ-yu”, duha càchí-ndó. <sup>19</sup> ;Te cùu-ndo cue tée ío ñíi díquí-xi, te cùu-ndo datná cue ñáyiú cuáá chi ñá tècú tnùní-ndó! Te vǎ cání iní-ndó sǎ ío-gǎ nándíhi sǎ ndúú tǎhú Yá Ndiòxí sácòdó nùú xító núú sácòdó tnǎhí sǎ ndúú tǎhú-gǎ-á<sup>n</sup> dàcúúxí mée xító-á<sup>n</sup>. <sup>20</sup> Chi nchaa ñáyiú duca<sup>n</sup> càcunehe xító-á<sup>n</sup>, te tnàhá-ni sǎ yódó nùú-xi càcu nehé-yu òré duca<sup>n</sup> càhá<sup>n</sup>-yu. <sup>21</sup> Te nchaa ñáyiú duca<sup>n</sup> càcunehe veñúhu càhnu sǎ ío cùnùu te ñá díú mée-ni veñúhu càcu nehé-yu òré duca<sup>n</sup> càhá<sup>n</sup>-yu, chi tnàhá-ni Yá Ndiòxí Yaá cúú cuèndá veñúhu-á<sup>n</sup> cǎcú nehé-yu òré duca<sup>n</sup> càhá<sup>n</sup>-yu. <sup>22</sup> Te nchaa ñáyiú càcunehe andiu cuèndá cutnùní iní tnàha ñáyiú-yu sǎ ndǎá cadǎ-yu ñ<sup>n</sup> sǎ sǎní iní-yu cadǎ-yu, te ñá díú mée-ni andiu cacu nehé-yu chi tnàhá-ni núú núcòo Yá Ndiòxí táxí tnùní-gǎ cǎcú nehé-yu òré duca<sup>n</sup> càhá<sup>n</sup>-yu, te tnàhá méé-gǎ cǎcú nehé-yu òré duca<sup>n</sup> càhá<sup>n</sup>-yu.

<sup>23</sup>Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cúú-ndó cuè tée ío dándahú méé-xí sá quidé ndää te ñá ndää sá quidé ndää-ndó. Te cuèi núú ùxí xichi yúcu mèntá nihí-ndó, te sãñaha-ndo ìh<sup>n</sup> xichi xii Yá Ndiòxí, te diu-ni duca<sup>n</sup> quide-ndo yúcu nání ànis, ndíhi yúcu nání còminú, dico ndàhú ní cuu-ndo chi ñá túú quide cuendá-ndó nàcuáa càhá<sup>n</sup> nchaa tnúhu sá ìo-gá cúnùu sanu ichi ñaha xii-ndo, te tnúhu-á<sup>n</sup> càchí-xi sá ìo xini ñuhu-xi cada ndää-ndó cùndecu-ndo, te cundàhú iní-ndó cuè tnaha ñáyiú-ndo, te quindáá iní-ndó Yá Ndiòxí, te cada-ndo nchàa nacuáa ndùu tnúhu càhá<sup>n</sup>-ndó, te nchaa tnúhu-á<sup>n</sup> cúú-xí tnúhu sá ìo cùnùu xini ñuhu-xi cada-ndo nacuáa càhá<sup>n</sup>-xi, dico vá dáñá ndéé-ndó càda-ndo nchaa dava-gá nàcuáa càhá<sup>n</sup> tnúhu sá sánú ichi ñaha xii-ndo. <sup>24</sup>Te nchòhó cúú-ndó dàtná cue ñáyiú cuáá, chi ñá túú cùnnumí iní-ndó nàcuáa canu ichi-ndo ñáyiú, chi quide cuendá-ndó mèe-ni nchaa tnúhu sá ñà túú ìo cùnùu, dico nchaa tnúhu sá ìo-gá cúnùu xini ñuhu-xi cada cuendá-ndó ñà túú quide cuendá-ndó!

<sup>25</sup>Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cùu-ndo cue tée ío dándahú méé-xí sá quidé ndää te ñá ndää sá quidé ndää-ndó. Te ndàhú ní cuu-ndo chi cùu-ndo datná cue ñáyiú nàquete sátá-ni tàsá<sup>n</sup> ndíhi sátá-ni còhó te xití-xi càndehe caduha-ni. Te duca<sup>n</sup> sãtnahá-xi cùu-ndo chi mee-ni sá ndécú ndíhi tnaha ñáyiú-ndo ñuhu iní-ndó, te nándi dándahú-ndó-yu te quèhe<sup>n</sup>-ndo sá ndécú ndíhi-yu. <sup>26</sup>Te nchòhó cue tée cùu fariséú, cúú-ndó dàtná cue ñáyiú cuáá, chi ñá túú cùnnumí iní-ndó nàcuáa ndùu sá quidé-ndó. Te ío xini ñuhu-xi sá cáda-ndó nàcuáa nduu ndoo nduu nine iní-ndó cuendá ndacu-ndo càda-ndo sá

vãha, te xíã<sup>n</sup> núu chí cáda dàtná xiquide ñáyiú nàquete ndaa xití tàsá<sup>n</sup> ndíhi ndaa xití còhó.

<sup>27</sup>Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cùu-ndo cue tée ío dándahú méé-xí sá quidé ndää te ñá ndää sá quidé ndää-ndó. Te ndàhú ní cuu-ndo chi cùu-ndo datná núú yíndùxi ndíyi núú nì cuáha vii te ní nacáhyú sá cuixí<sup>n</sup>, dico xití yaú-á<sup>n</sup> chi càndehe caduha chi mee-ni yiqui ndíyi ñuhu. <sup>28</sup>Te duca<sup>n</sup> sãtnahá-xi cùu-ndo chi sanuu sá cúú-ndó cuè tée vãha dico iní-ndó chi mee-ni sá cuèhé sá dúhá ñuhu, te ío dándahú-ndó mèe-ndo sá quidé ndää-ndó te ñá ndää sá quidé ndää-ndó.

<sup>29</sup>Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cúú-ndó cuè tée ío dándahú méé-xí sá quidé ndää te ñá ndää sá quidé ndää-ndó. Te ndàhú ní cuu-ndo chi càdúha-ndo nchàa núú nì nguíndùxi cue tée ní xóo càhá<sup>n</sup> tnúhu Yá Ndiòxí ndéé sanaha, te ío vii quide-ndo nchaa núú sá nì cuáha núú yíndùxi cue ñáyiú ní quide vãha ní xíndecu ñuyíú-a. <sup>30</sup>Te càchí-ndó: “Te núu dicó nchoo ni xíndecu-o cùtnàhá ní xíndecu cue ñaní tnáhá-ó ndéé sanaha, te vá chítàhá-ó-güedë cahni-o cuè tée ní xóo càhá<sup>n</sup> tnúhu Yá Ndiòxí dàvá-á<sup>n</sup> ní cùu”, duha càchí-ndó. <sup>31</sup>Te sá dúcá<sup>n</sup> càhá<sup>n</sup>-ndó, te xíã<sup>n</sup> cùtnùní sá íh<sup>n</sup>-ní cùu-ndo ndíhi cue ñaní tnáhá-ndó cuè tée ní xíndecu ndéé sanaha, cue tée ní sahni ñaha xii cue tée ní càhá<sup>n</sup> tnúhu Yá Ndiòxí dàvá-á<sup>n</sup>. <sup>32</sup>Te núu duca<sup>n</sup> te chí dáxíu cava chiú<sup>n</sup> ní tausaha-güedë.

<sup>33</sup>Te nchòhó cúú-ndó cuè tée ío cuihna iní-xi, chi cùu-ndo datná cóo déé<sup>n</sup>! Te nchòhó vá nihí-ndó nàcuáa cada-ndo càcu nihnu-ndo núú ùhú núú ndàhú. <sup>34</sup>Te cuendá xíã<sup>n</sup> núu tendaha-í



cue tée càhá<sup>n</sup> tnúhu Yá Ndiöxí quixi núú-ndó, ndihi cue tée cùu mestrú danèhé ñáhá xii-ndo tnúhu-gá, ndihi cue tée ío váha cùtnuní iní-xi cuèndá cáhá<sup>n</sup>-güedé tnúhu-gá núú-ndó. Dico nchòhó chi da cùu úhú iní-ndó-güedé, chi dava-güedé cahni-ndo-güedé, te dava-güedé cata caa-ndo-güedé núú cùrúxí, te dava-güedé cani-ndo-güedé xití veñúhu, te ndi tnahá ñuú ndi tnahá ñuú qufhí<sup>n</sup>-ndó nànducucu-ndo-güedé cuèndá cada úhú iní-ndó-güedé. <sup>35</sup> Te sá dúcá<sup>n</sup> ná càda-ndo, te ndadíquí-ndó cuè tée ní quide ndáá ní xíndecu ní xíhí ní sahani ñaha cuè ñaní tnahá-ndó. Te ndéé ndíi Àbél tée ío váha ní quide ndáá ní xíndecu ní sahani-güedé ndadíquí-ndó, ndihi nchaa dava-gá cue tée ní sahani-güedé, ndihi ndéé ndíi Zacàriá déhe ndíi Berèquiás tée ní sahani-güedé ndéé núú ñí ndihi-ná ndadíquí-ndó, te ndíi-á<sup>n</sup> ñí sahani-güedé mei tnùú veñúhu càhnu sá ío cùnucu ndihi xító núú sácódó sá ndúú tǎhú Yá Ndiöxí, te nchaa cue tée-á<sup>n</sup> ndadíquí-ndó chi dàtná tnúhu mee-ndo ñí sahani-ndo cuè tée-á<sup>n</sup>, chi diu-ni ñaní tnahá mée-ndo duca<sup>n</sup> ní sahani ñaha xii-güedé. <sup>36</sup> Te na càchí tnúhu ndáá-í xii-ndo sǎ nchàa cue tée ní quide ndáá ní xíndecu ní sahani-güedé, nchaa cue tée-á<sup>n</sup> ndadíquí nchaa ñáyíu ndècu vitna —cachí-gá xǎha<sup>n</sup>-gǎ xii-güedé.

**Jèsús càhá<sup>n</sup>-gá cuèndá  
ñáyíu ñuú Jerusálén**

(Lc. 13:34-35)

<sup>37</sup> Te xǎha<sup>n</sup> Jèsús xii ñáyíu ñuú Jerusálén:

—Nchòhó ñáyíu ñuú Jerusálén sǎhani-ndo cue tée ní tendaha Yá Ndiöxí véxi càhá<sup>n</sup> tnúhu-gá núú-ndó, te mee-ni ndihi yúú sǎhni-ndó dàva-güedé. ¡Te yúhú titní xito ní cuiní-í coto ñaha-í xii-ndo dàtná quidé nchùxi xito-güedé déhe-güedé sǎqufhi-güedé

xití ndíxí<sup>n</sup>-güedé, dico nchòhó ñá túú ní cuiní-ndó, te diu-ni duca<sup>n</sup> sàni iní-í ndéé vitna! <sup>38</sup> Te na càchí tnúhu ndáá-í xii-ndo sǎ sǎa nduu te ío ndàhú yáha ñuú-ndó, te vá cùndècu-gá-ndó. <sup>39</sup> Te na càchí tnúhu tucu-í xii-ndo sǎ vǎ quini ñáhá-gǎ-ndó xii-í, dico sǎa nduu quini ñáhá tucu-ndo, te dàvǎ-á<sup>n</sup> cachí-ndó: “Ío càhnu cuu Yaá ní tendaha Dǔttú Ndiöxí véxi”, duha cachí-ndó —cachí-gá xǎha<sup>n</sup>-gǎ xii-yu.

**Jèsús càchí-gá sá ngóyó veñúhu**

(Mr. 13:1-2; Lc. 21:5-6)

**24** Te Jèsús ní quee-gá veñúhu càhnu sá ío cùnucu, te mei òré ní quehe<sup>n</sup>-gá ichi qufhí<sup>n</sup>-gá ñí xichi, te ní sǎndehe yatni cue tée xica cuu ndihi-gá dǎñi-gá, te xǎha<sup>n</sup>-güedé xii-gá:

—Cundehe veñúhu-a nǎ ío váha ní sǎa —cachí-güedé xǎha<sup>n</sup>-güedé xii-gá.

<sup>2</sup> Te Jèsús ní xǎha<sup>n</sup>-gǎ xii-güedé:

—Na càchí tnúhu ndáá-í xii-ndo sǎ nchǎá sǎ ndéhe-ndó-á vitna sǎa nduu te vá cùnducu-gá-xi dàtná cáá-xí vitna, chi ni ñí-gá yúú vǎ códó nchihí tnahaxi chi ndihi ngoyo —cachí-gá xǎha<sup>n</sup>-gǎ xii-güedé.

**Nàcuáa cada-xi nduu ta  
cùyatni naa ñuyíu-a**

(Mr. 13:3-23; Lc. 21:7-24; 17:22-24)

<sup>3</sup> Te Jèsús ní sǎa-gá ndihi cue tée xica cuu ndihi-gá yucu Òlívú, te xía<sup>n</sup> ní ngóo-gá te núú núcòo-gá-á<sup>n</sup> ñí sǎhá<sup>n</sup> cue tée xica cuu ndihi-gá, te dayuhu ní xǎha<sup>n</sup>-güedé xii-gá:

—Cuiní-ndí cachí tnúhu-n nǎ nduu dùca<sup>n</sup> cada-xi ngoyo veñúhu càhnu sá ío cùnucu, ndihi nándi cùu sá cádá-xí òré sa ta cùyatni nduu quixi tucu-n ñuyíu-a, ndihi òré sa ta cùyatni naa-xi —cachí-güedé xǎha<sup>n</sup>-güedé xii-gá.

<sup>4</sup> Te Jèsús ní xǎha<sup>n</sup>-gǎ xii-güedé:

—Ío quihí iní-ndó cùndecu-ndo cuèndá sá vǎ yòo dandàhú ñáhá

xii-ndo. <sup>5</sup>Chi ío cuéhé cue téé coo ñuyíú, te danàni-güedé méé-güedé dàtná nàni-í, te cachí-güedé: “Yúhú cúu-í Cristú Yaá ní tendaha Yă Ndiöxí véxi ñuyíú-a”, duha cachí-güedé. Te sá dúcá<sup>n</sup> cáhá<sup>n</sup>-güedé te ío vâi ñáyíu dandáhú-güedé. <sup>6</sup>Te níhí-ndó tnúhu nâá-güedé ndëni ní cuu, dico vá yuhú-ndó chi dacuítíí sâ dúcá<sup>n</sup> càda-xi, dico vátá sâá-gá nduu nâa ñuyíú òré duca<sup>n</sup> càda-xi. <sup>7</sup>Chi cue téé ìí<sup>n</sup> nàció<sup>n</sup> nâá-güedé ndíhi cue téé íngá nàció<sup>n</sup>, te titní ñúú ngúíta-güedé nâá-güedé, te titní xichi ñuyíú coo tnamá, te titní tucu xichi ñuyíú quixi cuéhé, te titní tucu xichi ñuyíú ío níhi tnâa. <sup>8</sup>Te nchaa xíá<sup>n</sup> cuu-xi tnúndòho sá vítná vâha vâha quèsaha sá cúu-xí cuè ñáyíu xíndecu ñuyíú.

<sup>9</sup>Te cue ñáyíu na cùu úhú íní ñáhá xii-ndo cuáha cuendá ñáhá-yu núú cuè téé cùchiu<sup>n</sup> cuendá caniha-güedé xii-ndo, te dava-ndo càhni ñaha-güedé, te nchaa ñáyíu cuu úhú íní ñáhá-yu xii-ndo sâ cuendá-í. <sup>10</sup>Te dàvá-á<sup>n</sup> ío vâi ñáyíu dàñá-yu sá sàndáá íní-yu Yá Ndiöxí, te ngóo-yu cuu úhú íní tnáhá-yu, te cuáha cuendá tnáhá-yu núú cuè téé cùchiu<sup>n</sup>. <sup>11</sup>Te ío vâi cue téé cachí-güedé sá càhá<sup>n</sup>-güedé tnúhu Yá Ndiöxí te ñá ndâá sá càhá<sup>n</sup>-güedé tnúhu-gá, te duca<sup>n</sup> ío vâi ñáyíu dandáhú-güedé. <sup>12</sup>Te dàvá-á<sup>n</sup> cunuu mèe-ni nchaa sá cuéhé sá dúhá càdá-yu, te vâi-yu vá cúu íní-gá-yu tnâha ñáyíú-yu. <sup>13</sup>Dico nchaa ñáyíu na càda ndee-ni íní canchicú<sup>n</sup> nihnu ñaha-ni xii-í, ñáyíu-á<sup>n</sup> naníhí tàhú-yu. <sup>14</sup>Te níhí ñuyíú quíhí<sup>n</sup> ñáyíu cáhá<sup>n</sup>-yu tnúhu vâha, tnúhu sá càhá<sup>n</sup> nàcuáa ndíhu ndaha ñâha Yá Ndiöxí xii ñáyíu, te sátá ná níhí nchaa ñáyíu tnúhu-á<sup>n</sup> te naa ñuyíú.

<sup>15</sup>Te ndíi Dániél téé ní xóo cáhá<sup>n</sup> tnúhu Yá Ndiöxí ndéé sanaha ní chídó tnùní ndíi cuendá ìí<sup>n</sup> sá dáquèe tíhú Yă Ndiöxí cundecu ìí<sup>n</sup> xichi núú ní cuu íí, te xíá<sup>n</sup> cada-xi sá vâ cúndècu-gá ní ìí<sup>n</sup> ñáyíu

xíá<sup>n</sup>. Te cada cuendá vâha-ndo nàcuáa ní cáhá<sup>n</sup> ndíi, chi nduu na quíní-ndó xíá<sup>n</sup> cundecu-xi núú dúcá<sup>n</sup> ní cuu íí, <sup>16</sup>te dàvá-á<sup>n</sup> nchaa ñáyíu xíndecu distrítú Jùdeá xíní ñùhu-xi cunú-yu quíhí<sup>n</sup>-yu xití yucu. <sup>17</sup>Te nchaa ñáyíu ndâa ndódó díquí véhé-xí vâ ndíhu-gá-yu vehé-yu quehé<sup>n</sup>-yu ìí<sup>n</sup> ndachiú<sup>n</sup>-yu canehé-yu quíhí<sup>n</sup>. <sup>18</sup>Te nchaa ñáyíu cuáhá<sup>n</sup> yucu vá ñùhú-gá-yu vehé-yu cúnúquehé<sup>n</sup>-yu dóó-yu. <sup>19</sup>Te ndàhú ní cuu nchaa ñáyíu dîhí ñúhú dêhe-xi, ndíhi cue ñáyíu dîhí xíndeca déhe vitna sàdi na saá nduu dùca<sup>n</sup> cada-xi! <sup>20</sup>Te nchòhó, chí càcá<sup>n</sup> táhú núú Yă Ndiöxí cuendá sá vâ dúcá<sup>n</sup> ndòho-ndo yóo quidé víxi<sup>n</sup>-xi, te ni vâ dúcá<sup>n</sup> ndòho-ndo nduu cuu-xi nduu ndetatú-ndó. <sup>21</sup>Chi dàvá-á<sup>n</sup> coo tnúndòho cahnu vihi ñuyíú, te vátá íí<sup>n</sup> ndùu-gá coo tnúndòho cahnu vihi-á<sup>n</sup> ndèé cútñàhá ní ngáva ñuyíú, chi diu-ni dàvá-á<sup>n</sup> coo tnúndòho cahnu vihi-á<sup>n</sup>, te ni núú cuáhá<sup>n</sup> núú véxi vá cóó-gă tnúndòho-á<sup>n</sup>. <sup>22</sup>Te Yá Ndiöxí càchí-gá sá vâ ío vâi nduu coo tnúndòho cahnu vihi-á<sup>n</sup> sâ cuendá nchaa ñáyíu ní cáhá<sup>n</sup>-gá cundecu ndíhi-gá. Chi núú vâi nduu na coo tnúndòho-á<sup>n</sup> te vâ yóo cácu nihnu.

<sup>23</sup>Te núú ío ñáyíu càchí-yu xii-ndo: “Chí cúndèhe iha, chi iha ní quexio Cristú Yaá ní tendaha Yă Ndiöxí véxi ñuyíú-a”, àdi cachí-yu: “Chí cúndèhe yacá<sup>n</sup> chí yàcá<sup>n</sup> ndécú-gă”, càchí-yu ña. Te vá quíndáá íní-ndó tnúhu càhá<sup>n</sup>-yu. <sup>24</sup>Chi coo cue téé cachí-güedé sá cúu-güedé Yaá ní tendaha Yă Ndiöxí véxi ñuyíú-a, te dava-güedé cachí-güedé sá cúu-güedé cue téé càhá<sup>n</sup> tnúhu Yá Ndiöxí dico ñá ndâá sá cúu-güedé cue téé càhá<sup>n</sup> tnúhu-gá, te cada-güedé titní núú sâ vâ yóo tnàhí ndâcu cada cuendá dandáhú-güedé ñáyíu. Te caní íní-güedé dandáhú-güedé ndéé cue ñáyíu ní cáhá<sup>n</sup> Yă Ndiöxí cundecu ndíhi-gá. <sup>25</sup>Te duha ndùu tnúhu càhá<sup>n</sup>-í dátúha ñaha-í

xii-ndo. <sup>26</sup>Te núu cächí-yu xii-ndo: “Xití yucu-ǎ ní quexìo Yaá ní tendaha Yǎ Ndiòxí véxi ñuyú-a”, cächí-yu. Te vá quíndáá iní-ndó quíhí<sup>n</sup>-ndó, àdi cachí-yu: “Vehe-ǎ” ndécú Yàá ní tendaha Yǎ Ndiòxí véxi ñuyú-a”, cächí-yu. Te vá quíndáá iní-ndó tnúhu cǎhá<sup>n</sup>-yu. <sup>27</sup>Chi dàtná xíní nchaa ñáyiu quide-xi oré sǎá ndúté dàyehé-xi ní cǎa xico ñuyú duca<sup>n</sup> cǎda-xi oré quixi tucu yúhú Tée cùu ñaní tnáhá-ndó nchàa-ndo chi nchaa<sup>n</sup>-yu quíní ñáhǎ-yu xii-í. <sup>28</sup>Te nchòhó xíní-ndó sǎ ncháá núu yúcu yiqui cuñú ní xíhí te yàcǎ<sup>n</sup> tàcǎ nchaa ndixíí xéxí-güèdi.

**Nàcuáa cada-xi òré quixi tucu Tée cùu ñaní tnáhá cuè ñáyiu**

(Mr. 13:24-37; Lc. 21:25-33; 17:26-30, 34-36)

<sup>29</sup>Te na yǎha-ni coo tnúndòho cahnu vihi-á<sup>n</sup>, te vá dáyèhé-gǎ nchícanchii, te ní vǎ dáyèhé-gǎ yóó, te ngoyo nchaa chódíní ndèè andiu, te quidi-xi andiu <sup>30</sup>nàcuáa cutnùní iní ñáyiu sǎ sǎ véxi yúhú Tée cùu ñaní tnáhǎ-yu nchaa<sup>n</sup>-yu. Te cue ñáyiu ñihí ñuyú ndǎhyú-yu sǎ ndíhú iní-yu òré duca<sup>n</sup> cǎda-xi, te nchaa<sup>n</sup>-yu quíní ñáhǎ-yu xii-í quee-í andiu quixi-í ichi xití vícò, te quíní-yu sǎ ìo cǎhnu cuu-í, te quide-í nchaa sǎ vǎha. <sup>31</sup>Te tauchiù<sup>n</sup>-í cue espíritú xínú cuèchi núu-í ñhi tíu-xi cútú nadatàcǎ-xi nchaa ñáyiu ní cǎhá<sup>n</sup>-í chitnahǎ ñáhǎ xii-í xín-decu ní cǎa xico ñuyú.

<sup>32</sup>Te nchòhó sa xíní-ndó nàcuáa quide yutnu ngúxí, chi yutnu-á<sup>n</sup> ndúu yùte núu díté-xi te nàtáhú ndaha-xi. Te òré duca<sup>n</sup> quide-xi te cächí-ndó sǎ sǎ ní cuyatni nuu cahni. <sup>33</sup>Te diu-ni duca<sup>n</sup> sǎtnahǎ-xi cada-xi ñuyú-a òré ná quíní-ndó cǎda-xi nchaa nacúáa ní cǎhá<sup>n</sup>-í, te cutnùní iní-ndó sǎ sǎ ní cuyatni víí-nǎ nduu nǎa ñuyú. <sup>34</sup>Te na cächí tnúhu ndáá-í xii-ndo sǎ òré vátá cùu-gǎ nchaa ñáyiu xín-decu ñuyú-a vitna, te cada-xi nchaa

nàcuáa ní cǎhá<sup>n</sup>-í. <sup>35</sup>Te andiu ndíhi ñuyú-a chi ndíhi ñihnu-xi, dico tnúhu-í chi vá ndíhí ñihnu-xi chi cùu-xi tnúhu ndáá cuití.

<sup>36</sup>Dico ñá túu cùtnuní ná nduu quixi tucu-í, te ní ñà túu cùtnuní ná òré chi vá yóo xíní, te ní cuè espíritú xínú cuèchi núu Yǎ Ndiòxí ñá túu xíní-í ná nduu quixi-í, te ní mèe yúhú Tée cùu Déhe Dútú Ndiòxí ñá túu xíní-í ná nduu quixi tucu-í, chi ì<sup>n</sup>di díf-ni mee-gǎ xíní-gǎ núu ná nduu quixi-í.

<sup>37</sup>Te nduu na quixi tucu yúhú Tée cùu ñaní tnáhá-ndó nchàa-ndo ñuyú-a te cada-xi dàtná ní quide-xi cùtnahǎ ní xín-decu ndíi Nòé. <sup>38</sup>Chi nchaa ñáyiu ní xín-decu dàvǎ-á<sup>n</sup> òré vátá ndáá-gǎ ndute ñuyú, te xèxí-yu xíhí-yu quide-yu, te davá-yu ìo-yu vico tnándaha, te davá-yu dàsǎ<sup>n</sup>-yu déhe yòcò-yu candeca ñaha tǎe, te duca<sup>n</sup>-ni xíquidè-yu ndéé ní sǎá nduu cuǎnguee té Nòé xití bàrcú. <sup>39</sup>Te ñá túu ní cùtnuní iní-yu nàcuáa cada-xi ñuyú ndèè ní sǎá nduu ñí ngúíta-xi ní cuu<sup>n</sup> dáú ñí ndaa ndute ñuyú ñí dánáá ñaha-xi xii-yu. Te diu-ni duca<sup>n</sup> sǎtnahǎ tucu-xi cada-xi nduu na quixi tucu yúhú Tée cùu ñaní tnáhǎ-yu nchaa<sup>n</sup>-yu ñuyú-a, chi nduu ñà túu nǎ yíhí ìní-yu te quixi tucu-í. <sup>40</sup>Te dàvǎ-á<sup>n</sup> núu úú tnáhǎ cue tée yíhi-güedé xití yucu, te ì<sup>n</sup>-dé ndanchita te ì<sup>n</sup>-dé quendóo. <sup>41</sup>Àdi úú ñáyiu ñíhí nchíçò-yu ì<sup>n</sup>-ni vèhe, te ì<sup>n</sup>-yu ndanchita te ì<sup>n</sup>-yu quendóo.

<sup>42</sup>Te duha ndúu tnúhu cǎhá<sup>n</sup>-í cuendá nchòhó cundecu túha-ndo, chi ñá túu xíní-ndó nǎ òré quixi tucu yúhú Yaá cúu Xítòhó-ndó. <sup>43</sup>Te nchòhó xíní-ndó sǎ núu ì<sup>n</sup> tée cùu xítòhó vehe xíní-dé ná òré cúu-xí niù quíhu ñadúhú vehe-dé duhu-güedǎ, te quíhi iní-dé cundecu-dé cuendá sǎ vǎ dáñá-dǎ quíhu ñadúhú-ǎ<sup>n</sup> vehe-dé duhu-güedǎ, dico ñá túu xíní-dé. <sup>44</sup>Te duha cǎhá<sup>n</sup>-í chi nchòhó xíní ñúhu-xi cundecu túha-ndo, chi na cuáhǎ<sup>n</sup> òré ñá túu nǎ yíhí ìní-ndó

quèxio yúhú Tée cùu ñaní tnáhá-ndó nchàa-ndo.

### Cuèndá ìì<sup>n</sup> tée xìnu cuechi

(Lc. 12:41-48)

<sup>45</sup>Te na canì-í ìì<sup>n</sup> cuèndú núú-ndó. Ìì<sup>n</sup> tée xìnu cuechi núú ìì<sup>n</sup> pàtróó<sup>n</sup> cùú-dě ìì<sup>n</sup> tée ío váha tècú tnùnì, te quide ndáá-dé ndécú-dě. Te ìì<sup>n</sup> xito ní dándòo ndaha ñaha patróó<sup>n</sup>-dě xii-dé nchaa cue ñáyiú ndècu vehe-dé cuèndá coto ñaha-dě xii-yu cuñaha-dě sá caxí-yu òré tàú-xi caxí-yu, te tée cùu patróó<sup>n</sup>-á<sup>n</sup> nǐ quee-dé cuáhá<sup>n</sup>-dě. <sup>46</sup>Te váha táhú tée xìnu cuechi-á<sup>n</sup> te núu ndècuu-dé quidé-dě nchaa nàcuáa ní xáha<sup>n</sup> pàtróó<sup>n</sup>-dě cada-dé mei òré ní nasáá pàtróó<sup>n</sup>-dě-á<sup>n</sup>. <sup>47</sup>Te na càchì tnúhu ndáá-í xii-ndo sǎ tée cùu patróó<sup>n</sup>-dě-á<sup>n</sup> cǔñaha-dě xii-dé sá quíndaha-dé nchaa sá ndécú ndìhi-dé. <sup>48</sup>Dico núú tée xìnu cuechi-á<sup>n</sup> ní cùu-dé ìì<sup>n</sup> tée cuihna iní-xi, te ngóo-dé cani iní-dé sá cùyàa patróó<sup>n</sup>-dě vá násáá ndìhi-dé. <sup>49</sup>Te nguíta-dé cani-dé nchaa dava-gá cue ñáyiú xìnu cuechi ndìhi-dé, te ngóo-dé caxi-dé coho-dé cada-dé ndìhi nchaa cue tée quihu. <sup>50</sup>Te ìì<sup>n</sup> nduu òré ñá túú yìhi iní-dé nasáá pàtróó<sup>n</sup>-dě, <sup>51</sup>te ío dandòho ñaha patróó<sup>n</sup>-dě xii-dé, chi daquìhì<sup>n</sup> ñáhá-dě xii-dé núú xìn-decu cue ñáyiú ní cachí sá nǐ quide ndáá te ñá ndáá sá nǐ quide ndáá-yu. Te duca<sup>n</sup> sǎtnahá-xi dandòho ñaha Yá Ndiòxí xii ñáyiú, chi daquìhì<sup>n</sup> ñáhá-gǎ xii-yu ìì<sup>n</sup> xichi núú ío ndohó-yu te yàcá<sup>n</sup> ío ndáhyú-yu, te dicó rúhñú-nǎ cuu núhu-yu sá sàtù iní-yu sá ndòhó-yu — càchì-gá xǎha<sup>n</sup>-gǎ xii-güedé.

### Cuèndá úxí ñáyiú òhì

**25** Te xǎha<sup>n</sup> tùcu Jesús xii-güedé: —Na canì-í ìì<sup>n</sup> cuèndú núú-ndó nàcuáa tecú tnùnì-ndó nàcuáa cada-xi òré ndìhu ndaha ñaha Yá Ndiòxí xii ñáyiú. Te úxí tnàhá ñáyiú òhì ñáyiú

cuechi nǐ quehé<sup>n</sup>-yu lintèrnǎ-yu, te cuáhá<sup>n</sup>-yu ìì<sup>n</sup> xichi núú cóo vico tnándaha cuèndá cundetú-yu quexio tée tnándaha. <sup>2</sup>Te úhú<sup>n</sup> ñáyiú cuechi-ǎ<sup>n</sup> ío váha cùtnuní iní-yu, te úhú<sup>n</sup>-yu ñáhá. <sup>3</sup>Te ndì ùhú<sup>n</sup> ñáyiú cuechi dùca<sup>n</sup> ñá túú cùtnuní iní-xi-á<sup>n</sup> ñà túú ní cǎnehé-yu sá ndèe lintèrnǎ-yu. <sup>4</sup>Dico ndì ùhú<sup>n</sup> ñáyiú cuechi cùtnuní iní-xi-á<sup>n</sup> nèhé-yu sá ndèe lintèrnǎ-yu. <sup>5</sup>Te tée tnándaha-á<sup>n</sup> cùyàa-dé quexio-dé núú ndétú ñáhá-yu-á<sup>n</sup>, te nini dùca<sup>n</sup> cuyaa-dé ní tnii ñaha sàní xii-yu ní xidí-yu. <sup>6</sup>Te cùu-xi datná dava niú níhi ní cáhá<sup>n</sup> dava-gá ñáyiú, te cǎchì-yu: “Sa véxi tée tnándaha, chí táquèe quehé quehe<sup>n</sup> cuèndá-ndó-dě”, cǎchì-yu. <sup>7</sup>Te ndì ùxí ñáyiú cuechi-ǎ<sup>n</sup> nǐ ndacóo-yu quide túha-yu lintèrnǎ-yu. <sup>8</sup>Te ndì ùhú<sup>n</sup> ñáyiú cuechi ñà túú cùtnuní iní-xi-á<sup>n</sup> nǐ xǎhǎ<sup>n</sup>-yu xii cue ndì ùhú<sup>n</sup> ñáyiú cùtnuní iní-xi-á<sup>n</sup>: “Chí táxi nùu luha sá ndèe lintèrnǎ-ndó ná ndèe lintèrnǎ-ndì chí ñá cuiní-xi cáyú mee-ni ndàhvǎ”, cǎchì-yu xǎhǎ<sup>n</sup>-yu. <sup>9</sup>Te cue ñáyiú cuechi cùtnuní iní-xi-á<sup>n</sup> nǐ xǎhǎ<sup>n</sup>-yu: “Vá táxi nùu-ndì chí vá tnàhá canehe chiu<sup>n</sup> mee-ndí, te váha-gá chí cuáhá<sup>n</sup> cuaa<sup>n</sup>-ndo nùú cuè ñáyiú xidícó cuèndá sá vǎ cùmǎní xii-ndo, te vá cùmǎní xii nchúhú tucu”, cǎchì-yu xǎhǎ<sup>n</sup>-yu. <sup>10</sup>Te nini cuáhá<sup>n</sup> ndì ùhú<sup>n</sup> ñáyiú duca<sup>n</sup> ñà túú cùtnuní iní-xi-á<sup>n</sup> cuǎnguaá<sup>n</sup>-yu sá ndèe lintèrnǎ-yu ní quexio tée tnándaha. Te ndì ùhú<sup>n</sup> ñáyiú cuechi cùtnuní iní-xi-á<sup>n</sup> nǐ quehe<sup>n</sup> cuèndá ñáhá-yu xii-dé, te cuánguihu ndìhi ñáhá-yu xii-dé núú cóo vico tnándaha, te sàtá dúcá<sup>n</sup> te ní nandedí yuyèhe. <sup>11</sup>Te òré ní nasáá cue ñáyiú cuechi ñáyiú ní sǎnguaa<sup>n</sup> sá ndèe lintèrnǎ-xi-á<sup>n</sup>, te ní nguíta-yu cǎhá<sup>n</sup>-yu xìnutnì-yu ndàa sàtá yuyèhe ndaa quehé, te xǎhǎ<sup>n</sup>-yu xii tée tnándaha-á<sup>n</sup>: “;Tǎta, nacaá<sup>n</sup> yuyèhe na quìhu-ndí!” cǎchì-yu xǎhǎ<sup>n</sup>-yu xii-dé. <sup>12</sup>Te tée tnándaha-á<sup>n</sup> nǐ xáha<sup>n</sup>-dě xii-yu: “Na cǎchì tnúhu ndáá-í xii-ndo sǎ

nchòhó ñá túú tàú-ndó quǐhu-ndo vìco-a, chi ñá túú tñàhá tñúhu ndíhi ñaha-ndo xii-í”, cächí-dé xǎha<sup>n</sup>-dë xii-yu —cächí Jesús xǎha<sup>n</sup>-gǎ xii-güedé.

<sup>13</sup> Te xǎha<sup>n</sup> tùcu Jesús xii-güedé:

—Ío quíhi iní-ndó cùndecu-ndo, chi ñá túú xìní-ndó ñá nduu, te ni ñà túú xìní-ndó ñá òré quixi tucu yúhú Tée cùu ñani tñàhá-ndó nchàa-ndo —cachí-gǎ xǎha<sup>n</sup>-gǎ xii-güedé.

**Cuendá cue tée ní ndóo ndaha díhú<sup>n</sup>**

(Lc. 19:11-27)

<sup>14</sup> Te xǎha<sup>n</sup> tùcu Jesús xii-güedé:

—Na càni tucu-í ingá cuèndú núú-ndó nàcuáa tecú tñúni-ndó nàcuáa cada-xi òré ndíhu ndaha ñaha Yá Ndiòxí xii ñáyiu. Ìi<sup>n</sup> tée sa ñíhu ichi-ná-dé sá cǎcǎ-dë quíngaca cuu xica-dë, te ní cana-dé cue tée xínu cuechi núú-dë cuèndá dándóo ndaha ñaha-dé díhú<sup>n</sup>-dë xii-güedé.

<sup>15</sup> Te nàcuáa ndùu chiu<sup>n</sup> quide ìi<sup>n</sup> ìi<sup>n</sup>-güedé te duca<sup>n</sup> díhú<sup>n</sup> ní sǎñaha-dë xii-güedé, te ìi<sup>n</sup>-dé ní sǎñaha-dë úhú<sup>n</sup> tñàhá díhú<sup>n</sup> sǎ ìo yahu ñani talentú, te ingá-dé ní sǎñaha-dë úú tñàhá díhú<sup>n</sup>-ǎ<sup>n</sup>, te ingá-dé ní sǎñaha-dë ìi<sup>n</sup> díhú<sup>n</sup>-ǎ<sup>n</sup>, te dǎtnùni ní quee-dé cuáhá<sup>n</sup>-dé. <sup>16</sup> Te tée ní quehe<sup>n</sup> cuèndá úhú<sup>n</sup> tñàhá díhú<sup>n</sup> sǎ ñani talentú ní quide-dé ndáhú ndíhi-xi te ní níhí tucu-dé úhú<sup>n</sup>-gǎ tucu tñàhá díhú<sup>n</sup>-ǎ<sup>n</sup>. <sup>17</sup> Te ñi-ndú duca<sup>n</sup> ní quide tucu tée ní níhí úú díhú<sup>n</sup> sǎ ñani talentú-á<sup>n</sup>, chi ní quide-dé ndáhú te ní níhí tucu-dé úú-gǎ tucu tñàhá. <sup>18</sup> Dico tée ní níhí ìi<sup>n</sup>-ni díhú<sup>n</sup>-ǎ<sup>n</sup> chi da ní chiváha-dé díhú<sup>n</sup> patróo<sup>n</sup>-dë, chi ní xete-dé ìi<sup>n</sup> yaú te ní chindúxi-dé.

<sup>19</sup> Te ní cuu cuéhé nduu sǎ ní quee patróo<sup>n</sup>-güedé-á<sup>n</sup> ní sǎngaca cuu-dé, te ní nasáá-dé te ní ngúita-dé quídé ndǎá-dé ndíhi-güedé cuèndá díhú<sup>n</sup> sǎ ní dándóo ndaha ñaha-dé xii-güedé. <sup>20</sup> Te tée ní quendóo ndaha úhú<sup>n</sup> tñàhá díhú<sup>n</sup>-ǎ<sup>n</sup> ní xǎha<sup>n</sup>-dë xii patróo<sup>n</sup>-dë: “Patróo<sup>n</sup>,

náu úhú<sup>n</sup> tñàhá díhú<sup>n</sup> sǎ ní dándóo ndaha ñaha-n xii-í-a, te ní sǎhá<sup>n</sup>-í ní quide-í ndíhi-xi ndáhú te ní chídó-xí úhú<sup>n</sup>-gǎ tucu tñàhá, te náu-a naquehe<sup>n</sup> cuèndá-n”, cächí-dé xǎha<sup>n</sup>-dë xii patróo<sup>n</sup>-dë. <sup>21</sup> Te tée cùu patróo<sup>n</sup>-dë-á<sup>n</sup> ní xǎha<sup>n</sup>-dë xii-dé: “Ío váha ní quide-n, te vitna quide ñaha-í xii-n ìi<sup>n</sup> tée váha tée quide ndǎá, te sǎ sǎcú díhú<sup>n</sup> ní dándóo ndaha ñaha-í xii-n te ní quide ndǎá-n, te sǎ dúcǎ<sup>n</sup> ní quide-n te vǎi-gǎ taxi cuèndá ñàhá-í xii-n. Te vitna cuu cundecu-n núú ndécú-í, te ío cudíí iní-ó cundecu ndíhi tñaha-o”, cachí tée cùu patróo<sup>n</sup>-dë-á<sup>n</sup> xǎha<sup>n</sup>-dë xii-dé. <sup>22</sup> Te sǎtá dúcǎ<sup>n</sup> te tée ní quendóo ndaha úú tñàhá díhú<sup>n</sup> sǎ ñani talentú-á<sup>n</sup> ní xǎha<sup>n</sup>-dë xii patróo<sup>n</sup>-güedé: “Patróo<sup>n</sup>, náu úú tñàhá díhú<sup>n</sup> sǎ ní dándóo ndaha ñaha-n-a, te ní sǎhá<sup>n</sup>-í ní quide-í ndíhi-xi ndáhú, te ní chídó-xí úú-gǎ tucu tñàhá, te náu-a naquehe<sup>n</sup> cuèndá-n”, cächí-dé xǎha<sup>n</sup>-dë xii patróo<sup>n</sup>-güedé. <sup>23</sup> Te ní xǎha<sup>n</sup> tée cùu patróo<sup>n</sup>-á<sup>n</sup> xii-dé: “Ío váha ní quide-n, te vitna quide ñaha-í xii-n ìi<sup>n</sup> tée váha tée quide ndǎá, te sǎ sǎcú díhú<sup>n</sup> ní dándóo ndaha ñaha-í xii-n te ní quide ndǎá-n, te sǎ dúcǎ<sup>n</sup> ní quide-n te vǎi-gǎ taxi cuèndá-í. Te vitna cuu cundecu-n núú ndécú-í, te ío cudíí iní-ó cundecu ndíhi tñaha-o”, cachí tée cùu patróo<sup>n</sup>-á<sup>n</sup> xǎha<sup>n</sup>-dë xii-dé. <sup>24</sup> Te tée ní ndóo ndaha ìi<sup>n</sup>-ni díhú<sup>n</sup>-ǎ<sup>n</sup> ní xǎha<sup>n</sup>-dë xii tée cùu patróo<sup>n</sup>-dë-á<sup>n</sup>: “Patróo<sup>n</sup>, yúhú sa ñaha-í sǎ yòhó cúú-n ìi<sup>n</sup> tée ndùcu mee-ni sǎ cúú-xí mèe-xi te tàhu-n chiu<sup>n</sup> cuáhá<sup>n</sup> nchúhú cue tée xínu cuechi núú-n sǎcǎ<sup>n</sup>-ndí tríu, te òré ná nǎtaxi tñaha-ndí, te yòhó dicó-nǎ náquèhe<sup>n</sup> cuèndá-n tàxúha-n. <sup>25</sup> Te núu xǎá<sup>n</sup> ní yùhú-í cada-í ndáhú ndíhi díhú<sup>n</sup>-n, te ní sǎhá<sup>n</sup>-í ní xete-í ìi<sup>n</sup> yaú te ní chindúxi-í, te náu díhú<sup>n</sup>-n-á<sup>n</sup> naquehe<sup>n</sup> cuèndá-n”, cächí-dé xǎha<sup>n</sup>-dë xii tée cùu patróo<sup>n</sup>-á<sup>n</sup>. <sup>26</sup> Te tée cùu patróo<sup>n</sup>-á<sup>n</sup> ní xǎha<sup>n</sup>-dë: “Yòhó cúú-n ìi<sup>n</sup> tée cuihna iní-xi xínu

cuechi núu-í te cuhndu-n, te núu yòhò sání iní-n sã cùu-í ìí<sup>n</sup> tée tàuchi<sup>n</sup> cuáhá<sup>n</sup>-ndó sàcá<sup>n</sup>-ndó triú te òrè nàtáxi tnaha-ndo, te yúhú dìcò-nã náquehe<sup>n</sup> cuendá-í nàtáxúha-í. <sup>27</sup> Te núu sàni iní-n sã dúcá<sup>n</sup> quide-í, te dasa<sup>n</sup> núu-n díhù<sup>n</sup>-í te cúñaha-n chãhu-yu díquí-xi ni cùu, te òrè ndexio-í te sa ngódó lùha-gá díquí-xi naquehe<sup>n</sup>-í ní cùu”, cachí-dé xãha<sup>n</sup>-dẽ xii tée xinu cuechi-á<sup>n</sup>. <sup>28</sup> Te tée cùu patróo<sup>n</sup>-á<sup>n</sup> nĩ xãha<sup>n</sup>-dẽ xii dava-gá cue tée ndècu ndìhi-dé: “Chí quéndèè ìí<sup>n</sup> díhú<sup>n</sup> sã nání tàlentú néhé tẽe-á<sup>n</sup>, te cuáha-ndo tẽe nèhe úxí tñahá díu-ni díhú<sup>n</sup>-á<sup>n</sup>. <sup>29</sup> Chi cue tée sa ndècu ndìhi te nĩhí-gã-güedé cundecu ndìhi-güedé, te ni vã nĩhí-gã-güedé ndèè cundecu nchaa sã cùndècu ndìhi-güedé. Te cue tée ñã túú nã ndécú ndìhi vai, te nchaa sã ndécú ndìhi-güedé vá cùndècu ndìhi-gã-güedé. <sup>30</sup> Te tée xinu cuechi ñã túú vèdana nàndíhi-á<sup>n</sup>, chí tñí-dẽ te daquih<sup>n</sup>-ndó-dẽ ìí<sup>n</sup> xichi núú néé núú ïo ndoho-dé, te yàcá<sup>n</sup> ndáhyú-dé, te dìcò rúhñú-nã cuu núhu-dé sã sàtú iní-dé sã ndóhó-dẽ”, càchí tée cùu patróo<sup>n</sup>-á<sup>n</sup> xãha<sup>n</sup>-dẽ xii-güedé. Duha sãtnahá-xi ndoho nchaa ñáyiu ñã túú quide váha — càchí-gá xãha<sup>n</sup>-gã xii-güedé.

**Cuendá cue ñáyiu ní quide  
váha ndìhi cuendá cue ñáyiu  
ñã túú ní quide váha**

<sup>31</sup> Te xãha<sup>n</sup> tùcu Jesús xii-güedé:

—Te nduu na quixi tucu yúhú Tée cùu ñani tñahá-ndó nchàa-ndo, te quixi-í ndìhi nchaa cue espíritú xínú cuèchi núu-í, te nchaa ñáyiu quini-yu sã ïo càhnu cuu-í, te dàvá-á<sup>n</sup> cunucóo-í núú táxi tñuní-í, te ïo cuñúhu ñáyiu sã ïo càhnu cuu-í. <sup>32</sup> Te dàvá-á<sup>n</sup> nataká nchaa ñáyiu xĩndecu ni càa xico ñuyú cundecú-yu núu-í, te cada-í-yu dàtná quidé ìí<sup>n</sup> toli oré táú dèí<sup>n</sup>-dé nchaa mbèé ndìhi nchaa chivá chi dèí<sup>n</sup> taxi ndecu-dé nchaa mbèé, te dèí<sup>n</sup> taxi ndecu-dé nchaa

chivá. <sup>33</sup> Te duca<sup>n</sup> sãtnahá-xi cada-í chi nchaa ñáyiu ní quide ndáá núu-í ñáyiu-á<sup>n</sup> taxi ndecu-í-yu xio cùha-í, te nchaa ñáyiu cuihna iní-xi ñã túú ní cuini cada ndáá núu-í ñáyiu-á<sup>n</sup> taxi ndecu-í-yu xio dàtni-í. <sup>34</sup> Te duca<sup>n</sup> te yúhú tée ïo cùnuu cúñaha-í xii ñáyiu na cùndecu xio cuha-í: “Nchaa nchòhó ñáyiu ní quide váha ñaha Tàtà-í Dútú Ndiòxí, chí nèhé chi vitna ní sáá nduu cùndecu-ndo núú ndécú-gã táxi tñuní-gã, chí ndéé cùtnahá ní ngáva ñuyú sa ndècu túha tñahí núú ndécú-gã-á<sup>n</sup> sã nchòhó nduu táhú-ndó cùndecu-ndo. <sup>35</sup> Te duca<sup>n</sup> chi òrè xihí-í doco te ní taxi-ndo sã nĩ xexi-í, te òrè yìchí-í ndute te ní taxi-ndo ndute ní xihí-í, te òrè ñùhú-í ichi te ní taxi-ndo vèhe ní ndetatú-í. <sup>36</sup> Te òrè xíní ñùhu-í dóo cuihnu-í te ní taxi-ndo, te òrè ní cuhú-í te ní quixi coto ñaha-ndo xii-í, te òrè ní xihí-í vècáa te ní quixi tucu-ndo nĩ quixi coto ñaha-ndo xii-í”, duha cúñaha-í xii nchaa ñáyiu-á<sup>n</sup>. <sup>37</sup> Te nchaa ñáyiu duca<sup>n</sup> nĩ quide ndáá-á<sup>n</sup> cùñahá-yu xii-í: “Yòhó Yaá cúú Xitohó-ndí, ni ìí<sup>n</sup> xito ñã túú ní tàxi-ndí sã caxí-n òrè xihí-n dòcò, te ni ìí<sup>n</sup> xito ñã túú ní tàxi-ndí ndute coho-n òrè yìchí-n. <sup>38</sup> Te ni ñã túú ní tàxi-ndí vehe ndetatú-n òrè ñùhú-n ìchi, te ni ñã túú ní tàxi-ndí dóo cuihnu-n òrè xíní ñùhu-n. <sup>39</sup> Te ni ñã túú ní quixi coto ñaha-ndí xii-n òrè ní cuhú-n, te ni ñã túú ní quixi coto ñaha-ndí xii-n òrè ní xihí-n vècáa”, duha quesahá-yu cúñahá-yu xii-í. <sup>40</sup> Te yúhú tée cùnuu cúñaha-í xií-yu: “Na càchí tñúhu ndáá-í xii-ndo sã ncháá sã vãha ní quide-ndo sã cúu-xí nchàa ñáyiu xĩndecu ichi-í cuèi ïo ndàhú xĩndáa-yu, te sã dúcá<sup>n</sup> nĩ quide-ndo sã vãha sã cúu-xí-yu, te cada iní-ndó sã mèe-í duca<sup>n</sup> nĩ quide-ndo nĩ xito ñaha-ndo xii-í”, duha cúñaha-í xií-yu.

<sup>41</sup> Te dàtnùnì cúñaha-í xii ñáyiu na cùndecu xio datni-í: “Nchaa nchòhó ñáyiu ní xíta nihnu chí xócuñí núú

ndécù-í-a, chi nchòhó ní nduu táhú-ndó cùndecu-ndo núú ñùhú núú càyú, diu-ni núú ní quide túha-í cundecu sácuhná ndíhi nchaa espíritú cùndíhi-xi, te yàcá<sup>n</sup> cundecu-ndo ñi caa ñi quíhí<sup>n</sup>. <sup>42</sup>Chi yúhú òré xihí-í docó te ñá túú ní tàxi-ndo sá cáxi-í, te ni òré yìchí-í ndute te ñá túú ní tàxi-ndo ndute coho-í. <sup>43</sup>Te ni òré ní xúhu-í ichi ñá túú ní tàxi-ndo vehe ndetatú-í, te ni òré xíní ñùhu-í dóó cuihnu-í te ñá túú ní tàxi-ndo, te ni òré ní cuhú-í te ñá túú ní quixi-ndo quixi coto ñaha-ndo xii-í, te ni òré ní xíhi-í vecaá te diu-ni duca<sup>n</sup> ní quide-ndo ñá túú ní quixi-ndo quixi coto ñaha-ndo xii-í”, duha cùñaha-í xii-yu. <sup>44</sup>Te ñáyíu-á<sup>n</sup> cùñàhá-yu xii-í: “Yòhó Yaa cúú Xìtohó-ndí ni ñi<sup>n</sup> xito ñá túú ní xíní-ndí òré xihí-n dòcò cuendá taxi-ndí sá cáxi-n, te ni ñi<sup>n</sup> xito ñá túú ní xíní-ndí òré yìchí-n ndùte cuendá taxi-ndí ndute coho-n, te ni ñi<sup>n</sup> xito ñá túú ní xíní-ndí cuhu-<sup>n</sup> ichi cuendá taxi-ndí vehe ndetatú-n, te ni ñi<sup>n</sup> xito ñá túú ní xíní-ndí òré xíní ñùhu-n dóó cuendá taxi-ndí dóó cuihnu-n, te ni ñi<sup>n</sup> xito ñá túú ní xíní-ndí òré cùhú-n cuendá quixi coto ñaha-ndí xii-n, te ni ñi<sup>n</sup> xito ñá túú ní xíní-ndí quíhi-n vè-caá cuendá quixi coto ñaha-ndí xii-n”, duha quesàhá-yu cùñàhá-yu xii-í. <sup>45</sup>Te yúhú cùñaha-í xii-yu: “Na càchí tnúhu ndáá-í xii-ndo sá sá cuendá sá ñá túú ní quide-ndo ñi<sup>n</sup> sá vaha sá cúú-xí cuè ñáyíu ndècu ichi-í cuèi ío ndàhú xíndáa-yu, te sá dúcá<sup>n</sup> ní quide-ndo ñá túú ní quide-ndo sá vaha sá cúú-xí-yu, te cada iní-ndó sá mèe-í duca<sup>n</sup> ní quide-ndo ñá túú ní quide-ndo sá vaha sá cúú-xí-í”, duha cùñaha-í xii-yu. <sup>46</sup>Te nchaa ñáyíu-á<sup>n</sup> quíhí<sup>n</sup>-yu núú ùhú núú ndàhú ñi caa ñi quíhí<sup>n</sup>. Te nchaa ñáyíu ní quide ndáá núú-í ní xíndecu ñuyúí-a, ñáyíu-á<sup>n</sup> nduu táhú-yu ío váha cundecú-yu ñi caa ñi quíhí<sup>n</sup> —càchí-gá xáha<sup>n</sup>-gá xii-güedé.

**Cue tée cùu úhú iní ñáhá xii  
Jesús ndécú-güedé nàcuáa  
cada-güedé tñii ñaha-güedé xii-gá**

(Mr. 14:1-2; Lc. 22:1-2; Jn. 11:45-53)

**26** Te sátá ní yáha duca<sup>n</sup> ní cáhá<sup>n</sup> Jèsús, te ní xáha<sup>n</sup>-gá xii cue tée xica cuu ndíhi-gá:

<sup>2</sup>—Nchòhó sa xíní-ndó sá cùmání ùú-gá nduu te coo vico pàscuá, te càchí tnúhu-í xii-ndo sá yúhú Tée cùu ñaní tnáhá-ndó nchaa-ndo tñii ñaha-güedé xii-í, te cuáha cuendá ñáhá-güedé núú cuè tée cùu úhú iní ñáhá xii-í, te cata caa ñaha-güedé núú cùrúxí te núú cùrúxí-á<sup>n</sup> cuú-í —càchí-gá xáha<sup>n</sup>-gá xii-güedé.

<sup>3</sup>Te diu-ni òré càhá<sup>n</sup> ndíhi Jèsús cue tée xica cuu ndíhi-gá ní nataká cue tée cùu dútú cùnùu, ndíhi cue tée dàcuaha ñaha xii ñáyíu nchaa tnúhu ní chídó tnùní ndíi Moisés, ndíhi cue tée cùu sacuéhé núú ñáyíu isràél. Te mei quèhé vehe núú cúú vèchiu<sup>n</sup> té Caifás tée cùu dútú ío-gá cùnùu ní nataká-güedé. <sup>4</sup>Te xía<sup>n</sup> ní ndatnúhu-güedé nàcuáa cada-güedé dandàhú-güedé Jèsús cuendá tñii ñaha-güedé xii-gá, te cahni ñaha-güedé. <sup>5</sup>Te ní xítñaha-güedé:

—Váha-gá sá vã tñíí-ó Jèsús mei ndùu vico, chí núu duca<sup>n</sup> na càda-o te ío dusa<sup>n</sup> càda ñáyíu —càchí-güedé xítñaha-güedé.

**Ñi<sup>n</sup> ñadíhí chíhí-á<sup>n</sup> àcítí díquí Jèsús**

(Mr. 14:3-9; Jn. 12:1-8)

<sup>6</sup>Te ndècu Jesús ñuu Bètaniá vehe ñi<sup>n</sup> tée nàni Xímú, tée ní tnahá cuéhé sá dátèhyú nihnu-xi yíqui cùñú-ó. <sup>7</sup>Te xía<sup>n</sup> ndécú-gá ní quexìo ñi<sup>n</sup> ñadíhí néhé-á<sup>n</sup> ñi<sup>n</sup> sá ní cuáha yúú vaha nàni alabastnú, te xítí xía<sup>n</sup> ñúhú àcítí sàhá<sup>n</sup> tnámí sá ío ndèyáhu. Te yíhi Jesús mèsá xéxí-gá, te ñaha-á<sup>n</sup> ní sáhá<sup>n</sup>-a<sup>n</sup> ní sódó-a<sup>n</sup> àcítí ñúhú xítí xía<sup>n</sup> díquí-gá. <sup>8</sup>Te òré ní xíní cue tée xica cuu ndíhi Jesús sá dúcá<sup>n</sup> ní

quide ñaha-á<sup>n</sup> te ní cudéé<sup>n</sup>-güedě, te ní ngüíta-güedé xĩtnaha-güedé:

—Ñá túú quide váha ñaha-á<sup>n</sup> dàcá<sup>n</sup> quidé-á<sup>n</sup> dacuĩta-a<sup>n</sup> acití-á<sup>n</sup>. <sup>9</sup>Chi váha-gá ñũ cuyáhu acití-á<sup>n</sup> ní cùu chi ío ndeyáhu, te dǐhú<sup>n</sup> cuyáhu acití-á<sup>n</sup> cuu cuendá cue ñáyiú ndàhú ní cùu —cachí-güedé xĩtnaha-güedé.

<sup>10</sup>Te Jèsús ní cutnùní iní-gá nàcuáa ndùu tnúhu xĩtnaha-güedé, núu ní xáha<sup>n</sup>-gǎ xii-güedé:

—Vá dásátú-ndó iní ñadǐhí-a, chi sá ní quide ñaha-a<sup>n</sup> xii-í cúu-xí ì<sup>n</sup> sá váha. <sup>11</sup>Chi cue ñáyiú ndàhú duca<sup>n</sup>-ni cùtnahá ñáyiú-á<sup>n</sup> tnuú-ndó, dico yúhú chi vá ncháá ndùu cundecu ndihí ñaha-í xii-ndo ñũyíú-a. <sup>12</sup>Te sá dúhá ní quide ñaha ñadǐhí-a xii-í ní sódó-a<sup>n</sup> àcítí díquí-í, te xǐá<sup>n</sup> cada iní-ndó sǎ sǎ quide túha-a<sup>n</sup> yiqui cùñú-í cuendá nguǐndǔxi-xi. <sup>13</sup>Te na cǎchí tnúhu ndáá-í xii-ndo sǎ nděni ní cuu nihí ñũyíú ná cǎhá<sup>n</sup> ñáyiú tnúhu-í, te cǎhá<sup>n</sup>-yu tnàhá cuendá ñadǐhí-a cuendá quiní nchaa ñáyiú nàcuáa ní quide-a<sup>n</sup> te duca<sup>n</sup> vǎ nácua<sup>n</sup>áa-yu —cǎchí-gǎ xǎha<sup>n</sup>-gǎ xii-güedé.

**Té Jùdás ndúcú-dě nàcuáa cada-dé cuáha cuendá-dé Jèsús núu cué tée cùu úhú iní ñáhá xii-gǎ**

(Mr. 14:10-11; Lc. 22:3-6)

<sup>14</sup>Te sǎtá dúcá<sup>n</sup> te té Jùdás Iscàrioté ní sǎhá<sup>n</sup>-dé ní ndatnúhu-dé ndihí cue tée cùu dútú cúnùu. Te núu tnàhá té Jùdás-á<sup>n</sup> cúu ùxúú cue tée xica cuu ndihí Jèsús. <sup>15</sup>Te ní xáha<sup>n</sup>-dě xii cue tée cùu dútú cúnùu-á<sup>n</sup>:

—¿Ndědau cháhu ñaha-ndo xii-í te taxi cuendá-í Jèsús xii-ndo-i? —cǎchí-dě xǎha<sup>n</sup>-dě xii-güedé.

Te cue dútú-á<sup>n</sup> ní xáha<sup>n</sup>-güedě xii-dé sǎ cuǎñaha-güedě ócú úxí dǐhú<sup>n</sup> cuixí<sup>n</sup>, te dǐu-ni duca<sup>n</sup> ní sǎñaha-güedě xii-dé. <sup>16</sup>Te ndéé òré ní quehe<sup>n</sup> cuendá té Jùdás-á<sup>n</sup> dǐhú<sup>n</sup>, te ní ngüíta-dé ndúcú-dě

nàcuáa cada-dé cuáha cuendá-dé Jèsús núu-güedě.

**Cùdini Jèsús ndihí cue tée xica cuu ndihí-gǎ**

(Mr. 14:12-25; Lc. 22:7-23; Jn. 13:21-30; 1 Co. 11:23-26)

<sup>17</sup>Te ní sǎá nduu ní quesaha víco xexi ñáyiú pǎá sǎ ñà túú yǐhi levadurá dǐu-ni víco pásuá, te cue tée xica cuu ndihí Jèsús ní sǎndehe yatni-güedé dǐñi-gǎ, te xǎha<sup>n</sup>-güedě xii-gǎ:

—Mèstrú, véxi-ndí xicá<sup>n</sup> tnúhú-ndí núu-n ñũ ndéé cuiní-n cǎda túha-ndí cuendá cudini-o sacuaa nduu víco pásuá —cǎchí-güedé xǎha<sup>n</sup>-güedě xii-gǎ.

<sup>18</sup>Te Jèsús ní xáha<sup>n</sup>-gǎ xii-güedé:

—Chí cuáhá<sup>n</sup> xití ñuú-á<sup>n</sup>, te yàcá<sup>n</sup> naníhí-ndó ì<sup>n</sup> tée cùtnuní iní-ndó sǎ sǎ xiní ñáhá-dě xii-o, te cùñaha-ndo xii-dé: “Yaá cúu Mèstrú cǎchí-gǎ sǎ sǎ ní cuyatni nduu vǎ cùnděcu-gǎ ñũyíú-a, te vehe-n cuiní-gǎ cada-gǎ víco pásuá ndihí cue tée xica cuu ndihí-gǎ”, duha cùñaha-ndo xii tée-á<sup>n</sup> —cǎchí-gǎ xǎha<sup>n</sup>-gǎ xii-güedé.

<sup>19</sup>Te cue tée xica cuu ndihí-gǎ-á<sup>n</sup> ní xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gǎ xii-güedé, te ní quide túha-güedé sǎ cùdini-güedé ndihí-gǎ sacuaa nduu víco pásuá-á<sup>n</sup>. <sup>20</sup>Te òré sa ní cundiquí<sup>n</sup> te cuánguihu Jèsús ndihí ndí ùxúú cue tée xica cuu ndihí-gǎ mèsá cuendá cudini-gǎ ndihí-güedé. <sup>21</sup>Te nini xèxi-gǎ ndihí-güedé ní xáha<sup>n</sup>-gǎ xii-güedé:

—Na cǎchí tnúhu ndáá-í xii-ndo sǎ dǐú ì<sup>n</sup> nchohó cue tée xica cuu ndihí-í cuáha cuendá ñáhá-ndó xii-í núu cué tée cùu úhú iní ñáhá —cǎchí-gǎ xǎha<sup>n</sup>-gǎ xii-güedé.

<sup>22</sup>Te sǎ dúcá<sup>n</sup> ní xáha<sup>n</sup>-gǎ xii-güedé te nchaa-güedé ní ngüíta-güedé cùndǐyí-güedé, te da ì<sup>n</sup> da ì<sup>n</sup>-güedé ní ngüíta-güedé xǎha<sup>n</sup>-güedě xii-gǎ:



—Mèstrú, çñá dífú yúhú duca<sup>n</sup> sàni iní-n càda-í-u? —càchí-güedé xáha<sup>n</sup>-güedé xii-gá.

<sup>23</sup> Te ní xáha<sup>n</sup>-gá xii-güedé:

—Tée nacaxi ndihi-í ì<sup>n</sup>-ni cóhó caxi-ndí, tée-án<sup>n</sup> cuáha cuendá ñáhá-dě xii-í núú cuè tée cùu úhú iní ñáhá.

<sup>24</sup> Te yúhú Tée cùu ñani<sup>n</sup> tnáhá-ndo nchàa-ndo ñuhu ichi-í cuáhá<sup>n</sup>-í yáha-í nàcuáa càhá<sup>n</sup>-xi núú tütú Yá Ndiöxí, dico ndàhú ní cuu tée duca<sup>n</sup> na cuáha cuendá ñáhá xii-í núú cuè tée cùu úhú iní ñáhá, chi váha-gá sá vǎ cacú tée-án<sup>n</sup> cundecu-dé ní cùu, te ñá dífú sǎ ní cacu-dé te duca<sup>n</sup> càda-dé —càchí-gá xáha<sup>n</sup>-gǎ xii-güedé.

<sup>25</sup> Te sǎtá dúcǎ<sup>n</sup> te ní cǎhá<sup>n</sup> tǎ Jüdás tée cuáha cuendá ñáhá xii-gá, te xáha<sup>n</sup>-dě:

—Mèstrú, çte nǎa sàni iní-n sǎ yúhú cuáha cuendá ñáhá-í xii-n núú cuè tée cùu úhú iní ñáhá xii-n-án<sup>n</sup>? —càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gǎ xii-dé:

—Diu-n —càchí-gá xáha<sup>n</sup>-gǎ xii-dé.

<sup>26</sup> Te nini cùdini cue tée xica cuu ndihi Jesús ní quehe<sup>n</sup>-gǎ pǎá, te ní ndacá<sup>n</sup> táhú-gǎ núú Yá Ndiöxí, te dàt-nùnì ní táhú cuèchi-gǎ te ní nguíta-gǎ dǎcǎhñu-gǎ cue tée xica cuu ndihi-gǎ-án<sup>n</sup>, te xáha<sup>n</sup>-gǎ xii-güedé:

—Chí quéhé<sup>n</sup> pǎá-a caxi-ndo, te cada iní-ndó sǎ yèqui cuñú-í cúú-xí —càchí-gǎ xáha<sup>n</sup>-gǎ xii-güedé.

<sup>27</sup> Te ní quehe<sup>n</sup>-gǎ vǎsú ñúhú ndùdí ndéhé yoho yàha stilé, te ní ndacá<sup>n</sup> táhú-gǎ núú Yá Ndiöxí, te dàt-nùnì ní nguíta-gǎ sǎñaha-gǎ xii-güedé cuendá coho-güedé luha luha sǎ ñúhú xití-xi, te xáha<sup>n</sup>-gǎ xii-güedé:

—Chí cóhó nchàa nchohó ndudí ndéhé yoho yàha stilé ñúhú xití vǎsú-a. <sup>28</sup> Te cada iní-ndó sǎ cúú-xí dàtná ññì-í sǎ cǎtí òré cahni ñaha-güedé xii-í, te sǎ dúcǎ<sup>n</sup> cǎtí ññì-í xǎ<sup>n</sup> cutnùnì ndǎá sǎ Yá Ndiöxí cada-gǎ ingá núú sǎ váha sǎ cúú-xí vǎi ñáyiu dàtná ní cachí-gǎ cada-gǎ, te ío

vǎi ñáyiu cada càhnu iní-gǎ cuèchi-yu. <sup>29</sup> Te na càchí tnúhu-í xii-ndo sǎ vítǎ-nǎ duha xihì ndihì ñaha-í xii-ndo ndùdí ndéhé yoho yàha stilé-a, te vǎ cóhó ndihì ñaha-gǎ-í xii-ndo, dico na sǎá nduu nànihí tnáhá-ó núú ndécú Tǎtǎ-í Dútú Ndiöxí táxí tnùnì-gǎ te dàvǎ-án<sup>n</sup> cada iní-ndó sǎ dàtná sǎ cóhó ndihì ñaha tucu-í xii-ndo chi ío cudí iní-ó —càchí-gǎ xáha<sup>n</sup>-gǎ xii-güedé.

### Té Pèlú cùñaha-dě xii ñáyiu sǎ ñà túú xini-dé Jèsús

(Mr. 14:26-31; Lc.

22:31-34; Jn. 13:36-38)

<sup>30</sup> Te Jèsús ní xita-gǎ ì<sup>n</sup> ndudú ndihì cue tée xica cuu ndihì-gǎ, te dàtnùnì ní xica-gǎ cuáhá<sup>n</sup>-gǎ ndihì-güedé yucu Òlívú. <sup>31</sup> Te yàcǎ<sup>n</sup> ní xáha<sup>n</sup>-gǎ xii-güedé:

—Na càchí tnúhu-í xii-ndo sǎ nchǎá-ndó dǎndóo ñaha-ndo xii-í niú vitna, chi quee ndǎá-xi nàcuáa càhá<sup>n</sup>-xi núú tütú Yá Ndiöxí núú càchí-xi: “Yúhú cuáha-í tnúhu cahni-güedé tée cùu toli, te nchaa mbéé-dě ndihì-güedé cuténuu”, duha càchí-xi núú tütú-gǎ. <sup>32</sup> Dico na ndòto-í te codonù-í núú-ndó quǎhí<sup>n</sup> distrìtú Galileá —càchí-gǎ xáha<sup>n</sup>-gǎ xii-güedé.

<sup>33</sup> Te té Pèlú ní xáha<sup>n</sup>-dě xii-gǎ:

—Te cuèi nchaa-güedé ná dǎndóo ñaha-güedé xii-n, dico yúhú chi vǎ dǎndóo ñaha-í xii-n —càchí-dé xáha<sup>n</sup>-dě xii-gǎ.

<sup>34</sup> Te Jèsús ní xáha<sup>n</sup>-gǎ xii-dé:

—Na càchí tnúhu ndǎá-í xii-n sǎ niú vitna cùmánì-gǎ cana ì<sup>n</sup> líhi, te únì xito càhá<sup>n</sup>-n núú ñáyiu sǎ ñà túú xini ñáhá-n xii-í —càchí-gǎ xáha<sup>n</sup>-gǎ xii-dé.

<sup>35</sup> Te té Pèlú ní xáha<sup>n</sup>-dě xii-gǎ:

—Cuèi na cùu ndihì ñaha-í xii-n dico vǎ càhá<sup>n</sup>-í núú ñáyiu sǎ ñà túú xini ñáhá-í xii-n —càchí-dé xáha<sup>n</sup>-dě xii-gǎ.

Te nchaa dava-gǎ cue tée xica cuu ndihì-gǎ diu-ni duca<sup>n</sup> ní xáha<sup>n</sup>-güedé xii-gǎ.

**Jèsús càhá<sup>n</sup> ndihi-gá Yă Ndiöxí ìì<sup>n</sup>  
xichi núú nání Gètsemaní**

(Mr. 14:32-42; Lc. 22:39-46)

<sup>36</sup>Te Jèsús ní quexio-gá ndihi cue tée xica cuu ndihi-gá ìì<sup>n</sup> xichi núú nání Gètsemaní, te xíá<sup>n</sup> nǐ xáha<sup>n</sup>-gă xii-güedé:

—Chí cúnúccó iha cundetu-ndo na quìhí<sup>n</sup>-í yàcá<sup>n</sup> càhá<sup>n</sup> ndihi-í Yă Ndiöxí — cächí-gá xáha<sup>n</sup>-gă xii-güedé.

<sup>37</sup>Te ndèca-gá té Pèlú, ndihi ndi ndúú déhe té Zebèdeu cuáhá<sup>n</sup>, te ní nguíta-xi súúni ndihú iní-gá. <sup>38</sup>Te ní xáha<sup>n</sup>-gă xii cue tée úní-á<sup>n</sup>:

—Súúni ndihú iní-í dàtná sá cùú-í, te chí quéndö nchòhó iha te vá cùdú-ndó chí yúhú vá cùdú-í —cächí-gá xáha<sup>n</sup>-gă xii-güedé.

<sup>39</sup>Te sa ñùnchíf luha ní xica ndehe Jèsús núú ndécú-güedé, te ní nguífí xítí-gă te ní nuu núú-gă ndàa núú ñúhú, te ní nguíta-gá càhá<sup>n</sup> ndihi-gá Tătá-gă Dútú Ndiöxí, te xáha<sup>n</sup>-gă:

—Yòhó Tătá mée-í, càhá<sup>n</sup> ndàhú-í núú-n nǔu vá cündèe iní-n tàunihnu ñaha-n xii-í cuendá sá vă ndóhò-í ná sáá òré, dico vá cádá-n nàcuáa cächí iní mée-í, chí cada-n nàcuáa cächí iní mée-n —cächí-gá xáha<sup>n</sup>-gă xii Tătá-gă Dútú Ndiöxí.

<sup>40</sup>Te sáta nǐ yáha ní càhá<sup>n</sup> ndihi-gá Tătá-gă Dútú Ndiöxí, te cuánuhú-gá núú nǐ dándö-gá cue tée úní-á<sup>n</sup> te xixídí-güedé òré ní nasáá-gá, te ní xáha<sup>n</sup>-gă xii té Pèlú:

—¿Náa ñá cündèe iní-ndó vă cùdú-ni-ndo cuédicó ìì<sup>n</sup> òré nini càhá<sup>n</sup> ndihi-í Yă Ndiöxí-á<sup>n</sup>? <sup>41</sup>Te chí quéndö tucu te cuhu<sup>n</sup> iní-ndó vă cùdú-ndó, te càhá<sup>n</sup> ndihi-ndo Yă Ndiöxí cuendá sá vă dácàhá<sup>n</sup> ñáhá yùcu ñávàha xii-ndo càda-ndo sá ñà túú tàù-ndó càda-ndo. Te xiní ndáá-í sá nchòhó cuíní-ndó càda-ndo nchaa nàcuáa càhá<sup>n</sup>-í dicó-ni sá ñà túú nihí ndéé-ndó —cächí-gá xáha<sup>n</sup>-gă xii-güedé.

<sup>42</sup>Te xito cùu uú cuáhá<sup>n</sup> tucu Jèsús càhá<sup>n</sup> ndihi-gá Tătá-gă Dútú Ndiöxí, te xáha<sup>n</sup>-gă:

—Yòhó Tătá mée-í, te núu vá cündèe iní-n tàunihnu ñaha-n xii-í cuendá sá vă ndóhò-í, te cada nàcuáa cächí iní mée-n —cächí-gá xáha<sup>n</sup>-gă xii Tătá-gă Dútú Ndiöxí.

<sup>43</sup>Te òré ní yáha ní càhá<sup>n</sup> ndihi-gá Tătá-gă Dútú Ndiöxí, te cuánuhú tucu-gá núú xíndecu cue tée úní xícá cùu ndihi-gá-á<sup>n</sup>, te xidí-ni tucu-güedé òré ní nasáá-gá, te duca<sup>n</sup> nǐ quide-güedé chí súúni ñùhu saní núú-güedé. <sup>44</sup>Te ní dándö ñaha tucu Jesús xii-güedé xíá<sup>n</sup>, te cuáhá<sup>n</sup> tucu-gá xito cùu uní càhá<sup>n</sup> ndihi tucu-gá Tătá-gă Dútú Ndiöxí, te diu-ni tnúhu sá sà ní xáha<sup>n</sup>-gă xii Tătá-gă Dútú Ndiöxí, diu-ni tnúhu-á<sup>n</sup> nǐ xáha<sup>n</sup> tucu-gá. <sup>45</sup>Te sáta nǐ yáha ní càhá<sup>n</sup> ndihi-gá Tătá-gă Dútú Ndiöxí, te cuánuhú tucu-gá núú ndécú cuè tée xica cuu ndihi-gá-á<sup>n</sup>, te òré ní nasáá-gá, te ní xáha<sup>n</sup>-gă xii-güedé:

—¿Te náa xidí-ni tucu-ndo? Te sa ní sáá òré cuáha cuendá ñáhá-güedé xii-í núú cuè tée ndècu ichi cuehé ichi duha. <sup>46</sup>Dico vitna chí ndácöo na quìhí<sup>n</sup>-ó, chí sa véxi tée cuáha cuendá ñáhá xii-í núú cuè tée cùu úhú iní ñáhá —cächí-gá xáha<sup>n</sup>-gă xii-güedé.

**Ní tñii-güedé Jèsús ndéca  
ñàha-güedé xii-gá cuáhá<sup>n</sup>**

(Mr. 14:43-50; Lc. 22:47-53; Jn. 18:2-11)

<sup>47</sup>Te càhá<sup>n</sup> dúcá<sup>n</sup>-ní Jèsús ní quexio té Jüdás. Te núú tnàhá tée-á<sup>n</sup> cúú ùxúú tnàhá cue tée xica cuu ndihi-gá ní cùu te duca<sup>n</sup> nǐ quide-dé. Te ndihi-dé vâi cue tée ní quexio te dava-güedé xínehe-güedé machítí, te dava-güedé xínehe-güedé carrútí. Te cue tée-á<sup>n</sup> nǐ tendaha ñàha cue dútú cúnù, ndihi cue tée cùu sacuéhé nǔú ñäyiu isrâél. <sup>48</sup>Te té Jüdás tée cuáha cuendá ñáhá xii-gá-á<sup>n</sup> sa ní xítnúhu-dé cue tée-á<sup>n</sup> nàcuáa cada-dé

cuáha cuendá-dé Jèsús núú-güedé, te duha ní xáha<sup>n</sup>-dë xii-güedé:

—Cundehe-ndo tée na tøyuhu-í te tée-á<sup>n</sup> tñii-ndo-dë chi tée-á<sup>n</sup> cúú-dë tée ndéé iní-ndó —duha ní xáha<sup>n</sup>-dë xii-güedé.

<sup>49</sup> Te sátá dúcá<sup>n</sup> ní xáha<sup>n</sup>-dë xii-güedé, te ní sándehe yatni-dé núú Jèsús, te ní xáha<sup>n</sup>-dë xii-gá:

—¡Ració<sup>n</sup> Mèstrú! —càchí-dé xáha<sup>n</sup>-dë xii-gá.

Te ní tøyuhu ñaha-dé xii-gá. <sup>50</sup> Te Jèsús ní xáha<sup>n</sup>-gã xii-dé:

—Yòhó tée ní chitnahá ñáhá xii-í, ¿ná cuíní-n núu véxi-n núù-í? —càchí-gá xáha<sup>n</sup>-gã xii-dé.

Te òré-ni-á<sup>n</sup> ní tñii ñaha cuè tée ndíhi té Jùdás-á<sup>n</sup> xii Jèsús, te ndèca ñaha-güedé xii-gá cuáhá<sup>n</sup>.

<sup>51</sup> Te ñ<sup>n</sup> cue tée ndíhi Jèsús ní tava-dé machítí-dé, te ní xehndé-ni-dé ñ<sup>n</sup> xio lóho ñ<sup>n</sup> tée xínu cuechi núú dütú cúnùu te ní quendeé duu<sup>n</sup> lóho-dé. <sup>52</sup> Te Jèsús ní xáha<sup>n</sup>-gã xii tée duca<sup>n</sup> ní xehndé lóho tée-á<sup>n</sup>:

—Nachíhi machítí-n ññ-xi, chi nchaa cue tée na nàa ndíhi machítí cahni-güedé tñaha ñáyiü-güedé te ñiu-ni ndíhi machítí cuú méé-güedé tucu. <sup>53</sup> Te na càchí tñuhu-í xii-ndo sã núu yúhú cuíní-í cácu-í te cáhá<sup>n</sup> ndíhi-í Tãtà-í Dütú Ndióxi, te tendaha-gã cuéhé víhí espíritú xínú cuèchi núú-gã quixi-xi dácácu ñaha-xi xii-í. <sup>54</sup> Dico núu duca<sup>n</sup> na càda-í te vá queé ndáa-xi nàcuáa càhá<sup>n</sup>-xi núú tütú Tãtà-í Dütú Ndióxi núú ndéé tñuní sã dàcuítí xini ñuhu-xi nándi ndoho-í —càchí-gá xáha<sup>n</sup>-gã xii-dé.

<sup>55</sup> Te Jèsús ní xáha<sup>n</sup>-gã xii cue tée duca<sup>n</sup> ní tñii ñaha xii-gá-á<sup>n</sup>:

—Nchaa-ni nduu ní xiní-ndó ní xóo cunucóo-í xití veñúhu càhnu sá ño cúnuu ní xóo danèhé-í ñáyiü, te ñá túú ní tñii ñaha-ndo xii-í, ¿te ná cuendá vitna quide ñaha-ná-ndó xii-í dàtná

quidé-ndó ñ<sup>n</sup> ñadúhú, nèhe-ná-ndó mà-chítí nèhe-ná-ndó càrrutí ní quexio ní tñii ñaha-ndo xii-í-i? <sup>56</sup> Dico dacuítí sã dúhá càda-xi nàcuáa quee ndáa-xi nàcuáa ní cáhá<sup>n</sup> cue tée ní xóo cáhá<sup>n</sup> tñuhu Yá Ndióxi ndéé sanaha ní ngódó tñuní núú tütú-gá —càchí-gá xáha<sup>n</sup>-gã xii-güedé.

Te nchaa cue tée xica cuu ndíhi-gá ní xinu-güedé ní dándö ñaha-güedé xii-gá.

### Jèsús ndécú-gã jündá

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Te cue tée ní tñii ñaha xii Jèsús ndéca ñaha-güedé xii-gá cuáhá<sup>n</sup> núú tè Caifás tée cùu dütú cúnùu-gá. Te núú ndécú dütú cúnùu-gá-á<sup>n</sup> sa ní tacá cue tée dàcuaha ñaha xii ñáyiü nchaa tñuhu ní chídó tñuní ndíi Moisés, ndíhi cue tée cùu sacuéhé núú ñáyiü isràél cuendá cada-güedé jündá. <sup>58</sup> Te té Pèlú xica xica-ni nchicú<sup>n</sup> ñáhá-dë xii-gá cuáhá<sup>n</sup> ní sáá-dé ndéé quehé vehe núú ndécú tée cùu dütú cúnùu-gá-á<sup>n</sup>, te xíá<sup>n</sup> ní ngóo-dé ndíhi cue tée cùu poleciá cuendá cuíní-dé quiní-dé nása cada ñaha-güedé xii Jèsús.

<sup>59</sup> Te cue tée cùu dütú cúnùu, ndíhi cue tée cùu sacuéhé núú ñáyiü isràél, ndíhi nchaa dava-gá cue tée xíndecu jündá ndúcú-güedé nàcuáa cada-güedé dácàa-güedé ñ<sup>n</sup> cuéchi díquí Jèsús cuèi cùu-xi ñ<sup>n</sup> sã ñã ndáa cuendá ñhí-güedé nàcuáa cada-güedé cahni ñaha-güedé xii-gá. <sup>60</sup> Te vãi cue tée ní ngúfta-güedé dácàa-güedé cuéchi díquí-gã, dico ñá túú ní cùndee tñuhu-güedé chi mee-ni tñuhu ndehnde cùu-xi. Te sátá dúcá<sup>n</sup> te ní quexio tucu úú tñahá cue tée dàcuandehnde-güedé, <sup>61</sup> te xáha<sup>n</sup>-güedé xii nchaa cue tée xíndecu jündá:

—Véxi-ndí càchí tñuhu-ndí xii-ndo sã tée-a càchí-dé sã dängöyo-dé veñúhu càhnu sá ño cúnuu núú chíñùhu-o Yá Ndióxi, te dandaa-dé ingá veñúhu saa,

dìu-ni núú cáá tñàhí veñúhu-ǎ<sup>n</sup>, te xití úní-ni nduu sa nadaxínu-dé, duha càchí-dé —càchí-güedé xǎha<sup>n</sup>-güedé.

<sup>62</sup>Te téé cùu dútú cùnùu-gá-á<sup>n</sup> nǐ ndacuñí-dé, te xǎha<sup>n</sup>-dè xii Jèsús:

—ǀNá cuendá duha ndùu tnúhu càhá<sup>n</sup> cue téé-a cuendá-n? Te càhá<sup>n</sup> nùu nása cunduu tnúhu càhá<sup>n</sup>-n —càchí-dé xǎha<sup>n</sup>-dè xii-gá.

<sup>63</sup>Dico Jèsús ñá túú tñàhí ni càhá<sup>n</sup>-gá. Te téé cùu dútú cùnùu-gá-á<sup>n</sup> nǐ xǎha<sup>n</sup> tùcu-dé xii-gá:

—Yúhú, cáciu nèhe-í Yǎ Ndiòxí chi cuini-í sá càchí tnúhu ndáá-n xii-ndí nùu sá díú Crìstú Déhe Yá Ndiòxí Yaa ní tendaha-gǎ véxi ñuyú-a cùu-n —càchí-dé xǎha<sup>n</sup>-dè xii-gá.

<sup>64</sup>Te Jèsús ní xǎha<sup>n</sup>-gǎ xii-dé:

—Diu Yaa-á<sup>n</sup> cùu-í dàtná càchí-n-ǎ<sup>n</sup>, te na càchí tnúhu-í xii-ndo sǎ sǎá nduu te quiní-ndó yǔhú Téé cùu ñani tñáhá-ndó nchàa-ndo cunucóo-í xio cùha Dútú Ndiòxí Yaa ndácú quide nchaandi túhú sá vǎha. Te dàvǎ-á<sup>n</sup> quiní ñáhá-ndó xii-í quee-í andiu quixi-í ichi xití vícǎ —càchí-gá xǎha<sup>n</sup>-gǎ xii-dé.

<sup>65</sup>Te dútú cùnùu-gá-á<sup>n</sup> nǐ ndátá-dé dóó níhnú-dé cuendá sá ñà túú ní tñàhá iní-dé nàcuáa ní càhá<sup>n</sup> Jèsús, te ní xǎha<sup>n</sup>-dè xii nchaa cue téé xǐndecu jùndá:

—Téé-a càhá<sup>n</sup> úhú-dé cuendá Yǎ Ndiòxí, te vitna ñá túú-gǎ xíní ñuhu-xi cue téé càhá<sup>n</sup> ndáá nùu ndáá sá ndècuéchi-dé àdi ñá túú ndècuéchi-dé, chi sa ní tecú dóho-o nàcuáa ndùu tnúhu ní càhá<sup>n</sup>-dé ní càhá<sup>n</sup> úhú-dé cuendá Yǎ Ndiòxí. <sup>66</sup>Te nchaa-ndo chí càhá<sup>n</sup> vitna núu nása sàni iní-ndó cunduu cuendá téé-a —càchí-dé xǎha<sup>n</sup>-dè xii nchaa cue téé-á<sup>n</sup>.

Te cue téé-á<sup>n</sup> nǐ xǎha<sup>n</sup>-güedé:

—Nchúhú càchí-ndí sá taú-xi cuú-dé chi ndècuéchi-dé —càchí-güedé xǎha<sup>n</sup>-güedé.

<sup>67</sup>Te ní ngúita-güedé ní tiú díí ñáhá-güedé xii-gá te ní caniha-güedé, te tñàhá núú-gǎ ní cani-güedé. <sup>68</sup>Te ní cudíquí ndeé ñáhá-güedé xii-gá, te xǎha<sup>n</sup>-güedé:

—Yòhó Téé càchí sá cùu Crìstú Yaa ní tendaha Yǎ Ndiòxí véxi ñuyú-a, càhá<sup>n</sup> ná còto yoo ní caniha xii-n —càchí-güedé xǎha<sup>n</sup>-güedé xii-gá.

### **Té Pèlú xǎha<sup>n</sup>-dè xii ñáyiu sá ñà túú xíní-dé Jèsús**

(*Mr. 14:66-72; Lc. 22:56-62; Jn. 18:15-18, 25-27*)

<sup>69</sup>Te nini núcóo té Pèlú quehé, te ní sáhá<sup>n</sup> ii<sup>n</sup> xíchí xínú cuèchi vehe-á<sup>n</sup> nùú-dé, te xǎha<sup>n</sup>-xi xii-dé:

—Yòhó tñàhá-n cùu-n téé xica cuu ndihi Jesús téé distritú Galiléa —càchí-xi xǎha<sup>n</sup>-xi xii-dé.

<sup>70</sup>Te té Pèlú ñá túú ní nñuu-dé, te ndèdóho nchaa ñáyiu xǐndecu-á<sup>n</sup> nǐ xǎha<sup>n</sup>-dè xii xíchí-ǎ<sup>n</sup>:

—Yúhú, ñá túú cùtnuní iní-í nása ndùu tnúhu càhá<sup>n</sup>-n —càchí-dé xǎha<sup>n</sup>-dè xii-xi.

<sup>71</sup>Te ní xica té Pèlú cuáhá<sup>n</sup>-dé ndàa nacúaa nchíi yuyèhe vehe-á<sup>n</sup>, te ní xíní ñáhá tùcu ingá xíchí xínú cuèchi vehe-á<sup>n</sup>, te xǎha<sup>n</sup>-xi xii nchaa ñáyiu xǐndecu-á<sup>n</sup>:

—Téé-a tñàhá-dé xicá cùu-dé ndihi Jèsús téé ñuú Nazarét —càchí-xi xǎha<sup>n</sup>-xi xii-yu.

<sup>72</sup>Te té Pèlú ní xǎha<sup>n</sup>-dè:

—Nchàcuiti Yá Ndiòxí sá ñà túú xíní-í téé càcunehe-ndo-á<sup>n</sup> —càchí-dé xǎha<sup>n</sup>-dè xii-yu.

<sup>73</sup>Te tna tnaa-ni ní cuu, te dava ñáyiu xǐndecu xíá<sup>n</sup> nǐ xǎha<sup>n</sup> tùcú-yu xii té Pèlú:

—Ndáá sá tñàhá-n xica cuu-n ndihi téé ndèca-güedé cuánguihu-ǎ<sup>n</sup>, chí ñáyúhú càhá<sup>n</sup>-n —càchí-yu xǎhǎ<sup>n</sup>-yu xii-dé.

<sup>74</sup>Te té Pèlú ní xǎha<sup>n</sup>-dè xii-yu:

—Nchàcuiti Yá Ndiòxí sá yǔhú càhá<sup>n</sup> ndáá-í sá ñà túú xíní-í téé

càcunehe-ndo-á<sup>n</sup> —càchí-dé xáha<sup>n</sup>-dë xií-yu.

Te òré-ni-á<sup>n</sup> nǐ cana ì<sup>n</sup> líhi. <sup>75</sup>Te ní ndacu iní té Pèlú nàcuáa ní xáha<sup>n</sup> Jèsús xii-dé sá cùmání-gǎ cana ì<sup>n</sup> líhi te úní xito cáhá<sup>n</sup>-dé sá ñà túú xiní ñáhá-dë xii-gá. Te ní quee-dé tnuú ñáyíu-á<sup>n</sup> cuáhá<sup>n</sup>-dé ì<sup>n</sup> xio ní ndáhyú víhí-dë ní ndixi cuéchi iní-dé.

### Ndèca-güedé Jèsús cuáhá<sup>n</sup> núú tǎ Pilatú

(Mr. 15:1; Lc. 23:1-2; Jn. 18:28-32)

**27** Te sátá nǐ túndaá te nchaa cue tée cùu dútú cúnùu, ndihí cue tée cùu sacuéhé nǔú ñáyíu isràèl ní ndatnúhu-güedé nàcuáa cada-güedé cahni-güedé Jèsús. <sup>2</sup>Te ní dácútú ñàha-güedé xii-gá, te ndèca ñaha-güedé cuáhá<sup>n</sup> núú tǎ Pilatú tée cùu gobiernú.

### Ní xihí té Jüdás

<sup>3</sup>Te té Jüdás tée ní sáha cuèndá ñáhá xii Jèsús ní cutnùnǐ iní-dé sá cáhni ñàha-güedé xii-gá, te ní ndixi cuéchi iní-dé sá ñà túú ní quide váha-dé sá dúcá<sup>n</sup> nǐ quide-dé ní sáha cuèndá ñáhá-dë xii-gá núú cuè tée cùu úhú iní ñáhá, te ní xica-dé cuáhá<sup>n</sup>-dé danchòcáva-dé ócò úxí díhú<sup>n</sup> cuixí<sup>n</sup> núú cuè dútú cúnùu-á<sup>n</sup>, ndihí núú cuè tée cùu sacuéhé nǔú ñáyíu isràèl, chi ñíu cue tée-á<sup>n</sup> nǐ sǎñaha-güedé díhú<sup>n</sup> xii-dé. <sup>4</sup>Te òré ní quexìo té Jüdás-á<sup>n</sup> nǔú ndécú-güedé, te xáha<sup>n</sup>-dë xii-güedé:

—Yúhú, ñá túú ní quide váha-í sá dúcá<sup>n</sup> nǐ quide-í ní taxi cuèndá-í ì<sup>n</sup> tée ñá túú tñáhí cuéchi-xi cahni-ndo-dë —càchí-dé xáha<sup>n</sup>-dë xii-güedé.

Te cue tée-á<sup>n</sup> nǐ xáha<sup>n</sup>-güedé xii-dé:

—Nchúhú, ñá túú ñǎgá cuèndú cuìnǐ-ndí cáhá<sup>n</sup> ndihí ñaha-ndǐ xii-n, te mee-n ñaha núú nása sàni iní-n càda-n —càchí-güedé xáha<sup>n</sup>-güedé xii-dé.

<sup>5</sup>Te té Jüdás ní dǎngoyo-dé díhú<sup>n</sup>-á<sup>n</sup> xití veñúhu càhnu sá ïo cùnùu, te

ní xica-dé cuáhá<sup>n</sup>-dé ní dácüèhné-dé mée-dë.

<sup>6</sup>Te cue dútú cúnùu ní naquehe<sup>n</sup>-güedé díhú<sup>n</sup>-á<sup>n</sup>, te ní xitnàha-güedé:

—Díhú<sup>n</sup>-a ní quéyáhu cuèndá sá cùu ì<sup>n</sup> ñáyíu, núu xíá<sup>n</sup> vá cùu nàchihi-o xití càjá núú ñúhú sá cùu cuèndá Yǎ Ndiòxí —càchí-güedé xitnàha-güedé.

<sup>7</sup>Te ní ndatnúhu-güedé te ní cuu ì<sup>n</sup> nuu-güedé cuèndá nacuaa<sup>n</sup>-güedé ì<sup>n</sup> xichi núú cáá ñúhu danani-güedé Núú Cuáha Nchaa Sá Cuáha Ñuhu, te xíá<sup>n</sup> nǐ saa<sup>n</sup>-güedé cuèndá xíá<sup>n</sup> nguñdúxi nchaa ñáyíu véxi xica. <sup>8</sup>Te ní nadáma ñíu ñuhu-á<sup>n</sup>, te vitna dǎnani-güedé Ñuhu Yáhu Níñí, duha dǎnani-güedé. <sup>9</sup>Te duca<sup>n</sup> nǐ cuu chi ní quee ndáá-xi nàcuáa ní cáhá<sup>n</sup> ndí Jeremiás tée ní xóo cáhá<sup>n</sup> tñúhu Yá Ndiòxí ndéé sanaha, te duha ní cachí ndí: “Cue tée isràèl ní cachí-güedé sá òcò úxí díhú<sup>n</sup> cuixí<sup>n</sup> cháhu-güedé cuèndá ì<sup>n</sup> tée quehe<sup>n</sup> cuèndá-güedé. Te díhú<sup>n</sup>-á<sup>n</sup> nàquehe<sup>n</sup>-güedé, <sup>10</sup>te cuaa<sup>n</sup>-güedé ì<sup>n</sup> xichi núú nání Nǔú Cuáha Nchaa Sá Cuáha Ñuhu, te duca<sup>n</sup> càda-xi chi duca<sup>n</sup> nǐ cachí Yǎ Ndiòxí cunduu”, duha ní cachí ndí Jeremiás-á<sup>n</sup>.

### Jèsús ndécú-gǎ núú tǎ Pilatú

(Mr. 15:2-5; Lc. 23:3-5; Jn. 18:33-38)

<sup>11</sup>Te Jèsús ndécú-gǎ núú tǎ Pilatú tée cùu gobiernú, te tée-á<sup>n</sup> nǐ xicá<sup>n</sup> tñúhú-dë núú-gǎ, te xáha<sup>n</sup>-dë xii-gá:

—¿Ndáá sá díú-n cùu-n tée yìndaha ñaha xii ñáyíu isràèl-á<sup>n</sup>? —càchí-dé xáha<sup>n</sup>-dë xii-gá.

Te Jèsús ní xáha<sup>n</sup>-gǎ xii-dé:

—Ñíu-í yìndaha-í-yu —càchí-gǎ xáha<sup>n</sup>-gǎ xii-dé.

<sup>12</sup>Te cue dútú cúnùu ndihí cue tée cùu sacuéhé nǔú ñáyíu isràèl sàcá<sup>n</sup> cuéchi-güedé núú tǎ Pilatú cuèndá Jèsús, dico mee-gǎ ni ì<sup>n</sup> tñúhu ñá túú ní

cáhá<sup>n</sup>-gá. <sup>13</sup>Te té Pilatú ní xáha<sup>n</sup>-dě xii-gá:

—Cáhá<sup>n</sup>, ná cuendá ñá túú cáhá<sup>n</sup>-n, te cundehe nã ndéé duha titní cuéchi dàcaa cue tée-a díquí-n —càchí-dé xáha<sup>n</sup>-dě xii-gá.

<sup>14</sup>Dico Jèsús ñá túú tnàhí ní cáhá<sup>n</sup>-gá, te té Pilatú tée cùu gobiernú-á<sup>n</sup> ïo ní cuñúhu-dé sá dúcá<sup>n</sup> ñà túú tnàhí ní cáhá<sup>n</sup>-gá.

**Ní quide ndáá-güedé  
sá cahní-güedé Jèsús**

(Mr. 15:6-20; Lc. 23:13-25;

Jn. 18:38-19:16)

<sup>15</sup>Te ndi tnahá nduu vico pascuá dácácu té Pilatú tée cùu gobiernú-á<sup>n</sup> ïi<sup>n</sup> tée yíhi vecaá chi duca<sup>n</sup> tnàhí quide-dé, te mee ñáyiú cáhá<sup>n</sup>-yu te núu ndédacàa tée yíhi vecaá-á<sup>n</sup> cäcu-dé te tée-á<sup>n</sup> dácäcu-dé. <sup>16</sup>Te dàvá-á<sup>n</sup> yíhí ïi<sup>n</sup> tée nàni Barrabás vecaá, te tée-á<sup>n</sup> ïó cuëndú-dé sá ïo nèhé ní quide-dé. <sup>17</sup>Te ní nat-acá nchaa ñáyiú, te té Pilatú ní xicá<sup>n</sup> tnúhú-dé núú-yu, te xáha<sup>n</sup>-dè:

—¿Ndédacàa núú ùú cue tée-a cuiní-ndó dácäcu-í-güedé-i? ¿Té Barrabás ä<sup>n</sup> Jèsús tée nàni Cristú? —càchí-dé xáha<sup>n</sup>-dè xii-yu.

<sup>18</sup>Te duca<sup>n</sup> ñí cáhá<sup>n</sup> té Pilatú, chi ní cutnùní iní-dé sá dicó sá cuèdú íní-güedé duca<sup>n</sup> ñí quide-güedé ní sáha cuendá ñáhá-güedé xii Jèsús núú-dé.

<sup>19</sup>Te nini núcóo té Pilatú núú xèhndé-dé cuéchi ní tendaha ñàdihí-dé tnúhu cuáhá<sup>n</sup> núú-dé, te duha ndùu tnúhu ní tendaha-a<sup>n</sup>: “Vá cání iní-n nã cada-n tée ní taxi cuendá ñáhá-güedé xii-n, tée ñá túú tnàhí cuéchi-xi, chi icuini ïo nèhé ní dácótó ñàha saní-í cuëndá-dé”, duha ndùu tnúhu ní xáha<sup>n</sup>-a<sup>n</sup> xii té Pilatú.

<sup>20</sup>Dico cue tée cùu dútú cúnùu, ndihí cue tée cùu sacuéhé núú ñáyiú isràél ní xáha<sup>n</sup>-güedé xii ñáyiú sá ná cuñàhá-yu xii té Pilatú dácäcu-dé té Barrabás te

cahni-dé Jèsús, te ní quidé-yu nàcuáa ní xáha<sup>n</sup>-güedé. <sup>21</sup>Te té Pilatú-á<sup>n</sup> ñí xáha<sup>n</sup> tùcu-dé xii-yu:

—¿Ndédacàa núú ùú cue tée-a cuiní-ndó dácäcu-í? —càchí-dé xáha<sup>n</sup>-dè xii-yu.

Te ní xáhá<sup>n</sup>-yu xii-dé:

—Té Barrabás dácäcu-n —càchí-yu xáhá<sup>n</sup>-yu xii-dé.

<sup>22</sup>Te té Pilatú ní xicá<sup>n</sup> tnúhú-dé núú-yu, te xáha<sup>n</sup>-dè:

—¿Te ná cuiní-ndó càda-í Jèsús tée nàni Cristú tée càchí sá Yã Ndiöxi ní tendaha ñàha xii-dé véxi-dé ñuyú-a-i? —càchí-dé xáha<sup>n</sup>-dè xii-yu.

Te nchaá-yu ní cáhá<sup>n</sup>-yu, te xáhá<sup>n</sup>-yu:

—Cata caa-dé núú cùrúxí —càchí-yu xáhá<sup>n</sup>-yu xii-dé.

<sup>23</sup>Te té Pilatú ní xáha<sup>n</sup> tùcu-dé xii-yu:

—¿Te ná cúú cuéchi ní quide-dé núu duca<sup>n</sup> cuiní-ndó càda-í-dé-i? —càchí-dé xáha<sup>n</sup>-dè xii-yu.

Dico nchaá-yu uu<sup>n</sup>-gá ñihi ní cáhá<sup>n</sup>-yu, te xáhá<sup>n</sup>-yu xii-dé:

—¿Cata caa-dé núú cùrúxí! —càchí-yu xáhá<sup>n</sup>-yu xii-dé.

<sup>24</sup>Te té Pilatú ní cutnùní iní-dé sá vã ñihí-dé nàcuáa cada-dé, chi uu<sup>n</sup>-gá ní nguíta ñáyiú xicuáá-yu, te xiá<sup>n</sup> ní xicá<sup>n</sup>-dè ndute ní ndáhá-dè núú nchàa ñáyiú, te ní xáha<sup>n</sup>-dè xii-yu:

—Tée-a cùu-dé ïi<sup>n</sup> tée ñá túú tnàhí cuéchi-xi, te nchòhó cuiní-ndó sã cùú-dé, dico diu-ni mee-ndo cuído yáhu-ndo-dé chi yúhú vá cuído yáhu-í-dé —càchí-dé xáha<sup>n</sup>-dè xii-yu.

<sup>25</sup>Te nchaá-yu ní xáhá<sup>n</sup>-yu xii-dé:

—¿Diu nchúhú ndihi cue déhe-ndí cuído yáhu-ndí-dé! —càchí-yu xáhá<sup>n</sup>-yu.

<sup>26</sup>Te sáta dúcá<sup>n</sup> te té Pilatú ní dácäcu-dé té Barrabás, te ní táuchíú<sup>n</sup>-dè ní cani-güedé Jèsús. Te sáta dúcá<sup>n</sup> ñí quide ñàha-güedé xii-gá, te ní táuchíú<sup>n</sup>-dè candeca ñàha-güedé xii-gá quíhí<sup>n</sup> cata caa ñàha-güedé xii-gá núú cùrúxí.

<sup>27</sup> Te cue tée cùu sandadú té Pilatú ndécá-güedě Jèsús cuánguihu xítí vehe càhnu cuu cuendá-dé, te cue tée cùu sandadú-á" nǐ cana-güedé dava-gá cue sandadú núu dúcá" ndéca-güedé Jèsús cuánguihu-á". <sup>28</sup> Te xía" nǐ taunuu-güedé dóo-gă, te ní dácufhnú ñaha-güedé xii-gá ìi" dóo tícuèhé vǐhí. <sup>29</sup> Te ní cadúha-güedé ìi" coróná iñu ní chihi-güedé díquí-gă, te ní chitnǐ-güedé ìi" carrutí ndaha cùha-gă, te ní ngúñí xítí-güedé núu-gă cúdíquí ndeé ñáhá-güedé xii-gă, te xăha"-güedé:

—ǐo càhnu cuu yohó tée yindaha ñaha xii ñáyu isràél! —càchí-güedé xăha"-güedé xii-gă.

<sup>30</sup> Te ní tíú díí ñáhá-güedé xii-gă, te ní quehe"-güedé carrutí sá nǐ sáñaha-güedé xii-gă te ní ducu"-güedé díquí-gă. <sup>31</sup> Te sátá nǐ yáha ní cudíquí ndeé ñáhá-güedé xii-gă, te ní nataunuu ñaha-güedé xii-gă dóo tícuèhé vǐhí sá nǐ dácufhnú ñaha-güedé xii-gă, te ní dándíunuu ñaha-güedé xii-gă dóo méé-gă, te dătnúní ndécá ñaha-güedé cuáhá" núu catá cà ñaha-güedé xii-gă núu cùrúxí.

### Sàta caa-güedé Jèsús núu cùrúxí

(Mr. 15:21-32; Lc.

23:26-43; Jn. 19:17-27)

<sup>32</sup> Te ñuhu-güedé ndihi-gă ichi, te ní nanǐhí-güedé ìi" tée ñuú Cirené nání-dě Xímú, te tée-á" nǐ quide yica-güedé ní xido-dé cùrúxí sá nchídó Jèsús.

<sup>33</sup> Te ní sáá-güedé ndihi-gă ìi" xichi núu nání Gǒlgotá, te tnúhu-á" queé-xí: Núu nání yìquí díquí ndǐyi, duha quèe-xí tnúhu-á". <sup>34</sup> Te xía" sáñaha-güedé ndudí úá coho-gă ní cùu, te ñá túú ní xìhi-gă chi dico-ni ní xito ndéé-gă.

<sup>35</sup> Te ní sata caa ñaha-güedé xii-gă núu cùrúxí, te sátá dúcá" te cue tée cùu sandadú-á" nǐ xito ndéé-güedé ñuu ndédacàa-güedé cuu cuendá-güedé dóo-gă. Te duca" nǐ cuu chi ní quee

ndáá-xi nàcuáa ní cáhá" ìi" tée ní xóo cáhá" tnúhu Yá Ndióxí ndéé sanaha yòdo tnuní núu tütú-gă, te duha càchí-xi: "Ní xito ndéé-güedé ñuu ndédacàa-güedé cuu cuendá-güedé dóo-gă", duha ní cachí tée-á" te duca" nǐ ngódó tnuní núu tütú-gă. <sup>36</sup> Te sátá dúcá" nǐ quide-güedé, te ní ngóo-güedé ndeé ñáhá-güedé xii-gă. <sup>37</sup> Te ní taxi ndecu-güedé ìi" sá ndeé lètrá ndàa díquí-gă. Te lètrá-á" càhá"-xi ná cuendá duca" nǐ quide ñaha-güedé xii-gă, te duha càhá" lètrá-á": "Tée-a cùu-dé tée yindaha ñaha xii ñáyu isràél", duha càchí-xi. <sup>38</sup> Te tnáhá úú cue tée cùu ñadúhú nǐ sata caa-güedé diu-ni núu cùrúxí tucu, te ìi"-dé ní sata caa-güedé xio cùha-gă, te ingá-dé ní sata caa-güedé xio dătni-gă. <sup>39</sup> Te nchaa ñáyu yăha yatni núu táca-gă-á", te dăcuicó-yu díquí-yu ndehe ñahá-yu xii-gă, te xǐcuèhé ñáhă-yu. <sup>40</sup> Te xăhă"-yu xii-gă:

—Yòhó càchí-n sá dàngoyo-n veñúhu càhnu sá ìo cùnuu, te dandàa-n ingá veñúhu saa, te xítí úní-ni nduu sa nadaxǐnu-n, te vitna tanuu núu cùrúxí-á" dăcácu-n mée-n te núu ndisa sá Dêhe Yá Ndióxí cúú-n —càchí-yu xăhă"-yu xii-gă.

<sup>41</sup> Te diu-ni duca" cùdíquí ndeé ñáhá cuè tée cùu dútú cúnuu xii-gă, ndihi cue tée dăcuaha ñaha xii ñáyu nchaa tnúhu ní chídó tnuní ndíi Moisés, ndihi cue tée cùu fariséú, ndihi cue tée cùu sacuéhé núu ñáyu isràél, te xitnaha-güedé:

<sup>42</sup> —Tée-a ní ndacu-dé ní dăcácu-dé dava ñáyu, te mee-dě ñá ndácú-dé dăcácu nihnu-dé méé-dě. Te núu ndisa sá cúú-dě tée yindaha ñaha xii ñáyu isràél, te na cundehe-o nuu-dé núu cùrúxí-a cuendá quíndáá iní-ó-dě. <sup>43</sup> Te càchí-dé sá sandáá iní-dé Yá Ndióxí, te mee-gă ná dăcácu ñaha-gă xii-dé te núu cundahú iní ñáhá-gă, chi mee-dě càchí-dé sá Dêhe-gă cúú-dě —càchí-güedé xitnaha-güedé.

<sup>44</sup>Te ndéé tñháá cue tée cùu ñadúhú tácaà xio xio ñíni-gá xícuèhè ñáhá-güedé xii-gá.

### Ní xíhí Jèsús

(Mr. 15:33-41; Lc. 23:44-49; Jn. 19:28-30)

<sup>45</sup>Te òré ní cuu cuádava nduu te ní cunee ñíhí ñuyíú, te duca<sup>n</sup>-ni càa ní cuu caá úní sacuaa. <sup>46</sup>Te òré sa ta cùyatni cuu caá úní sacuaa-á<sup>n</sup>, te ñíhi ní cáhá<sup>n</sup> Jèsús, te càchí-gá:

—Èlí, Èlí, ¿láma sabàctani? —càchí-gá.

Te tñúhu-á<sup>n</sup> quée-xí: Ndiòxí mée-í, Ndiòxí mée-í, ¿ná cuèndá ní dáñá ñàha-n xii-í?, duha quèe-xi tñúhu-á<sup>n</sup>.

<sup>47</sup>Te dava cue tée xíndecu yatni núú tácaà-gá-á<sup>n</sup> ñí tecú dóho-güedé nàcuáa ní cáhá<sup>n</sup>-gá, te ní xítnàha-güedé:

—Tée-a càna-dé té Èliás —càchí-güedé xítnàha-güedé.

<sup>48</sup>Te òré-ni-á<sup>n</sup> ñí quene cunu ñí<sup>n</sup> cue tée xíndecu-á<sup>n</sup> ñí quehe<sup>n</sup>-dé luha cáchí, te ní chindóyo-dé xití ndudí íá, te ní chinenu-dé díquí ñí<sup>n</sup> yutnu càni te ní ndocani-dé ní chihi-dé yuhu-gá. <sup>49</sup>Te dava-güedé ní xáha<sup>n</sup>-güedé xii tée-á<sup>n</sup>:

—Cundetú tnaa na cùndehe-o nacoto núu quixi té Èliás dàcácu ñàha-dé xii-dé —càchí-güedé xáha<sup>n</sup>-güedé xii tée-á<sup>n</sup>.

<sup>50</sup>Te Jèsús ñíhi ní cana saa-gá, te ní xíhí-ni-gá. <sup>51</sup>Te sáta dúcá<sup>n</sup> te ní ndátá dóó cúú còrtiná xití veñúhu càhnu sá ño cùnuu ní quée dava ndáá, te ndàa núu ñínu ní nguíta-xi ní ndátá, te ní tnáa, te dava cava nàhnu ní táhú. <sup>52</sup>Te dava yaú núú yíndüxi ñáyíu ní xíhí ní sándáá iní ñáhá xii Yá Ndiòxí ní nacaá<sup>n</sup> te ní ndotó-yu. <sup>53</sup>Te sáta ñí yáha ní ndoto Jèsús, te cue ñáyíu ní ndoto-á<sup>n</sup> cuànguñíhú-yu xití ñúu Jerusàlén, te cue ñáyíu ñúú-á<sup>n</sup> ño vài-yu ní xiní-yu cue ñáyíu duca<sup>n</sup> ñí ndoto-á<sup>n</sup>.

<sup>54</sup>Te sá dúcá<sup>n</sup> nãndi ní quide-xi, ndíhi sá dúcá<sup>n</sup> ñí tnáa xíá<sup>n</sup> ño ní yùhú tée

cùu capitá<sup>n</sup> ndíhi nchaa dava-gá cue tée ndècu ndíhi-dé ndéé-güedé yíqui cùñú Jèsús, te ní xítnàha-güedé:

—Sá ndáa ndisa sá díú tée-a cùu-dé Déhe Yá Ndiòxí ní cùu —cachí-güedé xítnàha-güedé.

<sup>55</sup>Te xica xínutnái vài ñáyíu ñíhí ndéhè-yu nchaa nàcuáa ní quide ñàha-güedé xii Jèsús, te ñáyíu-á<sup>n</sup> cúu-yu ñáyíu ní chindèé-yu Jèsús, te ndéé distritú Galileá ní chinchícú<sup>n</sup> ñáhà-yu xii-gá. <sup>56</sup>Te tnuú ñáyíu-á<sup>n</sup> tñháá tá Màriá Magdalèná, ndíhi tá Màriá nãná tẽ Jàcobó ndíhi té Chèè, ndíhi nãná cue déhe té Zebèdeú.

### Chìndúxi-güedé Jèsús

(Mr. 15:42-47; Lc. 23:50-56; Jn. 19:38-42)

<sup>57</sup>Te ndècu ñí<sup>n</sup> tée cuica nàni-dé Chèè te cùu-dé tée ñúú Arimàtea, te tñháá-dé ní tñháá tñúhu-dé ndíhi Jèsús. Te òré sa ní cuaa, <sup>58</sup>te ní sáhá<sup>n</sup>-dé núú tẽ Pilatú, te xáha<sup>n</sup>-dè ñúu vá cùndèe iní-dé daña-dé chindúxi-dé yíqui cùñú Jèsús. Te té Pilatú-á<sup>n</sup> ñí sáha-dé tñúhu, te ní táúchíú<sup>n</sup>-dè sá cuáha cuèndá-güedé té Chèè-á<sup>n</sup> yíqui cùñú-gá. <sup>59</sup>Te té Chèè-á<sup>n</sup> ñí quehe<sup>n</sup> cuèndá-dé yíqui cùñú-gá, te ní chidúcú<sup>n</sup>-nuu-dé ñí<sup>n</sup> dóó cuixí<sup>n</sup> dóó càndò. <sup>60</sup>Te sa nchíí ñí<sup>n</sup> yaú sáá ñí caá<sup>n</sup> té Chèè-á<sup>n</sup> ñí<sup>n</sup> yíqui naha càva te xíá<sup>n</sup> cúú cuèndá-dé, te yaú-á<sup>n</sup> ñí chihi-dé yíqui cùñú Jèsús, te dàtnùní ní sadí-dé ñí<sup>n</sup> yúú cáhnú yúú quèhé<sup>n</sup> yuhu yaú-á<sup>n</sup>, te ní xica-dé cuánuhú-dé. <sup>61</sup>Te tñháá tá Màriá Magdalèná, ndíhi ingá xíchí nání Màriá ní quexió-yu ní ngóo-yu yatni núú nchíí yaú-á<sup>n</sup>.

### Cue tée ndèé yaú núú yíhí yíqui cùñú Jèsús

<sup>62</sup>Te sáta ñí yáha ní quide túha ñáyíu nchaa sá nándíhi-yu nduu tñéè nduu ndètátú-yu-á<sup>n</sup>, te díu-ni nduu ndètátú-yu-á<sup>n</sup> ñí sáhá<sup>n</sup> cue dútú cùnùu,



ndihi cue tée cùu fariséú ní cáhá<sup>n</sup> ndihi-güedé té Pilatú. <sup>63</sup>Te xáha<sup>n</sup>-güedé xii-dé:

—Yòhó tée cùnuu, véxi-ndí càchí tnúhu-ndí sá ní ndacu iní-ndí sá tée ndehnde ní xíhí-á<sup>n</sup> càchí-dé òré ndécú-gä-dé sá ndùu úní sá cùú-dé, te ndoto-dé. <sup>64</sup>Te tendaha-n cuè tée na quíhí<sup>n</sup>-güedé cundeé-güedé yuhu yaú núú ní chihi-güedé yiqui cùnú-dé, chi na cuáhá<sup>n</sup> quíhí<sup>n</sup> cue tée ní xica cuu ndihi-dé duhu-güedé yiqui cùnú-dé, te cúnaha-güedé xii ñáyiú sá ní ndoto-dé. Chi núu duca<sup>n</sup> na càda-güedé te ío-gá dandáhú-güedé cue ñáyiú dàcúxí dàtná ní quide mee tée ní xíhí-á<sup>n</sup> —càchí-güedé xáha<sup>n</sup>-güedé.

<sup>65</sup>Te té Pilatú ní xáha<sup>n</sup>-dè xii-güedé:

—Náú cue sandàdú-a candeca-ndo-güedé quíhí<sup>n</sup>, te cadí váha-ndo ndihi-güedé yuhu yaú-á<sup>n</sup> nàcuáa tàú-xi cunduu, te na cundeé-güedé nàcuáa sàni iní-ndó cunduu —cachí-dé xáha<sup>n</sup>-dè xii-güedé.

<sup>66</sup>Te cue tée-á<sup>n</sup> ní xica-güedé cuáhá<sup>n</sup>-güedé, te ní tee-güedé ì<sup>n</sup> sèná yúú ndèdí yèhe yaú-á<sup>n</sup>, te ní dándöo-güedé cue sandàdú-á<sup>n</sup> ndèè-güedé yaú-á<sup>n</sup>, te duca<sup>n</sup> ní quide-güedé cuendá sá vǎ yöo quíhí<sup>n</sup> nacaá<sup>n</sup> yaú-á<sup>n</sup>.

### Ní ndoto Jèsús

(Mr. 16:1-8; Lc. 24:1-12; Jn. 20:1-10)

**28** Te sátá ní yáha nduu ndètatú ñáyiú, te ndumíngú nehé víhí-ní ní xica tá Màriá Magdalèná ndihi ingá xíhí nání Màriá cuángotó-yu yaú núú ní chihi-güedé yiqui cùnú Jèsús. <sup>2</sup>Te uu<sup>n</sup> ní níhí vǐhí ní tnáa, te òré duca<sup>n</sup> ní quide-xi chi ì<sup>n</sup> espíritú xínú cuèchi núú Yǎ Ndiöxí ní quexio-xi núú dúcá<sup>n</sup> nchíí yaú núú ní chihi-güedé yiqui cùnú Jèsús, te ní xócání espíritú-á<sup>n</sup> yúú ndèdí yèhe yaú-á<sup>n</sup> te ní ngóo-xi núú

yúú-á<sup>n</sup>. <sup>3</sup>Te dàtná dátäsa<sup>n</sup>-xi òré sàá nduté dùca<sup>n</sup> datäsa<sup>n</sup>-xi núú espíritú-á<sup>n</sup>, te dóó níhí-xí cuixí<sup>n</sup> quíyí. <sup>4</sup>Te òré duca<sup>n</sup> ní quide-xi te cue sandàdú ndèé yaú-á<sup>n</sup> ní quidi ñaha-xi xii-güedé sá ní yùhú-güedé, te ní nduá-güedé, te ní xíta sá xíní tnúní-güedé. <sup>5</sup>Te espíritú-á<sup>n</sup> ní xáha<sup>n</sup>-xi xii cue ñáyiú ìhí cuángoto yaú-á<sup>n</sup>:

—Nchòhó ñáyiú ìhí véxi coto yaú-a, vá yùhú-ndó chi yùhú cùtnúní iní-í sá nchòhó véxi-ndo nànducu-ndo yiqui cunú Jèsús Yaá ní xíhí núú cùrúxí. <sup>6</sup>Dico Yaá-á<sup>n</sup> chi ñá túú-gǎ ndécú yiqui cunú-gǎ iha, chi sa ní ndoto-gǎ, te diu duca<sup>n</sup> ní cachí-gǎ sá ndótó-gǎ cùtnàhá vátá cùú-gǎ, te chí táquixi cundehe-ndo núú ní sacá<sup>n</sup>-güedé yiqui cùnú-gǎ ní cùu te quiní-ndó nǎ ñá túú-gǎ. <sup>7</sup>Te vitna ío ndíhi chí cuáhá<sup>n</sup> núú xǐndecu cue tée ní xica cuu ndihi-gǎ, te duha cúnaha-ndo xii-güedé: “Ní ndoto Jèsús Yaá ní xíhí ní cùu, te codonuu-gǎ núú-ndó quíhí<sup>n</sup> distrítú Galiléa te yàcá<sup>n</sup> quiní-ndó-gǎ”, duha cúnaha-ndo xii-güedé. Duha ndùu tnúhu ní cachí tnúhu-í xii-ndo —càchí espíritú-á<sup>n</sup> xáha<sup>n</sup>-xi xii cue ñáyiú ìhí-á<sup>n</sup>.

<sup>8</sup>Te cue ñáyiú ìhí-á<sup>n</sup> ní natní-yu ichi, te súúní ndíhi cuánuhú-yu núú xǐndecu cue tée ní xica cuu ndíhi Jèsús cuendá nacani tnúhu-yu núú-güedé nàcuáa ní xáha<sup>n</sup> espíritú-á<sup>n</sup> xíí-yu, te cuèi ní yùhú-yu dico súúní cùdíí iní-yu. <sup>9</sup>Te ichi ñùhú-yu cuánuhú-yu, te na iní-yu ní quexio Jesús núú-yu ní dándácöo váha ñaha-gǎ xíí-yu. Te ñáyiú-á<sup>n</sup> ní ngúíñí xítí-yu núú-gǎ, te ní numi ñàhá-yu xii-gǎ, te ní chiñuhu ñàhá-yu. <sup>10</sup>Te ní xáha<sup>n</sup>-gǎ xíí-yu:

—Vǎ yùhú-ndó, chí cuáhá<sup>n</sup> cúnaha-ndo xii cue tée ní xica cuu ndíhi-í sá ná quíhí<sup>n</sup>-güedé distrítú Galiléa, te yàcá<sup>n</sup> quiní ñàhá-güedé xii-í —càchí-gǎ xáha<sup>n</sup>-gǎ xíí-yu.

**Nàcuáa ndùu tnúhu ní  
nacani cue sandàdú**

<sup>11</sup> Te nini ñùhu cue ñáyiú dìhí-á<sup>n</sup> ichi cuánuhú-yu, te dava cue sandàdú cue téé ndéé yaú-á<sup>n</sup> ní cùu ní xica-güedé cuánuhú-güedé ñuú cuendá nacani tnúhu-güedé núú cuè téé cùu dútú dútú cúnùu-á<sup>n</sup> ní quide-güedé jùndá ndìhi cue téé cùu sacuéhé núú ñáyiú isràél, te ní ndatnúhu-güedé nàcuáa cada-güedé, te ní quide ndáá-güedé ndìhi cue sandàdú-á<sup>n</sup> sá cuñaha-güedé vài díhú<sup>n</sup> cuendá dacuàndehnde-güedé.

<sup>13</sup> Te ní xáha<sup>n</sup>-güedé xii cue sandàdú-á<sup>n</sup>:

—Cuíní-ndí sá vǎ cǎhá<sup>n</sup> ndáá-ndó núú ñáyiú nàcuáa ní cuu, chi cúñaha-ndo xíi-yu sá òré xidí-ndó ní quixi cue téé ní xica cuu ndìhi-dé ní dúhú-güedé yiqui cùnù-dé néhé-güedé cuáhá<sup>n</sup>, duha cúñaha-ndo xíi-yu. <sup>14</sup> Te núu na nihí té Pilatú téé cùu gobiernú tnúhu nàcuáa cúñaha-ndo xii ñáyiú, te nchúhú cada ndáá-ndí ndìhi-dé cuendá sá ñà túú nǎ cada ñaha-dé xii-ndo —cǎchí-güedé xáha<sup>n</sup>-güedé xii cue sandàdú-á<sup>n</sup>.

<sup>15</sup> Te cue sandàdú-á<sup>n</sup> ní quehe<sup>n</sup> cuendá-güedé díhú<sup>n</sup>, te ní xica-güedé cuáhá<sup>n</sup>-güedé te ní cǎhá<sup>n</sup>-güedé nàcuáa ní xáha<sup>n</sup> cuè téé-á<sup>n</sup> cǎhá<sup>n</sup>-güedé. Te nchaa ñáyiú isràél ní níhí-yu tnúhu ní cǎhá<sup>n</sup>-güedé-á<sup>n</sup>, te ñiu-ni tnúhu-á<sup>n</sup> cǎhá<sup>n</sup>-yu ndéé vitna.

**Jèsús xáha<sup>n</sup>-gǎ xii cue téé ní  
xica cuu ndìhi-gǎ nàcuáa  
ndùu chiu<sup>n</sup> cada-güedé**

(Mr. 16:14-18; Lc.

24:36-49; Jn. 20:19-23)

<sup>16</sup> Te ndi ùxí ñ<sup>n</sup> cue téé ní xica cuu ndìhi Jèsús ní xica-güedé cuáhá<sup>n</sup>-güedé ñ<sup>n</sup> yucu cǎa distritú Galileá núú ní xáha<sup>n</sup>-gǎ naníhí tnáhá-güedé ndìhi-gǎ.

<sup>17</sup> Te òré ní xiní-güedé Jèsús te ní chiñuhu ñaha-güedé xii-gǎ, dico dava-güedé sàni ñ<sup>n</sup> sani úú iní-güedé núu ñiu-gǎ àdi ñà díú-gǎ. <sup>18</sup> Te Jèsús ní sándehe yatni-gǎ ndéé núú-güedé, te ní xáha<sup>n</sup>-gǎ xii-güedé:

—Yúhú ndécú ndìhi-í tnúhu ndee ñni táxí tnùn-í cuèi andiu te cuèi ñuyú-a.

<sup>19</sup> Te vitna tàuchiu<sup>n</sup>-í sá quíhí<sup>n</sup>-ndó ñihí ñuyú cǎhá<sup>n</sup>-ndó tnúhu-í núú ñáyiú cuendá tuha ñáhá-yu xii-í, te dacuàndute-ndó-yu. Te òré duca<sup>n</sup> cǎda-ndo, te cacunehe-ndo tǎtá-ó Dütú Ndióxi ndìhi yúhú Yaá cúú Déhe-gǎ ndìhi Espíritú-gǎ. <sup>20</sup> Te cúñaha-ndo xíi-yu sá ná cǎdá-yu nchaa nàcuáa sa ní dánèhé ñáhà-í xii-ndo cǎda-ndo. Te na cǎchí tnúhu-í sá cùndècu ndìhi ñaha-ni-í xii-ndo ñuyú-a ndéé ná sàà nduu nàa-xi —cǎchí-gǎ xáha<sup>n</sup>-gǎ xii-güedé. Te duca<sup>n</sup> na cùnduu.

## TNÚHU NÍ CHÍDÓ TNÙNÍ TÉ MĂCÚ

**Té Juàá tée dàcuandute ñaha  
xii ñáyiú cáhá<sup>n</sup>-dé tnúhu  
Yá Ndiöxí xití yucu**

(Mt. 3:1-12; Lc. 3:1-9,  
15-17; Jn. 1:19-28)

**1** Duha ní quesaha tnúhu sá cáhá<sup>n</sup> nàcuáa naníhí tǎhú-ó tnúhu Xítohó Jesucristú Déhe Yá Ndiöxí.

<sup>2</sup>Te ndíi Chàíá tée ní xóo cáhá<sup>n</sup> tnúhu Yá Ndiöxí ndéé sanaha ní chídó tnùní ndíi nàcuáa ní xáha<sup>n</sup> Yá Ndiöxí xii Déhe-gá, te duha ní xáha<sup>n</sup>-gá: Tendaha-í ìí<sup>n</sup> tée codonùu-dé núú-n, te dàtúha-dé ñáyiú cuëndá tñí-yu tnúhu-n.

<sup>3</sup>Te tée-á<sup>n</sup> quihi-dé xití yucu te níhi cáhá<sup>n</sup>-dé cúnaha-dě xii ñáyiú: “Chí dǎná nchàa ichi cuehé ichi duha ndècu-ndo, te tñí-ndo ìchi váha, te duca<sup>n</sup> càda-ndo cuendá cundecu túha-ndo, chi véxi Yaá ío cùnuu”, duha cúnaha-dě xii-yu.

Duha ndùu tnúhu ní chídó tnùní ndíi Chàíá nàcuáa ní xáha<sup>n</sup> Yá Ndiöxí xii Déhe-gá. <sup>4</sup>Te tée dii cuëndá-xi ní ngódó tnùn-í-á<sup>n</sup> nání-dě Juàá, te tée-á<sup>n</sup> ní xíhi-dé xití yucu ní cáhá<sup>n</sup>-dé tnúhu Yá Ndiöxí, te ní xóo dacuandute-dé ñáyiú, te duha ní xáha<sup>n</sup>-dě xii-yu:

—Chí dándixi túu iní sá ñà túú quide váha-ndo ndècu-ndo, te daña-ndo nchàa ichi cuehé ichi duha te cuandute-ndo, te duca<sup>n</sup> te Yá Ndiöxí cada cǎhnu iní-gá nchaa yíca cuèchi-ndo —duha ní xáha<sup>n</sup>-dě xii-yu.

<sup>5</sup>Te nchaa ñáyiú distritú Jùdeá, ndíhi ñáyiú ñúú Jerusàlén ní sáhá<sup>n</sup>-yu ndéé yúte Jòrdán núú ndécú tǎ Juàá ní xíndedóho-yu nchaa tnúhu ní cáhá<sup>n</sup>-dé. Te cue ñáyiú ní náhmá nchaa yíca

cuèchi-xi te ní dǎcuándute ñaha-dé xii-yu.

<sup>6</sup>Te tée Juàá-á<sup>n</sup> ní xíhnu-dé dóó idi cǎméyu, te ìí<sup>n</sup> ñíi ní cuu pǎnú xití-dé, te ní xóo caxi-dé tíca làngóstá ndíhi ndudí ñúúú cuèchí. <sup>7</sup>Te ní xáha<sup>n</sup> tucu-dé xii ñáyiú:

—Nchícú<sup>n</sup> ìí<sup>n</sup> tée véxi, te tée-á<sup>n</sup> ò-gá cúnùu-dé dàcúxí yúhú, chi yúhú cúú-í ìí<sup>n</sup> tée duu<sup>n</sup> duu<sup>n</sup> ñǎ túú tǎú-í ngúnundeyi-í nandaxi cuèdicó ñíi nihnu chǎú-dé dico quide-í chiú<sup>n</sup>-dé. <sup>8</sup>Te yúhú dǎcuandute ñaha-í xii-ndo, dico mee-dě taxi-dé Espiritú Yá Ndiöxí cundecu ndíhi-ndo —cǎchí-dé xáha<sup>n</sup>-dě xii-yu.

### Sàndute Jesús

(Mt. 3:13-17; Lc. 3:21-22)

<sup>9</sup>Te dàvá-á<sup>n</sup> ní quee Jèsús ñúú Nazàrét ìí<sup>n</sup> ñúú yíndèhu distritú Galileá cuáhá<sup>n</sup>-gá yúte Jòrdán. Te yàcá<sup>n</sup> ní dǎcuándute ñaha tée Juàá xii-gá. <sup>10</sup>Te òré ní nene-gá xití ndute, te ní xini-gá nchíi andíu, te ní quee Espiritú Yá Ndiöxí véxi cuu<sup>n</sup>-xi ngúnndecu ndíhi ñaha-xi xii-gá, te dàtná cáá ìí<sup>n</sup> lómá cáá Espiritú-á<sup>n</sup> véxi cuu<sup>n</sup>-xi. <sup>11</sup>Te òré-á<sup>n</sup> ní tecú ní cáhá<sup>n</sup> Yá Ndiöxí ndéé andíu, te xáha<sup>n</sup>-gǎ xii Jèsús:

—Yòhó cúú-n Dǎhe-í tée ío cùu iní-í te ío cùdíí iní ñáhà-í xii-n —cǎchí-gá xáha<sup>n</sup>-gǎ.

**Sácuíhná quidé yíca-xi cada Jesús  
sá ñà túú tǎú-gá cada-gá  
dico ñǎ túú ní quide-gá**

(Mt. 4:1-11; Lc. 4:1-13)

<sup>12</sup>Te Espiritú Yá Ndiöxí ndécá-xí Jèsús cuáhá<sup>n</sup> ìí<sup>n</sup> xití yucu. <sup>13</sup>Te xití yucu-á<sup>n</sup> òó víhí quítì déé<sup>n</sup>, te xíá<sup>n</sup> ndécú Jèsús ní ngúíta sácuíhná quidé yíca-xi cada-gá ìí<sup>n</sup> sá ñà túú tǎú-gá cada-gá dico ñǎ túú ní sàndáá iní-gá. Te cue espíritú xínú cuèchi núú Yá Ndiöxí ní xinu cuechi-xi nǎú-gǎ. Te ní xíndecu-gá údico nduu xití yucu-á<sup>n</sup>.

**Distritú Galileá ní chisaha Jèsús chiù<sup>n</sup>  
ní tǎhú Tǎtá-gǎ Dútú Ndiöxí cada-gá**

(Mt. 4:12-17; Lc. 4:14-15)

<sup>14</sup>Te sátá nǐ ngava té Juáa ve-  
caá, te Jèsús cuáhá<sup>n</sup>-gá distritú Galileá  
dànehé-gá ñáyiú tnúhu váha, tnúhu sá  
cáhá<sup>n</sup> nàcuáa ndíhu ndaha ñaha Yá  
Ndiöxí xií-yu. <sup>15</sup>Te xǎha<sup>n</sup>-gǎ xií-yu:

—Vitna sa ní cuyatni nduu ndíhu  
ndaha ñaha Yá Ndiöxí xii-ndo, te  
chí dáñá nchàa ichi cuehé ichi duha  
ndècu-ndo, te quindáá iní-ndó tnúhu  
váha, tnúhu sá cáhá<sup>n</sup> nàcuáa naníhí  
tǎhú-ndó —càchí-gǎ xǎha<sup>n</sup>-gǎ xií-yu.

**Jèsús cǎhá<sup>n</sup>-gá cúmí  
tnáhá cue téé tnìi chácá**

(Mt. 4:18-22; Lc. 5:1-11)

<sup>16</sup>Te Jèsús ñúhú-gǎ ichi cuáhá<sup>n</sup>-gá  
tǎ yǎha-gá yuhu làgúná Galileá, te ní  
xiní-gá té Xímú ndíhi ñaní-dé té Ndríxí  
xídáquèe-güedé ñunu-güedé xití ndute  
tnìi-güedé chácá, chi quití tnàhí-á<sup>n</sup> cúú  
chiù<sup>n</sup>-güedé tníí-güedé-di. <sup>17</sup>Te Jèsús ní  
xǎha<sup>n</sup>-gǎ xii-güedé:

—Chí dáñá chiù<sup>n</sup> quide-ndo-á<sup>n</sup>, te  
quixi-ndo chitnahá ñáhá-ndó xii-í te  
taxi-í ingá núú chiù<sup>n</sup> cada-ndo chi  
qufíhí<sup>n</sup>-ndó cǎhá<sup>n</sup>-ndó ñáyiú cuendá  
dacuàhá-yu tnúhu-í —càchí-gǎ xǎha<sup>n</sup>-gǎ  
xii-güedé.

<sup>18</sup>Te òré-ni-á<sup>n</sup> ní dáñá cuè téé-á<sup>n</sup>  
ñunu-güedé te ní tuha ñaha-güedé  
xii-gá.

<sup>19</sup>Te cuáhá<sup>n</sup>-gá luha-gá, te ní  
xiní-gá té Jàcobó ndíhi ñaní-dé té  
Juáa ñúhú-güedé xití bàrcú-güedé  
nátcu-güedé ñunu-güedé, te ndi  
ndúú-güedé cúú-güedé déhe té Zebèdeú.  
<sup>20</sup>Te ní cana ñaha-gǎ xii-güedé, te ní  
dándõ-güedé tǎtá-güedé ndíhi cue téé  
xinu cuechi núú-güedé xití bàrcú, te ní  
tuha ñaha-güedé xii-gá.

**Ìì<sup>n</sup> téé yìhi ñaha espíritú  
cúndìhi yucu ñávàha**

(Lc. 4:31-37)

<sup>21</sup>Te ní quexìo Jesús ndíhi cue téé-á<sup>n</sup>  
ìì<sup>n</sup> ñuú nání Cǎpernaúm, te yàcá<sup>n</sup>  
ndécú-gǎ ní tnahá nduu ndètatú ñáyiú,  
te cuánguihu-gǎ veúúhu ñáyiú isràél  
dànehé ñáhá-gǎ xií-yu. <sup>22</sup>Te xícuñúhu  
vìhí-yu nchaa tnúhu cáhá<sup>n</sup>-gǎ, chi  
quide-gǎ sá cúú-gǎ ìì<sup>n</sup> Yáá táxí tnùnì  
vìhí, te ñá túú dàcuaha ñaha-gǎ xií-yu  
dàtná dǎcuàha ñaha cue téé dǎcuaha  
ñaha xií-yu nchaa tnúhu ní chídó tnùnì  
ndíi Moisés. <sup>23</sup>Te xití veñúhu-á<sup>n</sup> ndécú  
tnáhá ìì<sup>n</sup> téé yìhi ñaha ìì<sup>n</sup> espíritú  
cúndìhi yucu ñávàha, te espíritú-á<sup>n</sup> ní  
quide-xi níhi ní cáhá<sup>n</sup> téé-á<sup>n</sup>, te xǎha<sup>n</sup>-dè  
xii Jèsús:

<sup>24</sup>—¿Te ná cuínì yòhó Jèsús téé  
ñuú Nazàrét cada ñaha-n xii-ndí nùu  
véxi-n nùú ndécú-ndí-i? ¿Á<sup>n</sup> véxi-n dà-  
naa ñaha-n xii-ndí? Chi yúhú xiní  
ñáhà-í xii-n sǎ cúú-n ìì<sup>n</sup> téé ñá túú  
tnàhí cuèchi-xi, chi núú Yǎ Ndiöxí  
ní quee-n véxi-n ñùyíú-a —càchí-dé  
xǎha<sup>n</sup>-dè xii-gá.

<sup>25</sup>Dico Jèsús ní tenàá-gǎ espíritú  
cúndìhi yucu ñávàha-á<sup>n</sup>, te xǎha<sup>n</sup>-gǎ:

—¿Cadí yuhu-n, te taquèe yiquì  
cuñú téé-á<sup>n</sup>! —càchí-gǎ xǎha<sup>n</sup>-gǎ xii  
espíritú-á<sup>n</sup>.

<sup>26</sup>Te espíritú cúndìhi yucu ñávàha-á<sup>n</sup>  
ní dǎcüyìhí ñáhá-xí xii téé-á<sup>n</sup>, te ní  
dácáná sàa ñaha-xi, te ní quee-xi yiquì  
cùñú-dé cuáhá<sup>n</sup>-xi. <sup>27</sup>Te nchaa ñáyiú  
xíndecu-á<sup>n</sup> ìo ní cuñúhu-yu, te ní  
xítnáhá-yu:

—¿Te nása ndúu-tu sá quidé tèe-a?  
¿Ndudú sáá cáhá<sup>n</sup>-tu-dé sánùu? Te  
quide-dé dàtná quidé ìì<sup>n</sup> téé cùnùu vihi,  
chi cáhá<sup>n</sup>-ni-dé te sàndáá iní ñáhá nchaa  
espíritú cúndìhi yucu ñávàha —càchí-yu  
xítnáhá-yu.

<sup>28</sup>Te ío ndíhi ní níhí nchaa ñáyiú  
dava-gǎ ñuú yíndèhu distritú Galileá

tnúhu nchaa nàcuáa càhá<sup>n</sup> Jèsús ndihi nchaa sá quidé-gá.

**Jèsús quidé tātna-gá  
nāná ñadìhí té Xímú**

(Mt. 8:14-15; Lc. 4:38-39)

<sup>29</sup> Te òré ní ndee Jèsús veñúhu cue ñáyiú isràél, te cuáhá<sup>n</sup>-gá ndihi té Jà-cobó ndihi té Juáá vehe té Xímú ndihi té Ndríxí. <sup>30</sup> Te nāná ñadìhí té Xímú cùhú-a<sup>n</sup> ñùhu vihi-a<sup>n</sup> cahni, te ndìhí-ni ní xáha<sup>n</sup>-güedě xii Jèsús sá cùhú-a<sup>n</sup>. <sup>31</sup> Te ní sáhá<sup>n</sup>-gá núú cáá ñàha cùhú-á<sup>n</sup> te ní tñii-gá ndaha-a<sup>n</sup> ní ndocani ñaha-gá xii-a<sup>n</sup>. Te òré-ni-á<sup>n</sup> nǐ nchíco-a<sup>n</sup> cahni, te ní ngúíta-a<sup>n</sup> xínu cuechi-a<sup>n</sup> núú-güedě ndihi-gá.

**Jèsús quidé tātna-gá vai ñáyiú cùhú**

(Mt. 8:16-17; Lc. 4:40-41)

<sup>32</sup> Te òré sa cuíní-xi cundiquí<sup>n</sup> te ní quexio ñáyiú núú ndécú Jèsús, te nchaa ñáyiú cùhú ní dátacá-yu ndecá-yu ní sáá núú-gá, te tñàhá cue ñáyiú yìhi ñaha espíritú cùndìhi yucu ñávàha ndecá-yu ní sáá núú-gá. <sup>33</sup> Te nchaa ñáyiú ñuú-á<sup>n</sup> nǐ chítú níhnǔ-yu yuyèhe vehe núú nǐ quexio Jesús. <sup>34</sup> Te Jèsús ní quide tātna-gá nchaa ñáyiú cùhú cuèi ndi díí<sup>n</sup> ndi díí<sup>n</sup> núú cuèhé tñàhá-yu ì<sup>n</sup> ì<sup>n</sup>-yu, te ní queñuhu-gá nchaa espíritú cùndìhi yucu ñávàha yìhi ñaha xii ñáyiú, te ñá túú ní dàña-gá cáhá<sup>n</sup> cue espíritú cùndìhi yucu ñávàha-á<sup>n</sup> ni ì<sup>n</sup> tnúhu, te duca<sup>n</sup> nǐ quide-gá chi cue espíritú-á<sup>n</sup> sa xíní-xi yoo cùu-gá.

**Jèsús càhá<sup>n</sup>-gá tnúhu Yá  
Ndiòxí distritú Galileá**

(Lc. 4:42-44)

<sup>35</sup> Te òré vátá tñndaá váha-gá ní ndacóo Jèsús cuáhá<sup>n</sup>-gá ì<sup>n</sup> xio yuhu ñúú núú ñà túú ñáyiú ndècu cuendá yacá<sup>n</sup> cáhá<sup>n</sup> ndihi-gá Yá Ndiòxí. <sup>36</sup> Te té Xímú ndihi cue tée cùndìhi-dé nándücu

ñaha-güedé xii-gá. <sup>37</sup> Te òré ní naníhí ñáhá-güedě xii-gá, te ní xáha<sup>n</sup>-güedě:

—Nchaa ñáyiú nándücu ñahá-yu xii-n —càchí-güedé xáha<sup>n</sup>-güedě xii-gá.

<sup>38</sup> Te ní xáha<sup>n</sup>-gá xii-güedé:

—Chí ná quíhí<sup>n</sup>-ó nchaa ñuú xñdáa yatni-a, chi danèhé-í ñáyiú tnúhu Yá Ndiòxí chi diu chiú<sup>n</sup>-á<sup>n</sup> vèxi-í —càchí-gá xáha<sup>n</sup>-gá xii-güedé.

<sup>39</sup> Te Jèsús tá xica ndodo-gá cuáhá<sup>n</sup> nchaa ñuú yíndèhu distritú Galileá dánèhé-gá ñáyiú, te ndi tñhá ì<sup>n</sup> ì<sup>n</sup> ñuú sàá-gá te duca<sup>n</sup> cuànguihu-gá veñúhu-yu dànèhé ñáhá-gá xii-yu tnúhu Yá Ndiòxí, te cue ñáyiú yìhi ñaha espíritú cùndìhi yucu ñávàha ta queñuhu-gá nchaa espíritú-á<sup>n</sup> yiqui cùñú-yu cuáhá<sup>n</sup>.

**Jèsús quidé tātna-gá ì<sup>n</sup> tée  
tñàhá cuéhé sá dátèhyú  
nihnu-xi yiqui cùñú-ó**

(Mt. 8:1-4; Lc. 5:12-16)

<sup>40</sup> Te ní quexio ì<sup>n</sup> tée tñàhá cuéhé sá dátèhyú nihnu-xi yiqui cùñú-ó núú Jèsús, te ní ngúíñí xítí-dě núú-gá càhá<sup>n</sup> ndàhú-dé, te xáha<sup>n</sup>-dě xii-gá:

—Véxi-í càhá<sup>n</sup> ndàhú-í núú-n núu vá cùndèe iní-n càda tātna ñaha-n xii-í chi cùtnuní iní-í sá ndácú-n —càchí-dě xáha<sup>n</sup>-dě xii-gá.

<sup>41</sup> Te Jèsús ní cundàhú iní ñáhá-gá xii-dé te ní dácàá-gá ndaha-gá ní tendaha ñaha-gá xii-dé, te xáha<sup>n</sup>-gá:

—Cuu cada tātna ñaha-í xii-n, te vitna ndúha-n —càchí-gá xáha<sup>n</sup>-gá xii-dé.

<sup>42</sup> Te òré-ni-á<sup>n</sup> nǐ xócuíñí cuéhé tñàhá-dé. <sup>43-44</sup> Te Jèsús ní cáhá<sup>n</sup> víhí-gá dóho-dé, te xáha<sup>n</sup>-gá xii-dé:

—Vitna cuanùhú-na, dico vá yóo ì<sup>n</sup> cùñaha-n sà ní quide tātna ñaha-í xii-n, te núú dütú-ni cuáhá<sup>n</sup> cuendá sá ná quíní ñáhá-dě xii-n sà ní ndúha-n te cuáha-n-dě sá ndúú tǎhú Yá Ndiòxí dátñá ní cachí ndíi Moisés cuendá ná quíní ñáyiú sá ndáá ní ndúha-n —càchí-gá xáha<sup>n</sup>-gá xii-dé.

<sup>45</sup>Te téé ní cuhú-á<sup>n</sup> nǐ xica-dé cuáhá<sup>n</sup>-dé, te ní nguíta-dé xáha<sup>n</sup>-dě xii nchaa ñáyiú ta nàníhí-dě nàcuáa ní quide Jèsús ní quide tátna ñaha-gá xii-dé. Te sá dúcá<sup>n</sup> nǐ xíté nuu téé-á<sup>n</sup> cuèndú nàcuáa ní quide ñaha Jèsús xii-dé ní quide tátna ñaha-gá ní ndúha-dé, te xíá<sup>n</sup> nǔu dayuhu nǐ xóo quǎhu-gá dava ñuú núú ío vài ñáyiú ndèhe ñaha xii-gá, te ní xóo cundecu-gá xití yucu núú ñà túú ñáyiú ndècu. Te nchaa ñuú ní quee ñáyiú ní sáhá<sup>n</sup>-yu núú ndécú-gá ní cáhá<sup>n</sup> ndihi ñàhá-yu xii-gá.

**Jèsús quidé tátna-gá ñ<sup>n</sup> téé cùhú ñá cúú-gá candá nihnu**

(Mt. 9:1-8; Lc. 5:17-26)

**2** Te sátá nǐ cuu ñ<sup>n</sup> úú nduu sá nǐ quee Jèsús ñuú Capèrnaúm te ní nasáá tucu-gá, te cue ñáyiú ní níhí-yu tnúhu sá nǐ ndexìo-gá núú quidé vèhe-gá. <sup>2</sup>Te ndíhi-ni ní tacá cuéhé víhí-yu, te ní chítú víhí-yu ndéé yuyèhe te ñá ní tnàhá-gá-yu. Te ní nguíta-gá ní dánèhé ñàhá-gá xii-yu tnúhu Yá Ndiöxí. <sup>3</sup>Te òré-á<sup>n</sup> nǐ quexìo cúmí tnàhá cue téé núú ndécú-gá nchídó-güedé ñ<sup>n</sup> téé cùhú ñá cúú-gá candá nihnu-dé. <sup>4</sup>Dico ñá túú ní ndàcu-güedé sáá-güedé ndéé núú-gá chi ío cuéhé ñáyiú ndècu. Te xíá<sup>n</sup> nǔu ní sáá-güedé díquí véhé nǔú yíhí-gá-á<sup>n</sup> nǐ caá<sup>n</sup>-güedé, te ichi ndàa díquí véhé-á<sup>n</sup> nǐ dáquèe-güedé téé cùhú-á<sup>n</sup>, te ñùhu-dé ñ<sup>n</sup> xító ní dáquèe ñaha-güedé ndéé núú-gá. <sup>5</sup>Te Jèsús sa ní cutnùní iní-gá sá sàndáá iní ñàhá-güedé xii-gá nǔu ní xáha<sup>n</sup>-gá xii téé cùhú-á<sup>n</sup>:

—Yòhó téé cùhú, sa ní quide càhnu iní-í nchaa cuéchi-n —càchí-gá xáha<sup>n</sup>-gá xii-dé.

<sup>6</sup>Te xíá<sup>n</sup> xǐnucóo ñ<sup>n</sup> úú cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, te sá dúcá<sup>n</sup> nǐ cáhá<sup>n</sup> Jèsús núú cue téé-á<sup>n</sup> nǐ sani iní-güedé: <sup>7</sup>“Tée-a càhá<sup>n</sup> cuéhé-dé

cuèndá Yá Ndiöxí duha càhá<sup>n</sup>-dé, chi vá yóo ñ<sup>n</sup> ndàcu cada cahnu iní nchaa yíca cuéchi ñáyiú chi ñ<sup>n</sup> dií ní Yá Ndiöxí quidé càhnu iní-gá”, duha ní sani iní-güedé. <sup>8</sup>Dico òré-ni-á<sup>n</sup> nǐ cutnùnì iní Jèsús nàcuáa sàni iní-güedé, núu ní xáha<sup>n</sup>-gá xii-güedé:

—¿Te ná cuèndá duca<sup>n</sup> sàni iní-ndó-í?

<sup>9</sup>Te sá dúhá nǐ xáha<sup>n</sup>-í xii téé cùhú-a sá nǐ quide càhnu iní-í nchaa yíca cuéchi-dé, te xíá<sup>n</sup> nchòhó ñá túú cutnùnì iní-ndó nǔu ndáá càhá<sup>n</sup>-í àdi ñá ndàá. Dico núu cúu-í-dé sá ndácóo-dé, te ndocani-dé xító ñùhu-dé véxi, te caca-dé, te cutnùnì ndáá iní-ndó nǔu ndáá càhá<sup>n</sup>-í àdi ñá ndàa chi cundehe nǔú-ndó nàcuáa cada-í. <sup>10</sup>Te vitna na càda-í nàcuáa cutnùnì iní-ndó nchàa-ndo sá yǔhú Téé cùu ñàní tnàhá-ndó nchàa-ndo ndecu ndíhi-í tnúhu ndee iní sá cáda càhnu iní-í nchaa cuéchi ñáyiú ñuyíú-a —càchí-gá xáha<sup>n</sup>-gá xii-güedé.

Te sátá dúcá<sup>n</sup> te ní xáha<sup>n</sup>-gá xii téé cùhú-á<sup>n</sup>:

<sup>11</sup>—Ndacóo te ndocani-n xító ñùhu-n véxi-á<sup>n</sup>, te núhú-n vèhe-n —cachí-gá xáha<sup>n</sup>-gá xii-dé.

<sup>12</sup>Te òré-ni-á<sup>n</sup> nǐ ndacóo-dé, te ní ndocani-dé xító ñùhu-dé ní quexìo-á<sup>n</sup>, te ndèhe nchaa ñáyiú xǐndecu-á<sup>n</sup> ní ndee-dé tnuú-yu cuáhá<sup>n</sup>-dé. Te sá dúcá<sup>n</sup> nǐ quide Jèsús ní quide tátna-gá téé-á<sup>n</sup>, xíá<sup>n</sup> ío ní cuñúhu nchaa ñáyiú, te ní xíttnàhá-yu:

—Càhnu vihi cuu Yá Ndiöxí, chi ñá ñ<sup>n</sup> ndùu quini-ó dùha cuu datná ní cuu vitna —càchí-yu xíttnàhá-yu.

**Jèsús càhá<sup>n</sup>-gá ñ<sup>n</sup> téé nàni Leví**

(Mt. 9:9-13; Lc. 5:27-32)

<sup>13</sup>Te Jèsús cuáhá<sup>n</sup> tucu-gá yuhu làgúná, te ío cuéhé ñáyiú ní sátnàhá ñàhá xii-gá, te ní dánèhé ñàhá-gá xii-yu tnúhu Yá Ndiöxí. <sup>14</sup>Te òré ní yáha ní dánèhé ñàhá-gá xii-yu, te ní

naquehe<sup>n</sup>-gá ichi, te ní yáha yatni-gá ìí<sup>n</sup> xichi núú núcõo ìí<sup>n</sup> téé nàni Leví déhe ìí<sup>n</sup> téé nàni Alfeú quidé còbrá-dé ñáyiú cuendá impuèstú chi cobràdór cùú-dé. Te òré ní xini ñáhá-gã xii-dé, te ní xáha<sup>n</sup>-gã:

—Néhé chitnahá ñáhá-n xii-í —càchí-gá xáha<sup>n</sup>-gã xii-dé.

Te té Lèví-á<sup>n</sup> ní ndacuñí-dé, te ní tuha ñaha-dé xii-gã.

<sup>15</sup>Te té Lèví-á<sup>n</sup> cuáhá<sup>n</sup>-dé ndihi Jèsús vehe-dé. Te yìhi Jesús mèsa xéxí-gã ndihi cue téé xica cuu ndihi-gá, te tñáhá vài cue téé cuihna ìní-xi quide cobrá ñáhá xii ñáyiú cuendá impuèstú, ndihi dava-gá cue téé ndècu ichi cuehé ichi duha nùcõo ndihi ñaha-güedé xii-gã xéxí ndihi ñaha-güedé, te duca<sup>n</sup> chi ío vài ñáyiú nchìcú<sup>n</sup> ñáhá xii-gã. <sup>16</sup>Te sá ní xini cue téé dàcuáha ñaha xii-yu nchaa tñúhu ní chídó tñùni ndii Moisés, ndihi cue téé cùu fariséú xéxí Jèsús ndihi nchaa cue téé-á<sup>n</sup> nùu ní xicá<sup>n</sup> tñúhú-güedé núú cuè téé xica cuu ndihi-gá, te xáha<sup>n</sup>-güedé:

—¿Ná cuendá duca<sup>n</sup> quide téé cùu mestrú-ndó xèxi-dé ndihi cue téé cuihna ìní-xi quide cobrá ñáhá xii ñáyiú cuendá impuèstú, ndihi nchaa dava-gá cue téé ndècu ichi cuehé ichi duha-i? —càchí-güedé xáha<sup>n</sup>-güedé.

<sup>17</sup>Te Jèsús ní tecú dóho-gá nàcuáa nduu tñúhu ní xáha<sup>n</sup>-güedé xii cue téé xica cuu ndihi-gá, núú ní xáha<sup>n</sup>-gã xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í càhá<sup>n</sup>-í ñáyiú cùtnuní ìní-xi sá ndécú cuèchi-xi te ñá túú véxi-í càhá<sup>n</sup>-í ñáyiú càchí sá ñá túú ndècu cuèchi-xi —càchí-gá xáha<sup>n</sup>-gã xii-güedé.

### **Cuendá cue ñáyiú ñá túú tñáhí ná xéxí áma càhá<sup>n</sup> ndihí-yu Yá Ndiõxí**

(Mt. 9:14-17; Lc. 5:33-39)

<sup>18</sup>Te cue téé xica cuu ndihi té Juáá, ndihi cue téé xica cuu ndihi cue téé cùu fariséú ñá túú tñáhí ná xéxí-güedé áma càhá<sup>n</sup> ndihi-güedé Yá Ndiõxí. Te ìí<sup>n</sup> nduu duca<sup>n</sup> xiquide-güedé, te ní sáhá<sup>n</sup> ñáyiú ní xicá<sup>n</sup> tñúhú-yu núú Jèsús, te xáha<sup>n</sup>-yu xii-gã:

—Cuiní-ndí cachí tñúhu-n ná cuendá cue téé xica cuu ndihi té Juáá, ndihi cue téé xica cuu ndihi cue téé cùu fariséú ñá túú tñáhí ná xéxí-güedé áma càhá<sup>n</sup> ndihi-güedé Yá Ndiõxí, te cue téé xica cuu ndihi-n ñá túú dùca<sup>n</sup> quide-güedé —càchí-yu xáha<sup>n</sup>-yu xii-gã.

<sup>19</sup>Te Jèsús ní xáha<sup>n</sup>-gã xii-yu:

—Nchòhó xini-ndó sã vã cùú cùñaha-o xii ñáyiú ñúhu vico tñándaha sã vã cùú càxí-yu nini ndècu ndihi ñaha téé tñándaha xii-yu. <sup>20</sup>Dico sáá nduu te vã cùndècu ndihi ñaha-gá téé tñándaha-á<sup>n</sup> xii-yu, te dàvá-á<sup>n</sup> te cahni ìní-yu vã càxí-yu cuendá sã ndihú ìní-yu.

<sup>21</sup>Te vã yõo ìí<sup>n</sup> dándée luha dóó sáá ìí<sup>n</sup> dóó sa ní cuu tùhú víhí, chi dóó sáá-á<sup>n</sup> nàndiyi-xi te uu<sup>n</sup>-gã ndata-xi dõó sà ní cuu tùhú-á<sup>n</sup>. <sup>22</sup>Te ni vã yõo ìí<sup>n</sup> chihí ndidí sáá xití ìí<sup>n</sup> lamba sa ní cuu tùhú víhí, chi núu yoo duca<sup>n</sup> na càda te ndava lamba sa ní cuu tùhú-á<sup>n</sup>, chi ío níhi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup> te núu duca<sup>n</sup> na càdá-yu. Núu xíá<sup>n</sup> xini ñúhu-xi quée ndidí sáá-á<sup>n</sup> xití ìí<sup>n</sup> lamba saa —càchí-gá xáha<sup>n</sup>-gã xii-yu.

### **Cue téé xica cuu ndihi Jesús sàhnú-güedé yoco trìú nduu ndetàtú ñáyiú**

(Mt. 12:1-8; Lc. 6:1-5)

<sup>23</sup>Te ìí<sup>n</sup> nduu cùu-xi nduu ndetàtú ñáyiú ñúhu Jesús ichi ndihi cue téé xica cuu ndihi-gá, te ta yáha-gá ndihi-güedé ìí<sup>n</sup> xichi núú cáá trìú, te ní nguíta-güedé

sahnú-güedé yoco trùú-á<sup>n</sup>. <sup>24</sup>Te cue tée cùu fariséu ní xáha<sup>n</sup>-güedě xii-gá:

—¿Ná cuendá duca<sup>n</sup> quide cue tée xica cuu ndihi-n sahnú-güedé yoco trùú vitna cùu-xi nduu ndetatú-i? Te ñá túú tàú-güedé duca<sup>n</sup> càda-güedé — cächí-güedé xáha<sup>n</sup>-güedě xii-gá.

<sup>25</sup>Te ní xáha<sup>n</sup>-gá xii-güedé:

—¿Te náa vátá dácua<sup>n</sup>ha tnahi-gá-ndó nùú tütú Yá Ndiöxí núú cáhá<sup>n</sup>-xi nàcuáa ní quide ndí Dávíí cútñàhá ní xíhí ndíí docó ndíhi cue tée ní xica cuu ndíhi ndíí-á<sup>n</sup>? <sup>26</sup>Te dàv-á<sup>n</sup> ní xíndecu ì<sup>n</sup> tée ní xínani Abiàtár ní cuu-dé dútú cúnùu, te ndíí Dávíí ní qufhu ndíí xití vehe Yá Ndiöxí ní quehe<sup>n</sup> ndíí pàá ní cuu íí ndécú-á<sup>n</sup> ní dácáhñu ndíí cue tée ní xica cuu ndíhi ndíí ní xexi ndíí ndíhi-güedé, te mee-ni cuè dútú tàú-güedé caxi-güedé pàá-á<sup>n</sup> ní cùu — cächí-gá xáha<sup>n</sup>-gá xii-güedé.

<sup>27</sup>Te ní xáha<sup>n</sup> tucu Jesús xii-güedé:

—Mee Yá Ndiöxí ní taxi ndecu-gá nduu ndetatú ñáyiú, te ñá túú ní cächí-gá sá méě-yu nándi cani iní-yu cadá-yu canehe íi-yu nduu ndetatú-yu-á<sup>n</sup>. <sup>28</sup>Te yúhú Tée cùu ñaní tñáhá-ndó nchàa-ndo, tñáhá-í ndécú ndíhi-í tnúhu ndee iní sá cùu-í nchaa ñáyiú nàcuáa cadá-yu nduu ndetatú-ó-á<sup>n</sup> — cächí-gá xáha<sup>n</sup>-gá xii-güedé.

**Ì<sup>n</sup> tée ní yíhí ì<sup>n</sup> xio ndaha-xi**

(Mt. 12:9-14; Lc. 6:6-11)

**3** Te Jèsús cuánguihu tucu-gá xití veñúhu, te xití veñúhu-á<sup>n</sup> ndécú ì<sup>n</sup> tée ní yíhí ì<sup>n</sup> xio ndaha-dé. <sup>2</sup>Te xíá<sup>n</sup> ndécú cuè tée xito dayuhu ñaha xii-gá, te núu cada tátña-gá tée cùhú-á<sup>n</sup> nduu cùu-xi nduu ndetatú-güedé ndíhi ñáyiú, cuendá duca<sup>n</sup> te níhí-güedě nàcuáa cada-güedé cacá<sup>n</sup> cuéchi-güedé cuendá-gá. <sup>3</sup>Te ní xáha<sup>n</sup>-gá xii tée cùhú ndaha-xi-á<sup>n</sup>:

—Ndacuñí te ngúnutnì-n cuádava iha — cächí-gá xáha<sup>n</sup>-gá xii-dé.

<sup>4</sup>Te ní xícá<sup>n</sup> tnúhú-gá núu-güedě, te xáha<sup>n</sup>-gá:

—Chí cächí tnúhu ná cúú sá cúú càda-o nduu ndetatú-ó. ¿Sá vâha ñá sá cuèhé? ¿Sá cadá tátña-o ñáyiú cùhú ñá sá cáhni-ó-yu? — cächí-gá xáha<sup>n</sup>-gá xii-güedé.

Dico ní ì<sup>n</sup>-güedé ñá túú tñáhí ní cáhá<sup>n</sup>-güedé. <sup>5</sup>Te Jèsús ní xíndéhé vâha-gá núú nchàa-güedé te ní cudéé<sup>n</sup>-gá, te ní ndíhú iní-gá chi ío sàá iní-güedé, te ní xáha<sup>n</sup>-gá xii tée cùhú ndaha-xi-á<sup>n</sup>:

—Ndocani ndaha-n — cächí-gá xáha<sup>n</sup>-gá xii-dé.

Te ní ndocani-dé ndaha-dé, te òré-ni-á<sup>n</sup> ní ndúha. <sup>6</sup>Te cue tée cùu fariséu ní xica-güedé cuáhá<sup>n</sup>-güedé ì<sup>n</sup> xichi núú ní naníhí tñáhá-güedě ndíhi cue tée cùndíhi té Hèrodés cuendá ndatnúhu-güedé nása cada-güedé cahni-güedé Jèsús.

### **Cuéhé vñí ñáyiú ní quexìo yuhu lagúná**

<sup>7</sup>Te Jèsús ní xica-gá cuáhá<sup>n</sup>-gá ndíhi cue tée xica cuu ndíhi-gá yuhu làgúná distrítú Galileá, te ío cuéhé ñáyiú distrítú-á<sup>n</sup> nchicú<sup>n</sup> ñáhá-yu xii-gá cuáhá<sup>n</sup>. <sup>8</sup>Te núú ní quexìo-gá-á<sup>n</sup> ní sáhá<sup>n</sup> ñáyiú distrítú Jùdeá, ñáyiú ñuu Jerusàlén, ñáyiú distrítú Idùmeá, ñáyiú xíndecu ndaa ingá xio yúte Jòrdán, ndíhi ñáyiú xíndecu yatni ñuu Tírú ndíhi ñuu Sidón, te duca<sup>n</sup> ío vâi-yu ní sáhá<sup>n</sup> núú ndécú-gá chi ní níhí-yu tnúhu nchaa nàcuáa quide-gá. <sup>9</sup>Te Jèsús ní xáha<sup>n</sup>-gá xii cue tée xica cuu ndíhi-gá sá cadá tñha-güedé ì<sup>n</sup> bàrcú cuendá caa-gá núu-xi cuendá sá vâ dádèhnde ñáhá-yu xii-gá chi ío cuéhé-yu. <sup>10</sup>Te sá dúcá<sup>n</sup> ní níhí-yu tnúhu sá quídé tátña-gá ñáyiú cùhú, núu xíá<sup>n</sup> nchaa dava-gá ñáyiú cùhú súuní dicó ngõnchíhi



tnàhá-yu cuáhá<sup>n</sup>-yu núú ndécú-gǎ cuiní-yu tnándeé ñáhá-yu xii-gǎ cuendá sá cuiní-yu ndúha-yu. <sup>11</sup> Te cue ñáyiú yìhi ñaha espíritú cúndìhi yucu ñávàha ní sanu xiti ñàha-xi xií-yu núú Jèsús òré ní xiní ñáhá-xí xii-gǎ, te xǎá<sup>n</sup> ní quide níhi ní cáhá<sup>n</sup>-yu, te xǎhá<sup>n</sup>-yu xii Jèsús:

—¡Yòhó cútú-n Dèhe Yá Ndiòxí! — cǎchí-yu xǎhá<sup>n</sup>-yu xii-gǎ.

<sup>12</sup> Te Jèsús ní tenàá-gǎ nchaa espíritú cúndìhi yucu ñávàha-á<sup>n</sup>, te ní xáha<sup>n</sup>-gǎ xii nchaa ñáyiú ní xíhi-xi-á<sup>n</sup> sǎ vǎ cǎhá<sup>n</sup>-yu núú ñáyiú yoo cùu-gǎ.

**Jèsús cǎxi-gǎ úxúú tnàhá cue tée dacuàha ñaha xii ñáyiú tnúhu-gǎ**

(Mt. 10:1-4; Lc. 6:12-16)

<sup>13</sup> Te sátá dúcá<sup>n</sup> ní cuu te Jèsús ní sǎá-gǎ ì<sup>n</sup> yucu, te xǎá<sup>n</sup> ndécú-gǎ ní cana-gǎ nchaa cue tée cǎchí iní-gǎ. Te òré ní quexìo nchaa cue tée-á<sup>n</sup> núú-gǎ, <sup>14</sup> te ní cǎxi-gǎ úxúú tnàhá cue tée caca cuu ndìhi-gǎ, te diu-ni cue tée-á<sup>n</sup> tendaha-gǎ quíhí<sup>n</sup>-güedé cáhá<sup>n</sup>-güedé tnúhu-gǎ núú ñáyiú. <sup>15</sup> Te ní sǎñaha-gǎ xii-güedé tnúhu ndee iní cundecu ndìhi-güedé cuendá cada tátna-güedé ñáyiú cùhú, ndìhi cuendá queñuhu-güedé nchaa espíritú cúndìhi yucu ñávàha yìhi ñaha xii ñáyiú. <sup>16</sup> Te duha xínani ndi ùxúú cue tée-á<sup>n</sup>: H<sup>n</sup>-dé nání-dě Xímú, te mee-gǎ ní taudìu ñaha-gǎ xii-dé sá cúnàni-dé Pèlú. <sup>17</sup> Te ingá-dé nání-dě Jàcobó, te ingá-dé nání-dě Juàá, te ñani té Jàcobó-á<sup>n</sup> cútú tǎ Juàá te ndi ndúu-güedé cútú-güedé déhe té Zebèdeú, te ndi ndúu cue tée-á<sup>n</sup> ní dánání ñàha Jèsús xii-güedé Boànergés, te tnúhu-á<sup>n</sup> queé-xí: Cue tée ío yáchí cúdǎé<sup>n</sup>, duha quèe-xi tnúhu-á<sup>n</sup>. <sup>18</sup> Te duha xínani dàva-gǎ-güedé: Té Ndríxí, té Lìpé, té Bartolòmé, té Mǎteú, té Mǎxí, té Jàcobó déhe té Àlfeú, té Tǎdeú, té Xímú tée ní cundìhi cue tée canànistá ní cùu, <sup>19</sup> ndìhi té Jùdás Iscàrioté tée ní sǎá nduu ní sáha cuendá

ñáhá xii Jèsús núú cuè tée cùu úhú iní ñáhá xii-gǎ, duha xínani cuè tée ní cǎxi Jèsús ní xica cuu ndìhi-gǎ.

**Cǎchí-güedé sá ndécú ndìhi Jèsús yucu ñávàha dico ñá ndàá**

(Mt. 12:22-32; Lc. 11:14-23; 12:10)

Te sátá dúcá<sup>n</sup> te cuáhá<sup>n</sup>-gǎ ndìhi-güedé núú quídé vèhe-gǎ. <sup>20</sup> Te ío vǎi ñáyiú ní tacá-ni tucú-yu xǎá<sup>n</sup>, te ní ñǎ ní nìhí-gǎ nása cada-gǎ caxi-gǎ ndìhi cue tée xica cuu ndìhi-gǎ cuendá sá ío vǎi-yu. <sup>21</sup> Te cue ñáyiú cùu ndi mee Jèsús ní nìhí-yu tnúhu nchaa nàcuáa cùu, te nchaa ñáyiú ñá cùnuní váha iní-xi ní cǎchí-yu sá ní nduu lùcú-gǎ núu xǎá<sup>n</sup> cuáhá<sup>n</sup> ñáyiú cùu ndi mee Jèsús núú ndécú-gǎ cuendá candeca ñáhá-yu xii-gǎ núhú ní cùu.

<sup>22</sup> Te cue tée dàcuaha ñaha xii ñáyiú nchaa tnúhu ní chídó tnùnì ndii Moisés véxi ndéé ñuú Jerusàlén ní cáhá<sup>n</sup> cuèhé-güedé cuendá Jèsús, chi ní xítñaha-güedé:

—Tée-a ndècu ndìhi-dé sácúíhná, te diu xǎá<sup>n</sup> chíndèe ñaha-xi xii-dé queñuhu-dé nchaa espíritú cúndìhi-xi yìhi ñaha xii ñáyiú, te diu-ni-xi tàxi tnùnì-xi nchaa espíritú-á<sup>n</sup> —duha ní xítñaha-güedé.

<sup>23</sup> Te Jèsús ní cana ñaha-gǎ xii-güedé, te ní caní-gǎ ì<sup>n</sup> cuendú núú-güedé nàcuáa tecú tnùnì-güedé tnúhu-gǎ, te xǎha<sup>n</sup>-gǎ xii-güedé:

—¿Te nása cada sácúíhná queñuhu-xi cue espíritú cúndìhi-xi yìhi ñaha xii ñáyiú-i? <sup>24</sup> Te nchòhó xíní-ndó sǎ núu ì<sup>n</sup> tée yíndaha ì<sup>n</sup> nació<sup>n</sup> vá cútú ì<sup>n</sup>-nuu-dé ndìhi cue tée cùndìhi-dé, te vá cúdǎi-dé cunu-dě. <sup>25</sup> Te diu-ni duca<sup>n</sup> sǎtnahá-xi cùu tucu ñáyiú xíndecu ì<sup>n</sup>-ni vèhe, chi núu vá cútú ì<sup>n</sup>-nuú-yu, te vá cúdǎi-yu cundecu cǎhnú-yu. <sup>26</sup> Te núu sácúíhná ñà túu cùu ì<sup>n</sup>-nuu-xi ndìhi cue espíritú cúndìhi-xi, te vá cúdǎi-xi cundecu-xi taxi tnùnì-xi te núu duca<sup>n</sup> quide-xi.

<sup>27</sup> Te nchòhó xíní-ndó sã cuè ñadúhú chi vá ndácú-güedé cuendá-ni quíhu-güedé duhu-güedé vehe ìí<sup>n</sup> téé ío ndee, chi díhna-gá xíní ñuhu-xi tñii-güedé téé-á<sup>n</sup> dacùtu ñaha-güedé xii-dé dàtnùní duca<sup>n</sup> te ndacu-güedé duhu-güedé nchaa sá ndécú ndìhi-dé.

<sup>28</sup> Te na càchí tñúhu ndáá-í xii-ndo sã ncháá sã cuèhé sá dúhá quide ñáyiú, ndìhi nchaa tñúhu cuèhé tñúhu duha càhá<sup>n</sup>-yu cuendá Yã Ndiòxí cuu cada càhnu iní-gá. <sup>29</sup> Dico cue ñáyiú na càhá<sup>n</sup> cuèhé cuendá Espiritú Yã Ndiòxí, ñáyiú-á<sup>n</sup> vá cáda càhnu iní ñáhá tñàhí-gá xii-yu, chi cundecu-ni cuéchi-yu núú-gã ní caa ní quíhí<sup>n</sup> —càchí-gá xãha<sup>n</sup>-gã xii-güedé.

<sup>30</sup> Te duca<sup>n</sup> ñí cáhá<sup>n</sup>-gá chi càchí-güedé sá ndécú ndìhi-gá espíritú cùndìhi yucu ñávaha.

### Nãná Jèsús ndìhi cue ñaní-gá

(Mt. 12:46-50; Lc. 8:19-21)

<sup>31</sup> Te ní quexio náná Jèsús ndìhi cue ñaní-gá núú ndécú-gã xínutñí-yu quehé, te ní xáhá<sup>n</sup>-yu xii ìí<sup>n</sup> ñáyiú xíndecu-á<sup>n</sup> sã dáyãha-yu tñúhu núú-gã cuendá quee-gá ndatnùhu ndìhi ñaha-gã xii-yu. <sup>32</sup> Te cue ñáyiú xínucóo ní càndéé dññi-gá ní xáhá<sup>n</sup>-yu xii-gá:

—Nãná-n ndìhi cue ñaní-n ndécú-yu quehé nándùcu ñahá-yu xii-n —càchí-yu xáhá<sup>n</sup>-yu xii-gá.

<sup>33</sup> Te Jèsús ní xáhá<sup>n</sup>-gã xii-yu:

—Te cachí tñúhu-ndo yõndi-gá ñáyiú cùu datná nãná-í ndìhi dàtná cue ñaní-í —càchí-gã xãha<sup>n</sup>-gã xii-yu.

<sup>34</sup> Te dàtnùní ní xíndéhé vãha-gá núú nchaa ñáyiú xínucóo ní càndéé dññi-gá-á<sup>n</sup>, te ní xáhá<sup>n</sup>-gã xii-yu:

—Nchaa ñáyiú-a cùú-yu dàtná nãná-í ndìhi dàtná cue ñaní-í. <sup>35</sup> Chi nchaa ñáyiú quide nacuaá càhá<sup>n</sup> Yã Ndiòxí, ñáyiú-á<sup>n</sup> cúú-yu dàtná cue ñaní-í, ndìhi dàtná cue cúha-í, ndìhi dàtná nãná-í —càchí-gã xãha<sup>n</sup>-gã xii-yu.

### Nàcuáa quide téé cuángacá<sup>n</sup> tríú

(Mt. 13:1-9; Lc. 8:4-8)

**4** Te Jèsús ní ngüíta-gá dácuaáha tucu-gá ñáyiú yuhu làgúná. Te cuèhé víhí-yu ní tacá xía<sup>n</sup> nñu cuásaá-gá núú ìí<sup>n</sup> bàrcú nùtnñi xití ndute làgúná-á<sup>n</sup>, te núú xíã<sup>n</sup> ní ngóo-gá te ní ngüíta-gá dánèhé ñáhá-gã xii-yu, te nchaa-yu xíxucu-yu yuhu làgúná-á<sup>n</sup>. <sup>2</sup> Te ní ngüíta-gá ní caní-gá titní cuendú núú-yu nàcuáa tecú tñùní-yu tñúhu-gá, te xãha<sup>n</sup>-gã xii-yu:

<sup>3</sup> —Chí cùndédóho váha ìí<sup>n</sup> cuendú ná càni-í-a. Ìí<sup>n</sup> téé cuángacá<sup>n</sup>-dé tríú. <sup>4</sup> Te òré ní ngüíta-dé dängoyo-dé tríú-á<sup>n</sup>, te dava ní quene ndava ní ngava ndéé ichi, te ní xíní cue tñláá te ní nadatàcá-güedé.

<sup>5</sup> Te dava ní ngava ñuhu yadi nñú yíhí víhi yúú, te ndìhi-ni ní xínu-xi cuendá sá ñà túú càvili ñuhu. <sup>6</sup> Dico òré ní nayehé ñá túú ní cùndee iní-xi chi ní yíchí-xi, chi ñá túú ní níhí quíhí<sup>n</sup> cùnó yóho-xi.

<sup>7</sup> Te dava ní ngava núú yúcu ndíquí<sup>n</sup> tnu ìñu, te ìí<sup>n</sup> nuu-ni ñí xínu-xi ndìhi tnu ìñu, te tnu ìñu-á<sup>n</sup> ñí sahnu-xi te ní dánáá-xí nchaa tríú sá ñí xínu-á<sup>n</sup>. <sup>8</sup> Dico dava tríú-á<sup>n</sup> ñí ngava-xi núú ndécú ñuhu coco<sup>n</sup>, te xíã<sup>n</sup> ní xínu-xi te ní sahnu-xi te ío váha ní cuu, chi núú ìí<sup>n</sup>-ní tríú-á<sup>n</sup> te dava yoco-xi ní nguíhí ócó úxí tríú-xi, te dava yoco-xi ní nguíhí únídico tríú-xi, te dava yoco-xi ní nguíhí ìí<sup>n</sup> ciendú tríú-xi —càchí-gã xãha<sup>n</sup>-gã xii-yu.

<sup>9</sup> Te xãha<sup>n</sup> tucu-gá xii-yu:

—Nchaa nchòhó ñáyiú ní xíndédóho nchaa tñúhu ní cáhá<sup>n</sup>-í-a, te ío váha chí cuáha cuendá —càchí-gã xãha<sup>n</sup>-gã xii-yu.

### Jèsús càhá<sup>n</sup>-gá ná cuendá duca<sup>n</sup> càni-gá cuendú

(Mt. 13:10-17; Lc. 8:9-10)

<sup>10</sup> Te sátá ñí ndaca ñáyiú-á<sup>n</sup> te ní quendóo mee-nã Jèsús ndìhi cue téé xíca cuu ndìhi-gá, ndìhi ìí<sup>n</sup> úú-nã

ñáiyu. Te ñáiyu-á<sup>n</sup> ndihi cue téé-á<sup>n</sup> ní xicá<sup>n</sup> tnúhŭ-yu ndihi-güedé núú-gá, núu nása quèe-xi cuendú ní cani-gá núú-yu ndihi-güedé. <sup>11</sup> Te ní xáha<sup>n</sup>-gá:

—Nchòhó chi sa càchí tnúhu Yá Ndiòxí xii-ndo ì<sup>n</sup> sá vátá quini-gá-ndó, chi càchí tnúhu-gá nàcuáa cada-gá ndíhu ndaha-gá ñáiyu, dico dava-gá ñáiyu cani-í mee-ni cuendú núú-yu. <sup>12</sup> Chi cuéi na quini-yu nchaa nàcuáa cuu duca ni vǎ cútñuní iní-yu ná cuendá duca<sup>n</sup> cùu, àdi cuéi na cùndedóho-yu dico ni vǎ tècú tnùnì-yu. Te duca<sup>n</sup> ndòhó-yu cuendá sá vǎ quindáá iní-yu Yá Ndiòxí, ndihi cuendá sá vǎ cǎdá cǎhnu iní-gá nchaa yícá cuèchi-yu —càchí-gá xáha<sup>n</sup>-gǎ xií-yu ndihi-güedé.

**Jèsús càhá<sup>n</sup>-gá nàcuáa quèe-xi  
cuendá téé cuángacá<sup>n</sup> trùu**

(Mt. 13:18-23; Lc. 8:11-15)

<sup>13</sup> Te ní xáha<sup>n</sup> tùcu Jesús xii cue téé xica cuu ndihi-gá, ndihi cue ñáiyu-á<sup>n</sup>:

—Nchòhó, ñá túú ní tècú tnùnì-ndó cuendú ní cani-í núú-ndó, te núu duca<sup>n</sup>, ¿te nása tecú tnùnì-ndó dǎva-gá cuendú cani-í núú-ndó-í? Te na càchí tnúhu-í xii-ndo nàcuáa quèe-xi cuendú ní cani-í núú-ndó. <sup>14</sup> Te téé cuángacá<sup>n</sup> trùu-á<sup>n</sup> cúú-dě dàtná ì<sup>n</sup> téé cuáhá<sup>n</sup> càhá<sup>n</sup> tnúhu Yá Ndiòxí núú ñáiyu. <sup>15</sup> Te trùu-á<sup>n</sup> cúú-xí dàtná tnúhu Yá Ndiòxí, te trùu sá ní quene ndava ní ngava ndéé ichi, xǎ<sup>n</sup> cúú-xí dàtná ñáiyu ní tnahá iní-xi tnúhu Yá Ndiòxí, dico sácufhná cuáhá<sup>n</sup>-xi xòcani-xi tnúhu-gá iní-yu cuendá sá vǎ cǎnchícú<sup>n</sup> nihnú-yu nàcuáa càhá<sup>n</sup> tnúhu-á<sup>n</sup>. <sup>16</sup> Te trùu sá ní ngava ñuhu yadi núú yíhí vihi yúú, xǎ<sup>n</sup> cúú-xí dàtná ñáiyu ní xíndedóho tnúhu Yá Ndiòxí te díí iní ní tñíí-yu tnúhu-gá. <sup>17</sup> Dico òré ná ngüita ñáiyu cúcuèhé ñáhǎ-yu xií-yu àdi nándi-gá sá yǎha-yu sá cuendá tnúhu-gá, te ñá cùndèe iní-yu chi dàñá-yu tnúhu-gá cuendá sá ñá túú nhíí ndéé-yu. <sup>18</sup> Te trùu sá ní ngava

núú yúú ndíquí<sup>n</sup> tnu ì<sup>n</sup>hu xǎ<sup>n</sup> cúú-xí dàtná ñáiyu ní tecú dóho-xi tnúhu Yá Ndiòxí, <sup>19</sup> dico cuèé cuèé ní nacuaaá-yu tnúhu-gá, chi cuendá mee-ni sǎ cúú-xí mèe-yu ñuhu iní-yu, ndihi cuendá sá ìo sàni iní-yu cuu cuicá-yu, ndihi cuendá sá ìo cùdíí iní-yu nchaa sá ìo ñuyú-a, te ñá túú ñuhu iní-yu tnúhu sá ní xíndedóho-yu-á<sup>n</sup> nàcuáa cada váha-yu cundecú-yu. <sup>20</sup> Dico trùu sá ní ngava núú ndécú ñuhu coco<sup>n</sup>, xǎ<sup>n</sup> cúú-xí dàtná ñáiyu ní xíndedóho tnúhu Yá Ndiòxí te quidé-yu nchaa nàcuáa càhá<sup>n</sup> tnúhu-á<sup>n</sup>. Te cada iní-ndó sǎ ñáiyu-á<sup>n</sup> cúú-yu dàtná trùu sá ní nguíhi yoco-xi ócò úxí trùu-xi, ndihi trùu sá ní nguíhi yoco-xi únídico trùu-xi, ndihi trùu sá ní nguíhi yoco-xi ì<sup>n</sup> ciendú trùu-xi. Te duca<sup>n</sup> sǎtnahá-xi cùu-yu chi ìo váha quidé-yu —càchí-gá xáha<sup>n</sup>-gǎ xii cue téé xica cuu ndihi-gá ndihi cue ñáiyu-á<sup>n</sup>.

**Cuendá iti**

(Lc. 8:16-18)

<sup>21</sup> Te xáha<sup>n</sup>-gǎ xii nchaa ñáiyu:

—Ñá túú nì ì<sup>n</sup> ñáiyu tēñuhú iti te chiváha-yu ì<sup>n</sup> xitǎ quídí, àdi chiváha-yu ì<sup>n</sup> caha cǎmá, chi tàxi ndecú-yu ì<sup>n</sup> núú dùcú<sup>n</sup> cuendá cutnùnì núú nchaa ñáiyu. <sup>22</sup> Te nì ì<sup>n</sup> tnúhu sá ñǎ tècú tnùnì ñáiyu vitna cachí-ó sǎ vǎ tècú tnùnì-yu chi dacuitǎí sǎ tècú tnùnì-yu, te nì ì<sup>n</sup> tnúhu sá càchí-ó cùu yuhu vitna vǎ cúú yùhu chi dacuitǎí sǎ quèé tǔu-xi núú ñáiyu. <sup>23</sup> Te nchòhó cue ñáiyu ní xíndedóho nchaa tnúhu ní cǎhá<sup>n</sup>-í-a, te ìo váha chí ná cuáha cuendá —càchí-gá xáha<sup>n</sup>-gǎ xií-yu.

<sup>24</sup> Te ní xáha<sup>n</sup> tùcu-gá:

—Ío váha chí cùndedóho tnúhu na càhá<sup>n</sup>-í-a. Te nàcuáa-ni quide-ndo danehé-ndó ñáiyu tnúhu Yá Ndiòxí, te diu-ni duca<sup>n</sup> càda ñaha-gá xii-ndo, te uu<sup>n</sup>-gá duca<sup>n</sup> càda-gá sá cúú-xí-ndó. <sup>25</sup> Te nchaa nchòhó ñáiyu tècú tnùnì tnúhu Yá Ndiòxí, uu<sup>n</sup>-gá cuita tecú

tnùní-ndó tnũhu-gá quíhí<sup>n</sup>. Te nchaa nchòhó ñáyiú ñá túú tècú tnùnì tnúhu-gá, te uu<sup>n</sup>-gá vá tècú tnùnì-ndó —càchí-gá xǎha<sup>n</sup>-gǎ xíi-yu.

### Nàcuáa sàhnu triú

<sup>26</sup> Te Jèsús xǎha<sup>n</sup> tùcu-gá:

—Na càni-í ì<sup>n</sup> cuèndú núú-ndó cuèndá tecú tnùnì-ndó nàcuáa cada-xi òré ndíhu ndaha ñaha Yá Ndiòxí xii ñáyiú. Ì<sup>n</sup> téé cuángacá<sup>n</sup>-dé triú. <sup>27-28</sup> Te sáta ní yáha ní sacá<sup>n</sup>-dé triú-á<sup>n</sup>, te cuánuhú-dé vehe-dé ndétátú-dé. Te duca<sup>n</sup>-ni ta xica nduu cuáhá<sup>n</sup> te ní xínu triú-á<sup>n</sup>, te nàcuáa ta sàhnu-xi cuáhá<sup>n</sup> te ta quèè ndaha-xi, te duca<sup>n</sup>-ni cùu ní sáá nduu ní quene yoco-xi te ní nguíhi triú-xi, dico téé ní sacá<sup>n</sup> triú-á<sup>n</sup> ñà túú xìnì-dé nása ní sahnu-xi, chi mee ñũhu ní quide-xi ní sahnu triú-á<sup>n</sup>. <sup>29</sup> Te òré sa ní ndíhi ní cuaa<sup>n</sup> te ní nguíta téé ní sacá<sup>n</sup>-á<sup>n</sup> náquèhndé-dé nátàxi tnahá-dé —càchí-gá xǎha<sup>n</sup>-gǎ xíi-yu.

### Cuèndá ndíquí<sup>n</sup> yutnu nàni mostázá

(Mt. 13:31-32; Lc. 13:18-19)

<sup>30</sup> Te xǎha<sup>n</sup> tùcu Jesús xíi-yu:

—Na càni tucu-í ingá cuèndú núú-ndó cuèndá tecú tnùnì-ndó nàcuáa cada-xi òré ndíhu ndaha ñaha Yá Ndiòxí xii ñáyiú. <sup>31</sup> Ì<sup>n</sup> yutnu nàni mostázá cúú-xí ì<sup>n</sup> yutnu sá líhli víhi-gá ndíquí<sup>n</sup>-xi dàcúúxí ndíquí<sup>n</sup> nchaa cúhú, <sup>32</sup> dico òré ná càcá<sup>n</sup>-güedé núú ñũhú-güedé, te na xínu-xi te sàhnu-gá-xi dàcúúxí nchàa cúhú, te nchaa dité-xi ío cùu cahnu-xi, te ndéé cue quitì ndàva núú tàchí sácòo-güedi nchaa núú dité-xi xínu ndeti-güedi —cachí-gá xǎha<sup>n</sup>-gǎ xíi-yu.

### Ío títní cuèndú ní cani

#### Jèsús núú ñáyiú

(Mt. 13:34-35)

<sup>33</sup> Te ío-gá vai cuèndú ní cani Jèsús núú ñáyiú cuèndá tecú tnùnì-yu tnúhu Yá Ndiòxí, dico dava cuèndú ñá túú

ní càni-gá núú-yu, chi ní cutnùnì iní-gá sá vǎ tècú tnùnì-yu nchaa. <sup>34</sup> Te mee-ni cuèndú ní cani Jèsús núú ñáyiú ndi tnahá òré ní dánèhé ñáhá-gǎ xíi-yu tnúhu-gá. Te òré ndécú mèe Jesús ndíhi cue téé xica cuu ndíhi-gá, te ní xáha<sup>n</sup>-gǎ xii-güedé nàcuáa quèè-xi ì<sup>n</sup> ì<sup>n</sup> cuèndú ní cani-gá núú ñáyiú.

### Jèsús ngání-gǎ táchí ndíhi ndute làgúná

(Mt. 8:23-27; Lc. 8:22-25)

<sup>35</sup> Te diu-ni nduu-ǎ<sup>n</sup> òré sa ta cùndiquí<sup>n</sup> cuáhá<sup>n</sup> ní xáha<sup>n</sup> Jèsús xii cue téé xica cuu ndíhi-gá:

—Chí ná quíhí<sup>n</sup>-ó ndàa ingá xio yuhu làgúná —càchí-gá xǎha<sup>n</sup>-gǎ xii-güedé.

<sup>36</sup> Te ní quide ndee iní-gá nchaa ñáyiú xixúcu-á<sup>n</sup>, te diu-ni bàrcú sá ñũhú-gǎ òré ní dánèhé-gá ñáyiú tnúhu-gá diu-ni xǎ<sup>n</sup> ní dácacá cue téé xica cuu ndíhi-gá ndécá ñaha-güedé xii-gá cuáhá<sup>n</sup>, te tnahá ì<sup>n</sup> úú-gá bàrcú ní xica-xi nchìcú<sup>n</sup>-xi bàrcú ñũhú-gǎ-á<sup>n</sup> cuáhá<sup>n</sup>. <sup>37</sup> Te ñũhu bàrcú ñũhú-gǎ-á<sup>n</sup> ichi cuáhá<sup>n</sup>-xi núú ndute, te ní quexio ì<sup>n</sup> táchí níhi, te ta nàdachitú-xi ndute xití bàrcú-á<sup>n</sup> cuáhá<sup>n</sup>, te sa cuiní-nǎ-xi quèè naa bàrcú-á<sup>n</sup> xití ndute ní cùu. <sup>38</sup> Te Jèsús cáá-gǎ xidí-gá ì<sup>n</sup> xichi ndàa sáta bàrcú-á<sup>n</sup>, te yinchíhi ì<sup>n</sup> dóó dǐquí-gǎ. Te sá dúcá<sup>n</sup> cuiní-xi quèè naa bàrcú-á<sup>n</sup> nũu ní sáhá<sup>n</sup>-güedé ní ndocani ñaha-güedé xii-gá, te xǎha<sup>n</sup>-güedé:

—¡Mèstrú, ndíquíú iní! ¿Náa ñá túú ndíhú iní-n sǎ tá quèè naa-o cuáhá<sup>n</sup>-ǎ<sup>n</sup>? —càchí-güedé xǎha<sup>n</sup>-güedé xii-gá.

<sup>39</sup> Te Jèsús ní ndíquíú iní-gá te ní ndacóo-gá, te ní tenàá-gá táchí-ǎ<sup>n</sup>, te ní xáha<sup>n</sup>-gǎ xii ndute làgúná:

—¡Tnavíí-nǎ cuhu<sup>n</sup>, chi ío dusa<sup>n</sup>! —càchí-gá xǎha<sup>n</sup>-gǎ xii ndute-á<sup>n</sup>.

Te òré-ni ní nguííí táchí-ǎ<sup>n</sup> te ní nucúndecu nahi-nǎ ndute làgúná-á<sup>n</sup>.

<sup>40</sup> Te Jèsús ní xáha<sup>n</sup>-gǎ xii-güedé:

—¿Ná cuendá ndéé dúcá<sup>n</sup> yùhú-ndó-í? ¿Náa ñá túú sàndáá iní ñáhá ndísa-ndo xii-í-á<sup>n</sup>? —càchí-gá xàha<sup>n</sup>-gá xii-güedé.

<sup>41</sup> Dico mee-güedě chi ío ní yùhú-güedé sá duca<sup>n</sup> nĩ quide-gá ní xiní-güedé, te ní xítñaha-güedé:

—¿Te ná téé cùu téé-a núu ní cáhá<sup>n</sup>-ni-dé, te ní ngüñí táchí te ní nucúndecu nahi ndùte lagúná-a-í? —càchí-güedé xítñaha-güedé.

**Í<sup>n</sup> téé yìhi ñaha espíritú cùndìhi yucu ñávàha**

(Mt. 8:28-34; Lc. 8:26-39)

**5** Te ní sáá Jèsús ndihi cue téé xìca cuu ndihi-gá ndàa ingá xio yuhu làgúná yucu cue téé ñúú Gàdará. <sup>2</sup> Te òré ní quene-gá xití bàrcú te í<sup>n</sup> téé yìhi ñaha espíritú cùndìhi yucu ñávàha ní quee-dé núú yíndüxi ndíyí cuáhá<sup>n</sup>-dé núú-gá. <sup>3</sup> Te mee-ni nùú yíndüxi ndíyí-á<sup>n</sup> quidé vèhe-dé, te cuèi dácutu ñaha-güedé cadená xii-dé dico ñá túú tnàhí ndàcu-güedé núú-dě. <sup>4</sup> Te ío titní xito ní dácútú-güedě cadená sáhá-dě ndihi ndaha-dé dico ní dándává-ni-dě, te ní xóo dacàchi-gá-dé nchaa cadená-á<sup>n</sup>, te ñá túú tnàhí ni ndàcu-güedé núú-dě. <sup>5</sup> Te cuèi nduu cuèi niú ní xóo cana saa-dé, te váha-ni núu xití yucu ndècu-dé àdi núú yíndüxi ndíyí dico càna saa nahi-ni-dé, te ío ní xóo dànícüehé-dé méé-dě ndihi yúú. <sup>6</sup> Te òré ní xiní-dé Jèsús te xinu-dé ní sáhá<sup>n</sup> núú-gá, te ní ngüñí xití-dě, <sup>7</sup> te espíritú yíhí ñaha xii-dé-á<sup>n</sup> nĩ quide-xi níhi ní cáhá<sup>n</sup>-dé, te xàha<sup>n</sup>-dě xii-gá:

—¿Ná cuendá véxi yòhó Jèsús Déhe Dútú Ndióxi sàdí-n ìchi-í? Te càhá<sup>n</sup> ndàhú-í núú Ndióxi yuhu nùú-n sá vǎ dándòho ñaha-n xii-í —càchí-dé xàha<sup>n</sup>-dě xii-gá.

<sup>8</sup> Te duca<sup>n</sup> nĩ cáhá<sup>n</sup>-dé cuendá sá Jèsús ní xàha<sup>n</sup>-gá xii espíritú cùndìhi yucu ñávàha yìhi ñaha xii-dé-á<sup>n</sup> sǎ quéé ñaha-xi xii-dé.

<sup>9</sup> Te Jèsús ní xicá<sup>n</sup> tnùhú-gǎ núú-dě, te xàha<sup>n</sup>-gǎ:

—¿Nása nàni-n-í? —cachí-gá xàha<sup>n</sup>-gǎ xii-dé.

Te ní xàha<sup>n</sup>-dě:

—Vài Sandadú, duha nàni-í chi ío cuéhé-ndí —càchí-dé xàha<sup>n</sup>-dě xii-gá.

<sup>10</sup> Te cue espíritú cùndìhi yucu ñávàha-á<sup>n</sup> ní cáhá<sup>n</sup> ndàhú-xi núú Jèsús sá vǎ téndàha ñaha-gá xii-xi quíhí<sup>n</sup>-xi ingá xichi. <sup>11</sup> Te ñiu-ni yatni yucu núú ndécú Jèsús-á<sup>n</sup> yíhí vǎi cuchí xixexi-güedi. <sup>12</sup> Te nchaa cue espíritú-á<sup>n</sup> ní cáhá<sup>n</sup> ndàhú-xi núú-gǎ, te xàha<sup>n</sup>-xi xii-gá:

—Càhá<sup>n</sup> ndàhú-ndí núú-n sǎ dáñá-n quíhu-ndí yiqui cùñú nchaa cùchí-á<sup>n</sup> —càchí-xi xàha<sup>n</sup>-xi xii-gá.

<sup>13</sup> Te Jèsús ní xàha<sup>n</sup>-gǎ sá cúú quíhu-xi yiqui cùñú-güedi, te xínu dàtná úú mǐl-güedi yìhi yucu-á<sup>n</sup>. Te nchaa espíritú cùndìhi yucu ñávàha yìhi ñaha xii téé-á<sup>n</sup> nĩ quee ñaha-xi xii-dé, te cuánguíhu-xi yiqui cùñú nchaa cùchí-á<sup>n</sup>, te nchaa-güedi ní xinu-güedi duha ní quee-güedi ndàa núú dèhvǎ yuhu làgúná-á<sup>n</sup>, te ní ngaunihnu-güedi xití ndute te ní ndihi-güedi ní cáhá.

<sup>14</sup> Te òré ní xiní cue téé xitò cuchí-á<sup>n</sup> nàcuáa ní cuu te ní xinu-güedé, te ní sáhá<sup>n</sup>-güedé ní cani-güedé cuendú núú cuè ñáyiú ndècu xití ñúú, ndihi núú cuè ñáyiú ndècu xití yucu. Te nchaa ñáyiú ní níhí tnùhu ní xicá-yu cuáhá<sup>n</sup> ndéhě-yu nàcuáa ní cuu. <sup>15</sup> Te òré ní quexió-yu núú ndécú Jèsús te ní xiní-yu téé ní xíhi ñaha cuè espíritú cùndìhi yucu ñávàha-á<sup>n</sup> núcòo-dé núú sàhá Jèsús, te nihnu-ná-dé dóó-dě te núcòo-ná-dé dàtná í<sup>n</sup> ñáyiú váha, te ní yùhú-yu òré ní xiní ñáhǎ-yu xii-dé. <sup>16</sup> Te nchaa ñáyiú ní xiní nàcuáa ní cuu ní ndúha téé yìhi ñaha cue espíritú cùndìhi yucu ñávàha-á<sup>n</sup> ní cùu ní caní-yu cuendú núú nchàa ñáyiú ní quexio-á<sup>n</sup> nàcuáa ní cuu ní ndúha téé-á<sup>n</sup> ndihi nàcuáa ní cuu cuendá nchaa

cùchí-á<sup>n</sup>. <sup>17</sup>Te sá dúcá<sup>n</sup> ní níhí ñáyiú-á<sup>n</sup> tnúhu nàcuáa ní cuu núu nchaá-yu ní ngúíta-yu càhá<sup>n</sup> ndàhú-yu núú Jèsús sá ná quèe-gá yucu ñuú-yu núhú-gá.

<sup>18</sup>Te ní xica-gá cuáhá<sup>n</sup>-gá núú ndécú bàrcú, te òré ndée-gá bàrcú-á<sup>n</sup> nùhú-gá ní ngúíta tée ní xíhí ñaha cuè espíritú cùndìhí yucu ñávàha-á<sup>n</sup> càhá<sup>n</sup> ndàhú-dé núú-gá nùu vá cùndèe iní-gá qufhí<sup>n</sup> ndihí ñaha-gá xii-dé. <sup>19</sup>Dico ñá túú ní sàha-gá tnúhu qufhí<sup>n</sup> ndihí ñaha-gá xii-dé, te ní xàha<sup>n</sup>-gá xii-dé:

—Cuanùhú vehe-n, te cani-n cuèndú núú cuè ñáyiú sá Yà Ndiòxí ní cundàhú iní ñáhá-gá xii-n, te ío càhnu cuu ncha sá vaha ní quide-gá sá cúú-xí-n — càchí-gá xàha<sup>n</sup>-gá xii-dé.

<sup>20</sup>Te tée-á<sup>n</sup> ní xica-dé cuánuhú-dé, te ní sáhá<sup>n</sup>-dé ndi ùxí ñuú nání Dècápolís, te ní cani-dé cuèndú núú nchàa ñáyiú sá ío càhnu cuu ncha sá vaha ní quide ñaha Jèsús xii-dé, te nchaá-yu ío ní cuñuhu-yu.

**Cuèndá déhe yoco té Jàirú  
ndihí cuèndá ì<sup>n</sup> ñadìhí  
ní tnándeé dóó Jèsús**

(Mt. 9:18-26; Lc. 8:40-56)

<sup>21</sup>Te Jèsús cuánde-gá bàrcú, te ní natehdé-gá ndàa íngá xio yuhu làgúná, te ío vài ñáyiú ní tacá núú ní quexìo-gá-á<sup>n</sup>, te xíá<sup>n</sup> ndécú-gá <sup>22</sup>ní quexìo ì<sup>n</sup> tée tàxi tnuú veñúhu núú-gá, te tée-á<sup>n</sup> nání-dě Jàirú, te ní ngúíñí xítí-dě núú-gá. <sup>23</sup>Te ní ngúíta-dé càhá<sup>n</sup> ndàhú-dé núú-gá, te xàha<sup>n</sup>-dě xii-gá:

—Ío càhú tnhá déhe yoco-í cùhú-xi, te ndècu-ná-xi sá cúú-xi, te véxi-í càhá<sup>n</sup> ndàhú-í núú-n nùu vá cùndèe iní-n qufhí<sup>n</sup>-ó vèhe-í tendaha-n-xi cuèndá ndúha-xi, te cundecu-xi —càchí-dé xàha<sup>n</sup>-dě xii-gá.

<sup>24</sup>Te Jèsús ní xica-gá cuáhá<sup>n</sup>-gá ndihí tée-á<sup>n</sup>, te ío vài ñáyiú nchicú<sup>n</sup> ñáhá xii-gá cuáhá<sup>n</sup>, te dàdehnde ñaha-ná-yu xii-gá ní cùu. <sup>25</sup>Te tnuú ncha ñáyiú-á<sup>n</sup>

ñútnàhá ì<sup>n</sup> ñaha cùhú, te ñaha-á<sup>n</sup> sa ní cuu úxúú cuíá sá cùhú-a<sup>n</sup> ngòyo ñaha níñí xii-a<sup>n</sup>. <sup>26</sup>Te ío ta ndòho-a<sup>n</sup> véxi, te ío cuéhé ñátátná ní cuu ta quide tátna ñaha xii-a<sup>n</sup>, te sa ní ndihí ncha sá ndécú ndihí-a<sup>n</sup> ní nadico-a<sup>n</sup> cuèndá ní níhí-a<sup>n</sup> díhú<sup>n</sup> ní quehe<sup>n</sup> ncha ñáyiú ní quide tátna ñaha xii-a<sup>n</sup> dico ní ì<sup>n</sup>-yu ñá túú ní ndàcú-yu ndúha-a<sup>n</sup>, chí da uu<sup>n</sup>-gá tá cùu cahú-a<sup>n</sup> cuáhá<sup>n</sup>. <sup>27</sup>Te òré ní níhí-a<sup>n</sup> tnúhu cuèndá Jèsús, te ní xica-a<sup>n</sup> cuáhá<sup>n</sup>-a<sup>n</sup> núú ndécú-gá. Te òré ní quexìo-a<sup>n</sup> núú ndécú-gá te ní sáhá<sup>n</sup> ndehe yatni-a<sup>n</sup> ndàa sátá-gá ní tnándeé-a<sup>n</sup> dóó-gá. <sup>28</sup>Te duca<sup>n</sup> ní quide-a<sup>n</sup> chí ní sani iní-a<sup>n</sup> sá nùu ndacu-a<sup>n</sup> tnándeé-a<sup>n</sup> cuèdicó luha yuhu dóó Jèsús te ndúha-a<sup>n</sup> ní sani iní-a<sup>n</sup>. <sup>29</sup>Te òré duca<sup>n</sup> ní quide-a<sup>n</sup> te ñá túú-gá ní ngòyo ñaha-gá níñí xii-a<sup>n</sup>, te òré-á<sup>n</sup> ní cutnùní iní-a<sup>n</sup> sá ní ndúha-a<sup>n</sup> cuéhé tnhá-a<sup>n</sup>. <sup>30</sup>Te Jèsús ní cutnùní iní-gá sá ì<sup>n</sup> ñáyiú ní ndúha sá cuèndá-gá, núu ní nchócótó-gá ndàa sátá-gá te ní xicá<sup>n</sup> tnúhú-gá núú nchàa ñáyiú nchicú<sup>n</sup> ñáhá xii-gá, te xàha<sup>n</sup>-gá xii-yu:

—¿Ndèdacàa-ndo ní tnándeé ñáhá xii-í? —càchí-gá xàha<sup>n</sup>-gá xii-yu.

<sup>31</sup>Te cue tée xica cuu ndihí-gá ní xàha<sup>n</sup>-güedě xii-gá:

—Mèstrú, ndèhe-n sá vái ñáyiú nchicú<sup>n</sup> ñáhá xii-n, te texio texio dàdehnde ñahá-yu xii-n te xicá<sup>n</sup> tnúhú-gá-n yòo ní tnándeé ñáhá xii-n —càchí-güedé xàha<sup>n</sup>-güedě xii-gá.

<sup>32</sup>Te Jèsús ní xíndéhé vaha-gá xio xio dñi-gá nùu ndèdacàa ñáyiú ní tnándeé ñáhá xii-gá. <sup>33</sup>Te sá dúcá<sup>n</sup> ní cutnùní iní ñadìhí-á<sup>n</sup> nàcuáa ní cuu, núu yùhú yùhú-a<sup>n</sup> ní sáhá<sup>n</sup>-a<sup>n</sup> ní ngúíñí xítí-á<sup>n</sup> nùú Jèsús, te ní xàha<sup>n</sup> ndáa-a<sup>n</sup> xii-gá nàcuáa ndùu cuèndá-a<sup>n</sup>. <sup>34</sup>Te Jèsús ní xàha<sup>n</sup>-gá xii-a<sup>n</sup>:

—Yòhó ñaha cùhú ní cùu, ní sándáá iní ñáhá-n xii-í, núu ní ndúha-n, te vitna cuanùhú te vá ndihú-gá iní-n, chí vá

dúca<sup>n</sup>-gã ndoho-n —càchí-gã xãha<sup>n</sup>-gã xii-a<sup>n</sup>.

<sup>35</sup>Te cãhá<sup>n</sup> dúca<sup>n</sup>-ní Jèsús ní sáá cue téé xinu cuechi vehe té Jàirú téé tàxi tnuní veñúhu-á<sup>n</sup>, te xãha<sup>n</sup>-güedë xii-dé:

—Sa ní xíhí déhe-n, vá chíchiu<sup>n</sup>-gá-n Mèstrú —càchí-güedë xãha<sup>n</sup>-güedë xii-dé.

<sup>36</sup>Dico Jèsús ñá túú ní quide cuendá-gá nàcuáa ndùu tnúhu ní cãhá<sup>n</sup> cue téé-á<sup>n</sup>, te ní xãha<sup>n</sup>-gã xii téé tàxi tnuní veñúhu-á<sup>n</sup>:

—Ñá túú ñá cani iní-n, quindáá iní ñáhá-ní-n xii-í —càchí-gã xãha<sup>n</sup>-gã xii-dé.

<sup>37</sup>Te Jèsús vá yõo-gá ní cuini-gá can-chicú<sup>n</sup> ñáhá xii-gá quíhí<sup>n</sup>, chi té Pèlú-ni, ndihi té Jàcobó-ni, ndihi ñani-ni-dé té Juáá cuáhá<sup>n</sup> ndihi ñaha-gã xii-güedë.

<sup>38</sup>Te òré ní quexio-gá ndihi-güedë vehe téé tàxi tnuní veñúhu-á<sup>n</sup>, te ní xiní-gá sá ïo vãi ñáyiu xĩndecu, te súní dùsa<sup>n</sup> quidé-yu te níhi xicáhá<sup>n</sup>-yu te xĩndáhí-yu. <sup>39</sup>Te òré cuánguihu-gá xití vehe, te ní xãha<sup>n</sup>-gã xii-yu:

—¿Ná cuendá ndéé dúca<sup>n</sup> ïo dusa<sup>n</sup> quide-ndo, te ndàhyú-ndó? Te xíchí-a ñá túú ní xíhí-xi chi dícó xidí-xi —càchí-gã xãha<sup>n</sup>-gã xii-yu.

<sup>40</sup>Te ní sácú ndeé ñáhã-yu xii-gá sá dúca<sup>n</sup> ní cãhá<sup>n</sup>-gã, chi sá cúú-xí mèè-yu chi ní xíhí ndisa xíchí-ã<sup>n</sup>. Te òré-á<sup>n</sup> ñí queñuhu-gá nchaá-yu quehé, te cuánguihu-gá núú cándòdo yiqui cuñú xíchí ñí xíhí-á<sup>n</sup>. Te ndèca-gá tãtã xíchí ñí xíhí-á<sup>n</sup> ndihi ñaná-xi cuánguihu, te tnahá cue téé úní ndihi-gã-á<sup>n</sup> cuánguihu ndihi-gã. <sup>41</sup>Te ní tnií-gã ndaha xíchí ñí xíhí-á<sup>n</sup>, te ní xãha<sup>n</sup>-gã:

—Tãlíta, cúmí —càchí-gã xãha<sup>n</sup>-gã.

Te tnúhu-á<sup>n</sup> quée-xí: Yòhó xíchí cuéchí yúhú càchí-í sá ndácòo-n, duha quèe-xi tnúhu-á<sup>n</sup>.

<sup>42</sup>Te òré-ni-á<sup>n</sup> ñí ndoto xíchí cuéchí-ã<sup>n</sup> ñí ndacóo-xi ní nacaca cuu-xi, te ndècu-xi úxúú cuíá-xi. Te ïo ní cuñúhu

nchaa ñáyiu sá dúca<sup>n</sup> ñí dándótó ñaha Jèsús xii-xi. <sup>43</sup>Te Jèsús ní cãhá<sup>n</sup> víhí-gã dóho tãtã-xi ndihi ñaná-xi sá vã yõo ïí<sup>n</sup> cuñáhá-yu sá ñí dándótó ñaha-gã xii-xi. Te sáta dúca<sup>n</sup> te ní xãha<sup>n</sup>-gã xii-yu sá cuñáhá-yu xii-xi sá cáxi-xí.

### Jèsús ndécú-gã ñuú Nazàrèt

(Mt. 13:53-58; Lc. 4:16-30)

**6** Te Jèsús ní ndee-gã ñuú núú ñí dándótó-gã xíchí ñí xíhí-á<sup>n</sup>, te cuánuhú-gá núú cúú ñuú-gã, te tnahá cue téé xica cuu ndihi-gã cuánuhú ndihi-gã. <sup>2</sup>Te ndècu Jèsús ñuú-gã ní tnahá nduu ndetátú ñáyiu. Te nduu-ã<sup>n</sup> cuánguihu-gá xití veñúhu dàcuaha ñaha-gã xii-yu. Te vãi ñáyiu ndèdóho nchaa tnúhu cãhá<sup>n</sup>-gã, te xicuñúhu víhí-yu, te xĩtnáhá-yu:

—¿Ndeé ní sáhá<sup>n</sup> dácuahá tõe-a núu ndéé duha váha cãhá<sup>n</sup>-dé, nása ní quide-dé ñuu ndéé duha ío váha cùtnuní iní-dé, te ndàcu-dé quidé-dë nchaa sá vã yõo tnahí ndàcu cada-i? <sup>3</sup>Te dícó carpinterù cúú-dë, dícó déhe tá Màriá cúú-dë, te ñani-dé cúú tã Jàcobó, ndihi té Chèé, ndihi té Jüdás, ndihi té Xímú, te diu-ni cue cúha-dé cúú ñáyiu ndècu ndihi-o ñuú-a —càchí-yu xĩtnáhá-yu.

Te ñá túú ní cuini-gã-yu cãhá<sup>n</sup> ndihi váha ñáhá-yu xii-gã. <sup>4</sup>Te Jèsús ní xãha<sup>n</sup>-gã xii-yu:

—Te núu ïí<sup>n</sup> téé cãhá<sup>n</sup> tnúhu Yá Ndióxi ná nàsáá-dé ñuú-dé dacuahá-dé ñáyiu tnúhu-gã, te nchaa ñáyiu ñuú-dé-á<sup>n</sup>, ndihi nchaa ñáyiu ndècu ndihi-dé vehe-dé, ndihi nchaa ñáyiu cùu ndi mee-dé ñá túú nèhé-yu sá yíñúhu núú-dë, dico cue ñáyiu nchaa dava-gã ñuú chi nèhé-yu sá yíñúhu núú-dë —càchí-gã xãha<sup>n</sup>-gã xii-yu.

<sup>5</sup>Te ñá túú ní quide tátna Jèsús vãi ñáyiu cuendá sá ñà túú ní sàndáá iní ñáhá-yu xii-gã, dico ní quide tátna-gã ïí<sup>n</sup> úú ñáyiu cùhú ní sàndáá iní ñáhá xii-gã. Te ní tendaha ñaha-ni-gã xii-yu

te ní ndúha-yu. <sup>6</sup>Te ío ní cuñúhu-gá sá dúcá<sup>n</sup> ñà túú ní cuíní-yu quindáá iní ñáhã-yu xii-gá. Te sátá dúcá<sup>n</sup> te ní xica-gá cuáhá<sup>n</sup>-gá nchaa dava-gá ñuú líhli càa yatni xía<sup>n</sup> cuendá dacuàha-gá ñáyiú tnúhu-gá.

**Jèsús táuchìu<sup>n</sup>-gá quíhí<sup>n</sup> cue tée xica cuu ndihi-gá cáhá<sup>n</sup>-güedé tnúhu Yá Ndiöxí núú ñáyiú**

(Mt. 10:5-15; Lc. 9:1-6)

<sup>7</sup>Te Jèsús ní cana-gá ndi ùxúú cue tée xica cuu ndihi-gá, te ní sãnahã-gã xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cündìhi yucu ñávãha yìhi ñaha xii ñáyiú. Te ní xáha<sup>n</sup>-gã xii-güedé sá ndi ndúú ndi ndúú-güedé quíhí<sup>n</sup>-güedé cáhá<sup>n</sup>-güedé tnúhu Yá Ndiöxí núú ñáyiú. <sup>8-9</sup>Te cùmání-gã caca-güedé quíhí<sup>n</sup>-güedé, te ni xáha<sup>n</sup>-gã xii-güedé:

—Vá cánèhe-ndo ñunu cuhu<sup>n</sup> ndachiu<sup>n</sup>-ndo, te ni vã cánèhe-ndo sá cáxí-ndó, te ni vã cánèhe-ndo díhú<sup>n</sup>, chi ìí<sup>n</sup> caa-ni tàtnu canehe-ndo, te chàú yíhí-ní-ndó-ã<sup>n</sup> xía<sup>n</sup>-ni quíhí-ndo, te vã cánèhe-gá-ndó ìngá ichi dóó-ndó chi ñiu-ni dóó níhmu-ndó-ã<sup>n</sup> xía<sup>n</sup> tnàhí-ni cuihnu-ndo te ñã túú tnàhí-gá ná canehe-ndo —càchí-gá xáha<sup>n</sup>-gã xii-güedé.

<sup>10</sup>Te xáha<sup>n</sup> tùcu-gá:

—Te òré ná sàá-ndó ìí<sup>n</sup> ñuú, te ío ñáyiú cáhá<sup>n</sup> ñáhã-yu xii-ndo vèhè-yu, te xía<sup>n</sup>-ni cundecu-ndo ndèé ná sàá nduu ndèe-ndo ñuú-á<sup>n</sup>. <sup>11</sup>Te núú ío dava ñuú ñã túú cuíní-yu cáhá<sup>n</sup> ndihi ñaha vãha-yu xii-ndo, te ni ñà túú cuíní-yu cundedóho-yu tnúhu càhá<sup>n</sup>-ndó, te ndee-ni-ndo ñuú-á<sup>n</sup> te naquidí-ndo tìcáchúhmá ñí tníí sáhã-ndó cuendá ná cùtnuní iní-yu sá ñà túú quide váha-yu. Te na càchí tnúhu ndáá-í xii-ndo sã ná sàá nduu càda ndáá Yã Ndiöxí cuéchi nchaa ñáyiú, te cue ñáyiú duca<sup>n</sup> na càda

ñaha xii-ndo-á<sup>n</sup> ìo-gá ndohó-yu dàvã-á<sup>n</sup> dàcúxí dàtnã ndoho cue ñáyiú ñuú Sòdomá ndihi cue ñáyiú ñuú Gòmorrã —càchí-gá xáha<sup>n</sup>-gã xii-güedé.

<sup>12</sup>Te cue tée-á<sup>n</sup> ñí xica-güedé cuáhã<sup>n</sup>-güedé te ní ngüíta-güedé dacuàha-güedé cue ñáyiú tnúhu Yá Ndiöxí, te xáha<sup>n</sup>-güedé xii-yu:

—Chí dándixi túú iní sá ñà túú quide váha-ndo ndècu-ndo, te daña-ndo nchaa ichi cuehé ichi duha ndècu-ndo. —càchí-güedé xáha<sup>n</sup>-güedé xii-yu.

<sup>13</sup>Te vãi espíritú cündìhi yucu ñávãha yìhi ñaha xii ñáyiú ta queñuhu-güedé yiqui cùñú-yu cuáhã<sup>n</sup>, te vãi tucu ñáyiú cùhú tá quide tátna-güedé cuáhã<sup>n</sup> chíhí ñaha-güedé acití xii-yu te ndúha-yu.

**Nàcuáa ní cuu ní xíhí té Juàá tée dàcuandute ñaha xii ñáyiú**

(Mt. 14:1-12; Lc. 9:7-9)

<sup>14</sup>Te nchaa xichi ní níhí ñáyiú tnúhu nchaa nàcuáa quide Jesús, te tnàhá té Hèrodés tée yìndaha ñaha xii ñáyiú ní níhí-dé tnúhu nchaa nàcuáa quide-gá, te ní cachí-dé:

—Té Juàá tée ní xóo dacuandute ñaha xii ñáyiú ní ndoto núú dàcã<sup>n</sup> ndácú-dé quidé-dé nchaa sá vã yòo tnàhí ndàcu cada —duha ní cachí-dé.

<sup>15</sup>Te dava ñáyiú càchí-yu sá tẽ Èliás tée ní xóo cáhá<sup>n</sup> tnúhu Yá Ndiöxí ndéé sanaha ní nasáá-dé.

Te davã-yu càchí-yu sá cúú-gã dàtnã ìí<sup>n</sup> tée ní xóo cáhá<sup>n</sup> tnúhu Yá Ndiöxí ndéé sanaha. <sup>16</sup>Te té Hèrodés ní níhí-dé tnúhu nchaa nàcuáa càhá<sup>n</sup>-yu, te ní cachí-dé:

—Ñiu té Juàá tée ní táuchíu<sup>n</sup>-í ní xehndé-güedé díquí-xi ní ndoto —càchí-dé.

<sup>17-18</sup>Te duha ní cuu cùtnàhá ní sahni té Hèrodés té Juàá, chi dàvã-á<sup>n</sup> ñí naquehe<sup>n</sup> té Hèrodés-á<sup>n</sup> ìí<sup>n</sup> ñaha nani Herodiás ndécã-dé, te ñaha-á<sup>n</sup> sã ní cándeca ñaha ñàní-dé té Lipé. Te té Juàá ní xáha<sup>n</sup>-dẽ xii té Hèrodés sã ñà túú ní quide váha-dé



sá dúcá<sup>n</sup> nĩ naquehe<sup>n</sup>-dé ñaha ní cán-deca ñaní-dé, núu sá cuendá ñaha-á<sup>n</sup> nĩ táuchíú<sup>n</sup> tẽ Hèrodés ní tñii-güedé té Juàá ní chihi ñaha-güedẽ vecaá, te ní dácútú ñaha-güedé xii-dé, te duca<sup>n</sup> nĩ quide-dé cuendá sá ndécá ñaha-dé xii-a<sup>n</sup>.

<sup>19</sup>Te ñaha nàni Herodiás ndécá tẽ Hèrodés-á<sup>n</sup> ìo ní cuu úhú iní-a<sup>n</sup> té Juàá, te ní cuiní-a<sup>n</sup> cahni-a<sup>n</sup>-dé, dico ñá túú ní ñihí-a<sup>n</sup> nàcuáa cada-a<sup>n</sup>. <sup>20</sup>Te mee tẽ Hèrodés chi ní cutnùní ndáá iní-dé sá tẽ Juàá cúú-dẽ ìi<sup>n</sup> tée quide mee-ni sá vãha, te quide ndáá-dé núú Yã Ndiöxí, te ní xóo yuhú ñáhá-dẽ nõu xíã<sup>n</sup> ñá túú ní dàña-dé ná cada ñaha ñaha ndeca-dé-á<sup>n</sup> xii té Juàá. Te té Hèrodés-á<sup>n</sup> ìo ní cudí ìi iní-dé ní xindedóho-dé nchaa tñuhu ní xáha<sup>n</sup> tẽ Juàá xii-dé, dico ñá túú ní sàni iní-dé duu<sup>n</sup> duu<sup>n</sup> tñii-dé tñuhu-á<sup>n</sup>. <sup>21</sup>Te ìi<sup>n</sup> nduu ní xóo vico vehe té Hèrodés ní quide càhnu-dé nduu nĩ cacu-dé. Te nduu-á<sup>n</sup> nĩ ñihí ñaha nàni Herodiás-á<sup>n</sup> nàcuáa cada-a<sup>n</sup> cuendá cuú té Juàá. Te nduu-á<sup>n</sup> ní cáhá<sup>n</sup> té Hèrodés nchaa cue tée cùchiu<sup>n</sup>, ndihi nchaa cue tée tàxi tñuní ñáhá xii cue sandadú, ndihi nchaa cue tée cuica ndècu distritú Galileá cuendá cudìni ndihi ñaha-dé xii-güedé nduu-á<sup>n</sup>. <sup>22</sup>Te ndècu ìi<sup>n</sup> déhe yoco ñaha nani Herodiás-á<sup>n</sup>, te xíchí-á<sup>n</sup> nĩ quíhu-xi vehe núú cúú vico-á<sup>n</sup> nĩ xita saha-xi mèi oré yíhí tẽ Hèrodés mèsá ndihi nchaa cue tée ní cáhá<sup>n</sup>-dé, te ìo ní cudí ìi iní-dé ndihi nchaa cue tée-á<sup>n</sup> nàcuáa ní xita xíchí-á<sup>n</sup>. Te té Hèrodés ní xáha<sup>n</sup>-dẽ xii-xi:

—Cáca<sup>n</sup> núú-í nõu ná cuiní-n te taxi-í —càchí-dé xáha<sup>n</sup>-dẽ xii-xi.

<sup>23</sup>Te ní cacunehe-dé ndéé Yã Ndiöxí nàcuáa cutnùní iní xíchí-á<sup>n</sup> sã ndáá cuãñaha-dẽ nõu ná cúú sã ná càcá<sup>n</sup>-xi núú-dẽ cuèi ndéé cuádava nchaa sã ndécú ndìhi-dé, te núu na càcá<sup>n</sup>-xi. <sup>24</sup>Te sá dúcá<sup>n</sup> nĩ xáha<sup>n</sup>-dẽ xii-xi núu ní quee-xi quehé ní xáha<sup>n</sup>-xi xii náná-xi:

—Náá, ¿ná cúú sã càcá<sup>n</sup>-í núú tẽ Hèrodés? —càchí-xi xáha<sup>n</sup>-xi xii-a<sup>n</sup>.

Te náná-xi-á<sup>n</sup> nĩ xáha<sup>n</sup>-a<sup>n</sup> xii-xi:

—Cuàhá<sup>n</sup> cáca<sup>n</sup>-n díquí tẽ Juàá tée dàcuandute ñaha xii ñáyiú —càchí-a<sup>n</sup> xáha<sup>n</sup>-a<sup>n</sup>.

<sup>25</sup>Te ndìhi-ni cuándihu xíchí-á<sup>n</sup> xití vehe núú yíhí tẽ Hèrodés-á<sup>n</sup>, te xáha<sup>n</sup>-xi xii-dé:

—Cuiní-í sá mèi nduu vitna quehndé-n díquí tẽ Juàá tée dàcuandute ñaha xii ñáyiú te taxi-n, dico na cùhu<sup>n</sup> ìi<sup>n</sup> xití cóhó taxi-n —càchí-xi xáha<sup>n</sup>-xi xii-dé.

<sup>26</sup>Te té Hèrodés ní ngüfta-dé ndìhi vñhí iní-dé sá dúcá<sup>n</sup> nĩ xáha<sup>n</sup>-xi xii-dé, dico ñá túú ní cùyi-dé cùñaha-dẽ xii-xi sá vã cúú cuãñaha-dẽ sá xicá<sup>n</sup>-xi, chi cuendá sá nõu nchaa ñáyiú ní xáha<sup>n</sup>-dẽ sá cúú cuãñaha-dẽ nõu ná cúú sã ná càcá<sup>n</sup>-xi, te ní cacunehe-dé ndéé Yã Ndiöxí nàcuáa cutnùní iní-xi sã ndáá cuãñaha-dẽ sã ná càcá<sup>n</sup>-xi núú-dẽ. <sup>27</sup>Te té Hèrodés-á<sup>n</sup> ndìhi-ni ní xáha<sup>n</sup>-dẽ xii ìi<sup>n</sup> sandadú sá quíhí<sup>n</sup>-dé quehndé-dé díquí tẽ Juàá. <sup>28</sup>Te sandadú-á<sup>n</sup> nĩ xica-dé cuáhá<sup>n</sup>-dé vecaá núú yíhí tẽ Juàá-á<sup>n</sup>, te ní quexio-dé te ní xehndé-ni-dé díquí tẽ Juàá, te ní chihi-dé ìi<sup>n</sup> xití cóhó te nèhe-dé cuánuhú ní sáha-dé xíchí xicá<sup>n</sup>-á<sup>n</sup>, te xíchí-á<sup>n</sup> nĩ nacuáha-xi náná-xi. <sup>29</sup>Te oré ní ñihí nchaa cue tée ní xica cuu ndìhi ndí Juàá-á<sup>n</sup> tñuhu sá dúcá<sup>n</sup> nĩ sahi ñaha-güedẽ xii ndí, te ní sáhá<sup>n</sup>-güedé ní ndocani-güedé yiqui cùnú ndí te ní chindúxi-güedé.

**Jèsús dácàxi-gá úhú<sup>n</sup> mìl cue tée te dèi<sup>n</sup> ñáyiú dèhí ndìhi landú**

(Mt. 14:13-21; Lc. 9:10-17; Jn. 6:1-14)

<sup>30</sup>Te nchaa cue tée ní táuchíú<sup>n</sup> Jèsús cuáhá<sup>n</sup> cáhá<sup>n</sup> tñuhu Yã Ndiöxí núú ñáyiú ní ndexio-güedé núú-gã te ní ngüfta-güedé nácàni tñuhu-güedé nchaa nàcuáa ní quide-güedé ndìhi nchaa nàcuáa ní dánèhè ñáhá-güedé xií-yu. <sup>31</sup>Te Jèsús ní xáha<sup>n</sup>-gã xii-güedé:

—Chí nèhé ná quìhí<sup>n</sup>-ó ìí<sup>n</sup> xichi núú ñà túú ñáyiú ndetatú-ó —càchí-gá xǎha<sup>n</sup>-gǎ xii-güedé.

Te duca<sup>n</sup> ñí xáha<sup>n</sup>-gǎ xii-güedé, chi ío cuéhé ñáyiú cuáhá<sup>n</sup> véxi-yu cùú-yu núú ndécú-gǎ. Te ní ñǎ ñihí-gá nása cada-gá caxi-gá ndihí cue tée xica cuu ndihí-gá. <sup>32</sup>Te Jèsús cuánguee-gá bàrcú ndihí mee-ni cuè téé ní táuchíú<sup>n</sup>-gǎ cáhá<sup>n</sup> tnúhu-gá, te cuáhá<sup>n</sup>-gǎ ndihí-güedé ìí<sup>n</sup> xichi núú ñà túú ñáyiú ndècu. <sup>33</sup>Dico vài ñáyiú ní cutnùní iní-yu sá dífú-gǎ ñúhú bàrcú-á<sup>n</sup> cuáhá<sup>n</sup> ndihí cue tée xica cuu ndihí-gá, te nchaá ñúú cáá yàtni xíá<sup>n</sup> ñí quee ñáyiú xixinú-yu cuáhá<sup>n</sup> núú ñí quide-yu cuendá quexìo Jèsús, te sa ndécú-yu xíá<sup>n</sup> ñí quexìo-gá. <sup>34</sup>Te òré ní quene Jèsús xití bàrcú, te ní xiní-gá cuéhé vlíhí ñáyiú xixúcu núú ñí quexìo-gá-á<sup>n</sup>, te ní cundàhú iní ñáhá-gǎ xíí-yu chi ndécú-yu dàtná xĩndecu cue mbéé cue quiti ñǎ túú tòli-xi, te ío vài núú sǎ ñí ngúíta-gá ní dácuáhá ñàha-gá xíí-yu. <sup>35</sup>Te sátá tá cuàa cuáhá<sup>n</sup> te ní sáhá<sup>n</sup> cue tée xica cuu ndihí Jèsús núú-gǎ, te xǎha<sup>n</sup>-güedé xii-gá:

—Sa ní cuaa te ñǎ túú ñáyiú ndècu yatni iha. <sup>36</sup>Váha-gá dandàca nchaá ñáyiú-a chi na quìhí<sup>n</sup>-yu nchaá vehe càa xití yucu-a, ndihí nchaá ñúú cáá nchàa yatni iha cuaá<sup>n</sup>-yu sá cǎxí-yu —càchí-güedé xǎha<sup>n</sup>-güedé xii-gá.

<sup>37</sup>Te Jèsús ní xáha<sup>n</sup>-gǎ:

—Mee-ndo chí cuǎñaha sǎ ná cǎxí-yu —càchí-gá xǎha<sup>n</sup>-gǎ xii-güedé.

Te xǎha<sup>n</sup>-güedé xii-gá:

—¿Te nása cada-ndí, chi xini ñuhu-xi datná úú cièndú díhú<sup>n</sup> denàriú cuendá cuaa<sup>n</sup>-ndí sá cǎxí-yu? —càchí-güedé xǎha<sup>n</sup>-güedé xii-gá.

<sup>38</sup>Te Jèsús ní xáha<sup>n</sup>-gǎ xii-güedé:

—Chí cuáhá<sup>n</sup> cundehe-ndo ñúu ná daha pàa ndécú ndihí-ndo te cachí tnúhu-ndo —càchí-gá xǎha<sup>n</sup>-gǎ xii-güedé.

Te ní sáhá<sup>n</sup> ndéhé-güedé ñúu ná daha pàa ndécú, te ní xáha<sup>n</sup>-güedé xii-gá:

—Úhú<sup>n</sup> duha-ná pàa ndihí úú-nǎ chácá ndécú —càchí-güedé xǎha<sup>n</sup>-güedé xii-gá.

<sup>39</sup>Te Jèsús ní xáha<sup>n</sup>-gǎ xii nchaá ñáyiú sá ná ñihí tnáhá-yu cuu tìtní xichí-yu, te ngóo-yu nchaá núú cùhú cuíí càa xíá<sup>n</sup>. <sup>40</sup>Te nchaá-yu ní ngóo-yu, te dava xichí-yu ní ngóo ìí<sup>n</sup> cièndú-yu, te dava xichí-yu ní ngóo údico úxí-yu. <sup>41</sup>Te sátá ñí ndihí-yu ní ngóo, te ní quehe<sup>n</sup> Jèsús ndi ùhú<sup>n</sup> pàa ndi úú chácá-ǎ<sup>n</sup>, te ní ndacoto-gá andiu te ní ndacá<sup>n</sup> táhú-gǎ núú Yǎ Ndiòxí, te dàtnùní ní táhú cuèchi-gá pàa-á<sup>n</sup> te ní sǎñaha-gǎ xii cue tée xica cuu ndihí-gá ní dácǎhñu-güedé nchaá ñáyiú-á<sup>n</sup> ñí xexí-yu. Te diu-ni duca<sup>n</sup> ñí quide tucu-gá úú chácá-ǎ<sup>n</sup>. <sup>42</sup>Te nchaá-yu ní xexí-yu ní ndahá xití-yu. <sup>43</sup>Te sátá ñí túhú cóhò-yu te ní nadatàcá-güedé nchaá sá ñí quendóo, te ní chítú ùxúú tnáhá tídihi mee-ni sǎ ñí quendóo núú ùhú<sup>n</sup>-ni pàa, ndihí núú ùú-ni chácá. <sup>44</sup>Te nchaá ñáyiú ní xexi-á<sup>n</sup> chí xĩnu ùhú<sup>n</sup> mĩl mee-ni cuè téé chí diu-ni cue tée-á<sup>n</sup> ñí quíúndehu, te ñí<sup>n</sup> ñáyiú ñihí ndihí cue landú.

### Jèsús xíca-gǎ núú ndute

(Mt. 14:22-27; Jn. 6:16-21)

<sup>45</sup>Te òré-ni-á<sup>n</sup> ñí xáha<sup>n</sup> Jèsús xii cue tée xica cuu ndihí-gá sá quèe-güedé bàrcú codonùu-güedé quìhí<sup>n</sup>-güedé ìí<sup>n</sup> ñúú nání Bètsaidá cáá ndàa ingá xio yuhu làgúná núú ndécú-güedé-á<sup>n</sup>, te mee-gǎ quendóo-gá cada ndee iní tnáhá-gǎ ndihí cue ñáyiú. <sup>46</sup>Te sátá ñí yáha ní quide ndee iní tnáhá-gǎ ndihí-yu, te ní xica-gá cuáhá<sup>n</sup>-gǎ ìí<sup>n</sup> tĩndúú cáá yàtni xíá<sup>n</sup> cuendá cáhá<sup>n</sup> ndihí-gá Yǎ Ndiòxí. <sup>47</sup>Te òré sa ní cundiquí<sup>n</sup> te bàrcú sá ñúhú cuè téé xica cuu ndihí-gá sa cuáhá<sup>n</sup>-xi ndéé cuádava xití làgúná-á<sup>n</sup>, te mee-gǎ ndécú-gǎ ìí<sup>n</sup> núú tĩndúú. <sup>48</sup>Te túu ndèhe-gá sá sũúní ndòho-güedé tá dàcaca-güedé

bàrcú-á<sup>n</sup> cuáhá<sup>n</sup>, chi cuëndá ndàa nacuáa cuáhá<sup>n</sup>-xi-á<sup>n</sup> duha véxi táchí te nàtúndaha-xi. Te ingá nduu-á<sup>n</sup> tàcuíhndá-gá sa ní cuyatni vií-ná Jèsús bàrcú ñúhú-güedě-á<sup>n</sup>, dico núú ndute tá xica-gá cuáhá<sup>n</sup> te luha-ná te yáha ñaha-gá xii-güedé ní cùu. <sup>49-50</sup> Te òré ní xiní ñáhá cuè téé ñùhu bàrcú-á<sup>n</sup> xii-gá te ní yùhú-güedé ní cana saa-güedé, chi ní sani iní-güedé sá ñ<sup>n</sup> almá cúu-gá. Te ní xáha<sup>n</sup>-gá xii-güedé:

—¡Ñíí cunduu-ndo, vá yùhú-ndo, chi yùhú cúu-í! —càchí-gá xáha<sup>n</sup>-gá xii-güedé.

<sup>51</sup> Te Jèsús cuánguee-gá xití bàrcú ñúhú-güedě-á<sup>n</sup>, te sáta cuánguee-gá te òré-ni ní ngüíñí táchí, te ní cuñúhu vihi-güedé. <sup>52</sup> Te duca<sup>n</sup> chi cue téé-á<sup>n</sup> ñà túú ní cùtnuní iní-güedé nása quide-gá, chi ñà túú ní cùtnuní váha iní-güedé nàcuáa ndùu sá ñí quide-gá òré ní nadacàyá-gá pàá, chi ío ñí ñíquí-güedé.

### Jèsús quidé tătna-gá ñáyiú cùhú ñúú Genesàrét

(Mt. 14:34-36)

<sup>53</sup> Te ní yáha-güedé ndihi-gá ndàa ingá xio yuhu làgúná, te ní sáá-güedé ndihi-gá yucu cue téé ñúú Genesàrét. Te yàcá<sup>n</sup> ní dácútú ndèé-güedé bàrcú-güedé yuhu làgúná. <sup>54</sup> Te òré ní quene Jèsús ndihi cue téé xica cuu ndihi-gá xití bàrcú, te nchaa ñáyiú xíndecu-á<sup>n</sup> ñí cut-nùní iní-yu sá dífú-gá. <sup>55</sup> Te ñáyiú-á<sup>n</sup> ndihi-ni ní sáhá<sup>n</sup>-yu nchaa núú xíndecu cue ñáyiú cùhú, te cue ñáyiú cùhú-á<sup>n</sup> ñí quée-yu xíto nchido ñahá-yu cuáhá<sup>n</sup> ndi tnahá ñ<sup>n</sup> ñ<sup>n</sup> xichi núú ñihí-yu tnúhu quèxio Jesús. <sup>56</sup> Te nchaa ñúú náhnú ndihi nchaa ñúú líhli núú cuáhá<sup>n</sup> Jèsús, duca<sup>n</sup> xíndecá-yu nchaa ñáyiú cùhú cuáhá<sup>n</sup> xití ñúú sàcá<sup>n</sup> ñáhá-yu núú-gá cuëndá cada tătna ñaha-gá xií-yu. Te ñiú-ni duca<sup>n</sup> xíquidé-yu nchaa dava-gá xichi núú cuáhá<sup>n</sup>-gá núú xíndecu cue ñáyiú, te càhá<sup>n</sup> ndàhú-yu

núú-gá sá ná dāñá-gá tnāndéé cue ñáyiú cùhú-á<sup>n</sup> cuèdicó luha yuhu dōó-gá cuëndá ndúha-yu. Te nchaa ñáyiú cùhú ní tnāndéé yuhu dōó-gá ní ndúha-yu.

### Cuëndá nchaa sá quidé-xí ngündecu cuéchi ñáyiú

(Mt. 15:1-20)

**7** Te ñúú Jerusalén ní quee cue téé dàcuaha ñaha xii ñáyiú nchaa tnúhu ní chídó tnùní ndíi Moisés, te ní quexio-güedé núú ndécú Jèsús, te tnáhá cue téé cùu fariséú ní quexio ndihi-güedé. <sup>2</sup> Te cue téé-á<sup>n</sup> ñí xiní-güedé sá dàva cue téé xica cuu ndihi Jesús ñà túú ndàha-güedé dàtná ndáhá mèe cue téé cùu fariséú-á<sup>n</sup> òré caxi-güedé. Te xíá<sup>n</sup> ñúu cue téé ní quexio-á<sup>n</sup> ñí cáhá<sup>n</sup> cuèhé-güedé cuëndá cue téé xica cuu ndihi-gá. <sup>3</sup> Te duca<sup>n</sup> chi nchaa cue téé cùu fariséú-á<sup>n</sup> ndihi nchaa ñáyiú isràél nchicú<sup>n</sup> ñihnú-yu quidé-yu dàtná ní xóo cada nchaa cue ñaní tnáhá-yu ní xíndecu ndéé sanaha, chi nchaa ñáyiú-á<sup>n</sup> và caxí-yu te núu vá ndáhá-yu dàtná ní xóo ndaha nchaa cue ñaní tnáhá-yu ní xíndecu ndéé sanaha-á<sup>n</sup>. <sup>4</sup> Te ñáyiú-á<sup>n</sup> ndi tnahá òré cuáhá<sup>n</sup>-yu núú yáhu te nāsáá-yu, te ndáhá-yu nàcuáa sàni iní-yu ndùvétú iní Yá Ndiòxí, te núu vá dúcá<sup>n</sup> càdá-yu te vá caxí-yu. Te tnáhá náquèté-yu vāsú sá sácùhu<sup>n</sup> sá xíhí-yu, ndihi lítu, ndihi cóhó càá, ndihi càamá. Te nchaa xéhé náquèté-yu nàcuáa sàni iní-yu ndùvétú iní Yá Ndiòxí. Te ío-gá titní sá ñí xóo cada nchaa ñáyiú ní xíndecu ndéé sanaha-á<sup>n</sup> nchicú<sup>n</sup> ñihnú-yu quidé-yu. <sup>5</sup> Te cue téé cùu fariséú-á<sup>n</sup>, ndihi cue téé dàcuaha ñaha xii ñáyiú nchaa tnúhu ní chídó tnùní ndíi Moisés-á<sup>n</sup> ñí xáha<sup>n</sup>-güedé xii Jèsús:

—¿Ná cuëndá cue téé xica cuu ndihi-n ñà túú nàquete-güedé ndaha-güedé òré caxi-güedé dàtná ní cachí nchaa cue téé

ní xindecu ndéé sanaha-i? —càchí-güedé xăha<sup>n</sup>-güedé xii-gá.

<sup>6</sup>Te Jèsús ní xáha<sup>n</sup>-gă xii-güedé:

—Nchòhó cùú-ndó cuè téé ío dān-dahú méé-xí chí càchí-ndó sǎ ío quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tñuní ndíi Chàíá téé ní xóo cáhá<sup>n</sup> tñúhu Yá Ndiòxí ndéé sanaha nùú tütú-gá nùú cáhá<sup>n</sup>-xi nàcuáa ní cáhá<sup>n</sup>-gá cuendá-ndó, te duha ní cachí-gá:

Ñáyíu-a càchí-yu sǎ ío càhnu cuu-í, dico dicó-ni yuhu cáhá<sup>n</sup>-yu,

chí ñá túú ñúhu iní ñáhă-yu xii-í.

<sup>7</sup>Te àú<sup>n</sup> nă cuu chĩñuhu ñahá-yu xii-í, chí ñá túú vėdana ndèè nándĩhi-xi, chí cue ñáyíu-a dàcuahá-yu cue tñàha ñáyíu-yu nàcuáa cundecú-yu, dico mee-ni tñúhu sá nĩ cahu iní cue ñáyíu ñuyíú-a cáhá<sup>n</sup>-yu.

Duha ní chídó tñuní ndíi Chàíá nùú tütú Yă Ndiòxí nàcuáa ní cáhá<sup>n</sup>-gá cuendá-ndó. <sup>8</sup>Te nchòhó ní dáñá-ndó nàcuáa ní cachí Yă Ndiòxí cada-ndo, te nchícú<sup>n</sup> nihnu-ndo quide-ndo nacuáa ní cahu iní cue ñáyíu ñuyíú-a, chí nàquete-ni-ndo lítú, te nàquete-ni-ndo vasú sácũhu<sup>n</sup> sá xihí-ndó nàtava-ndo nacuáa ní xóo cada ñáyíu-á<sup>n</sup> nĩ xóo naqueté-yu nchaa xíă<sup>n</sup>, te nándi-gá nchaa nùú sǎ quidé-ndó —càchí Jèsús xăha<sup>n</sup>-gă xii-güedé.

<sup>9</sup>Te ní xáha<sup>n</sup> tucu-gá xii-güedé:

—Te nchòhó, ñá túú cuení-ndó càda-ndo nacuáa cuení Yă Ndiòxí, chí mee-ni nàcuáa ní cachí cue téé ní xindecu ndéé sanaha nchícú<sup>n</sup> nihnu-ndo quide-ndo. <sup>10</sup>Te ndíi Moisés ní cachí ndíi sá ncháá ñáyíu canehé-yu sá yĩñúhu nùú tătă-yu ndihí nùú năñă-yu. Te nchaa ñáyíu na cáhá<sup>n</sup> úhú cuendá tătă-yu àdi cuendá năñă-yu te cahni ñaha-güedé xii-yu ní cachí ndíi. <sup>11</sup>Te nchòhó càchí-ndó sǎ nùu ì<sup>n</sup> téé na cũñaha-dě xii tătă-dě ndihí năñă-dě sá sǎ nĩ sani iní-dé cuãñaha-dě xii-yu

cùu-xi Corbán, te ñá túú-gă xini ñúhu-xi sá cuãñaha-dě xii-yu, te tñúhu Còrbán-á<sup>n</sup> queé-xí: Sá cùú cuendá Yă Ndiòxí. <sup>12</sup>Te sá dúcá<sup>n</sup> ná cáhá<sup>n</sup> ì<sup>n</sup> téé-á<sup>n</sup> te nchòhó chindèe tñúhu-ndo-dě cuendá sá vă chindèe-gá-dé tătă-dě ndihí năñă-dě. <sup>13</sup>Te duca<sup>n</sup> quide-ndo chí ní dáquée tñú-ndo nàcuáa ní cachí Yă Ndiòxí cada-ndo, te mee-ni nàcuáa ta quide cue téé ñuyíú-a véxi nchícú<sup>n</sup> nihnu-ndo quide-ndo, te ðiu-ni duca<sup>n</sup> ta sànu ichi tñaha-ndo véxi, te nándi-gá nchaa sá cáhú iní-ndó quide-ndo —cachí-gá xăha<sup>n</sup>-gă xii-güedé.

<sup>14</sup>Te Jèsús ní xáha<sup>n</sup> tucu-gá xii cue ñáyíu xindecu-á<sup>n</sup>:

—Chí táquixi ndehe iha, te cundedóho vâha-ndo tñúhu na cáhá<sup>n</sup>-í-a te ío váha cuáha-ndo cuendá. <sup>15</sup>Nchaa sá xéxi-ndó chí ñá túú nă quidé-xí iní-ndó, dico nchaa sá cuèhé sá dúhá sàni iní-ndó quide-ndo, nchaa xíă<sup>n</sup> quidé-xí ndècu cuéchi-ndo. <sup>16</sup>Te nchaa nchòhó ñáyíu ndèdóho nchaa tñúhu cáhá<sup>n</sup>-í-a ío váha chí cuáha cuendá —càchí-gá xăha<sup>n</sup>-gă xii-yu.

<sup>17</sup>Te Jèsús ní dándöo-gá nchaa ñáyíu nùú xixúcu-yu-á<sup>n</sup> te cuándihu-gá xití vehe. Te cue téé xica cuu ndihí-gá ní xícá<sup>n</sup> tñúhú-güedé nùú-gă nùu nása quee-xi cuendú ní caní-gá nùú ñáyíu-á<sup>n</sup>. <sup>18</sup>Te ní xáha<sup>n</sup>-gă xii-güedé:

—¿Te náa tñahá nchòhó ñá túú ní təcú tñuní-ndó cuendú ní caní-í nùú ñáyíu-ă<sup>n</sup>? Nchaa sá xéxi-yu cuánguee xití-yu ñá túú quide-xi iní-yu nàcuáa ngúndecu cuéchi-yu. <sup>19</sup>Chí ñá dđú iní-yu cuánguee-xi chí cuánguee ndáá-xi xití-yu, te nâyáha ñaha-xi xii-yu —càchí-gá xăha<sup>n</sup>-gă xii-güedé.

Te sá dúcá<sup>n</sup> nĩ cáhá<sup>n</sup>-gá te ní dátũu-gá sá cùú càxi-o nchaa nùú sǎ cùú càxi-o.

<sup>20</sup>Te ní xáha<sup>n</sup> tucu-gá xii-güedé:

—Nchaa sá cuèhé sá dúhá quide ñáyíu xíă<sup>n</sup> cécú nihnu-xi iní-yu, te nchaa xíă<sup>n</sup> quidé-xí ndècu cuéchi-yu. <sup>21</sup>Te iní-yu-á<sup>n</sup>

cácú nihnu nchaa sá cuèhé sá dúhá, chi sàni cuehé sání dùha iní-yu. Te cue téé càhá<sup>n</sup> ndihí-güedé ñadìhí te ñá díú ñadìhí-güedé cúú-yu, te díu-ni duca<sup>n</sup> quide cue ñáyiú ñadìhí càhá<sup>n</sup> ndihí-yu téé te ñá díú yíi-yu cùu-güedé. Te sàhní-yu cue tñaha ñáyiú-yu, te mee-ni ichi díí ñí cúdíí ñí-yu cundecú-yu. <sup>22</sup> Te dùhu ndachiu<sup>n</sup> tnahá-yu, te xihó-yu cundecu ndihí-yu sá ndécú ndihí tñaha ñáyiú-yu, te ío quide úhú ñí-yu sá cúú-xí tñaha ñáyiú-yu, te ío dandahú tñahá-yu, te mee-ni nchaa sá cuèhé sá dúhá cùdíí ñí-yu quidé-yu, te ío cuédú ñí-yu, te ío yiti yùhú-yu, te ío quide cahnú-yu mèé-yu, te quidé-yu nándi-gá sá ñà túú tàú-yu cadá-yu. <sup>23</sup> Te nchaa sá cuèhé sá dúhá-ǎ<sup>n</sup> cácú nihnu-xi ñí-yu, te nchaa xíǎ<sup>n</sup> quidé-xí ndècu cuéchi-yu, te ñá túú cùu-xi sá váha sá cúú-xí ñí-yu.

**Íi<sup>n</sup> ñadìhí véxi ñúú xíca ñí sándáá ñí-a<sup>n</sup> Jèsús**

(Mt. 15:21-28)

<sup>24</sup> Te ní xica Jèsús cuáhá<sup>n</sup>-gá ndéé yucu cue téé ñúú Tírú, ndihí yucu cue téé ñúú Sidón. Te òré ní quexio-gá xíá<sup>n</sup> te cuánguìhu-gá ñí<sup>n</sup> vehe te xíá<sup>n</sup> cundecu-gá, te cuìní-gá sá vǎ quìní ñáyiú sá xíá<sup>n</sup> ndécú-gá ní cùu, dico dai ní ñíhí-yu tñúhu. <sup>25</sup> Te ñí<sup>n</sup> ñadìhí ndécú ñí<sup>n</sup> déhe yoco-a<sup>n</sup>, te yìhi ñaha espíritú cùndìhi yucu ñávǎha xii-xi, te ñaha-á<sup>n</sup> ío ndìhi ní ñíhí-a<sup>n</sup> tñúhu sá ñí quexio Jèsús xíá<sup>n</sup> ñúu ní sáhá<sup>n</sup>-a<sup>n</sup> núú ndécú-gá, te ní nguííni xítí-á<sup>n</sup> ñúú-gǎ. <sup>26</sup> Te ní nguíta-a<sup>n</sup> càhá<sup>n</sup> ndàhú-a<sup>n</sup> núú-gǎ, te xǎha<sup>n</sup>-a<sup>n</sup> sǎ ñúu vǎ cùndèe ñí-gá queñuhu-gá espíritú cùndìhi yucu ñávǎha yìhi ñaha xii déhe-a<sup>n</sup>. Dico ñá díú ñaha israél cúú-á<sup>n</sup> chi ñaha ñúú Sirofènicíá cúú-á<sup>n</sup> te tñúhu grégú cúú tñúhu-a<sup>n</sup>. <sup>27</sup> Te xíǎ<sup>n</sup> ñúu ní xǎha<sup>n</sup> Jèsús xii-a<sup>n</sup>:

—Daña na càxi tnaa nchaa landú chítú xítí-güexi, te dǎtnúni caxi cue iná, chi ñá túú ndùu váha-xi quehe<sup>n</sup>-o sǎ xéxí

lándú te cuáha-o iná —càchí-gá xǎha<sup>n</sup>-gǎ xii-a<sup>n</sup>.

<sup>28</sup> Te ní xǎha<sup>n</sup>-a<sup>n</sup> xii-gá:

—Mèstrú, ndáá-ni càhá<sup>n</sup>-n, dico iná chi nàdatacá-güedi sá ngóyó yùhu cóho lándú —càchí-a<sup>n</sup> xǎha<sup>n</sup>-a<sup>n</sup> xii-gá.

<sup>29</sup> Te Jèsús ní xǎha<sup>n</sup>-gǎ xii-a<sup>n</sup>:

—Ío váha ní càhá<sup>n</sup>-n, te cuanùhú te ñá túú-gǎ ná caní ñí-n, chi sa ní quee espíritú cùndìhi yucu ñávǎha yìhi ñaha xii déhe-n —càchí-gá xǎha<sup>n</sup>-gǎ xii-a<sup>n</sup>.

<sup>30</sup> Te ñaha-á<sup>n</sup> ní nasáá-a<sup>n</sup> vehe-a<sup>n</sup> te càa déhe-a<sup>n</sup> núú càamá, dico ñá túú-gǎ espíritú cùndìhi yucu ñávǎha yìhi ñaha xii-xi chi sa ní quee ñaha-xi.

**Jèsús quidé tátna-gá ñí<sup>n</sup> téé ñá cúú càhá<sup>n</sup> váha te doho-dé**

<sup>31</sup> Te Jèsús ní ndee-gá yucu cue téé ñúú Tírú te ní yáha-gá yucu cue téé ñúú Sidón, ndihí yucu ndi ùxí ñúú nání Dècápolis, te ní sáá-gá ndéé yuhu làgúná distrítú Galiléa. <sup>32</sup> Te xíá<sup>n</sup> ndécú-gǎ ní quexio ñáyiú ndéé núú-gǎ ndécǎ-yu ñí<sup>n</sup> téé ñá cúú càhá<sup>n</sup> váha-dé te doho-dé.

Te càhá<sup>n</sup> ndàhú-yu núú-gǎ sá ná tèn-daha ñaha-gá xii-dé cuendá ndúha-dé.

<sup>33</sup> Te Jèsús ní queñuhu ñaha-gǎ xii-dé tnuú-yu, te ndèca ñaha-gá cuáhá<sup>n</sup> ñí<sup>n</sup> xio, te ní dáquìhu-gá díquí ndáhá-gǎ yaú lóho-dé, te ní dácànùu-gá díí-gá díquí ndáhá-gǎ, te ní tendaha-gǎ yàa-dé. <sup>34</sup> Te ní ndacoto-gá andiu te ní sánuu ñí-gá, te ní càhá<sup>n</sup>-gá tñúhu mee-gǎ, te xǎha<sup>n</sup>-gǎ:

—¡Éfatá! —càchí-gá xǎha<sup>n</sup>-gǎ xii-dé.

Te tñúhu-á<sup>n</sup> quéé-xí: Nacaá<sup>n</sup> yòho lóho. <sup>35</sup> Te òré-ni-á<sup>n</sup> ní nacaá<sup>n</sup> lóho-dé, te ní nduu váha yàa-dé, te ní cuu càhá<sup>n</sup> váha-dé. <sup>36</sup> Te Jèsús ní càhá<sup>n</sup> víhí-gǎ dóho ñáyiú ndihí ñaha xii téé ní quide tátna-gá-á<sup>n</sup> sǎ vǎ yòo ñí<sup>n</sup> cùñahá-yu sá ñí quide tátna ñaha-gǎ xii-dé, dico uu<sup>n</sup>-gá ní quidé-yu ní càhá<sup>n</sup>-yu núú ñáyiú sá ñí quide tátna-gá téé-á<sup>n</sup>. <sup>37</sup> Te ncháá-yu ío ní cuñúhu-yu, te ní xítñahá-yu:

—Váha vîhi quide-dé, chi nchaa-ni ndàcu-dé quidé-dě, chi quide tátna-ni-dé ñáyiú doho, te quide tátna-ni-dé ñáyiú ñhí —càchí-yu xítñàhá-yu.

### Jèsús dácàxi-gá cúmí mĩ ñáyiú

(Mt. 15:32-39)

**8** Te ì<sup>n</sup> nduu tucu ío cuéhé ñáyiú ní tacá núú ndécú Jèsús, te ñá túú tñàhí sá caxí-yu. Te ní cana-gá cue téé xica cuu ndihi-gá, te ní xáha<sup>n</sup>-gá xii-güedé:

<sup>2</sup>—Yúhú, cùndahú iní-í nchaa ñáyiú-a chi sa ní cuu úní nduu ndècu ndihi ñàhá-yu xii-o ìha, te ñá túú tñàhí ná sá caxí-yu. <sup>3</sup>Te núú na nàtendaha-í-yu núhú tñámă-yu vehé-yu, te cunee-yu docó ichi, chi davá-yu ío xica ndécú-yu —càchí-gá xáha<sup>n</sup>-gá xii-güedé.

<sup>4</sup>Te ní xáha<sup>n</sup>-güedé xii-gá:

—¿Te ndèé ñhí-ó sá cuãñaha-o càxi nchaa ñáyiú-a, te iha ñá túú ñá ío chí cùu-xi xítí yucu-i? —càchí-güedé xáha<sup>n</sup>-güedé xii-gá.

<sup>5</sup>Te Jèsús ní xícá<sup>n</sup> tñúhú-gá núú-güedé, te xáha<sup>n</sup>-gá:

—¿Ná daha-gá pàà ndécú ndihi-ndo-i? —cachí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Ndècu ndihi-ndí úsá-gá tñàhá —càchí-güedé xáha<sup>n</sup>-güedé xii-gá.

<sup>6</sup>Te Jèsús ní xáha<sup>n</sup>-gá xii nchaa ñáyiú sá ngõo-yu nchaá-yu, te ní ngóo-yu, te ní quehe<sup>n</sup>-gá ndi úsá pàá-á<sup>n</sup>, te ní ndacá<sup>n</sup> táhú-gá núú Yă Ndiõxí. Te dätñuní ní táhú cuèchi-gá te ní sãñaha-gá xii cue téé xica cuu ndihi-gá ní dácãhñu-güedé nchaa ñáyiú-á<sup>n</sup>. <sup>7</sup>Te ndècu ndihi-güedé ì<sup>n</sup> úú chácá líhli, te diu-ni duca<sup>n</sup> ñí quide-gá ní ndacá<sup>n</sup> táhú-gá núú Yă Ndiõxí. Te dätñuní ní táuchíú<sup>n</sup>-gá ní dácãhñu ñaha-güedé xií-yu. <sup>8</sup>Te nchaá-yu ní xexí-yu ní ndahá xítí-yu. Te sátá ñí túhú cóhõ-yu te ní nadatácá-güedé nchaa sá ñí quendóo, te ní chítú úsá tñàhá tídihi mee-ni sá ñí quendóo-á<sup>n</sup>. <sup>9</sup>Te núú ncháá ñáyiú

ní xexí-á<sup>n</sup> xínu dätñá cúmí mĩ-yu. Te sátá ñí yáha ní dácaxí ñàha Jesús xií-yu te ní dándácá ñàha-gá. <sup>10</sup>Te dät-nùnì cuánguee-gá bàrcú ndihi cue téé xica cuu ndihi-gá cuáhá<sup>n</sup>-gá ndihi-güedé yucu cue téé ñuú Dalmànutá.

### Cue téé cùu fariséú xáha<sup>n</sup>-güedé xii Jèsús cada-gá ì<sup>n</sup> sá vă yõ tñàhí ndàcu cada

(Mt. 16:1-4; Lc. 12:54-56)

<sup>11</sup>Te núú ñí quexìo Jesús xiá<sup>n</sup> ñí sáá cue téé cùu fariséú, te ní ngüíta-güedé nándi tñúhu xáha<sup>n</sup>-güedé xii-gá xító ndèé ñàhá-güedé. Te xáha<sup>n</sup>-güedé sá ná cádá-gá ì<sup>n</sup> sá vă yõ tñàhí ndàcu cada cundehe-güedé nàcuáa cutnùnì iní-güedé ñuu ndáá sá Yă Ndiõxí ní tendaha ñàha-gá xii-gá véxi-gá ñuyíú-a. <sup>12</sup>Te ní sánuu iní-gá te ní xáha<sup>n</sup>-gá xii-güedé:

—Nchaa nchòhó ñáyiú ndècu ñuyíú-a cuiní-ndó càda-í ì<sup>n</sup> sá vă yõ tñàhí ndàcu cada nacuáa cutnùnì iní-ndó ñuu ndáá sá Yă Ndiõxí chindèe ñaha-gá xii-í. Dico na càchí tñúhu ndáá-í xii-ndo sá vă cádá-í sá cuiní-ndó —càchí-gá xáha<sup>n</sup>-gá xii-güedé.

<sup>13</sup>Te ní dándõo-gá ñáyiú xĩndecu-á<sup>n</sup>, te cuándeé-gá bàrcú ndihi cue téé xica cuu ndihi-gá te cuáhá<sup>n</sup>-gá ndihi-güedé ndàa ingá xio yuhu làgúná.

### Nàcuáa quide cue téé cùu fariséú

(Mt. 16:5-12)

<sup>14</sup>Te ní cunaa-güedé canehe-güedé sá caxí-güedé quhí<sup>n</sup>, te ì<sup>n</sup> dii-ni paá ndécú xítí bàrcú-á<sup>n</sup> ñí naníhí-güedé. <sup>15</sup>Te Jèsús ní cáhá<sup>n</sup>-gá dóho-güedé, te xáha<sup>n</sup>-gá xii-güedé:

—Na càchí tñúhu-í xii-ndo sá ño quíhi iní-ndó cùndecu-ndo te vá cádá cuendá tñàhí-ndo lèvadurá cue téé cùu fariséú, ndihi levadurá cue téé cùndihi té Hèrodés —càchí-gá xáha<sup>n</sup>-gá xii-güedé.

<sup>16</sup>Te ní ngüíta-güedé xítñaha-güedé:

—Cuendá sá ñà túú ní cãnehe-o pàá quixi núu xíá<sup>n</sup> duha càhá<sup>n</sup>-gá — càchí-güedé xĩtnàha-güedé.

<sup>17</sup> Te Jèsús ní cutnùnì iní-gá nàcuáa ndùu tnúhu xĩtnàha-güedé, núu ní xáha<sup>n</sup>-gá xii-güedé:

—¿Ná cuendá da sá ñà túú ní cãnehe-ndo pàá quixi càhá<sup>n</sup>-ndó? Te ñá díú cuendá pàá-á<sup>n</sup> ní cãhá<sup>n</sup>-í, te díco-ni sá méé-ndó ñà túú quide cuendá váha-ndo nàcuáa ndùu tnúhu càhá<sup>n</sup>-í, te ni ñá tècú tnùnì-ndó chí ío nii díquí-ndó. <sup>18</sup> Te cuèi ndèhe-ndo dico ñá túú cùtnuní iní-ndó nã cúu nchàa sá quidè-í, te cuèi ndèdóho-ndo nchàa tnúhu càhá<sup>n</sup>-í dico ñá cùtnuní iní-ndó nãsa ndùu-xi, te ni ñá ndácú iní-ndó nchàa sá tá quide-í véxi. <sup>19</sup> Te chí dándàcu iní cùtnàhá ní táhú cuèchi-í úhú<sup>n</sup>-ni pàá te ní xexi úhú<sup>n</sup> mĩl mee-ni cuè téé chí díu-ni cue téé-á<sup>n</sup> nĩ quíundehe. Te chí càchí tnúhu ná daha tídihi ní chítú mee-ni sã nĩ quendóo òré ní nadatàcá-ndó —càchí-gá xãha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Úxúú tnàhá tídihi ní chítú mee-ni sã nĩ quendóo —càchí-güedé xãha<sup>n</sup>-güedé xii-gá.

Te xãha<sup>n</sup> tùcu-gá:

<sup>20</sup> —Te cùtnàhá ní táhú cuèchi tucu-í úsá tnàhá pàá ní xexi cúmí mĩl ñáyíu, te chí càchí tnúhu ná daha tucu tídihi ní chítú mee-ni sã nĩ quendóo —càchí-gá xãha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Úsá tnàhá tídihi ní chítú mee-ni sã nĩ quendóo —càchí-güedé xãha<sup>n</sup>-güedé xii-gá.

<sup>21</sup> Te Jèsús ní xáha<sup>n</sup> tùcu-gá xii-güedé:

—Vitna, ¿te sa ní tecú tnùnì-ndó tnúhu ní càhá<sup>n</sup>-í ã<sup>n</sup> ñãhá? —càchí-gá xãha<sup>n</sup>-gá xii-güedé.

### Jèsús quidé tãtna-gá ii<sup>n</sup> téé cuáá ñúú Bètsaidá

<sup>22</sup> Te Jèsús ní sáá-gá ndihi cue téé xica cuu ndihi-gá ñúú Bètsaidá. Te ñúú-á<sup>n</sup> ndécú-gá ní quexìo ñáyíu núú-gá tánèhé-yu ii<sup>n</sup> téé cuáá, te càhá<sup>n</sup> ndàhú-yu núú-gá núu vá cündèe iní-gá tendaha ñàha-gá xii-dé cuendá ndúha núú-dé.

<sup>23</sup> Te Jèsús ní tnií-gá ndaha téé cuáá-á<sup>n</sup>, te ní queñuhu ñaha-gá tnuú-yu, te ndèca ñaha-gá cuáhá<sup>n</sup> ii<sup>n</sup> xio yuhu ñúú. Te yacá<sup>n</sup> ní dácànúu-gá díí-gá núú-dé te ní tendaha ñàha-gá xii-dé, te dàtnuní ní xicá<sup>n</sup> tnúhú-gá núú-dé, te xãha<sup>n</sup>-gá:

—¿Cùtnuní núú-n-ã<sup>n</sup>? —càchí-gá xãha<sup>n</sup>-gá xii-dé.

<sup>24</sup> Te téé cuáá-á<sup>n</sup> nĩ ndonehe núú-dé, te xãha<sup>n</sup>-dè xii-gá:

—Cùtnuní núú-í ndéhè-í nchaa cue téé-ã<sup>n</sup>, dico dà ndáa yutnu cuì ndáa-güedé te xica-güedé —càchí-dé xãha<sup>n</sup>-dè xii-gá.

<sup>25</sup> Te Jèsús ní tendaha tùcu-gá núú-dé te ní cuu ní ndacoto váha-gá-dé, te òré-á<sup>n</sup> nĩ ndúha núú-dé. Te nchaandi túhú sá ndéhè-dé ní cutnùnì váha núú-dé nándi cùu nchaa xíá<sup>n</sup>. <sup>26</sup> Te ní xáha<sup>n</sup> Jèsús xii-dé:

—Vitna te núhú-n, dico ndáá ichi vehe-n núhú-n te ñá díú dà xití ñúú quíhí<sup>n</sup>-n, te vá yõo ii<sup>n</sup> cúnaha-n sã yúhú ní quide tátna-í núú-n nĩ ndúha —càchí-gá xãha<sup>n</sup>-gá xii-dé.

### Té Pèlú xãha<sup>n</sup>-dè xii Jèsús sá díú-gá cúú-gá Crìstú

(Mt. 16:13-20; Lc. 9:18-21)

<sup>27</sup> Te Jèsús ní xica-gá cuáhá<sup>n</sup>-gá ndihi cue téé xica cuu ndihi-gá nchaa ñúú líhli càa ñúú Cèsareá Filipú, te òré núhú-gá ndihi-güedé ichi te ní xicá<sup>n</sup> tnúhú-gá núú-güedé, te xãha<sup>n</sup>-gá xii-güedé:

—Chí càchí tnúhu nása càhá<sup>n</sup> ñáyíu cuendá-í. ¿Yoo cùu-í càchí-yu-va? —càchí-gá xãha<sup>n</sup>-gá xii-güedé.

<sup>28</sup> Te ní xáha<sup>n</sup>-güedě xii-gá:

—Davá-yu cächí-yu sá cúú-n ndíi Juáá tée ní xóo dacuàndute ñaha xii ñáyi, te davá-yu cächí-yu sá cúú-n tē Ēlías, te dava tucú-yu cächí-yu sá cúú-n ñ<sup>n</sup> tée ní xóo cáhá<sup>n</sup> tnúhu Yá Ndiöxí ndéé sanaha, duha cächí-yu —cächí-güedě xáha<sup>n</sup>-güedě xii-gá.

<sup>29</sup> Te ní xícá<sup>n</sup> tnúhú tùcu-gá núú-güedě, te xáha<sup>n</sup>-gá xii-güedě:

—Te nchòhó, ¿yoo sàni iní-ndó cùu-í-i? —cächí-gá xáha<sup>n</sup>-gá xii-güedě.

Te té Pèlú ní xáha<sup>n</sup>-dě xii-gá:

—Yòhó cúú-n Cristú Yaa ní tendaha Yá Ndiöxí véxi ñuyú-a —cächí-dé xáha<sup>n</sup>-dě xii-gá.

<sup>30</sup> Te Jèsús ní cáhá<sup>n</sup>-gá dóho-güedě, te xáha<sup>n</sup>-gá:

—Vá yòo ñ<sup>n</sup> cúnaha-ndo yòo cuu-í —cächí-gá xáha<sup>n</sup>-gá xii-güedě.

### **Jèsús cähá<sup>n</sup>-gá sá cáhni ñaha-güedě xii-gá**

(Mt. 16:21-28; Lc. 9:22-27)

<sup>31</sup> Te Jèsús ní ngüíta-gá xitnùhu-gá cue tée xica cuu ndíhi-gá nàcuáa yáha-gá, te xáha<sup>n</sup>-gá xii-güedě:

—Yúhú Tée cùu ñaní tnáhá-ndó nchàa-ndo chi ío ndoho-í, chi daquèe tihú ñáhá nchàa cue tée cùu sacuéhé núú ñáyi israhél, ndíhi cue dútú cúnùu, ndíhi cue tée dàcuaha ñaha xii ñáyi nchaa tnúhu ní chídó tnùní ní chídó tnùní ndíi Moisés, nchaa cue tée-á<sup>n</sup> dàquee tihú ñáhá-güedě xii-í. Te sáá nduu te cahni ñaha-güedě xii-í, dico nduu úní sá cùu-í te ndoto-í —cächí-gá xáha<sup>n</sup>-gá xii-güedě.

<sup>32</sup> Te duca<sup>n</sup> ñí cáhá<sup>n</sup> Jèsús núú cuè tée xica cuu ndíhi-gá nàcuáa tecu tnùní váha-güedě tnúhu cähá<sup>n</sup>-gá. Te té Pèlú ní cana ñaha-dě xii-gá ñ<sup>n</sup> xio, te ní ngüíta-dé ténàá ñáhá-dě xii-gá ní cùu.

<sup>33</sup> Dico Jèsús ndíhi-ni ní nchócuñhu-gá ní ndàcoto-gá núú nchàa-güedě chi ndàa

sátá-gá xíndecu-güedé, te ní ngüíta-gá ténàá-gá té Pèlú, te xáha<sup>n</sup>-gá xii-dé:

—¡Xocuñí yòhó núu-í-a, chi dàtná cähá<sup>n</sup> yucu ñávaha cähá<sup>n</sup>-n! Chi ñá túú sàni iní-ò dàtná sání iní Yá Ndiöxí, chi ñ<sup>n</sup>-ni sàni iní-ò ndíhi dava-gá cue ñáyi ndècu ñuyú-a —cächí-gá xáha<sup>n</sup>-gá xii-dé.

<sup>34</sup> Te Jèsús ní cana-gá nchaa cue tée xica cuu ndíhi-gá, ndíhi nchaa ñáyi xíndecu-á<sup>n</sup>, te ní xáha<sup>n</sup>-gá:

—Nchaa ñáyi cuini chitnahá ñáhá xii-í, te xini ñuhu-xi vá cádá-gá-yu sá sání iní méé-yu, te ío cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. <sup>35</sup> Te nchaa ñáyi cuini sá ñà túú tnàhí ná yáha cundecu ñuyú-a cuíta nihnú-yu, dico nchaa ñáyi ñá túú tnàhí yùhú cuèi nándi sá ná yáha-yu cundecú-yu ñuyú-a sá cuendá-í, ndíhi sá cuendá tnúhu-í, te ñáyi-á<sup>n</sup> naníhí tàhú-yu. <sup>36</sup> Te cuèi nchaandi túhú sá ío ñuyú-a na nihí ñáyi cundecu ndíhí-yu, dico núu diu nchaa xíá<sup>n</sup> ná càda cuíta nihnú-yu te ñá túú vèdana nàndíhi-xi sá dúcá<sup>n</sup> ndècu ndíhí-yu nchaa xíá<sup>n</sup>. <sup>37</sup> Te ni ñ<sup>n</sup> sá ío ñuyú-a vá chíndèe-xi ñáyi cuendá naníhí tàhú-yu. <sup>38</sup> Te nchaa ñáyi na cùcaha<sup>n</sup> núu-xi cáhá<sup>n</sup> váha cuendá-í, ndíhi cuendá tnúhu-í núú nchàa ñáyi dàquee tihú ñáhá xii Yá Ndiöxí, ñáyi xíndecu ichi cuèhè ichi duha, te tnàhá yúhú Tée cùu ñaní tnáhá-yu ncháa-yu cùcaha<sup>n</sup> núu-í núu-yu òrè ná quixi tucu-í ndíhi cue espíritú xínú cuèchi núú Tàtà-í Dútú Ndiöxí. Te mee-gá cada cutnùní iní nchaa ñáyi sá yùhú ío càhnu cuu-í.

**9** Te na cächí tnúhu ndáá-í xii-ndo sá ío dava nchòhó ñáyi xíndecu iha vitna vá cùu-ni-ndo, chi cundecu-ni-ndo ndèe quiní-ndó sáá nduu ndíhu ndaha ñaha Yá Ndiöxí xii ñáyi, te dàvá-á<sup>n</sup> quiní-ndó sá ndácú-gá quidé-gá nchaandi túhú sá váha —cächí-gá



xăha<sup>n</sup>-gă xii cue tée xica cuu ndihi-gă ndihi cue ñáyiu-á<sup>n</sup>.

**Jèsús ní nadama dóó-gă ndihi núú-gă**

(Mt. 17:1-13; Lc. 9:28-36)

<sup>2</sup>Te núú ìnú nduu sá dúcá<sup>n</sup> ñí cáhá<sup>n</sup> Jèsús te ní xica-gă cuásaá-gă ìí<sup>n</sup> yucu dúcú<sup>n</sup>, te ndèca-gă té Pèlú, ndihi té Jàcobó, ndihi té Juàà cuásaá, te úní tñàhí-ni cue tée-á<sup>n</sup> ndécá-gă cuásaá. Te yucu-á<sup>n</sup> ndécú-gă ní nadama núú-gă, <sup>3</sup>te ní nadama dóó-gă. Te dóó-gă-á<sup>n</sup> sùúní ñí nduu cuixí<sup>n</sup> quiyí te tăsa<sup>n</sup>, te ni ìí ñáyiu ñuyú-a ñá túú ndàcú-yu naqueté-yu ìí<sup>n</sup> dóó nduu cuixí<sup>n</sup> dàtná ní nduu dóó-gă. <sup>4</sup>Te ní xiní-güedé té Moisés ndihi té Èliás nútñi-güedé ndihi-gă ndátnúhu ndihi ñaha-güedé xii-gă. <sup>5</sup>Te té Pèlú ní xăha<sup>n</sup>-dë xii Jèsús:

—Mèstrú, ¡váha ní cuu sá ndécú-ó iha vitna! Te na dàca-ní úní tñàhá vehe tnuvixi<sup>n</sup>, te ìí<sup>n</sup> cuu cuendá-n te ìí<sup>n</sup> cuu cuendá té Moisés te ìí<sup>n</sup> cuu cuendá té Èliás —càchí-dé xăha<sup>n</sup>-dë xii-gă.

<sup>6</sup>Te duca<sup>n</sup> ñí cáhá<sup>n</sup>-dé chi ío ní yùhú-güedé, te cuendá-ni ní cuu yáchí-dé ní cáhá<sup>n</sup>-dé, te ni mée-dé ñá túú ní cùtnuní iní-dé nása ndùu tñúhu ní cáhá<sup>n</sup>-dé. <sup>7</sup>Te òrè-á<sup>n</sup> ñí quexio ìí<sup>n</sup> vícò núú ndécú-güedé ndihi Jèsús ní dádähu ñaha-xi xii-güedé ndihi-gă, te xití vícò-á<sup>n</sup> ñí cáhá<sup>n</sup> Yă Ndiöxí ní tecú dóho-güedé, te xăha<sup>n</sup>-gă xii-güedé:

—Tée-a cùu-dé Déhe-í tée ío cùu iní-í, te cundedóho-ndo nchàa tñúhu cáhá<sup>n</sup>-dé —càchí-gă xăha<sup>n</sup>-gă xii-güedé.

<sup>8</sup>Te òré ní quide cuendá-güedé, te ñá túú-gă ní xiní-güedé cue tée úú-á<sup>n</sup> chi mee-ñá Jèsús ndécú.

<sup>9</sup>Te òré cuánuu ndihi ñaha-gă xii-güedé yucu-á<sup>n</sup>, te ní cáhá<sup>n</sup>-gă dóho-güedé, te xăha<sup>n</sup>-gă:

—Vá yôo ìí<sup>n</sup> cùñaha-ndo nchàa sá ñí xiní-ndó núú ñí sáá-ó-á, te cuu cáhá<sup>n</sup>-ndó dico ndéé ná yăha ndoto yùhú Tée cùu

ñaní tñàhá-ndó nchàa-ndo sá cùú-í —càchí-gă xăha<sup>n</sup>-gă xii-güedé.

<sup>10</sup>Núú xíá<sup>n</sup> cue tée-á<sup>n</sup> ñí xúhu<sup>n</sup> nahi-ni ìní-güedé nchaa sá ñí xiní-güedé núú ñí sáhá<sup>n</sup>-güedé ndihi Jèsús te ñá túú tñàhí ni cáhá<sup>n</sup>-güedé, dico ní ndúcú tñúhu núú tñàhá-güedé ná cuendá duca<sup>n</sup> ñí cáhá<sup>n</sup>-gă sá ndèé ná yăha ndoto-gă sá cùú-gă te dàtnuní cáhá<sup>n</sup>-güedé nàcuáa ndùu nchaa sá ñí xiní-güedé. <sup>11</sup>Te ní xícá<sup>n</sup> tñúhú-güedé núú Jèsús, te xăha<sup>n</sup>-güedé xii-gă:

—¿Cuíní-ndí cächí tñúhu-n nă cuendá cächí cue tée dàcuaha ñaha xii ñáyiu nchaa tñúhu ní chídó tñuní ndíi Moisés sá dīhna-gă té Èliás ndixi-dé te dàtnuní quixi Yá tendaha Yă Ndiöxí quixi ñuyú-a? —càchí-güedé xăha<sup>n</sup>-güedé xii-gă.

<sup>12</sup>Te Jèsús ní xăha<sup>n</sup>-gă:

—Ndáá sá códó nùu ìí<sup>n</sup> tée quixi-dé te cada-dé dàtná ní quide té Èliás, te tée-á<sup>n</sup> cada ndáá-dé nchaa nàcuáa cùu. Dico núú tütú Yă Ndiöxí cáhá<sup>n</sup>-xi cuendá yùhú Tée cùu ñaní tñàhá-ndó nchàa-ndo sá ío ndoho-í, te daquèe tihú ñàhá ñáyiu xii-í. <sup>13</sup>Te na cächí tñúhu-í xii-ndo vitna sá sá ní quixi ìí<sup>n</sup> tée ní quide dàtná ní xóo cada té Èliás, te cue ñáyiu ñá túú ní cãnehé-yu sá yíñúhu núú-dë, te ní quide ñàhá-yu xii-dé nchaa nàcuáa ní quixi iní mée-yu. Te núú tütú Yă Ndiöxí sa ndèé tñuní nchaa nàcuáa yáha-dé, te nchaa xíá<sup>n</sup> sa ní quide ñaha ñáyiu xii-dé —cächí-gă xăha<sup>n</sup>-gă xii-güedé.

**Jèsús quidé tătna-gă ìí<sup>n</sup> tée  
cuechi yèhi ñaha espíritú  
cúndihi yucu ñávaha**

(Mt. 17:14-21; Lc. 9:37-43)

<sup>14</sup>Te Jèsús ní ndexio-gă ndihi cue tée úní-á<sup>n</sup> núú xindecu dava-gă cue tée xica cuu ndihi-gă, te vâi vihi ñáyiu ndècu núú ndécú-güedé-á<sup>n</sup>, te tñàhá cue tée dàcuaha ñaha xii-yu nchaa tñúhu ní chídó tñuní ndíi Moisés xindecu, te

cue tée-á<sup>n</sup> nãndi tnúhu xãha<sup>n</sup>-güedë xii cue tée xica cuu ndihi Jesús. <sup>15</sup> Te òré ní xiní-yu ní ndexio-gá, te nchaá-yu ío ní cuñúhu-yu, te xinú-yu ní sáhá<sup>n</sup> ní cáhá<sup>n</sup> ndihi ñáhá-yu xii-gá. <sup>16</sup> Te ní xicá<sup>n</sup> tnúhú-gã núú cuè tée xica cuu ndihi-gá núu ná tnúhu ndàtnúhu-güedé ndihi cue tée-á<sup>n</sup>. <sup>17</sup> Te ìñ ñáiyu xĩndecu xía<sup>n</sup> ní xáhã<sup>n</sup>-yu xii-gá:

—Mèstrú, ndèca-í déhe-í véxi nànducu ñaha-í xii-n, chi yìhi ñaha espíritú cündìhi yucu ñávãha xii-dé, te ðiu xía<sup>n</sup> ní quide ní cuu ñihí-dé. <sup>18</sup> Te ío ndòho-dé chi súúní ndëni ní cuu ngötnii ñaha-xi xii-dé, te òré duca<sup>n</sup> quide ñaha-xi xii-dé te dànduá ñáhá-xí, te quène tĩnú yuhu-dé, te cùrúhñú nùhu-dé, te ndàda ruú<sup>n</sup> ñáhá-xí xii-dé. Te sa ní xáha<sup>n</sup>-í xii cue tée xica cuu ndihi-n sá queñúhu-güedé espíritú cündìhi yucu ñávãha yìhi ñaha xii-dé dico ñá túú ní ndàcu-güedé queñuhu-güedé-xi —càchí ñáiyu-á<sup>n</sup> xáhã<sup>n</sup>-yu xii-gá.

<sup>19</sup> Te Jèsús ní xáha<sup>n</sup>-gã:

—¡Nchaa nchòhò ñáiyu ndècu ñuyíú-a ío sàá iní-ndó, chi ñá túú cuíní-ndó quindáá iní-ndó Yã Ndiòxí, te ní cuu vài nduu quide ndee iní-í nchaa sá quídé-ndó! ¿Te ná ndéé ama vá dúcá<sup>n</sup>-gã cada-ndo-i? Te chí cándèca tée cùhú-á<sup>n</sup> táquixi iha —càchí-gã xáhã<sup>n</sup>-gã xii-yu.

<sup>20</sup> Te ñáiyu ndihi ñaha xii tée yìhi ñaha espíritú cündìhi yucu ñávãha-á<sup>n</sup> ndécá ñáhá-yu xii-dé cuáhá<sup>n</sup> ndéé núú Jèsús, te òré ní xiní ñáhá espíritú cündìhi yucu ñávãha-á<sup>n</sup> xii-gá, te ní ngüíta-ni-xi sàhni yìhi ñáhá tùcu-xi xii-dé, te ní dándúá ñáhá-xí xii-dé, te ní ngüíta-dé xíchí ñùhu-dé, te quène tĩnú yuhu-dé. <sup>21</sup> Te Jèsús ní xicá<sup>n</sup> tnúhú-gã núú tãtá-dë, te xáhã<sup>n</sup>-gã xii-dé:

—¿Ná ndéé ama ní ngüíta-xi duha ndòho déhe-n? —càchí-gã xáhã<sup>n</sup>-gã xii-dé.

Te tée-á<sup>n</sup> ní xáha<sup>n</sup>-dë xii-gá:

—Ndéé cùtnàhá cúú lĩhli-dé ní ngüíta espíritú cündìhi yucu ñávãha duha quide ñaha-xi xii-dé. <sup>22</sup> Te ní cùtítní xito dàngaunihnu ñaha-xi xii-dé núú ñùhú, te ní cutítní tucu xito dàngaunihnu ñaha-xi xii-dé ndute cuíní-xi cahni ñaha-xi xii-dé. Te ndèca-í-dé véxi núú-n te núu ndacu-n càda tátna-n-dë, te cundàhú iní ñáhá-n xii-ndí chindee ñaha-n —càchí-dé xáhã<sup>n</sup>-dë xii-gá.

<sup>23</sup> Te Jèsús ní xáha<sup>n</sup>-gã:

—Te ná cuendá càchí-n núu ndacu-í cada tátna-í déhe-n, chi nchaa ñáiyu na quindáá iní ñáhá xii-í te ñihí-yu sá ná càcá<sup>n</sup>-yu núú-í —càchí-gã xáhã<sup>n</sup>-gã xii-dé.

<sup>24</sup> Te tãtá tée cuechi-ã<sup>n</sup> ñihí ní cáhá<sup>n</sup>-dé xáhã<sup>n</sup>-dë xii-gá:

—Sàndáá iní ñáhà-í xii-n, dico chindee ñaha xii-í cuendá ná quindáá iní ñáhá-gã-í xii-n —càchí-dé xáhã<sup>n</sup>-dë xii-gá.

<sup>25</sup> Te Jèsús ndéhé-gã sá ìo vài ñáiyu ta tàcá núú ndécú-gã-á<sup>n</sup>. Te ní tenáá-gã espíritú cündìhi yucu ñávãha-á<sup>n</sup>, te xáhã<sup>n</sup>-gã xii-xi:

—Yòhò espíritú cündìhi yucu ñávãha, ní quide ñihí-n ní quide doho-n tée-a, dico vitna yúhú càchí-í sá queé-n yìqui cuñú-dé te vá ndĩhu-gã-n —càchí-gã xáhã<sup>n</sup>-gã xii espíritú cündìhi yucu ñávãha-á<sup>n</sup>.

<sup>26</sup> Te espíritú cündìhi yucu ñávãha-á<sup>n</sup> ní dácáná sàa ñaha-xi xii tée-á<sup>n</sup>, te ní sahni yìhi ñáhá tùcu-xi xii-dé, te dät-nùnì ní quee ñaha-xi xii-dé cuáhá<sup>n</sup>-xi, dico tée-á<sup>n</sup> chi dacàa-ni ndíyi càa-dé cätù-dé. Te nchaa ñáiyu xĩndecu xía<sup>n</sup> càchí-yu sá ní xihí-dé ní cùu. <sup>27</sup> Te Jèsús ní tñii-gã ndaha-dé ní ndocani ñaha-gã xii-dé, te ní ndacóo-dé ní nucúnutñii-dé.

<sup>28</sup> Te Jèsús cuándihu-gã xití vehe ndihi cue tée xica cuu ndihi-gã, te òré ndéhé-güedë ñá túú-gã ñáiyu, te ní xicá<sup>n</sup> tnúhú-güedë núú-gã, te xáhã<sup>n</sup>-güedë xii-gá:

—Cachí tnúhu xii-ndí ná cuendá ñá túú ní ndacu-ndí queñuhu-ndí espíritu cúndìhi yucu ñávàha yìhi ñaha xii téé-ǎ<sup>n</sup> —càchí-güedé xàha<sup>n</sup>-güedé xii-gá.

<sup>29</sup> Te Jèsús ní xàha<sup>n</sup>-gá xii-güedé:

—Na càchí tnúhu-í xii-ndo sá nñu òré cuiní-ndó queñuhu-ndo espíritu cúndìhi yucu ñávàha yìhi ñaha xii ñáyiu dàtná cútú espíritu cúndìhi-xi yìhi ñaha xii téé-ǎ<sup>n</sup> ní cùu ña, te xini ñuhu-xi sá ìo cáhá<sup>n</sup> ndìhi-ndo Yá Ndiòxí te ñá túú tnàhí ná caxi-ndo cáhá<sup>n</sup> ndìhi-ndo-gá, te duca<sup>n</sup> te ndacu-ndo queñuhu-ndo espíritu cúndìhi yucu ñávàha yìhi ñaha xii ñáyiu —càchí-gá xàha<sup>n</sup>-gá xii-güedé.

**Jèsús càhá<sup>n</sup> tucu-gá  
sá cahní ñaha-güedé xii-gá**

(Mt. 17:22-23; Lc. 9:43-45)

<sup>30</sup> Te Jèsús ní quee-gá núú ndécú-gá-ǎ<sup>n</sup> ndìhi cue téé xica cuu ndìhi-gá cuáhá<sup>n</sup>-gá ndìhi-güedé distrítú Galiléa, te cuiní-gá sá vǎ quini ñáyiu ndéé ichi cuáhá<sup>n</sup>-gá. <sup>31</sup> Te duca<sup>n</sup> ní sani iní-gá, chi mee-gá sa ñaha-gá sá ndáa cada-xi nàcuáa xàha<sup>n</sup>-gá xii cue téé xica cuu ndìhi-gá, te duha xàha<sup>n</sup>-gá xii-güedé:

—Yúhú Téé cùu ñaní tnáhá-ndó nchàa-ndo sáá ì<sup>n</sup> nduu te cuáha cuendá ñáhá-güedé xii-í núú cuè téé cùu úhú iní ñáhá, te cahni ñaha-güedé xii-í, dico nduu úní sá cútú-í te ndoto-í —càchí-gá xàha<sup>n</sup>-gá xii-güedé.

<sup>32</sup> Dico ñá túú tnàhí ni tècú tnùnì-güedé nása ndùu tnúhu ní cáhá<sup>n</sup>-gá, te ni ñá túú ní cùyì-güedé cǎcǎ<sup>n</sup> tnúhú-güedé núú-gá.

**Cue téé ndùcu tnúhu núú tnáhá nñu  
ndèdacàa-güedé ío-gá cúnúu**

(Mt. 18:1-5; Lc. 9:46-48)

<sup>33</sup> Te Jèsús ní quexio-gá ndìhi cue téé xica cuu ndìhi-gá ñúú Capèrnaúm, te òré sa ndècu-gá ì<sup>n</sup> vehe te ní xicá<sup>n</sup> tnúhú-gá núú-güedé, te xàha<sup>n</sup>-gá xii-güedé:

—¿Nándi cùu tnúhu ta xítnàha-ndo véxi? —càchí-gá xàha<sup>n</sup>-gá xii-güedé.

<sup>34</sup> Dico ñá túú tnàhí ni cáhá<sup>n</sup>-güedé cúnaha-güedé xii-gá nñu ná tnúhu xítnàha-güedé òré ñúhú-güedé ichi. Te duca<sup>n</sup> ní quide-güedé chi cuendá tá ndàtnúhu-güedé nñu ndèdacàa-güedé ío-gá cúnúu. <sup>35</sup> Te Jèsús ní ngóo-gá, te ní xàha<sup>n</sup>-gá xii ndi ùxúú cue téé xica cuu ndìhi-gá:

—Chí táquixi iha te cundedóho-ndo tnúhu na càhá<sup>n</sup>-í-a. Te núu ò dáva-ndo cuiní-ndó cúnúu-ndo, te cada-ndo sá cútú-ndó ñáyiu nchicú<sup>n</sup> cuí-nǎ, te cunu cuechi-ndo núú tnàha ñáyiu-ndo —càchí-gá xàha<sup>n</sup>-gá xii-güedé.

<sup>36</sup> Te Jèsús ní sanutnì-gá ì<sup>n</sup> té líhli cuádava tnuú-güedé, te dàtnùnì ní nguídèhé ñáhá-gá xii-dé, te xàha<sup>n</sup>-gá xii-güedé:

<sup>37</sup> —Nchaa ñáyiu na quèhe<sup>n</sup> cuendá ì<sup>n</sup> té líhli dàtná té líhli-a cuendá sá ñúhú iní ñáhá-yu xii-í ñá, te cada iní-yu sá yúhú ní quehe<sup>n</sup> cuendá-yu. Te nchaa ñáyiu na quèhe<sup>n</sup> cuendá ñáhá xii-í te ñá díú-ní mèe-í ní quehe<sup>n</sup> cuendá-yu, chi tnàhá Tǎtà-í Dútú Ndiòxí Yáá ní tendaha ñaha xii-í véxi-í ñuyúú-a ní quehe<sup>n</sup> cuendá-yu —càchí-gá xàha<sup>n</sup>-gá xii-güedé.

**Nchaa ñáyiu ñá túú cùu úhú iní  
ñáhá xii-o te cúndìhi ñahá-yu**

(Mt. 10:42; Lc. 9:49-50)

<sup>38</sup> Te té Juáa diu-ni ì<sup>n</sup> téé xica cuu ndìhi-gá ní xàha<sup>n</sup>-dè xii-gá:

—Mèstrú, ní xiní-ndí ì<sup>n</sup> téé càcunehe ñaha-dé xii-n, te queñuhu-dé espíritu cúndìhi yucu ñávàha yìhi ñaha xii ñáyiu, te nchúhú ñá túú ní dàña-gá-ndí duca<sup>n</sup> càda-dé, chi ñá túú xica cuu ndìhi ñaha-dé xii-o —càchí-dé xàha<sup>n</sup>-dè xii-gá.

<sup>39</sup> Te Jèsús ní xàha<sup>n</sup>-gá xii-güedé:

—Daña-ndo na càda nahi-dé ní cùu, chi ñá túú ni ì<sup>n</sup> ñáyiu ndìhi ndìhi-ni ndacu cáhá<sup>n</sup> cuèhé cuendá-í te núu càcunehe ñahá-yu xii-í, te quide-yu sá vǎ

yõo tnàhí ndàcu cada. <sup>40</sup> Te nchaá ñáyiú ñá túú cùu ùhú iní ñáhá xii-o te cùndìhì ñáhá-yu. <sup>41</sup> Te na càchí tnúhu-í xii-ndo sá cuè ñáyiú na tàxi ì<sup>n</sup> yaxi<sup>n</sup> ndute coho-ndo cuendá sá cúú-ndó cuè téé xica cuu ndìhì-í, te ñáyiú-á<sup>n</sup> sáá nduu te dacuéi sá ñihí-yu sá ndúú tãhù-yu — càchí-gá xãha<sup>n</sup>-gã xii-güedé.

**Cada cuendá-ó vã cùndècu-o  
ichi cuehé ichi duha**

(Mt. 18:6-9; Lc. 17:1-2)

<sup>42</sup> Te xãha<sup>n</sup> tùcu Jesús xii-güedé:

—Te núu ì<sup>n</sup> téé na dàcahá<sup>n</sup>-dé cue ñáyiú sàndáá iní ñáhá xii-í cada-yu nándi sá cuèhé sá dúhá, te váha-gá sá nõu na dàcutu ndeé-güedé ì<sup>n</sup> yúú yödó dũcú<sup>n</sup>-dè, te dàquée ñaha-güedé xii-dé xití ndute lámár, te ñá dífú sá cùndècu-dé duca<sup>n</sup> càda-dé. <sup>43</sup> Te núu ì<sup>n</sup> xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhù-ndó cuèi na cuíta ì<sup>n</sup> xio ndaha-ndo te ñá dífú sá quihí<sup>n</sup>-ndó ñihíí ní ndúú-ndó nõú ùhú núú ndàhú núú dícó sáá ndáhá itá ñuhú ní caa ní quihí<sup>n</sup>. <sup>44</sup> Chi yàcá<sup>n</sup> cúú-xí nõú ñà túú tnàhí ndàhvã ñuhú, te ío ndoho-ndo cùndecu-ndo xíá<sup>n</sup> ní caa ní quihí<sup>n</sup>. <sup>45</sup> Te núu ì<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhù-ndó cuèi na cuíta ì<sup>n</sup> xio sáhá-ndó, te ñá dífú sá quihí<sup>n</sup>-ndó ñihíí ní ndúú-ndó nõú ùhú núú ndàhú núú dícó sáá ndáhá itá ñuhú ní caa ní quihí<sup>n</sup>. <sup>46</sup> Chi yàcá<sup>n</sup> ñá túú tnàhí ndàhvã ñuhú, te ío ndoho-ndo cùndecu-ndo xíá<sup>n</sup> ní caa ní quihí<sup>n</sup>. <sup>47</sup> Te núu ì<sup>n</sup> xio tinùu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cùndècu-ndo núú ndécú Yã Ndiõxí táxi tnùnì-gá cuèi na cuíta ì<sup>n</sup> xio tinùu-ndo, te ñá dífú sá ndì nduú xio núú-ndó quihí<sup>n</sup>-ndó nõú ùhú núú ndàhú. <sup>48</sup> Chi yàcá<sup>n</sup> ñá túú

tnàhí ndàhvã ñuhú, te ío ndoho-ndo cùndecu-ndo xíá<sup>n</sup> ní caa ní quihí<sup>n</sup>.

<sup>49</sup> Te dàtná quidé-güedé quitì sàhni-güedé chìhi-güedé cuñú-dì ñíf te dàquée-güedé núú ñuhú, duca<sup>n</sup> sãtnahá-xi ndoho cue ñáyiú chi ío ndohó-yu. <sup>50</sup> Te ñíf chi ío váha nàndíhì-xi, dico núu na ndùu víxi<sup>n</sup>-xi te ñá túú-gã nándìhì-xi te ní ñà túú-gã nása cada-o ndùu ùhá tucu-xi. Te ío váha cada cuendá-ndó nàcuáa cundecu-ndo cuendá cuu-ndo ñáyiú váha, te duca<sup>n</sup> te cuu-ndo dàtná ñíf sá ñà túú ndùu víxi<sup>n</sup>, te ío váha cundecu ndìhì tnàha-ndo —cachí-gá xãha<sup>n</sup>-gã xii-güedé.

**Jèsús càhá<sup>n</sup>-gã cuendá  
cue ñáyiú dàña tnaha**

(Mt. 19:1-12; Lc. 16:18)

**10** Te Jèsús ní xica-gá cuáhá<sup>n</sup>-gã ní yáha-gá yucu distrítú Jùdeá ní téhndé-gã ndàa ingá xio yúte Jòrdán. Te yàcá<sup>n</sup> ndécú-gã ní tacá tucu cuèhé víhí ñáyiú, te ní ngúita-ni tucu-gã dánèhé ñáhá-gã xii-yu tnúhu-gã chi duca<sup>n</sup> tnàhí quide-gã. <sup>2</sup> Te ní quèxio ì<sup>n</sup> úú cue téé cùu fariséú núú ndécú Jèsús xíto ndèé ñáhá-güedé xii-gã nõu nása cunduu tnúhu càhá<sup>n</sup>-gã, te xãha<sup>n</sup>-güedé xii-gã:

—Véxi-ndí xicá<sup>n</sup> tnúhú-ndí núú-n nõu cuu dàña ì<sup>n</sup> téé ñadìhì-dé ã<sup>n</sup> ñáhá — càchí-güedé xãha<sup>n</sup>-güedé xii-gã.

<sup>3</sup> Te Jèsús ní xãha<sup>n</sup>-gã xii-güedé:

—Te nchòhó, ñása ní cachí ndíi Moisés cada-ndo-i? —càchí-gã xãha<sup>n</sup>-gã xii-güedé.

<sup>4</sup> Te ní xãha<sup>n</sup>-güedé xii-gã:

—Ndíi Moisés ní cachí ndíi sá cúú dàña ì<sup>n</sup> téé ñadìhì-dé dícó-ni sá cãdũha-dé ì<sup>n</sup> tutú cuãñaha-dé, te núú tütú-á<sup>n</sup> codo tnùnì sá ní dáña ñaha-dé, te duca<sup>n</sup> te cuu dàña-dé ñadìhì-dé —càchí-güedé xãha<sup>n</sup>-güedé xii-gã.

<sup>5</sup> Te Jèsús ní xãha<sup>n</sup>-gã xii-güedé:

—Te duca<sup>n</sup> ní chídó tnùní ndí Moisés cada-ndo cuendá sá ío sàá iní-ndó. <sup>6</sup> Dico Yá Ndiöxí cútñàhá ní cadúha-gá ñuyíú ndíhi nchaa sá ío, chi téé ñadìhí ní cadúha-gá. <sup>7</sup> Te xíá<sup>n</sup> núu nchaa cue téé na nihí ñadìhí-xi, te ìí<sup>n</sup>-ná cada-güedé tátá-güedé ndíhi náná-güedé, chi mee-ná ñadìhí-güedé cuu cuu ndíhi-güedé. <sup>8</sup> Te cue ñáyíu úú-á<sup>n</sup> ñà túú-gá ndí díí<sup>n</sup> ndí díí<sup>n</sup> yìqui cuñú cùú-yu, chi cada iní-ndó sá íí<sup>n</sup>-ná yìqui cùñú cùú-yu. <sup>9</sup> Te xíá<sup>n</sup> núu ñá túú ndùu váha-xi daña cuè téé ñadìhí-güedé, chi mee Yá Ndiöxí ní cachí-gá sá cùú úú-yu cundecú-yu ndéé naa ndéé cuú-yu —càchí-gá xáha<sup>n</sup>-gá xii-güedé.

<sup>10</sup> Te òré yíhí Jèsús ndíhi cue téé xíca cuu ndíhi-gá vehe, te ní xícá<sup>n</sup> tnúhú-güedé núú-gá nása ndùu tnúhu ní cáhá<sup>n</sup>-gá cuendá cue ñáyíu dàña tnaha.

<sup>11</sup> Te Jèsús ní xáha<sup>n</sup>-gá xii-güedé:

—Te núu íí<sup>n</sup> téé na dàña-dé ñadìhí-dé te naquehe<sup>n</sup>-dé ingá ñadìhí, te ío nèhé quídé-dé, te íí<sup>n</sup>-ni cuèchi cùu-xi ndíhi cuèchi quide téé ndèca ñadìhí te càhá<sup>n</sup> ndíhi-dé ingá ñadìhí. <sup>12</sup> Te ìíu-ni duca<sup>n</sup> sátnahá-xi cùu tucu ñáyíu ìíhí te núu na dàñá-yu yíí-yu te naquehe<sup>n</sup>-yu ingá téé, chi íí<sup>n</sup>-ni cuèchi cùu-xi sá quídé-yu ndíhi sá quídé cuè ñáyíu ìíhí ndécú yíí-xi, te càhá<sup>n</sup> ndíhí-yu ingá téé —càchí-gá xáha<sup>n</sup>-gá xii-yu.

### Jèsús xícá<sup>n</sup> táhú-gá núú Yá Ndiöxí cuendá landú

(Mt. 19:13-15; Lc. 18:15-17)

<sup>13</sup> Te íí<sup>n</sup> úú ñáyíu ndècá-yu landú líhli cuáhá<sup>n</sup> núú Jèsús, chi cuíní-yu sá téndàha ñaha-gá xii-güexi. Te cue téé xíca cuu ndíhi-gá ní ngúíta-güedé ténàá ñáhá-güedé xíí-yu, te xáha<sup>n</sup>-güedé sá vǎ dúcá<sup>n</sup> càdá-yu. <sup>14</sup> Te òré ní xiní-gá sá dúcá<sup>n</sup> quide-güedé, te ní cudéé<sup>n</sup>-gá núú-güedé, te xáha<sup>n</sup>-gá xii-güedé:

—Chí dàñá ná quixi nahi cue landú líhli-á<sup>n</sup> nùù-í-a te vǎ càdí-ndó ìchi-güexi,

chi dàtná cùú vǎha iní cue landú líhli-á<sup>n</sup> duca<sup>n</sup> cùu váha iní cue ñáyíu yíndaha Yá Ndiöxí. <sup>15</sup> Te na càchí tnúhu ndáá-í xii-ndo sǎ núu vǎ quíndáá iní ñáhá-ndó dàtná quídé cuè landú líhli sàndáá iní ñáhá xii-í, te vǎ ndíhu ndaha ñàha Yá Ndiöxí xii-ndo —càchí-gá xáha<sup>n</sup>-gá xii-güedé.

<sup>16</sup> Te sátá dúcá<sup>n</sup> ní xáha<sup>n</sup>-gǎ te ní nguídèhé-gǎ cue landú-á<sup>n</sup> te ní tendaha ñàha-gǎ xii-güexi, te ní xícá<sup>n</sup> táhú-gǎ núú Yǎ Ndiöxí cuendá-güexi.

### Íí<sup>n</sup> téé cuica càhá<sup>n</sup> ndíhi-dé Jèsús

(Mt. 19:16-30; Lc. 18:18-30)

<sup>17</sup> Te òré sa ñúhu ichi Jèsús caca-gǎ quíhí<sup>n</sup>-gǎ ingá xichi ni cùu ní quexíu cunu íí<sup>n</sup> téé ní nguíñí xítí-dé núú-gǎ, te xáha<sup>n</sup>-dǎ xii-gǎ:

—Yòhó Mèstrú, cùu-n téé ío váha iní-xi, te cuíní-í núu vǎ cùndèe iní-n càchí tnúhu-n nǎ cùú sǎ càdá-í cuendá nduu táhù-í cundecú-í ndíhi Yá Ndiöxí ní caa ní quíhí<sup>n</sup> —càchí-dé xáha<sup>n</sup>-dǎ xii-gǎ.

<sup>18</sup> Te Jèsús ní xáha<sup>n</sup>-gǎ xii-dé:

—¿Te cùtnuní iní-n nàcuáa ndùu tnúhu càhá<sup>n</sup>-n sǎ yǎhú váha iní-ǎ<sup>n</sup>? Chi íí<sup>n</sup> ìíí-ni Yá Ndiöxí ío váha iní-gǎ. <sup>19</sup> Te yòhó xiní-n nàcuáa ní cachí Yá Ndiöxí cada ñáyíu, te duha ní cachí-gǎ: “Nchòhó cue téé vǎ càhá<sup>n</sup> ndíhi-ndo ñadìhí te núu ñá díú ñadìhí-ndó cùú-yu, te duca<sup>n</sup>-ni nchòhó cue ñáyíu ìíhí tucu vǎ càhá<sup>n</sup> ndíhi-ndo tée te núu ñá díú yíí-ndo cuu-güedé, te vǎ cáhí-ndó tnàha ñáyíu-ndo, te ni vǎ dúhú-ndó sǎ ndécú ndíhí-yu, te ni vǎ dácàcu-ndo cuèchi neñúú sǎ cùú-xí tnàha ñáyíu-ndo, te ni vǎ dácùandehnde-ndo, te canehe-ndo sǎ yíñùhu núú tátá-ndó ndíhi núú náná-ndó”, duha ní cachí Yá Ndiöxí cada ñáyíu —càchí-gǎ xáha<sup>n</sup>-gǎ xii-dé.

<sup>20</sup> Te téé-á<sup>n</sup> ní xáha<sup>n</sup>-dǎ xii-gǎ:

—Mèstrú, nchaa xíá<sup>n</sup> ní ngúíta-í quídè-í ndéé cútñàhá cúú lándú-í —càchí-dé xáha<sup>n</sup>-dè xii-gá.

<sup>21</sup> Te Jèsús ní xíndéhé ñàha váha-gá xii-dé, te ní cuu váha iní ñàhá-gá, te ní xáha<sup>n</sup>-gá xii-dé:

—Dico cùmání ìngá núú sá cadá-n. Vitna te quíhí<sup>n</sup>-n te dico-n nchàa sá ndécú ndìhi-n, te díhú<sup>n</sup>-n cuàha táhú-n cuè ñáyi ndàhú. Te duca<sup>n</sup>, te nduu táhú-n nùcúndecu váha-n núú ndécú Yá Ndióxi táxi tñuní-gá, te sátá ná yáha duca<sup>n</sup> càda-n, te quixi-n chitnahá ñàhá-n xii-í cuèi na ndòho-n datná ndoho-í —càchí-gá xáha<sup>n</sup>-gá xii-dé.

<sup>22</sup> Te sá dúcá<sup>n</sup> ñí xáha<sup>n</sup> Jèsús xii-dé te ío ní cundiýi-dé chi ío cuica-dè, te ní xica-dé cuánuhú-dé.

<sup>23</sup> Te ní ndacoto-gá ñi càndéé dñi-gá, te ní xáha<sup>n</sup>-gá xii cue téé xica cuu ndìhi-gá:

—Cue ñáyi cuica chi ío úhú quíndáá iní-yu Yá Ndióxi cuèndá ndíhu ndaha ñàha-gá xii-yu —càchí-gá xáha<sup>n</sup>-gá xii-güedé.

<sup>24</sup> Te cue téé xica cuu ndìhi-gá-á<sup>n</sup> ìo ní cuñúhu-güedé nàcuáa ní cáhá<sup>n</sup>-gá, te ní xáha<sup>n</sup> tucu-gá xii-güedé:

—Nchòhó cue téé xica cuu ndìhi-í càchí tñúhu tucu-í xii-ndo sá ìo úhú quíndáá iní cue ñáyi cuica Yá Ndióxi cuèndá ndíhu ndaha ñàha-gá xii-yu, chi sàni iní-yu sá ncháá sá ndécú ndìhí-yu dàcácu nihnu ñaha-xi xii-yu núú ùhú núú ndàhú. <sup>25</sup> Te yáchí-gá yáha ìi<sup>n</sup> caméyu yaú ìi<sup>n</sup> yiqui tìcú dàcúxí sá quíndáá iní ìi<sup>n</sup> ñáyi cuica Yá Ndióxi cuèndá ndíhu ndaha ñàha-gá xii-yu —càchí-gá xáha<sup>n</sup>-gá xii-güedé.

<sup>26</sup> Te cue téé xica cuu ndìhi-gá ní cuñúhu vñhi-gá-güedé sá dúcá<sup>n</sup> ñí cáhá<sup>n</sup>-gá, te ní ngúíta-güedé xitñàha-güedé:

—¿Te yoo sa ndacu naníhí tàhú te núú duca<sup>n</sup> vài<sup>m</sup>? —càchí-güedé xitñàha-güedé.

<sup>27</sup> Te Jèsús ní xíndéhé váha ñaha-gá xii-güedé, te ní xáha<sup>n</sup>-gá:

—Nchaa ñáyi ñuyú-a chi vá ndácú-yu ná cadá-yu nàcuáa ndíhu ndaha ñàha Yá Ndióxi xii-yu, dico mee-gá chi ndacu-gá ndíhu ndaha ñàha-gá xii-yu, chi nchaandi túhú sá váha ndacu-gá quídé-gá —càchí-gá xáha<sup>n</sup>-gá xii-güedé.

<sup>28</sup> Te té Pèlú ní xáha<sup>n</sup>-dè xii-gá:

—Nchúhú ní dándòo-ndí nchaandi túhú sá ndécú ndìhi-ndí te ní tuha ñaha-ndí xii-n —càchí-dé xáha<sup>n</sup>-dè xii-gá.

<sup>29</sup> Te Jèsús ní xáha<sup>n</sup>-gá xii-dé:

—Na càchí tñúhu ndáa-í xii-ndo sá ncháá ñáyi na dándóo vehe-xi, àdi ñaní-xi, cúha-xi, tātá-xi, náná-xi, déhe-xi, àdi ñuhu-xi, te núú duca<sup>n</sup> na cadá-yu sá cuèndá-í ndìhi sá cuèndá tñúhu-í, <sup>30</sup> te ío-gá cuéhé sá cuñàha Yá Ndióxi cundecu ndìhí-yu, chi níhí-yu vehé-yu, ñuhú-yu, ñaní-yu, cúha-yu, náná-yu, déhe-yu, te ñá dñú-ní sá nchàa xíá<sup>n</sup> níhí-yu cundecu ndìhí-yu, chi tñàhá nduu táhú-yu cundecu ndìhi ñàhá-yu xii-í ni caa ni quíhí<sup>n</sup> ná sàá nduu. Dico díhna-gá ndoho tñahá-yu núú ñuyú-a sá cuèndá-í. <sup>31</sup> Te dava ñáyi cunuu ndecu ichi Yá Ndióxi vitna, ñáyi-á<sup>n</sup> sáá nduu te vá ìo-gá cunúú-yu dàtná cúnúú-yu vitna, te dava ñáyi nchicú<sup>n</sup> ñá túú cunuu vitna ñáyi-á<sup>n</sup> sáá nduu te ío cunúú-yu —càchí-gá xáha<sup>n</sup>-gá xii-güedé.

**Jèsús càhá<sup>n</sup> tucu-gá  
sá cáhni ñàha-güedé xii-gá**

(Mt. 20:17-19; Lc. 18:31-34)

<sup>32</sup> Te ñuhu Jesús ichi ndìhi cue téé xica cuu ndìhi-gá cuásaá ndìhi ñaha-gá xii-güedé ñuu Jerusálén, te yòdo nuu-gá núú-güedé cuásaá. Te cue téé-á<sup>n</sup> xicuñúhu-güedé sá dúcá<sup>n</sup> cuáhá<sup>n</sup>-gá ñuu Jerusálén, te dava cue ñáyi xinchicú<sup>n</sup> xiyùhú-yu. Te ní taudí<sup>n</sup>-gá

ndi ùxúú cue tée xica cuu ndihi-gá, te ní ngúíta-gá cání-gã cuèndú núú-güedě nchaa nàcuáa yáha-gá. <sup>33</sup>Te xáha<sup>n</sup>-gã xii-güedě:

—Vitna ñùhu-o ichi cuásaá-ó ñùú Jerusálén, te yàcá<sup>n</sup> cuáha cuèndá ñáhá-güedě xii yúhú Tée cùu ñaní tnáhá-ndó nchàa-ndo núú cuè tée cùu dútú cúnùu, ndihi núú cuè tée dàcuaha ñaha xii ñáyi nchaa tnúhu ní chídó tnùní ndíí Moisés. Te ñiú cue tée-á<sup>n</sup> cūñaha-güedě xii dava-gá cue tée sá cáhní ñaha-güedé xii-í, te cuáha cuèndá ñáhá-güedě xii-í núú cuè tée ñá túú cùu cue tée isràél. <sup>34</sup>Te cue tée-á<sup>n</sup> cudíquí ndeé ñáhá-güedě xii-í, te caniha-güedě ndihi ñíí, te tiú díí ñáhá-güedě, te cahni ñaha-güedě xii-í dico nduu úní sá cùú-í te ndoto-í —càchí-gá xáha<sup>n</sup>-gã xii-güedě.

**Té Jàcobó ndihi té Juàá càhá<sup>n</sup>  
ndàhú-güedé núú Jèsús sá  
cádá-gã ñí<sup>n</sup> sá cuíní-güedé**

(Mt. 20:20-28)

<sup>35</sup>Te cue déhe té Zebèdeú té Jàcobó ndihi té Juàá ní quexio-güedé núú Jèsús, te xáha<sup>n</sup>-güedě xii-gá:

—Mèstrú, véxi-ndí càhá<sup>n</sup> ndàhú-ndí núú-n núu vá cündèe iní-n càda-n ñí<sup>n</sup> sá cuíní-ndí —càchí-güedé xáha<sup>n</sup>-güedě xii-gá.

<sup>36</sup>Te Jèsús ní xicá<sup>n</sup> tnúhú-gã núú-güedě, te xáha<sup>n</sup>-gã:

—¿Ná cùú sã cuíní-ndó càda-í-í? —càchí-gá xáha<sup>n</sup>-gã xii-güedé.

<sup>37</sup>Te ní xáha<sup>n</sup>-güedě xii-gá:

—Cuíní-ndí sá òré ná sãá nduu cündecu-n núú táxí tnùní-n, te ñí<sup>n</sup>-ndí cunucóo-ndí xio cùha-n te ñí<sup>n</sup>-ndí cunucóo-ndí xio dàtni-n —càchí-güedé xáha<sup>n</sup>-güedě xii-gá.

<sup>38</sup>Te Jèsús ní xáha<sup>n</sup>-gã xii-güedé:

—Nchòhó, ñá túú cùtnuní iní-ndó nàcuáa ndùu sá xicá<sup>n</sup>-ndó nùú-í. ¿Te náa cundee iní-ndó dándoho ñaha ñáyi

xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-á<sup>n</sup>? —càchí-gá xáha<sup>n</sup>-gã xii-güedé.

<sup>39</sup>Te ní xáha<sup>n</sup>-güedě xii-gá:

—Cundee iní-ndí yáha-ndí nchaa nàcuáa càhá<sup>n</sup>-n-á<sup>n</sup> —càchí-güedé xáha<sup>n</sup>-güedě xii-gá.

Te Jèsús ní xáha<sup>n</sup>-gã xii-güedé:

—Ndáá sá cündèe iní-ndó ndòho-ndo nchaa nacúaa ndòho-í, te cundee tùcu iní-ndó càhni ñahá-yu xii-ndo, chi yúhú cahni ñahá-yu xii-í. <sup>40</sup>Dico sá dúcá<sup>n</sup> cuíní-ndó sã ñí<sup>n</sup>-ndó cùnucóo-ndo xio cuhá-í te ñí<sup>n</sup>-ndo cùnucóo-ndo xio datni-í, te xíá<sup>n</sup> chi ñá díú yúhú tàù-í cachí-í te núú sá cùú cùnucóo-ndo àdi sá vã cùú cùnucóo-ndo, chi mee Tãtà-í Dútú Ndiòxí cachí-gá te núú ná cùú ñáyi nduu táhú cunucóo ñíni-í dàvá-á<sup>n</sup> —càchí-gá xáha<sup>n</sup>-gã xii-güedé.

<sup>41</sup>Te òré ní níhí ùxí-gá cue tée xica cuu ndihi-gá tnúhu nàcuáa ndùu sá cuíní té Jàcobó ndihi ñaní-dé té Juàá, te ní cudéé<sup>n</sup>-güedě núú cuè tée úú-á<sup>n</sup>. <sup>42</sup>Te Jèsús ní cana-gá nchaa cue tée xica cuu ndihi-gá-á<sup>n</sup>, te ní xáha<sup>n</sup>-gã xii-güedé:

—Nchòhó xini-ndó sã cuè tée yìndaha ñí<sup>n</sup> nació<sup>n</sup> quide-güedé sá ño cùnuu-güedé, te nchaa dava-gá cue tée cündihi-güedé tnàhá-güedé quídé-güedé sá ño cùnuu-güedé. <sup>43</sup>Dico nchòhó chi vá dúcá<sup>n</sup> càda-ndo. Chi núú dava-ndo cuíní-ndó cùnuu-ndo te xini ñuhu-xi cunu cuechi núú tnáhá-ndó te vá cadá-ndó sã cúnùu-ndo. <sup>44</sup>Te núú dava-ndo cuíní-ndó quène cáva-ndo, te cuu-ndo dàtná cue ñáyi ñá túú tnàhí dàñá quee núú chíú<sup>n</sup> pàtróó<sup>n</sup>-xi cunu cuechi núú tnáhá-ndó. <sup>45</sup>Te yúhú Tée cùu ñaní tnáhá-ndó nchàa-ndo, chi ñá túú vèxi-í sá cúnú cuèchi ñáyi núú-í, chi véxi-í sá cúnú cuèchi-í núú-yu. Te cuú-í ñuyúú-a cuèndá vài-yu cácu nihnu núú ùhú núú ndàhú —càchí-gá xáha<sup>n</sup>-gã xii-güedé.

**Jèsús quidé tātna-gá ìí<sup>n</sup> téé  
cuàá nání-dě Bartimeú**

(Mt. 20:29-34; Lc. 18:35-43)

<sup>46</sup>Te Jèsús ní quexìo-gá ñuú Jericó ndìhi cue téé xìca cuu ndìhi-gá, te ní yáha-gá ndìhi-güedé ichi xití ñuú-á<sup>n</sup>, te ío cuéhé ñáyi nchìcú<sup>n</sup> ñáhá xii-gá cuáhá<sup>n</sup> te ìí<sup>n</sup> xio yuhu ichi sá ní quee xití ñuú-á<sup>n</sup> núcõo ìí<sup>n</sup> téé cuàá nání-dě Bartimeú, te tātá-dě nání-dě Tìmeú, te téé-á<sup>n</sup> núcõo-dé yuhu ichi-á<sup>n</sup> xicá<sup>n</sup> ndàhú-dé. <sup>47</sup>Te téé-á<sup>n</sup> ní cutnùni iní-dé sá Jèsús téé ñuú Nazàrèt ñúhú-dě ichi, te ní ngüíta-dé ñhi càhá<sup>n</sup>-dé, te xáha<sup>n</sup>-dë xii-gá:

—Jèsús, ñaní tnáhá ndíi Dàvíi, cundàhú iní ñáhá xii-í! —càchí-dé xáha<sup>n</sup>-dë xii-gá.

<sup>48</sup>Te vài ñáyi tènáá ñáhà-yu xii-dé, te xáhà<sup>n</sup>-yu sá ná càdí-dé yuhu-dé dico uu<sup>n</sup>-gá ñhi ní cáhá<sup>n</sup>-dé xáha<sup>n</sup>-dë xii-gá:

—Jèsús, ñaní tnáhá ndíi Dàvíi cundàhú iní ñáhá xii-í! —càchí-dé xáha<sup>n</sup>-dë xii-gá.

<sup>49</sup>Te Jèsús ní ngüíñí-gá te ní xáha<sup>n</sup>-gá xii cue téé ndìhi-gá:

—Chí cuànguaca téé cuàá-á<sup>n</sup> candeca-ndo-dë quixi iha —càchí-gá xáha<sup>n</sup>-gá.

Te cue téé-á<sup>n</sup> ní xica-güedé cuànguaca-güedé téé cuàá-á<sup>n</sup>, te òré ní quexìo-güedé núú-dë te ní xáha<sup>n</sup>-güedé xii-dé:

—Ndacuñí te vá ndìhú-gá iní-n, na quíhí<sup>n</sup>-ó chi càna ñaha Jesús xii-n —càchí-güedé xáha<sup>n</sup>-güedé xii-dé.

<sup>50</sup>Te téé-á<sup>n</sup> ní xócání-dë dóo ndíxí-dë, te ndìhi-ni ní ndacuñí-dé te ní xica-dé cuáhá<sup>n</sup>-dé núú Jèsús. <sup>51</sup>Te òré ní quexìo-dé te ní xicá<sup>n</sup> tnúhú-gá núú-dë, te xáha<sup>n</sup>-gá xii-dé:

—¿Ná cuíni-n càda ñaha-í xii-n-i? —càchí-gá xáha<sup>n</sup>-gá xii-dé.

Te téé cuàá-á<sup>n</sup> ní xáha<sup>n</sup>-dë xii-gá:

—Mèstrú, cuíni-í cada tātna-n nùú-í cuèndá cundehe-í —càchí-dé xáha<sup>n</sup>-dë xii-gá.

<sup>52</sup>Te Jèsús ní xáha<sup>n</sup>-gá xii-dé:

—Cuanùhú vitna, chi sa ní ndúha núú-n chi ní sándáá iní-n Yá Ndiöxí —càchí-gá xáha<sup>n</sup>-gá xii-dé.

Te òré-ni-á<sup>n</sup> ní ndúha núú-dë te nchìcú<sup>n</sup>-dé Jèsús cuáhá<sup>n</sup>.

**Jèsús cuànguahu-gá ñuú Jerusàlén**

(Mt. 21:1-11; Lc. 19:28-40; Jn. 12:12-19)

**11** Te Jèsús ní cuyatni-gá ndìhi cue téé xìca cuu ndìhi-gá ñuú Bè-taniá, ndìhi ñuú Bèttagé, te xíá<sup>n</sup> cáá yùcu nani Olívú, te yatni víi-ná xíá<sup>n</sup> cáá ñuú Jerusàlén. Te Jèsús ní cana-gá úú-ni tnàhá cue téé xìca cuu ndìhi-gá. <sup>2</sup>Te ní xáha<sup>n</sup>-gá xii-güedé:

—Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup> te naníhí-ndó ìí<sup>n</sup> búrru ndètníi-di, te vátá yõo ìí<sup>n</sup>-gá codo ñàha xii-di, te nandaxi-ndo-di te candeca-ndo-di quixi. <sup>3</sup>Te núu yoo na càcá<sup>n</sup> tnúhú nùú-ndó ná cuèndá nándaxi-ndo-di, te cúñaha-ndo sá yùhú Yaá xicá cùu ndìhi-ndo xini ñuhu-í-di, te na yáha canehe chiu<sup>n</sup>-í-di te ndìhi-ni natendaha-í-di, duha cúñaha-ndo —càchí-gá xáha<sup>n</sup>-gá xii-güedé.

<sup>4</sup>Te cue téé-á<sup>n</sup> ní xica-güedé cuáhá<sup>n</sup>-güedé, te òré ní quexìo-güedé ñuú-á<sup>n</sup> te ní naníhí-güedé ìí<sup>n</sup> búrru ndètníi-di ìí<sup>n</sup> yutnu ñihnu yatni ìí<sup>n</sup> yuyehe vehe caa yatni yuhu ichi, te ní ngüíta-güedé nándaxi-güedé-di.

<sup>5</sup>Te mei òré nándaxi-güedé-di ní quexìo ñáyi xáhà<sup>n</sup>-yu xii-güedé:

—¿Ná cuèndá nándaxi-ndo búrru-á<sup>n</sup>-i? —càchí-yu xáhà<sup>n</sup>-yu xii-güedé.

<sup>6</sup>Te cue téé-á<sup>n</sup> ní xáha<sup>n</sup>-güedé xii-yu nàcuáa ní xáha<sup>n</sup> Jèsús cúñaha-güedé. Te sátá dúcá<sup>n</sup> te ní dāñà-yu ndèca-güedé búrru-á<sup>n</sup> cuáhá<sup>n</sup> núú ndécú Jèsús. <sup>7</sup>Te òré ní quexìo-güedé ndìhi-di núú ndécú-gá, te ní sacá<sup>n</sup> ndodo-güedé



dóo-güedě sátá-di, ní ngódó ñàha Jesús xii-di. <sup>8</sup>Te ío cuéhé ñáyiú ta sàcá<sup>n</sup>-yu dóo-yu ichi cuáhá<sup>n</sup>-gá cuendá núú dóo-yu-á<sup>n</sup> yáha-gá ndihi quití yòdo-gá, te davá-yu xèhndé-yu ndaha yùtnu ta sacá<sup>n</sup>-yu cuáhá<sup>n</sup>.

<sup>9</sup>Te nchaa ñáyiú yòdo nuu núú-gá ndihi nchaa ñáyiú nchicú<sup>n</sup> ndàa sátá-gá ní nguíta-yu níhi càhá<sup>n</sup>-yu, te càchí-yu:

—Ío càhnu cuu Yaá-a! ¡Te Yá Ndióxi ná chindee ñaha-gá, chi diu-gá cúú-gá Yaá ní tendaha-gá véxi quide núú-gá! <sup>10</sup>¡Te diu-ni Yaá-á cúú-gá Yaá véxi quindaha ñaha xii-o datná ní xóo cada ndíi Dávi! ¡Te ndéé nchaa sá ío andiu na càchí-xi sá ío càhnu cuu-gá! —duha càchí-yu.

<sup>11</sup>Te Jèsús ní quexio-gá ñuú Jerusálén, te cuánguihu-gá xití veñúhu càhnu sá ío cùnunu, te ní xíndéhé vâha-gá nchaa sá ndécú xití veñúhu-á<sup>n</sup>. Te sátá dúcá<sup>n</sup> te ní ndee-gá cuáhá<sup>n</sup>-gá ñuú Bètaniá ndihi ndi ùxúú cue téé xica cuu ndihi-gá chi sa ní cuaa.

**Jèsús xâha<sup>n</sup>-gá xii yutnu ngüxí sá vâ cúú<sup>n</sup>-gá sávidí-xi**

(Mt. 21:18-19)

<sup>12</sup>Te nduu tnéé-á<sup>n</sup> ní quee Jèsús ñuú Bètaniá ndihi cue téé xica cuu ndihi-gá, te ichi ñùhu-gá ní xíhí-gá docó. <sup>13</sup>Te xica ní xiní-gá nútní ñi<sup>n</sup> yutnu ngüxí, te ní xica-gá cuándéhé-gá núu ndéé sávidí-xi te ñá túú nâ ndéé, chi mee-ni ndàha-xi ndéé chi ñá díú yóó sácündéé sávidí-xi. <sup>14</sup>Te Jèsús ní xâha<sup>n</sup>-gá xii yutnu ngüxí-á<sup>n</sup>:

—Vitna te vá yóo ñi<sup>n</sup>-gá caxi sávidí-n, chi vá cúú<sup>n</sup>-gá —càchí-gá xâha<sup>n</sup>-gá xii yutnu ngüxí-á<sup>n</sup>.

Te cue téé xica cuu ndihi-gá ní tecú dóho-güedé nàcuáa ní xâha<sup>n</sup>-gá xii yutnu ngüxí-á<sup>n</sup>.

**Jèsús ñá túú tnàhá iní-gá nàcuáa quide ñáyiú xití veñúhu**

(Mt. 21:12-17; Lc. 19:45-48; Jn. 2:13-22)

<sup>15</sup>Te Jèsús ní quexio tucu-gá ndihi cue téé xica cuu ndihi-gá ñuú Jerusálén, te cuánguihu tucu-gá xití veñúhu càhnu sá ío cùnunu, te xití veñúhu-á<sup>n</sup> xíndecu cue ñáyiú quide ndáhú nádícó-yu, ndihi cue ñáyiú xísaa<sup>n</sup>. Te nchaa-yu ní queñuhu ñaha Jèsús xii-yu quehé, te ní dándúá-gá mèsá cue ñáyiú dàma díhú<sup>n</sup>, ndihi nchaa xilé sácóo nchihí cue ñáyiú dico lómá xíndecu xití veñúhu-á<sup>n</sup>. <sup>16</sup>Te ñá túú tnàhí-gá ní dàña-gá yáha cue ñáyiú ndihi nchaa sá nchídó-yu ichi xití veñúhu-á<sup>n</sup>. <sup>17</sup>Te ní xâha<sup>n</sup>-gá xii-yu:

—Núú tütú Yá Ndióxi càhá<sup>n</sup>-xi nàcuáa ní càhá<sup>n</sup>-gá, te ní cachí-gá: “Vehe-í cúú-xi vèhe núú tàcá ñáyiú níhí ñuyú càhá<sup>n</sup> ndihi ñàhá-yu xii-í”, duha ní càhá<sup>n</sup>-gá càchí-xi núú tütú-gá. Dico nchóhó quidé-ndó vèhe-gá vehe ñadúhú —càchí-gá xâha<sup>n</sup>-gá xii-yu.

<sup>18</sup>Te nchaa dútú cùnunu, ndihi nchaa cue téé dàcuaha ñaha xii-yu nchaa tnúhu ní chídó tnùní ndíi Moisés ní tecú dóho-güedé nàcuáa ní càhá<sup>n</sup>-gá te ní nguíta-güedé ndúcú-güedé nàcuáa cada-güedé cahni ñaha-güedé xii-gá, chi yùhú-güedé sá ío cunuu-gá, te duca<sup>n</sup> chi nchaa ñáyiú ío cùnúhu-yu nchaa tnúhu càhá<sup>n</sup>-gá. <sup>19</sup>Te òrè sa ní cuaa cuí-nâ, te ní quee tucu Jèsús ndihi cue téé xica cuu ndihi-gá ñuú Jerusálén cuáhá<sup>n</sup>-gá ndihi-güedé ingá xichi.

**Ní yíchí yutnu ngüxí**

(Mt. 21:20-22)

<sup>20</sup>Te nduu tnéé nehé-ni ní yáha tucu Jèsús ndihi cue téé xica cuu ndihi-gá núú níhnú yùtnu ngüxí, te ní xiní-güedé sa ní yíchí níhí ndéé yóho-xi. <sup>21</sup>Te té Pèlú ní ndacu iní-dé nàcuáa ní xâha<sup>n</sup> Jèsús xii yutnu ngüxí-á<sup>n</sup>, te ní xâha<sup>n</sup>-dè xii-gá:

—Mèstrú, cundehe nã ní yíchí yutnu ngúxí sá nĩ xáha<sup>n</sup>-n sã vã cúú<sup>n</sup>-gã sãvidí-xi —càchí-dé xáha<sup>n</sup>-dẽ xii-gá.

<sup>22</sup> Te Jèsús ní xáha<sup>n</sup>-gã xii-güedé:

—Quindáá ndisa iní-ndó Yã Ndiöxí.

<sup>23</sup> Te na càchí tnúhu ndáá-í xii-ndo sã núu nchòhó cǔñaha-ndo xii tindúú-a xocuíñí-xi núú ndécú-xí, te quíhí<sup>n</sup>-xi quée-xi xití lámár. Te diu duca<sup>n</sup> càda-xi te núu nchòhó vá cání ñ<sup>n</sup> cani úú iní-ndó, te quindáá iní-ndó sã dúcá<sup>n</sup> càda-xi.

<sup>24</sup> Te xiã<sup>n</sup> núu càchí tnúhu-í xii-ndo sã nchàa sá ná càcá<sup>n</sup>-ndó núú Yã Ndiöxí òré càhá<sup>n</sup> ndihi-ndo-gã, te taxi-gá te núu nchòhó sàndáá ndisa iní-ndó sã táxí-gã sá xicá<sup>n</sup>-ndó núú-gã. <sup>25</sup> Te òré càhá<sup>n</sup> ndihi-ndo Yã Ndiöxí te dandàcu iní-ndó te núu ndècu ñáyíu ñá túú cùu vaha iní ñáhá xii-ndo, te cada càhnu iní-ndó-yu cuendá duca<sup>n</sup> càda cahnu iní ñáhá Tãtá-ndó Dütú Ndiöxí Yáá ndécú àndiu xii-ndo cuendá nchaa sá ñà túú vaha quide-ndo. <sup>26</sup> Dico núu nchòhó vá cádá càhnu iní-ndó sã quidé ñaha tnaha ñáyíu-ndo xii-ndo, te ni Tãtá-ndó Dütú Ndiöxí vá cádá càhnu iní ñáhá-gã xii-ndo cuendá nchaa sá ñà túú vaha quide-ndo —càchí-gá xáha<sup>n</sup>-gã xii-güedé.

### Jèsús ndécú ndihi-gá tnúhu ndee iní

(Mt. 21:23-27; Lc. 20:1-8)

<sup>27</sup> Te Jèsús ní ndexio tucu-gá ñúú Jerusálén ndihi cue téé xica cuu ndihi-gá, te cuánguihu tucu-gá xití veñúhu càhnu sá ño cùnūu ndihi-güedé. Te xití veñúhu-á<sup>n</sup> yíhí-gã ní quexio cue dútú cúnūu ndihi cue téé dàcuaha ñaha xii ñáyíu nchaa tnúhu ní chídó tnùní ndíi Moisés, ndihi cue téé cùu sacuéhé núú ñáyíu israhél. <sup>28</sup> Te xáha<sup>n</sup>-güedé xii-gá:

—Cuíní-ndí càchí tnúhu-n xii-ndí nása ndūu tnúhu ndee iní ndécú ndihi-n núu quide-n nándi sá quidé-n, ¿te yoo duca<sup>n</sup> nĩ taxi tnúhu ndee iní-á<sup>n</sup> xii-n-i? —càchí-güedé xáha<sup>n</sup>-güedé xii-gá.

<sup>29</sup> Te Jèsús ní xáha<sup>n</sup>-gã xii-güedé:

—Yúhú tnàhá-í cuíní-í càcá<sup>n</sup> tnúhu-í ñ<sup>n</sup> sá càcá<sup>n</sup> tnúhu-í núú-ndó te núu na càchí tnúhu-ndo, te càchí tnúhu-í xii-ndo yòo ní taxi tnúhu ndee iní xii-í duha quide-í. <sup>30</sup> Te chí càchí tnúhu xii-í yoo ní táúchíú<sup>n</sup> nĩ dácúándüte ndíi Juàá ñáyíu, ¿Yá Ndiöxí ã<sup>n</sup> cuè téé ñuyíú-a ní táúchíú<sup>n</sup> dùca<sup>n</sup> ní quide ndíi? Te chí càchí tnúhu —càchí-gá xáha<sup>n</sup>-gã xii-güedé.

<sup>31</sup> Te ní nguíta-güedé xítñaha-güedé:

—¿Nása cǔñaha-o? Chi núu na cǔñaha-o sã Yã Ndiöxí ní táúchíú<sup>n</sup> dùca<sup>n</sup> ní quide ndíi Juàá ñá, te quesaha-dé: “¿Ná cuendá ñá túú ní sàndáá iní-ndó tnúhu ní càhá<sup>n</sup> ndíi vài<sup>n</sup>?”, quesaha-dé. <sup>32</sup> Te ni vã cúú cǔñaha-o sã cuè ñáyíu ñuyíú-a ní táúchíú<sup>n</sup> dùca<sup>n</sup> ní quide ndíi Juàá —càchí-güedé xítñaha-güedé.

Te duca<sup>n</sup> nĩ xítñaha-güedé chi ñá túú ní cùtnuní iní-güedé nása cǔñaha-güedé xii-gá, chi xýyùhú-güedé cue ñáyíu chi nchaa ñáyíu-á<sup>n</sup> nĩ cutnùní ndáá iní-yu sá Yã Ndiöxí ní táúchíú<sup>n</sup>-gã duca<sup>n</sup> nĩ quide ndíi Juàá. <sup>33</sup> Te ní xáha<sup>n</sup>-güedé xii Jèsús:

—Ñá túú xiní-ndí yoo ní táúchíú<sup>n</sup> dùca<sup>n</sup> ní dácúándüte ndíi Juàá ñáyíu —càchí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gã xii-güedé:

—Te núu duca<sup>n</sup> te ni yùhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gá xáha<sup>n</sup>-gã xii-güedé.

### Cuendá cue téé cuihna iní-xi

(Mt. 21:33-46; Lc. 20:9-19)

**12** Te Jèsús ní nguíta-gá cání-gã ñ<sup>n</sup> cuendú núú ñáyíu nàcuáa tecú tnùní-yu tnúhu-gá, te xáha<sup>n</sup>-gã xii-yu:

—Ñ<sup>n</sup> téé ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sá vã cúú dàñú, te ní cadúha-dé núú quíhí-dé ndéhé yoho yàha stilé-á<sup>n</sup> òré ná cùu, te ní cadúha-dé ñ<sup>n</sup> xító dùcú<sup>n</sup> núú cáúndòdo cue téé coto yoho yàha stilé-á<sup>n</sup>.

1 Te ní sáá ìí nduu quèè-dé quíngaca cuu xica-dě vài nduu, te ní dándõ ndaha-dě sá ñí xitu-dé-á<sup>n</sup> xii ìí<sup>n</sup> úú cue tée càhá<sup>n</sup> ndíhi-dé cuèndá cada chiú<sup>n</sup>-güedé, te ní ndatnúhu-güedé sá òré ná cúú te cuu cuèndá dava-güedé te duca<sup>n</sup> te ní quee-dé cuáhá<sup>n</sup>-dè. <sup>2</sup> Te sátá ñí sáá nduu ñí cuu ndéhé yoho yàha stilé sá ñí xitu-dé-á<sup>n</sup>, te ní xáha<sup>n</sup>-dè xii ìí<sup>n</sup> tée xínu cuechi núú-dè: “Cuáhá<sup>n</sup> cáca<sup>n</sup>-n sá cúú cuèndá-í núú cuè tée ní dándõ ndàha-í nchaa yoho yàha stilé sá ñí xitu-í-á<sup>n</sup>”, càchí-dé xàha<sup>n</sup>-dè. Te tée xínu cuechi-á<sup>n</sup> ñí xica-dé cuáhá<sup>n</sup>-dè. <sup>3</sup> Te cue tée-á<sup>n</sup> ñí tñii-güedé tée xínu cuechi-á<sup>n</sup>, te ní caniha-güedé xii-dé, te dàtnùní ní nacuícú<sup>n</sup> ñáhá-güedé, te ñá túú tñàí ná ní sãñaha-güedé. <sup>4</sup> Te tée cùu xítóhó yoho yàha stilé-á<sup>n</sup> ñí tendaha tùcu-dé ingá tée xínu cuechi núú-dè cuáhá<sup>n</sup>-dè. Te òré ní quexio tée xínu cuechi-á<sup>n</sup> te cue tée-á<sup>n</sup> ñí sáha ñaha-güedé yúú xii-dé, te ní táhú-güedé díquí-dè, te ní xícuèhé ñáhá-güedé xii-dé. <sup>5</sup> Te tée cùu xítóhó nchaa yoho yàha stilé-á<sup>n</sup> ñí tendaha tùcu-dé ingá tée xínu cuechi núú-dè cuáhá<sup>n</sup>-dè núú cuè tée-á<sup>n</sup>, dico tée-á<sup>n</sup> òré ní quexio-dé te ní sañi ñaha-güedé xii-dé. Te tée cùu xítóhó nchaa yoho yàha stilé-á<sup>n</sup> ñí tendaha-dè vài-gá cue tée xínu cuechi núú-dè cuáhá<sup>n</sup> ngácá<sup>n</sup>-güedé sá cúú cuèndá-dé ní cùu dico ñiú-ni duca<sup>n</sup> ñí quide ñaha tùcu cue tée ndéé nchaa yoho yàha stilé-á<sup>n</sup> xii-güedé, chi dava-güedé ní caniha-güedé te dava-güedé ní sañi ñaha-güedé.

<sup>6</sup> Te tée cùu xítóhó nchaa yoho yàha stilé-á<sup>n</sup> ndécú ìí<sup>n</sup> ddi-ná tée tendaha-dè quíhí<sup>n</sup> núú cuè tée ní dándõ ndaha-dè sá ñí xitu-dé-á<sup>n</sup>, te tée tendaha-dè-á<sup>n</sup> cúú-dè déhe ducu<sup>n</sup>-dè, te ío cùu iní ñáhá-dè. Te ní sani iní-dé: “Váha-gá ñúu tendaha-í déhe-í-a núhú-dé, chi òré quini

ñáhá-güedé xii-dé te cànehe-güedé sá yíñùhu núú-dè”, duha ní sani iní-dé. Te duca<sup>n</sup> te ní xáha<sup>n</sup>-dè xii déhe-dé-á<sup>n</sup> sá nùhú-dé, te tée-á<sup>n</sup> cuñuhú-dé cuáhá<sup>n</sup> ngácá<sup>n</sup>-dè sá cúú cuèndá tātá-dè núú cuè tée-á<sup>n</sup>. <sup>7</sup> Dico òré ní xiní cue tée quide chiú<sup>n</sup>-á<sup>n</sup> dèhe tée cùu xítóhó nchaa yoho yàha stilé-á<sup>n</sup>, te ní xítñaha-güedé: “Tée-á<sup>n</sup> tée véxi nduu táhú ñuhu-a ndíhi sá cáá nùú-xi, dico cahni-o-dè te mee-o ndùu táhú-ó sá ndúú táhú-dè”, duha ní xítñaha-güedé. <sup>8</sup> Te ní tñii-güedé tée-á<sup>n</sup>, te ní sañi ñaha-güedé, te ní dáquéné-güedé yiqui cùñú-dé ìí<sup>n</sup> xio yuhu ñuhu núú cáá yòho yaha stilé-á<sup>n</sup> —duha cuáhá<sup>n</sup> cuèndú ní cani Jèsús núú-yu.

<sup>9</sup> Te Jèsús ní xáha<sup>n</sup> tùcu-gá xíí-yu:

—¿Te nchòhó sa cùtnuní iní-ndó nàcuáa cada xítóhó ñuhu-á<sup>n</sup> á<sup>n</sup>? Chi núhú-dé te cahni-dé cue tée-á<sup>n</sup> te dàndóo ndaha-dè ñuhu-dé xii cue tée cùtnuní iní-dé cada ndáá —càchí-gá xàha<sup>n</sup>-gá xíí-yu.

<sup>10</sup> Te xàha<sup>n</sup> tùcu-gá xíí-yu:

—Te nchòhó, ná ñá túú dàcuaha-ndo núú tütú Yã Ndiõxí núú càchí-xi: Yúú sá ñí dáquéé tñhú cue tée dàcaa vehe, ní cuu-xi yúú cúnùu vitna.

<sup>11</sup> Chi mee Yã Ndiõxí duca<sup>n</sup> ñí cachí-gá cunduu, te cùu-xi ìí<sup>n</sup> sá ío cùñúhu-o vitna.

Duha càchí-xi núú tütú-gá —càchí Jèsús xàha<sup>n</sup>-gá xíí-yu.

<sup>12</sup> Te cue tée ní xíndedóho nàcuáa ndùu tñúhu ní cáhá<sup>n</sup>-gá ní cuini-güedé tñii ñaha-güedé xii-gá ní cùu, chi ní cutnùní iní-güedé sá cuèndá-güedé ní cáhá<sup>n</sup>-gá, dico ní yùhú-güedé tñii ñaha-güedé xii-gá cuèndá sá ío vài ñáyi, te ná ío ná cada ñáhá-yu xii-güedé ní sani iní-güedé, te ní xica-güedé cuáhá<sup>n</sup>-güedé.

### Cuèndá impuèstú

(Mt. 22:15-22; Lc. 20:20-26)

<sup>13</sup> Te sátá nǐ xica-güedé cuáhá<sup>n</sup>-güedé, te ní tendaha-güedé ìí<sup>n</sup> úú cue tée cùu fariséú, ndìhi ìí<sup>n</sup> úú cue tée cùndìhi té Hèrodés cuáhá<sup>n</sup>-güedé núú ndécú Jèsús ndúcú-güedé nàcuáa cada-güedé datìcánuu ñaha-güedé xii-gá núú tnúhu càhá<sup>n</sup>-gá. <sup>14</sup> Te cue tée-á<sup>n</sup> nǐ quexìo-güedé núú Jèsús, te xáha<sup>n</sup>-güedé xii-gá:

—Mèstrú, cùtnuní iní-ndí sá ìo ndáá càhá<sup>n</sup>-n, te ñá túú quìde cuendá-n nàcuáa càhá<sup>n</sup> ñáyiu, te cuèi ndèdani càá-yu ìí<sup>n</sup>-ni càhá<sup>n</sup>-n ndìhí-yu chi ñá túú quìde cuendá-n cuèi ná ñáyiu cùú-yu, te càhá<sup>n</sup> ndáá-n nàcuáa càhá<sup>n</sup> Yá Ndiòxí cundecu-o ñùyíú-a. Te cachí tnúhu xii-ndí nǐ váha-ni quìde-ndí sá chǎhu-ndí té Cèsár tée ìo cùnuu cuendá impuèstú á<sup>n</sup> ñáhá —càchí-güedé xáha<sup>n</sup>-güedé xii-gá.

<sup>15</sup> Dico Jèsús ní cutnùní iní-gá sá xító ndèé ñáhá-güedé xii-gá, núú ní xáha<sup>n</sup>-gá xii-güedé:

—¿Ná cuèndá duca<sup>n</sup> xító ndeé ñáhá-ndó xii-í? Chí dánèhé ñáhá xii-í ìí<sup>n</sup> díhú<sup>n</sup> sǎ chǎhu-ndo cuèndá impuèstú te núú nása càa —cachí-gá xáha<sup>n</sup>-gá xii-güedé.

<sup>16</sup> Te cue tée-á<sup>n</sup> nǐ dánèhé ñáhá-güedé xii-gá ìí<sup>n</sup> díhú<sup>n</sup> sǎ chǎhu-güedé cuèndá impuèstú. Te Jèsús ní xáha<sup>n</sup>-gá xii-güedé:

—Chí càchí tnúhu xii-í nǐ yoo núú-xi ndèé ndìhi yoo ñu-xi ndeé —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Núú tǎ Cèsár ndèé ndìhi ñu-dé —càchí-güedé xáha<sup>n</sup>-güedé xii-gá.

<sup>17</sup> Te Jèsús ní xáha<sup>n</sup>-gá xii-güedé:

—Te núú duca<sup>n</sup> te chí nàcuáha té Cèsár sá cúú cuèndá-dé, te sá cúú cuèndá mée Yá Ndiòxí te xíá<sup>n</sup> nàcuáha-ndo-gá —càchí-gá xáha<sup>n</sup>-gá xii-güedé.

Te cue tée-á<sup>n</sup> ìo ní cuñúhu-güedé sá dúcá<sup>n</sup> nǐ càhá<sup>n</sup>-gá.

### Cuèndá cue ñáyiu ndoto

(Mt. 22:23-33; Lc. 20:27-40)

<sup>18</sup> Te sátá dúcá<sup>n</sup> te ní quexìo ìí<sup>n</sup> úú cue tée cùu saducéú núú ndécú Jèsús, te cue tée-á<sup>n</sup> ñá túú sàndáá iní-güedé sá ndótó cuè ñáyiu ní xíhí, te ní xáha<sup>n</sup>-güedé xii-gá:

<sup>19</sup> —Mèstrú, ndí Moisés càchí ndí núú tütú ndí ndècu vitna sá nǐ ìí<sup>n</sup> tée na cùú-dé te quendóo ñadhí-dé, te núú ñá túú ní xóo déhe-dé ndìhi ñadhí-dé-á<sup>n</sup>, te tée cùu ñaní-dé naquehe<sup>n</sup>-dé ñaha ní quendóo quèe-á<sup>n</sup> cuèndá coo déhe-dé ndìhi-a<sup>n</sup> cuèndá tée ní xíhí-á<sup>n</sup>. <sup>20</sup> Te ní xíndecu úsá tnàhá cue tée mee-ni ndí ñaní-güedé. Te tée díhna ní níhí ñadhí-dé, te ñá túú ní cùdì-dé cundecu-dé chi ní xíhí-dé, te ni ìí<sup>n</sup> déhe-dé ñá túú ní xóo ndìhi ñadhí-dé.

<sup>21</sup> Te tée cùu uú ní naquehe<sup>n</sup>-dé ñaha ní quendóo quèe-á<sup>n</sup>, dico ní xíhí tucu-dé, te ni ìí<sup>n</sup> tucu déhe-dé ñá túú ní xóo ndìhi ñaha-á<sup>n</sup>. Te ñu-ni duca<sup>n</sup> ní xíhí tée cùu uní. <sup>22</sup> Te ní xínu ndí ùsá-güedé ní cándeca ñaha-güedé xii ñaha-á<sup>n</sup>, dico ni ìí<sup>n</sup>-güedé ñá túú ní xóo déhe-güedé ndìhi-a<sup>n</sup>, te ní ndìhi-güedé ní xíhí te ndéé núú ní ndìhi-ná ní xíhí tnàhá ñadhí-á<sup>n</sup>. <sup>23</sup> Te na sáa nduu ndòto-güedé ndìhi ñaha-á<sup>n</sup>, ¿te ndèdaca-güedé ñadhí-güedé cuu-a<sup>n</sup>-i? Chi ndí ùsá-güedé ní cándeca ñaha-güedé xii-a<sup>n</sup> —càchí-güedé xáha<sup>n</sup>-güedé xii-gá.

<sup>24</sup> Te Jèsús ní xáha<sup>n</sup>-gá xii-güedé:

—Ní xíta nchòhó tnúhu càhá<sup>n</sup>-ndó, chi ñá túú xìní-ndó nàcuáa càhá<sup>n</sup> Yá Ndiòxí núú tütú-gá, te ni ñá túú xìní-ndó sǎ díú-gá ndácú-gá quídé-gá nchaandi túhú sá váha. <sup>25</sup> Te na càchí tnúhu-í xii-ndo sǎ òré ná sáa nduu ndòto nchaa ñáyiu ní xíhí, te dàvá-á<sup>n</sup> vǎ yóo-gá dasa<sup>n</sup> déhe yoco-xi chi vá yóo-gá can-

deca tnàha, chi na ndòtó-yu te cuu-ná-yu dàtná cue espíritú xínú cuèchi núú Yă Ndiöxí. <sup>26</sup> Te núu nchòhó cuìní-ndó cǎhá<sup>n</sup>-ndó cuendá nchaa ñáyiú ndoto, te díhna-gá dacuàha-ndo nacuáa ní chídó tnùní ndíi Moisés núú tütú ndíi ni cùu. Chi diu núú tütú ndíi cǎhá<sup>n</sup>-xi nacuáa ní xáha<sup>n</sup> Yă Ndiöxí xii ndíi cútnàhá ní cǎhá<sup>n</sup> ndihi ñaha-gǎ ñi<sup>n</sup> xichi núú níhnú tnùtaú nchìcú<sup>n</sup> ñuhú. Te duha ní xáha<sup>n</sup>-gǎ xii ndíi: “Yúhú cùu-í Ndiöxí tǎ Àbrahám, ndihi té Isàác, ndihi té Jácób”, duha ní xáha<sup>n</sup> Yă Ndiöxí xii ndíi cǎchí-xi núú tütú ndíi. <sup>27</sup> Te Yă Ndiöxí ñá túú cùu-gá Ndiöxí cue ñáyiú ní xíhí, chi cùu-gá Ndiöxí cue ñáyiú xĩ-decu vívú, núu xǎ<sup>n</sup> nchòhó ío xíta-ndo tnúhu cǎhá<sup>n</sup>-ndó. Te sá dúcá<sup>n</sup> ní cǎhá<sup>n</sup>-gá cuendá cue tée-á<sup>n</sup>, te xǎ<sup>n</sup> cútnùní sá cuèi ní xíhí-güedé sá cùu-xí tnàha ñáyiú-güedé, dico ndècu vívú-güedé sá cùu-xí-gǎ —cǎchí-gá xáha<sup>n</sup>-gǎ xii-güedé.

### **Tnúhu sá ìo-gá cúnùu**

(Mt. 22:34-40)

<sup>28</sup> Te tnàhá ñi<sup>n</sup> tée dàcuaha ñaha xii ñáyiú nchaa tnúhu ní chídó tnùní ndíi Moisés ndèdòho-dé nchaa tnúhu cǎhá<sup>n</sup> Jèsús ndihi cue tée cùu saducéú-á<sup>n</sup>, te ndèdòho-dé sá súúní vǎha níhí-gá tnúhu nàdanchocáva-gá. Te ní sǎndehe yatni-dé núú-gǎ, te xáha<sup>n</sup>-dǎ xii-gá:

—Cǎchí tnúhu xii-í ndédacàa tnúhu sá ní cǎhá<sup>n</sup> Yă Ndiöxí ío-gá cúnùu cuu díhna —cǎchí-dé xáha<sup>n</sup>-dǎ xii-gá.

<sup>29</sup> Te Jèsús ní xáha<sup>n</sup>-gǎ xii-dé:

—Duha cǎhá<sup>n</sup> tnúhu sá ìo-gá cúnùu: “Nchòhó ñáyiú isràél ío vǎha chí cùndèdòho tnúhu-a. H<sup>n</sup>dií díí-ni Yă Ndiöxí ndécú, te diu-ni-gá cùu-gǎ Ndiöxí-ó. <sup>30</sup> Te cuu iní-ndó Dütú Ndiöxí Yaá cùu Ndiöxí-ndó ñi yuhu ni iní-ndó, te caní iní-ndó cǎda-ndo datná cuìní mée-gǎ, te mee-ni tnúhu vǎha caní iní-ndó cuendá cuu vii cuu vǎha-ndo núú-gǎ, te coo iní-ndó cǎda-ndo nacuáa

cuu vǎha iní-gǎ”, duha cǎhá<sup>n</sup> tnúhu sá ìo-gá cúnùu. <sup>31</sup> Te duha cǎhá<sup>n</sup> tucu ìngá tnúhu cùu uú sá ìo cúnùu: “Cuu iní-ndó tnàha ñáyiú-ndo dàtná cùu ìni-ndó mée-ndo”, duha cǎhá<sup>n</sup> tnúhu cùu uú-á<sup>n</sup>. Te úú duha-ni tnúhu-a cùu-xi tnúhu sá ìo-gá cúnùu —cǎchí-gá xáha<sup>n</sup>-gǎ xii-dé.

<sup>32</sup> Te tée dàcuaha ñaha xii ñáyiú nchaa tnúhu ní chídó tnùní ndíi Moisés ní xáha<sup>n</sup>-dǎ xii-gá:

—Mèstrú, vǎha-ni cǎhá<sup>n</sup>-n chi ndáá sá ñi<sup>n</sup>dií-ni Yă Ndiöxí ndécú, te ñá túú-gǎ ndèè ndécú ìngá ndiöxí. <sup>33</sup> Te dàtná ní cǎchí-n sǎ ñi yuhu ni iní-ó cùu iní-ó Yă Ndiöxí, te caní iní-ó cǎda-o nacuáa cuu vii cuu vǎha iní-gá te ío vii ío vǎha cuu iní-ó dàtná cuìní mée-gǎ, te coo iní-ó cǎda-o nacuáa cuu vǎha iní-gá, te cuu iní-ó cuè tnaha ñáyiú-o dàtná cùu ìni-ó mée-o. Te nchaa xǎ<sup>n</sup> ío-gá xíni ñùhu-xi cada-o dacúxí sǎ cuǎñaha-o quèti cahni-güedé te cáyú-di nduu táhú ñáhá Yă Ndiöxí, ndihi dàcúxí nchaa dava-gá sá sǎñaha-o ndùu táhú-gǎ —cǎchí-dé xáha<sup>n</sup>-dǎ xii-gá.

<sup>34</sup> Te sá dúcá<sup>n</sup> ìo vǎha ndùu tnúhu ní cǎhá<sup>n</sup> tée-á<sup>n</sup>, núu ní xáha<sup>n</sup> Jèsús xii-dé:

—Luha-ná cùmǎní xii-n te ndíhu ndaha ñaha Yă Ndiöxí —cǎchí-gá xáha<sup>n</sup>-gǎ xii-dé.

Te sá dúcá<sup>n</sup> ní xáha<sup>n</sup>-gǎ xii tée-á<sup>n</sup>, núu vǎ yòo ñi<sup>n</sup>-gǎ ní cùyií nágá tnúhu nducu tnúhu-yu núú-gǎ.

### **Yoo cùu Xítóhó Jesucrístú**

(Mt. 22:41-46; Lc. 20:41-44)

<sup>35</sup> Te Jèsús yíhí-gǎ xití veñúhu cǎhnu sá ìo cúnùu danéhé-gá ñáyiú, te xáha<sup>n</sup>-gǎ xii-yu:

—Cue tée dàcuaha ñaha xii ñáyiú nchaa tnúhu ní chídó tnùní ndíi Moisés cǎchí-güedé sá Crístú Yaá tendaha Yă Ndiöxí quixi ñuyíú-a cùu-gá déhe ndíi Dàvíí, te ndíi-á<sup>n</sup> ní cunaha víhi ní xíhí ndíi. ¿Te ná cuendá duca<sup>n</sup> cǎhá<sup>n</sup>-güedé? <sup>36</sup> Te mee ndíi Dàvíí-á<sup>n</sup> ní dácáhú ìni

ñáhá Espíritú Yă Ndiöxí xii ndíi nàcuáa cáhá<sup>n</sup> ndíi, te duha ní cachí ndíi:

Dútú Ndiöxí ní xáha<sup>n</sup>-gă xii Yaá cúú Xitohó-í:

“Ngóo xio cùha-í,

te yúhu cada-í te nchaa sá cúú ùhú iní ñáhá xii-n canehe-xi sá yíñùhu núú-n.”

Duha ní xáha<sup>n</sup> Dútú Ndiöxí xii Yaá cúú Xitohó-í.

Duha ní cachí ndíi. <sup>37</sup> Te nása cùu Cristú déhe ndíi Dàvíí, te mee ndíi ní cachí ndíi sá cúú-gă Xitohó ndíi? —càchí Jèsús xáha<sup>n</sup>-gă xii-yu.

Te ío cuéhé ñáyiú ní xíndedóho nchaa tnúhu ní cáhá<sup>n</sup>-gă, te ío ní cudíí iní-yu ní xíndedóho ñáhá-yu xii-gă.

**Jèsús càhá<sup>n</sup>-gă cuendá cue tée dàcuaha ñaha xii ñáyiú nchaa tnúhu ní chídó tnùní ndíi Moisés**

(Mt. 23:1-36; Lc. 11:37-54; 20:45-47)

<sup>38</sup> Te òré dánèhé ñáhá Jèsús xii cue ñáyiú, te xáha<sup>n</sup>-gă xii-yu:

—Cada cuendá-ndó vă cádá-ndó dàtná quidé cuè tée dàcuaha ñaha xii ñáyiú nchaa tnúhu ní chídó tnùní ndíi Moisés, chi cue tée-á<sup>n</sup> tnàhá iní-güedé cuihnu-güedé dóó nání sá sácúihnu cue tée cùnuu-gă te cuíní-güedé sá méé-ní ndíhi tnúhu yíñùhu cáhá<sup>n</sup> ndíhi ñaha ñáyiú xii-güedé nchaa núú xícá cùu-güedé. <sup>39</sup> Te nàcáxi-güedé xilé sácóo nchihi cue tée cùnuu-gă xití veñúhu sácóo nchihi-güedé. Te duca<sup>n</sup>-ni quide-güedé cuèi òré quíhu-güedé mèsá caxi-güedé òré ndécú-güedé ì<sup>n</sup> vico, chi mee-ni núú sácóo cue tée cùnuu cuíní-güedé coo-güedé. <sup>40</sup> Te quèndeé-güedé vehe nchaa ñáyiú quèé, te ío naha càhá<sup>n</sup> ndíhi-güedé Yă Ndiöxí dándahú-güedé méé-güedé sá ío quide ndáá-güedé cuendá sá cuíní-güedé

cáhá<sup>n</sup> váha ñáyiú cuendá-güedé. Te sá dúcá<sup>n</sup> quide-güedé te ío-gă ndoho-güedé núú ùhú núú ndàhú dàcúxí dàva-gă ñáyiú —càchí-gă xáha<sup>n</sup>-gă xii-yu.

**Díhú<sup>n</sup> nduu táhú Yă Ndiöxí ní dáquèe ì<sup>n</sup> ñaha ndàhú ñaha quèé**

(Lc. 21:1-4)

<sup>41</sup> Te núcóo Jèsús xití veñúhu yatni núú ndécú alcanciá te ndèhe-gă xídáquèe ñáyiú díhú<sup>n</sup> xití alcanciá-á<sup>n</sup>, te tnàhá cue ñáyiú cuica xídáquèe-yu vài díhú<sup>n</sup>. <sup>42</sup> Te ní quexìo ì<sup>n</sup> ñaha ndahú ñaha quèé, te ndèhe-gă ní dáquèe-a<sup>n</sup> úú tnàhá díhú<sup>n</sup> còbrí xití alcanciá, te díhú<sup>n</sup>-ă<sup>n</sup> ío sacú yáhu-xi. <sup>43</sup> Te Jèsús ní cana-gă cue tée xica cuu ndíhi-gă, te ní xáha<sup>n</sup>-gă xii-güedé:

—Na càchí tnúhu ndáá-í xii-ndo sá ñàha ndahú ñaha quèé-a ío-gă nándíhi díhú<sup>n</sup> ní dáquèe-a<sup>n</sup> xití alcanciá dàcúxí díhú<sup>n</sup> ní dáquèe dava-gă-yu. <sup>44</sup> Chi nchaa ñáyiú-á<sup>n</sup> ní dáquèe-yu mee-nă díhú<sup>n</sup> sá ní quendóo-ná, dico ñaha quèé-a cuèi ndàhú-a<sup>n</sup> dico ní dáquèe-a<sup>n</sup> nihí díhú<sup>n</sup> sá cuáá<sup>n</sup> sá caxí-á<sup>n</sup> ní cùu —cachí-gă xáha<sup>n</sup>-gă xii-güedé.

**Jèsús càchí-gă sá ngóyó veñúhu**

(Mt. 24:1-2; Lc. 21:5-6)

**13** Te òré ní ndee Jèsús xití veñúhu càhnu sá ío cùnuu, te ì<sup>n</sup> tée xica cuu ndíhi-gă ní xáha<sup>n</sup>-dê xii-gă:

—ìMèstrú, cundehe nă ío vii ní sáá veñúhu-a<sup>n</sup> ndíhi nchaa vehe nèhe tnaha ndíhi-xi, te ío vii ndáa nchaa yúú yíhí! —càchí-dé xáha<sup>n</sup>-dê xii-gă.

<sup>2</sup> Te Jèsús ní xáha<sup>n</sup>-gă xii-dé:

—Nchaa nàcuáa càa nchaa vehe sá cùñúhu-n-a vîtna sáá nduu te vă cùndùu-gă-xi dàtná cáá-xí vîtna, chi ní ì<sup>n</sup>-gă yúú vă códó nchihi tnaha-xi, chi ndíhi ngoyo —càchí-gă xáha<sup>n</sup>-gă xii-dé.

**Nàcuáa cada-xi nduu  
ta cùyatni naa ñuyú**

(Mt. 24:3-28; Lc. 21:7-24; 17:22-24)

<sup>3</sup>Te Jèsús ní xica-gá ndihi cue tée xica cuu ndihí-gá cuáhá<sup>n</sup> ndihí ñaha-gá xii-güedé yucu nàni Olívú, te yucu Ólívú-á<sup>n</sup> tũu ndáá núú cáá veñúhu cãhnu sá ío cùnuu. Te Jèsús ní quexio-gá ndihí-güedé yucu Ólívú-á<sup>n</sup>, te xíá<sup>n</sup> ní ngóo-gá te núú núcõo-gá-á<sup>n</sup> ní sáhá<sup>n</sup> té Pélú ndihí té Jàcobó ndihí té Juáá ndihí té Ndríxí, te dayuhu ní xáha<sup>n</sup>-güedé xii-gá:

<sup>4</sup>—Cùiní-ndí cachí tñuhu-n nã nduu ðuca<sup>n</sup> cada-xi ngoyo veñúhu cãhnu sá ío cùnuu, àdi nãndí cùu sá cádá-xí cuendá cutnùni iní-ndí sá sà ta cuyatni nduu ðuca<sup>n</sup> cada-xi —cachí-güedé xãha<sup>n</sup>-güedé xii-gá.

<sup>5</sup>Te Jèsús ní xáha<sup>n</sup>-gá xii-güedé:

—Ío quihi iní-ndó cùndecu-ndo cuendá sá vã yõo dandàhú ñáhá xii-ndo. <sup>6</sup>Chi ío cuéhé cue tée coo ñuyú te danàni-güedé méé-güedé dàtná nãni-í, te cachí-güedé: “Yúhú cùu-í Cristú Yaá ní tendaha Yã Ndiõxí véxi ñuyú-a”, duha cachí-güedé. Te sá dúcá<sup>n</sup> cãhá<sup>n</sup>-güedé te ío vai ñáyiu dandàhú-güedé.

<sup>7</sup>Te òré ná nihí-ndó tñuhu sá nãá-güedé ndèni ní cuu, te vã yùhú-ndó chi dacuitíí sã dúcá<sup>n</sup> càda-xi, dico vátá sàá-gá nduu nàa ñuyú òré ðuca<sup>n</sup> càda-xi. <sup>8</sup>Chi cue tée ìí<sup>n</sup> nàció<sup>n</sup> nãá-güedé ndihí cue tée ingá nàció<sup>n</sup>, te titní ñuu nguíta-güedé nãá-güedé, te titní xichi ñuyú ñihí vihi tnáa, te titní tucu xichi ñuyú coo tnamá, te ío-gá cuéhé sã yãha ñáyiu. Te nchaa sá dúcá<sup>n</sup> càda-xi-á<sup>n</sup> cùu-xí tñundõho sá vítná vãha váha quèsaha-xi sácúu-xí cue ñáyiu ndècu ñuyú-a.

<sup>9</sup>Dico nchòhó ío quihi iní-ndó cùndecu-ndo, chi nchaa ñáyiu na cùu úhú iní ñáhá xii-ndo cuáha cuendá

ñáhá-yu xii dava-ndo núú cue tée cùchiu<sup>n</sup>, te candeca ñaha-güedé xii-ndo quíhí<sup>n</sup> xití veñúhu-güedé, te yácá<sup>n</sup> caniha-güedé xii-ndo. Te quíhí<sup>n</sup>-ndó núú cue tée yìndaha nàció<sup>n</sup> àdi núú ðava-gá cue tée cùnuu sá cuendá-í, te nchòhó nihí-ndó nàcuáa cada-ndo cãhá<sup>n</sup> váha-ndo cuendá-í núu-güedé.

<sup>10</sup>Te cùmání-gá sáá nduu nàa ñuyú-a te sa cuténuu tñuhu-í ní càa xico ñuyú-a, te tñuhu-á<sup>n</sup> cãhá<sup>n</sup>-xi nàcuáa nanhí tãhú ñáyiu. <sup>11</sup>Te òré ná candeca ñaha ñáyiu xii-ndo quíhí<sup>n</sup> núú cue tée cùchiu<sup>n</sup> cuáha cuendá ñáhá-yu, te òré vátá sàá-gá-ndó núu-güedé te vã cání ìní-ndó núu nása cunduu tñuhu cùñaha-ndo xii-güedé. Chi òré-nã te Yã Ndiõxí dacàhu iní ñáhá-gá xii-ndo nása cunduu tñuhu cùñaha-ndo xii-güedé, te ðiu-ni tñuhu sá dácàhu iní ñáhá-gá-á<sup>n</sup> cùñaha-ndo xii-güedé. Te ñá ðúú mèe-ndo cáhá<sup>n</sup>-ndó chi Espiritú Yã Ndiõxí cáhá<sup>n</sup>-xi yuhu-ndo. <sup>12</sup>Te dava cue tée cuáha cuendá-güedé ñaní-güedé núú cue tée cùchiu<sup>n</sup> cuendá cahni ñaha-güedé. Te dava cue tée cùu tátá ðiu-ni ðuca<sup>n</sup> càda-güedé cuáha cuendá-güedé déhe-güedé núú cue tée cùchiu<sup>n</sup>. Te dava cue tée cùu déhe cuu úhú iní-güedé tátá-güedé ndihí nãná-güedé, te cuáha cuendá ñáhá-güedé xii-yu núú cue tée cùchiu<sup>n</sup> cuendá cahni ñaha-güedé xii-yu. <sup>13</sup>Te ío cuéhé ñáyiu cuu úhú iní ñáhá-yu xii-ndo sã cuendá-í, dico nchaa nchòhó ñáyiu na càda ndee-ni iní canchicú<sup>n</sup> nihnu ñaha-ni xii-í te nanhí tãhú-ndó.

<sup>14</sup>Te ndíi Dániél tée ní xóo cáhá<sup>n</sup> tñuhu Yã Ndiõxí ndéé sanaha ní chídó tñuní ndíi núú tütú ndíi cuendá ìí<sup>n</sup> sá dáquèe tñhú Yã Ndiõxí cundecu ìí<sup>n</sup> xichi núú ñà túú tàu-xi cundecu-xi, te xíá<sup>n</sup> cada-xi sá vã cùndècu-gá ni ìí<sup>n</sup> ñáyiu xíá<sup>n</sup>. Te cada cuendá váha-ndo nàcuáa ní cáhá<sup>n</sup> ndíi, chi nduu na quíní-ndó xíá<sup>n</sup> cundecu-xi ìí<sup>n</sup> xichi núú





xii-ndo cuendá ñi<sup>n</sup> tée cuini quingaca cuu xica. Te tée-á<sup>n</sup> cumaní-gã quee-dé vehe-dé te ní xáha<sup>n</sup>-dẽ xii cue tée xinu cuechi núú-dẽ sá ná cada cuendá-güedé vehe-dé. Te ní sãñaha-dẽ xii-güedé ndí dí<sup>n</sup> núú-güedẽ chiú<sup>n</sup> cada-güedé. Te ní xáha<sup>n</sup>-dẽ xii tée ndéé yuyèhe sá ná cundecu túha-ni-dé yuyèhe ndéé nãsáá-dé. <sup>35</sup> Te duha ndùu tnúhu càhã<sup>n</sup>-í cuendá nchòhó cundecu túha-ndo, chi ñá túú xini-ndó nã nduu te ni ñà túú xini-ndó nã òré quixi tucu yúhú Yaá cúú Xitohó-ndó, núú òré sa ní cundiqui<sup>n</sup>, àdi dava niú, àdi òré sa ní cana uu<sup>n</sup> líhi, àdi òré sa ta cùditó cuáhã<sup>n</sup>, núú xíã<sup>n</sup> ío chí cundècu túha. <sup>36</sup> Te duha càhã<sup>n</sup>-í chi na cuáhã<sup>n</sup> òré ñá túú nã yíhi ñni-ndó quèxio-í, te ñá túú ndècu túha-ndo. <sup>37</sup> Te dàtná-ni xáha<sup>n</sup>-í xii nchòhó sá cundècu túha-ndo, te diu-ni duca<sup>n</sup> xáha<sup>n</sup>-í xii nchaa dava-gá ñáyiú sá cundècu túha-yu —càchí-gá xáha<sup>n</sup>-gã xii-güedé.

**Ndùcu-güedé nàcuáa  
cada-güedé cahni-güedé Jèsús**

(Mt. 26:1-5; Lc. 22:1-2; Jn. 11:45-53)

**14** Te cumaní úú-gá nduu te quesaha vico pascuá, vico xèxi ñáyiú pàá sá ñà túú yíhi levadurá. Te cue dútú cúnùu, ndihí cue tée dàcuaha ñaha xii ñáyiú nchaa tnúhu ní chídó tnùní ndíi Moisés ndúcú-güedẽ nàcuáa cada-güedé dandàhú-güedé Jèsús cuendá tñi ñaha-güedẽ xii-gá te cahni ñaha-güedẽ. <sup>2</sup> Te ní xitnàha-güedé:

—Váha-gá sá vã tñí-ó Jèsús mei ndùu vico, chí núú duca<sup>n</sup> na càda-o te ío dusa<sup>n</sup> càda ñáyiú —càchí-güedé xitnàha-güedé.

**Ñi<sup>n</sup> ñadìhí chíhí-á<sup>n</sup> àcítí díquí Jèsús**

(Mt. 26:6-13; Jn. 12:1-8)

<sup>3</sup> Te Jèsús ndécú-gã ñuú Bètaniá vehe ñi<sup>n</sup> tée nani Xímú, tée ní tnahá cuéhé sá dátèhyú nihnu-xi yiqui cùnú-ó. Te yíhi Jesús mèsá xéxi-gã ní quexio ñi<sup>n</sup> ñadìhí

nehé-á<sup>n</sup> ñi<sup>n</sup> sá ní cuáha yúú vãha yúú nání àlabastrú, te xití xíã<sup>n</sup> ñúhú àcítí sáhã<sup>n</sup> tnámí sã nání nãrdú sá ño ndèyáhu, te ní táhú-á<sup>n</sup> xíã<sup>n</sup> te acítí ñúhú xití-xi-á<sup>n</sup> ní sódó-a<sup>n</sup> díquí Jèsús. <sup>4</sup> Te ñi<sup>n</sup> úú cue tée xindecu-á<sup>n</sup> ní cudéé<sup>n</sup>-güedẽ sá dúcã<sup>n</sup> ní quide-a<sup>n</sup>, te ní xitnàha-güedé:

—Ñá túú quide váha ñaha-ã<sup>n</sup> dàcã<sup>n</sup> quidé-á<sup>n</sup>, chí íí ní dàcuíta-a<sup>n</sup> acítí váha-ã<sup>n</sup>. <sup>5</sup> Chí váha-gá núu cuyáhu acítí-ã<sup>n</sup> sá ñni cièndú díhú<sup>n</sup> denariú, te díhú<sup>n</sup> sã cuyáhu acítí-ã<sup>n</sup> cuu cuendá ñáyiú ndàhú ní cùu —cachí-güedé xitnàha-güedé.

Te ní tenàá-güedé ñaha-á<sup>n</sup> sã dúcã<sup>n</sup> ní quide-a<sup>n</sup>.

<sup>6</sup> Te Jèsús ní xáha<sup>n</sup>-gã xii-güedé:

—Chí dáñá, vá dásàtù-ndó ñni ñadìhí-a, chí sá ní quide ñaha-a<sup>n</sup> xii-í cúú-xi ñi<sup>n</sup> sá vãha. <sup>7</sup> Chí cue ñáyiú ndàhú duca<sup>n</sup>-ni cùtnahá ñáyiú-á<sup>n</sup> tnuú-ndó, te nání òré càchí ñni-ndó te chindee-ndò-yu. Dico yúhú chí vá nchãá ndùu cundecu ndihí ñaha-í xii-ndo ñnyíyí-a. <sup>8</sup> Te ñadìhí-a ní quide-a<sup>n</sup> ñi<sup>n</sup> sá vãha ndéé není ní ndacu-a<sup>n</sup>, chí sá dúhá ní quide ñaha-a<sup>n</sup> xii-í ní chíhi ñaha-a<sup>n</sup> àcítí, te xíã<sup>n</sup> cada ñni-ndó sã sã quide túha-a<sup>n</sup> yiqui cùnú-í cuendá quíndúxi-xi. <sup>9</sup> Te na càchí tnúhu ndáá-í xii-ndo sã ndèni ní cuu ñihí ñuyíyú ná càhã<sup>n</sup> ñáyiú tnúhu-í, te càhã<sup>n</sup>-yu tnahá cuendá ñadìhí-a cuendá quini nchaa ñáyiú nàcuáa ní quide-a<sup>n</sup>, te duca<sup>n</sup> vã nàcuánaá-yu —càchí-gá xáha<sup>n</sup>-gã xii-güedé.

**Té Jùdás ndúcú-dẽ nàcuáa cada-dé  
cuáha cuendá-dé Jèsús núú cuè  
tée cùu úhú ñni ñáhã xii-gá**

(Mt. 26:14-16; Lc. 22:3-6)

<sup>10</sup> Te té Jùdás Iscarioté ní sáhã<sup>n</sup>-dé ní ndatnúhu-dé ndihí cue tée cùu dútú cúnùu sá cuáha cuendá-dé Jèsús núú-güedé, te núú tnahá té Jùdás-á<sup>n</sup> cúú ùxúú tnahá cue tée xica cuu ndihí-gá

ní cùu. <sup>11</sup>Te òré duca<sup>n</sup> nǐ ndatnúhu-dé ndíhi-güedé, te ío ní cudíí ínǐ-güedé, te ní xáha<sup>n</sup>-güedé xii-dé sá cuǎñaha-güedé díhú<sup>n</sup> xii-dé. Te té Jüdás-á<sup>n</sup> nǐ nguíta-dé ndúcú-dé nàcuáa cada-dé cuáha cuendá-dé Jèsús núú-güedé.

**Cùdini Jesús ndíhi cue  
téé xica cuu ndíhi-gá**

(Mt. 26:17-29; Lc. 22:7-23;  
Jn. 13:21-30; 1 Co. 11:23-26)

<sup>12</sup>Te ní sáá nduu nǐ quesaha víco pascuá, víco ñá túú xèxi ñáyiú pàá sá ñà túú yíhi levadurá, te díu-ni nduu-á<sup>n</sup> sáhnǐ-güedé ì<sup>n</sup> mbéé líhli xèxí-yu nduu víco pascuá-á<sup>n</sup>. Te cue téé xica cuu ndíhi Jesús ní xicá<sup>n</sup> tnúhú-güedé núú-gá, te xáha<sup>n</sup>-güedé xii-gá:

—Mèstrú, véxi-ndí xicá<sup>n</sup> tnúhú-ndí núú-n núu ndèé cáá vèhe cuiní-n càda túha-ndí sá cùdini-o sacuaa nduu víco pascuá —càchí-güedé xáha<sup>n</sup>-güedé xii-gá.

<sup>13</sup>Te Jèsús ní xáha<sup>n</sup>-gá xii úú-ni tnàhá cue téé xica cuu ndíhi-gá:

—Chí cuáhá<sup>n</sup> xití ñuú-á<sup>n</sup>, te yacá<sup>n</sup> naníhí-ndó ì<sup>n</sup> téé tànehe yóó ndute, te téé-á<sup>n</sup> cándèndaha-ndo-dé quíhí<sup>n</sup>. <sup>14</sup>Te núu ndèdacàa vehe na ndíhu-dé te xíá<sup>n</sup> quíhu-ndo. Te cúñaha-ndo xii xítóhó vehe-á<sup>n</sup>: “Yaá cúú Mèstrú càchí-gá sá núu ndèdacàa xichi xití vehe-n cuáñaha nùu-n xii-gá cudini-gá ndíhi cue téé xica cuu ndíhi-gá sacuaa nduu pascuá”, duha cúñaha-ndo. <sup>15</sup>Te dàtnùnǐ danèhé ñáhá-dé xii-ndo ì<sup>n</sup> cuartú cáhnú càa núú nǐnu, chí vehe yòdo tnaha cuu-xi, te sa ní quide túha-dé nchaa sá nándíhi, te nchòhó dicó-nǎ comídá cada túha-ndo cùdini-o —càchí-gá xáha<sup>n</sup>-gá xii-güedé.

<sup>16</sup>Te cue téé-á<sup>n</sup> nǐ xica-güedé cuáhá<sup>n</sup>-güedé xití ñuú-á<sup>n</sup>, te nchaa-ni nàcuáa ní xáha<sup>n</sup> Jèsús ní cuu. Te ní quide túha-güedé sá cùdini-güedé ndíhi-gá sacuaa nduu víco pascuá-á<sup>n</sup>.

<sup>17</sup>Te sátá nǐ cundiquí<sup>n</sup> te ní quexìo Jesús ndíhi ndí ùxúú cue téé xica cuu ndíhi-gá. <sup>18</sup>Te cuánguìhu-gá mèsá ndíhi-güedé cuendá cudini ndíhi ñaha-gá xii-güedé, te òré yíhí-gá mèsá ndíhi-güedé, te xáha<sup>n</sup>-gá xii-güedé:

—Na càchí tnúhu ndáá-í xii-ndo sá ì<sup>n</sup> nchohó cue téé xèxi ndíhi ñaha xii-í cuáha cuendá ñáhá-ndó núú cuè téé cùu úhú ínǐ ñáhá xii-í —càchí-gá xáha<sup>n</sup>-gá xii-güedé.

<sup>19</sup>Te sá dúcá<sup>n</sup> nǐ xáha<sup>n</sup>-gá xii-güedé, te nchaa-güedé ní nguíta-güedé cùndiyí-güedé. Te da ì<sup>n</sup> da ì<sup>n</sup>-güedé ní nguíta-güedé xicá<sup>n</sup> tnúhú-güedé núú-gá, te xáha<sup>n</sup>-güedé xii-gá:

—¿Ñá díú yíhú duca<sup>n</sup> sàni ínǐ-n càda-í-u? —càchí-güedé xáha<sup>n</sup>-güedé xii-gá.

<sup>20</sup>Te Jèsús ní xáha<sup>n</sup>-gá xii-güedé:

—Díu-ni ì<sup>n</sup> nchòhó cue téé úxúú xicá cùu ndíhi-í, téé na dàquèndaha còhó òré daquèndaha-í, téé-á<sup>n</sup> cuáha cuendá ñáhá-dé xii-í núú cuè téé cùu úhú ínǐ ñáhá. <sup>21</sup>Te yúhú Téé cùu ñanǐ tnáhá-ndó nchàa-ndo ñuhu ichi-í cuáhá<sup>n</sup>-í ndoho-í nàcuáa càhá<sup>n</sup>-xi núú tütú Yá Ndiòxí. Dico ndàhú ní cuu téé duca<sup>n</sup> na cuáha cuendá ñáhá xii-í núú cuè téé cùu úhú ínǐ ñáhá, chí váha-gá sá vǎ cáccú téé-á<sup>n</sup> cundecu-dé ní cùu, te ñá díú sá nǐ cacu-dé te duca<sup>n</sup> càda-dé —càchí-gá xáha<sup>n</sup>-gá xii-güedé.

<sup>22</sup>Te nini cùdini cue téé xica cuu ndíhi Jesús ní quehe<sup>n</sup>-gá pàá, te ní ndacá<sup>n</sup> táhú-gá núú Yá Ndiòxí, te dàtnùnǐ ní táhú cuèchi-gá, te ní nguíta-gá dácáñhu ñaha-gá xii-güedé, te xáha<sup>n</sup>-gá:

—Chí quéhé<sup>n</sup> pàá-a caxi-ndo, te cada ínǐ-ndó sǎ cúú-xí dàtná yiquí cùñú-í —càchí-gá xáha<sup>n</sup>-gá xii-güedé.

<sup>23</sup>Te ní quehe<sup>n</sup>-gá vàsú ñúhú ndùdí ndéhé yoho yàha stilé, te ní ndacá<sup>n</sup> táhú-gá núú Yá Ndiòxí, te dàtnùnǐ ní nguíta-gá sǎñaha-gá xii-güedé cuendá coho-güedé luha luha sá ñúhú xití-xi, te

nchaa-güedé ní xihí. <sup>24</sup>Te ní xáha<sup>n</sup>-gǎ xii-güedé:

—Ndudí ndéhé yoha yàha stilé-a cada iní-ndó sǎ cúu-xí dàtná nǎhí-í sǎ cáti òré cahni ñaha-güedé xii-í. Te sǎ dúcá<sup>n</sup> càti nǎhí-í xíá<sup>n</sup> cutnùnì ndáá sǎ Yǎ Ndiòxí cada-gǎ ingá núú sǎ vǎha sǎ cúu-xí vǎi ñáyiú dàtná ní cachí-gǎ cada-gǎ. <sup>25</sup>Te na càchí tnúhu ndáá-í xii-ndo sǎ vítná-nǎ duha xihí-í ndudí ndéhé yoha yàha stilé-a te vá cóhó-gǎ-í, dico na sǎá nduu cùndecu-í núú ndécú Yǎ Ndiòxí táxí tnùnì-gǎ, te dàvǎ-á<sup>n</sup> cada iní-í sǎ dàtná sǎ cóhó tùcu-í chí ío cudǎí iní-í — càchí-gǎ xáha<sup>n</sup>-gǎ xii-güedé.

**Jèsús càhá<sup>n</sup>-gǎ sǎ tǎ Pèlú cúñaha-dé xii ñáyiú sǎ ñà túú xìnì ñáhá-dé xii-gǎ**

(Mt. 26:30-35; Lc.

22:31-34; Jn. 13:36-38)

<sup>26</sup>Te Jèsús ní xita-gǎ ì<sup>n</sup> ndudú ndihí cue tée xica cuu ndihí-gǎ, te dàtnùnì ní xica-gǎ cuáhá<sup>n</sup>-gǎ ndihí-güedé yucu Òlívú. <sup>27</sup>Te yàcá<sup>n</sup> ní xáha<sup>n</sup>-gǎ xii-güedé:

—Na càchí tnúhu-í xii-ndo sǎ ncháá-ndó dàña nihnu ñaha-ndo xii-í niú vitna, chí quee ndáá-xi nàcuáa càhá<sup>n</sup>-xi núú tùtú Yǎ Ndiòxí núú càchí-xi: “Yúhú cuáha-í tnúhu cahni-güedé tée cùu toli, te nchaa mbéé-dé ndihí-güedí cuténuu”, duha càchí-xi núú tùtú-gǎ. <sup>28</sup>Dico na cùu-í te ndoto-í te codonùu-í núú-ndó quǎhí<sup>n</sup> distritú Galileá —càchí-gǎ xáha<sup>n</sup>-gǎ xii-güedé.

<sup>29</sup>Te tǎ Pèlú ní xáha<sup>n</sup>-dǎ xii-gǎ:

—Te cuèi nchaa-güedé ná dándóo ñaha-güedé xii-n, dico yúhú chí vá dándóo ñaha-í xii-n —càchí-dé xáha<sup>n</sup>-dǎ xii-gǎ.

<sup>30</sup>Te Jèsús ní xáha<sup>n</sup>-gǎ xii-dé:

—Na càchí tnúhu ndáá-í xii-n sǎ niú vitna cùmání-gǎ cana líhi úú xito, te únì xito càhá<sup>n</sup>-n nǎú ñáyiú sǎ ñà túú xìnì ñáhá-n xii-í —càchí-gǎ xáha<sup>n</sup>-gǎ xii-dé.

<sup>31</sup>Dico tǎ Pèlú ní càhá<sup>n</sup> ñíí-dé, te xáha<sup>n</sup>-dǎ xii-gǎ:

—Cuèi na cùu ndihí ñaha-í xii-n dico vá càhá<sup>n</sup>-í núú ñáyiú sǎ ñà túú xìnì ñáhá-í xii-n —càchí-dé xáha<sup>n</sup>-dǎ xii-gǎ.

Te nchaa dava-gǎ cue tée xica cuu ndihí-gǎ diu-ni duca<sup>n</sup> ní xáha<sup>n</sup>-güedé xii-gǎ.

**Jèsús càhá<sup>n</sup> ndihí-gǎ Yǎ Ndiòxí ì<sup>n</sup> xichi núú nánì Gètsemaní**

(Mt. 26:36-46; Lc. 22:39-46)

<sup>32</sup>Te Jèsús cuáhá<sup>n</sup>-gǎ ndihí cue tée xica cuu ndihí-gǎ ì<sup>n</sup> xichi núú nánì Gètsemaní. Te òré ní quexìo-gǎ ndihí-güedé xíá<sup>n</sup>, te ní xáha<sup>n</sup>-gǎ xii-güedé:

—Chí cúnúçóo iha cundetú-ndo na quǎhí<sup>n</sup>-í yàcá<sup>n</sup> càhá<sup>n</sup> ndihí-í Yǎ Ndiòxí — càchí-gǎ xáha<sup>n</sup>-gǎ xii-güedé.

<sup>33</sup>Te ndèca-gǎ tǎ Pèlú, ndihí tǎ Jàcobó, ndihí tǎ Juàà cuáhá<sup>n</sup>, te ñà túú tnàhí-gǎ cúu vǎha iní-gǎ te ní nguíta-xi súúnì ndìhú iní-gǎ. <sup>34</sup>Te ní xáha<sup>n</sup>-gǎ xii cue tée únì-á<sup>n</sup>:

—Súúnì ndìhú iní-í dàtná sǎ cùu-í, te chí quéndóo iha te vá cùdú-ndó — càchí-gǎ xáha<sup>n</sup>-gǎ xii-güedé.

<sup>35</sup>Te sa ñùnchií luha ní xica ndehe Jèsús núú ndécú-güedé, te ní ngáundeyi-gǎ ndéé ñuhu càhá<sup>n</sup> ndihí-gǎ Tǎtá-gǎ Dútú Ndiòxí sǎ núu vá cùndèe iní-gǎ taunihnu ñaha-gǎ xii-gǎ cuendá nchaa nàcuáa yáha-gǎ. <sup>36</sup>Te òré càhá<sup>n</sup> ndihí Jèsús Tǎtá-gǎ Dútú Ndiòxí, te xáha<sup>n</sup>-gǎ:

—Yòhó tǎtá mèe-í, nchaandi túhú sǎ vǎha ndàcu-n quide-n, te càhá<sup>n</sup> ndáhú-í núu-n núu vá cùndèe iní-n tàunihnu ñaha-n xii-í cuendá sǎ vǎ ndóhò-í ná sǎá òré, dico vá cadá-n nàcuáa càchí iní mèe-í chí cada-n nàcuáa càchí mee-n —càchí-gǎ xáha<sup>n</sup>-gǎ xii Tǎtá-gǎ Dútú Ndiòxí.

<sup>37</sup>Te sǎtá ní yáha ní càhá<sup>n</sup> ndihí-gǎ Tǎtá-gǎ Dútú Ndiòxí, te cuánuhú-gǎ núú ní dándóo-gǎ cue tée únì-á<sup>n</sup>, te

xixídí-güedé òré ní nasáá-gá, te ní xáha<sup>n</sup>-gã xii té Pèlú:

—Xímú, ¿náa sama xidí-n? ¿Náa ñá cündèe tnahi núú-n vã cùdú-ni-n cuèdìcò ì<sup>n</sup> òré-ǎ<sup>n</sup>? —càchí-gá xáha<sup>n</sup>-gã xii-dé.

Te ní xáha<sup>n</sup> tucu-gá xii-güedé:

<sup>38</sup>—Te chí quéndòo tucu, te cuhu<sup>n</sup> iní-ndó vã cùdú-ndó, te cáhá<sup>n</sup> ndihi-ndo Yã Ndiöxí cuèndá sá vã dácàhá<sup>n</sup> ñáhá yùcu ñávãha xii-ndo càda-ndo sá ñà túú tàú-ndó càda-ndo. Te na càchí tnúhu ndáá-í xii-ndo sã nchòhó cuíní-ndó càda-ndo nchaa nacuaá càhá<sup>n</sup>-í dìcò-ni sá ñà túú nihí ndéé-ndó —càchí-gá xáha<sup>n</sup>-gã xii-güedé.

<sup>39</sup>Te Jèsús ní xica tucu-gá cuáhá<sup>n</sup>-gá cáhá<sup>n</sup> ndihi-gá Tãtá-gã Dútú Ndiöxí, te diu-ni nàcuáa ní xáha<sup>n</sup>-gã díhna xáha<sup>n</sup> tucu-gá. <sup>40</sup>Te òré ní yáha ní cáhá<sup>n</sup> ndihi-gá Tãtá-gã Dútú Ndiöxí, te cuánuhú tucu-gá núú xíndecu cue téé úní xicá cùu ndihi-gá-á<sup>n</sup>, te xidí-ni tucu-güedé òré ní nasáá-gá, te duca<sup>n</sup> nǐ quide-güedé chi súúní ñùhu saní núú-güedé, te ñá ní nǐhí-güedé tnúhu cúnaha-güedé xii-gá òré ní nasáá-gá. <sup>41</sup>Te ní sáhá<sup>n</sup> tucu-gá xito cùu úní ní cáhá<sup>n</sup> ndihi-gá Tãtá-gã Dútú Ndiöxí, te òré ní nasáá tucu-gá núú xíndecu-güedé, te xáha<sup>n</sup>-gã xii-güedé:

—¿Te náa xidí-ni tucu-ndo?, te vitna vã cùdú-gá-ndó chi sa ní sáá òré cuáha cuèndá ñáhá-güedé xii yúhú Téé cùu ñání tnáhá-ndó nchàa-ndo núú cuè téé ndècu ichi cuehé ichi duha. <sup>42</sup>Te vitna chí ndácòo na quíhí<sup>n</sup>-ó chi sa véxi téé cuáha cuèndá ñáhá xii-í núú cuè téé cùu úhú iní ñáhá —càchí-gá xáha<sup>n</sup>-gã xii-güedé.

**Ní tñii-güedé Jèsús ndéca  
ñaha-güedé xii-gá cuáhá<sup>n</sup>**

(Mt. 26:47-56; Lc. 22:47-53; Jn. 18:2-11)

<sup>43</sup>Te càhá<sup>n</sup> dúcá<sup>n</sup>-ní Jèsús ní quexio té Júdás. Te núú tnàhá téé-á<sup>n</sup> cùú

ùxúú tnàhá cue téé xica cuu ndihi-gá. Te ndihi-dé vãi cue téé ní quexio, te dava-güedé xínehe-güedé machití te dava-güedé xínehe-güedé carrutí. Te cue téé-á<sup>n</sup> nǐ tendaha ñaha cue dútú cúnúu ndihi cue téé dàcuaha ñaha xii ñáyiú nchaa tnúhu ní chídó tnúní ndí Moisés, ndihi cue téé cùu sacuéhé núú ñáyiú isràél. <sup>44</sup>Te té Júdás téé cuáha cuèndá ñáhá xii Jèsús sa ní xítnúhu-dé cue téé-á<sup>n</sup> nàcuáa cada-dé cuáha cuèndá ñáhá-dé xii Jèsús núú-güedé. Te duha ní xáha<sup>n</sup>-dè xii-güedé:

—Cundehe-ndo tée na tèyuhu-í, te téé-á<sup>n</sup> tñii-ndo-dé chi téé-á<sup>n</sup> cùú-dé téé ndèé iní-ndó, te ío quíhí iní-ndó càndeca-ndo-dé quíhí<sup>n</sup> —duha ní xáha<sup>n</sup>-dè xii-güedé.

<sup>45</sup>Te òré ní quexio té Júdás ndihi cue téé-á<sup>n</sup> núú ndécú Jèsús, te ní xáha<sup>n</sup>-dè xii-gá:

—Mèstrú —càchí-dé xáha<sup>n</sup>-dè xii-gá.

Te ní teyuhu ñaha-dé. <sup>46</sup>Te nchaa cue téé ndihi-dé-á<sup>n</sup> nǐ tñii-güedé Jèsús cuèndá candeca ñaha-güedé xii-gá quíhí<sup>n</sup>. <sup>47</sup>Te ì<sup>n</sup> cue téé cündihi Jèsús ní tava-dé machití-dé, te ní xehndé-ni-dé ì<sup>n</sup> xio lóho ì<sup>n</sup> téé xínu cuechi núú dütú cúnúu, te ní quendeé duu<sup>n</sup> lóho téé-á<sup>n</sup>. <sup>48</sup>Te Jèsús ní xáha<sup>n</sup>-gã xii cue téé ní tñii ñaha xii-gá-á<sup>n</sup>:

—Nchòhó, nèhe-ná-ndó màchití, nèhe-ná-ndó càrrutí véxi ní tñii ñaha-ndo xii-í, dàtná quídé-ndó ì<sup>n</sup> ñadúhú quídé ñaha-ndo xii-í. <sup>49</sup>Te nchaa-ni nduu ní xiní-ndó nǐ xíndecu-í xití veñúhu càhnu sá ìo cúnúu ní xóo danèhé-í ñáyiú, te ñá túú ní tñii ñaha-ndo xii-í. Dico dàcutití sã dúhá yáha-í cuèndá quee ndáá-xi nàcuáa càhá<sup>n</sup>-xi núú tütú Yã Ndiöxí —càchí-gá xáha<sup>n</sup>-gã xii-güedé.

<sup>50</sup>Te nchaa cue téé xica cuu ndihi-gá ní xínu-güedé ní dándòo ñaha-güedé xii-gá.



ngüíta-güedé cániha-güedé xii-gá, te xáha<sup>n</sup>-güedé:

—¡Cáhá<sup>n</sup> ná cótó nă cúú tée ní caniha xii-n! —cachí-güedé xáha<sup>n</sup>-güedé xii-gá.

Te cue tée cùu poleciá ní cani-güedé núú-gă.

**Té Pèlú cáhá<sup>n</sup>-dé núú ñáyiú sá ñà túú xini-dé Jèsús**

(Mt. 26:69-75; Lc. 22:56-62;  
Jn. 18:15-18, 25-27)

<sup>66</sup>Te ndéé xití vehe càa núú ñnu quide-güedé jündá, chi vehe yòdo tnaha cuu-xi, te té Pèlú núcõo-dé quehé vehe-á<sup>n</sup>. Te ì<sup>n</sup> xíchí xínú cuèchi núú düttú cúnùu-á<sup>n</sup> ñí quexio-xi núú núcõo té Pèlú.

<sup>67</sup>Te òré ní xini ñáhá-xí xii-dé núcõo teté-dé yuhu ñuhú, te ní xindéhé ñàha vâha-xi xii-dé, te xáha<sup>n</sup>-xi:

—Yòhó tnàhá-n cùu-n tée xica cuu ndihi Jesús tée ñuú Nazàrét —cachí-xi xáha<sup>n</sup>-xi xii-dé.

<sup>68</sup>Te té Pèlú ní xáha<sup>n</sup>-dè xii-xi:

—Yúhú ñà túú xini-í tée-á<sup>n</sup>, te ni ñà túú cùtnuní iní-í nása ndùu tnúhu cáhá<sup>n</sup>-n —cachí-dé xáha<sup>n</sup>-dè xii-xi.

Te té Pèlú ní xica-dé cuáhá<sup>n</sup>-dé ndàa nacuaá nchí yuyèhe vehe-á<sup>n</sup>, te ní cana ì<sup>n</sup> líhi. <sup>69</sup>Te xíchí xínú cuèchi-á<sup>n</sup> ñí xini ñáhá tùcu-xi xii-dé, te xáha<sup>n</sup>-xi xii nchaa ñáyiú xindecu-á<sup>n</sup>:

—Diu tée-á<sup>n</sup> tnàhá-dé xicá cùu-dé ndihi tée ndèca-güedé cuánguihu-a —cachí-xi xáha<sup>n</sup>-xi xii-yu.

<sup>70</sup>Dico té Pèlú ñà túú ní ñnuu tucu-dé sá xicá cùu-dé ndihi Jèsús. Te tna tnaa-ni ní cuu sá dúcá<sup>n</sup> ñí xáha<sup>n</sup> xíchí-á<sup>n</sup> xii-dé, te ní xáha<sup>n</sup> tùcu dava cue ñáyiú xindecu-á<sup>n</sup> xii-dé:

—Ndáá sá tnàhá-n cùu-n tée xica cuu ndihi tée ndèca-güedé cuánguihu-á<sup>n</sup> chi cùu-n tée distritú Galileá, te cáhá<sup>n</sup>-n dàtná cáhá<sup>n</sup>-güedé —cachí-yu xáhá<sup>n</sup>-yu xii-dé.

<sup>71</sup>Te té Pèlú ní xáha<sup>n</sup>-dè xii-yu:

—Nchàcuiiti Yá Ndiõxí sá yúhú cáhá<sup>n</sup> ndáá-í sá ñà túú xini-í tée càcunehe-ndo-á<sup>n</sup> —cachí-dé xáha<sup>n</sup>-dè xii-yu.

<sup>72</sup>Te òré-ni-á<sup>n</sup> ñí cana tucu líhi xito cùu uú, te òré-á<sup>n</sup> ñí ndacu iní té Pèlú nacuaá ní xáha<sup>n</sup> Jèsús xii-dé sá cùmání-gă cana ì<sup>n</sup> líhi úu xito te úní xito cáhá<sup>n</sup>-dé núú ñáyiú sá ñà túú xini ñáhá-dè xii-gă. Te òré duca<sup>n</sup> ñí ndacu iní-dé nacuaá ní xáha<sup>n</sup> Jèsús xii-dé, te ní ndáhyú-dé ní ndixi cuéchi iní-dé.

**Jèsús ndécú-gă núú tē Pilatú**

(Mt. 27:1-2, 11-14; Lc.  
23:1-5; Jn. 18:28-38)

**15** Te sáta ñí túndaá te cue tée cùu dúttú cúnùu, ndihi cue tée cùu sacuéhé núú ñáyiú isràél, ndihi cue tée dàcuaha ñaha xii ñáyiú nchaa tnúhu ní chídó tnúní ndíi Moisés, ndihi nchaa dava-gá cue tée cùnùu ní xindecu jündá ní natacá-güedé, te ní dácútú-güedé Jèsús te ndèca ñaha-güedé xii-gá cuáhá<sup>n</sup> núú tē Pilatú. <sup>2</sup>Te té Pilatú ní xicá<sup>n</sup> tnúhú-dé núú Jèsús, te xáha<sup>n</sup>-dè xii-gá:

—¿Ndáá sá díú-n cùu-n tée yindaha ñaha xii ñáyiú isràél-á<sup>n</sup>? —cachí-dé xáha<sup>n</sup>-dè xii-gá.

Te Jèsús ní xáha<sup>n</sup>-gă xii-dé:

—Diu-í yindaha-í-yu —cachí-gă xáha<sup>n</sup>-gă xii-dé.

<sup>3</sup>Te cue tée cùu dúttú cúnùu dacia-güedé vai cuéchi díquí-gă. <sup>4</sup>Te té Pilatú ní xicá<sup>n</sup> tnúhú tùcu-dé núú-gă, te xáha<sup>n</sup>-dè xii-gá:

—Cáhá<sup>n</sup>, ná cuendá ñà cáhá<sup>n</sup>-n te cundehe nă ndéé duha titní cuéchi dàcaa díquí ñáhá cuè tée-a xii-n —cachí-dé xáha<sup>n</sup>-dè xii-gá.

<sup>5</sup>Dico Jèsús ñà túú tnàhi ni cáhá<sup>n</sup>-gă te té Pilatú ío ní cuñúhu-dé sá dúcá<sup>n</sup> ñà túú tnàhi ni cáhá<sup>n</sup>-gă.

**Cue ñáyiú xǎhǎ<sup>n</sup>-yu xii té  
Pilátú sá cáhni-dě Jèsús**

(Mt. 27:15-31; Lc. 23:13-25;  
Jn. 18:38-19:16)

<sup>6</sup>Te ndi tnahá nduu vico pascuá dácäcu té Pilátú ì<sup>n</sup> téé yìhi vecaá chi duca<sup>n</sup> tñahí quide-dé, te mee ñáyiú cǎhá<sup>n</sup>-yu te núu ndédacàa téé yìhi vecaá-á<sup>n</sup> cäcu-dé, te téé-á<sup>n</sup> dácäcu-dé. <sup>7</sup>Te yìhi ì<sup>n</sup> téé nàni Barrabás vecaá ndihi dava-gá cue téé cündihí-dé. Te té Barrabás-á<sup>n</sup> ñí sanu ichi-dé ñáyiú ñúú ingá ichi, te ní ngúíta-yu ndihi-dé ní cuu úhú iní-yu cue téé cùchiu<sup>n</sup>, te ní sahní-dé ndíyí núu xǎ<sup>n</sup> ní chihi ñaha-güedé vecaá xii-dé. <sup>8</sup>Te nchaá ñáyiú ní sáhá<sup>n</sup>-yu núú tǎ Pilátú, te cǎhá<sup>n</sup> ndàhú-yu núú-dě sá ná cádá ñahi-ni-dé dàtná quídé-dě. <sup>9</sup>Te té Pilátú ní xáha<sup>n</sup>-dě xíí-yu:

—¿Cuíní-ndó sǎ dácäcu-í téé yìndaha ñaha xii ñáyiú isràél-ǎ? —càchí-dé xáha<sup>n</sup>-dě xíí-yu.

<sup>10</sup>Te duca<sup>n</sup> ñí cáhá<sup>n</sup> té Pilátú, chi ní cutnùní iní-dé sá dicó sá cuèdú iní cuè dútú cúnùu núu xǎ<sup>n</sup> duca<sup>n</sup> ñí quide-güedé ní sáha cuèndá ñáhá-güedé xii Jèsús núú-dě. <sup>11</sup>Te cue dútú cúnùu ní xáha<sup>n</sup>-güedé xii nchaá ñáyiú sá ná cǎñáhá-yu xii té Pilátú dácäcu-dé té Barrabás, te ní quídé-yu nàcuáa ní xáha<sup>n</sup>-güedé. <sup>12</sup>Te té Pilátú ní xícá<sup>n</sup> tñuhú-dě núu-yu, te xáha<sup>n</sup>-dě xíí-yu:

—¿Ná cuíní-ndó càda-í téé càchí-ndó yìndaha ñaha xii ñáyiú isràél-i? —càchí-dé xáha<sup>n</sup>-dě xíí-yu.

<sup>13</sup>Te nchaá-yu níhi ní cáhá<sup>n</sup>-yu, te xǎhǎ<sup>n</sup>-yu xii-dé:

—¿Cata caa-dé núu cùrúxí! —càchí-yu xǎhǎ<sup>n</sup>-yu xii-dé.

<sup>14</sup>Te té Pilátú ní xáha<sup>n</sup>-dě xíí-yu:

—¿Te ná cúú cuèchi ní quide-dé te núu duca<sup>n</sup> cuíní-ndó càda-í-dé-i? —càchí-dé xáha<sup>n</sup>-dě xíí-yu.

Dico nchaá-yu uu<sup>n</sup>-gá níhi ní cáhá<sup>n</sup>-yu, te xǎhǎ<sup>n</sup>-yu xii-dé:

—¿Cata caa-dé núu cùrúxí! —càchí-yu xǎhǎ<sup>n</sup>-yu xii-dé.

<sup>15</sup>Te té Pilátú ní quide-dé nàcuáa ní xáhǎ<sup>n</sup>-yu xii-dé cuèndá sá cúdiu-dé núu-yu, te ní dácäcu-dé té Barrabás, te ní táuchíú<sup>n</sup>-dě ní caní-güedé Jèsús ndihi ñii. Te sátá dúcá<sup>n</sup> ñí quide ñaha-güedé xii-gá, te ní táuchíú<sup>n</sup>-dě candeca ñaha-güedé quíhí<sup>n</sup> cata caa ñaha-güedé xii-gá núu cùrúxí.

<sup>16</sup>Te cue téé cùu sandadú ndécá ñaha-güedé xii-gá cuáhá<sup>n</sup> vechiu<sup>n</sup>, te diu-ní xǎ<sup>n</sup> cúú vèhe téé cùu gobiernú. Te xǎ<sup>n</sup> ñí tacá nchaá dava-gá cue téé cùu sandadú. <sup>17</sup>Te xǎ<sup>n</sup> ñí dácúíhnú ñaha-güedé xii-gá ì<sup>n</sup> dóo tícuèhé vǎhí, te ní cadúha-güedé ì<sup>n</sup> coróná iñu ní chihi-güedé díquí-gǎ. <sup>18</sup>Te ní ngúíta-güedé níhi cǎhá<sup>n</sup>-güedé cúdíquí ndeé ñáhá-güedé xii-gá, te xáha<sup>n</sup>-güedé:

—¿Ío cǎhnu cuu yohó téé yìndaha ñaha xii ñáyiú isràél! —càchí-güedé xáha<sup>n</sup>-güedé xii-gá.

<sup>19</sup>Te cǎni-güedé díquí-gǎ ndihi ì<sup>n</sup> car-rùtí, te tíu díí ñáhá-güedé xii-gá, te ngúíñí xítí-güedé núu-gǎ quídé-güedé sá néhé-güedé sá yínùhu núu-gǎ dico ñá ndàá chi dicó cúdíquí ndeé ñáhá-güedé xii-gá. <sup>20</sup>Te sátá dúcá<sup>n</sup> ñí cudíquí ndeé ñáhá-güedé xii-gá, te ní nataunuu ñaha-güedé xii-gá dóo tícuèhé vǎhí sǎ ñí dácúíhnú ñaha-güedé, te ní dándíunuu ñaha-güedé xii-gá dóo méé-gǎ. Te dàt-nùní ndécá ñaha-güedé cuáhá<sup>n</sup> núu cáta càa ñaha-güedé xii-gá núu cùrúxí.

**Sàta caa-güedé Jèsús núu cùrúxí**

(Mt. 27:32-44; Lc.

23:26-43; Jn. 19:17-27)

<sup>21</sup>Te ichi cuáhá<sup>n</sup>-güedé ndihi Jèsús ní naníhí-güedé ì<sup>n</sup> téé ñúú Cirené nání-dě Xímú, te déhe-dé cúú ì<sup>n</sup> téé nàni Lijandrú, ndihi ingá téé nàni Rúfú. Te té Xímú-á<sup>n</sup> ñuhú-dě ichi duha cuándixí-dé

ní sáhá<sup>n</sup>-dé yucu, te ní quide yica-güedě ní xido-dé cùrúxí sá nchídó Jèsús.

<sup>22</sup>Te ndèca-güedé Jèsús cuáhá<sup>n</sup> ì<sup>n</sup> xichi núú nání Gólgotá, te tnúhu-á<sup>n</sup> quée-xí: Ì<sup>n</sup> xichi núú nání yìqui díquí ndíyì, duha quèe-xi tnúhu-á<sup>n</sup>. <sup>23</sup>Te ní sáñaha-güedě xii-gá ndudí sá ní quée yúcu nání mirrà coho-gá ní cùu dico ñá túú ní xìhi-gá. <sup>24</sup>Te ní sata caa ñaha-güedě xii-gá núú cùrúxí. Te sáta dúcá<sup>n</sup> te cue tée cùu sandadú-á<sup>n</sup> ní xito ndeé-güedé nùu ndèdaca-güedé cuu cuendá-güedé dóó-gá.

<sup>25</sup>Te cùu-xi caá ì<sup>n</sup> dátneé òré ní sata caa ñaha-güedě xii-gá núú cùrúxí. <sup>26</sup>Te ní taxi ndecu-güedé ì<sup>n</sup> sá ndèè lètrá núú táca-gá. Te lètrá-á<sup>n</sup> càhá<sup>n</sup>-xi ná cuendá duca<sup>n</sup> ní quide ñaha-güedě xii-gá. Te duha càhá<sup>n</sup> lètrá-á<sup>n</sup>: “Tée yìndaha ñaha xii ñáyiú isràél”, duha càchí-xi. <sup>27</sup>Te tnàhá úú cue tée cùu ñadúhú ní sata caa-güedé ñu-ni núú cùrúxí tucu. Te ì<sup>n</sup>-dé ní sata caa-güedé xio cùha-gá, te ingá-dé ní sata caa-güedé xio dàtni-gá. <sup>28</sup>Te duca<sup>n</sup> ní cuu chí ní quee ndáá-xi nàcuáa càhá<sup>n</sup>-xi núú tütú Yá Ndiòxí núú càchí-xi: “Ì<sup>n</sup>-ni ní quide ñaha-güedě xii-gá ndìhi cue tée ndècu cuéchi-xi”, duha càchí-xi núú tütú-gá.

<sup>29</sup>Te nchaa ñáyiú yáha yatni núú táca-gá dácuicó-yu díquí-yu te xìcuèhé ñáhá-yu xii-gá, te xáhá<sup>n</sup>-yu:

—Te ná cuendá duca<sup>n</sup> càa-n tacaan-xiá<sup>n</sup>, te càchí-n sá dàngoyo-n veñúhu càhnu sá ìo cùnuu te dandaa-n ingá veñúhu saa, te xití úní-ni nduu sa nadaxinu-n càchí-n. <sup>30</sup>Te vitna tanùu núú cùrúxí-á<sup>n</sup> dàcácu-n mèn-n —cachí-yu xáhá<sup>n</sup>-yu xii-gá.

<sup>31</sup>Te ñu-ni duca<sup>n</sup> ní quide cue tée cùu dútú cúnùu, ndìhi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, chí ní cudíquí ndeé ñáhá-güedě xii-gá, te ní xítnàha-güedé:

—Tée-a ní ndacu-dé ní dácácu nihnu-dé ñáyiú, ¿te ná cuendá ñá

ndácú-dé dàcácu nihnu-dé mée-dě-i? <sup>32</sup>Te núu ndáá sá dífú-dě cùú-dě Cristú Yaá ní tendaha Yá Ndiòxí véxi ñuyíú-a quindaha ñaha xii ñáyiú isràél, te na cùndehe-o nuu-dé núú cùrúxí, cuendá quíndáá iní-ó-dě —càchí-güedé xítnàha-güedé.

Te ndeé tnàhá cue tée tàcaa xio xio ñiñi-gá xìcuèhé ñáhá-güedě xii-gá.

### Ní xíhí Jèsús

(Mt. 27:45-56; Lc.

23:44-49; Jn. 19:28-30)

<sup>33</sup>Te òré ní cuu cuádava nduu, te ní cunee nihí ñuyíú, te duca<sup>n</sup>-ni càa ní cuu ndeé caá úní sacuaa. <sup>34</sup>Te ñu-ni òré caá úní sacuaa-á<sup>n</sup> nihí ní càhá<sup>n</sup> Jèsús, te xáha<sup>n</sup>-gá xii Tátá-gá Dútú Ndiòxí:

—Elòí, Elòí, láma sabàctani —càchí-gá xáha<sup>n</sup>-gá.

Te tnúhu-á<sup>n</sup> quée-xí: Ndiòxí mée-í, Ndiòxí mée-í, ná cuendá ní dáñá ñaha-n xii-í, duha quèe-xi tnúhu-á<sup>n</sup>.

<sup>35</sup>Te dava cue tée xìndecu yatni núú táca-gá-á<sup>n</sup> ní tecu dóho-güedé nàcuáa ní càhá<sup>n</sup>-gá, te ní xítnàha-güedé:

—Chí cùndèdóho chí càna-dé té Èliás —càchí-güedé xítnàha-güedé.

<sup>36</sup>Te ì<sup>n</sup> cue tée xìndecu-á<sup>n</sup> xínú-dě ní sáhá<sup>n</sup> ní chindóyo-dé luha cáchí xití ndudí íá, te ní chinenu-dé díquí ì<sup>n</sup> yutnu càni te ní ndocani-dé chíhí-dě yuhu-gá cuendá coho-gá. Te ní xáha<sup>n</sup> cuè tée xìndecu-á<sup>n</sup> xii téé-á<sup>n</sup>:

—Cundetú tnaa na cùndehe-o nacoto núu quixi té Èliás nunehe ñaha-dě xii-dé núú cùrúxí —càchí-güedé xáha<sup>n</sup>-güedé xii-dé.

<sup>37</sup>Te Jèsús níhi ní canasaa-gá te ní xíhí-ni-gá. <sup>38</sup>Te sáta dúcá<sup>n</sup> te ní ndátá dóó cùú còrtiná xití veñúhu càhnu sá ìo cùnuu ní quée dava ndáá, te ndàa núú ñinu ní ngúíta-xi ní ndátá. <sup>39</sup>Te tée cùu capitá<sup>n</sup> nùtnñi-dé ndàa núú Jèsús, te ndèhe-dé nàcuáa ní quide-gá òré ní xíhí-gá, te ní cachí-dé:



—Sá ndàá ndisa sá díú tée-a cùu-dé Déhe Yá Ndiõxí ní cùu —duha ní cachí-dé.

<sup>40</sup>Te xica xĩnutnĩ ì<sup>n</sup> ũú ñáyiú ìhĩ ndéhě-yu nchaa nàcuáa ní quide ñaha-güedě xii Jèsús, te tnàhá tá Màriá Magdalená, ndihi tá Salómé, ndihi tá Màriá náná tẽ Chèè ní xini-yu nùú ñĩ chihí-dé yiqui cùñú Jèsús.

<sup>41</sup>Te cue ñáyiú ìhĩ-á<sup>n</sup> ñĩ xica cuú-yu ndihi Jèsús distritú Galileá ní xinu cuèchí-yu núú-gã. Te cue ñáyiú ìhĩ-á<sup>n</sup> nchicú<sup>n</sup> ñáhã-yu xii-gã ní quexìo ndéé ñuú Jerusálén ndihi dava-gã ñáyiú ìhĩ nchicú<sup>n</sup> ñáhã xii-gã cuáhã<sup>n</sup>.

### Chindúxi-güedé Jèsús

(Mt. 27:57-61; Lc.

23:50-56; Jn. 19:38-42)

<sup>42</sup>Te cùu-xi nduu vispré nduu ndètátú ñáyiú. Te nduu-ã<sup>n</sup> xĩquide túha-yu sá cúú ìngá nduu nduu ndètátú-yu-á<sup>n</sup>, te ìu-ni nduu-ã sa ní cuaa vihi, <sup>43</sup>te ì<sup>n</sup> tée nàni Cheé tée ñuú Arimateá ní cuyii-dě ní sáhã<sup>n</sup>-dé núú tẽ Pilatú, te ní xáha<sup>n</sup>-dě sá núu vá cùndèe iní-dé daña-dě chindúxi-dé yiqui cùñú Jèsús. Te tnàhá tẽ Chèè-á<sup>n</sup> cúú-dě ì<sup>n</sup> tée cùnuu cundihí-dé cue tée quide jundá, te tnàhá-dé ndétú-dě sáá nduu ndíhu ndaha ñaha Yá Ndiõxí xii-dé ndihi cue ñáyiú. <sup>44</sup>Te tẽ Pilatú ío ní cuñúhu-dé sá dúcã<sup>n</sup> ìo ndĩhi ní xihí Jèsús, te ní cana-dé tée cùu capitã<sup>n</sup> ní xicã<sup>n</sup> tnúhú-dě núú-dě núu ndisa sá sà ní xihí-gã. <sup>45</sup>Te tée cùu capitã<sup>n</sup>-á<sup>n</sup> ñĩ xáha<sup>n</sup>-dě xii tẽ Pilatú sá ndàá ní xihí Jèsús, núu xiã<sup>n</sup> tẽ Pilatú-á<sup>n</sup> ñĩ sáha-dé tnúhu chindúxi tẽ Chèè-á<sup>n</sup> yiqui cùñú-gã. <sup>46</sup>Te tẽ Chèè-á<sup>n</sup> ñĩ saa<sup>n</sup>-dé ì<sup>n</sup> dóó vãha, te ní sáhã<sup>n</sup>-dé ní nunehe-dé yiqui cùñú Jèsús núú cùrúxí, te ní chidúcú<sup>n</sup>nuu-dé yiqui cùñú-gã dóó vãha sá ñĩ saa<sup>n</sup>-dé-á<sup>n</sup>, te dàtnùní nehé-dě yiqui cùñú-gã cuáhã<sup>n</sup> ní chihí-dé ì<sup>n</sup> yaú nchĩ yiqui naha càva, te ní sadí-dé yuhu yàú-á<sup>n</sup> ndihi ì<sup>n</sup> yúú quèhé<sup>n</sup>. <sup>47</sup>Te tá

Màriá Magdalená, ndihi tá Màriá náná tẽ Chèè ní xini-yu nùú ñĩ chihí-dé yiqui cùñú Jèsús.

### Ní ndoto Jèsús

(Mt. 28:1-10; Lc. 24:1-12; Jn. 20:1-10)

**16** Te sátá ñĩ cundiqui<sup>n</sup> nduu ndètátú ñáyiú, te tá Màriá Magdalená, ndihi tá Salómé, ndihi tá Màriá náná tẽ Jacobó ní saã<sup>n</sup>-yu acití sáhã<sup>n</sup> tnámí cuèndá canehé-yu quĩhĩ<sup>n</sup> chihí-yu yiqui cùñú Jèsús. <sup>2</sup>Te ndumíngú nehé-ni òré vitna váha váha ní xinu coto núú nchĩcanchii ní quexìo-yu núú nchĩ yaú yĩhí yiqui cùñú Jèsús. <sup>3</sup>Te ní xitnàhá-yu: —Yoo cùñaha-o xòcani yúú ndèdí yuhu yàú-a, chi vá yòo tnàhí ndècu iha —cachí-yu xitnàhá-yu.

<sup>4</sup>Te òré ní xindéhé vãha-yu te ní xini-yu sá yúú cáhnú ndèdí yuhu yàú-á<sup>n</sup> ì<sup>n</sup> xio-ná ndécú. <sup>5</sup>Te cuánguĩhú-yu xití yaú-á<sup>n</sup>, te ní xini-yu nùcúo ì<sup>n</sup> espíritú xínú cuèchi núú Yá Ndiõxí ndàa xio cuhá-yu, te càa-xi datná cáá ì<sup>n</sup> tée cuechi, te ñihnu-xi ì<sup>n</sup> dóó cuixí<sup>n</sup> dóó cání, te ní yùhú-yu òré ní xini-yu espíritú-á<sup>n</sup>. <sup>6</sup>Te espíritú-á<sup>n</sup> ñĩ xáha<sup>n</sup>-xi xĩ-yu:

—Vá yùhú-ndó, chi yùhú sa cùtnuní iní-í sá nchòhò véxi-ndo nànducu-ndo yiqui cùñú Jèsús tée ñuú Nazàrét tée ní sahani-güedé núú cùrúxí, dico ñá túú-gã yiqui cùñú-dé ndécú ìha chi sa ní ndoto-dé, te chí cùndèhe núú ñĩ sacã<sup>n</sup>-güedé yiqui cùñú-dé te quini-ndó ñã ñã túú-gã-dé. <sup>7</sup>Te chí cuáhã<sup>n</sup> núú ndécú tẽ Pèlú ndihi dava-gã cue tée ní xica cuu ndihi-dé, te duha cùñaha-ndo xii-güedé: “Jèsús codonùu-gã núú-ndó quĩhĩ<sup>n</sup> distritú Galileá, te yàcã<sup>n</sup> quini-ndó-gã dàtná ní cachí-gã xii-ndo”, duha cùñaha-ndo xii-güedé —càchí espíritú-á<sup>n</sup> xãha<sup>n</sup>-xi xĩ-yu.

<sup>8</sup>Te cue ñáyiú ìhĩ-á<sup>n</sup> ìo ní yùhú-yu, te ní quene cunú-yu cuánuhú-yu, te quèdĩ ñaha-ná-xi xĩ-yu sá ìo ní yùhú-yu, te ñã

túú tnàhí ná tnúhu ni xähä<sup>n</sup>-yu xii cue ñáyiú ní naníhí-yu ichi cuèndá sá ïo ní yùhú-yu.

**Tá Màriá Magdalèná ní xiní-xi Jèsús**

(*Jn. 20:11-18*)

<sup>9</sup>Te sátá dúcá<sup>n</sup> ñí ndoto Jèsús ndumíngú nehé-ni-á<sup>n</sup>, te díhna nuu-gã tá Màriá Magdalèná ní quee túu-gá núú-xi, te diu tá Màriá-á<sup>n</sup> cúú-xí xíchí ñí xíhí ñaha úsá espíritú cündìhí yucu ñávàha ni cùu, te Jèsús ní queñuhu-gá nchaa espíritú-á<sup>n</sup> yiqui cùúú-xi. <sup>10</sup>Te xíchí-á<sup>n</sup> ñí sáhá<sup>n</sup>-xi ní xítñúhu-xi cue téé ní xica cuu ndíhí Jèsús nàcuáa ní cuu, te xíndáhí-güedé sá ndíhú iní-güedé òré ní quexìo-xi núú ndécú-güedé. <sup>11</sup>Te òré ní xáha<sup>n</sup> tá Màriá xii-güedé sá ñí ndoto Jèsús ndíhí sá ñí xiní ñáhá-xí xii-gá, te ñá túú ní sàndáá iní-güedé.

**Jèsús ní quee túu-gá núú úú  
cue téé ní xica cuu ndíhí-gá**

(*Lc. 24:13-35*)

<sup>12</sup>Te úú tnàhá cue téé ní xica cuu ndíhí Jèsús ñúhú-güedé ichi cuáhá<sup>n</sup>-güedé yucu, te uu<sup>n</sup>i ní quee túu-gá núú-güedé, te ní dácótó ñàha-xi xii-güedé sá ñà túú-gã cáá-gã dàtná cáá-gã. <sup>13</sup>Te cue téé úú-á<sup>n</sup> ñí xica-güedé cuáhá<sup>n</sup>-güedé ní xítñúhu-güedé nchaa dava-gá cue téé ní xica cuu ndíhí-gá sá ñí xiní ñáhá-güedé xii-gá, dico ñà duca<sup>n</sup> ñà túú ní sàndáá iní cue téé-á<sup>n</sup> tnúhu ní cáhá<sup>n</sup>-güedé.

**Jèsús xáha<sup>n</sup>-gã xii cue téé ní  
xica cuu ndíhí-gá nàcuáa  
ndùu chiu<sup>n</sup> cada-güedé**

(*Mt. 28:16-20; Lc.*

*24:36-49; Jn. 20:19-23*)

<sup>14</sup>Te ndí ùxí ñí<sup>n</sup> cue téé ní xica cuu ndíhí Jèsús yíhí-güedé mèsá xéxí-güedé,

te ní quee túu-gá núú-güedé te ní tenàá ñáhá-gã xii-güedé cuèndá sá ïo sáá iní-güedé ñá túú sàndáá iní ñáhá vàha-güedé xii-gá, chi ñá túú ní cuíní-güedé quíndáá iní-güedé nàcuáa ní xáha<sup>n</sup> ñáyiú ní xiní ñáhá xii-gá sátá ñí yáha ní ndoto-gá. <sup>15</sup>Te ní xáha<sup>n</sup>-gã xii-güedé:

—Quíhí<sup>n</sup>-ndó ñíhí ñuyúú cáhá<sup>n</sup>-ndó núú nchaa ñáyiú tnúhu vàha tnúhu sá cáhá<sup>n</sup> nàcuáa naníhí tàhú-yu. <sup>16</sup>Te nchaa ñáyiú na quíndáá iní tnúhu-á<sup>n</sup> te cuanduté-yu, te naníhí tàhú-yu, dico nchaa ñáyiú vá quíndáá iní tnúhu-á<sup>n</sup> te cuíta nihnú-yu. <sup>17</sup>Te nchaa ñáyiú na quíndáá iní ñáhá xii-í te cadá-yu sá vã yõ tnàhí ndàcu cada, te cacunehe ñáhá-yu xii-í, te queñuhú-yu nchaa espíritú cündìhí yucu ñávàha yèhí ñaha xii ñáyiú. Te uu<sup>n</sup>i ndacú-yu cáhá<sup>n</sup>-yu ingá núú tnúhu sá vátá dácuàha-gá-yu. <sup>18</sup>Te cuèi na tníhí-yu cóo dèé<sup>n</sup> dico ñá túú nã cada ñaha-dí xíi-yu, te cuèi venènú ná cáxí-yu dico ñá túú nã tnahá-yu, te tendàhá-yu cue ñáyiú cùhú te ndúha-yu —càchí-gá xáha<sup>n</sup>-gã xii-güedé.

**Jèsús cuánda-gá andíu**

(*Lc. 24:50-53*)

<sup>19</sup>Te sátá ñí yáha duca<sup>n</sup> ñí xáha<sup>n</sup> Jèsús xii cue téé ní xica cuu ndíhí-gá, te ní ndanchita-gá cuánda-gá andíu te ní ngóo-gá xio cùha Dútú Ndiõxí. <sup>20</sup>Te cue téé-á<sup>n</sup> ñí xica-güedé cuáhá<sup>n</sup>-güedé, te ní ngúíta-güedé cáhá<sup>n</sup>-güedé tnúhu Xítóhó Jesucristú nchaa xichi. Te mee-gã ní chindee ñàha-gá xii-güedé ní quide-güedé nchaa sá vã yõ tnàhí ndàcu cada cuèndá cutnùní iní ñáyiú sá ndàá cáhá<sup>n</sup>-güedé tnúhu-gá. Duha ní cuu dàvã-á<sup>n</sup>.

## TNÚHU NÍ CHÍDÓ TNUNÍ TÈ LÚCÁ

### Nàcuáa ní ngódó tnùnì tnúhu Yá Ndiöxí

**1** Te vài ñáyiú chído tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nàcuáa ní cuu. <sup>2</sup>Te ñiú-ni nchaa tnúhu chído tnuní-yu-á<sup>n</sup> cúú-xí tnúhu ní cáhá<sup>n</sup> nchaa cue téé ní xini ndáá nàcuáa ní cuu ndéé díhna, cue téé ní cáhá<sup>n</sup> tnúhu Yá Ndiöxí. <sup>3</sup>Te yúhú sa ní cuu nduu quide cuendá-í nchaa nàcuáa ní cuu, núu xíá<sup>n</sup> ní sani iní-í tee váha-í nchaa tnúhu-a núu tütú sá cúú-xí yòhó té Tëofilú chi ío váha cùu iní-í sá cúú-xí-n, <sup>4</sup>te tée-í cuendá cutnùnì iní-n sá sá ndàà cúú-xí nchaa sá ní dánèhé ñàhá-güedé xii-n.

### Ì<sup>n</sup> espíritú xínú cuèchi núú Yá Ndiöxí càchí-xi sá cáci ì<sup>n</sup> téé cunani Juáá

<sup>5</sup>Te cúnàhá ní xindaha té Hèrodés ñáyiú distrítú Jùdeá dàv-á<sup>n</sup> ní xindecu ì<sup>n</sup> dútú ní xínani-dé Zacàriá, te ní cundihi-dé cue dútú Àbiás. Te ñadìhí-dé ní xínani-a<sup>n</sup> Elisabét, te ñaha-á<sup>n</sup> ní cuu-a<sup>n</sup> ñaní tnàhá ndí Àrón. <sup>6</sup>Te ndi ndúú-yu ío ní quide ndáá-yu núú Dütú Ndiöxí, chi ní tñi-yu nchaa tnúhu ní cáhá<sup>n</sup>-gá. <sup>7</sup>Te ñá túú nì ì<sup>n</sup> déhe-yu, chi duca<sup>n</sup> tãhú tã Elisabét sá vã cóó déhe-a<sup>n</sup>, te duca<sup>n</sup> ndi ndúú-yu ío ní sahnú-yu.

<sup>8</sup>Te ì<sup>n</sup> nduu xínu cuechi tucu té Zacàriá ndihi nchaa cue téé cundihi-dé núú Yá Ndiöxí xití veñúhu. <sup>9</sup>Te dàv-á<sup>n</sup> ní xito ndeé-güedé cuendá cutnùnì iní-güedé ñuu ndédacàa-güedé quíhu núú nàa xití veñúhu-á<sup>n</sup> cahmi-güedé sá sàhá<sup>n</sup> tnámí, te ní cutnùnì sá tã Zacàriá quíhu-dé. Te duca<sup>n</sup> ní quide-güedé, chi duca<sup>n</sup> tnàhí ní xóo cada nchaa cue dútú dàv-á<sup>n</sup>. <sup>10</sup>Te ñini sàhmi té Zacàriá sá sàhá<sup>n</sup> tnámí núú nàa, te vài vihi

ñáyiú xindecu quehé veñúhu-á<sup>n</sup> càhá<sup>n</sup> ndihí-yu Yá Ndiöxí. <sup>11</sup>Te ní xini té Zacàriá ì<sup>n</sup> espíritú xínú cuèchi núú Yá Ndiöxí núnñi-xi xio cùha núú nàa núú càyú sá sàhá<sup>n</sup> tnámí-á<sup>n</sup>. <sup>12</sup>Te òré ní xini té Zacàriá espíritú-á<sup>n</sup> te ñá ní cùnuni iní-dé nása cada-dé chi ío ní yúhú-dé. <sup>13</sup>Te espíritú-á<sup>n</sup> ní xáha<sup>n</sup>-xi:

—Zacàriá, vã yúhú-n chi Yá Ndiöxí ní tedóho-gá tnúhu ní cáhá<sup>n</sup>-n, te vitna coo ì<sup>n</sup> déhe ñadìhí-n tã Elisabét te danani-n-dé Juáá. <sup>14</sup>Te ío cudí iní-n, te duca<sup>n</sup> ño vài ñáyiú cudí iní-yu na càcu-dé. <sup>15</sup>Te ío cudú-dé núú Yá Ndiöxí, te ni vã cóhó-dé ndidí te ni vã cóhó-dé ndudí sá ní natiu, te sa cundecu ndihi-dé Espíritú Yá Ndiöxí òré cacu-dé. <sup>16</sup>Te ñiú-dé cada te ío vài ñáyiú isràèl natuhá-yu ichi Dütú Ndiöxí Yáá cúú Ndiöxí-ó. <sup>17</sup>Te té Juáá-á<sup>n</sup> codonù-dé núú-gã, te cundecu ndihi-dé Espíritú-gá, te taxi tnùnì-dé dàtná ní quide té Èliás. Te nacanú ichi-dé cue téé cùu sacuéhé cuendá cada-güedé sá vãha sá cúú-xí cuè téé cuechi, te cuèi cue téé ío sàà iní-xi, te ñiú-dé cada te tñi-güedé tnúhu váha, tnúhu càhá<sup>n</sup> ñáyiú quide ndáá. Te duca<sup>n</sup> càda-dé cada túha-dé ñáyiú cuendá cunu cuèchí-yu núú Dütú Ndiöxí —càchí-xi xáha<sup>n</sup>-xi xii-dé.

<sup>18</sup>Te té Zacàriá ní ndúcú tnúhu-dé núú espíritú-á<sup>n</sup>, te xáha<sup>n</sup>-dè:

—¿Te nása cutnùnì ndáá iní-í tnúhu càhá<sup>n</sup>-n-í? Chi yúhú ío ní sahnú-í ndihi ñadìhí-í —càchí-dé xáha<sup>n</sup>-dè xii-xi.

<sup>19</sup>Te espíritú-á<sup>n</sup> ní xáha<sup>n</sup>-xi:

—Yúhú cùu-í espíritú nání Gàbriél, te xínu cuechi-í núú Yá Ndiöxí, te mee-gã ní táuchíú<sup>n</sup>-gã nàhá-í tnúhu-gá véxi cuendá cutnùnì iní-n nàcuáa cada ñaha-gã xii-ndo. <sup>20</sup>Te vitna cuu ñihí-n te vã càhá<sup>n</sup>-gá-n ndèé ná sàà nduu càcu déhe ñadìhí-n, chi ñá túú ní sàndáá-ni iní-n tnúhu ní cáhá<sup>n</sup>-í. Te dacuítí sáà nduu càda-xi nàcuáa ní cáhá<sup>n</sup>-í-a —càchí espíritú-á<sup>n</sup> xáha<sup>n</sup>-xi xii-dé.

<sup>21</sup> Te nchaa ñáyiú xíndecu quehé ndétŷ-yu té Zacàriá, te xicuñúhu-yu sá ŷo cùyaa-dé xití veñúhu. <sup>22</sup> Te òré ní ndee té Zacàriá, te ñá ní cùu-gá cáhá<sup>n</sup> ndihi ñaha-dě xií-yu, te òré-á<sup>n</sup> ní cut-núní iní-yu sá ní xiní-dé ì<sup>n</sup> espíritú xínú cuèchi núú Yá Ndiòxí xití veñúhu. Te mee-ná ndaha-dé ní quide-dé núŷ-yu chi ñá ní cùu-gá cáhá<sup>n</sup>-dé.

<sup>23</sup> Te ní xínu nduu ní xinu cuechi tě Zacàriá núú Yá Ndiòxí xití veñúhu, te cuánuhú-dé vehe-dé. <sup>24</sup> Te sátá dúcá<sup>n</sup> ní cuu te ñadhí-dé tá Elisàbét ní ngúhu<sup>n</sup> déhe-a<sup>n</sup>, te úhú<sup>n</sup> yóó ñà túú tñahí-gá ní quèe-a<sup>n</sup> caca cuu-a<sup>n</sup>, te ní cachí-a<sup>n</sup>: <sup>25</sup> “Mee Dútú Ndiòxí duha ní cundàhú iní ñáhá-gă sá cóó ì<sup>n</sup> déhe-í cuendá sá vă cùú yíchí iní ñáhá ñáyiú xii-í”, duha ní cachí-a<sup>n</sup>.

### Ì<sup>n</sup> espíritú xínú cuèchi núú Yá Ndiòxí cächí-xi sá cáci Jèsús

<sup>26-27</sup> Te núú ìñú yóó să ní ngúhu<sup>n</sup> déhe tá Elisàbét, te ní tendaha tùcu Yá Ndiòxí espíritú nání Gábriél cuáhá<sup>n</sup>-xi ì<sup>n</sup> ñuu nání Nàzarét cuáhá<sup>n</sup> ngoto-xi ì<sup>n</sup> xíchí cuéchi nani Mariá. Te ñuu-á<sup>n</sup> yíndèhu-xi distritú Galileá. Te xíchí-ă<sup>n</sup> sa ní cundáá tñúhu sá tñandaha-xi ndihi ì<sup>n</sup> tée nani Cheé ñani tñáhá ndí Dávíí. <sup>28</sup> Te espíritú-á<sup>n</sup> ní quíhu-xi ndéé xití vehe núú ndécú tă Măriá, te ní xáha<sup>n</sup>-xi:

—¿Cövăha-n-a<sup>n</sup>! Dútú Ndiòxí ío cùu iní ñáhá-gă xii-n te ndècu ndihi ñaha-gá, te ío-gá xító ñaha-gá xii-n dàcúxí dăva-gă ñáyiú dîhí —cächí espíritú-á<sup>n</sup> xáha<sup>n</sup>-xi.

<sup>29</sup> Dico òré ní xiní tá Măriá espíritú-á<sup>n</sup>, te ní quiyùhú iní-xi sá dúcá<sup>n</sup> ní cáhá<sup>n</sup> espíritú-á<sup>n</sup>. Te ní sani iní-xi: “¿Ná cuendá duha càhá<sup>n</sup>-tu espíritú-a-í?”, duha ní sani iní-xi. <sup>30</sup> Te espíritú-á<sup>n</sup> ní xáha<sup>n</sup>-xi:

—Măriá, vá yùhú-n chi duca<sup>n</sup> ní nduu táhú-n nŷu Yá Ndiòxí. <sup>31</sup> Te vitna ngúhu<sup>n</sup> déhe-n, te na càcu-dé te danàni-n-dé Jèsús. <sup>32</sup> Te ío cunuu-dě, chi Dútú Ndiòxí Yaá ío cunuu cachí-gá sá Dêhe-gá

cúú-dě, te diu-gá cada te cuu-dé ì<sup>n</sup> tée cunuu núú ñáyiú isrâél dàtná ní quide-gá ndí Dávíí. <sup>33</sup> Te taxi tñúní-dé ñáyiú isrâél, te duca<sup>n</sup>-ni cunuu-dé ni caa ni quíh<sup>n</sup> —cächí-xi xáha<sup>n</sup>-xi.

<sup>34</sup> Te tá Măriá ní xáha<sup>n</sup>-xi xii espíritú-á<sup>n</sup>:

—¿Te nása cuu tñúhu càhá<sup>n</sup>-n te ñá túú yîi-í? —cächí-xi xáha<sup>n</sup>-xi.

<sup>35</sup> Te ní xáha<sup>n</sup> espíritú-á<sup>n</sup>:

—Espíritú Yá Ndiòxí quixi cundecu ndihi-n, te duca<sup>n</sup> Yá Ndiòxí cada-gá ì<sup>n</sup> sá văha sá cúú-xi-n ná càcu déhe-n. Te Yá Ndiòxí cächí-gá sá ŷo cundecu yiñùhu-dé núú-gă, chi Déhe-gá cúú-dě. <sup>36</sup> Te tñáhá didí-n tă Elisàbét ñúhú dēhe-a<sup>n</sup> cuéi ío ní sahnua<sup>n</sup>, te diu-a<sup>n</sup> cächí-yu sá vă cóó dēhe-a<sup>n</sup> ni cùu, te vitna sa ní cuu ìñú yóó ñúhú dēhe-a<sup>n</sup>. <sup>37</sup> Chi Yá Ndiòxí ndácú-gă quidé-gă nchaa sá vă yôo tñahí ndàcu cada —cachí-xi xáha<sup>n</sup>-xi.

<sup>38</sup> Te tá Măriá ní xáha<sup>n</sup>-xi:

—Yúhú ná cúnú cuèchi-í núú Dútú Ndiòxí, te mee-gă ná cádá ñaha-gá xii-í nàcuáa ní cachí-n —cächí-xi xáha<sup>n</sup>-xi xii espíritú-á<sup>n</sup>.

Te sátá dúcá<sup>n</sup> te espíritú-á<sup>n</sup> ní xica-xi cuáhá<sup>n</sup>-xi.

### Tá Măriá cuáhá<sup>n</sup> ngoto-xi tá Elisàbét

<sup>39</sup> Te tá Măriá ío ndihi cuáhá<sup>n</sup>-xi ì<sup>n</sup> ñuu cáá xití yucu distritú Jùdeá. <sup>40</sup> Te ní sáa-xi vehe té Zacàriá, te cuánguihu-xi ní dándácôo váha-xi tá Elisàbét. <sup>41</sup> Te òré ní tecú dóho tá Elisàbét ní cáhá<sup>n</sup> tá Măriá, te ní candá déhe-a<sup>n</sup> xití-a<sup>n</sup>, te òré-á<sup>n</sup> ní ngúndecu ndihi-a<sup>n</sup> Espíritú Yá Ndiòxí. <sup>42</sup> Te níhi ní cáhá<sup>n</sup>-a<sup>n</sup>, te xáha<sup>n</sup>-a<sup>n</sup> xii tá Măriá:

—Yá Ndiòxí ío xito ñaha-gá xii-n dàcúxí dăva-gă tñaha dîhí-ó, te duca<sup>n</sup>-ni xito-gá cuéi déhe-n. <sup>43</sup> ¿Te ná cúú yùhú nŷu véxi coto ñaha yòhó ñaná Yaá cúú Xítòhó-í-í? <sup>44</sup> Chi òré-ni ní tecú dóho-í ní cáhá<sup>n</sup>-n te ní candá-ni déhe-í xití-í sá cùdíf iní-dé. <sup>45</sup> Te váha táhú

yòhó sá ni sàndáá iní-n, chi dacuitíí sá cádá Dútú Ndiöxí nàcuáa ní cáhá<sup>n</sup> espíritú ní tendaha-gá ní quixi ní cachí tnúhu xii-n nàcuáa cada-gá —càchí-a<sup>n</sup> xáha<sup>n</sup>-a<sup>n</sup> xii tá Màriá.

<sup>46</sup> Te ní xáha<sup>n</sup> tă Màriá:

Ío càhnu cuu Dútú Ndiöxí,

<sup>47</sup> Ío cùdíf iní-í chi diu-gá taunihnu ñaha-gá xii-í núú ùhú núú ndàhú.

<sup>48</sup> Chi ní ndacu iní ñáhá-gá xii yúhú, te dicó ì<sup>n</sup> xíchí xínú cuèchi núú-gá cùú-í,

te vitna te nchaandi túhú ñáyiu cachí-yu sá ìo váha táhù-í.

<sup>49</sup> Te Yá Ndiöxí cándòo caa nine iní-gá, te ío càhnu ì<sup>n</sup> sá vâha ní quide-gá sá cùú-xi-í.

<sup>50</sup> Te cùndahú iní-gá nchaa ñáyiu nèhe sá yíñùhu núú-gă.

Te duca<sup>n</sup>-ni cuèí ñáyiu sa ndècu ñuyúú-a ndihi ñáyiu vitna véxi.

<sup>51</sup> Chi ta quide-gá nchaa sá vă yòo tnàhí ndàcu cada véxi,

te ta dândóo canúú-gă cue ñáyiu quide cahnu mee-xi.

<sup>52</sup> Te cue ñáyiu tàxi tnuní ñă túú-gă dâñá-gă taxi tnùnì-yu,

te cue ñáyiu ndàhú ní quide ñnu ñaha-gă xii-yu.

<sup>53</sup> Te cue ñáyiu ndècu ndihi tnúndòho tnúhu ndàhú ní quide váha ñaha-gă xii-yu,

te cue ñáyiu cuica ñă túú ñă ní ñihí-gă-yu cundecu ndihí-yu.

<sup>54</sup> Te chindee-gá ñáyiu isrâél, ñáyiu xínu cuechi núú-gă, te ñă túú dâña ni-hnu ñaha-gă xii-yu, chi cùndahú iní ñáhá-gă.

<sup>55</sup> Chi duca<sup>n</sup> ní xáha<sup>n</sup>-gă xii ndii Àbrahám, ndihi cue ñaní tnáhá ndii.

Duha ní xáha<sup>n</sup> tă Màriá xii tá Elisàbét.

<sup>56</sup> Te ní xindecu tá Màriá dàtná úní yóó ndihi tá Elisàbét te dàtnùnì cuánuhú-xi vehe-xi.

### Ní cacu té Juàá tée dacuàndute ñaha xii ñáyiu

<sup>57</sup> Te ní sáá nduu ñí cacu ì<sup>n</sup> déhe tée tá Elisàbét. <sup>58</sup> Te nchaa ñáyiu ndècu yatni ndihi-a<sup>n</sup>, ndihi nchaa ñaní tnáhá-á<sup>n</sup> ní ñihí-yu tnúhu nàcuáa ní chindee ñaha Yá Ndiöxí xii-a<sup>n</sup>. Te ío ní cudíf ñí-yu cuèndá-a<sup>n</sup>. <sup>59</sup> Te núú ùná nduu sá ñí cacu déhe-a<sup>n</sup>, te ní sáhá<sup>n</sup> ñáyiu núú ndécú-á<sup>n</sup> cuèndá cuáhă-yu sèñá ñii déhe-a<sup>n</sup>. Te cuiní-yu cunani dèhe-á<sup>n</sup> Zacàriá dàtná nání tătă ní cùu. <sup>60</sup> Te ní xáha<sup>n</sup> nănă dèhe-á<sup>n</sup>:

—Ñáhá, chi Juàá cunani-dě —càchí-a<sup>n</sup> xáha<sup>n</sup>-a<sup>n</sup> xii-yu.

<sup>61</sup> Te ní xáhă<sup>n</sup>-yu:

—¿Te ná cuèndá te ñă túú ñí ñaní tnáhá-ndó dùca<sup>n</sup> nani-i? —cachí-yu xáhă<sup>n</sup>-yu.

<sup>62</sup> Te ní quidé-yu ndàhá-yu núú tătă dèhe-á<sup>n</sup> cuèndá cuiní-yu núú nása cuiní mée-dě cunani dèhe-dé. <sup>63</sup> Te ní xicá<sup>n</sup>-dé ì<sup>n</sup> tutú ní chídó tnùnì-dé nàcuáa cunani dèhe-dé, te duha ní chídó tnùnì-dé: “Juàá cunani-dě”, càchí-xi núú tûtú ní tee-dé-á<sup>n</sup>. Te nchaa ñáyiu xindecu-á<sup>n</sup> ñí cuñúhu-yu nàcuáa ní cuu. <sup>64</sup> Te òré-á<sup>n</sup> ñí nacáhá<sup>n</sup> té Zacàriá sá ñí cuu ñihí-dé ní cùu, te ní nguíta-dé ní cachí-dé sá ìo càhnu cuu Yá Ndiöxí. <sup>65</sup> Te nchaa ñáyiu xindecu yatni ndihi-dé ní cuñúhu-yu, te nchaa ñáyiu xindecu ñihí xití yucu dis-trítú Jùdeá ní ñihí-yu tnúhu nàcuáa ní cuu. <sup>66</sup> Te nchaa ñáyiu-á<sup>n</sup> ìo vâi ní sani iní-yu, te ní xítñahá-yu:

—¿Ná cùú sá cádá tée-ă<sup>n</sup> ndéé ìdá-gá ná cuèhnu-dé? —càchí-yu xítñahá-yu.

Te duca<sup>n</sup> ñí xítñahá-yu chi Dútú Ndiöxí ndécú ndihi ñaha-gă xii-dé.

### Té Zacàriá càchí-dé sá ìo càhnu cuu Yá Ndiöxí

<sup>67</sup> Te té Zacàriá tătă tē líhli-á<sup>n</sup> ñí ngúndecu ndihi-dé Espíritú Yá Ndiöxí te

ní cáhá<sup>n</sup>-dé nchaa tnúhu sá ní dánèhé ñáhá-gă, te ní cachí-dé:

<sup>68</sup> Ío càhnu cuu Dútú Ndiöxí nchoo ñäyiu isràél,

chi ní quixi coto ñaha-gă xii-o, te cùu-o ñäyiu cùu cuendá-gă, chi dàcácu nihnu ñaha-gă xii-o vîtna.

<sup>69</sup> Chi ní tendaha-gă ì<sup>n</sup> tée véxi-dé dàcácu nihnu ñaha-dě xii-o nùú ùhú nùú ndàhú.

Te cùu-dé ñaní tnáhá ndí Dàvíí tée ní xinu cuechi nùú-gă ndéé sanaha.

<sup>70</sup> Te ñu-ni tnúhu ní cáhá<sup>n</sup> Yă Ndiöxí ní cáhá<sup>n</sup> cue tée ní quide ndáá ní xindecu nùú-gă ñuyú-a ndéé sanaha.

<sup>71</sup> Te ní cachí-güedé sá táúnihnu ñaha-gă xii-o nùú nchàa ñäyiu cùu ùhú iní ñáhá, ndíhi nùú nchàa ñäyiu ñá túú cùu quini ndee ñáhá.

<sup>72</sup> Te ní xáha<sup>n</sup>-gă sá cündàhú iní ñáhá-gă xii-o, te duca<sup>n</sup> càda-gă chi vá nácuànaa-gă tnúhu ní cáhá<sup>n</sup>-gă ndíhi-güedé.

<sup>73</sup> Te ñu duca<sup>n</sup> ndùu tnúhu ní xáha<sup>n</sup>-gă xii ndí Àbrahám sá

<sup>74</sup> táúnihnu ñaha-gă xii-o nùú nchàa ñäyiu cùu ùhú iní ñáhá, cuendá sá vă yùhú-ó cùnu cuechi-o nùú-gă.

<sup>75</sup> Te cada ndáá-ó, te cundecu yîñùhu-o nùú-gă ndí nchàa nduu cundecu-o ñuyú-a.

Duha ní cachí té Zacàriá.

<sup>76</sup> Te xáha<sup>n</sup>-dě xii té lîhli-á<sup>n</sup>:

Te yòhó té lîhli, cáhá<sup>n</sup> ñäyiu cuendá-n sá cúu-n ì<sup>n</sup> tée càhá<sup>n</sup> tnúhu Dútú Ndiöxí Yaá ío cùnuu,

chi quíhí<sup>n</sup>-n còdonuu-n nùú Yáá cúú Xítòhó-ó dàtùha-n ñäyiu cuendá cundecu túha-yu òrè quexìo-gă.

<sup>77</sup> Te cúñaha-n xii ñäyiu isràél sá cuini-gă cada càhnu iní-gă nchaa cuéchi-yu,

te naníhí tàhú-yu.

<sup>78</sup> Te duca<sup>n</sup> càda-gă chi ío cùu iní ñáhá-gă xii-o, chi ndéé andiù ní tendaha-gă ì<sup>n</sup> tée véxi

cuu<sup>n</sup>-dé dandixi túu-dé iní-ó cuendá cut-nùní iní-ó nácuáa ndùu cuendá Yă Ndiöxí.

<sup>79</sup> Te duca<sup>n</sup> dandixi túu-dé iní nchaa ñäyiu ndècu ichi cuehé ichi duha ta xíta nihnu cuáhá<sup>n</sup> cuendá nucúnu ichi-yu ì<sup>n</sup> ichi váha.

Duha ní xáha<sup>n</sup> tē Zacàriá xii déhe-dé.

<sup>80</sup> Te té lîhli-á<sup>n</sup> tá sàhnu-dé, te ta chindee chitúu ñaha Yă Ndiöxí xii-dé cuáhá<sup>n</sup>, te ní xindecu-dé xití yucu ndéé ní sáá nduu ní ngúita-dé ní cáhá<sup>n</sup>-dé nùú cuè ñäyiu isràél tnúhu Yă Ndiöxí.

### Ní cacu Jèsús

(Mt. 1:18-25)

**2** Te dàvá-á<sup>n</sup> ní táúchíú<sup>n</sup> tē Àugustú Cèsár nucódó tnùní nchaa ñäyiu nació<sup>n</sup> yíndàha-dé. <sup>2</sup> Te xéhé sá dîhnanuu ní nucódó tnùní ñäyiu, te ñu-ni dàvá-á<sup>n</sup> ní cunuu té Cireníú distritú Siríá. <sup>3</sup> Te nchaa ñäyiu ní natacá-yu ñuú nùú ní cacú-yu cuendá nucódó tnùní-yu. <sup>4</sup> Nùú xíá<sup>n</sup> ní quee té Chèè ñuú Nazàrét ì<sup>n</sup> ñuú yíndèhu distritú Galileá, te cuáhá<sup>n</sup>-dé ñuú Bèlén ì<sup>n</sup> ñuú yíndèhu distritú Jùdeá, chi xíá<sup>n</sup> ní cuu ñuú ndí Dàvíí, te ñu-ni ñaní tnáhá tē Chèè-á<sup>n</sup> ní cuu ndí. <sup>5</sup> Nùú xíá<sup>n</sup> cuáhá<sup>n</sup>-dé ndéé ñuú Bèlén nucódó tnùní-dé, te tnàhá tá Màriá xíchí ní cundáá tnúhu sá tnàndaha ndíhi-dé cuáhá<sup>n</sup> ndíhi ñaha-dě, te sa ñùhu déhe-xi. <sup>6</sup> Te ñini cùyaá-yu ñuú Bèlén-á<sup>n</sup> ní sáá òrè cacu déhe-xi. <sup>7</sup> Te ní cacu déhe dîhna-xi, te ní chidúcú<sup>n</sup> nuu-xi dóó, te ní sacá<sup>n</sup> ñáhá-xí ì<sup>n</sup> vehe nùú cúú vehe quiti, chi ñá túú ní ñîhí-yu vehe coó-yu.

### Cue espíritú xínú cuèchi nùú Yă Ndiöxí ndíhi cue toli.

<sup>8</sup> Te yatni ñuú-á<sup>n</sup> xindecu ì<sup>n</sup> úú toli ndéé-güedé mbéé-güedé ndécú-güedi

majadá niú-á<sup>n</sup>. <sup>9</sup>Te uu<sup>n</sup>ni ní quexio ìí<sup>n</sup> espíritú xínú cuèchi núú Yá Ndiòxí, te Yá Ndiòxí ní quide-gá ní dáyèhé-xi ní càndéé núú xíndecu-güedé, te ní yùhú víhí-güedé. <sup>10</sup>Te ní xáha<sup>n</sup> espíritú-á<sup>n</sup>:

—Vá yùhú-ndó, chi ñaha-í ìí<sup>n</sup> tnúhu váha véxi sá cúu-xí-ndó, te ío cudíí ìní-ndó ndìhi nchaa ñáyiu. <sup>11</sup>Chi vitna ní cacu ìí<sup>n</sup> téé dàcácu nihnu ñaha xii-ndo núú ùhú núú ndàhú ñuú ndíí Dávìí, te téé-á<sup>n</sup> cúu-dé Xítóhó Jesucristú. <sup>12</sup>Te dàtná ìí<sup>n</sup> sèñá te naníhí-ndó tè líhli-á<sup>n</sup> yídúcú<sup>n</sup> nuu-dé dóó cáá-dé ìí<sup>n</sup> vehe quiti —càchí-xi xáha<sup>n</sup>-xi xii-güedé.

<sup>13</sup>Te òré-á<sup>n</sup> ní quexio cuéhé víhí espíritú véxi cuu<sup>n</sup> andiu ní naníhí tnáhá-xi ndìhi espíritú-á<sup>n</sup>, te ní nguíta-xi ní chiñuhu-xi Yá Ndiòxí, te càchí-xi:

<sup>14</sup>Ío càhnu cuu Yá Ndiòxí Yaá ndécú àndiu, te na cùndecu váha-ni nchaa ñáyiu cùu ìní méé-gá!

Duha càchí cue espíritú-á<sup>n</sup>.

<sup>15</sup>Te òré cuándaa cue espíritú-á<sup>n</sup> andiu, te ní nguíta cue toli-á<sup>n</sup> xítnàha-güedé:

—Na quíhí<sup>n</sup>-ó ñúú Bèlén quíní-ó nàcuáa ní cuu, chi Dútú Ndiòxí sa ní cachí tnúhu-gá —càchí-güedé xítnàha-güedé.

<sup>16</sup>Te ní tnií-güedé ichi súúní ndìhi cuáhá<sup>n</sup>-güedé, te ní naníhí-güedé tá Màriá ndìhi té Chèé, ndìhi té líhli-á<sup>n</sup> cáá-dé xití ìí<sup>n</sup> vehe quiti. <sup>17</sup>Te òré ní xiní ñáhá-güedé te ní xáha<sup>n</sup>-güedé xíí-yu nàcuáa ní xáha<sup>n</sup> espíritú-á<sup>n</sup> xii-güedé cuendá té líhli-á<sup>n</sup>. <sup>18</sup>Te nchaa ñáyiu ní tecú dóho-xi ní cuñúhu-yu nàcuáa ní cáhá<sup>n</sup>-güedé. <sup>19</sup>Dico tá Màriá chi ñúhu nahi-ni ìní-xi, te dícó-ni sàni ìní-xi cuendá nchaa tnúhu-á<sup>n</sup>. <sup>20</sup>Te cue toli-á<sup>n</sup> ní natnií-güedé ichi, te ta xítnàha-güedé cuánuhú sá ío càhnu cuu Yá Ndiòxí cuendá nchaa tnúhu ní xíndedóho-güedé, ndìhi cuendá nchaa sá

ní xiní-güedé, chi cuendá sá ndàá ní cuu nchaa nàcuáa ní tecú tnúhu-güedé.

### Ndècá-yu Jèsús cuáhá<sup>n</sup> veñúhu

<sup>21</sup>Te núú ùná nduu sá ní cacu té líhli-á<sup>n</sup>, te ní sáha-güedé sèñá ñii-dé, te ní dánání ñaha-güedé Jèsús xii-dé, diu-ni nàcuáa ní xáha<sup>n</sup> espíritú xínú cuèchi núú Yá Ndiòxí xii tá Màriá ndéé cùtnàhá vátá ngúhu<sup>n</sup>-gá-dé xití-xi.

<sup>22</sup>Te sátá ní tnahá nduu, nduu ñi-yu nàcuáa càhá<sup>n</sup> nchaa tnúhu ní chídó tnùní ndíí Moisés, te ndècá-yu té líhli-á<sup>n</sup> cuáhá<sup>n</sup> ñuú Jerusàlén cuendá quee túu-dé núú Dútú Ndiòxí. <sup>23</sup>Te duca<sup>n</sup> ní quidé-yu, chi duca<sup>n</sup> càhá<sup>n</sup>-xi núú tütú Yá Ndiòxí sá ncháá làndú téé na càcu díhna quetúu-güexi núú-gá cuendá cundecu-ná-güexi cuendá-gá. <sup>24</sup>Te ní quidé-yu nàcuáa càhá<sup>n</sup> Yá Ndiòxí núú tütú-gá núú càchí-xi: “Canehe-ndo úú lõmá àdi úú cùcu quíhí<sup>n</sup> nduu táhú ñáhá Yá Ndiòxí”, duha càhá<sup>n</sup>-gá núú tütú-gá.

<sup>25</sup>Te dàvã-á<sup>n</sup> ndécú ìí<sup>n</sup> téé nàni Mió ñuú Jerusàlén. Te ío váha ìní-dé, te chiñuhu-dé Yá Ndiòxí, te ndètu-dé sáá nduu chindee ñaha Yá Ndiòxí xii ñáyiu israhél. Te ndècu ndìhi té Mió-á<sup>n</sup> Espíritú Yá Ndiòxí. <sup>26</sup>Te sa ní xáha<sup>n</sup>-xi xii-dé sá vã cùu-ni-dé, chi dacuitíí quíní-dé Crístú Yaá tendaha Yá Ndiòxí quixi ñuyúú-a. <sup>27</sup>Te téé-á<sup>n</sup> ndècá ñaha Espíritú Yá Ndiòxí xii-dé cuáhá<sup>n</sup> veñúhu càhnu sá ío cùnuu. Te cuáhá<sup>n</sup>-yu ndìhi Jèsús veñúhu-á<sup>n</sup> cuendá cadá-yu ndìhi-gá nàcuáa càhá<sup>n</sup> tnúhu ní chídó tnùní ndíí Moisés. <sup>28</sup>Te òré ní sáá-yu, te té Mió-á<sup>n</sup> ní nguídèhè-dé Jèsús, te ní cáhá<sup>n</sup>-dé sá ío càhnu cuu Yá Ndiòxí, te ní xáha<sup>n</sup>-dè xii-gá:

<sup>29</sup>Yòhó Dútú Ndiòxí sa ní cuu dañã-ni cùú-í vitna,

chi sa ní quide-n nàcuáa ní cachí-n xii yùhú téé xínu cuechi núú-n.

<sup>30</sup> Chi sa ní xiní núù-í Yaá dàcácu nihnu ñaha xii ñáyiú núú ùhú núú ndàhú vitna.

<sup>31</sup> Te Yaá ní tendaha-n vèxi núú ndécú nchàa ñáyiú ñuyíú-a.

<sup>32</sup> Te cùu-gá dàtná ìí<sup>n</sup> ñuhú, chi dandixi túu-gá iní ñáyiú cuendá cutnùní iní-yu cuendá Yá Ndiöxí cuèi ñá díú ñáyiú isràél cúú-yu.

Te diu-gá cada, te canehé ñáyiú dava-gá ñuú sá yíñùhu núú ñáyiú isràél chi diu ñáyiú isràél cúú-yu ñáyiú cùu cuendá-n.

Duha ní xáha<sup>n</sup> tẽ Mió xii Yá Ndiöxí.

<sup>33</sup> Te té Chèé ndihi nãná Jèsús ní cuñùhu-yu tnúhu ní cáhá<sup>n</sup> té Mió cuendá-gá. <sup>34</sup> Te dàtnùní té Mió ní xicá<sup>n</sup> táhú-dẽ núú Yá Ndiöxí cuendá-yu, te xáha<sup>n</sup>-dẽ xii tá Màriá nãná Jèsús:

—Cundedóho tnúhu na càhá<sup>n</sup>-í-a, té lĩhli-a ní nduu táhú-dẽ nacanu ichi-dé dava ñáyiú isràél ichi Yá Ndiöxí, te davá-yu vá tnĩí-yu tnúhu cáhá<sup>n</sup>-dé, te ñáyiú-á<sup>n</sup> cuíta nihnú-yu, te cada-dé nàcuáa cutnùní iní ñáyiú sá Yá Ndiöxí ní tendaha ñaha-gá xii-dé, dico vá quindáá iní-yu, chi daquèe tĩhú ñáhã-yu xii-dé.

<sup>35</sup> Te duca<sup>n</sup> te cutnùní nàcuáa sàni iní ìí<sup>n</sup> ìí<sup>n</sup> ñáyiú. Dico sá cúú-xí yòhó chi ío cada ndàhú-xi iní-n, chi súúní dàtná sá ní nícuèhé iní-n càda-xi —cachí-dé xáha<sup>n</sup>-dẽ xii tá Màriá.

<sup>36</sup> Te xíá<sup>n</sup> ndécú tnàhá ìí<sup>n</sup> ñaha càhá<sup>n</sup> tnúhu Yá Ndiöxí nání-á<sup>n</sup> Àná, te tãtã-a<sup>n</sup> ní xínani-dẽ Fànuel ñaní tnàhá ndii Àsér. Te ñaha-á<sup>n</sup> sa ní sahnu vihi-a<sup>n</sup>, te cuechi-ni-a<sup>n</sup> ní tnándaha-a<sup>n</sup> te úsá-ni cuíá ní xíndecu-a<sup>n</sup> ndihi yíi-a<sup>n</sup>, <sup>37</sup> te ní quendóo quèé-a<sup>n</sup>, te sa ñùhu-a<sup>n</sup> cúmídíco cǔmí cuíá-a<sup>n</sup>. Te ñá túú ní xõo quee-a<sup>n</sup> veñùhu càhnu sá ío cùnuu, chi nduu níú ní xóo chiñuhu-a<sup>n</sup> Dútú Ndiöxí, te áma ñá túú tnàhí ná ní xõo caxi-a<sup>n</sup> ní xóo cáhá<sup>n</sup> ndihi-a<sup>n</sup> Yá Ndiöxí. <sup>38</sup> Te diu-ni òré ndécú-yu ndihi Jèsús ní quexìo-a<sup>n</sup> núú-yu, te ní ndacá<sup>n</sup> táhú-á<sup>n</sup>

núú Yá Ndiöxí cuendá sá ní xiní-a<sup>n</sup> Jèsús, te dàtnùní ní ngúíta-a<sup>n</sup> càhá<sup>n</sup> váha-a<sup>n</sup> cuendá-gá núú nchàa ñáyiú, ñáyiú ndètu quiní sáa nduu dàcácu Yá Ndiöxí ñáyiú Jerusàlén núú tnùndòho tnúhu ndàhú.

### Cuánuhú-yu ñuú Nazàrèt

<sup>39</sup> Te sátá ní quidè-yu nchaa nàcuáa càhá<sup>n</sup> tnúhu Yá Ndiöxí, te cuánuhú-yu ñuú Nazàrèt núú ndécú tnàhí-yu, te ñuú-á<sup>n</sup> yíndèhu-xi distritú Galileá. <sup>40</sup> Te té lĩhli nàni Jèsús-á<sup>n</sup> tá sàhnu-dé, te ta nihí ndéé-dẽ cuáhã<sup>n</sup>, te duca<sup>n</sup> ío váha ta sáa sá xiní tnùní-dé cuáhã<sup>n</sup>, chi Yá Ndiöxí ndécú ndihi ñaha-gá xii-dé.

### Jèsús ndécú-gã veñùhu

<sup>41</sup> Te ndi tnàhá cuíá ní xóo quĩhí<sup>n</sup> té Chèé ndihi nãná Jèsús vico pàs-cuá ñuú Jerusàlén. <sup>42</sup> Te cútnàhá ní chítú Jèsús úxúú cuíá-gã, te cuáhã<sup>n</sup>-yu ndihi-gá ñuú Jerusàlén vico pàs-cuá, chi duca<sup>n</sup> tnàhí quidè-yu. <sup>43</sup> Te òré ní yáha vico, te ní natnĩí-yu ichi cuánuhú-yu, te ní quendóo-gá ñuú Jerusàlén, te ni nãná-gã, te ni tẽ Chèé ñá túú ní xiní ní quendóo-gá. <sup>44</sup> Chi ní sani iní-yu sá ñútnàhá-gá tnuú nchaa ñáyiú ní sáhã<sup>n</sup> vico cuánuhú. Te ní xúhu<sup>n</sup>-yu ìí<sup>n</sup> nduu ichi ta ndùcu tnúhu-yu-gá núú nchàa ñaní tnàhã-yu, ndihi núú nchàa ñáyiú xiní tnàhá ndihí-yu, <sup>45</sup> te ñá túú ní nànhí ñáhã-yu xii-gá. Núu ní nacuíco-yu cuánuhú tucú-yu ñuú Jerusàlén cuendá yacá<sup>n</sup> nanducu ñàhá-yu xii-gá.

<sup>46</sup> Te núú ùní nduu sá ní dana núú ñáhã-yu xii-gá, te ní nanhí ñáhã-yu núcóo-gá xití veñùhu càhnu sá ío cùnuu tnuú cue tée dàcuaha ñaha xií-yu nchaa tnúhu ní chídó tnùní ndii Moisés, te ndèdóho ñaha-gã xii-güedé, te nándi sá ndúcú tnùhu-gá núú-güedé. <sup>47</sup> Te nchaa cue tée xíndedóho ñaha xii-gá xícuñùhu-güedé sá ío váha sáa sá xiní tnùní-gá, te ío váha nihí-gá tnúhu nàdanchocáva-gá. <sup>48</sup> Te òré ní xiní ñáhã



tě Chèé ndihi náná-gǎ xii-gá, te ío ní cuñúhu-yu, te ní xáha<sup>n</sup> náná-gǎ xii-gá:

—Yòhó déhe-í, ¿ná cuendá duca<sup>n</sup> ní quide ñaha-n xii-ndí? Te tǎtá-n ndihi yúhú ndihú iní-ndí xícá nànducu ñaha-ndí xii-n —càchí-xi xáha<sup>n</sup>-xi xii-gá.

<sup>49</sup>Te ní xáha<sup>n</sup> Jèsús xií-yu:

—¿Ná cuendá nánducu ñaha-ndo? ¿Náa ñá túú xiní-ndó sǎ núú chífú<sup>n</sup> Tǎtá-í tǎú-í caca cuu-í-ǎ? —càchí-gá xáha<sup>n</sup>-gǎ xií-yu.

<sup>50</sup>Dico mèé-yu ñá túú ní tècú tñuní-yu nàcuáa ní xáha<sup>n</sup>-gǎ.

<sup>51</sup>Te sátá dúcá<sup>n</sup> te cuánuhú ndihi ñàhá-yu xii-gá ñuú Nazàrét, te ío ní sándáa iní ñàhá-gǎ xií-yu. Te nchaa sá ní quide-gá-á<sup>n</sup> ní xúhu<sup>n</sup> nahi-ni iní náná-gǎ.

<sup>52</sup>Te Jèsús duca<sup>n</sup>-ni ta sàhnu-gá cuáhá<sup>n</sup>, te ta sàá-gá sá xiní tñuní-gá cuáhá<sup>n</sup>, te duca<sup>n</sup> cùdiu-gá núú Yǎ Ndiòxí, ndihi núú nchàa ñáyi.

**Té Juàá téé dàcuandute ñaha  
xii ñáyi cuáhá<sup>n</sup>-dé tñúhu  
Yá Ndiòxí xití yucu**

(Mt. 3:1-12; Mr. 1:1-8; Jn. 1:19-28)

**3** Te ní cuu sáhú<sup>n</sup> cuá sǎ yíndàha té Tiberiú cuéhé nàció<sup>n</sup>, te dàvá-á<sup>n</sup> ní cunuu té Pilatú distrítú Jùdeá, te té Hèrodés ní cunuu-dě distrítú Galileá, te ñani-dé té Lìpé ní cunuu-dě distrítú Itùreá ndihi ìngá distrítú nání Trà-conité, te té Lisàniás ní cunuu-dě distrítú Abiliniá. <sup>2</sup>Te té Ànás ndihi té Caifás ní cuu-güedé dútú cúnù. Te dàvá-á<sup>n</sup> ní cáhá<sup>n</sup> ndihi ñaha Yǎ Ndiòxí xii té Juàá déhe té Zacàriá xití yucu sá quèh<sup>n</sup>-dé cáhá<sup>n</sup>-dé tñúhu-gá núú ñáyi. <sup>3</sup>Te té Juàá ní yáha-dé nchaa ñuú cáá yàtni yúte Jòrdán, te xáha<sup>n</sup>-dě xii nchaa ñáyi:

—Chí dándixi túu iní sá ñà túú quide váha-ndo, te dañà-ndo nchàa ichi cuehé ichi duha ndècu-ndo, te cuandute-ndo, te duca<sup>n</sup> te cada càhnu iní Yǎ Ndiòxí nchaa yícá cuèchi-ndo —duha ní xáha<sup>n</sup>-dě xií-yu.

<sup>4</sup>Te duca<sup>n</sup> ní quide-dé chi ní quee ndáa-xi nàcuáa ní chídó tñuní ndí Chàíá téé ní xóo cáhá<sup>n</sup> tñúhu Yá Ndiòxí ndéé sanaha núú tútú ndí núú càchí-xi:

Tècú càhá<sup>n</sup> ñíhi ì<sup>n</sup> téé yèhi xití yucu, te xáha<sup>n</sup>-dě xii ñáyi:

“Chí dǎná nchàa ichi cuehé ichi duha ndècu-ndo, te tñii-ndo ìchi váha, te duca<sup>n</sup> càda-ndo cuendá cundecu túha-ndo, chi véxi Yaá ío cùnuc.

<sup>5</sup>Te nchaa núú cùnú nachítú, te nchaa tìndúú ndihi nchaa yucu ngoyo nihnu cuendá nduu ndáa, te nchaa ichi ñá túú cuáhá<sup>n</sup> ndáa nduu ndáa,

te nchaa ichi ñá túú càváha nduu váha.

<sup>6</sup>Te nchaa ñáyi ñuyíú-a ñíhí-yu tñúhu sá Yǎ Ndiòxí véxi-gá dàcácu nihnu ñaha-gǎ xií-yu núú ùhú núú ndàhú.” Duha ní chídó tñuní ndí Chàíá núú tútú ndí.

<sup>7</sup>Te òré ní xica ñáyi cuáhá<sup>n</sup>-yu cuendá dacuandute ñaha té Juàá xií-yu, te ní xáha<sup>n</sup>-dě:

—¿Nchaa nchòhó cúú-ndó dàtná ì<sup>n</sup> cóó dèé<sup>n</sup> chi ío cuihna iní-ndó! ¿Te nása ní cuu núu tñàhá nchòhó ndúcú-ndó nàcuáa cácu nihnu-ndo núú tñùndòho cahnu vihi sá tá cùyatni ñaha xii-ndo véxi-i? <sup>8</sup>Te chí cadá váha vitna cuendá duca<sup>n</sup> cùnuní sá ní dǎná-ndó nchàa ichi cuehé ichi duha ndècu-ndo. Te vá càchí-ndó sǎ ío càhnu cuu-ndo cuendá sá cúú-ndó ñàní tñàhá ndí Àbrahám, chi cuèi ndéé yúú te ndacu Yá Ndiòxí ndada-gá ñáyi te cuú-yu ñani tñàhá ndí Àbrahám. <sup>9</sup>Te caá chi ndècu túha-xi sá quèhndé-xi nchaa yutnu sá ñà túú càváha sávidí-xi, chi nchaa yutnu-á<sup>n</sup> tèhndé-xi te cuánguee-xi núú ñùhú càyú-xi. Te duha sǎtnhá-xi ndoho nchaa ñáyi ñá túú quide váha, chi nchaa ñáyi duca<sup>n</sup> ñà túú quide váha cùú-yu dàtná nchaa yutnu sá ñà túú càváha sávidí-xi. —càchí-dé xáha<sup>n</sup>-dě xií-yu.

<sup>10</sup>Te ní xícá<sup>n</sup> tnúhu-yu núú-dě, te xǎhá<sup>n</sup>-yu:

—¿Te nása cada-ndí váí<sup>n</sup>? —càchí-yu xǎhá<sup>n</sup>-yu xii-dé.

<sup>11</sup>Te xǎhá<sup>n</sup>-dě:

—Te núu ndědacàa-ndo ndecu ndihi-ndo úú dóó te cuǎñaha-ndo ì<sup>n</sup> xii ñáyiu ñá túú ndècu ndihi, àdi núu ndècu ndihi-ndo sá nchító-ó te cuáha-ndò-yu na cǎxí-yu —càchí-dé xǎhá<sup>n</sup>-dě xii-yu.

<sup>12</sup>Te ní quexio ì<sup>n</sup> úú cue tée cuihna ìní-xi quide cobrá ñáhá xii ñáyiu cuendá impuèstú cuendá cuàndute-güedé, te ní xícá<sup>n</sup> tnúhu-güedé núú tē Juàá, te xǎhá<sup>n</sup>-güedé:

—Mèstrú, ¿te nása cada-ndí cuendá cuu váha ìní Yǎ Ndiòxí-i? —càchí-güedé xǎhá<sup>n</sup>-güedé xii-dé.

<sup>13</sup>Te té Juàá ní xáha<sup>n</sup>-dě:

—Vá cuidó-ndó càda cobrá-ndó ñáyiu —càchí-dé xǎhá<sup>n</sup>-dě xii-güedé.

<sup>14</sup>Te tnàhá ì<sup>n</sup> úú cue tée cùu sandadú xǎndecu-á<sup>n</sup> ní xícá<sup>n</sup> tnúhú-güedé núú tē Juàá, te xǎhá<sup>n</sup>-güedé:

—Te nchúhú ¿nása cada-ndí cuendá cuu váha ìní Yǎ Ndiòxí-i? —càchí-güedé xǎhá<sup>n</sup>-güedé xii-dé.

Te ní xáha<sup>n</sup> tē Juàá:

—Vá quéndèé-ndó sǎ néhé tnàha ñáyiu-ndo, te ni vǎ dácàa díquí-ndò-yu ì<sup>n</sup> sá ñà túú nǎ quídè-yu, te nduu vétú ìní-ndó nàcuáa ñùhu yáhu-ndo —càchí-dé xǎhá<sup>n</sup>-dě xii-güedé.

<sup>15</sup>Te nchaa ñáyiu xǎndetu sá quíxí Crístú sàni ì<sup>n</sup> sani úú ìní-yu núu sá díú Crístú Yaá tendaha Yǎ Ndiòxí quixi ñuyíú-a cùu te Juàá àdi ñáhá. <sup>16</sup>Dico té Juàá ní cǎhá<sup>n</sup> ndodo-dé núú-yu nchaá-yu, te xǎhá<sup>n</sup>-dě:

—Na càchí tnúhu ndáá-í xii-ndo sǎ yúhú véxi-í sá cuendá-ni dacuàndute ñaha-í xii-ndo dàtná ní cachí Yǎ Ndiòxí, dico nchìcú<sup>n</sup> ìngá tée véxi, te tée-á<sup>n</sup>

taxi-dé Espíritú Yǎ Ndiòxí cundecu ndihi-ndo, te cùu-xi datná ì<sup>n</sup> ñuhú, chi ndada ndoo ndada nine-xi ìní-ndó. Te tée-á<sup>n</sup> ìo-gá cùnùu-dé dàcúxí yúhú, chi yúhú cùu-í ì<sup>n</sup> tée duu<sup>n</sup> duu<sup>n</sup> ñá túú tàù-í nandaxi-í cuèdicó ñii chàù-dé dico quide-í chiù<sup>n</sup>-dé. <sup>17</sup>Te tée-á<sup>n</sup> sa véxi túha-dé sá cǎdá ì<sup>n</sup> ñaha-dé xii-o dàtná quídé ñáyiu ndàda ndoo triú, chi ñáyiu-á<sup>n</sup> sa nèhe túha-ná-yu yaxí<sup>n</sup>-yu òré nǎñǎni cuendá ndada ndoo-yu, te òré ndádá ndò-yu triú-á<sup>n</sup> te dàquee díí<sup>n</sup>-yu mihi-xi, te tàxúha-yu mee-nǎ triú-á<sup>n</sup>, te mihi-xi-á<sup>n</sup> sáhmí-yu. Te dàtná quídè-yu mihi triú-á<sup>n</sup> duca<sup>n</sup> sǎtnahá-xi cada ñaha tée-á<sup>n</sup> xii nchaa ñáyiu ñá túú quide váha, chi daquèhí<sup>n</sup> ñáhá-dé xii-yu núú ñùhú núú càyú, te ñuhú-á<sup>n</sup> ñà túú tnàhí ndàhvá —càchí-dé xǎhá<sup>n</sup>-dě xii-yu.

<sup>18</sup>Te titní víhí-gǎ tnúhu váha ní xáha<sup>n</sup> tē Juàá xii-yu òré ní dásàhú ñáhá-dé. <sup>19</sup>Te ní cǎhá<sup>n</sup>-dé dóho té Hèrodés cuendá sá ndécá-dé ì<sup>n</sup> ñaha nàni Herodiás ñaha ní cǎndeca ñaní-dé té Lìpé, te ní xáha<sup>n</sup>-dé cuendá nchaa dava-gá sá cuèhé sá dúhá quide-dé. <sup>20</sup>Dico té Hèrodés ñá túú ní quide cuendá-dé tnúhu ní cǎhá<sup>n</sup> té Juàá, chi nèhé-gá tucu ní quide-dé, chi da vecaá ní chihi-dé té Juàá.

### Sàndute Jesús

(Mt. 3:13-17; Mr. 1:9-11)

<sup>21</sup>Te òré dàcuàndute té Juàá nchaa ñáyiu, te tnàhá Jèsús ní dácúàndute ñaha-dé xii-gá. Te nini cǎhá<sup>n</sup> ndihi-gá Dútú Ndiòxí ní nacaá<sup>n</sup> andiù, <sup>22</sup>te ní quee Espíritú Yǎ Ndiòxí véxi cuu<sup>n</sup> túu-xi, te cǎa-xi datná cǎá ì<sup>n</sup> lómá, te òré-á<sup>n</sup> ní tecú ní cǎhá<sup>n</sup> Yǎ Ndiòxí ndéé andiù, te xǎhá<sup>n</sup>-gǎ xii Jèsús:

—Yòhó cùu-n Dèhe-í tée ìo cùu ìní-í, te ìo cùdí ìní ñàhà-í xii-n —càchí-gá xǎhá<sup>n</sup>-gǎ xii Jèsús.

**Cue tée ní xíndecu díhna-gá ñuyú-a  
dàcúúxí Xìtohó Jesucrístú**

(Mt. 1:1-17)

<sup>23</sup>Te ndècu Jesús dàtná ócò úxí cuíá-gã cútnàhá ní chisaha-gã chiù<sup>n</sup> ní táhú Tǎtá-gã Dútú Ndiòxí cada-gá. Te ní cuu-gá déhe té Chèè chi duca<sup>n</sup> sàni iní ñáyiú ñuyú-a. Te té Chèè-á<sup>n</sup> ní cuu-dé déhe té Èlí, <sup>24</sup>te tée-á<sup>n</sup> ní cuu-dé déhe té Mátát. Te té Mátát-á<sup>n</sup> ní cuu-dé déhe té Lèví, te tée-á<sup>n</sup> ní cuu-dé déhe té Mèlquí. Te té Mèlquí-á<sup>n</sup> ní cuu-dé déhe té Jàná, te tée-á<sup>n</sup> ní cuu-dé déhe té Chèè. <sup>25</sup>Te té Chèè-á<sup>n</sup> ní cuu-dé déhe té Matàtiás, te tée-á<sup>n</sup> ní cuu-dé déhe té Àmós. Te té Àmós-á<sup>n</sup> ní cuu-dé déhe té Nàhúm, te tée-á<sup>n</sup> ní cuu-dé déhe té Èslí. Te té Èslí-á<sup>n</sup> ní cuu-dé déhe té Nagàí, <sup>26</sup>te tée-á<sup>n</sup> ní cuu-dé déhe té Màát. Te té Màát-á<sup>n</sup> ní cuu-dé déhe té Matàtiás, te tée-á<sup>n</sup> ní cuu-dé déhe té Semèì. Te té Semèì-á<sup>n</sup> ní cuu-dé déhe té Chèè, te tée-á<sup>n</sup> ní cuu-dé déhe té Jùdá. <sup>27</sup>Te té Jùdá-á<sup>n</sup> ní cuu-dé déhe té Jòaná, te tée-á<sup>n</sup> ní cuu-dé déhe té Rèsá. Te té Rèsá-á<sup>n</sup> ní cuu-dé déhe té Zorobàbél, te tée-á<sup>n</sup> ní cuu-dé déhe té Salàtiél. Te té Salàtiél-á<sup>n</sup> ní cuu-dé déhe té Nèrí, <sup>28</sup>te tée-á<sup>n</sup> ní cuu-dé déhe té Mèlquí. Te té Mèlquí-á<sup>n</sup> ní cuu-dé déhe té Ádí, te tée-á<sup>n</sup> ní cuu-dé déhe té Còsám. Te té Còsám-á<sup>n</sup> ní cuu-dé déhe té Elmòdám, te tée-á<sup>n</sup> ní cuu-dé déhe té Ęr. <sup>29</sup>Te té Ęr-á<sup>n</sup> ní cuu-dé déhe té Jò-sué, te tée-á<sup>n</sup> ní cuu-dé déhe té Elièzér. Te té Elièzér-á<sup>n</sup> ní cuu-dé déhe té Jòrím, te tée-á<sup>n</sup> ní cuu-dé déhe té Mátát. <sup>30</sup>Te té Mátát-á<sup>n</sup> ní cuu-dé déhe té Lèví, te tée-á<sup>n</sup> ní cuu-dé déhe té Mió. Te té Mió-á<sup>n</sup> ní cuu-dé déhe té Jùdá, te tée-á<sup>n</sup> ní cuu-dé déhe té Chèè. Te té Chèè-á<sup>n</sup> ní cuu-dé déhe té Jònán, te tée-á<sup>n</sup> ní cuu-dé déhe té Eliàquím. <sup>31</sup>Te té Eliàquím-á<sup>n</sup> ní cuu-dé déhe té Mèléá, te tée-á<sup>n</sup> ní cuu-dé déhe té Mainán. Te té Mainán-á<sup>n</sup> ní cuu-dé déhe té Mátatá, te tée-á<sup>n</sup> ní cuu-dé déhe té

Nàtán. <sup>32</sup>Te té Nàtán-á<sup>n</sup> ní cuu-dé déhe té Dàvií, te tée-á<sup>n</sup> ní cuu-dé déhe té Isàí. Te té Isàí-á<sup>n</sup> ní cuu-dé déhe té Òbéd, te tée-á<sup>n</sup> ní cuu-dé déhe té Bòóz. Te té Bòóz-á<sup>n</sup> ní cuu-dé déhe té Sàlmón, te tée-á<sup>n</sup> ní cuu-dé déhe té Naàson. <sup>33</sup>Te té Naàson-á<sup>n</sup> ní cuu-dé déhe té Aminàdáb, te tée-á<sup>n</sup> ní cuu-dé déhe té Àrám. Te té Àrám-á<sup>n</sup> ní cuu-dé déhe té Ès-róm, te tée-á<sup>n</sup> ní cuu-dé déhe té Fàrés. Te té Fàrés-á<sup>n</sup> ní cuu-dé déhe té Jùdá, <sup>34</sup>te tée-á<sup>n</sup> ní cuu-dé déhe té Jàcób. Te té Jàcób-á<sup>n</sup> ní cuu-dé déhe té Isàác, te tée-á<sup>n</sup> ní cuu-dé déhe té Àbrahám. Te té Àbrahám-á<sup>n</sup> ní cuu-dé déhe té Tàré, te tée-á<sup>n</sup> ní cuu-dé déhe té Nàcór. <sup>35</sup>Te té Nàcór-á<sup>n</sup> ní cuu-dé déhe té Sèrúg, te tée-á<sup>n</sup> ní cuu-dé déhe té Ragàú. Te té Ragàú-á<sup>n</sup> ní cuu-dé déhe té Pèlég, te tée-á<sup>n</sup> ní cuu-dé déhe té Hèbér. Te té Hèbér-á<sup>n</sup> ní cuu-dé déhe té Sàlá, <sup>36</sup>te tée-á<sup>n</sup> ní cuu-dé déhe té Cainán. Te té Cainán-á<sup>n</sup> ní cuu-dé déhe té Arfàxád, te tée-á<sup>n</sup> ní cuu-dé déhe té Sëm. Te té Sëm-á<sup>n</sup> ní cuu-dé déhe té Nòé, te tée-á<sup>n</sup> ní cuu-dé déhe té Làméc. <sup>37</sup>Te té Làméc-á<sup>n</sup> ní cuu-dé déhe té Matusàlén, te tée-á<sup>n</sup> ní cuu-dé déhe té Ènóc. Te té Ènóc-á<sup>n</sup> ní cuu-dé déhe té Jàréd, te tée-á<sup>n</sup> ní cuu-dé déhe té Mahalàleél. Te té Mahalàleél-á<sup>n</sup> ní cuu-dé déhe té Cainán, <sup>38</sup>te tée-á<sup>n</sup> ní cuu-dé déhe té Ènós. Te té Ènós-á<sup>n</sup> ní cuu-dé déhe té Sèt, te tée-á<sup>n</sup> ní cuu-dé déhe té Àdán. Te té Àdán-á<sup>n</sup> chi mee Yá Ndiòxí ní cadúha ndaha ñàha-gá xii-dé.

**Sácuíhná quidé yìca-xi cada Jesús sá  
ñà túú tàù-gá cada-gá ní cuu**

(Mt. 4:1-11; Mr. 1:12-13)

**4** Te Jèsús ní naquehe<sup>n</sup>-gá ichi yuhu yúte Jòrdán cuánuhú-gá. Te sa ndècu ndihi-gá Espíritú Yá Ndiòxí, te Espíritú-á<sup>n</sup> ndécá ñàha-xi xii-gá cuáhá<sup>n</sup> iì<sup>n</sup> xití yucu. <sup>2</sup>Te yàcá<sup>n</sup> ní xíndecu-gá údico nduu, te sácuíhná ní cuiní-xi coto ndeé ñàhá-xí xii-gá te núu ndisa sá vǎ

cadá-gă ɨ<sup>n</sup> sá ñà túú tàù-gá cada-gá. Te ñà túú tñàhí ná ní xèxi-gá ndi ùdico nduu-á<sup>n</sup>, te sátá dúcá<sup>n</sup> te ní xícá<sup>n</sup> iní-gá caxi-gá. <sup>3</sup>Te sácufíhná-ă<sup>n</sup> ñí xáha<sup>n</sup>-xi xii-gá:

—Te núu ndisa sá cúú-n Dêhe Yá Ndiöxí, te cúñaha xii yúú-a na nduu-xi paá —càchí-xi xáha<sup>n</sup>-xi xii-gá.

<sup>4</sup>Te Jèsús ní xáha<sup>n</sup>-gă xii-xi:

—Núú tütú Yă Ndiöxí càchí-xi: “Ñá díú mèe-ni paá candeca-xi iní ñáyiu, chi tñàhá nchaa tñúhu càhá<sup>n</sup> Yă Ndiöxí candeca-xi iní-yu”, duha càchí-xi núú tütú-gá —càchí-gá xáha<sup>n</sup>-gă xii-xi.

<sup>5</sup>Te dătnúni sácufíhná ndécá ñàha-xi xii-gá cuáhá<sup>n</sup> ɨ<sup>n</sup> núú tñdúú dùcú<sup>n</sup>, te uu<sup>n</sup>ni ní dánèhé núú ñáhá-xí xii-gá nchaandi túhú nació<sup>n</sup> cáá ñùyúú. <sup>6</sup>Te ní xáha<sup>n</sup>-xi xii-gá:

—Yúhú cada-í, te taxi tñúni-n nchàa-ndi túhú nació<sup>n</sup>-a ndíhi nchaa sá vâha ìó diu-ni nchaa nació<sup>n</sup>-a, te cachí ñáyiu sá ìo cùnuu-n, chi yúhú cúú cuendá-í nchaa sá ìo nchaa nació<sup>n</sup>-a, te ndédani càa ñáyiu cùu iní-í te cúñaha-í xií-yu taxi tñúni-yu. <sup>7</sup>Te núu ni yùhu ni iní-n chiñuhu ñaha-n xii-í ñá, te nchaa taxi-í cuu cuendá-n —càchí-xi xáha<sup>n</sup>-xi xii-gá.

<sup>8</sup>Te Jèsús ní xáha<sup>n</sup>-gă xii-xi:

—Xocuiñí yòhó sácufíhná nùú ndécú-í-a, chi vá cúú càda-í nàcuáa càchí-n chi núú tütú Yă Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ɨ<sup>n</sup>dii díí-ni-gă cada-ndo nchàa nacuáa càhá<sup>n</sup>-gă”, duha càchí-xi núú tütú-gá —càchí-gá xáha<sup>n</sup>-gă xii-xi.

<sup>9</sup>Te sácufíhná ndécá ñàha tucu-xi xii-gá cuáhá<sup>n</sup> ñúú Jerusalén, te ní xáha<sup>n</sup>-xi xii-gá cuása-gá díquí veñúhu càhnu sá ìo cùnuu, te ní xáha<sup>n</sup> tucu-xi:

—Te núu ndisa cùu-n Déhe Yá Ndiöxí te cuandèe ndava ndéé núú ñúhú <sup>10</sup>cuendá quee ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi:

Yá Ndiöxí tendaha-gă cue espíritú xínú cuèchi núú-gă quixi-xi coto ñaha-xi xii-n.

<sup>11</sup>Te núú ndáhá-xí cãundodo-n cuendá sá vâ dánicuèhé yúú sáhá-n, duha càchí-xi núú tütú-gá —càchí sácufíhná xáha<sup>n</sup>-xi xii-gá.

<sup>12</sup>Te Jèsús ní xáha<sup>n</sup>-gă xii-xi:

—Te càchí tucu-xi núú tütú Yă Ndiöxí: “Vá cãni iní-n còto ndeé-n Dütú Ndiöxí Yaá cúú Ndiöxí-n nùu ndisa sá dácãcu ni-hnu ñaha-gă xii-n cuendá ɨ<sup>n</sup> sá sání iní-n càda-n sá cúú-xí mèe-n”, duha càchí-xi núú tütú-gá —càchí-gá xáha<sup>n</sup>-gă xii-xi.

<sup>13</sup>Te sátá dúcá<sup>n</sup> te sácufíhná ñà túú-gă ní cùtnuní iní-xi nása cada-xi Jèsús, núú xíá<sup>n</sup> ní xica-xi cuáhá<sup>n</sup>-xi ní sanaa tnaa-xi.

**Distritú Galileá ní chisaha Jèsús chiú<sup>n</sup> ní táhú Tătá-gă Dútú Ndiöxí cada-gă**

(Mt. 4:12-17; Mr. 1:14-15)

<sup>14</sup>Te Jèsús cuáhá<sup>n</sup> tucu-gá distritú Galileá, dico sa ndècu ndíhi-gă Espíritú Yă Ndiöxí, te ni càa xico xía<sup>n</sup> ñí níhí-yu tñúhu nchaa nàcuáa quide-gá.

<sup>15</sup>Te ndi tñahá ñúú cuáhá<sup>n</sup>-gă duca<sup>n</sup> cuãnguihu-gá veñúhu-yu dãnèhé ñáhá-gă xií-yu, te nchaá-yu càchí-yu sá ìo càhnu cuu-gá.

**Jèsús ndécú-gă ñúú Nazàrét**

(Mt. 13:53-58; Mr. 6:1-6)

<sup>16</sup>Te Jèsús ní sáhá<sup>n</sup>-gă ñúú Nazàrét ñúú núú ñí sahnú-gá. Te nduu ndètatú ñáyiu ní quíhu-gá veñúhu, chi duca<sup>n</sup> tñahí quide-gá, te ní ngúnutnífí-gă dácuaaha-gá tutú ndèe tñúhu Yá Ndiöxí.

<sup>17</sup>Te ní sãñaha-güedë xii-gá tutú ndèe tñúhu ní càhá<sup>n</sup> ndíi Chaiá téé ní xóo càhá<sup>n</sup> tñúhu Yá Ndiöxí ndéé sanaha, te òré ní nandicá-gá núú tütú-á<sup>n</sup> te ní naníhí-gă núú càchí-xi:

<sup>18</sup>Espíritú Yă Ndiöxí ndécú ndíhi ñaha-xi xii-í, chi ní cachí-gá sá càhá<sup>n</sup>-í tñúhu-gá sá cúú-xí ñáyiu ndàhú,

ñáyiú vátá cúndèdóho tñàhí-gá.

Te véxi-í cuèndá vá ndìhú-gá iní ñáyiú ñá túú ndècu váha iní-xi,

te cue ñáyiú sa nèhe váha ñaha-nã yucu ñávãha dàcácu nihnu-í-yu.

Te cue ñáyiú cuáá nacaá-í núú-yu,

te ñáyiú ndòho dandoho ñaha tñaha ñáyiú-xi taunihnu-í-yu.

<sup>19</sup> Te cúñaha-í xii ñáyiú sá sáá nduu càda Yá Ndiòxí ìí<sup>n</sup> sá váha sá cúú-xi-yu.

Duha càchí-xi núú tütú dàcuàha-gá.

<sup>20</sup> Te Jèsús ní nacadí-gá núú tütú-á<sup>n</sup>, te ní nacuáha-gá ìí<sup>n</sup> téé xínu cuèchi veñúhu-á<sup>n</sup>, te ní ngóo-gá. Te nchaa ñáyiú yìhi veñúhu ñá núú nũ-yu ndèhe ñàhá-yu xii-gá. <sup>21</sup> Te xãha<sup>n</sup>-gã xií-yu:

—Mei vitna ní quee ndáá-xi nàcuáa càhá<sup>n</sup>-xi núú tütú Yã Ndiòxí —càchí-gã xãha<sup>n</sup>-gã xií-yu.

<sup>22</sup> Te nchaá-yu ní càhá<sup>n</sup> váha-yu cuèndá-gá, te ní cuñúhu-yu tñúhu váha càhá<sup>n</sup>-gá, te xitnàhá-yu:

—¿Te náa ñá díú tõe-a cùu-dé déhe té Chèè-ã? —càchí-yu xitnàhá-yu.

<sup>23</sup> Te Jèsús ní xáha<sup>n</sup>-gã:

—Na càchí tñúhu ndáá-í xii-ndo sã ñúhú iní-ndó cũñaha-ndo xii-í ìí<sup>n</sup> tñúhu cùtexínu sá càhá<sup>n</sup> méé-ndó, te quesaha-ndo: “Ñátátná cada tátna mee-n”, duha quesaha-ndo. Te cúñaha tucu-ndo xii-í: “Sa ní níhí-ndí tñúhu nàcuáa ní quide-n ñúú Capèrnaúm, te cada-n tñàhá ñúú núú ní sahnú-n”, duha quesaha-ndo —càchí-gã xãha<sup>n</sup>-gã xií-yu.

<sup>24</sup> Te ní xáha<sup>n</sup> tucu-gá:

—Na càchí tñúhu ndáá-í xii-ndo sã ní ìí<sup>n</sup> téé càhá<sup>n</sup> tñúhu Yá Ndiòxí ñá túú tñàhá iní ñàhá ñáyiú ñúú-dé. <sup>25</sup> Te na càchí tñúhu ndáá tucu-í xii-ndo sã ïo vãi ñáyiú ðìhí ñáyiú quèé ní xín-decu nàció<sup>n</sup> Isràèl cútnàhá ní xín-decu té Èliás cútnàhá ñá túú ní cùu<sup>n</sup> dáú ùní cuíá dava, te dàvá-á<sup>n</sup> ïo ní ndoho ñáyiú docó nitùhú nàció<sup>n</sup>. <sup>26</sup> Dico Yá Ndiòxí ñá túú ní tëndaha-gá té Èliás quíhí<sup>n</sup>-dé vehe ndèdani càa ñáyiú ðìhí-á<sup>n</sup>, chi

vehe ìí<sup>n</sup> ñaha ñúú Sàreptá ní xáha<sup>n</sup>-gã ní sáhá<sup>n</sup>-dé, te ñúú-á<sup>n</sup> cáá yàtni-xi ñúú Sidón. <sup>27</sup> Te ní xín-decu tucu ingá téé ní xóo càhá<sup>n</sup> tñúhu Yá Ndiòxí ndéé sanaha, te téé-á<sup>n</sup> ní xínani-dé Eliseú, te ðiu-ni dàvá-á<sup>n</sup> ní xín-decu tucu vãi ñáyiú cùhú nàció<sup>n</sup> Isràèl, ñáyiú ní tñahá cuéhé sã dátèhyú nihnu-xi yiqui cùñú-yu dico ñá túú ní ndúha-yu, chi ìí<sup>n</sup> ðii-ni té Nàamán téé ðistritú Siríá ní ndúha-dé —càchí-gã xãha<sup>n</sup>-gã xií-yu.

<sup>28</sup> Te sá dúcá<sup>n</sup> ní càhá<sup>n</sup>-gá te xiã<sup>n</sup> ní cudéé<sup>n</sup> víhí nchaa ñáyiú yìhi veñúhu-á<sup>n</sup> núú-gã. <sup>29</sup> Te ní queñuhú-yu Jèsús yuhu ðèhvã tñdúú núú cáá ñùu-yu-á<sup>n</sup> cuèndá yàcá<sup>n</sup> dàquée-yu-gá ðèhvã ní cùu. <sup>30</sup> Dico Jèsús vii-ni ní quee-gã tñuú-yu cuáhá<sup>n</sup>-gã.

### Ìí<sup>n</sup> téé yìhi ñaha espíritú cùndìhi yucu ñávãha

(Mr. 1:21-28)

<sup>31</sup> Te Jèsús cuáhá<sup>n</sup>-gã ñúú Capèrnaúm, te ñúú-á<sup>n</sup> yíndèhu-xi ðistritú Galileá. Te yàcá<sup>n</sup> ndécú-gã ní tñahá nduu ndètatú ñáyiú, te ní ngúita-gá dàcuàha-gá ñáyiú.

<sup>32</sup> Te xicuñúhu-yu nchaa nàcuáa dànehé ñàhá-gã xií-yu, chi càhá<sup>n</sup>-gã dàtná càhá<sup>n</sup> ìí<sup>n</sup> téé cùnúu, te cùnúu ndisa-gã.

<sup>33</sup> Te xití veñúhu yìhi ìí<sup>n</sup> téé yìhi ñaha ìí<sup>n</sup> espíritú cùndìhi yucu ñávãha, te espíritú-á<sup>n</sup> ní quide-xi níhi ní càhá<sup>n</sup> téé-á<sup>n</sup>, te xãha<sup>n</sup>-dè xii Jèsús:

<sup>34</sup> —¿Te ná cuíni yòhó Jèsús téé ñúú Nazàrét cada ñaha-n xii-ndí nũu véxi-n núú ndécú-ndí-i? ¿Á<sup>n</sup> véxi-n dà-naa ñaha-n xii-ndí? Chi yúhú xini ñàhá-í xii-n sã cúú-n ìí<sup>n</sup> téé ñá túú tñàhí cuèchi-xi chi núú Yã Ndiòxí ní quee-n véxi-n ñúyíú-a —càchí-dé xãha<sup>n</sup>-dè xii-gã.

<sup>35</sup> Te Jèsús ní tenàá-gã espíritú cùndìhi yucu ñávãha-á<sup>n</sup>, te xãha<sup>n</sup>-gã:

—¿Cadí yuhu-n, te taquèe yiqui cuñú téé-á<sup>n</sup>! —càchí-gã xãha<sup>n</sup>-gã.

Te espíritú cúndìhi yucu ñávàha-á<sup>n</sup> nǐ dándúá-xi téé-á<sup>n</sup> ndèé ñuhu tnuú ñáyiú xǐndecu-á<sup>n</sup>, te ñá túú-gǎ ná ní quide ñaha-xi, te ní quee ñaha-xi xii-dé. <sup>36</sup>Te nchaa ñáyiú xǐndecu-á<sup>n</sup> nǐ cuñúhu-yu, te ní xǐtnàhá-yu:

—¿Te nása ndùu-tu tnúhu càhá<sup>n</sup> téé-á<sup>n</sup> ñá? ¡Te càhá<sup>n</sup>-dé dàtná càhá<sup>n</sup> ì<sup>n</sup> téé tàxi tnuní víhí, chi càhá<sup>n</sup>-ni-dé te nchaa espíritú cúndìhi yucu ñávàha quèe-ni-xi yiqui cuñú-yu! —càchí-yu xǐtnàhá-yu.

<sup>37</sup>Te nchaa xichi ní ñhí-yu tnúhu nàcuáa quide Jesús.

**Jèsús quidé tǎtna-gǎ  
nǎná ñadìhí té Xímú**

(Mt. 8:14-15; Mr. 1:29-31)

<sup>38</sup>Te Jèsús ní ndee-gǎ xití veñúhu, te cuáhá<sup>n</sup>-gǎ vehe té Xímú. Te nǎná ñadìhí té Xímú-á<sup>n</sup> cùhú-a<sup>n</sup> ñuhu vihi-a<sup>n</sup> cahni, te ní cáhá<sup>n</sup> ndàhú-yu núú Jèsús cuèndá-a<sup>n</sup>. <sup>39</sup>Te Jèsús ní sáhá<sup>n</sup>-gǎ núú ndécú-á<sup>n</sup>, te ní ngúnundeyi-gǎ te ní xáha<sup>n</sup>-gǎ xii cahni-á<sup>n</sup> sǎ ná xòcuñí-xi, te ní xócuñí-ni-xi, te òré-ni-á<sup>n</sup> nǐ ndúha ñaha cùhú-á<sup>n</sup> te ní ndacóo-a<sup>n</sup> ní xinu cuechi-a<sup>n</sup> núú-güedé ndìhi-gǎ.

**Jèsús quidé tǎtna-gǎ vai ñáyiú cùhú**

(Mt. 8:16-17; Mr. 1:32-34)

<sup>40</sup>Te òré ní ngódó tnúú nchícanhii, te nchaa ñáyiú xǐndecu ndìhi ñáyiú cùhú vehe-xi ndèca ñahá-yu cuáhá<sup>n</sup> núú Jèsús. Te Jèsús ní sacá<sup>n</sup> ndodo-gǎ ndaha-gǎ díquí ì<sup>n</sup> ì<sup>n</sup> ñáyiú cùhú-á<sup>n</sup>, te duca<sup>n</sup> nǐ quide-gǎ te ní ndúha-yu. Te ndí díf<sup>n</sup> núú cuèhé tnàhá-yu ì<sup>n</sup> ì<sup>n</sup>-yu ni cùu. <sup>41</sup>Te tnàhá dava ñáyiú cùhú-á<sup>n</sup> yíhí ñaha espíritú cúndìhi yucu ñávàha xii-yu ni cùu, te òré ní quee ñaha-xi xii-yu, te xíá<sup>n</sup> ní quide-xi ñhí ní cáhá<sup>n</sup>-yu, te xǎhá<sup>n</sup>-yu xii Jèsús:

—Yòhó cúú-n Dèhe Dútú Ndiòxí —càchí-yu xǎhá<sup>n</sup>-yu xii-gǎ.

Dico Jèsús ñhí ní cáhá<sup>n</sup>-gǎ ní tenàá-gǎ nchaa espíritú cúndìhi yucu ñávàha-á<sup>n</sup>,

te xǎha<sup>n</sup>-gǎ sǎ vǎ dúcá<sup>n</sup>-gǎ cada-xi, chi sa xíní-xi sǎ díú-gǎ cúú-gǎ Cristú Yaa ní tendaha Yǎ Ndiòxí véxi ñuyíú-a.

**Jèsús dánèhé-gǎ  
ñáyiú distritú Galilea**

(Mr. 1:35-39)

<sup>42</sup>Te ì<sup>n</sup> nduu ní túndaá-ni ní quee Jèsús ñuú núú ndécú-gǎ-á<sup>n</sup> cuáhá<sup>n</sup>-gǎ ì<sup>n</sup> xichi núú ñá túú ñáyiú ndècu. Te cue ñáyiú ní ngúfta-yu nànducu ñahá-yu xii-gǎ te ní naníhí ñáhá-yu, te cuíní-yu ngani ñahá-yu xii-gǎ cuèndá sǎ ñá túú-gǎ ndèé quíhí<sup>n</sup>-gǎ ní cùu. <sup>43</sup>Dico ní xáha<sup>n</sup>-gǎ xii-yu:

—Dacuití quíhí<sup>n</sup>-í cúñaha-í xii nchaa ñáyiú dava-gǎ ñuú tnúhu sǎ càhá<sup>n</sup> nàcuáa ndíhu ndaha ñaha Yá Ndiòxí xii-yu, chi chù<sup>n</sup> tnahí-á<sup>n</sup> véxi-í —càchí-gǎ xáha<sup>n</sup>-gǎ xii-yu.

<sup>44</sup>Te ní xica cuu Jèsús ní dánèhé-gǎ ñáyiú tnúhu-gǎ nchaa xití veñúhu ndáa distritú Galilea.

**Jèsús ní quide-gǎ ní ñhí-güedé chácá**

(Mt. 4:18-22; Mr. 1:16-20)

**5** Te ì<sup>n</sup> xito ndècu Jesús yuhu làgúná Genesàrét, te ío cuéhé ñáyiú ní sáá, te ta dàdehnde ñaha-ná-yu xii-gǎ cuáhá<sup>n</sup> sǎ cuíní-yu cundedóho-yu nchaa tnúhu càhá<sup>n</sup>-gǎ. <sup>2</sup>Te Jèsús ní xíní-gǎ úú bàrcú cue téé tnèi chácá xǐnutnǐ-xi yatni yuhu làgúná-á<sup>n</sup>, te sa ní quene cue téé ñuhu xití-xi-á<sup>n</sup> xǐnaquete-güedé ñunu-güedé. <sup>3</sup>Te Jèsús cuásaá-gǎ núú ì<sup>n</sup> bàrcú-á<sup>n</sup>, te bàrcú-á<sup>n</sup> cúú-xí bàrcú té Xímú, te ní xáha<sup>n</sup>-gǎ xii té Xímú-á<sup>n</sup> sǎ dánùndehe-dé-xi luha-gǎ xití ndute. Te dàtnùnì ní ngóo-gǎ núú bàrcú-á<sup>n</sup>, te xíá<sup>n</sup> núcòo-gǎ ní ngúfta-gǎ dánèhé-gǎ ñáyiú. <sup>4</sup>Te òré ní túhú ní dánèhé ñahá-gǎ xii-yu, te ní xáha<sup>n</sup>-gǎ xii té Xímú:

—Daquíhí<sup>n</sup> bàrcú-a xití làgúná mei núú cùnú-gǎ, te dàquée-ndo ñunu-ndo tnèi-ndo chácá —càchí-gǎ xáha<sup>n</sup>-gǎ xii-dé.

<sup>5</sup> Te té Xímú ní xáha<sup>n</sup>-dè:

—Mèstrú, ni niú ní quide chiu<sup>n</sup>-ndí te ni ì<sup>n</sup> chácá ñà túú ní níhí-ndí, dico vitna cuendá-ni sá yòhò táúchiu<sup>n</sup>-n te na dàquée-ndí ñunu-ndí vá<sup>n</sup> —càchí-dé xáha<sup>n</sup>-dè xii-gá.

<sup>6</sup> Te òré ní dàquée-güedé ñunu-güedé te súní vài chácá ní níhí-güedé, te ta ndátá-nà ñunu-güedé cuáhá<sup>n</sup> ní cùu.

<sup>7</sup> Núú ní quide-güedé ndaha-güedé núú dáva-gá cue té cündihí-güedé xixúhu<sup>n</sup> ingá bàrcú cuendá quíhí<sup>n</sup>-güedé chindee ñàha-güedé. Te cue téé-á<sup>n</sup> ní sáhá<sup>n</sup>-güedé ní chindee tñàha-güedé ní dáchitù-güedé ndi ndúú bàrcú mee-ni chácá, te súní ní cuu vée núú cuíní-na-xi quée naa-güedé ndihí bàrcú ní cùu. <sup>8</sup> Te sá dúcá<sup>n</sup> cuíní-xi quée naa bàrcú ní cùu, núú té Xímú, àdi Pelú chi úú òu-dé, ní ngüíñí xítí-dé núú Jèsús, te xáha<sup>n</sup>-dè:

—Xocuñí yòhò Jèsús núú ndécú-í-a, chi yúhú cùú-í ì<sup>n</sup> téé ío ndècu cuéchi-xi —càchí-dé xáha<sup>n</sup>-dè xii-gá.

<sup>9</sup> Te duca<sup>n</sup> ní cáhá<sup>n</sup>-dé chi ní yùhú-dé, te ní cuñúhu-dé ndihí nchaa cue téé ndihí-dé-á<sup>n</sup> cuendá sá ïo vài chácá ní níhí-güedé. <sup>10</sup> Te tñàhá té Jàcobó ndihí té Juàá cue déhe té Zebèdeú ío ní cuñúhu-güedé, te diu-ni cue téé cündihí té Xímú-á<sup>n</sup> cúú-güedé tñàhá-güedé. Te Jèsús ní xáha<sup>n</sup>-gá xii té Xímú:

—Vá yùhú-n, chi není vitna quíhí<sup>n</sup>-n dàcahá<sup>n</sup>-n ñàyiú cuendá tuha ñàhá-yu xii-í —càchí-gá xáha<sup>n</sup>-gá xii-dé.

<sup>11</sup> Te ní quene-güedé ndihí bàrcú ndéé ñuhu yíchí yuhu làgúná-á<sup>n</sup>. Te òré-á<sup>n</sup> ní dándõ-güedé nchaandi túhú sá ndécú ndihí-güedé, te ní tuha-güedé Jèsús.

**Jèsús quidé tātna-gá ì<sup>n</sup> téé  
tñàhá cuéhé sá dátèhyú  
nihnu-xi yiqui cùñú-ó**

(Mt. 8:1-4; Mr. 1:40-45)

<sup>12</sup> Te òré ní quexìo Jesús ì<sup>n</sup> ñuú, te ní quexìo ì<sup>n</sup> téé cùhú tñàhá-dé cuéhé sá dátèhyú nihnu-xi yiqui cùñú-ó, te

òré ní xiní-dé Jèsús te ní sáhá<sup>n</sup>-dé núú ndécú-gá, te ní ngüíñí xítí-dé núú-gá te ní nuu núú-dé ndàa núú ñúhú te càhá<sup>n</sup> ndàhú-dé, te xáha<sup>n</sup>-dè xii-gá:

—Mèstrú, véxi-í càhá<sup>n</sup> ndàhú-í núú-n ñuu vá cündèe iní-n càda tátna ñàha-n xii-í, chi cùtnuní iní-í sá ndácú-n —càchí-dé xáha<sup>n</sup>-dè xii-gá.

<sup>13</sup> Te Jèsús ní dàcaá-gá ndaha-gá ní tendaha ñàha-gá xii-dé, te xáha<sup>n</sup>-gá:

—Cuu cada tátna ñàha-í xii-n, te vitna te ndúha-n —càchí-gá xáha<sup>n</sup>-gá xii-dé.

Te òré-ni ní xócuñí cuéhé tñàhá-dé.

<sup>14</sup> Te dàtnùni ní xáha<sup>n</sup> tucu Jesús xii-dé:

—Vá yòo ì<sup>n</sup> cùñàha-n sá ní quide tátna ñàha-í xii-n, núú dùtú-ni cuáhá<sup>n</sup> cuendá sá ná quíní ñàhá-dé xii-n sá ní ndúha-n te cuáha-n-dé sá ndúú tãhú Yã Ndiòxí dàtná ní cachí ndíi Moisés cuendá ná quíní ñàyiú sá ndàá ní ndúha-n —càchí-gá xáha<sup>n</sup>-gá xii-dé.

<sup>15</sup> Te duca<sup>n</sup> ta xíté nuu-gá tñúhu nchaa nàcuáa quide Jesús, te ío cuéhé ñàyiú ní xóo tacá nchaa núú ní xíndecu-gá cuendá sá cuíní-yu cundedóho-yu tñúhu càhá<sup>n</sup>-gá, ndihí cuendá sá cuíní-yu cada tátna ñàha-gá xii-yu. <sup>16</sup> Dico Jèsús ní xóo quee nihni-gá tnuú-yu ní xóo quíhí<sup>n</sup>-gá núú ñà túú ñàyiú ndècu ní xóo cáhá<sup>n</sup> ndihí-gá Yã Ndiòxí.

**Jèsús quidé tātna-gá ì<sup>n</sup> téé  
cùhú ñá cúú-gá candá nihnu**

(Mt. 9:1-8; Mr. 2:1-12)

<sup>17</sup> Te ì<sup>n</sup> nduu dànehé-gá ñàyiú, te xínucóo ì<sup>n</sup> úú cue téé cùu fariséú, ndihí cue téé dàcuaha ñàha xii ñàyiú nchaa tñúhu ní chídó tñuní ndíi Moisés. Te cue téé-á<sup>n</sup> ní quee-güedé nchaa ñuú yíndèhu distritú Galiléa, ndihí distritú Jùdeá, ndihí ñuú Jerusalén, te nchaa ñuú-á<sup>n</sup> ní quee-güedé cuáhá<sup>n</sup>-güedé núú ndécú-gá. Te Yá Ndiòxí chíndèe ñàha-gá quidé tātna-gá ñàyiú cùhú. <sup>18</sup> Te ì<sup>n</sup> úú cue téé nchido-güedé ì<sup>n</sup> téé cùhú ñá cúú-gá candá nihnu ñùhu-dé xító ní

quexìo ndìhi ñaha-güedé, te cuìní-güedé quíhu ndìhi ñaha-güedé ndéé xití vehe, sáa-güedé ndéé núú Jèsús ndìhi téé cùhú-á<sup>n</sup>. <sup>19</sup> Dico ñá túú ní ñíhí-güedé ndéé ichi quíhu-güedé, chi cuèndá ío cuéhé ñáyiú ndècu, núu xiá<sup>n</sup> ní sáa-güedé díquí véhé-á<sup>n</sup> ní caá<sup>n</sup>-güedé te ndàa díquí véhé-á<sup>n</sup> ní dáquèe-güedé téé cùhú-á<sup>n</sup>, te ñùhu-ni-dé xító ní dáquèe ñaha-güedé tnuú ñáyiú ní sáa ndéé núú Jèsús. <sup>20</sup> Te Jèsús ní cutnùnì iní-gá sá ñi yuhu ní iní-güedé sàndáá iní ñáhá-güedé xii-gá, núu ní xáha<sup>n</sup>-gá xii téé cùhú-á<sup>n</sup>:

—Yòhó téé cùhú, sa ní quide càhnu iní-í nchaa cuéchi-n —càchí-gá xáha<sup>n</sup>-gá xii-dé.

<sup>21</sup> Te cue téé dàcuaha ñaha xii-yu nchaa tñuhu ní chídó tñunì ndíi Moisés ndìhi cue téé cùu fariséú ní sani iní-güedé: “¿Ná cúú tée-a núu càhá<sup>n</sup> cuéhé-dé cuèndá Yá Ndiòxí-i? Te vá yòo ì<sup>n</sup> ndàcu cada cahnu iní nchaa yíca cuéchi ñáyiú, chi ì<sup>n</sup> dii díí-ni Yá Ndiòxí quidé càhnu iní-gá”, duha ní sani iní-güedé.

<sup>22</sup> Dico Jèsús sa ní cutnùnì iní-gá nàcuáa sàni iní-güedé núu ní xáha<sup>n</sup>-gá xii-güedé:

—¿Te ná cuèndá duca<sup>n</sup> sàni iní-ndó-í?

<sup>23</sup> Te sá dúhá ñí xáha<sup>n</sup>-í xii téé cùhú-a sá cáda càhnu iní-í nchaa yíca cuéchi-dé, te xiá<sup>n</sup> nchòhó ñá túú cùtnunì iní-ndó núu ndáá càhá<sup>n</sup>-í àdi ñá ndáá. Dico núu cúu-í-dé sá ndácòo-dé, te caca-dé te cutnùnì ndáá iní-ndó núu ndáá càhá<sup>n</sup>-í àdi ñá ndáá, chi cundehe núú-ndó nàcuáa cada-í. <sup>24</sup> Te vitna na càda-í nàcuáa cutnùnì iní-ndó nchàa-ndo sá yùhú Téé cùu ñaní tñáhá-ndó nchàa-ndo ndecu ndìhi-í tñuhu ndee ìní sá cáda càhnu iní-í nchaa cuéchi ñáyiú ñuyíú-a —càchí-gá xáha<sup>n</sup>-gá xii-güedé.

Te sáta dúcá<sup>n</sup> te ní xáha<sup>n</sup>-gá xii téé cùhú-á<sup>n</sup>:

—Ndacóo, te ndocani-n xító ñùhu-n véxi-á<sup>n</sup>, te núhú-n vèhe-n —cachí-gá xáha<sup>n</sup>-gá xii-dé.

<sup>25</sup> Te òré-ni-á<sup>n</sup> ñí ndúha téé cùhú-á<sup>n</sup> te ní ndacóo-dé, te ní ndocani-dé xító ñùhu-dé ní quexìo-á<sup>n</sup>, te ní natnii-dé ichi ta càhá<sup>n</sup>-dé cuánuhú sá ío càhnu cuu Yá Ndiòxí. <sup>26</sup> Te nchaa ñáyiú xíndecu-á<sup>n</sup> ní cuñùhu-yu, te tñáhá-yu ní cachí-yu sá ío càhnu cuu Yá Ndiòxí, te duca<sup>n</sup> ío ní yùhú-yu, te ní xítñáhá-yu:

—Vitna ní xiní-ó ì<sup>n</sup> sá ñà túú tñàhí xiní-ó ní cùu —cachí-yu xítñáhá-yu.

### Jèsús cáná-gá té Lèví

(Mt. 9:9-13; Mr. 2:13-17)

<sup>27</sup> Te sáta dúcá<sup>n</sup> ñí cuu te ní quee Jèsús xiá<sup>n</sup>, te ní xiní-gá ì<sup>n</sup> téé nàni Leví núcòo-dé ì<sup>n</sup> xichi quide cobrá-dé ñáyiú cuèndá impuèstú, chi cobràdór cúu-dé, te ní xáha<sup>n</sup>-gá xii-dé:

—Néhé chítñahá ñáhá-n xii-í —càchí-gá xáha<sup>n</sup>-gá xii-dé.

<sup>28</sup> Te té Lèví-á<sup>n</sup> ñí ndàcuñí-dé te ní dándòo-dé nchaa sá ndécú ndìhi-dé núu núcòo-dé-á<sup>n</sup>, te ní tuha-dé Jèsús.

<sup>29</sup> Te sáta dúcá<sup>n</sup> te té Lèví-á<sup>n</sup> ñí quide-dé ì<sup>n</sup> vico càhnu vehe-dé sá cúu-xí Jèsús, te ní tacá vai cue téé quide chiu<sup>n</sup> quide-dé, te nchaa-güedé cuànguihu-güedé mèsá ní ngóo-güedé ndìhi dava-gá ñáyiú ní quexìo cuèndá caxi-güedé ndìhí-yu. <sup>30</sup> Dico cue téé cùu fariséú ndìhi cue téé dàcuaha ñaha xii-yu nchaa tñuhu ní chídó tñunì ndíi Moisés ní ngúíta-güedé xicuèhé-güedé cue téé xica cuu ndìhi-gá, te xáha<sup>n</sup>-güedé:

—¿Ná cuèndá xéxi-ndó xìhi-ndo ndìhi cue téé cuihna iní-xi quide cobrá ñáhá xii ñáyiú cuèndá impuèstú, ndìhi nchaa dava-gá cue téé ndècu ichi cuéhé ichi duha-i? —càchí-güedé xáha<sup>n</sup>-güedé.

<sup>31</sup> Te Jèsús ní xáha<sup>n</sup>-gá xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhu ñahá-yu.



<sup>32</sup> Te yúhú véxi-í càhá<sup>n</sup>-í ñáyiu cùnnumí iní-xi sá ndécú cuèchi-xi cuèndá dàñá-yu nchaa sá cuèhé sá dúhá quidé-yu, te ñá túú véxi-í càhá<sup>n</sup>-í ñáyiu càchí sá ñà túú ndècu cuèchi-xi —càchí-gá xáha<sup>n</sup>-gá xii-güedé.

**Cue téé ndücu tnúhu núú Jèsús cuèndá ñáyiu ñá túú tnàhí ná xéxí áma càhá<sup>n</sup> ndihí-yu Yá Ndiöxí**

(Mt. 9:14-17; Mr. 2:18-22)

<sup>33</sup> Te ní xáha<sup>n</sup>-güedé xii Jèsús:

—Te áma ñá túú tnàhí ná xéxí cuè téé xica cuu ndihi té Juàá càhá<sup>n</sup> ndihi-güedé Yá Ndiöxí, te diu-ni duca<sup>n</sup> quide cue téé xica cuu ndihi nchúhú cue téé cùu fariséú. ¿Te ná cuèndá cue téé xica cuu ndihi-n ñá túú dù-ca<sup>n</sup> quide-güedé nñu nchaa-ni nduu xèxi-güedé xihí-güedé quidé-güedé-i? —cachí-güedé xáha<sup>n</sup>-güedé xii-gá.

<sup>34</sup> Te Jèsús ní xáha<sup>n</sup>-gá xii-güedé:

—Nchòhó xiní-ndó sá vǎ cúú cññaha-o xii cue ñáyiu ññuhu vico tnándaha sá vǎ cúú càxí-yu nini ndècu ndihi ñaha téé tnándaha-á<sup>n</sup> xii-yu. <sup>35</sup> Dico sáá nduu te vǎ cündècu ndihi ñaha-gá téé tnándaha-á<sup>n</sup> xii-yu, te dàvǎ-á<sup>n</sup> te cahni iní-yu vǎ càxí-yu sá ndihú iní-yu —cachí-gá xáha<sup>n</sup>-gá xii-güedé.

<sup>36</sup> Te ní caní-gá ì<sup>n</sup> cuèndú núú ñáyiu nàcuáa tecú tnùní-yu tnúhu-gá, te xáha<sup>n</sup>-gǎ:

—Vǎ yǒo ì<sup>n</sup> dàndéé luha dóó sáá ì<sup>n</sup> dóó sa ní cuu tühú víhí, chi núu yoo duca<sup>n</sup> na càda, te dóó sáá-á<sup>n</sup> nàndiyi-xi te uu<sup>n</sup>-gá ndata-xi dóó sǎ ní cuu tühú-á<sup>n</sup>, te luha dóó sáá-á<sup>n</sup> ñà túú nàtaú-xi ndéé dóó sǎ ní cuu tühú-á<sup>n</sup>. <sup>37</sup> Te nì vǎ yǒo ì<sup>n</sup> chihí ndidí sáá xití ì<sup>n</sup> lamba sa ní cuu tühú víhí, chi núu yoo duca<sup>n</sup> na càda, te ndava lamba sa ní cuu tühú-á<sup>n</sup> chi ío níhi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup>. <sup>38</sup> Núu xíá<sup>n</sup> xíní ññuhu-xi quée ndidí sáá-á<sup>n</sup> xití ì<sup>n</sup>

lamba saa cuèndá duca<sup>n</sup> ñà túú nǎ cuu cováha-xi. <sup>39</sup> Te nì ì<sup>n</sup> ñáyiu ñá túú tnàhí iní-yu cohó-yu ndidí sáá, te núu díhna-gá ná cohó-yu ndidí sá ní quene díhna-gá, chi càchí-yu sá xihí vǎha-gá ndidí sá ní quene díhna-gá-á<sup>n</sup> dàcúúxí ndidí sáá —càchí-gá xáha<sup>n</sup>-gá xii-yu.

**Cue téé xica cuu ndihi Jesús sàhnú-güedé yoco trüü nduu ndètátú ñáyiu**

(Mt. 12:1-8; Mr. 2:23-28)

**6** Te ì<sup>n</sup> nduu cùu-xi nduu ndetátú ñáyiu ññuhu Jesús ichi ndihi cue téé xica cuu ndihi-gá, te ta yǎha-gá ndihi-güedé ì<sup>n</sup> xichi núú cáá trüü, te ní ngüíta-güedé sàhnú-güedé yoco trüü-á<sup>n</sup> te ndihi ndaha-güedé quíí<sup>n</sup>-güedé quée trüü tá xèxi-güedé cuáhá<sup>n</sup>. <sup>2</sup> Te ì<sup>n</sup> úú cue téé cùu fariséú ní xáha<sup>n</sup>-güedé xii cue téé xica cuu ndihi-gá:

—¿Te ná cuèndá duca<sup>n</sup> quide nchohó ì<sup>n</sup> sá ñà túú tàú-ó càda-o vitna cuu-xi nduu ndetátú-ó-í? —cachí-güedé xáha<sup>n</sup>-güedé.

<sup>3</sup> Te Jèsús ní xáha<sup>n</sup>-gá xii-güedé:

—¿Te náa ñá túú dàcuaha-ndo núú tütú Yá Ndiöxí núú càhá<sup>n</sup>-xi nàcuáa ní quide ndí Dàvíí cúnàhá ní xihí ndí docó ndihi cue téé ní xica cuu ndihi ndí-á<sup>n</sup>? <sup>4</sup> Chi ní quíhu ndí vehe Yá Ndiöxí, te ní quehe<sup>n</sup> ndí pǎá ní cuu íí ndécú-á<sup>n</sup> ní dàcǎhñu ndí cue téé xica cuu ndihi ndí ní xexi ndí ndihi-güedé, te ñá túú tàú ndí sá dúcǎ<sup>n</sup> càda ndí ni cùu, chi mee-ni cuè dútú tàú-güedé caxi-güedé pǎá-á<sup>n</sup> ní cùu —cachí-gá xáha<sup>n</sup>-gá xii-güedé.

<sup>5</sup> Te ní xáha<sup>n</sup> tucu-gá:

—Te yúhú Téé cùu ñaní tnàhá-ndó nchàa-ndo, tnàhá-í ndécú ndihi-í tnúhu ndee ìní sá cùu-í nchaa ñáyiu nàcuáa cadá-yu nduu ndètátú-ó-á —cachí-gá xáha<sup>n</sup>-gá xii-güedé.

**Ī<sup>n</sup> tée ní yíchí ĩ<sup>n</sup> xio ndaha-xi***(Mt. 12:9-14; Mr. 3:1-6)*

<sup>6</sup>Te ingá nduu ðiu-ni nduu ndè-tatú ñáyiú cuánguĭhu Jèsús xití veñúhu ðanehé-gá ñáyiú. Te xíá<sup>n</sup> ndécú ĩ<sup>n</sup> tée cùhú ní yíchí nihnu ĩ<sup>n</sup> xio ndaha cùha-dé. <sup>7</sup>Te cue tée ðacuaha ñaha xii ñáyiú nchaa tnúhu ní chídó tnùnĭ ndíi Moisés, ndihi cue tée cùu fariséú ndéhé-güedé nùu cada tátna ñaha Jèsús xii tée cùhú-á<sup>n</sup> nduu ndètátú-güedé-á<sup>n</sup> cuendá níhí-güedé nàcuáa cada-güedé cacá<sup>n</sup> cuéchi-güedé cuendá-gá. <sup>8</sup>Dico Jèsús sa ní cutnùnĭ iní-gá nàcuáa sàni iní-güedé, te ní xáha<sup>n</sup>-gá xii tée cùhú ndaha-xi-á<sup>n</sup>:

—Ndacuñí te ngúnutnĭ-n caðdava tnuú-ndí-a —càchí-gá xáha<sup>n</sup>-gá xii-dé.

Te tée-á<sup>n</sup> nĭ ndacuñí-dé te ní ngúnutnĭ-dé cuádava tnuú-güedé ndihi-gá. <sup>9</sup>Te ðàtnùnĭ Jèsús ní xicá<sup>n</sup> tnúhú-gá núu cuè ñáyiú xĭndecu-á<sup>n</sup>, te xáha<sup>n</sup>-gá xii-yu:

—Cuiní-í cachí tnúhu-ndo nă cúú să văha cada-o ndùu ndetatú-ó. ¿Ī<sup>n</sup> chiú<sup>n</sup> váha àdi ĩ<sup>n</sup> chiú<sup>n</sup> cuehé, sá cádá tátna-o ñáyiú cùhú àdi sá cáhni-ó-yu? —càchí-gá xáha<sup>n</sup>-gá xii-yu.

<sup>10</sup>Te ðàtnùnĭ ní ndacoto-gá núú-yu nchaá-yu, te ní xáha<sup>n</sup>-gá xii tée cùhú ndaha-xi-á<sup>n</sup>:

—Ndocani ndaha-n —càchí-gá xáha<sup>n</sup>-gá xii-dé.

Te ní ndocani-dé ndaha-dé, te òré-ni ní ndúha. <sup>11</sup>Te cue tée xĭndecu-á<sup>n</sup> sũúnĭ nĭ cudéé<sup>n</sup>-güedé sá dúcá<sup>n</sup> nĭ quide tátna Jèsús tée cùhú-á<sup>n</sup>, te ní ngũíta-güedé ndátnúhu-güedé nùu nása cada ñaha-güedé xii-gá.

**Jèsús cǎxi-gá úxúú tnàhá cue tée dacuàha ñaha xii ñáyiú tnúhu-gá***(Mt. 10:1-4; Mr. 3:13-19)*

<sup>12</sup>Te sátá dúcá<sup>n</sup> nĭ cuu te ní xica Jèsús cuáhá<sup>n</sup>-gá xití yucu cuendá yàcá<sup>n</sup> cáhá<sup>n</sup>

ndihi-gá Tátá-gă Dútú Ndiöxí, te ni niú ní cáhá<sup>n</sup> ndihi ñaha-gă. <sup>13</sup>Te sátá nĭ tún-daá, te ní cana-gá nchaa cue tée xica cuu ndihi-gá, te ní cǎxi-gá úxúú tnàhá-güedé, te cue tée-á<sup>n</sup> nĭ xáha<sup>n</sup>-gá sá dífú-güedé cuu-güedé cue tée quĭhí<sup>n</sup> cáhá<sup>n</sup> tnúhu-gá núu ñáyiú. <sup>14</sup>Te duha xĭnani ndi úxúú cue tée-á<sup>n</sup>. Té Xímú, àdi Pelú chi úú ðiu-dé, ndihi ñani-dé té Ndrĭxí, ndihi té Jàcobó, ndihi té Juáá, ndihi té Lipé, ndihi té Bartolòmé, <sup>15</sup>ndihi té Mäteú, ndihi té Mǎxí, ndihi té Jàcobó déhe té Àlfeú, ndihi ingá té Xímú tée ní cundihi cue tée canànistá, <sup>16</sup>ndihi té Jüdás ñani té Jàcobó, ndihi té Jüdás Iscàrioté tée ní sáá nduu nĭ sáha cuendá ñáhá xii Jesús núu cuè tée cùu úhú iní ñáhá xii-gá, duha xĭnani cuè tée ní cǎxi Jèsús ní xica cuu ndihi-gá.

**Jèsús dánèhé-gá cuéhé víhí ñáyiú***(Mt. 4:23-25)*

<sup>17</sup>Te Jèsús cuánuu-gá yucu núú nĭ sáá-gá-á<sup>n</sup>, te ní ngava-gá ĩ<sup>n</sup> núú ndáá ndihi cue tée xica cuu ndihi-gá, te xíá<sup>n</sup> nĭ ngúnutnĭ-gá. Te xíá<sup>n</sup> ndécú ðava-gá cue tée xica cuu ndihi-gá ndihi vâi ñáyiú ndètu ñahá-yu xii-gá, te ñáyiú-á<sup>n</sup> vèxi-yu nchaa ñuú cáá ðistrítú Jùdeá, ndihi ñuú Jerusálén, te ndècu ñáyiú vèxi ndaa yuhu lamár yatni ñuú Tírú, ndihi ñuú Sidón. Te nchaa ñáyiú-á<sup>n</sup> nĭ quexió-yu cuiní-yu cundedóho-yu nchaa tnúhu cáhá<sup>n</sup> Jèsús, ndihi cuendá sá cuiní-yu ndúha-yu nchaa cuéhé tnàhá-yu. <sup>18</sup>Te tnàhá ñáyiú yĭhi ñaha espíritú cundĭhi yucu ñávaha. <sup>19</sup>Te nchaá-yu cuiní-yu dacáá-yu ndahá-yu tendàhá-yu Jèsús ní cùu cuendá sá nĭ níhĭ-yu tnúhu sá ndècu ndihi-gá tnúhu ndee iní quídé tátna-gá nchaa ñáyiú cùhú.

**Cuendá ñáyiú ío váha táhú-xi***(Mt. 5:1-12)*

<sup>20</sup>Te Jèsús ní ndacoto-gá núu cuè tée xica cuu ndihi-gá, te ní xáha<sup>n</sup>-gá:

—Váha táhú nchaa nchòhó cue ñáyi ndàhú, chi nduu táhú-ndó cùndecu-ndo núu táxi tnùní Yá Ndiòxí.

<sup>21</sup> Váha táhú nchaa nchòhó ñáyi ío cuiní cundedóho tnúhu Yá Ndiòxí chi ío víi ío váha cuu iní-ndó.

Váha táhú nchaa nchòhó ñáyi ndàhyú sá ndìhi iní-ndó, chi sáá nduu te cudíí iní-ndó nì caa nì quíhí<sup>n</sup>.

<sup>22</sup> Váha táhú nchaa nchòhó ñáyi na cùu úhú iní ñáhá tnàha ñáyi-xi, chi sáá nduu te vá dāñá-gǎ-yu quíhu-ndo venúhu, te cúcuèhé ñáhá-yu xii-ndo, te cachí-yu sá ñà dífú ñáyi váha cùu-ndo, te duca<sup>n</sup> càda ñahá-yu xii-ndo sǎ cuendá yúhú Tée cùu ñaní tnáhá-ndó nchàa-ndo. <sup>23</sup> Te òré duca<sup>n</sup> na càda ñahá-yu xii-ndo te cudíí víhí-ní iní-ndó cùndecu-ndo, chi sáá nduu ndùu táhú-ndó sǎ ío váha càa ndecu andiú cundecu ndìhi-ndo nduu na nasaá-ndó yacá<sup>n</sup> cundecu-ndo, chi diu-ni duca<sup>n</sup> nǐ xóo cada ñaha cuè ñaní tnáhá-yu xii cue téé ní xóo cáhǎ<sup>n</sup> tnúhu Yá Ndiòxí ní xíndecu ndéé sanaha.

<sup>24</sup> Te ndàhú ní cuu nchaa ñáyi cuica ñà túú sàndáá iní ñáhá xii Yá Ndiòxí, chi vitna ío váha ndècú-yu, dico sáá nduu te nduu ndàhú-yu.

<sup>25</sup> Te ndàhú ní cuu tucu nchaa ñáyi ñá túú tnàhí ná cúmānǐ xii-xi vitna, chi sáá nduu quíní-yu tnúndòho tnúhu ndàhú.

Te ndàhú ní cuu nchaa ñáyi cùdíí iní-xi ndècu ichi cuehé ichi duha vitna, chi sáá nduu te ndàhyú-yu sá ndìhi iní-yu.

<sup>26</sup> Te ndàhú ní cuu nchaa ñáyi na càhǎ<sup>n</sup> váha dava-gǎ ñáyi cuendá-xi, chi duca<sup>n</sup> nǐ xóo cáhǎ<sup>n</sup> váha-yu cuendá nchaa cue téé ní xóo dandàhú ñáhá xii ñáyi ndéé sanaha, chi ní cachí-güedé sǎ càhǎ<sup>n</sup>-güedé tnúhu Yá Ndiòxí te ñá ndǎá —càhǎ-gǎ xǎha<sup>n</sup>-gǎ xii-güedé.

### Cuu iní-ó nchàa ñáyi cùu úhú iní ñáhá xii-o

(Mt. 5:38-48; 7:12)

<sup>27</sup> Te Jèsús ní xáha<sup>n</sup>-gǎ xii nchaa ñáyi xíndecu-á<sup>n</sup>:

—Nchaa nchòhó ñáyi xíndedóho ñaha càhǎ tnúhu-í xii-ndo sǎ cúú iní-ndó ñáyi cùu úhú iní ñáhá xii-ndo, te cada-ndo sǎ váha sǎ cúú-xí-yu cuèi nándi sǎ ná cáda ñahá-yu xii-ndo. <sup>28</sup> Te cacá<sup>n</sup> táhú-ndó núu Yá Ndiòxí cuendá ñáyi càhǎ<sup>n</sup> úhú ñáhá xii-ndo, ndìhi cuendá ñáyi tèe ñaha cuéchi neñúú xii-ndo. <sup>29</sup> Te núu ní canihá-yu xii-ndo ì<sup>n</sup> xito te cuiní tucú-yu canihá-yu, te dañà-ndo na cànihá-yu, àdi núu na quèndéé-yu dóó ndíxí ndòdo-ndo, ndìhi dúhnú-ndó, te dañà-ndo na cànehé-yu quíhí<sup>n</sup>. <sup>30</sup> Te núu xicá<sup>n</sup>-yu ì<sup>n</sup> sǎ nándìhi-yu núu-ndó te cuañaha-ndo, àdi quèndéé-yu ì<sup>n</sup> ndachìu<sup>n</sup>-ndo, te vǎ nándàcá<sup>n</sup>-ndó nǔú-yu. <sup>31</sup> Te nchaa sǎ váha cuiní-ndó càda tnaha ñáyi-ndo, te cada-ndo tnàhǎ-ndó ndìhi-yu.

<sup>32</sup> Chi núu nchòhó ná cùu iní-ndó mèe-ni ñáyi cùu iní ñáhá xii-ndo, te vǎ càhǎ-ndó sǎ ío váha quide-ndo, chi tnàhǎ nchaa ñáyi ndècu ichi cuehé ichi duha duca<sup>n</sup> xíquidé-yu. <sup>33</sup> Àdi mee-ni ñáyi quide ñaha sǎ váha xii-ndo quide váha-ndò-yu, te vǎ càhǎ-ndó sǎ ío váha quide-ndo, chi tnàhǎ nchaa ñáyi ndècu ichi cuehé ichi duha duca<sup>n</sup> xíquidé-yu. <sup>34</sup> Àdi mee-ni ñáyi sàni iní-ndó nà-coto ñaha xii-ndo cuañaha-ndo ì<sup>n</sup> sǎ xicá<sup>n</sup>-yu núu-ndó, te vǎ cání iní-ndó sǎ ío quide váha-ndo, chi tnàhǎ ñáyi ndècu ichi cuehé ichi duha dàsa<sup>n</sup> nuu-yu ì<sup>n</sup> sǎ néhé váha-yu, te ndètu cahnu-ná-yu nacoto ñaha ñáyi ní sáha nùu-yu-á<sup>n</sup>. <sup>35</sup> Dico nchòhó xíní ñùhu-xi cuu iní-ndó ñáyi cùu úhú iní ñáhá xii-ndo, te cada-ndo sǎ váha sǎ cúú-xí-yu, te cuañaha nùu-ndo ì<sup>n</sup> sǎ ná ndìhi-yu te núu xicá<sup>n</sup>-yu núu-ndó, te vǎ cúndètu-ndo

nacoto ñahá-yu xii-ndo. Te duca<sup>n</sup> te ío-gá cuéhé ñihí-ndó cùndecu ndihí-ndo, te cuu ndisa-ndo dèhe Dútú Ndiöxí, chí ío càhnu iní-gá sá cúu-xí nchàa ñáiyu ñá túú ndacá<sup>n</sup> táhú núú-gã cuendá nchaa sá vâha quide-gá, ndihí sá cúu-xí nchàa ñáiyu ndècu ichi cuehé ichi duha. <sup>36</sup> Te cunduu càhnu iní nchòhó tucu dàtná càhnu iní Tãtã-ó Dütú Ndiöxí.

**Vá càhá<sup>n</sup> cuéhé-ó  
cuendá tnàha ñáiyu-o**

(Mt. 7:1-5)

<sup>37</sup> Te vá càhá<sup>n</sup> cuéhé-ndó cuendá sá quidé tnàha ñáiyu-ndo, te duca<sup>n</sup> te Yá Ndiöxí ñá túú nà tnúhu cúñaha-gã xii-ndo. Te vá cúñaha-ndo xì ñáiyu sá quihí<sup>n</sup>-yu ì<sup>n</sup> xichi núú ùhú núú ndàhú ndohó-yu cuendá nchaa sá ñá túú vâha quidé-yu, te duca<sup>n</sup> te Yá Ndiöxí vá cúñaha-gã xii-ndo sá tnàhá-ndó quihí<sup>n</sup>-ndó ì<sup>n</sup> xichi núú ùhú núú ndàhú ndoho-ndo. Te chí cadá càhnu iní nchaa sá quidé-yu, te duca<sup>n</sup> te Yá Ndiöxí cada càhnu iní ñáhá-gã xii-ndo tucu. <sup>38</sup> Te chí cuñaha xì ñáiyu núu ná cúu sá xíní ñùhú-yu, te dàtná chitu ì<sup>n</sup> yicá súúní xidó coyo-ná, duca<sup>n</sup> tàxi Yá Ndiöxí xii-ndo. Te nánicuáa na càda-ndo cada vâha-ndo sá cúu-xí tnàha ñáiyu-ndo, te ñiu-ni duca<sup>n</sup> càda ñaha Yá Ndiöxí xii-ndo —càhí Jèsús xãha<sup>n</sup>-gã xí-yu.

<sup>39</sup> Te dàtnùní ní caní-gá ì<sup>n</sup> cuèndú núú-yu nàcuáa tecú tnùní-yu tnúhu-gá, te xãha<sup>n</sup>-gã:

—H<sup>n</sup> tée cuáa chí ñá ndácú-dë cuita nehe-dé ingá tée cuáa, chí núu duca<sup>n</sup> na càda-güedé te ndi ndúu-güedé ngaunihnu-güedé déhvã. <sup>40</sup> Te ni ì<sup>n</sup> landú yíhí scuèlà ñá túú cùnuu-gã-güexi dàcúxí mèstrú-güexi, te ndéé núu na cútúha vâha-güexi, te dàtnùní nútahá-güexi tée dânehé ñáhá xìi-güexi.

<sup>41</sup> Te na càhí tnúhu-í xii-ndo sã nchàa cuéchi quide ñáiyu cùu-xi datná ì<sup>n</sup> mihi líhli. ¿Te ná cuendá ndéhé-ndó ì<sup>n</sup> sá ñá túú vâha quide tnaha ñáiyu-ndo, te mee-ndo vîhi-gá quidé-ndó-í? Te sá dúcã<sup>n</sup> quide-ndo te cada iní-ndó sã ndéhé-ndó dàtná ì<sup>n</sup> mihi líhli ñùhu núú tnàha ñáiyu-ndo, te mee-ndo ñùhu ì<sup>n</sup> mihi cahnu-gã núú-ndó. <sup>42</sup> Te núu na nàcanu ichi-ndo tnaha ñáiyu-ndo cuendá sá ñá túú quide váha-yu ndècú-yu te mee-ndo vîhi-gá quidé-ndó ñá, te cada iní-ndó sã xãha<sup>n</sup>-ndo xì-yu sá nátava-ndo mihi líhli ñùhu núú-yu, te mihi càhnu ñùhu núú mée-ndó ñá túú quide cuendá-ndó. ¿Te sá dúcã<sup>n</sup> quide-ndo te ío dândahú-ndó mèe-ndo sá quidé ndãá-ndó te ñá ndàa sá quidé ndãá-ndó! Te xìni ñuhu-xi díhna-gã daña-ndo nchàa sá ñá túú vâha quide-ndo, te dàtnùní duca<sup>n</sup> te cutnùní váha iní-ndó nàcuáa nàcanu ichi-ndo tnàha ñáiyu-ndo.

**Ndi díí<sup>n</sup> núú yutnu xíní-ó nã yutnu  
cùu-xi cuendá sá sãvidí-xi**

(Mt. 7:17-20; 12:34-35)

<sup>43</sup> Te ñá túú nì ì<sup>n</sup> yutnu váha te quiní-ó cùu<sup>n</sup> sãvidí sá ñá túú vâha, te ni ì<sup>n</sup> yutnu sá ñá túú vâha, te quiní-ó cùu<sup>n</sup> sãvidí váha, chí mee-ni sãvidí sá ñá túú vâha cùu<sup>n</sup>. <sup>44</sup> Te ndi díí<sup>n</sup> núú yutnu xíní-ó nã yutnu cùu-xi cuendá sá sãvidí-xi, chí ñá túú xíní-ó cùu<sup>n</sup> ngúxí ì<sup>n</sup> tnu ñnu, te ni ñá túú xíní-ó cùu<sup>n</sup> ndéhé yoho yàha stilé díquí ì<sup>n</sup> yoho yàha cutexínu. <sup>45</sup> Te nchaa ñáiyu váha iní-xi càhá<sup>n</sup>-yu tnúhu váha, chí ñiu-ni tnúhu váha tnàhí-á<sup>n</sup> ñúhú ñni-yu, te nchaa ñáiyu ñá túú vâha iní-xi càhá<sup>n</sup> cuéhé-yu, chí ñiu-ni tnúhu cuéhé tnàhí-á<sup>n</sup> ñúhú ñni-yu, chí nchaa sá ñúhú ñni-yu te xíã<sup>n</sup> càhá<sup>n</sup>-yu.

**Ī<sup>n</sup> vehe ndècu cimientú-xi ndihi  
ĭ<sup>n</sup> vehe ñá túú cìmientú-xi**

(Mt. 7:24-27)

46<sup>7</sup> Te ná cuendá càchí-ndó sǎ yǔhú cùu-í Yaa cùú Xìtohó-ndó te ñá túú quide-ndo nchaa nacuaa càhá<sup>n</sup>-í-í? 47 Te na càchí tnúhu-í xii-ndo cuendá ñáyiú tǔha ñaha xii-í, chi ñáyiú-á<sup>n</sup> sácúndedóho-yu nchaa tnúhu càhá<sup>n</sup>-í te tnǐ-yu. 48 Te ñáyiú-á<sup>n</sup> cùú-yu dàtná ĩ<sup>n</sup> tée ní dácáá ĩ<sup>n</sup> vehe, chi tée-á<sup>n</sup> dǐhna-gá ní xete-dé ndéé ní tnahá-dé yúú cáxí<sup>n</sup> te dàtnùní ní tava-dé cimientú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vehe-á<sup>n</sup>, dico ñá túú ní ndàcu-xi cuido-xi, te duca<sup>n</sup> chi tée ní dácáá vehe-á<sup>n</sup> ñí tava-dé cimientú-xi núú yúú cáxí<sup>n</sup>. Duha sǎtnahá-xi cùu nchaa ñáyiú sácúndedóho tnúhu càhá<sup>n</sup>-í te tnǐ-yu. 49 Te ñáyiú sácúndedóho tnúhu càhá<sup>n</sup>-í te ñá túú tnǐ-yu, ñáyiú-á<sup>n</sup> cùú-yu dàtná ĩ<sup>n</sup> tée ní dácáá ĩ<sup>n</sup> vehe, te ñá túú ní tava-dé cimientú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vehe-á<sup>n</sup>, te íí-ni ní xido-xi vehe-á<sup>n</sup> cuendá sá ñà túú ní quène cimientú-xi. Duha sǎtnahá-xi cùu nchaa ñáyiú sácúndedóho tnúhu-í te ñá túú cuìní-yu tnǐ-yu —càchí-gá xǎha<sup>n</sup>-gǎ xíí-yu.

**Jèsús quidé tǎtna-gá ĩ<sup>n</sup> tée xǐnu  
cuechi núú ĩ<sup>n</sup> tée cùu capitá<sup>n</sup>**

(Mt. 8:5-13)

**7** Te sǎtá ñí yáha ní cáhá<sup>n</sup> Jèsús ndihi ñáyiú, te cuáhá<sup>n</sup>-gá ñuú Capèrnaúm. 2 Te yàcá<sup>n</sup> ndécú ĩ<sup>n</sup> tée cùu capitá<sup>n</sup>, te cùhú ĩ<sup>n</sup> tée xǐnu cuechi núú-dě tée ío-gá cùú iní-dé, te sa ndècu-ná-dé sá cùú-dé. 3 Te òré ní níhí tée cùu capitá<sup>n</sup>-á<sup>n</sup> tnǔhu cuendá Jèsús, te ní tendaha-dě ĩ<sup>n</sup> úú cue tée cùu sacuéhé núú ñáyiú isràél cuáhá<sup>n</sup>-güedé cáhá<sup>n</sup> ndàhú-güedé núú-gǎ ñuú vá cúndèe iní-gá quǐhí<sup>n</sup>-gá cada tǎtna-gá tée xǐnu cuechi núú-dě-á<sup>n</sup>.

4 Te ní quexìo-güedé núú ndécú Jèsús, te ní nguíta-güedé càhá<sup>n</sup> ndàhú víhí-güedé núú-gǎ, te xǎha<sup>n</sup>-güedé:

—Tée cùu capitá<sup>n</sup> ní cachí-dé véxi-ndí ñuú vá cúndèe iní-n quǐhí<sup>n</sup>-n cada tǎtna-n ĩ<sup>n</sup> tée xǐnu cuechi núú-dě chi cùhú-dé, te tǎú ndisa-n càda-n nacuaa càhá<sup>n</sup> capitá<sup>n</sup>-á<sup>n</sup>, 5 chi tée-á<sup>n</sup> ío cùu iní ñáhá-dě xii nchaa nchúhú ñáyiú isràél te diu-dé ní táúchíú<sup>n</sup>-dě ní sáá veñúhu-ndí —càchí-güedé xǎha<sup>n</sup>-güedé xii-gá.

6 Te sǎtá dúcá<sup>n</sup> te Jèsús ní xica-gá cuáhá<sup>n</sup>-gá ndihi-güedé, te òré tá cùyatni-gá vehe núú ndécú tée cùhú-á<sup>n</sup> cuáhá<sup>n</sup>, te tée cùu capitá<sup>n</sup>-á<sup>n</sup> ñí xǎha<sup>n</sup>-dě xii ĩ<sup>n</sup> úú cue tée càhá<sup>n</sup> ndihi-dé:

—Quǐhí<sup>n</sup>-ndó cǔñaha-ndo xii Yaa cùú Mèstrú sá càchí-í sá ñà túú ñá cani iní-gá, chi ñá túú tǎu-í sá quǐhu-gá ndéé xití vehe-í, 7 chi ñí sá cùnú ndúcú mèe-í-gá ñá túú ní cùyíí-í. Núú xǐá<sup>n</sup> cǔñaha-ndo xii-gá sá ná càhá<sup>n</sup>-ni-gá sá ndúha tée xǐnu cuechi núú-í-a te ndúha-dé. 8 Chi yúhú ndécú cuè tée tàxi tnuní ñáhá xii-í, te duca<sup>n</sup> yǔhú tucu ndècu cue sandadú táxí tnùn-í. Te òré xǎha<sup>n</sup>-í xii ĩ<sup>n</sup>-dé quǐhí<sup>n</sup>-dé ĩ<sup>n</sup> chiú<sup>n</sup> te cuáhá<sup>n</sup>-dé, te òré xǎha<sup>n</sup>-í xii íngá-dé quixi-dé te véxi-dé, te òré xǎha<sup>n</sup>-í xii tée xǐnu cuechi núú-í cada-dé ĩ<sup>n</sup> chiú<sup>n</sup> te quide-dé. Duha càchí-í cǔñaha-ndo xii-gá —càchí-dé xǎha<sup>n</sup>-dě xii cue tée càhá<sup>n</sup> ndihi-dé-á<sup>n</sup>.

9 Te sǎtá dúcá<sup>n</sup> ñí xǎha<sup>n</sup>-güedé xii Jèsús, te ní cuñúhu-gá nchaa tnúhu ní cáhá<sup>n</sup> tée cùu capitá<sup>n</sup>-á<sup>n</sup>, te ní nchócótó-gǎ núú nchàa ñáyiú nchícú<sup>n</sup> ñáhá xii-gá cuáhá<sup>n</sup>, te ní xǎha<sup>n</sup>-gǎ:

—Na càchí tnúhu ndáá-í xii-ndo sǎ vǎtá quíni-gá-í ni ĩ<sup>n</sup> ñáyiú isràél, ñáyiú ío váha sandáá iní-xi Yá Ndióxí dàtná sandáá iní ñáhá tée-á<sup>n</sup> xii-gá —càchí-gá xǎha<sup>n</sup>-gǎ xii-yu.

10 Te òré ní ndexìo cue tée nèhe tnúhu-á<sup>n</sup> ñí sáhá<sup>n</sup> núú Jèsús, te sa ní ndúha tée cùhú-á<sup>n</sup>.

### Jèsús dándòto-gá déhe ì<sup>n</sup> ñaha quèé

<sup>11</sup> Te sáta dúcá<sup>n</sup> ñí cuu te ní xica Jèsús cuáhá<sup>n</sup>-gá ì<sup>n</sup> ñuú nání Nàín, ndihì cue téé xica cuu ndihì-gá, ndihì vai ñáyiú.

<sup>12</sup> Te òré ní sáá-gá yuhu ñùú-á<sup>n</sup>, te ní xiní-gá nchídó-güedë ì<sup>n</sup> ndíyi cuáhá<sup>n</sup> chindúxi ñaha-güedë, te ndíyi-á<sup>n</sup> cúú déhe ì<sup>n</sup> ñaha quèé, te ì<sup>n</sup> ñà duca<sup>n</sup>-ni déhe-a<sup>n</sup> ndècu ní cuu te ní xíhí-dé. Te ío cuéhé ñáyiú cuáhá<sup>n</sup> chindúxi ñaha. <sup>13</sup> Te òré ní xiní ñáhá Jèsús xii-a<sup>n</sup> ndàhyú-a<sup>n</sup> te ní cundàhú iní ñáhá-gá, te ní xáha<sup>n</sup>-gá:

—Vá ndàhyú-n —càchí-gá xáha<sup>n</sup>-gá xii-a<sup>n</sup>.

<sup>14</sup> Te ní dáyátní-gá cajú ñúhú ndíyi-á<sup>n</sup> te ní dácàá-gá ndaha-gá te ní tendaha-gá cajú-á<sup>n</sup>, te ní ngüíñí cue téé nchìdo ñaha-á<sup>n</sup>. Te ní xáha<sup>n</sup>-gá xii ndíyi-á<sup>n</sup>:

—Tée cuechi, yúhú càchí-í sá ndácòo-n —càchí-gá xáha<sup>n</sup>-gá xii ndíyi-á<sup>n</sup>.

<sup>15</sup> Te téé ní xíhí-á<sup>n</sup> ñí nucúnucóo-dé te ní ngüíta-dé càhá<sup>n</sup>-dé, te Jèsús ní nacuáha cuèndá ñáhá-gá xii-dé ndaha náná-dë. <sup>16</sup> Te sá dúcá<sup>n</sup> ñí quide Jèsús ní xiní-yu te ío ní yùhú-yu, te ní xítñàhá-yu:

—Ío càhnu cuu Yá Ndiòxí chi ì<sup>n</sup> téé càhá<sup>n</sup> tnúhu-gá ní quexio núú ndécú-ó —càchí-yu xítñàhá-yu.

Te ní xítñàha tucú-yu:

—Yá Ndiòxí véxi-gá chindee ñaha-gá xii nchaa nchoo ñáyiú cùu cuèndá-gá —càchí-yu xítñàhá-yu.

<sup>17</sup> Te nchaa ñuú distritú Jùdeá, ndihì dava-gá ñuú ní ñhí-yu tnúhu nàcuáa ní quide Jèsús.

### Cue téé ní tendaha té Juàá cuáhá<sup>n</sup> núú ndécú Jèsús

(Mt. 11:2-19)

<sup>18</sup> Te cue téé xica cuu ndihì té Juàá ní xáha<sup>n</sup>-güedë xii-dé nchaa sá ñí quide-gá, núu ní cana-dé úú tnàhá-güedë

<sup>19</sup> cuèndá cúnaha-dë quíhí<sup>n</sup>-güedë nducu tnúhu-güedë núú Jèsús, te núu sá

díú-gá cúú-gá Cristú Yaá ní tendaha Yá Ndiòxí véxi ñuyíú-a àdi sá cùndètu nahi-ni-güedé mei Yàá-á<sup>n</sup>. <sup>20</sup> Te òré ní quexio cue téé ní tendaha tã Juàá núú ndécú Jèsús, te xáha<sup>n</sup>-güedë xii-gá:

—Té Juàá téé dàcuandute ñaha xii ñáyiú ní tendaha ñaha-dé xii-ndí véxi-ndí cécá<sup>n</sup> tnúhú-ndí núú-n, núu sá díú-n cùu Cristú Yaá quixi ñuyíú-a, àdi sá cùndètu-ndí mei Cristú càchí-dé —càchí-güedé xáha<sup>n</sup>-güedë xii-gá.

<sup>21</sup> Te mei òré ní quexio-güedé-á<sup>n</sup> ñí quide tátna Jèsús vai ñáyiú cùhú, te davá-yu càhú víhí tnàhá-yu, te ndí díí<sup>n</sup> ndí díí<sup>n</sup> núú cuéhé tnàhá-yu ì<sup>n</sup> ì<sup>n</sup>-yu, te cue ñáyiú yìhi ñaha espíritú cùndèhi yucu ñávàha ní queñuhu-gá espíritú-á<sup>n</sup> yiquí cùñú-yu, te ío vai ñáyiú cuàá ní nacaá<sup>n</sup>-gá núú-yu. <sup>22</sup> Te Jèsús ní xáha<sup>n</sup>-gá xii-güedé:

—Chí cuánùhú te cani-ndo cuèndú núú tã Juàá nchaa sá ñí xiní-ndó quide-í, ndihì nchaa nàcuáa ndùu tnúhu ní càhá<sup>n</sup>-í ní xíndedóho-ndo. Te cúnaha-ndo xii-dé sá quidé tátna-í núú cuè ñáyiú cuàá, te quide tátna-í cue ñáyiú yacua, ndihì cue ñáyiú tnàhá cuéhé sã dátèhyú nihnu-xi yiquí cùñú-yu, ndihì cue ñáyiú doho, nchaa ñáyiú-á<sup>n</sup> quide tátna-í te ndúha-yu, te ndéé cue ñáyiú sa ní xíhí dándòto-í cúnaha-ndo xii-dé, te cúnaha tucu-ndo xii-dé sá ndècuu-í dánèhé-í nchaa ñáyiú ndàhú tnúhu sá sánú ìchi ñaha xíí-yu nàcuáa naníhí tàhú-yu. <sup>23</sup> Te cúnaha tucu-ndo xii-dé sá ío váha táhú nchaa ñáyiú ñá túú quide sáá iní nchaa tnúhu càhá<sup>n</sup>-í, duha cúnaha-ndo xii-dé —càchí-gá xáha<sup>n</sup>-gá xii-güedé.

<sup>24</sup> Te sáta ñí yáha-güedé cuánuhú-güedé, te ní ngüíta Jèsús ní càhá<sup>n</sup>-gá núú ñáyiú cuèndá té Juàá, te xáha<sup>n</sup>-gá xii-yu:

—Nchòhó ní sándéhé-ndó ì<sup>n</sup> téé ndècu xítí yucu, te téé-á<sup>n</sup> ñà túú sàni ì<sup>n</sup> sani úú iní-dé, chi ñá túú quide-dé

dàtná quidé nchàa ité nánú cuáhá<sup>n</sup>-xi duha cuáhá<sup>n</sup>-xi dàcá<sup>n</sup> òré quéné táchí. <sup>25</sup>Te ni ñà túú ní sàndéhé-ndó ì<sup>n</sup> téé nihnu dóó vâha dóó vii càa. Te nchòhó xìní-ndó sã ñâyiu sàcuìhnu dóó vâha dóó vii càa ñá túú nã cúmání xií-yu, te nchaa ñâyiu-á<sup>n</sup> ndécú-yu vehe cue téé cùnuu yindaha ñaha xii ñâyiu. <sup>26</sup>Dico nchòhó chi ní sàndéhé-ndó ì<sup>n</sup> téé càhá<sup>n</sup> tnúhu Yá Ndiòxí. Te ndáá sá díú tée càhá<sup>n</sup> tnúhu-gá cùú-dě dico cùnuu-gá-dé dácúúxí dâva-gá cue téé càhá<sup>n</sup> tnúhu-gá. <sup>27</sup>Te diu cuendá té Juàá-á<sup>n</sup> càhá<sup>n</sup>-xi núú tütú Yá Ndiòxí nàcuáa ní xáha<sup>n</sup>-gã xii Cristú, te duha ní xáha<sup>n</sup>-gã:

Tendaha-í ì<sup>n</sup> téé càhá<sup>n</sup> tnúhu-í codonù-dé núú-n cuendá dätúha-dé ñâyiu cuendá quíndáá iní-yu tnúhu-n.

Duha ní xáha<sup>n</sup>-gã, te duca<sup>n</sup> ñí ngódó tnùní núú tütú-gá. <sup>28</sup>Te na càchí tnúhu-í xii-ndo sã ñí ì<sup>n</sup> cue téé ñuyú-a ñá túú cùnuu-güedé dàtná cùnùu té Juàá téé dàcuandute ñaha xii ñâyiu. Te nchaa ñâyiu sa ta ndíhu ndaha ñaha Yá Ndiòxí vitna cuáhá<sup>n</sup> cùnùu-gá-ni tucú-yu dácúúxí tã Juàá cuèi cùú-yu ñâyiu ñá túú cùnuu dácúúxí dâva-gá ñâyiu yindaha-gá —càchí Jèsús xáha<sup>n</sup>-gã xií-yu.

<sup>29</sup>Te sá dúcá<sup>n</sup> ñí càhá<sup>n</sup> Jèsús, núu nchaa ñâyiu ní dácúúndute té Juàá ní cachí-yu sá ò vâha quide Yá Ndiòxí, te diu-ni duca<sup>n</sup> ñí càhá<sup>n</sup> cue téé cuihna iní-xi quide cobrá ñáhá xii ñâyiu cuendá impuèstú, cue téé ní dácúúndute-dé. <sup>30</sup>Dico cue téé cùu fariséú, ndihi cue téé dâcuaha ñaha xii ñâyiu nchaa tnúhu ní chídó tnùní ndíi Moisés, cue téé ñá túú ní dâcuandute té Juàá ñá túú ní tnàhá iní-güedé cada-güedé nchaa sá vâha cuiní Yá Ndiòxí. <sup>31</sup>Te Xítohó Jesu-cristú ní xáha<sup>n</sup>-gã xií-yu:

—Na càchí tnúhu-í xii-ndo nàcuáa sãtnahá-xi cùu ñâyiu ndècu vitna. <sup>32</sup>Chi ñâyiu-á<sup>n</sup> cùú-yu dàtná cue landú

sáçoo núú yâhu dàdiqui-güexi te níhi càhá<sup>n</sup>-güexi, te xítnàha-güexi: “Ní tiú-ndí yaá ndíhi vílu te ñá túú ní cuiní-ndó càta-ndo. Te ío yica iní ní xita yuhu-ndí te ñá túú ní ndâhyú-ndó”, càchí-güexi xítnàha-güexi. Te duca<sup>n</sup> sãtnahá-xi cùu ñâyiu ndècu vitna. <sup>33</sup>Te té Juàá téé ní xóo dâcuandute ñaha xii ñâyiu ío ndàhú ní xóo caxi-dé, te ni ñá túú ní xóo coho-dé ndudí ndéhé yoho yàha stilé sá sã ní nduu-xi ndidí, te ní cachí-ndó sã ñí xíndecu ndihi-dé espíritú cündíhi yucu ñávâha. <sup>34</sup>Te sáta ní quexio yúhú Téé cùu ñaní tnàhá-ndó nchaa-ndo, te xèxi-í xíhi-í ndécú-í te càchí-ndó sã cùú-í téé xèxi vihi te xíhi vihi-í. Te càchí tucu-ndo sã cùú-í téé xica cuu ndíhi cue téé cuihna iní-xi quide cobrá ñáhá xii ñâyiu cuendá impuèstú, ndíhi nchaa dâva-gá cue téé ndècu ichi cuehé ichi duha, duha càchí-ndó. <sup>35</sup>Te ñâyiu ní tnàhá tnúhu ndíhi Yá Ndiòxí, ñâyiu-á<sup>n</sup> quidè-yu nàcuáa cutnùní sá mée-gã ío ndècu ndíhi-gá sá xìní tnùní-gá —càchí-gá xáha<sup>n</sup>-gã xií-yu.

### Jèsús ndécú-gã vehe ì<sup>n</sup> téé cùu fariséú téé nàni Xímú

<sup>36</sup>Te ì<sup>n</sup> téé cùu fariséú ní càhá<sup>n</sup>-dé Jèsús vehe-dé caxi-gá, te òré ní quexio-gá te cuàngihu-gá mèsá. <sup>37</sup>Te xíá<sup>n</sup> núçoo-gá ní sáá ì<sup>n</sup> ñadhí te diu-ni ñaha ñuu-á<sup>n</sup> cùú-á<sup>n</sup>, te ndècu-a<sup>n</sup> ichi díí iní, te sá ñí níhí-a<sup>n</sup> tnúhu sá cuàngaxi Jèsús vehe téé cùu fariséú-á<sup>n</sup>, núu nèhe-a<sup>n</sup> ì<sup>n</sup> yoó chitu àcití sàhá<sup>n</sup> tnámí. <sup>38</sup>Te ní ngóo-a<sup>n</sup> ì<sup>n</sup> xio dñi Jesús, te ní ngúíta-a<sup>n</sup> ndâhyú-a<sup>n</sup> te ndíhi ndute núú-a<sup>n</sup> ní naquete-a<sup>n</sup> sàhá-gã. Te dàtnùní ní nadayíchí-a<sup>n</sup> ndíhi idi díquí-a<sup>n</sup>, te ní teyuhu-a<sup>n</sup> sàhá-gã, te ní chíhi ñaha-a<sup>n</sup> àcití sàhá<sup>n</sup> tnámí-á<sup>n</sup>. <sup>39</sup>Te sá dúcá<sup>n</sup> ñí quide-a<sup>n</sup> ní xìní téé cùu fariséú téé ní càhá<sup>n</sup> ñáhá xii-gá-á<sup>n</sup> núu ní sani iní-dé: “Te núu dicó ndisa téé

càhá<sup>n</sup> tnúhu Yá Ndiöxí cúú tée-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñáyiú cùu-a<sup>n</sup>, te dico ìí<sup>n</sup> ñaha ndècu ichi díí iní cúú-á<sup>n</sup>”, duha ní sani iní-dé. <sup>40</sup> Te Jèsús ní xáha<sup>n</sup>-gã xii-dé:

—Xímú, ndècu ìí<sup>n</sup> tnúhu cachí tnúhu-í xii-n —càchí-gá xáha<sup>n</sup>-gã xii-dé.

Te tée cùu farisèú-á<sup>n</sup> xáha<sup>n</sup>-dè xii-gá:

—Cachí tnúhu, Mèstrú —càchí-dé xáha<sup>n</sup>-dè xii-gá.

<sup>41</sup> Te Jèsús ní xáha<sup>n</sup>-gã:

—Ní xíndecu ìí<sup>n</sup> tée ní xóo dasa<sup>n</sup> nùu dífú<sup>n</sup>, te ní xítaú úú tnàhá-güedé núú-dé. Te ìí<sup>n</sup>-dé ní sáha-dé úhú<sup>n</sup> cièndú dífú<sup>n</sup> denàriú, te ingá-dé ní sáha-dé údico úxí. <sup>42</sup> Te ñá ní ñhí-güedé nacháhu-güedé núú-dé, te tée ní sánùu ñaha-á<sup>n</sup> ní quide càhnu iní-dé ndi ndùú-güedé. Te vitna cachí-ò tucu te núu ndèda càa-güedé cúú iní ñáhá-gã-güedé xii-dé —càchí-gá xáha<sup>n</sup>-gã xii-dé.

<sup>43</sup> Te ní xáha<sup>n</sup> tē Xímú-á<sup>n</sup>:

—Sànuu sá tēe tau vài-gá dífú<sup>n</sup> ño-gá cúú iní-dé tée ní sánùu ñaha dífú<sup>n</sup>-á<sup>n</sup> —càchí-dé xáha<sup>n</sup>-dè xii-gá.

Te ní xáha<sup>n</sup> Jèsús:

—Sá ndàá càhá<sup>n</sup>-n —càchí-gá xáha<sup>n</sup>-gã xii-dé.

<sup>44-46</sup> Te Jèsús ní ndacoto-gá núú ñadìhí-á<sup>n</sup>, te ní xáha<sup>n</sup>-gã xii tē Xímú-á<sup>n</sup>:

—¿Ndèhe-n nacuaa quide ñadìhí-a ñá? Chi cuánguihu-í vehe-n, dico ñá túú ní tàxi-n ndute ndoo sàhá-í, te ni ñà túú ní tēyuhu ñaha-n, te ni ñà túú ní chìhi-n acití díquí-í, dico ñadìhí-a ní naquete-a<sup>n</sup> ndìhi ndute núú-a<sup>n</sup> sàhá-í, te ní nadayìchí-a<sup>n</sup> ndìhi idi díquí-a<sup>n</sup>, te nuu núu teyuhu-a<sup>n</sup> sàhá-í, te ní chìhi-a<sup>n</sup> acití sàhá<sup>n</sup> tnámí sàhá-í. <sup>47</sup> Te na càchí tnúhu-í xii-n sã ño cùu iní ñáhá-á<sup>n</sup> xii-í, te núu xǎ<sup>n</sup> cútñuní iní-ó sã cuèí ío vài sá cuèhé sá dúhá ní quide-a<sup>n</sup>, dico Yá Ndiöxí sa ní quide càhnu iní ñáhá-gã xii-a<sup>n</sup>. Chi Yá Ndiöxí quidé càhnu iní-gá ñáyiú cuèí vài àdi sacú cuéchi-yu, te núu

sacú cuéchi-yu te sacú cúú iní ñáhá-yu xii-í —càchí-gá xáha<sup>n</sup>-gã xii-dé.

<sup>48</sup> Te ní xáha<sup>n</sup>-gã xii ñadìhí-á<sup>n</sup>:

—Sa ní quide càhnu iní-í nchaa cuéchi-n —càchí-gá xáha<sup>n</sup>-gã xii-a<sup>n</sup>.

<sup>49</sup> Te cue tēe xínucóo ndìhi-gá xitnàha-güedé:

—¿Ná tēe cùu tēe-a núu nándi sá quidé-dé, te ndéé nchaa yíca cuéchi ñáyiú quide cahnu iní-dé-i? —càchí-güedé xitnàha-güedé.

<sup>50</sup> Te Jèsús ní xáha<sup>n</sup> tucu-gá xii ñadìhí-á<sup>n</sup>:

—Sa ní cãcu nihnu-n núú ùhú núú ndàhú vitna chi ní sándáá iní ñáhá-n xii-í, te vitna cuanùhú te ñá túú-gã ná cani iní-n —càchí-gá xáha<sup>n</sup>-gã xii-a<sup>n</sup>.

### Ñáyiú dìhí ní chindee ñaha xii Jesús

**8** Te sátá dúcá<sup>n</sup> ní cuu te Jèsús ní xica-gá cuáhá<sup>n</sup>-gã titní víhí ñúú nánhú, ndìhi ñúú líhli dānehé-gá ñáyiú nācuáa ndíhu ndaha ñaha Yá Ndiöxí xii-yu. Te cuáhá<sup>n</sup> ndìhi-gá ndi ùxúú tnàhá cue tēe xica cuu ndìhi-gá, <sup>2</sup> ndìhi ìí<sup>n</sup> úú ñáyiú dìhí ní quide tátna-gá ní xíhi ñaha espíritú cúndìhi yucu ñávàha, ndìhi ñáyiú tnàhá dava-gá cuèhé ùhú ní cùu. Te xíá<sup>n</sup> tnàhá tucu ìí<sup>n</sup> ñaha nàni Mariá Magdaléná, te ñaha-á<sup>n</sup> ní xíhi ñaha úsá espíritú cúndìhi yucu ñávàha xii-a<sup>n</sup> ni cùu, te ní quee ñaha-xi. <sup>3</sup> Te tnàhá ìí<sup>n</sup> ñaha nàni Juáná ñadìhí ìí<sup>n</sup> tēe nàni Chúza tēe ní cunuu ní xinu cuechi vèhe tē Hèrodés, ndìhi ingá ñaha nàni Susaná nchaa ñáyiú-á<sup>n</sup> ní chindee ñáhá-yu xii-gá ndìhi nchaa sá ndécú ndìhí-yu, te ñu-ni duca<sup>n</sup> ní quide vài-gá tucu ñáyiú nchicú<sup>n</sup> ñáhá xii-gá cuáhá<sup>n</sup>.

### Nàcuáa quide tēe cuángacá<sup>n</sup> trìu

(Mt. 13:1-9; Mr. 4:1-9)

<sup>4</sup> Te ío vài ñáyiú ndaa ñúú ní tacá-yu núú ndécú Jèsús, te ní ngúita-gá ní cani-gá ìí<sup>n</sup> cuèndú núú-yu cuèndá tecú tnùnì-yu tnúhu-gá, te xáha<sup>n</sup>-gã xii-yu:



<sup>5</sup>—Ī<sup>n</sup> tée cuángacá<sup>n</sup>-dé triú. Te òré ní ngúíta-dé dǎngoyo-dé triú-á<sup>n</sup> te dava ní quene ndava ní ngava ndéé ichi, te ní xéniĥnu ñáyi, te ní xíní tǎlá te ní nadatácá-güedi. <sup>6</sup>Te dava ní ngava ñuhu yadi núú yǎhí vihi yúú, te ní xínu-xi dico núú sácú-ni nduu te ní yíchí-xi, chi ñá túú cǒhyo yǎhi. <sup>7</sup>Te dava ní ngava núú yúcu ndǐquí<sup>n</sup> tnu iñu, te ĩ<sup>n</sup>nuu-ni ní xínu-xi ndíhi tnu iñu-á<sup>n</sup>, te tnu iñu-á<sup>n</sup> ní dǎnáá-xí nchàa triú sá ní xínu-á<sup>n</sup>. <sup>8</sup>Dico dava triú-á<sup>n</sup> ní ngava-xi núú ndécú ñuhu coco<sup>n</sup>, te xiǎ<sup>n</sup> ní xínu-xi te ní saĥnu-xi, te ío váha ní cuu, chi núú ĩ<sup>n</sup>-ní triú te ní ngúĥi yoco-xi ĩ<sup>n</sup> ciendú triú-xi — cǎchí-gǎ xáha<sup>n</sup>-gǎ xií-yu.

Te níhi ní cǎhá<sup>n</sup>-gǎ ní xáha<sup>n</sup> tùcu-gǎ xií-yu:

—Nchaa nchòhó ñáyi ní xíndedóho tnúhu ní cǎhá<sup>n</sup>-í-a, te ío váha chí cuǎha cuendá — cǎchí-gǎ xáha<sup>n</sup>-gǎ xií-yu.

### **Nàcuáa quèe-xi tnúhu ní cǎhá<sup>n</sup> Jèsús**

(Mt. 13:10-17; Mr. 4:10-12)

<sup>9</sup>Te cue tée xica cuu ndíhi Jesús ní xícá<sup>n</sup> tnúhú-güedé núú-gǎ nū nása quèe-xi cuendú ní caní-gǎ núú ñáyi.

<sup>10</sup>Te ní xáha<sup>n</sup>-gǎ xii-güedé:

—Nchòhó chi sa cǎchí tnúhu Yá Ndiòxí xii-ndo ĩ<sup>n</sup> sá vǎtá quíní-gǎ-ndó, chi cǎchí tnúhu-gǎ nàcuáa cada-gǎ ndĥu ndaha-gǎ ñáyi, dico dava-gǎ ñáyi cǎni-í mee-ni cuendú núú-yu, chi cuéi na quíní-yu nchaa nàcuáa cuu dico ní vá cútñuní iní-yu ná cuendá duca<sup>n</sup> cùu, àdi cuéi na cùndedóho-yu dico ní vá tècú tnùní-yu — cǎchí-gǎ xáha<sup>n</sup>-gǎ xii-güedé.

### **Jèsús cǎhá<sup>n</sup>-gǎ nàcuáa quèe-xi tnúhu cuendá tée cuángacá<sup>n</sup> triú**

(Mt. 13:18-23; Mr. 4:13-20)

<sup>11</sup>Te xǎha<sup>n</sup> tùcu-gǎ xii-güedé:

—Duha quèe-xi cuendú ní caní-í núú-ndó, chi triú ní sacá<sup>n</sup> tée-á<sup>n</sup> cúu-xí dàtná tnúhu Yá Ndiòxí. <sup>12</sup>Te triú sá ní quene ndava ní ngava ndéé ichi-á<sup>n</sup>, xiǎ<sup>n</sup>

cúu-xí dàtná ñáyi ní quée iní-xi tnúhu Yá Ndiòxí, dico sácúĥná cuǎhá<sup>n</sup>-xi xòcani-xi tnúhu-gǎ iní-yu cuendá sá vǎ quíndáá iní-yu, te vá nánihí tǎhú-yu. <sup>13</sup>Te triú sá ní ngava ñuhu yadi núú yǎhí vihi yúú, xiǎ<sup>n</sup> cúu-xí dàtná ñáyi ní xíndedóho tnúhu Yá Ndiòxí te díí iní ní tniĥ-yu tnúhu-gǎ, dico òré ná dàcǎhá<sup>n</sup> ñáhá yùcu ñáváha xií-yu nǎndí cadá-yu, te dàña niĥnú-yu tnúhu-gǎ chí ñá níhi ndéé-yu canchicú<sup>n</sup> niĥnú-yu nàcuáa cǎhá<sup>n</sup> tnúhu-gǎ. <sup>14</sup>Te triú sá ní ngava núú yúcu ndǐquí<sup>n</sup> tnu iñu-á<sup>n</sup>, xiǎ<sup>n</sup> cúu-xí dàtná ñáyi ní tecú dóho-xi tnúhu Yá Ndiòxí, dico cuéé cuéé ní nacuanaá-yu tnúhu-gǎ, chí cuendá mee-ni sǎ cúu-xí mèe-yu ñuhu iní-yu, ndíhi cuendá sá ío sàni iní-yu cuu cuicá-yu, ndíhi cuendá sá ío cùdíí iní-yu nchaa sá ío ñuyú-a núu xiǎ<sup>n</sup> àú<sup>n</sup> nǎ cuu ní xíndedóho-yu tnúhu-gǎ. <sup>15</sup>Dico triú sá ní ngava núú ndécú ñuhu coco<sup>n</sup>, xiǎ<sup>n</sup> cúu-xí dàtná ñáyi váha iní-xi ní xíndedóho tnúhu Yá Ndiòxí chí ñá túú dàña niĥnú-yu, te ní yùhu ní iní-yu quídé-yu nchaa nàcuáa cǎhá<sup>n</sup> tnúhu-gǎ.

### **Nàcuáa quídé-yu iti**

(Mr. 4:21-25)

<sup>16</sup>Te ñá túú ní ĩ<sup>n</sup> ñáyi tēñuhú-yu ĩ<sup>n</sup> iti te dàdǎhu-yu, àdi chiváha-yu ĩ<sup>n</sup> caha cǎmá, chí tàxi ndecú-yu núú nínu cuendá cutñuní núú nchàa ñáyi ndècu vehe. <sup>17</sup>Te ní ĩ<sup>n</sup> tnúhu sá ñǎ tècú tnùní ñáyi vitna vá cǎchí-ó sǎ vǎ tècú tnùní-yu chí dacuéi sá tècú tnùní-yu, te ní ĩ<sup>n</sup> tnúhu sá cǎchí-ó cùu yuhu vitna vá cúu yùhu chí dacuitíí sǎ quée tùu-xi núú ñáyi.

<sup>18</sup>Te chí cùndedóho váha tnúhu na cǎhá<sup>n</sup>-í-a. Nchaa ñáyi sàndáá iní ñáhá xii Yá Ndiòxí ío-gǎ cuita quíndáá-gǎ iní ñáhá-yu xii-gǎ quíĥ<sup>n</sup>, te nchaa ñáyi ñá túú sàndáá iní ñáhá xii-gǎ uu<sup>n</sup>-gǎ cuita cuu sǎá-gǎ iní-yu núú-gǎ quíĥ<sup>n</sup> — cǎchí-gǎ xáha<sup>n</sup>-gǎ xii-güedé.

### Cue ñani Jèsús ndihi náná-gǎ

(Mt. 12:46-50; Mr. 3:31-35)

<sup>19</sup>Te ní quexìo náná Jèsús ndihi cue ñani-gǎ vehe núú ndécú-gǎ, te ñá ndácũ-yu cáhá<sup>n</sup> ndihi ñahá-yu xii-gǎ chi ío cuéhé ñáiyu ndècu núú ndécú-gǎ.

<sup>20</sup>Te ì<sup>n</sup> ñáiyu xĩndecu-á<sup>n</sup> ní dáyáha-yu tnúhu núú-gǎ, te xǎhá<sup>n</sup>-yu:

—Ní quexìo náná-n ndihi cue ñani-n xĩnutnĩ-yu quehé, te cuinĩ-yu cáhá<sup>n</sup> ndihi ñahá-yu xii-n —càchĩ-yu xǎhá<sup>n</sup>-yu xii-gǎ.

<sup>21</sup>Te ní xáha<sup>n</sup>-gǎ:

—Nchaa ñáiyu sácũndedóho tnúhu Yá Ndióxi te quidé-yu nchaa nàcuáa càhá<sup>n</sup> tnúhu-gǎ, ñáiyu-á<sup>n</sup> cúu-yu dàtná nǎnà-í ndihi dàtná cue ñani-í —càchĩ-gǎ xáha<sup>n</sup>-gǎ xii ñáiyu ní dáyáha tnúhu núú-gǎ-á<sup>n</sup>.

### Jèsús ngání-gǎ táchĩ ndihi ndute làgúná

(Mt. 8:23-27; Mr. 4:35-41)

<sup>22</sup>Te ì<sup>n</sup> nduu ní queé Jèsús bàrcú ndihi cue téé xica cuu ndihi-gǎ, te ní xáha<sup>n</sup>-gǎ:

—Chĩ ná quhĩ<sup>n</sup>-ó ndàa ingá xio yuhu làgúná —càchĩ-gǎ xáha<sup>n</sup>-gǎ xii-güedé.

Te cuáhá<sup>n</sup>-güedé ndihi-gǎ. <sup>23</sup>Te nini ñùhu bàrcú ichi cuáhá<sup>n</sup>-xi núú ndute ní xídĩ Jèsús. Te ní ngüíta-xi níhi vìhi quene táchĩ te ta nàdachitú-xi ndute xitĩ bàrcú-á<sup>n</sup> cuáhá<sup>n</sup>, te sa cuinĩ-nǎ-xi queé naa bàrcú-á<sup>n</sup> xitĩ ndute ní cùu. <sup>24</sup>Te ní sáhá<sup>n</sup>-güedé núú cáá Jèsús xidĩ-gǎ, te ní xáha<sup>n</sup>-güedé xii-gǎ:

—¡Mèstrú, ndiquíú ìní chi tà queé naa-o cuáhá<sup>n</sup>! —càchĩ-güedé xáha<sup>n</sup>-güedé xii-gǎ.

Te Jèsús ní ndiquíú ìní-gǎ te ní ndacóo-gǎ te ní tenàa-gǎ táchĩ-á<sup>n</sup> ndihi ndute làgúná-á<sup>n</sup>, te ní ngüĩnĩ-ni táchĩ-á<sup>n</sup> te ní nucũndecu nahi-nǎ ndute làgúná-á<sup>n</sup>. <sup>25</sup>Te ní xáha<sup>n</sup>-gǎ xii-güedé:

—¿Náa ñá túú sàndáá ìní ñahá ndisa-ndo xii-í á<sup>n</sup>? —càchĩ-gǎ xáha<sup>n</sup>-gǎ xii-güedé.

Te ní cuñúhu-güedé sá dúcá<sup>n</sup> ní quide-gǎ ní xinĩ-güedé, te ní yùhú-güedé, te ní xitnàha-güedé:

—¿Te ná téé cùu téé-a núú ní cáhá<sup>n</sup>-ni-dé te ní ngüĩnĩ táchĩ te ní nucũndecu nahi-ni ndüte làgúná-a-í? —càchĩ-güedé xitnàha-güedé.

### Téé yìhi ñaha cue espíritú cùndìhi yucu ñávàha

(Mt. 8:28-34; Mr. 5:1-20)

<sup>26</sup>Te ní sáa-gǎ ndihi-güedé yucu cue téé ñúú Gàdará, te yìhi ndáa-ni ndàa ingá xio làgúná-á<sup>n</sup> cáá dìstritú Galileá.

<sup>27</sup>Te òré ní quene Jèsús xitĩ bàrcú te ní dáyátnĩ ñaha ì<sup>n</sup> téé ñúú-á<sup>n</sup> xii-gǎ, te yìhi ñaha titnĩ espíritú cùndìhi yucu ñávàha xii-dé. Te ní cunaha ñà túú-gǎ sácũlhu-dé dóo-dé, te ní ñà túú-gǎ sácũndecu-dé vehe-dé, chi da nchaa núú yĩndũxi ndĩyì quide vehe-dé. <sup>28</sup>Te òré ní xinĩ-dé Jèsús te ní ngüĩnĩ xitĩ-dé núú-gǎ, te cue espíritú yìhĩ ñaha xii-dé-á<sup>n</sup> ní quide-xi níhi ní cáhá<sup>n</sup>-dé, te xáha<sup>n</sup>-dè xii-gǎ:

—¿Ná cuendá véxi-ò Jèsús Déhe Dútú Ndióxi sàdĩ-n ìchi-í-í? Te càhá<sup>n</sup> ndàhú-í núú-n sǎ và dándòho ñaha-n xii-í —càchĩ-dé xáha<sup>n</sup>-dè xii-gǎ.

<sup>29</sup>Te duca<sup>n</sup> ní cáhá<sup>n</sup>-dé cuendá sá Jèsús ní xáha<sup>n</sup>-gǎ xii nchaa espíritú cùndìhi yucu ñávàha yìhi ñaha sá ná queé ñaha-xi xii-dé. Te nchaa xǎ<sup>n</sup> ní xóo dacáhá<sup>n</sup>-xi ìní-dé nándi sá ní xóo cada-dé ñúu ní xóo dacùtu ñaha-güedé cadèná xii-dé cuendá sá ñà túú-gǎ ná cada-dé, te ní xóo cundee ñahá-güedé, dico cuèi duca<sup>n</sup> dico ní xóo dandàva-ni-dé cadèná, te cue espíritú cùndìhi yucu ñávàha-á<sup>n</sup> ní xóo dacùnu ñaha-xi xii-dé ní xóo quhĩ<sup>n</sup>-dé xitĩ yucu. <sup>30</sup>Te Jèsús ní xícá<sup>n</sup> tnúhú-gǎ núú-dé, te xáha<sup>n</sup>-gǎ:

—¿Nása nàni-n-i? —cachí-gá xáha<sup>n</sup>-gă.

Te ní xáha<sup>n</sup>-dê:

—Vài Sandadú nàni-í —càchí-dé xáha<sup>n</sup>-dê xii-gă.

Te duca<sup>n</sup> ní xáha<sup>n</sup>-dê xii-gă cuendá sá ïo cuéhé espíritú cúndìhi yucu ñávàha yìhi ñaha xii-dé. <sup>31</sup> Te nchaa espíritú-á<sup>n</sup> ní cáhá<sup>n</sup> ndàhú-xi núú Jèsús sá vă téndàha ñaha-gă xii-xi quíhí<sup>n</sup>-xi núú ùhú núú ndàhú. <sup>32</sup> Te ñu-ni yatni yucu núú ndécú Jèsús-á<sup>n</sup> yíhí vâi cuchí xixexi-güedi, te nchaa espíritú-á<sup>n</sup> ní cáhá<sup>n</sup> ndàhú-xi núú-gă sá ná dàña-gă quíhu-xi yiqui cùnú nchaa cùchí-á<sup>n</sup>, te Jèsús ní xáha<sup>n</sup>-gă sá cúú quíhu-xi yiqui cùnú-güedi. <sup>33</sup> Te ní quee ñaha nchàa espíritú-á<sup>n</sup> xii téé-á<sup>n</sup>, te ní quíhu-xi nchaa cùchí-á<sup>n</sup>, te cùchí-á<sup>n</sup> ní xinu-güedi duha ní quee-güedi ndàa núú dèhvá yuhu làgúná-á<sup>n</sup>, te ní ngaunihnu-güedi xití ndute te ní ndihi-güedi ní cáhá.

<sup>34</sup> Te òré ní xiní cue téé xito cuchí-á<sup>n</sup> nàcuáa ní cuu te ní yùhú-güedé ní xinu-güedé, te ní sáhá<sup>n</sup>-güedé ní cani-güedé cuendú núú cuè ñáyiu ndècu xití ñuú, ndihi núú cuè ñáyiu ndècu xití yucu. <sup>35</sup> Te nchaa ñáyiu ní níhí tñuhu ní quee-yu cuáhá<sup>n</sup> ndéhè-yu nàcuáa ní cuu. Te òré ní quexió-yu núú ndécú Jèsús, te ní xiní-yu téé ní xíhi ñaha cuè espíritú cúndìhi yucu ñávàha-á<sup>n</sup> núcòo-dé núú sàhá Jèsús, te ñihnu-ná-dé dóo-dê, te núcóo-dé dàtná ñ<sup>n</sup> ñáyiu váha, te ní yùhú-yu òré ní xiní ñáhă-yu xii-dé. <sup>36</sup> Te nchaa ñáyiu ní xiní nàcuáa ní cuu ní ndúha téé-á<sup>n</sup> ní cùu ní caní-yu cuendú núú nchàa ñáyiu ní quexió-á<sup>n</sup> nàcuáa ní cuu ní ndúha téé-á<sup>n</sup> ndihi nàcuáa ní cuu cuendá nchaa cùchí-á<sup>n</sup>. <sup>37</sup> Te sá dúcá<sup>n</sup> ní níhí-yu tñuhu nàcuáa ní cuu, núú nchaa ñáyiu ñuú Gàdará ïo ní yùhú-yu te ní ngüíta-yu càhá<sup>n</sup> ndàhú-yu núú Jèsús sá ná nùhú-gă nùu ndèè ichi véxi-gă. Te sá

dúcá<sup>n</sup> ní cáhá<sup>n</sup>-yu núú cuáhá<sup>n</sup>-gă núú ndécú bàrcú. Te òré ndée-gă bàrcú-á<sup>n</sup> nùhú-gă <sup>38</sup> ní ngüíta téé ní xíhi ñaha cuè espíritú cúndìhi yucu ñávàha càhá<sup>n</sup> ndàhú-dé núú-gă nùu vá cúndèe iní-gă quíhí<sup>n</sup> ndihi ñaha-gă xii-dé, dico Jèsús ní quide ndee iní ñáhá-ni-gă xii-dé, te ní xáha<sup>n</sup>-gă:

<sup>39</sup> —Cuanùhú vehe-n, te cani-n cuendú núú nchàa ñáyiu sá ïo càhnu cuu nchaa sá vâha ní quide ñaha Yă Ndiòxí xii-n —càchí-gă xáha<sup>n</sup>-gă xii-dé.

Te téé-á<sup>n</sup> ní xica-dé cuánuhú-dé te ní ngüíta-dé ní cani-dé cuendú núú nchàa ñáyiu xĩndecu níhí ñuú sá ïo càhnu cuu nchaa sá vâha ní quide ñaha Jèsús xii-dé.

**Cuendá déhe yoco tē Jàirú,  
ndihi cuendá ñ<sup>n</sup> ñadìhí  
ní tnàndéé dóó Jèsús**

(Mt. 9:18-26; Mr. 5:21-43)

<sup>40</sup> Te òré ní ndexìo Jèsús ndàa ingá xio yuhu làgúná, te ñáyiu xĩndecu xíá<sup>n</sup> sa ndètu càhnu ñaha-ná-yu, te ïo váha ní cáhá<sup>n</sup> ndihi ñáhá-yu xii-gă òré ní nasáá-gă. <sup>41</sup> Te ñ<sup>n</sup> téé tàxi tñuní veñúhu ní quexió-dé núú ndécú Jèsús, te téé-á<sup>n</sup> nání-dê Jàirú, te ní ngüíñí xití-dê núú-gă càhá<sup>n</sup> ndàhú-dé, te xáha<sup>n</sup>-dê xii-gă:

—Véxi-í càhá<sup>n</sup> ndàhú-í núú-n nùu vá cúndèe iní-n quíhí<sup>n</sup>-ó vèhe-í cada tátna-n dèhe yoco-í —càchí-dé xáha<sup>n</sup>-dê xii-gă.

<sup>42</sup> Te duca<sup>n</sup> ní xáha<sup>n</sup>-dê chi ndècu ñ<sup>n</sup> dii-ni déhe yoco-dê, te ndècu-xi datná úxúú cuíá-xi, te càhú víhí tñáhá-xi cùhú-xi te cuíní-xi cuú-xi. Te Jèsús ní xica-gă cuáhá<sup>n</sup>-gă ndihi téé-á<sup>n</sup>, te ïo vâi ñáyiu nchicú<sup>n</sup> ñáhá xii-gă cuáhá<sup>n</sup>, te dàdehnde ñaha-ná-yu xii-gă ní cuu.

<sup>43</sup> Te tnuú nchaa ñáyiu-á<sup>n</sup> ñútnàhâ ñ<sup>n</sup> ñaha cùhú, te ñaha-á<sup>n</sup> sà ní cuu úxúú cuíá sâ cùhú-a<sup>n</sup> ngòyo ñaha ñíhí xii-a<sup>n</sup>, te ïo cuéhé ñíhú<sup>n</sup> ní cuu dàndoñuhu-a<sup>n</sup> chi ní nadico-a<sup>n</sup> nchàa sá ndécú ndihi-a<sup>n</sup> cuendá ní níhí-a<sup>n</sup> ñíhú<sup>n</sup> ní quehe<sup>n</sup> nchaa ñáyiu ní quide tátna ñaha xii-a<sup>n</sup>, dico

ni ìí<sup>n</sup>-yu ñá túú ní ndàcú-yu ndúha-a<sup>n</sup>.

<sup>44</sup>Te ní sáhá<sup>n</sup> ndehe yatni-a<sup>n</sup> ndàa sátá Jèsús, te ní tnándeé-a<sup>n</sup> luha yuhu dǒó-gǎ te òré-ni-á<sup>n</sup> ní ndúha-a<sup>n</sup>.

<sup>45</sup>Te Jèsús ní xícá<sup>n</sup> tnúhú-gǎ núú-yu, te xáha<sup>n</sup>-gǎ:

—ǎNdédacàa-ndo ní tnándeé ñáhá xii-í? —càchí-gá xáha<sup>n</sup>-gǎ xii-yu.

Te nchaá-yu ní xáhǎ<sup>n</sup>-yu sá ní ìí<sup>n</sup>-yu ñá túú ní tnándeé ñáhá xii-gǎ. Te té Pèlú ndihi cue tée cùndihi-dé ní xáha<sup>n</sup>-güedé xii-gǎ:

—Mèstrú, ndèhe-n sá vái ñáiyu nchìcú<sup>n</sup> ñáhá xii-n, te xio xio dàdehnde ñáhá-yu, te xicá<sup>n</sup> tnúhú-gǎ-n yòo ní tnándeé ñáhá xii-n —càchí-güedé xáha<sup>n</sup>-güedé xii-gǎ.

<sup>46</sup>Dico Jèsús ní xáha<sup>n</sup>-gǎ xii-yu:

—Dico ñu ìí<sup>n</sup>-ndo ní tnándeé ñáhá xii-í, chi ní cutnùní iní-í sá ìí<sup>n</sup> ñáiyu cùhú ní tnándeé ñáhá xii-í te ní ndúha-yu —càchí-gá xáha<sup>n</sup>-gǎ xii-yu.

<sup>47</sup>Te sátá ní xiní ñaha-á<sup>n</sup> sá ní cutnùní iní Jèsús sá ní tnándeé ñáhá-á<sup>n</sup> xii-gǎ, te yùhú yùhú-a<sup>n</sup> ní sáhá-a<sup>n</sup> ní ngüñí xítí-á<sup>n</sup> núú-gǎ, te ní náhmá-a<sup>n</sup> núú-gǎ, ndihi núú nchàa ñáiyu ná cuendá duca<sup>n</sup> ní quide-a<sup>n</sup> ní tnándeé-a<sup>n</sup>-gǎ, ndihi cuendá sá òré-ni-á<sup>n</sup> ní ndúha-a<sup>n</sup>. <sup>48</sup>Te Jèsús ní xáha<sup>n</sup>-gǎ xii-a<sup>n</sup>:

—Yòhó ñaha cùhú, ní sándáá iní ñáhá-n xii-í núu ní ndúha-n, te cuanùhú vitna te ñá túú-gǎ ná caní iní-n —càchí-gá xáha<sup>n</sup>-gǎ xii-a<sup>n</sup>.

<sup>49</sup>Te càhá<sup>n</sup> dúcá<sup>n</sup>-ní Jèsús ní sáá ìí<sup>n</sup> tée xinu cuechi vehe té Jàirú té tǎxi tnuní veñuhu, te xáha<sup>n</sup> tée xinu cuechi-á<sup>n</sup> xii-dé:

—Sa ní xihí déhe-n, vá chíchiu<sup>n</sup>-gá-n Mèstrú —càchí-dé xáha<sup>n</sup>-dǎ.

<sup>50</sup>Te sá dúcá<sup>n</sup> xáha<sup>n</sup> tǎe xinu cuechi-á<sup>n</sup> xii té Jàirú ní tecú dóho Jèsús, núu ní xáha<sup>n</sup>-gǎ xii-dé:

—Vá ndihú iní-n, quindáá iní ñáhá-ní-n xii-í te ndúha déhe-n —càchí-gá xáha<sup>n</sup>-gǎ xii-dé.

<sup>51</sup>Te òré ní sáá-gá vehe té Jàirú te ñá ní dàña-gá quíhu ñáiyu cùtexínu, núu té Pèlú-ni ndihi té Jàcobó-ni, ndihi té Juàá-ni, ndihi tǎtá ndihi náná-ni xichí ní xihí-á<sup>n</sup> cuànguihu ndihi-gá xití vehe.

<sup>52</sup>Te nchaa ñáiyu sa xindecu vehe-dé-á<sup>n</sup> xindáhyú-yu sá ndihú iní-yu cuendá sá ní xihí-xi. Te Jèsús ní xáha<sup>n</sup>-gǎ xii-yu:

—Vá ndàhyú-ndó, chi dícó-ni xidí-xi ñá túú ní xihí-xi —càchí-gá xáha<sup>n</sup>-gǎ xii-yu.

<sup>53</sup>Te ní sácú ndeé ñáhǎ-yu xii-gǎ, chi sá cùú-xí mèè-yu chi ní xihí ndisa xichí-á<sup>n</sup>. <sup>54</sup>Te Jèsús ní tnií-gá ndaha xichí ní xihí-á<sup>n</sup>, te níhi ní càhá<sup>n</sup>-gǎ, te xáha<sup>n</sup>-gǎ:

—Xichí cuéchí, ndacóo —càchí-gá xáha<sup>n</sup>-gǎ.

<sup>55</sup>Te xichí-á<sup>n</sup> ní ndoto-xi, te òré-ni ní ndacóo-xi, te Jèsús ní xáha<sup>n</sup>-gǎ sá ná cuñàhá-yu sá caxí-xí. <sup>56</sup>Te tǎtá-xi ndihi náná-xi súúní ní cuñúhu-yu sá dúcá<sup>n</sup> ní dándótó ñaha Jèsús xii-xi, te ní xáha<sup>n</sup>-gǎ xii-yu sá vǎ yòo ìí<sup>n</sup> cùñàhá-yu sá dúcá<sup>n</sup> ní quide-gǎ.

**Jèsús téndàha-gá ndi ùxúú  
cue tée xica cuu ndihi-gá  
quíhí<sup>n</sup>-güedé càhá<sup>n</sup>-güedé tnúhu-gá**

(Mt. 10:5-15; Mr. 6:7-13)

**9** Te Jèsús ní cana-gá ndi ùxúú cue tée xica cuu ndihi-gá, te ní sánaha-gǎ xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cùndihi yucu ñávàha yìhi ñaha xii ñáiyu, ndihi cuendá sá cáda tǎtña-güedé nchaa ñáiyu cùhú. <sup>2</sup>Te ní xáha<sup>n</sup>-gǎ xii-güedé sá quíhí<sup>n</sup>-güedé danéhé-güedé ñáiyu nàcuáa cada Yá Ndiòxí ndíhu ndaha ñaha-gá xii-yu, te duca<sup>n</sup> càda tǎtña-güedé cue ñáiyu cùhú. <sup>3</sup>Te cùmání-gǎ caca-güedé quíhí<sup>n</sup>-güedé, te ní xáha<sup>n</sup>-gǎ xii-güedé:

—Ñá túú tñahí ná canehe-ndo cùu ichi-ndo, ní tǎtnu, ní ñunu, ní sǎ caxí-ndó, ní dǐhú<sup>n</sup>. Te ní vǎ

cànèhe-ndo ingá ichi dóó-ndó, chi diu-ni dóó níhnú-ndó-ǎ<sup>n</sup> xíǎ<sup>n</sup> tnàhí-ni. <sup>4</sup>Te ndédani càa vehe na saá-ndó, te xíá<sup>n</sup> cundecu-ndo ndèé ná sàà nduu ndèe-ndo. <sup>5</sup>Te núu ñá túú cuiní-yu quehe<sup>n</sup> cuendá ñáhǎ-yu xii-ndo, te ndee-ndo ñùú-á<sup>n</sup>, te naquidi-ndo ticá chúhmá ní tní sáhá-ndó cuendá sá ná cùtnuní iní-yu sá ñà túú quide váha-yu —càchí-gá xáha<sup>n</sup>-gǎ xii-güedé.

<sup>6</sup>Te sátá dúcá<sup>n</sup> ní xáha<sup>n</sup> Jèsús xii-güedé, te ní quee-güedé cuáhá<sup>n</sup>-güedé nchaá ñuu dácuàha-güedé ñáyíu tnúhu Yá Ndiöxí, tnúhu sá càhá<sup>n</sup> nàcuáa naníhí tǎhú-yu, te duca<sup>n</sup> ta quide tátna-güedé nchaá ñáyíu cùhú cuáhá<sup>n</sup>.

**Nàcuáa ní cuu ní xíhí té Juàá téé  
dàcuandute ñaha xii ñáyíu**

(Mt. 14:1-12; Mr. 6:14-29)

<sup>7</sup>Te té Hèrodés téé cùu gobiernú ní níhí-dě tnúhu nchaá nàcuáa quide Jèsús, te quìyuhú iní-dé te sàni iní-dé yoo cùu-gá. Te duca<sup>n</sup> ní sani iní-dé chi dava ñáyíu càchí-yu sá tǎ Juàá téé ní xóo dacuandute ñaha xii ñáyíu ní ndoto cùu-gá. <sup>8</sup>Te davá-yu càchí-yu sá tǎ Èliás cúú-gǎ, te davá-yu càchí-yu sá ì<sup>n</sup> téé ní xóo càhá<sup>n</sup> tnúhu Yá Ndiöxí ndéé sanaha vìhi ní ndoto cùu-gá, càchí-yu. <sup>9</sup>Dico té Hèrodés ní cachí-dé:

—Yúhú ní táuchíu<sup>n</sup>-í ní xehndé-güedé díquí tǎ Juàá. ¿Te yoo cùu téé dii cuendú-xi nihí-a sá súuní cuèhé nǔú sǎ quidé-dě vǎí? —duha ní cachí-dé.

Te té Hèrodés ndúcú-dě nàcuáa cada-dé cuendá quini-dé Jèsús.

**Jèsús dácaxi-gá úhú<sup>n</sup> mǐl cue téé te  
dìi<sup>n</sup> ñáyíu dìhí ndìhi landú**

(Mt. 14:13-21; Mr. 6:30-44; Jn. 6:1-14)

<sup>10</sup>Te nchaá cue téé ní táuchíu<sup>n</sup> Jèsús cuáhá<sup>n</sup> càhá<sup>n</sup> tnúhu Yá Ndiöxí núú ñáyíu ní ndexio-güedé núú-gǎ te ní ngúíta-güedé nácàni tnúhu-güedé nchaá

nàcuáa ní quide-güedé. Te dǎtnùní ní xica-gá medii-ni-gá ndécá ñaha-gá xii-güedé cuáhá<sup>n</sup> ì<sup>n</sup> xichi núú ñà túú ñáyíu ndècu, yatni núú cáá ñùú Bèt-saidá. <sup>11</sup>Dico òré ní níhí ñáyíu tnúhu sá cuáhá<sup>n</sup> Jèsús, te nchicú<sup>n</sup>-yu-gá cuáhá<sup>n</sup>, te òré ní quexió-yu núú-gǎ, te ní quehe<sup>n</sup> cuendá ñáhá-gǎ xii-yu, te ní dánèhé ñáhá-gǎ xii-yu nàcuáa ndíhu ndaha ñaha Yá Ndiöxí xii-yu, te ní quide tátna-gá nchaá ñáyíu cùhú.

<sup>12</sup>Te òré sa ní cuaa te ní natacá ndi ùxúú cue téé xica cuu ndìhi-gá núú-gǎ, te ní xáha<sup>n</sup>-güedé xii-gá:

—Sa ní cuu dandàca-n nchaá ñáyíu-a, chi sa ní cuaa, te na quíhí<sup>n</sup>-yu nchaá vehe càa yatni iha, ndìhi nchaá xití ñuu cáá yàtni iha cuaá<sup>n</sup>-yu sá cǎxí-yu, te diu-ni yàcá<sup>n</sup> ndetatú-yu, chi núú ndécú-ó iha ñá túú tnàhí ná lò —càchí-güedé xáha<sup>n</sup>-güedé xii-gá.

<sup>13</sup>Te Jèsús ní xáha<sup>n</sup>-gǎ xii-güedé:

—Mee-ndo chí cuñaha sǎ ná cǎxí-yu —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedé xii-gá:

—Ñá túú nǎgá ndécú ndìhi-ndí, chí úhú<sup>n</sup> duha-ná pàá, ndìhi úú-nǎ chácá ndécú ndìhi-ndí, te diu-ni núú quíhí<sup>n</sup>-ndí cuaa<sup>n</sup>-ndí sá cǎxí-yu —càchí-güedé xáha<sup>n</sup>-güedé xii-gá.

<sup>14</sup>Te xǐnu dǎtná úhú<sup>n</sup> mǐl mee-ni cué téé, te dìi<sup>n</sup> ñáyíu dìhí ndìhi landú. Te Jèsús ní xáha<sup>n</sup>-gǎ xii cue téé xica cuu ndìhi-gá:

—Chí cuñaha na ngóo ndi údico úxí ndi údico úxí-yu ì<sup>n</sup> ì<sup>n</sup> xichi —càchí-gá xáha<sup>n</sup>-gǎ xii-güedé.

<sup>15</sup>Te duca<sup>n</sup> ní quide-güedé, te ní ngóo-yu nchaá-yu. <sup>16</sup>Te dǎtnùní ní quehe<sup>n</sup>-gá ndi úhú<sup>n</sup> pàá-á<sup>n</sup>, ndìhi ndi ndùú chácá-á<sup>n</sup>. Te ní ndacoto-gá andiú, te ní ndacá<sup>n</sup> tǎhú-gǎ núú Yá Ndiöxí, te dǎtnùní ní tǎhú cuèchi-gá pàá-á<sup>n</sup> ndìhi chácá-á<sup>n</sup>, te ní sáha-gá nchaá cue téé xica cuu ndìhi-gá ní dácǎhñu ñaha-güedé xii-yu. <sup>17</sup>Te nchaá-yu ní xexí-yu ní

ndahá xití-yu. Te sáta ní túhú cóhõ-yu te ní nadatácá-güedé nchaa sá ní quendóo, te ní chítú ùxúú tnàhá tídihi mee-ni sá ní quendóo.

**Té Pèlú xáha<sup>n</sup>-dë xii Jèsús sá dífú-gã cúú-gã Cristú**

(Mt. 16:13-19; Mr. 8:27-29)

<sup>18</sup>Te ìí<sup>n</sup> nduu ndècu mee Jesús ndihi cue téé xica cuu ndihi-gá, te càhá<sup>n</sup> ndihi-gá Yã Ndiõxí, te sáta ní yáha ní càhá<sup>n</sup> ndihi-gá Yã Ndiõxí, te ní xicá<sup>n</sup> tnúhú-gã núú-güedë, te xáha<sup>n</sup>-gã xii-güedé:

—¿Yoo cùu yúhú càchí ñáyiú-va? — càchí-gã xáha<sup>n</sup>-gã xii-güedé.

<sup>19</sup>Te ní xáha<sup>n</sup>-güedë xii-gã:

—Davá-yu càchí-yu sá cúú-n ndíi Juàá téé ní xóo dacuàndute ñaha xii ñáyiú, te davá-yu càchí-yu sá cúú-n tã Èliás, te davá-yu càchí-yu sá ìí<sup>n</sup> téé ní xóo càhá<sup>n</sup> tnúhu Yá Ndiõxí ndéé sanaha ní ndoto cùu-n, duha càchí-yu — càchí-güedé xáha<sup>n</sup>-güedë xii-gã.

<sup>20</sup>Te ní xicá<sup>n</sup> tnúhú tucu-gã núú-güedë, te xáha<sup>n</sup>-gã xii-güedé:

—Te nchòhó, ¿yoo sàni iní-ndó cùu-í-i? —càchí-gã xáha<sup>n</sup>-gã xii-güedé.

Te té Pèlú ní xáha<sup>n</sup>-dë xii-gã:

—Yòhó cúú-n Cristú Déhe Dútú Ndiõxí —càchí-dé xáha<sup>n</sup>-dë xii-gã.

**Jèsús càhá<sup>n</sup>-gã sá càhni ñaha-güedé xii-gã**

(Mt. 16:20-28; Mr. 8:30-9:1)

<sup>21</sup>Te ní xáha<sup>n</sup>-gã xii-güedé sá vã yõo ìí<sup>n</sup> cúnaha-güedë yoo cùu-gã. <sup>22</sup>Te ní xáha<sup>n</sup>-gã xii-güedé:

—Yúhú Téé cùu ñaní tnáhá-ndó nchàa-ndo ío cuèhé sã ndóhò-í, chi daquèe tñhú ñáhá cuè téé cùu sacuéhé nũú ñáyiú isràél, ndihi cue dútú cúnùu, ndihi cue téé dàcuaha ñaha xii ñáyiú nchaa tnúhu ní chídó tnúmi ndíi Moisés, te sáá nduu te cahni ñaha-güedë xii-í,

dico nduu úní sá cùú-í te ndoto-í —càchí-gã xáha<sup>n</sup>-gã xii-güedé.

<sup>23</sup>Te dàtnùní ní xáha<sup>n</sup>-gã xii nchaa ñáyiú:

—Nchaa ñáyiú cuíni chitnahá ñáhá xii-í, te xini ñuhu-xi vã cadá-gã-yu sá sání ìní mée-yu, te ìí<sup>n</sup> nduu ìí<sup>n</sup> nduu cada ndee ìní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. <sup>24</sup>Te nchaa ñáyiú cuíni sá ñà túú tnàhí ná yáha cundecu ñuyúú-a cuíta nihnú-yu. Dico nchaa ñáyiú ñá túú yùhú cuèi nándi sá ná yáha-yu cundecú-yu ñuyúú-a sá cuendá-í, te ñáyiú-á<sup>n</sup> nanfí tãhú-yu. <sup>25</sup>Te cuèi nchaandi túhú sá ìó ñuyúú-a na nihí ñáyiú cundecu ndihí-yu, dico núu diu nchaa xíá<sup>n</sup> ná cada cuíta nihnú-yu te ñá túú vëdana nàndíhi-xi sá dúcá<sup>n</sup> ndècu ndihí-yu nchaa xíá<sup>n</sup>. <sup>26</sup>Te nchaa ñáyiú na cùc-aha<sup>n</sup> núú-xi càhá<sup>n</sup> váha cuendá-í ndíhi cuendá nchaa tnúhu-í, te tnàhá yúhú Téé cùu ñaní tnáhá-ndó nchàa-ndo cuc-aha<sup>n</sup> núú-í núú-yu òrè quixi tucu-í ndíhi cue espíritú xínú cuèchi núú Tãtã-í Dútú Ndiõxí, te mee-gã cada cutnùní iní nchaa ñáyiú sá ìo càhnu cuu-í. <sup>27</sup>Te na càchí tnúhu ndáá-í xii-ndo sã ìó dava nchòhó ñáyiú ndècu iha vitna vã cùú-ni-ndo, chi cundecu-ni-ndo ndéé quini-ndó sáá nduu ndíhu ndaha ñaha Yá Ndiõxí xii ñáyiú —càchí-gã xáha<sup>n</sup>-gã xii-yu.

**Ní nadáma dóo Jèsús ndihi núú-gã**

(Mt. 17:1-8; Mr. 9:2-8)

<sup>28</sup>Te ní cuu dàtná úná nduu sá dúcá<sup>n</sup> ní càhá<sup>n</sup> Jèsús, te cuásaá-gã ìí<sup>n</sup> yucu càhá<sup>n</sup> ndihi-gã Yã Ndiõxí, te ndèca-gã té Pèlú, ndihi té Jàcobó, ndihi té Juàá cuásaá. <sup>29</sup>Te nini càhá<sup>n</sup> ndihi-gã Yã Ndiõxí ní nadáma núú-gã ndihi dóo-gã, te dóo-gã-á<sup>n</sup> sùúni ní nduu cuixí<sup>n</sup> víhí, te súúni dàtása<sup>n</sup>-xi. <sup>30</sup>Te òrè-ni-á<sup>n</sup> ní xiní-güedé úú tnàhá cue téé càhá<sup>n</sup> ndihi-gã, te ìí<sup>n</sup>-dé cúú-dë té Moisés, te ingá-dé cúú-dë té Èliás, <sup>31</sup>te súúni

dátasa<sup>n</sup>-xi ní càndéé núú ndécú cuè téé úú-á<sup>n</sup> ndihi-gá, te xĩndatnúhu-güedé nàcuáa ndoho Jèsús cuú-gá ñúú Jerusálén dátaná ní cachí méé-gă. <sup>32</sup>Te té Pèlú ndihi úú-gá-güedé cuíni víhí-güedé cúdú-güedé, dico ní sahní iní-güedé ñá túú ní xĩdí-güedé, te ní dánèhé núú ñáhá-xí xii-güedé sá súúni váha càa núú ndécú Jèsús, ndihi úú cue téé càhá<sup>n</sup> ndihi-gá-á<sup>n</sup>. <sup>33</sup>Te òré sa ndücu ndee cue téé úú-á<sup>n</sup> caca-güedé núhú-güedé, te ní xáha<sup>n</sup> tē Pèlú xii-gá:

—Mèstrú, ¡váha ní cuu sá ndécú-ó iha vitna! Te na dàcaa-ndí úní tnàhá vehe tnuvixi<sup>n</sup>, ì<sup>n</sup> cuu cuèndá-n, te ì<sup>n</sup> cuu cuèndá té Moisés, te ì<sup>n</sup> cuu cuèndá té Èliás —càchí-dé xáha<sup>n</sup>-dē xii-gá.

Dico té Pèlú chí ní mèe-dé ñá túú ní cùtnuní iní-dé nása ndùu tnúhu ní càhá<sup>n</sup>-dē. <sup>34</sup>Te nini càhá<sup>n</sup>-dē ní quexio ì<sup>n</sup> vícò nùú ndécú-güedé-á<sup>n</sup> nĩ dádáhu ñaha-xi xii-güedé, te ní yùhú-güedé sá dúcá<sup>n</sup> nĩ quexio vícò-á<sup>n</sup> nĩ dádáhu ñaha-xi. <sup>35</sup>Te xití vícò-á<sup>n</sup> nĩ tecú ní càhá<sup>n</sup> Yá Ndiòxí, te xáha<sup>n</sup>-gă xii-güedé:

—Tée-a cùu-dé Déhe-í, téé ío cùu iní-í, te tñii-ndo nchàa tnúhu càhá<sup>n</sup>-dē —duha ní xáha<sup>n</sup>-gă xii-güedé.

<sup>36</sup>Te sátá dúcá<sup>n</sup> nĩ càhá<sup>n</sup> Yá Ndiòxí, te ní quide cuèndá-güedé sá mèdii-ná Jèsús ndécú-gă xíá<sup>n</sup>. Te vá yóo ì<sup>n</sup> ní xáha<sup>n</sup>-güedé nàcuáa ndùu nchaa sá ní xiní-güedé-á<sup>n</sup>.

**Jèsús quidé tātna-gá ì<sup>n</sup> téé  
cuechi yìhi ñaha espíritú  
cúndìhi yucu ñávàha**

(Mt. 17:14-21; Mr. 9:14-29)

<sup>37</sup>Te ingá nduu-á<sup>n</sup> cuánuu-gá yucu-á<sup>n</sup> ndihi-güedé, te ío cuéhé ñáyiú cuáhá<sup>n</sup> tnahá ñáhá xii-gá. <sup>38</sup>Te ì<sup>n</sup> téé ñùhu tnahá tnuú-yu-á<sup>n</sup> nĩ càhá<sup>n</sup> níhi-dé, te xáha<sup>n</sup>-dē xii-gá:

—Mèstrú, ío càhá<sup>n</sup> ndàhú-í núú-n nùu vá cùndèe iní-n càda tātna-n dēhe-í, chí ì<sup>n</sup> dñi duha-dé ndécú, <sup>39</sup>te yìhi ñaha es-

píritú cúndìhi yucu ñávàha xii-dé, te òré ná nàtnii ñaha-xi xii-dé, te dàcana saa ñaha-xi, te ndàda ruú<sup>n</sup> ñáhá-xí xii-dé, te tàva-xi tñúu yuhu-dé. Te ío dān-doho ñaha-xi xii-dé, chí ndéé núú ñà cùú-gă, te dàña ñaha tnaa-xi xii-dé. <sup>40</sup>Te sa ní càhá<sup>n</sup> ndàhú-í núú cuè téé xica cuu ndihi-n queñuhu-güedé-xi, dico ñá túú ní ndàcu-güedé —càchí-dé xáha<sup>n</sup>-dē xii-gá.

<sup>41</sup>Te Jèsús ní xáha<sup>n</sup>-gă xii nchaa ñáyiú:

—¡Nchaa nchòhò ñáyiú ndècu ñuyíú-a ío sáa iní-ndó, chí ñá túú cuíni-ndó quindáa iní-ndó Yá Ndiòxí! Te ní cuu vài nduu quide ndee iní-í nchaa sá quidé-ndó, ¿te ná ndéé ama vá dúcá<sup>n</sup>-gă cada-ndo-i? —càchí-gă xáha<sup>n</sup>-gă xii-yu.

Te ní xáha<sup>n</sup>-gă xii téé cùhú déhe-xi-á<sup>n</sup>:  
—Taxi déhe-n iha —cachí-gă xáha<sup>n</sup>-gă xii-dé.

<sup>42</sup>Te òré cuáhá<sup>n</sup> téé cuechi-á<sup>n</sup> nùú-gă, te espíritú cúndìhi yucu ñávàha-á<sup>n</sup> nĩ dándúá ñáhá-xí xii-dé, te sàhni yìhí ñáhá tucu-xi xii-dé ní cùu, dico Jèsús níhi ní càhá<sup>n</sup>-gă ní tenàà-gă espíritú-á<sup>n</sup>, te ní quee ñaha-xi xii-dé, te ní nacúaha cuèndá ñáhá-gă xii-dé tātá-dē. <sup>43</sup>Te nchaa-yu ní cuñúhu-yu sá dúcá<sup>n</sup> nĩ cuu, te ní cachí-yu sá ío càhnu cuu Yá Ndiòxí.

**Jèsús càhá<sup>n</sup> tucu-gá sá cùú-gá**

(Mt. 17:22-23; Mr. 9:30-32)

Te nini xicuñúhu-yu nàcuáa ní quide Jèsús, te ní xáha<sup>n</sup>-gă xii cue téé xica cuu ndihi-gá:

<sup>44</sup>—Nchòhò cundedóho váha-ndo tnúhu na càhá<sup>n</sup>-í-a, te vá ná cuànaa-ndo, chí yùhú Téé cùu ñaní tnàhá-ndó nchàa-ndo sáa ì<sup>n</sup> nduu te cuáha cuèndá ñáhá-güedé xii-í núú cuè téé cùu úhú iní ñáhá —càchí-gă xáha<sup>n</sup>-gă xii-güedé.

<sup>45</sup>Dico cue téé-á<sup>n</sup> ñà túú ní tècú tnùní-güedé nàcuáa ndùu tnúhu ní xáha<sup>n</sup>-gă xii-güedé, te duca<sup>n</sup> ní yáha-güedé, chí duca<sup>n</sup> tnàhí ní

cachí-gá sá vă tècú tnùnì-güedé, te ní yùhú-güedé cacadá<sup>n</sup> tnùhú-güedé núú-gă nâsa ndùu tnùhu ní xâha<sup>n</sup>-gă xii-güedé.

**Cue tée ndücu tnùhu núú tnâhá nùu ndëdacâa-güedé io-gá cúnüu**

(Mt. 18:1-5; Mr. 9:33-37)

<sup>46</sup>Te cue tée xica cuu ndihi-gá ní ngüíta-güedé ndátñuhu-güedé nùu ndëdacâa-güedé io-gá cúnüu, <sup>47</sup>dico Jèsús ní cutnùnì iní-gá nâcuâa sâni iní-güedé nùu ní cana-gă iï<sup>n</sup> té lihli, te ní sanu tnâi ñaha-gă iï<sup>n</sup> xio dâñi-gă. <sup>48</sup>Te ní xâha<sup>n</sup>-gă xii-güedé:

—Nchaa ñâyüu na quèhe<sup>n</sup> cuendá iï<sup>n</sup> té lihli dàtná té lihli-a cuendá sá ñhúhú ìní ñâhă-yu xii-í ñâ, te cada iní-yu sá yùhú ní quehe<sup>n</sup> cuendá-yu, te nchaa ñâyüu na quèhe<sup>n</sup> cuendá ñâhá xii yùhú, te cada iní-yu sá tnâhá Tătà-í Dútú Ndiöxí Yaá ní tendaha ñaha xii-í véxi-í ñuyú-a ní quehe<sup>n</sup> cuendá-yu. Te nchaa ñâyüu ío ndâhú iní-xi mee-ni xinu cuechí-yu, ñâyüu-á<sup>n</sup> ío-gá cúnüu-yu —câchí-gá xâha<sup>n</sup>-gă xii-güedé.

**Ñâyüu ñâ túú cùu úhú iní ñâhá cündihí ñahá-yu xii-o**

(Mr. 9:38-40)

<sup>49</sup>Te té Juáa diu-ni iï<sup>n</sup> tée xica cuu ndihi-gá ní xâha<sup>n</sup>-dë xii-gă:

—Mèstrú, ní xiní-ndí iï<sup>n</sup> tée càcunehe ñaha-dé xii-n, te ndëñuhu-dé espíritú cündihí yucu ñávâha yìhi ñaha xii ñâyüu, te nchúhú ñâ túú ní dàña-gă-ndí duca<sup>n</sup> càda-dé, chi ñâ túú xica cuu ndihi ñaha-dé xii-o —câchí-dé xâha<sup>n</sup>-dë xii-gă.

<sup>50</sup>Te Jèsús ní xâha<sup>n</sup>-gă xii-dé:

—Daña-ndo na càda nahi-dé ní cùu, chi ñâyüu ñâ túú cùu úhú iní ñâhá xii-o te cündihí ñahá-yu —câchí-gă xâha<sup>n</sup>-gă xii-dé.

**Jèsús càhá<sup>n</sup>-gá dóho té Jàcobó ndihi té Juáa**

<sup>51</sup>Te òré sa ta cùyatni ndaa Jesús andüu, te ní xica-gă cuáhâ<sup>n</sup>-gă ñuú Jerusalén, chi duu<sup>n</sup> duu<sup>n</sup> ní sani iní-gă sá quihí<sup>n</sup>-gă. <sup>52</sup>Te ní tendaha-gă cue tée yòdo nuu cuáhâ<sup>n</sup>, te ní quexio-güedé iï<sup>n</sup> ñuú, te ñuú-á<sup>n</sup> yíndëhu-xi distritú Sãmariá, te ndücu-güedé iï<sup>n</sup> vehe cada túha-güedé òré quexio-gă. <sup>53</sup>Dico ñâyüu Sãmariá ñâ túú ní cuínì-yu cuañaha nùu-yu vehe, chi cuendá sá ñi cutnùnì iní-yu sá ìchi yâha-ni-gă quihí<sup>n</sup>-gă ñuú Jerusalén. <sup>54</sup>Te sá dúcá<sup>n</sup> ní quidè-yu ñâ túú ní cuínì-yu cuañaha nùu-yu vehe ndetatú-gă, núu ní xâha<sup>n</sup> tē Jàcobó ndihi té Juáa cue tée xica cuu ndihi-gă xii-gă:

—Mèstrú, ¿cuínì-n càcá<sup>n</sup> táhú-ó nùú Yă Ndiöxí cuendá dangava-gă ñuhú danâa-gă ñâyüu ñuú-a dàtná ní quide té Èliás tée ní xóo cáhá<sup>n</sup> tnùhu Yá Ndiöxí ndéé sanaha-ă<sup>n</sup>? —câchí-güedé xâha<sup>n</sup>-güedé xii-gă.

<sup>55</sup>Te Jèsús ní nchócótó-gă núu-güedé, te ñihi ní cáhá<sup>n</sup>-gă dóho-güedé, te xâha<sup>n</sup>-gă:

—Nchòhó, chi ñâ túú vâha iní-ndó te núu duca<sup>n</sup> càhá<sup>n</sup>-ndó. <sup>56</sup>Chi yùhú Tée cùu ñanì tnâhá-ndó nchâa-ndo véxi-í sá dâcâcu nihnu-í ñâyüu, te ñâ dñú véxi-í sá dâcuíta nihnu-í-yu —câchí-gă xâha<sup>n</sup>-gă xii-güedé.

Te sâtá dúcá<sup>n</sup> ní xâha<sup>n</sup>-gă, te ní xica-gă cuáhâ<sup>n</sup>-gă ndihi-güedé ingá ñuú.

**Ñâyüu cuínì chitnahá ñâhá xii Jesús ní cùu**

(Mt. 8:19-22)

<sup>57</sup>Te ñùhu Jesús ichi ndihi-güedé, te iï<sup>n</sup> tée ní xâha<sup>n</sup>-dë xii-gă:

—Mèstrú, cuínì-í canchicú<sup>n</sup> ñâhá-í xii-n ndëni ní cuu na quihí<sup>n</sup>-n —câchí-dé xâha<sup>n</sup>-dë xii-gă.

<sup>58</sup>Te Jèsús ní xâha<sup>n</sup>-gă xii-dé:



—Nchaa ñúcuí chi ndècu yaú cúú vèhe-güedi saquihí-güedi, te nchaa quiti ndàva caa tacá-güedi díquí yutnu, dico yúhú Tée cùu ñaní tnáhá-ndó nchàa-ndo chi ñá túú ndèe cáá vèhe-í ñuyú-a ndetatú-í —càchí-gá xáha<sup>n</sup>-gá xii-dé.

<sup>59</sup> Te dàtnùnì ní xáha<sup>n</sup> tùcu-gá xii ingá-dé:

—Yòhò taquixi chitnahá ñáhá-n xii-í —càchí-gá xáha<sup>n</sup>-gá xii-dé.

Dico tée-á<sup>n</sup> ñí xáha<sup>n</sup>-dè xii-gá:

—Mèstrú, dañá na nùhú-í cundetu-í cuú tătá-í te chindúxi-í-dé, te dàtnùnì quixi-í chitnahá ñáhá dùca<sup>n</sup>-ná-í xii-n —càchí-dé xáha<sup>n</sup>-dè xii-gá.

<sup>60</sup> Te Jèsús ní xáha<sup>n</sup>-gá xii-dé:

—Daña ñáyiú ñá túú sàndáá iní ñáhá xii-í ná chindúxi tnàha meé-yu, chi ñáyiú-á<sup>n</sup> cúú-yu dàtná ñáyiú ní xíhí cuèi ndècu-ní-yu núú ñuyú-a. Te yòhò taquixi, chi quíhí<sup>n</sup>-n dànehé-n ñáyiú nàcuáa cada Yá Ndiòxí ndíhu ndaha ñàha-gá xii-yu —càchí-gá xáha<sup>n</sup>-gá xii-dé.

<sup>61</sup> Te ní xáha<sup>n</sup> tùcu ingá-dé xii-gá:

—Mèstrú, cuiní-í chitnahá ñáhá-í xii-n, dico díhna-gá dañá na nùhú-í cada ndee iní-í nchaa ñáyiú ndècu vehe-í, te dàtnùnì quixi-í —càchí-dé xáha<sup>n</sup>-dè xii-gá.

<sup>62</sup> Te Jèsús ní xáha<sup>n</sup>-gá:

—Nchaa ñáyiú ní sàndáá iní ñáhá xii-í, te núú vá cànchícú<sup>n</sup> nihnu ñáhá-yu ni yùhu ni iní-yu, te cúú-yu dàtná ì<sup>n</sup> tée ní tnií ndaha làtú cutu-dé, chi tée-á<sup>n</sup> núu na ndàcoto-dé ndàa sátá-dè òré xítú-dé, te vá quíhí<sup>n</sup> ndáá làtú-dé duca<sup>n</sup> sàtnahá-xi cúú-yu. Te cue ñáyiú chi vá cúú ndáá-yu nàcuáa ndíhu ndaha-gá dava-gá ñáyiú—càchí-gá xáha<sup>n</sup>-gá xii-dé.

**Jèsús téndàha-gá únídico úxí cue tée quíhí<sup>n</sup> cáhá<sup>n</sup> tnúhu-gá núú ñáyiú**

**10** Te sátá dúcá<sup>n</sup> ñí cuu, te ní cáxi tucu Xítóhó Jesucrístú únídico úxí cue tée codonù-güedé quíhí<sup>n</sup>-güedé

cáhá<sup>n</sup>-güedé tnúhu-gá nchaa ñúú, ndíhi nchaa dava-gá xichi núú quíhí<sup>n</sup>-gá, te ndí ndúú ndí ndúú-güedé tendaha ñàha-gá xii-güedé quíhí<sup>n</sup>-güedé. <sup>2</sup> Te cùmání-gá caca-güedé, te ní xáha<sup>n</sup>-gá xii-güedé:

—Nchòhò xìnì-ndó sá òré ná sáa yóó cuu nchaa sá xítú ñáyiú, te ío vai cuu. Te na càchí tnúhu ndáá-í xii-ndo sá dàtná vai sá xítú ñáyiú cùu, duca<sup>n</sup> ío vai ñáyiú cùmání cundedóho tnúhu Yá Ndiòxí te ío sacú ñáyiú dàcuaha ñàha xii-yu tnúhu-gá, núú xíá<sup>n</sup> xínì ñùhu-xi cáca<sup>n</sup>-ndó núú Yá Ndiòxí cuendá sá ná dàcahá<sup>n</sup>-gá iní ñáyiú cáhá<sup>n</sup>-yu tnúhu-gá núú ñáyiú cùmání cundedóho tnúhu-gá. <sup>3</sup> Te nchòhò cúú-ndó dàtná cue mbéé cue quiti cuáhá<sup>n</sup> núú yíhí cuè quiti déé<sup>n</sup>. Chi tendaha ñàha-í xii-ndo quíhí<sup>n</sup>-ndó núú xíndecu nchaa ñáyiú cuihna iní-xi. <sup>4</sup> Te vá cànèhe-ndo ñunu cuhu<sup>n</sup> ndachiu<sup>n</sup>-ndo, ni núú cúhú<sup>n</sup> díhú<sup>n</sup>-ndó, te ni vá cádá tùha-gá-ndó chàu-ndó chi díu-ni chàu yíhí-ndó-á<sup>n</sup> xíá<sup>n</sup>-ni quíhí-ndo, te vá ío cuyaa-ndo cáhá<sup>n</sup> ndíhi-ndo ñáyiú ñùhu ichi. <sup>5</sup> Te òré ná quèxio-ndo ì<sup>n</sup> vehe, te duha cúñaha-ndo xii ñáyiú dii vèhe-xi-á<sup>n</sup>: “Yá Ndiòxí chindee ñàha-gá xii-ndo ío váha cuu iní-ndó cùndecu-ndo”, duha cúñaha-ndo xii-yu. <sup>6</sup> Te núú ñáyiú-á<sup>n</sup> ñí nduu táhù-yu sá cùndècu váha iní-yu núú Yá Ndiòxí, te cuu-xi sá váha sá cúú-xi-yu tnúhu cúñaha-ndo-á<sup>n</sup>, dico núú ñá túú ní cáhá<sup>n</sup> váha ndíhi ñáhá-yu xii-ndo, te cúñaha-ndo sá vá cúú-xí sá váha sá cúú-xí-yu. Dico núú ní cáhá<sup>n</sup> váha ndíhi ñáhá-yu xii-ndo, <sup>7</sup> te díu-ni vehe-á<sup>n</sup> cada vehe tnaa-ndo, te ñá túú-gá ndèe nducu-ndo vèhe cundecu-ndo, te caxi-ndo nchàa sá ná tàxí-yu, chi nchaa cue tée quide chiu<sup>n</sup> dacuítí<sup>n</sup> tàù-güedé sá nihí-güedé sá cáxi-güedé cuendá nchaa chiu<sup>n</sup> quide-güedé. <sup>8</sup> Te núú ní sáá-ndó ì<sup>n</sup> ñúú núú ñí quehe<sup>n</sup> cuendá ñáhá-yu xii-ndo, te caxi-ndo nchàa sá ná tàxí-yu. <sup>9</sup> Te cada tátna-ndo cuè ñáyiú cùhú xín-

decu ñuú-á<sup>n</sup>, te cúñaha-ndo xii-yu sá sà ní sáá nduu ndíhu ndaha ñàha Yá Ndiöxí xii-yu. <sup>10</sup>Dico núu ní sáá-ndó ñ<sup>n</sup> ñuú núú ñà túú ní quèhe<sup>n</sup> cuendá ñáhã-yu xii-ndo, te tñii-ndo ìchi cuita cáhá<sup>n</sup>-ndó cuáhã<sup>n</sup>, te cúñaha-ndo xii-yu: <sup>11</sup>“Ndéé tícã chúhmá ñí tñíi sáhã-ndí ñuú-ndó ñàquidí-ndí, te duha quide-ndí cuendá cutnúní iní-ndó sã ñà túú quide váha-ndo ndècu-ndo. Dico cunaha-ndo sã sà ní sáá nduu ndíhu ndaha ñàha Yá Ndiöxí xii-ndo ni cùu”, duha cúñaha-ndo xii-yu. <sup>12</sup>Te na càchí tñúhu-í xii-ndo sã ná sáá nduu càda ndáá Yá Ndiöxí cuèchi nchaa ñáyiú, te ñáyiú ñuú-á<sup>n</sup> ïo-gá ndohó-yu dàvã-á<sup>n</sup> dàcúxí ñáyiú ñuú Sò-domá —càchí-gá xáha<sup>n</sup>-gã xii-güedé.

**Cuendá ñáyiú dava ñuú ñà túú sàndáá iní tñúhu Xítohá Jesucristú**

(Mt. 11:20-24)

<sup>13</sup>Te Jèsús xáha<sup>n</sup>-gã xii ñáyiú dava ñuú ñà túú sàndáá iní tñúhu-gá:

—¡Ndàhú nchòhó cue ñáyiú ñuú Corazín! ¡Te ndàhú nchòhó cue ñáyiú ñuú Bètsaidá! Chi núu dìcò ñuú Tírú, ndíhi ñuú Sidón ní quide-í nchaa sá vã yõo tñàhí ndàcu cada datná ní quide-í ñuú-ndó-á<sup>n</sup> ñí xiní-ndó ñá, te sá ndéé ama-gá cuihnú-yu dóó ndàhú, te cunucóo-yu núú yáá cuendá sá ndíxí cuèchi iní-yu sá ñà túú quide váha-yu ni cùu. <sup>14</sup>Dico sáá nduu te ïo-gá dandòho ñàha Yá Ndiöxí xii-ndo dàcúxí ñáyiú ñuú Tírú, ndíhi ñáyiú ñuú Sidón. <sup>15</sup>Te nchòhó ñáyiú ñuú Capèrnaúm quide iní-ndó sã sà cuándaa-ndo àndíu, dico ñáhã chi núú ùhú núú ndàhú cundecu-ndo —duha ní xáha<sup>n</sup>-gã xii nchaa ñáyiú ñuú-á<sup>n</sup>.

<sup>16</sup>Te xáha<sup>n</sup> tùcu-gá xii cue tée tendaha-gã quíhí<sup>n</sup> cáhá<sup>n</sup> tñúhu-gá-á<sup>n</sup>:

—Nchaa ñáyiú na cùndedóho nchaa tñúhu cáhá<sup>n</sup>-ndó, te cada iní-yu sá yúhú càhá<sup>n</sup>-í ndèdóho-yu, te nchaa ñáyiú na dàquee tíhú ñáhã xii-ndo, te tñàhã yúhú

daquèe tíhú-yu, te nchaa ñáyiú duca<sup>n</sup> na dàquee tíhú ñáhã xii-í, te tñàhã Tătã-í Dútú Ndiöxí Yáá ní tendaha ñàha xii-í véxi-í ñuyíú-a dàquee tíhú-yu —càchí-gá xáha<sup>n</sup>-gã xii-güedé.

Te duca<sup>n</sup> te ní xica-güedé cuáhã<sup>n</sup>-güedé.

**Ní nasáá cue tée únídico úxí ní tendaha Jèsús ní sáhã<sup>n</sup> ní cáhá<sup>n</sup> tñúhu-gá núú ñáyiú**

<sup>17</sup>Te cue tée únídico úxí-á<sup>n</sup> ñí nasáá-güedé te súuní cùdíí iní-güedé, te xáha<sup>n</sup>-güedé xii Jèsús:

—Mèstrú, ndéé espíritú cùndíhi yucu ñávãha sàndáá iní ñáhã-xí xii-ndí òré cácu nèhe ñaha-ndí xii-n —càchí-güedé xáha<sup>n</sup>-güedé xii-gá.

<sup>18</sup>Te Jèsús ní xáha<sup>n</sup>-gã:

—Ndáá càhá<sup>n</sup>-ndó chi yúhú ní xiní-í cùtnàhã ní xíta nihnu yucu ñávãha, chi dàtná ní ngava ñí tasa<sup>n</sup> ñí ngava-xi ñuyíú-a. <sup>19</sup>Te dàtná quidé-ndó òré xènihnu-ndo ñí<sup>n</sup> cóó, àdí ñí<sup>n</sup> nchacua duca<sup>n</sup> cada-ndo daquee tíhú-ndó yùcu ñávãha, te ñà túú ñà cada ñaha-xi xii-ndo, chi ní taxi-í tñúhu ndee iní ndécú ndíhi-ndo. <sup>20</sup>Dico vá cùdíí iní-ndó cuendá sá sàndáá iní ñáhã cuè espíritú cùndíhi yucu ñávãha xii-ndo, chi cudíí iní-ndó cuendá sá sà yodo tñuní-ndó núú tütú Yá Ndiöxí Yáá ndécú àndíu —cachí-gá xáha<sup>n</sup>-gã xii-güedé.

**Jèsús cùdíí iní-gá**

(Mt. 11:25-27; 13:16-17)

<sup>21</sup>Te òré-á<sup>n</sup> súuní ñí quide díí iní ñáhã Espíritú Yá Ndiöxí xii Jèsús, te ní xáha<sup>n</sup>-gã xii Yá Ndiöxí:

—Yòhó Tătã-í Dútú Ndiöxí, ïo chìñuhu ñaha-í xii-n chi díu-n tàxi tñuní-n àndíu ndíhi ñuyíú-a, te dànehé-n cuè ñáyiú nchaa tñúhu váha, te díu-ni ñáyiú-á<sup>n</sup> cùú-yu ñáyiú ñà túú cùtnuní iní-xi nchaa tñúhu càhá<sup>n</sup> cue tée túha, te nchaa tñúhu càhá<sup>n</sup>-n-ã<sup>n</sup> ñà túú ní dàtúu-n núú ñáyiú

càchí sá ío túha, te ío váha sàá díquí-xi. Te duca<sup>n</sup> quide-n, chi duca<sup>n</sup> cuiní-n cùn-duu —cachí-gá xáha<sup>n</sup>-gã xii Yá Ndiöxí.

<sup>22</sup> Te xáha<sup>n</sup> tùcu-gá xii cue téé ní nasáá-á<sup>n</sup>:

—Mee Tàtá-í Dútú Ndiöxí ní cachí-gá sá cùnùu-í núu nchàa-ndí túhú sá ío. Te vá yõ ì<sup>n</sup> xìní nàcuáa sàni iní yúhú Déhe Dútú Ndiöxí, chi ì<sup>n</sup>dii díf-ni mee-gã xìní-gá nàcuáa sàni iní-í. Te duca<sup>n</sup> ì<sup>n</sup>dii-ni yúhú xìní-í nàcuáa sàni iní mée-gã, te nchaa ñáyu càchí iní-í sá quini-yu nàcuáa sàni iní Tàtá-í Dútú Ndiöxí te xitnùhu-í-yu, te vá yõ ì<sup>n</sup>-gã xìní nàcuáa sàni iní-gá chi ñu-ni ñáyu duca<sup>n</sup> xitnùhu-í-á<sup>n</sup> xìní-yu —càchí-gá xáha<sup>n</sup>-gã xii-güedé.

<sup>23</sup> Te ní nchócótó-gã núu xĩndecu mee-ni cuè téé xica cuu ndihi-gá, te ní xáha<sup>n</sup>-gã xii-güedé:

—Váha táhú nchòhó ndihi nchaa ñáyu ndèhe nchaa nacuáa quide-í vitna. <sup>24</sup> Chi ío cuéhé cue téé ní xóo cáhá<sup>n</sup> tnúhu Yá Ndiöxí ndéé sanaha, ndihi cue téé ní xĩndaha ñàha xii ñáyu ní cuiní-güedé cundehe-güedé nchaa sá ndéhé-ndó quide-í vitna, te ñá túú ní xìní-güedé, te ní cuiní-güedé cundedóho-güedé nchaa tnúhu càhá<sup>n</sup>-í ndèdóho-ndo vitna, te ñá túú ní xĩndedóho-güedé —càchí-gá xáha<sup>n</sup>-gã xii-güedé.

### Nàcuáa ní quide ì<sup>n</sup> téé distritú Sàmariá

<sup>25</sup> Te ì<sup>n</sup> téé dàcuaha ñaha xii ñáyu nchaa tnúhu ní chídó tnùní ndíi Moisés ní ndacuñí-dé xító ndèé-dé Jèsús nũu nása cunduu tnúhu cáhá<sup>n</sup>-gã, te xáha<sup>n</sup>-dë xii-gá:

—Mèstrú, ¿ná cúú sã cáda-í cuendá nduu táhù-í cundecu-í ndihi Yá Ndiöxí ni caa ni quíhí<sup>n</sup>-i? —càchí-dé xáha<sup>n</sup>-dë xii-gá.

<sup>26</sup> Te Jèsús ní xáha<sup>n</sup>-gã xii-dé:

—Cuiní-í cachí tnúhu-n nása càhá<sup>n</sup>-xi núu tùtú ndíi Moisés —càchí-gá xáha<sup>n</sup>-gã xii-dé.

<sup>27</sup> Te xáha<sup>n</sup>-dë xii-gá:

—Ndíi Moisés càchí ndíi núu tùtú ndíi: “Cuu iní-ndó Dútú Ndiöxí Yaa cúu Ndiöxí-ndó nì yuhu ni iní-ndó, te cani iní-ndó càda-ndo datná cuiní mée-gã, te mee-ni tnúhu váha cani iní-ndó nàcuáa cuu vii cuu váha-ndo nũú-gã, te coo iní-ndó cùu iní-ndó-gã. Te cuu iní-ndó tnàha ñáyu-ndo datná cúu iní-ndó mée-ndo”, duha càchí ndíi núu tùtú ndíi —càchí-dé xáha<sup>n</sup>-dë xii-gá.

<sup>28</sup> Te Jèsús ní xáha<sup>n</sup>-gã:

—Váha-ni càhá<sup>n</sup>-n, te núu cada-n nàcuáa càhá<sup>n</sup>-n á<sup>n</sup>, te nduu táhú-n cundecu-n ndihi Yá Ndiöxí ni caa ni quíhí<sup>n</sup> —càchí-gá xáha<sup>n</sup>-gã xii-dé.

<sup>29</sup> Te sá dúcá<sup>n</sup> nĩ xáha<sup>n</sup> Jèsús xii-dé nũu ndùcu-dé nàcuáa cada-dé cácu nihnu-dé núu tnúhu ní cáhá<sup>n</sup>-dé, te ní xícá<sup>n</sup> tnúhú-dé núú-gã, te xáha<sup>n</sup>-dë:

—¿Yoo cùu tnaha ñáyu-í-i? —càchí-dé xáha<sup>n</sup>-dë xii-gá.

<sup>30</sup> Te Jèsús ní cani-gá ì<sup>n</sup> cuendú núú-dë nàcuáa tecú tnùní-dé tnúhu-gá, te xáha<sup>n</sup>-gã:

—Ì<sup>n</sup> téé ní ndee-dé ñuú Jerusalén ñúhú-dë ichi cuánuu-dé cuáhá<sup>n</sup>-dé ñuú Jericó, te ní quee ñadúhú ichi-dé ní dúhú-güedé dóo ñhnu-dë, ndihi nchaa sá néhé-dë, te ní caniha vihi-güedé, te nchito ñu-ná-dé ní dáñá ñaha-güedé te cuáhá<sup>n</sup>-güedé. <sup>31</sup> Te mei òré cátuu-dé-á<sup>n</sup> ñúhú ì<sup>n</sup> dútú ichi-á<sup>n</sup>, te òré ní xìní ñáhá dútú-á<sup>n</sup> xii-dé, te ì<sup>n</sup> xio-ni ní xócóo ndee-dé ní yáha-dé. <sup>32</sup> Te ñuuhú tucu ì<sup>n</sup> téé cùu levítá ichi-á<sup>n</sup>, te òré ní xìní-dé téé-á<sup>n</sup> cátuu-dé, te ñu-ni duca<sup>n</sup> nĩ quide-dé ì<sup>n</sup> xio-ni ní xócóo ndee-dé ní yáha-dé. <sup>33</sup> Dico ì<sup>n</sup> téé distritú Sàmariá ñúhú tùcu-dé ichi-á<sup>n</sup> te òré ní xìní-dé téé-á<sup>n</sup> cátuu-dé, te ní cundàhú iní ñáhá-dë. <sup>34</sup> Te ní sáhá<sup>n</sup>-dé núu cátuu téé-á<sup>n</sup>, te ní quide tátua-dé nchaa núu ní

nícuèhé xii téé-á<sup>n</sup> ní chihi-dé yúcu, te ní dácútú-dě. Te dātñuní ní dácáá ñàha-dé sáta quiti-dé, te ndèca ñàha-dé cuhá<sup>n</sup> ìí<sup>n</sup> vehe núú sácõo cue ñáyiú sácúhu<sup>n</sup> ichi, te yàcá<sup>n</sup> ní xito ñàha-dě. <sup>35</sup>Te ingá nduu òré ní nucúhu<sup>n</sup> téé Samaritánú-á<sup>n</sup> ichi, te ní tava-dé úú díhú<sup>n</sup> denàriú, te ní sáha-dé téé cùu xítòhò vehe-á<sup>n</sup>, te ní xáha<sup>n</sup>-dě: “Coto saú-n tée-a, te núú ñá ní tñàhá díhú<sup>n</sup> sá ní taxi-í, te cuèi na dàndoñuhu-gá-n díhú<sup>n</sup>-n cuendá-dé, te òré ná quixi tucu-í te nacháhu-í”, duha ní xáha<sup>n</sup> tée Samaritánú-á<sup>n</sup> xii téé dii vèhe xía<sup>n</sup>. <sup>36</sup>Te vitna cáhá<sup>n</sup>, te núú ndě-dacàa cue téé úní-á<sup>n</sup> cúú-güedě téé váha cùu iní-güedé tñàha ñáyiú-güedé — cächí-gá xáha<sup>n</sup>-gã xii téé dàcuaha ñàha xii-í ñáyiú-á<sup>n</sup> nchaa tñúhu ní chídò tñuní ndíi Moisés.

<sup>37</sup>Te téé-á<sup>n</sup> ní xáha<sup>n</sup>-dě xii-gá:

—Tée ní cundàhú iní ñáhá xii téé ní dánícuèhé ñáhá cuè ñadúhú-á<sup>n</sup>, téé-á<sup>n</sup> cúú-dě téé cùu iní tñàha ñáyiú-xi — cächí-dé xáha<sup>n</sup>-dě xii-gá.

Te Jèsús ní xáha<sup>n</sup>-gá:

—Cuáhá<sup>n</sup> te diu-ni duca<sup>n</sup> càda-n tñahá-n — cächí-gá xáha<sup>n</sup>-gã xii-dě.

### Jèsús ndécú-gá vehe tá Mårta ndíhi tá Måría

<sup>38</sup>Te Jèsús ñúhú-ni-gã ichi cuhá<sup>n</sup>-gá ndíhi cue téé xica cuu ndíhi-gá, te ní sáá-gá ìí<sup>n</sup> ñuú líhli, te xía<sup>n</sup> ní quee ìí<sup>n</sup> xíchí nání Mårta ní cáhá<sup>n</sup> ñáhá-xí xii-gá vehe-xi. <sup>39</sup>Te tá Mårta ndècu ìí<sup>n</sup> cúhú-xi nàni-xi Mariá, te xíchí-á<sup>n</sup> ní ngóo-xi núú Jèsús ndèdóho-xi nchaa tñúhu càhá<sup>n</sup>-gá. <sup>40</sup>Te tá Mårta-á<sup>n</sup> ndíhi vihi-ni iní-xi quide-xi chiu<sup>n</sup>-xi, te ní sáhá<sup>n</sup>-xi núú Jèsús, te ní xáha<sup>n</sup>-xi:

—Mèstrú, ¿náa ñá túú tñàhí sàni iní-n sá ní dándõ ndaha ñàha cùhú-í nchaa chiu<sup>n</sup>-á<sup>n</sup>? Cúñaha sàú ná quixi-xi chindee ñàha-xi — cachí-xi xáha<sup>n</sup>-xi xii-gá.

<sup>41</sup>Dico Jèsús ní xáha<sup>n</sup>-gá:

—Yòhó Mårta, ñúhu tneñu vihi-n, te ndíhú iní-n sá ío vài chiu<sup>n</sup>-n ñúhu, <sup>42</sup>dico xini ñúhu vihi-gá-xi cundedóho-n tñúhu càhá<sup>n</sup>-í, chi tá Måría-a sa ndèdóho-xi tñúhu-í, te vá yõo ìí<sup>n</sup> ndacu xocàni tñúhu-í sá ní ngúndecu ndíhi-xi — cächí-gá xáha<sup>n</sup>-gã xii-xi.

### Jèsús dánèhé-gá cue téé xica cuu ndíhi-gá nàcuáa cáhá<sup>n</sup> ndíhi-güedé Yá Ndiõxí

(Mt. 6:9-15, 7:7-11)

**11** Te ìí<sup>n</sup> nduu càhá<sup>n</sup> ndíhi Jèsús Yá Ndiõxí ìí<sup>n</sup> xichi, te sáta ní yáha ní cáhá<sup>n</sup> ndíhi-gá Yá Ndiõxí, te ní xáha<sup>n</sup> ìí<sup>n</sup> téé xica cuu ndíhi-gá xii-gá:

—Mèstrú, danèhé ñáhá xii-ndí nása cáhá<sup>n</sup> ndíhi-ndí Yá Ndiõxí dātñá ní quide ndíi Juáá ní dánèhé ndíi cue téé ní xica cuu ndíhi ndíi — cächí-dé xáha<sup>n</sup>-dě xii-gá.

<sup>2</sup>Te Jèsús ní xáha<sup>n</sup>-gã:

—Òré cáhá<sup>n</sup> ndíhi-ndo Yá Ndiõxí, te cachí-dó:

Yòhó tātá-ndí Dútú Ndiõxí Yáá ndécú àndiu, nchaa ñáyiú na càhá<sup>n</sup>-yu sá cúú-n Yáá ío yíñúhu.

Te xicá<sup>n</sup> táhú-ndí núú-n sá ná sàá nduu ndíhu ndàhá-n-yu.

Te cada-n dātñá cächí iní-n ñùyíú-a dātñá quidé-n àndiu.

<sup>3</sup>Te xicá<sup>n</sup> táhú-ndí núú-n sá táxí-n sá cándèca iní-ndí ìí<sup>n</sup> nduu ìí<sup>n</sup> nduu.

<sup>4</sup>Te cada càhnu iní-n nchàa yíca cuèchi-ndí, chi tñàhá nchúhú quidé càhnu iní-ndí nchaa sá quidé ñàha tñaha ñáyiú-ndí.

Te vá dāñá-n dācāhá<sup>n</sup> ñáhá yùcu ñávàha xii-ndí cada-ndí sá ñà túú vāha, chi coto ñàha-n xii-ndí cuendá sá vá dúcá<sup>n</sup> càda ñàha-xi,

duha cáhá<sup>n</sup>-ndó

—cächí-gá xáha<sup>n</sup>-gã xii-güedé.

<sup>5</sup>Te Jèsús ní xáha<sup>n</sup> tucu-gá:

—Te núu ndédacàa nchohó ndécú ì<sup>n</sup> tée tñaha tnúhu ndìhi-ndo, te dava níú cuáhá<sup>n</sup>-ndó vèhe-dé, te òré ní quexìo-ndo, te xáha<sup>n</sup>-ndo xii-dé: “Véxi-í núu vá cùndèe iní-n tàxi nuu-n úní tñahá pàá, <sup>6</sup> chi ì<sup>n</sup> tée xìní tñahá ndìhi-í ñúhú-dě ichi ní quexìo-dé vehe-í, te ñá túú tñahí ná cuáñaha-í caxi-dé”, quesaha-ndo cùñaha-ndo. <sup>7</sup> Te tée-á<sup>n</sup> cáhá<sup>n</sup>-dé ndéé xití vehe-dé, te cùñaha-dě xii-ndo: “Vá dásàtú nihá-n chi ndèdí yuyèhe-í, te càa-í ndìhi cue landú-í, te vá cúú ndàcòo-í taxi-í sá cuiní-n”, quesaha-dě cùñaha-dě xii-ndo. <sup>8</sup> Te na càchí tnúhu-í xii-ndo sá cuèi cùu-dé tée tñaha tnúhu ndìhi-ndo, dico duca<sup>n</sup> cùñaha-dě xii-ndo, dico dacuitíí sá ndácòo-dé taxi-dé sá cuiní-ndó cuendá sá vǎ dásàtú-gá-ndó iní-dé. <sup>9</sup> Te yúhú càchí-í xii-ndo sá cǎcǎ<sup>n</sup>-ndó núu ná cuiní-ndó núú Yǎ Ndiòxí te taxi-gá. Te vá dáñá ndéé-ndó cǎcǎ<sup>n</sup>-ndó núú-gǎ núu ná cuiní-ndó, te duca<sup>n</sup> te níhí-ndó. Te cada iní-ndó sǎ ní quexìo-ndo vehe ì<sup>n</sup> tñaha ñáyiu-ndo te ní cǎhá<sup>n</sup>-ndó, te ñáyiu-á<sup>n</sup> ní tedóho ñahá-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yǎ Ndiòxí tedóho ñaha-gǎ xii-ndo, te taxi-gá sá ná cǎcǎ<sup>n</sup>-ndó núú-gǎ. <sup>10</sup> Chi nchaa ñáyiu duca<sup>n</sup> xíquide te Yǎ Ndiòxí tédóho ñaha-gǎ xii-yu nihí-yu sá cuiní-yu. Te ñiu-ni duca<sup>n</sup> tucu nchaa ñáyiu na cǎcǎ<sup>n</sup> núú-gǎ ì<sup>n</sup> sá cuiní-yu, chi sǎñaha-gǎ sá xicǎ<sup>n</sup>-yu núú-gǎ. Te ñiu-ni duca<sup>n</sup> tucu níhí nchaa ñáyiu ñá túú dàña ndéé xicǎ<sup>n</sup> núú Yǎ Ndiòxí sá cuiní-yu, chi níhí-yu.

<sup>11</sup> Te nchòhó cue tée cùu tátá ñá túú cùndee iní-ndó cuáhaha-ndo cuè déhe-ndo ì<sup>n</sup> yúú caxi-güexi òré xicǎ<sup>n</sup>-güexi ì<sup>n</sup> pǎá núú-ndó cǎxi-güexi, te ní ñà túú cùndee iní-ndó cuáñaha-ndo ì<sup>n</sup> cóo caxi-güexi òré xicǎ<sup>n</sup>-güexi ì<sup>n</sup> chácá núú-ndó cǎxi-güexi. <sup>12</sup> Te ní ñà túú cùndee iní-ndó cuáñaha-ndo ì<sup>n</sup> nchacua caxi-güexi oré xicǎ<sup>n</sup>-güexi ì<sup>n</sup> ndúú

núú-ndó cǎxi-güexi. <sup>13</sup> Te nchòhó cuèi ndéé dau sǎá iní-ndó, dico sǎha-ndo cuè déhe-ndo sǎ vǎha xèxi-güexi oré xicǎ<sup>n</sup>-güexi núú-ndó. Te núu nchòhó duca<sup>n</sup> quide-ndo, ÿte uu<sup>n</sup>-gá duca<sup>n</sup> quide Tátá-ndó Dútú Ndiòxí Yǎ ndécú àndiu, chi taxi-gá Espiritú-gá cundecu ndìhi-ndo te núu na cǎcǎ<sup>n</sup>-ndó núú-gǎ! —càchí-gá xáha<sup>n</sup>-gǎ xii-güedé.

### Càchí-güedé sá ndécú ndìhi

#### Jesús yucu ñávaha

(Mt. 12:22-30; Mr. 3:20-27)

<sup>14</sup> Te Jèsús ndéñúhu-gá espíritú cùndìhi yucu ñávaha yìhi ñaha xii ì<sup>n</sup> tée ní quide ñhí-xi, te òré ní ndee ñaha espíritú-á<sup>n</sup> xii tée-á<sup>n</sup>, te ní nacaáhá<sup>n</sup>-dé. Te ío ní cuñúhu ñáyiu sá dúcǎ<sup>n</sup> ní quide-gá. <sup>15</sup> Te davá-yu ní xitñahá-yu:

—Tée-a ndèñuhu-dé nchaa espíritú cùndìhi sácúíhná yíhí ñaha xii ñáyiu, chi ñiu-ni sácúíhná-á<sup>n</sup> chindèe ñaha-xi xii-dé, te ñiu-ni-xi tàxi tñuní-xi nchaa espíritú-á<sup>n</sup> —càchí-yu xitñahá-yu.

<sup>16</sup> Te davá-yu xitò ndéé ñáhǎ-yu xii-gǎ, te xǎhǎ<sup>n</sup>-yu sá ná cǎdá-gǎ ì<sup>n</sup> sá vǎ yǒo tñahí ndàcu cada ñuyúú-a cundèhé-yu nàcuáa cutnùnì iní-yu núu ndáá sá Yǎ Ndiòxí ní tendaha ñaha-gǎ xii-gǎ véxi-gǎ ñuyúú-a. <sup>17</sup> Dico mee-gǎ sa ní cutnùnì iní-gǎ nchaa nàcuáa sǎni iní-yu, núu ní xáha<sup>n</sup>-gǎ xii-yu:

—Te nchòhó xìní-ndó sǎ núu ì<sup>n</sup> tée yìndaha ì<sup>n</sup> nació<sup>n</sup> vá cúú ì<sup>n</sup> nuu-dé ndìhi cue tée cùndìhi-dé, te vá cùdíi-dé cunu-dě. Te ñiu-ni duca<sup>n</sup> sǎtnahá tucu-xi cùu cue ñáyiu xìndecu ì<sup>n</sup>-ni vèhe, chi núu vá cúú ì<sup>n</sup> nuú-yu cundecú-yu, te vá cùdíi-yu cundecu cǎhnú-yu. <sup>18</sup> Te duca<sup>n</sup> sǎtnahá-xi cùu sácúíhná, chi núu vá cúú ì<sup>n</sup> nuu-xi ndìhi nchaa espíritú cùndìhi-xi te vá cùdíi-xi cundecu-xi taxi tñuní-xi. Te duha cáhá<sup>n</sup>-í chi nchòhó cǎchí-ndó sǎ sácúíhná chindèe ñaha-xi xii-í quèñúhu-í nchaa espíritú cùndìhi-xi

yíhi ñaha xii ñáyi. <sup>19</sup>Te núu yúhú quidé cuendá-ndó sã sàcuíhná chíndèe ñaha-xi xii-í, te xini ñuhu-xi cada cuendá-ndó yòo chindee ñaha xii cue tée xica cuu ndíhi-ndo queñuhu-güedé nchaa espíritú cündíhi-xi yíhi ñaha xii ñáyi. Te mee-güedé càchí-güedé sã nchòhó ñá túú càhá<sup>n</sup> ndáá-ndó sã dúcá<sup>n</sup> càhá<sup>n</sup>-ndó. <sup>20</sup>Te ndáá sá Yã Ndiöxí chíndèe ñaha-gá xii-í queñuhu-í nchaa espíritú cündíhi sàcuíhná yíhi ñaha xii ñáyi, te xiã<sup>n</sup> cutnùní iní-ndó sã sà ní sáá nduu ndíhu ndaha ñaha Yã Ndiöxí xii-ndo.

<sup>21</sup>Te núu ñi<sup>n</sup> tée ío ndee, te súní ñí cáá-dé, te ndèé-dé vehe-dé cuendá sá vã cuíta, te ní quide túha-dé titní sá dèé<sup>n</sup>, te ío váha nèhe váha-dé nchaa ndachìu<sup>n</sup>-dé. <sup>22</sup>Dico núu quexìo ingá tée ío-gá ñí cáá te ndee-gã-dé, te ngüíta-dé nãá-dé ndíhi tée ndèé vehe-xi-á<sup>n</sup>, te cada canári ñáhá tãe-á<sup>n</sup> xii tée ndèé vehe-xi-á<sup>n</sup>, te quendeé-dé nchaa sá dèé<sup>n</sup> cündèe iní-dé, te taxi tnùní-na-dé nchaa xiã<sup>n</sup>, ndíhi nchaa sá ndécú ndíhi-dé, te dàcáhũu-dé nchaa cue tée cündíhi-dé nchaa sá ná ñíhí-dé.

<sup>23</sup>Te nchaa ñáyi ñá túú cündíhi ñaha xii-í, te cùu úhú iní ñáhã-yu, te nchaa ñáyi ñá túú chindee ñaha xii-í, te dàquee tñhũ-yu chìu<sup>n</sup> quide-í.

**Espíritú cündíhi yucu ñávãha  
sá nánchòcáva xito cùu uú**

(Mt. 12:43-45)

<sup>24</sup>Te òré ná quèe ñaha ñi<sup>n</sup> espíritú cündíhi yucu ñávãha xii ñi<sup>n</sup> ñáyi, te cuáhá<sup>n</sup>-xi ndùcu-xi ñi<sup>n</sup> xichi núú cündècu-xi te ñá ñíhí-xi, te ní sani iní-xi: “Váha-gá nùhú tucu-í núú ní xíndecu-í”, duha ní sani iní-xi. <sup>25</sup>Te cuánuhú-xi, te òré ní nasáá-xi, te ní xiní-xi sá cáá iní ñáyi-á<sup>n</sup> dàtná cáá-nã ñi<sup>n</sup> vehe ní natíhú, chi ní nduu vii-ná, vá yòo-gá ndécú. <sup>26</sup>Te sáta dúcá<sup>n</sup> te ní xica-xi cuáhá<sup>n</sup>-xi cuándúcú-xí ùsá tnáhá es-

píritú cündíhi-xi sá nèhé víhí-gã xíquide, te òré ní ñíhí-xi cue espíritú-á<sup>n</sup> te ndèca ñaha-xi cuáhá<sup>n</sup> cuendá ngúndecu ndíhi-xi ñáyi-á<sup>n</sup>, te ñáyi-á<sup>n</sup> uu<sup>n</sup>-gá nándi yáha-yu dàcútúxí ndèé díhna — càchí-gá xáha<sup>n</sup>-gã xií-yu.

**Cuendá ñáyi cùu váha ndisa iní-xi**

<sup>27</sup>Te nini càhá<sup>n</sup> Jèsús tnúhu-á<sup>n</sup> núú ñáyi ní cáhá<sup>n</sup> ñíhi ñi<sup>n</sup> ñadìhí tnuú-yu, te xáha<sup>n</sup>-a<sup>n</sup> xii Jesús:

—Sá váha táhú ñadìhí ní dácácú ñaha xii-n, te ní dácuéhnú ñaha-a<sup>n</sup>! —cachí-a<sup>n</sup> xáha<sup>n</sup>-a<sup>n</sup> xii-gá.

<sup>28</sup>Te Jèsús ní xáha<sup>n</sup>-gã:

—Váha-gá táhú nchaa ñáyi sàcúnd-edóho nchaa tnúhu càhá<sup>n</sup> Yã Ndiöxí te sàndáá iní-yu! —càchí-gá xáha<sup>n</sup>-gã xii-a<sup>n</sup>.

**Ñáyi ñá túú sàndáá iní ñáhá xii  
Jesús cuíní-yu cada-gá ñi<sup>n</sup> sá  
vã yòo tnáhí ndacu cada**

(Mt. 12:38-42; Mr. 8:12)

<sup>29</sup>Te ta tàcá vai ñáyi te dàdehnde tnaha-ná-yu, te ní ngüíta Jèsús xáha<sup>n</sup>-gã xií-yu:

—Nchòhó ñáyi ndècu ñuyúú vitna, chi ío sãá iní-ndó, te cuíní-ndó càda-í ñi<sup>n</sup> sá vã yòo tnáhí ndacu cada cuendá cuíní-ndó cùtnuní iní-ndó núu ndisa sá Yã Ndiöxí ní tendaha ñaha-gá xii-í véxi-í. Dico ñá túú nãgá cada-í quiní-ndó, chi sa ñíhí-ndó tnũhu nàcuáa ní yáha ndí Jònás tée ní xóo cáhá<sup>n</sup> tnúhu Yã Ndiöxí ndèé sanaha, te diu-ni duca<sup>n</sup> yáha yúhú tucu. <sup>30</sup>Chi nchaa ñáyi ñuú Nínivé ní cutnùní iní-yu sá Yã Ndiöxí ní tendaha ñaha-gá xii ndí Jònás ní sáhá<sup>n</sup> ndí ñuú-yu. Te duca<sup>n</sup> sãtnahá-xi cùu yúhú Tée cùu ñaní tnáhá-ndó nchàa-ndo, chi sáá nduu te cutnùní iní-ndó sã Yã Ndiöxí ní tendaha ñaha-gá xii-í véxi-í ñuyúú-a. <sup>31</sup>Te na sãá nduu càda ndáá Yã Ndiöxí cuéchi nchaa nchòhó ñáyi ndècu ñuyúú-a, te dàvá-á<sup>n</sup> quiní-ndó ñi<sup>n</sup>

ñadihí ñaha ní xíndaha ñí<sup>n</sup> nació<sup>n</sup> cáá ndàa xio cuha núú quéné nchìcanchii. Te ñaha-á<sup>n</sup> ïo xica ñí xíndecu-a<sup>n</sup>, te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní cáhá<sup>n</sup> ndíi Salòmón, chi ndíi-á<sup>n</sup> ïo ní sáá sá xini tnúni ndíi. Te ñaha-á<sup>n</sup> cáhá<sup>n</sup>-a<sup>n</sup> dàvá-á<sup>n</sup> sá nchòhó ñáiyu ndècu vitna ñá túú ní quide ndáá-ndó. Dico vitna iha ndècu ndíhi ñaha-ndo xii yúhú, te ñiu-í ïo-gá cúnùu-í dàcúúxí ndíi Salòmón. <sup>32</sup>Te ñiu-ni nduu càda ndáá Yá Ndiòxí cuéchi nchaa nchòhó ñáiyu ndècu ñuyú-a vitna, dàvá-á<sup>n</sup> tnàhá cue ñáiyu ní xíndecu ñúú Nínivè cundecú-yu núú Yá Ndiòxí, te tnàhá-yu cachí-yu sá ñà túú ní quide ndáá-ndó. Chi ñáiyu ñúú Nínivè-á<sup>n</sup> ñí ndixi túu iní-yu sá ñà túú quide váha-yu ndècú-yu te ní natuhá-yu ichi Yá Ndiòxí cúnàhá ní cáhá<sup>n</sup> ndíhi ñaha ndíi Jónás tnúhu-gá xií-yu. Dico vitna iha ndècu ndíhi ñaha-ndo xii yúhú tée càhá<sup>n</sup> tucu tnúhu Yá Ndiòxí, te ñiu-í ïo-gá cúnùu-í dàcúúxí ndíi Jónás.

### Núú-ó cùu-xi datná ñí<sup>n</sup> ñuhú

(Mt. 5:15; 6:22-23)

<sup>33</sup>Te ñá túú ñí<sup>n</sup> ñáiyu tènùhú ñí<sup>n</sup> lìn-terná, te taxi ndecú-yu ñí<sup>n</sup> núú yídáhu, àdì chiváha-yu xití ñí<sup>n</sup> tídihi, chi tàxi ndecú-yu ñí<sup>n</sup> núú ñínu cuendá nchaa ñáiyu quíhu vehe cutnùní núu-yu. <sup>34</sup>Te núú-ndó cùu-xi datná ñí<sup>n</sup> ñuhú, chi ñí<sup>n</sup> sá ná quíni-ndó te ndixi túu iní-ndó ñá cúú xíá<sup>n</sup>, te núu càváha núú-ndó, te duca<sup>n</sup> cùtnuní iní-ndó ñá cúú sá ndécú ñúú-ndó, á<sup>n</sup> te núu cùhú, te vá cùtnùní iní-ndó ñá cúú sá ndécú ñúú-ndó. Te sá dúcá<sup>n</sup> cùhú núú-ndó te cada iní-ndó sá ndécú-ndó dàtná ñí<sup>n</sup> núú néé. <sup>35</sup>Te ïo cada cuendá-ndó vǎ cání cuèhé iní-ndó cuendá tnúhu Yá Ndiòxí cuendá cutnùní iní-ndó nàcuáa cundecu-ndo, chi núu na càni cuèhé iní-ndó cuendá tnúhu-gá, te cùu-ndo datná ñí<sup>n</sup> ñáiyu ñá túú cùtnuní núú-xí. <sup>36</sup>Te núu càndoo canine iní-ndó, te mee-ni sá vǎha ñùhu iní-ndó,

te cùtnuní váha iní-ndó tnúhu ndáá dàtná cùtnuní váha núú-ndó òré càyú ñuhú, duca<sup>n</sup> cùtnuní iní-ndó —càchí-gá xáha<sup>n</sup>-gǎ xií-yu.

### Jèsús càhá<sup>n</sup>-gǎ cuendá cue tée cùu fariséú ndíhi cue tée ñàcuaha ñaha xii-í ñáiyu

(Mt. 23:1-36; Mr.

12:38-40; Lc. 20:45-47)

<sup>37</sup>Te òré ní ndíhi tnúhu ní cáhá<sup>n</sup> Jèsús, te ñí<sup>n</sup> tée cùu fariséú ní cáhá<sup>n</sup> ñáhá-dé xii-gǎ vehe-dé caxi-gǎ, te cuánguihu-gǎ vehe-dé, te ní ngóo-gǎ mèsá. <sup>38</sup>Te tée cùu fariséú-á<sup>n</sup> ïo ní cuñúhu-dé, chi Jèsús ñá túú ní ndàha-gǎ nàcuáa sàni iní-güedé nduu vétú iní Yá Ndiòxí òré ní ngóo-gǎ caxi-gǎ dàtná quidé mèe-güedé. <sup>39</sup>Te Jèsús ní xáha<sup>n</sup>-gǎ xii-dé:

—Nchòhó cue tée cùu fariséú xini-ndó sǎ òó ñáiyu nàquete sátá-ni tàsá<sup>n</sup> ndíhi sátá-ni còhó, te xití-xi càndehe caduha-ni. Te duca<sup>n</sup> sǎtnahá-xi cùu nchòhó, chi ndaha-ni-ndo nàquete-ndo, te iní-ndó ñà túú ndùu ndoo, te nándi dándahú-ndó tnàha ñáiyu-ndo, te quèhe<sup>n</sup>-ndo sǎ ndécú ndíhi-yu, te nándi-gǎ nchaa sǎ cuèhé sǎ dúhá ñùhu iní-ndó quide-ndo. <sup>40</sup>Te nchòhó cúú-ndó cuè tée ïo ñí<sup>n</sup> iní-xi! ¿Te náa ñá túú cùtnuní iní-ndó sǎ Yá Ndiòxí Yá ní cadúha yiqui cùñú-ó ñiu-ni-gǎ ní chihí-gǎ iní-ó-á<sup>n</sup>? <sup>41</sup>Te nchaa sǎ vǎha ndècu ndíhi-ndo cuáha-ndo nchàa ñáiyu xini ñuhu na cundecu ndíhi-yu, te núu duca<sup>n</sup> na càda-ndo, te cuu-ndo ñáiyu sa ní nduu ndoo ní nduu nine iní-xi.

<sup>42</sup>Te ndáhú ní cuu nchaa nchòhó cue tée cùu fariséú! Chi sǎha-ndo Yá Ndiòxí núú ùxí xichi yúcu nání mენტá, ndíhi yúcu rùdá, ndíhi nchaa dava-gǎ núú yúcu quèe comídá, dico ñá túú quide ndáá-ndó, te ni ñà túú ñùhu iní-ndó Yá Ndiòxí. Dico tnúhu càhá<sup>n</sup>-í-a tàù-ndó càda-ndo, te ni vǎ dàná ndéé-ndó càda-ndo nchaa dava-gǎ sǎ vǎha.

<sup>43</sup> ¡Te ndàhú ní cuu nchòhó cue tée cùu fariséu! Chi cuíní-ndó cùnucóo-ndo núú sácòo cue tée ío cùnuu xití veñúhu, te cuíní-ndó mèe-ni ndihi tnúhu yinúhu cáhá<sup>n</sup> ndihi ñaha ñáiyu xii-ndo nchàa núú xicá cùu-ndo.

<sup>44</sup> ¡Te ndàhú ní cuu nchòhó cue tée dàcuaha ñaha xii ñáiyu nchaa tnúhu ní chídó tnùní ndí Moisés, ndihi nchòhó cue tée cùu fariséu chi ío dandahú-ndó mèe-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ì<sup>n</sup> ñáiyu ní xíhi te ní nguíndüxi, te ñá túú cùtnuní-gá ndéé yíndüxi-yu, te cuèi nà yáha ñáiyu dico ñá túú cùtnuní sá yíndüxi ndíyi. Te duca<sup>n</sup> sãtnahá-xi cùu nchohó, chi nchaa ñáiyu ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó —càchí-gá xáha<sup>n</sup>-gã xii-güedé.

<sup>45</sup> Te ní xáha<sup>n</sup> ì<sup>n</sup> tée dàcuaha ñaha xii-yu nchaa tnúhu ní chídó tnùní ndí Moisés xii-gá:

—Mèstrú, te sá dúcá<sup>n</sup> càhá<sup>n</sup>-n te tnàhá nchúhú xicuehè-n ã<sup>n</sup> —càchí-dé xáha<sup>n</sup>-dë xii-gá.

<sup>46</sup> Te Jèsús ní xáha<sup>n</sup>-gã:

—¡Ndàhú ní cuu tnàhá nchaa nchòhó cue tée dàcuaha ñaha xii ñáiyu nchaa tnúhu ní chídó tnùní ndí Moisés! Chi quide-ndo datná quidé ñáiyu dàcuído ì<sup>n</sup> tnaha ñáiyu-xi ì<sup>n</sup> sá ío vée, te mèe-yu ni lùha ñá túú cuíní-yu cuidó-yu. Te duca<sup>n</sup> sãtnahá-xi quide nchohó chi dānehé-ndó ñáiyu nacuáa cada-yu, dico mee-ndo chi ni lùha ñá túú cuíní-ndó càda-ndo nacuáa dānehé-ndó-yu.

<sup>47</sup> ¡Te ndàhú ní cuu tucu-ndo! Chi càdúha-ndo núú ní nguíndüxi cue tée ní xóo cáhá<sup>n</sup> tnúhu Yá Ndióxi ndéé sanaha cuèndá sá cúnàha-ndo núú yíndüxi cue ndí, te diu-ni cue ñaní tnáhá-ndó ní sahani-güedé cue ndí. <sup>48</sup> Te nchòhó sa ñaha-ndo nacuáa ní quide cue ñaní tnáhá-ndó, te càchí-ndó sá ní quide

váha-güedé sá dúcá<sup>n</sup> ní sahani-güedé cue ndí-á<sup>n</sup>, te vitna càdúha-ndo núú ní nguíndüxi cue ndí.

<sup>49</sup> Te Yá Ndióxi ío sàá nchaa sá xini tnùní-gá, te ní cachí-gá sá dácàhá<sup>n</sup>-gá iní cue tée cuèndá cáhá<sup>n</sup>-güedé tnúhu-gá núú ñáiyu, te cada-güedé nchaa nacuáa cuíní-gá, te dava-güedé cahni ñàhá-yu xii-güedé, te dava-güedé ío dandòho ñàhá-yu xii-güedé duha ní cachí-gá. <sup>50</sup> Te nchaa ñáiyu ñuyú vitna tnàhá-yu nacháhu-yu núú Yá Ndióxi cuèndá sá ní sahani-güedé cue tée ní cáhá<sup>n</sup> tnúhu-gá ndéé cùtnàhá ní ngáva ñuyú. <sup>51</sup> Te ndéé ndí Àbél tée ní sahani-güedé ndéé díhna nuu, ndihi ndéé ndí Zacariá tée ní sahani-güedé ndéé núú ní ndihi-ná ndácá<sup>n</sup> cuèndá ñàhá Yá Ndióxi núú ñáiyu ndècu ñuyú vitna, te diu ndí-á<sup>n</sup> ní sahani-güedé mei tnúú veñúhu càhnu sá ío cùnuu, ndihi xító núú sácòdó sã ndúú tãhú Yá Ndióxi.

<sup>52</sup> ¡Te ndàhú ní cuu tucu nchaa nchòhó cue tée dàcuaha ñaha xii ñáiyu nchaa tnúhu ní chídó tnùní ndí Moisés! Chi quide-ndo datná quidé ì<sup>n</sup> tée tàxi tnuní ì<sup>n</sup> vehe, chi nacadí-dé te ñá dáñá-dë quíhu ñáiyu te ni mèe-dé ñá túú quíhu-dé. Te duca<sup>n</sup> sãtnahá-xi quide-ndo, chi dàcuaha-ndo tnúhu Yá Ndióxi te ñá túú cuíní-ndó quíndáá iní-ndó te ni ñá túú dānehé-ndó ñáiyu cuíní tñi tnúhu-gá nacuáa tàú-xi cundu cuèndá naníhí tãhú-yu —càchí-gá xáha<sup>n</sup>-gã xii-dé.

<sup>53</sup> Te òré ní ndee Jèsús vehe tée cùu fariséu-á<sup>n</sup>, te cue tée dàcuaha ñaha xii ñáiyu nchaa tnúhu ní chídó tnùní ndí Moisés, ndihi cue tée cùu fariséu ní cudéé<sup>n</sup>-güedé núú-gã, te ní nguífta-güedé nándi sá xicá<sup>n</sup> tnúhú-güedé núú-gã cuèndá cuíní-güedé núu vá cuífta-gá ì<sup>n</sup> tnúhu càhá<sup>n</sup>-gá <sup>54</sup> cuèndá duca<sup>n</sup> ñihí-güedé nacuáa cada-güedé cacá<sup>n</sup> cuèchi-güedé cuèndá-gá.



**Jèsús càhá<sup>n</sup>-gá cuendá cue  
tée dándahú mée-xí**

**12** Te òré-á<sup>n</sup> ñí tacá titní mĩl ñáyiú núú ndécú Jèsús, te súúní dícó ngõnchihi tnàha-ná-yu. Te ndèdóho-yu ní xáha<sup>n</sup> Jèsús xii cue tée xica cuu ndiíhi-gá:

—Cada cuendá-ndó vǎ cáncñícú<sup>n</sup> nihnu-ndo nàcuáa quide cue tée cùu fariséú, chi cue tée-á<sup>n</sup> ío dándahú-güedé mée-güedě sá quidé ndáá-güedé dico ñá ndáá sá quidé ndáá-güedé. <sup>2</sup>Te nchaa tnúhu sá cúú yùhu ní cuu vá cúú yùhu-gá, chi nchaa dacuitíí sǎ quéé tũu-xi núú ñáyiú. <sup>3</sup>Chi nchaa tnúhu càhá<sup>n</sup> dayuhu-ndo quèe túu-xi núú chítú núú tàcá, te nchaa tnúhu càhá<sup>n</sup> mée-ndó vèhe-ndo dacuitíí sǎ ñihí ñáyiú tnúhu.

**Yá Ndiõxí xíní ñùhu-xi yuhú-ó-gǎ**

(Mt. 10:26-31)

<sup>4</sup>Te nchòhó cue tée ío váha tnàhá tnúhu ndiíhi-í ná càchí tnúhu-í xii-ndo sǎ vǎ yùhú-ndó cuè ñáyiú cuèí na càhni ñahá-yu xii-ndo, chi ñiú-ni yiqui cùñú-ndó ndácú-yu cahní-yu, te ñá túú nǎgá ndacú-yu cada ñàhá-yu xii-ndo. <sup>5</sup>Te na càchí tnúhu-í xii-ndo sǎ Yǎ Ndiõxí tàú-ndó yùhú-ndó-gǎ, chi mee-gǎ ío cùnuu-gǎ, te ñiú-gǎ quidé-gǎ sǎ vǎ cùndècu-gǎ ñáyiú ñuyíú, te daquihí<sup>n</sup> ñàhá-gǎ xií-yu núú ùhú núú ndàhú, núú xíá<sup>n</sup> càchí tnúhu-í xii-ndo sǎ Yàá-á<sup>n</sup> tàú-ndó yùhú-ndó-gǎ.

<sup>6</sup>Te nchòhó xini-ndó sǎ ndèé úhú<sup>n</sup> tnàhá tflaa cùyáhu-ñi núú ùú díhú<sup>n</sup>, dico Yá Ndiõxí ñá túú cùnaa-gǎ ní ñ<sup>n</sup>-güedi, chi nèhe cuendá ñàhá-gǎ xii-güedi. <sup>7</sup>Te nchòhó ndéé ñ<sup>n</sup> ñ<sup>n</sup> idi díquí-ndó yìnde hu, núú xíá<sup>n</sup> càchí-í sǎ vǎ yùhú-ndó, chi cùnuu-gǎ-ndó dàcúúxí tflaa cuèí vǎi vihi-güedi.

**Ñáyiú na dàtúu núú dàva-gá ñáyiú sá  
ndécú ndiíhi-yu Xítohó Jesucristú**

(Mt. 10:32-33; 12:32; 10:19-20)

<sup>8</sup>Te na càchí tnúhu-í xii-ndo sǎ ñúu na dàtúu-ndo núú dàva-gá ñáyiú sá ndécú ndiíhi ñaha-í xii-ndo. Te duca<sup>n</sup> te tnàhá yùhú Tée cùu ñani tnàhá-ndó nchàa-ndo datúu-í núú nchaa cue espíritú xínú cuèchi núú Yǎ Ndiõxí sǎ nchòhó ndécú ndiíhi ñaha-ndo xii-í. <sup>9</sup>Dico núu na cùñaha-ndo xii ñáyiú sǎ ñà túú ndècu ndiíhi ñaha-ndo xii-í, te ñiú-ni duca<sup>n</sup> cada yùhú Tée cùu ñani tnàhá-ndó nchàa-ndo, chi cùñaha-í xii cue espíritú xínú cuèchi núú Yǎ Ndiõxí sǎ ñà túú ndècu ndiíhi ñaha-í xii-ndo.

<sup>10</sup>Te ndèdani càa ñáyiú na càhá<sup>n</sup> cuèhé cuendá yùhú Tée cùu ñani tnàhá-ndó nchàa-ndo, te cada càhnu iní ñàhá Yǎ Ndiõxí xií-yu. Dico ñáyiú na càhá<sup>n</sup> cuèhé cuendá Espíritú Yǎ Ndiõxí, te ñáyiú-á<sup>n</sup> vǎ cadá càhnu iní ñàhá-gǎ xií-yu.

<sup>11</sup>Te òré ná càndeca ñaha-güedé xii-ndo quihí<sup>n</sup> veñúhu, àdi núú cuè tée cùchiu<sup>n</sup>, te ní vǎ cání ñni-ndó ñúu nása cunduu tnúhu cùñaha-ndo xii-güedé, te ní vǎ cání ñni-ndó ñúu ná tnúhu nadànchocáva-ndo núu ná tnúhu na cùñaha-güedé xii-ndo, <sup>12</sup>chi òré-ñǎ te mee Espíritú Yǎ Ndiõxí dacàhu iní ñàhá-xí xii-ndo tnúhu cùñaha-ndo xii-güedé —càchí-gǎ xáha<sup>n</sup>-gǎ xii-güedé.

**Cuendá ñ<sup>n</sup> tée cuica**

<sup>13</sup>Te ñ<sup>n</sup> tée ñùhu tnahá tnuú ñáyiú-á<sup>n</sup> ní xáha<sup>n</sup>-dè xii Jèsús:

—Mèstrú, cùñaha xii ñani-í sǎ ná chidava-dé sǎ ñí dándõo tǎtá-ndí cuu cuendá-ndí —càchí-dé xáha<sup>n</sup>-dè xii-gǎ.

<sup>14</sup>Te Jèsús ní xáha<sup>n</sup>-gǎ xii-dé:

—¿Te ná cuendá duca<sup>n</sup> càhá<sup>n</sup>-n? Te ñá díú chiu<sup>n</sup>-á<sup>n</sup> vèxi-í cada-í, chi ñá díú tée cùchiu<sup>n</sup> cuu-í —càchí-gǎ xáha<sup>n</sup>-gǎ xii-dé.

<sup>15</sup>Te xáha<sup>n</sup>-gã xii nchaa ñáyiú xĩndecu-á<sup>n</sup>:

—Nchaa nchòhó ñáyiú ndèdóho nchaa tnúhu càhá<sup>n</sup>-í ío váha cada cuendá-ndó, te vá cání ìní-ndó nãndi nducu-ndo cùndecu ndihi-ndo, chi cuèi vãi vihi na nihi-ndó cùndecu ndihi-ndo, dico vá chĩndèe ñaha-xi cudíi-ndo cùndecu-ndo ñuyíú-a —càchí-gã xáha<sup>n</sup>-gã xii-yu.

<sup>16</sup>Te dãtnùní ní nguíta-gã cání-gã ì<sup>n</sup> cuèndú nùú-yu cuèndá tecú tnùní-yu tnúhu-gã, te xáha<sup>n</sup>-gã:

—Ì<sup>n</sup> tée cuica sùúní ní cuu nchaa tatá ní xitu-dé núú ñúhú-dě. <sup>17</sup>Te ní nguíta-dé sání ìní-dé: “¿Te nása cada-í? Te ñá túú ndèe nataxúha-í nchaa sá ní xitu-í”, duha ní sani ìní-dé. <sup>18</sup>Te dãtnùní ní sáha váha tucu-dé cuèndá nãcuáa cada-dé, te ní cachí-dé: “Duha na cùnduu, dangòyo-í yacá-í, te ndada càhnu-gã-í, te xití-xi nataxúha-í nchaandi túhú sá ní xitu-í, ndihi nchaa dava-gã sá ndécú ndihi-í. <sup>19</sup>Te sátá dúcá<sup>n</sup>, te cachí-í: Ío vãi sá ndécú ndihi-í, te cudíi-xi cuéhé cuíá, te vitna ndetatú-í, te coho-í te caxi-í cada-í, te nãndi-gã cada-í cuèndá cudíi ìní-í cundecu-í, duha quesaha-í”, càchí-dé. <sup>20</sup>Dico Yá Ndiòxí ní xáha<sup>n</sup>-gã xii-dé: “Yòhó, ñá túú nãndíhi sá sání ìní-n, chi yúhú càchí-í sá niú vitna cuú-n, te nchaa sá ndécú ndihi-n ¿yoo cuu sá váha xii-a<sup>n</sup>-í?”; càchí-gã xáha<sup>n</sup>-gã xii-dé. <sup>21</sup>Duha yáha nchaa ñáyiú nãndi sání ìní-xi cundecu ndihi-xi ñuyíú-a, dico ñáyiú-á<sup>n</sup> ío ndàhú-yu chi ñá túú nã nduu táhú-yu núú Yá Ndiòxí cundecu ndihi-yu —càchí Jèsús xáha<sup>n</sup>-gã xii-yu.

**Yá Ndiòxí xító-gã nchaa ñáyiú sàndáá ìní ñáhá xii-gã**

(Mt. 6:25-34)

<sup>22</sup>Te ní xáha<sup>n</sup> Jèsús xii cue tée xica cuu ndihi-gã:

—Te na càchí tnúhu-í xii-ndo sã vã ío cani ìní-ndó nũ nása cundecu-ndo,

àdi nása níhí-ndó sã caxí-ndó, àdi nása níhí-ndó dõó cuihnu-ndo.

<sup>23</sup>Chi cùnuu-gã mée-ndó dácúxí sã nchító-ndó, te duca<sup>n</sup> yiqui cuñú-ndó cùnuu-gã-xi dácúxí dõó sácúihnu-ndo.

<sup>24</sup>Te chí cuáha cuendá nãcuáa quide cue tícacá, chi ni ñà túú chihi-güedi

tatá cuu itú natahu-güedi te ni ñà túú ndèe nútñí yacá-güedi, te nihi-güedi xèxi-güedi, chi Yá Ndiòxí xító ñaha-gã xii-güedi. ¿Te nchòhó cùnuu-gã-ndó dácúxí nchaa cue quiti ndava!

<sup>25</sup>Te cuèi nãndi sá sání vihi ìní-ndó ndècu-ndo, dico ñá ndácú-ndó càda-ndo nacúáa cuehnu-ndo cuèdicó ì<sup>n</sup> yiqui-gã.

<sup>26</sup>Te núu ni sã lúhá xĩã<sup>n</sup> ñá ndácú-ndó càda-ndo, ¿te ná cuèndá ío sání ìní-ndó cuèndá nchaa sá cùníní-ndó níhí-ndó cùndecu ndihi-ndo?

<sup>27</sup>Te chí cãdá cuèndá nãcuáa sàhnu ì<sup>n</sup> tnu itá, chi ni ñà túú quide chiu<sup>n</sup>-xi, te ni ñà túú quèhe<sup>n</sup>-xi idi. Te na càchí tnúhu-í xii-ndo sã ndíi Salòmón ío vii ní cãa nchaa sá ní xĩndecu ndihi ndíi, dico víi-gã tucu càa nchaa itá dácúxí nchaa sá ní xĩndecu ndihi ndíi. <sup>28</sup>Te cùhú sã lò vitna tnaa-ni cùdíi-xi te sàhmí-yu, te cuèi duca<sup>n</sup> dico ío vii càdúha Yá Ndiòxí nchaa cùhú-ã<sup>n</sup>. ¿Te nchòhó ío cùnuu-ndo dácúxí nchaa cùhú-ã<sup>n</sup>, núu xĩã<sup>n</sup> ío xito ñaha-gã xii-ndo, te dicó yica cùu ìní-ndó sàndáá ìní-ndó-gã!

<sup>29</sup>Te vá ío canchicú<sup>n</sup> nihnu-ndo sã cóhó sã caxí-ndó, te ni vã dándihú-ndó ìní-ndó nũ nása cada-ndo níhí-ndó. <sup>30</sup>Chi nchaa ñáyiú ñá túú sàndáá ìní ñáhá xii Yá Ndiòxí duca<sup>n</sup> mée-ni sã cóhó sã caxí-yu xica nchicú<sup>n</sup> nihnú-yu. Dico mee Tãtá-ó Dütú Ndiòxí sa ñaha-gã nãndi cùu sá xíní ñũhu-ndo, te taxi-gã. <sup>31</sup>Te cada-ndo nchaa nacúáa càhá<sup>n</sup> Yá Ndiòxí Yaá yíndàha ñaha xii-ndo, te duca<sup>n</sup> te taxi-gã nchaa sá xíní ñũhu-ndo.

**Cuendá sá váha nduu  
táhú-ó núú Yă Ndiöxí**

(Mt. 6:19-21)

<sup>32</sup>Te vá yùhú nchòhó cue tée ndècu ndihi-í cuèi ío sacú-ndó, chí Tătá-ó Dütú Ndiöxí ní cachí-gá sá ndúú tǎhú-ndó cùndecu-ndo núú ndécú-gǎ taxi tnùní-ndó tnàhá-ndó. <sup>33</sup>Te chí dícó nchàa sá ndécú ndihi-ndo, te chí cuàha nchaa ñáyiú ndàhú díhú<sup>n</sup>-ndó ñáyiú xìni ñuhu, te cada váha-ndo cùndecu-ndo, te duca<sup>n</sup> te nduu tǎhú-ndó sǎ ío-gá váha núú Yă Ndiöxí cundecu ndihi-ndo, te xǎ<sup>n</sup> vá cúú tùhú tnàhí-gá-xi, te ni vǎ ndíhí nihnu-gá-xi, te ni ñadúhú vǎ ndácú-güedě duhu-güedě, te ni tǐquidi vá queé-dí. <sup>34</sup>Te núú xǎ<sup>n</sup> cúú cuendá-ndó ñá, te diu-ni xǎ<sup>n</sup> ñúhú ìní-ndó, á<sup>n</sup> te núú mee-ni sǎ ndécú ñúyíú-a ndècu ndihi-ndo, te diu-ni nchaa xǎ<sup>n</sup> ñúhú ìní-ndó.

**Xìni ñuhu-xi quíhi ìní-ó cùndecu-o**

<sup>35-36</sup>Te ío quíhi ìní-ndó cùndecu-ndo, te cada-ndo dàtná quídé dàva cue tée xìnu cuechi sacúndecu túha-güedé cuèi nání òré-á<sup>n</sup> ndétú-güedě pàtróó<sup>n</sup>-güedě ná òré nasáá-dé sá cuàhá<sup>n</sup>-dé vico tnǎndaha. Te núú niú te sa cúú cáyú-ni ñuhú-güedé sá cùndètu ñaha-güedé, chí òré ná nàsáá-dé dacása<sup>n</sup>-dé yuyèhe, te ndíhi-ni nacaá<sup>n</sup>-güedé ndíhu-dé. <sup>37</sup>Te váha tǎhú nchaa cue tée xìnu cuechi-á<sup>n</sup>, chí ndècu túha-ni-güedé ndétú-güedé ndéé òré ní nasáá pàtróó<sup>n</sup>-güedě, te na càchí tnúhu ndáá-í xii-ndo sǎ òré ná nàsáá pàtróó<sup>n</sup>-güedě-á<sup>n</sup> te chihi ñaha-dě mèsá xii-güedé, te ndacá<sup>n</sup> ndee-dé dóó níhnú-dě núú yíquí-dě, te ngúíta-dé cani-dé cóhó-güedě cuendá caxi-güedé. <sup>38</sup>Te diu-ni duca<sup>n</sup> càda-dé cuèi dava niú, àdi tacuíhndá-gá, te núú ñá túú xidí-güedé òré nasáá-dé, te cue tée xìnu cuechi-á<sup>n</sup> ío váha tnahá-güedé. <sup>39</sup>Te núú dícó ì<sup>n</sup> tée cùu xítóhó ì<sup>n</sup> vehe

xìní-dé ná òré quíhu ñadúhú vehe-dé ñá, te quíhi ìní-dé te vá cùdú-dé, te vá dáñá-dě nacaá<sup>n</sup>-güedé yuyèhe-dé quíhu-güedé duhu-güedě. <sup>40</sup>Te nchòhó tucu nchaa-ni nduu quíhi ìní-ndó cùndecu túha-ndo, chí na cuáhá<sup>n</sup> nduu ñá túú yìhi ìní-ndó, te quixi tucu yúhú Tée cùu ñaní tnáhá-ndó nchaa-ndo — cachí-gá xáha<sup>n</sup>-gǎ xii-güedé.

**Cue tée quide ndáá ndihi  
cue tée ñá túú quide ndáá**

(Mt. 24:45-51)

<sup>41</sup>Te té Pèlú ní xicá<sup>n</sup> tnúhú-dě núú Jèsús, te xáha<sup>n</sup>-dě:

—Mèstrú, ¿te tnúhu ní cáhá<sup>n</sup>-n-á<sup>n</sup> cùu-xi mee-ni cuendá nchúhú á<sup>n</sup> cuendá nchaa ñáyiú? —càchí-dé xáha<sup>n</sup>-dě xii-gá.

<sup>42</sup>Te Jèsús ní xáha<sup>n</sup>-gǎ:

—Càhá<sup>n</sup>-í cuendá ñáyiú quide váha dàtná quídé ì<sup>n</sup> tée tàxi tnuní ñáhá xii cue ñáyiú xìnu cuechi ndecu vehe patróó<sup>n</sup>-xi, chí tée-á<sup>n</sup> ío váha tècú tnùní-dé, te quide-dé nchaa nàcuáa càhá<sup>n</sup> pàtróó<sup>n</sup>-dě, te dàcaxi-dé cue ñáyiú xìnu cuechi òré tàú-xi caxí-yu. <sup>43</sup>Te núú duca<sup>n</sup> quide váha tée tàxi tnuní ñáhá xii cue ñáyiú xìnu cuechi-á<sup>n</sup> ñá, te ío váha tnàhá-dé òré nàsáá pàtróó<sup>n</sup>-dě núú ndèé cuáhá<sup>n</sup>-dé. <sup>44</sup>Te na càchí tnúhu ndáá-í xii-ndo sǎ tèe quide ndáá táxi tnùní ñáhá xii cue ñáyiú xìnu cuechi-á<sup>n</sup> cǔñaha-ñǎ pàtróó<sup>n</sup>-dě xii-dé sá ncháándì túhú-ñǎ sǎ ndécú ndihi-dé quindaha-dě. <sup>45</sup>Dico núú tée tàxi tnuní ñáhá xii cue ñáyiú xìnu cuechi-á<sup>n</sup> ná càni ìní-dé sá cùyàa patróó<sup>n</sup>-dě vá nàsáá ndíhi-ni-dé ñá, te ngúíta-dé cani-dé nchaa ñáyiú xìnu cuechi, cuèi tée cuèi ñadíhí, te ngúíta-dé caxi-dé coho-dé, te dàxíni-dé méé-dě, <sup>46</sup>te nduu ñà túú yìhi ìní-dé te nasáá pàtróó<sup>n</sup>-dě, te dandòho ñaha patróó<sup>n</sup>-dě-á<sup>n</sup> xii-dé, te daquíhí<sup>n</sup> ñáhá-dě xii-dé núú ndécú ñáyiú ñá túú ní quide ndáá.

<sup>47</sup> Te dava cue tée xinu cuechi xiní-güedé nàcuáa cuiní patróo<sup>n</sup>-güedé cada-güedé te ñá túú quide-güedé, te ni ñá túú cuiní-güedé cundecu túha-güedé cundetu-güedé patróo<sup>n</sup>-güedé, te nchaa cue tée duca<sup>n</sup> xíquide dandòho ñaha patróo<sup>n</sup>-güedé, chi ñáni vihi-güedé.

<sup>48</sup> Te dava cue tée xinu cuechi ñá túú xiní-güedé nàcuáa cuiní patróo<sup>n</sup>-güedé cada-güedé, te ní quide-güedé sá nēñúú-güedé ñá sá ñá túú tàú-güedé cada-güedé ñá, te cue tée-á<sup>n</sup> sacú-gá dandòho ñaha patróo<sup>n</sup>-güedé, chi sacú-gá ñáni-güedé. Te ñáyiú cùtnuní iní-xi nàcuáa cuiní Yá Ndiòxí cadá-yu, te diu-ni duca<sup>n</sup> tàú-yu cadá-yu nàcuáa cuiní-gá. Te ñáyiú vai-gá tècú tñuní nàcuáa càhá<sup>n</sup>-gá, te diu-ni duca<sup>n</sup> vai nchaa sá càhá<sup>n</sup>-gá tàú-yu cadá-yu.

### Ñá túú cùu ñ<sup>n</sup>nuu ñáyiú

(Mt. 10:34-36)

<sup>49</sup> Te yúhú véxi-í ñuyíú-a cuendá cut-nuní iní ñáyiú nàcuáa cada ñaha Yá Ndiòxí xí-yu, ¡te cuiní-í sá ndíhi-ni cada-gá nàcuáa sàni iní-gá! <sup>50</sup> Te yúhú ío vai tñúhu sàni iní-í, ¡chi sáá nduu te ío ndoho-í, te diu-ni xí<sup>n</sup> cuhu<sup>n</sup> iní-í ndéé ná sáá nduu dùca<sup>n</sup> yáha-í! <sup>51</sup> Te nchòhó vá cání iní-ndó sá yúhú véxi-í ñuyíú-a te cundecu ndíhi tñaha váha-ni ñáyiú, te ñáhá chi da ngúífta-yu vá cúú ñ<sup>n</sup>nuú-yu cundecú-yu. <sup>52</sup> Te ndéé není vitna ngúífta ñáyiú vá cúú ñ<sup>n</sup>nuú-yu cundecú-yu, te na càda-o cuendá te núu úhú<sup>n</sup> ñáyiú xñdecu ñ<sup>n</sup>-ni vèhe, te vá cúú ñ<sup>n</sup>nuu-gá-yu, chi úní-yu ndatnúhu-yu te nàá-yu ndíhi úú-gá-yu, àdi ñáyiú úú-á<sup>n</sup> ndatnúhu-yu te nàá-yu ndíhi ñáyiú úní-á<sup>n</sup>. <sup>53</sup> Te dava cue tée cùu tátá vá cúú ñ<sup>n</sup>nuu-gá-güedé ndíhi déhe ducu<sup>n</sup>-güedé, te ni dáva cue ñáyiú cùu náná vá cúú ñ<sup>n</sup>nuu-gá-yu ndíhi déhe yòcò-yu, te ni sánu-yu vá cúú ñ<sup>n</sup>nuu ndíhi-gá-yu. Te duca<sup>n</sup> càdá-yu chi davá-yu quindáá iní ñáhá-yu xii-í,

te davá-yu vá quindáá iní ñáhá-yu — càchí-gá xáha<sup>n</sup>-gá xii-güedé.

### Ñáyiú cùtnuní iní-xi nàcuáa quide-xi ñuyíú ndíhi andíu

(Mt. 16:1-4; Mr. 8:11-13)

<sup>54</sup> Te Jèsús ní xáha<sup>n</sup>-gá xii nchaa ñáyiú xñdecu-á<sup>n</sup>:

—Te nchòhó òré ndéhe-ndó ndàn-chita vícò ndàa xio quée nchíanchii, te càchí-ndó sá cúú<sup>n</sup> dáú, te diu duca<sup>n</sup> ndisa quide-xi. <sup>55</sup> Te òré ná quène táchí ndàa xio datni nàcuáa quène nchíanchii, te càchí-ndó sá ío cada ihni-xi, te diu duca<sup>n</sup> ndisa quide-xi. <sup>56</sup> Te nchòhó ío váha cùtnuní iní-ndó nàcuáa quide-xi andíu ndíhi ñuyíú, ¿te ná cuendá quidé-ní-ndó sá ñá tècú tñuní-ndó nàcuáa quide Yá Ndiòxí vitna? Te sá dúcá<sup>n</sup> quide-ndo-á<sup>n</sup> ío dandahú-ndó mèe-ndo sá ío váha cùtnuní iní-ndó, chi ñá ndàá sá cùtnuní iní-ndó.

### Nducu-o nàcuáa nucúndecu ndíhi váha-o ñáyiú cùu úhú iní ñáhá

(Mt. 5:25-26)

<sup>57</sup> Te nchòhó, ¿ná cuendá ñá túú dandixi túu-ndo iní-ndó càda-ndo mee-ni sá váha sá tàú-ndó càda-ndo-i? <sup>58</sup> Te núu ìó ñ<sup>n</sup>-ndo ní sacá<sup>n</sup> cuéchi ñáyiú cuendá-ndó cuendá ñ<sup>n</sup> sá ní quide-ndo, te cuáhá<sup>n</sup>-ndó ndíhí-yu núú tée cùchiu<sup>n</sup>, te nini ñùhu-ndo ndíhí-yu ichi, te nducu-ndo nàcuáa cada-ndo nàcáhá<sup>n</sup> cáhnú iní tñáhá-ndó ndíhí-yu cuendá sá vǎ cándeca ñaha-gá-yu quíhí<sup>n</sup> núú tée cùchiu<sup>n</sup>, chi núu duca<sup>n</sup> na càdá-yu te tée cùchiu<sup>n</sup>-á<sup>n</sup> nachíhi ñaha-dě ndaha cue tée cùu poleciá, te cue tée-á<sup>n</sup> chíhi ñaha-güedé vecaá xii-ndo. <sup>59</sup> Te na càchí tñúhu-í xii-ndo sá nñu na ngáva-ndo vecaá, te vá càcu-ndo te núu vá nácháhu-ndo nchàa sá tàú-ndó —càchí-gá xáha<sup>n</sup>-gá xí-yu.

**Xini ñuhu-xi natuha-o ichi Yá Ndiõxí**

**13** Te ñu-ni òré-á<sup>n</sup> ñí ngúnutnñí ñí<sup>n</sup> úú ñáyíu núú Jèsús cání-yu cuèndú núú-gá ñàcuáa ní quide ñaha té Pilatú xii cue tée distritú Galileá cue tée ní sahní quiti nduu táhú Yá Ndiõxí, te mei òré ní sahní-güedé cue quiti-á<sup>n</sup> ñí táuchíú<sup>n</sup> té Pilatú cue sandádú-dé ní sahní-güedé cue tée Galileá-á<sup>n</sup>, te ní xica ññí-güedé núú ñúhú ñdìhi ññí cue quiti-á<sup>n</sup>, te ní nadácánuu-xi. <sup>2</sup> Te Jèsús ní xáha<sup>n</sup>-gá xíí-yu:

—Te núu nchòhó sání ìní-ndó sá sà dúcá<sup>n</sup> ñí yáha cue tée distritú Galileá-á<sup>n</sup> te cùu-güedé cue tée ndècu vihi-gá cuèchi-xi dàcúúxí cuè tée ñuú-güedé ñá. <sup>3</sup> Te na càchí tñúhu-í xii-ndo sá ñáhá. Te núu nchòhó vá ndíxí cuèchi ìní-ndó cuèndá ncha sá cuèhé sá dúhá quide-ndo ndècu-ndo ña, te tñáhá ncha nchòhó cuíta nihnu-ndo te núu vá nátnñi-ndo ichi Yá Ndiõxí. <sup>4</sup> Te núu nchòhó sání ìní-ndó sá ñáyíu sáhú<sup>n</sup> úní ní xíhí ní táú ñáhá vèhe ducú<sup>n</sup> Silòé ío-gá ndécú cuèchi-yu dàcúúxí nchàa ñáyíu xíndècu ñuú Jerusàlén ñá, <sup>5</sup> te na càchí tñúhu tucu-í xii-ndo sá ñáhá. Te núu nchòhó vá ndíxí cuèchi ìní-ndó cuèndá ncha sá cuèhé sá dúhá quide-ndo ndècu-ndo ña, te tñáhá ncha nchòhó cuíta nihnu-ndo te núu vá nátnñi-ndo ichi Yá Ndiõxí —càchí-gá xáha<sup>n</sup>-gá xíí-yu.

**Yutnu ngüxí ñá túú cùu<sup>n</sup> sávidí-xi**

<sup>6</sup> Te Jèsús ní caní tucu-gá ñí<sup>n</sup> cuèndú núú-yu ñàcuáa tecú tñuní-yu tñúhu-gá, te xáha<sup>n</sup>-gá:

—Ñí<sup>n</sup> tée nùtnñí ñí<sup>n</sup> yutnu ngüxí núú ñúhú-dé, te cuáhá<sup>n</sup> ndéhé-dé ñúú ní cuu<sup>n</sup> sávidí-xi ní cùu, te ní ñí<sup>n</sup> ñá túú ní cùu<sup>n</sup>. <sup>7</sup> Te ní xáha<sup>n</sup> tée-á<sup>n</sup> xii tée ndèé ñuhu-dé: “Ñaha-n sá vitna ní cuu úní cuíá quíxí còto-í yutnu ngüxí-a te ñá túú xíní-í ní ñí<sup>n</sup> sávidí-xi. Te quehndé-n vitna,

chi àú<sup>n</sup> ñá cuu nùtnñí-xi quide tneñu-xi núú ñuhu-á<sup>n</sup>”, càchí-dé xáha<sup>n</sup>-dè xii tée ndèé ñuhu-dé-á<sup>n</sup>. <sup>8</sup> Te tée ndèé ñuhu-á<sup>n</sup> ní xáha<sup>n</sup>-dè: “Pàtróó<sup>n</sup>, daña na cuìhnu-xi cuíá vitna-á, te na nàdatayá-í ñuhu núú sàhá-xi, te chihi-í sahá<sup>n</sup>. <sup>9</sup> Te duca<sup>n</sup> te cudana cuu<sup>n</sup> sávidí-xi, àdi núu ñá túú ní cùu<sup>n</sup> sávidí-xi ña te téhndé-ñá-xi”, càchí-dé xáha<sup>n</sup>-dè xii pàtróó<sup>n</sup>-dè —càchí-gá xáha<sup>n</sup>-gá xíí-yu.

**Jèsús quidé tātna-gá ñí<sup>n</sup> ñadìhí ní nduu cueyi sātá-xi nduu ndetátú ñáyíu**

<sup>10</sup> Te ñí<sup>n</sup> xito cùu-xi nduu ndetátú ñáyíu, te yìhi Jèsús ñí<sup>n</sup> veñúhu dànehé-gá ñáyíu. <sup>11</sup> Te xíá<sup>n</sup> ndécú ñí<sup>n</sup> ñadìhí ní cuu sáhú<sup>n</sup> úní cuíá sá cùhú-a<sup>n</sup> yìhi ñaha espíritú cùndìhi yucu ñávàha xii-a<sup>n</sup>, te xíá<sup>n</sup> ní ndada cueyi-xi sātá-a<sup>n</sup>, te ñá dáñá-gá-xi nucúnutnñí ndáá-a<sup>n</sup>. <sup>12</sup> Te òré ní xíní ñáhá Jèsús xii-a<sup>n</sup> te ní cana ñaha-gá, te xáha<sup>n</sup>-gá:

—Yòhó ñaha cùhú, ndúha-n cuèhé tñáhá-n —càchí-gá xáha<sup>n</sup>-gá xii-a<sup>n</sup>.

<sup>13</sup> Te ní dácàá-gá ndaha-gá ní tendaha ñaha-gá xii-a<sup>n</sup>, te òré-ni-á<sup>n</sup> ñí ndúha-a<sup>n</sup> te ní nucúnutnñí ndáá-a<sup>n</sup>, te ní ngüfta-a<sup>n</sup> ní cachí-a<sup>n</sup> sá ïo càhnu cuu Yá Ndiõxí. <sup>14</sup> Dico tée tàxi tñuní veñúhu ní cudéé<sup>n</sup>-dè sá dúcá<sup>n</sup> ñí quide Jèsús ní quide tātna-gá ñaha cùhú-á<sup>n</sup> nduu ndetátú-yu, te ní xáha<sup>n</sup>-dè xíí-yu:

—Íó ñí<sup>n</sup> nduu tàú-ó càda chiu<sup>n</sup>-o, te ndèdani càa nduu-á<sup>n</sup> quixi-ndo cùtātna-ndo, dico ñá díú nduu cuu-xi nduu ndetátú-ó —càchí-dé xáha<sup>n</sup>-dè xíí-yu.

<sup>15</sup> Te ní xáha<sup>n</sup> Jèsús:

—Nchòhó chi ío dandahú-ndó mèe-ndo sá quidé ndáá-ndó dico ñá ndàá sá quidé ndáá-ndó, ñáa ñá túú nàndaxi-ndo ndicutu-ndo àdi búrru-ndo dàcoho-ndo-güedí ndute nduu ndetátú-ó á<sup>n</sup>? <sup>16</sup> Te ñadìhí-a cùu-a<sup>n</sup> ñaní tñáhá ndíi Àbrahám, te dícó-ni

sá yùcu ñávãha quide duha cuhú-a<sup>n</sup> ní cuu sáhú<sup>n</sup> úní cuíá, ¿te náa ñá túú xìni ñuhu-xi cutátna-a<sup>n</sup> cuéi cùu-xi nduu ndetatú-ó á<sup>n</sup>? —càchí-gá xáha<sup>n</sup>-gá xii-dé.

<sup>17</sup> Te sá dúcá<sup>n</sup> ñí cáhá<sup>n</sup> Jèsús, núu nchaa cue téé cùu úhú iní ñáhá xìi-gá ní cucaha<sup>n</sup> núú-güedě, dico nchaa dava-gá ñáiyu chí xícudí iní-yu xíndéhě-yu nchaa sá vã yõo tñahí ndàcu cada quide-gá.

### **Cuëndá ndíqu<sup>n</sup> yutnu nàni mostázá**

(Mt. 13:31-32; Mr. 4:30-32)

<sup>18</sup> Te ní xáha<sup>n</sup>-gá xií-yu:

—Na càni-í ñí<sup>n</sup> cuëndú núú-ndó nàcuáa tecú tñuní-ndó nàcuáa cada-xi òrè ndíhu ndaha ñàha Yá Ndiõxí xii-ndo. <sup>19</sup> ñí<sup>n</sup> téé ní quehe<sup>n</sup>-dé ndíqu<sup>n</sup> yutnu nàni mostázá te nèhe-dé cuáhá<sup>n</sup> ní sacá<sup>n</sup>-dé núú ñúhú-dě te ní xínu-xi, te ní sahnu-xi ní cuu dùcú<sup>n</sup>-xi, te cue quití ndàva núú tàchí cádũha-güedi tacá-güedi núú díté-xi —càchí-gá xáha<sup>n</sup>-gá xií-yu.

### **Nàcuáa quide levadurá**

(Mt. 13:33)

<sup>20</sup> Te ní xáha<sup>n</sup> tùcu Jesús xií-yu:

—Te na càchí tñúhu tucu-í xii-ndo nàcuáa cada tucu Yá Ndiõxí òrè ndíhu ndaha ñàha-gá xii-ndo. <sup>21</sup> ñí<sup>n</sup> ñadhí ní quehe<sup>n</sup>-a<sup>n</sup> levadurá ní chihi-a<sup>n</sup> úní arròbá yuchi tríu, te levadurá-á<sup>n</sup> ñí quide-xi ní ndaa nihí yusa<sup>n</sup>-á<sup>n</sup> —càchí-gá xáha<sup>n</sup>-gá xií-yu.

### **Yuyèhe cuiñi**

(Mt. 7:13-14, 21-23)

<sup>22</sup> Te ichi ñùhu Jesús cuáhá<sup>n</sup>-gá ñúu Jerusálén, te nchaa ñúu náhnú, ndíhi nchaa ñúu líhli ta yãha-gá duca<sup>n</sup> ta dànehé-gá ñáiyu tñúhu-gá cuáhá<sup>n</sup>. <sup>23</sup> Te ñí<sup>n</sup> ñúú-á<sup>n</sup> ñí xáha<sup>n</sup> ñí<sup>n</sup> téé xii-gá:

—Mèstrú, cuiñi-í cáca<sup>n</sup> tñúhu-í ñí<sup>n</sup> tñúhu núu-n, ¿ndáá sá ño sacú ñáiyu

nànhí tãhú-á<sup>n</sup>? —càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gá xii-dé ndíhi nchaa ñáiyu:

<sup>24</sup> —Cada-ndo sã nánihí tãhú-ndó, te tñi-ndo ichi Yá Ndiõxí, te ichi-gá-á<sup>n</sup> cúu-xí dàtná ñí<sup>n</sup> yuyèhe cuiñi, te càchí tñúhu-í xii-ndo sã ño cuéhé ñáiyu cachí iní-yu quíhu-yu yuyèhe cuiñi-á<sup>n</sup> dico vá ndácú-yu. <sup>25</sup> Te na càni tucu-í ñngá cuëndú núú-ndó nàcuáa tecú tñuní-ndó tñúhu càhá<sup>n</sup>-í. Te òrè ná ndàcuiñí téé cùu xítohó vehe, te nacadí-dé yuyèhe, te nchaa nchòhó ñáiyu na quèndóo quehé dacàsa<sup>n</sup>-ndo yuyèhe, te quesaha-ndo cũñaha-ndo xìi-dé: “Tátá, naca<sup>n</sup> yuyèhe na quíhu-ndí”, quesaha-ndo cũñaha-ndo xìi-dé. Dico téé cùu xítohó vehe-á<sup>n</sup> cũñaha-dě xii-ndo: “Ñá túú xìni-í nchòhó ndèé ñáiyu cùu-ndo”, duha cũñaha-dě xii-ndo. <sup>26</sup> Te dàtnúni ngúfta nchòhó cũñaha-ndo xìi-dé: “Nchúhú ní xexi ndíhi ñaha-ndí, te ní xíhi ndíhi ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cũñaha-ndo xìi-dé. <sup>27</sup> Dico cachí tucu téé cùu xítohó vehe-á<sup>n</sup> cũñaha-dě xii-ndo: “Sa ní cachí-í sá ñà túú xìni-í ndèé ñáiyu cùu-ndo. Te chí xócuñí nchòhó ñáiyu ndècu ichi cuehé ichi duha núú ndècu-í”, quesaha-dě cũñaha-dě xii-ndo. <sup>28</sup> Te na sàá nduu dùca<sup>n</sup> cada-xi te quiní-ndó tẽ Àbrahám, ndíhi té Isàác, ndíhi té Jàcób, ndíhi nchaa cue téé ní xóo cáhá<sup>n</sup> tñúhu Yá Ndiõxí, te nchaa cue téé-á<sup>n</sup> ndécú-güedě núú ndécú-gã táxí tñuní-gá, te nchòhó quee tñú-ndó núú-gã sá tñúhu ñá túú ní cuiñí cada ndáá, te dàvã-á<sup>n</sup> ndãhyú-ndó te cuu rúhñú-nã núhu-ndo sã sàtú iní-ndó cuëndá sá ndóhó-ndó. <sup>29</sup> Te dàvã-á<sup>n</sup> quíhu nchaa ñáiyu ndí cùmí xio ñuyúú núú ndécú Yá Ndiõxí táxí tñuní-gá caxí-yu ndíhi-gá, te cundecú-yu ndíhi-gá. <sup>30</sup> Te dava ñáiyu nchícú<sup>n</sup> ñá túú cùnuu ndecu ichi Yá

Ndiöxí vitna, ñáyiú-á<sup>n</sup> sáá nduu te ío cunúú-yu. Te dava ñáyiú cunuú ndecu ichi-gá vitna, ñáyiú-á<sup>n</sup> sáá nduu te vá ïo-gá cunúú-yu —càchí-gá xáha<sup>n</sup>-gá xií-yu.

**Jèsús ndàhyú-gá cuëndá ñáyiú ñuú Jerusàlén**

(Mt. 23:37-39)

<sup>31</sup> Te ñuú-ni nduu-á<sup>n</sup> ní quexìo ñ<sup>n</sup> úú cue tée cùu fariséú núú ndécú-gá, te xáha<sup>n</sup>-güedé xii-gá:

—Quee-n ìha quíhí<sup>n</sup>-n núu ndèé quíhí<sup>n</sup>-n, chí tée cùu Herodés cùníní-dé cahni ñaha-dé xii-n —càchí-güedé xáha<sup>n</sup>-güedé xii-gá.

<sup>32</sup> Te Jèsús ní xáha<sup>n</sup>-gá:

—Chí cuàhá<sup>n</sup> te cúnaha-ndo xii tée nèhe mañá-á<sup>n</sup> sá càchí-í sá ná cùndedóho váha-dé ñ<sup>n</sup> tnúhu càhá<sup>n</sup>-í, chí cùmání ñ<sup>n</sup> úú-gá nduu cundecu-í xocàní-í nchaa espíritú cùndìhì yucu ñávaha yìhì ñaha xii ñáyiú, te cada tátna-í nchaa dava-gá ñáyiú cùhú, te duca<sup>n</sup> te ndìhì chùu<sup>n</sup>-í, duha cúnaha-ndo xii-dé. <sup>33</sup> Dico dacuitíí sá cùhú<sup>n</sup>-í ichi ñ<sup>n</sup> úú-gá nduu, te duca<sup>n</sup> te sáá-í núú quíhí<sup>n</sup>-í, chí vá cúú tnàhí cuú ñ<sup>n</sup> tée càhá<sup>n</sup> tnúhu Yá Ndiöxí ingá ñuú, chí mei ñuú Jerusàlén cuú-güedé —càchí-gá xáha<sup>n</sup>-gá xii-güedé.

<sup>34</sup> Te ní xáha<sup>n</sup>-gá xii ñáyiú ñuú Jerusàlén:

—Nchòhó chí sàhni-ndo nchaa cue tée càhá<sup>n</sup> tnúhu Yá Ndiöxí, cue tée ní tendaha-gá véxi, te mee-ni ndìhì yúú sàhni-ndó-güedé. ¡Te titní xito ní cuíní-í nadatàcá ñàhà-í xii-ndo dàtná nádà-tacá ñ<sup>n</sup> nchuxi cuè déhe-di sàquihì-güedi xití ndíxí<sup>n</sup>-di, dico ñá ní cuíní-ndó, te duca<sup>n</sup>-ni sàni iní-í ndéé vitna! <sup>35</sup> Te chí cùndedóho tucu ingá tnúhu na càhá<sup>n</sup>-í-a: Yá Ndiöxí dañá ñaha-gá xii-ndo. Te na càchí tnúhu tucu-í xii-ndo sá vã quíní ñáhá-gá-ndó xii-í, dico sáá nduu te quíní ñáhá tucu-ndo, te nduu-á<sup>n</sup> cachí-ndó sá ïo càhnu cuu yúhú Yaá ní tendaha Dütú

Ndiöxí véxi ñuyíú-a —càchí-gá xáha<sup>n</sup>-gá xií-yu.

**Jèsús quidé tátna-gá ñ<sup>n</sup> tée ñuhu cuiñu**

**14** Te duha ní cuu ñ<sup>n</sup> nduu, nduu ndètátú ñáyiú chí ñ<sup>n</sup> tée cùu fariséú cùnùu ní càhá<sup>n</sup>-dé Jèsús vehe-dé caxi-gá, te cue tée ndècu vehe-dé ndéhé-güedé núu nása cada-gá. <sup>2</sup> Te xíá<sup>n</sup> ndécú tnàhá ñ<sup>n</sup> tée cùhú ñúhú-dé cuiñu.

<sup>3</sup> Te Jèsús ní xícá<sup>n</sup> tnúhú-gá núú cuè tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhì núú cuè tée cùu fariséú, te xáha<sup>n</sup>-gá:

—¿Cuu cada tátna-o ñ<sup>n</sup> ñáyiú cùhú nduu ndètátú-ó á<sup>n</sup> ñáhá? —càchí-gá xáha<sup>n</sup>-gá xii-güedé.

<sup>4</sup> Dico cue tée-á<sup>n</sup> ñà túú tnàhí ní càhá<sup>n</sup>-güedé. Te ní dácàá-gá ndaha-gá ní tendaha-gá tée cùhú-á<sup>n</sup> ní quide tátna ñaha-gá xii-dé, te ní xáha<sup>n</sup>-gá sá ná ñuhú-dé vehe-dé. <sup>5</sup> Te ní xícá<sup>n</sup> tnúhú-gá núú nchaa cue tée-á<sup>n</sup>, te xáha<sup>n</sup>-gá:

—¿Te núú nchòhó ná ngáúnhnu ñ<sup>n</sup> búrru-ndo àdi ñ<sup>n</sup> ndicutu-ndo déhvá, te vá ná tàva ndíhì-ni-ndo-di cuèi cùu-xi nduu ndetátú-ndó-á<sup>n</sup>? —càchí-gá xáha<sup>n</sup>-gá xii-güedé.

<sup>6</sup> Te ñá túú ní ñihí-güedé tnúhu na dànhocáva-güedé.

**Ñáyiú càhá<sup>n</sup>-yu quíhí<sup>n</sup> vico tnándaha**

<sup>7</sup> Te ndèhe Jesús nàcuáa xíquide nchaa ñáyiú ndècu vico sá súúní ní nacaxi-yu xilé sácõo nchihì cue tée cunuú-gá conchihí-yu òré cuànguihú-yu mèsá caxí-yu, núú ní xáha<sup>n</sup>-gá xií-yu:

<sup>8</sup> —Òré ná càhá<sup>n</sup> ñáhá ñ<sup>n</sup> ñáyiú xii-ndo ñ<sup>n</sup> vico tnándaha, te vá cóó-ndó núú xilé sácõo cue tée cunuú-gá, chí núú duca<sup>n</sup> na càda-ndo, te cudana quexìo dava-gá ñáyiú cunuú-gá dàcúxí nchòhó. <sup>9</sup> Te ñáyiú ní càhá<sup>n</sup> ñáhá xii-ndo-á<sup>n</sup> quixí-yu te cúnàhá-yu xii-ndo: “Chí cuàñaha xilé núcõo nchihì-ndo-á<sup>n</sup> ná cònhihì ñáyiú

ní quexìo-a”, quesàhá-yu cúnàhá-yu xii-ndo. Te cuíní-ndó ñàhá cuèi cùc-aha<sup>n</sup> núú-ndó ndàcuíñí-ndó quíhí<sup>n</sup>-ndó ngóo-ndo núú xilé xínutnî ndéé núú ní ndíhi-ná ndàa sátá-xi. <sup>10</sup>Te yúhú càchí-í sá òré ná càhá<sup>n</sup> ñàhá-yu xii-ndo, te ngóo-ndo núú xilé xínutnî ndéé núú ní ndíhi-ná ndàa sátá-xi chí cuèndá òré ná quèxio ñáyiú ní càhá<sup>n</sup> ñàhá xii-ndo, te cúnàhá-yu xii-ndo: “Nchòhó cue ñáyiú càhá<sup>n</sup> ndíhi-í, chí yàha núú xilé sácóo cue téé cùnúu-gá coo-ndo”, duha cúnàhá-yu xii-ndo. Te duca<sup>n</sup> te cada nínu ñaha nchàa ñáyiú yìhi ndíhi-ndo mesá.

<sup>11</sup>Te nchaa ñáyiú na càda nínu mee-xi, te ñáyiú-á<sup>n</sup> ñà túú cùu nínu-yu, te nchaa ñáyiú ñà túú quide nínu mee-xi, ñáyiú-á<sup>n</sup> cúú nínu-yu —càchí-gá xáha<sup>n</sup>-gá xii-yu.

<sup>12</sup>Te dätñuní ní xáha<sup>n</sup>-gá xii téé ní càhá<sup>n</sup> ñàhá xii-gá:

—Te yòhó òré cuíní-n càda-n ì<sup>n</sup> vico, te vá càhá<sup>n</sup>-n mée-ni cue téé càhá<sup>n</sup> ndíhi-n, ni cuè ñaní-n, ni cuè ñáyiú cùu ñaní tnàhá-n, ni cuè ñáyiú cuica ndècu yatni ndíhi-n, chí ñáyiú-á<sup>n</sup> duca<sup>n</sup> càdá-yu ì<sup>n</sup> nduu càhá<sup>n</sup> ñàhá-yu xii-n te ndéyáhu-ni sá ní quidè-n-yu. <sup>13</sup>Te ñàhá chí òré ná càda-n ì<sup>n</sup> vico, te càhá<sup>n</sup>-n ñáyiú ndàhú, ndíhi ñáyiú ñà cúú càca, ndíhi ñáyiú yacua, ndíhi ñáyiú cuàá. <sup>14</sup>Te núú duca<sup>n</sup> na càda-n, te cuu-xi ì<sup>n</sup> sá vaha xii-n, chí ñáyiú-á<sup>n</sup> vâ nihí-yu nacoto ñàhá-yu xii-n, dico na cùú-n te sáá nduu ndòto-n ndíhi nchaa ñáyiú ní quide ndáá ní xíndecu ichi Yá Ndiòxí, te dàvá-á<sup>n</sup> taxi-gá sá ndúú tàhú-n —càchí-gá xáha<sup>n</sup>-gá xii-dé.

**Nàcuáa xiquide ñáyiú òré  
càhá<sup>n</sup> ñàhá ì<sup>n</sup> téé cada vico**

(Mt. 22:1-10)

<sup>15</sup>Te sá dúcá<sup>n</sup> ní càhá<sup>n</sup> Jèsús ní tecú dóho cue téé yìhi mesá-á<sup>n</sup>, núú ní xáha<sup>n</sup> ì<sup>n</sup>-dé xii-gá:

—Ío váha táhú nchaa ñáyiú na càxi nchaa sá cuàha ñaha Yá Ndiòxí nduu

na sàa-yu cundecú-yu núú ndécú-gá táxi tnùnì-gá —càchí-dé xáha<sup>n</sup>-dè xii-gá.

<sup>16</sup>Te Jèsús ní xáha<sup>n</sup>-gá xii-dé:

—Ì<sup>n</sup> téé quide-dé vico, te ní dátècú tnúhu-dé cuéhé víhí ñáyiú quíhí<sup>n</sup>-yu caxí-yu. <sup>17</sup>Te òré sa ní cuu-ná sá caxí-yu, te ní xáha<sup>n</sup>-dè xii téé xínu cuechi núú-dè sá quíhí<sup>n</sup>-dè cúnàha-dè quíhí<sup>n</sup>-yu caxí-yu, chí sa ndècu túha nchaa sá caxí-yu. <sup>18</sup>Dico nchaa-yu ní xáhá<sup>n</sup>-yu xii-dé sá ná cáda càhnu iní téé càhá<sup>n</sup> ñàhá-á<sup>n</sup>, chí ñà túú cùyáchí-yu quíhí<sup>n</sup>-yu vico-á<sup>n</sup>. Te téé ní càhá<sup>n</sup> ndíhi téé xínu cuechi-á<sup>n</sup> díhna ní xáha<sup>n</sup>-dè: “Íchí ní saa<sup>n</sup>-í ì<sup>n</sup> pedàsú ñuhu, te quíhí<sup>n</sup> ndéhè-í tnaví, núú xíá<sup>n</sup> càhá<sup>n</sup> ndàhú-í núú-n sá cúnàha-n xii téé càhá<sup>n</sup> ñàhá-á<sup>n</sup> xii-í sá ná cáda càhnu iní-dé chí ñà túú cùyáchí-í”, càchí-dé xáha<sup>n</sup>-dè. <sup>19</sup>Te ingá-dé ní xáha<sup>n</sup>-dè: “Ní saa<sup>n</sup>-í úhú<sup>n</sup> yùndá ndicutu sa xítu, te cue quítì-á<sup>n</sup> quíhí<sup>n</sup>-í coto ndeé-í-güedi vitna, núú xíá<sup>n</sup> càhá<sup>n</sup> ndàhú-í núú-n sá cúnàha-n xii téé càhá<sup>n</sup> ñàhá-á<sup>n</sup> xii-í sá ná cáda càhnu iní-dé chí ñà túú cùyáchí-í”, càchí-dé xáha<sup>n</sup>-dè. <sup>20</sup>Te ingá tucu-dé ní xáha<sup>n</sup>-dè: “Íchí ní tnándaha-í núu xíá<sup>n</sup> vâ cùyáchí-í quíhí<sup>n</sup>-í”, càchí-dé xáha<sup>n</sup>-dè. <sup>21</sup>Te òré ní nasáá téé xínu cuechi-á<sup>n</sup>, te ní nacani tnúhu-dé núú patróó<sup>n</sup>-dè nchaa nàcuáa ní xáhá<sup>n</sup>-yu. Te ní cud-éé<sup>n</sup> tée cùu patróó<sup>n</sup>-á<sup>n</sup>, te ní xáha<sup>n</sup>-dè xii téé xínu cuechi núú-dè-á<sup>n</sup>: “Yáchí cuàhá<sup>n</sup> nanducu-n nchàa ñáyiú ndàhú, ndíhi nchaa ñáyiú ñà cúú càca, ndíhi nchaa ñáyiú yacua, ndíhi nchaa ñáyiú cuàá, te ndèni ní cuu na nànhí<sup>n</sup>-yu te candècá-n-yu quixi”, càchí-dé xáha<sup>n</sup>-dè. <sup>22</sup>Te sátá ní nasáá téé xínu cuechi-á<sup>n</sup>, te ní xáha<sup>n</sup>-dè xii patróó<sup>n</sup>-dè: “Patróó<sup>n</sup>, sa ní quide-í chùu ní táhú-n, dico ndècu-gá núú cóo-yu”, càchí-dé xáha<sup>n</sup>-dè. <sup>23</sup>Te téé cùu patróó<sup>n</sup>-dè-á<sup>n</sup> ní xáha<sup>n</sup>-dè: “Cuàhá<sup>n</sup> tucu ndèni ní cuu te cada yica-n na quixí-yu quíhu-yu cuèndá ná chítú vehe-í. <sup>24</sup>Te na càchí tnúhu-í xii-n sá



ní ìí<sup>n</sup> ñáyíu ní cáhá<sup>n</sup>-í díhna vá cúú-gă caxí-yu sá sà ní quide túha-í caxí-yu ní cùú”, cachí tée-á<sup>n</sup> xăha<sup>n</sup>-dê xii tée xínu cuechi núú-dê —càchí-gă xăha<sup>n</sup>-gă xii tée-á<sup>n</sup>.

**Ndoho-o cùndecu-o  
ichi Xítóhó Jesucristú**

(Mt. 10:37-38)

<sup>25</sup> Te ío cuéhé ñáyíu nchìcú<sup>n</sup>-yu Jèsús, te ní xăha<sup>n</sup>-gă xií-yu:

<sup>26</sup> —Te núu dava nchòhó cuìní-ndó chitnahá ñáhá-ndó xii-í, te cuu iní ñáhá ndisa-ndo. Te cuèi na dándóo-ndo tătá-ndó, ndìhi náná-ndó, ndìhi ñadihí-ndó, ndìhi déhe-ndo, ndìhi ñaní-ndó, ndìhi cúha-ndo, te cani iní-ndó să cuèi na cùú-ndó să cuendá-í, te duca<sup>n</sup> te cuu ndisa-ndo cuè ñáyíu tnahá tnúhu ndìhi-í. <sup>27</sup> Te nchaá ñáyíu vá cánchezí<sup>n</sup> nihnu ñaha xii-í cuendá sá yùhú-yu ndohó-yu dàtná ndoho-í, ñáyíu-á<sup>n</sup> vă cúú-yu ñáyíu tnahá tnúhu ndìhi-í. <sup>28</sup> Te núu ìí<sup>n</sup> nchòhó ná càni iní-ndó dàcaa-ndo ìí<sup>n</sup> vehe ducú<sup>n</sup>, ζte náa ñá díú díhna-gă cada cuendá-ndó núu ndédau díhú<sup>n</sup> cuu, duca<sup>n</sup> te cutnùní iní-ndó núu tnahá díhú<sup>n</sup>-ndó càa vehe-á<sup>n</sup> àdi ñáhá? <sup>29</sup> Chi núu vá dúcá<sup>n</sup> càda-ndo, te na nguíta-ndo tàusaha-ndo te vá xínu cada-ndo, te nchaá ñáyíu na cùndehe ñaha xii-ndo, te cáhá<sup>n</sup> cuéhé-yu cuendá-ndó. <sup>30</sup> Te cachí-yu: “Tée-ă<sup>n</sup> ní nguíta-dé dácàa-dé ìí<sup>n</sup> vehe te ñá ní ndàcu-dé xínu”, cachí-yu. <sup>31</sup> Àdi te núu ìí<sup>n</sup> tée yìndaha ñaha xii ñáyíu cuìní-dé nàa-dé ndìhi ingá tucu tée yìndaha ñaha xii ñáyíu, ζte náa ñá díú díhna-gă cada cuendá-dé te núu ndacu-dé ndìhi úxí mĩl cue sandàdú-dé nàá-güedé, ndìhi ócò mĩl cue sandàdú ingá tucu tée yìndaha ñaha xii ñáyíu cùu úhú iní tnahá ndìhi-dé-ă<sup>n</sup>? <sup>32</sup> Àdi te núu xìto-dé sá vă ndácú-dê ñá, te òré vátá cùyàtni ñaha-gă tée cùu úhú iní tnahá ndìhi-dé-á<sup>n</sup>, te tendaha-dê ìí<sup>n</sup> tée

quhí<sup>n</sup>-dé quíhu-dé tnúhu ndàhú núú tée-á<sup>n</sup> cuendá sá vă nàá-güedé. <sup>33</sup> Te duha càhá<sup>n</sup>-í chi núu nchòhó vá cáda ndèe iní-ndó dàña-ndo nchaá sá ndécú ndìhi-ndo cuendá chitnahá ñáhá-ndó xii-í, te vá cúú-ndó cuè ñáyíu tnahá tnúhu ndìhi-í.

**Ñíí ní nduu víxí<sup>n</sup>**

(Mt. 5:13; Mr. 9:50)

<sup>34</sup> Te ñíí chi ío váha, dico núu na ndùu víxí<sup>n</sup>-xi, ζte nása-gă cada-o nándfhi-o te núu duca<sup>n</sup>-i? <sup>35</sup> Chi ñá túú-gă nándfhi-xi ní sá dácá ñuhu, te ní sá dácá sahá<sup>n</sup>, chi cuendá-nă dăngoyo-o. Te nchaá nchòhó ñáyíu ní xíndedóho tnúhu ní cáhá<sup>n</sup>-í-a xini ñuhu-xi ío váha cuáha-ndo cuendá —càchí-gă xăha<sup>n</sup>-gă xií-yu.

**Cuendá ìí<sup>n</sup> mběé quiti ní xíta**

(Mt. 18:10-14)

**15** Te cue tée cuihna iní-xi quide co-brá ñáhá xii ñáyíu cuendá impuèstú ndìhi cue dava-gă ñáyíu ndècu ichi cuehé ichi duha ní quexió-yu núú ndécú Jèsús cuendá cundedóho-yu tnúhu càhá<sup>n</sup>-gă. <sup>2</sup> Te ní nguíta cue tée cùu fariséú, ndìhi cue tée dàcuaha ñaha xii ñáyíu nchaá tnúhu ní chídó tñuní ndíi Moisés xícáhá<sup>n</sup> cuéhé-güedé cuendá-gă, te càchí-güedé:

—Tée-a quèhe<sup>n</sup> cuendá-dé ñáyíu ndècu ichi cuehé ichi duha, te xèxi ndìhi ñaha-dé xií-yu —càchí-güedé xìtnaha-güedé.

<sup>3</sup> Te Jèsús ní cani-gă ìí<sup>n</sup> cuendú nàcuáa tecú tñuní-güedé tnúhu-gă, te xăha<sup>n</sup>-gă xii-güedé:

<sup>4</sup> —H<sup>n</sup> tée ndècu ìí<sup>n</sup> ciendú mběé-dê, te ní xíta ìí<sup>n</sup>-di, te nchòhó sa cùt-nuní iní-ndó nàcuáa cada tée-á<sup>n</sup>, chi dándóo-dé cúmídícó săhú<sup>n</sup> cúmí-di ìí<sup>n</sup> yucu, te cúnúndúcú-dê quiti ní xíta xí<sup>n</sup> ndèe ndée naníhí-dê-di. <sup>5</sup> Te òré ní naníhí-dê-di te ní dácáá-dê-di chíó-dê ní docó-dê-di sá cúdĩ iní-dé. <sup>6</sup> Te òré

ní nasáá-dé vehe-dé, te ní dátàcá-dé nchaa cue téé càhá<sup>n</sup> ndihi-dé, ndihi nchaa ñáyi ndècu yatni ndihi-dé, te ní xáha<sup>n</sup>-dè: “Chí ná cùdíí ìní-ó vìtna, chí ní naníhì-í mbèè-í quítì ní xíta ni cùu”, cachí-dé xáha<sup>n</sup>-dè xií-yu. <sup>7</sup> Te yúhú càchí-í sá ìo-gá cùdíí ìní Yă Ndiöxí ndihi cue espíritú xínú cuèchi núú-gă nõu ìi<sup>n</sup> ñáyi ndècu ichi cuhé ichi duha na ndixi cuèchi ìní-yu cuendá nchaa sá ñà túú vâha quidé-yu ndècú-yu te tñif-yu ichi-gă, dâcúúxí cùmídícó sâhú<sup>n</sup> cùmí ñáyi sa ní tuha ichi-gă, chí ñà túú-gă xíní ñùhu-xi ndixi cuèchi ìní-yu chí sa ndècú-yu ichi-gă —càchí-gă xáha<sup>n</sup>-gă xii-güedé.

### **Cuendá díhú<sup>n</sup> ní xíta**

<sup>8</sup> Te ní cani Jèsús ingá cuendú núú-güedé, te xáha<sup>n</sup>-gă:

—Ìi<sup>n</sup> ñadìhí ndécú ndihi-a<sup>n</sup> úxí díhú<sup>n</sup> cuixí<sup>n</sup>, te ní dâcúíta-a<sup>n</sup> ìi<sup>n</sup> te ní teñuhú-a<sup>n</sup> itì, te ní ngüíta-a<sup>n</sup> nàtihu-a<sup>n</sup> vehe, te súúní vâha vâha ní nanducu-a<sup>n</sup> ndéé ní naníhì-a<sup>n</sup>. <sup>9</sup> Te òré ní naníhì-a<sup>n</sup>, te ní dátàcá-a<sup>n</sup> nchaa ñáyi dîhí càhá<sup>n</sup> ndihi-a<sup>n</sup> ndihi nchaa ñáyi ndècu yatni ndihi-a<sup>n</sup>, te ní xáha<sup>n</sup>-a<sup>n</sup>: “Chí ná cùdíí ìní-ó vìtna chí ní naníhì-í díhú<sup>n</sup>-í sá ní xíta ni cùu”, cachí-a<sup>n</sup> xáha<sup>n</sup>-a<sup>n</sup> xií-yu. <sup>10</sup> Te yúhú càchí-í sá dúcá<sup>n</sup> ìo cùdíí ìní nchaa espíritú xínú cuèchi núú Yă Ndiöxí, núú ìi<sup>n</sup> ñáyi ndècu ichi cuhé ichi duha na ndixi cuèchi ìní-yu cuendá nchaa sá ñà túú vâha quidé-yu, te tñif-yu ichi-gă —càchí-gă xáha<sup>n</sup>-gă xii-güedé.

### **Cuendá ìi<sup>n</sup> téé ñà túú ní quide váha**

<sup>11</sup> Te ní cani tucu Jèsús ingá cuendú núú-güedé, te xáha<sup>n</sup>-gă:

—Ìi<sup>n</sup> téé ndècu úú déhe ducu<sup>n</sup>-dé, <sup>12</sup> te téé líhli-gă ní xáha<sup>n</sup>-dè xii tâtá-dè: “Táu, taxi-n tãhú sã cúú cuendá-í”, càchí-dé xáha<sup>n</sup>-dè. Te tâtá-dè-á<sup>n</sup> ní sãñaha-dè ndí díí<sup>n</sup> nõú-güedé sá cúú cuendá-güedé. <sup>13</sup> Te núú sàcú-ni nduu, te déhe-dé téé

líhli-gă-á<sup>n</sup> ní nadico-dè nchaa sá ní sãñaha tâtá-dè, te ní xica-dé cuáhá<sup>n</sup>-dè ìi<sup>n</sup> nõú xícá, te yàcá<sup>n</sup> ní tñii-dé ìi<sup>n</sup> ichi cuhé ichi duha, te ní ndihi díhú<sup>n</sup>-dè ní dándónùhu-dé ndihi cue téé càhá<sup>n</sup> ndihi-dé, ndihi nchaa ñáyi dîhí xîndecu ichi díí ìní. <sup>14</sup> Te ní ndihi ndoo díhú<sup>n</sup>-dè ní dándónùhu-dé, te núú sàcú-ni nduu ní sáá tnamá nõú núú ndécú-dè-á<sup>n</sup>, te ñà ñihí-gă-dé sá caxí-dè, te xihí-dé docó. <sup>15</sup> Núú ní xica-dé cuáhá<sup>n</sup> ndúcú chiu<sup>n</sup>-dé núú ìi<sup>n</sup> téé ñu-ni nõú xía<sup>n</sup>, te téé-á<sup>n</sup> ní sáha chiú<sup>n</sup> ñaha-dé ìi<sup>n</sup> xichi núú ñùhú-dè coto-dé cùchí. <sup>16</sup> Te súúní xihí-dé docó te cuíni-dé caxi-dé nchaa sá sáha-yu cùchí-á<sup>n</sup> ní cùu, dico ñà túú ní sãñahá-yu xii-dé. <sup>17</sup> Te uu<sup>n</sup> ni ní sani váha ìní-dé, te ní cachí-dé: “Ío cuhé cue téé xínu cuechi vehe tâtá-í te ío cuhé sã xéxi-güedé ndécú, te yúhú duha ndòho-í docó iha! <sup>18</sup> Te ndacuñí-í te núhú-í vehe tâtá-í, te cúnaha-í xii-dé: Táu, ñà túú ní quide váha-í núú Yă Ndiöxí te ni ñà túú ní quide váha-í núú-n, <sup>19</sup> te ñà túú-gă tàú-í sá cúú-í déhe-n vìtna, te cada ñaha-ñà-n xii-í dàtná ìi<sup>n</sup> téé xínu cuechi núú-n”, duha ní sani ìní-dé cúnaha-dè xii tâtá-dè. <sup>20</sup> Te sátá dúcá<sup>n</sup> ní sani ìní-dé, te ní natñii-dé ichi cuánuhú-dé vehe tâtá-dè, te xica-gă cuánuhú-dé ní xíní ñáhá tâtá-dè xii-dé te ní cundahú ìní ñáhá-dè. Te xínu tâtá-dè-á<sup>n</sup> ní sáhá<sup>n</sup> nút-nahá ñáhá-dè, te ní numi ñaha-dè, te ío váha ní cáhá<sup>n</sup> ndihi ñaha-dè. <sup>21</sup> Te ní xáha<sup>n</sup> déhe-dé-á<sup>n</sup> xii-dé: “Táu, ñà túú ní quide váha-í núú Yă Ndiöxí te ni ñà túú ní quide váha-í núú-n, te ñà túú-gă tàú-í sá cúú-í déhe-n vìtna”, cachí-dé xáha<sup>n</sup>-dè.

<sup>22</sup> Dico tâtá-dè-á<sup>n</sup> ní xáha<sup>n</sup>-dè xii cue téé xínu cuechi núú-dè: “Chí quèñùhu ndíhi-ni dóó vâha-gă cuáha-ndo déhe-í-a na cuihnu-dé, ndihi ìi<sup>n</sup> dehé ná quíhi díquí ndáhá-dè, ndihi chàú váha na quíhi-dé. <sup>23</sup> Te quíhí<sup>n</sup> nguehe<sup>n</sup>-ndo ìi<sup>n</sup> ndicutu numa quítì caváha-gă, te

cahni-ndo-di, te na càda-o vico, te na càxi-o-di. <sup>24</sup>Chi déhe-í-a ní sani iní-í sá nǐ xíhí-dé ní cùu, te ñáhá chi ndècu vívú-dě, te ní sani tucu iní-í sá nǐ xíta-dé ní cùu te ní nasáá méé-dě”, càchí-dé xáha<sup>n</sup>-dě xii cue tée xínu cuechi núú-dě-á<sup>n</sup>. Te ní nguíta-güedé ní quide-güedé vico.

<sup>25</sup>Te déhe-dé tée sàcuéhé-gǎ cuáhá<sup>n</sup>-dé yucu, te òré cuándixi-dé tá ndüu yatni-dé vehe, te ní tecú dóho-dé ío yaá cúú vico. <sup>26</sup>Te ní cana-dé ì<sup>n</sup> tée xínu cuechi, te ní xícá<sup>n</sup> tnúhú-dě núú-dě ná cuendá duca<sup>n</sup> ío yaá. <sup>27</sup>Te tée xínu cuechi-á<sup>n</sup> nǐ xáha<sup>n</sup>-dě: “Ñaní-n tée cuáhá<sup>n</sup> ní cùu ní nasáá-dé, te tātá-n nǐ táuchíú<sup>n</sup>-dě ní xíhí ì<sup>n</sup> ndicutu nùma quiti caváha-gǎ cuendá sá nǐ nasáá váha-dé”, càchí-dé xáha<sup>n</sup>-dě.

<sup>28</sup>Dico ñaní-dé tée sàcuéhé-ǎ<sup>n</sup> nǐ cudéé<sup>n</sup>-dě, te ní cachí-dé sá vǎ ndíhu-dé vehe cundecu-dé vico-á<sup>n</sup> ní cùu, dico ní quee tātá-güedě ní cáhá<sup>n</sup> ndàhú-dé núú-dě cuendá ndíhu-dé. <sup>29</sup>Te ní xáha<sup>n</sup>-dě xii tātá-dě: “Táu, cundedóho váha saú-n tnúhu na càhá<sup>n</sup>-í-a, yúhú ío cuéhé cuá nǐ cuu xínu cuechi-í núú-n, te ni ì<sup>n</sup> xito ñá túú quide sáá iní-í núú-n, te ni ì<sup>n</sup> chivá líhli ñá túú tàxi-n-di caxi díí iní-í-di ndíhi cue tée càhá<sup>n</sup> ndíhi-í. <sup>30</sup>Te vitna ní nasáá déhe-n tée ní sáhá<sup>n</sup> ní dándõñuhu díhú<sup>n</sup>-n ndíhi nchaa ñáyiú xíndecu ichi díí iní. Te ní sahani-n ì<sup>n</sup> ndicutu numa quiti caváha-gǎ sá cuendá-dé”, càchí-dé xáha<sup>n</sup>-dě xii tātá-dě. <sup>31</sup>Te ní xáha<sup>n</sup> tātá-dě xii-dé: “Yòhó déhe-í duca<sup>n</sup>-ni ndècu ndíhi ñaha-n xii-í, te nchaa sá ndécú ndíhi-í cúú-xí cuendá-n. <sup>32</sup>Te vitna dacuitíí tàú-xi sá cádá-ó vico, te cudíí iní-ó, chi ñaní-n-á<sup>n</sup> nǐ quide-í cuendá sá nǐ xíhí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, càchí-dé xáha<sup>n</sup>-dě xii déhe-dé tée sàcuéhé-gǎ-á<sup>n</sup> —duha cuáhá<sup>n</sup> cuendú ní cani Jèsús núú-güedě.

### Nàcuáa ní quide ì<sup>n</sup> tée tàxi tnuní ñáhá xii cue tée xínu cuechi

**16** Te Jèsús xáha<sup>n</sup>-gǎ xii cue tée xína cuu ndíhi-gá:

—Ní xíndecu ì<sup>n</sup> tée cuica, te duca<sup>n</sup> nǐ xíndecu ì<sup>n</sup> tée ní taxi tnuní ñáhá xii cue tée ní xínu cuechi núú-dě. Te tée-á<sup>n</sup> nǐ xiní ñáhá ñáyiú dùhu-dé díhú<sup>n</sup> tée cùu patróó<sup>n</sup>-dě, te cuáhá<sup>n</sup>-dé dándõñuhu-dé, te ní xáhá<sup>n</sup>-yu xii tée cùu patróó<sup>n</sup>-dě sá dúcá<sup>n</sup> quide-dé. <sup>2</sup>Te tée cùu patróó<sup>n</sup>-dě-á<sup>n</sup> nǐ cana ñaha-dě xii-dé, te ní xáha<sup>n</sup>-dě: “¿Ná cuendá duha càhá<sup>n</sup> ñáyiú cuendá-n? Yáchí chi na tàxi cuendá-n nchaa chiu<sup>n</sup> ní quide-n, chi vitna te vǎ táxi tnuní-gá-n cuè tée xínu cuechi núú-í”, càchí-dé xáha<sup>n</sup>-dě. <sup>3</sup>Te tée tàxi tnuní ñáhá xii cue tée xínu cuechi-á<sup>n</sup> nǐ sani iní-dé: “¿Te nása cada-í vitna na quèhndé patróó<sup>n</sup>-í chiú<sup>n</sup>-í? Chi ñá cündèe-gá-í cada-í chiú<sup>n</sup> vée, te cùcaha<sup>n</sup> núú-í cáca<sup>n</sup> ndàhú-í. <sup>4</sup>Dico duha cada-í cuendá quehe<sup>n</sup> cuendá ñáhá ñáyiú vehé-yu òré ná quèhndé duu<sup>n</sup>-ná patróó<sup>n</sup>-í chiú<sup>n</sup>-í”, duha ní sani iní-dé. <sup>5</sup>Te sátá dúcá<sup>n</sup> te ní cana-dé ì<sup>n</sup> ì<sup>n</sup> cue tée tàú núú patróó<sup>n</sup>-güedě. Te tée díhna ní xícá<sup>n</sup> tnúhú-dě núú-dě, te xáha<sup>n</sup>-dě: “¿Ndèé dau tàú-n núú patróó<sup>n</sup>-í?”, càchí-dé xáha<sup>n</sup>-dě. <sup>6</sup>Te tée-á<sup>n</sup> ní xáha<sup>n</sup>-dě: “Tàú-í ì<sup>n</sup> ciendú bàrrí acití”, càchí-dé xáha<sup>n</sup>-dě. Te tée tàxi tnuní ñáhá xii cue tée xínu cuechi-á<sup>n</sup> nǐ xáha<sup>n</sup>-dě: “Iha náu reciú-n-á, te ndadúha ingá sá ùdico úxí taxi-n”, càchí-dé xáha<sup>n</sup>-dě. <sup>7</sup>Te dàtnuní ní xícá<sup>n</sup> tnúhú tucu-dé núú ingá-dé, te xáha<sup>n</sup>-dě: “Te yòhó, ¿ndèé dau tàú-n-í?”, càchí-dé xáha<sup>n</sup>-dě. Te tée tàú-á<sup>n</sup> nǐ xáha<sup>n</sup>-dě: “Ì<sup>n</sup> ciendú ngohnchi triú tàú-í”, càchí-dé xáha<sup>n</sup>-dě. Te tée tàxi tnuní ñáhá xii cue tée xínu cuechi-á<sup>n</sup> nǐ xáha<sup>n</sup>-dě: “Iha náu reciú-n-á, te cadúha ingá sá cùmídícó-nǎ taxi-n”, càchí-dé xáha<sup>n</sup>-dě. <sup>8</sup>Te tée cùu patróó<sup>n</sup>-á<sup>n</sup> nǐ cachí-dé

sá ïo váha ñùhu díquí tée dùhu-á<sup>n</sup> nàcuáa cada-dé cundecu váha-dé. Te nchaa ñáyiu xíndecu ichi cuèhé ichi duha, ío-gá váha ñùhu díquí-yu nàcuáa cada-yu cundecu váha-yu ndíhi nchaa ñáyiu cùndíhí-yu dàcúxí ñáyiu ndècu ichi Yá Ndiòxí.

<sup>9</sup> Te yúhu càchí-í sá cáda-ndó sá vâha ndíhi nchaa sá ndécú ndíhi-ndo ní cuáha ñuyíú yíca cuèchi-a, te duca<sup>n</sup> te coo cue tée ío váha tnahá tnúhu ndíhi-ndo, te òré ná ndíhi nchaa sá ío ñuyíú-a, te Yá Ndiòxí quehe<sup>n</sup> cuèndá ñáhá-gã xii-ndo, te cundecu-ndo ndíhi-gá ni caa ni quíhí<sup>n</sup>.

<sup>10</sup> Te núu ì<sup>n</sup> tée quide ndáá cuèi ì<sup>n</sup> chiú<sup>n</sup> líhli na càda-dé, te diu-ni duca<sup>n</sup> quide ndáá-dé cuèi ì<sup>n</sup> chiú<sup>n</sup> cahnu na cada-dé. Dico tée ñá túú quide ndáá, chi cuèi chiú<sup>n</sup> líhli àdi chiú<sup>n</sup> cahnu na cada-dé dico ì<sup>n</sup>-ni quide-dé. <sup>11</sup> Te núu nchòhó vá cáda-ndó sá vâha ndíhi nchaa sá ní cuáha ñuyíú yíca cuèchi-a ña, te Yá Ndiòxí vá táxí-gã sá vâha ndècu ndíhi-gá xii-ndo. <sup>12</sup> Te núu vá cáda ndáá-ndó còto-ndo nchaa sá táxí núu tnahá ñáyiu-ndo, te vá yõo taxi sá ndúú tàhú-ndó.

<sup>13</sup> Te ni ì<sup>n</sup> tée xínu cuechi vá ndácú-dě cunu cuechi-dě núú ùú pàtróó<sup>n</sup>, chi tée-á<sup>n</sup> cuu váha iní-dé núú ì<sup>n</sup> pàtróó<sup>n</sup>-dě te tni-dé nchaa tnúhu càhá<sup>n</sup> pàtróó<sup>n</sup> tée cùu váha iní-dé núú-xi-á<sup>n</sup>. Te núú ìngá tucu pàtróó<sup>n</sup>-dě vá cúú vâha iní-dé, te ni vâ tníí-dě tnúhu càhá<sup>n</sup> pàtróó<sup>n</sup>-dě-á<sup>n</sup>. Te duca<sup>n</sup> sãtnahá-xi cùu nchòhó chi vá ndácú-ndó cunu cuechi-ndo núú Yá Ndiòxí te cuhu<sup>n</sup> iní-ndó nchaa sá ío ñuyíú-a —càchí-gá xáha<sup>n</sup>-gã xii-güedé.

<sup>14</sup> Te nchaa cue tée cùu fariséú ío ñùhu iní-güedé nchaa sá ío ñuyíú-a, te xíndedóho-güedé nchaa tnúhu càhá<sup>n</sup> Jèsús, te ní càhá<sup>n</sup> yíchí-güedé cuèndá-gá.

<sup>15</sup> Te Jèsús ní xáha<sup>n</sup>-gã xii-güedé:

—Nchòhó cúú-ndó cuè tée ío váha càhá<sup>n</sup> núú ñáyiu cuèndá-ni sá cuíní-ndó

cãhá<sup>n</sup> váha-yu cuèndá-ndó, dico Yá Ndiòxí xini ndáá-gá nàcuáa càa iní-ndó ì<sup>n</sup> ì<sup>n</sup>-ndo, te nchaa sá càchí cue ñáyiu ñuyíú-a sá ío nàndíhi, Yá Ndiòxí dáquèe tíhú-gã.

### **Cuèndá nchaa tnúhu ní chídó tnùnì ndíi Moisés**

<sup>16</sup> Te nchaa tnúhu ní chídó tnùnì ndíi Moisés cùnùu-xi ni cuu, ndíhi nchaa tnúhu ní chídó tnùnì cue tée ní xóo càhá<sup>n</sup> tnúhu Yá Ndiòxí ndéé sanaha. Dico cút-nàhà ní ngúíta té Juàá tée ní xóo dacuàndute ñaha xii ñáyiu ní càhá<sup>n</sup>-dé tnúhu-í, ndéé dàvá-á<sup>n</sup> ñà túú-gã ní cùnùu nchaa tnúhu ní chídó tnùnì ndíi Moisés ndíhi nchaa tnúhu ní chídó tnùnì cue tée ní xóo càhá<sup>n</sup> tnúhu Yá Ndiòxí ndéé sanaha. Te diu-ni ndéé dàvá-á<sup>n</sup> ní quesaha ta təcú tnùnì ñáyiu nàcuáa ndíhu ndaha ñaha Yá Ndiòxí xii-yu, te vâi ñáyiu ío sàni iní-yu vitna nàcuáa cada-yu ndíhu ndaha ñaha Yá Ndiòxí xii-yu. <sup>17</sup> Te nchaa tnúhu ní chídó tnùnì ndíi Moisés ío ndáá càhá<sup>n</sup>-xi, te ndíhi-gá naa andíu ndíhi ñuyíú dàcúxí sá ndíhí ì<sup>n</sup> ì<sup>n</sup> tnúhu-á<sup>n</sup> cada-xi nàcuáa càhá<sup>n</sup>-xi.

### **Jèsús càhá<sup>n</sup>-gá cuèndá ñáyiu dàña tnahá**

(Mt. 19:1-12; Mr. 10:1-12)

<sup>18</sup> Te núu ì<sup>n</sup> tée na dàña tnahá-dé, ndíhi ñadíhí-dé, te tnándaha tucu-dé ndíhi ìngá-yu, te nèhé víhí quide-dé te núu duca<sup>n</sup> na càda-dé, te tée na tnándaha ndíhi ñaha ní dáñá yì-xi, te diu-ni duca<sup>n</sup> ñà túú cùu-xi sá vâha te núu duca<sup>n</sup> na cada-yu —càchí-gá xáha<sup>n</sup>-gã xii-güedé.

### **Cuèndá ì<sup>n</sup> tée nàni Lázaru ndíhi cuèndá ì<sup>n</sup> tée cuica**

<sup>19</sup> Te xáha<sup>n</sup> tucu-gá xii-güedé:

—Ní xíndecu ì<sup>n</sup> tée cuica, te ní xóo cuihnu-dé mee-ni dõó vâha dóó víi càa, te nchaa nduu súuní vâha ní xóo cada-dé vico vehe-dé. <sup>20</sup> Te ní xíndecu

tucu ii<sup>n</sup> téé ndàhú ní xínani-dě Lázará, te téé-á<sup>n</sup> ní cuhú-dé ní xindeé-dé nitùhú-dé ndíhyi, te ii<sup>n</sup> nduu ii<sup>n</sup> nduu ní xóo taxinucóo ñaha-güedě xii-dé yuyèhe téé cuica-á<sup>n</sup>. <sup>21</sup>Te téé ndàhú-á<sup>n</sup> ní xóo cuú-dé docó, te ní xóo cuini-dé caxi-dé nchaa sá ñà túú-gã ní xóo yáha caxi téé cuica-á<sup>n</sup>, te ñá túú ní xóo níhí-dě. Te cuèi iná ní xóo quíhí<sup>n</sup>-di ní xóo nayuu-di nchaa núú ndíhyi ndèé-dé-á<sup>n</sup>. <sup>22</sup>Te ní sáá ii<sup>n</sup> nduu te ní xíhí téé ndàhú-á<sup>n</sup>, te cue espíritú xínú cuèchi núú Yá Ndióxi ndéca ñaha-xi xii-dé cuándaa núú ndécú tē Àbrahám cundecu-dé. Te ní sáá nduu ní xíhí téé cuica-á<sup>n</sup> tñàhá-dé, te ní chindúxi ñaha-güedě xii-dé. <sup>23</sup>Te ní sáá-dé núú xindecu nchaa ñáyiu ní xíhí ñá túú ní quide ndáá núú Yá Ndióxi te xíá<sup>n</sup> ïo ndòho-dé ndécú-dě, te ní ndonehe núú-dě te xica ní xini-dé té Àbrahám ndíhi té Lázará-á<sup>n</sup> xindecu-güedé. <sup>24</sup>Te níhi ní cáhá<sup>n</sup>-dé, te xáha<sup>n</sup>-dě: “Yòhó tātá Àbrahám, cundàhú iní ñàhá xii-í, te cūñaha xii té Lázará ná dāndaxi<sup>n</sup>-dé díquí ndáhá-dě, te na quixi-dé dandaxi<sup>n</sup>-dé yàa-í, chí ïo ndòho-í ñùhú-í núú ñùhú núú càyú-a”, càchí-dé xáha<sup>n</sup>-dě xii té Àbrahám. <sup>25</sup>Dico té Àbrahám ní xáha<sup>n</sup>-dě: “Ndàhú yòhó ñaní tñàhá-í, dandàcu iní sá ïo váha ní xindecu-n ñùyíú, te té Lázará ïo ndàhú ní ndòho-dé ní xindecu-dé. Te vitna ní nucúndecu váha-dé iha, te yòhó ndóhó-n vitna. <sup>26</sup>Te ñá díú-ní sã xíá<sup>n</sup> tucu, chí cuádava ndècu ii<sup>n</sup> déhvä cùnú ñùhú ñèhu-xi núú ndécú-ó, te cuèi nchaa ñáyiu xindecu iha na càchí iní-yu quixí-yu núú ndécú-ndó dico vá ndácú-yu, te ni nchòhó vá ndácú-ndó quixi-ndo núú ndécú-ndí”, càchí-dé xáha<sup>n</sup>-dě. <sup>27</sup>Te ní xáha<sup>n</sup> tēe cuica-á<sup>n</sup>: “Te núú duca<sup>n</sup> te cáhá<sup>n</sup> ndàhú-í núú yòhó tātá Àbrahám vitna sá tēndàha-n té Lázará ná quíhí<sup>n</sup>-dé vehe tātá-í, <sup>28</sup>chí ndècu úhú<sup>n</sup>-gá ñaní-í, te na cūñaha-dě xii-güedé sá vã

cádá-güedě dàtná ní quide-í cuendá sá vã quixí-güedě tñàhá-güedé núú ndécú-í ndóhò-í-a”, càchí-dé xáha<sup>n</sup>-dě. <sup>29</sup>Te té Àbrahám ní xáha<sup>n</sup>-dě: “Mee-güedě ndécú ndíhi-güedé nchaa tñúhu ní chídó tñuní ndíi Moisés, ndíhi nchaa tñúhu ní chídó tñuní cue téé ní xóo cáhá<sup>n</sup> tñúhu Yá Ndióxi ndéé sanaha, te nchaa tñúhu-á<sup>n</sup> ná tñii-güedé nacuáa cáhá<sup>n</sup>-xi”, càchí-dé xáha<sup>n</sup>-dě xii-dé. <sup>30</sup>Te ní xáha<sup>n</sup> tucu téé cuica-á<sup>n</sup>: “Tātá Àbrahám, dico vá cádá cuendá-güedé nchaa tñúhu-á<sup>n</sup>, dico núú ii<sup>n</sup> ñáyiu ñá túú-gã ndécú ñùyíú ii<sup>n</sup> ñáyiu ndècu ndíhi-n quíhí<sup>n</sup>-yu cáhá<sup>n</sup> ndíhi ñàhá-yu xii-güedé nacuáa ndùu tñúhu váha, te ndixi cuèchi iní-güedé nchaa sá ñà túú quide váha-güedé ndécú-güedé, te cada váha-güedé”, càchí-dé xáha<sup>n</sup>-dě xii-dé. <sup>31</sup>Dico té Àbrahám ní xáha<sup>n</sup>-dě: “Te núú ñá túú cuini-güedé tñii-güedé tñúhu ní cáhá<sup>n</sup> ndíi Moisés, ndíhi tñúhu ní cáhá<sup>n</sup> cue téé ní xóo cáhá<sup>n</sup> tñúhu Yá Ndióxi ndéé sanaha ña, te díu-ni duca<sup>n</sup> càda-güedé cuèi ii<sup>n</sup> ñáyiu ní xíhí ná ndòtó-yu cūñàhá-yu nacuáa ndùu tñúhu váha, chí vá quindáá iní-güedé”, càchí té Àbrahám xáha<sup>n</sup>-dě xii téé cuica-á<sup>n</sup> —càchí Jèsús xáha<sup>n</sup>-gã xii cue téé cùu fariséú.

### Quihi iní-ó vã cündècu-ó ichi cuehé ichi duha

(Mt. 18:6-7, 21-22; Mr. 9:42)

**17** Te Jèsús ní xáha<sup>n</sup>-gã xii cue téé xica cuu ndíhi-gá:

—Dacuití sã cóó cuè téé dacàhá<sup>n</sup>-güedé ñáyiu cadá-yu nándi sá cuèhé sá dúhá, jidico ndàhú ní cuu cue téé duca<sup>n</sup> na dàcahá<sup>n</sup> ñàhá xii-yu cadá-yu nándi sá cuèhé sá dúhá! <sup>2</sup>Chí váha-gã sá ñuu na dàcutu ndéé ñáyiu ii<sup>n</sup> yúú yòdó dücú<sup>n</sup>-güedé te dàquée ñàhá-yu xii-güedé xití ndute làmár, te ñá díú sã cündècu-güedé dacàhá<sup>n</sup>-güedé ñáyiu cadá-yu nándi sá cuèhé sá dúhá,

cuèi ñáyi ndàhú iní-xi dandàhú-güedé.  
<sup>3</sup> Te ío quíhi iní-ndó cùndecu-ndo.

Te núu ìí ñaní tnàhá-ndó quide-dé ìí sá ñà túú tàù-dé cada-dé sá cúú-xí-ndó te cáhá-ndó dõho-dé, te núu ní ndixi cuéchi iní-dé sá ñà túú ní quide váha-dé, te cada càhnu iní-ndó sá ní quide-dé. <sup>4</sup> Te cuèi úsá xito na càda-dé nándi sá ñà túú tàù-dé cada-dé sá cúú-xí-ndó ìí nduu, te núu na quíxi-dé úsá xito núú-ndó, te cachí-dé sá vâ dúcá-gã cada-dé, te xini ñuhu-xi cada cahnu iní-ndó-dé — càchí-gá xáha-gã xii-güedé.

### Ñáyi sàndáá ndisa iní-xi

<sup>5</sup> Te ní xáha<sup>n</sup> cuè tée xica cuu ndihi Jesús xii-gá:

—Chindee ñàha xii-ndí cuèndá duca<sup>n</sup> te quindáá-gá iní-ndí sá Yã Ndiõxí ndácú-gã quídé-gã nchaá sá vâha — càchí-güedé xáha<sup>n</sup>-güedé xii-gá.

<sup>6</sup> Te ní xáha<sup>n</sup> Jèsús:

—Te núu nchòhó quindáá ndisa iní-ndó sũúni cuèdicó luha líí dàtná cuíní-ndó càa ìí ndíquí<sup>n</sup> yutnu nàni mostázá, te duca<sup>n</sup> te cuu cúñaha-ndo xii ìí yutnu: “Quene-n ìha te quíhí<sup>n</sup>-n cuíhnu-n xití làmár”, duha cúñaha-ndo. Te duca<sup>n</sup> càda-xi te núu na quindáá ndisa iní ñáhá-ndó xii-í —càchí-gá xáha<sup>n</sup>-gã xii-güedé.

### Nàcuáa tàù ìí tée xinu cuechi cada-dé

<sup>7</sup> Te xáha<sup>n</sup> tùcu-gá xii-güedé:

—Te núu ìí nchòhó ndécú ìí tée xinu cuechi núú-ndó, te cuáhá<sup>n</sup>-dé yucu cuángada chiú<sup>n</sup>-dé, àdi cuáhá<sup>n</sup>-dé yucu coto-dé quití, te òré ní nasáá-dé vehe sá ní sáhá<sup>n</sup>-dé yucu, te vâ cúñaha nchòhó cue tée cùu patróó<sup>n</sup>-dè xii-dé: “Yáchí nehé caxi-n dítá”, vâ dúhá cúñaha-ndo. <sup>8</sup> Chi nchòhó cue tée cùu patróó<sup>n</sup>-dè cúñaha-ndo xii-dé: “Cundíhí iní cada túha sá cúdini-í, te díhna-gá-í caxi-í dítá te dàtnúni caxi-n”, duha cúñaha nchòhó cue tée cùu patróó<sup>n</sup> xii-dé. <sup>9</sup> Te òré ná

ndíhí chiú<sup>n</sup> ní táhú nchòhó cue tée cùu patróó<sup>n</sup> cada tée xinu cuechi núú-ndó, te ñà túú tàù-ndó ndacá<sup>n</sup> táhú-ndó núú tée xinu cuechi núú-ndó. <sup>10</sup> Te duha càhá<sup>n</sup>-í chi núu òré ná ndíhi nchaá chiú<sup>n</sup> ní táhú Yã Ndiõxí cada-ndo, te cachí-ndó: “Nchúhú cúú-ndí cue tée xinu cuechi núú Yã Ndiõxí, dico ñà túú tàù-gá ndacá<sup>n</sup> táhú-gã núú-ndí, chi mee-ni chiú<sup>n</sup> ní táhú-gã ní quide-ndí”, duha cachí-ndó — càchí-gá xáha<sup>n</sup>-gã xii-güedé.

### Jèsús quídé tãtna-gá úxí cue tée tnàhá cuéhé sã dátèhyú nihnu-xi yiqui cùñú ñáyi

<sup>11</sup> Te ñuhu Jesús ichi cuáhá<sup>n</sup>-gã ñuu Jerusálén, te ní yáha-gã núú ràyá distritú Sãmariá ndíhi distritú Galileá. <sup>12</sup> Te ta cùyatni-gã ìí ñuu líhli cuáhá<sup>n</sup>, te ní sãtnahá ñáhá úxí tnàhá cue tée cùhú xii-gá, te tnàhá-güedé cuéhé sã dátèhyú nihnu-xi yiqui cùñú-ó dico xica lùha ní ngúnu tní-güedé, <sup>13</sup> te níhi ní cáhá<sup>n</sup>-güedé, te xáha<sup>n</sup>-güedé xii Jèsús:

—¡Mèstrú, cundàhú iní ñáhá xii-ndí! —càchí-güedé xáha<sup>n</sup>-güedé xii-gá.

<sup>14</sup> Te òré ní xini ñáhá Jèsús xii-güedé, te ní xáha<sup>n</sup>-gã:

—Chí cuáhá<sup>n</sup> núú dütú ná cundehe ñaha-dé xii-ndo —càchí-gá xáha<sup>n</sup>-gã xii-güedé.

Te ní xica-güedé cuáhá<sup>n</sup>-güedé, te ichi-ni ñuhu-güedé cuáhá<sup>n</sup>-güedé ní ndúha-güedé cuéhé tnàhá-güedé. <sup>15</sup> Te nchaá-güedé ní cutnùni iní-güedé sá ní ndúha-güedé, dico ìí-ni-dé ní nacuíco-dé, te ní ngúíta-dé níhi ní cáhá<sup>n</sup>-dé, te ní cachí-dé sá ío càhnu cuu Yã Ndiõxí. <sup>16</sup> Te ní ngúíñí xití-dé núú Jèsús, te ní nuu núú-dé ndàa núú ñúhú ndacá<sup>n</sup> táhú-dé núú-gã. Te tée-á<sup>n</sup> cúú-dé tée distritú Sãmariá. <sup>17</sup> Te Jèsús ní cachí-gá:

—Úxí tnàhá-güedé ní ndúha cuéhé tnàhá-güedé. ¿Te ndèè ndécú dàva-gã-güedé-í? <sup>18</sup> ¿Te náa ìí-dii-ni

tée ingá ñuú-a ní nacuico-dě ndàcá<sup>n</sup> táhú-dě núú Yă Ndiöxí, te cächí-dé sá ïo càhnu cuu-gá ñă? —cächí-gá.

<sup>19</sup> Te ní xáha<sup>n</sup>-gă xii tée-á<sup>n</sup>:

—Ndacuñí te núhú-n, chi sa ní ndúha-n cuéhé tnáhá-n, chi ní sándáá iní-n Yă Ndiöxí —cächí-gá xáha<sup>n</sup>-gă xii-dé.

### Nàcuáa yindaha ñaha Yă Ndiöxí

(Mt. 24:23-28, 36-41)

<sup>20</sup> Te cue tée cùu fariséú ní xícá<sup>n</sup> tnúhú-güedě núú Jèsús ñuú ná ama nguíta Yă Ndiöxí ndíhu ndaha-gă ñáyiu. Te ní xáha<sup>n</sup>-gă:

—Ñă túú ñă cada-xi ñuyúú quini-ndó cuendá cutnùní iní-ndó să ndíhu ndaha ñaha Yă Ndiöxí xii-ndo. <sup>21</sup> Te ni vă yô cachí: “Iha ndècu-gá táxí tnùní-gá, àdi yacá<sup>n</sup> ndécú-gă táxí tnùní-gá”, chi tnuú-ndó sà ndecu-gă ndíhi nchaa ñáyiu yindaha-gă —cächí-gá xáha<sup>n</sup>-gă xii-güedé.

<sup>22</sup> Te ní xáha<sup>n</sup>-gă xii cue tée xica cuu ndíhi-gá:

—Te nchòhó chi sáá nduu, te cachí iní-ndó să sùúni cuèdicó ñ<sup>n</sup> nduu quini ñáhá-ndó xii yúhú Tée cùu ñaní tnáhá-ndó nchàa-ndo, dico vá quini ñáhá-gă-ndó xii-í. <sup>23</sup> Te coo ñáyiu cùñáhá-yu xii-ndo: “Iha ndècu-gá, á<sup>n</sup> yacá<sup>n</sup> ndécú-gă”, quesàhá-yu cùñáhá-yu xii-ndo. Dico vá quindáá iní-ndó quíhí<sup>n</sup>-ndó ndíhí-yu núú cächí-yu, te ni vă cání iní-ndó quíhí<sup>n</sup> méé-ndó. <sup>24</sup> Chi dàtná cuini-ndó quide-xi oré sàá ndúté àndiu, chi uu<sup>n</sup>i dàyehé-xi nihí ñuyúú, duca<sup>n</sup> càda-xi nduu na quixi tucu yúhú Tée cùu ñaní tnáhá-ndó nchàa-ndo, te dàvá-á<sup>n</sup> quini ñáhá nchàa-ndi túhú ñáyiu xii-í. <sup>25</sup> Dico díhna-gă ndoho vîhi-í, te daquèe tîhú ñáhá ñáyiu ñuyúú-a xii-í. <sup>26</sup> Te cadá-yu dàtná ní quide ñáyiu ní xindecu cùtnàhà ní xindecu té Nöé, te ñu-ni duca<sup>n</sup> sätnahá-xi cada nchaa ñáyiu ndècu

vitna ndéé sáá nduu quixi tucu yúhú Tée cùu ñaní tnáhá-ndó nchàa-ndo. <sup>27</sup> Chi caxi-ní-yu, coho-ní-yu, te caca cuu-ni cue tée xica ndáhú, te tnândaha-ní-yu, chi duca<sup>n</sup> ní quidé-yu dàvá-á<sup>n</sup> ndéé ní sáá nduu cuànguee té Nöé xití bàrcú, te ní nguíta-xi ní cuu<sup>n</sup> dáú ní ndaa ndute ñuyúú, te nchaá-yu ní xíhí ní cáhá-yu dàvá-á<sup>n</sup>. <sup>28</sup> Te ñu-ni duca<sup>n</sup> ní quide tucu ñáyiu cùtnàhà ní xindecu té Löt, chi xèxí-yu xíhí-yu, te sàá<sup>n</sup>-yu te nàdicó-yu, te xixitú-yu nándi sá xixitú-yu, te nchaa cue tée xidácáá-güedě vehe. <sup>29</sup> Te òré ní quee té Löt ñuú Sòdomá, te ní ngoyo ñuhú andiu, te dàcá yúú sùúni dicó ní nduu ñuhú-ñă-xi, te ní xíhí nchaandi túhú ñáyiu ñuú-á<sup>n</sup>. <sup>30</sup> Te ñu-ni duca<sup>n</sup> sätnahá-xi cada ñáyiu na sàá nduu quixi tucu yúhú Tée cùu ñaní tnáhá-ndó nchàa-ndo ñuyúú-a.

<sup>31</sup> Te núú ñ<sup>n</sup> ñáyiu càndodó-yu díquí vèhé-yu nduu-á<sup>n</sup>, te nì vá ndíhu-gá-yu quehé<sup>n</sup>-yu ñ<sup>n</sup> ndachíú<sup>n</sup>-yu canehé-yu quíhí<sup>n</sup>, te ñáyiu cuáhá<sup>n</sup> yucu, te nì vá nùhú-gá-yu vehé-yu. <sup>32</sup> Te chí dándacu iní nàcuáa ní yáha ñadìhí té Löt. <sup>33</sup> Te nchaa ñáyiu cuini dàcácu nihnu mee-xi ñuyúú-a ña, te cuíta nihnú-yu, te nchaa ñáyiu na cùú sá cuendá-í, te naníhí tãhú-yu.

<sup>34</sup> Te na cächí tnúhu tucu-í xii-ndo să ndùu-á<sup>n</sup>, te núú úú-yu càa ñ<sup>n</sup> núú xito, te ñ<sup>n</sup>-yu ndanchitá-yu ndaa-yu andiu, te ñ<sup>n</sup>-yu quendóo. <sup>35</sup> Te núú úú ñáyiu ñíhí nchíçö-yu ñ<sup>n</sup>-ni vèhe, te ñ<sup>n</sup>-yu ndanchitá-yu ndaa-yu andiu, te ñ<sup>n</sup>-yu quendóo. <sup>36</sup> Te núú úú cue tée yîhi-güedé yucu, te ñ<sup>n</sup>-dé ndànchita-dé ndaa-dé andiu, te ñ<sup>n</sup>-dé quendóo —cächí-gá xáha<sup>n</sup>-gă xii-güedé.

<sup>37</sup> Te sá dúcá<sup>n</sup> ní cáhá<sup>n</sup>-gă ñuú ní xícá<sup>n</sup> tnúhú-güedě núú-gă, te xáha<sup>n</sup>-güedě xii-gá:

—Mèstrú, ¿te ndéè duca<sup>n</sup> càda-xi-i? —cachí-güedé xáha<sup>n</sup>-güedě xii-gá.

Te ní xáha<sup>n</sup>-gă:

—Te nchòhó xìní-ndó sǎ ncháá nǔú yúcu yìqui cuñú ní xíhí, te yàcá<sup>n</sup> tàcá cue ndixíí xéxí-güèdì —cachí-gá xáha<sup>n</sup>-gǎ xii-güedé.

**Jèsús càhá<sup>n</sup>-gá cuendá ì<sup>n</sup> juéxí ndihi cuendá ì<sup>n</sup> ñaha quèé**

**18** Te Jèsús ní cani-gá ì<sup>n</sup> cuèndú núú-güedé cuendá sá vǎ ná tǔhú iní-güedé càhá<sup>n</sup> ndihi-güedé Yǎ Ndiòxí nchaa-ní òré. <sup>2</sup> Te xáha<sup>n</sup>-gǎ:

—Ì<sup>n</sup> ñuú ndécú ì<sup>n</sup> juéxí, te ni ñà túú sàndáá iní-dé Yǎ Ndiòxí, te ni ì<sup>n</sup> tnúhu xáha<sup>n</sup> ñáyiú ñá túú cuiní-dé cada cuendá-dé. <sup>3</sup> Te diu-ni ñuú-á<sup>n</sup> ndécú tùcu ì<sup>n</sup> ñadihí ñaha quèé, te ní sáhá<sup>n</sup>-a<sup>n</sup> càhá<sup>n</sup> ndàhú-a<sup>n</sup> núú juéxí-á<sup>n</sup> cuendá cada ndáá-dé ì<sup>n</sup> cuéchi. <sup>4</sup> Te titní xito ní cuu sáhá<sup>n</sup>-a<sup>n</sup> càhá<sup>n</sup> ndàhú-a<sup>n</sup> núú-dé te ñá túú cuiní-dé cada cuendá-dé tnúhu càhá<sup>n</sup>-a<sup>n</sup> ní cùu, te ndéé núú ñà cúú-gǎ te ní sani iní-dé: “Te cuèi ñá túú sàndáá iní-í Yǎ Ndiòxí, te ni ñà túú quide cuendá-í nchaa tnúhu càhá<sup>n</sup> ñáyiú cada-í, <sup>5</sup> dico na càda ndáá-í cuendá ñaha quèé-a ndihi ñáyiú cùu úhú iní tnáhá ndihi-a<sup>n</sup>, chi vá cùndèe-gá iní-í nuu núu quixi-a<sup>n</sup> dasàtú iní ñáhá xii-í”, duha ní sani iní tée cùu juéxí-á<sup>n</sup> —càchí-gá xáha<sup>n</sup>-gǎ xii-güedé.

<sup>6</sup> Te ní xáha<sup>n</sup> tùcu-gá xii-güedé:

—Cada cuendá-ndó nàcuáa ní sani iní juéxí tée cuihna iní-xi-á<sup>n</sup>. <sup>7</sup> Te Yá Ndiòxí ío chindee-gá nchaa ñáyiú ní càhá<sup>n</sup>-gá cundecu ndihi-gá, chi cuèi nduu cuèi niú càhá<sup>n</sup> ndihi ñáhá-yu xii-gá, te vá cùyàa-gá nachinaa-gá nchaa sá quidé ñaha nchaa ñáyiú cùu úhú iní ñáhá xii-yu. <sup>8</sup> Te ío ndíhi duca<sup>n</sup> càda-gá. Te òré ná quixi yúhú Tée cùu ñaní tnáhá-ndó nchàa-ndo, ¿te náa naníhí-gǎ-í ñáyiú sàndáá ndisa iní Yǎ Ndiòxí-á<sup>n</sup>? —càchí-gá xáha<sup>n</sup>-gǎ xii-güedé.

**Nàcuáa quide ì<sup>n</sup> tée cùu fariséú ndihi ì<sup>n</sup> tée cùu cobradór**

<sup>9</sup> Te Jèsús ní càhá<sup>n</sup>-gá núú ñáyiú nàcuáa quide ñáyiú sàni iní sá ío quide ndáá te dàquee tǔhǔ-yu tnàha ñáyiú-yu, te xáha<sup>n</sup>-gǎ xii-yu:

<sup>10</sup> —Úú cue tée cuáhá<sup>n</sup>-güedé veñúhu càhnu sá ío cùnuu càhá<sup>n</sup> ndihi-güedé Yǎ Ndiòxí, te ì<sup>n</sup>-dé cúú-dé tée cùu fariséú, te ingá-dé cúú-dé tée cuihna iní-xi quide cobrá ñáhá xii ñáyiú cuendá impuèstú. <sup>11</sup> Te tée cùu fariséú-á<sup>n</sup> nútní-dé càhá<sup>n</sup> ndihi-dé Yǎ Ndiòxí, te xáha<sup>n</sup>-dé xii-gá: “Yòhó Dútú Ndiòxí ndàcá<sup>n</sup> tǎhú-í núú-n, chi ñá túú quide-í dàtná quidé dàva-gá-güedé, chi dùhu-güedé, càhá<sup>n</sup> ndihi-güedé ñadihí te ñá díú ñadihí-güedé cúú-yu, te nándi-gá nchaa sá cuèhé sá dúhá quide-güedé, te ni ñà túú quide-í dàtná quidé tée cuihna iní-xi quide cobrá ñáhá xii ñáyiú cuendá impuèstú ndécú ìha. <sup>12</sup> Chi yúhú ñá túú tnàhí ná xéxi-í úú nduu xití samàná cuendá sá càhá<sup>n</sup> ndihi ñaha-í xii-n, te nchaa sá ñihí-í te càhu-í úxí xichi, te ì<sup>n</sup> xichi tàxi-í xii-n”, càchí-dé xáha<sup>n</sup>-dé xii Yá Ndiòxí. <sup>13</sup> Dico tée cuihna iní-xi quide cobrá ñáhá xii ñáyiú cuendá impuèstú-á<sup>n</sup> chi xica lùha nutnǎ-dé, te ni lùha ñá túú cùyii-dé ndonehe núú-dé andiu cuendá sá ndíxí cuèchi iní-dé nchaa sá ñà túú vǎha quide-dé, te ndèdí ndaha-dé pèchú-dé sá ndihú iní-dé, te xáha<sup>n</sup>-dé xii Yá Ndiòxí: “¡Yòhó Dútú Ndiòxí cundàhú iní ñáhá xii-í, chi ío cuèhé sǎ ñà túú vǎha quide-í núú-n!”, càchí-dé xáha<sup>n</sup>-dé xii Yá Ndiòxí. <sup>14</sup> Te na càchí tnúhu-í xii-ndo sǎ tée cuihna iní-xi quide cobrá ñáhá xii ñáyiú-á<sup>n</sup> ní tedóho Yá Ndiòxí nchaa tnúhu ní càhá<sup>n</sup>-dé, te ní quide càhnu iní-gá nchaa sá ñà túú vǎha ní quide-dé, te cuánuhú-dé vehe-dé. Te tée cùu fariséú-á<sup>n</sup> ñà túú ní tédóho ñaha Yǎ Ndiòxí xii-dé. Chi nchaa ñáyiú na



càda cahnu mee-xi ñuyíu-a te vá cúũ-yu ñáyi cuñuu, te nchaa ñáyi ñá túú quide cahnu mee-xi, ñáyi-á<sup>n</sup> cunùu-yu —càchí Jèsús xáha<sup>n</sup>-gã xii-yu.

### Jèsús quidé íi-gã landú

(Mt. 19:13-15; Mr. 10:13-16)

<sup>15</sup> Te ì<sup>n</sup> úú ñáyi ndecá-yu landú líhli cuáhá<sup>n</sup> núú Jèsús chi cuíní-yu sá téndàha ñaha-gã xii-güexi, te òré ní xiní cue téé xica cuu ndíhi-gá sá ndecá-yu landú-á<sup>n</sup> cuáhá<sup>n</sup> núú-gã, te ní ngüíta-güedé ténáá ñáhá-güedé xii-yu, te xáha<sup>n</sup>-güedé sá vá dúcá<sup>n</sup> càdá-yu. <sup>16</sup> Dico Jèsús ní cana ñaha-gã xii-güedé, te ní xáha<sup>n</sup>-gã:

—Chí dáñá ná quixi nahi landú líhli-á<sup>n</sup> núu-í-a, te vá càdí-ndó ìchi-güexi, chi dàtná cúú vâha iní cue landú líhli-á<sup>n</sup> duca<sup>n</sup> cùu vâha iní cue ñáyi yândaha ñaha Yá Ndióxi. <sup>17</sup> Te na càchí tnúhu ndáá-í xii-ndo sá núu vá quíndáá iní ñáhá-ndó dàtná quidé dàva landú líhli sàndáá iní ñáhá xii-í, te vá ndíhu ndaha ñaha Yá Ndióxi xii-ndo, te vá ndúú táhú-ndó cundecu-ndo ndíhi-gá ni caa ni quíhí<sup>n</sup> —càchí-gá xáha<sup>n</sup>-gã xii-güedé.

### Ì<sup>n</sup> téé cuica càhá<sup>n</sup> ndíhi-dé Jèsús

(Mt. 19:16-30; Mr. 10:17-31)

<sup>18</sup> Te ì<sup>n</sup> téé cùnuu ní xicá<sup>n</sup> tnúhú-dé núú Jèsús, te xáha<sup>n</sup>-dë xii-gá:

—Yòhó Mèstrú, cùu-n téé ío vâha iní-xi, te cuíní-í núu vá cùndèe iní-n càchí tnúhu-n nã cúú sã vâha cada-í cuendá nduu táhú-í cundecu-í ndíhi Yá Ndióxi ni caa ni quíhí<sup>n</sup> —càchí-dé xáha<sup>n</sup>-dë xii-gá.

<sup>19</sup> Te Jèsús ní xáha<sup>n</sup>-gã xii-dé:

—¿Te cùtnuní iní-n nàcuáa nduu tnúhu càhá<sup>n</sup>-n sã yúhú vâha iní-á<sup>n</sup>? Chi ì<sup>n</sup> dîí-ni Yá Ndióxi vâha iní-gá. <sup>20</sup> Te yòhó xini-n nàcuáa ní cachí Yá Ndióxi cada ñáyi, te duha ní cachí-gá: “Nchòhó cue téé vá càhá<sup>n</sup> ndíhi-ndo ñàdihí te núu ñá díú ñàdihí-ndó cùu-yu, te duca<sup>n</sup>-ni nchòhó cue ñáyi dîhí tucu

vá càhá<sup>n</sup> ndíhi-ndo téé te núu ñá díú yì-ndo cuu-güedé, te vá cáhni-ndó tnàha ñáyi-ndo, te ni vá dúhú-ndó sã ndécú ndíhi-yu, te ni vá dácacu-ndo cuéchi neñúú sá cúú-xí tnàha ñáyi-ndo, te canehe-ndo sã yínùhu núú tãtá-ndó ndíhi núú ñaná-ndó”, duha ní cachí Yá Ndióxi cada ñáyi —càchí Jèsús xáha<sup>n</sup>-gã xii-dé.

<sup>21</sup> Te téé-á<sup>n</sup> ní xáha<sup>n</sup>-dë xii-gá:

—Nchaa xíá<sup>n</sup> ní ngüíta-í quidé-í ndéé cùtnàhá cúú làndú-í —càchí-dé xáha<sup>n</sup>-dë xii-gá.

<sup>22</sup> Te Jèsús ní xáha<sup>n</sup>-gã xii-dé:

—Dico cùmání ìngá núú sã càdá-n, vitna te quíhí<sup>n</sup>-n te dico-n nchaa sã ndécú ndíhi-n, te díhú<sup>n</sup>-n cuáha táhú-n cuè ñáyi ndáhú, te duca<sup>n</sup> te nduu táhú-n cundecu vâha-n núú ndécú Yá Ndióxi táxi tnúni-gá, te na yâha duca<sup>n</sup> càda-n te quixi-n chìtnahá ñáhá-n xii-í —càchí-gá xáha<sup>n</sup>-gã xii-dé.

<sup>23</sup> Te sá dúcá<sup>n</sup> ní xáha<sup>n</sup> Jèsús xii-dé, te ío ní cundíyí-dé, chí ío cuica-dë. <sup>24</sup> Te sá ní xiní ñáhá Jèsús xii-dé cundíyí-dé, núu ní cachí-gá:

—Ío úhú quíndáá iní ñáyi cuica Yá Ndióxi cuendá ndíhu ndaha ñaha-gã xii-yu! <sup>25</sup> Te yáchí-gá yâha ì<sup>n</sup> càméyu yaú ì<sup>n</sup> yiqui tícú dàcúxí sã quíndáá iní ì<sup>n</sup> ñáyi cuica Yá Ndióxi cuendá ndíhu ndaha ñaha-gã xii-yu —duha ní cachí-gá.

<sup>26</sup> Te nchaa ñáyi ní tecú dóho-xi tnúhu ní càhá<sup>n</sup>-gá ní xáhá<sup>n</sup>-yu xii-gá:

—¿Te yoo naníhí tàhú te núu duca<sup>n</sup> vâ<sup>n</sup>? —càchí-yu xáhá<sup>n</sup>-yu xii-gá.

<sup>27</sup> Te Jèsús ní xáha<sup>n</sup>-gã xii-yu:

—Cue ñáyi ñuyíu-a chí vá ndácũ-yu ná cadá-yu nàcuáa ndíhu ndaha ñaha Yá Ndióxi xii-yu, dico mee-gã chí ndacu-gá ndíhu ndaha ñaha-gã xii-yu chí nchaa sã vâha ndàcu-gá quidé-gã —càchí-gá xáha<sup>n</sup>-gã xii-yu.

<sup>28</sup> Te té Pèlú ní xáha<sup>n</sup>-dë xii-gá:

—Nchúhú ní dándóo-ndí nchaa sá ndécú ndíhi-ndí, te ní tuha ñaha-ndí xii-n —càchí-dé xáha<sup>n</sup>-dë xii-gá.

<sup>29</sup> Te ní xáha<sup>n</sup>-gã xii ñáyiú:

—Na càchí tnúhu ndáá-í xii-ndo sá ncháá ñáyiú na dándóo vehe-xi, àdì tátá-xi, náná-xi, ñaní-xi, cúha-xi, ñadíhí-xi, déhe-xi cuèndá sá cuiní-yu ndíhu ndaha ñaha Yá Ndióxi xii-yu, <sup>30</sup> te ío-gá cuéhé sá cuñaha-gã xii-yu cundecu ndíhí-yu, te ñá díú-ní xíá<sup>n</sup>, chi tnàhá nduu táhú-yu cundecu ndíhi ñáhá-yu xii-í ni caa ni quíhí<sup>n</sup> ná sàá nduu —càchí-gá xáha<sup>n</sup>-gã xii-yu.

**Jèsús càhá<sup>n</sup> tucu-gá  
sá cáhní ñaha-güedé xii-gá**

(Mt. 20:17-19; Mr. 10:32-34)

<sup>31</sup> Te Jèsús ní taudíhí<sup>n</sup>-gá ndí ùxúú cue téé xica cuu ndíhi-gá tnuú ñáyiú, te ní xáha<sup>n</sup>-gã xii-güedé:

—Vitna te quíhí<sup>n</sup>-ó ñúú Jerusàlén, chi yacá<sup>n</sup> cada-xi nchaa nàcuáa sa ní chídó tnùní cue téé ní xóo cáhá<sup>n</sup> tnúhu Yá Ndióxi ndéé sanaha nàcuáa yáha yúhú Téé cùu ñaní tnáhá-ndó ncháa-ndo. <sup>32</sup> Chi cuáha cuèndá ñáhá-güedé xii-í núú cuè téé ñá túú cùu cue téé isràèl, te cudíquí ndéé ñáhá-güedé xii-í, te cúcuèhé ñáhá-güedé, te tiú díhí ñáhá-güedé xii-í. <sup>33</sup> Te caniha-güedé ndíhi ñii, te dàtnùní cahni ñaha-güedé xii-í, dico nduu úní sá cùú-í te ndoto-í —càchí-gá xáha<sup>n</sup>-gã xii-güedé.

<sup>34</sup> Dico ni ìh<sup>n</sup> tnúhu ní cáhá<sup>n</sup>-gá ñá túú ní tècú tnùní-güedé, chi ío yidáhu tnúhu ní cáhá<sup>n</sup>-gá núú xíá<sup>n</sup> ni ìh<sup>n</sup> ñá túú ní tècú tnùní-güedé.

**Jèsús quidé tãtna-gá núú ìh<sup>n</sup>  
téé cuàá ñúú Jericó**

(Mt. 20:29-34; Mr. 10:46-52)

<sup>35</sup> Te òrè tá cùyatni Jesús ñúú Jericó cuáhá<sup>n</sup>, te yuhu ìchi cuáhá<sup>n</sup>-gá-á<sup>n</sup> núcóo ìh<sup>n</sup> téé cuàá xicá<sup>n</sup> ndáhú-dé. <sup>36</sup> Te òrè ní tecú dóho-dé xicáhá<sup>n</sup> vãi ñáyiú

xíyáha-yu, te ní xicá<sup>n</sup> tnúhú-dé núú ñáyiú ndécu ndíhi-dé ná cuèndá duca<sup>n</sup> vãi-yu yáha. <sup>37</sup> Te ní xáhã<sup>n</sup>-yu sá Jèsús téé ñúú Nazarét ñúhú-dé ìchi. <sup>38</sup> Te níhi ní cáhá<sup>n</sup>-dé, te xáha<sup>n</sup>-dë xii-gá:

—Jèsús ñaní tnáhá ndíi Dàvíí, cundáhú iní ñáhá xii-í! —càchí-dé xáha<sup>n</sup>-dë xii-gá.

<sup>39</sup> Te ñáyiú xixódó núú núú Jèsús ní tenàá ñáhã-yu xii-dé, te xáhã<sup>n</sup>-yu sá ná càdì-dé yuhu-dé dico uu<sup>n</sup>-gá níhi ní cáhá<sup>n</sup>-dé xáha<sup>n</sup>-dë xii-gá:

—Yòhó téé cùu ñaní tnáhá ndíi Dàvíí, cundáhú iní ñáhá xii-í! —càchí-dé xáha<sup>n</sup>-dë xii-gá.

<sup>40</sup> Te Jèsús ní ngüíñí-gá, te ní táúchíú<sup>n</sup>-gã ní sãnguehe<sup>n</sup> ñaha cuè téé ndíhi-gá. Te òrè ní quexìo-dé núú-gã, te ní xicá<sup>n</sup> tnúhú-gã núú-dë, te xáha<sup>n</sup>-gã:

<sup>41</sup> —¿Ná cuiní-n càda ñaha-í xii-n-i? —càchí-gá xáha<sup>n</sup>-gã xii-dé.

Te téé cuàá-á<sup>n</sup> ñí xáha<sup>n</sup>-dë:

—Mèstrú, cuiní-í cada tãtna-n núú-í cuèndá cundehe-í —càchí-dé xáha<sup>n</sup>-dë xii-gá.

<sup>42</sup> Te Jèsús ní xáha<sup>n</sup>-gã:

—Sa ní ndúha núú-n chi ní sándáá iní-n Yá Ndióxi —càchí-gá xáha<sup>n</sup>-gã xii-dé.

<sup>43</sup> Te òrè-ni-á<sup>n</sup> ñí ndúha núú-dë, te ní chinchícú<sup>n</sup>-dé Jèsús, te ní cachí-dé sá ío càhnu cuu Yá Ndióxi. Te nchaa ñáyiú ní xiní nàcuáa ní cuu ní ndúha núú-dë tnàhá-yu ní cachí-yu sá ío càhnu cuu Yá Ndióxi.

**Jèsús ndíhi ìh<sup>n</sup> téé nàni Zaqueú**

**19** Te Jèsús ní sáá-gá ñúú Jericó, te ta yáha-gá xití ñúú-á<sup>n</sup> cuáhá<sup>n</sup>. <sup>2</sup> Te ñúú-á<sup>n</sup> ndécú ìh<sup>n</sup> téé cuica nàni-dé Zaqueú, te cùnnu-dé táxi tnùní-dé cue téé cundíhi-dé, cue téé cuihna iní-xi quide cobrá ñáhá xii ñáyiú cuèndá impuèstú. <sup>3</sup> Te téé-á<sup>n</sup> cuiní-dé quiní-dé Jèsús òrè-á<sup>n</sup> ní cùu te ñá ní ndàcu-dé, chi ío cuéhé ñáyiú, te ñá túú dùcú<sup>n</sup>-dé.

<sup>4</sup>Te xínu-dé ní ngódó núú-dě te ní sáá-dé díquí ìí<sup>n</sup> yutnu sìcómorú nùtní yatni yuhu ichi núú yáha Jèsús cuèndá cuíní-dé quiní ñáhá-dě xii-gá. <sup>5</sup>Te òré tá yáha Jèsús xíá<sup>n</sup>, te ní ndonehe núú-gá díquí yutnu núú cándòdo-dé-á<sup>n</sup>, te ní xáha<sup>n</sup>-gá xii-dé:

—Zàqueú, tanùu ndíhi díquí yutnu-á<sup>n</sup>, chi tnaví quexio-í vehe-n ndètátú-í — cächí-gá xáha<sup>n</sup>-gá xii-dé.

<sup>6</sup>Te té Zàqueú-á<sup>n</sup> ní nuu ndíhi-dé díquí yutnu-á<sup>n</sup>, te ío ní cudíí ìní-dé ní quehe<sup>n</sup> cuèndá-dé Jèsús vehe-dé. <sup>7</sup>Te sá ní xiní ñáyiú ní quexio Jesús vehe-dé, te nchaá-yu ní ngúíta-yu càhá<sup>n</sup> cuèhé-yu cuèndá-gá, te xìtnhá-yu:

—Tée-a cuánguihu-dé vehe ìí<sup>n</sup> tée ndècu ichi cuehé ichi duha —cächí-yu xìtnhá-yu.

<sup>8</sup>Te té Zàqueú-á<sup>n</sup> ní ndacuíí-dé tnuú-yu, te xáha<sup>n</sup>-dě xii Jèsús:

—Yòhó Mèstrú, na cuáha-í ñáyiú ndáhú cuádava nchaá sá ndécú ndíhi-í. Te núu yoo ní dándàhú-í ní dúhù-í, te codo ùní-gá tnhá sá ní dúhù-í-yu nacuañaha-í xíí-yu —cächí-dé xáha<sup>n</sup>-dě xii-gá.

<sup>9</sup>Te Jèsús ní xáha<sup>n</sup>-gá xii té Zàqueú:

—Vitna ní naníhí tnhú-n ndíhi nchaá ñáyiú xíndecu vehe-n, chi tnhá-n cùu-n ñaní tnhá ndíi Àbrahám. <sup>10</sup>Te yúhú Tée cùu ñaní tnhá-ndó nchàa-ndo véxi-í nánducu-í ñáyiú ní xíta nihnu cuèndá dácácu nihnu-í-yu núú ùhú núú ndáhú —cächí-gá xáha<sup>n</sup>-gá xii-dé.

**Nàcuáa ní quide-güedé  
ndíhi díhú<sup>n</sup> cuáá<sup>n</sup>**

(Mt. 25:14-30)

<sup>11</sup>Te nchaá ñáyiú-á<sup>n</sup> ní sani ìní-yu sá ndíhi-ni ndíhu ndaha ñaha Yá Ndiöxí xíí-yu cuèndá sá ní cuyatni Jèsús ñuú Jerusálén, te xíá<sup>n</sup> núu ní ngúíta Jèsús ní cani-gá ìí<sup>n</sup> cuèndú núú-yu cuèndá tecú tñuní váha-yu tñuhu-gá. <sup>12</sup>Te xáha<sup>n</sup>-gá xíí-yu:

—Ní xíndecu ìí<sup>n</sup> tée cùu ñaní tnhá ñáyiú cùnuu, te cuáhá<sup>n</sup>-dé ìngá ñuú xíca cuèndá yacá<sup>n</sup> cuáha ñaha-güedé chiú<sup>n</sup> coo-dé, te dàtnùní ndixi-dé quíndaha-dě títí ñuú. <sup>13</sup>Te cùmání-gá quee-dé quíhí<sup>n</sup>-dé, te ní cana-dé úxí cue tée xínu cuechi núú-dě, te ní sáñaha-dě ndí díí<sup>n</sup> núú-güedé ìí<sup>n</sup> caa ìí<sup>n</sup> caa díhú<sup>n</sup> cuáá<sup>n</sup>, te ní xáha<sup>n</sup>-dě: “Chí cádá ndáhú ndíhi díhú<sup>n</sup>-á<sup>n</sup> ndèé ná sáá nduu nàsáá-í”, cächí-dé xáha<sup>n</sup>-dě xii-güedé. <sup>14</sup>Dico nchaá ñáyiú ñuú quíndaha-dě-á<sup>n</sup> ñà túú tnhá ìní-yu sá quíndaha ñaha-dé, núu ní tendàhá-yu cue tée nèhe tñuhu cuáhá<sup>n</sup> núú cuè tée cuáñaha chiú<sup>n</sup> coo-dé-á<sup>n</sup>, te ní xáhá<sup>n</sup>-yu sá cùñaha-güedé sá ñà túú tnhá ìní-yu sá tée-á<sup>n</sup> quíndaha ñaha-dé xíí-yu. <sup>15</sup>Dico dacuíí sá ní sáha-güedé tée-á<sup>n</sup> chiú<sup>n</sup> coo-dé sá díú-dě quíndaha-dě ñáyiú nchaá ñuú-á<sup>n</sup>, te ní nacuíco-dé cuánuhú-dé ñuú-dé. Te òré ní nasáá-dé vehe-dé, te ní tendaha-dě ìí<sup>n</sup> tée ní sánúcana ñaha xii cue tée xínu cuechi núú-dě, cue tée ní dándòo ndaha-dě díhú<sup>n</sup> cuèndá caca<sup>n</sup> tñuhú-dě núú-güedé ìí<sup>n</sup> ìí<sup>n</sup>-güedé núu ndèé dau ní chídó-xí díquí díhú<sup>n</sup> sá ní dándòo ndaha ñaha-dé-á<sup>n</sup>. <sup>16</sup>Te tée ní ndèxio díhna xáha<sup>n</sup>-dě: “Pàtróó”, ní quide-í ndáhú ndíhi díhú<sup>n</sup>-n sá ní dándòo ndaha ñaha-n xii-í, te sá ìí<sup>n</sup> ní taxi-n te ní chídó-xí ùxí-gá tnhá te náu-a naquehe<sup>n</sup> cuèndá-n”, cächí-dé xáha<sup>n</sup>-dě. <sup>17</sup>Te tée cùu patróó-dě-á<sup>n</sup> ní xáha<sup>n</sup>-dě: “Ío váha tée xínu cuechi cuu-n chi ío váha ní quide-n, te sá ní quide váha-n ndíhi sacú díhú<sup>n</sup> sá ní dándòo ndaha ñaha-í xii-n, te xíá<sup>n</sup> núu yúhú cächí-í sá táxí tñuní-n ùxí ñuú vitna”, cächí-dé xáha<sup>n</sup>-dě. <sup>18</sup>Te ní ndèxio ìngá-dé, te ní xáha<sup>n</sup>-dě: “Pàtróó”, ní quide-í ndáhú ndíhi díhú<sup>n</sup>-n sá ní dándòo ndaha ñaha-n xii-í, te sá ìí<sup>n</sup> ní taxi-n te ní chídó-xí ùhú<sup>n</sup>-gá tnhá te náu-a naquehe<sup>n</sup> cuèndá-n”, cächí-dé xáha<sup>n</sup>-dě.

<sup>19</sup>Te ní xáha<sup>n</sup> tée cùu patróó<sup>n</sup>-dë-á<sup>n</sup> xii-dé: “Te yòhó taxi tnùnì-n ùhú<sup>n</sup> ñuú”, càchí-dé xáha<sup>n</sup>-dë xii tée xìnu cuechi-á<sup>n</sup>.

<sup>20</sup>Te dātñuní ní ndexìo tucu ingá-dé, te xáha<sup>n</sup>-dë: “Pàtróó<sup>n</sup>, náu dífú<sup>n</sup>-n-á, te naquehe<sup>n</sup> cuendá-n chi ní taxúha-í ní chidúcú<sup>n</sup>nuu-í ì<sup>n</sup> pāñú te ñā túú ní quide-í ndáhú ndihì dífú<sup>n</sup>-n, <sup>21</sup>chi ní yùhú ñàhà-í xii-n, chi cùu-n ì<sup>n</sup> tée díí, te nàquehe<sup>n</sup>-n ì<sup>n</sup> sá ñā túú ní tàxi ndecu-n, te nàtahu-n ì<sup>n</sup> xichi núú ñā túú ní chihi-n tatá”, càchí-dé xáha<sup>n</sup>-dë xii pàtróó<sup>n</sup>-dë. <sup>22</sup>Te ní xáha<sup>n</sup> pàtróó<sup>n</sup>-dë xii-dé: “Yòhó cùu-n ì<sup>n</sup> tée cuìhna ìní-xi xìnu cuechi núú-í, te ñu-ni nchaa tnúhu càhá<sup>n</sup>-n-ǎ<sup>n</sup> càchí tnùnì-xi nàcuáa cuu ndáá cuéchi-n. Te núu sàni ìní-n sǎ cùu-í ì<sup>n</sup> tée díí, te nàquehe<sup>n</sup>-í ì<sup>n</sup> sá ñā túú ní tàxi ndecu-í, te nàtahu-í ì<sup>n</sup> xichi núú ñā túú ní chihi-í tatá, <sup>23</sup>te núu duca<sup>n</sup> ñā, ζte ná cuendá ñā túú ní càhu ìní-n dása<sup>n</sup> nuu-n dífú<sup>n</sup> ní taxi-í, te cùñaha-n chǎhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naquehe<sup>n</sup> cuendá-í ní cùu-i?”, càchí-dé xáha<sup>n</sup>-dë xii tée xìnu cuechi-á<sup>n</sup>. <sup>24</sup>Te ní xáha<sup>n</sup> tée cùu patróó<sup>n</sup>-á<sup>n</sup> xii cue tée xìndecu xíá: “Chí quéndèè dífú<sup>n</sup> cuàá<sup>n</sup> nèhé tée-a, te cuáha-ndo tée nèhe úxí tucu dífú<sup>n</sup> cuàá<sup>n</sup>-á<sup>n</sup>”, càchí-dé xáha<sup>n</sup>-dë xii-güedé. <sup>25</sup>Te ní xáha<sup>n</sup>-güedé: “Pàtróó<sup>n</sup>, dico sa nèhe-dé úxí dífú<sup>n</sup> cuàá<sup>n</sup>”, càchí-güedé xáha<sup>n</sup>-güedé. <sup>26</sup>Te ní xáha<sup>n</sup> tée cùu patróó<sup>n</sup>-á<sup>n</sup>: “Na càchí tnúhu-í xii-ndo sǎ cuè ñáyiu ío xii-xi te ñihí-gǎ-yu cundecu ndihí-yu, te cue ñáyiu sacú ndécú ndihì cuita ndihì nihnu nchaa sá ndécú ndihí-yu”, càchí tée cùu patróó<sup>n</sup>-á<sup>n</sup> xáha<sup>n</sup>-dë xii-güedé. <sup>27</sup>Te xáha<sup>n</sup> tucu-dé xii-güedé: “Nchaa ñáyiu cùu úhú ìní ñáhá xii-í ñā tnàhá ìní-yu quindaha-í-yu, te chí cándecá-yu taquixi iha, te cahni-ndö-yu núu-í-a”, càchí tée cùu patróó<sup>n</sup>-á<sup>n</sup> xáha<sup>n</sup>-dë xii-güedé —duha cuáhá<sup>n</sup> cuendú ní cani Jèsús núu ñáyiu.

### Jèsús cuánguihu-gá ñuú Jerusàlén

(Mt. 21:1-11; Mr. 11:1-11; Jn. 12:12-19)

<sup>28</sup>Te sátá dúcá<sup>n</sup> ñí càhá<sup>n</sup>-gá, te ní nucúhu<sup>n</sup> ichi-gá cuáhá<sup>n</sup>-gá ñuú Jerusàlén. <sup>29</sup>Te òré sa ní cuyatni-gá ñuú Bètfaqé, ndihì ñuú Bètaniá te xíá<sup>n</sup> cáá yècu nani Olívú, te ní xáha<sup>n</sup>-gǎ xii úú cue tée xica cuu ndihì-gá:

<sup>30</sup>—Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup>, te naníhí-ndó ì<sup>n</sup> búrru ndètníí-di, te vátá yòo ì<sup>n</sup>-gá codo ñàha xii-di, te nandaxi-ndo-di te candeca-ndo-di quixi. <sup>31</sup>Te núu yoo na càcá<sup>n</sup> tnúhu núú-ndó ñā cuendá nándaxi-ndo-di, te cùñaha-ndo xii-yu sá yùhú Yaá xíca cùu ndihì-ndo xini ñuhu-í-di —càchí-gá xáha<sup>n</sup>-gǎ xii-güedé.

<sup>32</sup>Te cue tée-á<sup>n</sup> ñí xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús duca<sup>n</sup> ñí cuu, <sup>33</sup>chi mei òré nándaxi-güedé búrru-á<sup>n</sup> ñí quexìo cue ñáyiu cùu xítóhó-di xicá<sup>n</sup> tnúhu-yu núu-güedé, te xáhǎ<sup>n</sup>-yu:

—¿Ná cuendá nándaxi-ndo búrru-ndí-i? —càchí-yu xáhǎ<sup>n</sup>-yu.

<sup>34</sup>Te ní xáha<sup>n</sup>-güedé xii-yu:

—Nà ndaxi-ndí-di chi Yaá xíca cùu ndihì-ndí xíní ñùhu ñaha-gá xii-di —càchí-güedé xáha<sup>n</sup>-güedé xii-yu.

<sup>35</sup>Te ndèca-güedé-di cuáhá<sup>n</sup> núu ndécú Jèsús, te òré ní quexìo-güedé ndihì-di núu ndécú-gǎ te ní sacá<sup>n</sup> ndodo-güedé dóo-güedé sátá-di, te ní ngódó ñáhá-gǎ xii-di. <sup>36</sup>Te ío cuéhé ñáyiu ta sàcá<sup>n</sup>-yu dóo-yu ichi cuáhá<sup>n</sup>-gá cuendá núu dóo-yu-á<sup>n</sup> yáha-gá ndihì quiti yòdo-gá. <sup>37</sup>Te ní nucuíta nuu-gá ichi tìndúú yucu Olívú tá cùyatni-gá ñuú Jerusàlén cuáhá<sup>n</sup>, te nchaa ñáyiu sàndáá ìní ñáhá xii-gá nchìcú<sup>n</sup> ñáhǎ-yu te ní ngúíta-yu níhi càhá<sup>n</sup>-yu sá cùdí ìní-yu, te càchí-yu sá ío càhnu cuu Yá Ndióxi cuendá sá ñí xini-yu nchaa sá vǎ yòo tnàhì ndàcu cada ní quide-gá. <sup>38</sup>Te càchí-yu:

—¡Ío càhnu cuu Yaá véxi quindaha ñaha xii-o, te diu-gá cúu-gã Yaá ní tendaha Yã Ndióxi véxi quide núu-gã! ¡Te ío càhnu cuu mee-gá! ¡Te andiu ñà túu tnàhá ná cúu! —duha càchí-yu.

<sup>39</sup> Te ñí<sup>n</sup> úú cue tée cùu fariséu ñúhú tnàhá tnuú ñáyi-u-á<sup>n</sup> ní xáha<sup>n</sup>-güedë xii Jèsús:

—Mèstrú, cúnaha nchaa ñáyi-u ndihi-n na càdí-yu yuhú-yu —càchí-güedë xáha<sup>n</sup>-güedë xii-gã.

<sup>40</sup> Dico Jèsús ní xáha<sup>n</sup>-gã xii-güedë:

—Te na càchí tnúhu-í xii-ndo sã nõu ñáyi-u-a na càdí-yu yuhú-yu ña, te nchaa yúu cãhá<sup>n</sup> ñíhi-xi dàtná ñí<sup>n</sup> ñáyi-u —càchí-gã xáha<sup>n</sup>-gã xii-güedë.

<sup>41</sup> Te òrë ní cuyatni-gã ñúu Jerusálén te ní xiní-gã, te ní ndáhyú-gã cuendá nchaa ñáyi-u dii ñúu-xi-á<sup>n</sup> sã ndihú iní-gã. <sup>42</sup> Te ní xáha<sup>n</sup>-gã xii cue ñáyi-u-á<sup>n</sup>:

—Ío cuu váha iní-í te núu dicó nchòhó tecú tnùní-ndó vitna ñí<sup>n</sup> tnúhu sá cádá vãha ñaha xii-ndo, chi ñá túu-gã ná cuu cundecu-ndo, te núu na tècú tnùní-ndó. Dico ñá tècú tnùní-ndó, chi ío yidáhu tnúhu-a. <sup>43</sup> Te sáá nduu tnündòho tnúhu ndàhú sá cúu-xí-ndó, te nchaa cue tée dava-gã ñúu cúu ùhú iní tnàhá ndihi-ndo quixi-güedë chidoco ñaha-güedë xii-ndo, te ñí càndéé núu ndécú-ndó-á<sup>n</sup> dacàa-güedë ndóho cuendá xíá<sup>n</sup> quíhi váha-güedë nàá ndihi ñaha-güedë xii-ndo, te vá dáñá-güedë cunu-ndo. <sup>44</sup> Te cahni ñaha-güedë xii-ndo, te ndihi nchaa vehe-ndo dàngoyo-güedë ndéé cimientú-xi, chi ñá túu ní cuíní-ndó nàcuáha-ndo cuendá òrë ní quixi coto ñaha Yã Ndióxi xii-ndo —duha ní xáha<sup>n</sup>-gã xii ñáyi-u ñúu-á<sup>n</sup>.

**Jèsús ñá túu tnàhá iní-gã  
nàcuáa quidë-yu veñúhu**

(Mt. 21:12-17; Mr.  
11:15-19; Jn. 2:13-22)

<sup>45</sup> Te Jèsús cuánguihu-gã xití veñúhu càhnu sá ío cùnuu, te xití veñúhu-á<sup>n</sup> xñ-

decu cue ñáyi-u quide ndáhu ndihi cue ñáyi-u xísaa<sup>n</sup>. Te ní queñuhu ñaha Jèsús xii-yu quehé. <sup>46</sup> Te ní xáha<sup>n</sup>-gã xii-yu:

—Núu tütú Yã Ndióxi càhá<sup>n</sup>-xi nàcuáa ní càhá<sup>n</sup>-gã, te duha ní cachí-gã: “Vehe-í cúu-xí núu càhá<sup>n</sup> ndihi ñaha ñáyi-u xii-í”, duha ní càhá<sup>n</sup>-gã càchí-xi núu tütú-gã. Dico nchòhó quidë-ndó vehe-gã vehe ñadúhú —càchí-gã xáha<sup>n</sup>-gã xii-yu.

<sup>47</sup> Te Jèsús nchaa nduu dànehé-gã ñáyi-u xití veñúhu, dico cue tée cùu dütú cùnùu, ndihi cue tée dàcuaha ñaha xii ñáyi-u nchaa tnúhu ní chídó tnùní ndí Moisés, ndihi cue tée cùnùu ñúu-á<sup>n</sup> ndúcú-güedë nàcuáa cada-güedë cahni ñaha-güedë xii-gã. <sup>48</sup> Dico ñá ñíhi-güedë nàcuáa cada-güedë, chi cuendá nchaa ñáyi-u ío cùdí iní-yu ndèdòho-yu nchaa tnúhu càhá<sup>n</sup>-gã.

**Jèsús ndécú ndihi-gã tnúhu ndee iní**

(Mt. 21:23-27; Mr. 11:27-33)

**20** Te ñí<sup>n</sup> nduu yíhi Jèsús xití veñúhu càhnu sá ío cùnuu danehé-gã ñáyi-u tnúhu sá càhá<sup>n</sup> nàcuáa naníhí tàhú-yu. Te ní quexío cue tée cùu dütú cùnùu ndihi cue tée dàcuaha ñaha xii ñáyi-u nchaa tnúhu ní chídó tnùní ndí Moisés, ndihi cue tée cùu sacuéhé núu ñáyi-u isràél, <sup>2</sup> te ní xáha<sup>n</sup>-güedë xii-gã:

—Cuíní-ndí cachí tnúhu-n xii-ndí nása ndùu tnúhu ndee iní ndécú ndihi-n núu quide-n nándi sá quidë-n. ¿Te yoo duca<sup>n</sup> ñí taxi tnúhu ndee iní-á<sup>n</sup> xii-n? —càchí-güedë xáha<sup>n</sup>-güedë xii-gã.

<sup>3</sup> Te Jèsús ní xáha<sup>n</sup>-gã:

—Yúhú tnàhá-í cuíní-í cáca<sup>n</sup> tnúhu-í ñí<sup>n</sup> sá cáca<sup>n</sup> tnúhu-í núu-ndó, te cachí tnúhu-ndo. <sup>4</sup> Te chí càchí tnúhu xii-í yoo ní táuchíú<sup>n</sup> ñí dácuaándute ndí Juáa ñáyi-u. ¿Yá Ndióxi á<sup>n</sup> cuè tée ñuyíú-a ní táuchíú<sup>n</sup> dùca<sup>n</sup> ní quide ndí? —càchí-gã xáha<sup>n</sup>-gã xii-güedë.

<sup>5</sup> Te ní ngúíta-güedë xitnàha-güedë:

—¿Nása cúnaha-o? Chi núu nà cúnaha-o sã Yã Ndióxi ní táuchíú<sup>n</sup> dùca<sup>n</sup>

ní quide ndí Juàá ñá, te quesaha-dě: “¿Ná cuendá ñá túú ní sàndáá iní-ndó tnúhu ní cáhá<sup>n</sup> ndí vài<sup>n</sup>?”; quesaha-dě. <sup>6</sup>Ádi te núu nà cúnaha-o sá cuè ñáyiú ñuyíú-a ní táuchíú<sup>n</sup> dùca<sup>n</sup> ní quide ndí ñá, te nchaa ñáyiú cuáha ñáhá-yu yúú xii-o, te cahni ñáhá-yu, chi càchí-yu sá ndáá sá Yá Ndiòxí ní táuchíú<sup>n</sup>-gã ní cáhá<sup>n</sup> ndí Juàá tnúhu-gá núú ñáyiú —càchí-güedé xítñaha-güedé.

<sup>7</sup>Te ní xáha<sup>n</sup>-güedé xii-gá sá ñá túú xiní-güedé yoo ní táuchíú<sup>n</sup> dùca<sup>n</sup> ní dácúándüte ndí Juàá ñáyiú. <sup>8</sup>Te ní xáha<sup>n</sup> Jèsús xii-güedé:

—Te núu duca<sup>n</sup> te ni yúhú vá càchí tnúhu-í xii-ndo yòò ní taxi tnúhu ndee iní duha quide-í —càchí-gá xáha<sup>n</sup>-gã xii-güedé.

### **Cuendá cue tée cuihna iní-xi**

(Mt. 21:33-44; Mr. 12:1-11)

<sup>9</sup>Te sáta dúcá<sup>n</sup> te ní ngúfta Jèsús ní cani-gá ñí<sup>n</sup> cuendú núú ñáyiú nàcuáa tecú tnùní-yu tnúhu-gá, te xáha<sup>n</sup>-gã xií-yu:

—Ñí<sup>n</sup> tée ní xitu-dé mee-ni yòò yaha stilé núú ñúhú-dě. Te ní sáá ñí<sup>n</sup> nduu quíngaca cuu xica-dě vài nduu te ní dándöo ndaha-dě sá ní xitu-dé-á<sup>n</sup> xii ñí<sup>n</sup> úú cue tée càhá<sup>n</sup> ndíhi-dé cuendá cada chiú<sup>n</sup>-güedé, te ní ndatnúhu-güedé sá òré ná cùu te cuu cuendá dava-güedé te duca<sup>n</sup> te ní quee-dé cuáhá<sup>n</sup>-dë. <sup>10</sup>Te sáta ní sáá nduu ní cuu nchaa ndéhé yoho yàha stilé sá ní xitu-dé-á<sup>n</sup>, te ní xáha<sup>n</sup>-dë xii ñí<sup>n</sup> tée xínu cuechi núú-dë: “Cuáhá<sup>n</sup> cáca<sup>n</sup>-n sá cúú cuendá-í núú cuè tée ní dándöo ndàha-í nchaa yoho yàha stilé sá ní xitu-í<sup>n</sup>”, càchí-dé xáha<sup>n</sup>-dë. Te tée xínu cuechi-á<sup>n</sup> ní xica-dé cuáhá<sup>n</sup>-dë, dico cue tée ndéé nchaa yoho yàha stilé-á<sup>n</sup> ní tñii-güedé tée xínu cuechi-á<sup>n</sup> te ní caniha-güedé, te ní nacuícú<sup>n</sup> ñáhá-güedé xii-dé, te ñá túú tnàhí ná ní sãñaha-güedé. <sup>11</sup>Te dàtnùní tée cùu xítòhó nchaa yoho yàha stilé-á<sup>n</sup>

ní tendaha tùcu-dé ingá tée xínu cuechi núú-dë cuáhá<sup>n</sup>-dë, dico ñíu-ni duca<sup>n</sup> ní quide ñaha-güedé xii-dé, chi ní xícuehé ñáhá-güedé, te ní caniha-güedé te ní nacuícú<sup>n</sup> ñáhá-güedé, te ñá túú tnàhí ná ní sãñaha-güedé. <sup>12</sup>Te tée cùu xítòhó nchaa yoho yàha stilé-á<sup>n</sup> ní tendaha tùcu-dé ingá-dé cuáhá<sup>n</sup>-dë, te ñíu-ni duca<sup>n</sup> ní quide ñaha tùcu-güedé, chi ní dancúehé ñáhá-güedé, te ní nacuícú<sup>n</sup> ñáhá-güedé.

<sup>13</sup>Te tée cùu xítòhó nchaa yoho yàha stilé-á<sup>n</sup> ní sani iní-dé: “¿Nása cada-í vitna? Váha-gá tendaha-í déhe-í tée ío cùu iní-a núhú-dé, chi cudana te òré quini ñáhá-güedé xii-dé, te canehe-güedé sá yíñuhu núú-dë”, duha ní sani iní-dé. <sup>14</sup>Dico òré ní xiní cue tée quide chiú<sup>n</sup>-á<sup>n</sup> dëhe xítòhó nchaa yoho yàha stilé-á<sup>n</sup>, te ní xítñaha-güedé: “Tée-á<sup>n</sup> tée véxi nduu táhú ñuhu-a ndíhi nchaa sá cáá núú-xi, dico cahni-o-dë te mee-o ndùu tahú-ó sá ndúú táhú-dë”, càchí-güedé xítñaha-güedé. <sup>15</sup>Te ní queñuhu ñaha-güedé ñí<sup>n</sup> xio yuhu ñuhu-á<sup>n</sup>, te ní sahani ñaha-güedé xii-dé —duha cuáhá<sup>n</sup> cuendú ní cani Jèsús núú-yu.

Te dàtnùní ní xáha<sup>n</sup> tùcu-gá xií-yu:

—¿Te nchòhó sa cùtnuní iní-ndó nàcuáa cada ñaha xítòhó ñuhu-á<sup>n</sup> xii cue tée-á<sup>n</sup> ñã? <sup>16</sup>Chi núhú-dé te cahni-dé cue tée-á<sup>n</sup>, te dándöo ndaha-dë ñuhu-dé xii cue tée cùtnuní iní-dé cada ndáá —càchí-gá xáha<sup>n</sup>-gã xií-yu.

Te sá dúcá<sup>n</sup> ní cáhá<sup>n</sup>-gá, núu ní cachí-yu:

—¿Sá vã càchí Ndiòxí sá dúcá<sup>n</sup> yàha-o! —càchí-yu.

<sup>17</sup>Te Jèsús ní ndacoto-gá núú-yu, te ní xáha<sup>n</sup>-gã:

—Chí càchí tnúhu nása quèe-xi nàcuáa càhá<sup>n</sup>-xi núú tütú Yá Ndiòxí, núú càchí-xi:

Yúú sá ní dáquéé tñhú cue tée dàcaa vehe ní saa-xi cùu-xi yúú cúnùu vitna.

Duha cächí-xi núú tütú-gá. <sup>18</sup> Te nchaa ñáyiú ñá túú cuíní tñii tnúhu-í, te ndohó-yu dàtná ìíñ ñáyiú tnàhnú duu<sup>n</sup> òré ndúá-yu núú yúú, àdi núu na tàù ñáhá-xí te dàcachi duu<sup>n</sup> ñaha-xi — cachí-gá xáha<sup>n</sup>-gá xií-yu.

### **Cuendá impuèstú**

(Mt. 21:45-46; 22:15-22; Mr. 12:12-17)

<sup>19</sup> Te cue téé cùu dútú cúnùu, ndihi cue téé dàcuaha ñaha xii ñáyiú nchaa tnúhu ní chídó tñini ndíi Moisés ní cuíní-güedé tñii-güedé Jèsús òré-ni-á ní cùu, chi ní cutnùní iní-güedé sá cuendá-güedé ní cáhá<sup>n</sup>-gá, dico ní yùhú-güedé cuendá sá ío vai ñáyiú. <sup>20</sup> Te ní ndúcú-güedé nàcuáa cada-güedé tñii ñaha-güedé xii-gá, te ní tendaha-güedé cue téé cuáhá<sup>n</sup> ngoto dayuhu ñaha xii-gá, te cuáhá<sup>n</sup>-güedé dàtná cue téé váha iní-xi, te ndücu-güedé nàcuáa cada-güedé núu cáhá<sup>n</sup>-gá ìíñ tnúhu sá ñà túú tàù-gá cáhá<sup>n</sup>-gá cuendá duca<sup>n</sup> te candeca ñaha-güedé xii-gá quíhí<sup>n</sup> cuáha cuendá ñáhá-güedé núú tée cùnùu. <sup>21</sup> Te ní xáha<sup>n</sup>-güedé xii Jèsús:

—Mèstrú, nihí-ndí tnúhu sá dánèhé-n ñáyiú mee-ni tnúhu váha, te cuèi ndè-dani càa ñáyiú ìíñ-ni càhá<sup>n</sup>-n ndíhí-yu, te càhá<sup>n</sup> ndáá-n nàcuáa càhá<sup>n</sup> Yá Ndiòxí cundecu-o ñùyúú-a. <sup>22</sup> Te cachí tnúhu xii-ndí núu váha-ni cháhu-ndí té Cèsár téé ío cùnùu cuendá impuèstú à<sup>n</sup> ñáhá —cächí-güedé xáha<sup>n</sup>-güedé xii-gá.

<sup>23</sup> Dico Jèsús ní cutnùní iní-gá sá xító ndèé ñáhá-güedé xii-gá, núu ní xáha<sup>n</sup>-gá xii-güedé:

<sup>24</sup> —Chí dánèhé ñáhá xii-í ìíñ díhú<sup>n</sup> cuixí<sup>n</sup> te cachí tnúhu-ndo núu yoo núú-xi ndèé, ndihi yoo ñu-xi ndèé —cächí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Núú tē Cèsár ndèé ndihi ñu-dé —cachí-güedé xáha<sup>n</sup>-güedé xii-gá.

<sup>25</sup> Te ní xáha<sup>n</sup> tucu-gá xii-güedé:

—Te núu duca<sup>n</sup> te chí nàcuáha té Cèsár sá cùu cuendá-dé, te sá cùu cuendá mée Yá Ndiòxí, te xíá<sup>n</sup> nacuáha-ndo-gá —cächí-gá xáha<sup>n</sup>-gá xii-güedé.

<sup>26</sup> Te ñá ní ndàcu tnahí-güedé datìcànùu ñaha-güedé xii-gá núu tnúhu càhá<sup>n</sup>-gá, chi òré ní cáhá<sup>n</sup>-gá, te da ní cuñúhu-güedé nchaa tnúhu ní cáhá<sup>n</sup>-gá, te váha-gá ní sadí-güedé yuhu-güedé.

### **Cuendá nchaa ñáyiú ndoto**

(Mt. 22:23-33; Mr. 12:18-27)

<sup>27</sup> Te sátá dúcá<sup>n</sup> te ní sáá ìíñ úú cue téé cùu saducéú núu ndécú Jèsús. Te cue téé-á<sup>n</sup> ñà túú sàndáá iní-güedé sá ndótó cuè ñáyiú ní xíhí, te ní xáha<sup>n</sup>-güedé xii-gá:

<sup>28</sup> —Mèstrú, ndíi Moisés cächí ndíi núu tütú ndècu vitna sá núu ìíñ téé na cùu, te quendóo ñadìhí-dé te ñá túú dèhe-dé ní xòo ndíhi-a<sup>n</sup>, te téé cùu ñaní-dé naquehe<sup>n</sup>-dé ñaha ní quendóo quèé-á<sup>n</sup> cuendá coo dèhe-dé ndíhi-a<sup>n</sup> cuendá ñaní-dé téé ní xíhí-á<sup>n</sup>. <sup>29</sup> Te ní xindecu úsá tñàhá cue téé mee-ni ndí ñaní-güedé. Te téé díhna ní nihí ñadìhí-dé, dico ñá túú ní cùdú-dé cundecu-dé chi ní xíhí-dé, te ni ìíñ dèhe-dé ñá túú ní xòo ndíhi ñadìhí-dé-á<sup>n</sup>. <sup>30</sup> Te téé cùu uú ní naquehe<sup>n</sup>-dé ñaha ní quendóo quèé-á<sup>n</sup> dico ní xíhí tucu-dé, te ni ìíñ tucu dèhe-dé ñá túú ní xòo ndíhi ñaha-á<sup>n</sup>. <sup>31</sup> Te téé cùu uní ní naquehe<sup>n</sup> tucu-dé ñaha ní quendóo quèé-á<sup>n</sup>, te ñu-ni duca<sup>n</sup> ní xíhí-dé, te ní xínu ndí úsá-güedé ní cándeca ñaha-güedé xii ñaha-á<sup>n</sup>, dico ni ìíñ-güedé ñá túú ní xòo dèhe-güedé ndíhi-a<sup>n</sup>, te ní ndíhi-güedé ní xíhí. <sup>32</sup> Te ndèé núú ní ndíhi-ná ní xíhí tñàhá ñadìhí-á<sup>n</sup>. <sup>33</sup> Te na sàà nduu ndòto-güedé ndíhi ñaha-á<sup>n</sup> ¿Te ndèdaca-güedé ñadìhí-güedé cuu-a<sup>n</sup>-í? Chi ndí úsá-güedé ní cándeca ñaha-güedé xii-a<sup>n</sup> —cächí-güedé xáha<sup>n</sup>-güedé xii-gá.

<sup>34</sup> Te Jèsús ní xáha<sup>n</sup>-gã xii-güedé:

—Nchaa ñáyiú ñuyíú-a tnándahá-yu.

<sup>35</sup> Dico nchaa ñáyiú ní nduu táhú ndoto díhna nuu ñáyiú-á<sup>n</sup> cundecú-yu ndihi Yá Ndiöxí ní caa ní quíhí<sup>n</sup>, te yàcá<sup>n</sup> ñá túú-gã sá cándèca tnahá-yu. <sup>36</sup> Te ní ñá túú-gã tnúhu xihí, chi cuu-ná-yu dàtná cue espíritú xínú cuèchi núú Yá Ndiöxí cuendá sá ní ndotó-yu, chi cúú-yu déhe-gá. <sup>37</sup> Te ndéé ndíi Moisés ní chídó tnùní ndíi núú tùtú ndíi sá ncháá ñáyiú ní xihí ndotó-yu, te diu-ni xía<sup>n</sup> càhá<sup>n</sup>-xi cuendá tnutàú nchicú<sup>n</sup> ñuhú, te diu-ni xía<sup>n</sup> càchí tucu-xi sá Yá Ndiöxí cúú-gã Ndiöxí ndíi Àbrahám, ndíi Isàac, ndíi ndíi Jàcób. <sup>38</sup> Te cue téé-á<sup>n</sup> chi cuèi ní xihí-güedé sá cúú-xí nchòhó, dico sá cúú-xí Yá Ndiöxí chi ndècu vívú-ni-güedé. Chi cùtnuní iní-ó sá Yá Ndiöxí cúú-gã Ndiöxí mee-ni cuè ñáyiú xíndecu vívú, te ñá túú cùu-gã Ndiöxí cue ñáyiú ñá túú ndècu vívú. Te sá cúú-xí mèe-gá chi nchaa ñáyiú ndècu ndíhi-gá ndécú vívú-yu cuèi sa ní xihí-yu núú ñùyíú-a —càchí-gá xáha<sup>n</sup>-gã xii-güedé.

<sup>39</sup> Te ì<sup>n</sup> téé dàcuaha ñaha xii ñáyiú nchaa tnúhu ní chídó tnùní ndíi Moisés ní xáha<sup>n</sup>-dè xii Jèsús:

—Mèstrú, váha-ni càhá<sup>n</sup>-n —càchí-dé xáha<sup>n</sup>-dè xii-gá. <sup>40</sup> Te ñá túú-gã ní cùyii-güedé cáca<sup>n</sup> tnúhú-güedé ni ì<sup>n</sup> tnúhu núú-gã.

### Yoo déhe-xi cùu Cristú

(Mt. 22:41-46; Mr. 12:35-37)

<sup>41</sup> Te Jèsús ní xáha<sup>n</sup>-gã xii-güedé:

—¿Te nása càchí-tu-yu sá Crístú Yaa tendaha Yá Ndiöxí quixi ñuyíú-a cùu-gá déhe ndíi Dàvíí? <sup>42</sup> Te mee ndíi Dàvíí-á<sup>n</sup> ní cachí ndíi núú libré Sàlmú:

Dútú Ndiöxí ní xáha<sup>n</sup>-gã xii Yaa cúú Xítóhó-í:

“Ngóo xio cùha-í,

<sup>43</sup> te yúhú cada-í te nchaa sá cúú ùhú iní ñáhá xii-n canehé-xi sá yíñuhu núú-n.”

Duha ní xáha<sup>n</sup> Dütú Ndiöxí xii Yaa cúú Xítóhó-í càchí ndíi núú libré Sàlmú. <sup>44</sup> ¿Te nása cùu Crístú déhe ndíi Dàvíí, te mee ndíi ní cachí ndíi sá cúú-gã Xítóhó ndíi-i? —càchí Jèsús xáha<sup>n</sup>-gã xii-güedé.

### Jèsús càhá<sup>n</sup>-gá cuendá cue téé dàcuaha ñaha xii ñáyiú nchaa tnúhu ní chídó tnùní ndíi Moisés

(Mt. 23:1-36; Mr.

12:38-40; Lc. 11:37-54)

<sup>45</sup> Te òré ndátnúhu Jèsús ndíhi cue téé xica cuu ndíhi-gá xíndedóho ñaha ñáyiú, te xáha<sup>n</sup>-gã xii-güedé:

<sup>46</sup> —Cada cuendá-ndó vã cáda-ndó nàcuáa quide cue téé dàcuaha ñaha xii ñáyiú nchaa tnúhu ní chídó tnùní ndíi Moisés, chi tnàhá iní-güedé cuihnu-güedé dóo nání sá sácúihnu cue téé cùnuu. Te nchaa núú tàcá ñáyiú cuiní-güedé sá ndíhi tnúhu yíñuhu càhá<sup>n</sup> ndíhi ñáhá-yu xii-güedé, te nàcáxi-güedé xilé sácòo nchíhi cue téé cùnuu-gá xití veñúhu conchíhi-güedé, te duca<sup>n</sup>-ni quide-güedé cuèi òré quíhu-güedé mèsá caxi-güedé òré ndécú-güedé ì<sup>n</sup> vico, chi mee-ni núú sácòo cue téé cùnuu-gá cuiní-güedé coo-güedé. <sup>47</sup> Te quèndéé-güedé vehe nchaa ñáyiú díhí ñáyiú quèé, te ío naha càhá<sup>n</sup> ndíhi-güedé Yá Ndiöxí cuendá cuiní-güedé càhá<sup>n</sup> váha-yu cuendá-güedé. Te sá dúcá<sup>n</sup> quide-güedé te sáá nduu te ío-gá ndoho-güedé núú ùhú núú ndàhú dàcúxí dàva-gá ñáyiú —càchí-gá xáha<sup>n</sup>-gã xii-güedé.

### Díhú<sup>n</sup> nduu táhú Yá Ndiöxí ní dáquèe ì<sup>n</sup> ñaha ndàhú ñaha quèé

(Mr. 12:41-44)

**21** Te Jèsús ní xiní-gá xití veñúhu nduu táhú Yá Ndiöxí xití alcanciá. <sup>2</sup> Te ní xiní-gá tnàhá ì<sup>n</sup> ñaha ndàhú ñaha quèé ní dáquèe-a<sup>n</sup> úú díhú<sup>n</sup> còbrí, <sup>3</sup> te ní xáha<sup>n</sup> Jèsús xii cue ñáyiú xíndecu-á<sup>n</sup>:



—Na cächí tnúhu ndáá-í xii-ndo sã ñaha ndahú ñaha quèe-a ío-gá nándíhi díhú" nĩ dáquèe-a" xití alcanciá nduu táhú Yã Ndiöxí dàcúxí díhú" nĩ dáquèe dava-gá-yu. <sup>4</sup>Chi nchaa ñáyi-u-á" nĩ dáquèe-yu mee-nã sá nĩ ndóo-ná, dico ñaha quèe-a cuèi ndàhú-a" dico ní dáquèe-a" nihí díhú" sã cuáá"-á" sã cáxí-á" ní cùu —cachí-gá xáha"-gã xií-yu.

### Jèsús cächí-gá sá ngóyó veñúhu

(Mt. 24:1-2; Mr. 13:1-2)

<sup>5</sup>Te ñ" úú ñáyi xicáhá"-yu cuendá veñúhu cãhnu sá ío cùnuu sá ío vii cãa nchaa yúu yíhi, ndihi cuendá nchaa sá nĩ sãñaha táhú ñáyi yíhi xití-xi. Te Jèsús ní xáha"-gã xií-yu:

<sup>6</sup>—Sáá nduu te nchaa sá cúnúhu-ndo-a vã cúndùu-gá-xi dàtná cáá-xí vitna, chi ni ñ"-gá yúu vã códo nchíhi tnaha-gá-xi chi ndihi ngoyo —cächí-gá xáha"-gã xií-yu.

### Nacuáa cada-xi nduu ta cüyatni naa ñuyúu

(Mt. 24:3-28; Mr. 13:3-23)

<sup>7</sup>Te cue tée xíndecu-á" nĩ xicá" tnúhú-güedé núu Jèsús, te xáha"-güedé xii-gá:

—Mèstrú, ¿te ná nduu ñuca" cada-xi ngoyo veñúhu, àdi nándi cùu sá cáda-xí cuendá cutnùní iní-ndí sá sã ta cüyatni nduu ñuca" cada-xi-i? —cachí-güedé xáha"-güedé xii-gá.

<sup>8</sup>Te Jèsús ní xáha"-gã xii-güedé:

—Ío quíhi iní-ndó cùndecu-ndo, te vã dáñá-ndó mèe-ndo dandahú ñáhá ñáyi xii-ndo. Chi ío cuéhé cue tée coo ñuyúu-a, te danani-güedé méé-güedé dàtná nání-í te cachí-güedé: “Yúhú cùu-í Cristú Yáá ní tendaha Yã Ndiöxí véxi ñuyúu-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuáa ní cáhá"-í”, duha cachí-güedé. Dico vã quindáá

iní-ndó, te nĩ vã túhá-ndó-güedé. <sup>9</sup>Te òré ná nihí-ndó tnúhu sá titní nació" xínáá-güedé te dava ñuu xínáá-güedé ndi mèe-güedé, te vã yúhú-ndó chi dacuití sã dúcá" càda-xi, dico vátá sãá-gá nduu nãa ñuyúu òré ñuca" càda-xi —cachí-gá xáha"-gã xii-güedé.

<sup>10</sup>Te xáha" tucu-gá xii-güedé:

—Nchaa cue tée ñ" nació" náá-güedé ndihi cue tée ingá nació", te titní ñuu ngúta-güedé náá-güedé. <sup>11</sup>Te titní xichi ñuyúu nihí vihi tnáa, te titní tucu xichi ñuyúu coo tnamá, te titní tucu xichi ñuyúu quixi cuéhé, te titní núu sã cáda-xí àndiu, te yúhú ñáyi.

<sup>12</sup>Te òré cùmání-gã cada-xi nchaa nacuáa cáhá"-í-a, te cue tée cùu úhú iní ñáhá xii-ndo tñi ñaha-güedé, te candeca ñaha-güedé xii-ndo quíhi" xití veñúhu-güedé cada ndáá-güedé cuéchi-ndo, te chihi ñaha-güedé vecaá xii-ndo, te candeca ñaha-güedé quíhi" núu cuè tée cùnuu yíndaha nació" àdi núu dàva-gá cue tée cùnuu sá cuendá-í. <sup>13</sup>Te òré ñuca" na càda ñaha-güedé xii-ndo, te òré-á" tàu-xi cáhá" váha-ndo cuendá-í núu-güedé.

<sup>14</sup>Te vã cání iní-ndó núu nása cunduu tnúhu cúnaha-ndo xii-güedé cuendá cácu nihnu-ndo. <sup>15</sup>Chi yúhú dacãhu iní ñáhá-í xii-ndo tnúhu cúnaha-ndo xii-güedé, te taxi-í sã vátá quíni tñní-gá-ndó, te ni ñ" ñáyi cùu úhú iní ñáhá xii-ndo vã nihí-gá-yu tnúhu cúnáhá-yu xii-ndo. <sup>16</sup>Te ndéé tãtã-ndó, ndihi ñaní-ndó, ndihi cue ñáyi cùu ñaní tnáhá-ndó, ndihi cue ñáyi càhá" ndihi váha-ndo cuãha cuendá ñáhá-yu xii-ndo núu cuè tée cùchiu", te dava-ndo càhni ñaha-güedé xii-ndo. <sup>17</sup>Te ío cuéhé ñáyi cuu úhú iní ñáhá-yu xii-ndo sã cuendá-í. <sup>18</sup>Dico Yá Ndiöxí ío coto ñaha-gã xii-ndo chi ndéé idi díquí-ndó còto-gá. <sup>19</sup>Te núu na càda ndee iní-ndó cànchicú" nihnu ñaha-ndo xii-í, te nduu

táhu-ndó cùndecu-ndo ndihi Yá Ndiöxí ní caa ní quíhí<sup>n</sup>.

<sup>20</sup>Te nduu na quíní-ndó ñùhu doco sandadú ní càndéé yuhu ñùú Jerusàlén, te sa cutnùní iní-ndó sá sà ní cuyatni nduu dànaa-güedé ñúú-á<sup>n</sup>. <sup>21</sup>Te dàvá-á<sup>n</sup> nchaa ñáyiú xíndecu distritú Jüdeá xíní ñùhu-xi cunú-yu quíhí<sup>n</sup>-yu xití yucu, te nchaa ñáyiú xíndecu ñúú Jerusàlén queé-yu xití ñúú-á<sup>n</sup>, te ñáyiú ñá túú xíndecu ñúú-á<sup>n</sup> vǎ ndíhu-gá-yu. <sup>22</sup>Chi dàvá-á<sup>n</sup> cuu-xi nduu tnúndòho tnúhu ndàhú, te duca<sup>n</sup> càda-xi chi duca<sup>n</sup> ndèè tnuní núú tütú Yǎ Ndiöxí nàcuáa dandòho ñaha-gá xí-yu. <sup>23</sup>Te ndàhú ní cuu nchaa ñáyiú ñíhí ñúhú ðehe-xi, ndihi nchaa ñáyiú ndèca ðehe vitna sàdi na sáá nduu dùca<sup>n</sup> cada-xi! Chi ío cuéhé tnúndòho tnúhu ndàhú coo núú ndécü-yu dàvá-á<sup>n</sup>, te xíá<sup>n</sup> cuu-xi ñ<sup>n</sup> tnúndòho tendaha Yá Ndiöxí quixi sá cúú-xí-yu. <sup>24</sup>Te dava cue téé cuú-güedé cahni ñaha-güedé, te dava-güedé tñii ñaha-güedé candeca ñaha-güedé quíhí<sup>n</sup> nchaa ñúú xíca, te cue téé dava-gá ñúú cunuu-güedé ñúú Jerusàlén, te mee Yǎ Ndiöxí cachí-gá te núu ná daha nduu cunuu-güedé ñúú-á<sup>n</sup>.

**Nàcuáa cada-xi òré quixi tucu Téé  
cùu ñaní tnáhá cuè ñáyiú**

(Mt. 24:29-35, 42-44; Mr. 13:24-37)

<sup>25</sup>Te cada-xi ñ<sup>n</sup> sá vǎtá quíní-gá ñáyiú núú nchícanhii, ndihi núú yóó, ndihi núú nchàa chódíní, te ñuyú-a coo tnúhu ndíhú iní-xi te vǎ cút-nùní iní-yu nása cadá-yu cuendá sá ío dusa<sup>n</sup> càda ndute lamár òré candaundéé tnáhá-xí. <sup>26</sup>Te nchaa ñáyiú cunee-yu sá yùhú-yu, ndihi sá ndíhú iní-yu cuendá nchaa sá cadá-xí ñuyú-a, te quidi-xi andíu. <sup>27</sup>Te sátá dúcá<sup>n</sup> te quíní-ndó yùhú Téé cùu ñaní tnáhá-ndó nchàa-ndo quee-í andíu quixi-í ichi xití vícò, te dàvá-á<sup>n</sup> quíní ñáhá nchàa ñáyiú sá ío cunuu-í te ndàcu-í quide-í nchaa sá vǎha.

<sup>28</sup>Te òré ná nguíta-xi duca<sup>n</sup> càda-xi, te cuita cundee-gǎ iní-ndó quíhí<sup>n</sup>, te quíhí iní-ndó chi sa ní cuyatni víí-nǎ nduu cǎcu nihnu-ndo vǎ cùndecu-gá-ndó ñúú ñuyúú yíca cuèchi-a —càchí-gá xáha<sup>n</sup>-gǎ xii-güedé.

<sup>29</sup>Te ní cani-gá ñ<sup>n</sup> cuendú núú-güedé nàcuáa tecú tnùní vǎha-güedé tnúhu-gá, te xáha<sup>n</sup>-gǎ xii-güedé:

—Chí cùndèhe yutnu ngúxí ndihi nchaa dava-gá yutnu. <sup>30</sup>Chí nàtahú ndaha-xi, te òré duca<sup>n</sup> quide-xi te cǎchí-ndó sá sà ní cuyatni nuu cahni. <sup>31</sup>Te ðiu-ni duca<sup>n</sup> sǎtnahá-xi cùu òré ná quíní-ndó càda-xi nchaa nacuáa càhá<sup>n</sup>-í, te sá dúcá<sup>n</sup> te cutnùní iní-ndó sá sà ní cuyatni nduu ndíhu ndaha ñàha Yá Ndiöxí xii-ndo.

<sup>32</sup>Te na cǎchí tnúhu ndáá-í xii-ndo sǎ òré vátá cùú-gá cue ñáyiú xíndecu ñuyúú-a vitna, te cada-xi nchaa nàcuáa ní càhá<sup>n</sup>-í. <sup>33</sup>Te andíu ndíhí ñuyúú-a chi ndíhí nihnu-xi, dico tnúhu-í chi vǎ ndíhí nihnu-xi, chi cùu-xi tnúhu ndáá.

<sup>34</sup>Te quíhí iní-ndó vǎ cùndecu-ndo ichi cuéhé ichi duha, te vǎ cúú-ndó ñáyiú quíhu, te vǎ cúhú<sup>n</sup> iní-ndó mée-ni nchaa sá ío ñuyúú-a, chi núu duca<sup>n</sup> na càda-ndo te nacuaana-ndo sǎ sáá nduu càda-xi nacuáa ní càhá<sup>n</sup>-í. Te uu<sup>n</sup>ni sáá nduu-ǎ<sup>n</sup>, <sup>35</sup>te cada-xi dàtná cuíní-ndó quide ñ<sup>n</sup> trampá chi uu<sup>n</sup>ni ngáva-xi, te duca<sup>n</sup> càda-xi nchaa ñáyiú xíndecu ñuyúú-a, chi uu<sup>n</sup>ni sáá nduu-ǎ<sup>n</sup>. <sup>36</sup>Te nchòhó cundecu túha-ndo te ío càhá<sup>n</sup> ndihi-ndo Yǎ Ndiöxí cuendá ndacu-ndo yǎha-ndo nchàa tnúndòho quixi ñuyúú-a, te duca<sup>n</sup> te nasáá-ndó cùndecu-ndo núú ndécú yùhú Téé cùu ñaní tnáhá-ndó nchàa-ndo —càchí-gá xáha<sup>n</sup>-gǎ xii-güedé.

<sup>37</sup>Te nduu ndúu ní xóo danèhé Jèsús ñáyiú tnúhu-gá xití veñúhu càhnu sá ío cùnuu, te níú níú ní xóo quíhí<sup>n</sup> ngúdú-gá xití yucu Ólívú. <sup>38</sup>Te nehé nehé ní xóo quíhí<sup>n</sup> nchaa ñáyiú veñúhu-á<sup>n</sup> ní xóo cundedòho-yu nchaa tnúhu càhá<sup>n</sup>-gá.

**Ndùcu-güedé nàcuáa  
cada-güedé cahni-güedé Jèsús**

(Mt. 26:1-5, 14-16; Mr. 14:1-2,  
10-11; Jn. 11:45-53)

**22** Te sa ní cuyatni nduu tnahá vico pascuá, te vico-á<sup>n</sup> xéxi ñäyiu pàá sá ñà túú yìhi levadurá. <sup>2</sup> Te cue tée cùu dútú cùnùu, ndihi cue tée dàcuaha ñaha xii ñäyiu nchaa tnúhu ní chídó tnùní ndíi Moisés ndúcú-güedé nàcuáa cada-güedé cahni-güedé Jèsús, te dicó-ni sá xiyùhú-güedé ñäyiu.

<sup>3</sup> Te yucu ñávaha ní dácáhu ìni ñáhá-xí xii té Jüdás déhe té Iscarioté, te núu tnahá tée-á<sup>n</sup> cúu ùxúú tnahá cue tée xica cuu ndihi-gá ní cùu. <sup>4</sup> Te té Jüdás-á<sup>n</sup> ñí sáhá<sup>n</sup>-dé ní ndatnúhu-dé ndihi cue tée cùu dútú cùnùu, ndihi cue tée tàxi tnuní ñáhá xii cue tée quide cuendá veñúhu nàcuáa cada-dé cuáha cuendá-dé Jèsús núu-güedé. <sup>5</sup> Te ío ní cudíí ìni-güedé, te ní xáha<sup>n</sup>-güedé xii-dé sá cuñaha-güedé díhú<sup>n</sup>, <sup>6</sup> te ní xáha<sup>n</sup>-dè sá cúu quehe<sup>n</sup>-dé díhú<sup>n</sup>-á<sup>n</sup>, te ní nguíta-dé ndúcú-dé nàcuáa cada-dé cuáha cuendá-dé Jèsús núu-güedé òré ñá túú ñäyiu.

**Cúdini Jesús ndihi cue  
tée xica cuu ndihi-gá**

(Mt. 26:17-29; Mr. 14:12-25;  
Jn. 13:21-30; 1 Co. 11:23-26)

<sup>7</sup> Te ní sáá nduu ñí quesaha vico xexí-yu pàá sá ñà túú yìhi levadurá, te diu-ni nduu-á<sup>n</sup> sáhní-güedé ìi<sup>n</sup> mbéé líhli xéxi-yu. <sup>8</sup> Te Jèsús ní xáha<sup>n</sup>-gá xii té Pèlú ndihi té Juáá:

—Chí cuáhá<sup>n</sup> chi cada túha-ndo núu cúdini-o sacuaa nduu vico pascuá — cächí-gá xáha<sup>n</sup>-gá xii-güedé.

<sup>9</sup> Te ní xicá<sup>n</sup> tnúhú-güedé núu-gá, te xáha<sup>n</sup>-güedé xii-gá:

—¿Te ndéé cáá vèhe cuini-n càda túha-ndí-i? —cächí-güedé xáha<sup>n</sup>-güedé xii-gá.

<sup>10</sup> Te ní xáha<sup>n</sup> Jèsús xii-güedé:

—Chí cündedóho na cächí tnúhu-í xii-ndo nàcuáa cada-ndo. Òré quíhu-ndo xití ñúú núu quíhí<sup>n</sup>-ndó, te naníhí-ndó ìi<sup>n</sup> tée tànehe ìi<sup>n</sup> yoó ndute, te tée-á<sup>n</sup> candédaha-ndo-dé quíhí<sup>n</sup>, te núu ndédacàa vehe na ndíhu-dé te xía<sup>n</sup> quíhu-ndo. <sup>11</sup> Te cúñaha-ndo xii xítóhó vehe-á<sup>n</sup>: “Yaá cúu Mèstrú cächí-gá núu ndédacàa xichi xití vehe-n cuñaha ñuu-n xii-gá cudini-gá ndihi cue tée xica cuu ndihi-gá sacuaa nduu vico pascuá”, duha cúñaha-ndo. <sup>12</sup> Te dàtnuní danèhé ñáhá-dé xii-ndo ìi<sup>n</sup> cuartú cáhnú càa núu ñinu, chi vehe yòdo tnaha cuu-xi, te sa ní quide túha-dé nchaa sá ná ndíhi, te nchòhó dicó-ná sá cúdini-o cada túha-ndo —cächí-gá xáha<sup>n</sup>-gá xii-güedé.

<sup>13</sup> Te ní xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús xii-güedé ní cuu, chi nchaa sa ndècu túha, te ní quide túha-güedé sá cúdini-güedé ndihi-gá sacuaa nduu vico pascuá-á<sup>n</sup>.

<sup>14</sup> Te sáta ñí tnahá òré cudini Jesús ndihi cue tée ní táuchíú<sup>n</sup>-gá cáhá<sup>n</sup> tnúhu-gá núu ñäyiu, te cuánguihu ndihi ñaha-gá xii-güedé mèsá. <sup>15</sup> Te xáha<sup>n</sup>-gá xii-güedé:

—¡Duca<sup>n</sup>-ni ío sàni ìni-í sá cúdini ndihi ñaha-í xii-ndo sàcuua nduu vico pascuá òré cúmání-gá sáá nduu ndòho-í te cúu-í! <sup>16</sup> Te na cächí tnúhu-í xii-ndo sá vǎ dúhá-gá caxi ndihi ñaha-í xii-ndo ndùu vico pascuá, chi ndéé òré ná sáá nduu nàsáá-ndó núu táxi tnùní Yǎ Ndióxi cundecu-o, te dàvá-á<sup>n</sup> cada ìni-ndó sá dàtná sá cáxi tucu-o chi ío váha cuu ìni-ó cundecu-o —cachí-gá xáha<sup>n</sup>-gá xii-güedé.

<sup>17</sup> Te ní quehe<sup>n</sup>-gá ìi<sup>n</sup> vàsú ñúhú ndùdí ndéhé yoho yàha stilé, te ní ndacá<sup>n</sup> táhú-gá núu Yǎ Ndióxi, te dàtnuní ní xáha<sup>n</sup>-gá xii-güedé:

—Chí quéhé<sup>n</sup> vàsú ñúhú ndùdí ndéhé yoho yàha stilé-a, te coho-ndo lúha lúha nchaa-ndo. <sup>18</sup> Te na cächí tnúhu

tucu-í xii-ndo sã vítná-nã duha xihhi ndihhi ñaha-í xii-ndo ndúdí ndéhé yoho yàha stilé-a te vá cóhó ndihhi ñaha-gá-í, dico na sàá nduu nàníhi tnáhá-ó núú ndécú Tàtà-í Dútú Ndiöxí táxi tnuní-gá, te dàvá-á<sup>n</sup> cada iní-ó sã dàtná sá cóhó ndihhi ñaha tucu-í xii-ndo, chi ío cudíí iní-ó — cächí-gá xáha<sup>n</sup>-gã xii-güedé.

<sup>19</sup> Te sátá ní túhú cóhó-güedé ní cudíni-güedé, te ní quehe<sup>n</sup>-gá paá te ní ndacá<sup>n</sup> táhú tucu-gá núú Yá Ndiöxí, te dàtnúni ní táhú cuéchi-gá, te ní dácãhñu ñaha-gã xii-güedé, te xáha<sup>n</sup>-gã:

—Paá-a cùu-xi datná yiqui cùnñ-í, chi cahni ñaha-güedé xii-í sá cuendá-ndó, te duca<sup>n</sup>-ni caxi-ndo paá-a cuendá ndacu iní ñáhá-ndó xii-í —cächí-gá xáha<sup>n</sup>-gã xii-güedé.

<sup>20</sup> Te ñiu-ni duca<sup>n</sup> ní quide-gá ndihhi vãsú ñúhú ndúdí ndéhé yoho yàha stilé, chi ní quehe<sup>n</sup>-gá te òré sãñaha-gã xii-güedé coho-güedé, te ní xáha<sup>n</sup>-gã:

—Ndudí ñúhú vãsú-a cada iní-ndó sã cúu-xí dàtná níñi-í sá cãtí òré cahni ñaha-güedé xii-í. Te sá dúcá<sup>n</sup> cãti níñi-í xíã<sup>n</sup> cutnùni ndáá sá Yá Ndiöxí cada-gá ingá núú sã vãha sá cúu-xí-ndó.

<sup>21</sup> Dico vitna chi iha tnáhá tée cuáha cuendá ñáhá xii-í núú cuè tée cùu úhú iní ñáhá yihí-dé mèsá. <sup>22</sup> Te yúhú Tée cùu ñaní tnáhá-ndó nchàa-ndo ñuhu ichi-í cuáhá<sup>n</sup>-í cuú-í dàtná ní cachí Yá Ndiöxí. ¡Dico ndàhú ní cuu tée duca<sup>n</sup> na cuáha cuendá ñáhá xii-í núú cuè tée cùu úhú iní ñáhá! —cächí-gá xáha<sup>n</sup>-gã xii-güedé.

<sup>23</sup> Te ní ngúíta-güedé ndúcú tnñhu núú tnáhá-güedé núu ndèda càa-güedé duca<sup>n</sup> càda cuáha cuendá ñáhá xii-gá núú cuè tée cùu úhú iní ñáhá.

### Xíndatnúhu-güedé ndèdacàa-güedé cunuu-gã

<sup>24</sup> Te sátá dúcá<sup>n</sup> te ní ngúíta-güedé xíndatnúhu-güedé núu ndèdacàa-güedé tàú-güedé cunuu-güedé. <sup>25</sup> Dico Jèsús ní xáha<sup>n</sup>-gã xii-güedé:

—Nchaa cue tée yìndaha ñaha xii ñáyiu ío tàxi tnuní-güedé, te mee-güedé cuiní-güedé sá càhá<sup>n</sup> vãha ñáyiu cuendá-güedé. <sup>26</sup> Dico nchòhó vá dúcá<sup>n</sup> càda-ndo, chi núu ñ<sup>n</sup>-ndo cùnuu te cada-ni-ndo sã ñà túú cùnuu-ndo, àdi cuu-ndo ñ<sup>n</sup> tée tàxi tnuní ñáhá xii cue tée xinu cuechi, te cada-ni-ndo sã cúu-ndó ñ<sup>n</sup> tée xinu cuechi-á<sup>n</sup>. <sup>27</sup> Te vá cächí-ó sã tée xinu cuechi cunuu-gá-dé, chi tée quñhu mèsá cùnùu-gá-dé. Dico yúhú ndécú ndihhi ñaha-í xii-ndo dàtná ñ<sup>n</sup> tée xinu cuechi.

<sup>28</sup> Te nchòhó duca<sup>n</sup>-ni ndècu ndihhi ñaha-ndo xii-í, te tàyáha ndihhi ñaha-ndo xii-í nchaa sá tàyáha-í véxi. <sup>29</sup> Te Tàtà-í Dútú Ndiöxí ní cachí-gá sá táxi tnuní-í, te yúhú cächí-í xii-ndo sã sàá nduu te tnáhá-ndó tàxi tnuní-ndó. <sup>30</sup> Te dàvá-á<sup>n</sup> caxi-o coho-o càda-o núú táxi tnuní-í, te yàcá<sup>n</sup> ngúíta-ndo càda ndáá-ndó cuéchi ndi ùxúú xichi ñáyiu isràél —cächí-gá xáha<sup>n</sup>-gã xii-güedé.

**Jèsús càhá<sup>n</sup>-gá sá tẽ Pèlù cúnaha-dé  
xii ñáyiu sã ñà túú xini ñáhá-dé xii-gã**

(Mt. 26:31-35; Mr.

14:27-31; Jn. 13:36-38)

<sup>31</sup> Te Xítohó Jesucrístú ní xáha<sup>n</sup>-gã xii té Xímú:

—Yòhó Xímú, cundedóho vãha ñ<sup>n</sup> tnúhu na càhá<sup>n</sup>-í-a, chi dàtná cuiní-n quide táchí trñú sàcá<sup>n</sup>-xi duha sàcá<sup>n</sup>-xi dàcá<sup>n</sup>, duca<sup>n</sup> quèsaha yucu ñávãha cada ñaha-xi xii-ndo. Chi coto ndeé ñáhá-xí xii-ndo te núu ndisa sàndáá iní ñáhá-ndó xii-í. <sup>32</sup> Dico yúhú xicá<sup>n</sup> táhú-í núú Yá Ndiöxí cuendá-n, cuendá sá vã dàñá ndèe-n quìndáá iní ñáhá-n xii-í. Te òré ndixi túu iní-n sã ñà túú ní quide vãha-n, te quñí<sup>n</sup>-n cuáha-n cuè tée cùndihhi-n tnúhu ndee iní cuendá canchicú<sup>n</sup> nihnu-ni-güedé ichi Yá Ndiöxí —cächí-gá xáha<sup>n</sup>-gã xii-dé.

<sup>33</sup> Te ní xáha<sup>n</sup>-dè xii-gã:

—Mèstrú, sa ndècu túha-í sá quihí<sup>n</sup> ndihi ñaha-í xii-n vècaá, àdi cuéi na cùu ndihi ñaha-í xii-n —càchí-dé xáha<sup>n</sup>-dë xii-gá.

<sup>34</sup>Te Jèsús ní xáha<sup>n</sup>-gá:

—Pèlú, na càchí tnúhu-í xii-n sá cùmání-gá cana ì<sup>n</sup> líhi te úní xito cáhá<sup>n</sup>-n núú ñàyiu sá ñà túú xíní ñáhá-n xii-í —càchí-gá xáha<sup>n</sup>-gá xii-dé.

### Sa ní cuyatni ndoho Jèsús

<sup>35</sup>Te Jèsús ní xáha<sup>n</sup>-gá xii-güedë:

—Te cútñahá ní tendaha ñaha-í xii-ndo ní sáhá<sup>n</sup>-ndó chiu<sup>n</sup>-í, chi ñá túú ní cãnehe-ndo nì ì<sup>n</sup> sá cùhú<sup>n</sup> dīhú<sup>n</sup>-ndó, te ni ì<sup>n</sup> sá cùhú<sup>n</sup> ndàchiu<sup>n</sup>-ndo ñá túú ní cãnehe-ndo. Te chí càchí tnúhu núu ìó ì<sup>n</sup> sá ní cumání xii-ndo —càchí-gá xáha<sup>n</sup>-gá xii-güedë.

Te ní xáha<sup>n</sup>-güedë:

—Ñáhá, chi ni ì<sup>n</sup> sá ñà túú ní cùmání xii-ndí —càchí-güedë xáha<sup>n</sup>-güedë xii-gá.

<sup>36</sup>Te ní xáha<sup>n</sup>-gá:

—Te vitna núu ndècu ndihi-ndo sá sácũhu<sup>n</sup> dīhú<sup>n</sup>-ndó, àdi sá sácũhu<sup>n</sup> ndachiu<sup>n</sup>-ndo te canehe-ndo. Te núu ñá túú ndècu ndihi-ndo machití, te nadico-ndo dđó tĩcachi nihnu-ndo te cuaa<sup>n</sup>-ndo. <sup>37</sup>Te na càchí tnúhu-í xii-ndo sá dàcuítí sá yáha-í nàcuáa càhá<sup>n</sup>-xi núú tütú Yá Ndióxi núú càchí-xi: “Ì<sup>n</sup>-ni ní quide ñaha-güedë xii-gá, ndihi cue téé ndècu cuéchi-xi”, duha càchí-xi núú tütú-gá. Te ñá dífú-ní xǎ<sup>n</sup> yáha-í chi nchaandi túhú nàcuáa càhá<sup>n</sup>-xi núú tütú-gá yáha-í —càchí-gá xáha<sup>n</sup>-gá xii-güedë.

<sup>38</sup>Te xáha<sup>n</sup>-güedë:

—Mèstrú, iha ndècu úú machití —càchí-güedë xáha<sup>n</sup>-güedë xii-gá.

Te ní xáha<sup>n</sup>-gá:

—Chí návíi-ná yuhu-ndo, vá càhá<sup>n</sup>-gá-ndó —càchí-gá xáha<sup>n</sup>-gá xii-güedë.

### Jèsús càhá<sup>n</sup> ndihi-gá Yá Ndióxi yucu Òlívú

(Mt. 26:36-46; Mr. 14:32-42)

<sup>39</sup>Te Jèsús ní quee-gá cuáhá<sup>n</sup>-gá yucu Òlívú, chi duca<sup>n</sup> tnàhí quide-gá. Te cue téé xica cuu ndihi-gá nchicú<sup>n</sup> ñáhá-güedë xii-gá cuáhá<sup>n</sup>. <sup>40</sup>Te òré ní quexio-gá xía<sup>n</sup>, te ní xáha<sup>n</sup>-gá xii-güedë:

—Chí càhá<sup>n</sup> ndihi Yá Ndióxi cuendá sá vǎ dácáhá<sup>n</sup> ñáhá yucu ñávaha xii-ndo càda-ndo sá ñà túú tàú-ndó càda-ndo —càchí-gá xáha<sup>n</sup>-gá xii-güedë.

<sup>41</sup>Te sátá dúcá<sup>n</sup> te ní quee dñi<sup>n</sup>-gá tnuú-güedë cuáhá<sup>n</sup>-gá ì<sup>n</sup> xio, te sa ñùnchií luha ní xica ndehe-gá núú ndécú-güedë, te xía<sup>n</sup> ní ngüíñí xítí-gá càhá<sup>n</sup> ndihi-gá Tǎtá-gá Dútú Ndióxi. <sup>42</sup>Te xáha<sup>n</sup>-gá:

—Táu, te núu dicó càchí-n te tauni-hnu ñaha-n xii-í cuendá sá vǎ ndóhò-í ná sàà òré, dico vá cadá-n nàcuáa càchí iní mée-í, chi cada-n nàcuáa càchí iní mée-n —càchí-gá xáha<sup>n</sup>-gá xii Tǎtá-gá Dútú Ndióxi.

<sup>43</sup>Te sátá dúcá<sup>n</sup> te ní quexio ì<sup>n</sup> es-píritú xínú cuèchi núú Yá Ndióxi ní sǎñaha-gá-xi tnúhu ndee iní xii-gá. <sup>44</sup>Te òré súúni ndìhú iní-gá, te uu<sup>n</sup>-gá súúni nì yuhu ni iní-gá càhá<sup>n</sup> ndihi-gá Dútú Ndióxi, te tnée-gá cáá dàtná cáá ñíñí te ngóyó núú ñúhú.

<sup>45</sup>Te sátá ní yáha ní càhá<sup>n</sup> ndihi-gá Tǎtá-gá Dútú Ndióxi, te ní ndacuñí-gá cuánuhú-gá núú ní dándõo-gá cue téé-á<sup>n</sup>, te òré ní nasáá-gá te xǎxídí-güedë cuendá sá ìo cuéhé tnúhu sàni iní-güedë cuendá-gá. <sup>46</sup>Te xáha<sup>n</sup>-gá xii-güedë:

—¿Ná cuendá xidí-ndó? Chí ndácõ, te càhá<sup>n</sup> ndihi-ndo Yá Ndióxi cuendá sá vǎ dácáhá<sup>n</sup> ñáhá yucu ñávaha xii-ndo càda-ndo sá ñà túú tàú-ndó càda-ndo —càchí-gá xáha<sup>n</sup>-gá xii-güedë.

**Ní tñii-güedé Jèsús ndécá  
ñàha-güedé cuáhá<sup>n</sup>**

(Mt. 26:47-56; Mr.  
14:43-50; Jn. 18:2-11)

<sup>47</sup> Te càhá<sup>n</sup> dúcá<sup>n</sup>-ní Jèsús ní quexio vai cue téé, te ì<sup>n</sup> téé xica cuu ndihi-gá nání Jùdás cùnùu-dé yódó nùu-dé nùú-güedé ní quexio ndéé nùú-gǎ, te ní teyuhu ñàha-dé xii-gá, te nùú tnàhá téé-á<sup>n</sup> cúú ùxúú cue téé xica cuu ndihi-gá. <sup>48</sup> Te ní xáha<sup>n</sup> Jèsús xii-dé:

—Jùdás, ¿te yòhó cuáha cuendá ñáhá-n xii yúhú Téé cùu ñaní tnáhá-ndó nchàa-ndo nùú cuè téé cùu úhú iní ñáhá xii-í cáhá<sup>n</sup>-n nùu duha tèyuhu ñàha-n-á<sup>n</sup>? —càchí-gá xáha<sup>n</sup>-gǎ xii-dé.

<sup>49</sup> Te sáta ní xiní nchaa cue téé cùndihi Jesús nàcuáa cùu cue téé ní quexio-á<sup>n</sup>, nùú ní xicá<sup>n</sup> tnúhú-güedé nùú-gǎ, te xáha<sup>n</sup>-güedé xii-gá:

—Mèstrú, ¿cùu nàá-ndí ndihi-güedé ndihi machítí-a ñǎ? —càchí-güedé xáha<sup>n</sup>-güedé xii-gá.

<sup>50</sup> Te ì<sup>n</sup>-dé ní xehndé-ni-dé lóho xio cùha ì<sup>n</sup> cue téé ní quexio-á<sup>n</sup>, te téé-á<sup>n</sup> xínú cuèchi-dé nùú dùtú cùnùu-gá, te ní quendé duu<sup>n</sup> lóho-dé. <sup>51</sup> Te Jèsús ní xáha<sup>n</sup>-gǎ xii-güedé:

—Chí dǎná-güedé, vá dúcá<sup>n</sup> càda-ndo —cachí-gá xáha<sup>n</sup>-gǎ xii-güedé.

Te ní dácáá-gá ndaha-gá ní tendaha-gǎ nùú ní xindeé lóho téé-á<sup>n</sup>, te ní nduu váha dàtná-ni càa. <sup>52</sup> Te nchaa cue téé cùu dùtú cùnùu, ndihi cue téé tàxi tnuní nchaa cue téé quide cuendá veñúhu sá ïo cùnùu, ndihi cue téé cùu sacuéhé nùú ñǎyiú isràél, nchaa cue téé-á<sup>n</sup> vèxi tñii ñàha-güedé xii-gá, te ní xáha<sup>n</sup>-gǎ xii-güedé:

—Nchòhó, nèhe-ná-ndó màchití, nèhe-ná-ndó càrutí véxi-ndo nùú ndécù-í, dàtná quidé-ndó ì<sup>n</sup> ñadúhú quidé ñàha-ndo xii-í. <sup>53</sup> Te duca<sup>n</sup>-ni ní xiní-ndó ní xindecú-í xití veñúhu càhnu sá ïo cùnùu ní xóo danèhé-í ñǎyiú, te ni

lùha ñá túú ní cùu tnàndéé ñáhá-ndó xii-í òré-á<sup>n</sup>, te vitna ní sáá òré duca<sup>n</sup> càda-ndo, te cada sácúíhná nàcuáa cùu iní-xi —càchí-gá xáha<sup>n</sup>-gǎ xii-güedé.

**Té Pèlú càhá<sup>n</sup>-dé nùú ñǎyiú sá  
ñà túú xiní-dé Jèsús**

(Mt. 26:57-58, 69-75; Mr. 14:53-54,  
66-72; Jn. 18:12-18, 25-27)

<sup>54</sup> Te ní tñii-güedé Jèsús, te ndèca ñàha-güedé xii-gá cuáhá<sup>n</sup> vehe téé cùu dùtú cùnùu-gá, te té Pèlú xica xica-ni nchicú<sup>n</sup> ñáhá-dé xii-gá cuáhá<sup>n</sup>. <sup>55</sup> Te òré ní quexio-güedé xía<sup>n</sup> te ní dàtnàhá-güedé ñuhú quehé vehe-á<sup>n</sup>, te ni càndéé yuhu nùhú-á<sup>n</sup> ní ngóo teté-güedé, chi quide víxi<sup>n</sup>-xi, te tnàhá té Pèlú ní ngóo teté ndihi ñàha-dé xii-güedé. <sup>56</sup> Te xía<sup>n</sup> ndécú ì<sup>n</sup> xíchí xínú cuèchi vehe-á<sup>n</sup>, te òré ní xiní-xi nùcúo teté tnàhá té Pèlú, te ní ndacoto-xi nùú-dé, te ní xáha<sup>n</sup>-xi xii-güedé:

—Tnàhá téé-a xica cuu ndihi-dé téé ndèca-güedé cuánguihu-ǎ<sup>n</sup> —càchí-xi xáha<sup>n</sup>-xi xii-güedé.

<sup>57</sup> Dico té Pèlú ñá túú ní nñnuu-dé, te xáha<sup>n</sup>-dé xii-xi:

—Yúhú ñá túú xiní-í téé-á<sup>n</sup> —càchí-dé xáha<sup>n</sup>-dé xii-xi.

<sup>58</sup> Te tna tnaa-ni ní cuu, te ní xiní ñáhá tùcu ì<sup>n</sup>-dé, te xáha<sup>n</sup>-dé:

—Yòhó tnàhá-n xica cuu ndihi-n téé ndèca-güedé cuánguihu-ǎ<sup>n</sup> —càchí-dé xáha<sup>n</sup>-dé xii-dé.

Dico té Pèlú ní xáha<sup>n</sup>-dé:

—Ñáhá, ñá díú yúhú xicá cùu ndihi-í-dé —càchí-dé xáha<sup>n</sup>-dé.

<sup>59</sup> Te sa ní cuu dàtná ì<sup>n</sup> òré te càchí tucu ingá-dé:

—Ndáá sá tèe-a xica cuu ndihi-dé téé ndèca-güedé cuánguihu-ǎ<sup>n</sup>, chi tnàhá-dé cúú-dé téé distrítú Galileá —càchí-dé xáha<sup>n</sup>-dé xii-güedé.

<sup>60</sup> Te té Pèlú ní xáha<sup>n</sup>-dé xii téé-á<sup>n</sup>:

—Yúhú ñá túú cùtnuní iní-í nása ndùu tnúhu càhá<sup>n</sup>-n —càchí-dé xáha<sup>n</sup>-dé.

Te ni vátá x̄nu duca<sup>n</sup>-gǎ tnúhu cǎhá<sup>n</sup>-dé ní cana-ni ì<sup>n</sup> líhi. <sup>61</sup>Te Xí-tohó Jesucristú ní nchócótó-gǎ núú-dě, te òré-ni-á<sup>n</sup> n̄ ndacu iní-dé tnúhu ní xǎha<sup>n</sup>-gǎ xii-dé sá cùmání-gǎ cana ì<sup>n</sup> líhi, te úní xito cǎhá<sup>n</sup>-dé sá ñà túú xini ñáhá-dě xii-gǎ. <sup>62</sup>Te té Pèlú ní quee-dé tnuú-güedé cuáhá<sup>n</sup>-dé ì<sup>n</sup> xio, te ní ndáhyú víhí-dě ní ndixi cuéchi iní-dé.

### Cùdiquí ndeé-güedé Jèsús

(Mt. 26:67-68; Mr. 14:65)

<sup>63-64</sup>Te cue tée ndèè ñáhá xii Jesús ní cudíquí ndeé ñáhá-güedé xii-gǎ, te ní dádáhu-güedé núú-gǎ, te ní caniha-güedé xii-gǎ, te xǎha<sup>n</sup>-güedé:

—¿Cǎhá<sup>n</sup> ná cótó yòò ní caniha xii-n!  
—cachí-güedé xǎha<sup>n</sup>-güedé xii-gǎ.

<sup>65</sup>Te cuéhé víhí-gǎ tnúhu cuèhé ní xǎha<sup>n</sup>-güedé xii-gǎ.

### Jèsús ndécú-gǎ jündá

(Mt. 26:59-66; Mr. 14:55-64; Jn. 18:19-24)

<sup>66</sup>Te sátá n̄ túndaá, te ní tacá cue tée cùu sacuéhé núú ñáyiú isràèl, ndihi cue tée cùu dútú cúnùu, ndihi cue tée dàcuaha ñaha xii-yu nchaa tnúhu ní chídó tnùnì ndíi Moisés, te ndèca-güedé Jèsús cuáhá<sup>n</sup> núú cǎdá-güedé jündá, te òré ní quexìo-güedé ndihi-gǎ núú cǎdá-güedé jündá-á<sup>n</sup>, te ní xǎha<sup>n</sup>-güedé xii-gǎ:

<sup>67</sup>—Cuínì-ndí cachí tnúhu-n xii-ndí núu diu-n cùu-n Cristú Yaá ní tendaha Yǎ Ndiòxí véxi ñuyúú-a —cachí-güedé xǎha<sup>n</sup>-güedé xii-gǎ.

Te ní xǎha<sup>n</sup>-gǎ xii-güedé:

—Te núu na cǎchí-í sá d̄íú-í cúú Cristú ñá, te n̄ vá quìndáá iní-ndó, <sup>68</sup>àdi te núu ì<sup>n</sup> sá ná cǎcá<sup>n</sup> tnúhu-í núú-ndó, te n̄ vá cǎchí tnúhu-ndo, te ni vǎ dáñá ñàha-ndo. <sup>69</sup>Dico vitna ní cuyatni nduu ngóo yúhú Tée cùu ñanì tnáhá-ndó nchàa-ndo xio cuha Dútú Ndiòxí Yaá ío cùnùu —cachí-gǎ xǎha<sup>n</sup>-gǎ xii-güedé.

<sup>70</sup>Te dǎtnùnì nchaa-güedé ní xícá<sup>n</sup> tnúhú-güedé núú-gǎ, te xǎha<sup>n</sup>-güedé xii-gǎ:

—¿Te yòhó cúú-n Dèhe Yá Ndiòxí te núu duca<sup>n</sup> v̄ani? —cǎchí-güedé xǎha<sup>n</sup>-güedé xii-gǎ.

Te ní xǎha<sup>n</sup> Jèsús:

—Ndáá sá d̄íú Dèhe-gǎ cúú-í dǎtná cǎchí méé-ndó-á<sup>n</sup> —cǎchí-gǎ xǎha<sup>n</sup>-gǎ xii-güedé.

<sup>71</sup>Te ní xítñaha-güedé:

—Ñá túú-gǎ xini ñùhu-xi cue tée cǎhá<sup>n</sup> núu ndáá sá ndècuéchi-dé àdi ñá túú ndècuéchi-dé chi yuhu mee-dé ní cǎhá<sup>n</sup>-dé vitna ní xíndedóho-o —cǎchí-güedé xítñaha-güedé.

### Jèsús ndécú-gǎ núú t̄ Pilatú

(Mt. 27:1-2, 11-14; Mr. 15:1-5; Jn. 18:28-38)

**23** Te nchaa-güedé ní ndacuúñí-güedé, te ndèca-güedé Jèsús cuáhá<sup>n</sup> núú t̄ Pilatú, <sup>2</sup>te núú t̄e-á<sup>n</sup> n̄ ngúíta-güedé sàcá<sup>n</sup> cuéchi-güedé cuendá-gǎ, te xǎha<sup>n</sup>-güedé:

—Ní nanhí-ndí t̄e-a dándahú-dé ñáyiú ñuú-ó, chi xǎha<sup>n</sup>-d̄é xii-yu sá vǎ chǎhu-gǎ-yu impuèstú xii t̄ Cèsár t̄e ío cùnùu, te cǎchí-dé sá d̄íú-dé cúú-dé Cristú Yaá ní tendaha Yǎ Ndiòxí véxi ñuyúú-a te yìndaha-dé ñáyiú cǎchí-dé —cǎchí-güedé xǎha<sup>n</sup>-güedé xii-dé.

<sup>3</sup>Te té Pilatú ní xícá<sup>n</sup> tnúhu-dé núú-gǎ, te xǎha<sup>n</sup>-d̄é xii-gǎ:

—¿Ndáá sá d̄íú-n cùu-n t̄e yìndaha ñaha xii ñáyiú isràèl-á<sup>n</sup>? —cǎchí-dé xǎha<sup>n</sup>-d̄é xii-gǎ.

Te Jèsús ní xǎha<sup>n</sup>-gǎ xii-dé:

—Diu-í yìndaha-í-yu —cǎchí-gǎ xǎha<sup>n</sup>-gǎ xii-dé.

<sup>4</sup>Te té Pilatú ní xǎha<sup>n</sup>-d̄é xii nchaa ñáyiú, ndihi cue tée cùu dútú cúnùu:

—Yúhú cútñùnì iní-í sá ñà túú n̄ ì<sup>n</sup> cuéchi t̄e-a —cǎchí-dé xǎha<sup>n</sup>-d̄é xii-yu.

<sup>5</sup>Dico níhi-gá ní cáhá<sup>n</sup>-güedé, te xáha<sup>n</sup>-güedé:

—Càchí-ndí sá ïo dusa<sup>n</sup> xĩquide ñáyiú cuendá nchaa sá dánèhé ñáhá-dě xíi-yu, te ní quesaha-dě ndéé distrítú Galileá, te ní yáha-dé nihí distrítú Jùdeá dánèhé-dé ñáyiú, te vitna ní sáá-ni-tu-dé ndéé ndíha dānehé-dé-yu —càchí-güedé xáha<sup>n</sup>-güedé xii té Pilatú.

### Jèsús ndécú-gă núú tĕ Hèrodés

<sup>6</sup>Te sá dúcá<sup>n</sup> nĩ tecú dóho té Pilatú ní cacu nehé-yu distrítú Galileá, núu xíá<sup>n</sup> ní xícá<sup>n</sup> tnúhú-dě núú-yu núu téé Galileá cúú-gă. <sup>7</sup>Te ní xáhă<sup>n</sup>-yu sá díú tĕe yácá<sup>n</sup> cúú-gă, núu xíá<sup>n</sup> ní na dàyáha ñaha-dě xii-gă ndaha té Hèrodés téé cùu gobiernú distrítú Galileá chi nduu-ă<sup>n</sup> ndécú-dě tnáhá-dé ñuú Jerusàlén-ă<sup>n</sup>. <sup>8</sup>Te òré ní xiní té Hèrodés-ă<sup>n</sup> Jèsús te ío ní cudíí iní-dé, chi ní cunaha dùca<sup>n</sup>-ni cuiní-dé quini ñáhá-dě xii-gă te ñá túú tnàhí xiní ñáhá-dě xii-gă ní cùu, chi cuendá-ni tnúhu nihí-dé cuendá-gă, te ndètu-dé sáá ì<sup>n</sup> nduu quini ñáhá-dě xii-gă, te cada-gă ì<sup>n</sup> sá vă yôo tnàhí ndàcu cada cundehe-dé ní sani iní-dé. <sup>9</sup>Te vâi sá nĩ xícá<sup>n</sup> tnúhú-dě núú Jèsús, dico ni ì<sup>n</sup> tnúhu ñá túú ní cáhá<sup>n</sup>-gă. <sup>10</sup>Te xíá<sup>n</sup> xĩndecu tnáhá cue téé cùu dútú cùnùu, ndihí cue téé dàcuaha ñaha xii ñáyiú nchaa tnúhu ní chídó tnùnĩ ndíi Moisés, te cue téé-ă<sup>n</sup> sũúnĩ ío iní-güedé sácá<sup>n</sup> cuéchi-güedé cuendá-gă. <sup>11</sup>Te té Hèrodés ndihí cue téé cùu sandadú-dé ñá túú ní cùu vâha iní-güedé núú Jèsús, te ní cudíquí ndéé ñáhá-güedé xii-gă, te ní dácúihnú ñaha-güedé dóó vâha xii-gă dàtná cáá dõó sácúihnu cue téé sàquíndaha ñaha xii ñáyiú. Te dàtnùnĩ té Hèrodés ní dánùhú ñáhá tucu-dé xii-gă ndaha té Pilatú. <sup>12</sup>Te nduu-ă<sup>n</sup> nĩ tnahá tnúhu té Pilatú ndihí té Hèrodés, chi cùu úhú iní tnáhá-güedé ní cùu.

### Càchí-güedé sá cáhni-güedé Jèsús

(Mt. 27:15-26; Mr. 15:6-15;  
Jn. 18:39-19:16)

<sup>13</sup>Te té Pilatú ní nadatácá-dé nchaa cue téé cùu dútú cùnùu ndihí dava-gă cue téé cùnùu, ndihí nchaa ñáyiú ñuú-ă<sup>n</sup>, <sup>14</sup>te ní xáha<sup>n</sup>-dĕ:

—Nchòhó ndécá-ndó tĕe-a véxi ní taxi cuendá-ndó-dĕ iha, te càchí-ndó sá ïo dusa<sup>n</sup> quide ñáyiú cuendá nchaa sá dánèhé ñáhá-dĕ xíi-yu, te núú-ndó ndùcu tnúhu-í núú-dĕ nũu ná ní quide-dĕ. Dico yúhú cútñunĩ iní-í sá ñà túú ni ì<sup>n</sup> cuéchi-dé dàtná cáhá<sup>n</sup>-ndó-ă<sup>n</sup>. <sup>15</sup>Te cuéi té Hèrodés diu-ni duca<sup>n</sup> cáhá<sup>n</sup>-dé sá ñà túú cuéchi-dé nũu ní techiú<sup>n</sup> ñaha tucu-dé cuándixi-dé iha. Te vitna sa ní cutñunĩ iní-ó sá ñà túú tàú-xi cahni-o-dĕ chi ñá túú cuéchi ni quide-dĕ. <sup>16</sup>Te na dāndoho-ni-í-dĕ te dàcácu-í-dĕ —càchí-dĕ xáha<sup>n</sup>-dĕ xíi-yu.

<sup>17</sup>Te ndi tnahá nduu vico pascuá te dacuitíi sá dàcácu té Pilatú-ă<sup>n</sup> ì<sup>n</sup> cue téé yìhi vecaá, chi duca<sup>n</sup> tnàhí quide-dĕ.

<sup>18</sup>Dico nchaá-yu ní cuáá-yu, te xáhă<sup>n</sup>-yu xii-dĕ:

—¡Queñuhu téé nàni Jesús-ă<sup>n</sup>, te cahni-n-dĕ! ¡Te dàcácu-n tĕ Barrábás! —càchí-yu xáhă<sup>n</sup>-yu xii-dĕ.

<sup>19</sup>Te té Barrábás-ă<sup>n</sup> nĩ sanu ichi-dé ñáyiú ñuú ingá ichi, te ní ngúfta-yu ndihí-dé ní cuu úhú iní-yu cue téé cùchiu<sup>n</sup>, te ní sahni-dé ndíyì núu xíá<sup>n</sup> ní chihí ñaha-güedé vecaá xii-dĕ. <sup>20</sup>Te té Pilatú cuiní-dé dàcácu-dé Jèsús nũu xíá<sup>n</sup> cáhá<sup>n</sup> ndihí ñaha tucu-dé xíi-yu ni cùu, <sup>21</sup>dico uu<sup>n</sup>-gă níhi ní cuáá-yu, te ní xáhă<sup>n</sup>-yu xii-dĕ úú xito:

—¡Cata caá-dé núú cùrúxí! ¡Cata caá-dé núú cùrúxí! —càchí-yu xáhă<sup>n</sup>-yu xii-dĕ.

<sup>22</sup>Te xito cuu únĩ ní xáha<sup>n</sup> tĕ Pilatú:

—¿Te ná cúú cuéchi ní quide-dĕ te núu duca<sup>n</sup> cuiní-ndó càda-í-dĕ-i? Te yúhú cútñunĩ iní-í sá ñà túú cuéchi ni quide-dĕ



nũu xíá<sup>n</sup> ñá túú tàù-xi cahni-o-dě, te na dândoho-ni-í-dé te dácácu-í-dé — cächí-dé xáha<sup>n</sup>-dě xií-yu.

<sup>23</sup> Dico níhi-ni cáhá<sup>n</sup>-yu xähá<sup>n</sup>-yu sá ná cãta caa ñaha-dé xii-gá núú cùrúxí, te ñáyíu-á<sup>n</sup> ndihi nchaa cue tée cùu dútú cúnùu xícáhá<sup>n</sup> níhi-güedé ndihí-yu ndéé ní xínu iní té Pilátú cada-dé nàcuáa cächí iní-yu. <sup>24</sup> Te ní xáha<sup>n</sup>-dě xií-yu sá cùú cãda-dé nàcuáa xähá<sup>n</sup>-yu. <sup>25</sup> Te duca<sup>n</sup> te ní dácácu-dé té Barrábás téé ní sanu ichi ñáyíu ñúú ingá ichi, te ñíu-ni-dé ní sahani-dé ndíyí núu xíá<sup>n</sup> ní xíhi-dé vecaá, te dãtnúni ní táuchíú<sup>n</sup>-dě cada-güedé Jèsús nàcuáa xähá<sup>n</sup>-yu.

### Sàta caa-güedé Jèsús núú cùrúxí

(Mt. 27:32-44; Mr.

15:21-32; Jn. 19:17-27)

<sup>26</sup> Te ndèca-güedé Jèsús cuáhá<sup>n</sup> núú cãtã cãa ñaha-güedé xii-gá, te ichi cuáhá<sup>n</sup>-güedé ndihi-gá ní tñii-güedé ñ<sup>n</sup> téé ñúu Cìrené nání-dě Xímú ñúhú-dě ichi duha cuándixi-dé ní sáhá<sup>n</sup>-dé yucu, te ní dácúidó ñaha-güedé xii-dé cùrúxí nchídó Jèsús, te ní ngúíta nchicú<sup>n</sup>-dé sãtã-gã.

<sup>27</sup> Te ío cuéhé ñáyíu nchicú<sup>n</sup> ñáhã xii-gá cuáhá<sup>n</sup>, te vai ñáyíu ñíhí ío níhi ndáhí-yu sá ndíhú iní-yu cuendã Jèsús. <sup>28</sup> Te Jèsús ní nchócótó-gã núú-yu, te ní xáha<sup>n</sup>-gã:

—Nchòhó ñáyíu ñíhí ñúú Jerusalén, vá ndàhyú-ndó cuendã-í chí ndàhyú cuendã méé-ndó ndíhi cuendã déhe-ndo. <sup>29</sup> Chi sãá nduu quèsaha ñáyíu: “Sã vãha tãhú nchaa ñáyíu ñá túú càcu déhe-xi, ndíhi nchaa ñáyíu vátã quíní-gã cuhu<sup>n</sup> déhe-xi, chi ni ñã túú xíní-yu dacadí-yu”, duha quèsáhã-yu. <sup>30</sup> Te dàvá-á<sup>n</sup> cññaha ñáyíu xii nchaa tĩndúú ndíhi nchaa núú xìquí: “Chí tácuú<sup>n</sup> ngónchihí ñaha-ndo xii-ndí”, duha cññáhã-yu. <sup>31</sup> Te núu yúhú téé quide ndáá duha quide ñaha-güedé xii-í vitna, te ndèé-gã cada-güedé nchaa

ñáyíu ndècu ichi cuéhé ichi duha —cächí-gã xáha<sup>n</sup>-gã xií-yu.

<sup>32</sup> Te ndèca tucu-güedé úú tñáhã cue téé ndècu ndisa cuéchi-xi cuáhá<sup>n</sup> cuendã cahni ñaha-güedé xii-güedé ndíhi Jèsús. <sup>33</sup> Te òré ní quexìo-güedé ndíhi-gã ñ<sup>n</sup> xichi núú nání Yìquí Díquí Ndíyí, te xíá<sup>n</sup> ní sata caa ñaha-güedé xii-gá núú cùrúxí, ndíhi úú cue téé ndècu ndisa cuéchi-xi-á<sup>n</sup>, te ñ<sup>n</sup>-dé ní sata caa-güedé xio cùha-gã te ingá-dé ní sata caa-güedé xio dàtní-gã ñíu-ni núú cùrúxí tucu. <sup>34</sup> Te ní xáha<sup>n</sup>-gã xii Tãtã-gã Dútú Ndiòxí:

—Táu, cada cãhnu iní sã quidé-güedé, chi ñá túú cùtnuní iní-güedé ná cùú sã quidé-güedé —cächí-gã xáha<sup>n</sup>-gã.

Te cue téé cùu sandadú ní xito ndéé-güedé nũu ndèdaca-güedé cuu cuendã-güedé dóó-gã. <sup>35</sup> Te nchaa ñáyíu xĩndecu-á<sup>n</sup> ndèhẽ-yu nàcuáa quide-güedé Jèsús, te nchaa cue téé cùnuu ní cudíquí ndéé ñáhã-güedé xii-gã, te ní xítñaha-güedé:

—Te dava ñáyíu ní ndacu-dé ní dácãcu nihnu-dé, te vitna na dácácu nihnu-dé méé-dě, te núu ndisa sã Crìstú Yáá ní tendaha Yã Ndiòxí véxi ñuyúú-a cùu-dé —cächí-güedé xítñaha-güedé.

<sup>36</sup> Te tñáhã cue téé cùu sandadú ní cudíquí ndéé ñáhã-güedé xii-gã, chi ní sãndehe yatni-güedé núú táca-gã sãñaha-güedé ndudí íã còho-gã ní cùu, <sup>37</sup> te ní xáha<sup>n</sup>-güedé xii-gã:

—Te núu yòhó cùú-n téé yĩndaha ñaha xii ñáyíu isrãél, te dácácu nihnu mee-n —cächí-güedé xáha<sup>n</sup>-güedé xii-gã.

<sup>38</sup> Te ní taxi ndecu-güedé ñ<sup>n</sup> sã ndèé lètrã ndãa díquí-gã te ndèé úní núú tñũhu, tñũhu gríégú, ndíhi tñũhu lãtĩn, ndíhi tñũhu hèbreu, te duha quèe-xi ndí nuní núú tñũhu-á<sup>n</sup> “Téé-a cùu-dé téé yĩndaha ñaha xii ñáyíu isrãél”, duha quèe-xi.

<sup>39</sup> Te ñ<sup>n</sup> téé ndècu ndisa cuéchi-xi, téé ní sata caa-güedé ñíhi-gã xícuhèé ñáhã-dě xii-gã, te xáha<sup>n</sup>-dě:

—Te núu yòhó cúú-n Cristú Yáá ní tenda Yá Ndiöxí véxi ñuyúú-a, te dàcácu nihnu mee-n, te dàcácu nihnu ñaha xii nchúhú tñàhá-ndí tucu —càchí-dé xáha<sup>n</sup>-dë xii-gá.

<sup>40</sup> Dico ingá tée cùndihi-dé tée tàcaa ingá xio ññi-gá ní tenàá ñàhá-dë xii-dé, te xáha<sup>n</sup>-dë:

—¿Te náa ñá túú ndàcu iní-n Yá Ndiöxí vitna duha càa-o ndoho-o ndihi tée nàni Jesús-a ñá? <sup>41</sup> Chi nchoo tàú ndisa-o sã dúhá ndòho-o nacháhu-o cuëchi-o, dico Jèsús-a chi ñá túú cuëchi-dé —càchí-dé xáha<sup>n</sup>-dë xii tée tàcaa ndihi-dé-á<sup>n</sup>.

<sup>42</sup> Te dàtnùni ní xáha<sup>n</sup>-dë xii-gá:

—Jèsús, ndacu iní ñàhá-n xii-í òré ná quixi-n taxi tnuni-n ñuyúú-a —càchí-dé xáha<sup>n</sup>-dë xii-gá.

<sup>43</sup> Te Jèsús ní xáha<sup>n</sup>-gã:

—Na càchí tnúhu ndáá-í xii-n sã méf ndùu vitna cundecu ndihi ñaha-í xii-n núú ní nduu táhù-í cundecu-í —càchí-gá xáha<sup>n</sup>-gã xii-dé.

### Ní xíhí Jèsús

(Mt. 27:45-56; Mr.

15:33-41; Jn. 19:28-30)

<sup>44</sup> Te òré ní cuu cuádava nduu. Te ní cunee nihíi ñuyúú, te duca<sup>n</sup>-ni càa ní cuu ndéé caá úní sacuaa. <sup>45</sup> Chi ñá túú-gã ní dàyehé nchícanhii te ní ndátá dǒó cúú còrtiná veñúhu càhnu sá ïo cùnunu ní quée dava ndáá. <sup>46</sup> Te níhi ní cáhá<sup>n</sup> Jèsús, te xáha<sup>n</sup>-gã xii Tátá-gã Dútú Ndiöxí:

—Táu, naquehe<sup>n</sup> cuendá-n espíritú-í —càchí-gá xáha<sup>n</sup>-gã xii Tátá-gã.

Te tnúhu-ná-á<sup>n</sup> ní cáhá<sup>n</sup>-gã te ní xíhí-ni-gá.

<sup>47</sup> Te òré ní xiní tée cùu capitá<sup>n</sup> sá dúcá<sup>n</sup> ní cuu, te ní ndacu iní-dé Yá Ndiöxí, te ní cachí-dé:

—Sá ndáá ndisa sá tée-a cùu-dé ï<sup>n</sup> tée ïo quide ndáá ndécú ñuyúú-a ni cùu —duha ní cachí-dé.

<sup>48</sup> Te chitu ñáyiú ní tacá xía<sup>n</sup> chi cuíní-yu cundèhé-yu nása cada-güedé Jèsús. Te sátá ñí yáha ní xiní-yu nàcuáa ní quide ñaha-güedé xii-gá, te ní ndihí-yu ní ndaca ta càní-yu pèchú-yu cuánuhú sá ndihú iní-yu. <sup>49</sup> Dico ndècu tnahá cue ñáyiú xiní tnahá ndihi Jèsús, ndihi ñáyiú ñíhí ní chinchícú<sup>n</sup> ñàhá xii-gá ndéé distritú Galileá, te ñáyiú-á<sup>n</sup> xica-ni xíxínutníf-yu xíndèhé-yu nchaa nàcuáa ní quide ñaha-güedé xii-gá.

### Chindúxi-güedé Jèsús

(Mt. 27:57-61; Mr.

15:42-47; Jn. 19:38-42)

<sup>50</sup> Te ndècu ï<sup>n</sup> tée ñúú Arimàtea nání-dé Chèé, te ñúú-á<sup>n</sup> yíndèhu-xi distritú Jùdeá, te ïo váha iní-dé te quide ndáá-dé núú Yá Ndiöxí, te tñàhá-dé cúú-dé chù<sup>n</sup> te ní xíndecu-dé jùndá cue tée isràél. <sup>51</sup> Te ñá ní tñàhá tñàhí iní-dé nàcuáa ní cáhá<sup>n</sup>-güedé núú jùndá nàcuáa cada-güedé Jèsús. Te tée-á<sup>n</sup> ndétú-dé sáá nduu ndíhu ndaha ñàha Yá Ndiöxí xii-dé ndihi ñáyiú. <sup>52</sup> Te tée-á<sup>n</sup> ní sáhá<sup>n</sup>-dé núú tē Pilatú te ní xáha<sup>n</sup>-dë sá ñúu vá cùndèe iní-dé daña-dë chindúxi-dé yiqui cùñú Jèsús. Te té Pilatú-á<sup>n</sup> ní sáha-dé tnúhu. <sup>53</sup> Te ní nunehe-dé yiqui cùñú-gá núú cùrúxí, te ní chidúcú<sup>n</sup>nuu-dé ï<sup>n</sup> dǒó cuixí<sup>n</sup>, te ní chihí-dé ï<sup>n</sup> yaú nchíi yiqui naha càva, te vátá yǒo ï<sup>n</sup>-gã nguíndúxi yaú-á<sup>n</sup>. <sup>54</sup> Te cùu-xi nduu vispré nduu ndètátú ñáyiú, núu xíquide túha-ná-yu sá cúú ñngá nduu.

<sup>55</sup> Te nchaa ñáyiú ñíhí ní chinchícú<sup>n</sup> ñàhá xii Jesús ndéé distritú Galileá ndëndàhá-yu té Chèé ní sáhá<sup>n</sup> núú nchíi yaú-á<sup>n</sup>, núu ní xiní-yu nàcuáa ní sacá<sup>n</sup>-dé yiqui cùñú-gá xití yaú-á<sup>n</sup>. <sup>56</sup> Te duca<sup>n</sup> te cuánuhú-yu vehé-yu, te ní quide túha-yu acití sáhá<sup>n</sup> tnámí, ndihi pomadá, te ní ndetátú-yu ñngá nduu-á<sup>n</sup> ní quidé-yu nàcuáa càhá<sup>n</sup> tnúhu Yá Ndiöxí.

### Ní ndoto Jèsús

(Mt. 28:1-10; Mr. 16:1-8; Jn. 20:1-10)

**24** Te ndumìngú nehé víhí-ní cuáhá<sup>n</sup> tucu ñáyiú ðíhí núú nchíí yaú ní chihi-güedé yiqui cùnú Jèsús, te nehé-yu nchaa sá sàhá<sup>n</sup> tnámí nǐ quide túha-yu-á<sup>n</sup> cuáhá<sup>n</sup>, te tnàhá tucu ìí<sup>n</sup> úú-gá tnàha ðíhí-yu nchicú<sup>n</sup> ñáhá xí-yu cuáhá<sup>n</sup>. <sup>2</sup>Te òré ní quexìò-yu yuhu yàú-á<sup>n</sup> te ní xiní-yu sá yúú ndèdí ìí<sup>n</sup> xio-ná ndécú, <sup>3</sup>te ní quíhu-yu xítí yaú-á<sup>n</sup>, dico ñá túú-gá yiqui cùnú Jèsús yíhí. <sup>4</sup>Te ñá ní cùtnuní tnàhí iní-yu ndéé ichi cuáhá<sup>n</sup> yiqui cùnú-gá, te ní xiní-yu úú espíritú xínú cuèchi núú Yá Ndiòxí xínutnǐ-xi ðíñí-yu te xíxíhu-xi dóó chàhnchí. <sup>5</sup>Te ní yùhú-yu te ñá túú ní cùyíí-yu cundèhé-yu cue espíritú-á<sup>n</sup>, te cue espíritú-á<sup>n</sup> nǐ xáha<sup>n</sup>-xi xíí-yu:

—¿Ná cuèndá nándücu-ndo Jesús Yaa ndécú vǐvú núú yíndüxi ñáyiú ní xíhí-i? <sup>6</sup>Te ñá túú-gá yiqui cùnú-gá ndécú ìha chi sa ní ndoto-gá, te chí dándàcu iní nàcuáa ní cáhá<sup>n</sup>-gá cùtnàhá ní xíndecu-ndo ndíhi-gá distritú Galileá, <sup>7</sup>chi ní cachí-gá sá méé-gá cúú-gá ñaní tnàhá-ndó nchaa-ndo, te dacuítíí cuàha cuèndá ñáhá-güedé xii-gá núú cuè téé ndècu ichi cuehé ichi duha, te cata caa ñaha-güedé xii-gá núú cùrúxí, te núú cùrúxí-á<sup>n</sup> cuú-gá dico nduu úní sá cùú-gá te ndoto-gá, duha ní cachí-gá xii-ndo.

<sup>8</sup>Te òré-á<sup>n</sup> nǐ ndacu iní-yu tnúhu ní cáhá<sup>n</sup> Jèsús. <sup>9</sup>Te sátá dúcá<sup>n</sup> te ní naquehé<sup>n</sup>-yu ichi cuánuhú-yu, te ní caní-yu cuèndú núú ndí úxí ìí<sup>n</sup> cue téé ní táuchíú<sup>n</sup> Jèsús cáhá<sup>n</sup> tnúhu-gá, ndíhi núú dàva-gá ñáyiú. <sup>10</sup>Te ñáyiú duca<sup>n</sup> nàha tnúhu cuánuhú núú-güedé-á<sup>n</sup> cúú tǎ Màriá Magdalèná, ndíhi tá Juáná, ndíhi tá Màriá nǎná tǎ Jàcobó, ndíhi dàva-gá ñáyiú ðíhí. <sup>11</sup>Dico cue téé-á<sup>n</sup> nǐ sani iní-güedé sá dicó cáhú iní-yu tnúhu xáhá<sup>n</sup>-yu xii-güedé nùu ñá túú ní sàndáá iní-güedé nàcuáa ní xáhá<sup>n</sup>-yu.

<sup>12</sup>Dico té Pèlú ní quee-dé xínú-dé cuáhá<sup>n</sup> cuándèhé-dé yaú núú nǐ chihi-güedé yiqui cùnú Jèsús, te ní sáá-dé te ní ngáundeyi-dé xító ñihni-dé xítí yaú-á<sup>n</sup> te ní xiní-dé sá méé-nǎ dóó nǐ xíducú<sup>n</sup> nuu-gá yúcu ìí<sup>n</sup> xio, te ío ní cunúhu-dé sá dúcá<sup>n</sup> nǐ cuu, te ní natnii-dé ichi cuánuhú-dé vehe núú xíndecu-güedé.

### Ichi ñuú Emàús

(Mr. 16:12-13)

<sup>13</sup>Te diu-ni nduu-á<sup>n</sup> ñúhú úú cue téé ní xica cuu ndíhi Jèsús ichi cuáhá<sup>n</sup>-güedé ìí<sup>n</sup> ñuú nání Emàús, te sàcúhu<sup>n</sup>-güedé dàtná úú òré ichi ndéé ñuú Jerusalén, te ndéé ñuú Emàús. <sup>14</sup>Te ta ndàtnúhu-güedé cuáhá<sup>n</sup> nchaa nàcuáa ní cuu, <sup>15</sup>te nini dùca<sup>n</sup> xícáhá<sup>n</sup>-güedé, te Jèsús ní natnahá ñáhá-gá xii-güedé te ndèca tnaha-gá ndíhi-güedé cuáhá<sup>n</sup>. <sup>16</sup>Te cuèí ndèhe ñaha-güedé xii-gá dico dàtná ìí<sup>n</sup> sá ndèdí núú-güedé, chi ñá ná quíni ñáhá-güedé xii-gá ní cùu. <sup>17</sup>Te Jèsús ní xícá<sup>n</sup> tnúhú-gá núú-güedé, te xáha<sup>n</sup>-gá:

—¿Ná tnúhu xícáhá<sup>n</sup>-ndó ñúhu-ndo ichi núu duca<sup>n</sup> ìo cùu ndiyí-ndó-í? —cachí-gá xáha<sup>n</sup>-gá xii-güedé.

<sup>18</sup>Te ìí<sup>n</sup> téé nàni Cleofás ní xáha<sup>n</sup>-dè xii-gá:

—¿Te ná cuèndá nchaa ñáyiú íchí nǐ sáá ñuú Jerusalén xiní-yu nchaa nàcuáa ní cuu, te ìí<sup>n</sup> ðii-ná yòhó ñá túú xiní-n-í? —cachí-dé xáha<sup>n</sup>-dè xii-gá.

<sup>19</sup>Te ní xáha<sup>n</sup>-gá xii-güedé:

—¿Te ná ní cuu-i? —cachí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Cuèndá Jèsús téé ñuú Nazàrét càhá<sup>n</sup>-ndí, chi téé-á<sup>n</sup> cúú-dé ìí<sup>n</sup> téé càhá<sup>n</sup> tnúhu Yá Ndiòxí, te ío váha ndùu tnúhu càhá<sup>n</sup>-dé ní cùu, te quide-dé sá vǎ yòo tnàhí ndàcu cada nàcuáa cudíí iní Yá Ndiòxí ndíhi ñáyiú ní cùu. <sup>20</sup>Te cue téé cùu dútú cùnùu, ndíhi cue téé cùnùu

taxi tñuní ñáhá xii-ndí ní sáha cuendá ñáhá-güedé xii-dé núú tē Pilatú te ní sata caa ñaha-güedé te núú cùrúxí-á<sup>n</sup> ní xihí-dé. <sup>21</sup> Dico vitna sa ní cuu úní nduu sá ní xihí-dé, te nchúhú ní sani iní-ndí sá tēe-á<sup>n</sup> dàcácu nihnu ñaha-dě xii nchúhú ñáyiú israhél núú nchàa tnúndòho tnúhu ndàhú ndécú-ndí. <sup>22</sup> Dico ío cùnúhu-ndí cùú, chí ì<sup>n</sup> úú ñáyiú dìhí ní tuha ñaha xii-dé ndécú ndìhi-ndí ní sáhá<sup>n</sup> ngotó-yu ndéxuehe tàcuñhdá-gá yaú núú ní chihi-güedé yiqui cùnú-dé, <sup>23</sup> te ní nasáá-yu cächí-yu xii-ndí sá ñà túú-gá yiqui cùnú-dé yihí xití yaú-á<sup>n</sup>. Te ní xiní-yu espíritú xínú cuèchi núú Yá Ndiòxí, te ní xáha<sup>n</sup>-xi xii-yu sá ndécú vívú-dě. <sup>24</sup> Te sátá dúcá<sup>n</sup> te ì<sup>n</sup> úú cue tée cùndìhi-ndí ní sáhá<sup>n</sup> ndéhe-güedé yaú-á<sup>n</sup>, te ní xiní-güedé sá ndáá cùú-xí nchàa tnúhu ní cáhá<sup>n</sup> ñáyiú dìhí-á<sup>n</sup>, dico ñá túú ní xiní-güedé tēe-á<sup>n</sup> — cächí-güedé xáha<sup>n</sup>-güedé xii-gá.

<sup>25</sup> Te Jèsús ní xáha<sup>n</sup>-gá xii-güedé:

—Ío cùmání sá xiní tñuní-ndó, chí ío cuèè sàndáá iní-ndó tnúhu ní cáhá<sup>n</sup> cue tée ní xóo cáhá<sup>n</sup> tnúhu Yá Ndiòxí ndéé sanaha! <sup>26</sup> ¿Te náa ñá túú tàú-xi sá ndóhó Cristú òré cùmání-gá sáá nduu ndaa-gá andiu núú ndécú Dütú Ndiòxí cundecu-gá-á<sup>n</sup>? —cächí-gá xáha<sup>n</sup>-gá xii-güedé.

<sup>27</sup> Te ní ngüíta-gá xáha<sup>n</sup>-gá nàcuáa quèe-xi nchaa tnúhu cáhá<sup>n</sup>-xi núú tütú Yá Ndiòxí cuendá-gá, te díhna-gá ní cáhá<sup>n</sup>-gá nàcuáa nduu nchaa tnúhu yòdo tñuní núú tütú ndíi Moisés, te dàtnùní ní cáhá<sup>n</sup>-gá nàcuáa nduu nchaa tnúhu yòdo tñuní núú tütú nchaa cue tée ní xóo cáhá<sup>n</sup> tnúhu Yá Ndiòxí ndéé sanaha.

<sup>28</sup> Te òré ní quexio-güedé yuhu ñnúú núú cuàhá<sup>n</sup>-güedé-á<sup>n</sup>, te Jèsús ní quide-ni-gá sá yáha-gá quíhí<sup>n</sup>-gá ingá xichi ní cùu. <sup>29</sup> Dico ní cáhá<sup>n</sup> ndàhú-güedé núú-gá sá quéndòo-gá xía<sup>n</sup> ndetatú-gá ndìhi-güedé, te xáha<sup>n</sup>-güedé xii-gá:

—Quendóo ndìhi ñaha xii-ndí iha ndetatú-n chí sa ní cuaa, te tnaví cundiquí<sup>n</sup> —cächí-güedé xáha<sup>n</sup>-güedé xii-gá.

Te xía<sup>n</sup> cáá ì<sup>n</sup> vehe cuánguihu-güedé ndetatú-güedé ndìhi-gá. <sup>30</sup> Te òré sa yìhi-güedé mèsá ndìhi-gá cùdini ndìhi ñaha-güedé, te ní quehe<sup>n</sup>-gá pàá te ní ndacá<sup>n</sup> táhú-gá núú Yá Ndiòxí, te ní táhú cuèchi-gá te dàtnùní ní dácàhñu ñaha-gá xii-güedé. <sup>31</sup> Te òré-á<sup>n</sup> ní naquiní ñáhá-güedé xii-gá ní cùu, dico uu<sup>n</sup> ní ndónúhú-gá. <sup>32</sup> Te ní xítñaha-güedé:

—Te ndáá sá sùuní cùdíf iní-ó òré tá ndàtnúhu-o ndìhi Jèsús véxi ichi, te ta dànehé ñáhá-gá xii-o nchaa nacuáa quèe-xi tnúhu cáhá<sup>n</sup>-xi núú tütú Yá Ndiòxí —cächí-güedé xítñaha-güedé.

<sup>33</sup> Te ñá túú-gá ní xíndetu-güedé chí ndìhi-ni ní natnii-güedé ichi cuánuhú-güedé ñúú Jerusàlén, te ní nasáá-güedé núú xíndecu ndi ùxí ì<sup>n</sup> cue tée ní táuchíú<sup>n</sup> Jèsús cáhá<sup>n</sup> tnúhu-gá, ndìhi dava-gá ñáyiú. <sup>34</sup> Te cue tée xíndecu-á<sup>n</sup> xáha<sup>n</sup>-güedé:

—Ndáá sá ní ndoto Yaá cùú Mèstrú, chí ní xiní ñáhá tē Xímú —cächí-güedé xáha<sup>n</sup>-güedé.

<sup>35</sup> Te cue tée ní nasáá-á<sup>n</sup> ní cani-güedé cuendú nàcuáa ní cuu ichi, ndìhi nàcuáa ní cuu ní naquiní-güedé Jèsús òré ní táhú-gá pàá ní dácàhñu ñaha-gá xii-güedé.

### **Jèsús ní quexio-gá núú xíndecu cue tée ní xica cuu ndìhi-gá**

(Mt. 28:16-20; Mr.

16:14-18; Jn. 20:19-23)

<sup>36</sup> Te cáhá<sup>n</sup> dúcá<sup>n</sup>-ní-güedé nàcuáa ní cuu ní quexio Jèsús ní ngúnutñi-gá ndéé tnuú-güedé, te xáha<sup>n</sup>-gá xii-güedé:

—Yá Ndiòxí chíndèe ñaha-gá xii-ndo ío váha cùu iní-ndó ndècu-ndo — cachí-gá xáha<sup>n</sup>-gá xii-güedé.

<sup>37</sup>Te da ní yùhú-güedé, te ní sani iní-güedé sá dicó ìí<sup>n</sup> espíritú cúú sá ndéhé-güedé ní cùu. <sup>38</sup>Dico Jèsús ní xáha<sup>n</sup>-gã xii-güedé:

—¿Ná cuendá yùhú-ndó, te sàni ìí<sup>n</sup> sani úú iní-ndó-í? <sup>39</sup>Chí cündèhe ndaha-í ndihi sáhà-í te quiní-ndó nã diu-ni-í. Te chí téndàha ñaha xii-í te cundehe-ndo, te núu ìí<sup>n</sup> espíritú ndécú yìqui cuñú-xi dàtná ndécú ndihi yùhú —càchí-gá xáha<sup>n</sup>-gã xii-güedé.

<sup>40</sup>Te sátá dúcá<sup>n</sup> nĩ xáha<sup>n</sup>-gã te ní dánhé ñáhá-gã xii-güedé ndaha-gá ndihi sáhá-gã. <sup>41</sup>Te ío ní cuñúhu-güedé, te ní cudíí iní-güedé sá ndécú-gã tnuú-güedé dico sàni ìí<sup>n</sup> sani úú iní-güedé, te ní xáha<sup>n</sup> Jèsús xii-güedé:

—¿Ndècu ndihi-ndo luha sá caxí-ó ìha ñá? —càchí-gá xáha<sup>n</sup>-gã xii-güedé.

<sup>42</sup>Te ní sãñaha-güedé xii-gá luha chácá nĩ chíhó, ndihi dítá ññúhú ñúhú ndùdí, <sup>43</sup>te ní quehe<sup>n</sup>-gá te ndèhe-güedé ní xexi-gá. <sup>44</sup>Te dàtnùnì ní xáha<sup>n</sup>-gã:

—Nchaa sá nĩ yáha-í-a cùu-xi sá nĩ cachí tnúhu-í xii-ndo cütnáhá ndécú ndihi ñaha-gá-í xii-ndo, chí ní cachí-í sá dàcuítíí càda-xi nchaa nacuaá càhá<sup>n</sup>-xi núú tütú ndíí Moisés, ndihi núú tütú ndèé tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiöxí ndéé sanaha, ndihi núú librú Sãlmú —càchí-gá xáha<sup>n</sup>-gã xii-güedé.

<sup>45</sup>Te òré-á<sup>n</sup> nĩ sãñaha-gã sá xìnì tñùnì-güedé, te ní tecú tñùnì-güedé nchaa tnúhu càhá<sup>n</sup>-xi núú tütú Yá Ndiöxí. <sup>46</sup>Te ní xáha<sup>n</sup>-gã xii-güedé:

—Duca<sup>n</sup> ndèé tñuní núú tütú Yá Ndiöxí sá dàcuítíí sá yùhú Crìstú cuú-í, te nduu únì ndoto-í. <sup>47</sup>Te nihì ñuyíú

cùtènuu tnúhu ní cáhá<sup>n</sup>-í, dico díhna nuu-gã ñuú Jerusàlén ngüíta-yu cacunehe ñáhá-yu xii-í, te cáhá<sup>n</sup>-yu nàcuáa ní dánhé-í-yu, te cüñáhá-yu xii cue ñáyíu sá ná dándixi túu-yu iní-yu sá ñà túú quide váha-yu, te dàñá-yu nchaa ichi cuèhé ichi duha ndècú-yu, te natnií-yu ichi Yá Ndiöxí, te duca<sup>n</sup> te cada càhnu iní-gá nchaa yíca cuèchi-yu. <sup>48</sup>Te vitna nchòhó cuu-ndo cue téé cáhá<sup>n</sup> ndáa nchaa nàcuáa ní cuu chí ní xiní núú-ndó. <sup>49</sup>Te yùhú tendaha-í Espíritú Yá Ndiöxí quixi cundecu ndihi-ndo, chí duca<sup>n</sup> nĩ cachí-gá. Dico chí cündècu-ni ñuú Jerusàlén-á<sup>n</sup> ndèé ná quèxio Espíritú Yá Ndiöxí ngúndecu ndihi-ndo cuendá chindee ñaha-xi xii-ndo cada-ndo nchaa nacuaá ní cáhá<sup>n</sup>-í —càchí-gá xáha<sup>n</sup>-gã xii-güedé.

### Jèsús cuándaa-gá andiu

(Mr. 16:19-20)

<sup>50</sup>Te Jèsús ní queñuhu ñaha-gã xii-güedé ñuú Jerusàlén ndécá ñaha-gá cuáhá<sup>n</sup> ñuú Bètaniá, te xía<sup>n</sup> nĩ ndonehe-gá ndaha-gá núú ñnu, te ní xíca<sup>n</sup> táhú ñaha-gá xii-güedé núú Yá Ndiöxí. <sup>51</sup>Te sátá nĩ xíca<sup>n</sup> táhú ñaha-gá xii-güedé núú Yá Ndiöxí, te ní quee-gã tnuú-güedé cuándaa-gá andiu. <sup>52</sup>Te ní ngüíta-güedé ní cachí-güedé sá ío càhnu cuu Jesús, te ní natnií-güedé ichi cuánuhú-güedé ñuú Jerusàlén, te súunì cùdíí iní-güedé ñúhú-güedé ichi. <sup>53</sup>Te nchaa nduu ní xíndecu-güedé veñúhu càhnu sá ío cùnuu ní ndacá<sup>n</sup> táhú-güedé núú Yá Ndiöxí, te ní cachí-güedé sá ío càhnu cuu-gá. Duha ní cuu dàvá-á<sup>n</sup>.

## TNÚHU NÍ CHÍDÓ TNUNÍ TÈ JUÀÀ

### Déhe Yá Ndiöxí ní cuu-gá ìḡ ñáyíu

**1** Cùmání-gă ngáva ñuyíú, te sa ndècu ndihí Yá Ndiöxí Déhe-gá. Te ìḡ-ni xícuu-gá. Te Déhe-gá-á<sup>n</sup> ñí cuu-gá dàtná ìḡ tnúhu, chi ní cachí tnúhu-gá nàcuáa càa Tátá-gă Dútú Ndiöxí. <sup>2</sup>Te sa ndècu-gá ndihí Dútú Ndiöxí te ní ngáva ñuyíú. <sup>3</sup>Te diu-ni tnúhu mee Dútú Ndiöxí ní cuu ní cadúha Déhe-gá nchaa sá íó ñuyíú. Te núu ñá túú Déhe-gá ñá, te ñá túú nă coo ñuyíú-a ní cùu. <sup>4</sup>Te diu-ni Déhe-gá quidé-gă ndécú-ó, te ní dáyèhé-gá iní-ó nàcuáa cundecu-o. <sup>5</sup>Te tnúhu-gá ní xíté nuu-xi núu ndécú nchàa ñáyíu ñùhu ichi cuehé ichi duha. Te ñáyíu-á<sup>n</sup> cúú-yu dàtná cue ñáyíu ndècu ìḡ núu néé, te diu-ní-yu cachí iní-yu xocàni-yu tnúhu-gá dico vá ndácú-yu.

<sup>6-7</sup>Te ní xíndecu ìḡ tée ní xínani-dě Juàà, te tée-á<sup>n</sup> ñí táuchíú<sup>n</sup> Yá Ndiöxí sá càhá<sup>n</sup>-dé tnúhu-gá núu ñáyíu. Te ní xáha<sup>n</sup>-dě xíí-yu sá véxi Déhe-gá ñuyíú-a, te dandixi túu-gá iní-yu cuèndá cutnùní iní-yu nàcuáa ndùu cuendá Yá Ndiöxí cuèndá quíndáá iní-yu tnúhu-gá. <sup>8</sup>Te ñá dífú mée té Juàà ní dándixi túu-dé iní-yu cuèndá cutnùní iní-yu nàcuáa ndùu cuendá Yá Ndiöxí, chi cuèndá-ni ní xica cuu-dé ní càhá<sup>n</sup>-dé sá Dèhe Yá Ndiöxí véxi-gá dandixi túu-gá iní-yu. <sup>9</sup>Te ndáá ndisa sá mée-gă dándixi túu-gá iní ñáyíu ñuyíú-a cuèndá cutnùní iní-yu nàcuáa ndùu cuendá Yá Ndiöxí.

<sup>10</sup>Te ní xíndecu-gá ñuyíú-a, te ñáyíu ñuyíú-a ñá ní cùtnuní iní-yu yoo cùu-gá, te diu-ni mee-gă ní cadúha-gá ñuyíú-a ní quide-gá chùu<sup>n</sup> ní táhú Dútú Ndiöxí. <sup>11</sup>Te ní quixi-gá ñuyíú ñí càdúha mee-gă, dico cue ñáyíu ñuyíú-a ñá ní cùu váha iní-yu núu-gă. <sup>12</sup>Dico davá-yu ní sándáá iní

ñáhá-yu xii-gá, te ní nduu táhú-yu ní nduu déhe ñaha Yá Ndiöxí xíí-yu. <sup>13</sup>Te ñá túú ní ndùu déhe ñaha-gă xíí-yu sá cúú-yu déhe ñáyíu ñuyíú-a, àdi sá ndécú tătá-yu, nănă-yu chi mee Yá Ndiöxí duca<sup>n</sup> ñí cuiní-gá cunduu sá ndúú dèhe ñaha-gă xíí-yu.

<sup>14</sup>Te Déhe-gá ní quixi túu-gá ñuyíú-a, te ní cuu-gá ìḡ yiquí cùnú ní xín-decu ndihí ñaha-gă xii nchoo cuè ñáyíu ní xica cuu túu ndihí-gá. Te ní xíní-ó sá ïo càhnu cuu-gá cuèndá sá íḡ dìí-ni-gă cúú-gă Déhe Yá Ndiöxí, te ío cùndahú iní ñáhá-gă chíndèe ñaha-gă xii nchoo ñáyíu ndècu ñuyíú-a, te ío ndáá càhá<sup>n</sup>-gá. <sup>15</sup>Te duha ní càhá<sup>n</sup> té Juàà cuèndá Déhe Yá Ndiöxí ní xáha<sup>n</sup>-dě xii ñáyíu:

—Cuèndá tée iha ni càhá<sup>n</sup>-í ndéé cãni-gá ní cachí-í sá quíxí ìḡ tée quixi. Te tée-á<sup>n</sup> cúnùu-gá-dé, chi díhna-gá-dé sa ndècu-dé dàcúxí yùhú —duha ní xáha<sup>n</sup>-dě xíí-yu.

<sup>16</sup>Te ío váha iní Yaa-á<sup>n</sup> chi xìto ñaha-gă xii-o nchàa-o ìḡ nduu ìḡ nduu. <sup>17</sup>Te ndíi Moisés ní cachí tnúhu ndíi tnúhu Yá Ndiöxí tnúhu sá sánú ichi ñaha xii-o nacuáa cundecu-o, dico Déhe-gá Xí-tohó Jesucristú ní cachí-gá sá ïo cùu iní ñáhá Yá Ndiöxí xii-o. Te ní càhá<sup>n</sup>-gá nchaa dava-gá tnúhu ndáá. <sup>18</sup>Te ñá íḡ ñáyíu xíní túu-yu Yá Ndiöxí. Dico ìḡ dìí-ni Déhe-gá Yaa ndécú ndihí-gá càchi tnúhu-gá nàcuáa cà-gá.

### Té Juàà tée dàcuandute ñaha xii ñáyíu càhá<sup>n</sup> váha-dé cuèndá Xítohó Jesucristú

(Mt. 3:11-12; Mr. 1:7-8; Lc. 3:15-17)

<sup>19</sup>Te cue tée isràél ndécú ñùú Jerusàlén ní tendaha-güedè cue dútú ndihí cue tée cùu levítá cuáhá<sup>n</sup>-güedé núu ndécú tē Juàà ndúcú tnúhu-güedé núu-dě nùu ná tée cùu-dé. <sup>20</sup>Te ní càhá<sup>n</sup> ndáá-dé ní xáha<sup>n</sup>-dě xii-güedé:

—Yúhú, ñá díú Crìstú Yaá ní tendaha Yá Ndiöxí véxi ñuyíú-a cùu-í —càchí-dé xáha<sup>n</sup>-dě.

<sup>21</sup> Te ní xáha<sup>n</sup> tùcu-güedé:

—¿Te yoo cùu yohó váí? ¿Á yohó cùu-n tē Èliás? —càchí-güedé xáha<sup>n</sup>-güedé xii-dé.

Te ní xáha<sup>n</sup> tē Juàá:

—Yúhú, ñá díú tē Èliás cùu-í —càchí-dé xáha<sup>n</sup>-dě.

Te xáha<sup>n</sup> tùcu-güedé:

—¿Te yohó cùu-n tēe ní cachí cue tēe ndéé sanaha quixi cáhá<sup>n</sup> tnúhu Yá Ndiöxí-á? —càchí-güedé xáha<sup>n</sup>-güedé xii-dé.

Te ní xáha<sup>n</sup>-dē:

—Ni ñá díú tēe-á<sup>n</sup> cùu-í —càchí-dé xáha<sup>n</sup>-dē xii-güedé.

<sup>22</sup> Te ní xáha<sup>n</sup> tùcu-güedé:

—¿Te ná tēe cùu yohó váí?, cuendá duca<sup>n</sup> ñàcani tnúhu-ndí núu cuè tēe ní tendaha ñàha xii-ndí véxi-ndí, te cáhá<sup>n</sup> duu<sup>n</sup>-n nùu ná tēe cùu-n —càchí-güedé xáha<sup>n</sup>-güedé xii-dé.

<sup>23</sup> Te ní xáha<sup>n</sup> tē Juàá:

—Yúhú cùu-í tēe xica cáhá<sup>n</sup> xití yucu ñàcuáa ní cáhá<sup>n</sup> ndí Chàíá, chi ndí-á<sup>n</sup> ní cachí ndí: “Chí dáñá ìchi cuehé ichi duha ndècu-ndo te tñi-ndo ìchi váha, chi véxi Yaá ío cùnūu”, duha ní cachí ndí —càchí tē Juàá xáha<sup>n</sup>-dē xii-güedé.

<sup>24</sup> Te cue tēe ndècu tnúhu núu tē Juàá nùu ná tēe cùu-dé, cue tēe-á<sup>n</sup> ní tendaha ñàha cue tēe cùu fariséu xii-güedé. <sup>25</sup> Te ní xáha<sup>n</sup> tùcu-güedé xii tē Juàá:

—¿Ná cuendá dácúandute-n ñáyiu te núu ñá díú Crìstú cùu-n, te ni ñá díú tē Èliás, te ni ñá díú tēe véxi cáhá<sup>n</sup> tnúhu Yá Ndiöxí cùu-n váí? —càchí-güedé xáha<sup>n</sup>-güedé xii-dé.

<sup>26-27</sup> Te ní xáha<sup>n</sup> tē Juàá:

—Yúhú ní ngódó núu-í dácúandute-í ñáyiu. Dico nchicú<sup>n</sup> ñ<sup>n</sup> tēe véxi, te tēe-á<sup>n</sup> cùnūu-gá-dé dácúxí yúhú, chi yúhú cùu-í ñ<sup>n</sup> tēe duu<sup>n</sup> duu<sup>n</sup> ñá túu tàú nandaxi cuèdicó ñii chàú-dé dico quide-í

chìu<sup>n</sup>-dé. Te tēe-á<sup>n</sup> sa ñùhu tnahá-dé tnuú-ndó dicó-ni sá ñá túu xini-ndó-dé —càchí-dé xáha<sup>n</sup>-dē.

<sup>28</sup> Duha ní cuu ñuu Bètábará ñuu cáá ndàa ingá xio yúte Jòrdán, yàcá<sup>n</sup> ní xindecu tē Juàá ní dácúandute-dé ñáyiu.

### **Jèsús quidé càhnu iní-gá nchaa yíca cuèchi ñáyiu**

<sup>29</sup> Te nduu tñéé ní xini tē Juàá Jèsús véxi yatni-gá núu ndécú-dē ndihi ñáyiu. Te ní xáha<sup>n</sup>-dē xií-yu:

—Chí cündèhe tēe-á<sup>n</sup>, chi tēe-á<sup>n</sup> cùu-dé Crìstú Yaá ní tendaha Yá Ndiöxí véxi ñuyíú-a, te véxi-dé cada càhnu iní-dé nchaa yíca cuèchi ñáyiu ñuyíú. Te cùu-dé dàtná ñ<sup>n</sup> mbéé quiti ío váha iní-xi. <sup>30</sup> Te diu tēe-á<sup>n</sup> ní cachí-í sá cànchícú<sup>n</sup>-dé quixi. Te cùnūu-gá-dé dácúxí yúhú, chi díhna-gá-dé sa ndècu ní cachí-í xii-ndo. <sup>31</sup> Te ni yúhú ñá túu xini-í-dé ní cùu, dico xica cuu-í dácúandute-í ñáyiu cuendá nchaa ñáyiu israhèl quini ñáha-yu xii-dé —càchí-dé xáha<sup>n</sup>-dē xií-yu.

<sup>32</sup> Te ní xáha<sup>n</sup> tùcu-dé:

—Ní xini-í Espiritú Yá Ndiöxí ní quee-xi andiu véxi cuu<sup>n</sup>-xi ngúndecu ndihi ñaha-xi xii-dé, te dàtná cáá lõmá cáá Espiritú-á<sup>n</sup> véxi cuu<sup>n</sup>-xi. <sup>33</sup> Te yúhú ñá túu xini-í-dé ní cùu, dico Yá Ndiöxí Yaá ní tendaha ñàha xii-í xíca cùu-í dácúandute-í ñáyiu, Yaá-á<sup>n</sup> ní cachí tnúhu-gá sá tēe na quini-í ngúndecu ndihi Espiritú-gá sá véxi cuu<sup>n</sup> andiu, te tēe-á<sup>n</sup> taxi-dé Espiritú-gá cundecu ndihi-o. <sup>34</sup> Te yúhú ní xini-í-dé te xini ndáá-í sá Dèhe Dútú Ndiöxí cùu-dé. Te xíá<sup>n</sup> càchí tnúhu-í xii-ndo —càchí tē Juàá xáha<sup>n</sup>-dē xií-yu.

### **Cue tēe díhna nuu xica cuu ndihi Jèsús**

<sup>35</sup> Te nduu tñéé-á<sup>n</sup> diu-ni xíá<sup>n</sup> ndécú tē Juàá ndihi úu cue tēe xica cuu ndihi-dé.

<sup>36</sup> Te ní xiní-dé Jèsús ñúhú-gǎ ichi, te ní xáha<sup>n</sup>-dě xii cue tée xica cuu ndihi-dé-á<sup>n</sup>:  
—Chí cúndèhe tée-ǎ<sup>n</sup>, chi tée-ǎ<sup>n</sup> cúú-dě Cristú Yaá ní tendaha Yǎ Ndiǒxí véxi ñuyúú-a. Te cùu-dé dàtná ìì<sup>n</sup> mběé quiti ío váha iní-xi —càchí-dé xáha<sup>n</sup>-dě.

<sup>37</sup> Te sá dúcá<sup>n</sup> ñí cáhá<sup>n</sup> té Juáá núú cue tée úú ndihi-dé-á<sup>n</sup> núu ní chinchícú<sup>n</sup>-güedé Jèsús. <sup>38</sup> Te ní nchócótó-gǎ ndàa sátá-gǎ, te ní xiní-gǎ sá nchicú<sup>n</sup> ñáhá-güedě xii-gǎ. Te ní xáha<sup>n</sup>-gǎ xii-güedé:

—¿Ná nándücu-ndo? —cachí-gǎ xáha<sup>n</sup>-gǎ xii-güedé.

Te ní xáha<sup>n</sup>-güedé:

—¿Ndéé ndécú-n, Ràbíí?  
—càchí-güedé xáha<sup>n</sup>-güedě xii-gǎ.

Te Ràbíí-á<sup>n</sup> quée-xí Mèstrú tnúhu mee-güedě. <sup>39</sup> Te ní xáha<sup>n</sup> Jèsús xii-güedé:

—Chí nèhé te quiní-ndó —càchí-gǎ xáha<sup>n</sup>-gǎ.

Te ní xica-güedé cuáhá<sup>n</sup>-güedé, te ní quexio-güedé núú quidé vèhe-gǎ. Te ndècu-ni-güedé ndihi-gǎ ní cuaa, chi dàtná òré caa cùmí sacuaa ní sáá-güedé.

<sup>40</sup> Te úú cue tée-á<sup>n</sup> ñí tñii-güedé tnúhu ní cáhá<sup>n</sup> té Juáá, te ní chinchícú<sup>n</sup>-güedé Jèsús. Te núú úú cue tée-á<sup>n</sup>, ìì<sup>n</sup>-dé nání-dě Ndríxí, te ñaní-dé cúú tē Xímú, àdi Pelú chi úú ñu-dé. <sup>41</sup> Te té Ndríxí-á<sup>n</sup> ní nanducu-ni-dě ñaní-dé te ní xáha<sup>n</sup>-dē:

—Ní nanfíí-ndí tée cùu Mesías —càchí-dé xáha<sup>n</sup>-dē.

Te Mèsiás-á<sup>n</sup> quée-xí Cristú tnúhu mee-güedě, Yaá ní tendaha Yǎ Ndiǒxí véxi ñuyúú-a. <sup>42</sup> Te ndèca té Ndríxí ñaní-dé cuáhá<sup>n</sup> núú ndécú Jèsús. Te òré ní xiní ñáhá Jèsús xii té Xímú, te ní xáha<sup>n</sup>-gǎ:

—Yòhó cúú-n tē Xímú déhe té Jònás, te vitna danani ñaha-í Cèfás xii-n —càchí-gǎ xáha<sup>n</sup>-gǎ.

Te Cèfás-á<sup>n</sup> quée-xí Pèlú tnúhu mee-güedě.

## Jèsús ní cáhá<sup>n</sup>-gǎ té Lipé ndihi té Natanàél

<sup>43</sup> Te nduu tñéé ní sani iní-gǎ quíhí<sup>n</sup>-gǎ distrítú Galileá. Te ní nanfíí-gǎ ìì<sup>n</sup> tée nani Lipé, te ní xáha<sup>n</sup>-gǎ xii-dé:

—Néhé ná quíhí<sup>n</sup>-ó núú quíhí<sup>n</sup>-í-a —càchí-gǎ xáha<sup>n</sup>-gǎ.

<sup>44</sup> Te té Lipé-á<sup>n</sup> cúú-dě tée ñuú Bèt-saidá. Te ñu-ni ñuú yàcá<sup>n</sup> cúú ñuú té Ndríxí ndihi té Pèlú. <sup>45</sup> Te té Lipé ní nanfíí tñáhá-dě ndihi té Natanàél, te ní xáha<sup>n</sup>-dē:

—Ní nanfíí-ndí tée dii cuendú-xi ní chídó tñuní ndíi Moisés ndihi dava-gǎ cue tée ní xóo cáhá<sup>n</sup> tnúhu Yá Ndiǒxí ndéé sanaha. Te tée-á<sup>n</sup> nání-dě Jèsús déhe té Chèé, tée ñuú Nazàrét —càchí-dé xáha<sup>n</sup>-dē.

<sup>46</sup> Te ní xáha<sup>n</sup> tē Natanàél xii té Lipé:

—¿Te náa ío váha càa ñuú Nazàrét núu da yàcá<sup>n</sup> quee tée cáhá<sup>n</sup> tnúhu Yá Ndiǒxí? —càchí-dé xáha<sup>n</sup>-dē.

Te ní xáha<sup>n</sup> tē Lipé:

—Néhé ná quíhí<sup>n</sup>-ó te quiní-n —càchí-dé xáha<sup>n</sup>-dē.

<sup>47</sup> Te òré ní xiní Jèsús té Natanàél tá cùyatni-dé cuáhá<sup>n</sup>, te ní cáhá<sup>n</sup>-gǎ cuendá-dé te ní cachí-gǎ:

—Tée véxi-ǎ<sup>n</sup> cúú-dě mei tēe isràél, te ñá íí<sup>n</sup> nduu dandahú-dé ñáyiú —càchí-gǎ xáha<sup>n</sup>-gǎ.

<sup>48</sup> Te ní xáha<sup>n</sup> tē Natanàél xii Jèsús:

—¿Te nása náquiní ñáhá-n? —càchí-dé xáha<sup>n</sup>-dē.

Te ní xáha<sup>n</sup> Jèsús:

—Yúhú sa ní xiní ñáhá-í xii-n òré ndécú-gǎ-n càha yutnu ngúxí-ǎ<sup>n</sup> te ni tē Lipé vátá cáná ñàha-gǎ-dé xii-n òré-á<sup>n</sup> —càchí-gǎ xáha<sup>n</sup>-gǎ xii-dé.

<sup>49</sup> Te sá dúcá<sup>n</sup> ñí cáhá<sup>n</sup>-gǎ, núu ní xáha<sup>n</sup> tē Natanàél xii-gǎ:

—Mèstrú, yòhó cúú-n Dèhe Dútú Ndiǒxí yíndàha-n ñáyiú isràél —càchí-dé xáha<sup>n</sup>-dē xii-gǎ.

<sup>50</sup> Te Jèsús ní xáha<sup>n</sup>-gǎ:



—Cuèndá sá nǐ xiní ñáhà-í xii-n cãha yutnu ngúxí xǐá<sup>n</sup> iní ñáhá-n, dico cuéhé-gã núú sã quini-n —càchí-gã xáha<sup>n</sup>-gã xii-dé.

<sup>51</sup> Te ní xáha<sup>n</sup> tùcu-gá:

—Na càchí tnúhu ndáá-í sá sàá nduu, te quini-ndó nàcaá<sup>n</sup> andiu. Te quini-ndó cuè espíritu xínú cuèchi núú Yá Ndiòxí sá ndaa nuu-xi quide-xi núú cùndècu yúhú Tée cùu ñaní tnàhá-ndó nchaa-ndo —cachí-gã xáha<sup>n</sup>-gã xii-güedé.

### Vico tnândaha ió ñuú Cànaá

**2** Te nduu úní sá dúcá<sup>n</sup> nǐ cuu te ní xóo ì<sup>n</sup> vico tnândaha ñuú Cànaá, ì<sup>n</sup> ñuú yíndèhu distritú Galileá. Te yàcá<sup>n</sup> ní xín-decu nǎná Jèsús. <sup>2</sup> Te tnàhá Jèsús ndihi cue tée xica cuu ndihi-gá ní cáhá<sup>n</sup>-yu cuáhá<sup>n</sup>-gá ndihi-güedé vico-á<sup>n</sup>. <sup>3</sup> Te òré ní ndihi vinú, te ní xáha<sup>n</sup> nǎná Jèsús xii-gá:

—Ñá túú-gã vinú ndécú ndihi-yu —càchí-a<sup>n</sup> xáha<sup>n</sup>-a<sup>n</sup>.

<sup>4</sup> Te ní xáha<sup>n</sup> Jèsús xii-a<sup>n</sup>:

—Nǎá, ñá túú xini ñuhu-xi da yúhú cúnaha-n cuèndá vinú-á<sup>n</sup>, chi vátá tnàhá-gá òré quini-yu yoo cùu yúhú —càchí-gã xáha<sup>n</sup>-gã xii-a<sup>n</sup>.

<sup>5</sup> Te ní xáha<sup>n</sup>-a<sup>n</sup> xii ñáiyu xinu cuechi:

—Cada-ndo nchaa nacuaa na cáhá<sup>n</sup> Jèsús —càchí-a<sup>n</sup> xáha<sup>n</sup>-a<sup>n</sup>.

<sup>6</sup> Te yàcá<sup>n</sup> nútñi ñú quídi yúu te quée dàtná ì<sup>n</sup> cièndú lítrú ndute ì<sup>n</sup> ì<sup>n</sup> quídi-á<sup>n</sup>. Te ndute-á<sup>n</sup> nándihi ñáiyu isràél ndáhã-yu te nàqueté-yu cóhõ-yu chi duca<sup>n</sup> tnàhí quidé-yu nàcuáa sàndáá iní-yu Yá Ndiòxí. <sup>7</sup> Te ní xáha<sup>n</sup> Jèsús xii nchaa cue tée xinu cuechi:

—Nadachítú-ndó ndute ndi nchaa quídi-á<sup>n</sup> —càchí-gã xáha<sup>n</sup>-gã xii-güedé.

Te ní nadachítú-güedé. <sup>8</sup> Te ní xáha<sup>n</sup>-gã:

—Vitna te tava-ndo lüha, te canehe-ndo quíhí<sup>n</sup> cuáha-ndo tée quide vico —cachí-gã xáha<sup>n</sup>-gã xii-güedé.

Te duca<sup>n</sup> nǐ quide-güedé ní tava-güedé luha nèhe-güedé cuáhá<sup>n</sup> ní sáha-güedé tée quide vico. <sup>9</sup> Te ní xito ndéé tée quide vico-á<sup>n</sup>, te sa ní nduu-xi vinú, te ñá túú ní xini-dé ndéé véxi-xi, dico mee cue tée xinu cuechi sa naha-güedé núú nǐ tava-güedé. Duca<sup>n</sup> te tée quide vico-á<sup>n</sup> ní cana-dé tée tnândaha. <sup>10</sup> Te ní xáha<sup>n</sup>-dè:

—Nchaa ñáiyu quide vico queñuhú-yu díhna-gá vinú váha. Te sa vǎi vinú váha xihí-yu, te dàtnúni queñuhú-yu vinú ndàhú. Te yòhó díhna-gá vinú ndàhú ní queñuhu-n, te ndéé núú nǐ ndihi-ná ní queñuhu-n vinú váha —càchí tée quide vico-á<sup>n</sup> xáha<sup>n</sup>-dè xii tée tnândaha-á<sup>n</sup>.

<sup>11</sup> Te sá nǐ nadatiu Jèsús ndute-á<sup>n</sup> ní nduu-xi vinú cúú-xí ì<sup>n</sup> chiu<sup>n</sup> díhna nuu sã vǎ yòo tnàhí ndàcu cada ní quide-gá ñuú Cànaá, ì<sup>n</sup> ñuú yíndèhu distritú Galileá, te chiú<sup>n</sup> ní quide-gá-á<sup>n</sup> cúú-xí ì<sup>n</sup> chiu<sup>n</sup> cahnu vihi, núu xǐá<sup>n</sup> ní cutnùni iní-yu sá ìo càhnu cuu-gá, te ní sándáá iní ñáhá nchaa cue tée xica cuu ndihi-gá.

<sup>12</sup> Te sátá nǐ yáha vico, te ní xica Jèsús ndihi nǎná-gã, ndihi cue ñaní-gá, ndihi nchaa cue tée xica cuu ndihi-gá cuáhá<sup>n</sup>-yu ñuú Capèrnaúm. Te yàcá<sup>n</sup> ní xíndecú-yu ì<sup>n</sup> úú nduu ndihi-gá.

### Jèsús ñá túú tnàhá iní-gá nàcuáa quide ñáiyu xití veñúhu

(Mt. 21:12-13; Mr.

11:15-18; Lc. 19:45-46)

<sup>13</sup> Te ta cùyatni cada ñáiyu isràél vico pascuá, te ní xica Jèsús cuáhá<sup>n</sup>-gã ñuú Jerusalén. <sup>14</sup> Te sátá nǐ sáa-gá yàcá<sup>n</sup>, te ní xica-gá cuáhá<sup>n</sup>-gã veñúhu càhnu sá ìo cùnuu, te xití veñúhu-á<sup>n</sup> nǐ xiní-gá ndécú ñáiyu dicó-yu ndicutu, mbéé ndihi lómá, te tnàhá ñáiyu dàma díhú<sup>n</sup> núcõo-yu ní xiní-gá. <sup>15</sup> Te ní quehe<sup>n</sup>-gã ì<sup>n</sup> úú yoho, te ní cáunuu tnàha-gá, te ní dáiyuhu-gá ñáiyu ní queé-yu quehé veñúhu, ndihi ndicutú-yu ndihi mbéë-yu. Te cue ñáiyu dàma díhú<sup>n</sup>-á<sup>n</sup> ní dǎngõyo-gá díhú<sup>n</sup>-yu,

te ní dándùá-gá mèsá-yu. <sup>16</sup>Te ní xáha<sup>n</sup>-gǎ xii cue ñáyiú dico lómá:

—¡Queñuhu-ndo nchàa quití-a xití veñúhu-a! ¡Vá cádá-ndó vèhe núú yáhu núú cúú vèhe Tàtà-í Dútú Ndiòxí! —càchí-gá xáha<sup>n</sup>-gǎ xií-yu.

<sup>17</sup>Te xíá<sup>n</sup> ní ndacu iní cue tée xica cuu ndihi-gá sá dúcá<sup>n</sup> yòdo tñuní núú tütú-gá, te càchí-xi: “Ío cùyica iní-í chi ñá cuíní-yu canehe íi-yu vehe Tàtà-í”, duha càchí-xi núú tütú-gá.

<sup>18</sup>Te ní xáha<sup>n</sup> cuè tée isràél xii-gá:

—¿Ná cúú sǎ vǎ yòo tñahí ndàcu cada, cada-n cuèndá cutnùní iní-ndí sá cúú dùha taxi tñuní ñáhá-n xii-ndí-i? —càchí-güedé xáha<sup>n</sup>-güedé xii-gá.

<sup>19</sup>Te ní xáha<sup>n</sup> Jèsús:

—Chí dǎngoyo veñúhu-a, te neni xití úní nduu te sa nadaxínu-í —càchí-gá xáha<sup>n</sup>-gǎ xii-güedé.

<sup>20</sup>Te ní xáha<sup>n</sup> tucu cue tée isràél:

—Údico ínú cufá ñí xindecuu-güedé ní sáá veñúhu-a, te yòhó cuíní-n nadaxínu-n xití úní-ni nduu —càchí-güedé xáha<sup>n</sup>-güedé xii-gá.

<sup>21</sup>Dico sá ñí cáhá<sup>n</sup>-gá chi ñá díú cuèndá veñúhu ni cáhá<sup>n</sup>-gá chi cuèndá yiqui cùnú-gá ní cáhá<sup>n</sup>-gá. <sup>22</sup>Núú sátá ñí xíhí-gá, te ní ndoto-gá, te òré-á<sup>n</sup> ñí ndacu iní cue tée ní xica cuu ndihi-gá nàcuáa ní cáhá<sup>n</sup>-gá, núú xíá<sup>n</sup> ní sándáá iní-güedé tñúhu yòdo tñuní núú tütú-gá. Te duca<sup>n</sup> te ní sándáá iní-güedé tñúhu ní cáhá<sup>n</sup>-gá.

### Jèsús xini-gá nàcuáa càa iní nchaa ñáyiú

<sup>23</sup>Te òré ndécú Jèsús vico pàscuá, te ío vǎi ñáyiú ní sándáá iní ñáhá xii-gá cuèndá ío titní sǎ vǎ yòo tñahí ndàcu cada ní quide-gá ní xini-yu. <sup>24</sup>Dico Jèsús ñá ní cáhá<sup>n</sup>-gá nchaa tñúhu ñúhu iní-gá, chi sa ní cutnùní iní-gá sǎ ñà túú cùu váha iní-yu. <sup>25</sup>Te ñá túú xini ñuhu-gá ñí ñáyiú cuñaha nàcuáa càa iní nchaa tñaha ñáyiú-yu, chi mee-gǎ sa nàha ndáá-gá nàcuáa càa iní-yu ncháá-yu.

### Jèsús ndihi té Nicòdemú

**3** Ní xindecu ñí tée cùu fariséú ní xínani-dé Nicòdemú, te ní cuu-dé ñí tée cùnuu núú ñáyiú isràél. <sup>2</sup>Te tée-á<sup>n</sup> ñí sáhá<sup>n</sup>-dé niú ní cáhá<sup>n</sup> ndihi-dé Jèsús, te ní xáha<sup>n</sup>-dè:

—Mèstrú, yúhú ndihi dava-gá-güedé sa nàha-ndí sǎ Yǎ Ndiòxí ní tendaha ñàha-gá xii-n véxi-n dànehé ñáhá-n xii-ndí, chi núú ñá túú Yǎ Ndiòxí ndécú ndihi-n, te vǎ ndácú-n càda-n nchaa sǎ vǎ yòo tñahí ndàcu cada quide-n —càchí-dé xáha<sup>n</sup>-dè.

<sup>3</sup>Te ní xáha<sup>n</sup> Jèsús:

—Na càchí tñúhu ndáá-í xii-n sǎ ncháá ñáyiú vǎ ná càcu saa tucu, te vǎ ndíhu ndaha ñàha Yǎ Ndiòxí xií-yu —càchí-gá xáha<sup>n</sup>-gǎ xii-dé.

<sup>4</sup>Te ní xáha<sup>n</sup> tē Nicòdemú:

—¿Te nása cada ñí ñáyiú sa ní yíi te cacu-ni tucú-yu? ¿Náa ndíhu tucú-yu xití nǎná-yu te cacu tucú-yu xito cùu uú-ǎ<sup>n</sup>? —càchí-dé xáha<sup>n</sup>-dè xii-gá.

<sup>5</sup>Te ní xáha<sup>n</sup> Jèsús:

—Na càchí tñúhu ndáá-í xii-n sǎ ncháa ñáyiú na ndùu ndoo nduu nine iní-xi cuú-yu ñáyiú ní na càcu saa ndihi ndute ndihi Espíritú Yǎ Ndiòxí, ñáyiú-á<sup>n</sup> ndíhu ndaha ñàha-gá xií-yu. <sup>6</sup>Te nchaa ñáyiú càcu ñuyíú-a, chi déhe ñáyiú ñuyíú-a cùú-yu. Te ñáyiú ní nduu ndoo ní nduu nine iní-xi, ñáyiú-á<sup>n</sup> ñí nduu táhú-yu Espíritú Yǎ Ndiòxí te tàxi tñuní ñáhá-nǎ Espíritú-gá xií-yu. <sup>7</sup>Te vǎ cùnúhu-n tñúhu ní cáhá<sup>n</sup>-í-a, chi nchaa ñáyiú ní sándáá iní ñáhá xii-í ní nduu ndoo ní nduu nine iní-yu, te ñáyiú-á<sup>n</sup> cúú-yu dàtná ñáyiú ní nacacu saa. <sup>8</sup>Táchí ndèni xíá<sup>n</sup> tècú dóho-o xico-xi, dico ñá túú xini-ó ndèè ichi véxi-xi, te ni ñà túú xini-ó ndèè ichi cuáhá<sup>n</sup>-xi. Duca<sup>n</sup> sǎtnahá-xi cùu Espíritú-gá ndécú ndíhi ñáyiú ní nduu ndoo ní nduu nine iní-xi —càchí-gá xáha<sup>n</sup>-gǎ xii-dé.

<sup>9</sup>Te dătnùnî ní xícá<sup>n</sup> tnúhú tùcu té Nicòdemú núú-gă, te xăha<sup>n</sup>-dĕ xii-gă:

—¿Te nása ndùu tnúhu càhá<sup>n</sup>-n òuca<sup>n</sup> cahá<sup>n</sup>-n? —càchî-dé xăha<sup>n</sup>-dĕ xii-gă.

<sup>10</sup>Te ní xăha<sup>n</sup> Jĕsús:

—Yòhó cúu-n ì<sup>n</sup> tée cùtnunî inî-xi, chi dăcuaha-n ñáyiu isrâél, ¿te ñă tĕcú tnùnî-n tnúhu càhá<sup>n</sup>-î-u? <sup>11</sup>Te na càchî tnúhu ndáá-î xii-n să nchŭhú càhá<sup>n</sup>-ndĭ ì<sup>n</sup> sá ní tecú tnùnî-ndĭ, te càhá<sup>n</sup> ndáá-ndĭ cuendá ì<sup>n</sup> sá ní xinî-ndĭ. Dico nchòhó ñă tĕcú tnùnî-ndó tnúhu càhá<sup>n</sup>-ndĭ. <sup>12</sup>Te ñă sândáá inî-ndó tnúhu càhá<sup>n</sup>-î cuendá nchaa năcuáa cùu ñuyíu-a, te uu<sup>n</sup>-gă cada-ndo nŭu cáhá<sup>n</sup>-î cuendá nchaa năcuáa cùu andiu.

<sup>13</sup>Vă yòo ì<sup>n</sup> sàá andiu, te cani-xi cuendú năcuáa càa. Chi ì<sup>n</sup>dîi díf-ni yúhú véxi cuu<sup>n</sup>-î andiu, te cùu-î ñanî tnáhá-ndó nchàa-ndo. Te diu-ni yàcá<sup>n</sup> ndaa-î cundecú-î. <sup>14</sup>Te dătná ní ndanehe ndĭi Moisés cóó ní sata caa ndĭi-dĭ xitĭ yucu, duca<sup>n</sup> càda ñaha-güedĕ cata caa ñaha-güedĕ núú cùrúxĭ xii yúhú Tĕe cùu ñanî tnáhá-ndó nchàa-ndo ì<sup>n</sup> nduu, <sup>15</sup>te duca<sup>n</sup> yăha-î cuendá nchaa ñáyiu na quindáá inî ñáhá xii-î te nduu táhŭ-yu cundecú-yu ndĭhi Yá Ndiòxĭ ní caa ní quíhĭ<sup>n</sup> —càchî-gă xăha<sup>n</sup>-gă xii-dé.

**Yá Ndiòxĭ ío cùu inî-gă ñáyiu ñuyíu-a**

<sup>16</sup>Te Yá Ndiòxĭ ío cùu inî-gă ñáyiu ñuyíu-a. Te ì<sup>n</sup>dîi-ni Déhe-gă ndécú, te ní tendaha ñaha-gă ní quixi-gă ñuyíu-a, te núu na quindáá inî ñáhá ñáyiu, te vá cuĭta nihnú-yu, chi nduu táhŭ-yu cundecú-yu ndĭhi-gă ní caa ní quíhĭ<sup>n</sup>. <sup>17</sup>Te Yá Ndiòxĭ ñă túú ní tendaha-gă Déhe-gă quixi-gă ñuyíu-a dacuĭta nihnu-gă ñáyiu, chi ní tendaha-gă Déhe-gă ní quixi-gă sá dăcăcu nihnu-gă ñáyiu ñuyíu-a núú ùhú núú ndàhú.

<sup>18</sup>Nchaa ñáyiu sândáá inî ñáhá xii Déhe-gă, te vá cuĭta nihnú-yu. Te nchaa ñáyiu ñă túú sândáá inî ñáhá xii Déhe-gă ñùhú-yu ichi cuáhá<sup>n</sup>-yu núú ùhú núú

ndàhú, chi ñă túú sândáá inî-yu Déhe Dútú Ndiòxĭ. <sup>19</sup>Chi ní quixi Déhe-gă ñuyíu-a ní dándĭxĭ tŭu-gă inî-yu cuendá cutnùnî inî-yu năcuáa ndùu cuendá Yá Ndiòxĭ te tnĭí-yu ì<sup>n</sup> ichi váha ni cùu, te ñă ní tnàhá inî-yu, chi ní cudĭí-gă inî-yu nchaa sá cuèhé sá dúhá dăcúxĭ sá văha, núu xĭá<sup>n</sup> tá xĭta nihnú-yu cuáhá<sup>n</sup>. <sup>20</sup>Te nchaa ñáyiu quide nchaa sá cuèhé sá dúhá ñă tnàhá inî-yu cutnùnî inî-yu năcuáa ndùu cuendá Yá Ndiòxĭ, te ñă tnĭí-yu tnúhu-gă cuendá yùhú-yu nduu tnùnî nchaa sá quídĕ-yu. <sup>21</sup>Te nchaa ñáyiu ñùhu ichi ndáá cuinî-yu cutnùnî inî-yu năcuáa ndùu cuendá Yá Ndiòxĭ, te cùtnunî sá chindĕe ñaha-gă xĭí-yu, chi quide váha-yu.

**Té Juáá tĕe dăcuandute ñaha xii ñáyiu càhá<sup>n</sup> váha tucu-dé cuendá Jĕsús**

<sup>22</sup>Te sátá dúcá<sup>n</sup> ní cuu, te ní quee Jĕsús cuáhá<sup>n</sup>-gă ndĭhi cue tĕe xĭca cuu ndĭhi-gă distrĭtú Jùdeá. Te yàcá<sup>n</sup> ní xĭndecu tnaa-gă ndĭhi-güedĕ ní xóo dăcuandute-güedĕ ñáyiu. <sup>23</sup>Te ndĕcu té Juáá ì<sup>n</sup> xichi núú nánĭ Ēnón yatni ñuú Sălém dăcuandute-dé ñáyiu, chi yàcá<sup>n</sup> ío váha ñùhu ndute, núu xĭá<sup>n</sup> ní xóo quíhĭ<sup>n</sup> ñáyiu yàcá<sup>n</sup> ní xóo cuandutĕ-yu. <sup>24</sup>Duha ní cuu cùtnàhá vátá ngává-gă té Juáá vecaá.

<sup>25</sup>Te ní cacu ì<sup>n</sup> cuendú ní cáhá<sup>n</sup> cue tĕe xĭca cuu ndĭhi té Juáá ndĭhi ì<sup>n</sup> úú cue tĕe isrâél, núu ndĕdacăa sá văha-gă cada ñáyiu cuendá nduu fĭ-yu. <sup>26</sup>Te ní sáhá<sup>n</sup>-güedĕ núú ndécú tĕ Juáá ní xăha<sup>n</sup>-güedĕ:

—Mĕstrú, tĕe ní quixi núú ní xĭndecu-n ndàa ingá xio yúte Jòrdán, tĕe dii cuendú-xi ní cáhá<sup>n</sup>-n, tĕe-ă<sup>n</sup> dăcuandute-dé tnàhá-dé ñáyiu. Te ío vâi ñáyiu ní chinchícú<sup>n</sup> ñáhá xii-dé —càchî-güedĕ xăha<sup>n</sup>-güedĕ xii-dé.

<sup>27</sup>Te ní xăha<sup>n</sup> tĕ Juáá:

—Te vá yõo ìí<sup>n</sup> ndàcu cada ìí<sup>n</sup> chiu<sup>n</sup> nacuaa cuu váha iní Yá Ndiõxí, te núu ñá túú mée-gá chindèe ñaha-gá xií-yu. <sup>28</sup>Te nchòhó sa ñaha-ndo sá yùhú ní càhá<sup>n</sup> ndáá-í sá ñà dífú Cristú cùtú-í, dico mee Yá Ndiõxí ní tendaha ñaha-gá yódó ñuu-í véxi núú Yáá-á<sup>n</sup>. <sup>29</sup>Te nchòhó xini-ndó sá ìí<sup>n</sup> téee tñandaha te xichí tñandaha ndihi-ná-dé cündihi-dé. Te téee ní xica ndáhú òo cùdíí iní-dé ndèdóho-dé nchaa tñuhu càhá<sup>n</sup> téee tñandaha-á<sup>n</sup>. Te duca<sup>n</sup> sãtnahá-xi cùu yùhú, chi òo cùdíí iní-í sá vái ñáyiu ta chinchícú<sup>n</sup> ñáhá xii Jesús cuáhá<sup>n</sup>. <sup>30</sup>Te uu<sup>n</sup>-gá cuita cuu vai ñáyiu cutnùní iní-xi sá òo cùnuu-gá, te yùhú cuita ndóo ndee-í quhí<sup>n</sup> —càchí-dé xãha<sup>n</sup>-dè xii-güedé.

### Cristú véxi cuu<sup>n</sup>-gá andiu

<sup>31</sup>Te ìí<sup>n</sup>dii díí-ni Cristú Yaá véxi cuu<sup>n</sup> andiu cùnuu-gá núú ñùyíú-a. Te nchaa ñáyiu ndècu ñuyíú-a cùu-yu ñáyiu ñuyíú iha, te càhá<sup>n</sup>-yu sá cúu-xí ñùyíú-a. Dico Cristú Yaá véxi cuu<sup>n</sup> andiu <sup>32</sup>càhá<sup>n</sup>-gá ìí<sup>n</sup> sá ní xini-gá, te càhá<sup>n</sup>-gá ìí<sup>n</sup> sá ní tecú dóho-gá. Te ñá túú cuini-yu quindáá iní-yu tñuhu càhá<sup>n</sup>-gá. <sup>33</sup>Te nchaa ñáyiu tñi tñuhu càhá<sup>n</sup> Yaá véxi cuu<sup>n</sup> andiu-á<sup>n</sup> càhá<sup>n</sup>-yu sá tñuhu Yá Ndiõxí cúu-xí ìí<sup>n</sup> sá ndáá. <sup>34</sup>Te Déhe-gá Yaá véxi cuu<sup>n</sup> andiu càhá<sup>n</sup>-gá mee-ni tñuhu-gá. Te ñá ùhú iní-gá ní sãñaha-gã Espiritú-gá ndécú ndihi Déhe-gá. <sup>35</sup>Te Dútú Ndiõxí òo cùu iní-gá Déhe-gá, núu ní xãha<sup>n</sup>-gã sá mée-gã taxi tñuní-gá nchaandi túhú sá òo. <sup>36</sup>Te nchaa ñáyiu na quindáá iní ñáhá xii Déhe-gá, ñáyiu-á<sup>n</sup> cundecú-yu ndihi-gá ní caa ni quhí<sup>n</sup>. Te nchaa ñáyiu vá quindáá iní ñáhá xii Déhe Yá Ndiõxí òo dandòho ñaha-gá xií-yu.

### Jesús ndihi ìí<sup>n</sup> ñaha Sãmariá

**4** Te ní níhí cue téee cùu fariséú tñuhu sá vai-gá ñáyiu ta chinchícú<sup>n</sup> ñáhá xii Jesús. Te duca<sup>n</sup> vai-gá-yu ta dàcuandute-gá cuáhá<sup>n</sup> dàcúxíú té Juáá.

<sup>2</sup>Te cuèi ñá dífú mée-gá dácuañdute ñaha-gá xií-yu, dico cue téee xica cuu ndihi-gá dácuañdute ñaha-güedé xií-yu. <sup>3</sup>Te ní níhí Jèsús tñuhu ñacuáa càhá<sup>n</sup> cue téee cùu fariséú, núu ní ndee-gá distritú Jüdeá cuánuhú tucu-gá distritú Galileá.

<sup>4</sup>Te ichi ñuhu-gá ní nayáha-gá distritú Sãmariá. <sup>5</sup>Te ní sáá-gá ìí<sup>n</sup> ñuu nání Sicár te ñuu-á<sup>n</sup> yíndèhu-xi distritú Sãmariá. Te xíá<sup>n</sup> cáá yãtñi ñuhu núu ní sáha táhú ndíi Jàcób déhe ndíi ndíi Chèé. <sup>6</sup>Te yàcá<sup>n</sup> cáá dòco ní cuu cuendá ndíi Jàcób. Te cùu-xi datná cuádava nduu ñuhu Jesús ichi, te òo ní xàú-gá ñuu ní sáá-gá yuhu dòco-á<sup>n</sup> ní ngóo-gá ndétátú-gá. <sup>7-8</sup>Te ní xica cue téee xica cuu ndihi-gá cuáhá<sup>n</sup>-güedé xití ñuu Sicár cuánguaa<sup>n</sup>-güedé sá cáxí-güedé. Te yuhu dòco-á<sup>n</sup> núcòo-gá ní sáá ìí<sup>n</sup> ñadhihí ñaha distritú Sãmariá véxi quèhnu-a<sup>n</sup> ndute, te ní xãha<sup>n</sup> Jèsús:

—Taxi táhú luha ndute na còho-í —càchí-gá xãha<sup>n</sup>-gã.

<sup>9</sup>Te ní xãha<sup>n</sup> ñadhihí-á<sup>n</sup>:

—¿Ná cuendá da núu-í xicá<sup>n</sup>-n ndute coho-n? Te yòhó cúu-n téee isràél, te yùhú cúu-í ñaha Sãmariá —càchí-a<sup>n</sup> xãha<sup>n</sup>-a<sup>n</sup> xii-gá.

Te duca<sup>n</sup> ní xãha<sup>n</sup>-a<sup>n</sup>, chi ñá túú ndècu váha ñáyiu isràél ndihi ñáyiu distritú Sãmariá. <sup>10</sup>Te ní xãha<sup>n</sup> Jèsús xii-a<sup>n</sup>:

—Ñá cútnùní iní-n ñá taxi Yá Ndiõxí xii-n, te ni ñá cútnùní iní-n yòo xicá<sup>n</sup> ndute núu-n. Te núu dícò xini-n yòo cuu yùhú á, te da mee-n cãcá<sup>n</sup>-n ndute núu-í coho-n, te yùhú taxi-í ndute cundecu ndihi-n núu cuáhá<sup>n</sup> núu véxi —càchí-gá xãha<sup>n</sup>-gã.

<sup>11</sup>Te ní xãha<sup>n</sup> tucu ñadhihí-á<sup>n</sup>:

—Tãtá, ni sá quèhnu-n ndute ñá túú nèhe-n, te doco-a cùnú víhí, te ñá túú ndèé quínguehe<sup>n</sup>-n ndute taxi-n coho-í. <sup>12</sup>Ndíi Jàcób ñaní tñáhá-ndíí ní xincúcu ndèé sanaha ní cadúha ndíi doco-a ní tóo ndute ní xihí ndíi, ndihi nchaa déhe ndíi, ndihi nchaa quiti ndíi, te ní

ndóo cùu cuendá-ndí. ¿Te násai, te yòhó cùnùu-gá-n dàcúxí ndii-ǎ? —càchí-a<sup>n</sup> xáha<sup>n</sup>-a<sup>n</sup> xii-gá.

<sup>13</sup> Te ní xáha<sup>n</sup> Jèsús:

—Nchaa ñáyiú xihí ndute doco-a, te vá cúú vètú dúcá<sup>n</sup> iní-yu chí dayìchí ñáhá-ní tùcu-xi ndute-a. <sup>14</sup> Dico nchaa ñáyiú na còho ndute na cuáñaha-í, te vá íí<sup>n</sup> ndùu-gá dayìchí ñáhá-xí ndùte-á<sup>n</sup> xií-yu, chí ndute cuáñaha-í cúú-xí ndùte váha-gá. Te dàtná quée nihni ndute xití doco-a, nchaa-ni nduu ñùhu ñá túú yìchí, duca<sup>n</sup> sàtnahá-xi cada-xi chí candeca-xi iní-yu ni caa ni quíhí<sup>n</sup>, te núu na còhó-yu ndute cuáñaha yùhú —càchí-gá xáha<sup>n</sup>-gá xii-a<sup>n</sup>.

<sup>15</sup> Te ní xáha<sup>n</sup>-a<sup>n</sup>:

—Tátá, taxi ndute-á<sup>n</sup> ná còho-í cuendá sá vá dáyìchí ñáhá tnàhí-gá-xi ndute. Te vá quíxí-gá-í quixi quèhnu-í ndute doco-a —càchí-a<sup>n</sup> xáha<sup>n</sup>-a<sup>n</sup> xii-gá.

<sup>16</sup> Te ní xáha<sup>n</sup> Jèsús:

—Cuàhá<sup>n</sup> cuángàna yii-n, te quixi-ndo iha —càchí-gá xáha<sup>n</sup>-gá xii-a<sup>n</sup>.

<sup>17</sup> Te ní xáha<sup>n</sup>-a<sup>n</sup>:

—Ñá túú yìi-í —càchí-a<sup>n</sup> xáha<sup>n</sup>-a<sup>n</sup> xii-gá.

Te ní xáha<sup>n</sup> tùcu Jèsús:

—Ndáá càhá<sup>n</sup>-n sá ñà túú yìi-n. <sup>18</sup> Dico ní cuu úhú<sup>n</sup> téé cãndeca-n, te téé ndëca-n vitna chí ñá dífú yìi-n cuu-dé, te ndáá càhá<sup>n</sup>-n sá ñà túú yìi-n —càchí-gá xáha<sup>n</sup>-gá xii-a<sup>n</sup>.

<sup>19</sup> Te sá dúcá<sup>n</sup> ní xáha<sup>n</sup>-gá ñuu ní xáha<sup>n</sup> tùcu-a<sup>n</sup>:

—Tátá, yúhú sání iní-í sá yòhó cúú-n ìí<sup>n</sup> téé càhá<sup>n</sup> tnúhu Yá Ndiòxí. <sup>20</sup> Te cue ñaní tnáhá-ndí ní xindecu ndéé sanaha ní xóo cada càhnú-yu Yá Ndiòxí tìndúú-a, dico nchòhó ñáyiú isràél càchí-ndó sá ndéé ñuu Jerusàlén cada càhnu-o-gá —càchí-a<sup>n</sup> xáha<sup>n</sup>-a<sup>n</sup> xii-gá.

<sup>21</sup> Te ní xáha<sup>n</sup> Jèsús xii-a<sup>n</sup>:

—Íí<sup>n</sup> tnúhu na càhá<sup>n</sup>-í-a, te quindáá iní-n. Sa ta cùyatni sáá nduu sá ñà dífú-gá mee-ni tìndúú-a, te ni ñà dífú-gá

mee-ni ñuu Jerusàlén cada càhnu-ndo Tátá-ó Dútú Ndiòxí, chí ndéni ní cuu cada càhnu-ndo-gá. <sup>22</sup> Te nchòhó cue ñáyiú Sãmariá chí ñá cùnùní iní-ndó ñá cúú sá quidé càhnu-ndo, dico nchúhú ñáyiú isràél, chí cùnuní iní-ndí ná cúú sá quidé càhnu-ndí. Chí ìí<sup>n</sup> téé isràél véxi-dé dàcácu nihnu-dé ñáyiú cuendá vá quíhí<sup>n</sup>-yu núú ùhú núú ndàhú. <sup>23</sup> Te není vitna ngúíta-yu cada càhnu ndisá-yu Tátá-ó Dútú Ndiòxí, te cadá-yu ni yùhu ni iní-yu sá cúú-xí-gá, chí mee-gá duca<sup>n</sup> cuíní-gá cadá-yu cada càhnú-yu-gá. <sup>24</sup> Te Yá Ndiòxí chí ìí<sup>n</sup> es-píritú cúú-gá. Te nchaa ñáyiú na càda cahnu ñaha, te cadá-yu ni yùhu ni iní-yu sá cúú-xí-gá te cadá-yu dàtná càhá<sup>n</sup> tnúhu-gá —càchí-gá xáha<sup>n</sup>-gá xii-a<sup>n</sup>.

<sup>25</sup> Te ní xáha<sup>n</sup> ñàdihí-á<sup>n</sup>:

—Xini-í sá quíxí téé cùu Mesías, téé càchí-güedé nání Crístú. Te téé-ǎ<sup>n</sup> ná sáá-dé, te cachí tnúhu ndáá-dé nàcuáa cuu —càchí-a<sup>n</sup> xáha<sup>n</sup>-a<sup>n</sup> xii-gá.

<sup>26</sup> Te ní xáha<sup>n</sup> Jèsús:

—Diu téé-á<sup>n</sup> cúú yùhú téé ndàtnúhu ndihi-n —càchí-gá xáha<sup>n</sup>-gá xii-a<sup>n</sup>.

<sup>27</sup> Te òré-á<sup>n</sup> ní ndexio cue téé xica cuu ndihí-gá, te ní cuñúhu-güedé sá ndàtnúhu-gá ndihi ñadìhí-á<sup>n</sup>. Dico ni ìí<sup>n</sup>-güedé ñá ní xicá<sup>n</sup> tnúhú-güedé núú-gá ñuu ná cuendú ndàtnúhu-gá ndihi ñadìhí-á<sup>n</sup>. <sup>28</sup> Duca<sup>n</sup> te ní dándóo ñadìhí-á<sup>n</sup> yoó ndute-a<sup>n</sup> xíá<sup>n</sup>, te ní xica-a<sup>n</sup> cuánuhú-a<sup>n</sup> ñuu cùnùhu-a<sup>n</sup> ñáyiú cuendá Jèsús. <sup>29</sup> Te ní xáha<sup>n</sup>-a<sup>n</sup>:

—Chí nèhé ná quíhí<sup>n</sup>-ó, chí quíní-ndó ñá cúú ìí<sup>n</sup> téé núcóo yuhu dòco-á<sup>n</sup> ñuu ñá dífú Crístú Yaá ní tendaha Yá Ndiòxí véxi ñuyúú-a cùu-dé ñuu ní càhá<sup>n</sup> ndáá-dé nàcuáa cùu ndecu-í —càchí-a<sup>n</sup> xáha<sup>n</sup>-a<sup>n</sup> xii-yu.

<sup>30</sup> Te sá ní níhí ñáyiú ñuu-á<sup>n</sup> tnúhu, xíá<sup>n</sup> ní xicá-yu cuáhá<sup>n</sup>-yu. <sup>31</sup> Te òré vátá sáá-gá-yu xíá<sup>n</sup> ní xáha<sup>n</sup> cuè téé xica cuu ndihi-gá xii-gá:

—Mèstrú, cudèhñu na cudehñu-o — cachí-güedé xáha<sup>n</sup>-güedé xii-gá.

<sup>32</sup> Te ní xáha<sup>n</sup>-gá:

—Ndècu ì<sup>n</sup> sá cáxi-í, ì<sup>n</sup> sá ñà túú xìni nchòhó —càchí-gá xáha<sup>n</sup>-gá xii-güedé.

<sup>33</sup> Te cue tée xica cuu ndihi-gá xitnàha-güedé:

—Váa ió ñáyiú ní quixi nehe sá ní xexi-gá ñuu duha càhá<sup>n</sup>-gá —càchí-güedé xitnàha-güedé.

<sup>34</sup> Te ní xáha<sup>n</sup>-gá:

—Dàtná cuini-ndó cùu vétú iní-ó òré xéxi-ó, duca<sup>n</sup> cùu vétú iní-í quidè-í nchaa nàcuáa ní cáhá<sup>n</sup> Yá Ndiòxí Yáa ní tendaha ñaha xii-í véxi-í ñuyú-a, te chiú<sup>n</sup>-gá ío cùdí iní-í dandìhi-í. <sup>35</sup> Te nchòhó càchí-ndó sã cùmání cùmí-gá yóo te cuu itú. Dico yúhú càchí-í sá cundehe-ndo ñáyiú-ã<sup>n</sup>, chi sa ndècu túha-yu, dàtná cúu-nã itú sá sã ní cuu-ná natahu-o cùu-yu, chi sa ndècu túha-ná-yu cundedóho-yu tnúhu-í. <sup>36</sup> Te dàtná cúu ñáyiú nàtahu itú chi sa cúhu<sup>n</sup> yáhu-yu, duca<sup>n</sup> sãtnahá-xi cùu ñáyiú na càhá<sup>n</sup> tnúhu-í, chi cuánaha-í sá ndúú tãhñu-yu na sãá nduu. Te nchaa ñáyiú na tnñi tnúhu-í te nduu tãhñu-yu cundecu-í ndihí-yu ni caa ni quíhñ. Te dàtná cúu ñáyiú ní chihi tata-xi, ndihi ñáyiú ní natahu itú-xi cùdí-nã iní-yu. Duca<sup>n</sup> sãtnahá-xi cùu ñáyiú na càhá<sup>n</sup> tnúhu-í. <sup>37</sup> Chi ndáá quée-xí nàcuáa cuáhá<sup>n</sup> ì<sup>n</sup> cuèndú sá càchí-xi: “Tucu tée ní chihi tata, te tucu tée ní natahu”, duha cuáhá<sup>n</sup> cuèndú-á<sup>n</sup>. <sup>38</sup> Te yúhú tendaha ñaha-í xii-ndo quíhñ-ndó cáhá<sup>n</sup>-ndó tnúhu-í núu sã ní yáha-güedé ní cáhá<sup>n</sup>-güedé tnúhu-í. Te nchòhó quíhñ-ndó dicó-nã nduu cuèndá-ndó chiú<sup>n</sup>-á<sup>n</sup> —càchí-gá xáha<sup>n</sup>-gá xii-güedé.

<sup>39</sup> Te ío cuéhé ñáyiú ñuu-á<sup>n</sup> ní xíndedóho-yu cuèndú ní caní ñadìhí-á<sup>n</sup> nñú-yu sá Jèsús ní xáha<sup>n</sup>-gá nchaa nàcuáa quide-a<sup>n</sup>, te xíã<sup>n</sup> ío vãi-yu ní sãndáa iní-yu Jèsús. <sup>40</sup> Te ní quexiò-yu

núu ndécú-gã, te ní cáhá<sup>n</sup> ndàhú-yu núu-gã sá quèndóo-gã ñuu-yu, núu xíã<sup>n</sup> ní xíndecu-gá ndihí-yu úu nduu. <sup>41</sup> Te ío cuéhé-gã-yu ní sãndáa iní-yu tnúhu ní cáhá<sup>n</sup> mée-gã. <sup>42</sup> Te ní xáhá<sup>n</sup>-yu xii ñadìhí-á<sup>n</sup>:

—Vitna te ñá díú mè-ni tnúhu ní cáhá<sup>n</sup>-n ní sãndáa iní-ndí-gá, chi ní cáhá<sup>n</sup> mée-gã ní xíndedóho-ndí vitna núu ní sãndáa ndisa iní-ndí sá díú-gã cúu-gã Cristú Yáa ní tendaha Yá Ndiòxí véxi ñuyú-a dàcácu nihnu-gá ñáyiú núu ùhú núu ndàhú —càchí-yu xáhá<sup>n</sup>-yu xii-a<sup>n</sup>.

### Jèsús quidé tãtna-gá déhe ì<sup>n</sup> tée ndèé chíú<sup>n</sup> nñú gobièrnú

<sup>43</sup> Te nduu úní ní nucúhu<sup>n</sup> Jèsús ichi cuáhá<sup>n</sup>-gá distrítú Galileá. <sup>44</sup> Te cuáhá<sup>n</sup>-gá yacá<sup>n</sup>, chi mee-gã ní cachí-gá sá ñuu ì<sup>n</sup> tée na càhá<sup>n</sup>-dé tnúhu Yá Ndiòxí ñuu núu ní cacu-dé, te ñá túú nèhé-yu sá yíñùhu núu-dé. <sup>45</sup> Te òré ní sãá-gá distrítú Galileá, te ío váha ní cuu iní ñáhã-yu xii-gá, chi cuèndá tnàhá-yu ní xíndecu ndihi-gá vico pascuá ñuu Jerusálén. Te yacá<sup>n</sup> ní xiní-yu nchaa sá ní quide-gá.

<sup>46</sup> Te ní sáhá<sup>n</sup> tucu-gá ñuu Cànaá ì<sup>n</sup> ñuu yíndèhu distrítú Galileá, núu ní nadatù-gá ndute ní nduu-xi vñú. Te ñuu Capèrnaúm ndécú ì<sup>n</sup> tée ndèé chíú<sup>n</sup> nñú tée cùu gobièrnú, te tée-á<sup>n</sup> cùhú ì<sup>n</sup> déhe-dé. <sup>47</sup> Te ní níhí-dé tnúhu sá ní ndee Jèsús distrítú Jùdeá ní ndexiò-gá distrítú Galileá, núu ní sáhá<sup>n</sup>-dé núu ndécú-gã, te ní cáhá<sup>n</sup> ndàhú-dé núu-gã sá quíhñ-gá cada tãtna-gá déhe-dé, chi sa ndècu-na-dé sá cùu-dé. <sup>48</sup> Te ní xáha<sup>n</sup> Jèsús xii-dé:

—Nchòhó, chi vá quíndáa iní ñáhã-ndó xii-í te núu vá cãdà-í ì<sup>n</sup> sá vã yõ tnàhí ndàcu cada quini-ndó —càchí-gá xáha<sup>n</sup>-gá xii-dé.

<sup>49</sup> Te ní xáha<sup>n</sup> tucu tée cùhú déhe-xi-á<sup>n</sup> xii-gá:

—Tătă, cundee iní-n ná quèhí<sup>n</sup>-ni-o cãda tãtã-n dèhe-í ná cuu-dé, chi cãhú vîhí tñàhá-dé —càchí-dé xãhã<sup>n</sup>-dê xii-gã.

<sup>50</sup>Te ní xãhã<sup>n</sup> Jèsús:

—Cuanùhú te quini-n nã ní ndúha déhe-n —càchí-gã xãhã<sup>n</sup>-gã xii-dé.

Te ní sãndãá iní-dé tñuhu ní cãhá<sup>n</sup> Jèsús, te cuãnuhú-dé. <sup>51</sup>Te ñuhu-dé ichi cuãnuhú-dé ní sãnú tñàhá ñãhá cuè téé xinu cuechi núú-dê. Te ní xãhã<sup>n</sup>-güedê sã sã ta ndúha déhe-dé cuáhã<sup>n</sup>.

<sup>52</sup>Te ní xícã<sup>n</sup> tñuhú-dê núú-güedê ná òré cúú-xí ní ngúíta-xi ta quètaú cuéhé-dê. Te ní xãhã<sup>n</sup>-güedê:

—Icu dàtnã òré caá ì<sup>n</sup> sacuaa ní nchíco-dé cahni —càchí-güedê xãhã<sup>n</sup>-güedê xii-dé.

<sup>53</sup>Te tãtã téé cùhú-á<sup>n</sup> ní ndacu iní-dé sã díú òré ní quètaú cuéhé-dê ní cãhá<sup>n</sup> ndîhi-dé Jèsús ní xãhã<sup>n</sup>-gã sã ndúha déhe-dé. Te xã<sup>n</sup> nõu ndi nchãã téé-á<sup>n</sup> vehe-dé ní sãndãá iní-yu Jèsús.

<sup>54</sup>Te sã ní quide-gã-á<sup>n</sup> cúú úú xito quide-gã sã vã yõo tñãhí ndacu cada. Te sã ní quide-gã xito cùu uú-á<sup>n</sup> cúú-xí sã ní quide-gã cùtñãhá ní ndee-gã distrítú Jùdeã cuãnuhú-gã distrítú Galileã.

### Jèsús quidé tãtã-gã ì<sup>n</sup> téé cùhú ì<sup>n</sup> xichi núú nání Bètesdá

**5** Te sãtã dúcã<sup>n</sup> ní cuu, te ní tñahã nduu ní quide ñãyiu isrãèl ì<sup>n</sup> vico. Te ní sãhá<sup>n</sup> Jèsús ñuú Jerusãlén. <sup>2</sup>Te ñi cãa xico yuhu ñuú-á<sup>n</sup> ñúhú dõco, te titní yèhe-xi ndecu. Te ì<sup>n</sup> yèhe-xi-á<sup>n</sup> nání Yüyehe Mbéé, te yatni xíã<sup>n</sup> caá ì<sup>n</sup> tanquí ndute dàna-ní-yu Bètesdá tñuhu mèé-yu tñuhu hèbreú, te yuhu tànquí-á<sup>n</sup> caá úhú<sup>n</sup> corrèdór. <sup>3</sup>Te xití corrèdór-á<sup>n</sup> xĩndecu cuéhé ñãyiu cùhú, ñãyiu cuãã, ñãyiu yacua, ñãyiu ñã cúú-gã candã nihnu, ndètú-yu candã ndute-á<sup>n</sup>. <sup>4</sup>Chi ñihí-yu tñuhu sã ãma nihnu cùu<sup>n</sup> ì<sup>n</sup> espíritú xínú cuèchi núú Yã Ndiõxí, te dàcandã-xi ndute ñuhu tanquí-á<sup>n</sup>. Te ñãyiu díhna nuu nã quée xití ndute-á<sup>n</sup>, te

òré-ni ndúha-yu. <sup>5</sup>Te yacã<sup>n</sup> ñútnãhá ì<sup>n</sup> téé ní cuu ócó sãhú<sup>n</sup> úní cuíã sã cùhú-dé. <sup>6</sup>Te ní xiní Jèsús caá-dê, te ní cutnùní iní-gã sã ní cuu cuéhé cuíã cùhú-dé, te ní xãhã<sup>n</sup>-gã:

—¿Cuiní-n ndúha-n-ã<sup>n</sup>? —càchí-gã xãhã<sup>n</sup>-gã xii-dé.

<sup>7</sup>Te ní xãhã<sup>n</sup> téé cùhú-á<sup>n</sup>:

—Tãta, vã yõo ñihí-í dàquée ñaha xii-í xití tànquí-a òré candã ndute, chi òré cuiní-í quée-í, te ingã-ni tucú-yu quènduú-yu núú-í cuãngueé-yu —càchí-dé xãhã<sup>n</sup>-dê xii-gã.

<sup>8</sup>Te ní xãhã<sup>n</sup> Jèsús:

—Ndacuñí, te ndaca-ni-n yùu-n, te caca-n —càchí-gã xãhã<sup>n</sup>-gã xii-dé.

<sup>9</sup>Te òré-ni-á<sup>n</sup> ní ndúha téé cùhú-á<sup>n</sup>, te ní ndaca-ni-dé yuu-dé, te ní xica-dé cuáhã<sup>n</sup>-dé. Te nduu-ã<sup>n</sup> cúú-xí ndùu ndetatú ñãyiu, <sup>10</sup>núu ní xãhã<sup>n</sup> cuè téé isrãèl xii téé ní cuhú-á<sup>n</sup>:

—Vitna cùu-xi nduu ndetatú-ó nõu vã cúú cuido-n yuu-n —cachí-güedê xãhã<sup>n</sup>-güedê xii-dé.

<sup>11</sup>Te ní xãhã<sup>n</sup>-dê:

—Mee téé ní quide tãtã ñaha xii-í ní cachí-dé sã ndácãni-í yuu-í, te caca-í —càchí-dé xãhã<sup>n</sup>-dê xii-güedê.

<sup>12</sup>Te ní xãhã<sup>n</sup>-güedê:

—¿Te ná cúú téé duca<sup>n</sup> ní cachí sã ndácãni-n yuu-n te caca-n-i? —càchí-güedê xãhã<sup>n</sup>-güedê xii-dé.

<sup>13</sup>Dico téé ní cuhú-á<sup>n</sup> ñã túú ní cùtnuní iní-dé ná cúú téé ní quide tãtã ñaha xii-dé, chi Jèsús òré-ni ní xica-gã cuáhã<sup>n</sup>-gã tnuú nchãã ñãyiu chitu xĩndecu xíã<sup>n</sup>. <sup>14</sup>Te sãtã dúcã<sup>n</sup> te ní naníhí tñãhá Jèsús ndîhi téé ní quide tãtã-gã-á<sup>n</sup> xití veñúhu cãhnu sã ÿo cùnnuu, te ní xãhã<sup>n</sup>-gã xii-dé:

—Ní xiní-n nã ní ndúha-n-va. Te vitna vã cádá-gã-n nãndi sã cuéhé sã dúhá, chi núu na càda-ni-n ñã, te quixi ingã cuéhé, te vîhi-gã ndoho-n —càchí-gã xãhã<sup>n</sup>-gã xii-dé.

<sup>15</sup> Duca<sup>n</sup> te ní xica téé ní cuhú-á<sup>n</sup> cuängúñaha-dě xii cue téé israél sá Jèsús ní quide tátna ñaha-gă xii-dé. <sup>16</sup> Núu sátá ní níhí cue téé israél tnúhu, te ní cuu úhú iní-güedé Jèsús. Te ní cuiní-güedé cahni ñaha-güedé xii-gá cuëndá sá dúcá<sup>n</sup> ní quide tátna-gá nduu ndètátú-güedé. <sup>17</sup> Te ní xáha<sup>n</sup> Jèsús xii-güedé:

—Tàtá-í Dútú Ndiòxí quidé chiú<sup>n</sup>-ni-gá núu xiá<sup>n</sup> quidé chiú<sup>n</sup>-í tnàhá-í —càchí-gá xáha<sup>n</sup>-gă xii-güedé.

<sup>18</sup> Te ní cudéé<sup>n</sup>-güedé sá ñă ní cãnehe íf-gă nduu ndètátú-güedé, te ní cuiní-güedé cahni ñaha-güedé, te uu<sup>n</sup>-gá ní cuiní-güedé cahni ñaha-güedé xii-gá sá ní cachí-gá sá Tàtá-gă cúu Dútú Ndiòxí, chi ní sani iní-güedé sá cuiní-gá nútnahá-gă Yă Ndiòxí núu xiá<sup>n</sup> ío ní cudéé<sup>n</sup>-güedé.

### Jèsús Déhe Yá Ndiòxí táxí tnùní-gá

<sup>19</sup> Te ní xáha<sup>n</sup> tùcu Jesús xii-güedé:

—Na càchí tnúhu ndáá-í xii-ndo sã yúhú chi ni ì<sup>n</sup> sá ñă ndácù-í cada mee-í núu ñá túú mèe Tàtá-í dãnèhé ñáhá-gă xii-í nàcuáa cada-í, chi nchaa sá quidé Tàtá-í quidé-í tnàhá-í. <sup>20</sup> Te Tàtá-í ío cùu iní ñáhá-gă xii-í núu dãnèhé ñáhá-gă nchaa nàcuáa quide-gă. Te vitna ndècu vai-gá chiú<sup>n</sup> tahu-gă cada-í, chiú<sup>n</sup> sá vátá quiní-gă-ndó càda-í nàcuáa cuñúhu vihi-ndo. <sup>21</sup> Chi Tàtá-í dandòto-gă ñáyiu ní xíhí. Te yúhú cada-í te nduu táhú nchaa ñáyiu càchí iní-í cundecu ndihi ñàhá-yu xii-í ni caa ni quíhí<sup>n</sup>. <sup>22</sup> Te na sáá nduu te ñá díú Tàtá-í cada ndáá-gă cuéchi ñáyiu, chi ní cachí-gá sá yúhú cada ndáá-í <sup>23</sup> cuëndá nchaa ñáyiu canehé-yu sá yíñúhu núu-í dàtná nèhè-yu sá yíñúhu núu Tàtá-í Yaá ní tendaha ñaha xii-í véxi-í ñuyíú-a. Te nchaa ñáyiu ñá túú nèhe sá yíñúhu núu yúhú, te ni núu Tàtá-í ñá túú nèhè-yu sá yíñúhu.

<sup>24</sup> Te na càchí tnúhu ndáá-í xii-ndo sã nchàa ñáyiu na cùndedóho tnúhu na

càhá<sup>n</sup>-í, te núu na quíndáá iní-yu Dútú Ndiòxí Yaá ní tendaha ñaha xii-í véxi-í ñuyíú-a ña, te vá cuíta nihnú-yu chi nduu táhú-yu cundecú-yu ndihi-gá ni caa ni quíhí<sup>n</sup>. <sup>25</sup> Te vitna na càchí tnúhu ndáá-í xii-ndo sã nchàa ñáyiu ndècu ichi cuéhé ichi duha cùú-yu dàtná ì<sup>n</sup> ñáyiu ní xíhí, te vitna ní sáá nduu cùndedóho-yu tnúhu càhá<sup>n</sup> yúhú Déhe Dútú Ndiòxí, te nchaa ñáyiu na quíndáá iní-xi, te nanhí tãhú-yu. <sup>26</sup> Te dàtná quidé mèe Tàtá-í dácacu niñu-gă ñáyiu, duca<sup>n</sup> ní cachí-gá cada-í dácacu niñu-í-yu. <sup>27</sup> Te ní cachí tucu-gă sá sáá ì<sup>n</sup> nduu, te cada ndáá-í cuéchi nchaa ñáyiu ñá túú quide ndáá, chi yúhú táxí tnùn-í, te cùu-í ñani tnàhá-ndó nchàa-ndo. <sup>28</sup> Te ni vã cùñúhu-ndo tnúhu càhá<sup>n</sup>-í, chi sáá nduu te nchaa ñáyiu ní xíhí tecú dóho-yu tnúhu càhá<sup>n</sup>-í. <sup>29</sup> Te ndoto nchaa ñáyiu ní quide váha cundecu ndihi-í-yu ni caa ni quíhí<sup>n</sup>, te ndoto tnàhá nchaa ñáyiu ní quide cuéhé ní quide duha, te ñáyiu-á<sup>n</sup> quíhí<sup>n</sup>-yu núu ùhú núu ndàhú.

### Yá Ndiòxí chindèe tnúhu-gá Jèsús

<sup>30</sup> Te yúhú, chi ni ì<sup>n</sup> sá ñă ndácù-í cada mee-í núu ñá díú mèe Yá Ndiòxí táuchiu<sup>n</sup>-gă nàcuáa cada-í. Te quide ndáá-í cuéchi ñáyiu nàcuáa tàxi tnùn-í-gă cada-í, te yúhú ñá túú quide-í sá cúu ìni mèe-í chi Tàtá-í ní táuchíú<sup>n</sup>-gă nàcuáa cada-í. <sup>31</sup> Te núu na càhá<sup>n</sup>-í sá mèe-í táxí tnùn-í, te vá quíndáá iní-ndó. <sup>32</sup> Chi Yá Ndiòxí chindèe tnúhu ñaha-gă xii-í, te yúhú xini-í sá tnúhu càhá<sup>n</sup>-gă cuëndá-í cúu-xí ì<sup>n</sup> sá ndáá. <sup>33</sup> Te nchòhó ní téchíú<sup>n</sup>-ndó cuè téé ní sáhá<sup>n</sup> ní ndúcú tnúhu-güedé núu tã Juáá núu ná tnúhu cáhá<sup>n</sup>-dé cuëndá-í, te téé-ã<sup>n</sup> ní cáhá<sup>n</sup> ndáá-dé nàcuáa ndùu cuëndá-í. <sup>34</sup> Dico yúhú, chi ñá túú xini ñuhu-í ì<sup>n</sup> ñáyiu ñuyíú-a chindee tnúhu ñàhá-yu xii-í, dico té Juáá ní cáhá<sup>n</sup> váha-dé cuëndá-í, te xiá<sup>n</sup> càchí tnúhu tucu-í cuëndá quíndáá iní-ndó, te nanhí tãhú-ndó.



<sup>35</sup> Te dàtná cuiní-ndó cùu ìí<sup>n</sup> iti ndéñuhú te dāyehé-xi, duca<sup>n</sup> sātnahá-xi ní cuu té Juáá, chi sacú-ni nduu ío ní cudíí iní-ndó tnūhu ní cáhá<sup>n</sup>-dé. <sup>36</sup> Te váha-ni ní cáhá<sup>n</sup> té Juáá, dico yúhú chi ndècu nchaa sá tá quide-í véxi nàcuáa ní táuchíú<sup>n</sup> Yá Ndiöxí cada-í, te nchaa xíá<sup>n</sup> cúu-xí ìí<sup>n</sup> sá cútñmí iní-ndó sá mée Yá Ndiöxí ní tendaha ñaha-gá xii-í véxi-í ñuyú-a. <sup>37</sup> Te ñu-ni-gá chíndèe tnúhu ñaha-gá xii-í, dicó-ni sá mée-ndó ña túú cuiní-ndó càda cuendá-ndó tnūhu càhá<sup>n</sup>-gá, te ni ña túú xiní-ndó nàcuáa càa-gá. <sup>38</sup> Te ña túú quèe iní nchòhó tnúhu càhá<sup>n</sup>-gá, chi ña túú sàndáá iní ñáhá-ndó xii yúhú Déhe-gá. <sup>39</sup> Te dàcuaha vihi-ndo tutú ndèe tnúhu-gá, chi sàni iní-ndó sá xíá<sup>n</sup>-ni dacuàha-ndo te naníhí tǎhú-ndó. Te váha-ni quide-ndo, chi ñu tutú-á<sup>n</sup> càhá<sup>n</sup>-xi cuendá-í. <sup>40</sup> Te nchòhó ña túú cuiní-ndó quindáá iní ñáhá-ndó xii-í cuendá naníhí tǎhú-ndó.

<sup>41</sup> Te yúhú, ña túú xini ñuhu-í sá cáda càhnu ñaha-ndo xii-í. <sup>42</sup> Dico sa xiní-í nàcuáa sàni iní-ndó chi ña túú cùu iní-ndó Yá Ndiöxí. <sup>43</sup> Te yúhú véxi-í ñuyú-a chi Tǎtà-í ní tendaha ñaha-gá, te nchòhó ña túú cuiní-ndó tní-ndo tnúhu càhá<sup>n</sup>-í, dico núu quixi ìí<sup>n</sup> tée cáhá<sup>n</sup> cuendá mée-xí, chi quindáá iní-ndó. <sup>44</sup> Te ná váha nchòhó ná tníí-ndó tnūhu càhá<sup>n</sup>-í, te xio xio-ni quide cahnu tnaha-ndo, te ña túú quide cuendá-ndó sá tnūhu váha càhá<sup>n</sup> Yá Ndiöxí cuu xii-ndo. <sup>45</sup> Te vá cání iní-ndó sá yúhú ndàcá<sup>n</sup> cuéchi-í núu Tǎtà-í nàcuáa quide-ndo, chi ndíí Moisés ní chídó tnùní ndíí núu tütú Yá Ndiöxí nàcuáa quide-ndo sá ña túú quide váha-ndo, te mee-ndo sàni iní-ndó sá naníhí tǎhú-ndó cuendá tnúhu ní cáhá<sup>n</sup> ndíí. <sup>46</sup> Chi núu nchòhó sàndáá ndisa iní-ndó tnūhu ní cáhá<sup>n</sup> ndíí Moisés ña, te duca<sup>n</sup> te quindáá iní-ndó yúhú ní cùu, chi ndíí-ǎ<sup>n</sup> ní chídó tnùní ndíí nàcuáa cada-í ñuyú-a vitna. <sup>47</sup> Te núu ña túú

sàndáá iní-ndó tnūhu ní chídó tnùní ndíí, te ñu-ni duca<sup>n</sup> càda ñaha-ndo xii-í vá quindáá iní-ndó tnūhu càhá<sup>n</sup>-í — càchí-gá xáha<sup>n</sup>-gá xii-güedé.

### Jèsús dácaxi-gá úhú<sup>n</sup> mǐl ñáyiu

(Mt. 14:13-21; Mr. 6:30-44; Lc. 9:10-17)

**6** Te sáta dúcá<sup>n</sup> ñí cuu, te ní quee Jèsús cuáhá<sup>n</sup>-gá ingá xio yuhu làgúná Galileá, àdi Tiberiás chi úú ñu-xi. <sup>2</sup> Te ío cuéhé ñáyiu nchicú<sup>n</sup> ñáhá xii-gá cuáhá<sup>n</sup> cuendá sá ñí xiní-yu nchaa sá vǎ yǒo tnàhí ndàcu cada ní quide-gá, chi ní quide tátna-gá nchaa ñáyiu cùhú. <sup>3</sup> Te ní sáá Jèsús ndíhi cue tée xica cuu ndíhi-gá ìí<sup>n</sup> núu tìndúú, te xíá<sup>n</sup> ñí ngóo-gá ndíhi-güedé. <sup>4</sup> Te ta cùyatni coo vico pascuá, vico quide ñáyiu isràél. <sup>5</sup> Te ní xiní-gá sá ío vǎi ñáyiu nchicú<sup>n</sup> ñáhá xii-gá cuáhá<sup>n</sup>, te ní xáha<sup>n</sup>-gá xii té Lìpé:

—¿Ndèe quíhí<sup>n</sup>-ó quǐnguaa<sup>n</sup>-o sá cáxi nchaa ñáyiu-a? —càchí-gá xáha<sup>n</sup>-gá xii-dé.

<sup>6</sup> Te duca<sup>n</sup> ñí xáha<sup>n</sup>-gá xii-dé cuendá sá cuiní-gá quini-gá nása cunduu tnúhu cáhá<sup>n</sup>-dé, dico mee-gá sa xiní-gá nàcuáa cada-gá. <sup>7</sup> Te ní xáha<sup>n</sup> té Lìpé xii-gá:

—Te cuéi úú cièndú díhú<sup>n</sup> denàriú ná dāndoñuhu-o cuaa<sup>n</sup>-o paá, te ni vǎ tnàhá caxí-yu luha luha —càchí-dé xáha<sup>n</sup>-dè xii-gá.

<sup>8</sup> Te té Ndríxí ingá tée xica cuu ndíhi-gá, ñaní té Xímú, àdi Pelú chi úú ñu-dé, ní xáha<sup>n</sup>-dè:

<sup>9</sup> —Iha ndècu ìí<sup>n</sup> té líhli nèhe-dé úhú<sup>n</sup> paá cebàda te úú chácá, dico ndèe tnahá xéhé, te cuéhé víhí ñáyiu —càchí-dé xáha<sup>n</sup>-dè xii-gá.

<sup>10</sup> Te ní xáha<sup>n</sup> Jèsús xii-güedé:

—Chí cǔñaha ná ngóo-yu nchaa-yu — càchí-gá xáha<sup>n</sup>-gá.

Te ñáyiu-á<sup>n</sup> ñí ngóo-yu, te càa vihi ité núu ñí ngóo-yu-á<sup>n</sup>, te xínu dàtná úhú<sup>n</sup> mǐl mee-ni cuè tée, te ñí<sup>n</sup> ñáyiu ñíhí ndíhi landú. <sup>11</sup> Te ní quehe<sup>n</sup> Jèsús paá, te ní ndacá<sup>n</sup> tǎhú-gá núu Yá Ndiöxí, te

ní sãñaha-gã pàá-á<sup>n</sup> xii cue tée xica cuu ndihi-gá, te cue tée-á<sup>n</sup> ní dácãhñu-güedé ní xexi nchaa ñáyiú xixúcu-á<sup>n</sup>. Te ñiu-ni duca<sup>n</sup> ní quide-gá chácá, te ní dácãhñu tucu-güedé-di ní xexi ñáyiú ní ndahá xití-yu. <sup>12</sup>Te òré ní túhú cóhõ-yu, te ní xáha<sup>n</sup> Jèsús xii cue tée xica cuu ndihi-gá sá ná nàquehe<sup>n</sup>-güedé nchaa sá ní quendóo cuendá sá vã quihí<sup>n</sup>-xi núú mñí.

<sup>13</sup>Te cue tée-á<sup>n</sup> ní naquehe<sup>n</sup>-güedé nchaa sá ní quendóo, te ní chítú ùxúú tídihi núú ùhú<sup>n</sup>-ni pàá cebadá. <sup>14</sup>Te sá ní xiní-yu ní nadacáyá-gá sá ní xexi-yu, xíá<sup>n</sup> ní ngúíta-yu ní xítñahá-yu:

—Ndáá sá tée-a sa ió cuendú sá quíxí-dě ñuyíú-a cáhá<sup>n</sup>-dé tnúhu Yá Ndiõxí —càchí-yu xítñahá-yu.

<sup>15</sup>Te ní cutnùní iní Jèsús sá cádá yicá-yu candeca ñahá-yu xii-gá quihí<sup>n</sup> cuendá cundecu-gá quindaha ñaha-gá xii-yu ni cùu, núú xíá<sup>n</sup> ní xica tucu-gá cuáhá<sup>n</sup>-gá xití yucu mee ñi chícúú-gá.

### Jèsús xicá-gã núú ndute

(Mt. 14:22-27; Mr. 6:45-52)

<sup>16</sup>Te òré ní cuu ndiquí<sup>n</sup>, te cuáhá<sup>n</sup> cue tée xica cuu ndihi-gá yuhu làgúná. <sup>17</sup>Te ní quée-güedé bàrcú cuáhá<sup>n</sup>-güedé ñuú Capèrnaúm cáá ndaa ingá xio yuhu làgúná, te sa ní cuu ndiquí<sup>n</sup>, te ñá túú Jèsús quéxio quée-gá bàrcú ñúhú-güedé-á<sup>n</sup>. <sup>18</sup>Te ní ngúíta-xi quène táchí ñíhi, te níhi dácandau ndéé tnáhá ndute làgúná-á<sup>n</sup>. <sup>19</sup>Te sa ní cuu dàtná úhú<sup>n</sup> kilómetrú cuáhá<sup>n</sup>-güedé, te ní xiní-güedé Jèsús tá cùyatni-gá bàrcú ñúhú-güedé véxi-gá núú ndúté, te ní yùhú-güedé. <sup>20</sup>Te ní xáha<sup>n</sup> Jèsús xii-güedé:

—Yúhú véxi-í, vá yùhú-ndó —càchí-gá xáha<sup>n</sup>-gã xii-güedé.

<sup>21</sup>Te ío ní cudíí ñí-güedé sá ní quexio-gá cuánguee-gá bàrcú, te òré-ni ní quexio-güedé ndihi-gá ndéé ingá xio yuhu làgúná núú cuáhá<sup>n</sup>-güedé.

### Ñáyiú nànducu ñaha xii Jèsús

<sup>22</sup>Te ingá nduu-á<sup>n</sup> xíndecu-ni nchaa ñáyiú ní quendóo yuhu làgúná. Te ní quide cuendá-yu sá íí<sup>n</sup> ñi-ná bàrcú nútñí-á<sup>n</sup> ní cùu ñá túú-gã, chi cue tée xica cuu ndihi Jèsús ní quée-güedé bàrcú-á<sup>n</sup> cuáhá<sup>n</sup>-güedé. Te ní ñíhi-yu tnúhu sá ñá túú ní quèe tnáhá Jèsús. <sup>23</sup>Te ñiu-ni nduu-á<sup>n</sup> ní quée íí<sup>n</sup> úú bàrcú ñuú Tìberías ní sáá-xi yatni núú ní xexi-yu pàá sá ní ndacá<sup>n</sup> táhú Jèsús núú Yá Ndiõxí. <sup>24</sup>Te ní xiní-yu sá ñá túú Jèsús ndihi cue tée xica cuu ndihi-gá, núú ní quée-yu bàrcú-á<sup>n</sup> cuáhá<sup>n</sup>-yu ñuú Capèrnaúm cuánúndúcú ñahá-yu xii-gá.

### Jèsús cúú-gã dàtná íí<sup>n</sup> sá nchító-ó

<sup>25</sup>Te ní sáá-yu ingá xio yuhu làgúná, xíá<sup>n</sup> ní naníhí-yu Jèsús, te ní xáhá<sup>n</sup>-yu xii-gá:

—Mèstrú, ¿ná òré ní sáá-n ñha? —cachí-yu xáhá<sup>n</sup>-yu xii-gá.

<sup>26</sup>Te ní xáha<sup>n</sup> Jèsús:

—Na càchí tnúhu ndáá-í sá nchòhó nánducu ñaha-ndo xii-í cuendá-ni sá ní xexi-ndo ní ndahá xití-ndó, dico ñá díú cuendá sá ní quide-í sá vã yõo tnáhí ndàcu cada nanducu ñaha-ndo. <sup>27</sup>Te vá cádá cuendá-ndó sã méé-ní sã cáxi-ndó càda chiu<sup>n</sup>-ndo chi xíá<sup>n</sup> vá cúdli-xi. Chi ío-gá xíní ñùhu-xi cada cuendá-ndó tnúhu Yá Ndiõxí te tñii-ndo, te naníhí táhú-ndó. Te tnúhu-á<sup>n</sup> cachí tnúhu yúhú Tée cùu ñaní tnáhá-ndó nchàa-ndo, te xíá<sup>n</sup> candeca-xi iní-ndó ñi caa ñi quihí<sup>n</sup>, chi mee Dütú Ndiõxí ní cachí-gá sá dúcá<sup>n</sup> càda-í —càchí-gá xáha<sup>n</sup>-gã xii-yu.

<sup>28</sup>Te ní xáhá<sup>n</sup>-yu:

—¿Nása cada-ndí cuendá ngúnu ichi-ndí nàcuáa cuíni Yá Ndiõxí cunduu-í? —càchí-yu xáhá<sup>n</sup>-yu xii-gá.

<sup>29</sup>Te ní xáha<sup>n</sup> Jèsús xii-yu:

—Yá Ndiõxí cuíni-gá sá quindáá ñí ñahá-ndó xii yúhú, tée ní tendaha-gã véxi ñuyíú-a —càchí-gá xáha<sup>n</sup>-gã xii-yu.

<sup>30</sup> Te ní xáha<sup>n</sup> tùcú-yu xii-gá:

—¿Ná cúu sá vǎ yǎo tnàhí ndàcu cada, cada-n cùndehe-ndí cuendá quíndáá iní ñáhá-ndí xii-n-i? ¿Àdi nágá cúu sá cǎdá-n cuendá cutnùní iní-ndí sá ndáa càhá<sup>n</sup>-n-í? <sup>31</sup> Chi cue ñaní tnáhá-ó nǐ xín-decu ndéé sanaha nǐ xexí-yu pàá nání mànáá xití yucu dàtná yódó tnùní núu tütú Yá Ndiöxí núu cǎchí-xi: “Yá Ndiöxí nǐ sǎñaha-gǎ sá nǐ xexí-yu, te ní cuu<sup>n</sup> túu-xi andiu”, duha cǎchí-xi núu tütú-gǎ —cǎchí-yu xǎhǎ<sup>n</sup>-yu xii-gǎ.

<sup>32</sup> Te ní xáha<sup>n</sup> Jèsús:

—Na cǎchí tnúhu ndáá-í xii-ndo sǎ ñà díú ndíi Moisés ní sǎñaha ndíi pàá ní cuu<sup>n</sup> andiu nǐ xexí-yu, chi mee Tǎtà-í ní sǎñaha-gǎ sá nǐ xexí-yu. Te sá táxí-gǎ vitna cùu-xi <sup>33</sup> datná pàá véxi cuu<sup>n</sup> andiu càndeca-xi iní-ndó nǐ caa ni quíhí<sup>n</sup> —cǎchí-gǎ xáha<sup>n</sup>-gǎ xií-yu.

<sup>34</sup> Te ní xǎhǎ<sup>n</sup>-yu xii-gǎ:

—Tǎtá, mee-ni pàá-á<sup>n</sup> taxi-n cǎxi-ndí —cǎchí-yu xǎhǎ<sup>n</sup>-yu xii-gǎ.

<sup>35</sup> Te ní xáha<sup>n</sup> Jèsús:

—Yúhú cúu-í dàtná ìí<sup>n</sup> sá xexí-ndó cǎndeca-xi iní-ndó. Te duha ndùu tnúhu càhá<sup>n</sup>-í, chi nchaa ñáyiu na quíndáá iní ñáhá xii-í, te vǎ ndóhó-gǎ-yu docó te vǎ ndóhó-gǎ-yu ndute. <sup>36</sup> Dicó-ni sá nchòhó ñá túú sàndáá iní ñáhá-ndó cuéi xini ñáhá-ndó xii-í. <sup>37</sup> Te nchaa ñáyiu na cǎchí Tǎtà-í nduu cuendá-í nasaá-yu núu-í, te ñáyiu-á<sup>n</sup> vǎ dáquèe tíhù-í-yu. <sup>38</sup> Te ñá díú yúhú sá véxi cuu<sup>n</sup>-í andiu te quide-í nchaa sá cúu iní meé-í, chi véxi cuu<sup>n</sup>-í sá cǎdá-í nchaa nàcuáa ní táuchíú<sup>n</sup> mèe Tǎtà-í Dútú Ndiöxí Yaa ní tendaha ñaha xii-í véxi-í ñuyíú-a. <sup>39</sup> Te cuini-gǎ sá ncháá ñáyiu ní cǎchí-gǎ nduu cuendá-í vǎ dáñà-í-yu cuíta nihnú-yu, te na sǎá nduu te díu-ni-í dandòto-í-yu. <sup>40</sup> Chi duca<sup>n</sup> nǐ cǎchí Dútú Ndiöxí cundu sá ncháá ñáyiu na tnèi tnúhu càhá<sup>n</sup>-í, te quíndáá ndisa iní ñáhǎ-yu xii yúhú Déhe-gǎ, te nduu táhù-yu cundecú-yu ndíhi Yá Ndiöxí ni caa ni quíhí<sup>n</sup>, te yúhú

dandòto-í-yu na sǎá nduu —cǎchí-gǎ xáha<sup>n</sup>-gǎ xií-yu.

<sup>41</sup> Te ñá ní tnàhá iní ñáyiu isràel tnúhu ní cǎhá<sup>n</sup> Jèsús núu ní ngúita-yu ní cǎhá<sup>n</sup> cuèhé-yu cuendá-gǎ cuendá sá nǐ xáha<sup>n</sup>-gǎ sá meé-gǎ cúu-gǎ dàtná sá xexí-ó véxi cuu<sup>n</sup> andiu. <sup>42</sup> Te ní xitnàhá-yu:

—¿Náa ñá díú tǎe-a cùu-dé Jèsús déhe té Chèé? Nchoo xini-ó tǎtá-dé, te xini-ó nǎná-dé, jná cǎchí-tu tǎe-a sá andiu véxi cuu<sup>n</sup>-dé! —cǎchí-yu xitnàhá-yu.

<sup>43</sup> Te ní xáha<sup>n</sup> Jèsús xií-yu:

—Vǎ càhá<sup>n</sup> cuèhé-gǎ-ndó cuendá-í, chí dáñá. <sup>44</sup> Vǎ yǎo quíndáá iní ñáhá xii yúhú núu ñá túú mèe Tǎtà-í táxi cuendá ñáhá-gǎ xií-yu. Te díu-gǎ ní tendaha ñaha-gǎ xii-í véxi-í, te yúhú dandòto-í-yu na sǎá nduu. <sup>45</sup> Te núu tütú cue tée ní xóo cǎhá<sup>n</sup> tnúhu Yá Ndiöxí ndéé sanaha cǎchí-xi: “Yá Ndiöxí danèhé ñáhá-gǎ xií-yu tnúhu-gǎ”, duha cǎchí-xi. Te nchaa ñáyiu na cùndedóho nchaa tnúhu càhá<sup>n</sup> Dútú Ndiöxí, te cutúha-yu nàcuáa càhá<sup>n</sup>-gǎ, te ñáyiu-á<sup>n</sup> quíndáá iní ñáhá-yu xii yúhú.

<sup>46</sup> Te vǎ yǎo xini ñáhá xii Dútú Ndiöxí chí ìí<sup>n</sup> dii-ni yúhú xini-í-gǎ, chí núu ndécú-gǎ ní quee-í véxi cuu<sup>n</sup>-í —cǎchí-gǎ xáha<sup>n</sup>-gǎ xií-yu.

<sup>47</sup> Te xǎha<sup>n</sup> tùcu-gǎ:

—Na cǎchí tnúhu ndáá-í xii-ndo sǎ nchaa ñáyiu na quíndáá iní ñáhá xii-í, te nanhí tǎhú-yu. <sup>48</sup> Te yúhú cùu-í dàtná ìí<sup>n</sup> sá xexí-ndó cǎndeca-xi iní-ndó, te duca<sup>n</sup> sǎtnahá-xi cùu-í chí yúhú cada-í te nduu táhú-ndó cùndecu-ndo ndíhi Yá Ndiöxí ni caa ni quíhí<sup>n</sup>. <sup>49</sup> Te cue ñaní tnáhá-ó nǐ xín-decu ndéé sanaha nǐ xexí-yu pàá nání mànáá xití yucu, dico ní sǎá nduu te dacuití<sup>n</sup> nǐ xihí-yu. <sup>50-51</sup> Te yúhú càhá<sup>n</sup>-í cuendá meé-í, chí véxi cuu<sup>n</sup>-í andiu. Te cùu-í dàtná ìí<sup>n</sup> sá nchító-ndó, te nchaa ñáyiu na cǎxi te candeca-xi iní-yu ni caa ni quíhí<sup>n</sup> te vǎ cuíta nihnu-gǎ-yu. Te sá táxi-í xii-ndo xǎá<sup>n</sup> cúu-xí yiqui cuñú-í, te

cùu-xi cuendá nchaa ñáyiú nihíi ñuyíú cuendá nduu táhũ-yu cundecú-yu ndihí Yá Ndiöxí ni caa ni quíhí<sup>n</sup> —càchí-gá xáha<sup>n</sup>-gã xií-yu.

<sup>52</sup> Te ní ngúíta ñáyiú isràèl xítnàhá-yu:

—¿Náa cada-tu té-e a núu càchí-tu-dé sá yiqui cuñú-dé taxi-dé caxi-o-i? —càchí-yu xítnàhá-yu.

<sup>53</sup> Te ní xáha<sup>n</sup> Jèsús:

—Na càchí tnúhu ndáá-í xii-ndo sã nũu na càda iní-ndó sã dàtná sá caxí-ndó yiqui cuñú yúhú Tée cùu ñaní tnáhá-ndó nchàa-ndo, te cada tucu iní-ndó sã dàtná sá cohó-ndó nĩnĩ-í ñá, te xíá<sup>n</sup> queé-xí sã quindáá iní ñáhá-ndó nì yuhu ni iní-ndó te nanhí tãhú-ndó, te núu ñáhá te cuíta nihnu-ndo. <sup>54</sup> Nchaa ñáyiú na càda iní-xi sá dàtná sá caxí-yu yiqui cùñú-í te cohó-yu nĩnĩ-í, ñáyiú-á<sup>n</sup> nanhí tãhú-yu te yúhú dandòto-í-yu na sàá nduu. <sup>55</sup> Chi yiqui cùñú-í ndihí nĩnĩ-í cúú-xí mèe-í. <sup>56</sup> Te nchaa ñáyiú na càda iní-xi sá dàtná sá caxí-yu yiqui cùñú-í te cohó-yu nĩnĩ-í, te ñáyiú-á<sup>n</sup> ì<sup>n</sup>-nã cuu-í ndihí-yu chi cundecu ndihí-í-yu. <sup>57</sup> Te yúhú nchito-í chi duca<sup>n</sup> nchito Tátà-í Yaá ní tendaha ñaha xii-í véxi-í ñuyíú-a. Te diu-ni duca<sup>n</sup> nchàa ñáyiú na quindáá iní ñáhá xii-í te cundecu ndihí-í-yu ni caa ni quíhí<sup>n</sup>. <sup>58</sup> Te yúhú cúú-í dàtná ì<sup>n</sup> sá nchító-ndó véxi cuu<sup>n</sup> andiu, dico ñá díú pàá sá nání mànáá ní xèxi cue ñaní tnáhá-ó nì xindecu ndéé sanaha, chi ní xexi-yu pàá te dacuèi ní xihí-yu. Te nchaa ñáyiú na quindáá iní ñáhá xii yúhú Yaá véxi cuu<sup>n</sup> andiu, te cundecu ndihí-í-yu ni caa ni quíhí<sup>n</sup> —càchí-gá xáha<sup>n</sup>-gã xií-yu.

<sup>59</sup> Nchaa tnúhu-a ní cáhá<sup>n</sup>-gã xití veñúhu ñáyiú ñuú Capèrnaúm.

### **Jèsús càchí tnúhu-gá nàcuáa nanhí tãhú-ó**

<sup>60</sup> Te sá dúcá<sup>n</sup> nì cáhá<sup>n</sup>-gã nũu vãi ñáyiú nchicú<sup>n</sup> ñáhá xii-gá ní xítnàhá-yu:

—Vá tñí cuíti-o tnúhu càhá<sup>n</sup>-dé chi ñá díú tnúhu sá cúú vãha iní-ó cáhá<sup>n</sup>-dé —càchí-yu xítnàhá-yu.

<sup>61</sup> Te ní cutnùnì iní Jèsús sá ñà túú cáhá<sup>n</sup> vãha-yu cuendá tnúhu ní cáhá<sup>n</sup>-gã, núu ní xáha<sup>n</sup>-gã xií-yu:

—¿Náa ñá tnàhá iní-ndó nàcuáa cáhá<sup>n</sup>-í-a? <sup>62</sup> Te uu<sup>n</sup>-gã cada nchòhó nũu quiní-ndó yúhú Tée cùu ñaní tnáhá-ndó nchàa-ndo ndaa-í núú nì xindecu-í díhna. <sup>63</sup> Te espíritú ndécú ndihí yiqui cuñú-ó, xíá<sup>n</sup> ndécá ñaha-xi xii-o, te núu ñá túú xíá<sup>n</sup>, te yiqui cùñú-ó ñà túú nandfhi-xi. Dico núu nchaa tnúhu cáhá<sup>n</sup>-í-a queé-xi iní-ndó ñá, te quiní-ndó nã xéhé candeca ñaha-xi xii-ndo núú cuàhá<sup>n</sup> núú véxi. <sup>64</sup> Te dava nchòhó chi ñá túú sàndáá iní-ndó —càchí-gá xáha<sup>n</sup>-gã xií-yu.

Te duca<sup>n</sup> nì xáha<sup>n</sup>-gã chi sa ñaha-gá nándi cùu ñáyiú vã quindáá iní ñáhá xii-gã. Te duca<sup>n</sup> sã naha-gá ndèdacaáa téé cuáha cuendá ñáhá xii-gã núú cuè téé cùu úhú iní ñáhá. <sup>65</sup> Te ní xáha<sup>n</sup> tùcu Jèsús xií-yu:

—Te duha cáhá<sup>n</sup>-í chi sa ní cachí tnúhu-í xii-ndo sã vã yõo ì<sup>n</sup> cuinì tñi tnúhu-í te núu ñá túú Tátà-í Dútú Ndiöxí sánú ìchi ñaha-gá xií-yu —càchí-gá xáha<sup>n</sup>-gã xií-yu.

<sup>66</sup> Te òré-á<sup>n</sup> ìo vãi ñáyiú nchicú<sup>n</sup> ñáhá xii-gá ní xócõo-yu ñá ní xica cuu-gá-yu ndihí-gã. <sup>67</sup> Te xíá<sup>n</sup> ní xáha<sup>n</sup> Jèsús xii ndi ùxúú cue téé xica cuu ndihí-gã:

—¿Cuiní-ndó dandóo ñaha-ndo tnáhá-ndó-á<sup>n</sup>? —càchí-gá xáha<sup>n</sup>-gã xii-güedé.

<sup>68</sup> Te ní xáha<sup>n</sup> tẽ Xímú, àdi Pelú chi úú òu-dé:

—Mèstrú, ñá túú-gã ndéé quíhí<sup>n</sup>-ndí, chi nchúhú náhá-ndí sã tnúhu mee-n cùu-xi sá vãha candeca-xi iní-ndí ni caa ni quíhí<sup>n</sup>. <sup>69</sup> Chi nchúhú sa ní sàndáá iní ñáhá-ndí xii-n chi ñaha-ndí sá yòhó cúú-n Cristú Déhe Dútú Ndiöxí yaá ndécú àndiu —cachí-dé xáha<sup>n</sup>-dẽ xii-gã.

<sup>70</sup>Te ní xáha<sup>n</sup> Jèsús:

—Nàha-ndo sá yùhú ní cáhá<sup>n</sup> ñàhà-í xii ndí ùxúú-ndó xica cuu ndíhi ñaha-í xii-ndo, dico ì<sup>n</sup>-ndo quíhu ñaha yùcu ñávàha xii-ndo —càchí-gá xáha<sup>n</sup>-gá xii-güedé.

<sup>71</sup>Duha ní cáhá<sup>n</sup> Jèsús cuendá té Jùdás déhe té Xímú Iscàrioté ì<sup>n</sup> téé ñùtnahá núú ùxí ì<sup>n</sup> cue téé xica cuu ndíhi-gá, chí sa nàha-gá sá tée-à<sup>n</sup> cuàha cuendá ñáhà-dě xii-gá ì<sup>n</sup> nduu núú cuè téé cùu úhú iní ñáhá.

**Cue ñaní Jèsús ñá túú  
sàndáá iní-güedé nàcuáa  
ndùu tnúhu càhá<sup>n</sup>-gá**

**7** Te sáta dúcá<sup>n</sup> ní cuu, te ní xica cuu Jèsús distrítú Galileá, te ñá ní sáhá<sup>n</sup>-gá distrítú Jùdeá, chí yàcá<sup>n</sup> cuiní cue téé isràèl cahni ñaha-güedě xii-gá ní cùu. <sup>2</sup>Te ní cuyatni nduu càdá-yu vico, vico sá dánàní-yu Vico Vehe Tnuvixi<sup>n</sup>.

<sup>3</sup>Te ní xáha<sup>n</sup> cuè ñaní Jèsús xii-gá:

—Váha-gá quíhí<sup>n</sup>-n distrítú Jùdeá te vá cùndècu-n iha, chí yàcá<sup>n</sup> cada-n nchàa sá quidé-n iha cuendá quiní nchaa ñáyíu cùndíhi ñaha xii-n ndecu yacá<sup>n</sup>.

<sup>4</sup>Chí núu cuiní-ó quiní nchaa ñáyíu ná chiú<sup>n</sup> cada-o te vá càdá dáyuhu-o. Te yòhó cuéhé núú sá quidé-n, te cada-n na quiní nchaa ñáyíu —càchí-güedé xáha<sup>n</sup>-güedě xii-gá.

<sup>5</sup>Duca<sup>n</sup> ní cáhá<sup>n</sup> cue ñaní-gá, chí ní mèe-güedé ñá túú sàndáá iní-güedé nàcuáa ndùu tnúhu càhá<sup>n</sup>-gá. <sup>6</sup>Te ní xáha<sup>n</sup> Jèsús xii-güedé:

—Vátá tnàhá-gá òré quíhí<sup>n</sup>-í dico nchòhó ndédani càa òré cuu quíhí<sup>n</sup>-ndó.

<sup>7</sup>Chí nchaa ñáyíu ñùhu ichi cuehé ichi duha chí ñá túú cùu úhú iní ñáhà-yu xii nchòhó. Dico yùhú chí cùu úhú iní ñáhà-yu xii-í cuendá sá càhá<sup>n</sup>-í sá quidé-yu nchaa sá cuéhé sá dúhá. <sup>8</sup>Te chí cuáhá<sup>n</sup> nchòhó vico chí yùhú vá quíhí<sup>n</sup>-ni-í chí vátá tnàhá-gá òré quíhí<sup>n</sup>-í —càchí-gá xáha<sup>n</sup>-gá xii-güedé.

<sup>9</sup>Te duca<sup>n</sup> ní xáha<sup>n</sup>-gá te ní ndóo-gá Galileá, te cue téé-á<sup>n</sup> cuáhá<sup>n</sup>-güedé.

**Jèsús ndécú-gá ì<sup>n</sup> vico  
chíñuhú-yu Yá Ndiòxí**

<sup>10</sup>Dico sáta cuáhá<sup>n</sup> cue ñaní-gá, te ní xica-gá cuáhá<sup>n</sup>-gá tnàhá-gá dícó-ni sá dáyuhu cuáhá<sup>n</sup>-gá. <sup>11</sup>Te ñáyíu isràèl ñáyíu xíndecu vico nànducú-yu Jèsús, te xítnàhá-yu:

—¿Ndèé ndécú Jèsús? —càchí-yu xítnàhá-yu.

<sup>12</sup>Te nchaa ñáyíu xíndecu vico xíndatnúhu-yu cuendá-gá. Te davá-yu xítnàhá-yu sá ìo váha iní-gá, te davá-yu xítnàhá-yu sá ñà díú tée váha cùu-gá, chí dàndahú-gá ñáyíu.

<sup>13</sup>Dico mee-ni xicáhá<sup>n</sup> nàhí-yu, chí xíyùhú-yu cue téé cùnuu núú-yu.

<sup>14</sup>Te ta ngúhu<sup>n</sup> dava vico, te cuán-guíhu Jèsús veñúhu càhnu sá ìo cùnuu, te ní nguíta-gá dácuaaha-gá ñáyíu. <sup>15</sup>Te ñáyíu isràèl ní cuñúhu víhí-yu sá ìo váha càhá<sup>n</sup>-gá, te ní xítnàhá-yu:

—¿Ná cuendá ío váha ñùhu-tu díquí tée-a tnúhu cáhá<sup>n</sup>-dé te ñá túú ní dácuaaha-dé-í? —càchí-yu xítnàhá-yu.

<sup>16</sup>Te ní xáha<sup>n</sup> Jèsús:

—Ñá díú cuendá mèe-í cúú-xí sá dánèhé ñàhà-í xii-ndo, chí cuendá Dútú Ndiòxí Yaá ní tendaha ñaha xii-í véxi-í cúú-xí. <sup>17</sup>Te núu ìo dava-ndo ñè yuhu ní iní-ndó cuiní-ndó càda-ndo nacuáa cuiní Yá Ndiòxí cunduu, te cutnùní ndáá iní-ndó sá tnúhu dácuaaha ñaha-í xii-ndo cùu-xi cuendá méé Dútú Ndiòxí, te ñá díú cuendá mèe-í cúú-xí. <sup>18</sup>Te téé cuiní sá càdá càhnu ñaha ñáyíu xii-dé, téé-á<sup>n</sup> càhá<sup>n</sup>-dé nàcuáa véxi iní méé-dě. Dico yùhú cuiní-í sá càdá càhnú-yu Dútú Ndiòxí Yaá ní tendaha ñaha xii-í véxi-í ñuyíú-a, te càhá<sup>n</sup> ndáá-í te ñá túú dácuaandehnde-í.

<sup>19</sup>Te ndíi Moisés ní taxi ndíi tnúhu sá sánú ichi ñaha xii-ndo nacuáa cundecu-ndo, te ní dùca<sup>n</sup> ñá túú sàndáá

iní-ndó nàcuáa càhá<sup>n</sup> tnúhu-á<sup>n</sup>. ¿Te ná cuendá cuíní-ndó càhni ñaha-ndo xii-í? —càchí-gá xáha<sup>n</sup>-gã xií-yu.

<sup>20</sup> Te ní xáhá<sup>n</sup>-yu xii-gá:

—Yucu ñávãha dàcoto ñaha xii-ó, chi vá yõo ì<sup>n</sup> cuíní cahni ñaha xii-n —cachí-yu xáhá<sup>n</sup>-yu xii-gá.

<sup>21</sup> Te ní xáhá<sup>n</sup> Jèsús xií-yu:

—Sá ní quide-í ì<sup>n</sup> sá vã yõo tnàhí ndàcu cada nduu cuu-xi nduu ndetatú-ó, xíã<sup>n</sup> ío ní cuñúhu ñaha-ndo xii-í. <sup>22</sup> Te ndíi Moisés ní cachí ndíi sá cuãha-yu sèñá ñii cue landú téé, dico ñá díú mèe ndíi ni càhu iní ndíi chi duca<sup>n</sup> tnàhí ní xóo cada cue ñaní tnáhá-ó dàvá-á<sup>n</sup>, núu xíã<sup>n</sup> nchòhó sãha-ndo sèñá ñii landú téé cuèi cùu-xi nduu ndetatú-ó. <sup>23</sup> Te duca<sup>n</sup> quide-ndo cuendá sá ñà túú nã cumání-ndó núú tnúhu sá sánú ìchi ñaha xii-ndo ní dándõ ndíi Moisés. ¿Te ná cuendá cúdéé<sup>n</sup>-ndó núú-í sá ní quide tátna-í téé cùhú nduu ndetatú-ó-í? <sup>24</sup> Te váha váha cada cuendá-ndó, te vá cuendá-ni cáhá<sup>n</sup>-ndó sã yúhú ndècuéchi-í chi ñá túú xìní-ndó —càchí-gá xáha<sup>n</sup>-gã xií-yu.

### Jèsús xáha<sup>n</sup>-gã xií-yu núú véxi-gá

<sup>25</sup> Te dava ñáyiu ñuú Jerusalén ní ngúíta-yu xitnãhá-yu:

—¿Náa ñá díú tèe-á<sup>n</sup> nánducu-güedé cahni-güedé?, <sup>26</sup> núu náí-dé nútníi núú chítú núú tàcá-ã<sup>n</sup> càhá<sup>n</sup>-dé, te vá yõo cùyii cúñaha xii-dé ì<sup>n</sup> tnúhu. Cudana te cue téé cùchiu<sup>n</sup> sandáá iní-güedé sá díú-dé cúú-dé Crístú Yaa ní tendaha Yã Ndiõxí véxi ñuyú-a. <sup>27</sup> Dico nchoo xìní-ó ndèe ichi véxi téé-ã<sup>n</sup>, dico Crístú ná quixi-gá chi vá yõo ì<sup>n</sup> quini ndèe ichi quixi Yaa-á<sup>n</sup> —càchí-yu xitnãhá-yu.

<sup>28</sup> Te yìhi Jesús xití veñúhu càhnu sá ìo cùnno danehe-gá ñáyiu, te ní tecú dóho-gá tnúhu càhá<sup>n</sup>-yu. Te níhi ní cáhá<sup>n</sup>-gá, te xáha<sup>n</sup>-gã xií-yu:

—¿Ná quini-tu nchòhó ndèe ichi véxi yúhú! Yúhú véxi-í dico ñá díú sã cúú

iní mèe-í, chi Yã Ndiõxí Yaa quidé nchãa-ndi túhú sá vãha ní tendaha ñaha-gá xii-í véxi-í, te nchòhó ñá túú xìní-ndó-gã. <sup>29</sup> Te yúhú xìní-í-gá chi núú ndécú-gã ní quee-í véxi-í, te diu mee-gã ní tendaha ñaha-gá véxi-í —càchí-gá xáha<sup>n</sup>-gã xií-yu.

<sup>30</sup> Te sã dúcã<sup>n</sup> ní cáhá<sup>n</sup>-gá, núu cuíní-güedé tñii ñaha-güedé xii-gá quíhí<sup>n</sup>-gá vecaá ní cùu, dico vá yõo ì<sup>n</sup> ni cùyii tñii ñaha xii-gá chi vátá sãá-gá òré tñii ñaha-güedé. <sup>31</sup> Dico vãi-yu ní sándáá iní ñãhá-yu xii-gá, te ní xitnãhá-yu:

—¿Nágá cúú sã cádá Crístú ná quixi-gá-í?, te téé-a ío cuéhé núú sã tá quide-dé véxi. Vaa diu téé-a cùu-dé Crístú Yaa ní tendaha Yã Ndiõxí véxi ñuyú-a —càchí-yu xitnãhá-yu.

### Cue téé cùu fariséu cuíní-güedé quíhí<sup>n</sup> Jèsús vecaá

<sup>32</sup> Te ní níhi cue téé cùu fariséu tnúhu nàcuáa càhá<sup>n</sup> ñáyiu cuendá Jèsús, núu ní ndatnúhu-güedé ndíhi cue dútú cùnno, te ní techiu<sup>n</sup>-güedé cue téé quide cuendá veñúhu cuáhã<sup>n</sup>-güedé cuátnii ñaha-güedé xii-gá ní cùu. <sup>33</sup> Te ní xáha<sup>n</sup>-gã xii-güedé:

—Sacú duha nduu cundecu ndíhi ñaha-í xii-ndo, te núhú tucu-í núú ndécú tàtà-í Yaa ní tendaha ñaha xii-í véxi-í ñuyú-a. <sup>34</sup> Te cuèi na nànducu ñaha-ndo dico vá ná níhi ñãhá-ndó chi vá sãá-ndó núú cündecu-í —càchí-gá xáha<sup>n</sup>-gã xii-güedé.

<sup>35</sup> Te ní ngúíta ñáyiu isràél xitnãhá-yu:

—¿Ndèe quíhí<sup>n</sup>-tu téé-a te vá ná níhi-ó-dé-í? ¿Àdi quíhí<sup>n</sup>-dé na chitnahá-dé ñáyiu isràél ñáyiu nchiténno nchaa ñuú xíca cuendá danèhé-dé ñáyiu griégú? <sup>36</sup> ¿Náa càhá<sup>n</sup>-tu-dé duha càhá<sup>n</sup>-dé: “Nanducu ñaha-ndo te vá nánihí ñãhá-ndó chi vá sãá-ndó núú cündecu-í”, càchí-tu-dé? —càchí-yu xitnãhá-yu.

**Nàcuáa cada Espíritú Yă Ndiöxí iní-ó**

<sup>37</sup> Te nduu ní yáha-ná vico cùu-xi nduu cahnu vihi, te nduu-ă<sup>n</sup> ní ngúnu tníi Jèsús tnuú ñáyiú, te níhi ní cáhá<sup>n</sup>-gá, te xáha<sup>n</sup>-gă xií-yu:

—Núu ió dava-ndo yìchí-ndó ndùte, te quixi-ndo nùu-í, te coho-ndo. <sup>38</sup> Duha càhá<sup>n</sup>-í chi nchaa ñáyiú na quindáá iní ñáhá xii-í, te cada-xi iní-yu dàtná ì<sup>n</sup> núu xicá ndùte, nchaa-ni nduu xica ñá túú yìchí, duca<sup>n</sup> càda-xi iní-yu núu cuàhá<sup>n</sup> núu véxi dàtná càhá<sup>n</sup>-xi núu tütú Yă Ndiöxí —càchí-gá xáha<sup>n</sup>-gă xií-yu.

<sup>39</sup> Te duca<sup>n</sup> ní cáhá<sup>n</sup>-gá cuendá sá quíxí Espíritú Yă Ndiöxí ngúndecu ndihi nchaa ñáyiú na quindáá iní ñáhá xii-gá, chi sáá nduu ndàa-gá andiu càda cahnu ñaha Tátá-gă xii-gá, te dàvâ-á<sup>n</sup> te quixi Espíritú Yă Ndiöxí cundecu ndihí-yu.

**Ñá ní cùu ì<sup>n</sup>nuú-yu cuendá tñúhu ní cáhá<sup>n</sup> Jèsús**

<sup>40</sup> Te dava ñáyiú ní xíndedóho tñúhu ní cáhá<sup>n</sup> Jèsús ní xítnàhá-yu:

—Ndáá sá tée-a cùu-dé tée càchí-yu quixi cáhá<sup>n</sup> tñúhu Yá Ndiöxí —càchí-yu xítnàhá-yu.

<sup>41</sup> Te dava tucú-yu xítnàhá-yu:

—Tée-a cùu-dé Crístú Yaá ní tendaha Yă Ndiöxí véxi ñuyíú-a —càchí-yu xítnàhá-yu.

Te dava-gá tucú-yu xítnàhá-yu:

—¿Náa ndàa dístrítú Galileá quixi Crístú Yaá tendaha Yă Ndiöxí quixi ñuyíú-a? <sup>42</sup> Chi núu tütú Yă Ndiöxí càchí-xi sá Crístú Yaá tendaha Yă Ndiöxí quixi ñuyíú-a cuu-gá ì<sup>n</sup> ñaní tnáhá ndíi Dàvíí, te quee-gá ñúú Bèlén ñúú méé ndíi Dàvíí, duha càhá<sup>n</sup>-xi núu tütú Yă Ndiöxí —càchí-yu xítnàhá-yu.

<sup>43</sup> Te xíă<sup>n</sup> nùu ñá ní cùu ì<sup>n</sup>nuú-yu cuendá Jèsús. <sup>44</sup> Te davá-yu cuíní-yu tníi-yu Jèsús quíhí<sup>n</sup>-gá vecaá ní cùu, dico ní ì<sup>n</sup>-yu ñá túú ní cùyíí-yu tñii ñàhá-yu xii-gá.

**Cue tée cùchiu<sup>n</sup> ñá túú sàndáá iní-güedé Jèsús**

<sup>45</sup> Te cue tée cuáhá<sup>n</sup> tñii ñaha xii Jèsús ní cùu ní ndexio-güedé núu cuè tée cùu fariséú ndihi núu cuè dütú cùnùu. Te xáha<sup>n</sup> cuè tée cùnùu-á<sup>n</sup>:

—¿Ná cuendá ñá ní cãndeca-ndo tée-ă<sup>n</sup> quixi? —càchí-güedé xáha<sup>n</sup>-güedé.

<sup>46</sup> Te cue tée ní sáhá<sup>n</sup> chiu<sup>n</sup> ní xáha<sup>n</sup>-güedé:

—Ni ì<sup>n</sup> tée ñá túú xíní-ndí cáhá<sup>n</sup> dàtná càhá<sup>n</sup> tée-ă<sup>n</sup> —càchí-güedé xáha<sup>n</sup>-güedé.

<sup>47</sup> Te ní xáha<sup>n</sup> cuè tée cùu fariséú:

—¿Náa tñáhá nchòhó ní sàndáá iní-ndó tñúhu ndehnde càhá<sup>n</sup> tée-ă<sup>n</sup>?

<sup>48</sup> ¿Náa ñá túú xíní-ndó sã ní ì<sup>n</sup> cue tée tàxi tñuní nchúhú, te ní ì<sup>n</sup> nchúhú cue tée cùu fariséú ñá túú sàndáá iní-ndí tée-ă<sup>n</sup> ñă? <sup>49</sup> Nchaa ñáyiú tùha ñaha xii tée-ă<sup>n</sup> ñá túú sàndáá iní-yu nàcuáa càhá<sup>n</sup> tñúhu sá sánú ìchi ñaha xii-o, dico cuíta nihnú-yu sá dúcá<sup>n</sup> quidé-yu —càchí-güedé xáha<sup>n</sup>-güedé xii cue tée-á<sup>n</sup>.

<sup>50</sup> Te té Nicòdemú tée ní sáhá<sup>n</sup> niú ní ndatnúhu-dé ndihi Jèsús cúú-dé tñáhá-dé ì<sup>n</sup> tée fariséú, te ní xáha<sup>n</sup>-dé xii-güedé:

<sup>51</sup> —Tñúhu sá sánú ìchi ñaha xii-o nacuáa cundecu-o càchí-xi sá ndéé cundedóho-o ñása càhá<sup>n</sup> tée tàú cuéchi cuendá cutnùni iní-ó ñá ní quide-dé, te dătnùni cáhá<sup>n</sup>-ó nùu ndisa ndècuéchi-dé àdi ñá túú ndècuéchi-dé —càchí-dé xáha<sup>n</sup>-dè.

<sup>52</sup> Te ní xáha<sup>n</sup>-güedé:

—Cùu ní cachí sá tñáhá-ö cúú-n tée dístrítú Galileá nùu duca<sup>n</sup> càhá<sup>n</sup>-n. Dacuàha tutú yódó tñuní tñúhu Yă Ndiöxí te quini-n nàcuáa càhá<sup>n</sup>-xi sá ní ì<sup>n</sup> tée véxi dístrítú Galileá ñá túú càhá<sup>n</sup>-dé tñúhu Yá Ndiöxí —càchí-güedé xáha<sup>n</sup>-güedé.

<sup>53</sup>Duca<sup>n</sup> te ndi díí<sup>n</sup> cuánuhú-güedé vehe-güedé.

### İ<sup>n</sup> ñadĩhí ndécú vĩhi cuéchi-xi

**8** Te Jèsús cuáhá<sup>n</sup>-gá yucu Òlívú. <sup>2</sup>Te sátá nĩ túndaá nduu tnéé, te cuáhá<sup>n</sup> tucu-gá veñúhu càhnu sá ïo cùnuu. Te ïo cuéhé ñáyũ ní chítú nĩnũ-yu núú-gã, te ní ngóo-gá ní dánèhé ñáhá-gã xií-yu. <sup>3</sup>Te ní quexio cue tée dàcuaha ñaha xií-yu nchaa tnúhu ní chídó tnùnĩ ndĩf Moisés, ndihĩ cue tée cùu fariséú, te ndèca-güedé ĩ<sup>n</sup> ñadĩhĩ ní sáá, te ñaha-á<sup>n</sup> nĩ xinĩ ñáhã-yu càhá<sup>n</sup> ndihĩ-a<sup>n</sup> ĩ<sup>n</sup> tée dico ñá díú yĩ-a<sup>n</sup> cuu-dé, te ní sanutnĩ ñaha-güedé xii-a<sup>n</sup> tnuú nchaa ñáyũ xĩndecu núú Jèsús. <sup>4</sup>Te ní xáha<sup>n</sup>-güedé xii Jèsús:

—Mèstrú, ñadĩhĩ-a ní xinĩ ñáhã ñáyũ xii-a<sup>n</sup> càhá<sup>n</sup> ndihĩ-a<sup>n</sup> ĩ<sup>n</sup> tée dico ñá díú yĩ-a<sup>n</sup> cuu-dé. <sup>5</sup>Te tnúhu ní chídó tnùnĩ ndĩf Moisés càchĩ-xi sá yúú cahni-o nchãa ñáyũ dĩhĩ duha quide. Te yòhó, ¿nása càchĩ-n cùnduu-i? —cachĩ-güedé xãha<sup>n</sup>-güedé xii-gã.

<sup>6</sup>Duha ní cáhá<sup>n</sup>-güedé chi cuendá sá cuinĩ-güedé coto ndeé ñáhã-güedé xii-gã nũ nása cáhá<sup>n</sup>-gá cuendá nùcúo nchihĩ ñaha-güedé xii-gã ní cáhá<sup>n</sup>-güedé. Te ní ngũnu ndeyĩ-gá te ní ngũíta-gá tée-gã ndihĩ díquí ndáhã-gã lètrá núú ñúhú. <sup>7</sup>Te xìcã<sup>n</sup> tnúhú-nĩ tucu-güedé núú-gã nũ ní ndonehe núú-gã, te ní xáha<sup>n</sup>-gã:

—Ndédani càa nchohó te núú ñá túú ñã cuéchi quide-ndo te díhna nuu-gã-ndó chí cuãha-a<sup>n</sup> yúú —càchĩ-gã xãha<sup>n</sup>-gã xii-güedé.

<sup>8</sup>Te ní ngũnu ndeyĩ tucu-gá tée tucu-gã lètrá núú ñúhú. <sup>9</sup>Te sá dúcã<sup>n</sup> nĩ xáha<sup>n</sup>-gã xii-güedé te ní ndixi túú inĩ-güedé sá ñã túú quide váha mee-güedé tnáhã-güedé, núú da ĩ<sup>n</sup> da ĩ<sup>n</sup>-güedé ní ndee, te díhna-gã cue tée cùu sacuéhé nĩ ndee te ní ngũíta nchicú<sup>n</sup> dava-gã-güedé. Te sátá nĩ ndihĩ-güedé ní ndee, te ní quendóo mee-ñã Jèsús

ndihĩ ñadĩhĩ-á<sup>n</sup>. <sup>10</sup>Te ní ndonehe núú Jèsús te ní xinĩ-gã sá nĩ ndihĩ-güedé cuáhã<sup>n</sup> te mee-ñã ñadĩhĩ-á<sup>n</sup> nĩ ndóo-a<sup>n</sup>, te ní xáha<sup>n</sup>-gã xii-a<sup>n</sup>:

—¿Ndèndĩ cuáhã<sup>n</sup> cue tée càchĩ sá nĩ quide-n cuéchi? ¿Nĩ ĩ<sup>n</sup>-güedé ñã ní cùndee tnúhu-güedé quĩhĩ<sup>n</sup>-n càstíú-va? —càchĩ-gã xáha<sup>n</sup>-gã xii-a<sup>n</sup>.

<sup>11</sup>Te ní xáha<sup>n</sup>-a<sup>n</sup> xii Jèsús:

—Ñáhã, chi ní ĩ<sup>n</sup>-güedé ñã ní ndàcu-güedé —càchĩ-a<sup>n</sup> xáha<sup>n</sup>-a<sup>n</sup>.

Te ní xáha<sup>n</sup> Jèsús:

—Te ní yúhú vá dáquĩhĩ<sup>n</sup> ñáhã-í castíú xii-n. Te vitna te núhú-n te vá cádá-gã-n nãndĩ sá cuéhé sá dúhá —càchĩ-gã xáha<sup>n</sup>-gã xii-a<sup>n</sup>.

### Jèsús dándixi túu-gã inĩ-ó

<sup>12</sup>Te ní cáhá<sup>n</sup> tucu Jèsús núú ñáyũ, te xáha<sup>n</sup>-gã xií-yu:

—Yúhú cúú-í dàtnã ĩ<sup>n</sup> ñuhú dáyèhe-í ñuyúú-a, te nchaa ñáyũ na chĩtnahã ñáhã xii-í, te vá cùndècu-gã-yu ichi cuéhé ichi duha, chi yúhú dándixi túu-í inĩ-yu cuendá cutnùnĩ inĩ-yu nàcuãa ndùu cuendá Yã Ndiõxĩ, te cundecu-í ndihĩ-yu ní caa ní quĩhĩ<sup>n</sup> —càchĩ-gã xáha<sup>n</sup>-gã xií-yu.

<sup>13</sup>Te ní xáha<sup>n</sup> cuè tée cùu fariséú xii-gã:

—Medĩ-n cahã<sup>n</sup>-n sã cúú-n tée váha, te vá yòo ĩ<sup>n</sup>-gã chĩndèe tnúhu ñaha xii-n núú ná tée cùu-n, dico xìã<sup>n</sup> ñã túú nãndĩhĩ-xi —càchĩ-güedé xãha<sup>n</sup>-güedé xii-gã.

<sup>14</sup>Te ní xáha<sup>n</sup> Jèsús:

—Cuèĩ càhá<sup>n</sup>-í cuendá mèè-í dico nãndĩhĩ tnúhu càhá<sup>n</sup>-í. Chi yúhú ñaha-í ndèè ichi véxi-í, te xìní-í ndèè ichi núhú-í, dico nchòhó chi ñã túú xìní-ndó ndèè ichi véxi-í, te ní ñã túú xìní-ndó ndèè ichi quĩhĩ<sup>n</sup>-í. <sup>15</sup>Te nchòhó chi cuendá-ni càhá<sup>n</sup>-ndó cuendá ñáyũ núú quide váha-yu àdĩ ñã túú quide váha-yu. Te yúhú ñã túú càhá<sup>n</sup>-í cuendá ñáyũ núú quide váha-yu àdĩ ñã túú quide váha-yu.



<sup>16</sup> Àdi núu cǎhá<sup>n</sup>-í dico ì<sup>n</sup> tnúhu ndáá cǎhá<sup>n</sup>-í chi ñá díú-ní mée-í cǎhá<sup>n</sup>, chi tnàhá Tǎtà-í Yaá ní tendaha ñàha xii-í véxi-í ñuyú-a cǎhá<sup>n</sup>-gá chíndèe tnúhu ñàha-gǎ xii-í. <sup>17</sup> Te tnúhu sá sánú ìchi ñàha xii-ndo cachí-xi sá núu na cùndecu úú cue tée cǎhá<sup>n</sup> ndáá-güedé nàcuáa cùu ì<sup>n</sup> sá cùndáá, te núu ì<sup>n</sup>-ni tnúhu na cǎhá<sup>n</sup>-güedé ndi ndúú-güedé te xǎ<sup>n</sup> nándíhi-xi, duha cǎchí tnúhu-á<sup>n</sup>. <sup>18</sup> Te ñiu-ni duca<sup>n</sup> cùu-xi yúhú chi cǎhá<sup>n</sup>-í ì<sup>n</sup> tnúhu ndáá sá cúú-xí mée-í, te ñiu-ni dàtná cǎhá<sup>n</sup>-í cǎhá<sup>n</sup> Tǎtà-í Yaá ní tendaha ñàha xii-í véxi-í ñuyú-a —cǎchí-gá xǎhá<sup>n</sup>-gǎ xii-güedé.

<sup>19</sup> Te ní xǎhá<sup>n</sup>-güedé xii-gǎ:

—¿Te ndèè ndécú Tǎtà-n-í? —cǎchí-güedé xǎhá<sup>n</sup>-güedé.

Te ní xǎhá<sup>n</sup> Jèsús:

—Te núu dìcò xìní-ndó yòo cuu yúhú-á te duca<sup>n</sup> te quini-ndó Tǎtà-í. Te ni yúhú ñá túú xìní-ndó yòo cuu-í núu xǎ<sup>n</sup> ñá túú xìní-ndó Tǎtà-í —cǎchí-gá xǎhá<sup>n</sup>-gǎ xii-güedé.

<sup>20</sup> Duha ní cǎhá<sup>n</sup> Jèsús nini dàcuaha-gǎ ñáyiú xití veñúhu núú ndécú àlcan-ciá díhú<sup>n</sup>. Te vá yòo ì<sup>n</sup> ni cùyii tnií ñàha xii-gǎ chi vátá sàá-gǎ òré tnií ñàha-güedé.

**Ñáyiú ñá túú sàndáá iní ñáhá xii  
Jesús vá ndácü-yu quíhí<sup>n</sup>-yu  
núú nùhú-gá cundecu-gá**

<sup>21</sup> Te ní xǎhá<sup>n</sup> tùcu Jesús xii-güedé:

—Yúhú nùhú-í te nanducu ñàha-ndo te vá nánihí ñáhá-ndó, te cuú-ndó núú yíca cuèchi-ndo, chi vá ndácú-ndó sǎá-ndó núú nùhú-í cundecu-í —cǎchí-gá xǎhá<sup>n</sup>-gǎ xii-güedé.

<sup>22</sup> Te ní xitnàha cue tée isràèl:

—¿Te náa cahni-dé mée-dé núu cǎchí-dé sá vǎ ndácú-ó sàá-ó núú quíhí<sup>n</sup>-dé-ǎ<sup>n</sup>? —cǎchí-güedé xitnàha-güedé.

<sup>23</sup> Te ní xǎhá<sup>n</sup> Jèsús xii-güedé:

—Nchòhó chi cue tée ñuyú-a cùu-ndo, núu ío ñùhu iní-ndó sǎ ìó ñuyú-a. Te yúhú chi tée núú ñnu cùu-í núu xǎ<sup>n</sup> ñá túú sǎ ìó ñuyú-a ñùhu iní-í. <sup>24</sup> Te xǎ<sup>n</sup> núu cǎchí-í sá cùu-ndó núú yíca cuèchi-ndo, chi ñá cuiní-ndó quindáá iní-ndó sǎ yúhú véxi cuu<sup>n</sup>-í andiu, te núu xǎ<sup>n</sup> ñiu-ni núú yíca cuèchi-ndo cùu-ndó —cǎchí-gá xǎhá<sup>n</sup>-gǎ xii-güedé.

<sup>25</sup> Te ní xícá<sup>n</sup> tnúhú-güedé núú-gǎ, te xǎhá<sup>n</sup>-güedé:

—¿Te ná cúú yòhó núu duca<sup>n</sup> cǎhá<sup>n</sup>-n-í? —cǎchí-güedé xǎhá<sup>n</sup>-güedé xii-gǎ.

Te ní xǎhá<sup>n</sup>-gǎ:

—Sa ní cachí tnúhu-í xii-ndo ndéè díhna —cǎchí-gá xǎhá<sup>n</sup>-gǎ xii-güedé.

<sup>26</sup> Te xǎhá<sup>n</sup> tùcu-gǎ:

—Ndècu cuéhé tnúhu cǎhá<sup>n</sup>-í cada ndáá-í cuendá nchòhó. Te Tǎtà-í Yaá ní tendaha ñàha xii-í véxi-í ñuyú-a cǎhá<sup>n</sup>-gá tnúhu ndáá, te tnúhu cǎhá<sup>n</sup> yúhú ñuyú-a cùu-xi tnúhu ní cǎhá<sup>n</sup>-gá ní xíndedóho-í —cǎchí-gá xǎhá<sup>n</sup>-gǎ xii-güedé.

<sup>27</sup> Te mee-güedé ñá túú ní tècú tnùn-í-güedé sá cuendá Dútú Ndiòxi ní cǎhá<sup>n</sup> Jèsús. <sup>28</sup> Te ní xǎhá<sup>n</sup>-gǎ xii-güedé:

—Òré ná catá cǎa ñàha-ndo xii yúhú Téé cùu ñani tnáhá-ndó nchàa-ndo núú cùrúxi cahni ñàha-ndo, te òré-á<sup>n</sup> cutnùní iní-ndó yòo cuu-í, te ñá túú quide-í sá cúú iní mée-í, chi yúhú cǎhá<sup>n</sup>-í nàcuáa ní dánèhè ñáhá Tǎtà-í <sup>29</sup> Yaá ní tendaha ñàha xii-í véxi-í. Te ñiu-gǎ ndécú ndíhi ñàha-gǎ xii-í, te ñá túú dàna nihnu ñàha-gǎ chi quide-í nchaa nàcuáa cùu iní-gǎ —cǎchí-gá xǎhá<sup>n</sup>-gǎ xii-güedé.

<sup>30</sup> Te sá dúcá<sup>n</sup> ní cǎhá<sup>n</sup>-gǎ núu ío vǎi ñáyiú ní sàndáá iní ñáhá xii-gǎ.

**Ñáyiú sàndáá iní ñáhá xii Yá  
Ndiöxí ndihi ñáyiú ndècu  
ichi cuehé ichi duha**

<sup>31</sup> Te ní xáha<sup>n</sup> Jèsús xii ñáyiú isràél ñáyiú ní sàndáá iní ñáhá xii-gá:

—Te núu vá dáñá ndèè-ndó càda-ndo nchaa nacuaá càhá<sup>n</sup>-í, te cuu ndisa-ndo cue téè tnahá tnúhu ndihi-í, <sup>32</sup> te tecú tnùnì-gá-ndó tnúhu ndáá, te duca<sup>n</sup> te cácu nihnu-ndo —càchí-gá xáha<sup>n</sup>-gá xií-yu.

<sup>33</sup> Te ní xáhã<sup>n</sup>-yu:

—Nchúhú cúu-ndí cue ñaní tnahá ndii Àbrahám, te ni ì<sup>n</sup> nduu ñá túú ndèé sácündedí nihnu-ndí ndoho tnahá-ndí nñu cáchí-ò sá dàcácu nihnu ñaha-n xii-ndí —càchí-yu xáhã<sup>n</sup>-yu xii-gá.

<sup>34</sup> Te ní xáha<sup>n</sup> Jèsús xií-yu:

—Na càchí tnúhu ndáá-í xii-ndo sã nchaa ñáyiú quide nchaa sá cuehé sá dúhá tàxi tñuní ñáhá-nã-xi xií-yu. <sup>35</sup> Te cue ñáyiú xinu cuechi te vá cúú ì<sup>n</sup>-ná cuú-yu ndihi ñáyiú dii vèhe-xi xinu cuechí-yu, dico cue déhe ñáyiú dii vèhe-xi-á<sup>n</sup> chi ì<sup>n</sup>-ni cùu ndihi ñaha-güexi xií-yu. <sup>36</sup> Te núu yúhú Yaá cúú Dèhe Yá Ndiöxí dàcácu nihnu ñaha-í xii-ndo núu nchaa yíca cuechi-ndo, te ndáá sá nchòhó cácu nihnu ndisa-ndo. <sup>37</sup> Te yúhú sa xini-í sá nchòhó cúu-ndó ñaní tnahá ndii Àbrahám, te dicó-ni sá ñã tnahá iní-ndó tnúhu càhá<sup>n</sup>-í nñu xíã<sup>n</sup> cuiní-ndó càhni ñaha-ndo. <sup>38</sup> Te yúhú càhá<sup>n</sup>-í nàcuáa ní dánèhé ñáhá Tàtà-í, te nchòhó quidé-ndó nàcuáa càhá<sup>n</sup> tãtã-ndó —càchí-gá xáha<sup>n</sup>-gá xií-yu.

<sup>39</sup> Te ní xáhã<sup>n</sup>-yu:

—Ndii Àbrahám cúú tãtã-ndí —càchí-yu xáhã<sup>n</sup>-yu xii-gá.

Te ní xáha<sup>n</sup> Jèsús:

—Núu ndisa ñaní tnahá ndii Àbrahám cúu-ndó, te cada-ndo nàcuáa ní xóo cada ndii ni cùu. <sup>40</sup> Te yúhú cueí càhá<sup>n</sup>-í ì<sup>n</sup> tnúhu ndáá nàcuáa càhá<sup>n</sup> Yá Ndiöxí cáchí tnúhu-gá xii-í, te cuiní-ndó càhni

ñaha-ndo. ¡Dico ndii Àbrahám chi ñã túú dùca<sup>n</sup> ni quide ndii! <sup>41</sup> Te nchòhó quidé-ndó nàcuáa quide tãtã-ndó —càchí-gá xáha<sup>n</sup>-gá xií-yu.

Te ní xáhã<sup>n</sup>-yu:

—Nchúhú, ñã túú yàyacá<sup>n</sup> ndécú tãtã-ndí, chi ì<sup>n</sup> dñi Yá Ndiöxí cúú tãtã-ndí —càchí-yu xáhã<sup>n</sup>-yu xii-gá.

<sup>42</sup> Te ní xáha<sup>n</sup> Jèsús:

—Núu dicó Yá Ndiöxí ndisa cùu Tãtã-ndó te cuu iní ñáhã-ndó xii-í ní cùu chi yúhú ní quee-í núu ndécú-gã véxi-í ñuyúú-a. Te ñã túú véxi-í sá cúú iní mèè-í, chi mee-gã ní tendaha ñaha-gã véxi-í. <sup>43</sup> Te ñã túú tècú tnùnì-ndó tnúhu càhá<sup>n</sup>-í chi ñã túú tnahá iní-ndó. <sup>44</sup> Te nchòhó chi tãtã-ndó cùu yucu ñávãha núu cùdñi iní-ndó quide-ndo nchaa nacuaá cùu iní-xi, chi ndéé òré ní ngáva ñuyúú duca<sup>n</sup>-ni ndècu-xi dacáhã<sup>n</sup>-xi iní-ndó sãhni tñaha-ndo. Te ñã ì<sup>n</sup> ndùu càhá<sup>n</sup>-xi ì<sup>n</sup> tnúhu ndáá chi ñã túú xica-xi ichi ndáá, chi mee-ni ìchi tnúhu ndehnde xica-xi chi duca<sup>n</sup> iní-xi. Te ñu-xi dàcahu-xi iní-ndó dàcuandehnde-ndo. <sup>45</sup> Te yúhú càhá<sup>n</sup>-í tnúhu ndáá te ñã túú cuiní-ndó quindáá iní ñáhã-ndó. <sup>46</sup> ¿Te ndèdacàa nchòhó xini-ndó sã quidé-í ì<sup>n</sup> sá cuehé sá dúhá-í?, te yúhú ñã túú nã quidé-í chi càhá<sup>n</sup> ndáá-í, ¿te ná cuendá ñã túú cuiní-ndó quindáá iní-ndó tnúhu càhá<sup>n</sup>-í? <sup>47</sup> Te nchaa ñáyiú ndècu ichi Yá Ndiöxí, ñáyiú-á<sup>n</sup> sácündedóho-yu nchaa tnúhu càhá<sup>n</sup>-gá. Te nchòhó chi ñã díú ichi Yá Ndiöxí ndécú-ndó nñu ñã túú sácündedóho-ndo tnúhu càhá<sup>n</sup>-gá —càchí-gá xáha<sup>n</sup>-gá xií-yu.

**Díhna-gá Cristú sa ndècu  
dacúxí ndii Àbrahám**

<sup>48</sup> Te ní xáha<sup>n</sup> ñáyiú isràél:

—Vãha-ni càhá<sup>n</sup>-ndí sá tèe samaritànú cúu-n, te yucu ñávãha ndècu ndihi-n —cachí-yu xáhã<sup>n</sup>-yu xii-gá.

<sup>49</sup> Te ní xáha<sup>n</sup> Jèsús:

—Yúhú, ñá túú yùcu ñávàha ndècu ndìhi-í, chi Tàtà-í quidé càhnu-í, te nchòhó da cùu úhú iní ñáhá-ndó xii-í — càchí-gá xáha<sup>n</sup>-gã xií-yu.

<sup>50</sup>Te xáha<sup>n</sup> tùcu-gá:

—Yúhú, ñá túú càchí-í sá cáda càhnu ñaha-ndo, dico Dútú Ndiòxí cuiní-gá sá cáda càhnu ñaha-ndo xii-í. Te mee-gã cáhá<sup>n</sup>-gá nõu ndèdacàa-ndo quide váha, te ndèdacàa-ndo ñá túú quide váha. <sup>51</sup>Te na càchí tnúhu ndáá-í xii-ndo sã nchàa ñáyiu na tnìi tnúhu càhá<sup>n</sup>-í te vá cuíta nihnú-yu —càchí-gá xáha<sup>n</sup>-gã xií-yu.

<sup>52</sup>Te ní xáha<sup>n</sup> tùcu ñáyiu isràél:

—Vitna te ní xiní ndáá-ndí sá yùcu ñávàha ndècu ndìhi-n, chi ndíi Àbrahám ndìhi nchaa cue téé ní xóo cáhá<sup>n</sup> tnúhu Yá Ndiòxí ndéé sanaha ñí xihí-güedé, te yòhó càchí-tu-n sã ncháá ñáyiu na tnìi tnúhu càhá<sup>n</sup>-n te vá cùu-gá-yu. <sup>53</sup>¿Náa ío-gá càhnu cuu-ó dàcúxí ñaní tnáhá-ndí ndíi Àbrahám-ã? Téé-á<sup>n</sup> dai ní xihí-dé ndìhi cue téé ní xóo cáhá<sup>n</sup> tnúhu Yá Ndiòxí ndéé sanaha. ¿Te yòhó nágá-tu cùu-n te vá cùu-n càha<sup>n</sup>-n-i? —cachí-yu xáhá<sup>n</sup>-yu.

<sup>54</sup>Te ní xáha<sup>n</sup> Jèsús:

—Te núu dicó mée-í quidé càhnu-í mée-í ñá, te ñá túú nàndfhi sá quidè-í nõu duca<sup>n</sup>. Dico Tàtà-í quidé càhnu ñaha-gá xii-í, te ñu-ni Yaá-á<sup>n</sup> càchí-ndó cùu Ndiòxí-ndó. <sup>55</sup>Te nchòhó chi ñá túú xiní-ndó-gã. Te yúhú chi xiní-í-gá. Te núu na càchí-í sá ñá túú xiní-í-gá te dàcuandehnde-í dàtná ndehnde mée-ndo. Te yúhú chi xiní ndisa-í-gá te tnìi-í nchaa tnúhu càhá<sup>n</sup>-gã. <sup>56</sup>Te ndíi Àbrahám ñaní tnáhá-ndó ñí xindecu ndéé sanaha ío ní cudíí iní ndíi sá quini ñáhá ndíi xii-í, te ní sáá nduu ñí xiní ñáhá ndíi xii-í nõu ío ní cudíí iní ndíi —càchí-gá xáha<sup>n</sup>-gã xií-yu.

<sup>57</sup>Te ní xáha<sup>n</sup> ñáyiu isràél xii Jèsús:

—Ni vátá cùhú<sup>n</sup>-gã-n údico úxí cuíá-n te càchí-n sã ñí xiní-n ndíi Àbrahám, te

ní cunaha vìhi ní xihí ndíi-á<sup>n</sup> —càchí-yu xáhá<sup>n</sup>-yu xii-gá.

<sup>58</sup>Te ní xáha<sup>n</sup> Jèsús:

—Te na càchí tnúhu ndáá-í xii-ndo sã cùmání-gã cundecu ndíi-á<sup>n</sup> ñuyúú-a te yúhú sa ndècu-gá-í —càchí-gá xáha<sup>n</sup>-gã xií-yu.

<sup>59</sup>Te sá dúcá<sup>n</sup> ñí cáhá<sup>n</sup>-gá nõu xíá<sup>n</sup> ní quehé<sup>n</sup>-yu yúú cuáha ñáhá-yu xii-gá ní cùu, te ní nguívàha-gá nõu-yu te ní quee-gá xití veñúhu cuáhá<sup>n</sup>-gã.

### Jèsús quidé tãtna-gá ii<sup>n</sup> téé cuàá

**9** Te núu xicá cùu Jèsús ní naníhí-gá ii<sup>n</sup> téé cuàá, te sa duca<sup>n</sup> tnàhí càa núu-dě ní cacu-dé. <sup>2</sup>Te ní xáha<sup>n</sup> cuè téé xica cuu ndìhi-gá xii-gá:

—Mèstrú, ¿ná cuendá dàcá<sup>n</sup> cuàá téé-ã<sup>n</sup> ní cacu-dé? ¿Sá cuendá nchaa yicá cuèchi tãtá-dě, ã<sup>n</sup> sã cuendá nchaa yicá cuèchi nãná-dě, ã<sup>n</sup> sã cuendá nchaa yicá cuèchi mee-dě dàcá<sup>n</sup> cáá-dě ní cacu-dé? —càchí-güedé xáha<sup>n</sup>-güedé xii-gá.

<sup>3</sup>Te ní xáha<sup>n</sup> Jèsús:

—Ni ñá díú sã cuendá nchaa yicá cuèchi mee-dě, te ni ñá díú sã cuendá nchaa yicá cuèchi tãtá-dě, te ni ñá díú sã cuendá nchaa yicá cuèchi nãná-dě, chi mee Yá Ndiòxí ní cuiní-gá sá dúcá<sup>n</sup> cunduu-dé sáá-dé ñuyúú-a cuendá sã ñuyúú-a quini ñáyiu nása cada ñaha Yá Ndiòxí xii-dé ndúha núu-dě. <sup>4</sup>Te vitna ío-gá nduu cùyica sá cáda-í nchaa chiú<sup>n</sup> ní táhú Yáá ní tendaha ñaha xii-í véxi-í ñuyúú-a, chi sáá nduu te vá ndácú-gá-í cada-í chiú<sup>n</sup>-gá. <sup>5</sup>Te nini ndècu-gá-í ñuyúú-a te dándixi túu-í iní nchaa ñáyiu cuendá cutnùni iní-yu nàcuáa nduu cuendá Yá Ndiòxí —càchí-gá xáha<sup>n</sup>-gã xii-güedé.

<sup>6</sup>Te sátá dúcá<sup>n</sup> ñí cáhá<sup>n</sup>-gá, te ní sati-gá díí-gá núu ñúhú te ní dácá-gá luha ñuhu ní cuáha ndéhyú, te ndéhyú-ã<sup>n</sup> ñí dácánùu-gá ndúú xio núu téé cuàá-á<sup>n</sup>. <sup>7</sup>Te ní xáha<sup>n</sup>-gã xii-dé:

—Quíhí<sup>n</sup>-n nàquete-n núu-n ndùte tanquí Silòé —càchí-gá xáha<sup>n</sup>-gǎ xii-dé. Te Silòé-án quée-xí tnùhu mèè-yu: Tée xica chiu<sup>n</sup>.

Te ní sáhá<sup>n</sup> tée cuàá-á<sup>n</sup> nǐ naquete-dé núu-dě, te òré ní ndexio-dé te sa ndèhe-dé. <sup>8</sup>Te nchaa ñáyiú ndècu yatni núú ndécú-dě ndihí nchaa ñáyiú xini ñáhá xii-dé núú xicá<sup>n</sup> ndàhú-dé ní xítñàhá-yu:

—¿Náa ñá díú tée-ǎ<sup>n</sup> ní xóo cǎcá<sup>n</sup> ndàhú-dé? —càchí-yu xítñàhá-yu.

<sup>9</sup>Te davá-yu càchí-yu sá díú-dě, te davá-yu càchí-yu sá ñà díú-dě, dico duca<sup>n</sup> càa-dé, càchí-yu xítñàhá-yu.

Dico mee-dě ní xáha<sup>n</sup>-dě xií-yu sá díú-dě.

<sup>10</sup>Te ní xicá<sup>n</sup> tnúhũ-yu núú-dě, te xǎhǎ<sup>n</sup>-yu:

—¿Nása ní cuu núu ní ndúha núú-n ndèhe-n vitna? —cachí-yu xǎhǎ<sup>n</sup>-yu xii-dé.

<sup>11</sup>Te ní xáha<sup>n</sup>-dě:

—Tée nàni Jesús-ǎ<sup>n</sup> ní cadúha-dé luha ndéhyú te ní dácánù-dé núú-í, te ní táuchíú<sup>n</sup>-dě ní sáhá<sup>n</sup>-í tànquí Silòé ní naquete-í núú-í, te òré-á<sup>n</sup> nǐ cuu cundehe-í —càchí-dé xáha<sup>n</sup>-dě xií-yu.

<sup>12</sup>Te ní xicá<sup>n</sup> tnúhú tùcú-yu núú-dě, te xǎhǎ<sup>n</sup>-yu:

—¿Te ndèè ndécú tée-á<sup>n</sup>? —càchí-yu xǎhǎ<sup>n</sup>-yu xii-dé.

Te ní xáha<sup>n</sup>-dě:

—Ñá túú xini-í —càchí-dé xáha<sup>n</sup>-dě xií-yu.

### **Cue tée cùu fariséú ndátnúhu-güedé ndihí tée ní ndúha núú-xi**

<sup>13</sup>Te ndèca-güedé tée ní ndúha núú-xi-á<sup>n</sup> cuáhá<sup>n</sup> núú cuè tée cùu fariséú. <sup>14</sup>Te cuendá sá ndùu ndetatú-yu ní cadúha Jèsús ndéhyú nǐ dácánù-gá núú tée-á<sup>n</sup> te ní ndúha, <sup>15</sup>xíǎ<sup>n</sup> nùu ní xicá<sup>n</sup> tnúhú cuè tée cùu fariséú núú-dě, te xáha<sup>n</sup>-güedé:

—¿Nása ní cuu ní ndúha núú-n? —càchí-güedé xáha<sup>n</sup>-güedé xii-dé.

Te ní xáha<sup>n</sup>-dě xii-güedé:

—Hí<sup>n</sup> tée ní dácánù-dé ndéhyú núú-í te ní sáhá<sup>n</sup>-í ní naquete-í, te ní cuu ndèhe-í vitna —càchí-dé xáha<sup>n</sup>-dě xii-güedé.

<sup>16</sup>Te dava cue tée cùu fariséú ní xítñàha-güedé:

—Ñá díú Yǎ Ndiòxí ní tèndaha ñaha-gá xii tée-ǎ<sup>n</sup> véxi-dé nùu duha quide-dé nchaa sá vǎ yòo tnàhí ndàcu cada, te ñá túú sàndáá ini-dé canehe íi-dě nduu ndetatú-ó —càchí-güedé xítñàha-güedé.

Te dava-güedé ní xítñàha-güedé:

—¿Nása ndacu-dé cada-dé sá vǎ yòo tnàhí ndàcu cada te núu cùu-dé tée yícá cuèchi? —càchí-güedé xítñàha-güedé.

Te ñá túú ní cùu hí<sup>n</sup>nuu-güedé tnúhu ní cáhá<sup>n</sup>-güedé. <sup>17</sup>Te ní xicá<sup>n</sup> tnúhú tùcu-güedé núú tée ní ndúha núú-xi-á<sup>n</sup>, te xáha<sup>n</sup>-güedé:

—Te yòhó, ¿nása càchí-n cuendá tée ní quide tátna núú-n te ní ndúha? —càchí-güedé xáha<sup>n</sup>-güedé xii-dé.

Te ní xáha<sup>n</sup>-dě:

—Yúhú càchí-í sá íí<sup>n</sup> tée càhá<sup>n</sup> tnúhu Yá Ndiòxí cúú-dě —càchí-dé xáha<sup>n</sup>-dě xii-güedé.

<sup>18</sup>Dico cue tée isràèl ñá ní sàndáá ini-güedé sá cuàá-dé ní cùu, chí cuendá sa ní ndúha núú-dě ní xini ñáhá-güedé, te xǎ<sup>n</sup> nùu ní cana-güedé tátá-dě ndihí nǎná-dě, <sup>19</sup>te ní xicá<sup>n</sup> tnúhú-güedé núú-yu, te xáha<sup>n</sup>-güedé:

—¿Diu tée-a déhe-ndo tée càchí-ndó cuàá-dé ní cacu-dé-ǎ<sup>n</sup>? ¿Te nása ní cuu ní ndúha núú-dě? —càchí-güedé xáha<sup>n</sup>-güedé xií-yu.

<sup>20</sup>Te ní xáha<sup>n</sup> tátá-dě ndihí nǎná-dě:

—Diu déhe-ndí cúú-dě te sa cuàá ndisa-dé ní cacu-dé, <sup>21</sup>dico ñá túú xini-ndí nása ní cuu ní ndúha núú-dě, te ni ñá túú xini-ndí yoo ní quide tátna. Chí cǎcá<sup>n</sup> tnúhú nùú méé-dě xǎ<sup>n</sup>

nũu sa sàcuéhé-dě, te na càhá<sup>n</sup>-dé nũu nása ní cuu ní ndúha núú-dě —càchí-yu xáhã<sup>n</sup>-yu xii-güedé.

<sup>22</sup> Duha ní cáhá<sup>n</sup> tătă-dě ndihi năná-dě ní xáhã<sup>n</sup>-yu xii-güedé cuendá sá yùhú-yu cue tée cunuú núú ñáyiú isràél, chi cue tée-ã<sup>n</sup> sa ní ndatnúhu-güedé ní cuu ì<sup>n</sup>nuu-güedé sá nũu ndèdaca ñáyiú na cáhá<sup>n</sup> sá Jèsús cuú-gã Crístú Yaá ní tendaha Yã Ndiöxí véxi ñuyú-a, te vá dãnã-gã-güedé qufhu-yu veñúhu. <sup>23</sup> Núu xíã<sup>n</sup> ní xáha<sup>n</sup> tătă-dě ndihi năná-dě sá ná càcá<sup>n</sup> tnúhú-güedé núú méé-dě chi sa sacuéhé-dě.

<sup>24</sup> Te xíã<sup>n</sup> nũu ní cana tucu-güedé tée ní ndúha núú-xi-ã<sup>n</sup>, te ní xáha<sup>n</sup>-güedé:

—Cáhá<sup>n</sup>-n ì<sup>n</sup> tnúhu ndáá chi Yã Ndiöxí ndéhé ndi-gã nàcuáa ní cuu ní ndúha núú-n, chi nchúhú xìní-ndí sá dícó ì<sup>n</sup> tée ndècu yíca cuèchi-xi cùu tée càchí-n ñi quide tátna núú-n —càchí-güedé xáha<sup>n</sup>-güedé xii-dé.

<sup>25</sup> Te ní xáha<sup>n</sup>-dě:

—Yúhú, ñá túú xìní-í te núu tée ndècu yíca cuèchi-xi cùu-dé àdi ñáhá. Dícó-ni sá xìní-í sá cuáá-í ní cùu te vitna ní cuu cundehe-í —càchí-dé xáha<sup>n</sup>-dë xii-güedé.

<sup>26</sup> Te ní xíca<sup>n</sup> tnúhú tucu-güedé núú-dë, te xáha<sup>n</sup>-güedé:

—¿Nása ní quide ñaha-dë xii-n te ní ndúha núú-n-í? —càchí-güedé xáha<sup>n</sup>-güedé xii-dé.

<sup>27</sup> Te ní xáha<sup>n</sup>-dë:

—Yúhú sa ní cáhá<sup>n</sup>-í te ñá túú quide cuendá-ndó. ¿Te ná cuendá cuiní-ndó càchí tnúhu-ni tucu-í? ¿Á tnáhá-ndó cuiní-ndó quindáá iní-ndó tnúhu càhá<sup>n</sup>-dé? —càchí-dé xáha<sup>n</sup>-dë xii-güedé.

<sup>28</sup> Te ní cudéé<sup>n</sup>-güedé núú-dë, te ní xáha<sup>n</sup>-güedé xii-dé:

—Te núu yòhó cuiní-n chinchícú<sup>n</sup>-n tée-ã<sup>n</sup> te cuahá<sup>n</sup>, dico nchúhú chi canchícú<sup>n</sup> nihnu nahi-ni-ndí nàcuáa ní cáhá<sup>n</sup> ndíi Moisés. <sup>29</sup> Te nchúhú chi ñaha-ndí

sá Yã Ndiöxí ní cáhá<sup>n</sup> ndihi-gã ndíi Moisés, dico tée càchí-n-ã<sup>n</sup> chi ni ñà túú xìní-ndí ndèé tée cùu-dé —càchí-güedé xáha<sup>n</sup>-güedé xii-dé.

<sup>30</sup> Te ní xáha<sup>n</sup> tée ní ndúha núú-xi-ã<sup>n</sup>:

—¿Te náa ñá dífú nchòhó càchí-ndó sá ìo túha-ndo? Te núu duca<sup>n</sup> càhá<sup>n</sup>-ndó sá ñà túú xìní-ndó ndèé tée cùu-dé, te diu-dé ní quide tátna-dé núú-í ní ndúha —càchí-dé xáha<sup>n</sup>-dë xii-güedé.

Te xáha<sup>n</sup> tucu-dé:

<sup>31</sup> —Xìní-ó sá Yã Ndiöxí ñá túú tédòho-gã tnúhu càhá<sup>n</sup> ñáyiú quide nchaa sá cuèhé sá dúhá, chi nchaa ñáyiú quide cahnu ñaha xii-gã te quidé-yu nchaa nàcuáa cùu iní-gã, te ñáyiú-ã<sup>n</sup> tédòho-gã tnúhu càhá<sup>n</sup>-yu. <sup>32</sup> Te ñá ì<sup>n</sup> ndùu cáhá<sup>n</sup> ñáyiú cuendá ì<sup>n</sup> tée cada tátna núú ì<sup>n</sup> ñáyiú cuáá ndéé ní cacu-xi te ndúha. <sup>33</sup> Te núu ñá dífú mèe Yã Ndiöxí ní tendaha ñaha-gã xii tée-ã<sup>n</sup> véxi-dé ñá, te vá ndácú-dë cada tátna-dé núú-í ní cùu —cachí-dé xáha<sup>n</sup>-dë xii-güedé.

<sup>34</sup> Te ní xáha<sup>n</sup>-güedé:

—Dico yòhó ndèé yatni vài cuèchi sa ta quide-n véxi, ¿te vitna nacanú ichi ñaha-n xii-ndí cáhá<sup>n</sup>-n-ã<sup>n</sup>? —càchí-güedé xáha<sup>n</sup>-güedé xii-dé.

Te ní queñuhu ñaha-güedé xii-dé tnuú-güedé ñá túú ní dàña-gã-güedé níhí tnáhá ndíhi ñaha-dé xii-güedé.

### **Ñáyiú ñá túú ndixi túu iní cuendá nchaa sá cuèhé sá dúhá quidé-yu**

<sup>35</sup> Te ní níhí Jèsús tnúhu sá ñi queñuhu-güedé tée ní cuhú núú-xi-ã<sup>n</sup> tnuú-güedé cuendá sá vã tnáhá tnúhu ndíhi ñaha-gã-dé xii-güedé, te ní naníhí ñáhá-gã xii-dé te ní xáha<sup>n</sup>-gã:

—¿Sàndáá iní-n Dèhe Yã Ndiöxí-ã<sup>n</sup>? —càchí-gã xáha<sup>n</sup>-gã.

<sup>36</sup> Te ní xáha<sup>n</sup> tée ní cuhú núú-xi-ã<sup>n</sup>:

—Mèstrú, cachí tnúhu núu ndèé ndécú tée-ã<sup>n</sup> cuendá quindáá iní-í-dé —càchí-dé xáha<sup>n</sup>-dë xii-gã.

<sup>37</sup> Te ní xáha<sup>n</sup> Jèsús:

—Sa xiní-n-dě chi diu-dé cúu yǔhu téé ndàtnúhu ndíhi-n —càchí-gá xáha<sup>n</sup>-gǎ xii-dé.

<sup>38</sup>Te ní nguǐmǐ xítí-dě núu-gǎ, te ní xáha<sup>n</sup>-dě:

—Xítohó Jesucristú, sàndáá iní ñáhà-í xii-n —càchí-dé xáha<sup>n</sup>-dě xii-gá.

<sup>39</sup>Te ní xáha<sup>n</sup> tùcu Jesús:

—Yúhú véxi-í ñuyíú-a cada ndáá-í cuéchi ñáyi. Te nchaa ñáyi ñá túú quide váha cúu-yu dàtná ì<sup>n</sup> ñáyi cuàá, dico nchaa ñáyi cùnuní iní-xi sá ñà túú quide váha, te núu na quìndáá iní-yu tnúhu càhá<sup>n</sup>-í, te cada iní-ndó sǎ dàtná sǎ ní nacaá<sup>n</sup> núu-yu chi tní<sup>n</sup>-yu tnúhu càhá<sup>n</sup>-í. Te ñáyi càchí sǎ quidé váha vá ñuu núu-yu cuéchi-yu chi quesàhá-yu sǎ ìo ndáá quidě-yu, ñáyi-á<sup>n</sup> cúu-yu dàtná ì<sup>n</sup> ñáyi cuàá, chi vá ndíxí tǔu iní-yu sá ñà túú quide váha-yu ndécú-yu, te vá tní<sup>n</sup>-yu tnúhu càhá<sup>n</sup>-í —càchí-gá xáha<sup>n</sup>-gǎ xii-dé.

<sup>40</sup>Te sǎ dúcá<sup>n</sup> ní càhá<sup>n</sup>-gǎ, núu ní càhá<sup>n</sup> ì<sup>n</sup> úú cue téé cùu fariséú, te xáha<sup>n</sup>-güedé:

—¿Te náa tnhá nchúhú cuàá-ndí càhá<sup>n</sup>-n-ǎ<sup>n</sup>? —càchí-güedé xáha<sup>n</sup>-güedé xii-gá.

<sup>41</sup>Te ní xáha<sup>n</sup> Jèsús:

—Te núu dicó nchòhó cuàá-ndó ñá, te vá cùndècu cuéchi-ndo ní cùu, dico càchí-ndó sǎ ndéhé-ndó ì<sup>n</sup> sǎ quidé-ndó te ñá ndáá, núu xiǎ<sup>n</sup> ìo ndècu cuéchi-ndo.

### Jèsús càhá<sup>n</sup>-gǎ cuendá cùrrálí mbéé

**10** Te na càchí tnúhu ndáá-í xii-ndo sǎ ì<sup>n</sup> téé ñá túú quǐhu ndàa yuyehe ì<sup>n</sup> cùrrálí mbéé, te cùtexínu-ni na cuídó-dé, téé-á<sup>n</sup> cúu-dě ñádúhú. <sup>2</sup>Dico téé quǐhu ichi yèhe cùrrálí-güedi, téé-á<sup>n</sup> cúu-dě xítohó-güedi. <sup>3</sup>Te téé ndéé yèhe cùrrálí-güedi nacaá<sup>n</sup>-dé te cuánguihu xítohó-güedi te ní càhá<sup>n</sup>-dé, te ní nucúhu<sup>n</sup> ndudú ñáhá-güedi xii-dé. Te ní càhá<sup>n</sup> díú-dě-güedi

te ní queñuhu-dé-güedi cùrrálí.

<sup>4</sup>Te sǎtá ní quee-güedi cùrrálí, te ní ngódó núu-dě núu-güedi, te ní nguíta nchicú<sup>n</sup> ñáhá-güedi xii-dé chi ní nucúhu<sup>n</sup> ndudú ñáhá-güedi.

<sup>5</sup>Te ñá túú chinchicú<sup>n</sup>-güedi ì<sup>n</sup> téé tàtú, chi nucúhu<sup>n</sup> ndudú-güedi sǎ ñà díú xítohó-güedi cùu-dé, núu xiǎ<sup>n</sup> xínú-güedi núu-dě —càchí-gá xáha<sup>n</sup>-gǎ xii-güedé.

<sup>6</sup>Duha ní càhá<sup>n</sup> Jèsús cuendá sǎ cuíní-gǎ dacuàhá-yu tnúhu-gǎ ní cùu, dico ñá ní tècú tnùní-yu nása ndùu tnúhu ní càhá<sup>n</sup>-gǎ.

### Jèsús cúu-gǎ dàtná ì<sup>n</sup> toli

<sup>7</sup>Te ní xáha<sup>n</sup> tùcu Jesús xii-güedé:

—Na càchí tnúhu ndáá-í xii-ndo sǎ yǔhú cúu-í dàtná ì<sup>n</sup> yèhe cùrrálí núu ndíhu cue mbéé. <sup>8</sup>Te nchaa cue téé sa yòdo nuu-gǎ ní quixi ní dándàhú-güedé ñáyi cùu-güedé dàtná ñádúhú dùhu-güedé cue mbéé ní cùu, dico ñá ní quide cuendá ñáhá-güedi xii-güedé, chi ní cutnùní iní-güedi sǎ ñà díú xítohó-güedi cùu-güedé. <sup>9</sup>Te yúhú cúu-í dàtná yuyèhe cùrrálí cue mbéé. Te duca<sup>n</sup> sǎtnahá-xi cùu-í chi nchaa ñáyi na tǔha ñaha xii-í te naníhí tǎhú-yu. Te cúu-yu dàtná cue mbéé quiti xíquee cùrrálí-xi cuàhá<sup>n</sup>-güedi núu cáá ité caxi-güedi, te dàtnùní cuándihu-ná-güedi cùrrálí, duca<sup>n</sup> sǎtnahá-xi cùu-yu.

<sup>10</sup>Ñádúhú òré véxi-dé chi dùhu-dé, sǎhni-dé te dànaa-dé mbéé, dico yúhú chi véxi-í cuendá sǎ naníhí tǎhú-ndó te ìo cudí iní-ndó cùnu cuechi-ndo núu Dütú Ndíoxí ní caa ní quíhí<sup>n</sup>. <sup>11</sup>Te yúhú cúu-í dàtná ì<sup>n</sup> toli téé ìo nèhe cuendá mbéé-xi, chi téé-á<sup>n</sup> cuéi na cùu-dé sǎ cúu-xí mbéé-dé cuendá-ñǎ sǎ ná cǎcu-güedi. <sup>12</sup>Te núu ì<sup>n</sup> téé na còto ñaha xii-güedi, te téé-á<sup>n</sup> cuendá-ni sǎ ñúhú yǎhu-dé xító-dě-güedi. Te núu na quíní-dé sǎá

ii<sup>n</sup> quiti dée<sup>n</sup> te dàña-dé-güedi xinu-dé, te ndihí-güedi xité nuu ñaha quiti dée<sup>n</sup>-á<sup>n</sup>, chi ná díú mèi xítóhó-güedi cùu-dé. <sup>13</sup> Chi cuendá-ni sá ñúhú yáhu-dé xító-dé-güedi núu ñá túú ná ndihú iní-dé cuéi na dândihí ñaha quiti cuihna. <sup>14</sup> Te yúhú cùu-í dàtná ii<sup>n</sup> téé ío váha xito mbéé-xi, chi téé-á<sup>n</sup> da ii<sup>n</sup> da ii<sup>n</sup>-di xiní-í-dé nàcuáa ndáa-di, te duca<sup>n</sup> xiní ñáhá-güedi xii-dé. Te duca<sup>n</sup> sátnahá-xi cùu yúhú ndihí nchaa ñáyiú sàndáá iní ñáhá xii-í, chi yúhú xiní-í-yu te duca<sup>n</sup> mèe-yu xiní ñáhá-yu xii-í.

<sup>15</sup> "Te ñu-ni duca<sup>n</sup> cùu-í ndihí Tàtá-í, chi xiní ñáhá-gá xii-í te xiní-í-gá. Te sáá nduu cùu-í cuendá nchaa ñáyiú sàndáá iní ñáhá xii-í. <sup>16</sup> Te ndècu-gá ñáyiú vátá quindáá iní ñáhá-gá xii-í. Te xiní ñuhu-xi cundedóho-yu tnúhu-í te quindáá iní ñáhá-yu cuendá ii<sup>n</sup>-ná ichi cuú-yu, te duca<sup>n</sup> cùndecu ii<sup>n</sup>-ná téé coto ñaha xii-yu cuu-dé dàtná ii<sup>n</sup> tòlí-yu, te téé coto ñaha xii-yu-á<sup>n</sup> cúu yúhú.

<sup>17</sup> "Te Tàtá-í ío cùdíí iní ñáhá-gá xii-í cuendá sá sàá ii<sup>n</sup> nduu te cuú-í, te cuú-í chi duca<sup>n</sup> càchí iní-í, te ñá díú sá cúu iní ñáyiú ñuyúí-a cuú-í, te cuú-í dico ndoto-í. <sup>18</sup> Te vá yóo ii<sup>n</sup> te ndacu cahni ñaha xii-í, te núu ñá díú sá cúu iní mèe-í cuú-í. Te dàtná-ni cùu iní-í sá cùu-í te ñu-ni duca<sup>n</sup> ndòto-í chi duca<sup>n</sup> ní cachí Tàtá-í Dútú Ndiòxí cunduu —càchí-gá xáha<sup>n</sup>-gá xii-güedé.

<sup>19</sup> Te sá dúcá<sup>n</sup> ní cáhá<sup>n</sup>-gá te ñá ní cùu ii<sup>n</sup> nuu tucu ñáyiú isràél. <sup>20</sup> Te davá-yu ní xitnàhá-yu:

—¿Ná cuendá sàndáá-tu iní-ndó tnúhu càhá<sup>n</sup> téé-á<sup>n</sup>, te yucu ñávàha ndècu ndihí-dé, lúcú téé-á<sup>n</sup>? —càchí-yu xitnàhá-yu.

<sup>21</sup> Te davá-yu ní xitnàhá-yu:

—¿Náa xiní-ndó ii<sup>n</sup> téé ndècu ndihí yucu ñávàha duha váha càhá<sup>n</sup>-dé? ¿Náa xiní-ndó núu ndacu yucu ñávàha cada tátna-xi núu ii<sup>n</sup> téé cuáá te ndúha? —càchí-yu xitnàhá-yu.

### Ñáyiú isràél dáquèe tíhü-yu Jèsús

<sup>22</sup> Te ndí tnahá cuía ndadá càhnü-yu vico veñuhu càhnu sá ío cùnuu ñuú Jerusàlén, te mei yóo quidé víxi<sup>n</sup>-xi quidé-yu vico-á<sup>n</sup>. <sup>23</sup> Te corrèdór veñuhu-á<sup>n</sup> nání-xí Salomón, te xíá<sup>n</sup> xícá cùu Jèsús. <sup>24</sup> Te ní chítú níhnú ñáyiú isràél núu-gá, te ní xáhá<sup>n</sup>-yu:

—¿Ná ndéé órè cachí tnúhu ndáá-n, te núu sá Cristú Yaá ní tendaha Yá Ndiòxí véxi ñuyúí-a cùu-n, àdi ná téé cùu-n?, cáhá<sup>n</sup>-ni-n —càchí-yu xáhá<sup>n</sup>-yu xii-gá.

<sup>25</sup> Te ní xáha<sup>n</sup> Jèsús:

—Sa ní cachí tnúhu-í te ñá sàndáá iní-ndó, te ndèhe-ndo sá vái núú sá quidé-í sá ní táúchíú<sup>n</sup> Tàtá-í cada-í, te cùu-xi ii<sup>n</sup> sá cùtnùní iní-ndó ná téé cùu-í.

<sup>26</sup> Dico nchòhó ñá sàndáá iní-ndó, chi ñá túú cùu-ndo ñáyiú ní chitnahá ñáhá xii-í.

<sup>27</sup> Chi nchaa ñáyiú ní chitnahá ñáhá xii-í cùu-yu dàtná cue mbéé quiti xìndecu ndihí xítóhó-xi chi nùcúhu<sup>n</sup> ndudú-güedi xítóhó-güedi, te duca<sup>n</sup> nàquiní ñáhá-ní xítóhó-güedi xii-güedi. Duca<sup>n</sup> sátnahá-xi cùu nchaa ñáyiú ní chitnahá ñáhá xii-í.

<sup>28</sup> Te yúhú cada-í te nduu táhü-yu cundecu ndihí ñáhá-yu xii-í ní caa ní quíhí<sup>n</sup> te vá íí<sup>n</sup> nduu-gá cuíta nihnú-yu, te ní vá yóo ii<sup>n</sup> ndacu naquendeé ñáhá xii-yu ndaha-í. <sup>29</sup> Chi Tàtá-í ní taxi cuendá ñáhá-gá xii-yu. Te ío cùnuu-gá núu xíá<sup>n</sup> vá yóo ii<sup>n</sup> ndacu naquendeé ñáhá xii-yu ndaha-gá. <sup>30</sup> Yúhú ndihí Tàtá-í Dútú Ndiòxí ii<sup>n</sup>-ni cùu-ndí —càchí-gá xáha<sup>n</sup>-gá xii-yu.

<sup>31</sup> Te ní quehe<sup>n</sup> tucu ñáyiú isràél yúú cuáha ñáhá-yu xii-gá ní cùu.

<sup>32</sup> Te ní xáha<sup>n</sup>-gá xii-yu:

—Ío cuéhé sá vaha ní quide-í núu-ndó ní chindee ñaha Tàtá-í Dútú Ndiòxí. ¿Te ndèdacáa sá ñá tnahá iní-ndó núu cuíní-ndó cuáha ñaha-ndo yúú xii-í-i? —càchí-gá xáha<sup>n</sup>-gá xii-yu.

<sup>33</sup> Te ní xáha<sup>n</sup> ñáyiú isràél:

—Ñá dǎú cuendá nchaa sá vǎha ni quide-n cuiní-ndí cuáha ñaha-ndǐ yúú xii-n, chi ìñ dǐi-ni sá ìo càhá<sup>n</sup> úhú-n cuendá Yǎ Ndiǒxí. Te dicó ìñ tée ñuyúú-a cùu-n te cǎchí-n sǎ cùú-n Ndiǒxí — cǎchí-yu xǎhá<sup>n</sup>-yu xii-gǎ.

<sup>34</sup> Te ní xáha<sup>n</sup> Jèsús:

—Núú tǔtú Yǎ Ndiǒxí sǎ ndécú ndǐhi-ndo càhá<sup>n</sup>-xí nàcuáa ní càhá<sup>n</sup>-gǎ, te duha ní cǎchí-gǎ: “Nchòhó quidé-ndó nǔú-í”, duha ní cǎchí-gǎ. <sup>35</sup> Te nàha-o sǎ vǎ cùú quèhndé nihnu-o tñhu yòdo tñuní núú tǔtú Yǎ Ndiǒxí, chi mee-gǎ ní cǎchí-gǎ sǎ cǎdá-yu núú-gǎ, te vǎ cǎchí-ó sǎ ñǎ ndáa. <sup>36</sup> Te núú duca<sup>n</sup> ní càhá<sup>n</sup>-gǎ sǎ nǔú-gǎ quidé nchaa ñáyiú ní sándáá iní ñáhá xii-gǎ ñá, ¿te ná cuendá cúdèé<sup>n</sup>-ndó nǔú yǔhú sǎ cǎchí-í sǎ cùú-í Déhe-gǎ? Te mee Yǎ Ndiǒxí ní tendaha ñaha-gǎ xii-í véxi-í ñuyúú-a sǎ cǎdá-í chiú<sup>n</sup>-gǎ. <sup>37</sup> Te núú ñá túú quide-í nàcuáa ní táuchíú<sup>n</sup> Tǎtà-í cada-í ñá, te vǎ quindáá iní ñáhá-ndó. <sup>38</sup> Te núú quide-í ñá, te cuèí vǎ quindáá iní ñáhá-ndó xii mee-í dico quindáá iní-ndó nchaa chiú<sup>n</sup> quide-í. Duca<sup>n</sup> te cutnùnì ndáá iní-ndó sǎ Yǎ Ndiǒxí ndécú ndǐhi-í te ìñ-ni cùu-ndí — cǎchí-gǎ xáha<sup>n</sup>-gǎ xii-yu.

<sup>39</sup> Te ní cuiní-güedé tñǐ ñaha tǔcu-güedé xii-gǎ quǐhí<sup>n</sup>-gǎ vecaá ní cùu, dico ní xinu núú ñáhá-gǎ xii-güedé.

<sup>40</sup> Te ní xica-gǎ cuáhá<sup>n</sup>-gǎ ndáa ingá xio yúte Jòrdán núú ní xóo dacuàndute ndíí Juàá ñáyiú ndéé díhna, yàcá<sup>n</sup> ní xindecu-gǎ. <sup>41</sup> Te yàcá<sup>n</sup> ìo vǎi ñáyiú ní sáhá<sup>n</sup> ní càhá<sup>n</sup> ndǐhi ñaha xii-gǎ, te ní xitnàhá-yu:

—Ndíí Juàá, cuèí ñá túú ní quide ndíí sǎ vǎ yòo tñàhí ndàcu cada dico ndáá ní càhá<sup>n</sup> ndíí, chi dàtná-ni ní càhá<sup>n</sup> ndíí quide tée-a — cǎchí-yu xitnàhá-yu.

<sup>42</sup> Te yàcá<sup>n</sup> ìo vǎi-yu ní sándáá iní ñáhá-yu xii-gǎ.

## Ní xǐhí té Lǎzarú

**11** Nǔú Bètaniá ní xindecu ìñ tée ní xinani-dè Lǎzarú. Te cǎhú víhí ní tñahá-dé ní cuhú-dé, te ní xindecu ndǐhi-dé cue cúha-dé tá Màriá ndǐhi tá Màrta chi xía<sup>n</sup> ñtúú-yu. <sup>2</sup> Te tá Màriá-á<sup>n</sup> cùú-xí xǐchí ní sódo àcítí sàhá<sup>n</sup> tñámí sáhá Jèsús, te ní nadayichí-xí sáhá-gǎ ndǐhi idi díquí-xí. Te cuendá sǎ cùhú cúha-yu té Lǎzarú, <sup>3</sup> núú ní tendàhá-yu ñáyiú nàha tñúhu cuáhá<sup>n</sup> núú Jèsús, te xǎhá<sup>n</sup>-yu xii-gǎ:

—Mèstrú, tée ìo cùu iní-n ìo cǎhú tñahá-dé cùhú-dé — cǎchí-yu xǎhá<sup>n</sup>-yu xii-gǎ.

<sup>4</sup> Te sǎ dúcá<sup>n</sup> càa tñúhu ní sáá, núú ní xáha<sup>n</sup> Jèsús xii-yu:

—Dico cuéhé-ǎ<sup>n</sup> chi vǎ cùú-dé sǎ cùú dúcá<sup>n</sup>-dè, chi Yǎ Ndiǒxí cuiní-gǎ sǎ quiní-yu nchaa sǎ cǎdá-gǎ cuendá chiñuhu ñahá-yu xii-gǎ, te díu-ni duca<sup>n</sup> chiñuhu ñahá-yu xii yúhú Déhe-gǎ — cǎchí-gǎ xáha<sup>n</sup>-gǎ xii-yu.

<sup>5</sup> Te cuèí ìo cùu iní ñáhá Jèsús xii té Lǎzarú ndǐhi cue cúha-dé <sup>6</sup> dico òré ní níhí-gǎ tñúhu, te ní cuyaa-gǎ úú-gǎ nduu núú ndécú-gǎ. <sup>7</sup> Te ní xáha<sup>n</sup>-gǎ xii cue tée xica cuu ndǐhi-gǎ:

—Na quǐhí<sup>n</sup> tucu-o dìstrítú Jùdeá — cǎchí-gǎ xáha<sup>n</sup>-gǎ xii-güedé.

<sup>8</sup> Te ní xáha<sup>n</sup> cuè tée xica cuu ndǐhi-gǎ xii-gǎ:

—Mèstrú, vitna-ni cuiní cue tée is-ràèl xindecu yàcá<sup>n</sup> cuáha ñaha-güedé xii-n yùú ní cùu, ¿te cuiní-ni tucu-n quǐhí<sup>n</sup>-n-ú? — cǎchí-güedé xáha<sup>n</sup>-güedé xii-gǎ.

<sup>9</sup> Te ní xáha<sup>n</sup> Jèsús:

—Úxúú òré cùú ìñ<sup>n</sup> nduu, te núú nduu na càca cuu-o, te ñá túú ñá candaundeé-ó chi cùtnuní núú-ó chi dító. <sup>10</sup> Dico núú niú ná càca cuu-o, te ìo ná candaundeé-ó chi vǎ cùtnuní núú-ó — cǎchí-gǎ xáha<sup>n</sup>-gǎ xii-güedé.

<sup>11</sup> Te ní xáha<sup>n</sup> Jèsús:



—Té Lăzarú tée ío váha tnàhá tnúhu ndihi-o ní xídí-dé dico quíhí<sup>n</sup>-ó chi ndocani-o-dě —càchí-gá xáha<sup>n</sup>-gă xii-güedě.

<sup>12</sup> Te ní xáha<sup>n</sup>-güedě xii-gá:

—Mèstrú, te núu xídí-dé te váa sa ta ndúha-dé cuáhá<sup>n</sup> —càchí-güedě xáha<sup>n</sup>-güedě xii-gá.

<sup>13</sup> Duha ní cáhá<sup>n</sup> Jèsús, chi té Lăzarú sa ní xíhí-dé te cue tée xica cuu ndihi-gá ní sani iní-güedě sá ní xídí ndisa-dé. <sup>14</sup> Te Jèsús ní xáha<sup>n</sup> ndáá-gá xii-güedě:

—Sa ní xíhí té Lăzarú. <sup>15</sup> Váha-gá sá ñă ní sáhá<sup>n</sup>-í quíngoto-í-dé, chi ndècu ingá chiú<sup>n</sup> cada-í quini-ndó, te quindáá iní ñáhá-gă-ndó xii-í, te vitna na quíhí<sup>n</sup>-ó núu ndécú yìqui cunú ndí —càchí-gá xáha<sup>n</sup>-gă xii-güedě.

<sup>16</sup> Te té Măxí tée xáha<sup>n</sup>-güedě cuáchí ní xáha<sup>n</sup>-dě xii dava-gă-güedě:

—Na quíhí<sup>n</sup>-ó nchàa-o chi yàcá<sup>n</sup> cuú-ó ndihi-dé —càchí-dé xáha<sup>n</sup>-dě xii-güedě.

### **Jèsús càhá<sup>n</sup>-gá sá cuèi na cùu ñáyiú dico ndotó-yu cundecú-yu ndihi-gá**

<sup>17</sup> Te òré ní sáá Jèsús ñúu Bètaniá, te ní xáhă<sup>n</sup>-yu sá sà ní cuu cúmí nduu ní xíhí té Lăzarú. <sup>18</sup> Te ñúu-á<sup>n</sup> cáá yàtni-ni-gá ñúu Jerusálén, dàtná cuádava-ná òré cuhu<sup>n</sup>-o ìchi te saá-ó. <sup>19</sup> Núu xíă<sup>n</sup> vâi ñáyiú isrâél ní sáhá<sup>n</sup>-yu ní cáhá<sup>n</sup> ndihí-yu tá Mărta ndihi cùhú-xi tá Măriá, te ní sãñáhá-yu tnúhu ndee iní sá dúcá<sup>n</sup> ní xíhí cúha-yu. <sup>20</sup> Te ní níhí tă Mărta tnúhu sá ñúhú Jèsús ichi cuáhá<sup>n</sup>-gá núu ndécú-yu núu ní sáhá<sup>n</sup>-xi ní sátnahá-xi-gă, te cùhú-xi tá Măriá ní ndóo-xi vehe. <sup>21</sup> Te òré ní naníhí tă Mărta Jèsús, te ní xáha<sup>n</sup>-xi xii-gá:

—Mèstrú, te núu dícó ní xĩndecu-n ìha te vá cùu cúha-ndí ní cùu. <sup>22</sup> Te cuèi vitna te núu ná sá ná càcá<sup>n</sup>-n núu Yă Ndiôxí te taxi-gá xii-n —càchí-xi xáha<sup>n</sup>-xi xii-gá.

<sup>23</sup> Te ní xáha<sup>n</sup> Jèsús:

—Vá ndìhú iní-n chi ndoto cúha-n —càchí-gá xáha<sup>n</sup>-gă xii-xi.

<sup>24</sup> Te ní xáha<sup>n</sup> tă Mărta:

—Ndáá chi sa xini-í sá ndótó-dě ná quítnahá nduu ndòto nchaa ñáyiú ní xíhí —càchí-xi xáha<sup>n</sup>-xi xii-gá.

<sup>25</sup> Te ní xáha<sup>n</sup> Jèsús:

—Yúhú dandòto-í-yu cuendá cundecú-yu ní caa ní quíhí<sup>n</sup> ná sáá nduu. Te nchaa ñáyiú na quindáá iní ñáhá xii-í, te cuèi na cùu-yu dico ndotó-yu cundecu-í ndihí-yu ní caa ní quíhí<sup>n</sup>. <sup>26</sup> Te nchaa ñáyiú ndècu vívú ñuyíú-a te núu na quindáá iní ñáhă-yu xii-í, te cundecu ndihi-í-yu ní caa ní quíhí<sup>n</sup>. ¿Sàndáá iní-n tnúhu-a ñă? —càchí-gá xáha<sup>n</sup>-gă xii tá Mărta.

<sup>27</sup> Te xáha<sup>n</sup>-xi:

—Mèstrú, sàndáá iní-í, te sàndáá tucu iní-í sá dífú-n cùu-n Cristú Déhe Yá Ndiôxí, Yaá ní tendaha-gă véxi ñuyíú-a —càchí-xi xáha<sup>n</sup>-xi xii-gá.

### **Jèsús ndàhí-gá núu ní nguíndüxi té Lăzarú**

<sup>28</sup> Sátá dúcá<sup>n</sup> ní cáhá<sup>n</sup>-xi te ní sáhá<sup>n</sup> ngana-xi cùhú-xi tá Măriá, te dayuhu ní xáha<sup>n</sup>-xi:

—Yàcá<sup>n</sup> ní quexìo Mèstrú, te càna ñaha-dé xii-n —càchí-xi xáha<sup>n</sup>-xi.

<sup>29</sup> Te sá dúcá<sup>n</sup> xáha<sup>n</sup> cùhú tă Măriá sá cáná ñàha Jesús xii-xi, núu ndíhi-ni ní xica-xi cuáhá<sup>n</sup>-xi núu ndécú-gă. <sup>30</sup> Te Jèsús vátá quíhu-gá xití ñúu, chi ndècu-ni-gá núu ní sáhá<sup>n</sup> tnahá ñáhá tă Mărta. <sup>31</sup> Te ñáyiú isrâél ndécú sãñaha tnúhu ndee iní xii tá Măriá ndihi cùhú-xi ní sani iní-yu sá cuáhá<sup>n</sup>-xi núu yíndüxi cúha-xi ndáhyú-xi ní cáhă<sup>n</sup>-yu, núu nchicú<sup>n</sup>-yu-xi cuáhá<sup>n</sup>.

<sup>32</sup> Te ní sáá tá Măriá núu ndécú Jèsús te ní nguíñí xití-xí núu-gă, te xáha<sup>n</sup>-xi xii-gá:

—Mèstrú, te núu dícó ní xĩndecu-n ìha te vá cùu cúha-ndí ní cùu —cachí-xi xáha<sup>n</sup>-xi xii-gá.

<sup>33</sup> Te sá nǐ xiní Jèsús ndàhyú tá Màriá ndihi ñáiyu isràél nchìcú<sup>n</sup> ñáhá cuáhá<sup>n</sup>, xíá<sup>n</sup> ío ní cuyica iní-gá. <sup>34</sup> Te ní xáha<sup>n</sup>-gǎ xií-yu:

—¿Ndèé ní taxi ndecu-ndo yìqui cuñú-dé-i? —càchí-gá xáha<sup>n</sup>-gǎ xií-yu.

Te ní xáhá<sup>n</sup>-yu:

—Mèstrú, néhé ná quihí<sup>n</sup>-ó te quiní-n —càchí-yu xáhá<sup>n</sup>-yu xii-gá.

<sup>35</sup> Te ní ndáhyú-gá tnahá-gá. <sup>36</sup> Te ní xítñaha ñáiyu isràél:

—Súuní cùu iní-dé ndíi ni cùu —cachí-yu xítñahá-yu.

<sup>37</sup> Te davá-yu xítñahá-yu:

—Tée-a ní quide tátna-dé núú tée cuàá te ní ndúha. ¿Te nása ní cuu núú ñá túú ní quide tátna-dé té Lázaru cuendá sá vǎ cùú-dé ní cùu-i? —cachí-yu xítñahá-yu.

### Jèsús dándòto-gá té Lázaru

<sup>38</sup> Te ío ní cuyica tucu iní Jèsús òré ní quexìo-gá yuhu yàú núú nǐ chihi-güedé yiqui cùñú té Lázaru. Te yuhu yàú-á<sup>n</sup> ndedí ì<sup>n</sup> yúú. <sup>39</sup> Te ní xáha<sup>n</sup> Jèsús xií-yu:

—Chí xócàni yúú-ǎ<sup>n</sup> —càchí-gá xáha<sup>n</sup>-gǎ xií-yu.

Te ní xáha<sup>n</sup> tǎ Màrta cúha tée ní xihí-á<sup>n</sup>:

—Mèstrú, sa tucu sàhá<sup>n</sup>-dé chi sa ní cuu cùmí nduu sá nǐ xihí-dé —càchí-xi xáha<sup>n</sup>-xi xii-gá.

<sup>40</sup> Te ní xáha<sup>n</sup> Jèsús:

—¿Náa ñá díú nǐ cachí-í sá núu na quindáa iní-n, te quiní-n sǎ ìo càhnu cuu Yá Ndiòxí? —càchí-gá xáha<sup>n</sup>-gǎ xii-xi.

<sup>41</sup> Te ní xócàní-yu yúú ndedí yuhu yàú-á<sup>n</sup>. Te ní ndacoto-gá andiu, te ní xáha<sup>n</sup>-gǎ xii Tǎtá-gǎ Dútú Ndiòxí:

—Táu, ndàcá<sup>n</sup> tǎhù-í núú-n sǎ nǐ tédoho-n tnúhu ní cáhá<sup>n</sup>-í. <sup>42</sup> Te yúhú sa ñaha-í sá ncháá-ni òré ndedóho ñaha-n xii-í, dico duha càhá<sup>n</sup>-í cuendá sá ná tècú dóho nchaa ñáiyu ndècu iha cuendá quindáa iní-yu sá díú-n nǐ tendaha ñaha-n xii-í véxi-í ñuyú-a —càchí-gá xáha<sup>n</sup>-gǎ xii Dútú Ndiòxí.

<sup>43</sup> Te sátá dúcá<sup>n</sup> nǐ cáhá<sup>n</sup>-gá ndihi Yá Ndiòxí, te níhi ní cáhá<sup>n</sup>-gá xáha<sup>n</sup>-gǎ xii tée ní xihí-á<sup>n</sup>:

—¿Lázaru, tandèe xía<sup>n</sup>! —càchí-gá xáha<sup>n</sup>-gǎ xii-dé.

<sup>44</sup> Te ní ndee tée ní xihí-á<sup>n</sup> yaú-á<sup>n</sup>, te ndùtu dóo cuñí ndàha-dé ndihi sáhá-dé, te dàhu tucu ì<sup>n</sup> dóo núú-dé. Te ní xáha<sup>n</sup> Jèsús xií-yu:

—Chí nándaxi-dé te dañando-dé ná cáca-dé —càchí-gá xáha<sup>n</sup>-gǎ xií-yu.

### Nducu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

<sup>45</sup> Te nchaa ñáiyu nchìcú<sup>n</sup> ñáhá xii tá Màriá cuáhá<sup>n</sup> ío vai-yu ní sándáa iní-yu Jèsús sá nǐ xiní-yu nàcuáa ní quide-gá.

<sup>46</sup> Dico davá-yu ní sáhá<sup>n</sup>-yu núú cuè tée cùu fariséú, te ní caní-yu cuendú núú-güedé nàcuáa ní quide Jèsús. <sup>47</sup> Te cue tée cùu fariséú ndihi cue dútú cùnùu ní nataká-güedé ní xóo-güedé jündá, te ní xítñaha-güedé:

—¿Nása cada-o?, chi tée-ǎ<sup>n</sup> ío vai sá vǎ yoo tnahí ndàcu cada quide-dé. <sup>48</sup> Te núu na dàña ío te nchaa ñáiyu quindáa iní ñáhá-yu xii-dé, te quixi cue tée ñuú Rómá dangoyo-güedé veñuhu-o te danàa-güedé nchaa ñuú-ó —càchí-güedé xítñaha-güedé.

<sup>49</sup> Te ì<sup>n</sup> cue tée-á<sup>n</sup> nání-dé Caifás, te cùnuu-gá-dé núú dàva-gá cue dútú cuíá-ǎ<sup>n</sup>, te ní xáha<sup>n</sup>-dè xii-güedé:

—Nchòhó ni lùha ñá túú cùnuni iní-ndó. <sup>50</sup> Te ni ñá sàha-ndo cuendá sá vǎha-gá tnahá-ó, te núu na cùú ì<sup>n</sup>-ni tée cuendá nchaa ñáiyu isràél, te ñá díú sǎ dánàa ñaha-güedé xií-yu —càchí-dé xáha<sup>n</sup>-dè xii-güedé.

<sup>51</sup> Dico té Caifás chi ñá díú sǎ cúú iní méé-dé ní cáhá<sup>n</sup>-dé, chi cuendá sá cuíá-ǎ<sup>n</sup> nǐ cunuu-dé núú cuè dútú, núu xíá<sup>n</sup> Yá Ndiòxí ní dácáhu iní ñáhá-gǎ nàcuáa cáhá<sup>n</sup>-dé sá Jèsús cuú-gá sá cúú-xí nchaa ñáiyu isràél. <sup>52</sup> Te ñá

díú cuendá mee-ni ñáyi-u-á<sup>n</sup> cuú-gá, chi cuú-gá tnahá cuendá nchaa ñáyi-u ní sándáá iní ñáhá xii-gá, ñáyi-u nchitenuu nihí ñuyú, te ñ<sup>n</sup>-ná cuú-yu ndihi-gá. <sup>53</sup>Núu ndéé nduu-á<sup>n</sup> ní ndatnúhu cue tée cúnuu núú ñáyi-u israhél nàcuáa cada-güedé cahni-güedé Jèsús.

<sup>54</sup>Te xíá<sup>n</sup> núu ñá ní xica cuu-gá Jèsús quiní ñáhá ñáyi-u israhél, te ní quee-gá cuáhá<sup>n</sup>-gá ñuú Efráin, ñ<sup>n</sup> ñuú cáá yátni yucu, yáca<sup>n</sup> ní nguñí-gá ndihi cue tée xica cuu ndihi-gá.

<sup>55</sup>Te ta cüyatni nduu cadá-yu vico páscaú. Te cuhé ñáyi-u ní quee-yu ñuú-yu cuáhá<sup>n</sup>-yu ñuú Jerusálén cuendá sá sà ndihí-yu nchaa-yu nduu íí, te tnahá nduu vico páscaú. <sup>56</sup>Te yáca<sup>n</sup> nándúcú-yu Jèsús ní cùu te ñá túú-gá òré-á<sup>n</sup>, te ní naníhí tñáhá-yu xití veñúhu, te xítnáhá-yu:

—¿Nása sàni iní-ndó-í? ¿Quixi Jèsús vico á<sup>n</sup> ñáhá? —càchí-yu xítnáhá-yu.

<sup>57</sup>Te cue tée cùu fariséú ndihi cue dútú cúnúu sa ní xáha<sup>n</sup>-güedé xii ñáyi-u sá núu ndéda-ni cáa-yu xini-yu núú ndécú Jèsús te na càhá<sup>n</sup>-ni-yu cuendá tñi ñaha-güedé xii-gá.

### Ñ<sup>n</sup> ñadihí chíhí-á<sup>n</sup> Jèsús acití

(Mt. 26:6-13; Mr. 14:3-9)

**12** Ínú-gá nduu cùmání tnahá vico páscaú, te ní sáhá<sup>n</sup> Jèsús ñuú Bè-taniá, ñuú té Lázaru té ní dándótó-gá. <sup>2</sup>Te xíá<sup>n</sup> ní cadúha-yu sá ní cudini Jesús. Te tá Màrta ní sani-xi cóhó, te té Lázaru yfíhí-dé mèsá ndihi Jèsús, ndihi dava-gá-güedé xéxi-güedé. <sup>3</sup>Te tá Màriá néhé-xí cuádava lítrú acití sàhá<sup>n</sup> tñámí sá ño ndèyáhu, te acití-á<sup>n</sup> ní cuáha mee-ni yúcu nárdú, te ní sódó-xi sáhá Jèsús, te ní nadayichí-xi ndihi idi díquí-xi sáhá-gá. Te nihí xití vehe ní xité nuu dicó acití-á<sup>n</sup>. <sup>4</sup>Te té Jüdás déhe té Xímú Iscarioté diu-ni ñ<sup>n</sup> té xica cuu ndihi-gá, té cuáha cuendá ñáhá xii-gá núu cùe té cùu úhu iní ñáhá ní xáha<sup>n</sup>-dè xii-gá:

<sup>5</sup>—¿Ná cuendá ñá ní cüyáhu acití-a sá ùní ciendú díhú<sup>n</sup> denariú cuu cuendá ñáyi-u ndàhú? —càchí-dé xáha<sup>n</sup>-dè xii-gá.

<sup>6</sup>Dico sá dúcá<sup>n</sup> ní cáhá<sup>n</sup> té Jüdás chi ñá díú sá ndísá ñuhu iní-dé ñáyi-u ndàhú chi dicó-ni ñ<sup>n</sup> ñádúhú cùú-dé, chi diu-dé néhé cuendá-dé díhú<sup>n</sup>-güedé nchaa-güedé te ní xóo duhu ñaha-dé xii-güedé. <sup>7</sup>Te ní xáha<sup>n</sup> Jèsús:

—Daña, vá dásatú-n iní xíchí-a na tàxúha nahi-xi acití-a, chi nándíhi ndéé òré ná nguñdúxi-í. <sup>8</sup>Chi nchòhó chi cuhu<sup>n</sup> tnahá-ni ñáyi-u ndàhú tnuú-ndó, dico yúhú chi vá ncháá ndùu cundecu ndihi ñaha-í xii-ndo —càchí-gá xáha<sup>n</sup>-gá xii-dé.

### Tnahá té Lázaru cuini-güedé cahni ñaha-güedé xii-dé

<sup>9</sup>Te vai ñáyi-u israhél ní nihí-yu tñúhu sá ndécú Jèsús ñuú Bè-taniá. Te ní sáhá<sup>n</sup>-yu cuendá quiní-yu-gá, te quiní-yu tnahá té Lázaru té ní dándótó-gá. <sup>10</sup>Te cue dútú cúnúu ní ndatnúhu-güedé ní cuu ñ<sup>n</sup>-nuu-güedé cuendá sá cáhni-güedé tnahá té Lázaru ní cùu, <sup>11</sup>chi diu cuendá téé-á<sup>n</sup> ní cuu cuhé ñáyi-u israhél tá daña nihnú-yu-güedé cuáhá<sup>n</sup> cuendá sá ní sándáá iní-yu Jèsús.

### Jèsús cuánguihu-gá ñuú Jerusálén

(Mt. 21:1-11; Mr. 11:1-11; Lc. 19:28-40)

<sup>12</sup>Te nduu tñéé-á<sup>n</sup> vai ñáyi-u ní quexio ñuú Jerusálén cuendá cundecú-yu vico, te ní nihí-yu tñúhu sá Jèsús sáá-gá tnahá-gá cundecu-gá vico-á<sup>n</sup>, <sup>13</sup>núu ní xehndé-yu ndaha yùtnu ñuú, te néhé-yu ní sáhá<sup>n</sup> ní sátnahá ñáhá-yu xii-gá. Te nihí ní cáhá<sup>n</sup>-yu, te càchí-yu:

—¡Ío càhnu cuu Yá Ndiöxí! Te duca<sup>n</sup>-ni ño càhnu cuu Yá ní tendaha-gá véxi quindaha ñaha xii-o —duha ní cachí-yu.

<sup>14</sup>Te Jèsús ní nihí-gá ñ<sup>n</sup> búrru, te yòdo-gá-dí cuáhá<sup>n</sup>. Te duca<sup>n</sup> ní cuu chi

ní quee ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi:

<sup>15</sup> Vă yúhú nchòhó cue ñáyiú ndècu ñuú Sión,

chi iha véxi téé yindaha ñaha xii-ndo yodo-dé ì<sup>n</sup> būrru.

Duha càchí-xi núú tütú-gá. <sup>16</sup> Dico cue téé xica cuu ndihi Jesús ñá ní ndàcu iní-güedé nàcuáa càhá<sup>n</sup>-xi núú tütú Yă Ndiöxí nàcuáa cada Jèsús. Dico sáta cuãndaa-gá andiu càda cahnu ñaha Tátá-gă xii-gá, te ní ndacu iní-güedé sá dúcá<sup>n</sup> yòdo tnuní nàcuáa cada-gá, te duca<sup>n</sup> ní cuu.

<sup>17</sup> Nchaa ñáyiú ní xindecu ndihi Jèsús òré ní dándótó-gă té Lăzarú, ya yàcá<sup>n</sup> ní caní-yu cuendú núú ñáyiú nàcuáa ní quide ñaha-gă xii-dé. <sup>18</sup> Te vâi-yu ní sáhá<sup>n</sup>-yu núú ndécú Jèsús cuendá sá ní níhí-yu tnúhu ní quide-gá sá vă yòo tnàhí ndàcu cada. <sup>19</sup> Te cue téé cùu fariséú ní xítñaha-güedé:

—Ní xito-ndo nă ñá túú nàndihi sá quidé-ó-vá, chi nchaa ñáyiú ní chinchícu<sup>n</sup> ñáhă-yu xii-dé —càchí-güedé xítñaha-güedé.

### Ñáyiú ñá túú cùu ñáyiú isràèl nándúcú-yu Jèsús

<sup>20</sup> Te tnàhá ñáyiú ñá túú cùu ñáyiú isràèl ní sáhá<sup>n</sup>-yu vico ñuú Jerusalén ní quide càhnú-yu Yă Ndiöxí. <sup>21</sup> Te ñáyiú-á<sup>n</sup> ní sáhá<sup>n</sup>-yu núú tē Lipé téé ñuú Bètsaidá, te ñuú-á<sup>n</sup> yíndèhu-xi distritú Galileá. Te ní xáhă<sup>n</sup>-yu xii-dé:

—Tátá, vá cùndèe iní-n càchí tnúhu-n ñuú ndéé ndécú Jèsús, chi cuíní-ndí càhá<sup>n</sup> ndihi-ndí-gá —càchí-yu xáhă<sup>n</sup>-yu xii-dé.

<sup>22</sup> Te té Lipé ní naníhí-dě té Ndríxí te ní xáhă<sup>n</sup>-dē nàcuáa càhá<sup>n</sup>-yu, te ndi ndúú-güedé ní sáhá<sup>n</sup>-güedé ní xáhă<sup>n</sup>-güedé xii Jèsús nàcuáa càhá<sup>n</sup>-yu. <sup>23</sup> Te ní xáhă<sup>n</sup> Jèsús xii-güedé:

—Vitna ní cuyatni òré cada càhnu ñaha Tátá-í xii-í, te quíní-yu sá ño

càhnu cuu yúhú Tée cùu ñaní tnáhă-yu nchaa-yu. <sup>24</sup> Te na càchí tnúhu ndáá-í xii-ndo să ñuú ì<sup>n</sup> tatá vá ngává-xí nūú ñúhú tēhyú-xi ña, te ñuú-ni duca<sup>n</sup> cùnduu-xi cundecu-xi. Dico ì<sup>n</sup> tatá ná ngává nūú ñúhú xínu déhe-xi, te xíá<sup>n</sup> nádacayá tnáhă-xí, te mee-xi tēhyú-xi. <sup>25</sup> Te nchaa ñáyiú ño ñuú iní-xi cundecu ñuyú-a ñá túú ñuú iní-yu Yă Ndiöxí, te ñáyiú-á<sup>n</sup> cuíta nihnú-yu. Te nchaa ñáyiú ño ñuú iní ñáhă xii Yă Ndiöxí, ñáyiú-á<sup>n</sup> cundecu-yu ndihi-gá ñi caa ñi qufhí<sup>n</sup>. <sup>26</sup> Te nchaa ñáyiú cuíní cunu cuechi nūú-í xini ñuhu-xi natuha ñahă-yu xii-í, te nduu táhă-yu cundecu-yu núú ñuhú-í cundecu-í. Te nchaa ñáyiú na cunu cuechi nūú-í, te cada càhnu ñaha Tátá-í xii-yu —càchí-gá xáhă<sup>n</sup>-gă xii-güedé.

### Jèsús càhá<sup>n</sup>-gá sá cahní ñaha-güedé xii-gá

<sup>27</sup> Te ní xáhă<sup>n</sup> tucu-gá:

—Ío ndíhú iní-í. Te cúnaha-í xii Tătá-í taunihnu ñaha-gă ñuú dícó sá cúú, dico vá cúú chi cuendá tnàhí-a véxi-í —càchí-gá xáhă<sup>n</sup>-gă xii-güedé.

<sup>28</sup> Te ní xáhă<sup>n</sup>-gă xii Tátá-gă Dútú Ndiöxí:

—Táu, cada nàcuáa ní sani iní-n cùnduu cuendá sá ná cadá càhnu ñaha ñáyiú xii-n —càchí-gá xáhă<sup>n</sup>-gă.

Te duca<sup>n</sup> te ní tecú ní càhá<sup>n</sup> Yă Ndiöxí ndéé andiu, te càchí-gá:

—Sa ní quide-í nàcuáa cachí ñáyiú sá ño càhnu cuu-í. Te cada tucu-í cuendá cada càhnu ñaha-gă-yu xii-í —càchí Yă Ndiöxí xáhă<sup>n</sup>-gă xii Déhe-gá.

<sup>29</sup> Te nchaa ñáyiú xindecu ní tecú dóho-yu ní càhá<sup>n</sup>-gá, dico ñá túú ní sàni iní-yu sá mée-gă ní càhá<sup>n</sup>, chi davá-yu ní xítñahă-yu sá ñuú ní càhá<sup>n</sup>, te davá-yu ní xítñahă-yu sá ì<sup>n</sup> espíritú xínu cuèchi núú Yă Ndiöxí ní càhá<sup>n</sup>. <sup>30</sup> Te ní xáhă<sup>n</sup> Jèsús xii-yu:

—Ñá dŭú cuendá yúhú ní cáhă<sup>n</sup> Yă Ndiöxí, chi ní càhá<sup>n</sup>-gá cuendá sá

nchòhó cundedóho-ndo. <sup>31</sup> Te vitna ní sáá nduu càda ndáá Yá Ndiòxí cuéchi nchaa ñáyíu ñuyíú-a, te duca<sup>n</sup> te vá cùnù-gá yucu ñávàha. <sup>32</sup> Te na càta caa ñaha-güedé xii-í nùú cùrúxí, te xíá<sup>n</sup> cuú-í te ñihí-yu tnúhu ní càa xico ñuyíú, te quindáá iní-yu tnúhu-í —càchí-gá xáha<sup>n</sup>-gá xii-yu.

<sup>33</sup> Duha ní cáhá<sup>n</sup>-gá cuendá cutnùní iní-yu nàcuáa ndoho-gá òré cuú-gá. <sup>34</sup> Te ní xáhà<sup>n</sup>-yu xii-gá:

—Ñihí-ndí tnúhu sá nùú tùtú yódó tnùnì tnúhu Yá Ndiòxí càhá<sup>n</sup>-xí sá Crístú Yaá tendaha-gá quixi ñuyíú-a cundecu-gá ni caa ni quíhí<sup>n</sup>. ¿Te yòhó nása càhá<sup>n</sup>-tu-n sá ì<sup>n</sup> téé cùu ñanì tnáhá nchàa ñáyíu ñuyíú-a cahni ñaha-güedé nùú cùrúxí? Te cachí tnúhu-n nã cúú tée-á<sup>n</sup> —càchí-yu xáhà<sup>n</sup>-yu xii-gá.

<sup>35</sup> Te ní xáha<sup>n</sup> Jèsús:

—Yúhú cuú-í dàtná ì<sup>n</sup> ñuhú dáyèhé ñuyíú-a, dico sacú-ni nduu ndècu ndihì ñaha-í xii-ndo. Te caca-ndo ìchi ndáá vitna dáyehé-gá-í nùú-ndó chi na cùnee te vá cùnùnì-gá nùú-ndó ndèè ichi quíhí<sup>n</sup>-ndó. <sup>36</sup> Quindáá iní ñáhá-ndó xii-í vitna ndècu ndihì ñaha-gá-í xii-ndo dandixi túu-í iní-ndó, cuendá cutnùnì iní-ndó nàcuáa ndùu cuendá Yá Ndiòxí, te cuu-ndo dèhe-í —càchí-gá xáha<sup>n</sup>-gá xii-yu.

Te sátá dúcá<sup>n</sup> ñí cáhá<sup>n</sup> Jèsús, te ní quee-gá cuáhá<sup>n</sup>-gá ì<sup>n</sup> nùú vã ná ñihì ñáhà-yu xii-gá.

### Ñáyíu isràèl ñá cuiní-yu quindáá iní-yu Jèsús

<sup>37</sup> Te cuèi ío vãi sá vã yòo tnàhì ndàcu cada ní quide Jèsús ní xiní-yu, dico ni dùca<sup>n</sup> ñá túú ní sàndáá iní-yu-gá. <sup>38</sup> Te duca<sup>n</sup> ñí quidé-yu chi dacuití ñí quee ndáá-xi nàcuáa ní chídó tnùnì ndíi Chàia ndíi ní cáhá<sup>n</sup> tnúhu Yá Ndiòxí ndéé sanaha nùú tùtú-gá nùú càchí-xi:

Yòhó Yaá cúú Xitohó-í, vá yòo ì<sup>n</sup> sàndáá iní tnúhu càhá<sup>n</sup>-ndí.

Te vá yòo ì<sup>n</sup> cùtnuní iní-xi sá ío càhnu cuu-n.

Duha ní chídó tnùnì ndíi Chàia nùú tùtú-gá. <sup>39</sup> Te ñá ní sàndáá iní-yu chi ní quee ndáá-xi nàcuáa ní chídó tnùnì tucu ndíi Chàia nùú tùtú Yá Ndiòxí nàcuáa cáhá<sup>n</sup> Jèsús:

<sup>40</sup> Mee Yá Ndiòxí ní quide-gá sá vã tècú tnùnì-yu,

chi ní dádähu ndodo iní ñáhá-gá xii-yu, chi ío sáá iní-yu nùú ñá ní cuiní-gá-yu quindáá iní ñáhà-yu xii-gá.

Te ní vã túhá ñáhà-yu xii yúhú cuendá dacäcu nihnu-í-yu.

<sup>41</sup> Duha ní chídó tnùnì ndíi Chàia nàcuáa cáhá<sup>n</sup> Jèsús chi ní xiní ndíi sá ío càhnu cuu-gá.

<sup>42</sup> Te cuèi duca<sup>n</sup> ñí cuu dico tit- ní cue téé cùnùu nùú ñáyíu isràèl ní sàndáá iní ñáhá-güedé xii-gá. Dico ñá túú ní xòo cáhá<sup>n</sup> ndáá-güedé chi ní xóo yùhú-güedé sá vã dáñá-gá cue téé cùu fariséu quíhu-güedé veñúhu. <sup>43</sup> Chi ní xóo cudíí-gá iní-güedé sá càhá<sup>n</sup> ñáyíu dàcúxí tnúhu càhá<sup>n</sup> Yá Ndiòxí.

### Ñáyíu ñá túú sàndáá iní tnúhu Jèsús cuíta nihnú-yu

<sup>44</sup> Jèsús ñihì ní cáhá<sup>n</sup>-gá, te càchí-gá:

—Nchaa ñáyíu na quindáá iní ñáhá xii-í, te ñá díú-ní mèe-í quindáá iní-yu, chi tnàhá Tàtà-í Yaá ní tendaha ñàha xii-í véxi-í ñuyíú-a quindáá iní-yu. <sup>45</sup> Te ñáyíu xinì ñáhá xii yúhú xinì-yu tnàhá Tàtà-í. <sup>46</sup> Te yúhú véxi-í dandixi túu-í iní ñáyíu ñuyíú-a cuendá cutnùnì iní-yu nàcuáa ndùu cuendá Yá Ndiòxí, te nchaa ñáyíu na quindáá iní ñáhá xii-í te vá cùndècu-gá-yu ichi cuèhé ichi duha.

<sup>47</sup> Te nùú ío davá-yu ndèdóho-yu nàcuáa càhá<sup>n</sup>-í te ñá túú tnìh-yu tnúhu-í, te ñá díú yùhú dàcuíta nihnu-í-yu, chi ñá túú véxi-í ñuyíú-a sá dácúita nihnu-í-yu, chi véxi-í sá dácäcu nihnu-í-yu. <sup>48</sup> Te nchaa ñáyíu na cùyíchí iní ñáhá xii-í te ñá túú quide cuendá-yu nàcuáa càhá<sup>n</sup>-í, te

ñáyi-u-á<sup>n</sup> ná sàà nduu te cuíta nihnú-yu chi ñá ní tñì-yu tñúhu ní cáhá<sup>n</sup>-í. <sup>49</sup> Te yúhú ñá túú càhá<sup>n</sup>-í tñúhu véxi iní mée-í, chi mee Tàtá-í Yaá ní tendaha ñàha xii-í véxi-í ñuyíú-a ní cachí tñúhu-gá nàcuáa cunduu tñúhu cáhá<sup>n</sup>-í danèhé-í ñáyi-u. <sup>50</sup> Te yúhú xini-í sá tñúhu ní táuchíú<sup>n</sup> Tàtá-í cáhá<sup>n</sup>-í cúú-xí ì<sup>n</sup> sá vâha sá cúú xii-ndo chi nduu tãhú-ndó cùndecu-ndo ndihi-gá ní caa nì quíh<sup>n</sup>, núu xíã<sup>n</sup> càhá<sup>n</sup>-í nchaa nàcuáa ní táuchíú<sup>n</sup>-gã —càchí-gá xâha<sup>n</sup>-gã xií-yu.

**Jèsús naquète-gá sáhá cuè  
téé xica cuu ndihi-gá**

**13** Te cùmání-gá tnahá vico pascuá, te Jèsús sa nàha-gá sá sà ní cuy-atni òrè dandóo-gá ñuyíú-a, te ndaa-gá núú ndécú Tàtá-gã. Te ío ní cuu iní-gá nchaa ñáyi-u ní sándáá iní ñáhá xii-gá, te ní quide ndisa-gá sá nì cuu iní ñáhá-gã xií-yu.

<sup>2-4</sup> Te ní quíhu yucu ñävâha díquí tã Jüdás déhe té Xímú Iscarioté, te ní sani iní-dé nàcuáa cada-dé cuáha cuèndá-dé Jèsús núú cuè téé cùu úhú iní ñáhá xii-gá. Te Jèsús sa nàha-gá sá mée Yã Ndiöxí Yaá cúú Tàtá-gã ní sãñaha-gã tñúhu ndee iní xii-gá sá cádá-gã núú-gã, te nàha-gá sá díú núú Tàtá-gã ní quee-gá véxi-gá ñuyíú-a. Te sáá nduu nàsáá tucu-gá núú Tàtá-gã. Te cùdini Jesús ndihi cue téé xica cuu ndihi-gá ní cùu, te ní ndacuñí-gá yuhu mèsá, te ní taunuu-gá ì<sup>n</sup> dóo níhnú-gã, te ní quehe<sup>n</sup>-gá ì<sup>n</sup> dóo ní dácútú-gã núú yíquí-gã. <sup>5</sup> Te ní chihi-gá ndute ì<sup>n</sup> tñá, te xíã<sup>n</sup> nì naquete-gá sáhá cuè téé xica cuu ndihi-gá, te ndihi dóo ndútú núú yíquí-gã-á<sup>n</sup> nì nadayíchí-gá sáhá-güedë.

<sup>6</sup> Te òrè naquete-gá sáhá tã Xímú, àdi Pelú, ní cùu ní xâha<sup>n</sup>-dë xii-gá:

—Mèstrú, ¿te yòhó naquete-n sãhà-í-u? —càchí-dé xâha<sup>n</sup>-dë xii-gá.

<sup>7</sup> Te ní xâha<sup>n</sup> Jèsús:

—Vitna ñá cùtnùní iní-n sã quidè-í-a dico sáá nduu te cutnùní iní-n —càchí-gá xâha<sup>n</sup>-gã xii-dé.

<sup>8</sup> Te ní xâha<sup>n</sup> tã Pèlú:

—Yúhú chi vá í<sup>n</sup> nduu te naquete-n sãhà-í —càchí-dé xâha<sup>n</sup>-dë xii-gá.

Te ní xâha<sup>n</sup> Jèsús:

—Te núu vá naquète-í sáhá-n á<sup>n</sup>, te vá cádá-gã-n cuèndá sá ndécú ndihi ñaha-í xii-n —càchí-gá xâha<sup>n</sup>-gã xii-dé.

<sup>9</sup> Te ní xâha<sup>n</sup> tã Pèlú:

—Te núu duca<sup>n</sup> te vá mée-ní sãhà-í naquete-n, chi naquete-n tñáhá ndaha-í ndihi díquí-í —càchí-dé xâha<sup>n</sup>-dë xii-gá.

<sup>10</sup> Te ní xâha<sup>n</sup> Jèsús xii-dé:

—Tée íchí nì xichi chi xini ñuhu-xi sá sãhá-na-dë ndoo, te duca<sup>n</sup> te nduu ndoo-dé nihíí-dé. Te nchòhó sa càndoo-ndo cuèi ñá ncháá-ndó càndoo —cachí-gá xâha<sup>n</sup>-gã xii-dé.

<sup>11</sup> Te duca<sup>n</sup> nì cáhá<sup>n</sup> Jèsús chi sa nàha-gá sá í<sup>n</sup> cuè téé-á<sup>n</sup> cuáha cuèndá ñáhá-güedë xii-gá núú cuè téé cùu úhú iní ñáhá, xíã<sup>n</sup> núu ní xâha<sup>n</sup>-gã sá ñá túú càndoo-güedë nchaa-güedë.

<sup>12</sup> Te sátá nì naquete-gá sáhá-güedë, te ní ndécuihnu-gá dóo-gã, te ní nucóo-gá yuhu mèsá, te ní xâha<sup>n</sup>-gã xii-güedë:

—¿Te ní cutnùní iní-ndó sã nì quide ñaha-í xii-ndo-ã<sup>n</sup>? <sup>13</sup> Te nchòhó váha-ni cáhá<sup>n</sup>-ndó sã cùnùu-í, te dànani ñaha tucu-ndo Mèstrú xii-í, te ndáá càhá<sup>n</sup>-ndó.

<sup>14</sup> Te núu yúhú cùú-í Mèstrú, te cùu tucu-í téé cùnùu te nàquete-í sáhá-ndó, te diu-ni duca<sup>n</sup> càda nchòhó tucu naquete sáhá tñáhá-ndó. <sup>15</sup> Yúhú sànu ichi ñaha-í xii-ndo nàcuáa cada-ndo. <sup>16</sup> Te na càchí tñúhu ndáá-í xii-ndo sã nì ì<sup>n</sup> téé xinu cuechi ñá túú cùnùu-dé dácúxí patróo<sup>n</sup>-dë, te ni ì<sup>n</sup> téé xica chiu<sup>n</sup> ñá túú cùnùu-dé dácúxí tã tendaha ñaha xii-dé cuáhá<sup>n</sup>-dë chiu<sup>n</sup>. Te duca<sup>n</sup> sãtnahá-xi cùu yúhú ndihi nchòhó. <sup>17</sup> Te núu ní cutnùní iní-ndó nàcuáa ní quide ñaha-í xii-ndo ña, te duca<sup>n</sup> càda

tnaha-ndo te cuu váha iní ñáhá Yă Ndiôxí xii-ndo.

<sup>18</sup> Yúhú, ñá túú cãhá<sup>n</sup>-í cuendá-ndó nchàa-ndo, chi yúhú sa ñaha-í nàcuáa sàni iní ì<sup>n</sup> ì<sup>n</sup> nchòhó cue téé ní nanducu nihnu-í tnuú nchaa ñáyiu ñùhu ichi cuehé ichi duha ní cachí-í chitnahá ñáhá-ndó xii-í. Chi dacuitíí sã queé ndáa-xi nàcuáa cãhá<sup>n</sup>-xi núú tütú Yă Ndiôxí núú cãchí-xi: “Téé xèxi ndihi ñaha xii-í ngóo-dé cuu úhú iní ñáhá-dě”, duha cãchí-xi núú tütú-gá. <sup>19</sup> Te cùmání-gã sáá nduu càda ñaha-dé sá sání iní-dé, núú xiã<sup>n</sup> cãchí tñúhu-í xii-ndo nàcuáa cada-dé, chi na sáá nduu-ã<sup>n</sup> te cutnùnì iní-ndó sã yúhú cùu-í Cristú Yaá ní tendaha Yă Ndiôxí véxi ñuyúú-a. <sup>20</sup> Te na cãchí tñúhu ndáá-í xii-ndo sã nchàa ñáyiu na quehe<sup>n</sup> cuendá ñáhá xii cue téé tendaha-í cãhá<sup>n</sup> tñúhu-í, te cada iní-yu sá tñáhá yúhú ní quehe<sup>n</sup> cuendá-yu. Te nchaa ñáyiu na quehe<sup>n</sup> cuendá ñáhá xii-í, te cada iní-yu sá tñáhá Tãtà-í Dútú Ndiôxí Yaá ní tendaha ñaha xii-í véxi-í ñuyúú-a ní quehe<sup>n</sup> cuendá-yu —cãchí-gá xáha<sup>n</sup>-gã xii-güedé.

**Jèsús cãchí-gá sá tẽ Jùdás cuáha  
cuendá ñáhá-dě xii-gá núú  
cuè téé cùu úhú iní ñáhá**

(Mt. 26:20-25; Mr.

14:17-21; Lc. 22:21-23)

<sup>21</sup> Te sátá dúcá<sup>n</sup> ní cãhá<sup>n</sup> Jèsús te ío ní ndíhú iní-gá, te ní xáha<sup>n</sup>-gã xii-güedé:

—Na cãchí tñúhu ndáá-í xii-ndo sã díú-ní ì<sup>n</sup> nchohó cuáha cuendá ñáhá-ndó xii-í núú cuè téé cùu úhú iní ñáhá —cãchí-gá xáha<sup>n</sup>-gã xii-güedé.

<sup>22</sup> Te ní ngúíta cue téé xica cuu ndihi-gá ndéhe ì<sup>n</sup> ndehe ì<sup>n</sup> núú tñáhá-güedé, chi ñá ní cùtnuní iní-güedé ndédacàa-güedé cuendá-güedé ní cãhá<sup>n</sup>-gá. <sup>23</sup> Te ì<sup>n</sup> téé-á<sup>n</sup> ìo cùdíí ìní ñáhá Jèsús, te ndècu yatni-dé ðĩni-gá cùdini-dé ndihi-gá. <sup>24</sup> Te té Xímú, àdi Pelú chi úú ðiu-dé, ní quide-dé sèñá

núú tẽ ndècu yatni ðĩni-gá-á<sup>n</sup> sá cãcá<sup>n</sup> tñúhú-dé núú-gã ñùu ndédacàa-güedé cuendá-güedé ní cãhá<sup>n</sup>-gá. <sup>25</sup> Te téé-ã<sup>n</sup> ní sáhá<sup>n</sup> ndehe yatni-gá-dé ðĩni Jèsús, te ní xáha<sup>n</sup>-dě xii-gá:

—Mèstrú, ¿ndédacàa-ndí cuendá-ndí ní cãhá<sup>n</sup>-n-í? —cãchí-dé xáha<sup>n</sup>-dě xii-gá.

<sup>26</sup> Te ní xáha<sup>n</sup> Jèsús:

—Na chindóyo-í luha pàá, te téé na cuáha-í te téé-á<sup>n</sup> cùú-dé —cãchí-gá xáha<sup>n</sup>-gã xii-dé.

Te ní chindóyo-gá luha pàá, te ní sáha-gá té Jùdás déhe té Xímú Iscarioté. <sup>27</sup> Te òré ní quehe<sup>n</sup>-dé pàá, te ní ngúndecu ndihi ñaha dùu<sup>n</sup>-ná yucu ñãvãha xii-dé. Te ní xáha<sup>n</sup> Jèsús:

—Sá ñí sani iní-n càda-n te cada ndíhi-ni-n —cãchí-gá xáha<sup>n</sup>-gã xii-dé.

<sup>28</sup> Te ni ì<sup>n</sup> cue téé cùdini ndihi-gá ñá ní tècú tñuní-güedé nása ndùu tñúhu ní xáha<sup>n</sup>-gã xii té Jùdás. <sup>29</sup> Te dava-güedé ní sani iní-güedé sá sã cuendá sá ndécú ndihi-dé sá ñúhú díhú<sup>n</sup>, te vaa ìo ì<sup>n</sup> sá cuáá<sup>n</sup>-dẽ nandíhi-güedé vico, àdi díhú<sup>n</sup> cuáha-dé ñáyiu ndáhú xáha<sup>n</sup>-gã ní cãhá<sup>n</sup>-güedé. <sup>30</sup> Te sa ní cundiquí<sup>n</sup> ní quehe<sup>n</sup> cuendá té Jùdás pàá caxi-dé, te òré ní níhí-dẽ pàá-á<sup>n</sup> te ní quee-dé cuáhá<sup>n</sup>-dé.

**Jèsús cãchí tñúhu-gá nàcuáa cada-o**

<sup>31</sup> Te sátá ñí quee té Jùdás cuáhá<sup>n</sup>-dé, te ní xáha<sup>n</sup> Jèsús xii dava-gá-güedé:

—Vitna te quiní-ndó ndihi nchaa ñáyiu sá ìo cãhnu cuu yúhú Téé cùu ñani tñáhá-ndó nchàa-ndo, te òré-á<sup>n</sup> cutnùnì iní-ndó sã ìo cãhnu cuu tucu mee Yă Ndiôxí. <sup>32</sup> Te núu yúhú quidé cãhnu-í Yă Ndiôxí, te ðiu-ni duca<sup>n</sup> càda cahnu ñaha-gá xii yúhú, te ñá túú-gã títñí nduu te duca<sup>n</sup> càda-gá. <sup>33</sup> Te nchòhó cue déhe-í na cãchí tñúhu-í sá sàcú duha-ná nduu ndècu ndihi ñaha-í xii-ndo. Te nchòhó nanducu ñaha-ndo xii-í dico vá ná nihí ñáhá-ndó dàtná ní xáha<sup>n</sup>-í xii ñáyiu isràél, te ðiu-ni duca<sup>n</sup> cãhá<sup>n</sup>-í

núu-ndó sǎ vǎ ndácú-ndó quǐhí<sup>n</sup>-ndó núú quǐhí<sup>n</sup>-í. <sup>34</sup>Te duha sànu ichi ñaha tucu-í xii-ndo nàcuáa cada-ndo sǎ cúú iní tnáhá-ndó ñ<sup>n</sup> ñ<sup>n</sup>-ndo datná yúhú cúú iní ñáhà-í xii-ndo. <sup>35</sup>Te núu na cùu iní tnáhá-ndó ñ<sup>n</sup> ñ<sup>n</sup>-ndo ña, te duca<sup>n</sup> te cutnùní iní nchaa ñáyíu sá cúú-ndó cuè tée ní chitnahá ñáhá xii-í —càchí-gá xáha<sup>n</sup>-gǎ xii-güedé.

**Jèsús càhá<sup>n</sup>-gá sá tǎ Pèlú vá nñuu-dé sá xicá cùu ndìhi ñaha-dé xii-gá**

(Mt. 26:31-35; Mr. 14:27-31; Lc. 22:31-34)

<sup>36</sup>Te ní xáha<sup>n</sup> tǎ Xímú, àdi Pelú chi úú òu-dé, xii Jèsús:

—Mèstrú, ¿ndèè quǐhí<sup>n</sup>-n-í? —càchí-dé xáha<sup>n</sup>-dǎ xii-gá.

Te ní xáha<sup>n</sup> Jèsús:

—Vitna te vá ndácú-n cànchicú<sup>n</sup> ñáhá-n quǐhí<sup>n</sup> núú quǐhí<sup>n</sup>-í, dico na sàa nduu te dai sáa-n núú cùndècu-í —càchí-gá xáha<sup>n</sup>-gǎ xii-dé.

<sup>37</sup>Te ní xáha<sup>n</sup> tǎ Pèlú xii-gá:

—Mèstrú, ¿te ná cuendá nñu vá ndácù-í canchicú<sup>n</sup> ñáhà-í xii-n quǐhí<sup>n</sup> vitna-í? Chi yúhú ñá túú tnàhí yùhú-í cuèi na cùú-í sá cuendá-n —càchí-dé xáha<sup>n</sup>-dǎ xii-gá.

<sup>38</sup>Te ní xáha<sup>n</sup> Jèsús:

—¿Te ndáá sá xèhndé iní-n sǎ cuèi na cùú-n cuendá-í-u? Te na càchí tnúhu ndáá-í xii-n sǎ cùmání-gǎ cana líhi, te úní xito cáhá<sup>n</sup>-n sǎ ñà túú xiní ñáhá-n xii-í —càchí-gá xáha<sup>n</sup>-gǎ xii-dé.

**Jèsús dánèhé ñáhá-gǎ nàcuáa cada-o nàsáá-ó núú ndécú Yǎ Ndiòxí**

**14** Te ní xáha<sup>n</sup>-gǎ xii-güedé: —Te ñá túú nǎ cani iní-ndó. Quindáá iní-ndó Yǎ Ndiòxí, te quindáá iní-ndó yúhú. <sup>2</sup>Chi núú ndécú Tǎtà-í ío nùne núú cùndècu-o, chi núú ñáhá ñá te sa cachí tnúhu-í xii-ndo ní cùu. Te vitna na nùhú-í te cada túha-í núú cùndècu-ndo. <sup>3</sup>Te dǎtnùní quixi tucu-í

te candeca ñaha-í xii-ndo quǐhí<sup>n</sup> cuendá ñ<sup>n</sup>-ni xìchi cundecu-o. <sup>4</sup>Te sa nàha-ndo ndéè quǐhí<sup>n</sup>-í te sa xiní-ndó ìchi —cachí-gá xáha<sup>n</sup>-gǎ xii-güedé.

<sup>5</sup>Te ní xáha<sup>n</sup> tǎ Mǎxí xii-gá:

—Mèstrú, ñá túú xiní-ndí ndéè quǐhí<sup>n</sup>-n te da ichi-ná quiní-ndí —càchí-dé xáha<sup>n</sup>-dǎ xii-gá.

<sup>6</sup>Te ní xáha<sup>n</sup> Jèsús:

—Yúhú cùú-í dǎtná ñ<sup>n</sup> ichi te càhá<sup>n</sup>-í tnúhu ndáá, te yúhú cada-í te nanhí tǎhú-ndó. Te ñ<sup>n</sup> òi díi-ni yúhú cada-í te sáa-ndó núú Yǎ Ndiòxí cundecu-ndo te núu na quindáá iní ñáhá-ndó xii-í.

<sup>7</sup>Te núu dícó cùtnùní ndisa iní-ndó yòo cuu-í-á<sup>n</sup>, duca<sup>n</sup> te cutnùní iní-ndó yòo cuu Tǎtà-í ní cùu. Dico vitna dǎtná sá ní xiní núú-ndó Dútú Ndiòxí Yaá cúú Tǎtà-í cada iní-ndó, chi ní xiní-ndó yúhú —càchí-gá xáha<sup>n</sup>-gǎ xii-dé.

<sup>8</sup>Te ní xáha<sup>n</sup> tǎ Lìpé xii-gá:

—Mèstrú, danèhé ñáhá xii-ndí Dútú Ndiòxí chi na cùu váha iní-ndí —càchí-dé xáha<sup>n</sup>-dǎ xii-gá.

<sup>9</sup>Te ní xáha<sup>n</sup> Jèsús xii-dé:

—Lìpé, ¿te náa ñá túú xiní ñáhá-n xii-í? Te sa ní cuu vai nduu ndecu ndìhi ñaha-í xii-ndo, chi ñáyíu xiní ñáhá xii-í te xiní-yu tnàhà Tǎtà-í. ¿Te ná cuendá yòhó càchí-n sǎ dánèhé ñáhá-í xii-ndo Tǎtà-í? <sup>10</sup>¿Náa ñá túú sàndáá iní-ndó sǎ yúhú ndécù-í ndìhi Tǎtà-í? Te mee-gǎ ndécú ndìhi ñaha-gá xii-í. Te nchaa tnúhu càhá<sup>n</sup>-í núú-ndó ñà túú càhá<sup>n</sup>-í sá véxi iní mèè-í, chi Tǎtà-í Yaá ndécú ndìhi ñaha xii-í chindèe ñaha-gá quidè-í chiù<sup>n</sup>-gá. <sup>11</sup>Te quindáá iní-ndó sǎ yúhú ndécù-í ndìhi Tǎtà-í, te duca<sup>n</sup> mèè-gá ndécú ndìhi ñaha-gá xii-í. Te núu ñá túú sàndáá iní-ndó tnúhu càhá<sup>n</sup>-í-a, te dandàcu iní-ndó nchaa chiù<sup>n</sup> ta quide-í véxi, te quindáá iní ñáhá-ndó. <sup>12</sup>Te na càchí tnúhu ndáá-í xii-ndo sǎ nchaa ñáyíu na quindáá iní ñáhá xii-í, te cadá-yu chiù<sup>n</sup> quide-í te càhnu-gá chiù<sup>n</sup> cadá-yu chi yúhú nùhú-í núú ndécú



Tàtà-í cundecu-í nàcuáa níhí ndéé-gă-yu cundecú-yu. <sup>13</sup> Te nchaa sá ná càcá<sup>n</sup>-ndó te taxi-í te núu na quindáá iní ñáhá-ndó xii-í, te nchaa cada-í cuendá cutnùní iní ñáiyu sá ïo càhnu cuu Tàtà-í Dútú Ndiöxí. <sup>14</sup> Te yúhú cada-í nchaa sá cuiní-ndó càcá<sup>n</sup> táhú-ndó nùh-í, te núu na quindáá iní ñáhá ndisa-ndo xii-í.

### Jèsús càchí-gá sá téndàha-gá Espiritú Yă Ndiöxí quixi cundecu ndihi-o

<sup>15</sup> Te núu nchòhó cúú iní ñáhá-ndó xii-í te tni-ndo nchaa tnúhu càhá<sup>n</sup>-í. <sup>16</sup> Te yúhú cacá<sup>n</sup> táhù-í núú Tàtà-í sá téndàha-gá Espiritú-gá quixi cundecu ndihi-ndo cànu ichi ñaha-xi xii-ndo nacuáa cundecu-ndo, te chindee ñaha-xi xii-ndo ni caa ni quíhí<sup>n</sup>. <sup>17</sup> Te nchaa ñáiyu ndècu ichi cuehé ichi duha ñá túú xini-yu Espiritú Yă Ndiöxí te ni vâ cúú cundecu ndihí-yu. Dico nchòhó sa xini-ndó Espiritú-gá te ndècu ndihi ñaha-xi xii-ndo. Te sáá ì<sup>n</sup> nduu te cunuu Espiritú-gá iní-ndó. <sup>18</sup> Te yúhú vâ dāná nhnu ñaha-í xii-ndo, chi quixi tucu-í cundecu ndihi ñaha-í xii-ndo. <sup>19</sup> Te sácú duha-ná nduu ndècu-í te vâ quini ñáhá-gă ñáiyu xii-í, dico nchòhó chi quini ñáhá-ní-ndó xii-í. Te duca<sup>n</sup>-ni cundecu-ndo ichi váha chi cundecu ndihi ñaha-í xii-ndo ni caa ni quíhí<sup>n</sup>. <sup>20</sup> Te dāvá-á<sup>n</sup> cutnùní iní-ndó sã ndécù-í ndihi Tàtà-í, te duca<sup>n</sup> nchòhó cundecu ndihi ñaha-ni-ndo xii-í. <sup>21</sup> Te nchaa ñáiyu dàcuaha tnúhu-í te tni-yu, ñáiyu-á<sup>n</sup> quidé ndisá-yu sá cúú iní ñáhă-yu xii-í. Te duca<sup>n</sup> Tàtà-í cúú iní ñáhá-gă xií-yu, te duca<sup>n</sup>-ni yúhú cúú iní-í-yu tucu, te duca<sup>n</sup> te cutnuni iní-yu sá ndécú ndihí-í-yu —càchí-gá xáha<sup>n</sup>-gă xii-dé.

<sup>22</sup> Te ní cáhá<sup>n</sup> ì<sup>n</sup> téé nàni Judás dico ñá díú tē Jūdás déhe té Xímú Iscarioté ní cáhá<sup>n</sup>, chi ingá té Jūdás ní xáha<sup>n</sup>-dē xii-gá:

—Mèstrú, ¿nása cada-n cuendá cutnùní iní-ndí sá cundècu ndihi ñaha-n xii-ndí, te ñáiyu ñuhu ichi cuehé ichi duha vâ cundècu ndihí-n-yu-í? —càchí-dé xáha<sup>n</sup>-dē xii-gá.

<sup>23</sup> Te ní xáha<sup>n</sup> Jèsús xii-güedé:

—Nchaa ñáiyu cùu iní ñáhá xii-í te tni-yu tnúhu càhá<sup>n</sup>-í, te ñáiyu-á<sup>n</sup> cúú iní ñáhá Tàtà-í xií-yu, te yúhú ndihi Tàtà-í ndécú-ndí ndihí-yu. <sup>24</sup> Te nchaa ñáiyu ñá túú cùu iní ñáhá xii-í te ñá túú tni-yu tnúhu càhá<sup>n</sup>-í. Te nchaa tnúhu ní cáhá<sup>n</sup>-í ní xindèdòho-ndo chi Tàtà-í Yaa ní tendaha ñaha xii-í véxi-í ñuyúú-a ní dácáhú iní ñáhá-gă xii-í, te ñá díú mèe-í ní càhu iní-í tnúhu cáhá<sup>n</sup>-í.

<sup>25</sup> Duha ndùu tnúhu càhá<sup>n</sup>-í núú-ndó vitna ndecu ndihi ñaha-gá-í xii-ndo. <sup>26</sup> Dico Yă Ndiöxí tendaha-gă Espiritú-gá quixi-xi cada-xi núú-í taxi-xi tnúhu ndee iní xii-ndo, te diu-xi chindee ñaha-xi xii-ndo te danèhé ñáhá-xí xii-ndo nchaa sá cúmāní quini-ndó, te diu-ni-xi dandacu iní ñáhá-xí xii-ndo nchaa nacuáa ní cáhá<sup>n</sup>-í.

<sup>27</sup> Te yúhú chindee chituu ñaha-í xii-ndo ïo váha cuu iní-ndó cundecu-ndo datná yúhú ío váha cùu iní-í ndécù-í, chi sa ta cùyatni nduu núhú-í. Te yúhú càchí tnúhu ndáá-í sá chindèe ñaha-í xii-ndo, te vâ cadà-í dàtná quidé ñáiyu ñuhu ichi cuehé ichi duha. Te ni vâ ndihú iní-ndó, te ni vâ yùhú-ndó. <sup>28</sup> Te sa ní xindèdòho-ndo ní cáhá<sup>n</sup>-í sá nùhú-í, te quixi tucu-í cundecu ndihi ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnúhu sá nùhú-í núú ndécú Tàtà-í, te cudíí iní-ndó ní cùu, chi ío càhnu cuu-gá dàcúúxí yúhú. <sup>29</sup> Te sa ní cachí tnúhu-í sá nùhú-í, te na sáá òré núhú-í núú ndécú Tàtà-í, te quindáá iní ñáhá-ndó xii-í.

<sup>30</sup> Te ñá túú-gă vâi tnúhu ndatnúhu ndihi ñaha-í xii-ndo chi sa véxi yucu ñāvāha sá táxi tnùní ñuyúú-a, dico vâ táxi tnùní ñáhá-xí xii yúhú. <sup>31</sup> Te cada-í

nchaa nàcuáa ní táuchíú<sup>n</sup> Tàtá-í cuendá cutnùnì iní nchaa ñáyiú ñuyíú-a sá yúhú ío cùu iní-í-gá. Te vitna chí ndácuñí ná quíhí<sup>n</sup>-ó —càchí-gá xáha<sup>n</sup>-gá xii-güedé.

**Cuendá yoho yàha stilé ndihi nchaa dité-xi**

**15** Te ní xáha<sup>n</sup> tùcu-gá xii-güedé: —Yúhú cùu-í dàtná yoho yàha stilé, te Tàtá-í cúu-gá dàtná ì<sup>n</sup> téé xito yoho yaha stilé-á<sup>n</sup>. <sup>2</sup>Te nchaa ñáyiú ní sándáá iní ñáhá xii-í cúu-yu dàtná dité nchaa yoho yàha stilé-á<sup>n</sup>. Te téé xito yoho yaha stilé-á<sup>n</sup> xèhndé-dé nchaa dité-xi sá ñá cuíní-gá-xi cuu<sup>n</sup> ndéhé-xi, te ndàda ndoo-dé nchaa dité-xi sá cúu<sup>n</sup> cuendá cuu<sup>n</sup>-gá. <sup>3</sup>Te duca<sup>n</sup> sàtnahá-xi cùu nchohó, chi sa ní xócuñí nchaa sá cuèhé sá dúhá ndècu ndihi-ndo, chi ní sándáá iní-ndó tnùhu ní cáhá<sup>n</sup>-í. <sup>4</sup>Te cuu ì<sup>n</sup>nuu-ndo cùndecu ndihi ñaha-ndo xii-í, te núu duca<sup>n</sup> na càda-ndo, te cundecu ndihi ñaha-í xii-ndo. Chi núu ì<sup>n</sup> yutnu vídí ná quéndéé dité-xi, te dité-xi sá ní quendéé-á<sup>n</sup> vǎ cúu<sup>n</sup>-gá sávidí-xi chi duu<sup>n</sup> duu<sup>n</sup> ní xíta-xi. Duca<sup>n</sup> sàtnahá-xi cùu nchohó chi vá ndácú-ndó càda-ndo chiu<sup>n</sup>-í, te núu vá cùndècu ndihi ñaha-í xii-ndo.

<sup>5</sup>Chi yúhú cùu-í dàtná yutnu vídí-á<sup>n</sup>, te nchòhó cúu-ndó dàtná nchaa dité-xi. Te nchaa ñáyiú cùu ì<sup>n</sup>nuu ndihi ñaha xii-í, te ndècu ndihi-í-yu, te ndácú-yu quidé-yu chiù<sup>n</sup>-í. Te núu vá cúu ì<sup>n</sup>nuu ndihi ñáhá-yu xii-í, te vá ndácú-yu cadá-yu chiù<sup>n</sup>-í. <sup>6</sup>Te nchaa ñáyiú vá cúu ì<sup>n</sup>nuu ndihi ñaha xii-í, te yàha-yu dàtná yàha ì<sup>n</sup> dité yutnu vídí sá ñà túú cùu<sup>n</sup> sávidí-xi, chi xèhndé-güedé yìchí-xi, te sàhmi-güedé.

<sup>7</sup>Cuu ì<sup>n</sup>nuu ndihi ñaha-ndo xii-í, te vá nàcuànaa-ndo nacuáa ní cáhá<sup>n</sup>-í. Te núu duca<sup>n</sup> na càda-ndo, te nání cuíní-ndó cǎcǎ<sup>n</sup>-ndó nùu-í te taxi-í. <sup>8</sup>Te núu nchòhó ná cadá vǎha-ndo cùndecu-ndo, te ío cada càhnu-ndo

Tàtá-í, te duca<sup>n</sup> cùtnuní sá ndísá cùu-ndo cue téé ní chitnahá ñáhá xii-í. <sup>9</sup>Te yúhú ío cùu iní ñáhà-í xii-ndo dàtná cúu iní ñáhá Yǎ Ndiòxí xii-í. Te cada-ni-ndo mée-ni sá vǎha cuendá cudí iní ñáhá-gǎ-í xii-ndo. <sup>10</sup>Te núu na quíndáá iní-ndó càda-ndo nchaa nacuáa ní cáhá<sup>n</sup>-í, te ío cuu iní ñáhà-í xii-ndo, chí yúhú duca<sup>n</sup> ío sàndáá iní-í Tàtá-í quídè-í nchaa nàcuáa ní cáhá<sup>n</sup>-gá, te xǎ<sup>n</sup> nùu ío cùu iní ñáhá-gǎ xii-í.

<sup>11</sup>'Duha càhá<sup>n</sup>-í núu-ndó cuendá cudí ndisa iní-ndó dàtná cudí iní mée-í. <sup>12</sup>Te duha ndùu tnúhu càhá<sup>n</sup>-í cuendá sá cúu iní tnáhá-ndó ì<sup>n</sup> ì<sup>n</sup>-ndo datná cúu iní ñáhà-í xii-ndo. <sup>13</sup>Te núu ní xíhó sǎ cúu-xí ì<sup>n</sup> téé ío váha tnáhá tnúhu ndihi-o, te xǎ<sup>n</sup> cutnùnì iní ñáyiú sá ío cùu iní-ó-dě. <sup>14</sup>Te nchòhó cuu-ndo cuè téé ío váha tnahá tnúhu ndihi-í te núu na càda-ndo nchaa nacuáa càhá<sup>n</sup>-í. <sup>15</sup>Te vá cǎñaha-gǎ-í xii-ndo sǎ cúu-ndó cuè téé xínu cuechi núu-í, chí ní ì<sup>n</sup> téé xínu cuechi ñá túú xini-dé ná quidé pǎtró<sup>n</sup>-dě. Te yúhú càchí-í xii-ndo sǎ cúu-ndó cuè téé ío váha tnáhá tnúhu ndihi-í, chí ní cachí tnúhu-í nchaa nàcuáa ní cáhá<sup>n</sup> Tàtá-í. <sup>16</sup>Te ñá díú nchòhó ní càhá<sup>n</sup> ñáhá-ndó xii yúhú, chí yúhú ní cáhá<sup>n</sup> ñáhà-í xii-ndo. Te yúhú tauchiù<sup>n</sup>-í quíhí<sup>n</sup>-ndó càda-ndo nchaa nacuáa ní cáhá<sup>n</sup>-í, chí tnúhu-á<sup>n</sup> vǎ ndíhí ñhnu-xi. Te duca<sup>n</sup> nchàa sá ná cǎcǎ<sup>n</sup>-ndó nùú Tàtá-í Yǎ Ndiòxí te taxi-gá, te núu na quíndáá iní ñáhá-ndó xii-í. <sup>17</sup>Te yúhú càhá<sup>n</sup>-í dóho-ndo sǎ cúu iní tnáhá-ndó ì<sup>n</sup> ì<sup>n</sup>-ndo.

**Ñáyiú ndècu ichi cuehé ichi duha cùu úhú iní-yu Jèsús ndihi nchaa ñáyiú sàndáá iní tnúhu-gá**

<sup>18</sup>Te nchaa ñáyiú ndècu ichi cuehé ichi duha ñá cúu quínì ñáhǎ-yu xii-ndo, te sa nàha-ndo sá díhna-gá yúhú ní ngúfta-yu duca<sup>n</sup> ñà cúu quínì ñáhǎ-yu xii-í. <sup>19</sup>Te núu òcò tnáhá nchòhó

ndécú-ndó ìchi cuehé ichi duha ña, te cuu iní ñáhã-yu xii-ndo dàtná cúú iní tnáhã-yu ndi mèé-yu ni cùu. Te yúhú ní nanducu nihnu ñaha-í xii-ndo tnùú ñáyiu ndècu ichi cuehé ichi duha, núu xiã<sup>n</sup> ío cùu úhú iní ñáhã-yu xii-ndo cuendá sá ñà túú-gã chítñahá-ndó-yu. <sup>20</sup>Te dandacu iní-ndó nàcuáa ní cáhá<sup>n</sup>-í sá ni ì<sup>n</sup> téé xinu cuechi ñá túú cùnuu-dé dácúúxí pàtróó<sup>n</sup>-dè. Te yúhú cúú úhú iní ñáhã-yu, te ñu-ni duca<sup>n</sup> càda ñahã-yu xii nchòhó. Te núu ñí<sup>n</sup> ní ñnì<sup>n</sup>-yu tnúhu ní cáhá<sup>n</sup>-í ñá, te ñu-ni duca<sup>n</sup> ñnì<sup>n</sup>-yu tnúhu cáhá<sup>n</sup>-ndó ññ<sup>n</sup>-yu ni cùu. <sup>21</sup>Te duca<sup>n</sup> càda ñahã-yu xii-ndo sã cuendá-í, chi ñá xiní-yu Tàtã-í Yaá ní tendaha ñaha xii-í véxi-í ñuyíú-a.

<sup>22</sup>Te vaa vá cùndècu cuéchi-yu ni cùu, te núu ñá túú yúhú ní cáhá<sup>n</sup>-í núú-yu, te vitna vá cúú tnàhí cachí-yu sá ñà túú cuéchi-yu. <sup>23</sup>Chi nchaa ñáyiu cùu úhú iní ñáhã xii-í, te cùu úhú iní-yu tnàhã Tàtã-í. <sup>24</sup>Te vaa ni ì<sup>n</sup> cuéchi-yu vá cùndècu ni cuu, te núu ñí<sup>n</sup> ní xiní-yu nchaa sá ñí quide-í sá vã yòò tnàhí ndàcu cada. Te cuéi ní xiní-yu dico dai cùu úhú iní ñáhã-yu xii-í ndihí Tàtã-í. <sup>25</sup>Te duha quidè-yu chi dacuítí quèè ndáá-xi nàcuáa yòdo tnuní núú tùtú Yã Ndiòxí sá dácuahá-yu, chi càchí-xi sá ñà túú ñã cuéchi-í te cuu úhú iní ñáhã-yu xii-í.

<sup>26</sup>Te Espiritú Tàtã-í Dútú Ndiòxí sá ndécú ññ<sup>n</sup>-gã tendaha-í quixi chindee ñaha-xi xii-ndo, te canu ichi ñaha-xi nàcuáa cundecu-ndo, te Espiritú-á<sup>n</sup> cáhá<sup>n</sup> ndáá-xi cuendá cutnùní iní nchaa ñáyiu yoo cùu-í. <sup>27</sup>Te nchòhó tnàhá-ndó cáhá<sup>n</sup> váha-ndo cuendá-í cuendá cutnùní iní-yu yoo cùu-í, chi ñaha-ndo sá ndèé òré ní ngúíta-í quidè-í chiù<sup>n</sup> Tàtã-í ní chitnahá ñáhã-ndó xii-í —càchí-gá xáha<sup>n</sup>-gã xii-güedé.

**16** Te ní xáha<sup>n</sup> tùcu-gá xii-güedé:  
—Duha càhá<sup>n</sup>-í cuendá ná nanchòcáva iní-ndó ññ<sup>n</sup>-ndó ìchi

cuehé ichi duha. <sup>2</sup>Chi vá dãnã-gã-güedé quíhu-ndo vèñúhu, te ni vã cúú-gã quiní ndèé ñáhã-güedé xii-ndo. Te sáá ì<sup>n</sup> nduu te cahni ñaha-güedé xii-ndo, te xiã<sup>n</sup> cuu caha<sup>n</sup>-güedé sá quidè-güedé chiù<sup>n</sup> Yã Ndiòxí. <sup>3</sup>Te duca<sup>n</sup> càda-güedé chi ñá túú xiní-güedé Tàtã-í, te ni ñà túú xiní ñáhã-güedé xii yúhú. <sup>4</sup>Te duha nduu tnúhu càhá<sup>n</sup>-í núú-ndó, chi na sáá òré te ndacu iní-ndó nchaa tnúhu sá sã ní cachí tnúhu-í xii-ndo nàcuáa cada ñaha-güedé xii-í.

### Nchaa chiù<sup>n</sup> quide Espiritú Yã Ndiòxí

<sup>5</sup>Te ñá túú ní càchí tnúhu-í xii-ndo ndèé díhna chi ndècu ndihí ñaha-í xii-ndo. <sup>5</sup>Dico vitna sa ta cùyatni nduu núhú-í núú ndécú Tàtã-í Yaá ní tendaha ñaha xii-í véxi-í ñuyíú-a. Te ni ì<sup>n</sup> nchòhó ñá túú xicá<sup>n</sup> tnúhú-ndó ññ<sup>n</sup>-í ññ<sup>n</sup> ndèé quíhí<sup>n</sup>-í. <sup>6</sup>Chi mee-ni sã ndihú iní-ndó sã dúcá<sup>n</sup> ñí cáhá<sup>n</sup>-í. <sup>7</sup>Te na càchí tnúhu ndáá-í xii-ndo sã váha-gá sá cúú-xi-ndó ññ<sup>n</sup> núhú-í, chi tendaha-í Espiritú Yã Ndiòxí quixi cundecu ndihí-ndo chindee ñaha-xi, chi núu vá ññ<sup>n</sup>-í te vá quíxí Espiritú-gá cundecu ndihí-ndo chindee ñaha-xi xii-ndo. <sup>8</sup>Te na quixi Espiritú-gá te dandixi túu-xi iní nchaa ñáyiu ndècu ichi cuehé ichi duha sá ñà túú quide váha-yu. Te dacàhu iní ñáhã-xí sã ndécú ì<sup>n</sup> ichi váha ichi ndáá. Te Espiritú-gá-á<sup>n</sup> cada-xi nàcuáa cutnùní iní-yu sá Yã Ndiòxí cada ndáá-gá cuéchi-yu. <sup>9</sup>Te duca<sup>n</sup> te cutnùní iní-yu sá ndécú cuéchi-yu, chi ñá túú sàndáá iní ñáhã-yu xii-í. <sup>10</sup>Te duca<sup>n</sup> te cutnùní iní-yu nàcuáa nduu cuendá ichi váha ichi ndáá, chi yúhú núhú-í núú ndécú Tàtã-í, te nchòhó vá quiní ñáhã-gã-ndó. <sup>11</sup>Te duca<sup>n</sup> te cutnùní iní-yu sá Yã Ndiòxí cada ndáá-gá cuéchi-yu, chi sa ní cáhá<sup>n</sup>-gá sá yúcu ñávãha sá táxí tnuní ñuyíú-a quíhí<sup>n</sup>-xi núú úhú núú ndàhú.

<sup>12</sup>Te vãi-gá tnúhu ndècu cachí tnúhu-í xii-ndo, dico nchòhó chi vá

cúndèe iní-ndó cùndedóho-ndo nchàa vitna. <sup>13</sup> Te na quìxi Espiritú Yă Ndiôxí, Espiritú càhá<sup>n</sup> ndáá cuiti, te Espiritú-á<sup>n</sup> danèhé ñáhá-xí nchàa tnúhu váha tnúhu ndáá. Te vá dácàhu iní ñáhá-xí xii-ndo sá vèxi iní méé-xí chi dacàhu iní ñáhá-xí nchàa sá càhá<sup>n</sup> Yă Ndiôxí, te cachí tnúhu-xi nchaa nàcuáa cada-xi ndéé núú cuahá<sup>n</sup> núú vèxi-gá. <sup>14</sup> Te Espiritú-gá-á<sup>n</sup> cada càhnu ñaha-xi xii yúhú chi ndècu ndìhi-xi tnúhu-í, te danèhé ñáhá-xí xii-ndo. <sup>15</sup> Te nchaa sá ndécú ndìhi Tàtá-í ndécú ndìhi-í tnàhá-í, núú xíá<sup>n</sup> càchí-í sá Espiritú-gá danèhé ñáhá-xí nchàa tnúhu-í xii-ndo.

### Nchaa ñáyiu ndìhú iní-xi nduu díf iní-yu na quìxi tucu Jesús

<sup>16</sup> Te ì<sup>n</sup> úú-nă nduu ndècu-í te vá quini ñáhá-gă-ndó xii-í, dico núú sàcú-ni nduu te quini ñáhá tucu-ndo xii-í, te duca<sup>n</sup> chi núhú-í núú ndécú Tàtá-í — càchí-gá xáha<sup>n</sup>-gă xii-güedé.

<sup>17</sup> Te sá dúcá<sup>n</sup> nǐ cáhá<sup>n</sup>-gá nǔu nǐ ngúíta ì<sup>n</sup> úú cue tée xica cuu ndìhi-gá xǐtnàha-güedé:

—¿Nása ndùu-tu tnúhu càhá<sup>n</sup>-gá sá càchí-gá sá ì<sup>n</sup> úú-nă nduu ndècu-gá te vá quini-gá-ó-gă, dico núú sàcú-ni nduu te quini tucu-o-gă-i?, chi núhú-gá núú ndécú Tàtá-gă —càchí-güedé xǐtnàha-güedé.

<sup>18</sup> Te xǐtnàha tucu-güedé:

—¿Nása cuahá<sup>n</sup>-tu tnúhu-ă<sup>n</sup> sá sàcú-ni nduu? Te ñá tècú tnùní-ó nása ndùu tnúhu càhá<sup>n</sup>-gá —càchí-güedé xǐtnàha-güedé.

<sup>19</sup> Te Jèsús nǐ cutnùní iní-gá sá cuini-güedé caca<sup>n</sup> tnúhú-güedé núú-gă nása ndùu tnúhu nǐ cáhá<sup>n</sup>-gá, núú nǐ xáha<sup>n</sup>-gă:

—Cuendá sá nǐ cachí-í sá ì<sup>n</sup> úú-nă nduu ndècu-í te vá quini ñáhá-gă-ndó xii-í, dico núú sàcú-ni nduu te quini ñáhá tucu-ndo xii-í nǐ cachí-í, ¿xíá<sup>n</sup> ndúcú

tnúhu núú tnáhá-ndó-ă<sup>n</sup>? —càchí-gá xáha<sup>n</sup>-gă xii-güedé.

<sup>20</sup> Te nǐ xáha<sup>n</sup> tucu-gá:

—Te na càchí tnúhu ndáá-í xii-ndo sá nchòhó ndǐhú vǐhí iní-ndó te ndáhyú-ndó, dico nchaa ñáyiu ndècu ichi cuehé ichi duha chi da cudǐ iní-yu. Dico nchòhó ñáyiu ndáhyú chi sáá nduu te nduu dǐf iní-ndó. <sup>21</sup> Chi dàtná cuini-ndó cùu ì<sup>n</sup> ñadihí ñaha nǐ tnáhá nduu cacu déhe-xi vài sani iní-a<sup>n</sup> sá quidé úhú ñáhá-xí. Dico na yáha cacu déhe-a<sup>n</sup>, te ñá túú-gă ndácú iní-a<sup>n</sup> sá nǐ quide úhú ñáhá-xí xii-a<sup>n</sup> chi mee-nă sá cudǐf iní-a<sup>n</sup> déhe-a<sup>n</sup>. <sup>22</sup> Duca<sup>n</sup> sǎtnahá-xi cùu nchohó vitna chi ndìhú iní-ndó sá nùhú-í, dico quixi tucu-í quixi coto ñaha-í xii-ndo, te òré-á<sup>n</sup> te cudǐf ndisa iní-ndó, te vá yò ì<sup>n</sup>-gá dandìhú iní ñáhá xii-ndo davá-á<sup>n</sup>.

<sup>23</sup> Te dàvâ-á<sup>n</sup> ñá túú-gă ná nducu tnúhu-ndo nù-í. Te na càchí tnúhu ndáá-í xii-ndo sá Tàtá-í taxi-gá nchaa sá ná càcá<sup>n</sup>-ndó nùú-gă nǔu na quindáá iní ñáhá-ndó xii-í. <sup>24</sup> Te ndéé vitna vátá dúcá<sup>n</sup>-gă cada-ndo càcá<sup>n</sup>-ndó. Dico càcá<sup>n</sup>-ndó nùú-gă nǔu ná cuini-ndó te taxi-gá cuendá cudǐf ndisa iní-ndó — càchí-gá xáha<sup>n</sup>-gă xii-güedé.

### Xítóhó Jesucrístú nǐ cunuu tnúhu-gá núú yucu ñávâha

<sup>25</sup> Te xáha<sup>n</sup> tucu-gá xii-güedé:

—Mee-ni nǐ chidáhu ndodo-í tnúhu nǐ cáhá<sup>n</sup>-í núú-ndó, dico sáá nduu te vá chidáhu-gá-í tnúhu cáhá<sup>n</sup>-í, chi cáhá<sup>n</sup> ndáá-na-í cuendá Tàtá-í. <sup>26</sup> Te dàvâ-á<sup>n</sup> càcá<sup>n</sup>-ndó nùú Tàtá-í nǔu ná cuini-ndó te taxi-gá, te núu na quindáá iní ñáhá-ndó xii yúhú Déhe-gá. Te ñá túú-gă xini ñùhu-xi sá yúhú càcá<sup>n</sup>-í núú-gă cuendá-ndó chi càcá<sup>n</sup> méé-nă-ndó. <sup>27</sup> Chi mee Tàtá-í ío cùu iní ñáhá-gă xii-ndo cuendá cúú iní ñáhá-ndó xii-í, te sàndáá iní-ndó sá nùú-gă nǐ quee-í véxi-í. <sup>28</sup> Te yúhú nǐ quee-í núú Tàtá-í véxi-í ñuyúú-a,

te vitna dândóo-í ñuyíú-a te núhú-í núú ndécú-gă —càchí-gá xáha<sup>n</sup>-gă xii-güedé.

<sup>29</sup>Te ní xáha<sup>n</sup> cuè téé xica cuu ndihi-gá:

—Vitna chi càhá<sup>n</sup> ndáá-nă-n, ñá túú-gă chídăhu-n tnúhu càhá-n. <sup>30</sup>Te vitna ní xiní-ndí sá ïo váha cùtnuní iní-n nchàa nacuáa cùu, te cùtnuní iní-n nchàa nacuáa sàni iní nchaa ñáyíu. Te ñá túú xini ñuhu-xi nágá nducu tnúhu-yu núú-n chi nchaa sa ní dátúu-n nùú-yu. Te xíá<sup>n</sup> nùu sàndáá iní-ndí sá nùú Yă Ndiöxí ní quee-n vëxi-n —càchí-güedé xáha<sup>n</sup>-güedé xii-gá.

<sup>31</sup>Te ní xáha<sup>n</sup> Jèsús:

—¿Te vitna sàndáá iní-ndó-ă<sup>n</sup>?

<sup>32</sup>Vitna ní sáá nduu ní sáá òrè sá ncháá nchòhó cuténuu-ndo càa ì<sup>n</sup> caa úú cuu-ndo, te dândóo mee ñàha-ndo xii-í. Dico ñá díú mèe dii-í quendóo chi ndècu ndihi-í Tătà-í. <sup>33</sup>Duha càhá<sup>n</sup>-í cuendá cuu váha iní-ndó cùndecu-ndo, chi ñuyíú-a cuu úhú iní ñáhă-yu xii-ndo, dico ni vă yùhú-ndó chi yùhú sa ní dáquéé tìhù-í nchaa sá cuèhé sá dúhá ïo ñuyíú-a —càchí-gá xáha<sup>n</sup>-gă xii-güedé.

**Jèsús xicá<sup>n</sup> táhú-gă núú Tătá-gă  
Dútú Ndiöxí cuendá  
cue téé xica cuu ndihi-gá**

**17** Te sátá dúcá<sup>n</sup> ní càhá<sup>n</sup> Jèsús te ní ndacoto-gá andíu, te ní xáha<sup>n</sup>-gă xii Tătá-gă Dútú Ndiöxí:

—Táu, vitna ní sáá nduu càda cahnu ñàha-n xii-í cuendá duca<sup>n</sup> càda cahnu ñàha-í xii-n. <sup>2</sup>Chi mee-n ní cachí-n sá táxí tnùn-í nchaa ñáyíu ñuyíú-a, te dà-cacu nihnu-í nchaa ñáyíu ní cachí-n nàníhí tàhú. <sup>3</sup>Te cundecu ndihi-ö-yu ni caa ni quíhí<sup>n</sup>, chi sàndáá iní ñáhă-yu sá ì<sup>n</sup> dii díí-ni yòhó cúú-n Ndiöxí ndisa, te duca<sup>n</sup> xiní ñáhă-yu xii yùhú Jesucristú téé ní tendaha-n vëxi ñuyíú-a.

<sup>4</sup>Te yùhú ní chiñuhu ñàha-í xii-n ñuyíú-a, te ní xínu chiú<sup>n</sup> ní cachí-n càda-í. <sup>5</sup>Táu, vitna na nàsáá-í núú-n te

cada càhnu ñàha-n xii-í dàtná ní xóo cada càhnu ñàha-n xii-í ndéé cùtnàhă vátá ngăva-gă ñuyíú.

<sup>6</sup>Te nchaa ñáyíu ní nanducu nihnu-n tnuú nchaa ñáyíu ndècu ichi cuehé ichi duha, ní taxi cuendá-n-yu, te ní xáha<sup>n</sup>-í xii-yu yoo cùu-n. Te cuendá-n cùú-yu, te ní taxi cuendá-n-yu, te ní sàndáá iní-yu tnúhu-n. <sup>7</sup>Te vitna ní cutnùn-í iní-yu sá ncháá tnúhu ndècu ndihi-í diu-ni mee-n ní taxi-n. <sup>8</sup>Te ní dánèhé-í-yu nchaa tnúhu sá ní dánèhé ñáhă-n xii-í, te ní sàndáá iní-yu. Te ní cutnùn-í iní-yu sá nùú-n ní quee-í véxi-í, te ní sàndáá iní-yu sá yòhó ní tendaha ñàha-n xii-í véxi-í ñuyíú-a.

<sup>9</sup>Te yùhú càhá<sup>n</sup> ndàhú-í núú-n cuendá nchaa ñáyíu ní taxi cuendá-n. Te ñá túú càhá<sup>n</sup> ndàhú-í núú-n cuendá ñáyíu ndècu ichi cuehé ichi duha, chi cuendá nchaa ñáyíu ní taxi cuendá-n càhá<sup>n</sup>-í, chi cuendá-n cùú-yu. <sup>10</sup>Te nchaa sá cúú cuendá-í cúú-xí cuendá-n, te nchaa sá cúú cuendá-n cùu-xi cuendá-í tnàhá-í. Te xíquide càhnu ñàhá-yu xii-í.

<sup>11</sup>Te yùhú vá cùndècu-gá-í ñuyíú-a, dico mèe-yu chi cundecu-ní-yu, te yùhú ndixi-í núú ndécú-n. Táu, yòhó ïo yinùhu ndecu-n, te yùhú càhá<sup>n</sup> ndàhú-í núú-n sá ní yùhu ni iní-n còto-n nchaa ñáyíu ní taxi cuendá-n, ñáyíu ní sàndáá iní tnúhu-í cuendá sá ì<sup>n</sup>-ní ichi cuú-yu cundecú-yu dàtná ì<sup>n</sup>-ni cùu nchoo. <sup>12</sup>Chi òrè ndécú-í ndihí-yu ñuyíú-a ní xito-í-yu nàcuáa cùu iní-n, te ni ì<sup>n</sup>-yu ñá túú ní xíta nihnu, chi ì<sup>n</sup>-dii-ni té Jùdás ní xíta nihnu tnàhí-dé, te duca<sup>n</sup> ní cuu cuendá sá ní quee ndáá-xi nàcuáa yòdo tnuní núú tütú-n.

<sup>13</sup>Te vitna sa ndixi-í núú ndécú-n, dico nini ndècu-gá-í ñuyíú-a duha càhá<sup>n</sup>-í cuendá sá cúđí iní-yu dàtná cúđí iní mèe-í. <sup>14</sup>Te yùhú ní dánèhé-í-yu tnúhu-n, dico nchaa ñáyíu ndècu ichi cuehé ichi duha cùu úhú iní ñáhă-yu xii-yu cuendá sá ñà túú-gă

ndécũ-yu ichi cuèhé ichi duha-á<sup>n</sup> dàtná yúhú ñá túú ndècu-í ichi-á<sup>n</sup>.  
<sup>15</sup>Te ñá túú càchí-í sá xócàní-n-yu ñuyúú-a, dico càhá<sup>n</sup> ndàhú-í núú-n sá dácácu ñìhnú-n-yu núú yucu ñávàha.  
<sup>16</sup>Te yúhú ñá túú ndècu-í ichi cuèhé ichi duha, te duca<sup>n</sup> mèè-yu ñá túú-gã ndécũ-yu ichi cuèhé ichi duha. <sup>17</sup>Te ío na cùndecu yihi ñuhu-gã-yu núú-n dácuahá-yu tnúhu-n, chí cùu-xi ì<sup>n</sup> tnúhu ndáá. <sup>18</sup>Te dàtná ní tendaha ñàha-n xii yúhú véxi-í tnuú nchaa ñáiyu ndècu ichi cuehé ichi duha, duca<sup>n</sup> càda-í tendaha-í-yu quíhí<sup>n</sup>-yu cáhá<sup>n</sup>-yu tnúhu-í tnuú nchaa ñáiyu ndècu ichi cuehé ichi duha. <sup>19</sup>Te yúhú ndécú yìñuhu-í núú-n, te cada ñaha-n xii-í nàcuáa cùu iní-n sã cuendá-yu, te duca<sup>n</sup> te cundecu yìñuhú-yu núú-n dácuahá-yu tnúhu-n.

<sup>20</sup>Te ñá díú cuendá mee-ni ñáiyu sa ní sándáá iní-xi càhá<sup>n</sup> ndàhú-í núú-n, chí tnàhá cuendá nchaa ñáiyu na quèndáá iní ñàhá xii-í ndéé idá-gã nõu na cùndedóho-yu tnúhu cáhá<sup>n</sup> ñáiyu na tendaha-í. <sup>21</sup>Te xicá<sup>n</sup> táhù-í núú-n sã ncháã-yu ì<sup>n</sup>-ná ichi na cùu-yu, te ì<sup>n</sup>-ná cani iní ndihi ñàhá-yu xii-o dàtná cúú nchò ì<sup>n</sup>-ni cuu-o. Te duca<sup>n</sup> ì<sup>n</sup>-ná cuu-o ndihí-yu cuendá sá ná quèndáá iní nchaa ñáiyu ndècu ichi cuehé ichi duha sá díú-n ní tendaha ñàha-n xii-í véxi-í ñuyúú-a. <sup>22</sup>Te nchaa sá vãha ní taxi-n ndècu ndihi-í ní dánhé-í-yu cuendá sá í<sup>n</sup>-ná cuú-yu cundecú-yu dàtná ndécú nchò. <sup>23</sup>Te yúhú cundecu ndihi-í-yu, te yòhó cundecu ndihi ñàha-n xii yúhú cuendá ì<sup>n</sup>-ná cuu ndisá-yu cundecú-yu. Te duca<sup>n</sup> te cutnùnì iní nchaa ñáiyu ndècu ichi cuehé ichi duha sá díú mèè-n ní tendaha ñàha-n xii-í véxi-í ñuyúú-a, te cùu iní-n-yu dàtná cúú iní ñàhá-n xii yúhú.

<sup>24</sup>Táu, mee-n ní taxi cuendá-n-yu, te cuiní-í sá cùndecú-yu núú cùndecú-í cuendá quini-yu sá quidé càhnu ñàha-n xii-í chí duca<sup>n</sup>-ni cùu iní ñàhá-n xii

yúhú ndéé cùtnàhá vátá ngãva-gã ñuyúú.  
<sup>25</sup>Táu, yòhó ío yìñuhu ndecu-n. Te ñáiyu ndècu ichi cuehé ichi duha ñá túú xini ñàhá-yu xii-n, dico yúhú chí xini ñàhá-í xii-n, dico ñáiyu ní sándáá iní ñàhá xii-í sa xini-yu sá díú-n ní tendaha ñàha-n xii-í véxi-í ñuyúú-a. <sup>26</sup>Te sa xãha-í xii-yu yoo cùu-n, te diu-ni duca<sup>n</sup> càda-í cuendá cuu iní tnàhá-yu dàtná cúú iní ñàhá-n xii-í, te duca<sup>n</sup> cùndecu-í ndihí-yu —càchí-gã xáha<sup>n</sup>-gã xii Tátá-gã Dútú Ndiöxí.

### Ní tnií-güedé Jèsús ndéca ñàha-güedé cuáhá<sup>n</sup>

(Mt. 26:47-56; Mr.

14:43-50; Lc. 22:47-53)

**18** Te sáta dúcá<sup>n</sup> ní cáhá<sup>n</sup> Jèsús, te ní quee-gã ndihi cue téé xica cuu ndihi-gã cuáhá<sup>n</sup>-güedé ndàa ingá xio yuhu yùú Cèdrón. Te yàcá<sup>n</sup> cáá ì<sup>n</sup> lahuertá, te xití lahuertá-á<sup>n</sup> cuànguihu Jèsús ndihi cue téé xica cuu ndihi-gã. <sup>2</sup>Te té Jüdás déhe té Ximú Iscarioté téé ní sáha cuendá ñàhá xii-gã núú cuè téé cùu úhú iní ñàhá sa xini-dé lahuertá-á<sup>n</sup> chí titní xito ní sáhá<sup>n</sup> Jèsús ndihi-güedé xía<sup>n</sup>. <sup>3</sup>Núu ndáá ichi xía<sup>n</sup> ní sáá té Jüdás ndihi vai sandadú, ndihi cue téé quide cuendá veñúhu ní techiù<sup>n</sup> ñàha cue dútú cùnùu, ndihi cue téé cùu fariséú. Te xínehe-güedé machití ndihi ì<sup>n</sup> úú-gã sá dèé<sup>n</sup>, te yòtnúú-güedé linterná ndihi iti ní sáá. <sup>4</sup>Te Jèsús sa ñàha-gã nchaa nàcuáa cada ñàha-güedé xii-gã nõu ní sáhá<sup>n</sup> tuha ñàha-gã xii-güedé, te ní xáha<sup>n</sup>-gã:

—¿Yoo nànducu-ndo? —cachí-gã xáha<sup>n</sup>-gã xii-güedé.

<sup>5</sup>Te ní xáha<sup>n</sup>-güedé:

—Jèsús téé ñuú Nazàrét nánducu-ndí —càchí-güedé xáha<sup>n</sup>-güedé xii-gã.

Te ní xáha<sup>n</sup> Jèsús:

—Yúhú duca<sup>n</sup> nàni-í, te náu-í ndécú-á te núu yúhú nánducu-ndo —cachí-gã xáha<sup>n</sup>-gã xii-güedé.

Te tnàhá té Jùdás téé ní sáha cuèndá ñáhá xii-gá ndihi-güedé. <sup>6</sup>Te òré ní xáha<sup>n</sup> Jèsús sá dífú-gǎ cúú téé nànducu-güedé, te ní nacaca dùma-güedé te ní nduá-güedé ndéé ñuhu. <sup>7</sup>Te ní xicá<sup>n</sup> tnúhú tucu Jesús núú-güedé yoo nànducu-güedé. Te ní xáha<sup>n</sup> tucu-güedé sá Jèsús téé ñúú Nazàrét nándücu-güedé, <sup>8</sup>núú ní xáha<sup>n</sup>-ná Jèsús:

—Sa ní cáhá<sup>n</sup>-í sá dífú yǎhú duca<sup>n</sup> nàni-í, te núú yǎhú nándücu-ndo, te dañà-ndo ncháa cue téé iha na nùhú-güedé —càchí-gá xáha<sup>n</sup>-gǎ xii-güedé.

<sup>9</sup>Duha ní cuu chi ní quee ndáá-xi nàcuáa ní cáhá<sup>n</sup> méé Jèsús chi ní cachí-gá sá ncháá ñǎyiu ní sáha cuèndá ñáhá Yǎ Ndiòxí cundecu ndihi-gá vǎ cuíta nihnú-yu. <sup>10</sup>Te té Xímú, àdi Pelú chi úú òdu-dé, néhé-dé ì<sup>n</sup> machití, te ní tava-dé machití-á<sup>n</sup> ñii-xi te ní xehndé-dé lóho xio cùha ì<sup>n</sup> téé nàni Malcú ní quéndé duu<sup>n</sup>. Te téé-á<sup>n</sup> xínú cuèchi-dé núú dútú cúnù-gǎ. <sup>11</sup>Te ní xáha<sup>n</sup> Jèsús xii té Pèlú:

—Nataxúha machití-á<sup>n</sup> núú ñúhú-xí, chi dacuití sǎ ndóhò-í nàcuáa ní cachí Tǎtà-í cunduu —càchí-gá xáha<sup>n</sup>-gǎ xii-dé.

### **Jèsús ndécú-gǎ núú dútú cúnù-gǎ**

(Mt. 26:57-58; Mr. 14:53-54; Lc. 22:54)

<sup>12</sup>Te cue sandàdú ndihi cue téé cúnù-gǎ núú-güedé, ndihi cue téé quide cuendá veñúhu ní tni-güedé Jèsús, te ní dácútú ñaha-güedé. <sup>13</sup>Te ndèca ñaha-güedé xii-gǎ cuáhá<sup>n</sup> núú ndécú té Ànás, te té Ànás-á<sup>n</sup> cúú-dé tǎtà ñadìhí té Caifás. Te té Caifás-á<sup>n</sup> ñí cuu-dé dútú cúnù-gǎ cuíá-ǎ<sup>n</sup>. <sup>14</sup>Te òdu-ni téé-á<sup>n</sup> ñí xáha<sup>n</sup>-dǎ xii ñǎyiu isràèl sá vǎha-gǎ sá ì<sup>n</sup>-ní téé na cùú-dé sá cuèndá-yu ncháa-yu.

### **Té Pèlú càhá<sup>n</sup>-dé núú ñǎyiu sá ñà túú xini-dé Jèsús**

(Mt. 26:69-70; Mr. 14:66-68; Lc. 22:55-57)

<sup>15</sup>Te té Pèlú, àdi Xímú chi úú òdu-dé, ndihi ingá tucu-dé nàcuáa xica cuu ndihi-güedé Jèsús nchicú<sup>n</sup> ñáhá-güedé xii-gǎ cuáhá<sup>n</sup>. Te ì<sup>n</sup> téé-á<sup>n</sup> xini tnàhá-dé ndihi dútú cúnù-á<sup>n</sup> núú nchicú<sup>n</sup>-dé tnàhá-dé Jèsús cuànguihu ndéé núú cáá vèhe téé cúnù-á<sup>n</sup>. <sup>16</sup>Dico té Pèlú ní ndóo-dé yuyèhe ndaa quehé, núú ní ndee téé ndihi té Pèlú-á<sup>n</sup> ñí cáhá<sup>n</sup> ndihi-dé ñaha ndèé yuyèhe, te ndèca-dé té Pèlú cuànguihu. <sup>17</sup>Te ní xáha<sup>n</sup> ñaha ndéé yuyèhe-á<sup>n</sup> xii té Pèlú:

—¿Náa ñǎ dífú yòhò tnàhá-n xica cuu ndihi-n téé ndèca-güedé cuànguihu-a? —càchí-a<sup>n</sup> xáha<sup>n</sup>-a<sup>n</sup> xii-dé.

Te ní xáha<sup>n</sup> té Pèlú:

—Ñáhá, ñà túú tǎe-ǎ<sup>n</sup> xicá cùu ndihi-ú —càchí-dé xáha<sup>n</sup>-dǎ xii-a<sup>n</sup>.

<sup>18</sup>Te ío víxi<sup>n</sup> quide-xi núú cue téé xinu cuechi, ndihi cue téé quide cuendá veñúhu ní dátñáhá-güedé ñuhú, te xínut-ñí teté-güedé ndihi té Pèlú.

### **Dútú cúnù nducu tnúhu-dé núú Jèsús**

(Mt. 26:59-66; Mr. 14:55-64; Lc. 22:66-71)

<sup>19</sup>Te dútú cúnù ní xicá<sup>n</sup> tnúhú-dǎ núú Jèsús núú nándi cùu cue téé xica cuu ndihi-gǎ, te nándi sá dǎnehé ñáhá-gǎ xii-güedé. <sup>20</sup>Te ní xáha<sup>n</sup>-gǎ:

—Yúhú càhá<sup>n</sup> ndodo-í núú ncháa ñǎyiu cuèi xití veñúhu càhnu sá ò cúnù, te cuèi xití ncháa dava-gǎ veñúhu núú tàcá ncháa ñǎyiu isràèl duca<sup>n</sup>-ni dǎnehé-í-yu, te ñà túú òduhu càhá<sup>n</sup>-í. <sup>21</sup>Núú vǎ càcá<sup>n</sup> tnúhú-n nùú-í. Càcá<sup>n</sup> tnúhú núú ncháa ñǎyiu sàcúndedóho tnúhu càhá<sup>n</sup>-í, te na càhá<sup>n</sup>-yu núú nása ndùu tnúhu càhá<sup>n</sup>-í chi xini-yu —càchí-gǎ xáha<sup>n</sup>-gǎ xii-dé.

22 Te sá dúcá<sup>n</sup> nǐ cáhá<sup>n</sup> Jèsús núu ìí<sup>n</sup> téé quide cuendá veñúhu nùtníi-dé tnàhá-dé te ní caní-dé ìí<sup>n</sup> déhndé nǔú-gǎ. Te ní xáha<sup>n</sup>-dǎ:

—¿Ná cuendá duca<sup>n</sup> cáhá<sup>n</sup>-n nǔú dǔtú cúnú-i? —cachí-dé xáha<sup>n</sup>-dǎ xii-gá.

23 Te ní xáha<sup>n</sup> Jèsús xii-dé:

—Te núu nèhé ní cáhá<sup>n</sup>-í te cáhá<sup>n</sup>-n ñása ndúu tnúhu ní cáhá<sup>n</sup>-í, te yúhú cáhá<sup>n</sup> váha-í te duca<sup>n</sup> càniha-n —cachí-gá xáha<sup>n</sup>-gǎ xii-dé.

24 Te ndùtu yoho-ni Jesús ní dánùhú ñáhá tǎ Ànás xii-gá ndaha té Caifás dǔtú cúnú-gá.

**Té Pèlú cáhá<sup>n</sup> tucu-dé núú ñáiyu sá ñà túú xìní-dé Jèsús**

(Mt. 26:71-75; Mr.

14:69-72; Lc. 22:58-62)

25 Te té Pèlú nǔtníi teté-ni-dé, te ní xáha<sup>n</sup>-güedé xii-dé:

—¿Náa ñá díú tnàhá yòhó xicá cùu ndíhi téé ndèca-ndí véxi-ǎ<sup>n</sup>? —cachí-güedé xáha<sup>n</sup>-güedé xii-dé.

Te ní xáha<sup>n</sup> tǎ Pèlú:

—Ñáhá, ñá túú tǎe-á<sup>n</sup> xicá cùu ndíhi-ú —cachí-dé xáha<sup>n</sup>-dǎ xii-güedé.

26 Te ìí<sup>n</sup> ñaní tnàhá tǎe ní xehndé té Pèlú lóho-xi-á<sup>n</sup> xínú cuèchi-dé tnàhá-dé núú dǔtú cúnú. Te tǎe-á<sup>n</sup> nǐ xáha<sup>n</sup>-dǎ xii té Pèlú:

—¿Náa ñá díú tnàhá-n ndíhi-n-dé ní xíní ñáhà-í òré ní tñí-ndí-dé xití lahuertá? —cachí-dé xáha<sup>n</sup>-dǎ xii-dé.

27 Te té Pèlú ní xáha<sup>n</sup> tucu-dé sá ñà díú-dǎ, te òré-á<sup>n</sup> nǐ cana ìí<sup>n</sup> líhi.

**Jèsús ndécú-gǎ núú tǎ Pilatú**

(Mt. 27:1-2, 11-14; Mr.

15:1-5; Lc. 23:1-5)

28 Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáhá<sup>n</sup> vechiú<sup>n</sup> téé cùu gobiernú. Te sa ta cùditó-ni-gá cuáhá<sup>n</sup> núu ñá ní cuíní cue tǎe isràel quíhu-güedé xití vechiú<sup>n</sup> téé cùu gobiernú-á<sup>n</sup>. Te núu nǐ

quíhu-güedé vechiú<sup>n</sup>-á<sup>n</sup> ñá, te vá cúú-gǎ quíhu-güedé cudini-güedé vico pàscuá ní cùu chi duca<sup>n</sup> tnàhí quide-güedé. 29 Núu té Pilatú téé cùu gobiernú ní quee-dé vechiú<sup>n</sup>-dé ní cáhá<sup>n</sup> ndíhi ñaha-dé xii-güedé, te ní xáha<sup>n</sup>-dǎ:

—¿Ná cuèchi ní quide tǎe-a núu ndèca-ndo-dé véxi? —cachí-dé xáha<sup>n</sup>-dǎ xii-güedé.

30 Te ní xáha<sup>n</sup>-güedé:

—Te núu dícò ñá túú cuèchi-dé-á<sup>n</sup> te vá cándèca-ndí-dé quixi núu-n ní cùu —cachí-güedé xáha<sup>n</sup>-güedé xii-dé.

31 Te ní xáha<sup>n</sup> tucu té Pilatú xii-güedé:

—Chí cándèca-dé cuánùhú, te cada ndáá-ndó cuèchi-dé nàcuáa càa leí méé-ndó —cachí-dé xáha<sup>n</sup>-dǎ xii-güedé.

Te ní xáha<sup>n</sup>-güedé:

—Dico nchúhú ñáiyu isràel chi ñá túú dùca<sup>n</sup> taxi tnuní leí sá cáhni-ndí —cachí-güedé xáha<sup>n</sup>-güedé xii-dé.

32 Te duca<sup>n</sup> nǐ cuu chi dacuití<sup>n</sup> nǐ quee ndáá-xi nàcuáa ní cáhá<sup>n</sup> méé Jèsús cada-xi cuú-gá. 33 Te cuándíhu té Pilatú vechiú<sup>n</sup>-dé, te ní cana-dé Jèsús ní xicá<sup>n</sup> tnúhú-dǎ núú-gǎ, te xáha<sup>n</sup>-dǎ:

—¿Yòhò yíndàha-n ñáiyu isràel-ǎ<sup>n</sup>? —cachí-dé xáha<sup>n</sup>-dǎ xii-gá.

34 Te ní xáha<sup>n</sup> Jèsús:

—¿Te xíá<sup>n</sup> cáhá<sup>n</sup>-n sǎ véxi iní méé-n, àdi ió ìí<sup>n</sup> ñáiyu ní cachí tnúhu xii-n cuendá-í? —cachí-gá xáha<sup>n</sup>-gǎ xii-dé.

35 Te ní xáha<sup>n</sup> tǎ Pilatú xii-gá:

—Ñá díú tǎe isràel cúú-í núu duca<sup>n</sup> cáhá<sup>n</sup>-n, chi cue ñaní tnàhá-n cuè tǎe isràel ndíhi cue dǔtú cúnú ní taxi cuendá ñáhá-güedé xii-n ìha. ¿Te ná ní quide-n? —cachí-dé xáha<sup>n</sup>-dǎ xii-gá.

36 Te ní xáha<sup>n</sup> Jèsús:

—Ñá díú tǎe ñuyíú-a cùu-í te ni ñà túú véxi-í taxi tnuní-í ñuyíú-a, chi núu dícò ìha tàxi tnuní-í á<sup>n</sup> te cue tǎe xica cuu ndíhi-í nàá-güedé ndíhi cue tǎe isràel cuendá sá vǎ tñí ñaha-güedé xii-í ní cùu, dico ñá túú véxi-í sá taxí tnuní-í ñuyíú-a —cachí-gá xáha<sup>n</sup>-gǎ xii-dé.



<sup>37</sup> Te ní xáha<sup>n</sup> tẽ Pilatú:

—¿Te tée yìndaha ñáyiú cùu-ó vání?  
—càchí-dé xáha<sup>n</sup>-dẽ xii-gá.

Te ní xáha<sup>n</sup> Jèsús:

—Te dàtná càchí-n-ǎ<sup>n</sup> yìndaha ndisa-í ñáyiú, chi yúhú véxi-í ñuyíú-a te iha ní cacu-í te càhá<sup>n</sup>-í mee-ni tñuhu ndáá. Te nchaa ñáyiú na cùdǎí ìní-xi tñuhu ndáá, te tedóho-yu nchaa tñuhu càhá<sup>n</sup>-í —càchí-gá xáha<sup>n</sup>-gǎ xii-dé.

<sup>38</sup> Te ní xáha<sup>n</sup> tẽ Pilatú:

—¿Te ná cúu-tu tñuhu ndáá-ái? —  
càchí-dé xáha<sup>n</sup>-dẽ xii-gá.

### Càchí-güedé sá cǎhni-güedẽ Jèsús

(Mt. 27:15-31; Mr.

15:6-20; Lc. 23:13-25)

Te sátá nǐ yáha ní xícá<sup>n</sup> tñuhú tẽ Pilatú núú Jèsús, te ní quee tucu-dé quehé, te xáha<sup>n</sup>-dẽ xii cue tée isràél:

—Ñá túú nǎ cuèchi tée-a. <sup>39</sup> Te váha-ni chi duca<sup>n</sup> tñahí quide nchohó sá ndì tnahá nduu vico pascuá cuiní-ndó sǎ dácácu-í ì<sup>n</sup> tée yìhì vecaá. Te núu cuiní-ndó te na dácácu-í tée yìndaha ñaha xii-ndo —cachí-dé xáha<sup>n</sup>-dẽ xii-güedé.

<sup>40</sup> Te sá dúcá<sup>n</sup> nǐ cǎhá<sup>n</sup>-dé, núu nchaa-güedé níhi ní cǎhá<sup>n</sup>-güedé, te xáha<sup>n</sup>-güedé:

—¡Vá dácácu-n tẽe-á<sup>n</sup>, té Barrábás dácácu-n! —càchí-güedé xáha<sup>n</sup>-güedé xii-dé.

Te té Barrábás-á<sup>n</sup> nǐ cuu-dé ì<sup>n</sup> ñadúhú.

**19** Te té Pilatú ní táuchíú<sup>n</sup>-dẽ ní tñii ñaha cuè sandadú xii Jèsús, te ní caniha-güedé xii-gá ndihi ñii. <sup>2</sup> Te diu-ni cue tée-á<sup>n</sup> nǐ cadúha-güedé ì<sup>n</sup> coróná ìñu ní chihí-güedé díquí-gǎ, te ní dáquú nuu ñaha-güedé xii-gá ì<sup>n</sup> dóó tícuehé víhí. <sup>3</sup> Te ní sáhá<sup>n</sup> ndehe yatni-gá-güedé núú-gǎ, te ní xáha<sup>n</sup>-güedé:

—¡Ío cǎhnu cuu yohó tée yìndaha ñaha xii ñáyiú isràél! —càchí-güedé xáha<sup>n</sup>-güedé cúdíquí ndeé ñáhá-güedé xii-gá.

Te ní cani-güedé déhndé nǔú-gǎ.

<sup>4</sup> Te ní quee tucu té Pilatú quehé te ní xáha<sup>n</sup>-dẽ xii nchaa ñáyiú xìndecu quehé:

—Te cundehe-ndo-dẽ ná ndeé ñuhu-í-dé iha, chi yúhú sǎha-í cuendá sá ñà túú cuèchi-dé —càchí-dé xáha<sup>n</sup>-dẽ xii-yu.

<sup>5</sup> Te ní ndeñuhu ñaha té Pilatú xii Jèsús xití vechiú<sup>n</sup>-dé te ñuhu ì<sup>n</sup> coroná ìñu díquí-gǎ, te nihnu-gá dóó tícuehé víhí-ǎ<sup>n</sup>. Te ní xáha<sup>n</sup> tẽ Pilatú xii-yu:

—¡Nái-dé-a! —càchí-dé xáha<sup>n</sup>-dẽ xii-yu.

<sup>6</sup> Te ní xini ñáhá cuè dútú cúnùu ndihi cue tée quide cuendá veñúhu. Te ní cuáá-güedé, te xáha<sup>n</sup>-güedé:

—¡Cata caa-dé! ¡Cata caa-dé núú cùrúxí! —càchí-güedé xáha<sup>n</sup>-güedé xii-dé.

Te ní xáha<sup>n</sup> tẽ Pilatú:

—Váha-gá nǔu candeca mee-ndo-dẽ quíhí<sup>n</sup> cata caa-ndo-dẽ núú cùrúxí, chi yúhú cútñuní ìní-í sá ñà túú na cuèchi-dé —càchí-dé xáha<sup>n</sup>-dẽ xii-güedé.

<sup>7</sup> Te ní xáha<sup>n</sup> cuè tée isràél:

—Lèi ndécú ndíhi nchúhú càchí-xi sá dài cuú-dé, chi càchí-dé sá Dèhe Yá Ndióxi cúu-dé —càchí-güedé xáha<sup>n</sup>-güedé xii-dé.

<sup>8</sup> Te sá dúcá<sup>n</sup> nǐ xáha<sup>n</sup>-güedé xii té Pilatú, te vaa-gá ní yùhú-dé. <sup>9</sup> Núu cuándihu tucu-dé vechiú<sup>n</sup>-dé, te ní xáha<sup>n</sup> tucu-dé xii Jèsús:

—¿Te yòhó ndeé tée cùu-n-i? —  
cachí-dé xáha<sup>n</sup>-dẽ xii-gá.

Dico Jèsús ñá túú ní cǎhá<sup>n</sup>-gá.

<sup>10</sup> Núu ní xáha<sup>n</sup> tẽ Pilatú xii-gá:

—¿Te vá càchí tñuhu-n nǔu ndeé tée cùu-n-u? ¿Náa ñá túú xini-n sǎ yùhú táxí tñuní-í, te cuu-ni tauchiú<sup>n</sup>-í cata caa ñaha-güedé xii-n nǔú cùrúxí cuú-n, te cuu-ni dácácu ñaha-í xii-n-ǎ<sup>n</sup>? —  
càchí-dé xáha<sup>n</sup>-dẽ xii-gá.

<sup>11</sup> Te ní xáha<sup>n</sup> Jèsús:

—Yòhó ñá túú sǎ táxí tñuní ñáhá-n xii yúhú ní cùu núu ñá túú Yá Ndióxi

ní cuíní-gá sá dúcá<sup>n</sup> cùnduu, te téé ní taxi cuèndá ñáhá xii-í núú-n tée-á<sup>n</sup> ño-gá ndècuéchi-dé dàcúxí yòhó —càchí-gá xáha<sup>n</sup>-gã xii-dé.

<sup>12</sup>Te òré-á<sup>n</sup> ñí ngúíta té Pilatú ndúcú-dě nàcuáa cada-dé dàcácu-dé Jèsús ní cùu, dico cue tée isràél ní ngúíta-güedé ní cuáá-güedé, te xáha<sup>n</sup>-güedé:

—Te núu na dàcácu-n tée-á<sup>n</sup>, te ñá díú tée tñàhá tñúhu ndíhi té Cèsár cúú-n. Chi nděda-ni càa tée na càchí sá cúú-dě tée yìndaha ñaha xii ñáyíu cùu úhú iní-dé té Cèsár. Te té Jèsús-á<sup>n</sup> càchí-dé sá táxí tñuní-dé —càchí-güedé xáha<sup>n</sup>-güedé xii-dé.

<sup>13</sup>Te sá dúcá<sup>n</sup> ñí xáha<sup>n</sup>-güedé xii té Pilatú núu ní quee-dé ndíhi Jèsús cuáhá<sup>n</sup> ndíhi ñaha-dě corrèdór núú ñí quee mee-ni yúú vâha núú ñúhú, te xíá<sup>n</sup> nání-xí Găbatá tñúhu hëbreú. Te xíá<sup>n</sup> ndécú xilé sácõo nchíhi té Pilatú xèhndé-dé cuéchi ñáyíu, núu ní nucóo-dé núu xilé-dé òré ní quexio-dé ndíhi Jèsús. <sup>14</sup>Te cùu-xi datná cuádava nduu, nduu vîspré vico pàscuá. Te ní xáha<sup>n</sup> tē Pilatú xii ñáyíu isràél:

—Ñái tée yìndaha ñaha xii-ndo-a! —cachí-dé xáha<sup>n</sup>-dě xíí-yu.

<sup>15</sup>Te ní cuáá-yu, te xăhă<sup>n</sup>-yu:

—¡Cahni-dé! ¡Cahni-dé! ¡Cata caa-dé núú cùrúxí! —càchí-yu xăhă<sup>n</sup>-yu.

Te ní xáha<sup>n</sup> tē Pilatú:

—¿Te yúhú cata caa-í tée yìndaha ñaha xii-ndo-u? —cachí-dé xáha<sup>n</sup>-dě xíí-yu.

Te cue dútú cúnùu ní xáha<sup>n</sup>-güedé:

—Nchúhú ñá túú-gă tée yìndaha ñaha xii-ndí, chi ñí<sup>n</sup> dîi-ni té Cèsár yìndaha ñaha-dé xii-ndí —càchí-güedé xáha<sup>n</sup>-güedé xii-dé.

<sup>16</sup>Te té Pilatú ní xáha<sup>n</sup>-dě ní quehe<sup>n</sup> cuèndá-güedé Jèsús ndécá ñaha-güedé cuáhá<sup>n</sup> cata caa ñaha-güedé núú cùrúxí.

### Sàta caa-güedé Jèsús núú cùrúxí

(Mt. 27:32-44; Mr.

15:21-32; Lc. 23:26-43)

<sup>17</sup>Te ní quee Jèsús nchídó-gă cùrúxí cuáhá<sup>n</sup> ñí xichi núú nání Yiquí Díquí Ndíyí. Te tñúhu hëbreú queé-xí Gôl-gotá. <sup>18</sup>Te yàcá<sup>n</sup> ní sata caa ñaha-güedé xii-gá núú cùrúxí-á<sup>n</sup>. Te xio xio dîñi-gá ní sata caa-güedé úu cue tée ndècu ndisa cuéchi-xi diu-ni núú cùrúxí tucu. <sup>19</sup>Te ní táúchíú<sup>n</sup> tē Pilatú ní taxi ndecu-güedé ñí sá ndéé lètrá núú cùrúxí tá càa-gá, te duha càchí lètrá-á<sup>n</sup>: “Jèsús tée ñúú Nazàrét, tée yìndaha ñaha xii ñáyíu isràél”, duha càchí-xi. <sup>20</sup>Te vâi ñáyíu isràél ní xiní-yu nàcuáa càhá<sup>n</sup> lètrá-á<sup>n</sup>, chi yatni-ni yuhu ñúú ní sata caa ñaha-güedé xii-gá núú cùrúxí. Te lètrá-á<sup>n</sup> càhá<sup>n</sup>-xi tñúhu hëbreú, te càhá<sup>n</sup>-xi tñúhu grîégú, te càhá<sup>n</sup>-xi tñúhu làtín. <sup>21</sup>Te ní xáha<sup>n</sup> cuè dútú cúnùu xii té Pilatú:

—Vá táúchíu<sup>n</sup>-n tee-güedé lètrá càhá<sup>n</sup>-xi “Tée yìndaha ñaha xii ñáyíu isràél” ní cùu, vâha-gá tauchíu<sup>n</sup>-n tee-güedé lètrá càhá<sup>n</sup>-xi “Tée càchí yìndaha ñaha xii ñáyíu isràél ní cùu” —cachí-güedé xáha<sup>n</sup>-güedé xii-dé.

<sup>22</sup>Te ní xáha<sup>n</sup> tē Pilatú:

—Nàcuáa ní táúchíu<sup>n</sup>-í ní tee-güedé te duca<sup>n</sup> quèndóo-xi —cachí-dé xáha<sup>n</sup>-dě xii-güedé.

<sup>23</sup>Te sátá ñí sata caa ñaha cuè sandadú xii Jèsús núú cùrúxí, te cúmí xichi ní quide-güedé dóó-gă, te ñí<sup>n</sup> ñí<sup>n</sup> xichi dóó-gă ní cáhñu cue sandadú-á<sup>n</sup>. Te ndècu ñí<sup>n</sup> dóó-gă dóó cání ñà túú ní tîcu. <sup>24</sup>Te cuèndá dóó-ă<sup>n</sup> ñí xítñaha cue sandadú-á<sup>n</sup>:

—Vá ndátá-ó dđó-a, vâha-gá núu na còto ndéé-ó cuèndá quíní-ó ndédacàa-o cuu cuèndá-ó —càchí-güedé xítñaha-güedé.

Te duca<sup>n</sup> ñí quide-güedé chi ní quee ndáá-xi nàcuáa càhá<sup>n</sup>-xi núú tütú Yă Ndiõxí núú càchí-xi: “Titní

xichi ní cáhñu-güedé dóò-í. Te ní xito ndéé-güedé cuendá cutnùní iní-güedé ndédacàa-güedé níhí-güedé dóò-í", duha càchí-xi núú tütú-gá. Te sá dúcá<sup>n</sup> càhá<sup>n</sup>-xi núú tütú Yá Ndiöxí núú xíá<sup>n</sup> duca<sup>n</sup> ní quide cue sandàdú-á<sup>n</sup>.

<sup>25</sup> Te yatni dñi curúxí núú tákàa Jesús nùtní náná-gá, ndihi cùhú-xi, ndihi tá Màriá ñadìhí té Clèofás, ndihi tá Màriá Magdalèná. <sup>26</sup> Te ní xiní Jèsús náná-gá nùtní-a<sup>n</sup> dñi ìi<sup>n</sup> té ní xica cuu ndihi-gá, téé ío cùu iní-gá, te ní xáha<sup>n</sup>-gá xii náná-gá:

—Náá, téé nùtní-á<sup>n</sup> nduu-dé dàtná dèhe mee-n —càchí-gá xáha<sup>n</sup>-gá xii-a<sup>n</sup>.

<sup>27</sup> Te ní xáha<sup>n</sup>-gá xii téé ní xica cuu ndihi-gá-á<sup>n</sup>:

—Ñaha-á<sup>n</sup> nduu-a<sup>n</sup> dàtná náná méé-n —càchí-gá xáha<sup>n</sup>-gá xii-dé.

Núú ndéé dàvá-á<sup>n</sup> ní nduu náná ñáhá tée-á<sup>n</sup> xii náná-gá.

### Ní xíhí Jèsús

(Mt. 27:45-56; Mr.

15:33-41; Lc. 23:44-49)

<sup>28</sup> Te ní cutnùní iní Jèsús sá ní ndihi chiú<sup>n</sup> ní táhú Tátá-gá Dútú Ndiöxí ní quide-gá núú ní cachí-gá:

—Yichí-í ndute —càchí-gá.

Te duha ní cáhá<sup>n</sup>-gá chi ní quee ndáá-xi nàcuáa càhá<sup>n</sup>-xi núú tütú Yá Ndiöxí.

<sup>29</sup> Te ndècu ìi<sup>n</sup> lítu ñùhu ndudí íá. Te sá dúcá<sup>n</sup> ní cáhá<sup>n</sup>-gá sá yichí-gá ndute, núú xíá<sup>n</sup> ní quehe<sup>n</sup>-güedé cáchí te ní chindóyo-güedé xití ndudí íá-á<sup>n</sup>, te ní chinenu-güedé díquí ìi<sup>n</sup> dité yutnu nàni hisópó, te ní ndocani-güedé ní chihi-güedé yuhu-gá. <sup>30</sup> Te sáta ní xihí-gá ndudí íá-á<sup>n</sup>, te càchí-gá:

—Vitna ní dáxínu cava-í nchaa chiú<sup>n</sup> ní cachí Tàtá-í cada-í —duha ní cachí-gá.

Te ní xócuíta dúcú<sup>n</sup>-gá ndàa núú-gá, te ní xíhí-ni-gá.

### Ìi<sup>n</sup> sandàdú ní caá<sup>n</sup>-dé yiqui naha Jèsús ndihi ìi<sup>n</sup> pùya yíhí caá núú-xi

<sup>31</sup> Te cuendá sá nduu vispré vico pás-cuá cúú-xí núú ñá ní cuíní cue tée israhél cundecu-ni yiqui cùñú-gá núú cùrúxí ndihi yiqui cùñú cue tée ní sata caa-güedé dñi-gá, chi cuendá nduu tnèé-á<sup>n</sup> cúú-xí nduu ndetatú ñáyiú, te ío quide cahnú-yu nduu-á<sup>n</sup>, núú ní xáha<sup>n</sup>-güedé xii té Pilatú sá táuchíu<sup>n</sup>-dé quíhí<sup>n</sup> cue tée cáhñú-güedé dñi<sup>n</sup> Jèsús ndihi dñi<sup>n</sup> cue tée tàcaa ndihi-gá, te xocàni-güedé yiqui cùñú-gá ndihi yiqui cùñú-güedé yàcá<sup>n</sup>. <sup>32</sup> Te sáta dúcá<sup>n</sup> te ní sáhá<sup>n</sup> cue sandàdú ní sáhnú-güedé dñi<sup>n</sup> cue tée tàcaa xio xio dñi Jesús. <sup>33</sup> Te òré ní cuyatni-güedé núú-gá, te ní xiní-güedé sá sà ní xíhí-gá núú ñá ní sáhnú-güedé dñi<sup>n</sup>-gá.

<sup>34</sup> Dico ìi<sup>n</sup> sandàdú-á<sup>n</sup> ní cúxi-dé pùya néhé-dé ìi<sup>n</sup> xio yiqui naha-gá, te yíhí caá núú-xi núú ní caá<sup>n</sup>-xi yiqui naha-gá ní quee níhí ndihi ndute cuíí. <sup>35</sup> Te yúhú té Juáá téé ní cadúha tutú-a ní xiní-í nàcuáa ní cuu ní xíhí Jèsús, te xíá<sup>n</sup> núú càhá<sup>n</sup> ndáá-í cuendá quíndáá iní-ndó. <sup>36</sup> Te duca<sup>n</sup> ní cuu ñá ní sáhnú-güedé dñi<sup>n</sup> Jèsús, chi ní quee ndáá-xi nàcuáa càhá<sup>n</sup>-xi núú tütú Yá Ndiöxí núú càchí-xi: “Vá cahnú-güedé ni ìi<sup>n</sup> yiquí-gá”, duha càchí-xi. <sup>37</sup> Te duca<sup>n</sup> ní quide-güedé Jèsús ní caá<sup>n</sup>-güedé yiqui naha-gá, chi ingá xichi núú tütú Yá Ndiöxí càchí-xi: “Sáá nduu te quiní-güedé ìi<sup>n</sup> téé ní dánicuèhé-güedé”, duha càchí-xi.

### Chìndúxi-güedé Jèsús

(Mt. 27:57-61; Mr.

15:42-47; Lc. 23:50-56)

<sup>38</sup> Te sáta dúcá<sup>n</sup> ní cuu, te té Chèé téé ñuú Arimàtea tñàhá-dé ní sándáá iní-dé tñuhu Jèsús dico dayuhu, chi ní xóo yùhú-dé cue tée cùnno núú ñáyiú israhél. Te tée-á<sup>n</sup> ní xáha<sup>n</sup>-dè xii té Pilatú

nũu vá dáńá-dé canehe-dé yiqui cùńú Jèsús quíhí<sup>n</sup> chindúxi-dé, te té Pilatú ní xáha<sup>n</sup>-dè xii-dé sá cúú cànhehe-dé yiqui cùńú Jèsús quíhí<sup>n</sup>, núu ní sáhá<sup>n</sup>-dé ní nuu nehe-dé yiqui cùńú-gá núú cùrúxí nchídó-dè cuáhá<sup>n</sup>. <sup>39</sup>Te té Nicòdemú téé ní sáhá<sup>n</sup> niú ní cáhá<sup>n</sup> ndihi-dé Jèsús ndéé díhna, téé-á<sup>n</sup> néhé-dè ócó úxí kílú yuchi ní cuáha mee-ni yúcu sá nání mirrá ndihi yúcu sá nání ãloés. Te ío váha tnàmi sahá<sup>n</sup>. <sup>40</sup>Te ní naníhí tnáhá-dè ndihi té Chèé, te ní chidúcu<sup>n</sup> nuu-güedé yiqui cùńú Jèsús mee-ni dõó váha, te nàcuáa ta dùcu<sup>n</sup> nuu-güedé yiqui cùńú-gá dóó-á<sup>n</sup>, te duca<sup>n</sup> ta chido-güedé yuchi sáhá<sup>n</sup> tnámí-á<sup>n</sup> núú dóó-á<sup>n</sup> chi duca<sup>n</sup> tnáhí quide náyiu isràél òré chindúxi tnáhá-yu. <sup>41</sup>Te yatni núú ní sata caa-güedé Jèsús cáá ì<sup>n</sup> lahuertá. Te xití lahuertá-á<sup>n</sup> nchí ì<sup>n</sup> yaú cava duha cuáhá<sup>n</sup> ndáá-xi, te vátá yõ ì<sup>n</sup>-gá nguúndúxi xía<sup>n</sup>. <sup>42</sup>Te cuendá sá ní cuyatni tnáhá nduu ndetatú náyiu isràél nũu xía<sup>n</sup> yaú cava nchí yatni-ni xía<sup>n</sup> ní chihigüedé yiqui cùńú Jèsús.

### Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

**20** Te ndumìngú tacuĩhndá-gá cuáhá<sup>n</sup> tá Màriá Magdalèná cuáhá<sup>n</sup> ngoto-xi yaú núú ní chihigüedé yiqui cùńú Jèsús, te ní sáá-xi ní xiní-xi sá ñà túú-gá ndèdí yúú yèhe yaú-á<sup>n</sup>. <sup>2</sup>Núú xinu-xi cuánuhú núú ndécú tẽ Xímú, àdi Pelú chi úú ñu-dé, ndihi ingá téé ní xica cuu ndihi-gá téé ío cùu iní-gá, te ní xáha<sup>n</sup>-xi xii-güedé:

—Nèhe-güedé yiqui cùńú Jèsús cuáhá<sup>n</sup>, te ñá xiní-ó ndèé ní taxi ndecu-güedé —càchí-xi xáha<sup>n</sup>-xi xii-güedé.

<sup>3</sup>Te ní quee té Pèlú ndihi ingá téé-á<sup>n</sup> cuáhá<sup>n</sup> ndéhé-güedé yaú núú ní chihigüedé yiqui cùńú-gá. <sup>4</sup>Te ndúú-güedé xínú-güedé cuáhá<sup>n</sup> ní cùu, dico ingá téé-á<sup>n</sup> ní cuu níhi-gá sáhá-dè

cuáhá<sup>n</sup>-dé nũu díhna-gá-dé ní sáá-dé yuhu yàú núú ní chihi-güedé yiqui cùńú Jèsús ní cùu. <sup>5</sup>Te ní ngáundeyi-dé xító ñihni-dé xití yaú-á<sup>n</sup>, te ní xiní-dé mee-ná dóó váha sá ní xiducú<sup>n</sup> nuu-gá yúcu, dico ñá ní quíhu-dé. <sup>6</sup>Te sátá ní sáá té Pèlú te cuánguihu-dé xití yaú-á<sup>n</sup>, núu tnáhá-dé ní xiní-dé nchaa dóó ní xiducú<sup>n</sup> nuu-gá yúcu-á<sup>n</sup>. <sup>7</sup>Te ní xiní-dé sá dõó ní xindútú díquí-gá ñá túú càtuu jundú-xi ndihi dóó ní xiducú<sup>n</sup> nuu-gá chi ní naducú<sup>n</sup> nuu-ná càtuu ì<sup>n</sup> xio. <sup>8</sup>Te nchícu<sup>n</sup> tucu téé ní sáá díhna-gá-á<sup>n</sup> cuánguihu xití yaú-á<sup>n</sup>, te ní xiní-dé sá dóó-ná yúcu, te ñá túú-gá yiqui cùńú Jèsús nũu ní sándáá iní-dé sá ní ndoto-gá. <sup>9</sup>Chi vátá təcú tnùnì-gá-güedé nàcuáa càhá<sup>n</sup>-xi núú tütú Yã Ndiõxí núú càchí-xi sá Jèsús ndoto-gá. <sup>10</sup>Te ní xícó ndì ndúú cue téé ní sángoto yaú núú ní chihi-güedé yiqui cùńú Jèsús ní cùu cuánuhú-güedé vehe-güedé.

### Jèsús ní naníhí tnáhá-gá ndihi tá Màriá Magdalèná

(Mr. 16:9-11)

<sup>11</sup>Te ní sáá tucu tá Màriá yuhu yàú núú ní chihi-güedé yiqui cùńú Jèsús te ní nguúfta-xi ndàhyú-xi, te ní ngáundeyi-xi xító ñihni-xi xití yaú-á<sup>n</sup>. <sup>12</sup>Te xití yaú-á<sup>n</sup> ní xiní-xi úú espíritú xínú cuèchi núú Yã Ndiõxí xíxíhnu-xi mee-ni dõó cuixí<sup>n</sup> xĩndecu-xi núú ní cáa yiqui cùńú-gá. Te ì<sup>n</sup>-xi nùcúo núú ní cáa díquí-gá, te ì<sup>n</sup>-xi nùcúo núú ní cáa sáhá-gá. <sup>13</sup>Te espíritú-á<sup>n</sup> ní xáha<sup>n</sup>-xi xii tá Màriá:

—¿Ná cuendá ndàhyú-n? —càchí-xi xáha<sup>n</sup>-xi.

Te ní xáha<sup>n</sup> tá Màriá:

—Ndàhyú-í chi nèhe-güedé yiqui cùńú Yaá cúú Xitohó-í cuáhá<sup>n</sup>, te ñá túú xiní-í ndèé ní taxi ndecu-güedé —càchí-xi xáha<sup>n</sup>-xi xii cue espíritú-á<sup>n</sup>.

<sup>14</sup>Te tnúhu-ni-á<sup>n</sup> ní cáhá<sup>n</sup>-xi te ní nchócótó-xí ì<sup>n</sup> xio, te ní xiní-xi Jèsús

nútn̄i-gá dico ñá túú ní cùtnuní iní-xi sá díú mèe-gá. <sup>15</sup>Te ní xáha<sup>n</sup> Jèsús xii-xi:

—¿Ná cuendá ndàhyú-n? ¿Yoo nànducu-n? —càchí-gá xáha<sup>n</sup>-gá xii-xi.

Te mee-xi ní sani iní-xi sá tée xito lahuertá-á<sup>n</sup> cúú tée-á<sup>n</sup>, núú ní xáha<sup>n</sup>-xi:

—Tàta, te núú yòhó néhé-n yìqui cuñú Jèsús cuáhá<sup>n</sup>, te cáhá<sup>n</sup>-n ndèé ní taxi ndecu-n chi cuendá naquehe<sup>n</sup>-í canehe-í núhú —càchí-xi xáha<sup>n</sup>-xi.

<sup>16</sup>Te ní cáhá<sup>n</sup> díú ñaha-gá xii-xi, te xáha<sup>n</sup>-gá:

—¿Màriá! —càchí-gá xáha<sup>n</sup>-gá xii-xi.

Te ní ndacoto-xi núú-gá, te ní cáhá<sup>n</sup>-xi tnúhu hèbreú, te xáha<sup>n</sup>-xi:

—¿Rabóni! —càchí-xi xáha<sup>n</sup>-xi. Te tnúhu-á<sup>n</sup> queé-xi Mèstrú.

<sup>17</sup>Te ní xáha<sup>n</sup> Jèsús:

—Daña vá ngání ñaha-n chi vátá ndáá-gá-í núú ndécú Tàtá-í. Te núhú-n cùñaha-n xii cue tée ío váha ní tnahá tnúhu ndihí-í sá ndáá-í núú ndécú Tàtá-í Dútú Ndiöxí, te ñu-gá cúú Tàtá-ndó nchàa-ndo, te ñu-ni-gá cúú Ndiöxí-ndó —càchí-gá xáha<sup>n</sup>-gá xii-xi.

<sup>18</sup>Te ní natnii tá Màriá Magdalèná ichi cuánuhú-xi cùñaha-xi xii cue tée ní xica cuu ndihí-gá sá ní xiní-xi Jèsús, te ní xáha<sup>n</sup>-xi xii-güedé nchaa nàcuáa ní xáha<sup>n</sup>-gá xii-xi.

### Ní quexio Jesús núú xñdecu cue tée ní xica cuu ndihí-gá

(Mt. 28:16-20; Mr.

16:14-18; Lc. 24:36-49)

<sup>19</sup>Te ñu-ni ndumíngú sandiquí<sup>n</sup> ní nataká cue tée ní xica cuu ndihí-gá, te xñdedí nihnu-güedé vehe sá xiyùhú-güedé cue tée cùnuu núú ñáyiú isràél. Te ní quíhu Jèsús ndéé tnuú-güedé ní ngúnutn̄i-gá, te ní xáha<sup>n</sup>-gá:

—Yá Ndiöxí chindèe ñaha-gá xii-ndo ío váha cùu iní-ndó ndècu-ndo —càchí-gá xáha<sup>n</sup>-gá xii-güedé.

<sup>20</sup>Te ní dánèhé ñahá-gá ndaha-gá ndihí yiquí naha-gá xii-güedé. Te ío ní cudíí iní-güedé sá díú ndisa-gá ní xiní ñahá-güedé. <sup>21</sup>Te ní xáha<sup>n</sup> tucu Jesús xii-güedé:

—Yá Ndiöxí chindèe ñaha-gá xii-ndo ío váha cùu iní-ndó ndècu-ndo. Te dàtná ní tendaha ñaha Tàtá-í Dútú Ndiöxí xii-í véxi-í ñuyíú-a, te duca<sup>n</sup> tëndaha ñaha-í xii-ndo quíh<sup>n</sup>-ndó cáhá<sup>n</sup>-ndó tnúhu-í núú ñáyiú —càchí-gá xáha<sup>n</sup>-gá xii-güedé.

<sup>22</sup>Te ní chiyóóc-gá núú-güedé, te ní xáha<sup>n</sup>-gá:

—Chí ndúú tàhú Espiritú Yá Ndiöxí cundecu ndihí-ndo. <sup>23</sup>Te nchaa ñáyiú na quindáá iní-xi tnúhu-í te cùñaha-ndo xii-yu sá ní quide càhnu iní Yá Ndiöxí nchaa cuéchi-yu. Te nchaa ñáyiú vá quindáá iní tnúhu-í te cùñaha-ndo xii-yu sá vá cádá càhnu iní-gá cuéchi-yu —càchí-gá xáha<sup>n</sup>-gá xii-güedé.

### Té Mǎxí càhá<sup>n</sup> ndihí-dé Jèsús

<sup>24</sup>Te núú ùxúú cue tée ní xica cuu ndihí-gá, te ñ<sup>n</sup>-dé nání-dé Mǎxí tée ní xóo danàni-güedé Cuáchí, te tée-á<sup>n</sup> ñà túú-dé ndécú ndihí-güedé òré ní sáhá<sup>n</sup> Jèsús. <sup>25</sup>Te dava-gá cue tée ní xica cuu ndihí-gá ní xáha<sup>n</sup>-güedé xii-dé:

—Ní xiní-ndí Jèsús —càchí-güedé xáha<sup>n</sup>-güedé.

Te ní xáha<sup>n</sup> tè Mǎxí:

—Te vá quindáá iní-í, chi ndéé quini-í ndaha-gá núú ní queé nduyú, te dàquíhu-í díquí ndáhà-í núú ní caá<sup>n</sup> nduyú-á<sup>n</sup>, te dàquíhu ndàha-í yiquí naha-gá núú ní caá<sup>n</sup>, duca<sup>n</sup> te quindáá iní-í —càchí-dé xáha<sup>n</sup>-dè xii-güedé.

<sup>26</sup>Te núú ùná tucu nduu ní nataká tucu cue tée ní xica cuu ndihí Jèsús ñ<sup>n</sup> vehe, te nduu-á<sup>n</sup> tnàhá té Mǎxí ndécú ndihí-güedé. Te cuéi ndèdí nihnu-güedé vehe-á<sup>n</sup>, te ní quíhu Jèsús ndéé tnuú-güedé, te ní xáha<sup>n</sup>-gá:

—Yá Ndiöxí chindèe ñaha-gá xii-ndo ïo váha cùu iní-ndó ndècu-ndo — cächí-gá xáha<sup>n</sup>-gã xii-güedé.

<sup>27</sup> Te ní xáha<sup>n</sup>-gã xii té Mǎxí:

—Cundehe ndàha-í te dàquíhu-n ðíquí ndáhá-n nùú ní quée nduyú, te dàquíhu-n ndàha-n yiquí naha-í-a cuendá quíndáá iní-n te vá cání ì<sup>n</sup> caní úú iní-n —cächí-gá xáha<sup>n</sup>-gã xii-dé.

<sup>28</sup> Te ní xáha<sup>n</sup> tē Mǎxí xii-gá:

—¡Yòhó cúú-n Xítohó-í! ¡Yòhó cúú-n Ndiöxí-í! —cächí-dé xáha<sup>n</sup>-dē xii-gá.

<sup>29</sup> Te ní xáha<sup>n</sup> Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdíf-gã iní nchaa ñáyiu ñá túú ní xiní nùú ñáhá xii-í, te ní sándáá iní-yu —cächí-gá xáha<sup>n</sup>-gã xii-dé.

### Quíndáá iní-ó tñuhu yòdo tñuní nùú tütú-a

<sup>30</sup> Te vài-gá sá vǎ yòo tñáhí ndàcu cada ñá túú yòdo tñuní nùú tütú-a ní quide Jèsús nùú cuè tée ní xica cuu ndíhi-gá. <sup>31</sup> Dico dava-gá ní ngódó tñuní nùú tütú-a cuendá sá quíndáá iní-ndó sǎ Jèsús cúú-gã Crístú Déhe Dútú Ndiöxí, te naníhí tǎhú-ndó te núu na quíndáá iní-ndó-gã.

### Úsá cue tée ní xica cuu ndíhi Jèsús ní xiní ñáhá-güedē xii-gá

**21** Te ingá nduu tucu xíndecu cue tée ní xica cuu ndíhi Jèsús yuhu làgúná ñuú Tiberiás, te ní sáhá<sup>n</sup>-gá nùú xíndecu-güedē-á<sup>n</sup>. Te duha ní cuu ní xiní ñáhá-güedē xii-gá. <sup>2</sup> Te ndècu té Xímú, àdi Pelú chi úú ðiu-dé, ndíhi té Mǎxí tée ní xóo cúñaha-güedē Cuáchí, ndíhi té Natanàél tée ñuú Cànaá, te ñuú-á<sup>n</sup> yíndèhu-xi distritú Galileá, te tñáhá ndí ndúú déhe té Zebèdeú, ndíhi úú-gá tucu cue tée ní xica cuu ndíhi-gá. <sup>3</sup> Te ní xáha<sup>n</sup> tē Pelú xii-güedé:

—Quíhí<sup>n</sup>-í quítníi-í chácá —cächí-dé xáha<sup>n</sup>-dē xii-güedé.

Te ní xáha<sup>n</sup>-güedé:

—Tñáhá nchúhú canchicú<sup>n</sup> ñáhá-ndí xii-n quíhí<sup>n</sup> tucu —cächí-güedé xáha<sup>n</sup>-güedē xii-dé.

Te ní xica-güedé cuáhá<sup>n</sup>-güedé ní sáá-güedé nùú ndécú bàrcú, te ní quée-güedé xití bàrcú-á<sup>n</sup> cuáhá<sup>n</sup>-güedé. Te niú-á<sup>n</sup> ñǎ ní níhí tñáhí-güedé chácá. <sup>4</sup> Te sa ta cùditó-ñǎ cuáhá<sup>n</sup> ní xiní-güedé Jèsús yuhu làgúná, dico ñá ní cùtnuní iní-güedé sá díú-gã. <sup>5</sup> Te ní xáha<sup>n</sup>-gã xii-güedé:

—Cue tée cuechi, ¿ní níhí-ndó chácá caxi-o ñǎ? —cächí-gá xáha<sup>n</sup>-gã xii-güedé.

Te ní xáha<sup>n</sup>-güedé:

—Védana chácá ñǎ túú ní níhí-ndí —cächí-güedé xáha<sup>n</sup>-güedē xii-gá.

<sup>6</sup> Te ní xáha<sup>n</sup> Jèsús:

—Chí dáquēe ñunu-ndo ndàa xio cuha barcú chi níhí-ndó-dí —cächí-gá xáha<sup>n</sup>-gã xii-güedé.

Te duca<sup>n</sup> ní quide-güedé, te òré nátava-güedé ñunu xití ndute, te ñá cùndèe-gá-güedé natava-güedé cuendá sá ní chítú chácá xití-xi. <sup>7</sup> Te tée ní xica cuu ndíhi-gá tée ïo cùu iní-gá ní xáha<sup>n</sup>-dē xii té Pelú:

—¡Diu Xítohó Jesucristú! —cächí-dé xáha<sup>n</sup>-dē xii-dé.

Te sá ní tecú dóho té Pelú sá dúcá<sup>n</sup> càhá<sup>n</sup>-dē nùu ní ndíunuu-dé dóó-dē, chi dóó sǎ yímàa-ni-dé níhí-ndé ní cùu. Duca<sup>n</sup> te ní nuu ndava-dé bàrcú ní ngaunihnu-dé ndute, te cuáhá<sup>n</sup>-dē nùú ndute-á<sup>n</sup> ní quene-dé ndéé ñuhu yìhí. <sup>8</sup> Te dava-gá cue tée ndíhi té Pelú ðiu-ni cue tée ní xica cuu ndíhi Jèsús ní quendóo-güedé dàtná ì<sup>n</sup> cièndú-gá mētrú te quene-güedé yuhu ndüte. Te tñáhu-ni-güedé ñunu-güedé chitu chácá ní quene-güedé ndéé yuhu ndüte. <sup>9</sup> Te òré ní quene-güedé ñuhu yìhí, te ní xiní-güedé càyú ñuhú, te nùú ñuhú-á<sup>n</sup> ñuhú ì<sup>n</sup> chácá ndíhi ì<sup>n</sup> pǎá. <sup>10</sup> Te ní xáha<sup>n</sup> Jèsús xii-güedé:

—Quíhí<sup>n</sup> ngehe<sup>n</sup>-ndo ìí<sup>n</sup> úú chácá  
quítí íchí ní tñii-ndo —càchí-gá xáha<sup>n</sup>-gã  
xii-güedé.

<sup>11</sup> Núu té Pèlú ní sáhá<sup>n</sup>-dé núu ndécú  
bàrcú, te ní queé-dé xití-xi ní cãndeé-dé  
ñunu ñuhu chácá táñuhu-dé ní queue  
ndéé ñuhu yichí, te chitu chácá náhnú,  
te ñuhu ìí<sup>n</sup> ciendú údico úxí úní-dí xití  
ñunu-á<sup>n</sup>, te cuèi duca<sup>n</sup> vãi-dí ñuhu dico  
ñã ní ndätä ñunu-á<sup>n</sup>. <sup>12</sup> Te ní xáha<sup>n</sup> Jèsús:

—Chí nèhé cadí iní-ndó —càchí-gá  
xáha<sup>n</sup>-gã xii-güedé.

Dico ní ìí<sup>n</sup> cue tée ní xica cuu  
ndihi-gá-á<sup>n</sup> ñã ní xicá<sup>n</sup> tnúhú-güedé  
núú-gã núu yoo cùu-gá, chi sa ní cut-  
nùní iní-güedé sá dífú Jèsús cúu-gã.  
<sup>13</sup> Te Jèsús ní sáhá<sup>n</sup>-gã ní quehe<sup>n</sup>-gã  
pàà ní sãñaha-gã xii-güedé caxi-güedé,  
te dätñuní ní quehe<sup>n</sup> tucu-gá chácá ní  
sãñaha-gã xii-güedé.

<sup>14</sup> Vitna cùu úní xito sá xiní ñáhá cue  
té ní xica cuu ndihi-gá sátá ní ndoto-gá.

### Jèsús càhá<sup>n</sup> ndihi-gá té Pèlú

<sup>15</sup> Te sátá ní túhú cóhó-güedé ní sadí  
iní-güedé te ní xicá<sup>n</sup> tnúhú Jèsús núu  
të Xímú, àdi Pelú chi úú ñuu-dé, te  
xáha<sup>n</sup>-gã:

—Xímú, déhe té Jònás, ¿cùu iní-gá-n  
yúhú dàcúúxí òava-gá cue tée-a ñã? —  
càchí-gá xáha<sup>n</sup>-gã xii-dé.

Te ní xáha<sup>n</sup> té Pèlú:

—Mèstrú, cùu iní ñáhà-í, yòhó sa  
nàha-n —cachí-dé xáha<sup>n</sup>-dë xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéé  
lìhli-í —càchí-gá xáha<sup>n</sup>-gã xii-dé.

Te cue mbéé-á<sup>n</sup> cúu-güèdi ñáyiu cùu  
cuendá-gá.

<sup>16</sup> Te ní xáha<sup>n</sup> tùcu-gá xii té Pèlú:

—Xímú, déhe té Jònás, ¿cùu iní  
ñáhá-n xii-í-u? —càchí-gá xáha<sup>n</sup>-gã  
xii-dé.

Te ní xáha<sup>n</sup> tùcu té Pèlú:

—Mèstrú, cùu iní ñáhà-í, yòhó sa  
nàha-n —cachí-dé xáha<sup>n</sup>-dë xii-gá.

Te ní xáha<sup>n</sup>-gã:

—Te núu duca<sup>n</sup>, te coto-n cuè mbéè-í  
—càchí-gá xáha<sup>n</sup>-gã xii-dé.

<sup>17</sup> Te xito cùu úní ní xáha<sup>n</sup> tùcu-gá xii  
té Pèlú:

—Xímú, déhe té Jònás, ¿cùu iní  
ñáhá-n-ã"? —càchí-gá xáha<sup>n</sup>-gã xii-dé.

Te té Pèlú ío ní cundiyí-dé sá dúcá<sup>n</sup>  
ní cuu úní xito xicá<sup>n</sup> tnúhú-gã núú-dé  
núu ndisa sá cúu iní ñáhá-dë xii-gá, te  
ní xáha<sup>n</sup>-dë:

—Mèstrú, yòhó nchaa sa xiní-n, te sa  
cùtnuní iní-n sã cúu iní ñáhà-í xii-n —  
càchí-dé xáha<sup>n</sup>-dë xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue  
mbéè-í. <sup>18</sup> Te na càchí tnúhu ndáá-í xii-n  
sã cùtnàhã cuechi-gã-n ní xóo ndécuihnu  
mee-n dõó-n, te ní xóo quíhí<sup>n</sup>-n ndëni ní  
xóo cachí iní-n, dico na yèi-n te dacàá-n  
ndàha-n, te ingá tée dacuihnu ñaha xii-n  
dóó-n te cada yica-dë candeca ñaha-dë  
xii-n quíhí<sup>n</sup> ìí<sup>n</sup> núu ñã túú tnàhá iní-n —  
càchí-gá xáha<sup>n</sup>-gã xii-dé.

<sup>19</sup> Te sá dúcá<sup>n</sup> ní càhá<sup>n</sup> Jèsús cúu-xí  
sã ní dátécú tnúhu ñaha-gã xii té Pèlú  
nàcuáa cada-xi cuú-dé, te duca<sup>n</sup> càda  
cahnu-dé Yã Ndiöxí, te ní xáha<sup>n</sup>-gã  
xii-dé:

—¿Canhicú<sup>n</sup> ñáhá-n xii-í! —càchí-gá  
xáha<sup>n</sup>-gã xii-dé.

### Tée ío cùu iní-gá

<sup>20</sup> Te ní nchócótó té Pèlú ndàa sátá-dë,  
te ní xiní-dé sá nchicú<sup>n</sup> ñáhá ingá tée  
xica cuu ndihi-gá cuáhá<sup>n</sup>, tée ío cùu  
iní-gá tée ní xinucóo dñi-gá òré ní cud-  
ìni ndihi ñaha-gã xii-güedé, te diu-ni  
tée-á<sup>n</sup> ní xicá<sup>n</sup> tnúhú-dë núú-gã òavá-á<sup>n</sup>  
núu ndëda càa tée cuáha cuendá ñáhá  
xii-gá núu cuè tée cùu úhú iní ñáhá.  
<sup>21</sup> Te òré ní xiní té Pèlú sá nchicú<sup>n</sup> ñáhá  
tëe-á<sup>n</sup>, te ní xicá<sup>n</sup> tnúhú-dë núu Jèsús, te  
xáha<sup>n</sup>-dë:

—Mèstrú, te tée-á<sup>n</sup>, ¿ná cúu sã  
yáha-dé-í? —càchí-dé xáha<sup>n</sup>-dë xii-gá.

<sup>22</sup>Te ní xáha<sup>n</sup> Jèsús:

—Te núu yúhú cuíní-í sá cùndècu-ni-dé ndéé ná quìxi tucu-í ñuyíú-a, ¿te yòhó ná cuèndá-n nũu xicá<sup>n</sup> tnúhú-n? Yòhó canchicú<sup>n</sup> ñáhá-ní xii-í —càchí-gá xáha<sup>n</sup>-gă xii-dé.

<sup>23</sup>Te ní xinu tnúhu núu nchàa ñáyiu sàndáá iní tnúhu-gá sá tẽe-ă<sup>n</sup> vă cùú-dé. Dico Jèsús ñá túú dùca<sup>n</sup> ní xáha<sup>n</sup>-gă sá vă cùú-dé, chí ní xáha<sup>n</sup>-gă: “Núu yúhú cuíní-í sá tẽe-ă<sup>n</sup> cundecu-ni-dé ndéé ná quìxi tucu-í ñuyíú-a, ¿te yòhó ná cuèndá-n?”, duha ní xáha<sup>n</sup>-gă xii té Pèlú.

<sup>24</sup>Te ñiu-ni yúhú té Juàá tée ní sani iní-yu sá vă cùú càhá<sup>n</sup> ndáá-í nchaa nàcuáa ní cuu, te duca<sup>n</sup> ñĩ tee-í núu tütú-a, te cùtnuní iní-ndó să tnúhu ndáá cùú-xí.

<sup>25</sup>Te ndècu vai-gá núú să ñĩ quide Jèsús. Te núu dicó ní ngũndee nchaandi túhú ñá, te vaa ni te nihì ñuyíú te vá tnàhá núu-xi cundecu librú, te núu dicó ní ngũndee nchaa. Te duca<sup>n</sup> na cùnduu. Te ío chí cádá ndèe iní-nă vitna.



**NCHAA NÀCUÁÁ NÍ QUIDE  
CUE TÉE NÍ TÁÚCHÍÚ<sup>n</sup>  
JÈSÚS DACUÀHA ÑAHA  
XII ÑÁYIU TNÚHU-GÁ**

**Jèsús ní cachí tnúhu ndáá-gá  
sá quixí Espíritú Yá Ndiöxí  
cundecu ndihi ñáyiú**

**1** Te duha ní cáhá<sup>n</sup> té Lùcá ní xíí-dé té Tëofilú: Yúhú sa ní chídó tnùn-í núú líbrú ndéé díhna nchaa sá ní quide Jèsús, ndihi nchaa sá ní dácuahá-gá ñáyiú. Te ní chídó tnùn-í nchaa sá ní quide-gá ndéé nduu ní quesaha-gá quidé chiú<sup>n</sup>-gá, <sup>2</sup>ndihi nchaa sá ní quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue tée ní cáhá<sup>n</sup>-gá dacuàha ñaha xii ñáyiú tnúhu-gá, te mee Espíritú Yá Ndiöxí ní chindee ñaha-xi xii-gá ní xáha<sup>n</sup>-gá nàcuáa cada-güedé. <sup>3</sup>Te sátá ní xíhí-gá te ní ndoto-gá, te ní xíndecu-gá údico nduu. Te titní xito ní sáhá<sup>n</sup>-gá núú ní xíndecu-güedé, te duca<sup>n</sup> ní quide-gá cuendá quiní-güedé sá ndàá ní ndoto-gá, te ní xáha<sup>n</sup>-gá nàcuáa quide Yá Ndiöxí ndíhu ndaha-gá ñáyiú.

<sup>4</sup>Te ii<sup>n</sup> nduu ndècu ndihi ñaha-gá xii-güedé, te ní xáha<sup>n</sup>-gá:

—Vá queé-ní-ndó ñúú Jerusàlén, chi cundetu-ndo quixí Espíritú Yá Ndiöxí cundecu ndihi-ndo, chi sa ní cachí tnúhu-í sá dúcá<sup>n</sup> ní cáhá<sup>n</sup> Tátá-ó Dütú Ndiöxí Yaá ndécú àndiu nacuáa cunduu. <sup>5</sup>Te ndáá sá ndíi Juáá ní dácuaándute ñaha ndíi xii-ndo, dico vitna ñá túú-gá cuéhé nduu, te quexio Espíritú Yá Ndiöxí cundecu ndihi-ndo —càchí-gá xáha<sup>n</sup>-gá xii-güedé.

**Jèsús cuándaa-gá andiu**

<sup>6</sup>Te òré ní xíndecu-güedé ndihi Jèsús, te ní xáha<sup>n</sup>-güedé xii-gá:

—Mèstrú, cuíní-ndí cachí tnúhu-n ñúu sa ta cùyatni nduu chindee-n ñáyiú ñúú Isràèl cuendá taxi tnùn-í tucú-yu ñúú-yu —càchí-güedé xáha<sup>n</sup>-güedé xii-gá.

<sup>7</sup>Te ní xáha<sup>n</sup> Jèsús xii-güedé:

—Ñá túú xìni ñuhu-xi cunaha nchóhó xíá<sup>n</sup>, chi Tátá-ó Dütú Ndiöxí nánhá-gá ná nduu cada-gá nchaa sá ní cáhá<sup>n</sup>-gá. <sup>8</sup>Te òré quexio Espíritú Yá Ndiöxí cundecu ndihi-ndo, te cuyii-ndo nì yuhu ni iní-ndó quíhí<sup>n</sup>-ndó cáhá<sup>n</sup>-ndó tnúhu-í núú ñáyiú ñúú Jerusàlén ndihi núú ñáyiú distrítú Jùdeá ndihi núú ñáyiú distrítú Sàmariá. Te duca<sup>n</sup>-ni cáhá<sup>n</sup>-ndó quíhí<sup>n</sup>-ndó nì caxico ñuyú —càchí-gá xáha<sup>n</sup>-gá xii-güedé.

<sup>9</sup>Te sátá dúcá<sup>n</sup> ní cáhá<sup>n</sup>-gá, te ndèhe-güedé ní ndanchita-gá cuándaa-gá andiu cuándihu-gá xití vícò, te ñá túú-gá ní xìni ñánhá-güedé xii-gá. <sup>10</sup>Te ndèhe vihi-güedé andiu núu ndéé quiní ñánhá-güedé xii-gá yòtnúhu, te ní quexio cunu úú cue tée nihnu dóó cuixí<sup>n</sup> núú ndécú-güedé. <sup>11</sup>Te xáha<sup>n</sup>-güedé:

—Nchòhó cue tée Galileá, ¿ná cuendá ndéhé-ndó àndiu? Te dàtná-ni càa Jesús cuándaa-gá andiu vitna, te duca<sup>n</sup>-ni cùnduu-gá quixi tucu-gá —càchí cue tée nihnu dóó cuixí<sup>n</sup>-á<sup>n</sup> xáha<sup>n</sup>-güedé.

**Cuendá sá ñà túú-gá ndíi Jùdás ñúu  
ní nanducu-güedé té Màtiá  
ní nucúnutñí-dé núú ndíi**

<sup>12</sup>Te ní ndee-güedé yucu Òlívú cuánuhú-güedé ñúú Jerusàlén, te ní xúhu<sup>n</sup>-güedé cuèdicò cuádava òré ichi. <sup>13</sup>Te òré ní ndexio-güedé ñúu-á<sup>n</sup>, te cuándaa-güedé cuàrtú ndéé núú ñnu, chi vehe yòdo tnaha ndecu-güedé. Te ní nanhí tnáhá-güedé nchaa-güedé té Pèlú, té Jàcobó, té Juáá, té Ndríxí, té Lìpé, té Mǎxí, té Bartolòmé, té Mâteú, té Jàcobó déhe té Àlfeú, ndihi té Xímú tée ní cundíhi cue tée canànistá, ndíhi té Jùdás ñan-í té Jàcobó. <sup>14</sup>Te ní nanhí tnáhá-güedé nchaa-güedé yàcá<sup>n</sup> ndíhi

tá Màriá năná Jèsús, ndihî cue ñaní-gá ndihî dava-gá cue ñáyiú dîhî. Te ì<sup>n</sup>-ni ní cuú-yu ní cáhá<sup>n</sup> ndihî-yu Yá Ndiöxí.

<sup>15</sup>Te ì<sup>n</sup> nduu ní xindecu dàtná ì<sup>n</sup> ciëndú ócó mee-ni ñáyiú sandáá iní tnúhu Jèsús, te ní ngúnutnî té Pèlú núu-yu, te ní xáha<sup>n</sup>-dê xií-yu:

<sup>16-17</sup>—Nchòhó cue ñáyiú ndècu ndihî-í ichi Xítohó Jesucristú, na càni-í cuèndú núú-ndó năcuáa ní chídó tnùnî ndîí Dàvií téé ní xindecu ndéé sanaha năcuáa ní cáhá<sup>n</sup> Espíritú Yă Ndiöxí cuèndá té Jüdás. Te dacuitíi òuca<sup>n</sup> ní cuu, chi tnàhá té Jüdás ní xindecu ndihî-o, te ní xinu cuechi-o ndihî-dé núú-gă sá dîhna, te duca<sup>n</sup> nî quide-dé ní sáha cuèndá-dé Jèsús núú cuè téé cùu úhú iní ñáhá xii-gá. <sup>18</sup>Te ní cháhu ñaha-güedê xii-dé cuèndá sá nî sáha cuèndá ñáhá-dê xii-gá. Te ní sáhá<sup>n</sup>-dé ì<sup>n</sup> xichi ní sata caa-dé méé-dê, te ní ngava-dé, te ní cahndí duu<sup>n</sup> xití-dé te xía<sup>n</sup> nî xihí-dé. Te ní naquehe<sup>n</sup>-güedé díhú<sup>n</sup> sá nî cháhu-güedé ndîí, te ní nacuaa<sup>n</sup>-güedé ñuhu núú nî ngava ndîí-á<sup>n</sup>. <sup>19</sup>Te nchaa ñáyiú Jerusalén ní níhî-yu tnúhu, te ní dánánî-yu ñuhu-á<sup>n</sup> Aceldamá. Te tnúhu mēé-yu quèe-xi: Ñuhu núú nî satí ñîí. <sup>20</sup>Te duha ní cáhá<sup>n</sup> ndîí Dàvií ní chídó tnùnî ndîí núú librú Sălmú ní dándóo ndîí: “Nà ndóo nahi vèhe-dé, vá yóo ì<sup>n</sup> quíhî<sup>n</sup> cundecu”, duha ní cáhá<sup>n</sup> ndîí. Te ingá tucu tnúhu ní cachí ndîí: “Na nanducu-güedé ingá téé nucúnutnî núú ndîí”, duha ní cáhá<sup>n</sup> ndîí Dàvií —càchí té Pèlú xáha<sup>n</sup>-dê xií-yu.

<sup>21-22</sup>Te ní xáha<sup>n</sup> tùcu-dé:

—Te duca<sup>n</sup> nî cáhá<sup>n</sup> ndîí Dàvií, te vitna xini ñuhu-xi nanducu-o ì<sup>n</sup> téé nucúnutnî-dé núú ndîí Jüdás, te xini ñuhu-xi diu-ni ì<sup>n</sup> téé ní xica cuu ndihî Xítohó Jesucristú cúnàhá ní xica cuu-o ndihî-gá, ì<sup>n</sup> téé ní xiní ndéé òré ní dăcuándute ñaha ndîí Juáa xii-gá, te ndéé òré cuándaa-gá andiu. Te téé

nanducu-o cundecu-dé cáhá<sup>n</sup>-dé năcuáa ní cuu ní ndoto-gá —càchí té Pèlú xáha<sup>n</sup>-dê xií-yu.

<sup>23</sup>Te ní cacunehe-güedé úú tnàhá-güedé nūu ndēdacāa-güedé nduu tǎhú-güedē nucúnutnî-güedé núú ndîí. Te ì<sup>n</sup>-dé nánî-dê Chèè Barsábás, àdi Justú chi úú diu-dé, te ingá-dé nánî-dê Mātiá. <sup>24</sup>Te ní cáhá<sup>n</sup> ndihî-güedé Yă Ndiöxí, te xáha<sup>n</sup>-güedê xii-gá:

—Yòhó Dútú Ndiöxí xinî-n iní nchaa ñáyiú, te mee-ni ñaha-n núu ndēda cāa núú úú cue téé-a tnàhá inî-n <sup>25</sup>cáhá<sup>n</sup>-güedé tnúhu-n nūú ñáyiú, te téé-á<sup>n</sup> nucúnutnî-dé núú ndîí Jüdás, chi cuáhá<sup>n</sup> ndîí núú ùhú núú ndàhú núú tàú-xi quíhî<sup>n</sup> ndîí —càchí-güedé xáha<sup>n</sup>-güedê xii-gá.

<sup>26</sup>Te ní xito ndéé-güedé, te ní cutnùnî sá tēe nàni Matíá quendóo-dé ndihî úxí ì<sup>n</sup> cue téé ní táuchíú<sup>n</sup>-gă dacuàha ñaha xii ñáyiú tnúhu-gá.

### Ní quexio Espíritú Yă Ndiöxí cundecu ndihî ñáyiú

**2** Te ní sáá nduu còo vico Pentecostés te xindecu nchaa ñáyiú ì<sup>n</sup>-ni xichi. <sup>2</sup>Te ní tecú dóho-yu uu<sup>n</sup>i ní ñhî andiu, dàtná quídé ì<sup>n</sup> táchí ñhî vilhî ní quide-xi, te duca<sup>n</sup> nî cuu ndéé xití vehe núú ndécü-yu nchaá-yu. <sup>3</sup>Te ní xinî-yu dàtná cáá itá ñuhú cáá sá ndécü xití vehe, te ní xité nuu-xi ní ngoyo ndodo-xi díquî-yu nchaá-yu. <sup>4</sup>Te duca<sup>n</sup> nî quide-xi òré ní quexio Espíritú Yă Ndiöxí ní ngúndecu ndihî-yu nchaá-yu. Te ní ngúita-yu ní cáhá<sup>n</sup>-yu tnúhu cue ñáyiú ñá túú cùu ñáyiú isràél, te nchaa xía<sup>n</sup> ní quide Espíritú Yă Ndiöxí.

<sup>5</sup>Te vai ñáyiú isràél xindecu nchaa dava-gá ñuú ní tacá-yu ñuú Jerusalén, te ñáyiú-á<sup>n</sup> òo ndècu ndéé-yu dăcuahá-yu nchaa ndudú sá dăcuàha tnahí-yu. <sup>6</sup>Te òré ní tecú dóho-yu ñhî, te ní sáhá<sup>n</sup>-yu ní xindedóho-yu tnúhu càhá<sup>n</sup> méé-yu ì<sup>n</sup> ì<sup>n</sup> ñuú-yu, chi ndî díhî<sup>n</sup> ndî díhî<sup>n</sup> tnúhu

càhá<sup>n</sup> ñáyi ndècu-á<sup>n</sup>. <sup>7</sup>Te xíá<sup>n</sup> ío ní cuñúhu ñáyi véxi dava-gá ñuú, te ní xítñàhá-yu:

—Ñáyi duca<sup>n</sup> xíčáhá<sup>n</sup> cúy-yu ñáyi distritú Galileá. <sup>8</sup>¿Te nása ní quidé-yu ní cutúha-yu nàcuáa càhá<sup>n</sup>-ó ì<sup>n</sup> ì<sup>n</sup>-o ndéé lĩhli-o? <sup>9</sup>Te iha véxi ñáyi dava nàció<sup>n</sup>, chi véxi ñáyi Pàrtiá, véxi ñáyi Mèdiá, véxi ñáyi Èlám, véxi ñáyi Mesopò-tamiá, véxi ñáyi Jùdeá, véxi ñáyi Capadóciá, véxi ñáyi Pòntó, véxi ñáyi Àsiá, <sup>10</sup>véxi ñáyi Frìgiá, véxi ñáyi Pànfilíá, véxi ñáyi Ègíptú, véxi ñáyi Áfricá ñáyi ndècu ndéé núú-gá-xi ñuú Cirené. Te tñàhá ñáyi ñuú Rómá véxi, te ñáyi-á<sup>n</sup> chi ñá dífú mèe-ni ñáyi isràél cúy-yu nchaá-yu, dico ì<sup>n</sup>-ni cùu sá dácuhá-yu. <sup>11</sup>Te véxi ñáyi Crètá, véxi ñáyi Àrabíá. Te nchaá-o sa ndèdóho-o càhá<sup>n</sup>-yu nàcuáa cuáhá<sup>n</sup> tñúhu mee-o ì<sup>n</sup> ì<sup>n</sup>-o. Te nchaá ñáyi xíčáhá<sup>n</sup> tñúhu-o càhá<sup>n</sup>-yu cuendá nchaá sá vǎ yõ tñàhí ndàcu cada ní quide Yá Ndiõxí —càchí-yu xítñàhá-yu.

<sup>12</sup>Te ní cuñúhu vihí-yu, te ñá ná sàà iní-yu nása ní cuu, te xítñàhá-yu:

—¿Nása ní cuu duha càhá<sup>n</sup>-yu tñúhu-o? —càchí-yu xítñàhá-yu.

<sup>13</sup>Te davá-yu ní sácú ndéé yíchí ñáhà-yu, te xítñàhá-yu:

—Xixíni ñáyi-á<sup>n</sup> ñuú ñá náhá-yu tñúhu càhá<sup>n</sup>-yu —càchí-yu xítñàhá-yu.

### Tnúhu ní xáha<sup>n</sup> tǎ Pèlú xii cue ñáyi

<sup>14</sup>Te ní ngúnutñí tǎ Pèlú ndihí úxi ì<sup>n</sup> cue téé ní táuchíú<sup>n</sup> Jèsús dacuàha ñaha xii ñáyi tñúhu-gá, te níhi ní càhá<sup>n</sup>-dé, te xáha<sup>n</sup>-dǎ xii-yu:

—Nchaá nchòhó ñáyi distritú Jùdeá ndihí nchòhó ñáyi ñuú Jerusàlén, cund-edóho váha-ndo tñúhu na càhá<sup>n</sup>-í-a. <sup>15</sup>Ñá ndàá tñúhu càhá<sup>n</sup>-ndó, chi ñá túú xíni-ndí te duca<sup>n</sup> càhá<sup>n</sup>-ndó, chi davitna cùu-xi caá í<sup>n</sup> dátneé, vátá tñàhá-gá òré coho ñáyi ndidí. <sup>16</sup>Te yúhú ná càchí tñúhu-í xii-ndo vitna nacuáa ní

xáha<sup>n</sup> Yá Ndiõxí xii ndíi Jòél téé ní xóo càhá<sup>n</sup> tñúhu-gá ndéé sanaha nàcuáa cada ñaha-gǎ xii ñáyi, te ndíi-á<sup>n</sup> ní chídó tñúni ndíi nàcuáa ní càhá<sup>n</sup>-gá. <sup>17</sup>Te duha ní xáha<sup>n</sup>-gǎ xii ndíi:

Cùmání-gǎ sáá nduu nàa ñuyíú, te cuáñaha-í Espiritú-í cundecu ndihí nchaá ñáyi na quìndáá iní ñáhà xii-í.

Te cue déhe-yu càhá<sup>n</sup>-yu tñúhu-í, te cue téé cuechi dacòto núú ñáhà-xí xii-güedé,

te duca<sup>n</sup>-ni cuè téé ni sàhnu càhá<sup>n</sup> saní-güedé,

te diu-ni cuendá nchaá sá quidè-í duca<sup>n</sup> dácoto núú ñáhà-xí xii-güedé.

<sup>18</sup>Te nchaá ñáyi xinu cuechi núú-í càhá<sup>n</sup>-yu tñúhu-í, te cuáñaha-í Espiritú-í cundecu ndihí-yu.

<sup>19</sup>Te ndéé andiu, yàcá<sup>n</sup> vǎi sá cadà-í nàcuáa cuñúhu vihí-yu,

te núú ñuyíú-a cada-í ì<sup>n</sup> sá vátá quini tñàhí-gá-yu,

te ngoyo ñíñí te ngoyo ñuhú te quene vihi ñúhmá.

<sup>20</sup>Te vǎ dáyèhé-gá nchícanhii, cuu nee ñuyíú te cuu ticuèhé núú yõ dǎtná ticuèhé ñíñí.

Te davá-á<sup>n</sup> sáá nduu quixi Yaá cúú Xitohó-yu,

te nduu-á<sup>n</sup> cuu-xi ì<sup>n</sup> nduu càhnu vihi, chi cada-gǎ nchaá sá ñá túú xini-yu, te cuñúhu vihí-yu.

<sup>21</sup>Te òré xía<sup>n</sup> te nchaá ñáyi càhá<sup>n</sup> ndihí ñaha xii Yaá cúú Xitohó-yu-á<sup>n</sup> nanhí tǎhú-yu.

Duha ní xáha<sup>n</sup> Yá Ndiõxí xii ndíi Jòél ní chídó tñúni ndíi.

<sup>22</sup>Te nchòhó ñáyi isràél, cundedóho váha-ndo tñúhu na càhá<sup>n</sup>-í-a cuendá Jèsús téé ñuú Nazàrét. Te Jèsús ní quide-gá chiú<sup>n</sup> Yá Ndiõxí, chi mee Yá Ndiõxí ní chindee ñaha-gá ní quide Jèsús ná daha núú chiú<sup>n</sup>, núu xíá<sup>n</sup> ní ndacu-gá ní quide-gá nchaá sá vǎ yõ tñàhí ndàcu cada, te xíá<sup>n</sup> ní cuñúhu vihi-ndo. Te

sa nàha-ndo nacuaa ní quide-gá cút-nàhá ní xica cuu-gá ñuyú. <sup>23</sup>Te ndíi Jùdás ní taxi cuendá ñáhá ndíi Jèsús xii nchòhò cue tée ní cuu úhú iní ñáhá xii-gá, te ní ndúcú-ndó cuè tée úhú iní-xi ní tñi ñaha-güedě xii-gá te ní sata caa ñaha-güedě núú cùrúxí, te núú cùrúxí-á<sup>n</sup> ní xihí-gá. Dico sa ní cutnùní iní Yá Ndiöxí sá dúcá<sup>n</sup> càda-ndo Jèsús, te mee Yá Ndiöxí ní cachí-gá sá dúcá<sup>n</sup> ndòho Jèsús. <sup>24</sup>Te diu-ni mee Yá Ndiöxí ní dándótó-gã Jèsús, chi sa ní cáhá<sup>n</sup>-gá sá òré cuú-gá te vâ cùú dúcá<sup>n</sup>-gã. <sup>25</sup>Te ndíi Dàvíí tée ní xíndaha ñaha xii cue ñaní tnáhá-ó ñí xíndecu ndéé sanaha ñí chídó tnùní ndíi nàcuáa ní cáhá<sup>n</sup> Jèsús, te duha ní cáhá<sup>n</sup>-gá:

Cùtnuní iní-í sá ncháá ndùu ndecu ndíhi-í Yá Ndiöxí, te ío chindee ñaha-gá xii-í,

te ñá túú tnàhí sá yùhú-í.

<sup>26</sup>Te ío ndàcá<sup>n</sup> táhù-í núú Yá Ndiöxí chi cùdíí iní-í, chi sa nàha-í sá cùú-í dico ndoto-í,

<sup>27</sup>chi vâ dáñá-gã quíhí<sup>n</sup> dúcá<sup>n</sup> àlmá-í núú ndécú ñáyiú ní xihí,

te vâ dáñá-gã téhyú yiqui cùñú-í chi cùu-í Déhe-gá, te yúhú sa nàha-í sá cùú iní ñáhá-gã xii-í.

<sup>28</sup>Te sa ní cachí tnúhu-gá nàcuáa cada-í cundecu-í ichi váha, te cuendá sá ndécú ndíhi ñaha-gá xii-í nùu ío cùdíí iní-í.

Duha ní cáhá<sup>n</sup> Jèsús, te duca<sup>n</sup> ñí chídó tnùní ndíi Dàvíí.

<sup>29</sup>Te nchòhò cue ñaní tnáhá-í, na càchí tnúhu ndáá-í xii-ndo cuendá ndíi Dàvíí tée ní xíndecu ndéé sanaha vîhi, chi ní xihí-dé, te ní chindúxi ñaha-güedě, te nàha-o tnavíí núú ñí chindúxi ñaha-güedě. <sup>30</sup>Te ndíi Dàvíí ní xóo cáhá<sup>n</sup> ndíi tnúhu Yá Ndiöxí, te sa nàha ndíi sá Yá Ndiöxí ní cáhá<sup>n</sup> ndáá cuítì-gá sá díú-ní ñí tnaha ndíi taxi tnùní-dé ñáyiú isràél ndéé cuèé-gá dàtná ní xóo taxi tnùní méé ndíi cùtnàhá ní xín-

decu ndíi, te tée taxi tnùní-á<sup>n</sup> cùú Crístú chi cùu-gá ñí tnàha ndíi. <sup>31</sup>Te sa ní cutnùní iní ndíi sá ndótó Crístú, núu xíá<sup>n</sup> ní chídó tnùní ndíi sá vâ dáñá Yá Ndiöxí sá quíhí<sup>n</sup> dúcá<sup>n</sup> àlmá-gã cundecu-xi núú ndécú ñáyiú ní xihí, te vâ dáñá-gã téhyú yiqui cùñú-gá.

<sup>32</sup>Te ndáá chi Yá Ndiöxí ní dándótó-gã Jèsús, te nchúhú ní xiní-ndí sá ñí ndoto-gã. <sup>33</sup>Te ní xáha<sup>n</sup> Yá Ndiöxí xii Jèsús sá cundecu ndíhi ñaha-gá, te taxi tnùní Jèsús ñí caa ñí quíhí<sup>n</sup>. Te Yá Ndiöxí ní sánaha-gã Espiritú-gá ní ngúndecu ndíhi-gã nàcuáa ní xáha<sup>n</sup>-gã, te diu Jèsús ní quide-gá nchaa sá ñí xiní-ndó vitna ndíhi nchaa sá ñí xíndedóho-ndo. <sup>34</sup>Te ndíi Dàvíí ñá túú ní ndàa túu ndíi andíu ndíhi yiqui cùñú ndíi, te òré ndécú-gã ndíi ñuyú-a ní cachí ndíi:

Dútú Ndiöxí ní xáha<sup>n</sup>-gã xii Yaá cùú Xìtohó-í:

“Ngóo xio cùha-í,

<sup>35</sup>te yúhú cada-í te nchaa sá cùú úhú iní ñáhá xii-n canehe-xi sá yínùhu núú-n.”

Duha ní xáha<sup>n</sup> Dútú Ndiöxí xii Yaá cùú Xìtohó-í càchí ndíi.

<sup>36</sup>Te nchòhò ñáyiú isràél cùu-ndo ndí mee-í, te cuíní-í cundedóho váha-ndo ñí tnúhu na càhá<sup>n</sup>-í-a. Jèsús ní sata caa-ndo-gã núú cùrúxí, dico Yá Ndiöxí ní cachí-gá sá Jèsús dacàcu nihnu-gá ñáyiú, te vâ cání ñí caní úú iní-ndó, chi diu-gá cùnùu-gá núú nchàa ñáyiú —càchí té Pèlú xàha<sup>n</sup>-dě xii-yu.

<sup>37</sup>Te ñáyiú ní xíndedóho tnúhu ní cáhá<sup>n</sup> té Pèlú ní ndixi túu iní-yu nàcuáa quidé-yu ndécú-yu, te ní xáhã<sup>n</sup>-yu xii-dé ndíhi dava-gá cue tée ní táúchíú<sup>n</sup> Jèsús dacuàha ñaha xii-yu tnúhu-gá:

—Nchaa nchòhò cue ñaní tnáhá-ndí, ¿nása cachí-ndó cùnduu, nása cada-ndí vitna? —càchí-yu xáhã<sup>n</sup>-yu xii-güedě.

<sup>38</sup>Te ní xáha<sup>n</sup> tē Pèlú xii-yu:

—Daña-ndo nchaa sá cuèhé sá dúhá quide-ndo, te cada càhnu iní Yá Ndiöxí nchaa yíca cuèchi-ndo. Te cuandute-ndo cuèndá quini-yu sá nĩ natuha-ndo ichi Jesús, te duca<sup>n</sup> te taxi Yá Ndiöxí Espíritú-gá cundecu ndihi-ndo, <sup>39</sup>chi cuini-gá taxi-gá Espíritú-gá xii mee-ndo ndihi déhe-ndo, te cuañaha-gá Espíritú-gá xii nchaa ñáyiú ni càa xico ñuyíú, ñáyiú cáhá<sup>n</sup>-gá cundecu ichi-gá ndéé idá-gá —càchí té Pèlú xáha<sup>n</sup>-dè xíí-yu.

<sup>40</sup>Te titní-gá tnúhu ní xáha<sup>n</sup>-dè nàcuáa cada-yu, te xáha<sup>n</sup> tùcu-dé:

—Daña-ndo nchaa sá cuèhé sá dúhá quide-ndo, vá cáda-ndó sã quidé dàva-gá-yu —càchí-dé xáha<sup>n</sup>-dè.

<sup>41</sup>Te nchaa ñáyiú ní sándáá iní-xi tnúhu ní cáhá<sup>n</sup> té Pèlú ní sanduté-yu, te diu-ni nduu-á<sup>n</sup> nĩ cuu dàtná úní mĩ ñáyiú ní sándáá iní-xi ní xindecu ndihi ñáyiú xídacuáhá tnúhu Yá Ndiöxí. <sup>42</sup>Te ío ní xindedóho-yu tnúhu ní cáhá<sup>n</sup> cue téé ní táuchíú<sup>n</sup> Jèsús dacuàha ñaha xíí-yu tnúhu-gá, te ío váha ní xindecú-yu ní xóo ndatnúhu váha-yu. Te ní xóo caxi càhnú-yu cuèndá nãhá-yu sá dúcá<sup>n</sup> nĩ quide Jèsús cútñahá vátá cáhni ñaha-gá-güedé xii-gá, te ní xóo cáhá<sup>n</sup> ndihí-yu Yá Ndiöxí.

**Nàcuáa ní quide nchaa ñáyiú  
ní sándáá iní tnúhu  
Jèsús ndéé díhna nuu**

<sup>43</sup>Te ncháa-yu ní cuñúhu vihí-yu, chi cue téé ní táuchíú<sup>n</sup>-gã dacuàha ñaha xíí-yu tnúhu-gá ní quide-güedé titní núú sã vã yõ tñahí ndàcu cada, te xíá<sup>n</sup> ní cutnùni iní-yu sá méé Yá Ndiöxí chíndèè ñaha-gá xii-güedé. <sup>44</sup>Te nchaa ñáyiú sándáá iní tnúhu Jèsús cáhá<sup>n</sup> ndihi tñaha váha-yu, te cuèi-ni nchaa ndachìu<sup>n</sup> nandíhi-yu ndècu cahnu. <sup>45</sup>Te ní dícõ-yu nchaa ndachìu<sup>n</sup> sá ñà túú xini ñuhú-yu, te ní níhí-yu díhú<sup>n</sup> te ní sãñahá-yu xii nchaa ñáyiú ñà nihí. <sup>46</sup>Te ìí<sup>n</sup> nduu

ìí<sup>n</sup> nduu ní xóo quíhí<sup>n</sup> ndihi tñahá-yu veñúhu càhnu sá ío cùnuu. Te ní xexi ndihi tñahá-yu vehé-yu. Te ío ní cudí iní-yu chi ìí<sup>n</sup>-ni ní cuú-yu ncháa-yu. <sup>47</sup>Te ío ní ndacá<sup>n</sup> táhú-yu núú Yá Ndiöxí, te nchaa dava-gá ñáyiú ní cáhá<sup>n</sup> váha-yu cuèndá ñáyiú-á<sup>n</sup>. Te mee Yá Ndiöxí ní quide-gá ní sándáá iní vãi-gá ñáyiú, te ní xindecú-yu ndihi dava-gá ñáyiú xídacuáhá tnúhu-gá.

**Quide tátna-güedé ìí<sup>n</sup> téé yacua**

**3** Te ìí<sup>n</sup> nduu òré caá úní sacuaa, òré xicáhá<sup>n</sup>-yu ndihi Yá Ndiöxí cuáhá<sup>n</sup> té Pèlú ndihi té Juáá veñúhu càhnu sá ío cùnuu sácúú-xí ñáyiú is-ràél. <sup>2</sup>Te ndècu ìí<sup>n</sup> téé yacua, te duca<sup>n</sup>-ni càa-dé ní cacu-dé. Te sàhá<sup>n</sup> ndihi ñahá-yu veñúhu càhnu sá ío cùnuu, te sàcõo-dé ìí<sup>n</sup> xio yuyèhe veñúhu sá nání Yèhe Vii Caa, chi duca<sup>n</sup> nàni-xi, te xicá<sup>n</sup> ndàhú-dé núú nchaa ñáyiú sàhá<sup>n</sup> veñúhu. <sup>3</sup>Te ní xiní-dé té Pèlú ndihi té Juáá cuánguihu-güedé veñúhu, te xicá<sup>n</sup> ndàhú-dé núú-güedé. <sup>4</sup>Te ní ndacoto-güedé núú-dè, te ní xáha<sup>n</sup> té Pèlú xii téé yacua-á<sup>n</sup>:

—Cundehe ñaha xii-ndí —càchí té Pèlú xáha<sup>n</sup>-dè xii-dè.

<sup>5</sup>Te ní xíndéhé ñaha-dé xii-güedé, chi ní cáhá<sup>n</sup>-dè sá ío ìí<sup>n</sup> sá cuañaha-güedé.

<sup>6</sup>Te ní xáha<sup>n</sup> tẽ Pèlú:

—Ñá túú tñahí díhú<sup>n</sup> nèhè-í dico chindee ñaha-í xii-n, te Xítóhó Jesucristú Yaá ní xindecu ñuú Nazàrét, ndacu-gá cada tátna ñaha-gã xii-n, ndacuñí te caca-n —càchí-dé xáha<sup>n</sup>-dè.

<sup>7</sup>Te té Pèlú ní tñii-dé ndaha cùha téé yacua-á<sup>n</sup>, te ní ngüíta-dé ndacàni ñaha-dé, te òré xíá<sup>n</sup> nĩ naníhí ndéé-dè, te ní ndúha sáhá-dè. <sup>8</sup>Te ní ndacuñí cunu mee-dè te ní xica-dé, te ní cachí-dé sá ío càhnu cuu Yá Ndiöxí cuèndá sá nĩ ndúha-dé, te ta sãndava-dé cuánguihu ndihi ñaha-güedé veñúhu. <sup>9</sup>Te nchaa ñáyiú xindecu-á<sup>n</sup> nĩ xiní-yu sá nĩ nduu

váha-dé, te ndèhé-yu ndàcá<sup>n</sup> táhú-dě núú Yă Ndiöxí. <sup>10</sup> Te ní naquiní ñáhă-yu xii-dé sá díú tée xicá<sup>n</sup> ndàhú tée ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vihi-yu sá ní ndúha-dé.

### Té Pèlú ní cáhá<sup>n</sup>-dé corrèdór sá néhé ñiú ndíi Salòmón

<sup>11</sup> Te sátá veñúhu cãa corredór sá néhé ñiú ndíi Salòmón. Yàcá<sup>n</sup> ndécú tē Pèlú ndihi té Juàá ndihi tée ní ndúha sáhă-xi, te ñă cuiní tée ní ndúha sáhă-xi-á<sup>n</sup> dañă-dě quhí<sup>n</sup>-güedé dandöo ñaha-güedě xii-dé. Te chitú-yu ní quexio coyó-yu núú ndécú-güedě, te ní cuñúhu vihi-yu sá ní ndúha sáhă tée cùhú-á<sup>n</sup>. <sup>12</sup> Te té Pèlú ní xiní-dé ní quexio coyó-yu, te ní xáha<sup>n</sup>-dě xií-yu:

—Nchòhó ñáyíu isràél, ¿ná cuendá ndéé dúcá<sup>n</sup> ndèhe ñaha-ndo xii-ndí te cùñúhu-ndo sã ní ndúha tée yacua-ái<sup>n</sup>? Nchòhó cáhá<sup>n</sup>-ndó sã méé-ndí ní quide tátna-ndí-dé sã ño váha iní-ndí, dico ñáhă chi ñă díú mèe-ndí ní quide tátna-ndí-dé. <sup>13</sup> Chi Yă Ndiöxí ní ndadúha ñaha-gă xii-dé, chi ñiú-gá cúú Ndiöxí ndíi Àbrahám ndihi ndíi Isàác ndihi ndíi Jácób, te ñiú-ni cue tée-á<sup>n</sup> cúú ñaní tnáhă-ó ní xíndecu ndéé sanaha vihi. Te ñiú-ni Ndiöxí-á<sup>n</sup> ní xáha<sup>n</sup>-gă xii Déhe-gă Jèsús sá táxí tnùní-gă nchaa sã ño andíu ndihi nchaa ñáyíu ndècu ñuyúú-a, dico mee-ndo ní sáha cuendá-ndó Jèsús núú tē cùchiu<sup>n</sup>. Te té Pilatú ní cuiní-dé dacăcu-dé Jèsús ní cùu, te mee-ndo ñă ní cuiní-ndó. <sup>14</sup> Te Yă Ndiöxí ní cachí-gă sã ño váha iní Jèsús te ñă túú tnàhí cuéchi-gă. Te mee-ndo ñă túú ní cuiní-ndó căcu-gă ñúu ní xáha<sup>n</sup>-ndo xìi té Pilatú sá vâha-gă dacăcu-dé ñ<sup>n</sup> tée ndècu vihi cuéchi-xi, te vâ dacăcu-dé Jèsús. <sup>15</sup> Te ní xáha<sup>n</sup>-ndo sã cáhni-güedě Jèsús Yaá quidé nchito-o ndecu-o, dico Yă Ndiöxí ní dándótó ñaha-gă, te ní xiní-ndí sã ndàá ní ndoto-gă. <sup>16</sup> Te

nchúhú sa nâha-ndí sá díú Xítohó Jesu-crístú ní ndadúha-gă tée yacua, te náí-dé nútñi-a. Te duca<sup>n</sup> ní quide-gă chi ní sándáá iní ñáhă-dě xii-gă, te vitna ní xiní-ndó sã ndàá ní ndúha-dé.

<sup>17</sup> Te nchòhó ndihi cue tée cùnuu ní sahni-ndo Xítohó Jesucristú, chi ñă ní cùtnuní iní-ndó sã ní quide-ndo. <sup>18</sup> Te cue tée ní xóo cáhá<sup>n</sup> tnúhu Yă Ndiöxí ndéé sanaha ní chídó tnùní-güedé năcuáa ní xáha<sup>n</sup> Yă Ndiöxí xii-güedé sá Crístú quixi-gă ñuyúú-a, te ndoho vihi-gă, te xíă<sup>n</sup> ñúu duca<sup>n</sup> ní cuu ío ní ndoho-gă. <sup>19</sup> Te vitna te dañă-ndo nchàa sã cuèhé sá dúhá quide-ndo. Te quindáá iní-ndó Yă Ndiöxí, te duca<sup>n</sup> te cada cãhnu iní-gă nchaa sã ñă túú vâha ní quide-ndo ñuyúú-a, te canu ichi ñaha-gă xii-ndo ñ<sup>n</sup> ichi váha. <sup>20</sup> Te ní tendaha-gă Crístú ní quixi-gă ñuyúú-a, chi mee Yă Ndiöxí ní cachí-gă sá díú Crístú tau-nihnu ñaha-gă xii-ndo. <sup>21</sup> Te dacuití cùndecu-gă andíu ndéé ná sàá nduu nàtaxi ndecu-gă nchaa sã ndécú ñuyúú năcuáa sàni iní méé-gă. Te ñiú duca<sup>n</sup> ní cáhá<sup>n</sup> Yă Ndiöxí ñúu duca<sup>n</sup> ní chídó tnùní cue tée ní xóo cáhá<sup>n</sup> tnúhu-gă ndéé sanaha. <sup>22</sup> Te ndíi Moisés ní xáha<sup>n</sup> ndíi xii cue ñaní tnáhă-ó ní xíndecu ndéé sanaha: “Yă Ndiöxí tendaha-gă ñ<sup>n</sup> tée quixi-dé cáhá<sup>n</sup>-dé tnúhu-gă dàtná cuiní-ndó ní quide ñaha-gă xii yúhú, te tée-á<sup>n</sup> cuu-dé ñ<sup>n</sup> ñaní tnáhă-ndó. Te cundedóho váha-ndo nchàa tnúhu cáhá<sup>n</sup>-dé. <sup>23</sup> Te nchaa ñáyíu vâ quindáá iní tnúhu cáhá<sup>n</sup>-dé, te cuíta nihnú-yu chi vâ quhí<sup>n</sup>-yu núú quhí<sup>n</sup> ñáyíu sándáá iní tnúhu Yă Ndiöxí”, duha ní xáha<sup>n</sup> ndíi Moisés xií-yu —cächí té Pèlú xáha<sup>n</sup>-dě xií-yu.

<sup>24</sup> Te ní xáha<sup>n</sup> tùcu té Pèlú xií-yu:

—Ndíi Sàmuel ndihi nchaa cue tée nchícú<sup>n</sup>-gă ní xóo cáhá<sup>n</sup> tnúhu Yă Ndiöxí ndéé sanaha ní cáhá<sup>n</sup>-güedé năcuáa cada-xi vitna. <sup>25</sup> Te Yă Ndiöxí ní cáhá<sup>n</sup>-gă ndihi cue tée ní cáhá<sup>n</sup> tnúhu-gă ndéé

sanaha. Te ní quide ndáá-gá ndihi nchaá ñaní tnáhá-ó ní xíndecu ndéé sanaha nàcuáa cada-gá naníhí tànhú-ó. Te duha ní xáha<sup>n</sup>-gã xii ndíi Àbrahám: “Ío nduu cacu ìi<sup>n</sup> tnàha-n, te tée-á<sup>n</sup> cada-dé te naníhí tànhú ñáyiu ñuyíu-a”, duha ní xáha<sup>n</sup>-gã xii ndíi Àbrahám. <sup>26</sup>Núu xíá<sup>n</sup> ní tendaha-gã Déhe-gá ní quixi-gá núu ndécú-ndo cuendá daña-ndo nchaá sá cuèhé sá dúhá quide-ndo, te naníhí tànhú-ndó —càchí té Pèlú xáha<sup>n</sup>-dè xií-yu.

### Té Pèlú ndihi té Juàá ndécú-güedë ndaha tée cùchiu<sup>n</sup>

**4** Te té Pèlú ndihi té Juàá càhá<sup>n</sup> dúcá<sup>n</sup>-ni-güedë ndihi ñáyiu, ní quexìo cue dútú ndihi tée tàxi tnuí ñáhá xii cue tée quide cuendá veñúhu càhnu sá ìo cùnuu, ndihi cue tée cùu saducéú. <sup>2</sup>Te ní cudéé<sup>n</sup>-güedë nchaá-güedé núu tã Pèlú ndihi té Juàá sá xáha<sup>n</sup>-güedë xii ñáyiu sá ndótó ñáyiu ní xíhí dàtná ní ndoto Jèsús. <sup>3</sup>Te ní tnií ñaha-güedë ní chihi ñaha-güedë vecaá xii-güedé, te ñá ní quide ndáá tée cùchiu<sup>n</sup> cuéchi-güedé nduu-á<sup>n</sup> chi sa ní cuaa. <sup>4</sup>Te ío vai ñáyiu ní sándáá iní-yu tnúhu ní cáhá<sup>n</sup>-güedé, te ñáyiu-á<sup>n</sup> ndihi ñáyiu sa ní sándáá iní-xi ndéé càni-gá ní xínu dàtná úhú<sup>n</sup> mìl mee-ni cuè tée, te ìi<sup>n</sup> ñáyiu ìihí ndihi landú.

<sup>5</sup>Te nduu tnéé-á<sup>n</sup> diu-ni ñuu Jerusàlén-á<sup>n</sup> ñí tacá cue tée yìndaha veñúhu, ndihi cue tée cùu sacuéhé nùú ñáyiu isràél ndihi cue tée dàcuaha ñaha xii-yu nchaá tnúhu ní chídó tnuí ndíi Moisés. <sup>6</sup>Te tnàhá dútú cùnùu-gá tée nàni Anás ndécú ndihi té Caifás, ndihi té Juàá, ndihi té Lijandrú ndihi dava-gá ñaní tnáhá dütú cùnùu-gá-á<sup>n</sup> ndécú. <sup>7</sup>Te ní xáha<sup>n</sup>-güedë xii cue tée xínu cuechi núu-güedë:

—Chí cuàhá<sup>n</sup> queñuhu-ndo tã Pèlú ndihi té Juàá vecaá, te na quixi-güedé iha —càchí-güedé xáha<sup>n</sup>-güedë.

Te ní quexìo té Pèlú ndihi té Juàá núu cuè tée cùnuu, te cue tée cùnuu-á<sup>n</sup> ñí xíca<sup>n</sup> tnúhú-güedë núu-güedë, te xáha<sup>n</sup>-güedë:

—¿Nása ní quide-ndo cuendá tée yacua-á<sup>n</sup>? ¿Yoo ní táuchíu<sup>n</sup> dùca<sup>n</sup> cada-ndo? —cachí-güedé xáha<sup>n</sup>-güedë.

<sup>8</sup>Te ndècu ndihi té Pèlú Espiritú Yá Ndiòxí, núu xíá<sup>n</sup> ní xáha<sup>n</sup>-dè xii-güedé:

—Nchòhó cue tée cùchiu<sup>n</sup> ndihi nchòhó cue tée cùu sacuéhé nùú ñáyiu isràél, <sup>9</sup>te núu cuìní-ndó quini-ndó ñasa ní quide-ndí ní ndúha tée yacua-á<sup>n</sup>, <sup>10</sup>te cundedóho-ndo ìi<sup>n</sup> tnúhu na càhá<sup>n</sup>-í-a. Xini ñuhu-xi cundedóho nchaá ñáyiu isràél cuendá quini-yu nàcuáa ní cuu ní ndúha tée-á<sup>n</sup>. Xitohó Jesucristú Yaá ní xíndecu ñuu Nazàrét ní quide tátna-gá sáhá tãe yacua ní ndúha, te diu-ni-gá ní sata caa-ndo nùú cùrúxí te núu cùrúxí-á<sup>n</sup> ñí xíhí-gá, te ní dándótó ñaha Yá Ndiòxí xii-gá. <sup>11</sup>Te núu tütú Yá Ndiòxí càchí-xi: “Cristú cúu-gá dàtná ìi<sup>n</sup> yúu ndécú xíquí ìi<sup>n</sup> vehe. Te yúu càchí-yu sá ñà túu nàndíhi, te diu xíá<sup>n</sup> ní nàndíhi-xi ní ngúnutnií-xi xíquí véhé”, duha càchí-xi núu tütú-gá. Te duca<sup>n</sup> sátnahá-xi cùu Jèsús, chi càchí-ndó sá ñà túu nàndíhi-gá, <sup>12</sup>dico Yá Ndiòxí ñà túu ndéé ní tàxi ndecu-gá ingá tée dàcácu nihnu ñaha xii-o núu ùhú núu ndàhú, chi ìi<sup>n</sup> díi ní Déhe-gá Xitohó Jesucristú dacácu nihnu ñaha-gã xii-o —càchí té Pèlú xáha<sup>n</sup>-dè xii-güedé.

<sup>13</sup>Te té Pèlú ndihi té Juàá ñá túu túha-güedé, te cùñúhu cue tée cùchiu<sup>n</sup> sá ìo ñíi xíndáa-güedé. Te ní cutnùní iní cue tée cùchiu<sup>n</sup>-á<sup>n</sup> sã Jèsús ní xica cuu ndihi-güedé, núu xíá<sup>n</sup> ñá túu tnàhí yùhú-güedé càhá<sup>n</sup>-güedé. <sup>14</sup>Te cuendá ndécú ndihi té Pèlú ndihi té Juàá tée ní ndúha sáhá-xi, núu xíá<sup>n</sup> ñá ní ñíhí cue tée cùchiu<sup>n</sup> tnúhu cáhá<sup>n</sup>-güedé. <sup>15</sup>Te ní xáha<sup>n</sup>-güedë xii té Pèlú ndihi té Juàá sá quée-güedë quehé cuendá

ndóo mee-güedě ndatnúhu-güedé. <sup>16</sup> Te ní xítñaha-güedé:

—¿Nása cada-o úú cue tée-ǎ<sup>n</sup>?, chi nchaa ñáyiú ñuú Jerusálén nǎhá-yu sá ní quide tátña-güedé ì<sup>n</sup> tée yacua, te xiǎ<sup>n</sup> xícuñúhu vihi ñáyiú. Te vá cúú cǎchí-ó sǎ ñǎ ndáá, chi vǎi ñáyiú ní xiní nàcuáa ní cuu. <sup>17</sup> Te dayùhú-ó-güedě te cúñaha-0 sǎ vǎ cǎhá<sup>n</sup>-gá-güedě tnúhu Jèsús, chi núu ñáhá te quindáá-gá iní-yu —cǎchí-güedé xítñaha-güedé.

<sup>18</sup> Te ní cana tucu-güedé té Pèlú ndihi té Juàá, te xǎha<sup>n</sup>-güedě sá vǎ dǎcuàha-gá-güedé ñáyiú tnúhu Jèsús. <sup>19</sup> Te té Pèlú ndihi té Juàá ní xǎha<sup>n</sup>-güedé:

—Chí cuǎha cuèndá, te núu sá cǎchí nchòhó cada-ndí àdi sá cǎhá<sup>n</sup> Yǎ Ndiòxí cada-ndí. Te cada cǎhnu iní-ndó chi vá cúú cǎda-ndí sá cǎchí-ndó, chi cada nahi-ni-ndí sá cǎchí Yǎ Ndiòxí. <sup>20</sup> Chi dacuítí cǎhá<sup>n</sup>-ndí nàcuáa ní cǎhá<sup>n</sup> Jèsús, te cǎhá<sup>n</sup>-ndí nchaa sá ní xiní-ndí ní quide-gá —cǎchí-güedé xǎha<sup>n</sup>-güedé.

<sup>21</sup> Te cue tée cùchiu<sup>n</sup> níhi-gá ní cǎhá<sup>n</sup>-güedé xǎha<sup>n</sup>-güedé sá cadá cǎstiú ñáhá-güedé nùu vá dǎná-güedé sá dǎcuàha-güedé ñáyiú. Te duca<sup>n</sup> te ní dǎná ñaha-güedé cuánuhú-güedé, chi ñǎ ní níhi-güedé nása cada-güedé cada castiú ñáhá-güedé, chi nchaa-yu ndàcá<sup>n</sup> táhú-yu núú Yǎ Ndiòxí sá ní ndúha tée yacua. <sup>22</sup> Te tée ní quide tátña-güedé-á<sup>n</sup> ndécú-dě vihi-gá údico cuíá-dě, te ío ní cuñúhu-yu sá ní ndúha-dé.

**Ñáyiú sàndáá iní tnúhu Jèsús  
xicá<sup>n</sup> táhú-yu núú-gǎ sá vǎ  
yùhú-yu cǎhá<sup>n</sup>-yu tnúhu-gá**

<sup>23</sup> Te ní ndee té Pèlú ndihi té Juàá cuánuhú-güedé núú ndécú cuè tée cùndihi-güedé, te ní nacani tnúhu-güedé nàcuáa ní xǎha<sup>n</sup> cuè dútú cúnùu ndihi cue tée cùu sacuéhé nùú ñáyiú isràél. <sup>24</sup> Te sátá ñǎ xíndedóho-yu tnúhu ní cǎhá<sup>n</sup>-güedé, te ì<sup>n</sup>-ni tnúhu ní

cǎhá<sup>n</sup>-yu nchaa-yu ndihi Yá Ndiòxí, te ní xǎhá<sup>n</sup>-yu xii-gá:

—Yòhó Dútú Ndiòxí, ní cadúha-n àndiu, ní cadúha-n ñùyíú, ní cadúha-n làmár, ní cadúha-n nchàandi túhú sá ìo ñuyíú. <sup>25</sup> Te ndí Dàvíí ní sàndáá iní ndí tnúhu ní cǎhá<sup>n</sup>-n, te ní chídó tnùní ndí nàcuáa ní xǎha<sup>n</sup>-n cǎhá<sup>n</sup> ndí, te diu-ni Espíritú-n ní chindee ñaha-xi xii ndí ní chídó tnùní ndí, te duha ní chídó tnùní ndí:

Ñáyiú ñǎ túú cùu ñáyiú isràél ío cùdèé<sup>n</sup>-yu núú Yǎ Ndiòxí, te cuini-yu nàá-yu ndihi-gá, dico vá ndácú-yu chi mee-gǎ cúnùu-gá.

<sup>26</sup> Te cue tée yàndaha nació<sup>n</sup> ndihi cue tée cùchiu<sup>n</sup> tacá-güedé nàá-güedé ndihi Dútú Ndiòxí ndihi Cristú Yaa ní quixi ñuyíú-a.

Duha ní chídó tnùní ndí Dàvíí nàcuáa ndùu tnúhu ní cǎhá<sup>n</sup>-n —cǎchí-yu xǎhá<sup>n</sup>-yu xii Yá Ndiòxí.

<sup>27</sup> Te xǎha<sup>n</sup> tùcú-yu xii-gá:

—Ndáá ní cǎhá<sup>n</sup> ndí Dàvíí chi diu-ni ñuú iha ní tacá té Hèrodés ndihi té Pònciú Pìlatú ndihi ñáyiú ñǎ túú cùu ñáyiú isràél ndihi ñáyiú isràél ní cǎhá<sup>n</sup> cuèhé-yu cuèndá Jèsús. Te Yòhó Dútú Ndiòxí, Déhe-n cùu Jesús nùu ío váha iní-gá, te ní sáha chiú<sup>n</sup>-n-gá, te ío úhú ní cuu iní ñáhá ñáyiú xii-gá.

<sup>28</sup> Te ní quidé-yu nàcuáa ní sani iní-n cǎdá-yu ndéé sanaha, ndéé cùtnàhá ní ngáva ñuyíú. <sup>29</sup> Te Yòhó Dútú Ndiòxí sa ñaha-n nása cǎhá<sup>n</sup> cue tée cuini cada úhú ñáhá xii-ndí. Te quide-ndí chiú<sup>n</sup> tahu-n, te vitna chindee ñaha-n xii-ndí cuèndá sá vǎ yùhú-ndí cǎhá<sup>n</sup>-ndí tnúhu-n. <sup>30</sup> Te cada tátña-n ñáyiú cùhú, te chindee ñaha-n xii-ndí, te cada-ndí nchaa sá vǎ yòo tnàhí ndàcu cada nàcuáa cuñúhu vihi-yu. Te xiní-ndí sá mée Jèsús chindee ñaha-gá xii-ndí, chi quide-gá chiú<sup>n</sup> tahu-n —cachí-yu xǎhá<sup>n</sup>-yu xii Yá Ndiòxí.



<sup>31</sup> Te sátá nǐ yáha ní cáhá<sup>n</sup>-yu ndíhi Yá Ndiöxí, te ní quidi-xi vehe núú xíndecú-yu, te òré-á<sup>n</sup> nǐ cutáhú tucú-yu nchaá-yu Espíritú-gá. Te ní cáhá<sup>n</sup>-yu tnúhu Yá Ndiöxí, te ñá túú tnàhí nǐ yùhú-yu.

**Cuèndá nchaa ndachìu<sup>n</sup>  
cánehe chiú<sup>n</sup>-yu**

<sup>32</sup> Te nchaa ñáyiú ní sándáá iní tnúhu Yá Ndiöxí ì<sup>n</sup>-ni tnúhu ní cáhá<sup>n</sup>-yu nchaá-yu. ì<sup>n</sup>-ni tnúhu ní sani iní-yu, te ní xóo chindee tnàhá-yu chí ní xóo cuáha táhú tnàhá-yu nchaa sá xíní ñùhú-yu, te ní ì<sup>n</sup>-yu ñá túú ní cáhá<sup>n</sup>-yu sá ndächìú<sup>n</sup>-yu ì<sup>n</sup>-dìi-ní-yu cùu nchaa sá ndécú ndìhí-yu. <sup>33</sup> Te cue téé ní táuchíú<sup>n</sup> Jèsús dacuàha ñaha xí-yu tnúhu-gá ío váha ní cáhá<sup>n</sup>-güedé nàcuáa ní cuu ní ndoho Xítóhó Jesucristú. Te ío ní chindee ñaha Yá Ndiöxí ní cáhá<sup>n</sup>-yu tnúhu-gá, te ñá túú ní cáhá<sup>n</sup> cuèhé dava-gá-yu cuèndá ñáyiú dàcuaha tnúhu-gá. <sup>34</sup> Te ñá túú tnàhí ní cùndahú-yu díhú<sup>n</sup>, chí nchaa ñáyiú ndècu ndíhi ñuhu-xi, ndíhi nchaa ñáyiú càa vehe-xi ní nadicó-yu, te da ì<sup>n</sup> da ì<sup>n</sup> ndachìú<sup>n</sup>-yu ní nadicó-yu òré xíní ñùhú-yu díhú<sup>n</sup>. <sup>35</sup> Te ní sàñàhá-yu xii cue téé ní táuchíú<sup>n</sup> Jèsús dacuàha ñaha xí-yu tnúhu-gá, te cue téé-á<sup>n</sup> ní dácàhñu-güedé nchaa ñáyiú xini ñuhu. <sup>36</sup> Te distritú Chipré ndécú ì<sup>n</sup> téé nàni-dé Chèè ñaní tnàhá ndíi Lèví, te ní xóo cunu cuechi-dě veñùhu ñáyiú isràél. Te cuèndá sá sàñaha-dě tnúhu ndee ìní xí-yu, xíá<sup>n</sup> ñuu ní dánání ñaha-güedé Vèè xii-dé. <sup>37</sup> Te téé-á<sup>n</sup> ní nadico-dě luha ñuhu-dé, te nèhe-dé díhú<sup>n</sup> cuáhá<sup>n</sup> núú cuè téé ní táuchíú<sup>n</sup>-gá dacuàha ñaha xí-yu tnúhu-gá.

**Té Ananiás ndíhi tá Sàfirá ñá  
túú ní quide ndáá-yu**

**5** Te ndècu ì<sup>n</sup> téé nàni Ananiás, te ñadìhí-dé nání-á<sup>n</sup> Sàfirá, te

ñáyiú-á<sup>n</sup> nǐ nadicó-yu luha ñuhú-yu. <sup>2</sup> Te ní taxúha-dé sacú díhú<sup>n</sup>, te sacú-gá néhé-dě cuáhá<sup>n</sup> ní sàñaha-dě xii cue téé ní táuchíú<sup>n</sup> Jèsús dacuàha ñaha xii ñáyiú tnúhu-gá, te ní dándàhú ñáhá-dě xii-güedé, chí ní xáha<sup>n</sup>-dě sá ñihí ní sàñaha-dě, te nàha ñadìhí-dé sá dúcá<sup>n</sup> nǐ quide-dé. <sup>3</sup> Te ní xáha<sup>n</sup> tǐ Pèlú xii-dé:

—Ananiás, ¿ná cuèndá duca<sup>n</sup> ní quide-n ní dání-n ní quíhu sácúfná ìní-n? Te ní dácúándèhnde-n núú Espíritú Yá Ndiöxí, te ní taxúha-n sácú díhú<sup>n</sup> ní níhí-n cuèndá ñuhu-n. <sup>4</sup> ¿Te ñuhu-á<sup>n</sup> cuèndá sá ñùhú mèe-n, àdi díhú<sup>n</sup>-á<sup>n</sup> cuèndá sá díhú<sup>n</sup> méé-n cùu-xi, te cuu-ni cada-n nàcuáa càchí iní-n càha<sup>n</sup>-n ñá? ¿Ná cuèndá duca<sup>n</sup> ní quide-n? ¿Ná ní quide-xi iní-n ñuu ní dácúándèhnde-n núú Yá Ndiöxí? Chí ñá dífú-ní mèe-ni ñáyiú ní dándahú-n —càchí tǐ Pèlú xáha<sup>n</sup>-dě xii-dé.

<sup>5</sup> Te òré ní ndíhi tnúhu ní xáha<sup>n</sup> tǐ Pèlú, te uu<sup>n</sup> ní nduá-dé te ní xíhí-ni-dé. Te nchaa ñáyiú ní níhí tnúhu sá ní xíhí-dé, te ní yùhú víhí-yu. <sup>6</sup> Te ní quixi ì<sup>n</sup> úú cue téé cuechi, te ní ndanehe ñaha-güedě ní sacá<sup>n</sup> ñáhá-güedě núú yuu, te ní ducu<sup>n</sup> nuu ñaha-güedě yuu-á<sup>n</sup>, te ní xido ñaha-güedě néhé ñaha-güedé cuáhá<sup>n</sup> chindúxi ñaha-güedě xii-dé.

<sup>7</sup> Te ní cuu úú uní òré, te ní quexio ñadìhí téé ní xíhí-á<sup>n</sup>, te vátá quíní-gá-a<sup>n</sup> sá ní xíhí yíi-a<sup>n</sup>. <sup>8</sup> Te ní xáha<sup>n</sup> tǐ Pèlú xii-a<sup>n</sup>:

—Cuíní-í cachí tnúhu ndáá-n. ¿Ndě-dau ní dícó-ndó ñùhu, ní dícó-ndó nàcuáa ní cachí yíi-n á<sup>n</sup>? —càchí tǐ Pèlú xáha<sup>n</sup>-dě xii-a<sup>n</sup>.

Te ní xáha<sup>n</sup>-a<sup>n</sup>:

—Ndáá sá dífú-ní dùca<sup>n</sup> —cachí-a<sup>n</sup> xáha<sup>n</sup>-a<sup>n</sup>.

<sup>9</sup> Te ní xáha<sup>n</sup> tǐ Pèlú:

—¿Ná cuèndá duca<sup>n</sup> ní chitnàha tnúhu-ndo dùca<sup>n</sup> ní quide-ndo ní cuíní-ndó dándahú-ndó Espíritú Yá Ndiöxí? Quíní-n, chí sa cuándixi cue

tée ní sáhá<sup>n</sup> ní chindúxi yíi-n, te yòhó tñàhá-n càndeca ñaha tucu-güedé xii-n quíhí<sup>n</sup> vitna —càchí-dé xáha<sup>n</sup>-dë xii-a<sup>n</sup>.

<sup>10</sup>Te òré-á<sup>n</sup> ní nduá-a<sup>n</sup> núú tē Pèlú, te ní xíhí-ni-a<sup>n</sup>. Te cuándihu cue tée cuechi-á<sup>n</sup> xítí vehe, te ní xiní-güedé sá sà ní xíhí-a<sup>n</sup>, núú ní xido ñaha tucu-güedé cuáhá<sup>n</sup> chindúxi-güedé-a<sup>n</sup> ñíni yíi-a<sup>n</sup>.

<sup>11</sup>Te ní yùhú víhí ñáyiú ní sándáá iní tñúhu Yá Ndiòxí, ndíhi dava-gá ñáyiú ní níhí tñúhu nàcuáa ní cuu.

**Ní quide-güedé titní núú sǎ  
vǎ yǎo tñáhi ndàcu cada te  
ío ní cuñúhu ñáyiú**

<sup>12</sup>Te cue tée ní táuchíú<sup>n</sup> Jèsús dacuàha ñaha xíi-yu tñúhu-gá titní víhí sǎ vǎ yǎo tñáhi ndàcu cada ní quide-güedé, te ní cuñúhu víhí-yu. Te nchaa ñáyiú ní sándáá iní-xi tñúhu Jèsús ní xóo tacá-yu corredór néhé ñú ndí Salòmón. <sup>13</sup>Te nchaa ñáyiú ñá túú dàcuaha tñúhu-gá ñá ní cùyíi-yu chitnahá-yu ñáyiú ní sándáá iní-xi tñúhu-gá, dico nchaa-yu ní cáhá<sup>n</sup> váha-yu cuendá ñáyiú ní sándáá iní-xi tñúhu-gá. <sup>14</sup>Te vǎi tée, vǎi ñadihí ní sándáá iní-yu tñúhu-gá. <sup>15</sup>Te cuendá sá ní níhí-yu tñúhu sá quidé tǎtna cue tée ní xica cuu ndíhi Jèsús, núú xíǎ<sup>n</sup> ní queñuhú-yu nchaa ñáyiú cùhú ichi, te davá-yu ní quide túha-yu camá te davá-yu ní quide túha-yu yuu, núú núú nchaa xíǎ<sup>n</sup> tá sàcá<sup>n</sup>-yu cue ñáyiú cùhú-á<sup>n</sup> cuáhá<sup>n</sup>, te xíǎ<sup>n</sup> cáá-yu ndètú-yu, chi ní sani iní-yu sá òré yáha té Pèlú te cuèdicó cuándáhú-dë yáha ndodo ñaha-xi xíi-yu te ndúha-yu. <sup>16</sup>Te ní quixi ñáyiú ñúú yatni Jerusálén ndécǎ-yu ñáyiú cùhú, ndíhi ñáyiú yíhi ñaha espíritú cùndíhi yucu ñáváha ní quixi, te nchaa-yu ní ndúha.

**Ío ní quide úhú-güedé  
té Pèlú ndíhi té Juàá**

<sup>17-18</sup>Te dútú cúnú-gá ndíhi cue tée cùu saducéú cue tée cùndíhi-dé ní

cudéé<sup>n</sup>-güedé sá ío chítú-yu dàcuaha tñúhu Jèsús, núú xíǎ<sup>n</sup> ní tñii-güedé cue tée ní táuchíú<sup>n</sup> Jèsús dacuàha ñaha xíi-yu tñúhu-gá ní chihi ñaha-güedé vecaá. <sup>19</sup>Te xítí niú-á<sup>n</sup> ní quexío íi<sup>n</sup> espíritú xínú cuèchi núú Yá Ndiòxí ní nacaá<sup>n</sup>-xi yèhe vecaá ní quee-güedé, te ní xáha<sup>n</sup>-xi xii-güedé:

<sup>20</sup>—Quíhí<sup>n</sup>-ndó venúhu càhnu sá ío cúnúu te cúnaha-ndo xii ñáyiú nàcuáa cada-yu nanhí tǎhú-yu —càchí espíritú-á<sup>n</sup> xáha<sup>n</sup>-xi xii-güedé.

<sup>21</sup>Te sá dúcá<sup>n</sup> ní xáha<sup>n</sup>-xi núú sátá ní tundaá, te ní sáhá<sup>n</sup>-güedé venúhu càhnu sá ío cúnúu sá cútú-xí ñáyiú isràél ní dacuáhá ñaha-güedé xíi-yu.

Te dútú cúnú-gá ndíhi cue tée cùndíhi-dé ní nadatácá tñáhá-güedé ndíhi nchaa cue tée cùu sacuéhé núú ñáyiú isràél ndíhi cue tée cùchiu<sup>n</sup>, te ní tendaha-güedé sandàdú cuáhá<sup>n</sup> queñuhu-güedé cue tée yíhi vecaá ní cùu. <sup>22</sup>Te ní quexío-güedé yèhe vecaá, te ní xiní-güedé sá ní íi<sup>n</sup>-gá cue tée dàcuaha ñaha xii ñáyiú tñúhu Jèsús ñá túú-gǎ-güedé yíhí. Te cuánuhú-güedé <sup>23</sup>ní xítñúhu-güedé cue tée cùchiu<sup>n</sup>, te xáha<sup>n</sup>-güedé:

—Ní sáhá<sup>n</sup>-ndí ní sándéhé-ndí vecaá, te ndéé chóó-ni, te xíndecu-ni sandàdú cue tée xíndeé yèhe vecaá. Te ní nacaá<sup>n</sup>-ndí vecaá, te vǎ yǎo íi<sup>n</sup>-gá yíhí —càchí-güedé xáha<sup>n</sup>-güedé.

<sup>24</sup>Te sá dúcá<sup>n</sup> ní xáha<sup>n</sup>-güedé, te cuáhá<sup>n</sup> iní cue dútú cúnúu ndíhi tée tàxi tñuní cue tée xíndeé venúhu càhnu sá ío cúnúu, te ní xítñaha-güedé:

—¿Nása cada-xi vitna duha càa ní cuu ní xinu cue tée yíhi vecaá-i? —càchí-güedé xítñaha-güedé.

<sup>25</sup>Te ní quexío íi<sup>n</sup> tée ní xáha<sup>n</sup>-dë:

—Cundedóho-ndo na càchí tñúhu-í íi<sup>n</sup> tñúhu. Cue tée ní chihi-ndo vecaá ndécú-güedé venúhu càhnu sá ío cúnúu dacuaha-güedé ñáyiú —càchí-dé xáha<sup>n</sup>-dë.

<sup>26</sup> Te cue tée ndèe veñúhu ndihi tée tàxi tnuní ñáhá xii-güedé cuánguaca ñaha-güedé, te ñá túú ní quide úhú ñáhá-güedé, chi ní yùhú-güedé cuáha yúú ñáhá ñáyiú dii ñùú-xi-á<sup>n</sup>. <sup>27</sup> Te ní ndexìo ndihi ñaha-güedé núú cuè tée cùchiu<sup>n</sup>. Te dútú cúnùu-gá ní ngúíta-dé ténàà ñáhá-dé xii-güedé, te xàha<sup>n</sup>-dè:

<sup>28</sup> —Te náa ñá dífú ní cachí-ndí sá vǎ dácuaàha-gá-ndó ñáyiú tnúhu Jèsús te dàcuaha-ni-ndó-yu, te vitna nchaa ñáyiú ñuú Jerusàlén ní ñihí-yu tnúhu nàcuáa càhá<sup>n</sup>-ndó. ¿Te ná cuèndá duca<sup>n</sup> quide-ndo, te càchí-ndó sǎ nchúhú ndècuéchi-ndí ní sahni-ndí Jèsús-i? —cachí dútú cúnùu-gá xàha<sup>n</sup>-dè xii-güedé.

<sup>29</sup> Te té Pèlú ndihi dava-gá cue tée ní táuchíú<sup>n</sup> Jèsús dacuàha ñaha xii-yu ní xàha<sup>n</sup>-güedé xii cue tée cùchiu<sup>n</sup>:

—Nchúhú, Yá Ndiòxí cúnùu-gá sàndáá iní-ndí tnúhu càhá<sup>n</sup>-gá dàcúxí tnúhu càhá<sup>n</sup> ñáyiú. <sup>30</sup> Te nchòhó ní sata caa-ndo Jèsús núú cùrúxí te núú cùrúxí-á<sup>n</sup> nì xíhí-gá, dico ní dándótó ñaha Yá Ndiòxí xii-gá. Te Yá Ndiòxí ní sàndáá iní cue ñaní tnáhá-ndí ní xindecu ndéé sanaha. <sup>31</sup> Te Yá Ndiòxí ní xàha<sup>n</sup>-gǎ sá cùndècu Jesús xio cùha-gá cuèndá taxi tnùnì-gá te dacàcu nihnu-gá ñáyiú isràél núú ùhú núú ndàhú. Te duca<sup>n</sup>-ni dacàcu nihnu-gá nchaa ñáyiú na dàña nchaa sá cuèhé sá dúhá, te cada càhnu iní-gá nchaa yíca cuèchi-yu. <sup>32</sup> Te ní xiní-ndí nàcuáa ní quide-gá, núú xíá<sup>n</sup> cánì-ndí cuèndú núú nchàa ñáyiú, te Espiritú Yá Ndiòxí chindèe ñaha-xi xii-ndí càhá<sup>n</sup>-ndí tnúhu-gá. Te diu-ni Espiritú-gá ní sàñaha-gǎ xii nchaa ñáyiú ní sàndáá iní-xi tnúhu-gá —càchí té Pèlú ndihi dava-gá-güedé xàha<sup>n</sup>-güedé xii cue tée cùchiu<sup>n</sup>.

<sup>33</sup> Te sátá dúcá<sup>n</sup> nǐ xàha<sup>n</sup>-güedé xii cue tée cùchiu<sup>n</sup>, te ní cudéé<sup>n</sup>-güedé, te ní ndatnúhu-güedé sá càhni ñaha-güedé. <sup>34</sup> Te ñ<sup>n</sup> tée cùu farisèú tnàha-dé cúú-dé

chiu<sup>n</sup>, te nàni-dé Gamaliél, te cùu-dé mèstrú dácuaàha-dé ñáyiú nàcuáa ní chídó tnùnì ndíi Moisés, te ío yinúhu cahá<sup>n</sup> ndihi ñáhá-yu xii-dé. Te ní ngúnutnì-dé, te ní xàha<sup>n</sup>-dè sá ná quèe tnaa té Pèlú ndihi dava-gá-güedé quehé. <sup>35</sup> Te ní xàha<sup>n</sup>-dè xii cue tée cùchiu<sup>n</sup>:

—Nchòhó cue tée isràél, xinì ñuhu-xi sá cánì vǎha iní-ndó nàsa cada-ndo ndihi cue tée-á<sup>n</sup>. <sup>36</sup> Chi ní nacana ní xindecu ñ<sup>n</sup> tée ní xínani Tèudás, te ní cachí-dé sá cúnùu-dé, te ní cundihí-dé dàtná cùmí cièndú cue tée, te ñá ní cuiní-güedé cuu ñ<sup>n</sup>nuu-güedé ndihi cue tée cùchiu<sup>n</sup>. Te ní sahni ñaha cuè tée cùchiu<sup>n</sup>-á<sup>n</sup> xii tée Tèudás, te ní ndihi cue tée ní xica cuu ndihi-dé ní xité nuu-güedé, te ñá túú-gǎ ní quide-güedé nàcuáa ní sani iní-güedé cada-güedé. <sup>37</sup> Te sátá nì xíhí tée-á<sup>n</sup>, te ní tnahá nduu nùcódó tnùnì ñáyiú. Te dàvǎ-á<sup>n</sup> nǐ xindecu ñ<sup>n</sup> tée distritú Galileá ní xínani-dè Jüdás. Te titnì-güedé ní chitnahá ñáhá-güedé xii-dé. Te tnàhá-dé ní sahni ñaha tucu cue tée cùchiu<sup>n</sup>, te nchaa cue tée ní xica cuu ndihi-dé ní xité nuu-güedé. <sup>38</sup> Te na càchí tnúhu-í sá dàñá-ndó cuè tée-á<sup>n</sup>, te nì ñà túú nǎgá tnúhu cùñaha-ndo xii-güedé, chi núú chiú<sup>n</sup> mee-güedé quidè-güedé te cuíta-güedé, <sup>39</sup> dico núú chiú<sup>n</sup> Yá Ndiòxí quidè-güedé, te vǎ ndínihnu chiú<sup>n</sup> quide-güedé. Te núú quide-güedé chiú<sup>n</sup> Yá Ndiòxí, te vǎ nàà-ndó ndihi-güedé, chi Yá Ndiòxí nàà ndihi-ndo sǎ dúcá<sup>n</sup> xíquide-ndo —càchí té Gamaliél xàha<sup>n</sup>-dè xii cue tée cùchiu<sup>n</sup>.

<sup>40</sup> Te nchaa-güedé ní càhá<sup>n</sup> sá tnúhu ndáá càhá<sup>n</sup>-dé. Te dàtnùnì ní nacana tucu-güedé té Pèlú ndihi dava-gá-güedé te ní caniha-güedé, te ní càhá<sup>n</sup> ñihí-güedé, te xàha<sup>n</sup>-güedé sá vǎ càhá<sup>n</sup>-gá-güedé tnúhu Jèsús, te dàtnùnì ní dàñá ñaha-güedé cuánuhú-güedé. <sup>41</sup> Te ío ní cudíí iní-güedé, chi mee Yá Ndiòxí ní cachí-gá sá dúcá<sup>n</sup> ndòho-güedé dacuàha-güedé ñáyiú

tnúhu Jèsús. <sup>42</sup>Te ìí<sup>n</sup> nduu ìí<sup>n</sup> nduu ní dácúhá-güedé ñáyiú xítí veñúhu càhnu sá ío cùnuu ndíhi nchaa vehé-yu. Te ní xáha<sup>n</sup>-güedé xí-yu sá Jèsús cúú-gã Cristú Yáá ní quixi ñuyúú-a.

**Ní ndúcú-güedé úsá cue tée cundecu dacãhñu sá cáxí ñáyiú**

**6** Te diu-ni dàvá-á<sup>n</sup> ní sándáá iní vài ñáyiú tnúhu Jèsús. Te cue ñáyiú gríégú ní cáhá<sup>n</sup> cuèhé-yu cuèndá ñáyiú isràél, sá ñáyiú ðíhí ñáyiú quèé ñáyiú càhá<sup>n</sup> tnúhu gríégú ñá túú tnàhá sá cáxí-yu, chi ñá túú sãñaha ìí<sup>n</sup>nuu-güedé. <sup>2</sup>Te cue tée úxúú ní táúchíú<sup>n</sup> Jèsús dacuàha ñaha xí-yu tnúhu-gá, cue tée-ã<sup>n</sup> ní cana-güedé nchaa ñáyiú sándáá iní tnúhu Jèsús. Te ní xáha<sup>n</sup>-güedé xí-yu:

—Nchúhú chi vá cúú dàcãhñu-ndí sá cáxí-yu, chi mee-ni tnúhu Yá Ndiòxí càhá<sup>n</sup>-ndí. <sup>3</sup>Te nchòhó cue tée ndècu ndíhi-ndí ichi Xíttohó Jesucristú cáhá<sup>n</sup> ndíhi-ndo úsá cue tée xíndecu iha, cue tée càhá<sup>n</sup> ndíhi ñàhá-yu mee-ni tnúhu yíñúhu, cue tée ndècu ndíhi Espíritú Yá Ndiòxí, mee-ni cuè tée cùnuní váha iní-xi. Te cue tée-á<sup>n</sup> cuàha-ndí-güedé chiú<sup>n</sup> cada-güedé dacãhñu-güedé sá cáxí-yu. <sup>4</sup>Te nchúhú mee-ni Yá Ndiòxí cáhá<sup>n</sup> ndíhi-ndí, te mee-ni tnúhu-gá dacuàha-ndí-yu —càchí-güedé xãha<sup>n</sup>-güedé xí-yu.

<sup>5</sup>Te nchaá-yu ní tñí-yu tnúhu ní cáhá<sup>n</sup>-güedé, núu ní ndúcú-yu cue tée cada chiú<sup>n</sup>-á<sup>n</sup>. Te ìí<sup>n</sup>-dé nání-dé Tèvá, te ío váha sándáá iní-dé Yá Ndiòxí, te ndècu ndíhi-dé Espíritú-gá. Te duha ní xínani dàva-gá-güedé: té Lipé, té Pròcoró, té Nicànór, té Tìmon, té Pàrmenás, té Lãxí tée ñuú Antiòquiá tée ní sándáá iní-xi sá dacuàha ñáyiú isràél te vitna ní sándáá iní-dé tnúhu Jèsús. <sup>6</sup>Te úsá cue tée-á<sup>n</sup> ní sáhá<sup>n</sup>-güedé núu cuè tée úxúú ní táúchíú<sup>n</sup> Jèsús dacuàha ñaha xí-yu tnúhu-gá, te cue tée úxúú-á<sup>n</sup> ní cáhá<sup>n</sup> ndíhi-güedé Yá Ndiòxí, te ní sacá<sup>n</sup>

ndodo-güedé ndaha-güedé díquí cuè tée úsá-á<sup>n</sup>.

<sup>7</sup>Te ñáyiú ní sándáá iní tnúhu Jèsús cuáhá<sup>n</sup>-yu titní xichi càhá<sup>n</sup>-yu tnúhu-gá. Te vài-gá ñáyiú ta sándáá iní-yu tnúhu-gá cuáhá<sup>n</sup>, te ní xíndecú-yu ndíhi dava-gá ñáyiú dácuaaha tnúhu-gá ñuú Jerusálén. Te titní dútú ní sándáá iní-güedé tnúhu-gá.

**Ní tñii-güedé té Tèvá**

<sup>8</sup>Te té Tèvá ní quide-dé titní núu sã vã yõ tnàhí ndàcu cada, te ní cuñúhu vihí-yu sá dúcá<sup>n</sup> ní quide-dé, te duca<sup>n</sup> ní quide-dé chi ndècu ndíhi-dé Yá Ndiòxí chíndèe ñaha-gá. <sup>9</sup>Te ní xíndecu cue tée ní xóo cunu cuechi núu ìí<sup>n</sup> tée tàxi tñuní, te tée tàxi tñuní-á<sup>n</sup> ñã ní xõ daña tnàhí-dé quee-güedé núu chíú<sup>n</sup>-dë, te ní xinu-ná-güedé. Te sátá xã<sup>n</sup>, te ní dácáá-güedé veñúhu-güedé, te veñúhu-á<sup>n</sup> sàhá<sup>n</sup> ñáyiú ñuú Cìrené, ñáyiú ñuú Alejandriá, ñáyiú ñuú Cìliciá, ndíhi ñáyiú distritú Àsiá. Te nchaa ñáyiú-á<sup>n</sup> ní nàá ndíhí-yu té Tèvá. <sup>10</sup>Te ñá ní ñíhí-yu tnúhu cáhá<sup>n</sup>-yu, chi ío váha ní sáá díquí-dë nàcuáa ní xáha<sup>n</sup>-dë xí-yu, chi Espíritú Yá Ndiòxí ní chindee ñaha-xi xii-dé. <sup>11</sup>Te ní cháhu-yu cue tée ní dácúandèhnde tnúhu ní cáhá<sup>n</sup> té Tèvá núu-yu. Te ní xáha<sup>n</sup>-güedé sá càhá<sup>n</sup> cuèhé-dé cuèndá ndíi Moisés ndíhi cuèndá Yá Ndiòxí. <sup>12</sup>Te cuèndá sá dúcá<sup>n</sup> ní dácúandèhnde-güedé núu ní sándáá iní-yu, te ní cudéé<sup>n</sup>-yu núu tã Tèvá. Te ní cudéé<sup>n</sup> cue tée cùu sacuéhé, te tnàhá cue tée dácuaaha ñaha xí-yu nchaa tnúhu ní chídó tñuní ndíi Moisés ní cudéé<sup>n</sup>-güedé. Te ní sáhá<sup>n</sup>-güedé ní tñii-güedé té Tèvá ndécá ñaha-güedé cuáhá<sup>n</sup> núu quídé cuè tée cùchiu<sup>n</sup> jundá, ndíhi cue tée cùu sacuéhé. <sup>13</sup>Te ndécá-yu cue tée dácúandehnde cuáhá<sup>n</sup> núu quídé-güedé jundá, te ní quesaha-ni tìcu-güedé càhá<sup>n</sup> cuèhé-güedé, te xãha<sup>n</sup>-güedé:

—Tée-a mee-ni càhá<sup>n</sup> cuèhé-dé cuèndá veñúhu sá ïo cùnuu, veñúhu ní cuu íí, te càhá<sup>n</sup> cuèhé-dé cuèndá nchaa sá ní chídó tnúni ndíi Moisés. <sup>14</sup>Te ní tecú dóho-ndí càchí-dé sá Jèsús tée ñúú Nazàrét dangòyo-dé veñúhu càhnu sá ïo cùnuu te vá dàñá-gà-dé cada-ndí nàcuáa ní cachí ndíi Moisés cada-ndí — càchí-güedé xáha<sup>n</sup>-güedé.

<sup>15</sup>Te nchaa cue tée ndècu jundá ní ndacoto váha-güedé núú tē Těvá. Te ní dáyèhé-xi núú-dě dàtná quíde-xí núú es-píritú xínú cuèchi núú Yá Ndiöxí.

### Té Těvá xáha<sup>n</sup>-dě sá ñà túú cuèchi-dé

**7** Te ní xáha<sup>n</sup> dütú cùnùu-gá xii-dé:  
—¿Ndáá tnúhu càhá<sup>n</sup>-güedé cuèndá-n-á? —càchí-dé xáha<sup>n</sup>-dě.

<sup>2</sup>Te té Těvá ní xáha<sup>n</sup>-dě xii-güedé:

—Nchòhó cue ñaní tnáhà-í ndíhi nchòhó cue tée cùu sacuéhé, cundedóho-ndo ñ<sup>n</sup> tnúhu na càhá<sup>n</sup>-í-a. Yá Ndiöxí ïo cùnuu-gá, te ní cáhá<sup>n</sup> ndíhi-gá ndíi Àbrahám nàció<sup>n</sup> Mesopotamiá cútnáhá vátá quíhí<sup>n</sup>-gá ndíi cundecu ndíi ñúú Hàrán. <sup>3</sup>Te ní xáha<sup>n</sup>-gá xii ndíi: “Daña-n nchàa ñaní tnáhà-n, te daña-n ñúhu-n, te quíhí<sup>n</sup>-n ñ<sup>n</sup> xichi núú dánèhé ñáhà-í cundecu-n”, duha ní xáha<sup>n</sup> Yá Ndiöxí xii ndíi Àbrahám. <sup>4</sup>Te sátá dúcá<sup>n</sup> ní xáha<sup>n</sup> Yá Ndiöxí xii ndíi Àbrahám, te ní ndee ndíi ñúú Càldeá, te cuáhá<sup>n</sup> ndíi cundecu ndíi ñúú Hàrán. Te sátá ní xíhí tātá ndíi, te ní xáha<sup>n</sup> Yá Ndiöxí quixi ndíi cundecu ndíi núú ndécú-ó vitna. <sup>5</sup>Te Yá Ndiöxí ñá túú ní sãnhaha-gã ni lùha ñúhu cuu cuendá ndíi núú ní xíndecu ndíi. Te ní xáha<sup>n</sup> ndáá Yá Ndiöxí xii ndíi sá cuãnhaha-gã ñúhu cuu cuendá ndíi, te na cùú ndíi, te ndóo ndíhi nchaa ñaní tnáhá ndíi cacu túu ndéé cuèé-gá. Te duca<sup>n</sup> ní xáha<sup>n</sup>-gã cuèi vátá cündècu-gá ni ñ<sup>n</sup> déhe ndíi. <sup>6</sup>Te ní xáha<sup>n</sup> tùcu Yá Ndiöxí xii ndíi Àbrahám sá díú-ní ñàní tnáhá ndíi quíhí<sup>n</sup>-yu núú

xíca cündecú-yu cúmí cièndú cuíá, te vá dàñá-yu queé-yu núú chíú<sup>n</sup>-yu, te ïo dandòho ñaha-güedé núú cündècu-yu. Duha ní xáha<sup>n</sup> Yá Ndiöxí xii ndíi, te ndáá duca<sup>n</sup> ní cuu. <sup>7</sup>Te ní xáha<sup>n</sup> tùcu Yá Ndiöxí xii ndíi Àbrahám: “Yúhu dandòho-í nchaa ñáyíu na dandòho ñaha xii cue ñaní tnáhà-n. Te dàvá-á<sup>n</sup> te ndee cue ñaní tnáhà-n núú cündècu-yu, te quixí-yu chínuhu ñàhà-yu xii-í iha”, duha ní xáha<sup>n</sup> Yá Ndiöxí xii ndíi Àbrahám, te ndáá duca<sup>n</sup> ní cuu. <sup>8</sup>Te Yá Ndiöxí ní quide ndáá-gá ndíhi ndíi Àbrahám, te ní xáha<sup>n</sup>-gá xii ndíi sá cuãha-güedé sèñá ñíi nchaa landú tée cuendá cumáhà-yu nàcuáa ndùu sá ní quide ndáá-gá ndíhi ndíi Àbrahám. Núu xíá<sup>n</sup> núú ùnà nduu sá ní cacu té Isàác déhe ndíi Àbrahám, te ní sáha ndíi sèñá ñíi-dé. Te ñíu-ni duca<sup>n</sup> ní quide tucu té Isàác déhe-dé té Jàcób, te ñíu-ni duca<sup>n</sup> ní quide té Jàcób, chi úxúú déhe-dé ní xíndecu, te nchaa-güedé duca<sup>n</sup> ní quide-dé. Te ndí ùxúú cue tée-á<sup>n</sup> ní cuu-güedé ñaní tnáhà-ó.

<sup>9</sup>Te ñ<sup>n</sup> déhe té Jàcób ní xínani-dě Chèé. Te ñá ní cùu váha iní cue ñaní-dé núú-dě, núu ní díco ñaha-güedé ní quehe<sup>n</sup> ñaha cuè tée cuáhá<sup>n</sup> nàció<sup>n</sup> Ègiptú, te Yá Ndiöxí ñá ní dàna ñaha-gá xii-dé cuíta nihnu-dé. <sup>10</sup>Te ní chindee ñaha-gá xii-dé ní cacu-dé cútnáhá ní ndoho vihi-dé. Te tée yìndaha Egiptú ïo ní cudíí iní-dé té Chèé, te ní cutnùní iní-dé sá ïo váha túha té Chèé, te duca<sup>n</sup> ní cutnùní iní-dé, chi Yá Ndiöxí ní chindee ñaha-gá xii té Chèé. Te ní xáha<sup>n</sup> tée yìndaha Egiptú xii té Chèé sá díú tē Chèé coo-dé gobièrnú Ègiptú, te taxi tnùní-dé nchaa ñáyíu xínu cuechi núú tée yìndaha Egiptú-á<sup>n</sup>.

<sup>11</sup>Te ní quíhu tnamá ñíhí nàció<sup>n</sup> Ègiptú ndíhi nàció<sup>n</sup> Cànaá, te ïo ní ndohó-yu. Te nchaa ñaní tnáhà-ó ní xíndecu ndéé sanaha ñá ní xòo ñíhí-gã-yu sá cáxí-yu. <sup>12</sup>Te ní ñíhí tē

Jàcób tnúhu sá ío trìu Ègiptú, núu ní tendaha-dé cue déhe-dé ní sáhá<sup>n</sup>-güedé ní sânguaa<sup>n</sup>-güedé trìu-á<sup>n</sup>, te dàvá-á<sup>n</sup> nĩ sáhá<sup>n</sup> cue ñaní tnáhá-ó xito díhna nuu nació<sup>n</sup> Ègiptú. <sup>13</sup> Te xito cùu uú cuáhá<sup>n</sup>-güedé, te ní xáha<sup>n</sup> tẽ Chèé sá ñaní-dé cùu-güedé. Te tée yìndaha Egiptú ní cutnùní iní-dé sá díú-ní ñaní té Chèé cùu-güedé. <sup>14-15</sup> Te ní cana té Chèé tãtã-dé té Jàcób ndihi nchaa ñaní tnáhá-dé. Te cùu-xi datná únidico sáhú<sup>n</sup>-yu ndèca té Jàcób cuáhá<sup>n</sup> nació<sup>n</sup> Ègiptú núu ndécú tẽ Chèé, te xíá<sup>n</sup> nĩ quexìo-yu ní ngóo-yu. Te yàcá<sup>n</sup> ní xíhí té Jàcób ndihi nchaa déhe-dé cue ñaní tnáhá-ó. <sup>16</sup> Te sátã nĩ cuu titní cuíá, te ní natava-güedé yiqui ndíi Jàcób ndihi nchaa déhe ndíi nchido-güedé cuáhá<sup>n</sup> ñúu Sìquém. Te ndíi Àbrahám sa ní cuu titní-gá cuíá sã nĩ nacuaa<sup>n</sup> ndíi ñuhu núu cuè déhe ndíi Hãmór. Te xíá<sup>n</sup> nchìi yaú ní nachindúxi-güedé yiqui-á<sup>n</sup>.

<sup>17</sup> Te cùtnàhá vátã nátava-gá-güedé yiqui cue ndíi, te sa ta tnáhá yatni cada Yã Ndiòxi nàcuáa ní xáha<sup>n</sup>-gã xii ndíi Àbrahám cada-gá sá cùu-xí ñãyiù isràél ndécú Ègiptú, te ta cãyã víhì-yu cuáhá<sup>n</sup>. <sup>18</sup> Te dàvá-á<sup>n</sup> chi ingá tée yìndaha nació<sup>n</sup> Ègiptú, te ñã túú-gã ní xiní-dé nása ní xóo cada ndíi Chèé. <sup>19</sup> Te tée yìndaha Egiptú ñã ní quide ndáá-dé, chi ío ní dándóhó-dé ñaní tnáhá-ó ní xíndecu dàvá-á<sup>n</sup>. Te ní táúchíú<sup>n</sup>-dẽ sá xócuñí-yu dándóo-yu déhe yiqui<sup>n</sup> cuendá ndihi-güexi cuú. <sup>20</sup> Te dàvá-á<sup>n</sup> nĩ cacu té Moisés, te ío ní cudíí iní ñáhã Yã Ndiòxi xii-dé. Te ní xíndecu ndihi ñaha ñaná-dé ndihi tãtã-dé úní-ni yóo. <sup>21</sup> Te ndèca ñahã-yu cuáhá<sup>n</sup> ingá xichi, te yàcá<sup>n</sup> ní dándóo ñahã-yu xii-dé, te ní naníhí ñahã dẽhe yoco tée yìndaha Egiptú, te ní xito-xi-dé datná xító-xí ñ<sup>n</sup> déhe mee-xi nĩ xito-xi-dé ndéé ní sahnu-dé. <sup>22</sup> Te ní cutúha-dé nchaa sá xiní cue tée ègiptú, te ío váha ní sáá

díquí-dẽ tnúhu cáhá<sup>n</sup>-dé ndihi nchaa sá cádá-dé.

<sup>23</sup> Te cùtnàhá ndécú-dé údico cuíá-dé, te ní cachí-dé sá quèh<sup>n</sup>-dé cáhá<sup>n</sup> ndihi-dé cue ñaní tnáhá-dé ñãyiù isràél. <sup>24</sup> Te ní xiní-dé ní caniha ñ<sup>n</sup> tée ègiptú xii ñ<sup>n</sup> tée isràél, te ñã ní cùndee iní-dé cundehe-dé núu ní sáhá<sup>n</sup>-dé ní chindee-dé tée isràél, te ní sahani-dé tée ègiptú, <sup>25</sup> chi ní cachí Yã Ndiòxi sá díú-dé dacácu-dé ñaní tnáhá-dé ñãyiù isràél núu cuè tée ègiptú. Te ní sani iní-dé sá cùtnùní iní-yu nàcuáa ní xáha<sup>n</sup> Yã Ndiòxi xii-dé, dico ñã túú ní cùtnuní iní-yu. <sup>26</sup> Te nduu tnéé ní xiní-dé nàá úú cue tée isràél, te ñã túú ní tnáhã iní-dé nàá-güedé núu ní xáha<sup>n</sup>-dẽ xii-güedé: “¿Nã cuendã duca<sup>n</sup> xínãã-ndó? ¿Nãã ñã díú ndimee-ndo núu duca<sup>n</sup> xínãã-ndó?” Duha ní xáha<sup>n</sup> tẽ Moisés xii-güedé. <sup>27</sup> Te tée ndécuechi ní sáhá<sup>n</sup>-dé ní chindaha ñihnu-dé té Moisés ñ<sup>n</sup> xio, te ní xáha<sup>n</sup>-dẽ: “¿Nã cùu yòhó núu véxi-n tãxi tnuní ñáhã-n?” <sup>28</sup> Te tnáhã-ni tucu yúhú cahni-n datná ní sahani-n tée ègiptú icu càha<sup>n</sup>-n á”, duha ní xáha<sup>n</sup>-dẽ xii té Moisés. <sup>29</sup> Te sá dúcã<sup>n</sup> nĩ cáhá<sup>n</sup> tée isràél núu ní yúhú té Moisés ní xinu-dé cuáhã<sup>n</sup>-dé ní sáá-dé nació<sup>n</sup> Mèdián. Yàcá<sup>n</sup> ní ngóo-dé, te yàcã<sup>n</sup> ní tnándaha-dé, te ní cacu úú déhe tée-dé.

<sup>30</sup> Te sátã nĩ xínu údico cuíá, te ní sáhã<sup>n</sup> té Moisés ñ<sup>n</sup> xio yucu Sinãí. Te yàcã<sup>n</sup> ní xiní-dé ñ<sup>n</sup> tnutãú nchicú<sup>n</sup> ñuhú, te xití itã ñuhú-á<sup>n</sup> nĩ xiní-dé yíhí ñ<sup>n</sup> espíritú xínú cuèchi núu Yã Ndiòxi. <sup>31</sup> Te òré ní xiní-dé sá yíhí-xí xití itã ñuhú-á<sup>n</sup>, te ní cuñíhu víhì-dé sã nĩ xiní-dé espíritú-á<sup>n</sup> xití itã ñuhú-á<sup>n</sup>, te ní sãndehé-gã-dé, te ní xíndéhé vãha-dé. Te ní tecú dóho-dé ní cáhá<sup>n</sup> Yã Ndiòxi, te xáha<sup>n</sup>-gã xii-dé: <sup>32</sup> “Yúhú cùu-í Ndiòxi ní cáhá<sup>n</sup> ndihi cue ñaní tnáhã-n ndéé sanaha, ndíi Àbrahám ndihi ndíi Isãac ndihi ndíi Jàcób, ndihi dava-gã cue ñaní tnáhã-n. Nchaa cue ndíi-á<sup>n</sup> nĩ xóo cáhá<sup>n</sup> ndihi-í.” Duha ní xáha<sup>n</sup>-gã

xii té Moisés. Te ní quidi ñaha-xi xii té Moisés sá ñi yühú-dé, te ñá ní cùyii-gá-dé cundehe-dé tnutàú nchìcú<sup>n</sup> ñuhú-á<sup>n</sup>. <sup>33</sup>Te Yá Ndiöxí ní xáha<sup>n</sup>-gã xii-dé: “Queñuhu chàu-n, chi núú ñuhú ní cuu íí nútñi-n. <sup>34</sup>Te yühú ndèhè-í sá ïo ndòho nchaa ñáyiú cùu cuendá-í, ñáyiú ndècu nació<sup>n</sup> Ègiptú. Te ní tecú dóho-í sá ïo ndàhú xícáhá<sup>n</sup>-yu, núu xíá<sup>n</sup> véxi-í càchí tñúhu-í sá ñuhú-n nació<sup>n</sup> Ègiptú cuendá ndèñuhú-n-yu yàcá<sup>n</sup>.” Duha ní xáha<sup>n</sup> Yá Ndiöxí xii té Moisés.

<sup>35</sup>Te ñá ní sàndáá iní-yu té Moisés ndéé díhna, chi ní xáhá<sup>n</sup>-yu: “¿Ná cuendá véxi-n tàxi tñuní ñáhá-n xii-ndí?” Duha ní xáhá<sup>n</sup>-yu xii té Moisés. Te ñi-ni té Moisés ní tendaha ñaha Yá Ndiöxí ní sáhá<sup>n</sup>-dé dacäcu-dé ñáyiú isràèl nació<sup>n</sup> Ègiptú cuèi ñá ní sàndáá iní ñáhá-yu xii-dé. Dico ní taxi tñuní-dé-yu, chi duca<sup>n</sup> ní xáha<sup>n</sup>-gã òrè ní xiní-dé espíritú xínú cuèchi núú-gã xití tnutàú nchìcú<sup>n</sup> ñuhú. <sup>36</sup>Te té Moisés ní ngüíta-dé ní quide-dé sá vã yòo tñahí ndàcu cada, te ní cuñúhu vñí-yu sá dúcá<sup>n</sup> ní quide-dé, te duca<sup>n</sup> ní quide-dé Ègiptú ndíhi Làmar Tícuèhé. Te ní ngódó núú-dé núú-yu ní queé-yu Ègiptú cuáhá<sup>n</sup>-yu ì<sup>n</sup> ichi xití yucu núú vã yòo tñahí ndècu, te ní xñi-yu údico cuíá xití yucu-á<sup>n</sup>, te xíá<sup>n</sup> ní xóo cada-dé sá vã yòo tñahí ndàcu cada. <sup>37</sup>Te ñi-ni té Moisés ní xáha<sup>n</sup>-dè xii cue ñaní tnáhá-dè dàvá-á<sup>n</sup>: “Yá Ndiöxí cada-gá te coo ì<sup>n</sup> ñaní tnáhá-ndó ndéé cuèé-gá, te téé-á<sup>n</sup> cáhá<sup>n</sup>-dé tñúhu-gá núú-ndó dàtná cuiní-ndó ní cachí-gá quidé yühú, te ïo xini ñuhu-xi cundedòho-ndo tñúhu cáhá<sup>n</sup>-dé”, duha ní xáha<sup>n</sup> tè Moisés xii-yu dàvá-á<sup>n</sup>. <sup>38</sup>Te ñi-ni té Moisés ní xíndecu ndíhi-dé ñáyiú isràèl xití yucu, te ní sáá-dé yucu Sinàí, te xíá<sup>n</sup> ní quixi ì<sup>n</sup> espíritú xínú cuèchi núú Yá Ndiöxí ní cáhá<sup>n</sup> ndíhi ñaha-xi xii-dé, te yàcá<sup>n</sup> ní dácuahá ñaha-xi tñúhu-gá, te ñi-ni tñúhu-á<sup>n</sup> ní ndóo dàcuaha-o.

<sup>39</sup>Te cue ñaní tnáhá-ó ñi xíndecu ndéé sanaha ñá ní sàndáá iní-yu té Moisés, te ñá ní ndéé iní ñáhá-yu xii-dé, chi ní cuiní-yu nuhú tucú-yu ñuú Ègiptú cundecú-yu. <sup>40</sup>Te òrè ndécú tè Moisés yucu ní xáhá<sup>n</sup>-yu xii ñaní-dé tè Àron: “Cadúha-n ì<sup>n</sup> úú ndiöxí díhú<sup>n</sup> cuáá<sup>n</sup> codonùu núú-ó cùhu<sup>n</sup>-o ichi, chi ñá túú cùtñuní iní-ó ndéé ichi cuáhá<sup>n</sup> té Moisés, téé yòdo nuu núú-ó ndùu ní quee-o Ègiptú”, duha ní xíi-yu té Àron. <sup>41</sup>Te dàvá-á<sup>n</sup> ní cadúha-güedé ì<sup>n</sup> chèhlu mee-ni díhú<sup>n</sup> cuáá<sup>n</sup>, te ní sahani-güedé ì<sup>n</sup> úú quiti nchito ní quide càhnu-güedé chèhlu-á<sup>n</sup>. Te ïo ní cudíí iní-yu quiti-á<sup>n</sup>, chi ní cachí-yu sá díú-ní ndiöxí cúú-dí. <sup>42</sup>Te sá dúcá<sup>n</sup> ní quide-yu, xíá<sup>n</sup> ní dàñá ñaha Yá Ndiöxí xii-yu. Te ní dàñá-gã ní xóo cada càhnu-yu nchícanhii, ndíhi yóó, ndíhi nchaa chódíní. Te duha ní chídó tñuní ì<sup>n</sup> téé ní xóo cáhá<sup>n</sup> tñúhu Yá Ndiöxí ndéé sanaha nàcuáa ní xáha<sup>n</sup>-gã xii ñáyiú dàvá-á<sup>n</sup>:

Nchòhò ñáyiú isràèl, ní cuu údico cuíá yñí-ndó yùcu,

te ní sahani-ndo quiti-ndo ní quide càhnu ñaha-ndo xii-í cáhá<sup>n</sup>-ndó, dico ñáhá chi ní sahani-ndo-güedé ní quide càhnu-ndo sá ní cadúha mee-ndo.

<sup>43</sup>Te ní cadúha-ndo ì<sup>n</sup> veñúhu líhli, te ní sanutñi-ndo Mòlóc sá càchí-ndó cùu ndiöxí-ndó xica nchido-ndo xití yucu,

te ní cadúha-ndo ì<sup>n</sup> chódíní, te quiti-á<sup>n</sup> càchí-ndó sá cúú-dí ndiöxí Rènfan, te ndi ndùú sá ní cadúha-ndo-á<sup>n</sup> ní quide càhnu-ndo.

Te cuendá sá dúcá<sup>n</sup> ní quide-ndo te yühú queñuhu ñaha-í xii-ndo quíhí<sup>n</sup>-ndó cùndecu-ndo ñngá xio nació<sup>n</sup> Babilonia.

Duha ní xáha<sup>n</sup> Yá Ndiöxí xii-yu, te duca<sup>n</sup> ní chídó tñuní téé ní xóo cáhá<sup>n</sup> tñúhu-gá.

<sup>44</sup>Te xití yucu-á<sup>n</sup> ní dácáá-güedé ì<sup>n</sup> veñúhu vehe dóó. Te vehe-á<sup>n</sup> ní cuu-xi ì<sup>n</sup> sá cùtñuní iní-yu sá Yá Ndiöxí ndécú

ndihi ñaha-gá xii-yu. Te vehe-á<sup>n</sup> ní dácáá-güedě nàcuáa ní xáha<sup>n</sup> Yá Ndiöxí xii té Moisés, chi ní dánèhé ñáhá-gă xii-dé nàcuáa dacàa-güedé. <sup>45</sup>Te sátá ní xíhí nchaa cue téé-á<sup>n</sup>, te ní ndóo ndihi nchaa déhe-güedé veñúhu-á<sup>n</sup>. Te ní xido tucu-güedé veñúhu-güedé cuáhá<sup>n</sup>-güedé, te cuáhá<sup>n</sup> ndihi-güedé té Jòsué núú cündécú-yu. Te sátá ní quexió-yu, te ní dácúnũ-yu ñáyiu dii ñúú-xi-á<sup>n</sup> chi mee Yá Ndiöxí ní chindee ñaha-gá xii-yu. Te sátá ní ndihi nchaa ñáyiu ní xica nchido veñúhu dóó-á<sup>n</sup> ní xíhí, te ní ndóo ndihi dava-gá-yu. Te duca<sup>n</sup>-ni ndècu-xi ní cacu té Dàvií, téé ní xíndaha ñaha xii-yu. <sup>46</sup>Te Yá Ndiöxí ní cudíí víhí ínì-gá té Dàvií. Te ní xicá<sup>n</sup> tnúhú-dě núú-gă ñuu cuu dacàa-dé veñúhu cuu cuèndá-gá, chi ì<sup>n</sup>-ni Yá Ndiöxí ní xóo cada càhnu té Dàvií ndihi té Jácób, ñaní tnáhá-ó ní xíndecu ndéé sanaha víhi-gá. <sup>47</sup>Te Yá Ndiöxí ñá ní dàña-gá dacàa té Dàvií veñúhu-gá dico déhe-dé té Salòmón, chi ní dáñá-gă ní dácáá-dě veñúhu cuu cuèndá-gá <sup>48</sup>cuèi ñá túú sàcúndecu-gá veñúhu dàcaa cue téé ñuyúú-a, chi ndèni xía<sup>n</sup> ndécú-gă chi espíritú cúú-gă. Te duha ní chídó tnùnì téé ní xóo cáhá<sup>n</sup> tnúhu Yá Ndiöxí ndéé sanaha nàcuáa ní cáhá<sup>n</sup>-gá:

<sup>49</sup>Yúhú táxí tnùnì-í andiu ndihi ñuyúú, te xíá<sup>n</sup> ñuu nchòhó vá ndácú-ndó chihì ñaha-ndo xití veñúhu dàtná quidě-yu sá càchí-yu cùu ndiöxí-yu ní cadúha-yu.

Te ñá túú xini ñuhu-í núú ndétàtù-í, <sup>50</sup>chi yúhú ní cadúha-í nchaa sá ìo ñuyúú-a.

Duha ní cáhá<sup>n</sup> Yá Ndiöxí, te ñuu-ni duca<sup>n</sup> ní chídó tnùnì téé ní xóo cáhá<sup>n</sup> tnúhu-gá —duha ndùu nchaa tnúhu ní xáha<sup>n</sup> té Těvá xii-güedé.

<sup>51</sup>Te ní xáha<sup>n</sup> tùcu-dé:

—Nchòhó, ìo sàá ínì-ndó chi quide-ndo datná quidé ñáyiu ñá túú cùu ñáyiu isràèl chi ñá túú tédóho-ndo

tnúhu càhá<sup>n</sup> Yá Ndiöxí, chi ñá cuìní-ndó quíndáá ínì-ndó tnúhu-gá, mee-ni cùu úhú ínì-ndó Espíritú-gá dàtná ní xóo cada cue ñaní tnáhá-ndó ní xíndecu ndéé sanaha. <sup>52</sup>Chi cue téé-á<sup>n</sup> ìo ní xóo dandòho-güedé nchaa cue téé ní xóo cáhá<sup>n</sup> tnúhu Yá Ndiöxí ndéé sanaha. Te ní sahani-güedé nchaa cue téé ní cáhá<sup>n</sup> sá quixí Cristú ñuyúú-a, te Yaa-á<sup>n</sup> ñá túú cuèchi-gá. Te ñuu-ni duca<sup>n</sup> ní quide-ndo Cristú cùtnáhá ní quixi-gá ñuyúú-a, chi ní sáha cuèndá-ndó-gă núú cuè téé ní cuu úhú ínì ñáhá xii-gá ní sahani ñaha-güedé. <sup>53</sup>Te ndècu ndihi-ndo tnúhu ní chídó tnùnì ndíi Moisés nàcuáa ní xáha<sup>n</sup> espíritú xínú cuèchi núú Yá Ndiöxí xii ndíi, te ni duca<sup>n</sup> ñá túú sàndáá ínì-ndó tnúhu-á<sup>n</sup> ñuu ní sahani-ndo Jèsús. Te ñuu-ni tnúhu-á<sup>n</sup> ndécú ndihi-ndo ndéé vitna —càchí té Těvá xáha<sup>n</sup>-dě xii-güedé.

#### Ní sahani-güedé té Těvá

<sup>54</sup>Te sá dúcá<sup>n</sup> ní xáha<sup>n</sup> tē Těvá xii-güedé, te ní cudéé<sup>n</sup> víhí-güedé núú-dě, núú ní quide rúhñú-güedé núhu-güedé sá sàtú ínì-güedé. <sup>55</sup>Te té Těvá ndécú ndihi-dé Espíritú Yá Ndiöxí, te ní ndacoto váha-dé andiu, te ní xiní-dé súúnì dàtása<sup>n</sup>-xi núú ndécú Yá Ndiöxí, te ní xiní-dé Xítóhó Jesucristú nútñi-gá xio cùha Yá Ndiöxí. <sup>56</sup>Te ní xáha<sup>n</sup> tē Těvá xii-güedé:

—Chí cündèhe andiu chi yúhú ndèhè-í Xítóhó Jesucristú nútñi-gá xio cùha Yá Ndiöxí, te ñuu-gá cúú-gă ñaní tnáhá-ndó nchàa-ndo —cachí-dé xáha<sup>n</sup>-dě.

<sup>57</sup>Te ní sadí-güedé dóho-güedé cuèndá sá ñá ní tnáhá ínì-güedé cundedóho-güedé tnúhu càhá<sup>n</sup>-dé, te uu<sup>n</sup>-ni ní cuáá-güedé, te ní taxi ndaha ñaha-güedé xii-dé <sup>58</sup>ndécá ñaha-güedé cuáhá<sup>n</sup> ndéé ì<sup>n</sup> xio yuhu ñúú, te yàcá<sup>n</sup> ní sánaha-güedé yúú xii-dé. Te ndècu ì<sup>n</sup> téé cuechi nàni-dé Sàulú, te téé-á<sup>n</sup> ní quide cuèndá-dé dóó-güedé cuèndá ní



nune ndaha-güedé ní sãñaha-güedë yúú xii té Tëvá. <sup>59</sup>Te òré sãñaha-güedë yúú, te ní cáhá<sup>n</sup> ndihi-dé Xítóhó Jesucristú te xãha<sup>n</sup>-dë:

—Yòhó Xítóhó Jesucristú, naquehe<sup>n</sup>-n iní-í —càchí-dé xãha<sup>n</sup>-dë xii-gá.

<sup>60</sup>Te ní ngüññí xítí-dë, te níhi ní cáhá<sup>n</sup>-dé, te xãha<sup>n</sup>-dë:

—Yòhó Xítóhó Jesucristú, vá técuèchi-n cuè téé-a sá dúhá quide ñaha-güedé xii-í —càchí-dé xãha<sup>n</sup>-dë xii-gá.

Te xiã<sup>n</sup>-nã ní cáhá<sup>n</sup>-dé, te ní xíhí-dé.

### Té Sàulú chíhí-dë ñáyiú sàndáá iní-xi tnúhu Jèsús vecaá

**8** Te té Sàulú ní nduu vétú iní-dé sá ní sahani-güedé té Tëvá.

Te diu-ni nduu-ã<sup>n</sup> ní cuu níhi cuendá nchaa ñáyiú sàndáá iní-xi tnúhu Jèsús ñúú Jerusálén. Te ní ndihí-yu ní xité nuu cuáhá<sup>n</sup>-yu distritú Jùdeá ndihi distritú Sãmariá. Te cue téé ní táuchíú<sup>n</sup> Jèsús dácuàha ñaha xii-yu tnúhu-gá ní ndóo-güedé ñúú Jerusálén. <sup>2</sup>Te nchaa cue téé càhá<sup>n</sup> ndihi Yá Ndiöxí ní chindúxi-güedé ndíi Tëvá. Te ío ní ndáhyú ñáyiú ní sàndáá iní tnúhu Jèsús sá ní xíhí ndíi. <sup>3</sup>Te té Sàulú ío dándoho-dé-yu, chi ndí vehe ndí vehe cuáhá<sup>n</sup>-dé cuátnii-dé cuèi téé cuèi ñadìhí ndécá-dë cuáhá<sup>n</sup> vecaá.

### Càhá<sup>n</sup>-yu tnúhu Yá Ndiöxí distritú Sãmariá

<sup>4</sup>Te nchaa ñáyiú ní xité nuu cuáhá<sup>n</sup>-yu càhá<sup>n</sup>-yu tnúhu Jèsús nchaa núú quexió-yu. <sup>5</sup>Te té Lìpé cuáhá<sup>n</sup>-dé distritú Sãmariá càhá<sup>n</sup>-dé tnúhu Xítóhó Jesucristú Yaá ní tendaha Yá Ndiöxí ní quixi ñuyíú-a. <sup>6</sup>Te ío vai núú sã vã yõo tnàhí ndàcu cada ní quide-dé, te ní cuñúhu vihí-yu, te ní xíndedóho váha-yu nchaa tnúhu ní cáhá<sup>n</sup>-dé. <sup>7</sup>Te vai ñáyiú yìhi ñaha espíritú cundìhi yucu ñávãha ní queñuhu-dé nchaa

espíritú-á<sup>n</sup> yiqui cunú-yu, te ní cana saa-xi òré ní ndee-xi yiqui cunú-yu cuáhá<sup>n</sup>-xi, te ní ndúha-yu. Te vai ñáyiú cùhú ñá cùú-gã candá nihnú-yu ndihi ñáyiú yacua ní quide tátna-dé, te ní ndúha-yu. <sup>8</sup>Te sá dúcá<sup>n</sup> ní cáhá<sup>n</sup>-dé tnúhu Jèsús te ní quide tátna-dé-yu, xiã<sup>n</sup> ío ní cudí iní ñáyiú ñuú-ã<sup>n</sup>.

<sup>9</sup>Te diu-ni ñuú-ã<sup>n</sup> ndécú ì<sup>n</sup> téé nàni Xímú, te téé-ã<sup>n</sup> xiní-dé cada ndùu-dé, te ní cuu naha dùca<sup>n</sup> quide-dé, te ní xóo cuñúhu ñáyiú distritú Sãmariá sá dúcá<sup>n</sup> quide-dé, te ní cachí-dé sá díú-ní-dë cúnú. <sup>10</sup>Te nchaa ñáyiú cuèi ñáyiú cuica te cuèi ñáyiú ndàhú ío nèhé-yu sá yínúhu núú-dé, te xitnàhá-yu:

—Tée-ã<sup>n</sup> ío chindee ñaha Yá Ndiöxí xii-dé núu vai núú sã quidé-dë —càchí-yu xitnàhá-yu.

<sup>11</sup>Te ní sàndáá iní-yu nàcuáa ní xóo cada ndùu-dé, te ní xóo cuñúhu vihí-yu, te ní cuu naha dùca<sup>n</sup>-ni dandahú ñáhá-dë xii-yu. <sup>12</sup>Te té Lìpé ní cáhá<sup>n</sup>-dé tnúhu Xítóhó Jesucristú, te ní xáha<sup>n</sup>-dë xii-yu sá Yá Ndiöxí cuiní-gá ndíhu ndaha ñaha-gá xii-yu. Te cuèi téé cuèi ñadìhí ní sàndáá iní-yu tnúhu-gá, te ní sanduté-yu. <sup>13</sup>Te tnàhá té Xímú ní sàndáá iní-dé tnúhu-gá, te ní sandute-dé, te ní xica cuu-dé ndihi té Lìpé, te ní cuñúhu-dé chi titní núú sã vã yõo tnàhí ndàcu cada ní quide té Lìpé, te ní cuñúhu vihí nchaa ñáyiú.

<sup>14</sup>Te dava-gá cue téé ní táuchíú<sup>n</sup> Jèsús dacuàha ñaha xii ñáyiú tnúhu-gá ní níhí-güedë tnúhu sá ñáyiú distritú Sãmariá ní sàndáá iní-yu tnúhu Yá Ndiöxí. Te ní tendaha-güedë té Pèlú ndihi té Juáa cuáhá<sup>n</sup>-güedé distritú Sãmariá. <sup>15</sup>Te ní quexio-güedé, te ní cáhá<sup>n</sup> ndihi-güedé Yá Ndiöxí ní xicá<sup>n</sup>-güedé Espíritú-gá quixi cundecu ndihí-yu. <sup>16</sup>Chi ní ì<sup>n</sup>-yu vátá sàá-gá Espíritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé. <sup>17</sup>Te òré ní sacá<sup>n</sup> ndodo-güedé ndaha-güedé díquí-yu,

te ní quexìo Espiritú-gá ní ngúndecu ndihí-yu.

<sup>18</sup>Te ní xiní té Xímú nàcuáa ní quide-güedé ní quexìo Espiritú-gá ní ngúndecu ndihí-yu, te cuíní-dé cuañaha-dě dífú<sup>n</sup> xii té Pèlú ndihi té Juàá ní cùu. <sup>19</sup>Te ní xáha<sup>n</sup>-dě:

—Chindee ñaha-ndo cuendá nděda-ni càa-yu cacá<sup>n</sup> ndodo-í ndaha-í díquí-yu, te ñhí-yu Espiritú Yá Ndiòxí cundecu ndihí-yu —càchí-dé xáha<sup>n</sup>-dě xii-güedé.

<sup>20</sup>Te té Pèlú ní xáha<sup>n</sup>-dě xii-dé:

—Yòhó cuíta nihnu-n ndihi dífú<sup>n</sup>-n, chi cuíní-n cuàa<sup>n</sup>-n sá vâha quide Yá Ndiòxí. <sup>21</sup>Yòhó vá cúu càda-n chiu<sup>n</sup> quide-ndí, chi ñá túú ndècu vâha iní-n nùú Yá Ndiòxí. <sup>22</sup>Te vá dúcá<sup>n</sup> càhá<sup>n</sup>-n, chi ío nèhé càhá<sup>n</sup>-n sã dúcá<sup>n</sup> càhá<sup>n</sup>-n. Te càhá<sup>n</sup> ndàhú-n nùú Yá Ndiòxí sá ná cáda càhnu iní-gá tñúhu ní càhá<sup>n</sup>-n. <sup>23</sup>Te yúhú sa xiní-í sá ïo úhú iní-n, chi mee-ni sã cuèhé sá dúhá chido nuu-n quide-n —cachí té Pèlú xáha<sup>n</sup>-dě xii té Xímú.

<sup>24</sup>Te ní xáha<sup>n</sup> tã Xímú xii-güedé:

—Cáhá<sup>n</sup> ndàhú-ndó nùú Yá Ndiòxí sá ñà túú nã tnahá-í sá dúcá<sup>n</sup> ñí càhá<sup>n</sup>-í —càchí-dé xáha<sup>n</sup>-dě.

<sup>25</sup>Te té Pèlú ndihi té Juàá ní càhá<sup>n</sup>-güedé tñúhu Yá Ndiòxí núú ñâyíu ñúú-á<sup>n</sup>. Te ní xáha<sup>n</sup>-güedě nchaa nàcuáa ní quide Jèsús ní xiní-güedé òré ní xica cuu-gá ñuyú-a. Te ní tñii-güedé ichi cuánuhú-güedé ñúú Jerusalén, te ní yáha-güedé titní ñúú yíndèhu distritú Sãmariá, te ní càhá<sup>n</sup>-güedé tñúhu-gá.

### Té Lìpé ndihi ñí<sup>n</sup> tée ñúú Etiòpiá

<sup>26</sup>Te ñí<sup>n</sup> espíritú xinú cuèchi núú Yá Ndiòxí ní quexìo-xi ñúú Jerusalén ní xáha<sup>n</sup>-xi xii té Lìpé:

—Cada túha-n chi quée nuu-n ñúú Gázã, dico mee-ni xití yucu cuáhá<sup>n</sup> ichi —càchí-xi xáha<sup>n</sup>-xi xii-dé.

<sup>27</sup>Te ní xica-dé cuáhá<sup>n</sup>-dé, te ní natnahá-dé ñí<sup>n</sup> tée nació<sup>n</sup> Etiòpiá ñúhú-dě ichi. Te cùu-dé tesorèrú xinú

cuèchi-dé núú ñí<sup>n</sup> ñadhí ñaha yíndaha nació<sup>n</sup> Etiòpiá, te ñaha-á<sup>n</sup> nání-á<sup>n</sup> Cándacé. <sup>28</sup>Te tée etiòpiá-á<sup>n</sup> ñí sáhá<sup>n</sup>-dé ñúú Jerusalén ní càhá<sup>n</sup> ndihí-dé Yá Ndiòxí, te ñuhu-dé ichi cuánuhú-dé ñúú-dé ñúhú-dě carrètã, te dàcuaha-dé tñúhu ní chídó tñuní ndí Chàia tée ní xóo càhá<sup>n</sup> tñúhu Yá Ndiòxí ndéé sanaha. <sup>29</sup>Te ní xáha<sup>n</sup> Espiritú Yá Ndiòxí xii té Lìpé:

—Quíh<sup>n</sup> tuha-n càrretã-á<sup>n</sup> —càchí Espiritú-gá xáha<sup>n</sup>-xi xii-dé.

<sup>30</sup>Te té Lìpé ní sãtuha-dé carrètã-á<sup>n</sup>, te ní tecú dóho-dé nàcuáa càhá<sup>n</sup> tée etiòpiá-á<sup>n</sup>, tée ñuhu carrètã-á<sup>n</sup> dàcuaha-dé nàcuáa ní chídó tñuní ndí Chàia. Te ní xáha<sup>n</sup> tã Lìpé xii tée etiòpiá-á<sup>n</sup>:

—¿Tècú tñuní-n nchã tñúhu dàcuaha-n-á<sup>n</sup>? —càchí té Lìpé xáha<sup>n</sup>-dě xii-dé.

<sup>31</sup>Te ní xáha<sup>n</sup> tã etiòpiá:

—¿Nása tecú tñuní-í te vá yoo dànehé ñáhã xii-í? Ta quène iha coo-n chi danèhé ñáhã-n —càchí-dé xáha<sup>n</sup>-dě xii té Lìpé.

Te cuásaá té Lìpé núú carrètã ní ngóo-dé. <sup>32</sup>Te ndèdóho-dé nàcuáa dàcuaha tée etiòpiá-á<sup>n</sup> nàcuáa ní chídó tñuní ndí Chàia núú tütú Yá Ndiòxí núú càchí-xi:

Dàtnã quidé ñí<sup>n</sup> mbéé cada-dé òré can-deca ñaha-güedě xii-dé quíh<sup>n</sup> cahni ñaha-güedě chi ñá túú nã cada-dé, dàtnã cuíní-ndó quide mbéé òré dèté-di ñã túú ndàhí-di duca<sup>n</sup> càda-dé òré cahni ñaha-güedě chi ni vá càhá<sup>n</sup>-dé.

<sup>33</sup>Te mee-ni cùdiquí ndéé ñáhã-güedě xii-dé, te ni vá ndúcú tñúhu-güedé núú-dě ñúu ndáá ndècuèchi-dé.

Te ío cuu nduu cuihna iní cue ñaní tñáhã-dě, chi cahni ñaha-güedě xii-dé ñuyú-a.

Duha càhá<sup>n</sup> tutú ní dàcuáhã tã etiòpiá ní xíndedóho té Lìpé.

<sup>34</sup>Te ní xáha<sup>n</sup> tùcu tée Etiòpiá xii té Lìpé:

—Cundee iní-n càchí tnúhu-n yòo cacunehe tée ní cáhá<sup>n</sup> tnúhu Yá Ndiòxí ndéé sanaha, núu càhá<sup>n</sup>-dé cuèndá mée-dě àdi cahá<sup>n</sup>-dé cuèndá ingá ñáyiu —càchí tée etiòpiá-á<sup>n</sup> xáha<sup>n</sup>-dě xii té Lìpé.

<sup>35</sup>Te té Lìpé ní cani-dé cuèndú núú tée etiòpiá nàcuáa ní cáhá<sup>n</sup> ndíi Chàíá nàcuáa cada Jèsús òré quixi-gá ñuyúí-a. Te ní xáha<sup>n</sup>-dě nàcuáa ndùu tnúhu Jèsús ndíhi nàcuáa ní quide-gá.

<sup>36</sup>Te ñùhu-güedé ichi cuáhá<sup>n</sup>-güedé ní naníhí-güedé ì<sup>n</sup> xichi núú ñúhú ndüte, te ní xáha<sup>n</sup> tée etiòpiá:

—Iha ñùhu ndute, ¿te vá cúú cuàndute-í iha-á<sup>n</sup>? —càchí-dé xáha<sup>n</sup>-dě xii té Lìpé.

<sup>37</sup>Te xáha<sup>n</sup> tē Lìpé:

—Te núu sàndáá ndisa iní-n Jèsús, te cuu cuandute-n —càchí-dé xáha<sup>n</sup>-dě.

Te ní xáha<sup>n</sup> tée etiòpiá:

—Sàndáá ndisa iní-í sá Dēhe Yá Ndiòxí cúú Xítóhó Jesucristú —càchí-dé xáha<sup>n</sup>-dě.

<sup>38</sup>Te ní ngani-dé carretà, te ní nuu-güedé ndi ndùu-güedé, te cuánguee-güedé xití ndute, te ní dácuándüte ñaha té Lìpé xii-dé. <sup>39</sup>Te òré ní nene-güedé xití ndute, te ndèca ñaha Espiritú Yá Ndiòxí xii té Lìpé cuáhá<sup>n</sup>. Te ñá túú ní xíní tée ní sandute-á<sup>n</sup> ndéé ichi cuáhá<sup>n</sup> té Lìpé. Te ío ní cudíí iní-dé sá ñí natuha-dé ichi Yá Ndiòxí, te cuándaa-dé núú carretà-dé cuánuhú-dé. <sup>40</sup>Te ní quexìo té Lìpé ñúú Àzotó, te ndi tnahá ñúú ndi tnahá ñúú cuáhá<sup>n</sup>-dé càhá<sup>n</sup>-dé tnúhu Yá Ndiòxí, te ní yáha-dé cuáhá<sup>n</sup>-dé ní quexìo-dé ndéé ñúú Cèsareá.

### Té Sàulú ní tuha-dé ichi Xítóhó Jesucristú

(Hch. 22:6-16; 26:12-18)

**9** Te té Sàulú mee-ni càhá<sup>n</sup> cuèhé-dé cuèndá ñáyiu ní sàndáá iní tnúhu Jèsús, te cuíní-dé cahni ñaha-dé xii-yu. Te ní sáhá<sup>n</sup>-dé núú dütú cúnüu-gá, <sup>2</sup>te ní xáha<sup>n</sup>-dě sá cádüha dütú-á<sup>n</sup> ì<sup>n</sup> tutú canehe-dé quíhí<sup>n</sup> cuáha-dé cue tée xíndeé nchito veñúhu ñúú Dàmascú, chi cuíní-dé tñii-dé nchaa ñáyiu dàcuaha tnúhu Xítóhó Jesucristú candeca ñaha-dé quíhí<sup>n</sup> ñúú Jerusàlén. <sup>3</sup>Te ní xica-dé cuáhá<sup>n</sup>-dé tá cùyatni-dé ñúú Dàmascú, te uu<sup>n</sup>ni ní quee ñuhú andüu, te ní dáyèhé-xi ndéé núú nútñi-dé. <sup>4</sup>Te ní nduá-dé ndéé ñuhu, te ní tecú dóho-dé càhá<sup>n</sup> ì<sup>n</sup> sá càhá<sup>n</sup> núú ñnuu, te xáha<sup>n</sup>-xi xii-dé:

—Yòhó Sàulú, ¿ná cuèndá cúú ùhú iní ñáhá-n xii-í te dàndoho ñaha-n? —cachí sá càhá<sup>n</sup>-á<sup>n</sup> xáha<sup>n</sup>-xi xii-dé.

<sup>5</sup>Te ni xáha<sup>n</sup>-dē:

—¿Ná cúú yòhó sá càhá<sup>n</sup>-á<sup>n</sup>-i? —càchí-dé xáha<sup>n</sup>-dē.

Te ní xáha<sup>n</sup> sá càhá<sup>n</sup> xii-dé:

—Yúhú cúú-í Jèsús tée cùu úhú iní-n. Te ío dàndoho-n mee-n, chi dàtná quidé ndicutu quide-n, chi quiti-á<sup>n</sup> núu na cüxi-güedé-di püyá te sáha-di patadá núú-xi, te quide úhú-di mee-di. Te duca<sup>n</sup> sátnahá-xi cùu yohó chi ñá túú sàndáá iní ñáhá-n xii-í —càchí sá càhá<sup>n</sup>-á<sup>n</sup> xáha<sup>n</sup>-xi xii-dé.

<sup>6</sup>Te té Sàulú ní quidi ñaha-xi xii-dé sá ní yuhú-dé, te ní xáha<sup>n</sup>-dē:

—Xítóhó Jesucristú, ¿te ná cuíní-n cada-í-i? —càchí-dé xáha<sup>n</sup>-dē.

Te Jèsús ní xáha<sup>n</sup>-gá xii-dé:

—Ndacóo, te quíhí<sup>n</sup>-n ñúú-á<sup>n</sup>, te yàcá<sup>n</sup> tecú tnúhu-n ñá cúú sá cádá-n —càchí-gá xáha<sup>n</sup>-gá xii-dé.

<sup>7</sup>Te cue tée cuáhá<sup>n</sup> ndíhi té Sàulú ní tecú dóho-güedé càhá<sup>n</sup> ì<sup>n</sup> sá càhá<sup>n</sup>, dico vá yòo tñáhí ni xíní-güedé, te ní

yùhú víhí-güedë, te ñá túú tnàhí ní cǎhá<sup>n</sup>-güedë. <sup>8</sup>Te ní ndacóo té Sàulú, te ñá ní cùu-gá cundehe-dë, chi ní cuaa-dë, te ní tñii-güedë ndaha-dë ndécá ñàha-güedë cuáhá<sup>n</sup> ñúú Dàmascú. <sup>9</sup>Te yácá<sup>n</sup> ní xíndecu-dë úní nduu, te ñá ní cùu tñahí cundehe-dë, te ñá túú nǎ ní xèxi-dë, te ñá túú ní xìhi-dë ndute.

<sup>10</sup>Te ndècu tée sàndáá iní tnúhu Jèsús ñúú Dàmascú, nání-dë Anàniás, te ní sáhá<sup>n</sup> Jèsús núú sàní-dë, te ní xáha<sup>n</sup>-gǎ xii-dë:

—¡Anàniás! —càchí-gǎ xáha<sup>n</sup>-gǎ.

Te ní xáha<sup>n</sup>-dë:

—¿Yúhú cǎhá<sup>n</sup> ndihi-n-ǎ<sup>n</sup>? —càchí-dë xáha<sup>n</sup>-dë.

<sup>11</sup>Te ní xáha<sup>n</sup>-gǎ:

—Ndacuñí, te quíhí<sup>n</sup>-n ì<sup>n</sup> chiu<sup>n</sup> ichi núú dánani-güedë Ichi Ndáá, te yácá<sup>n</sup> nanducu-n vehe té Jùdás, chi vehe tée-á<sup>n</sup> ndécú ì<sup>n</sup> tée ñúú Tàrsú nání-dë Sàulú, te tée-á<sup>n</sup> sa cǎhá<sup>n</sup> ndihi ñaha-dë xii-í.

<sup>12</sup>Te tée-á<sup>n</sup> nǐ dácótó ñàha-xi sǎ nǐ xini ñáhá-dë xii-n nǐ quexio-n núú ndécú-dë, te ní sacá<sup>n</sup> ndodo-n ndàha-n díquí-dë, te duca<sup>n</sup> te ní nacaá<sup>n</sup> núú-dë ní dácótó ñàha-xi xii-dë —càchí-gǎ xáha<sup>n</sup>-gǎ.

<sup>13</sup>Te té Anàniás ní xáha<sup>n</sup>-dë:

—Yòhó Xítóhó Jesucristú, càchí tnúhu-í xii-n sǎ nǐ níhí-í tnúhu nàcuáa quide-dë sǎ ìo quide úhú-dë ñáyiu cǎhá<sup>n</sup> ndihi-n ñúú Jerusalén. <sup>14</sup>Chi nèhe-dë tutú ní sǎñaha cuè dútú cúnùu cuendá níhí-dë nàcuáa cada-dë tñii-dë nchaa ñáyiu sàndáá iní ñáhá xii-n —cachí-dë xáha<sup>n</sup>-dë xii-gǎ.

<sup>15</sup>Te Jèsús ní xáha<sup>n</sup>-gǎ xii-dë:

—Quíhí<sup>n</sup>-n ndatnúhu-n ndihi-dë, chi cuini-í cada-dë chiu<sup>n</sup>-í, quíhí<sup>n</sup>-dë cǎhá<sup>n</sup>-dë tnúhu-í núú cuè ñáyiu isràél, ndihi núú cuè ñáyiu ñá túú cùu ñáyiu isràél, ndihi núú cuè tée yíndaha ñaha xii-yu. <sup>16</sup>Te yúhú cúñaha-í xii-dë sǎ ndóhó víhi-dë cuendá-í —càchí-gǎ xáha<sup>n</sup>-gǎ xii té Anàniás.

<sup>17</sup>Te cuáhá<sup>n</sup> té Anàniás vehe núú ndécú tē Sàulú te ní sacá<sup>n</sup> ndodo-dë ndaha-dë díquí tē Sàulú, te ní xáha<sup>n</sup>-dë:

—Yòhó té Sàulú tée ndècu ndihi-í ichi Xítóhó Jesucristú, diu-ni Xítóhó Jesucristú Yáá ní cǎhá<sup>n</sup> ndihi ñaha xii-n ichi ní tendaha ñàha-gǎ véxi-í cuendá cacá<sup>n</sup> táhù-í núú-gǎ cuendá-n te ndúha núú-n, te dàtnùní quixi Espiritú-gǎ cundecu ndihi-n —càchí-dë xáha<sup>n</sup>-dë.

<sup>18</sup>Te dàtná sǎ ní xócání-ó ì<sup>n</sup> sǎ ndèdí núú-dë ní quide ñaha-xi xii-dë, te ní nacaá<sup>n</sup> núú-dë, te ní sandute-dë. <sup>19</sup>Te ní xexi-dë, te ní nanhí ndéé-dë, te tití ní nduu ní xíndecu ndihi-dë ñáyiu ní sàndáá iní tnúhu-gǎ ñúú Dàmascú.

### Té Sàulú dǎcuàha-dë ñáyiu tnúhu Yá Ndióxi ñúú Dàmascú

<sup>20</sup>Te sǎtá nǐ ndúha núú-dë, te ní sáhá<sup>n</sup>-dë veñúhu cue ñáyiu isràél ní xáha<sup>n</sup>-dë sǎ Jèsús cúu-gǎ Déhe Yá Ndióxi. <sup>21</sup>Te nchaa ñáyiu ní xíndedóho tnúhu ní cǎhá<sup>n</sup>-dë, te ní cuñúhu víhí-yu, te ní xítnáhá-yu:

—Diu tée-ǎ<sup>n</sup> ní sahani-dë ñáyiu ní xóo chiñuhu ñaha xii Jesús ñúú Jerusalén. Te ní quixi-dë iha ní cuini-dë tñii ñaha-dë xii-yu candeca ñaha-dë quíhí<sup>n</sup> núú cuè dútú cúnùu ni cuu —cachí-yu xítnáhá-yu.

<sup>22</sup>Te ìo iní-gǎ té Sàulú xáha<sup>n</sup>-dë xii-yu sǎ díú Jèsús cúu-gǎ Cristú Yáá ní tendaha Yá Ndióxi ní quixi ñuyíu-a, te xǎ<sup>n</sup> ñá ní níhí ñáyiu isràél ndécú ñúú Dàmascú tnúhu cǎhá<sup>n</sup>-yu, te ní cuñúhu víhí-yu.

### Té Sàulú ní dǎxío-dë núú ñáyiu isràél

<sup>23</sup>Te sǎtá nǐ cuu tití nduu, te ní ndatnúhu cue tée isràél sǎ cǎhni-güedë té Sàulú. <sup>24</sup>Te té Sàulú ní níhí-dë tnúhu nàcuáa cǎhá<sup>n</sup>-güedë cada ñaha-güedë xii-dë, te cuèi nduu cuèi niú néhé cuendá-güedë yuyèhe núú ñúddòcu ndóho yuhu ñúú cuendá cuini-güedë tñii ñaha-güedë xii-dë te

cahni ñaha-güedë. <sup>25</sup> Te ñi<sup>n</sup> niú ndécá ñaha cue téé ní sándáá iní-xi tnúhu Jèsús cuáhá<sup>n</sup> ndéé núú ñúðòco ndóho yuhu ñúú. Te ní sáá-güedé núú ndóho, te ní chihí ñaha-güedë xii-dé xití tídihi te ní dándëe ñaha-güedë núú ñúhú, te ní quene-dé cuáhá<sup>n</sup>-dé.

### Te Sàulú ndécú-dë ñúú Jerusàlén

<sup>26</sup> Te té Sàulú ní nasáá-dé ñúú Jerusàlén, te cuiní-dé chitnahá-dé ñáyíu sándáá iní tnúhu Jèsús, te ní yùhú-yu chi ní cáhã<sup>n</sup>-yu sá dándàhú ñáhá-dë sá sándáá iní-dé Jèsús. <sup>27</sup> Te té Bèé ndécá-dë té Sàulú cuáhá<sup>n</sup> núú ndécú cuè téé ní táuchíú<sup>n</sup> Jèsús dacuàha ñaha xií-yu tnúhu-gá. Te ní caní té Bèé cuèndú núú-güedë nàcuáa ní cuu ní naníhí tnáhá tē Sàulú ndihí Jèsús ichi, te ní cáhã<sup>n</sup> ndihí ñaha-gã xii-dé. Te ní xáha<sup>n</sup> tùcu té Bèé nàcuáa ní cáhã<sup>n</sup> té Sàulú tnúhu Jèsús núú ñáyíu Dàmascú, te ñá túú tnàhí ní yùhú-dé ní cáhã<sup>n</sup>-dé, càchí té Bèé xáha<sup>n</sup>-dë xii-güedé. <sup>28</sup> Te ní xíndecu té Sàulú ndihí ñáyíu xidácuáhá tnúhu-gá ñúú Jerusàlén. Te ní ndicuu ndicuu-dé ní cáhã<sup>n</sup>-dé tnúhu Jèsús, te ñá túú tnàhí ní yùhú-dé <sup>29</sup> ní cáhã<sup>n</sup> ndihí-dé ñáyíu isràèl ñáyíu càhã<sup>n</sup> tnúhu grìégú. Te ñáyíu-á<sup>n</sup> ní nguíta-yu ndàtnúhu-yu sá cáhni ñáhá-yu xii-dé. <sup>30</sup> Te ñáyíu sándáá iní tnúhu-gá ní níhí-yu tnúhu nàcuáa cuiní ñáyíu càhã<sup>n</sup> tnúhu grìégú cada ñáhá-yu xii té Sàulú, núú ní sàndeca ñáhá-yu xii-dé ñúú Cèsareá, te yàcá<sup>n</sup> ní tendaha ñáhá-yu cuánuhú-dé ñúú Tàrsú.

<sup>31</sup> Te sáta xíá<sup>n</sup> te ní sanaá-yu ñá túú-gã ní xóo cada úhú-yu nchaa ñáyíu sándáá iní tnúhu Jèsús nihí distritú Jùdeá, ndihí distritú Galileá, ndihí distritú Sà-mariá. Te ní níhí ndéë-yu ní quidé-yu nàcuáa ní xáha<sup>n</sup> Yã Ndiòxí cadá-yu, te ío ní xíndecu yíñhúhú-yu núú-gã, te Espíritú-gá ní chindee ñaha-xi xií-yu, te vãi-gá ñáyíu ní sándáá iní-yu tnúhu-gá.

### Té Pèlú ní quide tátna-dé té Èneás

<sup>32</sup> Títí xichi ní sáhã<sup>n</sup> té Pèlú ní cáhã<sup>n</sup>-dé tnúhu Yá Ndiòxí. Te ñi<sup>n</sup> nduu ní sáhã<sup>n</sup>-dé ñúú Lidá ní cáhã<sup>n</sup> ndihí-dé ñáyíu sándáá iní ñáhá xii Jèsús. <sup>33</sup> Te yàcá<sup>n</sup> ní naníhí-dë ñi<sup>n</sup> téé nani Eneás, te ní cuu úná cuíá cùhú-dé, te ní lùha ñá cùú-gã candá nihnu-dé. <sup>34</sup> Te ní xáha<sup>n</sup> tē Pèlú xii-dé:

—Èneás, Xítóhó Jesucristú cada tátna ñaha-gã xii-n tnávíí. Ndacóo te ndocani-n yùu-n —cachí-dé xáha<sup>n</sup>-dë.

Te òré-ni ní ndacóo-dé. <sup>35</sup> Te nchaa ñáyíu ñúú Lidá ndihí ñáyíu ñúú Sàrón ní xiní-yu sá ní ndúha-dé, te ní sándáá víhí iní-yu Xítóhó Jesucristú.

### Ní ndoto tá Dòrcás

<sup>36</sup> Te ñúú Jòpé ndécú ñi<sup>n</sup> ñadihí sándáá iní-a<sup>n</sup> tnúhu Jèsús, te nani-a<sup>n</sup> Tabitá, te tnúhu grìégú xáhã<sup>n</sup>-yu Dòrcás, te ío váha ní xóo cada-a<sup>n</sup> chi ío váha iní-a<sup>n</sup>, te ní xóo chindee-a<sup>n</sup> ñáyíu ndàhú. <sup>37</sup> Te váha-ni ndècu-a<sup>n</sup> ní cuu, te ní tñi ñaha cuèhé ní xíhí-a<sup>n</sup>, te ní nadacùchi ñáhá-yu, te ní chihí ñáhá-yu ñi<sup>n</sup> cuàrtú ndécú ndéé núú ñínu. <sup>38</sup> Te ñáyíu ní sándáá iní tnúhu Jèsús ñúú Jòpé ní níhí-yu tnúhu sá ndécú tē Pèlú ñúú Lidá. Te yatni-ni càa ñúú-á<sup>n</sup>, te ní tendàhã-yu úú cue téé cuáhã<sup>n</sup>-güedé núú ndécú-dé cuèndá cùñaha-güedë candeca ñaha-güedë xii-dé quíhí<sup>n</sup> núú ndécú-yu. Te ní xáha<sup>n</sup>-güedë xii té Pèlú:

—Yáchí ná quíhí<sup>n</sup>-ó ñúú-ndí, chi yàcá<sup>n</sup> cáná ñáhá-yu quíhí<sup>n</sup>-n tnávíí —càchí-güedé xáha<sup>n</sup>-güedë xii té Pèlú.

<sup>39</sup> Te té Pèlú ní xica-dé cuáhã<sup>n</sup>-dé ndihí cue téé-á<sup>n</sup> ñúú Jòpé, te òré ní quexio-güedé ndihí-dé, te cuásaá ndihí ñaha-güedë cuàrtú ndéé núú ñínu. Te nchaa ñáyíu ñáhí ñáyíu quèé ní tacá ndéé ñáhá xii ndíyi-á<sup>n</sup> xíndáhyú-yu, te ní dánèhé ñáhã-yu nchaa dóo ní cadúha ñaha ní xíhí-á<sup>n</sup>. Chi ní xóo cadúha-a<sup>n</sup>

dícu<sup>n</sup>, te ní xóo cadúha-a<sup>n</sup> dío òré ní xíndecu-a<sup>n</sup> ñuyíu-a, te nchaa xíǎ<sup>n</sup> ní dánèhé ñáhǎ-yu xii té Pèlú. <sup>40</sup>Te té Pèlú ní xáha<sup>n</sup>-dè sá queé-yu nchaá-yu quehé, te ní queé-yu. Te ní ngüǎí xítí-dè te ní cáhá<sup>n</sup> ndihi-dé Yǎ Ndiǒxí, te dàtnùní ní ndacoto-dé núú cándòdo ndíyi-á<sup>n</sup>, te ní xáha<sup>n</sup>-dè:

—Tàbitá, ndacóo —càchí-dé xáha<sup>n</sup>-dè.

Te ní ndacoto-a<sup>n</sup> núú tǎ Pèlú te ní ndacóo-a<sup>n</sup>. <sup>41</sup>Te ní tñi-dé ndaha-a<sup>n</sup> ní nacanutñi ñaha-dè. Te ní cana-dé nchaa ñáyi dñi ñáyi queé ndihi nchaa ñáyi sàndáá iní tñúhu Jèsús cuèndá quiní-yu sá ñí ndoto-a<sup>n</sup>. <sup>42</sup>Te nchaa ñáyi núú Jòpé ní níhi-yu tñúhu nàcuáa ní quide té Pèlú ní ndoto ñaha ní xíhi-á<sup>n</sup>, te vǎi-yu ní sàndáá iní-yu Xítóhó Jesucrístú. <sup>43</sup>Te tit- ní nduu ní xíndecu té Pèlú vehe té Xímú téè dàcuítá ñii.

### Té Pèlú ndihi té Còrneliú

**10** Te ndècu i<sup>n</sup> téè nàni-dé Còrneliú ñúú Cèsareá te cùu-dé capitá<sup>n</sup>, te ndècu ndihi-dé i<sup>n</sup> cièndú sandàdú. Te cue téè-á<sup>n</sup> nání-güedé Sandàdú Itàlianú. <sup>2</sup>Te téè cùu capitá<sup>n</sup> ío váha iní-dé, te mee-dè ndihi ñadihí-dé ndihi nchaa landú-dé ío nèhé-yu sá yíñùhu núú Yǎ Ndiǒxí, te sáha-dé ñáyi ndàhú ñáyi isràèl díhú<sup>n</sup>, te ío càhá<sup>n</sup> ndihi-dé Yǎ Ndiǒxí. <sup>3</sup>Te i<sup>n</sup> nduu dàtná òré caá úní sacuaa ní dácótó núú ñáhá-xí xii-dé sá ní sǎhá<sup>n</sup> i<sup>n</sup> espíritú xínú cuèchi núú Yǎ Ndiǒxí núú-dè, te ní xáha<sup>n</sup>-xi:

—Còrneliú —càchí-xi xáha<sup>n</sup>-xi xii-dé.

<sup>4</sup>Te ní xíní-dé ndi ndúú xio núú-dé espíritú-á<sup>n</sup>. Te ío ní yùhú-dé. Te ní xáha<sup>n</sup>-dè:

—¿Ná chíu<sup>n</sup> vèxi-n? —càchí-dé xáha<sup>n</sup>-dè.

Te xáha<sup>n</sup>-xi:

—Ío càhá<sup>n</sup> ndihi-n Yǎ Ndiǒxí, te ñáyi ndàhú sǎñaha-n díhú<sup>n</sup>-n, te nchaa xíǎ<sup>n</sup> sa ñaha-gá. <sup>5</sup>Te vitna tendaha-n cuè téè na quíhí<sup>n</sup>-güedé ñúú Jòpé quíngana-güedé

i<sup>n</sup> téè nàni Xímú, àdi Pelú chi úú òu-dé, te candeca ñaha-güedé quixi. <sup>6</sup>Te òré quexìo-dé te cachí tñúhu-dé nchaa dava-gá sá cuíní Yǎ Ndiǒxí cada-n. Te ndècu-dé vehe ingá tucu téè nàni Xímú téè dàcuítá ñii, te vehe téè-á<sup>n</sup> caá i<sup>n</sup> xio yuhu lamár —càchí-xi xáha<sup>n</sup>-xi xii-dé.

<sup>7</sup>Te sáta cuáhá<sup>n</sup> espíritú-á<sup>n</sup>, te té Còrneliú ní cana-dé úú tñàhá cue téè xínu cuèchi núú-dé ndihi i<sup>n</sup> sandàdú xínú cuèchi tucu núú-dé, te tñàhá sandàdú-á<sup>n</sup> ío càhá<sup>n</sup> ndihi-dé Yǎ Ndiǒxí. <sup>8</sup>Te té Còrneliú ní cani-dé cuèndú núú-güedé nàcuáa ní cáhá<sup>n</sup> espíritú xínú cuèchi núú Yǎ Ndiǒxí. Te ní tendaha ñaha-dé xii-güedé cuáhá<sup>n</sup>-güedé ñúú Jòpé.

<sup>9</sup>Te nduu tñèe-á<sup>n</sup> ñúhú-ní-güedé ichi cuáhá<sup>n</sup>-güedé, te cùu-xi datná òré caúxúú nduu ta cùyatni-güedé ñúú-á<sup>n</sup>, te òré-á<sup>n</sup> ní sáá té Pèlú díquí véhé càhá<sup>n</sup> ndihi-dé Yǎ Ndiǒxí. <sup>10</sup>Te òré-á<sup>n</sup> sa xíhi-dé docó cuíní-dé caxi-dé, te ñini cadúha-yu sá caxí-dé ní dácótó núú ñáhá-xí <sup>11</sup>sá ní xíní-dé i<sup>n</sup> sá ndécú àndiu, te càa datná caá i<sup>n</sup> dóó cáhnú nchicú<sup>n</sup> yoho ndi cùmí xíquí-xi véxi cuu<sup>n</sup> núú ñúhú. <sup>12</sup>Te núú dǒó-á<sup>n</sup> yódó cǒo ndihi quiti ndàva ndihi nchaa núú quiti ndèé cùmí sǎhá-xi. <sup>13</sup>Te ní tecú dóho-dé càhá<sup>n</sup> i<sup>n</sup> sá càhá<sup>n</sup>, te xáha<sup>n</sup> sá càhá<sup>n</sup>-á<sup>n</sup> xii-dé:

—Pèlú, ndacuǎí cahni-n ndèda-ni càa quiti-a caxi-n-di —cachí sá càhá<sup>n</sup>-á<sup>n</sup> xáha<sup>n</sup>-xi xii-dé.

<sup>14</sup>Te té Pèlú ní xáha<sup>n</sup>-dè:

—Vǎ cáhni-í-di chi càchí tñúhu sá sánú ichi ñaha xii nchúhú ñáyi isràèl sá vǎ cúu càxi-ndí nchaa quiti-a chi cuu cuèchi, te vátá caxí-gǎ-í-di ni i<sup>n</sup> xito —càchí-dé xáha<sup>n</sup>-dè.

<sup>15</sup>Te ní cáhá<sup>n</sup> tucu sá ní cáhá<sup>n</sup>-á<sup>n</sup>, te xáha<sup>n</sup>-xi:

—Vǎ cúu càchí-n sǎ vǎ cúu càxi-n-di, chi mee Yǎ Ndiǒxí ní cachí-gá sá díú

nchàa quiti-a cuu caxi-o vitna —cachí sá ní cáhá<sup>n</sup>-á<sup>n</sup> xáha<sup>n</sup>-xi xii-dé.

<sup>16</sup>Te duca<sup>n</sup> ní cáhá<sup>n</sup> sá ní cáhá<sup>n</sup>-á<sup>n</sup> ũní xito, te dàtnùnì cuándaa tucu dóó-á<sup>n</sup> andiú. <sup>17</sup>Te té Pèlú ñá ní cùtnunì iní-dé ná cuèndá duca<sup>n</sup> ní dácótó núú ñáhá-xí xii-dé, núu xíá<sup>n</sup> ío cuéhé ní sani iní-dé. Te òrè-á<sup>n</sup> ní quexio cue téé ní tendaha té Còrneliú ndéé yuyèhe, chi ndi vehe ndi vehe cuáhá<sup>n</sup>-güedé ndúcú tñuhu-güedé ndéé cáá vèhe té Xímú téé dii vèhe-xi ndecu té Pèlú. <sup>18</sup>Te ní cáhá<sup>n</sup> níhi-güedé, te xáha<sup>n</sup>-güedé:

—Ñá túú cùdana iha ndecu ì<sup>n</sup> téé nànducu-ndí nánì-dé Xímú, àdi Pelú chi úú òu-dé —càchí-güedé xáha<sup>n</sup>-güedé.

<sup>19</sup>Te té Pèlú vai sani iní-dé sá ní dácótó núú ñáhá-xí xii-dé. Te òrè-á<sup>n</sup> ní xáha<sup>n</sup> Espiritú Yá Ndiòxí xii-dé:

—Cundedóho-n ì<sup>n</sup> tñuhu na càhá<sup>n</sup>-í-a. Ní quexio únì cue téé nànducu ñaha xii-n. <sup>20</sup>Yáchí, cuandèe chi quíh<sup>n</sup>-n ndíhi-güedé, te vá yùhú-n chi yùhú ní xáha<sup>n</sup>-í véxi cuaca ñaha-güedé xii-n —càchí Espiritú-gá xáha<sup>n</sup>-xi xii té Pèlú.

<sup>21</sup>Te ní xica-dé cuándee-dé núú ndécú cuè téé xica nanducu ñaha xii-dé, te xáha<sup>n</sup>-dè xii-güedé:

—Yùhú cúú tée nànducu-ndo-á<sup>n</sup>. Náú-í-a núu ná chíú<sup>n</sup> cuiní ñáhá-ndó —càchí-dé xáha<sup>n</sup>-dè xii-güedé.

<sup>22</sup>Te xáha<sup>n</sup>-güedé:

—Tée cùu capitá<sup>n</sup> téé nàni Corneliú ní tendaha ñaha-dé véxi-ndí, te tée-á<sup>n</sup> ío váha iní-dé, chi ío sàndáá iní-dé Yá Ndiòxí, te nchaa ñáyiú isràèl ío váha càhá<sup>n</sup>-yu cuèndá-dé. Te ì<sup>n</sup> espíritú xínú cuèchi núú Yá Ndiòxí ní xáha<sup>n</sup>-xi xii-dé sá cáná ñaha-dé xii-n quíh<sup>n</sup>-n vèhe-dé dacuàha-n-dé tñuhu Yá Ndiòxí —càchí cue téé ní tendaha té Còrneliú xáha<sup>n</sup>-güedé xii té Pèlú.

<sup>23</sup>Te ní xáha<sup>n</sup> tē Pèlú sá quíhu-güedé vehe-dé, te candeca tñaha-güedé ndíhi-dé quíh<sup>n</sup> ndéé nduu tnéé. Te nduu tnéé-á<sup>n</sup> ní xica-güedé ndécá

tñaha-güedé ndíhi té Pèlú cuáhá<sup>n</sup>, te tñahá ì<sup>n</sup> úú cue téé sàndáá iní tñuhu Jèsús ñuú Jòpé cuáhá<sup>n</sup> ndíhi ñaha-güedé xii-dé.

<sup>24</sup>Te ndéé ingá nduu ní quexio-güedé ñuú Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndíhi ñadìhí-dé ndíhi nchaa landú-dé ndíhi cue téé ío váha tñahá tñuhu ndíhi-dé, chi ní cana ñaha-dé ní nítnáhá-yu ndíhi-dé cundetú-yu té Pèlú. <sup>25</sup>Te sáta ní quèxio té Pèlú vehe té Còrneliú, te ní quee-dé quehé, te ní ngüñí xítí-dé núú tē Pèlú chíñùhu ñaha-dé ní cùu. <sup>26</sup>Te té Pèlú ní xáha<sup>n</sup>-dè:

—Ndacuñí vá ngüñí xítí-n nùu-í chi ñá díú Ndiòxí cùu-í, dicó ì<sup>n</sup> téé ñuyú-a cùu-í —càchí té Pèlú xáha<sup>n</sup>-dè xii-dé.

<sup>27</sup>Te ta càhá<sup>n</sup> té Pèlú ndíhi té Còrneliú cuánguihu-güedé xítí vehe, te chitu ñáyiú xixíhi xítí vehe. <sup>28</sup>Te ní xáha<sup>n</sup> tē Pèlú xii-yu:

—Sa ñaha-ndo sá càchí tñuhu sá sánú ìchi ñaha xii nchúhú ñáyiú isràèl sá vá cúú quíxi-ndí vehe ní ì<sup>n</sup> nchóhó ñáyiú ñá túú cùu ñáyiú isràèl te ní vá cúú tñahá tñuhu ndíhi ñaha-ndí xii-ndo. Dico Yá Ndiòxí ní cachí-gá sá vá cúú càhá<sup>n</sup>-í sá vá cúú càhá<sup>n</sup> ndíhi-í ñáyiú ñá túú cùu ñáyiú isràèl, chi cuu cuèchi. <sup>29</sup>Núu xíá<sup>n</sup> ndíhi-ní véxi-í òrè ní quexio tñuhu sá cáná ñaha-ndo. Te cachí tñuhu-ndo ná cuèndá cáná ñaha-ndo —cachí té Pèlú xáha<sup>n</sup>-dè xii-yu.

<sup>30</sup>Te té Còrneliú ní xáha<sup>n</sup>-dè:

—Ní cuu cúmí nduu, te diu-ni dàtná òrè iha cùu-xi, te yùhú ndècu-í diu-ni vehe-í, te ñá túú tñahí ná xèxi-í cáhá<sup>n</sup> ndíhi-í Yá Ndiòxí, te òrè-á<sup>n</sup> ní quexio ì<sup>n</sup> espíritú xínú cuèchi núú-gá níhú-xí dđó cuixí<sup>n</sup> dóó chàhñchí. <sup>31</sup>Te càchí-xi: “Còrneliú, ní xíndedóho Yá Ndiòxí tñuhu ní cáhá<sup>n</sup>-n ndíhi-gá, te xini-gá sá sáñaha-n díhú<sup>n</sup> xii ñáyiú ndàhú. <sup>32</sup>Te ñuú Jòpé ndécú ì<sup>n</sup> téé nàni Xímú, àdi Pelú chi úú òu-dé, te ndècu-dé vehe ì<sup>n</sup> téé

nàni tucu Xímú téé dâcuitá ñii, te càa vehe-dé ì<sup>n</sup> xio yuhu làmár, te cana-n-dě ná quixi-dé ndatnúhu-n ndìhi-dé”, duha ní cáhá<sup>n</sup> espíritú xínú cuèchi núú Yá Ndiòxí. <sup>33</sup>Núu xiá<sup>n</sup> ndìhi-ni ní cana ñaha-í xii-n. Te táxáhu xii-n sá vèxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yá Ndiòxí, te cuíní-ndí cachí tnúhu-n nchàa tnúhu ní cachí Yá Ndiòxí cáhá<sup>n</sup>-n —càchí té Còrneliú xàha<sup>n</sup>-dě.

### **Té Pèlú ní ndatnúhu-dé ndìhi ñáyíu ní tacá vehe té Còrneliú**

<sup>34</sup>Te té Pèlú xàha<sup>n</sup>-dě xií-yu:

—Vitna ní xiní-í sá Yá Ndiòxí cáhá<sup>n</sup> ndìhi-gá ñáyíu cuèi ndèda-ni càa ñuú, te ì<sup>n</sup>-ni quide-gá ndìhi nchaa<sup>n</sup>-yu. <sup>35</sup>Te nchaa ñáyíu nèhe sá yíñùhu núú Yá Ndiòxí, te xiquide váha-yu, te nchaa<sup>n</sup>-yu cùu váha iní ñáhá-gá xií-yu. Te ñá túú quide cuendá-gá cuèi ná ñáyíu ñuú cùu-yu. <sup>36</sup>Te Yá Ndiòxí ní tendaha-gá Xítóhó Jesucristú ní sáhá<sup>n</sup>-gá ní xíndecu-gá nació<sup>n</sup> Isràél, te ní xàha<sup>n</sup>-gá xií-yu ì<sup>n</sup> tnúhu váha nàcuáa cuu váha iní-yu. Te diu-ni mee Jèsús cúnù-gá núú ñáyíu ni càa xico ñuyíú. <sup>37</sup>Te nàha-ndo sá dñha-gá ndíi Juáá ní cáhá<sup>n</sup> ndíi tnúhu Yá Ndiòxí núú ñáyíu, te ní dâcuándute ñaha ndíi xií-yu. Te dâtnùní ní ngüíta Jèsús ní cáhá<sup>n</sup>-gá tnúhu-gá distrítú Galileá, te dâtnùní ní sáhá<sup>n</sup>-gá nihíi nació<sup>n</sup> Isràél ní cáhá<sup>n</sup>-gá tnúhu-gá núú ñáyíu. <sup>38</sup>Te sa nàha-ndo sá Yá Ndiòxí ní sánaha-gá Espíritú-gá xii Jèsús téé ñuú Nazàrèt ndécú ndìhi-dé chindèe ñaha-xi xii-dé. Te nàha-ndo sá ñí xica cuu Jèsús ní quide tátna-gá nchaa ñáyíu yíhi ñaha espíritú cùndìhi yucu ñávàha. Te ío vâi-gá sá vâha ní quide ñaha-gá xií-yu, te duca<sup>n</sup> ñí quide-gá, chi Yá Ndiòxí ní chindee ñaha-gá. <sup>39</sup>Te mee-ndí ní xiní-ndí nàcuáa ní quide Jèsús ñuú Jerusalén ndìhi nihíi nació<sup>n</sup> Isràél. Te ní sata caa ñaha-güedé xii-gá núú cùrúxí

te yacá<sup>n</sup> ní xíhí-gá. <sup>40</sup>Te núú ùmí nduu ní dándótó ñaha Yá Ndiòxí xii-gá. Te ní cuíní-gá sá cùndècu Xítóhó Jesucristú titní nduu sátá ñí ndoto-gá cuendá cáhá<sup>n</sup> ndìhi ñaha-gá xii-ndí nchaa-ndí nàcuáa ní xica cuu-ndí ndìhi-gá. <sup>41</sup>Te ñá ncháá ñáyíu ni xiní ñáhá xii-gá, chi mee-ni nchùhú cue téé ní cachí-gá sá cáhá<sup>n</sup> ndáá-ndí sá ñí ndoto-gá, chi ní xíndecu ndìhi-ndí-gá, te ní xihí ní xexi-ndí ndìhi-gá, núu cáhá<sup>n</sup> ndáá-ndí sá ñí ndoto-gá. <sup>42</sup>Te ní cachí-gá sá nchùhú quíhí<sup>n</sup>-ndí cùñaha-ndí xii ñáyíu sá méé Yá Ndiòxí ní táuchíú<sup>n</sup>-gá sá Jèsús cada ndáá-gá cuèchi nchaa ñáyíu ndècu vívú ndìhi cuèchi nchaa ñáyíu ní xíhí. Te duca<sup>n</sup> ñí xàha<sup>n</sup> Yá Ndiòxí xii Jèsús, te diu-ni duca<sup>n</sup> ñí cachí Jèsús cáhá<sup>n</sup>-ndí. <sup>43</sup>Te cue téé ní cáhá<sup>n</sup> tnúhu Yá Ndiòxí ndéé sanaha ñí cáhá<sup>n</sup>-güedé sá quíxí Jèsús, te ní cachí-güedé sá ncháá ñáyíu na quèndáá iní ñáhá xii Jèsús, te cada càhnu iní-gá nchaa cuèchi-yu —càchí té Pèlú xàha<sup>n</sup>-dě xií-yu.

### **Ní quexìo Espíritú Yá Ndiòxí ní ngúndecu ndìhi cue ñáyíu ñá túú cùu ñáyíu isràél**

<sup>44</sup>Te mei òré cáhá<sup>n</sup>-dè ndedóho-yu ní quexìo Espíritú Yá Ndiòxí ní ngúndecu ndìhi nchaa ñáyíu-á<sup>n</sup>. <sup>45</sup>Te cue téé isràél cuáhá<sup>n</sup> ndìhi té Pèlú, cue téé ní sándáá iní tnúhu Jèsús ní cuñùhu vihi-güedé sá ñí quexìo Espíritú Yá Ndiòxí ní ngúndecu ndìhí-yu, chi cuendá sá ñà dñú ñáyíu isràél cùu-yu núu xiá<sup>n</sup> ní cuñùhu-güedé. <sup>46</sup>Te ní cutnùní sá ñí quexìo Espíritú Yá Ndiòxí ní ngúndecu ndìhí-yu, chi ní ngüíta-yu cáhá<sup>n</sup>-yu tnúhu sá dâcàhu iní ñáhá Espíritú-gá, tnúhu sá ñà túú xiní-yu cáhá<sup>n</sup>-yu. Te ní ndacá<sup>n</sup> táhù-yu núú Yá Ndiòxí cuendá nchaa sá ñí quide-gá. <sup>47</sup>Te dâtnùní ní xàha<sup>n</sup> tē Pèlú:

—Vitna te cuandute ñáyíu ní natuha ichi Xítóhó Jesucristú chi sa ndècu ndìhí-yu Espíritú Yá Ndiòxí dâtná



cuini-ndó ndècu ndihi nchoo, núu xíá<sup>n</sup> vá cúu càchí dava-gá ñáyiú sá vǎ cúu cuànduté-yu —càchí-dé xǎhá<sup>n</sup>-dǎ xií-yu.

<sup>48</sup>Te dàtnùní ní xáha<sup>n</sup>-dǎ xii ñáyiú:

—Vitna te cuandute-ndo, te òré-á<sup>n</sup> te cacunehe-ndo Xítohó Jesucristú —càchí-dé xǎhá<sup>n</sup>-dǎ xií-yu.

Te dàtnùní ní cáhá<sup>n</sup> ndàhú-yu núú tǎ Pèlú cundecu ndihi ñaha-dǎ xií-yu ì<sup>n</sup> úú nduu.

### Té Pèlú ní cani-dé cuèndú núú ñáyiú sàndáá iní tnúhu Jèsús ñuú Jerusalén

**11** Te cue téé ní táuchíú<sup>n</sup> Jèsús dacuàha ñaha xii ñáyiú tnúhu-gá, ndihi cue ñáyiú ní sàndáá iní tnúhu-gá, ñáyiú ndècu distritú Jùdeá ní ñihí-yu tnúhu sá ñáyiú ñá túú cùu ñáyiú isràél ní sàndáá iní-yu tnúhu Yá Ndiòxí. <sup>2</sup>Te òré ní ndexìo té Pèlú ñuú Jerusalén, te ñáyiú isràél ñáyiú ní cachí sá cáda nchàa nacuáa ní cáhá<sup>n</sup> ndíi Moisés ní satnuhu ñahá-yu xii-dé. <sup>3</sup>Te ní xáhá<sup>n</sup>-yu xii té Pèlú:

—¿Ná cuèndá ní sáhá<sup>n</sup>-n ndéé ndíácǎ<sup>n</sup> ní cáhá<sup>n</sup> ndihi-n ñáyiú-ǎ<sup>n</sup>, te ñá túú quidé-yu dàtná quidé nchòo-i? Te ní sáhá<sup>n</sup>-n yàcá<sup>n</sup> ní xexi-n ndihí-yu —càchí-yu xǎhá<sup>n</sup>-yu xii-dé.

<sup>4</sup>Te té Pèlú ní cani-dé cuèndú nacuáa ní cuu núú ní sáhá<sup>n</sup>-dé, te xáha<sup>n</sup>-dǎ:

<sup>5</sup>—Ní xíndecu-í ñuú Jòpé. Te òré càhá<sup>n</sup> ndihi-í Yá Ndiòxí, te ní dácótó ñaha-xi xii-í sá vǎxi cuu<sup>n</sup> ì<sup>n</sup> dóo cáhnú àndiu, te ndùtu ndi cumí xíquí-xi, te ní ngava-xi núú ndécù-í. <sup>6</sup>Te ní xíndéhé vǎha-í, te ní xiní-í nchaa quití yòdo núú-xi. Te ì<sup>n</sup> xichi yòdo quití cúmí sáhá-xi, te ì<sup>n</sup> xichi yòdo quití déé<sup>n</sup>, te ì<sup>n</sup> xichi yòdo cóó, te ì<sup>n</sup> xichi yòdo quití ndava. <sup>7</sup>Te ní tecú dóho-í càhá<sup>n</sup> ì<sup>n</sup> sá càhá<sup>n</sup>, te càchí-xi: “Pèlú, ndacuíní cahni-n ndéda-ni càa quití-a caxi-n-dí”, cachí sá ní cáhá<sup>n</sup>-á<sup>n</sup>. <sup>8</sup>Te ní xáha<sup>n</sup>-í: “Vá cáhni-í-dí chi càchí tnúhu sá sánú ìchi ñaha xii nchúhú ñáyiú isràél sá vǎ cúu

càxi-ndí nchaa quití-a”, xáha<sup>n</sup>-í. <sup>9</sup>Te ní tecú dóho-í càhá<sup>n</sup>-ni tucu núú ñnu, te càchí sá càhá<sup>n</sup>-á<sup>n</sup>: “Vá cúu càchí-n sá vǎ cúu càxi-n-dí, chi mee Yá Ndiòxí ní cachí-gá sá díú nchàa quití-á<sup>n</sup> cuu caxi-o”, càchí sá càhá<sup>n</sup>-á<sup>n</sup>. <sup>10</sup>Te duca<sup>n</sup> ní cáhá<sup>n</sup> sá ní cáhá<sup>n</sup>-á<sup>n</sup> ùní xito, te dàtnùní cuàndaa dóó-ǎ<sup>n</sup> ndihi nchaa quití-á<sup>n</sup> andiu. <sup>11</sup>Te òré-ni ní quexìo úní cue téé vehe núú ndécù-í. Te cue téé-á<sup>n</sup> ní tendaha ñaha ì<sup>n</sup> téé ñuú Cèsareá nánducu ñaha-güedé xii-í. <sup>12</sup>Te mee Espiritú Yá Ndiòxí ní cachí-xi sá quihí<sup>n</sup>-í ndihi-güedé, te ní cachí-xi sá ñà túú ñà cani iní-í. Te tnàhá ñúú cue téé ndècu iha ní sáhá<sup>n</sup> ndihi ñaha-güedé xii-í, te nchaa-ndí ní sáhá<sup>n</sup>-ndí vehe té Còrneliú ñuú Cèsareá. <sup>13</sup>Te ní cani-dé cuèndú nacuáa ní cuu ní sáhá<sup>n</sup> ì<sup>n</sup> espíritú xínú cuèchi núú Yá Ndiòxí vehe-dé, te ní quíhu-xi ndéé xití vehe-dé, te ní xáha<sup>n</sup>-xi xii-dé: “Tendaha-n cuè téé na quihí<sup>n</sup>-güedé ñuú Jòpé quíngana-güedé ì<sup>n</sup> téé nàni Xímú, àdi Pelú chi úú ñuú-dé. Te candeca ñaha-güedé quixi. <sup>14</sup>Te téé-á<sup>n</sup> cachí tnúhu-dé nása cada-n nàníhí tǎhú-n ndihi ñadihí-n, ndihi landú-n, ndihi nchaa ñáyiú xínu cuechi vehe-n”, duha ní xáha<sup>n</sup> espíritú-á<sup>n</sup> xii té Còrneliú. <sup>15</sup>Te òré ní ngüfta-í càhá<sup>n</sup> ndihi-í-yu ní quexìo Espiritú Yá Ndiòxí ní ngúndecu ndihí-yu dàtná ní quide-xi cút-nàhà ní taxi Yá Ndiòxí Espiritú-gá ndéé díhna ní ngúndecu ndihi nchoo. <sup>16</sup>Te ní ndacu iní-í nacuáa ní cáhá<sup>n</sup> Xítohó Jesucristú, te duha ní cachí-gá: “Té Juàá ní xóo dacuàndute-dé ñáyiú, dico yúhú sǎñaha-í Espiritú Yá Ndiòxí cundecu ndihí-yu”, duha ní cachí-gá. <sup>17</sup>Te Yá Ndiòxí ní sǎñaha-gǎ Espiritú-gá cundecu ndihi ñáyiú ñá túú cùu ñáyiú isràél dàtná ní quide-gá cút-nàhà ní sàndáá iní-ó tnúhu Jèsús, núu xíá<sup>n</sup> vá càchí-í sá vǎ cúu càda-í ì<sup>n</sup> sá cuini Yá Ndiòxí cada-í —càchí té Pèlú xáha<sup>n</sup>-dǎ xií-yu.

<sup>18</sup>Te sáta dúcá<sup>n</sup> ní xáha<sup>n</sup> tẽ Pèlú, te ñá túú-gã ná tnúhu ní cãhá<sup>n</sup>-yu, te ío ní cudíí ìní-yu nchaa nàcuáa ní quide Yá Ndiöxí, te ní xítñàhá-yu:

—Tnàhá nchaa ñáyíu ñá túú cùu ñáyíu isràél naníhí tàhú-yu núu na dàñá-yu nchaa sá cuèhé sá dúhá quidé-yu, chi duca<sup>n</sup> cuíni Yá Ndiöxí cunduu — cãchí-yu xítñàhá-yu.

### Ñáyíu sàndáá ìní tnúhu Jèsús ñúú Antiòquiá

<sup>19</sup>Te sáta ní sahani-güedé té Těvá, te ní cuíni-güedé cada úhú-güedé nchaa ñáyíu ní sàndáá ìní-xi tnúhu Jèsús, te ní xíté nuú-yu ndi tnahá ì<sup>n</sup> ì<sup>n</sup> ñúú. Te davá-yu cuáhá<sup>n</sup>-yu ndéé distritú Fènicíá ndíhi distritú Chìpré ndíhi ñúú Antiòquiá. Te ní cãhá<sup>n</sup>-yu tnúhu Jèsús núu mee-ni ñáyíu isràél, te ñá ní xítñúhu-yu dava-gá-yu. <sup>20</sup>Te dava-gá ñáyíu distritú Chìpré ndíhi ñáyíu ñúú Cirené ní sáhá<sup>n</sup>-yu ñúú Antiòquiá. Te ñá díú mèe-ni ñáyíu isràél ní cãhá<sup>n</sup> ndíhí-yu, chi tnàhá ñáyíu ñá túú cùu ñáyíu isràél ní xáhã<sup>n</sup>-yu tnúhu Jèsús. <sup>21</sup>Te ní chindee ñàha-gá xii ñáyíu cãhá<sup>n</sup> tnúhu-gá, te vãi-gá-yu ní sàndáá ìní-yu-gá chi ní tuhá-yu ichi-gá.

<sup>22</sup>Te ñáyíu ndècu ñúú Jerusàlén ñáyíu ní sàndáá ìní tnúhu Jèsús ní níhí-yu tnúhu nàcuáa ní cuu, núu xíã<sup>n</sup> ní tendàhá-yu té Bèé cuáhá<sup>n</sup>-dé ñúú Antiòquiá. <sup>23</sup>Te òré ní quexio té Bèé, te ní xiní-dé nàcuáa ní quide ñaha-gã xíí-yu sá ní naníhí tàhú-yu, núu xíã<sup>n</sup> ío ní cudíí ìní-dé. Te ní dácáhu ìní ñáhá<sup>n</sup>-dẽ, te ní xáha<sup>n</sup>-dẽ:

—Ío nducu ndèe-ndo cada-ndo nchaa sá cãchí Yá Ndiöxí cada-ndo —cãchí-dé xáhã<sup>n</sup>-dẽ xíí-yu.

<sup>24</sup>Te té Bèé cúú-dẽ ì<sup>n</sup> tée váha ìní-xi, te ndècu ndíhi-dé Espíritú Yá Ndiöxí, te ío sàndáá ìní-dé tnúhu Jèsús. Te vãi vihi ñáyíu ní tuhá-yu ichi-gá.

<sup>25</sup>Te dătnùní cuáhá<sup>n</sup> té Bèé ñúú Tarsú cuánúndúcú-dẽ té Sàulú. <sup>26</sup>Te òré ní naníhí ñáhá<sup>n</sup>-dẽ, te ndèca ñaha-dé cuáhá<sup>n</sup> ñúú Antiòquiá, te yàcá<sup>n</sup> ní xíndecu-güedé ì<sup>n</sup> cuíá ndíhi ñáyíu ní sàndáá ìní tnúhu Jèsús, te vãi-yu ní dácúáhá ñàha-güedé tnúhu-gá. Te díu-ni ñúú Antiòquiá ní dánámí ñàhá-yu Cristiànú xii nchaa ñáyíu sàndáá ìní tnúhu Jèsús.

<sup>27</sup>Te ndéé dává-á<sup>n</sup> ní quee ì<sup>n</sup> úú cue tée cãhá<sup>n</sup> tnúhu Yá Ndiöxí ñúú Jerusàlén cuáhá<sup>n</sup>-güedé ñúú Antiòquiá. <sup>28</sup>Te ì<sup>n</sup>-dé nání-dẽ Àgábú, te ní chindee ñàha Espíritú Yá Ndiöxí xii-dé, te ní sáhá<sup>n</sup>-dé núu nchaa ñáyíu sàndáá ìní tnúhu-gá, te ní xáha<sup>n</sup>-dẽ xíí-yu sá quíxí ì<sup>n</sup> tnamá níhíí ñuyíú. Te duca<sup>n</sup> ní cuu sáta ní ngúnut-ñí té Clàudiú tée yìndaha cuèhé nació<sup>n</sup>. <sup>29</sup>Núu xíã<sup>n</sup> nchaa ñáyíu sàndáá ìní tnúhu Jèsús ñúú Antiòquiá ní ndatnúhu-yu sá chíndèé-yu nchaa ñáyíu sàndáá ìní tnúhu-gá ndécú distritú Jùdeá cuendá vá ndóhó vihi-yu docó. Te nàcuáa ní níhí-yu, te duca<sup>n</sup> ní sacá<sup>n</sup> tnáhã-yu. <sup>30</sup>Te ní tacá díhú<sup>n</sup>-ã<sup>n</sup>, te nèhe té Bèé ndíhi té Sàulú cuáhá<sup>n</sup>, cuáha-güedé cue tée yìndaha ñáyíu sàndáá ìní tnúhu-gá.

### Sáta ní xíhí té Jàcobó, te ní ngava té Pèlú vecaá

**12** Te ndéé dává-á<sup>n</sup> ní ngúíta té Hèrodés tée yìndaha ñaha xii ñáyíu isràél ní quide úhú-dé ì<sup>n</sup> úú ñáyíu sàndáá ìní tnúhu Yá Ndiöxí. <sup>2</sup>Te ní táúchíú<sup>n</sup>-dẽ ní tnií-güedé té Jàcobó ñaní té Juáá, te ní sahani ñaha-güedé ndíhi machití. <sup>3</sup>Te ío ní cudíí ìní dava ñáyíu isràél cuendá sá ní sahani ñaha-güedé xii té Jàcobó, núu xíã<sup>n</sup> ní tendaha tùcu té Hèrodés sandàdú-dé ní sáhá<sup>n</sup> tnií tucu-güedé té Pèlú. Te duca<sup>n</sup> ní quide-dé cútñàhá ní xóo vico ní xexí-yu pàá sá ñà túú yìhi levadurá. <sup>4</sup>Te ní naníhí-güedé té Pèlú, te ní tnií ñaha-güedé ndécá ñàha-güedé cuáhá<sup>n</sup> vecaá. Te té Hèrodés

ní táuchíú<sup>n</sup>-dě cuáhá<sup>n</sup> sáhú<sup>n</sup> ì<sup>n</sup> sandàdú cuèndé-güedé té Pèlú. Te ní xáha<sup>n</sup>-dě:

—Cundeé-ndó ndì cùmí ndì cùmí-ndó ttee-ǎ<sup>n</sup> —càchí-dé xǎha<sup>n</sup>-dě xii-güedé.

Te té Hèrodés ní sani iní-dé queñuhu-dé té Pèlú vecaá òré ná yǎha vico cuèndá cahni ñaha-güedé cáhá<sup>n</sup>-dě ní cùu. <sup>5</sup>Te ní xǎhi-ni té Pèlú vecaá, te ní xíndeé cuaa ñaha sandadú xii-dé. Te cue ñáyiú sandáá iní tnúhu Yá Ndiòxí ío ní xicá<sup>n</sup> táhú-yu núú-gǎ cuèndá sá ñà túú nǎ cada ñaha-güedé xii-dé.

### Yá Ndiòxí ní dácacu-gǎ té Pèlú vecaá

<sup>6</sup>Ì<sup>n</sup> niú-gǎ quihi té Pèlú vecaá ní cùu, te nduu tnéé tauchìu<sup>n</sup> té Hèrodés quíhí<sup>n</sup> sandàdú queñuhu ñaha-güedé xii-dé vecaá cuèndá quini nchaa ñáyiú nása cada ñaha-güedé ní cùu. Te té Pèlú cáá-dé xidí-dé xití vecaá, te ndi ndùú dúcú<sup>n</sup> ndáhá-dé ndútú càdená, te xio xio ñni-dé ndécú sandadú, te dava-gǎ sandàdú xíndeé-güedé yèhe vecaá. <sup>7</sup>Te ní quexìo ì<sup>n</sup> espíritú xínú cuèchi núú Yá Ndiòxí xití vecaá núú cáá tǎ Pèlú xidí-dé, te uu<sup>n</sup>ni ní dáyèhé-xi xití vecaá, te ní dǎnguìhi ñaha-xi xii-dé, te xǎha<sup>n</sup>-xi xii-dé:

—Yáchí, ndàcáo —càchí-xi xǎha<sup>n</sup>-xi xii-dé.

Te ní ndacáo-dé, te nchaa cadená ndútú dúcú<sup>n</sup> ndáhá-dé ní nandáxí. <sup>8</sup>Te ní xáha<sup>n</sup> tucu espíritú-ǎ<sup>n</sup> xii-dé:

—Yáchí, nucuíhnu dóó-n, te ndfhu-n chàu-n —càchí-xi xǎha<sup>n</sup>-xi xii-dé.

Te ní ndfhu nuu-dé dóó-dé, te ní xáha<sup>n</sup> tucu espíritú-ǎ<sup>n</sup>:

—Candixi dóó-n, te na quíhí<sup>n</sup>-ó —càchí-xi xǎha<sup>n</sup>-xi xii-dé.

<sup>9</sup>Te té Pèlú ní chinchícu<sup>n</sup>-dé espíritú-ǎ<sup>n</sup>, te ñá ní cùtnuní iní-dé nǔu ndáá ì<sup>n</sup> espíritú xínú cuèchi núú Yá Ndiòxí duca<sup>n</sup> quide àdi ñáhá, te dàcoto ñaha-xi xii-dé ní sani iní-dé. <sup>10</sup>Te ndèndaha-ni-dé espíritú-ǎ<sup>n</sup> cuáhá<sup>n</sup> ní yǎha-dé nàcuáa xínutnǎi sandàdú, te ta

yǎha-gǎ-dé núú ndécú dàva-gǎ-güedé. Te ní sáá-dé ndéé yuyèhe núú ndèdì caá nàcuáa ní yǎha ichi sá cuáhá<sup>n</sup> ndéé xití ñuú, te ní nacaá<sup>n</sup> mée yèhe-ǎ<sup>n</sup>, te ní quee-dé cuáhá<sup>n</sup>-dé ndihi espíritú-ǎ<sup>n</sup>. Te ní tnahá-dé ì<sup>n</sup> tnuú, te yàcá<sup>n</sup> ní dándò ñaha espíritú-ǎ<sup>n</sup> xii-dé. <sup>11</sup>Te dàtnuní ní nene váha saní núú-dé, te ní cutnùnì iní-dé, te ní cachí-dé:

—Ndáá sá Yá Ndiòxí ní tendaha-gǎ espíritú-ǎ<sup>n</sup> ní quixi-xi ní dácacu ñaha-xi xii-í cuèndá sá và cáhni ñaha té Hèrodés. Te dava ñáyiú isràèl ío ní cudíí iní-yu cuèndá sá nǐ cuini té Hèrodés cahni ñaha-dé xii-í —duha ní cachí-dé sáta nǐ cutnùnì iní-dé.

<sup>12</sup>Te sáta nǐ cutnùnì iní-dé sá nǐ cácu-dé, te cuáhá<sup>n</sup>-dé vehe ì<sup>n</sup> ñaha nani Mariá nǎnǎ tǎ Juáá, àdi Mácú chi úú ñu-dé, te xíá<sup>n</sup> ndécú vai-yu càhá<sup>n</sup> ndihí-yu Yá Ndiòxí. <sup>13</sup>Te té Pèlú ní quexìo-dé ndéé yuyèhe ní dácásá<sup>n</sup>-dǎ, te ní quixi ì<sup>n</sup> xíchí nánì Ròdé ní quixi ndehe-xi nǎ cúú ñáyiú dàcasa<sup>n</sup>. <sup>14</sup>Te ní nucúhu<sup>n</sup> ndudú-xi sá dǎú tǎ Pèlú, te ní cudíí víhí iní-xi, dico ñá ní nacaá<sup>n</sup>-xi yuyèhe. Te ní quene cunu-xi cuáhá<sup>n</sup> ngúñaha-xi xǐ-yu sá nútñi té Pèlú yuyèhe ndaa quehé. <sup>15</sup>Te ñá ní sandáá iní-yu tnúhu ní cáhá<sup>n</sup>-xi, te xǎhá<sup>n</sup>-yu xii-xi:

—¡Ná tnúhu vihi cáhá<sup>n</sup>-ó<sup>n</sup> xíchí lúcú! —càchí-yu xǎhá<sup>n</sup>-yu.

Te xǎha<sup>n</sup>-xi sǎ ndáá nútñi-dé, te xǎhá<sup>n</sup>-yu:

—Ñá dǎú tǎ Pèlú chi espíritú sá xító ñaha xii-dé cúú sǎ càhá<sup>n</sup> —càchí-yu xǎhá<sup>n</sup>-yu xii-xi.

<sup>16</sup>Te òré duca<sup>n</sup> xǐtnáhá-yu, te té Pèlú ní dácásá<sup>n</sup> tucu-dé yuyèhe. Te ní sáhá<sup>n</sup>-yu ní nacaá<sup>n</sup>-yu yuyèhe, te ní xiní-yu sá dǎú tǎ Pèlú, te ní cuúhu vihí-yu. <sup>17</sup>Te ní quide-dé ndaha-dé núú-yu cuèndá cadí-yu yuhú-yu. Te ní ngúfta-dé ní cani-dé cuèndú nàcuáa ní quide ñaha Yá Ndiòxí xii-dé sá nǐ dácacu

ñaha ì<sup>n</sup> espíritú xínú cuèchi núú-gă xii-dé vecaá, te ní xáha<sup>n</sup>-dê xíí-yu:

—Cúu-ndo tē Jàcobó ndihi dava-gá ñáyiú sàndáá iní tnúhu Jèsús nàcuáa ní quide ñaha Yă Ndiòxí xii-í —càchí-dé xáha<sup>n</sup>-dê xíí-yu.

Te sátá dúcá<sup>n</sup> nǐ xáha<sup>n</sup>-dê, te ní quee-dé cuáhá<sup>n</sup>-dé ingá xichi.

<sup>18</sup>Te sátá nǐ tũndaá, te ní ngúíta nchaa sandádú càhá<sup>n</sup> ì<sup>n</sup> càhá<sup>n</sup> ì<sup>n</sup>-güedé, te xĩtnàha-güedé:

—Ñá túú-gă té Pèlú yíhí vècaá, ¿te nása cada-o-i? —càchí-güedé xĩtnàha-güedé.

<sup>19</sup>Te té Hèrodés ní tendaha-dê tit-ní sandádú cuáhá<sup>n</sup>-güedé cuánúndúcú ñaha-güedé, te ñá ní nàníhí ñáhá-güedé xii-dé. Te dătnúní ní cana-dé sandádú cue tée ní xindeé ñáhá xii té Pèlú, te ní tenàá ñáhá-dê xii-güedé, te ní xáha<sup>n</sup>-dê xii dava-gá cue sandádú-dé:

—Cahni-ndo cuè tée-ă<sup>n</sup> —càchí té Hèrodés xáha<sup>n</sup>-dê.

Te dătnúní ní quee té Hèrodés distritú Jùdeá cuáhá<sup>n</sup>-dé ñuú Cèsareá, yàcá<sup>n</sup> ní ngúndecu-dé.

### Ní xíhí té Hèrodés

<sup>20</sup>Té Hèrodés ní cudéé<sup>n</sup>-dê núú ñáyiú ñuú Tírú ndihi núú ñáyiú ñuú Sídón. Te xíá<sup>n</sup> ní ndatnúhu-yu ní cuu ì<sup>n</sup>nuu tnúhu-yu, te ní xicá-yu cuáhá<sup>n</sup>-yu cuáhá<sup>n</sup> ndatnúhu ndihi ñáhá-yu xii-dé, te ní ndatnúhu ndihí-yu té Blástú. Te tée-ă<sup>n</sup> cúú-dê chiú<sup>n</sup> quide-dé núú tē Hèrodés, te ní chindee tnúhu ñaha-dê xíí-yu, chi ní càhá<sup>n</sup> ndàhú-yu núú tē Hèrodés sá vă cádá ũhú ñáhá-dê xíí-yu. Te duca<sup>n</sup> nǐ quidé-yu cuendá ñuú té Hèrodés-ă<sup>n</sup> queé să xéxí-yu. <sup>21</sup>Te ní xáha<sup>n</sup> tē Hèrodés ná nduu quíhí<sup>n</sup>-yu ndatnúhu ndihi ñaha-dê xíí-yu, te nduu-ă<sup>n</sup> nǐ quífunuu-dé ì<sup>n</sup> dóo vâha, ì<sup>n</sup> sá sácũhnu tée tàxi tnuní. Te ní ngóo-dé núú xilé váha, xilé sá sácõo nchihí tée tàxi tnuní, te ní ngúíta-dé ní

cáhá<sup>n</sup> sàhú-dé dóho-yu. <sup>22</sup>Te uu<sup>n</sup>ni ní cuáá-yu te càchí-yu:

—¡Tée-a càhá<sup>n</sup>-dé dico ñá dǐú tēe ñuyítú-a cùu-dé chi ndiòxí cúú-dê! —càchí-yu xĩtnàhá-yu.

<sup>23</sup>Te diu-ni òrè-ă<sup>n</sup> nǐ yáha ì<sup>n</sup> espíritú xínú cuèchi núú Yă Ndiòxí, te ní sãñaha-xi cuèhé xii té Hèrodés. Te duca<sup>n</sup> nǐ tnahá-dé chi mee-dê ñá ní xáha<sup>n</sup>-dê sá ñáyiú cùu-dé, te ní càhá<sup>n</sup>-yu sá ndiòxí cúú-dê. Te nchìto-gá-dé ní sanú ñáhá tĩndácú xii-dé, te dătnúní ní xíhí-dé.

<sup>24</sup>Te ío titní xichi ní sáhá<sup>n</sup> ñáyiú sàndáá iní tnúhu Yá Ndiòxí ní càhá<sup>n</sup>-yu tnúhu-gá, te ío chítú-yu ní sándáá iní-yu tnúhu-gá.

<sup>25</sup>Te té Bèè ndihi té Sàulú ní ndihi chiú<sup>n</sup>-güedé, te ní ndee-güedé ñuú Jerusàlén cuáhá<sup>n</sup>-güedé ndihi té Juàá, àdi Mácú chi úú òu-dé.

### Té Bèè ndihi té Sàulú cuáhá<sup>n</sup>-güedé dăcuàha-güedé ñáyiú tnúhu Yá Ndiòxí nchaa ñuú xicá

**13** Te ñuú Antiòquiá ndécú ì<sup>n</sup> úú cue tée càhá<sup>n</sup> tnúhu Yá Ndiòxí núú nchaa ñáyiú ní sándáá iní-xi tnúhu-gá. Te ndècu tucu ì<sup>n</sup> úú cue tée cùu mestrú dăcuàha ñaha-güedé xíí-yu tnúhu-gá. H<sup>n</sup>-dê nání-dê Bèè, te ì<sup>n</sup>-dê nání-dê Xímú, te té Xímú-ă<sup>n</sup> xáha<sup>n</sup>-güedé Nègrú chi tnuu-dê. Te ingá-dé nání-dê Lùciú, te tée-ă<sup>n</sup> cúú-dê tée ñuú Cirené. Te ingá-dé nání-dê Sàulú, te ingá tucu-dé nání-dê Manàén. Te té Manàén-ă<sup>n</sup> ndihi té Hèrodés tée cùu gobiernú Galileá ío váha ní xóo càhá<sup>n</sup> ndihi tñaha-güedé cútñahá ní cuu líhli-güedé. <sup>2</sup>Te ì<sup>n</sup> nduu ñá túú nă ní xèxi ñáyiú ní sándáá iní tnúhu Yá Ndiòxí cuendá mee-ni-gă ní càhá<sup>n</sup> ndihí-yu, te ní xáha<sup>n</sup> Espíritú Yă Ndiòxí xíí-yu:

—Tendaha-ndo tē Bèè ndihi té Sàulú quíhí<sup>n</sup>-güedé dava-gá ñuú cada-güedé

chìu<sup>n</sup> tahu-í, chi duca<sup>n</sup> cuiní-í cunduu — cächí Espíritú-gá xǎha<sup>n</sup>-xi xii-yu.

<sup>3</sup>Te ní cáhá<sup>n</sup> ndihi tucú-yu Yá Ndiöxí, te ñá túu tñahí ná ní xèxi tucú-yu, te ní sacá<sup>n</sup> ndodo-güedé ndaha-güedé díquí tē Bèé ndihi té Sàulú. Te sátá dúcá<sup>n</sup> nǐ quide-güedé, te ní quide ndee ìní ñàhǎ-yu xii-güedé.

**Té Bèé ndihi té Sàulú  
cuáhá<sup>n</sup>-güedé distritú Chìpré  
cáhá<sup>n</sup>-güedé tñuhu Yá Ndiöxí**

<sup>4</sup>Te té Bèé ndihi té Sàulú ní quee-güedé cuáhá<sup>n</sup>-güedé cuendá duca<sup>n</sup> cuiní Espíritú Yá Ndiöxí cunduu sá cáca cùu-güedé dava-gá ñuú, te ní quexìo-güedé ñuú Selèuciá, te yàcá<sup>n</sup> ní quee-güedé bàrcú cuáhá<sup>n</sup>-güedé distritú Chìpré. Te ñuú-á<sup>n</sup> cáá xití lámár chi ndècu ñuhu yichí xití ndute. <sup>5</sup>Te ní quexìo-güedé mei ñuú Salàminá, te ní quee-güedé bàrcú, te ní xica-güedé cuáhá<sup>n</sup>-güedé nchaa veñúhu ñáyiú isràél cáhá<sup>n</sup>-güedé tñuhu Yá Ndiöxí. Te cuáhá<sup>n</sup> ndihi-güedé té Juàà cuendá chindee ñaha-dé xii-güedé. <sup>6</sup>Te ní tñii-güedé ichi cuáhá<sup>n</sup>-güedé ñuú Páfós cáá ndàa ìngá xio Chìpré, te yàcá<sup>n</sup> ní naníhí tñahá-güedé ndihi ì<sup>n</sup> tée isràél nání-dé Barjèsús, te tée-á<sup>n</sup> xini-dé cada ndùu-dé, te cächí-dé sá cáhá<sup>n</sup>-dé tñuhu Yá Ndiöxí dico ñá ndàá. <sup>7</sup>Te tée-á<sup>n</sup> quidé chìu<sup>n</sup>-dé ndihi té Sèrgiú, àdi Páblú chi úú òu-dé, te cùu-dé gobièrnú Chìpré, te ío túha-dé. Te ní cana-dé té Bèé ndihi té Sàulú, chi cuiní-dé cundedóho-dé tñuhu Yá Ndiöxí. <sup>8</sup>Te tée quide nduu-á<sup>n</sup> ñǎ ní dàña-dé cáhá<sup>n</sup>-güedé tñuhu-gá, chi ñá ní cuiní-dé sá tē cùu gobièrnú-á<sup>n</sup> tuha-dé ichi Yá Ndiöxí. Te duca<sup>n</sup> nǐ quide té Barjèsús, tē xǎha<sup>n</sup>-güedé Èlimás. <sup>9</sup>Te tñahá tucu té Sàulú ndécú ũú òu-dé chi xǎha<sup>n</sup> tucu-güedé Páblú, te ndècu ndihi-dé Espíritú Yá Ndiöxí.

Te ní xíndéhé ñhí ñáhá-dé xii tēe quide nduu-á<sup>n</sup>. <sup>10</sup>Te ní xǎha<sup>n</sup>-dē:

—Yòhó, chi dàtná quidé yùcu ñávǎha quide-n chi mee-ni dándahú-n ñáyiú. Yòhó cùu-n dēhe sácufhná, chi nchaa tñuhu váha cuiní Yá Ndiöxí cáhá<sup>n</sup>-yu, te yòhó ñá dàñá-n. <sup>11</sup>Te vitna quiní-n nàcuáa cunduu, chi taxi Yá Ndiöxí ì<sup>n</sup> castiú xii-n chi vá cùtnùní-gá núu-n càca cuu-n ì<sup>n</sup> úú nduu —cächí-dé xǎha<sup>n</sup>-dē xii tēe quide nduu-á<sup>n</sup>.

Te òré duca<sup>n</sup> nǐ xǎha<sup>n</sup> tē Páblú xii-dé, te òré-ni ní cuaa-dé, te ñá túu ní cùtnùní tñahí-gá núu-dé, te ní xóo nducu-nǎ-dé ñáyiú ní xóo cuita nehe ñaha xii-dé. <sup>12</sup>Te tēe cùu gobièrnú ní xini-dé nàcuáa ní quide té Páblú, te ío ní cuñúhu-dé. Te ní tñahá ìní-dé tñuhu Jèsús, núu xǎ<sup>n</sup> ní sándáá ìní-dé.

**Té Páblú ndihi té Bèé ndécú-güedé  
ñuú Antiòquiá Písidiá**

<sup>13</sup>Te té Páblú ndihi dava-gá cue tēe xica cuu ndihi-dé ní quee-güedé bàrcú, te ní quee-güedé ñuú Páfós cuáhá<sup>n</sup>-güedé ñuú Pèrgé, te ñuú-á<sup>n</sup> yíndèhu-xi distritú Pànfiliá. Te té Juàà ní nacuíco-dé ní dándòo ñaha-dé xii-güedé cuánuhú-dé ñuú Jerusalén. <sup>14</sup>Te dava-gá-güedé ní quee-güedé ñuú Pèrgé cuáhá<sup>n</sup>-güedé ñuú Antiòquiá, te Písidiá yíndàha-xi ñuú-á<sup>n</sup>. Te nduu xíndetátú-yu, te ní sáhá<sup>n</sup>-güedé veñúhu ñáyiú isràél, te ní ngóo-güedé xití veñúhu. <sup>15</sup>Te cue tēe ndècu veñúhu ní quehe<sup>n</sup>-güedé tutú yódó tñùní nchaa tñuhu sá nǐ chídó tñùní ndii Moisés ndihi tutú yódó tñùní nchaa tñuhu sá nǐ chídó tñùní dava-gá cue tēe ní xóo cáhá<sup>n</sup> tñuhu Yá Ndiöxí ndéé sanaha, te ní dácúahá-güedé ní xíndedóho cue ñáyiú, te dàtnùní cue tēe yíndaha veñúhu-á<sup>n</sup> nǐ xǎha<sup>n</sup>-güedé xii té Páblú ndihi dava-gá-güedé:

—Nchòhó cue tēe cùu ñaní tñahá-ndǐ, te núu cuiní-ndó cáhá<sup>n</sup>-ndó tñuhu Yá

Ndiöxí, te cuu cáhá<sup>n</sup>-ndó tñavíi cuendá cutúha-yu —càchí-güedé xáha<sup>n</sup>-güedé.

<sup>16</sup>Te té Páblú ní ndacuñí-dé, te ní ndacani-dé ndaha-dé cuendá cadí-yu yuhú-yu te cundedóho-yu tnúhu cáhá<sup>n</sup>-dé, te ní xáha<sup>n</sup>-dè:

—Te nchòhó ñáyiú quide nchaa nacuaa càhá<sup>n</sup> Yá Ndiöxí ndihi nchaa nchòhó ñáyiú isràél, cundedóho-ndo nchàa-ndo ñ<sup>n</sup> tnúhu na càhá<sup>n</sup>-í-a. <sup>17</sup>Te cuèi ndéé sanduu te cuèi vitna chindee ñaha-ni Yá Ndiöxí xii nchaa ñáyiú isràél, te ní nacáxi ñaha-gã xií-yu te ní chindee ñaha-gã cuendá cáyá-yu, chi cuiní-gã sá cúu vâi-yu, te duca<sup>n</sup> ñi quide-gã cútnàhá ní xindecú-yu nació<sup>n</sup> Ègiptú. Te dâtnùní ní dácäcu ñaha-gã xií-yu ñuu-á<sup>n</sup>, chi mee-gã nchaa ndäcu-gã quidé-gã. <sup>18</sup>Te ní xindecú-yu ñ<sup>n</sup> xichi núu ñã túu tñahí sácúndecu ñáyiú údico cuíá, te xití údico cuíá-ã<sup>n</sup> ñi cundee ñi-gã nchaa sá ñi quidé-yu. <sup>19</sup>Te Yá Ndiöxí ní chindee ñaha-gã xii ñáyiú isràél, te ní dánáã-yu úsá nació<sup>n</sup>, chi cuendá ní cuiní-gã cuu cuendá-yu ñuhú-á<sup>n</sup>. <sup>20</sup>Te dâtnùní ní cachí Yá Ndiöxí sá díu-ní cuè tée cùchiu<sup>n</sup> taxi tnuní-güedé nchaa ñáyiú, te duca<sup>n</sup> ñi quide-güedé dâtná cúmí ciëndú dava cuíá. Te sátá xiã<sup>n</sup>, te ní xindecu té Sãmuél tée ní cáhá<sup>n</sup> tnúhu Yá Ndiöxí. <sup>21</sup>Te dàvã-á<sup>n</sup> ñi cuiní ñáyiú isràél sá cündècu ñ<sup>n</sup> tée quindaha ñaha-dé xií-yu, te Yá Ndiöxí ní cachí-gã sá tã Sàul quindaha-dè-yu, te tée-á<sup>n</sup> ñi cuu-dé déhe té Cís, te té Benjamín tée ní xindecu ndéé sanaha-gã ní cuu ñani tñahá-dè. Te té Sàul ní xindaha-dè ñáyiú údico cuíá. <sup>22</sup>Te Yá Ndiöxí ñã ní cuiní-gã cundecu-ni-dé quindaha-dè ñáyiú, chi ní cuiní-gã sá tã Dàvíi ndíhu ndaha-dè cue ñáyiú isràél, te ní cachí-gã: “Ío váha ní tñahá ñi-í nàcuáa quide té Dàvíi déhe tée Isái, te cada-dé nchaa nàcuáa cúnaha-í xii-dé”, duha

ní cachí Yá Ndiöxí —càchí té Páblú xáha<sup>n</sup>-dè xií-yu.

<sup>23</sup>Te ní xáha<sup>n</sup> tucu té Páblú:

—Diu-ni ñani tñahá tã Dàvíi cúu Jèsús. Te Yá Ndiöxí ní tendaha-gã Jèsús ní quixi-gã ñuyú-a cuendá nchaa ñáyiú isràél ná quindáa ñi ñahá xii Jèsús naníhi tãhú-yu, chi duca<sup>n</sup> ñi cachí Yá Ndiöxí cunduu. <sup>24</sup>Te cútnàhá vátã ngüita-gã Jèsús cáhá<sup>n</sup>-gã tnúhu Yá Ndiöxí, te ní cáhá<sup>n</sup> té Juàá núu ñáyiú isràél sá xini ñuhu-xi dañá-yu nchaa sá cuèhé sá dúhá, te cuanduté-yu. <sup>25</sup>Te sa ta cùyatni-ni-gã cúu-dé, te ní xáha<sup>n</sup>-dè xií-yu: “Nchòhó càchí-ndó sã yúhú cúu-í Crístú Yaa ndétú-ndó dico ñahá, chi ñã díu yúhú cúu-í Crístú, chi davitna quixi Crístú Yaa tendaha Yá Ndiöxí quixi ñuyú-a. Te yúhú cúu-í ñ<sup>n</sup> tée duu<sup>n</sup> duu<sup>n</sup> ñã túu tàu nandaxi cuèdicó chàu-gã dico quide-í chiu<sup>n</sup>-gã”, duha ní cáhá<sup>n</sup> te Juàá —càchí té Páblú xáha<sup>n</sup>-dè xií-yu.

<sup>26</sup>Te ní xáha<sup>n</sup> tucu té Páblú:

—Cundedóho tucu-ndo ñngã tnúhu na càhá<sup>n</sup>-í. Nchòhó tñahá-ndó cùu-ndo ñani tñahá ndii Àbrahám, te xini-ndó sã Yá Ndiöxí cúnù-gã. Te diu-ni-gã cuiní-gã sá nchãá-ndó cundedóho-ndo tnúhu-gã, chi cùu-xi tnúhu sá càhá<sup>n</sup> nàcuáa naníhi tãhú-ndó. <sup>27</sup>Te nchaa ñáyiú ndècu ñuu Jerusálén ndihi nchaa cue tée cùmu ñã ní cùtnuní ñi-yu ndihi-güedé sã Yá Ndiöxí ní tendaha-gã Jèsús ní quixi-gã ñuyú-a. Te ñã ní sãha-yu cuendá sã díu Jèsús ní cacunehe cue tée ní cáhá<sup>n</sup> tnúhu Yá Ndiöxí ndéé sanaha cuèi ní dácuaã-yu tnúhu-gã veñuhu-yu ndi tñahá únã nduu, nduu ndetátú-yu. Te ní cachí-yu sã ndècuéchi Jèsús, te ní xáhã<sup>n</sup>-yu sá cáhni ñaha-güedé xii-gã. Te xiã<sup>n</sup> sa ñaha cue tée ní xóo cáhá<sup>n</sup> tnúhu-gã ndéé sanaha sã dúcã<sup>n</sup> càhá<sup>n</sup>-yu. <sup>28</sup>Te cuèi ñã túu ñã ní quide-gã te ní xáhã<sup>n</sup>-yu xii té Pilátú tée cùu gobiernú sá táuchiu<sup>n</sup>-dè cahni ñaha-güedé xii-gã. <sup>29</sup>Te xiã<sup>n</sup> núu ní sata caa ñaha-güedé

xii-gá núú cùrúxí. Te ní quide-güedé nchaa nàcuáa ní chídó tñuní cue téé ní cáhá<sup>n</sup> tñúhu Yá Ndiöxí ndéé sanaha. Te sátá nì xíhí-gá, te ní nunehe ñaha-güedé xii-gá núú cùrúxí, te nchìdo ñaha-güedé cuáhá<sup>n</sup>, te ní chíhi ñaha-güedé ì<sup>n</sup> xití yaú. <sup>30</sup>Te Yá Ndiöxí ní dándótó-gã Jèsús. <sup>31</sup>Te titní xito ní sáhá<sup>n</sup> Jèsús núú ndécú ñáyiú ní xica cuu ndihi-gá, ñáyiú ní quee distritú Galileá ní sáhá<sup>n</sup>-yu ndihi-gá ñuú Jerusalén. Te vitna nchaa ñáyiú-á<sup>n</sup> xáhá<sup>n</sup>-yu xii dava-gá ñáyiú isràél nàcuáa ní cuu ní ndoto-gá.

<sup>32</sup>Te nchúhú càhá<sup>n</sup>-ndí nàcuáa cada-ndo nàníhí tàhú-ndó, chi Yá Ndiöxí ní xáha<sup>n</sup>-gã xii cue ñaní tnáhá-ó nì xíndecu ndéé sanaha sã téndàha-gá Déhe-gá Jèsús quixi-gá ñuyíú-a. <sup>33</sup>Te ní quixi-gá ní xíhí-gá, te ní dándótó ñaha Yá Ndiöxí xii-gá, te núú xíá<sup>n</sup> naníhí tàhú-ó núu na quíndáá iní-ó-gã. Te ì<sup>n</sup> téé ní cáhá<sup>n</sup> tñúhu Yá Ndiöxí ndéé sanaha nì chídó tñuní-dé núú sàlmú cúú ùú nàcuáa ní cáhá<sup>n</sup> Yá Ndiöxí ní xáha<sup>n</sup>-gã xii Déhe-gá, te duha ní xáha<sup>n</sup>-gã: “Yòhó cúú-n Déhe-í, te vitna cutnùnì iní ñáyiú sá yùhú cúú-í Tátá-n”, duha ní xáha<sup>n</sup>-gã xii Jèsús. Te ñu-ni duca<sup>n</sup> nì chídó tñuní téé ní cáhá<sup>n</sup> tñúhu-gá ndéé sanaha. <sup>34</sup>Te ingá xichi tucu núú tütú-gá ní chídó tñuní ì<sup>n</sup> téé ní xíndecu ndéé sanaha nàcuáa ní xáha<sup>n</sup>-gã xii Déhe-gá, te duha ní xáha<sup>n</sup>-gã: “Mee-ni sã vâha cada ñaha-í dàtná ní xí-í té Dàvíí”, duha ní xáha<sup>n</sup>-gã. Te duca<sup>n</sup> nì chídó tñuní téé ní xíndecu ndéé sanaha nàcuáa ní cáhá<sup>n</sup> Yá Ndiöxí, chi òré ní xíhí Jèsús te ní dándótó ñaha-gá cuendá sã vã tñú yìqui cuñú-gã. <sup>35</sup>Te núú xíá<sup>n</sup> duha ní chídó tñuní ì<sup>n</sup> téé ní xíndecu ndéé sanaha nùú librí Sàlmú nàcuáa ní xáha<sup>n</sup>-dè xii-gá: “Vá dánhá-n sã tñú yìqui cuñú Déhe-n chi ío vâha quide-gá”, duha ní chídó tñuní téé ní xíndecu ndéé sanaha —càchí té Pàblú xáha<sup>n</sup>-dè xí-yu.

<sup>36</sup>Te xáha<sup>n</sup> tucu-dé:

—Te té Dàvíí ní quide-dé nchaa chiú<sup>n</sup> ní táhú Yá Ndiöxí cada-dé, te dàtnùnì ní xíhí-dé. Te ní chindúxi ñaha-güedé xii-dé yatni nàcuáa yíndúxi cue ñaní tnáhá-dè ndéé sanaha-gã, te xíá<sup>n</sup> nì téhyú yiqui cuñú-dé. <sup>37</sup>Te Jèsús chi ñá ní téhyú yiqui cuñú-gã, chi ní dándótó ñaha Yá Ndiöxí xii-gá. <sup>38</sup>Te cuiní-í cachí tñúhu-í xii-ndo cuendá cutnùnì iní-ndó nchaa-ndo sã cáda càhnu iní Yá Ndiöxí nchaa cuéchi-o, chi ní xíhí Jèsús cuendá naníhí tàhú-ó. <sup>39</sup>Te nchaa ñáyiú na quíndáá iní ñáhá xii Jesús te cada càhnu iní-gá nchaa sã ñà túú vâha ní quidè-yu, chi núu mee-ni tñúhu ní chídó tñuní ndí Moisés ná quíndáá iní-yu te vã nàníhí tàhú-yu. <sup>40-41</sup>Te ío coto-ndo mée-ndo cuendá sã vã yâha-ndo dàtná ní cachí Yá Ndiöxí yâha cue ñáyiú ñá túú ní quide vâha ní xíndecu ndéé sanaha. Te nàcuáa ní cáhá<sup>n</sup>-gã ní chídó tñuní ì<sup>n</sup> téé ní cáhá<sup>n</sup> tñúhu-gá ndéé sanaha, te duha ní xáha<sup>n</sup>-gã xí-yu dàvã-á<sup>n</sup>:

Cundedóho nchaa nchòhó ñáyiú cuèhé yuhu-xi na càhá<sup>n</sup>-í ì<sup>n</sup> tñúhu te quínì-ndó nã cuñúhu-ndo, yúhú quidè-í vâi núú sã ío vâha vitna ndècu-ndo ñuyíú-a,

te cuèí na còo ñáyiú cachí tñúhu xii-ndo nàcuáa ndùu nchaa sã vâha-á<sup>n</sup>, dico nchòhó vã quíndáá iní-ndó, te sã dúcã<sup>n</sup> càda-ndo vã quíndáá iní-ndó, te dàcuíta nihnu-ndo mée-ndo.

Duha ní xáha<sup>n</sup>-gã xí-yu te duca<sup>n</sup> nì chídó tñuní téé ní cáhá<sup>n</sup> tñúhu-gá ndéé sanaha —càchí té Pàblú xáha<sup>n</sup>-dè xí-yu.

<sup>42</sup>Te òré ní ndee té Pàblú veñúhu ñáyiú isràél ndihi cue téé xica cuu ndihi-dé, te ní cáhá<sup>n</sup> ndàhú ñáyiú yìhi veñúhu núú-dè sã quèh<sup>n</sup>-dé núú ùná nduu, te ñu-ni tñúhu ní cáhá<sup>n</sup>-dé cáhá<sup>n</sup> tucu-dé òré quexio-dé. <sup>43</sup>Te sátá nì tñúhú veñúhu-yu, te vâi ñáyiú isràél ndihi ñáyiú ní chitnahá ñáhá xí-yu nchicú<sup>n</sup> nihnu quide nacuáa quidè-yu càhá<sup>n</sup>

ndihí-yu Yá Ndiöxí cuáhá<sup>n</sup> ndihí-yu té Páblú ndihí té Bèé. Te ní xáha<sup>n</sup>-güedé xií-yu sá vǎ dáñá ndèé-yu canchicú<sup>n</sup> nihnú-yu tnúhu sá cǎhá<sup>n</sup> nàcuáa quide Yá Ndiöxí sá cúu-xí-yu.

<sup>44</sup> Te núú ùná nduu, nduu ndètatú-yu ní quexìo vai vihi ñáyiú, chi nihíí ñuú ní quexìo ndedóho-yu tnúhu Yá Ndiöxí.

<sup>45</sup> Te cuendá sá ïo vǎi ñáyiú ní quexìo, núu xiǎ<sup>n</sup> ní cuu cuédú ínì ñáhá ñáyiú isràél xii té Páblú, te ní xícuehè ñáhá-yu xii-dé. Te ní xáhá<sup>n</sup>-yu xii-dé sá dándàhú ñáhá-dé xií-yu ndihí tnúhu cǎhá<sup>n</sup>-dé.

<sup>46</sup> Te té Páblú ndihí té Bèé ñá túú ní yùhú ñáhá-güedé xií-yu. Te ní xáha<sup>n</sup>-güedé:

—Xini ñuhu-xi díhna-gá nchòhò ñáyiú isràél cǎhá<sup>n</sup> ndihí-ndí tnúhu Yá Ndiöxí, te mee-ndo ñǎ cuíní-ndó cùndedóho-ndo. Te sá dúcá<sup>n</sup> quide-ndo, te vǎ nánihí tǎhú-ndó, te ni vǎ cǎhá<sup>n</sup>-gá-ndí tnúhu Yá Ndiöxí núú-ndó, dico cǎhá<sup>n</sup>-ndí núú dàva-gá ñáyiú cuèi ñá díú ñáyiú isràél cúu-yu, <sup>47</sup> chi duca<sup>n</sup> ní táuchíú<sup>n</sup> Yá Ndiöxí cada-ndí. Te ní cachí-gá:

Cuíní-í cundecu-ndo dàtná ïí<sup>n</sup> tée yòtnuú ñuhú cundecu-ndo

cǎhá<sup>n</sup>-ndó tnúhu-í núú nchàa ñáyiú ñá túú cùndihí-ndo ñáyiú ndècu nihíí ñuyíú, te naníhí tǎhú-yu,

duha ní cǎhá<sup>n</sup>-gá —cǎchí té Páblú ndihí té Bèé xǎha<sup>n</sup>-güedé xií-yu.

<sup>48</sup> Te ñáyiú ñá túú cùu ñáyiú isràél ïo ní cudíí ínì-yu sá dúcá<sup>n</sup> ní cǎhá<sup>n</sup>-güedé, te ní xitnàhá-yu sá ïo váha cuáhá<sup>n</sup> tnúhu Yá Ndiöxí. Te mee Yá Ndiöxí sa nàha-gá nándi cùu ñáyiú naníhí tǎhú, te díu-ni ñáyiú-á<sup>n</sup> ní sándáá ínì-yu.

<sup>49</sup> Te nchaa xichi xiǎ<sup>n</sup> ní sáhá<sup>n</sup>-yu ní cǎhá<sup>n</sup>-yu tnúhu-gá. <sup>50</sup> Te cue tée isràél ní ndatnúhu-güedé ndihí cue tée cùnuu, ndihí cue ñáyiú díhí cùnuu, te ñáyiú díhí-á<sup>n</sup> ñá túú tnàhí cùmánì-yu veñúhu. Te ní xáha<sup>n</sup>-güedé sá cǎdá úhú-yu té Páblú ndihí té Bèé, te dàtnùní cuícú<sup>n</sup> ñáhá-yu xii-güedé, te duca<sup>n</sup> ní quidé-yu.

<sup>51</sup> Te ní casa<sup>n</sup> ñuhu té Páblú ndihí té Bèé sáhá-güedé ní naquidi-güedé tícǎ chùhmá ní tníí sáhá-güedé. Te duca<sup>n</sup> ní quide-güedé cuendá cutnùní ínì-yu sá ñá túú ní quide váha-yu. Te dàtnùní ní quee-güedé cuáhá<sup>n</sup>-güedé ñuú Ìconiú.

<sup>52</sup> Te ñáyiú ní sándáá ínì-xi tnúhu Jèsús ïo váha ní cuu ínì-yu cuendá sá ní naníhí tǎhú-yu, te ncháa-yu sa ndècu ndihí-yu Espiritú Yá Ndiöxí.

### Té Páblú ndihí té Bèé ndécú-güedé ñuú Ìconiú

**14** Te ní quexìo té Páblú ndihí té Bèé ñuú Ìconiú. Te ní sáhá<sup>n</sup>-güedé veñúhu ñáyiú isràél, te ïo váha ní cǎhá<sup>n</sup>-güedé tnúhu Yá Ndiöxí, te vǎi ñáyiú isràél ndihí ñáyiú ñá túú cùu ñáyiú isràél ní sándáá ínì-yu tnúhu-gá.

<sup>2</sup> Te dava ñáyiú isràél ñá ní sándáá ínì-yu, te ní cǎhá<sup>n</sup> cuèhé-yu cuendá té Páblú ndihí té Bèé cuendá sá vǎ quindáá ínì ñáyiú ñá túú cùu ñáyiú isràél. <sup>3</sup> Te ní xíndecu-güedé titní nduu, te ñá túú tnàhí ni yùhú-güedé ní dǎcuáhá-güedé ñáyiú tnúhu Yá Ndiöxí. Te mee-gǎ ní chindee ñàha-gá ní quide-güedé titní núú sǎ vǎ yòo tnàhí ndàcu cada, te ïo ní cuñúhu-yu. Te duca<sup>n</sup> ní quide-gá cuendá cutnùní ínì-yu sá ndáá cǎhá<sup>n</sup>-güedé sá mée-gǎ ïo cùu ínì ñáhá-gǎ xií-yu, te naníhí tǎhú-yu núu na quindáá ínì-yu tnúhu-gá. <sup>4</sup> Te ní quee dava ñáyiú ñuú Ìconiú, davá-yu cùndihí-yu ñáyiú isràél ñáyiú ñá túú sándáá ínì tnúhu Jèsús. Te davá-yu cùndihí-yu cue tée ní táuchíú<sup>n</sup> Jèsús cǎhá<sup>n</sup> tnúhu-gá. <sup>5</sup> Te ñáyiú isràél ndihí dava-gá ñáyiú ñá túú sándáá ínì-xi ní cuu ïí<sup>n</sup>nuú-yu ndihí cue tée cùnuu sá cǎní-yu-güedé, te cuáha yúú ñáhá-yu xii-güedé. <sup>6</sup> Te té Páblú ndihí té Bèé ní níhí-güedé tnúhu sá cuínì-yu caníhá-yu, núu xiǎ<sup>n</sup> dayuhu ní quee-güedé cuáhá<sup>n</sup>-güedé ñuú Lìstrá ndihí ñuú Dèrbé. Te ndi ndúú ñuú-á<sup>n</sup> yíndèhu-xi Licaonía. Te ní sáhá<sup>n</sup>-güedé



dava-gá ñuú lĩhli cãa yatni xía<sup>n</sup>. <sup>7</sup>Te nchaa ñuú-á<sup>n</sup> ñĩ cáhá<sup>n</sup>-güedé tnúhu Jësús.

**Ñuú Lìstrá ní sãha yúu  
ñáhã-yu xii té Pãblú**

<sup>8</sup>Te ñuú Lìstrá ndécú ì<sup>n</sup> tée yacua, mee-ni nùcúo-dé chi duca<sup>n</sup> tnàhĩ cãa-dé ní cacu-dé. <sup>9</sup>Te ndédóho-dé tnúhu cãhá<sup>n</sup> té Pãblú, te ní cutnùnĩ iní té Pãblú sã ìo sãndáá iní tée yacua-ã<sup>n</sup> sã Yã Ndiöxĩ cada tátna ñaha-gã xii-dé, núu xía<sup>n</sup> ní xíndéhé ñaha váha té Pãblú xii-dé. <sup>10</sup>Te té Pãblú ní cáhá<sup>n</sup> ñhi-dé, te ní xáha<sup>n</sup>-dë:  
—Ndacuíñĩ cunutnĩ váha-n  
—càchĩ-dé xãha<sup>n</sup>-dë.

Te ní ndacuíñĩ cunu-dé te ní xica-ni-dé. <sup>11</sup>Te òré ní xiní-yu sã tẽ Pãblú ní quide tátna-dé tée yacua-ã<sup>n</sup>, te ncháa-yu ní cáhá<sup>n</sup>-yu tnúhu mèe-yu tnúhu Licàoniá. Te ní cáhá<sup>n</sup> ñhi-yu, te xĩtnáhã-yu:

—Cue tée-ã<sup>n</sup> sãnuu sã ñãyiu cùu-güedé dico ñáhã, chi ndiöxĩ cúu-güedé te ní quexio-güedé ñuyíu-a  
—càchĩ-yu xĩtnáhã-yu.

<sup>12</sup>Te ní cachĩ-yu sã tẽ Bèé cúu-dë ndiöxĩ dánànĩ-yu Jüpitér, te té Pãblú cúu-dë ndiöxĩ dánànĩ-yu Mèrcuriú, chi cuendá tée-á<sup>n</sup> cúu-dë tée cãhá<sup>n</sup>. <sup>13</sup>Te cãa ì<sup>n</sup> veñúhu yuhu ñuú-á<sup>n</sup> núu quidé cãhnú-yu ndiöxĩ sã dánànĩ-yu Jüpitér. Te dútú yíndàha veñúhu-á<sup>n</sup> ndécã-dë ì<sup>n</sup> úú ndicutu cuáhã<sup>n</sup> quehé veñúhu, te ñũhu itá dúcú<sup>n</sup>-güedi. Te cue quiti-á<sup>n</sup> cahni-dé cada cãhnu-dé ndihĩ-yu té Bèé ndihĩ té Pãblú ní cùu, chi duca<sup>n</sup> quidé-yu quide cahnú-yu ndiöxĩ-yu. <sup>14</sup>Te té Bèé ndihĩ té Pãblú ní ñhi-güedé tnúhu nãcuãa sãni iní-yu cadã-yu, te ní ndátã-güedé dóó-güedé cuendá cutnùnĩ iní-yu sã ñã tnàhã iní-güedé nãcuãa sãni iní-yu cadã-yu. Te xĩnu-güedé cuãnguihu-güedé tnuú-yu, te ñhi ní cáhá<sup>n</sup>-güedé, te xãha<sup>n</sup>-güedé:

<sup>15</sup>—¿Nã cuendã duca<sup>n</sup> cuinĩ-ndó cãda-ndo? Te ñu-ni tnàha ñãyiu-ndo cùu-ndĩ, dicó-ni tnúhu Yã Ndiöxĩ véxi-ndĩ dacuãha ñaha-ndĩ xii-ndo cuendã sã vã cadã-gã-ndó nãcuãa quide-ndo, te quindãá iní-ndó Yã Ndiöxĩ, chi ì<sup>n</sup>dii-ni Yã Ndiöxĩ ndécú. Te ñu-gã ní cadũha-gã andiu ndihĩ ñuyíu-a ndihĩ lãmar ndihĩ nchaandi túhú sã ìo ñuyíu-a. <sup>16</sup>Te ndéé sanaha ní dãnã Yã Ndiöxĩ ní quidé-yu nãcuãa cuáhã<sup>n</sup> iní mèe-yu. <sup>17</sup>Te ní xóo cada-gã sã váha cuendã cutnùnĩ iní-yu sã ìo váha iní-gã. Te ñu-gã dácùu<sup>n</sup>-gã dáu, te tàxi-gã sã nchító-ó chi xitò-gã nchaa tatã xítú-ó, te xía<sup>n</sup> cúdĩ iní-ó ndecu-o ñuyíu-a —càchĩ té Pãblú ndihĩ té Bèé xãha<sup>n</sup>-güedé xii-yu.

<sup>18</sup>Te cuẽ duca<sup>n</sup> ñĩ xáha<sup>n</sup>-güedé nchaa tnúhu-á<sup>n</sup>, dico ìo úhú ní sãndáá iní-yu ñã ní sãhnĩ-yu ndicutu-á<sup>n</sup> chi cuendã duca<sup>n</sup> tnàhĩ quidé-yu sãhnĩ-yu ndicutu òré quidé cãhnú-yu ndiöxĩ-yu.

<sup>19</sup>Te ñuú Antiöquíã ndihĩ ñuú Ìconiú xĩndecu dava ñãyiu isrãel, te ní queé-yu cuáhã<sup>n</sup>-yu ñuú Lìstrá núu ndécú té Pãblú. Te xía<sup>n</sup> ñĩ quexiò-yu te ní xãhá<sup>n</sup>-yu xii ñãyiu dii ñuú xía<sup>n</sup> sã cãhnĩ-yu té Pãblú. Te ní sãha yúu ñáhã-yu xii-dé, te ní cáhá<sup>n</sup>-yu sã ñĩ xĩhĩ-dé, te ní tñi ñaha-güedé xii-dé, te tãñuhu ñaha-güedé xii-dé cuáhã<sup>n</sup> ì<sup>n</sup> xio yuhu ñuú ní sã dáquéné ñaha-güedé. <sup>20</sup>Te ní quexio cue ñãyiu sãndáá iní tnúhu Jësús núu cátuu-dé-á<sup>n</sup>, te ní nadúcú<sup>n</sup> ndéé ñáhã-yu xii-dé, te nini xĩnutnĩ-yu-á<sup>n</sup> ñĩ ndacúo-dé cuãnuhú ndihĩ ñaha tucu-dé xii-yu xitĩ ñuú. Te nduu tñé-á<sup>n</sup> ñĩ ndee-dé ndihĩ té Bèé cuáhã<sup>n</sup>-güedé ñuú Dèrbé.

<sup>21</sup>Te ní cáhá<sup>n</sup>-güedé tnúhu Yã Ndiöxĩ ñuú-á<sup>n</sup>, te ìo vãi ñãyiu ní sãndáá iní-yu tnúhu-gã. Te dãtnùnĩ ní quee-güedé cuáhã<sup>n</sup> tucu-güedé ñuú Lìstrã, ndihĩ ñuú Ìconiú, ndihĩ ñuú Antiöquíã. <sup>22</sup>Te ní xáha<sup>n</sup>-güedé xii-yu sã vã dãnã

nìhnú-yu tnúhu Jèsús. Te sá dúcá<sup>n</sup> ní cáhá<sup>n</sup>-güedé, te vîhi-gá ní cudíí iní-yu cadá-yu nàcuáa cuiñí Yá Ndiöxí cadá-yu, te ní xáha<sup>n</sup>-güedé:

—Dacuití cündecu-o ñuyú-a ndoho-o, te dätñuní duca<sup>n</sup> te nacuaca ñaha Yá Ndiöxí xii-o —càchí-güedé xáha<sup>n</sup>-güedé xií-yu.

<sup>23</sup>Te ní sáhá<sup>n</sup>-güedé ndi tnahá ì<sup>n</sup> ì<sup>n</sup> xichi núu ndécú ñáyiú dàcuaha tnúhu Yá Ndiöxí, te ní taxi ndecu-güedé cue téee quindaha ñaha xií-yu, te ní cáhá<sup>n</sup> ndihi-güedé Yá Ndiöxí, te ñá túu tnahí ná ní xèxi-güedé cuendá sá ñí cáhá<sup>n</sup> ndihi-güedé-gá. Te ní xáha<sup>n</sup>-güedé sá Yá Ndiöxí coto ñaha-gá xií-yu chi ñiu-ni-gá ní sándáá iní-yu.

### **Té Páblú ndihi té Bèè cuáhá<sup>n</sup> tucu-güedé ñuú Antiòquiá Siríá**

<sup>24-25</sup>Te dätñuní ní quee té Páblú ndihi té Bèè cuáhá<sup>n</sup>-güedé, ní yáha-güedé distrítú Pìsidíá. Te ní quexìo-güedé ñuú Pèrgé, xíá<sup>n</sup> ñí cáhá<sup>n</sup>-güedé tnúhu Jèsús. Te ñuú-á<sup>n</sup> yíndèhu-xi Panfilíá. Te dätñuní cuáhá<sup>n</sup>-güedé ñuú Àtaliá. <sup>26</sup>Te yàcá<sup>n</sup> ní quee-güedé bàrcú cuánuhú tucu-güedé ñuú Antiòquiá. Te ñuú-á<sup>n</sup> cúu-xí ñuú núu ñí xícá<sup>n</sup> táhü-yu núu Yá Ndiöxí cuendá sá chíndèe ñaha-gá xii-güedé chiu<sup>n</sup> quide-güedé. Te cuendá sá ñí ndihi chiu<sup>n</sup>-güedé nchaa ñuú núu ñí sáhá<sup>n</sup>-güedé, núu xíá<sup>n</sup> cuánuhú-na-güedé. <sup>27</sup>Te ní ndexìo-güedé ñuú-á<sup>n</sup>, te ní cana-güedé nchaa ñáyiú sándáá iní tnúhu-gá, te ní cani-güedé cuendú núu-yu nchaa nàcuáa ní cuu núu ñí sáhá<sup>n</sup>-güedé, te xáha<sup>n</sup>-güedé: “Yá Ndiöxí ío ní chindee ñaha-gá xii-ndí ní cáhá<sup>n</sup>-ndí tnúhu-gá núu ñí sáhá<sup>n</sup>-ndí, te mee-gá ní quide sá tnahá ñáyiú ñá túu cùu ñáyiú isràèl ní xíndedóho-yu tnúhu-gá cuendá quíndáá iní-yu”, càchí-güedé xáha<sup>n</sup>-güedé xií-yu. <sup>28</sup>Te vâi nduu ní xíndecu-güedé ñuú

Antiòquiá ndihi nchaa ñáyiú ní sándáá iní tnúhu Jèsús.

### **Ní natacá ñáyiú sándáá iní tnúhu Jèsús ñuú Jerusalén**

**15** Te ní quee ì<sup>n</sup> úú cue téee distrítú Jüdeá cuáhá<sup>n</sup>-güedé ñuú Antiòquiá, te ní sáá-güedé, te ní xáha<sup>n</sup>-güedé xii ñáyiú sándáá iní tnúhu Jèsús sá núu vá cuáhá-güedé seña ñíi nchaa cue téee dätñá ní cachí ndíi Moisés, te vá náníhí tãhú-güedé. <sup>2</sup>Te sá dúcá<sup>n</sup> ñí cáhá<sup>n</sup> cue téee-á<sup>n</sup>, te ní ngúíta té Páblú ndihi té Bèè ní tenàá-güedé cue téee-á<sup>n</sup>, chi dandáhú ñáhá-güedé cuiñí-güedé ní cùu. Te nchaa ñáyiú sándáá iní tnúhu-gá ní cachí-yu sá quíhí<sup>n</sup> té Páblú ndihi té Bèè ndihi ì<sup>n</sup> úú-gá-güedé ñuú Jerusalén. Te yàcá<sup>n</sup> cada-güedé ì<sup>n</sup> jündá ndihi mee-ni cuèee téee ní táuchíú<sup>n</sup> Jèsús càhá<sup>n</sup> tnúhu-gá, ndihi cue téee yíndaha ñáyiú sándáá iní tnúhu-gá ñuú-á<sup>n</sup>, te jündá-á<sup>n</sup> cada ndáá-güedé tnúhu ní cáhá<sup>n</sup> cue téee ní sáá ñuú Antiòquiá.

<sup>3</sup>Te nchaa ñáyiú sándáá iní tnúhu-gá ní quide ndee iní ñáhá-yu xii-güedé, te ní tñii-güedé ichi cuáhá<sup>n</sup>-güedé. Te ní yáha-güedé distrítú Fèniciá ndihi distrítú Sàmariá, te yàcá<sup>n</sup> ní cani-güedé cuendú nása ní cuu ní tuha ñáyiú ñá túu cùu ñáyiú isràèl ichi Yá Ndiöxí, te ní cudíí víhí iní nchaa ñáyiú ní xíndedóho-á<sup>n</sup>.

<sup>4</sup>Te té Páblú ndihi té Bèè ní ndexìo-güedé ñuú Jerusalén, te ío ní cudíí iní-yu sá ñí ndexìo váha-güedé. Te ndècu dava-gá cue téee ní táuchíú<sup>n</sup> Jèsús dácuáha ñaha xií-yu tnúhu-gá, ndihi cue téee yíndaha ñaha xií-yu, ndihi dava-gá ñáyiú sándáá iní tnúhu-gá, te ní cani-güedé cuendú núu-yu nàcuáa ní quide Yá Ndiöxí ní chindee ñaha-gá xii-güedé ní quide-güedé chiu<sup>n</sup>-gá. <sup>5</sup>Te ndècu ì<sup>n</sup> úú cue téee ní tuha ichi Yá Ndiöxí, te cue téee-á<sup>n</sup> cúu-güedé cue

tée fariséú, te ní ndacuñí-güedé, te ní xáha<sup>n</sup>-güedé:

—Dacuití xini ñuhu-xi sá cuáha-güedé seña ñii cue tée cumaní cue tée ñá túú cùu ñáyiú isràél, te cúnaha-ndo sá ná cáda-güedé nchaa nàcuáa ní chídó tñuní ndí Moisés —cächí cue tée cùu fariséú-á<sup>n</sup> xáha<sup>n</sup>-güedé xii-güedé.

<sup>6</sup> Te cue tée ní táuchí<sup>n</sup> Jèsús dacuàha ñaha xii ñáyiú tñuhu-gá, ndihi cue tée yíndaha ñáyiú sàndáá iní tñuhu-gá ní quide-güedé jündá cuendá ní ndatnúhu-güedé nása cunduu. <sup>7</sup> Te vài vihi tñuhu ní cáhá<sup>n</sup>-güedé. Te té Pèlú ní ndacuñí-dé, te ní xáha<sup>n</sup>-dè xii-güedé:

—Nchòhó cue tée ndècu ndihi-í ichi Xítóhó Jesucristú, chí cündèdóho ì<sup>n</sup> tñuhu na càhá<sup>n</sup>-í-a. Sa naha-ndo sá ñ cachí Yá Ndióxi sá díu-í cáhá<sup>n</sup>-í tñuhu Jèsús núú ñáyiú ñá túú cùu ñáyiú isràél cuendá sá quíndáá iní-yu, te naníhí tàhú-yu. <sup>8</sup> Dico Yá Ndióxi sa naha-gá nása càa iní ì<sup>n</sup> ì<sup>n</sup> ñáyiú. Te cùt-nuní iní-ó sá cúú iní ñáhá-gá xii cue ñáyiú ñá túú cùu ñáyiú isràél, chí ní sánaha-gá Espíritú-gá ndécú ndihí-yu dàtná cuíní-ndó ñí taxi-gá ndécú ndihi nchoo. <sup>9</sup> Chi Yá Ndióxi ì<sup>n</sup> nuu-ni cùu iní ñáhá-gá xii-o nchàa-o ndihi cue ñáyiú ñá túú cùu ñáyiú isràél, chí tñahá-yu ní xócání-gá nchaa sá cuèhè sá dúhá ñí xóo cadá-yu ndéé òré ní sàndáá iní-yu Jèsús. <sup>10</sup> ¿Te ná cuendá nchòhó cuíní-ndó càda ñáyiú ní sàndáá iní tñuhu-gá ì<sup>n</sup> sá ñá tñahá iní-gá sá cáda-yu? Te cuíní-ndó dàndoho-ndó-yu. Te ni nchò te ni cue ñaní tñahá-ó ñí xíndecu ndéé sanaha ñá ní ndàcú-yu cadá-yu nchaa xíá<sup>n</sup>. <sup>11</sup> Te vá dúcá<sup>n</sup> càhá<sup>n</sup>-ndó, chí sa naha-ndo sá Yá Ndióxi ní cundàhú iní ñáhá-gá xii-o, te díó duca<sup>n</sup> ñí quide-gá sá naníhí tàhú-ó nchàa-o. Te díu-ni duca<sup>n</sup> ñí quide-gá ñáyiú ñá túú cùu ñáyiú isràél, te ní naníhí tàhú-yu —cächí té Pèlú xáha<sup>n</sup>-dè xii-güedé.

<sup>12</sup> Te dàtnuní té Bèè ndihi té Páblú ní ngúita-güedé ní cáhá<sup>n</sup>-güedé, te ní xíndedóho-yu nchaa tñuhu ní cáhá<sup>n</sup>-güedé. Te ní xáha<sup>n</sup>-güedé xii-yu nàcuáa ní chindee ñaha Yá Ndióxi xii-güedé, te ní quide-güedé vài núú sá và yòo tñahí ndàcu cada, te duca<sup>n</sup> te ní cutnùní iní ñáyiú ñá túú cùu ñáyiú isràél sá ndàá càhá<sup>n</sup>-güedé. <sup>13</sup> Te òré ní ndihi cuèndú ní cáhá<sup>n</sup>-güedé, te té Jàcobó ní xáha<sup>n</sup>-dè:

—Nchòhó cue tée ndècu ndihi-í ichi Xítóhó Jesucristú, chí cündèdóho ì<sup>n</sup> tñuhu na càhá<sup>n</sup>-í-a. <sup>14</sup> Té Xímú, àdi Pelú chí úú díu-dé, ní cani-dé cuèndú nàcuáa ní quide Yá Ndióxi ndéé dífna ní dáquée dí<sup>n</sup>-gá ñáyiú ñá túú cùu ñáyiú isràél tnuú nchaa ñáyiú ñá túú ndècu ichi-gá, cuendá cuíní-gá chiñuhu ñahá-yu xii-gá. <sup>15</sup> Te dàtnuní ní cáhá<sup>n</sup>-dè nàcuáa ní cáhá<sup>n</sup> Yá Ndióxi ndéé sanaha. Te duha ní chídó tñuní cue tée ní xóo cáhá<sup>n</sup> tñuhu-gá ndéé sanaha nàcuáa ní cáhá<sup>n</sup>-gá, te duha ní cachí-gá:

<sup>16</sup> Dàtná cuíní-ndó cùu ì<sup>n</sup> vehe ní sáá te ní ngoyo te dàndaa-güedé xito cùu uú, duca<sup>n</sup> sàtnahá-xi cada-xi ì<sup>n</sup> nduu,

chí ñaní tñahá ndii Dàvíí ní xóo cáhá<sup>n</sup> ndihi ñahá-yu xii-í ní cùu, te ní dáñá ndéé-yu ichi-í,

te na quixi-í te natuha ñaha tucú-yu.

<sup>17</sup> Te duca<sup>n</sup> te vài ñáyiú ñá túú cùu ñáyiú isràél nanducú-yu ichi-í te cáhá<sup>n</sup> ndihi ñahá-yu.

<sup>18</sup> Duha ní cáhá<sup>n</sup> Yá Ndióxi, te duca<sup>n</sup> ní chídó tñuní cue tée ní xóo cáhá<sup>n</sup> tñuhu-gá ndéé sanaha —cächí té Jàcobó xáha<sup>n</sup>-dè xii-güedé.

<sup>19</sup> Te xáha<sup>n</sup> tucú-dé:

—Yúhú cächí iní-í sá và cúú dàsatú-ó iní nchaa ñáyiú ta sàndáá iní-xi tñuhu Yá Ndióxi, ñáyiú ñá túú cùu ñáyiú isràél, te ì<sup>n</sup> úú-ni tñuhu cúnaha-o nàcuáa cadá-yu. <sup>20</sup> Dico xini ñuhu-xi daquihí<sup>n</sup>-ó tütú cúnaha-o sá và cáxi-gá-yu nchaa sá

nchító-ó ndùu táhú nchaa sá cächí-yu cùu ndióxí-yu. Te cūñaha-o sã vã cãhá<sup>n</sup> ndihí cue tée ñadhí te núu ñã díú ñadhí-güedé cūu-yu, te ni cuè ñáyiu dñí vã cãhá<sup>n</sup> ndihí-yu tée te núu ñã díú yĩ-yu cùu-güedé, te vã cãxí-yu cuñú quiti cuèhné, te vã cãxí-yu ññí.<sup>21</sup> Te duca<sup>n</sup> cūñaha-o, chi ndi tnahá ñuú núu ndécú-yu, te xíndecu ñáyiu israhél dácuahá-yu tnúhu ní chídó tnùní ndíi Moisés, te ndi tnahá nduu ndètátú-yu dácuahá-yu tnúhu ndíi veñúhu-yu — cächí té Jácobó xãha<sup>n</sup>-dẽ xii-güedé.

<sup>22</sup> Te dãtnùní cue tée ní táuchíú<sup>n</sup> Jèsús dacuàha ñaha xí-yu tnúhu-gá, ndihí cue tée yíndaha ñáyiu sãndáá iní tnúhu-gá ní cachí-güedé sá ndúcú-güedé ñ<sup>n</sup> úú-gá cue tée quíhí<sup>n</sup> ndihí té Pãblú ndihí té Bèè ñuú Antiòquiá, te diu-ni duca<sup>n</sup> ñí cãhá<sup>n</sup> dava-gá ñáyiu ndècu ichi-gá. Te úú cue tée ní ndúcú-güedé, ñ<sup>n</sup>-dé nání-dẽ Silás, te ñ<sup>n</sup>-dé nání-dẽ Jùdás, àdi Barsabás chi úú ñuú-dé, te cùnuu-güedé ndi ndúu-güedé.<sup>23</sup> Te ní cadúha nchaa cue tée cùnuu tutú canehe-güedé quíhí<sup>n</sup>, te duha cãhá<sup>n</sup>-xi:

“Cóvãha díí-ndó nchãa-ndo. Nchúhú cue tée ní táuchíú<sup>n</sup> Jèsús cãhá<sup>n</sup>-ndí tnúhu-gá, ndihí cue tée yíndaha cue ñáyiu sãndáá iní tnúhu-gá quide ndee iní ñãhá-ndí xii nchòhó cue ñáyiu ndècu ndihí-ndí ichi-gá cuèi ñã díú ñáyiu israhél cùu-ndó. Te nchòhó ñáyiu xíndecu ñuú Antiòquiá, ndihí nchòhó ñáyiu ndècu distritú Siríá, ndihí nchòhó ñáyiu ndècu distritú Ciliciá, cächí tnúhu-ndí xii-ndo sã<sup>24</sup> ñí ñíhí-ndí tnúhu sá ñ<sup>n</sup> úú cue tée ndècu iha ní quixi-güedé núu ndécú-ndó, te ñã túú chiú<sup>n</sup> ni tahu-ndí quixi-güedé. Te sá ñ<sup>n</sup> tnúhu ní cãhá<sup>n</sup>-güedé ní xãha<sup>n</sup>-güedé xii-ndo sã ngündecu seña ññi-ndo, te canchicú<sup>n</sup> nihnu-ndo nchãa nacuaá ní chídó tnùní ndíi Moisés, te xíã<sup>n</sup> ní sani ñ<sup>n</sup> ní sani úú iní-ndó, chi ñã túú xíní-ndó ñuu ndáá tnúhu cãhá<sup>n</sup>-güedé àdi ñã ndáá.<sup>25</sup> Te ní ndatnúhu-ndí

nacuáa cunduu sá téndãha-ndí úú cue tée quixi-güedé ndihí té Bèè ndihí té Pãblú, cue tée ío cùu iní-ndí, te cue tée-á<sup>n</sup> cãhá<sup>n</sup>-güedé nacuaá cãhá<sup>n</sup>-ndí-a.<sup>26</sup> Te diu-ni té Bèè ndihí té Pãblú ní sãhá<sup>n</sup>-güedé ní cãhá<sup>n</sup>-güedé tnúhu Xí-tohó Jesucristú nchaa xichi. Te ndi tnahá cuáhã<sup>n</sup>-güedé cuíni-yu cahni ñãhá-yu xii-güedé.<sup>27</sup> Te tendaha-ndí té Jùdás ndihí té Silás quixi-güedé tnãhá-güedé cachí tnúhu váha-güedé nacuaá cuáhã<sup>n</sup> tnúhu cãhá<sup>n</sup>-ndí.<sup>28</sup> Te diu-ni duca<sup>n</sup> cãhá<sup>n</sup>-ndí cächí tnúhu-ndí nacuaá cãhá<sup>n</sup> Espiritú Yã Ndióxí cada-ndo, chi nchúhú vã cãhá<sup>n</sup>-ndí sá cadá-ndó nchãa sá ñí cãhá<sup>n</sup> ndíi Moisés cada ñáyiu, chi ío úhú, te vã yõ ndacu cada. Te vitna na cãhá<sup>n</sup>-ndí ñ<sup>n</sup> úú-ni tnúhu nacuaá cada-ndo.<sup>29</sup> Vã cãxí-ndó sã nchító-ó ndùu táhú nchaa sá cächí ñáyiu cùu ndióxí-yu, te vã cãxí-ndó ññí, te vã cãxí-ndó cūñú quiti cuèhné, te vã cãhá<sup>n</sup> ndihí cue tée ñadhí te núu ñã díú ñadhí-güedé cūu-yu, te ni cuè ñáyiu dñí vã cãhá<sup>n</sup> ndihí-yu tée te núu ñã díú yĩ-yu cùu-güedé. Te núu na càda-ndo nchaa nacuaá cãhá<sup>n</sup>-ndí-a, te cada váha-ndo. Te vitna ío cada ndee ñí-ndó nchãa-ndo-na.” Duha ní chídó tnùní-güedé núu tütú ní tendaha-güedé cuáhã<sup>n</sup>.

<sup>30</sup> Te ní quide ndee ñí-yu cue tée quíhí<sup>n</sup> ñuú Antiòquiá, te duca<sup>n</sup> te ní xica-güedé cuáhã<sup>n</sup>-güedé. Te òré ní quexio-güedé ñuú-á<sup>n</sup>, te ní cana-güedé nchaa ñáyiu sãndáá iní tnúhu Jèsús, te ní sãñaha-güedé tutú xí-yu.<sup>31</sup> Te ní dácuahá-yu tutú ní sãñaha-güedé-á<sup>n</sup>, te ní cudíí víhí ñí-yu chi ío váha cãhá<sup>n</sup> tutú-á<sup>n</sup>.<sup>32</sup> Te té Jùdás ndihí té Silás tnãhá-güedé ní nduu táhú-güedé cãhá<sup>n</sup>-güedé tnúhu sá dácãhu iní ñãhá Yã Ndióxí. Te ní xãha<sup>n</sup>-güedé vãi tnúhu nacuaá cadá-yu, te víhi-gá ní cudíí ñí-yu cadá-yu nacuaá cãhá<sup>n</sup> Yã Ndióxí cadá-yu.<sup>33</sup> Te ní xíndecu-güedé ñ<sup>n</sup> úú

nduu ndihí-yu, te dǎtnùnǐ ní quide ndee iní ñáhǎ-yu xii-güedé cuendá sá ñuhú-güedé núú vèxi-güedé, te mee-ni tǎ Jüdás cuánuhú-dé. <sup>34</sup>Te té Silás ní xáha<sup>n</sup>-dǎ sá vǎ ñuhú-ni-dé. <sup>35</sup>Te té Pǎblú ndihi té Bèé ní ndóo-güedé ní cáhá<sup>n</sup>-güedé tnúhu Yá Ndiöxí ñúú Antiòquiá, te vǎi-gá tucu ñáyiú Antiòquiá ní cáhá<sup>n</sup>-yu tnúhu-gá.

### Xito cùu uú cuáhá<sup>n</sup> té Pǎblú cáhá<sup>n</sup>-dǎ tnúhu Yá Ndiöxí núú ñáyiú

<sup>36</sup>Te sátá ní cuu cuéhé nduu, te ní xáha<sup>n</sup> tǎ Pǎblú xii té Bèé:

—Na quíhí<sup>n</sup>-ó ncháa ñúú núú ní sáhá<sup>n</sup>-ó ní cáhá<sup>n</sup>-ó tnúhu Yá Ndiöxí cáhá<sup>n</sup> ndihi-o ncháa ñáyiú ní tuha ichi-gá cuendá quini-ó ñúú ndècu váha-yu — cáchí-dé xáha<sup>n</sup>-dǎ.

<sup>37</sup>Te té Bèé ní xáha<sup>n</sup>-dǎ sá quíhí<sup>n</sup> ndihi-güedé té Juáá, àdi Mácú chi úú ñúú-dé. <sup>38</sup>Dico té Pǎblú ñá ní dàña-gá-dé quíhí<sup>n</sup> té Juáá, chi ní dándöo ñaha-dǎ xii-güedé cúnáhá ní xíndecu-güedé Pànfilíá, te ní nacuico-dǎ cuánuhú-dé, te ñá túú-gǎ ní sáhá<sup>n</sup> ndihi ñaha-dǎ xii-güedé.

<sup>39</sup>Xiá<sup>n</sup> ní cuu ní tenáa tnahá tǎ Bèé ndihi té Pǎblú, te ichi càa ichi caa ní cuu-güedé. Te té Bèé ndihi té Mácú ní quée-güedé bàrcú cuáhá<sup>n</sup>-güedé Chìpré.

<sup>40</sup>Te té Pǎblú ní xáha<sup>n</sup>-dǎ xii té Silás sá quíhí<sup>n</sup> ndihi ñaha-dǎ, te ñáyiú sándáá iní-xi tnúhu Jèsús ní cáhá<sup>n</sup> ndihí-yu Yá Ndiöxí sá chindèe ñaha-gá xii-güedé.

<sup>41</sup>Te ní xica-güedé cuáhá<sup>n</sup>-güedé te ní yáha-güedé ñihí distrítú Siríá ndihi distrítú Ciliciá. Te ní cáhá<sup>n</sup>-güedé tnúhu Jèsús núú ncháa ñáyiú ní sándáá iní tnúhu-gá, núú xiá<sup>n</sup> ío-gá ní cudí iní-yu cadá-yu nàcuáa cáhá<sup>n</sup> Yá Ndiöxí.

### Tnahá té Timùteú cuáhá<sup>n</sup> ndihi-dé té Pǎblú ndihi té Silás

**16** Te té Pǎblú ndihi té Silás cuáhá<sup>n</sup>-güedé ñúú Dèrbé ndihi ñúú Lìstrá, te ñúú Lìstrá yàcá<sup>n</sup> ndécú

íi<sup>n</sup> tée nàni Timuteú. Te tée-á<sup>n</sup> sándáá iní-dé tnúhu Jèsús, te tnahá ñaná-dǎ sándáá iní-a<sup>n</sup> tnúhu-gá, te ñaha isràèl cúú-á<sup>n</sup>, te tée griégú cúú tǎtá-dǎ.

<sup>2</sup>Te ncháa ñáyiú ní sándáá iní tnúhu-gá ñáyiú ndècu ñúú Lìstrá, ndihi ñáyiú ñúú Ìconiú, ncháa ñáyiú-á<sup>n</sup> cudí iní-yu nàcuáa quide-dé. <sup>3</sup>Te ní cuini té Pǎblú sá tnahá té Timùteú quíhí<sup>n</sup> ndihi-dé dava-gá ñúú, núú xiá<sup>n</sup> díhna-gá sèñá ní sáha té Pǎblú ñii té Timùteú, chi ñá ní tnahá iní té Pǎblú sá cáhá<sup>n</sup> cuèhé ñáyiú isràèl cuendá té Timùteú. Te ncháa ñáyiú isràèl ndécú ñúú-á<sup>n</sup> xiní-yu sá tée griégú cúú tǎtá-dǎ, te ñá díú tée isràèl cúú-dǎ, te xiá<sup>n</sup> ní sáha té Pǎblú sèñá ñii té Timùteú. <sup>4</sup>Te ndi tnahá ñúú ndi tnahá ñúú cuáhá<sup>n</sup>-güedé cáhá<sup>n</sup> ndihi-güedé ncháa ñáyiú ní sándáá iní tnúhu Jèsús. Te ní xáha<sup>n</sup>-güedé nàcuáa cáhá<sup>n</sup> tutú ní cadúha cue tée ní táuchíú<sup>n</sup> Jèsús dacuàha ñaha xií-yu tnúhu-gá, ndihi cue tée yándaha ñáyiú sándáá iní tnúhu-gá ñúú Jerusalén. <sup>5</sup>Te cuendá duca<sup>n</sup> ní sáhá<sup>n</sup>-güedé ncháa ñúú núú ndécú ñáyiú sándáá iní tnúhu-gá ní dáciuhá ñaha-güedé xií-yu, núú xiá<sup>n</sup> tá cùu túha-gá-yu tnúhu Yá Ndiöxí, te vǎi-gá-yu ní tuhá-yu ichi-gá.

### Ní dácótó ñaha-xi xii té Pǎblú sá ní xiní-dé íi<sup>n</sup> tée distrítú Macèdoniá

<sup>6</sup>Te ñá ní dàña Espíritú Yá Ndiöxí quíhí<sup>n</sup>-güedé cáhá<sup>n</sup>-güedé tnúhu-gá distrítú Àsiá, núú ní sáhá<sup>n</sup>-güedé distrítú Frigiá ndihi distrítú Gàlaciá cáhá<sup>n</sup>-güedé tnúhu-gá. <sup>7</sup>Te ní sáa-güedé yuhu distrítú Misiá. Te quíhí<sup>n</sup>-güedé distrítú Bìtiniá ní cùu, dico ñá ní dàña Espíritú Yá Ndiöxí quíhí<sup>n</sup>-güedé yàcá<sup>n</sup>. <sup>8</sup>Te ní yáha-güedé Misiá, te ní quexìo-güedé ñúú Tróas, te yàcá<sup>n</sup> ní nanítnáhá-ndí ndihi-dé. <sup>9</sup>Te íi<sup>n</sup> niú ní dácótó-xí ñúú tǎ Pǎblú sá ní xiní-dé íi<sup>n</sup> tée distrítú Macèdoniá nútñi-dé, te ní xáha<sup>n</sup> tée-á<sup>n</sup> xii té Pǎblú: “Cada ndee iní-n quíhí<sup>n</sup>-n

Macedoniá chi dachuàha ñaha-n nchaa sá xini-n", cächí-dé xáha<sup>n</sup>-dë, ní dácótó ñaha-xi xii té Páblú. <sup>10</sup>Te cuendá sá dúcá<sup>n</sup> ní dácótó ñaha-xi xii té Páblú ñuu ní ndatnúhu-ndí quíhí<sup>n</sup>-ndí Macèdoniá, chi ní cutnúni iní-ndí sá cáná ñaha Yá Ndióxi quíhí<sup>n</sup>-ndí cáhá<sup>n</sup>-ndí tnúhu-gá núu ñáyiú yacá<sup>n</sup>.

### Té Páblú ndíhi té Silás ndécú-güedë ñuu Filipú

<sup>11</sup>Te ní queé-ndí bàrcú ñuu Tròas, te cuáhá<sup>n</sup> ndáá-ndí ñuu Samòtraciá, te yacá<sup>n</sup> ní quexìo-ndí, te ní yáha-ni-ndí cuáhá<sup>n</sup>-ndí. Te nduu tnëé ní quexìo-ndí ñuu Nèápolis. <sup>12</sup>Te yacá<sup>n</sup> ní quene-ndí bàrcú, te xica-na-ndí cuáhá<sup>n</sup>-ndí ñuu Filipú te ñuu-á<sup>n</sup> yíndèhu-xi distritú Macèdoniá. Te yacá<sup>n</sup> ní cudíi-ndí ní xíndecu tnaa-ndí. Te ñuu Filipú-á<sup>n</sup> ío cùnuu-xi, chi ío chitu ñáyiú ròma ní ngóo-yu. <sup>13</sup>Te nduu ndètátú-yu ní quee-ndí ñuu cuáhá<sup>n</sup>-ndí íi<sup>n</sup> xio yuhu yúte, chi yacá<sup>n</sup> sàhá<sup>n</sup>-yu càhá<sup>n</sup> ndihí-yu Yá Ndióxi. Te òré ní quexìo-ndí, te ní naníhí tnáhá-ndí ndíhi mee-ni ñáyiú ðíhí, te ní cáhá<sup>n</sup>-ndí tnúhu Yá Ndióxi ní xíndedóho-yu. <sup>14</sup>Te ndècu íi<sup>n</sup> ñaha nani Lidíá ní xíndedóho-a<sup>n</sup> nàcuáa ní cáhá<sup>n</sup>-ndí, te ñaha ñuu Tiàtirá cúu-á<sup>n</sup>, te ðico-a<sup>n</sup> dóó muradú, te ío càhá<sup>n</sup> ndíhi-a<sup>n</sup> Yá Ndióxi. Te ðiu-ni mee Yá Ndióxi ní chindee ñaha-gá ní sándáá iní-a<sup>n</sup> tnúhu ní cáhá<sup>n</sup> té Páblú. <sup>15</sup>Te ní sandute-a<sup>n</sup> ndíhi landú-a<sup>n</sup>, ndíhi nchaa ñáyiú xinu cuechi núu-a<sup>n</sup>, te ní cachí-a<sup>n</sup> xii-ndí:

—Te núu ní cutnúni iní-ndó sã ní sándáá ndisa iní-í tnúhu Jèsús, te cun-decu tnaa-ndo vèhe-í —cächí-a<sup>n</sup> xii-ndí.

Te ní quide yica-a<sup>n</sup> ní xíndecu-ndí vehe-a<sup>n</sup>.

<sup>16</sup>Te íi<sup>n</sup> nduu ñuhu-ndí ichi cuáhá<sup>n</sup>-ndí núu càhá<sup>n</sup> ndíhi-yu Yá Ndióxi, te ní naníhí-ndí íi<sup>n</sup> xíchí ñúhú ichi, te yíhi ñaha espíritú cúndíhi yucu ñávãha xii-xi. Te xíá<sup>n</sup> ní quide ní cáhá<sup>n</sup>-xi nchaa sá

vã yõ tnàhí cùtnuní iní-xi núu nchaa ñáyiú ní sángándíhi ñaha xii-xi. Te ñáyiú dii vèhe-xi xinu cuechi-xi ío vãi díhú<sup>n</sup> ní níhí-yu chi ní cháhu nchaa ñáyiú ní sángándíhi ñaha xii-xi. <sup>17</sup>Te xíchí-á<sup>n</sup> ní chinchícú<sup>n</sup> ñáhá-xí xii-ndí ndíhi té Páblú ndëndaha ñaha-xi cuáhá<sup>n</sup>, te ní cáhá<sup>n</sup> níhi-xi xáha<sup>n</sup>-xi xii dava-gá ñáyiú:

—Cue té-a xinu cuechi-güedë núu Yá Ndióxi, chi ío càhu cuu-gá, te cächí tnúhu-güedé nása cada-ndo naníhí tãhú-ndó —cächí-xi xáha<sup>n</sup>-xi xii-yu.

<sup>18</sup>Te titní xito ní yáha-ndí duca<sup>n</sup>-ni ní cáhá<sup>n</sup>-xi. Te ñá ní cùndee-gá iní té Páblú sá dúcá<sup>n</sup> càhá<sup>n</sup>-xi, núu ní nanchocufhnu-dé núu nútní-xi, te ní xáha<sup>n</sup>-dë xii espíritú cúndíhi yucu ñávãha yíhi ñaha xii-xi:

—Ío càhnu cuu Xítohó Jesucristú, núu xíá<sup>n</sup> cächí-í sá xócuñí-n vã quíhí-gã-n yìqui cuñú xíchí-a —cächí-dé xáha<sup>n</sup>-dë.

Te òré-ni ní quee espíritú cúndíhi yucu ñávãha-á<sup>n</sup> yiqui cùñú-xi.

<sup>19-20</sup>Te ñáyiú dii vèhe-xi xinu cuechi-xi-á<sup>n</sup> ní cutnúni iní-yu sá vã níhí-gá-yu díhú<sup>n</sup> cuendá tnúhu càhá<sup>n</sup>-xi, núu ní tñí-yu té Páblú ndíhi té Silás ndécá ñáhá-yu cuáhá<sup>n</sup> núu cuè téa cùchiu<sup>n</sup> Romá, te xáhã<sup>n</sup>-yu xii-güedé:

—Cue té-a cùu-güedé cue téa isràël, te ío dusa<sup>n</sup> xíquide-güedé ñuu-ó. <sup>21</sup>Te cuñí-güedé cada-o nàcuáa quide-güedé, te vá cúu dùca<sup>n</sup> cada-o chi ñáyiú nació<sup>n</sup> Rómá cúu-ó —cächí-yu xáhã<sup>n</sup>-yu xii cue téa cùchiu<sup>n</sup>.

<sup>22</sup>Te uu<sup>n</sup>-ni ní cáhá<sup>n</sup> ncháa-yu, te xáhã<sup>n</sup>-yu sá ñà túú quide váha té Páblú ndíhi té Silás. Te cue téa cùchiu<sup>n</sup> ní cándee-güedé dóó tè Páblú ndíhi dóó tè Silás ní ndátá-güedë, te ní táuchíú<sup>n</sup>-güedë caniha-güedë ndíhi tñudíi xii-güedé. <sup>23</sup>Te ní caniha-güedë, te dàtnuní ní chíhi ñaha-güedë vecaá. Te ní xáha<sup>n</sup>-güedë xii téa ndénchito vecaá sá cádá cuèdadú víhí-dë cuendá ná canú-güedé vecaá. <sup>24</sup>Te cuendá

sá dúcá<sup>n</sup> nĩ cáhá<sup>n</sup>-güedé, núu téé ndénchito vecaá ní dáyãha ñaha-dě ingá cuártú ndécú xítí vecaá, te ní chihi-dé sáhá-güedé yaú nduhu, te ní quide tii-dé.

<sup>25</sup> Te dava niú ní cáhá<sup>n</sup> ndihi té Páblú ndihi té Silás Yá Ndióxi, te ní xita-güedé ndudú ní quide càhnu ñaha-güedé xii-gá. Te dava-gá cue téé yìhi vecaá ní xíndedóho-güedé nàcuáa ní xita-güedé. <sup>26</sup> Te uu<sup>n</sup> ní nfihi víhi ní tnáa ní quidi-xi ndéé cimièntú vecaá, te ní nacaá<sup>n</sup> nchaa yèhe vecaá, te ní ndihi cadená ndútú cuè téé yìhi vecaá ní nandáxi. <sup>27</sup> Te ní ndiquíú cúnú ínĩ téé ndénchito vecaá, te ní quide cuèndá-dé nchií nchaa yèhe vecaá. Te ní tava-dé machití-dé cahni-dé méé-dě ní cùu, chi ní cáhá<sup>n</sup>-dě sá nĩ ndihi cue téé yìhi vecaá ní xinu ni cùu. <sup>28</sup> Te té Páblú ní cáhá<sup>n</sup> níhi-dé, te xãha<sup>n</sup>-dě xii téé ndénchito vecaá:

—Vá dúcá<sup>n</sup> càda-n cahni-n mee-n, chi nchaa-ni-ndí yíhi —càchí-dé xãha<sup>n</sup>-dě xii téé ndénchito vecaá.

<sup>29</sup> Te dätñuní ní xicá<sup>n</sup> téé ndénchito vecaá ñuhú, te xinu-dé cuánguihu xití vecaá núu yíhi tẽ Páblú ndihi té Silás, te quidi ñaha-ná-xi xii-dé ní quexio-dé ní ngüíñí xítí-dě núu-güedé. <sup>30</sup> Te dätñuní ndécá ñaha-dé xii-güedé ní ndee vecaá, te ní xicá<sup>n</sup> tnúhú-dě núu-güedé, te xãha<sup>n</sup>-dě:

—Nchòhó cachí tnúhu-ndo ñasa cada-í naníhi tãhú-í —càchí-dé xãha<sup>n</sup>-dě.

<sup>31</sup> Te ní xãha<sup>n</sup>-güedé:

—Quindáa ínĩ-n ndihi ñadihí-n, ndihi landú-n, ndihi nchaa ñayiu xinu cuechi núu-n tnúhu càhá<sup>n</sup> Xitohó Jesucrístú, te naníhi tãhú-ndó —càchí-güedé xãha<sup>n</sup>-güedé.

<sup>32</sup> Te ní dácuáhã ñaha-güedé xii téé ndénchito vecaá ndihi nchaa ñayiu ndècu vehe-dé tnúhu Yá Ndióxi. <sup>33</sup> Te ñiu-ni òrè-á<sup>n</sup> nĩ naquete-dé sátá-güedé

núu nĩ ñáni, te dätñuní ní sandute-dé ndihí-yu. <sup>34</sup> Te ndèca ñaha-dé cuáhã<sup>n</sup> vehe-dé ní sãñaha-dě sá nĩ xexi-güedé, te ní cudíí víhi ínĩ téé ndénchito vecaá ndihi nchaa-dé vehe-dé sá nĩ tuhá-yu ichi Yá Ndióxi. Te cuándihu tucu té Páblú ndihi té Silás vecaá.

<sup>35</sup> Te nduu tnéé ní xãha<sup>n</sup> cuè téé cùchiu<sup>n</sup> xii poleciá cuáhã<sup>n</sup>-güedé cúu-güedé téé ndénchito vecaá queñuhu-dé úú cue téé cuánguihu ndedí nduu ìcu núhú-güedé. <sup>36</sup> Te téé ndénchito vecaá ní xãha<sup>n</sup>-dě xii téé Páblú ndihi té Silás:

—Cue téé cùchiu<sup>n</sup> ní cachí-güedé sá queé-ndó nùhú-ndó, chi ñã túu-gã ná cada-güedé, chi sa ní yãha cuèndá-ndó —càchí téé ndénchito vecaá xãha<sup>n</sup>-dě xii-güedé.

<sup>37</sup> Te té Páblú ní xãha<sup>n</sup>-dě xii cue téé cùu poleciá:

—Téé ròmá cúu-ndí, te vá cúu dùca<sup>n</sup>-ni cunduu, chi ní caniha-güedé tnudíi xii-ndí, te ní xiní-yu nchaá-yu. Te ñã túu tnãhí ni xicá<sup>n</sup> tnúhú-güedé nũ ndáa ndècuéchi-ndí àdi ñáhã, chi cuèndá-ni ní chihi ñaha-güedé vecaá xii-ndí. Te vitna cuíní-güedé dacãcu ñaha-güedé núhú-ndí cuèndá sá vã yõo quini ñáhã nùhú-ndí cáhá<sup>n</sup>-güedé, dico vá cúu dùca<sup>n</sup> cada ñaha-güedé xii-ndí. Chí cuáhã<sup>n</sup> cúnaha-ndo na quixi mee-güedé queñuhu ñaha-güedé —càchí téé Páblú xii-dé cue poleciá.

<sup>38</sup> Te cue téé cùu poleciá cuánuhú-güedé núu ndécú cuè téé cùchiu<sup>n</sup>, te ní xãha<sup>n</sup>-güedé nàcuáa ní cáhá<sup>n</sup> téé Páblú. Te sá dúcá<sup>n</sup> nĩ xãha<sup>n</sup> pòleciá sá tẽe ròmá cúu-güedé, xíã<sup>n</sup> ní yùhú-güedé. <sup>39</sup> Te ní sáhã<sup>n</sup> cue téé cùchiu<sup>n</sup> yehe vecaá, te ní xãha<sup>n</sup>-güedé sá cáda càhnu ínĩ-güedé sá nĩ chihi ñaha-güedé vecaá, te ní ndeñuhu ñaha-güedé vecaá. Te ní cáhá<sup>n</sup> ndàhú-güedé núu cuè téé ní xíhi vecaá sá ndéé-güedé ñuú-á<sup>n</sup> nùhú-güedé. <sup>40</sup> Te

ní ndee-güedé vecaá, te cuáhá<sup>n</sup>-güedé vehe tá Lidiá, te ní ndatnúhu-güedé ndihi nchaá ñáyiú ní sándáá iní-xi tnúhu Jèsús, te ní xáha<sup>n</sup>-güedé xí-yu nàcuáa cadá-yu, te ío ní cudíí iní-yu, te duca<sup>n</sup> te ní xica-güedé cuáhá<sup>n</sup>-güedé.

### Ío dusa<sup>n</sup> quide ñáyiú ñuú Tesalónica

**17** Te ní yáha-güedé ñuú Anfípolís ndihi ñuú Apoloniá, te ní quexiò-güedé ñuú Tesalónica, te yacá<sup>n</sup> cáá ñ<sup>n</sup> veñúhu ñáyiú isràél. <sup>2</sup>Te ní sáhá<sup>n</sup> té Páblú veñúhu-á<sup>n</sup>, chí duca<sup>n</sup> tnàhí quide-dé, te ndi tnahá nduu ndètatú-yu ní sáhá<sup>n</sup>-dé veñúhu-á<sup>n</sup> ùní xito. Te ní ndatnúhu ndihi ñaha-dé xí-yu nàcuáa ní chídó tnùnì cue tée ní xóo cáhá<sup>n</sup> tnúhu Yá Ndiòxí ndéé sanaha. <sup>3</sup>Te ní xítnúhu ñaha-dé nàcuáa ní cáhá<sup>n</sup> cue tée-á<sup>n</sup> sã Crìstú Yaa tendaha Yã Ndiòxí quixi ñuyíú-a ndoho vihi-gá, te cuú-gá, te ndoto-gá, te xáha<sup>n</sup>-dè:

—Te diu Jèsús cúu Crìstú Yaa ní tendaha Yã Ndiòxí ní quixi ñuyíú-a, núu xíá<sup>n</sup> càchí tnúhu-í vitna —càchí té Páblú xáha<sup>n</sup>-dè xí-yu.

<sup>4</sup>Te dava ñáyiú isràél ní sándáá iní-yu tnúhu ní cáhá<sup>n</sup> té Páblú, te ní níhí tnáhá-yu ndihi-dé, ndihi té Silás. Te vai ñáyiú griégú ñáyiú càhá<sup>n</sup> ndihi Yá Ndiòxí ní sándáá iní-yu tnúhu Jèsús. Te ndècu titní ñáyiú dìhí ñáyiú cùnuu, te ñáyiú-á<sup>n</sup> tnàhá-yu ní sándáá iní-yu tnúhu-gá. <sup>5</sup>Te dava ñáyiú isràél ná túú ní cùu váha iní-yu núú tẽ Páblú ñuu ní ndúcü-yu cue tée cuíhna iní-xi tuhío-güedé cada chü<sup>n</sup>-güedé, chí ndi cuíhnu ndi cuíhnu-ni-güedé, te nchaá-yu ndihi cue tée-á<sup>n</sup> ndi coyo ndi coyó-yu xícuáá-yu. Te sáta ñ tecú dóho dava-gá-yu, te ní sáhá<sup>n</sup> tuhá-yu, te ío ní quide dùsá<sup>n</sup>-yu. Te nísáhá<sup>n</sup>-yu vehe té Jàsón, te ní quide yicá-yu ní quíhu-yu vehe-dé nándücú-yu té Páblú ndihi té Silás cuendá queñuhu ñahá-yu núu nchàa ñáyiú. <sup>6</sup>Te ñá ní nàníhí

ñáhá-yu xii-güedé, núu xíá<sup>n</sup> ní tñí-yu té Jàsón ndihi ñ<sup>n</sup> úú-gá cue tée sándáá iní tnúhu Jèsús, te tãñuhu ñahá-yu xii-güedé cuáhá<sup>n</sup> núu cuè tée cùchiu<sup>n</sup>. Te òrè ní quexiò-yu núu ndécú cuè tée cùchiu<sup>n</sup>, te ní ngúíta-yu ní cuáá-yu, te xáhá<sup>n</sup>-yu xii-güedé:

—Ní quexiò cue tée-á<sup>n</sup> ñuú-ó, te ío dusa<sup>n</sup> quide-güedé, te duca<sup>n</sup>-ni quide-güedé nchaá ñuú núu xícá cùu-güedé. <sup>7</sup>Te té Jàsón-á<sup>n</sup> ní xáha<sup>n</sup>-dè sá cúu cündecu-güedé vehe-dé, te ñá túú sándáá iní-güedé nàcuáa càhá<sup>n</sup> té Cèsár tée yindaha cuéhé nació<sup>n</sup>, te càchí-güedé sá ndécú ñngá tée cùnuu-gá tucu nani-dé Jèsús —càchí-yu xáhá<sup>n</sup>-yu xii cue tée cùchiu<sup>n</sup>.

<sup>8</sup>Te sáta dúcá<sup>n</sup> ñ cáhá<sup>n</sup>-yu, te ní cud-éé<sup>n</sup> víhí cuè tée cùchiu<sup>n</sup> ndihi dava-gá ñáyiú ndèdóho. <sup>9</sup>Te vai díhú<sup>n</sup> ñ xícá<sup>n</sup> cue tée cùchiu<sup>n</sup> núu tẽ Jàsón ndihi dava-gá cue tée cuáhá<sup>n</sup> ndihi-dé cuendá té Páblú ndihi té Silás, te núu na ndèe-güedé núhú-güedé, te nacuáñaha cuè tée cùchiu<sup>n</sup> díhú<sup>n</sup>-güedé.

### Té Páblú ndihi té Silás ndécú-güedé ñuú Bèrea

<sup>10</sup>Te òrè ní cundiquí<sup>n</sup>, te ní quide ndee ñní ñáhá ñáyiú sándáá iní tnúhu Jèsús xii té Páblú ndihi té Silás, te ní xica-güedé cuáhá<sup>n</sup>-güedé ñuú Bèrea. Te diu-ni nduu ñ sáá-güedé yacá<sup>n</sup> ní sáhá<sup>n</sup>-güedé veñúhu ñáyiú isràél. <sup>11</sup>Te váha-gá iní ñáyiú ñuú Bèrea dácúúxí ñáyiú ñuú Tesalónica, chí ío ní cudíí ñní-yu ní xíndedóho-yu tnúhu Jèsús, te ñ<sup>n</sup> nduu ñ<sup>n</sup> nduu ní dácúáhá-yu tnúhu ní chídó tnùnì cue tée ní xóo cáhá<sup>n</sup> tnúhu Yá Ndiòxí ndéé sanaha cuendá cuíni-yu quini-yu núu ndáá càhá<sup>n</sup> té Páblú ndihi té Silás. <sup>12</sup>Te titní ñáyiú isràél ní sándáá iní-yu tnúhu-gá ndihi titní cue tée griégú ndihi ñáyiú dìhí ñáyiú cùnuu ní sándáá iní-yu. <sup>13</sup>Te dava ñáyiú isràél ndécü-yu ñuú Tesalónica, te ñáyiú-á<sup>n</sup> ní



nĩhi-yu tnúhu sá ndécú tẽ Páblú ndĩhi té Silás ñuú Bèrea càhá<sup>n</sup>-güedé tnúhu Yá Ndiõxí, núu xíá<sup>n</sup> ní sáhá<sup>n</sup>-yu ñuú Bèrea ní dácuañdèhndé-yu núu nchàa ñáyiú vátá dácuañhá-gá. Te ñáyiú-á<sup>n</sup> ní sándáá iní-yu tnúhu ndehnde te ní cud-éé<sup>n</sup> víhĩ-yu núu-güedé. <sup>14</sup>Te òré-á<sup>n</sup> ní xáha<sup>n</sup> ñáyiú sándáá iní tnúhu-gá xii té Páblú sá quĩhĩ<sup>n</sup>-dé yuhu lámár, te ní xica-dé cuáhá<sup>n</sup>-dé, te té Silás ndĩhi té Timùteú ní quendóo-güedé ñuú Bèrea. <sup>15</sup>Te ì<sup>n</sup> ùú-güedé cuáhá<sup>n</sup> ndĩhi-güedé té Páblú, te ndèca ñaha-güedé cuáhá<sup>n</sup> ndéé ñuú Àtenás, te ní xáha<sup>n</sup> tẽ Páblú xii-güedé:

—Núu na nùhú-ndó, te cúu-ndo tẽ Silás ndĩhi té Timùteú ná quíxí ndĩhi-ni-güedé nanítñhá-ndĩ iha —càchĩ-dé xáha<sup>n</sup>-dẽ.

Te ní xica-güedé cuánuhú-güedé.

### Té Páblú ndécú-dẽ ñuú Àtenás

<sup>16</sup>Te ñuú Àtenás ndétú tẽ Páblú quĩhĩ<sup>n</sup> té Silás ndĩhi té Timùteú. Te yacá<sup>n</sup> ní xiní-dé sá ìo cuéhé sá càchĩ-yu cùu ndiõxí-yu ndècu te ñá ndáá sá dífú ndiõxí cúu-xí, te xíá<sup>n</sup> ñá túú ní cùu váha iní-dé, chi ñá tñhá iní-dé nàcuáa quidé-yu. <sup>17</sup>Te ní sáhá<sup>n</sup>-dé veñúhu ní cáhá<sup>n</sup> ndĩhi-dé ñáyiú isràel ndĩhi dava-gá ñáyiú càhá<sup>n</sup> ndĩhi Yá Ndiõxí. Te ì<sup>n</sup> nduu ì<sup>n</sup> nduu sàhá<sup>n</sup>-dé xití ñuú càhá<sup>n</sup>-dé tnúhu-gá ndĩhi nchaa ñáyiú xica cuu yacá<sup>n</sup>. <sup>18</sup>Te cue tée cùu epìcureú ndĩhi cue tée cùu estoicú, cue tée-á<sup>n</sup> ní ndatnúhu-güedé ndĩhi té Páblú, te dava-güedé xĩtnàha-güedé:

—¡Ná tnúhu víhi cáhá<sup>n</sup> tée lùcú-á<sup>n</sup>! —càchĩ-güedé xĩtnàha-güedé.

Te dava-güedé xĩtnàha-güedé:

—Sàni iní-ndí sá càhá<sup>n</sup>-dé cuendá ndiõxí sá vátá quini-gá-ó —càchĩ-güedé xĩtnàha-güedé.

Te duca<sup>n</sup> xĩtnàha-güedé, chi càhá<sup>n</sup> té Páblú tnúhu Jèsús, te ní cáhá<sup>n</sup>-dé nàcuáa ní dándótó ñaha Yá Ndiõxí xii-gá, xíá<sup>n</sup>

núu duca<sup>n</sup> xĩtnàha-güedé. <sup>19</sup>Te ndèca ñaha-güedé xii té Páblú cuáhá<sup>n</sup> ì<sup>n</sup> xichi núu nání Àreópagú, te ní xáha<sup>n</sup>-güedé xii-dé:

—Cachí tnúhu ndáá-n nàsa cuáhá<sup>n</sup> tnúhu càhá<sup>n</sup>-n, chi na cùtnuní ndáá iní-ndí, <sup>20</sup>chi duca<sup>n</sup>-ni càhá<sup>n</sup>-n tnúhu sá ñà túú sàcúndèdóho-ndí, te cuini-ndí cachí tnúhu ndáá-n nàsa nduu tnúhu-á<sup>n</sup> cuendá cutnùní váha iní-ndí —càchĩ-güedé xáha<sup>n</sup>-güedé xii-dé.

<sup>21</sup>Te nchaa ñáyiú ñuú Àtenás ndĩhi ñáyiú dava-gá ñuú, mee-ni tnúhu saa cuini-yu cáhá<sup>n</sup>-yu, nchaa sá vátá cùndèdóho-gá-yu cuini-yu cundedóho-yu.

<sup>22</sup>Te té Páblú ní ngúnutñí-dé núu xixúcu-yu nchaa-yu, te xáha<sup>n</sup>-dẽ:

—Nchòhó cue ñáyiú ñuú Àtenás, cundedóho-ndo nchàa tnúhu na càhá<sup>n</sup>-í-a. Ío quide cahnu nchohó sá càchĩ-ndó cùu ndiõxí-ndó. <sup>23</sup>Te vitna ní quexìo-í ñuú-ndó, te ní xiní-í sá yàyacá<sup>n</sup> ndécú nchàa sá càchĩ-ndó cùu ndiõxí-ndó càhá<sup>n</sup> ndĩhi-ndo. Te ní xiní-í ì<sup>n</sup> xichi núu ndéé tñuní quidé cahnu-ndo Yá Ndiõxí Yáá ñá túú xiní-ndó, te diu-ni duca<sup>n</sup> càhá<sup>n</sup> lètrá ndéé tñuní xíá<sup>n</sup>, te càchĩ-xi: “Iha quide cahnu-ndí Ndiõxí sá ñà túú xiní-ndí”, duha càhá<sup>n</sup> lètrá-á<sup>n</sup>. Te quide cahnu-ndo Yá Ndiõxí cáhá<sup>n</sup>-ndó, dico ñá túú xiní-ndó nàsa càa-gá, te yúhú xiní ndáá-í nàcuáa càa Yá Ndiõxí, chi diu-ni Yá Ndiõxí càhá<sup>n</sup> ndĩhi-í, te diu tnúhu-gá càhá<sup>n</sup>-í vitna.

<sup>24</sup>Te diu Yá Ndiõxí ní cadúha-gá ñuyíú-a ndĩhi nchaa sá ìo, núu diu-gá cúu Xìtohó ñuyíú-a ndĩhi andiu. Te ñá túú xiní ñuhu-gá vehe dàcaa ñáyiú ñuyíú-a cundecu-gá. <sup>25</sup>Te ñá túú xiní ñuhu-gá ñáyiú chindee ñhá-yu xii-gá, chi mee-gá quidé-gá nchító-ó ndècu-o te tàxi-gá yócó tächí-ó ndĩhi nchaa sá xiní ñuhu-o.

26 Te ndéé sanaha nĩ cadúha-gá ìí<sup>n</sup> òò-ni tée, te òò-ni nĩnĩ-dě cùú ñáyi ndècu nicaxico ñuyú. Te òò-ni mee Yá Ndiòxí ní xáha<sup>n</sup>-gá nchaa núú cùndècu-yu, te mee-gá ní cáhá<sup>n</sup>-gá ná daha cuía cudfí nchaa nàció<sup>n</sup> ndihì mée-yu. 27 Te cuinĩ-gá sá ncháá ñáyi nanducu ñàhá-yu cáhá<sup>n</sup> ndihì ñàhá-yu xii-gá, te mee-gá ndécú túha-gá sá cáhá<sup>n</sup> ndihì ñaha-gá xii-yu ìí<sup>n</sup> ìí<sup>n</sup>-yu. 28 Te òò-ni Yá Ndiòxí xító ñàha-gá xii-yu núú cùdífí-yu ndécú-yu te càndá-yu. Te duha ní cáhá<sup>n</sup> ìí<sup>n</sup> ñanì tnàhá-ndó, tée ní cutnùnì iní-xi ní xindecu ndéé sanaha, te ní xáha<sup>n</sup>-dě xii-yu: “Nchaa-o cùu-déhe Yá Ndiòxí”, duha ní xáha<sup>n</sup>-dě xii-yu. 29 Te núú déhe Yá Ndiòxí cùú-yu ncháá-yu, te vá cùú cáhá<sup>n</sup>-yu sá Yá Ndiòxí cùú sá nĩ cadúha-yu ndahá-yu. Te sá nĩ cadúha-yu cùu ndiòxí-yu-á<sup>n</sup>, dava cùu-xi díhú<sup>n</sup> cuáá<sup>n</sup>, dava cùu-xi díhú<sup>n</sup> cuixí<sup>n</sup>, dava cùu-xi yúú. Te mée-yu ní cahu iní-yu nàcuáa cunduu sá cùú ndiòxí-yu. 30 Te cùtnàhá ñá túú ní cùtnunì iní-yu sá nèhé ní quidé-yu ní cadúha-yu nchaa xíá<sup>n</sup>, te ñá túú ní quide cuendá Yá Ndiòxí sá dúcá<sup>n</sup> nĩ quidé-yu. Te vitna càchí Yá Ndiòxí sá dáñá nchàa ndi túhú-yu nchaa sá cuéhé sá dúhá quidé-yu. 31 Te Yá Ndiòxí ñàhá-gá ná nduu cùndecu nchaa ñáyi núú-gá, te mee-gá sa ñàha-gá ndëndida càa ñáyi ní quide váha, te ndëndida càa ñáyi ñá túú ní quide váha. Te mee-gá ní xáha<sup>n</sup>-gá xii Déhe-gá Yaá nání Jèsús cùñaha-gá xii-yu núú ndëndida càa-yu ní quide váha te ndëndida càa-yu ñá túú ní quide váha. Te mee Jèsús cáhá<sup>n</sup> ndáá cuiti-gá, te sa ñàha-o sá ncháá xíá<sup>n</sup> cada Jèsús, chi òò cuèndá-á<sup>n</sup> nĩ dándótó ñàha Yá Ndiòxí xii-gá —càchí té Páblú xáha<sup>n</sup>-dě xii-yu.

32 Te òrè ní cáhá<sup>n</sup> té Páblú sá nĩ ndoto Jèsús, te dava ñáyi ñá ní tnàhá iní-xi tnúhu ní cáhá<sup>n</sup>-dé ní cáhá<sup>n</sup> yíchí-yu. Te davá-yu ní xáhá<sup>n</sup>-yu xii-dé:

—Te ingá xito quixi-n, te cáhá<sup>n</sup> tucu-n tnúhu ní cáhá<sup>n</sup>-n vitna —cachí-yu xáhá<sup>n</sup>-yu xii-dé.

33 Te ní xica-dé cuáhá<sup>n</sup>-dé. 34 Te dava ñáyi ní xindedóho tnúhu ní cáhá<sup>n</sup> té Páblú ní sándáá iní-yu Jèsús, te ní chindee tnúhu ñàhá-yu xii-dé. Te ìí<sup>n</sup> tée cùchiu<sup>n</sup> Areópagú nání-dé Nixú ndihì ìí<sup>n</sup> ñadìhí nání-á<sup>n</sup> Damaris, tnàhá-yu ní sándáá iní-yu tnúhu-gá ndihì dava-gá-yu.

### Té Páblú ndécú-dě ñúú Còrintú

**18** Te té Páblú ní quee-dé ñúú Àtenás cuáhá<sup>n</sup>-dé ñúú Còrintú. 2 Te yacá<sup>n</sup> ní naníhí tnàhá-dě ndihì ìí<sup>n</sup> tée isràèl nání-dě Àquilú, te tée-á<sup>n</sup> cùú-dě tée distritú Pòntó, te ní xindecu-dé ndihì ñadìhí-dé tá Priscilá ñúú Rómá. Te té Cèsár tée yindaha cuéhé nàció<sup>n</sup>, tée nani Claudiú ní xáha<sup>n</sup>-dě sá vā cùú-gá cundecu ñáyi isràèl ñúú Rómá, te xíá<sup>n</sup> ñúú ní ndee té Àquilú ndihì ñadìhí-dé cuáhá<sup>n</sup>-yu ñúú Còrintú. Te sácú-ni nduu ní cuu sá nĩ quexió-yu ñúú-á<sup>n</sup>, te ní sáhá<sup>n</sup> té Páblú ní ndatnúhu ndihì ñàha-dě xii-yu vehé-yu. 3 Te ní xáhá<sup>n</sup>-yu sá cùndecu-dé cada chiú<sup>n</sup> ndihì ñàhá-yu, chi ìí<sup>n</sup>-ni chiú<sup>n</sup> quide-dé ndihí-yu, te ní xóo dacáa-yu vehe dóó. Te núú xíá<sup>n</sup> ní xindecu ndihì ñàha té Páblú ní quide chiú<sup>n</sup> ndihì ñàha-dé xii-yu. 4 Te núú ùná núú ùná nduu, nduu ndètatú-yu, ní xóo quíhí<sup>n</sup>-dé veñúhu ñáyi isràèl. Te ní ndatnúhu-dé ndihì ñáyi isràèl ndihì ñáyi ñá túú cùu ñáyi isràèl, te ní xáha<sup>n</sup>-dě sá quindáá iní-yu tnúhu Jèsús.

5 Te té Silás ndihì té Timùteú ní quee-güedé distritú Macèdoniá cuáhá<sup>n</sup>-güedé núú ndécú tè Páblú. Te òrè ní quexio-güedé, te ní cáhá<sup>n</sup>-ni té Páblú tnúhu Yá Ndiòxí núú ñáyi isràèl, te xáha<sup>n</sup>-dě xii-yu sá Jèsús cùú-gá Cristú Yaá ní tendaha Yá Ndiòxí ní quixi ñuyú-a. 6 Te sá dúcá<sup>n</sup> nĩ cáhá<sup>n</sup>-dé ñúú ní nàá ndihì ñàhá-yu xii-dé, te ní

cáhá<sup>n</sup> cuèhé-yu cuendá-dé, núu xíá<sup>n</sup> ní naquidi-dé dóó-dé. Te duca<sup>n</sup> ní quide-dé cuendá sá cútnùní iní-yu sá ñá ní tnàhá iní-dé nàcuáa ní cáhá<sup>n</sup>-yu, te ní xáha<sup>n</sup>-dè xíí-yu:

—Yúhú ñá túú cuèchi-í, te núu ní xíta nihnu-ndo, xíá<sup>n</sup> quèndóo cuèchi mee-ná-ndó. Te vitna quíhí<sup>n</sup>-í cáhá<sup>n</sup> ndíhi-í ñáiyu ñá túú cùu ñáiyu isràél, te vá nándücu-gá-í nchòhó ñáiyu isràél cáhá<sup>n</sup> ndíhi ñaha-í xii-ndo —càchí-dé xáha<sup>n</sup>-dè xíí-yu.

<sup>7</sup>Te ní xica-dé cuáhá<sup>n</sup>-dé vehe ì<sup>n</sup> tée nàni Justú, te tée-á<sup>n</sup> ndécú yàtni-dé núú cáá veñúhu, te tnàhá-dé càhá<sup>n</sup> ndíhi-dé Yá Ndiòxí. <sup>8</sup>Te té Crispú tée yìndaha veñúhu-á<sup>n</sup> ní sándáa iní-dé Jèsús ndíhi ñadìhí-dé ndíhi landú-dé. Te vài ñáiyu ñúú Còrintú ní sáhá<sup>n</sup>-yu ní xíndedóho-yu tnúhu-gá, te ní sándáa iní ñáhá<sup>n</sup>-yu xii-gá, te ní sanduté-yu. <sup>9</sup>Te ì<sup>n</sup> niú ní cáhá<sup>n</sup> saní té Páblú sá ní xáha<sup>n</sup> Yá Ndiòxí xii-dé:

—Cáhá<sup>n</sup>-ni-n tnúhu-í, te vá yùhú-n nchaa tnúhu cuèhé tnúhu duha càhá<sup>n</sup> ñáiyu, <sup>10</sup>chi yúhú chindee ñaha-í xii-n, te vá yóo ì<sup>n</sup> cada úhú ñáhá<sup>n</sup> xii-n, te vài-gá ñáiyu ñúú-á<sup>n</sup> quìndáa iní-yu tnúhu-í —càchí-gá xáha<sup>n</sup>-gá núú saní-dé.

<sup>11</sup>Te ñúú Còrintú ní xíndecu té Páblú ì<sup>n</sup> cuía dava, te mee-ni tnúhu Yá Ndiòxí ní xóo dacuàha-dé ñáiyu.

<sup>12</sup>Te ndècu-gá-dé ñúú-á<sup>n</sup> ní ngóo té Gàlìón chiù<sup>n</sup> taxi tnuní-dé distritú Acáyá. Te dàvá-á<sup>n</sup> ní cudéé<sup>n</sup> ñáiyu isràél núú tè Páblú, te ní tnií ñàhá-yu xii-dé ndéca ñàhá-yu cuáhá<sup>n</sup> núú cuè tée cùchiu<sup>n</sup>. <sup>13</sup>Te ní xáhá<sup>n</sup>-yu xii té Gàlìón tée cùu gobiernú:

—Tée-a ní quexio-dé ñúú-ó xica cuu-dé te cuiní-dé dandáhú ñáhá-dé chitnahá-ndí-dé cada-ndí nàcuáa quide-dé quidé càhnu-dé Ndiòxí-dé, te dañá-ndí vá cáda-gá-ndí nàcuáa càhá<sup>n</sup> tnúhu sá sánú ichi ñaha xii-o nàcuáa cundecu-o cuiní-dé —càchí-yu xáhá<sup>n</sup>-yu xii tée cùu gobiernú.

<sup>14</sup>Te té Páblú cuiní-dé cani-dé cuendú ní cùu, te ní ngúita té Gàlìón càhá<sup>n</sup>-dé, te xáha<sup>n</sup>-dè xíí-yu:

—Nchòhó ñáiyu isràél, cundedóho-ndo tnúhu na càhá<sup>n</sup>-í-a. Te núu ndècu núú ì<sup>n</sup> cuèchi ní quide-dé àdi ní sahní-dé ì<sup>n</sup> ndíyi, te cuu cundáa-xi iha, te cáhá<sup>n</sup>-ndó núu nándi cùu sá ní quide-dé, <sup>15</sup>àdi dico-ni sá í<sup>n</sup> tnúhu ní cáhá<sup>n</sup>-dé, te yáchí-gá chí cuáhá<sup>n</sup> yacá<sup>n</sup> ndatnúhu-ndo núú méé-ndó, chi mee-ni sá ñá túú quide-dé nàcuáa càhá<sup>n</sup> tnúhu sá sánú ichi ñaha xii-ndo cahá<sup>n</sup>-ndó, te yúhú ñá túú tnàhá iní-í cada ndáa-í nchaa xíá<sup>n</sup> —càchí-dé xáha<sup>n</sup>-dè.

<sup>16</sup>Te ní cudéé<sup>n</sup>-dè, te ní ndeñuhu ñaha-dè xíí-yu vechiù<sup>n</sup>. <sup>17</sup>Te ñáiyu ñá túú cùu ñáiyu isràél ní tnií-yu té Sòstenés tée yìndaha veñúhu ñáiyu isràél, te ndèhe té Gàlìón tée cùu gobiernú ní canihá-yu xii-dé, dico ñá túú tnàhí ná tnúhu ni càhá<sup>n</sup>-dé taunihnu-dé tée ní caní-yu-á<sup>n</sup>.

**Té Páblú cuáhá<sup>n</sup> tucu-dé ñúú  
Antiòquia, te yacá<sup>n</sup> ní xica  
tucu-dé cuáhá<sup>n</sup>-dé dava-gá ñúú  
càhá<sup>n</sup>-dé tnúhu Yá Ndiòxí**

<sup>18</sup>Te titní-gá nduu ní xíndecu té Páblú ñúú Còrintú, te ní quide ndee ìní-dé nchaa ñáiyu ní sándáa iní-xi tnúhu Jèsús, te ní tnií-dé ichi cuáhá<sup>n</sup>-dé distritú Siríá ndíhi té Àquilú ndíhi ñadìhí té Àquilú-á<sup>n</sup> tă Priscilá, te ní quexió-yu ñúú Cèncreá. Te cùmání-gá tnií-yu ichi quíhí<sup>n</sup>-yu ñúú Éfesú, te ní dèté díquí tè Páblú, chi duca<sup>n</sup> ní xáha<sup>n</sup>-dè xii Yá Ndiòxí sá ndèé xínu ì<sup>n</sup> chiù<sup>n</sup> ní saní iní-dé cada-dé cuendá-gá, te dàtnùní dèté-dé. Te ní quée-yu bàrcú cuáhá<sup>n</sup>-yu. <sup>19</sup>Te ní quexió-yu ñúú Éfesú, te yacá<sup>n</sup> ní xáha<sup>n</sup> tè Páblú sá cùndecu té Àquilú ndíhi ñadìhí-dé, te mee-dé quíhí<sup>n</sup>-dé dava-gá ñúú. Te cùmání-gá caca-dé quíhí<sup>n</sup>-dé, te ní sáhá<sup>n</sup>-dé veñúhu ñáiyu isràél ní ndatnúhu ndíhi ñaha-dè xíí-yu.

<sup>20</sup>Te ní xáhã<sup>n</sup>-yu sá cúndècu-dé titní nduu, te ñá ní cuiní-dé cundecu-dé. <sup>21</sup>Te ní xáha<sup>n</sup>-dè:

—Núhú-í chi dacuití xini ñuhu-xi cundecu-í vico coo ñuu Jerusàlén, te quixi tucu-í te núu Ndiòxí ná càchí-gá, te vitna chí cadá ndèe iní —càchí-dé xáha<sup>n</sup>-dè xíi-yu.

Te ní quée-dé bàrcú cuáhã<sup>n</sup>-dé.

<sup>22</sup>Te ní quexio-dé ñuu Cèsareá, te ní quene-dé bàrcú, te ní xica-dé cuánuhú-dé ñuu Jerusàlén, te ní ndexio-dé, te ní dándáçoo váha-dé ñáiyu ndècu ichi Yá Ndiòxí, te dàtnùní ní xica-dé cuáhã<sup>n</sup>-dé ñuu Antiòquia.

<sup>23</sup>Te yacá<sup>n</sup> ní xíndecu-dé titní nduu, te dàtnùní ní tñii-dé ichi cuáhã<sup>n</sup>-dé. Te ní sáhã<sup>n</sup>-dé nihíi distritú Gàlaciá ndihi distritú Frigiá. Te ndi tnahá ñuu ní sáhã<sup>n</sup>-dé ní cáhã<sup>n</sup>-dé ndihi ñáiyu sàndáá iní tñuhu Yá Ndiòxí, te ní ndúcú ndéé-gã-yu ní quidé-yu nchaa nàcuáa ní xáha<sup>n</sup>-dè cadá-yu.

### Té Àpolós càhã<sup>n</sup>-dé tñuhu Yá Ndiòxí ñuu Éfesú

<sup>24</sup>Te dàvá-á<sup>n</sup> ní quèxio ñ<sup>n</sup> tée isràél ñuu Éfesú, te nani-dé Àpolós, te cùu-dé tée ñuu Alejándriá, te ío váha túha-dé tñuhu Yá Ndiòxí, te ío váha ñuhu díquí-dè nàcuáa cáhã<sup>n</sup>-dé, <sup>25</sup>chi sa xini-dé nàcuáa ní xóo cáhã<sup>n</sup> ndíi Juáá cútñahá ní xóo dacuàndute ndíi ñáiyu. Te ío ní cudíi iní-dé ní cáhã<sup>n</sup>-dé nchaa nàcuáa ní cuu cuèndá Jèsús, dico vátá dácuaà-gá-dé nchaa tñuhu ní cáhã<sup>n</sup> mée Jèsús. <sup>26</sup>Te ní sáhã<sup>n</sup>-dé veñuhu ñáiyu isràél, te yacá<sup>n</sup> ní cáhã<sup>n</sup>-dé ni yùhu ni iní-dé. Te ndècu té Àquilú ndihi ñadhi-dé tá Priscilá ndèdóho-yu tñuhu ní cáhã<sup>n</sup>-dé, te ní xáhã<sup>n</sup>-yu sá quíhí<sup>n</sup>-dé vehé-yu, te ní sáhã<sup>n</sup>-dé, te ní xítñuhu ñahá-yu xii-dé dava-gá tñuhu Yá Ndiòxí sá ñà túu xini-dé. <sup>27</sup>Te ní cachí té Àpolós sá quíhí<sup>n</sup>-dé distritú Acãyá, núu xíã<sup>n</sup> ní cadúha ñáiyu ñuu Éfesú ñ<sup>n</sup> tutú

canehe-dé quíhí<sup>n</sup> ndaha ñáiyu sàndáá iní tñuhu-gá xíndecu Acãyá. Te xáhã<sup>n</sup>-yu núu tütú-yu: “Cáhã<sup>n</sup> váha-ndo ndihi té Àpolós núu ní quexio-dé”, càchí-yu xáhã<sup>n</sup>-yu núu tütú-yu. Te ní xica-dé cuáhã<sup>n</sup>-dé, te ní quexio-dé Acãyá. Te nchaa ñáiyu sàndáá iní tñuhu-gá yacá<sup>n</sup>, diu-ni mee Yá Ndiòxí ní chindee ñaha-gá ní sàndáá iní ñahã-yu xii-gá. Te té Àpolós ío váha ní cáhã<sup>n</sup>-dé tñuhu Yá Ndiòxí núu-yu, te xíã<sup>n</sup> ío ní ndúcú ndéé-gã-yu ní quidé-yu chiú<sup>n</sup>-gá. <sup>28</sup>Te té Àpolós ní ndatnúhu-dé ndihi ñáiyu isràél, te ní xíndedóho dava-gá-yu. Te ío váha ní cani-dé cuèndú nchaa nàcuáa ní xóo cáhã<sup>n</sup> cue tée ndéé sanaha sã quíxí Cristú ñuyíu-a. Te ní cáhã<sup>n</sup> ndáá-dé ní xáha<sup>n</sup>-dè sá díu-ní Jèsús cúu-gã Cristú Yaá ní tendaha Yá Ndiòxí ní quixi ñuyíu-a. Te ñáiyu isràél xíndatnúhu-yu sá ñã ndáa nàcuáa càhã<sup>n</sup>-dé, dico ñá ní ñihí-yu tñuhu cúnahá-yu xii-dé, chi ío váha ñuhu díquí-dè tñuhu cáhã<sup>n</sup>-dé.

### Té Páblú ndécú-dè ñuu Éfesú

**19** Te cútñahá ndécú-gã té Àpolós ñuu Còrintú, te ní xica té Páblú cuáhã<sup>n</sup>-dé tá yáha-dé mee-ni xití yucu cuáhã<sup>n</sup>, te ní sáa-dé ndéé ñuu Éfesú. Te ñuu-á<sup>n</sup> ní naníhí tñahá-dè ndihi cue tée sàndáá iní tñuhu Jèsús. <sup>2</sup>Te ní xicã<sup>n</sup> tñuhú-dè núu-güedè, te xáha<sup>n</sup>-dè:

—¿Sa ní quexio Espiritú Yá Ndiòxí ní ngúndecu ndihi-ndo ndéé òrè ní sàndáá iní-ndó Jèsús-ã”? —càchí-dé xáha<sup>n</sup>-dè xii-güedé.

Te ní xáha<sup>n</sup>-güedè:

—Ñá túu xini-ndí sá ío Espiritú Yá Ndiòxí —càchí-güedé xáha<sup>n</sup>-güedé xii-dé.

<sup>3</sup>Te ní xáha<sup>n</sup> tucu-dé:

—¿Nása ní cáhã<sup>n</sup> tée ní dácuaàndute ñaha xii-ndo-i? —cachí-dé xáha<sup>n</sup>-dè xii-güedé.

Te ní xáha<sup>n</sup>-güedè:

—Ní cáhá<sup>n</sup>-dé nàcuáa ní xóo cáhá<sup>n</sup> ndíi Juàá —càchí-güedé xáha<sup>n</sup>-güedé xii-dé.

<sup>4</sup>Te ní xáha<sup>n</sup> tē Páblú:

—Ndíi Juàá ní dácuaándute ñaha ndíi xii ñáyi, chi ní cuiní-yu sá dáñá-yu nchaa sá cuéhé sá dúhá quidé-yu. Te ní xáha<sup>n</sup> ndíi xii-yu: “Quindáá iní-ndó tnúhu Jèsús chi dacuítí quixi-gá ñ<sup>n</sup> nduu”, duha ní xáha<sup>n</sup> ndíi Juàá xii-yu —càchí té Páblú xáha<sup>n</sup>-dē xii-güedé.

<sup>5</sup>Te sá dúcá<sup>n</sup> ñí cáhá<sup>n</sup> té Páblú xáha<sup>n</sup>-dē xii-güedé, núu xíá<sup>n</sup> ní sandute-güedé nàcuáa ní dándöo tnúhu Jèsús. <sup>6</sup>Te ní sacá<sup>n</sup> ndodo té Páblú ndahá-dé díquí-güedé, te òrè-ni ní quexìo Espiritú Yá Ndióxi ní ngúndecu ndíhi-güedé, te ní nguíta-güedé ní cáhá<sup>n</sup>-güedé tnúhu sá dácáhu iní ñáhá Espiritú-gá, tnúhu sá ñà túú xini-güedé cáhá<sup>n</sup>-güedé, te ní cáhá<sup>n</sup>-güedé tnúhu Yá Ndióxi nàcuáa ní dácáhu iní ñáhá Espiritú-gá xii-güedé. <sup>7</sup>Te cùu datná úxúú tnàhá-güedé.

<sup>8</sup>Te té Páblú ní sáhá<sup>n</sup>-dé veñúhu ñáyi israhél ní cáhá<sup>n</sup> ndíhi-dé-yu, te úní yóo ñí xínu ní xica cuu-dé veñúhu-yu. Te ío váha ñúhu díquí-dē tnúhu cáhá<sup>n</sup>-dé, núu xíá<sup>n</sup> ní cuyi-dē ní cáhá<sup>n</sup>-dé, te ní xáha<sup>n</sup>-dē sá quindáá iní-yu tnúhu Jèsús, te duca<sup>n</sup> te ndíhu ndaha ñaha Yá Ndióxi xii-yu. <sup>9</sup>Te davá-yu ío sàá iní-yu ñá ní cuiní-yu quindáá iní-yu, te ío ní cáhá<sup>n</sup> cuéhé-yu cuendá Jèsús xití veñúhu núu dàva-gá-yu. Te té Páblú ní ndee-dé veñúhu cuáhá<sup>n</sup>-dé ndíhi ñáyi sándáá iní tnúhu Jèsús. Te ñ<sup>n</sup> nduu ñ<sup>n</sup> nduu ní sáhá<sup>n</sup>-dé scuèlá té Tiranú ní dácuahá ñaha-dé xii-yu. <sup>10</sup>Te úú cuíá duca<sup>n</sup> ñí sáhá<sup>n</sup>-dé scuèlá ní dácuahá-dē ñáyi. Te nchaa ñáyi israhél ñáyi ndècu ñihí distritú Àsiá ndíhi nchaa ñáyi ñá túú cùu ñáyi israhél ní xindedóho-yu tnúhu Jèsús. <sup>11</sup>Te té Páblú ío ní chindee ñaha Yá Ndióxi xii-dé ní quide-dé vai núú sá vā yōo tnàhí ndacu cada. <sup>12</sup>Te pañú díquí-dē ndíhi dóo cándèé núu yíquí-dē

ní xicá<sup>n</sup>-yu nèhé-yu ní sáhá<sup>n</sup> núu ndécú ñáyi cùhú, te xíá<sup>n</sup> ní tñi ñáyi cùhú ndíhi ñáyi yìhi ñaha espíritú cúndìhi yucu ñávaha, te ní ndúha-yu.

<sup>13</sup>Te ñúu Israhél véxi cue tée tatna xica cuu-güedé quidé tátna-güedé ñáyi yìhi ñaha espíritú cúndìhi yucu ñávaha. Te ní nguíta-güedé ní cacu nèhe-güedé Jèsús cuendá quee espíritú-á<sup>n</sup> yiqui cùñú-yu, te ní xáha<sup>n</sup>-güedé:

—Xocuñí-n, chi càchí Jèsús sá vā cúndecu ndíhi-gá-n tēe-a. Te diu-ni Jèsús cacú nèhe té Páblú òrè cáhá<sup>n</sup>-dé tnúhu-gá —càchí-güedé xáha<sup>n</sup>-güedé xii espíritú-á<sup>n</sup>.

<sup>14</sup>Te úsá tnàhá-güedé duca<sup>n</sup> ñí xóo cada-güedé. Te tátá-güedé ní xínani-dē Èsevá, te tēe-á<sup>n</sup> ñí cuu-dé dútú cúnú.

<sup>15</sup>Te sá dúcá<sup>n</sup> ñí cáhá<sup>n</sup>-güedé, te ní xáha<sup>n</sup> espíritú cúndìhi yucu ñávaha-á<sup>n</sup> xii-güedé:

—¿Te ná cúú nchòhó nñu dayùhu ñáhá-ndó? Te xini-í Jèsús, te xini-í yoo cùu té Páblú, te nchòhó ñá túú xini ñáhà-í xii-ndo —càchí espíritú-á<sup>n</sup> xáha<sup>n</sup>-xi xii-güedé.

<sup>16</sup>Te tēe yìhi ñaha espíritú cúndìhi yucu ñávaha-á<sup>n</sup> ñí ndanchita-dé ní tñi-dé cue tée quide tátna-á<sup>n</sup>, te ní ndíhi dóo-güedé ní ndátá-dē, te ní dánicuéhé ñáhà-dē xii-güedé, te ní xinu-güedé cuáhá<sup>n</sup>-güedé. <sup>17</sup>Te nchaa ñáyi israhél ndécú ñúú Èfesú ndíhi dava-gá ñáyi ndècu diu-ni ñúú-á<sup>n</sup> ñí níhí-yu tnúhu nàcuáa ní cuu, te ío ní yùhú-yu, te vai-yu ní cachí sá ío càhnu cuu Xitohó Jesucristú.

<sup>18</sup>Te dava ñáyi ní sándáá iní-xi tnúhu Jèsús ní sáhá<sup>n</sup>-yu núu ndécú tē Páblú, ndíhi núu ndécú nchaa ñáyi ní sándáá iní tnúhu-gá ní náhma-yu nàcuáa ní xóo cada-yu. <sup>19</sup>Te titñí ñáyi ní xóo cada ndúu nehé-yu tutú-yu ní sáhá<sup>n</sup> núu ndécú nchaa ñáyi sándáá iní-xi tnúhu-gá, te yacá<sup>n</sup> ní ndada cuendá-yu sá ío yahu ní sáha-yu tutú-yu, chi ndéé

údico úxí mǐl díhú<sup>n</sup> cuixí<sup>n</sup> ní sáha-yu núú ncháá. Te ncháá-yu ní sahmí-yu tutú-yu. <sup>20</sup> Te sátá ní cáyú nchaa tutú-á<sup>n</sup>, te vâi-gá ñáyiú ní tuhá-yu ichi Yá Ndiöxí, te ní sáha-yu cuendá sá ïo xini ñuhu tnúhu Yá Ndiöxí.

<sup>21</sup> Te ní cachí té Páblú sá quihí<sup>n</sup>-dé distritú Macèdoniá ndihi distritú Acáyá, te dátñuní núhú-dé ñuú Jerusálén, te duca<sup>n</sup> te dátñuní quihí<sup>n</sup>-dé ñuú Rómá. <sup>22</sup> Te ndècu ndihi-dé té Timùteú ndihi té Èrastú cue téé chindee ñaha xii-dé. Te té Páblú ní xáha<sup>n</sup>-dè xii-güedé sá códó nùu-güedé quíhí<sup>n</sup> Macèdoniá, te ní xica-güedé cuáhá<sup>n</sup>-güedé, te mee-dè ní quendóo-dé.

### Ñáyiú Éfesú ío dusa<sup>n</sup> quidé-yu ñuú-yu

<sup>23</sup> Te dàvá-á<sup>n</sup> ïo ní cudéé<sup>n</sup>-yu núú ncháa ñáyiú ní tuha ichi Yá Ndiöxí. <sup>24</sup> Te ñ<sup>n</sup> téé ñuú Éfesú nání-dè Demètriú. Te téé-á<sup>n</sup> ní xóo canehe chiú<sup>n</sup>-dé mee-ni díhú<sup>n</sup> cuixí<sup>n</sup> ní xóo cadúha-dé veñúhu líhli, dátñá cuíní-ndó càa veñúhu Diàná sá cúú ndiöxí-yu. Te vâi díhú<sup>n</sup> ní xóo níhí-dè ndihi cue téé ní xóo cada chiú<sup>n</sup> ndihi-dé. <sup>25</sup> Te ní cana-dé cue téé quide chiú<sup>n</sup> ndihi-dé, ndihi nchaa cue téé quide chiú<sup>n</sup> ndihi díhú<sup>n</sup> cuixí<sup>n</sup>, te ní xáha<sup>n</sup>-dè xii-güedé:

—Nàha-ndo sá ïo váha nihí-ó díhú<sup>n</sup> cuendá chiú<sup>n</sup> quide-o. <sup>26</sup> Te nàha-ndo sá càchí té Páblú sá ñà díú ndiöxí cúú sã ní cadúha ñáyiú ñuyúú-a. Te duca<sup>n</sup> càhá<sup>n</sup>-dé ñuú-ó, te duca<sup>n</sup>-ni càhá<sup>n</sup>-dé nihí distritú Àsiá, te ío-gá vâi ñáyiú sàndáá iní tnúhu càhá<sup>n</sup>-dé. <sup>27</sup> Te ío úhú ñúu na cuíta chiú<sup>n</sup> quide-o, vá yóo-gá cuaa<sup>n</sup> sá cádüha-o. Te nguíta-yu càhá<sup>n</sup>-yu sá veñúhu Diàná ñá túú càváha, te vá cádá càhnu-gá-yu sàndú-ó. Te nàha-ndo sá ïo càhnu cuu Dianá, chi nchaa ñáyiú distritú Àsiá quidé càhnu ñahá-yu ndihi ñáyiú xindecu ní càa xico ñuyúú —càchí té Demètriú xáha<sup>n</sup>-dè xii-güedé.

<sup>28</sup> Te sá dúcá<sup>n</sup> ní cáhá<sup>n</sup> té Demètriú, xíã<sup>n</sup> ní cudéé<sup>n</sup>-güedé núú tè Páblú, te uu<sup>n</sup>ni ní cuáá-güedé te càchí-güedé:

—Ío càhnu cuu Dianá sàndú ñáyiú Éfesú! —càchí-güedé.

<sup>29</sup> Te nchaa ñáyiú ñuú Éfesú ndi coyo ndi coyó-yu xicáhá<sup>n</sup>-yu. Te tnàhá úú cue téé distritú Macèdoniá xicá cùu-güedé ndihi té Páblú, ñ<sup>n</sup>-dé nání-dè Gáyú, te ñ<sup>n</sup>-dé nání-dè Aristarcú. Te ní tñii-güedé úú cue téé-á<sup>n</sup>, te cuánguihu coyo ndihi ñaha-güedé vehe núú quidé-güedé jündá. <sup>30</sup> Te té Páblú cuíní-dé quíhu-dé tnàhá-dé vehe-á<sup>n</sup> càhá<sup>n</sup> ndihi ñaha-dè ní cùu, te ñá ní dàña cue téé ní sàndáá iní tnúhu-gá. <sup>31</sup> Te ñ<sup>n</sup> úú cue téé cùnuu distritú Àsiá ní cáhá<sup>n</sup> váha-güedé cuendá té Páblú, te ní xáha<sup>n</sup>-güedé xii ñ<sup>n</sup> téé xinu cuechi núú-güedé ní sáhá<sup>n</sup>-dé ní xáha<sup>n</sup>-dè xii té Páblú sá vâ quíhu-dé vehe núú quidé-güedé jündá.

<sup>32</sup> Te uu<sup>n</sup>ni ní cuáá-yu ncháa-yu, te ñá ñ<sup>n</sup>-ní tñúhu ní càhá<sup>n</sup>-yu, chi ndi díf<sup>n</sup> tñúhu ní càhá<sup>n</sup>-yu ñ<sup>n</sup> ñ<sup>n</sup>-yu. Te chitu-gã ñáyiú ñá ní cùnuni iní-yu ná cuendá ní dátacá ñahá-güedé xití vehe-á<sup>n</sup>, chi ñá ñ<sup>n</sup>-ní tñúhu ní càhá<sup>n</sup>-yu. <sup>33</sup> Te davá-yu ní càhá<sup>n</sup>-yu sá cuèchi té Lijandrú cúú-xí, chi ní xáha<sup>n</sup> ñáyiú isràél xii-dé sá càhá<sup>n</sup>-dé yuhú-yu chindee tñúhu ñaha-dè xí-yu. Te ní quide-dé ndaha-dé núú-yu sá cündedóho-yu tñúhu càhá<sup>n</sup>-dé chindee tñúhu ñaha-dè xí-yu yòtnúhu. <sup>34</sup> Te ní cutñuní iní-yu sá tèe isràél cúú-dè, te uu<sup>n</sup>ni ní cuáá tucú-yu, ñá ní dàña-yu càhá<sup>n</sup>-dé, te càchí-yu:

—Ío cùnuu Dianá sàndú ñuú Éfesú! —càchí-yu. Te dátñá úú òrè ñ<sup>n</sup>-ni tñúhu ní càhá<sup>n</sup>-yu.

<sup>35</sup> Te téé cùu secretariú-ni-gá ní càhá<sup>n</sup>-dé, te dátñuní cuèé cuèé ní sadí-yu yuhú-yu. Te ní xáha<sup>n</sup>-dè xí-yu:

—Nchaa-ndo cündedóho-ndo ñ<sup>n</sup> tñúhu na càhá<sup>n</sup>-í-a. Ío cùnuu Dianá, te nchaandi túhú ñáyiú sa nàhá-yu sá ncháá-ó ïo nèhe cuendá-ó veñúhu-ã<sup>n</sup>.

Te nàhá-yu sá néhé cuendá-ó sàndú-á<sup>n</sup>, chi véxi cuu<sup>n</sup>-gá andiu. <sup>36</sup>Te vá yõo ì<sup>n</sup> càchí sá ñã ndáá. Te coto-ndo mée-ndo, te vá cuidó-ndó càda-ndo, te vá cuidó-ndó cãhá<sup>n</sup>-ndó. <sup>37</sup>Te ná cuendá ndécá-ndó cuè téé-á<sup>n</sup> véxi, te ñã túú nã ní quide-güedé, te ñã túú nã ní dùhu-güedé veñúhu, te ñã túú cãhá<sup>n</sup> cuèhé-güedé cuendá Diána. <sup>38</sup>Te núu ìo yoo nãá ndihi ñaha xii té Demètriú ndihi cue téé quide chiu<sup>n</sup> ndihi-dé, te quíhí<sup>n</sup>-güedé cacá<sup>n</sup> cuéchi-güedé núu cuè téé cùchiu<sup>n</sup>. Te cue téé cùchiu<sup>n</sup> na cundoho-güedé núu quehndé-güedé cuéchi-yu àdi ñáhá. <sup>39</sup>Àdi ío-gá ná cuendú ñúhú ìní-ndó, te cãhá<sup>n</sup>-ndó òré ná cóo jùndá. <sup>40</sup>Te ío úhú núu na ñihí téé tàxi tnuí ñáhá xii-o tnúhu sá dúhá ìo quide dusa<sup>n</sup>-o, te cachí-dé sá ndècuéchi-o chi ñã túú sàndáá ìní-ó-dé quesaha-dé. Te ñã túú tnàhí ndùu váha-xi sá dúhá càda-o ni cuu, te vitna duha ní quide-o, te ñã cútnùní ìní-ó nãsa cùñaha-o xii téé tàxi tnuí ñáhá xii-o núu na càna ñaha-dé —càchí téé cùu secretariú xãha<sup>n</sup>-dè xií-yu.

<sup>41</sup>Te ní xãha<sup>n</sup>-dè sá nùhú-yu te ní ndihí-yu cuánuhú.

### Té Pãblú cuáhá<sup>n</sup>-dé distrítú Macèdoniá ndihi distrítú Grèciá

**20** Te òré ñã túú-gã ní quide dusá<sup>n</sup>-yu, te ní cana ñaha tẽ Pãblú xii nchaa ñáyiu sàndáá ìní tnúhu Jèsús ní cãhá<sup>n</sup>-dé dóho-yu nàcuáa cadá-yu. Te ní quide ndee ìní ñáhá-dé xií-yu, te ní tnuí-dé ichi cuáhá<sup>n</sup>-dé distrítú Macèdoniá. <sup>2</sup>Te tayãha-dé cuáhá<sup>n</sup> ì<sup>n</sup> ì<sup>n</sup> núu yíndèhu Macèdoniá. Te cãhá<sup>n</sup>-dé dóho nchaa ñáyiu sàndáá ìní tnúhu Jèsús nàcuáa cadá-yu, te ní cudíí ìní-yu cadá-yu nàcuáa cãhá<sup>n</sup> Yã Ndiõxí cadá-yu sá dúcá<sup>n</sup> ñí cãhá<sup>n</sup>-dé dóho-yu. Té ní quexio-dé distrítú Grèciá. <sup>3</sup>Te xíá<sup>n</sup> ñí xíndecu-dé úní yóo. Te xíá<sup>n</sup> quèé-dé bàrcú quíhí<sup>n</sup>-dé

distrítú Siriá ní cùu, te ní ñihí-dé tnúhu sá ndétú ñaha ì<sup>n</sup> úú cue téé isràél cahni ñaha-güedé xii-dé ní cùu, núu xíá<sup>n</sup> ní tnuí-dé ichi cuáhá<sup>n</sup>-dé ní yáha-dé ichi distrítú Macèdoniá. <sup>4</sup>Te cuáhá<sup>n</sup> ndihi-dé té Sopàtér téé ñúu Bèréá, ndihi té Aristarcú, ndihi ì<sup>n</sup> téé nani Segundú. Te ndi ndúu cue téé-á<sup>n</sup> cúú-güedé cue téé ñúu Tesalónica. Te tnàhá té Gãyú téé ñúu Dèrbé, ndihi té Timùteú cuáhá<sup>n</sup> ndihi-dé, te tnàhá té Tiquicú ndihi té Trõfimú cuáhá<sup>n</sup> ndihi-dé, te úú cue téé-á<sup>n</sup> cúú-güedé cue téé distrítú Àsiá. Te nchaa cue téé-á<sup>n</sup> cuáhá<sup>n</sup> ndihi-güedé té Pãblú. <sup>5-6</sup>Te ní quexio-güedé ñúu Filipú, te yacá<sup>n</sup> ní naníhí ñáhá-güedé xii-ndí. Te té Pãblú ní tendaha-dé cue téé ndihi-dé cuáhá<sup>n</sup>-güedé ñúu Tròás, te ní xãha<sup>n</sup>-dè sá díú-ní yacá<sup>n</sup> cundetu ñaha-güedé xii-ndí. Te ní ndóo-í ndihi-dé, te ní xíndecu-ndí vico xèxi-yu pãá sá ñã túú yìhi lebadurá. Te sáta ñí yáha vico, te ní quée-ndí bàrcú cuáhá<sup>n</sup>-ndí, te ní xúhu<sup>n</sup>-ndí ichi úhú<sup>n</sup> nduu, te ní quexio-ndí ñúu-á<sup>n</sup>. Te yacá<sup>n</sup> ní naníhí tnàhá-ndí ndihi cue téé yòdo nuu cuáhá<sup>n</sup> ní xíndecu-ndí úsá nduu.

### Té Pãblú cuáhá<sup>n</sup> ngándihi-dé ñáyiu ñúu Tròás

<sup>7</sup>Te ì<sup>n</sup> nduu ndumíngú ní naníhí tnàhá-ndí ndihi nchaa ñáyiu ní sàndáá ìní-xi tnúhu Jèsús ní xexi-ndí pãá ndihí-yu. Te duca<sup>n</sup> ñí quide-ndí, chi ní cachí Jèsús sá dúcá<sup>n</sup> càda-o cuendá sá vã nàcuànaa-o sá ñí xíhí-gá cuendá naníhí tàhú-ó. Te té Pãblú ní ngúíta-dé cãhá<sup>n</sup>-dé tnúhu-gá, te cãhá<sup>n</sup>-dé ní cuu dava niú, chi cuendá ná tũndaá ìngá nduu-á<sup>n</sup>, te caca-dé quíhí<sup>n</sup>-dé ìngá xi-chi. <sup>8</sup>Te ndècú-yu vehe yòdo tnaha, te yìhí-yu ndéé cuàrtú cúú ùní núu ñínu, te càyú víhí ñùhú xití cuàrtú-á<sup>n</sup>. <sup>9</sup>Te ì<sup>n</sup> téé sa ta cùu sacuéhé luha nani-dé Eùticú núcõo-dé yèhe ventaná, cuíní-dé cúdú-dé, chi ní cunaha vìhi

cahá<sup>n</sup> té Páblú, te ní tñi ñaha sàní xii-dé ní xídí-dé, te ní ngava-dé ndéé ñuhu. Te ní nuú-yu núú ñúhú cuendá ndacani ñàhá-yu, te sa ní xíhí-dé, chi ío òcú<sup>n</sup> ní ngava-dé. <sup>10</sup> Te tñàhá té Páblú nchìcú<sup>n</sup>-dé ní nuu. Te ní quexio cunu-dé núú càtùu téé ní xíhí-á<sup>n</sup>, te ní numi ñaha-ní-dé, te ní xáha<sup>n</sup>-dè xí-yu:

—Vá ndìhú iní-ndó, chi ní ndoto-dé — cächí-dé xáha<sup>n</sup>-dè xí-yu.

<sup>11</sup> Te dàtnùní cuánda ndihi ñaha tucu-dé xí-yu cuàrtù núú yfíhí-yu ní cùu, te yàcá<sup>n</sup> ní xexi ndihi ñaha-dè xí-yu, dàtnùní ní ngúíta-dé vài-gá tñúhu ní cáhá<sup>n</sup>-dé, te càhá<sup>n</sup>-ni-dé ní túndaá, te dàtnùní ní xica-dé cuáhá<sup>n</sup>-dé. <sup>12</sup> Te téé ní ngava-á<sup>n</sup> ní sánúndeca ñàhá-yu xii-dé ndéé vehe-dé, te ío ní cudí iní-yu sá ní ndoto-dé.

### Ní quee-güedé ñúú Tròás cuáhá<sup>n</sup>-güedé ñúú Miletú

<sup>13</sup> Te té Páblú ní cachí-dé sá quíhí<sup>n</sup>-ndí ndihi bàrcú ndéé ñúú Àsón, te mee-dè caca saha-dè, te yàcá<sup>n</sup> naníhí tñàhá-ndí ndihi-dé te quee-dé bàrcú, te ní quee-ndí bàrcú cuáhá<sup>n</sup>-ndí. <sup>14</sup> Te ní naníhí tñàhá-ndí ndihi-dé ñúú Àsón, te yàcá<sup>n</sup> ní quee-dé bàrcú tñàhá-dé cuáhá<sup>n</sup>-ndí ñúú Mitilené. <sup>15</sup> Te ní quexio-ndí ndéé ingá nduu yatni ñúú Quú, te ndéé nduu tñéé ní quexio-ndí ñúú Sámú te yàcá<sup>n</sup> ní yáha-ndí, te ní quexio-ndí ñúú Trògiliú. Te ndéé nduu idá ní quexio-ndí ñúú Miletú. <sup>16</sup> Te té Páblú ñá ní cuíní-dé yáha-ndí ñúú Éfesú, chi ñá túú ní tñàhá iní-dé cuyaa-dè ichi, chi ío ndíhi iní-dé cuendá cuíní-dé quíní-dé ñúú vá ndácú-dè ndexio-dé ñúú Jerusàlén cundecu-dé vico Pentecòstés.

### Té Páblú càhá<sup>n</sup> ndihi-dé cue téé yíndaha ñaha xii ñáyíu sàndáá iní tñúhu Jèsús ñúú Éfesú

<sup>17</sup> Te òré ndécú tè Páblú ñúú Miletú, te ní cana-dé cue téé yíndaha ñaha xii ñáyíu sàndáá iní tñúhu Jèsús ñúú Éfesú sá quíhí<sup>n</sup>-güedé núú ndécú-dè. <sup>18</sup> Te sátá ní quexio-güedé, te ní xáha<sup>n</sup>-dè xii-güedé:

—Nàha-ndo nacúaá ní quide-í ndéé cútñàhá ní quexio-í distritú Àsiá. <sup>19</sup> Chi ní quide-í nàcuáa ní cáhá<sup>n</sup> Yá Ndiòxí cada-í, ñá túú ní tùhío-í, te ñá túú ní quide cahnu-í meé-í, te ío ní ndáhyú-í sá quidé dàvá-yu, chi ío sàá iní-yu. Te sa ñaha-ndo sá tìtní xito ní cuíní ñáyíu isràèl cahni ñàhá-yu xii-í ní cùu, te ío ní ndoho-í ní cácu-í. <sup>20</sup> Te sa ñaha-ndo sá ncháándì tùhú sa ní cachí tñúhu-í nàcuáa cada-ndo cuendá sá chindèe ñaha Yá Ndiòxí xii-ndo. Te ní cáhá<sup>n</sup>-í tñúhu-gá núú-ndó nchàa-ndo, te diu-ni duca<sup>n</sup> ní quixi-í ndi tñàhá vehe-ndo ní cáhá<sup>n</sup>-í tñúhu-gá núú-ndó. <sup>21</sup> Te ní xáha<sup>n</sup>-í xii ñáyíu isràèl ndihi ñáyíu ñá túú cùu ñáyíu isràèl sá dāñā-yu nchaa sá cuèhé sá dúhá quidé-yu te quindáá iní-yu tñúhu Xítóhó Jesucristú. <sup>22</sup> Te dacuití quíhí<sup>n</sup>-í ñúú Jerusàlén, chi Espíritú Yá Ndiòxí ní cachí-xi sá dáí quíhí<sup>n</sup>-í, te ñá túú xíní-í nándi cada ñaha-güedé xii-í yàcá<sup>n</sup> te núu na quèxio-í. <sup>23</sup> Te ñí ñí ñúú núú sàhá<sup>n</sup>-í cächí tñúhu Espíritú-gá sá chíhí ñaha-güedé vecaá, te cada úhú ñàhá-güedé. <sup>24</sup> Dico ñá túú tñàhí ná cuu cuèi na càhni ñaha-güedé xii-í, dico cuíní-í sá dñí iní dandíhí-í nchaa sá ní cachí Xítóhó Jesucristú cada-í. Te ní cachí Yá Ndiòxí sá càhá<sup>n</sup>-í núú ñáyíu sá ío cùu iní ñàhá-gá xí-yu, te naníhí tñúhu-yu núu na quindáá iní-yu tñúhu-gá.

<sup>25</sup> Te sa ní cachí tñúhu-í xii-ndo nchàa-ndo sá ñúu na quindáá iní-ndó Yá Ndiòxí, te ndíhu ndaha ñaha-gá



xii-ndo. Te na càchí tnúhu-í sá nì ìí<sup>n</sup> nduu-gá vá quìní ñáhá-ndó xii-í ñuyíú-a. <sup>26-27</sup> Te yúhú ñá túú cuèchi-í nùu ìó ñáyiú vá nánihí tàhú, chi sa ní cachí tnúhu-í nchaá sá nì cáhá<sup>n</sup> méé Yá Ndiöxí cada-ndo. <sup>28</sup> Te coto-ndo mée-ndo, te coto-ndo tnàhá ñáyiú sàndáá iní tnúhu-gá, chi Espíritú-gá ní cachí-xi sá cùnùu-ndo núù-yu dacuàha-ndó-yu tnúhu-gá. Te cada-ndo cuèndá sá dàtná mbéé-ndó cùu-yu, te mee-ndo cùu-ndo datná toli xito-ndó-yu duca<sup>n</sup> càda-ndo cuendá, chi nàha-ndo sá Jèsús ní sati níñí-gá, te ní xíhí-gá cuèndá naníhí tàhú-ó ndìhí-yu. <sup>29</sup> Te yúhú sa cùtnuní iní-í sá òrè ñá túú-gá-í ndécú, te quixi ñáyiú dandàhú ñáhá xii-ndo cuendá dañà-ndo tnúhu Yá Ndiöxí, te cada ñáhá-yu xii-ndo dàtná quidé ñáñá òrè tníí-dí mbéé. <sup>30</sup> Te diu-ni ìí<sup>n</sup> úú cue téé ndècu ndìhi-ndo, cue téé-á<sup>n</sup> dacuàndehnde-güedé, te cudana davá-yu quindáá iní-yu chítnáhá ñáhá-yu xii-güedé. <sup>31</sup> Te xíá<sup>n</sup> nùu càchí tnúhu-í sá ìo quíhi iní-ndó cùndecu-ndo ndìhi nchaá ñáyiú sàndáá iní tnúhu-gá. Te nàha-ndo sá yúhú ní xíndecu-í úní cuíá nì cáhá<sup>n</sup>-í tnúhu Jèsús núú ñáyiú cuèi nduu cuèi niú. Te áma ní xóo ndáhyú-í, chi ñá ní cuimí-yu quindáá iní-yu nchaá-yu tnúhu ní cáhá<sup>n</sup>-í —càchí té Pàblú xàha<sup>n</sup>-dè xii-güedé.

<sup>32</sup> Te xàha<sup>n</sup> tùcu-dé:

—Nchòhó cue téé ndècu ndìhi-í ichi Xítohó Jesucristú, ío cuimí-í sá méé Yá Ndiöxí chindee ñàha-gá xii-ndo. Te mee-gá ní cáhá<sup>n</sup>-gá sá ìo cùdí iní ñáhá-gá xii-ndo. Te naníhí tàhú-ndó ndìhi nchaá ñáyiú cùu cuendá-gá, te chindee ñàha-gá xii-ndo cuèndá cada-ndo nchàa sá càhá<sup>n</sup>-gá. <sup>33</sup> Te òrè ní xíndecu ndìhi ñàha-í xii-ndo, te ní díhú<sup>n</sup> ni dóó ñá túú ní cùdí iní-í. <sup>34</sup> Te mee-ndo sà naha-ndo sá yúhú ní quide chiú<sup>n</sup>-í, te ní ñhí-í nchaá sá nì nandíhi-í ndìhi cue téé xica cuu ndìhi-í. <sup>35</sup> Te sa

ní xiní-ndó nàcuáa ní quide-í ní quide chiú<sup>n</sup>-í, te diu-ni duca<sup>n</sup> càda chiú<sup>n</sup>-ndo cuendá chindee-ndo nchàa ñáyiú ndàhú, chi sa nàha-ndo nacuáa ní cachí Xítohó Jesucristú, te duha ní cachí-gá: “Cùdí-gá iní-ó cuàha-o ñáyiú ndàhú sá xíní ñùhú-yu dàcúxí sá táxí-yu xii mee-o”, duha ní cachí-gá —càchí té Pàblú xàha<sup>n</sup>-dè xii-güedé.

<sup>36</sup> Te sáta dúcá<sup>n</sup> ní cáhá<sup>n</sup>-dé, te ní ngüfí xítí-dè ndìhi dava-gá-güedé, te ní cáhá<sup>n</sup> ndìhi-dé Yá Ndiöxí. <sup>37</sup> Te sáta ní túhú tnúhu ní cáhá<sup>n</sup>-dé ndìhi Yá Ndiöxí, te ní ndáhyú víhí-güedé sá quíhí<sup>n</sup>-dé, te ní numi ñàha-güedé, te ní teyuhu ñàha-güedé. <sup>38</sup> Te ní ndíhú víhí ìní-güedé, chi ní xàha<sup>n</sup> tē Pàblú sá nì ìí<sup>n</sup> nduu-gá vá nánihí tnáhá-güedé cáhá<sup>n</sup> ndìhi tnàha-güedé. Te cuáhá<sup>n</sup> ndìhi ñàha-güedé xii-dé núú ndécú bàrcú.

#### Té Pàblú cuáhá<sup>n</sup>-dé ñuú Jerusalén

**21** Te ní quide ndee ìní-ndí nchaá cue téé cùnùu. Te ní queé-ndí bàrcú cuáhá<sup>n</sup> ndáá ichi-ndí ñuú Cös. Te nduu tnéé ní sáhá<sup>n</sup>-ndí ñuú Ròdás, te ní yáha-ndí cuáhá<sup>n</sup>-ndí ñuú Pà-tará. <sup>2</sup> Te yàcá<sup>n</sup> ní naníhí-ndí ìí<sup>n</sup> bàrcú ñùhú ìchi-xi quíhí<sup>n</sup>-xi distritú Fèniciá, xíá<sup>n</sup> ní queé-ndí cuáhá<sup>n</sup>-ndí. <sup>3</sup> Te ichi cuáhá<sup>n</sup>-ndí ní xiní-ndí distritú Chipré cáá cuàdava xití làmár, te ní yáha-ndí, te ní quendóo ñuú-á<sup>n</sup> xio dàtni-ndí. Te cuáhá<sup>n</sup>-ndí ñuú Tírú ìí<sup>n</sup> ñuú yíndèhu distritú Siríá cuèndá yàcá<sup>n</sup> tava-güedé nchaá sá nchídó bàrcú. <sup>4</sup> Te yàcá<sup>n</sup> ní naníhí tnáhá-ndí ndìhi ñáyiú ní sàndáá iní tnúhu Jèsús, te ní xíndecu-ndí úsá nduu ndìhí-yu. Te ní xáhá<sup>n</sup>-yu sá vá quíhí<sup>n</sup> té Pàblú ñuú Jerusalén, chi Espíritú Yá Ndiöxí ní xàha<sup>n</sup>-xi xíi-yu sá ndóhó víhi-dé nùu na quíhí<sup>n</sup>-dé. <sup>5</sup> Te sáta ní yáha nduu úsá, te ní quee-ndí cuáhá<sup>n</sup>-ndí yuhu làmár. Te ní quee nchaá ñáyiú ní sàndáá iní tnúhu-gá, téé, ñadìhí, nchaá landú, nchaá-yu ní sán-

deca ñàhá-yu yuhu làmár, te òré ní quexìo-ndí, te ní ngüíñí xítí-ndí ní cáhá<sup>n</sup> ndihí-ndí Yá Ndiöxí. <sup>6</sup>Te ní quide ndee iní tnáhá-ndí ndihí-yu, te dätñuní ní quee-ndí bàrcú, te ní naquehé<sup>n</sup>-yu ichi cuánuhú-yu vehé-yu.

<sup>7</sup>Te ní xica bàrcú ñúhú-ndí ní quee-xi ñúu Tírú cuáhá<sup>n</sup>-ndí ndihí-xi ñúu Tolèmaidá. Te xíá<sup>n</sup> ñí sáá-xi te ní quene-ndí, te ní sáhá<sup>n</sup>-ndí ní cáhá<sup>n</sup> ndihí-ndí nchaa ñáyiú sándáá iní-xi tnúhu Jèsús, te ní xíndecu-ndí ndihí-yu ñí<sup>n</sup> nduu. <sup>8</sup>Te nduu tnéé ní ndée tucu-ndí bàrcú cuáhá<sup>n</sup>-ndí ñúu Cèsareá, te yàcá<sup>n</sup> ní quene tucu-ndí bàrcú, te cuáhá<sup>n</sup>-ndí vehe té Lìpé cundecu-ndí ndihí-dé. Te téé-á<sup>n</sup> ñí xóo cada chiú<sup>n</sup> ndihí-dé ñnú-gá cue téé ní chindee ñàha xii ñáyiú sándáá iní tnúhu-gá ñúu Jerusalén ní xóo cuáñaha-güedé sá ñí xóo caxí-yu. Te dätñuní mee-ñá tnúhu Yá Ndiöxí càhá<sup>n</sup>-dé xíca cùu-dé. <sup>9</sup>Te té Lìpé-á<sup>n</sup> ndècu cúmí dèhe ñihí-dé, te ni ñí<sup>n</sup>-yu vátá ndúcú ñàha-gá téé xii-yu, te nchaá-yu càhá<sup>n</sup>-yu tnúhu Yá Ndiöxí tnúhu sá dácàhu iní ñàhá mèe-gá. <sup>10</sup>Te xíá<sup>n</sup> ñí cuu titní nduu ndècu-ndí, te ní quexìo ñí<sup>n</sup> téé nàni Agabú ñúu-á<sup>n</sup>, véxi-dé distritú Jüdeá, te téé-á<sup>n</sup> tnàhá-dé càhá<sup>n</sup>-dé tnúhu Yá Ndiöxí. <sup>11</sup>Te ní ñíhí-dé tnúhu núu ndécú-ndí ñúu ní quixi-dé ní cáhá<sup>n</sup> ndihí ñàha-dé xii-ndí. Te ní xíca<sup>n</sup>-dé cínchú té Páblú, te ní ngóo-dé, te ní ngüíta-dé ní dácútú-dé sáhá-dé ndihí ndaha-dé, te ní cachí-dé xii-ndí:

—Espiritú Yá Ndiöxí ní cachí-xi sá tée dii cínchú-xi-a tñii ñàha cuè téé isràèl ñúu Jerusalén, te duha dacùtu ñàha-güedé xii-dé, te cuáha cuendá ñàhá-güedé xii-dé núu cuè téé ñúu Rómá. Duha ní cáhá<sup>n</sup> Espiritú-gá —càchí té Ágabú.

<sup>12</sup>Te sá dúcá<sup>n</sup> ñí cáhá<sup>n</sup>-dé, te ní xáha<sup>n</sup>-ndí nchaa-ndí sá vǎ quíhí<sup>n</sup> té Páblú ñúu Jerusalén. <sup>13</sup>Te té Páblú ní cachí-dé:

—¿Ná cuendá ndéé dúcá<sup>n</sup> ndàhyú-ndó dándihú iní ñàhá-ndó xii-í-í? Te ñá túu nǎ cuu cuéi na dàcutu ñàha-güedé, àdi cuéi na càhni ñàha-güedé xii-í cuendá sá càhá<sup>n</sup> ndihí-í Jèsús, chi sa ndècu túha-í sá cùu-í —càchí-dé.

<sup>14</sup>Te ñá túu ní sándáá iní-dé sá dúcá<sup>n</sup> xáha<sup>n</sup>-ndí, núu xíá<sup>n</sup> ñá túu-gá ná ní xáha<sup>n</sup>-ndí xii-dé sá vǎ quíhí<sup>n</sup>-dé, te ní xitnàha-ndí:

—Mee-ni-gǎ Yá Ndiöxí ná cùnaha-gá nása sàni iní-gá cada-gá —xitnàha-na-ndí.

<sup>15</sup>Te ní quehe<sup>n</sup>-ndí ndàchiu<sup>n</sup>-ndí, te ní xica-ndí cuáhá<sup>n</sup>-ndí ñúu Jerusalén. <sup>16</sup>Te cuáhá<sup>n</sup> ndihí-ndí ñí<sup>n</sup> úú cue téé Cèsareá, cue téé ní sándáá iní tnúhu Jèsús. Te ndèca ñàha-güedé xii-ndí cuáhá<sup>n</sup> vehe té Mnàson, te téé-á<sup>n</sup> cúu-dé téé distritú Chìpré, te ndècu-dé ñúu Jerusalén, te sa ní cuu vǎi nduu ní sándáá iní-dé tnúhu-gá, te vehe téé-á<sup>n</sup> ñí xíndecu-ndí.

### Té Páblú ndátñuhu-dé ndihí té Jàcobó

<sup>17</sup>Te òré ní quexìo-ndí ñúu Jerusalén, te nchaa ñáyiú ní sándáá iní tnúhu Jèsús ní quixí-yu ní dándácóo váha ñàhá-yu, chi ní cudíí víhí iní-yu sá ñí quexìo-ndí. <sup>18</sup>Te nduu tnéé cuáhá<sup>n</sup> ndihí-ndí té Páblú cuendá càhá<sup>n</sup> ndihí-ndí té Jàcobó, te òré ní quexìo-ndí núu ndécú-dé, te ndècu ndihí-dé nchaa cue téé yìndaha ñàha xii ñáyiú sándáá iní tnúhu Jèsús. <sup>19</sup>Te té Páblú ní dándácóo váha ñàha-dé xii-güedé, te ní xáha<sup>n</sup>-dè nàcuáa ní quide Yá Ndiöxí ní chindee ñàha-gá xii-dé ní cáhá<sup>n</sup>-dé tnúhu-gá núu ñáyiú ñá túu cùu ñáyiú isràèl. <sup>20</sup>Te sátá ñí yáha ní cáhá<sup>n</sup>-dé, te ní ndácá<sup>n</sup> tǎhǎ-yu núu Yá Ndiöxí cuendá nchaa sá ñí quide-gá. Te dätñuní ní xáha<sup>n</sup>-güedé xii té Páblú:

—Yòhó sa nàha-n sá ñí cuu titní mìl ñáyiú isràèl ní sándáá iní-yu tnúhu Jèsús, te càchí-yu sá ño xìni ñuhu-xi cadá-yu nchaa nàcuáa càhá<sup>n</sup> tnúhu sá ñí chídó tnùní ndí Moisés. <sup>21</sup>Te

ní níhí-yu tnúhu sá dácuaàha-n ñáyiú isràèl ñáyiú ndècu ñuú xícá cuèndá sá vǎ cǎdá-gǎ-yu nàcuáa ní cachí ndíi Moisés cadá-yu. Te xǎha<sup>n</sup>-n xíi-yu sá vǎ cuǎha-gǎ-yu sèñá ñii landú-yu, te vǎ cǎdá-gǎ-yu dàtná ní xóo cada ñáyiú ndéé sanaha, duha dácuaaha-n ñáyiú ní níhí-yu tnúhu. <sup>22</sup> Te na níhí-yu tnúhu sá ndécú-n iha, te tnàvíí ngúíta-yu cáhá<sup>n</sup> cuèhé-yu cuèndá-n. <sup>23</sup> Te na cachí tnúhu-ndí nàcuáa cada-n. Ndècu cúmí cue tée vátá cǎdá-gǎ-güedé nàcuáa ní cáhá<sup>n</sup> méé-güedé sá cǎdá-güedé cuèndá nduu vétú iní Yǎ Ndiöxí. <sup>24</sup> Te quíhí<sup>n</sup>-n ndíhi-güedé te cada-n nchàa nacuáa ní xóo cada ñáyiú ndéé sanaha cuèndá nduu vétú iní Yǎ Ndiöxí. Te tava-n díhú<sup>n</sup> cuu núú-güedé cháhu-güedé veñúhu, te duca<sup>n</sup> te dàtnùnì ndacu dèté díquí-güedé. Nchaa xǎ<sup>n</sup> cada-n, te quini ñáyiú sá ñǎ ndáá tnúhu càhá<sup>n</sup> nchaa ñáyiú càhá<sup>n</sup> cuèhé cuèndá-n. Te na cùtnuní iní-yu sá tnàhá-n quide-n nchaa nacuáa ní chídó tnùnì ndíi Moisés cadá-yu. <sup>25</sup> Te sa ní quide ndáá-ndí cuèndá nchaa ñáyiú ñuú xícá, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáhá<sup>n</sup> ndaha nchaa ñáyiú-á<sup>n</sup> sǎ vǎ cǎxí-yu nchaa sá nchító-ó ndúu táhú nchaa sá cǎchí-yu cùu ndióxí ní cadúha cue ñáyiú ñuyíú-a. Te ní xǎha<sup>n</sup>-ndí sá vǎ cǎxí-yu níhí, te vǎ cǎxí-yu cuñú nchaa quiti cuèhné. Te vǎ càhá<sup>n</sup> ndíhi cue tée ñadíhí te núu ñá díú ñadíhí-güedé cúú-yu, te ni cuè ñáyiú díhí vǎ càhá<sup>n</sup> ndíhí-yu tée te núu ñá díú yíi-yu cùu-güedé. Duha ní tee-ndí núú tütú cuáhá<sup>n</sup> —cǎchí-güedé xǎha<sup>n</sup>-güedé xii té Pǎblú.

**Ní tñii-güedé té Pǎblú xití  
veñúhu ñáyiú isràèl**

<sup>26</sup> Te nduu tnéé cuáhá<sup>n</sup> té Pǎblú ndíhi cúmí cue tée veñúhu càhnu sá ìo cùnuu núú ñáyiú isràèl cada-güedé nàcuáa ní

xóo cada ñáyiú ndéé sanaha cuèndá nduu vétú iní Yǎ Ndiöxí. Te ní quíhu-dé veñúhu càhnu sá ìo cùnuu-á<sup>n</sup> ní xǎha<sup>n</sup>-dé ná daha-gǎ nduu cùmání dandíhi-güedé nàcuáa ní xóo cada ñáyiú ndéé sanaha, te dàtnùnì cǎnehe-güedé sá ndúú táhú Yǎ Ndiöxí quíhí<sup>n</sup> veñúhu.

<sup>27</sup> Te cùmání-gǎ cuu úsá nduu sá ní sáhá<sup>n</sup>-güedé veñúhu càhnu sá ìo cùnuu, te sa ndècu tucu té Pǎblú veñúhu. Te cue tée isràèl véxi distritú Àsiá ní xiní-güedé té Pǎblú yíhí-dé veñúhu, te ní tñii ñaha-güedé xii-dé, te ìo ní cáhá<sup>n</sup> cuèhé-güedé cuèndá-dé núú dàva-gǎ ñáyiú yíhi veñúhu cuèndá sá cúdèé<sup>n</sup>-yu núú tē Pǎblú. <sup>28</sup> Te níhi ní cáhá<sup>n</sup>-güedé, te xǎha<sup>n</sup>-güedé xii-yu:

—ìNchòhó ñáyiú isràèl, yáchí-ndó chì cuánundaha ñaha-ndo! Chi tée-a yayàcá<sup>n</sup> cuáhá<sup>n</sup>-dé càhá<sup>n</sup>-dé sá ñǎ túú nàndíhi-o, te càhá<sup>n</sup>-dé sá vǎ cǎdá-ó nchàa nacuáa càhá<sup>n</sup> tnúhu sá ní chídó tnùnì ndíi Moisés, te cǎchí-dé sá ñǎ túú nàndíhi veñúhu-a. Te ñá díú-ní xǎ<sup>n</sup> chi sa ní quíhu-dé veñúhu-a ndíhi cue tée ñá túú cùu ñáyiú isràèl, te sá dúcá<sup>n</sup> ní quide-dé, te ñá túú-gǎ ní cǎnehe íi-dé xití veñúhu. Te veñúhu-a cùu-xi vehe Yá Ndiöxí —cǎchí-güedé xǎha<sup>n</sup>-güedé xii-yu.

<sup>29</sup> Te duca<sup>n</sup> ní cáhá<sup>n</sup>-güedé chi ní sani iní-güedé sá ní quíhu ndíhi-dé té Tröfímú veñúhu-güedé, chì ní xiní-güedé xícá cùu ndíhi ñaha-dé xití ñuú. Te tée-á<sup>n</sup> cúú-dé tée ñuú Èfesú, te ñá díú tēe isràèl cúú-dé.

<sup>30</sup> Te chitu ñáyiú ñuú-á<sup>n</sup> ní tacá-yu ní tñii-yu té Pǎblú táñúhu ñahá-yu ní ndee veñúhu càhnu sá ìo cùnuu, te òré-ni ní nacadí-güedé yèhe veñúhu-á<sup>n</sup>. <sup>31</sup> Te sa cahní-yu té Pǎblú ní cùu, te ní sáhá<sup>n</sup> ìi<sup>n</sup> úú-güedé núú ndécú tēe cùu capitá<sup>n</sup> cùnùu-gǎ, te ní xǎha<sup>n</sup>-güedé xii-dé sá ncháá ñáyiú ñuú Jerusalén xínàá-yu. <sup>32</sup> Te òré-á<sup>n</sup> cuáhá<sup>n</sup> tée cùu capitá<sup>n</sup> cùnùu-gǎ ndíhi dava-gǎ cue tée

nchìcú<sup>n</sup>-gá ndìhi sandàdú-dé. Te òré ní xíní-yu ní quexìo coyo-güedé núú xǐxúcu-yu, te ní yùhú-yu ñá túú-gǎ ní càní-yu té Pǎblú. <sup>33</sup>Te téé cùu capitá<sup>n</sup> ní sátuha-dé té Pǎblú, te ní xáha<sup>n</sup>-dë xii cue sandàdú-dé sá tñí ñàha-güedé dacùtu ñàha-güedé úú cadená. Te dǎtnùní ní xícá<sup>n</sup> tnúhú-dë núú-yu, te xáha<sup>n</sup>-dë:

—¿Ná cùú tée-a? ¿Ná ní quide-dé? —  
càchí-dé xáha<sup>n</sup>-dë xií-yu.

<sup>34</sup>Te téé cùu capitá<sup>n</sup>-á<sup>n</sup> ñǎ ní cùt-nuní iní-dé nüú ná cùú sǎ ní quide té Pǎblú, chi uu<sup>n</sup> ní cuáá-yu. Te tucu càhá<sup>n</sup> ìì<sup>n</sup>, tucu càhá<sup>n</sup> ìì<sup>n</sup>-yu, núú xǎ<sup>n</sup> ní xáha<sup>n</sup>-dë cue sandàdú-dé sá cándèca ñàha-güedé xii-dé qufh<sup>n</sup> cuártél núú ndécú-güedë. <sup>35-36</sup>Te nchìcú<sup>n</sup> ñáhǎ-yu cuáhá<sup>n</sup> ní quexìo ndéé nàcuáa càa nchìo cùnì-yu cahni ñáhá-yu xii-dé ní cùu. Te níhi ní cáhá<sup>n</sup>-yu xǎhǎ<sup>n</sup>-yu sá cáhni ñàha-güedé, te xǎ<sup>n</sup> ní ndacani ñàha-güedë ndécá ñàha-güedé cuásáa nchìo-ǎ<sup>n</sup>.

### Té Pǎblú xáha<sup>n</sup>-dë xii-güedé sá ñà túú cuèchi-dé

<sup>37</sup>Te cuánguihu-güedé cuártél ndìhi té Pǎblú ní cùu, te ní xáha<sup>n</sup>-dë xii téé cùu capitá<sup>n</sup> cùnùu-gá:

—Càhá<sup>n</sup> ndàhú-í núú-n cùndetu-n na cùñaha-í ìì<sup>n</sup> úú tnúhu xií-yu —càchí-dé xáha<sup>n</sup>-dë.

Te téé tàxi tnuní-á<sup>n</sup> ní xáha<sup>n</sup>-dë:

—¿Náa tnàhá yòhó càhá<sup>n</sup>-n tnúhu grìégú? <sup>38</sup>Te ní cáhá<sup>n</sup>-í sá tée ègìptú cùú-n, chi ñiu-n ní ndúcú-n cuè téé ní nàá ndìhi téé cùchiu<sup>n</sup> Cesár ní cáhá<sup>n</sup>-í, chi ñiu ìì<sup>n</sup> téé yàcá<sup>n</sup> ní ndúcú-dë cùmí mǐl cue téé ní sahnì ndíyì. Te ndèca tnaha-güedé ní sáhá<sup>n</sup> xití yucu ní xǐhi váha-güedé —càchí-dé xáha<sup>n</sup>-dë xii té Pǎblú.

<sup>39</sup>Te té Pǎblú ní xáha<sup>n</sup>-dë:

—Ñá dǐú tée ègìptú cùú-í, chi téé isràél cùú-í, chi ñiu-ni téé isràél cùú tǎtà-í, te

dìcò-ni sá ní cacu-í ñuú Tàrsú ñuú cáhnú, te ñuú-á<sup>n</sup> yíndèhu-xi distritú Cìlicíá. Te cùnì-í cada ndee iní-n dàña-n na cahá<sup>n</sup> ndìhi-í-yu —càchí-dé xáha<sup>n</sup>-dë.

<sup>40</sup>Te ní xáha<sup>n</sup> téé cùu capitá<sup>n</sup> cùnùu-gá sá cùú cáhá<sup>n</sup> té Pǎblú, núu ní ngúnutnǐ-dé núú nchìo, te ní quide-dé ndaha-dé sá cùndèdòho-yu. Te ní sadí-yu yuhú-yu, te ní cáhá<sup>n</sup>-dë tnúhu ñáyiú isràél, te xáha<sup>n</sup>-dë xií-yu:

**22**—Chí cádá càhuu iní nchòhó cue téé cuechi, na càhá<sup>n</sup>-í ìì<sup>n</sup> tnúhu cundedòho-ndo sá ñà túú cuèchi-í, chi ñá túú ñǎ ní quide-í, te ní ñà túú ñǎ tnúhu càhá<sup>n</sup>-í —càchí-dé xáha<sup>n</sup>-dë xii-güedé.

<sup>2</sup>Te cuendá sá dúcá<sup>n</sup> ní cáhá<sup>n</sup>-dë tnúhu mèé-yu núu tnàví-ñǎ ní sadí-yu yuhú-yu ní xíndedòho-yu ní cáhá<sup>n</sup>-dë, te xáha<sup>n</sup>-dë:

<sup>3</sup>—Yúhú cùú-í téé isràél, te ní cacu-í ñuú Tàrsú, te ñuú-á<sup>n</sup> yíndèhu-xi Cìlicíá. Te davitna lìhli-í cùtnàhá ní quexìo-í ñuú Jerusàlén ní dácúahá ñàha té Gamaliél. Te ní dácúahà-í nchaa tnúhu ní chídó tnùnì nchaa cue téé ndéé sanaha nàcuáa cada ñáyiú. Te yúhú ní cahu iní-í ní quide-í tǐtní núú chiu<sup>n</sup> nacúaa cuu váha iní Yǎ Ndiòxí ní cáhá<sup>n</sup>-í, te ñiu-ni duca<sup>n</sup> quide nchòhó tucu. <sup>4</sup>Te ní sánú ndúcú-í nchaa ñáyiú sàndáá iní-xi tnúhu Jèsús, cuèí téé, cuèí ñáyiú ñìhí ní dácútù-í-yu, te ní chihi-í-yu vecaá, te ní níhì-í tnúhu ndee iní sá cáhni-ndǐ-yu. <sup>5</sup>Te dútú cùnùu-gá ndìhi cue téé cùnùu núú-ndó ñàha-güedé sá ndáá càhá<sup>n</sup>-í chi mee-güedé ní taxi-güedé tutú cuñaha-í xii ñáyiú isràél ñáyiú ndècu ñuú Dàmascú cuendá cutnùnì iní-yu ná chíú<sup>n</sup> cuáhá<sup>n</sup>-í ní cùu. Te ñùhu-í ichi cuáhá<sup>n</sup>-í ñuú-á<sup>n</sup> cuànúndúcú-í ñáyiú ní sàndáá iní-xi tnúhu Jèsús cuendá dacùtu-í-yu te candeca-í-yu ndixi, te iha cada úhú ñáhá-güedë xií-yu ní cùu.

**Té Páblú xǎha<sup>n</sup>-dě xii ñáyiú nàcuáa ní cuu ní tuha-dé ichi Jèsús**

(Hch. 9:1-19; 26:12-18)

<sup>6</sup>Te ta cùyatni-í ñuú Dàmascú cuáhá<sup>n</sup>-í, te cùu-xi datná òré cauxúú nduu, te uu<sup>n</sup>i ní quee ñuhú andiu, te ní dáyèhé-xi ndéé núú nútnǎ-í. <sup>7</sup>Te ní quide nee-xi núu-í, xǎ<sup>n</sup> ní nduá-í ndéé ñuhu. Te ní tecú dóho-í cǎhá<sup>n</sup> ñ<sup>n</sup> sá cǎhá<sup>n</sup> andiu, te cǎchí-xi: “Yòhó té Sàulú, ¿ná cuendá cùú ũhú iní ñáhá-n dándoho ñaha-n xii-í?”, cǎchí sá cǎhá<sup>n</sup>-á<sup>n</sup>. <sup>8</sup>Te ní xáha<sup>n</sup>-í: “¿Ná cùú yòhó sá cǎhá<sup>n</sup>-ái?”, xǎha<sup>n</sup>-í. Te ní cǎhá<sup>n</sup> tucu ingá xito te cǎchí-xi: “Yúhú cùu-í Jèsús téé ní xindecu ñuú Nazàrét, te duca<sup>n</sup> ño dándoho ñaha-n xii-í”, cǎchí sá cǎhá<sup>n</sup>-á<sup>n</sup>. Te xǎ<sup>n</sup> ní cutnùní iní-í sá dǎú Jèsús cǎhá<sup>n</sup>. <sup>9</sup>Te nchaá cue téé ndihi-í ní xiní-güedé ní dáyèhé ñuhú, te ní yùhú-güedé, dico ñá túú ní tècú dóho-güedé òré ní cǎhá<sup>n</sup>-gá. <sup>10</sup>Te ní xáha<sup>n</sup>-í xii-gá: “Yòhó Xítóhó Jesucristú, ¿ná cuiní-n cǎda-í?”, xǎha<sup>n</sup>-í xii-gá. Te ní cǎchí-gá: “Ndacóo, te quǎh<sup>n</sup>-n ñuú Dàmascú, yàcá<sup>n</sup> tecú tnúhu-n nchàa nacuáa cuiní Yǎ Ndiòxí cada-n”, cǎchí-gá —cǎchí té Páblú xǎha<sup>n</sup>-dě xií-yu.

<sup>11</sup>Te ní xáha<sup>n</sup> tùcu té Páblú:

—Te cuendá sá ní dǎcuáá ñaha ñuhú xii-í nùu ní tñii cue téé ndihi-í ndaha-í ndécá ñaha-güedé cuáhá<sup>n</sup> ndéé ñuú Dàmascú.

<sup>12</sup>Te yàcá<sup>n</sup> ndécú ñ<sup>n</sup> téé nàni Ananiás, te ño vǎi sá ní chídó tnùní ndíi Moisés cadá-yu quide-dé. Te nchaá ñáyiú ñuú Dàmascú ño váha cǎhá<sup>n</sup> ndihi ñáhá-yu xii-dé. <sup>13</sup>Te ní quexio-dé núú ndécù-í, te ní cǎchí-dé: “Yòhó té Sàulú, téé ndècu ndihi-í ichi Xítóhó Jesucristú, ndúha núu-n”, cǎchí-dé. Te òré-ni ní nacaá<sup>n</sup> núu-í te ní xiní-í-dé. <sup>14</sup>Te dǎtnùní ní cǎchí-dé: “Yǎ Ndiòxí ní cǎhá<sup>n</sup> ndihi-gá

ñaní tnáhá-ó ní xindecu ndéé sanaha. Te diu-gá ní cáxi ñaha-gǎ xii-n cuendá quiní-n nchàa sá váha cuiní-gá cada-n. Te quiní-n Jèsús Yaá ñá túú cuèchi-xi, te diu-ni mee-gǎ cǎhá<sup>n</sup> ndihi ñaha-gǎ xii-n. <sup>15</sup>Te cǎhá<sup>n</sup>-n tnúhu Jèsús núú nchàa ñáyiú, te cǎhá<sup>n</sup>-n nchàa sá ní xiní-n ndihi nchaá sá ní xindedóho-n. <sup>16</sup>Tnáví, te quǎh<sup>n</sup>-n cuàndute-n, te cǎhá<sup>n</sup> ndihi-n Yǎ Ndiòxí cuendá cada cǎhnu iní-gá nchaá sá cuèhé sá dúhá ní quide-n”, duha ní cǎchí té Ananiás xii-í —cǎchí té Páblú xǎha<sup>n</sup>-dě xií-yu.

**Té Páblú ní cani-dé cuendú nàcuáa ní xáha<sup>n</sup> Jèsús cada-dé quǎh<sup>n</sup>-dé ñuú núú xindecu ñáyiú ñá túú cùu ñáyiú isràél**

<sup>17</sup>Te ní xáha<sup>n</sup> tùcu té Páblú:

—Te ní ndee-í cuándixi-í ñuú Jerusàlén. Te ní sáhá<sup>n</sup>-í veñúhu cǎhnu sá ño cùnuu ní cǎhá<sup>n</sup> ndihi-í Yǎ Ndiòxí, te ní dácótó nùú ñáhá-xi sǎ méé Jèsús ní xiní-í xitǎ veñúhu, <sup>18</sup>te ní cǎchí-gá: “Yáchí, quee-n ñuú Jerusàlén, chi ñáyiú-a vá quíndáá iní-yu nàcuáa ní cǎchí-í cùñaha-n xií-yu cuendá-í”, duha ní cǎchí-gá xii-í. <sup>19</sup>Te ní xáha<sup>n</sup>-í xii-gá: “Yòhó Xítóhó Jesucristú, sa xiní-n sǎ nchàá ñáyiú nàhá-yu sá ní sáhá<sup>n</sup>-í ndi tnahá ñ<sup>n</sup> ndi tnahá ñ<sup>n</sup> veñúhu nànducu-í ñáyiú sàndáá iní tnúhu-n, te ní tñii-í-yu, ní chihi-í-yu vecaá, te ní táuchù<sup>n</sup>-í ní caniha-güedé xií-yu. <sup>20</sup>Te cùtnàhá ní sahani-güedé ndíi Tèvá téé ní xóo cǎhá<sup>n</sup> tnúhu-n, te tnàhá-í ndécú òré-á<sup>n</sup> te ní xindeé-í dóo cue téé ní sahani ñaha xii ndíi. Te yúhú ní cǎhá<sup>n</sup>-í sá ní quide váha-güedé sá dúcá<sup>n</sup> ní quide-güedé”, duha ní xáha<sup>n</sup>-í xii-gá. <sup>21</sup>Te ní cǎchí tnúhu-gá xii-í: “Cuáhá<sup>n</sup> chi cuiní-í quǎh<sup>n</sup>-n nchàa ñuú xicá nùú xindecu cue ñáyiú ñá túú cùu ñáyiú isràél cǎhá<sup>n</sup>-n tnúhu-í”, cǎchí-gá —cǎchí té Páblú xǎha<sup>n</sup>-dě xií-yu.

**Te Pǎblú ndihi téè tàxi tnuní  
ñáhá xii cue sandadú**

<sup>22</sup> Te sá dúcá<sup>n</sup> ñí cáhá<sup>n</sup>-dé, te ñá ní tnàhá-gá iní-yu cundedóho-yu tnúhu cáhá<sup>n</sup>-dé. Te ñí<sup>n</sup>-ni ñí cuú-yu nchaá-yu, te ní cuáá-yu, te xǎhá<sup>n</sup>-yu:

—¡Chí cáhni-dě! ¡Ñá díú sǎ cúndecu-dé ñuyú-a! —càchí-yu xǎhá<sup>n</sup>-yu.

<sup>23</sup> Te mei òré duca<sup>n</sup> ñí cáhá<sup>n</sup>-yu, te ní ndátá-yu dóó-yu, te ní dáquéně-yu núú ñínu sá sàtú iní-yu. Te ní quéhnu-yu ñuhu, te ní dácácóyó-yu núú ñínu sá ìo sàtú iní-yu. <sup>24</sup> Te téè cùu capitá<sup>n</sup> cúnùu-gá ní xáha<sup>n</sup>-dě xii cue sandadú-dé:

—Chí dítá-dě ná quǐhu-dé ndéé xití vehe, te cani-ndo-dě ñíi, chi na quène yuhu-dé ná tnúhu ní cáhá<sup>n</sup>-dé ñú ndéé dúcá<sup>n</sup> cùdèě<sup>n</sup>-yu núú-dě —càchí-dé xǎhá<sup>n</sup>-dě xii-güedé.

<sup>25</sup> Te sáta ñí dácútú ñàha-güedé xii té Pǎblú sá cáni ñàha-güedé ní cùu, te ní xáha<sup>n</sup>-dě xii téè cùu capitá<sup>n</sup> ndécú-ǎ<sup>n</sup>:

—Te na càchí tnúhu-í sá vǎ cúu càniha-güedé ñíi, chi téè ròma cùu-í, te vátá quíni ndáá-gá-ndó ñú ndécuéchi-í àdi ñáhá —càchí-dé xǎhá<sup>n</sup>-dě xii téè cùu capitá<sup>n</sup>.

<sup>26</sup> Te sá dúcá<sup>n</sup> ñí cáhá<sup>n</sup>-dé, te ní sáhá<sup>n</sup> téè cùu capitá<sup>n</sup> núú téè cùnùu-gá, te ní xáha<sup>n</sup>-dě:

—Vá cúu càni-o téè-ǎ<sup>n</sup>, chi téè ròma cùu-dě —càchí-dé xǎhá<sup>n</sup>-dě.

<sup>27</sup> Te ní sáhá<sup>n</sup> téè cùu capitá<sup>n</sup> cúnùu-gá ndéé núú tǎ Pǎblú, te ní xáha<sup>n</sup>-dě:

—Cáhá<sup>n</sup> ndáá-n ñú ndisa téè ròma cùu-n —càchí-dé xǎhá<sup>n</sup>-dě.

Te ní xáha<sup>n</sup> tǎ Pǎblú:

—Ndáá sá tǎe ròma cùu-í —càchí té Pǎblú xǎhá<sup>n</sup>-dě xii téè cùnùu-á<sup>n</sup>.

<sup>28</sup> Te ní xáha<sup>n</sup> tǎe cùnùu-á<sup>n</sup>:

—Yúhú tnàhá-í cùu-í téè ròma, chi vài díhú<sup>n</sup> ñí cháhu-í —càchí-dé xǎhá<sup>n</sup>-dě.

Te té Pǎblú ní xáha<sup>n</sup>-dě:

—Tnàhá-í cùu-í téè yàcá<sup>n</sup> tucu, chi tǎta-í cùu-dě téè ròma —càchí té Pǎblú xǎhá<sup>n</sup>-dě xii téè cùu capitá<sup>n</sup> cúnùu-gá.

<sup>29</sup> Te uu<sup>n</sup> ní nacaca sata cuè téè cuáhá<sup>n</sup> caniha xii-dé ní cùu. Te ní yùhú téè tàxi tnuní sá dúcá<sup>n</sup> ñí xáha<sup>n</sup> tǎ Pǎblú sá tǎe ròma cùu-dě, chi ní xáha<sup>n</sup>-dě ní dácútú ñàha-güedé xii-dé, núu xǎá<sup>n</sup> ní yùhu-dé.

**Té Pǎblú ní cáhá<sup>n</sup> ndihi-dé cue téè  
cùnùu oré ní quide-güedé jùndá**

<sup>30</sup> Te téè tàxi tnuní sandadú ñá ní xíní-dé ná cuéchi ní dácáá ñáiyu is-ràel díquí tǎ Pǎblú, núu xǎá<sup>n</sup> nduu tnéé ní cana-dé cue dútú cúnùu, ndihi cue téè cùchiu<sup>n</sup>, ndihi cue téè cùu sacuéhé, te ní xáha<sup>n</sup>-dě sá cáda-güedé jùndá cuendá nducu tnúhu-güedé núú tǎ Pǎblú ná cuéchi ní dácáá-yu díquí-dě. Te ní xáha<sup>n</sup>-dě xii cue sandadú sá nándàxi ñàha-güedé cadená ndútú-dě, te can-deca ñàha-güedé quǐh<sup>n</sup> núú cáda-güedé jùndá. Te ní sáhá<sup>n</sup>-güedé ní nandaxi ñàha-güedé xii-dé ndécá ñàha-güedé cuáhá<sup>n</sup> jùndá, te ní quexio-güedé, te ní ngúnutnǎi-dé núú cuè téè cùchiu<sup>n</sup>.

**23** Te yàcá<sup>n</sup> ní xíndéhé vaha té Pǎblú núú nchàa-güedé, te ní xáha<sup>n</sup>-dè:

—Cada càhnu iní nchòhó cue téè cùchiu<sup>n</sup>, te duca<sup>n</sup> nchòhó cue téè cùu sacuéhé, véxi-í càchí tnúhu-í sá ñà túú cuéchi-í, chi mee Yǎ Ndiòxí ñáhá-gǎ nása ndècu-í ñuyú-a, te ñà túú cùcaha<sup>n</sup> núu-í núu-gǎ —càchí té Pǎblú xǎhá<sup>n</sup>-dè xii-güedé.

<sup>2</sup> Te té Ananiás téè cùu dútú cúnùu-gá ní xáha<sup>n</sup>-dè xii cue téè nùtnǎi yatni ñíni té Pǎblú sá cáni-güedé déhndé yuhu-dé.

<sup>3</sup> Te té Pǎblú ní xáha<sup>n</sup>-dè xii dútú-ǎ<sup>n</sup>:

—Yòhó, chi úhú tnàhí iní-n, chi ní ndúcú-n tǎe ní caniha xii-í, te ñà túú cuéchi-í, dico quíni-n ñà cada ñàha Yǎ Ndiòxí xii-n. Te yòhó ní cana ñàha-n ndècu tnúhu-n ñú quide-í nchaa nàcuáa cáhá<sup>n</sup> tnúhu sá ñí chídó tnùn

ndíi Moisés cada-o. Te mee-n ní ndúcú-n tée ní caniha, te ñá túú dùca<sup>n</sup> ní cáhá<sup>n</sup> ndíi cada-o —càchí té Páblú xáha<sup>n</sup>-dë xii dútú cúnù-gá-á<sup>n</sup>.

<sup>4</sup>Te cue tée xínutní ðñi té Páblú ní xáha<sup>n</sup>-güedë xii-dé:

—Nèhé ní quide-n chi ní xícuèhé-n dútú cúnù-gá tée xinu cuechi núú Yá Ndiöxí —càchí-güedë xáha<sup>n</sup>-güedë xii té Páblú.

<sup>5</sup>Te té Páblú ní xáha<sup>n</sup>-dë xii-güedë:

—Cada càhnu iní-ndó chi ñá túú xini-í sá dútú cúnù-gá cúú-dë, chi núú tütú Yá Ndiöxí càchí-xi sá vā cúú cáhá<sup>n</sup> cuèhé-ó cuendá ñ<sup>n</sup> tée cúnuu ñuú-ó yòtnúhu. Te yúhú ñá túú xini-í sá tée cúnuu cuu-dé ñuu ní sácóo-í ní cáhá<sup>n</sup>-í —càchí té Páblú xáha<sup>n</sup>-dë xii-güedë.

<sup>6</sup>Te òrè-á<sup>n</sup> ní cutnùní iní té Páblú sá dáva-güedë cündñhi-güedë cue tée cùu saducéú, te dava-güedë cündñhi-güedë cue tée cùu fariséú, te ñíhi ní cáhá<sup>n</sup>-dë ní xáha<sup>n</sup>-dë xii-güedë:

—Yúhú cúú-í tée fariséú, te tñàhá tātà-í ndíhi xñ-í cúú-güedë cue tée fariséú tucu. Te tñàhá yúhú sàndáá iní-í sá ndótó nchaa ñáyiú ní xíhí, te núú xíá<sup>n</sup> cuini-ndó ndùcu tñúhu-ndo ñùú-í cáná ñàha-ndo —cachí-dé xáha<sup>n</sup>-dë xii-güedë.

<sup>7</sup>Te sá dúcá<sup>n</sup> ní cáhá<sup>n</sup>-dë xíá<sup>n</sup> ní nàá ndíhi tñàha cue tée cùu fariséú ndíhi cue tée cùu saducéú, chi ñá íñ<sup>n</sup>-ní tñúhu ní cáhá<sup>n</sup>-güedë, chi ní ndí quehe<sup>n</sup> ndí quehe<sup>n</sup>-güedë sá ñí cáhá<sup>n</sup>-güedë. <sup>8</sup>Te cue tée cùu saducéú càchí-güedë sá vā ndótó cuè ñáyiú ní xíhí, te cue tée cùu fariséú càchí-güedë sá ndótò-yu. Te cue tée cùu saducéú càchí-güedë sá ñà túú espíritú xínú cuèchi núú Yá Ndiöxí, te cue tée cùu fariséú càchí-güedë sá ñó espíritú xínú cuèchi núú-gá. <sup>9</sup>Te ta cùdée<sup>n</sup>-güedë cuáhá<sup>n</sup>, te ñíhi-gá cúú iní-güedë càhá<sup>n</sup>-güedë, te ñ<sup>n</sup> úú cue tée cùu fariséú cue tée dàcuaha ñaha xii ñáyiú nchaa tñúhu ní chídó tñmí

ndíi Moisés ní cáhá<sup>n</sup> ñíhi-güedë, te xáha<sup>n</sup>-güedë:

—Ñá túú cuèchi-dé, te cudana te ní cáhá<sup>n</sup> ndíhi-dé ñ<sup>n</sup> espíritú xínú cuèchi núú Yá Ndiöxí te vā ngöo vā cúú vāha iní-ó ñúú-gá —càchí cue tée cùu fariséú xáha<sup>n</sup>-güedë xii-güedë.

<sup>10</sup>Te cuendá sá ño xínáá-güedë, xíá<sup>n</sup> ní yúhú tée cùu capitá<sup>n</sup> cúnù-gá sá cáhñi-güedë té Páblú, núu xíá<sup>n</sup> ní xáha<sup>n</sup>-dë sá quíhñ<sup>n</sup>-güedë cúnúcuca ñaha-güedë candeca ñaha-güedë ñúhú cuártél.

<sup>11</sup>Te ndéé níú cúú ùú ní quexio Xí-tohó Jesucristú núú ndécú tē Páblú, te ní xáha<sup>n</sup>-gá:

—Ñíi cunduu-n, vā yúhú-n, chi nàcuáa ní cáhá<sup>n</sup>-n ní cacunehe ñaha-n xii-í iha, te ðiu-ni duca<sup>n</sup> cáhá<sup>n</sup>-n càcunehe ñaha-n xii-í quíhñ<sup>n</sup>-n ñúú Rómá —càchí-gá xáha<sup>n</sup>-gá xii-dé.

### Cahni-güedë té Páblú ní cùu

<sup>12-13</sup>Te nduu tñéé ní nataká vñhi-gá údico cue tée israhél ní ndatnúhu-güedë sá cáhñi-güedë té Páblú, te ní xítnàha-güedë:

—Ni dítá vā cáxí-ó te ni ndüte vā cóhó-ó ndéé ndacu-o càhni-o té Páblú, te dàtnùní caxi-o dítá, te coho-o ndüte, chi sa ní sani iní-ó sá cádá-ó, te cuu cuèchi xii-o ñuu vā cádá-ó —càchí-güedë xítnàha-güedë.

<sup>14</sup>Te ní sáhá<sup>n</sup>-güedë núú ndécú nchaa dútú cúnùu ndíhi nchaa cue tée cùu sacuéhé, te ní xáha<sup>n</sup>-güedë:

—Ní cachí-ndí sá ni dítá vā cáxí-ndí ndéé ñuu ní ndacu-ndí ní sahni-ndí té Páblú, chi sa ní sani iní-ndí sá cádá-ndí, te cuu cuèchi núú vā cádá-ndí. <sup>15</sup>Te duha cada-ndo ndíhi dava-gá cue tée cúnuu, chi cúnaha-ndo xii tée cùu capitá<sup>n</sup> cúnù-gá: “Quixi ndíhi-n té Páblú núú ndécú-ndí cuendá ndatnúhu ndíhi-ndí-dé, chi cuini-ndí nducu tñúhu váha-gá-ndí ná cúú sá ñí quide-dé”,

duha cūñaha-ndo xii tée tàxi tñuní sandàdú. Te duca<sup>n</sup>-ni cūñaha-ndo dāndahú-ndó-güedě cuendá quixi ndihi-güedé té Pāblú, te nchúhú sa cundetu-ndí-güedé ichi, chi quiní té Pāblú ná cahni-ndí-dé —càchí-güedé xāha<sup>n</sup>-güedě xii cue tée cūchiu<sup>n</sup>.

<sup>16</sup> Te dēhe cūha té Pāblú ní níhí-dě tnúhu nàcuáa cada-güedé ditó-dé. Te ní sáhá<sup>n</sup>-dé cuartél, te ní xāha<sup>n</sup>-dě xii ditó-dé nàcuáa càhá<sup>n</sup>-güedé cada ñaha-güedě. <sup>17</sup> Te ní cana té Pāblú ñ<sup>n</sup> tée cūu capitá<sup>n</sup>, te ní xāha<sup>n</sup>-dē:

—Vá cūndēe iní-n, quíhí<sup>n</sup> ndihi-n tēe-a na càhá<sup>n</sup> ndihi-dé tée cūnuu-gá, chi ndēcu ñ<sup>n</sup> cuendú cūñaha-dē cuiní-í —càchí té Pāblú xāha<sup>n</sup>-dē xii tée cūu capitá<sup>n</sup>.

<sup>18</sup> Te dātñuní ní xica tée cūu capitá<sup>n</sup> ndécá-dē dāxí<sup>n</sup> tē Pāblú cuáhá<sup>n</sup> núu ndécú tēe cūnuu-gá, te òré ní quexio-güedé núu-dē, te ní xāha<sup>n</sup> tēe cūu capitá<sup>n</sup> xii-dē:

—Té Pāblú tēe yìhi vecaá ní cana ñaha-dē xii-í, te ní cachí-dé véxi-í ndihi tēe-a cuendá cachí tnúhu-dé ñ<sup>n</sup> cuendú cuiní-dé —càchí-dé xāha<sup>n</sup>-dē xii tée cūnuu-gá.

<sup>19</sup> Te tēe cūnuu-á<sup>n</sup> ní tñi-dé ndaha dāxí<sup>n</sup> tē Pāblú, te tēnehe ñaha-dé cuáhá<sup>n</sup> ñ<sup>n</sup> xio, te ní xícá<sup>n</sup> tnúhú-dē núu-dē, te xāha<sup>n</sup>-dē:

—¿Ná cuendú cuiní-n càhá<sup>n</sup>-n? —càchí-dé xāha<sup>n</sup>-dē xii dāxí<sup>n</sup> tē Pāblú.

<sup>20</sup> Te ní xāha<sup>n</sup>-dē xii tēe cūnuu-á<sup>n</sup>:

—Cue tēe isràel ní ndatnúhu ndáá-güedé sá quixí-güedé tñeé càhá<sup>n</sup> ndàhú-güedé núu-n cāndeca-n té Pāblú quíhí<sup>n</sup> jundá, te yàcá<sup>n</sup> cācá<sup>n</sup> tnúhú ndáá-güedé núu-dē ná cúu sã ní quide-dé, càchí-güedé xītnāha-güedé.

<sup>21</sup> Te vá quindáá iní-n chi dícó dandāhú ñāhá-güedě, chi vihi-gá údico-güedé ndátñúhu-güedé cundedí-güedé ichi cahni ñaha-güedé. Te xītnāha-güedé sá ní dítá vã cáxí-güedé, te ni ndüte vá

cóhó-güedě ndée nūu ní ndacu-güedé ní sahní ñaha-güedě, te dātñuní caxi-güedé dítá, te coho-güedé ndute, chi sa ní sani iní-güedé sá cādá-güedě, te cuu cuéchi núu vá cādá-güedě, càchí-güedé xītnāha-güedé. Te cundecu túha-ná-güedé cundetu ñaha-güedé tñeé, te núu na quindáá iní-n cāndeca-n-dé quíhí<sup>n</sup> jundá —càchí-dé xāha<sup>n</sup>-dē xii tēe cūnuu-á<sup>n</sup>.

<sup>22</sup> Te tēe cūnuu-á<sup>n</sup> ní xāha<sup>n</sup>-dē:

—Cuanúhú, te vá yōo tñahí cūñaha-n sã ní quixi-n ní cachí tnúhu-n nàcuáa càhá<sup>n</sup>-güedé cada-güedé té Pāblú —càchí-dé xāha<sup>n</sup>-dē.

### **Ndēca-güedé té Pāblú cuáhá<sup>n</sup> núu tē Juélí tēe cūu gobiernú**

<sup>23</sup> Te tēe cūnuu-gá ní cana-dé úu cue tēe cūu capitá<sup>n</sup>, te xāha<sup>n</sup>-dē:

—Tava-ndo úu ciendú sandàdú cue tēe xica saha, ndihi únídico úxí sandàdú cue tēe yòdo cuayú, ndihi úu ciendú sandàdú mee-ni cuè tēe xīnehe lānzá. Te cada túha-ndo chi caca-ndo òré caá ñ<sup>n</sup> niú quíhí<sup>n</sup>-ndó ñūú Cēsareá ndihi té Pāblú. <sup>24</sup> Te nducu-ndo cuēdicó ñ<sup>n</sup> úu cuayú codo-dé ndihi cue tēe ndēē ñāhá xii-dé. Te cada cuedādú-ndó-dé ichi, te candeca-ndo-dé quíhí<sup>n</sup> quíndeca-ndo-dé núu tēe cūu gobiernú —càchí tēe cūnuu-á<sup>n</sup> xāha<sup>n</sup>-dē xii cue tēe cūu capitá<sup>n</sup>.

<sup>25</sup> Te tēe cūnuu-á<sup>n</sup> ní cadúha-dé tutú cuendá quíhí<sup>n</sup> ndaha té Juélí tēe cūu gobiernú. Te duha ní chídó tñuní-dé núu tūtú cuáhá<sup>n</sup>:

<sup>26</sup> “Cóvāha díí-n, tātá gobernàdór. Ío cada càhnu iní, yúhú nāni-í Claudiú Lisiás. Yúhú ní tendaha-í ñ<sup>n</sup> tutú véxi ndaha-n cuendá quiní tñuní-n nàcuáa ní cuu iha. <sup>27</sup> Cue tēe isràel ní tñi-güedé ñ<sup>n</sup> tēe nāni Pāblú cuiní-güedé cahni ñaha-güedé ní cūu, te ní níhí-í tnúhu sá tēe rómá cúu-dē nūu ní sáhá<sup>n</sup>-í ndihi sandàdú-í ní dácacu-ndí-dé. <sup>28</sup> Te ní



cuiní-í quini-í ná cuendá tée ñaha-güedé cuéchi xii-dé, núu xiá<sup>n</sup> ndécà-í-dé ní sáhá<sup>n</sup> núu nǐ quide cue tée cùchiu<sup>n</sup> israél jündá. <sup>29</sup>Te yàcá<sup>n</sup> ní níhi-í tnúhu sá ñà túú nǎ cuéchi ni quide-dé, chi cuendá-ni sá nǐ níhi-güedé tnúhu sá ñà túú sàndáá iní-dé cada-dé nchaa sá nǐ xóo cada ñáyiú ní xíndecu ndéé sanaha nchicú<sup>n</sup> nihnu-güedé quide-güedé, xiá<sup>n</sup> ní cudéé<sup>n</sup>-güedé núu-dé. Te ñà túú cuéchi càhnu ni quide-dé núu qufhí<sup>n</sup>-dé vecaá àdi cahni-í-dé. <sup>30</sup>Te ní níhi-í tnúhu sá cuè tée israél ndúcú-güedé nàcuáa cada-güedé cahni ñaha-güedé xii-dé, xiá<sup>n</sup> ní xáha<sup>n</sup>-í xii sandàdú-í sá cándèca ñaha-güedé quixi xiá<sup>n</sup>. Te ní xáha<sup>n</sup>-í xii cue tée tée ñaha cuéchi sá quixí-güedé ndéé xiá<sup>n</sup> cǎhá<sup>n</sup>-güedé núu ná cuéchi ní quide-dé. Te cada càhnu iní-n chi duha-ni ndùu tnúhu cǎhá<sup>n</sup>-í, te cundee iní-n quèhe<sup>n</sup> cuendá-n-dé”, duha ní chídó tnùní tée ní cadúha tutú cuáhá<sup>n</sup> ndaha té Juélí.

<sup>31</sup>Te cue sandàdú ní quide-güedé nàcuáa ní xáha<sup>n</sup> tée tàxi tnuní ñáhá xii-güedé chi ní xica-güedé ndihi té Pǎblú òré caá íf<sup>n</sup> niú, te ñu-ni niú-á<sup>n</sup> nǐ quexio-güedé ñuú Antipatrís. <sup>32</sup>Te sátá nǐ túndaá, te ní nacuico cuè tée xínehe lǎnzá ndihi dava-gá sandàdú xícá sàha cuánuhú-güedé cuàrtél, te mee-nǎ sandàdú cue tée yòdo cuayú cuáhá<sup>n</sup> ndihi té Pǎblú. <sup>33</sup>Te òré ní quexio-güedé ñuú Cèsareá, te ní sàha-güedé tée cùu gobiernú tutú néhé-güedé cuáhá<sup>n</sup>. Te ní quehe<sup>n</sup> cuendá-dé té Pǎblú. <sup>34</sup>Te sátá nǐ dácuahá tée cùu gobiernú-án tutú-án te ní xícá<sup>n</sup> tnúhú-dé núu tē Pǎblú, te xáha<sup>n</sup>-dē:

—¿Ndéé tée cùu-n? —cachí-dé xáha<sup>n</sup>-dē.

Te ní xáha<sup>n</sup> tē Pǎblú:

—Tée Ciliciá cùu-í —càchí-dé xáha<sup>n</sup>-dē.

<sup>35</sup>Te ní xáha<sup>n</sup> tée cùu gobiernú-án:

—Òré quexio cue tée tée ñaha cuéchi xii-n, te cǎhá<sup>n</sup>-n nása ní cuu, chi níhi-í

nàcuáa cada ndáá-í cuendá-n —càchí-dé xáha<sup>n</sup>-dē xii té Pǎblú.

Te ní xáha<sup>n</sup>-dē xii sandàdú sá cündéé-güedé té Pǎblú vehe càhnu té Hèrodés.

### Té Pǎblú xáha<sup>n</sup>-dē xii té Juélí sá ñà túú cuéchi-dé

**24** Te sátá nǐ cuu úhú<sup>n</sup> nduu, te té Ananiás dútú cúnúu-gá cuáhá<sup>n</sup>-dé ñuú Cèsareá ndihi cue tée cùu sacuéhé ndihi íi<sup>n</sup> tée nàni Tértulú tée cǎhá<sup>n</sup> yuhu-güedé. Te cuáhá<sup>n</sup>-güedé núu tē cùu gobiernú cuáhá<sup>n</sup> dácuaéndehnde-güedé núu-dé sá ndècuéchi té Pǎblú. <sup>2</sup>Te ní ságuaca-güedé té Pǎblú. Te òré ní quexio-dé núu-güedé, te ní ngúita té Tértulú xáha<sup>n</sup>-dē xii té Juélí nàcuáa càa cuéchi tē-güedé té Pǎblú:

—Ío càhnu cada iní tǎtǎ gobernàdór. Duha ndùu chiu<sup>n</sup> ndéé iní ñáhá-ndǐ xii-n vèxi-ndí, núu nása cachí-n cùnduu. Tǎxáhu xii-n, chi ío váha ndècu nchaa ñáyiú, te ñà túú nàá-yu chi ío váha quide-n. <sup>3</sup>Te ío cùdíí iní-yu chi nchaa-ni nduu xíndecu váha-yu nchaa-yu, te ío tǎxáhu Ndiöxí xii-n sǎ dúcá<sup>n</sup> quide-n. <sup>4</sup>Te cada càhnu iní, cuiní-í ndatnúhu-o íi<sup>n</sup> úu-ni cuèndú cuendá sá vǎ cùyàa-o dacuíta-í chiu<sup>n</sup>-n. <sup>5</sup>Te íi<sup>n</sup> tée iha ío dásatú iní ñáhá-dē, chi ndēni ní cuu cuáhá<sup>n</sup>-dé ndátnúhu-dé ndihi ñáyiú israél dánàá-dé-yu. Te nèhé quidé-dé chi cuáhá<sup>n</sup>-dé dácáhá<sup>n</sup>-dé nchaa ñáyiú cuendá quíndáá iní-yu tnúhu tée ní xíndecu ñuú Nazàrét. <sup>6</sup>Chi duca<sup>n</sup> cǎhá<sup>n</sup> cue tée iha sá nǐ sáhá<sup>n</sup>-dé veñúhu càhnu sá ío cùnuu, te cuiní-dé daquèe fhú-dé veñúhu cuendá cuiní-dé xocàni-dé sá íi ndécú, núu xiá<sup>n</sup> ní tñi ñaha-güedé ndécá ñaha-güedé cuáhá<sup>n</sup> núu cuè tée cùchiu<sup>n</sup> cuendá cǎcá<sup>n</sup> tnúhú-güedé núu-dé núu ná cuendá duca<sup>n</sup> cuiní-dé cada-dé, chi duca<sup>n</sup> càa leí ndécú ndihi-güedé sá cǎdá ndǎá-güedé núu ná íi<sup>n</sup> sá cùu.

<sup>7</sup>Te té Lisiú tée cùu capitá<sup>n</sup> cúnùu-gá ní quexìo-dé ndìhi sandádú, te ní dácúnú-güedë nchaa cue tée nùtní ndìhi té Pàblú, te dàtnùní ní tnií ñaha-güedë xii-dé ndécá ñaha-güedé cuáhá<sup>n</sup>. <sup>8</sup>Te sátá xǎ<sup>n</sup>, te ní xáha<sup>n</sup>-dë sá quíxí-güedë ndéé ndíha cundáá cuéchi-dé. Te yòhó cundee ìní-n càcá<sup>n</sup> tnúhú-n nùú-dë, te núu ndáá duca<sup>n</sup> nǎ quide-dé àdi ñáhá — càchí té Tèrtulú xáha<sup>n</sup>-dë xii té Juéllí tée cùu gobiernú.

<sup>9</sup>Te dava-gá cue tée isràél xñutnǎí xǎ<sup>n</sup> ní cáhá<sup>n</sup>-güedé sá ndáá càhá<sup>n</sup> té Tèrtulú. <sup>10</sup>Te tée cùu gobiernú ní quide-dé ndaha-dé núu tǎ Pàblú cuendá cáhá<sup>n</sup>-dë, te té Pàblú ní xáha<sup>n</sup>-dë:

—Yòhó sa ní cuu titní cuía ndécú-n ìha xehndé-n cuéchi nchaa ñáyíu xñnáá, núu xǎ<sup>n</sup> ío cùdíí ìní-í sá ndíha téhndé cuéchi tée ñaha-güedé xii-í. Te cundee ìní-n cùndedóho-n na càni-í cuendú nàcuáa ní cuu. <sup>11</sup>Te nducu tnúhu-n te quiní-n nǎ càhá<sup>n</sup> ndáá-í, chi sa ní cuu úxúú nduu sá ní sáhá<sup>n</sup>-í veñúhu càhnu sá ìo cùnnoo ñúú Jerusalén ní cáhá<sup>n</sup> ndìhi-í Yá Ndiòxí. <sup>12</sup>Te ni ñà túú ní nàá-í ndìhi ñáyíu xití veñúhu, te ñá túú ní xáha<sup>n</sup>-í nàá-yu ni ì<sup>n</sup> xichi, te ni ì<sup>n</sup> veñúhu líhli ní sáhá<sup>n</sup>-í ñá túú nǎ ní xáha<sup>n</sup>-í cadá-yu. <sup>13</sup>Te ni ñà túú quèñuhu-güedé cue tée cáhá<sup>n</sup> ndáá te núu ndáá duca<sup>n</sup> nǎ quide-í. <sup>14</sup>Te yúhú càhá<sup>n</sup> ndáá-í sá càhá<sup>n</sup> ndìhi-í Yá Ndiòxí, chi diu-ni Yá Ndiòxí ní xóo cáhá<sup>n</sup> ndìhi ñáyíu ndéé sanaha, núu xǎ<sup>n</sup> ní tuha-í ichi-gá. Te cue tée-a càchí-güedé sá ñà díú ì<sup>n</sup> ichi váha ni tuha-í. Te yúhú sàndáá ìní-í nchaa sá ní chídó tnùnì ndíí Moisés ndìhi dava-gá cue tée ní xóo cáhá<sup>n</sup> tnúhu Yá Ndiòxí ndéé sanaha. <sup>15</sup>Te sàndáá tucu ìní-í sá ndótó nchàa ñáyíu ní xíhí, cuèi ñáyíu váha ìní-xi, te cuèi ñáyíu úhú ìní-xi, dico ndotó-yu. Te duca<sup>n</sup> nǎ xóo quindáá ìní nchaa ñáyíu ní xíndecu ndéé sanaha. <sup>16</sup>Te yúhú ío ndücu ndee-í quidë-í nchaa sá càhá<sup>n</sup> Yá

Ndiòxí cuendá sá vǎ cúu càha<sup>n</sup> nùú-í nùú-gǎ ndìhi núu ñáyíu ñuyíú-a.

<sup>17</sup>Te sa ní cuu titní cuía sǎ ñà túú-gǎ sáhá<sup>n</sup>-í ñúú Jerusalén, te ní sáhá<sup>n</sup> tucu-í nehè-í díhú<sup>n</sup> ní taxi ñáyíu ñúú xícá cuendá cuañaha-í xii ñáyíu ñúú Jerusalén. Te ní ndúcù-í sá cuáha táhù-í Yá Ndiòxí. <sup>18</sup>Te ní xíndecu-í veñúhu càhnu sá ìo cùnnoo ní quide-í nchaa nàcuáa ní xóo cada ñáyíu ní xíndecu ndéé sanaha cuendá nduu vetú ìní Yá Ndiòxí. Te ñá túú chitú-yu ni sáhá<sup>n</sup>, te ni ñà túú nǎ ní cùu, te ní naníhí ñáhá ì<sup>n</sup> úú cue tée isràél xii-í, cue tée véxi distritú Àsiá. <sup>19</sup>Te quixi mee-güedë ìha cáhá<sup>n</sup>-güedé, te núu sá ndáá ní xini-güedé sá yúhú ndècuéchi-í ní cùu, <sup>20</sup>àdi ñáhá. Dico cachí tnúhu cue tée-á<sup>n</sup> nása ní cuu òré ní xíndecu-í jùndá-güedé ñúu ndècuéchi-í àdi ñá túú ndècuéchi-í. <sup>21</sup>Dico ñá túú cuéchi-í chi ì<sup>n</sup> dii-ni tnúhu ni cáhá<sup>n</sup>-í ní xáha<sup>n</sup>-í xii-güedé sá sàndáá ìní-í sá ndótó nchàa ñáyíu ní xíhí, te diu-ni núu xǎ<sup>n</sup> càchí-güedé sá ndècuéchi-í —càchí té Pàblú xáha<sup>n</sup>-dë xii té Juéllí.

<sup>22</sup>Te té Juéllí sa xini váha-dé nàcuáa cuáhá<sup>n</sup> tnúhu Jèsús, núu xǎ<sup>n</sup> ñá ní cuiní-gá-dé ndatnúhu-dé ndìhi té Pàblú, te ní xáha<sup>n</sup>-dë:

—Sa ní cuu, cundetu-n na quèxio té Lisiú tée cùu capitá<sup>n</sup> cúnùu-gá, te òré-á<sup>n</sup> cundáá cuendá-n —càchí té Juéllí xáha<sup>n</sup>-dë.

<sup>23</sup>Te ní xáha<sup>n</sup>-dë xii tée cùu capitá<sup>n</sup>:

—Cundee-n tǎ Pàblú-á<sup>n</sup>, te núu nása càchí-dé cada-n, te dañá-n na càhá<sup>n</sup> ndìhi-dé cue tée xini tnáhá ndìhi-dé ñúu cuañaha-güedë nchaa sá xini ñúhu-dé àdi nása cada-güedé —càchí té Juéllí xáha<sup>n</sup>-dë xii tée cùu capitá<sup>n</sup>.

<sup>24</sup>Te ní cuu titní nduu, te ní sáhá<sup>n</sup> té Juéllí vechiú<sup>n</sup> ndìhi ñadihí-dé, te ñaha-á<sup>n</sup> nání-á<sup>n</sup> Drüsílá, te ñaha isràél cúu-á<sup>n</sup>. Te ní xáha<sup>n</sup>-dë sá quèñuhu-güedé té Pàblú, te òré ní quexìo-dé vechiú<sup>n</sup>, te

ní cáhá<sup>n</sup>-dé núŷ-yu nchaá-yu sá quèndáá iní-yu tnúhu Xítoho Jesucrístú. <sup>25</sup>Te ní xáha<sup>n</sup>-dê:

—Mee-ni sã vãha cada-ndo. Te coto-ndo mée-ndo, te vá cádá-ndó ñi ñ<sup>n</sup> sá cuèhè sá dúhá, chi ñ<sup>n</sup> nduu cáhá<sup>n</sup> Yã Ndiöxi ndèdacàa ñáyiú váha iní-xi, te ndèdacàa ñáyiú úhú iní-xi —càchí té Pãblú xáha<sup>n</sup>-dê.

Te sá dúcá<sup>n</sup> ní xáha<sup>n</sup>-dê, te ní yùhú té Juèlí, te ní xáha<sup>n</sup>-dê:

—Vá càhá<sup>n</sup>-gá-ó tnáví, cuàhá<sup>n</sup>, te òrè cùyáchí-í, te cana ñaha-í xii-n —càchí-dé xáha<sup>n</sup>-dê.

<sup>26</sup>Te té Juèlí ní quide-dé cuèndá sá cuãñaha tẽ Pãblú díhú<sup>n</sup> te vá ndíhu-gá-dé veacaá ní cùu, núu xíã<sup>n</sup> tit-ní xito ní cana-dé té Pãblú vechiú<sup>n</sup> ní ndatnúhu ndíhi tnàha-güedé, dico ñá túú ní chãhu-dé. <sup>27</sup>Te úú cuíá duca<sup>n</sup> ní quide-güedé, te dàtnùní ní xínu té Juèlí chiú<sup>n</sup>-dé, te ní ngúnutnîí té Pòrsiú Fèstú. Te òrè ní xínu té Juèlí chiú<sup>n</sup>-dé, te ní dándõ-dé té Pãblú yíhí-ni-dê veacaá. Te duca<sup>n</sup> ní quide-dé cuèndá ní cuiní-dé cuèdu-dé núu cuè téé isràèl.

### Té Pãblú càhá<sup>n</sup> ndíhi-dé té Fèstú

**25** Te ní cuu úní nduu sá ñí quexio té Fèstú ñuú Cèsareá ní quehe<sup>n</sup>-dé chiú<sup>n</sup>, te ní quee-dé cuáhá<sup>n</sup>-dé ñuú Jerusálén. <sup>2</sup>Te yàcá<sup>n</sup> ní nanhí tnáhá-dê ndíhi nchaa dútú cúnùu ndíhi nchaa cue téé tàxi tnuní ñáhá xii ñáyiú isràèl, te xáha<sup>n</sup>-güedè xii té Fèstú sá ndáá ndècuéchi té Pãblú. <sup>3</sup>Te ní cáhá<sup>n</sup> ndàhú-güedé núú-dê sá téndàha-dé sandàdú-dé quínguènhu ñaha-güedè veacaá xii-dé ndéé ñuú Cèsareá te candeca ñaha-güedè quíhí<sup>n</sup>. Te duca<sup>n</sup> ní cáhá<sup>n</sup>-güedé, chi ní ndatnúhu-güedé sá cáhni ñaha-güedé xii té Pãblú ichi ni cùu. <sup>4</sup>Te té Fèstú ní xáha<sup>n</sup>-dê:

—Vá cúú quixi-dé ndéé ndíha. Na cùndetu-dé ñuú Cèsareá chi sacú-ni

nduu cuyaa-í iha te dàtnùní núhú-í yàcá<sup>n</sup>. <sup>5</sup>Te yáchí-gá quíhí<sup>n</sup> ndíhi-í cue téé cùnùu-gá, te yàcá<sup>n</sup> cuu cáhá<sup>n</sup>-ndó ñuú ndáá ndècuéchi-dé àdi cáhá<sup>n</sup> mée-dê ñuú ndáá ndècuéchi-dé àdi ñáhá, te cutnùní iní-ndó —càchí-dé xáha<sup>n</sup>-dê.

<sup>6</sup>Te ní xíndecu té Fèstú úná úxí nduu ñuú Jerusálén, te dàtnùní cuánuhú-dé ñuú Cèsareá. Te nduu tnèé cuáhá<sup>n</sup>-dé vechiú<sup>n</sup>, te òrè ní quexio-dé, te ní xáha<sup>n</sup>-dê xii cue sandàdú xínú cuèchi sá quíhí<sup>n</sup>-güedé queñuhu-güedé té Pãblú veacaá te candeca ñaha-güedè quíhí<sup>n</sup> vechiú<sup>n</sup>. <sup>7</sup>Te òrè ní quexio té Pãblú vechiú<sup>n</sup>, te sa ndècu cue téé isràèl cue téé ní quee ñuú Jerusálén, te cuánguihu-güedé ndéé díñi té Pãblú ní ngúnutnîí-güedé, te xáha<sup>n</sup>-güedè xii cue téé cùchiú<sup>n</sup> sá ndècuéchi víhi-dé, dico ñá túú ní cùndee tnúhu-güedé. <sup>8</sup>Te té Pãblú ní xáha<sup>n</sup>-dê xii té Fèstú:

—Ñá túú ndècuéchi-í, ñá túú nã ní quide-í, chi ñá túú tnáhá iní-í cada-í ñ<sup>n</sup> sá càchí lèi sá vã cúú càda-o. Te ni xití veñúhu càhnu sá ño cùnùu ñá túú nã quidè-í, te ni té Cèsár téé yíndaha cuéhé nació<sup>n</sup> ñá túú càhá<sup>n</sup> cuèhé-í cuèndá-dé —càchí té Pãblú xáha<sup>n</sup>-dê xii-dé.

<sup>9</sup>Te té Fèstú ní cuiní-dé cada-dé nàcuáa cuèdu-dé núu cuè téé isràèl ní cùu, núu xíã<sup>n</sup> ní xáha<sup>n</sup>-dê xii té Pãblú:

—¿Cundee iní-n quíhí<sup>n</sup>-n ñuú Jerusálén-ã<sup>n</sup>? Te yàcá<sup>n</sup> cundáá cuéchi sá sàá díquí-n —càchí té Fèstú xáha<sup>n</sup>-dê xii té Pãblú.

<sup>10</sup>Te xáha<sup>n</sup> tẽ Pãblú:

—Diu-ni ñ<sup>n</sup> vechiú<sup>n</sup> téé cùchiú<sup>n</sup> Cèsár ndècù-í iha, te diu-ni iha cada ndáá-n ñuú cuiní-n ní cùu. ¿Te ná cuèndá candeca ñaha-n quíhí<sup>n</sup> ingá xichi? Yòhó tnáhá-n xíní-n sã ñá túú nã quidè-í ñáyiú isràèl. <sup>11</sup>Chi núu dicó yúhú ní quide-í ñ<sup>n</sup> cuéchi càhnu, te ñá túú nã cada-xi cuèi na càhni ñaha-ndo xii-í ní cùu. Te sa ní cutnùní iní-n sã ñá ndáá, chi mee-ni tnúhu ndehnde xícáhá<sup>n</sup>-güedé, te ñá túú

ndüu váha-xi duca<sup>n</sup> càda-n cúñaha-n sã quíhí<sup>n</sup>-í ndíhi-güedé ingá xichi. Te xíã<sup>n</sup> cuiní-í quíhí<sup>n</sup>-í núú tẽ Cèsár tée yìndaha cuéhé nació<sup>n</sup>, te yacá<sup>n</sup> cáhá<sup>n</sup> mée-dẽ nõu ndáá ndècuéchi-í —càchí té Pãblú xãha<sup>n</sup>-dẽ xii té Fèstú.

<sup>12</sup> Te ní ndatnúhu té Fèstú ndíhi cue tée chĩndee tnúhu ñaha xii-dé, te dät-nùnì ní xãha<sup>n</sup>-dẽ xii té Pãblú:

—Te sa ní cáhá<sup>n</sup>-n sã quíhí<sup>n</sup>-n quítnahá-n tẽ Cèsár te diu-ni quíhí<sup>n</sup>-n, te quini-n nõsa cáhá<sup>n</sup> tée-ã<sup>n</sup> yacá<sup>n</sup> —càchí-dé xãha<sup>n</sup>-dẽ xii té Pãblú.

### **Té Pãblú càhá<sup>n</sup> ndíhi-dé té Àgripá tée yìndaha nació<sup>n</sup> Isràél**

<sup>13</sup> Te sátá nĩ cuu cuéhé nduu, te ní quee té Àgripá tée yìndaha nació<sup>n</sup> Isràél cuáhá<sup>n</sup>-dé nõú Cèsareá ndíhi ñadĩhí-dé, te ñaha-á<sup>n</sup> nání-á<sup>n</sup> Berènicé te òré ní quexió-yu, te ní cáhá<sup>n</sup> ndíhí-yu té Fèstú.

<sup>14</sup> Te sátá nĩ cuu tĩtní nduu, te ní cáhá<sup>n</sup> té Fèstú cuendá té Pãblú ní xii-dé té Àgripá:

—Ndècu ìi<sup>n</sup> tée ní dándõõ té Juélí vecaá nání-dẽ Pãblú. <sup>15</sup> Te cútnahá ní sáhá<sup>n</sup>-í nõú Jerusálén ní nanítnáhà-í ndíhi cue dútú cúnùu ndíhi cue tée cùu sacuéhé nõú ñãyiu isràél. Te ní dácáá díquí-güedé té Pãblú cuéchi, te ní cachí-güedé sá táúchìu<sup>n</sup>-í cahni ñaha-güedé xii-dé ní cùu. <sup>16</sup> Te ní xãha<sup>n</sup>-í xii-güedé sá vã cúú, chi ñá túú dùca<sup>n</sup> quide nchúhú cue tée ròmá cùtexínu cada castú-ndí ñãyiu, chi díhna-gá ndúcú tnúhu-ndí núú ñãyiu sãa cuéchi díquí-xi cuendá quini-ndí nõu nõsa cáhá<sup>n</sup> mée-yu ndíhi ñãyiu sàcá<sup>n</sup> cuéchi cuendá-yu, te òré-á<sup>n</sup> cùtnùnì iní-ndí nõu ndáá ndècuéchi-yu àdi ñáhá, te duca<sup>n</sup> te nihí-ndí nõcuáa quide ndáá-ndí cuendá-yu, duha ní xãha<sup>n</sup>-í xii-güedé —càchí té Fèstú xãha<sup>n</sup>-dẽ xii té Àgripá.

<sup>17</sup> Te ní xãha<sup>n</sup> tùcu té Fèstú:

—Te sátá nĩ quexió-güedé ndéé ndíha, te nduu tnéé ní sáhá<sup>n</sup>-ni-ndí vechiù<sup>n</sup>. Te ní xãha<sup>n</sup>-í sá quĩngueñuhu-güedé té

Pãblú candeca ñaha-güedé quixi, te òré ní quexió-dé, <sup>18</sup> te ní ngüfta-güedé xãha<sup>n</sup>-güedé sá ndècuéchi-dé. Te ní sani iní-í sá ìi<sup>n</sup> cuéchi càhnu tee ñaha-güedé dico ñáhá, chi dicó-ni sá ìi<sup>n</sup> tnúhu ní cáhá<sup>n</sup>-dé, xíã<sup>n</sup> duca<sup>n</sup> nĩ quide-güedé.

<sup>19</sup> Te ní tenáá ñáhá-güedé xii-dé, chi càchí-güedé sá ñà túú càhá<sup>n</sup> váha-dé cuendá ndiõxí-güedé. Te tnáhá-ni cuendá ìi<sup>n</sup> tée nani Jesús càhá<sup>n</sup>-dé, chi càchí-dé sá ní xíhí tée-á<sup>n</sup> te ní ndoto-dé càchí-dé xãha<sup>n</sup>-dẽ xii-güedé, càchí-güedé. <sup>20</sup> Te ñá ní cùtnunì iní-í nõsa cúñaha-í xii-güedé cuendá téhndé cuéchi-dé. Te xíã<sup>n</sup> ní xícá<sup>n</sup> tnúhu-í núú tẽ Pãblú nõu cundee iní-dé quíhí<sup>n</sup>-dé nõú Jerusálén, te ndéé ndíácá<sup>n</sup> cada ndáá-ndí cuendá-dé, te núu ndáá ndècuéchi-dé nõcuáa càhá<sup>n</sup>-güedé àdi ñáhá ní cùu. <sup>21</sup> Te dät-nùnì té Pãblú ní cachí-dé sá cùndècu tnaa-dé vecaá te dät-nùnì quíhí<sup>n</sup>-dé núú tẽ Cèsár, te tée-á<sup>n</sup> cada ndáá-dé cuendá-dé. Te cuendá sá dúcá<sup>n</sup> nĩ cáhá<sup>n</sup> té Pãblú, xíã<sup>n</sup> nõu ní xãha<sup>n</sup>-í sá cùndèé ñáhá cuè sandadú xii-dé, nini na còto-í nõsa cada-í quíhí<sup>n</sup>-dé núú tẽ Cèsár, duha ní xãha<sup>n</sup>-í xii-güedé —càchí té Fèstú xãha<sup>n</sup>-dẽ xii té Àgripá.

<sup>22</sup> Te té Àgripá ní xãha<sup>n</sup>-dẽ xii té Fèstú:

—Te tnáhá yúhú ío cudí iní-í cundedóho-í tnúhu càhá<sup>n</sup>-dé —càchí-dé xãha<sup>n</sup>-dẽ.

Te ní xãha<sup>n</sup> tẽ Fèstú:

—Tneé cana-í-dé te cundedóho-n nõsa cáhá<sup>n</sup>-dé —càchí-dé xãha<sup>n</sup>-dẽ.

<sup>23</sup> Te nduu tnéé ní quexió té Àgripá ndíhi ñadĩhí-dé tá Berènicé vechiù<sup>n</sup>, te ío ní quide càhnu ñaha-güedé xií-yu. Te cuánguihú-yu vechiù<sup>n</sup> ndíhi cue tée cùu capitá<sup>n</sup> cúnùu-gá ndíhi cue tée cùnùu nõú Cèsareá. Te té Fèstú ní xãha<sup>n</sup>-dẽ sá quĩngueñuhu-güedé té Pãblú vecaá, te òré ní quexió-dé, <sup>24</sup> te ní xãha<sup>n</sup> té Fèstú xii té Àgripá ndíhi nchaa ñãyiu xĩndecu-á<sup>n</sup>:

—Chí cündèhe tée iha chi tée-a cächí cue tée isràèl sá ndècuéchi-dé, te cútnàhá ní xíndecu-í ñúú Jerusalén ní cachí-güedé sá ndàà ndècuéchi-dé, te diu-ni duca<sup>n</sup> cãhá<sup>n</sup>-güedé iha. Te nchaa-güedé ní cuáá-güedé te cächí-güedé sá táuchìu<sup>n</sup>-í cahni ñaha-güedé xii-dé ní cùu. <sup>25</sup> Te sá tá ní ndíhi cuèndú ní cãhá<sup>n</sup>-güedé, te ní cutnùnì iní-í sá ñà túú nì ì<sup>n</sup> cuéchi cãhnu ní quide-dé, núu ñá túú ní tàuchiu<sup>n</sup>-í cahni ñaha-güedé xii-dé. Te mee-dé ní cachí-dé sá quihí<sup>n</sup>-dé núú tẽ Cèsár tée yìndaha cuéhé nació<sup>n</sup>, te ní xáha<sup>n</sup>-í sá cúú quihí<sup>n</sup>-dé. <sup>26</sup> Te ñá túú ní xíní váha-í nása ní quide-dé, núu xíã<sup>n</sup> ñá ní ñhì-í nàcuáa cadúha-í tutú quihí<sup>n</sup> ndaha té Cèsár, te xíã<sup>n</sup> ní cana-í-dé véxi-dé iha cuèndá nchaa-ndo cãhá<sup>n</sup> ndíhi-ndo-dé. Te duca<sup>n</sup> cànuu cadíhna-gá yòhó tãtá Àgripá cáca<sup>n</sup> tnúhu-n nùú-dé núu nása cãhá<sup>n</sup>-dé, te òrè-á<sup>n</sup> cutnùnì iní-í nása cada-í cadúha-í tutú quihí<sup>n</sup> ndaha té Cèsár. <sup>27</sup> Chi sàni iní-í sá ñà túú ndùu váha-xi sá quihí<sup>n</sup> ì<sup>n</sup> tée tàú cuéchi te núu vá códó tnùnì núú ì<sup>n</sup> tutú nàcuáa càa cuéchi tàú-dé —cächí té Fèstú xáha<sup>n</sup>-dé xii-güedé.

### Te Pãblú cãhá<sup>n</sup> ndíhi-dé té Àgripá

**26** Te dàtnùnì ní xáha<sup>n</sup> tẽ Àgripá tée yìndaha nació<sup>n</sup> Isràèl xii té Pãblú:

—Te vitna cãhá<sup>n</sup>-n núu nása ní cuu cuèndá-n —cächí-dé xáha<sup>n</sup>-dè.

Te té Pãblú ní ndacani-dé ndaha-dé sá cündèdóho-güedé, te ní xáha<sup>n</sup>-dè xii té Àgripá tée yìndaha nació<sup>n</sup> Isràèl:

<sup>2-3</sup> —Tãtá Àgripá, ío cùdíí iní-í sá ní naníhí tnáhá-ó vitna, chi yòhó ío váha xíní-n nchàa nacuáa quide ñáyíu isràèl quidé cãhnú-yu Yá Ndiòxí, te ío váha xíní-n nchàa tnúhu xìtnáhá-yu. Te vitna cundee iní-n cündedóho-n ì<sup>n</sup> úú tnúhu na cãhá<sup>n</sup>-í. Na cächí tnúhu-í sá ñá ndàà ní quide-í nchaa sá cãhá<sup>n</sup> cue tée isràèl.

### Té Pãblú cãhá<sup>n</sup>-dé nàcuáa ní quide-dé cútnàhá vátá túhá-gã-dé ichi Yá Ndiòxí

<sup>4</sup> Te sa nàha nchaa cue tée cùnunu núú ñáyíu isràèl nàcuáa ní quide-í ñúú-í ndíhi ñúú Jerusalén cútnàhá ní cuu landú-í. <sup>5</sup> Te mee-güedé nãhá-güedé sá ndèé lĩhli-í ní chitnahá-í cue tée cùu farisèú. Te núu cuiní-güedé cãhá<sup>n</sup>-güedé sá tẽ farisèú cùú-í àdi ñáhá dico nchaa-güedé sa nàha-güedé sá cuè tée-á<sup>n</sup> ní chitnahá-í. Te cue tée cùu farisèú-á<sup>n</sup> ïo cuiní-güedé cada-güedé nchaa nàcuáa nchìcú<sup>n</sup> nihnu ñáyíu quidé-yu. Te yúhú nchaa sá nchìcú<sup>n</sup> nihnú-yu quidé-yu-á<sup>n</sup> ní quide-í. <sup>6</sup> Te vitna ndècu-í iha, te cãhá<sup>n</sup>-n núu váha-ni quide-í àdi ñáhá, chi cue tée-á<sup>n</sup> tée ñaha-güedé cuéchi xii-í cuèndá sá sàndáá iní-í sá ndótó nchàa ñáyíu ní xíhí. Te diu-ni duca<sup>n</sup> nĩ xáha<sup>n</sup> Yá Ndiòxí xii nchaa ñanì tnáhá-ó nĩ xín-decu ndéé sanaha. <sup>7</sup> Te nchaa ñáyíu-á<sup>n</sup> xíndetú-yu nduu ndòto ñáyíu ní xíhí ní cùu. Te diu-ni duca<sup>n</sup> ndètu nchaa ñanì tnáhá-ó ndècu ñuyíú-a ndéé vitna, te xíã<sup>n</sup> núu cuèi nduu cuèi niú cãhá<sup>n</sup> ndíhí-yu Yá Ndiòxí. Te sá sàndáá iní-í núu xíã<sup>n</sup> ní cãhá<sup>n</sup>-í, te tõe ñaha cue tée isràèl cuéchi xii-í. <sup>8</sup> ; Te ná cuèndá nchòhó cue tée isràèl ñá túú cuiní-ndó quindáá iní-ndó sá dándòto Yá Ndiòxí nchaa ñáyíu ní xíhí? —cächí té Pãblú xáha<sup>n</sup>-dè.

### Té Pãblú cãní-dè cuèndú sá nĩ xóo chihí-dé ñáyíu sàndáá iní tnúhu Jèsús vecaá

<sup>9</sup> Te ní xáha<sup>n</sup> tìcu té Pãblú:

—Ndéé dàvá-á<sup>n</sup> nĩ quide úhú-í ñáyíu sàndáá iní-xi tnúhu Jèsús Yaá ní quee ñúú Nazàrèt, te ní cãhá<sup>n</sup>-í sá váha-ni ní quide-í sá dúcá<sup>n</sup> nĩ quide-í. <sup>10</sup> Te diu-ni duca<sup>n</sup> nĩ quide-í ñúú Jerusalén. Te cue dútú cùnunu ní taxi-güedé ì<sup>n</sup> tutú cuèndá tnií-í ñáyíu ní sàndáá iní tnúhu Jèsús, te vài-yu ní chihí-í vecaá.

Te òré ní cáhá<sup>n</sup>-güedé sá cáhni-güedé ñáiyu-á<sup>n</sup>, te tnàhá-í ní cáhá<sup>n</sup>-í sá cúú cãhni ñaha-güedé xíi-yu. <sup>11</sup> Te titní xito ní sáhá<sup>n</sup>-í nchaa veñúhu ñáiyu isràél, te ní cani-í-yu te ní xáha<sup>n</sup>-í sá dáñã-yu ichi Jèsús. Te cuendá ío ní cudéè<sup>n</sup>-í núú-yu, xiã<sup>n</sup> ní sáhá<sup>n</sup>-í nchaa ñuú xícá ní sánúndúcù-í dava-gá ñáiyu sàndáá iní tnúhu-gá cuendá dandòho ñaha-güedé xíi-yu.

**Té Pãblú cãhá<sup>n</sup> tucu-dé nása ní cuu ní tuha-dé ichi Yá Ndiöxí**

(Hch. 9:1-19; 22:6-16)

<sup>12</sup> Te cuendá xiã<sup>n</sup> ní xica tucu-í cuáhá<sup>n</sup>-í ñuú Dàmascú, néhè-í tutú ní taxi cue dútú cúnùu cuáhá<sup>n</sup>, cuendá sá ndácù-í tni-í nchaa ñáiyu sàndáá iní tnúhu Jèsús ní cùu. <sup>13</sup> Te òré cauxúú nduu ñuhu-í ichi cuáhá<sup>n</sup>-í, te uu<sup>n</sup> ni ní quee ñuhú andüu ñí dáyèhé-xi ndéé núú nùtni-í ndihi cue té ndèca tnaha ndihi-í, te níhi-gá ní dáyèhé-xi dàcúúxí nchìcanchii. <sup>14</sup> Te nchaa-ndí ní nduá-ndí ndéé ñuhu, te ní tecú dóho-í cãhá<sup>n</sup> ñí sá cãhá<sup>n</sup> tnúhu ñáiyu isràél, te cãchí-xi: “Yòhó Sàulú, ¿Ná cuendá cúú ùhú iní ñáhá-n xii-í dándòho ñaha-n? Te ío dándoho-n mee-n, chi dàtná cuiní-n quide ndicutu quide-n chi quiti-á<sup>n</sup> òré cùxi-güedé-di pùyá te sãha-di patadá núú-xi, te sá dúcá<sup>n</sup> quide-di te quide úhú-di mee-di. Te duca<sup>n</sup> sãtnahá-xi cùu yohó chi ñá túú sàndáá iní ñáhá-n xii-í”, cãchí sá ñí cáhá<sup>n</sup>-á<sup>n</sup>. <sup>15</sup> Te ní xáha<sup>n</sup>-í: “¿Ná cúú yòhó sá ñí cáhá<sup>n</sup>-ái?”, xãha<sup>n</sup>-í. Te cãchí sá cãhá<sup>n</sup>-á<sup>n</sup>: “Yúhú cùú-í Jèsús Yaá cúú ùhú iní-n”, duha ní cachí sá cãhá<sup>n</sup>-á<sup>n</sup>. Te xiã<sup>n</sup> ní cutnùní iní-í sá Jèsús cãhá<sup>n</sup>. <sup>16</sup> Te ní cachí-gá: “Ndacuíñí-n chi yúhú cãhá<sup>n</sup>-í chi cuiní-í quíhí<sup>n</sup>-n càda-n chiu<sup>n</sup>-í, chi quíhí<sup>n</sup>-n cãhá<sup>n</sup>-n nùú ñáiyu nàcuáa ní cuu ní xiní ñáhá-n xii-í vitna, te quixi tucu-í cáhá<sup>n</sup> ndihi ñaha-í xii-n, te cúnaha-n xii-yu nàcuáa cáhá<sup>n</sup>-í. <sup>17</sup> Chi cuiní-í quíhí<sup>n</sup>-n cãhá<sup>n</sup>-n

tnúhu-í núú ñáiyu isràél ndihi núú ñáiyu ñá túú cùu ñáiyu isràél, te coto ñaha-í xii-n cuendá vá cáhni ñáhá-yu xii-n. <sup>18</sup> Te cuiní-í quíhí<sup>n</sup>-n cúnaha-n xii-yu sá dáñã-yu nchaa ichi cuèhé ichi duha ndècú-yu, te tuhá-yu ichi váha cuendá vá quindáá iní-yu cadá-yu sá cãhá<sup>n</sup> yucu ñávãha, te quindáá iní-yu cadá-yu nchaa nàcuáa cãhá<sup>n</sup> Yá Ndiöxí. Te núu na quindáá iní-yu tnúhu cãhá<sup>n</sup>-í, te cada cãnuu iní-í nchaa cuèchi-yu, te nanhí tãhú-yu ndihi dava-gá ñáiyu sa ní xócuñí nchaa sá cuèhé sá dúhá ñí xíndecu iní-yu”, duha ní cachí-gá xii-í — cãchí té Pãblú xãha<sup>n</sup>-dè xii té Àgripá téé yìndaha nació<sup>n</sup> Isràél.

**Té Pãblú quidé-dè nchaa nàcuáa ní xáha<sup>n</sup> Jèsús cada-dé**

<sup>19</sup> Te ní xáha<sup>n</sup> tucu té Pãblú xii té Àgripá:

—Ñá túú dàña ndeé-í quidè-í nchaa nàcuáa ní cáhá<sup>n</sup> Jèsús òré ní cáhá<sup>n</sup>-gá andüu. <sup>20</sup> Te díhna-gá ñáiyu ñuú Dàmascú ní cáhá<sup>n</sup>-í tnúhu-gá núú-yu, te ní xáha<sup>n</sup>-í xii-yu sá dáñã-yu nchaa sá cuèhé sá dúhá quidé-yu, te cáhá<sup>n</sup> ndihí-yu Yá Ndiöxí, te cadá-yu mee-ni sã vãha cuendá cutnùní iní dava-gá-yu sá ñí dáñã-yu nchaa sá ñá túú vãha ní xóo cadá-yu. Te duca<sup>n</sup>-ni ñí xáha<sup>n</sup>-í xii ñáiyu ñuú Jerusàlén ndihi ñáiyu ñihí nació<sup>n</sup> Isràél ndihi nchaa ñáiyu ñá túú cùu ñáiyu isràél. <sup>21</sup> Te cuendá sá dúcá<sup>n</sup> ñí cáhá<sup>n</sup>-í núu ní tni ñaha cuè téé isràél xii-í cutnãhá ní sáhá<sup>n</sup>-í veñúhu cãhnu sá ío cùnùu cãhni ñaha-güedé ní cùu. <sup>22</sup> Te diu-ni mee Yá Ndiöxí ní chindee ñaha-gá xii-í núu ndècú-í iha tnáví cãhá<sup>n</sup>-í tnúhu-gá, te mee-ni tnúhu-gá cãhá<sup>n</sup> ndihi-í nchaa-yu, cuè ñáiyu cuica, te cuè ñáiyu ndàhú. Te ndíi Moisés ndihi dava-gá cue téé ní xóo cáhá<sup>n</sup> tnúhu Yá Ndiöxí ndéé sanaha ñí cáhá<sup>n</sup>-güedé nàcuáa cada-xi vitna, te diu-ni duca<sup>n</sup> cáhá<sup>n</sup>-í nchaa-ni nduu. <sup>23</sup> Te cue téé-á<sup>n</sup>

nĩ cachí-güedé sá Crìstú Yaá tendaha Yă Ndiöxí quixi ñuyú-a ndoho tnahá-gá, te cuú-gá, te dàtnùnĩ ndoto-gá. Te duca<sup>n</sup> càda-xi nchaa ñáyiú ní xíhí ndotó-yu núu na sàá nduu chi duca<sup>n</sup> càda-xi ní cachí mée Yă Ndiöxí. Te cuendá sá dúcá<sup>n</sup> nĩ ndoto-gá, xíã<sup>n</sup> cútñuní sá cúu nãníhí tãhú ñáyiú, cuèi ñáyiú isràél, te cuèi ñáyiú ñá túú cùu ñáyiú isràél. Te dàtná-ni ndùu tnúhu ní cáhá<sup>n</sup> cue tée ní xóo cáhá<sup>n</sup> tnúhu-gá ndéé sanaha-ã<sup>n</sup>, te ñiu-ni duca<sup>n</sup> càhá<sup>n</sup> yúhú tucu —càchí té Pãblú xãha<sup>n</sup>-dë.

### Té Pãblú xãha<sup>n</sup>-dë xii té Àgripá sá quindáá iní-dé tnúhu Jësús

<sup>24</sup> Te sá dúcá<sup>n</sup> nĩ cáhá<sup>n</sup> té Pãblú, te ní cáhá<sup>n</sup> nĩhi té Fèstú, te xãha<sup>n</sup>-dë:

—Pãblú, jó lùcú càhá<sup>n</sup>-n! Cuendá ío vài ní dácuahá-n, núu xíã<sup>n</sup> ndadá lùcú ñáhá-xí xii-n —cachí-dé xãha<sup>n</sup>-dë.

<sup>25</sup> Te ní xãha<sup>n</sup> tã Pãblú:

—Ñáhá, vá dúcá<sup>n</sup> càhá<sup>n</sup>-n chi ñá ñíú sã lùcú-í duha càhá<sup>n</sup>-í, chi tnúhu ndáá càhá<sup>n</sup>-í. <sup>26</sup> Te té Àgripá-a sa ñaha-dé ndihi nchaa ñáyiú isràél nàcuáa ní cuu, chi sa ní níhí-dë tnúhu ndihi dava-gá-yu nàcuáa ní cáhá<sup>n</sup>-í, núu xíã<sup>n</sup> cúyì-í càhá<sup>n</sup> ndihi-í-dé —càchí-dé xãha<sup>n</sup>-dë xii té Fèstú.

<sup>27</sup> Te ní xãha<sup>n</sup>-dë xii té Àgripá:

—Yúhú sa xini-í sá sãndáá iní-n tnúhu ní chídó tnùnĩ cue tée ní xóo cáhá<sup>n</sup> tnúhu Yă Ndiöxí ndéé sanaha —càchí-dé xãha<sup>n</sup>-dë.

<sup>28</sup> Te ní xãha<sup>n</sup> tã Àgripá:

—¿Quide-n cuendá sá íf<sup>n</sup> úú tnúhu ní cáhá<sup>n</sup>-n te quindáá iní-í tnúhu Jësús cáhá<sup>n</sup>-n-ã<sup>n</sup>? —càchí-dé xãha<sup>n</sup>-dë.

<sup>29</sup> Te ní xãha<sup>n</sup> tucu té Pãblú:

—Cuèi vitna te cuèi ndéé cuèé-gá dico cuiní-í sá dàcutíí sã quindáá iní-n tnúhu Jësús. Te ñiu-ni duca<sup>n</sup> xicá<sup>n</sup> táhù-í núu Yă Ndiöxí sá ncháá ñáyiú ndècu ndihi-o iha quindáá iní-yu tnúhu-gá dàtná cuiní-n nĩ quide yúhú, duca<sup>n</sup>

càdá-yu. Dico-ni sá nõu vá quíhí<sup>n</sup>-ni-yu vecaá dàtná cuiní-n ndòho yúhú —càchí-dé xãha<sup>n</sup>-dë xii té Àgripá.

<sup>30</sup> Te sátá dúcá<sup>n</sup> nĩ cáhá<sup>n</sup>-dë, te ní ngúnutñí té Àgripá tée yìndaha nació<sup>n</sup> Isràél, ndihi té Fèstú tée cùu gobiernú, ndihi tá Berènicé ndihi dava-gá ñáyiú xínucóo yatni. <sup>31</sup> Te ní tnahá-yu ndèca tnahá-yu cuáhá<sup>n</sup> í<sup>n</sup> xio. Te ní xítñahá-yu:

—Tée-ã<sup>n</sup> ñá túú nã cuèchi ní quide-dé nõu chihi ñaha-güedë vecaá àdi cahni ñaha-güedé —càchí-yu xítñahá-yu.

<sup>32</sup> Te té Àgripá ní xãha<sup>n</sup>-dë xii té Fèstú:

—Cuèchi mee-dë chi ní cachí-dé sá quítñahá-dé té Cèsár, xíã<sup>n</sup> nõu ndíhu tucu-dé vecaá, te núu ñá túú dùca<sup>n</sup> ní cáhá<sup>n</sup>-dë, te cácu-dé ní cùu —cachí-dé xãha<sup>n</sup>-dë xii té Fèstú.

### Té Pãblú cuáhá<sup>n</sup>-dë ñuú Rómá

**27** <sup>1-2</sup> Te ní ndatnúhu-güedé sá quíhí<sup>n</sup> té Pãblú ndihi bàrcú nació<sup>n</sup> Itàliá, te tñahá yúhú quíhí<sup>n</sup>-í ndihi-dé. Te tñahá í<sup>n</sup> tée nani Aristarcú cuiní-dé quíhí<sup>n</sup> ndihi-ndí-dé, te cùu-dé tée ñuú Tesalónica, te ñuú-á<sup>n</sup> yíndèhu-xi distritú Macèdoniá. Te ní sãha cuendá-güedé té Pãblú ndihi í<sup>n</sup> úú-gá cue tée xixíhi vecaá ní quehe<sup>n</sup> cuendá ñáhá tã Jülüú tée cùu capitá<sup>n</sup>, tée yìndaha nchaa sandadú nání Àgustú, te ní queé-ndí nchaa-ndí bàrcú ñuú Adràmitiú. Te ní xica bàrcú-á<sup>n</sup> cuáhá<sup>n</sup>-ndí ndihi-xi te cuita yáha-ndí í<sup>n</sup> úú ñuú yíndèhu distritú Àsiá quíhí<sup>n</sup>.

<sup>3</sup> Te nduu tñéé ní quexio-ndí ñuú Sídón. Te ío váha ní quide té Jülüú, chi ní dáñá-dë ní quene té Pãblú ní sáhá<sup>n</sup>-dë ní cáhá<sup>n</sup> ndihi-dé cue tée ío váha tñahá tnúhu ndihi-dé nõu cudana cundáhú iní ñáhá-güedë cuãñaha-güedë nchaa sá xini ñùhu-dé. <sup>4</sup> Te dàtnuní ní ndéé tucu-dé bàrcú cuáhá<sup>n</sup>-ndí. Te ío níhi táchí te ñá ní dàña-xi caca ndáá bàrcú, te ní sáhá<sup>n</sup> bàrcú ndéé yatni yuhu distritú Chipré, te distritú-á<sup>n</sup>

caá cuădava xití lâmar, te xîá<sup>n</sup> ñà túú cuéhé táchí ni yăha-ndí. <sup>5</sup>Te ta yăha-ndí cuáhá<sup>n</sup>, te ní yăha-ndí ì<sup>n</sup> xio yuhu distritú Ciliciá ndîhi yuhu distritú Pânfilíá, te ní sáá-ndí ndéé ñuú Mîrâ ì<sup>n</sup> ñuú yîndêhu distritú Liciá.

<sup>6</sup>Te ní quene tée cùu capitá<sup>n</sup> cuándúcú-dě ingá bàrcú, te ní níhí-dě ì<sup>n</sup> bàrcú tée ñuú Alejândriá, ñúhú ìchi-xi quîhî<sup>n</sup>-xi nàció<sup>n</sup> Itàliá. Te ní ndicuaca ñaha-dě xii-ndí cuáhá<sup>n</sup>-ndí ní quée-ndí bàrcú-á<sup>n</sup>, te ní xica-xi cuáhá<sup>n</sup>-xi. <sup>7</sup>Te ío cuèé cuáhá<sup>n</sup> bàrcú-á<sup>n</sup>, cuéhé nduu ní xúhu<sup>n</sup>-xi ichi, te yica-ní ní quexìo-ndí yuhu ñúú Nîdú, te ñá ní dàña-gá táchí quîhî<sup>n</sup> ndáá bàrcú ñuu ní xícó ndúú-xi. Te ní yăha-ndí ì<sup>n</sup> xio yuhu distritú Crètá núú ñà túú quène vihi táchí, te ñu-ni cuădava tucu lâmar cáá distritú-á<sup>n</sup>. Te ní yăha-ndí yuhu ñúú Sàlmón, te ñu-ni Crètá yîndâha-xi ñuú-á<sup>n</sup>. <sup>8</sup>Te ní yăha-ndí cuáhá<sup>n</sup>-ndí mee-nă núú ràyá distritú Crètá, te ío ní ndoho-ndí ní sáá-ndí ì<sup>n</sup> xichi núú nání Puèrtú Váha, yatni víi-ni-gá ñuú Laseá.

<sup>9</sup>Te ní cuyaa vihi-ndí ichi, duca<sup>n</sup>-ni cùu-ndí ní tnahá yóó cúú<sup>n</sup> dăú táchí, te ío úhú yăha bàrcú ñuu na quîhî<sup>n</sup>-ni-xi.

<sup>10</sup>Te ní xáha<sup>n</sup> tĕ Păblú xii-güedé:

—Nchaa-ndo cùndedóho-ndo tnúhu na cáhá<sup>n</sup>-í-a. Ío úhú núú na càda yica-o quîhî<sup>n</sup>-ó ndîhi barcú chi cuíta càrgá te cuíta bàrcú, te cuu-ni iní-xi tnahá-ni mee-o cùú-ó chi cáhá-ó ñuu na ngàunihnu-o xití ndute —càchí-dé xăha<sup>n</sup>-dĕ xii-güedé.

<sup>11</sup>Te tée cùu capitá<sup>n</sup> ñá ní sândáá iní-dé tnúhu ní cáhá<sup>n</sup> té Păblú. Dico tnúhu ní cáhá<sup>n</sup> tée dàcaca barcú ndîhi xítohó-xi chi ní sândáá iní-dé. <sup>12</sup>Te ñá ní tnahá iní-güedé Puèrtú Váha cuendá sá ní tnahá yóó cúú<sup>n</sup> dăú táchí, te ñá túú dăhu váha táchí xîá<sup>n</sup>, núu vâi-güedé ní cuiní-güedé yăha-güedé quîhî<sup>n</sup>-güedé sáá-güedé ndéé ñuú Fènicé ní cùu. Te yacá<sup>n</sup> cundecu-güedé yóó cúú<sup>n</sup> dăú táchí

cuèi ñá túú cāvâha vihi, chi nchîi năcuáa yăha bàrcú, te yacá<sup>n</sup> quîhu táchí, dico dăhu-gá. Núu xîá<sup>n</sup> ndéé ndíacá<sup>n</sup> nâtacá bàrcú yóó cúú<sup>n</sup> dăú táchí, te ñu-ni Crètá yîndâha-xi ñuú-á<sup>n</sup>.

### Nitùhú lâmar cúú<sup>n</sup> dăú táchí

<sup>13</sup>Te duha ní quene nuu luha táchí, xîá<sup>n</sup> ní sani iní-güedé sá ndácú-güedé quîhî<sup>n</sup>-güedé, núu ní natava-güedé caá ndètnîi ndéé bàrcú, te ní xica-xi cuáhá<sup>n</sup>-xi ní yăha-ndí yatni víi yuhu distritú Crètá. <sup>14</sup>Te tnaa-ni ní cuu sá ní xica bàrcú, te duha ní cunuu dăú táchí ì<sup>n</sup> xio yuhu ñúú-á<sup>n</sup> <sup>15</sup>te nchîta ichi cuáhá<sup>n</sup> bàrcú. Te ñá ní ndàcu-gá-xi quîhî<sup>n</sup> ndáá-xi năcuáa cuáhá<sup>n</sup>-xi ni cùu, núu ní dāñá-ndĕ cuáhá<sup>n</sup> mée-nă bàrcú. <sup>16</sup>Te ní yăha-ndí ì<sup>n</sup> ñuú nání Clăudá, te ñuú-á<sup>n</sup> cáá cuădava xití lâmar. Te ì<sup>n</sup> xio yuhu ñúú núú ñà túú quène vihi táchí ní yăha-ndí, te bàrcú lihli sá nchîcú<sup>n</sup> sátá bàrcú cáhnú, chi ní ndacu-ndí ní taxúha-ndí xití bàrcú cáhnú. <sup>17</sup>Te sátá ní ndacu-ndí ní taxúha-ndí bàrcú lihli, te ní ducu<sup>n</sup> nuu-güedé yoho bàrcú cáhnú. Te ío ní yùhú-güedé sá yăha bàrcú ndéé núú ñúhú cŭchí yuhu ñúú Sirté, núu xîá<sup>n</sup> ní ndîhi dóó nchítá điquí bàrcú ní nuu nehe-güedé, chi dóó-ă<sup>n</sup> ío níhi chîndaha táchí, núu xîá<sup>n</sup> cuáhá<sup>n</sup> bàrcú ì<sup>n</sup> xio. Te ní dāñá-güedĕ ñá túú-gă ní dàcaca-güedé, núu cuáhá<sup>n</sup> mée-nă-xi ta chîndaha táchí cuáhá<sup>n</sup>. <sup>18</sup>Te ío níhi dăú táchí, te ñá ní cuiní tnahí-xi yăha. Te nduu úú sá dúcá<sup>n</sup> ñà túú-gă ní dàcaca-güedé bàrcú te ní ngüíta-güedé ní dāngöyo-güedé sá nchídó-xí cuendá cuiní-güedé nduu ñamá-xi. <sup>19</sup>Te nduu úní ní dāngoyo-güedé nchaa ndachîu<sup>n</sup> cānehe chîu<sup>n</sup>-güedé xití bàrcú. <sup>20</sup>Te cuéhé nduu ñá túú ní xîní-ndĕ ni chòdîní ni nchîcanchii, chi ío níhi ní cuu<sup>n</sup> dăú táchí, núu ní cáhá<sup>n</sup>-ndĕ sá vă căcu-ndĕ, chi ndîhi-ndĕ cáhá ní cáhá<sup>n</sup>-ndĕ.



<sup>21</sup>Te ní cuu titní nduu ñá túú-gă xéxi-ndí, núu xíá<sup>n</sup> ní ngúnutní té Páblú núú-güedé, te xáha<sup>n</sup>-dê:

—Quindáá iní-ndó tñhu ní cáhá<sup>n</sup>-í, te cundecu nahi-o Crétá ní cùu. Te núu ni tñi-ndo tñuhu-í, te vá dácúita-o cãrgá ndihi dava-gá ndàchiu<sup>n</sup> ni cuu. <sup>22</sup>Te vá yùhú-ndó chi vá cùú ni ì<sup>n</sup>-ndo dico bàrcú chi cuí. <sup>23</sup>Te nàha-ndo sá yùhú càhá<sup>n</sup> ndihi-í Yă Ndiöxí te quide-í nàcuáa càhá<sup>n</sup>-gá. Te ñu-ni mee-gá ní techiu<sup>n</sup>-gá ì<sup>n</sup> espíritú xínú cuèchi núú-gă ní quixi, <sup>24</sup>te ní cachí-xi xii-í: “Vá yùhú-n chi vá cùú-n, dico dacuití quíhí<sup>n</sup>-n cáhá<sup>n</sup> ndihi-n tē Cēsár. Te ni ì<sup>n</sup> tēe ndihi-n vá cùú, chi ío cùdíf iní ñáhá Yă Ndiöxí xii-n”, duha ní cáhá<sup>n</sup> espíritú xínú cuèchi núú-gă ní cachí tñuhu-xi xii-í. <sup>25</sup>Núu xíá<sup>n</sup> càchí tñuhu-í sá vá yùhú-ndó, chi sa cùtnuní iní-í sá cádá Yă Ndiöxí nàcuáa ní cáhá<sup>n</sup> espíritú xínú cuèchi núú-gă. <sup>26</sup>Te mee táchí chindaha-xi bàrcú daquihí<sup>n</sup>-xi ndéé yuhu ndüte — cachí té Páblú xáha<sup>n</sup>-dê xii-güedé.

<sup>27</sup>Te sa ní cuu sáhú<sup>n</sup> nduu sáhú<sup>n</sup> niú sá ñí ngúíta-xi cùu<sup>n</sup> dáú táchí, te ñá túú-gă dácaca-güedé bàrcú, chi mee-nă táchí tá chindaha-xi barcú cuáhá<sup>n</sup> núu ndute lámár Àdriá. Te sátá ñí cuu dava niú, te ní quide cuendá cue tēe dácaca barcú sá tá cùyatni-güedé ñuhu yìchí. <sup>28</sup>Te ní chicuàhá-güedé ná daha-gá mètrú néhé-xí sã cùnú xití ndute cuendá cutnùní iní-güedé sá tá cùyatni-xi ndéé yuhu lámár, te nèhe-xi ócò sáhú<sup>n</sup> ì<sup>n</sup>-ni-gá mètrú. Te ní xica tucu bàrcú luha-gá, te dät-nùní ní chicuàhá tucu-güedé, te xíá<sup>n</sup> néhé-xí ócò úsá-ni-gá mètrú. <sup>29</sup>Te ní yùhú-güedé sá candaundé-xi cava, te ní quehe<sup>n</sup>-güedé cúmí caá náhnú sã nchícú<sup>n</sup> yoho, te ní dáquēe-güedé xití ndute ndàa sátá bàrcú, te dät-nùní ní ngúñí-xi ñá ní xica-gá-xi, te ní cuiní-güedé sá òré-ni túndaá ní cùu. <sup>30</sup>Te cue tēe dácaca barcú ní natava-güedé bàrcú

lìhli dándée-güedé núu ndute ni cùu, te ní cachí-güedé sá quíhí<sup>n</sup>-güedé ndàa núu bàrcú dàquēe-güedé úú-gá caá cuendá cuita candé-xi bàrcú cáhnú cuendá sá vá cáca-xí. Te cuiní-güedé dandàhú-güedé dava-gá nchúhú cue tēe ñuhu ndihi-güedé bàrcú, chi ní ndatnúhu-güedé sá cùnú-güedé ní cùu. <sup>31</sup>Te té Páblú ní xáha<sup>n</sup>-dê xii tēe cuu capitá<sup>n</sup> ndihi dava-gá sandàdú:

—Te núu na dándóo ñaha cue tēe dà-caca barcú cunu-güedé, te vá cãcu-o — càchí-dé xáha<sup>n</sup>-dê.

<sup>32</sup>Te sá dúcá<sup>n</sup> ñí xáha<sup>n</sup>-dê ñuu ní sáhá<sup>n</sup> sandàdú ní xehndé-güedé yoho nchícú<sup>n</sup> bàrcú lìhli dángáunìhnu-güedé xití ndute cuáhá<sup>n</sup>-xi.

<sup>33</sup>Te váha váha-ni ta tñndaá cuáhá<sup>n</sup>, te ní xáha<sup>n</sup> tē Páblú:

—Sa ní cuu sáhú<sup>n</sup> nduu ñá túú tñàhí xèxi-ndo sá ndìhú iní-ndó. <sup>34</sup>Te vitna yáchí-ndó, chi caxi-ndo cuendá naníhí ndéé-ndó, te vá yùhú-ndó chi ñá túú nă tñahá ni ì<sup>n</sup>-ndo —cachí-dé xáha<sup>n</sup>-dê xii-güedé.

<sup>35</sup>Te sátá dúcá<sup>n</sup> ñí cáhá<sup>n</sup>-dé, te ní quehe<sup>n</sup>-dé ì<sup>n</sup> pàá, te ní ndacá<sup>n</sup> táhú-dé núu Yă Ndiöxí, te núú-güedé ncha-güedé duca<sup>n</sup> ñí quide-dé, te dät-nùní ní táhú-dé luha ní xexi-dé.

<sup>36</sup>Te duca<sup>n</sup> te dät-nùní ní cuyí-güedé ní xexi-güedé ncha-güedé. <sup>37</sup>Te úú cièndú únídico sáhú<sup>n</sup> ì<sup>n</sup>-ndí ñúhú bàrcú núu tñahá té Páblú, te ncha-ndí ní xexi ndihi-ndí-dé. <sup>38</sup>Te ní xexi-ndí ní ndahá xití-ndí. Te dät-nùní ní ngúíta-güedé ní tava-güedé ncha ngohchi trúú ní dängoyo-güedé xití ndute cuendá nduu ñamá-gá bàrcú.

### Ní dáhu bàrcú xití lámár

<sup>39</sup>Te sátá ñí túndaá, te ñá ní cùtnuní-gá iní-güedé ndèe cùú-xí ñúú ñí sáá-güedé, te ní xiní-güedé ì<sup>n</sup> xichi núu ñí xícó ndúu luha yuhu lámár, te vài vihi cúchí dándáá-xí yùhu ndute, te

xíá<sup>n</sup> ñà túú dàcandá víhí tǎchí ndute. Te ní ndatnúhu-güedé sá ndácú-güedé dacàca-güedé bàrcú quíhí<sup>n</sup>-xi ndéé núú ñùhú cùchí. <sup>40</sup>Te xíá<sup>n</sup> ñúu ní sáhá<sup>n</sup>-güedé ní xehndé-güedé nchaa yoho nchicú<sup>n</sup> caá tácàndeé bàrcú ní ndóo xítí làmár, te ní nadatàya-güedé vítú sá dácucó-xi barcú, te ní nacata caa-güedé ìí<sup>n</sup> dóó díquí bàrcú, te ta chindaha táchí cuáhá<sup>n</sup> yuhu làmár tá cùyatni-xi ñuhu yichí cuáhá<sup>n</sup>. <sup>41</sup>Te ndècu ìí<sup>n</sup> xichi ní natacá víhí cùchí xítí ndute, te xíá<sup>n</sup> ñí nguíndüxi nihnu bàrcú-güedé, te ní cutii-xi xítí cùchí, te ñá ní ñíhí-gǎ-güedé nàcuáa cada-güedé nene-xi. Te ío níhi ní dácàndá táchí ndute, te ní chúcú ndéé-xi ndàa sátá bàrcú, te ní ndíhi ní táhú-xí. <sup>42</sup>Te cue sandàdú ní xítñaha-güedé sá cáhni-güedé nchaa cue téé ní xíhi vecaá cuèndá sá vǎ quíhí<sup>n</sup>-güedé núú ndute te cunu-güedé. <sup>43</sup>Te téé cùu capitá<sup>n</sup> ñá ní dàña-dé cahni-güedé cue téé ní xíhi vecaá, chi ñá ní cùndee iní-dé cahni-güedé tñàhá té Pǎblú. Te ní xáha<sup>n</sup>-dǎ xii-güedé sá cuè téé xícuu cada quíhí<sup>n</sup> núú ndute te na yáha-güedé ndute quene-güedé yuhu làmár. <sup>44</sup>Te dava cue téé ñá cùú cada, ní xáha<sup>n</sup>-dǎ nanducu-güedé vítú ñí àdi vítú ñí táhú sǎ ñí xíhi bàrcú, te núú xíá<sup>n</sup> caundodo-güedé yáha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

### Té Pǎblú ndécú-dǎ ñúú Mǎltá cáá cuádava làmár

**28** Te sátá ñí cácu-ndí ní nene-ndí ñuhu yichí, te ní níhí-ndí tñúhu nàcuáa nàni ñúú núú ñí sáá-ndí, te ñúú-á<sup>n</sup> nání-xí Mǎltá, te càa-xi cuádava làmár. <sup>2</sup>Te ío quide víxi<sup>n</sup>-xi cuèndá ío cùu<sup>n</sup> dáú. Te ñáyiú ñúú-á<sup>n</sup> ñí cundàhú iní ñàhá-yu xii-ndí, ní dátñaha-yu ñuhú te ní cana ñàhá-yu ní sáhá<sup>n</sup>-ndí ní nacuídí-ndí. <sup>3</sup>Te té Pǎblú dátàcá-dé

nducú, te tñàhá-ni ìí<sup>n</sup> cóó dǎé<sup>n</sup> ñí tñii nihnu-dé-dí, te òré cuáhá<sup>n</sup> ndaha-dé chucu-dé núú ñùhú, te ní ñáni-dí cahni, te ní ndee-dí xítí nducú ní sànduú-dí ndaha-dé, te ní xexiha<sup>n</sup>-dí xii-dé. <sup>4</sup>Te nchaa ñáyiú ndèhé-yu sá tácàndeé-dí ndaha-dé, te ní nguíta-yu ní xítñaha-yu:

—Váa ndíyi ní sahni téé-a, te ñá ní xíhí-dé làmár, te dacutíí sǎ cùú-dé vitna, chi sa ñaha Yá Ndiòxí ná ní quide-dé ñuyúú-a —càchí-yu xítñaha-yu.

<sup>5</sup>Te té Pǎblú ní quidi-dé ndaha-dé ní ngaunihnu-dí núú ñùhú, te ñá túú tñàhí ná ní cùu núú ñí xexi-dí. <sup>6</sup>Te ñáyiú ñúú-á<sup>n</sup> xíndéhe-yu núu daquíhí<sup>n</sup>-xi chúhú<sup>n</sup> àdi nduá-dé cuú-dé. Te naha ñí xíndéhe ñàhá-yu núu nása cada ñaha-xi xii-dé, te ñá túú tñàhí ná ní quide ñaha-xi, te ní xítñaha-yu:

—Váa ndiòxí cùú téé-a núu dàcá<sup>n</sup> ñá túú tñàhí ná ní quide-xi ndaha-dé núú ñí xexi cóó —càchí-yu xítñaha-yu.

<sup>7</sup>Te yatni núú dúcá<sup>n</sup> ñí xexiha<sup>n</sup> cóó-á<sup>n</sup> cáá ñùhu xitu téé nàni Publiú, te téé-á<sup>n</sup> táxi tñuní-dé ñíhí ñúú cáá cuádava xítí làmár núú ndécú-ndí nduu-á<sup>n</sup>. Te ío váha iní-dé chi ní cana ñaha-dǎ ní sáhá<sup>n</sup>-ndí ní xíndecu-ndí úní nduu vehe-dé. <sup>8</sup>Te tǎtá tǎ Pùbliú-á<sup>n</sup> cáá-dǎ cùhú-dé ñùhú-dǎ cahni, te tñàhá-dé daxi. Te té Pǎblú ní sáhá<sup>n</sup>-dǎ núú cáá-dǎ, te ní cáhá<sup>n</sup> ndíhi-dé Yá Ndiòxí, te ní sacá<sup>n</sup> ndodo-dé ndaha-dé díquí téé cùhú-á<sup>n</sup>, te duca<sup>n</sup>-ni ñí quide-dé, te ní ndúha téé cùhú-á<sup>n</sup>. <sup>9</sup>Te sátá dúcá<sup>n</sup> ñí quide té Pǎblú, te ní quixi nchaa ñáyiú cùhú núú ndécú-ndí, te ní quide tǎtna ñaha tǎ Pǎblú xii-yu te ní ndúha-yu. <sup>10</sup>Te òré ndécú-ndí xíá<sup>n</sup>, te vǎi sá ñí taxi táhú-güedé, te òré ní xica-ndí ní taxi tucu-güedé nchaa sá xíní ñùhu-ndí ichi.

### Té Pǎblú ní quexio-dé ñúú Ròmá

<sup>11</sup>Te yàcá<sup>n</sup> ní xíndecu-ndí úní yóó, te sa ndècu ìí<sup>n</sup> barcú téé ñúú Alejándriá òré ní quexio-ndí, te ní xíndecu-xi ñíhí

yóo cúú<sup>n</sup> dǎú táchí. Te núú-xi cǎndodo sandú sá dánàni-güedé Cǎstór ndihí sǎndú sá dánàni-güedé Pòlúx, te xití bàrcú-á<sup>n</sup> nǐ quée-ndí cuáhá<sup>n</sup>-ndí. <sup>12</sup> Te ní quexìo-ndí ñúú Siràcusá, te yàcá<sup>n</sup> ní xíndecu-ndí úní nduu. <sup>13</sup> Te ní xica tucu bàrcú cuáhá<sup>n</sup>-xi, te ní quexìo-ndí ñúú Règiú. Te nduu tnèé duha ní quene nuu táchí. Te ní xica bàrcú cuáhá<sup>n</sup>-xi, te ndéé nduu úú ní quexìo-ndí ñúú Pù-teolí. <sup>14</sup> Te yàcá<sup>n</sup> ní naníhí tnáhá-ndí ndihí ñáyiu sàndáá iní tnúhu Jèsús, te ní cachí-yu sá cúndècu-ndí úná nduu, núu xǎá<sup>n</sup> ní xíndecu-ndí úná nduu ndihí-yu. Te ní xica tucu bàrcú cuáhá<sup>n</sup>-xi, te ní quexìo-ndí ñúú Rómá. <sup>15</sup> Te ñáyiu rómá ñáyiu sàndáá iní tnúhu Jèsús, ní níhí-yu tnúhu sá cuáhá<sup>n</sup>-ndí, te ní quixí-yu ní quixi tnahá ñáhá-yu ichi. Te davá-yu ní naníhí-ndí ñúú Fòrú Àpiú, te davá-yu ní naníhí-ndí ñúú Úní Tàbernás. Te òré ní xiní té Pǎblú nchaa ñáyiu véxi tnahá ñáhá xii-ndí, te ndee ndèe ní cuu iní-dé, te ní ndacá<sup>n</sup> táhú-dé núú Yǎ Ndiòxí sá dúcá<sup>n</sup> nǐ quidé-yu. <sup>16</sup> Te sátá nǐ quexìo-ndí ñúú Rómá, te cue tée cùchiu<sup>n</sup> ní xáha<sup>n</sup>-güedé xii té Pǎblú sá cúndècu díi<sup>n</sup>-dé, te ní xindeé ñáhá cuàa sandadú xii-dé.

### Té Pǎblú cǎhá<sup>n</sup>-dé tnúhu Yá Ndiòxí ñúú Rómá

<sup>17</sup> Nduu úní sá nǐ quexìo té Pǎblú, te ní cana-dé cue tée cùnuu núú ñáyiu isràèl ndécú ñúú Rómá, te ní sáhá<sup>n</sup>-güedé núú ndécú-dé, te ní xáha<sup>n</sup>-dè:

—Nchòhó cue tée isràèl, cǎchí tnúhu-í sá ñà túú nǎ ní quide-í ni ñi<sup>n</sup> ñáyiu cútnàhá ní xíndecu-í ñúú Jerusàlén. Te ñá túú ní cǎhá<sup>n</sup> cuèhé-í sá quidé-yu nchaa nàcuáa ní xóo cada cue ñaní tnáhá-ó nǐ xíndecu ndéé sanaha, te ñá túú nǎ ní quide-í te ní tnií ñaha-güedé ní sáha cuèndá ñáhá-güedé xii-í núú cuè tée rómá, cue tée ndècu yacá<sup>n</sup>. <sup>18</sup> Te cue tée-á<sup>n</sup> nǐ ndúcú tnúhu-güedé

núu ndáá ndècuéchi-í, te ní cutnùni iní-güedé sá ñǎ túú nǎ ní quide-í, te xǎá<sup>n</sup> cuiní-güedé queñuhu ñaha-güedé xii-í vecaá ní cùu. <sup>19</sup> Te diu-ni cue tée isràèl ñá ní dǎña-güedé cǎcu-í, chi cuiní-güedé sá cǎhni ñaha cue tée rómá, cue tée xín-decu yacá<sup>n</sup> xii-í ní cùu, te xǎá<sup>n</sup> núu ní xáha<sup>n</sup>-í sá quixí-í cǎhá<sup>n</sup> ndihí-í té Cèsár cuèndá iha cada ndáá méé-dé cuèndá-í, te vá yóo ñi<sup>n</sup> tee-í cuéchi. <sup>20</sup> Núu xǎá<sup>n</sup> ní cana ñaha-í xii-ndo cuèndá cunaha-ndo nàcuáa ní cuu. Te ní xáha<sup>n</sup>-í sá sàndáá iní-í sá ndótó ñáyiu ní xíhí, te diu-ni duca<sup>n</sup> cǎhá<sup>n</sup> dava-gá ñáyiu isràèl, te sá dúcá<sup>n</sup> nǐ cǎhá<sup>n</sup>-í, te ní chihí ñaha-güedé vecaá, te xindeé ñáhá-güedé ndéé vitna —cǎchí té Pǎblú xáha<sup>n</sup>-dè xii-güedé.

<sup>21</sup> Te ní xáha<sup>n</sup>-güedé xii-dé:

—Ñá túú tnàhí tutú ní tèndaha cue tée distritú Jùdeá quixi cuèndá-n. Te ni cuè tée isràèl ñá túú ní quixi-güedé cǎhá<sup>n</sup> cuèhé-güedé cuèndá-n. <sup>22</sup> Te cuiní-ndí cundedóho-ndí nása cunduu tnúhu cǎhá<sup>n</sup>-n, chi sa ní níhí-ndí tnúhu sá ncháá xìchi ío xǎcǎhá<sup>n</sup> cuèhé-yu cuèndá nchaa ñáyiu sàndáá iní tnúhu Jèsús —cǎchí-güedé xáha<sup>n</sup>-güedé xii té Pǎblú.

<sup>23</sup> Te ní xáha<sup>n</sup>-güedé nduu cùyáchí-güedé te quixi-güedé cundedóho-güedé dava-gá cuèndú cǎhá<sup>n</sup> té Pǎblú. Te ní tnahá nduu nǐ ndatnúhu-güedé quíhí<sup>n</sup>-güedé núú quidé vèhe-dé, te vai-yu ní sáhá<sup>n</sup>-yu ní xíndedóho-yu tnúhu ní cǎhá<sup>n</sup>-dé, te nchaca nchaa ní cǎhá<sup>n</sup> ndihí-dé-yu. Te ní xáha<sup>n</sup>-dè xii-yu sá ndii Moisés ndihí dava-gá cue tée ní xóo cǎhá<sup>n</sup> tnúhu Yá Ndiòxí ndéé sanaha nǐ chídó tnùní-güedé núú tütú-güedé sá díú-gǎ tendaha-gǎ Crístú quixi-gá ñuyíú-a. Te ní chídó tnùní-güedé nchaa nàcuáa cada-gá, te diu-ni nàcuáa cǎhá<sup>n</sup> tutú-güedé cada Crístú, te duca<sup>n</sup> nǐ quide-gá cútnàhá ní xica cuu-gá ñuyíú-a, núu xǎá<sup>n</sup> ní cutnùni sá díú

Jèsús cúu-gă Crìstú Yaá ní tendaha Yă Ndiöxí ní quixi ñuyíú-a. Te núu quindáá iní-yu, te ndíhu ndaha ñàha Yá Ndiöxí xíí-yu. <sup>24</sup>Te davá-yu ní sándáá iní-yu tnúhu ní cáhá<sup>n</sup>-dé, te davá-yu ñá túú ní sándáá iní-yu. <sup>25</sup>Te cuendá sá ñă í<sup>n</sup>-ní tnúhu ni cǎhá<sup>n</sup>-yu, núu xǎ<sup>n</sup> cuiní-yu núhu-yu ni cùu. Te ní xáha<sup>n</sup> tǎ Pǎblú sá cùndètu tnaá-yu cáhá<sup>n</sup>-dé ingá tnúhu, te xǎha<sup>n</sup>-dǎ:

—Ní xáha<sup>n</sup> Espíritú Yă Ndiöxí xii ndíí Chàíá nàcuáa cáhá<sup>n</sup> ndíí núú nchàa ñaní tnáhá-ó nǐ xíndecu ndéé sanaha. Te ní cáhá<sup>n</sup> Espíritú-gá íí<sup>n</sup> sá ndáá ní xáha<sup>n</sup>-xi xii ndíí, te duha ní xáha<sup>n</sup>-xi:

<sup>26</sup>Quíhí<sup>n</sup>-n te cúñaha-n xii ñáyíu:

Nchòhó mee-ni cùndedóho-ndo tnúhu cǎhá<sup>n</sup> Yă Ndiöxí, dico ni vǎ tǎcù tnùnín-dó.

Te cada-gá titní núú sǎ vǎ yǒo tnàhí ndàcu cada, dico ni vǎ cùtnùnín iní-ndó nàcuáa ndùu sá cádá-gǎ,

<sup>27</sup>chi cuendá sá ío sàá iní-ndó,

xǎ<sup>n</sup> duca<sup>n</sup> ñà túú sǎha-ndo cuendá nása cuáhá<sup>n</sup> tnúhu cǎhá<sup>n</sup>-gá,

chi ñá cuiní-ndó cùndedóho-ndo, te ni ñă sándáá iní-ndó.

Te ni ñă cuiní-ndó dàña-ndo nchaa sá cuèhé sá dúhá quide-ndo cuendá xocàni-gá nchaa xǎ<sup>n</sup> iní-ndó, duha cúñaha-n xíí-yu.

Càchí Espíritú-gá xǎha<sup>n</sup>-xi xii ndíí. <sup>28</sup>Te na cǎchí tnúhu-í sá quíhí<sup>n</sup> cue téé cǎhá<sup>n</sup> tnúhu Yá Ndiöxí cáhá<sup>n</sup>-güedé tnúhu-gá núú ñáyíu ñá túú cùu ñáyíu isràél, chi ñáyíu isràél ñá túú cuiní-yu cundedóho-yu. Dico ñáyíu ñá túú cùu ñáyíu isràél chi cùdíí iní-yu cundedóho-yu, núu xǎ<sup>n</sup> naníhí tǎhú-yu —cǎchí té Pǎblú xǎha<sup>n</sup>-dǎ xíí-yu.

<sup>29</sup>Te sátá nǐ ndíhí cuèndú ní xáha<sup>n</sup>-dǎ, te ní ndéé-yu cuánuhú-yu ta ndàtnúhu-yu cuáhá<sup>n</sup>.

<sup>30</sup>Te úú cuíá nǐ xínu ní xíndecu té Pǎblú íí<sup>n</sup> vehe ní cháhu-dé. Te ní xóo cáhá<sup>n</sup> váha-dé ndíhí nchaa ñáyíu ní xóo quíhí<sup>n</sup> vehe-dé. <sup>31</sup>Te ní xáha<sup>n</sup>-dǎ sá ndíhu ndaha ñàha Yá Ndiöxí xíí-yu núu quindáá iní-yu tnúhu-gá, te vǎ yǒo íí<sup>n</sup> ni sàdí yuhu-dé. Te mee-ni tnúhu Xítóhó Jesucristú ní cáhá<sup>n</sup>-dé núú-yu.

## TUTÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU ÑUÚ RÒMÁ

**Té Păblú cādũha-dé tutú quíhí<sup>n</sup>  
ndaha ñáyiu xĩndecu ichi Xítohó  
Jesucrístú ndécú ñuú Ròmá**

**1** Yúhú té Păblú xínú cuèchi-í núú Xítohó Jesucrístú, chi mee Yă Ndiöxí ní cachí-gá sá cùú-í ìí<sup>n</sup> téé cáhá<sup>n</sup> tnúhu-gá núú ñáyiu, te tnúhu-gá cúú-xí tnúhu sá cāhá<sup>n</sup> nàcuáa nanhí tǎhú-ó, núú diu-gá ní tendaha ñaha-gá xii-í xícá cùú-í cāhá<sup>n</sup>-í tnúhu-gá.

<sup>2</sup>Te ndéé sanaha nĩ cachí Yă Ndiöxí sá dăcuiití sàá nduu ngũndecu ndihi ñáyiu tnúhu-gá. Te duca<sup>n</sup> nĩ xáha<sup>n</sup>-gă xii cue téé ní cáhá<sup>n</sup> tnúhu-gá dāvá-á<sup>n</sup> nĩ chidó tnùnì-güedé núú tütú-gá. <sup>3</sup>Te tnúhu-gá sá cāhá<sup>n</sup>-í-a cāhá<sup>n</sup>-xi diu-ni cuendá Xítohó Jesucrístú Yaá cúú Dēhe-gá. Te Dēhe-gá-á<sup>n</sup> cúú-gă ìí<sup>n</sup> ñáyiu, te cùu-gá ñanì tñáhá ndii Dăvií. <sup>4</sup>Te cùu-gá Yaá ñá túú tñahí cuèchi-xi. Te ní xihí-gá te ní ndoto-gá, te xíá<sup>n</sup> cúnùnì iní-ó sá cúú-gă Dēhe Yá Ndiöxí, te ío cǎhnu cuu-gá. <sup>5</sup>Te diu-ni Xítohó Jesucrístú ní quide-gá ní nduu tǎhú-í núú Yă Ndiöxí sá cāhá<sup>n</sup>-í tnúhu-gá núú cuè ñáyiu ñuyíú-a cuendá quíndáá iní-yu tnúhu-gá te canchicú<sup>n</sup> nihnú-yu cadá-yu nchaa nàcuáa cāhá<sup>n</sup>-xi, te duca<sup>n</sup> ío cuu cǎhnu-gá. <sup>6</sup>Te tñáhá nchòhó cúú-ndó ñáyiu sa nchicú<sup>n</sup> nihnu quide-ndo nchaa nacuáa cāhá<sup>n</sup> tnúhu-á<sup>n</sup>, chi ní cachí Yă Ndiöxí sá nchòhó tñáhá tnúhu-ndo ndihi Xítohó Jesucrístú. <sup>7</sup>Te nchòhó ñáyiu xĩndecu ñuú Ròmá, ñáyiu ío cùu iní ñáhá Yă Ndiöxí, cādúha-í tutú-a daquixi-í ndaha-ndo. Te diu-ni nchòhó cúú-ndó cuè ñáyiu ní cachí Yă Ndiöxí cada ndáá cundecu-ndo nũú-gă. Te xícá<sup>n</sup> tǎhú-í núú Tătá-ó Dütú Ndiöxí ndihi núú Xítohó Jesucrístú sá ío na chĩndee chitúu ñaha-gă

xii-ndo, te duca<sup>n</sup> ndì nduú-gá ná càda te ío váha cuu iní-ndó cundecu-ndo.

**Té Păblú cuiní-dé quíhí<sup>n</sup> ngoto-dé  
cue ñáyiu xĩndecu ichi Xítohó  
Jesucrístú ndécú ñuú Ròmá**

<sup>8</sup>Te díhna nuu-gă cǎchí tnúhu-í xii-ndo sǎ ío ndácá<sup>n</sup> tǎhú-í núú Yă Ndiöxí cuendá sá ío sàndáá iní-ndó-gă, te nchaa ñáyiu nihí-yu tnúhu sá dúcá<sup>n</sup> quide-ndo. Te Xítohó Jesucrístú dáyaha-gá nchaa tnúhu cāhá<sup>n</sup>-í núú Yă Ndiöxí. <sup>9</sup>Te ndi tñahá òré cāhá<sup>n</sup> ndihi-í Yă Ndiöxí duca<sup>n</sup>-ni xícá<sup>n</sup> tǎhú-í núú-gă cuendá-ndó, te mee-gă náhá-gă sá cāhá<sup>n</sup> ndáá-í, te diu-ni núú-gă xínú cuèchi-í ni yùhu ni iní-í, chi cāhá<sup>n</sup>-í nàcuáa ní quide Dēhe-gá Xítohó Jesucrístú cuendá nanhí tǎhú-ó. <sup>10</sup>Te xícá<sup>n</sup> tǎhú-í núú Yă Ndiöxí sá nũu mee-gă ná cǎchí te sáá ìí<sup>n</sup> nduu quixi coto ñaha-í xii-ndo. <sup>11</sup>Chi ío cuiní-í cundecu ndihi ñaha-í xii-ndo dānehé ñáhà-í ìí<sup>n</sup> úú tnúhu nàcuáa ío-gá chĩndee ñaha Espíritú Yă Ndiöxí xii-ndo, te duca<sup>n</sup> ío-gá cuita nducu ndēe-ndo cada-ndo nchaa nacuáa cuiní-gá. <sup>12</sup>Te ío chí ná cuáha tñaha-o tnúhu ndee ìní cundecu-o ìchi-gá, chi nchòhó ndihi yúhú ío sàndáá iní-ó-gă.

<sup>13</sup>Te nchòhó ñáyiu ndècu ndihi-í ichi Xítohó Jesucrístú na cǎchí tnúhu-í xii-ndo sǎ dúcá<sup>n</sup>-ní ío sàni iní-í quixi coto ñaha-í xii-ndo. Te cuiní-í sá òré quixi coto ñaha-í xii-ndo, te vá cuíta chiú<sup>n</sup> quixi-í dǎtná quidè-í òré sǎngoto-í nchaa ñáyiu dava-gă ñuú ñá túú xita chiú<sup>n</sup>-í chi ío váha sàhúu<sup>n</sup>-yu tnúhu cāhá<sup>n</sup>-í, dico ñá ndácú-í quixi-í quixi coto ñaha-í xii-ndo. <sup>14</sup>Te yúhú yídiquè-í cāhá<sup>n</sup>-í tnúhu Xítohó Jesucrístú núú nchàa ñáyiu cāhá<sup>n</sup> tnúhu gríégú, ndihi núú nchàa ñáyiu cāhá<sup>n</sup> dava-gá núú tnúhu, ndihi núú nchàa ñáyiu túha, ndihi núú nchàa ñáyiu ñá túú túha. <sup>15</sup>Te cuendá sá dúhá yídiquè-í cāhá<sup>n</sup>-í tnúhu-gá, xíá<sup>n</sup> ío cuiní-í danèhé ñáhà-í xii nchaa nchòhó ñáyiu ñuú Ròmá

nàcuáa ndùu tnúhu sá cãhá<sup>n</sup> nàcuáa naníhí tãhú-ó.

### Ío cùnùu tnúhu Xítóhó Jesucristú

<sup>16</sup>Te yúhú ñá túú tnàhí cùcaha<sup>n</sup> núu-í cáhá<sup>n</sup>-í tnúhu Xítóhó Jesucristú, chi cùu-xi tnúhu ío cùnùu, chi Yá Ndiöxí ní cachí-gá sá ncháá ñáyiu na quindáá iní-xi tnúhu-á<sup>n</sup> te naníhí tãhú-yu. Te ní cachí-gá sá dñhanuu-gã ñáyiu israhél ngúndecu ndihí-yu tnúhu-á<sup>n</sup> te dàtnùní ngúndecu ndihí ñáyiu ñá túú cùu ñáyiu israhél. <sup>17</sup>Te tnúhu-á<sup>n</sup> dánèhé ñáhá-xí xii-o sá cúdùu-o núú Yá Ndiöxí te núu mee-ni sã quindáá iní-ó-gã dàtná cãhá<sup>n</sup>-xi núú tütú-gá núú cãchí-xi: “Nchaa ñáyiu sàndáá iní ñáhá xii Yá Ndiöxí cúdùu-yu núú-gã, te ndècu ndihí ñáhá-yu xii-gã”, duha cãchí-xi núú tütú-gã.

### Nchaa ñáyiu ndècu ñuyíú ndècuéchi-yu

<sup>18</sup>Te ndéé andiu tëndaha Yá Ndiöxí sá ùhú quixi sá cúú-xí nchaa ñáyiu ñá túú quide ndáá núú-gã, ñáyiu quide nchaa sá cuèhé sá dúhá. Te cuendá nchaa sá quidè-yu-á<sup>n</sup> xiã<sup>n</sup> ñá túú cuiní-yu tñí-yu tnúhu ndáá tnúhu Yá Ndiöxí cuendá cuu-xi ñ<sup>n</sup> sá vãha sá cúú-xí-yu. <sup>19</sup>Te cuèi duca<sup>n</sup> quidè-yu dico cùnùní ndáá iní-yu nàcuáa ndùu sá sání iní Yá Ndiöxí ndihí nàcuáa ndùu sá quidè-gã dàtná cùnùní iní nchaa dava-gã-yu, chi diu-gã dánèhé ñáhá-gã xií-yu. <sup>20</sup>Te ni vã ndácú-ó quini núú-ó nãsa cãa-gã, te ni vã ndácú-ó quini-ó nãsa cãa iní-gã, te ni vã ndácú-ó quini-ó nãsa quide-gã táxi tñuní-gã nchaa nduu nchaa quíú. Te cuèi duca<sup>n</sup> dico ndéé cútnáhá ní ngáva ñuyíú ní ngúita nchaa ñáyiu tècú tñuní vãha-yu nàcuáa ndùu sá sání iní-gã ndihí nàcuáa ndùu sá quidè-gã te duca<sup>n</sup> tècú tñuní-yu cuendá nchaa sá ñí cadúha-gã ndéhè-yu ío ñuyíú-a, núu xiã<sup>n</sup> vá cãchí-yu sá ñá túú cuèchi-yu. <sup>21</sup>Te cuèi duca<sup>n</sup> ñí cut-

nùní iní-yu cuendá Yá Ndiöxí dico ñá túú cuiní-yu canehè-yu sá yíñuhu núú-gã nàcuáa tàú-xi cunduu. Te ni ñá túú cuiní-yu ndacá<sup>n</sup> táhù-yu núú-gã cuendá nchaa sá vãha quide ñaha-gã xií-yu, chi mee-ni nchaa sá ñá túú vèdana nandñhi ñuhu iní-yu. Te quidè-yu dàtná quidè ñ<sup>n</sup> ñáyiu ñá túú ndècu ndihí nchaa sá xiní tñuní-xi. Te uu<sup>n</sup>-gã uu<sup>n</sup>-gã tá quidè-yu cuáhá<sup>n</sup>. <sup>22</sup>Te cãchí-yu sá cúú-yu ñáyiu ío vãha sãá sá xiní tñuní-xi dico ñá ndáá, chi cùu-yu ñáyiu ío ñii dñquí-xi. <sup>23</sup>Te ñá túú cuiní-yu cáhá<sup>n</sup>-yu sá ío cãhnu cuu Yá Ndiöxí Yaá ndécú nchaa nduu nchaa quíú, chi da nchaa sá ñí cadúha mèè-yu quide cahnú-yu. Te ní cadúha-yu nchaa sá nàhá ñáyiu ñá túú cùdú ndècu ñuyíú-a. Te ní cadúha-yu sá nàhá quiti ndàva, ndihí sá nàhá quiti sàcuíta ñuhu mee-xi, ndihí sá nàhá nchaa dava-gã quiti, nchaa xiã<sup>n</sup> quidè cahnú-yu.

<sup>24</sup>Te xiã<sup>n</sup> ñuu ní dáñá Yá Ndiöxí quidè-yu nchaa sá cuèhé sá dúhá sàni iní-yu. Te xiã<sup>n</sup> ío quide ndihí tnahá-yu sá cuèhé sá dúhá sàcúú-xí yiqui cuñú-yu. <sup>25</sup>Te duca<sup>n</sup> quidè-yu chi ñá túú sàndáá iní-yu tnúhu ndáá tnúhu Yá Ndiöxí. Te mee-ni tñuhu ndehnde sàndáá iní-yu, te nèhé-yu sá yíñuhu núú dàva sá ñí cadúha-gã ío ñuyíú-a ndihí dava sá ndéé andiu te quide cahnú-yu, te ñá túú cãchí-yu sá mée-gã ío cãhnu cuu-gã, dico mee-gã xiní ñuhu-xi cáhá<sup>n</sup>-yu sá ío cãhnu cuu-gã ñí caa ñí quíh<sup>n</sup>. Te ndáá ndisa sá ío cãhnu cuu-gã.

<sup>26</sup>Te sá dúcá<sup>n</sup> ñá túú quide vãha-yu núu xiã<sup>n</sup> ní dáñá-nã Yá Ndiöxí quidè-yu nchaa sá cuèhé sá dúhá sàni iní mèè-yu. Te dava ñáyiu dñhí cãhá<sup>n</sup> ndihí tnahá-yu ndi mèè dñhí-yu te ñá túú quidè-yu nàcuáa ní nduu táhù-yu cadá-yu. <sup>27</sup>Te diu-ni duca<sup>n</sup> xiquide dava cue téé chi sàni cuèhé sání dùha iní-güedé sá cúú-xí yiqui cuñú-güedé ndi mèè tnahá téé-güedé, chi cãhá<sup>n</sup> ndihí tnahá ndi mee-güedé te ñá túú

quide-güedé nàcuáa ní nduu táhú-güedé cada-güedé, te sá dúcá<sup>n</sup> quide-güedé te ñá túú tnàhí cùu váha iní-güedé ndécú-güedé, te duca<sup>n</sup> tnàhí tàú-xi ndoho-güedé cundecu-güedé.

<sup>28</sup>Te ñá túú tnàhí ñùhu iní-yu Yá Ndiöxí nùu xíá<sup>n</sup> duu<sup>n</sup> duu<sup>n</sup> ní dáñá nihnu ñaha-gá xíi-yu sàni cuehé sání dùha iní-yu, te quidé-yu nchaa sá ñà túú tàú-yu cada-yu. <sup>29</sup>Te nchaa núú sá cuèhé sá dúhá cunu quidé-yu. Te cue téé càhá<sup>n</sup> ndihi-güedé ñáiyu ðihí te ñá díú ñàðihí-güedé cúú-yu. Te ðiu-ni duca<sup>n</sup> xíquide cue ñáiyu ðihí chi càhá<sup>n</sup> ndihí-yu cue téé te ñá díú yìi-yu cùu-güedé. Te mee-ni sá ñà túú váha quidé-yu sá cúú-xí tnàha ñáiyú-yu, te xihó-yu cundecu ndihí-yu sá ndécú ndihi dava-gá tnàha ñáiyú-yu, te ío sàni cuehé sání dùha iní-yu sá cúú-xí tnàha ñáiyú-yu, te ío cuédú iní-yu, te sàhni tnàhá-yu, te ío plètú-yu, te dándahú tnàhá-yu, te cùu úhú iní-yu cue tnàha ñáiyú-yu, te ío yiti yùhú-yu. <sup>30</sup>Te càhá<sup>n</sup> cuèhé-yu cuendá nchaa dava-gá tnàha ñáiyú-yu, te cùu úhú iní-yu Yá Ndiöxí, te xio xio cuiní-yu cunuú tnúhu-yu, te mee-ni sàni iní-yu sá ío váha cunduú-yu, te ío quide cahnú-yu mèé-yu, te ío sàni iní-yu sá cádá úhú-yu tnàha ñáiyú-yu, te ñá túú sàndáá iní-yu ni tátá-yu ni nãã-yu. <sup>31</sup>Te ñá túú tècú tnùní-yu sá váha, te ñá túú quidé-yu ñ<sup>n</sup> sá càhá<sup>n</sup>-yu, te ñá túú cùu iní-yu ni ñáiyu cùu ndi mèé-yu, te ni dàva-gá tnàha ñáiyú-yu, te ñá túú quide cahnu iní-yu ñ<sup>n</sup> sá cúmãní núú tnàhá-yu, te ni ñà túú cundahú iní-yu tnàha ñáiyú-yu. <sup>32</sup>Te Yá Ndiöxí ní cachí-gá sá ncháá ñáiyu duca<sup>n</sup> xíquide quíhí<sup>n</sup>-yu núú ùhú núú ndàhú. Te xini-yu sá Yá Ndiöxí daquihí<sup>n</sup> ñáhá-gã xii-yu núú ùhú núú ndàhú sá dúcá<sup>n</sup> quidé-yu, dico uu<sup>n</sup>-gá quidě-yu chi váha-gá cúú iní-yu cue ñáiyu quide datná quidé mèé-yu.

### Yá Ndiöxí cada ndáá-gá cuéchi nchaa ñáiyu ndècu ñuyú

**2** Te nchòhó ñáiyu càchí sá ío ndècu cuéchi dava-gá ñáiyu tnàhá-ndó ío ndècu cuéchi-ndo cuéi nágá ñáiyu cùu-ndo, chi tnàhá-ndó quide-ni-ndo nchaa nacúaa quide dava-gá ñáiyu càchí-ndó ndècu cuéchi-xi, te sá dúcá<sup>n</sup> càhá<sup>n</sup>-ndó sá ndécú cuéchi ñáiyu-á<sup>n</sup> te dàcaa-ndo cuéchi díquí-ndó chi tnàhá-ndó quide-ndo datná quidě-yu. <sup>2</sup>Te nchoo xini-ó sá Yá Ndiöxí ío váha cùnuni iní-gá nàcuáa cada ndáá-gá cuéchi ñ<sup>n</sup> ñ<sup>n</sup> nchoo ñáiyu ndècu ñuyú-a, chi daquihí<sup>n</sup>-gá nchaa ñáiyu quide nacúaa ní càhá<sup>n</sup>-í núú ùhú núú ndàhú. <sup>3</sup>Te nchòhó ñáiyu ñ<sup>n</sup>-ni quide ndihi ñáiyu càchí mèé-ndó sá ndécú cuéchi-xi dacuití sá ná chãhu-ndo núú Yá Ndiöxí sá dúcá<sup>n</sup> quide-ndo. <sup>4</sup>Te ñá túú cùu váha iní-ndó sá Yá Ndiöxí cundàhú iní ñáhá-gã xii-ndo, te ni ñà túú cùu váha iní-ndó sá ío cuiní-gá cada càhnu iní-gá nchaa sá ñà túú váha quide-ndo, te ni ñà túú quide cuendá-ndó sá Yá Ndiöxí quidé váha ñaha-gã xii-ndo cuendá cuiní-gá sá nchòhó ndixi túu iní-ndó sá ñà túú quide váha-ndo ndècu-ndo. <sup>5</sup>Te nchòhó cúú-ndó ñáiyu ío sáá iní-xi, chi ñá túú cuiní-ndó ndixi túu iní-ndó sá ñà túú quide váha-ndo ndècu-ndo, te xíá<sup>n</sup> núu ío-gá tá cùu vai tnúndòho sá cúú-xí-ndó. Te na sáá nduu tnúhu ndòho tnúhu ndàhú te ío ndoho-ndo, chi Yá Ndiöxí cada ndáá-gá nàcuáa ndùu cuéchi-ndo. <sup>6</sup>Te dàvá-á<sup>n</sup> cada ndáá Yá Ndiöxí nchaa nàcuáa ndùu nchaa sá ní quide ñ<sup>n</sup> ñ<sup>n</sup> ñáiyu ndècu ñuyú-a. <sup>7</sup>Te nchaa ñáiyu nchicú<sup>n</sup> nihnu-ni quide mee-ni sá váha, ñáiyu-á<sup>n</sup> nduu táhú-yu cundecú-yu ndihi Yá Ndiöxí ni caa ni quíhí<sup>n</sup>, te duca<sup>n</sup> quide váha-yu chi cuiní-yu sá Yá Ndiöxí cuu váha iní ñáhá-gã xii-yu, te cuiní tucú-yu nduu táhú-yu núú ío váha

càa ndecu Yá Ndiöxí cundecú-yu ni caa ni quíhí<sup>n</sup>. <sup>8</sup>Te ío cùdée<sup>n</sup>-gá núú nchàa ñáyiú ñùhu iní mee-ni sá cúú-xí mèe-xi, te ñá túú sàndáá iní-yu tnúhu ndáá chi mee-ni sá cuèhé sá dúhá quidé-yu. <sup>9</sup>Te nchaa ñáyiú duca<sup>n</sup> xíquide ío ndíhú iní-yu. Te díhna-gá ñáyiú isràél ngúíta-xi ndohó-yu, te dàtnùní ngúíta-xi ndoho nchaa ñáyiú ñá túú cùu ñáyiú isràél. <sup>10</sup>Te nchaa ñáyiú ní quide váha, te Yá Ndiöxí cada-gá te ngúndecú-yu núú ío váha càa ndecu-gá, te cachí-gá sá ní quide váha-yu, te ío váha cuu iní-yu cundecú-yu. Te díhna-gá ñáyiú isràél ñáyiú ní quide váha duca<sup>n</sup> càda ñaha-gá xí-yu, te dàtnùní duca<sup>n</sup> càda ñaha-gá xii ñáyiú ñá túú cùu ñáyiú isràél ñáyiú ní quide váha.

<sup>11</sup>Te ñá túú quide cuendá-gá cuèi náí ñáyiú cùu-yu. <sup>12</sup>Te nchaa ñáyiú ndècu ndíhi nchaa tnúhu ní chídó tnùní ndíi Moisés, Yá Ndiöxí cada ndáá-gá cuéchi-yu nàcuáa càhá<sup>n</sup> nchaa tnúhu-á<sup>n</sup>. Te nchaa ñáyiú ñá túú ndècu ndíhi tnúhu ní chídó tnùní ndíi-á<sup>n</sup>, Yá Ndiöxí vá cáda ndáá-gá cuéchi-yu nàcuáa càhá<sup>n</sup> nchaa tnúhu-á<sup>n</sup>. Dico nchaa ñáyiú quide nándi sá cuèhé sá dúhá dàcuítíi cuíta nihnú-yu cuèi ndècu ndíhí-yu tnúhu ní chídó tnùní ndíi Moisés àdi ñá túú ndècu ndíhí-yu. <sup>13</sup>Te nchaa ñáyiú dicó-ni sàcúndedóho nchaa tnúhu ní cáhá<sup>n</sup> ndíi Moisés te ñá túú tní-yu, ñáyiú-á<sup>n</sup> ñà túú cùdítú-yu núú Yá Ndiöxí, dico nchaa ñáyiú tní nchaa tnúhu ní cáhá<sup>n</sup> ndíi, ñáyiú-á<sup>n</sup> càchí Yá Ndiöxí sá cùdítú-yu núú-gá, chi ñá túú-gá cuéchi-yu ndècu núú-gá. <sup>14</sup>Te nchaa ñáyiú ñá túú ndècu ndíhi tnúhu ní chídó tnùní ndíi Moisés, te núu quidé-yu nchaa nàcuáa ní cáhá<sup>n</sup> ndíi te cùu-xí ìí<sup>n</sup> sá sání tnàhí iní mèe-yu cadá-yu, te sá sání iní-yu-á<sup>n</sup> cúú-xí ìí<sup>n</sup> tnúhu váha sá sánú ichi ñaha xii-yu nàcuáa cada váha-yu cundecú-yu. <sup>15</sup>Te sá dúcá<sup>n</sup> quidé-yu xíá<sup>n</sup> cùtnùní sá sání iní-yu dàtná càhá<sup>n</sup> tnúhu ní chídó tnùní ndíi Moisés cada ñáyiú

isràél, te ío váha cùtnuní iní-yu nchaa nàcuáa quidé-yu chi ndixi túu iní-yu òrè ñá túú quide váha-yu. <sup>16</sup>Te sáá nduu te Yá Ndiöxí cùñaha-gá xii Xítohó Jesucristú cada ndáá-gá nchaa cuéchi ñáyiú, nchaa sá sání iní mèe-yu nduu yuhu, te cada-gá dàtná càhá<sup>n</sup> tnúhu sá sánú ichi ñaha xii-o nàcuáa naníhí tàhú-ó, tnúhu sá dánèhé ñàhà-í xii-ndo.

### **Cuendá ñáyiú isràél ndíhi cuendá nchaa tnúhu ní chídó tnùní ndíi Moisés**

<sup>17</sup>Te nchòhó ñáyiú isràél nchaa-ndo cùu-ndo ndi mee-í, te càchí-ndó sá nchìcú<sup>n</sup> nihnu-ndo quide-ndo nchaa tnúhu ní cáhá<sup>n</sup> ndíi Moisés núu xíá<sup>n</sup> ndécú vâha-ndo, te càchí-ndó sá ío càhnu cuu-ndo sá ndécú ndíhi-ndo Yá Ndiöxí. <sup>18</sup>Te cùtnuní iní-ndó nchàa nàcuáa cuíní Yá Ndiöxí cada-ndo, te sá dúcá<sup>n</sup> nchìcú<sup>n</sup> nihnu-ndo quide-ndo nàcuáa càhá<sup>n</sup> tnúhu-á<sup>n</sup> xíá<sup>n</sup> cùtnùní iní-ndó nchàa sá ío-gá váha xini ñuhu-xi cada-ndo. <sup>19</sup>Te càchí-ndó sá ío váha xini-ndó cànuichi-ndo nchaa ñáyiú ñá túú cùtnuní iní-xi, te càchí tucu-ndo sá ío váha xini-ndó nà canu ichi-ndo nchaa ñáyiú ndècu ichi cuèhé ichi duha. <sup>20</sup>Te sànu ichi-ndo nchaa ñáyiú ío ñi díquí-xi, ndíhi nchaa ñáyiú vitna ta tècú tnùní nchaa sá vâha, te duca<sup>n</sup> quide-ndo chi ndècu ndíhi-ndo nchaa tnúhu ní chídó tnùní ndíi Moisés, te tnúhu-á<sup>n</sup> cúú-xí tnúhu ndáá, chi sànu ichi ñaha-xi xii-ndo nàcuáa cada-ndo. <sup>21</sup>Te nchòhó dàcuaha-ndo ñáyiú nàcuáa cadá-yu, te mee-ndo ñà túú dàcuaha-ndo cada-ndo nchaa nàcuáa tàú-xi cunduu, te xâha<sup>n</sup>-ndo xii-yu sá vâ cúú dùhú-yu te mee-ndo dùhu-ndo. <sup>22</sup>Te dàcuaha-ndó-yu sá cuè téé vá cúú càhá<sup>n</sup> ndíhi-güedé ñáyiú dîhí te núu ñá díú ñàdîhí-güedé cúú-yu, te duca<sup>n</sup>-ni cuè ñáyiú dîhí, vá cúú càhá<sup>n</sup> ndíhí-yu téé te núu ñá díú yî-yu cùu-güedé. Te



nchaa sá xǎha<sup>n</sup>-ndo vǎ cúú càda ñáyiú te mee-ndo quide-ni-ndo, te xǎha<sup>n</sup>-ndo xií-yu sá vǎ cǎnèhé-yu sá yǎñùhu núú nchàa sá cǎchí-yu cùu ndiöxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu. <sup>23</sup> Te cǎchí-ndó sǎ ïo cùnuu nchaa tnúhu ní chídó tnùní ndíi Moisés, te ñá túú quide-ndo nchaa nacuáa ní cǎhá<sup>n</sup> ndíi, te sá dúcá<sup>n</sup> quide-ndo-á<sup>n</sup> te dàquee tǎhú-ndó Yǎ Ndiöxí. <sup>24</sup> Te quèe ndáá-xi nàcuáa cǎhá<sup>n</sup>-xi núú tütú Yǎ Ndiöxí nàcuáa quide-ndo-á<sup>n</sup> núú cǎchí-xi sá ncháá ñáyiú ñá túú cùu ñáyiú isràél cǎhá<sup>n</sup> cuèhé-yu cuèndá Yǎ Ndiöxí sá cuèndá-ndó.

<sup>25</sup> Te nchòhó ñáyiú isràél nchaa-ndo cùu-ndo ndi mee-í, te tnàhá-ndó ndècu ndihhi-ndo seña ñii-ndo, te váha-ni sá dúcá<sup>n</sup> te núu quide-ndo nchaa nacuáa ní cǎhá<sup>n</sup> ndíi Moisés. Dico núu ñá túú quide-ndo nchaa nacuáa ní cǎhá<sup>n</sup> ndíi ña, te ñá túú nàndíhi-xi sá cúú-ndó ñáyiú isràél cuèi ndècu seña ñii-ndo. <sup>26</sup> Te nchaa ñáyiú ñá túú ndècu ndihhi seña ñii-xi, te núu quidé-yu nchaa nàcuáa ní cǎhá<sup>n</sup> ndíi Moisés, te cùu-yu dàtná cue ñáyiú ndècu ndihhi seña ñii-xi, chi quidé-yu nchaa nàcuáa ní cǎhá<sup>n</sup> ndíi. <sup>27</sup> Te ñáyiú ñá túú ndècu ndihhi seña ñii-xi, te núu na càdá-yu nchaa nàcuáa ní cǎhá<sup>n</sup> ndíi Moisés, te ñáyiú-á<sup>n</sup> cachí-yu sá ña túú quide ndáá nchaa nchòhó ñáyiú ndècu ndihhi seña ñii-xi, chi ndècu ndihhi-ndo nchaa tnúhu ní chídó tnùní ndíi te ñá túú quide-ndo nacuáa cǎhá<sup>n</sup> tnúhu-á<sup>n</sup>. <sup>28</sup> Te nchòhó ñáyiú isràél, ñáyiú nchicú<sup>n</sup> nihnu-ni quide nchaa nacuáa ta quide tnahi-ndo véxi, ñá túú quide-ndo sá cúú-ndó ñáyiú isràél, te mee-ndo ndècu seña ñii-ndo dico ñá túú quide-ndo nacuáa tàú-xi cada nchaa ñáyiú ndècu seña ñii-xi, te mee-ni seña-á<sup>n</sup> sǎha-ndo ñii-ndo te ñá túú quide-ndo nacuáa cuiní Yǎ Ndiöxí cada-ndo. <sup>29</sup> Te nchaa ñáyiú sàndáá

ndisa iní-xi Yá Ndiöxí, ñáyiú-á<sup>n</sup> cúú ndisá-yu ñáyiú isràél, te sa ní nduu ndoo ní nduu nine iní-yu chi Espíritú Yǎ Ndiöxí duca<sup>n</sup> ñi quide-xi, dico ñá díú sá sǎha-yu seña ñii-yu dàtná ní cachí ndíi Moisés. Te ñáyiú-á<sup>n</sup> cúú váha iní ñáhá Yǎ Ndiöxí xií-yu cuèi ñá túú cǎhá<sup>n</sup> váha tnàha ñáyiú-yu cuèndá-yu.

**3** Te sá dúhá cǎhá<sup>n</sup>-í te ío dava ñáyiú quesàhá-yu sá íí<sup>n</sup>-ní cùu ñáyiú ñá túú cùu ñáyiú isràél ndihhi nchoo ñáyiú isràél, te quesaha tucú-yu sá íí<sup>n</sup>-ní quide tucu-xi cuèi na cuàha àdi vá cuàha seña ñii-yu. <sup>2</sup> Dico yúhú cǎchí-í sá ncháá ñáyiú isràél ío-gá cúnùú-yu, chi ío tit-ní núú sǎ váha ní quide ñaha Yǎ Ndiöxí xií-yu, chi ní sǎñaha-gǎ tnúhu-gǎ ndécú ndihhi-yu. <sup>3</sup> Te davá-yu ñá túú cuiní-yu cada ndáá-yu, dico ñá díú sǎ xǎ<sup>n</sup> te cùyica iní Yǎ Ndiöxí ñá túú quide ndáá-gǎ. <sup>4</sup> Dico ñáhá chi xini ñuhu-xi sá ncháá ñáyiú cada cuèndá-yu sá Yǎ Ndiöxí cúú-gǎ Yaá quidé ndáá cuiti, te cuèi ncháá-yu na cǎchí-yu sá ña túú quide ndáá-gǎ, dico mee-gǎ chi quide ndáá-ni-gǎ. Te núú tütú-gǎ cǎhá<sup>n</sup>-xi nàcuáa ní xáha<sup>n</sup> ñi<sup>n</sup> tée ní xindecu ndéé sanaha xii-gǎ, te duha ní xáha<sup>n</sup>-dè:

Yòhó Dútú Ndiöxí, cùtnuní iní ñáyiú sá ïo ndáá cǎhá<sup>n</sup>-n,  
te cùnuu nahi-ni tnúhu-n cuèi òré cǎchí ñáyiú sá ña túú cǎhá<sup>n</sup> ndáá-n.  
Duha ní xáha<sup>n</sup> tée ndéé sanaha-ǎ<sup>n</sup> xii-gǎ cǎchí-xi núú tütú-gǎ.

<sup>5</sup> Te cuèndá nchaa sá cuèhé sá dúhá quide ñáyiú, xǎ<sup>n</sup> cùtnuní iní-yu sá Yǎ Ndiöxí cúú-gǎ Yaá ío váha quide ndáá, chi mee-gǎ ñá túú dùca<sup>n</sup> quide-gǎ. Te cuèi duca<sup>n</sup> dico vá cǎní ìní-yu sá Yǎ Ndiöxí ñá túú quide ndáá-gǎ sá dándòho ñaha-gǎ xií-yu na sàà nduu, te núu duca<sup>n</sup> na cànì iní-yu, te sàni iní-yu dàtná sání ìní cue ñáyiú ñá túú ndècu ichi-gǎ. <sup>6</sup> Te vá dúcá<sup>n</sup> cànì iní-yu, chi núu Yá Ndiöxí ñá túú quide ndáá-gǎ ñá, te vá cúú càda

ndáá-gá nchaa cuéchi cue ñáyiú ñuyíú-a te núu duca<sup>n</sup>.

<sup>7</sup>Te núu yúhú ná càni iní-í cáhá<sup>n</sup>-í ì<sup>n</sup> tnúhu ndehnde, te sá tnúhu-á<sup>n</sup> te caní tucu iní-í sá quidé càhnu-gá-í tnúhu ndáá tnúhu Yá Ndiòxí, te sá dúcá<sup>n</sup> ná càhá<sup>n</sup>-í te caní tucu iní-í sá vǎ cǔú cǎhá<sup>n</sup> Yǎ Ndiòxí sá ndécú cuéchi-í. <sup>8</sup>Te núu na càni tucu iní-í sá vǎha-gá cada-í nchaa sá cuèhé sá dúhá cuèndá Yǎ Ndiòxí cada-gá sá vǎha, dico ñǎ ndáá. Te ío ñáyiú càhá<sup>n</sup> cuèhé cuèndá-í te càhí-yu sá díú-ní dùca<sup>n</sup> dacuaha-í ñáyiú dico ñǎ ndáá sá dúcá<sup>n</sup> dǎnehé-í-yu, te ñáyiú-á<sup>n</sup> nacháhu-yu tnúhu càhá<sup>n</sup>-yu, chí duca<sup>n</sup> tàú-xi cunduu.

### Nchaa ñáyiú ñuyíú-a ndècuéchi-yu

<sup>9</sup>Te vitna càhí dava ñáyiú sá ìo-gá cúnùu nchoo cue ñáyiú isràél dǎcúúxí dǎva-gá ñáyiú, dico yúhú càhí-í sá ñǎhá, te sa ní cachí tnúhu ndáá-í xii-ndo sǎ nchàa ñáyiú ndècuéchi-yu cuèi ñáyiú isràél te cuèi ñáyiú ñǎ túú cùu ñáyiú isràél. <sup>10</sup>Te núu tùtú Yǎ Ndiòxí càhí-xi: Vǎ yǎo ì<sup>n</sup> quide ndáá,

<sup>11</sup>te ni vǎ yǎo ì<sup>n</sup> tècú tnùnì tnúhu vǎha, te ni vǎ yǎo ì<sup>n</sup> nǎnducu nihnu Yá Ndiòxí.

<sup>12</sup>Chí nchaa-yu ñǎ túú nchicú<sup>n</sup> nihnú-yu ichi vǎha, te nchaa-yu cùú-yu ñáyiú xǐndecu neñùú sá cùú-xí Yǎ Ndiòxí.

Te ni ì<sup>n</sup>-yu ñǎ túú quidé-yu ì<sup>n</sup> sá vǎha.

<sup>13</sup>Te cada iní-ndó sǎ yúhú-yu cùu-xi datná cùú ì<sup>n</sup> yáú núu yǐndǔxi ndíyi núu ìo ndehe sǎhá<sup>n</sup>,

te duca<sup>n</sup> sǎtnahá-xi cùu yuhú-yu, chí ío càhá<sup>n</sup> cuèhé-yu, te mee-ni dǎndahú-yu nchaa tnàha ñáyiú-yu.

Te cada iní-ndó sǎ vènenú cóó yǐhí yúhú-yu chí mee-ni càhá<sup>n</sup> úhú-yu cuèndá tnàha ñáyiú-yu.

<sup>14</sup>Te ío iní-yu càhá<sup>n</sup> úhú tnǎhá-yu.

<sup>15</sup>Te àú<sup>n</sup> nǎ cuu àú<sup>n</sup> nǎ xǐá<sup>n</sup> xǐsahni tnàhá-yu.

<sup>16</sup>Te nchaa núu xícá cùú-yu quide úhú iní-yu nchaa tnàha ñáyiú-yu nàcuáa ndíhú iní ñáyiú-á<sup>n</sup>.

<sup>17</sup>Te ñǎ túú cuíní-yu cundecu ndíhi tnàha vǎha-yu.

<sup>18</sup>Te ñǎ túú sǎni iní-yu canehé-yu sá yǐñùhu núu Yǎ Ndiòxí.

Duha quidé-yu càhí-xi núu tùtú-gá.

<sup>19</sup>Te cùtnuní iní-ó sǎ nchàa tnúhu ní chídó tnùnì ndíi Moisés cùú-xí cuèndá nchaa ñáyiú nchicú<sup>n</sup> nihnu nchaa tnúhu-á<sup>n</sup>. Te tnúhu-á<sup>n</sup> cùú-xí cuèndá sá vǎ yǎo tnàhí cachí sá ñǎ túú cuéchi-xi, te duca<sup>n</sup> te nchaandi túhú ñáyiú cutnùnì iní-yu sá ná chǎhu-yu nchaa sá quidé-yu núu Yǎ Ndiòxí. <sup>20</sup>Te duca<sup>n</sup> càda-xi chí ni ì<sup>n</sup> ñáyiú vǎ càhí-ó sǎ vǎ cùndècu cuéchi-yu núu Yǎ Ndiòxí cuèndá-ni sá nchicú<sup>n</sup> nihnú-yu nchaa tnúhu sá ní chídó tnùnì ndíi Moisés, te tnúhu-á<sup>n</sup> càhí tnúhu-xi cuèndá-ni sá cùtnùnì iní-ó sǎ ndécú-ó ìchi cuèhé ichi duha.

### Te núu na quèndáá iní-ó Xítohó Jesucristú te naníhí tàhú-ó

<sup>21</sup>Te vitna ní cutnùnì iní-ó sǎ ñǎ díú sǎ cǎdá-ó nchàa nacuáa ní cáhá<sup>n</sup> ndíi Moisés cudúu-o núu Yǎ Ndiòxí, chí mee-gǎ quidé cùdúu-o núu-gǎ. Te núu tùtú ndíi Moisés ndíhi núu tùtú cue téé ní xóo cáhá<sup>n</sup> tnúhu Yá Ndiòxí ndéé sanaha càhá<sup>n</sup>-xi nàcuáa cada ñaha-gǎ xii-o vitna. <sup>22</sup>Te duca<sup>n</sup> cùdúu-o núu Yǎ Ndiòxí te núu na quèndáá iní-ó Xítohó Jesucristú. Te díu-ni duca<sup>n</sup> cùdúu nchaa ñáyiú ñuyíú te núu na quèndáá iní ñǎhá-yu xii-gǎ, chí ì<sup>n</sup>-ni cùu-o nchaa-o sá cùú-xí Yǎ Ndiòxí. <sup>23</sup>Chí nchaa-yu ndècu cuéchi-yu, chí ñǎ ì<sup>n</sup>-yu quidé-yu nàcuáa cáhá<sup>n</sup> Yǎ Ndiòxí sá cùú-yu ñáyiú quide vǎha. <sup>24</sup>Dico Yá Ndiòxí ío vǎha iní-gǎ chí ní quide ñaha-gǎ xii-o ì<sup>n</sup> sá vǎha, chí dicó-ni duca<sup>n</sup> ní quide-gǎ nàcuáa vǎ cùndècu-gǎ cuéchi-o nǔú-gǎ, chí Xítohó Jesucristú ní sati ñíí-gǎ te ní

xíhí-gá, te duca<sup>n</sup> ní yáha-gá cuèndá sá vǎ cùndècu-gá cuéchi-o. <sup>25</sup>Te Yá Ndiöxí ní taxi ndecu-gá Xítóhó Jesucristú núú ñáyiú ñuyíú-a, te ní xíhí-gá sá cuèndá nchaa yíca cuéchi-yu, te duca<sup>n</sup> ní cuu cuèndá sá ncháá ñáyiú na quìndáá iní ñáhá xii-gá te vǎ náchǎhu-yu cuéchi-yu núú Yá Ndiöxí. Te Yá Ndiöxí ní quide ndee iní-gá nchaa sá cuèhé sá dúhá ní quide cue ñáyiú ní xindecu ndéé sanaha. Te xǎ<sup>n</sup> ní xíhí Xítóhó Jesucristú cuèndá cutnùní iní-ó sǎ Yá Ndiöxí cúú-gǎ Yaá ío váha quide ndáá cuèi duca<sup>n</sup> ní quide ndee iní-gá nchaa sá ní quide cue ñáyiú-á<sup>n</sup>. <sup>26</sup>Núú xǎ<sup>n</sup> vitna ní cutnùní ndisa iní-ó sǎ quidé ndáá-gǎ, te quide-gǎ sá cuè ñáyiú vǎ cùndècu-gá cuéchi-yu núú-gǎ, te núú na quìndáá iní-yu Xítóhó Jesucristú.

<sup>27</sup>Te vitna vǎ càchí-ó sǎ ío càhnu cuu-o cuèndá sá ñà túú-gǎ cuéchi-o ndècu núú Yá Ndiöxí, te duca<sup>n</sup> ñà túú-gǎ cuéchi-o ndècu núú-gǎ cuèndá sá sàndáá iní-ó Xítóhó Jesucristú, te ñá dǎú sǎ cuèndá nchaa tnúhu ní cáhá<sup>n</sup> ndíi Moisés. <sup>28</sup>Te cùtnuní iní-ó sǎ ndéda-ni càa ñáyiú vǎ cùndècu-gá cuéchi-yu núú Yá Ndiöxí te núú na quìndáá iní-yu Xítóhó Jesucristú cuèi ní quidé-yu nchaa nàcuáa ní cáhá<sup>n</sup> ndíi Moisés àdi ñà túú ní quidé-yu.

<sup>29</sup>Te cùtnuní iní-ó sǎ Yá Ndiöxí cúú-gǎ Ndiöxí nchaandi túhú ñáyiú, te ñá dǎú mèe-ni Ndiöxí ñáyiú isràél cúú-gǎ. <sup>30</sup>Te ñ<sup>n</sup>dií dǎí-gǎ cúú-gǎ Ndiöxí, te nchaa ñáyiú sàndáá iní ñáhá xii Xítóhó Jesucristú te vǎ cùndècu-gá cuéchi-yu núú Yá Ndiöxí cuèi cùú-yu ñáyiú isràél àdi ñà túú cùú-yu. <sup>31</sup>Te ñá dǎú sǎ sàndáá iní-ó Xítóhó Jesucristú te cachí-ó sǎ ñà túú nàndǎhi nchaa tnúhu sá sánú ichi ñaha xii-o nacuáa cada-o, te ñáhá chi sá dúhá sàndáá iní-ó-gǎ te xǎ<sup>n</sup> nchicú<sup>n</sup> nihnu-o quide-o nacuáa càhá<sup>n</sup> tnúhu-á<sup>n</sup>.

### Cuèndá ndíi Àbrahám

**4** Te vitna na càchí tnúhu-í xii-ndo cuèndá ndíi Àbrahám téé ní cuu ñaní tnáhá-ó ní xindecu ndéé sanaha. <sup>2</sup>Te ndíi-á<sup>n</sup> ñà túú ní xindecu cuéchi ndíi núú Yá Ndiöxí, dico ñá dǎú cuèndá ñ<sup>n</sup> chiu<sup>n</sup> ní quide ndíi duca<sup>n</sup> ñà túú ní xindecu cuéchi ndíi núú-gǎ. Chi núú cuèndá ñ<sup>n</sup> chiu<sup>n</sup> ní quide ndíi duca<sup>n</sup> ñà túú ní xindecu cuéchi ndíi núú Yá Ndiöxí ñá, te cada càhnu ndíi mee ndíi ni cùu, dico ñá dǎú núú Yá Ndiöxí cada càhnu ndíi mee ndíi te núú duca<sup>n</sup> ní quide ndíi. <sup>3</sup>Te chí dándàcu iní nàcuáa càhá<sup>n</sup>-xi núú tütú Yá Ndiöxí núú càchí-xi: “Té Àbrahám ní sàndáá iní-dé Yá Ndiöxí, te xǎ<sup>n</sup> ní cachí-gǎ sǎ cúú-dé núú-gǎ”, duha càchí-xi núú tütú-gǎ. <sup>4</sup>Te sǎ cúhú<sup>n</sup> yǎhu ñ<sup>n</sup> téé quide chiu<sup>n</sup>, te vǎ càchí-ó sǎ xǎ<sup>n</sup> cúú-xi ñ<sup>n</sup> táhú sǎ cúú-xi-dé chi yáhu tnàhí-dé cúú-xi. <sup>5</sup>Te vǎ yóo ñ<sup>n</sup> ndàcu cada ñ<sup>n</sup> chiu<sup>n</sup> nacuáa cudú-xi núú Yá Ndiöxí. Te ñá túú nǎ chiu<sup>n</sup> xini ñuhu-xi cada ñáyiú te cudú-yu núú-gǎ, chi xini ñuhu-ni-xi sǎ quìndáá-ni iní-yu-gǎ. Te diu-gǎ càchí-gǎ sǎ ñáyiú ndècu ichi cuehé ichi duha vǎ cùndècu-gá cuéchi-yu núú-gǎ, te núú na quìndáá iní ñáhǎ-yu xii-gǎ. <sup>6</sup>Te diu-ni duca<sup>n</sup> ní cáhá<sup>n</sup> ndíi Dàvíí, chi ní cachí ndíi sǎ ío váha táhú nchaa ñáyiú ní cachí Yá Ndiöxí cudú núú-gǎ, dico ñá dǎú cuèndá ñ<sup>n</sup> chiu<sup>n</sup> quidé-yu cudú-yu núú-gǎ. <sup>7</sup>Te duha ní cachí ndíi:

Váha táhú nchaa ñáyiú quide cahnu iní Yá Ndiöxí nchaa cuéchi-xi, te ñà túú-gǎ quidé cuèndá-gǎ nchaa sǎ cuèhé sǎ dúhá ní quidé-yu.

<sup>8</sup>Váha táhú-yu chi Yá Ndiöxí càchí-gǎ sǎ ñà túú-gǎ cuéchi-yu.

Duha ní cachí ndíi Dàvíí.

<sup>9</sup>Te ñá dǎú mèe-ni ñáyiú ngúndecu sèná ñii-xi duca<sup>n</sup> vǎha táhú-yu, chi tnáhá ñáyiú ñà túú ngúndecu sèná ñii-xi duca<sup>n</sup> vǎha táhú-yu. Te sa nàha-o sǎ

Yá Ndiöxí ní cachí-gá sá cùdù ndíi Àbrahám núú-gã cuendá sá ni sándáá iní ñáhá ndíi xii-gá. <sup>10</sup>Te cunaha-ndo sã dîhna-gá ní cachí Yá Ndiöxí sá cùdù ndíi Àbrahám núú-gã te dàtnùnì ngúndecu sèñá ñii ndíi. <sup>11</sup>Te ní ngúndecu sèñá ñii ndíi cuendá xíã<sup>n</sup> cuu-xi ìi<sup>n</sup> sèñá sá cùdù ndíi núú Yá Ndiöxí. Te ndéé cùtnàhá vátá ngúndecu-gá sèñá ñii ndíi, te sa cùdù ndíi núú-gã chi ní sándáá iní ñáhá ndíi xii-gá. Te sá dúcá<sup>n</sup> ñà túú ndècu sèñá ñii ndíi cùtnàhá ní sándáá iní ndíi Yá Ndiöxí xíã<sup>n</sup> ní cuu ndíi dàtná ìi<sup>n</sup> dîhí dütú nchaa ñáyiu sándáá iní ñáhá xii-gá, ñáyiu ñá túú ní ngúndecu sèñá ñii-xi, te cùdiú-yu núú-gã. <sup>12</sup>Te ndíi Àbrahám ní cuu tucu ndíi dàtná ìi<sup>n</sup> dîhí dütú nchaa ñáyiu ní ngúndecu sèñá ñii-xi, dico ñá dífú cuendá-ni sá ní ngúndecu sèñá ñii-yu cùu ndíi dîhí dütú-yu, chi cuendá sá sándáá iní-yu Yá Ndiöxí nchìcú<sup>n</sup> nihnú-yu nàcuáa ní quide ndíi ní sándáá iní ñáhá ndíi xii-gá ndéé cùtnàhá vátá ngúndecu-gá sèñá ñii ndíi.

**Yá Ndiöxí cada-gá nchaa nàcuáa ní cachí-gá te núu na quindáá iní-ó-gã**

<sup>13</sup>Te Yá Ndiöxí ní xáha<sup>n</sup>-gã xii ndíi Àbrahám sá ndúú tãhú ndíi cunuu ndíi ñuyú, ndíi cue déhe ndíi, ndíi nchaa ðava-gá cue ñaní tnáhá ndíi vitna cacu túu. Te duca<sup>n</sup> ní xáha<sup>n</sup> Yá Ndiöxí xii ndíi ndíi cue ñaní tnáhá ndíi, chi ní sándáá iní ñáhá ndíi xii-gá ñuu xíã<sup>n</sup> ní cudù ndíi núú-gã. Te duca<sup>n</sup> ní xáha<sup>n</sup>-gã xii ndíi dico ñá dífú cuendá sá ní quide ndíi nàcuáa ní xáha<sup>n</sup> Yá Ndiöxí xii ndíi Moisés cada ñáyiu ndéé cuèè-gá. <sup>14</sup>Te núu mee-ni ñáyiu nchìcú<sup>n</sup> nihnu quide nacuáa ní cáhá<sup>n</sup> ndíi Moisés ní ndùu tãhù-yu cunùú-yu ñuyú-a ni cùu ña, te ñá túú xini ñuhu-xi quindáá iní-ó Yá Ndiöxí, te ñá túú nàndîhi tnúhu ní xáha<sup>n</sup> Yá Ndiöxí xii ndíi Àbrahám ní cùu te núu duca<sup>n</sup>. <sup>15</sup>Te núu ìi<sup>n</sup> ñáyiu ñá túú quide nacuáa càhá<sup>n</sup> tnúhu sá sánú ìchi

ñaha xii-o nacuáa cada-o te nacháhu-yu sá dúcá<sup>n</sup> quidé-yu. Te núu ñá túú tnúhu sá sánú ìchi ñaha-xi xii-o nacuáa cada-o ni cùu ña, te ñá túú cuèchi-o ni cùu.

<sup>16</sup>Te duca<sup>n</sup> ní xáha<sup>n</sup> Yá Ndiöxí xii ndíi Àbrahám nàcuáa cada-gá, chi cuendá sá ni sándáá iní ñáhá ndíi xii-gá. Te duca<sup>n</sup> ní quide-gá chi ío váha iní-gá, dico ñá dífú sá ìi<sup>n</sup> chiu<sup>n</sup> ni quide ndíi duca<sup>n</sup> ní xáha<sup>n</sup>-gã. Te sá dúcá<sup>n</sup> ní cuu te cùu-xi ìi<sup>n</sup> tnúhu ndáá sá cùú-xí nchaa ñaní tnáhá ndíi, ñáyiu sándáá iní ñáhá xii-gá dàtná ní sándáá iní ñáhá mèe ndíi xii-gá, te ñá dífú mèe-ni cuendá nchaa ñaní tnáhá ndíi nchìcú<sup>n</sup> nihnu nchaa nàcuáa ní cáhá<sup>n</sup> ndíi Moisés, chi ndíi Àbrahám-á<sup>n</sup> ní cuu ndíi dàtná ìi<sup>n</sup> dîhí dütú cue ñáyiu sándáá iní ñáhá xii Yá Ndiöxí. <sup>17</sup>Te núu tütú Yá Ndiöxí càhá<sup>n</sup>-xi nàcuáa ní xáha<sup>n</sup>-gã xii ndíi, te duha ní xáha<sup>n</sup>-gã: “Yòhó té Àbrahám ní quide ñaha-í xii-n dàtná ìi<sup>n</sup> dîhí dütú cue ñáyiu xíndecu nihí ñuyú.” Duha ní xáha<sup>n</sup> Yá Ndiöxí xii ndíi, càchí-xi núu tütú-gá. Te Yá Ndiöxí náhá ndáá-gá sá cadá-xí nàcuáa ní xáha<sup>n</sup>-gã xii ndíi Àbrahám, te ðiu-ni-gá cùú Yáá ní sándáá iní ndíi, te ðiu-ni-gá dándòto-gá ñáyiu ní xíhí, te ðiu-ni-gá quidé tá ngúndecu nchaa sá vátá cùndècu-gá ñuyú-a.

<sup>18</sup>Te Yá Ndiöxí ní xáha<sup>n</sup>-gã xii ndíi Àbrahám sá ío cuéhé ðèhe ndíi coo, te ío ní sándáá iní ndíi nàcuáa ní xáha<sup>n</sup>-gã dico ñá túú ní cùtnuní iní ndíi nása cada-gá, chi ío ní sahnu ndíi. Te cuendá sá dúcá<sup>n</sup> ío ní sándáá iní ndíi tnúhu ní xáha<sup>n</sup>-gã ñuu xíã<sup>n</sup> ní cuu ndíi dîhí dütú vài ñáyiu xíndecu nihí ñuyú. <sup>19</sup>Te ndíi Àbrahám ñuhu ndíi ìi<sup>n</sup> cièndú cuíá cùtnàhá duca<sup>n</sup> ní xáha<sup>n</sup> Yá Ndiöxí xii ndíi, te ní cutnùnì iní ndíi sá ñà túú tãhú ndíi sá cóó ðèhe ndíi ndíi ñadîhí ndíi ndíi Sãrá, chi ndí ndúú-yu sa ní sahnu vîhí-yu, te cuèi duca<sup>n</sup> dico ní sándáá-ni iní ndíi nàcuáa ní xáha<sup>n</sup> Yá Ndiöxí. <sup>20</sup>Te ñá túú ní sàni ìi<sup>n</sup> sani úú iní ndíi nàcuáa ní xáha<sup>n</sup> Yá Ndiöxí cada-gá sá cùú-xí

ndii, chi da uu<sup>n</sup>-gá váha ní sándáá iní ndíi nàcuáa ní xáha<sup>n</sup>-gá, te ní cachí ndíi sá ïo càhnu cuu-gá. <sup>21</sup> Te ní cutnùnì ndáá iní ndíi sá Yá Ndiöxí ndácú-gá quidé-gá nchaa sá càhá<sup>n</sup>-gá. <sup>22</sup> Te sá ni sándáá iní ndíi nàcuáa ní cáhá<sup>n</sup> Yá Ndiöxí, núu xíá<sup>n</sup> ní cachí-gá sá cúú ndíi ïí<sup>n</sup> téé ñá túú cuèchi-xi núú-gá.

<sup>23</sup> Te ní ngódó tñuní núú tütú Yá Ndiöxí cuendá ndíi Àbrahám sá ní cachí-gá sá ñà túú cuèchi ndíi núú-gá, te ñá díú-ní cuendá méé ndíi ni ngódó tñuní núú tütú-gá. <sup>24</sup> Chi tñàhá cuendá-ó nchàa-o ní ngódó tñuní núú tütú-gá. Te càchí-gá sá ñà túú cuèchi-o núú-gá chi sándáá iní-ó-gá, te ñu-gá cúú-gá Yaa ní dándótó ñàha xii Xítohó Jesucristú Yaa cúú Xítohó-ó. <sup>25</sup> Te Yá Ndiöxí ní cachí-gá sá díú Xítohó Jesucristú cuú-gá cuendá nacháhu-gá nchaa cuèchi-o. Te ní xíhí-gá te ní ndoto-gá cuendá nchaa-o vǎ cùndècu-gá cuèchi-o núú Yá Ndiöxí te núu na quèndáá iní-ó-gá.

### Ío váha tñàhá ñáyiu càchí Yá Ndiöxí sá ñà túú cuèchi-xi

**5** Te vitna, ñá túú-gá cuèchi-o ndècu núú Yá Ndiöxí chi sándáá iní-ó Xítohó Jesucristú, te ío váha ndècu ndíhi-o Yá Ndiöxí vitna sá cuendá Xítohó Jesucristú. <sup>2</sup> Te cuendá sá ni sándáá iní-ó Xítohó Jesucristú xíá<sup>n</sup> ñu-gá ní quide ní ngúndecu váha-o núú Yá Ndiöxí, te duca<sup>n</sup>-ni cùndecu-o, te ío cùdíf iní-ó chi ndècu ndíhi-o tñúhu ndee iní sá sáá nduu ngúndecu-o núú ïo váha càa ndecu Yá Ndiöxí. <sup>3</sup> Te ñá díú-ní sá cuendá sá ndúú tǎhú-ó cùndecu-o núú ndécú-gá cùdíf iní-ó, chi cùdíf iní-ó ndòho-o cuendá-gá, chi cùtnuní iní-ó sá ñuu na ndòho-o cuendá-gá te cunduu càhnu-gá iní-ó, <sup>4</sup> te núu cùu-o ñáyiu ta quide cahnu-gá iní-xi te cùtnuní sá cúú-ó ñáyiu quide váha, te núu cùu-o ñáyiu quide váha te uu<sup>n</sup>-gá tá ngúndecu ndíhi-o tñúhu ndee iní cuáhá<sup>n</sup> sá cádá váha ñàha Yá Ndiöxí xii-o. <sup>5</sup> Te

núu duca<sup>n</sup> te vá íí<sup>n</sup> ndùu ndixi cuéchi iní-ó sá ndécú ndíhi-o tñúhu ndee iní ngúndecu váha-o. Te Espíritú sá ní taxi Yá Ndiöxí ndécú ndíhi-o xíá<sup>n</sup> quidé-xi cùtnuní iní-ó sá ïo cùu iní ñàhá Yá Ndiöxí xii-o.

<sup>6</sup> Te nchoo ñà túú vèdana ná ní ndàcu-o cada-o cuendá dàcácu nihnu-o mèe-o, dico Xítohó Jesucristú ní xíhí-gá cuendá-ó, ndíhi cuendá nchaa ñáyiu ñá túú tñàhá tñúhu ndíhi Yá Ndiöxí, te ní xíhí-gá mei ndùu taú-xi cúú-gá. <sup>7</sup> Te cudana-ni núu xíhí ïí<sup>n</sup> ñáyiu sá cuendá ïí<sup>n</sup> ñáyiu quide ndáá, te áma xíhí tucu ïí<sup>n</sup>-yu sá cuendá ñáyiu quide váha tñàha ñáyiu-xi. <sup>8</sup> Te Yá Ndiöxí ní quide-gá sá nchóo cùtnuní iní-ó sá ïo cùu iní ñàhá-gá xii-o, chi cùtnàhá ndécú-ó ìchi cuehé ichi duha te ní tendaha-gá Xítohó Jesucristú ní quixi-gá ñuyú-a ní xíhí-gá cuendá-ó. <sup>9</sup> Te sá cuendá sá ní xíhí Xítohó Jesucristú xíá<sup>n</sup> ñá túú-gá cuèchi-o ndècu núú Yá Ndiöxí, te vitna ní cutnùnì ndáá iní-ó sá vǎ dáquihí<sup>n</sup> ñàhá-gá Yá Ndiöxí xii-o núú ùhú núú ndàhú sá cuendá Xítohó Jesucristú. <sup>10</sup> Te cùtnàhá ñá túú tñàhá tñúhu-o ndíhi Yá Ndiöxí ní cùu ní xíhí Xítohó Jesucristú Yaa cúú Dèhe-gá cuendá cuu váha iní ñàhá-gá xii-o, te duca<sup>n</sup> te nduu tǎhú-ó cùndecu-o ndíhi-gá ni caa ni quíhí<sup>n</sup> cuendá sá ní ndoto Xítohó Jesucristú. <sup>11</sup> Te ndètu-o sáá nduu ngúndecu-o ndíhi-gá ni caa ni quíhí<sup>n</sup>, te ñá díú-ní xíá<sup>n</sup> quidé-ó chi tñàhá cùdíf iní-ó Yá Ndiöxí, chi Xítohó Jesucristú ní quide-gá duca<sup>n</sup> cùdíf iní-ó-gá, te ñu-ni Xítohó Jesucristú ní quide-gá ní nucúndecu váha-o ndíhi Yá Ndiöxí.

### Nàcuáa ní quide ndíi Àdán ndíhi nàcuáa ní quide Xítohó Jesucristú

<sup>12</sup> Te ndíi Àdán ñá túú ní quide ndáá ndíi núú Yá Ndiöxí ñuu xíá<sup>n</sup> ní ngúndecu nchaa sá cuehé sá dúhá ñuyú-a, te sá cuendá nchaa sá cuehé sá dúhá

quide ñáyiú xíǎ<sup>n</sup> xihí-yu, te nchaá-yu xihí-yu chi nchaá-yu quidé-yu nchaá sá cuèhé sá dúhá. <sup>13</sup>Te sa quide-gá-yu nchaá sá cuèhé sá dúhá te dǎtnùní ní ngúndecu nchaá tnúhu sá ní chídó tnùní ndíi Moisés nàcuáa ní xáha<sup>n</sup> Yǎ Ndiöxí cada ñáyiú, te nchoo cùtnuní iní-ó sǎ núu ñá túú tnúhu sá sánú ichi ñaha xii-o nacuáa cada-o, te ñá túú cuèchi-o sǎnuu. <sup>14</sup>Te ndéé cùtnàhá ní xíndecu ndíi Àdán ní quesaha-xi xihí ñáyiú, te duca<sup>n</sup>-ni xihí-yu ndéé ní sǎá nduu ní xíndecu ndíi Moisés. Te duca<sup>n</sup> ní xihí-yu chi ní quidé-yu nchaá sá cuèhé sá dúhá cuèi ñá túú ní quidé-yu nàcuáa ní quide ndíi Àdán, chi ndíi-á<sup>n</sup> ñà túú ní sàndáá iní ndíi nàcuáa ní xáha<sup>n</sup> Yǎ Ndiöxí cada ndíi. Te ndíi Àdán ní cuu ndíi ì<sup>n</sup> téé cùu cahnu ní xíndecu ñuyúú-a, te sǎtá dúcá<sup>n</sup> te ní quixi Xítohó Jesucristú te Yaa-á<sup>n</sup> ño-gá cǎhnu cuu-gá.

<sup>15</sup>Te sá ní quide ndíi Àdán te vá cǎchí-ó sǎ ì<sup>n</sup>-ní cùu-xi ndíhi sá ní cachí Yǎ Ndiöxí nduu táhú-ó vǐtna. Te sá ñà túú ní quide ndáá ndíi xíǎ<sup>n</sup> nchaá ñáyiú xihí-yu, dico Yǎ Ndiöxí ío váha iní-gá chí ío váha ní quide-gá sá cúu-xí nchàa nchoo ñáyiú ndècu ñuyúú-a, chí dicó duca<sup>n</sup> ní cachí-gá sá nánihí tàhú-ó, te ì<sup>n</sup>dii-ni téé tnàhá-dé ío váha ní quide-dé sá cúu-xí-ó, te téé-á<sup>n</sup> cúu-dě Xítohó Jesucristú. <sup>16</sup>Te sá ní quide ì<sup>n</sup>dii-ni ndíi Àdán ñá túú ì<sup>n</sup>-ni cuu-xi ndíhi sá ní quide Yǎ Ndiöxí sá cúu-xí-ó, chí ndíi-á<sup>n</sup> ñà túú ní quide ndáá ndíi núu-gǎ. Te sá dúcá<sup>n</sup> ní quide ndíi te xíǎ<sup>n</sup> ní cuu-xi cuéchi díhna nuu ní quide ndíi, núu xíǎ<sup>n</sup> ní cachí Yǎ Ndiöxí sá cuè ñáyiú quíhí<sup>n</sup>-yu núu ùhú núu ndàhú nacháhu-yu nchaá sá cuèhé sá dúhá quidé-yu. Dico mee-gǎ ní quide sá cuè ñáyiú nanhí tàhú-yu dicó-ni duca<sup>n</sup>, te duca<sup>n</sup> te vá cùndècu-gá cuéchi-yu núu-gǎ cuèi ío vǎi cuéchi-yu. <sup>17</sup>Te sá dúcá<sup>n</sup> ñà túú ní quide ndáá ì<sup>n</sup>dii-ni ndíi Àdán-á<sup>n</sup> núú Yǎ Ndiöxí, xíǎ<sup>n</sup> ní quide-xi xihí nchaá ñáyiú. Te

sá cuèndá sá ní quide ì<sup>n</sup>dii-ni Xítohó Jesucristú xíǎ<sup>n</sup> ío váha ní quide ñaha Yǎ Ndiöxí xii ñáyiú, chí dicó-ni duca<sup>n</sup> ní nduu táhú-yu cùdíu-yu núu-gǎ. Te nchaá ñáyiú duca<sup>n</sup> cùdíu núu-gǎ nduu táhú-yu cunúu-yu ndíhi Xítohó Jesucristú cuèndá sá ní quide-gá sá váha sá cúu-xí-yu.

<sup>18</sup>Te sá dúcá<sup>n</sup> ní quide ndíi Àdán ñá túú ní quide ndíi nàcuáa ní xáha<sup>n</sup> Yǎ Ndiöxí xii ndíi ì<sup>n</sup> xito, núu xíǎ<sup>n</sup> ní cachí-gá sá nchǎá ñáyiú tàú-yu nacháhu-yu nchaá cuéchi-yu, dico Xítohó Jesucristú ní quide-gá ì<sup>n</sup> sá váha cuèndá nchaá ñáyiú vá cùndècu-gá cuéchi-yu núu Yǎ Ndiöxí te núu na quíndáá iní ñáhǎ-yu xii-gǎ, te duca<sup>n</sup> te cundecú-yu ndíhi-gá ní caa ní quíhí<sup>n</sup>. <sup>19</sup>Te sá ñà túú ní sàndáá iní ì<sup>n</sup>dii-ni ndíi Àdán nàcuáa ní xáha<sup>n</sup> Yǎ Ndiöxí xii ndíi, xíǎ<sup>n</sup> ní nguínchicú<sup>n</sup> nihnu nchaá ñáyiú quidé-yu nchaá sá cuèhé sá dúhá. Te duca<sup>n</sup> ì<sup>n</sup>dii-ni Xítohó Jesucristú ní quide-gá nàcuáa ní xáha<sup>n</sup> Yǎ Ndiöxí cuèndá sá Yǎ Ndiöxí cachí-gá sá cúdíu-yu núu-gǎ.

<sup>20</sup>Te Yǎ Ndiöxí ní xáha<sup>n</sup>-gǎ xii ndíi Moisés nàcuáa cada ñáyiú, te sá cuèndá tnúhu-á<sup>n</sup> uu<sup>n</sup>-gǎ ní nguíta nchaá ñáyiú quidé-yu nchaá sá cuèhé sá dúhá, te Yǎ Ndiöxí uu<sup>n</sup>-gǎ cùndàhú iní ñáhǎ-gǎ xíí-yu tucu. <sup>21</sup>Te sá cuèndá nchaá cuéchi ñáyiú xíǎ<sup>n</sup> xihí-yu, dico Yǎ Ndiöxí ío váha iní-gá chí díu-gá ní cachí-gá sá nchǎá ñáyiú na tnàhá tnúhu ndíhi ñaha xii-gǎ cudúu-yu núu-gǎ, te cundecú-yu ndíhi-gá ní caa ní quíhí<sup>n</sup>, te duca<sup>n</sup> chí Xítohó Jesucristú ní quide-gá sá váha sá cúu-xí-yu.

**Ñáyiú ñá túú-gǎ ndécú ichi  
cuèhé ichi duha ndècu-yu  
cuèndá Xítohó Jesucristú**

**6** Te sá dúcá<sup>n</sup> quide Yǎ Ndiöxí, te vá cǎní iní-ó cǎnchicú<sup>n</sup> nihnu-ni-o ichi cuèhé ichi duha, chí ñá díú sǎ cǎnchícú<sup>n</sup>

nihnu-o ìchi-á<sup>n</sup> te ngóo càni iní-ó sǎ ïo-gá cundàhú iní ñáhá-gǎ xii-o. <sup>2</sup>Te vá cúú cànchicú<sup>n</sup> nihnu-o ìchi cuehé ichi duha, chi nchoo cùu-o datná cue ñáyiú sa ní xíhí, núu xǎ<sup>n</sup> vá cúú-gǎ canchicú<sup>n</sup> nihnu-o ìchi-á<sup>n</sup>. <sup>3</sup>Te sa nàha-o sǎ cuèndá sǎ ní sandute-o quèe-xi sǎ tnàhá tnúhu-o ndìhi Xítohó Jesucristú. Te sǎ ní sandute-o quèe tucu-xi sǎ cúú-ó dàtná ñáyiú ní xíhí ndìhi-gǎ. <sup>4</sup>Te ñá díú-ní sǎ ní xíhí-ó ndìhi-gǎ chi quèe tucu-xi sǎ ní nguúndüxi-o ndìhi-gǎ te ní ndoto-o dàtná ní ndoto mee-gǎ ní dándótó ñàha Dútú Ndiöxí Yaa ío càhnu cuu, te duca<sup>n</sup> ní cuu cuèndá sǎ vá cùndècu-gǎ-ó dàtná ní xíndecu-o.

<sup>5</sup>Te núu ì<sup>n</sup>-ni cùu-o ndìhi Xítohó Jesucristú cuèndá sǎ cúú-ó dàtná ñáyiú ní xíhí ndìhi-gǎ, te ndáá sǎ cúú-ó dàtná ñáyiú ní ndoto ní nguúndecu váha dàtná ní ndoto mee-gǎ ní nucúndecu váha-gǎ. <sup>6</sup>Te nchoo nàha-o sǎ cúú-ó ñáyiú ío ndècu cuéchi-xi ni cùu, dico sátá ní cuu-o dàtná ñáyiú ní xíhí dàtná ní xíhí Xítohó Jesucristú núu cùrúxí, te ndéé dāvá-á<sup>n</sup> ní dáñá-ó nchàa ichi cuehé ichi duha ndècu-o ní cuu, te ñá túú-gǎ cúnùu sǎ cuèhé sǎ dúhá iní-ó. <sup>7</sup>Chi nchaa ñáyiú ní xíhí ñá túú-gǎ ndécú-yu ichi cuehé ichi duha. <sup>8</sup>Te núu cùu-o datná ñáyiú ní xíhí dàtná ní xíhí Xítohó Jesucristú ñá, te cùtnuní ndáá iní-ó sǎ cùndècu-o ndìhi-gǎ ní caa ní quíhí<sup>n</sup>. <sup>9</sup>Te sa nàha-o sǎ Xítohó Jesucristú ní xíhí-gǎ te ní ndoto-gǎ te vá ì<sup>n</sup> ndùu ì<sup>n</sup> quíú-gǎ te cuú-gǎ, chi ñá túú nǎgá sǎ cáda cùú-gǎ. <sup>10</sup>Te Xítohó Jesucristú ní xíhí-gǎ ì<sup>n</sup> xito-ni sǎ cuèndá nchaa cuéchi nchoo ñáyiú ñuyíú, te vá ì<sup>n</sup> ndùu-gǎ cuú-gǎ, te ndècu-ni-gǎ sǎ cúú-xí Yá Ndiöxí. <sup>11</sup>Núu xǎ<sup>n</sup> nchòhó cada iní-ndó sǎ dàtná sǎ ní xíhí-ndó vá cùndècu-gǎ-ndó sǎ cúú-xí ichi cuehé ichi duha, chi ndècu-ná-ndó sǎ cúú-xí Yá Ndiöxí, chi ní tnahá tnúhu-ndo ndìhi Xítohó Jesucristú Yaa cúú Xítohó-ó.

<sup>12</sup>Te núu xǎ<sup>n</sup> vá dáñá-gǎ-ndó cúnùu ni ì<sup>n</sup> sǎ cuèhé sǎ dúhá iní-ndó cuèndá sǎ vá cáda-gǎ-ndó ní ì<sup>n</sup> sǎ cuèhé sǎ dúhá sàni iní-ndó. <sup>13</sup>Te vá dáñá-ndó tàxi tnuní ñáhá ní ì<sup>n</sup> sǎ cuèhé sǎ dúhá-á<sup>n</sup> xii-ndo cuèndá sǎ vá cáda-gǎ-ndó, te chí dáñá ná tàxi tnuní ñáhá Yá Ndiöxí xii-ndo, te chí dáñá ná chindee ñaha-gǎ cada-ndo mée-ni sǎ vǎha, te duca<sup>n</sup> te cada iní-ndó sǎ cúú-ndó dàtná ñáyiú ní xíhí te ní ndoto ndècu. <sup>14</sup>Te duca<sup>n</sup> cada-ndo chi vá ndácú-gǎ ní ì<sup>n</sup> sǎ cuèhé sǎ dúhá tàxi tnuní ñáhá-xí xii-ndo, chi Yá Ndiöxí cùndàhú iní ñáhá-gǎ chíndèe ñaha-gǎ xii-ndo. Te duca<sup>n</sup> chi ñá túú-gǎ cúnùu nchaa tnúhu sǎ ní chídó tnuní ndí Moisés cada ñáyiú.

### Ñáyiú nchicú<sup>n</sup> nihnu sǎ vǎha

<sup>15</sup>Te ñá díú sǎ cùndàhú iní ñáhá Yá Ndiöxí xii-o chindee ñaha-gǎ ndìhi sǎ ñà túú-gǎ cúnùu nchaa tnúhu ní chídó tnuní ndí Moisés, te cachí-ó sǎ cúú-ní cùndecu-o ichi cuehé ichi duha. <sup>16</sup>Te nchoo xìní-ó sǎ nùu na cuǎha-o tnúhu cunu cuechi-o núú ì<sup>n</sup> ñáyiú cuíní cunu cuechi-o núú-xi, te cùu-ná-ó ñáyiú xìnu cuechi núú-yu te quíde-o nchaa chiu<sup>n</sup> tahú-yu. Te duca<sup>n</sup> sǎtnahá-xi cùu nchaa ñáyiú quíde nchaa sǎ cuèhé sǎ dúhá chi tàxi tnuní ñáhá-nǎ-xi xí-yu, te ñu nchaa xǎ<sup>n</sup> dácuíta nihnu ñaha-xi xí-yu, te ñu-ni duca<sup>n</sup> sǎtnahá-xi cùu nchaa ñáyiú sàndáá iní ñáhá xii Yá Ndiöxí chi tàxi tnuní ñáhá-gǎ xí-yu, te quíde-yu nchaa sǎ vǎha nàcuáa cuíní mée-gǎ cáda-yu. <sup>17</sup>Te nchòhó duca<sup>n</sup> ní xóo cada-ndo nchàa sǎ cuèhé sǎ dúhá ní cùu, dico táxǎhu xii Yá Ndiöxí chi vitna ní yùhu ní iní-ndó quíde-ndo nchaa nacuáa càhá<sup>n</sup> tnúhu-gǎ sǎ ní nguúndecu ndìhi-ndo. <sup>18</sup>Te vitna ñá túú-gǎ táxi tnuní ñáhá ní ì<sup>n</sup> sǎ cuèhé sǎ dúhá xii-ndo, te quíde-ná-ndó nchàa sǎ vǎha tàuchiu<sup>n</sup> Yá Ndiöxí cada-ndo. <sup>19</sup>Te duha càhá<sup>n</sup>-í cuèndá cue ñáyiú xìnu cuechi cuèndá

sá nchòhó tecú tñuní-ndó nàcuáa ndùu tñúhu càhá<sup>n</sup>-í. Te nchòhó ní dǎná-ndó ní taxi tñuní ñáhá nchàa sá cuèhé sá dúhá xii-ndo, te ñá túú ní quide-ndo nacuáa ní càhá<sup>n</sup> Yá Ndiòxí cada-ndo chi da vihi-gá ní quide-ndo, te diu-ni duca<sup>n</sup> chí dǎná ná tàxi tñuní ñáhá Yá Ndiòxí xii-ndo vitna cuendá cada-ndo mèe-ni sá vǎha nàcuáa cuiní mèé-gǎ cada-ndo, te duca<sup>n</sup> te cuu-ndo ñáyiú quide ndáá cundecu núú-gǎ.

<sup>20</sup> Te nchoo cǔtnàhá ní xóo cada-o nchàa sá cuèhé sá dúhá ñà túú ní xóo cada-o nì ì<sup>n</sup> sá vǎha cuiní Yá Ndiòxí cada-o. <sup>21</sup> Te dicó sácá<sup>n</sup>núú sǎñaha nchàa sá cuèhé sá dúhá-ǎ<sup>n</sup> te núu na càda-o, te ni ì<sup>n</sup> sá vǎha vá nihí-ó te núu na càda-o nchaa xíǎ<sup>n</sup>, te diu nchaa xíǎ<sup>n</sup> dácũita nihnu ñaha-xi xii-o. <sup>22</sup> Te vitna ñá túú-gǎ cúú-ó ñáyiú ndècu ichi cuehé ichi duha, chi cùu-ná-ó ñáyiú quide nchaa nacuáa càhá<sup>n</sup> Yá Ndiòxí. Te sá dúhá quide-o cuu ndisa-xi ì<sup>n</sup> sá vǎha sá cúú-xí-ó, te cùu-o ñáyiú quide ndáá ndécú-ó núú-gǎ vitna, te sáá nduu cundecu-o ndihí-gá ni caa ni quíhí<sup>n</sup>. <sup>23</sup> Te nchaa sá cuèhé sá dúhá dicó dácũita nihnu ñaha-xi xii-o, dico Yá Ndiòxí ní quide-gá sá dicó-ni duca<sup>n</sup> ndùu táhú-ó cundecu-o ndihí-gá ni caa ni quíhí<sup>n</sup>, chi ní tnahá tñúhu-o ndihí Xítóhó Jesucristú Yáá cúú Xítóhó-ó.

### Cuendá ñáyiú tñandaha

**7** Te nchaa nchòhó ñáyiú ndècu ndihí-í ichi Xítóhó Jesucristú sa ñaha-ndo nacuáa càhá<sup>n</sup> tñúhu sá dánèhé ñáhá xii-o nacuáa cada-o cundecu-o, chi tñúhu-á<sup>n</sup> càhá<sup>n</sup>-xi dóho nchaa ñáyiú xindecu vívú ñuyúí-a. <sup>2</sup> Te nchaa ñáyiú ðihí sa ndècu yíi-xi, te diu tñúhu-á<sup>n</sup> dánèhé ñáhá-xí xii-yu sá vǎ dǎná-yu yíi-yu, dico núu na cùú yíi-yu te ñá túú-gǎ ná càhá<sup>n</sup> tñúhu-á<sup>n</sup> cuendá-yu. <sup>3</sup> Dico núu vátá cùú-gǎ yíi-yu te ñá túú ndùu váha-xi naquehé<sup>n</sup>-yu ingá

tée, dico núu na cùú yíi-yu te quendóo mèe-yu, te ñá túú nǎgá càhá<sup>n</sup> tñúhu sá dánèhé ñáhá xii-yu nacuáa cadá-yu te duca<sup>n</sup> te cuu naquehé<sup>n</sup>-yu ingá tée, te ñá túú cùu-xi ì<sup>n</sup> cuéchi.

<sup>4</sup> Te nchòhó cue ñáyiú ndècu ndihí-í ichi Xítóhó Jesucristú cúú-ndó dàtná ñáyiú ní xíhí dàtná ní xíhí-gǎ. Te xíǎ<sup>n</sup> ñá túú-gǎ táxi tñuní ñáhá nchàa tñúhu ní chídó tñuní ndíi Moisés xii-ndo. Te duca<sup>n</sup> ní cuu cuendá nchòhó ngúndecu-ndo ndihí Xítóhó Jesucristú Yáá ní xíhí ní cùu te ní ndoto-gǎ. Te duca<sup>n</sup> ní cuu cuendá nchaa nchoo ñáyiú ndècu ichi-gǎ cada-o nchàa nacuáa càhá<sup>n</sup> Yá Ndiòxí. <sup>5</sup> Te nchoo ní xindecu-o ichi cuehé ichi duha, te tñúhu sá sánú ichi ñaha xii-o nacuáa cada-o cundecu-o cachí-xi sá ñà túú vǎha cundecu-o ichi-á<sup>n</sup>, te nchoo dà uu<sup>n</sup>-gǎ ní quide-o nchàa sá cuèhé sá dúhá sǎ dúcá<sup>n</sup> càhá<sup>n</sup> tñúhu-á<sup>n</sup>, te sá dúcá<sup>n</sup> ní quide-o te ta xíta nihnu-o cuǎhá<sup>n</sup> ní cùu. <sup>6</sup> Te vitna cada iní-ó sá cúú-ó dàtná ñáyiú ní xíhí sá cúú-xí tñúhu sá dánèhé ñáhá xii-o nacuáa cada-o cundecu-o, chi ñá túú-gǎ cúnùu-xi, te vitna mee-nǎ Espíritú Yá Ndiòxí chindèe ñaha-xi xii-o xinu cuechi-o núú-gǎ, te ñá díú cuendá nchaa tñúhu sá ní ngúndeé ndéé ðíhna cada ñáyiú xinu cuechi-o núú-gǎ vitna.

### Nchaa sá cuèhé sá dúhá ñúhu iní-í

<sup>7</sup> Te cuéi duha càhá<sup>n</sup>-í dico vá cúú tñahí càhá<sup>n</sup>-ó sǎ tñúhu sá sánú ichi ñaha xii-o nacuáa cada-o cundecu-o ñá díú tñúhu váha cùu-xi. Te yúhú ñá túú cùt-nuní iní-í ná cúú nchàa sá cuèhé sá dúhá ní cùu te núu ñá túú tñúhu-á<sup>n</sup> ní càchí tñúhu-xi xii-í, te ni ñà túú cùt-nuní tucu iní-í núu váha àdi ñá túú vǎha sá nchídó ìní-í sá ndécú ndihí tñaha ñáyiú-o ni cùu te núu ñá túú tñúhu-á<sup>n</sup> ní càchí-xi sá vǎ cúú cùu iní-í sá ndécú ndihí-yu. <sup>8</sup> Te tñúhu-á<sup>n</sup> ní dánèhé ñáhá-xí xii-í sá vǎ cúú càda-í ni ì<sup>n</sup> sá cuèhé sá dúhá, dico sá cuendá tñúhu-á<sup>n</sup> uu<sup>n</sup>-gǎ duca<sup>n</sup>



nĩ sani iní-í ní quide-í. Te núu ñá túú tnũhu sá sánú ichi ñaha xii-o nacuaá cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. <sup>9</sup> Te cùtnàhá vátá ñihí-gá-í tnúhu-á<sup>n</sup> te ñá túú tnàhí ná sání iní-í ndécù-í ni cùu, dico sátá nì ñihí-í tnúhu-á<sup>n</sup> te ní cutnùnì iní-í sá ndécú cuèchi-í, te ta xíta nihnu-í cuáhá<sup>n</sup> ní cùu. <sup>10</sup> Te núu ni quide-í nchaa nacuaá càhá<sup>n</sup> tnúhu-á<sup>n</sup> te sa ndéé ama-gá nanfíhí tànhú-í ní cùu, dico ñá túú ní quide-í núu ní cutnùnì iní-í sá tá xíta nihnu-í cuáhá<sup>n</sup> ní cùu. <sup>11</sup> Te sá xíí tnúhu-á<sup>n</sup> xíá<sup>n</sup> uu<sup>n</sup>-gá ní cunuu nchàa sá cuèhé sá dúhá nĩ dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáhá<sup>n</sup> ní cùu.

<sup>12</sup> Te tnúhu sá sánú ichi ñaha xii-o nacuaá cada-o cùndecu-o cuu-xi tnúhu ío yñũhu ní taxi Yá Ndiòxí, te ì<sup>n</sup> ì<sup>n</sup> tnúhu-á<sup>n</sup> cúu-xí mée-ni tnúhu váha, te ni ì<sup>n</sup> tnúhu cuèhé tnúhu duha ñá túú ñũhu tnahá. <sup>13</sup> Te vá cúu càchí-í sá tnũhu váha-á<sup>n</sup> nĩ quide-xi ta xíta nihnu-í cuáhá<sup>n</sup> ní cùu, chi nchaa sá cuèhé sá dúhá nĩ quide-í, xíá<sup>n</sup> tá dàcuíta nihnu ñaha-xi xii-í cuáhá<sup>n</sup> ní cùu, te sá cuèndá tnúhu váha-á<sup>n</sup> nĩ cutnùnì iní-í sá quidè-í nchaa sá cuèhé sá dúhá, te xíá<sup>n</sup> tá xíta nihnu-í cuáhá<sup>n</sup> ní cùu. Te sá cuèndá nchaa nacuaá càhá<sup>n</sup> tnúhu sá sánú ichi ñaha xii-o nacuaá cada-o cùndecu-o ní cutnùnì iní-í sá xidó ndécú cuèchi-í ní cùu.

<sup>14</sup> Te tnúhu-á<sup>n</sup> nĩ taxi Espíritú Yá Ndiòxí ndécú ndìhi-o cachí tnúhu-xi nacuaá cada váha-o. Te nchoo cùu-o mee-ni ñáiyu yíca cuèchi, te tàxi tnuní ñáhá nchàa sá cuèhé sá dúhá xii-o ni cuu. <sup>15</sup> Dico nchoo tnàhá iní-ó càda-o nchaa sá vãha dico ñá túú quide-o, te da nchaa sá ñá túú tnàhá iní-ó càda-o quide-o, te ñá túú cùtnuní iní-ó nã cuèndá duca<sup>n</sup> quide-o. <sup>16</sup> Te sá dúcá<sup>n</sup> quide-o nchaa sá ñá túú tnàhá iní-ó, te xíá<sup>n</sup> ndíxí tũu iní-ó sã tnũhu sá dúcá<sup>n</sup> sãnu ichi ñaha

xii-o nacuaá cada-o cùndecu-o cuu-xi tnúhu ío váha. <sup>17</sup> Te cùtnuní iní-ó sá nchàa sá cuèhé sá dúhá ñũhu iní-ó, xíá<sup>n</sup> quidè-xí dùca<sup>n</sup> quide-o sá ñá túú vãha, te ñá díú sá cãhú iní mée-ó dùca<sup>n</sup> quide-o. <sup>18</sup> Te cùu-o cue ñáiyu sàni cuèhé sání dùha iní-xi, te cuiní-ó càda-o nchaa sá vãha dico ñá túú ñihí ndéé-ó càda-o. <sup>19</sup> Te cuiní-ó càda-o nchaa sá vãha dico ñá ndácú-ó, te ñá túú cuiní-ó càda-o datná quidè nchàa ñáiyu ndècu ichi cuèhé ichi duha, chi ñáiyu-á<sup>n</sup> mee-ni nchàa sá cuèhé sá dúhá quidè-yu, dico diu-ni nchaa xíá<sup>n</sup> quidè-ó tnàhá-ó. <sup>20</sup> Te sá dúcá<sup>n</sup> quide-o nchaa sá ñá túú tnàhá iní-ó càda-o te ñá díú mée-o duca<sup>n</sup> cahu iní-ó quide-o, chi nchaa sá cuèhé sá dúhá ñũhu iní-ó xíá<sup>n</sup> quidè-xí dùca<sup>n</sup> quide-o.

<sup>21</sup> Te duca<sup>n</sup> tnàhí yãha-o òré cuiní-ó càda-o sá vãha, chi da mee-ni nchàa sá cuèhé sá dúhá quide-o. <sup>22</sup> Te ío cùdíf iní-ó càda-o nchaa nacuaá càhá<sup>n</sup> Yá Ndiòxí, <sup>23</sup> te dicó-ni sá ncháá sá cuèhé sá dúhá ñũhu iní-ó, xíá<sup>n</sup> quidè-xí ngàni ñaha-xi xii-o ñá túú quide-o sá vãha sàni iní-ó càda-o, te duca<sup>n</sup> yãha-o chi nchaa sá cuèhé sá dúhá-á<sup>n</sup> cùnũu-xi taxi tnuní ñáhá-xí xii-o.

<sup>24</sup> ;Te ndàhú ní cuu nchoo! Chi vá yõ ì<sup>n</sup> ni ndàcu cada nacuaá vá táxí tnùnì ñáhá-gã nchaa sá cuèhé sá dúhá xii-o sá tá dàcuíta nihnu ñaha xii-o cuáhá<sup>n</sup> ní cùu. <sup>25</sup> Te táxãhu xii Yá Ndiòxí sá Xí-tohó Jesucristú ní quide-gá cuèndá sá vã táxí tnùnì ñáhá-gã ni ì<sup>n</sup> sá cuèhé sá dúhá xii-o, sá tá dàcuíta nihnu ñaha xii-o cuáhá<sup>n</sup> ní cùu. Te mee-o sàni iní-ó càda-o nchaa nacuaá càhá<sup>n</sup> Yá Ndiòxí, dico núu nchaa sá cuèhé sá dúhá ná cùnũu-xi taxi tnuní ñáhá-xí xii-o, te diu-ni nchaa xíá<sup>n</sup> cada-o.

### Ñáiyu quide nchaa nacuaá càhá<sup>n</sup> Espíritú Yá Ndiòxí

**8** Te vitna nchaa nchoo ñáiyu tnàhá tnúhu ndìhi Xítohó Jesucristú vá

cuíta nihnu-gá-ó, chi ñá túú-gă ndécú-ó ichi cuehé ichi duha, chi mee-nă nchaa năcuáa cãhá<sup>n</sup> Espíritú Yă Ndiöxí quidé-ó.

<sup>2</sup>Te Espíritú Yă Ndiöxí-ă<sup>n</sup> táxi tñuní ñáhá-xí xii-o, te duca<sup>n</sup> chi ndècu ndihi-o Xítohó Jesucristú, te sá dúcá<sup>n</sup> tàxi tñuní ñáhá Espíritú-gá xii-o nũu xíă<sup>n</sup> ñá túú-gă táxi tñuní ñáhá ni ì<sup>n</sup>-gá sá cuehé sá dúhá xii-o, te duca<sup>n</sup> quide Espíritú-gá cuendá sá vă cuíta nihnu-o, te diu-ni Espíritú-gá quidé-xí cuendá sá nchóó ndũu táhú-ó cùndecu-o ndihi-gá ni caa ni quíhí<sup>n</sup>.

<sup>3</sup>Te nchoo ñá ní ndăcu-o cada-o nchaa nacuáa cãhá<sup>n</sup> tñúhu sá sánú ichi ñaha xii-o nacuáa cada-o cùndecu-o, núu xíă<sup>n</sup> tñúhu-ă<sup>n</sup> ñá túú ní nihí ndée-xí cãda-xi cuendá sá nchóó vă cuíta nihnu-o. Dico Yă Ndiöxí ní tendaha-gă Déhe mee-gă ní quixi ñuyú-a, te Yaá-ă<sup>n</sup> cúú-gă ì<sup>n</sup> ñáyiu, te cãa-gă dătná cáá ñáyiu ndècu cuéchi-xi xĩndecu ñuyú-a, te sá cuendá nchaa cuéchi nchaa nchoo ñáyiu xĩndecu ñuyú-a ní quixi-gá, te ndée dăvă-ă<sup>n</sup> ní quide-gá cuendá sá vă táxi tñuní ñáhá-gă ni ì<sup>n</sup> sá cuehé sá dúhá xii-o.

<sup>4</sup>Te duca<sup>n</sup> ní quide-gá cuendá nchoo nchícú<sup>n</sup> nihnu-o quide-o nacuáa cãhá<sup>n</sup> tñúhu sá sánú ichi ñaha xii-o nacuáa cada-o, chi ñá túú-gă cúnũu ni ì<sup>n</sup> sá cuehé sá dúhá ìní-ó, chi Espíritú Yă Ndiöxí-nă táxi tñuní ñáhá-xí xii-o.

<sup>5</sup>Te nchaa ñáyiu cúnũu nchaa sá cuehé sá dúhá ìní-xi mee-ni xíă<sup>n</sup> ñúhú ìní-yu te quidé-yu. Dico nchoo ñáyiu quide nchaa nacuáa cuíní Espíritú Yă Ndiöxí ñúhú ìní-ó mēe-ni nacuáa cãhá<sup>n</sup> Espíritú-gá-ă<sup>n</sup> te quide-o. <sup>6</sup>Te núu mee-ni nchăa sá cuehé sá dúhá cúnũu ìní-ó, te cuíta nihnu-o, dico núu mee-ni nchăa tñúhu cãhá<sup>n</sup> Espíritú Yă Ndiöxí cúnũu ìní-ó, te ío văha cuu ìní-ó cùndecu-o ndihi-gá ni caa ni quíhí<sup>n</sup>. <sup>7</sup>Te nchaa ñáyiu ñũhu ìní mee-ni sã cuehé sá dúhá cùu úhú ìní-yu Yă Ndiöxí, te ñá túú cuíní-yu cadă-yu năcuáa cãhá<sup>n</sup>-gă, te ni ñá ndăcũ-yu cadă-yu. <sup>8</sup>Te nchaa

ñáyiu duca<sup>n</sup> cúnũu nchaa sá cuehé sá dúhá ìní-xi-ă<sup>n</sup> ñá túú cùdiú-yu núu Yă Ndiöxí.

<sup>9</sup>Te nchòhó chi ñá túú-gă cúnũu sá cuehé sá dúhá ìní-ndó, chi mee-nă năcuáa cãhá<sup>n</sup> Espíritú Yă Ndiöxí quidé-ndó, te duca<sup>n</sup> quide-ndo chi ndècu ndihi-ndo Espíritú-gá, te diu-ni Espíritú-gá-ă<sup>n</sup> ní tendaha Xítohó Jesucristú véxi ndècu ndihi-o, te nchaa ñáyiu ñá túú ndècu ndihi Espíritú sá ní tendaha Xítohó Jesucristú véxi ndècu ndihi-o ñá túú ndècu ndihi ñahá-yu xii-gă. <sup>10</sup>Te núu ndècu ndihi-ndo Xítohó Jesucristú, te cuéi na cùu yiqui cùñú-ndó sã cuendá nchaa sá cuehé sá dúhá ío ñuyú-a, dico ìní-ndó chi cundecu ndihi-xi Yă Ndiöxí chi ñá túú-gă cuéchi-ndo ndècu núú-gă.

<sup>11</sup>Te núu ndècu ndihi-ndo Espíritú Yă Ndiöxí Yaá ní dándótó ñaha xii Xítohó Jesucristú, te diu-ni-gă cada te ndoto yiqui cùñú-ndó sã tá xíta nihnu cuáhá<sup>n</sup> nũu na cùu-xi, te duca<sup>n</sup> chi ndècu ndihi-ndo Espíritú-gă.

<sup>12</sup>Te nchòhó ñáyiu ndècu ndihi-í ichi Xítohó Jesucristú, ñá túú-gă tàú-ndó cúnũu ni ì<sup>n</sup> sá cuehé sá dúhá ìní-ndó nacuáa vă cùndecu-gă-ndó ichi cuehé ichi duha. <sup>13</sup>Chi núu na cúnũu sá cuehé sá dúhá ìní-ndó te cuíta nihnu-ndo, chi quíhí<sup>n</sup>-ndó núú ùhú núú ndàhú. Dico núu daña-ndo mēe-ndo chindee ñaha Espíritú Yă Ndiöxí xii-ndo cuendá sá vă cúnũu-gă sá cuehé sá dúhá ìní-ndó ñá, te nduu táhú-ndó cùndecu-ndo ndihi-gá ni caa ni quíhí<sup>n</sup> te núu duca<sup>n</sup> na cãda-ndo.

<sup>14</sup>Chi nchaa ñáyiu quide nchaa nacuáa sãnu ichi ñaha Espíritú Yă Ndiöxí cúũ-yu déhe-gă. <sup>15</sup>Te Espíritú sá ní taxi Yă Ndiöxí ndécú ndihi-o ñá túú quide-xi sá nchóó yùhú-ó cùnu cuechi-o núú-gă, chi Espíritú-ă<sup>n</sup> quidé-xí sã nchóó cùu-o déhe-gă, te diu-ni Espíritú-ă<sup>n</sup> quidé xăha<sup>n</sup>-o xii Yă Ndiöxí: “¡Yòhó Dútú Ndiöxí cúú-n Tătá

mée-ndí!”, duha xáha<sup>n</sup>-o xii-gá. <sup>16</sup>Te diu-ni Espiritú-gá-ǎ<sup>n</sup> tnahá tñuhu-xi ndihi iní-ó, te cǎhá<sup>n</sup> ndáá-xi sá nchóó cùu-o déhe-gá. <sup>17</sup>Te sá dúcá<sup>n</sup> cùu-o déhe Yá Ndióxi xǎ<sup>n</sup> ní cachí-gá sá tnahá-ó nduu táhú-ó sǎ ní nduu táhú Xítóhó Jesucristú, te duca<sup>n</sup> nduu táhú-ó te núu na cada ndee iní-ó ndòho-o datná ní ndoho Xítóhó Jesucristú, te núu duca<sup>n</sup> te ío cuu cǎhnu-o ndihi-gá ni caa ni quíhí<sup>n</sup>.

<sup>18</sup>Te yúhú cǎchí-í sá ñá túú ná cada-xi cuéi ndòho-o cuendá-gá ndécú-ó ñyíyú-a, chi ío váha cǎa núú ndúú táhú-ó cùndecu-o na saá nduu. <sup>19</sup>Te nchaandi túhú sá ní cadúha Yá Ndióxi ní taxi ndecu-gá ñyíyú-a ndètu cahnu-ná-xi sáá nduu cǎchí-gá sá ío cǎhnu cuu nchaa déhe-gá. <sup>20</sup>Te nchaa sá ní cadúha Yá Ndióxi ní taxi ndecu-gá ñyíyú-a ní sáá nduu ñá túú-gǎ cúu-xí sǎ váha sá cúu-xí-gǎ. Te ñá díú mèe sá ní taxi ndecu Yá Ndióxi ñyíyú-a duca<sup>n</sup> ni sàni iní-xi cunduu, chi mee-gǎ duca<sup>n</sup> tnahí ní cachí-gá cunduu sá sáá nduu vǎ cúu-xí sǎ váha sá cúu-xí-gǎ, dico sáá tucu nduu te nchaa xǎ<sup>n</sup> cuu tucu-xi sá váha sá cúu-xí-gǎ. <sup>21</sup>Te nchaa sá ní taxi ndecu-gá ñyíyú-a vǎ cùndèu-gá-xi dàtná cáá-xí vitna te ni vǎ dánàa-gá, chi nduu saa-xi te ngúndecu váha-xi dàtná ngúndecu váha nchaa cue déhe-gá. <sup>22</sup>Te nàha-o sá ncháándi túhú sá nchító ní cadúha Yá Ndióxi ndécú ñyíyú-a ndòho-xi vitna datná ndóhó ìi<sup>n</sup> ñadihí sa ní tnahá òré cacu déhe-xi. <sup>23</sup>Te ñá díú-ní nchàa sá dúcá<sup>n</sup> ní cadúha-gá-ǎ<sup>n</sup> duca<sup>n</sup> ndòho-xi, chi tnahá nchoo dùca<sup>n</sup> ndoho-o ndecu-o ñyíyú-a tucu, te nchoo sà ní nduu táhú-ó Espiritú Yá Ndióxi Espiritú sá ní cachí mée-gǎ nduu táhú-ó díhnanuu. Te ío ndòho tnahá-ó ndècu-o ñyíyú-a te ndètu cahnu-ná-ó sáá nduu ndàda saa-gá yiqui cùnú-ó, te cǎhá<sup>n</sup>-gá sá cúu-ó déhe-gá. <sup>24</sup>Te Yá Ndióxi ní quide-gá ní naníhí táhú-ó nǔu xǎ<sup>n</sup> ní ngúndecu ndihi-o

tñuhu ndee iní ndétú-ó sáá nduu cǎda-gá nàcuáa ní cachí-gá, te núu sa ndècu ndihi-o sá ndúú táhú-ó te vǎ cúu cǎhá<sup>n</sup>-ó sǎ cùndètu-o sá ndúú táhú-ó chi sa ndècu ndihi-o. <sup>25</sup>Dico sá ndétú-ó nduu táhú-ó cùu-xi sá vǎtá cùndècu ndihi-gá-ó, te xini ñuhu-ni-xi cada ndee-ni iní-ó cùndetu-o ndéé sáá nduu nduu táhú-ó sǎ dúcá<sup>n</sup> ní cachí Yá Ndióxi nduu táhú-ó.

<sup>26</sup>Te Espiritú-gá chindee ñàha-xi xii-o nacúaa níhí ndéé-ó cùndecu-o, te nchoo ñá túú xini-ó cǎhá<sup>n</sup> ndihi-o Yá Ndióxi nàcuáa tàú-xi cunduu dico Espiritú-gá cǎhá<sup>n</sup> ndàhú-xi núú-gǎ cuendá-ó cuéi òré ñá níhí-ó tñuhu cǎhá<sup>n</sup>-ó cuendá nchaa sá ío cuini-ó cǎcá<sup>n</sup>-ó nǔú-gǎ. <sup>27</sup>Te Yá Ndióxi sa nàha ndáá-gá nchaa nàcuáa sàni iní-ó, te duca<sup>n</sup> sǎ naha ndáá-gá nchaa nàcuáa sàni iní Espiritú-gá. Te Espiritú-gá cǎhá<sup>n</sup> ndàhú-xi núú-gǎ cuendá nchoo ñáyiu yìndaha-gá, te cǎhá<sup>n</sup> ndàhú-xi núú-gǎ nàcuáa cuini mée-gǎ cunduu.

**Nchaa sá ná cǎda ñàha ñáyiu te vǎ  
ndácǔ-yu nadatùhú-yu iní-ó  
chi ndacu nahi-ni-o yǎha-o  
nchàa sá ná cǎdá ñàhá-yu**

<sup>28</sup>Te sa nàha-o sá Yá Ndióxi quidé-gǎ sá ncháá sǎ yǎha-o ndècu-o ñyíyú-a cùu-xi sá váha sá cúu-xí nchòo cue ñáyiu cùu iní ñàhá xii-gá, chi cùu-o ñáyiu ní cǎhá<sup>n</sup>-gá cundecu ndihi-gá dàtná ní cachí iní mée-gǎ. <sup>29</sup>Te ndéé cùtnàhá vátá ngáva-gá ñyíyú, te Yá Ndióxi sa nàha-gá nándi cùu ñáyiu cundecu ndihi-gá, te diu-ni ndéé dàvá-á<sup>n</sup> ní cachí-gá sá ñáyiu-á<sup>n</sup> cunduu váha iní-yu dàtná váha iní Déhe mee-gǎ, te duca<sup>n</sup> ní cachí-gá cuendá sá Dèhe mee-gǎ-á<sup>n</sup> cunuu-gǎ núú nchàa ñáyiu cundecu ndihi-gá. <sup>30</sup>Te nchaa ñáyiu duca<sup>n</sup> ní cachí-gá cundecu ndihi-gá ndéé cùtnàhá vátá ngáva-gá ñyíyú cǎhá<sup>n</sup> ñàhá-gǎ xii-yu vitna, te nchaa ñáyiu duca<sup>n</sup> cǎhá<sup>n</sup>-gá cǎchí-gá sá ñá

túú-gă cuéchi-yu ndècu núú-gă, te diu-ni ñáiyu-á<sup>n</sup> cachí-gá sá ïo cànnyu cuú-yu.

<sup>31</sup> Te vitna ní cutnùní iní-ó, te ñá túú nǎgá caní iní-ó, chí Yá Ndiòxí ndécú ndíhi ñaha-gá xii-o, te vá yõ ïi<sup>n</sup>-gá ndacu quehdé nihnu cuendá sá vǎ chindèe ñaha-gá xii-o. <sup>32</sup> Te Yá Ndiòxí ñá túú ní cùdí iní-gá Déhe-gá sá cùú-gá cuendá nchaa nchoo ñáiyu xìn-decu ñuyíú-a, te sá dúcá<sup>n</sup> ndèe Déhe-gá ñá túú ní cùdí iní-gá xǎ<sup>n</sup> cùtnùní iní-ó sǎ táxí-gǎ nchaandi túhú sá xíní ñùhu-o. <sup>33</sup> Te vá yõ ïi<sup>n</sup> ndacu cacá<sup>n</sup> cuéchi núú Yá Ndiòxí cuendá nchaa ñáiyu ní cachí-gá cundecu ndíhi-gá te núu ná cùú cuéchi-yu ndècu. Chí mee-gǎ cǎchí-gá sá ñá túú ndècu cuéchi-yu núú-gǎ. <sup>34</sup> Te vá yõ ïi<sup>n</sup> ndacu daquihí<sup>n</sup> ñáhá xii-o núú ùhú núú ndàhú, chí Xítóhó Jesucristú ní xíhí-gá te ní ndoto-gá, te cuándaa-gá núú ndécú Dǔtú Ndiòxí núcõo-gá xio cùha-gá, te duca<sup>n</sup> ïo cùnnyu-gá, te yàcá<sup>n</sup> cǎhá<sup>n</sup> ndàhú-gá núú Dǔtú Ndiòxí cuendá-ó. <sup>35</sup> Te vá yõ ïi<sup>n</sup> ndacu cada ñaha xii-o ïi<sup>n</sup> sá ñá túú vǎha cuendá sá vǎ cùú ìní ñáhá-gǎ Xítóhó Jesucristú xii-o, te ní tnúndõho tnúhu ndàhú, te ní sá ndíhú iní-ó ñá cùtnùní iní-ó nǎsa cada-o cǎcu nihnu-o ïi<sup>n</sup> sá ná yǎha-o, te ní nchàa sá cǎdá ñaha ñáiyu sá cuendá-gá, te cuéi-ni sá vǎ nihí-ó sǎ cóhó sǎ cǎxí-ó, te cuéi-ni sá vǎ nihí-ó dǒó cuihnyu-o, te cuéi ndècu-ná-ó sǎ yǎha-o ïi<sup>n</sup> sá yǎha-o, te cuéi sa ndècu-ná-ó sǎ cǎhní ñáhá-yu, dico Xítóhó Jesucristú vá dáñá ndèe-gá sá cùú ìní ñáhá-gǎ xii-o. <sup>36</sup> Te quee ndáá-xi nàcuáa ní cǎhá<sup>n</sup> ïi<sup>n</sup> tée ní xóo cǎhá<sup>n</sup> tnúhu Yá Ndiòxí ndéé sanaha ñí ngódó tnùní núú tütú-gá núú cǎchí-xi:

Yòhó Dútú Ndiòxí nchaa-ni nduu nchaa-ni òré cuiní ñáiyu cahni ñáhá-yu xii-ndí sá cuendá-n, te cǎchí-yu sá cùú-ndí dàtná cue mbéé cue quití sa ndècu túha-ná cahní-yu.

Duha ní cachí tée ní xóo cǎhá<sup>n</sup> tnúhu-gá-á<sup>n</sup>, te duca<sup>n</sup> ñí ngódó tnùní núú tütú-gá. <sup>37</sup> Te cuéi duca<sup>n</sup> nǎndí sá ná cǎda ñáhá-yu xii-o, dico vá ndácú-yu nadatùhú-yu iní-ó chí ndacu nahi-ni-o yǎha-o nchàa sá dúcá<sup>n</sup> ná cǎda ñáhá-yu xii-o, te duca<sup>n</sup> chí Xítóhó Jesucristú Yáá ïo cùu ìní ñáhá xii-o ndecu ndíhi ñaha-gá chindèe ñaha-gá. <sup>38-39</sup> Te yúhú cùtnùní ndáá iní-í sá ní ïi<sup>n</sup> sá ìo ñuyíú-a vá ndácú-xí cǎda-xi cuendá sá vǎ cùú ìní ñáhá-gǎ Yá Ndiòxí xii-o, te ní sǎ cùú-ó, te ní sǎ cùndècu-o ñuyíú-a, te ní ïi<sup>n</sup> espíritú sá ïo cùnnyu cundihi yucu ñávǎha te ní ïi<sup>n</sup> dava-gá cue espíritú cùndíhi-xi vá ndácú-xí cǎda-xi cuendá sá vǎ cùú ìní ñáhá Yá Ndiòxí xii-o. Te ní sǎ cùú ñuyíú-a vitna, te ní sǎ cùú ndèe cuéè-gá, te ní ïi<sup>n</sup> sá ndécú àndíu, te ní ïi<sup>n</sup> sá ndécú ñuyíú-a, te ní ïi<sup>n</sup> sá ñí cadúha mee Yá Ndiòxí, ní ïi<sup>n</sup> xǎ<sup>n</sup> vá ndácú-xí cǎda-xi cuendá sá vǎ cùú ìní ñáhá-gǎ xii-o chí ndècu ndíhi-o Xítóhó Jesucristú Yáá cùú Xítóhó-ó.

**Yá Ndiòxí ní cachí-gá sá ñáiyu  
israél cuú-yu ñáiyu  
canchicú<sup>n</sup> nihnu ñaha xii-gá**

**9** Te yúhú cǎhá<sup>n</sup> ndáá-í chí cùu-í ïi<sup>n</sup> tée ndècu ndíhi Xítóhó Jesucristú, te ndècu ndíhi-í Espíritú Yá Ndiòxí ñúu xǎ<sup>n</sup> cùtnùní iní-í sá cǎhá<sup>n</sup> ndáá-í. <sup>2</sup> Te nchaa-ni nduu nchaa-ni òré ïo ndíhú iní-í, te duca<sup>n</sup>-ni ïo quide úhú-xi iní-í <sup>3</sup> sá cuendá nchaa ñáiyu cùu ndí mee-í. Te núu dícó cùú-xí ïi<sup>n</sup> sá chindèe ñaha xií-yu nucúndecu váha-yu núú Yá Ndiòxí ñá, te dàña-í mèe-í dàcuíta nihnu ñaha Xítóhó Jesucristú ñúu dícó sá cùú. <sup>4</sup> Te nchaa ñáiyu cùu ndí mee-í-á<sup>n</sup> cùú-yu ñáiyu israél, te Yá Ndiòxí ní cachí-gá sá cùú-yu déhe-gá, te ní quide-gá nàcuáa ní cutnùní iní-yu sá ïo cànnyu cuu-gá, te ní cǎhá<sup>n</sup> ndáá-gá núú-yu nàcuáa cada ñaha-gǎ xií-yu, te ní xáha<sup>n</sup>-gǎ xii ndíi Moisés ní chídó

tnùní ndíi nàcuáa cadá-yu cundecú-yu. Te ní xáha<sup>n</sup>-gã xií-yu nàcuáa cadá-yu cada càhnu ñahá-yu xii-gã, te ní xáha<sup>n</sup> tùcu-gã xií-yu nchaa nàcuáa cada-gã ndéé cuèè-gã. <sup>5</sup>Te nchaa ñáiyu-á<sup>n</sup> cúu-yu ñaní tnáhá nchaa cue téé ní cunuu ní xíndecu ndéé sanaha, te diu-ni ñaní tnáhá-yu cùu Xítohó Jesucristú Yaa ní tendaha Dùtú Ndiòxí ní quixi ñuyíú-a, te tnàhá-gã cúu-gã Ndiòxí te ío cùnuu-gã, te nchaa nduu nchaa quíú ío càhnu cuu-gã. Te duca<sup>n</sup> na cundu.

<sup>6</sup>Te vá cãchí-ó sã Yã Ndiòxí ñã túú ní quide-gã nchaa nàcuáa ní cachí-gã cada-gã cuendá sã ñã túú sàndáá iní ñáhá dava ñáiyu isràél xii-gã. Te sã dúcá<sup>n</sup> xíquide davá-yu te ñã túú quidé-yu nàcuáa tàú-xi cadá-yu sã cúu-yu ñáiyu isràél. Te ñáiyu duca<sup>n</sup> xíquide-á<sup>n</sup> cúu-yu ñáiyu ñã túú cùu cuendá ñáhá Yã Ndiòxí. <sup>7</sup>Te cuèi nchaa-yu cùu-yu ñaní tnáhá ndíi Àbrahám dico ñã túú quidé-yu nchaa nàcuáa tàú-xi cundu cadá-yu sã cúu-yu ñaní tnáhá ndíi. Te Yã Ndiòxí ní xáha<sup>n</sup>-gã xii ndíi Àbrahám: “Nchaa cue ñaní tnáhá tã Isàác téé cùu déhe ducu<sup>n</sup>-n, mee-ni cuè ñáiyu-á<sup>n</sup> cuu ñaní tnáhá-n”, duha ní xáha<sup>n</sup>-gã xii ndíi Àbrahám. <sup>8</sup>Te xíã<sup>n</sup> cútnùní iní-ó sã ñã ncháá ñáiyu cùu ñaní tnáhá ndíi Àbrahám cúu-yu ñáiyu cùu cuendá Yã Ndiòxí, chi mee-ni ñáiyu sàndáá iní nàcuáa ní cáhá<sup>n</sup>-gã cada-gã, ñáiyu-á<sup>n</sup> cúu cuendá-gã. <sup>9</sup>Te duha nduu tnúhu ní xáha<sup>n</sup> Yã Ndiòxí xii ndíi Àbrahám: “Sáa nduu te yúhú cada-í te coo ñi<sup>n</sup> déhe-n ndíhi ñadihí-n tã Sãrá”, duha ní xáha<sup>n</sup>-gã xii ndíi.

<sup>10</sup>Te ñã díú-ní xíã<sup>n</sup> ní quide Yã Ndiòxí, chi tnàhá ní ndatnúhu-gã ndíhi ndíi Rèbecá cútnàhá vitna ñùhu úú déhe ndíi ndíhi ndíi Isàác téé ní cuu ñaní tnáhá-ó ní xíndecu ndéé sanaha. <sup>11-13</sup>Te cútnàhá vitna ñùhu-gã déhe ndíi Rèbecá, cútnàhá vátá cadá-gã-güexi ni ñi<sup>n</sup> sã cuèhé

sá dúhá, te ni ñi<sup>n</sup> sã vãha, ní xáha<sup>n</sup> Yã Ndiòxí xii ndíi: “Déhe-n tãe díhna na càcu te téé-á<sup>n</sup> tñi-dé nchaa tnúhu cáhá<sup>n</sup> déhe-n tãe cùu uú ná càcu”, duha ní xáha<sup>n</sup>-gã xii ndíi Rèbecá. Te ní quee ndáá-xi nàcuáa ní cáhá<sup>n</sup> Yã Ndiòxí núú tütú-gã núú cãchí-xi: “Té Jácób ní cuu vãha iní-í núú-dé, te té Esáu ñã túú ní cùu vãha iní-í núú-dé”, duha cãchí-gã núú tütú-gã. Te duca<sup>n</sup> ní cuu chi duca<sup>n</sup> ní cachí mée-gã cundu sã càhá<sup>n</sup>-gã nchaa ñáiyu cuíni mée-gã, te ñã díú cuendá ñi<sup>n</sup> chiú<sup>n</sup> quidé-yu càhá<sup>n</sup> ñáhá-gã xií-yu.

<sup>14</sup>Te vá cúu tnàhí cáhá<sup>n</sup>-ó sã Yã Ndiòxí ñã túú quide vãha-gã sã dúcá<sup>n</sup> quide-gã chi mee-gã ío ndáá quidé-gã! <sup>15</sup>Te mee-gã ní xáha<sup>n</sup>-gã xii ndíi Moisés: “Cundàhú iní-í chindee-í mee-ni cuè ñáiyu cãchí iní-í”, duha ní xáha<sup>n</sup>-gã xii ndíi. <sup>16</sup>Te xíã<sup>n</sup> cútnùní iní-ó sã cundàhú iní-gã ñáiyu chi duca<sup>n</sup> cuíni mée-gã cundu, dico ñã túú cundahú iní ñáhá-gã xií-yu cuendá sã dúcá<sup>n</sup> cuíni-yu cada-gã, te ni ñã túú cundahú iní ñáhá-gã xií-yu cuendá sã ío ndùcu ndéé-yu quidé-yu ñi<sup>n</sup> sã quidé-yu. <sup>17</sup>Te núú tütú Yã Ndiòxí càhá<sup>n</sup>-xi nàcuáa ní xáha<sup>n</sup>-gã xii téé ní cuu Faràón téé ní xíndaha nació<sup>n</sup> Ègiptú, te duha ní xáha<sup>n</sup>-gã: “Yúhú ní quide-í yíndàha-n ñáiyu cuendá cada-í títní núú sã cádá-í núú-n cuendá cutnùní iní-n sã ío càhnu cuu-í, te duca<sup>n</sup> nchaa ñáiyu ñuyíú cutnùní iní-yu sã yúhú cúu-í Ndiòxí”, duha ní xáha<sup>n</sup>-gã xii téé ní cuu Faràón. <sup>18</sup>Te xíã<sup>n</sup> cútnùní iní-ó sã Yã Ndiòxí cundàhú iní-gã mee-ni cuè ñáiyu cãchí iní mée-gã, te duca<sup>n</sup> ndàda díí-gã iní nchaa ñáiyu cãchí iní mée-gã duca<sup>n</sup> cada-gã.

<sup>19</sup>Te sã dúhá càhá<sup>n</sup>-í te dava-ndo quèsaha-ndo: “Ná cuendá Yã Ndiòxí dácàa-gã cuèchi díquí ñáiyu núu ni ñi<sup>n</sup>-yu ñã ndácü-yu quehndé nihnú-yu cuendá sã vã cádá Yã Ndiòxí nàcuáa cuíni-gã”, quèsaha-ndo. <sup>20</sup>Te chí cuãha cuendá sã díco ñáiyu ñuyíú-a cùu-ndo te ñã túú

ndüu váha-xi sá nchòhó cáhá<sup>n</sup>-ndó ì<sup>n</sup> tnúhu sá ñà túú ndüu váha sá cúú-xí Yá Ndiöxí. Te duha na càhá<sup>n</sup>-í núú-ndó nàcuáa tecú tnùní-gá-ndó nàcuáa ndüu tnúhu càhá<sup>n</sup>-í. Te ñà túú xìní-ó sã ì<sup>n</sup> quídi ñuhu cúnaha-xi xii ñáyüu ní cadúha ñaha xii-xi: “Ná cuendá duha ní cadúha ñaha-n xii-í”, cúnaha-xi. <sup>21</sup> Chi ñáyüu cadúha nchaa quídi-á<sup>n</sup> cuu-ni cadúha-yu ndihi ñuhu cuéi nása na cünduu quídi cadúha-yu canehe chiú<sup>n</sup>-yu, chi ì<sup>n</sup>-ni ñuhu cadúha-yu quídi cánehe chiú<sup>n</sup>-yu ndi tnahá nduu sàcúo-yu vico ndihi quídi sá cánehe chiú<sup>n</sup>-yu nduu cùtexínu.

<sup>22</sup> Te diu-ni duca<sup>n</sup> quíde Yá Ndiöxí, chi cuíní-gá dandòho-gá ñáyüu ñà túú quíde nchaa nacuáa nduu vétú iní-gá, te cada-gá nàcuáa cutnùnì iní-yu sá ìo càhnu cuu-gá. Te sa ndècu túha-ná-yu sá quìhí<sup>n</sup>-yu núú ùhú núú ndàhú, te cuéi duca<sup>n</sup> dico ío ta quíde cahnu iní-gá cuáhá<sup>n</sup>. <sup>23</sup> Te duca<sup>n</sup> quíde-gá cuendá cutnùnì iní nchaa ñáyüu ñuyúú sã ìo váha quíde-gá sá cúú-xí nchaa nchoo ñáyüu cündahú iní-gá, chi ní cachí-gá sá nchóó cué ñáyüu cündahú iní-gá nduu táhú-ó cündecu-o ndihi-gá núú ìo váha càa ndecu-gá. <sup>24</sup> Te dava nchoo ñáyüu ní cáhá<sup>n</sup> Yá Ndiöxí cúú-ó ñáyüu isràél, te dava-o cùu-o ñáyüu ñà túú cùu ñáyüu isràél. <sup>25</sup> Te ní quee ndáá-xi nàcuáa ní xáha<sup>n</sup> Yá Ndiöxí xii ndíi Òseás téé ní xóo cáhá<sup>n</sup> tnúhu-gá ndéé sanaha ní chídó tnùnì ndíi núú tütú-gá núú càchí-xi:

Ñáyüu ñà túú cùu cuendá-í ní cùu te nduu cuendá-í-yu,

te diu-ni ñáyüu-á<sup>n</sup> ñà túú cùu váha iní-í núú-yu ni cùu, dico vitna cùu váha iní-í núú-yu.

<sup>26</sup> Te diu-ni ñuú núú dúcá<sup>n</sup> ní cachí-í sá ñà túú ñáyüu cùu cuendá-í diu-ni ñuú-á<sup>n</sup> coo ñáyüu cuu déhe yúhú Dútú Ndiöxí Yá ndécú tũu andüu.

Duha ní xáha<sup>n</sup> Yá Ndiöxí xii ndíi Òseás ní chídó tnùnì ndíi núú tütú-gá. <sup>27</sup> Te ndíi Chàáá téé ní xóo cáhá<sup>n</sup> tucu tnúhu Yá

Ndiöxí ndéé sanaha ní cáhá<sup>n</sup> ndíi cuendá ñáyüu isràél, te duha ní cachí ndíi: “Cuéi cuéhé víhí ñáyüu isràél dàtná cuéhé ñuhu cúchí lámár dico sacú-ni-yu vá quíní-yu tnúndòho tnúhu ndàhú. <sup>28</sup> Te Yá Ndiöxí ío ndihi cada-gá nchaa nàcuáa càhá<sup>n</sup>-gá ñuyúú”, duha ní cachí ndíi. <sup>29</sup> Te ní cáhá<sup>n</sup> tucu ndíi nàcuáa cada-xi ndéé cuéé-gá, te ní cachí ndíi:

Yá Ndiöxí Yáá táxí tnùnì nchaandi túhú sá ìo andüu ndihi ñuyúú ñà túú ní dànaa-gá nchaa ñáyüu isràél, chi núu ni ndíhí-yu danàa ñaha-gá,

te nchoo cùu-o datná ní cuu nchaa ñáyüu ní xíndecu ñuú Sòdomá ndihi nchaa ñáyüu ní xíndecu ñuú Gòmorrá, te ndihi-o nàa datná ní naa nchaa ñáyüu-á<sup>n</sup> ní cùu.

Duha ní cachí ndíi.

### Ñáyüu isràél ñà túú sàndáá iní-yu tnúhu Xítohó Jesucristú

<sup>30</sup> Te sá cuendá xíá<sup>n</sup> nũu vitna càchí tnúhu-í xii-ndo sã cué ñáyüu ñà túú cùu ñáyüu isràél ñà túú ní nànducu nihnú-yu nàcuáa cadá-yu cudiú-yu núú Yá Ndiöxí, dico vitna cudiú-yu núú-gã chi ní sàndáá iní-yu Xítohó Jesucristú. <sup>31</sup> Te ñáyüu isràél nchicú<sup>n</sup> nihnú-yu tnúhu sá dánèhé ñáhá xii-yu nàcuáa cadá-yu cudiú-yu núú Yá Ndiöxí dico ñà túú cudiú-yu núú-gã chi ñà ndácü-yu cadá-yu nchaa nàcuáa càhá<sup>n</sup>-xi. <sup>32</sup> Te duca<sup>n</sup> ñà túú cudiú-yu núú Yá Ndiöxí chi ñà túú sàndáá iní-yu Xítohó Jesucristú, te sàni iní-yu sá sã cuendá mee-ni nchaa sá quíde mèé-yu cudiú-yu núú-gã, te sá dúcá<sup>n</sup> quíde-yu te cùu-yu dàtná ì<sup>n</sup> ñáyüu nguínenu ì<sup>n</sup> yúú te nduá-yu. Te duca<sup>n</sup> sãtnahá-xi cùu-yu chi ñà túú cùu váha iní-yu núú Xítohó Jesucristú. <sup>33</sup> Te quèe ndáá-xi nàcuáa ní cáhá<sup>n</sup> Yá Ndiöxí ì<sup>n</sup> xii-chi núú tütú-gá núú càchí-xi:

Yúhú táxí ndècu-í ì<sup>n</sup> téé ñuú Sìón, te cuu-dé dàtná ì<sup>n</sup> yúú, te yúú-á<sup>n</sup> nguínenu ñáyüu te nduá-yu,

te nchaa ñáyi u na quíndáá iní ñáhá xii-dé, te vá ndíxí cuéchi iní-yu sá dúcá<sup>n</sup> ní sándáá iní ñáhá-yu xii-dé. Duha càchí-gá núú tütú-gá.

**10** Te nchòhó ñáyi u ndècu ndihi-í ichi Xítohó Jesucristú càchí tnúhu-í xii-ndo sá cáhá<sup>n</sup> ndihi-í Yá Ndiöxí cuèndá ñáyi u isràél, chi ío cuíní-í sá nánihí tǎhú-yu. <sup>2</sup>Te na cáhá<sup>n</sup> ndáá-í cuèndá-yu sá ío ndücu ndeé-yu xínu cuechí-yu núú Yá Ndiöxí, te dicó-ni sá ñá túú quidé-yu nàcuáa cuíní mée-gá cada-yu. <sup>3</sup>Chi ñá túú quide cuendá-yu nàcuáa cuíní Yá Ndiöxí cada ñaha-gá xii-yu nàcuáa cudü-yu núú-gá, te quide-ní-yu nàcuáa sàni iní mée-yu cudü-yu núú-gá te ñá túú cuíní-yu tñí-yu tnúhu cáhá<sup>n</sup>-gá nàcuáa cudü-yu núú-gá. <sup>4</sup>Te Xítohó Jesucristú ní quide-gá cuèndá sá vǎ cúnü-gá nchaa tnúhu ní chídó tnùní ndíi Moisés, te nchaa ñáyi u na quíndáá iní ñáhá xii-gá te diu-gá cada te cudü-yu núú Yá Ndiöxí.

<sup>5</sup>Te ndíi Moisés cáhá<sup>n</sup> ndíi núú tütú ndíi cuèndá ñáyi u cuíní cudü núú Yá Ndiöxí cuèndá sá nchìcú<sup>n</sup> nihnú-yu nchaa nàcuáa ní cáhá<sup>n</sup> ndíi. Te ní cachí ndíi sá ncháá ñáyi u na càda nchaa nàcuáa ní xáha<sup>n</sup> Yá Ndiöxí xii ndíi ní chídó tnùní ndíi te naníhí tǎhú-yu, te núú dicó ndacú-yu cada-yu nchaa nàcuáa ní cáhá<sup>n</sup> ndíi. <sup>6</sup>Dico vitna núú na quíndáá iní-ó Xítohó Jesucristú, te cudü-o núú Yá Ndiöxí. Te duha càchí tnúhu ní chídó tnùní ndíi núú tütú-gá: “Vá cání iní-ndó sǎ xíní ñùhu-xi cada-ndo ñí<sup>n</sup> sá vǎ yòo tnàhí ndàcu cada sá cáá tñu-ndo àndü te cúñaha-ndo xii Cristú cuu<sup>n</sup>-ndo ndihi-gá núú ñüyú-a. <sup>7</sup>Te ni vǎ cání tucu iní-ndó sǎ quíhí<sup>n</sup> tñu-ndo nñú xindecu nchaa ñáyi u ní xíhí te cada-ndo sǎ Crístú ndoto-gá”, duha càchí tnúhu-á<sup>n</sup> sǎ vǎ dúcá<sup>n</sup> càni iní-ó. <sup>8</sup>Te càchí tucu tnúhu-á<sup>n</sup>: “Tnúhu Yá Ndiöxí sá ndécú ndíhi ñaha-xi xii-ndo

chi sàni iní-ndó cuèndá tnúhu-á<sup>n</sup> te cáhá<sup>n</sup>-ndó”, duha càchí tnúhu-á<sup>n</sup>. Te tnúhu sá ndécú ndíhi-ndo-á<sup>n</sup> cúú-xí tnúhu cáhá<sup>n</sup>-ndí núú ñáyi u, te xini ñuhu-xi sá quíndáá iní-yu tnúhu-á<sup>n</sup>. <sup>9</sup>Te núu na nñuu-ndo cáhá<sup>n</sup>-ndó sǎ Xítohó Jesucristú cúú-gǎ Xítohó-ndó, te quíndáá iní-ndó nì yuhu nì iní-ndó sǎ Yá Ndiöxí ní dándótó-gǎ Xítohó Jesucristú, te naníhí tǎhú-ndó te núú duca<sup>n</sup> na càda-ndo. <sup>10</sup>Te nchaa ñáyi u duca<sup>n</sup> sándáá iní te cáhá<sup>n</sup>-yu sá Xítohó Jesucristú cúú-gǎ Xítohó-yu, ñáyi u-á<sup>n</sup> cúú-yu núú Yá Ndiöxí te naníhí tǎhú-yu.

<sup>11</sup>Te núú tütú Yá Ndiöxí càchí-xi sá ni ñí<sup>n</sup> ñáyi u sándáá iní ñáhá xii Xítohó Jesucristú vá ndíxí cuéchi iní-yu sá dúcá<sup>n</sup> sándáá iní ñáhá-yu xii-gá. <sup>12</sup>Te sá cúú-xí Xítohó Jesucristú chi ñí<sup>n</sup>-ni cùu ñáyi u isràél ndíhi ñáyi u ñá túú cùu ñáyi u isràél, chi diu-gá cúú-gǎ Yaá cúnü taxi tñuní-gá nchaa ñáyi u, te ío váha quide-gá sá cúú-xí nchaa ñáyi u cáhá<sup>n</sup> ndíhi ñaha xii-gá. <sup>13</sup>Te quèe ndáá-xi nàcuáa cáhá<sup>n</sup>-xi núú tütú Yá Ndiöxí núú càchí-xi: “Nchaa ñáyi u na cáhá<sup>n</sup> ndàhú núú Xítohó Jesucristú sá dácacu niñu ñaha-gǎ xii-yu, te ñáyi u-á<sup>n</sup> naníhí tǎhú-yu”, duha càchí-xi núú tütú-gá. <sup>14</sup>Te ñáyi u-á<sup>n</sup> vǎ ñihí-yu nàcuáa cáhá<sup>n</sup> ndàhú-yu núú-gǎ te núú ñá túú sándáá iní ñáhá-yu xii-gá, te ni vǎ ñihí-yu nàcuáa cada-yu quíndáá iní ñáhá-yu xii-gá te núú vátá cündèdóho-gǎ-yu tnúhu-gá, te ni vǎ ñihí-yu tnúhu-gá te núú vá yòo quíhí<sup>n</sup> cútñuhu ñaha xii-yu. <sup>15</sup>Te ni vǎ yòo quíhí<sup>n</sup> duca<sup>n</sup> cútñuhu ñaha xii-yu tnúhu-gá te núú Yá Ndiöxí vá téndàha-gǎ ñáyi u quíhí<sup>n</sup> cútñuhu ñaha xii-yu. Te núú tütú Yá Ndiöxí càchí-xi: “Ío vii ío váha cùu iní-ó vèxi ñáyi u dànehé ñáhá xii-o nàcuáa ndüu tnúhu sá cáhá<sup>n</sup> nàcuáa naníhí tǎhú-ó”, duha cáhá<sup>n</sup>-xi núú tütú-gá.

16 Te ñá ncháá-yu cuiní-yu quindáá iní-yu tnúhu-á". Te ní quee ndáá-xi nàcuáa ní xáha" ndíi Chàíá xii Yá Ndiöxí te duha ní xáha" ndíi xii-gá: "Yòhó Dútú Ndiöxí na nàcani tnúhu-í núu-n sá ïo sacú-ni ñáyiú sàndáá iní-yu tnúhu càhá"-ndí", duha ní xáha" ndíi xii-gá. 17 Te xini ñuhu-xi sá díhna-gá cundedóho-yu tnúhu-á" cuendá duca" te quindáá iní-yu, te tnúhu-á" cúu-xí tnúhu Xítóhó Jesucristú.

18 Te vá cúu càhá"-ó sá ñà túú ní ñíhí ñáyiú isràél tnúhu-gá, chi nchaá-yu ní ñíhí-yu tnúhu-gá, chi núú tütú Yá Ndiöxí cächí-xi:

Cue téé ní càhá" tnúhu Yá Ndiöxí ní càhá"-güedé tnúhu-gá núú ñáyiú, te tnúhu-á" ní xité nuu-xi ñíhí ñuyúí.

Duha cächí-xi núú tütú-gá. 19 Te ni vá càhá"-ó sá ñáyiú isràél ñá túú ní cùu tnuní iní-yu nàcuáa ndúu tnúhu-gá chi ní tecú tnùní-yu. Te ndéé sanaha ñí chídó tnùní ndíi Moisés nàcuáa ní xáha" Yá Ndiöxí xii ñáyiú isràél, te duha ní xáha"-gá xii-yu:

Yúhú cada váha-í nchaa ñáyiú ñá túú cùu ñáyiú isràél, ñáyiú ñá túú cùu-ñuní iní-xi nàcuáa cada váha cundecu núu-í,

te nchòhó cudéé"-ndó nùu-yu te cuu cuédú iní-ndó-yu.

Duha ní xáha" Yá Ndiöxí xii-yu te duca" ñí chídó tnùní ndíi Moisés. 20 Te ndíi Chàíá ñá túú tnàhí ni yùhú ndíi ní quide ndíi núú Yá Ndiöxí ní càhá" ndíi tnúhu-gá, te ní cachí ndíi:

Ñáyiú ñá túú nànducu ñaha xii-í ní cùu ní naníhí ñáhá-yu xii-í,

te ni ñá túú ndùcu tnúhu ñáhá-yu xii-í ní cùu te ní xini ñáhá-yu.

Duha ní cachí ndíi Chàíá ní càhá" ndíi tnúhu Yá Ndiöxí. 21 Te ní quide tucu ndíi núú Yá Ndiöxí ní càhá" ndíi tnúhu-gá cuendá ñáyiú isràél, te ní cachí ndíi: "Nchaá-ni nduu yíhi-í càhá"-í ñáyiú isràél te ñá túú cuiní-yu quindáá iní-yu chi

ío sáá iní-yu", duha ní cachí ndíi Chàíá ní càhá" ndíi tnúhu Yá Ndiöxí.

**Cuendá ñáyiú isràél ñáyiú naníhí tàhú**

**11** Te cuéi duca" dico vá càhá"-ó sá Yá Ndiöxí dáquée tñhú-gá ñáyiú isràél chi diu-ni ñáyiú-á" cúu cuendá-gá, chi yúhú tnàhá-í cùu-í mei téé isràél, te ñani tnàhá-í ní cuu ndíi Àbrahám téé ní xíndecu ndéé sanaha víhi-gá, te diu-ni ñani tnàhá-í ní cuu tucu ndíi Benjamín. 2 Te ndéé sanaha dùca" ní cachí Yá Ndiöxí sá nchùhú ñáyiú isràél cúu-ndí ñáyiú cùu cuendá-gá, te ñá túú dàquee tñhú ñáhá-gá xii-ndí, te nchòhó sa xini-ndó nàcuáa càhá"-xi núú tütú Yá Ndiöxí núú cächí-xi nàcuáa ní quide té Èliás ní ndacá" cuéchi-dé núú-gá cuendá ñáyiú isràél. 3 Te duha ní xáha"-dè xii-gá: "Yòhó Dútú Ndiöxí, ná nàcani tnúhu-í núu-n sá ñí sahní-yu cue téé càhá" tnúhu-n, te ní dátanú-yu núú xihí quití ndúu táhú-n, te yúhú-ñá ní cácu-í ndécù-í dico nànducu ñahá-yu chi tnàhá-í cuiní-yu cahni ñáhá-yu xii-í", duha ní xáha"-dè xii Yá Ndiöxí. 4 Te Yá Ndiöxí ní xáha"-gá xii-dé: "Sa ní dáquée ñí"-í úsá míl cue téé cùu cuendá-í, te ñá túú nèhe-güedé sá yíñùhu núú Bàál sá cächí-yu cùu ndiöxí-yu te ñá ndáá sá ndiöxí cúu-xí", duha ní xáha"-gá xii té Èliás. 5 Te duca" sàtnhá-xi cùu vitna chi xíndecu ñáyiú ní càhá"-gá ní chitnahá ñáhá xii-gá, te duca" ní quide-gá chi ní cundàhú iní ñáhá-gá xii-yu. 6 Te duca" ní càhá" ñáhá-gá xii-yu sá cundàhú iní ñáhá-gá, te ñá dífú cuendá ñí" chiù" quidé-yu duca" ní càhá" ñáhá-gá xii-yu, chi núu dícó cuendá ñí" chiù" quidé-yu duca" ní càhá" ñáhá-gá xii-yu ña, te ñá dífú-gá sá cúu iní mée-gá duca" ní càhá" ñáhá-gá xii-yu te núu duca".

7 Te na cächí tnúhu-í xii-ndo nàcuáa cùu vitna sá ñáyiú isràél cuiní-yu cudíu-yu núú Yá Ndiöxí dico ñá



ndácũ-yu, dico dava ñáyiú ní cáhá<sup>n</sup>-gá ñáyiú-á<sup>n</sup> cúdíú-yu núú-gǎ, te ñáyiú duca<sup>n</sup> ñà túú cùdiu núú-gǎ-á<sup>n</sup> ïo ní cuu sǎá iní-yu núú-gǎ. <sup>8</sup>Te ní quee ndáá-xi nàcuáa càhá<sup>n</sup>-xi núú tütú Yǎ Ndiöxí núú cǎchí-xi: “Yá Ndiöxí ní cachí-gá sá cùú-yu ñáyiú ío ñi díquí-xi, chi cuéi ndéhé-yu nàcuáa càhá<sup>n</sup> tnúhu-gá dico ñá cútñuní iní-yu nàcuáa càhá<sup>n</sup>-xi, te cuéi ndedóho-yu dico ñá túú quée díquí-yu, te duca<sup>n</sup>-ni quidé-yu ndéé vitna”, duha cǎchí-xi núú tütú-gǎ. <sup>9</sup>Te ndíi Dávíí ní cachí ndíi:

Ñáyiú ío váha ndècu te cùdíí iní-yu quidé-yu vico,  
dico yáha-yu dàtná yǎha ñ<sup>n</sup> quiti ngáva trampá àdi ñ<sup>n</sup> quiti ñá cútñuní iní-xi quée xití ñunu,  
chi cuíta nihnú-yu te nacháhu-yu nchaa sá quidé-yu.

<sup>10</sup>Te cùú-yu ñáyiú ñá túú vèdana tècú tnùní, te cùu tucú-yu dàtná ñ<sup>n</sup> ñáyiú ío ndòho nchido ñ<sup>n</sup> sá vèe.

Duha ní cachí ndíi Dávíí.

### **Ñáyiú ñá túú cùu ñáyiú isràél naníhí tǎhú-yu**

<sup>11</sup>Te cuéi duca<sup>n</sup> dico vá cǎchí-ó sǎ sǎ dúcá<sup>n</sup> ñà túú ní quide ndáá ñáyiú isràél te ní xíta nihnu duú<sup>n</sup>-yu, te ñáhá chi sá dúcá<sup>n</sup> ñí quidé-yu te ní ngúndecu ndíhi ðava-gá ñáyiú tnúhu sá càhá<sup>n</sup> nàcuáa naníhí tǎhú-yu, te ñáyiú isràél quiní-yu nàcuáa naníhí tǎhú ñáyiú ñá túú cùu ñáyiú isràél, te tnàhá-yu cudíí iní-yu naníhí tǎhú-yu. <sup>12</sup>Te sá dúcá<sup>n</sup> ñí quide sǎá iní-yu ñá túú ní quide ndáá-yu núú Yǎ Ndiöxí, te xǎá<sup>n</sup> ní cuu-xi ñ<sup>n</sup> sá váha sá cùú-xí ñáyiú nihíi ñuyíú, dico sǎá nduu te cada ñáyiú isràél nchaa nàcuáa càhá<sup>n</sup> Yǎ Ndiöxí, te ðavá-á<sup>n</sup> ïo-gǎ váha cuu xii nchaa ñáyiú nihíi ñuyíú.

<sup>13</sup>Te nchòhó ñáyiú ñá túú cùu ñáyiú isràél cǎchí tnúhu-í xii-ndo sǎ Yǎ Ndiöxí ní cachí-gá sá càhá<sup>n</sup>-í tnúhu-gǎ núú-ndó, te yúhú cǎchí-í sǎ ïo càhnu cuu chiu<sup>n</sup>

quide-í. <sup>14</sup>Te duha càhá<sup>n</sup>-í cuendá sá ñúu cudana ío dava ñáyiú cùu ndí mee-í cudíí iní-yu cada váha ñaha Yǎ Ndiöxí xíi-yu dàtná quidé váha ñaha-gǎ xii-ndo, te naníhí tǎhú-yu. <sup>15</sup>Te sá cuendá sá ñí quee tǎhú ñáyiú isràél ní nacáhá<sup>n</sup> cǎhnú iní tnáhá ñáyiú nihíi ñuyíú ndíhi Yá Ndiöxí, dico na sǎá nduu núcúndecu váha ñáyiú isràél ndíhi Yá Ndiöxí, te ío-gǎ váha tnáhá ñáyiú nihíi ñuyíú, te ñáyiú-á<sup>n</sup> cada iní-ó sǎ cùú-yu dàtná ñáyiú ní xǎhí, dico ðavá-á<sup>n</sup> cada tucu iní-ó sǎ cùú-yu dàtná ñáyiú ní ndoto chi nucúndecu váha-yu ndíhi-gǎ. <sup>16</sup>Te núu sá lúhá-ní ñ<sup>n</sup> tǎlúlú yusa<sup>n</sup> càváha te diu-ni duca<sup>n</sup> càváha nihíi. Te núu càváha yóho ñ<sup>n</sup> yutnu te diu-ni duca<sup>n</sup> càváha-xi nihíi-xi. Te diu-ni duca<sup>n</sup> sǎtnahá-xi cùu ñáyiú isràél, chi ñaní tnáhá-yu ní xín-decu ndéé sanaha ñí cuú-yu ñáyiú ní cuu cuendá ñáhá Yǎ Ndiöxí, te diu-ni duca<sup>n</sup> cùu cuendá ñáhá-gǎ xii mèé-yu ndéé vitna.

<sup>17</sup>Te ío ñ<sup>n</sup> yutnu váha nàni olívú, te dava dité yutnu-á<sup>n</sup> ñí téhndé te ní nucódó dité yutnu òlívú cùtexínu, te mee-nǎ yutnu òlívú váha-á<sup>n</sup> ïo váha quide-xi nchito dité yutnu òlívú cùtexínu-á<sup>n</sup>. Te dité nchaa yutnu òlívú váha-á<sup>n</sup> cùú-xí dàtná ñáyiú isràél, te nchaa dité-xi sá ñí téhndé-á<sup>n</sup> cùú-xí diu-ni ñáyiú isràél ñáyiú ñá túú tnáhá tnúhu ndíhi Yá Ndiöxí. Te dité yutnu òlívú cùtexínu sá ñí nucódó tnáhá-á<sup>n</sup> cùú-xí dàtná ñáyiú ñá túú cùu ñáyiú isràél tnáhá tnúhu ndíhi Yá Ndiöxí. <sup>18</sup>Te vá cǎní iní-ndó sǎ sǎ dúcá<sup>n</sup> ndècu váha-ndo ndíhi Yá Ndiöxí te ío cùnuu-ndo dacúúxí ñáyiú isràél, te vá dúcá<sup>n</sup> cǎni iní-ndó chi sá cuendá nchaa ñaní tnáhá ñáyiú isràél ní xín-decu ndéé sanaha duca<sup>n</sup> ndècu váha-ndo ndíhi Yá Ndiöxí vitna, te ñá díú sǎ cuendá nchòhó ndécú ndíhi váha ñáyiú-á<sup>n</sup> Yá Ndiöxí vitna.

<sup>19</sup> Te cudana sàni iní-ndó te cächí-ndó sá ñáyi isràél ní quee tǎhú-yu cuendá sá nchòhó nucuíní-ndó nǔú-yu nucuñdecu váha-ndo ndíhi Yá Ndiòxí. <sup>20</sup> Te ndáá sá ní quee tǎhú-yu chi ñá túú ní sàndáá iní ñáhà-yu xii-gá, te nchòhó ío váha cùu ndecu-ndo ndíhi-gá chi ní sàndáá iní-ndó-gá, dico vá cächí-ndó sá ío càhnu cuu-ndo, te ío váha chí cuáha cuendá nàcuáa cundecu-ndo. <sup>21</sup> Te cue ñáyi isràél cùú-yu ñáyi cùu cuendá-gá ní cùu te ní dáqueé tǎhú ñáhà-gá xií-yu cuendá sá ñá túú ní sàndáá iní ñáhà-yu xii-gá, te tnàhá nchòhó daquèe tǎhú ñáhà-gá xii-ndo te núu na càda-ndo datná ní quide ñáyi-á<sup>n</sup>. <sup>22</sup> Te chí cáda cuendá sá Yá Ndiòxí ío váha iní-gá, dico cùdée<sup>n</sup>-gá núu nchàa ñáyi ñá túú sàndáá iní ñáhà xii-gá, dico sá cùú-xí nchòhó cue ñáyi sàndáá iní ñáhà xii-gá chi ío váha iní-gá. Te duca<sup>n</sup>-ni cùnduu váha iní-gá sá cùú-xí-ndó te núu vá dáñá ndèe-ndó càda-ndo nacuáa càhá<sup>n</sup>-gá cuendá sá ío váha iní-gá, te núu ñáhà te tnàhá nchòhó quee tǎhú-ndó dàtná ní quee tǎhú ñáyi isràél, ñáyi ñá túú ní sàndáá iní ñáhà xii-gá. <sup>23</sup> Dico núu ñáyi isràél ñáyi ní dáqueé tǎhú ñáhà Yá Ndiòxí quíndáá iní ñáhà-yu xii-gá te nduu cuendá ñáhà tucu-gá xií-yu, te ñáyi-á<sup>n</sup> cùú-yu dàtná dava dité yutnu òlívú sá ní téhndé te ní nucuódo tnáhà tucu. Te duca<sup>n</sup> sàtnahá-xi cùú-yu te núu na quíndáá iní ñáhà-yu xii-gá. <sup>24</sup> Te nchòhó cùú-ndó dàtná nchaa dité yutnu òlívú cùtexínu, chi ñá díú ñáyi isràél cùú-ndó, te dité nchaa yutnu òlívú cùtexínu-á<sup>n</sup> ní nucuódo-xi núu dité yutnu òlívú váha-á<sup>n</sup>. Te yáchí-gá nucuñdecu váha ñáyi isràél ndíhi Yá Ndiòxí, chi cùú-yu dàtná nchaa dité yutnu òlívú váha sá ní téhndé te ní nucuódo tnáhà tucu. Te duca<sup>n</sup> sàtnahá-xi cùú-yu te núu na quíndáá iní ñáhà-yu xii-gá.

### Sáa nduu te naníhí tǎhú ñáyi isràél

<sup>25</sup> Te nchòhó ñáyi ndècu ndíhi-í ichi Xítóhó Jesucristú, na cächí tnúhu-í xii-ndo ñ<sup>n</sup> tnúhu nduu yuhu ni cuu, cuendá sá vá cání iní-ndó sá ío-gá váha sáa díquí-ndó dàcúxí ñáyi isràél, chi dava ñáyi isràél cùú sáa iní-yu núu Yá Ndiòxí nini na ndíhi ñáyi ní cachí Yá Ndiòxí ngúndecu váha ndíhi ñáhà-yu xii-gá, ñáyi ñá túú cùu ñáyi isràél. <sup>26</sup> Te nduu na ndíhi ñáyi-á<sup>n</sup> ngúndecu váha-yu ndíhi Yá Ndiòxí, te dàvá-á<sup>n</sup> naníhí tǎhú ñáyi isràél chi quee ndáá-xi nàcuáa càhá<sup>n</sup> Yá Ndiòxí núu tütú-gá núu cächí-xi:

Ndàa ñúú Sìon quixi Yaá cada naníhí tǎhú nchaa ñáyi, te diu-ni Yaá-á<sup>n</sup> cada-gá cuendá sá dáñá nchàa ñáyi isràél ichi cuèhé ichi duha.

<sup>27</sup> Te yúhú cada càhnu iní-í nchaa cuéchi ñáyi isràél, chi cada-í dàtná ní cachí-í ndéé sanaha.

Duha cächí Yá Ndiòxí núu tütú-gá.

<sup>28</sup> Te sá cuendá tnúhu sá càhá<sup>n</sup> nàcuáa naníhí tǎhú-ó xiá<sup>n</sup> cùú ùhú iní ñáyi isràél Yá Ndiòxí, te sá dúcá<sup>n</sup> quidé-yu xiá<sup>n</sup> nchòhó ní níhí-ndó tnúhu sá càhá<sup>n</sup> nàcuáa naníhí tǎhú-ndó. Te ní cachí Yá Ndiòxí sá ñáyi isràél cuu cuendá-gá, te cùu iní ñáhà-ní-gá xií-yu, te duca<sup>n</sup> quide-gá chi duca<sup>n</sup> ní xáha<sup>n</sup>-gá xii cue ñani tnáhà-yu ní xíndecu ndéé sanaha.

<sup>29</sup> Te Yá Ndiòxí ñá túú nduu úhú iní-gá ñ<sup>n</sup> sá táxí-gá, te ni ñá túú ndíxi cuéchi iní-gá sá càhá<sup>n</sup> ñáhà-gá xii-o. <sup>30</sup> Te nchòhó chi ñá túú sàndáá iní-ndó Yá Ndiòxí ní cùu, dico vitna nini ñá túú sàndáá iní ñáhà ñáyi isràél xii-gá, te ní cundàhú iní ñáhà-gá ní dácacu nihnu ñaha-gá xii-ndo nǔú ùhú núu ndàhú.

<sup>31</sup> Te vitna quidé-yu dàtná ní xóo cada nchòhó cùtnàhà ñá túú ní xóo quíndáá iní-ndó-gá. Dico sáa nduu te natuha ñáhà-yu xii-gá te dácacu nihnu ñaha-gá

xií-yu sá cundàhú iní ñáhá-gă dâtná ní quide ñaha-gă xii nchòhó. <sup>32</sup>Te Yá Ndiöxí ní dáñá-gă sá dúcá<sup>n</sup> cunduu saá iní nchaa ñáiyu cuendá cuiní-gă cundàhú iní ñáhá-gă xií-yu.

<sup>33</sup>Te súuní vâha quide ñaha Yá Ndiöxí xii-o, te ío vâha xini-gă nchaa cuéi sá ío andiu te cuéi sá ío ñuyíú-a, te duca<sup>n</sup> ío vâha sâá nchaa sá xini tñuní-gă. Te ñá ndácú-ó cùtnuní iní-ó nâ cúu nchâa sá sání iní-gă cada-gă, te ni ñá ndácú-ó cùtnuní iní-ó nâcuáa nduu cuendá nchaa sá quidé-gă. <sup>34</sup>Te núu tûtú-gă cächí-xi: “Vá yôo ìi<sup>n</sup> cùtnuní iní-xi nâcuáa sâni iní Yá Ndiöxí, te ni vâ yôo ìi<sup>n</sup> ndâcu dacahu iní ñáhá xii-gă nâcuáa cáhá<sup>n</sup>-gă. <sup>35</sup>Te Yá Ndiöxí ñá túu quide yica iní-gă cada-gă sá vâha sá cúú-xí ñáiyu cuendá ìi<sup>n</sup> sá sãñàhá-yu xii-gă chi ñá túu dù-ca<sup>n</sup> quide-gă”, duha cächí-xi núu tûtú-gă. <sup>36</sup>Te duca<sup>n</sup> chi mee Yá Ndiöxí ní taxi ndecu-gă nchaandi túhú sá ío ñuyíú, te diu-ni mee-gă táxí tñuní-gă nchaa sá ní taxi ndecu-gă, te nchaa cùu-xi cuendá-gă. Te vitna chí ná cächí-ó sã ío càhnu cuu-gă ni caa ni quíhí<sup>n</sup>. Te duca<sup>n</sup> na cunduu.

**Cada-o nâcuáa nduu vétú iní Yá Ndiöxí**

**12** Te vitna nchòhó ñáiyu ndècu ndíhi-í ichi Xítóhó Jesucristú cächí tñuhu-í xii-ndo sã Yá Ndiöxí cundàhú iní ñáhá-gă xii-o chindee ñaha-gă, núu xíá<sup>n</sup> càhá<sup>n</sup> ndàhú-í núu-ndó sã dáñá-ndó mée-ndo núu ndáhá-gă, te cada iní-ndó sã cúu-ndó dâtná ìi<sup>n</sup> táhú sã nchító-ó ní nduu táhú-gă. Te cuu-ndo ñáiyu vâha ñáiyu cada nchaa nâcuáa nduu vétú iní Yá Ndiöxí chi duca<sup>n</sup> tàu-ndó càda-ndo sá cúu-xí-gă. <sup>2</sup>Te vá cãchicú<sup>n</sup> nihnu-gă-ndó càda-ndo datná xíquide nchaa ñáiyu ndècu ichi cuehé ichi duha ndècu ñuyíú-a, te vá cúhú<sup>n</sup>-gă iní-ndó ichi cuehé ichi duha-á<sup>n</sup>, chi mee-nã sã

vâha cuhu<sup>n</sup> iní-ndó, te duca<sup>n</sup> te cutnùní iní-ndó nchâa nâcuáa cuiní Yá Ndiöxí cada-ndo, te nchaa sá cuiní-gă cada-ndo cùu-xi mee-ni sá vâha, sá ío vâha nduu vétú iní-gă, te cùu-xi nchaa sá xini ñuhu-xi cada-ndo núu-gă.

<sup>3</sup>Te sá cuendá chiú<sup>n</sup> ní cundàhú iní ñáhá Yá Ndiöxí ní taxi-gă xii-í xíá<sup>n</sup> núu na càhá<sup>n</sup>-í dóho-ndo vitna: Vá cáni iní-ndó ìi<sup>n</sup> sá ñá túu tàú-ndó càni iní-ndó te cucaha<sup>n</sup>-ndo sã ío càhnu cuu-ndo. Te nchòhó ní sândáá iní-ndó Yá Ndiöxí núu chindee ñaha-gă xii-ndo, te vitna chí cuãha cuendá núu ná daha núu chiú<sup>n</sup>-gă ndacu-ndo càda-ndo. <sup>4</sup>Te nchoo títí xi-chi cùu yiqui cuñú-ó, te ndi díí<sup>n</sup> ndi díí<sup>n</sup> chiú<sup>n</sup> quide-xi ìi<sup>n</sup> ìi<sup>n</sup>-xi. <sup>5</sup>Te duca<sup>n</sup> sãtnahá tucu-xi cùu nchoo ñáiyu ndècu ndíhi Xítóhó Jesucristú chi cuéi ná daha tñáhá-ó dico ìi<sup>n</sup>-ni cùu-o ndíhi-gă, te duca<sup>n</sup> mée-o tucu ìi<sup>n</sup>-ni cùu-o.

<sup>6</sup>Te mee Yá Ndiöxí ní cundàhú iní ñáhá-gă xii-o ní taxi-gă chiú<sup>n</sup> taú-ó càda-o ìi<sup>n</sup> ìi<sup>n</sup>-o te chindee ñaha-gă xii-o, te xini ñuhu-xi cada-o nâcuáa nduu chiú<sup>n</sup> ní taxi-gă cada-o. Te núu ní nduu táhú-ó núú-gă sá càhá<sup>n</sup>-ó tñuhu sá dácàhu iní ñáhá mée-gă xii-o te cáhá<sup>n</sup>-ó nâcuáa sândáá iní-ó chindee ñaha-gă xii-o, <sup>7</sup>àdi ní nduu táhú-ó núú-gă sá ío vâha chindee-o tñaha ñáiyu-o te diu-ni duca<sup>n</sup> càda-o, àdi ní nduu táhú-ó dânehé-ó ñáiyu tñuhu-gă te diu-ni duca<sup>n</sup> càda-o, <sup>8</sup>àdi ní nduu táhú-ó núú-gă sá dácàhá<sup>n</sup>-ó ñáiyu canchicú<sup>n</sup> nihnú-yu ichi-gă te diu-ni duca<sup>n</sup> càda-o, àdi ní nduu táhú-ó núú-gă sá cuãñaha-o xii tñaha ñáiyu-o sã ñihí-ó ndècu ndíhi-o te diu-ni duca<sup>n</sup> càda-o, dico ni yùhu ni iní-ó cuãñaha-o xii-yu, àdi ní nduu táhú-ó núú-gă taxi tñuní-ó te diu-ni duca<sup>n</sup> càda-o, te ni yùhu ni iní-ó càda-o, àdi ní nduu táhú-ó núú-gă chindee-o cué ñáiyu ndècu ndíhi tñundòho tñuhu ndàhú te diu-ni duca<sup>n</sup> càda-o, te ío cudíí iní-ó càda-o chiú<sup>n</sup>-á<sup>n</sup>.

**Nchaa nàcuáa tàù-xi cada nchaa ñáyiu ndècu ichi Xítohó Jesucristú**

<sup>9</sup>Te cuu iní tnáhá ndisa-ndo ì<sup>n</sup> ì<sup>n</sup>-ndo, te daña-ndo nchaa sá cuèhé sá dúhá te cada-ndo mée-ni sá vâha. <sup>10</sup>Te ío cuu iní tnáhá-ndó, te cada-ndo cuendá sá íí<sup>n</sup>-ní ñáyiu cùu-ndo, te ì<sup>n</sup> ì<sup>n</sup>-ndo càni-gá iní-ndó cànehe yiñuhu núu tnáhá-ndó.

<sup>11</sup>Te nducu ndèe-ndo cada-ndo nchaa chiu<sup>n</sup> tahu Xítohó Jesucristú vâ tühío-ndo, te cada-ndo ñi yuhu ni iní-ndó sá cúu-xí-gá.

<sup>12</sup>Te ío cudíí iní-ndó cùndecu-ndo chi ní ngúndecu ndìhi-ndo tnùhu ndee iní sá cùndècu ndìhi-ndo Xítohó Jesucristú, te cada cànhu iní-ndó cuèi nándi na càda ñaha ñáyiu xii-ndo sá cuendá-gá, te vâ dáñá ndèe-ndó càhá<sup>n</sup> ndìhi-ndo Yá Ndiòxí.

<sup>13</sup>Te chindee tnàha-ndo te núu ío dava nchòhó ñáyiu ndècu ichi-gá ío ì<sup>n</sup> sá cúmání xii-ndo, te ío vâha cuu iní-ndó còto-ndo ñáyiu véxi vehe-ndo.

<sup>14</sup>Te cáca<sup>n</sup> táhú-ndó nùú Yá Ndiòxí cuendá nchaa ñáyiu nándi quide ñaha xii-ndo, te cáca<sup>n</sup> táhú-ndó nùú-gá sá ná chindee ñaha-gá xií-yu te ñá díú dà cáca<sup>n</sup> táhú-ndó nùú-gá sá ná dàcuíta nihnu ñaha-gá xií-yu.

<sup>15</sup>Te núu ío ñáyiu cùdíí iní-xi te cudíí iní-ndó ndìhí-yu, te núu ío ñáyiu ndìhú iní-xi te ndìhú iní-ndó ndìhí-yu.

<sup>16</sup>Te cuu ì<sup>n</sup>nuu-ndo cùndecu-ndo, te vâ cadá cànhu-ndo mee-ndo, te tnahá tnùhu-ndo ndìhi nchaa ñáyiu ndàhú iní-xi, te vâ cáni iní-ndó sá ìo-gá túha-ndo.

<sup>17</sup>Te vâ nánchòcáva-ndo nàchinaa-ndo ì<sup>n</sup> sá quidé ñaha ñáyiu xii-ndo, te ío nducu ndèe-ndo cada-ndo mee-ni sá vâha nàcuáa cuu vâha iní ñáyiu. <sup>18</sup>Te ío nducu ndèe-ndo cada-ndo sá ndácú-ndó cùndecu vâha-ndo ndìhi nchaa ñáyiu. <sup>19</sup>Te nchòhó ñáyiu ío cùu iní-í, vâ cáni

iní-ndó nàchinaa-ndo ì<sup>n</sup> sá cadá ñaha ñáyiu xii-ndo, chi cundetú-ndo sá mée Yá Ndiòxí ná nàchinaa-gá sá quidé ñahá-yu xii-ndo, chi quee ndáá-xi nàcuáa càhá<sup>n</sup> Yá Ndiòxí núu tütú-gá núu càchí-xi: “Yúhú dandòho-í-yu chi nachinaa-í nchaa sá quidé-yu”, duha càchí-gá núu tütú-gá. <sup>20</sup>Te xini ñuhu tucu-xi cada-ndo nàcuáa càhá<sup>n</sup> tucu-xi ingá xichi núu tütú-gá núu càchí-xi: “Te núu ñáyiu cùu úhú iní ñahá xii-ndo ñá túú sá cóhó sá cáxí-yu te cuañaha-ndo xií-yu, te núu duca<sup>n</sup> na càda-ndo te ío cucaha<sup>n</sup> núú-yu”, duha càchí-xi núu tütú-gá. <sup>21</sup>Te núu ío ì<sup>n</sup> sá quidé ñaha tnaha ñáyiu-ndo xii-ndo te vâ nánchòcáva-ndo nàchinaa-ndo sá quidé ñahá-yu xii-ndo, chi cada-ndo sá vâha sá cúu-xí-yu, te duca<sup>n</sup> te vâ cadá-ndó sá ñà túú tàù-ndó càda-ndo núu Yá Ndiòxí dàtná quidé-yu.

**13** Te nchaa ñáyiu tàù-yu quindáá iní-yu nchaa cue téé cùchiu<sup>n</sup>, chi Yá Ndiòxí ní cachí-gá sá cùndècu téé cùchiu<sup>n</sup> ñuyúí-a, núu xiá<sup>n</sup> xíndecu-güedé vitna. <sup>2</sup>Te nchaa ñáyiu ñá túú sàndáá iní ñahá xii cue téé cùchiu<sup>n</sup> ñá túú tnahá iní Yá Ndiòxí sá dúca<sup>n</sup> quidé-yu, chi mee-gá ní cachí-gá sá cùndècu-güedé. Te nchaa ñáyiu duca<sup>n</sup> ñà túú sàndáá iní ñahá xii cue téé cùchiu<sup>n</sup> nacháhu-yu sá dúca<sup>n</sup> quidé-yu. <sup>3</sup>Te nchaa ñáyiu quide váha ñá túú yùhú-yu cue téé cùchiu<sup>n</sup> chi quide váha-yu, dico nchaa ñáyiu ñá túú quide váha chi xiyùhú-yu cue téé cùchiu<sup>n</sup>. Te vitna núu nchòhó cuiní-ndó sá vâ yùhú-ndó cuè téé cùchiu<sup>n</sup> te chí cadá vâha, te duca<sup>n</sup> te cáhá<sup>n</sup> váha-güedé cuendá-ndó. <sup>4</sup>Te Yá Ndiòxí duca<sup>n</sup> ñi cachí-gá cundecu-güedé cuendá cada-güedé sá ñà túú ñá cuu cundecu-ndo, te núu ñá túú quide váha-ndo ndècu-ndo te quiyùhú iní-ndó nùú-güedé, chi ñá túú àú<sup>n</sup> ñá cuu ndècu ndìhi-güedé tnùhu ndee iní dandòho-güedé nchaa ñáyiu

ñá túú quide váha, chi Yá Ndiöxí duca<sup>n</sup> ní cachí-gá cundecu-güedé sá dúcá<sup>n</sup> càda-güedé dandòho-güedé nchaa ñáyiú ñá túú quide váha. <sup>5</sup>Núu xíá<sup>n</sup> ío xini ñuhu-xi sá quindáá iní-ndó nchàa cue tée cùchiu<sup>n</sup>, te ñá díú sá yùhú-ndó dandòho ñaha-güedé xii-ndo, chi cada-ndo sá cùtnùní iní-ndó sá cùú-xí ì<sup>n</sup> sá váha. <sup>6</sup>Chi diu cuendá xíá<sup>n</sup> sàcá<sup>n</sup>-ndó díhú<sup>n</sup> núú cuè tée cùchiu<sup>n</sup>, te duca<sup>n</sup> chi Yá Ndiöxí duca<sup>n</sup> ní cachí-gá cundecu-güedé te diu-ná chiù<sup>n</sup> ndéé-güedé ñúhú iní-güedé.

<sup>7</sup>Te nacháhu-ndo nchàa sá tàú-ndó núú nchàa ñáyiú tàú-ndó núú-xi, te cuèí díhú<sup>n</sup> tàú-ndó cuendá ñuhu-ndo núú cuè tée cùchiu<sup>n</sup> àdi nágá díhú<sup>n</sup> tàú-ndó núú-güedé te nacháhu-ndo núú-güedé. Te ío-gá canehe-ndo sá yíñùhu núú nchàa ñáyiú cùnùu, te cáhá<sup>n</sup> váha-ndo ndìhí-yu. <sup>8</sup>Te vá dácuidó-ndó ndùu nacháhu-ndo sá tàú-ndó núú tnàha ñáyiú-ndo, te cuu iní tnáhá-ndó ì<sup>n</sup> ì<sup>n</sup>-ndo. Te núu duca<sup>n</sup> quide-ndo ndecu-ndo ña, te quide-ndo nchaa nacuaá càhá<sup>n</sup> tnúhu sá sánú ìchi ñaha xii-o nacuaá cada-o cundecu-o. <sup>9</sup>Te duha ndùu tnúhu càhá<sup>n</sup> Yá Ndiöxí cuendá nchaa sá vǎ cùú càda-o: “Nchaa nchòhó cue tée vá càhá<sup>n</sup> ndìhi-ndo ñáyiú ìhí te núu ñá díú ñàdìhí-ndó cùú-yu, te duca<sup>n</sup>-ni nchàa nchohó cue ñáyiú ìhí tucu vá càhá<sup>n</sup> ndìhi-ndo tée te núu ñá díú yìi-ndo cuu-güedé, te vá cáhni-ndó tnàha ñáyiú-ndo, te vá dúhú-ndó sǎ ndécú ndìhí-yu, te vá dácàcu-ndo cuéchi neñúú, te vá xíhó-ndó sǎ ndécú ndìhi tnaha ñáyiú-ndo”, nchaa xéhé càchí Yá Ndiöxí sá vǎ cùú càda-o. Te tnúhu-a quide-o ndìhi nchaa dava-gá tnúhu sá sánú ìchi ñaha xii-o nacuaá cada-o cundecu-o, te núu quide-o íngá tnúhu sá càchí-xi: “Cuu iní-ndó nchàa tnaha ñáyiú-ndo

dàtná cùú iní-ndó mée-ndo”, duha càhá<sup>n</sup> tnúhu-á<sup>n</sup>. Te nchaa dava-gá quidé-ó te núu quide-o nacuaá càhá<sup>n</sup> tnúhu-a. <sup>10</sup>Te nchaa ñáyiú cùu iní tnàha ñáyiú-xi te ñá túú quide úhú iní-yu tnàha ñáyiú-yu, te núu duca<sup>n</sup> cùu iní-yu tnàha ñáyiú-yu te quidé-yu nacuaá càhá<sup>n</sup> tnúhu sá sánú ìchi ñaha xii-o nacuaá cada-o cundecu-o.

<sup>11</sup>Te duca<sup>n</sup> xini ñuhu-xi cada-ndo chi sa ní cutnùní iní-ndó nàcuáa ta xica nduu cuáhá<sup>n</sup> ñuyúú-a, te ní sáá nduu sá ìo xini ñuhu-xi ndixi túu iní-ó càda-o nchaa nacuaá càhá<sup>n</sup> Yá Ndiöxí, chi vitna sa ní cuyatni-gá nduu nàcuaca ñaha Xítohó Jesucristú xii-o dàcúúxí ndéé cùt-nàhá ní sándáá iní-ó tnúhu-gá. <sup>12</sup>Te cada iní-ndó sǎ dàtná ì<sup>n</sup> niú sá sǎ ta cuyatni túndaá, duca<sup>n</sup> sǎtnahá-xi cùu ñuyúú yǐcǎ cuéchi-a chi sa ta cùyatni nduu quixi tucu Xítohó Jesucristú, te núu xíá<sup>n</sup> xíní ñuhu-xi dañ-a-o nchaa sá cuèhé sá dúhá te cada-o mée-ni sá váha, te duca<sup>n</sup> te ni ì<sup>n</sup> sá cuèhé sá dúhá vǎ cúnùu-xi taxi tnuní ñáhá-xí xii-o, te duca<sup>n</sup> te vá cùú-gǎ-ó dàtná ñáyiú ndècu núú néé chi cuu-ná-ó dàtná ñáyiú ndècu núú ditó. <sup>13</sup>Te cada-o nchàa nacuaá tàú-xi cunduu cundecu-o dàtná tàú-xi cada ñáyiú ndècu ìchi Xítohó Jesucristú, te vá quìhí<sup>n</sup>-ó vico cuehé vico duha, te vá cùú-ó ñáyiú quihu, te ni vǎ càhá<sup>n</sup> ndìhi-o ñáyiú ìhí te núu ñá díú ñàdìhí-ó cùú-yu, te duca<sup>n</sup>-ni cuè ñáyiú ìhí tucu vá càhá<sup>n</sup> ndìhí-yu tée te núu ñá díú yìi-yu cùu-güedé, te ni vǎ cùndècu-o ìchi díí ìní, te ni vǎ nàà-ó ndìhi tnaha ñáyiú-o, te ni vǎ cùú-ó ñáyiú cuédú ìní. <sup>14</sup>Te vitna nchòhó dañ-a-ndo mée-ndo sá Xítohó Jesucristú ná chindee ñaha-gá xii-ndo càda váha-ndo cundecu-ndo datná quidé mée-gá ndécú-gǎ, te vá cání-gǎ iní-ndó càda-ndo datná ní xóo cada-ndo cùtnàhá ní cùnùu nchàa sá cuèhé sá dúhá iní-ndó.

**Vá cuátnùhu tñaha-o nacúaa  
ndècu-o ichi Xítóhó Jesucristú**

**14** Te núu ìí<sup>n</sup> ñáyíu ndècu ichi Xítóhó Jesucristú ñá túú təcú tnùní váha-yu nàcuáa cuíní Yă Ndiöxí cadá-yu, te quehe<sup>n</sup> cuendá-ni-ndö-yu te vá tənää tnáhá-ndó ndìhí-yu. <sup>2</sup> Chi ìó ñáyíu sàni iní sá cúú vâha iní Yă Ndiöxí sá cúú càxí-yu nání nihí-yu, te dava ñáyíu ñá túú cùtnuní váha iní-yu nàcuáa càhá<sup>n</sup> Yă Ndiöxí te mee-ni yücú xéxí-yu. <sup>3</sup> Te ñáyíu xèxi nchaa núú sá nihí-yu te vá dáquèe tñhü-yu ñáyíu ñá túú xèxi, te duca<sup>n</sup>-ni ñáyíu duca<sup>n</sup> ñá túú xèxi-á<sup>n</sup> vâ cuátnùhú-yu nchaa ñáyíu duca<sup>n</sup> xèxi nchaa núú sá nihí-xi-á<sup>n</sup>, chi tnáhá ñáyíu duca<sup>n</sup> xèxi nchaa núú sá nihí-xi-á<sup>n</sup> quéhé<sup>n</sup> cuendá ñáhá Yă Ndiöxí xíí-yu. <sup>4</sup> Te ñá túú ndècu ndìhi-o tnúhu ndee iní cuatnúhu-o ñáyíu xínu cuechi, chi mee ñáyíu cùu patród<sup>n</sup>-yu tàú-yu cáhá<sup>n</sup>-yu te núu cùndáá ñáyíu xínu cuechi núú-yu àdi ñá túú cùndáá-yu. Te duca<sup>n</sup> sãtnahá-xi cùu ñáyíu xínu cuechi núú Yă Ndiöxí, chi mee-gã cáhá<sup>n</sup>-gá te núu nása quidé-yu, te diu-ni mee-gã cada te cundáá-yu cundecú-yu núú-gã.

<sup>5</sup> Te na càchí tnúhu tucu-í xii-ndo sá ìó ñáyíu càchí sá ìó dava nduu ío càhnu cuu-xí, te ìó tucu dava ñáyíu càchí-yu sá ìí<sup>n</sup>-ni cuu-xí nchaa-ni nduu, te xìni ñuhu-xí sá cùtnuní ndáá iní-yu sá ndáá cúú-xí nàcuáa càhá<sup>n</sup>-yu ìí<sup>n</sup> ìí<sup>n</sup>-yu. <sup>6</sup> Te ñáyíu cànehe íí dava nduu quidé-yu sá nehè-yu sá yíñùhu núú Yă Ndiöxí, te ñáyíu càchí sá ìí<sup>n</sup>-ní cùu-xi nchaa-ni nduu quidé-yu sá nehè-yu sá yíñùhu núú Yă Ndiöxí tnáhá-yu. Te diu-ni duca<sup>n</sup> sãtnahá-xi cùu nchaa ñáyíu xèxi nchaa nání nihí-yu, chi quidé-yu sá nehè-yu sá yíñùhu núú Yă Ndiöxí, chi ndàcá<sup>n</sup> táhü-yu núú-gã cuendá nchaa sá nihí-yu. Te diu-ni duca<sup>n</sup> sãtnahá-xi cùu nchaa ñáyíu ñá túú xèxi nchaa núú sá nchító-ó chi quidé-yu sá nehè-yu sá yíñùhu núú

Yă Ndiöxí, te ndàcá<sup>n</sup> táhü-yu núú-gã cuendá nchaa sá nihí-yu.

<sup>7</sup> Te nchoo cuèi vitna ndècu vívú-ó àdi cuèi na cùú-ó dico ñá díú cuendá mée-ó cùú-ó. <sup>8</sup> Chi vitna ndècu vívú-ó te ndècu-o sá cúú-xí Xítóhó Jesucristú àdi cuèi na cùú-ó dico cuú-ó diu-ni sá cúú-xí-gã, núu xíá<sup>n</sup> cuèi vitna ndècu vívú-ó àdi cuèi na cùú-ó dico diu-ni Xítóhó Jesucristú cúú cuendá ñáhá-gã xii-o. <sup>9</sup> Chi Xítóhó Jesucristú ní xíhí-gá te ní ndoto-gá, te vitna cùu-gá Xítóhó nchaa ñáyíu, cuèi ñáyíu xíndecu vívú te cuèi ñáyíu ní xíhí.

<sup>10</sup> Te nchòhó, ñá túú nduu váha-xi cuatnuhu tñaha-ndo nacúaa ndècu-ndo ichi Xítóhó Jesucristú, te ni ñá túú nduu váha-xi daquèe tñhü tnáhá-ndó, chi nchaa-o sáá nduu cùndecu-o núú Xítóhó Jesucristú, te mee-gã cachí-gá te núu ní quide ndáá-ó àdi ñá túú ní quide ndáá-ó.

<sup>11</sup> Te Yă Ndiöxí càchí-gá núú tütú-gá: Yúhú Yă Ndiöxí ndécú-í càchí tnúhu ndáá-í xii-ndo sá nchaa ñáyíu ngüññí xítí-yu núú-í,

te nchaa-yu cáhá<sup>n</sup>-yu sá yúhú cùú-í Ndiöxí.

Duha càchí Yă Ndiöxí núú tütú-gá.

<sup>12</sup> Núu xíá<sup>n</sup> nchaa-o ndè díí<sup>n</sup> nàcani tnúhu-o núú Yă Ndiöxí nchaa sá ní quide-o.

**Vá dácuíta nihnu tñaha-o**

<sup>13</sup> Núu xíá<sup>n</sup> vá cuátnùhu tñaha-gá-ndó, te cada yica-ndo càda-ndo mee-ni sá vâha, te vá cadá-ndó ìí<sup>n</sup> sá ñá túú tàú-ndó càda-ndo cuendá sá vâ cuíta nihnu dava ñáyíu ndècu ndìhi-ndo ichi Xítóhó Jesucristú. <sup>14</sup> Te yúhú ndécú ndìhi-í Xítóhó Jesucristú te cùtnuní ndáá iní-í sá ncháá nñú sá cúú càxi-o cuu-ni caxi-o te vá cúú cuèchi. Te ñáyíu sàni iní sá vâ cúú càxí-yu te núu na càxí-yu te cuu cuèchi xíí-yu. <sup>15</sup> Te nchòhó, te núu cuendá sá xéxí-ndó nchaa núú sá cúú càxi-ndo, cuendá xíá<sup>n</sup> ñá túú-gã cúú

váha iní nchaa ñáyiú ndècu ndìhi-ndo ichi Xítohó Jesucristú, te ñá túú-gã quidé-ndó sã cúú iní ndisa-ndõ-yu te núu duca<sup>n</sup> na càda-ndo, te núu ì<sup>n</sup> sã sání iní-ndó càxi-ndo te cùtnuní iní-ndó sã xǎ<sup>n</sup> cada-xi cuíta nihnu ñáyiú ndècu ndìhi-ndo ichi Xítohó Jesucristú te vá cáxi-ndó xǎ<sup>n</sup> te núu duca<sup>n</sup>, chi Xítohó Jesucristú ní xǎhí-gã cuendá-yu. <sup>16</sup>Te núu ì<sup>n</sup> sã quidé-ndó sání iní-ndó sã cúú-xí ì<sup>n</sup> sã váha, te ñáyiú càchí-yu sã ñà túú váha te vá cáda-ndó cuendá sã vá càhá<sup>n</sup> cuèhé-yu cuendá-ndó. <sup>17</sup>Te sã yíndàha ñaha Yá Ndióxi xii-o xǎ<sup>n</sup> ío xini ñuhu-xi cada ndáá-ó cùndecu-o, te cundecu váha ndìhi tnàha-o, te cudíí iní-ó cùndecu-o chi Espíritú-gã ndécú ndìhi ñaha-xi xii-o, te nchaa xéhé ìo-gã cúnùu dacúúxí sã cóhó sã cáxí-ó. <sup>18</sup>Te nchaa ñáyiú duca<sup>n</sup> quide nchaa sã ìo-gã xíní ñuhu-xi, xinu cuechí-yu núú Xítohó Jesucristú, te sã dúcá<sup>n</sup> quidé-yu te ndùu vétú iní Yá Ndióxi, te cùdiú-yu núú ñáyiú.

<sup>19</sup>Te nchoo chí ná ndùcu-o nacuaá cada-o cùndecu ndìhi váha tnàha-o, te nducu tùcu-o nacuaá cada-o chindee tnúhu tnàha-o nacuaá cuita cundáá-gá-ó núú Xítohó Jesucristú quíhí<sup>n</sup>. <sup>20</sup>Te ñá díú sã cuendá ì<sup>n</sup> núú sã xéxi-ó, te dàquee tǎhú-ó sã váha ní quide ñaha Yá Ndióxi xii tnàha ñáyiú-o. Te na càchí tnúhu ndáá-í xii-ndo sã ncháá-ní núú sã cúú càxi-o, te dicó-ni sã ñà túú ndùu váha-xi núú sã cuendá-ni sã cáxí-ó ì<sup>n</sup> núú sã cúú càxi-o cuíta nihnu ì<sup>n</sup> tnàha ñáyiú-o. <sup>21</sup>Te váha-gã sã vá cáxí-ó cùnú te vá cóhó ndidí, te ni ñà túú nǎgá cada-o te núu xito-o sã xǎ<sup>n</sup> cada te ngúíta tnàha ñáyiú-o càda-yu sã ñà túú váha, àdi xito-o sã xǎ<sup>n</sup> cada te ngúíta-yu cani ì<sup>n</sup> cani úú iní-yu cundecú-yu ichi Xítohó Jesucristú, te vá cundáá-gá-yu núú-gã te núu duca<sup>n</sup> na càda-o. <sup>22</sup>Te núu ì<sup>n</sup> sã váha sání iní-ó càda-o, te vá dátùu-o núú ñáyiú chi mee-ni núú Yá Ndióxi dátùu-o. Te nchoo cùu-o ñáyiú ío váha

táhú-xi te núu cùtnuní ndáá iní-ó sã quidé ndáá-ó núu nándi cùu sã quidé-ó, te cùtnuní iní-ó sã ñà díú ì<sup>n</sup> cuéchi cùu-xi sã quidé-ó. <sup>23</sup>Te núu nchoo sání iní-ó sã quidé váha-o àdi ñà túú quide váha-o òrè xéxi-ó ì<sup>n</sup> núú sã xéxi-ó, te cuu cuéchi xii-o te núu duca<sup>n</sup> na càda-o. Te duca<sup>n</sup> cùu cuéchi xii-o chi ñà túú ì<sup>n</sup>-ni sã sání iní-ó, chi nchaa núú sã quidé-ó sání ì<sup>n</sup> sání úú iní-ó núu váha-ni àdi ñà túú váha-ni, te cuu cuéchi xii-o sã dúcá<sup>n</sup> quide-o.

### Cada-o sã váha sã cúú-xí tnàha ñáyiú-o

**15** Te nchoo ñáyiú ío váha sàndáá iní ñáhá xii Xítohó Jesucristú, xini ñuhu-xi cuáñaha-o tnúhu ndee iní xii ñáyiú ñà túú ñíhí ndéé cùndecu ichi-gã, te vá cáda-ó mèe-ni sã cúú-xí mèe-o. <sup>2</sup>Te cada-o sã váha nàcuáa cuu váha iní tnàha ñáyiú-o cuendá cuu-xi sã váha sã cúú-xí-yu, te duca<sup>n</sup> cuita ñíhí ndéé-gã-yu quíndáá iní-yu Xítohó Jesucristú. <sup>3</sup>Te Xítohó Jesucristú ñà túú ní quide-gã mee-ni sã cúú váha iní mée-gã, te ní quee ndáá-xi nàcuáa càhá<sup>n</sup>-xi núú tütú Yá Ndióxi nàcuáa ní xáha<sup>n</sup> Xítohó Jesucristú xii-gã, te càchí-xi: “Nchaa ñáyiú cùu úhú iní ñáhá xii-n ní xícuèhé ní xíduha ñáhá-yu xii-í”, duha càhá<sup>n</sup>-xi núú tütú Yá Ndióxi nàcuáa ní xáha<sup>n</sup> Xítohó Jesucristú xii-gã. <sup>4</sup>Te ndéé sanaha ñí ngúndeé nchaa tnúhu Yá Ndióxi núú tütú-gã, te duca<sup>n</sup> ñí ngúndeé cuendá dacuàha-o, te tnúhu-án dánèhé ñáhá-xí cùnduu cahnu iní-ó cuèi nándi nà yáha-o cùndecu-o ichi-gã, te sã xíí tnúhu-án te vá ndìhú-gã iní-ó cùndecu-o, te diu-ni sã xíí tnúhu-án cundecu ndìhi-o tnúhu ndee iní. <sup>5</sup>Te Yá Ndióxi quidé-gã ndécú ndìhi-o tnúhu càhnu iní, te diu-ni-gã quidé-gã ñà túú ndìhú iní-ó ndècu-o. Te xicá<sup>n</sup> tǎhú-í núú-gã sã díú-gã ná cáda te cuu ì<sup>n</sup>nuu-ndo cùndecu-ndo datná ní quide mee Xítohó Jesucristú cút-

nàhá ní xíndecu-gá ñuyíú-a. <sup>6</sup> Te duca<sup>n</sup> nchàa-ndo cuu ì<sup>n</sup>nuu-ndo, te daníhí tnáhá-ndó yòcò tǎchí-ndó te cachí-ndó sǎ ìo càhnu cuu Yá Ndiòxí Yáa cúú Tǎtá Xítóhó Jesucristú.

**Ñáyiú ñá túú cùu ñáyiú isràèl ní ñíhí-yu tnúhu Xítóhó Jesucristú**

<sup>7</sup> Te núu xǎ<sup>n</sup> chí quéhé<sup>n</sup> cuèndá tnáhá dàtná ní quide Xítóhó Jesucristú ní quehe<sup>n</sup> cuèndá ñáhá-gǎ xii-o, te núu duca<sup>n</sup> na càda-ndo te ìo cuu càhnu Yá Ndiòxí.

<sup>8</sup> Te na cǎchí tnúhu-í xii-ndo sǎ Xítóhó Jesucristú ní quixi-gá ní quide-gá sǎ vǎha sǎ cúú-xí ñáyiú isràèl, te sǎ dúcá<sup>n</sup> ní quide-gá xǎ<sup>n</sup> cútnùní ndáá iní-ó sǎ Yá Ndiòxí quidé-gǎ ì<sup>n</sup> sǎ cǎhá<sup>n</sup>-gǎ, chi Xítóhó Jesucristú ní quide-gá nchaa nàcuáa ní xáha<sup>n</sup> Yá Ndiòxí xii cue ñaní tnáhá-ó ní xíndecu ndéé sanaha. <sup>9</sup> Te duca<sup>n</sup> ní quide Xítóhó Jesucristú sǎ vǎha sǎ cúú-xí ñáyiú isràèl cuèndá nchaa ñáyiú ñá túú cùu ñáyiú isràèl cachí-yu sǎ ìo càhnu cuu Yá Ndiòxí, te duca<sup>n</sup> quèsahá-yu chi ìo cùndahú iní ñáhá-gǎ chíndèe ñaha-gǎ xii-yu, te quee ndáá-xi nàcuáa cǎhá<sup>n</sup>-xi núú tütú Yá Ndiòxí núú cǎchí-xi:

Yúhú cachí-í sǎ ìo càhnu cuu-n núú nchaa ñáyiú ñá túú cùu ñáyiú isràèl, te cata-í ndudú chíñuhu ñaha-í xii-n.

Duha cǎchí-xi núú tütú-gá <sup>10</sup> Te cǎchí tucu-xi núú tütú-gá:

Te nchòhó ñáyiú ñá túú cùu ñáyiú isràèl ìo chí cúdíí iní ndíhi ñáyiú isràèl ñáyiú ndècu ndíhi-í.

Duha cǎchí-xi núú tütú-gá. <sup>11</sup> Te cǎchí tucu-xi ìngá xichi núú tütú-gá:

Nchaa nchòhó ñáyiú ñá túú cùu ñáyiú isràèl chí cǎhá<sup>n</sup> sǎ ìo càhnu cuu Yá Ndiòxí,

te nchaa ñáyiú na cǎhá<sup>n</sup>-yu sǎ ìo càhnu cuu-gá.

Duha cǎchí-xi núú tütú-gá. <sup>12</sup> Te ndíí Chàá cǎchí tucu ndíí núú tütú Yá Ndiòxí:

Coo ì<sup>n</sup> ñaní tnáhá ndíi Isàì téé ní xíndecu ndéé sanaha,

te téé-á<sup>n</sup> taxi tnùnì-dé cue ñáyiú ñá túú cùu ñáyiú isràèl,

te ñáyiú-á<sup>n</sup> cundee cùu cahnu iní ñáhá-yu xii-dé.

Duha ní cǎhá<sup>n</sup> ndíí Chàá cǎchí-xi núú tütú-gá.

<sup>13</sup> Te xìcá<sup>n</sup> táhù-í núú Yá Ndiòxí Yáa ní taxi tnúhu ndee ìní ndécú ndíhi-o sǎ méé-gǎ ná càda ìo cudíí ìní-ndó cùndecu-ndo, te duca<sup>n</sup> ìo vǎha cundecu iní-ndó nùú-gǎ chi sàndáá iní-ndó-gǎ, te duca<sup>n</sup> Espíritú-gá ná càda te uu<sup>n</sup>-gá uu<sup>n</sup>-gá cuita ngúndecu ndíhi-ndo tnúhu ndee ìní quíhí<sup>n</sup> sǎ cǎdá vǎha ñaha-gǎ xii-ndo.

<sup>14</sup> Te nchòhó ñáyiú ndècu ndíhi-í ichi Xítóhó Jesucristú cùtnuní ndáá iní-í sǎ nchòhó ìo vǎha iní-ndó, te duca<sup>n</sup> ìo vǎha cùtnuní iní-ndó nchaa tnúhu vǎha, te duca<sup>n</sup> ìo dàsahú tnáhá-ndó nàcuáa cundecu-ndo. <sup>15</sup> Te dava tnúhu ní chídó tnùnì-í núú tütú-a cùu-xi tnúhu sǎ ìo cǎhá<sup>n</sup>-í dóho-ndo, te duca<sup>n</sup> ní tee-í cuèndá sǎ nchòhó dandàcu iní-ndó tnúhu-á<sup>n</sup>, te ní tee-í chi Yá Ndiòxí ní cundàhú iní ñáhá-gǎ xii-í ní taxi-gá chiú<sup>n</sup> quide-í <sup>16</sup> xínú cuèchi-í núú Xítóhó Jesucristú cǎhá<sup>n</sup>-í tnúhu-gá núú ñáyiú ñá túú cùu ñáyiú isràèl. Te tnúhu-á<sup>n</sup> cúú-xí tnúhu sǎ sánú ichi ñaha xii-o nàcuáa naníhí tǎhú-ó, te duca<sup>n</sup> dànehé-í ñáyiú ñá túú cùu ñáyiú isràèl tnúhu Yá Ndiòxí cuèndá cuú-yu dàtná ì<sup>n</sup> sǎ ndúú tǎhú-gǎ, te Espíritú-gá quidé-xí cùu-yu ñáyiú cùdiu núú-gǎ, te cùu vǎha iní ñáhá-gǎ xii-yu.

<sup>17</sup> Te ìo vǎha cùu iní-í cuèndá nchaa chiú<sup>n</sup> quide-í sǎ cúú-xí Yá Ndiòxí, chi Xítóhó Jesucristú ndécú ndíhi ñaha-gǎ xii-í. <sup>18</sup> Te mee-ni nàcuáa quide Xítóhó Jesucristú chíndèe ñaha-gǎ xii-í xǎ<sup>n</sup>-ni cǎhá<sup>n</sup>-í, te sǎ dúcá<sup>n</sup> quide-gá xǎ<sup>n</sup> ní sàndáá iní cue ñáyiú ñá túú cùu ñáyiú isràèl tnúhu-gá. Te duca<sup>n</sup> chi ní



chindee ñaha-gá xii-í ní cáhá<sup>n</sup>-í tnúhu-gá te duca<sup>n</sup>-ni ní chindee ñaha-gá xii-í ní quide-í titní núú sá ní quide-í núú-yu ní xiní-yu. <sup>19</sup>Te Espíritú Yă Ndiöxí ní quide-xi ní quide-í titní núú sá vă yöo tnàhí ndàcu cada ní xiní-yu te ío ní cuñúhu-yu. Te nchaa ñuú ní sáhá<sup>n</sup>-í ní cáhá<sup>n</sup>-í tnúhu Xítohó Jesucristú núú ñáyiu cuéi ndéé ñuú Jerusalén, te cuéi ndéé distritú Ilfricú, núu nchaa ñuú-á<sup>n</sup> ní sáhá<sup>n</sup>-í ní cáhá<sup>n</sup>-í núú-yu tnúhu sá càhá<sup>n</sup> nàcuáa nanhí tǎhú-ó. <sup>20</sup>Te duca<sup>n</sup> ío ndùcu ndee-í càhá<sup>n</sup>-í tnúhu sá càhá<sup>n</sup> nàcuáa nanhí tǎhú-ó núú vǎtá nihí-gá-yu tnúhu cuèndá Xítohó Jesucristú, te duca<sup>n</sup> quide-í chi ñá túú cuíní-í quíhí<sup>n</sup>-í cáhá<sup>n</sup>-í tnúhu-gá núú sà xíndecu ñáyiu càhá<sup>n</sup> tnúhu-gá. <sup>21</sup>Te quide-í nàcuáa càhá<sup>n</sup>-xi núú tütú Yă Ndiöxí núú cǎchí-xi:

Ñáyiu vǎtá nihí-gá tnúhu cuèndá Yaa quixi ñuyú te níhí-yu,  
te duca<sup>n</sup> təcú tnùnì-yu tnúhu-gá.  
Duha cǎchí-xi núú tütú-gá.

**Té Páblú cuíní-dé quíhí<sup>n</sup>-dé ñuú Ròmá**

<sup>22</sup>Te sá dúcá<sup>n</sup> càhá<sup>n</sup>-í tnúhu-gá núú xǎá<sup>n</sup> ñá túú ní ndàcu-í quixi-í quixi coto ñaha-í xii-ndo cuéi duca<sup>n</sup>-ni sàni iní-í quixi coto ñaha-í. <sup>23</sup>Te ní cuu titní cuíá duca<sup>n</sup>-ni sàni iní-í quixi coto ñaha-í xii-ndo, te vitna ní ndíhi-í nchaa íha ní cáhá<sup>n</sup>-í tnúhu Xítohó Jesucristú núú nchàa ñáyiu. <sup>24</sup>Núu xǎá<sup>n</sup> sání iní-í sá ndùu na quíhí<sup>n</sup>-í nàció<sup>n</sup> Èspañá te yáha càhá<sup>n</sup>-í quíní-í nása ndècu-ndo, te dǎvá-á<sup>n</sup> ío cudíí iní-ó cùndecu tnaa-o, te duca<sup>n</sup> te òré nucúhu<sup>n</sup> tucu-í ichi te cada ndee iní-ndó chindee ñaha-ndo xii-í. <sup>25</sup>Te vitna quíhí<sup>n</sup>-í ñuú Jerusalén quínehe-í sá ndúú tǎhú ñáyiu ndècu ichi Xítohó Jesucristú xíndecu yàcá<sup>n</sup>. <sup>26</sup>Te ñáyiu xíndecu ichi Xítohó Jesucristú ndécú distritú Macèdoniá, ndíhi

distritú Acáyá ní cuu íh<sup>n</sup>núú-yu ní sacá<sup>n</sup> tnáhă-yu sá ndúú tǎhú ñáyiu ndàhú xíndecu ichi-gá ndécú ñuú Jerusalén. <sup>27</sup>Te duca<sup>n</sup> tnàhí ní cudíí iní-yu cadá-yu, te duca<sup>n</sup> tnàhí tǎu-yu cadá-yu chindèe-yu ñáyiu xíndecu ñuú Jerusalén. Te ñáyiu Macèdoniá ndíhi ñáyiu Acáyá-á<sup>n</sup> ñà túú cùu-yu ñáyiu isràél. Te ñáyiu xíndecu ñuú Jerusalén cùu-yu mee-ni ñáyiu isràél, te duca<sup>n</sup> tǎu-yu cadá-yu chi sá cuèndá ñáyiu isràél-á<sup>n</sup> ní níhí-yu tnúhu sá càhá<sup>n</sup> nàcuáa nanhí tǎhú-yu, núu xǎá<sup>n</sup> tǎu-yu chindee ñahá-yu ndíhi nchaa sá nihí-yu. <sup>28</sup>Te sǎtá ná yáha quínguáha cuèndá-í-yu sá ndúú tǎhú-yu, te duca<sup>n</sup> te dǎtnùnì quee-í quíhí<sup>n</sup>-í nàció<sup>n</sup> Èspañá, te ichi yáha-í yáha càhá<sup>n</sup>-í núú ndécú-ndó. <sup>29</sup>Te cùtnunì ndáá iní-í sá òré ná quèxio-í núú ndécú-ndó, te Xítohó Jesucristú ío chindee ñaha-gá xii-í cáhá<sup>n</sup>-í tnúhu-gá núú-ndó nàcuáa ío váha cundecu-ndo ichi-gá.

<sup>30</sup>Te nchòhó ñáyiu ndècu ndíhi-í ichi Xítohó Jesucristú càhá<sup>n</sup> ndàhú-í núú-ndó sá ío chindee ñaha-ndo xii-í cáhá<sup>n</sup> ndíhi-o Yă Ndiöxí cuèndá-í, te duca<sup>n</sup> càda-ndo chi ndècu ndíhi-ndo Xítohó Jesucristú. Te Espíritú Yă Ndiöxí quidé-xí cùu iní tnáhá-ó íh<sup>n</sup> íh<sup>n</sup>-o. <sup>31</sup>Te ío chí cǎcá<sup>n</sup> tǎhú núú Yă Ndiöxí sá ná còto ñaha-gá xii-í, te ñá túú ñà cada ñaha nchàa ñáyiu ñá túú sàndáá iní ñáhá xii-gá xíndecu distritú Jùdeá. Te cǎcá<sup>n</sup> tǎhú tucu-ndo núú-gǎ sá nchǎá sǎ cǎnèhe-í quíhí<sup>n</sup> nduu tǎhú ñáyiu ndècu ichi-gá ndécú ñuú Jerusalén ío váha cuu iní-yu quehe<sup>n</sup> cuèndá-yu. <sup>32</sup>Te duca<sup>n</sup> càda-ndo cuèndá sá núu Yă Ndiöxí ná cǎchí-gá te ío cudíí iní-í òré quèxio-í núú ndécú-ndó, te ío váha cuu iní-í cundecu ndíhi ñaha tnài xii-ndo. <sup>33</sup>Te vitna xicá<sup>n</sup> tǎhú-í núú Yă Ndiöxí Yaa quidé ío váha cùu iní-ó ndècu-o sá ná chindee chitúu ñaha-gá xii-ndo nchàa-ndo. Te duca<sup>n</sup> na cùnduu.

Té Páblú quidé ndèe iní-dé  
ñáyiú ndècu ñuú Ròmá

**16** Te yúhú tendaha-ĩ tá Fèbè quixi-xi núú ndécú-ndó, te tñàhá-xi ndècu-xi ichi Xítóhó Jesucristú, te quide-xi chiu<sup>n</sup> Yá Ndiöxí sá cúú-xí ñáyiú ndècu ichi Xítóhó Jesucristú xĩndecu ñuú Cèncreá. <sup>2</sup>Te cuiní-í sá ïo váha cuu iní-ndó quèhe<sup>n</sup> cuendá-ndó-xí, chi ndècu ndíhi-xi Xítóhó Jesucristú, te cada-ndo nàcuáa tàù-xi cunduu dàtná tàù-xi cada ñáyiú ndècu ichi-gá, te ïo chindee-ndo-xi te núú ná cúú sá xíní ñùhu-xi, chi tñàhá-xi ïo chindee-xi cue ñáyiú ndècu ichi Xítóhó Jesucristú, te tñàhá yúhú duca<sup>n</sup> ïo chindee-xi.

<sup>3</sup>Te cúñaha-ndo ïo na càda ndee iní té Àquilú ndíhi ñadìhí-dé tá Priscilá, chi ñáyiú-á<sup>n</sup> ñí quide chiú<sup>n</sup>-í ndíhí-yu ní quide-ndí chiú<sup>n</sup> Xítóhó Jesucristú. <sup>4</sup>Chi mèe-yu ní cácu cuú-yu sá cuendá sá ñí dácácu ñàhá-yu xii-í sá ñí yáha-í, núú xíá<sup>n</sup> ïo ndàcá<sup>n</sup> táhù-í núú-yu, te ñá díú-ní yúhú duca<sup>n</sup> ïo ndàcá<sup>n</sup> táhù-í núú-yu chi tñàhá nchaa ñáyiú ñá túú cùu ñáyiú isràèl xĩndecu ichi-gá xĩndecu nchaa xichi duca<sup>n</sup> ïo ndàcá<sup>n</sup> táhù-yu núú tē Àquilú ndíhi núú ñadìhí-dé tá Priscilá. <sup>5</sup>Te cúñaha tùcu-ndo sá ïo na càda ndee iní nchaa ñáyiú xĩndecu ichi Xítóhó Jesucristú tàcá vehe té Àquilú ndíhi tá Priscilá dácuahá-yu tñúhu-gá, te cúñaha tùcu-ndo sá ïo na càda ndee iní té Epènetú chi tñàhá-dé ïo ñùhu iní-í-dé, chi tée-á<sup>n</sup> cúú-dě tée díhna nuu ñí sándáá iní tñúhu Xítóhó Jesucristú distritú Acăyá. <sup>6</sup>Te cúñaha tùcu-ndo sá ïo na càda ndee iní tá Màriá xíchí ndécú ndíhi-ndo, xíchí ïo ndùcu ndee xinu cuechi núú Xítóhó Jesucristú. <sup>7</sup>Te cúñaha tùcu-ndo sá ïo na càda ndee iní cue tée cùu ndí mee-í té Àndrónicú ndíhi té Jüniás, chi tñàhá-güedé ní xíhi ndíhi ñaha-güedé xii-í veceaá, te ïo cùdiu-güedé núú nchaa cue tée ní táúchíú<sup>n</sup> Jèsús

cáhá<sup>n</sup> tñúhu-gá. Te díhna-gá-güedé ní sándáá iní-güedé tñúhu Xítóhó Jesucristú dácúúxí yúhú.

<sup>8</sup>Te cúñaha-ndo sá ná càda ndee iní té Àmpliás chi tñàhá-dé ïo ñùhu iní-í-dé, te ndècu-dé tñàhá-dé ichi Xítóhó Jesucristú. <sup>9</sup>Te cúñaha tùcu-ndo xii té Bánú tée cündíhi ñaha xii-o quide-o chiu<sup>n</sup> Xítóhó Jesucristú sá ná càda ndee iní-dé, te cúñaha tùcu-ndo xii té Èstaquis sá ná càda ndee iní-dé chi tñàhá-dé ïo ñùhu iní-í-dé. <sup>10</sup>Te cúñaha tùcu-ndo xii té Àpelés sá ïo na càda ndee iní-dé, chi tée-á<sup>n</sup> ïo váha cündáá-dé núú Xítóhó Jesucristú, te cúñaha tùcu-ndo xii ñáyiú xĩndecu vehe té Àristóbulú sá ïo na càda ndee iní-yu. <sup>11</sup>Te cúñaha-ndo xii té Heròdión tée cùu ndí mee-í sá ïo na càda ndee iní-dé, te cúñaha-ndo xii ñáyiú ndècu ichi Xítóhó Jesucristú xĩndecu vehe té Nàrcisú sá ïo na càda ndee iní-yu. <sup>12</sup>Te cúñaha-ndo xii tñàhá tá Trifená ndíhi tá Trifosá sá ïo na càda ndee iní-yu, chi tñàhá-yu quidé-yu chiú<sup>n</sup> Xítóhó Jesucristú. Te tñàhá tá Pèrsidá xíchí ndécú ndíhi-o ichi Xítóhó Jesucristú cúñaha-ndo xii-xi sá ïo na càda ndee iní-xi, chi tñàhá-xi ïo ndùcu ndee-xi quide-xi chiu<sup>n</sup> Xítóhó Jesucristú. <sup>13</sup>Te cúñaha-ndo tñàhá té Rűfú tée ïo váha sándáá iní tñúhu Xítóhó Jesucristú sá ïo na càda ndee iní-dé ndíhi náná-dě, chi ñaha-á<sup>n</sup> quidé iní-í sá cúú-á<sup>n</sup> dàtná náná-í. <sup>14</sup>Te cúñaha-ndo sá ïo na càda ndee iní té Àsíncritú, ndíhi té Flègonté, ndíhi té Hèrmás, ndíhi té Pàtrobás, ndíhi té Hèrmés, ndíhi nchaa dava-gá cue ñáyiú ndècu ndíhi-o ichi Xítóhó Jesucristú xĩndecu ndíhi-güedé. <sup>15</sup>Te cúñaha tùcu-ndo sá ïo na càda ndee iní té Filólogó, ndíhi tá Jüliá, ndíhi té Nèréú, ndíhi cúha té Nèréú, ndíhi tá Òlimpás, ndíhi nchaa dava-gá ñáyiú sándáá iní tñúhu Xítóhó Jesucristú xĩndecu ndíhí-yu.

<sup>16</sup>Te ío yiñuhu cada ndee iní tnáhá-ndó ì<sup>n</sup> ì<sup>n</sup>-ndo. Te nchaa ñáyiú tàcá nchaa iha dàcuaha tnúhu Xítohó Jesucristú quidé ndèe iní ñáhá-yu xii-ndo.

<sup>17</sup>Te nchòhó ñáyiú ndècu ndihi-í ichi Xítohó Jesucristú càhá<sup>n</sup>-í dóho-ndo sá cadá cuèndá-ndó nùu ìó ñáyiú quide nacuaá vá cúú ì<sup>n</sup>nuu-ndo cundecu-ndo, chi ñáyiú-á<sup>n</sup> sánú ìchi ñahá-yu ì<sup>n</sup> ichi ñá túú vâha, chi ñá túú ì<sup>n</sup>-ni cuu-xi tnúhu càhá<sup>n</sup>-yu ndihi tnúhu sá ñí ñíhí-ndó ndècu ndihi-ndo, te ñáyiú duca<sup>n</sup> xíquide vá ñíhí tnáhá-gã-ndó ndihi-yu. <sup>18</sup>Chi ñáyiú-á<sup>n</sup> ñá túú quidé-yu chiú<sup>n</sup> sá cúú-xí Xítohó Jesucristú, chi mee-ni sá cúú-xí mèe-yu quidé-yu, te mee-ni nchaa tnúhu sá ìo vii ío váha cuáhá<sup>n</sup> càhá<sup>n</sup>-yu òré cuáhá<sup>n</sup>-yu dândahú-yu nchaa ñáyiú ío yáchí sàndáá iní-xi ì<sup>n</sup> tnúhu. <sup>19</sup>Te nchaa ñáyiú ñíhí-yu tnúhu sá nchòhó sàndáá iní-ndó tnúhu Xítohó Jesucristú, núu xíá<sup>n</sup> ío cùdíí iní-í. Te cuíní-í sá nchòhó ío váha cutnúní iní-ndó nàcuáa cada-ndo mèe-ni sá vâha, te vá cání iní-ndó càda-ndo datná xíquide nchaa ñáyiú ndècu ichi cuehé ichi duha. <sup>20</sup>Te Yá Ndiöxí Yaá quidé ìo váha cùu iní-ó ndècu-o ío ndihi cada-gá cuèndá sá sàcuíhná ñá túú-gã ná cada ñaha-xi xii-ndo, te xicá<sup>n</sup> táhù-í núú Xítohó Jesucristú sá ìo na chindee chitúu ñaha-gã xii-ndo.

<sup>21</sup>Te té Timùteú tée quide ndihi-í chiú<sup>n</sup> Xítohó Jesucristú iha quide ndee iní ñáhá-dě xii-ndo, te tnàhá té Lùciú, ndihi té Jàson, ndihi té Sosipàtér cue tée cùu ndi mee-í quidé ndèe iní ñáhá-güedě xii-ndo.

<sup>22</sup>Te tnàhá yúhú té Tèrciú tée càduha tutú-a cuèndá té Páblú quidé ndèe iní

ñáhá-í xii-ndo, chi ì<sup>n</sup>-ni cùu-o ndihi Xítohó Jesucristú.

<sup>23</sup>Te tnàhá té Gâyú tée dii vèhe-xi ndecu-í quidé ndèe iní ñáhá-dě xii-ndo, te òu-dé ní taxi nùu-dé vehe tàcá ñáyiú dàcuahá-yu tnúhu Xítohó Jesucristú. Te tnàhá té Èrastú tée yìndaha díhú<sup>n</sup> nùú quidé ndèe iní ñáhá-dě xii-ndo, te tnàhá té Cuártú tée ndècu ndihi-o ichi Xítohó Jesucristú quidé ndèe iní ñáhá-dě xii-ndo.

<sup>24</sup>Te xicá<sup>n</sup> táhù-í núú Xítohó Jesucristú sá ìo na chindee chitúu ñaha-gã xii-ndo nchaa-ndo. Te duca<sup>n</sup> na cùnduu.

### **Cáhá<sup>n</sup>-ó sá ìo càhnu cuu Yá Ndiöxí**

<sup>25</sup>Te vitna chí ná càchí-ó sá ìo càhnu cuu Yá Ndiöxí, chi mee-gã cada te ío-gã cuita ñíhí ndéé-gã-ndó cùndecu-ndo ichi Xítohó Jesucristú dàtná càchí tnúhu sá càhá<sup>n</sup> nàcuáa naníhí tàhù-ó, tnúhu sá dánèhé-í ñáyiú cuèndá Xítohó Jesucristú, te nchaa tnúhu-a ì<sup>n</sup>-ni cùu-xi ndihi nchaa tnúhu sá ñí cachí Yá Ndiöxí cuu yuhu ndèe cùtnàhá ní ngáva ñuyíú, te vitna ní quee túu-xi, <sup>26</sup>chi mee Yá Ndiöxí ní dátúu-gá núú-ó vitna, te càhá<sup>n</sup>-ndí nàcuáa ní chídó tnúní cue tée ní xóo càhá<sup>n</sup> tnúhu Yá Ndiöxí ndéé sanaha. Te duca<sup>n</sup> tnúhu sá ndúú yùhu ni cuu ta xíté nuu-xi ñíhí ñuyíú cuáhá<sup>n</sup>, chi duca<sup>n</sup> ñí cachí Yá Ndiöxí Yaá ndécú nchaa nduu nchaa quíú cunduu cuèndá sá quèndáá iní ñáhá ñáyiú xii-gá, te tnií-yu nchaa tnúhu càhá<sup>n</sup>-gá.

<sup>27</sup>¡Te ì<sup>n</sup>-dii-ni Yá Ndiöxí cúú-gã Yaá ío sàá sá xiní tnúní-xi! ¡Te nchaa-o chí ná càchí-ó sá ìo càhnu cuu-gá, chi ndècu ndihi-o Xítohó Jesucristú, te duca<sup>n</sup>-ni càda-o ni caa ñí quíh<sup>n</sup>! Te duca<sup>n</sup> na cùnduu. Te ío chí cadá ndèe iní-ñá vitna.

## TUTÚ DÍHNA NUU NĪ CADÚHA TÉ PĀBLÚ QUIHĪ<sup>n</sup> NDAHA NĀYIU ÑUÚ CÒRINTÚ

**Té Pāblú cādūha-dé tutú quihĪ<sup>n</sup>  
ndaha nāyiu x̄ndecu ichi Xítohó  
Jesucristú ndécú ñúú Còrintú**

**1** Yúhú té Pāblú ní cáhá<sup>n</sup> ñáhá Yá Ndiöxí xii-í cuendá sá cáhá<sup>n</sup>-í tnúhu Xítohó Jesucristú núú nāyiu, chi duca<sup>n</sup> nĭ cachí Yá Ndiöxí cunduu. Te cādúha-í tutú-a ndihi té Sostenés té ndècu ndihi-o ichi Xítohó Jesucristú <sup>2</sup>cuendá daquixi-í ndaha nchòhó nāyiu x̄ndecu ichi Yá Ndiöxí ndécú ñúú Còrintú, chi nchòhó cúu-ndó nāyiu cùu cuendá Yá Ndiöxí cuendá sá ndécú ndihi-ndo Xítohó Jesucristú. Te diu-ni-ndo cùu-ndo nāyiu ní cáhá<sup>n</sup> ñáhá Yá Ndiöxí cuendá cundecu yĩñuhu-ndo núú-gă, ndihi nchaa dava-gă nāyiu ndècu nchaa xichi, nāyiu cāchí sá ïo cāhnu cuu Xítohó Jesucristú. Te Yaá-á<sup>n</sup> cúu-gă Xítohó-yu, te diu-ni-gă cúu-gă Xítohó nchoo tucu. <sup>3</sup>Te xicá<sup>n</sup> táhù-í núú Tātá-ó Dütú Ndiöxí ndihi núú Xítohó Jesucristú sá ndi nduú-gă ïo na chindee chitúu ñaha-gă xii-ndo, te ïo váha cuu iní-ndó cundecu-ndo.

**Yá Ndiöxí ïo chindee ñaha-gă  
xii-o cuendá sá ndécú-ó  
ndihi Xítohó Jesucristú**

<sup>4</sup>Te duca<sup>n</sup>-ni ïo ndàcá<sup>n</sup> táhù-í núú Yá Ndiöxí cuendá-ndó, chi mee-gă ïo chindee chitúu ñaha-gă xii-ndo sã cuendá Xítohó Jesucristú. <sup>5</sup>Te cuendá sá ndécú-ndó ndihi Xítohó Jesucristú, núú xĩá<sup>n</sup> Yá Ndiöxí ïo chindee ñaha-gă xii-ndo sãá díquí-ndó nàcuáa cáhá<sup>n</sup>-ndó, ndihi nàcuáa cùnuni iní-ndó, <sup>6</sup>chi tnúhu sá ni nĩhí-ndó cuendá Xítohó Jesucristú ní quée-xi iní-ndó. <sup>7</sup>Te xĩá<sup>n</sup> nũ nchaa sá vāha ñá túú tnàhí

cùmání xii-ndo chi Yá Ndiöxí ïo chindee ñaha-gă. Te duca<sup>n</sup> quide-gă nini nchòhó ni yùhu ni iní-ndó ndètu-ndo sáá nduu quixi tucu Xítohó Jesucristú. <sup>8</sup>Te Yá Ndiöxí duca<sup>n</sup>-ni ïo chindee ñaha-gă xii-ndo cuendá sá vã yõ teñaha cuèchi nduu na quixi tucu Xítohó Jesucristú. <sup>9</sup>Te nchaa sá cáhá<sup>n</sup> Yá Ndiöxí dacuití quide-gă, te diu-gă cúu-gă Yaá ní cáhá<sup>n</sup> ñáhá xii-ndo cuendá cuu ï<sup>n</sup>nuu-ndo ndihi Déhe-gă Xítohó Jesucristú Yaá cúu Xítohó-ó.

**Ñá túú cùu ï<sup>n</sup>nuu nāyiu ndècu  
ichi Xítohó Jesucristú**

<sup>10</sup>Te nchòhó nāyiu ndècu ndihi-í ichi Xítohó Jesucristú cáhá<sup>n</sup>-í dóho-ndo sã vã ndi díí<sup>n</sup> càni iní-ndó, te ïo cuu ï<sup>n</sup>nuu-ndo cundecu-ndo, te ï<sup>n</sup>-ni càni iní-ndó, te ï<sup>n</sup>-ni càda-ndo chi duca<sup>n</sup> cuiní-gă cunduu. <sup>11</sup>Te duha cáhá<sup>n</sup>-í dóho nchòhó nāyiu ndècu ndihi-í ichi Xítohó Jesucristú, chi cue nāyiu vehe té Clòè ní cachí tnúhu-yu xii-í sá ñà túú cùu ï<sup>n</sup>nuu-ndo ndecu-ndo. <sup>12</sup>Te duha ndùu tnúhu ní nĩhí-í nàcuáa cùu ndecu-ndo, chi dava-ndo cāchí-ndó: “Yúhú cúu-í cuendá té Pāblú.” Te dava-ndo cāchí-ndó: “Yúhú cúu-í cuendá té Àpolós.” Te dava-ndo cāchí-ndó: “Yúhú cúu-í cuendá té Pèlú.” Te dava tucu-ndo cāchí-ndó: “Yúhú cúu-í cuendá Xítohó Jesucristú”, duha cāchí-ndó. <sup>13</sup>Te vã dúcá<sup>n</sup> cáhá<sup>n</sup>-ndó chi ñá túú nã daha Xítohó Jesucristú ndécú chi ï<sup>n</sup>dii-ni-gă. Te ñá díú yúhú té Pāblú ní xĩhí-í núú cùrúxí sá cuendá-ndó, te ni ñà túú ní sàndute-ndo cuendá sá yúhú cuu cuendá ñáhà-í xii-ndo. <sup>14</sup>Te táxāhu xii Yá Ndiöxí chi ñá díú nchāa-ndo ni dacuandute-í, chi té Crispú-ni ndihi té Gāyú-ni ní dācuándute-í-güedé. <sup>15</sup>Te xĩá<sup>n</sup> nũ vã cúu tnàhí cáhá<sup>n</sup>-ndó sã nĩ sandute-ndo sã cúu cuendá ñáhà-í xii-ndo. <sup>16</sup>Te ní ndacu tucu iní-í sá tnàhá tucu nāyiu cùu ndi mee té Èstéfanás ní dācuándute-í, te diu-ná

ñáyi-u-á<sup>n</sup> te sànuu sá ñà túú-gă nágá ñáyi-u ni dâcuandute-í. <sup>17</sup> Te Xítohó Jesucristú ñá túú ní tëndaha ñaha-gá xii-í sá dâcuandute-í ñáyi-u, chi ní tendaha ñaha-gá xii-í sá cãhá<sup>n</sup>-í tnúhu-gá núú-yu, tnúhu sá cãhá<sup>n</sup> nâcuáa naníhí tãhú-ó. Te ñá túú cãhá<sup>n</sup>-í dâtná cãhá<sup>n</sup> ñáyi-u túha. Te duca<sup>n</sup> quide-í cuendá sá nchòhó quíndáá váha iní-ndó tnúhu sá cãhá<sup>n</sup> nâcuáa ní xíhí Xítohó Jesucristú núú cùrúxí. Chi núu na cãhá<sup>n</sup>-í dâtná cãhá<sup>n</sup> ñáyi-u túha te nchòhó vá quíndáá iní-ndó tnúhu-á<sup>n</sup> nâcuáa tàú-xi cunduu.

### Sá cuendá Xítohó Jesucristú cútnùní iní-ó sá ïo cãhnu cuu Yá Ndiöxí

<sup>18</sup> Te nchaa ñáyi-u ta xíta nihnu cuáhá<sup>n</sup> cãhí-yu sá ñà túú nândíhi tnúhu sá cãhá<sup>n</sup> nâcuáa ní xíhí Xítohó Jesucristú núú cùrúxí, dico sá cúú-xí nchò ñáyi-u sa ní naníhí tãhú, chi tnúhu-á<sup>n</sup> cúú-xí ì<sup>n</sup> tnúhu sá ñí taxi Yá Ndiöxí ndécú ndíhi-o cuendá ndacu-gá cada-gá nchaa nâcuáa cuíní-gá iní-ó, <sup>19</sup> te quèe ndáá-xi nâcuáa cãhá<sup>n</sup>-gá núú tütú-gá núú cãhí-xi: Yúhú cada-í te nchaa ñáyi-u túha vá nândíhi-gá nchaa sá xíní tnùní-yu, te nchaa ñáyi-u ío váha sàá díquí-xi vá nândíhi-gá nchaa nâcuáa sàni iní-yu.

Duha cãhí Yá Ndiöxí núú tütú-gá.

<sup>20</sup> Te xíá<sup>n</sup> cútnùní iní-ó sá ncháá ñáyi-u sàni iní-xi sá ïo túha ndècu ñuyíú-a, ndíhi nchaa cue tée dâcuaha ñaha xii-yu nchaa tnúhu ní chídó tnùní ndíí Moisés, ndíhi nchaa ñáyi-u ío váha sàá díquí-xi cãhá<sup>n</sup> cuendá nchaa sá ío ñuyíú-a, te nchaa ñáyi-u-á<sup>n</sup> cãhí Yá Ndiöxí sá ñà túú nândíhi nchaa sá xíní tnùní-yu sá cúú-xí-gă. <sup>21</sup> Te Yá Ndiöxí ío váha cùtnuní iní-gá nâcuáa quide-gá, chi ñá túú dàña-gá cundecu ndíhi ñàhá-yu xii-gá sá cuendá nchaa sá ñí sáá díquí-méé-yu, te duca<sup>n</sup> quide-gá chi cuíní-gá sá cùndèdóho-yu tnúhu sá sání iní-yu ñá túú nândíhi. Te sá cuendá tnúhu-á<sup>n</sup>

te naníhí tãhú-yu te núu na quíndáá iní ñàhá-yu xii-gá.

<sup>22</sup> Te cue ñáyi-u isràél cuíní-yu quíní-yu sá vã yõ tnàhí ndàcu cada, te cue ñáyi-u griégú nchìcú<sup>n</sup> nihnú-yu nchaa sá dâcuaha ñáyi-u ío túha. <sup>23</sup> Dico nchoo yìhi-o cãhá<sup>n</sup>-ó núú ñáyi-u sá Xítohó Jesucristú ní xíhí-gá núú cùrúxí. Te cue ñáyi-u isràél ñá túú tnàhí tnàhá iní-yu cundèdóho-yu tnúhu-á<sup>n</sup>. Te cue ñáyi-u ñá túú cùu ñáyi-u isràél cãhí-yu sá ñà túú vèdana nândíhi tnúhu-á<sup>n</sup>. <sup>24</sup> Dico sá cúú-xí nchaa ñáyi-u ní cãhá<sup>n</sup> ñàhá Yá Ndiöxí chi cuèi cùu-yu ñáyi-u isràél àdi ñá túú cùu-yu, dico ñáyi-u-á<sup>n</sup> cãhí-yu sá sã cuendá Xítohó Jesucristú cútnùní iní-yu sá ïo cãhnu cuu Yá Ndiöxí te ndècu ndíhi-gá nchaa sá xíní tnùní-gá. <sup>25</sup> Te sá quidé Yá Ndiöxí cãhí ñáyi-u ñuyíú-a sá ñà túú nândíhi, dico xíá<sup>n</sup> ío-gá nândíhi dâcúúxí sã sání iní-méé-yu. Te sá ñí xíhí Xítohó Jesucristú núú cùrúxí, xíá<sup>n</sup> cãhí ñáyi-u sá ñà túú ní ñíhí ndéé Yá Ndiöxí cada-gá sá ñí sani iní-gá cada-gá. Dico sá dúcá<sup>n</sup> ñí quide Yá Ndiöxí, xíá<sup>n</sup> cúú-xí sã ío-gá ní ñíhí ndéé-gă ní quide-gá ì<sup>n</sup> sá ñí sani iní-gá dâcúúxí sã sání ìní-méé ñáyi-u ñuyíú-a. <sup>26</sup> Te nchòhó ñáyi-u ndècu ndíhi-í ichi Xítohó Jesucristú, chí dândàcu iní nâcuáa ndècu-ndo cútnàhá ní cãhá<sup>n</sup> ñàhá Yá Ndiöxí xii-ndo, chi sacú-ni-ndo túha dâcúúxí ñáyi-u ñá túú ndècu ichi-gá. Te duca<sup>n</sup> sâcú-ni-ndo tàxi tnùní-ndó, te diu-ni duca<sup>n</sup> sâcú-ndó nèhe ñáyi-u sá yíñùhu núú-ndó. <sup>27</sup> Te ñáyi-u ñá túú ndècu ichi Yá Ndiöxí cãhí-yu sá ñà túú tnàhí túha dava-gá tnàha ñáyiú-yu, dico dava ñáyi-u ñá túú túha-á<sup>n</sup> cãhá<sup>n</sup> ñàhá Yá Ndiöxí xii-yu cundecú-yu ichi-gá, te cundecu ndíhi ñaha-gă xii-yu, te duca<sup>n</sup> dândóo canúú-yu nchaa ñáyi-u cãhí sá ïo túha. Te cãhá<sup>n</sup> tucu-gá ñáyi-u cãhí dava-gá ñáyi-u sá ñà túú tnàhí tàu cunuu cundecú-yu ichi-gá, te

duca<sup>n</sup> cùndecu ndihi ñaha-gá xií-yu, te dándóo canúu-yu nchaa ñáiyu cächí sá táxi tnùní. <sup>28</sup>Te duca<sup>n</sup> Yá Ndiöxí cähá<sup>n</sup>-gá ñáiyu ñá túú tnàhí cùnuu cundecu ndihi-gá, ndihi ñáiyu quèe tñú nùú dāva-gá tnàha ñáiyu-xi, ndihi ñáiyu cächí-yu sá ñà túú vēdana nāndīhi, nchaa ñáiyu-á<sup>n</sup> cähá<sup>n</sup>-gá cundecu ndihi-gá, te duca<sup>n</sup> quide-gá cuendá dāndóo canúu-yu nchaa ñáiyu cächí sá ïo cùnuu. <sup>29</sup>Te núu xíǎ<sup>n</sup> ni ñ<sup>n</sup> ñáiyu vā cúú cächí-yu sá ïo cāhnu cuú-yu núú Yá Ndiöxí. <sup>30</sup>Dico nchòhó chi mee Yá Ndiöxí ní quide-gá ndécú-ndó ndihi Xítohó Jesucristú, te Xítohó Jesucristú ní quide-gá ní cutnùní iní-ó sǎ Yá Ndiöxí cúú-gǎ Yaá ndécú ndihi nchaa sá xìní tnùní-gá. Te ñu-ni Xítohó Jesucristú ní quide-gá cuendá sá nchóó vǎ cùndecu-gá cuéchi-o nùú Yá Ndiöxí, te duca<sup>n</sup> cùndecu yiñuhu-o núú-gǎ, te nduu táhú-ó cùndecu-o ndihi-gá ni caa ni quíh<sup>n</sup>. <sup>31</sup>Te sá dúcá<sup>n</sup> quide-gá nùu xíǎ<sup>n</sup> xíní ññuhu-xi cada-o nacuaá cähá<sup>n</sup>-xi núú tütú Yá Ndiöxí núú cächí-xi: “Vá cächí-ndó sǎ mée-ndó ïo cāhnu cuu-ndo, chi cachí-ndó sǎ Yàá cúú Xítohó-ndó ïo cāhnu cuu-gá”, duha cächí-xi núú tütú-gá.

### **Tnúhu sá cähá<sup>n</sup> nacuaá ní cuu ní xíhí Xítohó Jesucristú núú cùrúxí**

**2** Te nchòhó ñáiyu ndècu ndihi-í ichi Xítohó Jesucristú sa ñaha-ndo sá cùtnàhá ní quixi-í ní cähá<sup>n</sup>-í tnúhu Yá Ndiöxí núú-ndó, te ñá túú ní cähá<sup>n</sup>-í dàtná cähá<sup>n</sup> ñ<sup>n</sup> ñáiyu ío váha sǎá díquí-xi, àdi datná cähá<sup>n</sup> ñ<sup>n</sup> ñáiyu ío túha. <sup>2</sup>Chi cùtnàhá ní xíndecu ndihi ñaha-í xii-ndo chi ní sani iní-í sá mée-ní cuendá Xítohó Jesucristú cähá<sup>n</sup>-í núú-ndó ndihi nacuaá ní cuu ní xíhí-gá, te ñu duca<sup>n</sup> ní quide-í. <sup>3</sup>Te cùtnàhá ní quexìo-í núú ndécú-ndó te ni ñǎ cùtnùní iní-í nása cada-í ní cùu, te ío ní quiyùhú iní-í ní cähá<sup>n</sup>-í tnúhu-gá núú-ndó. <sup>4</sup>Te

cùtnàhá ní cähá<sup>n</sup>-í nacuaá nduu tnúhu Xítohó Jesucristú núú-ndó, te ñaha-ndo sá Espiritú Yá Ndiöxí ní chindee ñaha-xi xii-í ní cähá<sup>n</sup>-í tnúhu-gá núú-ndó, te tnúhu-á<sup>n</sup> ní quée-xi iní-ndó. Te ñá túú ní cähá<sup>n</sup>-í ñ<sup>n</sup> tnúhu cāhnu núú-ndó tnúhu sá cähá<sup>n</sup> cue ñáiyu ío váha sǎá díquí-xi. <sup>5</sup>Te duca<sup>n</sup> ní cuu cuendá sá nchòhó quíndáá iní-ndó tnúhu Yá Ndiöxí chi ní quide-gá sá váha sá cúú-xí iní-ndó, te ñá díú sǎ cuendá tnúhu sá cähá<sup>n</sup> ñáiyu cächí sá ïo túha duca<sup>n</sup> ní sándáá iní-ndó tnúhu-gá.

### **Espiritú Yá Ndiöxí quidé-xí cùtnuní iní-ó nacuaá sani iní-gá**

<sup>6</sup>Te nchoo cähá<sup>n</sup>-ó tnúhu cāhnu núú ñáiyu sa ní níhí ndéé ndècu ichi Xítohó Jesucristú. Te tnúhu-á<sup>n</sup> ñà túú cähá<sup>n</sup> ñáiyu ñá túú ndècu ichi-gá, te ni cuè tée yñdaha ñaha xií-yu ñá túú cähá<sup>n</sup>-güedé tnúhu-á<sup>n</sup> chi cue tée-á<sup>n</sup> naa-güedé. <sup>7</sup>Te tnúhu cāhnu-á<sup>n</sup> cúú-xí tnúhu Yá Ndiöxí, te mee-gǎ ní cachí-gá ndéé cùtnàhá vátá ngáva-gá ñuyúú sǎ ncháá ñáiyu na quíndáá iní tnúhu-á<sup>n</sup> te nduu táhú-yu cundecú-yu ndihi-gá núú ïo váha cāa ndecu-gá ni caa ni quíh<sup>n</sup>. Te tnúhu-á<sup>n</sup> ndúú yùhu-xi ni cuu. <sup>8</sup>Te ni ñ<sup>n</sup> cue tée yñdaha cue ñáiyu ñuyúú-a ñá túú tècú tnùní-güedé tnúhu-á<sup>n</sup>, chi núú dicó tècú tnùní-güedé tnúhu-á<sup>n</sup> te vǎ cǎtá cāa-güedé Xítohó Jesucristú núú cùrúxí cahni ñaha-güedé xii-gá ní cùu. Te ñu-ni Yaá-á<sup>n</sup> ïo cāhnu cuu-gá. <sup>9</sup>Dico duca<sup>n</sup> ní cuu chi ní quee ndáá-xi nacuaá cähá<sup>n</sup>-xi núú tütú Yá Ndiöxí núú cächí-xi: Yá Ndiöxí sa ní sani iní-gá nchaa nacuaá cada-gá sá cúú-xí cuendá nchaa ñáiyu cùu iní ñǎhá xii-gá. Te sá ní sani iní-gá cada-gá cúú-xí sǎ vátá quíní-gá ñáiyu te ni vátá cùndédóho-gá-yu, te ni ñá túú tnàhí cùtnuní iní-yu nása cada-gá.

Duha càchí-xi núú tütú-gá. <sup>10</sup>Te mee Yá Ndiöxí ní cachí-gá sá Espíritú-gá cada-xi te nchoo cùtnuní iní-ó nchàa nacuaá sàni iní-gá cada-gá, núu xíá<sup>n</sup> duca<sup>n</sup> tècú tnùnì-ó vitna, chi Espíritú-gá xiní-xi nchaandi túhú nàcuáa sàni iní-gá cada-gá.

<sup>11</sup>Te ñá íí<sup>n</sup> ñáyiú xiní ndáá-yu nàcuáa sàni iní ingá ñáyiú, chi mee ñáyiú-á<sup>n</sup> xiní ndáá-yu nchaa nàcuáa sàni iní-yu. Te duca<sup>n</sup> sátnahá-xi cùu Yá Ndiöxí chi medii-ni Espíritú-gá xiní-xi nchaa nàcuáa sàni iní-gá. <sup>12</sup>Te nchoo chi Yá Ndiöxí ní taxi-gá Espíritú-gá ndécú ndíhi-o, te ñá díú ñùyíú-a duca<sup>n</sup> ni quèe espíritú ní ngúndecu ndíhi-o. Te duca<sup>n</sup> ní taxi-gá Espíritú-gá ndécú ndíhi-o cuendá duca<sup>n</sup> cùtnuní iní-ó nàcuáa ndùu nchaa sá vâha sá dîcô duca<sup>n</sup> ní taxi-gá ndécú ndíhi-o. <sup>13</sup>Te cuendá nchaa sá vâha-á<sup>n</sup> càhá<sup>n</sup>-ndí, te càhá<sup>n</sup>-ndí nàcuáa dàcahu iní ñáhá Espíritú Yá Ndiöxí xii-ndí, te ñá túú càhá<sup>n</sup>-ndí nàcuáa càhu iní ñáyiú ñuyíú-a càhá<sup>n</sup>-yu, te diu-ni nchaa tnúhu dàcahu iní ñáhá Espíritú-gá xii-ndí càhá<sup>n</sup>-ndí, diu-ni nchaa xíá<sup>n</sup> dánèhé-ndí nchaa ñáyiú ndècu ndíhi tucu Espíritú-gá.

<sup>14</sup>Te ñáyiú ñá túú ndècu ndíhi Espíritú Yá Ndiöxí ñá túú tnàhá iní-yu nàcuáa ndùu tnúhu dàtecú tnúhu ñaha Espíritú-gá xíí-yu, te ni ñá túú tècú tnùnì-yu, te càchí-yu sá ñá túú nàndíhi-xi. Te duca<sup>n</sup> chi mee-ni nchàa ñáyiú ndècu ndíhi Espíritú-gá tècú tnùnì-yu nàcuáa ndùu tnúhu-á<sup>n</sup>. <sup>15</sup>Te cue ñáyiú duca<sup>n</sup> ndècu ndíhi Espíritú Yá Ndiöxí cútnuní ndáá iní-yu ná cúú nchàa sá vâha, te vá yôo íí<sup>n</sup> xiní nchaa nàcuáa sàni iní-yu. <sup>16</sup>Te núú tütú Yá Ndiöxí càchí-xi: “Vá yôo íí<sup>n</sup> xiní nàcuáa sàni iní Yá Ndiöxí, núu xíá<sup>n</sup> vá yôo íí<sup>n</sup> ndacu ná danèhé ñáhá xii-gá”, duha càchí-xi núú tütú-gá. Te nchoo chi íí<sup>n</sup>-ni sàni iní-ó ndíhi Xítohó Jesucristú.

### Cue tée xíquide chiú<sup>n</sup> Yá Ndiöxí

**3** Te nchòhó ñáyiú ndècu ndíhi-í ichi Xítohó Jesucristú càchí tnúhu-í xii-ndo sá ñá ní ñíhi-í nàcuáa cada-í càhá<sup>n</sup>-í tnúhu-gá núú-ndó dàtná càhá<sup>n</sup>-í núú nchàa ñáyiú quide nchaa nacuaá càhá<sup>n</sup> Espíritú Yá Ndiöxí, chi ní càhá<sup>n</sup>-í núú-ndó dàtná càhá<sup>n</sup>-í núú nchàa ñáyiú cùnuu nchaa sá cuèhé sá dúhá íní-xi, te ní quide ñaha-í xii-ndo dàtná cue ñáyiú íchí ní sándáá iní tnúhu Xítohó Jesucristú, núu xíá<sup>n</sup> duca<sup>n</sup> ní càhá<sup>n</sup>-í núú-ndó.

<sup>2</sup>Te ní quide ñaha-í xii-ndo dàtná íí<sup>n</sup> déhe yiquí<sup>n</sup> vitna sadi camá, te ñá túú ní quide ñaha-í xii-ndo dàtná cue landú sa xèxi díta, chi ní dánèhé ñáhà-í xii-ndo íí<sup>n</sup> sá ñá túú tnàhí úhú tecú tnùnì-ndó, te ñá túú ní dànèhé ñáhà-í xii-ndo íí<sup>n</sup> sá xítò-í sá vâ tècú tnùnì-ndó. Te quide cuendá-í sá díú-ní dùca<sup>n</sup> vá tècú tnùnì-ndó ndèe vitna te núu na dànèhé ñáhà-í xii-ndo nchàa dava-gá tnúhu. <sup>3</sup>Te duca<sup>n</sup> chi quide-ni-ndo nacuaá sàni iní méé-ndó, chi ndècu-ni-ndo ichi cuédú íní, te nàa ndíhi tnàha-ni-ndo, te ñá túú tnàhí cùu íí<sup>n</sup>nuu-ndo ndecu-ndo. Te xíá<sup>n</sup> cútnuní sá méé-ní nchàa nacuaá sàni iní méé-ndó quide-ndo, te xíquide-ndo dàtná quidé nchàa ñáyiú ñá túú ndècu ichi Xítohó Jesucristú. <sup>4</sup>Te dava-ndo càchí-ndó: “Yúhú cúú-í cuendá té Pàblú.” Te dava-ndo càchí-ndó: “Yúhú cúú-í cuendá té Àpolós”, duha càchí-ndó. Te sá dúcá<sup>n</sup> càhá<sup>n</sup>-ndó xíá<sup>n</sup> cútnuní sá quidé-ní-ndó mèe-ni nchaa nacuaá sàni iní méé-ndó.

<sup>5</sup>Te yúhú té Pàblú càchí tnúhu-í xii-ndo sá ñá túú cùnuu-í, te ni té Àpolós ñá túú cùnuu-dé chi dîcô cue tée xínu cuechi núú Yá Ndiöxí cúú-ndí, te ní càhá<sup>n</sup>-ndí tnúhu-gá núú-ndó, núu xíá<sup>n</sup> ní sándáá iní-ndó. Te ndí díí<sup>n</sup> ndí díí<sup>n</sup> ndùu chiú<sup>n</sup> ní táhú Yá Ndiöxí cada-ndí. <sup>6</sup>Te yúhú cúú-í dàtná íí<sup>n</sup> tée chìhi tatá chi dàcahá<sup>n</sup> ñáhà-í xii-ndo tûha-ndo ichi Yá Ndiöxí. Te té

Àpolós cúú-dě dàtná ìí<sup>n</sup> téé nàcuhũu chi téé-á<sup>n</sup> ndécú-dě dánèhé ñáhá-dě xii-ndo tnũhu-gá. Te Yá Ndiòxí cúú-gă Yá quidé sàhnu tatá ní chihi-í-á<sup>n</sup>, te duha càhá<sup>n</sup>-í chi ðiu-gá quidé-gă tá nihí ndéé-ndó ndècu-ndo ichi-gá. <sup>7</sup>Te núu xíá<sup>n</sup> ni téé chihi tatá te ní téé nàcuhũu ñá túú cùnuu-güedé, dico Yá Ndiòxí ío cùnuu-gá chi ðiu-gá quidé-gă xĩnu tatá-á<sup>n</sup> te sàhnu-xi. <sup>8</sup>Te ìí<sup>n</sup>-ni cùu téé chihi tatá ndihi téé nàcuhũu. Te duca<sup>n</sup> sàtnahá-xi cùu nchúhú cue téé xĩquide chiú<sup>n</sup> Yá Ndiòxí, te nàcuáa ndùu chiú<sup>n</sup> ní quide-ndí te duca<sup>n</sup> cùnduu táhú taxi Yá Ndiòxí nduu táhú-ndí. <sup>9</sup>Te nchòhó cúú-ndó dàtná ìí<sup>n</sup> xichi núú nĩ quée tatá, te nchúhú cúú ìí<sup>n</sup>-nuu-ndí quidé chiú<sup>n</sup>-ndí xíá<sup>n</sup>. Te duca<sup>n</sup> sàtnahá-xi cùu-ndo chi cùu cuendá ñáhá Yá Ndiòxí xii-ndo, te nchúhú cúú ìí<sup>n</sup>-nuu-ndí quidé-ndí chiú<sup>n</sup>-gá.

Te cùu tucu-ndo datná ìí<sup>n</sup> vehe sá vítná sáá, te duca<sup>n</sup> sàtnahá-xi cùu-ndo chi Yá Ndiòxí quidé-gă tá sàhnu nihnu-ndo ichi-gá cuáhá<sup>n</sup>. <sup>10</sup>Te yúhú cúú-í dàtná ìí<sup>n</sup> téé cùnuu dacia vehe te ní tava-í cimièntú-xi, te ðií<sup>n</sup> cue téé véxi dàcaa-güedé ndóho, te ìí<sup>n</sup> ìí<sup>n</sup> cue téé-á<sup>n</sup> ìo xini ñuhu-xi cada cuendá-güedé nàcuáa dacàa-güedé. Núu duca<sup>n</sup> sàtnahá-xi cùu yúhú chi Yá Ndiòxí ní taxi-gá chiú<sup>n</sup> quide-í te chĩndee ñaha-gá, chi díhna-gá-í ní quixi-í ní càhá<sup>n</sup>-í tnúhu Xítohó Jesucristú núú-ndó, te ðií<sup>n</sup> cue téé véxi dàcuaha ñaha-ná xii-ndo tnũhu-gá, te ìí<sup>n</sup> ìí<sup>n</sup> cue téé-á<sup>n</sup> ìo xini ñuhu-xi cada cuendá-güedé nàcuáa dacuàha ñaha-güedé xii-ndo tnũhu-gá. <sup>11</sup>Te cimièntú vehe-á<sup>n</sup> cada iní-ó sã cúú-xí mèe Xítohó Jesucristú, te duca<sup>n</sup> chi yúhú ní dánèhé ñáhà-í xii-ndo nĩ ngúndecu ndihi-ndo Xítohó Jesucristú, te vá yòo-gá cundecu ndihi-ndo chi ìí<sup>n</sup> ðií<sup>n</sup>-ni-gă ndécú. <sup>12</sup>Te dava cue téé dàcaa-güedé vehe váha te chihi-güedé díhú<sup>n</sup> cuàá<sup>n</sup>, ndihi díhú<sup>n</sup> cuixí<sup>n</sup>, ndihi

yúú sã ìo vii càa. Te dava-güedé dacàa-güedé vehe vítú, te dava-güedé dacàa-güedé vehe ité, te dava-güedé dacàa-güedé vehe tnuvixi<sup>n</sup>. <sup>13</sup>Te sáá nduu te nchaa vehe-á<sup>n</sup> càyú-xi, te vehe vítú-á<sup>n</sup> ndihi vehe ité-á<sup>n</sup> ndihi vehe tnuvixi<sup>n</sup>-á<sup>n</sup> ndoo ndoo càyú, te nchaa vehe váha-á<sup>n</sup> vã càyú-xi cuéi na yãha ñuhú. Te nchaa cue téé ní dácáá vèhe váha-á<sup>n</sup> cada iní-ó sã cúú-güedé ñáyiu ío váha quide chiú<sup>n</sup> Yá Ndiòxí. Te nchaa cue téé ní dácáá vèhe vítú, ndihi cue téé ní dácáá vèhe ité, ndihi cue téé ní dácáá vèhe tnuvixi<sup>n</sup> cada iní-ó sã cúú-güedé ñáyiu ñá túú cuiní cada chiú<sup>n</sup> Yá Ndiòxí nàcuáa tàú-xi cunduu. Te sáá nduu te cutnùni nàcuáa ndùu chiú<sup>n</sup> ní quide ìí<sup>n</sup> ìí<sup>n</sup> ñáyiu, chi Yá Ndiòxí càhá<sup>n</sup>-gá nàcuáa ndùu chiú<sup>n</sup> ní quide ìí<sup>n</sup> ìí<sup>n</sup> ñáyiu ní quide chiú<sup>n</sup>-gá. <sup>14</sup>Te cue ñáyiu ío váha xĩquide chiú<sup>n</sup> Yá Ndiòxí te cùdíi chiú<sup>n</sup> quidé-yu, te ñáyiu-á<sup>n</sup> nĩhĩ-yu sá ndúú tãhũ-yu. <sup>15</sup>Te cue ñáyiu ñá túú quide chiú<sup>n</sup> Yá Ndiòxí nàcuáa tàú-xi cunduu, te vá cùdíi chiú<sup>n</sup> ní quidé-yu chi cuíta te ndóo-ná-yu duha, dico mèe-yu chi naníhí tãhũ-yu.

<sup>16</sup>Te yúhú càhá<sup>n</sup>-í dóho-ndo dandacu-í iní-ndó sã cúú-ndó dàtná vehe Yá Ndiòxí, chi Espíritú-gá ndécú ndihi ñaha-xi xii-ndo. <sup>17</sup>Te núu yoo na dànaa ñaha xii nchohó ñáyiu cùu veñúhu-gá, te Yá Ndiòxí danàa ñaha-gá xii ñáyiu-á<sup>n</sup>, te duca<sup>n</sup> càda-gá chi nchòhó cúú-ndó ñáyiu cùu cuendá-gá.

<sup>18</sup>Te vá dándahú-ndó mèe-ndo sã ìo túha-ndo. Te núu ìo dava-ndo sàni iní-ndó sã túha-ndo dàtná sání iní cue ñáyiu ñá túú ndècu ichi Yá Ndiòxí, te cada-ndo sã cúú-ndó dàtná ñáyiu ñá túú tnàhí túha, te duca<sup>n</sup> te cuu ndisa-ndo ñáyiu túha sã cúú-xí Yá Ndiòxí. <sup>19</sup>Te nchaa sã xini tnùnì nchaa ñáyiu càchí sã ìo túha ñá túú ndècu ichi Yá Ndiòxí ñá túú nàndíhi-xi sã cúú-xí-gă. Te càchí-xi núú tütú-gá: “Nchaa ñáyiu càchí sã ìo



túha te Yá Ndiöxí dandöo canúú ñáhá-gă xií-yu núú nchaa sá quidě-yu”, duha cächí-xi núú tütú-gá. <sup>20</sup> Te cächí tucu-xi ingá xichi: “Yá Ndiöxí cútnúni iní-gá nchaa nàcuáa sàni iní ñáiyu cächí sá ïo túha. Te nchaa nàcuáa sàni iní-yu-á” cächí-gá sá ñà túú vèdana nàndíhi-xi”, duha cächí-xi núú tütú-gá. <sup>21</sup> Núu xíá” cáhá”-í dóho-ndo sã vã cächí-ndo sã nchúhú cue tée dànehé ñáhá xii-ndo tnúhu-gá ïo càhnu cuu-ndí. Te nchaa sá ïo ñuyú-a cùu-xi sá vãha sá cúu-xí-ndó. <sup>22</sup> Te cuëi yúhú ndihi té Àpolós ndihi té Pèlú ndécú-ndí sá cúu-xí-ndó, te cuëi nchaa sá ïo ñuyú-a te cuëi nchaa nduu ndècu-ndo te cuëi sá cùu-ndó dico nchaa cùu-xi sá vãha sá cúu-xí-ndó. Te cuëi nchaa sá ndécú tnávíí, te cuëi nchaa sá cóo ndèé cuèé-gá nchaa cùu-xi sá vãha sá cúu-xí-ndó. <sup>23</sup> Te mee-ndo ndècu-ndo sá cúu-xí Xítohó Jesucristú, te mee Xítohó Jesucristú ndécú-gá sá cúu-xí Yá Ndiöxí.

**Nàcuáa nduu chiu<sup>n</sup> quide  
cue tée ní táuchíú<sup>n</sup> Xítohó  
Jesucristú cáhá<sup>n</sup> tnúhu-gá**

**4** Te cada cuèndá-ndó sã nchúhú dicó-ni cue tée xínu cuechi núú Xítohó Jesucristú cúu-ndí, te chiú<sup>n</sup>-á” ní taxi Yá Ndiöxí quidè-ndí càhá<sup>n</sup>-ndí tnúhu sá ní cachí-gá yíyùhu ni cuu. <sup>2</sup> Te xini ñuhu-xi sá ncháá ñáiyu duca<sup>n</sup> ní sãñaha Yá Ndiöxí chiú<sup>n</sup> quidè-yu cada ndáá-yu cadá-yu chiú<sup>n</sup>-á”. <sup>3</sup> Te yúhú ñá túú quide cuèndá-í nũ nása nduu tnúhu càhá<sup>n</sup>-ndó cuèndá-í nũ cùu-í tée vãha àdi ñá túú cùu-í. Te diu-ni duca<sup>n</sup> ñà túú quide cuèndá-í nũ nása-gá càhá<sup>n</sup> nchaa dava-gá ñáiyu cuèndá-í. Te ni mée-í ñá túú càhá<sup>n</sup>-í nũ cùu-í tée vãha àdi ñá túú cùu-í. <sup>4</sup> Te sãnuu iní-í sá ñà túú ñà cúmãni-í núú Yá Ndiöxí, dico ñá dífú sã xíá” te cachí-í sá ñà túú cuëchi-í ndécú núú-gá, chi mee-gã ñáhá ndáá-gá te núu nása quide-í ndécú-í. <sup>5</sup> Te nchòhó vá càhá<sup>n</sup>-gá-ndó sã ñà túú

cùndáá ñáiyu núú Yá Ndiöxí, chi vátá sãá-gá nduu cùndáá cuëchi-yu. Te na sãá nduu quixi tucu Xítohó Jesucristú te dàvá-á” dàtúu-gá nchaa sá quidè-yu, nchaa sá ñà túú xiní-ó quidè-yu vitna, te duca<sup>n</sup> dàtúu-gá nchaa nàcuáa sàni iní-yu. Te Yá Ndiöxí cáhá<sup>n</sup> vãha-gá cuèndá nchaa ñáiyu ní quide vãha.

<sup>6</sup> Te nchòhó ñáiyu ndècu ndihi-í ichi Xítohó Jesucristú, càcunehe-í té Àpolós ndihi yúhú núú-ndó dànehé ñáhá-í xii-ndo nàcuáa cada-ndo cuèndá duca<sup>n</sup> cùu-xi ìi” sá vãha sá cúu-xí-ndó, ndihi cuèndá sá nchòhó canchicú” nihnu-ndo càda-ndo mee-ni nchaa nacuáa yòdo tnuní núú tütú Yá Ndiöxí. Te duca<sup>n</sup> te vá cächí-ndó sã ìi” tée càhá<sup>n</sup> tnúhu Yá Ndiöxí ïo-gá càhnu cuu-dé dàcúúxí ìngá-dé. <sup>7</sup> Te nchòhó vá cächí-ndó sã ïo-gá cúmnu-ndo dàcúúxí dàva-gá ñáiyu chi Yá Ndiöxí ní quide-gá ní ngún-decu ndihi-ndo nchaa sá xiní tnùn-ndó. Te mee-gã duca<sup>n</sup> ní quide-gá ¿Te ná cuèndá nchòhó duca<sup>n</sup> quide cahnu-ndo mee-ndo? Te quide-ndo datná tnúhu sá mée-ndó ní quide-ndo dùca<sup>n</sup> ní ngún-decu ndihi-ndo nchaa sá xiní tnùn-ndó.

<sup>8</sup> Te nchòhó quidè-ndó sã ñà túú tnáhí-gá ná cúmãni-ndó núú Yá Ndiöxí, te quide-ndo sá ni ñihí-ndó nchaa sá cuiní-ndó núú-gá ndécú ndihi-ndo, te sãnuu sá cúu-ñà-ndó dàtná cue tée yìndaha ñáiyu, te nchúhú ñá túú cùu ìi”nuu ndihi ñaha-ndí xii-ndo quìndaha ndihi ñaha-ndí xii-ndo ñáiyu, ìte vãha-ni te núu dicó ndisa sá yìndaha-ndo ñáiyu chi tnáhá nchúhú ní tnahá ndihi ñaha-ndí xii-ndo quìndaha-ó-yu te núu dicó cúu-xí ìi” sá ndáa dico ñáhá! <sup>9</sup> Te yúhú quidè cuèndá-í sá nchúhú cue tée ní táuchíú<sup>n</sup> Xítohó Jesucristú cáhá<sup>n</sup> tnúhu-gá núú ñáiyu ní cachí Yá Ndiöxí sá cúu-ndí cue tée ñá túú nàndíhi sá cúu-xí dàva-gá ñáiyu. Te ní cachí tucu-gá sá cúu-ndí dàtná cue ñáiyu sa ní tnahá òrè cuú-xi quíhí<sup>n</sup> nacháhu cuëchi-xi,

te nchaa ñáyiú cùñúhu ñàhá-yu xii-ndí sá dúcá<sup>n</sup> ndòho-ndí, te tnàhá nchaa espíritú cùñúhu ñaha-xi xii-ndí. <sup>10</sup>Te cuèndá sá xínú cuèchi-ndí núú Xítóhó Jesucristú, xíá<sup>n</sup> cúú-ndí dàtná cue tée ñá túú vèdana nàndíhi sá cúú-xí ñáyiú. Te nchòhó quidé-ndó sá cúú-ndó ñáyiú ío túha ndècu ndíhi Xítóhó Jesucristú. Te ñáyiú cächí-yu sá nchúhú cúú-ndí cue tée ñá túú ndàcu cada ì<sup>n</sup> sá cádá sá cúú-xí Yă Ndiöxí. Te nchòhó quidé-ndó sá cúú-ndó ñáyiú ío vâha ndàcu quide ì<sup>n</sup> sá sání iní-ndó sá cúú-xí-gă. Te cue ñáyiú dàquee tihú ñáhă-yu xii-ndí, te nchòhó néhě-yu sá yîñúhu núú-ndó. <sup>11</sup>Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dõó-ndí, te nchaa ñáyiú quide úhú ñáhă-yu xii-ndí, te ni vèhe-ndí ñá túú ndéé cáá cùndecu-ndí. <sup>12</sup>Te ío ndòho-ndí quidé chù<sup>n</sup>-ndí nihí-ndí sá xéxí-ndí. Te cue ñáyiú xicuéhé ñáhă-yu xii-ndí dico xicá<sup>n</sup> táhú-ndí núú Yă Ndiöxí cuèndá-yu, te ñá cúú tnàhí quini ndéé ñáhă-yu xii-ndí dico quide cahnu iní-ndí nchaa sá quidé ñáhă-yu. <sup>13</sup>Te mee-ni tnúhu cuèhé tnúhu duha cãhá<sup>n</sup>-yu cuèndá-ndí dico sàcahnu iní-ndí te dâsahú-ndí-yu mee-ni tnúhu vâha. Te cächí-yu sá cúú-ndí dàtná ì<sup>n</sup> sá ñá túú-gă vèdana nàndíhi, te nchaa-ni nduu duca<sup>n</sup> cãhá<sup>n</sup>-yu xãhá<sup>n</sup>-yu xii-ndí.

<sup>14</sup>Te yúhú duha cãhá<sup>n</sup>-í núú tütú-a dâsahú ñáhà-í xii-ndo, dico ñá dífú tnúhu sá cúú cãhá<sup>n</sup> núú-ndó cãhá<sup>n</sup>-í. Te duha cãhá<sup>n</sup>-í dóho-ndo chi quide iní-í sá sũúni dàtná déhe mee-í cúú-ndó chi ío cùu iní ñáhà-í xii-ndo. <sup>15</sup>Te nchaa-o ndècu-o ichi Xítóhó Jesucristú vitna, dico yúhú cúú-í tée díhna nuu nĩ dánèhé ñáhá xii-ndo nacuaá ndùu tnúhu sá cãhá<sup>n</sup> nãcuáa naníhí tãhú-ó, núú xíá<sup>n</sup> cúú-í dàtná tãtá-ndó. Te cuèi vâi vihi cue tée na quixi-güedé danèhé ñáhă-güedé xii-ndo tnúhu-gă dico ì<sup>n</sup>

dii-ni yúhú cúú-í tée díhna nuu-gă ní dánèhé ñáhá xii-ndo tnúhu-gă. <sup>16</sup>Núu xíá<sup>n</sup> cãhá<sup>n</sup>-í dóho-ndo sã cãchícú<sup>n</sup> nihnu-ndo cãda-ndo nchaa nacuaá quide-í.

<sup>17</sup>Te xíá<sup>n</sup> núu sa ní tendaha-í té Timùteú véxi coto ñaha-dé xii-ndo, te tée-á<sup>n</sup> ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucristú, te tée-á<sup>n</sup> cächí tnúhu-dé xii-ndo nchaa nacuaá quide-í ndécú-í ichi-gă. Te diu-ni nãcuáa na cächí tnúhu-dé-á<sup>n</sup> diu-ni duca<sup>n</sup> quide-í nchaa xichi núú tàcá ñáyiú dàcuaha tnúhu Xítóhó Jesucristú. <sup>18</sup>Te dava nchòhó ío quide cahnu-ndo mee-ndo chi sání iní-ndó sá vã quixí-gă-í quixi coto ñaha-í xii-ndo. <sup>19</sup>Dico núu mee Yă Ndiöxí ná cächí-gă te ío ndíhi quixi coto ñaha-í xii-ndo, te dàvá-á<sup>n</sup> quini-í te núu nása quide nchaa ñáyiú duca<sup>n</sup> ío xiquide cãhnu mee-xi-á<sup>n</sup> ndécú-yu ichi Xítóhó Jesucristú. Te vá cádá cuèndá-í tnúhu cãhá<sup>n</sup>-yu chi chù<sup>n</sup> quidé-yu cada cuèndá-í. <sup>20</sup>Te vitna yîndaha ñaha Yă Ndiöxí xii-o, te chindee ñaha-gă xii-o quide-o nchaa sá vâha sání iní-ó quide-o te ñá dífú mée-ni sá cãhá<sup>n</sup>-ó. <sup>21</sup>Te ío chí cání iní núu ndè-dacãa sá vâha-gă cada-í òré ná quéxio-í núú ndécú-ndó, núu sá ténãá ñáhà-í xii-ndo àdi sá cãhá<sup>n</sup> ndíhi ñaha-í xii-ndo ndíhi tnúhu vii tnúhu vâha nãcuáa cut-nùni iní-ndó sá cúú iní ñáhà-í xii-ndo.

### Ì<sup>n</sup> cuèchi cãhnu vihi

**5** Te yúhú sa ní nhí ndãá-í tnúhu nãcuáa cùu ndecu-ndo, chi ì<sup>n</sup> tée ndècu ndíhi-ndo ndeca-dé nãná chãhá-dé. Te xíá<sup>n</sup> cúú-xí ì<sup>n</sup> cuèchi cãhnu vihi, chi ndéé nchaa ñáyiú ñá túú ndècu ichi Yă Ndiöxí cächí-yu sá vã cúú tnàhí duca<sup>n</sup> cãda-o. <sup>2</sup>Te nchòhó ío quide cahnu-ni-ndo mee-ndo xíndecu-ndo! ;Te tàú-ndó sã cùndiyí-ndó ndixi cuèchi iní-ndó sã dúcá<sup>n</sup> cùu ndecu-ndo ni cuu!

Te tée duca<sup>n</sup> quide-á<sup>n</sup> xíní ñùhu-xi sá vǎ dáńá-gǎ-ndó ñihí tnáhá ndìhi ñaha-dé xii-ndo ni cùu dico ñá túú dùca<sup>n</sup> quide-ndo. <sup>3</sup>Te yúhú ñá túú ndècu ndìhi ñaha-í xii-ndo dico dàtná tnúhu sá ndécú ndìhi ñaha-í xii-ndo chi duca<sup>n</sup>-ni ò ñùhu iní ñáhà-í xii-ndo. Te yúhú càchí-í sá náchǎhu tée-á<sup>n</sup> cuèchi-dé sá dúcá<sup>n</sup> quide-dé, te ñiu-ni duca<sup>n</sup> càhá<sup>n</sup>-í núú ndó te núu dicó ndécú ndìhi ñaha-í xii-ndo. <sup>4</sup>Te òré nàtácá-ndó càhá<sup>n</sup> ndìhi-ndo Yǎ Ndiòxí te ñiu-ni Xítóhó Jesucristú ñá túú dàña ndéé-gá chíndèe ñaha-gá xii-ndo, te òré-á<sup>n</sup> cada-ndo nàcuáa cuíní Xítóhó Jesucristú cada-ndo, te cada iní-ndó sǎ tnáhá-í ndécú ndìhi ñaha-í xii-ndo. <sup>5</sup>Chi tàú-xi sá tée duca<sup>n</sup> quide-á<sup>n</sup> daquèe tǎhú-ndó-dě, te duca<sup>n</sup> te sácufhná dandòho ñaha-xi xii-dé cuèi na cùú-dé, dico na sǎá nduu te nduu táhú-dě cundecu-dé ndìhi Xítóhó Jesucristú.

<sup>6</sup>Te nchòhó ñá túú ndùu váha-xi sá càchí-ndó sǎ ò càhnu cuu-ndo. Te xíní-ndó sǎ cuèi luha-ni levadùrá ná quǎhu yuchi cuáha pǎá dándàa-xi cuèi luha-ni nà quǎhu te ñihí-ni yuchi sàhá<sup>n</sup> ndoho-xi. Te duca<sup>n</sup> sǎtnáhá-xi cùu nchòhó chi núu ndècu ndìhi-ndo ñ<sup>n</sup> ñáyiu quide sá ñà túú vǎha te nchaa-ndo ñà túú-gǎ cúú vǎha iní-ndó ndècu-ndo. <sup>7</sup>Te xíní ñùhu-xi sá cǎdá-ndó dàtná quídé cuè ñáyiu quide vico pascuá, chi ñá túú chihí-yu levadùrá yuchi cuáha pǎá xéxí-yu nduu quidé-yu vico-á<sup>n</sup>. Te sá quǎhu pǎá-á<sup>n</sup> cada iní-ó sǎ cúú-xí nchàa sá cuèhé sá dúhá ñí xóo cada-ndo. Te vǎ cǎdá-gǎ-ndó ñí ñ<sup>n</sup> sá cuèhé sá dúhá, te duca<sup>n</sup> te cuu-ndo ñáyiu váha chi sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-á<sup>n</sup> cada iní-ó sǎ cúú-güedí datná Xítóhó Jesucristú nàcuáa ní xihí-gá núú cùrúxí. <sup>8</sup>Te núu xǎ<sup>n</sup> xíní ñùhu-xi sá vǎ cǎdá-gǎ-ndó ñí ñ<sup>n</sup> sá cuèhé sá dúhá sǎ ñí xóo cada-ndo,

te ñí vǎ cúhú<sup>n</sup>-gǎ iní-ndó te ñí vǎ cǎdá-gǎ-ndó, te ñí yùhu ñí iní-ná-ndó cǎda-ndo mee-ni sá vǎha.

<sup>9</sup>Te tutú sá sà ní dáquíxi-í ndaha-ndo ñí cachí-í sá vǎ ñihí tnáhá-ndó ndìhi cue ñáyiu ndècu ichi díí iní. <sup>10</sup>Te sá dúcá<sup>n</sup> càhá<sup>n</sup>-í núú tütú ní dáquíxi-í ndaha-ndo te vǎ cǎní iní-ndó sǎ yúhú càchí-í sá vǎ cúú-gǎ tnáhá tnúhu-ndo ndìhi cue ñáyiu ndècu ichi cuèhé ichi duha, ndìhi ñáyiu ndècu ichi díí iní, ndìhi ñáyiu xihò nchaa sá ò ñuyú, ndìhi ñáyiu dùhu sá ndécú ndìhi tnaha ñáyiu-xi, ndìhi ñáyiu quide cahnu sá càchí-yu cùu ndióxí te ñá ndàá sá ndiòxí cúú-xí chi dicó cue tée ñuyú-a ní cadúha nchaa xǎ<sup>n</sup>, chi núu duca<sup>n</sup> na cǎda-ndo vǎ tnáhá tnúhu-gǎ-ndó ndìhi-yu te xíní ñùhu-xi sá vǎ cùndècu-gǎ-ndó núú ndécú-yu. <sup>11</sup>Te ñá túú dùca<sup>n</sup> quee-xi nacuáa càhá<sup>n</sup>-í núú tütú-í, chi yúhú càchí-í sá vǎ cúú tnáhá tnúhu-ndo ndìhi ñáyiu càchí sá ndécú ichi Xítóhó Jesucristú te ñá ndàá sá ndécú-yu ichi-gá. Te núu cúú-yu ñáyiu ndècu ichi díí iní, àdi cuú-yu ñáyiu xihò nchaa sá ò ñuyú-a, àdi cuú-yu ñáyiu quide cahnu nchaa sá càchí-yu cùu ndióxí te ñá ndàá chi dicó cue tée ñuyú-a ní cadúha nchaa xǎ<sup>n</sup>, àdi cuú-yu ñáyiu yiti yùhu-xi, àdi cuú-yu ñáyiu quihu, àdi cuú-yu ñáyiu dùhu sá ndécú ndìhi tnaha ñáyiu-xi, te nchaa ñáyiu duca<sup>n</sup> càchí sá ndécú ichi-gá te ñá ndàá te duca<sup>n</sup> xíquidè-yu, te ñí vǎ cúú ñihí tnáhá-ndó ndìhi-yu caxi-ndo ndìhi-yu. <sup>12-13</sup>Te ñá díú yúhú cúú-í tée càhá<sup>n</sup> cuendá nchaa ñáyiu ñá túú ndècu ichi Xítóhó Jesucristú núu quide ndàá-yu àdi ñá túú quide ndàá-yu ndécú-yu, chi mee Yǎ Ndiòxí càhá<sup>n</sup>-gǎ te núu nása quidé-yu ndécú-yu. Dico nchòhó chi tàú-ndó cǎda cuendá-ndó núu nása quide cue ñáyiu ndècu ndìhi-ndo ichi Xítóhó Jesucristú. Núu xǎ<sup>n</sup> xíní ñùhu-xi daquèe tǎhú-ndó tée duca<sup>n</sup> ñà túú quide váha ndècu

ndihi-ndo-á<sup>n</sup>, te vá dáñá-gă-ndó nihí tnáhá ndihi ñaha-dé xii-ndo.

**Nàcuáa tàù-xi cada ñáyiù ndècu ichi Xítohó Jesucristú te núu ñá túú ndècu ndihi váha tnàhá-yu**

**6** Te dava nchòhó òrè ñá túú ndècu ndihi váha tnàha-ndo te cùyii-ndo cuáhá<sup>n</sup>-ndó núú cuè téè cùchiu<sup>n</sup> ñá túú ndècu ichi Xítohó Jesucristú sàcá<sup>n</sup> cuéchi-ndo, te ñá túú òuca<sup>n</sup> taù-xi cada-ndo chi núú cuè téè ndècu ichi-gá duca<sup>n</sup> tàù-ndó quíhí<sup>n</sup>-ndó càcá<sup>n</sup> cuéchi-ndo. <sup>2</sup>Te nchòhó sa nàha-ndo sá ncháá ñáyiù cùu cuendá Yă Ndiòxí sáá nduu cãhá<sup>n</sup>-yu te núu ní quide ndáá nchaa dava-gá ñáyiù àdi ñá túú ní quide ndáá-yu, te nchòhó tnàhá-ndó cùu-ndo ñáyiù duca<sup>n</sup> cãhá<sup>n</sup>, te núu duca<sup>n</sup> te cutnùní iní-ndó sã ndácú-ndó càda ndáá-ndó nchaa cuéchi sá ñá túú ùhú cundáá vitna ndècu-ndo ñuyíú-a. <sup>3</sup>Te nchòhó sa nàha-ndo sá ncháá ndéé cue espíritú xínú cuèchi núú Yă Ndiòxí sáá nduu cãhá<sup>n</sup>-ó te núu nása quide-xi ndecu-xi. ¡Núu xíá<sup>n</sup> cùtnùní iní-ó sã úú<sup>n</sup>-gã ndacu-o càda ndáá-ó nchaa cuéchi sá ìó ñuyíú-a! <sup>4</sup>Te núu ìó dava-ndo ìó nása cùu ndecu-ndo te xínáá-ndó, te vá quíhí<sup>n</sup>-ndó càcá<sup>n</sup> cuéchi-ndo núú cuè téè ndèhe-ndo sá ñá túú ndècu-güedé ichi Yă Ndiòxí, dico nchòhó chi da núú cuè téè-á<sup>n</sup> cuáhá<sup>n</sup>-ndó sàcá<sup>n</sup> cuéchi-ndo. <sup>5</sup>Te duha cãhá<sup>n</sup>-í cuendá cucaha<sup>n</sup> núú-ndó chi ñá túú quide váha-ndo sã dúcá<sup>n</sup> quide-ndo. <sup>6</sup>Te náa dicó-nã ñá túú tnàhí ìí<sup>n</sup> téè cùtnuní iní-xi nàcuáa cada ndáá cuéchi-ndo ndècu ndihi-ndo ichi Xítohó Jesucristú-á<sup>n</sup>? <sup>6</sup>Te nchòhó, ñá túú quide váha-ndo, chi dava-ndo cuáhá<sup>n</sup>-ndó núú cuè téè ñá túú ndècu ichi Xítohó Jesucristú sàcá<sup>n</sup> cuéchi-ndo cuendá dava-gá cue ñáyiù ndècu ndihi-ndo ichi-gá.

<sup>7</sup>Te ñá túú quide váha-ndo sã dúcá<sup>n</sup> nàa ndihi tnàha-ndo te cuáhá<sup>n</sup>-ndó sàcá<sup>n</sup> cuéchi-ndo, te váha-gá sá cãdá cãhnu iní-ndó cuéi nándi na càda ñaha tnaha ñáyiù-ndo xii-ndo cuéi dùhú-yu sá ndécú ndihi-ndo dico cada cãhnu-ni iní-ndó. <sup>8</sup>Dico nchòhó chi ñá túú quide cãhnu iní-ndó chi da uu<sup>n</sup>-gá ñá túú quide váha-ndo sàcúú-xí tnàha ñáyiù-ndo, chi cùu ùhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítohó Jesucristú duca<sup>n</sup> quide tnaha-ndo.

<sup>9</sup>Te nchòhó sa nàha-ndo sá ncháá ñáyiù ndècu ichi cuehé ichi duha vá ndúú tãhú-yu cundecú-yu núú ndécú Yă Ndiòxí táxí tnùní-gá, núu xíá<sup>n</sup> vá cání iní-ndó sã ñáyiù-á<sup>n</sup> nduu tãhú-yu cundecú-yu ndihi-gá. Te ni cuè ñáyiù ndècu ichi díí iní, te ni cuè ñáyiù quide cãhnu nchaa sá cãchí-yu cùu ndiòxí te ñá ndáa chi dicó cue téè ñuyíú-a ní cadúha nchaa xíá<sup>n</sup>, te ni cuè téè cãhá<sup>n</sup> ndihi ñadìhí te ñá díú ñadìhí-güedé cùú-yu, te ni cuè ñáyiù òhí cãhá<sup>n</sup> ndihi téè te ñá díú yí-yu cùu-güedé, te ni cuè téè cãhá<sup>n</sup> ndihi tnàha téè-xi, <sup>10</sup>te ni cuè ñáyiù dùhu, te ni cuè ñáyiù xihó sá ndécú ndihi tnaha ñáyiù-xi, te ni cuè ñáyiù quíhu, te ni cuè ñáyiù cãhá<sup>n</sup> ùhú, te ni cuè ñáyiù òanícuehé tnàha ñáyiù-xi te dùhu ñahá-yu, te ni ìí<sup>n</sup> cue ñáyiù duha xíquide vá ndúú tãhú-yu cundecú-yu núú ndécú Yă Ndiòxí táxí tnùní-gá. <sup>11</sup>Te dava nchòhó duca<sup>n</sup> ní xóo cada-ndo ni cùu, te vitna ní cuu-ndo ñáyiù sa ní nduu ndoo ní nduu nine iní-xi, te ní cuu-ndo ñáyiù cùu cuendá Yă Ndiòxí, te ní cuu tucu-ndo ñáyiù ñá túú-gã cuéchi-xi ndècu núú-gã. Te duca<sup>n</sup> ní quide ñaha Yă Ndiòxí xii-ndo sã vãha sá cuendá Xítohó Jesucristú, te ní ngún-decu ndihi-ndo Espíritú Yă Ndiòxí.

**Nàcuáa ndùu cuendá yiqui cùñú-ó**

<sup>12</sup>Te cãchí ñáyiù sá ncháá sá sání iní-ó cuu cada-o, te ndáá cãhá<sup>n</sup>-yu dicó-ni sá

ñã ncháá cùu-xi sá vãha sá cúú-xí-ó. Te núu cuíní nchaa sá sání íní-ó-ã<sup>n</sup> taxi tñmí ñáhá-xí te vá cádá-ó. <sup>13</sup>Te nchòhó sa xíní-ndó sã ncháá sã xéxí-ó cuãnguee-xi xití-ó, te xití-ó ñí cuáha tñàhí-xi sá cúhú<sup>n</sup> nchàa sá cáxí-ó, dico xití-ó ndìhi nchaa sá xéxí-ó chí naa-xi. Te Xítóhó Jesucristú nêhé cuendá-gá yiqui cùñú-ó, te duca<sup>n</sup> yìqui cuñú-ó cùu-xi cuendá-gá, te ñã túú ní cuáha yiqui cùñú-ó sã cùndècu-xi ichi díí íní. <sup>14</sup>Te dàtná ní quide Yá Ndiòxí ní dándótó-gã Xítóhó Jesucristú duca<sup>n</sup> càda ñaha-gá xii nchoo tùcu chí dandòto ñaha-gá xii-o nñu na cùú-ó, chí ndàcu-gá quidé-gã nchaa sá vãha.

<sup>15</sup>Te nchòhó sa ñaha-ndo sá yìqui cuñú-ó cùu-xi cuendá Xítóhó Jesucristú chí ñ<sup>n</sup>-ni cùu-o ndìhi-gá, núu xíã<sup>n</sup> ñã túú tñàhí ndùu vãha-xi cáhá<sup>n</sup> ndìhi-o ñãyiu ndècu ichi díí íní, chí yiqui cùñú-ó cùu-xi cuendá Xítóhó Jesucristú, te núu duca<sup>n</sup> na càda-o te cada íní-ó sã cuendá-ñã ñãyiu-á<sup>n</sup> cúú yìqui cuñú-ó, núu xíã<sup>n</sup> ñã túú tñàhí ndùu vãha-xi duca<sup>n</sup> càda-o. <sup>16</sup>Te sa xíní-ndó sã nñu ñ<sup>n</sup> tée na càhá<sup>n</sup> ndìhi-dé ñ<sup>n</sup> ñadìhí ndécú ichi díí íní te cada íní-ó sã íf<sup>n</sup>-nã yiqui cùñú cúú-yu. Te duca<sup>n</sup> càhá<sup>n</sup>-xi núú tütú Yá Ndiòxí núú càchí-xi: “H<sup>n</sup> tée na càhá<sup>n</sup> ndìhi-dé ñ<sup>n</sup> ñadìhí te ñ<sup>n</sup>-nã yiqui cùñú cúú-yu”, duha càchí-xi. <sup>17</sup>Te duca<sup>n</sup> sãtnahá-xi cùu nchaa ñãyiu tñàhá tñúhu ndìhi Xítóhó Jesucristú, chí ñ<sup>n</sup>-nã cúú-yu ndìhi-gá.

<sup>18</sup>Te núu xíã<sup>n</sup> càhá<sup>n</sup>-í dóho-ndo sã vã cùndècu-ndo ichi díí íní, chí núu duca<sup>n</sup> na càda-ndo te ñã túú tñàhí sá vãha cùu-xi sá cúú-xí yìqui cuñú-ndó chí ío dàcuíta nihnu-xi yiqui cùñú-ndó. Te nchaa dava-gá sá cuèhé sá dúhá ñã túú quide-xi yiqui cuñú-ndó dàtná quidé xíã<sup>n</sup>. <sup>19</sup>Te nchòhó sa cùtnuní íní-ndó sã yìqui cuñú-ndó cùu-xi datná ñ<sup>n</sup> vehe núú ndécú Espíritú Yá Ndiòxí. Te duca<sup>n</sup> sãtnahá-xi cùu yiqui cuñú-ndó chí ndècu-ndo ndìhi Espíritú-gá. Te mee-gã

ní taxi-gá Espíritú-gá ndécú ndìhi-ndo, te ñã díú mèe-ndo cuu cuendá-ndó mèe-ndo chí Yá Ndiòxí cúú cuendá ñáhá-gã xii-ndo. <sup>20</sup>Te duca<sup>n</sup> cùu-ndo ñãyiu cùu cuendá Yá Ndiòxí chí Xítóhó Jesucristú ní nacháhu-gá nchaa yíca cuèchi-ndo. Te núu xíã<sup>n</sup> xíní ñùhu-xi sá ñìhí ní ndúú-ndó càda-ndo nacuaa cuu càhnu Yá Ndiòxí, te duca<sup>n</sup> tàù-xi cada-ndo chí espíritú-ndó ndìhi yiqui cuñú-ndó cùu-xi cuendá-gá.

### Sáhú sã cúú-xí ñãyiu ní tñándaha

**7** Te ní quexio tutú sá ñí dáquíxí-ndó ndàha-í, te vitna na càchí tñúhu-í xii-ndo cuendá tñúhu càhá<sup>n</sup>-ndó nñu tütú-ndó. Te vãha cada-xi te núu vá cándèca tée ñadìhí, te duca<sup>n</sup>-ni vãha cada-xi te núu ñãyiu ñìhí vá cándècá-yu tée. <sup>2</sup>Te dìcò-ni sá nñu duca<sup>n</sup> na càda-ndo te dava-ndo càni íní-ndó cùndècu-ndo ichi díí íní. Núu xíã<sup>n</sup> xíní ñùhu-xi sá ncháá cuè tée ndí díí<sup>n</sup> cùndècu ñadìhí-güedé, te duca<sup>n</sup>-ni tùcu nchaa cue ñãyiu ñìhí ndí díí<sup>n</sup> cùndècu yí-yu. <sup>3</sup>Te càchí tñúhu-í xii-ndo sã ncháá cuè tée vá cúú càchí-güedé sá vã cúú càhá<sup>n</sup> ndìhi-güedé ñadìhí-güedé, te ñiu-ni duca<sup>n</sup> cuè ñãyiu ñìhí tucu, vá cúú càchí-yu sá vã cúú càhá<sup>n</sup> ndìhí-yu yí-yu. <sup>4</sup>Te nchaa cue ñãyiu ñìhí chí ñã díú mèe-ní-yu cùu cuendá-yu yiqui cùñú-yu chí tñàhá cúú cuendá yí-yu, te duca<sup>n</sup>-ni nchaa cue tée tucu chí ñã díú-ní mèe-güedé cúú cuendá-güedé yiqui cùñú-güedé chí tñàhá cúú cuendá cue ñadìhí-güedé. <sup>5</sup>Te cue tée vá cúú càchí-güedé sá vã cúú càhá<sup>n</sup> ndìhi-güedé ñadìhí-güedé. Te ni cuè ñãyiu ñìhí vá cúú càchí-yu sá vã cúú càhá<sup>n</sup> ndìhí-yu yí-yu. Àdi te núu ní ndatnúhu-yu sá vã dúcá<sup>n</sup> càdá-yu ñ<sup>n</sup> úú nduu cuendá sá cuíní-yu ío cáhá<sup>n</sup> ndìhí-yu Yá Ndiòxí, dico nã yáha núu ná daha nduu duca<sup>n</sup> ñí ndatnúhu-yu sá vã dúcá<sup>n</sup> càdá-yu te naníhí tñàhá

túcú-yu, chi núu ñáhá te cudana te vá cuácàhnu iní-yu te sácuíhná dacàhá<sup>n</sup> ñáhá-xí xii-yu cadá-yu sá ñà túú tàù-yu cadá-yu.

<sup>6</sup>Te tnúhu càhá<sup>n</sup>-í-a quèe-xi sá tõe ndihí ñadihí cuu candeca tnàhá-yu dico ñá túú quide yica-í sá dúcá<sup>n</sup> cadá-yu. <sup>7</sup>Te yúhú sání iní-í sá núu dicó sá cúú te nchaa-ndo cundecu-ndo datná ndécú-í, dico ñáhá chi mee Yá Ndióxi ní cachí-gá nàcuáa nduu táhú-ó ñ<sup>n</sup> ñ<sup>n</sup>-o cundecu-o, chi dava-o ní cutáhú-ó núú-gã sá cundècu ñadihí-ó te dava-o ñáhá. <sup>8</sup>Te càhí tnúhu-í xii nchòhó cue tée vátá nihí-gá ñadihí-xi sá vâha-gá sá núu vá cundècu ñadihí-ndó datná yúhú. Te duca<sup>n</sup>-ni nchòhó cue ñáyiu ñáhí ñáyiu vátá nihí-gá yii-xi sá vâha-gá sá núu vá cundècu yii-ndo. Te ñiu-ni duha càhá<sup>n</sup>-í sá cúú-xí nchàa nchòhó ñáyiu ñáhí ní quendóo quèe sá vâha-gá sá núu vá cándeca-gá-ndó tõe. <sup>9</sup>Te càhí tnúhu-í xii nchaa-ndo sã núu xito-ndo sá vã cundèe iní-ndó cundecu mee-ndo te vâha-gá sá núu tnândaha-ndo, te ñá ñúú sã méé-ní cãni cuehé cani duha iní-ndó cundecu-ndo.

<sup>10</sup>Te nchaa nchòhó ñáyiu sa ní tnândaha càhá<sup>n</sup>-í dóho-ndo, te ñá ñúú mèe-í duha càhu iní-í càhá<sup>n</sup>-í dóho-ndo chi Xítohó Jesucristú duca<sup>n</sup> dàcahu iní ñáhá-gã xii-í, chi mee-gã cuiní-gá cada-ndo nàcuáa na càhá<sup>n</sup>-í-a. Te nchaa nchòhó cue ñáyiu ñáhí càhá<sup>n</sup>-í dóho-ndo sã vã dáñá-ndó yii-ndo. <sup>11</sup>Te núu ío dava-ndo sã ní dáñá-ndó yii-ndo, te xini ñuhu-xi sá vã cándeca-gá-ndó tõe, chi cundecu mee-ñã-ndó àdi núu ñáhá te naquehe<sup>n</sup> tucu-ndo tõe ní cuu yii-ndo. Te nchaa nchòhó cue tée ndècu ñadihí-xi càhá<sup>n</sup>-í dóho-ndo sã vã dáñá-ndó ñáyiu cùu ñadihí-ndó.

<sup>12</sup>Te tnúhu na càhá<sup>n</sup>-í-a cùu-xi sá ní sani iní mèe-í te ñá ñúú tnúhu sá ní cachí Xítohó Jesucristú cáhá<sup>n</sup>-í cúú-xí. Te núu dava nchòhó cue tée ndècu ichi Xítohó

Jesucristú ndécá-ndó ñáyiu ñáhí ñáyiu ñá túú ndècu ichi-gá, te vã dáñá-ndó-yu te núu cùu vâha iní-yu ndèca ñáhá-yu xii-ndo. <sup>13</sup>Te núu dava nchòhó cue ñáyiu ñáhí ñáyiu ndècu ichi Xítohó Jesucristú ndécá-ndó cue tée ñá túú ndècu ichi-gá te vã dáñá-ndó-güedé te núu cùu vâha iní-güedé ndécá ñàha-güedé xii-ndo. <sup>14</sup>Te núu ñ<sup>n</sup> tée ñá túú sãndáá iní-dé Xítohó Jesucristú te ñadihí-dé sãndáá iní ñáhá-á<sup>n</sup> xii-gá, te tée-á<sup>n</sup> ní cuu-dé ñ<sup>n</sup> tée sa ní cuyatni tnahá tnúhu ndihí ñaha xii-gá sá cuendá ñadihí-dé. Te duca<sup>n</sup> sãtnahá-xi cùu tucu ñadihí ñá túú sãndáá iní ñáhá xii Xítohó Jesucristú te yii-a<sup>n</sup> sãndáá iní ñáhá-dé xii-gá, te ñaha-á<sup>n</sup> sa ní cuyatni tnahá tnúhu-a<sup>n</sup> ndihí-gá sá cuendá yii-a<sup>n</sup>, te ñiu-ni duca<sup>n</sup> sãtnahá-xi cùu cue landú-yu chi sa ní cuyatni tnahá tnúhu-güexi ndihí-gá. Te núu vá dúcá<sup>n</sup> cùu te cue landú-yu-á<sup>n</sup> ío xica cundecu-güexi núú-gã. <sup>15</sup>Te núu ñ<sup>n</sup> tée ñá túú sãndáá iní ñáhá xii Xítohó Jesucristú cuiní-dé ñaha tnàha-dé ndihí ñadihí-dé ñaha sãndáá iní ñáhá xii Xítohó Jesucristú, te ñiu-ni na càda-dé nàcuáa sãni iní-dé. Te ñiu-ni duca<sup>n</sup> tucu te núu ñadihí ñaha ñá túú sãndáá iní ñáhá xii Xítohó Jesucristú cuiní-a<sup>n</sup> ñaha-a<sup>n</sup> tõe sãndáá iní ñáhá xii-gá, tée cùu yii-a<sup>n</sup> te ñiu-ni na càda-a<sup>n</sup> nàcuáa sãni iní-a<sup>n</sup>. Chi tée sãndáá iní ñáhá xii Xítohó Jesucristú ñá túú tàù-dé cada yica-dé ñadihí-dé cundecu ndihí ñaha-a<sup>n</sup> xii-dé te núu ñá túú cuiní-a<sup>n</sup>. Te ñiu-ni duca<sup>n</sup> ñadihí ñaha sãndáá iní ñáhá xii-gá ñá túú tàù-a<sup>n</sup> cada yica-a<sup>n</sup> cundecu ndihí ñaha yii-a<sup>n</sup> xii-a<sup>n</sup> te núu ñá túú cuiní-dé cundecu ndihí ñaha-dé xii-a<sup>n</sup>, chi Yá Ndióxi cuiní-gá sá ncháá nchòo ñáyiu ndècu ichi-gá cundecu vâha-o vã nãá-ó. <sup>16</sup>Chi cue tée sãndáá iní tnúhu Xítohó Jesucristú ñá túú cùtnuní iní-güedé te núu ndacu-güedé canu ichi-güedé ñadihí-güedé ichi-gá àdi ñáhá te núu ñá túú sãndáá iní ñáhá-yu xii-gá, te

duca<sup>n</sup>-ni cuè ñáyiú ðìhí sàndáá iní tnúhu Xítohó Jesucristú ñá túú cùtnuní iní-yu te núu ndacú-yu canu ichí-yu yí-yu ichi-gá àdi ñáhá te núu ñá túú sàndáá iní ñáhá-güedë xii-gá.

<sup>17</sup> Te duha na càchí tnúhu-í xii-ndo, nchaa chiú<sup>n</sup> ní nduu táhú-ndó nűú Yă Ndiöxí quíde-ndó ndèè cùtnàhá ní cáhá<sup>n</sup> ñáhá-gá xii-ndo ní natuha-ndo ìchi-gá te ðiu-ni chiú<sup>n</sup>-á<sup>n</sup> cada-ndo cùndecu-ndo. Te nchaa xichi núú tàcá ñáyiú dàcuaha tnúhu-gá ðiu-ni duha càhá<sup>n</sup>-í dóho-yu. <sup>18</sup> Te nchaa cue téè ndècu señá ñii-xi dàtná ní cachi ndí Moisés, cue téè ní cáhá<sup>n</sup> Yă Ndiöxí ndécú ìchi-gá, te ðiu-ni duca<sup>n</sup> cùnduu-güedé cundecu-güedé, te nchaa cue téè ñá túú ndècu señá ñii-xi ní cáhá<sup>n</sup>-gá cundecu ichi-gá, ðiu-ni duca<sup>n</sup> cùnduu-güedé cundecu-güedé vá cuăha-güedé señá ñii-güedé. <sup>19</sup> Te ì<sup>n</sup>-ni cùu-xi cuéi na cuăha-o señá ñii-o àdi vá cuăha-o. Te sá ïo-gá xíní ñùhu-xi cada-o xíá<sup>n</sup> cúu-xí sá cádá-ó nchàa nacuáa cuíní Yă Ndiöxí. <sup>20</sup> Chi xini ñuhu-xi sá cùndècu-ni-o datná ndécú-ó cùtnàhá ní cáhá<sup>n</sup> ñáhá Yă Ndiöxí xii-o ní ngùndecu-o ìchi-gá. <sup>21</sup> Te núu cùu-ndo ñáyiú ñá túú tnàhí dàñá quee núú chíú<sup>n</sup> pàtró<sup>n</sup>-xi cùtnàhá ní cáhá<sup>n</sup> ñáhá Yă Ndiöxí xii-ndo, te ñá túú nă cani iní-ndó, dico núu dàña ñaha patró<sup>n</sup>-ndó queè-ndo núú chíú<sup>n</sup>-ndó te váha-ni quee-ndo nűú chíú<sup>n</sup>-ndó. <sup>22</sup> Te sátá ní cáhá<sup>n</sup> ñáhá Xítohó Jesucristú xii nchòhó ñáyiú duca<sup>n</sup> ñá túú tnàhí dàñá quee núú chíú<sup>n</sup> pàtró<sup>n</sup>-xi-á<sup>n</sup>, te ní cuu-ndo dàtná ñáyiú dàñá queé nűú chíú<sup>n</sup> pàtró<sup>n</sup>-xi sá cúu-xí-gá, te duca<sup>n</sup> chi ñá túú-gá ndécú-ndó ìchi cuehé ichi duha. Te nchòhó ñáyiú dàñá queé nűú chíú<sup>n</sup> pàtró<sup>n</sup>-xi cùu-ndo datná ñáyiú ñá túú tnàhí dàñá quee núú chíú<sup>n</sup> pàtró<sup>n</sup>-xi sá cúu-xí Xítohó Jesucristú, te duca<sup>n</sup> chi xinu cuechi-ná-ndó nűú-gá. <sup>23</sup> Te Yă Ndiöxí ní nduu cuendá ñáhá-gá xii-o chi Xítohó Jesucristú ní

nacháhu-gá nchaa yíca cuèchi-o sá ndécú nűú Yă Ndiöxí ní cùu, te vá dàñá-ndó sá tnàha ñáyiú-ndo nàdatuhú iní ñáhá-yu xii-ndo vá cúnú cuèchi-ndo núú Xítohó Jesucristú nacuáa tàú-xi cunduu. <sup>24</sup> Te núu xíá<sup>n</sup> càchí tnúhu-í xii nchaa nchòhó ñáyiú ndècu ndihí-í ichi Xítohó Jesucristú sá cùndècu-ni-ndo datná-ni ndècu-ndo ndéè cùtnàhá ní cáhá<sup>n</sup> ñáhá-gá xii-ndo, te ðiu-ni duca<sup>n</sup> cùndecu-ndo ichi-gá.

<sup>25</sup> Te càchí tnúhu tucu-í xii-ndo sá Xítohó Jesucristú ñá túú càchí tnúhu-gá xii-í nűu nása cáhá<sup>n</sup>-í cuendá nchaa ñáyiú vátá tnàndaha-gá. Te duha sàni iní-í cáhá<sup>n</sup>-í cuendá-yu, te nchòhó cuu quíndáá iní-ndó tnúhu càhá<sup>n</sup>-í chi Xítohó Jesucristú chindèe chitúu ñaha-gá xii-í. <sup>26</sup> Te yúhú càchí-í sá sá cuendá nchaa tnúndòho tnúhu ndàhú ìo ñuyú-a vitna, te váha-gá sá ncháá ñáyiú te núu nása xíndecú-yu te duca<sup>n</sup>-ni na cùndecú-yu. <sup>27</sup> Te nchaa cue téè ndècu ñadihí-xi te duca<sup>n</sup>-ni na cùndecu-güedé ndihí-yu, te nchaa cue téè ñá túú ñadihí-xi te duca<sup>n</sup>-ni na cùnduu-güedé vá ndúcú-güedé ñadihí-güedé. <sup>28</sup> Dico nchaa cue téè na ndècu ñadihí-xi te ñá ðfú ì<sup>n</sup> cuèchi cùu-xi sá dúcá<sup>n</sup> ná ndècu-güedé ñadihí-güedé, te ðiu-ni duca<sup>n</sup> cùu tucu cue ñáyiú ðìhí te núu na ñihí-yu yí-yu chi ñá ðfú ì<sup>n</sup> cuèchi cùu-xi sá dúcá<sup>n</sup> ñihí-yu yí-yu. Te núu cue téè na ñihí-güedé ñadihí-güedé te nándi ndohó-yu cundecú-yu ñuyú-a, te núu xíá<sup>n</sup> duha càhá<sup>n</sup>-í cuendá sá vá ndúcú-güedé ñadihí-güedé cuendá sá vá ndòhó-yu.

<sup>29</sup> Te nchaa nchòhó ñáyiú ndècu ndihí-í ichi Xítohó Jesucristú na càchí tnúhu-í xii-ndo sá ñá túú-gá vài nduu cumání te quixi tucu Xítohó Jesucristú, núu xíá<sup>n</sup> xíní ñùhu-xi sá ndéè vitna ngúfta nchaa cue téè ndècu ñadihí-xi cada-güedé chiú<sup>n</sup> Xítohó Jesucristú, te cada-güedé dàtná sá ñá túú

ñàdihí-güedé. <sup>30</sup> Te nchaa ñáyi ndihú iní-xi te na càda-ní-yu sá ñà túú ndihú iní-yu cadá-yu chiú<sup>n</sup> Yá Ndiöxí. Te nchaa ñáyi cùdí iní-xi te na càda-ní-yu sá ñà túú cùdí iní-yu cadá-yu chiú<sup>n</sup>-gá, te nchaa ñáyi ndècu ndihí nándi sá ndécú ndihí te na càda-ní-yu sá ñà túú nã ndécú ndihí-yu cadá-yu chiú<sup>n</sup>-gá. <sup>31</sup> Te nchaa ñáyi nèhe chiu<sup>n</sup> nchaa sá ío ñuyíú-a te na càda-ní-yu cuendá sá ñà túú nã nèhé chiú<sup>n</sup>-yu cadá-yu chiú<sup>n</sup> Yá Ndiöxí, chi nchaa sá ío ñuyíú-a sa ñuhu-xi ichi cuáhá<sup>n</sup>-xi núú ndihí ñihu-xi.

<sup>32</sup> Te cuíní-í sá vá cúhú<sup>n</sup> iní-ndó nándi sá ío ñuyíú-a, te ni ñà túú tnàhí ná cani iní-ndó cùndecu-ndo, chi nchaa cue té ndècu ichi Xítohó Jesucristú xñdecu mee ío ñuhu iní-güedé cada-güedé chiú<sup>n</sup>-gá nacuáa cudíu-güedé núú-gá. <sup>33</sup> Te nchaa cue té sa ndècu ñadihí-xi cue té ndècu ichi-gá ñuhu iní-güedé nacuáa cada-güedé cundecu-güedé ñuyíú-a cuendá duca<sup>n</sup> cùdiu-güedé núú ñadihí-güedé. <sup>34</sup> Te diu-ni duca<sup>n</sup> cùu tucu cue ñáyi dñhí chi ñà túú ñ<sup>n</sup>-ni cuu ñáyi sa ndècu yñ-xi ndihí ñáyi vátá cùndecu-gá yñ-xi, chi ñáyi ndècu ichi Xítohó Jesucristú ñà túú ndèca téé ío ñuhu iní-yu cadá-yu chiú<sup>n</sup>-gá nacuáa ñihí ní ndúú-yu cundecu yññuhú-yu núú Yá Ndiöxí, dico cue ñáyi dñhí ndécá tē ndècu ichi-gá ío ñuhu iní-yu nacuáa cundécú-yu ñuyíú-a cuendá cudíu-yu núú yñ-yu.

<sup>35</sup> Te duha càhá<sup>n</sup>-í cuendá cúú-xí ñ<sup>n</sup> sá váha xii-ndo, te cudíu núú tnáhá-ndó, te cuu-ndo ñáyi cada ndáá núú Xítohó Jesucristú, te mee-ni-gã cuhu<sup>n</sup> iní-ndó. Te ñà díú sá dúhá càhá<sup>n</sup>-í te quide yica-í sá cádá-ndó nacuáa càhá<sup>n</sup>-í.

<sup>36</sup> Te núú ío dava-ndo sàni iní-ndó sá ñà túú ndùu váha-xi sá ío cuu sacuéhé dēhe yoco-ndo cùndécú-yu ña, te núú sàni iní-ndó sá váha-gá candecá-yu téé te cada-ndo nacuáa sàni iní-ndó, chi ñà díú ñ<sup>n</sup> cuéchi cùu-xi. <sup>37</sup> Te núú dava-ndo

ndècu déhe yoco-ndo, te vá yō ñ<sup>n</sup> cada yica ñaha xii-ndo sá cándecá-yu téé. Te núú mee-ndo sàni váha iní-ndó nacuáa cada-ndo, te núú vá dásá<sup>n</sup>-ndó dēhe yoco-ndo càndeca ñaha téé te quide váha-ndo sá dúcá<sup>n</sup> quide-ndo. <sup>38</sup> Te nchaa ñáyi dása<sup>n</sup> déhe yoco-xi càndeca ñaha téé te váha-ni quidé-yu, te nchaa ñáyi ñà túú dása<sup>n</sup> déhe yoco-xi càndeca ñaha téé te váha-gá tucu quidé-yu sá dúcá<sup>n</sup> quidé-yu.

<sup>39</sup> Te nchaa ñáyi dñhí ndécú yñ-xi xini ñuhu-xi sá cùndecu-ní-yu ndihí yñ-yu nini ndècu vívú-güedé chi duca<sup>n</sup> càhá<sup>n</sup> tnúhu sá dánèhé ñáhá xii-o nacuáa cada-o cùndecu-o, dico núú na cùu-güedé te cuu naquehé<sup>n</sup>-yu ingá téé candecá-yu dicó-ni sá diu-ni téé ndècu ichi Xítohó Jesucristú. <sup>40</sup> Te yúhú sání iní-í sá ío-gá váha cundécú-yu te núú vá nándúcú-yu ingá téé candecá-yu, te duha càhá<sup>n</sup>-í chi Espíritú Yá Ndiöxí duca<sup>n</sup> dàcahu iní ñáhá-xí xii-í càhá<sup>n</sup>-í.

**Cuendá nchaa sá nchító-ó  
sãñaha ñáyi ndùu táhú  
nchaa sá càchí-yu cùu ndióxí**

**8** Te vitna na càhá<sup>n</sup>-í cuendá nchaa sá nchító-ó sãñaha ñáyi ndùu táhú nchaa sá càchí-yu cùu ndióxí te ñà ndàá chi dicó ndaha cue tee ñuyíú-a ní cuáha nchaa xíã<sup>n</sup>. Te nchoo sa cùtnuní váha iní-ó cuendá nchaa xíã<sup>n</sup>, dicó-ni sá cuendá nchaa sá cùtnuní váha iní-ó xíã<sup>n</sup> quidé càhnu-o mee-o, dico núú cùu iní-ó tnàha ñáyi-o te canu ichi-ö-yu ichi váha. <sup>2</sup> Te núú dava-ndo sàni iní-ndó sá tñha-ndo dico cùu-ndo ñáyi vátá cútñha-gá nacuáa tàú-xi cunduu. <sup>3</sup> Te núú nchòhó cúú iní-ndó Yá Ndiöxí te mee-gã càhá<sup>n</sup>-gá sá cúú-ndó ñáyi cùu cuendá-gá.

<sup>4</sup> Te vitna na càchí tnúhu-í xii-ndo nacuáa ndùu cuendá nchaa sá nchító-ó sãñaha ñáyi ndùu táhú nchaa sá càchí-yu cùu ndióxí te ñà ndàá chi dicó



ndaha cue téé ñuyú-a ní cuáha nchaa xíã<sup>n</sup>. Te nchoo cùtnuní iní-ó sã ncháá sã cãchí ñáyiu cùu ndióxí cãdũha-yu ñuyú-a ñá túú cùu-xi ndióxí, chi ì<sup>n</sup>dii díí-ni Yá Ndióxí ndécú. <sup>5</sup>Te cue ñáyiu ñuyú-a cãchí-yu sã cuèi andiu te cuèi ñuyú-a ndècu titní ndióxí. Te ndáá sã ndèni ní cuu ndècu espíritú sã cãchí ñáyiu cùu ndióxí te ñá ndàá sã ndióxí cùú-xí, te nchaa xíã<sup>n</sup> táxí tñuní ñáhá-xí xíí-yu. <sup>6</sup>Te nchoo cùtnuní ndáá iní-ó sã ì<sup>n</sup>dii díí-ni Yá Ndióxí ndécú te diu-gá cùú-gã Tãtá-ó, te nchoo cùu-o ñáyiu cùu cuendá-gá. Te diu-ni mee-gã ní táuchíú<sup>n</sup>-gã ní cuáha nchaa sã ió ñuyú-a, te cùtnuní tucu iní-ó sã ì<sup>n</sup>dii díí-ni Xítohó Jesucristú ndécú, te Yaá-á<sup>n</sup> ñí quide-gá nchaa chiú<sup>n</sup> ní táhú Dütú Ndióxí ní cadúha-gá nchaandi túhú sã ió ñuyú. Te diu-ni mee Xítohó Jesucristú quidé ndècu-o ichi-gá vitna.

<sup>7</sup>Te ñá ncháá nchòhò ñáyiu ndècu ichi Xítohó Jesucristú cùtnuní iní-ndó nàcuáa ndùu tñuhu cãhá<sup>n</sup>-í. Chi sa ní cáa<sup>n</sup>-ndo quide cahnu-ndo nchaa sã cãchí-yu cùu ndióxí ní cùu. Te cuendá xíã<sup>n</sup> nùu nàquehe<sup>n</sup>-ni-ndo nchaa sã nchító-ó ndùu táhú nchaa sã cãchí-yu cùu ndióxí-á<sup>n</sup> xéxí-ndó, te sàni-ni iní-ndó sã quidé cahnu-ndo nchaa sã cãchí-yu cùu ndióxí-á<sup>n</sup> te ñá ndàá sã ndióxí cùú-xí. Te núu sàni iní-ndó sã ñá túú vãha caxi-ndo sã dúcá<sup>n</sup> ndùu táhú-xi-á<sup>n</sup> te xèxi-ndo te xíã<sup>n</sup> ñá túú cùu vãha iní-ndó cuendá sã dúcá<sup>n</sup> quide-ndo. <sup>8</sup>Te ñá díú nchaa sã xéxí-ó quide-xi cudüu-o núú Yá Ndióxí, chi ì<sup>n</sup>-ni quide-xi cuèi na cãxi-o àdi vá cãxí-ó chi ni ì<sup>n</sup> sã cãxí-ó vã chindèe ñaha-xi cudüu-o núú Yá Ndióxí. Te cuèi vá cãxí-ó dico ñá díú xíã<sup>n</sup> cada sã vã cùdùu-o núú-gã. <sup>9</sup>Te cuu-ni caxi-ndo nchaa nãni nihí-ndó. Te dicó-ni sã càda cuendá-ndó sã ñá díú cuendá sã xéxí-ndó-ã<sup>n</sup> cuíta nihnu dava ñáyiu ndècu ndihi-ndo ichi Xítohó Jesucristú cadá-yu nãndi sã cadã-yu nàcuáa

vá cùú vãha iní Yá Ndióxí chi ñáyiu-á<sup>n</sup> ñá túú cùtnuní iní-yu. <sup>10</sup>Te nchòhò ñáyiu xini vãha cuendá nchaa sã cãchí-yu cùu ndióxí, te núu na quih<sup>n</sup>-ndó nùú ndécú nchaa xíã<sup>n</sup> te ngóo-ndo cãxi-ndo nchaa sã ñí cutáhú-xi, te quini ñáyiu ndècu ndihi-ndo ichi Xítohó Jesucristú, ñáyiu vátá cùtnuní-gá iní-xi nàcuáa ndùu cuendá nchaa sã dúcá<sup>n</sup> cãchí-yu cùu ndióxí-á<sup>n</sup>, te cuèi sàni iní-yu sã ñá túú quide vãha-ndo sã dúcá<sup>n</sup> quide-ndo te cudana te cada yicá-yu caxi-yu tñhá-yu nchaa sã dúcá<sup>n</sup> ñí nduu táhú nchaa sã cãchí-yu cùu ndióxí-á<sup>n</sup> te ñá ndàá sã ndióxí cùú-xí. <sup>11</sup>Te núu duca<sup>n</sup> cùtnuní iní-ndó nàcuáa ndùu cuendá nchaa xíã<sup>n</sup> te duca<sup>n</sup> quide-ndo, te sã dúcá<sup>n</sup> quide-ndo-á<sup>n</sup> te dàcuíta nihnu-ndo dàva-gá ñáyiu ndècu ndihi-ndo ichi Xítohó Jesucristú, ñáyiu vátá cùtnuní-gá iní-xi nàcuáa ndùu cuendá nchaa xíã<sup>n</sup>, te diu cuendá tñhá ñáyiu-á<sup>n</sup> ñí xihí Xítohó Jesucristú. <sup>12</sup>Te sã dúcá<sup>n</sup> quide-ndo-á<sup>n</sup> cùú-xí ì<sup>n</sup> cuèchi núú Xítohó Jesucristú, chi quide-ndo nàcuáa xínu iní-yu cadá-yu ì<sup>n</sup> sã sání iní-yu ñá túú vãha, núu xíã<sup>n</sup> ñá túú quide vãha-ndo sã cùú-xí-yu. <sup>13</sup>Te núu yúhú cùtnuní iní-í sã sã cuendá ì<sup>n</sup> sã cãxí-í te ngóo ì<sup>n</sup> ñáyiu ndècu ndihi-í ichi Xítohó Jesucristú cadá-yu ì<sup>n</sup> sã vã cùú vãha iní Yá Ndióxí, te vãha-gá sã vã cãxí-gã-í xíã<sup>n</sup> cuendá sã vã cadã-yu ì<sup>n</sup> sã vã cùú vãha iní-gã.

### Nchaa sã cùú càda cue téé ní táuchíú<sup>n</sup> Xítohó Jesucristú cãhá<sup>n</sup> tñuhu-gá

**9** Te yúhú chi cuu cada-í nchaa sã sání iní-í, chi tñhá-í ní táuchíú<sup>n</sup> Xítohó Jesucristú cãhá<sup>n</sup>-í tñuhu-gá núú ñáyiu. Te yúhú ní xini núu-í Xítohó Jesucristú Yaá cùú Xítohó-ó te nchòhò cùú-ndó ñáyiu ní sãndáá iní tñuhu-gá sã cãhá<sup>n</sup>-í te duca<sup>n</sup> chi ndècu ndihi-í-gã. <sup>2</sup>Te ió dava ñáyiu ñá túú sãndáá iní-yu sã Xítohó Jesucristú ní táuchíú<sup>n</sup>-gã cãhá<sup>n</sup>-í tñuhu-gá,

dico nchòhó chi cùtnuní ndáá iní-ndó sá dífú-gã ní tendaha ñaha-gá xii-í xicá cùu-í cãhá<sup>n</sup>-í tnúhu-gá, te duca<sup>n</sup> chi yúhú ní cãhá<sup>n</sup>-í tnúhu-gá núu-ndó te ní sándáá iní-ndó-gã te xiã<sup>n</sup> cùtnuní sá dífú-gã ní tendaha ñaha-gá xii-í xicá cùu-í cãhá<sup>n</sup>-í tnúhu-gá núu ñáyiú.

<sup>3</sup> Te duha ndùu tnúhu cãhá<sup>n</sup>-í cuèndá cundedòho nchaa ñáyiú sàtnuhu ñaha xii-í. <sup>4</sup> Chi yúhú cuu-ni caxi-í nchaa núu sá cùú caxi-o na taxi ñáyiú.

<sup>5</sup> Te cuu-ni cundecu ñadìhí-í te caca ndeca-í-yu nchaa núu xicá cùu-í cãhá<sup>n</sup>-í tnúhu Yá Ndiòxí dàtná quidé dàva-gá cue téé cãhá<sup>n</sup> tnúhu-gá, ndihi cue téé cùu ñaní Xítóhó Jesucristú, ndihi té Pèlú. <sup>6</sup> Te tnàhá yúhú ndihi té Bèè cuu daña-ndí chù<sup>n</sup> quide-ndí te cada-ndí dàtná xiquide dàva-gá-güedé cãhá<sup>n</sup>-güedé tnúhu Xítóhó Jesucristú.

<sup>7</sup> Te nchoo xiní-ó sá ncháá cuè sandadú dacuitíí sá ñúhú yáhu-güedé xinú cuèchi-güedé, te ñá túú dicó duca<sup>n</sup> xinú cuechi-güedé. Te duca<sup>n</sup> sãtnahá-xi cùu tucu ñáyiú xitu ñ<sup>n</sup> sá xítú chi dacuitíí ñihí-yu ñ<sup>n</sup> sá xítú-yu xèxi-yu, te ñá dífú dicó duca<sup>n</sup> xítú-yu. Te duca<sup>n</sup> cùu tucu cue téé cùu toli chi quihni-güedé dífú quiti xito-güedé xihni-güedé te ñá túú dicó duca<sup>n</sup> xito-güedé-di. <sup>8</sup> Te vá cání iní-ndó sá sà dúhá cãhá<sup>n</sup>-í te cãhu iní mée-í duha cãhá<sup>n</sup>-í, chi tnúhu cãhá<sup>n</sup>-í-a ñ<sup>n</sup>-ni quèè-xi ndihi tnúhu ní cãhá<sup>n</sup> ndíi Moisés. <sup>9</sup> Chi ndíi-á<sup>n</sup> ní chídó tnùní ndíi núu tütú ndíi nàcuáa ní xáha<sup>n</sup> Yá Ndiòxí xii ndíi, te cãchí-xi: “Vá chíhí-ndó ñunu yuhu ndicutu oré dãnchihí-di tríú”, duha cãchí-xi núu tütú ndíi. Te ñá dífú sá dúcá<sup>n</sup> ní cãhá<sup>n</sup> Yá Ndiòxí te cãhá<sup>n</sup>-gá mee-ni cuèndá ndicutu-á<sup>n</sup>. <sup>10</sup> Chi ní cãhá<sup>n</sup>-gá cuèndá nchoo cuè ñáyiú ndècu ichi-gá, te ndáá sá dífú cuèndá-ó dùca<sup>n</sup> ní cãhá<sup>n</sup>-gá. Te nchaa cue téé xitu chihni tátá sàni iní-güedé sá dífú tátá chíhí-güedé-á<sup>n</sup> cuu sá caxí-güedé, te diu-ni duca<sup>n</sup> cùu tucu cue téé xicani tríú chi cãni-güedé

cuèndá quee caxi-güedé. <sup>11</sup> Te duca<sup>n</sup> sãtnahá-xi cùu nchúhú cue téé cãhá<sup>n</sup> tnúhu Xítóhó Jesucristú, chi dànehé ñáhá-ndí xii-ndo cuèndá nchaa sá vãha quide ñaha Yá Ndiòxí xii-o, núu xiã<sup>n</sup> dai tàú-xi sá nchòhó chindee ñaha-ndo xii-ndí núu ná cùú sá xiní ñùhu-ndí. <sup>12</sup> Te núu dava cue téé cãhá<sup>n</sup> tnúhu Yá Ndiòxí chindèe-ndo-güedé, te uu<sup>n</sup>-gá duca<sup>n</sup> tàú-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tàú ndisa-ndo sá chindèe ñaha-ndo xii-ndí dico ñá túú dùca<sup>n</sup> cãhá<sup>n</sup>-ndí núu-ndó càda-ndo, te quide cahnu iní-ndí cuèi nãndí sá tá yãha-ndí véxi. Te duca<sup>n</sup> quide-ndí cuèndá sá ñà túú nã cani iní ñáyiú cuèndá-ndí te duca<sup>n</sup> cuíta cutènuu-gá tnúhu sá cãhá<sup>n</sup> nàcuáa naníhí tàhú-ó quíh<sup>n</sup>.

<sup>13</sup> Te nchòhó xiní-ndó sá ncháá cuè téé xinú cuechi veñúhu diu-ni xiã<sup>n</sup> ñihí-güedé xéxi-güedé, te diu-ni cue téé-á<sup>n</sup> xinú cuèchi-güedé núu xihí quiti ndùu tàhú Yá Ndiòxí, te diu-ni xiã<sup>n</sup> ñihí tucu-güedé sá xéxi-güedé. <sup>14</sup> Te diu-ni duca<sup>n</sup> sãtnahá-xi cùu nchúhú cue téé cãhá<sup>n</sup> tnúhu sá cãhá<sup>n</sup> nàcuáa naníhí tàhú-ó, chi Xítóhó Jesucristú ní cachí-gá sá dífú-ní cuèndá chù<sup>n</sup> quide-ndí ñihí-ndí caxi-ndí. <sup>15</sup> Te ñá ñ<sup>n</sup> ndùu cãhá<sup>n</sup>-í núu-ndó càda-ndo nàcuáa tàú-xi cunduu sá cùú-xi-í, te vá cání iní-ndó sá sà dúhá cãhá<sup>n</sup>-í te ñ<sup>n</sup> sá xicá<sup>n</sup>-í núu-ndó. ¡Chi cuèi na cùu-í sá ndóhò-í te ñá dífú sá cãhá<sup>n</sup> ñáyiú sá sá cuèndá sá cãhá<sup>n</sup>-í tnúhu Xítóhó Jesucristú ñihí-í xéxi-í!

<sup>16</sup> Te yúhú ñá túú quide cahnú-í mée-í sá cãhá<sup>n</sup>-í tnúhu sá cãhá<sup>n</sup> nàcuáa naníhí tàhú-ó, chi tàú tnàhá-í sá càdà-í chi duca<sup>n</sup> ní cachí Yá Ndiòxí cada-í. ¡Te ndàhú ní cuu yúhú te núu vá cãhá<sup>n</sup>-í tnúhu-á<sup>n</sup>! <sup>17</sup> Te ñá túú cãhá<sup>n</sup>-í tnúhu-gá sá cùú iní mée-í chi mee-gã ní táuchíú<sup>n</sup>-gã cãhá<sup>n</sup>-í tnúhu-gá. Te núu cãhá<sup>n</sup>-í tnúhu-gá sá cùú iní mée-í te tàú-í ñihí-í sá ndúú tãhù-í ní cùu. <sup>18</sup> Dico sá sá

ní nduu táhù-í cúú-xí sǎ ǐo cùdíí ìní-í sǎ díco duca<sup>n</sup> càhá<sup>n</sup>-í tnúhu sǎ càhá<sup>n</sup> nàcuáa naníhí tǎhú-ó. Te cuèi tàù-í quehe<sup>n</sup>-í sǎ táxí-ndó nduu táhù-í sǎ cuendá sǎ càhá<sup>n</sup>-í tnúhu Xítóhó Jesucristú, dico ñá túú dùca<sup>n</sup> quide-í. <sup>19</sup>Te sǎ dúcá<sup>n</sup> díco duca<sup>n</sup> càhá<sup>n</sup>-í tnúhu sǎ càhá<sup>n</sup> nàcuáa naníhí tǎhú-ó, xǎ<sup>n</sup> ni ì<sup>n</sup> ñáyíu ñuyú-a vá cúú cǎchí-yu sǎ táxí tnùní ñáhà-yu xii-í, te cuèi duca<sup>n</sup> dico mee-í ní sani ìní-í sǎ cúú-í dàtná ì<sup>n</sup> téé xínu cuechi núú nchàa ñáyíu cuendá duca<sup>n</sup> cuíta cuu vaí-yu tuhá-yu ichi Xítóhó Jesucristú quíhí<sup>n</sup>. <sup>20</sup>Te òré ñúhú tnàhí tnuú cue ñáyíu isràél te quide-í sǎ í<sup>n</sup>-ní cùu-í ndíhí-yu cuèi ñá túú nchìcú<sup>n</sup> nihnu-í tnúhu ní cǎhá<sup>n</sup> ndíi Moisés, te duca<sup>n</sup> quide-í cuendá sǎ ñáyíu-á<sup>n</sup> quíndáá ìní-yu tnúhu càhá<sup>n</sup>-í te tuhá-yu ichi Xítóhó Jesucristú. <sup>21</sup>Te òré ñúhú tnàhí tnuú nchaa ñáyíu ñá túú nchìcú<sup>n</sup> nihnu tnúhu ní cǎhá<sup>n</sup> ndíi Moisés, te quide-ni-í sǎ quidè-í dàtná quidé mèe-yu cuendá quíndáá ìní-yu tnúhu càhá<sup>n</sup>-í, te tuhá-yu ichi Xítóhó Jesucristú. Te cuèi duca<sup>n</sup> quide-í dico ñá túú dàña ndeé-í quidè-í nchaa nàcuáa cuíní Yǎ Ndiòxí cada-o, te duca<sup>n</sup> chi nchìcú<sup>n</sup> nihnu-í quidè-í nchaa nàcuáa càhá<sup>n</sup> Xítóhó Jesucristú. <sup>22</sup>Te òré ndécù-í ndíhi nchaa ñáyíu ñá túú cùtnuní váha ìní-xi nàcuáa cundecu ichi Xítóhó Jesucristú, te tnàhá-í quidè-í dàtná quidè-yu cuendá sǎ ná tédóho-yu nchaa tnúhu càhá<sup>n</sup>-í te duca<sup>n</sup> cùtnuní-gá ìní-yu nàcuáa cundecú-yu ichi-gá. Te nchaandi túhú ñáyíu quide-í sǎ ì<sup>n</sup>-ní cuu-í ndíhí-yu cuendá duca<sup>n</sup> ñíhí-í nàcuáa cada-í te cundedóho-yu tnúhu càhá<sup>n</sup>-í te tñí-yu ichi Xítóhó Jesucristú te naníhí tǎhú-yu. <sup>23</sup>Te duha quide-í cuendá sǎ cuítá quíndáá ìní-yu tnúhu sǎ càhá<sup>n</sup> nàcuáa naníhí tǎhú-ó quíhí<sup>n</sup>, te duca<sup>n</sup> te tnàhá yúhú ío váha cundecu-í dàtná càhá<sup>n</sup> tnúhu-á<sup>n</sup>.

<sup>24</sup>Te nchòhó sa xini-ndó sǎ ncháá cuè téé xínu quíhu màrcúhúyú nchaa-güedé

xínú-güedé, dico ì<sup>n</sup>-ní-dé cúú tée ndacu ngodó núú te téé-á<sup>n</sup> cúú tée ñíhí sǎ ndúú tǎhú-xi, te duca<sup>n</sup> xini ñuhu-xi cada nchòhó tucu chi cada-ndo nchàa nacuáa cuíní Yǎ Ndiòxí cada-ndo cuendá duca<sup>n</sup> ñíhí-ndó sǎ ndúú tǎhú-ndó. <sup>25</sup>Te nchaa cue téé xini dadíqui te váha váha quide cuendá-güedé núu ná cúú sǎ cǎdá tñèñi te xòcani-güedé cuendá sǎ ñá dífú xǎ<sup>n</sup> cada te cuíta-güedé òré dadíqui-güedé. Te duca<sup>n</sup> quide-güedé cuendá cuíní-güedé ñíhí-güedé sǎ ndúú tǎhú-güedé, te sǎ ndúú tǎhú-güedé-á<sup>n</sup> cúú-xí ì<sup>n</sup> sǎ ndíhí nihnu ñuyú-a. Dico nchoo nducu ndee-o quide-o nacuáa ñíhí-ó sǎ ndúú tǎhú-ó, te xǎ<sup>n</sup> cudíi-xi cundecu ndíhi-o ñi caa ñi quíhí<sup>n</sup>. <sup>26</sup>Te yúhú quidè-í dàtná quidé cuè téé xínu, chi cue téé-á<sup>n</sup> xini-güedé núú quéxio-güedé, te quide tucu-í dàtná xǎquide cue téé sa ní cutúha naá, te ñá túú quide-í dàtná quidé cuè téé vitna dàcuaha naá. Te duca<sup>n</sup> chi yúhú quidè-í nchaa nàcuáa cuíní Yǎ Ndiòxí cunduu. <sup>27</sup>Te yúhú ñá túú dàña-í taxi tnùní ñáhà ñi ì<sup>n</sup> sǎ cuèhé sǎ dúhá xii-í chi yòtnii-í mèe-í. Te duca<sup>n</sup> quide-í chi yúhú càhá<sup>n</sup>-í tnúhu Xítóhó Jesucristú núú ñáyíu, te cuíní-í sǎ vǎ cuíta sǎ ñi cǎchí Yǎ Ndiòxí nduu táhù-í.

### Cuendá nchaa sǎ ñi cadúha cue téé ñuyú-a quide cahnu ñáyíu

**10** Te nchòhó ñáyíu ndècu ndíhi-í ichi Xítóhó Jesucristú na cǎchí tnúhu-í xii-ndo cuendá nchaa ñaní tnàhá-ndí ñáyíu isràél ní xindecu ndéé sanaha, chi vitna tnàhá nchòhó cúú-ndó dàtná cue ñaní tnàhá nchàa ñáyíu-á<sup>n</sup> chi ndècu-ndo ichi-gá. Te nchaa ñáyíu-á<sup>n</sup> ñi taxi ndecu Yǎ Ndiòxí ì<sup>n</sup> vícò ñi dánèhé ñáhà-xí xii-yu ichi quíhí<sup>n</sup>-yu, te ní queé dava ndute làmár nání Mǎr Tícuèhé te ncháá-yu ní yáha-yu. <sup>2</sup>Te sǎ dúcá<sup>n</sup> ñi cuu te ncháá-yu ì<sup>n</sup>-ná ní cuú-yu ndíhi ndíi Moisés, te ní xíhi ndaha ñàha ndíi xii-yu.

<sup>3</sup>Te nchaá-yu ní xexí-yu sá nǐ sǎñaha Yǎ Ndiǒxí xíi-yu. <sup>4</sup>Te duca<sup>n</sup> nchàa tucú-yu ní xihí-yu ndute sá nǐ sǎñaha-gǎ xíi-yu, ndute sá nǐ quee yiqui nàha cava. Te cava-á<sup>n</sup> cada iní-ó sǎ cúu-xí dàtná Xítóhó Jesucristú te duca<sup>n</sup> chi ndihi ñaha-gǎ xíi-yu ichi cuáhá<sup>n</sup>-yu dàvá-á<sup>n</sup>. <sup>5</sup>Dico ío vǎi-yu ñá túú ní quidé-yu nàcuáa càhá<sup>n</sup> Yǎ Ndiǒxí, te xǎá<sup>n</sup> ñá túú ní cùu váha iní ñáhá-gǎ xíi-yu. Te sá dúcá<sup>n</sup> ní quidé-yu núu xǎá<sup>n</sup> òré ñúhú-yu ichi cuáhá<sup>n</sup>-yu xití yucu ío vǎi-yu ní xihí.

<sup>6</sup>Te duca<sup>n</sup> nǐ cuu cuendá nchoo vǎ cǎnchícú<sup>n</sup> nihnu-o càda-o nacuáa ní quidé-yu, chi ñáiyu-á<sup>n</sup> mee-ni nchàa sá cuèhé sá dúhá nǐ sani iní-yu ní quidé-yu. Te nchoo xini ñuhu-xi sá vǎ dúcá<sup>n</sup> càda-o. <sup>7</sup>Te yúhú càhá<sup>n</sup>-í dóho-ndo sǎ vǎ quindáa iní-ndó te ni vǎ cáda càhnu-ndo ni ñ<sup>n</sup> sá cǎchí-yu cùu ndióxí ní cadúha cue téé ñuyúú-a dàtná ní quide cue ñaní tnáhá-ndǐ ní xíndecu ndéé sanaha. Chi ñáiyu-á<sup>n</sup> nǐ quidé-yu dàtná càhá<sup>n</sup>-xi núú tütú Yǎ Ndiǒxí núú cǎchí-xi: “Nchaa ñáiyu ní xexí-yu ní xihí-yu ní quidé-yu vico, ní quide cǎhnú-yu sá cǎchí-yu cùu ndióxí ní cadúha-yu te ñá ndàá sá ndiǒxí cúu-xí”, duha cǎchí-xi núú tütú-gǎ. <sup>8</sup>Te ni vǎ cùndècu-ndo ichi díí iní dàtná ní quide dava ñáiyu-á<sup>n</sup>, chi sá dúcá<sup>n</sup> nǐ quidé-yu te ní xihí ócó úní mǐl-yu ñ<sup>n</sup>-ni ndúu. <sup>9</sup>Te vǎ cǎní iní-ndó sǎ sá cǎhnú iní Yǎ Ndiǒxí te nándi sá cuèhé sá dúhá càda-ndo cuendá cuíní-ndó quíní-ndó núu nása cada ñaha-gǎ xii-ndo, chi ñáiyu ní xíndecu ndéé sanaha-ǎ<sup>n</sup> duca<sup>n</sup> nǐ xóo cadá-yu, te ní xihí-yu ní xexiha<sup>n</sup> cǒó. <sup>10</sup>Te ni vǎ càhá<sup>n</sup> cuèhé-ndó cuendá Yǎ Ndiǒxí, chi dava ñáiyu ní xíndecu ndéé sanaha-ǎ<sup>n</sup> duca<sup>n</sup> nǐ quidé-yu ní cǎhá<sup>n</sup> cuèhé-yu cuendá-gǎ te ní quixi espíritu xínú cuèchi núú-gǎ ní sahni ñaha-xi xíi-yu.

<sup>11</sup>Te duca<sup>n</sup> nǐ cuu te duca<sup>n</sup> nǐ ngúndéé núú tütú Yǎ Ndiǒxí cuendá dacuàha-o vitna ta cuyatni nduu naa ñuyúú-a.

Te nchaa tnúhu sá nǐ ngódó tnùní-á<sup>n</sup> càhá<sup>n</sup> dóho ñaha-xi xii-o cuendá sá vǎ cáda-ó dàtná ní quide ñáiyu-á<sup>n</sup>. <sup>12</sup>Te xǎá<sup>n</sup> núu nchaa nchòhó ñáiyu sàni iní sá ío váha cùndáa ndécú ichi Xítóhó Jesucristú cada cuendá-ndó sá dúcá<sup>n</sup>-ní cùndáa-ndó núú-gǎ, te vǎ dáná cuendá-ndó càda-ndo sá ñá túú cùu váha iní Yǎ Ndiǒxí. <sup>13</sup>Te diu-ni dàtná quidé sàcufhná dǎcàhá<sup>n</sup>-xi iní nchaa dava-gǎ ñáiyu nándi quidé-yu, te diu-ni duca<sup>n</sup> quide ñaha-xi xii-ndo. Dico mee Yǎ Ndiǒxí cúu-gǎ Yaá quidé ndáa chi quide-gǎ nchaa sá càhá<sup>n</sup>-gǎ, te ñá dáñá-gǎ sá sùúní cuídó sàcufhná coto ndéé ñáhá-xí xii-ndo, chi není-ni nàcuáa cùndee iní-ndó dàña-gǎ duca<sup>n</sup> quide ñaha-xi xii-ndo. Te diu-ni-gǎ chindee ñaha-gǎ xii-ndo cùndee iní-ndó vǎ cáda-ndó cuèi nándi sá ná dàcahu iní ñáhá-xí xii-ndo.

<sup>14</sup>Te xǎá<sup>n</sup> núu càhá<sup>n</sup>-í dóho nchòhó ñáiyu ío cùu iní-í sá vǎ quindáa iní-ndó nǐ ñ<sup>n</sup> sá cǎchí-yu cùu ndióxí te ñá ndàá chi dícó ndaha cue téé ñuyúú-a ní cuáha nchaa xǎá<sup>n</sup>, te ni vǎ cáda càhnu-ndo. <sup>15</sup>Te duha càhá<sup>n</sup>-í chi cùu-ndo ñáiyu tècú tnùní, te mee-ndo ío váha cuáha-ndo cuendá te núu váha-ni càhá<sup>n</sup>-í àdi ñá túú vǎha-ni. <sup>16</sup>Te nchoo ndàcá<sup>n</sup> táhú-ó núú Yǎ Ndiǒxí cuendá ndudí ndéhé yoho yàha stilé sá xihí-ó, te sá dúcá<sup>n</sup> xihí-ó ndudí ndéhé yoho yàha stilé-á<sup>n</sup>, te xǎá<sup>n</sup> ndácú iní-ó sǎ ñ<sup>n</sup>-ní cùu-o ndihi Xítóhó Jesucristú cuendá sá nǐ satí níní-gǎ ní xihí-gǎ núú cùrúxí, te diu-ni duca<sup>n</sup> sǎtnahá tucu-xi cùu paá sá xéxí-ó òré xihí-ó ndudí ndéhé yoho yàha stilé-á<sup>n</sup>, chi sá dúcá<sup>n</sup> xèxi-o paá-á<sup>n</sup> xǎá<sup>n</sup> ndácú iní-ó sǎ ñ<sup>n</sup>-ní cùu-o ndihi Xítóhó Jesucristú sá cuendá yiqui cùñú-gǎ. <sup>17</sup>Te cuèi vǎi vihi-o dico ñ<sup>n</sup>dii-ni paá xéxí-ó, te sá dúcá<sup>n</sup> ñ<sup>n</sup>dii-ni paá xéxí-ó xǎá<sup>n</sup> ndácú iní-ó sǎ ñ<sup>n</sup>-ní cùu-o ndihi Xítóhó Jesucristú.

<sup>18</sup> Te cada cuendá-ndó nàcuáa quide ñáyiú isràél, chi ñáyiú-á<sup>n</sup> xéxí-yu sá ndúú táhú Yá Ndiöxí. Te sá dúcá<sup>n</sup> quidé-yu-á<sup>n</sup> cútnùní iní-ó sá tnàhá tnúhu-yu ndìhi-gá. <sup>19</sup> Te vá cání iní-ndó sá sà dúhá càhá<sup>n</sup>-í te cachí-ndó sá cùnuu nchaa sá càchí-yu cùu ndiöxí ní cadúha cue tée ñuyúú-a chi ñá túú nã cúú nì ì<sup>n</sup> nchaa xǎ<sup>n</sup>. Te diu-ni duca<sup>n</sup> cùu tucu nchaa sá sǎnhaha ñáyiú ndùu táhú-xi chi ñá túú cùnuu-xi, chi ì<sup>n</sup>-ni cùu-xi ndìhi nchaa dava-gá sá xéxí-ó. <sup>20</sup> Te yúhú càchí-í sá sá dúcá<sup>n</sup> quide nchaa ñáyiú ñá túú tnàhá tnúhu ndìhi Yá Ndiöxí, te dicó nchaa espíritú cùndìhi yucu ñávàha sǎñhàhà-yu sá ndúú táhú-xi sá dúcá<sup>n</sup> quidé-yu. Te ñá dǔú Yá Ndiöxí sǎñhàhà-yu sá ndúú táhú-gǎ. Te yúhú cuiní-í sá vǎ tnàhá tnúhu-ndo ndìhi cue espíritú cùndìhi yucu ñávàha. <sup>21</sup> Te duca<sup>n</sup> chi vá cúú tnàhá tnúhu-o ndìhi cue espíritú cùndìhi yucu ñávàha te tnahá tnúhu-o ndìhi Xítóhó Jesucristú, te ñá túú ndùu váha-xi ngóo càxi-o coho-o sá ndúú táhú cue espíritú cùndìhi yucu ñávàha-á<sup>n</sup>, te ngóo càda-o nacuéa ní dándöo tnúhu Xítóhó Jesucristú coho-o ndùdí ndéhé yoho yàha stilé, te caxi-o pǎa cada-o sá ndácú iní-ó sá nǐ xǐhí-gá núú cùrúxí. <sup>22</sup> Te vá cání iní-ó òuca<sup>n</sup> cada-o cuendá sá vǎ cùdǎé<sup>n</sup> Yá Ndiöxí, chi ñá túú nã càhnu cuu-o núu cada-o nǎni véxi iní mée-ó, chi mee-gǎ ío càhnu cuu-gá.

### **Cada-o nchàa nacuéa cuu càhnu Yá Ndiöxí**

<sup>23</sup> Te ndáá sá ncháá sá cuiní-ó càda-o te cuu cada-o dico ñá ncháá cùu-xi sá vǎha sá cúú-xí-ó, te ni ñá ncháá-xí chindee ñaha-xi nacuéa níhí ndée-gǎ-ó cùndecu-o ichi Xítóhó Jesucristú. <sup>24</sup> Te xǐni ñuhu-xi sá cadá-ó sá vǎha sá cúú-xí tnàha ñáyiú-o te ñá dǔú mée-ni sá cúú-xí mée-o cada-o.

<sup>25</sup> Te nchòhó cuu caxi-ndo nchàa cuñú sá cùyáhu cuñú sá xǐní caxi-ndo, te vá ndúcú tnúhu-ndo te núu cùu-xi cuñú sá nǐ nduu táhú sá càchí-yu cùu ndiöxí. Te ñá túú nã cani iní-ndó càxi-ndo, <sup>26</sup> chi ñuyúú-a ndìhi nchaa sá ío cúú-xí cuendá Yá Ndiöxí.

<sup>27</sup> Te núu ì<sup>n</sup> ñáyiú ñá túú ndècu ichi Xítóhó Jesucristú càhá<sup>n</sup> ñáhà-yu xii-ndo quǐhǐ<sup>n</sup>-ndó càxi-ndo dítá vehé-yu, te núu sàni iní-ndó sá quǐhǐ<sup>n</sup>-ndó te cuu quǐhǐ<sup>n</sup>-ndó te caxi-ndo cuèi nǎi cùu sá táxí-yu dico vá càcá<sup>n</sup> tnúhú-ndó nǔú-yu núu ndèé ní níhí-yu, te duca<sup>n</sup> te cuu váha iní-ndó càxi-ndo. <sup>28</sup> Te núu ì<sup>n</sup> ñáyiú càchí-yu sá xǎ<sup>n</sup> cúú-xí sá nǐ nduu táhú sá càchí-yu cùu ndiöxí te vá cǎxí-ndó cuendá sá ñáyiú duca<sup>n</sup> càhá<sup>n</sup>-á<sup>n</sup> cuu váha iní-yu te ñá túú tnàhí ná cani iní-yu. <sup>29</sup> Te yúhú càhá<sup>n</sup>-í cuendá nàcuáa sàni iní mée ñáyiú duca<sup>n</sup> càhá<sup>n</sup>-á<sup>n</sup> te ñá dǔú sá nàcuáa sàni iní mée-ndó quide-ndo.

Te dava-ndo càchí-ndó: “Cuu-ni cada-o nchàa nacuéa sàni iní mée-ó cuèi dava-gá ñáyiú sàni iní-yu sá ñá túú ndùu váha-xi sá dúcá<sup>n</sup> càda-o”, duha càchí-ndó. <sup>30</sup> Te càchí tucu-ndo: “Ñá túú tàù-xi càhá<sup>n</sup> cuèhé ñáyiú cuendá-ó sá cuendá nchaa sá xéxí-ó chi ndàcá<sup>n</sup> táhú-ó nǔú Yá Ndiöxí òré xéxí-ó”, duha càchí-ndó. <sup>31</sup> Te cuèi nǎndi sá xǐní caxi-ndo níhí-ndó xèxi-ndo àdi quide-ndo, te cada-ndo nàcuáa càhá<sup>n</sup> váha ñáyiú cuendá Yá Ndiöxí. <sup>32</sup> Te vá cadá-ndó sá ñá túú tàù-ndó càda-ndo cuendá sá vǎ cadá ñáyiú ì<sup>n</sup> sá ñá túú cùu váha iní Yá Ndiöxí. Te ni sá cúú-xí cuè ñáyiú isràél, te ni sá cúú-xí cuè ñáyiú ñá túú cùu ñáyiú isràél, te ni sá cúú-xí cuè ñáyiú ndècu ichi-gá vá dúcá<sup>n</sup> càda-ndo sá cúú-xí-yu. <sup>33</sup> Te yúhú ío ndùcu ndee-í quidè-í nàcuáa cudùu-í núu nchàa ñáyiú, te quide-í sá vǎha sá cúú-xí-yu, te ñá túú quide-í mee-ni sá cúú-xí mée-í. Te duca<sup>n</sup> quide-í cuendá

quíndáá iní-yu tnúhu Xítohó Jesucristú te naníhí tǎhú-yu.

**11** Te chí cáncicú<sup>n</sup> nihnu cada-ndo ncháa nacuáa quide-í nchicú<sup>n</sup> nihnu-í ncháa nàcuáa quide Xítohó Jesucristú.

**Nàcuáa tàù-xi cada ncháa  
ñáyiú dìhí núú tàcá-yu  
dàcuahá-yu tnúhu Yá Ndiòxí**

<sup>2</sup>Te nchòhò ñáyiú ndècu ndihi-í ichi Xítohó Jesucristú càchí tnúhu-í xii-ndo sǎ ïo cùdíí iní-í, chí ndàcu iní ñáhá-ndó xii-í, te quide-ndo ncháa nacuáa ní dánèhé ñáhà-í xii-ndo. <sup>3</sup>Te cuiní-í sǎ nchòhò cutnùnì iní-ndó sǎ ì<sup>n</sup>dii-ni Yá Ndiòxí cúú-gǎ Yaá cúnùu taxi tnuí ñáhá xii Xítohó Jesucristú, te duca<sup>n</sup> Xítohó Jesucristú ì<sup>n</sup>dii-ni-gǎ cúnùu taxi tnuí-gǎ ncháa cue téé, te ncháa cue téé ðiu-ni mee-güedé cúnùu-güedé táxí tnùnì-güedé ñadìhí-güedé. <sup>4</sup>Te núu nchoo cuè téé na dàdáhu-o ðíquí-ó òré càhá<sup>n</sup>-ó núú ñáyiú tnúhu sǎ dácàhu iní ñáhá Yá Ndiòxí xii-o àdi oré càhá<sup>n</sup> ndihi-o-gǎ, te ì<sup>n</sup> sácá<sup>n</sup>núú cúú-xí te núu duca<sup>n</sup> na càda-o dadáhu-o ðíquí-ó. <sup>5</sup>Dico núu ñáyiú dìhí vǎ dádáhu-yu ðíquí-yu òré càhá<sup>n</sup> ndihí-yu Yá Ndiòxí, àdi oré càhá<sup>n</sup>-yu tnúhu sǎ dácàhu iní ñáhá-gǎ xii-yu núú tnàhá ñáyiú-yu, te sácá<sup>n</sup>núú cúú-xí te núu vǎ dádáhu-yu ðíquí-yu, chí ì<sup>n</sup>-ni cùu-xi te núu na dèté ndíí-yu ðíquí-yu. <sup>6</sup>Te núu ñǎ túú cuiní cue ñáyiú dìhí dàdáhu-yu ðíquí-yu te váha-gǎ sǎ ná dèté ndíí-yu ðíquí-yu. Te núu cùcaha<sup>n</sup> núú-yu sǎ dèté ðíquí-yu te váha-gǎ sǎ ná dàdáhu-yu ðíquí-yu. <sup>7</sup>Te nchoo cuè téé vǎ cúú dàdáhu-o ðíquí-ó òré càhá<sup>n</sup> ndihi-o Yá Ndiòxí ni òré càhá<sup>n</sup>-ó tnúhu sǎ dácàhu iní ñáhá-gǎ xii-o núú ñáyiú chí díhna-gǎ-ó ñí cadúha ñaha Yá Ndiòxí xii-o, te ní taxi ndecu-gǎ ncháa sǎ xini tnùnì-ó dàtnǎ ndécú ncháa sǎ xini tnùnì méé-gǎ. Te

duca<sup>n</sup> ñí quide-gǎ chí cuiní-gǎ sǎ nchóó càda-o nacuáa cáhá<sup>n</sup> ncháa dava-gǎ ñáyiú sǎ ïo càhnu cuu-gǎ, te cue ñáyiú dìhí quidè-yu nàcuáa cunuú nchòo cue téé. <sup>8</sup>Te Yá Ndiòxí ní cadúha-gǎ téé, dico ñǎ ðíú yìqui naha ñadìhí ní quènehe-gǎ ní cadúha-gǎ téé chí yiquí naha téé ní quenehe-gǎ ní cadúha-gǎ ñadìhí. <sup>9</sup>Te sǎ cuendá téé duca<sup>n</sup> ní cadúha-gǎ ñadìhí-á<sup>n</sup> te ñǎ ðíú sǎ cuendá ñadìhí ní cadúha-gǎ téé. <sup>10</sup>Núu xíǎ<sup>n</sup> tàù-xi sǎ ncháá ñáyiú dìhí dàdáhu-yu ðíquí-yu cuendá duca<sup>n</sup> cùnunì sǎ ñǎ túú cùnùu-yu dàtnǎ cúnùu nchoo cue téé. Te duca<sup>n</sup> xini ñuhu-xi cadá-yu sǎ cuendá ncháa espíritú xínú cuèchi núú Yá Ndiòxí. <sup>11</sup>Te vitna nchoo ñáyiú ndècu ichi Xítohó Jesucristú, vǎ càchí-ó sǎ cuè téé ñǎ túú xini ñuhu-güedé cue ñáyiú dìhí chindee ñáhá-yu, te ni vǎ càchí-ó sǎ cuè ñáyiú dìhí ñǎ túú xini ñuhú-yu cue téé chindee ñàha-güedé xii-yu. <sup>12</sup>Te ì<sup>n</sup> yiquí naha téé ní queñuhu Yá Ndiòxí ní cadúha-gǎ ñadìhí, dico vitna chí ñáyiú dìhí dácàcú-yu téé. Te téé, ñadìhí ní cadúha Yá Ndiòxí, te ðiu-ni duca<sup>n</sup> ní cadúha-gǎ ncháa dava-gǎ sǎ ïó.

<sup>13</sup>Te mee-ndo càda cuendá-ndó te núu ndùu váha-xi sǎ vǎ dádáhu cue ñáyiú dìhí ðíquí-yu òré càhá<sup>n</sup> ndihí-yu Yá Ndiòxí àdi ñáhá. <sup>14</sup>Te ncháa ñáyiú càhá<sup>n</sup>-yu sǎ ñǎ túú ndùu váha-xi sǎ cuè téé cunduu nàni idi ðíquí-güedé, chí ì<sup>n</sup> sácá<sup>n</sup>núú cúú-xí càchí-yu. <sup>15</sup>Te ncháa ñáyiú dìhí ñáyiú nàni idi ðíquí-xi càchí ñáyiú sǎ ì<sup>n</sup> sǎ vǎha cùu-xi sǎ cúú-xí-yu sǎ dúcá<sup>n</sup> nàni idi ðíquí-yu. Te duca<sup>n</sup> chí Yá Ndiòxí ní cachí-gǎ sǎ dúcá<sup>n</sup> cùnùu-yu cuendá quidáhu-xi ðíquí-yu. <sup>16</sup>Te núu ïó ñáyiú cuiní dacáa cuendú cuendá sǎ ñí càhá<sup>n</sup>-í-a, te na cùnahá-yu sǎ ncháá nchùhú cue téé càhá<sup>n</sup> tnúhu Xítohó Jesucristú ðiu-ni duca<sup>n</sup> sàni iní-ndí cada ncháa ñáyiú dìhí. Te ðiu-ni duca<sup>n</sup> sàni iní ncháa ñáyiú ndècu ichi-gǎ.

**Cuèndá ñáyiú ñá túú quide datná  
ní quide Xítohó Jesucristú  
cútnàhá ní cudìni-gá ndihi  
cue téé ní xica cuu ndihi-gá**

<sup>17</sup> Te nchòhó ñá túú quide váha-ndo ndècu-ndo núú xíá<sup>n</sup> duha na càhá<sup>n</sup>-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tnaha-ndo cada-ndo sá váha, chi da nàdatuhú iní tnàhá-ndó nàcuáa ndècu-ndo. <sup>18</sup> Te òhna-gá na càchí tnúhu-í xii-ndo sá nihi-í tnúhu sá òré tàcá-ndó quide-ndo nacuaa ní càhá<sup>n</sup> Xítohó Jesucristú, te ñá túú cùu ì<sup>n</sup>nuu-ndo oré duca<sup>n</sup> quide-ndo nacuaa ní càhá<sup>n</sup>-gá. Te dava sá càhá<sup>n</sup> ñáyiú sàndáá iní-í te dava ñáhá. <sup>19</sup> Te ndáá sá dúcá<sup>n</sup> tnàhí cada-xi vá cúú ì<sup>n</sup>nuu-ndo cuendá duca<sup>n</sup> cùnuni nũu ndèdacàa-ndo sandáá ndisa iní-ndó tnũhu Xítohó Jesucristú te ndèdacàa-ndo ñáhá! <sup>20</sup> Te ndi tnahá òré tàcá-ndó quide-ndo datná ní quide Xítohó Jesucristú cútnàhá ní cudìni-gá ndihi cue téé ní xica cuu ndihi-gá, te ñá túú quide-ndo nacuaa tàú-xi cunduu chi cùtexínu-ni quide-ndo. <sup>21</sup> Chi òré tàcá-ndó quide-ndo nacuaa ní cachí Xítohó Jesucristú, te dava-ndo ngódó núú-ndó òhna-gá-ndó xèxi-ndo sá néhé-ndó te ñá túú sá cùndètu tnaha-ndo, te ñá túú càhá<sup>n</sup> tnàhá-ndó nũu xíá<sup>n</sup> dava-ndo ñá túú xèxi-ndo ndahá xití-ndó, te dava-ndo xidó-ndó quide-ndo chi xini-ndo. <sup>22</sup> Te vá dúcá<sup>n</sup> càda-ndo chi càa vehe-ndo núú dúcá<sup>n</sup> càxi-ndo coho-ndo cada-ndo ndéé ndahá xití-ndó, chi sá dúcá<sup>n</sup> quide-ndo te dàquee tñhú-ndó nchàa dava-gá ñáyiú ndècu ndihi-ndo ichi Yá Ndiòxí, te dándóo canúú-ndó nchàa ñáyiú ndàhú sá dúcá<sup>n</sup> quide-ndo. Te Núú xíá<sup>n</sup> vá cúú càchí-í sá cúú-ndó ñáyiú quide váha

chi ñá túú quide váha-ndo sá dúcá<sup>n</sup> quide-ndo ndecu-ndo!

**Xítohó Jesucristú ní dándóo  
tnúhu-gá sá cóhó-ó ndùdí ndéhé  
yoho yàha stilé te caxi-o pàá  
cuèndá ndacu iní-ó sá ní xíhí-gá**

(Mt. 26:26-29; Mr.

14:22-25; Lc. 22:14-20)

<sup>23</sup> Te dàtná-ni ní dánhé ñáhá Xítohó Jesucristú xii-í te òhni duca<sup>n</sup> ní dánhé ñáhá-í xii-ndo, chi òhni niú cútnàhá ní sáha cuèndá ñáhá ndi Júdás Iscarioté xii-gá núú cuè téé cùu úhú iní ñáhá ní quehe<sup>n</sup>-gá pàá, <sup>24</sup> te ní ndacá<sup>n</sup> tãhú-gá núú Yá Ndiòxí, te ní tãhú cuèchi-gá, te ní xáha<sup>n</sup>-gá xii cue téé xica cuu ndihi-gá: “Chí quéhé<sup>n</sup> pàá-a caxi-ndo te cada iní-ndó sá cúú-xí dàtná yiqui cùnũ-í, chi yúhú cuú-í sàcuèndá-ndó. Te duca<sup>n</sup>-ni càda-ndo cundecu-ndo cuendá ndacu iní ñáhá-ndó xii-í”, càchí-gá xãha<sup>n</sup>-gá xii-güedé. <sup>25</sup> Te sátá ní yáha ní xexi-güedé pàá sá ní sãnaha-gã, te ní quehe<sup>n</sup>-gá tàsá<sup>n</sup> ñúhú ndùdí ndéhé yoho yàha stilé, te ní ndacá<sup>n</sup> tãhú tucu-gá núú Yá Ndiòxí. Te ní xáha<sup>n</sup>-gá xii cue téé xica cuu ndihi-gá: “Chí cóhó ndùdí ndéhé yoho yàha stilé-a, te cada iní-ndó sá cúú-xí dàtná níñi-í, te cuèndá níñi-í sá cáti òré cuú-í cut-nùni ndáá sá Yá Ndiòxí cada-gá ingá núú sá váha sá cúú-xí ñáyiú. Te ndi tnahá òré coho-ndo ndùdí ndéhé yoho yàha stilé-á<sup>n</sup> te ndacu iní ñáhá-ndó xii-í, te duca<sup>n</sup>-ni càda-ndo cundecu-ndo”, cachí-gá xãha<sup>n</sup>-gá xii-güedé. <sup>26</sup> Te ndi tnahá òré xexí-ndó pàá te xihí-ndo ndudí ndéhé yoho yàha stilé, te xíá<sup>n</sup> dátũu-ndo nũu ñáyiú sá Xítohó Jesucristú ní xíhí-gá cuèndá-yu, te duca<sup>n</sup>-ni càda-ndo cundecu-ndo ndéé ná sãa nduu quixi tucu Xítohó Jesucristú.

**Nàcuáa cada-o òré caxi-o pàá ndihi òré coho-o ndùdí ndéhé yoho yàha stilé dàtná ní cachí Xítohó Jesucristú**

<sup>27</sup> Te dava-ndo ñà túú quide-ndo nacuaá cuini Yá Ndiöxí cada-ndo òré xéxi-ndó pàá ndihi òré xíhí-ndó ndùdí ndéhé yoho yàha stilé, te sá dúcá<sup>n</sup> quide-ndo-á<sup>n</sup> te cucuéchi xii-ndo chi ñá túú nèhe-ndo sá yíñùhu sá cúú-xí yiqui cuñú Xítohó Jesucristú, te ni ñà túú nèhe-ndo sá yíñùhu sá cúú-xí ñíñí-gá. <sup>28</sup> Te ío váha cada cuendá-ndó te núu ndècu váha iní-ndó núú Xítohó Jesucristú òré cúmání-gá caxi-ndo pàá ndihi òré cúmání-gá coho-ndo ndùdí ndéhé yoho yàha stilé. Te núu ndècu váha iní-ndó núú-gá te caxi-ndo te coho-ndo. <sup>29</sup> Te dava nchòhó ñá túú sàni váha iní-ndó cuendá yiqui cuñú Xítohó Jesucristú te xèxi-ndo paá te xíhi-ndo ndudí ndéhé yoho yàha stilé, te nacháhu-ndo sá dúcá<sup>n</sup> ñà túú sàni váha iní-ndó. <sup>30</sup> Te diu sá dúcá<sup>n</sup> quide-ndo núu xíá<sup>n</sup> vài-ndo cuhú, te ío ndàhú ndécú-ndó, te dava ñáyíu ndècu ndihi-ndo sa ní xíhí-yu. <sup>31</sup> Dico núu ío váha sáha-o cuendá nàcuáa ndècu-o núú Yá Ndiöxí, te vá dúcá<sup>n</sup> dandoho ñaha-gá xii-o. <sup>32</sup> Te òré ndéhé Yá Ndiöxí sá ñà túú quide ndáá-ó ndècu-o te dandoho ñaha-gá xii-o. Te duca<sup>n</sup> quide-gá cuendá sá vǎ cuíta nihnu-o, chi núu ñáhá te cuíta nihnu-o ndíhi nchaa ñáyíu ndècu ichi cuehé ichi duha.

<sup>33</sup> Te núu xíá<sup>n</sup> càhá<sup>n</sup>-í dóho nchaa nchòhó ñáyíu ndècu ndihi-í ichi Xítohó Jesucristú sá òré tacá-ndó càda-ndo nacuaá ní quide Xítohó Jesucristú cút-nàhá ní cudini-gá ndíhi cue téé ní xica cuu ndíhi-gá, te cundetú tnàha-ndo nduu nchaa-ndo te dàtnùní duca<sup>n</sup> càda-ndo. <sup>34</sup> Te núu dava-ndo xíhí-ndó dòcò te caxi duu<sup>n</sup>-ndo vèhe-ndo te dàtnùní nataká-ndó, cuendá òré nataká-ndó te vá cádá-ndó ñ<sup>n</sup> sá ñà túú tàú-ndó càda-ndo

cuendá sá vǎ dándòho ñaha Yá Ndiöxí xii-ndo. Te òré quixi coto ñaha-í xii-ndo te dàvá-á<sup>n</sup> cachí tnúhu-í xii-ndo nchàa dava-gá sá cúmání.

**Nàcuáa chindee ñaha Espíritú Yá Ndiöxí cada-o ñ<sup>n</sup> ñ<sup>n</sup>-o**

**12** Te nchòhó ñáyíu ndècu ndihi-í ichi Xítohó Jesucristú cuini-í cachí tnúhu-í xii-ndo nàcuáa chindee ñaha Espíritú Yá Ndiöxí xii-o ñ<sup>n</sup> ñ<sup>n</sup>-o cuendá cutnùní iní-ndó.

<sup>2</sup> Te nchòhó sa nàha-ndo sá cùtnàhá vátá cùndècu-gá-ndó ichi Xítohó Jesucristú ní xóo dandàhú ñáhá yùcu ñávàha xii-ndo, te ní xóo quíndáá iní-ndó nchàa sá ní cadúha cue ñáyíu ñuyíú-a nchaa sá càchí-yu cùu ndiöxí te ñá ndàa sá ndiöxí cúú-xí, te nchaa xíá<sup>n</sup> ñá túú càhá<sup>n</sup>-xi.

<sup>3</sup> Te cuini-í sá nchòhó cutnùní iní-ndó sá Espíritú Yá Ndiöxí ñá túú chindee-xi ni ñ<sup>n</sup> ñáyíu cuendá sá càhá<sup>n</sup> úhú-yu Xítohó Jesucristú. Te ni ñ<sup>n</sup> ñáyíu ñá túú càhu iní-yu càhá<sup>n</sup>-yu sá Xítohó Jesucristú cúú-gá Xítohó-yu te núu ñá túú Espíritú Yá Ndiöxí dácàhu iní ñáhá-xí xí-yu.

<sup>4</sup> Te ndí díf<sup>n</sup> ndí díf<sup>n</sup> ndùu chiu<sup>n</sup> ní cachí Espíritú Yá Ndiöxí cada-o, te diu-ni ñ<sup>n</sup>dii-ni Espíritú-gá ndécú. <sup>5</sup> Te ndí díf<sup>n</sup> ndùu chiu<sup>n</sup> quide-o xinu cuechi-o núú ñ<sup>n</sup>dii-ni Xítohó Jesucristú. <sup>6</sup> Te ndí díf<sup>n</sup> ndí díf<sup>n</sup> chindee ñaha Yá Ndiöxí xii-o nàcuáa cada-o chiu<sup>n</sup>-gá, te diu-ni ñ<sup>n</sup> dii-gá ndécú chindee-gá nchaa ñáyíu. <sup>7</sup> Te Espíritú Yá Ndiöxí quidé-xí sá nchóo càda-o sá vǎha, te duca<sup>n</sup> chindee-o cue ñáyíu ndècu ndíhi-o ichi Xítohó Jesucristú. <sup>8</sup> Te dava-o ní nduu táhú-ó núú Yá Ndiöxí sá Espíritú-gá cada te ndacu-o càhá<sup>n</sup>-ó tnúhu sá ío càhnu cuu diu-ni tnúhu mee Yá Ndiöxí, te dava tucu-o ní nduu táhú-ó cùtnumí iní-ó nàcuáa càhá<sup>n</sup> tnúhu-gá te càhá<sup>n</sup>-ó nàcuáa cuini Espíritú-gá. <sup>9</sup> Te dava tucu-o ní nduu táhú-ó sá ío quíndáá iní-ó Xítohó Je-



sucristú cuendá cada-gá ì<sup>n</sup> sá cuíní-ó, te duca<sup>n</sup> chi Espíritú Yă Ndiöxí chíndèè ñaha-xi xii-o. Te dava tucu-o ní nduu táhú-ó sá càcá<sup>n</sup> táhú-ní-ó núú Xítóhó Jesucristú cuendá ñáyíu cùhú te ndúha-yu. <sup>10</sup>Te dava tucu-o ní nduu táhú-ó sá ndácú-ó càda-o nchaa sá vă yöö tnahí ndàcu cada, te dava tucu-o ní nduu táhú-ó núú Yă Ndiöxí sá càhá<sup>n</sup>-ó tnúhu sá dácàhu iní ñáhá-gă xii-o, te dava tucu-o ní nduu táhú-ó sá cútñùní iní-ó núú ðíu Espíritú Yă Ndiöxí chíndèè ñaha-xi xii ñáyíu òré càhá<sup>n</sup>-yu tnúhu-gá àdi cue espíritú cùndìhi yucu ñávàha. Te dava tucu-o ní nduu táhú-ó càhá<sup>n</sup>-ó tnúhu sá dácàhu iní ñáhá Espíritú Yă Ndiöxí xii-o tnúhu sá ñà túú xíní-ó, te dava tucu-o ní nduu táhú-ó càhá<sup>n</sup>-ó nàcuáa quèe-xi nchaa tnúhu-á<sup>n</sup>. <sup>11</sup>Te ì<sup>n</sup> ðìi díf-ni Espíritú Yă Ndiöxí duca<sup>n</sup> chindee ñaha-xi, te ðíu-ni Espíritú-gá dácàhñu ñaha-xi xii-o ndí díf<sup>n</sup> núú chìu<sup>n</sup> sá cuíní mée-xí càda-o.

### Nchaa-o ì<sup>n</sup>-ni cuu-o ndihi Xítóhó Jesucristú

<sup>12</sup>Te nchoo ñáyíu ndècu ñuyúy-a titní xichi cùu yiqui cuñú-ó dico ì<sup>n</sup>-ni cùu-xi, te ðíu-ni duca<sup>n</sup> sãtnahá-xi cùu-o vitna ndecu-o ichi Xítóhó Jesucristú chi ì<sup>n</sup>-ni cùu-o ndihi-gá. <sup>13</sup>Te dava-o cùu-o ñáyíu isràél, te dava-o ñà túú cùu-o ñáyíu isràél, te dava-o cùu-o ñáyíu ñà túú tnahí dàñá quee núú chíú<sup>n</sup> pàtróó<sup>n</sup>-xi, te dava-o cùu-o ñáyíu dàñá quée núú chíú<sup>n</sup> pàtróó<sup>n</sup>-xi. Te mee Espíritú Yă Ndiöxí ní quide-xi sá ncháá-ó ì<sup>n</sup>-ná cúú-ó ndècu-o ndihi Xítóhó Jesucristú. Te Yă Ndiöxí ní cachí-gá sá ncháá-ó cùndecu ndihi-o Espíritú-gá.

<sup>14</sup>Te nchòhó xíní-ndó sã tìtní xichi cùu yiqui cuñú-ó te ñà díú ì<sup>n</sup>-ni xichi cuu-xi. <sup>15</sup>Te cuèi sáhá-ó ndihi ndaha-o ñà túú ì<sup>n</sup>-ni cuu-xi dico vă cúú càchí-ó sã sáhá-ó ñà túú cùu-xi yiqui cuñú-ó. <sup>16</sup>Te cuèi lóho-o ndihi tinnu-o ñà túú

ì<sup>n</sup>-ni cuu-xi dico vă càchí-ó sã lóho-o ñà túú cùu-xi yiqui cuñú-ó. <sup>17</sup>Te núu ñihí ní ndúú yiqui cuñú-ó ní xindee mee-ni tinnu-o, te ñà túú ndèe cundeé lóho-o cùndedóho ní cùu te núu duca<sup>n</sup>, àdi núu ñihí yiqui cuñú-ó ní xindee mee-ni lóho-o te ñà túú ndèe cundeé dítní-ó ní cùu te núu duca<sup>n</sup>. <sup>18</sup>Dico mee Yă Ndiöxí ní taxi ndecu-gá ì<sup>n</sup> ì<sup>n</sup> xichi yiqui cuñú-ó nàcuáa ní cachí iní mée-gă. <sup>19</sup>Te núu ì<sup>n</sup>-ni sã ní xíndecu ñihí yiqui cuñú-ó, te vă cùndùu-xi nàcuáa tàú-xi cunduu ní cùu te núu duca<sup>n</sup>. <sup>20</sup>Dico tìtní xichi cùu yiqui cuñú-ó, te ì<sup>n</sup>-ni cùu-xi ñihí-xi.

<sup>21</sup>Te sa ñaha-o sá vă cúú càchí-ó sã tinnu-o ñà túú xini ñuhu-xi ndaha-o, àdi díquí-ó ñà túú xini ñuhu-xi sáhá-ó.

<sup>22</sup>Te nchoo sã ñaha-o sá dává xichi yiqui cuñú-ó sã càchí-ó sã ñà túú cùnnu ío-gá xíní ñuhu-xi. <sup>23</sup>Te dava xichi yiqui cuñú-ó sã ñà túú quide cuendá cávìhí-ó nchàa xí<sup>n</sup> sá quidáhu dóó sácúihnu-o, te dava xichi yiqui cuñú-ó ñà cúú cùtúu chi dacuítí sã quidáhu. <sup>24</sup>Te nchaa xichi yiqui cuñú-ó sã cúú cùtúu ñà túú xini ñuhu-xi quidáhu. Te Yă Ndiöxí ní taxi ndecu-gá nchaa xichi yiqui cuñú-ó nàcuáa tàú-xi cunduu. Te ní cachí-gá sá dává-gă xichi yiqui cuñú-ó núú vă cúú cùtúu quidáhu. <sup>25</sup>Te duca<sup>n</sup> ní quide-gá cuendá sá ì<sup>n</sup>-ní cùu yiqui cuñú-ó. Te duca<sup>n</sup> ndí tnahá ì<sup>n</sup> ì<sup>n</sup> xichi yiqui cuñú-ó chindee tnahá-xi. Te duca<sup>n</sup> sãtnahá-xi cùu nchoo vitna ndecu-o ichi Xítóhó Jesucristú chi chindee tnahá-o. <sup>26</sup>Te núu ì<sup>n</sup> xichi yiqui cuñú-ó ná tnahúhú te ñihí-ó quide úhú-xi, te núu ì<sup>n</sup> xichi yiqui cuñú-ó ío vâha ndècu-xi te duca<sup>n</sup> ñihí yiqui cuñú-ó cúú vâha-xi. Te duca<sup>n</sup> sãtnahá-xi cùu-o vitna ndecu-o ichi Xítóhó Jesucristú.

<sup>27</sup>Te nchoo ndècu ndihi-o Xítóhó Jesucristú, te cùu-o datná yiqui cuñú-gá te ì<sup>n</sup> ì<sup>n</sup>-o cùu-o datná ì<sup>n</sup> ì<sup>n</sup> xichi yiqui cuñú-gá. <sup>28</sup>Te duca<sup>n</sup> sãtnahá-xi cùu-o chí Yă Ndiöxí ní taxi-gá ndí díf<sup>n</sup> ndí

díí<sup>n</sup> chiú<sup>n</sup> quide-o sá cúú-xí nchaa ñáyiú ndècu ichi-gá. Te díhna-gá cue tée caca cuu cáhá<sup>n</sup> tnúhu-gá núú ñáyiú ní taxi ndecu-gá, te dātnūní ní taxi ndecu-gá cue tée cáhá<sup>n</sup> tnúhu-gá nācuāa dācahu iní ñáhá mēe-gá, te dātnūní ní taxi ndecu-gá cue tée dānehé ñáhá xii ñáyiú tnúhu-gá núú tàcá-yu, te dātnūní ní taxi ndecu tucu-gá cue tée ndācu quide sá vā yōo tnāhí ndācu cada. Te ní taxi ndecu tucu-gá cue tée xicá<sup>n</sup> táhú-ní núú Xí-tohó Jesucristú cuendá ñáyiú cūhú te ndúha-yu. Te ní taxi ndecu tucu-gá cue tée chindee cue ñáyiú ndècu ichi-gá. Te ní taxi ndecu tucu-gá cue tée yindaha ñaha xii ñáyiú ndècu ichi-gá, te ní taxi ndecu tucu-gá cue tée cāhá<sup>n</sup> tnúhu sá dācāhu iní ñáhá Espiritú-gá tnúhu sá ñā túú xini-güedé. <sup>29</sup> Te ñā nchāá-ó cūu-o cue tée ní táuchíú<sup>n</sup> Xítohó Jesucristú cáhá<sup>n</sup> tnúhu-gá núú ñáyiú, te ñā nchāá-ó cūu-o cue tée cāhá<sup>n</sup> tnúhu sá dācāhu iní ñáhá Yā Ndiōxí xii-o. Te ñā nchāá-ó cūu-o cue tée dācuaha ñaha xii-yu. Te ñā nchāá-ó cūu-o cue tée quide sá vā yōo tnāhí ndācu cada. <sup>30</sup> Te ñā nchāá-ó cūu-o cue tée dicó-ni cácá<sup>n</sup> táhú núú Xí-tohó Jesucristú cuendá ñáyiú cūhú te ndúha-yu. Te ñā nchāá-ó cūu-o cue tée cāhá<sup>n</sup> tnúhu sá dācāhu iní ñaha Espiritú Yā Ndiōxí tnúhu sá ñā túú xini-ó, te ñā nchāá-ó cūu-o cue tée cūtnuní iní-xi cáhá<sup>n</sup> nācuāa ndūu tnúhu-á<sup>n</sup>. <sup>31</sup> Te ío nducu ndēe-ndo cada-ndo nācuāa nduu táhú-ndó núú Yā Ndiōxí nchaa sá ío-gá cūnūu cada-ndo. Te vitna na dānehé ñáhá tūcu-í xii-ndo nācuāa cada-ndo, dico sá dānehé ñāhā-í-a ío-gá cūnūu-xi.

### Cuu iní-ó tnaha ñáyiú-o

**13** Te núu nchoo xini-ó cāhá<sup>n</sup>-ó tnúhu sá ío vii ío váha cuáhá<sup>n</sup> cāhá<sup>n</sup> ñáyiú ñuyíú-a, àdi xini-ó cāhá<sup>n</sup>-ó tnúhu sá ío vii ío váha cuáhá<sup>n</sup> cāhá<sup>n</sup> cue espíritú xínú cuèchi núú Yā Ndiōxí, te núu xini-ó cāhá<sup>n</sup>-ó nchaa tnúhu-á<sup>n</sup> te

ñā túú cūu iní-ó cuè tnaha ñáyiú-o ñā, te ñā túú nāndíhi-xi sá xini-ó cāhá<sup>n</sup>-ó tnúhu-á<sup>n</sup> te cūu-o datná dava caá sá ío dusa<sup>n</sup> quide. <sup>2</sup> Te núu cūu-o ñáyiú cāhá<sup>n</sup> tnúhu sá dācāhu iní ñáhá Yā Ndiōxí, àdi cuu-o ñáyiú cūtnuní iní-xi nācuāa cuáhá<sup>n</sup> nchaa tnúhu ndūu yuhu ni cuu, àdi cuu-o ñáyiú ío váha cūtnuní iní-xi nchaa nācuāa quide Yā Ndiōxí, àdi cuu-o ñáyiú ío váha sāndāá iní ñáhá xii Yā Ndiōxí nācuāa ndacu-o cūu-o ñā yucu xocuiñi-xi núú ndécú-xí, te núu nchaa xíá<sup>n</sup> xini-ó càda-o te ñā túú cūu iní-ó cuè tnaha ñáyiú-o ñā, te ñā túú vēdana nāndíhi-xi te núu vā cúú iní-ó tnaha ñáyiú-o cuèi na càda-o nchaa xíá<sup>n</sup>. <sup>3</sup> Te cuèi nchaa sá ndécú ndíhi-o na dācāhūu-o, te cuèi na cuāha cuendá-ó mēe-o cáyú-ó sá cúú-xí Yā Ndiōxí, dico ñā túú vēdana chindee ñaha-xi xii-o sá dúcá<sup>n</sup> càda-o te núu ñā túú cūu iní-ó cuè tnaha ñáyiú-o.

<sup>4</sup> Dico núu cūu iní-ó cuè tnaha ñáyiú-o, te cāhnu iní-ó, te quide váha-o, te ñā túú cūu-o ñáyiú cuédú iní, te ni ñā túú cāhá<sup>n</sup>-ó núu cūu cāhnu-o, te ni ñā túú sàni iní-ó càda cāhnu-o mee-o, <sup>5</sup> te ni ñā túú ñūhu cuehé iní-ó, te ni ñā túú ndūcu-o mee-ni sá cúú-xí mēe-o, te ni ñā túú-gā cúdēé<sup>n</sup>-ó cuendá ñā sá cúú, te ni ñā túú-gā sácūhu<sup>n</sup> iní-ó sá quidé ñaha tnaha ñáyiú-o xii-o. <sup>6</sup> Te ni ñā túú-gā cúdíí iní-ó nchaa sá ñā túú váha quide ñáyiú, chi mee-nā cuendá nchaa sá vāha cúdíí iní-ó. <sup>7</sup> Te nchaa sá yāha-o sācāhnu iní-ó, te sàni váha iní-ó cuendá nchaa ñáyiú, te sàni iní-ó sá dūú-ní nchaa sá vāha cuu xii nchaa tnaha ñáyiú-o ndēe cuèe-gá, te ío quide cāhnu iní-ó cuèi nāndi sá yāha-o, te nchaa xíá<sup>n</sup> quidé-ó te núu cūu iní-ó cuè tnaha ñáyiú-o.

<sup>8</sup> Te ni caa ni quíhí<sup>n</sup> duha-ni cuu iní-ó cuè tnaha ñáyiú-o. Dico sáá nduu te vā cóo-gā ñáyiú cáhá<sup>n</sup> tnúhu sá dācāhu iní ñáhá Yā Ndiōxí, te ni vā cóo-gā ñáyiú cáhá<sup>n</sup> tnúhu sá dācāhu iní ñáhá

Espiritú Yă Ndiöxí tnúhu sá ñà túú xini-yu, te ni vâ cóó-gă ñáiyu túha dàtná túha ñáiyu vitna. <sup>9</sup>Te vitna ñà túú cùtnuní iní-ó nchaa nacuaáa sàni iní Yă Ndiöxí chi sacú-ni cùtnuní iní-ó, te duca<sup>n</sup> sàcú-ni càhá<sup>n</sup>-ó nàcuáa ndùu tnúhu-gá, dico càhá<sup>n</sup>-ó tnúhu-gá nàcuáa dàcahu iní ñáhá-gă xii-o. <sup>10</sup>Te na sàá nduu càda Yă Ndiöxí nchaa nàcuáa tàù-xi cunduu, te dàvâ-á<sup>n</sup> te nchaa sá càchí-gă ñà túú ndècu-xi nacuaáa tàù-xi cunduu vâ dúcá<sup>n</sup>-gă cundecu-xi.

<sup>11</sup>Te yúhú cùtnàhá ní cuu landú-í ní xóo cada-í sá cùú-í landú, ní xóo càhá<sup>n</sup>-í, ní xóo cani iní-í, te ní xóo tecú tnùnì-í dàtná quidé cuè landú xindecu vitna, dico sàtá nǐ cuu-í ì<sup>n</sup> tée cùu sacuéhé te ñà túú-gă quidé-í dàtná ní xóo cada-í cùtnàhá ní cuu landú-í. <sup>12</sup>Te duca<sup>n</sup> sàtnahá-xi cùu-o vitna ndecu-o ichi Xítóhó Jesucristú, chi ñà túú cùtnuní váha iní-ó nàcuáa cùu cuendá Yă Ndiöxí, te cùu-o datná ñáiyu ndèhe ì<sup>n</sup> núú yùtátá sá ñà túú túu váha núú-xi, te duca<sup>n</sup> sàtnahá-xi cùu-o chi ñà túú cùtnuní váha iní-ó nàsa cùu cuendá-gă, dico sáá nduu quini núú-ó-gă. Te nchoo sàcú-ni cùtnuní iní-ó nàcuáa ndùu-gá vitna dico na sáá nduu te quini ndáá-ó nàcuáa càa nacuaáa ndùu-gá dàtná xini ñáhá mèe-gă xii-o. <sup>13</sup>Te ni caa ni quíhí<sup>n</sup> duca<sup>n</sup>-ni quindáá iní-ó Yă Ndiöxí, te duca<sup>n</sup>-ni cundecu ndihi-o tnúhu ndee iní cundecu-o ndihi-gă, te duca<sup>n</sup>-ni ío cuu iní-ó-gă ndihi tnàha ñáiyu-o. Te sá cùú iní-ó Yă Ndiöxí ndihi sá cùú iní-ó tnàha ñáiyu-o xiá<sup>n</sup> ío-gă cùnùu-xi dacúxí dâva-gă.

### Ñáiyu càhá<sup>n</sup> tnúhu sá dácàhu iní ñáhá Espiritú Yă Ndiöxí

**14** Te vâ dáñá ndèe-ndó cùu iní-ndó tnàha ñáiyu-ndo, te cuhu<sup>n</sup> iní-ndó sá ndùu táhú-ndó núú Yă Ndiöxí títñí núú chiú<sup>n</sup> cada-ndo nacuaáa chindee ñàha Espiritú-gă xii-ndo, te

íó cuhu<sup>n</sup> iní-ndó sá ndúú táhú-ndó càhá<sup>n</sup>-ndó tnúhu sá dácàhu iní ñáhá Yă Ndiöxí xii-ndo. <sup>2</sup>Te cue ñáiyu càhá<sup>n</sup> tnúhu sá dácàhu iní ñáhá Espiritú Yă Ndiöxí tnúhu sá ñà túú xini-yu, te tnúhu càhá<sup>n</sup>-yu-á<sup>n</sup> cùú-xí sá cùú-xí Yă Ndiöxí te ñà dǐú sá cùú-xí ñáiyu chi ñà túú tècú tnùnì-yu, te mee Espiritú Yă Ndiöxí quidé-xí dũca<sup>n</sup> càhá<sup>n</sup>-yu tnúhu yiyuhu. <sup>3</sup>Te cue ñáiyu ní nduu táhú núú Yă Ndiöxí càhá<sup>n</sup> tnúhu sá dácàhu iní ñáhá-gă xii-yu, te ñáiyu-á<sup>n</sup> dácàhá<sup>n</sup>-yu ñáiyu nàcuáa cuita níhí ndéé-gă-yu cundecú-yu ichi-gă, te duca<sup>n</sup> cuññáhá-yu tnúhu ndee iní xii-yu òré ndhú iní-yu. <sup>4</sup>Te ñáiyu càhá<sup>n</sup> tnúhu sá dácàhu iní ñáhá Espiritú Yă Ndiöxí xii-yu tnúhu sá ñà túú xini-yu-á<sup>n</sup>, ñáiyu-á<sup>n</sup> mee-nǐ-yu níhí ndéé-yu ndècú-yu ichi-gă. Dico ñáiyu càhá<sup>n</sup> tnúhu sá dácàhu iní ñáhá-gă xii-yu, càhá<sup>n</sup>-yu tnúhu-á<sup>n</sup> nàcuáa níhí ndéé dâva-gă ñáiyu nchicú<sup>n</sup> nihnu ichi-gă.

<sup>5</sup>Te yúhú ío cudíí iní-í te núu nchaa-ndo càhá<sup>n</sup>-ndó tnúhu sá dácàhu iní ñáhá Espiritú Yă Ndiöxí xii-ndo tnúhu sá ñà túú xini-ndó. Dico ío-gă cudíí iní-í te núu nchaa-ndo càhá<sup>n</sup>-ndó tnúhu sá dácàhu iní ñáhá-gă, chi ío-gă xini ñùhu-xi sá càhá<sup>n</sup>-ndó tnúhu-á<sup>n</sup> dácúxí sá càhá<sup>n</sup>-ndó tnúhu sá dácàhu iní ñáhá Espiritú-gă càhá<sup>n</sup>-ndó tnúhu sá ñà túú xini-ndó. Dico ì<sup>n</sup>-ni nùtnahá-xi quide-ndo te núu nchòhó ñáiyu càhá<sup>n</sup> tnúhu sá dácàhu iní ñáhá Espiritú-gă càhá<sup>n</sup>-ndó nàcuáa quèe-xi tnúhu-á<sup>n</sup>. Te duca<sup>n</sup> te nchaa ñáiyu ndècu ichi Yă Ndiöxí cuita níhí ndéé-gă-yu quíhí<sup>n</sup> cundecú-yu ichi-gă. <sup>6</sup>Te núu yúhú quexio-í núú ndécú nchòhó ñáiyu ndècu ndihi-í ichi Xítóhó Jesucristú, te ngúíta-í càhá<sup>n</sup>-í mee-ni tnúhu sá dácàhu iní ñáhá Espiritú Yă Ndiöxí xii-í tnúhu sá ñà túú xini-í, te ñà túú nǎ sá vâha cuu-xi sá cùú-xí-ndó. Dico cuu-xi sá vâha xii-ndo te núu na càhá<sup>n</sup>-í núú-ndó nchaa tnúhu

sá dánèhé ñáhá Yă Ndiöxí xii-í tnúhu sá vátá dácùàha-gá-í, ndihi nchaa tnúhu sá sà xini-í, ndihi nchaa tnúhu sá dácàhu iní ñáhá-gă xii-í cáhá<sup>n</sup>-í, ndihi nchaa dava-gá tnúhu-gá.

<sup>7</sup>Te na càda-o cuendá sá nũu ì<sup>n</sup> tée tũú-dé vĩlu àdi cani-dé àrpá te núu ñá túú sàhnú-dé ndihi-xi ì<sup>n</sup> yaá, te ñá cútñuní iní-ó nă yaá caní-dé àdi nă yaá tũú-dé te núu duca<sup>n</sup> na càda-dé. <sup>8</sup>Te ðiu-ni duca<sup>n</sup> sãtnahá-xi cùu tucu tée cùu sandadú tũú cútú, chi núu vá tũú váha-dé nàcuáa tàú-xi cunduu òré quíhí<sup>n</sup>-güedé nàá-güedé, te vá ngũndecu túha dava-gá cue sandadú te núu duca<sup>n</sup> na càda-dé vá tũú váha-dé. <sup>9</sup>Te duca<sup>n</sup> sãtnahá-xi cùu nchohó te núu vá càhã<sup>n</sup>-ndó ì<sup>n</sup> tnúhu nàcuáa tàú-xi cunduu núu ñãyiu te vá tècú tnùní-yu tnúhu càhã<sup>n</sup>-ndó. ¶Chi àú<sup>n</sup> nă cuu càhã<sup>n</sup>-ndó te núu duca<sup>n</sup> na càda-ndo! <sup>10</sup>Te ío tĩtní núú tũhu ío ñuyú, te ì<sup>n</sup> ì<sup>n</sup> núú tũhu-á<sup>n</sup> cútñuní iní ñãyiu nàcuáa quèe-xi. <sup>11</sup>Te núu nchoo ñă tècú tnùní-ó ì<sup>n</sup> tnúhu càhã<sup>n</sup> ì<sup>n</sup> ñãyiu, te quide-ó-yu ñãyiu ñuu xicá chi ñá túú càhã<sup>n</sup>-yu tnúhu càhã<sup>n</sup>-ó, te ðiu-ni duca<sup>n</sup> quide ñahá-yu xii nchoo tucu. <sup>12</sup>Te xĩã<sup>n</sup> nũu càchí tnúhu-í xii nchaa nchòhó ñãyiu ío cuimí nduu táhú núú Yă Ndiöxí sá Espíritú-gá chindee ñàha-xi xii-ndo cada-ndo ná daha núú chiú<sup>n</sup>, te ío nducu ndèe-ndo cada-ndo chiú<sup>n</sup> sá ní nduu táhú-ndó nàcuáa cuita níhí ndéé-gă ñãyiu ndècu ichi-gá quíhí<sup>n</sup>.

<sup>13</sup>Te núu càhã<sup>n</sup>-ndó tũhu sá ñà túú xini-ndó, tnúhu sá dácàhu iní ñáhá Espíritú Yă Ndiöxí xii-ndo, te xini ñuhu-xi sá càcã<sup>n</sup> táhú-ndó núú Yă Ndiöxí cuendá sá ná chindee ñaha-gá xii-ndo cãhã<sup>n</sup>-ndó núú ñãyiu núu nása quèe-xi tnúhu-á<sup>n</sup>. <sup>14</sup>Chi núu nchoo na càhã<sup>n</sup> ndihi-o Yă Ndiöxí ndihi tnúhu sá ñà túú xini-ó, te ni yũhu ni iní-ó càhã<sup>n</sup> ndihi-o-gă ðicó-ni sá ñă tècú tnùní-ó nàcuáa nduu tnúhu càhã<sup>n</sup>-ó. <sup>15</sup>Te xĩã<sup>n</sup> nũu xini ñuhu-xi càhã<sup>n</sup> ndihi-o Yă Ndiöxí ni yũhu ni iní-ó

nàcuáa chindee ñaha Espíritú-gá xii-o te cáhã<sup>n</sup>-ó nàcuáa tecú tnùní-ó, te ðiu-ni duca<sup>n</sup> càda-o oré xitá yũhu-o chiũhu-o Yă Ndiöxí, chi ni yũhu ni iní-ó ðuca<sup>n</sup> cada-o nàcuáa chindee ñaha Espíritú-gá xii-o, te cútñuní iní-ó nàcuáa cuáhã<sup>n</sup> nchaa tnúhu càhã<sup>n</sup>-ó xita-o. <sup>16</sup>Chi núu nchoo na ndàcã<sup>n</sup> táhú-ó núú Yă Ndiöxí ndihi mee-ni tũhu sá ñà túú xini-ó tnúhu sá dácàhu iní ñáhá Espíritú-gá xii-o, te ñãyiu ñá túú ní nduu táhú cãhã<sup>n</sup> tnúhu càhã<sup>n</sup>-ó ndèdòho ñàhã-yu xii-o, te ñãyiu-á<sup>n</sup> vá ndácũ-yu cáhã<sup>n</sup>-yu tnúhu càhã<sup>n</sup>-ó ndàcã<sup>n</sup> táhú-ó ndihi-yu núú Yă Ndiöxí chi ñá túú tècú tnùní-yu tnúhu càhã<sup>n</sup>-ó. <sup>17</sup>Te váha-ni quide-o sá ðucã<sup>n</sup> càhã<sup>n</sup>-ó ndàcã<sup>n</sup> táhú-ó núú Yă Ndiöxí, te ðicó-ni sá tũhu-á<sup>n</sup> ñà túú chindee-xi ñãyiu nàcuáa cuita níhí ndéé-gă-yu cundecú-yu ichi-gá. <sup>18</sup>Te yúhú ío ndàcã<sup>n</sup> táhú-í núú Yă Ndiöxí chi càhã<sup>n</sup>-í tnúhu sá ñà túú xini-í tnúhu sá dácàhu iní ñáhá Espíritú-gá xii-í, te càhã<sup>n</sup>-gá-í dácúxí nchaa nchohó. <sup>19</sup>Te òré tàcá ñãyiu ndècu ichi Yă Ndiöxí dácùàhã-yu tnúhu-gá, te càhã<sup>n</sup>-í tnúhu-gá núũ-yu sá sà ní cutñuní iní mée-í nàcuáa duca<sup>n</sup> cútñuní iní-yu nàcuáa nduu tnúhu càhã<sup>n</sup>-í. Te tnàhã-gá iní-í cáhã<sup>n</sup>-í úhũ<sup>n</sup>-ni tnúhu-á<sup>n</sup> núũ-yu dácúxí sã càhã<sup>n</sup>-í úxí mĩl tnúhu sá ñà túú xini-í, tnúhu sá dácàhu iní ñáhá Espíritú Yă Ndiöxí xii-í càhã<sup>n</sup>-í.

<sup>20</sup>Te nchòhó ñãyiu ndècu ndihi-í ichi Xitohó Jesucristú, vá caní iní-ndó ðàtná sání iní cue landú, chi caní iní-ndó ðàtná tàú-xi cunduu chi sa sacuéhé-ndó. Dico cuu-ndo ðàtná cue landú líhli vá cundècu-ndo ichi cuehé ichi duha, chi cue landú-á<sup>n</sup> ñà túú ndècu-güexi ichi-á<sup>n</sup>. <sup>21</sup>Te núú tũtú Yă Ndiöxí càhã<sup>n</sup>-xi nàcuáa ní cáhã<sup>n</sup>-gá, te càchí-xi: “Cue tée ñuu xicá càhã<sup>n</sup> ndi díf<sup>n</sup> núú tũhu quíhí<sup>n</sup>-güedé càhã<sup>n</sup>-güedé tnúhu-í núú ñãyiu isràel cada-güedé núú-í, te cuèi duca<sup>n</sup> dico vá quĩndáá iní-yu tnúhu-í”,

duha ní cachí Yă Ndiôxí te duca<sup>n</sup> nĩ ngúndeé núú tütú-gá. <sup>22</sup>Te tnúhu sá dácàhu iní ñáhá Espíritú Yă Ndiôxí xii-o tnúhu sá ñà túú xìní-ó, xí<sup>n</sup> cúú-xí cuendá sá cútñuní iní cue ñáyiu ñá túú sàndáá iní tnúhu Yă Ndiôxí sá ñà túú cùu váha iní ñáhá-gă xí-yu. Dico sá cúú-xí cuè ñáyiu sàndáá iní tnúhu-gá ñá túú ná quidé-xí sá cúú-xí-yu. Te tnúhu sá dácàhu iní ñáhá Yă Ndiôxí xii-o, xí<sup>n</sup> cúú-xí cuendá sá cútñuní iní cue ñáyiu sàndáá iní tnúhu-gá sá ndécú ndìhi ñaha-gá xí-yu, dico ñá túú dù-ca<sup>n</sup> sani iní cue ñáyiu ñá túú sàndáá iní tnúhu-gá. <sup>23</sup>Te núu ní tacá ncha nchòhó ñáyiu ndècu ichi Yă Ndiôxí, te ncha-ndo nĩ ngúíta-ndo càhá<sup>n</sup>-ndó tnúhu sá dácàhu iní ñáhá Espíritú Yă Ndiôxí xii-ndo tnúhu sá ñà túú xìní-ndó, te mei òré-á<sup>n</sup> quexìo cue ñáyiu ñá túú sàndáá iní tnúhu-gá, ndìhi cue ñáyiu vátá quíní dana-gá tnúhu-gá núú ndécú-ndó, te ñáyiu-á<sup>n</sup> quesàhá-yu sá lùcú-ndó te núu duca<sup>n</sup> càhá<sup>n</sup>-ndó tnúhu sá dácàhu iní ñáhá Espíritú-gá xii-ndo òré quexìo-yu. <sup>24</sup>Dico núu ncha-ndo càhá<sup>n</sup>-ndó tnúhu sá dácàhu iní ñáhá Yă Ndiôxí xii-ndo, te mei òré-á<sup>n</sup> quexìo cue ñáyiu duca<sup>n</sup> ñà túú sàndáá iní-xi tnúhu-gá, ndìhi cue ñáyiu duca<sup>n</sup> ñà túú xìní dana tnúhu-gá-á<sup>n</sup>, te ñáyiu-á<sup>n</sup> cut-nùní iní-yu sá ndécú cuèchi-yu núú-gă, te ngúíta-yu cuáha-yu cuendá sá ñà túú quide váha-yu ndècú-yu cuendá sá càhá<sup>n</sup>-ndó tnúhu-gá ndédóho-yu. <sup>25</sup>Te ncha sá cuèhé sá dúhá nĩ quidé-yu sàni iní-yu yìyuhu ndacu iní-yu, te ngúíta-yu nàhmá-yu ncha sá ñà túú vâha ní quidé-yu núú Yă Ndiôxí, te cachí-yu sá ïo càhnu cuu-gá, te cachí tucú-yu sá ndáá ndécú ndìhi-ndo-gá.

### Cada-o nàcuáa tàù-xi cunduu

<sup>26</sup>Te vitna nchòhó ñáyiu ndècu ndìhi-í ichi Xítóhó Jesucristú xini ñuhu-xi duha cada-ndo. Òré tàcá-ndó te

dava-ndo càta yuhu-ndo chiñuhu-ndo Yă Ndiôxí, te dava-ndo dásahú-ndó ñáyiu tnúhu-gá, te dava-ndo càhá<sup>n</sup>-ndó nàcuáa dàquixi túu Yă Ndiôxí iní-ndó, te dava-ndo càhá<sup>n</sup>-ndó tnúhu sá dácàhu iní ñáhá Espíritú Yă Ndiôxí xii-ndo tnúhu sá ñà túú xìní-ndó, te dava-ndo càhá<sup>n</sup>-ndó nàcuáa quèe-xi tnúhu-á<sup>n</sup>. Te ncha sá quidé-ndó ná cùu-xi nacuáa chindee-xi ñáyiu nàcuáa cuita nñí ndéé-gá-yu cundecú-yu ichi-gá. <sup>27</sup>Te òré càhá<sup>n</sup>-ndó tnúhu sá dácàhu iní ñáhá Espíritú Yă Ndiôxí xii-ndo tnúhu sá ñà túú xìní-ndó, te úú-ni-ndo àdi úní-ni tnàhá-ndó càhá<sup>n</sup>-ndó tnúhu-á<sup>n</sup> te vá úú<sup>n</sup> ní càhá<sup>n</sup>-ndó chi ndéé ndìhi ì<sup>n</sup>-ndo te dătnùní ngúíta ingá-ndó càhá<sup>n</sup>-ndó. Te xini ñuhu-xi sá ì<sup>n</sup> ñáyiu càhá<sup>n</sup>-yu nàcuáa quèe-xi tnúhu càhá<sup>n</sup>-ndó-ă<sup>n</sup>. <sup>28</sup>Te núu ñá túú ñáyiu tècú tnùní nàcuáa quèe-xi tnúhu càhá<sup>n</sup>-ndó-ă<sup>n</sup>, te núú méé núú ì<sup>n</sup>-ní-ndó càhá<sup>n</sup>-ndó tnúhu-á<sup>n</sup> càhá<sup>n</sup> ndìhi-ndo Yă Ndiôxí te vá càhá<sup>n</sup>-ndó núú ñáyiu. <sup>29</sup>Te òré càhá<sup>n</sup>-ndó tnúhu sá dácàhu iní ñáhá Yă Ndiôxí xii-ndo te úú-ni-ndo àdi úní-ni tucu-ndo càhá<sup>n</sup>, te dava-gá-ndó cùndedóho-ndo tnúhu-á<sup>n</sup> te càhá<sup>n</sup>-ndó núu váha-ni càhá<sup>n</sup>-güedé àdi ñá túú vâha-ni. <sup>30</sup>Te núu ì<sup>n</sup>-ndo ní dácáhú iní ñáhá Yă Ndiôxí xii-ndo ì<sup>n</sup> tnúhu càhá<sup>n</sup>-ndó, te núu ì<sup>n</sup>-ndo sà cahá<sup>n</sup>-ndó te ngúíñí-ndó te quíhu tucu ingá-ndó càhá<sup>n</sup>-ndó nàcuáa ní dácáhú iní ñáhá Yă Ndiôxí xii-ndo. <sup>31</sup>Te ncha nchòhó ñáyiu ní nduu táhú càhá<sup>n</sup> tnúhu sá dácàhu iní ñáhá Yă Ndiôxí, te vá úú<sup>n</sup> ní càhá<sup>n</sup>-ndó chi díhna-gá ì<sup>n</sup>-ndo càhá<sup>n</sup> te dătnùní càhá<sup>n</sup> tucu ingá-ndó. Te duca<sup>n</sup> càda-ndo cuendá ncha-ndo tècú tnùní-ndó nàcuáa ndùu tnúhu càhá<sup>n</sup> ì<sup>n</sup> ì<sup>n</sup>-ndo, te duca<sup>n</sup> te cudíí-gă iní-ndó cànchicú<sup>n</sup> nihnu-ndo ìchi-gá. <sup>32</sup>Te ncha ñáyiu càhá<sup>n</sup> tnúhu Yă Ndiôxí sa nàha-ná méé-yu nàcuáa quidé-yu càhá<sup>n</sup>-yu tnúhu-gá nàcuáa

ñá túú quède cutexínu-yu. <sup>33</sup>Te Yá Ndiöxí cúú-gă Yaá quidé ïo váha cùu ì<sup>n</sup>nuu-ndo ndecu-ndo, te ñá túú dàtica nuu ñaha-gă xii-ndo.

Te na cächí tnúhu-í xii-ndo nàcuáa cãhá<sup>n</sup>-í nchaa núú tàca cue ñáyiú ndècu ndihi-o ichi Xítohó Jesucristú. <sup>34</sup>Te yúhú cächí-í sá vâ cúú cãhá<sup>n</sup> cue ñáyiú ðíhí òrè tàcá-ndó dàcuaha-ndo tnúhu-gă, chi ñá túú dùca<sup>n</sup> cuiní-gă cadá-yu, te quíndáá-ni iní-yu cadá-yu nàcuáa tàú-xi cunduu. <sup>35</sup>Te núú ì<sup>n</sup> sá cuiní-yu nducu tnúhu-yu te ndéé òrè nasáá-yu vehé-yu te nducu tnúhu-yu núú yí-yu, chi ñá túú ndùu váha-xi sá cãhá<sup>n</sup>-yu núú tàcá nchaa ñáyiú dàcuáha ndihi-yu tnúhu-gă.

<sup>36</sup>Te chí dándàcu iní sá ñà díú nchòhó cúú-ndó ñáyiú ní ngúndecu ndihi tnúhu Yá Ndiöxí díhna nuu nàcuáa datècú tnúhu-ndo dàva-gă ñáyiú, te ni ñà díú mèe-ni nchòhó sa ní ngúndecu ndihi-ndo tnúhu Yá Ndiöxí vitna, núú xí<sup>n</sup> vâ cächí-ndó sã ïo cùnuu-ndo. <sup>37</sup>Te núú dava nchòhó sání iní-ndó sã cãhá<sup>n</sup>-ndó nàcuáa dàcahu iní ñáhá Yá Ndiöxí xii-ndo àdí sani iní-ndó sã quidé-ndó nàcuáa chindee ñaha Espíritú-gă xii-ndo, te cuáha váha-ndo cuèndá sá ncháá tnúhu cãhá<sup>n</sup>-í-a cùu-xi tnúhu sá ní cachí tnúhu mee Xítohó Jesucristú cada-o. <sup>38</sup>Te ndèda-ni càa ñáyiú ndècu ndihi-ndo te núú ñá túú sàndáá iní-yu tnúhu cãhá<sup>n</sup>-í, te vâ cadá cuèndá-ndó tnúhu cãhá<sup>n</sup>-yu.

<sup>39</sup>Te vitna nchòhó ñáyiú ndècu ndihi-í ichi Xítohó Jesucristú, ío cani iní-ndó cãhá<sup>n</sup>-ndó tnúhu sá dácàhu iní ñáhá Yá Ndiöxí núú ñáyiú, te daña-ndo na cãhá<sup>n</sup> cue ñáyiú ní nduu táhú núú Yá Ndiöxí sá cãhá<sup>n</sup>-yu tnúhu sá dácàhu iní ñáhá Espíritú-gă xíí-yu tnúhu sá ñà túú xíní-yu. <sup>40</sup>Te cada-ndo nchàa nacuáa tàú-xi cunduu nàcuáa ñá túú ñà cuu cundecu-ndo.

### Ní ndoto Xítohó Jesucristú

**15** Te vitna nchòhó ñáyiú ndècu ndihi-í ichi Xítohó Jesucristú cuiní-í sá dándàcu iní-ndó nàcuáa ní dánèhé ñáhà-í xii-ndo tnúhu sá cãhá<sup>n</sup> nàcuáa naníhí tàhú-ó, chi diu tnúhu-á<sup>n</sup> ní sàndáá iní-ndó te nchìcú<sup>n</sup> nihnu-ndo. <sup>2</sup>Te sá xíí tnúhu-á<sup>n</sup> níhnú-ndó ichi cuáhá<sup>n</sup>-ndó núú ndúú táhú-ndó cùndecu-ndo ndihi Yá Ndiöxí ní caa ní quíhí<sup>n</sup>, te duca<sup>n</sup> ndùu táhú-ndó núú cùndecu-ndo ní caa ní quíhí<sup>n</sup> ndihi Yá Ndiöxí te núú nchìcú<sup>n</sup> nihnu-ndo nàcuáa ní dánèhé ñáhà-í xii-ndo, te núú ñá túú nchìcú<sup>n</sup> nihnu-ndo te ñá túú ní sàndáá iní-ndó nàcuáa tàú-xi cunduu.

<sup>3</sup>Te yúhú sa ní cachí tnúhu-í xii-ndo ì<sup>n</sup> tnúhu sá ïo cùnuu ní níhí-í, chi ní cachí tnúhu-í xii-ndo sã Xítohó Jesucristú ní xíhí-gă cuèndá nchaa yíca cuèchi-o, te duca<sup>n</sup> ní cuu chi duca<sup>n</sup> cãhá<sup>n</sup>-xi núú tütú Yá Ndiöxí sá dúcá<sup>n</sup> yãha-gă. <sup>4</sup>Te ní chindúxi ñaha-güedé xii-gă te nduu úní ní dándótó ñaha Yá Ndiöxí xii-gă, te duca<sup>n</sup> ní cuu chi duca<sup>n</sup> cãhá<sup>n</sup>-xi núú tütú Yá Ndiöxí. <sup>5</sup>Te sátá ní ndoto-gă te ní quee túu-gă núú tẽ Pèlú, te dät-nùní ní quee túu-gă núú dàva-gă cue tée ní táúchíú<sup>n</sup>-gă cãhá<sup>n</sup> tnúhu-gă. <sup>6</sup>Te sátá dúcá<sup>n</sup> te dät-nùní ní quee túu-gă núú ùhú<sup>n</sup> cièndú cue ñáyiú ndècu ichi-gă, te vâí-yu xíndecu-ní-yu vitna chi sacú-ni-yu ní xíhí. <sup>7</sup>Te dät-nùní ní quee túu-gă núú tẽ Jàcobó, te sátá dúcá<sup>n</sup> te dät-nùní ní quee túu-gă núú nchaa cue tée ní táúchíú<sup>n</sup>-gă cãhá<sup>n</sup> tnúhu-gă.

<sup>8</sup>Te ndéé núú ní ndihi-ná te ní quee túu-gă núú mèe-í, te òrè ní quee túu-gă núú-í te cùu-í dàtná ì<sup>n</sup> déhe yiquí<sup>n</sup> vátá sãá-gă nduu càcu chi cùu-í ì<sup>n</sup> tée ñá túú sàni váha iní-xi cuèndá-gă ní cùu. <sup>9</sup>Te yúhú ñá túú cùnuu-í dàtná cùnùu cue tée ní táúchíú<sup>n</sup> Xítohó Jesucristú cãhá<sup>n</sup> tnúhu-gă. Te cùu-í ì<sup>n</sup> tée ní táúchíú<sup>n</sup>-gă cãhá<sup>n</sup> tnúhu-gă, cuèí ñá túú tàú-í sá

càhá<sup>n</sup>-í tnúhu-gá, chi ní xóo cuu úhú iní-í cue ñáyi ndècu ichi Yá Ndiöxí. <sup>10</sup> Dico Yá Ndiöxí ío váha iní-gá chi ní quide ñaha-gá xii-í ì<sup>n</sup> téé váha, chi ñá túú-gá quidè-í dàtná ní xóo cada-í. Te ío cùndahú iní ñáhá-gá chindèe ñaha-gá xii-í dico ñá túú àú<sup>n</sup> nã cuu chindèe ñaha-gá, chi ío-gá vâi chiu<sup>n</sup>-gá ní cuu sa ta quide-í cuáhá<sup>n</sup> dàcúúxí dàva-gá cue téé ní táuchíú<sup>n</sup>-gá càhá<sup>n</sup> tnúhu-gá te ñá dífú mèe-í duca<sup>n</sup> quide-í chi mee Yá Ndiöxí ío cùndahú iní ñáhá-gá chindèe ñaha-gá xii-í quidè-í chiú<sup>n</sup>-gá. <sup>11</sup> Te ñá túú nã cada-xi cuèi dava-gá-güedé sa ní cuu vâi-gá chiú<sup>n</sup>-gá quidè-güedé àdi yúhú, chi ì<sup>n</sup>-ni tnúhu càhá<sup>n</sup>-ndí te tnúhu-á<sup>n</sup> cúú tnúhu ní sándáá iní-ndó.

### Cue ñáyi ní xíhí ndotó-yu

<sup>12</sup> Te nchúhú cue téé càhá<sup>n</sup> tnúhu Xítohó Jesucristú càhá<sup>n</sup>-ndí sá ní xíhí-gá te ní ndoto-gá, ¿te ná cuendá dava nchòhò càchí-ndó sã vã ndótó cuè ñáyi ní xíhí? <sup>13</sup> Te núu duca<sup>n</sup> sàni iní-ndó sã vã ndótó cuè ñáyi ní xíhí te ni Xítohó Jesucristú ñá túú ní ndòto-gá te núu duca<sup>n</sup>. <sup>14</sup> Te núu dicó Xítohó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñá túú nãndíhi-xi te núu duca<sup>n</sup>, te àú<sup>n</sup> nã cuu sándáá iní-ndó-gá te núu duca<sup>n</sup>. <sup>15</sup> Te núu dicó cúú-xí ì<sup>n</sup> sá ndáá tnúhu sàni iní dava-ndo ña, te dàcuandehnde-ndí sá càhá<sup>n</sup>-ndí tnúhu Yá Ndiöxí núú-ndó te núu duca<sup>n</sup>, te ñá túú càhá<sup>n</sup> ndáá-ndí núú-ndó sã Yá Ndiöxí ní dándótó-gá Xítohó Jesucristú, te núu ndáá nàcuáa sàni iní dava-ndo sã vã ndótó cuè ñáyi ní xíhí, dico ñá ndáá nàcuáa sàni iní-ndó. <sup>16</sup> Te núu vá ndótó cuè ñáyi ní xíhí te ni Xítohó Jesucristú ñá túú ní ndòto-gá. <sup>17</sup> Te núu Xítohó Jesucristú ñá túú ní ndòto-gá ñá, te àú<sup>n</sup> nã cuu sándáá iní-ndó-gá te núu duca<sup>n</sup>, te ndècu-ni cuèchi-ndo núú Yá Ndiöxí te núu duca<sup>n</sup>. <sup>18</sup> Te núu ndáá nàcuáa sàni iní-ndó ñá te

cue ñáyi ní sándáá iní ñáhá xii Xítohó Jesucristú ñáyi ní xíhí ní xíta nihnú-yu te núu duca<sup>n</sup>. <sup>19</sup> Te núu nchoo ndècu ndíhi-o tnúhu ndee iní núú Xítohó Jesucristú cuendá-ni sá cùndècu-o ñuyú-a ña, te cùu-o ñáyi ío-gá duu<sup>n</sup> duu<sup>n</sup> ndàhú sá cúú-xí dàva-gá ñáyi te núu duca<sup>n</sup>.

<sup>20</sup> Dico ndáá sá Xítohó Jesucristú ní xíhí-gá te ní ndoto-gá núu xíá<sup>n</sup> cútùnini iní dava-o sã ndótó cuè ñáyi ní xíhí ñáyi ní sándáá iní tnúhu-gá. <sup>21</sup> Te sá cuèchi ì<sup>n</sup>-ni téé ní xíndecu ñuyú-a xíá<sup>n</sup> xíhí ñáyi, te sá cuendá ì<sup>n</sup>-ni tucu ingá téé te ndoto cue ñáyi ní xíhí. <sup>22</sup> Te nchaa ñáyi xíhí-yu sá cuèchi ì<sup>n</sup> téé, te téé-á<sup>n</sup> cúú-dè ndíi Àdán téé díhna nuu ní cuu ñani tnáhá cuè ñáyi ñuyú. Te diu-ni duca<sup>n</sup> sã cuendá ì<sup>n</sup>-ni téé te ndoto cue ñáyi ní xíhí, te téé-á<sup>n</sup> cúú-dè Xítohó Jesucristú chi nchaa ñáyi ndècu ndíhi-gá ndotó-yu. <sup>23</sup> Te díhna-gá Xítohó Jesucristú ní ndoto-gá xíá<sup>n</sup> cútùnini iní dava-o sã ndùu na quixi tucu-gá ñuyú-a te dàvá-á<sup>n</sup> ndoto nchaa ñáyi ní xíhí ñáyi ní sándáá iní tnúhu-gá. <sup>24</sup> Te dāt-nùni duca<sup>n</sup> te sáá nduu nàa nchaa sá ío ñuyú, te Xítohó Jesucristú danàa-gá nchaa ndi túhú sá cùnùu ío ñuyú-a, chi danàa-gá nchaa ñáyi ío cùnùu, ndíhi yucu ñávàha, ndíhi nchaa espíritú xínú cuèchi núú-xi. Te duca<sup>n</sup> te cùñaha-gá xii Tātá-ó Dütú Ndiöxí taxi tnùn-í-gá. <sup>25</sup> Chi Xítohó Jesucristú dacuití tãxi tnuní-gá ndéé ná sáá nduu dànaa-gá nchaa sá cúú úhú iní ñáhá xii-gá. <sup>26</sup> Te ndéé núú ní ndíhi-ná te danàa-gá sá quidè xíhí ñáyi. <sup>27</sup> Te duca<sup>n</sup> chi càhá<sup>n</sup>-xi núú tütú Yá Ndiöxí sá mée-gá ní nachíhi-gá nchaa sá ío ndaha Xítohó Jesucristú cuendá sá mée Xítohó Jesucristú taxi tnùn-í-gá, te vá yõo ì<sup>n</sup> tãxi tnuní ñáhá xii Yá Ndiöxí, chi mee Yá Ndiöxí cúú-gá Yá ní nachíhi-gá nchaa sá ío ndaha Xítohó Jesucristú. <sup>28</sup> Te díhna-gá ní xáha<sup>n</sup> Yá Ndiöxí xii Xítohó Jesucristú Yá cúú Dèhe-gá sá quíndàha-gá nchaa sá ío, te

òré ná quìndaha Xítohó Jesucrìstú nchaa sá íó, te cùñaha-gă xii Yá Ndiòxí taxi tnùnì ñàhá-gă xii-gá, te duca<sup>n</sup> te mee-ñă Yă Ndiòxí taxi tnùnì-gá nchaandi túhú sá íó.

<sup>29</sup> Te núu ñă túú ndăá càhá<sup>n</sup>-í, ¿te ná cuendá dava ñáyiú sànduté-yu cuendá ñáyiú ní xíhí nũ ñă túú ndăá sá ndótó ñáyiú ní xíhí?

<sup>30</sup> Te nchúhú duca<sup>n</sup>-ni sàni iní ñáyiú cahni ñàhá-yu xii-ndí, te núu vá ndótó ñáyiú ní xíhí te àú<sup>n</sup> ñă cuu duca<sup>n</sup> quide cahnu iní-ndí duca<sup>n</sup> cuiní-yu cahni ñàhá-yu xii-ndí te núu duca<sup>n</sup>. <sup>31</sup> Te nchòhó ñáyiú ndècu ndìhi-í ichi Xítohó Jesucrìstú ío váha sàni iní-í cuendá-ndó, chi ndècu-o ichi-gá. Te na càchí tnúhu ndăá-í xii-ndo să ì<sup>n</sup> nduu ì<sup>n</sup> nduu ndeé iní ñàhá ñáyiú cahni ñàhá-yu xii-í. <sup>32</sup> Te núu dìcò ndăá sá vă ndótó ñáyiú ní xíhí dâtná càchí dava ñáyiú, te àú<sup>n</sup> ñă cuu ní xíndecu-í ñuú Éfesú ní cuu úhú iní ñàhá ñáyiú xii-í te núu duca<sup>n</sup>, chi ñáyiú-á<sup>n</sup> ñí quidé-yu dâtná quidé ì<sup>n</sup> quiti déé<sup>n</sup> să cúu-xì-í. Te núu ndăá sá vă ndótó ñáyiú ní xíhí ñă, te váha-gá nũ cachí-ó dâtná càchí ñáyiú: “Vitna na còho-o te na càxi-o chi tneé idá cuú-ó”, duha càchí-yu.

<sup>33</sup> Te vá dâná-ndó mề-ndo dandahú ñàhá ñáyiú ndècu ichi cuehé ichi duha xii-ndo, te nguíta-ndo càni iní-ndó dâtná sání iní-yu. Chi quèe ndăá-xi nàcuáa càhá<sup>n</sup> tucu dava-gá ñáyiú, chi càchí-yu sá nũ ñáyiú quide váha na ñihí tnáhă-yu ndìhi ñáyiú ndècu ichi cuehé ichi duha, te nguíta ñáyiú quide váha-á<sup>n</sup> cadá-yu tnáhă-yu nchaa sá cuèhé sá dúhá dâtná quidé ñáyiú-á<sup>n</sup>. <sup>34</sup> Te ío váha cuáha-ndo cuendá nàcuáa cundecu-ndo, te vá cadá-gă-ndó dâtná quidé cuè ñáyiú ndècu ichi cuehé ichi duha. Te dava-ndo quide-ndo datná quidé cuè ñáyiú ndècu ichi cuehé ichi duha chi ñă túú sàndăá iní-ndó Yă Ndiòxí. Te

duha càhá<sup>n</sup>-í cuendá sá cúcàha<sup>n</sup> núu-ndó cuendá nchaa sá ñă túú vâha quide-ndo.

### Nàcuáa ndoto ñáyiú ní xíhí

<sup>35</sup> Te cudana dava-ndo ndùcu tnúhu-ndo nũ nása ndoto ñáyiú ní xíhí, te nása cunduu yiqui cùñú-yu òré ndotó-yu. <sup>36</sup> Te nchòhó ñáyiú duca<sup>n</sup> càhá<sup>n</sup> cúu-ndó ñáyiú ñă túú tnàhí cùnùnì iní-xi, te duha na càhá<sup>n</sup>-í nàcuáa tecú tnùnì-ndó. Te núu ì<sup>n</sup> tatá ná chíhí-ó te tèhyú mềé-xí te xínu déhe-xi. <sup>37</sup> Dico ñă díú să sà ní xínu ta sàhnu cuáhá<sup>n</sup> ní cùxi-o, te diu-ni duca<sup>n</sup> quide-o cuéi tríu ndìhi nchaa dava-gá tatá xítú-ó. <sup>38</sup> Te Yá Ndiòxí quidé-gă sácũnduu tatá xínu-á<sup>n</sup> dâtná cuiní mềé-gă cunduu. Te ndèda-ni cãa tatá te diu-ni-gá quidé-gă sácũnduu-xi nàcuáa tàú-xi cunduu. <sup>39</sup> Te ndí díí<sup>n</sup> ndăa nchaa yiqui cùñú, chi tucu cãa yiqui cuñú nchoo cuè ñáyiú, te tucu cãa yiqui cuñú nchaa quiti xica núu ñũhú, te tucu cãa yiqui cuñú nchaa quiti ndàva, te tucu cãa yiqui cuñú nchaa chácá. <sup>40</sup> Te duca<sup>n</sup> ñă túú ì<sup>n</sup>-ni caa nchaa yiqui cuñú sá íó andíu ndìhi nchaa yiqui cuñú ñáyiú íó ñuyíú-a, te duca<sup>n</sup> ñă túú ì<sup>n</sup>-ni ndăa vii nchaa sá íó andíu ndìhi ñuyíú-a. <sup>41</sup> Te duca<sup>n</sup> cùu tucu-xi nchícanhii chi tucu dâyehé-xi, te tucu dâyehé yóó, te tucu dâyehé nchaa chódíní, te duca<sup>n</sup> ñă túú ì<sup>n</sup>-ni dayehé nchaa chódíní. <sup>42</sup> Te duca<sup>n</sup> sãtnahá-xi cùu ñáyiú ní xíhí te ndoto, chi tucu cãa yiqui cuñú-yu sá nguĩndũxi te tucu cunduu yiqui cùñú-yu òré ndotó-yu, te yiqui cùñú sá ndótó ndìhí-yu-á<sup>n</sup> vă ndìhí ñihnu-gá-xi. <sup>43</sup> Te yiqui cùñú ñáyiú xíhí ñă túú nàndfhi-xi, dico yiqui cùñú sá ndótó ndìhí-yu te ío váha cunduu. Te nchaa yiqui cùñú ñáyiú xíhí ñă túú tnàhí-gá ndee-xi, dico yiqui cùñú ndoto ndìhí-yu xíá<sup>n</sup> ío cunduu ndee-xi. <sup>44</sup> Te yiqui cùñú nchaa ñáyiú xíhí cúu-xí cuendá ñuyíú-a, dico yiqui cùñú sá ndótó ndìhí-yu



xíǎ<sup>n</sup> cundecu-ná-xi cuendá Espíritú Yǎ Ndiǒxí. Te dàtná íò yìqui cùñú sá cúú-xí cuendá ñuyíú-a, te duca<sup>n</sup> íò yìqui cùñú sá cúú-xí cuendá mee-nǎ Espíritú Yǎ Ndiǒxí.

<sup>45</sup> Te núú tütú Yǎ Ndiǒxí càchí-xi: “Ndíí Àdán ndíí ní xíndecu ndéé díhna ní chihi Yá Ndiǒxí íní ndíí”, duha càchí-xi núú tütú-gá. Te ìngá tucu téé cùu-dé dàtná ndíí Àdán te téé-á<sup>n</sup> cúú-dě Xítohó Jesucristú, te Yaá-á<sup>n</sup> quíde-gǎ sá mèe-ná Espíritú Yǎ Ndiǒxí quíde-xí ndècu-o ichi-gá vitna. <sup>46</sup> Te díhna-gá yìqui cùñú cuendá ñuyíú-a ní ngúndecu, te dàtnúni ngúndecu yìqui cùñú cundecu ndíhi mee-nǎ Espíritú Yǎ Ndiǒxí. <sup>47</sup> Te téé díhna nuu ní xíndecu ñuyíú-a chi ñuhu ní cadúha ñaha Yǎ Ndiǒxí xii-dé, te téé-á<sup>n</sup> cúú-dě ndíí Àdán, te ìngá tucu téé ní cuu<sup>n</sup>-dé andíu te téé-á<sup>n</sup> cúú-dě Xítohó Jesucristú. <sup>48</sup> Te nchaa ñáyíu càa yìqui cuñú-yu dàtná cáá yìqui cuñú té Àdán téé duca<sup>n</sup> ní cuáha ñuhu-á<sup>n</sup>, te nchaa ñáyíu ní nduu táhú cundecu ndíhi téé duca<sup>n</sup> vèxi cuu<sup>n</sup> andíu-á<sup>n</sup>, ñáyíu-á<sup>n</sup> nduu yìqui cùñú-yu dàtná cáá yìqui cuñú ní nduu táhú-dě ndécú ndíhi-dé vitna, te téé-á<sup>n</sup> cúú-dě Xítohó Jesucristú. <sup>49</sup> Te nchaa ñáyíu ñuyíú-a càa-yu dàtná-ni càa datná-ni ndùu téé duca<sup>n</sup> ní cuáha ñuhu-á<sup>n</sup>. Te nchaa nchoo ñáyíu ní nduu táhú cundecu ndíhi téé duca<sup>n</sup> vèxi cuu<sup>n</sup> andíu-á<sup>n</sup> nduu-o dàtná-ni càa datná-ni ndùu téé-á<sup>n</sup> tucu.

<sup>50</sup> Te nchòhó ñáyíu ndècu ndíhi-í ichi Xítohó Jesucristú càchí tnúhu-í xii-ndo sǎ ncháá nàcuáa càa yìqui cuñú ñáyíu xíndecu vitna vá sǎá-xi cundecu-xi núú ndécú Yǎ Ndiǒxí táxí tnùnì-gá, chi ñuyíú-a ndíhi nihnu-xi. Dico sá tàú-xi sǎá núú ndécú-gǎ táxí tnùnì-gá xini ñuhu-xi cuu-xi sá cùdíi cundecu. <sup>51</sup> Te na càchí tnúhu-í xii-ndo ì<sup>n</sup> tnúhu sá yíyùhu ni cuu: Dava-o cùú-ó te dava-o cùndecu-ni-o, dico nchaa-o

nàdama yiqui cuñú-ó. <sup>52</sup> Te uu<sup>n</sup>ni duca<sup>n</sup> nàdama yiqui cuñú-ó òré cáhá<sup>n</sup> ì<sup>n</sup> cútú, te cútú-ǎ<sup>n</sup> cǎhá<sup>n</sup>-xi òré sa ta cùyatni naa ñuyíú. Te òré cáhá<sup>n</sup> cútú-ǎ<sup>n</sup> te ndoto nchaa ñáyíu ní xíhí ñáyíu ní xíndecu ichi Xítohó Jesucristú, te duca<sup>n</sup> te vá í<sup>n</sup> ndùu ì<sup>n</sup> quíú-gǎ cuú-yu. Te nchaa ñáyíu ndècu vívú te nàdama yiqui cuñú-yu tnàhá-yu. <sup>53</sup> Te nchaa yiqui cùñú ndécú ndíhi nchaa ñáyíu ndècu ñuyíú-a vitna ñá túú cùdíi-xi chi xíhí-xi, dico yiqui cùñú nduu táhú nchoo ñáyíu ndècu ichi Xítohó Jesucristú chi cùdíi-xi ni caa ni quíhí<sup>n</sup> chi vá cùú-gá-xi. <sup>54</sup> Te òré ná ndùu táhú-ó yìqui cuñú sá dúcá<sup>n</sup> cùdíi ni caa ni quíhí<sup>n</sup>-á<sup>n</sup>, te vá cùndècu ndíhi-gá-ó yìqui cuñú sá ñà túú cùdíi. Te dàvá-á<sup>n</sup> te quee ndáá-xi nàcuáa cǎhá<sup>n</sup>-xi núú tütú Yǎ Ndiǒxí núú càchí-xi: “Vitna ñá túú-gǎ xíhí ñáyíu chi mee-nǎ Yǎ Ndiǒxí cùnùu-gá táxí tnùnì ñáhá-gǎ xíi-yu. <sup>55</sup> Te ñá túú tnàhí-gá ná ndoho ñáyíu sá cuendá tnúhu xíhí, chi vá cóo-gǎ tnúhu xíhí”, duha càchí-xi núú tütú Yǎ Ndiǒxí. <sup>56</sup> Te cue ñáyíu ndècu ndíhi-yu tnúhu sá sánú ichi ñaha xíi-yu nàcuáa cadá-yu cundecú-yu dico uu<sup>n</sup>-gá quíde-yu nchaa sá cuèhé sá dúhá. Te sá cuendá nchaa sá cuèhé sá dúhá quíde-yu-á<sup>n</sup>, te xíǎ<sup>n</sup> ní ngúndecu tnúhu xíhí dándòho ñaha-xi xíi-yu. <sup>57</sup> Dico táxáhu xii Yá Ndiǒxí chi ní taxi-gǎ tnúhu ndee ìní ndécú ndíhi-o sá sǎá nduu te vá quínì-gá-ó tnúhu xíhí, te duca<sup>n</sup> chi ndècu ndíhi-o Xítohó Jesucristú.

<sup>58</sup> Te xíǎ<sup>n</sup> nùu cǎhá<sup>n</sup>-í dóho nchòhó cue ñáyíu ndècu ndíhi-í ichi Xítohó Jesucristú chi ío cùu ìní ñàhà-í xii-ndo, te cǎhá<sup>n</sup>-í dóho-ndo sǎ cǎnchícú<sup>n</sup> nihnu-ni-ndo ichi Xítohó Jesucristú cuèi nándi na càda ñaha ñáyíu xii-ndo sǎ cuendá-gǎ, te ío nducu ndèe-ni-ndo cada-ndo chiu<sup>n</sup>-gǎ, chi sa nàha-ndo sá ncháá chiu<sup>n</sup> quide-o cuendá-gǎ ñá túú àú<sup>n</sup> nǎ cuu quide-o.

### Nàcuáa sàcá<sup>n</sup> tnáhá ñáyiú dǎhú<sup>n</sup>

**16** Te na càchí tnúhu-í xii-ndo cuendá dǎhú<sup>n</sup> sá sàcá<sup>n</sup> tnáhá-ndó sá cúu-xí ñáyiú ñuú Jerusálén, chi diu-ni duha ní dánèhé-í cue ñáyiú xǎndecu ichi Xítóhó Jesucristú ndécú ñ<sup>n</sup> ñ<sup>n</sup> xichi distritú Gàlaciá. <sup>2</sup> Te duha cada-ndo ndí tnáhá nduu ndumíngú, te ñ<sup>n</sup> ñ<sup>n</sup>-ndo dàquee di<sup>n</sup>-ndo sacú dǎhú<sup>n</sup> nàcuáa chindee ñaha Yá Ndióxi xii-ndo ñihí-ndó cuendá òré quexio-í te sa cundecu túha dǎhú<sup>n</sup>-ǎ<sup>n</sup>. <sup>3</sup> Te òré quexio-í te mee-ndo cǎxi-ndǒ-yu núu ndédacàa-yu sàni iní-ndó càda ndáá canehe dǎhú<sup>n</sup>-ǎ<sup>n</sup> quǎhí<sup>n</sup> ndaha ñáyiú xǎndecu ichi Xítóhó Jesucristú ndécú ñuú Jerusálén. Te cadúha-í ñ<sup>n</sup> úú tutú canehe-yu quǎhí<sup>n</sup> cuendá cutnùnì iní ñáyiú ñuú Jerusálén nàcuáa ndùu chiu<sup>n</sup> cuáhá<sup>n</sup>-yu. <sup>4</sup> Te núu xini ñuhu-xi sá quǎhí<sup>n</sup>-í te candeca-í-yu quǎhí<sup>n</sup>.

### Té Pǎblú sání iní-dé quíngoto-dé cue ñáyiú ndècu ichi Xítóhó Jesucristú

<sup>5</sup> Te yúhú sání iní-í yáha-í ñ<sup>n</sup> úú ñuú cáá distritú Macèdoniá, te dǎtnùnì duca<sup>n</sup> te sáa-í núu ndécú-ndó. <sup>6</sup> Te òré quexio-í te cudana cundecu ndihi ñaha-í xii-ndo vǎi nduu, àdi cudana te cundecu ndihi ñaha-í xii-ndo ndèé yáha nchaa yóó quídé vǎxi<sup>n</sup>-xi. Te sátá dúcá<sup>n</sup> te cada ndee iní-ndó chindee ñaha-ndo xii-í òré nucúhu<sup>n</sup> ichi-í te núu ndèé ichi na quǎhí<sup>n</sup>-í. <sup>7</sup> Te duha càhá<sup>n</sup>-í chi núu Yá Ndióxi ná càchí-gá te cundecu ndihi ñaha tnàa-í xii-ndo òré quexio-í te ñá díú dicó-ni ichi yáha-í. <sup>8</sup> Te cundecu-ni-í ñuú Éfesú-a ndéé tnáhá vico Pentecòstés. <sup>9</sup> Te duca<sup>n</sup> chi iha ío tédóho ñáyiú tnúhu Xítóhó Jesucristú sá càhá<sup>n</sup>-í núu-yu. Núu xǎ<sup>n</sup> ío váha quèe cuendá cada-í chiú<sup>n</sup>-gá cuèi ío vǎi ñáyiú ñá túú tnáhá iní-yu sá càhá<sup>n</sup>-í tnúhu-gá.

<sup>10</sup> Te núu na quixi coto ñaha té Timùteú xii-ndo, te ío váha cuu iní-ndó

cáhá<sup>n</sup> ndihi-ndo-dé cuendá duca<sup>n</sup> ñá túú nǎ cani iní-dé cundecu ndihi ñaha-dé xii-ndo, chi tnáhá-dé cúu-dé téé quide chiu<sup>n</sup> Xítóhó Jesucristú dàtná quídè-í. <sup>11</sup> Te cuiní-í sá ñi ñ<sup>n</sup>-ndo vá cánì cuèhé iní-ndó cuendá-dé, te chindee-ndo-dé nàcuáa cuu váha iní-dé òré quixi-dé quixi coto ñaha-dé xii-í, chi yúhú ndihi dava-gá ñáyiú ndècu ichi Xítóhó Jesucristú ndétú-ndí-dé quexio-dé.

<sup>12</sup> Te ío ní cáhá<sup>n</sup> ndàhú-í núu té Àpolós téé ndècu ndihi-o ichi Xítóhó Jesucristú cuendá quixi-dé ndihi dava-gá cue téé ndècu ndihi-o ichi-gá quixi coto ñaha-güedé xii-ndo dico ñá túú ní cuiní-dé quixi-dé vitna, dico quixi-dé ndéé cuèé-gá.

### Tnúhu ndéé núu ñi ndihi-ná

<sup>13</sup> Te ío quíhi iní-ndó cùndecu-ndo ichi Xítóhó Jesucristú, te vá dǎná ndèé-ndó quíndáá iní-ndó-gǎ, te ío yíi cùnduu iní-ndó cùndecu-ndo ichi-gá, te ío nducu ndèe-ndo canchicú<sup>n</sup> nihnu-ndo ichi-gá. <sup>14</sup> Te ío váha cuu iní tnáhá-ndó, te duca<sup>n</sup> ío váha cada tnàha-ndo te núu nándi cùu sá váha sàni iní-ndó càda-ndo.

<sup>15</sup> Te nchòhó ñáyiú ndècu ndihi-í ichi Xítóhó Jesucristú sa ñaha-ndo sá dǎhnanuu cuè ñáyiú cùu ndi mee té Èstéfanás ndécú distritú Acáyá ní sándáá iní-yu tnúhu Xítóhó Jesucristú. Te vitna ñá túú dàña ndéé-yu quídé-yu sá váha sá cúu-xí dàva-gá ñáyiú sàndáá iní tnúhu-gá. <sup>16</sup> Te càhá<sup>n</sup> ndàhú-í núu-ndó sá quíndáá iní-ndó nchàa ñáyiú duca<sup>n</sup> xǎquide, ndihi nchaa dava-gá ñáyiú ío ndècu ndee quide chiu<sup>n</sup> ndihi-ndo cuendá Xítóhó Jesucristú. <sup>17</sup> Te ío cùdí iní-í sá ñi quexio té Èstéfanás, ndihi té Fortunatú, ndihi té Acàicú, chi cue téé-ǎ<sup>n</sup> ñi quide-güedé núu-ndó ñi quide-güedé nchaa sá ñá túú ndàcu-ndo cada-ndo cuendá-í ní cùu. <sup>18</sup> Te ío tàxi-güedé tnúhu ndee iní xii-í, te diu-ni duca<sup>n</sup> tàxi-güedé tnúhu ndee iní xii nchòhó

tucu, te núu xíã<sup>n</sup> xíní ñùhu-xi sá cànèhe-ndo sá yíñùhu núú nchàa cue téé duha xĩquide váha.

<sup>19</sup>Te nchaa ñáyiú xĩndecu ichi Xítohó Jesucristú ndécú òdistritú Àsiá quide ndee iní ñáhã-yu xii-ndo, te ío cada ndee ìní-ndó càchí té Àquilú ndihi ñadìhí-dé tá Priscilá, te duca<sup>n</sup> quide ndee iní ñáhá tùcu nchaa ñáyiú tàcá dácuàha tnúhu Yá Ndiòxí vehé-yu xii nchaa nchòhó ñáyiú ndècu ichi-gá. <sup>20</sup>Te cada ndee ìní tucu-ndo càchí cue dava-gá ñáyiú ndècu ndihi-o ichi Xítohó Jesucristú. Te ni yùhu ni iní-ndó càda ndee iní tnáhá-ndó ìh<sup>n</sup> ìh<sup>n</sup>-ndo.

<sup>21</sup>Te vitna ndaha mee yùhú té Páblú téè-í tnúhu-a quide ndee iní ñáhà-í xii-ndo.

<sup>22</sup>Te ñáyiú ñá túú cùu váha iní-xi núú Xítohó Jesucristú te na cuíta nihnú-yu. Te vitna nchaa-o chĩ ná càchí-ó sã Xítohó Jesucristú quixi tucu-gá.

<sup>23</sup>Te xicá<sup>n</sup> táhù-í núú Xítohó Jesucristú sá ná chĩndee chítúu ñaha-gã xii-ndo. <sup>24</sup>Te ío cùu iní ñáhà-í xii-ndo nàcuáa ndècu-o ichi Xítohó Jesucristú, te duca<sup>n</sup> na cùnduu, te ío chí cádá ndèe iní-ñã vitna.

## TUTÚ CÚÚ ÒÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU NUÚ CÒRINTÚ

**Té Păblú cādũha-dé tutú quíhí<sup>n</sup>  
ndaaha ñáyiu xĩndecu ichi Xítohó  
Jesucristú ndécú ñúú Còrintú**

**1** Yúhú té Păblú cāhá<sup>n</sup>-í tnúhu Xítohó Jesucristú chi duca<sup>n</sup> ní cachí Yă Ndiöxí cunduu. Te cādũha-í tutú-a ndihi té Timùteú té ndècu ndihi-o ichi-gá cuendá daquixí-í ndaha nchòhó ñáyiu xĩndecu ichi Yă Ndiöxí ndécú ñúú Còrintú, te tutú-a cuu-xi tnàhá cuendá nchaa ñáyiu cùu cuendá Yă Ndiöxí xĩndecu nchaa ñúú yĩndèhu distritú Acăyá. <sup>2</sup>Te xicá<sup>n</sup> tǎhù-í núú Tǎtá-ó Dútú Ndiöxí ndihi núú Xítohó Jesucristú sá ìo na chĩndee chitúu ñaha-gă xii-ndo, te diu-ni ndi ndùu-gá ná càda te ìo váha cuu iní-ndó cùndecu-ndo.

**Té Păblú cāhá<sup>n</sup>-dé nchaa  
năcuáa ndòho-dé**

<sup>3</sup>Te chí ná cāchí-ó sǎ ìo váha iní Dútú Ndiöxí Yaa cúú Tǎtá Xítohó Jesucristú, te diu-ni Dútú Ndiöxí cúú-gă Yaa ìo cùndahú iní ñǎhá xii-o, te diu-ni-gă cúú-gă Yaa táxi tnúhu ndee iní. <sup>4</sup>Te cuéi nándi ndòho-o ndecu-o dico diu-ni Dútú Ndiöxí táxi-gă tnúhu ndee iní xii-o, te duca<sup>n</sup> quide-gă cuendá sá nchóo cuǎnaha-o tnúhu ndee iní xii nchaa ñáyiu nándi ndòho ndecu, te diu-ni nchaa tnúhu ndee iní táxi-gă xii-o ðiu-ni nchaa tnúhu ndee iní-á<sup>n</sup> cuǎnaha-o xii-yu. <sup>5</sup>Te Xítohó Jesucristú ìo ní ndoho-gá, te duca<sup>n</sup> nchòo tucu ìo ndòho-o, te duca<sup>n</sup> ìo vǎi tnúhu ndee iní ñihí-ó ndècu ndihi-o chi ndècu-o ndihi Xítohó Jesucristú. <sup>6</sup>Te nchúhú nándi ndòho-ndí ndécú-ndí cuendá sá nchòhó ñihí-ndó tnúhu ndee iní cundecu ndihi-ndo te naníhí tǎhú-ndó. Te

Yă Ndiöxí táxi-gă tnúhu ndee iní xii-ndí, te duca<sup>n</sup> quide-gă cuendá sá nchòhó tnàhá-ndó ñihí-ndó tnúhu ndee iní-á<sup>n</sup> te naníhí tǎhú-ndó, te duca<sup>n</sup> càda ndee cada cahnu iní-ndó ndòho-ndo datná ndóhó nchúhú. <sup>7</sup>Te nchúhú ìo váha sàni ndáá iní-ndí cuendá-ndó chi ndòho-ndo datná ndóhó-ndí, te duca<sup>n</sup> táxi Yă Ndiöxí tnúhu ndee iní xii-ndo dàtná táxi-gă xii-ndí.

<sup>8</sup>Te nchòhó ñáyiu ndècu ndihi-ndí ichi Xítohó Jesucristú cuiní-ndí cachí tnúhu-ndí xii-ndo năcuáa ní yáha-ndí cùtnàhá ní xĩndecu-ndí distritú Àsiá chi dàvǎ-á<sup>n</sup> ìo ní ndoho-ndí, te luha-ná te vá cùndèe iní-ndí yáha-ndí nchaa tnúndòho-á<sup>n</sup> ní cùu chi ní xehndé iní-ndí sá vǎ cǎcu-ndí. <sup>9</sup>Chi ní sani iní-ndí sá ndíyi-ná cuu-ndí ní cùu, te duca<sup>n</sup> ní yáha-ndí cuendá sá ìo-gá quĩndáá iní-ndí Yă Ndiöxí sá dǎfú-gă taunihnu ñaha-gă xii-ndí, te ñá díú mèe-ndí taunihnu-ndí mée-ndí, te diu-gă cúú-gă Yaa dándòto cuéi ñáyiu sa ní xíhí. <sup>10</sup>Te diu-ni-gă ní taunihnu ñaha-gă ñá túú ní sǎhni ñaha ñáyiu xii-ndí, te diu-ni-gă táúnihnu ñaha-gă xii-ndí cuéi vitna, te cùtnuní ndáá iní-ndí sá dǎfú-ní-gă taunihnu ñaha-gă xii-ndí núú cuahá<sup>n</sup> núú vèxi te vá cǎhni ñaha ñáyiu. <sup>11</sup>Te nchòhó tnàhá-ndó chĩndee ñaha-ndo xii-ndí chi cāhá<sup>n</sup> ndihi-ndo Yă Ndiöxí cuendá-ndí, te ìo vǎi ñáyiu cāhá<sup>n</sup> ndihi ñàhá-yu xii-gă cuendá-ndí, te duca<sup>n</sup> ìo vǎi ñáyiu ndàcá<sup>n</sup> tǎhù-yu núú-gă cuendá nchaa sá vǎha quide ñaha-gă xii-ndí.

**Té Păblú cāhá<sup>n</sup>-dé ná cuendá ñá túú  
ní năyáha-dé ñúú Còrintú**

<sup>12</sup>Te ìo váha cùu iní-ndí chi cùtnuní iní-ndí sá cúú-ndí cue tée cùu ndáá dàtná cuiní Yă Ndiöxí cunduu ndècu-ndí ñuyíú-a, te diu-ni duca<sup>n</sup> quide-ndí sá cúú-xí-ndó chi mee-gă cùndahú iní ñǎhá-gă xii-ndí chĩndèe ñaha-gă, te ñá túú quide-ndí dàtná sání iní cue ñáyiu

ñuyíú-a. <sup>13-14</sup> Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñà túú ùhú tecú tnùnì-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuiní-ndí sá ïo-gá váha tecú tnùnì-ndó cuendá sá òrè ná quixi tucu Xíttohó Jesucristú, te dàvá-á<sup>n</sup> ïo cada nínu ñaha-ndo xii-ndí dàtná cada nínu ñaha-ndí xii-ndo. <sup>15</sup> Te cuendá xíá<sup>n</sup> ñuu ní sani iní-í yáha cáhá<sup>n</sup>-í úú xito núú ndécú-ndó cuendá ïo cudíí ìní-ndó. <sup>16</sup> Chi ní sani iní-í sá òrè quíhí<sup>n</sup>-í distritú Macèdoniá te yáha cáhá<sup>n</sup>-í núú ndécú-ndó, te òrè ndixi tucu-í te nayáha cáhá<sup>n</sup> tucu-í, te òrè nayáha cáhá<sup>n</sup>-í te taxi-ndo sá cúú ìchi-í cuendá quíhí<sup>n</sup>-í distritú Jùdeá, duha ní sani iní-í ní cùu. <sup>17</sup> Te sá dúcá<sup>n</sup> ñà túú ní quixi coto ñaha-í xii-ndo te cudana sàni iní-ndó sá yùhú ñà túú ní sàha váha-í cuendá nàcuáa ní sani iní-í cada-í, àdi cudana ñáyüu ndècu ichi cuehé ichi duha, chi cue ñáyüu-á<sup>n</sup> tnaa càchí-yu sá cúú càdá-yu ì<sup>n</sup> sá sání ìní-yu cadá-yu te tnaa càchí-yu sá ñáhá. <sup>18</sup> Dico Yá Ndiöxí Yaá ïo váha quide ndáá ñaha ndáá náhá càxi-gá sá nchùhú ñà túú dàma-ndí sá càhá<sup>n</sup>-ndí. <sup>19</sup> Te yùhú ndihi té Silvanú ndihi té Timùteú dánèhé ñáhá-ndí xii-ndo cuendá Xíttohó Jesucristú Yaá cúú Dèhe Yá Ndiöxí, te Xíttohó Jesucristú cúú-gá Yaá ñà túú dàma-gá tnúhu càhá<sup>n</sup>-gá, chi cùu-gá Yaá càhá<sup>n</sup> mee-ni tnúhu ndáá tnúhu cuiti. <sup>20</sup> Te ñuu-ni Xíttohó Jesucristú cúú-gá Yaá quidé nchàa nacuaa ní cachí Yá Ndiöxí. Te sá cuendá sá dúcá<sup>n</sup> quide Xíttohó Jesucristú xíá<sup>n</sup> càchí-ó sá ïo càhnu cuu Yá Ndiöxí. Te nchaa-o na càchí-ó sá díú-ní dùca<sup>n</sup> na cada-gá. <sup>21</sup> Te mee Yá Ndiöxí quidé-gá ndécú-ní-ó ìchi Xíttohó Jesucristú. Te ñuu-ni mee-gá ní cáhá<sup>n</sup> ñáhá-gá xii-o cuendá cunu cuechi-o núú-gá. <sup>22</sup> Te Yá Ndiöxí ní quide-gá sá nchóó cùu-o ñáyüu cùu cuendá-gá, te ní taxi-gá Espiritú-gá ní ngúndecu ndihi-o cuendá cutnùnì

iní-ó sá ndáá cada ñaha-gá xii-o nàcuáa ní cachí-gá cada-gá.

<sup>23</sup> Te Yá Ndiöxí náhá-gá sá yùhú càhá<sup>n</sup> ndáá-í ná cuendá vátá quíxí-gá-í quixi coto ñaha-í xii-ndo, te vátá quíxí-gá-í chi ñà túú cuiní-í dandihú-í iní-ndó. <sup>24</sup> Te nchùhú ñà túú tàú-ndí cada yica ñaha-ndí xii-ndo nàcuáa quíndáá iní-ndó Yá Ndiöxí, chi sa sàndáá váha iní-ndó-gá, chi nchùhú cuiní-ndí chindee tnúhu ñaha-ndí xii-ndo nàcuáa ïo-gá cudíí ìní-ndó cùndecu-ndo.

**2** Te ní sani ndáá iní-í sá vā quíxí ndíhi-ni-í quixi coto ñaha-í xii-ndo cuendá sá vā dándihú-í iní-ndó. <sup>2</sup> Te nchòhó cúú-ndó ñáyüu tàxi tnúhu ndee ìní xii-í cúdíí ìní-í ndécú-í, te xíá<sup>n</sup> ñuu ñà túú cuiní-í dandihú-í iní-ndó, chi núu duca<sup>n</sup> na càda-í te vā cùndècu váha-gá iní-ndó nàcuáa taxi-ndo tnúhu ndee ìní xii-í. <sup>3</sup> Te xíá<sup>n</sup> ñuu ní tendaha-í tutú véxi ndaha-ndo cuendá sá òrè quixi coto ñaha-í xii-ndo, te dàvá-á<sup>n</sup> quini-í sá quidé-ndó nàcuáa cudíí ìní-í te ñà díú dà dandihú-ndó ìní-í òrè quexio-í, chi nchòhó tàú-ndó càda-ndo sá yùhú cudíí ìní-í. Te cùtnunì ndáá iní-í sá ñuu yùhú cúdíí ìní-í te tnàhá nchòhó cúdíí ìní-ndó cuendá sá dúcá<sup>n</sup> cùdíí ìní-í. <sup>4</sup> Te ndàhyú-í sá ndihú iní-í òrè ní cadúha-í tutú ní dáquixi-í ndaha-ndo, chi ïo cuéhé sá sání ìní-í, te ñà túú ní dàquixi-í tutú-á<sup>n</sup> ndaha-ndo cuendá sá dándihú iní ñáhá-í xii-ndo, chi ní dáquixi-í cuendá sá nchòhó cutnùnì iní-ndó sá ïo cùu iní ñáhá-í xii-ndo.

**Nàcuáa tàú ñáyüu ñuu  
Còrintú cadá-yu cuendá ì<sup>n</sup>  
ñáyüu ñà túú quide ndáá**

<sup>5</sup> Te na càchí tnúhu-í xii-ndo cuendá ì<sup>n</sup> téé ní quide ì<sup>n</sup> sá ñà túú tàú-dé cada-dé ndécú ndíhi-ndo, te ní quide ndàhú-xi luha iní-í cuendá sá ñí quide-dé-á<sup>n</sup> dico nchòhó tnàhá-ndó ñí dándihú-dé luha iní-ndó, te duha càchí-í sá lúhá-ní

nĩ dándihú-dé iní-ndó cuendá sá vǎ cuídó-gá-í ná tnúhu cáhá<sup>n</sup>-í. <sup>6</sup>Te nàcuáa ní ndatnúhu-ndo nĩ quide ndáá-ndó cuěchi tée-á<sup>n</sup> te sa ndói-gá cuu nàcuáa ní quide-ndo-dě. <sup>7</sup>Te vitna tǎu-ndó càda cahnu iní-ndó sǎ nĩ quide-dé, te cuǎñaha-ndo tnúhu ndee ìní xii-dé chi núu ñáhá te vǎ nihí ndéé-gǎ-dé cada-dé sǎ vǎha cuendá sǎ ndihú iní-dé. <sup>8</sup>Te xǎ<sup>n</sup> núu cǎhá<sup>n</sup> ndáhú-í núu-ndó sǎ cádá tucu-ndo sǎ cúú ìní-ndó-dě. <sup>9</sup>Te ñiu-ni cuendá iha cǎhá<sup>n</sup>-í ì<sup>n</sup> núu tútú sǎ sǎ ní dáquixí-í ndaha-ndo, te duca<sup>n</sup> nĩ quide-í xító ndéé ñáhá-í xii-ndo núu ndisa cuíní-ndó càda-ndo nchaa nacuáa cǎhá<sup>n</sup>-í. <sup>10</sup>Te ndéda-ni cǎa ñáyiú na càda cahnu iní-ndó ì<sup>n</sup> sǎ quídě-yu, te tnàhá yúhú cada cǎhnu iní-í sǎ quídě-yu tucu. Te núu ìó ì<sup>n</sup> sǎ xíní ñùhu-xi cada cahnu iní-í te quide cahnu iní-í, te mee Xítóhó Jesucristú náhá-gǎ sǎ dúcá<sup>n</sup> quide-í, te duca<sup>n</sup> quide-í cuendá sǎ nchòhó cuu-xi sǎ vǎha xii-ndo. <sup>11</sup>Te duca<sup>n</sup> te sácuíhná vǎ ñihí-xi ná cada ñaha-xi xii-o, chi nchoo sǎ xíní-ó nàcuáa quide-xi.

### **Té Pǎblú ndihú iní-dé ndécú-dě ñuú Tròás**

<sup>12</sup>Te ní xica-í cuáhá<sup>n</sup>-í ñuú Tròás cuendá yàcá<sup>n</sup> cáhá<sup>n</sup>-í tnúhu sǎ cǎhá<sup>n</sup> nàcuáa naníhí tǎhú-ó tnúhu Xítóhó Jesucristú, te òré ní quexio-í te ní ñihí-í ì<sup>n</sup> ichi cǎhnu cáhá<sup>n</sup>-í tnúhu-gǎ. <sup>13</sup>Dico ñá túú ní cùu vǎha iní-í chi ñá túú ní nàñhí-í té Títú tée ndècu ndihi-o ichi Xítóhó Jesucristú, núu xǎ<sup>n</sup> ní quide ndee ìní tnàhá-í ndihi cue ñáyiú ñuú-á<sup>n</sup>, te ní xica-í cuáhá<sup>n</sup>-í distritú Macèdonía.

### **Dàquetihú-ó yùcu ñávǎha chi ndècu ndihi-o Xítóhó Jesucristú**

<sup>14</sup>Te táxǎhu xii Yá Ndiòxí chi duca<sup>n</sup>-ni sànu ichi ñaha-gǎ xii-ndí nàcuáa cunuu-ndí núu yucu ñávǎha chi ndècu ndihi-ndí Xítóhó Jesucristú, te mee Yá Ndiòxí sǎchìu<sup>n</sup> ñaha-gǎ

xii-ndí cǎhá<sup>n</sup>-ndí tnúhu-gǎ. Te cada iní-ó sǎ tnúhu-gǎ-á<sup>n</sup> cúú-xí dàtná ì<sup>n</sup> yúcu sǎ ìo vǎha sǎhá<sup>n</sup> te ta xítenuu dicó-xi ndèni ní cuu cuáhá<sup>n</sup>. Te duca<sup>n</sup> sǎtnahá-xi cùu tnúhu-gǎ chi nchúhú quídé-ndí nàcuáa ta xítenuu ndèni ní cuu cuáhá<sup>n</sup>. <sup>15</sup>Te cùu-ndí dàtná dicó ì<sup>n</sup> yúcu sǎ ìo vǎha sǎhá<sup>n</sup>, te nàcani cuendá Xítóhó Jesucristú núú Yá Ndiòxí, te dicó yúcu-á<sup>n</sup> nchítá cuěi núú xĩndecu cue ñáyiú sa ní naníhí tǎhú, te cuěi núú xĩndecu cue ñáyiú ta xíta nihnu cuáhá<sup>n</sup>. <sup>16</sup>Te sǎ cúú-xí cué ñáyiú ta xíta nihnu cuáhá<sup>n</sup>-á<sup>n</sup>, dicó yúcu-á<sup>n</sup> cúú-xí dàtná ì<sup>n</sup> sǎ sǎhni ñaha xii-yu, dico sǎ cúú-xí cué ñáyiú sa ní naníhí tǎhú, dicó yúcu-á<sup>n</sup> cúú-xí dàtná ì<sup>n</sup> sǎ ndécá ìní-yu, duca<sup>n</sup> sǎtnahá-xi cùu nchúhú. Te vitna chí cuǎha cuendá núu ná cúú ñáyiú sàni iní-ndó ndàcu cada nacuáa ndùu tnúhu cǎhá<sup>n</sup>-í-a. <sup>17</sup>Chi nchúhú cǎhá<sup>n</sup>-ndí tnúhu Yá Ndiòxí dico ñá túú ndáhú quídé-ndí ndihi tnúhu-gǎ dàtná xĩquide dava-gǎ-güedé, chi quide ndáá-ndí cǎhá<sup>n</sup>-ndí tnúhu-gǎ, te mee-gǎ ní cachí-gǎ sǎ dúcá<sup>n</sup> càda-ndí te ndèhe-gǎ sǎ nchúhú quídé-ndí nàcuáa ní cachí-gǎ, chi ndècu ndihi-ndí Xítóhó Jesucristú.

### **Cuendá ìngá núú sǎ vǎha ní cachí Yá Ndiòxí cada-gǎ ñáyiú**

**3** Te cuěi duha cǎhá<sup>n</sup>-ndí núú-ndó dico ñá túú xini ñuhu-xi sǎ cǎñaha-ndí xii-ndo sǎ cúú-ndí cue tée quide vǎha, te ni ñà túú xini ñuhu-xi cacanehe-ndí ì<sup>n</sup> tutú núú cǎhá<sup>n</sup>-xi sǎ cúú-ndí cue tée vǎha danèhé ñáhá xii-ndo datná xĩquide dava-gǎ-güedé, te ni ñà túú xini ñuhu-xi sǎ nchòhó taxi-ndo ì<sup>n</sup> tutú núú cǎhá<sup>n</sup>-ndó sǎ nchúhú cúú-ndí cue tée quide vǎha. <sup>2</sup>Te ñá túú xini ñuhu-xi duca<sup>n</sup> cada-ndí. Te cùtnuní ndáá iní-ndí sǎ nchòhó cúú-ndó dàtná ì<sup>n</sup> tutú sǎ ìo vǎha cǎhá<sup>n</sup> cuendá-ndí. Te duca<sup>n</sup> sǎtnahá-xi cùu-ndo chi nchaa ñáyiú ñihí-yu tnúhu nàcuáa quide-ndo

ndecu-ndo, te xíá<sup>n</sup> cútñuní iní-yu sá nchühú cúu-ndí cue tée quide váha. <sup>3</sup>Te nchòhó cúu-ndo cuendá Xítohó Jesucristú, te cùu-ndo datná tutú-gá te tutú-á<sup>n</sup> ní táuchíu<sup>n</sup>-gá xii-ndí ní cadúha-ndí, te mee-ni ndíhi Espíritú Yá Ndiöxí ní ngúndeé tnúhu-á<sup>n</sup> te ñá díu ndíhi tindá ní ngúndeé. Te ñá díu ñ<sup>n</sup> núu yúú ní ngúndeé chi iní-ndo cùu-xi núu dúcá<sup>n</sup> ní ngúndeé tnúhu-á<sup>n</sup> te duca<sup>n</sup> sátnahá-xi cùu-ndo.

<sup>4</sup>Te duha càhá<sup>n</sup>-ndí chi cùtnuní ndáá iní-ndí sá Yá Ndiöxí quidé váha ñaha-gá xii-ndí, chi ndècu ndíhi-ndí Xítohó Jesucristú. <sup>5</sup>Te nchühú chi ndàcu-ndí quidé-ndí sá váha dico ñá díu mèe-ndí duca<sup>n</sup> ndàcu-ndí quidé-ndí, chi mee Yá Ndiöxí chindèe ñaha-gá xii-ndí nùu ndàcu-ndí quidé-ndí sá váha. <sup>6</sup>Te mee Yá Ndiöxí ní quide-gá sá nchühú ndacu-ndí cunu cuechi-ndí núu-gá càhá<sup>n</sup>-ndí núu ñáyiú cuendá ingá núu sá váha ní cachí-gá cada ñaha-gá xií-yu. Te sá váha ní cachí-gá cada ñaha-gá xií-yu-á<sup>n</sup> ñà túú ñ<sup>n</sup>-ni cuu-xi ndíhi nchaá tnúhu sá ní xáha<sup>n</sup>-gá xii ndíi Moisés ní chídó tnùní ndíi, te duca<sup>n</sup> chi espíritú Yá Ndiöxí néhé chiú<sup>n</sup>-xi nchaá tnúhu sá càhá<sup>n</sup> cuendá nchaá sá váha-á<sup>n</sup>. Te nchaá tnúhu ní chídó tnùní ndíi Moisés, dándixi túu-xi iní nchaá ñáyiú ndècu ndíhi tnúhu-á<sup>n</sup> sá cuíta niñnú-yu cuendá nchaá cuéchi-yu, dico cue ñáyiú ndècu ndíhi Espíritú Yá Ndiöxí ñáyiú-á<sup>n</sup> ndécú ndíhi-yu tnúhu ndee iní sá cäcu niñnú-yu.

<sup>7</sup>Te tnúhu sá ní càhá<sup>n</sup> Yá Ndiöxí ndéé díhna nàcuáa cada ñáyiú ní ngúndeé-xi ñ<sup>n</sup> núu yúú quèhé<sup>n</sup>. Te òré ní dátüu ndíi Moisés nàcuáa càhá<sup>n</sup> tnúhu sá ní càhá<sup>n</sup> Yá Ndiöxí ndéé núu yúú-á<sup>n</sup> nùu cue ñáyiú isràèl, te súuní ní tása<sup>n</sup> núu ndíi te ñá túú-gá ní cùu cundehé-yu núu ndíi, te duca<sup>n</sup>-gá duca<sup>n</sup>-gá quidé-xí dátása<sup>n</sup>-xi núu ndíi ni cùu ñá túú-gá duca<sup>n</sup> ni quide-xi. Te tnúhu ndéé núu yúú-á<sup>n</sup>

dándixi túu-xi iní cue ñáyiú sá cuíta niñnú-yu sá cuendá nchaá cuéchi-yu, te ío váha ní quide-xi cùtnahá ní ngúndecu ndíhi cue ñáyiú isràèl tnúhu-á<sup>n</sup>. <sup>8</sup>Te sá dúcá<sup>n</sup> ní quide-xi xíá<sup>n</sup> cútñuní sá tnúhu càhá<sup>n</sup> Espíritú Yá Ndiöxí vitna uu<sup>n</sup>-gá duca<sup>n</sup> ío-gá váha quide-xi. <sup>9</sup>Te núu duca<sup>n</sup> ío váha ní quide-xi cùtnahá ní ngúndecu ndíhi cue ñáyiú isràèl tnúhu sá dándixi túu iní-yu sá cuíta niñnú-yu sá cuendá nchaá cuéchi-yu, te uu<sup>n</sup>-gá duca<sup>n</sup> váha quide-xi vitna ní ngúndecu ndíhi-o tnúhu sá càhá<sup>n</sup> nàcuáa quide Yá Ndiöxí cuendá sá vā cùndècu-gá cuéchi ñáyiú núu-gá. <sup>10</sup>Te vā càchí-ó sá cùtnahá ní ngúndecu ndíhi cue ñáyiú isràèl tnúhu ndèé núu yúú-á<sup>n</sup> ío-gá váha ní quide-xi, te ñáhá chi uu<sup>n</sup>-gá váha quide-xi vitna cuendá tnúhu sá càhá<sup>n</sup> nàcuáa quide Yá Ndiöxí. <sup>11</sup>Te núu duca<sup>n</sup> ío váha ní quide-xi cùtnahá ní ngúndecu ndíhi ñáyiú isràèl tnúhu sá ñà túú ní cùdíi, te uu<sup>n</sup>-gá duca<sup>n</sup> ío váha quide-xi vitna ní ngúndecu ndíhi-o tnúhu sá vā ndíhí niñnu tnahí-gá.

<sup>12</sup>Te cùtnuní iní-ndí sá vā ndíhí niñnu sá dúcá<sup>n</sup> ío váha quide-xi, núu xíá<sup>n</sup> ío víi ío váha cùu iní-ndí càhá<sup>n</sup>-ndí tnúhu sá ní ngúndecu ndíhi-o. <sup>13</sup>Te ñá túú quide-ndí datná ní xóo cada ndíi Moisés, chi ndíi-á<sup>n</sup> ní xóo dàdàhu ndíi núu ndíi òré dátása<sup>n</sup>-xi núu ndíi cuendá sá vā quíní cue ñáyiú isràèl òré ñá túú-gá dátása<sup>n</sup>-xi núu ndíi. <sup>14</sup>Te cue ñáyiú isràèl ñá túú ní tècú tnùní váha-yu nàcuáa ní xóo danèhé ñáhá ndíi Moisés xií-yu, te cuèi ndéé vitna ñá túú tècú tnùní-yu òré dācuahá-yu tnúhu sá ní càhá<sup>n</sup> Yá Ndiöxí ndéé díhna nàcuáa cada-gá, te cada iní-ó sá datná sá ní xídáhu núu ndíi Moisés yídáhu núu-yu cuendá sá vā cùtnuní núu-yu cundehé-yu te tecú tnùní-yu, dico núu tnahá tnúhu-yu ndíhi Xítohó Jesucristú te tecú tnùní-yu. <sup>15</sup>Te cuèi ndéé vitna òré dācuahá-yu nchaá tnúhu sá ní chídó tnùní ndíi Moisés nchaá

núú tütú ndíi, te cada iní-ó sã dàtná sá ñí xídáhu núú ndíi yídáhu núú-yu chi ñá túú tècú tnùní-yu. <sup>16</sup> Dico cue ñáiyu na tũha ñaha xii Xítohó Jesucristú te tècú tnùní-yu tnúhu-gá. <sup>17</sup> Te Xítohó Jesucristú ñí-ni cùu-gá ndíhi Espíritú Yá Ndiòxí, te nchaa ñáiyu ndècu ndíhi Espíritú-gá ñá túú-gá táxí tnùní ñáhá ñí ñí sá ñá túú vãha xii-yu. <sup>18</sup> Te dàtná cùú ñí yutátá sã dánèhé núú ñáhá-xí xii ñáiyu ñí sá vãha, duca<sup>n</sup> sãtnahá-xi cùu-o chi quide-o nacuaá cáhá<sup>n</sup> ñáiyu sá ño càhnu cuu Xítohó Jesucristú, te duca<sup>n</sup> ùu<sup>n</sup>-gá uu<sup>n</sup>-gá tá cùndáá-ó ndècu-o ichi-gá dàtná quidé mèe-gá quidé ndáá-gá. Te Espíritú-gá quidé-xí dùca<sup>n</sup> ta cundáá-ó nũú-gá cuáhá<sup>n</sup>.

**4** Te mee Yá Ndiòxí ní cundáhu iní ñáhá-gá xii-ndí ní taxi-gá chùu<sup>n</sup> quide-ndí càhá<sup>n</sup>-ndí tnúhu-gá, núu xíá<sup>n</sup> ñá túú tnàhí nàtúhú iní-ndí càhá<sup>n</sup>-ndí tnúhu-gá. <sup>2</sup> Te nchúhú dàquee tñhú-ndí nchaandi túhú sá ñá túú vãha quide dayuhu ñáiyu, chi nchaa xíá<sup>n</sup> cùú-xí ñí sácá<sup>n</sup>-nũú sã cùú-xí-yu, te nchúhú ñá túú sàni iní-ndí dandàhú-ndí ñáiyu te ni ñá túú sàni iní-ndí dama-ndí nàcuáa càhá<sup>n</sup> tnúhu Yá Ndiòxí, chi càhá<sup>n</sup> ndáá-ndí nàcuáa tàù-xi cáhá<sup>n</sup>-ndí, te mee Yá Ndiòxí ñáhá-gá nàcuáa ndùu tnúhu càhá<sup>n</sup>-ndí núú ñáiyu, te ñáiyu-á<sup>n</sup> cùtnùní iní-yu sá nchúhú càhá<sup>n</sup> vãha-ndí. <sup>3</sup> Te cue ñáiyu ñá túú tècú tnùní nàcuáa ndùu tnúhu sá càhá<sup>n</sup> nàcuáa naníhí tãhú-ó càhá<sup>n</sup>-ndí núú-yu, ñáiyu-á<sup>n</sup> cùú-yu ñáiyu ta xíta nihnu cuáhá<sup>n</sup>. <sup>4</sup> Te cue ñáiyu-á<sup>n</sup> cùú-yu ñáiyu ío sãá iní-xi chi ñá túú cuiní-yu quíndáá iní-yu tnúhu Xítohó Jesucristú, te xíá<sup>n</sup> nũú sácúíhna cùnùu-xi núú-yu te nihí-xi nàcuáa quide-xi dadáhu ndodo iní ñáhá-xí xii-yu cuendá sá vã tècú tnùní-yu tnúhu sá càhá<sup>n</sup> nàcuáa naníhí tãhú-yu, te tnúhu-á<sup>n</sup> cùú-xí tnúhu sá ño vãha chi càhá<sup>n</sup>-xi sá ño càhnu cuu Xítohó Jesucristú, te cùu-gá dàtná mèe

Tátá-gá Dútú Ndiòxí. <sup>5</sup> Te nchúhú ñá túú càhá<sup>n</sup>-ndí cuendá sá cùú-xí mèe-ndí núú-ndó chi càhá<sup>n</sup>-ndí cuendá Xítohó Jesucristú, te càchí-ndí xii-ndo sã díú-gá cùú-gá Yáá ío cùnùu, te càchí-ndí xii-ndo sã mèe-ndí cùú-ndí dícó-ni cue tée xinu cuechi sá cùú-xí-ndó, te duca<sup>n</sup> quide-ndí nàcuáa cuu vii cuu vãha iní Xítohó Jesucristú. <sup>6</sup> Te Yá Ndiòxí Yáá ní dáyèhé ndéé cùtnàhã nee ñuyú ní cùu, Yáá-á<sup>n</sup> ní cachí-gá sá Xítohó Jesucristú cada-gá nàcuáa tecú tnùní-ó sã ño càhnu cuu mee Yá Ndiòxí. Te sá dúcá<sup>n</sup> ñí quide-gá te cada iní-ó sã dàtná tnúhu sá ñí dáyèhé-gá iní-ó.

### Ío quíndáá iní-ó Yá Ndiòxí

<sup>7</sup> Te nchúhú ndécú ndíhi-ndí tnúhu Xítohó Jesucristú, te tnúhu-gá cùú-xí dàtná ñí sá ño vãha ñùhu ñí xítí quídi ñuhu, te nchúhú cùú-ndí dàtná quídi-á<sup>n</sup>. Te duca<sup>n</sup> sãtnahá-xi cùu-ndí chi tnúhu-gá ío càhnu cuu-xi te mee-ndí ñáhá, te duca<sup>n</sup> cùu nàcuáa cutnùní sá mèe Yá Ndiòxí quidé-gã nchaa sá vãha te ñá díú mèe-ndí. <sup>8</sup> Te cuéi ío ndòho-ndí ndécú-ndí dico nihí-ndí nàcuáa quide-ndí tá yãha-ndí nchaa tnúndòho-á<sup>n</sup> cuáhá<sup>n</sup>, cuéi áma sa ndètu víi-nã quehndé iní-ndí sá vã ndácú-ndí yãha-ndí nchaa tnúndòho-á<sup>n</sup>, dico ndàcu-ndí yãha-ndí. <sup>9</sup> Te cuéi nànducu ñaha ñáiyu cuiní-yu ná cada ñáhá-yu xii-ndí dico ñá túú dàña ñaha Yá Ndiòxí xii-ndí, te cuéi cànihá-yu xii-ndí dico cãcu-ndí ñá túú sãhni ñáhá-yu. <sup>10</sup> Te ndèni ní cuu cuáhá<sup>n</sup>-ndí xícá cùu-ndí, te cãcu cãcu cahni ñáhá-yu xii-ndí dàtná ní quidé-yu Xítohó Jesucristú, te duca<sup>n</sup> yãha-ndí cuendá cutnùní sá ndécú tũu Xítohó Jesucristú andíu te chindee ñaha-gá xii-ndí. <sup>11</sup> Te nchúhú nini ndècu-ndí ñuyú-a te nchaa-ni nduu cãcu cãcu cahni ñaha ñáiyu xii-ndí sá cuendá Xítohó Jesucristú, te duca<sup>n</sup> yãha-ndí ndécú-ndí cuendá



cutnùní sá Xítohó Jesucristú ndécú ndìhi ñaha-gá xii-ndí cuéí vâ cúdîi yiqui cùñú-ndí cundecu-xi. <sup>12</sup>Te sá dúcá<sup>n</sup> cãcu cãcu cahni ñaha ñáyiu xii-ndí xíã<sup>n</sup> nchòhò uu<sup>n</sup>-gá tá nihí ndéé-ndó cuáhá<sup>n</sup> ndécú-ndó ìchi Xítohó Jesucristú.

<sup>13</sup>Te ì<sup>n</sup> téé ní xíndecu ndéé sanaha ní chídó tnùnì-dé núú tütú Yã Ndiòxí núú cächí-xi: “Yúhú ní sándáá iní-í Yã Ndiòxí núú xíã<sup>n</sup> ní cáhá<sup>n</sup>-í”, duha ní cachí téé-á<sup>n</sup>. Te dàtná-ni ní sani iní téé-á<sup>n</sup> nì cáhá<sup>n</sup>-dé te diu-ni duca<sup>n</sup> sàni iní nchúhú tucu núú xíã<sup>n</sup> cächí-ndí: “Sándáá iní-ndí Yã Ndiòxí núú xíã<sup>n</sup> càhá<sup>n</sup>-ndí”, duha cächí-ndí. <sup>14</sup>Te cùtnuní iní-ndí sá núú na cùú-ndí te Yã Ndiòxí dandòto ñaha-gá xii-ndí dàtná ní dándótó-gã Xítohó Jesucristú, te tnàhá nchòhò duca<sup>n</sup> càda ñaha-gá xii-ndo, te dàvá-á<sup>n</sup> candeca ñaha-gã xii-o quíhí<sup>n</sup> nucúndecu-o núú-gã. <sup>15</sup>Te nchúhú nándi cùu sá tá yãha-ndí véxi cuèndá nchòhò ngúndecu váha-ndo, te duca<sup>n</sup> cuíta cáyá-gã ñáyiu ngúndecu váha sá xíí Yã Ndiòxí, te diu-ni duca<sup>n</sup> cuíta cuu vai-gã ñáyiu ndacá<sup>n</sup> táhũ-yu núú-gã te cachí-yu sá ìo càhnu cuu-gã.

<sup>16</sup>Te xíã<sup>n</sup> núú nchúhú ñá túú tnàhí nàtùhú iní-ndí ndécú-ndí ìchi Xítohó Jesucristú, te cuéí yiqui cùñú-ndí tá xàú-xi cuáhá<sup>n</sup> dico iní-ndí chi uu<sup>n</sup>-gá uu<sup>n</sup>-gá tá nihí ndéé-xí cuáhá<sup>n</sup>. <sup>17</sup>Te nchaa sá ndóhò-ndí ñuyúú-a ñá túú cächí-ndí sá cùú-xí ì<sup>n</sup> tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyúú-a te Yã Ndiòxí ìo váha cada ñaha-gã xii-ndí nduu na sàà-ndí núú ndécú-gã, te diu-ni duca<sup>n</sup> càda ñaha-gã xii-ndí ni caa ni quíhí<sup>n</sup>. <sup>18</sup>Te nchúhú ñá túú nchìcú<sup>n</sup> nihnu-ndí sá tũu ndèhe-ndí ìo ñuyúú-a, chi nchìcú<sup>n</sup> nihnu-ndí sá vátá quìnì-gã-ndí ndécú àndiu, te duca<sup>n</sup> quide-ndí chi nchaa sá tũu ndèhe-ndí ìo ñuyúú-a vâ cúdîi-xi cundecu-xi, te nchaa

sá ñà túú tũu ndècu andiu xíã<sup>n</sup> cudîi-xi cundecu-xi ni caa ni quíhí<sup>n</sup>.

**5** Te yiqui cùñú-ó cùu-xi datná ì<sup>n</sup> vehe, te vehe-á<sup>n</sup> ñà túú cúdîi-xi, te duca<sup>n</sup> sãtnahá-xi cùu yiqui cùñú-ó chi vâ cúdîi-xi, te na sàà nduu vâ cùndècu-gã-ó ndìhi yiqui cùñú-ó, te Yã Ndiòxí taxi-gã ì<sup>n</sup> yiqui cùñú sáá sã cùú-xí-ó, te xíã<sup>n</sup> cùú-xí dàtná ì<sup>n</sup> vehe sá ñà túú ní càdúha cue ñáyiu ñuyúú-a, chi mee Yã Ndiòxí ní cadúha-gã vehe-á<sup>n</sup> te vehe-á<sup>n</sup> cudîi-xi cundecu-xi ni caa ni quíhí<sup>n</sup> andiu. Te duca<sup>n</sup> sãtnahá-xi cùu yiqui cùñú sá táxí Yã Ndiòxí xii-o chi cudîi-xi cundecu-xi ni caa ni quíhí<sup>n</sup>. <sup>2</sup>Te nchúhú ndècu ndìhi-gã-ndí yiqui cùñú-ndí sá ndécú ndìhi-ndí vitna te sama cuìnì-ndí sá ìo ndìhi taxi Yã Ndiòxí yiqui cùñú sáá cùndecu ndìhi-ndí. <sup>3</sup>Chi mee-gã vâ dàñá-gã sá dúcá<sup>n</sup>-ní cùnduu-ndí cundecu-ndí, chi dai taxi-gã yiqui cùñú sáá-ã<sup>n</sup> xii-ndí. <sup>4</sup>Te nini ndècu-ndí ndìhi yiqui cùñú-ndí vitna ìo sàni iní-ndí te ndìhú iní-ndí, dico ñá dúú sã dúhá quide-ndí te ñá túú-gã tnàhá iní-ndí cundecu-ndí ndìhi yiqui cùñú-ndí, chi cuìnì-ndí sá Yã Ndiòxí ìo ndìhi taxi-gã yiqui cùñú sáá ndùu táhú-ndí, chi xíã<sup>n</sup> cudîi-xi ni caa ni quíhí<sup>n</sup> te yiqui cùñú-ndí sá tá ndìhi nihnu cuáhá<sup>n</sup>-a vâ cúdîi-xi cundecu-xi. <sup>5</sup>Te duca<sup>n</sup> tnàhí ní cachí Yã Ndiòxí cunduu sá dúcá<sup>n</sup> ndùu táhú-ó yìqui cùñú sáá-ã<sup>n</sup>, te ní taxi-gã Espiritú-gã ní ngúndecu ndìhi-o cuèndá cutnùní iní-ó sã ndàá taxi-gã yiqui cùñú sáá-ã<sup>n</sup> nduu táhú-ó.

<sup>6</sup>Te xíã<sup>n</sup> núú nchúhú nihí ndéé-ndí ndécú-ndí, te cùtnuní iní-ndí sá ñini ndecu-ndí ndìhi yiqui cùñú-ndí sá ndécú ndìhi-ndí vitna te vátá sàà-gã-ndí cundecu-ndí mei núú ndécú Xítohó Jesucristú. <sup>7</sup>Te duca<sup>n</sup> cùtnuní iní-ndí chi sándáá iní-ndí Yã Ndiòxí ndécú-ndí ñuyúú-a cuéí ñá túú xìní-ndí-gã. <sup>8</sup>Te ìo váha cùu iní-ndí ndécú-ndí, te sàni iní-ndí sá váha-gã sá núú vâ cùndècu-gã-ndí ndìhi yiqui cùñú-ndí sá

ndécú ndíhi-ndí vitna. Te duca<sup>n</sup> sàni iní-ndí chi váha-gá cundecu-ndí mei nũú ndécú Xítohó Jesucristú. <sup>9</sup>Te ío ndècu ndee-ndí quidé-ndí nàcuáa cuu vii cuu váha iní Xítohó Jesucristú vitna ndècu-ndí ñuyíu-a, te diu-ni duca<sup>n</sup> càda-ndí cueí òré vá cùndècu-gá-ndí. <sup>10</sup>Te dacuitíí sã ncháá-ó cùndecu-o núú Xítohó Jesucristú ìí<sup>n</sup> nduu, te dàvá-á<sup>n</sup> mee-gã cáhá<sup>n</sup>-gá te núu nása ndùu chiu<sup>n</sup> ní quide-o ìí<sup>n</sup> ìí<sup>n</sup>-o, núu ní quide váha-o àdi ñã túú ní quide váha-o, te nàcuáa ndùu chiu<sup>n</sup> ní quide-o ìí<sup>n</sup> ìí<sup>n</sup>-o te duca<sup>n</sup> ndùu sá táxi-gã nduu táhú-ó.

### Nàcuáa ní cuu ní ngúndecu váha-o ndíhi Yá Ndiòxí

<sup>11</sup>Te nchúhú quíyùhú iní-ndí nàcuáa cada Xítohó Jesucristú, núu xíá<sup>n</sup> càhá<sup>n</sup>-ndí tnúhu-gá núú ñáyiú cuendá xínu iní-yu tuha ñáhá-yu xii-gá. Te mee Yá Ndiòxí sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùnì iní-ndó nàcuáa quide-ndí ndécú-ndí. <sup>12</sup>Te sá dúhá càhá<sup>n</sup>-ndí te vá cánì iní-ndó sã nchùhú càhá<sup>n</sup> váha-ndí cuendá-ndí nàcuáa nchòhó cuu váha iní ñáhá-gá-ndó xii-ndí te ñáhá, chi duha càhá<sup>n</sup>-ndí cuendá sá nchòhó níhí-ndó tnúhu cáhá<sup>n</sup> váha-gá-ndó cuendá-ndí núú ñáyiú. Te duca<sup>n</sup> níhí-ndó tnúhu cùñaha-ndo xii cue ñáyiú quide nínu mee-xi, chi cue ñáyiú-á<sup>n</sup> ñã túú quide cuendá-yu nása ndècu iní-yu. <sup>13</sup>Te núu nchòhó sání iní-ndó sã lùcú-ndí cuendá nàcuáa quide-ndí ndécú-ndí te cùu-xi cuendá Yá Ndiòxí, àdi núu sàni iní-ndó sã ñã túú lùcú-ndí cuendá nàcuáa quide-ndí ndécú-ndí te cùu-xi sá váha sá cúu-xí-ndó. <sup>14</sup>Te quide-ndí nàcuáa cuiní Xítohó Jesucristú chi cùtnunì iní-ndí sá ío cùu iní-gá nchaá ñáyiú, te duca<sup>n</sup> xìnì ndáá-ndí sá ñí xíhí-gá cuendá nchaá-yu, te xíá<sup>n</sup> nũu cada iní-ó sã dàtná tnúhu sá ncháá ñáyiú ní xíhí-yu ndíhi-gá. <sup>15</sup>Te duca<sup>n</sup> ñí xíhí

Xítohó Jesucristú cuendá nchaá ñáyiú chi cuiní-gá sá ncháá-yu cundecu-yu cadá-yu nàcuáa cuiní méé-gã te vá cadá-yu nàcuáa cuiní méé-yu, chi mee-gã ní xíhí-gá te ní ndoto-gá cuendá cuu-xi sá váha sá cúu-xí-yu. <sup>16</sup>Te xíá<sup>n</sup> nũu nchúhú ñã túú-gã nã sání iní-ndí cuendá tnàha ñáyiú-ndí núu nàndíhi-yu àdi ñã túú nàndíhi-yu dàtná ní xóo canì iní-ndí cùtnàhá ní xíndecu-ndí ichi cuèhé ichi duha, te dàvá-á<sup>n</sup> ñí xóo canì iní-ndí cuendá Xítohó Jesucristú dàtná sání iní cue ñáyiú ndècu ichi cuehé ichi duha vitna. <sup>17</sup>Te nchaá nchoo ñáyiú ní tnàhá tnúhu ndíhi Xítohó Jesucristú ní nduu-o dàtná ìí<sup>n</sup> ñáyiú saa, te duca<sup>n</sup> chi ñã túú-gã quidé-ó dàtná ní xóo cada-o cùtnàhá ní xíndecu-o ìchi cuehé ichi duha, chi ní ngúíta-o quide-o mee-ná sá váha te nchaá xíá<sup>n</sup> cúu-xí sã sáá sã cúu-xí-ó chi vátá quiní-gá-ó càda-o.

<sup>18</sup>Te duca<sup>n</sup> quide-o ndecu-o chi mee Yá Ndiòxí quidé-gã sá dúcá<sup>n</sup> càda-o cundecu-o. Te Xítohó Jesucristú ní quide-gá ní ngúndecu váha-o ndíhi Yá Ndiòxí vitna, te duca<sup>n</sup> chi mee Yá Ndiòxí duca<sup>n</sup> tnàhí ní cachí-gá cunduu, te diu-ni mee Yá Ndiòxí ní taxi-gá chiu<sup>n</sup> quide-ndí càhá<sup>n</sup>-ndí tnúhu-gá nàcuáa ngúndecu váha cue ñáyiú ndíhi-gá. <sup>19</sup>Te duca<sup>n</sup> chi mee-gã ní cachí-gá sá Xítohó Jesucristú cada-gá nàcuáa nucúndecu váha nchaá nchoo cuè ñáyiú ndècu ñuyíu-a ndíhi Yá Ndiòxí. Te nchaá ñáyiú ní tuha ñaha xii-gá ñã túú-gã sání iní-gá sá ñáyiú-á<sup>n</sup> nacháhu-yu cuéchi-yu núu-gã. Te mee Yá Ndiòxí ní taxi-gá chiu<sup>n</sup> quide-ndí càhá<sup>n</sup>-ndí tnúhu-gá núú ñáyiú nàcuáa ngúndecu ndíhi ñaha váha-yu xii-gá. <sup>20</sup>Te Xítohó Jesucristú ní cachí-gá sá nchùhú cáhá<sup>n</sup>-ndí tnúhu-gá núu nchàa ñáyiú, te sá dúhá quide-ndí càhá<sup>n</sup>-ndí tnúhu-gá te quide-ndí núú Yá Ndiòxí càhá<sup>n</sup>-ndí yuhu-gá, te xíá<sup>n</sup> nũu càhá<sup>n</sup> ndàhú-ndí núu-ndó sã tnàhá tnúhu-ndo ndíhi Yá Ndiòxí cuendá

cundecu váha-ndo ndìhi-gá, te duha càhá<sup>n</sup>-ndí chi duca<sup>n</sup> càchí Xítoho Jesucristú cada-ndí. <sup>21</sup> Te Xítoho Jesucristú cúú-gá Yáá nã túú tnháí cuéchi-xi, dico Yá Ndiöxí ní quide ñaha-gã xii-gá dàtná ì<sup>n</sup> ñáyiú ndècu cuéchi-xi, te duca<sup>n</sup> chi Xítoho Jesucristú ní xido-gá cuéchi nchaa nchoo ñáyiú ñuyíú-a, te duca<sup>n</sup> ní xido Xítoho Jesucristú nchaa cuéchi-o cuèndá sá ñuu na tnháí tñúhu-o ndìhi-gá te cudúu-o núú Yá Ndiöxí, te duca<sup>n</sup> ní cuu chi mee Yá Ndiöxí duca<sup>n</sup> ñí cachí-gá cunduu.

**6** Te nchoo ì<sup>n</sup>-ni cùu-o quide chiú<sup>n</sup>-o cuendá Yá Ndiöxí ñuu xíã<sup>n</sup> càhá<sup>n</sup> ndàhú-ndí núú-ndó sã vã dicó-ni duca<sup>n</sup> cùndedóho-ndo tñúhu Yá Ndiöxí, chi cada-ndo nàcuáa na chindee ñaha-ni-gá. <sup>2</sup> Chi mee-gã càchí-gá ì<sup>n</sup> xichi núú tütú-gá núú càchí-xi:

Sáá nduu te cundàhú iní ñáhà-í xii-ndo chindee ñaha-í cuèndá naníhí tãhú-ndó, te ní sáá nduu tàú-xi sá cùndàhú iní ñáhà-í xii-ndo chindee ñaha-í cuèndá naníhí tãhú-ndó, núú xíã<sup>n</sup> ní xindedóho-í tñúhu ní càhá<sup>n</sup>-ndó te ní chindee ñaha-í xii-ndo nàcuáa naníhí tãhú-ndó.

Duha càchí-gá núú tütú-gá. Te vitna cùu-xi nduu cundahú iní ñáhá Yá Ndiöxí chindèe ñaha-gá, te cùu-xi nduu naníhí tãhú-ó.

<sup>3</sup> Te nchúhú ñã túú quide-ndí ì<sup>n</sup> sá ñã túú tàú-ndí cada-ndí sá cúú-xí ñáyiú, chi cuíní-ndí sá vã càhá<sup>n</sup> cuèhé-yu cuèndá chiú<sup>n</sup> quide-ndí. <sup>4</sup> Te nchaa sá quidé-ndí cúú-xí nàcuáa cutnùní iní cue ñáyiú sá nchúhú xínú cuéchi-ndí núú Yá Ndiöxí, te ío quide cahnu iní-ndí cuèndá nchaa sá ndóhó-ndí, chi nándí quide ñaha ñáyiú xii-ndí, te duca<sup>n</sup>-ni ta quide cahnu iní-ndí cuèi nándí-gá nchaa sá tá yãha-ndí véxi. <sup>5</sup> Te duha ta yãha-ndí véxi, núú cániha ñáyiú xii-ndí, núú chíhí ñáhá-yu vecaá, núú cuää ndeé

ñáhá ñáyiú xii-ndí xícuèhé ñáhã-yu, te ío ndòho-ndí quidé-ndí chiú<sup>n</sup> Yá Ndiöxí, te áma xidí-ndí te áma ñã túú xidí-ndí, te áma ñihí-ndí sá xéxi-ndí te áma ñã túú ñihí-ndí. <sup>6</sup> Te quide ndáá-ndí ndécú-ndí, te cùtnuní váha iní-ndí nàcuáa càhá<sup>n</sup> tñúhu Yá Ndiöxí, te quide cahnu iní-ndí cuèi nándí quide ñaha ñáyiú xii-ndí, te cùndahú iní-ndí tñaha ñáyiú-ndí, te quide-ndí nchaa sá váha nàcuáa chindee ñaha Espíritú Yá Ndiöxí xii-ndí, te ío ndisa iní-ndí cúú ìní-ndí cue tñaha ñáyiú-ndí. <sup>7</sup> Te dànehé-ndí ñáyiú mee-ni tñúhu ndáá, te nchaa chiú<sup>n</sup> quide-ndí te quide-ndí nàcuáa chindee ñaha Yá Ndiöxí xii-ndí, te cuèndá sá quidé ndáá-ndí ndécú-ndí ñuu xíã<sup>n</sup> ñihí ndéé-ndí dáquèe tñú-ndí nchaa sá cuèhé sá dúhá. <sup>8</sup> Te dava ñáyiú quide nínu ñáhá-yu xii-ndí, te davá-yu tñúhu cuèhé tñúhu duha càhá<sup>n</sup>-yu xãhá<sup>n</sup>-yu xii-ndí, te davá-yu xíçáhá<sup>n</sup> váha-yu cuèndá-ndí te davá-yu xíçáhá<sup>n</sup> cuèhé-yu, te davá-yu càchí-yu sá dándàhú-ndí ñáyiú dico ñã ndáá chi càhá<sup>n</sup> ndáá-ndí. <sup>9</sup> Te davá-yu càchí-yu sá ñã túú xìní-yu ná ñáyiú cùu-ndí, te davá-yu càchí-yu sá xìní-yu yoo cùu-ndí, te davá-yu cuíní-yu cahni ñáhá-yu xii-ndí dico vátá càhni ñaha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiöxí, te cuèi ndòho-ndí dico ñã túú cùu-xi sá cùú-ndí. <sup>10</sup> Te cuèi ndìhú iní-ndí dico ñã túú dàña ndeé-ndí sá cùdí ìní-ndí, te cùu-ndí cue téé ndàhú dico sànu ichi-ndí vãi ñáyiú ichi Yá Ndiöxí cuèndá ngúndecu váha-yu sá cuèndá-gá, te cuèi ñã túú ñã ndécú ndìhi-ndí dico ñã túú ñã cùmãní xii-ndí.

<sup>11</sup> Te nchòhó ñáyiú ndècu ndìhi-í ichi Xítoho Jesucristú ndécú ñúú Còrintú ío cùu iní ñáhá-ndí xii-ndo, te ni yùhu ni iní-ndí càhá<sup>n</sup>-ndí nchaa tñúhu càhá<sup>n</sup>-ndí sá cúú-xí-ndó. <sup>12</sup> Te nchúhú chi ni yùhu ni iní-ndí cúú ìní ñáhá-ndí xii-ndo, dico nchòhó chi ñã túú dùca<sup>n</sup> quide-ndo sá

cúu-xí-ndí. <sup>13</sup>Te yúhú càhá<sup>n</sup> ndàhú-í núu-ndó dàtná quidé ì<sup>n</sup> téé cùu tátá òré càhá<sup>n</sup> ndìhì-dé cue déhe-dé sá nì yuhu nì iní-ndó cùu iní ñáhá-ndó xii-ndí dàtná quidé mèe-ndí cúu iní ñáhá-ndí xii-ndo.

### Nchoo cùu-o datná ì<sup>n</sup> vehe Yá Ndiöxí

<sup>14</sup>Te cue ñáyiu ñá túú sàndáá iní tnúhu Xítóhó Jesucristú, te vá cúu ì<sup>n</sup>nuu-ndo ndihí-yu cada-ndo dàtná xíquidé-yu, chi ðì<sup>n</sup> cuu nchaa sá vâha te ðì<sup>n</sup> cuu nchaa sá cuèhé sá dúhá, te ñúmí nchíanchii ndihì niú chi ñá túú ì<sup>n</sup>-ni cuu-xi. Te duca<sup>n</sup> sãtnahá-xi cùu nchaa sá vâha ndihì nchaa sá cuèhé sá dúhá chi ñá túú ì<sup>n</sup>-ni cuu-xi. <sup>15</sup>Te ðiu-ni duca<sup>n</sup> ñá túú ì<sup>n</sup>-ni cuu Xítóhó Jesucristú ndihì sácufhá, te ðiu-ni duca<sup>n</sup> ñá túú ì<sup>n</sup>-ni cuu ñáyiu sàndáá iní ñáhá xii Xítóhó Jesucristú ndihì ñáyiu ñá túú sàndáá iní ñáhá xii-gá. <sup>16</sup>Te ðiu-ni duca<sup>n</sup> sãtnahá tucu-xi cùu vehe Yá Ndiöxí ndihì nchaa sá càchí ñáyiu cùu ndióxí ní cadúha cue téé ñuyúú-a, chi vá cúu quèhì ni ì<sup>n</sup> xíá<sup>n</sup> xití vehe-gá. Te nchoo cùu-o datná vehe Yá Ndiöxí Yaá ndécú tũu andiu, chi mee-gã càchí-gá núu tütú-gá núu càchí-xi:

Yúhú vá cúmãní cundecu-í ndihí-yu ndèni ní cuu na cundecú-yu, te ðiu-ni yúhú cuu-í Ndiöxí-yu, te mèe-yu cuú-yu ñáyiu cùu cuendá-í. Duha càchí-gá núu tütú-gá. <sup>17</sup>Te xíá<sup>n</sup> nũu càchí tucu-gá ingá xichi núu tütú-gá núu càchí-xi: Chí tá quèe tnuú nchaa ñáyiu ñá túú sàndáá iní ñáhá xii-í, te vá cání iní-ndó càda-ndo ni ì<sup>n</sup> sá cuèhé sá dúhá, te duca<sup>n</sup> te quehe<sup>n</sup> cuendá ñáhá-í xii-ndo, <sup>18</sup>te yúhú cuu-í Tãtã-ndó, te nchòhó cuu-ndo cuè déhe ducu<sup>n</sup>-í, ndihì cue déhe yoco-í, duha càhá<sup>n</sup> yúhú Yaá ío càhnu cuu. Duha càchí-gá núu tütú-gá.

**7** Te sá dúcá<sup>n</sup> ìo vâha càhá<sup>n</sup> Yá Ndiöxí sá cúu-xí-ó nũu xíá<sup>n</sup> càhá<sup>n</sup>-í dóho nchòhó ñáyiu ío cùu iní-í sá dùu<sup>n</sup> duu<sup>n</sup> daña-o nchaa sá cuèhé sá dúhá, chi nchaa xíá<sup>n</sup> ñá túú cùu-xi sá vâha sá cúu-xí iní-ó ndihì yiquí cuñú-ó, te cada-o nàcuáa tàú-xi cunduu nàcuáa cundáá-ó nũu Yá Ndiöxí, te cada-o sã néhé-ó sá yñũhu núu-gã.

### Cue ñáyiu ñuú Còrintú quidé vâha-yu

<sup>2</sup>Te ni yùhu nì iní-ndó chì cúu ìní ñáhá xii-ndí, chi nchúhú vá yõ ì<sup>n</sup> quide úhú iní-ndí, te ni vã yõ ì<sup>n</sup> dàcuíta nihnu-ndí, te ni vã yõ ì<sup>n</sup> dàndahú-ndí. <sup>3</sup>Te sá dúhá càhá<sup>n</sup>-í te vá cání iní-ndó sã ì<sup>n</sup> cuéchi dàcaa-í díquí-ndó, chi dàtná sa ní cachí-í xii-ndo sã yùhú ío cùu iní ñáhá-í xii-ndo, te cuèi vitna ndècu-gá-ó ñùyúú-a àdi cuéi na cùu-ó dico ðiu-ni duca<sup>n</sup> cùu iní ñáhá-í xii-ndo. <sup>4</sup>Te yúhú ío vâha sãni iní-í cuendá-ndó, te duca<sup>n</sup> ìo vâha càhá<sup>n</sup>-í cuendá-ndó, te ío ndècu ndihì-í tnúhu ndee iní cuendá-ndó, te ío cùdíf ìní-í sá cuendá-ndó cuèi nãndi ndòho-í ndihì dava-gã-güedé ndécú-ndí.

<sup>5</sup>Te nchúhú cútñahá ní sáhá<sup>n</sup>-ndí distritú Macèdoniá, te ñá túú tñahí ni ndètatú-ndí cuendá nchaa sá nì yãhandì chì ío ní ndòho-ndí cuendá nchaa sá nì quidé-yu, chì ío ní cuãndeé ñáhã-yu xii-ndí, te ío ní sani iní-ndí nũu nása-gã yáha-ndí ní cùu. <sup>6</sup>Dico Yá Ndiöxí ní taxi-gã tnúhu ndee ìní xii-ndí òré ní quexio té Títú núu ndécú-ndí, te ðiu-ni Yaá-ã<sup>n</sup> cúu-gã Yaá sãñaha-gã tnúhu ndee ìní xii cue ñáyiu ndihú iní-xi. <sup>7</sup>Te duca<sup>n</sup> nì taxi Yá Ndiöxí tnúhu ndee ìní xii-ndí cuendá sá nì quexio té Títú núu ndécú-ndí, te ñá dífú-ní sã cuendá ní quexio-dé chì ní níhí tucu-ndí tnúhu ndee ìní cuendá ní caní-dé cuendú núu-ndí sá nchòhó ní sãñaha-ndo tnúhu ndee ìní xii-dé, te ní cachí tnúhu-dé xii-ndí sá nchòhó ío cuini-ndó càhá<sup>n</sup> ndihì ñaha-ndo xii-ndí, te ní cachí tnúhu

tucu-dé xii-ndí sá nchòhó ío ndìhú iní-ndó cuèndá nàcuáa cùu ndecu-ndo ni cuu, ndìhì cuèndá sá ìo sàni iní-ndó cuèndá-í, te sá dúcá<sup>n</sup> ndùu cuèndú ní cani-dé núu-ndí nùu xíá<sup>n</sup> ío ní cudíí iní-í.

<sup>8</sup>Te nchòhó ní ndíhú iní-ndó cuèndá tnúhu càhá<sup>n</sup>-í núu tùtú sá ní dáquíxì-í ndaha-ndo, te òrè ní níhì-í tnúhu sá ndìhú iní-ndó te tnaa-ni ní ndixi cuéchi iní-í sá dúcá<sup>n</sup> ní quide-í te dàtnùnì ní tútú-gã ní ndìxi cuéchi iní-í. <sup>9</sup>Te vitna ní ndíhú iní-ndó, te xíá<sup>n</sup> ní quide-xi ní ndixi cuéchi iní-ndó sã ñà tútú quide vâha-ndo ndècu-ndo ni cuu, te ní cudíí iní-í dico ñà díú cuèndá sá ni ndìhú iní-ndó ní cudíí iní-í chi cuèndá sá ní ndixi cuéchi iní-ndó, te ní ndíhú iní-ndó nàcuáa ní cuu vâha iní Yã Ndiòxí, te xíá<sup>n</sup> nùu ní cuu-xi ìí<sup>n</sup> sá vâha sá cúú-xí-ndó cuèndá tnúhu ní càhá<sup>n</sup>-í te ñà tútú ní cùu-xi ìí<sup>n</sup> sá cuèhé sá cúú-xí-ndó. <sup>10</sup>Te nchoo nùu na ndìhú iní-ó nàcuáa cuu vâha iní Yã Ndiòxí, te ndixi cuéchi iní-ó te núu ñà tútú quide vâha-o ndècu-o, te sá dúcá<sup>n</sup> quide-o te nàníhí tàhú-ó, te vâ ndìhú iní-ó sã dúcá<sup>n</sup> ní quide-o, te dava ñâyüu xíndecu ichi cuèhé ichi duha ndìhú iní-yu dico ñà tútú ndixi cuéchi iní-yu cuèndá nchaa sá ñà tútú vâha quidé-yu, te sá dúcá<sup>n</sup> quidé-yu te cuíta níhnú-yu. <sup>11</sup>Te sá dúcá<sup>n</sup> ní ndíhú iní-ndó nàcuáa ní cuu vâha iní Yã Ndiòxí, te xíá<sup>n</sup> nùu ndùcu ndee-ndo quide-ndo nchaa nacuáa tàú-xi cunduu, te vitna ni yùhu ni iní-ndó càhá<sup>n</sup>-ndó sã quidé vâha-ndo, te ío cùdèé<sup>n</sup>-ndó nùú mée<sup>n</sup>-ndó sã ñà tútú quide vâha-ndo ndècu-ndo ni cuu, te yùhú-ndó ndècu-ndo cuèndá sá ñà tútú quide vâha-ndo ni cùu, te ío ní xúhu<sup>n</sup> iní ñáhá-ndó xii-í, te ní ndúcú ndéé<sup>n</sup>-ndó ní quide ndáá-ndó cuèndá téè ndècuéchi ndècu ndìhì-ndo, te sá dúcá<sup>n</sup> ní quide-ndo te xíá<sup>n</sup> ní cutnùnì sá mée<sup>n</sup>-ndó ñà tútú cuéchi-ndo. <sup>12</sup>Te ní cadúha-í tutú ní dáquíxì-í ndaha-ndo, te ní quide-ndo nàcuáa ní càhá<sup>n</sup>-í, te

sá dúcá<sup>n</sup> ní quide-ndo xíá<sup>n</sup> ní cutnùnì iní-ndó sã ìo cùu iní ñáhá-ndó xii-í. Te Yá Ndiòxí náhá-gã sá díú cuèndá xíá<sup>n</sup> ní dáquíxì-í tutú ndaha-ndo, te ñà díú-ní cuèndá sá sání iní-í cuèndá téè ndècuéchi ndècu ndìhì-ndo, te ni ñà díú-ní cuèndá ñâyüu ní dándìhú téè ndècuéchi-á<sup>n</sup> iní-xi ní cadúha-í tutú ní dáquíxì-í ndaha-ndo. <sup>13</sup>Te cuèndá sá quidé vâha-ndo ndècu-ndo xíá<sup>n</sup> cúú-xí tnúhu ndee iní ndécú ndìhì-ndí.

Dico ñà díú-ní xíá<sup>n</sup> chi tnàhá ío cùdíí iní-ndí cuèndá sá ìo cùdíí iní té Títú, te duca<sup>n</sup> cùdíí iní-dé chi nchòhó ní sãñaha-ndo tnúhu ndee iní xii-dé. <sup>14</sup>Te yúhú ñà tútú cùcaha<sup>n</sup> núu-í sá ní càhá<sup>n</sup> vâha-í cuèndá-ndó nùú tè Títú cùt-nàhá vátá quíxì-gã-dé núu ndécú-ndó, chi ní cutnùnì iní-dé sá ndàá càhá<sup>n</sup> vâha-í nàcuáa quide-ndo datná cúú-xí sã ndàá nchaa tnúhu dàcuaha ñaha-í xii-ndo. <sup>15</sup>Te vitna ío-gá vâha cùu iní té Títú cuèndá-ndó, chi ndàcu iní-dé sá ncháá-ndó ìo vâha ní tnìí-ndo nchàa tnúhu ní càhá<sup>n</sup>-dé núu-ndó, te ndàcu tucu iní-dé sá ní quehe<sup>n</sup> cuèndá vâha-ndo-dé, te ní dátüu-ndo nùú-dé sá ìo ní quiyùhú iní-ndó sã vâ ndácú-ndó càda-ndo nchaa nacuáa tàú-xi cunduu. <sup>16</sup>Te ío cùdíí iní-í cuèndá-ndó chi cùt-numí ndáá iní-í sã ñà tútú dàña ndeé<sup>n</sup>-ndó quide-ndo nchaa nacuáa tàú-xi cunduu.

### Ío vâha cuu iní-ó chindee tnaha-o

**8** Te nchòhó ñâyüu ndècu ndìhì-ndí ichi Xítohó Jesucristú càchí tnúhu-ndí xii-ndo nàcuáa quide ñaha Yá Ndiòxí xii cue ñâyüu xíndecu ichi-gá ndécú dìstrítú Macèdoniá, chi ío chindee ñaha-gá xii-yu cuèndá sá quidé vâha-yu ndécú-yu. <sup>2</sup>Te cuéi ndòho vihí-yu ndécú-yu dico ío-ni cùdíí iní-yu, te cuèndá xíá<sup>n</sup> nùu ni yùhu ni iní-yu ní sacá<sup>n</sup> tnáhã-yu díhú<sup>n</sup> sã cúú-xí tnàha ñâyüu-yu, te ñà tútú tnàhí ni xínduu díí-yu cuéi ío ndàhú-yu. <sup>3</sup>Te ñà díú-ní

nàcuáa ní sani iní-yu ndacú-yu cacá<sup>n</sup> tnáhá-yu, chi ní quide yica iní-yu ní sacá<sup>n</sup> tnáhá-gă-yu, te yúhú cächí tnúhu ndáá-í xii-ndo sá nì yuhu nì iní-yu duca<sup>n</sup> nì quidé-yu. <sup>4</sup>Te ío ní cáhá<sup>n</sup> ndàhú-yu núu-ndí cuendá sá cuàha-ndí tnúhu sá tnáhá-yu chindèe-yu dava-gá cue ñáyiú cùu cuendá Yă Ndiöxí. <sup>5</sup>Te ñá díú-ní nàcuáa ní sani iní-ndí ní quidé-yu, chi ní xídó-gă-yu ní quide váha-yu, te duca<sup>n</sup> chi mèe-yu ní sani iní-yu sá cádă-yu nchaa nàcuáa cuíní Yă Ndiöxí, te dàtnùní duca<sup>n</sup> te ní cachí-yu sá cùú càdá-yu nchaa nàcuáa na cũñaha-ndí xíí-yu. Te duca<sup>n</sup> nì quidé-yu chi duca<sup>n</sup> nì cuíní méé Yă Ndiöxí cunduu. <sup>6</sup>Te sá dúcá<sup>n</sup> nì quide ñáyiú-á<sup>n</sup> núu xíă<sup>n</sup> cáhá<sup>n</sup> ndàhú-ndí núú tē Títú sá quíxí tùcu-dé núú ndécú-ndó cuendá dàxínu cava-dé chiú<sup>n</sup> sá sà ní ngúíta-dé quidé-dě dátacá-dé díhú<sup>n</sup> sá sà ní ngúíta-ndo sàcá<sup>n</sup> tnáhá-ndó, te duca<sup>n</sup> quide-ndo chi cùndahú iní-ndó tnàha ñáyiú-ndo. <sup>7</sup>Te nchòhó cùú-ndó ñáyiú ío ngòdónúú quide nchaa sá vâha, te ío váha sàndáá iní-ndó Xítóhó Jesucristú, te ío váha cùtnuní iní-ndó nàcuáa cáhá<sup>n</sup> tnúhu-gá, te ío váha dàcuaha-ndo ñáyiú tnúhu-gá, te ío ndùcu ndee-ndo quide-ndo mee-ni sá vâha, te duca<sup>n</sup> ío cùu iní ñáhá-ndó xii-ndí, te sá dúcá<sup>n</sup> quide-ndo núu xíă<sup>n</sup> cáhá<sup>n</sup> ndàhú-í núú-ndó sá ngòdó núú-gă-ndó càda-ndo sá cùú-xí tnàha ñáyiú-ndo.

<sup>8</sup>Dico yúhú ñá túú tàuchiu<sup>n</sup>-í sá dúcá<sup>n</sup> càda-ndo, chi cuendá-ni sá cächí tnúhu-í xii-ndo nàcuáa quide dava-gá cue ñáyiú ndècu ichi Xítóhó Jesucristú, chi cue ñáyiú-á<sup>n</sup> nì yùhu nì iní-yu quidé-yu sá vâha sá cùú-xí tnàha ñáyiú-yu, te cächí tnúhu-í xii-ndo nàcuáa quidé-yu cuendá cutnùnì núu nása cada-ndo núu ndisa sá cùú iní-ndó cuè tnaha ñáyiú-ndo. <sup>9</sup>Te nchòhó sa xìní-ndó sá Xítóhó Jesucristú ío cùndahú iní ñáhá-gă xii-o, te ío váha ndècu-gá ní cùu te ní quixi-gá ñuyúú-a

nì quide váha ñaha-gă xii-o, te ñuyúú-a ñá túú ní xĩndecu váha-gá, te duca<sup>n</sup> nì quixi-gá ñuyúú-a cuè ñá túú ní xĩndecu váha-gá cuendá sá nchóó ngũndecu váha-o núú ndécú-gă.

<sup>10</sup>Te na cächí tnúhu-í xii-ndo nàcuáa sàni iní-í. Chiú<sup>n</sup> sá nì yuhu nì iní-ndó nì ngúíta-ndo quide-ndo cuíá nì yáha chi cùu-xi sá vâha sá cùú-xí-ndó núu na dàxínu cava-ndo. <sup>11</sup>Te dàtná-ni nì yùhu nì iní-ndó nì tausaha-ndo chiú<sup>n</sup>-á<sup>n</sup> te duca<sup>n</sup>-ni nì yuhu nì iní-ndó dàxínu cava-ndo, te cacá<sup>n</sup> tnáhá-ndó sá ndécú ndíhi-ndo nàcuáa xito mee-ndo ndacu-ndo. <sup>12</sup>Te núu nchòhó nì yùhu nì iní-ndó cächí<sup>n</sup> tnáhá-ndó sá xító mèe-ndo ndacu-ndo ña, te cùu váha iní Yă Ndiöxí, chi mee-gă sa nàha-gá nása ndècu-o te ndùu vétú-ni iní-gá.

<sup>13</sup>Te sá dúhá ndùu tnúhu cáhá<sup>n</sup>-í te vá cání iní-ndó sá yùhú cuíní-í sá nchòhó ndoho-ndo cùndecu-ndo te dava-gá-yu ngũndecu váha-yu sá cuendá-ndó. <sup>14</sup>Te vitna ndècu ndee iní-ndó nàcuáa ndacu-ndo chĩndee-ndo cue ñáyiú xini ñuhu, te nduu ñá túú ndècu ndee iní-ndó te cue ñáyiú-á<sup>n</sup> chĩndee ñáhá-yu xii-ndo te núu ndècu ndee iní-yu, te duca<sup>n</sup> te nì nchòhó ñá túú nă cumání xii-ndo te nì cuè ñáyiú-á<sup>n</sup> ñá túú nă cumání xíí-yu. <sup>15</sup>Te duca<sup>n</sup> te quee ndáá-xi nàcuáa cáhá<sup>n</sup>-xi núu tütú Yă Ndiöxí núú cächí-xi: “Cue ñáyiú ío vai sá nì níhí ñá túú ní cùu sobrá xíí-yu, te cue ñáyiú sacú ní níhí ñá túú ní cùmání xíí-yu”, duha cächí-xi núú tütú-gá.

### Té Títú ndíhi cue tée cùndíhi-dé

<sup>16</sup>Te ndàcá<sup>n</sup> táhù-í núú Yă Ndiöxí chi mee-gă ní quide sá tē Títú ío ñùhu iní ñáhá-dě xii-ndo dàtná ñùhú iní ñáhà-í xii-ndo. <sup>17</sup>Te yúhú ní xáha<sup>n</sup>-í xii-dé sá quíxí còto ñaha-dé xii-ndo te ní sáha-dé tnúhu, te ñá díú mèe-ni sá dúcá<sup>n</sup> nì xáha<sup>n</sup>-í xii-dé quixi coto ñaha-dě xii-ndo,

chi mee-dě cúdǐ tñahí iní-dé quixi coto ñaha-dě xii-ndo.

<sup>18</sup> Te tendaha-ndǐ ñí tée ndècu ndihi-o ichi Xítoho Jesucristú quixi-dé ndihi té Títú, te tée quixi ndihi té Títú-án cúu-dě ñí tée ío váha cǎhá<sup>n</sup> cue ñáyu xǐndecu ichi Xítoho Jesucristú cuendá-dé cuendá sá ío váha quide-dé chiú<sup>n</sup> Xítoho Jesucristú cǎhá<sup>n</sup>-dé tnúhu-gá tnúhu sá cǎhá<sup>n</sup> nàcuáa naníhí tǎhú-ó. <sup>19</sup> Te cue ñáyu xǐndecu ichi Xítoho Jesucristú ñá dǐú-ní sǎ cǎhá<sup>n</sup> váha-yu cuendá-dé, chi tñahá ní cǎxi ñahá-yu xii-dé cuendá sá cǎcǎ cùu ndihi ñaha-dé xii-ndǐ chindee ñaha-dé tacá sá cúu-xí ñáyu ndàhú, te quide-ndǐ chiú<sup>n</sup>-a cuendá ío cuu cǎhnu Yá Ndióxi, te cue ñáyu cutnùní iní-yu sá nchòhó nǐ yùhu nǐ iní-ndó quide-ndo nchaa sá váha sá cúu-xí cuè tñaha ñáyu-ndo. <sup>20</sup> Te cuíní-ndǐ sá vǎ cǎhá<sup>n</sup> cuèhé ñáyu cuendá nàcuáa quide-ndǐ ndihi sá ngǎutnàha sá cúu-xí cuè tñaha ñáyu-o, te ío vǎi cuu-xi. <sup>21</sup> Chi ndùcu ndee-ndǐ quidé-ndǐ nàcuáa cǎhá<sup>n</sup> váha Xítoho Jesucristú cuendá-ndǐ, te quide tucu-ndǐ nàcuáa cǎhá<sup>n</sup> váha ñáyu sá quidé váha-ndǐ.

<sup>22</sup> Te tendaha tucu-ndǐ ingá tucu tée ndècu ndihi-o ichi Xítoho Jesucristú quixi-dé ndihi cue tée úu quixi coto ñaha xii-ndo, te tée quixi ndihi-güedé-án nǐ cuu vǎi xito quide-dé nàcuáa cutnùní iní-ndǐ sá ío ndùcu ndee-dé quidé-dě sá váha, te vitna ío-gá cuíní-dé cada-dé sá váha vitna quixi-dé núu ndécú-ndó, chi cùtnuní ndáá iní-dé sá cúu-ndó cuè ñáyu quide váha. <sup>23</sup> Te cǎchí tnúhu-í xii-ndo sǎ tǎ Títú cúu-dě ñí tée cùndihi-í quidé-ndǐ chiú<sup>n</sup> Xítoho Jesucristú, te tñahá-dé cúu-dě ñí tée xǐnu cuechi núu-ndó cǎhá<sup>n</sup>-dé tnúhu-gá. Te cǎchí tnúhu tucu-í xii-ndo cuendá cue tée úu quixi ndihi-dé, chi cue tée-án cúu-güedě cue tée tendaha cuè ñáyu xǐndecu ichi Xítoho Jesucristú quixi coto ñaha xii-ndo. Te cue tée-án quidé-güedě

nàcuáa cǎchí ñáyu sá ío cǎhnu cuu Xítoho Jesucristú. <sup>24</sup> Te chí cǎdá sǎ cúu iní ndisa-ndo-güedě cuendá duca<sup>n</sup> na cùtnuní iní nchaa dava-gá ñáyu xǐndecu ichi Xítoho Jesucristú sá ndáa ndisa duca<sup>n</sup> quide-ndo, te duca<sup>n</sup> cùtnuní iní-yu sá ndáa ndisa quide váha-ndo dàtná cǎhá<sup>n</sup>-ndǐ cuendá-ndó sǎ quidé váha-ndo.

### **Cuendá sá ngǎutnàha sá cúu-xí cuè ñáyu xǐndecu ichi Xítoho Jesucristú**

**9** Te cuendá sá ngǎutnàha sá cúu-xí cuè ñáyu ndècu ichi Xítoho Jesucristú ñá túu-gǎ xíní ñùhu-xi cǎchí tnúhu-í xii-ndo núu tütú-a nàcuáa cada-ndo, <sup>2</sup> chi sa cùtnuní iní-í sá ío cuíní-ndó chindee-ndó-yu. Te duca<sup>n</sup>-ni ío váha cǎhá<sup>n</sup>-í cuendá-ndó núu ñáyu xǐndecu ichi Xítoho Jesucristú ndécú dǐstrítú Macèdoniá, te xǎhá<sup>n</sup>-í xǐ-yu sá nchòhó ñáyu xǐndecu ichi Xítoho Jesucristú ndécú dǐstrítú Acǎyá sa ní cuu ñí cuíá duca<sup>n</sup> cuíní-ndó cǎcǎ<sup>n</sup> tñahá-ndó sǎ cúu-xí cuè ñáyu ndàhú ndécú ichi-gá. Te vǎi cue ñáyu dǐstrítú Macèdoniá cuíní-yu cǎcǎ<sup>n</sup> tñahǎ-yu sá cúu-xí cuè ñáyu ndàhú ndécú ichi Xítoho Jesucristú cuendá sá ní níhǐ-yu tnúhu sá nchòhó ío cuíní-ndó dùca<sup>n</sup> cada-ndo. <sup>3</sup> Te cuendá sá sání iní-ndó cǎda-ndo xǐǎ<sup>n</sup> tendaha-í cue tée ndècu ndihi-o ichi Xítoho Jesucristú quixi-güedé núu ndécú-ndó cuendá dàtúha ñaha-güedě xii-ndo, cuendá sá vǎ queé ndèhnde-í núu ñáyu sá nǐ cǎhá<sup>n</sup> váha-í cuendá-ndó, te duca<sup>n</sup> cùndecu túha ndisa-ndo dàtná sa ní cǎhá<sup>n</sup>-í núu-yu. <sup>4</sup> Chi na cuáhá<sup>n</sup> ndèe quixi-í ndihi ñí tée cue ñáyu dǐstrítú Macèdoniá núu ndécú-ndó te quíní-yu sá ñá túu ndècu túha-ndo, te cucaha<sup>n</sup> núu-í núu-yu sá nǐ cǎhá<sup>n</sup> váha-í cuendá-ndó te núu ñá túu ndècu túha-ndo, te tñahá-ndó cùcaha<sup>n</sup> núu-ndó. <sup>5</sup> Te xǐǎ<sup>n</sup> núu ní sani iní-í

sá vǎha-gá codonùu cue téé ndècu ndìhi-o ichi Xítóhó Jesucristú quixi coto ñaha-güedé xii-ndo cuendá chindee ñaha-güedé tacá sá ñí sani iní-ndó càcá<sup>n</sup> tnáhá-ndó cuendá sá cündècu túha-xi, te cuu-xi dàtná ìí<sup>n</sup> táhú sá ñí quene cuu iní méé-ndó càcá<sup>n</sup> tnáhá-ndó sá cúu-xí cuè tñaha ñáyüu-ndo. Te duca<sup>n</sup> te vǎ yóo caní iní-xí quesáhá-yu sá nchùhú ní quide yica-ndí duca<sup>n</sup> ñí sacá<sup>n</sup> tnáhá-ndó.

<sup>6</sup>Te nchòhó sa xíní-ndó sǎ ñáyüu na chihí vai tatá te vǎi ñíñí-yu cùu, te cue ñáyüu na chihí sacú tatá te sacú ñíñí-yu cùu. Duca<sup>n</sup> sǎtnahá-xi cùu ñáyüu sàcá<sup>n</sup> tnáhá sǎ cúu-xí tñaha ñáyüu-yu. <sup>7</sup>Te ìí<sup>n</sup> ìí<sup>n</sup>-ndo càcá<sup>n</sup> tnáhá-ndó nàcuáa quène cuu iní méé-ndó, te ío váha cuu iní-ndó dùca<sup>n</sup> cada-ndo te vǎ cǎdá-ndó cuendá-ni sá quidé yica ñaha ñáyüu xii-ndo, chi Yá Ndiòxí cúu vǎha iní-gá núu nchàa ñáyüu cùdǎí iní sàcá<sup>n</sup> tnáhá sǎ cúu-xí cuè tñaha ñáyüu-xi. <sup>8</sup>Te Yá Ndiòxí ndacu-gá chindee ñaha-gá xii-ndo nàcuáa cundecu váha-ndo, chi ñiu-gá cada te ñíhí-ndó nchàa núu sǎ xíní ñùhu-ndo cundecu ndìhi-ndo, te ñá túú tnáhí-gá ná cumání xii-ndo, te mee-gǎ chindee ñaha-gá xii-ndo ñíhí-ndó ío vǎi cundecu ndìhi-ndo cuendá duca<sup>n</sup> chindee-ndo cue tñaha ñáyüu-ndo. <sup>9</sup>Te núu tütú Yá Ndiòxí cǎchí-xi ìí<sup>n</sup> xichi:

Ìí<sup>n</sup> ñáyüu ío vǎi sǎ ñí sǎñáhá-yu xii ñáyüu ndàhú,

te sǎ ñí quide ñáyüu-á<sup>n</sup> ñí cuu-xi sǎ vǎha sǎ vǎ yóo cùnaa.

Duha cǎchí-xi núu tütú-gá. <sup>10</sup>Te mee Yá Ndiòxí táxí-gǎ nchaa sǎ cúu tǎtǎ nchaa nchòhó ñáyüu xitu nándi sǎ xítú cuendá cuu sǎ cúu nchìto-ndo, te ñiu-gá cada te ío vǎi sǎ ñíhí-ndó cündecu ndìhi-ndo, te duca<sup>n</sup> ío-gá vǎi sǎ vǎha cada-ndo sǎ cúu-xí cuè tñaha ñáyüu-ndo. <sup>11</sup>Te Yá Ndiòxí taxi-gá vǎi núu sǎ cündècu ndìhi-ndo cuendá duca<sup>n</sup> ñí yuhu ñí iní-ndó vǎi cuǎñaha-ndo sǎ cúu-xí tñaha ñáyüu-ndo. Te cuendá nchaa sǎ sàcá<sup>n</sup>

tnáhá-ndó quèhe<sup>n</sup> cuendá-ndí cuu xii tñaha ñáyüu-ndo, te cue ñáyüu-á<sup>n</sup> ío ndacá<sup>n</sup> táhü-yu núu Yá Ndiòxí cuendá sǎ dúcá<sup>n</sup> sàcá<sup>n</sup> tnáhá-ndó sǎ cúu-xí-yu. <sup>12</sup>Te sǎ dúcá<sup>n</sup> quide-ndo sacá<sup>n</sup> tnáhá-ndó sǎ cúu-xí cuè ñáyüu cùu cuendá Yá Ndiòxí, te ñáyüu-á<sup>n</sup> ñà túú-gǎ ná cumání xí-yu, te ío ndacá<sup>n</sup> táhü-yu núu Yá Ndiòxí sǎ dúcá<sup>n</sup> quide-ndo. <sup>13</sup>Te ñáyüu-á<sup>n</sup> cutnùní iní-yu sǎ nchòhó quidé-ndó sǎ sǎndáa ndisa iní-ndó tñuhu Xítóhó Jesucristú, te cuendá xǎ<sup>n</sup> te ñáyüu-á<sup>n</sup> chihùhú-yu Yá Ndiòxí, te cuendá sǎ dúcá<sup>n</sup> ñí yuhu ñí iní-ndó sàcá<sup>n</sup> tnáhá-ndó sǎ cúu-xí-yu ndìhi sǎ cúu-xí nchàa dava-gá ñáyüu, te cachí-yu sǎ ío cǎhnu cuu Yá Ndiòxí. <sup>14</sup>Te ñáyüu-á<sup>n</sup> cǎhá<sup>n</sup> ndìhí-yu Yá Ndiòxí cuendá-ndó, te ío cuu váha iní ñáhǎ-yu xii-ndo cuendá sǎ Yá Ndiòxí chindèe ñaha-gá xii-ndo quide-ndo sǎ vǎha sǎ cúu-xí-yu ndìhi dava-gá ñáyüu. <sup>15</sup>Te ío ndacá<sup>n</sup> táhü-ó núu Yá Ndiòxí cuendá sǎ ñí taxi-gá sǎ ío váha ndècu ndìhi-o, te ñí ñǎ cutnùní iní-ó ñása cunduu tñuhu cǎhá<sup>n</sup>-ó cuendá sǎ vǎha ñí taxi-gá.

**Té Pǎblú ndécú ndìhi-dé  
tñuhu ndee iní sǎ cǎhá<sup>n</sup>-dé  
tñuhu Xítóhó Jesucristú**

**10** Te Xítóhó Jesucristú ío cǎhnu iní-gá, te cündahú iní ñáhǎ-gǎ xii-o chindee ñaha-gá, núu xǎ<sup>n</sup> yúhú té Pǎblú duca<sup>n</sup> quide-í cǎhá<sup>n</sup> ndàhú-í núu-ndó nàcuáa cada-ndo. Te dava-ndo cǎchí-ndó sǎ yúhú ío ndàhú iní-í òré ndécú ndìhi ñaha-í xii-ndo, te òré ñá túú ndècu ndìhi ñaha-í xii-ndo te ío ñí cǎà-í. <sup>2</sup>Te cǎhá<sup>n</sup> ndàhú-í núu-ndó sǎ cǎdá-ndó nàcuáa vá cǎhá<sup>n</sup> ñí-í núu-ndó òré quixi-í quixi coto ñaha-í xii-ndo. Te cuíní-í sǎ ndìhi tñuhu ñí iní-xi cǎhá<sup>n</sup> ndìhi-í cue ñáyüu cǎchí sǎ ìí<sup>n</sup>-ni cuu-í ndìhi cue ñáyüu ñá túú sǎndáa iní tñuhu Xítóhó Jesucristú. <sup>3</sup>Te nchùhú cùu-ndí cue téé ñuyú-a, dico ndùcu ndee-ndí quidé-ndí nàcuáa ndàcu-ndí dáquèe tǎhú-ndí nchaa



sá cuèhé sá dúhá, dico ñá díú mèe-ndí duca<sup>n</sup> ndàcu-ndí quidé-ndí, <sup>4</sup>te ni ì<sup>n</sup> sá ìò ñuyíú-a ñá túú chindee ñaha-xi, chi mee Yá Ndióxi chindèe ñaha-gá xii-ndí dáquèe tǎhú duu<sup>n</sup>-ndí nchaa núú sá cuèhé sá dúhá. <sup>5</sup>Te xǎ<sup>n</sup> núu ñihí-ndí tnúhu cǎhá<sup>n</sup>-ndí sǎdí-ndí yuhu cue ñáyiú cǎhá<sup>n</sup> tnúhu sá ñà túú cùu váha iní Yá Ndióxi, ñáyiú xíquide nínu mee-xi cǎchí sá ñà túú nǎndíhi tnúhu-gá. Te quide-ndí sá ñáyiú-á<sup>n</sup> quíndáá iní-yu tnúhu Xítóhó Jesucristú. <sup>6</sup>Te nchúhú sa ndècu túha-ndí sá dáquètǎhú-ndí cue ñáyiú ñá túú cuíní cada nàcuáa cuíní Xítóhó Jesucristú, dico díhna-gá xíní ñùhu-xi sá ncháá nchòhó ñáyiú cuíní cada nàcuáa cuíní-gá cundáá-ndó.

<sup>7</sup>Te nchòhó nàcuáa ndúu sá ndéhé-ndó te duca<sup>n</sup> sàni iní-ndó, dico vá dúcá<sup>n</sup> cǎni iní-ndó cuendá-ndí. Chi núu cùtnuní ndáá iní-ndó sá cúú-ndó cuendá Xítóhó Jesucristú, te díu-ni duca<sup>n</sup> tàú-ndó cǎni iní-ndó cuendá-ndí tucu. <sup>8</sup>Te Xítóhó Jesucristú ní taxi-gá tnúhu ndee ìní ndécú ndíhi-ndí sá dánèhé ñáhá-ndí xii-ndo nàcuáa cuita cuehnu nihnu-ndo ìchi-gá quǎhí<sup>n</sup>, te ñá díú sá dánèhé ñáhá-ndí xii-ndo nàcuáa cuíta nihnu-ndo, te cuèi na chido-gá-í cǎhá<sup>n</sup>-í cada nínu-í mèe-í cuendá tnúhu ndee ìní ní taxi Xítóhó Jesucristú ndécú ndíhi-ndí, dico vá cúcǎhá<sup>n</sup> núú-í chi cǎhá<sup>n</sup> ndáá-í. <sup>9</sup>Te ñá túú cuíní-í sá nchòhó cǎni iní-ndó sá yǎhú dáyhúhú ñáhà-í xii-ndo nàcuáa ndúu tnúhu cǎhá<sup>n</sup>-í núú tǎtú-í. <sup>10</sup>Te dava-ndo cǎchí-ndó sá ténáa ñáhà-í xii-ndo núú tǎtú-í, te mee-ni tnúhu cǎhnu sá ìo cùnuu cuu-xi, te cǎchí tucu-ndo sá òré ndécú ndíhi ñaha-í xii-ndo te ñá túú cǎa-í sá cúú-í ì<sup>n</sup> tée cùu váha cùu dico iní-ndó, te cǎchí tucu-ndo sá ñà túú tnáhá iní-ndó nàcuáa quide-í òré dácuàha ñaha-í xii-ndo. <sup>11</sup>Te nchòhó ñáyiú duca<sup>n</sup> cǎhá<sup>n</sup> cada

cuendá váha-ndo sá dátǎná-ni cǎhá<sup>n</sup>-ndí núú tǎtú-ndí díu-ni duca<sup>n</sup> quide-ndí òré ndécú ndíhi ñaha-ndí xii-ndo.

<sup>12</sup>Te nchúhú, vá cúú tnáhí cǎhá<sup>n</sup>-ndí sá ì<sup>n</sup>-ni cuu-ndí ndíhi cue ñáyiú cǎhá<sup>n</sup> váha cuendá méé-xí, chi ñáyiú-á<sup>n</sup> sání ìní-yu ná cúú sá váha te quide-yu te xǎ<sup>n</sup> cǎchí-yu sá ìo váha quide-yu, te cǎchí-yu sá quidé váha-gá-yu dácuúxí tnàha ñáyiú-yu, te sá dúcá<sup>n</sup> cǎhá<sup>n</sup>-yu te quide-yu dátǎná quidé cue ñáyiú ñá túú tnáhí cùtnuní iní-xi. <sup>13</sup>Te dico nchúhú ñá túú xidó-ndí cǎhá<sup>n</sup> váha-ndí cuendá-ndí, chi cǎhá<sup>n</sup> váha-ndí cuendá-ndí dico nàcuáa ndúu chiu<sup>n</sup> ní taxi Yá Ndióxi cǎhá<sup>n</sup>-ndí, chi mee-gǎ ní cǎchí-gá ndèe neni sáá-ndí cǎhá<sup>n</sup>-ndí tnúhu-gá, te ní sáá-ndí ndéé ñuú-ndó cǎhá<sup>n</sup>-ndí tnúhu-gá. <sup>14</sup>Te vitna ndècu ndíhi-ndí tnúhu ndee ìní sá tnáhá nchòhó cuu cǎhá<sup>n</sup> ndíhi ñaha-ndí xii-ndo, chi díhna-gá nchúhú ní quixi-ndí ní cǎhá<sup>n</sup>-ndí tnúhu Xítóhó Jesucristú ñuú-ndó, tnúhu sá cǎhá<sup>n</sup> nàcuáa naníhí tǎhú-ó. <sup>15</sup>Te nchúhú ñá túú quide cǎhnu-ndí méé-ndí cuendá chiú<sup>n</sup> quide dava-gá-güedé quesaha-ndí sá chíú<sup>n</sup> mèe-ndí cúú-xí. Te cuíní-ndí sá nchòhó cuita quíndáá-gá iní-ndó Xítóhó Jesucristú, te duca<sup>n</sup> te níhí-gǎ-ndí nàcuáa cada-ndí chiú<sup>n</sup>-gá nchaa dava-gá xichi núú ní cǎchí-gá cada-ndí chiú<sup>n</sup>-gá. <sup>16</sup>Chi cǎhá<sup>n</sup>-ndí tnúhu-gá tnúhu sá cǎhá<sup>n</sup> nàcuáa naníhí tǎhú-ó, te yáha-gá-ndí ñuú-ndó quǎhí<sup>n</sup>-ndí nchaa dava-gá xichi cǎhá<sup>n</sup>-ndí, te vá cádá cǎhnu-ndí méé-ndí cuendá chiú<sup>n</sup> sá sá ní quide dava-gá-güedé.

<sup>17</sup>Te cue ñáyiú cuíní cada cǎhnu mee-xi te vá dúcá<sup>n</sup> cǎdá-yu, chi mee Xítóhó Jesucristú ná cǎda cǎnú-yu-gá. <sup>18</sup>Te nchaa ñáyiú na cǎhá<sup>n</sup> váha Xítóhó Jesucristú cuendá-yu, ñáyiú-á<sup>n</sup> cúdíú-yu núú-gǎ, te ñá túú cùdíú-yu núú-gǎ cuendá sá cǎhá<sup>n</sup> váha-yu cuendá méé-yu.

**Cuendá té Páblu ndihi cuendá cue  
tée càchí sá càhá<sup>n</sup> tnúhu  
Yá Ndiöxi te ñá ndàá**

**11** Te cuiní-í sá nchòhó cada ndee iní-ndó cùndedóho-ndo tnúhu na càhá<sup>n</sup>-í, chi càhá<sup>n</sup>-í dàtná càhá<sup>n</sup> cue ñáyiú ñá túú cùtnuní iní-xi, te cuèi nása-gá ná cùnduu tnúhu càhá<sup>n</sup>-í dico chí cádá ndèe iní cùndedóho-ndo. <sup>2</sup>Chi yúhú ío ñùhu iní ñáhà-í xii-ndo dàtná ñúhú iní ñáhá mèe Yá Ndiöxi xii-o, te ní càhá<sup>n</sup>-í tnúhu Xítohó Jesucristú núú-ndó núu xíá<sup>n</sup> ní tnahá tnúhu-ndo ndihi-gá vitna, te sá dúcá<sup>n</sup> ní quide-í te cada iní-ndó sá yúhú cúú-í dàtná ì<sup>n</sup> tée xica ndáhú te nchòhó cúú-ndó dàtná ì<sup>n</sup> xíchí cuéchi, te Xítohó Jesucristú cúú-gá dàtná ì<sup>n</sup> tée tnándaha ndihi xíchí cuéchi-á<sup>n</sup>. Te duca<sup>n</sup> càda iní-ndó chí na sàá nduu te yúhú na càni cuendá ñáhà-í xii-ndo núú Xítohó Jesucristú, te cuu-ndo ñáyiú vá cùndècu tnahí-gá cuéchi-xi. <sup>3</sup>Te yùhú-í sá sàcuíhná dandàhú ñáhá-xí xii-ndo vá cání-gá iní-ndó càncicú<sup>n</sup> nihnu-ndo nì yuhu nì iní-ndó ìchi Xítohó Jesucristú dàtná nchìcú<sup>n</sup> nihnu-ndo vitna. Te yùhú-í ná yáha-ndo dàtná ní yáha tá Èvá, chi sàcuíhná nì nduu-xi cóó nì dándàhú ñáhá-xí xii-xi, chi sàcuíhná-á<sup>n</sup> ìo váha ní xito-xi nàcuáa ní quide-xi ní dándàhú-xi tá Èvá-á<sup>n</sup>. <sup>4</sup>Te nchòhó, quidé ndèe iní-ndó sàcùndedóho-ndo nchàa tnúhu càhá<sup>n</sup> cue tée càhá<sup>n</sup> ingá núú tnúhu cuendá Jèsús tnúhu sá ñá túú dànehé ñáhá-ndí xii-ndo, te quide ndee tucu iní-ndó ndèdóho-ndo dànehé ñáhá-güedé xii-ndo cuendá ingá espíritú, te ñá díú cuendá Espíritú Yá Ndiöxi sá nì ngúndecu ndihi-ndo dànehé ñáhá-güedé xii-ndo, te quide ndee tucu iní-ndó ndèdóho-ndo dànehé ñáhá-güedé xii-ndo ingá núú tnúhu sá càchí-güedé càhá<sup>n</sup> nàcuáa naníhí tàhú-ndó, te ñá díú nàcuáa ndùu tnúhu

sá ní sàndáá iní-ndó cuendá naníhí tàhú-ndó càhá<sup>n</sup>-güedé. <sup>5</sup>Te cue tée duca<sup>n</sup> càhá<sup>n</sup>-á<sup>n</sup> càchí-güedé sá Yá Ndiöxi ní tendaha ñàha-gá xii-güedé xíca cùu-güedé càhá<sup>n</sup>-güedé tnúhu-gá te ío cùnuu-güedé, dico ñá ndàá sá càhá<sup>n</sup>-güedé tnúhu-gá. Te yúhú cùtnuní iní-í sá cuè tée-á<sup>n</sup> ñá túú cùnuu-güedé dàtná cùnùu yúhú. <sup>6</sup>Te cuèi ñá túú càhá<sup>n</sup>-í dàtná càhá<sup>n</sup> cue tée ío váha sàá díquí-xi dico ío váha cùtnuní iní-í cuendá nchaa sá dácuaa-í, te yúhú sa quide-í nàcuáa cùtnuní iní-ndó sá ìo váha cùtnuní iní-í nàcuáa ndùu nchaa tnúhu càhá<sup>n</sup>-í.

<sup>7</sup>Te cudana te sàni iní-ndó sá yúhú ñá túú ní quide váha-í sá nì quide-í mèe-í dàtná ì<sup>n</sup> tée ío ndàhú iní-xi, chi ñá túú ní xíca<sup>n</sup>-í yáhu-í núú-ndó cuendá sá nì càhá<sup>n</sup>-í tnúhu Yá Ndiöxi tnúhu sá càhá<sup>n</sup> nàcuáa naníhí tàhú-ó núú-ndó. <sup>8</sup>Te ní quehe<sup>n</sup>-í díhú<sup>n</sup> nì taxi dava-gá cue ñáyiú ndècu ichi Xítohó Jesucristú, te díhú<sup>n</sup>-á<sup>n</sup> nì dándónùhu-í ní saa<sup>n</sup>-í nchaa sá nì xini ñùhu-í cùtnàhá ní càhá<sup>n</sup>-í tnúhu Xítohó Jesucristú núú-ndó. <sup>9</sup>Te cùtnàhá ní xíndecu ndihi ñàha-í xii-ndo te áma ní xóo cumání sá xíní ñùhu-í, te ñá túú nà ní xíca<sup>n</sup>-í núú ni ì<sup>n</sup>-ndo. Chi cue ñáyiú xíndecu ichi Xítohó Jesucristú ndécú distritú Macèdoniá ní quixí-yu ní taxi-yu sá cùmàní xii-í, te ñá túú tnahí ní dásatú iní ñáhà-í xii-ndo càcá<sup>n</sup>-í núú-ndó núu ná cúú sá xíní ñùhu-í, te diu-ni duca<sup>n</sup> càda-í. <sup>10</sup>Te diu-ni duha càhá<sup>n</sup> váha-í cuendá-í te ni ì<sup>n</sup> cue ñáyiú distritú Acáyá vá nihí-yu tnúhu cùñàhá-yu xii-í cuendá cadí-yu yuhu-í. Te mee Xítohó Jesucristú nàhá-gá sá ndàá càhá<sup>n</sup>-í dàtná càhá<sup>n</sup> ndàá mée-gá. <sup>11</sup>Te cudana te sàni iní-ndó sá sá dúhá càhá<sup>n</sup>-í te ñá túú cùu iní ñáhà-í xii-ndo, dico ñáhá chi mee Yá Ndiöxi nàhá-gá sá yúhú ío cùu iní ñáhà-í xii-ndo.

<sup>12</sup>Te nàcuáa-ni ta quide-í véxi te diu-ni duca<sup>n</sup> càda-í cuendá sá cuè tée

cuini cada ninu mee-xi cachi sá ñ<sup>n</sup>-ni cuu ndihi ñaha-güedé xii-í vâ ñihí-güedé tnúhu cáhá<sup>n</sup>-güedé cachí-güedé sá ñ<sup>n</sup>-ni chiu<sup>n</sup> quide ndihi ñaha-güedé xii-í. <sup>13</sup>Te cue téé-á<sup>n</sup> cachi-güedé sá Yá Ndiöxí ní tendaha ñaha-gá xii-güedé xicá cùu-güedé càhá<sup>n</sup>-güedé tnúhu-gá dico ñá ndáá, chi mee-ni dandahú-güedé ñáyiú ndihi tnúhu càhá<sup>n</sup>-güedé, te quide-güedé dàtná quidé cuè téé càhá<sup>n</sup> tnúhu Xítohó Jesucristú dico ñá ndáá sá cúu-güedé cue téé càhá<sup>n</sup> tnúhu-gá. <sup>14</sup>Te vâ cúnñhu-o sá dúcá<sup>n</sup> quide cue téé-á<sup>n</sup>, chi mee sàcufhná quidé-xí sá cúu-xí dàtná ñ<sup>n</sup> espíritu xínú cuèchi núú ño váha càa ndecu Yá Ndiöxí dico ñá ndáá sá xínú cuèchi-xi xíá<sup>n</sup>. <sup>15</sup>Te xíá<sup>n</sup> vâ cúnñhu-o sá cuè téé xínu cuechi núu-xi quide-güedé sá cúu-güedé cue téé quide váha chi ñá ndáá sá quidé váha-güedé chi dandahú-güedé ñáyiú. Te nàcuáa ndùu nchaa sá quidé-güedé te duca<sup>n</sup> nàcháhu-güedé núú Yá Ndiöxí.

**Té Páblú ío ndòho-dé cuèndá  
sá cúu-dé téé càhá<sup>n</sup>  
tnúhu Xítohó Jesucristú**

<sup>16</sup>Te yúhú càhá<sup>n</sup> tucu-í dóho-ndo sá vâ cání ñí-ndó sá yúhú cúu-í ñ<sup>n</sup> téé càhá<sup>n</sup> lúcú càhá<sup>n</sup> duha, te núu dava-ndo òuca<sup>n</sup> sani ñí-ndó dico chí cáda ndèe ñí cundedóho-ndo tnúhu na càhá<sup>n</sup>-í cuèndá duca<sup>n</sup> tnàhá-í cada ninu-í mée-í. <sup>17</sup>Te vitna na càhá<sup>n</sup>-í dàtná càhá<sup>n</sup> ñ<sup>n</sup> téé ñá túú cùnñuní ñí-xi, chi tnúhu cáhá<sup>n</sup>-í ñá túú ñ<sup>n</sup>-ni cuu-xi ndihi tnúhu Xítohó Jesucristú, chi vitna cáhá<sup>n</sup>-í nàcuáa cada ninu-í mée-í. <sup>18</sup>Te ío cuéhé ñáyiú quide ninu mee-xi cuèndá nchaa sá ío ñuyíú-a te xíá<sup>n</sup> núu tnàhá-í cuini-í cada ninu-í mée-í. <sup>19</sup>Chi cùnñuní sá nchòhó quidé ndèe ñí-ndó sàcúndedóho-ndo nchàa tnúhu càhá<sup>n</sup> cue téé càhá<sup>n</sup> lúcú càhá<sup>n</sup> duha, te duca<sup>n</sup> quide ndee ñí-ndó sàcúndedóho-ndo tnúhu càhá<sup>n</sup>-güedé chi cachi-ndó sá ño túha-ndo. <sup>20</sup>Te nchòhó, quide ndee ñí-ndó tní-ndo

nchaa tnúhu càhá<sup>n</sup> cue téé quide yica ñaha xii-ndo sá cúnú cuèchi-ndo núu-güedé, te xicá<sup>n</sup>-güedé nándi sá xicá<sup>n</sup>-güedé núu-ndó, te tàxi tnuní ñáhá-güedé xii-ndo, te quide-güedé sá ño cùnñu-güedé ndécú ndihi ñaha-güedé xii-ndo, te càniha-güedé xii-ndo, te cuéi nchaa xíá<sup>n</sup> quidé ñaha-güedé xii-ndo dico quide ndee-ñí ñí-ndó. <sup>21</sup>Te nchòhó cachi-ndó sá cúu-ñí cue téé ñá túú ní cùyí cada nándi sá cáda, te ndáá chi ñá túú ñ<sup>n</sup>-ni cuu-ñí ndihi cue téé duca<sup>n</sup> xíquide.

Dico núu cue téé-á<sup>n</sup> cùyí-güedé quidé ñínu-güedé mée-güedé, te tnàhá-í cùyí-í duca<sup>n</sup> càda-í. Te sá dúhá càhá<sup>n</sup>-í te càhá<sup>n</sup>-í dàtná ñ<sup>n</sup> téé ñá túú cùnñuní ñí-xi. <sup>22</sup>Te núu quide cahnu-güedé mée-güedé cuèndá sá càhá<sup>n</sup>-güedé tnúhu hèbreú, te yúhú tucu ñíu-ñí téé càhá<sup>n</sup> tnúhu hèbreú cúu-í, àdi quide cahnu-güedé mée-güedé cuèndá sá cúu-güedé cue téé israhél, te yúhú tucu tnàhá-í cúu-í téé israhél, àdi quide cahnu-güedé mée-güedé cuèndá sá cúu-güedé ñaní tnàhá ndíi Àbrahám, te tnàhá yúhú cúu-í ñaní tnàhá ndíi Àbrahám tucu. <sup>23</sup>Àdi quide cahnu-güedé mée-güedé cuèndá sá sání ñí-güedé sá dñú núú Xítohó Jesucristú xínú cuèchi-güedé, dico yúhú ío-gá xínú cuèchi ndisa-í núu-gá. Te sá dúhá quide cahnu-í mée-í te càhá<sup>n</sup>-í dàtná ñ<sup>n</sup> téé ñá túú cùnñuní ñí-xi, te yúhú cúu-í ñ<sup>n</sup> téé ío-gá quidé chiú<sup>n</sup>-gá dàcúxí cuè téé-á<sup>n</sup>, te vâi xito ní cuu càniha ñáyiú xii-í, te vâi xito ní cuu chíhi ñahá-yu vecaá xii-í, te vâi xito ní cuu càcu càcu cahni ñaha ñáyiú xii-í. <sup>24</sup>Te cue ñáyiú israhél ní canihá-yu xii-í úhú<sup>n</sup> xito, te ndí tnahá ñ<sup>n</sup> ñ<sup>n</sup> xito ní canihá-yu ní dáquèe-yu ócú sáhú<sup>n</sup> cúmí ñíi sàtà-í. <sup>25</sup>Te úní xito ní caniha tucu ñáyiú xii-í ndihi carrutí, te ñ<sup>n</sup> xito ní sáha yúú ñahá-yu xii-í, te ní cuu úní xito quèe naa bàrcú xití ndute òré sácúhu<sup>n</sup>-í, te ñ<sup>n</sup> xito ío ní ndòho-í

ní xíndecu-í ìí<sup>n</sup> nduu ìí<sup>n</sup> niú núú ndute làmár. <sup>26</sup>Te ío títní xichi ní cuu xica cuu-í, te dava xichi ní cácu cuido ñaha ndute ñuhu xii-í, te dava xichi ní cácu duhu ñàdúhú nchaa ndachü<sup>n</sup>-í, te dava xichi ní cácu cada ñaha cuè ñáyü cùu ndi mee-í ìí<sup>n</sup> sá cádá ñàhá-yu xii-í, te ñu-ni duca<sup>n</sup> ní cácu cada ñaha tùcu cue ñáyü ñá túú cùu ndi mee-í ìí<sup>n</sup> sá cádá ñàhá-yu xii-í ní cùu, te cuèi xití ñúú te cuèi xití yucu cácu cácu cada ñaha ñáyü xii-í ìí<sup>n</sup> sá cádá ñàhá-yu, te ñu-ni duca<sup>n</sup> cácu cácu quini-í tnúndòho oré ñúhú-í bàrcú cuáhá<sup>n</sup> núú ndute làmár. Te cue ñáyü càchí sá ndécú ìchi Xítoho Jesucristú te ñá ndáá cácu cácu cada ñàhá-yu xii-í ìí<sup>n</sup> sá cádá ñàhá-yu. <sup>27</sup>Te ío ndòho-í cuendá chiú<sup>n</sup> quide-í chi ío xàú-í, te ní cuu vai xito ñá túú xidí-í, te títní xito ní cuu xihí víhí-í docó, te títní xito ní cuu yìchí-í ndute, te títní xito ní cuu ñá túú tnàhí ná xéxi-í cuendá chiú<sup>n</sup> quide-í, te títní xito ní cuu ndòho-í sá vxi<sup>n</sup>, te títní xito ní cuu ñá túú nihí-í dóó cuihnu-í.

<sup>28</sup>Te ñá díú-ní xǎ<sup>n</sup> chi ìí<sup>n</sup> nduu ìí<sup>n</sup> nduu ío sàni iní-í cuendá nchaa ñáyü ndècu ìchi Xítoho Jesucristú xíndecu nchaa xichi. <sup>29</sup>Te ndèda-ni càa ñáyü ñá túú nihí ndéé cùndecu ìchi Xítoho Jesucristú, te ío cùndahú iní-í chi sànuu sá tnàhá-í ñá túú nihí ndéé-í cundecu-í ìchi-gá sá dúcá<sup>n</sup> quidé-yu. Te núú ìí<sup>n</sup> ñáyü quidé-yu sá ìí<sup>n</sup> nchóho ñáyü ndècu ìchi Xítoho Jesucristú quidé-ndó ìí<sup>n</sup> sá ñá túú tàù-ndó càda-ndo te vá cúú vǎha iní-í chi cudè<sup>n</sup>-í. <sup>30</sup>Te núú xini ñuhu-xi sá cádá càhnu-í mèè-í, te cuu duca<sup>n</sup> càda-í te càhá<sup>n</sup>-í mee-ni cuendá nchaa sá quidé nàcuáa ñá túú nihí ndéé yiqui cuñú-í. <sup>31</sup>Te Dútú Ndiöxí Yaá cúú Tǎtǎ Xítoho Jesucristú nǎhá-gǎ sá yúhú càhá<sup>n</sup> ndáá-í núú-ndó, te ñu-ni gá tàú-gá cachí-ó sǎ ìo càhnu cuu-gá ni caa ni quǎhí<sup>n</sup>. <sup>32</sup>Te cútnàhá ní xíndecu-í ñúú Dàmascú te tée cùu gobiernú tée cùndihi

tée yìndaha ñáyü nàni Aretás ní taxi ndecu-dé cue tée ní xíndedí yuyèhe sá ñúhú dòco ñúú cuendá òré quee-í te tñii ñaha-güedé xii-í ní cùu. <sup>33</sup>Dico yúhú ní queé-í ìí<sup>n</sup> xití tídihi, te cue ñáyü cùndihi ñaha xii-í ní queñuhu ñàhá-yu ndáa ventaná nchii yiqui naha sá ñúhú dòco ñúú-á<sup>n</sup>, te duca<sup>n</sup> te ní cácu-í ñá túú ní ndàcu-güedé tñii ñaha-güedé xii-í.

**Té Pǎblú càhá<sup>n</sup>-dé sá ìo vii  
càa sá ní dánèhé núú ñàhá  
Xítoho Jesucristú xii-dé**

**12** Te ñá túú ndèé nándihí-xi sá càhá<sup>n</sup> váha-o cuendá méé-ó, dico vitna xini ñuhu-xi duca<sup>n</sup> cada-í chi càhá<sup>n</sup>-í nàcuáa ní quide ñaha Xítoho Jesucristú xii-í, chi ní quide-gá sá ní cutnùni iní-í nàcuáa ndùu tnúhu-gá, te vai núú sǎ ní dánèhé núú ñàhá-gǎ xii-í. <sup>2</sup>Te yúhú xini-í ìí<sup>n</sup> tée sàndáá iní ñàhá xii Xítoho Jesucristú, te sa ní cuu úxícúmí cuíá sǎ tée-á<sup>n</sup> ní sáá-dé ndéé andiu cùu uní, te ñá túú xini-í te núú ndihí yiqui cùñú-dé ní sáá-dé àdi ñàhá, chi ìí<sup>n</sup>dií dí-ni Yá Ndiöxí nǎhá-gǎ te núú nása càa-dé ní sáá-dé. <sup>3</sup>Te yúhú càhá<sup>n</sup> ndáá-í cuendá tée-á<sup>n</sup>, dico dàtná ní cachí-í sá ñá túú xini-í te núú ndihí yiqui cùñú-dé ní sáá-dé andiu àdi ñàhá, chi mee Yǎ Ndiöxí nǎhá-gǎ te núú nása càa-dé ní sáá-dé. <sup>4</sup>Te tée-á<sup>n</sup> ní sáá-dé ìí<sup>n</sup> xichi núú ìo váha càa andiu, te yàcá<sup>n</sup> ní xíndedóho-dé tnúhu mee-ni sǎ cúú-xí cuendá méé-dé, te tnúhu-á<sup>n</sup> vǎ cúú tnàhí càhá<sup>n</sup>-dé núú ni ìí<sup>n</sup> ñáyü. <sup>5</sup>Te yúhú quidé ñnu-í tée-á<sup>n</sup>, dico mee-í ñá túú càhá<sup>n</sup> váha-í cuendá-í cuendá cada nínu-í mèè-í, chi càhá<sup>n</sup>-ni mee-ni cuendá nchaa sá quidé nàcuáa ñá túú nihí ndéé yiqui cuñú-í. <sup>6</sup>Te núú dícó yúhú cuini-í te cuu càhá<sup>n</sup> váha-í cuendá-í cuendá cada nínu-í mèè-í, te núú duca<sup>n</sup> na càhá<sup>n</sup>-í te ñá túú cùu-xi ìí<sup>n</sup> tnúhu neñúú càhá<sup>n</sup>-í, chi cùu-xi ìí<sup>n</sup> sá càhá<sup>n</sup> ndáá-í te núú na càhá<sup>n</sup>-í. Dico vá

dúcá<sup>n</sup> càda-í chi cuiní-í sá nchòhó cada cuendá-ndó nàcuáa ndùu tnúhu càhá<sup>n</sup>-í ndìhi nàcuáa quide-í, te duca<sup>n</sup> mée-ndo càhá<sup>n</sup>-ndó te núu ná tée cùu-í, te ñá díú sá yúhú càhá<sup>n</sup> váha-í cuendá mée-í cuendá nchòhó cachí-ndó sá ïo cùnùu-í.

<sup>7</sup> Te sá ñí dánèhé núú ñáhá Xítóhó Jesucristú xii-í cúu-xí sá xidó ío váha, te cuendá sá vǎ cáda càhnu-í mée-í núu xíǎ<sup>n</sup> Xítóhó Jesucristú ní quide-gá duha ndòho yiqui cuñú-í vitna. Te sá dúcá<sup>n</sup> quide ñaha-gá xii-í te xíǎ<sup>n</sup> sácufhná ñí ñíhí-xi ichi càhnu dandoho ñaha-xi xii-í. <sup>8</sup> Te ní cuu úní xito càhá<sup>n</sup> ndàhú-í núú Xítóhó Jesucristú sá ná cáda-gǎ nàcuáa vǎ ndóhó-gǎ yiqui cùnú-í. <sup>9</sup> Dico mee-gǎ càchí-gá xii-í: “Yúhú ío cùndahú iní ñáhà-í xii-n chindee ñaha-í, te ñá túú nǎ cúmǎní xii-n, te cùnùní sá ïo-gǎ chíndèe-í cue ñáyíu ñá túú ñíhí ndéé cùndecu”, duha ní cachí-gá xii-í. Te xíǎ<sup>n</sup> núu yúhú ío cùdǎhí iní-í sá ñá túú ñíhí ndéè-í ndécù-í, chi díu cuendá xíǎ<sup>n</sup> Xítóhó Jesucristú ñá túú dàña ñíhnu ñaha-gá xii-í chíndèe ñaha-gá. <sup>10</sup> Te xíǎ<sup>n</sup> núu cùdǎhí iní-í sá dúhá ñá túú ñíhí ndéè-í ndécù-í, te cùdǎhí tucu iní-í cuendá nchaa tnúhu cuèhé tnúhu duha càhá<sup>n</sup> ñáyíu cuendá-í, te cùdǎhí iní-í cuendá nchaa sá ndòhò-í, te cùdǎhí tucu iní-í cuendá sá quídé ñaha ñáyíu xii-í, te cùdǎhí tucu iní-í cuendá nchaa dava-gá sá ndòhò-í cuendá Xítóhó Jesucristú. Te òré ñá túú ñíhí ndéè-í te Xítóhó Jesucristú chíndèe ñaha-gá xii-í ñíhí ndéè-í.

**Té Pǎblú ío sàni iní-dé cuendá cue ñáyíu xíndecu ichi Xítóhó Jesucristú ndécú ñúú Còrintú**

<sup>11</sup> Te cùu-í dàtná ñí<sup>n</sup> téé ñá túú cùnùní iní-xi sá dúhá càhá<sup>n</sup> váha-í cuendá-í, te duca<sup>n</sup> quide-í chi mee-ndo quide-ndo sá dúcá<sup>n</sup> càhá<sup>n</sup>-í, dico mee-ndo tàu-ndó càhá<sup>n</sup> váha-ndo cuendá-í ní cùu. Te dava cue téé ío quide cahnu-güedé mée-güedé, te càchí-güedé sá Xítóhó Je-

sucristú ní táuchíú<sup>n</sup>-gǎ sá càhá<sup>n</sup>-güedé tnúhu-gǎ, dico yúhú cùnùu-gá-í dácúúxí cuè téé-á<sup>n</sup> cuèi ñá túú vèdana ná cùu-í ndécù-í ñuyíú-a. <sup>12</sup> Te cùnàhá ní xíndecu ndìhi ñaha-í xii-ndo ïo ní quide càhnu iní-í nándi sá ñí váha-í ní quide-í chiú<sup>n</sup> Xítóhó Jesucristú sá cúu-xí-ndó. Te ní chindee ñaha-gá xii-í ní quide-í tit-í ní núu sá vǎ yòo tnàhí ndàcu cada te ní cuñúhu-ndo, te sá dúcá<sup>n</sup> ní chindee ñaha-gá xii-í ní cutnùní iní-ndó sá yúhú cúu ndísa-í ñí<sup>n</sup> téé ní cachí Xítóhó Jesucristú sá càhá<sup>n</sup>-í tnúhu-gá. <sup>13</sup> Te yúhú ñí<sup>n</sup>-ni quide ndìhi ñaha-í xii-ndo ndìhi nchaa dava-gá cue ñáyíu ndècu ichi Xítóhó Jesucristú, te dicó-ni sá yúhú ñá túú ní cuiní-í taxi-ndo sá xíní ñúhu-í dàtná ní quide-í dava-gá-yu. Te núu ñá túú ní quide váha-í sá dúcá<sup>n</sup> ní quide-í ñá túú ní cuiní-í chindee ñaha-ndo te chí cáda càhnu iní ñáhá xii-í.

<sup>14</sup> Te vitna sa ndècu túha-í sá quíxí-í núú ndécú-ndó, te sá quíxí còto ñaha tucu-í xii-ndo cùu-xi xito cuu úní sá quíxí-í, te cuiní-í sá vǎ dándíhú-ndó iní-ndó ndùcu-ndo sá táxí-ndó cùu xii-í, chí ñá díú xíǎ<sup>n</sup> ndéé iní-í chí mee-ndo ndéé iní-í quixi-í. Te duha càhá<sup>n</sup>-í chí nchòhó xíní-ndó sá cuè téé cùu tátá sǎñaha-güedé sá cúu-xí cuè déhe-güedé te ñá díú cuè déhe-güedé sǎñaha-güedé sá cúu-xí mée-güedé. <sup>15</sup> Te yúhú ío váha cùu iní-í dandòñuhu-í sá ndécú ndìhi-í nàcuáa ndacu-í chindee ñaha-í xii-ndo cùndecu váha-ndo sá cúu-xí Yǎ Ndiòxí chí ío cùdǎhí iní-í, te cuèi na cùu-í sá cuendá-ndó, chí ío cùu iní ñáhà-í xii-ndo, te sá dúcá<sup>n</sup> cùu iní ñáhà-í xii-ndo, te sànuu sá nchòhó ñá túú cùu iní ñáhá càvìhi-ndo xii-í.

<sup>16</sup> Te ñaha-ndo sá ñá túú ní dándíhú-í iní-ndó nǎ taxi-ndo cùu xii-í, dico dava-ndo càchí-ndó sá ïo váha ní xito-í nàcuáa ní quide-í nàcuáa ní dándàhú ñáhà-í xii-ndo. <sup>17</sup> Te chí càhá<sup>n</sup> te núu yúhú ní dándàhú ñáhà-í xii-ndo ndìhi

cue tée ní tendaha-ĩ ní quixi coto ñaha xii-ndo. <sup>18</sup>Te ní cáhá<sup>n</sup> ndàhú-í núú tẽ Títú ndihi núú ìngá tucu tée ndècu ndihi-o ichi Xítóhó Jesucristú ní quixi coto ñaha-güedẽ xii-ndo. Te nchòhó cùtnùnì iní-ndó sã tẽ Títú ñã túú ní dándahú ñáhá-dẽ xii-ndo, te duca<sup>n</sup> chi ì<sup>n</sup>-ni sàni iní-ndí te ì<sup>n</sup>-ni quide-ndí.

<sup>19</sup>Te cudana te sàni iní-ndó sã sã dúhá càhá<sup>n</sup>-ndí te tàunihnu-ndí mée-ndí, dico ñã díú dùca<sup>n</sup> quee-xi tnúhu càhá<sup>n</sup>-ndí, chi càhá<sup>n</sup>-ndí nàcuáa tàù-xi càhá<sup>n</sup>-ndí chi ndècu ndihi-ndí Xítóhó Jesucristú, te mee Yã Ndiõxí nãhá ndáá-gã nàcuáa ndùu tnúhu càhá<sup>n</sup>-ndí, te nchaá sã càhá<sup>n</sup>-ndí cúú-xí cuendá nchòhó cue ñáyíu ío cùu iní-ndí, te càhá<sup>n</sup>-ndí nàcuáa cundecu váha-ndo ìchi Xítóhó Jesucristú. <sup>20</sup>Te ío sàni iní-í cuendá-ndó chi na cuáhá<sup>n</sup> te òrẽ quixi-í quixi coto ñaha-ĩ xii-ndo, te ñã túú quide-ndo nàcuáa cuu váha iní-í, te sã dúcá<sup>n</sup> te yúhú cáhá<sup>n</sup>-í nàcuáa vá cúú váha iní-ndó, te duca<sup>n</sup> ío sàni iní-í cuendá-ndó chi na cuáhá<sup>n</sup> òrẽ quexio-í te nã-ndó, àdi ndecu-ndo ichi cuédú íní, àdi cudéé<sup>n</sup> núú tnáhá-ndó, àdi ñã túú cùu ì<sup>n</sup>nuu-ndo ndecu-ndo, àdi cáhá<sup>n</sup> cuèhé-ndó cuendá tnàha ñáyíu-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide òdusa<sup>n</sup> dóho tnàha-ndo. <sup>21</sup>Te ío sàni iní-í cuendá-ndó chi na cuáhá<sup>n</sup> òrẽ quixi-í, te Yã Ndiõxí cada-gã te cucaha<sup>n</sup> núú-í sã cuendá-ndó, te ío ndíhú iní-í cuendá-ndó te núu vátá dáñá-gã-ndó nchàa sã cuèhé sã dúhá ní ngúíta-ndo quide-ndo ndéé sanduu, te vài-ndo ní ngúíta-ndo dùca<sup>n</sup> quide-ndo, chi ndècu-ndo ichi díí iní te nándi-gã nchaá sã cuèhé sã dúhá quide-ndo, te duca<sup>n</sup> ío ndíhú iní-í te núu vátá dáñá-gã-ndó nchàa xiã<sup>n</sup>.

### Tnúhu ndéé núú ní ndihi-ná

**13** Te sã quíxi-í vitna núú ndécú-ndó cùu-xi xito cuu únì sã quíxi

còto ñaha-í xii-ndo. Te càchí tnúhu-í xii-ndo sã òrẽ cundáá cuéchi-ndo te canehe núú úú àdi únì ñáyíu cáhá<sup>n</sup> ndáá nàcuáa ndùu cuéchi-ndo. <sup>2</sup>Te yúhú sa ní cáhá<sup>n</sup>-í dóho-ndo cùtnàhá ní quixi-í ní quixi coto ñaha-ĩ xii-ndo xito cuu úú, te òdi-ni duca<sup>n</sup> càhá<sup>n</sup> tucu-í dóho-ndo vitna vátá quíxi tucu-gá-í quixi coto ñaha-í xii-ndo. Te nchòhó ñáyíu ní cunduu ní ngúíta quide nchaá sã cuèhé sã dúhá, tenàá ñáhá-í xii-ndo òrẽ quexio-í te núu vátá dáñá-gã-ndó nchàa sã cuèhé sã dúhá quide-ndo te tnàhá nchaá dava-gã-ndó tènàá ñáhá-í xii-ndo. <sup>3</sup>Te nchòhó cuínì-ndó quínì-ndó núu ndáá sã quidè-í núú Xítóhó Jesucristú càhá<sup>n</sup>-í yuhu-gã, dico dàvá-á<sup>n</sup> cutnùnì ndáá iní-ndó. Te Xítóhó Jesucristú quidè-gã nàcuáa cutnùnì iní-ndó sã ío càhnu cuu-gã te ñã túú quide-gã dàtná quidè ì<sup>n</sup> ñáyíu ñã túú nìhí ndéé cùndecu. <sup>4</sup>Te Xítóhó Jesucristú ní ndoho-gã dàtná ì<sup>n</sup> ñáyíu ñã túú nìhí ndéé cùndecu, chi ní sahni ñaha-güedẽ xii-gã núú cùrúxí dico mee Yã Ndiõxí ní quide-gã ní nìhí ndéé Xítóhó Jesucristú ní ndoto-gã ndécú-gã vitna, te tnàhá nchúhú tucu duca<sup>n</sup> yàha-ndí ñã túú nìhí ndéé-ndí cundecu-ndí, dico mee Yã Ndiõxí chindèe ñaha-gã xii-ndí nìhí ndéé-ndí ndécú-ndí cuendá sã ndécú ndihi-ndí Xítóhó Jesucristú, te xiã<sup>n</sup> núu ndàcu-ndí quidè-ndí nàcuáa tàù-xi cunduu sã cúú-xí-ndó.

<sup>5</sup>Te chí cádá cuendá váha te núu ndisa sã sàndáá iní-ndó tnúhu Xítóhó Jesucristú, te núu ndáá sã ndécú-ndó ìchi-gã te cùtnùnì iní-ndó sã ndécú-ndó ndihi-gã. <sup>6</sup>Te cuínì-ndí sã nchòhó cutnùnì ndáá iní-ndó sã nchúhú ndécú ndihi ndisa-ndí Xítóhó Jesucristú. <sup>7</sup>Te nchúhú càhá<sup>n</sup> ndihi-ndí Yã Ndiõxí cuendá-ndó cuendá sã vã cádá-ndó nì ì<sup>n</sup> sã cuèhé sã dúhá, te vá cánì iní-ndó sã sã dúcá<sup>n</sup> càhá<sup>n</sup> ndihi-ndí-gã cuendá-ndó, te cuínì-ndí sã nchòhó

cutnùní iní-ndó sǎ nchùhú ío ndècu yĩñuhu-ndí núú-gǎ, te ñáhá chi càhá<sup>n</sup> ndìhi-ndí-gá cuendá-ndó chi cuìní-ndí sá nchòhó cada váha-ndo cùndecu-ndo cueí sàni iní-ndó sǎ nchùhú cúú-ndí cue tée ñá túú ndècu yĩñuhu núú-gǎ. <sup>8</sup>Te nchùhú mee-ni càhá<sup>n</sup> váha-ndí cuendá tnúhu ndáá tnúhu Yá Ndiòxí, te ñá túú càhá<sup>n</sup>-ndí ìí<sup>n</sup> tnúhu sá ñà túú tàú-xi càhá<sup>n</sup>-ndí cuendá tnúhu-á<sup>n</sup>. <sup>9</sup>Te cùdífí iní-ndí sá ñà túú-gǎ xíní ñùhu-xi cada-ndí nàcuáa ñhí ndéé-ndí tenàá ñáhá-ndí xii-ndo càhá<sup>n</sup>-ndí dóho-ndo, chi nchòhó sa ní ñhí ndéé-ndó ndècu-ndo ichi-gá. Te nchùhú càhá<sup>n</sup> ndìhi-ndí Yá Ndiòxí cuendá-ndó cuendá sá nchòhó cundáá-ndó cùndecu-ndo ñá túú-gǎ ná cumání-ndó nùú-gǎ. <sup>10</sup>Te xíá<sup>n</sup> nùu duha ndùu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndìhi ñaha-í xii-ndo, cuendá sá òré ná cùndecu ndìhi ñaha-í xii-ndo te vá ìo ñhí càhá<sup>n</sup>-í dóho-ndo nàcuáa ndùu tnúhu ndee ìní ní taxi Xítohó Jesucristú ndécú ndìhi-í, chi ní taxi-gá tnúhu ndee ìní xii-í nàcuáa canu ichi

ñaha-í xii-ndo cuíta cuehnu nihnu-ndo ichi-gá quíhí<sup>n</sup>, te ñá díú cuendá sá cánúichi ñaha-í xii-ndo cuíta nihnu-ndo.

<sup>11</sup>Te vitna nchaa nchòhó ñáyiú ndècu ndìhi-ndí ichi Xítohó Jesucristú ío quide ndee iní ñáhá-ndí xii-ndo, te ío chí ndúcú nàcuáa cada-ndo cundáá-ndó nùú Yá Ndiòxí cuendá sá ñà túú tnàhí-gá ná cumání-ndó nùú-gǎ, te ndee ndèe cada iní-ndó cùndecu-ndo, te chí cúú ìí<sup>n</sup>nuu cundecu ndìhi tnaha, te duca<sup>n</sup> te Yá Ndiòxí cundecu ndìhi ñaha-gǎ xii-ndo chi ío cùu iní ñáhá-gǎ xii-o, te diu-gá quidé-gǎ ío váha cùu iní-ó ndècu-o. <sup>12</sup>Te ndìhi tnúhu yĩñùhu chí cádá ndèe iní tnáhá. <sup>13</sup>Te nchaa ñáyiú cùu cuendá Yá Ndiòxí ndécú ìha quide ndee iní ñáhá-yu xii-ndo.

<sup>14</sup>Te xìcá<sup>n</sup> táhú-ndí núú Xítohó Jesucristú sá ìo na chindee chitúu ñaha-gǎ xii-ndo. Te mee Yá Ndiòxí ná cádá-gǎ nàcuáa cutnùní iní-ndó sǎ ìo cùu iní ñáhá-gǎ xii-ndo, te Espíritú-gá cundee cùu cahnu iní-ndó cùndecu-ndo. Te duca<sup>n</sup> na cùnduu. Te ío chí cádá ndèe iní-nǎ vitna.

## TUTÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU DISTRITÚ GÀLACIÁ

Té Päblú cádüha-dé tutú  
quihí<sup>n</sup> ndaha nchaa ñáyi  
sàndáá iní ñáhá xii Xítohá

Jesucristú ndécú distritú Gàlaciá

**1** Te yúhú té Päblú ní tendaha ñaha Xítohá Jesucristú, ndihi Dútú Ndiöxí véxi-í càhá<sup>n</sup>-í tnúhu-gá. Te diu Yá Ndiöxí ní dándótó-gá Xítohá Jesucristú Yaa ní xíhí ní cùu. Te càchí tnúhu-í xii-ndo sã ñà díú ñáyi ñuyíú-a ni tendaha ñaha xii-í véxi-í, te ni Yá Ndiöxí te ni Xítohá Jesucristú ñà túú ní xãha<sup>n</sup>-gã xii ñáyi quixí-yu cachí tnúhu-yu nàcuáa cada-í. <sup>2</sup>Te yúhú té Päblú cádüha-í tutú-a ndihi nchaa dava-gá ñáyi ndècu ichi Yá Ndiöxí ndécú ndihi-í iha cuèndá daquixi-í ndaha nchòhó ñáyi sàndáá iní ñáhá xii Xítohá Jesucristú ndécú distritú Gàlaciá. <sup>3</sup>Te xicá<sup>n</sup> tãhù-í núú Dútú Ndiöxí, ndihi núú Xítohá Jesucristú sã ïo na chindee chítúu ñaha-gá xii-ndo, te duca<sup>n</sup> ndè nduú-gá ná cádá te ïo váha cuu iní-ndó cùndecu-ndo. <sup>4</sup>Te Xítohá Jesucristú ní xíhí-gá sã cuèndá nchaa cuèchi nchoo cuè ñáyi ndècu ñuyíú-a. Te duca<sup>n</sup> ñí quide-gá, chi cuiní-gá sã vã cùndecu-o ichi cuehé ichi duha. Te duca<sup>n</sup> ñí cuu, chi Dútú Ndiöxí duca<sup>n</sup> ñí cuiní-gá cunduu. <sup>5</sup>Te ïo chí ná ndácá<sup>n</sup> tãhú-ó núú Yá Ndiöxí cuèndá sã ïo càhnu cuu-gá, te diu-ni duca<sup>n</sup> càda-o ni caa ni quihí<sup>n</sup>! Te duca<sup>n</sup> na cùnduu.

**Mee-ni tnúhu Xítohá  
Jesucristú cúú-xí tnúhu sã  
cãhá<sup>n</sup> nàcuáa naníhí tãhú-ó**

<sup>6</sup>Te ïo cùnúhu-í cúú chi ïo ndihi ní dáñá-ndó ichi Yá Ndiöxí. Te Yaa-á<sup>n</sup> ñí càhá<sup>n</sup> ñáhá-gã xii-ndo, chi Xítohá Jesucristú ïo ní cundàhú iní ñáhá-gã ní quide

váha ñaha-gã xii-ndo, te vitna dàcuaha tucu-ndo ingá tnúhu, te càchí-ndó sã xã<sup>n</sup> dàcácu nihnu ñaha-xi xii-ndo núú ùhú núú ndàhú. <sup>7</sup>Dico ñáhá, chi ñà túú-gã tnúhu sã dácácu nihnu ñaha xii-o núú ùhú núú ndàhú. Te dicó-ni sã ïo ñáyi véxi daticá nuu ñáhá-yu xii-ndo dànehé ñáhá-yu tnúhu sã dácúita nihnu ñaha xii-ndo, chi tnúhu-á<sup>n</sup> ñà túú cùu-xi tnúhu Xítohá Jesucristú. <sup>8</sup>Te yúhú càhá<sup>n</sup>-í tnúhu Xítohá Jesucristú, dico núú ïo ñáyi véxi dànehé ñáhá xii-ndo ingá tnúhu sã ñà túú ní dànehé ñáhá-í xii-ndo, te nchòhó cachí-ndó sã ñáyi-á<sup>n</sup> nacháhu-yu núú Yá Ndiöxí sã dúcá<sup>n</sup> quidé-yu. Te cuèi yúhú, te núu na dàma-í tnúhu danèhé ñáhá-í xii-ndo, te diu-ni duca<sup>n</sup> càhá<sup>n</sup>-ndó sã náchãhu-í núú-gã te núu duca<sup>n</sup> na càda-í. Àdi te núu ñí espíritú xínú cuèchi núú-gã véxi-xi càhá<sup>n</sup>-xi ingá tnúhu sã ñà túú ní dànehé ñáhá-í xii-ndo nàcuáa naníhí tãhú-ndó ñà, te diu-ni duca<sup>n</sup> càhá<sup>n</sup>-ndó sã náchãhu-xi núú Yá Ndiöxí te núu duca<sup>n</sup> na càda-xi. <sup>9</sup>Te diu-ni duha sa ní dánèhé ñáhá-í xii-ndo sã ñu véxi ñáyi dànehé ñáhá ingá tnúhu sã ñà túú ní dànehé ñáhá-í xii-ndo nàcuáa naníhí tãhú-ndó ñà, te cachí-ndó sã ñáyi-á<sup>n</sup> nacháhu-yu núú Yá Ndiöxí sã dúcá<sup>n</sup> quidé-yu, duha ní cachí-í xii-ndo.

<sup>10</sup>Te duha ndùu tnúhu càhá<sup>n</sup>-í chi nchòhó sa xíní-ndó sã yúhú cuiní-í sã Yá Ndiöxí càhá<sup>n</sup>-gã sã quidé vãha-í ndécù-í, te ñà díú sã ñáyi ñuyíú-a cachí-yu sã quidé vãha-í, àdi sã ïo cùdíí iní-yu nchaa nàcuáa quide-í ndécù-í. Te núu na càni iní-í cudù-í núú ñáyi ñuyíú-a, te ñà túú cùu-í tée xínu cuechi núú Xítohá Jesucristú te núu duca<sup>n</sup> na càda-í.

**Nàcuáa ní cuu ní nguíta té Päblú  
cãhá<sup>n</sup>-dé tnúhu Yá Ndiöxí**

<sup>11-12</sup>Te nchòhó ñáyi ndècu ndihi-í ichi Xítohá Jesucristú càchí tnúhu-í xii-ndo sã tnúhu sã dánèhé ñáhá-í



xii-ndo nàcuáa naníhí tǎhú-ndó cùu-xi tnúhu sá nǐ cachí tnúhu mee Xítohó Jesucristú xii-í, te nǎ díú ìí<sup>n</sup> nǎyiu ñuyíú-a ní càhu iní-yu tnúhu-á<sup>n</sup>, àdi danehé ñǎhǎ-yu xii-í, chi mee Xítohó Jesucristú ní dánèhé ñǎhǎ-gǎ.

<sup>13</sup> Te nchòhó sa nihí-ndó tnúhu nàcuáa ní xóo cada-í cútñàhá nchìcú<sup>n</sup> nihnu-í nchaa nàcuáa dàcuaha ñáyiu cùu ndi mee-í ñáyiu isràèl ní cùu. Te dàvǎ-á<sup>n</sup> ìo ní xóo cuu úhú iní-í nchaa ñáyiu ndècu ichi Yá Ndiòxí, te nándi sá nǐ xóo cada-í-yu, te ní cuiní-í danàa-í-yu ni cùu. <sup>14</sup> Te yúhú ío-gǎ ní xóo quene cáva-í ní xóo dacuàha-í nchaa sá dácuaàha ñáyiu cùu ndi mee-í dàcúxí ñáyiu ìí<sup>n</sup>-ni cuíà-í ndihí-yu ni cùu, te ío-gǎ ní xóo cuiní-í cada ndáá-í canchicú<sup>n</sup> nihnu-í nchaa nàcuáa ní dánèhé ñǎhǎ cuè ñaní tnáhà-í ní xíndecu ndéé sanaha ni cùu. <sup>15</sup> Te ndéé cútñàhá vátá cǎcú-gǎ-í Yǎ Ndiòxí sa nèhe váha ñaha-gǎ xii-í cuèndá sá càhá<sup>n</sup>-í tnúhu-gǎ, núu xǎ<sup>n</sup> ní càhá<sup>n</sup> ñǎhǎ-gǎ xii-í quidè-í chiu<sup>n</sup>-gǎ vitna, te sá dúcǎ<sup>n</sup> nǐ quide-gǎ te ío váha ní quide ñaha-gǎ xii-í. <sup>16</sup> Te òrè ní càhá<sup>n</sup> ñáhǎ Yǎ Ndiòxí xii-í te ní cachí tnúhu-gǎ cuèndá Dèhe-gǎ Xítohó Jesucristú. Te duca<sup>n</sup> nǐ quide Yá Ndiòxí cuèndá sá cuiní-gǎ sá cùñaha-í xii ñáyiu nǎ túú cùu ñáyiu isràèl cuèndá Yaá cúú Dèhe-gǎ. Te cútñàhá ní càhá<sup>n</sup> ñáhǎ Yǎ Ndiòxí xii-í, te vǎ yǒo ìí<sup>n</sup> díi núú-xi ni ndùcu tnúhu-í nàcuáa cada-í. <sup>17</sup> Te ní nǎ túú ní sǎhá<sup>n</sup>-í ñuú Jerusalén nducu tnúhu-í núu cuè tée díhna nuu nǐ tendaha Xítohó Jesucristú càhá<sup>n</sup> tnúhu-gǎ ñuú nása cada-í, chi ndíhi-ni ní sǎhá<sup>n</sup>-í distritú Àrabiá ní xíndecu tnaa-í te dàtnùní cuánuhú tucu-í ñuú Dàmascú.

<sup>18</sup> Te núú ùní cuíá sǎ nǐ càhá<sup>n</sup> ñáhǎ Yǎ Ndiòxí xii-í, te ní sǎhá<sup>n</sup> tucu-í ñuú Jerusalén ní càhá<sup>n</sup> ndíhi-í té Pèlú, te ní xíndecu-í ndíhi-dé sǎhú<sup>n</sup> nduu. <sup>19</sup> Te tnáhà té Jàcobó ñaní Xítohó Jesucristú ní càhá<sup>n</sup> ndíhi-í. Te nǎ túú ní xìní-í

dava-gǎ cue tée ní tendaha Xítohó Jesucristú càhá<sup>n</sup> tnúhu-gǎ. <sup>20</sup> Te Yá Ndiòxí ndéhé ndíi ndehe caxi-gǎ sá ncháá tnúhu tée-í núú tütú-a sá cúú-xí-ndó cùu-xi ìí<sup>n</sup> sá ndàá.

<sup>21</sup> Te sátá nǐ sǎhá<sup>n</sup>-í ñuú Jerusalén, te dàtnùní ní sǎhá<sup>n</sup>-í distritú Siríá, ndíhi distritú Ciliciá. <sup>22</sup> Te nchaa ñáyiu xíndecu ichi Xítohó Jesucristú ndécú distritú Jùdeá nǎ túú xini ñáhǎ-yu xii-í ní cùu. <sup>23</sup> Dico ní xóo nǐhi-yu tnúhu nchaa nàcuáa ní xóo cada-í, te ní cachí-yu: “Tée cùu úhú iní ñáhǎ xii nchaa nchoo ñáyiu ndècu ichi Xítohó Jesucristú càhá<sup>n</sup>-dé tnúhu-gǎ núu ñáyiu cuèndá quindáá iní ñáhǎ-yu xii-gǎ, te diu-dé nándi sá quidé ñaha-dé, te cuiní-dé danàa ñaha-dé cuèndá sá vǎ cóo-gǎ ñáyiu quindáá iní ñáhǎ xii-gǎ ní cùu”, duha ní cachí-yu cuèndá-í. <sup>24</sup> Te ní ngúfta-yu ní cachí-yu sá ìo càhnu cuu Yá Ndiòxí cuèndá sá nǎ túú-gǎ quidè-í dàtná ní xóo cada-í.

### **Té Pǎblú ní nihí tnáhà-dě ndíhi dava-gǎ cue tée càhá<sup>n</sup> tnúhu Yá Ndiòxí**

**2** Te ní nútñahǎ úxícúmí cuíá sǎ ní sǎhá<sup>n</sup>-í ñuú Jerusalén ní càhá<sup>n</sup> ndíhi-í té Pèlú, te dàtnùní ndécà-í té Bèè ní sǎhá<sup>n</sup>, te tnáhà té Títú ní sǎhá<sup>n</sup> ndíhi-ndí-dé. <sup>2</sup> Te ní sǎhá<sup>n</sup>-í chi mee Yǎ Ndiòxí ní cachí-gǎ sá quíhí<sup>n</sup>-í. Te yàcǎ<sup>n</sup> ní tacá mee-ni cuè tée cùnuu. Te ní xáha<sup>n</sup>-í xii-güedé nàcuáa ndùu tnúhu dànehé-í ñáyiu nǎ túú cùu ñáyiu isràèl cuèndá naníhí tǎhú-yu. Te duca<sup>n</sup> nǐ quide-í cuèndá cuiní-í quini-güedé nàcuáa ndùu chiu<sup>n</sup> quide-í, chi nacuáhǎ<sup>n</sup> cachí-güedé sá nǎ túú nàndíhi-xi. <sup>3</sup> Te té Títú tée ndècu ndíhi-í chi nǎ díú tée isràèl cúú-dě, dico nǎ túú ní quide yica-güedé cuáha-güedé sèñá ñii-dé. <sup>4</sup> Te ñáyiu càhí sá ndécú ichi Xítohó Jesucristú te nǎ ndáá sá ndécü-yu ichi-gǎ, ñáyiu-á<sup>n</sup> nǐ chitnahǎ ñáhǎ-yu xii-ndí cuèndá cuiní-yu quini-yu nása quide-ndí

ndécú-ndí ichi Xítohó Jesucristú. Te duca<sup>n</sup> ní quidé-yu cuendá sá nchúhú sa ní cácu nihnu-ndí ñá túú-gã quidé-ndí nchaa nàcuáa ní cáhá<sup>n</sup> ndí Moisés. Te cuíní-yu sá núcuíta saa tucu-ndí cada-ndí nchaa nàcuáa ní cáhá<sup>n</sup> ndí nucúndecu-ndí dàtná ní xíndecu-ndí cútnàhá vátá cácu nihnu-gá-ndí núu tnúhu-á<sup>n</sup> ni cùu. <sup>5</sup>Te nchúhú ñá túú tnàhí ni dàña-ndí méé-ndí dandàhú ñàhã-yu xii-ndí. Te duca<sup>n</sup> ní quide-ndí, chi cuíní-ndí sá ñà túú nãgã tnúhu dácánuu ndíhi tnúhu sá càhá<sup>n</sup> nàcuáa naníhí tàhú-ó ndècu ndíhi-ndo.

<sup>6</sup>Te ni ñ<sup>n</sup> tnúhu sá vátá quíní-gá-í ñá túú ní cãchí tnúhu cue tée cùnuu núu ñãyiu cada-í. Dico yúhú chi ñá túú ní quide cuendá-í núu cùnuu-güedé àdi ñá túú cùnuu-güedé, chi núu Yã Ndiöxí ñ<sup>n</sup>-ni cùu-o nchaa-o. <sup>7</sup>Te ní cutnùní iní-güedé sá Yã Ndiöxí ní cachí-gá xii-í sá càhá<sup>n</sup>-í tnúhu-gá núu ñãyiu ñá túú cùu ñãyiu isràèl dàtná ní quide-gá té Pèlú ní xáha<sup>n</sup>-gã càhá<sup>n</sup>-dé tnúhu-gá núu ñãyiu isràèl. <sup>8</sup>Te duca<sup>n</sup> ní cutnùní iní-güedé, chi diu-ni Yã Ndiöxí Yaá chíndèe ñaha xii té Pèlú càhá<sup>n</sup>-dé tnúhu-gá núu ñãyiu isràèl, diu-ni Yaá-á<sup>n</sup> chíndèe ñaha-gá xii-í càhá<sup>n</sup>-í tnúhu-gá núu ñãyiu ñá túú cùu ñãyiu isràèl.

<sup>9</sup>Te té Jàcobó, ndíhi té Pèlú, ndíhi té Juàá, cue tée ío cùnuu-gá ní cutnùní iní-güedé sá Yã Ndiöxí ío chíndee ñaha-gá xii-í quídè-í chiú<sup>n</sup>-gá. Te ío váha ní cáhá<sup>n</sup> ndíhi ñaha-güedè xii-í, ndíhi té Bèé, te ní cuu ñ<sup>n</sup>-nuu-ndí sá nchúhú quíhí<sup>n</sup>-ndí cáhá<sup>n</sup>-ndí tnúhu Yã Ndiöxí núu nchaa ñãyiu ñá túú cùu ñãyiu isràèl, te mee-güedè cáhá<sup>n</sup>-güedé tnúhu-gá núu ñãyiu isràèl. <sup>10</sup>Te ñ<sup>n</sup>-ni tnúhu ní cáhá<sup>n</sup>-güedé dóho-ndí te ní cachí-güedé xii-ndí sá chíndèe-ndí cue ñãyiu ndàhú, te sa duca<sup>n</sup> tnàhí sàni iní-ndí cada-ndí.

### Té Pàblú càhá<sup>n</sup>-dé dóho té Pèlú ñuú Antiòquia

<sup>11</sup>Te cútnàhá ní sáhá<sup>n</sup> té Pèlú ñuú Antiòquia yàcá<sup>n</sup> ní cáhá<sup>n</sup>-í dóho-dé, chi quide-dé ñ<sup>n</sup> sá ñà túú tàù-dé cada-dé ní cùu. <sup>12</sup>Te quide váha-dé ní cùu chi xèxi-dé ndíhi ñãyiu ñá túú cùu ñãyiu isràèl, dico òré ní sáá ñ<sup>n</sup> úú ñãyiu cùndíhi té Jàcobó, te òré-á<sup>n</sup> ñà túú-gá ní cuíní-dé caxi-dé ndíhi ñãyiu-á<sup>n</sup>. Te duca<sup>n</sup> ní quide-dé chi ní yúhú-dé cue ñãyiu nchícú<sup>n</sup> nihnu quide nchaa nàcuáa ní cáhá<sup>n</sup> ndí Moisés sá vã càhá<sup>n</sup> váha-yu cuendá-dé. <sup>13</sup>Te tnàhá dava-gá ñãyiu isràèl xíndecu ichi Yã Ndiöxí ñá túú quide váha-yu, chi quidé-yu dàtná quidé té Pèlú ní cùu, te ndéé tnàhá té Bèé ní ngüíta-dé duca<sup>n</sup> quide-dé ní cùu. <sup>14</sup>Te òré ní xini-í sá ñà túú quide-güedé ndíhí-yu nàcuáa càhá<sup>n</sup> tnúhu Yã Ndiöxí, te núu nchaa ñãyiu ndècu ichi Yã Ndiöxí ní xáha<sup>n</sup>-í xii té Pèlú: “Yòhó cúú-n tée isràèl, te ñá túú quide-n nchaa nàcuáa quide ñãyiu isràèl, chi quide-ni-n datná quidé nchaa ñãyiu ñá túú cùu ñãyiu isràèl. Te núu duca<sup>n</sup> quide-n, ¿te ná cuendá dánèhé-n ñãyiu ñá túú cùu ñãyiu isràèl sá cádá-yu nchaa nàcuáa quide ñãyiu isràèl?”, duha ní xáha<sup>n</sup>-í xii té Pèlú.

### Ñ<sup>n</sup>-ni nàníhí tàhú-ó ndíhi ñãyiu isràèl núu na quíndáá iní-ó Xítohó Jesucristú ndíhí-yu

<sup>15</sup>Te yúhú ndíhi té Pèlú cúú-ndí ñani tnàhá ñãyiu isràèl, te ñá túú ndècu-ndí ichi cuèhé ichi duha dàtná ndécú nchaa ñãyiu ñá túú cùu ñãyiu isràèl. <sup>16</sup>Te xini-ó sã vã cúndècu-gá cuèchi-o núu Yã Ndiöxí te núu na quíndáá iní-ó Xítohó Jesucristú, te ñá díú sã cãchícú<sup>n</sup> nihnu-o càda-o nchaa nàcuáa ní cáhá<sup>n</sup> ndí Moisés. Te tnàhá dava nchúhú ñãyiu isràèl sàndáá iní-ndí Xítohó Jesucristú, te xíá<sup>n</sup> cutnùní iní-ndí sá ñà

túú-gă cuéchi-ndí ndécú núú-gă, dico ñá dǫú sǎ ní cǎnchicú<sup>n</sup> nihnu-ndí ní quide-ndí nàcuáa ní cáhá<sup>n</sup> ndíi Moisés, chi cuendá sá sàndáá iní-ndí Xítóhó Jesucristú. Te vá yǫo ìí<sup>n</sup> cachí-ó sǎ ñà túú ndècu cuéchi-xi núú Yǎ Ndiǫxí cuendá sá nchicú<sup>n</sup> nihnú-yu nchaa nàcuáa ní cáhá<sup>n</sup> ndíi Moisés.

<sup>17</sup> Te núu cuiní-ó sǎ vǎ cùndècu cuéchi-o núú Yǎ Ndiǫxí cuendá sá sàndáá iní-ó Xítóhó Jesucristú, te xǎá<sup>n</sup> cútñuní iní-ó sǎ ñà túú quide váha-o. ¡Te vá cúú tñáhí cani iní-ó sǎ Xítóhó Jesucristú dánèhé ñáhá-gǎ xii-o sǎ vǎ cádá váha-o cùndecu-o! <sup>18</sup> Te yúhú cǎchí-í sǎ vǎ cǎnchicú<sup>n</sup> nihnu-gǎ-ó nchaa nàcuáa ní cáhá<sup>n</sup> ndíi Moisés, dico núu vitna cǎchí-í sǎ xíní ñùhu-xi cada-o nchaa nàcuáa ní cáhá<sup>n</sup> ndíi ña, te ñá túú quide váha-í núú Yǎ Ndiǫxí te núu duca<sup>n</sup> na càda-í. <sup>19</sup> Te yúhú duu<sup>n</sup> duu<sup>n</sup> ní cutñuní iní-í sǎ vǎ ndácú-í cada-í nchaa nàcuáa ní cáhá<sup>n</sup> ndíi Moisés núu xǎá<sup>n</sup> ní dáñà-í ñá túú-gǎ nchicú<sup>n</sup> nihnu-í nchaa nàcuáa ní cáhá<sup>n</sup> ndíi cuendá sá cuiní-í cùndecu-í sǎ cúú-xí Yǎ Ndiǫxí. <sup>20</sup> Te Xítóhó Jesucristú ní xǎhí-gǎ cuendá-í, dico dàtná tñúhu sǎ tñáhá-í ní xǎhí ndíhi-gǎ, chi ñá cúú-gǎ cada-í nchaa nàcuáa sàni iní mée-í, chi Xítóhó Jesucristú-ñá ndécú ndíhi ñaha-gǎ xii-í táxí tñuní ñáhá-gǎ. Te vitna ndècu-í ñuyúú-a, te ío sàndáá iní-í Xítóhó Jesucristú Déhe Yǎ Ndiǫxí, te chindee ñaha-gǎ xii-í. Te diu-ni Xítóhó Jesucristú ío cùu iní ñáhá-gǎ xii-í núu ní xǎhí-gǎ núú cùrúxí sǎ cuendá-í. <sup>21</sup> Te vitna ñá túú dàquee tñù-í sǎ váha ní quide ñaha Yǎ Ndiǫxí xii-í, chi núu ní ndàcu-o vá cùndècu cuéchi-o núú Yǎ Ndiǫxí cuendá sá nchicú<sup>n</sup> nihnu-o quide-o nchaa nàcuáa ní cáhá<sup>n</sup> ndíi Moisés ní cùu ña, te àú<sup>n</sup> nǎ cuu ní xǎhí Xítóhó Jesucristú ní cùu te núu duca<sup>n</sup>.

### Vá dáñá ndèé-ó quindáá iní-ó tñúhu Xítóhó Jesucristú

**3** Te nchòhó ñáyiú distritú Gàlaciá, ñáyiú sa xǎndecu ichi Xítóhó Jesucristú, ¿ná cuendá ío ñíí iní-ndó ñá cuiní-ndó tñi-ndo nchaa tñúhu cǎhá<sup>n</sup>-gǎ?, ¿te yoo ní dádàhu ndodo iní ñáhá xii-ndo núu duca<sup>n</sup> quide-ndo? Te ñaha-ndo sǎ ío váha ní dánèhé ñáhá-ndí xii-ndo nàcuáa ní cuu ní xǎhí Xítóhó Jesucristú. <sup>2</sup> Te vitna cáhá<sup>n</sup>-ndó núu sǎ nchicú<sup>n</sup> nihnu-ndo nchaa nàcuáa ní cáhá<sup>n</sup> ndíi Moisés ní níhí-ndó Espiritú Yǎ Ndiǫxí ndécú ndíhi-ndo, àdi sǎ ni sàndáá iní-ndó tñúhu Xítóhó Jesucristú sǎ ní dánèhé ñáhá-ndí xii-ndo ní níhí-ndó Espiritú-gǎ ndécú ndíhi-ndo. <sup>3</sup> Te nchòhó ío ñíí dǫuí-ndó chi Espiritú Yǎ Ndiǫxí tá quide váha ñaha-xi xii-ndo cuáhá<sup>n</sup> ní cùu. ¿Te náa vitna mee-nǎ-ndó cuiní-ndó càda-ndo nàcuáa ta quide ñaha Espiritú-gǎ cuáhá<sup>n</sup> xii-ndo ni cùu-á<sup>n</sup>? <sup>4</sup> Te sàni ìí<sup>n</sup> sani úú iní-í cuendá-ndó sǎ àú<sup>n</sup> nǎ cuu nándi yáha-ndo ndècu-ndo ichi Yǎ Ndiǫxí. <sup>5</sup> Te xíní-ndó sǎ Yǎ Ndiǫxí ní taxi-gǎ Espiritú-gǎ ní ngúndecu ndíhi-ndo, te ní quide-gǎ sǎ vǎ yǫo tñáhí ndàcu cada núú-ndó ní xíní-ndó. Te duca<sup>n</sup> ní quide-gǎ, chi ní sàndáá iní-ndó-gǎ, dico ñá dǫú cuendá nchaa nàcuáa ní cachí ndíi Moisés cada ñáyiú duca<sup>n</sup> ní quide-gǎ.

<sup>6</sup> Te ndíi Àbrahám duca<sup>n</sup> ío ní sàndáá iní ndíi Yǎ Ndiǫxí, núu xǎá<sup>n</sup> ní cachí-gǎ sǎ ní cudùu ndíi núú-gǎ sǎ dúcá<sup>n</sup> ní quide ndíi. <sup>7</sup> Te cǎchí tñúhu ndáá-í xii-ndo sǎ ncháá ñáyiú sàndáá iní ñáhá xii Yǎ Ndiǫxí dàtná ní sàndáá iní ñáhá ndíi Àbrahám xii-gǎ, ñáyiú-á<sup>n</sup> ìí<sup>n</sup>-ni cùú-yu ndíhi ndíi núú-gǎ. <sup>8</sup> Te núú tütú Yǎ Ndiǫxí ní ngódó tñuní tñúhu váha, tñúhu sǎ ní xáha<sup>n</sup> Yǎ Ndiǫxí xii ndíi Àbrahám, te duha ní xáha<sup>n</sup>-gǎ xii ndíi: “Nchaa ñáyiú nihíi ñuyúú cada váha-í-yu sǎ

cuendá-n", duha ní xáha<sup>n</sup>-gã xii ndíi. Te sá dúcá<sup>n</sup> nǐ ngódó tñuní núú tütú Yá Ndiöxí ndéé dává-á<sup>n</sup>, te xíá<sup>n</sup> cútñuní sá sàá nduu, te cue ñáyiú ñá túú cùu ñáyiú isràél vá cùndècu-gá cuéchi-yu núú-gã te núu na quíndáá iní ñáhá-yu xii-gá. <sup>9</sup>Te xíá<sup>n</sup> núu nchaa ñáyiú sàndáá iní ñáhá xii Yá Ndiöxí cada váha ñaha-gã xii-yu dàtná ní quide váha-gá ndíi Àbrahám, chi ndíi-á<sup>n</sup> duca<sup>n</sup> nǐ sàndáá iní ñáhá ndíi xii-gá.

<sup>10</sup>Te nchaa ñáyiú cuíní cada nchaa nàcuáa ní cáhá<sup>n</sup> ndíi Moisés cuendá sá cuíní-yu sá vǎ cùndècu-gá cuéchi-yu núú Yá Ndiöxí, ñáyiú-á<sup>n</sup> dañá nihnu ñaha-gã xii-yu, chi vá ndácü-yu cadá-yu nàcuáa sàni iní-yu, te duca<sup>n</sup> càda-gá chi quèe ndáá-xi nàcuáa càhá<sup>n</sup>-xi núú tütú-gá núú càchí-xi sá ncháá ñáyiú ñá túú quide nchaandi tǔhú nàcuáa ní cáhá<sup>n</sup> ndíi Moisés te dañá nihnu ñaha-gã xii-yu. <sup>11</sup>Te núu na càncicú<sup>n</sup> nihnu-ni-o càda-o nàcuáa ní cáhá<sup>n</sup> ndíi Moisés, te ñá túú vèdana chindee ñaha-xi xii-o nàcuáa vá cùndècu-gá cuéchi-o núú Yá Ndiöxí. Te ndáá chi núú tütú-gá càchí-xi sá ncháá ñáyiú sàndáá iní ñáhá xii-gá, ñáyiú ñá túú-gã cuéchi-xi ndècu ío váha ndècú-yu núú-gã. <sup>12</sup>Te núu dícó ío ñáyiú quide nchaandi tǔhú nàcuáa ní cáhá<sup>n</sup> ndíi Moisés ñá, te ñá túú xini ñuhu-xi quíndáá iní-yu tnúhu Xítohó Jesucristú, chi núú tütú Yá Ndiöxí càchí-xi sá núu dícó ío ñáyiú ndacu cada nchaa nàcuáa ní cáhá<sup>n</sup> ndíi Moisés ñá, te cundecu váha-yu núú Yá Ndiöxí.

<sup>13</sup>Te tnúhu ní chídó tñuní ndíi Moisés càchí-xi sá ío ndècu cuéchi-o núú Yá Ndiöxí cuendá sá ñá ndácú-ó càda-o nchaa nàcuáa ní cáhá<sup>n</sup> ndíi, te cuendá xíá<sup>n</sup> tá dàña nihnu ñaha-gã xii-o cuáhá<sup>n</sup>. Dico Xítohó Jesucristú ní xido-gá nchaa cuéchi-o cuendá sá vǎ dáña nihnu ñaha-gã Yá Ndiöxí xii-o. Te càchí-xi núú tütú Yá Ndiöxí: "Í<sup>n</sup> tée na càta caa-güedé íi<sup>n</sup> yutnu, te tée-á<sup>n</sup> cúú-dé tée dàña ni-

hnu ñaha Yá Ndiöxí", duha càchí-xi núú tütú-gá. <sup>14</sup>Te duca<sup>n</sup> nǐ yáha Xítohó Jesucristú, chi cuíní Yá Ndiöxí sá nduu tǔhú nchaa ñáyiú ñá túú cùu ñáyiú isràél cundecu váha-yu dàtná ní nduu tǔhú ndíi Àbrahám ndécú váha ndíi. Te duca<sup>n</sup> nǐ yáha-gá cuendá nchaa nchoo ñáyiú sàndáá iní ñáhá xii-gá ngúndecu ndíhi-o Espíritú Yá Ndiöxí sá nǐ cachí mée-gã taxi-gá.

### Nàcuáa ní cachí Yá Ndiöxí cada-gá

<sup>15</sup>Te nchòhó cue ñáyiú ndècu ndíhi-í ichi Yá Ndiöxí na càchí tnúhu-í xii-ndo nàcuáa quide cue ñáyiú ñuyú-a cuendá tecú tñuní-gá-ndó nàcuáa quide Yá Ndiöxí. Chi ñáyiú-á<sup>n</sup> òré cuíní-yu cadá-yu íi<sup>n</sup> sá cádá-yu, te díhna-gá ndátnúhu-yu te òré cúú íi<sup>n</sup>nuú-yu, te sáha firmá-yu íi<sup>n</sup> tutú te tutú-á<sup>n</sup> vǎ yõ íi<sup>n</sup> ndacu cáhá<sup>n</sup> sá vǎ nándíhi-gá-xi, te ni vǎ yõ-gá ndacu nágá tnúhu chido tñuní núú-xí. <sup>16</sup>Te duca<sup>n</sup> nǐ quide Yá Ndiöxí ndíhi ndíi Àbrahám, chi ní xáha<sup>n</sup>-gã xii ndíi nàcuáa cada-gá, te tnúhu-á<sup>n</sup> cúú-xí cuendá mée ndíi ndíhi cuendá íi<sup>n</sup> ñaní tnáhá ndíi cundecu ñuyú-a ndéé cuèé-gá. Te núú tütú-gá càchí-xi sá tnúhu-á<sup>n</sup> cúú-xí cuendá íi<sup>n</sup>-ni ñaní tnáhá ndíi te ñá díú cuendá ncháá-yu. Te ñaní tnáhá ndíi tée cùu cuendá tnúhu-á<sup>n</sup> cúú Xítohó Jesucristú. <sup>17</sup>Te na càchí tnúhu-í xii-ndo sǎ Yá Ndiöxí ní quide ndáá duu<sup>n</sup>-gá ndíhi ndíi Àbrahám nàcuáa cada-gá. Te sa ní cuu cúmí cièndú ócò úxí cuíá sǎ dúcá<sup>n</sup> nǐ xáha<sup>n</sup> Yá Ndiöxí xii ndíi Àbrahám, te dàtnuní ní xáha<sup>n</sup>-gã xii ndíi Moisés chido tñuní ndíi nàcuáa cada ñáyiú, te nchaa tnúhu ní chídó tñuní ndíi Moisés ñá túú dàquee tǔhú-xi tnúhu sá nǐ xáha<sup>n</sup> Yá Ndiöxí xii ndíi Àbrahám nàcuáa cada-gá. <sup>18</sup>Te núu dícó cuendá nchaa tnúhu sá nǐ chídó tñuní ndíi Moisés ní nàníhí tǔhú-ó ñá, te ñá túú-gã xini ñuhu-xi cada cuendá-ó tnúhu ní xáha<sup>n</sup>

Yă Ndiöxí xii ndíi Àbrahám cada-gá ní cùu te núu duca<sup>n</sup>. Te ndíi-á<sup>n</sup> nǐ naníhí tǎhú ndíi chi duca<sup>n</sup> nǐ cachí Yă Ndiöxí cada ñaha-gǎ xii ndíi.

<sup>19</sup>Te nchaa tnúhu ní cáhá<sup>n</sup> ndíi Moisés ní ngódó núú-xí nchícú<sup>n</sup> nihnu ñáyíu cuèndá duca<sup>n</sup> cùtnuní iní-yu sá ndécú cuèchi-yu, te nchícú<sup>n</sup> nihnu-ní-yu ndéé ní sáá nduu ní quexìo Yaá cúu ñàní tnáhá ndíi Àbrahám, chi Yaá-á<sup>n</sup> duca<sup>n</sup> ní xáha<sup>n</sup> Yă Ndiöxí quixi-gá cada váha-gá nchaa ñáyíu. Te nchaa tnúhu ní chídó tnùní ndíi Moisés, chi Yă Ndiöxí ní tendaha-gǎ cue espíritú xínú cuèchi núú-gǎ ní sáhá<sup>n</sup>-xi ní xítnúhu ñaha-xi xii ndíi nàcuáa danèhé ndíi ñáyíu. <sup>20</sup>Te Yă Ndiöxí ñá túú ní cǎhá<sup>n</sup>-gá núú mée ñáyíu, chi ndíi Moisés ní cáhá<sup>n</sup> ndíi yuhu-gá núú-yu, dico cútnàhá ní cáhá<sup>n</sup> ndíi-gá ndíi Àbrahám chi núú mée núú íí<sup>n</sup> ndíi ndíi-gá ní xáha<sup>n</sup>-gǎ xii ndíi nàcuáa cada-gá.

### Nàcuáa ndùu nchaa tnúhu ní chídó tnùní ndíi Moisés

<sup>21</sup>Te nchaa nàcuáa ní chídó tnùní ndíi Moisés, ndíi nchaa nàcuáa ní xáha<sup>n</sup> Yă Ndiöxí xii ndíi Àbrahám cada-gá, ñá túú dàquee tǎhú tnáhá-xí. Te núu dicó náníhí tǎhú ñáyíu nchícú<sup>n</sup> nihnu nchaa nàcuáa ní cáhá<sup>n</sup> ndíi Moisés ñá te cudíú-yu núú-gǎ cuèndá-ni sá nchícú<sup>n</sup> nihnú-yu nchaa nàcuáa ní cáhá<sup>n</sup> ndíi ní cùu. <sup>22</sup>Te núú tütú Yă Ndiöxí cǎchí-xi: “Nchaa nchòhó ñáyíu ndècu ñuyíú ndécú cuèchi-ndo”, duha cǎchí-xi. Te duca<sup>n</sup> cǎhá<sup>n</sup>-xi cuèndá quíndáá iní-ó Xítóhó Jesucristú, te naníhí tǎhú-ó chi duca<sup>n</sup> nǐ cachí Yă Ndiöxí cada-gá.

<sup>23</sup>Te cútnàhá vátá cùndècu ndíi-gá-ó tnúhu Xítóhó Jesucristú, te nchícú<sup>n</sup> nihnu-o nchàa nàcuáa ní cáhá<sup>n</sup> ndíi Moisés, te ní cutnùní iní-ó sǎ ïo ndècu cuèchi-o ni cùu. Te duca<sup>n</sup>-ni nchícú<sup>n</sup> nihnu-o ndéé ní sáá nduu nǐ quexìo Xítóhó Jesucristú ñuyíú-a, te ní

sándáá iní-ó-gǎ. <sup>24</sup>Te nchaa tnúhu sá nǐ chídó tnùní ndíi Moisés ní sanu ichi ñaha-xi xii-o nàcuáa cada-o cùndècu-o, te duca<sup>n</sup>-ni sanu ichi ñaha-xi xii-o ndéé ní sáá nduu ní quexìo Xítóhó Jesucristú ñuyíú-a. Te duca<sup>n</sup> nǐ cuu cuèndá quíndáá iní-ó-gǎ, te vátá cùndècu-gá cuèchi-o núú Yă Ndiöxí. <sup>25</sup>Te vitna ní ngúndècu ndíi-o tnúhu Xítóhó Jesucristú, te ñá túú-gǎ xíní ñúhu-xi canu ichi ñaha nchaa tnúhu ní chídó tnùní ndíi Moisés.

<sup>26</sup>Te vitna tnàhá nchaa nchòhó cúu-ndó dèhe Yă Ndiöxí, chi ní sándáá iní-ndó Xítóhó Jesucristú. <sup>27</sup>Te nchòhó ní sandute-ndo dàtná cǎchí-gá, te ndècu-ndo ndíi-gá, te quide-ndo nchaa nàcuáa ní cáhá<sup>n</sup>-gá ndécú-ndó, te ïo ndècu yíñuhu-ndo núú Yă Ndiöxí dàtná ndécú yíñuhu mee Xítóhó Jesucristú. <sup>28</sup>Te vitna íí<sup>n</sup>-ni cùu-o nchaa-o ndècu-o ndíi Xítóhó Jesucristú cuèi cùu-o ñáyíu isràél àdi ñá túú cùu-o, te cuèi cùu-o ñáyíu ñá túú tnàhí dàñá quee núú chíú<sup>n</sup> pàtróó<sup>n</sup>-xi àdi cuu-o ñáyíu dàñá queé núú chíú<sup>n</sup> pàtróó<sup>n</sup>-xi, te cuèi tée te cuèi ñadìhí íí<sup>n</sup>-ni cùu-o nchaa-o ndècu-o ndíi Xítóhó Jesucristú. <sup>29</sup>Te nchòhó ndécú ndíi-ndo Xítóhó Jesucristú, te cùu-ndo datná cue ñaní tnáhá ndíi Àbrahám, chi ní nduu tǎhú-ndó cùndècu váha-ndo núú Yă Ndiöxí dàtná ní nduu tǎhú ndíi-á<sup>n</sup> ndécú váha ndíi núú-gǎ, te duca<sup>n</sup> chi mee-gǎ duca<sup>n</sup> nǐ cachí-gá cunduu.

**4** Te nchòhó xíní-ndó sǎ íí<sup>n</sup> té líhli chi vátá nǎgá cuañaha tǎtá-dě cuu cuèndá-dé chi líhli-dé, te íí<sup>n</sup>-ni cùu-dé ndíi tée xínu cuechi, dico na sáá nduu cuèhnu-dé, te nduu tǎhú-dě nchaa sá ndécú ndíi tǎtá-dě. <sup>2</sup>Te xító-yu té líhli-á<sup>n</sup> sáhnú-dě ndéé sáá nduu nǐ cachí tǎtá-dě sá cuañaha-dě sá ndúú tǎhú-dě. <sup>3</sup>Te duca<sup>n</sup> sǎtnahá-xi cùu nchoo, chi nchícú<sup>n</sup> nihnu-o nchàa nàcuáa ní cáhá<sup>n</sup> cue tée ní xíndècu ndéé sanaha ni cùu. <sup>4</sup>Te ní sáá nduu nǐ quide Yă Ndiöxí dàtná

ní cachí-gá, te ní tendaha-gá Déhe-gá Xítoho Jesucristú ní quixi-gá ñuyíu-a, ní dácácú ñaha ì<sup>n</sup> ñadihí te ní cuu-gá ñáyiú, te ní quide-gá nchaa nàcuáa ní cáhá<sup>n</sup> ndíi Moisés. <sup>5</sup>Te duca<sup>n</sup> ní tendaha Yá Ndiöxí Déhe-gá cuendá sá vǎ cǎnchicú<sup>n</sup> nihnu-gá-ó nchàa nacuáa ní chídó tñuní ndíi Moisés cuendá duca<sup>n</sup> te cuu-o dēhe Yá Ndiöxí.

<sup>6</sup>Te Yá Ndiöxí ní taxi-gá Espiritú Déhe-gá Xítoho Jesucristú ndécú ndíhi-ndo chí cùu-ndo déhe-gá, te Espiritú-á<sup>n</sup> chindèe ñaha-xi xii-ndo te cǎchí-ndó: “Yòhó Dútú Ndiöxí cúu-n Tǎtǎ méé-ndǐ”, duha cǎchí-ndó. <sup>7</sup>Te xǐǎ<sup>n</sup> cútnuní iní-ndó sǎ cúu-ndó dēhe Yá Ndiöxí vitna, te ñá túú-gǎ cúu-ndó dàtná cue ñáyiú ñá túú tñàhí dàǎá quee núú chíú<sup>n</sup> pàtróo<sup>n</sup>-xi. Te sá dúcá<sup>n</sup> cùu-ndo déhe-gá, te Xítoho Jesucristú taxi-gá nchaa sá vǎha ní cachí Yá Ndiöxí nduu táhú-ndó.

### **Té Pǎblú ío sàni iní-dé cuendá nchaa ñáyiú ndècu ichi Xítoho Jesucristú**

<sup>8</sup>Te cútnàhá vátá quindáá-gá iní-ndó tñùhu Yá Ndiöxí ní xinu cuechi-ndo núú nchàa sá cǎchí-yu cùu ndiöxí te ñá ndáá sá ndiöxí cúu-xí. <sup>9</sup>Te vitna nchòhó cǎhá<sup>n</sup> ndíhi-ndo Yá Ndiöxí, te mee-gǎ xini ñáhá-gǎ xii-ndo, te ñá túú ndùu vǎha-xi nanchòcǎva iní-ndó càda tucu-ndo nacuáa ní xóo cada-ndo dǐhna, chí nchaa xǐǎ<sup>n</sup> ñá túú vèdana nàndíhi-xi. <sup>10</sup>Te nchòhó cǎnehe íi-ni-ndo ndùu cachí-ndó íi, te ñiú-ni duca<sup>n</sup> quide-ndo dava yoó ndíhi dava cuíá, te ndi tnahá nduu sàcòo vico ñiú-ni duca<sup>n</sup> quide-ndo cǎnehe íi-ndó ndùu-á<sup>n</sup>. <sup>11</sup>Te ío sàni iní-í cuendá-ndó, chí na cuáhá<sup>n</sup> àú<sup>n</sup> ñá cuu ní dánèhé ñàhà-í xii-ndo tñùhu Yá Ndiöxí.

<sup>12</sup>Te cǎhá<sup>n</sup> ndàhú-í núú nchòhó ñáyiú ndècu ndíhi-í ichi Xítoho Jesucristú sá cǎdá-ndó dàtná quidè-í ñá túú nchicú<sup>n</sup> nihnu-í nchaa tñùhu ní cáhá<sup>n</sup> ndíi Moisés, chí yúhú quidè-í vitna dàtná

ní quide nchòhó ñá túú ní cǎnchicú<sup>n</sup> nihnu-ndo nàcuáa ní cáhá<sup>n</sup> ndíi. Te cút-nàhá ní xíndecu ndíhi ñaha-í xii-ndo ní quide vǎha ñaha-ndo xii-í. <sup>13</sup>Te sa ñaha-ndo sá cúttnàhá ní cáhá<sup>n</sup>-í tñùhu Xítoho Jesucristú núú-ndó ndèe dǐhna ní cuhú-í, núu xǐǎ<sup>n</sup> ní xíndecu ndíhi ñaha-í xii-ndo ní cáhá<sup>n</sup>-í tñùhu-gǎ núú-ndó. <sup>14</sup>Te cuéhé sǎ ní tnahá-í-á<sup>n</sup> cúu-xí ì<sup>n</sup> cuéhé sǎ vǎ yòo tñàhí cundee iní-xi cundecu ndíhi ñaha xii-í ní cùu, dico nchòhó chí ío vǎha ní cáhá<sup>n</sup> ndíhi ñaha-ndo xii-í, te ñá túú ní sàni cuéhé ní sàni duha iní-ndó cuendá-í, te ní cáhá<sup>n</sup> ndíhi ñaha-ndo xii-í dàtná tñùhu sá yúhú cúu-í ì<sup>n</sup> espíritú xínú cuèchi núú Yá Ndiöxí àdi datná méé Xítoho Jesucristú. <sup>15</sup>¿Te ná ní tnahá-ndó núu ñá túú-gǎ sání vǎha iní-ndó cuendá-í dàtná ní xóo cada-ndo ndèe dǐhna ío vǎha ní xóo cani iní-ndó cuendá-í? Te na cǎchí tñùhu ndáá-í xii-ndo sǎ ìo ní cuu iní ñáhá-ndó xii-í cútnàhá ní xíndecu ndíhi ñaha-í xii-ndo, te nándi sá ndécú ndíhi-ndo taxi-ndo xii-í ní cùu, te núu dícó sá cúu te ndéé tinùu-ndo tava-ndo te taxi-ndo xii-í ní cùu. <sup>16</sup>¿Te náa cùu úhú iní ñáhá-ndó xii-í vitna cuendá sá cǎhá<sup>n</sup>-í tñùhu ndáá tñùhu Yá Ndiöxí núú-ndó-ǎ<sup>n</sup>?

<sup>17</sup>Te ìo ñáyiú ío vǎha cǎhá<sup>n</sup> ndíhi ñaha xii-ndo, dico ñáyiú-á<sup>n</sup> ñúhú cuéhé iní-yu, chí cuiní-yu sá vǎ cúu-gǎ cáhá<sup>n</sup> ndíhi tñàha-o, chí mee-nǎ-yu cundecu ndíhi-ndo cuiní-yu. <sup>18</sup>Te vǎha quide ñáyiú cǎhá<sup>n</sup> ndíhi ñaha xii-ndo ndíhi tñùhu yǐñùhu, te núu cuiní-yu cadá-yu ì<sup>n</sup> sá vǎha sá cúu-xí-ndó. Te duca<sup>n</sup>-ni na cǎdá-yu cuèi òré ñá túú ndècu ndíhi ñaha-í xii-ndo. <sup>19</sup>Te nchòhó ñáyiú ní sanu ichi-í ichi Xítoho Jesucristú cǎchí tñùhu-í xii-ndo sǎ quidè-xí iní-í dàtná quidè-xí iní ì<sup>n</sup> ñadihí ñaha sa ní tnahá òré cacu déhe-xi, te duca<sup>n</sup> quide-xi iní-í, chí ío vǎi sani iní-í cuendá-ndó dàtná ní xóo cada-í ndéé dǐhna, te duca<sup>n</sup>-ni cǎda-í ndéé ná sàà nduu cǎda-ndo nchaa

nacuáa càhá<sup>n</sup> Xítóhó Jesucristú. <sup>20</sup> Te ío váha cada-xi te núu dicó tnavíí sa ndècu ndihí ñaha-í xii-ndo cuendá càhá<sup>n</sup>-í núú-ndó nàcuáa cada-ndo, te ña cútnùnì iní-í nása cada-í cuendá-ndó!

### Cuendá ndíi Àgár ndihí ndíi Sără

<sup>21</sup> Te nchòhò ñáyíu cuení canchicú<sup>n</sup> nihnu nchaa tnúhu ní càhá<sup>n</sup> ndíi Moisés, ¿náa ñá túú tècú tnùnì-ndó nàcuáa càhá<sup>n</sup>-xi tnúhu ní chídó tnùnì ndíi? <sup>22</sup> Chi càchí tnúhu ní chídó tnùnì ndíi-á<sup>n</sup> sã ndíi Àbrahám ní xíndecu úú déhe ducu<sup>n</sup> ndíi, te ì<sup>n</sup>-dé ní cuu déhe ndíi ndihí ñadhí méé ndíi ndíi Sără, te ingá-dé ní cuu-dé déhe ndíi ndihí ì<sup>n</sup> ndíi ní xinu cuechi nũ-yu ní xínani Àgár. <sup>23</sup> Te sã dúcá<sup>n</sup> nĩ cacu déhe ndíi Sără, chi mee Yã Ndiòxí ní cundàhú iní ñáhá-gã xii-a<sup>n</sup>, chi duca<sup>n</sup> nĩ cachí-gá cada-gá. Dico ndíi ní xinu cuechi-ã<sup>n</sup> chi duca<sup>n</sup> tnàhí ní nduu táhú ndíi-á<sup>n</sup> sã cóo dèhe ndíi. <sup>24</sup> Te na càchí tnúhu-í xii-ndo nã cúú sã nánèhé ndí ndúú cue ndíi ðhí-á<sup>n</sup>. Te úú xito ní càhá<sup>n</sup> Yã Ndiòxí nàcuáa cada-gá, te ì<sup>n</sup> ndíi-á<sup>n</sup> nánèhé ndíi nàcuáa ní càhá<sup>n</sup> Yã Ndiòxí xito ðhna nuu, te ingá tucu ndíi-á<sup>n</sup> nánèhé ndíi nàcuáa ní càhá<sup>n</sup> tucu-gá xito cùu uú. Te ndíi Àgár-á<sup>n</sup> nánèhé ndíi nàcuáa ní xáha<sup>n</sup> Yã Ndiòxí xii ndíi Moisés yucu Sinàí cada ñáyíu, te nchaa ñáyíu nchicú<sup>n</sup> nihnu nchaa tnúhu-á<sup>n</sup> cúú-yu dàtná déhe ndíi Àgár téé ní xinu cuechi, chi téé-á<sup>n</sup> ñà túú tnàhí ni dàná-dé quee-dé núú chíú<sup>n</sup> pàtróó<sup>n</sup>-dè, te duca<sup>n</sup> sãtnahá-xi cùú-yu chi nchicú<sup>n</sup> nihnú-yu nchaa nàcuáa ní xáha<sup>n</sup> Yã Ndiòxí xii ndíi Moisés. <sup>25</sup> Te tnúhu Àgár queé-xi: Yucu Sinàí, te yucu-á<sup>n</sup> yíndèhu-xi nació<sup>n</sup> Àrabiá. Te ndíi Àgár-á<sup>n</sup> nánèhé tucu ndíi cue ñáyíu ndècu ñuú Jerusálén, chi ñáyíu-á<sup>n</sup> ndécú-nĩ-yu dàtná ní xíndecu ndíi Àgár ndihí déhe ndíi, chi cue ndíi-á<sup>n</sup> nĩ cuu cue ndíi ñáyíu ñá túú tnàhí ni dàná quee núú chíú<sup>n</sup> pàtróó<sup>n</sup>-xi,

te duca<sup>n</sup> sãtnahá-xi cùu ñáyíu-á<sup>n</sup> chi nchicú<sup>n</sup> nihnu-nĩ-yu nchaa nàcuáa ní càhá<sup>n</sup> ndíi Moisés. <sup>26</sup> Dico nchoo ní nduu táhú-ó cùndecu-o ñuú Jerusálén sáá nũú ndécú Yã Ndiòxí, te vitna chi ñá túú-gã nchicú<sup>n</sup> nihnu-o nchaa nacuáa ní càhá<sup>n</sup> ndíi Moisés. <sup>27</sup> Te duha càhá<sup>n</sup>-í, chi núú tùtú Yã Ndiòxí càchí-xi:

Yòhó ñaha ní nduu táhú vã cóo dèhe-xi ní cùu, vitna cana saa-n sã cùdĩ iní-n cuèi vátá quini-gá-n nása càcu ì<sup>n</sup> landú.

Te cuèi ní cuu táhú-n sã vã cóo dèhe-n ní cùu dico ío-gá titní déhe-n còo dacúxí xíchí ní cuu táhú tnàhí sã cóo dèhe-xi.

Duha càchí-xi núú tùtú-gá. <sup>28</sup> Te nchoo cuè ñáyíu ndècu ichi Xítóhó Jesucristú vitna cùu-o datná ndíi Isàác, chi ndíi-á<sup>n</sup> nĩ cacu ndíi, chi mee Yã Ndiòxí ní cachí-gá sã cáci ndíi. Te duca<sup>n</sup> sãtnahá-xi cùu nchoo chi ní nduu-o dèhe-gá vitna chi duca<sup>n</sup> nĩ cachí tucu-gá cunduu. <sup>29</sup> Te déhe ndíi Àgár ní nduu táhú tnàhí ndíi sã cáci ndíi ñuyíú-a, te ndíi-á<sup>n</sup> nĩ cuu úhú iní ndíi ndíi Isàác, te ndíi Isàác-á<sup>n</sup> chi Espíritú Yã Ndiòxí ní quide ní cacu ndíi. Te duca<sup>n</sup> sãtnahá-xi cùu vitna, chi nchaa nchoo ñáyíu ndècu ndihí Espíritú Yã Ndiòxí cúú úhú iní ñáhá ñáyíu xii-o. <sup>30</sup> Te núú tùtú Yã Ndiòxí càchí-xi: “Chí nàcuí<sup>n</sup> xíchí xínú cuèchi ndihí déhe-xi na nùhú-yu, chi déhe xíchí xínú cuèchi-á<sup>n</sup> ñà túú nã níhí-dè nduu táhú-dè, chi mee-ni dèhe ñaha ndècu vehe-xi nduu táhú-dè sã cuãhaha tãtá-dè”, duha càchí-xi núú tùtú-gá. <sup>31</sup> Te nchoo cuè ñáyíu ndècu ichi Xítóhó Jesucristú ñá túú-gã cúú-ó dàtná cúú dèhe ndíi ní xinu cuechi-ã<sup>n</sup>, chi ní cuu-o vitna datná cúú ndíi ní nduu táhú nchaa sã nĩ sãhaha tãtá-xi-á<sup>n</sup>. Te duca<sup>n</sup> nĩ cuu, chi Yã Ndiòxí ní dácacu ñaha-gã xii-o cuendá sã vã cãchicú<sup>n</sup> nihnu-gá-ó nchaa nacuáa ní càhá<sup>n</sup> ndíi Moisés.

**Canchicú<sup>n</sup> nihnu-ni-o  
ichi Xítoho Jesucristú**

**5** Te Xítoho Jesucristú ní quide-gá nàcuáa vá cání ìní-ó sã nánihí tàhú-ó te núu na cànchicú<sup>n</sup> nihnu-o nàcuáa ní cáhá<sup>n</sup> ndíi Moisés, te diu-ni duca<sup>n</sup> càni ìní-ó cùndecu-o te vá ngõ cànì ìní-ó sã nánihí tàhú-ó te núu na cànchicú<sup>n</sup> nihnu-o càda-o nacuáa ní cáhá<sup>n</sup> ndíi, chi núu duca<sup>n</sup> na càda-o te ío dandòho-o mee-o datná ní xóo ndoho-o cùtnàhá vátá cùndecu-gá-ó ìchi-a.

<sup>2</sup>Te yúhú té Páblú cuiní-í sá cùndedòho-ndo ìi<sup>n</sup> tnúhu na càhá<sup>n</sup>-í-a. Te núu nchòhó cuáha-ndo sèñá ñii-ndo cuendá sá sàndáá ìní-ndó nàcuáa ní cachí ndíi Moisés cada-ndo, te núu duca<sup>n</sup> na càda-ndo ña, te àú<sup>n</sup> nã cuu ndècu-ndo ichi Xítoho Jesucristú te núu duca<sup>n</sup>. <sup>3</sup>Te dàtná ní cachí-í xii-ndo, te diu-ni duca<sup>n</sup> càhá<sup>n</sup> tucu-í vitna sá nũu ndèda-ni càa ìi<sup>n</sup> té na cuáha-dé sèñá ñii-dé, te xini ñuhu-xi sá dàcui<sup>n</sup> tãú-dé cada-dé nchaa nàcuáa ní cáhá<sup>n</sup> ndíi Moisés. <sup>4</sup>Te nchaa nchòhó ñáyiu sàni ìní sá ñã túú-gã cuéchi-xi ndècu núú Yã Ndiòxí cuendá sá nchicú<sup>n</sup> nihnu-ndo nchàa nacuáa ní cáhá<sup>n</sup> ndíi Moisés, ñã túú-gã ndécú-ndó ndíhi Xítoho Jesucristú, te ni Yã Ndiòxí ñã túú-gã cùndàhú ìní ñãhá-gã xii-ndo càda váha ñaha-gã. <sup>5</sup>Dico nchaa nchoo ñáyiu sàndáá ìní ñãhá xii-gã cùdiu-o núú-gã, chi chindee ñaha Espiritú-gã xii-o, te ndètu cahnu-ná-ó sàà nduu cũnaha nũú Yã Ndiòxí xii-o sã cùdiu-o núú-gã. <sup>6</sup>Te nchoo cuè ñáyiu ndècu ndíhi Xítoho Jesucristú ìi<sup>n</sup>-ni quide-xi cuèi na cuáha-o sèñá ñii-o àdi vá cuáha-o, chi ñã túú chindee ñaha-xi xii-o nacuáa cundecu váha-o ndíhi-gã. Te ìi<sup>n</sup>dii díi-ni sá xini ñuhu-xi quindáá ìní-ó Xítoho Jesucristú, te núu duca<sup>n</sup> na càda-o te cuu ìní-ó cuè taha ñáyiu-o.

<sup>7</sup>Te nchòhó ío váha quide-ndo ndecu-ndo ichi Yã Ndiòxí ní cùu, te vitna cùnúhu-í sá ñã túú-gã sàndáá váha ìní-ndó tnúhu-gã, te duca<sup>n</sup> quide-ndo chi ndècu ñáyiu sànu ichi ñaha xii-ndo ìngá ichi. <sup>8</sup>Te ñã díú Yã Ndiòxí Yaá ní cáhá<sup>n</sup> ñãhá xii-ndo duca<sup>n</sup> ni cachí-gã cada-ndo sã vá quindáá-gã ìní-ndó tnúhu-gã. <sup>9</sup>Te nchòhó xini-ndó sã núu luha levadürá ná quíhu yuchi te dandaa-xi. Duca<sup>n</sup> sãtnahá-xi cùu ñáyiu dandahú ñãhá xii-ndo, chi cuiní-yu dàcuíta nihnu ñãhá-yu xii-ndo nchàa-ndo. <sup>10</sup>Te yúhú cùtnùní ndáá ìní-í sá Xítoho Jesucristú chindee ñaha-gã xii-ndo cuendá sá ñã túú nãgã tnúhu quindáá ìní-ndó, dico nchaa ñáyiu duca<sup>n</sup> dandahú ñãhá xii-ndo nacháhu-yu núú Yã Ndiòxí nchaa sá quidè-yu cuèi náí-gã ñáyiu cùú-yu.

<sup>11</sup>Te càchí tnúhu-í xii nchòhó ñáyiu ndècu ndíhi-í ichi Yã Ndiòxí sá nũu dìcò dānehé-ni-í ñáyiu sá cuáha-yu sèñá ñii-yu dàtná ní cachí ndíi Moisés ñã, te vá yõo cuu úhú ìní ñãhá xii-í ní cùu, te ni vá túu úhú ìní-yu cuendá sá ñi xíhí Xítoho Jesucristú núú cùrúxí ní cùu. <sup>12</sup>Te nchaa ñáyiu dàsatú ìní ñãhá xii-ndo sã cuáha-ndo sèñá ñii-ndo, te váha-gã sá ná cáda-yu mèe-yu ìi<sup>n</sup> tnúndòho, te ñã díú sã dúcá<sup>n</sup> cànuichi ñãhá-yu xii-ndo cùndecu-ndo.

<sup>13</sup>Te nchòhó ñáyiu ndècu ndíhi-í ichi Xítoho Jesucristú diu-gã ní taunihnu ñaha-gã xii-ndo cuendá sá vá cànchicú<sup>n</sup> nihnu-gã-ndó nchàa nacuáa ní cáhá<sup>n</sup> ndíi Moisés, dico vá cání ìní-ndó sã sã dúcá<sup>n</sup> ñi taunihnu ñaha-gã xii-ndo, te cuu-ni cada-ndo nãndi sá cuèhé sá dúhá vèxi ìní-ndó, dico cuu ìní tnáhá-ndó ìi<sup>n</sup> ìi<sup>n</sup>-ndo te chindee tnàha-ndo. <sup>14</sup>Chi duca<sup>n</sup> càhá<sup>n</sup> Yã Ndiòxí sá cúú ìní-ó cuè taha ñáyiu dàtná cúú ìní-ó mèe-o. Te núu duca<sup>n</sup> na càda-o, te quide-o nchaa nacuáa tãú-xi cada-o dàtná càhá<sup>n</sup> nchaa tnúhu ní chídó tnùnì ndíi Moisés.



<sup>15</sup> Te núu nchòhó cúú ũhú iní tnáhá-ndó ndècu-ndo, te ñá túú quide váha-ndo te núu duca<sup>n</sup> quide-ndo, dico yúhú càchí-í sá vǎ dúcá<sup>n</sup>-gǎ cada-ndo cùndecu-ndo cuendá sá vǎ dáciuta nihnu tnàha-ndo.

**Nàcuáa sàni iní ñáyiu ndècu ichi cuehé ichi duha ndihi nàcuáa sàni iní ñáyiu ndècu ndihi Espíritú Yǎ Ndiòxí**

<sup>16</sup> Te na càchí tnúhu-í xii-ndo sǎ cǎdá-ndó nchàa nacuáa cuiní méé Espíritú Yǎ Ndiòxí cada-ndo, te duca<sup>n</sup> te vǎ cǎní-gǎ iní-ndó cǎda-ndo nándi nchaa sǎ cuèhé sǎ dúhá sàni iní méé-ndó. <sup>17</sup> Chi nchaa xǎ<sup>n</sup> ñá túú tnàhá tnúhu-xi ndihi Espíritú Yǎ Ndiòxí. Te ñu-ni duca<sup>n</sup> quide Espíritú Yǎ Ndiòxí, chi ñá túú tnàhá iní-xi nchaa sǎ cuèhé sǎ dúhá sàni iní-ndó. Te sǎ dúcá<sup>n</sup> ñà túú tnàhá tnúhu tnàha-xi xǎ<sup>n</sup> ñà túú ñihí ndéé-ndó cǎda-ndo ñ<sup>n</sup> sǎ vǎha sàni iní-ndó cǎda-ndo. <sup>18</sup> Te núu quide-ndo nchaa nacuáa sànu ichi ñaha Espíritú Yǎ Ndiòxí, te ñá túú-gǎ táxí tnùní ñáhá nchàa tnúhu ní chídó tnùní ndí Moisés xii-ndo.

<sup>19</sup> Te nchaa ñáyiu xìní-yu nchaa nàcuáa quide ñáyiu quide cuehé quidé ñuha. Te duha quidé-yu: Cue téé cǎhá<sup>n</sup> ndihi-güedé ñáyiu ñihí te ñá ñúú ñàñihí-güedé cúú-yu, te ñu-ni duca<sup>n</sup> xǎquide cue ñáyiu ñihí, te nándi-gǎ nchaa sǎ cuèhé sǎ dúhá cuǎhá<sup>n</sup> véxi-yu quidé-yu. <sup>20</sup> Te quide cahnú-yu nchaa sǎ càchí-yu cùu ndiòxí te ñá ndàá sǎ ndiòxí cúú-xí, te quide nduu tnahá-yu, te cùu úhú iní tnáhǎ-yu, te nǎà-yu, te cùu cuiñú tnáhǎ-yu, te ío yáchí cúdě<sup>n</sup>-yu, te ndúcú-yu mee-ni sǎ cúú-xí mèe-yu, te ñá túú cùu ñ<sup>n</sup>nuú-yu cundecú-yu, te quide ñ<sup>n</sup> tnahá-yu. <sup>21</sup> Te cùu cuedú ñ<sup>n</sup>-yu nchaa sǎ ndécú ndihi dava-gǎ-yu, te sàhni tnahá-yu, te ío quihú-yu, te ndí cuu ndí cuú-yu quidé-yu nchaa sǎ cuèhé sǎ dúhá, te nándi-gǎ nchaa sǎ cuèhé sǎ dúhá quidé-yu. Te sa càchí tnúhu-í

xii-ndo sǎ ncháá ñáyiu duca<sup>n</sup> xǎquide vá ndúú tǎhǎ-yu cundecú-yu núu ndécú Yǎ Ndiòxí táxí tnùní-gǎ.

<sup>22</sup> Dico Espíritú Yǎ Ndiòxí chindèe ñaha-xi xii-o cuu iní tnáhá-ó, te cùdǎ iní-ó ndècu-o, te ío váha cùu iní-ó, te cǎhnu iní-ó, te váha iní-ó, te cùndahú iní tnáhá-ó, te quide ndáá-ó ndècu-o. <sup>23</sup> Te ndàhú iní-ó, te quide-o nchaa nacuáa tàú-ó cǎda-o, te nchaa xǎ<sup>n</sup> chindèe ñaha Espíritú Yǎ Ndiòxí quidé-ó, te núu duca<sup>n</sup> quide-o, te vǎ yòo ñ<sup>n</sup>-gǎ cǎhá<sup>n</sup> sǎ ñà túú quide váha-o ndècu-o. <sup>24</sup> Te nchoo cuè ñáyiu ndècu ndihi Xítóhó Jesucristú, sa ñaha-o sǎ ní xǎhí-gǎ núu cùrúxí sǎ cuendá-ó, núu xǎ<sup>n</sup> duu<sup>n</sup> duu<sup>n</sup> ní dǎñá-ó nchàa ichi cuehé ichi duha, te ñá túú-gǎ táxí tnùní ñáhá ñ<sup>n</sup> ñ<sup>n</sup> sǎ cuèhé sǎ dúhá sǎ ní xóo caní iní-ó ní cùu. <sup>25</sup> Te vitna ní ngúndecu ndihi-o Espíritú Yǎ Ndiòxí chindèe ñaha-xi, te xìni ñuhu-xi sǎ cǎdá-ó nàcuáa sànu ichi ñaha Espíritú-gǎ cada-o.

<sup>26</sup> Te vǎ cǎdá cǎhnu-o mee-o, te vá ndúcú-ó plètú, te ni vǎ cúú cuedú iní-ó sǎ ndécú ndihi tnaha ñáyiu-o.

**Chindee tnàha-o ñ<sup>n</sup> ñ<sup>n</sup>-o**

**6** Te nchòhó ñáyiu ndècu ndihi-í ichi Xítóhó Jesucristú càchí tnúhu-í xii-ndo sǎ ñuu ñ<sup>n</sup> ñáyiu ndècu ndihi-ndo ichi-gǎ ní quidé-yu ñ<sup>n</sup> sǎ ñà túú tàú-yu cǎdá-yu núú-gǎ, te nchòhó ñáyiu quide váha ndècu ndihi Espíritú Yǎ Ndiòxí cǎhá<sup>n</sup>-ndó dǎho cue ñáyiu duca<sup>n</sup> xǎquide-á<sup>n</sup> cuendá nucúnu ichi-yu, te vii vii cǎhá<sup>n</sup> ndihi-ndó-yu, te ío coto-ndo mèe-ndo cuendá sǎ vǎ cǎdá-ndó ñ<sup>n</sup> sǎ ñà túú tàú-ndó cǎda-ndo núú-gǎ. <sup>2</sup> Te ío chindee tnàha-ndo, te cuáha tnàha-ndo tnúhu ndee ñ<sup>n</sup> cundecu-ndo cuendá nchaa sǎ yǎha-ndo. Te núu duca<sup>n</sup> na cǎda-ndo, te quide-ndo nchaa nacuáa ní cǎhá<sup>n</sup> Xítóhó Jesucristú cada-o.

<sup>3</sup> Te núu ío ñ<sup>n</sup>-ndo càchí-ndó sǎ ío váha quide-ndo ndecu-ndo ichi Yǎ Ndiòxí

te ñá ndàá ñá, te dicó dándàhú-ndó mée-ndo sá dúcá<sup>n</sup> quide-ndo. <sup>4</sup>Te ndi díí<sup>n</sup> ndi díí<sup>n</sup> càda cuendá-ndó nũ quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudíí ìní-ndó sá cúú-xí mée-ndo, te vá cání ìní-ndó sá quidé váha-gá-ndó dàcúúxí dáva-gá-yu. <sup>5</sup>Chi tàú-ó sá ndi díí<sup>n</sup> ndi díí<sup>n</sup> càda cuendá-ó nàcuáa ndècu-o.

<sup>6</sup>Te nchaa nchòhó ñáyiú dàcuaha tnúhu Yá Ndiòxí chindee-ndo cuè téè dàcuaha ñaha xii-ndo tnúhu-gá cuáñaha-ndo nãndi sá xíní ñùhu-güedé.

<sup>7</sup>Te vá dándàhú-ndó mée-ndo cundecu-ndo, chi vá cúú cùdiquí ndeé-ó Yá Ndiòxí, chi nchòhó xíní-ndó sá nũ na càda váha-o cùndecu-o, te cùu-xi ìí<sup>n</sup> sá váha sá cúú-xí-ó, dico núu vá cáda váha-o ña, te ío ndoho-o te núu duca<sup>n</sup> na càda-o. <sup>8</sup>Te núu quide-o nchaa sá cuèhé sá dúhá sàni ìní-ó, te diu-ni xíá<sup>n</sup> dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espíritú Yá Ndiòxí xii-o, te cundecu ndihi-o Yá Ndiòxí ni caa ni quíí<sup>n</sup>. <sup>9</sup>Te xini ñuhu-xi vá dáñá ndèé-ó càda váha-o cùndecu-o, te duca<sup>n</sup> te sáá nduu càda váha ñaha Yá Ndiòxí xii-o, te núu vá ná túhú ìní-ó càda váha-o cùndecu-o. <sup>10</sup>Te cada-o sá váha sá cúú-xí nchàa tnaha ñáyiú-o vitna ndecu-o ñuyíú-a, te ío-gá tàú-ó chindee-o cue ñáyiú ndècu ndihi-o ichi Xítohó Jesucristú.

### Tnúhu ndéé núú ñí ndihi-ná

<sup>11</sup>Te cundehe-ndo sá ndàa ndàa lètrá téè-í núú tùtú-a sá cúú-xí-ndó. <sup>12</sup>Te nchaa ñáyiú quide yicá sá cuáha-ndo sèñá ñii-ndo dàtná ní cachí ndíí Moisés,

ñáyiú-á<sup>n</sup> cúú-yu ñáyiú cuíni cudíu núú tnàha ñáyiú-xi. Te duca<sup>n</sup> quidé-yu cuendá sá vã ndòhò-yu cuendá nchaa tnúhu sá dánèhé ñáhá sã ñí xíhí Xítohó Jesucristú núú cùrúxí. <sup>13</sup>Te ni ñáyiú sa ní ngúndecu ndihi sèñá ñii-xi ñá túú quidé-yu nchaa nàcuáa ní cáhá<sup>n</sup> ndíí Moisés, dico mée-yu cuíni-yu sá cuáha-ndo sèñá ñii-ndo. Te duca<sup>n</sup> quidé-yu chi quide cahnú-yu mée-yu núú nchàa dáva-gá ñáyiú. <sup>14</sup>Te yíhú chi ñá túú quide cahnu-í mée-í cuendá nchaa sá quidè-í, chi mee-ni sã ío cùu váha ìní-í sá Xítohó Jesucristú ní xíhí-gá núú cùrúxí cuendá-ó. Te diu cuendá sá ñí xíhí-gá ñá túú-gã ndècù-í ichi cuèhé ichi duha, te ni ña túú-gã táxí tnùní ñáhá ñí ìí<sup>n</sup> sá cuèhé sá dúhá xii-í. <sup>15</sup>Te ñá túú nã chindèe ñaha-xi xii-o cuéi na cuáha-o sèñá ñii-o àdi vá cuáha-o, chi ndècu ndihi-o Xítohó Jesucristú, te ní nduu-o dàtná ìí<sup>n</sup> ñáyiú saa, te xíá<sup>n</sup> cúú-xí sá ío-gá xíní ñùhu-xi. <sup>16</sup>Te xicá<sup>n</sup> táhù-í núú Yá Ndiòxí sá ncháá nchòhó ñáyiú quide nchaa nacuáa càhá<sup>n</sup>-í-a cundecu nahi-ndo, nchòhó ñáyiú cùu cuendá Yá Ndiòxí dàtná ñáyiú isràel chi ñáyiú-á<sup>n</sup> ñí cachí-gá sá cúú cuendá-gá. Te mee-gã ío cundàhú ìní ñáhá-gã xii-ndo chindee ñaha-gã.

<sup>17</sup>Te neni vitna cuíni-í sá vã yò ìí<sup>n</sup>-gá chidácá nihnu ñaha xii-í cuendá chiú<sup>n</sup> quide-í, chi yayacá<sup>n</sup> sa ní nduu tìlòhó ñii-í cuendá sá ndòhò-í cuendá Xítohó Jesucristú.

<sup>18</sup>Te nchòhó ñáyiú ndècu ndihi-í ichi Xítohó Jesucristú xicá<sup>n</sup> táhù-í núú-gã sá ío na chindee ñaha-gã xii-ndo nchàa-ndo. Te duca<sup>n</sup> na cùnduu. Te ío chí cáda ndèe ìní-nã vitna.

## TUTÚ NÍ CADÚHA TÉ PÄBLÚ QUIHÍ<sup>n</sup> NDAHA NÁYIU ÑUÚ ÉFESÚ

**Té Páblú cadúha-dé tutú quihí<sup>n</sup>  
ndaha ñáyiu x̄ndecu ichi Xítohó  
Jesucristú ndécú ñuú Éfesú**

**1** Yúhú té Páblú ní tendaha ñaha Yá Ndiöxí cãhá<sup>n</sup>-í tnúhu Xítohó Jesucristú núú ñáyiu, chi duca<sup>n</sup> ñí cachí Yá Ndiöxí cunduu, te vitna cadúha-í tutú-a cuendá daquixi-í ndaha nchaa nchòhó ñáyiu cùu cuendá Yá Ndiöxí x̄ndecu ñuú Éfesú, te diu-ni nchòhó cúú-ndó ñáyiu sãndáá iní ñáhá x̄i Xítohó Jesucristú.

<sup>2</sup>Te x̄icá<sup>n</sup> tãhù-í núú Dütú Ndiöxí Yáá cúú Tãtá-ó, ndihi núú Xítohó Jesucristú sá ná ch̄ndee chitúu ñaha-gã xii-ndo, te duca<sup>n</sup> ndè nduú-gã ná cádá te ío váha cuu iní-ndó c̄ndecu-ndo.

**Espíritú Yá Ndiöxí ch̄ndèe  
ñaha-xi xii-o chi ndècu  
ndihi-o Xítohó Jesucristú**

<sup>3</sup>Te cachí-ó sã ïo cãhnu cuu Yá Ndiöxí Yáá cúú Tãtá Xítohó Jesucristú, te ndéé andiu quide Yá Ndiöxí nchaa sá váha sá cúú-xí-ó cuendá sá ndécú ndihi-o Espíritú-gã, te duca<sup>n</sup> quide-gã chi ndècu ndihi-o Xítohó Jesucristú. <sup>4</sup>Te ndéé cútñahá vátã ngãva-gã ñuyíú ñí cachí Yá Ndiöxí sá nchóó cùu-o ñáyiu cùu cuendá-gã, te duca<sup>n</sup> ñí cachí-gã sá cuendá Xítohó Jesucristú cuendá sá nchóó cùu-o ñáyiu ñã túú tñahí ná cumání cundecu núú-gã, te duca<sup>n</sup> te vã c̄ndècu cuéchi-o. <sup>5</sup>Te Yá Ndiöxí ío cùu iní ñáhá-gã xii-o ñuu x̄iã<sup>n</sup> duca<sup>n</sup> ñí cachí-gã ndéé cútñahá vátã ngãva-gã ñuyíú sã nchóó ndùu-o déhe-gã. Te sá cuendá nchaa sá cádá Xítohó Jesucristú sá cúú-xí-ó, x̄iã<sup>n</sup> duca<sup>n</sup> ñí cachí Yá Ndiöxí, te duca<sup>n</sup> ñí cachí-gã chi duca<sup>n</sup> tñahí ní sani iní-gã cunduu. <sup>6</sup>Te x̄iã<sup>n</sup>

ñuu x̄ini ñuhu-xi sá nchóó cãchí-ó sã ïo cãhnu cuu Yá Ndiöxí, chi ío c̄ndahú iní ñáhá-gã ch̄ndèe ñaha-gã xii-o. Te duca<sup>n</sup> quide-gã chi ndècu ndihi-o Xítohó Jesucristú Yáá ío cùu iní-gã. <sup>7</sup>Te Yá Ndiöxí ío cùu iní ñáhá-gã xii-o ñuu x̄iã<sup>n</sup> Xítohó Jesucristú ní sati ñíñi-gã te ní x̄ihí-gã cuendá dacãcu nihnu ñaha-gã xii-o núú ùhú núú ndàhú, te duca<sup>n</sup> càda cãhnu iní-gã nchaa yíca cuéchi-o. <sup>8</sup>Te Yá Ndiöxí ío c̄ndahú iní ñáhá-gã ch̄ndèe ñaha-gã xii-o, nãcuáa nḡndecu ndihi-o nchaa sá x̄ini tñuní-ó te duca<sup>n</sup> te cuu-o ñáyiu tècú tñuní. <sup>9</sup>Te Yá Ndiöxí ní dãnèhé ñáhá-gã xii-o nchaa sá ndúú yùhu, nchaa sá ñí sani iní-gã cada-gã. Te duca<sup>n</sup> ñí quide-gã chi duca<sup>n</sup> ñí sani iní-gã cunduu. <sup>10</sup>Te sá ñí sani iní-gã cada-gã te dacuitíí sã cádá-gã ná sàá nduu, te na sàá nduu-á<sup>n</sup> te mee-gã cada sá Xítohó Jesucristú quindaha-gã nchaa sá ío andiu, ndihi nchaa sá ío ñuyíú-a.

<sup>11</sup>Te nchoo ñí nduu tãhú-ó ñí nduu-o ñáyiu cùu cuendá Yá Ndiöxí chi ndècu ndihi-o Xítohó Jesucristú. Te duca<sup>n</sup> ñí cuu chi duca<sup>n</sup> tñahí ní sani iní Yá Ndiöxí cunduu. Te nchaandi túhú sá quidè-gã, quide-gã nãcuáa sãni iní meé-gã cunduu. <sup>12</sup>Te duca<sup>n</sup> ñí cuu cuendá sá nchùhú ñáyiu d̄fhna nuu ñí sãndáá iní tnúhu Xítohó Jesucristú cãhá<sup>n</sup>-ndí sá ïo cãhnu cuu mee Yá Ndiöxí cuendá nchaa sá váha quide-gã. <sup>13</sup>Te nchòhó tucu cútñahá ní x̄indedóho-ndo tñúhu ndáá tnúhu sá cãhá<sup>n</sup> nãcuáa naníhí tãhú-ó ní cuu ñí<sup>n</sup>nuu-ndo ndihi Xítohó Jesucristú chi ní sãndáá iní-ndó-gã. Te x̄iã<sup>n</sup> cútñuní sá nchòhó ní nduu-ndo ñáyiu cùu cuendá Yá Ndiöxí, chi ní nḡndecu ndihi-ndo Espíritú-gã sá ñí cachí-gã taxi-gã. <sup>14</sup>Te sá ndécú ndihi-o Espíritú Yá Ndiöxí x̄iã<sup>n</sup> cútñuní sá ndãá nduu tãhú-ó c̄ndecu-o ndihi-gã ná sàá nduu nãcuaca ñaha-gã xii nchaa nchoo ñáyiu cùu cuendá-gã, te sá dúcã<sup>n</sup> càda-gã ñuu x̄iã<sup>n</sup> tãu-ó cãchí-ó sã ïo cãhnu cuu-gã.

**Té Páblú xicá<sup>n</sup> táhú-dě núú Yá Ndiöxí  
cuendá cue ñáyiú ndècu ichi-gá**

<sup>15</sup> Te yúhú ñihí-í tnúhu sá nchòhó ío váha sàndáá iní-ndó Xítohó Jesucristú, te nchaa ñáyiú cùu cuendá Yá Ndiöxí ío cùu iní-ndö-yu. <sup>16</sup> Te xíá<sup>n</sup> núú ñá túú dàña ndeé-í ndacá<sup>n</sup> táhù-í núú-gá cuendá-ndó, te ío xicá<sup>n</sup> táhù-í <sup>17</sup> núú Yá Ndiöxí Yaá cùú Tátá Xítohó Jesucristú cuendá-ndó. Te diu-ni Yá Ndiöxí cùú-gá Yaá ío càhnu cuu. Te xicá<sup>n</sup> táhù-í núú Yá Ndiöxí sá mée-gá ná cádá sá Espiritú-gá chindee ñaha-xi xii-ndo cuendá cuu-ndo ñáyiú tècú tnùní, te na càda-xi sá cùt-nùní iní-ndó nàcuáa sàni iní Yá Ndiöxí. <sup>18</sup> Te duca<sup>n</sup> xicá<sup>n</sup> táhù-í núú Yá Ndiöxí cuendá-ndó, cuendá sá nchòhó tecú tnùní-ndó nàcuáa ndùu tnúhu ndee ìní ní taxi-gá ní ngúndecu ndihi-ndo cùt-nàhá ní cáhá<sup>n</sup> ñáhá-gá xii-ndo. Te duca<sup>n</sup> cùtnuní tucu iní-ndó sá ncháá sá ñí cachí-gá taxi-gá nduu táhú nchoo cùè ñáyiú cùu cuendá-gá cùú-xí mèe cuií-ni sá ío-gá váha. <sup>19</sup> Te cùtnuní tucu iní-ndó sá Yá Ndiöxí ío càhnu cuu-gá quidé-gá nchaa núú sá váha sá cùú-xí nchòhó ñáyiú sàndáá iní ñáhá xii-gá, chi quide-gá sá vǎ yòo tnàhí ndàcu cada sá cùú-xí-ó dàtná ní quide-gá <sup>20</sup> ní dándótó-gá Xítohó Jesucristú cùtnàhá ní xíhí-gá. Te ní taxinucóo-gá Xítohó Jesucristú xio cùha-gá táxí tnùní-gá. <sup>21</sup> Te Xítohó Jesucristú ío-gá cùnùu-gá dàcúxí nchàa núú cùè espíritú, ndihi dàcúxí nchàa cue tée yàndaha ñáyiú, ndihi dàcúxí nchàa dava-gá cue tée cùnùu. Te cuèi vitna te cuèi ndéé núú cuàhá<sup>n</sup> núú vǎxi duca<sup>n</sup>-ni ìo cùnùu-gá taxi tnùní-gá. <sup>22</sup> Te mee Yá Ndiöxí ní quide-gá sá Xítohó Jesucristú taxi tnùní-gá nchaandi túhú sá ìó, te diu-ni mee Yá Ndiöxí ní cachí-gá sá ncháá ñáyiú cùu cuendá-gá quindaha ñaha Xítohó Jesucristú. <sup>23</sup> Te cada iní-ó sá ncháá ñáyiú cùu cuendá Yá Ndiöxí cùú-yu yiqui cùnù Xítohó Jesucristú, chi

ii<sup>n</sup>-ni cùú-yu ndihi-gá, te mee-gá táxí tnùní-gá nchaandi túhú sá ìó.

**Yá Ndiöxí ío cundahú iní  
ñáhá-gá xii-o núu xíá<sup>n</sup> ní  
dácácu nihnu ñaha-gá**

**2** Te nchòhó cùú-ndó dàtná ñáyiú ní xíhí cuendá nchaa sá cuèhé sá dúhá quide-ndo ni cuu, dico vitna cada iní-ndó sá dàtná ní ndoto-ndo chi ní nduu táhú-ndó cùndecu-ndo ndihi Yá Ndiöxí ñí caa ñí qufhí<sup>n</sup>. <sup>2</sup> Te duca<sup>n</sup> ñí xíndecu-ndo ichi cuèhé ichi duha, chi ní cáncicú<sup>n</sup> nihnu-ndo nchàa sá cuèhé sá dúhá ìó ñuyú-a, te ní xóo cada-ndo nchàa nacuáa càhá<sup>n</sup> sácufhná, te diu-ni sácufhná-ǎ táxí tnùní-xi nchaa dava-gá espíritú cùndihi-xi, te diu-ni-xi ndècu ndihi-xi nchaa ñáyiú ñá túú cuení tnií tnúhu càhá<sup>n</sup> Yá Ndiöxí, te dàcahá<sup>n</sup> ñáhá-xí xii-yu cuendá cundecu-ní-yu ichi cuèhé ichi duha. <sup>3</sup> Te nchaa-o dùca<sup>n</sup> ní xóo cada-o dàtná quidé cùè ñáyiú-á<sup>n</sup>, chi ní xóo cada-o nchàa sá cuèhé sá dúhá ñí xóo cani iní-ó, te nándi-gá nchaa sá cuèhé sá dúhá ñí xóo cahu iní-ó ñí xóo cada-o, núu xíá<sup>n</sup> tàú-ó sá dándòho ñaha Yá Ndiöxí xii-o ñí cùu datná tàú-xi dándòho-gá nchaa ñáyiú duca<sup>n</sup> ndècu ichi cuèhé ichi duha-á<sup>n</sup>. <sup>4</sup> Te Yá Ndiöxí ío cùu iní ñáhá-gá xii-o núu xíá<sup>n</sup> ní cundahú iní ñáhá-gá xii-o <sup>5</sup> cuèi cùu-o datná ñáyiú ní xíhí sá cuendá nchaa sá cuèhé sá dúhá quide-o ni cuu. Te duca<sup>n</sup> ñí quide-gá ní cundahú iní ñáhá-gá xii-o cuendá cundecu-o ndihi Xítohó Jesucristú vitna, te cuu ii<sup>n</sup>-nuu-o ndihi-gá. Te sá cuendá-ni sá cundahú iní ñáhá Yá Ndiöxí xii-o xíá<sup>n</sup> ní quide-gá nàcuáa nchoo nàníhí táhú-ó. <sup>6</sup> Te cada iní-ó sá dàtná ní quide Yá Ndiöxí cùtnàhá ní dándótó-gá Xítohó Jesucristú cùtnàhá ní xíhí-gá duca<sup>n</sup> ñí quide ñaha-gá xii-o chi ndècu-o ndihi-gá vitna. Te Xítohó Jesucristú sa ndècu-gá andiu núú ndécú Yá Ndiöxí. Te cada iní-ó sá Yá Ndiöxí sa ní quide-gá sá

nchóó ní ngúndecu túu-o ndìhi Xítóhó Jesucristú, chí ío váha ndècu-o vitna. <sup>7</sup>Te Yá Ndiòxí quidé vâha ñaha-gã xii-o vitna cuendá sá ná sâá nduu, te ñiu-ni mee-gã cada te cutnùnì iní nchaa ñáyiu sá ío cùu iní ñáhá-gã xii-o, te duca<sup>n</sup> ío chindee chítúu ñaha-gã xii-o cuendá sá ndécú ndìhi-o Xítóhó Jesucristú. <sup>8</sup>Te Yá Ndiòxí ío cùndahú iní ñáhá-gã xii-ndo núu xíá<sup>n</sup> ní quide-gá sá nchòhó naníhí tãhú-ndó. Te duca<sup>n</sup> ní quide-gá chí ní sándáá iní-ndó-gã. Te ñá díú sá cuendá ñ<sup>n</sup> chiú<sup>n</sup> ní quide-ndo duca<sup>n</sup> ní naníhí tãhú-ndó, chí mee Yá Ndiòxí ní cuiní-gá sá ñicó-ni duca<sup>n</sup> naníhí tãhú-ndó. <sup>9</sup>Te mee Yá Ndiòxí ní cachí-gá sá ñà díú cuendá ñ<sup>n</sup> chiú<sup>n</sup> quide-o naníhí tãhú-ó, te duca<sup>n</sup> ní cachí-gá cuendá sá vã cádá càhnu-o mee-o. <sup>10</sup>Te Yá Ndiòxí ní quide ñaha-gã xii-o dàtná ñ<sup>n</sup> ñáyiu saa cuendá sá ní tnahá tnúhu-o ndìhi Xítóhó Jesucristú, te duca<sup>n</sup> ní quide-gá cuendá sá cádá-ó mée-ni sá vâha. Te Yá Ndiòxí duca<sup>n</sup> tnahí ní sani iní-gá cunduu sá nchóó cùu-o ñáyiu cada mee-ni sá vâha.

### **Xítóhó Jesucristú quidé-gã ío váha cùu iní-ó ndècu-o**

<sup>11</sup>Te nchòhó chí dándacu iní nàcuáa ní xíndecu-ndo ní cùu, chí ñá túú cùu-ndo ñáyiu isràél, te ní ñà túú quide-ndo datná quidé ñáyiu-á<sup>n</sup>, chí ñáyiu-á<sup>n</sup> sãha-yu señá ñíí-yu, te dàquee tñhú-yu nchaa ñáyiu ñá túú ndècu señá ñíí-xi. <sup>12</sup>Te chí dándacu iní nàcuáa ní xíndecu-ndo, chí dàvã-á<sup>n</sup> ñà túú ní xíndecu-ndo ndìhi Xítóhó Jesucristú, te ní ñà túú ní xõ cuu tnahá tnúhu-ndo ndìhi ñáyiu isràél, te ní ñà túú ní xínì tñùnì-ndó nàcuáa ndùu tnúhu sá ní cáhá<sup>n</sup> ndáá Yá Ndiòxí nàcuáa cada váha-gã ñáyiu, te ní ñà túú ní cùu-ndo ñáyiu quíndaha-gã, te ní ñà túú ní xõ níhí-ndó tñùhu ndee iní sá cùndècu-ndo ndìhi-gá. <sup>13</sup>Te cuèí ní cuu-ndo ñáyiu ñá túú tnahá tnúhu ndìhi Yá Ndiòxí ní cùu,

dico vitna ní tnahá tnúhu-ndo ndìhi-gá chí cùu ñ<sup>n</sup>nuu-ndo ndìhi Xítóhó Jesucristú, cuendá sá ní sati níñí-gã te ní xíhí-gá te xíá<sup>n</sup> duca<sup>n</sup> tnahá tnúhu-ndo ndìhi Yá Ndiòxí vitna. <sup>14</sup>Te Xítóhó Jesucristú ní quide-gá sá nchóó ío váha cuu iní-ó cùndecu-o, te ñiu-ni-gá ní quide cuendá sá vã dáquèe tñhú ñáhá ñáyiu isràél xii ñáyiu ñá túú cùu ñáyiu isràél, te duca<sup>n</sup> ñ<sup>n</sup>-ná cuú-yu cundecú-yu. <sup>15</sup>Te sá ní xíhí Xítóhó Jesucristú, xíá<sup>n</sup> ñá túú-gã cúnúu nchaa tnúhu sá sánú ìchi ñaha xii ñáyiu nàcuáa cada-yu cundecú-yu ní cùu. Te duca<sup>n</sup> ní xíhí Xítóhó Jesucristú cuendá sá cuè ñáyiu isràél ndìhi cuè ñáyiu ñá túú cùu ñáyiu isràél ñ<sup>n</sup>-ná cuú-yu cundecú-yu ichi-gá, te duca<sup>n</sup> te vã dáquèe tñhú tnahá-gã-yu, te ío váha cundecu ndìhi tnahá-yu. <sup>16</sup>Te duca<sup>n</sup> ní quide Xítóhó Jesucristú ní xíhí-gá núú cùrúxí cuendá sá cuè ñáyiu cùu ñáyiu isràél ndìhi cuè ñáyiu ñá túú cùu ñáyiu isràél vã dáquèe tñhú tnahá-gã-yu. Te duca<sup>n</sup> ní xíhí-gá cuendá ñ<sup>n</sup>-ná cuú-yu tnahá tnúhu-yu ndìhi Yá Ndiòxí nàcuáa cuu váha iní ñáhá-gã xíí-yu.

<sup>17</sup>Te cuèí cùu-ndo ñáyiu ñá túú tnahí xínì ndáá cuendá Yá Ndiòxí ní cùu, dico Xítóhó Jesucristú ní quixi-gá ñuyúú-a ní cáhá<sup>n</sup>-gá tnúhu váha nàcuáa ío váha cuu iní-ndó cùndecu-ndo ndìhi Yá Ndiòxí. Te ñiu-ni duca<sup>n</sup> ní quide-gá sá cúú-xí nchaa ñáyiu sa xínì cuendá Yá Ndiòxí, ñiu-ni ñáyiu isràél. <sup>18</sup>Te cuèí cùu-o ñáyiu isràél àdi ñá túú cùu-o dico ñiu-ni mee Xítóhó Jesucristú ní quide-gá sá ncháá-ó tnahá tnúhu-o ndìhi Dútú Ndiòxí Yaa cúú Tãtá-ó. Te duca<sup>n</sup> ní tnahá tnúhu-o ndìhi Yá Ndiòxí chí ní ngúndecu ndìhi-o Espíritú-gá. <sup>19</sup>Te nchòhó ñáyiu ñá túú cùu ñáyiu isràél ní cuu-ndo ñáyiu ñá túú tnahá tnúhu ndìhi Yá Ndiòxí ní cùu, dico vitna chí ñ<sup>n</sup>-ná ní cuu-ndo ndìhi nchaa dava-gã ñáyiu cùu cuendá-gá chí cùu-ndo déhe-gá. <sup>20</sup>Te cada iní-ó sá cuè téé ní táuchíú<sup>n</sup> Xítóhó Jesucristú

cáhá<sup>n</sup> tnúhu-gá, ndihi cue téé ní xóo cáhá<sup>n</sup> tnúhu Yá Ndiöxí ndéé sanaha cùu-güedé dàtná cimièntú ì<sup>n</sup> vehe, te nchòhó cùú-ndó dàtná ndóho sá sàá vehe-á<sup>n</sup>, te cada tucu iní-ó sá Xítohó Jesucristú cùú-gá ì<sup>n</sup> yúú cùnùu cuu cimièntú vehe-á<sup>n</sup>. <sup>21</sup> Te duca<sup>n</sup> ìo váha cùu ì<sup>n</sup>nuu nchaa ndóho-á<sup>n</sup> ndihi yúú cùnùu-á<sup>n</sup>, te duca<sup>n</sup> tucu ío váha ta quèe tnàha nchaa ndóho-á<sup>n</sup> cuásaá. Te xíá<sup>n</sup> cada iní-ó sá cùú-xí vèhe Yá Ndiöxí, vehe sá ìo ní cuu íí. Te duca<sup>n</sup> sàtnahá-xi cùu nchaa ñáyiú ndècu ichi Xítohó Jesucristú chi ní tnahá tnúhu-yu ndihi-gá, te ì<sup>n</sup> nduu ì<sup>n</sup> nduu ta cùu vii cuu váha-gá-yu núú Yá Ndiöxí cuáhá<sup>n</sup>. <sup>22</sup> Te tnàhá nchòhó duca<sup>n</sup> sàtnahá-xi cùu-ndo chi ní ngúndecu ndihi-ndo Xítohó Jesucristú, te duca<sup>n</sup> ta cùu vii cuu váha tucu-ndo núú Yá Ndiöxí cuáhá<sup>n</sup>, te cùu-ndo datná vehe Yá Ndiöxí chi ndècu ndihi-ndo Espiritú-gá.

**Té Páblú yíhí díquí-dé cáhá<sup>n</sup>-dé  
tnúhu Xítohó Jesucristú núú  
ñáyiú ñá túú cùu ñáyiú isràél**

**3** Te yúhú té Páblú yíhí-í vecaá sá cuèndá sá cáhá<sup>n</sup>-í tnúhu Xítohó Jesucristú núú nchòhó ñáyiú ñá túú cùu ñáyiú isràél, núu xíá<sup>n</sup> diu cuèndá-gá duha yíhí-í vecaá vitna. <sup>2</sup> Te nchòhó sa nàha-ndo sá Yá Ndiöxí ní cundàhú iní ñáhá-gá xii-í, te ní cachí-gá sá yúhú quihi díquí-í cáhá<sup>n</sup>-í tnúhu Xítohó Jesucristú núú-ndó, te cuèndá sá cáhá<sup>n</sup>-í tnúhu-gá núú-ndó te cuu-xi sá váha sá cùú-xí-ndó. <sup>3</sup> Te yúhú sa ní cachí tnúhu-í xii-ndo lùha nacuaá ndùu tnúhu ndùu yuhu ni cuu, sá ní cachí tnúhu Yá Ndiöxí xii-í. <sup>4</sup> Te òré dàcuaha-ndo tnúhu ndùu yuhu-á<sup>n</sup> ní cùu te quini-ndó sá yúhú tècú tnùn-í nàcuáa ndùu tnúhu-á<sup>n</sup>, te tnúhu-á<sup>n</sup> cáhá<sup>n</sup>-xi cuèndá Xítohó Jesucristú. <sup>5</sup> Te tnúhu-á<sup>n</sup> cùú-xí tnúhu sá vā yòo tnàhí xini ní cùu, dico cue téé ní táuchí<sup>n</sup> Xítohó Jesucristú cáhá<sup>n</sup> tnúhu-gá, ndihi cue téé

cáhá<sup>n</sup> nàcuáa dàcahu iní ñáhá Yá Ndiöxí ní níhí-güedé tnúhu ndùu yuhu-á<sup>n</sup>, chi Espiritú Yá Ndiöxí ní xáha<sup>n</sup>-xi xii-güedé. <sup>6</sup> Te duha cáhá<sup>n</sup> tnúhu ndùu yuhu-á<sup>n</sup> ní cùu: “Cuèi ñáyiú ñá túú cùu ñáyiú isràél te cuèi ñáyiú cùu ñáyiú isràél dico ì<sup>n</sup>-ni ndùu tãhú-yu sá váha núú Yá Ndiöxí, te núu na quindáá iní-yu tnúhu sá cáhá<sup>n</sup> nàcuáa naníhí tãhú-yu, te ì<sup>n</sup>-nã cùú-yu cundecú-yu, te duca<sup>n</sup> ì<sup>n</sup>-ni cada váha ñaha Yá Ndiöxí xii-yu te núu na cundecu ndihí-yu Xítohó Jesucristú”, duha ndùu tnúhu ndùu yuhu-á<sup>n</sup> ní cùu.

<sup>7</sup> Te Yá Ndiöxí ní cundàhú iní ñáhá-gá xii-í ní taxi-gá chiú<sup>n</sup> quide-í cáhá<sup>n</sup>-í tnúhu-gá, te mee-gá quidé-gá sá yúhú ndacu-í cáhá<sup>n</sup>-í tnúhu-gá. <sup>8</sup> Te nchaa ñáyiú cùu cuèndá Yá Ndiöxí cùú-yu ñáyiú ío-gá cùnùu cadá-yu chiú<sup>n</sup>-gá dàcúxí yúhú, te cuèi duca<sup>n</sup> dico Yá Ndiöxí ní cundàhú iní ñáhá-gá xii-í ní taxi-gá chiú<sup>n</sup> quide-í cáhá<sup>n</sup>-í tnúhu-gá núú cuè ñáyiú ñá túú cùu ñáyiú isràél. Te tnúhu-gá-á<sup>n</sup> cáhá<sup>n</sup>-xi sá súúni ìo váha cada ñaha Xítohó Jesucristú xii-o. <sup>9</sup> Te duca<sup>n</sup> ní cachí Yá Ndiöxí sá cáhá<sup>n</sup>-í tnúhu-gá cuèndá danèhé-í nchaa ñáyiú. Te sá dánèhé-í-yu-á<sup>n</sup> cùú-xí tnúhu ndùu yuhu sá ní sani iní-gá ndéé sanaha nàcuáa cada váha-gá cue ñáyiú. Te ndéé dàvã-á<sup>n</sup> ní quesaha ndùu yuhu tnúhu-á<sup>n</sup> ní cùu. Te diu-ni-gá cùú-gá Yaá ní cadúha nchaandi túhú sá ío. <sup>10</sup> Te duca<sup>n</sup> ndùu yuhu tnúhu-á<sup>n</sup> ní cùu cuèndá sá ncháá espíritú cùnùu ndecu andiú quini-xi vitna nàcuáa quide nchaa ñáyiú ní tuha ñaha xii Yá Ndiöxí cuèndá duca<sup>n</sup> cùtnuní iní-xi sá ìo váha cùtnuní iní-gá nàcuáa cada-gá. <sup>11</sup> Te Yá Ndiöxí ní sani iní-gá ndéé sanaha nàcuáa ní cuini-gá cada Xítohó Jesucristú, te ní sáá nduu ní quide Xítohó Jesucristú nàcuáa ní cuini Yá Ndiöxí cada-gá. <sup>12</sup> Te vitna cùyii-o cáhá<sup>n</sup> ndihi-o Yá Ndiöxí cuèndá sá ndécú ndihi-o Xítohó Jesucristú, te sàndáá iní-ó-gá. <sup>13</sup> Te núu xíá<sup>n</sup>

càhá<sup>n</sup>-í dóho-ndo sã cuëi duha ndòho-í vitna dico vá ná tũhú iní-ndó cànchicú<sup>n</sup> nihnu-ndo ichi Xítohó Jesucristú. Te sã dúhá ndòho-í te cùu-xi sã vãha sã cùú-xí-ndó, chi cuu-ndo ñãyiú cùu cahnu núú Yã Ndiöxí.

### **Xítohó Jesucristú ío cùu iní ñáhá-gã xii-o**

<sup>14</sup>Te sã cuëndá nchaa sã ñi sani iní Dútú Ndiöxí quidé-gã xíã<sup>n</sup> yúhú ngüññí xítí-í núú-gã càhá<sup>n</sup> ndihi-í-gã, te diu-ni-gã cùú Yàá cùú Tãtá Xítohó Jesucristú. <sup>15</sup>Te mee Yã Ndiöxí ní cachí-gã sã ncháá espíritú ndécú àndiú cunduu-xi datná ní cachí méé-gã cunduu-xi. Te ní cachí tucu-gã sã nchóó cùu-o ñãyiú, te cunduu-o dàtná cuiní méé-gã cunduu-o. <sup>16</sup>Te xicá<sup>n</sup> táhù-í núú Dútú Ndiöxí sã Espíritú-gã ná cádá nacuáa cuita níhí ndéé-gã-ndó quíhí<sup>n</sup> cundecu-ndo ichi-gã, te duca<sup>n</sup> xicá<sup>n</sup> táhù-í núú-gã cada Espíritú-gã chi ío càhnu cuu-gã. <sup>17</sup>Te xicá<sup>n</sup> táhú tucu-í núú Yã Ndiöxí sã Xítohó Jesucristú ná cùndecu ndihi ñaha-ni-gã xii-ndo chi sàndáá iní-ndó-gã, te duca<sup>n</sup> te vá dáñá ndéé-ndó ío cuu iní tnáhá-ndó. <sup>18</sup>Te xicá<sup>n</sup> táhú tucu-í núú Yã Ndiöxí cuëndá-ndó ndihi cuendá dava-gã ñãyiú cùu cuendá-gã, cuëndá sã cútnúni iní-ndó sã súúni cùu iní ñáhá Xítohó Jesucristú xii-o. <sup>19</sup>Te duha xicá<sup>n</sup> táhù-í núú Yã Ndiöxí chi cuiní-í sã ncháá-ndó tècú tnúni-ndó sã ío cùu iní ñáhá Xítohó Jesucristú xii-o cuëi vá ndácú càva-o quini-ó nacuáa cùu iní ñáhá-gã xii-o. Te xicá<sup>n</sup> táhú tucu-í núú Yã Ndiöxí sã ío na cùndecu ndihi ñaha-gã xii-ndo, te duca<sup>n</sup> cànchicú<sup>n</sup> nihnu-ndo càda-ndo nchaa nacuáa quide mee-gã.

<sup>20</sup>Te Yã Ndiöxí ío-gã vai sã ndácú-gã táxi-gã dàcúxí sã xicá<sup>n</sup>-ó núú-gã, te cuëi ndéé nchaa sã ñã túú sàni iní-ó níhí-ó te tàxi-gã, te duca<sup>n</sup> chi mee-gã ndécú ndihi ñaha-gã xii-o, te ndacu-gã

quidé-gã nándi sã vãha sã cùú-xí-ó. <sup>21</sup>Te vitna nchaa nchoo ñãyiú ndècu ichi Xítohó Jesucristú chí ná càchí-ó sã ío càhnu cuu Yã Ndiöxí, te duca<sup>n</sup>-ni càhá<sup>n</sup>-ó sã ío càhnu cuu-gã ní caa ní quíhí<sup>n</sup> chi ndècu ndihi-o Xítohó Jesucristú. Te duca<sup>n</sup> na cùnduu.

### **Espíritú Yã Ndiöxí quidé-xí cùu ñ<sup>n</sup>nuu-o ndecu-o**

**4** Te yúhú té Pãblú yíhí-í vecaá sã cuëndá Xítohó Jesucristú, te càhá<sup>n</sup> ndàhú-í núú-ndó sã cádá vãha-ndo cùndecu-ndo datná tàú-xi cada cue ñãyiú ní càhá<sup>n</sup> Yã Ndiöxí cundecu ndihi-gã. Te nchòhó tnáhá-ndó cùu-ndo ñãyiú ní càhá<sup>n</sup> ñáhá Yã Ndiöxí cundecu ndihi-gã. <sup>2</sup>Te vá cádá càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó nacuáa duca<sup>n</sup> cùndee iní-ndó núu ná cùú sã cúmãni núú tnáhá-ndó. <sup>3</sup>Te ío nducu ndèe-ndo cuu ñ<sup>n</sup>nuu-ndo cundecu-ndo, chi Espíritú Yã Ndiöxí chindee ñaha-xi xii-ndo, te duca<sup>n</sup> ío váha cuu iní-ndó cùndecu-ndo chi cùu ñ<sup>n</sup>nuu-ndo. <sup>4</sup>Te nchoo ñãyiú ndècu ichi Xítohó Jesucristú ñ<sup>n</sup>-ni cùu-o, te duca<sup>n</sup> ñ<sup>n</sup>-ni Espíritú Yã Ndiöxí ndécú, te diu-ni duca<sup>n</sup> ñ<sup>n</sup>-ni tnúhu ndee iní ní ngúndecu ndihi-o cùt-ñáhá ní càhá<sup>n</sup> ñáhá Yã Ndiöxí xii-o. <sup>5</sup>Te ñ<sup>n</sup>-ni Xítohó Jesucristú ndécú tàxi tnuni ñáhá-gã xii-o, te ñ<sup>n</sup>-ni cùu-o sandáá iní-ó tnúhu-gã, te ñ<sup>n</sup>-ni ñi sandute-o. <sup>6</sup>Te ñ<sup>n</sup>-ni Dútú Ndiöxí cùú Yàá cùú Tãtá-ó ncháa-o, te diu-gã cùnùu-gã yíndàha ñaha-gã xii-o ncháa-o. Te Yã Ndiöxí dácàhá<sup>n</sup>-gã iní-ó quide-o chiu<sup>n</sup>-gã, te duca<sup>n</sup> ndècu ndihi ñaha-gã xii-o ncháa-o.

<sup>7</sup>Te nchoo ndè díf<sup>n</sup> ndè díf<sup>n</sup> chindee ñaha Yã Ndiöxí xii-o quide-o nacuáa ndùu chiu<sup>n</sup> ní cachí Xítohó Jesucristú cada-o. <sup>8</sup>Te quèe ndáá-xi nacuáa càhá<sup>n</sup>-xi núú tütú Yã Ndiöxí núú càchí-xi:

Xítohó Jesucristú cuándaa-gá andiu te ío cùnuu-gá, chi nchaa cue espíritú cúu ũhú iní ñáhá xii-gá ñá túú ní ndàcu-xi naá ndihi ñaha-xi xii-gá, te mee-gá ní cachí-gá nàcuáa ndùu chiu<sup>n</sup> nduu táhú ì<sup>n</sup> ì<sup>n</sup> ñáyiú cadá-yu. Duha càchí-xi núú tùtú-gá.

<sup>9</sup>Te sá dúcá<sup>n</sup> càhá<sup>n</sup>-xi sá cuándaa-gá andiu xiá<sup>n</sup> cùtnùní iní-ó sã ní cuu<sup>n</sup>-gá ñuyúú-a. <sup>10</sup>Te Xítohó Jesucristú ní cuu<sup>n</sup>-gá ñuyúú-a, te diu-ni-gá cuándaa-gá andiu cuendá ío cunuu-gã taxi tnùní-gá nchaandi túhú sá ío. <sup>11</sup>Te ní dácãhũu-gá cue tée xinu cuechi núú-gã ì<sup>n</sup> ì<sup>n</sup> núú chiú<sup>n</sup> cada-güedé. Te ní cachí-gá sá dava-güedé cáhá<sup>n</sup>-güedé tnúhu-gá, te dava-güedé ní cachí-gá sá cãhá<sup>n</sup>-güedé nàcuáa dàcahu iní ñáhá Yã Ndiöxí xii-güedé. Te dava-güedé ní cachí-gá sá cúu-güedé cue tée datècú tnúhu cue ñáyiú nàcuáa cadá-yu naníhí tàhú-yu. Te dava-güedé ní cachí-gá sá cúu-güedé cue tée quindaha ñaha xii ñáyiú dacuàha ñaha-güedé xii-yu tnúhu-gá. <sup>12</sup>Te duca<sup>n</sup> ní cachí-gá cada cue tée-á<sup>n</sup> cuendá canu ichi-güedé cue ñáyiú cùu cuendá Yã Ndiöxí cuendá duca<sup>n</sup> ñáyiú-á<sup>n</sup> nihí-yu nàcuáa cadá-yu chiú<sup>n</sup>-gá, te duca<sup>n</sup> cuíta nihí ndéé-gã-yu cundecú-yu ichi Xítohó Jesucristú. <sup>13</sup>Te duca<sup>n</sup> ní cachí Xítohó Jesucristú cunduu ndéé sáá nduu cùu ì<sup>n</sup>nuu-o quindáá iní-ó tnũhu-gá, te duca<sup>n</sup> cùu ì<sup>n</sup>nuu-o tecú tnùní-ó nàcuáa ndùu cuendá-gá chi diu-gá cúu-gã Déhe Yã Ndiöxí, te cuu-o ñáyiú ío quide ndáá dàtná quidé mèe Xítohó Jesucristú. Te duca<sup>n</sup> te ñá túú tnàhí-gá ná cùmání-ó nũú Yã Ndiöxí. <sup>14</sup>Te duca<sup>n</sup> te vá cúu-gã-ó dàtná cue landú vátá cùtnùní váha-gá iní-xi, te ni vã cadá-gã-ó dàtná quidé ndùte lamár, chi ndute-á<sup>n</sup> óré quéné tãchí te cuáhá<sup>n</sup>-xi duha cuáhá<sup>n</sup>-xi dácá<sup>n</sup>, te duca<sup>n</sup> chi vá quindáá-gá iní-ó tnũhu càhá<sup>n</sup> nchaa ñáyiú dándahú ñáhá xii-o,

chi ñáyiú-á<sup>n</sup> ío váha xitó-yu nàcuáa dandáhú ñáhá-yu xii-o chi càchí-yu sá càhá<sup>n</sup>-yu tnúhu Yã Ndiöxí dico ñá ndáá. <sup>15</sup>Te nchoo ío cuu iní tnáhá-ó, te vá dándáhú tnáhá-ó, chi cáhá<sup>n</sup>-ó mèe-ni sá ndáá. Te xini ñuhu-xi sá ì<sup>n</sup> nduu ì<sup>n</sup> nduu cuíta cada ndáá-gã-ó quĩhí<sup>n</sup> dàtná quidé ndáá mèe-gã, te diu-ni-gá cúu-gã Yáá cùnũu cuu díhna tàxi tnuní ñáhá-gã xii-o. <sup>16</sup>Te diu-ni Xítohó Jesucristú quidé ñaha-gá xii nchaa nchoo ñáyiú ndècu ichi-gá dàtná yiqui cùnũ mèe-gã, chi ì<sup>n</sup> yiqui cùnũ ío váha ní queé tnàha ì<sup>n</sup> ì<sup>n</sup> xichi, te duca<sup>n</sup> yihí túchi yiqui cùnũ-ã<sup>n</sup> yótnĩ-xi nchaa nacuáa ní queé tnàha. Te duca<sup>n</sup> sãtnahá-xi cùu nchoo chi ì<sup>n</sup>-ni cùu-o ndecu-o ichi Xítohó Jesucristú táxi tnùní ñáhá-gã xii-o. Te núu nchoo quide-o nchaa nacuáa tàu-xi cunduu te cùu iní tnáhá-ó, te duca<sup>n</sup> ta nihí ndéé-gã-ó cuáhá<sup>n</sup> ndécú-ó ichi-gá.

**Vá cadá-gã-ó dàtná ní xóo  
cada-o cùtnàhá ní xindecu-o  
ichi cuehé ichi duha**

<sup>17</sup>Te vitna yúhú càhá<sup>n</sup>-í dóho-ndo quide-í núú Xítohó Jesucristú sá vã cùndècu-gã-ndó dàtná xindecu ñáyiú ñá túú sãndáá iní ñáhá xii Yã Ndiöxí, chi nchaa ñáyiú-á<sup>n</sup> ñà túú vèdana nãndfhi nchaa sá sání iní-yu. <sup>18</sup>Te ni ñà túú vèdana cùtnuní iní-yu nàcuáa ndùu tnúhu ndáá tnúhu Yã Ndiöxí. Te ñáyiú-á<sup>n</sup> ñà túú ndùu táhũ-yu cundecú-yu nàcuáa cuiní Yã Ndiöxí, chi ñá túú vèdana tècú tnùní-yu te duca<sup>n</sup> chi ío sàá iní-yu. <sup>19</sup>Te ñá túú tnàhí-gá ná sání iní-yu ndécú-yu ichi cuehé ichi duha, te ío cùdĩ iní-yu ndécú-yu ichi dĩ iní, te ñá dũú-ní xĩã<sup>n</sup> chi nãndi-gã nchaa sá cuehé sá dúhá quidé-yu ndécú-yu. <sup>20</sup>Dico tnúhu Xítohó Jesucristú sá ní sãndáá iní-ndó chi ñá túú dùca<sup>n</sup> sanu ichi ñaha-xi xii-ndo cada-ndo. <sup>21</sup>Te nchòhó ní cutnùní iní-ndó nàcuáa ndùu cuendá Xítohó Jesucristú, te dàcuaha-ndo tnúhu



ndáá ñi-ni tnúhu-gá nàcuáa ndècu-ndo ichi-gá. <sup>22</sup>Te vitna vá cání-gã iní-ndó càda-ndo datná ní xóo cada-ndo cút-nàhá ní xíndecu-ndo ìchi cuehé ichi duha, chi núu nchaa-ni sá cuèhé sá dúhá-ã<sup>n</sup> ná cùhu<sup>n</sup>-ni iní-ndó càda-ndo, te uu<sup>n</sup>-gá uu<sup>n</sup>-gá cuita dacuíta nihnu ñaha-xi xii-ndo quíhí<sup>n</sup>, chi núu nchaa-ni sá cuèhé sá dúhá-ã<sup>n</sup> ná cùhu<sup>n</sup>-ni iní-ndó te dàticá nuu ñaha-xi xii-ndo. <sup>23</sup>Te nchòhó, xini ñuhu-xi sá vã dúcá<sup>n</sup>-gã cani iní-ndó càda-ndo te tàù-ndó ndùu-ndo datná ì<sup>n</sup> ñáyiu ní cacu túu saa. <sup>24</sup>Te nduu iní-ndó dàtná cuíni méé Yã Ndiöxí cunduu, chi nduu-xi nàcuáa càa iní méé-gã, te duca<sup>n</sup> te cuu-ndo ñáyiu ío vãha cada ndáá, te cuu ndisa-ndo ñáyiu ñá túú tnàhí ná cumání cundecu núu-gã.

<sup>25</sup>Te cuèndá xíã<sup>n</sup> núu càhá<sup>n</sup>-í dóho-ndo sã nchòhó vá dácuandehnde-gá-ndó dàtná ní xóo cada-ndo, te mee-nã sá ndàá cáhá<sup>n</sup> ndìhi tnàha-ndo, chi ì<sup>n</sup>-ni cùu-o ndecu-o ichi Xítóhó Jesucristú.

<sup>26</sup>Te núu cùdée<sup>n</sup>-ndó te cada cuèndá-ndó sã vã cádá-ndó ì<sup>n</sup> cuèchi sá dúcá<sup>n</sup> cùdée<sup>n</sup>-ndó, te vá dúcá<sup>n</sup>-ní cùhu<sup>n</sup> iní-ndó tnúhu sàtú iní-á<sup>n</sup>. <sup>27</sup>Te vá dàñá-ndó mèe-ndo dandahú ñáhá sàcufhná xii-ndo.

<sup>28</sup>Te núu dava-ndo cùu-ndo ñadúhú te vá dúcá<sup>n</sup>-gã cada-ndo, chi nducu-nã-ndó ì<sup>n</sup> chiú<sup>n</sup> vãha cada-ndo nàcuáa duca<sup>n</sup> ñíhí-ndó sã chíndèe-ndo cue ñáyiu ndàhú ñáyiu ñá túú nã ndécú ndìhi.

<sup>29</sup>Te vá càhá<sup>n</sup>-gá-ndó nì ì<sup>n</sup> tnúhu cuèhé, chi mee-nã tnúhu vii tnúhu vãha càhá<sup>n</sup>-ndó nàcuáa duca<sup>n</sup> ngũnu ichi cue ñáyiu ndèdóho ñaha xii-ndo, te núu duca<sup>n</sup> na càda-ndo te cuu-xi sá vãha sá cúu-xí ñáyiu duca<sup>n</sup> ndèdóho ñaha xii-ndo-á<sup>n</sup>. <sup>30</sup>Te vá cádá-gã-ndó nì ì<sup>n</sup> sá ñà túú tàù-ndó càda-ndo cuèndá sá vã dándìhú-ndó iní Espiritú Yã Ndiöxí, chi ñi Espiritú-gá ndécú ndìhi-ndo, te xíã<sup>n</sup> cútñuní iní-ndó sã sàá nduu nàcuaca

ñaha-gá xii-ndo cùndecu-ndo ndìhi-gá ni caa ni quíhí<sup>n</sup>.

<sup>31</sup>Te vá dásatú-gá-ndó iní tnàha ñáyiu-ndo, te ni vã cúhú<sup>n</sup> iní-ndó tnúhu sàtú iní, te ni vã cùdée<sup>n</sup>-gã-ndó, te cuèi núu chítú núu tàcá vá càhá<sup>n</sup> cana-ndo cùcuèhé-ndó tnàha ñáyiu-ndo, te ni vã cuátnúhu-ndo tnaha ñáyiu-ndo, te ni vã cání cuèhé cani duha iní-ndó cuèndá tnàha ñáyiu-ndo. <sup>32</sup>Te cundàhú iní tnàhá-ndó, te cada tnàha-ndo sá vãha, te cada càhnu iní tnàhá-ndó núu ná cúu sã cúmãní núu tnàhá-ndó dàtná ní quide Yã Ndiöxí ní quide càhnu iní-gá nchaa yíca cuèchi-ndo sã cuèndá Xítóhó Jesucristú.

#### Nàcuáa tàù-xi cundecu nchaa ñáyiu cùu déhe Yã Ndiöxí

**5** Te nchòhó cúu-ndó ñáyiu ío cùu iní ñáhá Yã Ndiöxí, te ñi déhe-gá cúu-ndó núu xíã<sup>n</sup> xíní ñuhu-xi canchicú<sup>n</sup> nihnu-ndo càda-ndo datná quidé mèe-gá. <sup>2</sup>Te ío cuu iní tnàhá-ndó cùndecu-ndo datná cúu iní ñáhá Xítóhó Jesucristú xii-ndo, chi ñi-gá ní cachí-gá sá cùu-gá cuèndá nchaa cuèchi-o te ní xíhí-gá, te sá dúcá<sup>n</sup> nì xíhí-gá te ní cuu-gá dàtná ì<sup>n</sup> táhú sã cúu-xí Yã Ndiöxí, te ío vãha ní cuu iní Yã Ndiöxí sá dúcá<sup>n</sup> ní quide-gá.

<sup>3</sup>Te sá cuèndá sá nchòhó cúu-ndó ñáyiu cùu cuèndá Yã Ndiöxí núu xíã<sup>n</sup> nchaa nchòhó cue tée vá càhá<sup>n</sup> ndìhi-ndo ñáyiu ñíhí te núu ñá díú ñadìhí-ndó cúu-yu, te duca<sup>n</sup>-ni nchaa nchòhó cue ñáyiu ñíhí tucu vá càhá<sup>n</sup> ndìhi-ndo cue tée te núu ñá díú yì-ndo cuu-güedé, te ni vã cání tnàhí iní-ndó cùndecu-ndo ichi díí iní, te ni vã xíhó-ndó nì ì<sup>n</sup> sá ndécú ndìhi tnaha ñáyiu-ndo, te ni ì<sup>n</sup> nchaa xíã<sup>n</sup> vá cání iní-ndó càda-ndo, te ni vã cácu nèhe-ndo. <sup>4</sup>Te ni vã càhá<sup>n</sup>-ndó ì<sup>n</sup> tnúhu sá ni vã cúu cùndedóho ñáyiu, te ni vã càhá<sup>n</sup>-ndó ì<sup>n</sup> tnúhu cùtexínu, te ni dàva-gá nchaa tnúhu sá ñà túú vè-

dana nàndíhi vá càhá<sup>n</sup>-ndó, chi nchaa tnúhu-á<sup>n</sup> ñà túú tàù-xi cáhá<sup>n</sup>-ndó, te xìni ñuhu-xi sá vǎha-gá sá ndàcá<sup>n</sup> táhú-ndó nǔú Yǎ Ndiòxí cuendá nchaa sá vǎha quide-gá. <sup>5</sup>Te nchòhó sa xìni ndáá-ndó sǎ ncháá cue tée càhá<sup>n</sup> ndìhi ñáyiú dìhí te ñá díú ñàdihí-güedé cùu-yu, ndìhi cue ñáyiú dìhí càhá<sup>n</sup> ndìhi cue tée te ñá díú yǎ-yu cùu-güedé, nchaa ñáyiú-á<sup>n</sup> vǎ ndúú tǎhǔ-yu cundecú-yu núú ndécú Yǎ Ndiòxí ndìhi Xítóhó Jesucristú táxi tnùnì-gá. Te ni cue ñáyiú xǐndecu ichi díí ìní, te ni cue ñáyiú xìho nchaa sá ndécú ndìhi tnaha ñáyiú-xi vǎ ndúú tǎhǔ-yu cundecú-yu ndìhi-gá núú ndécú-gǎ táxi tnùnì-gá. Te tnúhu sá càchí-ó xìho-o nchaa sá ndécú ndìhi tnaha ñáyiú-o, ì<sup>n</sup>-ni cùu-xi ndìhi tnúhu sá càchí ñáyiú quide cahnú-yu nchaa sá càchí-yu cùu ndiòxí te ñá ndàá sá ndiòxí cúu-xí. <sup>6</sup>Te vǎ quèndáá ìní-ndó nì ì<sup>n</sup> tnúhu sá ñà túú nàndíhi càhá<sup>n</sup> ñáyiú, chi ñáyiú-á<sup>n</sup> ò dandòho ñaha Yǎ Ndiòxí xíi-yu cuendá nchaa sá cuèhé sá dúhá quidé-yu chi ñá túú sàndáá ìní ñáhǎ-yu xii-gá. <sup>7</sup>Núú xǎ<sup>n</sup> càhá<sup>n</sup>-í dóho-ndo sǎ vǎ ñìhí tnáhá-ndó ndìhi cue ñáyiú-á<sup>n</sup>.

<sup>8</sup>Te nchòhó ní cuu-ndo dàtná cue ñáyiú ní xǐndecu núú néé chi ní xǐndecu-ndo ìchi cuehé ichi duha, dico vitna ní ngúndecu-ndo ìchi Xítóhó Jesucristú, te ñá túú-gǎ ndécú-ndó nǔú néé dàtná ní xǐndecu-ndo ni cùu. Te vitna cada-ndo nchaa nacuáa tàù-xi cunduu chi ndècu-ndo ìchi-gá. <sup>9</sup>Te sá cuendá sá ndécú-ndó ìchi-gá nǔu xǎ<sup>n</sup> cúu-ndó ñáyiú váha, te quide ndáá-ndó ndècu-ndo, te ñá túú dàcuandehnde-ndo chi càhá<sup>n</sup>-ndó mèe-ni sá ndáá. <sup>10</sup>Te ío váha cada cuendá-ndó nchaa sá cúu vǎha ìní Xítóhó Jesucristú, te xǎ<sup>n</sup> cada-ndo. <sup>11</sup>Te vǎ cǎnchǐcú<sup>n</sup> nihnu-ndo tnáhá-ndó càda-ndo datná quidé cue ñáyiú ndècu ichi cuehé ichi duha, chi nchòhó tàù-ndó càhá<sup>n</sup>-ndó dóho nchaa ñáyiú duca<sup>n</sup> ndècu ichi cuehé ichi

duha-á<sup>n</sup> cuendá nchaa sá quidé-yu. <sup>12</sup>Te cucaha<sup>n</sup> núu-ndó vǎ càhá<sup>n</sup>-ndó cuendá ni ì<sup>n</sup> sá cuèhé sá dúhá quide dayuhu nchaa ñáyiú-á<sup>n</sup>. <sup>13</sup>Dico òré dándixi túu tnúhu Yǎ Ndiòxí ìní-yu nàcuáa quidé-yu te cùt-nuní ìní-yu sá ñǎ túú quide váha-yu, te duca<sup>n</sup> ndìxi cuechi ìní-yu cuendá nchaa sá cuèhé sá dúhá quidé-yu. <sup>14</sup>Te núú tǔtú Yǎ Ndiòxí càchí-xi:

Nchòhó cúu-ndó dàtná ñáyiú xidí, te vitna ndiquúú ìní-ndó,  
te cùu tucu-ndo datná ñáyiú ní xǐhí, te vitna ndoto-ndo,  
te Xítóhó Jesucristú chindee ñàha-gá xii-ndo nàcuáa vǎ cùndècu-gá-ndó ìchi cuehé ichi duha.

Duha càhá<sup>n</sup>-xi núú tǔtú-gá.

<sup>15</sup>Te ío váha cada cuendá-ndó nàcuáa cada-ndo cùndecu-ndo, te vǎ cáda-ndó dàtná xǐquide cue ñáyiú ñá túú tècú tnùnì, chi cada-ndo dàtná xǐquide ñáyiú ío váha sǎá díquí-xi. <sup>16</sup>Te ì<sup>n</sup> nduu ì<sup>n</sup> nduu cani ìní-ndó càda-ndo nchaa nacuáa tàù-xi cunduu, chi vitna ío cùnuu nchaa sá cuèhé sá dúhá. <sup>17</sup>Te cuu-ndo ñáyiú tècú tnùnì cuendá duca<sup>n</sup> cùt-nuní ìní-ndó nàcuáa cuìní Yǎ Ndiòxí cada-ndo, te vǎ cáda-ndó dàtná xǐquide cue ñáyiú ñá túú tnàhí cùtnuní ìní-xi nàcuáa cuìní Yǎ Ndiòxí cadá-yu. <sup>18</sup>Te vǎ cúu-ndó ñáyiú quihu chi núu duca<sup>n</sup> na càda-ndo te dàcuíta nihnu-ndo mèe-ndo, te dañà-ndo mèe-ndo sá Espírítú Yǎ Ndiòxí ná tàxi tnùnì ñáhá-xí xii-ndo. <sup>19</sup>Te càhá<sup>n</sup>-ndó nàcuáa-ni cuáhá<sup>n</sup> ndudú sá ñǎ xóo cata nchaa cue ñáyiú ndéé sanaha ñǎ xóo chiñuhu-yu Yǎ Ndiòxí. Te càhá<sup>n</sup>-ndó nàcuáa cuáhá<sup>n</sup> ndudú sá chíñuhu-ndo Yǎ Ndiòxí, te cata-ndo. Te cuèi nchaa dava-gá ndudú diu-ni duca<sup>n</sup> cǎhá<sup>n</sup>-ndó te cata-ndo. Te ni yùhu ni ìní-ndó càta-ndo nchaa ndudú-á<sup>n</sup> chiñuhu-ndo Yǎ Ndiòxí. <sup>20</sup>Te vǎ dǎñá ndèé-ndó ndàcá<sup>n</sup> táhú-ndó nǔú Tǎtá-ó Dǔtú Ndiòxí cuèi ndècu váha-ndo àdi ñá

túú ndècu váha-ndo. Te duca<sup>n</sup> càda-ndo chi ndècu ndìhi-ndo Xítóhó Jesucristú.

**Tàú-xi sá quíndáá iní tnáhá cuè ñáyiú ndècu ichi Xítóhó Jesucristú**

<sup>21</sup> Te nchòhó ñáyiú ndècu ichi Xítóhó Jesucristú tàú-xi sá quíndáá iní tnáhá-ndó, te duca<sup>n</sup> càda-ndo chi nèhe-ndo sá yíñùhu núú Yá Ndiòxí.

<sup>22</sup> Te nchaa nchòhó ñáyiú ìhí ndécú yíi-xi, xìni ñuhu-xi sá quíndáá iní-ndó yíi-ndo datná sàndáá iní-ndó Xítóhó Jesucristú. <sup>23</sup> Chi yíi-ndo tàxi tñuní ñáhá-güedě xii-ndo dàtná quidé Xítóhó Jesucristú táxi tñuní ñáhá-gä xii nchoo cuè ñáyiú ndècu ichi-gá. Te diu-gá cúú-gä Yaa ní dácäcu nihnu ñaha xii-o núú ùhú núú ndàhú, te cùu-o datná yiqui cùñú-gä. <sup>24</sup> Te dàtná quidé nchòo ñáyiú ndècu ichi Xítóhó Jesucristú sàndáá iní-ó tñii-o nchaa tñúhu càhá<sup>n</sup>-gä, duca<sup>n</sup> tàú-xi cada nchaa nchòhó ñáyiú ìhí quíndáá iní-ndó tñii-ndo nchaa tñúhu càhá<sup>n</sup> yíi-ndo.

<sup>25</sup> Te tnáhá nchaa nchòhó cue téé tucu tàú-xi sá ïo cuu iní-ndó ñàdìhí-ndó dàtná quidé Xítóhó Jesucristú cúú iní ñáhá-gä xii nchaa nchoo ñáyiú ndècu ichi-gä, chi mee-gä ní xíhí-gä sá cuèndá-ó sá cúú iní ñáhá-gä xii-o. <sup>26</sup> Te duca<sup>n</sup> ní quide-gä cuèndá sá ncháá ñáyiú vitna ngúndecu ichi-gä cuu yíñùhú-yu núú Yá Ndiòxí, te duca<sup>n</sup> ndàda ndoo ndada nine-gä iní-yu sá cuèndá sá quíndáá iní-yu tñúhu Yá Ndiòxí, te cuanduté-yu. <sup>27</sup> Te duca<sup>n</sup> ní quide-gä cuèndá sá ncháá ñáyiú na ngúndecu ichi-gä ïo váha cundecú-yu núú-gä, te duca<sup>n</sup> vǎ cúndècu-gä ni ìh<sup>n</sup> cuéchi-yu núú-gä, te ni ìh<sup>n</sup>-gä sá ñà túú-gä ná cumání-yu núú-gä chi ïo cundecu yíñùhú-yu. <sup>28</sup> Te sá dúcá<sup>n</sup> quide Xítóhó Jesucristú sá cúú-xí cuè ñáyiú ndècu ichi-gä, xíá<sup>n</sup> tàú-xi sá nchòhó cue téé xíndecu ñàdìhí-xi cuu iní-ndó ñàdìhí-ndó, te coto-ndö-yu dàtná xító-ndó yiqui cuñú

mée-ndó, te cada iní-ndó sá ncháá cuè téé ïo cùu iní ñàdìhí-xi cùu iní-güedé mée-güedé chi ìh<sup>n</sup>-nǎ cúú-yu. <sup>29</sup> Te nchoo sá naha-o sá ni ìh<sup>n</sup> ñáyiú ñá túú dàquee tíhú-yu yiqui cùñú-yu, chi da uu<sup>n</sup>-gä chíndèè-yu te xító-yu. Te diu-ni duca<sup>n</sup> quide Xítóhó Jesucristú ndìhi nchaa ñáyiú ndècu ichi-gä, <sup>30</sup> chi cùu-o datná yiqui cùñú mée-gä, te duca<sup>n</sup> chi ìh<sup>n</sup>-ni cùu-o ndìhi-gä. <sup>31</sup> Te tñúhu Yá Ndiòxí càchí-xi: “Sá cuèndá xíá<sup>n</sup> núu nchaa cue téé na nihí ñàdìhí-xi te ìh<sup>n</sup>-ná cada-güedé tǎtá-güedě ndìhi náná-güedě, te ñàdìhí-nǎ-güedé cuu cuu ndìhi-güedé, te duca<sup>n</sup> ìh<sup>n</sup>-ná cuu-güedé ndìhí-yu”, duha càchí-xi. <sup>32</sup> Te tñúhu-a cùu-xi ìh<sup>n</sup> tñúhu càhnu vihi, te duca<sup>n</sup> sǎ tnáhá-xi cùu Xítóhó Jesucristú ndìhi cue ñáyiú ndècu ichi-gä. <sup>33</sup> Te càhá<sup>n</sup>-ni tucu-í dóho nchaa nchòhó cue téé xíndecu ñàdìhí-xi sá ïo cuu iní-ndó ñàdìhí-ndó te coto-ndö-yu dàtná xító-ndó mée-ndo, te duca<sup>n</sup>-ni nchaa nchòhó ñáyiú ìhí tucu canehe-ndo sǎ yíñùhu núú yíi-ndo.

**6** Te nchaa nchòhó cue landú, quíndáá iní-ndó tǎtá-ndó ndìhi náná-ndó chi duca<sup>n</sup> cuíní Yá Ndiòxí cunduu, te diu duca<sup>n</sup> tnáhí tàú-xi cada-ndo. <sup>2</sup> Te Yá Ndiòxí ní cachí-gä sá canèhe-ndo sá yíñùhu núú tǎtá-ndó ndìhi núú náná-ndó. Te tñúhu-á<sup>n</sup> cúú-xí tñúhu cùnuu ní càhá<sup>n</sup>-gä cada cue ñáyiú cuèndá cada váha ñaha-gä xíi-yu. <sup>3</sup> Te ní cachí-gä sá núu duca<sup>n</sup> na càda-ndo te ïo váha cundecu-ndo, te duca<sup>n</sup> ïo naha cùdíi-ndo cùndecu-ndo ñuyíú-a.

<sup>4</sup> Te nchaa nchòhó cue téé cùu tǎtá, vá dásátú-ndó ìní cue déhe-ndo chi canu ichi-ndo-güèxi nacúáa tàú-xi cunduu, te dacuàha-ndo-güèxi nchaa tñúhu váha nàcúáa cuíní Yá Ndiòxí cunduu.

<sup>5</sup> Te nchaa nchòhó cue ñáyiú xìnu cuechi, quíndáá iní-ndó cuè ñáyiú dii chíu<sup>n</sup>-xi quide-ndo, te canehe-ndo sǎ yíñùhu núú-yu, te ïo váha cuu iní-ndó càda-ndo chíú<sup>n</sup>-yu, te duca<sup>n</sup> ni yuhu ni

iní-ndó càda-ndo. Te cada iní-ndó sã dâtná tnúhu sá chíú<sup>n</sup> Xítohó Jesucristú quidé-ndó. <sup>6</sup>Te dava ñáyiú xínu cuechi, mee-ni òré ndéhé ñáyiú dii chiú<sup>n</sup>-xi quidé-yu ío ndùcu ndéé-yu quide chiu<sup>n</sup> váha-yu cuendá cuiní-yu cudù-yu. Dico nchòhó vá dúcá<sup>n</sup> càda-ndo, chi cuéi ndècu ñáyiú dii chiú<sup>n</sup>-xi quide-ndo àdi ñá túú-yu dico cada chiu<sup>n</sup> váha-ni-ndo, te cada iní-ndó sã dâtná tnúhu sá chíú<sup>n</sup> Xítohó Jesucristú quidé-ndó, te cada-ndo nì yuhu nì iní-ndó nàcuáa cuiní Yá Ndiòxí cunduu. <sup>7</sup>Te ío váha cuu iní-ndó càda-ndo chiu<sup>n</sup>-á<sup>n</sup>, chi cada iní-ndó sã dâtná tnúhu sá chíú<sup>n</sup> Xítohó Jesucristú quidé-ndó te ñá díú chiú<sup>n</sup> cue ñáyiú ñuyíú-a. <sup>8</sup>Te nchòhó sa cùnnumí iní-ndó sã nàcuáa ndùu chiu<sup>n</sup> váha ní quide-ndo ì<sup>n</sup> ì<sup>n</sup>-ndo, te duca<sup>n</sup> cunduu sá táxí Xítohó Jesucristú nduu táhú-ndó cuéi cùu-ndo ñáyiú dàñá quéé núú chíú<sup>n</sup> pàtróó<sup>n</sup>-xi àdi cuu-ndo ñáyiú ñá túú tnàhí dàñá quee núú chíú<sup>n</sup> pàtróó<sup>n</sup>-xi.

<sup>9</sup>Te nchaa nchòhó ñáyiú xíndecu ndihi ñáyiú xínu cuechi, tnàhá-ndó tàú-ndó càda váha-ndo sã cúú-xí cue ñáyiú xínu cuechi núú-ndó, te vá cùndùu nínu iní-ndó núú-yu, te chí cuãha cuendá sá dfú-ní Xítohó Jesucristú Yaá ndécú àndiu taxi tnuní ñàhá-gã xii-ndo ndihí-yu, te sá cúú-xí mèe-gá chi ì<sup>n</sup>-ni cùu-ndo núú-gã, te ì<sup>n</sup>-ni càda ñaha-gã xii-ndo.

**Yá Ndiòxí chindèe-gá cue ñáyiú ndècu ichi-gá cuendá sá vã ndácú sàcuíhná nàa ndihi ñaha-xi xii-yu**

<sup>10</sup>Te vitna nchaa nchòhó ñáyiú ndècu ndihi-í ichi Xítohó Jesucristú càchí tnúhu-í xii-ndo sã ìo nducu-ndo nàcuáa cada-ndo ñhí ndéé-ndó cùu ì<sup>n</sup>nuu-ndo ndihi Xítohó Jesucristú, chi mee-gã ío càhnu cuu-gá, te chindee ñàha-gã xii-ndo. <sup>11</sup>Te diu-ni nchaa sá nì nduu táhú-ndó núú Yá Ndiòxí diu-ni nchaa xíá<sup>n</sup> cuhu<sup>n</sup> iní-ndó, chi

xíá<sup>n</sup> chindee ñàha-xi xii-ndo ñhí ndéé-ndó cùndecu-ndo cuendá sá vã dándàhú ñàhá sàcuíhná xii-ndo. <sup>12</sup>Chi nchoo ñà díú cuè ñáyiú ñuyíú-a nàa ndihi-o, chi ndihi cue espíritú cùndihi yucu ñávàha, te diu-ni nchaa espíritú-á<sup>n</sup> cùnùu-xi cuéi núú nínu quide-xi nchaa sá cuèhé sá dúhá, te diu-ni-xi cùnùu-xi ñuyíú-a sànu ichi-xi cue ñáyiú quidé-yu nchaa sá cuèhé sá dúhá. <sup>13</sup>Te ío cuhu<sup>n</sup> iní-ndó nchaa sá nì nduu táhú-ndó núú Yá Ndiòxí cuendá duca<sup>n</sup> ñhí ndéé-ndó cùndecu-ndo, te vá ndácú yùcu ñávàha ná cada ñaha-xi xii-ndo oré cuiní-xi coto ndéé ñàhá-xí. Te sàtá ná dàquee tñhú-ndó yùcu ñávàha te ñhí-ni cunduu-ndo cùndecu-ndo ichi Yá Ndiòxí. <sup>14</sup>Te duca<sup>n</sup> cùndecu-ni-ndo ichi Yá Ndiòxí cada-ndo dâtná xíquide cue sandàdú, chi cue téé-á<sup>n</sup> ìo ñhí xíndaa-güedé. Te càhá<sup>n</sup>-ndó mèe-ni tnúhu ndáá tnúhu Yá Ndiòxí, te cuu-ndo dâtná cue sandàdú cue téé ndàda tii xití-xi òré quíhí<sup>n</sup>-güedé nàa-güedé. Te duca<sup>n</sup> sàtnahá-xi cuu-ndo te núu na càhá<sup>n</sup>-ndó mèe-ni tnúhu ndáá tnúhu Yá Ndiòxí. Te cada ndáá-ndó cùndecu-ndo ichi-gá, te cuu-ndo dâtná cue sandàdú cue téé xixíhnu sá yídàhu ñaha xii-güedé òré nàa-güedé cuendá sá vã ñicuehé-güedé. Te duca<sup>n</sup> sàtnahá-xi cuu-ndo te núu na càda ndáá-ndó cùndecu-ndo ichi-gá. <sup>15</sup>Te cundecu túha-ndo càhá<sup>n</sup>-ndó tnúhu Xítohó Jesucristú, tnúhu sá càhá<sup>n</sup> nàcuáa cuu váha iní ñáyiú cundecú-yu, te cuu-ndo dâtná cue sandàdú cue téé ndíhu zapátú-xi quíhí<sup>n</sup>-güedé nàa-güedé. Te duca<sup>n</sup> sàtnahá-xi cuu-ndo te núu na cùndecu túha-ndo càhá<sup>n</sup>-ndó tnúhu Xítohó Jesucristú núú ñáyiú. <sup>16</sup>Te càchí tnúhu tucu-í xii-ndo sã ìo quíndáá iní-ndó Yá Ndiòxí cuendá sá vã ndácú sàcuíhná nã cada ñaha-xi xii-ndo, te duca<sup>n</sup> te cuu-ndo dâtná cue sandàdú cue téé xínehe vítú chínèe-güedé

sáquídáhu ñaha-xi xii-güedé cuendá sá vǎ cuicú<sup>n</sup>-güedé sá nchícú<sup>n</sup> ñuhú téé ñaha cue téé nàá ndìhi-güedé. Te duca<sup>n</sup> sǎtnahá-xi cuu-ndo te núu na quindáá iní-ndó Yǎ Ndiöxí. <sup>17</sup> Te ío cuhu<sup>n</sup> iní-ndó sǎ ñí naníhí tǎhú-ndó, te cuu-ndo dàtná cue sandàdú cue téé ñùhu mbelú cáxí<sup>n</sup>. Te duca<sup>n</sup> sǎtnahá-xi cuu-ndo te núu na cùhu<sup>n</sup> iní-ndó sǎ ñí naníhí tǎhú-ndó. Te ío cuhu<sup>n</sup> iní-ndó tnúhu Yǎ Ndiöxí, chí tnúhu-á<sup>n</sup> ñí taxi Espiritú-gá ndécú ndìhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machítí cuáhá<sup>n</sup>-güedé nàá-güedé. Te duca<sup>n</sup> sǎtnahá-xi cuu-ndo te núu na cùhu<sup>n</sup> iní-ndó tnúhu Yǎ Ndiöxí. <sup>18</sup> Te vǎ dǎná ndèé-ndó cǎhá<sup>n</sup> ndìhi-ndo Yǎ Ndiöxí nàcuáa chindee ñaha Espiritú-gá xii-ndo, te cáca<sup>n</sup> tǎhú-ndó núú-gǎ núu ná cuiní-ndó, te ío cundecu túha-ndo cǎhá<sup>n</sup> ndìhi-ndo-gǎ, te vǎ nátùhú iní-ndó cáca<sup>n</sup> tǎhú-ndó núú-gǎ cuendá nchaa dava-gá cue ñáyíu cùu cuendá-gǎ. <sup>19</sup> Te tnàhá cuendá-í cáca<sup>n</sup> tǎhú-ndó núú Yǎ Ndiöxí cuendá sǎ ná chindee ñaha-gá xii-í ñíhí-í tnúhu cáhá<sup>n</sup>-í òré cǎhá<sup>n</sup>-í tnúhu-gǎ, te duca<sup>n</sup> vǎ yùhú-í cáhá<sup>n</sup>-í nàcuáa ndùu tnúhu sǎ cǎhá<sup>n</sup> nàcuáa naníhí tǎhú-ó núú ñáyíu tnúhu sǎ vǎtá cùndèdóho-gǎ-yu. <sup>20</sup> Te Yǎ Ndiöxí ní cachí-gǎ sǎ yùhú cuu-í ñí<sup>n</sup> téé cada-í núú-gǎ cáhá<sup>n</sup>-í tnúhu-gǎ núú

ñáyíu, te diu cuendá tnúhu-á<sup>n</sup> yíhí-í vecaá vitna. Te ío cáca<sup>n</sup> tǎhú-ndó núú Yǎ Ndiöxí cuendá-í cuendá sǎ yùhú cuyíi-í ní yùhu ní iní-í cáhá<sup>n</sup>-í tnúhu-gǎ núú ñáyíu nàcuáa tǎu-xi cunduu.

### Tnúhu ndéé núú ñí ndìhi-ná

<sup>21</sup> Te té Tiquicú téé ío cùu iní-í ndécú ndìhi-o ichi Xítohó Jesucristú cúú-dě ñí<sup>n</sup> téé ío váha quide ndáá xínú cuèchi-dé núú Xítohó Jesucristú, téé-á<sup>n</sup> cachí tnúhu-dé xii-ndo nàcuáa cùu ndecu-í ndìhi nchaa nàcuáa quide-í cuendá duca<sup>n</sup> cùtnuní iní-ndó. <sup>22</sup> Te cuendá xíá<sup>n</sup> núu cuiní-í tendaha-í-dé quixi-dé núú ndécú-ndó cuendá cachí tnúhu-dé xii-ndo nchaa nàcuáa cùu ndecu-ndí iha, te duca<sup>n</sup> tǎxi-gǎ-dé tnúhu ndee ñí cundecu ndìhi-ndo.

<sup>23</sup> Te xicá<sup>n</sup> tǎhú-í núú Tǎtá-ó Dütú Ndiöxí ndìhi núú Xítohó Jesucristú sǎ ncháá nchòhó ñáyíu ndècu ndìhi-í ichi-gǎ sǎ òu-gǎ ná cáda te ío váha cuu iní-ndó cùndecu-ndo, te duca<sup>n</sup> ño cuu iní tnáhá-ndó, te ío quindáá iní-ndó-gǎ. <sup>24</sup> Te nchòhó ío cùu iní-ndó Xítohó Jesucristú, te ñá túú dàña ndéé-ndó cùu iní-ndó-gǎ. Te mee Yǎ Ndiöxí ío na chindee chítúu ñaha-gǎ xii-ndo. Te duca<sup>n</sup> na cunduu. Te ío chí cáda ndèe iní-ñá vitna.

## TUTÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU ÑUÚ FİLIPÚ

**Té Păblú cādũha-dé tutú quihí<sup>n</sup>  
ndaha ñáyiu quide ndáá xĩndecu ichi  
Xítóhó Jesucristú ndécú ñúú Filipú**

**1** Yúhú té Păblú ndihi té Timùteú cúu-ndĩ cue tée xĩnu cuechi núú Xítóhó Jesucristú, te tëndaha-ndĩ tutú-a véxi ndaha nchòhó cue tée yĩndaha nchaa ñáyiu ndècu ichi Xítóhó Jesucristú, ndihi cue tée chĩndee ñaha xii-ndo, ndihi nchaa dava-gá ñáyiu xĩquide ndáá ndécú ìchi-gá ñúú Filipú. <sup>2</sup>Te xicá<sup>n</sup> táhù-í núú Tătá-ó Dütú Ndiöxí ndihi núú Xítóhó Jesucristú sá ná chĩndee chitúu ñaha-gá xii-ndo, te duca<sup>n</sup> ndì nduú-gá ná cáda te ío váha cuu iní-ndó cùndecu-ndo.

**Té Păblú càhá<sup>n</sup> ndihi-dé Yă Ndiöxí  
cuendá nchaa ñáyiu ndècu ichi-gá**

<sup>3</sup>Te ndi tnahá òré ndácú iní ñáhà-í xii-ndo, te ndàcá<sup>n</sup> táhù-í núú Tătá-ó Dütú Ndiöxí sá ndécú-ndó ìchi-gá. <sup>4</sup>Te ndi tnahá òré duca<sup>n</sup> quide-í te ío cùdíf iní-í càhá<sup>n</sup> ndihi-í-gá cuendá-ndó. <sup>5</sup>Chi ndéé cùtnàhá ní sándáá iní-ndó-gă ní ngúíta-ndo tnahá-ndó quide váha-ndo ndècu-ndo cuendá sá quĩndáá iní ñáyiu tnúhu Xítóhó Jesucristú. <sup>6</sup>Te yúhú sàni ndáá iní-í sá Yă Ndiöxí Yaá ní quesaha chĩndee ñaha xii-ndo quide váha-ndo ndècu-ndo, te diu-ni-gá chĩndee ñaha-gá xii-ndo càda váha-ndo cùndecu-ndo ndéé ná sàá nduu quixi tucu Xítóhó Jesucristú. <sup>7</sup>Te duca<sup>n</sup> tnahí tàu-xi cani iní-í sá cúu-xí-ndó, chi ío cùu iní ñáhà-í xii-ndo. Te tnahá-ndó ò chĩndee chitúu ñaha Yă Ndiöxí xii-ndo ndècu-ndo, te diu-ni duca<sup>n</sup> chĩndee ñaha-gá xii-ndo tnahá-ndó cuèi vitna yìhi-í vecaá, te diu-ni duca<sup>n</sup> chĩndee ñaha-gá xii-í cuèi

òré cuáhà<sup>n</sup>-í núú cuè ñáyiu ñá túú tnahá iní tnúhu-gá, chi nihí-í tnúhu nàdanchocáva-í nũu ná tnúhu càhá<sup>n</sup>-yu cuendá-gá, te nchaa ñáyiu xáha<sup>n</sup>-í xii-yu sá tnúhu-gá cúu-xí tnúhu ndáá cuiti. <sup>8</sup>Te mee Yă Ndiöxí nahá ndáá-gá sá yúhú ío cùu iní ñáhà-í xii-ndo dàtná cúu iní ñáhá mèe Xítóhó Jesucristú xii-o. <sup>9</sup>Te xicá<sup>n</sup> táhù-í núú Yă Ndiöxí sá díú-gá ná chĩndee ñaha-gá xii-ndo te uu<sup>n</sup>-gá cuita cuu iní tnahá-gá-ndó quihí<sup>n</sup>, te duca<sup>n</sup> ò váha cuita cutnùnì iní-ndó nchàa nacuáa sàni iní-gá cada-ndo, te duca<sup>n</sup> ò váha cuita cutnùnì tucu iní-ndó nàcuáa cundecu-ndo. <sup>10</sup>Te duca<sup>n</sup> cùtnunì tucu iní-ndó nchàa sá ò-gá váha xini ñuhu-xi cada-ndo, te duca<sup>n</sup> te cuu-ndo ñáyiu cada mee-ni sá vâha, te duca<sup>n</sup> ñà túú tnahí ná cùmání-ndó nũu Yă Ndiöxí ndéé ná sàá nduu quixi tucu Xítóhó Jesucristú. <sup>11</sup>Te diu-ni Xítóhó Jesucristú chĩndee ñaha-gá xii-ndo càda-ni-ndo nchaa núú sá vâha nàcuáa cuinì Yă Ndiöxí. Te sá dúcá<sup>n</sup> ná càda-ndo te ío cada càhnu-ndo-gá, te nchaa dava-gá ñáyiu càhá<sup>n</sup> váha-yu cuendá-gá.

**Xítóhó Jesucristú ío cùnuu-gá  
ndécú ndihi-gá té Păblú**

<sup>12</sup>Te nchaa nchòhó ñáyiu ndècu ndihi-í ichi Xítóhó Jesucristú na càchi tnúhu-í xii-ndo sá úú<sup>n</sup>-gă tá xíté nuu tnúhu-gá vitna yìhi-í vecaá. <sup>13</sup>Te nchaa cue tée cùu sandadú xĩndecu vechi<sup>n</sup> núú ndécú tée cùnuu xini-güedé sá sá cuendá sá càhá<sup>n</sup>-í tnúhu Xítóhó Jesucristú duha yìhi-í vecaá, te diu-ni duca<sup>n</sup> sá xini nchaa dava-gá ñáyiu sá sá càhá<sup>n</sup>-í tnúhu-gá duha yìhi-í vecaá. <sup>14</sup>Te cuendá sá dúhá yìhi-í vecaá xĩ<sup>n</sup> ío-gá vâi ñáyiu ndècu ichi Yă Ndiöxí ta cùtnunì-gá iní-yu sá cúu-gă ì<sup>n</sup> Yaá ío quide ndáá, te uu<sup>n</sup>-gá tá cùyí<sup>n</sup>-yu càhá<sup>n</sup>-yu tnúhu-gá, te ñá túú tnahí-gá yúhú-yu càhá<sup>n</sup>-yu.

<sup>15</sup>Te na càchí-í tnúhu ndáá-í xii-ndo sá dàva ñáyiu càhá<sup>n</sup>-yu tnúhu Xítóhó

Jesucristú cuendá-ni sá cúú cuèdú iní ñáhã-yu xii-í sá ïo chindee ñaha-gá xii-í càhá<sup>n</sup>-í tnúhu-gá. Te duca<sup>n</sup> quidé-yu chi cuini-yu nãa ndihi ñahã-yu xii-í, dico davã-yu chi ïo váha sãni iní-yu càhá<sup>n</sup>-yu tnúhu-gá. <sup>16-17</sup> Te ñãyiú-ã<sup>n</sup> càhá<sup>n</sup>-yu tnúhu-gá chi cùu iní ñáhã-yu xii-í, te sa ñahã-yu sá sã cuendá sã càhá<sup>n</sup> váha-í cuendá tnúhu-gá núú ñãyiú ñã túú tnàhá iní tnúhu-gá, cuendá xiã<sup>n</sup> yfhi-í veçaá. Te ñava-gã-yu càhá<sup>n</sup>-yu tnúhu Xítohó Jesucristú cuendá-ni sá cuini-yu cuu sã váha xii mèe-yu, te ñã díú sã càhá<sup>n</sup>-yu cuendá sá sání váha iní-yu. Te duca<sup>n</sup> quidé-yu chi cuendá cuini-yu sã ñãndi-gã cada ñaha-güedé xii-í. <sup>18</sup> Dico ïo cùdíf iní-í sã càhá<sup>n</sup>-yu tnúhu Xítohó Jesucristú cuèi cùu váha iní-yu àdi ñã túú cùu váha iní-yu càhá<sup>n</sup>-yu.

Te ñiu-ni duca<sup>n</sup> cùdíf iní-í núú cuahã<sup>n</sup> núú véxi. <sup>19</sup> Te cùnuni iní-í sã sã cuendá nchaa sã quidé ñaha-güedé xii-í, cuendá xiã<sup>n</sup> cada váha ñaha Yã Ndiõxí xii-í, chi nchòhó ïo càhá<sup>n</sup> ndihi-ndo-gã cuendá-í, te Espíritú ní taxi Xítohó Jesucristú ndécú ndihi-o ïo chindee ñaha-xi xii-í. <sup>20</sup> Te cuini-í sã ñã túú tnàhí ná cumãni-í núú Yã Ndiõxí cuendá sã vã cúú càha<sup>n</sup> núú-í, te cùnuni iní-í sã díú-gã chindee ñaha-gá xii-í. Te cuini tucu-í sã ïo cuyii-í càhá<sup>n</sup>-í tnúhu-gá vitna ñãtná tá quide-í véxi, te duca<sup>n</sup> ïo cada nínu-í Xítohó Jesucristú cuèi vitna nini ndécú-í ñuyíú-a te cuèi na cùú-í duca<sup>n</sup>-ni càda nínu-í-gã. <sup>21</sup> Te nini ndécú-í ñuyíú-a te Xítohó Jesucristú ïo cùnuyu-gã ndécú ndihi ñaha-gá xii-í, te na sãã nduu cùú-í te ïo-gã váha tnahã-í chi nucúndecu-í ndihi-gã. <sup>22</sup> Te núú na cùndecu-gã-í ñuyíú-a te cada-gã-í chùu<sup>n</sup> sã cúú-xí Yã Ndiõxí, te ñã cùnuni iní-í nása cada-í nõu sã cùndecu-í àdi sã cùú-í. <sup>23</sup> Te ïo vãi sani iní-í te cuini-í cuú-í chi ïo-gã váha cundecu-í núú ndécú Xítohó Jesucristú. <sup>24</sup> Dico sã cúú-xí nchòhó chi ïo xini ñuhu-xi cundecu-í. <sup>25</sup> Te cùnuni ndãá

iní-í sã ñi<sup>n</sup> tnúhu ndãá càhá<sup>n</sup>-í, te cùnuni tucu iní-í sã cùndecu-ni-í cundecu ndihi ñaha-í xii-ndo nchãa-ndo cuendá chindee ñaha-í xii-ndo cuita quindãá-gã iní-ndo Xítohó Jesucristú quíhí<sup>n</sup>, te duca<sup>n</sup> ïo cudíf iní-ndo cùndecu-ndo. <sup>26</sup> Te duca<sup>n</sup> te uu<sup>n</sup>-gã cachí-ndó sã ïo càhu cuu Xítohó Jesucristú cuendá sã ní dácãcu ñaha-gã xii-í ndécú ndihi ñaha-í xii-ndo.

<sup>27</sup> Te xini ñuhu-xi cada-ndo nchaa nacuaã càhá<sup>n</sup> tnúhu Xítohó Jesucristú. Te núú ní ndacu-í véxi coto ñaha-í xii-ndo, te ñavã-ã<sup>n</sup> quini ndãá-í sã ndécú-ni-ndo ïchi Xítohó Jesucristú. Dico núú ñã túú ní ndacu-í quixi coto ñaha-í xii-ndo ñã, te ñiu-ni níhí-í tnúhu sã ndécú-ni-ndo ïchi-gã, te níhí tucu-í tnúhu sã ñi<sup>n</sup>-ní cùu-ndo ndecu-ndo, te níhí tucu-í tnúhu sã ñi<sup>n</sup>nuu nducu ndee-ndo cahã<sup>n</sup>-ndó tnúhu Yã Ndiõxí núú ñãyiú, tnúhu sã sãndãá iní-ndo. <sup>28</sup> Te ñã túú yùhú-ndó nchãa sã quidé ñaha ñãyiú cùu úhú iní ñahã xii-ndo, te sã dúcã<sup>n</sup> quide-ndo ñã túú yùhú-ndó nchãa sã quidé ñahã-yu xii-ndo, te ndixi túu iní-yu sã nchòhó ndécú-ndó ñi<sup>n</sup> ïchi núú nãnihí tàhú-ndó, te ñãyiú-ã<sup>n</sup> cuita nihnú-yu, chi duca<sup>n</sup> ní cachí Yã Ndiõxí cunduu. <sup>29</sup> Te mee Yã Ndiõxí ní taxi-gã tnúhu ndee iní sã quindãá iní-ó Xítohó Jesucristú, te ñã díú-ní sã quindãá iní-ó-gã chi tnàhá ndoho-o cuendã-gã. <sup>30</sup> Te tnàhá nchòhó ndóhó-ndó cuendã-gã vitna, te nchòhó ní xini núú-ndó nacuaã ní ndoho-í, te vitna níhí-ndó tnúhu nchãa nacuaã ndòho tucu-í.

**Xítohó Jesucristú ñã túú ní quide nínu-gã mée-gã dico Yã Ndiõxí ní quide nínu ñaha xii-gã**

**2** Te Xítohó Jesucristú dácãhu iní ñahã-gã xii-ndo nacuaã cundecu-ndo, te cùu iní ñahã-gã xii-ndo nacuaã cuu váha iní-ndo cùndecu-ndo,

te ndècu ndihi-ndo Espiritú Yă Ndiöxí, te ío cùndahú iní tnáhá-ndó. <sup>2</sup>Te xíă<sup>n</sup> nũu cãhá<sup>n</sup>-í dóho-ndo sã ïo cuu ì<sup>n</sup>nuu-ni-ndo cùndecu-ndo nacuáa ío-gá cudí iní-í, te ì<sup>n</sup>-ni cùu iní tnáhá-ndó, te ì<sup>n</sup>-ni càni iní-ndó, te ì<sup>n</sup>-ni càda-ndo. <sup>3</sup>Te vá cádá nĩnu-ndo mēe-ndo nducu-ndo mee-ni sá cúú-xí mēe-ndo, chi cunduu ndàhú iní-ndó, te caní iní-ndó sã tnàha ñáyiu-ndo ïo-gá cùnùú-yu dàcúúxí mēe-ndo. <sup>4</sup>Te ní vã cání iní-ndó ndùcu-ndo mee-ni sá vãha sá cúú-xí mēe-ndo, chi nducu-ndo sã cúú-xí tnàhá cuendá tnàha ñáyiu-ndo.

<sup>5</sup>Te ío váha caní iní-ndó nàcuáa cundecu-ndo dàtná quidé mēe Xítohó Jesucristú. <sup>6</sup>Te ì<sup>n</sup>-ni cùu Xítohó Jesucristú ndihi Yă Ndiöxí. Te cuèi duca<sup>n</sup> dico mee Xítohó Jesucristú ní sani iní-gá sá ñà túú cùyica cundecu-gá taxi tnùnì-gá ndihi Yă Ndiöxí. <sup>7</sup>Te ní dáñá-gã sá cùnùu-gá andiu te ní quixi-gá ñuyúú-a ní cuu-gá ì<sup>n</sup> ñáyiu, te ní quide-gá dàtná quidé ì<sup>n</sup> tée xinu cuechi. <sup>8</sup>Te ní cuu-gá ì<sup>n</sup> tée dàtná ndãa cue tée xĩndecu ñuyúú-a, te ní cuu-gá ì<sup>n</sup> tée ío ndàhú iní-xi chi ñà túú ní quide nĩnu-gá mēe-gã, te ní sãndáá iní-gá ní quide-gá nchaa nàcuáa ní xáha<sup>n</sup> Yă Ndiöxí xii-gá cùtnàhá ní quixi-gá ñuyúú-a. Te sá dúcá<sup>n</sup> nĩ sãndáá iní-gá xíă<sup>n</sup> ní xíhí-gá núú cùrúxí. <sup>9</sup>Te xíă<sup>n</sup> ío ní quide nĩnu ñaha Yă Ndiöxí xii Xítohó Jesucristú cuendá ío cunuu-gã. Te ní xáha<sup>n</sup> Yă Ndiöxí xii Xítohó Jesucristú sá cúú-gã Xítohó nchaa ñáyiu ndècu ñuyúú-a. <sup>10</sup>Te duca<sup>n</sup> nĩ quide Yă Ndiöxí cuendá nchaa Espiritú ndécú andiu, ndihi nchaa ñáyiu ndècu ñuyúú-a, ndihi nchaa ñáyiu ní xíhí ngüüñí xítí-yu ndihi nchaa espíritú-á<sup>n</sup> te cachí-yu ndihi-xi sá ïo càhnu cuu Xítohó Jesucristú. <sup>11</sup>Te nchaa-yu cachí-yu sá Xítohó Jesucristú cúú-gã Yaá táxí tnùnì. Te sá dúcá<sup>n</sup> càdá-yu, te quide cahnú-yu Dútú Ndiöxí.

**Ñáyiu ndècu ichi Xítohó Jesucristú cúú-yu dàtná ì<sup>n</sup> nũhu**

<sup>12</sup>Te xíă<sup>n</sup> nũu nchaa nchòhó ñáyiu ío cùu iní-í cuiní-í sá quèndáá iní ñáhá-ndó xii-í dàtná ní quide-ndo cùtnàhá ní xĩndecu ndihi ñaha-í xii-ndo, chi dàvá-á<sup>n</sup> ñà túú tnàhí ní dàña ndeé-ndó nì sãndáá iní ñáhá-ndó xii-í. Te cuiní-í sá úú<sup>n</sup>-gã quèndáá iní ñáhá-ndó xii-í vitna ñà túú ndècu ndihi ñaha-í xii-ndo. Te ío nducu ndèe-ndo cada-ndo nchaa nacuáa tàú-xi cunduu ndéé ná sàá nduu ndùu tãhú-ndó cùndecu-ndo ndihi Xítohó Jesucristú, te ío canehe-ndo sã yĩnũhu núú-gã. <sup>13</sup>Te Yă Ndiöxí ío váha dàcahu iní ñáhá-gã xii-ndo càda-ndo nchaa nacuáa cuiní mēe-gã, te diu-ni mee-gã chĩndèe ñaha-gã xii-ndo dùca<sup>n</sup> quide-ndo.

<sup>14</sup>Te vá cání iní-ndó nã tnúhu cãhá<sup>n</sup>-ndó cuendá ñáyiu, te ní ñà túú nãndi tnúhu cùtnàha-ndo ndihí-yu, <sup>15</sup>te duca<sup>n</sup> te cuu-ndo ñáyiu ñà túú cuèchi-xi núú Yă Ndiöxí. Te nchòhó ñáyiu cùu déhe Yă Ndiöxí, ñà túú tnàhí-gá ná cumání-ndó nũú-gã nini ndècu-ndo tnuú nchaa ñáyiu ndècu ichi cuehé ichi duha ñuyúú-a, ñáyiu cuihna iní-xi. Te cuu-ndo dàtná chódíní sã dáyèhé niú nee, <sup>16</sup>te duca<sup>n</sup> chi dàcuaha-ndo ñáyiu tnúhu Yă Ndiöxí tnúhu sá cãhá<sup>n</sup> nàcuáa nanhí tãhú-yu. Te núu duca<sup>n</sup>-ni na càda-ndo te òrè ná sàá nduu càda ndáá Xítohó Jesucristú nchaa yícá cuèchi ñáyiu, te dàvá-á<sup>n</sup> vã cúú càha<sup>n</sup> núú-í, chi ñà túú dió duca<sup>n</sup> ní sàhni iní-í cada-í nchaa chiú<sup>n</sup> ní tãhú-gã. <sup>17</sup>Te nchòhó ío váha quide-ndo ndecu-ndo ichi Yă Ndiöxí chi sãndáá iní-ndó-gã, te yúhú cahni ñaha-güedě xii-í cuendá nchaa sá vãha quide-ó. Te xíă<sup>n</sup> ío cùdĩ iní-í te cùdĩ tucu iní-í dàtná cùdĩ iní-ndó cuendá nchaa sá vãha quide-ndo. <sup>18</sup>Te diu-ni duca<sup>n</sup> ío chí cùdĩ iní dàtná cùdĩ iní mēe-í cuendá nchaa sá yãha-í ndécú-í.



**Té Timùteú ndihi té Epafròditú**

<sup>19</sup>Te núu Xítóhó Jesucristú ná cächí-gá te ndíhi-ni tendaha-í té Timùteú quixi-dé quixi coto ñaha-dě xii-ndo nàcuáa cudíí iní-ndó. Te òré ndixi-dé canaha-dě tnúhu ndixi núu nása cùu ndecu-ndo, te tnàhá yúhú ío cudíí iní-í tucu. <sup>20</sup>Te núu ncháá cuè téé ndècu ndihi-í te ì<sup>n</sup>dii-ni té Timùteú-a cùu-dé téé ío váha sàni iní-xi dàtná sání iní-í, chi diu tnàhí-ni-dé ío sàni iní-dé núu nása ndècu-ndo. <sup>21</sup>Chi dava-gá-güedé mee-ni sá cùú-xí mèe-güedé ío sàni iní-güedé, te ñá túú sàni iní-güedé cada-güedé chiù<sup>n</sup> tahu Xítóhó Jesucristú. <sup>22</sup>Te nchòhó sa xini-ndó sá tē Timùteú-a cùu-dé ì<sup>n</sup> téé quide váha chi nándi sá tá yàha-dé véxi te quide ndee iní-dé. Te cùu-dé dàtná ì<sup>n</sup> déhe-í ndécú ndíhi ñaha-dé xii-í xínú cuèchi-ndí núu Xítóhó Jesucristú cáhá<sup>n</sup>-ndí tnúhu-gá núu ñáyiu. <sup>23</sup>Te òré ná cùtnuní núu nása cada ñaha-güedě xii-í te ndíhi-ni tendaha-í-dé quixi coto ñaha-dě xii-ndo. <sup>24</sup>Te sàni iní-í sá Xítóhó Jesucristú cada-gá te tnàhá mèe-í ío ndíhi quixi coto ñaha-í xii-ndo. <sup>25</sup>Te tnàhá sání iní-í sá ío xini ñuhu-xi tendaha-í té Epafròditú téé ndècu ndíhi-o ichi Xítóhó Jesucristú ndixi coto ñaha-dě xii-ndo, chi tnàhá-dé quíde-dě chiù<sup>n</sup>-gá te quide ndee iní-dé tnàhá-dé nándi yàha-dé sá cuendá-gá, te diu mee-ndo ní tendaha-ndo-dě véxi-dé cuendá coto ñaha-dě xii-í. <sup>26</sup>Te duca<sup>n</sup> cuiní-í tendaha-í-dé ndixi-dé chi mee-dě ío sàni iní-dé ndixi cáhá<sup>n</sup> ndíhi ñaha-dě xii-ndo, te ío ndíhú iní-dé sá ni ñíhí-ndó tnúhu sá cùhú-dé ní cùu. <sup>27</sup>Te ndáá sá ní cuhú-dé chi luha ndiquí<sup>n</sup>-ná cuú-dé ní cùu, dico Yá Ndiòxí ní cundàhú iní ñáhá-gă xii-dé ní quide tátna ñaha-gă te ní ndúha-dé. Te ñá díú-ní mèe-dé duca<sup>n</sup> ni cundahú iní ñáhá-gă xii-dé chi tnàhá yúhú ío ní cundàhú iní

ñáhá-gă xii-í, chi núu ni xíhí-dé te ío-gá ndíhú iní-í ní cùu. <sup>28</sup>Te xíá<sup>n</sup> ío ndíhi cuiní-í tendaha-í-dé ndixi-dé cuendá òré nasáá-dé núu-ndó te ío cudíí iní-ndó, te duca<sup>n</sup> yúhú ñá túú-gă ná cani iní-í. <sup>29</sup>Te òré nasáá-dé te ío cudíí iní-ndó nàquehe<sup>n</sup> cuendá-ndó-dě, te duca<sup>n</sup> ío ndacá<sup>n</sup> táhú-ndó núu Xítóhó Jesucristú cuendá-dé. Te ío caneh-ndo sá yíñúhu núu ncháa cue téé quide datná quíde-dě. <sup>30</sup>Chi téé-a sa luha ndiquí<sup>n</sup>-ná cuú-dé ní cùu sá xínú cuèchi-dé núu Xítóhó Jesucristú, te ní sàni iní-dé sá ñá túú ná cada-xi cuèi na cùú-dé ní quide-dé nchaa chiù<sup>n</sup> sá cùmăní cada-ndo cuendá-í ní cùu.

**Ñáyiu cundáá núu Yă Ndiòxí**

**3** Te vitna nchaa nchòhó ñáyiu ndècu ndíhi-í ichi Xítóhó Jesucristú cáhá<sup>n</sup> ndàhú-í núu-ndó sá ío cudíí iní-ndó sá yíndàha ñaha-gá xii-ndo. Te yúhú ñá túú cùu dusa<sup>n</sup>-í tee tucu-í nchaa tnúhu sá sà ní dánhé ñáhà-í xii-ndo, chi cùu-xi tnúhu sá ío chindee ñaha-xi xii-ndo. <sup>2</sup>Te ío quíhi iní-ndó vă cadá cuendá-ndó ni ì<sup>n</sup> tnúhu cáhá<sup>n</sup> cue téé ío cuíhna iní-xi ñá túú tnàhí cuiní cada sá vâha, chi cue téé-á<sup>n</sup> néhé-güedě iní iná chi cächí-güedé sá ncháá cuè téé xini ñuhu-xi cuáha-güedé seňá ñíhí-güedé cuendá duca<sup>n</sup> cùdiu-güedé núu Yă Ndiòxí. <sup>3</sup>Dico nchoo chí cùdiu-o núu Yă Ndiòxí cuèi dava-o sà ní ngúndecu seňá ñíi-o te dava-o ñáhá, chi Espíritú-gá chíndèe ñaha-xi xii-o quide-o nchaa nacuáa tàú-xi cunduu cuendá cuu càhnu-gá. Te ío cudíí iní-ó cächí-ó sá ío cànnu cuu Xítóhó Jesucristú, te ñá túú sàni iní-ó sá sá cuendá nchaa sá vâha quide-o cùdiu-o núu Yă Ndiòxí. <sup>4</sup>Te núu dicó cuendá nchaa sá vâha quide-o cùdiu-o núu Yă Ndiòxí, te yúhú sa ama-gá cùdiu-í núu-gă cuendá nchaa sá ní quide-í ní cùu te núu dicó duca<sup>n</sup>. Te ío cue téé cächí-güedé sá

cùdiu-güedé núú Yă Ndiöxí cuendá nchaa sá vâha quide-güedé. Te yúhú uu<sup>n</sup>-gá duca<sup>n</sup> cǎhá<sup>n</sup>-í núu dicó sá cúú chi yúhú ní xídó-gǎ-í ní quide-í dâcúúxí dâva-gá-güedé. <sup>5</sup>Te núú úná-ni nduu sá ní cacu-í te ní sáha-güedé sèñá ñii-í, te yúhú cúú-í tée isràél, te mei ñàní tnàhá ndíi Benjàmín tée ní xíndecu ndéé sanaha cúu-í. Te cǎhá<sup>n</sup>-í tnúhu hèbreú tnúhu cǎhá<sup>n</sup> tǎtà-í ndíhi nǎnà-í, te ní cundihi-í nchaa cue tée cùu fariséú, te ní cǎnchicú<sup>n</sup> nihnu-í nchaa nàcuáa ní cǎhá<sup>n</sup> ndíi Moisés dàtná xíquide mee-güedé. <sup>6</sup>Te yúhú ní sani iní-í sá ñ<sup>n</sup> ichi ndáá ndécù-í ní cùu, te ío ní cuiní-í cunu cuechi-í núú Yă Ndiöxí, núu xǎ<sup>n</sup> nándi sá ní quide-í nchaa ñáyiu ndècu ichi Xítóhó Jesucristú, te vǎ yôo ñ<sup>n</sup> ni xóo cúñaha ñ<sup>n</sup> tnúhu xii-í cachí-yu sá ñà túú quide-í nàcuáa ní cǎhá<sup>n</sup> ndíi Moisés ní cùu. <sup>7</sup>Te nchaa sá sání iní-í sá ío nándíhi nchicú<sup>n</sup> nihnu-í ní cùu, ní cutnùní iní-í sá ñà túú tnàhí chindee ñaha-xi nacuáa cundáá-í núú Yă Ndiöxí, núu xǎ<sup>n</sup> duu<sup>n</sup> duu<sup>n</sup> ní xehndé iní-í sá vǎ chíndèe ñaha-xi cuendá sá ní cuiní-í cundecu ndíhi-í Xítóhó Jesucristú. <sup>8</sup>Te nchaa sá cǎchí ñáyiu chindee ñaha cundáá-ó núú Yă Ndiöxí ní cutnùní iní-í sá ñà túú chindee ñaha-xi. Te yúhú ní cutnùní iní-í sá ío-gá vâha tnahá tnúhu-o ndíhi Xítóhó Jesucristú. Te nchaa sá sání iní-í chíndèe ñaha xii-í ní cùu, ñà túú-gǎ sàndáá iní-í sá chíndèe ñaha-xi vitna chi ní cutnùní iní-í sá ñà túú nándíhi-xi. Te duca<sup>n</sup> quide-í ñà túú-gǎ sàndáá iní-í nchaa xǎ<sup>n</sup> sá chíndèe ñaha-xi, chi cuiní-í sá úú<sup>n</sup>-gǎ cuita tnahá tnúhu-í ndíhi Xítóhó Jesucristú quíh<sup>n</sup>, <sup>9</sup>te cuu ñ<sup>n</sup>nuu-í ndíhi-gá, te duca<sup>n</sup>-ni cundáá-í núú Yă Ndiöxí dàtná cundáá-í vitna, dico ñà dǎú cuendá sá nchicú<sup>n</sup> nihnu-í nàcuáa ní cǎhá<sup>n</sup> ndíi Moisés ní cùu, chi cuendá sá sàndáá iní-í Xítóhó Jesucristú. Te Yă Ndiöxí ní quide-gá cundáá-í núú-gǎ,

te duca<sup>n</sup> chi ní sàndáá iní-í Xítóhó Jesucristú. <sup>10</sup>Te cuiní-í cutnùní iní-í nchaa nàcuáa sàni iní Xítóhó Jesucristú, te cuiní-í sá ío chindee ñaha-gǎ, te diu-ni-gǎ cúú-gǎ Yáá ní xíhí te ní ndoto-gǎ, te duca<sup>n</sup> cuiní-í cada-gǎ cuendá cada-í nchaa nàcuáa cuiní-gǎ. Te cuiní-í tnàhá-í ndoho-í dàtná ní ndoho-gǎ. Te yúhú cuiní-í sá vǎ cǎdà-í ni ñ<sup>n</sup> sá ñà túú tnàhá iní Yă Ndiöxí, chi diu cuendá-á<sup>n</sup> ní xíhí Xítóhó Jesucristú. <sup>11</sup>Te cuiní-í sá Yă Ndiöxí cachí-gǎ te tnàhá-í ndoto na sàá nduu ndòto nchaa ñáyiu sa ní xíhí ní xíndecu ichi-gǎ.

#### **Cada-o nchaa nacuáa tàù-xi cunduu cuendá níhí-ó sá ndúú tǎhù-ó**

<sup>12</sup>Te cùmání-gǎ cada-í nchaa nàcuáa cǎhá<sup>n</sup>-í-a, te cumání-gǎ cada-í nchaa nàcuáa cǎhá<sup>n</sup> Yă Ndiöxí cuendá sá ñà túú-gǎ ná cumání-í núú-gǎ. Te ío ndùcu ndee-í nchicú<sup>n</sup> nihnu-í quidè-í nàcuáa duca<sup>n</sup> ñà túú-gǎ ná cumání-í núú-gǎ, chi diu cuendá-á<sup>n</sup> ní cǎhá<sup>n</sup> ñáhá Xítóhó Jesucristú xii-í. <sup>13</sup>Te nchaa nchòhò ñáyiu ndècu ndíhi-í ichi Xítóhó Jesucristú cǎchí tnúhu-í xii-ndo sǎ cùtnuní ndáá iní-í sá vítná cùmání-gǎ cada-í nchaa nàcuáa ñà túú-gǎ ná cumání-í núú-gǎ. Te ní níhí-í ñ<sup>n</sup> sá ío xini ñuhu-xi cada-í te xǎ<sup>n</sup> quidè-í, te ñà túú-gǎ quidé cuendá-í nchaa sá ní xóo cada-í, te ío ndùcu ndee-í quidè-í nchaa nàcuáa cǎhá<sup>n</sup> Yă Ndiöxí. <sup>14</sup>Te ndùcu ndee vihi-í nchicú<sup>n</sup> nihnu-í quidè-í nchaa nàcuáa cǎhá<sup>n</sup>-gǎ, te diu-ni duca<sup>n</sup> cǎdà-í ndéé ná sàá nduu sǎá-í núú ndécú-gǎ taxi-gǎ sá ndúú tǎhù-í. Te duca<sup>n</sup> tnàhí sa ní cǎhá<sup>n</sup> ñáhá-gǎ xii-o cundecu-o ndíhi-gǎ, te duca<sup>n</sup> ní cǎhá<sup>n</sup> ñáhá-gǎ xii-o sǎ cuendá Xítóhó Jesucristú chi tnàhá tnúhu-o ndíhi-gǎ.

<sup>15</sup>Te nchaa nchòhò ñáyiu quide vâha ndècu ichi Yă Ndiöxí xini ñuhu-xi cani iní-ndó dàtná sání iní-í-a, àdi núu dava-ndo ñà túú sàni iní-ndó dàtná sání iní-í-a, dico mee Yă Ndiöxí dandixi

túu-gá iní-ndó te cutnùní iní-ndó nàcuáa cada-ndo. <sup>16</sup>Te xini ñuhu-ni-xi cada-ndo nchaa nacuáa ta quide-o véxi.

<sup>17</sup>Te nchaa nchòhò ñáyiú ndècu ndìhi-í ichi Xítohó Jesucristú càhá<sup>n</sup>-í dóho-ndo sá cànchícú<sup>n</sup> nihnu-ndo càda-ndo datná quidè-í. Te cundehe-ndo nàcuáa quide nchaa ñáyiú sa nchìcú<sup>n</sup> nihnu nchaa nàcuáa dānehé ñàhà-í xii-ndo cuendá duca<sup>n</sup> càda-ndo tnahá-ndó. <sup>18</sup>Te sa ní cuu vāi xito cachí tñúhu-í xii-ndo sá ìò ñáyiú ñá túú tñàhí cùu váha iní-xi sá ñí xíhí Xítohó Jesucristú núú cùrúxí cuendá sá nánìhí tǎhú-ó. Te ndìhi ndute núú-í dándacu iní ñàhà-í xii-ndo cuendá-yu. <sup>19</sup>Te sáá nduu te nchaa ñáyiú duca<sup>n</sup> xíquide-á<sup>n</sup> cuíta nihnú-yu, chi mee-ni nchàa sá cuèhé sá dúhá ñùhu iní-yu te diu-ni nchaa xǎ<sup>n</sup> cúnùu quidè-yu, te cucaha<sup>n</sup> núú-yu cuendá nchaa sá quidè-yu núú dícó sá cúú, dico ñàhá chi da quide cahnú-yu mèé-yu cuendá nchaa xǎ<sup>n</sup>. Te mee-ni nchàa sá ìò ñuyúú-a ñùhu iní-yu. <sup>20</sup>Dico nchoo chi andiú ndècu núú cúú ñùú-ó, te ndètu cahnu-o sáá nduu quixi tucu Xítohó Jesucristú nacuaca ñaha-gǎ xii-o. Te diu-ni-gǎ cúú-gǎ Yaá ní dácacu nihnu ñaha xii-o núú ùhú núú ndàhú. <sup>21</sup>Te yiqui cùñú-ó chi vá cùdǐ-xi cundecu-xi dàtná cáá-xí vitna, dico mee Xítohó Jesucristú nadama-gǎ yiqui cùñú-ó te ndada-gǎ dàtná ní nduu yiqui cùñú mèé-gǎ cùtñàhá ní ndoto-gǎ. Te duca<sup>n</sup> càda-gǎ chi ndàcu-gǎ quidè-gǎ nchaa sá vǎha càhí iní-gǎ, te duca<sup>n</sup> tàxi tñuní-gǎ nchaandi túhú sá ìó.

**Ío cudǐ iní-ó sǎ ndécú-ó  
ichi Xítohó Jesucristú**

**4** Te nchaa nchòhò ñáyiú ío cùu iní-í ndécú ndìhi-í ichi Xítohó Jesucristú ío cuiní-í cáhá<sup>n</sup> ndìhi ñaha-í xii-ndo. Te ío cùdǐ iní-í cuendá nchaa sá vǎha quide-ndo chi ñá túú ní xíta chiú<sup>n</sup> Yá Ndióxi ní quide-í sá cúú-xí-ndó, te

diu-ni nchòhò ñáyiú ío cùu iní-í càhá<sup>n</sup>-í dóho-ndo sá cànchícú<sup>n</sup> nihnu-ni-ndo ichi Xítohó Jesucristú.

<sup>2</sup>Te yòhó tá Vòdiá ndìhi yòhó tá Sín-tiqué càhá<sup>n</sup> ndàhú-í núú-ndó sá cúú ñ<sup>n</sup>nuu-ndo cundecu-ndo ichi Xítohó Jesucristú. <sup>3</sup>Te yòhó té cùndìhi-í quide ndáá quidè nchaa chiú<sup>n</sup> quide-í, càhá<sup>n</sup> ndàhú-í núú-n sá chindèe tñúhu-n úú ñáyiú dǐh-á<sup>n</sup> cuendá sá ná cùu ñ<sup>n</sup>nuú-yu cundecú-yu, chi cùtñàhá ní xíndecu ndìhi ñàhá-yu xii-í ío ní chindee ñàhá-yu xii-í, ndìhi té Clémenté, ndìhi nchaa dava-gǎ-yu ní quide-ndí chiú<sup>n</sup> Xítohó Jesucristú, te nchaa ñáyiú-á<sup>n</sup> sa yòdo tñuní-yu núú tútú Yá Ndióxi sá ndúú tǎhú-yu cundecú-yu ndìhi-gǎ ní caa ní quǐhí<sup>n</sup>.

<sup>4</sup>Te nchaa-ni nduu ío cudǐ iní-ndó sá ndécú-ndó ichi Xítohó Jesucristú. ¡Te càhá<sup>n</sup>-ni tucu-í dóho-ndo sá cùdǐ ndisa iní-ndó! <sup>5</sup>Te ío váha cuu iní-ndó càhá<sup>n</sup> ndìhi-ndo ñáyiú cuendá ná cùt-nuní iní-yu sá cúú-ndó ñáyiú váha iní-xi, chi sa ta cùyatni nduu quixi tucu Xítohó Jesucristú.

<sup>6</sup>Te ñá túú tñàhí ná cani iní-ndó te núú nása cùu ndecu-ndo, chi cáhá<sup>n</sup> ndìhi-ndo Yá Ndióxi cuendá sá ná chindee ñaha-gǎ xii-ndo. Te ío ndacá<sup>n</sup> tǎhú-ndó núú-gǎ. <sup>7</sup>Te núú duca<sup>n</sup> na càda-ndo te Yá Ndióxi cada-gǎ te ío váha cuu iní-ndó cùndecu-ndo. Te nchoo ñáyiú ñá túú cùt-nuní iní-ó nása quide-gǎ ndéé duca<sup>n</sup> ìo váha cùu iní-ó, te duca<sup>n</sup> ìo váha cùu iní-ó chi cùu ñ<sup>n</sup>nuu-o ndìhi Xítohó Jesucristú.

**Mee-ni sǎ vǎha cuhu<sup>n</sup> iní-ó**

<sup>8</sup>Te càhá<sup>n</sup> ndàhú tucu-í núú nchàa nchohó ñáyiú ndècu ndìhi-í ichi Xítohó Jesucristú sá mèé-ní sǎ vǎha cuhu<sup>n</sup> iní-ndó. Te xini ñuhu-xi cuhu<sup>n</sup> iní-ndó mèe-ni nchaa tñúhu ndáá, ndìhi nchaa tñúhu yǐñùhu, ndìhi nchaa tñúhu sá ìo cudǐ iní-ó, ndìhi nchaa tñúhu sá ìo vii ío váha cuáhá<sup>n</sup>, ndìhi nchaa tñúhu sá

ñà túú ñùhu tnahá tnúhu cuèhé, ndihi nchaa tnúhu sá cèhí ñáyiú váha, ndihi nchaa dava-gá tnúhu sá sání iní mée-ndó sá ï váha te ðiu-ni nchaa xíǎ<sup>n</sup> cuhu<sup>n</sup> iní-ndó.

<sup>9</sup>Te cútnàhá ní xíndecu ndihi ñaha-í xii-ndo ní dánèhé ñàhà-í nàcuáa cada-ndo te ní sándáá iní-ndó. Te xíǎ<sup>n</sup> càhá<sup>n</sup>-í dóho-ndo sá vǎ dáñá ndèè-ndó càda-ndo, te ðiu-ni duca<sup>n</sup> vǎ dáñá ndèè-ndó càda-ndo nchaa nacuáa ní quide-í ní xíní-ndó. Te núu duca<sup>n</sup> na càda-ndo te Yá Ndiöxí Yaá quidé ïo váha cùu iní-ó ndècu-o cundecu ndihi ñaha-gá xii-ndo.

**Ñáyiú ñuú Filipú ndécú ichi Xítohó Jesucristú sǎñàhá-yu sá ndúú tǎhú tǎ Pǎblú**

<sup>10</sup>Te cùdǎí vǐhí iní-í ndàcá<sup>n</sup> tǎhù-í núú Xítohó Jesucristú sá ñí ndacu iní ñáhá-ndó xii-í, dico ñá ðfú sǎ ñà túú ñùhu iní ñáhá-ndó xii-í chi ðicó sá ñǎ ñihí-ndó nàcuáa cada-ndo chindee ñaha-ndo xii-í ní cùu. <sup>11</sup>Te ñá ðfú sǎ dúhá càhá<sup>n</sup>-í te caní iní-ndó sǎ cèhí tnúhu-í xii-ndo sǎ ìò ì<sup>n</sup> sá cùmǎní xii-í, chi yúhú cùu váha-ni iní-í ñùu ìò xii-í àðì ñá túú ìò. <sup>12</sup>Te xíní-í cunduú ndàhú-í, te xíní-í cunduú cuica-í, te xíní-í caxi-í ndahá xitǎ-í, te xíní-í cuú-í docó, te xíní-í nàcuáa quide-xi oré ñá túú vǎdana ná ndécú ndìhi-o, te xíní-í nàcuáa quide-xi oré xidó ndécú ndìhi-o. Te duca<sup>n</sup> ñí cutúha-í quidè-í cuendá nchaa nàcuáa ta yǎha-í véxi. <sup>13</sup>Te nchaa ndàcu-í quidè-í chi Xítohó Jesucristú chindèe ñaha-gá xii-í. <sup>14</sup>Te nchòhó ïo váha ní quide-ndo ñí cundàhú iní ñáhá-ndó xii-í ní chindee ñaha-ndo vitna ndecu ndìhi-í tnúndòho.

<sup>15</sup>Te nchòhó cue ñáyiú ñuú Filipú sa ñaha-ndo nacuáa ní cuu cútnàhá ní ñuúgǎ-í càhá<sup>n</sup>-í tnúhu Xítohó Jesucristú

distritú Macèdoniá, te cútnàhá ní ndee-í distritú-á<sup>n</sup> te ðiu tnahí-ni nchòhó ní taxi-ndo sǎ ndúú tǎhù-í, te nchaa ñáyiú ndècu ichi Xítohó Jesucristú dava-gá xichi ñá túú tnahí ní chindee ñahá-yu xii-í. <sup>16</sup>Te cuèi cútnàhá ní xíndecu-í ñuú Tesalónicá titní xito ní tendaha-ndo sǎ ndúú tǎhù-í sǎ ñí cutnùní iní mée-ndó ñí xini ñùhu-í. <sup>17</sup>Te vǎ caní iní-ndó sǎ sǎ dúhá càhá<sup>n</sup>-í te cuiní-í nándi-gá taxi tǎhú-ndó, te duha càhá<sup>n</sup>-í chi Yá Ndiöxí ïo-gá vǎi sǎ váha cada ñaha-gǎ xii-ndo sǎ dúcá<sup>n</sup> quide-ndo. <sup>18</sup>Te ní xidó vǎi nchaa sǎ xíní ñùhu-í ndécú ndìhi-í vitna, te duca<sup>n</sup> ïo vǎi sǎ ndécú ndìhi-í ní cuu chi ní tendaha tucu-ndo sǎ ndúú tǎhù-í véxi ndihi té Epafrodítú. Te tǎhú-a cùu-xi datná ì<sup>n</sup> tǎhú sǎ ñí sáha-ndo mée Yá Ndiöxí, te cùu vii cuu váha iní-gá sǎ dúcá<sup>n</sup> ñí quide-ndo. <sup>19</sup>Te núu ná cùú sǎ xíní ñùhu-ndo, te mee Yǎ Ndiöxí ïo vǎi taxi-gá chi ïo vǎi sǎ ndécú ndìhi-gá, te duca<sup>n</sup> càda-gá chi ndècu ndìhi-o Xítohó Jesucristú. <sup>20</sup>Te vitna nchaa-o chǐ ná cèhí-ó sǎ ïo càhnu cuu Tátá-ó Dütú Ndiöxí ñí caa ñí quǐh<sup>n</sup>. Te duca<sup>n</sup> na cunduú.

**Tnúhu ndée núú ñí ndìhi-ná**

<sup>21</sup>Te cúñaha-ndo sǎ ïo na càda ndee iní nchaa ñáyiú ndècu ichi Xítohó Jesucristú, ñáyiú cùu cuendá Yǎ Ndiöxí. Te tnahá nchaa ñáyiú xíndecu ichi Xítohó Jesucristú ndécú ndìhi-í quidé ndèe iní ñáhǎ-yu xii-ndo. <sup>22</sup>Te nchaa ñáyiú cùu cuendá Yǎ Ndiöxí xínú cuèchi vehe té Cèsár tée yǐndaha cuéhé nàció<sup>n</sup> quidé ndèe iní ñáhǎ-yu xii-ndo, ndihi nchaa dava-gá ñáyiú cùu cuendá-gá.

<sup>23</sup>Te Xítohó Jesucristú ïo na chindee chitúu ñaha-gǎ xii-ndo nchàa-ndo. Te duca<sup>n</sup> na cunduú. Te ïo chí cǎdá ndèe iní-ñǎ vitna.

## TUTÚ NÍ CADÚHA TĒ PĀBLÚ QUIHĪ<sup>n</sup> NDAHA ÑÁYIU NUÚ CÒLOSÁ

**Té Pāblú cādūha-dé tutú quihĪ<sup>n</sup>  
ndaha ñáyiū x̄ndecu ichi Xítohó  
Jesucristú ndécú ñúú Còlosá**

**1** Yúhú té Pāblú ní tendaha ñaha Yá Ndiõxí cāhá<sup>n</sup>-í tnúhu Xítohó Jesucristú núú ñáyiū chi duca<sup>n</sup> cuiní méé Yá Ndiõxí cunduu, te cādúha-í tutú-a ndihi té Timùteú <sup>2</sup>cuendá daquixi-í ndaha nchòhó ñáyiū ñúú Còlosá, ñáyiū cùu cuendá Yá Ndiõxí, ñáyiū quide ndáá ndécú ichi Xítohó Jesucristú, te xicá<sup>n</sup> táhù-í núú Tātá-ó Dütú Ndiõxí sá ïo na chindee chitúu ñaha-gá xii-ndo, te duca<sup>n</sup> ndì nduú-gá ná cādá te ïo váha cuu iní-ndó cùndecu-ndo.

**Té Pāblú cāhá<sup>n</sup> ndihi-dé Yá Ndiõxí  
cuendá ñáyiū sàndáá iní  
ñáhá x̄i Xítohó Jesucristú**

<sup>3</sup>Te duca<sup>n</sup>-ni cāhá<sup>n</sup> ndihi-ndí Yá Ndiõxí Yaá cúu Tātá Xítohó Jesucristú ndacá<sup>n</sup> táhù-ndí núú-gá cuendá nchaa nācuáa quide-ndo ndecu-ndo, <sup>4</sup>chi nihí-ndí tnúhu sá ïo sàndáá iní-ndó Xítohó Jesucristú, te duca<sup>n</sup> ïo cùu iní-ndó nchaa ñáyiū cùu cuendá Yá Ndiõxí. <sup>5</sup>Te duca<sup>n</sup> quide-ndo chi sàndáá iní-ndó sá ndúú táhù-ndó cùndecu-ndo núú ndécú Xítohó Jesucristú, te tnúhu-á<sup>n</sup> ní nihí-ndó cùtnàhá ní x̄indedóho-ndo tnúhu ndáá tnúhu Xítohó Jesucristú. <sup>6</sup>Te tnúhu Xítohó Jesucristú tá x̄ité nuu-xi nihí ñuyú cuáhá<sup>n</sup>. Te vai ñáyiū ta sàndáá iní-yu cuáhá<sup>n</sup>, te ta quidé-yu mee-ni sá vāha cuáhá<sup>n</sup> ndécū-yu ichi-gá. Te nchòhó chi ndéé cùtnàhá ní tecú dóho-ndo tnúhu-gá ní quesaha-xi ta cùu vai ñáyiū ñúú-ndó tá quide ndáá-yu núú-gá

cuáhá<sup>n</sup>. Te dàvá-á<sup>n</sup> ní cutnùní ndáá ndisa iní-ndó sá Yá Ndiõxí ïo chindee chitúu ñaha-gá xii-ndo. <sup>7</sup>Te duca<sup>n</sup> ní dánèhé ñáhá té Ēpafrás téé ïo cùu iní-ndí, chi tnàhá-dé ïo quide ndáá-dé x̄ínú cuèchi-dé núú Xítohó Jesucristú quidé-dé núú-ndí dācuàha ñaha-dé xii-ndo tnúhu-gá. <sup>8</sup>Te cāchí tnúhu-dé xii-ndí sá ïo cùu iní ñáhá-ndó x̄i-ndí, te duca<sup>n</sup> quide-ndo chi Espiritú Yá Ndiõxí ch̄indèe ñaha-xi xii-ndo.

<sup>9</sup>Te ndéé cùtnàhá ní nihí-ndí tnúhu nācuáa quide-ndo ndecu-ndo ndéé dàvá-á<sup>n</sup> ní ngúita-ndí ñá túú dàña ndee-ndí xicá<sup>n</sup> táhù-ndí núú Yá Ndiõxí cuendá-ndó sá Espiritú-gá ná tàxi-xi nchaa-gá sá cūmāni quiní tnùnī-ndó, te duca<sup>n</sup> te cutnùní váha-gá iní-ndó nācuáa cuiní Yá Ndiõxí cada-ndo. <sup>10</sup>Te sá dúcá<sup>n</sup> te ndacu-ndo cāda-ndo mee-ni sá vāha dàtná cuiní Xítohó Jesucristú cada nchaa ñáyiū ndècu ichi-gá. Te duca<sup>n</sup> ïo nduu vétú iní-gá te núu na cāda-ndo nchaa núú sá vāha. Te duca<sup>n</sup> ïo-gá cuita cutnùní iní-ndó nchaa nācuáa cuiní Yá Ndiõxí cada-ndo. <sup>11</sup>Te mee-gá cúu-gá Yaá ïo cùnūu, te diu-gá ïo chindee ñaha-gá xii-ndo, te cudí iní-ndó cuéi nāndi na cāda ñaha ñáyiū xii-ndo sá cuendá-gá, te duca<sup>n</sup> ïo cunduu cāhnu iní-ndó. <sup>12</sup>Te ndacá<sup>n</sup> táhù-ó núú Dütú Ndiõxí chi ní quide túha ñaha-gá xii-o cuendá nduu táhù-ó cùndecu-o ndihi nchaa dava-gá ñáyiū ȳndaha-gá x̄ndecu núú cāndò canine ñá túú tnàhi-gá ni ñi<sup>n</sup> cuèchi ïo. <sup>13</sup>Te diu-gá ní quide ní dāñá-ó nchaa ichi cuehé ichi duha núú táxi tnùnī yucu ñāvāha, te ní nachihi ñaha-gá xii-o ndàha Déhe-gá Yaá ïo cùu iní-gá. <sup>14</sup>Te Déhe-gá ní x̄ihí-gá cuendá sá nchóó cācu nihnu-o núú ùhú núú ndàhú, te ní quide cāhnu iní-gá nchaa sá cuèhé sá dúhá ní quide-o.

**Ñáyiú cùu ìì<sup>n</sup>nuu ndìhi Yá Ndiòxí  
cuèndá sá ñí xíhí Xítohó Jesucristú**

<sup>15</sup>Te Yá Ndiòxí cúú-gá Yaá vá cúú quíní-ó dico Xítohó Jesucristú chi ní quixi túu-gá ñuyúú-a, te ní quide-gá nchaa nàcuáa sàni iní-gá. Te dàtná-ni sàni iní-gá te duca<sup>n</sup> sàni iní Yá Ndiòxí, te Yaá-á<sup>n</sup> duca<sup>n</sup>-ni ndècu-gá ndéé cút-nàhá vátá ngáva-gá ñuyúú. <sup>16</sup>Te Xítohó Jesucristú ní quide-gá núú Yá Ndiòxí ní cadúha-gá nchaa sá íó andiu ndìhi nchaa sá íó ñuyúú-a, te ní cadúha-gá nchaa sá cúú quíní núú-ó cùndehe-o, ndìhi nchaa sá vá quíní tñàhí-o, ndìhi nchaa espíritú cùnù vihi xinu cuechi núú Yá Ndiòxí, ndìhi nchaa dava-gá espíritú xínú cuèchi. Te nchaa ní cadúha Xítohó Jesucristú chi duca<sup>n</sup> ñí cachí Yá Ndiòxí cunduu. Te duca<sup>n</sup> ñí cachí Yá Ndiòxí cunduu cuèndá nchaa cuu-xi mee-ni sá vâha sá cúú-xí Xítohó Jesucristú. <sup>17</sup>Te Xítohó Jesucristú duca<sup>n</sup>-ni ndècu-gá ndéé cút-nàhá vátá ngáva-gá ñuyúú-a, te diu núú ndáhá-gá cándòdo ñuyúú-a, ndìhi andiu, ndìhi nchaandi túhú sá íó. <sup>18</sup>Te diu Xítohó Jesucristú cùnù-gá yíndàha ñaha-gá xii nchaa nchoo ñáyiú ndècu ichi-gá, te diu-gá quídé-gá ndécú vâha-o núú-gá. Te núú ncháá ñáyiú ndoto diu-gá cúú-gá Yaá ío càhnu cuu sa ní ndoto, te sá dúcá<sup>n</sup> ñí ndoto-gá te xíá<sup>n</sup> cúú-gá Yaá ío tàxi tñuní nchaandi túhú sá íó ñuyúú-a ndìhi andiu. <sup>19</sup>Te duca<sup>n</sup> ío cùnù-gá táxi tñuní-gá chi ndáá sá ìì<sup>n</sup>-ni cuu-gá ndìhi Yá Ndiòxí. <sup>20</sup>Te Xítohó Jesucristú ní xíhí-gá núú cùrúxí, chi duca<sup>n</sup> ñí cuíní Yá Ndiòxí cunduu cuèndá sá vá yòo ìì<sup>n</sup>-gá cuu úhú iní ñáhá xii-gá cuèi ñáyiú xíndecu ñuyúú-a, te cuèi cue espíritú ndécú àndiu.

<sup>21</sup>Te nchòhó cút-nàhá vátá cùndècu-gá-ndó ìchi Xítohó Jesucristú ñá túú tñàhí ni xò cáhá<sup>n</sup> ndìhi-ndo-gá, chi mee-ni ñí xóo cuu úhú iní-ndó-gá, te mee-ni nchàa sá cuèhé sá dúhá ñí xóo

cunuu ñí xóo cada-ndo ni cùu, dico Xítohó Jesucristú ní quide-gá ní tñahá tñúhu-ndo ndìhi Yá Ndiòxí vitna. <sup>22</sup>Chi diu cuèndá-á<sup>n</sup> ñí xíhí Xítohó Jesucristú núú cùrúxí cuèndá sá nchóo ndùu ndoo nduu nine iní-ó ngündecu-o núú Yá Ndiòxí, te duca<sup>n</sup> te ñá túú tñàhí-gá ná cumání-ó núú-gá, te vá yòo ìì<sup>n</sup>-gá cachí sá nchóo ndècu cuèchi-o. <sup>23</sup>Te núú vá dàhá ndèé-ndó quíndáá iní-ndó Xítohó Jesucristú, te cundecu-ni-ndo ìchi-gá, te vá cání iní-ndó dàña-ndo tñúhu ndee ìní ní taxi-gá ndécú ndìhi-o. Te nchaa tñúhu-gá-á<sup>n</sup> tá xíté nuu-xi nihií ñuyúú cuáhá<sup>n</sup>, te diu-ni tñúhu-á<sup>n</sup> càhá<sup>n</sup> yúhú té Pàblú dánèhé-í ñáyiú.

**Té Pàblú yíhí díquí-dě cáhá<sup>n</sup>-dé  
tñúhu Xítohó Jesucristú núú  
ñáyiú ndècu ichi-gá**

<sup>24</sup>Te vitna ío cùdíí ìní-í ndóhò-í cuèndá-ndó, chi Xítohó Jesucristú ío ní ndoho-gá cuèndá-ó, te tñàhá yúhú ndóhò-í cuèndá nchaa ñáyiú ndècu ichi-gá, dico vitna cùmání-gá ndoho-í cuèndá-yu. <sup>25</sup>Te Yá Ndiòxí ní cachí-gá sá yúhú quíhi díquí ñáhá-í xii nchaa nchòhó ñáyiú ndècu ichi-gá cuèndá danèhé ñáhá vâha-í xii-ndo tñúhu-gá cuèndá cuu-xi sá vâha sá cúú-xí-ndó. <sup>26</sup>Te nchaa tñúhu sá dánèhé ñáhà-í xii-ndo ñà túú ní tècú dóho nchaa ñáyiú ní xíndecu ndéé sanaha, te mee-gá ní cuíní-gá sá ncháá nchò ñáyiú yíndaha-gá vitna cundecu ndìhi-o tñúhu-á<sup>n</sup>. <sup>27</sup>Te mee-gá ní cachí-gá sá dátúu-gá nchaa tñúhu sá ío vii ío vâha cuáhá<sup>n</sup> núú nchàa ñáyiú yíndaha-gá. Te tñúhu-á<sup>n</sup> cúú-xí cuèndá tñàhá nchaa nchòhó ñáyiú ñá túú cùu ñáyiú isràèl. Te tñúhu-á<sup>n</sup> dánèhé ñáhá-xí xii-ndo sá Xítohó Jesucristú ndécú ndìhi ñaha-gá xii-ndo. Te cuèndá xíá<sup>n</sup> ní ngündecu ndìhi-ndo tñúhu ndee ìní cundecu-ndo ndìhi-gá ni caa ni quíhí<sup>n</sup>.

<sup>28</sup>Te nchúhú mee-ni cuendá Xítohó Jesucristú cãhá<sup>n</sup> váha-ndí, te däsahú-ndí ñáyiú nãcuáa cadá-yu. Te váha vihi danehé-ndí nchaa ñáyiú nãcuáa tecú tnùní-yu tnúhu-gá, te duca<sup>n</sup> dānehé-ndí-yu nãcuáa cundáá-yu núú Yã Ndiöxí, te duca<sup>n</sup> chi tnáhá tnúhu-yu ndihi Xítohó Jesucristú. <sup>29</sup>Te cuendá xíã<sup>n</sup> ío ndücu ndee-í quidè-í chiú<sup>n</sup> Xítohó Jesucristú, te mee-gã ío chindee ñaha-gã xii-í núu xíã<sup>n</sup> ndácü-í quidè-í chiú<sup>n</sup>-gã.

**2** Te cuiní-í sá nchòhó cutnùní iní-ndó sã ïo sàni iní-í cuendá-ndó, ndihi cuendá nchaa ñáyiú ndècu ñuú Laodiceá, ñáyiú xindecu ichi Xítohó Jesucristú. Te duca<sup>n</sup>-ni ïo sàni iní-í cuendá nchaa ñáyiú vátá quiní ñáhá-gã xii-í. <sup>2</sup>Te cuiní-í sá nchòhó ndihi nchaa ñáyiú-ã<sup>n</sup> ío nducu ndèe-ndo canchicú<sup>n</sup> nihnu-ndo ìchi Xítohó Jesucristú, te ío cuu iní tnáhá-ndó, te duca<sup>n</sup> cùu ì<sup>n</sup>nuu-ndo cundecu-ndo. Te cuiní-í sá nchòhó ndihi dava-gã ñáyiú-ã<sup>n</sup> ío váha sáá sá xiní tnùní-ndó cuendá tecú tnùní-ndó nchaa nacuáa ndüu cuendá Xítohó Jesucristú chi ío ndüu yuhu ni cuu, dico vitna ní dátüu-gã núú-ó. <sup>3</sup>Te Xítohó Jesucristú néhé váha-gã nchaa tnúhu sá ïo xiní ñuhu-xi tecú tnùní-ó. <sup>4</sup>Te duha cãhá<sup>n</sup>-í chi cuiní-í sá vã quindáá iní-ndó ni ì<sup>n</sup> tnúhu cãhá<sup>n</sup> nchaa ñáyiú cuiní dandàhú ñáhá xii-ndo cuéi ío váha cãhá<sup>n</sup>-yu. <sup>5</sup>Te cuéi ñá túú ndècu ndihi ñaha-í xii-ndo dico duca<sup>n</sup>-ni ïo ñuhu iní ñáhà-í, te ío cùdí ìní-í chi nihí-í tnúhu sá ïo cùu ì<sup>n</sup>nuu-ndo ndecu-ndo, te ñá túú dàña ndeé-ndó sãndáá iní-ndó Xítohó Jesucristú.

<sup>6</sup>Te dàtná-ni ní sãndáá iní-ndó Xítohó Jesucristú, te duca<sup>n</sup>-ni quindáá iní-ndó-gã canchicú<sup>n</sup> nihnu-ndo ìchi-gã. <sup>7</sup>Te ni yühu ni iní-ndó cãchicú<sup>n</sup> nihnu-ndo ìchi-gã, te duca<sup>n</sup> cuíta cutnùní-gã iní-ndó nchaa nacuáa cãhá<sup>n</sup>-gã quíhí<sup>n</sup>. Te vá dãná ndèc

tnáhí-ndo quindáá iní-ndó nchaa tnúhu sá ni dānehé ñáhá cuè téé cãhá<sup>n</sup> tnúhu-gã xii-ndo. Te xiní ñuhu-xi ndacá<sup>n</sup> táhú vihi-ndo núú Yã Ndiöxí cuendá nchaa tnúhu-ã<sup>n</sup>.

### **Ñáyiú ío váha tnáhá tnúhu ndihi Xítohó Jesucristú**

<sup>8</sup>Te ío quíhi iní-ndó cundecu-ndo chi xica cuu ñáyiú cuiní dandàhú ñáhá xii-ndo, te ñáyiú-ã<sup>n</sup> cãhá<sup>n</sup>-yu mee-ni nchaa tnúhu ní cahu iní nchaa cue téé ñuyíú-a, te nchaa tnúhu-ã<sup>n</sup> ñã túú vè-dana nandíhi-xi. Te duca<sup>n</sup> quidè-yu chi nchicú<sup>n</sup> nihnu-ní-yu nchaa nãcuáa ní xóo cada ñáyiú ní xindecu ndéé sanaha. Te cãhá<sup>n</sup>-yu nãcuáa sàni iní yucu ñävãha, te ñá túú cãhá<sup>n</sup>-yu nãcuáa cuiní méé Xítohó Jesucristú.

<sup>9</sup>Te Xítohó Jesucristú cúu-gã ì<sup>n</sup> ñáyiú dico ì<sup>n</sup>-ni cùu-gã ndihi Dútú Ndiöxí. <sup>10</sup>Te nchòhó chi ñá túú tnáhí-gã ná cúmãní-ndó núú-gã chi ndècu ndihi-ndo Xítohó Jesucristú. Te ío cùnūu-gã te tàxi tnùní-gã nchaa núú cuè espíritú cùnūu. <sup>11</sup>Te mee-gã ní ndada ndoo ní ndada nine-gã iní-ndó chi ní ngún-decu ndihi-ndo-gã te duca<sup>n</sup> ñã túú-gã ndécú-ndó ìchi cuehé ichi duha, te cada iní-ndó sã ni ngún-decu ndihi-ndo ì<sup>n</sup> seña, chi ní ndada ndoo ní ndada nine-gã iní-ndó, dico ñá díú ì<sup>n</sup>-ni cuu-xi ndihi seña sá sãha cue téé isràél ñii-güedé. <sup>12</sup>Te nchòhó sa ní sandute-ndo te cada iní-ndó sã dàtná tnúhu sá ni xihí-ndó ndihi Xítohó Jesucristú, te ní nguindüxi-ndo ndihi-gã, te ní ndoto-ndo ndihi-gã, te duca<sup>n</sup> càda iní-ndó chi ñá túú-gã ndécú-ndó ìchi cuehé ichi duha. Te duca<sup>n</sup> chi sãndáá iní-ndó nchaa nacuáa quide Yã Ndiöxí, te diu-gã ní dándótó-gã Xítohó Jesucristú. <sup>13</sup>Te nchòhó cùtnáhá ndécú-ndó ìchi cuehé ichi duha cùu-ndo datná ñáyiú ní xihí, chi ñá túú tnáhá tnúhu-ndo ndihi Yã Ndiöxí ní cùu, te ni ñã díú ñáyiú is-

ràel cúu-ndó. Te Yá Ndiöxí ní cachí-gá sá nchóó ío váha tnahá tnúhu-o ndíhi Xítóhó Jesucristú vitna. Te duca<sup>n</sup> ní quide-gá chi sa ní quide cànno iní-gá nchaa sá cuèhé sá dúhá ní xóo cada-o. <sup>14</sup>Te vitna duu<sup>n</sup> duu<sup>n</sup> ñá túú-gá cuéchi-o ndècu núú-gá. Te nchoo ñà túú cuiní-ó càda-o nacuaá càhá<sup>n</sup>-gá, te cuèdá xíá<sup>n</sup> ío ndècuéchi-o, te vài nacháhu-o núú-gá ní cùu. Te vitna ñá túú-gá ni ì<sup>n</sup> cuéchi-o ndècu núú-gá, chi diu cuèdá-á<sup>n</sup> ní xíhí Xítóhó Jesucristú núú cùrúxí. <sup>15</sup>Te sá dúcá<sup>n</sup> ní xíhí Xítóhó Jesucristú núú cùrúxí, te duu<sup>n</sup> duu<sup>n</sup> ní dáquée tíhú-gá sácufhná ndíhi nchaa espíritú cúndíhi-xi, te ní quendóo canúú-xi, te mee-gá ío cùnno-gá táxí tnúní-gá.

#### Nanducu nihnu-o mee-ni sá vaha cächí Xítóhó Jesucristú

<sup>16</sup>Te núu dava ñáyiú xícuehé ñáhá-yu xii-ndo cuèdá sá ñà túú xèxi-ndo xíhi-ndo datná quidé mèe-yu te vá cáda cuèdá-ndó, te ni vâ cáda cuèdá-ndó te núu xícuehé ñáhá-yu xii-ndo cuèdá sá ñà túú cãnehe íí-ndó vico quide meé-yu núú cuiá núú cuiá, ndíhi vico quidé-yu ndi tnahá yóó, ndíhi cuèdá sá ñà túú cãnehe íí-ndó ndúu ndetatú-yu. <sup>17</sup>Te nacuaá quidé-yu ndi tnahá òré quidé-yu nchaa vico-á<sup>n</sup>, ndíhi nacuaá quidé-yu ndi tnahá nchaa nduu cãnehe íí-yu-á<sup>n</sup>, te cada iní-ó sã sã quidé-yu-á<sup>n</sup> dãnèhé núú ñáhá-xí nacuaá cada Xítóhó Jesucristú núú cuhá<sup>n</sup> núú vèxi. <sup>18</sup>Te vá quindáá iní-ndó ni ì<sup>n</sup> tnúhu càhá<sup>n</sup> ñáyiú cächí sá cuíta nihnu-ndo cuèdá sá ñà túú tnèi-ndo tnúhu càhá<sup>n</sup>-yu, chi cächí-yu sá ío xini ñuhu-xi cada cahnu-o nchaa cue espíritú xínú cuèchi núú Yá Ndiöxí, te ni yùhu ni iní-ó cãnehe-o sá yíñùhu núú-xi. Te ñáyiú-á<sup>n</sup> cächí-yu sá ndàá càhá<sup>n</sup>-yu chi dàcoto ñaha saní-yu nacuaá cáhá<sup>n</sup>-yu, te ío quide cahnú-yu mèe-yu cuèdá nchaa sá saní ìní mèe-yu quidé-yu, te ñà túú vè-

dana nândíhi nchaa sá quidé-yu. <sup>19</sup>Te nchaa ñáyiú duca<sup>n</sup> xíquide-á<sup>n</sup> ñà túú tnàhá tnúhu-yu ndíhi Xítóhó Jesucristú. Te mee-gá cúú-gá Yáá cúnno taxi tnuní ñáhá-gá xii nchaa nchoo ñáyiú ndècu ichi-gá, te chindee ñaha-gá xii-o ndècu-o ichi-gá, te mee-gá quidé-gá cúú ì<sup>n</sup>nuu-o ndecu-o, te ta quide-o nchaa nacuaá cuiní Yá Ndiöxí cuhá<sup>n</sup>.

<sup>20</sup>Te nchòhó cúú-ndó dàtná ñáyiú ní xíhí ndíhi Xítóhó Jesucristú cuèdá sá vâ cãncìcú<sup>n</sup> nihnu-gá-ndó nacuaá càhá<sup>n</sup> ñáyiú ñà túú ndècu ichi-gá. Te núu duca<sup>n</sup> ña, ζte ná cuèdá tníí-ní-ndó tnúhu càhá<sup>n</sup> ñáyiú-á<sup>n</sup> te quide-ni-ndo datná quidé-yu? <sup>21</sup>Chi ñáyiú-á<sup>n</sup> cächí-yu sá ío sá ni vâ cúú tèe ndaha-o, te dava ni vâ cúú càxi-o, te dava ni vâ cúú tnèi-o. <sup>22</sup>Te nchaa xíá<sup>n</sup>, núú nèhé chiú<sup>n</sup>-ni-o ndíhi nihnu-xi. Te nchaa sá dúcá<sup>n</sup> càhá<sup>n</sup>-yu-á<sup>n</sup> cúú-xí mèe-ni sá ní cahu iní mèe nchaa ñáyiú ñuyúú-a nacuaá cada-yu cundecú-yu. <sup>23</sup>Te nchaa tnúhu càhá<sup>n</sup>-yu-á<sup>n</sup> sánno sá cúú-xí ì<sup>n</sup> tnúhu càhá<sup>n</sup> ì<sup>n</sup> tée ío váha sàá díquí-xi, chi cächí-yu sá cáda cànno-o Yá Ndiöxí nacuaá véxi iní mèe-ó, te cunduu ndàhú iní-ó dico ñà túú dãnèhé ñáhá-yu nacuaá tàú-xi cunduu. Te cächí tucú-yu sá cáda ũhú-ó mèe-o, chi duca<sup>n</sup> cuiní Yá Ndiöxí cada-o cächí-yu. Te nchaa xíá<sup>n</sup> ñà túú vè-dana chindee ñaha-xi xii-o cuèdá sá vâ táxí tnúní ñáhá ni ì<sup>n</sup> sá cuèhé sá dúhá sàni iní-ó.

**3** Te nchòhó cada iní-ndó sã ní xíhí-ndó ndíhi Xítóhó Jesucristú te ní ndoto-ndo ndíhi-gá, núu xíá<sup>n</sup> tàú-ndó càda-ndo nchaa sá vaha dàtná cuiní mèe-gá chi mee-gá núcõo-gá xio cùha Dútú Ndiöxí chi tnàhá-gá ío cùnno-gá. <sup>2</sup>Te ío cuhu<sup>n</sup> iní-ndó nchaa sá vaha cächí Xítóhó Jesucristú nduu táhú-ndó cundecu ndíhi-ndo, te vá cúhú<sup>n</sup> ìní-ndó mèe-ni nchaa sá ío ñuyúú-a. <sup>3</sup>Te duca<sup>n</sup> càda-ndo chi cùu-ndo datná ñáyiú ní xíhí ndíhi Xítóhó Jesucristú, chi



ñá túú-gă ndécú-ndó ìchi cuehé ichi duha. Te Yá Ndiöxí néhé cuendá ñáhá-gă xii-ndo chi tnàhá tnúhu-ndo ndìhi Xítohó Jesucristú. <sup>4</sup>Te Xítohó Jesucristú cúú-gă Yaá ndécú ndìhi ñaha xii-o vitna, te sáá nduu quèe túú ndìhi ñaha-gă xii-o àndiu, te tnàhá-ó ïo cuunu-o ndìhi-gă.

**Duu<sup>n</sup> duu<sup>n</sup> daña-o nchàa sá  
cuèhé sá dúhá ñùhu iní-ó  
te cada-o mèe-ni sá vâha**

<sup>5</sup>Te duu<sup>n</sup> duu<sup>n</sup> daña-ndo nchàa sá cuèhé sá dúhá ñùhu iní-ndó. Te nchaa nchòhó cue téé vâ càhá<sup>n</sup> ndìhi-ndo ñáyiú òhí te núú ñá dífú ñàdihí-ndó cùú-yu, te duca<sup>n</sup>-ni nchàa nchòhó cue ñáyiú òhí tucu vâ càhá<sup>n</sup> ndìhi-ndo cuè téé te núú ñá dífú yìi-ndo cuu-güedé, te nchaa-ndo vâ cání-gă iní-ndó càda-ndo ni ì<sup>n</sup> sá cuèhé sá dúhá ndìhi tnaha ñáyiú-ndo. Te vâ cání cuèhé cani duha-gă iní-ndó sá cúú-xí-ndó ndìhí-yu, te vâ cání-gă iní-ndó nì ì<sup>n</sup> sá cuèhé sá dúhá, te ni vâ xíhó-ndó ì<sup>n</sup> sá ndécú ndìhi tnaha ñáyiú-ndo, chi núú duca<sup>n</sup> na càda-ndo xiho-ndo sá ndécú ndìhí-yu te ì<sup>n</sup>-ni cùu-ndo ndìhi ñáyiú chíñuhu nchaa sá càchí-yu cùu ndiöxí te ñá ndàá sá ndiöxí cúú nchàa xíá<sup>n</sup>. <sup>6</sup>Te nchaa ñáyiú duca<sup>n</sup> xiquide ío dandòho ñaha Yá Ndiöxí xí-yu na sáá nduu tnúndòho tnúhu ndàhú, chi ñá túú sàndáá iní ñáhă-yu xii-gă. <sup>7</sup>Te nchòhó cútnàhá ní xíndecu-ndo ìchi cuehé ichi duha, te tnàhá-ndó nì xóo cada-ndo dàtná quidé nchàa ñáyiú-á<sup>n</sup>. <sup>8</sup>Te vitna duu<sup>n</sup> duu<sup>n</sup> daña-ndo nchàa sá ná càchí tnúhu-í-a: Vâ cúdeé<sup>n</sup>-gă-ndó, te ni vâ cúnđuú líhli-gă iní-ndó, te ni vâ cúú ùhú-gă iní-ndó tnàha ñáyiú-ndo, te ni vâ cùcuèhé-gă-ndó-yu, te ni ì<sup>n</sup>-gă tnúhu cuèhé vâ càhá<sup>n</sup>-ndó. <sup>9</sup>Te ni vâ dácuàndehnde-gă-ndó, chi nchòhó sa ní dáñá-ndó nchàa ichi cuehé ichi duha, te ñá túú-gă sání cuèhé sání òha

iní-ndó nă cada-ndo vitna datná ní xóo cada-ndo. <sup>10</sup>Te vitna nchòhó ní nduu-ndo ñáyiú vâha, te uu<sup>n</sup>-gă tá cùt-nuní iní-ndó nchàa nacúaá cuiní Yá Ndiöxí cada-ndo, te duca<sup>n</sup> ta ndücu ndee-ndo quide-ndo mee-ni sá vâha dàtná quidé mèe-gă. <sup>11</sup>Te vitna ní ngún-decu ndìhi-ndo Xítohó Jesucristú, te vâ cádá cuendá-gă-ndó núu cùu-ndo ñáyiú isràél àdi ñá túú cùu-ndo, te ni vâ cádá cuendá-ndó núu cùu-ndo ñáyiú ní ngún-decu sèñá ñii-xi àdi ñáhá, te ni vâ cádá cuendá-ndó núu cùu-ndo ñáyiú véxi ñúú xíca, te ni vâ cádá cuendá-ndó núu cùu-ndo ñáyiú cùu neñúú, te ni vâ cádá cuendá-ndó núu cùu-ndo ñáyiú ñá túú tnàhí dàñá quee núú chíú<sup>n</sup> pàtróó<sup>n</sup>-xi, te ni vâ cádá cuendá-ndó núu cùu-ndo ñáyiú dàñá quée núú chíú<sup>n</sup> pàtróó<sup>n</sup>-xi, chi Xítohó Jesucristú cúnüu-gă ndécú ndìhi ñaha-gă xii-o nchàa-o.

<sup>12</sup>Te Yá Ndiöxí ní dáquée òhí ñaha-gă xii-ndo cuendá cundecu-ndo ndìhi-gă, te vitna cùu-ndo ñáyiú quide ndáá ndécú ìchi-gă. Te mee-gă ío cùu iní ñáhá-gă xii-ndo núu xíá<sup>n</sup> tàú-ndó cùndahú iní tnàhá-ndó, te ío vâha cuu iní-ndó chindee tnaha-ndo, te cuu-ndo ñáyiú ndàhú iní-xi, te ío vii ío vâha cuu iní-ndó cùndecu ndìhi tnaha-ndo, te ío càhnu cunduu iní-ndó cuendá nchaa sá quidé ñaha ñáyiú xii-ndo. <sup>13</sup>Te duca<sup>n</sup> cànehe-ndo tnúhu càhnu iní núú ndi mèe-ndo nacúaá ndècu-ndo ìchi-gă, te cada càhnu tucu iní-ndó núu ná cúú sá cùmání núú tnàhá-ndó. Te dàtná ní quide càhnu iní Xítohó Jesucristú nchaa sá ñá túú vâha ní xóo cada-ndo duca<sup>n</sup> càda-ndo cada cahnu iní-ndó nchàa sá cùmání núú tnàhá-ndó ndècu-ndo. <sup>14</sup>Te xini ñuhu vihi-xi sá ío cuu iní tnàhá-ndó cùndecu-ndo, chi núú duca<sup>n</sup> na càda-ndo, te quide-ndo nchaa dava-gă sá càhá<sup>n</sup>-í, te ñá túú tnàhí-gă ná cùmání-ndó. <sup>15</sup>Te daña-ndo sá Yá Ndiöxí ná chindee ñaha-gă nàcuáa

ío váha cuu iní-ndó cùndecu-ndo, chi diu cuèndá-á<sup>n</sup> nǐ cáhá<sup>n</sup> ñáhá Yă Ndiöxí xii-ndo cuèndá cuu ì<sup>n</sup>nuu-ndo ndìhi nchaa dava-gá ñáyi ndècu ichi-gá, te duca<sup>n</sup>-ni ïo ndacá<sup>n</sup> táhú-ndó núú-gă.

<sup>16</sup>Te ío cuhu<sup>n</sup> iní-ndó tnúhu Xítóhó Jesucristú, te ío váha cuáha-ndo cuèndá năcuáa cǎhá<sup>n</sup> tnúhu-gá te duca<sup>n</sup> dănehé náhá-ndó. Te ío cáhá<sup>n</sup> dóho tnàha-ndo nacuáa cada-ndo cànchicú<sup>n</sup> niñnu-ndo càda-ndo nchaa nacuáa cǎhá<sup>n</sup> tnúhu-gá, te cata-ndo ndùdú ndèè núú tütú Yă Ndiöxí, ndìhi nchaa dava-gá ndudú sá xini méé-ndó xita-ndo te nchaa xǎ<sup>n</sup> cata-ndo chiñuhu-ndo Yă Ndiöxí. Te òré xítá-ndó te ni yùhu ni iní-ndó ndacá<sup>n</sup> táhú-ndó núú-gă. <sup>17</sup>Te cuhu<sup>n</sup> iní-ndó Xítóhó Jesucristú òré sání ìní-ndó càda-ndo ì<sup>n</sup> chiu<sup>n</sup> àdi ná tnúhu cuiní-ndó cǎhá<sup>n</sup>-ndó, te diu-ni-gá cuhu<sup>n</sup> iní-ndó. Te xini ñuhu-xi ndacá<sup>n</sup> táhú-ndó núú Yă Ndiöxí, te diu-ni Xítóhó Jesucristú chindee ñàha-gá xii-ndo ndacá<sup>n</sup> táhú-ndó núú Tătá-ó Dütú Ndiöxí.

**Năcuáa tàù ñáyi ndècu ichi  
Xítóhó Jesucristú cadá-yu  
sá cúú-xí ndì meé-yu**

<sup>18</sup>Te nchaa nchòhó ñáyi dǐhí ñáyi ndècu yii-xi quindáá iní-ndó yìi-ndo, chi duca<sup>n</sup> tàù-xi cada nchaa ñáyi dǐhí ndécú ichi Xítóhó Jesucristú. <sup>19</sup>Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cǔcuèhé-ndö-yu. <sup>20</sup>Te nchaa nchòhó ñáyi ndècu tátá-xi ndìhi năná-xi quindáá iní-ndö-yu, chi núu duca<sup>n</sup> na càda-ndo te ndüu vétú iní Yă Ndiöxí. <sup>21</sup>Te nchaa nchòhó ñáyi cùu tátá ndìhi năná vá dásátú-ndó ìni cue déhe-ndo, chi núu duca<sup>n</sup> na càda-ndo te ni vă quíxí-gă iní-güexi cada-güexi sá vâha. <sup>22</sup>Te nchaa nchòhó ñáyi xinu cuechi quindáá iní-ndó nchàa ñáyi cùu patró<sup>n</sup>-ndó, te ni yùhu ni iní-ndó càda-ndo nchaa chiu<sup>n</sup> tahú-yu

cuèi òré ndécú-yu àdi oré ñá túú-yu, te ñá díú òré-ni ndèhé-yu cada-ndo cuèndá-ni sá cuiní-ndó cùdiu-ndo núú-yu, chi cada-ndo sá néhé-ndó sá yññuhu núú Xítóhó Jesucristú. <sup>23</sup>Te nchaa chiu<sup>n</sup> sani iní-ndó càda-ndo te cada-ndo ni yuhu ni iní-ndó, te sá dúcá<sup>n</sup> càda-ndo-á<sup>n</sup> te cada-ndo cuèndá sá xínú cuèchi-ndo núú Xítóhó Jesucristú te ñá díú núú ñáyi ñuyíú-a xinu cuechi-ndo. <sup>24</sup>Te nchòhó sa nàha-ndo sá Xítóhó Jesucristú taxi-gá sá ndúú tǎhú-ndó te núu duca<sup>n</sup> na càda-ndo, chi cùu-ndo ñáyi xinu cuechi núú-gă. <sup>25</sup>Te nchaa ñáyi quide nchaa sá cuèhé sá dúhá nàcháhu-yu núú Yă Ndiöxí cuèndá nchaa sá quidě-yu, te mee-gă vá cǎdá cuèndá-gá cuèi ná ñáyi cùu-yu, chi nchaa-yu nacháhu-yu nchaa sá ñà túú vâha quidě-yu núú-gă.

**4** Te nchaa nchòhó ñáyi cùu patró<sup>n</sup> cuu-ndo ñáyi váha, te cada-ndo nchàa nacuáa tàù-xi cunduu ndìhi nchaa ñáyi xinu cuechi núú-ndó, te cunaha-ndo sá àndiu ndecu Yaá cúú Xítóhó-ndó tàxi tñuní ñáhá-gă xii-ndo.

<sup>2</sup>Te nchaa nchòhó ñáyi ndècu ichi Xítóhó Jesucristú, vá dáñá ndèé-ndó cǎhá<sup>n</sup> ndìhi-ndo Yă Ndiöxí, te ío cuhu<sup>n</sup> iní-ndó-gă òré cǎhá<sup>n</sup> ndìhi-ndo-gă, te òré-á<sup>n</sup> ïo ndacá<sup>n</sup> táhú-ndó núú-gă. <sup>3</sup>Te cǎcá<sup>n</sup> táhú-ndó tnàhá cuèndá-ndí núú-gă cuèndá sá díú-gă ná cǎdá te ndacu-ndí cǎhá<sup>n</sup>-ndí tnúhu-gá núú nchàa dava-gá ñáyi, te duca<sup>n</sup> cǎhá<sup>n</sup>-ndí tnúhu Xítóhó Jesucristú sá ñă túú ní xindecu ndèé sanaha, te diu cuèndá tnúhu-á<sup>n</sup> yfñi-í vecaá vitna. <sup>4</sup>Te cáhá<sup>n</sup> ndìhi-ndo Yă Ndiöxí cuèndá cǎhá<sup>n</sup>-í năcuáa tàù-xi cunduu te tecú tñuní-yu.

<sup>5</sup>Te cada-ndo nchàa nacuáa tàù-xi cunduu sá cúú-xí nchàa ñáyi ñă túú ndècu ichi-gá, te duca<sup>n</sup>-ni ïo nducu ndèe-ndo cada-ndo nchaa nacuáa tàù-xi cunduu. <sup>6</sup>Te cada cuèndá-ndó sá ïo vii ío

váha cunduu tnúhu cáhá<sup>n</sup> ndihi-ndó-yu, te cáhá<sup>n</sup>-ndó ì<sup>n</sup> tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cúñaha-ndo xii ì<sup>n</sup> ì<sup>n</sup>-yu.

### Tnúhu ndéé núú nǐ ndihi-ná

<sup>7</sup>Te té Tiquicú tée ío cùu iní-ó ndècu ndihi-o ichi Xítohó Jesucristú, tée-á<sup>n</sup> cachí tnúhu-dé nchaa nàcuáa cùu ndecu-í. Te tnàhá-dé xínú cuèchi-dé núú Xítohó Jesucristú te ío váha quide ndáá-dé. <sup>8</sup>Te tendaha-í-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee iní cundecu ndihi-ndo. <sup>9</sup>Te tnàhá tucu té Ònésimú tée ío cùu iní-ó ndècu ndihi-o ichi Xítohó Jesucristú quixi ndihi-dé, te diu-ni tée ñuú-ndó cùu-dé te tnàhá-dé ío váha quide ndáá-dé. Te ndi ndùú-güedé cachí tnúhu-güedé nchaa nàcuáa cùu iha.

<sup>10</sup>Te té Arístarcú tée yìhi ndihi-í vecaá quidé ndèe iní ñáhá-dě xii-ndo ndihi té Mácú ñaní prímú tē Bèé. Te sa ñaha-ndo nchaa nacuaá ní cáhá<sup>n</sup>-í cada-ndo quèhe<sup>n</sup> cuendá-ndó tē Mácú, te núu na quixi-dé quixi coto ñaha-dě xii-ndo, te ío váha cuu iní-ndó quèhe<sup>n</sup> cuendá-ndó-dě. <sup>11</sup>Te tnàhá tée ñani Jesús, àdi Bustú chi úú ñuú-dé, quidé ndèe iní ñáhá-dě xii-ndo. Te cue tée-a cùu-güedé cue tée isràél ní chitnahá ñáhá-güedě xii-í càhá<sup>n</sup>-ndí núú ñáyu nàcuáa ndíhu ndaha ñaha Yá Ndiöxí xii-yu, te ni ì<sup>n</sup>-gá ñáyu isràél ñá túú quide datná quidé-güedě. Te ío váha tàxi-güedé tnúhu ndee iní xii-í. <sup>12</sup>Te tnàhá tée ñuú-ndó tē Ępafrás quidé ndèe iní ñáhá-dě xii-ndo, te cùu-dé tnàhá-dé tée xínu cuechi núú Xítohó Jesucristú. Te duca<sup>n</sup>-ni ñi yuhu ñi iní-dé xicá<sup>n</sup> táhú-dě núú Yá Ndiöxí

cuendá-ndó cuendá sá cáncñícú<sup>n</sup> nihnu-ni-ndo ìchi-gá, te duca<sup>n</sup> te ío váha tecu tnúmi-ndó nchaa nacuaá cuini Yá Ndiöxí cada-ndo, te diu-ni duca<sup>n</sup> cáncñícú<sup>n</sup> nihnu-ndo càda-ndo. <sup>13</sup>Te yúhú càchí tnúhu ndáá-í xii-ndo sá súmí sàni iní-dé sá mée-ní sá váha cuu xii-ndo cundecu-ndo ndihi nchaa ñáyu xíndecu ichi Xítohó Jesucristú ndécú ñúú Laodiceá, ndihi nchaa ñáyu xíndecu tucu ichi-gá ndécú ñúú Hièrápólis. <sup>14</sup>Te tnàhá té Lùcá tée xini nchaa núu yúcú sá quidé tātna quide ndee iní ñáhá-dě xii-ndo tée ío cùu iní-ó, te tnàhá tucu té Dēmás quidé ndèe iní ñáhá-dě xii-ndo.

<sup>15</sup>Te cúñaha-ndo na càda ndee iní nchaa ñáyu ndècu ndihi-o ichi Xítohó Jesucristú ndécú ñúú Laodiceá, ndihi tá Míñfás, ndihi nchaa ñáyu ndècu ichi-gá tàcá vehe-xi dàcuahá-yu tnúhu-gá. <sup>16</sup>Te tutú cádùha-í-a tendaha-í quixi ndaha-ndo, te òré ná ndíhí dàcuaha-ndo te tendaha-ndo quíhí<sup>n</sup> ndaha ñáyu xíndecu ichi-gá ndécú ñúú Laodiceá cuendá dacuahá-yu tnàhá-yu. Te diu-ni duca<sup>n</sup> dàcuaha-ndo tutú tendaha-í quíhí<sup>n</sup> ndaha ñáyu ñuú Laodiceá òré ná dándixí-yu ndaha-ndo. <sup>17</sup>Te na càchí tnúhu-í xii-ndo nàcuáa cúñaha-ndo xii té Àrquipú, te duha cúñaha-ndo xii-dé: “Yá Ndiöxí ní taxi-gá chiú<sup>n</sup> quide-n, te ío váha cada cuendá-n càda-n nchaa nacuaá ní cachí-gá”, duha cúñaha-ndo xii-dé.

<sup>18</sup>Te yúhú té Páblú ndihi ndaha mee-í tée-í ì<sup>n</sup> úú tnúhu-a quide ndee iní ñáhá-í xii-ndo, te cunaha-ndo sá yúhú yíhí-í vecaá. Te Yá Ndiöxí ío na chindee chítúu ñaha-gá xii-ndo. Te duca<sup>n</sup> na cunduu. Te ío chí cádá ndèe iní-ñá vitna.

## TUTÚ DÍHNA NUU NĪ CADÚHA TÉ PÄBLÚ QUIHĪ<sup>n</sup> NDAHA ÑÁYIU ÑUÚ TESÀLÓNICÁ

**Té Páblú ndihi cue tée cùndihi-dé  
cádúha-güedé tutú quíhĪ<sup>n</sup> ndaha  
ñáyiú xĩndecu ichi Xítohó  
Jesucristú ndécú ñuú Tesàlónicá**

**1** Yúhú té Páblú cádúha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiú ndècu ndihi-ndí ichi Xítohó Jesucristú ndécú ñuú Tesàlónicá, chi cùu ì<sup>n</sup>nuu-ndo ndihi Tátá-ó Dütú Ndiöxí, ndihi Xítohó Jesucristú. Te xicá<sup>n</sup> táhù-í núú Dütú Ndiöxí, ndihi núú Xítohó Jesucristú sá ìo na chĩndee chitúu ñaha-gă xii-ndo, te duca<sup>n</sup> ndĩ nduú-gă ná càda te ío váha cuu iní-ndó cùndecu-ndo.

**Ñáyiú ñuú Tesàlónicá ío váha  
sàndáá iní-yu Yá Ndiöxí**

<sup>2</sup>Te ndi tnahá òré càhá<sup>n</sup> ndihi-ndí Yá Ndiöxí ndàcá<sup>n</sup> táhù-ndĩ núú-gă sá ìo quide váha-ndo ndècu-ndo, te duca<sup>n</sup> xicá<sup>n</sup> táhù-ndĩ núú-gă sá ná còto ñaha-gă xii-ndo. <sup>3</sup>Te ío ndàcá<sup>n</sup> táhù-ndĩ núú Tátá-ó Dütú Ndiöxí sá ìni yuhu ìni iní-ndó sàndáá iní-ndó-gă, te xĩnu cuechi-ndo núú-gă, te cùu iní tnahá-ndó nàcuáa ndècu-ndo ichi-gă ñuu xĩá<sup>n</sup> ío xito tnahá-ndo. Te cùtnuní ndáá iní-ndó sã quixí tucu Xítohó Jesucristú ñuu xĩá<sup>n</sup> ñá túú dàña ndeé-ndó ndètu-ndo-gă. <sup>4</sup>Te nchòhó ñáyiú ndècu ndihi-ndí ichi Xítohó Jesucristú sa nàha-ndí sá Yá Ndiöxí ío cùu iní ñáhá-gă xii-ndo, te diu-gă ní càhá<sup>n</sup> ñáhá-gă xii-ndo cuendá cundecu-ndo ìchi-gă. <sup>5</sup>Te cùtnàhá ní dánhé ñáhá-ndĩ xii-ndo tñuhu-gă, chi ñá dũú sã cúú ìní mée-ndĩ duca<sup>n</sup> ñĩ dánhé ñáhá-ndĩ xii-ndo, chi mee Espiritú Yá Ndiöxí ní chĩndee ñaha-xi ní càhá<sup>n</sup>-ndĩ ñi yuhu ñi iní-ndí tñuhu-gă

núu-ndó. Te nàha-ndo sá cùtnàhá ní xĩndecu ndihi ñaha-ndĩ xii-ndo ñĩ quide-ndĩ nàcuáa càhá<sup>n</sup> Yá Ndiöxí cuendá sá cúú-xĩ sã váha sá cúú-xĩ-ndó.

<sup>6</sup>Te nchòhó nchìcú<sup>n</sup> nihnu-ndo quide-ndo vitna datná quidé-ndĩ, chi quide váha-ndo dàtná quidé mèe Xítohó Jesucristú, te dĩf ìní ní tñii-ndo ìchi-gă cuéi ní ndoho ní tnahá-ndó, chi mee Espiritú-gă ní chĩndee ñaha-xi xii-ndo. <sup>7</sup>Te sá dũcá<sup>n</sup> quide váha-ndo ñuú Yá Ndiöxí, xĩá<sup>n</sup> yĩnchĩcú<sup>n</sup> nihnu ñáyiú distritú Macèdoniá, ndihi ñáyiú distritú Acăyá xĩquide váha-yu tnahá-yu, ñáyiú xĩndecu ichi-gă. <sup>8</sup>Te diu-ndo ñĩ sanu ichi-ndo ñáyiú distritú Macèdoniá, ndihi ñáyiú distritú Acăyá, te ñá dũú-ní ñáyiú nchaa ñuu-á<sup>n</sup> chi nchaa ñáyiú dava-gă ñuú ñihí-yu tñuhu sá ìo sàndáá iní-ndó Yá Ndiöxí. Te ñá túú-gă ná tñuhu càhá<sup>n</sup>-ndĩ cuendá-ndó, chi nchaa-yu sa ñihí-yu tñuhu sá ìo váha quide-ndo ndecu-ndo. <sup>9</sup>Te mèe-yu xĩcáhá<sup>n</sup> váha-yu cuendá-ndó sã ìo váha ní quehe<sup>n</sup> cuendá ñáhá-ndó xii-ndí cùtnàhá ní quixi-ndí díhna nuu. Te ní dánhá-ndó nchàa sá càchĩ-ndó cùu ndiöxí-ndó chi ñá dũú ndiöxí cúú-xĩ, te ní tñii-ndo ìchi Yá Ndiöxí Yaá ndécú tũu andiu chi diu-gă cúú-gă Ndiöxí ndisa, te xĩnu cuechi-ndo núú-gă vitna, <sup>10</sup>te ndètu-ndo quixi tucu Xítohó Jesucristú Déhe Yá Ndiöxí Yaá ndécú àndiu, chi diu-ni-gă ní quixi-gă ñuyiú-a ní xĩhĩ-gă, te ní ndoto-gă ní dándótó ñaha Yá Ndiöxí xii-gă. Te diu-ni Xítohó Jesucristú dácacu nihnu ñaha-gă xii-o ñuú ùhú núú ndàhú, chi sàndáá iní-ó-gă.

**Nàcuáa nduú chiu<sup>n</sup> ní quide té  
Páblú ñuú Tesàlónicá**

**2** Te nchòhó ñáyiú ndècu ndihi-ndí ichi Xítohó Jesucristú nàha-ndo sã ñà dũú àú<sup>n</sup> nã cuu ñi quixi coto ñaha-ndĩ xii-ndo, chi ní sàndáá iní-ndó tñuhu Yá Ndiöxí. <sup>2</sup>Te nàha-ndo sá cùtnàhá

ní xíndecu-ndí ñúú Filipú ío ní xúhu<sup>n</sup> tnúhu cuèhé tnúhu duha núú-ndí, te ní caniha-güedé xii-ndí. Te ní ndee-ndí ní quixi-ndí ñúú-ndó, te ñá túú ní yùhú-ndí ní cáhá<sup>n</sup>-ndí tnúhu Yá Ndiöxí núú-ndó, chi mee-gã ní chindee ñàha-gá xii-ndí cuèí ío chitu ñáyü ní cuu úhú iní ñáhá xii-ndí. <sup>3</sup>Te ñá túú ní dándahú ñáhá-ndí xii-ndo chi mee-ni tnúhu ndáá ní cáhá<sup>n</sup>-ndí núú-ndó, te ni ñà túú ni ñ<sup>n</sup> tnúhu cuèhé ñúhú iní-ndí ní cáhá<sup>n</sup>-ndí tnúhu-gá núú-ndó chi sa ní nduu ndoo ní nduu nine iní-ndí. <sup>4</sup>Te mee Yá Ndiöxí ní cachí-gá sá càhá<sup>n</sup>-ndí tnúhu-gá, te càhá<sup>n</sup>-ndí nàcuáa cùu iní mée-gã, chi sa ñaha-gá nàcuáa càa iní-ndí, te ñá túú càhá<sup>n</sup>-ndí nàcuáa cùu iní ñáyü. <sup>5</sup>Te ñaha-ndo sá ñà díú ñ<sup>n</sup> tnúhu cudíí iní-ndó cùndecu-ndo ichi ñuyíú ní cáhá<sup>n</sup>-ndí núú-ndó cuendá taxi-ndo díhú<sup>n</sup>. Te Yá Ndiöxí sa ñaha-gá sá càhá<sup>n</sup> ndáá-ndí. <sup>6</sup>Te ñá ñ<sup>n</sup> ndùu ni quide-ndí ñ<sup>n</sup> sá cádá-ndí cuendá-ni sá cádá càhnu ñaha-ndo xii-ndí, àdi cada cahnu ñaha dava-gá ñáyü, te cuèí tàù ndisa-ndí sá cádá càhnu ñaha-ndo xii-ndí ní cùu, chi chiù<sup>n</sup> Xítohó Jesucristú quidé-ndí, te dicó-ni sá nchùhú ñá túú ní cuiní-ndí sá dúcá<sup>n</sup> càda-ndo. <sup>7</sup>Te ío vii ío váha ní cáhá<sup>n</sup>-ndí núú-ndó, dàtná quidé ñ<sup>n</sup> ñaha cuu náná vii vii càhá<sup>n</sup> ndihi cue déhe-a<sup>n</sup> dàcuehnu ñaha-a<sup>n</sup> xii-güexi. <sup>8</sup>Te duca<sup>n</sup> ío cùu iní ñáhá-ndí xii-ndo, dico ñá díú-ní sã ñí cáhá<sup>n</sup>-ndí tnúhu Yá Ndiöxí núú-ndó, chi ndéé iní-ndí taxi-ndí ní dácótó ñaha-xi, te núu dicó ní cùu-xi sá cúú, cuendá sá ío cùu iní ñáhá-ndí xii-ndo. <sup>9</sup>Te nchòhó ñáyü ndècu ndihi-ndí ichi Xítohó Jesucristú ñaha-ndo sá ío ní quide chiù<sup>n</sup>-ndí cuendá ní níhí-ndí sá ñí xexi-ndí. Te cuèí nduu cuèí niú ní quide chiù<sup>n</sup>-ndí ní níhí-ndí sá ñí xexi-ndí ní cáhá<sup>n</sup>-ndí tnúhu Yá Ndiöxí núú-ndó cuendá sá ñà túú ní cuiní-ndí chichìu<sup>n</sup> ñaha-ndí xii-ndo.

<sup>10</sup>Te nchòhó ñáyü sàndáá iní tnúhu Yá Ndiöxí xini ndáá-ndó sá cúú-ndí cue téé váha te duca<sup>n</sup> sà naha Yá Ndiöxí tucu, te ní xica-ndí ichi ndáá òré ní cáhá<sup>n</sup>-ndí tnúhu-gá núú-ndó te diu-ni duca<sup>n</sup> quide-ndí vitna. Te vá yòo ñ<sup>n</sup> càhá<sup>n</sup> sá ñà túú quide ndáá-ndí ndécú-ndí. <sup>11</sup>Te ñaha tucu-ndo sá ní dácàhá<sup>n</sup> ñáhá-ndí xii-ndo, te ní taxi-ndí tnúhu ndee iní xii-ndo nchàa-ndo, te dàtná quidé ñ<sup>n</sup> tátá ndihi cue déhe-dé ní quide-ndí. <sup>12</sup>Te ní cachí-ndí xii-ndo sá cádá ndáá-ndó cùndecu-ndo nacuáa tàù-xi cada nchaa ñáyü tnàhá tnúhu ndihi Yá Ndiöxí, chi mee-gã ní cáhá<sup>n</sup> ñáhá-gá xii-o cuendá nduu táhú-ó cùndecu-o ndihi-gá núú ío váha càa ndecu-gá táxi tnùnigá.

<sup>13</sup>Te xíá<sup>n</sup> ío ndácá<sup>n</sup> táhú-ndí núú Yá Ndiöxí sá nchòhó òré ní tedóho-ndo tnúhu-gá ní cáhá<sup>n</sup>-ndí, te ní sàndáá iní-ndó chi ní cutnùnì iní-ndó sã díú tnúhu Yá Ndiöxí cúú-xí, te ñá díú tnúhu ñáyü ñuyíú-a cùu-xi. Te ndáá sá cúú-xí ñ<sup>n</sup> sá ío váha sá cúú-xí nchòo cue ñáyü ní sàndáá iní tnúhu-gá. <sup>14</sup>Te nchòhó ñáyü ndècu ndihi-í ichi Xítohó Jesucristú, ío ní ndoho ní tnàhá-ndó sã ñí quide ñaha ñáyü ñúú-ndó. Te nchòhó ní ndoho-ndo dàtná ní ndoho nchaa ñáyü tàcá dácùaha tnúhu Xítohó Jesucristú ndécú distritú Jùdeá, chi tnàhá-yu ío ní dándóhó ñaha ñáyü ñúú-yu. <sup>15</sup>Te diu-ni ñáyü distritú Jùdeá-á<sup>n</sup> ní sahní-yu cue téé ní xóo cáhá<sup>n</sup> tnúhu Yá Ndiöxí ndéé sanaha. Te diu-ni ñanì tnáhã-yu cùu cue ñáyü ní sahnì ñaha xii Xítohó Jesucristú, te sátá xíá<sup>n</sup> te ní ngüíta-yu ní cuu úhú iní ñáhã-yu xii-ndí, núu xíá<sup>n</sup> ñá túú tnàhá iní Yá Ndiöxí nchaa sá quidé-yu, te ndéé nchaa dava-gá ñanì tnáhã-yu cùu úhú iní-yu. <sup>16</sup>Te ío chidácá nihnu ñáhã-yu xii-ndí òré càhá<sup>n</sup>-ndí tnúhu Yá Ndiöxí núú ñáyü ñá túú cùu ñáyü isràél, te duca<sup>n</sup> quide ñáyü-á<sup>n</sup> cuendá cuiní-yu sá vã càhá<sup>n</sup>-ndí tnúhu-gá, sá

cadá cuendá naníhí tǎhú ñáyiú ñá túú cùu ñáyiú israhél-á<sup>n</sup>, te sá dúcá<sup>n</sup> quidé-yu te ío ta cùu vai-gá cuéchi-yu cuáhá<sup>n</sup>. Te Yá Ndiöxí ío cùdéé<sup>n</sup>-gǎ núu-yu, te tendaha-gǎ ì<sup>n</sup> tnúndòho quixi sá cùú-xí-yu te ío ndohó-yu.

**Té Pǎblú cuiní-dé quíngoto-dé  
ñáyiú xǐndecu ichi Xítohó  
Jesucristú ndécú ñúú Tesalónicá**

<sup>17</sup>Te nchòhó ñáyiú ndècu ndihi-ndí ichi Xítohó Jesucristú ní quee-ndí núú-ndó, te cuéi ní cuxica-ndí dico duca<sup>n</sup>-ni ñùhu iní ñáhá-ndí xii-ndo, te ío ñùhu iní-ndí sá quíxí còto ñaha tucu-ndí xii-ndo. <sup>18</sup>Te yúhú té Pǎblú duca<sup>n</sup>-ni ñùhu iní-í sá cuédicó mèe-í quixi-í, quixi coto ñaha-í xii-ndo, dico yucu ñávàha chidácá nihnu ñaha-xi xii-í. <sup>19</sup>Te nchoo ñáyiú ndècu ichi Xítohó Jesucristú ndètu-ni-gá-ó quèxio-gá candeca ñaha-gǎ xii-o ndàa andiú cundecu-o ndihi-gá. Te cùdíí víhí iní-ndí sá cuendá-gá chi ní chindee ñaha-gá ní sanu ichi ñaha-ndí xii-ndo ichi-gá, te ío vǎi ñáyiú cáhá<sup>n</sup> váha-yu cuendá-ndí ná sáá nduu quixi tucu-gá. <sup>20</sup>Te duca<sup>n</sup> ío vǎi ñáyiú cáhá<sup>n</sup> váha-yu cuendá-ndí cuendá sá ní sanu ichi ñaha-ndí xii-ndo ichi-gá, te quide váha-ndo. Te xǎ<sup>n</sup> ío cùdíí iní-ndí.

**3**<sup>1-2</sup>Te sa ní cunduu ñá túú-gǎ cáhá<sup>n</sup> ndihi tnàha-o, núu xǎ<sup>n</sup> ñá ní cùndee-gá iní-ndí ní tendaha-ndí té Timùteú ní quixi coto ñaha-dé xii-ndo, te nchúhú ní quendóo-ndí ñúú Àtenás, chi tnàhá-dé xínú cuèchi-dé núú Yá Ndiöxí, ndihi núú Xítohó Jesucristú cáhá<sup>n</sup>-dé tnúhu-gá núú ñáyiú. Te ní quixi-dé ní taxi-dé tnúhu ndee iní xii-ndo cuendá sá ío quindáá-ni iní-ndó Xítohó Jesucristú, te canchicú<sup>n</sup> nihnu-ni-ndo ñè yuhu ní iní-ndó ichi-gá. <sup>3</sup>Te vá nátùhú iní-ndó càncicú<sup>n</sup> nihnu-ndo ichi-gá sá dúhá cùu úhú iní ñáhá ñáyiú xii-o, te nchòhó sa ñaha-ndo sá dàcutíí sǎ

ndóhó víhi-o cuendá-gá. <sup>4</sup>Te ndéé cùt-ñàhá ndécú ndihi ñaha-gá-ndí xii-ndo ní cachí tnúhu ndáá-ndí sá ío ndoho-o, te duca<sup>n</sup> ndisa quide-xi. <sup>5</sup>Te xǎ<sup>n</sup> núu ñá ní cùu váha-gá iní-í chi cuendá ñá túú-gǎ ní ñìhí-í tnúhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú tnúhu-dé núú-ndó núu ndècu-ni-ndo ichi Xítohó Jesucristú, chi ní sani ì<sup>n</sup> ní sani úú iní-í sá cùú-xí-ndó, chi ná ndèé chidácá nihnu ñaha yècu ñávàha xii-ndo te cuíta chùu<sup>n</sup> ní quide-ndí sá cùú-xí-ndó ní cáhá<sup>n</sup>-í.

<sup>6</sup>Te ñáhá, chi ní ndexio té Timùteú sá ní quixi-dé ñúú-ndó, te ñaha-dé tnúhu ní nasáá sá ñè yuhu ní iní-ni-ndo sàndáá iní-ndó Yá Ndiöxí, te cùu iní-ndó cué tnaha ñáyiú-ndo. Te càchí-dé sá ío ñùhu iní ñáhá-ndó xii-ndí, te ío cuiní-ndó cáhá<sup>n</sup> ndihi ñaha-ndo, te diu-ni duca<sup>n</sup> ío cuiní nchúhú cáhá<sup>n</sup> ndihi ñaha-ndí xii-ndo tucu. <sup>7</sup>Te ío ndòho-ndí chi ío cùu úhú iní ñáhá ñáyiú xii-ndí, dico sá ní ñìhí-ndí tnúhu sá nchòhó ñáyiú ndècu ndihi-ndí ichi Xítohó Jesucristú ñá túú dàña ndéé-ndó sàndáá iní-ndó Yá Ndiöxí, te xǎ<sup>n</sup> cùú-xí ì<sup>n</sup> tnúhu càhnu iní ní ñìhí-ndí chi ní naníhí ndéé-ndí. <sup>8</sup>Te ní nduu vétú iní-ndí sá ní ñìhí-ndí tnúhu ndècu-ni-ndo ichi-gá. <sup>9</sup>Te òré cáhá<sup>n</sup> ndihi-ndí Yá Ndiöxí, te ío ndácá<sup>n</sup> tǎhú-ndí núú-gǎ cuendá sá ñá túú dàña nihnu-ndo ichi-gá, núu xǎ<sup>n</sup> ío cùdíí iní-ndí. <sup>10</sup>Te cuéi nduu cuéi niú xicá<sup>n</sup> tǎhú-ndí núú Yá Ndiöxí sá méé-gǎ ná càda te sáá ì<sup>n</sup> nduu naníhí tnàhá-ó cuendá danèhé ñáhá váha-gá-ndí tnúhu-gá sá cùmǎní-gǎ xii-ndo.

<sup>11</sup>Te mee Tǎtá-ó Dùtú Ndiöxí, ndihi Xítohó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo. <sup>12</sup>Te mee Xítohó Jesucristú ná chindee ñaha-gá xii-ndo, te ío-gá cuíta cuu iní tnàhá-gǎ-ndó nàcuáa ndècu-ndo ichi-gá ndihi nchaa dava-gá

ñáyiú dàtná cúú íní ñáhá-ndĩ xii-ndo. <sup>13</sup>Te xicá<sup>n</sup> táhú tùcu-ndí núú Tátá-ó Dǔtú Ndiöxí sá nì yuhu nì íní-ndó cànchicú<sup>n</sup> nihnu-ni-ndo ìchi-gá, te duca<sup>n</sup> te cundáá-ndó núú-gǎ, te ñá túú-gǎ ná cumání-ndó òré ná sàá nduu quixi tucu Xítohó Jesucristú ndihi nchaa ñáyiú sa ndècu ndihi-gá.

### Nàcuáa cuíní Yá Ndiöxí cada-o

**4** Te nchòhó ñáyiú ndècu ndihi-í ichi Xítohó Jesucristú càhá<sup>n</sup> ndàhú-í núú-ndó sǎ cùndèdóho-ndo na càhá<sup>n</sup>-í nàcuáa nduu tnúhu càhá<sup>n</sup> Xítohó Jesucristú, chi mee-gǎ cuíní-gá sá cǎdá-ndó nàcuáa ní dǎnèhé ñáhá-ndĩ xii-ndo cuèndá cuu váha íní Yá Ndiöxí núú-ndó, te duca<sup>n</sup>-ni càda-ndo ndéé núú cuàhá<sup>n</sup> núú vèxi.

<sup>2</sup>Te nchòhó sa nàha-ndo nacuáa ní càhá<sup>n</sup>-ndí núú-ndó, chi ní càhá<sup>n</sup>-ndí nàcuáa ní táuchíú<sup>n</sup> Xítohó Jesucristú te ní cachí-gá sá <sup>3</sup>Yá Ndiöxí cuíní-gá sá cǎdá ndǎá-ó cùndecu-o ichi-gá. Te nchoo cuè téé vá càhá<sup>n</sup> ndihi-o ñáyiú òhí te núú ñá díú ñàdihí-ó cùú-yu, te ní cuè ñáyiú òhí vá càhá<sup>n</sup> ndihí-yu téé núú ñá díú yí-yu cùu-güedé. <sup>4</sup>Te núú xǎ<sup>n</sup> nchaa nchòhó tnàha téé-í ndí dí<sup>n</sup> cùndecu ñàdihí-ndó, te òu-ni duca<sup>n</sup> nchòhó cue ñáyiú òhí tucu ndí dí<sup>n</sup> cùndecu yí-ndo, te mee-ni tnúhu yíñuhu càhá<sup>n</sup> ndihi tnàha-ndo. <sup>5</sup>Te vá cǎní cuèhé caní duha íní-ndó dàtná quídé cuè ñáyiú ñá túú sàndáá íní tnúhu Yá Ndiöxí. <sup>6</sup>Te ní ì<sup>n</sup>-ndo vá cǎní íní-ndó dǎndahú-ndó tnàha téé-ndo càhá<sup>n</sup> ndihi-ndo ñàdihí-güedé. Te duca<sup>n</sup>-ni nchòhó cue ñáyiú òhí tucu vá cǎní íní-ndó dǎndahú-ndó tnàha òhí-ndó càhá<sup>n</sup> ndihi-ndo yí-yu. Chi núú duca<sup>n</sup> na càda-ndo, te Yá Ndiöxí ío dǎndòho ñaha-gá xii-ndo dàtná ní cachí-ndí ndéé díhna. <sup>7</sup>Chi Yá Ndiöxí ní càhá<sup>n</sup> ñáhá-gǎ xii-o cuèndá sá cǎdá-ó mèe-ni sá vǎha, te ñá díú sǎ cuèhé sá

dúhá. <sup>8</sup>Te nchaa ñáyiú na càda sáá íní-xi tnúhu càhá<sup>n</sup>-ndí, te quide sáá íní-yu núú Yá Ndiöxí, chi ñá díú tnúhu téé ñuyíú-a cùu-xi, chi tnúhu Yá Ndiöxí, Yáá ní taxi Espiritú-gá ndécú ndihi-o cuu-xi.

<sup>9</sup>Te nchòhó ñáyiú ndècu ndihi-í ichi Xítohó Jesucristú, ñá túú-gǎ xíní ñùhu-xi cachí tnúhu-í xii-ndo sǎ cúú íní tnáhá-ndó, chi Yá Ndiöxí sa ní dǎnèhé ñáhá-gǎ xii-ndo nàcuáa cuu íní tnáhá-ndó, ndihi nàcuáa cuu íní-ndó dàva-gá tnàha ñáyiú-ndo. <sup>10</sup>Te duca<sup>n</sup> xíquide-ndo ndihi nchaa ñáyiú ndècu ndihi-ndo ichi Xítohó Jesucristú ndécú òstrítú Macèdoníá. Te càhá<sup>n</sup> ndàhú-ndí núú-ndó sǎ cǎdá ndǎá-gǎ-ndó, te cuita cuu íní-gǎ-ndó cuè tnàha ñáyiú-ndo quíh<sup>n</sup>. <sup>11</sup>Te cada ndee íní-ndó cùndecu ñucaxi íní-ndó, te cuhu<sup>n</sup> íní-ndó chiú<sup>n</sup> mee-ndo, te xǎ<sup>n</sup> cada-ndo dàtná ní dǎnèhé ñáhá-ndĩ xii-ndo. <sup>12</sup>Te duca<sup>n</sup> te tnàhá nchaa ñáyiú ñá túú sàndáá íní tnúhu Yá Ndiöxí càhá<sup>n</sup> váha-yu cuèndá-ndó, te duca<sup>n</sup> te ñá túú tnàhí-gǎ ná cùmání xii-ndo.

### Nàcuáa cada-xi òré quixi tucu Xítohó Jesucristú

<sup>13</sup>Te vitna na càchí tnúhu-ndí xii nchòhó ñáyiú ndècu ndihi-ndí ichi Xítohó Jesucristú cuèndá nchaa ñáyiú sa ní xíhí, ñáyiú ní sàndáá íní tnúhu Yá Ndiöxí cuèndá sá vǎ ndíhú íní-ndó cuèndá-yu dàtná xíquide nchaa ñáyiú ñá túú yíhí íní-xi sá quixí tùcu Xítohó Jesucristú ñuyíú-a. <sup>14</sup>Te nchoo sàndáá íní-ó sǎ ní xíhí Xítohó Jesucristú te ní ndoto-gǎ ní dǎndótó ñàha Yá Ndiöxí, te sàndáá tucu íní-ó sǎ dàtná ní dǎndótó Yá Ndiöxí Xítohó Jesucristú, duca<sup>n</sup> dǎndoto-gǎ nchaa ñáyiú ní xíhí ñáyiú ní sàndáá íní ñáhá xii-gǎ.

<sup>15</sup>Te na càchí tnúhu tucu-ndí íngǎ tnúhu nàcuáa ní càhá<sup>n</sup> Xítohó Jesucristú, chi ní cachí-gá sá ná sàá nduu quixi tucu-gǎ te nchaa ñáyiú sàndáá

iní tnúhu-gá ndécú vǐvú ñuyíú-a vá códó nùú-yu núú ñáyiú ní xíhí ndaa andiú, chí jùndú candeca ñaha-gǎ xíí-yu ndaa. <sup>16</sup>Chí Xítóhó Jesucristú quee túu-gá andiú, te cana-gá nchaa ñáyiú ní sándáá iní tnúhu-gá, te òré-á<sup>n</sup> Yǎ Ndiòxí cada-gá te òré-á<sup>n</sup>, cáhá<sup>n</sup> ìí<sup>n</sup> cútú te òré-ni-á<sup>n</sup> ndoto nchaa ñáyiú ní xíhí, ñáyiú ní sándáá iní tnúhu-gá. <sup>17</sup>Te dàtnùní nchaa nchoo ñáyiú xĩndecu vǐvú ñuyíú-a nanhí tñáhá-ó ndìhí-yu, te ndanchita-o ndìhu-o xítí vícó nanhí tñáhá-ó ndìhí Xítóhó Jesucristú, te candeca ñaha-gǎ xii-o ndàa andiú cundecu ndìhi-o-gá ní caa ní quíhí<sup>n</sup>. <sup>18</sup>Núú xíá<sup>n</sup> chí cuǎha tñaha tnúhu ndee iní, te vá ndìhú iní-ndó chí nanhí tǎhú-ndó nùú-gǎ.

**5** Te nchòhó ñáyiú ndècu ndìhi-í ichi Xítóhó Jesucristú ñá túú-gǎ xíní ñùhu-xi sá càchí tnúhu-í xii-ndo sǎ quíxí tucu-gá, te ní ñà túú-gǎ xíní ñùhu-xi sá càchí tnúhu-í xii-ndo nǎsa cada-xi òré quixi-gá. <sup>2</sup>Chí nchòhó sa ñaha ndáá-ndó sǎ Xítóhó Jesucristú quixi-gá nduu ñà túú yǐhí iní-ó, chí dàtná quídé ìí<sup>n</sup> ñadúhú cada-gá òré quixi-gá, chí nduu ñà túú nǎ yǐhí iní-ó quixi tucu-gá. <sup>3</sup>Te sáá nduu te cachí nchaa ñáyiú ndècu ichi cuehé ichi duha: “Vitna ío váha cùu iní-ó ndècu-o, te ñá túú-gǎ ná cúmǎní xii-o”, duha quesàhá-yu. Te ñáyiú-á<sup>n</sup> òré ñá túú nǎ yǐhí iní-yu, te quèxio tnúndòho tnúhu ndàhú sá cúú-xí-yu. Chí cada-xi dàtná quídé-xí ìí<sup>n</sup> ñáyiú dìhí ní tñahá òré cacu déhe-xi, chí na iní-yu ní dátñùhú ñáhá-xí te vá cǎcu-yu núú tnùndòhó-yu, te duca<sup>n</sup> sǎ tñahá-xi yáha nchaa ñáyiú ñá túú ndècu ichi-gá, chí na iní-yu quexio tnúndòho sá cúú-xí-yu te vá cǎcu-yu núú tnùndòho-á<sup>n</sup>. <sup>4</sup>Te nchòhó ñáyiú ndècu ndìhi-í ichi Xítóhó Jesucristú, ñá túú-gǎ ndécú-ndó ichi cuehé ichi duha, núú xíá<sup>n</sup> sa yǐhí-ná iní-ndó ndùu quixi-gá te vá yáha-ndo dàtná yáha nchaa ñáyiú ñá túú ndècu ichi-gá, chí ñáyiú-á<sup>n</sup> ñà

túú nǎ yǐhí iní-yu sá quíxí-gǎ. Te na iní-yu quexio-gá dàtná quídé ñadúhú na iní-ó quíhu-güedé vehe-o dùhu-güedé duca<sup>n</sup> càda-gá òré quixi-gá. <sup>5</sup>Te nchoo ñà túú-gǎ ndécú-ó ichi cuehé ichi duha, te ichi-á<sup>n</sup> cúú-xí dàtná ìí<sup>n</sup> ichi nee ndècu-o ní cuu, te vitna sa ní ngúndecu-o ichi váha, te duca<sup>n</sup> chí Yá Ndiòxí ní dàndíxí tǔu-gá iní-ó cuendá cutnùní iní-ó nàcuáa ndùu cuendá-gá. <sup>6</sup>Te xini ñuhu-xi dandixi túu-o iní-ó, te cada váha-o cùndecu-o ichi-gá, te vá cáda-ó dàtná quídé nchaa ñáyiú ñá túú sándáá iní ñáhá xii-gá, chí ñáyiú-á<sup>n</sup> ñà túú-gǎ quídé cuendá-yu te núu quide váha-yu àdi ñá túú quide váha-yu ndècu-yu. <sup>7</sup>Te nchaa ñáyiú quide cuehé quídé dùha cuú-yu dàtná ìí<sup>n</sup> ñáyiú xidí àdi xíní, chí ñá túú quide cuendá-yu nàcuáa cadá-yu ìí<sup>n</sup> sá váha dàtná cuíní Yá Ndiòxí. <sup>8</sup>Te nchòhó ñáyiú sa ní cutnùní iní-xi nàcuáa ndùu ichi váha, dandixi túu-ndo iní-ndó cùndecu-ndo, te quindáá ndisa iní-ndó Yá Ndiòxí, te cuu iní-ndó cuè tñaha ñáyiú-ndo te duca<sup>n</sup> te vá táxí tnùní ñáhá nì ìí<sup>n</sup> sá cuèhé sá dúhá xii-ndo. Te ío cuhu<sup>n</sup> iní-ndó sǎ cùndècu-ndo ndìhi-gá ní caa ní quíhí<sup>n</sup>. <sup>9</sup>Chí Yá Ndiòxí ní cachí-gá sá vǎ quíhí<sup>n</sup>-ó núú ùhú núú ndàhú, chí mee-gǎ nacuaca ñaha-gǎ xii-o cùndecu-o ndìhi-gá, chí ní sándáá iní-ó Xítóhó Jesucristú. <sup>10</sup>Te mee Xítóhó Jesucristú ní xíhí-gá sá cuendá nchaa yíca cuèchi-o, te ní ndoto-gá cuendá nduu tǎhú-ó cùndecu-o ndìhi-gá andiú na sàá nduu cuèi sa ní xíhí-ó, àdi vátá cùú-gá-ó. <sup>11</sup>Núú xíá<sup>n</sup> chí cuǎha tñaha tnúhu ndee iní, te chindee tñaha-ndo cundecu-ndo ichi-gá dàtná tá quide-ndo véxi.

#### **Té Pǎblú dáquíní sàhú-dé ñáyiú ndècu ichi Xítóhó Jesucristú**

<sup>12</sup>Te nchòhó ñáyiú ndècu ndìhi-ndí ichi Xítóhó Jesucristú, càhá<sup>n</sup> ndàhú-ndí núú-ndó sǎ cànèhe-ndo sá yǐñùhu núú cuè téé cùnùu xinu cuechi núú Yá



Ndiöxí, cue tée dānehé ñáhá xii-ndo nacuáa cundecu-ndo ìchi-gá. <sup>13</sup>Te cáhá<sup>n</sup> váha-ndo ndìhi-güedé, te cuu iní-ndó-güedé, chi ñaha-ndo sá chíú<sup>n</sup> Yá Ndiöxí quidé-güedé. Te cundecu ndìhi váha ñaha-ndo ncha-ndo.

<sup>14</sup>Te cáhá<sup>n</sup> ndàhú tucu-ndí núú-ndó sá cáhá<sup>n</sup>-ndó dōho ncha ñáyiú ñá túú cuini cada chiú<sup>n</sup>, te duca<sup>n</sup> cuñaha-ndo tnúhu ndee ìní xii ncha ñáyiú quiyuhu iní-xi canchicú<sup>n</sup> nihnu ichi-gá, te chindee tucu-ndo ncha ñáyiú vátá ngūnu ichi váha-gá, te cunduu càhnu iní-ndó nū-yu ncháá-yu.

<sup>15</sup>Te cada ndee ìní-ndó te núu ndècu tnaha ñáyiú-ndo cùu úhú iní ñáhá-yu xii-ndo, te vá tnàhá-ni-ndo cùu úhú iní-ndó-yu. Te mee-ni sá vāha cada-ndo sá cúú-xí nchàa tnaha ñáyiú-ndo.

<sup>16</sup>Te ncha nduu ío cudíí ìní-ndó cùndecu-ndo. <sup>17</sup>Te ìí<sup>n</sup> nduu ìí<sup>n</sup> nduu cáhá<sup>n</sup> ndìhi-ndo Yá Ndiöxí. <sup>18</sup>Te ndacá<sup>n</sup> táhú-ndó nū-gá te núu nándi cùu sá yāha-ndo ndècu-ndo, chi duca<sup>n</sup> cuini-gá cada-o, te diu duca<sup>n</sup> nduu tnúhu cáhá<sup>n</sup> Xítohó Jesucristú.

<sup>19</sup>Te vá quèhndé nihnu-ndo chiú<sup>n</sup> quide Espiritú Yá Ndiöxí iní-ndó. <sup>20</sup>Te vá cádá sàá iní-ndó nūú cuè tée cáhá<sup>n</sup> tnúhu Yá Ndiöxí nàcuáa dàc-ahu iní ñáhá-gá xii-güedé. <sup>21</sup>Te cada cuèndá váha-ndo nàcuáa cáhá<sup>n</sup>-güedé, te tñi-ndo nchàa tnúhu váha cáhá<sup>n</sup>-güedé.

<sup>22</sup>Te daña-ndo nchàa ichi cuehé ichi duha.

<sup>23</sup>Te mee Yá Ndiöxí quidé-gá ío váha cùu iní-ó ndècu-o ichi-gá. Te xicá<sup>n</sup> táhú-í núú-gá sá ná càda íí ñáhá-gá xii-ndo, te na còto ñaha-gá xii-ndo ndìhi iní-ndó cuèndá sá vā cádá-gá-ndó ñi ìí<sup>n</sup> sá cuèhé sá dúhá, te diu-ni duca<sup>n</sup> na càda-gá sá cúú-xí-ndó ndéé ná sàá nduu quixi tucu Xítohó Jesucristú ñuyú-a. <sup>24</sup>Chi Yá Ndiöxí Yaá ní cáhá<sup>n</sup> ñáhá xii-o cada-gá nàcuáa ní cáhá<sup>n</sup>-gá, te chindee ñaha-gá xii-ndo.

**Té Páblú quidé ndèe iní-dé  
ñáyiú xīndecu ichi Xítohó  
Jesucristú ndécú ñúú Tesalónica**

<sup>25</sup>Te nchòhó ñáyiú ndècu ndìhi-í ichi Xítohó Jesucristú, cacadá<sup>n</sup> táhú-ndó nūú Yá Ndiöxí sá ná chindee ñaha-gá xii-ndí.

<sup>26</sup>Te cúñaha-ndo xii ncha ñáyiú ndècu ndìhi-o ichi Xítohó Jesucristú sá ñi yuhu ñi iní-ndí quidé ndèe iní ñáhá-ndí xii-ndo ndìhi-yu.

<sup>27</sup>Te vitna mee Yá Ndiöxí ndéhé-gá sá cáhá<sup>n</sup> ndàhú-í núú-ndó sá dácua-ndo tutú-a núu nchàa ñáyiú ndècu ndìhi-o ichi-gá.

<sup>28</sup>Te Xítohó Jesucristú ío na chindee chitúu ñaha-gá xii-ndo nūú cuahá<sup>n</sup> núú vèxi. Te duca<sup>n</sup> na cunduu. Te ío chí cádá ndèe iní-nā vitna.

## TUTÚ CÚÚ ÒÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU ÑÚÚ TESÀLÓNICÁ

**Té Päblú ndihi cue té cùndihi-dé  
cádúha-güedé tutú quíhí<sup>n</sup> ndaha  
ñáyiu xĩndecu ichi Xítohó  
Jesucristú ndécú ñúú Tesàlónicá**

**1** Yúhú té Päblú cádúha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiu ndècu ndihi-ndí ichi Xítohó Jesucristú ndécú ñúú Tesàlónicá, chi tnàhá tnúhu-ndo ndihi Tátá-ó Dütú Ndiòxí, ndihi Xítohó Jesucristú. <sup>2</sup> Te xicá<sup>n</sup> táhú-ndí núú Dütú Ndiòxí, ndihi núú Xítohó Jesucristú sá ná chĩndee chitúu ñaha-gá xii-ndo, te duca<sup>n</sup> ndè nduú-gá ná cádá te ío váha cuu iní-ndó cùndecu-ndo.

**Yá Ndiòxí cada ndáá-gá cuéchi nchaa  
ñáyiu ndècu ichi cuehé ichi duha na  
sàá nduu quixi tucu Xítohó Jesucristú**

<sup>3</sup> Te nchòhó ñáyiu ndècu ndihi-ndí ichi Xítohó Jesucristú, cächí tnúhu-í xii-ndo sá cúnàha-ndo sá ñà túú dàña ndee-ndí ndàcá<sup>n</sup> táhú-ndí núú Yá Ndiòxí cuendá-ndó, chi dacuitíí dùca<sup>n</sup> taú-xi cunduu chi ío-gá tá sàndáá iní-ndó-gá cuáhá<sup>n</sup>, te duca<sup>n</sup> ùu<sup>n</sup>-gá tá cùu iní tnáhá-ndó nàcuáa ndècu-ndo ichi Yá Ndiòxí. <sup>4</sup> Núú xíá<sup>n</sup> nchúhú ío váha cáhá<sup>n</sup>-ndí cuendá-ndó núú nchaa ñáyiu sàndáá iní tnúhu Yá Ndiòxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gá, te ñà túú dàña ndeé-ndó nchìcú<sup>n</sup> nihnu-ndo ìchi-gá, te quide cahnu-ni iní-ndó cuéi nándi sá yáha-ndo ndècu-ndo ichi-gá. <sup>5</sup> Te sá dúcá<sup>n</sup> quide váha-ndo ndècu-ndo xíá<sup>n</sup> cútnùnì nàcuáa cada ñaha Yá Ndiòxí xii-ndo na sàá nduu, chi nduu táhú-ndó cùndecu-ndo núú táxí tnùnì-gá, te duca<sup>n</sup> càda-gá chi cùu-gá Yaá quidé ndáá

cuítì. Te vitna ndòho-ndo nacuáa ndíhu ndaha-gá dava-gá ñáyiu.

<sup>6</sup> Te Yá Ndiòxí ío váha ndáá quidé-gá, chi mee-gá nachinaa-gá nchaa sá quidé ñàha ñáyiu cùu úhú iní ñáhá xii-ndo, <sup>7</sup> te nchoo ñáyiu ndòho cuendá Xítohó Jesucristú nucúndecu váha-o na sàá nduu nùu túu-gá andiu, te tnàhá cue espíritú xínú cuéchi núú Yá Ndiòxí cuu<sup>n</sup> ndihi-gá, te cue espíritú-á<sup>n</sup> quidé-xí nchaa núú chiu<sup>n</sup> tahu-gá. Te òrè nuu túu-gá andiu ndihi cue espíritú-á<sup>n</sup>, te ío dátása<sup>n</sup>-xi andiu. <sup>8</sup> Te dandòho-gá nchaa ñáyiu ñà túú tnàhá tnúhu ndihi Yá Ndiòxí, ñáyiu ñà túú sàndáá iní tnúhu Xítohó Jesucristú tnúhu sá cáhá<sup>n</sup> nàcuáa naníhí táhú-yu. <sup>9</sup> Te nchaa ñáyiu-á<sup>n</sup> ío dandòho ñaha-gá xii-yu, chi ndohó-yu ni caa ni quíhí<sup>n</sup>, te vá cùndècú-yu núú ío váha càa ndecu-gá táxí tnùnì-gá. <sup>10</sup> Te duca<sup>n</sup> càda ñaha-gá xii-yu na sàá nduu, te dàvá-á<sup>n</sup> ío cada càhnu ñaha nchaa ñáyiu sàndáá iní ñáhá xii-gá. Te tnàhá nchaa nchòhó ñáyiu ní sàndáá iní tnúhu ní cáhá<sup>n</sup>-ndí duca<sup>n</sup> càda-ndo, te nchaa-o ío cuñúhu-o-gá dàvá-á<sup>n</sup>.

<sup>11</sup> Te cuendá xíá<sup>n</sup> núú ío xicá<sup>n</sup> táhú-ndí núú Dütú Ndiòxí sá ná chĩndee ñaha-gá xii-ndo cùndecu váha-ndo ìchi-gá dàtná cuínì mée-gá cundecu nchaa ñáyiu ní cáhá<sup>n</sup>-gá cundecu ndihi-gá. Te xicá<sup>n</sup> táhú tucu-ndí núú-gá sá ío na chĩndee ñaha-gá xii-ndo càda-ndo nchaa sá váha sàni iní-ndó, ndihi cuendá chiu<sup>n</sup> quide-ndo cuendá-gá, te duca<sup>n</sup> chi sàndáá iní-ndó-gá. <sup>12</sup> Te núú duca<sup>n</sup> na càda-ndo, te cáhá<sup>n</sup> váha ñáyiu cuendá Xítohó Jesucristú, te tnàhá-ni nchòhó cáhá<sup>n</sup> váha-yu cuendá-ndó, chi mee Yá Ndiòxí ndihi Xítohó Jesucristú cùndàhú iní ñáhá-gá chĩndèe ñaha-gá xii-ndo.

**Té quixi dandàhú ñáyiu**

**2** Te nchòhó ñáyiu ndècu ndihi-ndí ichi Xítohó Jesucristú cächí

tnúhu-ndí xii-ndo nàcuáa cada-xi nduu na quixi tucu-gá, chi quixi-gá nacuaca ñaha-gã xii-o, núu xíã<sup>n</sup> càhá<sup>n</sup>-ndí dóho-ndo. <sup>2</sup>Te ñá díú sã íí<sup>n</sup> tnúhu tecú dóho-ndo te nguíta-ndo càni íí<sup>n</sup> cani úú iní-ndó, te ni vã yùhú-ndó te núu véxi íí<sup>n</sup> téé càchí-dé sã càhá<sup>n</sup>-dé tnúhu Yá Ndiöxí, te càchí-dé sã véxi Xítoho Jesucristú, te vá quindáá iní-ndó tnúhu càhá<sup>n</sup>-dé chi ñá ndáá, àdi véxi íí<sup>n</sup> téé nèhe íí<sup>n</sup> tutú núu-ndó te càchí-dé sã yùhú ní tendaha-í véxi, te núu títú-á<sup>n</sup> càhá<sup>n</sup>-xi sã sã véxi Xítoho Jesucristú, te diu-ni vá quindáá iní-ndó nàcuáa càhá<sup>n</sup>-xi, te ndèda-ni càa ñáyiu cáhá<sup>n</sup>-yu dàvá-á<sup>n</sup> sã sã véxi-gá dico vá quindáá tnàhí iní-ndó. <sup>3</sup>Núu xíã<sup>n</sup> dátúha ñaha-í xii-ndo cuendá sã vã dáñá tnàhí-ndo mèe-ndo dandahú ñáhá ñáyiu. Chi cùmání-gã sáá nduu quixi tucu Xítoho Jesucristú, te nguíta nchaa ñáyiu cuu úhú iní-yu Yá Ndiöxí, te dàvá-á<sup>n</sup> quini-yu íí<sup>n</sup> téé xidó quidé nchaa sã cuèhé sã dúhá, te téé-á<sup>n</sup> quíhí<sup>n</sup>-dé núu ùhú núu ndàhú ni caa ni quíhí<sup>n</sup>. <sup>4</sup>Te diu-ni téé-á<sup>n</sup> vã ndèe iní-dé nchaa sã càchí ñáyiu cùu ndiöxí-yu ndihi nchaa dava-gá sã quidé càhnú-yu, te cachí-dé sã ío cùnuu-dé, te quíhu-dé ndéé xití veñúhu núu ndécú cuè ñáyiu chiñuhu ñaha xii Yá Ndiöxí coo-dé, te cúnaha-dè xii-yu sã cúú-dè Yá Ndiöxí.

<sup>5</sup>Te dandàcu iní-ndó chi nchaa tnúhu-a sa ní cachí tnúhu-í xii-ndo cùtnàhá ní xíndecu ndihi ñaha-í. <sup>6</sup>Te nchòhó sa cùnuní iní-ndó ñá cúú sã ngání ñaha xii téé-á<sup>n</sup> nùu ñá túú-dè vitna, dico na sáa nduu tàú-xi quee-dé caca cuu-dé te dàvá-á<sup>n</sup> quini ñáhá nchaa ñáyiu. <sup>7</sup>Te ío titní núu sã cuèhé sã dúhá quide yucu ñávãha dicó-ni sã vátá quini-gá ñáyiu, dico ndècu íí<sup>n</sup> sã ñá dáñá càda-xi nchaandi túhú nàcuáa càchí iní-xi, dico sáá nduu xòcuíñí sã ñá dáñá-á<sup>n</sup> te dàvá-á<sup>n</sup> cada-xi nchaa nàcuáa càchí iní-xi. <sup>8</sup>Te sáá nduu

quini-yu téé quide nchaa sã cuèhé sã dúhá-á<sup>n</sup> ñuyíú-a. Te òré ná quixi túu Xítoho Jesucristú, te mee-ni sã dátãsa<sup>n</sup>-xi, ndihi yóco yuhu-gá cuú téé-á<sup>n</sup>. <sup>9</sup>Te sácuihná tendaha-xi téé-á<sup>n</sup> quixi-dé, te cuãñaha-xi tnúhu ndee iní cada-dé nándi sã cadá-dè. Te cada-dé sã ñá túú tnàhí ndàcu ni íí<sup>n</sup> ñáyiu ñuyíú-a cadá-yu, dico mee-ni dandahú ñáhá-dè xii-yu caca cuu-dé. <sup>10</sup>Te nchaa núu sã cuèhé sã dúhá càda-dé dandahú-dé nchaa ñáyiu sa ñuhu ichi cuáhá<sup>n</sup> núu ùhú núu ndàhú, chi ñá túú ní cuini-yu quindáá iní-yu tnúhu ndáá tnúhu Yá Ndiöxí cuendá nanhí tãhú-yu. <sup>11</sup>Te sã dúcá<sup>n</sup> ñá túú ní cuini-yu quindáá iní-yu tnúhu ndáá, núu xíã<sup>n</sup> daña Yá Ndiöxí dacáhá<sup>n</sup> yucu ñávãha iní-yu quindáá iní-yu nchaa tnúhu ndehnde <sup>12</sup>cuendá cuíta nihnú-yu, te duca<sup>n</sup> yãha-yu chi ñá túú sàndáá iní-yu tnúhu ndáá càhá<sup>n</sup> Yá Ndiöxí, chi mee-ni nchaa sã cuèhé sã dúhá cùdíí iní-yu quidé-yu, te cuíta nihnú-yu chi duca<sup>n</sup> ní cachí Yá Ndiöxí cunduu.

### Ñáyiu ní cachí Yá Ndiöxí nanhí tãhú

<sup>13</sup>Te nchòhó ñáyiu ndècu ndihi-ndí ichi Xítoho Jesucristú, ñáyiu ío cùu iní-gá càchí tnúhu-ndí xii-ndo sã ñá túú daña ndee-ndí ndàcá<sup>n</sup> tãhú-ndí núu Yá Ndiöxí cuendá-ndó, chi duca<sup>n</sup> tàú-xi cunduu, chi Yá Ndiöxí ní cachí-gá ndéé cùtnàhá vátá ngãva-gá ñuyíú sã nánihí tãhú-ndó, te diu Espiritú-gá dácáhá<sup>n</sup>-xi iní-ndó ndècu yiñuhu-ndo núu-gã, te sàndáá iní-ndó tnúhu ndáá càhá<sup>n</sup>-gá nùu xíã<sup>n</sup> ní nanhí tãhú-ndó. <sup>14</sup>Chi cuendá tnàhí-a ní cáhá<sup>n</sup> ñáhá Yá Ndiöxí xii-ndo, te duca<sup>n</sup> ní nanhí tãhú-ndó chi ní sàndáá iní-ndó tnúhu Xítoho Jesucristú ní cáhá<sup>n</sup>-ndí núu-ndó, te sáá nduu te cundecu-ndo tnàhá-ndó nùu ío váha càa ní nduu tãhú Xítoho Jesucristú ndécú-gã.

<sup>15</sup>Núu xíá<sup>n</sup> nchòhó ñáyiú ndècu ndihi-ndí ichi Xítóhó Jesucristú ío càhá<sup>n</sup>-ndí dóho-ndo sá và dáñá nihnu-ndo ichi-gá, te ni và nàcuànaa-ndo nchaa tnúhu ní cáhá<sup>n</sup>-ndí núú-ndó cùtnàhá ní xíndecu ndihi ñaha-ndí xii-ndo, te diu-ni duca<sup>n</sup> càda-ndo nchaa tnúhu tëndaha-ndí véxi. <sup>16-17</sup>Te xicá<sup>n</sup> táhú-ndí núú-gá sá ná dàcahá<sup>n</sup>-gá iní-ndó cùndecu-ni-ndo ichi-gá, te duca<sup>n</sup> ío na chindee ñaha-gá xii-ndo càhá<sup>n</sup>-ndó mèe-ni tnúhu váha, te cada váha-ndo cùndecu-ndo nacuaá cuu váha iní-gá, chi mee Dítú Ndióxi ío cùu iní ñáhá-gá xii-o, te diu-gá ní taxi-gá tnúhu ndee iní cundecu ndihi-o nì caa nì quíh<sup>n</sup>, te ní cachí tnúhu tucu-gá ingá tnúhu váha sá cùndètu-o Xítóhó Jesucristú.

### **Cáhá<sup>n</sup> ndihi-ndo Yá Ndióxi cuendá-ndí**

**3** Te nchòhó ñáyiú ndècu ndihi-ndí ichi Xítóhó Jesucristú, ndéé núú ndíhí-ná càchí tnúhu-í xii-ndo sá càhá<sup>n</sup> ndihi-ndo Yá Ndióxi cuendá-ndí cuendá sá ná chindee ñaha-gá xii-ndí, te duca<sup>n</sup> ndíhi-ni cuténuu tnúhu Xítóhó Jesucristú nchaa xichi, te cudí iní-yu tnúhu-gá dàtná quidé nchòhó. <sup>2</sup>Te cáhá<sup>n</sup> ndihi tucu-ndo Yá Ndióxi cuendá sá ná còto ñaha-gá xii-ndí, te ñá túú nà cada ñaha ñáyiú cuihna iní-xi ndècu ichi cuehé ichi duha xii-ndí, chi ñá ncháá-yu sàndáá iní-yu tnúhu-gá. <sup>3</sup>Dico Xítóhó Jesucristú quidé-gá nchaa sá càhá<sup>n</sup>-gá, te diu-gá cada te nchòhó cundecu-ni-ndo ichi-gá, te coto ñaha-gá xii-ndo cuendá sá ñà túú nà cada ñaha yècu ñávàha. <sup>4</sup>Te Xítóhó Jesucristú quidé-gá cùtnùnì iní-ndí sá nchòhó quidé-ndó nchàa nacuaá ní dánèhé ñáhá-ndí xii-ndo, te diu-ni duca<sup>n</sup> càda-ndo cundecu-ndo. <sup>5</sup>Te xicá<sup>n</sup> táhú-ndí núú Yá Ndióxi sá ná chindee ñaha-gá xii-ndo cùu iní-ndó-gá, te diu-ni-gá ná chindee ñaha-gá xii-ndo

cùnduu cahnu iní-ndó, chi Xítóhó Jesucristú duca<sup>n</sup> ío càhnu iní-gá.

### **Tàú-ó càda chiu<sup>n</sup>-o**

<sup>6</sup>Te nchòhó ñáyiú ndècu ndihi-í ichi Xítóhó Jesucristú, càhá<sup>n</sup>-í dóho-ndo sá mée-gá cuiní-gá sá và nihí tnáhá-gá-ndó ndihi ndéda-ni càa ñáyiú càchí sá sàndáá iní tnúhu-gá, ñáyiú ñá túú cuiní cada chiu<sup>n</sup>, chi ñáyiú duca<sup>n</sup> xíquide ñá túú cuiní-yu tñí-yu tnúhu sá ní dánèhé ñáhá-ndí xii-ndo. <sup>7</sup>Te nchòhó sa xini-ndó nàcuáa cada-ndo cundecu-ndo canchicú<sup>n</sup> nihnu-ndo nàcuáa quide-ndí. Te cùtnàhá ní xíndecu ndihi ñaha-ndí xii-ndo chi ni ì<sup>n</sup> nduu ñá túú ní tùhí-o-ndí. <sup>8</sup>Te ni ñà túú dícó duca<sup>n</sup> ni quèhe<sup>n</sup>-ndí sá ndécú ndihi ñáyiú caxi-ndí àdi canehe-ndí, chi cuéi nduu cuéi niú ío ní quide chiu<sup>n</sup>-ndí ní níhí-ndí díhú<sup>n</sup> nì saa<sup>n</sup>-ndí nchaa sá ní nàndíhi-ndí cuendá sá ñà túú ní cuiní-ndí chichiu<sup>n</sup> ñaha-ndí xii-ndo. <sup>9</sup>Te cuéi tàú ndisa-ndí cachí tnúhu-ndí xii-ndo sá chindèe ñaha-ndo xii-ndí ní cùu, dico ní quide chiu<sup>n</sup>-ndí cuendá ní cuiní-ndí danèhé ñáhá-ndí xii-ndo nàcuáa cada-ndo cundecu-ndo. <sup>10</sup>Te cùtnàhá ní xíndecu ndihi ñaha-ndí xii-ndo ní cachí-ndí sá ncháá ñáyiú ñá túú cuiní cada chiu<sup>n</sup> te vá cuàha-ndó-yu sá caxí-yu. <sup>11</sup>Te vitna nihí-ndí tnúhu sá ío dava nchòhó ñá túú tnáhí quide chiu<sup>n</sup>-ndo, chi àú<sup>n</sup> nà cuu ndí cuu ndí cuu-ni-ndo núú ndécú dàva-gá tnàha ñáyiú-ndo. <sup>12</sup>Te yúhú càhá<sup>n</sup>-í dóho nchaa nchòhó ñáyiú duca<sup>n</sup> ñà túú cuiní cada chiu<sup>n</sup> sá cáda chiu<sup>n</sup>-ndo cuendá níhí-ndó nchàa sá cóhó sá caxí-ndó, te duha càhá<sup>n</sup>-í dóho-ndo, chi duca<sup>n</sup> cuiní Xítóhó Jesucristú Yaá táxi tñùnì ñáhá xii-o cada-ndo, te òrè cada chiu<sup>n</sup>-ndo te vá ío cada dusa<sup>n</sup>-ndo.

<sup>13</sup>Te nchòhó ñáyiú ndècu ndihi-í ichi Xítóhó Jesucristú, và dáñá ndéé-ndó càda-ndo mee-ni sá váha. <sup>14</sup>Te núu ì<sup>n</sup> ñáyiú ndècu ndihi-ndo ñá túú cuiní-yu

tníí-yu tnúhu càhá<sup>n</sup>-ndí núú tütú-a, te cundehe-ni-ndo núu nděda càá-yu, te vá nihí tnáhá-gă-ndó ndihí-yu cuendá sá ná cùcaha<sup>n</sup> núű-yu, <sup>15</sup> dico vá cúú ůhú iní-ndö-yu, chi cáhá<sup>n</sup>-ndó dōho-yu cada-ndo sã ndécú-ndó ìchi Xítóhó Jesucristú ndihí-yu.

**Tnúhu ndéé núú nĩ ndihí-ná**

<sup>16</sup> Te mee Xítóhó Jesucristú ío váha cùu iní-gá ndécú-gă, te xicá<sup>n</sup> táhù-í núú-gă sá méé-gă ná cádá te ío váha cuu

iní-ndó tnáhá-ndó cùndecu-ndo cuéi nása-gá ná cùndecu-ndo. Te mee-gă ná cùndecu ndihi ñaha-gá xii-ndo nchàa-ndo.

<sup>17</sup> Te vitna yúhú té Păblú tée-í tnúhu-a quide ndee iní ñáhà-í xii-ndo, te diu-ni duha càa nchaa letrá-í nchaa núú tütú cáđúha-í. <sup>18</sup> Te xicá<sup>n</sup> táhù-í núú Xítóhó Jesucristú sá ío na chìndee chitúu ñaha-gă xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nă vitna.

## TUTÚ DÍHNA NUU NĪ CADÚHA TÉ PĀBLÚ QUIHĪ<sup>n</sup> NDAHA TÉ TIMŪTEÚ

### Té Pāblú cādūha-dé tutú quihĪ<sup>n</sup> ndaha té Timūteú

**1** Yúhú té Pāblú ní tendaha ñaha Yá Ndiöxí cāhá<sup>n</sup>-í tnúhu Xítohó Jesucristú núú ñáyiú chi duca<sup>n</sup> ní cachí Yá Ndiöxí cunduu, te diu-gá cúú-gă Yá ní dácăcu nihnu ñaha xii-o núú ùhú núú ndàhú. Te tnàhá Xítohó Jesucristú duca<sup>n</sup> ní cachí-gá sá cāhá<sup>n</sup>-í tnúhu-gă, te diu-gá ní taxi-gă tnúhu ndee iní xii-o sã cündècu-o ndihi-gă ni caa ni quihĪ<sup>n</sup>. <sup>2</sup>Te yòhó té Timūteú cúú-n ñ<sup>n</sup> téé ní sanu ichi ndisa-í ichi Xítohó Jesucristú chi ío váha ní sándáá iní-n-gă. Te cādúha-í ñ<sup>n</sup> tutú daquixi-í ndaha-n. Te xicá<sup>n</sup> tãhú-í núú Tátá-ó Dütú Ndiöxí ndihi núú Xítohó Jesucristú sá ío na chindee chitúú ñaha-gă xii-n, te duca<sup>n</sup> ndè nduú-gă ná cādá te ío váha cuu iní-n cündecu-n.

### Cuèndá nchaa ñáyiú dàndahú tnàha ñáyiú-xi

<sup>3</sup>Te nàha-n nacuáa ní cāhá<sup>n</sup>-í cút-nàhá ní quee-í ñuú Éfesú véxi-í distritú Macèdoniá, chi ní cachí-í sá quèndòo-n ñúú-á<sup>n</sup> cāhá<sup>n</sup>-n dõho nchaa ñáyiú dàndahú ñáhá cāhí sá cāhá<sup>n</sup> tnúhu Yá Ndiöxí te ñá ndáá sá cāhá<sup>n</sup>-yu tnúhu-gă, te diu-ni duca<sup>n</sup> cāhá<sup>n</sup>-í vitna cada-n cündecu-n. <sup>4</sup>Te cúñaha-n xii-yu sá vã cādá cuèndá-yu nchaa cuèndú nihí-yu nacuáa ní xóo cada ñáyiú ní xín-decu ndéé sanaha, te nchaa cuèndú-á<sup>n</sup> dicó chinàa ñáhá-xí chi ñá túú vèdana nàndfhi-xi, te ni ñà túú chindee ñaha-xi cada-o nacuáa cuiní Yá Ndiöxí, chi mee-ni sã quindáá iní-ó-gă quidé-xí quide-o nchaa nacuáa cuiní-gă.

<sup>5</sup>Te duha cāhá<sup>n</sup>-í cúñaha-n xii-yu cuèndá sá ná cùu iní-yu tnàha ñáyiú-yu,

te xini ñuhu-xi nduu ndoo nduu nine iní-yu, te cunduu váha iní-yu, te quindáá iní-yu Yá Ndiöxí, te vã cání ñ<sup>n</sup> cani úú iní-yu, te núu duca<sup>n</sup> na cādá-yu te cuu iní ndisá-yu nchaa tnàha ñáyiú-yu. <sup>6</sup>Chi dava ñáyiú ñá túú-gă quidě-yu nchaa nacuáa cāhá<sup>n</sup>-í-a, chi mee-nã nchaa cuèndá sá ñã túú vèdana nàndfhi xicāhá<sup>n</sup>-yu. <sup>7</sup>Te cuiní-yu cāhá<sup>n</sup>-yu nchaa tnúhu ní cāhá<sup>n</sup> ndfi Moisés dico ñá ndácü-yu, chi cuěi ni yùhu ni iní-yu cāhá<sup>n</sup>-yu dico ñá tècú tnùní-yu nacuáa ní cāhá<sup>n</sup> ndfi, te ni tnúhu cāhá<sup>n</sup> mée-yu ñá cút-nùni iní-yu nacuáa ndùu-xi.

<sup>8</sup>Te sa nàha-o sá ncháá tnúhu ní cāhá<sup>n</sup> ndfi Moisés váha, te núu na tècú tnùní-ó nã cuèndá duca<sup>n</sup> ní ngúndecu nchaa tnúhu-á<sup>n</sup>. <sup>9</sup>Te cùtnuní iní-ó sã ñã díú sã cúú-xí nchaa ñáyiú quide váha ndècu ñuyíú-a ni ngúndecu nchaa tnúhu-á<sup>n</sup>, chi ní ngúndecu-xi sá cúú-xí nchaa ñáyiú ñá túú quide váha, ndihi cuèndá nchaa ñáyiú ío sàá iní-xi, ndihi cuèndá nchaa ñáyiú quide cuehé quidé dùha, ndihi cuèndá nchaa ñáyiú ío ndècu cuéchi-xi, ndihi cuèndá nchaa ñáyiú ñá túú nèhe vèdana sá yíñùhu núú Yá Ndiöxí, ndihi cuèndá nchaa ñáyiú ñá túú cāhá<sup>n</sup> váha cuèndá ichi Yá Ndiöxí, ndihi cuèndá nchaa ñáyiú sàhni tátá-xi ndihi nãná-xi, ndihi cuèndá nchaa dava-gă ñáyiú sàhni tnaha, <sup>10</sup>ndihi cuèndá nchaa cue téé cāhá<sup>n</sup> ndihi ñáyiú ñihi te ñá díú ñàdihí-güedé cúú-yu, ndihi cuèndá tucu nchaa ñáyiú ñihi cāhá<sup>n</sup> ndihi cue téé te ñá díú yì-yu cùu-güedé, ndihi cuèndá nchaa cue téé cāhá<sup>n</sup> ndihi tnàha ndi mee téé-xi, ndihi cuèndá nchaa ñáyiú chiváha tnàha ñáyiú-xi cuèndá sá cuiní-yu níhí-yu díhú<sup>n</sup>, ndihi cuèndá nchaa ñáyiú ndehnde, ndihi cuèndá nchaa ñáyiú càcunehe ndéé Yá Ndiöxí cuèndá cuiní-yu cutnùní iní tnàha ñáyiú-yu sá cāhá<sup>n</sup> ndáá-yu, te ñá ndáá sá cāhá<sup>n</sup> ndáá-yu, ndihi cuèndá nchaa ñáyiú quide nchaa dava-gă sã ñã

túu tàuchiu<sup>n</sup> Yá Ndiöxí cadá-yu. Cuèndá nchaa ñáyiú duca<sup>n</sup> xíquide ní ngúndecu nchaa tnúhu-á<sup>n</sup>. <sup>11</sup>Te nchaa tnúhu-á<sup>n</sup> ì<sup>n</sup>-ni cùu-xi ndihi nchaa tnúhu sá ñí cachí Yá Ndiöxí cáhá<sup>n</sup>-í, te tnúhu-á<sup>n</sup> cúu-xí tnúhu váha vihi, chi mee-gá ío váha iní-gá.

**Té Páblú ndàcá<sup>n</sup> táhú-dě  
núú Yá Ndiöxí sá ñí  
cundàhú iní ñáhá-gá xii-dě**

<sup>12</sup>Te Xítohó Jesucristú ní cutnùní iní-gá sá cadá ndáá-í cada-í nchaa chiú<sup>n</sup> tahu-gá. Te ndàcá<sup>n</sup> táhú-í núú-gá sá ñí taxi-gá chiú<sup>n</sup>-gá quídè-í, te ío chindee ñaha-gá xii-í. <sup>13</sup>Te ní taxi-gá chiú<sup>n</sup>-gá quídè-í cuèi ní xóo cáhá<sup>n</sup> cuèhé-í cuèndá-gá, te cuèi ní xóo cúu cuèhé cúu duha-í nchaa ñáyiú ndècu ichi-gá, te cuèi nándi-gá sá ñí xóo cada-í-yu dico ní cundàhú iní ñáhá Yá Ndiöxí xii-í, chi vátá quíndáá-gá iní-í Xítohó Jesucristú cùtnàhá duca<sup>n</sup> ñí xóo cada-í, te ni ñá cùtnùní iní-í nchaa sá quídè-í ní cùu, te cuèi duca<sup>n</sup> ñí xóo cada-í, <sup>14</sup>dico Yá Ndiöxí ío ní cundàhú iní ñáhá-gá xii-í te chindee ñaha-gá. Te mee Xítohó Jesucristú chíndèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

<sup>15</sup>Te nihí-ó tnúhu sá Xítohó Jesucristú ní quixi-gá ñuyíú-a cuèndá sá dácäcu nihnu-gá nchaa ñáyiú ndècu ichi cuehé ichi duha. Te tnúhu-á<sup>n</sup> cúu-xí ì<sup>n</sup> tnúhu ndáá, te xini ñuhu-xi quíndáá iní nchaa nchoo ñáyiú ndècu ñuyíú-a. Te yúhú cúu-í téé ío-gá ndécú cuèchi-xi núú Yá Ndiöxí ní cùu. <sup>16</sup>Te Yá Ndiöxí ní cundàhú iní ñáhá-gá ní dácäcu nihnu ñaha-gá xii yúhú téé xidó ndécú cuèchi-xi ni cùu, cuèndá cutnùní iní nchaa ñáyiú sá Xítohó Jesucristú ío càhnu iní-gá. Te sá dúcá<sup>n</sup> ñí quide ñaha-gá xii-í, te xíá<sup>n</sup> cutnùní iní-yu sá nùu na quíndáá iní ñáhá-yu xii-gá te cundécú-yu ndihi-gá ni caa ni quíhí<sup>n</sup>.

<sup>17</sup>Te nchaa-o chí ná càchí-ó sá ío càhnu cuu Yá Ndiöxí, te canehe-o sá yíñùhu núú-gá ni caa ni quíhí<sup>n</sup>, chi mee-gá cúu-gá Yá táxi tnùní nchaa nduu nchaa quíú. Te cùu-gá ì<sup>n</sup> Yá ñá túú xini núú-ó, te ì<sup>n</sup> dii díí-ni-gá ío ndècu ndihi-gá nchaa sá xini tnùní-gá.

<sup>18</sup>Te yòhó té Timùteú téé cùu datná ì<sup>n</sup> déhe mee-í sa ñaha-n nacuaá ní cáhá<sup>n</sup> dava-gá cue téé càhá<sup>n</sup> tnúhu Yá Ndiöxí cuèndá-n, te diu-ni duca<sup>n</sup> càhá<sup>n</sup>-ú tucu, te cada-n nchaa nacuaá càhá<sup>n</sup> tnúhu-á<sup>n</sup> chi diu nchaa tnúhu-á<sup>n</sup> canu ichi ñaha-xi xii-n cada-n nchaa nacuaá cuini Yá Ndiöxí. <sup>19</sup>Te ío quíndáá iní-n Xítohó Jesucristú, te cada váha-n cùndecu-n nacuaá cundecu váha iní-n, chi dava ñáyiú ñá túú-gá duca<sup>n</sup> quídè-yu núu xíá<sup>n</sup> ñá túú-gá sàndáá iní-yu nàcuáa càhá<sup>n</sup> tnúhu-gá. <sup>20</sup>Te diu-ni duca<sup>n</sup> ñí quide té Himèneú ndihi té Lijandrú ní dáñá ndèe-güedé ñá túú-gá sàndáá iní-güedé nàcuáa càhá<sup>n</sup> tnúhu Xítohó Jesucristú, te ní xáha<sup>n</sup>-í xii-güedé sá ná cùndoho-ná-güedé nùu nása cada ñaha sàcúíhná xii-güedé, te duca<sup>n</sup> ñí xáha<sup>n</sup>-í cuèndá sá vǎ càhá<sup>n</sup> cuèhé-gá-güedé cuèndá Yá Ndiöxí.

**Nàcuáa cáhá<sup>n</sup> ndihi-o Yá Ndiöxí**

**2** Te na càchí tnúhu-í xii-n nchaa nacuaá cada-n. Te díhna-gá càchí tnúhu-í sá càhá<sup>n</sup> ndihi-n Yá Ndiöxí cuèndá nchaa ñáyiú te núu nása cùu xíndecú-yu, te cǎcǎ<sup>n</sup> táhú-n nùú-gá cuèndá-yu, te duca<sup>n</sup> ío ndacá<sup>n</sup> táhú-n nùú-gá cuèndá nchaa sá váha quide ñaha-gá xii-yu. <sup>2</sup>Te duca<sup>n</sup> càhá<sup>n</sup> ndihi-n Yá Ndiöxí cuèndá nchaa cue téé cùnuu ndihi cuèndá nchaa dava-gá cue téé cùchiu<sup>n</sup> cuèndá cada váha-güedé, te duca<sup>n</sup> nchò ñá túú nǎ cuu cundecu-o, te ñá túú tnàhí ná cani iní-ó cùndecu-o, te ío cundecu yíñùhu-o núú Yá Ndiöxí, te cada-o nchaa nacuaá tàú-xi cunduu. <sup>3</sup>Te núu duca<sup>n</sup> na càda-o cáhá<sup>n</sup> ndihi-o

Yá Ndiöxí cuendá nchaa ñáyi te quide váha-o, te nduu vétú iní Yá Ndiöxí Yaá ní dácäcu nihnu ñaha xii-o núú ùhú núú ndàhú. <sup>4</sup>Te mee-gã cuiní-gã sá ncháá ñáyi tecu tnùní-yu nchaa tnúhu càhá<sup>n</sup>-gã, chi cuiní-gã sá nánihí tàhú-yu. <sup>5</sup>Te ì<sup>n</sup>-ni Dútú Ndiöxí ndécú, te ì<sup>n</sup>-ni Xítóhó Jesucristú, te medií-ni Xítóhó Jesucristú quidé-gã tnàhá tnúhu-o ndìhi Yá Ndiöxí. <sup>6</sup>Te Xítóhó Jesucristú ní dáñá-gã méé-gã ní sahi ñaha-güedé xii-gã cuendá sá cuiní-gã sá cäcu nihnu nchaa ñáyi ndècu ñuyúú núú ùhú núú ndàhú. Te Yá Ndiöxí cuiní-gã sá ncháá ñáyi ñuyúú ndécú vitna níhí-yu tnúhu nàcuáa ní cuu ní xhí Xítóhó Jesucristú. <sup>7</sup>Te Yá Ndiöxí ní cachí-gã sá càhá<sup>n</sup>-í tnúhu-á<sup>n</sup> ndèni ní cuu núú xñdecu ñáyi ñá túú cùu ñáyi isràél, te mee-ni tnúhu ndáá dánèhé-í-yu nàcuáa quindáa iní ñáhã-yu xii-gã, te yúhú càhá<sup>n</sup> ndáá-í sá Yá Ndiöxí ní cachí-gã sá càhá<sup>n</sup>-í tnúhu-gã chi ndècu ndìhi-í Xítóhó Jesucristú, te ñá túú dandahú ñáhã-í xii-n.

<sup>8</sup>Te yúhú cuiní-í sá ncháá xìchi càhá<sup>n</sup> ndìhi cue téé Yá Ndiöxí, te na cùnduu ndoo cunduu nine iní-güedé òré ndonehe-güedé ndaha-güedé càhá<sup>n</sup> ndìhi ñaha-güedé xii-gã, chi vá cúú cùdé<sup>n</sup>-güedé cuendá nchaa sá quidé ñaha ñáyi xii-güedé, te ni vã cání iní-güedé cúcuèhé tnáhã-güedé ndìhi-yu. <sup>9</sup>Te càchí tnúhu-í xii-n sã ncháá ñáyi ìhí ná cùnduu dío-yu nàcuáa tàú-xi cunduu, te vá cùnduu cuehé cunduu duha dàtná cáá dío nchaa ñáyi ndècu ichi cuehé ichi duha, te na ndádá-yu díquí-yu nàcuáa tàú-xi cunduu, te vá ndádá cuèhé ndada duhá-yu, te vá cání iní-yu cunduu víí-yu ndìhi sá ìo ndèyáhu, te ni vã cání iní-yu cuihnú-yu dóó sã ìo ndèyáhu. <sup>10</sup>Te mee-ni sã váha cadá-yu, chi duca<sup>n</sup> tàú-xi cada nchaa ñáyi ìhí ndécú ichi Yá Ndiöxí. <sup>11</sup>Te òré tàcá-yu

núú dácuahá-yu tnúhu Yá Ndiöxí, te cue ñáyi ìhí-á<sup>n</sup> na ñahi dacuahá-yu tnúhu-gã, te cadá-yu nchaa nàcuáa càhá<sup>n</sup> cue téé dácuaaha ñaha xii-yu tnúhu-gã. <sup>12</sup>Te yúhú càchí-í sá vã cúú dácuaaha ñáyi ìhí cue téé, te ni vã cúú tàxi tnuní ñáhã-yu xii-güedé chi cunduu tnávíí-ni yuhú-yu cundedóho-yu. <sup>13</sup>Te duca<sup>n</sup> xini ñuhu-xi cadá-yu, chi Yá Ndiöxí ní cadúha-gã díhna-gã té Àdán te dàtnuní ní cadúha-gã tá Èvá. <sup>14</sup>Te ñá díú mèè té Àdán ní dandahú ñáhã sàcufhná xii-dé, chi tá Èvá ní dandahú-xi, te ñá túú ní quide váha-xi núú Yá Ndiöxí sá dúcá<sup>n</sup> ní sándáa iní-xi tnúhu ní càhá<sup>n</sup> sàcufhná-á<sup>n</sup>. <sup>15</sup>Dico ñáyi ìhí ní nduu táhú-yu sá cóó dèhe-yu, te naníhí tàhú-yu te núú vá dáñá ndèe-yu canchicú<sup>n</sup> nihnú-yu ichi Yá Ndiöxí, te cundecu yíñhú-yu núú-gã, te cuu iní-yu nchaa tnàha ñáyi-yu, te cadá-yu nchaa nàcuáa tàú-xi cunduu cundecú-yu.

**Nàcuáa tàú cue téé yìndaha  
ñaha xii ñáyi ndècu ichi  
Yá Ndiöxí cada-güedé**

**3** Te ìo ì<sup>n</sup> tnúhu càhá<sup>n</sup> ñáyi sá núú ì<sup>n</sup> téé cuiní quindaha ñaha xii ñáyi ndècu ichi Yá Ndiöxí, te ì<sup>n</sup> sá váha cuiní-dé cada-dé càchí-yu, te ndáá quée-xí tnúhu càhá<sup>n</sup>-yu. <sup>2</sup>Te yúhú càchí-í sá cuè téé duca<sup>n</sup> na quindaha ñaha xii ñáyi te xini ñuhu-xi cuu-güedé cue téé quide ndáá cuendá sá vã càhá<sup>n</sup> ñáyi cuendá-güedé sá ñá túú quide ndáá-güedé. Te na cùu-güedé cue téé ndèca ì<sup>n</sup> caa-ni ñadihí, te na cùu-güedé cue téé ñá túú quide cutexínu ndècu, te na cùu-güedé cue téé quide nchaa nacuaa tàú-xi cunduu, te na cùu-güedé cue téé sãñaha nùu vehe ndetatú nchaa ñáyi ñuhu ichi, te na cùu-güedé cue téé dānehé ñáhã váha xii ñáyi tnúhu Yá Ndiöxí. <sup>3</sup>Te vá cúú-güedé cue téé quihu, te ni vã cúú-güedé cue téé ndècu



pletú, te ni vǎ cúu-güedě cue tée dicó-ni duca<sup>n</sup> nihí díhú<sup>n</sup>, te ni vǎ cúu-güedě cue tée sàni iní nàá, te ni vǎ cúu-güedě cue tée ñuhu iní mee-ni díhú<sup>n</sup>. Chi na cùu-güedé cue tée váha iní-xi te cunduu càhnu iní-güedé. <sup>4</sup>Te na cùu-güedé cue tée ío váha sànu ichi ñadihí-xi ndihi landú-xi, te na cùu-güedé cue tée quide nacuaá sàndáá iní ñáhá landú-xi cuendá canehe-güexi sá yíñuhu núu-güedé. <sup>5</sup>Chi núu cùu-güedé cue tée ñá ndácú cànuichi ñadihí-xi ndihi landú-xi, te vǎ ndácú-güedé quindaha-güedé cue ñáyi ndècu ichi Yá Ndiöxí. <sup>6</sup>Te vǎ cúu-güedé cue tée íchí ni sàndáá iní-xi tnúhu Yá Ndiöxí, chi na cuáhá<sup>n</sup> te cada nínu-güedé méé-güedé te cuíta nihnu-güedé dàtná ní xíta nihnu sácufhná. <sup>7</sup>Te xini ñuhu-xi cuu-güedé cue tée càhá<sup>n</sup> váha ñáyi cuendá-xi, cuéi ñá dfú ñáyi ndècu ichi Yá Ndiöxí cuendá sá vǎ cuátnúhu ñaha ñáyi xii-güedé, chi núu ñáhá te cudana te sácufhná quesaha-xi tàxi tuní ñáhá-xí xii-güedé.

**Cue tée chindee ñaha xii  
cue tée yindaha ñaha xii  
ñáyi ndècu ichi Yá Ndiöxí**

<sup>8</sup>Te tnàhá cue tée chindee ñaha xii cue tée yindaha ñaha xii ñáyi ndècu ichi Yá Ndiöxí xini ñuhu-xi cuu-güedé cue tée quide ncha nacuaá tàú-xi cunduu, te vǎ cúu-güedé cue tée càchí sá càhá<sup>n</sup> ndáá te ñá ndáá, te ni vǎ cúu-güedé cue tée quihu, te ni vǎ cúu-güedé cue tée sàni iní-xi dicó-ni duca<sup>n</sup> nihí díhú<sup>n</sup>. <sup>9</sup>Te xini ñuhu-xi cuu-güedé cue tée ñá túú dàña ndeé sàndáá iní tnúhu Yá Ndiöxí, te na cùu-güedé cue tée ío váha cùu iní-xi cuendá ncha sá váha quide-güedé. <sup>10</sup>Te xini ñuhu-xi coto ndeé ñáhá xii-güedé te núu cùu-güedé cue tée quide váha, te núu cùu-güedé cue tée quide váha ña te cuu chindee-güedé cue tée yindaha ñaha xii ñáyi ndècu ichi Yá Ndiöxí.

<sup>11</sup>Te tnàhá tucu ncha ñáyi dihí ná cadá-yu ncha nàcuáa tàú-xi cunduu, te vǎ cùnduu yiti yuhú-yu, te ni vǎ cúu-yu ñáyi quide cutexínu ndècu, te na cùu-yu ñáyi ío váha quide ndáá. <sup>12</sup>Te ncha cue tée chindee ñaha xii cue tée yindaha ñaha xii ñáyi ndècu ichi Yá Ndiöxí, xini ñuhu-xi cuu-güedé cue tée ndècu ñ<sup>n</sup> caa-ni ñadihí-xi, te na cùu-güedé cue tée sànu ichi váha ñadihí-xi ndihi landú-xi. <sup>13</sup>Te núu na cada ndáá-güedé chindee-güedé cue tée yindaha ñaha xii ñáyi ndècu ichi Yá Ndiöxí, te canehé-yu sá yíñuhu núu-güedé, te duca<sup>n</sup> te vǎ cúu càhá<sup>n</sup> núu-güedé càhá<sup>n</sup>-güedé núu ñáyi tnúhu Xítoho Jesucristú sá sàndáá iní-güedé.

**Ío càhnu cuu tnúhu càhá<sup>n</sup> Yá Ndiöxí**

<sup>14</sup>Te cuení-í ndíhi-ni quixi coto ñaha-í xii-n dico díhna-gá cadúha-í tutú-a daquixi-í ndaha-n <sup>15</sup>chi na cuáhá<sup>n</sup> cuyaa-í. Te xía<sup>n</sup> núu cadúha-í tutú-a daquixi-í ndaha-n cuendá cutnùní iní-n nasa cada-n cùndecu-n ndihi ncha ñáyi ndècu ichi Yá Ndiöxí. Te ñáyi-á<sup>n</sup> cúu-yu dàtná ñ<sup>n</sup> vehe cùu cuendá Yá Ndiöxí Yaá ndécú ncha nduu ncha quíú, chi ndècu ndíhi ñaha-gá xii-yu, te cúu-yu ñáyi càhá<sup>n</sup> váha cuendá tnúhu-gá. <sup>16</sup>Te cùtnuní ndáá iní-ó sá ío càhnu cuu tnúhu càhá<sup>n</sup> Xítoho Jesucristú, tnúhu sá càhá<sup>n</sup> nàcuáa nduu ichi ndecu-o, te duha càhá<sup>n</sup> tnúhu-á<sup>n</sup>:  
Te ní quixi Yá cúu Ndiöxí ñuyíú-a ní cuu-gá ñ<sup>n</sup> ñáyi,  
te Espiritú Yá Ndiöxí ní càhá<sup>n</sup> ndáá-xi sá cúu-gá ñ<sup>n</sup> Yaá ío váha quide ndáá,  
te cue espíritu xínú cuèchi núu Yá Ndiöxí ní xini ndáá-xi ncha nàcuáa ní quide Yaá ní quixi ñuyíú-a.  
Te ní xité nuu tnúhu-gá nihí ñuyíú-a,  
te ndèni ní cuu ní ngúita-yu sàndáá iní ñáhá-yu xii-gá,  
te mee-gá cuánda-gá andiu.  
Duha càchí tnúhu-á<sup>n</sup>.

**Ñáyiú daña nihnu vá  
quindáá-gá iní-yu Yá Ndiöxí**

**4** Te Espíritú Yá Ndiöxí càhá<sup>n</sup> ndáá-xi sá sáá nduu dàña nihnu dava ñáyiú ndècu ichi-gá vá quindáá iní ñáhá-gá-yu xii-gá, te duca<sup>n</sup> chi cue espíritú cùndìhi yucu ñávàha dandàhú ñáhá-xí xii-yu, te mee-nà nchaa tnúhu càhá<sup>n</sup> nchaa ñáyiú cùndìhi nchaa espíritú-á<sup>n</sup> cuhu<sup>n</sup> iní-yu. <sup>2</sup>Te nchaa ñáyiú duca<sup>n</sup> cùndìhi cue espíritú cùndìhi yucu ñávàha-á<sup>n</sup> cúu-yu ñáyiú ío dandahú méé-xí chi càchí-yu sá càhá<sup>n</sup> ndáá-yu te ñá ndáá, te ñá túú tnàhí-gá ná quidé-xí iní-yu cuendá nchaa sá cuèhé sá dúhá quidé-yu. <sup>3</sup>Te ñáyiú-á<sup>n</sup> quesàhá-yu sá vǎ cúú càndeca tnaha ñáyiú, te ni vǎ cúú càxí-yu dava núú sǎ xini-yu caxí-yu, dico Yá Ndiöxí ní cadúha-gá nchaa sá nchító-ó cuendá caxi-o, te cuiní-gá sá ncháá nchò ñáyiú sàndáá iní tnúhu-gá ndacá<sup>n</sup> táhú-ó núú-gǎ òré caxi-o. <sup>4</sup>Te nchaa sá ní cadúha Yá Ndiöxí cúú-xí sǎ vǎha te vá dáquèe tǎhú-ó, te xini ñuhu-xi ndacá<sup>n</sup> táhú-ó núú-gǎ cuendá nchaa xǎ<sup>n</sup>. <sup>5</sup>Te Yá Ndiöxí càchí-gá sá méé-gǎ quidé-gǎ cúú-xí sǎ vǎha sá cúú-xí-ó te núú na ndacá<sup>n</sup> táhú-ó núú-gǎ.

**Tée quide ndáá xínú cuèchi  
núú Xítohó Jesucristú**

<sup>6</sup>Te núú na dàcuaha-n ñáyiú ndècu ndìhi-o ichi Xítohó Jesucristú nchaa nàcuáa càhá<sup>n</sup>-í-a ña, te cuu-n ì<sup>n</sup> tée quide ndáá xínú cuèchi núú-gǎ, te nducu ndèe-ni-n dacuaha-n tnúhu Yá Ndiöxí sá sàndáá iní-n, te canchicú<sup>n</sup> nihnu-ni-n càda-n nchaa nacuáa càhá<sup>n</sup>-gá, te núú duca<sup>n</sup> nà cada-n, te níhí ndéé-n cùndecu-n ichi-gá. <sup>7</sup>Te vá cáda cuendá-n nchàa cuendú cuèhé cuendú duha càhá<sup>n</sup> ñáyiú, ndìhi nchaa dava-gá cuendú sá ñà túú nàndíhi cuendá sá ñà túú nǎ cumání-n cùndecu-n núú Yá Ndiöxí. <sup>8</sup>Te núú ì<sup>n</sup> chiù<sup>n</sup> cada-o te

nàcaá luha yiqui-o te nàndíhi-xi luha, dico ío-gá nàndíhi-xi te núú cada-o sá cùndècu yìñuhu-o núú Yá Ndiöxí. Te núú duca<sup>n</sup> na càda-o te cùu-xi ì<sup>n</sup> sá vǎha sá cúú-xí-ó vitna, te ni caa ni quíhí<sup>n</sup> duca<sup>n</sup> cùu-xi ì<sup>n</sup> sá vǎha sá cúú-xí-ó. <sup>9</sup>Te xini ñuhu-xi sá ncháá-ndó quindáá iní-ndó nchàa tnúhu càhá<sup>n</sup>-í-a chi cùu-xi tnúhu ndáá. <sup>10</sup>Te vitna ío ndùcu ndee-o quide-o chiu<sup>n</sup> Yá Ndiöxí Yaá ndécú nchàa nduu nchaa quíú te quide ndee iní-ó cuendá nchaa sá quidé ñàha ñáyiú xii-o, chi sàndáá iní-ó sá díú-gǎ chindèe ñaha-gá xii-o. Te nchaa ñáyiú cùndahú iní ñáhá-gǎ te chindee ñaha-gá xii-yu, dico ñáyiú sàndáá iní ñáhá xii-gá ío-gá cùnùú-yu chindee ñaha-gá xii-yu, chi dàcácu nihnu ñaha-gǎ núú ùhú núú ndàhú.

<sup>11</sup>Te nchaa tnúhu-á<sup>n</sup> cǔñaha-n xii-yu, te càhá<sup>n</sup>-n dǒho-yu sá ná càdá-yu nchaa nàcuáa càhá<sup>n</sup>-xi. <sup>12</sup>Te ío cada váha-n cùndecu-n cuendá sá vǎ yǒo daquee tǎhú ñáhá xii-n cuendá sá cúú-n tée cuechi, te ío váha cada-n nchàa sá tàù-n càda-n cuendá duca<sup>n</sup> càchicú<sup>n</sup> nihnu nchaa ñáyiú ndècu ichi Yá Ndiöxí, te vii vii càhá<sup>n</sup> ndìhí-n-yu, te cuu iní-n-yu, te ío quindáá iní-n Yá Ndiöxí, te mee-ni sǎ vǎha caní iní-n, te duca<sup>n</sup> càda-n cuendá canchicú<sup>n</sup> nihnú-yu. <sup>13</sup>Te nini cùyaa-í quixi-í, te ío nducu ndèe-n càhá<sup>n</sup> ndodo-n tnúhu Yá Ndiöxí núú-yu, te dacuàhá-n-yu nàcuáa càhá<sup>n</sup> tnúhu-gá, te càhá<sup>n</sup>-n dǒho-yu nàcuáa cuu vii cuu váha iní-yu cundecú-yu ichi Yá Ndiöxí. <sup>14</sup>Te vá dáñá ndèe-n càda-n nacuáa ndùu táhú ní taxi Yá Ndiöxí ní ngúndecu ndìhi-n cǔtnàhá ní sacá<sup>n</sup> ndodo cue tée yǎndaha ñaha xii ñáyiú ndècu ichi Yá Ndiöxí ndaha-güedé díquí-n, te ní cachí tnúhu-güedé sá dúcá<sup>n</sup> ní cuiní Yá Ndiöxí cunduu.

<sup>15</sup>Te ni yùhu ni iní-n càda-n nchaa nacuáa càhá<sup>n</sup>-í-a cuendá sá ná quini ñáyiú sá ìo-gá váha ta quide-n

cuáhá<sup>n</sup>. <sup>16</sup>Te ío váha cundehe-n nchàa nacuáa quide-n, ndihi nchaa nàcuáa dànehé-n-yu, te vá dáñá ndèe-n dùca<sup>n</sup> cada-n. Te núu duca<sup>n</sup> na càda-n te nduu táhú-n cùndecu váha-n núú Yá Ndiöxí ni caa ni quíhí<sup>n</sup> ndihi nchaa ñáyiú na tédóho nchaa tnúhu càhá<sup>n</sup>-n.

**Nàcuáa tàú-xi cada-o cùndecu-o ndihi ñáyiú sàndáá iní tnúhu Yá Ndiöxí**

**5** Te vá ténàá-n nchàa cue tée cùu sacuéhé chi vii vii cáhá<sup>n</sup>-n dõho-güedé, te cada iní-n sã dàtná tãtã-n cùu-güedé, te diu-ni duca<sup>n</sup> vii vii cáhá<sup>n</sup>-n dõho nchaa cue tée cuechi, te cada iní-n sã dàtná cue ñani-n cùu-güedé. <sup>2</sup>Te diu-ni duca<sup>n</sup> vii vii cáhá<sup>n</sup> tucu-n dõho nchaa ñáyiú ðihí ñáyiú cùu sacuéhé, te cada iní-n sã dàtná nãná-n cùú-yu, te diu-ni duca<sup>n</sup> vii vii cáhá<sup>n</sup> tucu-n dõho nchaa ñáyiú ðihí ñáyiú cuechi, te cada iní-n sã dàtná cue cúha-n cùú-yu, te ío cuu váha iní-n òré duca<sup>n</sup> cãhá<sup>n</sup>-n dõho nchaa ñáyiú cuechi-ã<sup>n</sup>.

<sup>3</sup>Te canehe-n sã yínùhu núú ñáyiú ðihí ní quendóo quèé, te chindèe-n-yu núu ndàhú-yu. <sup>4</sup>Te núu ihí<sup>n</sup> ñaha quèé ndécú cuè déhe-a<sup>n</sup> àdi cue déhe ñani-a<sup>n</sup>, te ío xini ñuhu-xi cada-güexi nchaa nacuáa tàú-xi cunduu núú-a<sup>n</sup> chi duca<sup>n</sup> cuíní Yá Ndiöxí cada-güexi. Te núu duca<sup>n</sup> na càda-güexi te nànchocáva-güexi quide-güexi sã váha sã cúú-xí ñáyiú ní dácuéhnú ñaha xii-güexi. Te núu duca<sup>n</sup> na càda-güexi te quide váha-güexi te ío nduu vétú iní Yá Ndiöxí. <sup>5</sup>Te ñáyiú quèé ñáyiú ndàhú ndécú ichi Yá Ndiöxí sàndáá iní-yu sã ðíú-gã chindèe ñaha-gã xií-yu, te cuèi nduu cuèi niú ñá túú dàña ndeé-yu càhá<sup>n</sup> ndihi ñàhá-yu xii-gã. <sup>6</sup>Te nchaa ñáyiú quèé cúðí iní quidé nchàa sã cuèhé sã dúhá cùú-yu dàtná ñáyiú ní xihí cuèi ndècu vívũ-yu. <sup>7</sup>Te cúñaha-n xii nchaa ñáyiú sã ná cádá-yu nchaa

tnúhu càhá<sup>n</sup>-í-a cuendá sã ñà túú ñã cumání-yu cundecú-yu, te duca<sup>n</sup> vã yõo cáhá<sup>n</sup> cuèhé cuendá-yu. <sup>8</sup>Te ío xini ñuhu-xi chindeé-yu cue tnàha ñáyiú-yu, dico ío-gã xini ñuhu-xi chindeé-yu cue ñáyiú cùu ndi meé-yu ndècu ndihí-yu, te núu vá dúcá<sup>n</sup> càdá-yu te ñá túú-gã sàndáá iní-yu cadá-yu nàcuáa càhá<sup>n</sup> Yá Ndiöxí. Te sã dúcá<sup>n</sup> ná càdá-yu te vihi-gã quídè-yu dàcúúxí ñáyiú ndècu ichi cuehé ichi duha.

<sup>9</sup>Te chido tnùní-n mènè-ni ñáyiú quèé ñáyiú sa ndècu únídico cuíá-xi àdi vihi-gã cuendá ñáyiú-á<sup>n</sup> cadá-yu nchaa nàcuáa cuíní Yá Ndiöxí núú nchàa ñáyiú ndècu ichi-gã, te ñáyiú-á<sup>n</sup> xini ñuhu-xi cuú-yu mee-ni ñáyiú ní quide ndáá ní xindecu ndihi yíi-xi. <sup>10</sup>Te na cùú-yu ñáyiú quèé quidé váha cùdiu núú nchàa ñáyiú, te na cùú-yu ñáyiú quèé xini canu ichi váha cue landú-xi, te na cùú-yu ñáyiú sãñaha nùu vehe ndetatú cue ñáyiú ñuhu ichi, te na cùú-yu ñáyiú ndècu túha quide nání chiú<sup>n</sup> cuendá cue ñáyiú ndècu ichi Yá Ndiöxí, te na cùú-yu ñáyiú chindee nchaa ñáyiú ndècu ndihi tnúndòho tnúhu ndàhú, te na cùú-yu ñáyiú ñá túú dàña ndeé quidé nchàa núú sã váha.

<sup>11</sup>Te vá chídó tnùní-n ñáyiú quèé ñáyiú ñá túú ndècu únídico cuíá-xi cada chiú<sup>n</sup> Yá Ndiöxí, chi núu cuechi-gã-yu ña, te vá cùndáá-yu cadá-yu chiú<sup>n</sup>-gã, chi quesàhá-yu natnándaha tucú-yu. <sup>12</sup>Te sã cuendá xíã<sup>n</sup> te nacháhu-yu núú Yá Ndiöxí, chi vá cadá-gã-yu nàcuáa ní cuu tnúhu cadá-yu ni cùu. <sup>13</sup>Te ngüíta-yu cani iní-yu quíhí<sup>n</sup>-yu ndi vehe ndi vehe caca nihní-yu, te nchaa ñáyiú duca<sup>n</sup> quide ío cùu cuhndú-yu, te cùyiti yuhú-yu, te ndèni ní cuu cuáhá<sup>n</sup>-yu chinee ðíquí-yu vehe tnàha ñáyiú-yu ndèhé-yu núu nása ndécú-yu, te ñá túú tàú-yu duca<sup>n</sup> càdá-yu, te càhá<sup>n</sup>-yu mee-ni tnúhu sã ñà túú nàndíhi. <sup>14</sup>Núu xíã<sup>n</sup> cuíní-í sã ncháá ñáyiú quèé ñáyiú

cuechi na nàtnándaha tucú-yu cuendá cuú-yu náná, te duca<sup>n</sup> càdá-yu nchaa sá xíní ñùhu-xi cadá-yu vehé-yu, te núu duca<sup>n</sup> na càdá-yu, te nchaa ñáyiú cùu úhú iní ñáhá xii-o vá nihí-gá-yu tnúhu càhá<sup>n</sup> cuèhé-yu cuendá tnúhu Yá Ndiòxí.  
<sup>15</sup> Te dava ñáyiú quèé ndécú ichi Yá Ndiòxí ní cùu ní dǎñá-yu te ní tñí-yu tnúhu càhá<sup>n</sup> sácúíhná.

<sup>16</sup> Te núu dava ñáyiú ndècu ichi Yá Ndiòxí ndécú ndìhí-yu ì<sup>n</sup> ñaha quèé cúú ndì meé-yu ña, te tàù-yu chindee ñàhá-yu xii-a<sup>n</sup> cuendá sá vǎ ìo chi chiu<sup>n</sup>-a<sup>n</sup> nchaa ñáyiú ndècu ichi Yá Ndiòxí, te duca<sup>n</sup> te nchaa ñáyiú ndècu ichi-gá-á<sup>n</sup> ñihí ndéé-gǎ-yu chindèé-yu dava-gǎ ñáyiú quèé ñá túú vèdana ndècu ndìhi.

<sup>17</sup> Te nchaa cue tée ìo váha quide yin-daha ñaha xii ñáyiú ndècu ichi Yá Ndiòxí ìo xíní ñùhu-xi canehe sá yíhí ñùhu núu-güedé, te chindee ñàha xii-güedé. Te uu<sup>n</sup>-gǎ tàù ñáyiú duca<sup>n</sup> càdá-yu sá cúú-xí nchaa cue tée ni yùhu ni iní càhá<sup>n</sup> tnúhu-gǎ. <sup>18</sup> Te núu tütú Yǎ Ndiòxí càchí-xi: “Vá chíhí-ndó ñùnu yuhu ndicutu oré dánchezí-dí trùú”, duha càchí-xi. Te càchí tucu-xi ingá xichi: “Ì<sup>n</sup> tée quide chiu<sup>n</sup> dacuitíí tàù-xi sá cúhú<sup>n</sup> yǎhu-dé”, duha càchí-xi núu tütú-gǎ.

<sup>19</sup> Te núu ìo ñáyiú véxi sàcá<sup>n</sup> cuèchi núu-n cuendá ì<sup>n</sup> tée yìndaha ñaha xii ñáyiú ndècu ichi Yá Ndiòxí ñá, te cada cuendá-n tnúhu càhá<sup>n</sup>-yu te núu véxi-yu ndìhi úú àdi úní ñáyiú càhá<sup>n</sup> ndáá nàcuáa ní cuu, á<sup>n</sup> nùu ñáhá te vá cadá cuendá-n tnúhu càhá<sup>n</sup>-yu. <sup>20</sup> Te núu cue tée yìndaha ñaha xii ñáyiú-á<sup>n</sup> ndécú cuèchi-güedé, te càhá<sup>n</sup>-n dǎho-güedé núu nchaa ñáyiú ndècu ichi-gǎ cuendá sá dává-gǎ-yu vá cúyì-yu duca<sup>n</sup> cadá-yu. <sup>21</sup> Te Yá Ndiòxí ndìhi Xítóhó Jesucristú náhá-gǎ ndìhi cue espíritú xínú cuèchi núu-gǎ sá yùhú càhá<sup>n</sup>-í dóho-n sǎ cadá-n nchaa nacuáa càhá<sup>n</sup>-í-a, te ì<sup>n</sup>-ni càhá<sup>n</sup> ndìhi-n cuè tée xíní tnáhá ndìhi-n, ndìhi

cue tée ñá túú xíní tnáhá ndìhi-n. <sup>22</sup> Te vá ìo cundihí iní-n tàxi ndecu-n ì<sup>n</sup> tée quindaha ñàha xii ñáyiú, chi díhna-gǎ cada cuendá-n te núu cùu-dé ì<sup>n</sup> tée quide ndáá, chi núu cuendá-ni na tàxi ndecu-n-dé te vá cadá ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ìo coto-n mèe-n vá cadá-n ni ì<sup>n</sup> sá cuèhé sá dúhá.

<sup>23</sup> Te duca<sup>n</sup> ìo mee-ni cùhú xití-n te vá cóhó-n mèe-ni ndute, chi tnáhá luha vinú ndéhé yoho yàha stilé coho-n cuendá cada tátna-xi.

<sup>24</sup> Te dava ñáyiú cùtnuní nchaa sá cuèhé sá dúhá quidé-yu, te cùtnuní tucu sá náchǎhu-yu na sàà nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sàà nduu cùndáá cuèchi-yu te dàvá-á<sup>n</sup> cut-nuní. <sup>25</sup> Te duca<sup>n</sup> sǎtnahá-xi cùu nchaa sá váha quide davá-yu chi cùtnuní, te cuèi ñá túú cùtnuní òré-ni dico dacuitíí sǎ sàà nduu cùtnuní.

**6** Te nchaa ñáyiú ndècu tnuú quidé chiu<sup>n</sup> ndìhi ì<sup>n</sup> patróo<sup>n</sup> xíní ñùhu-xi ìo canehé-yu sá yíñùhu núu-dé cuendá sá vǎ càhá<sup>n</sup> cuèhé ñáyiú cuendá Yá Ndiòxí, te ni vǎ càhá<sup>n</sup> cuèhé-yu cuendá tnúhu-gǎ. <sup>2</sup> Te núu patróo<sup>n</sup> cue ñáyiú xínu cuechi-á<sup>n</sup> sàndáá iní-dé Yá Ndiòxí, te ñá díú sǎ dúcá<sup>n</sup> sàndáá iní-dé Yá Ndiòxí te vá cǎnèhé-yu sá yíñùhu núu-dé, chi uu<sup>n</sup>-gǎ tàù-yu cada váha-yu cunu cuèchí-yu núu-dé, te duca<sup>n</sup> na càdá-yu chi xínu cuechí-yu núu tée sàndáá iní ndìhí-yu tnúhu Yá Ndiòxí. Te vá dǎñá ndèe-n dǎnehé-n-yu nchaa nàcuáa càhá<sup>n</sup>-í-a, te cúñaha-n xii-yu sá ná cadá-yu.

### Nduu vétú iní-ó cùndecu-o

<sup>3</sup> Te ìo cue tée ñá túú tñì-güedé nàcuáa càhá<sup>n</sup> tnúhu Xítóhó Jesucristú, te cue tée-á<sup>n</sup> càchí-güedé sá càhá<sup>n</sup> ndáá-güedé dico ñá ndáá, chi ñá túú càhá<sup>n</sup>-güedé nàcuáa cuáhá<sup>n</sup> tnúhu-gǎ. Te

nchaa tnúhu Xítoho Jesucristú cúu-xí mée-ni tnúhu ndáá, te chindee ñaha-xi cada ndáá-ó cundecu-o ichi-gá. <sup>4</sup>Te nchaa cue téee duca<sup>n</sup> xiquide quide cahnu-güedé mée-güedé dico ñá túú vèdana xini-güedé, te cue téee-á<sup>n</sup> ñà túú ndècu váha iní-güedé chi nándi tnúhu sá ñà túú nándíhi cuini-güedé cútnàha-güedé. Te nguíta-güedé cúu cuèdú iní tnáhá-güedé, te nàa ndihi tnáhá-güedé, te xicuehè tnáhá-güedé, te ñá túú-gá cúu váha iní núú tnáhá-güedé. <sup>5</sup>Te cue téee-á<sup>n</sup> mee-ni nàá-güedé chi ñá túú sàni váha iní-güedé, te ni ñà túú xini-güedé nàcuáa cuáhá<sup>n</sup> tnúhu ndáá tnúhu Yá Ndiöxí, te càchí-güedé sá ïo váha cundecu-güedé ichi-gá chi sàni iní-güedé sá ïo vài díhú<sup>n</sup> nĩhi-güedé cundecu ndihi-güedé. Te yúhú càhá<sup>n</sup>-í dóho-n sá vã níhi tnáhá-n ndihi nchaa cue téee duca<sup>n</sup> xiquide. <sup>6</sup>Te ndáá sá ichi Yá Ndiöxí cúu-xí ñ<sup>n</sup> ichi sá ïo váha cundecu-o, dico xini ñuhu-xi nduu vétú iní-ó nàcuáa ndècu-o ñuyú-a. <sup>7</sup>Te nchoo cuè ñáyiú chi ñá túú vèdana nèhe-o ní quexìo ñuyú-a, te diu-ni duca<sup>n</sup> ñà túú vèdana canehè-o quíhí<sup>n</sup> òré ná cùú-ó. <sup>8</sup>Te ío xini ñuhu-xi nduu vétú iní-ó te núu ndècu-ni sá cúnchito-o ndihi dóo cuihnu-o. <sup>9</sup>Te ío ñáyiú ío cuini-yu cuu cuicá-yu, te ñáyiú-á<sup>n</sup> dácàhu iní ñáhá yùcu ñávàha xí-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidè-yu, te nchaa sá quidè-yu-á<sup>n</sup> ñà túú vèdana nándíhi-xi chi uu<sup>n</sup>-gá ndádá ndàhú ñáhá-xí xii-yu, te dácúita nihnu ñaha-xi. <sup>10</sup>Chi nchaa ñáyiú ñuhu iní mee-ni díhú<sup>n</sup>, te xíá<sup>n</sup> quidè-xí nguíta-yu sàni iní-yu cadá-yu nándi sá cuèhé sá dúhá. Te ío ñáyiú ndècu ichi Yá Ndiöxí te sá tnúhu duca<sup>n</sup> ñuhu iní mee-ni díhú<sup>n</sup> nĩ dáñá-yu ñá túú-gá sàndáá iní ñáhá-yu xii-gá, te vitna ñá túú tnàhí-gá ndécú váha iní-yu.

**Cahni iní-ó càda-o nchaa nacuáa càhá<sup>n</sup> Yá Ndiöxí chi sàndáá iní-ó-gá**

<sup>11</sup>Te yòhó téee quide chiu<sup>n</sup> Yá Ndiöxí xini ñuhu-xi vá cadá-n dàtná quidè nchàa ñáyiú ní cachí-í sá ñà túú quide ndáá, te vá dáñá ndèe-n càda ndáá-n cundecu-n, te cada-n nàcuáa nduu vétú iní Yá Ndiöxí, te ío quindáá iní-n-gá, te cuu iní-n nchàa tnaha ñáyiú-n, te cada càhnu iní-n nchàa sá ná yàha-n cundecu-n ichi-gá, te cunduu ndàhú iní-n. <sup>12</sup>Te cahni iní-n càda-n nchaa nacuáa cuini Yá Ndiöxí chi sàndáá iní-n-gá, te ío cuhu<sup>n</sup> iní-n sã cundècu-n ndihi Yá Ndiöxí nĩ caa nĩ quíhí<sup>n</sup>, chi diu cuendá tnàhí-á<sup>n</sup> nĩ càhá<sup>n</sup> ñáhá-gá xii-n, te ní càhá<sup>n</sup> ndáá-n núú vài ñáyiú sá ïo váha sàndáá iní-n-gá. <sup>13</sup>Te Yá Ndiöxí Yaá quidè nchìto nchaandi túhú sá ío ñuyú náha-gá sá càhá<sup>n</sup>-í dóho-n vitna, te diu-ni duca<sup>n</sup> nàha tucu Xítoho Jesucristú Yaá ní càhá<sup>n</sup> tnúhu ndáá núú tẽ Pilatú <sup>14</sup>sá quindáá iní-n càda-n nchaa nacuáa càhá<sup>n</sup> Yá Ndiöxí, te nchaa tnúhu càhá<sup>n</sup>-gá cada-n nàcuáa vá dáquèe tíhú ñáhá ñáyiú xii-n, te duca<sup>n</sup>-ni càda-n ndéé ná sàá nduu quixi tucu Xítoho Jesucristú. <sup>15</sup>Te quixi tucu-gá chi duca<sup>n</sup> nĩ cachí Yá Ndiöxí cunduu, te mee Yá Ndiöxí ñáhá-gá ná nduu quixi tucu Xítoho Jesucristú. Te Yá Ndiöxí ío váha cùu iní-gá te ñ<sup>n</sup>dií dí-ni-gá ío-gá cúnùu-gá dácúúxí cuè téee tàxi tñuní ñ<sup>n</sup> ñ<sup>n</sup> nàció<sup>n</sup> ndihi nchaa dava-gá cue téee cùnùu, chi tàxi tñuní ñáhá-gá xii-güedé, te nchaa ñáyiú ndècu ñuyú-a tàxi tñuní-gá. <sup>16</sup>Te diu-gá cúu-gá Yaá ndécú nchàa nduu nchaa quíú, te ío càhnu cuu-gá chi dàtná dáyèhé nchí-canchii dàyèhé-xi núú ndécú-gá, te vá yòo ñ<sup>n</sup> cùyíi dayatni núú ndécú-gá, te ni ñà túú nĩ ñ<sup>n</sup> ñáyiú xini ñáhá xii-gá te ni vã ndácú-yu quini ñáhá-yu xii-gá. Te ío na cànehe nchaa ñáyiú sá yíñùhu núú-gá nĩ caa nĩ quíhí<sup>n</sup>, te duca<sup>n</sup> ïo na

tàxi tnuní-gá ni caa ni quíhí<sup>n</sup>. Te duca<sup>n</sup> na cùnduu.

<sup>17</sup>Te cáhá<sup>n</sup>-n dõho nchaa ñáyiú cuica ndècu ndíhi nchaa sá ío ñuyíú-a cuendá sá vǎ cádá càhnú-yu mèe-yu, te duu<sup>n</sup> duu<sup>n</sup> vǎ cùndèé iní-yu ni ì<sup>n</sup> sá ndécú ndíhí-yu chi vǎ cúdí-xi, te cáhá<sup>n</sup>-n dõho-yu sá ná cùndèé iní-yu Yá Ndiõxí chi diu-gá cúú-gǎ Yaá ndécú nchàa nduu nchaa quíú, te chitu núú ndáhá tàxi-gá nchaa sá xíní ñùhu-o, chi cuíní-gá sá ío cuu váha iní-ó cùndecu-o. <sup>18</sup>Te cáhá<sup>n</sup> tucu-n dõho-yu sá ná càdá-yu mee-ni sǎ vǎha, te cuendá nchaa sá vǎha cadá-yu-á<sup>n</sup> te cuú-yu ì<sup>n</sup> ñáyiú cuica sǎ cúú-xí Yǎ Ndiõxí, te na cùndecu túha-yu chindèé-yu cue ñáyiú ndàhú cuáñàhá-yu sá xíní ñùhú-yu. <sup>19</sup>Te núú duca<sup>n</sup> na càdá-yu te Yá Ndiõxí cuáñaha-gǎ sá

ndúú tǎhǔ-yu na sǎá nduu, te ngúndecu váha-yu ndíhi-gá ni caa ni quíhí<sup>n</sup>.

### **Tnúhu ndéé núú ñí ndíhi-ná**

<sup>20</sup>Te yòhó té Timùteú cáhá<sup>n</sup>-í dõho-n sǎ ío cada cuendá-n vǎ dǎma tnúhu ní taxi Yá Ndiõxí danèhé-n ñáyiú, te vǎ cádá cuendá-n nchàa cuendú cuèhé cuendú duha ío ñuyíú-a chi ñǎ túú nàndíhi-xi, te ni vǎ cádá cuendá-n nchàa tnúhu xítnàha ñáyiú càchí sá xícá nàha tnúhu cue téé túha chi ñǎ díú ì<sup>n</sup> tnúhu ndáá cúú-xí. <sup>21</sup>Te ío ñáyiú ñǎ túú-gǎ sàndáá iní-yu tnúhu Yá Ndiõxí, chi ní quide cuendá-yu nchaa tnúhu xica naha ñáyiú-á<sup>n</sup>.

Te Yá Ndiõxí ná chindee chitúu ñaha-gǎ xii-n. Te duca<sup>n</sup> na cùnduu. Te ío cada ndee iní-nǎ vitna.

## TUTÚ CÚÚ ÒÚ NÍ CADÚHA TÉ PÁBLÚ QUIHÍ<sup>n</sup> NDAHA TÉ TIMÛTEÚ

### Té Páblú cádúha-dé tutú quíhí<sup>n</sup> ndaha té Timùteú

**1** Yúhú té Páblú ní tendaha ñaha Yá Ndiöxí cáhá<sup>n</sup>-í tnúhu Xítohó Jesucristú núú ñäyiu, chi duca<sup>n</sup> ní cachí Yá Ndiöxí cunduu. Te cáhá<sup>n</sup>-í dàtná ní cachí Yá Ndiöxí sá ncháá nchò ñäyiu ndècu ndihi Xítohó Jesucristú nanfí tãhú-ó. <sup>2</sup>Te yúhú té Páblú cádúha-í tutú-a daquixi-í ndaha yòhó té Timùteú chi ío cùu iní ñàhà-í xii-n, te ñu-í ní sanu ichi ñaha-í xii-n ichi Xítohó Jesucristú, te xicá<sup>n</sup> tãhú-í núú Dütú Ndiöxí ndihi núú Xítohó Jesucristú sá ño na chindee chitúu ñaha-gã xii-n, te cundàhú iní ñáhá-gã, te duca<sup>n</sup> ndè nduú-gã ná cádá te ío váha cuu iní-n cùndecu-n.

### Cáhá<sup>n</sup> váha-o cuendá Xítohó Jesucristú

<sup>3</sup>Te cuéi nduu cuéi niú duca<sup>n</sup>-ni cáhá<sup>n</sup> ndihi-í Yá Ndiöxí cuendá-n, te ndácá<sup>n</sup> tãhú-í núú-gã, te xinu cuechi-í núú-gã dàtná ní quide cue ñaní tnáhà-í ní xíndecu ndéé sanduu, te cùtnuní iní-í sá quidé ndáá-í núú-gã dàtná ní xóo cada-güedé. <sup>4</sup>Te ío sàni iní-í nanfí tnáhá-ó cuendá ío cudí iní-í, chi ndacu iní-í sá ño ní ndáhyú-n sã ndihú iní-n cùtnáhá ní quide ndee iní-í tnáhá-ó. <sup>5</sup>Te ñaha-í sá sàndáá ndisa iní-n Yá Ndiöxí dàtná ní ngüífta díhna-gã xítná-n tã Lòidá ndihi ñaná-n tã Eùnicé quidè-yu, te cùtnuní ndáá iní-í sá dífú tnáhá-n ño váha sàndáá iní-n-gã.

<sup>6</sup>Te xíã<sup>n</sup> dándacu iní ñàhà-í xii-n cuendá sá ño-gã nducu ndèe-n cada-n chiu<sup>n</sup> ní nduu tãhú-n núú Yá Ndiöxí cada-n, chi ní taxi-gã tnúhu ndee iní ní ngúndecu ndihi-n cùtnáhá ní sacá<sup>n</sup>

ndodo-í ndaha-í díquí-n sã dífú chiú<sup>n</sup>-gã cada-n. <sup>7</sup>Te Espíritú sá ní taxi Yá Ndiöxí ndécú ndihi-o ñá túú cùu-xi ñ<sup>n</sup> Espíritú sá cádá nàcuáa yùhú-ó, chi cùu-xi ñ<sup>n</sup> Espíritú sá táxi tnúhu ndee iní cada-o chiú<sup>n</sup>-gã, te ñu-xi quide cuu iní tnáhá-ó ñ<sup>n</sup> ñ<sup>n</sup>-o, te ñu-ni tucu-xi quide cùtnuní iní-ó nàcuáa cada-o cùndecu-o. <sup>8</sup>Te xíã<sup>n</sup> núú vá cúcàha<sup>n</sup> núú-n cãhá<sup>n</sup> váha-n cuendá Xítohó Jesucristú, te ní vá cúcàha<sup>n</sup> núú-n sã dúhá yìhi-í ve-caá sá cuendá-gã, te xini ñuhu-xi sá tnáhá-n ndòho-n sá cuendá tnúhu-gã, te cundee iní-n ndòho-n, chi Yá Ndiöxí chindee ñaha-gã xii-n. <sup>9</sup>Te Yá Ndiöxí ní dácacu nihnu ñaha-gã xii-o núú ùhú núú ndàhú, te ní cachí-gã sá cádá-ó nchàa nacuáa cuiní méé-gã cunduu, te duca<sup>n</sup> ní quide-gã chi duca<sup>n</sup> ní sani iní méé-gã cunduu sá cádá váha ñaha-gã xii-o, te ñá dífú sã ño váha quide-o ndecu-o duca<sup>n</sup> ní quide-gã. Te ndéé cùtnáhá vátá ngáva-gã ñuyú ní cachí-gã sá cádá váha ñaha-gã xii nchaa nchoo ñäyiu ní ngúndecu ndihi Xítohó Jesucristú vitna. <sup>10</sup>Te vitna cùtnuní iní-ó sã ño váha quide ñaha-gã xii-o, chi ní quixi Xítohó Jesucristú ñuyú-a ní dácacu nihnu ñaha-gã xii-o núú ùhú núú ndàhú, te Yaá-á<sup>n</sup> ní quide-gã cuendá sá vá cùú-gã-ó cùú dúcá<sup>n</sup>-ó, chi ní cachí-gã sá cùndecu-o ní caa ní quíhí<sup>n</sup> te núú na quíndáá iní-ó tnúhu-gã.

<sup>11</sup>Te ní cachí-gã sá cáhá<sup>n</sup>-í tnúhu-gã núú ñäyiu ñá túú cùu ñäyiu isràél te dacuàha váha-í-yu tnúhu-gã, te cuéi ndèni ní cuu ndécú-yu te quíhí<sup>n</sup>-í cáhá<sup>n</sup>-í tnúhu-gã núú-yu chi duca<sup>n</sup> ní cachí-gã cunduu. <sup>12</sup>Te cuendá xíã<sup>n</sup> nándi sá ndóhò-í vitna cuendá-gã, dico ñá túú cùcaha<sup>n</sup> núú-í chi cùtnuní váha iní-í nàcuáa sàni iní Xítohó Jesucristú Yaá sàndáá iní-í, te yúhú ní dàña-í mèe-í núú ndáhá-gã, te cùtnuní ndáá iní-í sá cótó ñaha-gã xii-í ndéé ná sàá nduu nàcuaca ñaha-gã.

<sup>13</sup>Te vá dáñá ndèe-n càda-n nchaa nacuáa càhá<sup>n</sup> tnúhu váha ní dánèhé ñàhá-í xii-n, te ío quindáá iní-n Yá Ndiöxí, te nchaa-o nàcuáa ndècu-o ndihi Xítoho Jesucristú ío cuu iní tnáhá-ó ì<sup>n</sup> ì<sup>n</sup>-o. <sup>14</sup>Te cada cuendá váha-n sá vǎ dáma tnúhu Yá Ndiöxí sá ní taxi-gá ndécú ndìhi-n, te Espíritú-gá sá ní taxi-gá ndécú ndìhi-o chindee ñaha-xi xii-n.

<sup>15</sup>Te yòhó sa xìní-n sǎ nchàa ñáyiu ndècu distritú Àsiá, ñáyiu ní sándáá iní tnúhu Xítoho Jesucristú ní dáñá ñàhá-yu xii-í, te tnàhá té Fígeló ndihi té Hèrmógenés ní dáñá ñàha-güedé xii-í. <sup>16</sup>Te xicá<sup>n</sup> tǎhù-í núú Xítoho Jesucristú sá ná chindee-gá cue ñáyiu cùu ndi mee té Onèsiforó, chi diu-dé ío vǎi xito ní quixi-dé ní quide cuendá ñàhá-dě xii-í, te ní taxi-dé tnúhu ndee iní, te ñá túú ní cùcaha<sup>n</sup> núú-dě sá yíhì-í vecaá. <sup>17</sup>Te cùt-ñàhá ní xíndecu-dé ñúú Ròmá duca<sup>n</sup>-ni ní xóo nanducu ñàha-dé xii-í ndéé ndéé naníhí ñàhá-dě. <sup>18</sup>Te xicá<sup>n</sup> tǎhù tùcu-í núú Xítoho Jesucristú sá ná cùndahú iní ñàhá-gǎ xii-dé nduu na sǎa cundáá cuéchi nchaa ñáyiu. Te yòhó sa xìní ndáá-n sǎ ío ní chindee ñàha-dé xii-o cùt-ñàhá ní xíndecu-o ñúú Éfesú.

### Tée quide ndáá xínú cuèchi núú Xítoho Jesucristú

**2** Te yòhó tée cùu datná ì<sup>n</sup> déhe mee-í ío nducu ndèe-n cada-n nacuáa níhí ndéé-gǎ-n cùndecu-n ichi Xítoho Jesucristú chi diu-gá chindee ñàha-gǎ xii-n. <sup>2</sup>Te nchaa tnúhu sá ní dánèhé ñàhá-í xii-n ndihi nchaa dava-gǎ ñáyiu, xǎ<sup>n</sup> danèhé-n dàva-gǎ cue tée quide ndáá cuendá danèhé-güedé dava-gǎ ñáyiu.

<sup>3</sup>Te cahni iní-n ndòho-n cunu cuechi-n núú Xítoho Jesucristú dàtná cuiní-n ndòho ì<sup>n</sup> sandadú sǎhni iní-dé xínú cuèchi-dé. <sup>4</sup>Chi ni ì<sup>n</sup> sandadú ñá túú nǎgá sání iní-dé cada-dé òré xínú cuèchi-dé cuendá cudù-dé núú tée tàxi

tnuní ñàhá. <sup>5</sup>Te diu-ni duca<sup>n</sup> sǎtnahá-xi cùu tucu ì<sup>n</sup> tée dàdiquí, chi núu vá dádiquí-dé nàcuáa tàú-xi cunduu te vá nihí-dé sá ndúú tǎhù-dě. <sup>6</sup>Te núu ì<sup>n</sup> tée xinu cuechi ío nducu ndee-dé quidé chiú<sup>n</sup>-dé chíhí-dě tatá, te diu-dé tàú-dé díhna-gǎ-dé níhí-dě sá cùhú<sup>n</sup> yǎhu-dé. <sup>7</sup>Te cani iní-n nchàa tnúhu càhá<sup>n</sup>-í-a, te Xítoho Jesucristú chindee ñàha-gǎ xii-n te tecú tnùnì-n nchàa.

<sup>8</sup>Te ndacu iní-n sǎ Xítoho Jesucristú ní cuu-gǎ ñaní tnáhá ndíi Dávíí, te ní xíhí-gǎ te ní ndoto-gǎ, te diu duca<sup>n</sup> ndùu tnúhu dànehé-í ñáyiu. <sup>9</sup>Te ío dǎndohó ñaha ñáyiu xii-í cuendá sá càhá<sup>n</sup>-í tnúhu-gǎ, te quide ñàhá-yu xii-í dàtná quidě-yu ì<sup>n</sup> tée ní quide ì<sup>n</sup> cuéchi càhnu, chi ní chihí ñàhá-yu vecaá xii-í, dico tnúhu Yá Ndiöxí chi vá ndácù-yu nganí-yu. <sup>10</sup>Te xǎ<sup>n</sup> núu cuéi nándi cùu nchaa sá quidé ñàhá-yu xii-í, dico quide cahnu iní-í cuendá sá nánihí tǎhù tnàhá nchaa dava-gǎ ñáyiu cuiní Yá Ndiöxí cundecu ndihi-gǎ, chi nchaa ñáyiu na tnàhá tnúhu ndihi Xítoho Jesucristú nduu tǎhù-yu cundecú-yu ndihi-gǎ núú ío váha càa ndecu-gǎ ni caa ni quíhí<sup>n</sup>.

<sup>11</sup>Te xéhé cùú-xí ì<sup>n</sup> tnúhu ndáá cuiti: Nchoo cùu-o datná ñáyiu ní xíhí ndihi Xítoho Jesucristú chi ñá túú-gǎ ndécú-ó ichi cuehé ichi duha, te xǎ<sup>n</sup> núu cuéi na sǎa nduu cùú-ó ñùuyú-a, dico diu-ni cundecu-o ndihi-gǎ.

<sup>12</sup>Te núu na cùndee iní-ó ndòho-o nándi sá ndóhó-ó sǎ cuendá-gǎ, te sǎa nduu te cunuu-o ndihi-gǎ.

Te núu na càhá<sup>n</sup>-ó sǎ ñà túú xìní-ó-gǎ, te diu-ni duca<sup>n</sup> cùñaha-gǎ xii-o sǎ ñà túú xìní ñàhá-gǎ ná sǎa nduu càda ndáá-gǎ cuéchi nchaa ñáyiu.

<sup>13</sup>Te núu nchoo ñà túú quide ndáá-ó ndècu-o núú-gǎ ñá, dico mee-gǎ chi ío ndáá quidé-gǎ, chi Yá Ndiöxí nchaa sá sání iní-gǎ quidé-gǎ.



**Tée quide nacuaá ndũu  
vétú iní Yá Ndiõxí**

<sup>14</sup>Te dandacu iní-n nchàa ñáyiú ndècu ndihi-o ichi Xítóhó Jesucristú nchaa tnúhu càhá<sup>n</sup>-í-a, te cúñaha-n xíi-yu sá Xítóhó Jesucristú cuíní-gá sá ñà túú-gá nándi tnúhu cútnàhá-yu, chi nchaa tnúhu càhá<sup>n</sup>-yu-á<sup>n</sup> dácũta nihnu-xi ñáyiú ndèdóho ñaha xíi-yu, chi ñà túú vèdana nàndíhi nchaa tnúhu-á<sup>n</sup>. <sup>15</sup>Te ío nducu ndèe-n cada ndáá-n cùndecu-n núú Yá Ndiõxí, te cada-n chiú<sup>n</sup>-gá nàcuáa nduu vétú iní-gá, te càhá<sup>n</sup> ndáá-n tnúhu-gá, cuendá sá vǎ cúcàha<sup>n</sup> núú-n núú-gǎ. <sup>16</sup>Te vǎ cǎdá cuendá-n nchàa tnúhu sá ñà túú vèdana nàndíhi càhá<sup>n</sup> ñáyiú cuendá Yá Ndiõxí, chi nchaa ñáyiú càhá<sup>n</sup> tnúhu-á<sup>n</sup> ndihi nchaa ñáyiú sàcúndedóho ñaha xíi-yu uu<sup>n</sup>-gá quídě-yu nchaa sá cuèhé sá dúhá. <sup>17</sup>Te nchaa tnúhu-á<sup>n</sup> cúténuu-xi dàtná quídé ì<sup>n</sup> cuèhé sǎ ñǎni ñaha xii ñáyiú xitè nuu-xi ñihíi yiqui cùñú-yu. Te tnàhá té Himèneú ndihi té Filetú càhá<sup>n</sup>-güedé tnúhu-á<sup>n</sup> quídé-güedé dàtná quídé ñáyiú-á<sup>n</sup>. <sup>18</sup>Te cue téé-á<sup>n</sup> ñà túú-gǎ càhá<sup>n</sup> ndáá-güedé dàtná càhá<sup>n</sup> tnúhu Yá Ndiõxí, chi càchí-güedé sá ncháá nchòo ñáyiú ndècu ichi Yá Ndiõxí cúú-ó dàtná cue ñáyiú sa ní ndoto, dico na cúú ndisa-o te vǎ ndótó-gǎ-ó càchí-güedé. Te dava ñáyiú ní dǎñá-yu sá sàndáá iní-yu tnúhu Yá Ndiõxí sá dúcá<sup>n</sup> càhá<sup>n</sup>-güedé. <sup>19</sup>Te cuèi duca<sup>n</sup> quide davá-yu, dico Yá Ndiõxí ní taxi ndecu-gá cue ñáyiú ni yùhu ni iní ndécú ichi-gǎ, te cùtnuní sá ndécú ndihi ñaha-gǎ xii-yu, chi ì<sup>n</sup> xichi núú tütú-gǎ càchí-xi sá méé-gǎ xini-gǎ cue ñáyiú cùu cuendá-gǎ. Te ingá tucu xichi núú tütú-gǎ càchí-xi sá ncháá ñáyiú sàndáá iní ñáhá xii Xítóhó Jesucristú xini ñùhu-xi sá vǎ cùndècu-gǎ-yu ichi cuèhé ichi duha.

<sup>20</sup>Te ñáyiú cuica chi ndècu ndihi-yu vehé-yu cóhó sǎ ní cuáha mee-ni dǐhú<sup>n</sup> cuáá<sup>n</sup>, ndihi cóhó sǎ ní cuáha mee-ni dǐhú<sup>n</sup> cuixí<sup>n</sup>, te nchaa cóhó-ǎ<sup>n</sup> cúú-xí dàtná cue ñáyiú ñà túú nǎ cúmǎni núú Yá Ndiõxí. Te ndècu ndihi tucú-yu cóhó sǎ ní cuáha mee-ni ñùhu, ndihi cóhó sǎ ní cuáha mee-ni yùtnu, te nchaa cóhó-ǎ<sup>n</sup> cúú-xí dàtná cue ñáyiú ñà túú quide ndáá núú Yá Ndiõxí. <sup>21</sup>Te nchaa ñáyiú ío ndècu yiñuhu núú Yá Ndiõxí cúú-yu ñáyiú ñà túú ñihí tnàhá ndihi cue ñáyiú ñà túú quide ndáá núú-gǎ, te cue ñáyiú ndècu yiñuhu núú-gǎ-á<sup>n</sup> ñà túú tnàhí quée cáva-yu quidè-yu nchaa chiú<sup>n</sup> tahu-gǎ.

<sup>22</sup>Te ío cada cuendá-n vǎ cǎdá-n nàcuáa quide cue tée cuechi ndècu ichi cuehé ichi duha, te cada-n nàcuáa cundáá-n cùndecu-n ichi Yá Ndiõxí, te quindáá iní-n-gǎ, te cuu iní-n nchàa tnaha ñáyiú-n, te cundecu nahi-n, chi duca<sup>n</sup> tàú-xi cada-n ndihi nchaa dava-gǎ ñáyiú sa ní nduu ndoo ní nduu nine iní-xi ñáyiú càhá<sup>n</sup> ndihi ñaha xii Yá Ndiõxí. <sup>23</sup>Te vǎ cǎdá cuendá-n ñi ì<sup>n</sup> tnúhu xitnàha ñáyiú chi ñà túú vèdana nàndíhi-xi, chi núu na cǎda cuendá-ó te dicó dǎnǎá ñáhá-xí. <sup>24</sup>Chi nchaa cue tée xinu cuechi núú Yá Ndiõxí xini ñùhu-xi càhá<sup>n</sup> váha-güedé ndihi nchaa ñáyiú, te danèhé ñáhá váha-güedé tnúhu-gǎ, te cunduu càhnu iní-güedé te vǎ nàá-güedé. <sup>25</sup>Te vii vii càhá<sup>n</sup>-güedé dóho nchaa ñáyiú sàá iní-xi, ñáyiú ñà túú tnàhá iní tnúhu ndáá tnúhu Yá Ndiõxí, te duca<sup>n</sup> te cudana Yá Ndiõxí cada-gǎ te ndixi túu iní-yu sá ñà túú quide váha-yu ndècú-yu te quindáá iní-yu tnúhu-gǎ. <sup>26</sup>Te duca<sup>n</sup> te cutnùni iní-yu sá sàcúíhná cúnùu-xi taxi tnuní ñáhá-xí xii-yu, chi dàcahu iní ñáhá-xí xii-yu quidè-yu nchaa nàcuáa cùu iní-xi ni cùu.

**Nàcuáa cada ñáyiú òrè sa ta cùyatni sáá nduu quixi tucu Xítohó Jesucristú**

**3** Te cächí tnúhu-í xii-n cuendá cunaha-n nàcuáa cada-xi òrè sa ta cùyatni sáá nduu quixi tucu Xítohó Jesucristú, chi dává-á<sup>n</sup> ío cada úhú-xi. <sup>2</sup> Chi ngúíta ñáyiú cuhu<sup>n</sup> iní-yu mee-ni sá cúú-xí mèé-yu, te cuhu<sup>n</sup> iní-yu mee-ni dñhú<sup>n</sup>, te ío cada càhnú-yu mèé-yu, te cunduu yíchí iní-yu, te cáhá<sup>n</sup> cuèhé-yu cuendá Yá Ndiöxí, te vá quindáá-gá iní-yu ni tātá-yu ni nāñá-yu, te ni vā ndacá<sup>n</sup> táhú núú tnáhá-yu cuendá nchaa sá vāha cada tnáhá-yu, te cadá-yu mee-ni sá ñà túú tnáhá iní Yá Ndiöxí. <sup>3</sup> Te vá cúú iní tnáhá ndì meé-yu, te nāá-yu te vá cuánāá-yu, te tee tnáhá-yu cuéchi neñtúú, te vá cuánāá-yu cadá-yu nchaa sá cuèhé sá dúhá sàni iní-yu, te ío cunduu cuihna iní-yu, te vá tnáhá iní-yu nchaa sá vāha. <sup>4</sup> Te dayuhu cuāha cuendá tnáhá-yu núú cuè téé cùchiu<sup>n</sup>, te ío cunduu yii iní-yu cadá-yu nāndi sá ñà túú vāha, te ío cada nínú-yu mèé-yu, te mee-ni nchāa sá cúđhí iní-yu cadá-yu, te vá cúđhí iní-yu nanducu nihnú-yu Yá Ndiöxí. <sup>5</sup> Te quesāhá-yu sá tnáhá-yu ndécú-yu ichi Yá Ndiöxí dico vá cadā-yu nchaa nàcuáa càhá<sup>n</sup>-gá.

Te yúhú cächí tnúhu-í xii-n sá vā nihí tnáhá-n ndìhi nchaa ñáyiú duca<sup>n</sup> quide. <sup>6</sup> Te dava ñáyiú-á<sup>n</sup> quñhí<sup>n</sup>-yu dava vehe núú xñdecu ñáyiú, te ngúíta-yu dandāhú-yu ñáyiú dñhí ñà túú xini dana cuendá Yá Ndiöxí, te ñáyiú dñhí-á<sup>n</sup> cúú-yu ñáyiú ndècu vihi cuéchi-xi, chi ío cùđhí iní-yu quidé-yu nchaa nāni sá cuèhé sá dúhá sàni iní-yu. <sup>7</sup> Te cuèí ío dācuahá-yu, dico ñà túú cùtnuní iní-yu nása cuāhá<sup>n</sup> tnúhu ndāá tnúhu Yá Ndiöxí. <sup>8</sup> Te ñáyiú duca<sup>n</sup> dāndahú ñáhá xii cue ñáyiú dñhí-á<sup>n</sup> ñà túú càhá<sup>n</sup> vāha-yu cuendá tnúhu Yá Ndiöxí, chi quidé-yu dātná ní quide ndí Jānēs ndìhi ndí Jāmbrés chi cue ndí-á<sup>n</sup> ñà túú ní

cúu vāha iní cue ndí núú ndí Moisés cuendá tnúhu ní càhá<sup>n</sup> ndí. Te ñáyiú-á<sup>n</sup> cúú-yu ñáyiú sàni iní mee ñine-ni nchaa sá cuèhé sá dúhá, te cuèí cächí-yu sá sāndāá iní-yu Yá Ndiöxí dico ñà ndāá sá sāndāá iní ñáhá-yu xii-gá. <sup>9</sup> Dico vá ndácú-gá-yu dandāhú-yu vāi ñáyiú, chi nchaa ñáyiú cutnùn iní-yu sá ío ñi dñquí-yu, te ñà túú càhá<sup>n</sup> ndāá-yu dātná ní quide cue téé úú ñà túú ní tnáhá iní tnúhu ní càhá<sup>n</sup> ndí Moisés.

### **Té Pāblú dāsāhú-dé té Timùteú**

<sup>10</sup> Te yòhó quidé-n nchāa nacuáa ní dānehé ñáhá-í xii-n, te ní xini-n nchāa nacuáa quide-í ndécú-í, te cùtnuní iní-n nàcuáa sàni iní-í ndécú-í ñuyú-a, te xini-n sá ío sāndāá iní-í Yá Ndiöxí, te ío càhnu iní-í, te cúu iní-í nchaa ñáyiú, te xini tucu-n sá ío quide cahnu iní-í cuèí nāndi sá yāha-í ndécú-í dico ñà túú dāna ndeé-í ichi-gá. <sup>11</sup> Te ío vāi sá quidé ñāha ñáyiú xii-í dāndōho ñahá-yu sá ndécú-í ichi Xítohó Jesucristú, te sa ñāha tucu-n datná ní quide ñāhá-yu xii-í cútnāhá ní xñdecu-í ñuú Antiòquiá, ndìhi ñuú Ìconiú, ndìhi ñuú Listrá, chi ío ní dāndōhó ñāhá-yu xii-í sá cuendá-gá. Dico Xítohó Jesucristú ío ní xito ñāha-gá xii-í te ní chindee ñāha-gá cuèí nāndi cúu sá ní yāha-í. <sup>12</sup> Te na cächí tnúhu ndāá-í xii-n sá ío vāi sá ñà túú vāha cada ñāha ñáyiú xii nchaa ñáyiú cuini sá ñà túú nā cumāni núú Yá Ndiöxí cuendá sá ndécú ndìhí-yu Xítohó Jesucristú. <sup>13</sup> Dico dava ñáyiú cächí-yu sá càhá<sup>n</sup>-yu tnúhu Yá Ndiöxí te ñà ndāá sá càhá<sup>n</sup>-yu tnúhu-gá, ñáyiú-á<sup>n</sup> uu<sup>n</sup>-gá cuita cada-gá-yu nchaa sá cuèhé sá dúhá quñhí<sup>n</sup>, te duca<sup>n</sup>-ni ío dandāhú tnáhá-yu.

<sup>14</sup> Te yòhó chi ío vāha ní sāndāá iní-n tnúhu Yá Ndiöxí sá dācuāha-n, te vitna càhá<sup>n</sup>-í dóho-n sá vā dāñā ndèe-n quindāá iní-n tnúhu-á<sup>n</sup>, te yòhó sa ñāha-n ná cúú ñáyiú ní dānehé ñáhá xii-n tnúhu-gá. <sup>15</sup> Te yòhó chi

ndéé cútnàhá cúú làndú-n nǐ ngüíta-n dâcuaha-n tnúhu ndéé núú tùtú Yă Ndiöxí, te diu-ni nchaa tnúhu-gá canu ichi ñaha-xi xii-n te naníhí tǎhú-n, chi sândáá iní-n Xítóhó Jesucristú. <sup>16</sup> Te nchaa cue téé ní tee tnúhu Yá Ndiöxí, chi diu-ni mee-gǎ ní dácáhú iní ñáhá-gǎ xii-güedé nâcuáa tee-güedé, te tnúhu-gá ío váha dacuàha-o nchaa dava-gǎ ñáyiú, te cǎhá<sup>n</sup>-xi dóho-o sǎ vǎ cündècu-gǎ-ó ìchi cuehé ichi duha, te núu ñá túú quide ndáá-ó ndècu-o te nâcanu ichi ñaha-xi, te dânehé ñáhá-xí nâcuáa cada-o cündáá-ó núú Yă Ndiöxí. <sup>17</sup> Te diu-ni tnúhu-gá dátúha ñaha váha-xi xii nchoo cuè ñáyiú ndècu ndihi-gǎ cuendá cada-o nchaa núú sǎ váha.

**4** Te Xítóhó Jesucristú quixi-gǎ taxi tnùnǐ-gǎ ñuyú-a, te cada ndáá-gǎ cuéchi nchaa ñáyiú sa ní xíhí, ndihi cuéchi nchaa ñáyiú xĩndecu vívú. Te mee-gǎ ndihi Yá Ndiöxí náhá-gǎ sǎ ío cǎhá<sup>n</sup>-í dóho-n vitna <sup>2</sup> sǎ ío dacuàha-n ñáyiú tnúhu-gǎ, te vǎ dǎná ndéé-n dâcuahá-n-yu ndéda-ni cǎa oré cuèí ñá túú cuiní-yu cundedóho-yu, te nchaa ñáyiú ñá túú cuiní cada ndáá cúñaha ndáá-n nchaa nâcuáa quidé-yu. Te cúñaha tùcu-n xií-yu sǎ vǎ dúcá<sup>n</sup>-gǎ cadá-yu, te cǎhá<sup>n</sup>-n dóho-yu cuendá cada ndáá-yu cundecú-yu. Te ío cundu cǎhnu iní-n òré cǎhá<sup>n</sup>-n dóho-yu, te ío dacuàhá-n-yu tnúhu-gǎ. <sup>3</sup> Chi sǎá nduu te vǎ cǎchí-gǎ-yu cundedóho-yu nchaa tnúhu sǎ sánú ichi ñaha cundecu váha-o núú Yă Ndiöxí, chi mee-nǎ nchaa sǎ cúdí iní mee-yu cundedóho-yu, te ndúcú-yu cue téé danèhé ñáhá xíí-yu nchaa tnúhu cùu iní-yu-á<sup>n</sup>. <sup>4</sup> Te vǎ cadá cuendá tnàhí-gǎ-yu tnúhu ndáá tnúhu Yă Ndiöxí, chi mee-nǎ tnúhu sǎ ñá túú nândíhi cada cuendá-yu. <sup>5</sup> Dico yòhó ío quíhi iní-n cündecu-n, te cahni iní-n cuèí nándí na ndòho-n, te dacuàha-ni-n ñáyiú tnúhu Yă Ndiöxí, ñáyiú vátá quindáá iní

ñáhá-gǎ xii-gǎ, te cada-ni-n nchaa chiu<sup>n</sup> ní tǎhú-gǎ cada-n.

<sup>6</sup> Te yúhú sa ñúhu ichi-ná-í quíhí<sup>n</sup>-í núú ndécú Yă Ndiöxí cundecu-í, chi sa ní cuyatni cahni ñaha-güedé xii-í cuendá sǎ xínú cuèchi-í núú-gǎ. <sup>7</sup> Te ní quide-í nchaa chiú<sup>n</sup> ní tǎhú Yă Ndiöxí cada-í te vitna ní xínu cava nchaa chiú<sup>n</sup> ní tǎhú-gǎ-á<sup>n</sup> ní quide-í, te ñá túú ní dǎña ndeé-í ní sândáá iní-í-gǎ, te duca<sup>n</sup>-ni sândáá iní-í-gǎ ndéé vitna. <sup>8</sup> Te vitna sa ndècu túha-nǎ sǎ ndúú tǎhú-í cuendá sǎ quidé ndáá-í núú Yă Ndiöxí, te Xítóhó Jesucristú taxi-gǎ tǎhú-á<sup>n</sup> nduu tǎhú-í ná sǎá nduu, chi cùu-gǎ ìh<sup>n</sup> Yaá quidé ndáá cuiti, te ñá díú-ní yúhú taxi-gǎ tǎhú-á<sup>n</sup> cuu cuendá-í, chi tnàhá nchaa ñáyiú ndètu cahnu-nǎ sǎá nduu quixi tucu-gǎ ñuyú-a cuañaha-gǎ tǎhú-á<sup>n</sup> nduu tǎhú-yu.

#### Chiú<sup>n</sup> tahu té Pǎblú cada té Timùteú

<sup>9</sup> Te cuiní-í sǎ ío ndíhi quixi-n quixi coto ñaha-n xii-í. <sup>10</sup> Chi té Dêmás ñá túú-gǎ quidé cuendá ñáhá-dé xii-í, chi mee-nǎ nchaa sǎ ío ñuyú-a ío cùdí iní-dé. Te ní dándóo ñaha-dé cuáhá<sup>n</sup>-dé ñúú Tesalónica, te té Crèscenté cuáhá<sup>n</sup>-dé cundecu-dé distrítú Gálaciá, te té Títú cuáhá<sup>n</sup>-dé cundecu-dé distrítú Dálmaciá. <sup>11</sup> Te ìh<sup>n</sup> dii-nǎ té Lùcá ndécú ndihi ñaha-dé xii-í, te cúñaha-n xii té Mǎcú quixi-n ndihi-dé, chi téé-á<sup>n</sup> ndacu-dé cada-dé ìh<sup>n</sup> chiú<sup>n</sup>-í. <sup>12</sup> Te té Tìquicú ní tendaha-í-dé cuáhá<sup>n</sup>-dé ñúú Éfesú. <sup>13</sup> Te òré quixi-n te yáha-n vèhe té Cǎrpú cǎá ñúú Tróas canehe-n ìh<sup>n</sup> dóo tǐcachi ní dándóo-í vehe-dé quixi, ndihi nchaa librú-í, te tnàhá nchaa dava-gǎ tutú-í ndécú vèhe-dé canehe-n quixi chi xǎ<sup>n</sup> ío-gǎ xíní ñúhu-í. <sup>14</sup> Te té Lìjandrú téé cùu rerú ío vai sǎ ñá túú váha ní cuu quide ñaha-dé xii-í, dico mee Yă Ndiöxí náhá-gǎ nása cada ñaha-gǎ xii-dé cuendá sǎ dúcá<sup>n</sup> quide-dé. <sup>15</sup> Te vǎ nihí tnáhá-n

ndìhi-dé chi ío càhá<sup>n</sup> cuèhé-dé cuèndá nchaa tnúhu càhá<sup>n</sup>-ó.

<sup>16</sup>Te cútnàhá ndéca ñaha-güedé xii-í ní sáhá<sup>n</sup> núú cuè tée cùchiu<sup>n</sup> xito díhna nuu, chi mee ìi ní sáhá<sup>n</sup> te ñá túú ní sáhá<sup>n</sup> ni ìi<sup>n</sup> cue tée cùndìhi-í, chi nchaa-güedé ní dándöo ñaha-güedé xii-í, te yúhú xicá<sup>n</sup> táhù-í núú Yá Ndiöxí sá vǎ cádá cuèndá-gá sá dúcá<sup>n</sup> nǐ quide-güedé.

<sup>17</sup>Dico Xítoho Jesucristú ní chindee ñaha-gá xii-í, chi ní taxi-gá tnúhu ndee ìní ní cáhá<sup>n</sup>-í tnúhu-gá nàcuáa tàú-xi cunduu núú cuè tée-á<sup>n</sup> ndìhi núú nchàa ñáyiú, dico ñá díú ñáyiú isràèl cúŷ-yu, te ñiú-gá ní dácácu nihnu ñaha-gǎ xii-í ñá túú ní sàhni ñaha-güedé. <sup>18</sup>Te mee Xítoho Jesucristú coto ñaha-gǎ xii-í te ñá túú nǎ cuu cuèi nándi sá ná cádá ñaha ñáyiú xii-í te ñiú-ni-gá coto ñaha-gǎ xii-í ndéé ná sǎá nduu sǎá-í andiú nǔú ndécú-gǎ táxí tnùn-í-gá. Te nchaa-o chí

ná càchí-ó sǎ ìo càhnu cuu-gá ni caa ni quíh<sup>n</sup>. Te duca<sup>n</sup> na cùnduu.

### Tnúhu ndéé núú nǐ ndìhi-ná

<sup>19</sup>Te ío cúñaha-n na càda ndee ìní tá Priscá, ndìhi té Àquilú, ndìhi cue ñáyiú cùu ndi mee té Onèsíforó. <sup>20</sup>Te té Èrastú ní quendóo-dé ñuú Còrintú, te té Trófimú ní dándöo-í-dé ñuú Miletú chi cùhú-dé. <sup>21</sup>Te ío cundìhí ìní-n quixi-n oré vátá sǎá-gá yóó quidé víxi<sup>n</sup>-xi. Te ío cada ndee ìní-n càchí té Èùbulú, ndìhi té Pùdenté, ndìhi té Línú, ndìhi tá Claudiá, ndìhi nchaa dava-gá ñáyiú sàndáá ìní tnúhu Xítoho Jesucristú.

<sup>22</sup>Te xicá<sup>n</sup> táhù-í núú Xítoho Jesucristú sá ná cùndecu ndìhi ñaha-gá xii-n ndìhi nchaa dava-gá-yu. Te duca<sup>n</sup> ìo na chindee chitúu ñaha-gǎ xii-ndo nchàa-ndo. Te duca<sup>n</sup> na cùnduu. Te ío chí cádá ndèe ìní-nǎ vitna.

## TUTÚ NÍ CADÚHA TÉ PÄBLÚ QUÍHÍ<sup>n</sup> NDAHA TÉ TITÚ

### Té Päblú cadúha-dé tutú quíhí<sup>n</sup> ndaha té Titú

**1** Yúhú té Päblú xínú cuèchi-í núú Yá Ndiöxí, te diu-gá ní tendaha ñaha-gá xii-í cãhá<sup>n</sup>-í tnúhu Xítohó Jesucristú núú ñáyiú cuendá quíndáá iní nchaa ñáyiú ní cachí Yá Ndiöxí naníhí tãhú, ndihi cuendá sá tècú tnùní váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá. <sup>2</sup>Te yúhú dácúaha-í-yu tnúhu-gá cuendá cundecu ndíhí-yu tnúhu ndee iní sá cundècu ndíhí-yu Yá Ndiöxí ní caa ní quíhí<sup>n</sup>, chi ndéé cútnàhá vátá ngãva-gá ñuyúú-a ní cachí-gá sá cundècu ndíhi ñaha-gá xii-yu, te ñá túú dándahú ñáhá-gã, chi quide-gá ñ<sup>n</sup> sá cãhá<sup>n</sup>-gá. <sup>3</sup>Te ní sáá nduu ní cachí-gá sá ñíhí-yu tnúhu nãcuáa cuáhá<sup>n</sup> tnúhu-gá, te diu-ni tnúhu-á<sup>n</sup> ní cachí Yá Ndiöxí Yaá dácãcu nihnu ñaha xii-o núú ùhú núú ndàhú sá dácúaha-í ñáyiú. <sup>4</sup>Te tutú-a cadúha-í cuendá daquixi-í ndaha yòhó té Titú, téé ní sanu ichi ndisa-í ichi Xítohó Jesucristú, chi ñ<sup>n</sup>-ni tnúhu sàndáá iní-ó. Te xicá<sup>n</sup> táhù-í núú Tãtã-ó Dütú Ndiöxí sá ño na chindee chitúú ñaha-gã xii-n, te diu-ni-gá ná càda te ío váha cuu iní-n cundecu-n. Te xicá<sup>n</sup> táhú tùcu-í núú Xítohó Jesucristú Yaá dácãcu nihnu ñaha xii-o núú ùhú núú ndàhú sá dífú-ní dùca<sup>n</sup> na cada ñaha-gã xii-n.

### Chiu<sup>n</sup> quide té Titú distritú Crětá

<sup>5</sup>Te yúhú ní dándõo ñaha-í xii-n distritú Crětá, chi cuíní-í cada-n nchaa chiu<sup>n</sup> cumání, te cuíní-í taxi ndecu-n cuè téé quíndaha ñaha xii cue ñáyiú sàndáá iní tnúhu Yá Ndiöxí xíndecu ñ<sup>n</sup> ñ<sup>n</sup> ñuú yíndèhu distritú-á<sup>n</sup>, te cada-n nãcuáa ní cachí-í cada-n. <sup>6</sup>Te cue téé cada chiu<sup>n</sup>-á<sup>n</sup>

xíní ñùhu-xi cuu-güedé mee-ni cuè téé ío váha quide ndáá nãcuáa vá yõ cãhá<sup>n</sup> dóho-güedé, te na cùu-güedé cue téé ndècu ñ<sup>n</sup> dii-ní ñadíhí-xi. Te duca<sup>n</sup> nchaa landú-güedé ná cùu-güexi landú sàndáá iní ñáhá xii Yá Ndiöxí cuendá sá vá yõ cuatnuñaha xii-güexi quesahá-yu sá ño sàá iní-güexi te quide-güexi nándi sá ñà túú tàù-güexi cada-güexi. <sup>7</sup>Chi xini ñuhu-xi sá nchaa<sup>n</sup> cuè téé quíndaha ñaha xii ñáyiú sàndáá iní tnúhu Yá Ndiöxí ío cundecu yíñùhu-güedé, chi duca<sup>n</sup> tàù-xi cada nchaa cue téé quide chiu<sup>n</sup> Yá Ndiöxí, te xini ñuhu tucu-xi sá vá cúú-güedé cue téé ñíhí iní-xi, te ni vá cúú-güedé cue téé líhli iní-xi, te ni vá cúú-güedé cue téé quihu, te ni vá cúú-güedé cue téé plètú, te ni vá cúú-güedé cue téé dicó-ni duca<sup>n</sup> ñíhí díhú<sup>n</sup>. <sup>8</sup>Te xini ñuhu-xi cuu-güedé cue téé sãñaha nùu vehe ndetatú cue ñáyiú ñùhu ichi, cue téé quide váha sá cúú-xí tnàha ñáyiú-xi, cue téé ío váha cùtnuní iní-xi nãcuáa cada cundecu ñuyúú-a, cue téé quide ndáá xíndecu, cue téé quide nchaa nãcuáa ndùu vétú iní Yá Ndiöxí, cue téé xito mee-xi ñá túú quide cutexínu. <sup>9</sup>Te na cùu-güedé cue téé ío váha sàndáá iní tnúhu váha tnúhu Yá Ndiöxí sá ní dánèhé ñáhá-í xii-ndo cuendá duca<sup>n</sup> te cue téé-á<sup>n</sup> ndacu-güedé cãhá<sup>n</sup>-güedé dóho ñáyiú cuendá cadã-yu nchaa nãcuáa cãhá<sup>n</sup> Yá Ndiöxí, te ñíhí-güedé tnúhu cãhá<sup>n</sup> váha-güedé núú nchaa ñáyiú dàquee tíhú tnúhu Yá Ndiöxí, te mee-ni cuè téé duca<sup>n</sup> quide váha taxi ndecu-n quíndaha-güedé ñáyiú sàndáá iní tnúhu-gá.

<sup>10</sup>Te na càchí tnúhu-í xii-n sã váí ñáyiú sàá iní-xi ío, te cãhá<sup>n</sup>-yu mee-ni tnúhu sá ñà túú nándíhí, te dándahú-yu tnàhá ñáyiú-yu, te ñáyiú isràèl ío-gá vãi-yu duca<sup>n</sup> xíquide. <sup>11</sup>Te nchaa ñáyiú duca<sup>n</sup> xíquide xini ñuhu-xi nducu-o tnúhu cúñaha-o xii-yu cuendá cadí-yu yuhú-yu, chi dãnèhé-yu dava-gá ñáyiú

ii<sup>n</sup> sá ñà túú tàù-yu dacuàhá-yu, te duca<sup>n</sup> quidé-yu cuendá-ni sá nihí-yu díhú<sup>n</sup>, te ío títní xichi ní cuu dándahú-yu nchaa ñáiyu xĩndecu ii<sup>n</sup>-ni vèhe.

<sup>12</sup>Te ní cachí ii<sup>n</sup> téé ío váha sàà díquí-xi ndècu mei ñuú distritú Crétá sá ncháá ñáiyu ñuú-dé-á<sup>n</sup> ío ndèhndé-yu, te ío cuihna iní-yu, te ío vài xexí-yu, te cùhndú-yu. <sup>13</sup>Te ndáá ní cáhá<sup>n</sup>-dé chi duca<sup>n</sup> quidé-yu, te xiá<sup>n</sup> ío cáhá<sup>n</sup>-n dôho-yu cuendá sá ná quindáá váha iní-yu tnúhu Yá Ndióxi. <sup>14</sup>Te cúñaha-n xí-yu sá vǎ cádá cuendá-yu nchaa tnúhu ndehnde càhá<sup>n</sup> ñáiyu isràél, te ni vǎ cádá cuendá-yu nchaa tnúhu càhá<sup>n</sup> ñáiyu ñá túú cuení quindáá iní tnúhu Yá Ndióxi.

<sup>15</sup>Te nchaa sá ñí cadúha Yá Ndióxi ío ñuyú-a cùu-xi mee nine-ni sá váha sá cúú-xí nchaa ñáiyu sa ní nduu ndoo ní nduu nine iní-xi ndècu ichi Yá Ndióxi. Dico nchaa sá ñí cadúha-gá ñá túú cùu-xi sá váha sá cúú-xí nchaa ñáiyu ndècu ichi cuehé ichi duha, chi ñá túú sàndáá iní-yu tnúhu-gá, chi mee-ni sǎ cuèhé sá dúhá ñùhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècú-yu. <sup>16</sup>Te cǎchí-yu sá sàndáá iní-yu Yá Ndióxi, dico nchaa sá quidé-yu-á<sup>n</sup> cǎchí tnùní-xi sǎ ñǎ ndáá. Te Yá Ndióxi chi duu<sup>n</sup> duu<sup>n</sup> ñá túú tnàhá iní-gá nchaa nàcuáa quidé-yu, chi ío sàà iní-yu, te ñá túú quidé-yu ni ii<sup>n</sup> sá váha.

### Tnúhu váha tnúhu Yá Ndióxi

**2**Te yòhó òré dánèhé-n ñáiyu, te danèhé-n-yu mee-ni nàcuáa càhá<sup>n</sup> tnúhu váha tnúhu Yá Ndióxi. <sup>2</sup>Te nchaa cue téé cùu sacuéhé ná càda cuendá-güedé vǎ cádá cùtexínu-güedé cundecu-güedé, te na cùndecu yĩñuhu-güedé, te na cuǎha váha-güedé cuendá nàcuáa cada-güedé cundecu-güedé, te na quindáá váha iní-güedé Yá Ndióxi, te na cùu iní-güedé tnàha ñáiyu-güedé, te na cùnduu cahnu iní-güedé cuèi nándi sá ná yǎha-güedé.

<sup>3</sup>Te vitna càhá<sup>n</sup> tucu-í sá cúú-xí nchaa ñáiyu díhí ñáiyu cùu sacuéhé sǎ ná cùndecu yĩñuhu-yu, te vǎ cúú-yu ñáiyu yiti yùhu-xi, te ni vǎ cúú-yu ñáiyu quíhu, te na dǎnehé-yu nchaa dava-gá ñáiyu cada váha-yu. <sup>4</sup>Te na dǎsahú-yu nchaa ñáiyu díhí ñáiyu cuechi cuendá ná cùu iní-yu yí-yu, ndihí cue landú-yu, <sup>5</sup>ndihí cuendá sǎ ná caní váha iní-yu nàcuáa cundecu-yu, ndihí cuendá sǎ vǎ caní iní-yu cadá-yu ni ii<sup>n</sup> sǎ cuèhé sǎ dúhá, ndihí cuendá sǎ ná càdá-yu nchaa chiú<sup>n</sup> ñuhu vehé-yu, ndihí cuendá sǎ cádá váha-yu nchaa tnàha ñáiyú-yu, ndihí cuendá sǎ ná cádá-yu nchaa nàcuáa càhá<sup>n</sup> yí-yu, te duca<sup>n</sup> xini ñuhu-xi cadá-yu cuendá sǎ vǎ yò cáhá<sup>n</sup> cuèhé cuendá tnúhu Yá Ndióxi. Duha cúñaha-n xii cue ñáiyu díhí ñáiyu cùu sacuéhé cuendá duca<sup>n</sup> dǎsahú-yu nchaa ñáiyu díhí ñáiyu cuechi.

<sup>6</sup>Te yòhó cáhá<sup>n</sup>-n dôho nchaa cue téé cuechi cuendá sǎ ná caní váha iní-güedé nàcuáa cundecu-güedé, <sup>7</sup>te cada-n mée-ni sǎ váha cuendá duca<sup>n</sup> cǎnchicú<sup>n</sup> nihnu-güedé cada-güedé, te òré danèhé-n-güedé te ío váha cuu iní-n dǎnehé-n-güedé, te ndihí tnúhu yĩñuhu cáhá<sup>n</sup> ndihí-n-güedé. <sup>8</sup>Te cáhá<sup>n</sup>-n mée-ni tnúhu váha, te duca<sup>n</sup> te vǎ yò ii<sup>n</sup> cáhá<sup>n</sup> cuèhé cuendá tnúhu càhá<sup>n</sup>-n, te nchaa ñáiyu cùu úhú iní ñáhá xii-o cu-caha<sup>n</sup> núú-yu, te vǎ nihí-yu tnúhu cáhá<sup>n</sup> cuèhé-yu cuendá-ó.

<sup>9</sup>Te ío cáhá<sup>n</sup>-n dôho nchaa cue téé xinu cuechi sǎ ná quindáá iní-güedé cada-güedé nchaa chiú<sup>n</sup> tahu patróó<sup>n</sup>-güedé nàcuáa cudù-güedé núu cuè téé-á<sup>n</sup>, te vǎ càhá<sup>n</sup> sàà iní-güedé. <sup>10</sup>Te vǎ caní iní-güedé duhu-güedé, te cada ndáá-güedé cuendá sǎ ñá túú ñá caní iní ñáhá cuè patróó<sup>n</sup>-güedé, te duca<sup>n</sup> te cutnùní iní ñáiyu sǎ tnúhu Yá Ndióxi ío váha dǎnehé ñáhá-xí nàcuáa cada-o cùndecu-o, te díu-gá cúú-gǎ Yáa

dácäcu nihnu ñaha xii-o núú ùhú núú ndàhú.

<sup>11</sup>Te nchoo nǐ cutnùnǐ iní-ó sǎ Yǎ Ndiöxí ío cùndahú iní-gá nchaa nchoo ñǎyiu ndècu ñuyúú-a, te ní taxi-gá tnúhu ndee iní sá nánihí tàhú nchaandi túhú ñǎyiu te núu na quíndáá iní ñáhǎ-yu xii-gá. <sup>12</sup>Te ní cachí-gá sá dáñá-ó nchàa ichi cuehé ichi duha chi ñá tnàhá iní-gá cundecu-o ìchi-á<sup>n</sup>, te vá ío cuhu<sup>n</sup> iní-ó nchàa sá ío ñuyúú-a, te ní cachí tucu-gá sá ío caní iní-ó nàcuáa cundecu-o vitna ndecu-o ñuyúú-a te cada ndáá-ó cùndecu-o cuendá nduu vétú iní-gá. <sup>13</sup>Te cundetú-o sǎá nduu càhnu vihi, nduu quixi tucu Xítohó Jesucristú Yaa cúú Ndiöxí-ó, te diu-gá ní dácäcu nihnu ñaha-gǎ xii-o núú ùhú núú ndàhú. Te nduu-ǎ<sup>n</sup> ío cudíí iní-ó. <sup>14</sup>Te mee-gǎ ní xíhí-gá chi duca<sup>n</sup> nǐ cuiní-gá cunduu, te duca<sup>n</sup> nǐ quide-gá cuendá nchoo vǎ cùndècu-gá-ó ìchi cuehé ichi duha, te nduu ndoo nduu nine iní-ó, te duca<sup>n</sup> te cuu-o cuè ñǎyiu quíndaha-gǎ, te nǐ yùhu ní iní-ó càda-o mee-ni sá vǎha.

<sup>15</sup>Te nchaa tnúhu-á<sup>n</sup> danèhé-n-yu te cúñaha-n xii-yu nàcuáa cadá-yu, te cáhá<sup>n</sup>-n dǒho-yu te núu ñá túú quide ndáá-yu. Te cada-n sǎ cúú-n ì<sup>n</sup> téé xinu cuechi núú Yǎ Ndiöxí, te vá dáñá-n mèe-n daquee tǐhú ñáhǎ ñǎyiu xii-n.

### Nchaá sá tàú ñǎyiu ndècu ichi Yá Ndiöxí cadá-yu

**3** Te cúñaha-n xii-yu sá ná quíndáá iní-yu cadá-yu nchaa nàcuáa cáhá<sup>n</sup> nchaa cue téé cùchiu<sup>n</sup>, te tàú-yu chindee ñáhǎ-yu xii-güedé nchaa chiú<sup>n</sup> váha quide-güedé. <sup>2</sup>Te vá cáhá<sup>n</sup> cuèhé-yu cuendá ñǎyiu, te vá cùndùu pletú-yu, te na cúú-yu ñǎyiu ndàhú iní-xi, te na cùndahú iní-yu nchaa tnàha ñǎyíú-yu.

<sup>3</sup>Te tnàhá-ó nǐ xóo cada-o dàtná quidé ñǎyiu-á<sup>n</sup> vitna, chi ío nǐi ðǐquí-ó chi ñá tècú tnùnǐ-ó nàcuáa cáhá<sup>n</sup> tnúhu Yá Ndiöxí ní cùu, te ío ní xínduu sǎá iní-ó

núú-gǎ, te ní xíndecu-o ì<sup>n</sup> ichi sá ñà túú tàú-ó cùndecu-o ní cuu, te nándi sá cuèhé sá dúhá ío ñuyúú-a ní xóo cudíí iní-ó nǐ xóo cada-o chi ní xóo taxi tnùnǐ ñáhǎ-xí xii-o, te ní xóo cada cuèhé ní xóo cada duha-o ní cùu, te ní xíndecu-o ìchi cuedú iní, te cuendá nchaá sá ní xóo cada-o-ǎ<sup>n</sup> xíá<sup>n</sup> ío ní xóo cuu úhú iní ñáhǎ ñǎyiu xii-o, te duca<sup>n</sup>-ni nchòo tucu ní xóo cuu úhú iní-ò-yu. <sup>4</sup>Te Yá Ndiöxí Yaa ní dácäcu nihnu ñaha xii-o núú ùhú núú ndàhú ní dándíxí tǔu-gá iní-ó nàcuáa cutnùnǐ iní-ó sǎ ío váha iní-gá, te cùu iní ñáhǎ-gǎ xii nchaa nchoo ñǎyiu ndècu ñuyúú-a. <sup>5</sup>Te Yá Ndiöxí ní dácäcu nihnu ñaha-gǎ xii-o núú ùhú núú ndàhú, dico ñá díú cuendá ì<sup>n</sup> sá vǎha quide-o ndecu-o ñuyúú-a duca<sup>n</sup> nǐ quide-gá, chi mee-gǎ duca<sup>n</sup> tnàhí ní cundàhú iní ñáhǎ-gǎ xii-o. Te ní nduu ndoo ní nduu nine iní-ó, te ní cuu-o dàtná ì<sup>n</sup> ñǎyiu saa, chi Espíritú Yǎ Ndiöxí duca<sup>n</sup> nǐ quide ñaha-xi xii-o. <sup>6</sup>Te Espíritú-gá ní taxi-gá ní yùhu ní iní-gá ndécú ndíhi-o, te duca<sup>n</sup> nǐ quide-gá chi ní sándáá iní-ó Xítohó Jesucristú Yaa ní dácäcu nihnu ñaha xii-o núú ùhú núú ndàhú. <sup>7</sup>Te ío cùndahú iní ñáhǎ-gǎ xii-o núu sa ní quide ndáá-gá cuéchi-o te ní cuu-o dèhe-gá, núu xíá<sup>n</sup> vitna ndètu-ná-ó sǎá nduu ndùu táhú-ó cùndecu-o ndíhi-gá ní caa ní quíhí<sup>n</sup>.

<sup>8</sup>Te tnúhu ní cáhá<sup>n</sup>-í-a cùu-xi tnúhu ndáá cuiti, te cuiní-í sá nǐ yuhu ní iní-n cáhá<sup>n</sup>-n tnúhu-gá núú-yu cuendá sá ncháá ñǎyiu sàndáá iní ñáhǎ xii Yá Ndiöxí nducu ndèé-yu cadá-yu mee-ni sǎ vǎha, te tnúhu-á<sup>n</sup> cúú-xí mèe-ni tnúhu váha, te ío váha sá cúú-xí-yu. <sup>9</sup>Te vá cadá cuendá-n nchàa tnúhu sá ñà túú nàndíhi xítnàha ñǎyiu, te vá cadá cuendá-n ñǎyiu nándi cáhá<sup>n</sup> cuendá nchaá sá nǐ xóo cada cue ñǎyiu ní xíndecu ndéé sanaha, te vá cadá cuendá-n nchàa tnúhu xítnàha ñǎyiu xícuèhé tnàhá cuendá tnúhu ní chídó tnùnǐ ndíi Moisés, chi nchaá tnúhu

xĩtnàhá-yu-á<sup>n</sup> ñà túú tnàhí nandíhi-xi, te dàcuíta ñaha-xi xii-o.

<sup>10</sup>Te núu ío ñáyiú ní ngúíta-yu nándi tnúhu càhá<sup>n</sup>-yu cuèndá sá vǎ cúú ì<sup>n</sup>nuu cue ñáyiú ndècu ichi Yá Ndiöxí ñá, te ñáyiú-á<sup>n</sup> cǎhá<sup>n</sup> sàhú-n dǒho-yu ì<sup>n</sup> úú xito, te núu vá tnǎ-yu tnúhu càhá<sup>n</sup>-n ñá, te vá ñihí tnáhá-gǎ-n ndíhí-yu. <sup>11</sup>Te duca<sup>n</sup> càda-n, chi ñáyiú-á<sup>n</sup> duu<sup>n</sup> duu<sup>n</sup> ñá túú-gǎ cuìní-yu cadá-yu sá vǎha, chi mee-nǎ sá cuèhé sá dúhá tnàhá iní-yu cadá-yu, te cùtnuní iní méě-yu sá ñà túú quide ndáá-yu, te sáá nduu te nacháhu-yu nchaa sá quídě-yu.

### Nàcuáa cada té Títú

<sup>12</sup>Te cuìní-í tendaha-ĩ té Àrtemás quixi-dé núú ndécú-n àdi té Tìquicú, te òré ná quèxio ndéda-ni càa ì<sup>n</sup> cue téa-a núú ndécú-n, te ío nducu ndèe-n quǎhí<sup>n</sup>-n ñùú Nìcópolis núú quǎhí<sup>n</sup>-í cundecu-í,

chi yàcá<sup>n</sup> cuìní-í quǎhí<sup>n</sup>-í cundecu-í yóó quídé vǎxi<sup>n</sup>-xi. <sup>13</sup>Te ío cuǎñaha-n nchàa sá xíní ñùhu té Zènás téé ío váha xíní nchaa nàcuáa càhá<sup>n</sup> lèí, ndihi té Àpolós cuèndá sá ñà túú nǎ cumání xii-güedé ichi. <sup>14</sup>Te cuìní-í sá ncháá ñáyiú ndècu ndihi-o ichi Yá Ndiöxí cada váha-yu, te cuǎñàhá-yu ì<sup>n</sup> sá xíní ñùhu ñáyiú, te ío váha chiú<sup>n</sup> cadá-yu te núu duca<sup>n</sup> na càdá-yu.

### Tnúhu ndéé núú ñí ndíhi-ná

<sup>15</sup>Te vitna ío cada ndee ìní-n càchí nchaa ñáyiú ndècu ndíhi-í iha, te cúñaha-n sǎ ìo na càda ndee iní nchaa ñáyiú cùu iní ñáhá xii-o, ñáyiú sàndáá iní ñáhá xii Yá Ndiöxí. Te Yá Ndiöxí ío na chindee chitúu ñaha-gǎ xii-ndo nchàa-ndo. Te duca<sup>n</sup> na cùnduu. Te ío chí cadá ndèe iní-nǎ vitna.



## TUTÚ NÍ CADÚHA TÉ PÄBLÚ QUÍHÍ<sup>n</sup> NDAHA TÉ FILEMÓN

### Té Päblú cádúha-dé tutú quíhí<sup>n</sup> ndaha té Filemón

**1** Te yúhú té Päblú té yíhi ve-caá sá cuendá Xítóhó Jesucristú cádúha-í ìí<sup>n</sup> tutú ndihi té Timùteú cuendá daquixi-í ndaha yòhó té Filemón, te ío cùu iní ñàhá-í xii-n chi tnàhá-n quide-n chiu<sup>n</sup> Yá Ndiòxí. Te tutú-a tëndaha-í quixi ndaha-n <sup>2</sup>ndihi ndaha ñaha nàni Apiá ñaha ndècu ndihi-o ichi Xítóhó Jesucristú, ndihi ndaha té Àrquipú, chi tnàhá-dé quidé-dé chiu<sup>n</sup> Yá Ndiòxí, ndihi ndaha nchaa ñáyiú tàcá vehe-n dàcuahá-yu tnúhu-gá. <sup>3</sup>Te xicá<sup>n</sup> táhù-í núú Tátá-ó Dütú Ndiòxí ndihi núú Xítóhó Jesucristú sá ìo na chindee chitúú ñaha-gá xii-ndo, te duca<sup>n</sup> ndì nduú-gá ná cádá te ío váha cuu iní-ndó cùndecu-ndo.

### Té Filemón ío sàndáá iní-dé Xítóhó Jesucristú te cùu iní-dé tnàha ñáyiú-dé

<sup>4</sup>Te ndì tnahá òré càhá<sup>n</sup> ndihi-í Yá Ndiòxí cuendá-n ndàcá<sup>n</sup> táhù-í núú-gá. <sup>5</sup>Chi ñihí-í tnúhu sá ìo sàndáá iní-n Xítóhó Jesucristú, te cùu iní-n cuè ñáyiú ndècu ichi-gá. <sup>6</sup>Te xicá<sup>n</sup> táhù-í núú Yá Ndiòxí sá dàtná-ni sàndáá iní-n-gá duca<sup>n</sup>-ni dànehé-n ñáyiú cuendá duca<sup>n</sup> ngünu ichí-yu tnàhá-yu, te cutnùní iní-yu nàcuáa ndùu nchaa sá vâha tàxi Xítóhó Jesucristú xii-o, te tnàhá-yu nduu táhù-yu nchaa sá vâha-á<sup>n</sup>. <sup>7</sup>Te yòhó té Filemón cúú-n tée ndècu ndihi-í ichi Xítóhó Jesucristú càchí tnúhu-í xii-n sá ìo cùdífí iní-í cuendá sá ìo váha quide-n ndecu-n, chi cùu iní-n nchàa ñáyiú ndècu ichi Yá Ndiòxí, te uu<sup>n</sup>-gá ñihí ndèè-í sá dúcá<sup>n</sup> quide-n, te ñi-n

ìo sáhà-n-yu tnúhu ndee iní ndécú ndihí-yu.

### Té Päblú chindèe tnúhu-dé té Ònésimú

<sup>8</sup>Te yúhú té Päblú ní taxi Xítóhó Jesucristú tnúhu ndee iní ndécú ndihí-í sá táxi tnùnì ñàhá-í xii-n te tahu-í chiu<sup>n</sup> cada-n, dico vá táxi tnùnì ñàhá-í xii-n, <sup>9</sup>chi váha-gá sá càhá<sup>n</sup> ndàhú-í núú-n sá cádá-n nchàa nacúáa càhá<sup>n</sup>-í chi ío cùu iní ñàhá-í xii-n. Chi yúhú sa ta yì-í cuáhá<sup>n</sup>, te yíhi-í veccá cuendá sá càhá<sup>n</sup>-í tnúhu Xítóhó Jesucristú. <sup>10</sup>Te càhá<sup>n</sup> ndàhú-í núú-n sá ñà túú nã cani iní-n cuendá té Ònésimú, chi ní cuu-dé vitna dàtná ìí<sup>n</sup> déhe-í, chi ní sàndáá iní-dé tnúhu Yá Ndiòxí ní xáha<sup>n</sup>-í xii-dé vitna yíhi-í veccá.

<sup>11</sup>Te nàha-n sá cùtnàhá ní xíndecu ndihi-n-dé ñà túú ní quide ndáá-dé, dico vitna ío váha quide-dé ndécú ndihi-í-dé, te ñi-ni duca<sup>n</sup> càda-dé òré cundecu ndihi tucu-n-dé. <sup>12</sup>Te vitna tendaha-í-dé ndixi-dé cundecu tucu-n ndihi-dé, te òré quehe<sup>n</sup> cuendá-n-dé, te cada iní-n sá yúhú ní quehe<sup>n</sup> cuendá-n. <sup>13</sup>Te vitna yíhi-í veccá sá cuendá tnúhu Xítóhó Jesucristú, te cuiní-í ngani-í-dé cunu cuechi-dé núú-í cuendá cada-dé núú-n ní cùu. <sup>14</sup>Dico ñà túú ní ngani-í-dé, chi vátá ndátnúhu ndihi ñaha-gá-í xii-n nùu nása cachí-n cùnduu. Te ñà cùndèe iní-í cada yica-í cada-n ìí<sup>n</sup> sá vâha sá cúú-xì-í, chi cuiní-í sá méé-n càni iní-n nùu cuu àdi sá vã cúú. <sup>15</sup>Te ní cunduu ñí quee té Ònésimú vehe-n, te cudana te mee Yá Ndiòxí duca<sup>n</sup> ñí cachí-gá cunduu cuendá dacuàha-dé cada váha-dé. Te ndixi tucu-dé cundecu ndihi duca<sup>n</sup>-nã-n-dé. <sup>16</sup>Te vá cúú-gá-dé dàtná ìí<sup>n</sup> tée xínu cuechi chi ní cuu-dé dàtná ìí<sup>n</sup> ñanì-ó chi ní sàndáá iní-dé Yá Ndiòxí, te yúhú ío cùu iní-í-dé, dico yòhó uu<sup>n</sup>-gá cuu iní-n-dé, chi cùu-dé ìí<sup>n</sup> tnàha ñáyiú-o, te ndècu-dé ichi Yá Ndiòxí.

<sup>17</sup>Te ì<sup>n</sup>-ni cùu-o ndecu-o ichi Yá Ndiõxí nũu xíã<sup>n</sup> càhá<sup>n</sup> ndàhú-í núú-n sã quéhé<sup>n</sup> cuendá-n-dě dàtná quéhé<sup>n</sup> cuendá-n yũhú òré quéxiò-í vehe-n. <sup>18</sup>Te núu ió ì<sup>n</sup> sá nĩ cumání-dě núú-n ñà túú ní quide ndáá-dé cútnàhá ní xíndecu-n ndìhi-dé, àdi ió ì<sup>n</sup> sá tàú-dé te vá ndacá<sup>n</sup> cuendá-n nũú-dě, chi yũhú ndacá<sup>n</sup> cuendá-n nũú-í. <sup>19</sup>Te ndaha mee yũhú té Păblú cādũha-í tutú-a càchí tnũhu-í xii-n sã ná chăhu-í nchaa sá nĩ quide-dé. Dico dandăcu saú iní-n sã yũhú ní sanu ichi ñaha-ĩ xii-n ichi Xítóhó Jesucristú. <sup>20</sup>Dico yòhó tée ndecu ndìhi-í ichi Xítóhó Jesucristú cada ndee iní-n càda-n tnũhu ndàhú càhá<sup>n</sup>-í núú-n chi ndecu-o ichi-gá. Te duca<sup>n</sup> càda-n nacuaá cuu-xi dàtná ì<sup>n</sup> tnũhu ndee iní sá cúú-xì-í, chi ndi ndùú-ó ndecu-o ichi-gá.

<sup>21</sup>Te cùtnuní iní-í sá cádá-n nchàa nacuaá càhá<sup>n</sup>-í, te cùtnuní tucu iní-í sá

ïo-gá vâi sá văha cada-n dâcúxí tnũhu ndàhú càhá<sup>n</sup>-í núú-n, núu xíã<sup>n</sup> tëndaha-í tutú-a véxi ndaha-n. <sup>22</sup>Te vitna cuiní-í cada túha-n ì<sup>n</sup> vehe cundecu-í, chi sàni iní-í sá quíxí còto ñaha-í xii-ndo, te ndètu-í sáá nduu-ă<sup>n</sup> chi nchòhó xicá<sup>n</sup> táhú-ndó nũu Yă Ndiõxí cuendá-í.

### Tnũhu ndéé núú nĩ ndìhi-ná

<sup>23</sup>Te ío cada ndee iní-n càchí té Ěpafrás tée yìhi ndìhi-í vecaá sá cuendá tnũhu Xítóhó Jesucristú. <sup>24</sup>Te ío cada ndee iní tucu-n càchí té Măcú, ndìhi té Aristarcú, ndìhi té Dēmás, ndìhi té Lùcá, chi tnàhá cue tée-ă<sup>n</sup> quide-güedé chiú<sup>n</sup> Xítóhó Jesucristú.

<sup>25</sup>Te Xítóhó Jesucristú ío na chindee chitúu ñaha-gă xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nă vitna.

## TUTÚ QUÍHÍ<sup>n</sup> NDAHA CUE ÑÁYIU HÈBREÚ

### Dútú Ndiòxí ní cachí-gá sá Dèhe-gá cada núú-gă

**1** Te ndéé sanaha, Yá Ndiòxí ní xáha<sup>n</sup>-gă xii cue téé ní cachí iní méé-gă cada núú-gă cáhá<sup>n</sup>-güedé tnúhu-gá núú nchàa ñaní tnáhá-ó ní xindecu ndéé dàvá-á<sup>n</sup> te diu duca<sup>n</sup> ní quide-güedé. Te titní xito duca<sup>n</sup> ní xáha<sup>n</sup>-gă xii-güedé ní cáhá<sup>n</sup>-güedé tnúhu-gă. Te ndi díí<sup>n</sup> ndi díí<sup>n</sup> ní xítnúhu ñaha-gă xii-güedé nàcuáa cáhá<sup>n</sup>-güedé tnúhu-gă núú-yu. <sup>2</sup>Te sátá ní cuu vâi nduu ta yáha cuáhá<sup>n</sup>, te ní sáá nduu ní cachí Yá Ndiòxí sá Dèhe-gá cada núú-gă cáhá<sup>n</sup> tnúhu-gă núú-ó. Te diu-ni mee-gă ní táuchíú<sup>n</sup> ní cadúha Dèhe-gă ñuyú ndíhi nchaa sá íó, te ní cachí-gá sá ncháá cùu-xi cuendá Dèhe-gá. <sup>3</sup>Te Dèhe Yá Ndiòxí ío càhnu cuu-gă dàtná càhnu cuu mee-gă, te dàtná-ni sàni iní méé-gă diu-ni duca<sup>n</sup> sàni iní Dèhe-gá chi tnáhá-gă cúú-gă Ndiòxí, te sá cuendá tnúhu cáhá<sup>n</sup> Dèhe-gá xíá<sup>n</sup> ndécú-ní nchàa sá íó ñuyú, te duca<sup>n</sup> chi ío càhnu cuu Dèhe-gá, te diu-ni Dèhe-gá ní quide nàcuáa vá cündècu-gă cuèchi-o. Te sátá dúcá<sup>n</sup> te ní ngóo-gă xio cùha Tátá-gă Dútú Ndiòxí Yáá ío cùnunu ndecu andíu.

### Dèhe Dútú Ndiòxí ío-gă cúnùu-gă dàcúúxí cuè espíritú xínú cuèchi núú-gă

<sup>4</sup>Te Dèhe Yá Ndiòxí ío-gă cúnùu-gă dàcúúxí cuè espíritú xínú cuèchi núú-gă, te duca<sup>n</sup> chi ní nduu táhú-gă núú Tátá-gă Dútú Ndiòxí sá ío-gă cunuu-gă dàcúúxí cuè espíritú-á<sup>n</sup>. <sup>5</sup>Chi Yá Ndiòxí ñá túú ní xáha<sup>n</sup>-gă xii ni ìí<sup>n</sup> cue espíritú xínú cuèchi núú-gă dàtná ní xáha<sup>n</sup>-gă xii Dèhe-gá, te duha ní xáha<sup>n</sup>-gă: Yòhó cúú-n Dèhe mee-í,

te duca<sup>n</sup>-ni cündecu-n núú ndécú-í. Duha ní xáha<sup>n</sup>-gă. Te ní cachí tucu Yá Ndiòxí:

Yúhú cúú-í Tátá Yàá-á<sup>n</sup>,  
te mee-gă cúú-gă Dèhe-í.

Duha ní cachí-gă. <sup>6</sup>Te cútñahá ní tendaha-gă Dèhe-gá Yáá ío cùnunu ní quixi-gă ñuyú-a, te ní cachí-gă:

Tàú-xi sá ncháá cuè espíritú xínú cuèchi núú-í chíñuhu-xi Dèhe-í.

Duha ní cachí-gă. <sup>7</sup>Te Yá Ndiòxí ní cáhá<sup>n</sup>-gă cuendá cue espíritú xínú cuèchi núú-gă, te ní cachí-gă:

Yúhú quidè-í sá ncháá cuè espíritú xínú cuèchi núú-í cúú-xí dàtná táchí,  
te diu-ni cue espíritú-á<sup>n</sup> quidè-í sá cúú-xí dàtná itá ñuhú.

Duha càchí-gă. <sup>8</sup>Dico Dèhe-gá chi ñá túú dùca<sup>n</sup> ni xáha<sup>n</sup>-gă, chi duha ní xáha<sup>n</sup>-gă: Yòhó tnáhá-n cùu-n Ndiòxí dàtná cúú yúhú Yáá cúú Tátá-n,

te duca<sup>n</sup>-ni tàxi tñuní-n nì caa ni quíhí<sup>n</sup>,  
te ío váha ndáá quidè-n tàxi tñuní-n.

<sup>9</sup>Te dàquee tihú-n nchàa sá cuèhé sá dúhá, te cùu iní-n nchàa sá váha, núu xíá<sup>n</sup> yúhú Yáá cúú Tátá-n ní quide-í sá ío-gă vii ío-gă váha cuu iní-n, dàcúúxí nchàa dava-gă ñáyiu ndècu ndíhi-n.

Duha ní xáha<sup>n</sup>-gă xii Dèhe-gă. <sup>10</sup>Te ní xáha<sup>n</sup> tucu Yá Ndiòxí xii Dèhe-gá:

Yòhó cúú-n Yáá ío cùnunu, chí ndéé cútñahá ñá túú vèdana ná íó te ní cadúha-n ñuyú ndíhi andíu.

<sup>11</sup>Te andíu ndíhi ñuyú chi naa-xi, dico yòhó chi cundecu-ni-n nì caa ni quíhí<sup>n</sup>.

Te andíu ndíhi ñuyú chi ndíhi-xi dàtná ndíhí ìí<sup>n</sup> dóó,

<sup>12</sup>te dàtná cuíní-n quide ñáyiu ndíhi ìí<sup>n</sup> dóó òré ndàcá<sup>n</sup> tnáhnú-yu tàxi ndécú-yu ìí<sup>n</sup> xio, duca<sup>n</sup> càda-n ñuyú ndíhi andíu,

te dàtná nádàma dóó ñáyiu duca<sup>n</sup> càda tucu-n ñuyú ndíhi andíu.

Te yòhó dàtná-ni càa-n ndecu-n vitna duca<sup>n</sup>-ni cùnduu-n cundecu-n ni caa ni quíhí<sup>n</sup>, chi vá yí tnahí-n.

Duha ní xáha<sup>n</sup> Yá Ndiöxí xii Déhe-gá.

<sup>13</sup> Te Yá Ndiöxí ñá túú ní xáha<sup>n</sup>-gã xii ni ìí<sup>n</sup> cue espíritú xínú cuèchi núú-gã dàtná ní xáha<sup>n</sup>-gã xii Déhe-gá, te duha ní xáha<sup>n</sup> tùcu-gá:

Ngóo xio cùha-í taxi tñuní-n,

te yúhú cada-í te nchaa sá cúú ùhú iní ñáhá xii-n canehé-xi sá yíñùhu núú-n.

Duha ní xáha<sup>n</sup>-gã xii Déhe-gá. <sup>14</sup> Te nchaa espíritú xínú cuèchi núú Yá Ndiöxí mee-ni chiù<sup>n</sup>-gá quidé-xí, chi tëndaha-gá cue espíritú-á<sup>n</sup> cuähá<sup>n</sup>-xi nchaa núú ndécú cuè ñáyiu ní nduu táhú cundecu ndihi-gá chindee ñàha-xi xií-yu.

**Vá dáñá ndèé-ó tñuhu sá cãhá<sup>n</sup> nàcuáa naníhí tàhú-ó**

**2** Te sá cuendá sá ìo cùnuu Xítohó Jesucristú, núú xíá<sup>n</sup> ío xini ñuhu-xi cada cuendá-ó nchaa tñuhu cãhá<sup>n</sup>-gá sá sá ní xíndedóho-o cuendá sá vã dáñá nihnu-o. <sup>2</sup> Te cue espíritú xínú cuèchi núú Yá Ndiöxí ní cãhá<sup>n</sup>-xi tñuhu-gá ndéé sanaha, te tñuhu ní cãhá<sup>n</sup> cue espíritú-á<sup>n</sup> cúú-xí sã ndáá cuiti. Te nchaa ñáyiu ñá túú ní cuíní tñii nchaa tñuhu ní cãhá<sup>n</sup> cue espíritú-á<sup>n</sup>, te ni ñá túú ní cuíní-yu cundedóho-yu, nchaa ñáyiu-á<sup>n</sup> ní nacháhu-yu nàcuáa ndùu nchaa cuèchi ní quidé-yu ìí<sup>n</sup> ìí<sup>n</sup>-yu. <sup>3</sup> Te sá dúcá<sup>n</sup> ní yáha cue ñáyiu-á<sup>n</sup>, xíá<sup>n</sup> cútnùní ndáá iní-ó sã vã cãcu nihnu-o te núú na dàña nihnu-o tñuhu sá cãhá<sup>n</sup> nàcuáa naníhí tàhú-ó, tñuhu sá ìo cùnuu, chi nacháhu-o te núú duca<sup>n</sup> na càda-o. Te díhna-gá Xítohó Jesucristú ní cãhá<sup>n</sup>-gá tñuhu-á<sup>n</sup> te nchaa ñáyiu ní xíndedóho nchaa nàcuáa ndùu tñuhu-á<sup>n</sup> ní cãhá<sup>n</sup> ndáá-yu tñuhu-á<sup>n</sup> nùú-ó. <sup>4</sup> Te tnahá Yá Ndiöxí cùndìhi-gá nchaa ñáyiu-á<sup>n</sup> quidé-gã nàcuáa cutnùní iní-ó sã tñuhu-á<sup>n</sup> cúú-xí tñuhu ndáá,

chi quíde-gá títñí núú sã vã yòo tnahí ndàcu cada te ío cùñúhu-o. Te Espíritú Yá Ndiöxí quidé-xí nàcuáa nduu táhú-ó ndì díí<sup>n</sup> nùú chiù<sup>n</sup> cada-o nàcuáa cuíní mée-gã. Te sá dúcá<sup>n</sup> quíde Yá Ndiöxí nchaa xíá<sup>n</sup>, xíá<sup>n</sup> cútnùní iní-ó sã tnahá-gá cãhá<sup>n</sup>-gá sã tñuhu-á<sup>n</sup> cúú-xí tñuhu ndáá.

**Xítohó Jesucristú ní xínduu yiqui cùñú-gá dàtná cáá yiqui cuñú nchoo cuè ñáyiu ñuyíú-a**

<sup>5</sup> Te Yá Ndiöxí vá táxí ndècu-gá cue espíritú xínú cuèchi núú-gã taxi tñuní-xi ñuyíú sáá sã vátá quíní-gá-ó, te diu cuendá xíá<sup>n</sup> cãhá<sup>n</sup>-í. <sup>6</sup> Te núú tütú Yá Ndiöxí càchí-xi:

Yòhó Dútú Ndiöxí ñá túú nã cúú cuè ñáyiu ñuyíú nùu ndacu iní-n-yu, àdi chindeé-n-yu.

<sup>7</sup> Te yòhó ní cachí-n sã nchaa ñáyiu ñuyíú-a vá cùnùú-yu dàtná cùnùu cue espíritú xínú cuèchi núú-n, dico ní cachí-n sã sáá nduu te ío cùnùú-yu tnahá-yu, te mee-n cãhá<sup>n</sup>-n sã ìo càhnu cuú-yu, te ní cachí tucu-n sã táxí tñuní-yu nchaa sã ní cadúha-n.

<sup>8</sup> Te duca<sup>n</sup> nchàandi túhú sá ìo quíndàhá-yu.

Duha càchí-xi núú tütú-gá. Te sá dúcá<sup>n</sup> ní cachí Yá Ndiöxí sá quíndàha ñáyiu ñuyíú nchaa sá ìo, xíá<sup>n</sup> cútnùní sá ncháándì túhú sá ìo taxi tñuní-yu, dico vátá sàá-gá nduu dùca<sup>n</sup> quíní-ó càda-xi. <sup>9</sup> Te nchoo sa nàha-o sá tñáá-ní ní quíde Yá Ndiöxí cuendá sá vã cùnùu Xítohó Jesucristú dàtná cùnùu cue espíritú xínú cuèchi núú-gã. Te duca<sup>n</sup> ní quíde Yá Ndiöxí chi ní cundàhú iní-gá nchaa ñáyiu ñuyíú-a, chi ní cachí-gá sã Déhe-gá cuú cuendá nchaa-yu, te Xítohó Jesucristú ío ní ndoho-gá òré ní xíhí-gá, núú xíá<sup>n</sup> ní nduu táhú-gã cùnùu vihi-gá vitna. Te mee Yá Ndiöxí càchí-gá sá ìo càhnu cuu Déhe-gá.

<sup>10</sup> Te Yá Ndiöxí ní cadúha-gá nchàandi túhú sá ìo nàcuáa ní cachí iní mée-gã,

te sá dúcá<sup>n</sup> nǐ quide-gá nõu xíã<sup>n</sup> váha-ni sá nǐ cachí-gá sá Xítoho Jesucristú nándi ndoho-gá te cuú-gá cuendá duca<sup>n</sup> ñà túú tnàhí-gá ná cùmání-gã núú Yã Ndiõxí. Te sá dúcá<sup>n</sup> nǐ cuu núu xíã<sup>n</sup> ní níhí Yã Ndiõxí nàcuáa cada-gá càndeca-gá nchaa ñáyiú cùu déhe-gá quíhí<sup>n</sup> núú ïo váha càa cundecú-yu ndihí-gá ni caa ni quíhí<sup>n</sup>. Te Xítoho Jesucristú cúú-gã Yaá quidé ndècu yiñuhu ñáyiú núú Yã Ndiõxí ñáyiú sàndáá iní ñáhá xii-gá, te Xítoho Jesucristú ndihi cue ñáyiú-á<sup>n</sup> ii<sup>n</sup>-ni Yàá cúú Tãtä-yu ndihi-gá, núu xíã<sup>n</sup> Xítoho Jesucristú Yaá cúú Dèhe Dútú Ndiõxí ñá túú cùcaha<sup>n</sup> núú-gã càhá<sup>n</sup>-gá sá ñàní-gá ndihi cùha-gá cúú nchàa ñáyiú-á<sup>n</sup>. <sup>12</sup>Te quèe ndáá-xi nàcuáa càhá<sup>n</sup>-xi núú tütú Yã Ndiõxí núú càchí-xi nàcuáa ní xáha<sup>n</sup> Xítoho Jesucristú xii Tãtä-gã Dútú Ndiõxí, te duha ní xáha<sup>n</sup>-gã:

Cáhá<sup>n</sup> váha-í cuendá-n nõú nchàa cue tée cùu datná ñàní-í ndihi núú nchàa cue ñáyiú òhí cúú dàtná cùha-í, te cata-í ndudú chiñuhu ñaha-í xii-n nõú tàcá-yu.

Duha yòdo tnuní núú tütú-gá nàcuáa ní xáha<sup>n</sup> Dèhe-gá xii-gã. <sup>13</sup>Te ìngá tucu xichi núú tütú Yã Ndiõxí càhá<sup>n</sup>-xi nàcuáa ní càhá<sup>n</sup> Xítoho Jesucristú cuendá-gã, te duha ní cachí-gã:

Yúhú nchaa-ni nduu quindáá iní-í Tãtä-í Dútú Ndiõxí.

Duha càchí-xi núú tütú Yã Ndiõxí nàcuáa ní càhá<sup>n</sup> Xítoho Jesucristú. Te ìngá tucu xichi núú tütú Yã Ndiõxí càhá<sup>n</sup>-xi nàcuáa ní càhá<sup>n</sup> tucu Xítoho Jesucristú, te duha ní cachí-gã:

Iha ndècu ndihi-í nchaa ñáyiú cùu déhe Tãtä-í Dútú Ndiõxí, te òu-ni ñáyiú-á<sup>n</sup> nǐ taxi cuendá Tãtä-í cuu cuendá-í.

Duha càchí-xi núú tütú-gá nàcuáa ní càhá<sup>n</sup> Xítoho Jesucristú.

<sup>14</sup>Te sá cuendá nchaa ñáyiú cùu déhe Yá Ndiõxí cúú-yu yiqui cùñú, núu xíã<sup>n</sup> duca<sup>n</sup> tnàhá Xítoho Jesucristú ní cuu-gá yiqui cùñú, te duca<sup>n</sup> nǐ cuu-gá yiqui cùñú cuendá cuú-gá, te sá dúcá<sup>n</sup> cùú-gá te ndacu-gá daquèe tñhú-gã sácufhná, te òu sácufhná-ã<sup>n</sup> quidé-xí xihí ñáyiú. <sup>15</sup>Te duca<sup>n</sup> nǐ quide-gá cuendá sá cue ñáyiú ñuyú-a vá yùhú-gá-yu sá cùu-yu, chi nchaa-ni nduu yùhú-yu sá cùu-yu. <sup>16</sup>Te na càchí tnúhu ndáá-í sá Xítoho Jesucristú ní quixi-gá cuendá chindee-gã cue ñáyiú cùu ñàní tnàhá ndíi Àbrahám, te ñá díú cuendá sá chindèe-gá cue espíritú xínú cuèchi núú Yã Ndiõxí. <sup>17</sup>Te cuendá xíã<sup>n</sup> nõu dai ní xini ñuhu-xi sá cúú-gã ñáyiú cuendá yãha-gá nándi sá yãha-gá dàtná yãha cue ñáyiú cùu ndi mee-gá cuendá duca<sup>n</sup> cùu-gá dútú ïo cùnuu te cuu ndáá-gá núú Yã Ndiõxí, te cundàhú iní-gá nchaa ñáyiú te cuú-gá cuendá sá vá cùndècu-gá cuèchi-yu núú Yã Ndiõxí. <sup>18</sup>Te mei òrè ndóhó Xítoho Jesucristú ní xito ndéé ñáhá sàcufhná xii-gã te núu ndisa sá vá càdá-gã ni ì<sup>n</sup> sá ñà túú tàú-gá cada-gá, te sá dúcá<sup>n</sup> nǐ ndoho-gá xíã<sup>n</sup> nõu ndácú-gã chindèe-gá nchaa ñáyiú duca<sup>n</sup> yãha.

### Xítoho Jesucristú ío-gá cùnùu-gá dàcúxí ndíi Moisés

**3** Te nchòhó cúú-ndó ñáyiú ndècu ndihi-í ichi Xítoho Jesucristú ñáyiú cùu cuendá Yã Ndiõxí, te tnàhá-ndó cùu-ndo ñáyiú ní càhá<sup>n</sup> ñáhá-gã cuendá cundecu-ndo ndihi-gã. Te yúhú càchí tnúhu-í xii-ndo sã ïo váha cada cuendá-ndó nàcuáa nduu cuendá Xítoho Jesucristú, chi òu-gá cúú-gã Yaá ní tendaha ñàha Dútú Ndiõxí ní quixi-gã ñuyú-a, te òu-gá cúú-gã Dútú ïo cùnuu chi quide-gá núú Yã Ndiõxí. Te òu-ni cuendá Xítoho Jesucristú càhá<sup>n</sup> tnúhu sá ni sàndáá iní-ó. <sup>2</sup>Te mee Yã Ndiõxí ní sáha chiú<sup>n</sup>-gã Xítoho Jesucristú, te ío ndáá quidé-gã chiú<sup>n</sup>-á<sup>n</sup>

să cúú-xí Yă Ndiöxí, te ðiu-ni duca<sup>n</sup> nĩ quide ndĩi Moisés ní quide ndĩi chiù<sup>n</sup> ní táhú Yă Ndiöxí, te ío ndáá ní quide ndĩi chiù<sup>n</sup>-gá sá cúú-xí nchàa ñáyiu cùu cuendá-gá, te cue ñáyiu-á<sup>n</sup> cúú-yu ðàtná vehe mee-gă. <sup>3</sup>Te ìì<sup>n</sup> téé ðàcaa ìì<sup>n</sup> vehe váha ío càhnu-gá cúú-dě ðàcúúxí vèhe ðàcaa-dé. Te duca<sup>n</sup> sàtnahá-xi cùu Xítóhó Jesucristú chi ío-gá càhnu cuu-gá ðàcúúxí ndĩi Moisés. <sup>4</sup>Te nchoo sà naha-o sá ncháá vèhe ðacuitĩ ñècú cue téé ní ðácáá, ðico sa nàha tucu-o sá Yă Ndiöxí quíde-gă ñécú nchàa sá ío ñuyú-a. <sup>5</sup>Te ndĩi Moisés-á<sup>n</sup> ío ndáá ní quide ndĩi chiù<sup>n</sup> ní táhú Yă Ndiöxí ní quide ndĩi sá cúú-xí nchàa ñáyiu cùu cuendá-gá. Te sá dúcá<sup>n</sup> nĩ quide ndĩi xíă<sup>n</sup> ní cuu ndĩi ìì<sup>n</sup> téé ní xinu cuechi núú Yă Ndiöxí. Te ní xáha<sup>n</sup> ndĩi xii nchaa ñáyiu cùu cuendá-gá nàcuáa cáhá<sup>n</sup>-gá ndéé cuèè-gá. <sup>6</sup>Ðico Xítóhó Jesucristú cúú-gă Déhe mee Yă Ndiöxí, te cùu-gá Yaá ío quide ndáá yíndàha-gá nchaa ñáyiu cùu cuendá Yă Ndiöxí. Te tnàhá-ó cùu-o ñáyiu cùu cuendá-gá, te ðiu-ni duca<sup>n</sup> cùu cuendá ñáhá-gă xii-o te núu na càncicú<sup>n</sup> nihnu-ni-o càni ndáá iní-ó cuendá-gá ndéé ná sàá nduu ngúndecu-o ndĩhi-gá.

**Cue ñáyiu cùu cuendá Yă Ndiöxí ío váha cùu iní-yu ndécú-yu ndĩhi-gá**

<sup>7</sup>Te núu tütú Yă Ndiöxí yódó tnùnì nàcuáa ní cáhá<sup>n</sup> Espíritú-gá, te duha ní cachí-xi: Te núu nchòhó ndèdóho-ndo nchàa tnúhu càhá<sup>n</sup> Yă Ndiöxí vitna, <sup>8</sup>te vá cùndùu sáá iní-ndó ðàtná ní xín-duu sàá iní ñáyiu ní ðáquée tĩhú tnúhu Yá Ndiöxí, ñáyiu ní xíndecu xití yucu, chi ñáyiu-á<sup>n</sup> nĩ xito ndeé-yu Yá Ndiöxí núu nása cada ñaha-gă xif-yu. Duha ní cachí Espíritú-gá. <sup>9</sup>Te càchí tucu Espíritú Yă Ndiöxí nàcuáa ní cáhá<sup>n</sup> mée-gă, te duha ní cachí-gá:

Xití yucu ní xito ndéé ñáhá cuè ñani tnáhá-ndó ní xíndecu ndéé sanaha xii-í,

te duca<sup>n</sup> nĩ quide ñáhá-yu cuèí ní xiní-yu nchaa sá nĩ quide-í ndi ùdico cuíá ní xíndecú-yu xití yucu-á<sup>n</sup>.

<sup>10</sup>Te sá dúcá<sup>n</sup> nĩ quide-yu núu xíă<sup>n</sup> ní cudèè<sup>n</sup>-í núú-yu,

núu xíă<sup>n</sup> ní cáhá<sup>n</sup>-í cuendá-yu, te ní cachí-í:

“Ñáyiu-a quide-ní-yu nchaa sá ñà túú tàú-yu cadá-yu te ní ñà túú cuíní-yu cadá-yu nchaa nàcuáa sàni iní-í, te ní ñà túú cuíní-yu cadá-yu nàcuáa càhá<sup>n</sup>-í”,

duha ní cáhá<sup>n</sup>-í cuendá-yu.

<sup>11</sup>Te xíă<sup>n</sup> núu ní cudèè<sup>n</sup>-í núú-yu te ní xáha<sup>n</sup> ndáá-í xif-yu sá vă ndúú tãhú-yu cundecu váha-yu núú ndécú-í.

Duha ní cachí Yă Ndiöxí càchí Espíritú-gá.

<sup>12</sup>Te nchòhó ñáyiu ndècú ndĩhi-í ichi Xítóhó Jesucristú, càhá<sup>n</sup>-í dóho-ndo sá ío cada cuendá-ndó vă cáni cuèhé iní-ndó te ngóo-ndo vă quíndáá-gá iní-ndó Yă Ndiöxí te ðaña-ndo ìchi-gá, te ðiu-gá cúú-gă Yaá ndécú nchàa nduu nchaa quíú. <sup>13</sup>Te ìì<sup>n</sup> nduu ìì<sup>n</sup> nduu ío chí cuáha tnàha tnúhu ndee iní cundecu-ndo ñini ndecu-ndo ñuyú-a cuendá sá vă xínu iní-ndó càda-ndo nándi sá cuèhé sá dúhá, te duca<sup>n</sup> te vá cúú sàá iní-ndó núú Yă Ndiöxí. <sup>14</sup>Te vá ðáñá ndèè-ó càni ndáá iní-ó nàcuáa cada ñaha Yă Ndiöxí xii-o, te ðàtná-ni ní sani iní-ó ndèè cútnàhá ní tuha-o ìchi Yá Ndiöxí, te ðiu-ni duca<sup>n</sup> càni iní-ó ndèè ná sàá nduu vă cùndècú-gá-ó ñuyú-a, te núu duca<sup>n</sup> na càda-o te cùu ìì<sup>n</sup>nuu-o ndĩhi Xítóhó Jesucristú.

<sup>15</sup>Te duha càhá<sup>n</sup>-xi ìì<sup>n</sup> xichi núu tütú Yă Ndiöxí:

Te núu nchòhó ndèdóho-ndo nàcuáa càhá<sup>n</sup> Yă Ndiöxí vitna,

te vá cúndüu sáá iní-ndó dàtná ní xín-duu sáá iní cue ñáyiü ní dáquéé tǎhü tñühu-gá ndéé sanaha.

Duha cächí-xi núú tütü-gá. <sup>16</sup>Te cue ñáyiü duca<sup>n</sup> ní xín-duu sáá iní-xi cütü-yu ñáyiü ní ndeñuhu ndíi Moisés nació<sup>n</sup> Ègíptú, te ñáyiü-á<sup>n</sup> ní xíndedóho-yu tñühu ní cáhá<sup>n</sup> Yá Ndiöxí te ní quide sáá iní-yu ní dáquéé tǎhü-yu tñühu-gá.

<sup>17</sup>Te ndi ùdico cufá ní xúhu<sup>n</sup>-yu ichi ío ní cùdéé<sup>n</sup> Yá Ndiöxí núü-yu cuèndá sá ní quidé-yu nándi nchaa sá cuèhé sá dúhá, te ñáyiü-á<sup>n</sup> ní xíhí-yu xití yucu.

<sup>18</sup>Te nchaa ñáyiü-á<sup>n</sup> ñà túú ní cuini-yu tñif-yu tñühu ní cáhá<sup>n</sup> Yá Ndiöxí núü xíá<sup>n</sup> ní cáhá<sup>n</sup> ndáá-gá sá vǎ ndúú tǎhü-yu cundecú-yu núú ò váha càa ndecu-gá.

<sup>19</sup>Te xíá<sup>n</sup> núü nchoo cùtnuní iní-ó sǎ nchàa ñáyiü-á<sup>n</sup> ñà túú ní ndüu tǎhü-yu cundecu váha-yu núú ndécú-gǎ, chi ñà túú ní sàndáá iní-yu tñühu ní cáhá<sup>n</sup>-gá.

**4** Te vitna ndècu ndihi-gá-ó tñühu Yá Ndiöxí tñühu sá dánèhé ñáhá xii-o sá cúú cùndecu váha-o núü ndécú-gǎ, te tàú-xi quiyùhü iní-ó chi na cuáhá<sup>n</sup> te vá ndúú tǎhü-ó cùndecu váha-o núü ndécú-gǎ. <sup>2</sup>Te tñàhá nchoo ní ngún-decu ndihi-o tñühu sá cáhá<sup>n</sup> nàcuáa naníhí tǎhü-ó dàtná ní xíndecu ndihi cue ñáyiü ndéé sanaha, dico ñáyiü-á<sup>n</sup> chi ñà túú vèdana ní nàndíhi-xi cuèi ní xíndedóho-yu tñühu-á<sup>n</sup> chi ñà túú ní sàndáá iní ñáhǎ-yu xii-gá. <sup>3</sup>Dico nchoo cùu-o ñáyiü ní sàndáá iní tñühu Yá Ndiöxí, núú xíá<sup>n</sup> nduu tǎhü-ó cùndecu váha-o núü ndécú-gǎ, te ní quee ndáá-xi nàcuáa cáhá<sup>n</sup>-gá núú tütü-gá núú cächí-xi:

Yúhü ní cudè<sup>n</sup>-í núü-yu, te ní cáhá<sup>n</sup> ndáá-í sá vǎ ndúú tǎhü-yu cundecu váha-yu núú ndécü-í.

Duha ní cachí-gá. Te cuu nduu tǎhü-yu cundecu váha-yu núú ndécú Yá Ndiöxí ní cùu, chi sa ní xínu cava nchaa chiü<sup>n</sup> ní quide-gá sá ní cadúha-gá ñuyíú. <sup>4</sup>Te

núú tütü Yá Ndiöxí cáhá<sup>n</sup>-xi nàcuáa ní quide-gá nduu úsá, te duha cächí-xi:

Yá Ndiöxí ní quide chiü<sup>n</sup>-gá ínü nduu ní quide-gá nchaa chiü<sup>n</sup>-gá te ní ndetatú-gá nduu úsá.

Duha cächí-xi núú tütü-gá. <sup>5</sup>Te cächí tucu-xi núú tütü Yá Ndiöxí nàcuáa ní cáhá<sup>n</sup>-gá cuèndá cue ñáyiü ndéé sanaha, te duha ní cachí-gá:

Cue ñáyiü-a vá ndúú tǎhü-yu cundecu váha-yu núú ndécü-í ndétätü-í.

Duha ní cachí-gá. <sup>6</sup>Te ñáyiü ní xíndedóho tñühu sá cáhá<sup>n</sup> nàcuáa naníhí tǎhü-ó ndéé sanaha, ñà túú ní ndüu tǎhü-yu cundecu váha-yu núú ndécú Yá Ndiöxí ndétätü-gá, te duca<sup>n</sup> chi ñà túú ní sàndáá iní ñáhǎ-yu xii-gá, dico ío-gá ñáyiü nduu tǎhü cundecu váha núú ndécú-gǎ ndétätü-gá. <sup>7</sup>Te ní xica cuéhé nduu sá dúcá<sup>n</sup> ñà túú ní sàndáá iní ñáhá ñáyiü-á<sup>n</sup> xii-gá, te dàtnüni ní cáhá<sup>n</sup> ndíi Dàvíi yuhu-gá nàcuáa cada-gá vitna, te ñiu-ni nàcuáa sa yòdo tñuní ñiu-ni duca<sup>n</sup> chido tñuní tucu-í nàcuáa ní cáhá<sup>n</sup> ndíi yuhu-gá, te duha ní cachí-gá:

Te núú nchòhó ndèdóho-ndo tñühu cáhá<sup>n</sup>-í te vá cadá sáá iní-ndó.

Duha ní cachí-gá. <sup>8</sup>Te ndíi Jòsué ní sanu ichi ndíi ñáyiü núú quihí<sup>n</sup>-yu cundecu váha-yu, dico ñà díú cuèndá xíá<sup>n</sup> ní cáhá<sup>n</sup> Yá Ndiöxí, chi cuèndá nàcuáa cada-gá vitna ní cáhá<sup>n</sup>-gá. <sup>9</sup>Núú xíá<sup>n</sup> sáá nduu ndüu tǎhü nchaa ñáyiü cùu cuèndá Yá Ndiöxí ngúndecu váha-yu núú ndécú-gǎ ndétätü-gá. <sup>10</sup>Te nchaa ñáyiü duca<sup>n</sup> na ndüu tǎhü cundecu váha núú ndécú Yá Ndiöxí ndétätü-gá, te tñàhá-yu ndetatü-yu cuèndá nchaa sá váha ní quidé-yu dàtná ndétätü méé-gǎ. <sup>11</sup>Te xini ñuhu-xi sá nchóó ò nducu ndèe-o nducu-o nacuáa cada-o cuèndá nduu tǎhü-ó ngúndecu váha-o núü ndécú Yá Ndiöxí ndétätü-gá, chi na cuáhá<sup>n</sup> dava-ndo càda-ndo datná ní quide cue ñáyiü ñà túú ní sàndáá iní ñáhá xii-gá, te vá ndúú tǎhü-ndó cùn-

decu váha-ndo núu ndécú-gă te núu duca<sup>n</sup> na căda-ndo.

<sup>12</sup>Te tnúhu Yá Ndiöxí cúú-xí datná ìi<sup>n</sup> sá nchító-ó chi quide-xi nándi sá quidé-xí, te cùu-xi datná ìi<sup>n</sup> sá dēé<sup>n</sup> víhí-gă dâcúxí ìi<sup>n</sup> yuchí sá ndēé úú xio núú-xi. Te duca<sup>n</sup> sâtnahá-xi cùu tnúhu-gă chi quée-xi iní-ó, te dândixi túu-xi nchaandi túhú sá sání iní-ó te núu quide váha-o àdi nã túú quide váha-o ndècu-o. <sup>13</sup>Te ni ìi<sup>n</sup> sá ní cadúha Yá Ndiöxí vá cáni iní-ó sã ndâcú-xí nguivăha-xi núú-gă, chi nchaandi túhú sá sání iní-ó ndècu túu-xi núú-gă, te diu núú Yàá-á<sup>n</sup> na cànî cuendá-ó nchàa sá quidé-ó.

**Xítohó Jesucristú  
cúú-gă Dútú ìo cùnûu**

<sup>14</sup>Te Xítohó Jesucristú cúú-gă Dútú ìo cùnûu ndecu ndîhi-o, te diu-gă cúú-gă Déhe Dútú Ndiöxí, te Yaá-á<sup>n</sup> cuândaa-gă andîu nî nucúndecu-gă núú Yá Ndiöxí, núu xîă<sup>n</sup> tàú-xi sá cãncîcú<sup>n</sup> nihnu-ni-o quindáá iní-ó-gă. <sup>15</sup>Te mee Yàá-á<sup>n</sup> ìo cùnûu-gă cúú-gă dútú-ó ndècu ndîhi-o, te ío na cùndahú iní nãhá-gă xii-o cuendá sá nã nihí ndéé-ó cùndecu-o. Te duca<sup>n</sup> căda-gă chi ní yáha-gă datná yăha mee-o, chi nchaa sá ní yáha-gă-á<sup>n</sup> nî cuu-xi sá cădá-gă nándi nchaa sá cuèhé sá dúhá ní cùu dico ni ìi<sup>n</sup> nã túú ní quide-gă. <sup>16</sup>Núu xîă<sup>n</sup> tàú-ó sã nchóó nî yuhu ni iní-ó căhá<sup>n</sup> ndîhi-o Yá Ndiöxí Yaá ío cùndahú iní nãhá xii-o chindee nãha-gă, te duca<sup>n</sup> căda-o te cundahú iní nãhá-gă chindee nãha-gă xii-o ndēda-ni căa oré xínî ñuhu-o-gă.

**5** Te nchaa cue dútú cùnûu núú năyiu isrâel diu-ni năyiu cùu-güedé, te duca<sup>n</sup> nî ngúndecu-güedé cuendá cada-güedé çhîu<sup>n</sup> sá cúú-xí Yá Ndiöxí cuendá-yu, chi diu cue téé-á<sup>n</sup> nî xóo nacani cuendá-güedé núú-gă quiti ní xóo cahni-güedé ní xóo nduu táhú-gă, te duca<sup>n</sup> nî xóo cada-güedé cuendá sá cădá

càhnu iní Yă Ndiöxí cuéchi-yu, te duca<sup>n</sup> nî xóo nacani cuendá tucu-güedé núú-gă nchaa dava-gă sá ní xóo nihí-güedé ní xóo nduu táhú-gă. <sup>2</sup>Te nchaa cue dútú-ă<sup>n</sup> nî xóo cundee iní-güedé nchaa sá ní xóo cada nchaa năyiu nã túú ní quide ndáá năyiu nã túú cùt-nuní iní-xi, te duca<sup>n</sup> nî xóo cada cue dútú-ă<sup>n</sup> chi tnàhá-güedé nã túú ní xóo nihí ndéé-güedé cundecu-güedé cuendá nchaa sá ní xóo yáha-güedé. <sup>3</sup>Te sá cuendá sá dúcá<sup>n</sup> nã túú ní xóo nihí ndéé-güedé núu xîă<sup>n</sup> dai ní xini ñuhu-xi sá tnàhá-güedé cuáha-güedé Yá Ndiöxí sá ndúú táhú-gă cuendá méé-güedé datná quidé-güedé cuendá năyiu.

<sup>4</sup>Te ni ìi<sup>n</sup> téé vá ndâcú-dé cuu-dé dútú cùnûu cuendá-ni sá cãchí iní méé-dé te núu nã díú mēe Yá Ndiöxí duca<sup>n</sup> cuiní-gă sá cúú-dé dútú cùnûu datná ní quide-gă ndîi Àron. <sup>5</sup>Te cuēi Xítohó Jesucristú chi nã díú mēe-gă ní quide-gă méé-gă ìi<sup>n</sup> dútú cùnûu nacuáa cada nínu-gă méé-gă, chi mee Tătá-gă Dútú Ndiöxí duca<sup>n</sup> nî cachí-gă sá cúú-gă Dútú cùnûu, te duca<sup>n</sup> chi Yá Ndiöxí ní xáha<sup>n</sup>-gă: Yòhó cúú-n Dēhe-í, te cuiní-í sá dúhá-ní cùndecu-n núú ndècú-í.

Duha ní xáha<sup>n</sup>-gă xii Xítohó Jesucristú. <sup>6</sup>Te núú tütú Yá Ndiöxí yódó tnùnî nâcuáa ní xáha<sup>n</sup> tûcu-gă xii Xítohó Jesucristú, te duha ní xáha<sup>n</sup>-gă: Yòhó cúú-n dütú cundecu ni caa ni quíhí<sup>n</sup>,

te cùu-n datná ní cuu ndîi Melquisèdèc. Duha ní xáha<sup>n</sup>-gă xii Xítohó Jesucristú. <sup>7</sup>Te cùtnàhá ní xíndecu Xítohó Jesucristú ñuyúú-a te níhi ní xóo căhá<sup>n</sup> ndîhi-gă Yá Ndiöxí te ní xóo căhá<sup>n</sup> ndàhú-gă núú-gă, te ní xóo ndáhyú-gă òré duca<sup>n</sup> nî xóo căhá<sup>n</sup> ndîhi-gă Yá Ndiöxí, te duca<sup>n</sup> nî quide-gă chi nàha-gă sá Yá Ndiöxí cúú-gă Yaá ndacu dâcâcu nihnu nãha xii-gă cuendá sá vă cùú dúcá<sup>n</sup>-gă. Te Yá Ndiöxí ní xíndedóho-gă



nchaa tnúhu ní cáhá<sup>n</sup> Xítoho Jesucristú cuendá sá ñí quide-gá nchaa nàcuáa ní xáha<sup>n</sup> Yá Ndiöxí cada-gá. <sup>8</sup> Te sá cuendá nchaa sá ñí ndoho Xítoho Jesucristú xiá<sup>n</sup> ní cutnùní iní-gá cada-gá nchaa dava-gá sá vâha nàcuáa cuiní méé Yá Ndiöxí cada-gá. Te duca<sup>n</sup> ñí cuu cuéi cùu-gá Déhe Yá Ndiöxí. <sup>9</sup> Te sá dúcá<sup>n</sup> ñí quide-gá nchaa nàcuáa cuiní méé Yá Ndiöxí, xiá<sup>n</sup> ñuu vitna cùu-gá Yaá dácäcu nihnu nchaa ñáyiú sàndáá iní ñáhá xii-gá núú ùhú núú ndàhú. <sup>10</sup> Te mee Yá Ndiöxí ní cachí-gá sá Xítoho Jesucristú cúú-gá dútú cúnùu datná ní cunuu ndíi Melquisèdec cúnàhá ní cuu ndíi dútú ñuyúú-a.

### Cuendá ñáyiú cuiní daña nihnu ichi Yá Ndiöxí

<sup>11</sup> Te vâi-gá tnúhu ndècu cáhá<sup>n</sup>-í nàcuáa ndùu cuendá Xítoho Jesucristú, ndíhi ndíi Melquisèdec, te dicó-ni sá nchòhó ío cuèé tècú tnùnì-ndó, te yúhú ío úhú nihí-í nàcuáa cáhá<sup>n</sup>-í nàcuáa tecú tnùnì-ndó.

<sup>12</sup> Te nchòhó sa ní cuu cuéhé nduu ndècu-ndo ichi Xítoho Jesucristú, te tàú-ndó dānehé-ndó cuè ñáyiú ndècu ichi-gá tnúhu-gá ñuu dicó sá cúú, dico xini ñuhu-ni-xi sá cundècu ñáyiú danèhé ñáhá tnúhu-gá xii-ndo, tnúhu sá ñí dācuáhá-ndó ndèé dīhna sá ñà túú ūhú tecú tnùnì-ndó. Te sá dúcá<sup>n</sup> quide-ndo núú xiá<sup>n</sup> cúú-ndó dàtná cue landú vitna sàdi camá, landú vátá cúú-gá caxi dítá. <sup>13</sup> Chi nchaa ñáyiú cùu datná landú vitna sàdi, ñáyiú-á<sup>n</sup> cúú nèñuú-yu ñà túú cùt-nuní iní-yu nàcuáa càhá<sup>n</sup> tnúhu sá càhá<sup>n</sup> nàcuáa cada ndáá-yu cundecú-yu. <sup>14</sup> Te nchaa sá vátá cúú-gá caxi cue landú yíquí<sup>n</sup> xiá<sup>n</sup> cúú-xí cuendá cue ñáyiú sacuéhé, te xiá<sup>n</sup> cúú-xí dàtná tnúhu sá dācuàha ñáyiú sa ní nihí ndéé ndècu ichi-gá, ñáyiú sa ní cutnùní vâha iní-xi nāndi cùu nchaa sá cuéhé sá dúhá, ndíhi nāndi cùu nchaa sá vâha.

**6** Te xiá<sup>n</sup> ñuu vitna xini ñuhu-xi dācuaha-o dava-gá tnúhu Yá Ndiöxí cuendá duca<sup>n</sup> te cuu-o ñáyiú tècú tnùnì nchaa tnúhu-gá. Te xini ñuhu-xi sá ncháá tnúhu Xítoho Jesucristú sá ñí dācuáhá-ó ndèé dīhna vā dācuàha-gá-ó dàtná ní dācuáhá-ó chi sa tècú tnùnì-ó. Te ñà túú-gá xini ñuhu-xi dācuaha-o datná ní dācuáhá-ó ndèé dīhna nàcuáa cada-o ndixi cuéchi iní-ó cuendá nchaa sá cuéhé sá dúhá quide-o, sá tá dācuíta nihnu ñaha xii-o cuáhá<sup>n</sup> ní cùu. Te duca<sup>n</sup> vā dācuàha-gá tucu-o dàtná ní dācuáhá-ó ndèé dīhna nàcuáa cada-o quindáá iní-ó Yá Ndiöxí, <sup>2</sup> ndíhi cuendá nàcuáa ní dācuáhá-ó nàcuáa cuandute-o, ndíhi cuendá nàcuáa cada-o càcá<sup>n</sup> ndodo-o ndàha-o díquí ñáyiú ní sàndáá iní ñáhá xii-gá. Te duca<sup>n</sup> ñà túú-gá xini ñuhu tucu-xi dācuaha-o datná ní dācuáhá-ó ndèé dīhna cuendá nàcuáa ndoto cue ñáyiú ní xihí, ndíhi cuendá nàcuáa ní dācuáhá-ó sá Yá Ndiöxí daquihí<sup>n</sup>-gá ñáyiú núú ùhú núú ndàhú ni caa ni quihí<sup>n</sup>. <sup>3</sup> Te núu Yá Ndiöxí ná cāchí-gá, te cuita dācuàha-gá-ó nchāa dava-gá tnúhu sá cūmāni quihí<sup>n</sup>.

<sup>4</sup> Te cue ñáyiú sa tècú tnùnì tnúhu Yá Ndiöxí, ñáyiú sa xini nchaa nàcuáa ndùu nchaa sá vâha quide ñaha Yá Ndiöxí xii-o ndíhí-yu, ñáyiú sa chindee ñaha Espiritú Yá Ndiöxí, <sup>5</sup> ñáyiú sa cùt-nuní iní-xi sá ïo vâha tnúhu Yá Ndiöxí, ñáyiú sa xini nàcuáa ta quide Yá Ndiöxí vèxi nchaa sá vā yōo tnāhí ndācu cada, <sup>6</sup> te núu ñáyiú-á<sup>n</sup> ná nguíta tucú-yu daquèe tñhú duú<sup>n</sup>-yu tnúhu Yá Ndiöxí, te vā ndácú-gá-ó nā canu ichi-ó-yu nàcuáa ndixi cuéchi iní-yu te núu duca<sup>n</sup> na càdá-yu, te sá dúcá<sup>n</sup> ná càdá-yu te tnāhá-yu cùu-yu dàtná cue téé ní sahani ñaha xii Xítoho Jesucristú Déhe Yá Ndiöxí núú cùrúxí. Te sá dúcá<sup>n</sup> ná càdá-yu te ngóo dava-gá ñáyiú cáhá<sup>n</sup> cuéhé-yu cuendá Xítoho Jesucristú. <sup>7</sup> Te

nchaa ñáyiú cùu-yu dàtná ñuhu, chi ñuhu-á<sup>n</sup> ndí tnahá òré cúú<sup>n</sup> dǎú te xíhi-xi ndute, te dava ñuhu váha cùu sá xítú ñáyiú, te sá cúú núú ñuhu-á<sup>n</sup> ò nàndíhi-xi, te mee Yá Ndiòxí quidé-gǎ cúú sǎ váha núú ñúhú-ǎ<sup>n</sup>. <sup>8</sup> Dico núu da iñu na ndàa núú ñuhu-á<sup>n</sup> te ñá túú vèdana nàndíhi-xi te núu duca<sup>n</sup>, te Yá Ndiòxí vá cúú váha iní-gǎ cuendá ñuhu-á<sup>n</sup> sǎ dúcá<sup>n</sup> dà iñu ndaa núú-xi, te iñu-á<sup>n</sup> ndíhi-xi cáyú. Te duca<sup>n</sup> sǎtnahá-xi cùu ñáyiú dàquee tñhú tñhu Yá Ndiòxí chi ñá túú cùu váha iní-gǎ núú-yu.

### Níhí-ó sǎ ndétú-ó ndùu táhú-ó

<sup>9</sup> Te cuéi duha càhá<sup>n</sup>-í dico nchòhó cue ñáyiú ío cùu iní-í, chi cùtnuní ndáá iní-í sǎ vǎ cádá-ndó dàtná xíquide dava-gǎ ñáyiú, te mee-ni sǎ váha cuu xii-ndo chi cùu-ndo ñáyiú sa ní naníhí tàhú. <sup>10</sup> Te duca<sup>n</sup> chi Yá Ndiòxí cúú-gǎ Yaá ío váha quide ndáá, te vá dáná ndòdo iní-gǎ nchaa sǎ váha quide-ndo, te ni vǎ dáná ndòdo iní-gǎ nàcuáa quide-ndo cuu iní-ndó-gǎ, te sá dúcá<sup>n</sup> quide-ndo cuu iní-ndó-gǎ xǎ<sup>n</sup> chíndèe-ndo cue ñáyiú ndècu ndíhi-ndo ichi Xítohó Jesucristú, te duca<sup>n</sup>-ni ta quide-ndo véxi ndéé vitna. <sup>11</sup> Te cuimí-í sǎ ñ<sup>n</sup> ñ<sup>n</sup>-ndo nducu ndee-ndo cada-ndo nacuáa cuimí Yá Ndiòxí dàtná tá quide-ndo véxi, te ðiu-ni duca<sup>n</sup> càda-ndo ndéé ná sǎá nduu ndùu táhú-ndó cùndecu-ndo ndíhi-gǎ núú ndécú-gǎ, te duca<sup>n</sup> te níhí-ndó nchàandi túhú sǎ ndétú-ndó ndùu táhú-ndó cùndecu ndíhi-ndo ni caa ni quíhí<sup>n</sup>. <sup>12</sup> Te yúhú cuimí-í sǎ nchòhó vá túhío-ndo càda-ndo nchaa nacuáa cuimí Yá Ndiòxí, te cada-ndo dàtná quidé ñáyiú sàndáá iní tñuhu-gǎ, ñáyiú càhnu iní-xi. Te sá dúcá<sup>n</sup> quidé-yu xǎ<sup>n</sup> nihí-yu nchaa sǎ ñ cachí Yá Ndiòxí nduu táhú-yu.

<sup>13</sup> Te cútnahá ní xáha<sup>n</sup> Yá Ndiòxí xii ndíi Àbrahám nàcuáa cada-gǎ, te ní cacunehe-gǎ méé-gǎ nàcuáa cutnùní iní ndíi sǎ ndáa cada-gǎ nàcuáa ní xáha<sup>n</sup>-gǎ

xii ndíi, te vá yǒo ñ<sup>n</sup> ní càcunehe-gǎ cuendá sǎ quíndáá iní ndíi tñuhu ní cáhá<sup>n</sup>-gǎ. Te duca<sup>n</sup> ñí quide-gǎ chi ñ<sup>n</sup> ðii díi-ni mee-gǎ ío cùnuu-gǎ. <sup>14</sup> Te duha ní xáha<sup>n</sup>-gǎ xii ndíi Àbrahám: “Yòhó té Àbrahám na càchí tñuhu ndáá-í xii-n sǎ ío chindee ñàha-í xii-n, te cáyá cuhé víhí ñàní tñáhá-n”, duha ní xáha<sup>n</sup>-gǎ xii ndíi. <sup>15</sup> Te ndíi Àbrahám ío ní quide ndee iní ndíi ní xíndetu ndíi, te duca<sup>n</sup> te Yá Ndiòxí ní quide-gǎ nàcuáa ní xáha<sup>n</sup>-gǎ cada-gǎ sǎ cúú-xí ndíi. <sup>16</sup> Te núu ñ<sup>n</sup> ñáyiú càhá<sup>n</sup> ñ<sup>n</sup> tñuhu ndáá cuiti te càcu nehé-yu Yá Ndiòxí cuendá quíndáá iní tñaha ñáyiú-yu tñuhu càhá<sup>n</sup>-yu, te òré duca<sup>n</sup> na càhá<sup>n</sup>-yu te ñá túú-gǎ sǎ dácáa ñáyiú càhá<sup>n</sup> ndíhí-yu cuendú. <sup>17</sup> Te duca<sup>n</sup> ñí quide Yá Ndiòxí ní cáhá<sup>n</sup> ndáá-gǎ sǎ cádá-gǎ nàcuáa ní cachí-gǎ, te duca<sup>n</sup> ñí cáhá<sup>n</sup>-gǎ cuendá nchaa ñáyiú ní cachí-gǎ nduu táhú sǎ cádá-gǎ nàcuáa cutnùní iní-yu sǎ quidé-gǎ ñ<sup>n</sup> sǎ càhá<sup>n</sup>-gǎ, te ni ñà túú nàdáma-gǎ ñ<sup>n</sup> sǎ càhá<sup>n</sup>-gǎ. <sup>18</sup> Te nchoo ñí natuha-o Yá Ndiòxí cuendá dàcácu nihnu ñaha-gǎ xii-o núú ùhú núú ndàhú, te ní níhí-ó tñuhu ndee iní ndécú ndíhi-o cuendá sǎ vǎ dáñá ndèé-ó cùndetu-o sǎá nduu ndùu táhú-ó cùndecu-o ndíhi-gǎ. Te duca<sup>n</sup> ñí níhí-ó tñuhu ndee iní chi Yá Ndiòxí ní cáhá<sup>n</sup> ndáá-gǎ sǎ cádá-gǎ nàcuáa ní cachí-gǎ, te ñá túú dàndahú ñáhá-gǎ, te ni ñà túú nàdáma-gǎ ñ<sup>n</sup> sǎ ñí cachí-gǎ cada-gǎ. <sup>19</sup> Te tñuhu ndee iní ndécú ndíhi-o xǎ<sup>n</sup> quidé-xí cùtnuní ndáá iní-ó sǎ ndúú táhú-ó cùndecu-o ndíhi Yá Ndiòxí núú ndécú-gǎ, te duca<sup>n</sup> cùtnuní ndáá ndisa iní-ó sǎ cuendá Xítohó Jesucristú Yaá ndécú núú Yá Ndiòxí. <sup>20</sup> Te duca<sup>n</sup> ñí nucúndecu Xítohó Jesucristú núú Yá Ndiòxí cuendá duca<sup>n</sup> cànchicú<sup>n</sup> nihnu-o càda-o, te duca<sup>n</sup> ñí nucúndecu-gǎ núú Yá Ndiòxí chi cùu-gǎ dútú cùnùu datná ní cunu ndíi Melquisèdec ñuyú-a, te duca<sup>n</sup>-ni cùu-gǎ dútú cùnùu ni caa ni quíhí<sup>n</sup>.

### Xítohó Jesucristú cúú-gã dútú òtáná ní cuu ndí Melquisèdèc

**7** Te ndí Melquisèdèc ní xíndaha ndí cue ñáyiú ñúú Sàlém, te ní cuu ndí dútú ní xinu cuechi ndí núú Dútú Ndiòxí Yáá ío cùnuu. Te ndí Melquisèdèc-á<sup>n</sup> ní xícá<sup>n</sup> táhú ndí núú Yá Ndiòxí cuèndá ndí Àbrahám cùtnàhá ní sáhá<sup>n</sup> ndí Àbrahám-á<sup>n</sup> ní nàá ndí ndíhi cue dava-gá cue téé yíndaha ñáyiú. Te cue téé-á<sup>n</sup> ñà túú ní ndàcu-güedé nàá-güedé ndíhi ndí Àbrahám-á<sup>n</sup> chí ní xíta-güedé. <sup>2</sup>Te nchaa sá ní níhí ndí Àbrahám-á<sup>n</sup> núú ní nàá ndí, te ní quide ndí úxí xichi te ì<sup>n</sup> xichi núú ùxí-á<sup>n</sup> ní sáñaha ndí xii ndí Melquisèdèc. Te ðiú ndí Melquisèdèc-á<sup>n</sup> quèé-xí: Téé ío váha quide ndáá yíndaha ñaha xii ñáyiú, duha quèe-xi. Te ní xóo danàni ñahá-yu xii ndí Téé yíndaha ñúú Sàlém, duha ní xóo danàni ñahá-yu. Te tnúhu Sàlém-á<sup>n</sup> quèé-xí: Ñúú ndécú ñahi, duha quèe-xi tnúhu-á<sup>n</sup>. Núú xíá<sup>n</sup> quèé tucu-xi nacúáa nani ndí Téé yíndaha ñúú ndécú ñahi, duha quèe tucu-xi ðiú ndí. <sup>3</sup>Te ñá túú tnúhu núú yoo cùu tátá ndí ndíhi náná ndí, te ní ñà túú tnúhu núú yoo cùu xí ndí ndíhi xítáná ndí, te ní ñà túú tnúhu núú nándi cùu ñáyiú ní cuu ñaní tnáhá ndí ní xíndecu ndéé sanaha-gã, te ní ñà túú tnúhu núú ná ama ní cacu ndí, te ní ñà túú tnúhu núú ná ama ní xíhí ndí. Te ndí-á<sup>n</sup> duca<sup>n</sup>-ni ní cuu ndí dútú ní xíndecu ndí, te duca<sup>n</sup> sãtnahá-xi cùu Xítohó Jesucristú déhe Yá Ndiòxí chí cuu-gá dútú ní caa ní qíhí<sup>n</sup>.

<sup>4</sup>Te vitna chí cuãha váha cuèndá sá ndí Melquisèdèc ní cuu ndí ì<sup>n</sup> téé ío ní cuu càhnu ní xíndecu ñuyú-a, chí ndí Àbrahám téé ní cuu ñaní tnáhá-ó ní xíndecu ndéé sanaha ní quide ndí úxí xichi nchaa sá ní níhí ndí núú ní nàá ndí. Te ì<sup>n</sup> xichi núú ùxí-á<sup>n</sup> ní sáñaha ndí xii ndí Melquisèdèc. <sup>5</sup>Te ndí Moisés ní chídó tnùnì ndí nàcuáa cada

nchaa dútú, cue téé ní cuu ñaní tnáhá ndí Lèví sá cuè téé-á<sup>n</sup> quehe<sup>n</sup>-güedé ì<sup>n</sup> xichi núú ùxí xichi sá níhí cue ñáyiú israhèl ñáyiú cùu ñaní tnáhá-güedé cuu cuèndá-güedé. Te duca<sup>n</sup> quide-güedé cuèi ñaní tnáhá-güedé ndíhí-yu ní cuu ndí Àbrahám. <sup>6</sup>Te cuèi ñá díú ñaní tnáhá ndí Melquisèdèc cúú ndí Àbrahám dico ní quehe<sup>n</sup> ndí Melquisèdèc-á<sup>n</sup> ì<sup>n</sup> xichi núú ùxí xichi nchaa sá ní níhí ndí Àbrahám. Te ndí Melquisèdèc-á<sup>n</sup> ní xícá<sup>n</sup> táhú ndí núú Yá Ndiòxí cuèndá ndí Àbrahám. Te ðiú-ni ndí Àbrahám-á<sup>n</sup> ní xáha<sup>n</sup> Yá Ndiòxí xii ndí sá cádá váha ñaha-gã xii ndí. <sup>7</sup>Te sa cùtnunì iní-ó sã núu ì<sup>n</sup> téé na càcá<sup>n</sup> táhú-dé núú Yá Ndiòxí cuèndá ì<sup>n</sup> ñáyiú, te téé-á<sup>n</sup> cúnùu-gá-dé. <sup>8</sup>Te cue dútú ñáyiú israhèl quèhé<sup>n</sup>-güedé ì<sup>n</sup> xichi núú ùxí xichi nchaa sá níhí-yu cùu cuèndá-güedé, te cue téé-á<sup>n</sup> cuú-güedé. Te núú tütú Yá Ndiòxí càhí-xi sá ndí Melquisèdèc ndécú-ní ndí, te duca<sup>n</sup> càhá<sup>n</sup>-xi chí ñá túú tnúhu sá ní xíhí ndí. <sup>9-10</sup>Te sá dúcá<sup>n</sup> ní sáñaha ndí Àbrahám sá ní nduu táhú ndí Melquisèdèc, te xíá<sup>n</sup> cada iní-ó sã sã ndecu ndíhi ndí Àbrahám cue ñaní tnáhá ndí Lèví cue téé cùu dútú, cue téé quehe<sup>n</sup> ì<sup>n</sup> xichi núú ùxí xichi nchaa sá níhí ñáyiú israhèl cuèi vátá càcú-gã-güedé. Te cada iní-ó sã tnáhá-güedé ní sáha-güedé ndí Melquisèdèc ì<sup>n</sup> xichi núú ùxí xichi nchaa sá ní níhí ndí Àbrahám núú ní nàá ndí. Te duca<sup>n</sup> càda iní-ó chí cue téé-á<sup>n</sup> cúú-güedé ñaní tnáhá ndí Àbrahám cuèi vátá càcú-gã-güedé dàvá-á<sup>n</sup>.

<sup>11</sup>Te sá cuèndá cue dútú cue téé cùu ñaní tnáhá ndí Lèví ní ngúndecu ndíhi cue ñáyiú israhèl tnúhu sá sánú ìchi ñaha xíi-yu nàcuáa cada-yu cundecú-yu. Te ñaní tnáhá ndí Àrón cúú cuè dútú-á<sup>n</sup>. Te núú dicó cue dútú-á<sup>n</sup> ní ndàcu-güedé cada-güedé nàcuáa cudíu ñáyiú israhèl núú Yá Ndiòxí, te ñá túú-gã

xíní ñùhu-xi ngúndecu ingá dútú dàtná ndíi Melquisèdec ní cùu. Te dútú-ǎ<sup>n</sup> ñà túú ní cùu-dé dàtná ní cuu cue ñani tnáhá ndíi Àrón. <sup>12</sup> Te núú cuè dútú cue téé cùu ñani tnáhá ndíi Lèví-á<sup>n</sup> ní ngúndecu ingá dútú. Te sá dúcá<sup>n</sup> ní ngúndecu ingá dútú xiǎ<sup>n</sup> dacuitíí ní xini ñuhu-xi sá dāma nàcuáa ndùu tnúhu sá sánú ichi ñaha xií-yu nàcuáa cadá-yu cundecú-yu. <sup>13-14</sup> Te diu-ni cuèndá dútú-ǎ<sup>n</sup> sa nihí-ó tnúhu, te dútú-ǎ<sup>n</sup> cúú Xítohó Jesucristú, te ñá dífú ñani tnáhá ndíi Àrón cúú-gǎ chi ñani tnáhá ndíi Jùdá cúú-gǎ. Te nchaa-o tà xini ndáá-ó sǎ ñani tnáhá ndíi Jùdá cúú-gǎ, te ndíi Moisés ñá túú tnàhí ná ní càchí ndíi cuèndá cue ñani tnáhá ndíi Jùdá sá cúú-güedé dútú, chi ni ì<sup>n</sup>-güedé ñá túú ní cùu-güedé dútú ní cùu.

<sup>15</sup> Te vitna cùtnuní ndáá iní-ó nàcuáa ní cuu, chi Xítohó Jesucristú cúú-gǎ ingá dútú dàtná ní cuu ndíi Melquisèdec. <sup>16</sup> Te ñá dífú cuèndá tnúhu sá sánú ichi ñaha xii ñáiyu nàcuáa cadá-yu cundecú-yu duca<sup>n</sup> ni cùu-gǎ dútú, chi ní cuu-gǎ dútú cuèndá sá cúú-gǎ Yaá cundecu ni caa ni quíhí<sup>n</sup> chi vá í<sup>n</sup> ndùu te ndíhi nihnu-gǎ. <sup>17</sup> Te duha ní xáha<sup>n</sup> Yá Ndióxi xii-gǎ: Yòhó cúú-n dútú dàtná ní cuu ndíi Melquisèdec,

te cundecu-n nchàa nduu nchaa quíú. Duha ní xáha<sup>n</sup> Yá Ndióxi xii-gǎ. <sup>18</sup> Te xiǎ<sup>n</sup> núu nchaa tnúhu ndéé díhna, tnúhu sá ní xíndecu ndíhi cue dútú ñà túú-gǎ cúnùu-xi vitna chi ñá túú-gǎ xíní ñùhu-xi te ni ñà túú ñá chindèe ñaha-xi. <sup>19</sup> Te diu-ni tnúhu-á<sup>n</sup> cúú-xí tnúhu sá ní chídó tnùní ndíi Moisés canu ichi ñaha xii ñáiyu nàcuáa cadá-yu cundecú-yu. Te tnúhu-á<sup>n</sup> ñà túú vèdana ní quide-xi nàcuáa chindee-xi ñáiyu cudú-yu núú Yá Ndióxi. Dico vitna ní ngúndecu ndíhi-o tnúhu ndee iní sá ío-gǎ váha dàcúuxí tnúhu ndéé díhna, chi ndècu ndíhi-o Xítohó Jesucristú Yaá

cúú dútú-ó. Te Yaá-á<sup>n</sup> quidé-gǎ tnàhá tnúhu-o ndíhi Yá Ndióxi vitna.

<sup>20</sup> Te Yá Ndióxi ní cáhá<sup>n</sup> ndáá cuiti-gǎ sá Xítohó Jesucristú cuu-gǎ dútú. <sup>21</sup> Dico ñá túú duca<sup>n</sup> ní cáhá<sup>n</sup>-gǎ cuèndá cue ñani tnáhá ndíi Lèví cue téé ní cuu dútú, cuéi mei òré ní chisaha-güedé ní cuu-güedé dútú. Te cùtnàhá ní chisaha Xítohó Jesucristú cúú-gǎ dútú, te Yá Ndióxi ní xáha<sup>n</sup> ndáá cuiti-gǎ xii-gǎ, te duha ní xáha<sup>n</sup>-gǎ: Yúhú Dútú Ndióxi càhá<sup>n</sup> ndáá cuiti-í te vá dāmà-í tnúhu càhá<sup>n</sup>-í: “Yòhó cúú-n dútú dàtná ndíi Melquisèdec,

te cundecu-n ni caa ni quíhí<sup>n</sup>.” Duha ní xáha<sup>n</sup> Yá Ndióxi xii Xítohó Jesucristú. <sup>22</sup> Te Xítohó Jesucristú quidé-gǎ nàcuáa cutnùní ndáá iní-ó sǎ Yá Ndióxi cada-gǎ ingá núú sǎ váha sá cúú-xí-ó dàtná ní cachí-gǎ, te xiǎ<sup>n</sup> cúú-xí sǎ ío-gǎ váha dàcúuxí tnúhu ní cáhá<sup>n</sup>-gǎ ndéé díhna. <sup>23</sup> Te ío cuéhé cue ñani tnáhá ndíi Lèví ní cuu-güedé dútú, te duca<sup>n</sup> cuèndá sá ñà túú ní cùdú-güedé cundecu-güedé chi ní ndíhi-güedé ní xíhí. <sup>24</sup> Dico Xítohó Jesucristú chi vá cùu-gǎ, chi cundecu-gǎ ni caa ni quíhí<sup>n</sup> núu xiǎ<sup>n</sup> diu-ni-gǎ cuu-gǎ dútú, te vá yòo í<sup>n</sup>-gǎ cuu dútú cada núú-gǎ. <sup>25</sup> Te núu xiǎ<sup>n</sup> Xítohó Jesucristú dácácu nihnu ñaha-gǎ xii nchoo ñáiyu núú ùhú núú ndàhú, nchoo ñáiyu sàndáá iní ñàhà xii-gǎ, te diu-ni nchoo cùu-o ñáiyu tnàhà tnúhu ndíhi Yá Ndióxi, te vá í<sup>n</sup> ndùu-gǎ te cuíta nihnu-o. Te duca<sup>n</sup> chi Xítohó Jesucristú ñá túú xòcuiñí-gǎ núú Yá Ndióxi càhá<sup>n</sup> ndàhú-gǎ cuèndá-ó.

<sup>26</sup> Te Xítohó Jesucristú cúú-gǎ Yaá cúú dútú cúnùu xini ñuhu-o cundecu ndíhi-o, te diu-gǎ cúú-gǎ Yaá chindèe chitúu ñaha xii-o, te cùu-gǎ Yaá ío quide ndáá núú Yá Ndióxi, te cùu-gǎ Yaá cándòo canine chi ñá túú tnàhí cuéchi-gǎ. Te ñá túú tnàhí quide-gǎ dàtná quidé nchàa cue ñáiyu ndècu ichi cuéhé ichi duha, te cùu-gǎ Yaá ní nucúndecu andiu núú ndécú Yá Ndióxi te

yàcá<sup>n</sup> táxi tñuní-gá. <sup>27</sup> Te ñá túú quide-gá dàtná ní quide cue dútú nǐ cunuu nǐ xíndecu, chi cue dútú-ǎ<sup>n</sup> ì<sup>n</sup> nduu ì<sup>n</sup> nduu ní xóo cahni-güedé quiti ní xóo nduu táhú Yǎ Ndiöxí, te díhna-gá cuendá nchaa cuéchi mee-güedé duca<sup>n</sup> nǐ xóo cada-güedé te dàtnuní duca<sup>n</sup> nǐ xóo cada tucu-güedé cuendá nchaa cuéchi ñáyiú. Dico Xítoho Jesucristú chi ì<sup>n</sup> xito-ni ní xíhí-gá sá cúu-xí nchaa ñáyiú chi duca<sup>n</sup> nǐ sani iní-gá, te vá ì<sup>n</sup> nduu-gá duca<sup>n</sup> càda tucu-gá. <sup>28</sup> Te sá cuendá nchaa tnúhu ní chídó tñuní ndíi Moisés xíǎ<sup>n</sup> ní xíndecu cue téé ní cuu dútú cúnúu, te cue téé-á<sup>n</sup> nǐ cuu-güedé cue téé yíca cuéchi-xi. Te sátá dúcá<sup>n</sup> nǐ chídó tñuní ndíi Moisés nàcuáa cada ñáyiú, te ní xica cuéhé víhí ndúu te dàtnuní ní cáhá<sup>n</sup> ndáá cuiti Yá Ndiöxí sá Dèhe-gá cuu-gá dútú cúnúu. Te Yaa cúu Dèhe-gá-á<sup>n</sup> nǐ quide-gá nchaa nàcuáa tàú-xi cunduu, te ñi-ni duca<sup>n</sup> càda-gá ni caa ni quíhí<sup>n</sup>.

### Xítoho Jesucristú cúu-gǎ dútú cúnúu

**8** Te Xítoho Jesucristú Yaa cúu dútú cúnúu ndecu ndíhi-o cuándaa-gá andíu, te ní ngóo-gá xio cùha Dútú Ndiöxí Yaa ío cúnúu, te tnàhá-gá cúnúu-gá. Te ñi cuendá-a cùu-xi sá ío-gá cúnúu ta cáhá<sup>n</sup>-ndí véxi. <sup>2</sup> Te núu ndécú Yá Ndiöxí cúu-xí nǐ víhí. Te cada iní-ó sá cúu-xí ì<sup>n</sup> vehe te xíǎ<sup>n</sup> ndécú Xítoho Jesucristú cúu-gǎ dútú, te vehe-á<sup>n</sup> nǐ dácáá mèe Yá Ndiöxí te ñá díú cuè téé ñuyíú-a. <sup>3</sup> Te sá cuendá nchaa tnúhu ní chídó tñuní ndíi Moisés xíǎ<sup>n</sup> ní xíndecu cue dútú cúnúu cuendá sá cáhni-güedé quiti nduu táhú Yá Ndiöxí, te nacani cuendá-güedé núu-gǎ nchaa dava-gá sá nihí-güedé nduu táhú-gǎ. Te xíǎ<sup>n</sup> nǐ dai ní xini ñuhu-xi sá tnàhá Xítoho Jesucristú cuáñaha-gǎ ì<sup>n</sup> sá ndúú táhú Yá Ndiöxí, te táhú-ǎ<sup>n</sup> cúu-xí mèe-gá chi ní xíhí-gá ní cuu-gá dàtná ì<sup>n</sup> táhú sá cúu-xí Yá Ndiöxí. <sup>4</sup> Te núu ni xíndecu-ni Xítoho Jesucristú ñuyíú-a te vá cúu-gǎ dútú ní

cùu, chi sa ndècu cue dútú sǎñaha nchaa sá ndúú táhú Yá Ndiöxí dàtná càhá<sup>n</sup> nchaa tnúhu ní chídó tñuní ndíi Moisés. <sup>5</sup> Te nchaa sá quidé cuè dútú ñáyiú isràél nǐtnahá-xi luha nchaa sá quidé Xítoho Jesucristú Yaa cúu dútú cúnúu ndecu andíu. Te quèe ndáá-xi nàcuáa ní xáha<sup>n</sup> Yá Ndiöxí xii ndíi Moisés cúnàhá tá cùyatni ngüita ndíi dacàa ndíi vehe-gá, te duha ní xáha<sup>n</sup>-gǎ: “Ío váha cada cuendá-n nàcuáa dacàa-n vehe-í dàtná cáá sǎ ní dánèhé ñàhà-í xii-n xítí yucu”, duha ní xáha<sup>n</sup>-gǎ xii ndíi. <sup>6</sup> Dico vitna chi Xítoho Jesucristú cúu-gǎ dútú cúnúu, te ío-gá cǎhnu nduu chiu<sup>n</sup> quide-gá dàcúúxí cuè dútú cue ñáyiú isràél. Te ñi Xítoho Jesucristú cúu-gǎ Yaa quidé tnàhá tnúhu-o ndíhi Yá Ndiöxí, te duca<sup>n</sup> chi Yá Ndiöxí ío-gá váha ndúu tnúhu ní cáhá<sup>n</sup>-gǎ xito cùu uú dàcúúxí tnúhu ní cáhá<sup>n</sup>-gǎ ndéé díhna, te duca<sup>n</sup> ío váha ndúu tnúhu ní cáhá<sup>n</sup>-gǎ xito cùu uú chi ní cachí-gá sá ñngá núú sǎ ío-gá váha cada ñaha-gǎ xii-o vitna.

<sup>7</sup> Te núu nàcuáa ní cachí Yá Ndiöxí cada ñaha-gǎ xii-o ndéé díhna ni quide-xi nchaa nàcuáa tàú-xi cunduu nàcuáa nduu táhú-ó cundecu váha-o nǐú-gǎ ñá, te ñá túú xini ñuhu-xi cáhá<sup>n</sup> tucu-gá sá cádá-gǎ ñngá núú sǎ váha sá cúu-xí-ó vitna ni cuu. <sup>8</sup> Te Yá Ndiöxí ñá túú ní cùu váha iní-gá núú ñáyiú isràél nǐu xíǎ<sup>n</sup> ní cáhá<sup>n</sup>-gǎ cuendá-yu, te duha ní cachí-gá:

Yúhú cúu-í Dútú Ndiöxí, te duha ndúu tnúhu na càhá<sup>n</sup>-í: Sáa nduu te cada-í ñngá núú sǎ váha sá cúu-xí cuè ñaní tnàhá ñáyiú isràél, ndíhi cue ñaní tnàhá ndíi Jùdá ñi-ni ñáyiú isràél.

<sup>9</sup> Te tnúhu sá càhá<sup>n</sup>-í-a ñá túú ì<sup>n</sup>-ni cuu-xi ndíhi tnúhu sá ní xáha<sup>n</sup>-í xii cue ñáyiú ní cuu ñaní tnàhá-yu ní xíndecu ndéé sanaha càda-í-yu, te ñi-ni dàvá-á<sup>n</sup> nǐ quide yica-í ní ndeñuhu-í-yu nàció<sup>n</sup> Ègiptú,

te ñá túú ní cuení-yu tñí-yu tnúhu ní xáha<sup>n</sup>-í xií-yu cuendá duca<sup>n</sup> càda vâha-í-yu,

te xíã<sup>n</sup> núu ní dáñá ñihnu-í-yu ñá túú-gã ní quide cuendá-í-yu.

<sup>10</sup> Te na sâá nduu te duha nduu tucu ingá núú sâ vâha cada-í cue ñáyiú isrâél.

Te yúhu cada-í ñacuáa cutnùní vâha iní-yu ñacuáa cuení-í cadá-yu,

te duca<sup>n</sup> ñi yuhu ñi iní-yu cadá-yu.

Te yúhu Yã Ndiöxí quindaha-í-yu,

te mêtè-yu cuú-yu ñáyiú cùu cuendá-í.

<sup>11</sup> Te dâvâ-á<sup>n</sup> chi ñi ñáyiú cùu ndi meé-yu,

te ñi cuè dava-gã ñáyiú vá cùtnúhu tñahá-yu sá nátùha ñahá-yu xii-í,

chi dâvâ-á<sup>n</sup> nchaa ñáyiú cundecu ndihi ñahá-yu xii-í,

cuèi ñáyiú cùnunu te cuèi ñáyiú ñá túú cùnunu.

<sup>12</sup> Te dâvâ-á<sup>n</sup> cada càhnu iní-í nchaa sá cuèhé sá dúhá quidé-yu,

te vá ñí<sup>n</sup> nduu-gã ndacu iní-í nchaa sá quidé-yu.

Duha ní cachí Yã Ndiöxí cuendá ñáyiú isrâél.

<sup>13</sup> Te sá dúcá<sup>n</sup> ñi cáhá<sup>n</sup> Yã Ndiöxí sá cáda-gã ingá núú sâ vâha sá cúú-xí ñáyiú xíã<sup>n</sup> cùtnùní sá tnúhu sá ñi cáhá<sup>n</sup>-gã díhna ñá túú-gã xíní ñùhu-xi.

Te cada iní-ó sâ tnúhu-á<sup>n</sup> cúú-xí ñí<sup>n</sup> sá ñi cunaha ndècu te ñá túú-gã nándíhi-xi te cuíta-ná-xi,

duca<sup>n</sup> sãtnahá-xi cùu tnúhu sá ñi cáhá<sup>n</sup>-gã ndéé díhna.

### Cuendá vehe Yã Ndiöxí

**9** Te tnúhu sá ñi cáhá<sup>n</sup> Yã Ndiöxí ndéé díhna cùu-xi cuendá ñacuáa cada ñáyiú isrâél chiñuhu ñahá-yu xii-gã, ndihi cuendá vehe-gã caa ñuyíú-a. <sup>2</sup> Te ñáyiú isrâél ní dácáã-yu vehe Yã Ndiöxí, te vehe-á<sup>n</sup> ñi cuu-xi vehe dóó te ní xúhu<sup>n</sup> nehu xití-xi. Te cuàrtú díhna ní xínani-xi cuàrtú ní cuu íí, te xíã<sup>n</sup> ñi xín-decu ñí<sup>n</sup> sá ndèé dité-xi sá ñi cándodó ñí<sup>n</sup> caa candíl núú dité-xi, te ní xínutñí ñí<sup>n</sup> mèsá ní xóo códó pãã ní xóo nduu

táhu Yã Ndiöxí. <sup>3</sup> Te cuàrtú cúú úú ní xínani-xi cuàrtú ní cuu íí víhí-gã. <sup>4</sup> Te xití cuàrtú-á<sup>n</sup> ñi xínutñí ñí<sup>n</sup> sá ñi cuáha mee-ni díhú<sup>n</sup> cuàã<sup>n</sup> te núú xíã<sup>n</sup> ní xóo cahmi-güedé dúsa sá sâhá<sup>n</sup> tñámí. Te diu-ni xíã<sup>n</sup> ñi xín-decu tucu ñí<sup>n</sup> càjá ní cuu mee-ni díhú<sup>n</sup> cuàã<sup>n</sup> te xití càjá-á<sup>n</sup> ñi xúhu<sup>n</sup> ñí<sup>n</sup> lítu ní cuáha mee-ni díhú<sup>n</sup> cuàã<sup>n</sup>, te xití lítu-á<sup>n</sup> ñi xúhu<sup>n</sup> mànáá sá ñi xóo caxí-yu dâvâ-á<sup>n</sup>. Te diu-ni xití càjá-á<sup>n</sup> ñi xúhu<sup>n</sup> tñudii ndíi Àrón sá ñi saa itá-xi, ndihi yúú sâ ñi xín-deé tnúhu ní cáhá<sup>n</sup> Yã Ndiöxí ñacuáa cada ñáyiú. Te duha ní xínani càjá-á<sup>n</sup>: Càjá sá ñúhú tñùhu ní cáhá<sup>n</sup> Yã Ndiöxí sá cúú-xí ñáyiú, duha ní xínani-xi. <sup>5</sup> Te núú càjá-á<sup>n</sup> ñi cándodó úú tñahá sá ñi cadúha-yu, te xíã<sup>n</sup> cáá-xí dàtná cáá espíritú xínú cuèchi núú Yã Ndiöxí. Te cuendá úú xíã<sup>n</sup> ní cut-nùní iní-yu sá ño càhnu cuu Yã Ndiöxí, te sá ñi cadúha-yu-á<sup>n</sup> ndèé ndíxí<sup>n</sup>-xi, te ndíxí<sup>n</sup>-xi-á<sup>n</sup> dâhu-xi xio xio núú quidé càhnu iní Yã Ndiöxí nchaa yíca cuèchi ñáyiú, dico vá cúú-gã cáhá<sup>n</sup>-í cuendá nchaa dava-gã xíã<sup>n</sup> vitna.

<sup>6</sup> Te nchaa xíã<sup>n</sup> ní xín-decu xití vehe Yã Ndiöxí, te cue dútú ñi xóo quíhu-güedé ñí<sup>n</sup> nduu ñí<sup>n</sup> nduu xití cuàrtú díhna ní xóo cada-güedé ñacuáa tàú-güedé cada-güedé sá cúú-xí Yã Ndiöxí. <sup>7</sup> Te cuàrtú cúú úú-á<sup>n</sup> chi mee-ni dútú cùnunu ní xóo quíhu-dé ñí<sup>n</sup> xito-ni ndi tñahá cuíá. Te ndi tñahá òrè duca<sup>n</sup> ñi xóo quíhu dútú cùnunu-á<sup>n</sup> te ní xóo canehe-dé ñí<sup>n</sup> ñi xóo quíhu ní xóo nduu táhu Yã Ndiöxí. Te duca<sup>n</sup> ñi xóo cada dútú-á<sup>n</sup> cuendá sá Yã Ndiöxí cada càhnu iní-gã nchaa yíca cuèchi mee-dé, ndihi nchaa yíca cuèchi ñáyiú. <sup>8</sup> Te sá dúcá<sup>n</sup> mètè-ni dútú cùnunu ní xóo quíhu-dé xití cuàrtú ní cuu íí-gã-á<sup>n</sup>, xíã<sup>n</sup> Espíritú Yã Ndiöxí quidé-xí cùtnuní iní-ó sâ ñìni duca<sup>n</sup> ní xín-decu vehe-á<sup>n</sup> ñi xóo cadá-yu ñacuáa ní xóo cùñaha Yã Ndiöxí cadá-yu. Te xíã<sup>n</sup> cùtnuní sá vâtá sâã-gã nduu càhá<sup>n</sup> ndíhi-yu Yã Ndiöxí ñacuáa tàú-xi cunduu. <sup>9</sup> Te sá

dúcá<sup>n</sup> nĩ xĩndecu vehe-á<sup>n</sup>, ndihĩ sá dúcá<sup>n</sup> nĩ xóo cada nchaa cue dútú-á<sup>n</sup>, xĩá<sup>n</sup> cút-nùnĩ iní-ó nàcuáa quide Yá Ndiöxĩ vitna, chi nchaa quitĩ ní xóo cahni cue dútú-á<sup>n</sup> nĩ xóo nduu táhú Yá Ndiöxĩ, ndihĩ nchaa dava-gá sá nĩ xóo nduu táhú-gá ñá túú ní quide-xi nacuáa nduu ndoo nduu nine iní cue ñáyiú nàcuáa cutnùnĩ iní-yu sá ñá túú-gá cuéchi-yu ndècu núú Yá Ndiöxĩ. <sup>10</sup> Te sá dúcá<sup>n</sup> nĩ xóo cada nchaa dútú-á<sup>n</sup> nĩ nĩhĩ tnáhá-xĩ ndihĩ nchaa tnúhu sá dánèhè ñáhá xii ñáyiú ná cúú sã cáxĩ-yu ndihĩ ná cúú sã cúú còhó-yu ndihĩ nàcuáa ndàhá-yu. Te tnúhu-á<sup>n</sup> nĩ cuu-xi mee-ni sã nĩ sanu ichi ñaha xĩ-yu nàcuáa cundecú-yu ñuyúú-a. Te tnúhu-á<sup>n</sup> nĩ nàndĩhi-xi ndéé ní sáá nduu nĩ nadama Yá Ndiöxĩ tnúhu-á<sup>n</sup> cuendá sá vã dúcá<sup>n</sup>-gã cadá-yu cundecú-yu.

<sup>11</sup> Te Xítohó Jesucristú ní quixi-gá ñuyúú-a, te ñiu-gá cúú-gã Yaá cúú dútú cúnù, te xĩá<sup>n</sup> nũu quide-gá nchaa sá vãha sá cúú-xi-ó. Te vitna ní nucúndecu-gá núú ïo vii ïo váha càa, te núú ndécú-gã-á<sup>n</sup> ñà túú cùu-xi ñ<sup>n</sup> vehe sá nĩ dácáá cuè téé ñuyúú-a. <sup>12</sup> Te cada iní-ó sã Xítohó Jesucristú cuánguihu-gá xitĩ cuàrtú núú nĩ cuu íi víhĩ dàtná ní xóo cada dútú cúnù ní xĩndecu ndéé sanaha, chi ní nucúndecu-gá núú ndécú Yá Ndiöxĩ. Dico ñá túú ní quide-gá dàtná ní xóo cada dútú cúnù ní xĩndecu ndéé sanaha, chi dútú-á<sup>n</sup> òré ní xóo quĩhu-dé xitĩ cuàrtú ní cuu íi-gã-á<sup>n</sup>, te ní xóo canehe-dé nĩnĩ chivá ndihĩ nĩnĩ chěhlu ní xóo quĩhu. Dico Xítohó Jesucristú chi nĩnĩ meé-gã ní sati ní xihĩ-gá núú cùrúxĩ, te xĩá<sup>n</sup> duu<sup>n</sup> duu<sup>n</sup> cuáhá<sup>n</sup>-gá ní nucúndecu-gá núú ndécú Yá Ndiöxĩ. Te sá dúcá<sup>n</sup> nĩ quide-gá xĩá<sup>n</sup> ní nanĩhĩ tàhú-ó. <sup>13</sup> Te nchaa ñáyiú ní xóo cada nàcuáa vá cúú-gã-yu ñáyiú ní cuu íi, ñáyiú-á<sup>n</sup> nĩ xóo códó ñáhá cuè dútú nĩnĩ ndicutu, ndihĩ nĩnĩ chivá, ndihĩ yáá cùnú chěhlu quitĩ sàhni-güedé cuendá nduu íi tucú-yu. <sup>14</sup> Dico nĩnĩ Xĩ-

tohó Jesucristú chi ïo-gá nàndĩhi-xi sá cúú-xi nchòo ñáyiú xĩndecu vitna! Te cuendá nĩnĩ-gã-á<sup>n</sup>, chi Espiritú Yá Ndiöxĩ sá ndécú nchàa nduu nchaa quíú ní cuu ñ<sup>n</sup>nuu-xi ndihĩ Xítohó Jesucristú sá cúú cùú-gá cuendá cuu-gá dàtná ñ<sup>n</sup> táhú sá cúú-xi Yá Ndiöxĩ cuèi cùu-gá Yaá ñá túú tnáhĩ cuéchi-xi, te ní sati nĩnĩ-gã te ní xihĩ-gá. Te cuendá xĩá<sup>n</sup> ní cutnùnĩ iní-ó sá Yá Ndiöxĩ ní quide càhnu iní-gá nchaa sá ñà túú vãha ní quide-o, te ní nduu ndoo ní nduu nine iní-ó. Te duca<sup>n</sup> nĩ nduu ndoo ní nduu nine iní-ó cuendá sá ndácú-ó cunu cuechi-o núú Yá Ndiöxĩ Yaá ndécú nchàa nduu nchaa quíú.

<sup>15</sup> Te Xítohó Jesucristú ní quide ndáá-gá núú Yá Ndiöxĩ cuendá cue ñáyiú ndècu ñuyúú-a. Te cuendá xĩá<sup>n</sup> Yá Ndiöxĩ cada-gá ingá núú sã vãha sá cúú-xi-yu dàtná ní cachĩ-gá, te duca<sup>n</sup> càda-gá sá cuendá nchaa ñáyiú ní cáhá<sup>n</sup>-gá cundecu ndihĩ-gá, chi ñáyiú-á<sup>n</sup> nduu táhũ-yu cundecu ndihĩ váha ñàhá-yu xii-gá nĩ caa nĩ quĩhĩ<sup>n</sup> chi duca<sup>n</sup> nĩ cachĩ-gá, te duca<sup>n</sup> chi Xítohó Jesucristú ní xihĩ-gá núú cùrúxĩ cuendá sá Yá Ndiöxĩ cada càhnu iní-gá nchaa yícá cuéchi-yu, nchaa cuéchi sá nĩ quidè-yu cùtnáhá ní cunuu tnúhu sá ní cáhá<sup>n</sup>-gá dĩhna. <sup>16</sup> Te nchoo xini-ó sã nũu ñ<sup>n</sup> téé na càdúha ñ<sup>n</sup> tutú nàcuáa cada ñáyiú dàcáhũ-yu nchaa sá ndécú ndihĩ-dé, te tutú-á<sup>n</sup> xini ñũhu-xi ndéé ná yãha nduu cùú-dé. <sup>17</sup> Te ñá túú tàú-xi cada ñáyiú nàcuáa càhá<sup>n</sup>-xi núú tütú-á<sup>n</sup> nini ndècu téé ní cadúha, dico sátá ná yãha cuú-dé te cadá-yu nàcuáa càhá<sup>n</sup>-xi. <sup>18</sup> Te cuèi tnúhu ní cáhá<sup>n</sup> Yá Ndiöxĩ ndéé dĩhna nàcuáa cada váha-gá ñáyiú, te ñiu-ni ndihĩ nĩnĩ nĩ cundáá-xi chi ní sahni-güedé quitĩ te ní sati nĩnĩ-güedé. <sup>19</sup> Te ndii Moisés ní cáhá<sup>n</sup> ndodo ndii núú nchàa ñáyiú nàcuáa ní cachĩ Yá Ndiöxĩ cadá-yu, te nàcuáa-ni nduu tnúhu ní chídó tnùnĩ ndii núú tütú ndii ní cáhá<sup>n</sup> ndii, te ní dácá ndii ndute

níí chěhlu ndíhi níí chivá líhli, te ní quehe<sup>n</sup> ndíi ì<sup>n</sup> dité yutnu nàni hisópó ndíhi luha idi ticuèhé, te ní chindóyo ndíi níí-á<sup>n</sup>. Te ní sódó ndíi núú tütú ndèé tnúhu Yá Ndiöxí sá ní chídó tnúni ndíi-á<sup>n</sup>, te tnàhá cue ñáyiú xĩndecu-á<sup>n</sup> ní chucú ndíi. <sup>20</sup> Te ní xáha<sup>n</sup> ndíi Moisés xií-yu: “Cuèndá níí-a ní cundáá sá Yá Ndiöxí cada ñaha-gá xii-ndo sá vaha chi duca<sup>n</sup> ní cachí-gá cada-gá sá cútú-xí-ndó”, duha ní xáha<sup>n</sup> ndíi xií-yu. <sup>21</sup> Te ñíu-ni duca<sup>n</sup> ní quide tucu ndíi ní chucú ndíi níí vehe-gá ndíhi nchaa sá nándíhi-güedé òré chíñùhu-güedé Yá Ndiöxí ndécú xití vehe-gá-á<sup>n</sup>. <sup>22</sup> Te tnúhu ní chídó tnúni ndíi Moisés càchí-xi sá méé-ní níí chucu-güedé nchaa sá cànehe chù<sup>n</sup>-güedé òré chíñùhu-güedé Yá Ndiöxí, te sacú-nà te ndíhi ndoo nchaa xíá<sup>n</sup> chucu-güedé níí ní cùu. Te dacuití ní xini ñuhu-xi sá cátí níí cuèndá duca<sup>n</sup> càda cahnu iní Yá Ndiöxí nchaa yíca cuèchi ñáyiú.

**Xítóhó Jesucristú ní xíhí-gá  
núú cùrúxí cuèndá sá vǎ  
cúndècu-gá cuèchi-o núú Yá Ndiöxí**

<sup>23</sup> Te sá cuèndá sá ní xíhí Xítóhó Jesucristú núú cùrúxí, xíá<sup>n</sup> ñá túú-gǎ cuèchi-o ndècu núú Yá Ndiöxí. Te cuèndá nchaa sá ní xíhí xití vehe-gá sá ní dácáá ñáyiú isràél xíá<sup>n</sup> cútùníní iní-ó nàcuáa quide-xi núú ndécú-gǎ. Te dacuití ní xini ñuhu-xi sá cáhni-güedé cue quití ní cachí Yá Ndiöxí cuèndá nduu íí nchaa sá ní xíhí xití vehe-gá-á<sup>n</sup>. Te cuèi duca<sup>n</sup> ní sahní-güedé cue quití-á<sup>n</sup> dico ñá túú ní quide-xi nacuáa ngúndecu váha-o núú Yá Ndiöxí. Dico Xítóhó Jesucristú ní xíhí-gá, te sá ní xíhí-gá xíá<sup>n</sup> ní quide-gá nàcuáa ngúndecu váha-o núú Yá Ndiöxí. <sup>24</sup> Te Xítóhó Jesucristú cuándaa-gá andiu núú ndécú Yá Ndiöxí càhá<sup>n</sup> ndàhú-gá cuèndá-ó, te Xítóhó Jesucristú chi ñá dífú ì<sup>n</sup> vehe ní dácáá cue téé ñuyíú-a cuánguìhu-gá. Te vehe

Yá Ndiöxí sá ní dácáá cue ñáyiú isràél ñuyíú-a ndéé sanaha, ndíhi nchaa nàcuáa ní xóo cada-güedé xití vehe-gá-á<sup>n</sup> xíá<sup>n</sup> cútùníní iní-ó nàcuáa quide-xi núú ndécú-gǎ. <sup>25</sup> Te dútú cúnùu núú ñáyiú isràél ní xóo quíhu-dé núú cuíá núú cuíá xití cuàrtú ní cuu íí víhí-gǎ-á<sup>n</sup>, te ní xóo canehe-dé níí ní xóo quíhu xití cuàrtú-á<sup>n</sup> dico ñá dífú níí méé-dé. Dico Xítóhó Jesucristú chi ñá túú dùca<sup>n</sup> ní quide-gá chi ì<sup>n</sup> xito-ni ní satí níí-gǎ te ní xíhí-gá. <sup>26</sup> Chi núú ní xíhí-gá nuu núú te ndéé cútñàhá ní ngáva ñuyíú duca<sup>n</sup> ngüíta-gá cada-gá ní cùu, te vitna ta ndíhi nduu cuáhá<sup>n</sup> ní quixi-gá ñuyíú-a ní xíhí-gá ì<sup>n</sup> xito-ni cuèndá cuu-gá dàtná ì<sup>n</sup> táhú sá cútú-xí Yá Ndiöxí, te duca<sup>n</sup> ní quide-gá cuèndá sá vǎ cúndècu-gá cuèchi ñáyiú núú Yá Ndiöxí. <sup>27</sup> Te nchoo cue ñáyiú ñuyíú-a chi ì<sup>n</sup> xito-ni cuú-ó te dàtnúní duca<sup>n</sup> te cada ndáá Yá Ndiöxí cuèchi-o. <sup>28</sup> Te duca<sup>n</sup> sàtnahá-xi cùu Xítóhó Jesucristú chi ì<sup>n</sup> xito-ni ní xíhí-gá cuèndá sá vǎ cúndècu-gá cuèchi ñáyiú núú Yá Ndiöxí, te duca<sup>n</sup> ní cuu ní xíhí-gá chi mee-gǎ duca<sup>n</sup> ní cachí-gá cunduu. Te quixi tucu Xítóhó Jesucristú ñuyíú-a dico ñá dífú-gǎ sá cáda-gǎ cuèndá sá vǎ cúndècu-gá cuèchi ñáyiú núú Yá Ndiöxí, chi quixi-gá nacuaca-gá nchaa ñáyiú ndètu ñaha xii-gǎ cuèndá cundecú-yu ndíhi-gá ní caa ní quíhí<sup>n</sup>.

**10** Te nchaa tnúhu ní xáha<sup>n</sup> ndíi Moisés xii ñáyiú isràél cadá-yu, nchaa tnúhu-á<sup>n</sup> ní quide-xi ní cutnúní luha iní-yu nàcuáa cada Yá Ndiöxí cada váha ñaha-gǎ xii-o vitna. Dico ñá dífú mèi nacuáa ní xáha<sup>n</sup> ndíi Moisés xii ñáyiú quide Yá Ndiöxí vitna chi dǎma quide-gá. Te nchaa tnúhu ní cáhá<sup>n</sup> ndíi Moisés ñá túú ní ndàcu-xi cada-xi nacuáa cundáá nchaa ñáyiú tùha ñaha xii Yá Ndiöxí cuèi ní xóo cahni-güedé quití ní xóo nduu táhú-gǎ núú cuíá núú cuíá. <sup>2</sup> Te núú dícó sá ní xóo cahni-güedé quití ní xóo nduu táhú Yá Ndiöxí ní quide-xi



nacuáa nduu ndoo nduu nine iní cue ñáyi, te vá cáhni-gă-güedé cue quiti-á<sup>n</sup> nduu táhú-gă ní cù, te duca<sup>n</sup> te cutnùnì iní-yu sá ñà túú-gă cuéchi-yu ndècu núú Yă Ndiöxí ní cù. <sup>3</sup>Te sá dúcá<sup>n</sup> nǐ xóo cahni-güedé quiti ní xóo nduu táhú Yă Ndiöxí núú cuiá núú cuiá, xíã<sup>n</sup> ní xóo ndacu iní cue ñáyi nchaá sá cuèhé sá dǔhá ní xóo cadá-yu. <sup>4</sup>Te duca<sup>n</sup> chi nǐnǐ ndicutu-á<sup>n</sup> ndihi nǐnǐ chivá-á<sup>n</sup> ñà túú ní xóo ndacu-xi cada-xi nacuáa vá cǔndècu cuéchi-yu núú Yă Ndiöxí.

<sup>5</sup>Te xíã<sup>n</sup> nǔu cǔtnàhá ní quexìo Xítóhó Jesucristú ñuyíu-a ní xáha<sup>n</sup>-gă xii Yă Ndiöxí:

Yòhó Tătà-í, ñà túú ndùu vétú váha iní-n sá sàhni-güedé quiti ndùu táhú-n, te ni ñà túú ndùu vétú váha tucu iní-n cuendá nchaá dava-gá sá táxi-güedé ndúú táhú-n,

núú xíã<sup>n</sup> ní quide túha-n yèqui cuñú-í cuendá yúhú cuú-í te nduu táhú ñáhá-n xii-í.

<sup>6</sup>Te ni ñà túú ndùu vétú váha iní-n cuendá quiti sàhmi-güedé ndúú táhú-n te ni ñà túú ndùu vétú váha iní-n cuendá nchaá dava-gá sá táxi-güedé ndúú táhú-n cuendá sá vǎ cǔndècu-gá cuéchi ñáyi núú-n.

<sup>7</sup>Núú xíã<sup>n</sup> yúhú ní cachí-í xii yòhó Tătà-í Dútú Ndiöxí sá yúhú véxi-í ñuyíu-a cada-í nchaá sá cuiní-n cada-í dàtná yódó tnùnì cuendá-í núú tǔtú-n.

Duha ní xáha<sup>n</sup> Xítóhó Jesucristú xii Tătá-gă Dútú Ndiöxí. <sup>8</sup>Te Xítóhó Jesucristú díhna-gá ní xii-gă Yă Ndiöxí Yaá cúú Tătá-gă: “Yòhó Tătà-í ñà túú ndùu vétú váha iní-n cuendá quiti sàhni-güedé ndúú táhú-n, ndihi cuendá quiti sàhmi-güedé ndúú táhú tucu-n cuendá sá vǎ cǔndècu-gá cuéchi ñáyi núú-n, ndihi cuendá nchaá dava-gá táhú sá táxi-güedé xii-n ñà túú ndùu vétú váha iní-n cuendá nchaá xíã<sup>n</sup>”, duha ní xáha<sup>n</sup> Xítóhó Jesucristú xii Tătá-gă Dútú

Ndiöxí. Te duca<sup>n</sup> nǐ xáha<sup>n</sup>-gă cuèi núú tǔtú ndíi Moisés yódó tnùnì sá dúcá<sup>n</sup> cada-güedé. <sup>9</sup>Te sátá dúcá<sup>n</sup> te ní xáha<sup>n</sup> tǔcu-gá xii Tătá-gă Dútú Ndiöxí: “Yòhó Tătà-í Dútú Ndiöxí, mee-í véxi-í ñuyíu-a cuendá cada-í nchaá nacuáa cuiní-n”, duha ní xáha<sup>n</sup>-gă xii Tătá-gă. Te sá dúcá<sup>n</sup> nǐ cáhá<sup>n</sup> Xítóhó Jesucristú xíã<sup>n</sup> ní cutnùnì sá ñà túú-gă xínì ñùhu-xi duca<sup>n</sup> cada-güedé cahni-güedé nchaá quiti-á<sup>n</sup>, te duca<sup>n</sup> chi mee Xítóhó Jesucristú ní xíhí-gá ní cuu-gá dàtná ñ<sup>n</sup> táhú sá cúu-xí Yă Ndiöxí, te duca<sup>n</sup> nǐ cuu chi duca<sup>n</sup> tnàhí ní cachí Yă Ndiöxí cunduu. <sup>10</sup>Te Xítóhó Jesucristú ní quide-gá nacuáa ní cuiní Yă Ndiöxí cada-gá, chi ní xíhí-gá núú cǔrúxí chi duca<sup>n</sup> nǐ cuiní méé-gă cunduu, te ñ<sup>n</sup> xito-ni ní xíhí-gá sá cuendá nchaá ñáyi, te cuendá xíã<sup>n</sup> nǔu ndècu yíñuhu-o núú-gă vitna.

<sup>11</sup>Te cue dútú ñáyi israhél chi ñ<sup>n</sup> nduu ñ<sup>n</sup> nduu ní xóo cahni-güedé quiti ní xóo nduu táhú-gă, te ñà túú ní dâma-güedé nacuáa ní xóo cada-güedé. Te nchaá sá nǐ xóo cada-güedé-á<sup>n</sup> ñà túú ní quide-xi nacuáa vá cǔndècu-gá cuéchi ñáyi núú Yă Ndiöxí. <sup>12</sup>Dico Xítóhó Jesucristú ní cachí-gá sá cúú cǔú-gá, te ní xíhí-gá núú cǔrúxí cuendá nchaá yicá cuéchi nchaá nchoo ñáyi ndècu ñuyíu-a. Te sátá dúcá<sup>n</sup> te dàtnùnì ní ngóo-gá xio cùha Dútú Ndiöxí táxi tnùnì-gă, te vá ñ<sup>n</sup> ndùu ñ<sup>n</sup> quíú-gă te cuú-gá. <sup>13</sup>Te diu-ni xíã<sup>n</sup> cundecu-gá cundetú-gá ndéé sáá nduu cànehe nchaá sá cúú ùhú iní ñáhá xii-gă sá yíñuhu núú-gă. <sup>14</sup>Te cuendá sá nǐ xíhí Xítóhó Jesucristú ñ<sup>n</sup> xito-ni xíã<sup>n</sup> ní cuu-gá dàtná ñ<sup>n</sup> táhú sá cúu-xí Yă Ndiöxí, xíã<sup>n</sup> ní quide-xi sá ncháá ñáyi cùu cuendá-gá ñà túú-gă ná cumánì-yu núú-gă ni caa ni quíhí<sup>n</sup>. <sup>15</sup>Te mee Espíritú Yă Ndiöxí càhá<sup>n</sup> ndáá-xi nacuáa ní cáhá<sup>n</sup>-gá cuendá-ó, te duha ní cáhá<sup>n</sup>-gá: <sup>16</sup>Sáá nduu te cada-í nchaá ñáyi nacuáa na càhá<sup>n</sup>-í-a,

te cada-í nàcuáa cutnùní iní-yu tnúhu sá dánèhé-í-yu tnúhu sá cánúichi ñaha xií-yu nàcuáa cada-yu cundecú-yu, te cada tucu-í sá tnff-yu nchaa tnúhu-á<sup>n</sup>. Duha ní cachí-gá. <sup>17</sup> Te ní cachí tucu-gá: Te vá íí<sup>n</sup> ndùu íí<sup>n</sup> quíú-gã ndacu iní-í sá quidé sàá iní-yu tnúhu-í, te ni vá íí<sup>n</sup> ndùu íí<sup>n</sup> quíú-gã te ndacu iní-í nchaa sá cuèhé sá dúhá quidé-yu. Duha ní cáhá<sup>n</sup> Yá Ndiöxí cächí Espíritú-gá. <sup>18</sup> Te sá dúcá<sup>n</sup> quide cahnu iní Yá Ndiöxí nchaa cuéchi-o, núu xíá<sup>n</sup> ñá túú-gã xíní ñùhu-xi cuú quití nduu táhú-gã cuendá nchaa sá cuèhé sá dúhá quide-o.

### Tàú-ó sã tnàhá tnúhu-o ndìhi Yá Ndiöxí

<sup>19</sup> Te cue dútú ní xóo cunuu núú ñáyiú isràél cue téé-á<sup>n</sup> ní xóo quíhu-güedé xití cuártú ní cuu íí víhí-gã. Dico nchoo cue ñáyiú ndècu ichi Xítohá Jesucristú vitna tàú-ó sã nì yuhu ni iní-ó tnàhá tnúhu-o ndìhi Yá Ndiöxí. Te cuu tnahá tnúhu-o ndìhi-gá chi Xítohá Jesucristú ní sati níí-gã te ní xíhí-gá núú cùrúxí. <sup>20</sup> Te cada iní-ó sã dõó sã ní xíndedí nàcuáa ní xóo quíhu-güedé xití cuártú ní cuu íí víhí-gã-á<sup>n</sup> ní xócuíí, te duca<sup>n</sup> càda iní-ó chi Xítohá Jesucristú ní xíhí-gá cuendá nchoo níhí-ó nàcuáa cada-o ngündecu váha-o sã cúú-xí-gã. <sup>21</sup> Te ñiu-gã cúú-gã Yaá cúú dütú-ó, te ñiu-gã cúú-gã Dútú cúnùu ndecu-gá núú ndécú Yá Ndiöxí. <sup>22</sup> Núu xíá<sup>n</sup> xíní ñùhu-xi sá ío tnahá tnúhu-o ndìhi Yá Ndiöxí, te vá cání íí<sup>n</sup> caní úú iní-ó, te ío váha quindáá iní-ó-gã chi ñiu-gã ní ndada ndoo ní ndada nine-gá iní-ó cuendá nchoo cùtnuní iní-ó sã ñà túú-gã cuéchi-o ndècu núú-gã. Te ní sandute-o cuendá sá dúcá<sup>n</sup> ní nduu ndoo ní nduu nine iní-ó. <sup>23</sup> Te nchoo càhá<sup>n</sup> ndáá-ó sã ndécú ndìhi-o tnúhu ndee iní sá ndúú táhú-ó cùndecu ndìhi-o Yá Ndiöxí, te xini ñuhu-xi sá vá dãná ndèé-ó cànchicú<sup>n</sup> nihnu-o

tnúhu ndee iní-á<sup>n</sup> chi Yá Ndiöxí cada-gá nàcuáa ní cachí-gá sá cúú-xí-ó. <sup>24</sup> Te xini ñuhu-xi cuhu<sup>n</sup> iní tnáhá-ó te chindee tnàha-o nacuáa duca<sup>n</sup> cùu iní tnáhá-gã-ó, te cada-o mèe-ni sá vãha. <sup>25</sup> Te nchoo vá dãná ndèé-ó nàtacá-ó núú dácuaàha-o tnúhu Yá Ndiöxí, te vá cadá-ó dàtná xíquide davá-yu ñá túú-gã cuíni-yu quixí-yu núú dácuaàha-o tnúhu-gã. Chi xini ñuhu-xi sá cuàha tnàha-o tnúhu ndee iní canchicú<sup>n</sup> nihnu-o ichi-gá, te uu<sup>n</sup>-gã duca<sup>n</sup> tàú-xi cada-o vitna ta cuyatni nduu quixi tucu Xítohá Jesucristú ñuyíú-a.

<sup>26</sup> Te cue ñáyiú sa ní tecú tnèni nàcuáa càhá<sup>n</sup> tnúhu Yá Ndiöxí te núu na ngüíta-yu ñucù<sup>n</sup> cadá-yu nándi sá cuèhé sá dúhá, te àú<sup>n</sup> nã cuu ní xíhí Xítohá Jesucristú cuendá-yu, te ni vá yõo íí<sup>n</sup>-gã cuú cuendá sá vá cùndècu-gá cuéchi-yu núú Yá Ndiöxí. <sup>27</sup> Te núu duca<sup>n</sup> na càdá-yu nándi sá cuèhé sá dúhá, te ío quiyùhú iní-yu nàcuáa cada ñaha Yá Ndiöxí xií-yu. Chi nchaa ñáyiú cùu úhú iní ñáhá xii-gã daquihí<sup>n</sup> ñáhá-gã xií-yu núú ñùhú núú càyú núú ío ndohó-yu. <sup>28</sup> Te nchaa ñáyiú ní xóo daquèe tñhú tnúhu ní cáhá<sup>n</sup> ndí Moisés, te núu ndècu úú àdi úní ñáyiú càhá<sup>n</sup> ndáá sá dúcá<sup>n</sup> ní dáquéé tñhú-yu tnúhu ní cáhá<sup>n</sup> ndí, te vá yõo nì xóo cundàhú iní ñáhá xii nchaa ñáyiú duca<sup>n</sup> ní xóo cada chi ní xóo cahni ñaha-güedé. <sup>29</sup> Te núu duca<sup>n</sup> ní ndoho cue ñáyiú duca<sup>n</sup> ní dáquéé tñhú tnúhu ní cáhá<sup>n</sup> ndí Moisés-á<sup>n</sup>, te uu<sup>n</sup>-gã ndoho cue ñáyiú dàquee tñhú ñáhá xii Xítohá Jesucristú Yaá cúú Dèhe Yá Ndiöxí ñiu-ni ñáyiú cächí sá ñà túú nàndíhi nííí-gã. Te nííí-gã-á<sup>n</sup> ní sati, te ní xíhí-gã, te duca<sup>n</sup> ní cuu cuendá cada Yá Ndiöxí íngá núú sã vãha sá cúú-xí nchòo ñáyiú ndècu ñuyíú-a dàtná ní cachí-gá cada-gá. Te ñiu-ni cuendá nííí-gã-á<sup>n</sup> ní nduu ndoo ní nduu nine iní cue ñáyiú-á<sup>n</sup> ní cùu, te ñiu-ni ñáyiú-á<sup>n</sup> càhá<sup>n</sup> úhú-yu

Espíritú Yă Ndiöxí sá chindèe chitúu ñaha xii-o. <sup>30</sup> Te nchoo sà naha-o sá Yă Ndiöxí cächí-gá ìí<sup>n</sup> xichi núú tütú-gá: “Yúhú cada-í te nacháhu ñáyiú nchaa sá quidě-yu, te duha cãhá<sup>n</sup>-í chi nachinaa-í cuendá nchaa sá quidě-yu-á<sup>n</sup>”, duha cächí-gá. Te sa ñaha tucu-o nacuaá cãhá<sup>n</sup>-xi núú tütú-gá núú cächí-xi: “Yá Ndiöxí cada ndáá-gá cuendá nchaa sá quidě ñáyiú cùu cuendá-gá”, duha cächí-xi núú tütú-gá. <sup>31</sup> Te ío ndàhú ndoho cue ñáyiú na dândoho ñaha Yá Ndiöxí, te diu-gá cùú-gă Yaá cúnùu nchaa nduu nchaa quíú!

<sup>32</sup> Te chí dándacu iní nacuáa ní quide-ndo cùtnàhá vitna cuu saa ní tecú tnùnín-dó tnúhu Yá Ndiöxí, chi dàv-á<sup>n</sup> ní quide cãhnu iní-ndó cuèi nándi sá ní yáha-ndo cuendá-gá. <sup>33</sup> Te dava-ndo ní quide úhú ñáhá ñáyiú xii-ndo núú chítú núú tàcá, te nándi tnúhu cuèhé tnúhu duha ní xáhă<sup>n</sup>-yu xii-ndo. Te dava-ndo ní cuyii-ni-ndo ní xindecu ndihi tnàha-ndo cuèi nándi ní ndoho dava-gá-ndó. <sup>34</sup> Te ní cundàhú iní-ndó cuè ñáyiú yìhi vecaá, te cuèi ní quen-deé ñáyiú sá ndécú ndihi-ndo dico ñá túú ní ndíhú iní-ndó chi ní cudíí-ni iní-ndó. Te duca<sup>n</sup> ní quide-ndo chi sa ñaha-ndo sá ndúú tãhú-ndó sã ío-gá váha, te xíă<sup>n</sup> cundecu ndihi-ndo ni caa ni quíhí<sup>n</sup>. <sup>35</sup> Te xíă<sup>n</sup> vá dãná ndèe-ndó quindáá iní-ndó nacuáa ní cachí Yă Ndiöxí cada ñaha-gă xii-ndo, chi sáá nduu te ío váha cada ñaha-gă xii-ndo. <sup>36</sup> Te nchòhó xíní ñúhu-xi ío cada ndee iní-ndó càda-ndo nchaa nacuaá cãhá<sup>n</sup> Yă Ndiöxí, te duca<sup>n</sup> te nduu tãhú-ndó sã ní cachí-gá nduu tãhú-ndó cundecu ndihi-ndo ni caa ni quíhí<sup>n</sup>. <sup>37</sup> Te Yá Ndiöxí cächí-gá núú tütú-gá:

Ta cùyatni víí-ñă nduu quixi Yaá quixi ñuyúú-a, te vá cùyaa-gá.

<sup>38</sup> Te nchaa ñáyiú cundáá núú-í ñá túú dàña ndeé-yu sàndáá iní ñáhă-yu xii-í,

te cuendá xíă<sup>n</sup> cundecu-ní-yu ichi-í, dico núu na dàñá-yu ichi-í te vá cùú váha iní-í núú-yu.

Duha cächí Yă Ndiöxí núú tütú-gá.

<sup>39</sup> Dico nchoo chi ñá túú cùu-o ñáyiú duca<sup>n</sup> xiquide dàñá-ó ichi Yá Ndiöxí, chi cùu-o ñáyiú nchicú<sup>n</sup> nihnu-ni sàndáá iní-ó-gă, te sá dúcá<sup>n</sup> te nduu tãhú-ó cundecu-o ndihi-gá ni caa ni quíhí<sup>n</sup>, te ñá túú cùu-o ñáyiú dàña nihnu ichi-gá te xíta nihnú-yu.

**Ñáyiú sàndáá iní ñáhá xii Yá Ndiöxí**

**11** Te núu sàndáá ndisa iní-ó Yă Ndiöxí te duca<sup>n</sup> cùtnuní ndáá iní-ó sã nihí-ó sã cuiní-ó núú-gă. Te núu sàndáá iní-ó-gă te duca<sup>n</sup> cùtnuní ndáá tucu iní-ó sã cãhá<sup>n</sup> ndáá-gá cuendá nchaa sá ñà túú xìní-ó. <sup>2</sup> Te duca<sup>n</sup> ní quide ñáyiú ní xindecu ndéé sanaha ío ní sàndáá iní-yu Yá Ndiöxí te xíă<sup>n</sup> núu ío váha ní cuu iní ñáhá-gă xii-yu.

<sup>3</sup> Te núu nchoo sàndáá ndisa iní-ó Yă Ndiöxí te cùtnuní ndáá iní-ó sã sã cuendá tnúhu ní cãhá<sup>n</sup>-gá ní cuáha andiu ndihi ñuyúú-a. Te cùtnuní iní-ó sã ñà dífú sã cuendá ìí<sup>n</sup> sá túu ndèhe-o ío ñuyúú-a ní cuáha andiu ndihi ñuyúú-a.

<sup>4</sup> Te ndíi Àbél ío ní sàndáá iní ndíi Yá Ndiöxí núu xíă<sup>n</sup> ío-gá ní cuu iní-gá sá ní sãñaha ndíi ní nduu tãhú-gă dàcúúxí sã ní sãñaha ndíi Cãn xii-gá ní nduu tãhú-gă. Te ndíi Àbél-á<sup>n</sup> ní cutnùní iní ndíi sá ní cudíu ndíi núú Yă Ndiöxí cuendá sá ní quehe<sup>n</sup> cuendá-gá sá ní sãñaha ndíi ní nduu tãhú-gă. Te cuèi ñá túú-gă ndíi ndècu ñuyúú-a dico yòdo tnuní sá ní sàndáá iní ndíi Yá Ndiöxí cuendá duca<sup>n</sup> càda-o canchicú<sup>n</sup> nihnu-o.

<sup>5</sup> Te té Ènóc téé ní xindecu ndéé sanaha ñà túú ní xíhí-dé chi ní nacuaca ñaha túu Yá Ndiöxí xii-dé cuendá sá ní sàndáá iní ñáhá-dě xii-gá. Te vá yòo ni nanihí ñáhá xii-dé chi mee-gă ní nacuaca ñaha-gă xii-dé. Te núú tütú Yă Ndiöxí cächí-xi sá cùtnàhá vátá nacuaà

ñaha-gá xii té Ènóc, te ní quide-dé mee-ni nàcuáa ní cuu váha iní ñáhá-gã xii-dé. <sup>6</sup>Te nchaa ñáyiú ñá túú sàndáá iní ñáhá xii Yá Ndiöxí ñá ndácũ-yu cadá-yu nàcuáa cudũ-yu núú-gã, chi nchaa ñáyiú cuíní tuha ñaha xii-gá xíní ñũhu-xi sá quindáá iní-yu sá ndécú-gã, te quindáá iní-yu sá nõu na nànducu ni-hu ñahá-yu xii-gá te cuãñaha-gã xii-yu sá ndúú tãhũ-yu.

<sup>7</sup>Te Yá Ndiöxí ní dátũha-gá ndíi Nöé nchaa nàcuáa cada-gá. Te ní quide ndíi nchaa nàcuáa ní xáha<sup>n</sup> Yá Ndiöxí cada ndíi, te ní cadũha ndíi ì<sup>n</sup> bàrcú cuendá xití bàrcú-á<sup>n</sup> quëe ndíi ndíhi nchaa ñáyiú vehe ndíi cuendá cácu nihnú-yu. Te duca<sup>n</sup> ñí quide ndíi chi ní sàndáá iní ndíi Yá Ndiöxí. Te sá dúcá<sup>n</sup> ñí sàndáá iní ndíi-á<sup>n</sup> Yá Ndiöxí xíã<sup>n</sup> ní cutnùní sá ncháá ñáyiú ío ndècu cuéchi-yu, chi ñá túú ní cãchicú<sup>n</sup> nihnú-yu cadá-yu nàcuáa ní quide ndíi. Te sá dúcá<sup>n</sup> ñí quide ndíi ní sàndáá iní ndíi Yá Ndiöxí xíã<sup>n</sup> ío ní cundáá ndíi núú-gã.

<sup>8</sup>Te Yá Ndiöxí ní xáha<sup>n</sup>-gã xii ndíi Àbrahám sá queé ndíi ñuú núú ndécú ndíi quíh<sup>n</sup> ndíi ingá xichi cundecu ndíi. Te ní quide ndíi nàcuáa ní xáha<sup>n</sup> Yá Ndiöxí chi ní quee ndíi cuáhá<sup>n</sup> ndíi núú cuãñaha Yá Ndiöxí cundecu ndíi. Te òré ní quee ndíi núú ndécú ndíi te ñá túú ní cùtnuní iní ndíi ndèé cúú nõú cuáhá<sup>n</sup> ndíi cundecu ndíi. Te duca<sup>n</sup> ñí quide ndíi chi ní sàndáá iní ndíi Yá Ndiöxí. <sup>9</sup>Te sá dúcá<sup>n</sup> ñí sàndáá iní ndíi Yá Ndiöxí nõu xíã<sup>n</sup> ní xíndecu ndíi núú ñí sãñaha-gã cundecu ndíi, te cuëi duca<sup>n</sup> dico ñá túú ní quide ñuú ndíi xíã<sup>n</sup>. Te ní xóo cundecu ndíi vehe cùtexínu vehe dóó. Te ñiú-ni duca<sup>n</sup> ñí quide ndíi Isàác ndíhi ndíi Jàcób chi tñahá cue ndíi-á<sup>n</sup> ñí cachí Yá Ndiöxí sá ndúú tãhú cue ndíi xíã<sup>n</sup> cundecu cue ndíi. <sup>10</sup>Te duca<sup>n</sup> ñí quide ndíi Àbrahám chi ní xíndetu ndíi ndéé ní sáá nduu ndùu tãhú ndíi cundecu ndíi núú ndécú Yá Ndiöxí. Te núú ndécú-gã-á<sup>n</sup>

cúú-xí ñuú ní cadũha mee-gã, te ñuú-á<sup>n</sup> cudíi-xi ní caa ñí quíh<sup>n</sup>.

<sup>11</sup>Te ndíi Sárá, sa ní xídó cuíá ndíi sá cóó dèhe ndíi chi sa ní sahnu vñhi ndíi, dico Yá Ndiöxí ní quide-gá te ní xóo ì<sup>n</sup> dèhe ndíi. Te duca<sup>n</sup> chi ní sàndáá iní ndíi Yá Ndiöxí te ní cutnùní ndáá iní ndíi sá cadá-gã nàcuáa ní xáha<sup>n</sup>-gã xii ndíi. <sup>12</sup>Te cuëi ío ní sahnu ndíi Àbrahám ndíhi ñadìhí ndíi, ndíi Sárá dico dacuitíí ní nduu tãhũ-yu ní xóo ì<sup>n</sup> dèhe-yu. Te xíã<sup>n</sup> nõu ío cuéhé ndíqu<sup>n</sup> yává ndíi Àbrahám ní cáyá dàtná cuéhé chòdíní ndèé andíu, ndíhi dàtná cuéhé ñuhu cúchí làmár, chi ní vã yóo ì<sup>n</sup> ndacu cahu ñaha xii-yu sá cuëhẽ-yu.

<sup>13</sup>Te cue ndíi-á<sup>n</sup> duca<sup>n</sup>-ni ñí sàndáá iní cue ndíi Yá Ndiöxí ndéé ní sáá nduu ñí xíhí cue ndíi. Te cue ndíi-á<sup>n</sup> ñà túú ní ndùu tãhú cue ndíi quíní cue ndíi nchaa nàcuáa ní cachí Yá Ndiöxí cada-gá, dico ní cutnùní ndáá iní cue ndíi-á<sup>n</sup> nàcuáa cada-gá núú cuáhá<sup>n</sup> núú vëxi. Te ío ní cudíí ìní cue ndíi, te ní cachí cue ndíi sá dicó-ni ichi yáha cue ndíi ñuyíú-a, chi ñá díú ñuyíú-a cundecu duca<sup>n</sup> cuè ndíi. <sup>14</sup>Te sá dúcá<sup>n</sup> ndùu tnúhu ní cáhá<sup>n</sup> cue ndíi-á<sup>n</sup>, xíã<sup>n</sup> ní cutnùní sá cuíní cue ndíi ingá xichi núú cùndècu cue ndíi. <sup>15</sup>Te ní ñà díú ñuú núú ñí quee cue ndíi ní cuíní cue ndíi núhú cue ndíi. Chi núu duca<sup>n</sup> ní sàni iní cue ndíi te núhú cue ndíi ní cùu. <sup>16</sup>Dico ñáhá chi cuíní cue ndíi quíh<sup>n</sup> cue ndíi ì<sup>n</sup> xichi núú vãha-gá cáá cùndecu cue ndíi. Te núú dúcá<sup>n</sup> ìo-gá váha càa-á<sup>n</sup> cúú-xí ñuú núú ndécú Yá Ndiöxí, te sá dúcá<sup>n</sup> ñí sani iní cue ndíi xíã<sup>n</sup> nõu ío váha cùu iní Yá Ndiöxí càchí-gá sá ñà túú cùcaha<sup>n</sup> núú-gã cúú-gã Ndiöxí cue ndíi-á<sup>n</sup>, te cùtnuní iní-ó sã ndáá sá dúcá<sup>n</sup> càhá<sup>n</sup>-gã chi ní quide túha-gã ì<sup>n</sup> xichi núú cùndècu cue ndíi-á<sup>n</sup>.

<sup>17</sup>Te ndíi Àbrahám ní xíndecu ì<sup>n</sup> ñiú-ni dèhe ndíi ndíhi ñadìhí ndíi, te cùtnahá ní xito ndéé ñáhá Yá Ndiöxí xii ndíi ní xícá<sup>n</sup>-gã dèhe ndíi, ndíi Isàác cuendá

nduu táhú ñáhá-gã xii ndíi. Te ní xáha<sup>n</sup> ndíi sá cúú ndúu táhú-gã déhe ndíi, te duca<sup>n</sup> ñí quide ndíi chi ní sándáá iní ñáhá ndíi xii-gá. Te sa ndècu túha ndíi sá cuañaha ndíi déhe ndíi xii-gá cuèi mee Yã Ndiöxí ní xáha<sup>n</sup> ndáá-gá xii ndíi <sup>18</sup> sá sã cuendá ndíi Isàac te ngúndecu cue ñaní tnáhá ndíi. <sup>19</sup> Te duca<sup>n</sup> ñí quide ndíi Àbrahám, chi ní cutnùní ndáá iní ndíi sá Yã Ndiöxí ndácú-gã dándòto-gã cuèi ñáyiu sa ní xíhí. Te sá dúcá<sup>n</sup> ñí xáha<sup>n</sup> ndíi xii Yã Ndiöxí sá cúú ndúu táhú-gã déhe ndíi, te xíá<sup>n</sup> cada iní-ó sã sã ní xíhí ndíi Isàac te ní ndoto tucu ndíi ní nucúndecu ndíi ndíhi tãtá ndíi, ndíi Àbrahám.

<sup>20</sup> Te ndíi Isàac ní xícá<sup>n</sup> táhú ndíi núú Yã Ndiöxí cuendá sá cádá vãha-gã cue déhe ndíi, ndíi Jàcób ndíhi ndíi Esàù núú cuàhá<sup>n</sup> núú vëxi. Te duca<sup>n</sup> ñí quide ndíi chi ní sándáá iní ndíi Yã Ndiöxí. <sup>21</sup> Te sa ta cùyatni-ná nduu cùú ndíi Jàcób, te ní xícá<sup>n</sup> táhú ndíi núú Yã Ndiöxí cuendá cue déhe ñaní ndíi déhe ndíi Chèè. Te yìtuu-ná ndíi tatnu ndíi ní chiñuhu ndíi Yã Ndiöxí. Te duca<sup>n</sup> ñí quide ndíi chi ní sándáá iní ñáhá ndíi xii-gá. <sup>22</sup> Te cút-nàhá sa ta cùyatni víí-nã nduu cùú ndíi Chèè, te ní cachí ndíi sá cuè ñáyiu isràél sáá nduu quèè-yu núú xíndecú-yu-á<sup>n</sup>. Te ní cáhá<sup>n</sup> tucu ndíi nàcuáa cadá-yu yiqui cùñú ndíi na sàá nduu quèè-yu núú ndécü-yu-á<sup>n</sup>. Te duca<sup>n</sup> ñí quide ndíi chi ní sándáá iní ndíi Yã Ndiöxí.

<sup>23</sup> Te cút-nàhá ní cacu ndíi Moisés te ní chiváha ñaha ñaná ndíi ndíhi tãtá ndíi úní yóó. Te duca<sup>n</sup> ñí quide cue ndíi-á<sup>n</sup> chi ní sándáá iní cue ndíi Yã Ndiöxí. Te ní quide cuendá cue ndíi-á<sup>n</sup> sã ìo vãha càa ndíi Moisés déhe cue ndíi, te ñá túú ní yùhú cue ndíi nàcuáa ní cáhá<sup>n</sup> téè cùu Faraón sá cáhni-dè cue landú. <sup>24</sup> Te sátá ñí sahnu ndíi Moisés te duu<sup>n</sup> duu<sup>n</sup> ní cachí ndíi sá vã càhá<sup>n</sup> ñáyiu sá dèhe yoco téè cùu Faraón cúú ñaná ndíi. Te duca<sup>n</sup> ñí quide ndíi chi ní sándáá iní ndíi Yã Ndiöxí. <sup>25</sup> Te duca<sup>n</sup> ñí quide tucu

ndíi chi ní tnahá-gã iní ndíi ndoho ndíi ndíhi nchaa ñáyiu cùu cuendá Yã Ndiöxí dàcúxí sã cúdíí iní ndíi cundecu tnaa ndíi ichi cuèhé ichi duha. <sup>26</sup> Chi ní sani iní ndíi sá vãha-gã ndoho ndíi cúcuèhé ñáhá cuè ñáyiu xii ndíi sá cuendá Yaa quixi ñuyúú-a dàcúxí sã cúndecu ndíhi ndíi nchaa sá ìo Ègiptú. Te duca<sup>n</sup> ñí quide ndíi chi ní xúhu<sup>n</sup> iní ndíi sá Yã Ndiöxí cuañaha-gã sá ndúú táhú ndíi. <sup>27</sup> Te ndíi Moisés ní quee ndíi nació<sup>n</sup> Ègiptú te ñá túú ní quide cuendá ndíi sá ìo cùdèé<sup>n</sup> téè cùu Faraón núú ndíi. Te duca<sup>n</sup> ñí quide ndíi chi ní sándáá iní ndíi Yã Ndiöxí. Te ní quide càhnu iní ndíi cuendá nchaa sá ñí yãha ndíi, te ní quide iní ndíi sá Yã Ndiöxí ndécú ndíhi ñaha túu-gá xii ndíi cuèi ñá túú ní xini núú ñáhá ndíi xii-gá. Te duca<sup>n</sup> ñí sani iní ndíi chi Yã Ndiöxí ndécú ndíhi ñaha-gã xii ndíi.

<sup>28</sup> Te ndíi Moisés cúú ndíi téè ní tausaha ñí quide vico pàscuá ndíhi cue ñáyiu isràél, te dàvá-á<sup>n</sup> ñí táuchíú<sup>n</sup> ndíi ní sahní-yu mbéè te níñí quiti-á<sup>n</sup> ñí dácánúú-yu yuyèhé-yu. Te duca<sup>n</sup> ñí quide ndíi chi ní sándáá iní ndíi Yã Ndiöxí. Te duca<sup>n</sup> ñí quide tucu ndíi cuendá sá espíritú sá ñí tendaha Yã Ndiöxí cahni-xi mee-ni dèhe téè déhe díhna cue ñáyiu Ègiptú, te vá cáhni-xí nì ìí<sup>n</sup> déhe cue ñáyiu isràél. <sup>29</sup> Te ndute lámár sá nání Mår Tícuèhé ní quée dava-xi ní natúu ñuhu yìchí ní níhí ñí yãha cue ñáyiu isràél. Te duca<sup>n</sup> ñí cuu chi ní sándáá iní-yu Yã Ndiöxí. Te cue téè Ègiptú tnàhá-güedé nchicú<sup>n</sup>-güedé cuáhá<sup>n</sup> dico ñá túú ní ndàcu-güedé yãha-güedé chi ní ndíhi-güedé ní cáhá.

<sup>30</sup> Te cue ñáyiu isràél ní dúcú<sup>n</sup> ndèè-yu úsá nduu ñúú Jericó te ní ngoyo nchaa sá ñúdòco. Te duca<sup>n</sup> ñí cuu chi ní sándáá iní-yu Yã Ndiöxí. <sup>31</sup> Te ìí<sup>n</sup> ñaha ní xíndecu ichi díí iní ní xínani-a<sup>n</sup> Ràháb, ñaha-á<sup>n</sup> ñà túú ní xíhí-a<sup>n</sup> dàtná ní xíhí nchaa ñáyiu ìo ní cuu sàá iní-xi núú Yã

Ndiöxí, chi ní cuu váha iní-a<sup>n</sup> núú cuè téé ní tendaha cuè ñáyiú isràél ní sángoto dayuhu ñùú-a<sup>n</sup>. Te duca<sup>n</sup> ní quide-a<sup>n</sup> chi ní sándáá iní-a<sup>n</sup> Yá Ndiöxí.

<sup>32</sup> Te núú dicó sá cúú te cáhá<sup>n</sup>-í cuendá ndí Gedèón, ndíhi cuendá ndí Bàrác, ndíhi cuendá ndí Sànsón, ndíhi cuendá ndí Jéfté, ndíhi cuendá ndí Dàvií, ndíhi cuendá ndí Sàmúél, ndíhi cuendá nchaa cue téé ní xóo cáhá<sup>n</sup> tnúhu Yá Ndiöxí ndéé sanaha, te nchaa cuendá cue téé-á<sup>n</sup> cáhá<sup>n</sup>-í te núú dicó cùyächí-í dico ñá túú cùyáchí-í. <sup>33</sup> Te nchaa cue ndí-á<sup>n</sup> ni sándáá iní cue ndí Yá Ndiöxí nñu xíá<sup>n</sup> ní xóo ndacu cue ndí ní xóo nàá cue ndí ndíhi nchaa ñáyiú dava-gá ñuú. Te nchaa ñáyiú-á<sup>n</sup> ñà túú ní xóo ndacú-yu nàá-yu ndíhi cue ndí, te ní xóo cada cue ndí nchaa nàcuáa tàú-xi cunduu, te ní quide váha ñaha Yá Ndiöxí xii cue ndí dàtná ní cachí-gá cada ñaha-gá xii cue ndí. Te cuèi nchaa cue quiti déé<sup>n</sup> ñà túú ní ndàcu-güedi ná cada ñaha-güedi xii cue ndí. <sup>34</sup> Te ní xóo ndacu cue ndí ní xóo ndahvá cue ndí ñuhú sá vǎ yóo tnàhí ndàcu ndahvá, te ní cácu cue ndí vǎ yóo ni ndàcu cahni ñaha xii cue ndí. Te cue ndí-á<sup>n</sup> ñà túú nihí ndéé cuè ndí ni cùu, dico ní níhí ndéé cuè ndí chi Yá Ndiöxí ní chindee ñaha-gá xii cue ndí, te nchaa ndí-á<sup>n</sup> ño ní níhí ndéé cuè ndí ní nàá cue ndí ndíhi nchaa ñáyiú ní cuu úhú iní ñáhá xii cue ndí, te nchaa ñáyiú duca<sup>n</sup> ní xóo nàá ndíhi cue ndí-á<sup>n</sup> ñà túú ní xóo ndacú-yu nàá ndíhi ñàhá-yu xii cue ndí chi ní xóo cunú-yu. Te duca<sup>n</sup> ní cuu chi ní sándáá iní cue ndí Yá Ndiöxí. <sup>35</sup> Te dava ñáyiú ñíhí ní nduu táhǔ-yu ní ndoto cue ñáyiú ní xíndecu ndíhí-yu ní nucúndecu ndíhi ñaha tùcú-yu.

Te dava ñáyiú ío ní dándóhó ñàha tnaha ñáyiú-yu te ní xíhí-yu, dico ñà túú ní dàñá-yu ichi váha nàcuáa cácu nihnú-yu núú tnàha ñáyiú-yu, te duca<sup>n</sup> chi ní cuiní-yu sá ndótò-yu ndéé cuèé-gá nàcuáa ngúndecu váha-yu núú ndécú Yá

Ndiöxí. <sup>36</sup> Te dava cue ndí ío ní ndoho cue ndí chi ío ní cudíquí ndéé ñáhá ñáyiú xii cue ndí, te ní canihá-yu xii cue ndí, te dava cue ndí ní dácútú ñàhá-yu, te ní chihi ñàhá-yu xii cue ndí vecaá. <sup>37</sup> Te dava cue ndí ní sahani ñàhá-yu ndíhi yúú. Te dava cue ndí ní chi-dava ndáá ñàhá-yu ní xehndé ñàhá-yu ndíhi sièrrá. Te dava cue ndí ní xito ndéé ñàhá-yu te núú ndisa sá sándáá iní cue ndí Yá Ndiöxí, te dava cue ndí ní sahani ñàhá-yu ndíhi machítí. Te mee-ni ñí mbéé ndíhi ñí chivá, ní xóo cuu dóó cue ndí. Te mee-ni ñí cue quiti-á<sup>n</sup> ní xóo cuu dóó cue ndí cuèi ndèni ní cuu ní xóo caca cuu cue ndí. Te mee-ni cuè téé ndàhú ní cuu cue ndí. Te ío ní xóo dandihú-yu iní cue ndí, te nándi sá ní xóo cada ñàhá-yu xii cue ndí ní xóo dandòho ñàhá-yu. <sup>38</sup> Te cue ndí-á<sup>n</sup> ño-gá ní xínduu váha iní cue ndí dácúxí nchaa dava-gá ñáyiú. Te nchaa cue ndí-á<sup>n</sup> ní xica cuu cue ndí cuèi nchaa núú ñà túú vǎ yóo tnàhí ndècu, te cuèi xití yucu ní xica cuu cue ndí. Te ní xóo cada vehe cue ndí nchaa yaú cava. Te ndèni ní cuu nchíí yaú ní xóo cundecu cue ndí. <sup>39</sup> Te ío ní cudúu cue ndí núú Yá Ndiöxí cuendá sá ni sándáá iní ñáhá cue ndí xii-gá. Te cuèi duca<sup>n</sup> ní quide cue ndí dico ñà túú ní xíní cue ndí nchaa sá ní cachí Yá Ndiöxí cada-gá. <sup>40</sup> Te duca<sup>n</sup> ní cuu chi ñí sá ño-gá váha ní cachí Yá Ndiöxí cada-gá. Te sá dúcá<sup>n</sup> ño-gá váha ní cachí-gá cada-gá cúú-xí cuendá nchoo ndíhi cuendá cue ndí-á<sup>n</sup> cuendá sá ñà díú mèe-ni cue ndí-á<sup>n</sup> cundáá cue ndí núú-gǎ, chi tnàhá nchoo cùndáá-ó nñú-gǎ.

### Ío cuhu<sup>n</sup> iní-ó Xítohó Jesucristú

**12** Te cue ñáyiú ní xíndecu ndéé sanaha ní quidé-yu nàcuáa ní cut-nùní sá ní sándáá iní-yu Yá Ndiöxí. Te cada iní-ó sǎ ncháá ñáyiú-á<sup>n</sup> xíndéhé ñàhá-yu xii-o vítina. Núú xíá<sup>n</sup> xíní

ñùhu-xi sá vǎ cádá-ó nì ìí<sup>n</sup> sá cuèhé sá dúhá chi diu nchaá xǎ<sup>n</sup> quidé-xí ñà túú cùndáá-ó nǔú Yǎ Ndiöxí. Te vǎ cádá cuendá-ó nchàa sá quidé tneñu iní-ó nàcuáa ndacu-o càda-o nchaá nacuáa càhá<sup>n</sup>-gá. Te ío càhnu cunduu iní-ó càncicú<sup>n</sup> nihnu-o càda-o nchaá nacuáa ní cachí-gá cada-o cùndecu-o ñuyú-a. <sup>2</sup>Te ío cuhu<sup>n</sup> iní-ó Xítohó Jesucristú, chi diu-gá ní quide ní sándáá iní-ó Yǎ Ndiöxí, te diu-ni duca<sup>n</sup> quide-gá cuèi vitna te cuèi ndéé núú cuàhá<sup>n</sup> núú vèxi diu-ni duca<sup>n</sup> càda-gá sá quíndáá iní-ó Yǎ Ndiöxí. Te Xítohó Jesucristú ío ní quide ndee iní-gá ní ndoho-gá te ní xíhí-gá núú cùrúxí, te ñá túú ní quide cuendá-gá cuèi ìí<sup>n</sup> sácá<sup>n</sup> núú cúú-xí sǎ dúcá<sup>n</sup> ní ndoho-gá. Te duca<sup>n</sup> ní quide-gá chi sa ñaha-gá sá ná yǎha sá dúcá<sup>n</sup> ndòho-gá te ío cudíí iní-gá. Te vitna nùcúo-gá xio cùha núú nùcúo Yǎ Ndiöxí te tàxi tñuní-gá.

<sup>3</sup>Te xini ñuhu-xi sá ío cada cuendá-ndó nàcuáa ní quide Xítohó Jesucristú chi Yaá-án ío ní quide càhnu iní-gá nchaá sá ní ndoho-gá ní quide ñaha nchàa ñáyiu ndècu ichi cuehé ichi duha xii-gá. Te duca<sup>n</sup> càda cuendá-ndó nàcuáa ní quide-gá cuendá sá vǎ tǔu dusa<sup>n</sup>-ndo, te ni vǎ nátǔhú iní-ndó càda-ndo nchaá nacuáa càhá<sup>n</sup>-gá. <sup>4</sup>Te nchòhó dáquèe tihú-ndó nchàa sá cuèhé sá dúhá dico vátá cáhni ñaha-gá-yu xii-ndo sǎ dúcá<sup>n</sup> quide-ndo. <sup>5</sup>Te ndacu iní-ndó nàcuáa càhá<sup>n</sup> Tǎtá-ó Dǔtú Ndiöxí dásàhú ñáhá-gǎ xii nchoo cuè ñáyiu cùu dèhe-gá. Te duha càchí-gá núú tǔtú-gá:

Nchòhó cue déhe mee-í, vǎ cáni iní-ndó sǎ àú<sup>n</sup> nǎ cuu dándoho ñaha-í xii-ndo, te ni vǎ nátǔhú iní-ndó òré càhá<sup>n</sup>-í dóho-ndo nàcuáa cada-ndo cùndecu-ndo.

<sup>6</sup>Chi mee-í dándòho-í nchaá ñáyiu cùu iní-í cuendá sá cùndáá-yu núú-í,

te quide úhú-í-yu, te diu-ní-yu cùú-yu ñáyiu càchí-í cúú dèhe-í.

Duha càchí-gá núú tǔtú-gá. <sup>7</sup>Te ío cada ndee iní-ndó sǎ dúcá<sup>n</sup> dándoho ñaha Yǎ Ndiöxí xii-ndo, chi quide-gá sá cúú-gǎ Tǎtá-ó. Te ñá túú nì ìí<sup>n</sup> téé cùu tátá te cachí-ó sǎ ñà túú sànu ichi-dé cue déhe-dé nàcuáa tàù-xi cunduu. <sup>8</sup>Te núu Yǎ Ndiöxí ñá túú dándoho ñaha-gá xii-ndo dàtná dándòho-gá cue ñáyiu càchí-gá cúú dèhe-gá, te ñá díú dèhe mee-gǎ cúú-ndó te núu duca<sup>n</sup>, chi cùu-ndo datná cue ñáyiu ñá túú cùtnuní yoo cùu tátá-xi. <sup>9</sup>Te nchoo sǎ naha-o sá cùtnàhá ní cuu landú-ó ní sanu ichi ñaha tátá-ó nàcuáa tàù-xi cunduu, te duca<sup>n</sup> ní xóo canehe-o sǎ yíñùhu núú-güedè te diu-ni duca<sup>n</sup> nèhe-o sá yíñùhu núú-güedè vitna. Te núu duca<sup>n</sup> ní sándáá iní-ó tǎtá-ó, te ío-gá xíni ñuhu-xi quíndáá iní-ó Tǎtá-ó Dǔtú Ndiöxí cuendá duca<sup>n</sup> ndùu tǎhú-ó cùndecu-o ndíhi-gá ni caa ni quíhí<sup>n</sup>, chi diu-gá cúú-gǎ Yaá ní chihi iní-ó. <sup>10</sup>Te cùtnàhá ní cuu landú-ó, ñá túú tǔtní nduu ni càniha tátá-ó ní sanu ichi ñaha-güedè xii-o nàcuáa ní cuu iní mée-güedè. Te Yǎ Ndiöxí duca<sup>n</sup> dándoho ñaha-gá xii-o sànu ichi ñaha-gá cuendá cúú-xí sǎ vǎha sá cúú-xí-ó, te duca<sup>n</sup> quide-gá cuendá nchoo càda ndáá-ó dàtná quidé mee-gá. <sup>11</sup>Te òré véxi ìí<sup>n</sup> tñúndòho sá cúú-xí-ó te ñá túú cùdíí iní-ó chi dándihú iní ñáhá-xí xii-o. Te nchaá ñáyiu ngúnu ichi sá cuendá nchaá tñúndòho-án te ngúita-yu quide ndáá-yu, te ío vǎha cùu iní-yu ndécú-yu.

### Vá dáquèe tihú-ó tñùhu Yǎ Ndiöxí

<sup>12</sup>Te núu xǎ<sup>n</sup> ío chí ndúcú ndèe-gá canchicú<sup>n</sup> nihnu-ndo ichi Xítohó Jesucristú, te vǎ dicó yica cùu iní-ndó càncicú<sup>n</sup> nihnu-ndo ichi-gá. <sup>13</sup>Te cada vǎha-ndo cùndecu-ndo ichi-gá cuendá nchaá ñáyiu sàni ìí<sup>n</sup> sani úú iní-xi níhí ndéé-yu cundecú-yu ichi-gá te vǎ ná tǔhú iní-yu canchicú<sup>n</sup> nihnú-yu.

<sup>14</sup>Te nducu-ndo nàcuáa cada-ndo cùndecu váha-ndo ndìhi cue tnahá ñáyi-ndo, te ío cada váha-ndo cùndecu-ndo nacuáa cundáá-ndó nũú Yă Ndiöxí chi núu vá dúcá<sup>n</sup> càda-ndo te vá ndúú tǎhú-ndó cùndecu-ndo ndìhi-gá. <sup>15</sup>Te ío váha cada cuendá-ndó nacuáa cada-ndo cùndecu-ndo, chi núu ñáhá te vá chíndèe ñaha-gá Yă Ndiöxí xii-ndo. Te ío váha cada cuendá tucu-ndo nacuáa cundecu-ndo vá cání cuèhé iní-ndó cuendá Yă Ndiöxí, chi núu duca<sup>n</sup> na càda-ndo te dava-gá ñáyi-ndo ndècu ndìhi-ndo ichi-gá tnahá-yu ngúíta-yu duca<sup>n</sup> càdá-yu, te vá cùndecu váha-gá-ndó ndìhí-yu ichi-gá. <sup>16</sup>Te cada cuendá tucu-ndo sǎ vá cùndecu-ndo ichi díí iní, te ni vá dáquèe tihú-ndó ni ì<sup>n</sup> sá cúú cuendá Yă Ndiöxí dàtná ní quide ndíi Esáú, chi sá cuǎñaha tǎtá ndíi-á<sup>n</sup> nduu tǎhú ndíi ni cùu ní dama ndíi ì<sup>n</sup> cóhó comidá. <sup>17</sup>Te nchòhó sa nàha-ndo sá cùtnàhá ní cuiní ndíi Esáú cáca<sup>n</sup> tǎhú tǎtá ndíi núú Yă Ndiöxí cuendá nchaa sá ndúú tǎhú ndíi ni cùu, te ñá túú ní xicá<sup>n</sup> tǎhú tǎtá ndíi núú Yă Ndiöxí nacuáa cuiní méé ndíi ni cùu. Te ní ndáhyú víhí ndíi, te cuèi duca<sup>n</sup> ní quide ndíi dico ñá túú ní ndàcu-gá ndíi nàníhí ndíi tǎhú sǎ ní dama ndíi comidá.

<sup>18</sup>Te cue ñáyi-ndo isràèl ní sátuhá-yu ì<sup>n</sup> yucu núú càyú ñuhú, te nchòhó ñá túú ndèé duca<sup>n</sup> sàhá<sup>n</sup> tuha-ndo ì<sup>n</sup> yucu núú càyú ñuhú dàtná ní quide cue ñáyi-á<sup>n</sup>. Te cùtnàhá duca<sup>n</sup> ní sátuhá-yu yucu-á<sup>n</sup> te ní cunee víhi níhí yucu-á<sup>n</sup>, te ní quene táchí níhi. <sup>19</sup>Te ní tecú dóho-yu ní cáhá<sup>n</sup> ì<sup>n</sup> cútú, te ní tecú tucu dóho-yu ní cáhá<sup>n</sup> Yă Ndiöxí ní cáhá<sup>n</sup> ndìhi ñaha-gǎ xii-yu. Te nchaa ñáyi-ndo ní tecú dóho-xi ní cáhá<sup>n</sup>-gá te ní cuiní-yu sá vá càhá<sup>n</sup>-gá. <sup>20</sup>Te duca<sup>n</sup> ní quidé-yu chi ñá túú ní cùndee iní-yu nacuáa ní cáhá<sup>n</sup>-gá, te duha ní cachí-gá: “Te cuèi ì<sup>n</sup> quiti nà yáha xití yucu-a, te cahni-ndo-di ndìhi yúú àdi ndìhi ì<sup>n</sup> yutnu puyá”, duha ní

cachí-gá. <sup>21</sup>Te sá dúcá<sup>n</sup> ní quide-xi ní xiní-yu xíá<sup>n</sup> ío ní dáyùhú ñáhá-xí xii-yu. Te tnahá té Moisés ní yùhú-dé, te ní cachí-dé: “Quidi ñaha-xi xii-í sá yùhú-í”, duha ní cachí-dé.

<sup>22</sup>Te nchòhó, ñá túú quide-ndo datná ní quide cue ñáyi-á<sup>n</sup> ní sàhá<sup>n</sup> tuhá-yu yucu-á<sup>n</sup>, dico cada iní-ndó sǎ sá ní tuha-ndo yucu Sión sá ndécú nũú ndécú Yă Ndiöxí, ndìhi ñuú-gá ñuú Jerusàlén sá cáá àndiu te diu-gá cúú-gá Yá ndécú nchaa nduu nchaa quíú. Te diu-ni xíá<sup>n</sup> xindecu cuèhé víhí cuè espíritú xínú cuèchi núú-gǎ <sup>23</sup>chíñùhu ñaha-xi xii-gá. Te nchòhó cúú-ndó cuè ñáyi-ndo cùu cuendá Yă Ndiöxí, te ní tnahá tñuhu-ndo ndìhi nchaa dava-gá ñáyi-ndo cùu cuendá-gá, ñáyi-ndo yòdo tñuní núú tütú-gá ndécú àndiu, te diu-ni ñáyi-á<sup>n</sup> cuǎñaha-gǎ xii-yu sá ndúú tǎhú-yu. Te nchòhó ní tuha-ndo Yă Ndiöxí Yá cada ndáá yícá cuèchi nchaa ñáyi-ndo. Te cada iní-ndó sǎ ní tnahá tñuhu-ndo ndìhi cue ñáyi-ndo ní quide ndáá ní xindecu ichi Yă Ndiöxí ñuyú-a. Te ñáyi-á<sup>n</sup> ñá túú tñahí-gá ná cúmǎñí-yu vitna ndécú-yu núú-gǎ. <sup>24</sup>Te ní tnahá tñuhu-ndo ndìhi Xítóhó Jesucristú Yá ní quide nacuáa cada Yá Ndiöxí ingá núú sǎ váha sá cúú-xí nchaa nchoo ñáyi-ndo ndècu ñuyú-a, chi ní sati níñí-gǎ te ní xíhí-gá núú cùrúxí. Te níñí Xítóhó Jesucristú ñá túú ì<sup>n</sup>-ni cuu-xi ndìhi níñí ndíi Àbél, chi diu cuendá níñí-gǎ-á<sup>n</sup> ní quide càhnu iní Yă Ndiöxí nchaa cuèchi-o.

<sup>25</sup>Núú xíá<sup>n</sup> ío cada cuendá-ndó vá dáquèe tihú-ndó tñuhu càhá<sup>n</sup> Yă Ndiöxí, chi nchaa ñáyi-ndo ní xindecu ndéé sanaha dùca<sup>n</sup> ní quidé-yu ní dáquèé tihú-yu tñuhu ní cáhá<sup>n</sup>-gá ñuyú-a sá cúú-xí-yu. Te ñá túú ní càcu-yu chi ní nacháhu-yu sá dúcá<sup>n</sup> ní quidé-yu. Te uu<sup>n</sup>-gá tucu nchoo chi vá càcu-o te núu duca<sup>n</sup> na dàquèe tihú-ó tñuhu càhá<sup>n</sup> Yă Ndiöxí ndéé andiu sǎ cúú-xí-ó. <sup>26</sup>Te cùtnàhá ní cáhá<sup>n</sup> Yă Ndiöxí ndéé sanaha te



ní quidi-xi ñuyíú. Te vitna càchí-gá: “Yúhú quidi tucu-í ìngá xito ñuyíú, te ñá díú mèe-ni ñuyíú duca<sup>n</sup> quèdí-í chi tnàhá andiu quèdí-í”, càchí-gá. <sup>27</sup> Te sá dúcá<sup>n</sup> cãhá<sup>n</sup>-gá sá ìngá xito tucu duca<sup>n</sup> càda-gá xíã<sup>n</sup> cùtnùní sá ncháándì túhú sá túu ndèhe-o danaa-gá. Te nchaa sá ñá túú ndèé tũu quini-ó ñuyíú-a xíã<sup>n</sup> vá quídí-xí te ni vã náá-xí. <sup>28</sup> Te núú ní cachí Yã Ndiòxí nduu táhú-ó cùndecu-o chi mee-gã táxí tnùní-gá xíã<sup>n</sup>, te ni vã quídí-xí te ni vã náá-xí. Te xíã<sup>n</sup> ío xini ñuhu-xi ndacá<sup>n</sup> táhú-ó núú-gã, te yĩñuhu yĩñuhu cunu cuechi-o núú-gã nàcuáa cuu váha iní-gá, te duca<sup>n</sup> cùhu<sup>n</sup> iní-ó sã ìo càhnu cuu-gá. <sup>29</sup> Te Tãtã-ó Dũtũ Ndiòxí cúú-gã dàtná ìi<sup>n</sup> ñuhú chi danàa-gá nchaa sá ñá túú quide nacuáa cuu váha iní-gá.

### Nàcuáa tàú-xi cada-o cuendá cuu váha iní Yã Ndiòxí

**13** Te nchaa nchòhó ñáyíu ndècu ichi Xítohó Jesucristú, vá dãñá ndèé-ndó cùu iní tnáhá-ndó nàcuáa ndècu-ndo ichi-gá. <sup>2</sup> Te cunaha-ndo sã núu ío ñáyíu ñuhu ichi ní quexió-yu vehe-ndo te cuãñaha-ndo vèhe ndetatú-yu, te cuãñaha-ndo sã cáxi-yu. Chi davá-yu ndéé espíritu xínú cuèchi núú Yã Ndiòxí ní sáhá<sup>n</sup> vehé-yu ní quehe<sup>n</sup> cuendá-yu te ñá túú ní cùtnuní iní-yu sá díú espíritu xínú cuèchi núú-gã cúú-xí.

<sup>3</sup> Te ndacu tucu iní-ndó cuè ñáyíu xixíhi vecaá, te cada iní-ndó sã tnáhá-ndó yìhi-ndo vecaá ndíhí-yu. Te ndacu tucu iní-ndó nchàa ñáyíu ío ndòho, te cada iní-ndó sã tnáhá-ndó ndòho-ndo ndíhí-yu.

<sup>4</sup> Te nchaa ñáyíu na cãchí-yu sá ìi<sup>n</sup> sá váha cùu-xi sá ìi<sup>n</sup> téé ndíhi ìi<sup>n</sup> ñadìhí ná níhí tnáhã-yu candeca tnáhã-yu. Te nchòhó cue téé vá cání iní-ndó cãhá<sup>n</sup> ndíhi-ndo ñadìhí te núu ñá díú ñadìhí-ndó cùu-yu. Te duca<sup>n</sup>-ni nchòhó

cue ñáyíu dìhí tucu vá cání iní-ndó cãhá<sup>n</sup> ndíhi-ndo téé te núu ñá díú yìi-ndo cuu-güedé, chi Yã Ndiòxí dandòho-gá nchaa ñáyíu ndècu ichi díí ìní.

<sup>5</sup> Te vá cúhú<sup>n</sup> ìní-ndó mèe-ni díhú<sup>n</sup>. Te núu nándi cùu nchaa sá ndécú ndíhi-ndo te diu-ni nchaa xíã<sup>n</sup> sa nduu vétú iní-ndó, chi Yã Ndiòxí ní cachí-gá: “Ni ìi<sup>n</sup> nduu vá dãñá nihnu ñaha-í xii-ndo, chi nchaa-ni nduu chindee ñaha-í”, duha ní cachí-gá.

<sup>6</sup> Te xíã<sup>n</sup> núu nchoo ñi yuhu ñi iní-ó cãhá<sup>n</sup>-ó ìi<sup>n</sup> ìi<sup>n</sup>-o, te cachí-ó:

Yã Ndiòxí cúú-gã Yáa chindèe ñaha xii-í, núu xíã<sup>n</sup> ñá túú yùhú-í cuèí nándi càhá<sup>n</sup> ñáyíu cada ñahá-yu xii-í.

Duha cachí-ó.

<sup>7</sup> Chí ndácú ìní cue téé ní sanu ichi ñaha xii-ndo ichi Xítohó Jesucristú cue téé ní cãhá<sup>n</sup> tnúhu Yã Ndiòxí núú-ndó, te ío váha chí nàcuãha cuendá nàcuáa ní quide nchaa cue téé-á<sup>n</sup> ñi xíndecu-güedé ndéé ní sáa nduu ñi xíhí-güedé. Te ío quindáa iní-ndó Yã Ndiòxí dàtná ní xóo cada cue téé-á<sup>n</sup>.

<sup>8</sup> Te dàtná-ni ní quide Xítohó Jesucristú ndéé sanaha diu-ni duca<sup>n</sup> quide-gá vitna, te diu-ni duca<sup>n</sup> càda-gá ndéé núú cuahá<sup>n</sup> núú vèxi. <sup>9</sup> Te vá dãñá-ndó mèe-ndo dandahú ñahá ñáyíu dacahá<sup>n</sup> ñahá xii-ndo natuha-ndo ìngá ichi, ñáyíu danehé tnàha ñáyíu-xi nándi sá ñi cutúha-yu, te nchaa xíã<sup>n</sup> ñá túú ìi<sup>n</sup>-ni cahá<sup>n</sup>-xi ndíhi tnúhu sá ndécú ndíhi-ndo. Te Yã Ndiòxí chindèe ñaha-gá xii-o nàcuáa níhí ndéé-ó cùndecu-o ichi-gá, te duca<sup>n</sup> te cuu-xi sá váha sá cúú-xí-ó, te ñá díú cuendá ìi<sup>n</sup> sá xéxi-ó níhí ndéé-ó ndècu-o ichi-gá. Te dava ñáyíu cãchí-yu sá davá núú comidá cuu caxi-o te dava ñahá nàcuáa níhí ndéé-ó cùndecu-o ichi-gá, dico ñá ndáa sá sã dúcá<sup>n</sup> vá cáxi-ó nchàa núú comidá níhí ndéé-ó cùndecu-o ichi-gá.

<sup>10</sup> Chi Xítohó Jesucristú ní xíhí-gá cuendá-ó núú cùrúxí, te nchaa ñáyíu nchìcú<sup>n</sup> nihnu-ni quide nchaa nacuáa ní

quide nchaá dútú nǐ xinu cuechi nǔú Yă Ndiôxí ndéé sanaha, ñáyiú-á<sup>n</sup> vǎ cúú tnàhá tnúhu-yu ndihi Xítohó Jesucristú Yaá ní xíhí núú cùrúxí sá dúcá<sup>n</sup> quidé-yu. <sup>11</sup> Chi dútú cùnù-gá ní xíndecu ndihi cue ñáyiú isràél, téé-á<sup>n</sup> nǐ xóo canehe-dé nǐnǐ nchaá quiti ní xóo cahni-dé ní xóo quǐhu ndéé xitǐ cuártú ní cuu í-gǎ. Te duca<sup>n</sup> nǐ xóo cada dútú-á<sup>n</sup> cuendá cada cǎhnu iní Yă Ndiôxí nchaá yícá cuèchi ñáyiú, te cuñú nchaá quiti-á<sup>n</sup> nǐ xóo cahmi-güedé ì<sup>n</sup> xio yuhu ñùú. <sup>12</sup> Te duca<sup>n</sup> nǐ yáha Xítohó Jesucristú chi ndéé ì<sup>n</sup> xio yuhu ñùú ní sahani ñaha-güedé xii-gá. Te cuendá nǐnǐ-gǎ sá nǐ sati núú cùrúxí núú nǐ xíhí-gá, ní nduu ndoo ní nduu nine iní cue ñáyiú sàndáá iní ñáhá xii-gá. <sup>13</sup> Te vitna chí ná tǔha-o Xítohó Jesucristú te cada ndee iní-ó ndòho-o datná ní ndoho-gá. <sup>14</sup> Te ñuyíú-a nǐ ì<sup>n</sup> xichi ñá túú ndéé cáá ì<sup>n</sup> ñuú cudíi nǐ caa nǐ quǐhǐ<sup>n</sup> cuendá cundecu-o, dico duca<sup>n</sup>-ni ñuhu iní-ó ì<sup>n</sup> xichi núú ndúú tǎhú-ó cùndecu-o nǐ caa nǐ quǐhǐ<sup>n</sup>.

<sup>15</sup> Te núu xǎ<sup>n</sup> xíní ñuhu-xi sá vǎ dáñá ndéé-ó chíñuhu-o Dútú Ndiôxí chi Xítohó Jesucristú ní quide-gá nàcuáa ndacu-o tnàhá tnúhu-o ndihi Yă Ndiôxí, te òré cǎhá<sup>n</sup> ndihi-o-gǎ te nuu núu ndacá<sup>n</sup> tǎhú-ó nǔú-gǎ. Te nchaá tnúhu cǎhá<sup>n</sup>-ó òré cǎhá<sup>n</sup> ndihi-o-gǎ cúú-xi dàtná ì<sup>n</sup> tǎhú sǎ cúú-xí-gǎ. <sup>16</sup> Te vǎ dáñá ndéé-ndó càda-ndo mee-ni sá vǎha cundecu-ndo, te duca<sup>n</sup> chindee tnaha-ndo ì<sup>n</sup> ì<sup>n</sup>-ndo ndihi sá ndécú ndihi-ndo. Te núu duca<sup>n</sup> na càda-ndo te cani iní-ndó sǎ cúú-xí dàtná ì<sup>n</sup> tǎhú sǎ ìo vǎha cùu iní Yă Ndiôxí.

<sup>17</sup> Te quindáá iní-ndó càda-ndo nchaá nacuáa cǎhá<sup>n</sup> cue téé yìndaha ñaha xii-ndo nacuáa ndècu-ndo ichi Xítohó Jesucristú, chi ñuú cue téé-á<sup>n</sup> quidé cuendá ñáhá-güedé xii-ndo nàcuáa cundecu vǎha-ndo nǔú-gǎ. Te sáá nduu nàcani tnúhu-güedé núú-gǎ nǔu ní quide vǎha-güedé àdi ñá túú ní quide

vǎha-güedé ní xíndecu ndihi ñaha-güedé xii-ndo. Te núu duca<sup>n</sup> na càda-ndo quindáá iní-ndó-güedé te cudíi iní-güedé cundecu ndihi ñaha-güedé xii-ndo, te vǎ ndihú iní-güedé. Te núu vǎ dúcá<sup>n</sup> càda-ndo te vǎ cúú-xí sǎ vǎha xii-ndo nchàa sá quidé-güedé sá cúú-xí-ndó.

<sup>18</sup> Te cǎhá<sup>n</sup> ndàhú-í núú-ndó sǎ cǎhá<sup>n</sup> ndihi-ndo Yă Ndiôxí cuendá-ndí. Te nchúhú cùnùnì ndáá iní-ndí sá ñà túú nǎ cùmǎnǐ-ndí núú Yă Ndiôxí, te duca<sup>n</sup> chi ndùcu-ndí nàcuáa quide-ndí cundáá-ndí núú-gǎ. <sup>19</sup> Te cǎhá<sup>n</sup> ndàhú tucu-í núú-ndó sǎ ìo cǎcá<sup>n</sup> tǎhú-ndó nǔú Yă Ndiôxí cuendá sá mée-gǎ ná cáda te ìo ndihi quixi coto ñaha tucu-í xii-ndo.

### Tnúhu ndéé núú nǐ ndihi-ná

<sup>20</sup> Te Yă Ndiôxí Yaá quidé cùu vǎha iní-ó ndècu-o, Yaá-á<sup>n</sup> nǐ dándótó-gǎ Xítohó Jesucristú. Te Xítohó Jesucristú-á<sup>n</sup> cúú-gǎ dàtná ì<sup>n</sup> toli ìo-gá quéné cǎva xito mbéé. Te duca<sup>n</sup> sǎtnahá-xi cùu-gǎ cuendá sá nǐ sati nǐnǐ-gǎ te ní xíhí-gá, te duca<sup>n</sup> nǐ cuu cuendá sá nǐ quide ndáá-gǎ ndihi Yă Ndiôxí sá cáda-gǎ ingá núú sǎ vǎha sá cúú-xí nchòo cue ñáyiú ndècu ñuyíú-a. Te nàcuáa ní quide ndáá-gǎ ndihi Yă Ndiôxí te ñuú-ni duca<sup>n</sup> càda-xi núú cuahá<sup>n</sup> núú vèxi. <sup>21</sup> Te xicá<sup>n</sup> tǎhú-í núú Yă Ndiôxí sá mée-gǎ ná chindee ñaha-gǎ xii-ndo cuendá cada-ndo mée-ni sá vǎha nàcuáa cuíní mée-gǎ, te mee-gǎ ná cáda ñaha-gǎ xii-o nchàa sá vǎha sá sání iní-gǎ. Te ñuú-ni duca<sup>n</sup> na tàuchiu<sup>n</sup>-gǎ cada Xítohó Jesucristú sá cúú-xí-ó, ñuú-xicá<sup>n</sup> tǎhú-í núú-gǎ. Te vitna nchaá-o chí ná cǎchí-ó sǎ ìo cǎhnu cuu Xítohó Jesucristú nǐ caa nǐ quǐhǐ<sup>n</sup>. Te duca<sup>n</sup> na cùnduu.

<sup>22</sup> Te cǎhá<sup>n</sup> ndàhú-í núú nchòho ñáyiú ndècu ndihi-í ichi Xítohó Jesucristú sá cáda cǎhnu iní-ndó nàcuáa nduu nchaá tnúhu cǎhá<sup>n</sup>-í dásahú ñàhà-í xii-ndo, chi ñá túú vǎi tnúhu chido tñuní-í núú tütú-a sá cúú-xí-ndó.

<sup>23</sup>Te cǎchí tnúhu-í xii-ndo sǎ tǎ Timùteú té ndècu ndíhi-o ichi Xí-tohó Jesucristú ní cácu-dé ñá túú-gǎ yíhí-dě vecaá. Te núu na quèxio ndíhi-dé núú ndécù-í te quixi-í ndíhi-dé núú ndécú-ndó quixi coto ñaha-ndí.

<sup>24</sup>Te cúñaha-ndo sǎ ïo na càda ndee iní nchaa cue té yìndaha ñaha xii-ndo nacuáa ndècu-ndo ichi Yá Ndiöxí.

Te duca<sup>n</sup> cǔñaha tùcu-ndo xii nchaa dava-gǎ ñáyiú cùu cuendá-gǎ sǎ ïo na càda ndee iní-yu. Te cue ñáyiú nàció<sup>n</sup> Itàliá ñáyiú ndècu ndíhi-o ichi-gǎ cǎchí-yu sǎ ïo cada ndee iní-ndó. <sup>25</sup>Te Yá Ndiöxí ïo na chìndee chitúu ñaha-gǎ xii-ndo nchàa-ndo. Te duca<sup>n</sup> na cùnduu. Te ïo chí cǎdá ndèe iní-nǎ vitna.

## TUTÚ NÍ CADÚHA TÉ SÀNTIAÚ

**Té Sàntiaú cádúha-dé tutú  
quhí<sup>n</sup> ndaha ñáyiú isràél  
nchíté nuu nihíí ñuyíú**

**1** Yúhú té Sàntiaú xínú cuèchi-í núú Yá Ndiòxí ndihí núú Xítohó Jesucrístú, te tõe-í tnúhu-a quide ndee iní ñáhà-í xii nchòhó ñáyiú isràél nchíté nuu nihíí ñuyíú-a.

**Yá Ndiòxí táxí-gă sá xìní tnùnì-ó**

<sup>2</sup>Te nchòhó ñáyiú ndècu ndihí-í ichi Xítohó Jesucrístú, ío cudíí iní-ndó cùndecu-ndo cuéi náí cùu sá ùhú véxi cuèndá-ndó, <sup>3</sup>chi duca<sup>n</sup> te cutnùnì iní-ndó sá sàndáá ndisa iní-ndó-gă, te cunduu cànnu iní-ndó cuéi náí ná yáha-ndo. <sup>4</sup>Te cunduu cànnu-ni iní-ndó te duca<sup>n</sup> te cuu-ndo ñáyiú váha, te cundáá-ndó núú Yá Ndiòxí, te duca<sup>n</sup> te ñá túú-gă ná cumání-ndó núú-gă.

<sup>5</sup>Te núu cùmání sá xìní tnùnì-ó, te cacă<sup>n</sup>-ó núú Yá Ndiòxí te mee-gă taxi-gă, chi ío váha iní-gă, te ñá túú cùnini iní-gă núú-ó. <sup>6</sup>Te ni yùhu ni iní-ó cacă<sup>n</sup>-ó núú-gă, te quindáá ndisa iní-ó sá táxí-gă sá cùmání quiní tnùnì-ó, te vá cání ì<sup>n</sup> caní úú iní-ó. Chi nchaá ñáyiú sàni ì<sup>n</sup> sàni úú iní-xi cùú-yu dàtná ndute làmár cuáhá<sup>n</sup>-xi duha cuáhá<sup>n</sup>-xi dàcá<sup>n</sup> nàá-xi òré quéné tächí. <sup>7</sup>Te nchaá ñáyiú duca<sup>n</sup> sàni iní-xi, te vá cání iní-yu sá nihí-yu sá xicá<sup>n</sup>-yu núú-gă. <sup>8</sup>Chi nchaá ñáyiú sàni ì<sup>n</sup> sàni úú iní-xi ñá cùtnùnì iní-yu ndèdaca sá sání iní-yu cadá-yu.

<sup>9</sup>Te nchaá ñáyiú ndàhú ñáyiú ndècu ichi-gă, xìní ñuhu-xi ñá túú-gă ná caní iní-yu, mee-nă cudíí iní-yu, chi Yá Ndiòxí chindèè ñaha-gă xíí-yu. <sup>10</sup>Te nchaá ñáyiú cuica xini ñuhu-xi cundecu váha iní-yu núú Yá Ndiòxí cuéi náí ná yáha-yu. Chi ñáyiú-á<sup>n</sup> cùú-yu dàtná itá nchaá cùhú sá ñà túú cùdíí naha. <sup>11</sup>Chi

òré ní cuu níhi cahni nchíanchii, te ní dádíí-ni-xi nchaá cùhú cuíí-ă<sup>n</sup> te ní cóyo-ni nchaá itá-xi, te ñá túú-gă cáá vii. Te duca<sup>n</sup> sàtnahá-xi cùu ñáyiú cuica chi núú chíú<sup>n</sup>-ñí-yu xihí-yu.

**Nchaá ñáyiú quide cahnu  
iní-xi nchaá sá yáha-yu**

<sup>12</sup>Te váha táhú nchaá ñáyiú quide cahnu-ni iní-xi cuéi nándi sá yáha-yu ndècú-yu ichi Yá Ndiòxí, chi òré ná ndíhí nchàa xíá<sup>n</sup> yáha-yu, te cuáñaha Yá Ndiòxí ì<sup>n</sup> coróná váha vîhi cundecu ndihí-yu, te ndáá chi duca<sup>n</sup> cãhá<sup>n</sup> Yá Ndiòxí sá táxí-gă xii nchaá nchoo ñáyiú ñùhu iní ñáhá xii-gă. <sup>13</sup>Te nchaá ñáyiú sàni iní-xi cada nándi sá cuèhé sá dúhá, te vá cání iní-yu sá Yá Ndiòxí táuchìu<sup>n</sup>-gă duca<sup>n</sup> cãdá-yu, chi Yá Ndiòxí ñá quèú te caní iní-gă cada-gă ì<sup>n</sup> sá cuèhé sá dúhá, te ni ñà túú tàuchìu<sup>n</sup>-gă sá dúcá<sup>n</sup> cãdá-yu. <sup>14</sup>Te cuíní-yu cadá-yu nchaá sá cuèhé sá dúhá chi duca<sup>n</sup> véxi iní-yu. <sup>15</sup>Te nchaá ñáyiú ío ñùhu iní nchaá sá cuèhé sá dúhá te quidè-yu, te núu na cãda-ní-yu te cuíta nihnú-yu.

<sup>16</sup>Te nchòhó ñáyiú ío cùu iní-í ndécú ndihí-í ichi Xítohó Jesucrístú, vá dãná-ndó mèe-ndo dandahú ñáhá ñáyiú xii-ndo. <sup>17</sup>Chi nchaá sá váha véxi-xi núú Yá Ndiòxí Yaa ndécú àndiu, chi diu mee-gă ní cadúha-gă andiu ndihí nchaá chódíní, ndihí yóó, ndihí nchíanchii. Te Yá Ndiòxí ñá túú ndì quehe<sup>n</sup> ndì quehe<sup>n</sup>-gă sá cání iní-gă, te ni ñà túú cùu-gă dàtná ì<sup>n</sup> cuándáhú cuáhá<sup>n</sup>-xi duha cuáhá<sup>n</sup>-xi dàcá<sup>n</sup>, chi ì<sup>n</sup>-ni sá sání iní-gă. <sup>18</sup>Te Yá Ndiòxí ní cuíní-gă sá cùú-ó dèhe-gă, te ndáá sá cùú-ó dèhe-gă chi sàndáá iní-ó tnùhu-gă. Te nchoo ñáyiú sàndáá iní-xi tnùhu-gă cùnùu-gă-ó chi ní nduu-o dèhe-gă.

**Ichi ndáá cuiti**

<sup>19</sup>Te nchòhó ñáyiú ío cùu iní-í ndécú ndihí-í ichi Xítohó Jesucrístú,

cundedóho-ndo ìí<sup>n</sup> tnúhu na càhá<sup>n</sup>-í-a. Te cuíní-í sá cùndecu túha-ndo cùndedóho-ndo tnúhu Yá Ndiòxí, te cani váha iní-ndó nàcuáa cáhá<sup>n</sup>-ndó, te cunduu càhnu iní-ndó te vá cùdèé<sup>n</sup>-ndó. <sup>20</sup> Chi núu na cùdèé<sup>n</sup>-ó te ñá túú quide váha-o núú Yá Ndiòxí. <sup>21</sup> Te dañà-ndo nchàa sá cuèhé sá dúhá iò ñuyíú-a. Te quindáá iní-ndó tnúhu Yá Ndiòxí ndécú ndìhi-ndo, te vá cùndèu sáá iní-ndó, te duca<sup>n</sup> te nanfíhí tànhú-ndó.

<sup>22</sup> Te quindáá iní-ndó tnúhu-gá te vá cuendá-ni cundedóho-ndo, chi núu na cùndedóho-ndo te vá tníí-ndó ñá, te dicó-ni dándahú-ndó mèe-ndo te vá nánihí tànhú-ndó. <sup>23</sup> Chi nchaa ñáyiú dicó-ni sàcùndedóho tnúhu-gá te ñá túú sàndáá iní-yu, ñáyiú-á<sup>n</sup> cúú-yu dàtná ìí<sup>n</sup> ñáyiú sàcùndéhé-ní núú-xi núú yùtátá. <sup>24</sup> Chi nini ndèhé-yu ní xiní-yu núú-yu, te ní xócání-yu te ní nacuanáa-ní-yu nàcuáa càa núú-yu. Te duca<sup>n</sup> sàtnahá-xi cùu ñáyiú sàcùndedóho tnúhu Yá Ndiòxí, te ñá túú tníí-yu. <sup>25</sup> Te nchaa ñáyiú dàcuaha ndisa tnúhu ní dándòo Yá Ndiòxí nihnu-ní-yu ichi-gá, chi ñá díú ìí<sup>n</sup> sá vèe cùu-xi. Te ñáyiú-á<sup>n</sup> ñá túú dicó-ni sàcùndedóho-yu chi quide ndáá-yu núú-gá, te cùdèé iní-yu xíndecú-yu.

<sup>26</sup> Te nchaa ñáyiú càchí sá ndécú ìchi ndáá te cùtèxínu-ni càhá<sup>n</sup>-yu, te xíá<sup>n</sup> dicó-ni dándahú-yu mèe-yu sá ndécú-yu ichi ndáá. <sup>27</sup> Te núu ndècu-o ichi ndáá cuítì ichi Dútú Ndiòxí, te chindee-o nchàa ñáyiú ní ndóo ndàhú, ndìhi ñáyiú quèe ndécú ndìhi tnúndòho tnúhu ndàhú, te vá càdá-ó nãndi sá cuèhé sá dúhá iò ñuyíú-a.

### **Ìí<sup>n</sup>nuu-ni cùu iní-ó nchàa tnahà ñáyiú-o**

**2** Te nchòhó ñáyiú ndècu ndìhi-í ichi Xítóhó Jesucristú Yáá cùnùu, ìí<sup>n</sup>nuu-ni càhá<sup>n</sup> ndìhi váha-ndo nchàa tnahà ñáyiú-ndo. <sup>2</sup> Te núu

núu nàtàcá-ndó chìñuhu-ndo Yá Ndiòxí ní sáá ìí<sup>n</sup> tée ío váha càa dóo níhnú-dè, te ní sáá tucu ìí<sup>n</sup> tée nihnu dóo ndàhú, <sup>3</sup> te núu tée nihnu dóo váha-ni-á<sup>n</sup> néhé-ndó sá yíñùhu núú-dè, te taxinucóo-ndo-dè ìí<sup>n</sup> núu xilé váha, te tée ndàhú-á<sup>n</sup> daxòcáo-ndo-dè ìí<sup>n</sup> xio àdi canucóo-ndo-dè núú ñhúhú, <sup>4</sup> te núu duca<sup>n</sup> na càda-ndo te ñá túú quide váha-ndo. Chi ìí<sup>n</sup>-ni-dé cúú iní-ndó, te ìí<sup>n</sup>-dé ñá túú cùu iní-ndó.

<sup>5</sup> Te nchòhó ñáyiú ío cùu iní-í ndécú ndìhi-í ichi Xítóhó Jesucristú, chí cùndedóho tucu tnúhu na càhá<sup>n</sup>-í-a. Yá Ndiòxí càhá<sup>n</sup>-gá vèi ñáyiú ndàhú cuendá tnahá tnúhu ndìhi ñàhá-yu xii-gá, te ndècu váha-gá-yu dàcúúxí ñáyiú cuica ñáyiú ñá túú sàndáá iní tnúhu-gá, chi ní cachí-gá sá ncháá ñáyiú na cùu iní ñàhá xii-gá nduu tànhú-yu cundecú-yu ndìhi-gá ní caa ní quíhí<sup>n</sup>. <sup>6</sup> Te nchòhó, ñá túú nèhe-ndo sá yíñùhu núú ñáyiú ndàhú, chi núú ñáyiú cuica-ni nèhe-ndo sá yíñùhu. ¿Te náa ñá cùtnùnì iní-ndó sá ñáyiú cuica dándòho ñaha-gá-yu xii-ndo, te càndeca ñàhá-yu sàhá<sup>n</sup> núú cuè tée cùchiu<sup>n</sup>-á<sup>n</sup>? <sup>7</sup> Te díu-ní-yu ío càhá<sup>n</sup> cuèhé-yu cuendá Xítóhó Jesucristú, te nchòhó sa ní nduu-ndo dèhe-gá.

<sup>8</sup> Te ìí<sup>n</sup> ndudú cùnùu-gá ní càhá<sup>n</sup> Yá Ndiòxí ní ngódó tnùnì núú tütú-gá càchí-xi sá cúú iní-ó tnàha ñáyiú-o dàtná cúú iní-ó mèe-o. Te núu duca<sup>n</sup> na càda-o te quide váha-o. <sup>9</sup> Dico núu ñá túú cùu iní ìí<sup>n</sup>nuu-o cuè tnahà ñáyiú-o, te cuu cuèchi xii-o chi ñá túú quide-o nàcuáa càhá<sup>n</sup> Yá Ndiòxí. <sup>10</sup> Te núu ìí<sup>n</sup> ñáyiú ndàunihnu ìí<sup>n</sup> sá càhá<sup>n</sup> Yá Ndiòxí, te dàva-ni quidè-yu ñá, te ñáyiú-á<sup>n</sup> ñá túú quidè-yu nàcuáa càhá<sup>n</sup> ndudú Yá Ndiòxí. <sup>11</sup> Te Yá Ndiòxí ní cachí-gá sá tée ndècu ñàdìhí-xi vá càhá<sup>n</sup> ndìhi-dé ìngá ñàdìhí. Te díu-ni-gá ní cachí-gá sá vá càhní-ó tnàha ñáyiú-o. Te cuèi ñá túú càhá<sup>n</sup> ndìhi-o ìngá ñàdìhí, te núu

sàhni-o tnahà ñáyiu-o te ñá túú quide-o nacuáa càhá<sup>n</sup> ndudú Yá Ndiöxí. <sup>12</sup>Te nchoo xini ñuhu-xi càhá<sup>n</sup>-ó tñuhu váha te cada ndáá-ó, chi ñá díú ì<sup>n</sup> sá vëe cùu-xi sá ñí cachí Yá Ndiöxí cada-o. Te mee-gã ní cachí-gã sá cáda ndáá-gã cuéchi-o na sáa nduu. <sup>13</sup>Te nchaa ñáyiu ñá túú cùndahú ìní tñaha ñáyiu-xi, te vá cùndàhú ìní ñáhá-gã xíi-yu na sáa nduu cáda ndáá-gã cuéchi-yu. Te nchaa ñáyiu cùndahú ìní tñaha ñáyiu-xi te Yá Ndiöxí cùndàhú ìní ñáhá-gã xíi-yu na sáa nduu-ã<sup>n</sup>.

### Quindáá ìní-ó Yá Ndiöxí te cada váha-o

<sup>14</sup>Te nchòhó ñáyiu ndècu ndihi-í ichi Xítohó Jesucristú, te núu càchí-ó sã sàndáá ìní-ó Yá Ndiöxí te ñá túú quide-o sá váha, te ñá túú ndéé nándíhi-xi, chi vá nánihí tãhú-ó te núu duca<sup>n</sup> na càda-o. <sup>15</sup>Te núu ndèhe-o ì<sup>n</sup> tnahà ñáyiu-o ñà túú dõö-yu àdi ñá túú sã cùncitò-yu, <sup>16</sup>te xãha<sup>n</sup>-o: “Núhú-n te nducu-n dõó cuihnu-n te nducu-n sã cáxi-n”, xãha<sup>n</sup>-o, te ñá túú nã sãñaha-o, te sá dúcá<sup>n</sup> quide-o te ñá túú quide váha-o. <sup>17</sup>Te núu càchí-ó sã sàndáá ìní-ó Yá Ndiöxí te ñá túú quide váha-o ndècu-o, te vèdana nándíhi-xi.

<sup>18</sup>Te ìó ñáyiu càchí-yu sá sàndáá ìní-yu Yá Ndiöxí, te ìó ñáyiu càchí-yu sá méé-ní sã váha quidé-yu. Te yúhú càchí-í sá ñúu ñá túú quide-o sá váha, te ñá túú sàndáá ìní-ó Yá Ndiöxí. Te nchoo quide-o sá váha núu xíã<sup>n</sup> cùtnùní ìní-ó sã sàndáá ìní-ó-gã. <sup>19</sup>Te ìó ñáyiu càchí sá ì<sup>n</sup>dii-ni Yá Ndiöxí ndécú, te váha-ni càhá<sup>n</sup>-yu. Te tñahá yucu ñávãha ndíhi nchaa espíritú cùndíhi-xi xiní-xi sá ndécú ì<sup>n</sup>dii-ni Yá Ndiöxí, te yúhú-xi dico ñá túú tñi-xi tñuhu-gã. <sup>20</sup>Te ìó ñi dǐquí-ó te núu na càchí-ó sã sàndáá ìní-ó Yá Ndiöxí, te vá cáda-ó sã váha. <sup>21</sup>Te ñani tñáhá-ó ndíi Àbrahám téé ní xíndecu ndéé sanaha ñí ngúndecu váha ndíi

núu Yá Ndiöxí, chi ní xito ndéé ñáhá-gã xii ndíi núu ndisa sá cáhni ndíi déhe ndíi té Isàac nduu táhú-gã ní cùu, te dàvá-á<sup>n</sup> ñí cutnùní ìní-gã sá ìo sàndáá ìní ñáhá ndíi xii-gã, núu ñá ní dàña-gã cahni ndíi déhe ndíi. <sup>22</sup>Te nàha-o sá ndíi Àbrahám ñá díú-ní sã méé-ní sã ñí sàndáá ìní ñáhá ndíi xii-gã, chi ní tñi ndíi tñuhu-gã. <sup>23</sup>Te duca<sup>n</sup> ñí quee ndáá-xi nàcuáa càhá<sup>n</sup>-xi núu tütú Yá Ndiöxí núu càchí-xi: “Ndíi Àbrahám ñí sàndáá ìní ndíi ní quide ndíi nchaa nàcuáa ní xãha<sup>n</sup> Yá Ndiöxí, te ní ngúndecu váha ndíi núu-gã, te ní cachí-gã sá cúu ndíi ì<sup>n</sup> téé ìo váha tñahá tñuhu ndihi-gã”, duha càchí-xi núu tütú-gã.

<sup>24</sup>Te xíã<sup>n</sup> cùtnùní ìní-ó sã ñà díú mèe-ni sá quindáá ìní-ó Yá Ndiöxí, chi núu na càda-o nacuáa cuu váha ìní-gã te ngúndecu váha-o núu-gã <sup>25</sup>dàtná ní quide-gã tá Ràháb ì<sup>n</sup> ñadíhí ní xíndecu ndéé sanaha, chi xíchí-ã<sup>n</sup> ñí xíndecu-xi ichi dǐí ìní, dico ní tuha-xi ichi Yá Ndiöxí te ní ngúndecu váha-xi núu-gã, chi ní chindee-xi cuè téé isràél cue téé ní xica chiù<sup>n</sup>-gã, te ní sanu ichi ñaha-xi xii-güedé ì<sup>n</sup> ichi núu vã nánihí ñáhá cuè téé cùu úhú ìní ñáhá xii-güedé. <sup>26</sup>Te nchaa ñáyiu càchí sá sàndáá ìní Yá Ndiöxí, te ñá túú quidé-yu nàcuáa càhá<sup>n</sup>-gã ñáyiu-ã<sup>n</sup> cùu-yu dàtná ì<sup>n</sup> ñáyiu ní xíhí. Chi ñá túú-gã ndíxí túu ìní-yu nchaa sá cuèhé sá dúhá quidé-yu. Duha sãtnahá-xi cùu nchaa ñáyiu ñá túú cuini tñi tñuhu càhá<sup>n</sup> Yá Ndiöxí.

### Nàcuáa quide yaa-o

**3** Te nchòhó ñáyiu ndècu ndihi-í ichi Xítohó Jesucristú, vá ncháá-ndó càni ìní-ndó cùu-ndo mestrú dacuàha-ndo ñáyiu tñuhu Yá Ndiöxí chi íí cáá-xí. Chi na quítnahá nduu nàcuáha-o cuendá núu-gã, te núu ñá túú ní quide ndáá-ó ñá, te vá cúu váha ìní-gã núu-ó. <sup>2</sup>Te nchaa-ò ìo cuèhé sã ñà túú váha quide-o. Te nchaa ñáyiu ñá túú càhá<sup>n</sup> tñuhu cuèhé

tnúhu duha cùú-yu ñáiyu ñá túú nă cùmăní chi ío ndáá quídě-yu. Te xìní-yu cotnî-yu mềe-yu, te quide váha-yu núú Yă Ndiöxí. <sup>3</sup>Te dàtná cuiní-ndó cùu ìi<sup>n</sup> quiti te núu na chihí-o frenú yuhu-dí, te cotnî-o-dí te ngúnu ichi-dí, te duca<sup>n</sup> sãtnahá-xi cùu ñáiyu sãcót-nî mee-xi, chi ñá túú cãhá<sup>n</sup>-yu tnúhu cuèhé tnúhu duha. <sup>4</sup>Te dàtná cuiní-ndó cùu barcú cuèi nãhnu vihi-xi, dico òré quéné nîhi táchí te tũndaha-xi ìi<sup>n</sup> xio, dico tée dácaca ndacu-dé dáquihí<sup>n</sup>-dé-xi ndîhi ìi<sup>n</sup> yutnu sá dánani-güedé tímú ndàa núú cãchí iní-dé quíhí<sup>n</sup>-xi. <sup>5</sup>Te duca<sup>n</sup> cùu tucu yaa-o chi ío lîhli-xi dico ío cuèhé tnúhu cãhá<sup>n</sup>-ó ndîhi-xi. Te duca<sup>n</sup>-ni sãtnahá-xi cùu tucu sá lúhá ñùhú chi sãhmi-xi ìi<sup>n</sup> yucu. <sup>6</sup>Te ðiu-ni duca<sup>n</sup> sãtnahá-xi cùu yaa-o chi ío cuèhé tnúhu cuèhé tnúhu duha cãhá<sup>n</sup>-ó ndîhi-xi, te dáciuta nihnu ñaha-xi xii-o. Te ío cuèhé cuèchi quide-o ndîhi-xi cuendá sá ñuyú-a ñùhu tnahá ñùhú tñî yucu ñávãha daticá nihnu ñaha-xi. <sup>7</sup>Te ndacu-o càda masú-ó nchàa núú quiti ío ñuyú cuèi quiti déé<sup>n</sup> quiti xica núú ñùhú, te cuèi quiti ndàva, te cuèi cóó, te cuèi quiti ñùhu xití ndute lâmár, chi duca<sup>n</sup> quide dava cue tée ñuyú-a. <sup>8</sup>Dico yàa-o chi vá yõ ìi<sup>n</sup> ndàcu cada masú ñáhá xii-xi nacuáa cãhá<sup>n</sup>-ó mềe-ni tnúhu váha ndîhi-xi, chi mee-ni tnúhu cuèhé tnúhu duha cùnuu-gá cãhá<sup>n</sup>-ó ndîhi-xi. Te cùu-xi datná ìi<sup>n</sup> venènu chi dätü-xi iní-ó. <sup>9</sup>Te ðiu-ni ndîhi yàa-o quide cahnu-o Dútú Ndiöxí Yaá cúú Tãtá-ó, te ðiu-ni ndîhi yàa-o cahá<sup>n</sup> úhú-ó cuè tnahã ñáiyu-o. Te xini ñuhu-xi vá dúcá<sup>n</sup> càda-o, chi mee-gã ní chihí-gá sá xìní tnùní-ó ndîhi iní-ó, dàtná cáá mềe-gá ñùhú iní-gá. <sup>10</sup>Te ðiu-ni yuhu-o quèe tnúhu váha cãhá<sup>n</sup>-ó, te ðiu-ni yuhu-o quèe tnúhu cuèhé tnúhu duha. Te nchòhó ñáiyu ndècu ndîhi-í ichi Xítóhó Jesucristú cunaha-ndo sã ñà túú ndùu váha-xi duca<sup>n</sup> càda-o. <sup>11</sup>Te ñá túú

xìní-ndó sã ìi<sup>n</sup> núú quèe nîhni ndute, te quèe ndute váha te quèe ndute úá-ă<sup>n</sup>. <sup>12</sup>Te nchòhó ñáiyu ndècu ndîhi-í ichi Xítóhó Jesucristú, te ñá túú xìní-ndó sã ìi<sup>n</sup> yutnu ngúxí, te cùu<sup>n</sup> aceitúná, àdi xìní-ndó sã ìi<sup>n</sup> yoho yaha stilé te cùu<sup>n</sup> ngúxí. Te duca<sup>n</sup> cuèi ìi<sup>n</sup> núú quèe nîhni ndute, vá cúú quèe ndute váha te quee ndute úhá. Te duca<sup>n</sup> sãtnahá-xi cùu yuhu-o chi vá cúú cãhá<sup>n</sup>-ó tnúhu váha te cãhá<sup>n</sup>-ó tnúhu cuèhé tnúhu duha.

### Nchaa sá vãha xìní tnùní-ó tàxi Yá Ndiöxí

<sup>13</sup>Te núu ndècu ñáiyu túha tnuú-ndó ñáiyu cùtnuní iní-xi, te xini ñuhu-xi mee-ni sá vãha cadá-yu, duca<sup>n</sup> te cut-nùní iní-ó sã tũha ndisá-yu, te vá cadá cãhnú-yu mềe-yu. <sup>14</sup>Te núu nchoo cuèdú iní-ó te cuiní-ó cùnuu-o núú tñaha ñáiyu-o, te vá cãchí-ó sã tũha-o, chi ñá túú quide ndáá-ó te núu duca<sup>n</sup> na càda-o. <sup>15</sup>Chi ñá ðíú xǎ<sup>n</sup> ní dànehé ñáhá Yă Ndiöxí, chi ñuyú iha ní cacu nihnu-xi cuendá sá yùcu ñávãha dác-ahu iní ñáhá-xí. <sup>16</sup>Te núú ndécú ñáiyu cuèdú iní ñáiyu cuiní cunuu, te yàcá<sup>n</sup> mee-ni ndáhú nàá xĩndecú-yu, te ñá túú quide váha-yu, chi mee-ni nchàa sá cuèhé sá dúhá quide-yu. <sup>17</sup>Te núu ní taxi Yá Ndiöxí sá xìní tnùní-ó, te cada váha-o, te cãhá<sup>n</sup> ndîhi váha-o nchàa tnahã ñáiyu-o, te tñii-o tnúhu váha cãhá<sup>n</sup>-yu, te cundàhú iní-ó-güè-yu te chindee-ö-yu, te vá cání ìi<sup>n</sup> caní úú iní-ó, te ío cunduu ndáá iní-ó. <sup>18</sup>Te núu cuiní-ó ñà túú nă cuu cundecu-o ñuyú-a, te cada váha-o sã cúú-xí tñaha ñáiyu-o cuendá sá ñà túú nă cuu cundecu-o ndîhi-yu. Te duca<sup>n</sup> te nguínchicú<sup>n</sup> dava-gá tñaha ñáiyu-o càda váha-yu.

### Vá cúú cundecu-o ichi Yá Ndiöxí te cada-o nãndi sá cuèhé sá dúhá

**4** ¿Te xìní-ndó nă cuendá nàá ñáiyu te xǎsahni tñáhã-yu-ă<sup>n</sup>? Te nàá-yu sá

tn̄hu cuédú ínì, chi diu-ni xíá<sup>n</sup> ñúhú ínì-yu, te ñá túú ndècu váha ínì-yu. <sup>2</sup>Chi cuínì-yu cundecu ndihí-yu ì<sup>n</sup> sá ñà túú ndècu ndihí-yu, te ñá túú nihí-yu núu xíá<sup>n</sup> xícuu cuédú ínì tnáhã-yu, te xícuehé tnáhã-yu, te càni tnahá-yu, te xisahni tnáhã-yu. Te ñá túú nihí-yu sá cuínì-yu chi ñá túú xicá<sup>n</sup>-yu núú Yá Ndiöxí. <sup>3</sup>Te cuèi xicá<sup>n</sup>-yu ì<sup>n</sup> sá cuínì-yu núú-gã te ñá túú sãnahã-gã, chi ñá túú xicá<sup>n</sup>-yu ì<sup>n</sup> sá cúú xí-yu sá váha, chi ì<sup>n</sup> sá ná ndíhi-yu núú cáda-yu nchaa sá cuèhé sá dúhá xicá<sup>n</sup>-yu, núu xíá<sup>n</sup> ñá nihí-yu. <sup>4</sup>Te nchaa ñáyiú duca<sup>n</sup> xíquide ío cùu sáá ínì-yu núú Yá Ndiöxí. Te ñaha-ndo sá ncháá ñáyiú cùdíf ínì-xi cundecu ichi cuèhé ichi duha cùu úhú ínì-yu Yá Ndiöxí, chi vá cúú cùndecu-o ichi cuehé ichi duha, te cundecu-o ìchi-gá. <sup>5</sup>Te ñá túú dió duca<sup>n</sup> càhá<sup>n</sup>-xi núú tütú Yá Ndiöxí núú càchí-xi: “Yá Ndiöxí ní taxi-gá Espiritú-gá ndécú ndíhi-o. Te Espiritú-gá-á<sup>n</sup> cuínì-xi sá méé-ní-gã cuhu<sup>n</sup> ínì-ó”, duha càchí-xi núú tütú-gá. <sup>6</sup>Te Yá Ndiöxí ío chindee ñaha-gá cuendá cada ndáá-ó nñú-gã dàtná càchí tucu-xi núú tütú-gá núú càchí-xi: “Yá Ndiöxí ñá túú cùu váha ínì-gá núú nchàa ñáyiú quide cahnu mee-xi, dico chindee-gá cue ñáyiú ndàhú ínì-xi”, duha càhá<sup>n</sup>-xi núú tütú-gá. <sup>7</sup>Te cada-ndo nàcuáa càhá<sup>n</sup> Yá Ndiöxí. Te vá cáda-ndó nàcuáa cuínì yucu ñávãha, duca<sup>n</sup> te xóo cóo ndéé ñáhã-xí xii-ndo. <sup>8</sup>Te tñii-ndo tn̄hu càhá<sup>n</sup> Yá Ndiöxí te cundecu ndíhi ñaha-gã xii-ndo. Te nchaa nchòhó ñáyiú ndècu ichi cuehé ichi duha daña-ndo ìchi-á<sup>n</sup> te cada váha-ndo. Te nchaa nchòhó ñáyiú sàni ínì cunu cuechi nñú Yá Ndiöxí te quide-ni-ndo nchaa sá cuèhé sá dúhá, te ñá túú quide váha-ndo nñú duca<sup>n</sup>, chi xini ñuhu-xi sá càcá<sup>n</sup>-ndó nñú Yá Ndiöxí sá ná ndádá ndòo ndada nine-gá ínì-ndó. <sup>9</sup>Te ndixi cuéchi ínì-ndó nchàa sá quidé-ndó ndèe ndáhyú ndisa-ndo sã ndíhú ínì-ndó, te

ñá díú dà cudíf ínì-ndó. <sup>10</sup>Te náhmá-ndó nñú Yá Ndiöxí nchaa sá ní quide-ndo, te ngúndecu váha-ndo nñú-gã.

### Vá càhá<sup>n</sup>-ó nchàa sá quidé tnàha ñáyiú-o

<sup>11</sup>Te nchòhó ñáyiú ndècu ndíhi-í ichi Xítohó Jesucristú, vá cuátn̄hu tnaha-ndo, chi nchaa ñáyiú sàtnuhu tnaha dicó-ni ndàa nuú-yu ndèhe tnahá-yu, te ñá túú càhá<sup>n</sup> váha-yu cuendá tn̄hu Yá Ndiöxí sá sánú ìchi ñaha xí-yu nàcuáa cundecú-yu, chi dàquee tñh̄-yu tn̄hu-á<sup>n</sup>. Te núu càchí-ndó sã ñà túú càhá<sup>n</sup> váha tn̄hu Yá Ndiöxí, te xíá<sup>n</sup> queé-xí sã ñà túú sàndáá ínì-ndó tn̄hu càhá<sup>n</sup>-gã, te cuínì-ndó cùnūu tn̄hu-ndo nñú tn̄hu-gã. <sup>12</sup>Te mee Yá Ndiöxí ní cachí-gá nàcuáa cada-o, te diu-ni mee-gã càhá<sup>n</sup>-gã te núu ní quide váha-o, àdi ñá túú ní quide váha-o. Te diu-ni mee-gã dàcácu nihnu ñaha-gã xii-o nñú ùhú núú ndàhú, te diu-ni-gã daquih̄<sup>n</sup> ñáhã-gã xii-o nñú ùhú núú ndàhú-á<sup>n</sup> te núu vá cáda váha-o. Te nchoo ñà túú nã cúú-ó, te núu mee-ni nchàa sá quidé tnàha ñáyiú-o cundehe-o.

### Ñá túú cùtnuní ínì-ó ñãsa túndaá-ó ìngá nduu

<sup>13</sup>Te dava nchòhó càchí-ndó sã vítná àdi tneé quíh̄<sup>n</sup>-ndó ì<sup>n</sup> ñúú, te yàcá<sup>n</sup> cundecu-ndo ì<sup>n</sup> cuía cada-ndo ì<sup>n</sup> ndáhú te níhí-ndó díhú<sup>n</sup>. <sup>14</sup>Te ni ñã xini-ndó nã cúú sã yãha-ndo vítna àdi tneé. Te nchoo cùu-o datná ì<sup>n</sup> vícò núhú, chi vícò-ã<sup>n</sup> tnàvíí ndéhé-ó te tna tnaa-gã sa ní ndón̄hú-xí. Duca<sup>n</sup> sãtnahã-xi cùu nchoo chi ì<sup>n</sup> úú nduu duha vèxi-o ñuyíú-a te ndoñuhu-o. <sup>15</sup>Te núu sàndáá ínì-ó Yá Ndiöxí te duha càhá<sup>n</sup>-ó: “Te núu Ndiöxí ná càchí-gá sá cùndècu tnaa-o ñuyíú-a te cada chi<sup>n</sup>-o”, duha cachí-ó. <sup>16</sup>Dico mee-ndo chi ío ñíí ínì-ndó cuínì-ndó cùnūu tn̄hu-ndo nñú Yá Ndiöxí, te ñá



túu ndùu váha-xi sá dúcá<sup>n</sup> quide-ndo. <sup>17</sup>Te núu xini-ó càda-o sá váha te ñá túú quide-o, te cùu-xi ì<sup>n</sup> cuéchi núú-gã.

**Tnúhu sá dátúha ñaha xii  
nchaa ñáyiu cuica ñà túú  
sàndáá iní tnúhu Yá Ndiöxi**

**5** Te nchòhò ñáyiu cuica ñáyiu cuihna iní-xi cundedóho-ndo tnúhu na càhá<sup>n</sup>-í-a. Vitna nguíta-ndo ndihú iní-ndó, te ndáhyú víhí-ndó, chi quixi ì<sup>n</sup> tnúndòho cuendá-ndó te ndoho vihi-ndo. <sup>2</sup>Te nchaa sá ndécú ndihi-ndo ndihi cuita tiu quíhí<sup>n</sup>, te quee tíquidi dóó-ndó, <sup>3</sup>te díhú<sup>n</sup>-ndó caxi cudi ñuhu. Te xía<sup>n</sup> cuita naquiní ndeé-ndó tnúndòho sá ñà túú quide váha-ndo. Te ndihi-ndo ndihi díhú<sup>n</sup>-ndó sã ní taxúha-ndo, chi vitna sa ta cùyatni sáá nduu ndihi ñuyú<sup>n</sup>-a. <sup>4</sup>Te nchaa cue téé ní quide chiú<sup>n</sup> núú chíú<sup>n</sup>-ndó ní ndatnúhu-ndo ndihi-güedé nàcuáa cháhu-ndo-güedé ní cùu, te ñá túú ní cháhu-ndo-güedé nàcuáa ní xáha<sup>n</sup>-ndo xii-güedé, núu xía<sup>n</sup> ío ndècuéchi-ndo. Te Yá Ndiöxi Yaá ndécú àndiu ní tecú dóho-gá nàcuáa càhá<sup>n</sup>-güedé sá ní dándàhú-ndó-güedé. <sup>5</sup>Te nchòhò ñáyiu cuica, sá ndécú váha-ni-ndo cùndee iní-ndó, núu quide-ni-ndo nchaa sá vèxi iní-ndó. Te cùu-ndo datná ì<sup>n</sup> quiti nùcuíhnu mee-ni xèxi-dí, te sáá nduu sàhni-güedé-dí. Te duca<sup>n</sup> sàtnahá-xi cùu nchohó chi ndècu váha-ndo vitna, te sáá ì<sup>n</sup> nduu nàcháhu-ndo nchàa sá quidé-ndó núú Yá Ndiöxi te núu vá quindáá iní-ndó-gã. <sup>6</sup>Te quide úhú iní-ndó sàhni-ndo cue ñáyiu quide ndáá núú Yá Ndiöxi, te ñá túú ñã quidé-yu.

**Cunduu càhnu iní-ó  
te cáhá<sup>n</sup> ndihi-o Yá Ndiöxi**

<sup>7</sup>Te nchòhò ñáyiu ndècu ndihi-í ichi Xítohó Jesucristú, cada ndee-ni iní-ndó cùndetu-ndo ndéé ná quixi tucu-gá ñuyú<sup>n</sup>-a, te cada-ndo dàtná quidé nchàa

ñáyiu chìhi tatá chi sàcúndetú-yu ndéé cúú<sup>n</sup> dǎú te chìhí-yu. Te cùndee-ni iní-yu sàcúndetú-yu ndéé cúú<sup>n</sup>-gã dǎú te cùu itú-yu, te ndùdí<sup>n</sup> iní-yu. <sup>8</sup>Te duca<sup>n</sup> càda nchohó tucu cada ndee iní-ndó cùndetu-ndo, chi sa ta cùyatni nduu quixi tucu Xítohó Jesucristú. <sup>9</sup>Te duha ndùu tnúhu càhá<sup>n</sup>-í núú nchòhò ñáyiu ndècu ndihi-í ichi Xítohó Jesucristú, vá ndàcá<sup>n</sup> cuéchi núú tnáhá-ndó te núu nása cùu ndecu-ndo, chi ñá cuèhé-gá nduu cùmání te quixi Crístú nacuaa ñaha-gã xii-o cùndecu-o núú Yá Ndiöxi, te mee-gã cada ndáá-gã cuéchi-o. <sup>10</sup>Te nchòhò ñáyiu ndècu ndihi-í ichi Xítohó Jesucristú, ndacu iní-ndó nàcuáa ní quide nchaa cue téé ní xóo cáhá<sup>n</sup> tnúhu Yá Ndiöxi ndéé sanaha sá ìo càhnu ní xínduu iní-güedé cuéi nándi ní ndoho-güedé. <sup>11</sup>Te cùtnuní iní-ó sã cúú-ó ñáyiu ío váha táhú-xi te núu na càda cahnu iní-ó nchàa sá ná yáha-o cuendá Yá Ndiöxi. Te nàha-ndo sá ndíi Jòb duca<sup>n</sup> ní quide ndíi, chi nándi sá ní yáha ndíi te ní quide càhnu iní ndíi. Te sáta ní yáha ní ndoho ndíi, te ío cuéhé sã ní sáñaha Yá Ndiöxi xii ndíi. Chi ío váha iní-gá te ío cùndahú iní-gá nchaa ñáyiu ío càhnu iní-xi.

<sup>12</sup>Te nchòhò ñáyiu ndècu ndihi-í ichi Xítohó Jesucristú, chí cùndèdóho tucu tnúhu na càhá<sup>n</sup>-í-a, chi ío xini ñuhu-xi. Vá cácu nèhe-ndo Yá Ndiöxi òré cuíní-ndó sã cùtnuní iní ñáyiu sá ndàá cada-ndo ì<sup>n</sup> sá càhá<sup>n</sup>-ndó. Te ní vá cácu nèhe-ndo sá càchí-yu cùu ndióxi cádúha cue téé ñuyú<sup>n</sup>-a. Te núu ì<sup>n</sup> sá xicá<sup>n</sup> tnàha ñáyiu-ndo núú-ndó te cúñaha-ni-ndo te núu cuu àdi sá vã cúú. Te vá cácu nèhe-ndo Yá Ndiöxi, duca<sup>n</sup> te vá dándòho ñaha-gã xii-ndo.

<sup>13</sup>Te núu ndòho-ndo te cáhá<sup>n</sup> ndihi-ndo Yá Ndiöxi, àdi te núu ndècu váha-ndo te cudíí iní-ndó te chiñuhu-ndo-gã, <sup>14</sup>àdi núu cùhú-ndó te cana-ndo cué téé yíndaha ñaha xii-ndo

nacuáa ndècu-ndo ichi Yá Ndiöxí cuèndá tee-güedé acití díquí-ndó, te cáca<sup>n</sup> táhú-güedě núú-gă cuèndá-ndó dàtná ní cachí méé-gă cunduu. <sup>15</sup>Te núu quindáá ndisa iní-ndó sã ndúha-ndo, te ndúha-ndo chi Yá Ndiöxí cada tátna ñaha-gă xii-ndo, àdi núu ní quide-ndo ì<sup>n</sup> sá ñà túú tàú-ndó càda-ndo núú-gă te cada càhnu iní-gă cuéchi-ndo. <sup>16</sup>Te xini ñuhu-xi cútnúhu tnàha-ndo oré ñá túú cundáá-ndó núú Yă Ndiöxí cuèndá chindee tnúhu tnàha-ndo cáhá<sup>n</sup> ndihi-ndo-gă te xocani-gă cuéhé-ndó, te cada càhnu iní-gă nchaa sá ñà túú vâha ní quide-ndo te núu cundecu vâha iní-xi núú Yă Ndiöxí na càcá<sup>n</sup>-yu ì<sup>n</sup> sá cuiní-yu núú-gă te ñihí-yu, chi sàá tnúhu-yu núú-gă. <sup>17</sup>Te té Èliás, téé ní

xindecu ndéé sanaha ñí cáa-dé dàtná cáá nchò. Te ní cáhá<sup>n</sup> ndihi-dé Yă Ndiöxí ñi yùhu ñi iní-dé ní xáha<sup>n</sup>-dē xii-gă sá vă dácù<sup>n</sup>-gă dáu, te ní tnií-gă tnúhu ní cáhá<sup>n</sup>-dē, te ñá ní dâcuu<sup>n</sup>-gă dáu ùní cuíá dava. <sup>18</sup>Te dàtnùní duca<sup>n</sup> te ní cáhá<sup>n</sup> ndihi tucu té Èliás-á<sup>n</sup> Yă Ndiöxí sá dácù<sup>n</sup>-gă dáu te ní cuu<sup>n</sup>, te ní cuu tucu nchaa sá ñi xitu-güedé.

<sup>19</sup>Te nchòhó ñáyi ndècu ndihi-í ichi Xítóhó Jesucristú, te núu dava-ndo sã ndecu-ndo ichi Yá Ndiöxí ní cùu te ní dãná-ndó, te ndècu tucu dava-ndo nadaxinu iní tnáhá-ndó núcúndecu tucu-ndo ìchi-gă, <sup>20</sup>te núu duca<sup>n</sup> na càda-ndo te dâcácu nihnu tnàha-ndo núú ùhú núú ndàhú, te mee Yă Ndiöxí cada càhnu iní ñáhá-gă xii-ndo cuéi ío cuéhé cuéchi ní quide-ndo.

## TUTÚ DÍHNA NUU NĪ CADÚHA TÉ PÈLÚ

**Té Pèlú cádúha-dé tutú sá cúú-xí cue  
ñáyiú sàndáá iní ñáhá xii Yá Ndiöxí**

**1** Yúhú té Pèlú ní tendaha ñaha Xí-tohó Jesucristú xíca cùu-í càhá<sup>n</sup>-í tnúhu-gá, te cádúha-í tutú-a sá cúú-xí nchòhó ñáyiú xínchíté nuu ndècu distritú Pòntó, ndihi distritú Gàlaciá, ndihi distritú Capadociá, ndihi distritú Àsiá, ndihi distritú Bitiniá. <sup>2</sup> Chi Dútú Ndiöxí ní cachí-gá sá cúú-ndó dèhe-gá ndéé cút-nàhá vátá ngáva-gá ñuyíú, te Espiritú-gá ní quide-xi ndècu yíñuhu-ndo núú-gá vitna. Te ní cachí-gá sá cúú-ndó dèhe-gá cuendá tñi-ndo nchàa tnúhu càhá<sup>n</sup> Xí-tohó Jesucristú, ndihi cuendá nduu ndoo nduu nine iní-ndó, chi diu cuendá-á<sup>n</sup> nĩ xíhí Xítohó Jesucristú. Te xicá<sup>n</sup> táhù-í núú Yá Ndiöxí sá ïo na chindee chitúu ñaha-gá xii-ndo cuèi vitna te cuèi núú cuàhá<sup>n</sup> núú vèxi, te diu-ni-gá ná cádá te ïo váha cuu iní-ndó cùndecu-ndo.

**Tnúhu ndee iní sá ndécú ndihi ñáyiú  
sàndáá iní ñáhá xii Yá Ndiöxí**

<sup>3</sup> Te vitna chí ná cächí-ó sã ïo cãhnu cuu Yá Ndiöxí Yáa cúú Tãtã Xítohó Jesucristú, chi diu-gá ïo ní cundàhú iní ñáhá-gã xii-o núu xíã<sup>n</sup> ní quide-gá sá nchóó nĩ nduu-o dàtná ïi<sup>n</sup> ñáyiú saa vitna. Te duca<sup>n</sup> nĩ quide ñaha-gã xii-o cuendá sá Xítohó Jesucristú ní xíhí-gá te ní ndoto-gá. Te cuendá sá nĩ nduu-o dàtná ïi<sup>n</sup> ñáyiú saa, xíã<sup>n</sup> ní ngúndecu ndihi-o tnúhu ndee iní <sup>4</sup> sá cùndècu ndihi-o-gá ni caa ni quíhí<sup>n</sup>, chi duca<sup>n</sup> nĩ cachí-gá cunduu. Te yàcá<sup>n</sup> vá quini-gá-ó nĩ ïi<sup>n</sup> sá cuèhé sá dúhá, te ïo cudíí iní-ó cùndecu-o ndihi-gá ni caa ni quíhí<sup>n</sup>. <sup>5</sup> Te sá sàndáá iní-ó Yá Ndiöxí, núu xíã<sup>n</sup> coto ñaha-gã xii-o ndèé ná sãá nduu nàquehe<sup>n</sup> cuendá ñáhá-gã chi ïo cãhnu cuu-gá.

<sup>6</sup> Te xíã<sup>n</sup> ïo cùdíí iní-ndó ndècu-ndo, te cuèi nãndi ndòho-ndo ndecu-ndo dico sacú-ni nduu duca<sup>n</sup> ndòho-ndo. <sup>7</sup> Te òrè ná cádá cãhnu iní-ndó yãha-ndo nchàa sá ná càda ñaha ñáyiú xii-ndo, te duca<sup>n</sup> te cutnùní sàndáá ndisa iní-ndó Yá Ndiöxí, te sá dúcá<sup>n</sup> sàndáá iní-ndó Yá Ndiöxí ïo-gá váha dàcúúxí díhú<sup>n</sup> cuàá<sup>n</sup> chi xíã<sup>n</sup> ñã túú cùdíí-xi. Te cuèi duca<sup>n</sup> dico xito ndeé nãhí-ní-güedè núu ndisa cùu-xi díhú<sup>n</sup> cuàá<sup>n</sup>. Te duca<sup>n</sup> sãtnahá-xi cùu nchohó cuendá nchaa sá ndóhó-ndó, te na sãá nduu quixi tucu Xítohó Jesucristú te cúnaha-gã xii-ndo: “Ïo váha ní quide-ndo, te vitna ïo cãhnu cuu-ndo, te tàú-ndó nùcùndecu váha-ndo”, duha cúnaha-gã xii-ndo.

<sup>8</sup> Te vitna ïo cùu iní-ndó Xítohó Jesucristú cuèi vátá quini-gá-ndó-gã, te duca<sup>n</sup> ïo sàndáá iní-ndó-gã, te ïo cùdíí iní-ndó te súúni nĩ ñã cùtnùní iní-ndó nãsa cunduu tnúhu cáhá<sup>n</sup>-ndó sã dúcá<sup>n</sup> ïo cùdíí iní-ndó <sup>9</sup> cuendá sá nĩ naníhí tàhú-ndó, chi ní sàndáá iní-ndó-gã.

<sup>10</sup> Te cue téé ní xóo cáhá<sup>n</sup> tnúhu Yá Ndiöxí ndéé sanaha nĩ cachí-güedé nàcuáa cada-gá cundàhú iní ñáhá-gã xii-o vitna. Te cue téé-á<sup>n</sup> ïo váha ní dàcuáhá-güedé nàcuáa cada Yá Ndiöxí dàcácu nihnu ñaha-gã xii-o vitna. <sup>11</sup> Te Espiritú Xítohó Jesucristú ní ngúndecu ndihi cue téé-á<sup>n</sup> nĩ xáha<sup>n</sup>-xi xii-güedé nàcuáa ndoho-gá, te ní xáha<sup>n</sup> tùcu-xi xii-güedé sá sãtá ná yãha ndoho-gá te ïo cunuu-gã ndihi Yá Ndiöxí. Te ïo ní sani iní-güedé núu ná nduu sãá duca<sup>n</sup> càda-xi, ndihi nchaa nãndi-gá cúú sã cádá-xí. <sup>12</sup> Te Yá Ndiöxí ní xáha<sup>n</sup>-gã xii-güedé sá nchãá tnúhu váha cãhá<sup>n</sup>-güedé vá cúú-xí cuendá méé-güedé, chi cuendá nchoo cuè ñáyiú ndècu ñuyíú-a vitna cùu-xi. Te diu-ni tnúhu-á<sup>n</sup> cúú tnúhu cãhá<sup>n</sup> nchúhú cue téé cãhá<sup>n</sup> tnúhu Yá Ndiöxí núú-ndó. Te Espiritú sá nĩ taxi Yá Ndiöxí ndécú ndihi-o chindee ñaha-xi xii-ndí cãhá<sup>n</sup>-ndí tnúhu-gá. Te cue espíritú xínú

cuèchi núú Yă Ndiöxí ío cuíní-xi quini ndáá-xi nchaa nàcuáa cuáhá<sup>n</sup> tnúhu-á<sup>n</sup>.

**Yá Ndiöxí càchí-gá  
sá cádá-ó mèe-ni sá vâha**

<sup>13</sup> Te sá dúcá<sup>n</sup> ío váha ní quide ñaha Yă Ndiöxí xii-ndo xíá<sup>n</sup> xíní ñùhu-xi ío váha cuáha-ndo cuendá nàcuáa cundecu-ndo te vá cání iní-ndó cada-ndo ni ì<sup>n</sup> sá cuèhé sá dúhá, te ío quindáá iní-ndó sá Yă Ndiöxí cada váha ñaha-gá nduu na quixi tucu Xítohó Jesucristú. <sup>14</sup> Te ío tni-ndo nchaa tnúhu càhá<sup>n</sup> Yă Ndiöxí, te vá cúhú<sup>n</sup>-gá iní-ndó nãndi sá cuèhé sá dúhá sã ní xúhu<sup>n</sup> iní-ndó cútñahá vátá cundècu-gá-ndó ìchi-gá te ni vá cádá-ndó. <sup>15</sup> Te cada-ndo mèe-ni sá vâha cundecu-ndo dàtná quidé mèe Yá Ndiöxí Yaá ní cáhá<sup>n</sup> ñáhá xii-o cundecu-o ndihi-gá. <sup>16</sup> Te càchí-gá núú tütú-gá: “Cada-ndo mèe-ni sá vâha cundecu-ndo, chi duca<sup>n</sup> quide yúhú”, duha càchí-gá núú tütú-gá.

<sup>17</sup> Te Yá Ndiöxí cada ndáá-gá cuèchi nchaa ñáyi, te vá cádá cuendá-gá cuèi náí ñáyi cùú-yu, te nchòhó càchí-ndó sã díú Tátá-ndó cùu-gá te ndáá, núu xíá<sup>n</sup> xíní ñùhu-xi canehe-ndo sá yñùhu núú-gá ndi nchaa nduu cundecu-ndo ñuyíú-a. <sup>18</sup> Te diu-gá ní dácäcu nihnu ñaha-gá xii-ndo ì<sup>n</sup> ichi sá ñà tütú nãndíhi ní sanu ichi ñaha cuè ñaní tnáhá-ndó ní xíndecu ndéé sanaha ni cùu, te nchòhó sa ñaha-ndo sá sã dúcá<sup>n</sup> ní quide ñaha Yá Ndiöxí ní dácäcu nihnu ñaha-gá xii-ndo ìchi-á<sup>n</sup> ñà tütú ní chãhu-gá ni ì<sup>n</sup> díhú<sup>n</sup> cuáá<sup>n</sup>, te ni ì<sup>n</sup> díhú<sup>n</sup> cuixí<sup>n</sup> sá ndíhí nihnu ñuyíú-a cuendá-ndó. <sup>19</sup> Chi Xítohó Jesucristú ní quixi-gá ní sati nñí-gá, te ní xíhí-gá núú cùrúxí cuendá sá nchóó nãníhí tãhú-ó, te cùu-gá dàtná ì<sup>n</sup> mbéé quiti ío váha iní-xi, quiti cãndoo canine. <sup>20</sup> Te duca<sup>n</sup> ní ndoho Xítohó Jesucristú, chi duca<sup>n</sup> tnàhí ndéé tñuní ndoho-gá ndéé cútñahá vátá ngãva-gá ñuyíú. Te duca<sup>n</sup> ní yáha-gá cút-

ñahá ní quixi-gá òré vitna cùmání sáá nduu nàa ñuyíú-a cuendá nchoo cùu-xi sá vâha xii-o vitna. <sup>21</sup> Te nchòhó sa nihí-ndó tnúhu nàcuáa ní yáha Xítohó Jesucristú cútñahá ní quixi-gá ñuyíú-a, núu xíá<sup>n</sup> sãndáá iní-ndó Yă Ndiöxí. Te Yá Ndiöxí ní dándótó-gá Xítohó Jesucristú, te sátá ní dándótó ñaha-gá te ní cachí-gá sá ío cãhnu cuu Xítohó Jesucristú. Te sá dúcá<sup>n</sup> ní cuu, xíá<sup>n</sup> ío sãndáá iní-ndó Yă Ndiöxí, te ní taxi-gá tnúhu ndee ìní ndécú ndihi-ndo sá sáá nduu cundecu-ndo ndihi-gá ni caa ni quíhí<sup>n</sup>.

<sup>22</sup> Te Espiritú Yă Ndiöxí ní quide-xi te ní sãndáá iní-ndó tnúhu-gá, te xíá<sup>n</sup> ní nduu ndoo ní nduu nine iní-ndó, te cùu iní tnáhá ndisa-ndo nacúáa ndècu-ndo ichi Yá Ndiöxí, te xini ñuhu ndisa-xi sá ío ni yùhu ni iní-ndó cùu iní tnáhá-ndó ì<sup>n</sup> ì<sup>n</sup>-ndo. <sup>23</sup> Te nchòhó ní nduu-ndo dàtná ì<sup>n</sup> ñáyi sa sá cuendá tnúhu Yá Ndiöxí, te tnúhu-á<sup>n</sup> candeca-xi iní-ndó nì caa ni quíhí<sup>n</sup>, te vá í<sup>n</sup> ndùu ndihi nihnu-xi, te ñá díú cuendá ñáyi ñuyíú-a ni ndùu-ndo ì<sup>n</sup> ñáyi sa chi cuendá tnúhu-gá. <sup>24</sup> Chi núú tütú Yă Ndiöxí càchí-xi:

Nchaa ñáyi ndècu ñuyíú-a cùú-yu dàtná cúhú, chi cúhú-á<sup>n</sup> tnaa-ni cùdí-xi te xihí-xi, duca<sup>n</sup> sãtnahá-xi cùú-yu.

Te nchaa sá ndécú ndihí-yu cùu-xi datná ì<sup>n</sup> itá cúhú-á<sup>n</sup>, chi itá-á<sup>n</sup> tnaa-ni tucu cùdí-xi te ndàhvá-xi, duca<sup>n</sup> sãtnahá-xi cùu nchaa sá ndécú ndihí-yu.

<sup>25</sup> Dico tnúhu Yá Ndiöxí chi vá náá tnàhí-xi, chi duha-ni ndècu-xi, te diu-ni duha cundecu-xi ni caa ni quíhí<sup>n</sup>.

Duha càchí-xi núú tütú-gá. Te diu tnúhu-á<sup>n</sup> ní dánèhé ñáhá nchùhú cue tée càhá<sup>n</sup> tnúhu Yá Ndiöxí xii-ndo.

**2** Te xíá<sup>n</sup> xíní ñùhu-xi dañá-ndo nchaa núú sã cuèhé sá dúhá, te dañá-ndo ìchi tnúhu ndehnde, te

daña-ndo vǎ dándàhú-gá-ndó mèe-ndo sá quidé vǎha-ndo, te daña-ndo ìchi cuedú ínì, te daña-ndo nchàa tnúhu yiti. <sup>2</sup>Te cada-ndo cuendá sá cúu-ndó dàtná cue landú yíquí<sup>n</sup> vitna sadi camá, chi landú-á<sup>n</sup> mee-ni sàdi-güexi te sàhnu-güexi. Te cada ínì-ndó sǎ dúcá<sup>n</sup> càda-ndo chi xini ñuhu-xi sá ïo cuhu<sup>n</sup> ínì-ndó dàcuaha-ndo tnúhu Yá Ndiöxí, chi xíǎ<sup>n</sup> cúu-xí mée-ni tnúhu váha, te duca<sup>n</sup> te cuíta cuehnu nihnu-ndo ìchi-gá quíhí<sup>n</sup> ndéé ná sàá nduu cùndecu-ndo núu ndécú-gǎ. <sup>3</sup>Te duca<sup>n</sup> xini ñuhu-xi cada-ndo, chi nchòhó sa ní cutnùní ndisa ínì-ndó sǎ Yá Ndiöxí ío váha ínì-gá.

### Xítohó Jesucristú cúu-gǎ dàtná ìí<sup>n</sup> yúú

<sup>4</sup>Te ío nanducu nihnu-ni-ndo Xítohó Jesucristú Yaá quidé nàcuáa naníhí tàhú-ó. Te diu-gá ní cuu-gá dàtná ìí<sup>n</sup> yúú sǎ ñà túú nàndìhi sá cúu-xí ñáyiu ñuyíú-a, chi ní dáquéeé tìhú ñáhǎ-yu xii-gá. Dico Yá Ndiöxí ní cachí-gá sá Xítohó Jesucristú cúu-gǎ dàtná ìí<sup>n</sup> yúú sǎ ïo-gá váha, chi ío cùnuu-gá. <sup>5</sup>Te nchòhó sa ní naníhí tàhú-ndó, te ío-gá chí nándùcu nihnu Yá Ndiöxí cuendá cuu ìí<sup>n</sup>nuu-ndo cùndecu-ndo ndìhi Espiritú-gá. Te núu duca<sup>n</sup> na càda-ndo te cuu-ndo dàtná yúú váha dàcaa-güedé dava vehe, te cuu tucu-ndo dàtná cue dútú ní xinu cuechi nǔú Yá Ndiöxí ndéé sanaha, nàcuáa ñá túú nǎ cumánì-ndó nǔú-gǎ, chi nchaa cue tée-á<sup>n</sup> ní xóo cuáha ñaha-güedé sá ní xóo nduu táhú-gǎ. Te nchòhó vitna tàù-ndó càda-ndo nchaa nacuéa càhá<sup>n</sup>-gá, te nduu vétú ínì-gá. Te duca<sup>n</sup> càda-ndo chi ndècu-ndo ndìhi Xítohó Jesucristú. <sup>6</sup>Te Yá Ndiöxí càchí-gá núu tùtú-gá: Yúhú taxi ndecu-í ìí<sup>n</sup> Yaá ñuu Sión, te cuu-gá dàtná ìí<sup>n</sup> yúú váha sá sánútní-güedé xíquí cimientú ìí<sup>n</sup> vehe, chi yúhú ní cachí-í sá Yáá-á<sup>n</sup> ïo cunuu-gǎ.

Te nchaa ñáyiu quèndáá ínì ñáhǎ xii-gá vá ìí<sup>n</sup> ndùu ndixi cuèchi ínì-yu sá dúcá<sup>n</sup> sàndáá ínì ñáhǎ-yu xii-gá.

Duha càchí-gá núu tùtú-gá. <sup>7</sup>Te nchòhó ñáyiu sàndáá ínì ñáhǎ xii Xítohó Jesucristú ío cùu ínì-ndó-gǎ, te nchaa ñáyiu ñá túú sàndáá ínì ñáhǎ xii-gá quídè-yu dàtná càhá<sup>n</sup>-xi núu tùtú Yá Ndiöxí núu càchí-xi:

Yúú sǎ ní dáquéeé tìhú cue tée dà-caa vehe, xíǎ<sup>n</sup> cúu-xí yúú sǎ ïo-gá nándìhi vitna.

Duha càchí-xi núu tùtú-gá. Te yúú-á<sup>n</sup> cada ínì-ó sǎ cúu-xí Xítohó Jesucristú, chi ní dáquéeé tìhú ñáhǎ-güedé xii-gá.

<sup>8</sup>Te càchí tucu-xi ingá xichi núu tùtú Yá Ndiöxí:

Yúú-á<sup>n</sup> nguñenu ñáyiu te ndúá-yu.

Duha càchí-xi núu tùtú-gá. Te tnúhu-á<sup>n</sup> quée-xí sǎ ïo quide sáá ínì ñáyiu núu-gǎ, chi ñá túú cuiní-yu tñí-yu tnúhu càhá<sup>n</sup>-gá, te duca<sup>n</sup> tnàhí ndèé tñuní sá nchǎá ñáyiu ñá túú cuiní tñí tnúhu càhá<sup>n</sup>-gá, te ío cùu sáá ínì-yu núu-gǎ.

### Ñáyiu ndècu ndìhi Yá Ndiöxí

<sup>9</sup>Te nchoo cùu-o ñáyiu sa ní dáquéeé dìí<sup>n</sup> ñaha Yá Ndiöxí xii-o cuendá cundecu-o ndìhi-gá, te cùu-o dútú xínú cuèchi-o núu-gǎ, te mee-gǎ cúu-gǎ Yaá ío cùnuu, te cùu-o ñáyiu quide ndáá xíndecu ìchi-gá te cùu tucu-o ñáyiu yìndaha-gá. Te duca<sup>n</sup> ní quide ñaha-gǎ xii-o cuendá sá cǔñaha-o xii nchaa ñáyiu sá ïo càhnu cuu-gá, te ío vǎi núu sǎ váha quide-gá, te diu-gá ní quide ní dáñá-ó nchàa ìchi cuehé ìchi duha ndècu-o ní cuu, te ní sanu ìchi ñaha-gǎ xii-o ìí<sup>n</sup> ìchi váha, te vitna cùnùnì ínì-ó sǎ ïo càhnu cuu-gá. <sup>10</sup>Te nchoo cùu-o ñáyiu ñá túú ndècu ndìhi Yá Ndiöxí ní cùu, dico vitna ní ngúndecu ndìhi-o-gǎ, te dàvá-á<sup>n</sup> vǎtǎ sàá-gá nduu càda váha ñaha-gǎ xii-o, dico vitna sa ní sáá nduu quide váha ñaha-gǎ xii-o, chi ío cùndahú ínì ñáhǎ-gǎ.

### Cada váha-o cùndecu-o cunu cuechi-o núú Yá Ndiöxí

<sup>11</sup> Te nchòhó ío cùu iní ñáhà-í xii-ndo, te càchí tnúhu-í xii-ndo sã nchóó cùu-o datná cue ñáyíu ndècu tnaduha ìí<sup>n</sup> ñuú, te duca<sup>n</sup> sãtnahá-xi cùu-o chi tnaa-ni ndècu-o ñuyíú-a, te sáá nduu ndùu táhú-ó cùndecu-o núú ndécú Yá Ndiöxí táxí tnùn-í-gá, te xíã<sup>n</sup> càhá<sup>n</sup> ndáhú-í núú-ndó sã vã cádá-ndó ni ìí<sup>n</sup> sã cuèhé sã dúhá sàni iní-ndó, chi nchaa xíã<sup>n</sup> ñá túú cùu-xi sã vãha sã cúu-xi-ndó. <sup>12</sup> Te cada váha-ndo cùndecu-ndo núú nchàa ñáyíu ñá túú ndècu ichi Yá Ndiöxí, te cuèí na càhá<sup>n</sup> ñáyíu sã nchòhó nchìcú<sup>n</sup> nihnu-ndo ìchi cuehé ichi duha, dico quíní-yu nchaa sã vãha quide-ndo, dico na sáá nduu dândixi túu Yá Ndiöxí iní-yu sã ñà túú quide váha-yu ndécú-yu, te dàvá-á<sup>n</sup> cachí-yu sã quidé vãha-ndo ndècu-ndo, te cada càhnú-yu Yá Ndiöxí.

<sup>13</sup> Te Xítohó Jesucristú cuíní-gá sã nchòhó ío quindáá iní-ndó nchàa cue téé cùchiu<sup>n</sup> taxi tnuní ñáhá xii-ndo, te duca<sup>n</sup>-ni quindáá iní-ndó cuèí mee téé cùnuu vihi-gá yíndàha ñaha xii ñáyíu. <sup>14</sup> Te duca<sup>n</sup>-ni quindáá iní-ndó nchàa ðava-gá cue téé cùnuu, chi Yá Ndiöxí duca<sup>n</sup> ní cachí-gá cunduu sã cuè téé-á<sup>n</sup> cada ndáá-güedé nchaa cuèchi ñáyíu quide cuehé quidé dùha ndecu, te càhá<sup>n</sup> váha-güedé cuendá nchaa ñáyíu xíquide váha ndècu. <sup>15</sup> Te Yá Ndiöxí cuíní-gá sã cádá vãha-ndo cùndecu-ndo cuendá nchaa ñáyíu ío ni ðíquí-xi càhá<sup>n</sup> cuèhé cuendá-ndó sã ndécú-ndó ìchi Yá Ndiöxí vã níhí-gá-yu tnúhu càhá<sup>n</sup>-yu.

<sup>16</sup> Te nchòhó, Yá Ndiöxí ní quide-gá sã cúu-ndó ñáyíu cuu cada nàcuáa véxi iní méé-xí, dico ñá ðíú sã dúcá<sup>n</sup> ní quide ñaha-gã xii-ndo, te ngóo-ndo càni iní-ndó càda-ndo nándi sã cuèhé sã dúhá, chi cada-ndo sã cúu-ndó ñáyíu xìnu cuechi núú Yá Ndiöxí. <sup>17</sup> Te canehe-ndo sã yíñùhu núú nchàa ñáyíu,

ndíhi núú téé cùnuu vihi yíndàha ñaha xii-yu, te cuu iní tnáhá ndì mee-ndo nacuéa ndècu-ndo ichi Yá Ndiöxí, te ío canehe-ndo sã yíñùhu núú-gã.

### Nchaa nàcuáa ndoho-o cùndecu-o ichi Xítohó Jesucristú

<sup>18</sup> Te nchaa nchòhó ñáyíu xìnu cuechi canehe-ndo sã yíñùhu núú cuè patróo<sup>n</sup>-ndó, te quindáá iní-ndó càda-ndo nchaa chiu<sup>n</sup> tahu-güedé. Te ìí<sup>n</sup>-ni càda-ndo núú cuè téé váha iní-xi, ndíhi núú cuè téé ío cuihna ìní-xi. <sup>19</sup> Te núú nchòhó ná càda ndee iní-ndó ndòho-ndo nchaa sã ñà túú tàú-ndó ndòho-ndo cuendá sã cuíní-ndó cùndáá-ndó núú Yá Ndiöxí ñá, te ío nduu vétú iní-gá. <sup>20</sup> Te núú nchòhó ní quide-ndo ìí<sup>n</sup> cuèchi, te sàhni iní-ndó dândoho ñaha ñáyíu xii-ndo, ¿te ná sã vãha cùu xíã<sup>n</sup>-í? Dico núú nchòhó ná cádá ndèe iní-ndó ndòho-ndo nchaa sã cádá ñaha ñáyíu xii-ndo sã cuendá sã quidé-ndó sã vãha ña, te núú duca<sup>n</sup> na càda-ndo te cùu-xi ìí<sup>n</sup> sã vãha núú Yá Ndiöxí. <sup>21</sup> Te Yá Ndiöxí ní cachí-gá sã cádá ndèe iní-ó ndòho-o nándi ndoho-o sã cuendá sã quidé-ó sã vãha, chi ío ní ndoho Xítohó Jesucristú cuendá-ó, te duca<sup>n</sup> tàú-ó cànchicú<sup>n</sup> nihnu-o càda ndee iní-ó ndòho-o nándi ndoho-o, chi duca<sup>n</sup> ní quide-gá. <sup>22</sup> Te mee-gã ñá túú quide-gá ni ìí<sup>n</sup> sã cuèhé sã dúhá, te ni ìí<sup>n</sup> tnúhu ndehnde ñà túú càhá<sup>n</sup>-gá. <sup>23</sup> Te òré ní xóo cúcuèhé ñáhá-güedé xii-gá, te ñá túú ní xóo danchòcáva-gá tnúhu cuèhé, te òré ní xóo dandòho ñaha-güedé xii-gá, te ñá túú ní xãha<sup>n</sup>-gã xii-güedé sã ío ná cada ñaha-gã, chi núú ndáhá Yá Ndiöxí ní xóo nachíhi-gá méé-gã, ndíhi nchaa sã sání iní-güedé cada ñaha-güedé xii-gá. Te Yá Ndiöxí cúu-gã Yaá ío váha cada ndáá cuèchi nchaa ñáyíu na sáá nduu. <sup>24</sup> Te Xítohó Jesucristú cúu-gã Yaá ní xíhí núú cùrúxí cuendá nchaa cuèchi nchoo ñáyíu

ndècu ñuyíú-a. Te duca<sup>n</sup> ñí xíhí-gá cuendá nchoo dùu<sup>n</sup> duu<sup>n</sup> dañá-o nchaa ichi cuehé ichi duha, te cada ndáá-ó cùndecu-o ichi-gá. Te ní dánicuehé ñáhá-güedě xii-gá, te sá dúcá<sup>n</sup> ñí ndoho-gá xiá<sup>n</sup> ní ngúndecu váha nchoo vitna. <sup>25</sup>Te nchoo cùu-o datná cue mbéé cue quití ní xíta ni cùu, dico vitna ní tuha-o Xìtohó Jesucristú, te Yaá-á<sup>n</sup> cùú-gá dàtná ì<sup>n</sup> toli xito ñaha-gá xii-o vitna cuendá sá vǎ cuíta nihnu-o.

### Nàcuáa tàù ñáyiú tñándaha cadá-yu cundecú-yu

**3** Te nchaa nchòhó ñáyiú ðíhí ní tñandaha ío quindáá iní-ndó yìi-ndo cuendá sá ñúu ñá túú sàndáá iní-güedé tñúhu Yá Ndiöxí te quindáá iní-güedé cuendá sá ndéhe-güedé quidé ndáá-ndó ndècu-ndo, te ni ñà túú xini ñuhu-xi cáhá<sup>n</sup>-ndó tñúhu-gá núú-güedě. <sup>2</sup>Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yíñùhu núú Yá Ndiöxí. <sup>3</sup>Te vǎ cání iní-ndó mée-ni cunduu vii-ndo, te ndada-ndo ðíquí-ndó nàcuáa tàú-xi cunduu, te vǎ cání iní-ndó nǎndi canehe-ndo, te ni vǎ cání iní-ndó cuìhnu-ndo mee-ni dóó váha sá ío vii ndáa. <sup>4</sup>Chi iní-ndó xini ñuhu-xi cunduu vii cunduu váha-xi núú Yá Ndiöxí cuéi vitna te cuéi núú cuǎhá<sup>n</sup> núú vǎxi, te cuu-ndo ñáyiú ío càhnu iní-xi, te núu duca<sup>n</sup> na càda-ndo te ío cuu váha iní Yá Ndiöxí. <sup>5</sup>Te duca<sup>n</sup> ío vii ío váha ní xínduu iní nchaa ñáyiú ðíhí ní xíndecu ndéé sanaha, te ñáyiú-á<sup>n</sup> ío ní sàndáá iní-yu Yá Ndiöxí te ní cudúú-yu núú-gǎ, te ní tñí-yu nchaa tñúhu ní cáhá<sup>n</sup> yíi-yu. <sup>6</sup>Te duca<sup>n</sup> ñí xóo cada ndíi Sǎrá ní xóo quindáá iní ndíi yíi ndíi, ndíi Àbrahám, te ní cánehe ndíi ðíhí-á<sup>n</sup> sǎ yíñùhu núú yíi ndíi. Te núu nchòhó quidé váha-ndo ndècu-ndo te ñá túú yùhú-ndó ñǎ cada ñaha tñaha ñáyiú-ndo xii-ndo, te núu duca<sup>n</sup> quide

váha-ndo ndècu-ndo te quide-ndo datná ní quide ndíi Sǎrá.

<sup>7</sup>Te nchòhó cue téé ndècu ñadíhí-xi ío váha cuáha-ndo cuendá nàcuáa cundecu váha-ndo ndíhí-yu, te ío vii cáhá<sup>n</sup> ndíhí-ndó-yu, chi ñáyiú-á<sup>n</sup> íi-gǎ-yu dàcúxí nchòo cue téé, te duca<sup>n</sup> càda-ndo chi ndí ndúú-ndó ndúu táhú-ndó cùndecu-ndo ndíhí Yá Ndiöxí, te núu duca<sup>n</sup> na càda-ndo te òré cáhá<sup>n</sup> ndíhí-ndo Yá Ndiöxí te tedóho ñaha-gǎ xii-ndo.

### Ñáyiú quide sá váha ndòhó-yu

<sup>8</sup>Te càchí tñúhu tucu-í xii-ndo sǎ ío cuu ì<sup>n</sup>nuu-ndo cùndecu-ndo, te cundàhú iní tñáhá-ndó ì<sup>n</sup> ì<sup>n</sup>-ndo, te cuu iní tñáhá tucu-ndo nacuáa ndècu-ndo ichi Yá Ndiöxí, te cuu-ndo ñáyiú ndàhú iní-xi. <sup>9</sup>Te núu ì<sup>n</sup> sǎ ñà túú váha quide ñaha ñáyiú xii-ndo, te ñá ðíú-ní dù-ca<sup>n</sup> nanchocáva-ndo càda-ndó-yu, àdi xícuèhé ñáhǎ-yu xii-ndo, te vǎ ná dǎnchocáva-ndo ðiu-ni tñúhu cuèhé, chi cáca<sup>n</sup> táhú-ndó núú Yá Ndiöxí cuendá sá ná cadá váha ñaha-gǎ xii-yu, te duca<sup>n</sup> càda-ndo chi Yá Ndiöxí ní cáhá<sup>n</sup> ñáhá-gǎ xii-ndo cuendá sá cadá váha ñaha-gǎ xii-ndo tñáhá-ndó. <sup>10</sup>Te núú tütú Yá Ndiöxí càchí-xi:

Nchaa ñáyiú cuiní cundecu váha ndí nchàa nduu nini cundecú-yu ñuyíú-a,

xini ñuhu-xi sǎ vǎ càhá<sup>n</sup>-yu tñúhu cù-texínu, te ni vǎ dàcuàndehndé-yu.

<sup>11</sup>Te xini ñuhu-xi duu<sup>n</sup> duu<sup>n</sup> dañá-yu nchaa ichi cuèhé ichi duha, te cadá-yu mee-ni sǎ váha,

te ío ndúcú-yu nàcuáa cadá-yu cundecu váha-yu ndíhí tñaha ñáyiú-yu te ðiu-ni duca<sup>n</sup> cànchicú<sup>n</sup> nihnú-yu cadá-yu.

<sup>12</sup>Te Yá Ndiöxí xító-gǎ nchaa ñáyiú quide ndáá núú-gǎ

te tedóho-gǎ nchaa tñúhu càhá<sup>n</sup>-yu,

dico nchaa ñáyiú ñá túú cuíní cada ndáá, ñáyiú-á<sup>n</sup> ñà túú cùu váha iní-gá núú-yu.

Duha càchí-xi núú tùtú-gá.

<sup>13</sup>Te vá yõo ñhí ndéé càda ñaha xii-o ìí<sup>n</sup> sá ñà túú váha te núu mee-ni sá váha na càda-o cundecu-o. <sup>14</sup>Àdi núu ná cúú sá ná cáda ñàha ñáyiú xii-o sá cuendá sá quidé váha-o ndècu-o ña, te sá dúcá<sup>n</sup> ná cáda ñáhá-yu xii-o cùu-xi ìí<sup>n</sup> sá váha sá cúú-xí-ó núú Yá Ndiõxí. Te na càchí tnúhu-í xii-ndo sá vǎ yùhú-ndõ-yu, te ni vǎ cùndiyí-ndó cuendá nchaa sá ná càda ñáhá-yu xii-ndo. <sup>15</sup>Te nèhe-ndo sá yíñùhu núú Xítohó Jesucristú. Te ío cundecu túha-ndo dānehé-ndó ñáyiú véxi ndùcu tnúhu núú-ndó nācuáa ndùu tnúhu ndee ìní ní taxi Xítohó Jesucristú ndécú ndìhi-ndo, te cuu vii cuu váha iní-ndó cǎhá<sup>n</sup> ndìhi-ndõ-yu, te cǎhá<sup>n</sup>-ndó nǔŷ-yu mee-ni tnúhu yíñùhu nācuáa cùu váha iní Yá Ndiõxí. <sup>16</sup>Te ío cada váha-ndo cùndecu-ndo cuendá sá vǎ cùndiyí-ndó, te núu duca<sup>n</sup> na càda-ndo, te nchaa ñáyiú xǐcuèhé ñáhá xii-ndo cuendá sá quidé váha-ndo ndècu-ndo ichi Xítohó Jesucristú quendóo canúŷ-yu ndìhi nchaa tnúhu cǎhá<sup>n</sup>-yu, chi nchòhó quidé váha-ndo ndècu-ndo. <sup>17</sup>Te váha-gá sá ndóhó-ó cuendá sá quidé-ó sá váha te núu mee Yá Ndiõxí duca<sup>n</sup> cuíní-gá cunduu, te ñá díú sá ndóhó-ó cuendá sá ñà túú quide-o sá váha.

<sup>18</sup>Te Xítohó Jesucristú ní xíhí-gá sá cuendá nchaa cuéchi nchaa nchoo ñáyiú ndècu ñuyíú-a, te ìí<sup>n</sup> xito-ni duca<sup>n</sup> ní xíhí-gá te duca<sup>n</sup> te vá cùu tnàhí-gá, te mee-gǎ cúú-gǎ Yaá ñá túú tnàhí cuéchi-xi, te duca<sup>n</sup> ní ndoho-gá cuendá nchaa cuéchi ñáyiú ndècu ñuyíú-a ñáyiú ñá túú cuíní cada ndáá núú Yá Ndiõxí, te duca<sup>n</sup> ní cuu cuendá sá núcūndecu váha-yu núú Yá Ndiõxí te núu na quindáá iní ñáhá-yu xii-gá. Te mee-gǎ ní xíhí-gá dico Espíritú-gá chi

ní xindecu-ni-xi, <sup>19</sup>te Espíritú-gá ní sáhá<sup>n</sup>-xi ní cǎhá<sup>n</sup>-xi tnúhu Yá Ndiõxí núú nchaa espíritú ñáyiú ndècu núú ùhú núú ndàhú. <sup>20</sup>Te ñáyiú-á<sup>n</sup> cúú ñáyiú ní xindecu ndéé sanaha cǔtnàhá ní xindecu ndí Nõé, chi ñáyiú-á<sup>n</sup> ío ní quide sáá iní-yu núú Yá Ndiõxí. Te Yá Ndiõxí ío váha iní-gá, chi ní dácácá-gǎ nduu ní xindecu ndí Nõé ní cadúha ndí bàrcú cuendá ndétú-gǎ ndixi cuéchi iní-yu sá ñà túú quide váha-yu ndècú-yu ni cùu. Te dàvá-á<sup>n</sup> ní ndaa ndute ñuyíú te ní cácu úná duha ná tnàhá ñáyiú, chi ní quée-yu xití bàrcú-á<sup>n</sup>, te ñà túú ní cǎhá-yu. <sup>21</sup>Te sá dúcá<sup>n</sup> ní cácu ñáyiú úná-á<sup>n</sup> ñà túú ní cǎhá-yu ndute ní ndaa ñuyíú dàvá-á<sup>n</sup>. Te xíá<sup>n</sup> quée-xí sá cuandùte ñáyiú vitna, te nanhí tǎhú-yu te núu na quindáá iní-yu tnúhu ndáá tnúhu Yá Ndiõxí. Te ñá díú sá cuandùte-o te nduu ndoo nduu nine yiqui cùñú-ó te nanhí tǎhú-ó, chi xini ñuhu-xi nǎhmá-ó núú Yá Ndiõxí nchaa yícá cuéchi-o, te nduu ndoo nduu nine iní-ó, te duca<sup>n</sup> te nanhí tǎhú-ó, chi Xítohó Jesucristú ní xíhí-gá cuendá-ó te ní ndoto-gá. <sup>22</sup>Te Yaá-á<sup>n</sup> cuandaa-gǎ andiu, te ní ngóo-gá xio cùha Yá Ndiõxí, te tàxi tnuní-gá nchaa espíritú cùnùu ndìhi nchaa dava-gá cue espíritú xínú cuéchi.

#### Cada-o nācuáa cuíní mée Yá Ndiõxí

**4** Te Xítohó Jesucristú ní ndoho-gá cǔtnàhá ní xindecu-gá ñuyíú-a, te vitna nchòhó cundecu túha-ndo ndòho-ndo cuendá-gá, chi nchaa ñáyiú ndòho nándi sá ndóhó cuendá-gá dāñá-yu nchaa sá cuèhé sá dúhá. <sup>2</sup>Te duca<sup>n</sup> ñà túú-gǎ ndècú-yu ichi cuèhé ichi duha, chi mee-nǎ nācuáa cǎhá<sup>n</sup> Yá Ndiõxí quidè-yu ndècú-yu ñuyíú-a. <sup>3</sup>Te nchòhó sa ñàha-ndo sá ío cuèhé núú sá cuèhé sá dúhá ní xóo cada-o cǔtnàhá vátá cùndecu-gá-ó ichi Yá Ndiõxí, chi ní xóo cada-o nchaa sá cuèhé sá dúhá



cùdí íní nchaa ñáiyu ñá túú sàndáá íní tnúhu-gá, te dàvá-á<sup>n</sup> ñí xóo cada-o nchàa núú sá cuèhé sá dúhá, te ní xóo caní cuèhé ní xóo caní duha íní-ó, te ní cuu-o cuè ñáiyu quihu, te ní xóo cundecu-o víco núú ñí xóo cada-o nchàa sá ñà túú vâha, te ní xóo ñíhí tnáhá-ó ndíhi nchaa tnaha quihu-o, te ní xóo chiñuhu-o nchàa sá càchí-yu cùu ndiòxí te ñà ndáá sá ndiòxí cùú nchàa xíá<sup>n</sup>, te nándi-gá nchaa sá cuèhé sá dúhá ñí xóo cada-o dàvá-á<sup>n</sup>. <sup>4</sup>Te ñáiyu-á<sup>n</sup> cúnñuhu-yu vitna sá ñà túú-gá ñíhí tnáhá-ó ndíhi-yu cada-o nchàa sá cuèhé sá dúhá quidé-yu, te xíá<sup>n</sup> càhá<sup>n</sup> cuèhé-yu cuèndá-ó vitna. <sup>5</sup>Dico sáá nduu te ñáiyu-á<sup>n</sup> ñahmá-yu nchaa sá quídè-yu núú Xítoho Jesucristú, chi diu-gá sa ndècu túha-gá sá cáda ndáá-gá cuéchi nchaa ñáiyu sa ní xíhí, ndíhi cuéchi nchaa ñáiyu xíndecu vívú. <sup>6</sup>Te cue ñáiyu sa ní xíhí ní xíndedóho tnúhu Xítoho Jesucristú, te cuèi ní xíhí-yu dàtná xíhí dava-gá ñáiyu, dico espíritú-yu chi ní nduu táhú-xi ndècu váha-xi dàtná ndécú Yá Ndiòxí.

<sup>7</sup>Te vitna ta cùyatni danaa Yá Ndiòxí ñuyíú-a núu xíá<sup>n</sup> ío váha cuáha-ndo cuèndá nàcuáa cundecu-ndo, te càhá<sup>n</sup> ndíhi-ndo-gá. <sup>8</sup>Te xini ñuhu-xi sá ío cuu íní tnáhá-ndó ì<sup>n</sup> ì<sup>n</sup>-ndo, chi núu duca<sup>n</sup> na cùu íní tnáhá-ndó ì<sup>n</sup> ì<sup>n</sup>-ndo, te vá cání-gá íní-ndó càda cuèndá-ndó nchàa sá ñà túú vâha quide ñaha ñáiyu xii-ndo, <sup>9</sup>te nchòhó ñáiyu xíndecu vehe-xi cuáha ñuu-ndo vehe xii cue ñáiyu ñuhu ichi na ndetatú-yu, te ío váha cuu íní-ndó dùca<sup>n</sup> cada-ndo. <sup>10</sup>Te Yá Ndiòxí ní taxi-gá ndí dí<sup>n</sup> núú táhú ndécú ndíhi-ndo ì<sup>n</sup> ì<sup>n</sup>-ndo, te nàcuáa ndùu táhú ñí nduu táhú-ndó ì<sup>n</sup> ì<sup>n</sup>-ndo te duca<sup>n</sup> chindee tnaha-ndo, te vá dáñá ndèè-ndó càda-ndo nchaa nacuéa tàuchiu<sup>n</sup> Yá Ndiòxí cada-ndo, te chindee ñaha-gá xii-ndo. <sup>11</sup>Te dava nchòhó ñáiyu càhá<sup>n</sup> tnúhu Yá Ndiòxí núú ñáiyu, xini ñuhu-xi càhá<sup>n</sup>-ndó nàcuáa ndùu

tnúhu-gá núú-yu, te dava nchòhó ñáiyu quide nchaa núú chiú<sup>n</sup> chindee tnaha ñáiyu-xi, xini ñuhu-xi cada-ndo sá Yá Ndiòxí chindèe ñaha-gá xii-ndo, te duca<sup>n</sup> càda-ndo nchaa núú sá vâha, chi Xítoho Jesucristú tnáhá-gá chindèe ñaha-gá xii-ndo, te duca<sup>n</sup> ío cuu càhnu Yá Ndiòxí. Te vitna tàú-ó càhá<sup>n</sup>-ó sá ío càhnu cuu Xítoho Jesucristú, chi diu-gá cúnùu-gá nchaa nduu nchaa qufú, te duca<sup>n</sup> na cùnduu.

### Ndoho tnáhá-ó cùndecu-o ichi Xítoho Jesucristú

<sup>12</sup>Te nchòhó ñáiyu ío cùu íní-í, vá cúnñuhu-ndo sá ío ndòho-ndo ndecu-ndo ichi Xítoho Jesucristú, chi sá dúcá<sup>n</sup> ndòho-ndo-á<sup>n</sup> cùtnùní ndisa sá sàndáá íní-ndó-gá, te vá cání íní-ndó nà cuèndá duca<sup>n</sup> ndòho-ndo. <sup>13</sup>Chi da cudíí íní-ndó te núu ndòho-ndo datná ní ndoho Xítoho Jesucristú, te duca<sup>n</sup> súúní cùdíí íní-ndó òré ná quixi tucu-gá ñuyíú-a te dàvá-á<sup>n</sup> quiní-ndó sá ío càhnu cuu-gá. <sup>14</sup>Te núu xícuèhé ñáhá ñáiyu ndècu ichi cuehé ichi duha xii-ndo cuèndá sá ndécú-ndó ichi Xítoho Jesucristú, te xíá<sup>n</sup> cùú-xí ì<sup>n</sup> sá vâha sá cùú-xí-ndó núú-gá, te duca<sup>n</sup> chi Espíritú Yá Ndiòxí sá ío cùnùu ndecu ndíhi ñaha-xi xii-ndo, te nchaa ñáiyu ndècu ichi cuehé ichi duha-á<sup>n</sup> càhá<sup>n</sup> cuèhé-yu cuèndá Xítoho Jesucristú, dico nchòhó càchí-ndó sá ío càhnu cuu-gá. <sup>15-16</sup>Te núu nchòhó dándòho ñaha ñáiyu xii-ndo sá cuèndá sá ndécú-ndó ichi Xítoho Jesucristú ñà, te vá cùú càhá<sup>n</sup> núú-ndó, chi ndacá<sup>n</sup> táhú-ndó núú Yá Ndiòxí cuèndá sá ndécú-ndó ichi-gá. Te cuèi ndòho-ndo ndecu-ndo, dico ñà túú cùu-ndo ñáiyu sàhni ndíyi te ni ñà túú cùu-ndo ñáiyu dùhu, te ni ñà túú cùu-ndo ñáiyu quide cuehé quidé dùha, te ni ñà túú cùu-ndo ñáiyu chindee tnúhu tnàha ñáiyu-xi ì<sup>n</sup> sá ñà túú tàú-ndó càda-ndo.

<sup>17</sup> Te vitna sa quèsaha Yá Ndiöxí cada ndáá-gá nchaa sá quidé nchò ñáyi ndècu ndìhi-gá, te núu duca<sup>n</sup> te ndèé-gá cada-gá nchaa ñáyi ñá túú sàndáá iní ñáhá xii-gá òré ná sáá nduu dùca<sup>n</sup> cada ñaha-gá xií-yu. <sup>18</sup> Te nchòhó xìní-ndó sá ñáyi quide váha ndècu ichi Xítohó Jesucristú ndòho tnahá-yu ndècú-yu, dico sáá nduu te nduu táhũ-yu cundecú-yu ndìhi-gá. Te núu duca<sup>n</sup> ndòho nchaa ñáyi quide váha ña, ¿te nása-gá yáha nchaa ñáyi ndècu ichi cuehé ichi duha na sáá nduu càda ndáá Yá Ndiöxí cuéchi-yu-i? <sup>19</sup> Te nchaa nchòhó ñáyi ndòho nacuaá cuiní Yá Ndiöxí xini ñuhu-xi sá vã dãná ndèé-ndó càda váha-ndo cundecu-ndo, te ío quindáá iní-ndó sá xító ñaha-gá xii-ndo. Te ñiu-gá cúu-gã Yaá ní cadúha ñaha xii-o, te quide-gá ñ<sup>n</sup> sá càhá<sup>n</sup>-gá.

#### Nàcuáa tàù-xi cada ñáyi ndècu ichi Xítohó Jesucristú

**5** Te yúhú càhá<sup>n</sup>-í dóho nchaa nchòhó cue téé yíndaha nchaa dava-gá ñáyi ndècu ichi Xítohó Jesucristú, chi tnahá yúhú yíndaha-í ñáyi ndècu ichi-gá, te sàndáá iní-í tñuhu-gá, te ní xini-í nchaa nàcuáa ní ndòho-gá, te sáá nduu te tnahá-í cunuu-í ndìhi-gá. <sup>2</sup> Te ío canehe cuendá-ndó nchaa ñáyi ndècu ichi Yá Ndiöxí yíndaha-ndo te cada-ndo dàtná quidé cuè toli, chi cue téé-á<sup>n</sup> ío váha xito-güedé mbéé-güedé. Te canehe cuendá-ndó-yu sá cúu iní méé-ndó te ñá díú sá ío ñ<sup>n</sup> ñáyi cada yica ñaha xii-ndo, te ni ña díú sá cuiní-ndó cùhu<sup>n</sup> yáhu-ndo, chi ni yùhu ni iní-ndó còto-ndó-yu, chi duca<sup>n</sup> cuiní Yá Ndiöxí cunduu. <sup>3</sup> Te vá cádá-ndó sá ío cùnuu-ndo núú-yu, chi cada-ndo mèe-ni sá váha cuendá duca<sup>n</sup> càncicú<sup>n</sup> nihnú-yu cadá-yu tnahá-yu. <sup>4</sup> Te òré ná quíxí tùcu Xítohó Jesucristú Yaá néhé cuendá ñáhá xii-o nchaa-o ñuyíú-a, te taxi-gá sá ío váha nduu

táhú-ó, te cunuu-o ndìhi-gá ni caa ni quíh<sup>n</sup>.

<sup>5</sup> Te nchòhó ñáyi ndècu ichi Xítohó Jesucristú càhá<sup>n</sup>-í dóho-ndo sá ío quindáá iní-ndó cuè téé yíndaha ñaha xii-ndo nacuaá ndècu-ndo ichi-gá, te nchaa-ndo tàù-ndó quindáá iní tnahá-ndó ñ<sup>n</sup> ñ<sup>n</sup>-ndo, chi núu tùtú Yá Ndiöxí càchí-xi ñ<sup>n</sup> xichi:

Nchaa ñáyi quide cahnu mee-xi ñá túú cùu váha iní Yá Ndiöxí núu-yu, dico nchaa ñáyi ndàhú iní-xi te chindee ñaha-gá xií-yu.

Duha càchí-xi núú tùtú-gá. <sup>6</sup> Te dañ-ndo mèe-ndo núú ndáhá Yá Ndiöxí, chi mee-gã ío cùnuu-gá. Te núu duca<sup>n</sup> na càda-ndo, te sáá nduu te cada nínu ñaha-gã xii-ndo. <sup>7</sup> Te nchaa sá yáha-ndo ndècu-ndo te nachihi-ndo ndàha Yá Ndiöxí, chi mee-gã xító ñaha-gã xii-ndo.

<sup>8</sup> Te ío váha cuáha-ndo cuendá cundecu-ndo, te quíhi iní-ndó chi sácúhñá xícá cùu-xi cuiní-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi datná ñ<sup>n</sup> quítí déé<sup>n</sup> xícá ndùcu sá cáxí-xí. <sup>9</sup> Te ío quindáá iní-ndó Xítohó Jesucristú, te vá dãná-ndó mèe-ndo dandahú ñáhá sácúhñá xii-ndo càda-ndo nacuaá cuiní-xi, chi ñaha-ndo sá ncháá ñáyi ndècu ichi Xítohó Jesucristú xíndecu nihí ñuyíú ndóhò-yu dàtná ndóhó nchò ndecu-o ichi-gá. <sup>10</sup> Dico sacú-ni nduu duha cundòho-o te dàtnùnì ñá túú-gã ná cumání-ó cundecu-o núú Yá Ndiöxí, te dàvã-á<sup>n</sup> vã cání ñ<sup>n</sup> caní úú iní-ó cundecu-o ichi-gá. Te ío-gã ngúndecu ndìhi-o tñuhu ndee iní cada-o nchaa nacuaá càhá<sup>n</sup>-gá, te duca<sup>n</sup> càda-o chi mee Yá Ndiöxí ío chindee ñaha-gã xii-o, te ñiu-ni Yaá-á<sup>n</sup> ío cùu iní ñáhá-gã xii-o, chi ní càhá<sup>n</sup> ñáhá-gã xii-o cundecu-o núú ío váha càa ndecu-gã cundecu-o nì caa ni quíh<sup>n</sup>, te duca<sup>n</sup> ñá quide-gá chi ní sàndáá iní-ó Xítohó

Jesucristú. <sup>11</sup>Te ío ndacá<sup>n</sup> táhú-ó nńú Yă Ndiöxí chí ío cǎhnu cuu-gá, te cùnuu-gá nchaa nduu nchaa qufú. Te duca<sup>n</sup> na cùnduu.

### **Tnúhu ndéé núú nń ndihí-ná**

<sup>12</sup>Te té Silvanú xíní-í sá cúú-dě ĩ<sup>n</sup> tée quide ndáá ndécú ichi Xítóhó Jesucristú, te diu-dé ní cáhá<sup>n</sup> ndàhú-í núú-dě ní tee-dé ĩ<sup>n</sup> ũú tnúhu sá nń xáha<sup>n</sup>-í xii-dé núú tütú-a cuëndá daquixi-í ndaha-ndo, te núú tütú-a cǎchí tnúhu ndáá-í xii-ndo sǎ Yă Ndiöxí ío cùu iní nńhá-gǎ, te chindee nńaha-gá xii-ndo ndècu-ndo, te cǎchí tnúhu tucu-í xii-ndo sǎ ĩo quindáá

iní-ndó sǎ ndàá duca<sup>n</sup> quide nńaha-gá xii-ndo.

<sup>13</sup>Te cue nńáyu ndècu nńú Babiloniá, nńáyu ndècu ichi Yă Ndiöxí, diu-ni nńáyu ní cachí Yă Ndiöxí sá nánihí tàhú dàtná cúú nchòhó, ío quide ndee iní nńáhă-yu xii-ndo, te tnàhá té Mǎcú tée cùu datná ĩ<sup>n</sup> déhe-í quidé ndèe iní nńáhă-dě xii-ndo.

<sup>14</sup>Te ndihí tnúhu yĩñuhu cada ndee iní tnáhă-ndó ĩ<sup>n</sup> ĩ<sup>n</sup>-ndo, te xicá<sup>n</sup> táhú-í núú Yă Ndiöxí sá ĩo na cùndecu nahi nchaa nchohó nńáyu ndècu ndihí Xítóhó Jesucristú. Te duca<sup>n</sup> na cùnduu. Te ío chí cǎdá ndèe iní-nǎ vitna.

## TUTÚ CÚÚ ÒÚ NÍ CADÚHA TÉ PÈLÚ

### Té Pèlú cádúha-dé tutú quíhí<sup>n</sup> ndaha ñáyiú sàndáá iní tnúhu Yá Ndiöxí

**1** Yúhú té Xímú, àdi Pelú chi úú òú-í, xínú cuèchi núú Xítóhó Jesucristú, chi mee-gá ní tendaha ñaha-gá xii-í xíca cùu-í càhá<sup>n</sup>-í tnúhu-gá. Te cádúha-í tutú-a sá cúú-xí nchàa nchóhó ñáyiú sàndáá iní ñáhá xii-gá dàtná sàndáá iní-ndí-gá, te duca<sup>n</sup> chi Tátá-ó Dütú Ndiöxí ní dácàhá<sup>n</sup>-gá iní-ó ní sàndáá iní-ó-gá, chi cùu-gá Yaa ío váha quide ndáá ndíhi Xítóhó Jesucristú Yaa dácäcu nihnu ñaha xii-o núú ùhú núú ndàhú. <sup>2</sup>Te xicá<sup>n</sup> táhù-í núú Yá Ndiöxí sá ùu<sup>n</sup>-gá uu<sup>n</sup>-gá ná cuíta chindee chitúu ñaha-gá xii-ndo quíhí<sup>n</sup>, te duca<sup>n</sup> ío váha cuu iní-ndó cùndecu-ndo, te duca<sup>n</sup> càda-gá chi ta cùtnuní-gá iní-ndó nàcuáa ndùu cuendá-gá, te duca<sup>n</sup> ta cùtnuní tucu iní-ndó nchàa nacuáa ndùu cuendá Xítóhó Jesucristú Yaa cúú Xítóhó-ó.

### Nàcuáa quide ñáyiú ndècu ichi Xítóhó Jesucristú

<sup>3</sup>Te Yá Ndiöxí ío càhnu cuu-gá chi chindee ñaha-gá xii-o quide ndáá-ó ndècu-o datná cuíní méé-gá, te duca<sup>n</sup> chi cùtnuní iní-ó nàcuáa sàni iní Xítóhó Jesucristú Yaa ní cáhá<sup>n</sup> ñáhá xii-o. Te òré ní cáhá<sup>n</sup> ñáhá-gá xii-o te ní cutnùní iní-ó sá ío càhnu cuu-gá te ío váha quide-gá. <sup>4</sup>Te duca<sup>n</sup> ní cutnùní tucu iní-ó nàcuáa ní cáhá<sup>n</sup>-gá cada ñaha-gá xii-o, te tnúhu ní cáhá<sup>n</sup>-gá-á<sup>n</sup> ío càhnu cuu-xi te ío váha, te nchoo ní sàndáá iní-ó tnúhu-á<sup>n</sup> nùu xíá<sup>n</sup> ñá túú-gá ndécú-ó ichi cuehé ichi duha te ní ñà túú-gá sání iní-ó càda-o nándi sá cuèhé sá dúhá, te ní cuu vii ní cuu váha iní-ó vitna. <sup>5</sup>Te sá dúcá<sup>n</sup> quide-gá te xíá<sup>n</sup> ío nducu ndèe-ndo cada-ndo nchaa nacuáa

càhá<sup>n</sup>-í-a, te nchòhó sàndáá iní-ndó-gá dico ñá díú mèe-ni xíá<sup>n</sup> chi tnàhá xíní ñùhu-xi cada ndáá-ndó cùndecu-ndo. Te núu quide ndáá-ndó ndècu-ndo te xini ñuhu-xi tecú tnùní-ndó tnúhu-gá. <sup>6</sup>Te núu tècú tnùní-ndó te cùu-ndo ñáyiú xíní cotnii mee-xi, te núu cùu-ndo ñáyiú sàcáo tnií mee-xi te xini ñuhu-xi cunduu cahnu iní-ndó cuéi nándi sá ná yáha-ndo cùndecu-ndo, te núu càhnu iní-ndó te xini ñuhu-xi cada ndáá-ndó cùndecu-ndo datná cuíní méé Yá Ndiöxí cada-ndo. <sup>7</sup>Te núu quide ndáá-ndó ndècu-ndo, te xini ñuhu-xi ío cuu iní tnàhá ndì mee-ndo nacuáa ndècu-ndo ichi-gá, te núu cùu iní tnàhá ndì mee-ndo te xini ñuhu-xi cuu iní-ndó nchàa dava-gá tnàha ñáyiú-ndo.

<sup>8</sup>Te núu sa duca<sup>n</sup> quide-ndo ndècu-ndo te uu<sup>n</sup>-gá cuíta duca<sup>n</sup> càda-ndo quíhí<sup>n</sup> núú cuàhá<sup>n</sup> núú vèxi, te núu duca<sup>n</sup> quide-ndo te cùu-ndo cue ñáyiú ñá túú dàna iní-xi xíndecu, te cuíta cutnùní-gá iní-ndó nchàa nacuáa sàni iní Xítóhó Jesucristú quíhí<sup>n</sup>. <sup>9</sup>Te nchaa ñáyiú ñá túú cuíní duca<sup>n</sup> càda cuú-yu ñáyiú ñá túú tnàhí ndìxi túu iní-xi sá Yá Ndiöxí sa ní ndada ndoo ní ndada nine-gá iní-yu cuendá nchaa sá cuèhé sá dúhá ní xóo cadá-yu, te ñáyiú-á<sup>n</sup> cúú-yu dàtná íi<sup>n</sup> ñáyiú cuáá àdi datná íi<sup>n</sup> ñáyiú ñá túú cùtnuní váha núú-xi, te duca<sup>n</sup> sàtnahá-xi cùú-yu cuendá sá dúcá<sup>n</sup> quide-yu. <sup>10</sup>Te xíá<sup>n</sup> nùu yúhú càhá<sup>n</sup>-í dóho nchaa nchòhó ñáyiú ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sá Yá Ndiöxí ní cáhá<sup>n</sup> ñáhá-gá xii-ndo, te duca<sup>n</sup> ní quide-gá chi duca<sup>n</sup> ní cachí-gá cada-gá. Te vá íí<sup>n</sup> ndùu cani iní-ndó dàña-ndo ichi-gá, te núu vá dáña ndèe-ndó càda-ndo nchaa nacuáa càhá<sup>n</sup>-í-a. <sup>11</sup>Te núu duca<sup>n</sup> na càda-ndo cundecu-ndo, te ío vii ío váha cada Yá Ndiöxí quehe<sup>n</sup> cuendá ñáhá-gá

xii-ndo òré ná sàá-ndó núú ndécú Xítohó Jesucristú táxí tnùní-gá nchaa nduu nchaa quíú, te ñu-ni Yaá-ǎ<sup>n</sup> cúú Xítohó-ó te ní dácäcu nihnu ñaha-gǎ xii-o núú ùhú núú ndàhú.

<sup>12</sup>Te duca<sup>n</sup>-ni quíhi-í dandäcu iní ñáhà-í xii-ndo nchàa tnúhu càhá<sup>n</sup>-í-a cuèi sa xíní-ndó tnúhu-á<sup>n</sup>, te cuèi sàndáá váha iní-ndó nchàa tnúhu ndáá dácuaaha-ndo. <sup>13</sup>Te yúhú quidé cuendá-í sá ïo tàù-xi càhá<sup>n</sup>-í dóho-ndo nini ndecu-í ñuyíú-a cuendá sá vǎ nácuaana-ndo nacuaá cada-ndo cundecu-ndo. <sup>14</sup>Chi Xítohó Jesucristú ní cachí-gá sá ñà túú-gǎ vai nduu cundecu-í ñuyíú-a te cuú-í. <sup>15</sup>Te ïo nducu ndè-í nducu-í nácuaá cada-í cuendá quendóo ndíhi-ndo nchàa tnúhu càhá<sup>n</sup>-í-a, te cuèi na yǎha cuú-í dico vá nácuaana-ndo cada-ndo nchaa nacuaá càhá<sup>n</sup> tnúhu sá dánèhé ñáhà-í xii-ndo vitna.

### **Cue téé ní xíní núú sǎ ïo cǎhnu cuu Xítohó Jesucristú**

<sup>16</sup>Te sa ní dánèhé ñáhà-ndí xii-ndo sǎ ïo cǎhnu cuu Xítohó Jesucristú. Te ní cachí tnúhu tucu-ndí nácuaá cada-gǎ òré quixi tucu-gǎ, te tnúhu-á<sup>n</sup> cúú-xí tnúhu ndáá cuítí te ñá dǎú tnúhu sá ní sani iní cue ñáyiú ñuyíú-a cùu-xi, chi nchúhú ní xíní núú-ndí nácuaá ní quide-xi cǔtnàhá ní cutnùní iní-ndí sǎ ïo cǎhnu cuu Xítohó Jesucristú. <sup>17</sup>Chi dàvǎ-á<sup>n</sup> ïo váha ní quide Tǎtǎ-ó Dǔtú Ndiöxí ní quide cǎhnu-gǎ Xítohó Jesucristú, te ñu-ni dàvǎ-á<sup>n</sup> ní càhá<sup>n</sup> Dútú Ndiöxí ndéé andíu ní xáha<sup>n</sup>-gǎ xii Xítohó Jesucristú: “Yòhó cúú-n Dèhe-í téé ïo cùu iní-í, te ïo cùdǎí iní ñáhà-í xii-n”, duha ní xáha<sup>n</sup> Yǎ Ndiöxí xii Xítohó Jesucristú. <sup>18</sup>Te nchúhú ní tecú dóho-ndí ní càhá<sup>n</sup> Yǎ Ndiöxí ndéé andíu cǔtnàhá duca<sup>n</sup> ní xáha<sup>n</sup>-gǎ xii Xítohó Jesucristú, chi tnàhá-ndí ndécú-ndí ndíhi-gǎ yucu núú dúcá<sup>n</sup> ní quide cǎhnu ñaha Yǎ Ndiöxí xii-gǎ.

<sup>19</sup>Te ndècu ndíhi-o nchaa tnúhu ní càhá<sup>n</sup> cue téé ní xóo càhá<sup>n</sup> tnúhu Yǎ Ndiöxí ndéé sanaha te nchaa tnúhu-á<sup>n</sup> càhá<sup>n</sup>-xi nchaa nácuaá cada-xi vitna, te cǔtnùní iní-ó sǎ tnúhu ndáá cúú-xí, te xini ñuhu-xi cada cuendá váha-ndo nchàa nacuaá càhá<sup>n</sup> tnúhu-á<sup>n</sup>, chi tnúhu-á<sup>n</sup> cúú-xí dàtná ì<sup>n</sup> ñuhú dáyèhé-xi ndéé òré véxi túndaá quéné chòdíní cǎhnú dáyèhé-dí. Te duca<sup>n</sup> sǎtnahá-xi cùu tnúhu-á<sup>n</sup> chi quide-xi nacuaá cutnùní iní-ó cuendá Xítohó Jesucristú. <sup>20</sup>Te xini ñuhu-xi sǎ ïo-gǎ cada cuendá-ndó sǎ ñà túú ñáyiú tecú tnùní ni ì<sup>n</sup> tnúhu sá ní chídó tnùní cue téé ní càhá<sup>n</sup> tnúhu Yǎ Ndiöxí ndéé sanaha, te núu Yǎ Ndiöxí vá cadá-gǎ nácuaá cutnùní iní-yu nácuaá càhá<sup>n</sup> nchaa tnúhu-á<sup>n</sup>. <sup>21</sup>Te cue téé-á<sup>n</sup> ïo ní xíndecu yíñuhu-güedé núú Yǎ Ndiöxí, te nchaa tnúhu sá ní càhá<sup>n</sup>-güedé-á<sup>n</sup> ñà túú cùu-xi tnúhu sá ní cahu iní mée-güedé, chi Espíritú Yǎ Ndiöxí ní dácáhú ìní ñáhà-xí xii-güedé nácuaá cunduu tnúhu càhá<sup>n</sup>-güedé.

### **Cue téé cǎchí sǎ càhá<sup>n</sup> tnúhu Yǎ Ndiöxí te ñà ndáá**

**2** Te ndéé sanduu chi ní xíndecu cue téé ní xóo dandàhú ñáhà xii ñáyiú isràél cǎchí sǎ càhá<sup>n</sup> tnúhu Yǎ Ndiöxí te ñà ndáá sǎ càhá<sup>n</sup>-güedé tnúhu-gǎ, te ñu-ni duca<sup>n</sup> tucu cundecu cue téé dandàhú ñáhà xii-ndo vitna, chi cachí-güedé sǎ càhá<sup>n</sup>-güedé tnúhu Yǎ Ndiöxí te ñà ndáá. Te cue téé-á<sup>n</sup> ïo yǎdàhu càhá<sup>n</sup>-güedé, te nchaa tnúhu càhá<sup>n</sup>-güedé-á<sup>n</sup> dacuíta nihnu ñaha-xi xii-ndo te núu na tédóho-ndo, chi cue téé-á<sup>n</sup> vǎ nñuu-güedé sǎ Xítohó Jesucristú ní xíhí-gǎ cuendá-güedé. Te sǎ dúcá<sup>n</sup> càda-güedé ïo-gǎ ndíhi dacuíta nihnu-güedé mée-güedé. <sup>2</sup>Te vai ñáyiú xínu iní-yu cadá-yu nándi sǎ cuèhé sǎ dúhá cuendá sǎ dúcá<sup>n</sup> càda cue téé-á<sup>n</sup>, te cuendá xǎ<sup>n</sup> ngóo ñáyiú càhá<sup>n</sup> úhú-yu

cuendá ichi Yá Ndiöxí. <sup>3</sup> Te mee-ni tnühu sá nĩ cahu iní cue ñáyiü ñuyíü-a danèhé ñáhá-güedé xii-ndo, te quesaha-güedé sá cúú-xí tnühu ndáá te ñá ndáá cuendá-ni sá cuañaha-ndo ðihú<sup>n</sup> xii-güedé, chi ðiu-ni xíá<sup>n</sup> tnàhí cuhu<sup>n</sup> iní-güedé, dico Yá Ndiöxí sá ní cunaha ndècu túha-gá cuendá cada ndáá-gá cuèchi-güedé, te na sáá nduu te cuíta nihnu duu<sup>n</sup>-güedé, chi Yá Ndiöxí vá nácuaana-gá ñ<sup>n</sup> sá ní cachí-gá cada-gá.

<sup>4</sup> Te Yá Ndiöxí ñá túú ní quide cahnu iní-gá sá nĩ quide cue espíritú ñá túú ní cuíní cada ndáá xínú cuèchi núú-gá ní cùu, chi ní dáquihí<sup>n</sup> ñáhá-gá xii-xi ñ<sup>n</sup> xichi núú ïo ndòho-xi ndecu-xi, te xíá<sup>n</sup> cundedí nihnu-xi ndéé sáá nduu cuíta nihnu duu<sup>n</sup>-ná-xi. <sup>5</sup> Te Yá Ndiöxí ñá túú ní quide cahnu tucu iní-gá nchaa sá nĩ quide ñáyiü ñuyíü ðihna, chi ðává-á<sup>n</sup> nĩ dándáá-gá ndute ñuyíü nĩ cáhá nchaa ñáyiü ndècu ichi cuehé ichi duha te ñ<sup>n</sup> ðii-ni té Nöé ndihi úsá-gá tucu cue ñáyiü cùu ndí mee-dé ní dácäcu nihnu-gá. Te té Nöé-á<sup>n</sup> cúú-dé téé ní cáhá<sup>n</sup> dóho-yu nácuaá cada váha-yu cundecú-yu ni cùu te ñá túú ní cuíní-yu.

<sup>6</sup> Te Yá Ndiöxí ní dángává-gá ñuhú ní dánáá-gá ñáyiü ñuú Sòdomá ndihi ñáyiü ñuú Gòmorrá te mee-ná yáá nĩ nduu ñuú-á<sup>n</sup>. Te sá dúcá<sup>n</sup> nĩ cuu xíá<sup>n</sup> cút-nùní iní-ó nácuaá cada ñaha Yá Ndiöxí xii nchaa ñáyiü ñá túú quide váha.

<sup>7</sup> Dico té Löt téé ní quide ndáá ní xín-decu ñ<sup>n</sup> ñuú-á<sup>n</sup> ðává-á<sup>n</sup> chi ní dácäcu nihnu ñaha-gá xii-dé. Te nchaa ñáyiü ñuú núú nĩ xín-decu-dé-á<sup>n</sup> ïo ní xín-duu cuihna iní-yu, te mee-ni ìchi ðíí ñí ní xín-decú-yu, te sá dúcá<sup>n</sup> nĩ xóo cadá-yu xíá<sup>n</sup> ío ní ndíhú iní té Löt. <sup>8</sup> Te ñ<sup>n</sup> nduu ñ<sup>n</sup> nduu ní xóo cada ndàhú-xi iní té Löt-á<sup>n</sup> cuendá nchaa tnühu cuèhé tnühu duha ní xóo cáhá<sup>n</sup>-yu ní xóo cundedóho-dé, ndihi cuendá nchaa sá cuèhé sá dúhá nĩ xóo cadá-yu ní xóo quiní-dé, te mee-dé ní cuu-dé ñ<sup>n</sup> téé ní xín-duu vii ní xín-duu

váha iní-xi núú Yá Ndiöxí. <sup>9</sup> Te sá dúcá<sup>n</sup> nĩ yáha té Nöé ndihi té Löt, xíá<sup>n</sup> cút-nùní iní-ó sá Yá Ndiöxí ío chindee-gá cue ñáyiü quide ndáá ndécú ichi-gá cuendá sá vã cadá-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiöxí càchí-gá sá ncháá ñáyiü ndècu ichi cuehé ichi duha sa ndècu túha-yu sá quihí<sup>n</sup>-yu núú ùhú núú ndàhú nduu na yáha cundáá cuèchi-yu.

<sup>10</sup> Te uu<sup>n</sup>-gá cada ñaha Yá Ndiöxí xii nchaa cue téé ndècu ichi ðíí ñí, te dàquee tñhú-güedé nchaa tnühu sá sánú ìchi ñaha xii-o nacuáa cada-o cundecu-o, te cùu-güedé cue téé ñíí iní-xi, te yíí ñí-güedé, te ñá túú yùhú-güedé cáhá<sup>n</sup> úhú-güedé cuendá nchaa espíritú cúnùu.

<sup>11</sup> Te cue espíritú xínú cuèchi núú Yá Ndiöxí ío cùnuu-xi dacúúxí cuè téé-á<sup>n</sup>, dico ñá túú cùyí-xi cáhá<sup>n</sup>-xi dàtná càhá<sup>n</sup> cue téé-á<sup>n</sup> òré ndácá<sup>n</sup> cuèchi-xi núú Yá Ndiöxí cuendá nchaa sá quidé cuè espíritú cündìhi yucu ñáváha.

<sup>12</sup> Te nchaa cue téé dandàhú ñáhá xii-ndo-á<sup>n</sup> cúú-güedé dàtná cue quiti, chi cue quiti-á<sup>n</sup> ñá túú ndècu sá xíní tnùní-güedi, chi cue quiti-á<sup>n</sup> nĩ cacu-güedi sá tníí-ó-güedi te cahni-o-güedi. Te duca<sup>n</sup> sàtnhá-xi cùu nchaa cue téé-á<sup>n</sup>, chi càhá<sup>n</sup> cuèhé-güedé cuendá ndèdani càa espíritú cuèi ñá túú xíní-güedé ná espíritú cúú-xí, te ðiu-ni mee-güedé dácuita nihnu-güedé méé-güedé sá dúcá<sup>n</sup> quide-güedé, <sup>13</sup> te sáá nduu te nacháhu-güedé nchaa sá quidé-güedé-á<sup>n</sup>, te cuèi nduu cuèi niú cúdíí ñí-güedé quidé-güedé nchaa núú sã cuèhé sá dúhá sàni iní-güedé. Te òré nàtacá-ndó càda-ndo ñ<sup>n</sup> vico chiñuhu-ndo Yá Ndiöxí te chitnahá ñáhá-güedé xii-ndo, te cada dusa<sup>n</sup>-güedé sá cúdíí ñí-güedé sá dándàhú ñáhá-güedé xii-ndo, te ðicó sácá<sup>n</sup>-núú cuàha ñaha-güedé xii-ndo ðuca<sup>n</sup> na cada-güedé.

<sup>14</sup>Te nchaa cue tée-á<sup>n</sup> òré xini-güedé ìí<sup>n</sup> ñáyiú ðíhí te ndíhi-ni sàni iní-güedé cáhá<sup>n</sup> ndíhi ñaha-güedé xíi-yu, te ñá túú ndüu vétú iní-güedé cuendá nchaa sá cuèhé sá dúhá quide-güedé chi uu<sup>n</sup>-gá uu<sup>n</sup>-gá sání iní-güedé cada-güedé. Te cuáhá<sup>n</sup>-güedé dándàhú-güedé nchaa ñáyiú ñá túú nihí ndéé càda ndáá cuendá canchicú<sup>n</sup> nihnú-yu nchaa tnúhu càhá<sup>n</sup>-güedé. Te mee-ni nchàa sá ndécú ndíhi taha ñáyiú-güedé cúú iní-güedé, te cue tée-á<sup>n</sup> cúú-güedé cue tée duu<sup>n</sup> duu<sup>n</sup> sa ní xíta nihnu núú Yá Ndiöxí. <sup>15</sup>Chi cùu-güedé cue tée vá cáni-gá iní-xi cada ndáá, te nchicú<sup>n</sup> nihnu-ná-güedé quidé-güedé nàcuáa ní xóo cada ndíi Bàlaám déhe ndíi Bèór, chi ndíi Bàlaám-á<sup>n</sup> ní xóo tnahá iní ndíi cada ndíi chùu<sup>n</sup> cuehé nàcuáa ní xóo níhí ndíi díhú<sup>n</sup>. <sup>16</sup>Te Yá Ndiöxí ní quide-gá ní cáhá<sup>n</sup> búrru ndíi ní tenáá ñáhá-dí xii ndíi cuendá sá vǎ cáda ndíi ìí<sup>n</sup> cuèchi sàni iní ndíi cada ndíi ni cùu. Te sá dúcá<sup>n</sup> ní cuu xíá<sup>n</sup> ní nguítuu ndíi ñá túú ní quide ndíi ìí<sup>n</sup> sá ñà túú nàndíhi sàni iní ndíi ni cùu.

<sup>17</sup>Te nchaa cue tée duca<sup>n</sup> xíquide cùu-güedé dàtná ìí<sup>n</sup> doco yíchí, te cùu tucu-güedé dàtná ìí<sup>n</sup> vícǎ sǎ xídó táchí te ñá túú dáú nchídó-xí, te sa ndècu túha ìí<sup>n</sup> xichi núú ìo nee quíhí<sup>n</sup>-güedé cundecu-güedé ní caa ní quíhí<sup>n</sup>. <sup>18</sup>Te cue tée-á<sup>n</sup> càhá<sup>n</sup>-güedé dàtná càhá<sup>n</sup> ìí<sup>n</sup> tée ìo cùu cahnu dico ñá túú vèdana nàndíhi nchaa tnúhu càhá<sup>n</sup>-güedé, te cue tée-á<sup>n</sup> dándàhú-güedé nchaa ñáyiú íchí ní dáñá ìchi cuehé ìchi duha, te xǎha<sup>n</sup>-güedé xíi-yu sá cúú-ní càdá-yu nchaa sá cuèhé sá dúhá quide nchaa ñáyiú ndècu ìchi díí iní, <sup>19</sup>te xǎha<sup>n</sup> tùcu-güedé sá cúú-ní càdá-yu nání véxi iní-yu cuèi sá vǎha te cuèi sá cuèhé, dico mee-güedé chi mee-ni sǎ cuèhé sá dúhá cùnuu quide-güedé. Te nchaa ñáyiú ñá ndácú dàña nándí sá cuèhé sá dúhá cùu-yu dàtná ìí<sup>n</sup> ñáyiú xinu

cuechi ñá túú tnàhí dàñá quee núú chíú<sup>n</sup> pàtróó<sup>n</sup>-xi. Te duca<sup>n</sup> sátnahá-xi cùu-yu chi ñá ndácú-yu dàñá-yu nándí sá cuèhé sá dúhá quidé-yu. <sup>20</sup>Te núú ñáyiú sa ní dáñá nchàa ìchi cuehé ìchi duha cuendá sá ní cutnùnì iní-yu nàcuáa ndüu tnúhu Xítohó Jesucristú, Yá ní dácácu nihnu ñaha xii-o núú ùhú núú ndàhú ná nànchocáva iní-yu cundecu tucú-yu ìchi cuèhé ìchi duha, te mee-nǎ sá cuèhé sá dúhá tàxi tnuní ñáhá-xí xíi-yu, te núú duca<sup>n</sup> te vǎa-gá tucu cadá-yu dàcúxí dàtná ní xóo cadá-yu cùtnàhá vátá cùtnùnì-gá iní-yu nàcuáa ndüu tnúhu-gá. <sup>21</sup>Te vǎha-gá sá vǎ ngúnu ìchí-yu ìchi ndáá ní cùu te ñá díú sǎ sà ní ngúnu ìchí-yu te ní dáñá-yu nchaa tnúhu-gá sá sà ní níhí-yu ndècu ndíhí-yu sànu ìchi ñaha-xi nàcuáa cundecú-yu ni cùu. <sup>22</sup>Te ñáyiú duca<sup>n</sup> xíquide quèe ndáá-xi nàcuáa cuáhá<sup>n</sup> ìí<sup>n</sup> cuendú sá càchí-xi: “Iná ní nacaxi-dí sá ní ndusa<sup>n</sup>-dí, te cùchí quití íchí ní xichi ndute càndoo cuáhá<sup>n</sup>-ni tucu-dí cuchi ñuhu-dí núú ndèhyú”, duha cuáhá<sup>n</sup> cuendú-á<sup>n</sup>.

### Xítohó Jesucristú quixi tucu-gá

**3** Te nchaa nchòhó ñáyiú ìo cùu iní-í cùtnuní iní-í sá ìo vǎha sàni iní-ndó, te xéhé cúú-xí tùtú cúú ùú càdúha-í sá cúú-xí-ndó, te ìí<sup>n</sup>-ni càhá<sup>n</sup>-í dándàcu iní ñáhà-í xii-ndo nchàa tnúhu sá sà ní xíndedóho-ndo. <sup>2</sup>Chi cuiní-í sá vǎ nàcuànaa-ndo nchaa tnúhu ní cáhá<sup>n</sup> nchaa cue tée ní xóo cáhá<sup>n</sup> tnúhu Yá Ndiöxí ndéé sanaha, te ni vǎ nàcuànaa-ndo nchaa tnúhu ní cáhá<sup>n</sup> cue tée ní cáhá<sup>n</sup> tnúhu Xítohó Jesucristú Yá ní dácácu nihnu ñaha xii-o núú ùhú núú ndàhú, chi diu nchaa tnúhu-á<sup>n</sup> sánú ìchi ñaha-xi xii-o nàcuáa cada-o cundecu-o.

<sup>3</sup>Te ìo-gá xíní ñùhu-xi cutnuní iní-ndó nàcuáa cada-xi òré vátá sàa-gá nduu quixi tucu Xítohó Jesucristú ñuyíú-a, te càchí tnúhu-í xii-ndo sǎ cùndècu ñáyiú

cuhu<sup>n</sup> iní mee-ni nchàa sá cuèhé sá dúhá te mee-ni xǎ<sup>n</sup> cada-yu, te cáhá<sup>n</sup> cuèhé cáhá<sup>n</sup> duhá-yu cuèndá tnúhu Yá Ndiöxí. <sup>4</sup>Te cachí-yu: “Ná ndàá sá quíxí Xí-tohó Jesucristú ñuyú-a, chi núu quixi-gá te sá ndéé ama-gá sa ní quexio-gá ní cùu. Te dàtná-ni quide-xi vitna diu-ni duha ní quesaha-xi quide-xi ndéé cút-nàhá ní ngáva ñuyú, te diu-ni duha quide-xi ndéé cút-nàhá ní xíndecu cue ñaní tnàhá-ó ndéé sanaha, te diu-ni duha quide-xi ndéé ní sáá nduu ní xíhí-güedé, te diu-ni duha quide-xi ndéé vitna”, duha cáhá<sup>n</sup>-yu. <sup>5</sup>Te ñucù<sup>n</sup> cada-yu vǎ cádá cuèndá-yu sá Yǎ Ndiöxí ní cáhá<sup>n</sup>-gá te ní ngúndecu andiu ndíhi ñuyú-a, te diu-gá ní quide ní quene ñuhu yíhí xití ndute ní ngúndecu-xi ñ<sup>n</sup> xio. <sup>6</sup>Te ñ<sup>n</sup> xito ní dándáá Yǎ Ndiöxí ndute ñuyú-a ní dánáá-gǎ nchaa sá ió. <sup>7</sup>Te Yǎ Ndiöxí ní cachí-gá sá cúndècu-ni ñuyú-a ndíhi andiu ndéé ná sáá nduu càda-gá nchaa nàcuáa ní cáhá<sup>n</sup>-gá sá cúu-xí nchàa ñáiyu ndècu ichi cuehé ichi duha, te dàvá-á<sup>n</sup> danàa-gá nchaa ñáiyu-á<sup>n</sup> chi cáyú andiu ndíhi ñuyú-a.

<sup>8</sup>Te nchaa nchòhó ñáiyu ío cùu iní-í, ío cuhu<sup>n</sup> iní-ndó tnúhu na càhá<sup>n</sup>-í-a, chi Yǎ Ndiöxí ñá túú sàni iní-gá dàtná sání iní méé-ó, te ñ<sup>n</sup> nduu cùu-xi datná úxí cièndú cuíá, te úxí cièndú cuíá-á<sup>n</sup> cúu-xí dàtná ñ<sup>n</sup> nduu sá cúu-xí-gǎ. <sup>9</sup>Te Yǎ Ndiöxí ñá túú dàna ndodo iní-gá vǎ cádá-gǎ ñ<sup>n</sup> sá càhá<sup>n</sup>-gá dàtná càhí cue ñáiyu sá dáná ndòdo iní-gá cada-gá ñ<sup>n</sup> sá càhá<sup>n</sup>-gá, chi ñucù<sup>n</sup> tnahí dàcaca-gá nduu cuèndá sá ío cùndahú iní ñáhá-gǎ xii-o, te cuíní-gá sá ncháá ñáiyu ndixi túú iní-yu sá ñà túú quide váha-yu ndècú-yu te tuhá-yu ichi-gá, te duca<sup>n</sup> quide-gá chi cuíní-gá sá vǎ cuíta nihnu ní ñ<sup>n</sup>-yu.

<sup>10</sup>Te dàtná quidé cue ñadúhú quíhu-güedé ñ<sup>n</sup> vehe dùhu-güedé òré ñá túú yíhi iní xítohó vehe-á<sup>n</sup>, te duca<sup>n</sup> càda Xítohó Jesucristú chi nduu ñà túú

yíhi iní ñáiyu ñuyú-a quixi tucu-gá, te dàvá-á<sup>n</sup> cada-xi andiu dàtná quidé-xí òré níhi víhi cahá<sup>n</sup> ñúhu, te diu-ni òré-á<sup>n</sup> ndoñuhu àndiu, te cáyú nchaa chódíní, te cáyú tucu tnàhá ñuyú-a ndíhi nchaa sá ió.

<sup>11</sup>Te vitna nchòhó sa xíní-ndó sǎ náá ñuyú-a te xǎ<sup>n</sup> ío xíni ñuhu-xi cada váha-ndo cùndecu-ndo, te cada-ndo nàcuáa cuíní méé Yǎ Ndiöxí cunduu. <sup>12</sup>Te ío nducu ndèe-ndo duca<sup>n</sup> cada-ndo cuèndá duca<sup>n</sup> ndíhi-ni sáá nduu càda-gá nchaa nàcuáa càhá<sup>n</sup>-gá, te duca<sup>n</sup> nchòhó cundecu túha-ndo sáá nduu-á<sup>n</sup>. Te diu-ni nduu-á<sup>n</sup> ndoñuhu àndiu chi cáyú-xi, te diu-ni duca<sup>n</sup> ndoñuhu tucu nchaa chódíní chi ndíhi-dí cáyú. <sup>13</sup>Te nchoo ndètu-o sáá nduu cùndecu-o ñ<sup>n</sup> ñuyú sáá, te quíní-ó ñ<sup>n</sup> andiu saa datná ní cachí Yǎ Ndiöxí, te yàcá<sup>n</sup> chi mee-nǎ cue ñáiyu quide váha cundecu.

<sup>14</sup>Te nchòhó ñáiyu ío cùu iní-í, nini ndètu-ndo sáá nduu dùca<sup>n</sup> cada-xi ío nducu ndèe-ndo cada-ndo mee-ni sá váha cundecu-ndo ichi Yǎ Ndiöxí, te cundecu nahi-ndo, te cada-ndo nchàa nàcuáa vǎ cùndècu cuéchi-ndo núú-gǎ. <sup>15</sup>Te ío cada cuèndá-ndó sǎ dàcaca-gá nduu dùca<sup>n</sup> cada-gá chi cuíní-gá sá ncháá ñáiyu naníhí tàhú-yu. Te té Páblú téé ío cùu iní-ó ndècu ndíhi-o ichi Xí-tohó Jesucristú diu-ni nàcuáa càhá<sup>n</sup>-í-a diu-ni duca<sup>n</sup> ní tee-dé ñ<sup>n</sup> núú tütú ní dáquixí-dé ndaha-ndo, te ní tee-dé nàcuáa ní dácáhu iní ñáhá Yǎ Ndiöxí xii-dé. <sup>16</sup>Te diu-ni duca<sup>n</sup> càhá<sup>n</sup>-dé nchaa dáva-gá núú tütú cáduha-dé, te dáva tnúhu càhá<sup>n</sup>-dé ío úhú tecú tnùní-ó, núú xǎ<sup>n</sup> ñáiyu ñá túú cùtnuní váha iní-xi, ñáiyu ío yáchí sàndáá iní-xi ñ<sup>n</sup> tnúhu, ñáiyu-á<sup>n</sup> tècú tnùní dátñi-yu nchaa tnúhu ní chídó tnùní-dé, ndíhi nchaa dáva-gá tnúhu yòdo tnuní núú tütú Yǎ Ndiöxí, te sá dúcá<sup>n</sup> quidé-yu te dacuíta nihnú-yu mèe-yu.



<sup>17</sup>Te nchòhó ñáyiú ío cùu iní-í, sa cùtnuní iní-ndó nàcuáa quède dava ñáyiú, núu xíǎ<sup>n</sup> ío xìni ñuhu-xi quíhi iní-ndó cùndecu-ndo cuendá duca<sup>n</sup> cùndecu-ni-ndo ichi-gá, te vá dáñá-ndó mèe-ndo dandahú ñáhá nchàa cue tée ndècu ichi cuehé ichi duha, chi cue tée-á<sup>n</sup> ñà túú sàni váha iní-güedé cuendá tnúhu Yá Ndiǒxí. Te núu na dàña-ndo mee-ndo dandahú ñáhá-güedé xii-ndo te vá cùndècu váha-gá-ndó ichi-gá dàtná ndécú-ndó vitna. <sup>18</sup>Te

nchòhó uu<sup>n</sup>-gá uu<sup>n</sup>-gá cuita cutnùní-gá iní-ndó quíhi<sup>n</sup> nchaa nàcuáa ta chindee ñaha Xítóhó Jesucristú xii-ndo cuáhá<sup>n</sup>. Te duca<sup>n</sup> ïo-gá cuita cutnùní iní-ndó nchàa nacuáa sàni iní-gá, te ñiu-gá cúú-gǎ Yaá ní dácăcu nihnu ñaha xii-o núú ùhú núú ndàhú. Te chí ná càchí-ó sǎ ïo càhnu cuu-gá cuéi vitna té cuéi ndéé núú cuáhá<sup>n</sup> núú vǎxi. Te duca<sup>n</sup> na cùnduu. Te ío chí cádá ndèe iní-nǎ vitna.

## TUTÚ DÍHNA NÍ CADÚHA TĒ JUÀÁ

### Tnúhu sá càhá<sup>n</sup> nàcuáa naníhí tǎhú-ó

**1** Te yúhú té Juàá càchí tnúhu-í xii-ndo cuendá Cristú Yaá càhá<sup>n</sup> nàcuáa cundecu ndihi-o Yǎ Ndiöxí. Te Cristú-á<sup>n</sup> sa ndècu-gá ndéé cút-nàhá ní ngáva ñuyúú. Te yúhú ní xiní núu-í ndihi tée ní xica cuu ndihi-í nàcuáa càa nacuáa ndùu-gá. Te ní xindedóho-ndí tnúhu ní cáhá<sup>n</sup>-gá, te ní tendaha-ndí-gá te ní cutnùní ndáá iní-ndí sá ì<sup>n</sup> yiqui cuñú cúú-gǎ. <sup>2</sup>Te ní quixi túu-gá ñuyúú-a, te ní xiní-ndí-gá, te xǎ<sup>n</sup> càchí tnúhu ndáá-ndí xii-ndo. Te càchí tnúhu tucu-ndí sá ndécú-gǎ ndihi Tǎtá-gǎ Dútú Ndiöxí ní cùu, te ní quixi-gá ñuyúú-a ní xindecu-ndí ndihi-gá. Te ní cachí tnúhu-gá xii-ndí sá ndúú tǎhú-ó cundecu ndihi-o Yá Ndiöxí ní caa ní quíh<sup>n</sup> te núu na quíndáá iní-ó-gǎ. <sup>3</sup>Te xǎ<sup>n</sup> dátúu-ndí núu-ndó nchàa sá ní xiní-ndí, ndihi nchaa sá ní xindedóho-ndí cuendá cuu ì<sup>n</sup>nuu-o nchàa-o datná nchúhú cúú ì<sup>n</sup>nuu-ndí ndihi Tǎtá-ó Dútú Ndiöxí, ndihi Déhe-gá Xítóhó Jesucristú. <sup>4</sup>Te xǎ<sup>n</sup> núu tèe-í nchaa tnúhu-a cuendá cud-í iní-ó nchàa-o.

### Yá Ndiöxí cúú-gǎ dàtná ì<sup>n</sup> ñuhú

<sup>5</sup>Te nchaa tnúhu ní dánèhé ñáhá Xítóhó Jesucristú xii-ndí, xǎ<sup>n</sup> dánèhé ñáhá-í xii-ndo. Te ní cachí-gá sá Yǎ Ndiöxí cúú-gǎ dàtná ì<sup>n</sup> ñuhú dáyèhé-gá iní-ó, te duca<sup>n</sup> sǎtnahá-xi cùu-gá chi ío váha quide-gá, te ñá túú quide-gá ní ì<sup>n</sup> sá cuèhé sá dúhá. <sup>6</sup>Te núu càchí-ó sǎ ndécú-ó ìchi Yá Ndiöxí, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó núú-gǎ. <sup>7</sup>Te núu na càda váha-o dàtná quidé mèe-gá, te cuu ì<sup>n</sup>nuu-o nchàa-o.

Te ndada ndoo ndada nine-gá iní-ó, chi cada càhnu iní-gá nchaa sá cuèhé sá dúhá quide-o, chi diu cuendá-á<sup>n</sup> ní xíhí Déhe-gá Xítóhó Jesucristú núu cùrúxí.

<sup>8</sup>Te núu càchí-ó sǎ ñá túú quide-o ní ì<sup>n</sup> sá cuèhé sá dúhá, te dándahú-ó mèe-o, te ñá túú quide ndáá-ó núú Yǎ Ndiöxí. <sup>9</sup>Te núu na nàhmá-ó nchàa yíca cuèchi-o núú-gǎ, te mee-gǎ cada càhnu iní-gá, te ndada ndoo-gá iní-ó, cuendá cada ndáá-ó cundecu-o ìchi-gá, chi mee-gá ío váha quide-gá te ío ndáá quidé-gǎ, duca<sup>n</sup> ní cáhá<sup>n</sup>-gá te duca<sup>n</sup> quide-gá. <sup>10</sup>Te núu na càchí-ó sǎ ñá túú quide-o ní ì<sup>n</sup> sá cuèhé sá dúhá, te quide-o Yá Ndiöxí ì<sup>n</sup> ñándéhdé, dico ñá túú ndèhnde-gá. Te ñá túú ndècu tnúhu-gá iní-ó te núu duca<sup>n</sup> na càda-o.

### Xítóhó Jesucristú càhá<sup>n</sup> ndàhú-gá cuendá-ó

**2** Te nchòhó ñáyiú cùu datná déhe-í, chido tnuní-í nchaa tnúhu-a cuendá sá vǎ cáda-ndó ní ì<sup>n</sup> sá cuèhé sá dúhá. Dico núu ì<sup>n</sup>-ndo quide-ni-ndo nándí sá cuèhé sá dúhá, te ndècu ì<sup>n</sup> Yaá càhá<sup>n</sup> ndàhú cuendá-ó núú Yǎ Ndiöxí. Te Yaá-á<sup>n</sup> cúú-gǎ Xítóhó Jesucristú Yaá quidé ndáá. <sup>2</sup>Te ní xíhí-gá sá cuendá nchaa yíca cuèchi-o cuendá ngúndecu váha-o núú-gǎ te núu na quíndáá iní-ó-gǎ. Te ñá díú-ní sǎ cuendá yíca cuèchi nchoo ní xíhí-gá, chi tnàhá cuendá nchaa yíca cuèchi ñáyiú ní càa xico ñuyúú.

<sup>3</sup>Te núu cada-o nchàa nacuáa càhá<sup>n</sup> Yǎ Ndiöxí, te cutnùní iní-ó sǎ ndécú-ó ìchi-gá. <sup>4</sup>Te núu càchí-ó sǎ ndécú-ó ìchi-gá te ñá túú quide-o nacuáa càhá<sup>n</sup>-gá, te dàcuandehnde-o, te ñá túú quide ndáá-ó núú-gǎ. <sup>5</sup>Te núu sàndáá ndisa iní-ó tnúhu-gá, te quide-o nchaa nacuáa càhá<sup>n</sup>-gá, te duca<sup>n</sup> te cùu iní ndisa-o-gǎ, te cùtnuní ndáá iní-ó sǎ ndécú-ó ìchi-gá. <sup>6</sup>Te núu càchí-ó sǎ ndécú-ó ìchi Yá Ndiöxí, te xiní ñuhú-xi

cada ndáá-ó cùndecu-o ñuyú-a datná ní quide ndáá Xítoho Jesucristú cùtnàhá ní xíndecu-gá ñuyú-a.

### Nduú sáa

<sup>7</sup>Te nchòhó ñáyiu ndècu ndihi-í ichi Xítoho Jesucristú, ñá túú chido tnumí-í ìí<sup>n</sup> tnúhu saa sà cúu-xí-ndó, chi diu-ni tnúhu sá ní ngúndecu ndihi-ndo ndéé cùtnàhá ní sándáá iní-ndó-gá, xíá<sup>n</sup> chídó tnùn-í. <sup>8</sup>Te tnúhu-a cùu-xi datná ìí<sup>n</sup> tnúhu saa tè-í dándacu iní ñàhà-í xii-ndo nàcuáa ní quide Xítoho Jesucristú cùtnàhá ní quixi-gá ñuyú-a ní quide váha-gá, te tnàhá nchòhó ní tñii-ndo tnúhu-gá te quide váha-ndo tnàhá-ndó. Te vitna ìí<sup>n</sup> nduu ìí<sup>n</sup> nduu ta cùu vai ñáyiu ta dàña nchaa sá cuèhé sá dúhá cuáhá<sup>n</sup>, chi Xítoho Jesucristú tá dándixi túu-gá iní-yu cuendá cutnùn-í iní-yu nàcuáa nduu cuendá Yá Ndiòxí.

<sup>9</sup>Te núu càchí-ó sá quidé váha-o, te cùu úhú iní-ó tnàhá ñáyiu-o, te xíá<sup>n</sup> ñá túú quide ndáá-ó, chi ndècu-ni-o ichi cuehé ichi duha sá dúcá<sup>n</sup> quide-o. <sup>10</sup>Te núu na cùu iní-ó tnàhá ñáyiu-o datná cúu iní ñàhá mèe Yá Ndiòxí xii-o ña, te quide ndáá-ó nùú-gá, te vá cánùichi-o tnàhá ñáyiu-o ìí<sup>n</sup> ichi cuehé ichi duha. <sup>11</sup>Te núu cùu úhú iní-ó tnàhá ñáyiu-o, te ñá túú quide váha-o nùú Yá Ndiòxí, chi ndècu-ni-o ichi cuehé ichi duha, te ñá túú cùtnuní iní-ó sá quidé-ó. Chi cùu-o datná ìí<sup>n</sup> té ndècu núu nées chi ñá cùtnuní núu-dé ndéé ichi quíhí<sup>n</sup>-dé. Duca<sup>n</sup> sàtnàhá-xi cùu nchoo chi ñá cùtnuní iní-ó ndéé ichi quíhí<sup>n</sup>-ó te núu duca<sup>n</sup> na càda-o cuu úhú iní-ó tnàhá ñáyiu-o.

<sup>12</sup>Te nchòhó ñáyiu cùu datná déhe-í, yúhú chídó tnùn-í tnúhu-a ìí<sup>n</sup> núu tütú càchí tnúhu-í xii-ndo sá ní quide càhnu iní Yá Ndiòxí nchaa cuéchi-ndo, chi diu cuendá-án ní xíhí Xítoho Jesucristú. <sup>13</sup>Te nchòhó ñáyiu sacuéhé, yúhú té-í tnúhu-a sá cúu-xí-ndó chi càhá<sup>n</sup>

ndihi-ndo Jèsús, te Yaá-á<sup>n</sup> sa ndècu-gá ndéé cùtnàhá ní ngáva ñuyú. Te nchòhó ñáyiu nchicú<sup>n</sup>-gá téé tucu-í tnúhu-a sá cúu-xí-ndó chi ñá túú sándáá iní-ndó tnúhu càhá<sup>n</sup> yucu ñávàha.

Te nchaa nchòhó ñáyiu cùu datná déhe-í, tèe tucu-í tnúhu-a sá cúu-xí-ndó, chi sa càhá<sup>n</sup> ndihi-ndo Tàtá-ó Dütú Ndiòxí. <sup>14</sup>Te nchòhó ñáyiu ni sàhnu, yúhú chídó tnùn-í tnúhu-a ìí<sup>n</sup> núu tütú chi càhá<sup>n</sup> ndihi-ndo Jèsús, te Yaá-á<sup>n</sup> sa ndècu-gá ndéé cùtnàhá ní ngáva ñuyú. Te nchòhó ñáyiu nchicú<sup>n</sup>-gá, yúhú chídó tnùn-í tnúhu-a chi ío nihí ndéé-ndó ndècu-ndo, chi tñii-ndo tnúhu càhá<sup>n</sup> Yá Ndiòxí. Te ñá túú sándáá iní-ndó tnúhu càhá<sup>n</sup> yucu ñávàha.

<sup>15</sup>Te vá cùhú<sup>n</sup> iní-ndó nì ìí<sup>n</sup> sá cuèhé sá dúhá ío ñuyú-a, te nì vǎ cání iní-ndó càda-ndo. Chi núu na cùu<sup>n</sup> iní-ó nchàa sá cuèhé sá dúhá ío ñuyú-a ña, te ñá túú Tàtá-ó Dütú Ndiòxí ñúhú iní-ó te núu duca<sup>n</sup> na càni iní-ó. <sup>16</sup>Te nchaa ñáyiu ñuyú-a quidé-yu nchaa sá cuèhé sá dúhá, chi diu nchaa xíá<sup>n</sup> cùdǎ iní-yu cadá-yu. Te nchaa sá cuèhé sá dúhá sàni iní-yu, ndihi nchaa sá xìn-í-yu quidé-yu. Te xíquide nín-yu mèe-yu cuendá nchaa sá ndécú ndíhí-yu. Te nchaa sá ñà túú vǎha ní cacu nihnu-xi ñuyú-a. <sup>17</sup>Te nchaa sá ñà túú vǎha ío ñuyú-a, ndihi nchaa sá sání cuèhé sání dùha iní-yu cuita ndihi nihnu-xi quíhí<sup>n</sup>. Te nchaa ñáyiu tñii tnúhu càhá<sup>n</sup> Yá Ndiòxí cundecú-yu ndihi-gá nì caa nì quíhí<sup>n</sup>.

### Tnúhu ndáá tnúhu Yá Ndiòxí ndihi tnúhu ndehnde

<sup>18</sup>Te nchòhó ñáyiu cùu datná déhe-í, sa nihí-ndó tnúhu sá quíxí ìí<sup>n</sup> téé cunuu-gá-dé cuu úhú iní-dé Cristú. Te sa xíndecu-gá ñáyiu cùu úhú iní ñàhá xii-gá, núu xíá<sup>n</sup> cùtnuní iní-ó sá sá ta cuyatni nduu naa ñuyú-a. <sup>19</sup>Te ñáyiu-á<sup>n</sup> ní xíndecu ndihi ñàhá-yu xii-o,

te ní queé-yu cuáhá<sup>n</sup>-yu chi ñá túú ní cùu ì<sup>n</sup>nuu-o ndìhí-yu. Chi núu dícó ní cùu ì<sup>n</sup>nuu-o ndìhí-yu te cundecu ndìhí ñáhá-yu xii-o ni cùu. Te duha ní cuu cuendá cutnùní ndáá iní-ó nchàa-o sá ñá túú cùu ì<sup>n</sup>nuu-o ndìhí-yu, chi ñá túú sàndáá iní-yu Yá Ndiöxí.

<sup>20</sup> Te Xítoho Jesucristú ní taxi-gá Espiritú Yá Ndiöxí ndécú ndìhi-o, núu xíá<sup>n</sup> təcú tnùní-ó tnúhu-gá. <sup>21</sup> Te cuendá sá xìní-ndó tnúhu ndáá tnúhu Yá Ndiöxí núu xíá<sup>n</sup> tée-í tnúhu-a, te ñá díú ì<sup>n</sup> sá ñá cútùníní iní-ndó cùu-xi. Te sa nàha-ndo sá ni ì<sup>n</sup> tnúhu ndehnde ñá túú ñùtnahá-xi núu tnúhu Yá Ndiöxí, chi mee nìne-ni tnúhu ndáá cùu-xí.

<sup>22</sup> Te nchaa ñáyiú cächí sá ñá díú Jèsús cùú Cristú Yaá ní tendaha Yá Ndiöxí ní quixi ñuyíú-a dàcuandehndé-yu, te cùu úhú iní-yu Jèsús. Te diu-ní-yu cächí-yu sá ñá díú Dèhe Yá Ndiöxí cùú Jèsús, te sá dúcá<sup>n</sup> quidé-yu te cùu úhú iní-yu Yá Ndiöxí ndìhi Déhe-gá Jèsús. <sup>23</sup> Te nchaa ñáyiú ñá túú sàndáá iní sá Dèhe Yá Ndiöxí cùú Jèsús, ñáyiú-á<sup>n</sup> ñá túú ndécú-yu ichi Tátá-ó Dütú Ndiöxí. Te nchaa ñáyiú càhá<sup>n</sup> sá Dèhe Yá Ndiöxí cùú Jèsús, ñáyiú-á<sup>n</sup> ndécú-yu ichi Tátá-ó Dütú Ndiöxí.

<sup>24</sup> Te nchaa tnúhu Yá Ndiöxí ní tecú dóho-ndo ndèé díhna, tnúhu-á<sup>n</sup> cuhu<sup>n</sup> iní-ndó. Te núu nchaa tnúhu-á<sup>n</sup> ná cùhu<sup>n</sup>-ni iní-ndó, te cundecu ndìhi-ndo Yá Ndiöxí ndìhi Déhe-gá cuéi vá cùndècu túu-ndo ndìhi-gá ñuyíú-a. <sup>25</sup> Te Jèsús ní cachí-gá sá ndúú tǎhú-ó cùndecu ndìhi-o-gá ni caa ni quíh<sup>n</sup> andíu.

<sup>26</sup> Te cuendá nchaa ñáyiú dándahú ñáhá xii-ndo ní chídó tnùníní-í tnúhu-a, <sup>27</sup> dico nchòhó chi ndècu ndìhi-ndo Espiritú Yá Ndiöxí sá ñí taxi Xítoho Jesucristú. Núu xíá<sup>n</sup> ñá túú xìni ñuhu-ndo ñáyiú danèhé ñáhá xii-ndo, chi mee Espiritú-gá dánèhé ñáhá-xí nchàa sá vǎha. Te nchaa sá dánèhé ñáhá-xí xii-ndo cuu-xi sá ndáá, te ñá díú ì<sup>n</sup>

tnúhu ndehnde. Te vitna chí cǎnchícú<sup>n</sup> nihnu-ni ichi Yá Ndiöxí dàtná ní sanu ichi ñaha mée Espiritú-gá xii-ndo.

<sup>28</sup> Te nchòhó ñáyiú cùu datná déhe-í, chí cǎnchícú<sup>n</sup> nihnu-ni ichi Xítoho Jesucristú, chi cuendá òré ná quixi tucu-gá ñuyíú-a te vá yùhú-ndó te ni vá cùú càha<sup>n</sup> núu-ndó nùú-gǎ. <sup>29</sup> Te nchòhó sa nàha-ndo sá mée-gǎ quidé ndáá-gǎ, te sa xìní-ndó sá ncháá ñáyiú quide ndáá cùu-yu déhe Yá Ndiöxí.

### Ñáyiú cùu déhe Yá Ndiöxí

**3** Te chí cuàha cuendá sá ìo cùu iní ñáhá Tátá-ó Dütú Ndiöxí xii-o cuendá sá cùú-ó déhe-gǎ, chi duca<sup>n</sup> ñí cachí-gǎ, te déhe ndisa-gǎ cùú-ó. Te núu xíá<sup>n</sup> ñáyiú ndècu ichi cuehé ichi duha ñá cùú quini ñáhá-yu xii-o, chi ñá túú xìní-yu nàcuáa ndùu cuendá Yá Ndiöxí. <sup>2</sup> Te nchòhó ñáyiú ìo cùu iní-í, vitna cùu-o déhe Yá Ndiöxí, te vátá cútùníní váha-gǎ iní-ó nǎsa cunduu-o ndèé núu cuáhá<sup>n</sup> núú vèxi. Dico sa cùtnuní iní-ó sǎ òré ná quixi tucu Xítoho Jesucristú te nduu-o dàtná cáá mée-gǎ, chi quini-ó-gǎ nàcuáa-ni càa nacuáa-ni ndùu-gǎ. <sup>3</sup> Te nchaa ñáyiú sa ndètu ñaha xii-gǎ sa ta ngündecu túha-yu cuáhá<sup>n</sup>, chi ta ndùu ndoo nduu nine iní-yu cuáhá<sup>n</sup> dàtná cáá ndòo caa nine mee-gǎ.

<sup>4</sup> Te nchaa ñáyiú quide nándi sá cuehé sá dúhá ñá túú quide váha-yu núú Yá Ndiöxí, chi ní cachí-gǎ sǎ vǎ dúcá<sup>n</sup> càda-o. <sup>5</sup> Te sa nàha-ndo sǎ ñí quixi túu Xítoho Jesucristú ñuyíú-a cuendá cada càhnu iní-gǎ nchaa sǎ cuehé sǎ dúhá quide-o, chi mee-gǎ ñá túú quide-gǎ ni ì<sup>n</sup> sǎ cuehé sǎ dúhá. <sup>6</sup> Te nchaa ñáyiú ndècu ichi Yá Ndiöxí ñá túú ñùhú-yu ichi cuehé ichi duha. Te nchaa ñáyiú ñuhu ichi cuehé ichi duha ñá túú xìní-yu nàcuáa ndùu cuendá Xítoho Jesucristú te ni ñá túú xìní-yu nása càa-gǎ. <sup>7</sup> Te nchòhó ñáyiú cùu datná déhe-í, vá dàná-ndó mée-ndo dándahú ñáhá

ñáiyu ndècu ichi cuehé ichi duha, chi cächí-yu sá cúú cùndecu-o ichi Yá Ndiöxí te cada-o nändi sá cuèhé sá dúhá dico ñá ndáá. Te nchaa ñáiyu quide váha quide ndáá-yu dàtná quidé mèe Jesús. <sup>8</sup>Te nchaa ñáiyu ndècu ichi cuehé ichi duha ndècu ndihí-yu yucu ñávãha, chi duca<sup>n</sup> quide mee-xi ndéé cùtnàhá vátá ngáva-gá ñuyúú. Te xíã<sup>n</sup> ní quixi Jèsús Déhe Yá Ndiöxí ní dáquéé tñhú-gá nchaa sá quidé yùcu ñávãha.

<sup>9</sup>Te nchaa ñáiyu ní natuha ichi Yá Ndiöxí ní nduú-yu déhe-gá, te ñá túú-gã quidè-yu nándi sá cuèhé sá dúhá chi ní ndada ndoo ní ndada nine-gá iní-yu. Núu xíã<sup>n</sup> ñá túú-gã quidè-yu nándi sá cuèhé sá dúhá, chi ní ngúndecu ndihi ñaha-gã xíí-yu. <sup>10</sup>Te cùtnuní iní-ó nändi cùu ñáiyu cùu déhe Yá Ndiöxí, te cùtnuní iní-ó nändi cùu ñáiyu cùu déhe yucu ñávãha. Te nchaa ñáiyu ñá túú quide ndáá, te cùu úhú iní-yu tnàha ñáiyú-yu, te ñáiyu-á<sup>n</sup> ñà díú déhe Yá Ndiöxí cúú-yu.

#### **Cuu iní tnáhá-ó ìí<sup>n</sup> ìí<sup>n</sup>-o**

<sup>11</sup>Te ndéé òré ní natuha-o ichi Yá Ndiöxí ní tecu dóho-o sã cúú ìní-ó tnàha ñáiyu-o. <sup>12</sup>Te vá cùndùu úhú ìní-ó dàtná ní quide ndíí Càín, chi ndíí-á<sup>n</sup> ní xíndecu ndíí ndihi yucu ñávãha núu xíã<sup>n</sup> ní sahni ndíí ñaní ndíí. Te duca<sup>n</sup> ní quide ndíí chi ní xíndecu ndíí ichi cuèhé ichi duha, te ñaní ndíí ní xíndecu-dé ichi váha.

<sup>13</sup>Te nchòhó ñáiyu ndècu ndihi-í ichi Xítohó Jesucristú, vá cádá cuèndá-ndó sã cúú ùhú iní ñáhá nchaa ñáiyu ndècu ichi cuehé ichi duha xii-ndo. <sup>14</sup>Te cunaha-ndo na cächí tnúhu-í xii-ndo sã núu na cùu iní-ó tnàha ñáiyu-o, te cùtnuní iní-ó sã sã ní dáñá-ó ichi sá tá dàcuíta nihnu ñaha xii-o cuáhá<sup>n</sup> ní cùu, te vitna ní tñi-o ichi váha. Te nchaa ñáiyu ñá túú cùu iní tnàha ñáiyu-xi ñùhu-ní-yu ichi cuáhá<sup>n</sup>-yu núú

ùhú núú ndàhú. <sup>15</sup>Te nchaa ñáiyu ñá cúú quìní ndéé tnàha ñáiyu-xi cùú-yu dàtná ìí<sup>n</sup> ñáiyu sàhni ndííyí. Te nchòhó sa nàha-ndo sá nì ìí<sup>n</sup> ñáiyu sàhni ndííyí ñá túú ndècu ndihí-yu tnúhu ndee ìní sá nánihí tãhú-yu. <sup>16</sup>Te Xítohó Jesucristú ní xíhí-gá cuèndá nchaa yíca cuèchi-o, núu xíã<sup>n</sup> cùtnuní iní-ó sã ìo cùu iní ñáhá-gã xii-o. Te xíã<sup>n</sup> cùtnuní iní-ó nàcuáa cada-o cùu iní-ó tnàha ñáiyu-o, te cuèi na cùú-ó cuèndá sá cúú-xí ìí<sup>n</sup>-yu, cuèndá-nã sá ná dàcácu nihnu-ò-yu núú tñùndòho ndecú-yu. <sup>17</sup>Te núu ndècu ndihi-o sá cóhó sã cáxi-ó ndihi nchaa sá nándihi-o, te ndècu ñáiyu ndàhú ñá túú vèdana ná ndécú ndihi, te ñá túú chindee-ó-yu, te ñá túú cùu iní-ó Yá Ndiöxí te núu duca<sup>n</sup> na càda-o. <sup>18</sup>Te nchòhó ñáiyu cùu datná déhe-í vá cuèndá-ni cùnàha cáhá<sup>n</sup>-ndó sã cúú ìní tnáhá-ndó, chi cuu ìní tnáhá ndìsa-ndo te coto tnàha-ndo.

#### **Vá yùhú-ó núú Yá Ndiöxí**

<sup>19</sup>Te núu duca<sup>n</sup> na càda-o, te cùtnuní iní-ó sã ndécú-ó ìchi ndáá ichi Yá Ndiöxí, te ñá túú-gã ná quihí iní-ó núú-gã. <sup>20</sup>Te núu ndihú iní-ó cuèndá ìí<sup>n</sup> sá ní quide-o, te sa nàha Yá Ndiöxí te núu ní quide váha-o àdi ní quide cuèhé-ó, chi sa nàha ndáá-gá nàcuáa càa iní-ó. <sup>21</sup>Te nchòhó ñáiyu ìo cùu iní-í, na cächí tnúhu-í xii-ndo, te núu ñá túú ñá sání ìní-ó te ñá túú ñá quidé-ó, te vá yùhú-ó núú Yá Ndiöxí. <sup>22</sup>Te nchaa sá váha na càcá<sup>n</sup>-ó núú Yá Ndiöxí, te mee-gã taxi-gá chi tñi-o tnúhu càhá<sup>n</sup>-gã, te quide-o nchaa nàcuáa cùu iní-gá. <sup>23</sup>Te ní cachí Yá Ndiöxí sá quìndáá iní-ó Déhe-gá Xítohó Jesucristú, te cuu iní-ó tnàha ñáiyu-o dàtná ní cachí-gá. <sup>24</sup>Te nchaa ñáiyu tñi tnúhu-gá ndécú-yu ichi-gá, te ndècu ndihi ñaha-gá xíí-yu. Te cùtnuní iní-ó sã ndécú-ó ndihi-gá chi ní taxi-gá Espiritú-gá ndécú ndihi-o.

**Ñáiyu ndècu ndihi Espíritú Yá  
Ndiöxí ndihi ñáiyu cùu úhú iní  
ñáhá xii Xítohó Jesucrístú**

**4** Te nchòhó ñáiyu ío cùu iní-í, vá cùtèxínu quindáá iní-ndó tñuhu càhá<sup>n</sup> nchaa ñáiyu càchí sá ndécú ndihi Espíritú Yá Ndiöxí. Chi díhna-gá cada cuendá váha-ndo te núu càhá<sup>n</sup> ndáá-yu nàcuáa càhá<sup>n</sup> tñuhu Yá Ndiöxí, chi ío vài ñáiyu ñuyú-a cachí-yu sá càhá<sup>n</sup>-yu tñuhu-gá dico ñá ndáá. <sup>2</sup>Te duha cutnùní iní-ó nändi cùu ñáiyu ndècu ndihi Espíritú Yá Ndiöxí. Nchaa ñáiyu càhá<sup>n</sup> ndáá sá Xítohó Jesucrístú ní quixi-gá ñuyú-a te ní cuu-gá ì<sup>n</sup> yiqui cùñú, ñáiyu-á<sup>n</sup> cùú-yu ñáiyu cùu cuendá Yá Ndiöxí. <sup>3</sup>Te nchaa ñáiyu ñá túú càhá<sup>n</sup> nàcuáa càa Jesús cùtñahá ní quixi-gá ñuyú-a ñáiyu-á<sup>n</sup> dándahú ñáhá-yu, chi ñá túú cùú-yu ñáiyu cùu cuendá Yá Ndiöxí. Te diu-ní-yu cùu úhú iní-yu Jèsús. Te nchòhó sa nàha-ndo sá cùndècu ñáiyu cuu úhú iní ñáhá xii-gá, dico yúhú càchí tñuhu-í xii-ndo sá sá ndecú-yu.

<sup>4</sup>Te nchòhó ñáiyu cùu datná déhe-í, ndècu ndihi-ndo Yá Ndiöxí, te ñá dñáá-ndó dándahú ñáhá nchaa ñáiyu càchí sá càhá<sup>n</sup> tñuhu-gá te ñá ndáá. Te ñá túú sàndáá iní-ndó chi Yá Ndiöxí Yaá ndécú ndihi-ndo taxi tñuní vñíhí-gá dàcúxí yècu ñávàha ndècu ndihi nchaa ñáiyu ñuhu ichi cuehé ichi duha. <sup>5</sup>Te nchaa ñáiyu dándahú ñáhá sá càhá<sup>n</sup> tñuhu Yá Ndiöxí ndécú-yu ichi cuehé ichi duha, te mee-ni cuendá nchaa sá ío ñuyú-a càhá<sup>n</sup>-yu. Te tédóho ñaha nchaa dává-gá ñáiyu ndècu diu-ni ichi cuehé ichi duha. <sup>6</sup>Te nchoo cùu-o ñáiyu cùu cuendá Yá Ndiöxí. Te nchaa ñáiyu xñ-decu ichi-gá tñè-yu tñuhu càhá<sup>n</sup>-ó, te nchaa ñáiyu ñá túú ndècu ichi-gá ñá túú tñè-yu tñuhu càhá<sup>n</sup>-ó. Te duha te cùt-nuní iní-ó nändi cùu ñáiyu càhá<sup>n</sup> ndáá, te

cùtnuní tucu iní-ó nändi cùu ñáiyu dándahú ñáhá.

**Cuu iní-ó tñaha ñáiyu-o datná cúú  
iní ñáhá mèe Yá Ndiöxí xii-o**

<sup>7</sup>Te nchòhó ñáiyu ío cùu iní-í, xini ñuhu-xi cuu iní tñahá-ó datná cúú iní ñáhá mèe Yá Ndiöxí xii-o, chi mee-gá táxi-gá sá xini tñuní-ó cuendá cuu iní-ó tñaha ñáiyu-o. Te nchaa ñáiyu cùu iní tñaha ñáiyu-xi cùú-yu déhe Yá Ndiöxí, te cùtnuní ndáá iní-yu sá ndécú ndihi ñaha-gá xií-yu. <sup>8</sup>Te nchaa ñáiyu ñá túú cùu iní tñaha ñáiyu-xi ñá túú ndècu ndihí-yu Yá Ndiöxí. Te nchaa ñáiyu ndècu ndihi Yá Ndiöxí, ñáiyu-á<sup>n</sup> sññaha-gá sá xini tñuní-yu cuendá cuu iní-yu tñaha ñáiyú-yu. <sup>9</sup>Te cùtnuní iní-ó sá cúú iní ñáhá Yá Ndiöxí xii-o nchaa-o, chi ní tendaha-gá ì<sup>n</sup>dii díí-ni Déhe-gá Xítohó Jesucrístú ní quixi-gá ñuyú-a cuendá sá dñú-gá cada te naníhí tñhú-ó, te núu na quindáá iní-ó tñuhu-gá. <sup>10</sup>Te ío cùu iní ñáhá Yá Ndiöxí xii-o nchaa-o. Te ñá díú sá mée-ó cùu iní-ó-gá, chi díhna-gá mée-gá sa cùu iní ñáhá tñahí-gá xii-o, núu xíá<sup>n</sup> ní tendaha-gá Déhe-gá ní quixi-gá ñuyú-a ní xihí-gá sá cuendá nchaa yíca cuèchi-o.

<sup>11</sup>Te nchòhó ñáiyu ío cùu iní-í, xini ñuhu-xi cuu iní tñahá-ó, chi mee Yá Ndiöxí ío cùu iní ñáhá-gá xii-o. <sup>12</sup>Te ní ì<sup>n</sup> nchoo ñáiyu ndècu ñuyú-a ñá túú xini-ó nàcuáa càa Yá Ndiöxí, dico nchoo ñáiyu ní tuha ichi-gá chi cùtnuní iní-ó sá ndécú ndihi ñaha-gá xii-o. Núu xíá<sup>n</sup> cúú iní tñahá-ó ì<sup>n</sup> ì<sup>n</sup>-o, te cùtnuní iní-ó sá cúú iní ndisa-o-gá. <sup>13</sup>Te cùtnuní iní-ó sá ndécú-ó ìchi-gá, te ndècu ndihi ñaha-gá xii-o, chi ní taxi-gá Espíritú-gá ndécú ndihi-o. <sup>14</sup>Te yúhú ndihi dává-gá cue tée ní xica cuu ndihi-gá càhá<sup>n</sup>-ndí sá ní xini-ndí Jèsús Déhe Yá Ndiöxí ní quixi-gá ñuyú-a, chi Tátá-ó Dütú Ndiöxí ní tendaha ñaha xii-gá ní quixi-gá cuendá dàcácu nihnu-gá nchaa nchoo

ñáiyu ndècu ñuyíú-a núú ùhú núú ndàhú. <sup>15</sup>Te nchaa ñáiyu càhá<sup>n</sup> ni yùhu ni iní-xi sá Dèhe Yá Ndiöxí cúú Jèsús, ñáiyu-á<sup>n</sup> ndécü-yu ichi-gá te ndècu ndihi ñaha-gá xíí-yu.

<sup>16</sup>Te sàndáá iní-ó nì yuhu ni iní-ó sá Yá Ndiöxí cúú iní ñáhá-gá xii-o, chi duca<sup>n</sup> iní-gá. Te nchaa ñáiyu cùu iní ñáhá xii Yá Ndiöxí ndécú ndihi ñaha-gá xíí-yu. <sup>17</sup>Te núu ndisa cùu iní-ó Yá Ndiöxí te vá yùhú-ó òré ná sàá nduu tàudii<sup>n</sup> ñaha-gá xii-o tñúu nchaa ñáiyu ndècu ichi cuehé ichi duha, chi quide ndáá-ó ndècu-o núú-gá ñuyíú-a dàtná ní quide mee Jèsús. <sup>18</sup>Chi nchaa ñáiyu cùu iní ñáhá xii Yá Ndiöxí ñá túú-gá yùhú-yu, te núu cùu iní ndisá-yu-gá. Te núu yùhú-yu te xíá<sup>n</sup> sa ndòhó-yu, chi ñùhú-yu ichi cuáhá<sup>n</sup>-yu núú ùhú núú ndàhú, chi nchaa ñáiyu yùhú ñá túú cùu iní ndisá-yu Yá Ndiöxí.

<sup>19</sup>Te cuu iní-ó Yá Ndiöxí, chi mee-gá ndéé cútñahá vátá quindáá-gá iní-ó tñùhu-gá sa cùu iní ñáhá-gá xii-o. <sup>20</sup>Te nchaa ñáiyu càchí sá cúú iní-yu Yá Ndiöxí, te cùu ùhú iní-yu tñàha ñáiyú-yu, ñáiyu-á<sup>n</sup> dácuañdehndé-yu. Te núu ñá túú cùu iní-yu tñàha ñáiyú-yu ndècu ñuyíú-a ña, te uu<sup>n</sup>-gá quidè-yu Yá Ndiöxí Yaá ñá túú xini núú-yu. <sup>21</sup>Te càchí-gá núú tñùhu-gá sá ñáiyu na cùu iní ñáhá xii Yá Ndiöxí, te duca<sup>n</sup>-ni cùu iní-yu tñàha ñáiyú-yu.

### Nchaa ñáiyu ní ndacu ní dàná ichi cuehé ichi duha

**5** Te nchaa ñáiyu sàndáá iní sá Jèsús cúú-gá Cristú Yaá ní quixi ñuyíú-a, ñáiyu-á<sup>n</sup> cúú-yu déhe Yá Ndiöxí. Te cùu iní-yu Tàtá-ó Dütú Ndiöxí, te cùu iní-yu Déhe-gá. <sup>2</sup>Te núu cùu iní-ó Yá Ndiöxí te quide-o nacuaá càhá<sup>n</sup>-gá, te cùtnuní iní-ó sá cúú iní tñáhá ndisa-o nacuaá ndècu-o ichi-gá. <sup>3</sup>Te núu cùu iní-ó Yá Ndiöxí te tñi-o tñùhu càhá<sup>n</sup>-gá, chi cùt-

nuní iní-ó sá ñà díú ìi<sup>n</sup> sá ùhú cúú-xí dàtná càchí ñáiyu. <sup>4</sup>Te nchaa nchoo ñáiyu cùu déhe-gá sa ní dàná-ó ichi cuehé ichi duha, chi ní sàndáá iní-ó Jèsús núu xíá<sup>n</sup> ní ndacu-o ní dàná-ó ichi-á<sup>n</sup>. <sup>5</sup>Te nchaa ñáiyu sàndáá iní sá Dèhe Yá Ndiöxí cúú Jèsús ní ndacu-yu ní queé-yu ichi cuehé ichi duha.

### Nàcuáa ní càhá<sup>n</sup> Yá Ndiöxí cuendá Jèsús

<sup>6</sup>Te Xítohó Jesucristú ní quixi-gá ñuyíú-a, te ní sandute-gá. Te ñá díú-ní xíá<sup>n</sup>, chi ní xíhí-gá sá cuendá nchaa yíca cuèchi-o. Te Espiritú Yá Ndiöxí càhá<sup>n</sup>-xi mee-ni sá ndàá, chi càhá<sup>n</sup> Espiritú-gá-á<sup>n</sup> sá Jèsús cúú-gá Cristú Yaá ní quixi ñuyíú-a. <sup>7</sup>Te úní testiú ndécú àndiú, Tàtá-ó Dütú Ndiöxí, ndihi Déhe-gá Xítohó Jesucristú, ndihi Espiritú-gá. Te ìi<sup>n</sup>-ni tñùhu càhá<sup>n</sup> ndi nùní testiú-á<sup>n</sup>. <sup>8</sup>Te duca<sup>n</sup> cùu-xi ñuyíú-a tucu, chi càhá<sup>n</sup> Espiritú Yá Ndiöxí sá Jèsús cúú-gá Cristú. Te ní sandute-gá, te ní xíhí-gá sá cuendá nchaa yíca cuèchi-o. Te xíá<sup>n</sup> cùtnùnì ndáá iní-ó sá díú Jèsús cúú-gá Cristú. <sup>9</sup>Te núu tñi-o tñùhu váha càhá<sup>n</sup> ñáiyu, te váha-gá tñi-o tñùhu càhá<sup>n</sup> Yá Ndiöxí, chi càhá<sup>n</sup> ndáá-gá sá Déhe-gá cúú Jèsús. <sup>10</sup>Te nchaa ñáiyu sàndáá iní sá Jèsús cúú-gá Déhe Yá Ndiöxí, ñáiyu-á<sup>n</sup> cùtnuní iní-yu sá cúú-xí ìi<sup>n</sup> sá ndàá. Te nchaa ñáiyu ñá túú sàndáá iní tñùhu càhá<sup>n</sup> Yá Ndiöxí quidè-yu-gá ìi<sup>n</sup> ñándéhndé, dico ñá túú ndèhnde-gá, chi mèé-yu ñá túú sàndáá iní-yu sá Déhe-gá cúú Jèsús dàtná càchí mée-gá. <sup>11</sup>Te Yá Ndiöxí càchí tñùhu ndáá-gá sá cùndècu-o ndihi-gá ni caa ni quíhí<sup>n</sup>. Te duha càhá<sup>n</sup>-gá chi sàndáá iní-ó Déhe-gá. <sup>12</sup>Te nchaa ñáiyu na quindáá iní ñáhá xii Déhe-gá cundecú-yu ndihi-gá ni caa ni quíhí<sup>n</sup>. Te nchaa ñáiyu ñá túú sàndáá iní ñáhá xii Déhe-gá vá cùndècú-yu ndihí-gá.

### Sáhu ndèé núú ní ndihi-ná

<sup>13</sup>Te cuendá sá sàndáá iní-ndó Dèhe Yá Ndiöxí nùu xíá<sup>n</sup> chídó tñùní-í tñúhu-a cuendá cutnùní iní-ndó sá cùndècu ndihi-o-gá ni caa ni quíhí<sup>n</sup>.

<sup>14</sup>Te ñá túú tñúhu yùhú cáhá<sup>n</sup> ndihi-o Yá Ndiöxí, chi tedóho ñaha-gá xii-o nùu ìí<sup>n</sup>-ná sá ná càcá<sup>n</sup>-ó nùú-gá dàtná cuìní mée-gá. <sup>15</sup>Te cùtnuní iní-ó sá táxí-gá sá xicá<sup>n</sup>-ó nùú-gá, chi ñaha-o sá tedóho ñaha-gá xii-o nùu na càcá<sup>n</sup>-ó nàcuáa cùu iní-gá.

<sup>16</sup>Te núu xìní-ó ñáyiú ndècu ichi Yá Ndiöxí te quidé-yu sá ñà túú vǎha núú-gá, te ndèhe-o sá ñà túú ní xíta nihnu duú<sup>n</sup>-yu, te cáhá<sup>n</sup> ndihi-o Yá Ndiöxí cuendá-yu, te dàcácu nihnu ñaha-gá xíí-yu te núu na nùcúnu ichi váha-yu. Chi ìó ñáyiú xídó quidé nǎndi sá ñà túú vǎha te xíta nihnu duú<sup>n</sup>-yu, te vá càhá<sup>n</sup> ndihi-gá-ó Yá Ndiöxí cuendá-yu. <sup>17</sup>Te nchaa sá cuèhé sá dúhá cùu-xi yíca cuèchi, dico ñá ncháá-xí cùu-xi sá dácúita nihnu ñaha dùu<sup>n</sup>.

<sup>18</sup>Te ñaha-o sá nchóó ñáyiú cùu déhe Yá Ndiöxí ñá túú-gá sání iní-ó càda-o nándi sá cuèhé sá dúhá. Te duca<sup>n</sup> chi mee Jèsús déhe Yá Ndiöxí xító ñaha-gá xii-o, núu xíá<sup>n</sup> ñá ndácú-gá yucu ñávǎha dàxínu iní ñáhá-xí xii-o cada-o sá ñà túú vǎha.

<sup>19</sup>Te nchoo ñaha-o sá ndécú ndihi-o Yá Ndiöxí. Te nchaa ñáyiú ndècu ichi cuèhé ichi duha tàxi tñuní ñáhá-nǎ yucu ñávǎha xíí-yu.

<sup>20</sup>Te ñaha tucu-o sá ñùyíú-a ní quixi Jèsús Déhe Yá Ndiöxí ní taxi-gá sá xìní tñùní-ó cuendá cutnùní iní-ó sá mée-gá cúú-gá Ndiöxí-ó. Te ndècu ndihi-o mee-gá ndihi Déhe-gá Jèsús, te ìí<sup>n</sup>dii díí-ni mee-gá cúú-gá Yá Ndiöxí, te ndècu dava-gá sá nàcuàca ñaha-gá xii-o cùndecu-o ndihi-gá ni caa ni quíhí<sup>n</sup>.

<sup>21</sup>Te nchòhó ñáyiú cùu datná déhe-í, vá quíndáá iní-ndó nchàa sá càchí-yu cùu ndióxí, chi dicó ndaha cue téé ñuyíú-a ní cuáha nchaa xíá<sup>n</sup>. Te duca<sup>n</sup> na cùnduu. Te ío chí cádá ndèe iní-nǎ vitna.



## TUTÚ CÚÚ ÛÚ NÍ CADÚHA TÉ JUÁÁ

### Tnúhu Yá Ndiöxí ndihi nàcuáa cuu iní tnáhá-ó

**1** Te yúhú té Juáá téé yìndaha ñaha xii ñáyiú sàndáá iní tnúhu Jèsús, tèe-í tnúhu-a ìí<sup>n</sup> núú tütú daquixi-í ndaha yòhó ñaha ní cáhá<sup>n</sup> ñáhá Yá Ndiöxí, te nchaa tnúhu-a cùu-xi tnahá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiöxí. Te ñá díú-ní mèe-í cúú ìní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú ìní ñáhá-ndí xii-ndo. <sup>2</sup>Te cùu iní ñáhá-ndí xii-ndo chi ndècu ndihi-ndo tnúhu ndáá tnúhu Yá Ndiöxí, te duca<sup>n</sup>-ni cùndecu-o ndihi tnúhu-á<sup>n</sup> ni caa ni quíhí<sup>n</sup>. <sup>3</sup>Te xìcá<sup>n</sup> táhù-í núú Tátá-ó Dütú Ndiöxí, ndihi núú Déhe-gá Xítóhó Jesucristú sá ná chíndèe ñaha-gá xii-ndo, te coto ñaha-gá te ío váha cuu iní-ndó cùndecu-ndo. Te duha xìcá<sup>n</sup> táhù-í núú-gá chi ndècu ndihi-o tnúhu ndáá tnúhu Yá Ndiöxí, te cùu iní-ó-gá.

<sup>4</sup>Te ío cùdíí ìní-í, chi ní naníhì-í ìí<sup>n</sup> ùú déhe-n, te quidé-yu nàcuáa sànu ichi ñaha tnúhu ndáá dàtná ní táuchíú<sup>n</sup> mèe Tátá-ó Dütú Ndiöxí. <sup>5</sup>Te vitna yòhó ñaha ní cáhá<sup>n</sup> ñáhá Yá Ndiöxí, cächí tnúhu-í xii-n sá xíní ñùhu-xi cuu iní-ó tnàha ñáyiú-o. Te ñá díú ìí<sup>n</sup> tnúhu saa cùu-xi, chi ñiú-ni tnúhu sá ní ngúndecu ndihi-o ndèe cútnàhà ní tuha-o ichi Yá Ndiöxí. <sup>6</sup>Te núu cùu iní-ó Yá Ndiöxí, te cùu iní-ó tnàha ñáyiú-o dàtná ní cachí mée-gá, te tñi-o nchaa tnúhu càhá<sup>n</sup>-gá. Te ní cachí-gá sá cúú ìní-ó-gá, te cuu iní-ó

tnàha ñáyiú-o. Te tnúhu-a ní tecú dóho-o ndèe cútnàhà ní tuha-o ichi-gá.

### Cue téé dàndahú tnàha ñáyiú-xi

<sup>7</sup>Te ío vài ñáyiú dàndahú ñáhá xica cuú-yu ñuyíú-a, te cächí-yu sá ñá ndàá sá Xítóhó Jesucristú ní cuu-gá ìí<sup>n</sup> ñáyiú ndisa. Te nchaa ñáyiú duha càhá<sup>n</sup> dácuañdehndé-yu, te cùu úhú iní-yu Jèsús. <sup>8</sup>Te quíhì iní-ndó sá vâ dándahú ñáhá ñáyiú-á<sup>n</sup> xii-ndo cuèndá sá vâ cuíta chiú<sup>n</sup> Yá Ndiöxí ní quide-o. Te òré ná quíxí tucu Jesús ñuyíú-a te taxi-gá nchaa sá vâha cùu iní mée-gá cundecu ndihi-o.

<sup>9</sup>Te nchaa ñáyiú dàña tnúhu Xítóhó Jesucristú, te nàtñií-yu ingá ichi, ñáyiú-á<sup>n</sup> ñá túú ndècu ndihí-yu Yá Ndiöxí. Te nchaa ñáyiú ñá túú dàña tnúhu Xítóhó Jesucristú ndècu ndihí-yu Yá Ndiöxí ndihi Déhe-gá Xítóhó Jesucristú. <sup>10</sup>Te núu véxi ñáyiú núú ndécú-ndó cächí-yu sá càhá<sup>n</sup>-yu tnúhu Yá Ndiöxí te ñá ndàá, te vá cuàha-ndo tnúhu danèhé ñáhá-yu xii-ndo, te ní vâ cuàha-ndö-yu tnúhu ndee ìní cuèndá chiú<sup>n</sup> quidé-yu. <sup>11</sup>Chi núu na càhá<sup>n</sup> ndihi váha-ndö-yu, te dàtná tnúhu sá chíndèe-ndó-yu quidé-yu nchaa sá cuèhé sá dúhá.

### Tnúhu ndée núú ní ndihi-ná

<sup>12</sup>Te ío vài-gá tnúhu cuíní-í cachí tnúhu-í xii-ndo, dico vá téé-gá-í chi cuíní-í quixi-í núú ndécú-ndó ndàtnúhu-o cuèndá cudíí víhí ìní-ó nchàa-o.

<sup>13</sup>Te nchaa cue déhe cùhú-n, ñáyiú ní cáhá<sup>n</sup> ñáhá Yá Ndiöxí quidé ndèe ìní ñáhá-yu xii-n.

## TUTÚ CÚÚ ÒNÍ NÍ CADÚHA TÉ JUÁÁ

### Càhá<sup>n</sup> váha-yu cuèndá té Gǎyú

**1** Te yúhú té Juáá tée yìndaha ñaha xii ñáyíu sàndáá iní tnúhu Jèsús, chido tnuní-í tnúhu-a ì<sup>n</sup> núú tütú sá cúú-xí yòhó té Gǎyú tée ío cùu iní-í, chi ndècu ndìhi-n tnúhu ndáá tnúhu Yá Ndiòxí.

<sup>2</sup>Te yòhó tée ío cùu iní-í, xìcá<sup>n</sup> táhù-í núú Yá Ndiòxí sá cùndècu váha-n ñà túú nǎ cumání xii-n, te vá cùhú-n, chi sa ñaha-í sá ndécú váha-n núú Yá Ndiòxí. <sup>3</sup>Te ío ní cudíí iní-í òrè ní sáá ñáyíu ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá diu-ni tnúhu-gá te tñi-n nchaa nacuaá càhá<sup>n</sup> tnúhu-á<sup>n</sup>. <sup>4</sup>Te ío cùdíí iní-í ní nìhì-í tnúhu sá ncháá-ní ñáyíu ní sanu ichi-í ichi Yá Ndiòxí ndécú-ní-yu ichi-gá, te quide-ní-yu nchaa nacuaá càhá<sup>n</sup>-gá.

<sup>5</sup>Te yòhó tée ío cùu iní-í, ío váha quide-n núú Yá Ndiòxí, chi chindee-n nchaa ñáyíu véxi dava-gá ñúú xìcá, ñáyíu sàndáá iní tnúhu Yá Ndiòxí. <sup>6</sup>Te nchaa ñáyíu-á<sup>n</sup> càhá<sup>n</sup>-yu núú tàcá ñáyíu càhá<sup>n</sup> ndìhi Yá Ndiòxí iha sá ío cùu iní-n nchàa tnaha ñáyíu-n dàtná càhá<sup>n</sup> Yá Ndiòxí. Te yúhú càhá<sup>n</sup> ndàhú-í núú-n sǎ cádá ndèe-ni iní-n chindee-n nchaa ñáyíu-á<sup>n</sup> nchaa sá xíní ñùhú-yu ichi. Te núu duca<sup>n</sup> na càda-n te quide-n nacuaá cùu iní Yá Ndiòxí, te xìnu cuechi-n tnahá-n núú-gǎ. <sup>7</sup>Chi nchaa ñáyíu-á<sup>n</sup> ní tñí-yu ichi cuáhá<sup>n</sup>-yu càhá<sup>n</sup>-yu tnúhu Jèsús. Te ñá túú tñí-yu ni ì<sup>n</sup> sá sǎñaha ñáyíu ñá túú ndècu ichi Yá Ndiòxí. <sup>8</sup>Te núú xíá<sup>n</sup> nchoo xìni ñùhu-xi chindee-o nchaa ñáyíu xìnu cuechi núú-gǎ ñáyíu càhá<sup>n</sup> tnúhu-gá, te duca<sup>n</sup> te cutnùní iní-ó sǎ tnàhá-ó xìnu cuechi-o ndìhí-yu núú-gǎ.

### Ñá túú quide váha té Diótréfés

<sup>9</sup>Te yúhú ní tendaha-í tutú cuáhá<sup>n</sup> núú tàcá ñáyíu chìñuhú-yu Yá Ndiòxí, dico ì<sup>n</sup> tée ndècu-á<sup>n</sup> nání-dě Diótréfés, te ñá sàndáá iní-dé nchaa tnúhu càhá<sup>n</sup>-í, chi cuíní-dé cunuu-dě núú-yu. <sup>10</sup>Te òrè quixi-í te cada ndáá-ó nchàa tnúhu cuèhé tnúhu duha càhá<sup>n</sup>-dè cuèndá-í. Te ñá díú-ní xíá<sup>n</sup> quidé-dě, chi nchaa ñáyíu véxi ingá ñúú càhá<sup>n</sup> tnúhu Yá Ndiòxí ñá túú càhá<sup>n</sup> ñáhá-dě vehe-dé, te ni ñá dáñá-dě càhá<sup>n</sup> ndìhi ñaha dàva-gá ñáyíu xíí-yu. Te nchaa ñáyíu cuíní càhá<sup>n</sup> ndìhi ñaha xíí-yu, te quèñuhu ñaha duu<sup>n</sup>-ni-dé ñá dáñá-gǎ-dé nìhí tnàhá-yu ndìhi nchaa ñáyíu tàcá dácuaàh tnúhu Yá Ndiòxí.

<sup>11</sup>Te yòhó tée ío cùu iní-í, vá cùndècu-n ichi cuehé ichi duha dàtná quidé nchàa dava-gá ñáyíu, cada-n mèe-ni sá váha. Chi nchaa ñáyíu quide váha ndècú-yu ichi Yá Ndiòxí. Te nchaa ñáyíu quide nchaa sá cuèhé sá dúhá ñà túú ndècú-yu ichi Yá Ndiòxí.

### Nchaa ñáyíu càhá<sup>n</sup> váha-yu cuèndá té Demètriú

<sup>12</sup>Te nchaa ñáyíu càhá<sup>n</sup> váha-yu cuèndá té Demètriú, chi quide ndáá-dé dàtná càhá<sup>n</sup> Yá Ndiòxí. Te tnàhá yúhú càhá<sup>n</sup>-í cuèndá-dé sá ío váha quide-dé, te nchòhó sa ñaha-ndo sá yúhú càhá<sup>n</sup> ndáá-í.

### Tnúhu ndée núú ní ndìhi-ná

<sup>13</sup>Te vai-gá tnúhu cuíní-í cachí tnúhu-í xii-n ni cùu, dico ñá ní tèe-gá-í, <sup>14</sup>chi cuíní-í quixi ndìhí-í, te càhá<sup>n</sup>-ó núú núú-ó.

<sup>15</sup>Te ío cada ndee iní, te xìcá<sup>n</sup> táhù-í núú Yá Ndiòxí sá ná cùndècu váha-n ñà túú nǎ cuu cundècu-n. Te nchaa cue ñáyíu xìní tnàhá ndìhi-o ndècu iha quide ndee iní ñáhá-yu xii-n. Te yòhó cùñaha-n nchàa ñáyíu xìní tnàhá ndìhí-í ndécú

xǐá<sup>n</sup> ná càda ndee iní-yu. Te ío cada ndee  
iní-nǎ vitna.

## TUTÚ NÍ CADÚHA TÉ JÙDÁS

### Té Jùdás cadúha-dé tutú quíhí<sup>n</sup> ndaha ñáyiú ní cachí Yă Ndiöxí nduu cuendá-gá

**1** Yúhú té Jùdás ñaní té Jàcobó xínú cuèchi-í núú Xítóhó Jesucristú, te cadúha-í tutú-a sá cúú-xí nchòhó ñáyiú ní cachí Yă Ndiöxí Yaá cúú Tàtá-ó nduu cuendá-gá, ñáyiú ío cùu iní-gá. Te dàtná-ni xito ñaha-gá xii-ndo vitna diu-ni duca<sup>n</sup> còto ñaha-gá xii-ndo ndéé ná sàà nduu quixi tucu Xítóhó Jesucristú ñuyúú-a. <sup>2</sup>Te xicá<sup>n</sup> tãhù-í núú Yă Ndiöxí sá ïo-gá ná chindee chítúú ñaha-gă xii-ndo, te na cùtnuní-gá iní-ndó sã ïo cùu iní ñáhá-gă xii-ndo, te duca<sup>n</sup> ïo váha cuu iní-ndó cundecu-ndo.

### Ñáyiú ñá túú càhá<sup>n</sup> tnúhu ndáá tnúhu Yă Ndiöxí

(2 Pedro 2:1-17)

<sup>3</sup>Te nchòhó ñáyiú ío cùu iní-í, duca<sup>n</sup>-ni ïo sàni iní-í cadúha-í ì<sup>n</sup> tutú sá cúú-xí-ndó cuendá danèhé ñáhà-í xii-ndo nàcuáa ní cuu ní naníhí tãhù-ó dico ñá túú cadúha-í, dico vitna quide cuendá-í sá xímí ñuhu-gá-xi càhá<sup>n</sup>-í núú tütú-í sá nchòhó ío cundehe-ndo tnúhu càhá<sup>n</sup>-ndó ndìhi ñáyiú, te càhá<sup>n</sup>-ndó nàcuáa ndùu tnúhu sàndáá iní méé-ndó, chi diu-ni tnúhu-á<sup>n</sup> nĩ càhá<sup>n</sup> Yă Ndiöxí sá cúú-xí nchàa ñáyiú ndècu ichi-gá. Te vitna ñá túú-gă ná tnúhu càhá<sup>n</sup>-gá sá cúú-xí-yu, chi sa ní càhá<sup>n</sup> duu<sup>n</sup>-gá. <sup>4</sup>Te duha càhá<sup>n</sup>-í núú tütú-a sá cúú-xí-ndó, chi ñihí-í tnúhu sá xicá cùu ñáyiú chitnahá ñáhá xii-ndo, te ni ñà túú xíní-ndó nã ñáyiú cùú-yu, te ñáyiú-á<sup>n</sup> cùú-yu ñáyiú cùu úhú iní ñáhá xii Yă Ndiöxí. Te ì<sup>n</sup> xichi núú tütú Yă Ndiöxí càchí-xi sá ñáyiú-á<sup>n</sup> quíhí<sup>n</sup>-yu núú ùhú núú ndàhú, te diu-ni ñáyiú-á<sup>n</sup> càchí-yu sá ïo váha iní Yă Ndiöxí nũu xíá<sup>n</sup> cuu-ni

cadá-yu nchaa sá cuèhé sá dúhá. Te dàquee tñhú-yu Yă Ndiöxí Yaá ío cùnuu, ndìhi Xítóhó Jesucristú.

<sup>5</sup>Te nchòhó sa xíní váha-ndo nàcuáa ní quide Yă Ndiöxí ndéé sanaha dico dandacu iní ñáhà-í xii-ndo, chi dàvá-á<sup>n</sup> nĩ queñuhu-gá ñáyiú isràél nàció<sup>n</sup> Ègiptú, te dava ñáyiú-á<sup>n</sup> ñà túú ní sàndáá iní ñáhà-yu xii-gá te ní dánáá ñaha-gá xi-yu. <sup>6</sup>Te nchaa espíritú ñá túú ní cuiní cada ndáá cunu cuechi núú Yă Ndiöxí ní quee-xi núú ndécú-xí, te mee-gă ní sadí nihnu ñaha-gă xii-xi ì<sup>n</sup> xichi núú néé te vá càcu-xi, chi sáà nduu te nayáha-xi cundecu-xi núú ùhú núú ndàhú ni caa ni quíhí<sup>n</sup>. <sup>7</sup>Te dandacu iní ñáhá tucu-í xii-ndo nàcuáa ní yáha ñáyiú ñuú Sòdomá, ndìhi ñáyiú ñuú Gòmorrá, ndìhi nchaa ñáyiú ñuú ní caa yatni xíá<sup>n</sup>, chi tñhá-yu ñá túú ní quide váha-yu dàtná ní quide nchaa cue espíritú-á<sup>n</sup>. Chi cue téé ní xóo càhá<sup>n</sup> ndìhi tñaha ndi mee-güedé, te diu-ni duca<sup>n</sup> nĩ xóo cada cue ñáyiú ñihí tucu. Te sá dúcá<sup>n</sup> nĩ quidé-yu núú ní dányóyó Yă Ndiöxí ñuhú ñuú-yu ní dánáá ñaha-gá xi-yu. Te xíá<sup>n</sup> cùtnuní iní-ó sã nchàa ñáyiú ñá túú cuiní cada váha núú-gă quíhí<sup>n</sup>-yu núú ùhú núú ndàhú ni caa ni quíhí<sup>n</sup>.

<sup>8</sup>Te diu-ni duca<sup>n</sup> quide ñáyiú chitnahá ñáhá xii-ndo cuiní-yu dandàhú ñáhà-yu, chi càchí-yu sá dácòto ñaha saní-yu nàcuáa cadá-yu, núu xíá<sup>n</sup> nándi nchaa sá cuèhé sá dúhá quidé-yu sá cúú-xí yiqui cuñú-yu, te dàquee tñhú-yu nchaa nàcuáa càhá<sup>n</sup> Yă Ndiöxí cada-o, te càhá<sup>n</sup> úhú-yu cuendá nchaa espíritú cùnùu. <sup>9</sup>Te mee espíritú cùnùu-gá xínú cuèchi núú Yă Ndiöxí nání Miguél ní nàa-xi ndìhi sácufíhná cuendá yiqui cùñú ndii Moisés. Te espíritú-á<sup>n</sup> ñà túú ní cùyii-xi càhá<sup>n</sup> úhú-xi sácufíhná-á<sup>n</sup>, chi ní xáha<sup>n</sup>-ni-xi: “Mee Yă Ndiöxí ñáhá-gă te núu nása cada ñaha-gă xii-n”, duha ní xáha<sup>n</sup>-xi. <sup>10</sup>Te nchaa ñáyiú duca<sup>n</sup> dãn-

dahú ñáhá xii-ndo-á<sup>n</sup> càhá<sup>n</sup> cuèhé-yu cuèndá nchaa sá vátá cùtnúni-gá iní-yu nása ndùu, te quidé-yu dàtná quidé cuè quiti chi cue quiti-á<sup>n</sup> quidé-güèdi nání vèxi iní-güèdi, te ni ñà túú cùtnuní iní-güèdi nchaa sá quidé-güèdi. Te duca<sup>n</sup> sà tnahá-xi cùú-yu, chi nchaa sá cuèhé sá dúhá vèxi iní-yu quidé-yu, te sá dúcá<sup>n</sup> quidé-yu xíá<sup>n</sup> tá xíta nihnú-yu cuáhá<sup>n</sup>.

<sup>11</sup>Te ndàhú ní cuú-yu chi ío ndohó-yu!, chi quidé-yu dàtná ní quide ndíi Càn. Te nándi sá quidè-yu cuèndá sá cuini-yu dñú<sup>n</sup> dàtná ní xóo cada ndíi Bàlaám. Te ío cùu sáá iní-yu núú Yá Ndiòxí dàtná ní xóo cada ndíi Còré, núu xíá<sup>n</sup> tá xíta nihnú-yu cuáhá<sup>n</sup>. <sup>12</sup>Te dícó sácá<sup>n</sup>núú sáha ñahá-yu xii-ndo òré nàtácá-ndó quide-ndo vico chiñuhu-ndo Yá Ndiòxí. Te òré xéxí ndíhi ñahá-yu xii-ndo te mee-ni sá cúú-xí mèè-yu quide cuendá-yu, te ñá túú nèhé-yu sá yíñuhu núú Yá Ndiòxí. Te cùú-yu dàtná ìi<sup>n</sup> vícò sá cuáhá<sup>n</sup>-xi duha cuáhá<sup>n</sup>-xi dàcá<sup>n</sup> te ñá túú dǎú nchídó-xí, duca<sup>n</sup> sà tnahá-xi cùú-yu. Te cùu tucú-yu dàtná ìi<sup>n</sup> yutnu vídí sá ñà túú tnahí cùu<sup>n</sup> sávídí-xi, te nchaa yutnu duca<sup>n</sup> ñà túú cùu<sup>n</sup> sávídí-xi te tñuhu-güèdé ndéé yóho-xi te xihí duu<sup>n</sup>-xi. Te duca<sup>n</sup> sàtnahá-xi cùú-yu, chi ñá túú quide váha-yu. <sup>13</sup>Te cùu tucú-yu dàtná ndute lámár, chi ndute-á<sup>n</sup> òré càndá-xi te quecòo tñú-xi ìi<sup>n</sup> xio. Te cùu tucú-yu dàtná ìi<sup>n</sup> chódíni cuáhá<sup>n</sup>-di duha cuáhá<sup>n</sup>-di dàcá<sup>n</sup>. Te duca<sup>n</sup> sàtnahá-xi cùú-yu, chi ñá túú cuini-yu cada váha-yu. Te ñáyiu-á<sup>n</sup> daquihí<sup>n</sup> ñáhá Yá Ndiòxí xii-yu ìi<sup>n</sup> xichi núú néé núú sà ndecu túha cundecú-yu ni caa ni quíhí<sup>n</sup>.

<sup>14</sup>Te ndíquí<sup>n</sup> yává ndíi Àdán téé cùu usá ní xínani Ènóc ní dácáhu iní ñáhá Yá Ndiòxí xii-dé ní cáhá<sup>n</sup>-dé dñu-ni cuèndá nchaa ñáyiu-á<sup>n</sup>. Te ní cachí-dé: “Na càhí tñuhu-í xii-ndo sá Yá Ndiòxí quixi-gá ndíhi cuèhé víhí es-  
píritú xínú cuèchi núú-gá. <sup>15</sup>Te dàvá-á<sup>n</sup>

cada ndáá-gá cuèchi nchaa ñáyiu te daquihí<sup>n</sup>-gá nchaa ñáyiu ndècu ichi cuèhé ichi duha núú ùhú núú ndàhú, te duca<sup>n</sup> càda ñaha-gá xii-yu, chi mee-ni sá cuèhé sá dúhá quidé-yu, te càhá<sup>n</sup> úhú ñáhá-yu xii-gá”, duha ní cachí te Ènóc. <sup>16</sup>Te ñáyiu-á<sup>n</sup> ìo yica iní-yu chi ñá túú ndùu vétú iní-yu nàcuáa ndècú-yu ñuyíu-a, te sàtnuhú-yu tñaha ñáyiu-yu te mee-ni sá cuèhé sá dúhá sàni iní-yu quidé-yu, te quide cahnú-yu mèè-yu, te mee-ni càhá<sup>n</sup> váha-yu núú tñaha ñáyiu-yu cuèndá cuini-yu sá cáda váha ñaha ñáyiu-á<sup>n</sup> xii-yu.

### Té Jùdás càhá<sup>n</sup>-dé dóho ñáyiu ndècu ichi Yá Ndiòxí

<sup>17</sup>Te nchòhó ñáyiu ío cùu iní-í, càhá<sup>n</sup> ndàhú-í núú-ndó sá ìo cuhu<sup>n</sup> iní-ndó tñuhu sá sà ní dánèhé ñáhá cuè téé ní tendaha Xítohó Jesucristú càhá<sup>n</sup> tñuhu-gá núú ñáyiu. <sup>18</sup>Te sa ñaha-ndo sá ñí cachí-güèdé sá cùmání-gá quixi tucu Xítohó Jesucristú ñuyíu-a, te coo ñáyiu cáhá<sup>n</sup> cuèhé cáhá<sup>n</sup> duha cuèndá tñuhu-gá. Te ñáyiu-á<sup>n</sup> cadá-yu mee-ni sá cuèhé sá dúhá vèxi iní mèé-yu. <sup>19</sup>Te ñáyiu-á<sup>n</sup> cúú-yu ñáyiu càhá<sup>n</sup> nándi tñuhu sá ñà túú nàndíhi cuèndá sá vǎ cúú ìi<sup>n</sup>nuu-ndo cundecu-ndo, te mee-ni sá cuèhé sá dúhá ñuhu iní-yu, te ñá túú ndècu ndihí-yu Espíritú Yá Ndiòxí.

<sup>20</sup>Te nchòhó ñáyiu ío cùu iní-í, ío dacuàha-ndo tñuhu Yá Ndiòxí sá ñí sándáá iní-ndó cuèndá duca<sup>n</sup> cuita cuehnu nihnu-ndo ichi-gá quíhí<sup>n</sup>, te cáhá<sup>n</sup> ndíhi-ndo Yá Ndiòxí nàcuáa dàc-ahu iní ñáhá Espíritú-gá xii-ndo. <sup>21</sup>Te ío coto-ndo mèè-ndo cundecu-ndo cuendá cuu váha iní ñáhá Yá Ndiòxí xii-ndo, te cundetu-ndo sàa nduu quixi Xítohó Jesu-  
cristú ñuyíu-a nacuaca ñaha-gá xii-ndo cundecu-ndo ndíhi-gá ni caa ni quíhí<sup>n</sup>, chi Yaá-á<sup>n</sup> ìo cùndahú iní ñáhá-gá xii-o.

<sup>22</sup>Te ñáyiu sàni ìi<sup>n</sup> sani úú iní-xi cúñaha-ndo xii-yu nàcuáa cadá-yu

cundecú-yu ichi Yá Ndiöxí. <sup>23</sup>Te nchaa ñáyiú ta xíta nihnu ñùhu ichi cuáhá<sup>n</sup> núú ùhú núú ndàhú, ío cundihi iní-ndó cñaha-ndo xí-yu tnúhu Yá Ndiöxí cuendá sá ná cäcu nihnú-yu, te cundàhú iní-ndó-yu, te quihí iní-ndó vǎ cádá-ndó tñahá-ndó nàcuáa quidé-yu, chi daquèe tihú-ndó nchàa sá cuèhé sá ðúhá quidé-yu-á<sup>n</sup>.

**Nàcuáa ndacá<sup>n</sup> táhú-ó nǔú Yǎ Ndiöxí**

<sup>24</sup>Te Yá Ndiöxí chindee ñaha-gá xii-ndo cuendá sá vǎ cündècu-ndo ichi cuehé ichi duha, te cunduu ndoo cunduu nine iní-ndó càndeca ñaha-gá xii-ndo quihí<sup>n</sup> cundecu-ndo nǔú ò váha càa

ndecu-gá, te ío cudíí iní-ndó. <sup>25</sup>Te Yá Ndiöxí ío ndècu ndihi-gá nchaa sá xini tnùní-gá te ðiu-gá ní dácäcu nihnu ñaha-gǎ xii-o nǔú ùhú núú ndàhú, te duca<sup>n</sup> ñí quide ñaha-gǎ xii-o chi ndècu ndihi-o Xítóhó Jesucristú. Te ío ndacá<sup>n</sup> táhú-ó nǔú Yǎ Ndiöxí, chi ío càhnu cuu-gá ndécú-gǎ táxi tnùní-gá, te súúní vǎha iní-gá, te ndàcu-gá quidé-gǎ nchaa sá vǎha, te duca<sup>n</sup>-ni ò càhnu cuu-gá ndéé cútnàhá vátá ngáva-gá ñuyíú, te duca<sup>n</sup>-ni ò càhnu cuu-gá ndéé vitna, te ðiu-ni duca<sup>n</sup> ò càhnu cuu-gá ñí caa ñí quihí<sup>n</sup>, duha xini ñuhu-xi ndacá<sup>n</sup> táhú-ó nǔú-gǎ. Te duca<sup>n</sup> na cünduu. Te ío chí cádá ndèe iní-nǎ vitna.

## NCHAA SÁ NĪ XINÍ TĒ JUÀÁ NDIHI NCHAA SÁ NĪ TECÚ DÓHO-DE

### Xítohó Jesucrístú xáha<sup>n</sup>-gã xii té Juàá nchaa nàcuáa cada-xi ñuyíú

**1** Te Yá Ndiöxí ní xáha<sup>n</sup>-gã xii Xítohó Jesucrístú nchaa sá tá cùyatni ví-nã cada-xi ñuyíú-a cuendá sá cūñaha-gã xii cue tée xinu cuechi núú-gã, te Xítohó Jesucrístú ní tendaha-gã ñ<sup>h</sup> espíritú xínú cuèchi núú-gã ní quixi-xi ní cachí tnúhu-xi nchaa tnúhu-á<sup>n</sup> xii yúhú té Juàá tée xinu cuechi núú-gã, te nchaa tnúhu-á<sup>n</sup> ndèé núú tütú-a. <sup>2</sup>Te yúhú càchí tnúhu ndáá-í xii-ndo nàcuáa ní cáhá<sup>n</sup> Yá Ndiöxí, te càhá<sup>n</sup> ndáá tucu-í cuendá Xítohó Jesucrístú, ndihi cuendá nchaa sá nĪ xiní-í.

<sup>3</sup>Te váha táhú ñáyiú dàcuaha nchaa tnúhu ndèé núú tütú-a, te váha tucu táhú ñáyiú ndèdóho, te váha tucu táhú nchaa ñáyiú tñi nacuáa càhá<sup>n</sup>-xi, chi sa ta cùyatni ví-nã nduu càda-xi nchaa nacuáa càhá<sup>n</sup>-xi.

### Té Juàá cádūha-dé tutú quíhí<sup>n</sup> ndaha ndi úsá xichi cue ñáyiú ndècu ichi Yá Ndiöxí

<sup>4</sup>Te yúhú té Juàá cádūha-í tutú daquixi-í ndi úsá xichi núú ndécú nchòhó ñáyiú ndècu ichi Yá Ndiöxí ndécú dīstrítú Àsía. Te mee-gã ná chindee chitúú ñaha-gã xii-ndo, te ío váha cuu iní-ndó cūndecu-ndo. Te cuēi ndéé sanaha diu-ni-gã ndécú, te diu-ni-gã ndécú cuēi vitna, te duca<sup>n</sup>-ni cūndecu-gã cuēi ndéé núú cuáhá<sup>n</sup> núú vëxi, te diu-ni duca<sup>n</sup> ño na chindee chitúú ñaha ndi usá cue espíritú ndécú nūú-gã xii-ndo, te ío váha cuu iní-ndó cūndecu-ndo. <sup>5</sup>Te diu-ni duca<sup>n</sup> na càda tucu Xítohó Jesucrístú, te diu-gã cúú-gã Yá càhá<sup>n</sup> ndáá, te diu-ni-gã ní xíhí-gã

te díhna-gã ní ndoto, te dātñuní ndéé cuèé-gã te ndoto cue ñáyiú ní xíhí, te diu-ni-gã táxí tñuní-gã nchaa cue tée yīndaha ñaha xii ñáyiú ndècu ñuyíú-a. Te ío cūu iní ñáhá-gã xii-o, te mee-gã ní sati nīnī-gã te ní xíhí-gã núú cūrúxí sá cuendá nchaa sá cuèhé sá dúhá quide-o, te ní ndada ndoo ní ndada nine-gã iní-ó, <sup>6</sup>te vitna ní quide ñaha-gã xii-o dātñá cue tée yīndaha ñáyiú, te ní quide ñaha tūcu-gã xii-o dātñá cue dútú xínú cuèchi-o núú Tātá-gã Dútú Ndiöxí. Te vitna nchaa-o chí ná càchí-ó sã ño càhnu cuu Xítohó Jesucrístú, te ío cūnuu-gã, te duca<sup>n</sup>-ni na cūnuu-gã ni caa ni quíhí<sup>n</sup>. Te duca<sup>n</sup> na cūnduu.

<sup>7</sup>¡Te cundehe-ndo àndiú! Chi ichi xití vícó quixi Xítohó Jesucrístú, te nchaa ñáyiú ndècu ñuyíú-a quini ñáhã-yu xii-gã, te tñáhá nchaa ñáyiú ñ<sup>h</sup>-ni cūu ndihi ñáyiú ní dánícuèhé ñáhá xii-gã quini ñáhã-yu, te nchaa ñáyiú xīndecu ñihí ñuyíú, ñáyiú ñá tūú cūu váha iní ñáhá xii-gã ndíhú iní-yu òré quini ñáhã-yu xii-gã, te ndáá sá dúcá<sup>n</sup> càda-xi.

<sup>8</sup>Te Yá Ndiöxí càchí-gã: “Yúhú ío cūnuu-í chi diu-í sa ndècu ndéé cūtnáhá ní ngáva ñuyíú, te diu-ni-í cūndecu ndéé ná sáá nduu nàa-xi ndihi nchaa sá ño, chí yúhú cūndecu-í ni caa ni quíhí<sup>n</sup>”, duha càchí Yá Ndiöxí Yáá ndácú quide nchaandi tūhú sá váha. Chi diu-ni-gã sa ndècu ndéé cūtnáhá ní ngáva ñuyíú, te diu-ni-gã ndécú-gã vitna, te duca<sup>n</sup>-ni cūndecu-gã ni caa ni quíhí<sup>n</sup>.

### Té Juàá ní xiní-dé Xítohó Jesucrístú Yáá ío cūnuu

<sup>9</sup>Te yúhú té Juàá tée ndècu ndihi-ndo ichi Xítohó Jesucrístú, tñáhá-í ndóhò-í cuendá-gã dātñá ndóhò-ndó, te tñáhá-í nduu táhù-í cūndecu ndihi ñaha-í xii-ndo nūú ndécú Yá Ndiöxí táxí tñuní-gã. Te ío quide cahnu iní-ó cuēi nándi yáha-o ndècu-o sá cuendá Xítohó Jesucrístú. Te yúhú ní ngava-í vecaá

ii<sup>n</sup> ñuú nání Pătmós, te ñuú-á<sup>n</sup> cáá xítí ndute lámár. Te duca<sup>n</sup> ní cuu cuendá sá cǎhá<sup>n</sup>-í tnúhu Yá Ndióxi, te cǎhá<sup>n</sup> váha-í cuendá Xítóhó Jesucristú. <sup>10</sup> Te ii<sup>n</sup> nduu ndumíngú nduu nàtacá-ó chĩnuhu-o Yá Ndióxi ní quide ñaha Espíritú-gá xii-í nàcuáa cǎchí iní-xi, te ní tecú dóho-í níhi ní cǎhá<sup>n</sup> ii<sup>n</sup> sá ní cǎhá<sup>n</sup> ndàa sàtá-í te dàtná níhi cǎhá<sup>n</sup> ii<sup>n</sup> cútú duca<sup>n</sup> níhi ní cǎhá<sup>n</sup>-xi. <sup>11</sup> Te cǎchí sá cǎhá<sup>n</sup>-á<sup>n</sup>:

—Yúhú sa ndècu-í ndéé cútñàhá ní ngáva ñuyúú, te diu-ni-í cundecu-í ndéé ná sàá nduu nàa-xi ndihi nchaá sá ió, te chido tnùnì-n ii<sup>n</sup> núú tütú sá ná dǎnehé núú ñǎhà-í xii-n, te daquih<sup>n</sup>-n tütú-á<sup>n</sup> ndi ùsá xichi núú xĩndecu cue ñáyiu ndècu ichi Yá Ndióxi xĩndecu distrítú Àsiá, ndaha ñáyiu ñuú Éfesú, ndaha ñáyiu ñuú Èsmirná, ndaha ñáyiu ñuú Pèrgamú, ndaha ñáyiu ñuú Tiàtirá, ndaha ñáyiu ñuú Sǎrdís, ndaha ñáyiu ñuú Filàdelfiá, ndaha ñáyiu ñuú Laodiceá, nchaá ñáyiu ñuú-á<sup>n</sup> daquih<sup>n</sup>-n tütú-á<sup>n</sup> ndahá-yu —cǎchí sá cǎhá<sup>n</sup>-á<sup>n</sup>.

<sup>12</sup> Te ní nchócuĩhnu-í ndéhè-í nùu ná cúú sǎ cǎhá<sup>n</sup>-á<sup>n</sup>, te ní xiní-í xĩnutnĩ ùsá tnàhá sá ní cuáha mee-ni dǐhú<sup>n</sup> cuáá<sup>n</sup> sá ndéé dité-xi, te núú dité-xi-á<sup>n</sup> yĩndòdo ii<sup>n</sup> caa candíl. <sup>13</sup> Te cuádava tnuú nchaá xǎá<sup>n</sup> ní xiní-í nǔtnĩ Yaa cáá dàtná cáá nchàa nchoo ñáyiu ndècu ñuyúú-a, te ñihnu-gá ii<sup>n</sup> dóó cánì cǎa-xi ndéé núú sǎhá-gá, te yidúcú<sup>n</sup>nuu ii<sup>n</sup> sìnchú ní cuáha mee-ni dǐhú<sup>n</sup> cuáá<sup>n</sup> pèchú-gá. <sup>14</sup> Te idi díquí-gǎ cuixí<sup>n</sup> quiyí dàtná cuixí<sup>n</sup> idi dava mbéé, àdi yúhá sǎ quée òré quidé víxi<sup>n</sup>-xi, te tinùu-gá quidé-xí dàtná quidé-xí òré sàá itá ñuhú. <sup>15</sup> Te sǎhá-gǎ súunì dàtása<sup>n</sup>-xi dàtná dátása<sup>n</sup> sá nání bròncé òré càyú-xi duca<sup>n</sup> dátása<sup>n</sup>-xi sǎhá-gǎ, te dónaha tnúhu cǎhá<sup>n</sup>-gá quidé-xí dàtná quidé-xí dǒndaha tĩtní víhí yúte. <sup>16</sup> Te xio ndaha cùha-gá nùndàha-gá úsá tnàhá chódínì, te mei yùhu-gá quéné ii<sup>n</sup> yuchí cǎhnú ndéè úú xio núú-xi, te núú-gǎ quidé-xí

dàtná quidé-xí nùú nchìcanchii òré súunì ngòyo cahni.

<sup>17</sup> Te sá dúcá<sup>n</sup> cǎa Yaa-á<sup>n</sup> ní xiní-í nùu xǎá<sup>n</sup> ní yùhú-í ní nduá-í núú-gǎ, te ní cuu-í dàtná ii<sup>n</sup> téé ní xǐhí sá dúcá<sup>n</sup> ió ní yùhú-í, dico mee-gǎ ní sacá<sup>n</sup> ndodo-gá ndaha cùha-gá núú yiqui cùñú-í, te ní cǎchí-gá:

—Vá yùhú-n, chi diu-ni yúhú sa ndècu-í ndéé cútñàhá ní ngáva ñuyúú, te diu-ni yúhú cundecu-í ndéé ná sàá nduu nàa-xi ndihi nchaá sá ió. <sup>18</sup> Te yúhú cùu-í Yaa ní xǐhí te ní ndoto-í, te vitna ndècu vívù-í, te duca<sup>n</sup>-ni cundecu-í ni caa ni quǐh<sup>n</sup>. Te yúhú cùnùu-í núú nchàa ñáyiu ní xǐhí te diu-ni-í cùnùu-í núú ndécú-yu. <sup>19</sup> Te chido tnùnì-n nchàa sá ní xiní-n-á<sup>n</sup> ii<sup>n</sup> núú tütú, ndihi nchaá nàcuáa cùu vitna, ndihi nchaá sá cádá-xí ndéè núú cuàhá<sup>n</sup> núú vèxi-gá. <sup>20</sup> Te na cǎchí tnúhu-í xii-n nàcuáa quée-xi ndi usá chódínì ní xiní-n yòtni-í xio ndaha cùha-í, ndihi nàcuáa quée-xi ndi usá sá ní cuáha mee-ni dǐhú<sup>n</sup> cuáá<sup>n</sup>, sá ndéé dité-xi te yĩndodo ii<sup>n</sup> caa candíl núú dité-xi-á<sup>n</sup>. Te ndi ùsá chódínì-á<sup>n</sup>, xǎá<sup>n</sup> cúú-xí sǎ cútñunì iní-ó sǎ ndécú ùsá cue téé xinu cuechi núú Yá Ndióxi, te ndi ùsá cue téé-á<sup>n</sup> ndécú-güedè ndi ùsá xichi núú ndécú ñáyiu ndècu ichi Yá Ndióxi. Te cuendá ndi ùsá sá ndéé dité-xi-á<sup>n</sup>, xǎá<sup>n</sup> cúú-xí sǎ cútñunì iní-ó sǎ ndécú ùsá xichi ñáyiu ndècu ichi Yá Ndióxi —duha cǎchí Yaa cǎhá<sup>n</sup>-á<sup>n</sup>.

### Tnúhu sá cúú-xí ñáyiu xĩndecu ichi Yá Ndióxi ndécú ñuú Éfesú

**2** Te ní cǎchí tucu Yaa cǎhá<sup>n</sup>-á<sup>n</sup> xii-í sá chídó tnùnì-í nchaá tnúhu sá vítná cǎhá<sup>n</sup>-gá ii<sup>n</sup> núú tütú, te tendaha-í quǐh<sup>n</sup> ndaha téé xinu cuechi núú Yá Ndióxi ndécú ñuú Éfesú sá cúú-xí cuè ñáyiu xĩndecu ichi-gá ndécú ñuú-á<sup>n</sup>, te duha ní cǎchí-gá: “Yúhú cùu-í Yaa nùndàha úsá chódínì xio ndaha cùha-í, te xica cuu-í núú ndécú ndi usá sá



nǐ cuáha mee-ni dǐhú<sup>n</sup> cuàá<sup>n</sup>, sá ndèé dité-xi te yǐndodo ìì<sup>n</sup> caa candíl núú dité-xi. <sup>2</sup>Te yúhú xìnǐ-í nchaa nàcuáa quide nchohó ñáyiú xǐndecu ichi Yá Ndiöxí ndécú ñùú Éfesú, te xìnǐ-í sá ïo ndücu ndee-ndo quide chiu<sup>n</sup>-ndo cuendá-gá, te ïo quide cahnu iní-ndó ndècu-ndo quide-ndo chiu<sup>n</sup>-gá. Te xìnǐ-í sá ñà túú tnàhí tnàhá iní-ndó nàcuáa quide nchaa ñáyiú ndècu ichi cuehé ichi duha. Te xìnǐ tucu-í sá xító ndèé-ndó cuè téé càchí sá ñǐ tendaha-ï véxi càhá<sup>n</sup> tnúhu-í te ñá ndàá sá càhá<sup>n</sup>-güedé tnúhu-í, te duca<sup>n</sup> te cùtnuní iní-ndó sá ñá ndàá sá càhá<sup>n</sup>-güedé tnúhu-í. <sup>3</sup>Te xìnǐ tucu-í sá ïo ndòho-ndo quide-ndo chiu<sup>n</sup> cuendá-í, te duca<sup>n</sup> ïo quide cahnu iní-ndó cuèi nándi yáha-ndo, te ñá túú cùu dusa<sup>n</sup>-ndo quide-ndo chiu<sup>n</sup>-á<sup>n</sup>. <sup>4</sup>Dico ñá túú cùu váha iní-í chi nchòhó ñá túú-gǎ quidé-ndó dàtná ní xóo cada-ndo cùtnàhá vitna cùu víi-ni ní sándáá iní ñáhá-ndó xii-í, chi vitna ñá túú-gǎ cúú iní ñáhá vihi-ndo datná ní xóo cada-ndo dàvá-á<sup>n</sup>. <sup>5</sup>Te chí dándàcu iní nàcuáa ní xóo cada-ndo cùtnàhá vitna cùu saa ní sándáá iní ñáhá-ndó xii-í, te ndixi cuèchi iní-ndó sá ñà túú-gǎ quidé váha-ndo ndècu-ndo vitna, te nu-cuíta saa tùcu-ndo cada-ndo datná ní xóo cada-ndo ndèé dǐhna. Te nchòhó cada iní-ndó sá ndécú ndǐhi-ndo ìì<sup>n</sup> sá ñǐ cuáha mee-ni dǐhú<sup>n</sup> cuàá<sup>n</sup>, sá ndèé dité-xi te yǐndodo ìì<sup>n</sup> caa candíl núú dité-xi. Te núu vá ndíxí cuèchi iní-ndó nàcuáa quide-ndo ndecu-ndo ñà, te quixi-í xocàni-í xíǎ<sup>n</sup>, te duca<sup>n</sup> sǎtnhá-xi cada ñaha-ï xii-ndo te núu vá ndíxí cuèchi iní-ndó nàcuáa quide-ndo ndecu-ndo, te duca<sup>n</sup> te vá yòo-gá nà-tacá chiñuhu ñaha xii-í ñuú-ndó. <sup>6</sup>Dico quide váha-ndo ìì<sup>n</sup> xichi chi dàquee tǐhú-ndó nchaa sá quidé cuè ñáyiú cùu nicolaitás, te yúhú tnàhá-í dáquèe tǐhù-í nchaa sá quidé ñáyiú-á<sup>n</sup>. <sup>7</sup>Te nchòhó cada cuendá váha-ndo nàcuáa xáha<sup>n</sup>-í

xii Espiritú Yá Ndiöxí xáha<sup>n</sup>-xi xii cue ñáyiú ndècu ichi-gá xǐndecu nchaa xichi. Te duha ndüu tnúhu xáha<sup>n</sup>-í xii Espiritú-gá xáha<sup>n</sup>-xi xii-yu: Cúñaha-n xii nchaa ñáyiú sá ñüu na càda ndee iní-yu yáha-yu nándi sá ná yáha-yu sá cuendá-í, te yúhú cada-í te nduu tǎhù-yu cundecu váha-yu núú ndécú Yá Ndiöxí, duha xáha<sup>n</sup>-í xii Espiritú-gá cúu-xi ñáyiú”, duha càchí Yáá càhá<sup>n</sup>-á<sup>n</sup>. Te nchaa tnúhu-á<sup>n</sup> ñǐ chídó tnùnǐ-í sá cúú-xí ñáyiú xǐndecu ichi Yá Ndiöxí ndécú ñùú Éfesú.

### **Tnúhu sá cúú-xí ñáyiú xǐndecu ichi Yá Ndiöxí ndécú ñùú Èsmirná**

<sup>8</sup>Te ní cachí tucu Yáá càhá<sup>n</sup>-á<sup>n</sup> xii-í sá chídó tnùnǐ-í nchaa tnúhu sá vítná càhá<sup>n</sup>-gá ìì<sup>n</sup> núú tùtú, te tendaha-ï quǐh<sup>n</sup> ndaha téé xǐnu cuechi núú Yá Ndiöxí ndécú ñùú Èsmirná sá cúú-xí cuè ñáyiú xǐndecu ichi-gá ndécú ñùú-á<sup>n</sup>, te duha càchí-gá: “Yúhú ndécù-í ndéé cùtnàhá ní ngáva ñuyúú, te diu-ni-í cundecu-í ndéé ná sàá nduu nàa-xi ndǐhi nchaa sá ïó, te diu-ni-í ní xǐhí te ní ndoto-í ndécù-í vitna. <sup>9</sup>Te yúhú xìnǐ-í nchaa nàcuáa quide nchohó ñáyiú ndècu ichi Yá Ndiöxí ndécú ñùú Èsmirná. Te xìnǐ-í sá ïo ndòho-ndo ndecu-ndo sá cuendá-í, te xìnǐ tucu-í sá ïo ndàhú-ndó dico cùu-ndo ñáyiú xǐndecu váha núú Yá Ndiöxí. Te xìnǐ tucu-í sá ïo càhá<sup>n</sup> cuèhé ñáyiú isràél cuendá-ndó, dico ñá túú quidé-yu nàcuáa tàú-yu cadá-yu sá cúú-yu ñáyiú isràél, chi cúú-yu ñáyiú xǐnu cuechi mee-ni núú sàcuíhna. <sup>10</sup>Dico nchòhó vá yùhú-ndó cuèi nándi cùu nchaa sá ná ndòho-ndo cuendá-í, chi sàcuíhna cada-xi te ngava dava-ndo vè-caá, te duca<sup>n</sup> càda-xi chi cuínǐ-xi coto ndéé ñáhá-xí xii-ndo núu ndisa sá vá ná tǐhú iní-ndó sá nchìcú<sup>n</sup> nihnu-ndo ìchi Yá Ndiöxí. Te ndoho-ndo ùxi nduu dico vá dáñá ndèé-ndó cànchicú<sup>n</sup> nihnu-ni-ndo ìchi-gá cuèi na cùú-ndó sá cuendá-gá, te yúhú cada-í te nduu

táhu-ndó cùndecu-ndo ndihi-gá ni caa ni quíhí<sup>n</sup>. <sup>11</sup>Te nchaa nchòhó cada cuèndá váha-ndo nàcuáa xáha<sup>n</sup>-í xii Espíritú Yá Ndiòxí xáha<sup>n</sup>-xi xii cue ñáyiú ndècu ichi-gá xíndecu nchaa xichi, te duha nduu tnúhu xáha<sup>n</sup>-í xii Espíritú-gá xáha<sup>n</sup>-xi xii-yu: Cúñaha-n xii nchaa ñáyiú sá núu na cùndee iní-yu yáha-yu nándi sá ná yáha-yu sá cuèndá-í te vá cuíta nihnú-yu na sáa nduu cuíta nihnú nchaa dawa-gá ñáyiú, duha xáha<sup>n</sup>-í xii Espíritú-gá cúu-xi ñáyiú”, duha ní cachí Yá cáhà<sup>n</sup>-á<sup>n</sup>. Te nchaa tnúhu-á<sup>n</sup> ní chídó tnùnì-í sá cúu-xí ñáyiú xíndecu ichi Yá Ndiòxí ndécú ñúú Èsmirná.

### **Tnúhu sá cúu-xí ñáyiú xíndecu ichi Yá Ndiòxí ndécú ñúú Pèrgamú**

<sup>12</sup>Te ní cachí tucu Yá cáhà<sup>n</sup>-á<sup>n</sup> xii-í sá chídó tnùnì-í nchaa tnúhu sá vítná cáhà<sup>n</sup>-gá ñ<sup>n</sup> núú tütú, te tendaha-í quíhí<sup>n</sup> ndaha tée xínu cuechi núú Yá Ndiòxí ndécú ñúú Pèrgamú sá cúu-xí cuè ñáyiú xíndecu ichi-gá ndécú ñúú-á<sup>n</sup>, te duha càchí-gá: “Yúhú cúu-í Yá néhé ñ<sup>n</sup> yuchí cánì te ndéé úú xio núu-xi. <sup>13</sup>Te yúhú xínì-í nchaa nàcuáa quide nchohó cue ñáyiú xíndecu ichi Yá Ndiòxí ndécú ñúú Pèrgamú, te xínì tucu-í sá ndécú-ndó núú ïo cùnuu yucu ñávàha, te ñá túú dàña ndeé-ndó nchìcú<sup>n</sup> nihnú-ndo ichi-í, te duca<sup>n</sup> ïo sàndáá iní ñáhà-ní-ndó xi-í, te ñuu-ni duca<sup>n</sup> ñ<sup>n</sup> quide-ndo cùtnàhá ní sahnì-güedé té Àntipás núú ndécú-ndó ñuu-ni núú dúcá<sup>n</sup> ïo cùnuu yucu ñávàha. Te ndíi-á<sup>n</sup> ñ<sup>n</sup> quide ndáá ndíi ní xíndecu ndíi ichi-í chi ní cáhà<sup>n</sup> váha ndíi cuèndá-í. <sup>14</sup>Dico ñá túú cùu váha iní-í cuèndá ñ<sup>n</sup> úú sá quidé-ndó, chi ndècu ndihi-ndo ñáyiú nchìcú<sup>n</sup> nihnú-ni nchaa nàcuáa ní cáhà<sup>n</sup> ndíi Balaám. Chi ndíi-á<sup>n</sup> ñá túú ní quide váha ndíi chi ní dácáhu iní ndíi íngá tée ní xínani Bálac nàcuáa cada-dé canu ichi-dé cue ñáyiú isràèl íngá ichi sá ñá túú vâha, chi ní xáha<sup>n</sup> tē Bálac-á<sup>n</sup> xii-yu sá cáxi-yu nchaa sá

ndúú táhu nchaa sá ñ<sup>n</sup> cadúha cue tée ñuyíú-a dānani ñáyiú ndiòxí te ñá ndáá sá ndiòxí cúu-xí, te ní dácáhu iní ñáhà-dē xii-yu sá cùndécú-yu ichi díí iní. <sup>15</sup>Te ndècu ndihi tucu-ndo ñáyiú nchìcú<sup>n</sup> nihnú sá dácúàha cue ñáyiú cùu nico-laitás. Te nchaa sá dácúàha ñáyiú-á<sup>n</sup> dáquèe tñhù-í, <sup>16</sup>te nchòhó chí dāndixi cuéchi iní sá ñá túú quide váha-ndo ndècu-ndo, chi núú ñáhà te quixi-í nàá-í ndihi cue ñáyiú-á<sup>n</sup> ndihi yuchí cánì sá quéné yùhu-í. <sup>17</sup>Te nchaa nchòhó cada cuèndá váha-ndo nàcuáa xáha<sup>n</sup>-í xii Espíritú Yá Ndiòxí xáha<sup>n</sup>-xi xii cue ñáyiú ndècu ichi-gá xíndecu nchaa xichi. Te duha nduu tnúhu xáha<sup>n</sup>-í xii Espíritú-gá xáha<sup>n</sup>-xi xii-yu: Cúñaha-n xii nchaa ñáyiú sá núu na càda ndee iní-yu yáha-yu nándi sá ná yáha-yu sá cuèndá-í, te yúhú cuáñaha-í sá ndúú yùhu xii-yu caxi-yu ñ<sup>n</sup> sá vátá quínì-gá-yu caxi-yu. Te xíá<sup>n</sup> cúu-xí mànáá sá ñ<sup>n</sup> xóo caxi cue ñáyiú ní xíndecu ndéé sanaha, te cuáñaha tucu-í ñ<sup>n</sup> caa yúú cuixí<sup>n</sup> xii-yu, te núú yúú-á<sup>n</sup> cundee ñ<sup>n</sup> ñuu saa. Te ñuu-á<sup>n</sup> vâ yóo tnàhí xínì chi ñ<sup>n</sup> ñuu díí-ni ñáyiú na quèhe<sup>n</sup> cuèndá ñuu-á<sup>n</sup> quínì-yu, duha xáha<sup>n</sup>-í xii Espíritú-gá cúu-xi ñáyiú”, duha càchí Yá cáhà<sup>n</sup>-á<sup>n</sup>. Te nchaa tnúhu-á<sup>n</sup> ní chídó tnùnì-í sá cúu-xí ñáyiú xíndecu ichi Yá Ndiòxí ndécú ñúú Pèrgamú.

### **Tnúhu sá cúu-xí cuè ñáyiú xíndecu ichi Yá Ndiòxí ndécú ñúú Tiàtirá**

<sup>18</sup>Te ní cachí tucu Yá cáhà<sup>n</sup>-á<sup>n</sup> xii-í sá chídó tnùnì-í nchaa tnúhu sá vítná cáhà<sup>n</sup>-gá ñ<sup>n</sup> núú tütú, te tendaha-í quíhí<sup>n</sup> ndaha tée xínu cuechi núú Yá Ndiòxí ndécú ñúú Tiàtirá sá cúu-xí cuè ñáyiú xíndecu ichi-gá ndécú ñúú-á<sup>n</sup>, te duha càchí-gá: “Yúhú cúu-í Déhe Yá Ndiòxí, te càa tinuu-í dàtná cáá itá ñuhú, te sáhà-í cáá dàtná cáá sá nánì bròncé òrè ñuhú-xí núú ñuhú càyú-xi. <sup>19</sup>Te yúhú xínì-í nchaa nàcuáa quide

nchohó ñáyiú xĩndecu ichi Yá Ndiöxí ndécú ñùú Tiàtirá. Te xini tucu-í sá ïo cùu iní-ndó Yá Ndiöxí te sàndáá iní-ndó-gá. Te xini tucu-í nàcuáa ndùu chiu<sup>n</sup> quide-ndo sá cúu-xí-gá. Te xini tucu-í sá ïo quide cahnu iní-ndó cuèi nándi cùu sá yáha-ndo ndècu-ndo. Te xini tucu-í sá ïo-gá ndúcú ndèe-ndo quide váha-ndo vitna dacúxí cùtnàhá vitna cùu saa ní sàndáá iní-ndó Yá Ndiöxí. <sup>20</sup>Dico ñá túú cùu váha iní-í cuendá ì<sup>n</sup> sá quidé-ndó, chi ñá túú tñàhí ná sání iní-ndó ndècu ndìhi-ni-ndo ñáyiú nchìcú<sup>n</sup> nihnu nchaa nàcuáa dānehé ñáhá ñàha nani Jezabél. Te ñaha-á<sup>n</sup> cāchí-a<sup>n</sup> sá cāhá<sup>n</sup>-a<sup>n</sup> tñúhu Yá Ndiöxí dico ñá ndàá sá cāhá<sup>n</sup>-a<sup>n</sup> tñúhu-gá, te cuáhá<sup>n</sup>-a<sup>n</sup> dāndahú-a<sup>n</sup> nchaa ñáyiú xinu cuechi núu-í ndìhi nchaa sá dānehé ñáhá-á<sup>n</sup> cuendá cundecú-yu ichi díí iní, te caxí-yu nchaa sá ndúú tǎhú nchaa sá ní cadúha cue téé ñuyú-a dānani ñáyiú ndiöxí te ñá ndàá sá ndiöxí cúu nchàa xǎ<sup>n</sup>. <sup>21</sup>Te ní cuu vai nduu ta dacaca-í ndécú-á<sup>n</sup> cuendá ndixi cuèchi iní-a<sup>n</sup> sá ñà túú quide váha-a<sup>n</sup> ndècu-a<sup>n</sup>, te cuèi duca<sup>n</sup> quide-í dico ñá túú cuini-a<sup>n</sup> dañā-a<sup>n</sup> nì ì<sup>n</sup> sá cuèhé sá dúhá quide-a<sup>n</sup>. <sup>22</sup>Te vitna yúhú ío dandòho-í-a<sup>n</sup> chi tñii ñaha cuèhé xii-a<sup>n</sup>, te diu-ni duca<sup>n</sup> ïo dandòho-í nchaa ñáyiú quide datná quidé-á<sup>n</sup> te núu vá ndíxí cuèchi iní-yu sá ñà túú quide váha-yu ndécú-yu, te dāñā-yu nchaa sá cuèhé sá dúhá quidé-yu. <sup>23</sup>Te nchaa ñáyiú cundìhi ñaha xii ñaha-á<sup>n</sup> cahni-í-yu, te duca<sup>n</sup> te nchòhó ndìhi dava-gá nchaa ñáyiú xĩndecu ichi Yá Ndiöxí ndécú nchàa xichì cutnuni iní-ndó ndìhí-yu sá yúhú cúu-í Yáá xini ndáá nchaa nàcuáa sàni iní ñáyiú, ndìhi nchaa nàcuáa quide-xi iní-yu. Te nchòhó nàcuáa ndùu sá quidé-ndó ì<sup>n</sup> ì<sup>n</sup>-ndo te duca<sup>n</sup> cunduu sá táxi-í nduu táhú-ndó. <sup>24</sup>Te dava nchòhó ñáyiú ndècu ñuú Tiàtirá, ñáyiú ñá túú nchìcú<sup>n</sup> nihnu nàcuáa dānehé ñáhá ñàha

nani Jezabél-á<sup>n</sup> ñà túú xini-ndó ñà cúu sá cāchí ñáyiú ndùu yuhu dacahu iní ñáhá yùcu ñávàha. Te nchòhó, ñá túú ñágá cachí tñúhu-í xii-ndo càda-ndo <sup>25</sup>diu-ná sá ïo nducu ndèe-ndo cada-ndo nchaa nacuáa cāhá<sup>n</sup> tñúhu sá ndécú ndìhi-ndo, te duca<sup>n</sup>-ni càda-ndo ndéé òré quixi tucu-í. <sup>26</sup>Te nchaa nchòhó ñáyiú na càda ndee iní yáha nándi sá ná yáha sá cuendá-í, te núu na càda-ni-ndo nchaa nacuáa cuini-í cada-ndo ndéé nduu vǎ cundècu-gá-ndó ñuyú-a, te yúhú taxi-í tñúhu ndee iní xii-ndo sá táxi tñuni-ndó nchàa ñáyiú ñuyú <sup>27</sup>dàtná ní quide mee Tǎtà-í Dútú Ndiöxí ní taxi-gá tñúhu ndee iní ndécú ndìhi-í, te duca<sup>n</sup> càda ñaha-í xii-ndo tàxi-í tñúhu ndee iní xii-ndo cuendá ío taxi tñuni-ndó, te cada iní-ndó sǎ cadá-ndó cuè ñáyiú dātná quidé-xí ì<sup>n</sup> quidi òré tǎhú-xi cāchi duu<sup>n</sup>-xi, te duca<sup>n</sup> chi nchòhó cada-ndo sǎ nchàá ñáyiú ñá túú quide váha cuíta nihnú-yu. <sup>28</sup>Te cada iní-ndó sǎ dātná dáyèhé chódini quiti quène oré sa ta tūndaá-ñà cuáhá<sup>n</sup> duca<sup>n</sup> càda-xi oré ná sǎá nduu ngũita-xi cada váha-xi, te duca<sup>n</sup> chi yúhú cada-í nàcuáa nduu táhú-ndó cundècu ndìhi ñaha-ndo xii-í núu ïo váha càa ndecu-í. <sup>29</sup>Te nchaa nchòhó cada cuendá váha-ndo nàcuáa xǎha<sup>n</sup>-í xii Espiritú Yá Ndiöxí xǎha<sup>n</sup>-xi xii cue ñáyiú ndècu ichi-gá xĩndecu nchaa xichì”, duha cāchí Yáá cāhá<sup>n</sup>-á<sup>n</sup>. Te nchaa tñúhu-á<sup>n</sup> ní chídó tñuni-í sá cúu-xí ñáyiú xĩndecu ichi Yá Ndiöxí ndécú ñùú Tiàtirá.

### Tnúhu sá cúu-xí ñáyiú xĩndecu ichi Yá Ndiöxí ndécú ñùú Sǎrdís

**3** Te ní cachí tucu Yáá cāhá<sup>n</sup>-á<sup>n</sup> xii-í sá chídó tñuni-í nchaa tñúhu sá vitná cǎhá<sup>n</sup>-gá ì<sup>n</sup> núu tütú, te tendaha-í quíhí<sup>n</sup> ndaha téé xinu cuechi núu Yá Ndiöxí ndécú ñùú Sǎrdís sá cúu-xí cuè ñáyiú xĩndecu ichi-gá ndécú ñùú-á<sup>n</sup> te duha cāchí-gá: “Yúhú cúu-í Yáá ndécú

ndìhi ndi usá espíritú cúu cuendá Yá Ndiöxí, te diu-ni-í cùu-í Yaá ndécú ndìhi ndi usá chódíní. Te yúhú xìn-í nchaa nàcuáa quide nchohó ñáyiú xĩndecu ichi Yá Ndiöxí ndécú ñùú Sárdís, te xìn-í sá cúu-ndó dàtná ñáyiú ní xíhí cuéi càchí ñáyiú sá ñǎhá. <sup>2</sup>Te chí cuáha cuendá nàcuáa quide-ndo ndecu-ndo vitna, te nducu ndèe-ndo cada-ndo ìh<sup>n</sup> úú-gá nchaa sá vǎha nchicú<sup>n</sup> nihnu-ndo vitna, chí sa ndètu víí-nǎ dañá-ndo nchàa-ndi túhú sá vǎha quide-ndo ni cuu, te quide cuendá-í sá ñà túú quide-ndo nchaa nacuáa cuíní Yá Ndiöxí cada-ndo. <sup>3</sup>Te chí dándacu iní nàcuáa càhá<sup>n</sup> tnúhu sá ñí xĩndedóho-ndo cùt-nǎhá ní tuha-ndo ìchi Yá Ndiöxí, te canchicú<sup>n</sup> nihnu-ndo càda-ndo nacuáa càhá<sup>n</sup> tnúhu-á<sup>n</sup>, te ndixi cuéchi iní-ndó sǎ ñà túú quide váha-ndo ndècu-ndo, te núu vá nàcuáha-ndo cuendá nàcuáa quide-ndo ndecu-ndo ña, te cada-í dàtná quidé ñàdúhú, chí òré ñà túú nǎ yíhí ìní-ndó quèxio-í núu ndécú-ndó. <sup>4</sup>Dico ndècu ndìhi-ndo ìh<sup>n</sup> úú ñáyiú càndoo caa nine iní-xi, chí ñáyiú-á<sup>n</sup> ñí nduu táhǔ-yu cuihnú-yu dóo cuixí<sup>n</sup> cuendá cundecu ndìhi-í-yu, te duca<sup>n</sup> chí cùdiú-yu núu-í. <sup>5</sup>Te nchaa ñáyiú na càda ndee iní-xi yáha nándi sá ná yáha sá cuendá-í, te ñáyiú-á<sup>n</sup> nduu táhǔ-yu cuihnú-yu dóo cuixí<sup>n</sup>, te vá náquète-í ñùú-yu núu tútú núu yódó tnùn-í cue ñáyiú ní nduu táhú cundecu ndìhi-í ñí caa ñí quíhí<sup>n</sup>, te cúñaha-í xii Tǎtǎ-í Dútú Ndiöxí ndìhi cue espíritú xínú cuèchi núu-í sá ñáyiú-á<sup>n</sup> cúu-yu ñáyiú cùu cuendá-í. <sup>6</sup>Te nchaa nchòhó cada cuendá váha-ndo nàcuáa xáha<sup>n</sup>-í xii Espíritú Yá Ndiöxí xáha<sup>n</sup>-xí xii cue ñáyiú ndècu ichi-gá xĩndecu nchaa xichi<sup>n</sup>, duha càchí Yaá càhá<sup>n</sup>-á<sup>n</sup>. Te nchaa tnúhu-á<sup>n</sup> ñí chídó tnùn-í sá cúu-xí ñáyiú xĩndecu ichi Yá Ndiöxí ndécú ñùú Sárdís.

### Tnúhu sá cúu-xí cuè ñáyiú xĩndecu ichi Yá Ndiöxí ndécú ñùú Filàdelfiá

<sup>7</sup>Te ní cachí tucu Yaá càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vitná càhá<sup>n</sup>-gá ìh<sup>n</sup> núu tútú, te tendaha-í quíhí<sup>n</sup> ndaha téé xínu cuechi núu Yá Ndiöxí ndécú ñùú Filàdelfiá sá cúu-xí cuè ñáyiú xĩndecu ichi-gá ndécú ñùú-á<sup>n</sup>, te duha càchí-gá: “Yúhú cùu-í Yaá ío váha quide ndáá te ñà túú tnàhí cuéchi-í. Te díhna-gá ndí Dàvíí ní taxi tnùn-í ndí ñáyiú, te vitna yúhú táxi tnùn-í-yu, te yúhú càhá<sup>n</sup>-í te núu ndèndida cà ñáyiú ndíhu ndaha-í te ndèndida cà ñáyiú vá ndíhu ndaha-í. <sup>8</sup>Te yúhú xìn-í nchaa nàcuáa quide nchohó ñáyiú xĩndecu ichi Yá Ndiöxí ndécú ñùú Filàdelfiá, te yúhú ní quide-í nàcuáa ní ñhí-ndó ìh<sup>n</sup> ichi cahnu quide-ndo chiu<sup>n</sup>-í, te vá yòo ìh<sup>n</sup> cada nàcuáa vá ñhí-gá-ndó nàcuáa cada-ndo chiú<sup>n</sup>-í. Te cuéi ñà túú ío ñhí ndéé-ndó cundecu-ndo ichi Yá Ndiöxí dico tnè-ndo nchaa tnúhu càhá<sup>n</sup>-í, te ni ìh<sup>n</sup> xito ñà túú càhá<sup>n</sup>-ndó sǎ ñà túú ndècu ndìhi ñaha-ndo xii-í. <sup>9</sup>Te nchaa ñáyiú quide nchaa nacuáa cuíní yucu ñávǎha, ñáyiú-á<sup>n</sup> cúu-yu ñáyiú isràél, te cuéi cúu-yu ñáyiú isràél dico ñà túú quidé-yu nàcuáa tàu-yu cadá-yu, te yúhú cada-í sá ncháá ñáyiú-á<sup>n</sup> canehé-yu sá yíñùhu núu-ndó, te cutnùn-í iní-yu sá yúhú ío cùu iní ñǎhá-í xii-ndo. <sup>10</sup>Te ío quide ndee-ni iní-ndó nchicú<sup>n</sup> nihnu-ndo quide-ndo nchaa nacuáa ní càhá<sup>n</sup>-í, te xíǎ<sup>n</sup> coto ñaha-í xii-ndo ñà túú nǎ tnahá-ndó ndùu na quixi nchaa tnúndòho tnúhu ndàhú ñuyúú-a. Te òré quexio nchaa tnúndòho-á<sup>n</sup> ñuyúú-a te dàvá-á<sup>n</sup> cutnùn-í nàcuáa ndùu sá quidé ìh<sup>n</sup> ìh<sup>n</sup> ñáyiú. <sup>11</sup>Te ío ndìhi quixi tucu-í. Te vá dáñá ndéé-ndó càda-ndo nchaa sá vǎha nchicú<sup>n</sup> nihnu-ndo quide-ndo cuendá sá vǎ cuíta sá ñí cachí Yá Ndiöxí nduu táhú-ndó. <sup>12</sup>Te nchaa nchòhó ñáyiú na càda ndee iní yáha nándi sá

ná yáha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tàtá-í Dútú Ndiòxí, te vá íí<sup>n</sup> ndùu-gá xocuiñí-ndó núú ndécú-gá. Te cada iní-ndó sá dàtná sá chídó tnùn-í dèu Tàtá-í Dútú Ndiòxí ñii-ndo chi duca<sup>n</sup>-ni cundecu-ndo ndihi-gá, te cada tucu iní-ndó sá dàtná sá chídó tnùn-í nàcuáa nàni ñuú-gá ñii-ndo, chi diu ñuú-gá-á<sup>n</sup> cundecu-ndo, te ñuú-á<sup>n</sup> nání-xí Jèrusalén Sáá, duha nàni ñuú-gá. Te ñuú-á<sup>n</sup> quee-xi andiu núú ndécú Yá Ndiòxí Yáá cúú Tàtá-í quée-xi ñuyú. Te cada tucu iní-ndó sá dàtná sá chídó tnùn-í dèu mee-í ñii-ndo, te xiá<sup>n</sup> cúú-xí ñ<sup>n</sup> diu saa, te duca<sup>n</sup> càda iní-ndó chi cundecu ndihi ñaha-ndo xii-í. <sup>13</sup>Te nchaa nchòhó cada cuendá váha-ndo nàcuáa xáha<sup>n</sup>-í xii Espíritú Yá Ndiòxí xáha<sup>n</sup>-xi xii cue ñáyiu ndècu ichi-gá xíndecu nchaa xichi”, duha càchí Yáá càhá<sup>n</sup>-á<sup>n</sup>. Te nchaa tnúhu-á<sup>n</sup> nì chídó tnùn-í sá cúú-xí ñáyiu xíndecu ichi Yá Ndiòxí ndécú ñúú Filàdelfíá.

### **Tnúhu sá cúú-xí ñáyiu xíndecu ichi Yá Ndiòxí ndécú ñúú Laodiceá**

<sup>14</sup>Te càchí tucu Yáá càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vítná càhá<sup>n</sup>-gá ñ<sup>n</sup> núú tùtú, te tendaha-í quíhí<sup>n</sup> ndaha téé xínu cuechi núú Yá Ndiòxí ndécú ñúú Laodiceá sá cúú-xí cuè ñáyiu xíndecu ichi-gá ndécú ñúú-á<sup>n</sup>, te duha càchí-gá: “Yúhú cúú-í Yáá quidé núú Yá Ndiòxí, te cùu-í Yáá quidé ndáá chi càhá<sup>n</sup> ndáá cuiti-í nàcuáa càhá<sup>n</sup> Yá Ndiòxí. Te yúhú cúú-í Yáá ní quide ní ngúndecu nchaa sá ñí cadúha Yá Ndiòxí. <sup>15</sup>Te yúhú xini-í nchaa nàcuáa quide nchòhó ñáyiu xíndecu ichi Yá Ndiòxí ndécú ñúú Laodiceá, te xini-í sá ñà túú cuiní-ndó càncicú<sup>n</sup> nihnu-ndo nchàa nacuáa càhá<sup>n</sup>-í, te ni ñà túú cuiní-ndó dàña duu<sup>n</sup>-ndo. Te váha-gá sá dúú<sup>n</sup> dùu<sup>n</sup> cada-ndo nchaa nacuáa càhá<sup>n</sup>-í àdi núú ñáhá te duu<sup>n</sup> duu<sup>n</sup> dañando. <sup>16</sup>Te

sá dúcá<sup>n</sup> quide-ndo ñà túú cuiní-ndó dùu<sup>n</sup> duu<sup>n</sup>-ni cada-ndo nàcuáa càhá<sup>n</sup>-í, te ni ñà túú cuiní-ndó dùu<sup>n</sup> duu<sup>n</sup>-ni dañando te sáá nduu vá cùndèe-gá iní-í cuendá nchaa sá quidé-ndó-á<sup>n</sup>, te daquèe tñhú ñáhà-í xii-ndo. <sup>17</sup>Te càchí-ndó sá cuicá-ndó, te ío váha ta yáha-ndo nchàa nduu cuáhá<sup>n</sup>, te ñà túú tnàhí ná cúmání xii-ndo, te ñà túú cùtnuoní iní-ndó sá cúú-ndó dàtná cue ñáyiu ío ndàhú yáha, te cùu-ndo datná ñáyiu ndàhú, ñáyiu ío cùndahú iní ñáhá tnàha ñáyiu-xi, te cùu-ndo datná cue ñáyiu cuáá, te cùu tucu-ndo datná cue ñáyiu ndàhú ñà túú tnàhí dóo-xi. <sup>18</sup>Te na càchí tnúhu-í xii-ndo sá càdá-ndó dàtná xíquide cue ñáyiu sàa<sup>n</sup> ñ<sup>n</sup> sá ñí cuáha mee-ni dñhú<sup>n</sup> cuáa<sup>n</sup> sá ío váha càa, te duca<sup>n</sup> quidé-yu te ío-gá cúú cuicá-yu. Te cada tucu-ndo dàtná xíquide cue ñáyiu sàa<sup>n</sup> dóo cuixí<sup>n</sup> sácuñhu-yu cuendá sá vá cúú-yu dàtná ñáyiu ndàhú ñà túú dóo-xi, te cada tucu-ndo dàtná quidé cuè ñáyiu sàa<sup>n</sup> yúcu quèe núú-xi nàcuáa cutnùn-í váha núú-yu, te duha càhá<sup>n</sup>-í xáha<sup>n</sup>-í xii-ndo chi cuiní-í sá nàtuha ñaha-ndo xii-í, te ío váha cundecu-ndo sá cúú-xí Yá Ndiòxí. <sup>19</sup>Te càhá<sup>n</sup>-í dóho nchaa ñáyiu cùu iní-í òré ñà túú quide ndáá-yu, te dándoho-í-yu, núú xiá<sup>n</sup> cuiní-í sá nchòhó ndixi cuéchi iní-ndó sá ñà túú quide váha-ndo ndècu-ndo. <sup>20</sup>Te na càchí tnúhu-í xii-ndo sá yúhú cúú-í dàtná ñ<sup>n</sup> téé nùtníi yuyèhe ndaa quehé te càhá<sup>n</sup>-í ñáyiu yìhi xití vehe, te núu na càda cuendá-yu sá càhá<sup>n</sup>-í te nacaá<sup>n</sup>-yu yuyèhe te quíhu-í xití vehe cudini-í ndihí-yu, te duha càhá<sup>n</sup>-í chi cuiní-í cundecu ndihi ñaha-í xii-ndo. <sup>21</sup>Te nchaa nchòhó ñáyiu na càda ndee iní-xi yáha nándi sá ná yáha sá cuendá-í, te yúhú taxi-í xii-ndo ñ<sup>n</sup> xichi núú ndécú-í cundecu-ndo te cunuu-ndo tnàhá-ndó dàtná cùnùu-í, chi yúhú duca<sup>n</sup> ñí quide ndee iní-í ní yáha-í nándi sá ñí yáha-í te vitna ní nduu táhù-í ndécú-í núú ndécú

Tàtá-í Dútú Ndiöxí cúnùu-í. <sup>22</sup> Te nchaa nchòhó cada cuèndá váha-ndo nàcuáa càhá<sup>n</sup> Espíritú Yá Ndiöxí xáha<sup>n</sup>-xi xii cue ñáyiú ndècu ichi-gá xĩndecu nchaa xichi”, duha càchí Yá cáhá<sup>n</sup>-á<sup>n</sup>. Te nchaa tnúhu-á<sup>n</sup> ní chídó tnùn-í sá cúu-xí ñáyiú xĩndecu ichi Yá Ndiöxí ndécú ñùú Laodiceá.

**Nàcuáa chiñuhu ñáyiú  
Yá Ndiöxí andiu**

**4** Te sátá ní yáha duca<sup>n</sup> ní cuu te ní xiní-í nchí andiu, te ní cáhá<sup>n</sup> tucu Yá ní cáhá<sup>n</sup> ndihi ñaha xii-í díhna, te Yá-á<sup>n</sup> ní cáhá<sup>n</sup> ñhi-gá dàtná càhá<sup>n</sup> ñhi ì<sup>n</sup> cútú, te ní cachí-gá xii-í:

—Taquène iha te na dànehé ñáhà-í xii-n nchàa nacuáa cada-xi ndéé núú cuàhá<sup>n</sup> núú vèxi —càchí-gá.

<sup>2</sup> Te òré-ni-á<sup>n</sup> ní quide ñaha tucu Espíritú Yá Ndiöxí xii-í nàcuáa càchí iní-xi, te diu-ni òré-á<sup>n</sup> ní xiní-í nútñí ì<sup>n</sup> xilé váha andiu te cà datná cáá xilé sácõo nchihí cue ñáyiú ío cùnùu, te núú xilé váha-á<sup>n</sup> núcõo Yá táxí tnùn-í. <sup>3</sup> Te Yá-á<sup>n</sup> cáá-gá dàtná cáá yúú chàhchí yúú váha sá nání jàspé, te càa tucu-gá dàtná cáá yúú váha sá nání còrnalíná, te ñuhu doco ñaha ì<sup>n</sup> cóo yáhnchí xii-gá, te tása<sup>n</sup>-dí dàtná tása<sup>n</sup> ì<sup>n</sup> yúú váha sá nání èsmeraldá. <sup>4</sup> Te ní xiní tucu-í nútñí ócó cúmí xilé váha ní càndéé núú núcõo-gá, te núú xilé-á<sup>n</sup> xĩnucóo ócó cúmí cue téé cùu sacuéhé te xixíhnu-güedé mee-ni dóo cuixí<sup>n</sup>, te ì<sup>n</sup> caa coróná sá ní cuáha mee-ni díhú<sup>n</sup> cuáá<sup>n</sup> xixúhu<sup>n</sup> díquí-güedé. <sup>5</sup> Te núú núcõo Yá táxí tnùn-í-á<sup>n</sup> sáa ndúté, te càhá<sup>n</sup> ñuhu te xica chihí-xi dón-daha, te càyú úsá iti núú núcõo-gá, te sá úsá iti-á<sup>n</sup> xǎ<sup>n</sup> cútñuní sá ndécú úsá espíritú cúú cuèndá-gá. <sup>6</sup> Te ndècu ì<sup>n</sup> sá ndécú ndàa núú-gá te xǎ<sup>n</sup> cáá dàtná cáá làmár, te dàtná cáá vidriú cáá ñihí.

Te ní càndéé diñi Yá núcõo-á<sup>n</sup> xĩnutñí cúmí quiti te titní víhí tĩnuu-güedi ndéé ndàa sátá-güedi ndihi

ndàa núú-güedi. <sup>7</sup> Te quiti díhna nuu càa-dí datná cáá ndìcaha, te quiti cùu uú cáá-dí dàtná cáá ndìcutu, te quiti cùu uní néhé-dí núú téé, te quiti cùu cumí cáá-dí dàtná cáá yàcolo oré cuáhá<sup>n</sup>-dí núú tàchí. <sup>8</sup> Te ndi cùmí quiti-á<sup>n</sup> ndéé ì<sup>n</sup>ú ndíxí<sup>n</sup>-güedi ì<sup>n</sup> ì<sup>n</sup>-güedi, te ñihí xití ndíxí<sup>n</sup>-güedi ndèhi ndàa sátá ndíxí<sup>n</sup>-güedi ndéé tĩnuu-güedi, te nduu núú chíñuhu-güedi Yá Ndiöxí, te xáha<sup>n</sup>-güedi xii-gá:

Yòhó Dútú Ndiöxí duca<sup>n</sup>-ni ta quide ndáá-n vèxi, te duca<sup>n</sup>-ni quide ndáá-n cuéi vitna, te diu-ni duca<sup>n</sup> càda ndáá-n núú cuàhá<sup>n</sup> núú vèxi, te cùu-n Yáa quidé nchàa-ndi túhú sá váha,

te diu-ni-n sà ndecu-n ndéé cútñahá ní cuáha ñuyúú,

te diu-ni-n ndècu-n cuéi vitna, te diu-ni-n cùndecu-n cuéi ndéé núú cuáhá<sup>n</sup> núú vèxi.

Duha xáha<sup>n</sup> cué quiti-á<sup>n</sup> xii Yáa núcõo núú xilé váha-á<sup>n</sup> chíñuhu ñaha-güedi.

<sup>9</sup> Te cue quiti-á<sup>n</sup> ìo ndàcá<sup>n</sup> táhú-güedi núú Yáa núcõo núú xilé váha-á<sup>n</sup> cuèndá nchaa sá quidé-gá. Te Yá-á<sup>n</sup> cúú-gá Yáa ndécú nchàa nduu nchaa quíú. Te cue quiti-á<sup>n</sup> càchí-güedi sá ìo càhnu cuu-gá te nèhe-güedi sá yĩñuhu núú-gá. Te ndi tnahá òré duca<sup>n</sup> càhá<sup>n</sup>-güedi, <sup>10</sup> te ndi òcó cúmí cue téé cùu sacuéhé xĩnucóo-á<sup>n</sup> ngüñí xití-güedé núú Yáa núcõo-á<sup>n</sup>, chí diu-gá cúú-gá Yáa ndécú nchàa nduu nchaa quíú te chíñuhu ñaha-güedé xii-gá, te tàva-güedé coróná ñúhú díquí-güedé te tàxi ndecu-güedé núú-gá, te xáha<sup>n</sup>-güedé xii-gá:

<sup>11</sup> Yòhó cúú-n Dútú Ndiöxí Yáa cúú cuèndá ñáhá xii-ndí,

te ío càhnu cuu-n, te ío váha quide-n, te nèhe-ndí sá yĩñuhu núú-n, chí duca<sup>n</sup> tàú-xi cada-ndí,

chí yòhó cúú-n Yáa ní cadúha nchaandi túhú sá ío,

te duca<sup>n</sup> nǐ ngúndecu nchaa xǎ<sup>n</sup> chi mee-n dùca<sup>n</sup> nǐ sani iní-n càda-n.

**Cuendá Yaá cáá dàtná cáá ì<sup>n</sup> mbéé  
quiti ní dánicuèhé-güedé  
ndihi cuendá ì<sup>n</sup> tutú**

**5** Te ní xiní tucu-í sá Yàá núcõo núú xilé váha-á<sup>n</sup> nundàha-gá ì<sup>n</sup> tutú ní nacaúnuu xio ndaha cùha-gá, te ndèé lètrá ndàa sátá-xi ndihi ndàa xití-xi, te úsá tnhá<sup>n</sup> tutú lǐhli ñuhu seyú ndèé sátá tütú-á<sup>n</sup> cuendá sá vǎ dǎná-xí nàcaá. <sup>2</sup> Te ní xiní-í ì<sup>n</sup> espíritú xínú cuèchi núú Yǎ Ndiõxí, te ndee vìhi-xi te níhi càhá<sup>n</sup>-xi, te càchí-xi:

—¿Yoo tàú-xi xocàni nchaa tutú lǐhli ñuhu seyú ndèé sátá tütú-a te nadacàá-xi? —càchí espíritú-á<sup>n</sup>.

<sup>3</sup> Dico ni àndiu, te ni núú ñuyú-a, te ni ndàa xití ñuhu ñá túú ì<sup>n</sup> ñáyiu tàú-xi nadacàá tutú-á<sup>n</sup> te cundèhé-yu. <sup>4</sup> Te yúhú ní ngúita-í ndàhyú vìhi-í cuendá sá ñà túú ì<sup>n</sup> ñáyiu tàú-xi nadacàá tutú-á<sup>n</sup> cundèhé-yu. <sup>5</sup> Te ì<sup>n</sup> cue téé cùu sacuéhé xñucóo xǎ<sup>n</sup> nǐ cachí-güedé xii-í:

—Vá ndàhyú-gá-n, te cada cuendá-n chi Yaá ío cùnuu cuu ndi mee cue ñáyiu cùu ñaní tnhá<sup>n</sup> ndíi Jùdá, diu-ni Yaá cúú ñaní tnhá<sup>n</sup> ndíi Dàvií, Yaá-á<sup>n</sup> cúú-gǎ Yaá ní ndacu ní yáha nchaa nándi sá nǐ yáha, núu xǎ<sup>n</sup> diu-gá tàú-gá xocàni-gá nchaa tutú lǐhli ñuhu seyú ndèé sátá tütú-á<sup>n</sup> te nadacàá-gá —duha càchí téé cùu sacuéhé-á<sup>n</sup>.

<sup>6</sup> Te tnuú ndi òcò cùmí cue téé cùu sacuéhé xñucóo-á<sup>n</sup>, ndihi tnuú ndi cùmí quitì xñutnǐ-á<sup>n</sup>, ndihi núú núcõo Yaá táxí tñuní-á<sup>n</sup> nǐ xiní-í nút-ñǐ ì<sup>n</sup> Yaá cáá dàtná cáá ì<sup>n</sup> mbéé quitì ní dánicuèhé-güedé te ní xǐhí-di ní cùu te ní ndoto-di, te ndèé úsá ndiqui-di, te ndèé úsá tñùu-di, te sá úsá tñùu-di-á<sup>n</sup> cùtñuní sá ndécú ùsá espíritú cúú cuendá Yǎ Ndiõxí, duca<sup>n</sup> càa Yaá-á<sup>n</sup> nǐ xiní-í. Te cue espíritú-á<sup>n</sup> nǐ tendaha-gǎ xǐcá cùu-xi ní caa xico ñuyúí.

<sup>7</sup> Te Yaá cáá dàtná cáá ì<sup>n</sup> mbéé quitì ní dánicuèhé-güedé-á<sup>n</sup> nǐ sáhá<sup>n</sup>-gá núú Yàá núcõo núú xilé váha-á<sup>n</sup>. <sup>8</sup> Te òré ní quehe<sup>n</sup>-gá tutú-á<sup>n</sup> te ndi cùmí quitì xñutnǐ xǎ<sup>n</sup> nǐ ngúíñí xití-güedé núú-gǎ, te duca<sup>n</sup> nǐ ngúíñí xití tùcu ndi òcò cùmí cue téé cùu sacuéhé xñucóo-á<sup>n</sup>, te ndi dí<sup>n</sup> núú-güedé xínehe-güedé yaá sá nání àrpá, te xínehe tucu-güedé ndi dí<sup>n</sup> núú-güedé ì<sup>n</sup> caa tǐcùu ní cuáha mee-ni díhú<sup>n</sup> cuáá<sup>n</sup>, te chitu dùsa sá sàhá<sup>n</sup> tñámí. Te ñúhmá dùsa sá sàhá<sup>n</sup> tñámí-á<sup>n</sup> cúú-xí dàtná nchaa tñúhu càhá<sup>n</sup> nchaa ñáyiu ndècu ichi Yǎ Ndiõxí òré càhá<sup>n</sup> ndihi ñàhá-yu xii-gá. <sup>9</sup> Te xita-güedé ì<sup>n</sup> ndudú sáa ndihi cue quitì-á<sup>n</sup> chínùhu ñaha-güedé xii-gá, te càchí-güedé ndihi cue quitì-á<sup>n</sup>:

Yòhó tàú-n quèhe<sup>n</sup>-n tutú-a te xocàni-n nchaa tutú lǐhli ñuhu seyú ndèé sátá-xi,

chi yòhó ní sati níñí-n te ní xǐhí-n, te cuendá xǎ<sup>n</sup> ní nduu cuendá Yǎ Ndiõxí cue ñáyiu ì<sup>n</sup> ì<sup>n</sup> nació<sup>n</sup>, ndihi ñáyiu xñndecu ì<sup>n</sup> ì<sup>n</sup> ñuu, ndihi ñáyiu càhá<sup>n</sup> ndi dí<sup>n</sup> ndi dí<sup>n</sup> núú tñùhu, ndihi ñáyiu xñndecu ì<sup>n</sup> ì<sup>n</sup> xichi.

<sup>10</sup> Te ní quidé-n-yu dàtná cue téé yìndaha ñáyiu, te ní quide tütú-n-yu dàtná cue dútú sǎ cúú-xí Yǎ Ndiõxí. Te sáa nduu te taxi tñuní-yu ñuyúí-a. Duha càhá<sup>n</sup> cue téé-á<sup>n</sup> ndihi cue quitì-á<sup>n</sup> chínùhu-güedé ndihi-güedé Yaá-á<sup>n</sup>.

<sup>11</sup> Te sátá dúcá<sup>n</sup> te ní tecú dóho-í ní càhá<sup>n</sup> cuéhé vìhí espíritú xínú cuèchi ní candéé núú núcõo Yaá táxí tñuní-á<sup>n</sup>, ndihi núú xñutnǐ ndi cùmí cue quitì-á<sup>n</sup>, ndihi núú xñucóo cue téé cùu sacuéhé-á<sup>n</sup>, te ní xiní-í sá sùúni cuéhé vìhí espíritú-á<sup>n</sup> xñndecu xǎ<sup>n</sup>, <sup>12</sup> te níhi ní càhá<sup>n</sup> cue espíritú-á<sup>n</sup>, te càchí-xi:

Yòhó Yaá cáá dàtná cáá ì<sup>n</sup> mbéé quitì ní dánicuèhé-güedé te ní xǐhí ní cùu te ní ndoto,  
te yòhó ío càhnu cuu-n, te ndècu ndihi-n nchaandi tùhú,

te ío ndècu ndihi-n sá xìní tnùní-n,  
 te ndàcu-n quide-n nchaa sá cuiní-n,  
 te nèhe-ndí sá yínùhu núú-n, te ío váha  
 quide-n,  
 te chiñuhu ñaha-ndí xii-n, chi duca<sup>n</sup>  
 tàú-ndí cada-ndí chi ío càhnu cuu-n.  
 Duha càchí nchaa cue espíritú-á<sup>n</sup>  
 xáha<sup>n</sup>-xi xii-gá chíñùhu ñaha-xi.

<sup>13</sup>Te ní tecú dóho-í ní cáhá<sup>n</sup> nchaandi  
 túhú sá ní cadúha Yá Ndióxi ndécú  
 àndiu, ndihi nchaa sá ndécú ñuyú, ndihi  
 nchaa sá ndécú xití ñuhu, ndihi nchaa sá  
 ñúhú xití ndute làmár, te xicachí-xi:

Yòhó Yaá núcõo núú xilé váha, ndihi  
 yòhó Yaá cáá dàtná cáá ì<sup>n</sup> mbéé  
 quití ní dánicuehé-güedé táxi  
 tnùní-ndó, te nèhe-ndí sá yínùhu  
 núú-ndó,

te duca<sup>n</sup> ío ndàcá<sup>n</sup> táhú-ndí núú-ndó, chi  
 ío váha quide-ndo te ío cùnuu-ndo,  
 te ñiu-ni duha cáhá<sup>n</sup> váha-ndí  
 cuendá-ndó ñi caa ni quíhí<sup>n</sup>.

Duha càchí nchaa sá ní cadúha Yá  
 Ndióxi.

<sup>14</sup>Te ndí cùmí cue quití xñutnñí-á<sup>n</sup>  
 càchí-güedí:

—¡Duca<sup>n</sup> na cùnduu! —cachí-güedí.

Te ndí òcó cùmí cue téé cùu  
 sacuéhé xñdecu-á<sup>n</sup> ní ngüññí xití-güedé  
 chíñùhu-güedé Yaá ndécú nchaa nduu  
 nchaa quíú.

**Cuendá úsá tutú lñhli ñuhu seyú**

**6** Te sáta dúcá<sup>n</sup> te ní xiní-í sá Yáa  
 cáá dàtná cáá ì<sup>n</sup> mbéé quití ní  
 dánicuehé-güedé-á<sup>n</sup> ní xócání-gá ì<sup>n</sup> tutú  
 lñhli ñuhu seyú ndèé sáta tütú sá ní  
 nadúcú<sup>n</sup> nuu-á<sup>n</sup>, te ní tecú dóho-í ní  
 cáhá<sup>n</sup> ì<sup>n</sup> quití cùmí xñutnñí-á<sup>n</sup>, te níhi ní  
 cáhá<sup>n</sup>-dì dàtná càhá<sup>n</sup> ñùhu, te càchí-dì:

—¡Taquixi cundehe-n! —cachí-dì.

<sup>2</sup>Te òré-ni-á<sup>n</sup> ní xiní-í ì<sup>n</sup> cuàyu cuixí<sup>n</sup>  
 yódó ñaha ì<sup>n</sup> sá yódó ñaha xii-dì, te  
 sá yódó ñaha xii-dì-á<sup>n</sup> nèhé-xí ì<sup>n</sup> arcú  
 sá cúu tnùxií-xi, te ní nduu táhú-xi ì<sup>n</sup>

coróná, te ní ndacu-xi ní cùnuu-xi te  
 duca<sup>n</sup>-ni ta cùnuu-xi cuáhá<sup>n</sup>.

<sup>3</sup>Te òré ní xócání-gá tutú lñhli cùu úú  
 ñúhú sèyú ndèé sáta tütú sá ní nadúcú<sup>n</sup>  
 nuu-á<sup>n</sup>, te ní tecú dóho-í ní cáhá<sup>n</sup> tucu  
 ingá quití cùu úú xñutnñí-á<sup>n</sup>, te càchí-dì:  
 —¡Taquixi cundehe-n! —cachí-dì.

<sup>4</sup>Te òré-ni-á<sup>n</sup> ní xiní tucu-í ì<sup>n</sup> cuàyu  
 tñcúehé ní quee-dì cuáhá<sup>n</sup>-dì, te yòdo  
 ñaha ì<sup>n</sup> sá yódó ñaha xii-dì, te sá yódó  
 ñaha xii-dì-á<sup>n</sup> ní níhí-xi tnúhu ndee ñí  
 sá dátícánuu-xi ñáyiú vá cùndècu ndihi  
 tnaha váha-gá-yu, te ngüíta ñáyiú cahni  
 tnàhá-yu, te ní nduu táhú-xi ì<sup>n</sup> yuchi  
 cáhnú vihi.

<sup>5</sup>Te òré ní xócání tucu Yaa-á<sup>n</sup> ingá tutú  
 lñhli cùu úní ñúhú sèyú ndèé sáta tütú  
 sá ní nadúcú<sup>n</sup> nuu-á<sup>n</sup>, te ní tecú dóho-í  
 ní cáhá<sup>n</sup> quití cùu úní xñutnñí xíá<sup>n</sup>, te  
 càchí-dì:

—¡Taquixi cundehe-n! —cachí-dì.

Te òré-ni-á<sup>n</sup> ní xiní tucu-í ì<sup>n</sup> cuàyu  
 tnúú te yòdo ñaha tucu ì<sup>n</sup> sá yódó ñaha  
 xii-dì, te sá yódó ñaha-á<sup>n</sup> nundàha-xi úú  
 yaxi<sup>n</sup> libré. <sup>6</sup>Te ní tecú dóho-í ní cáhá<sup>n</sup>  
 ì<sup>n</sup> sá ní cáhá<sup>n</sup> tnuu cue quití xñutnñí-á<sup>n</sup>,  
 te càchí-xi:

—<sup>ñ</sup>cuártú-nã triú níhí-ndó sã í<sup>n</sup>  
 ñhú<sup>n</sup> denariú, te úní cuártú-nã cebadá  
 níhí-ndó sã í<sup>n</sup> tucu ñhú<sup>n</sup> denariú, dico  
 acití ndihi ndudí ndéhé yoho yàha stilé  
 chí vá ndñhí ñihnu —duha càchí sá  
 càhá<sup>n</sup>-á<sup>n</sup>.

<sup>7</sup>Te òré ní xócání tucu Yaa-á<sup>n</sup> tutú  
 lñhli cùu cumí ñúhú sèyú ndèé sáta tütú  
 sá ní nadúcú<sup>n</sup> nuu-á<sup>n</sup>, te ní tecú tucu  
 dóho-í ní cáhá<sup>n</sup> tucu ingá quití cùu cumí  
 xñutnñí-á<sup>n</sup>, te càchí-dì:

—¡Taquixi cundehe-n! —cachí-dì.

<sup>8</sup>Te òré-ni-á<sup>n</sup> ní xiní tucu-í ì<sup>n</sup> cuàyu  
 yàhá, te yòdo ñaha tucu ì<sup>n</sup> sá yódó ñaha  
 xii-dì, te sá yódó ñaha xii-dì-á<sup>n</sup> nání-xí  
 Sã xíhí, te xíá<sup>n</sup> sáhní-xí ñáyiú, te sáta  
 xíá<sup>n</sup> nchicú<sup>n</sup> sá nèhé núú ndécú ñáyiú  
 ní xíhí. Te cùmí xichi cùu ñuyú, te sá  
 sáhní ñaha xii ñáyiú-á<sup>n</sup> ní níhí-xi tnúhu



ndee ìní danàa-xi ñáyiú ìí<sup>n</sup> xichi ñuyíú, te davá-yu cahni ñaha-xi ndìhi yuchí, te cada-xi sá cóo tñamá te cuú-yu, te cada tucu-xi sá cóo cuèhé cahni-xi ñáyiú, te ñu-ni tucu-xi cada sá ncháá quítì déé<sup>n</sup> cahni-di ñáyiú.

<sup>9</sup> Te òré ní xócání tùcu Yaá-á<sup>n</sup> tutú lìhli cùu uhú<sup>n</sup> ñúhú sèyú ndèé sátá tùtú sá ní nadúcú<sup>n</sup> nuu-á<sup>n</sup>, te òré-á<sup>n</sup> ní xiní-í nùtní ìí<sup>n</sup> núú sácòdó sá ndúú tǎhú Yá Ndiòxí, te ndàa caha xǎ<sup>n</sup> ní xiní-í xíndecu nchaa àlmá ñáyiú ní sahani-güedé núú ñuyíú sǎ cuèndá tñuhu Yá Ndiòxí, ndìhi sá cuèndá sá ní cáhá<sup>n</sup> váha-yu cuèndá-gá. <sup>10</sup> Te nchaa àlmá-á<sup>n</sup> ñìhi xícáhá<sup>n</sup>-xi, te xǎhá<sup>n</sup>-xi xii Yá Ndiòxí:

—Yòhó Dútú Ndiòxí cúu-n Yáá ñá túú tñahí cuèchi-xi, te ñá túú tñahí quee cáva-n quède-n ìí<sup>n</sup> sá càhá<sup>n</sup>-n. ¿Te ná ndéé ama dandòho-n ñáyiú ndècu ñuyíú nachinaa-n cuèndá sá ní quide ñàhá-yu xii-ndí-i? —càchí cue àlmá-á<sup>n</sup> xǎhá<sup>n</sup>-xi xii-gá.

<sup>11</sup> Te sátá dúcá<sup>n</sup> te nchaa cue àlmá ñáyiú-á<sup>n</sup> ní ñìhí-xi dóo cuìxí<sup>n</sup> ní quee cuíhnu-xi, te ní xítnúhu ñaha xii-xi sá ná ndètatú-xi te cundetú tnaa-xi ndéé ná xínu cava cuú ñáyiú nàcuáa ndèé tñuní dàtná ní xíhí cue ñáyiú dìi àlmá-xi cùu-xi. Te ñáyiú sa ní xíhí-á<sup>n</sup> ìí<sup>n</sup>-ni cùú-yu ndìhi ñáyiú vitna cuú-á<sup>n</sup> chi mee-ni chiú<sup>n</sup> Xítóhó Jesucristú quídè-yu, te ñu-ni ichi-gá ndécú-yu.

<sup>12</sup> Te òré ní xócání tùcu Yaá-á<sup>n</sup> tutú lìhli cùu ìñú ñúhú sèyú ndèé sátá tùtú sá ní nadúcú<sup>n</sup> nuu-á<sup>n</sup>, te ní xiní-í sùuní ñìhi ní quidí-xi ñuyíú, te ní cutnuu ñìhí núú nchíanchii dàtná ìí<sup>n</sup> dóo tñúú, te ní cuu ticuèhé ñíñí ñìhí núú yóó. <sup>13</sup> Te ní xiní-í ní ngoyo chódíní ñuyíú-a dàtná ngóyó ngúxí yíhí òré quéné tǎchí ñìhi. <sup>14</sup> Te ní xiní-í ní nadúcú<sup>n</sup> nuu andíu dàtná nádúcú<sup>n</sup> nuu ìí<sup>n</sup> tutú te ní ndòñúhú-xí, te nchaa tìndúú ní xica ndehe-xi núú ndécú-xí, te duca<sup>n</sup> ní xica ndehe tucu nchaa tìndúú yìchí

ndécú xítì ndute làmár. <sup>15</sup> Te nchaa cue téé yíndaha ñáyiú ní nguíváha-güedé, ndìhi nchaa dava-gá cue téé ío tàxi tñuní, ndìhi nchaa ñáyiú cuica, ndìhi nchaa cue téé tàxi tñuní sandàdú, ndìhi cue sandàdú cue téé ío váha sàá díquí-xi nàcuáa cada-güedé nàá-güedé, ndìhi nchaa ñáyiú ñá túú tñahí dàná quee núú chíú<sup>n</sup> pàtróó<sup>n</sup>-xi, ndìhi nchaa ñáyiú dàná queé núú chiú<sup>n</sup> patróó<sup>n</sup>-xi. Te dava ñáyiú-á<sup>n</sup> ní nguíváha-yu xítì yaú, te davá-yu ní nguíváha-yu nchaa tñuú cava. <sup>16</sup> Te xǎhá<sup>n</sup>-yu nchaa tìndúú ndìhi nchaa cava:

—Chí tǎcù<sup>n</sup> chiváha ñaha-ndo xii-ndí cuèndá sá vǎ quíní ñàhá Yáá ío tàxi tñuní núcòo núú xilé váha, ndìhi cuèndá sá vǎ dándòho ñaha Yáá cáá dàtná cáá ìí<sup>n</sup> mbéé quítì ní dánícuèhé-güedé, chí Yáá-á<sup>n</sup> ío cùdèé<sup>n</sup>-gǎ núú-ndí —duha càchí nchaa ñáyiú-á<sup>n</sup> xǎhá<sup>n</sup>-yu xii nchaa tìndúú-á<sup>n</sup> ndìhi nchaa cava-á<sup>n</sup>.

<sup>17</sup> Te vitna ní sáá nduu ío cùu cahnu nduu tñúndòho tñuhu ndàhú, te vǎ yóo ìí<sup>n</sup> cundee ìní-xi yáha nchaa tñúndòho-a.

### Ñáyiú isráel ñáyiú nanhí tǎhú

**7** Te sátá xǎ<sup>n</sup> te ní xiní-í cúmí tñàhá espíritú xínú cuèchi núú Yá Ndiòxí xínutñí-xi ndí cùmí xio ñuyíú, te cue espíritú-á<sup>n</sup> ní ngani-xi tǎchí cuèndá sá vǎ cuícó-gǎ-xi ní làmár, te ní díquí yutnu, te ní ìí<sup>n</sup> xichi ñuyíú vǎ cuícó-gǎ-xi. <sup>2</sup> Te cue espíritú-á<sup>n</sup> ndécú ndìhi-xi tñuhu ndee ìní danàa-xi sá ío làmár ndìhi sá ío ñuhu yìchí, te ní xiní tucu-í ingá espíritú xínú cuèchi núú Yá Ndiòxí ní quee nchita-xi ndàa nacuáa quène nchíanchii, te nundaha-xi seyú Yá Ndiòxí Yaá ndécú nchaa nduu nchaa quíú, te ñìhi ní cáhá<sup>n</sup>-xi xǎhá<sup>n</sup>-xi xii ndí cùmí cue espíritú-á<sup>n</sup>:

<sup>3</sup> —Vǎ dánàa-ndo sá ío làmár, te ní vǎ dánàa-ndo yutnu, te ní ìí<sup>n</sup> sá ío ñuyíú vǎ dánàa-ndo, chí cundetú-ndo ndèé ná tàxi ndecu-ndí ìí<sup>n</sup> sèñá tneé nchaa ñáyiú xìnu

cuechi núú Tǎtá-ó Dútú Ndiöxí —duha cǎchí espíritú-á<sup>n</sup> xǎha<sup>n</sup>-xi xii ndí cumí espíritú xĩnutnǎi ndí cumí xichi ñuyúú.

<sup>4</sup>Te ní tecú dóho-í ní cǎhá<sup>n</sup> ì<sup>n</sup> sǎ ní cǎhá<sup>n</sup>, te ní cachí-xi sǎ núú ndí úxúú xichi cue ñáyiú isrǎél te ní xĩnu ì<sup>n</sup> cièndú údico cúmí mǎl-yu ní ngúndecu sèhá tneé-yu. <sup>5</sup>Te núú ì<sup>n</sup> cièndú údico cúmí mǎl ñáyiú-á<sup>n</sup>, te ní xĩnu úxúú mǎl cue ñaní tnáhá ndí Júdá ní ngúndecu sèhá tneé-yu, te úxúú mǎl cue ñaní tnáhá ndí Rùbén, te úxúú mǎl cue ñaní tnáhá ndí Gǎd, <sup>6</sup>te úxúú mǎl cue ñaní tnáhá ndí Àsér, te úxúú mǎl cue ñaní tnáhá ndí Neftálí, te úxúú mǎl cue ñaní tnáhá ndí Manásés, <sup>7</sup>te úxúú mǎl cue ñaní tnáhá ndí Míó, te úxúú mǎl cue ñaní tnáhá ndí Lèví, te úxúú mǎl cue ñaní tnáhá ndí Isàcár, <sup>8</sup>te úxúú mǎl cue ñaní tnáhá ndí Zabùlón, te úxúú mǎl cue ñaní tnáhá ndí Chèé, te úxúú mǎl cue ñaní tnáhá ndí Benjámín, nchaandi túhú ñáyiú-á<sup>n</sup> ní ngúndecu sèhá tneé-yu.

### Cuéhé víhí ñáyiú ñihnu dóó cuixí<sup>n</sup>

<sup>9</sup>Te sátá xǎ<sup>n</sup> te ní xini-í cuéhé víhí ñáyiú, ñáyiú ì<sup>n</sup> ì<sup>n</sup> nació<sup>n</sup>, ndíhi ñáyiú ì<sup>n</sup> ì<sup>n</sup> ñuú, ndíhi ñáyiú cǎhá<sup>n</sup> ndí dí<sup>n</sup> ndí dí<sup>n</sup> núú tnúhu, ndíhi ñáyiú ní xĩndecu ì<sup>n</sup> ì<sup>n</sup> xichi, te nchaá ñáyiú-á<sup>n</sup> xĩnutnǎi-yu ndàa núú Yàá táxí tnùní núcõo núú xilé váha, ndíhi núú Yàá cǎá dàtná cǎá ì<sup>n</sup> mbéé quiti ní dánicuèhé-güedé, te vá yõ ì<sup>n</sup> ndàcu cahu ñaha xí-yu chí cuéhé víhí-yu, te nchaá-yu xĩxĩhnu-yu mee-ni dóó cuixí<sup>n</sup>, te nundahá-yu nchaá-yu ì<sup>n</sup> caa ndàha yutnu ñúú. <sup>10</sup>Te nchaá-yu níhi xícáhá<sup>n</sup>-yu, te cǎchí-yu:

Yàá táxí tnùní núcõo núú xilé váha cùu-gǎ Ndiöxí-ó,  
te ñu-gǎ ndíhi Yàá cǎá dàtná cǎá ì<sup>n</sup> mbéé quiti ní dánicuèhé-güedé ní dǎcǎcu ñihnu ñaha-gǎ xii-o núú ùhú núú ndàhú.

Duha cǎchí nchaá ñáyiú-á<sup>n</sup>. <sup>11</sup>Te nchaá espíritú xĩnú cuèchí núú Yǎ Ndiöxí

ní nadúcú<sup>n</sup>ndèé-xi xĩnutnǎi-xi ní cǎndéé núú núcõo Yàá núcõo núú xilé váha, ndíhi núú xĩnucõo cue téé cùu sacuéhé, ndíhi cue ndí cumí quiti xĩnutnǎi-á<sup>n</sup>, te nchaá-xi ní ngüíñí xítí-xí te ní ngúnu ndeyi-xi núú Yàá núcõo núú xilé váha-á<sup>n</sup>, te nchaá-xi ní ngüíta-xi chíñuhu ñaha-xi xii-gǎ, <sup>12</sup>te cǎchí-xi:

Na cǎhá<sup>n</sup> ndáá-ndí núú yòhó Tǎtá-ndí Dútú Ndiöxí sǎ ìo cǎhnu cuu-n, te ndàcu-n quide-n nchaá sǎ váha cuiní-n, te ìo váha quide-n, te ndècu ndíhi-n nchaá sǎ xini tnùní-n,

te chíñuhu ñaha-ndí xii-n, te duca<sup>n</sup> ndàcá<sup>n</sup> táhú-ndí núú-n cuendá nchaá sǎ quidé-n, te nèhe-ndí sǎ yĩñuhu núú-n,

te tnúhu cǎhá<sup>n</sup>-ndí-a cùu-xi tnúhu ndáá, te ñu-ni duha cǎhá<sup>n</sup>-ndí ndéé núú cuahá<sup>n</sup> núú vèxi.

Duha cǎchí nchaá cue espíritú-á<sup>n</sup> xǎha<sup>n</sup>-xi xii Yàá núcõo núú xilé váha-á<sup>n</sup>.

<sup>13</sup>Te ì<sup>n</sup> cue téé cùu sacuéhé xĩndecu-á<sup>n</sup> ní xícá<sup>n</sup> tnúhú-dě núú-í, te cǎchí-dé:

—¿Yóndí cùu ñáyiú dàcá<sup>n</sup> xĩxĩhnu dóó cuixí<sup>n</sup>-á<sup>n</sup>, te ndèé véxi-yu núu dàcá<sup>n</sup> xĩndáá-yu-i? —cǎchí-dé.

<sup>14</sup>Te yúhú ní xáha<sup>n</sup>-í:

—Tǎtá, ñá túú xini-í, dico mee-n xini-n —duha ní xáha<sup>n</sup>-í xii-dé.

Te dǎtnùní ní cachí tnúhu-dé xii-í ná cùú ñáyiú-á<sup>n</sup>, te cǎchí-dé:

—Nchaá ñáyiú-a cùú-yu ñáyiú ní quee núú ìo víhí tnúhu ndòho tnúhu ndàhú sǎ vǎ cùndèe ini-ó te véxi-yu iha, te cùú-yu ñáyiú sa ní nduu ndoo ní nduu nine ini-xi cuendá sǎ ní sati níñí Yàá cǎá dàtná cǎá ì<sup>n</sup> mbéé quiti ní dánicuèhé-güedé, cuendá xǎ<sup>n</sup> vitna ní ndíhí-yu ní nduu cuixí<sup>n</sup> dóó xĩxĩhnu-yu. <sup>15</sup>Te núu xǎ<sup>n</sup> vitna ní nduu táhú-yu ndècú-yu núú ndècú Yǎ Ndiöxí Yàá táxí tnùní núcõo núú xilé váha, te cuèi nduu cuèi níu xĩnú cuèchí-yu núú-gǎ vitna, te ñu-gǎ xító ñaha-gǎ xii-yu. <sup>16</sup>Te vitna ní sáá-yu

núú-gǎ cundecú-yu te vá ndóhó-gǎ-yu docó, te ni vǎ quíní-gǎ-yu ndohó-yu yíhí-yu ndute, te ni vǎ quíní-gǎ-yu ndohó-yu cahni nchíanchii, te ñá túú-gǎ ná cahni ndohó-yu. <sup>17</sup>Te duca<sup>n</sup> chi Yaá cáá dàtná cáá ì<sup>n</sup> mbéé quiti ní dǎnicuèhé-güedé ndécú-gǎ núú nútñi xilé váha núcáo Yá Ndióxi Yaá táxi tnùní, Yaá-á<sup>n</sup> coto ñaha-gǎ xí-yu dàtná quíde ì<sup>n</sup> toli oré xító-dě mbéé-dě, te candeca ñaha-gǎ xí-yu quíh<sup>n</sup> núú tóo ndute, te ndute-á<sup>n</sup> cúú-xí ndüte candeca iní-yu, te Yá Ndióxi cada-gǎ sá vǎ quíní-gǎ-yu tnúhu ndàhyú —duha ní cachí tnúhu téé cùu sacuéhé-ǎ<sup>n</sup> xii-í.

**Cuèndá tícúú sá ní cuáha  
mee-ni díhú<sup>n</sup> cuáá<sup>n</sup>**

**8** Te sáta dúcá<sup>n</sup> te Yaá cáá dàtná cáá ì<sup>n</sup> mbéé quiti ní dǎnicuèhé-güedé ní xócání-gǎ tutú líhli cùu usá ñuhú sèyú ndèè sáta tütú sá ní nadúcú<sup>n</sup>nuu-á<sup>n</sup>, te òré-á<sup>n</sup> ní cunahi sùúni nàvií-nǎ ní cuu andiu dàtná cuádava òré. <sup>2</sup>Te ní xiní-í usá tnàhá espíritú xínú cuèchi núú Yá Ndióxi xínutñi-xi núú núcáo-gǎ, te ní níhí-xi ì<sup>n</sup> caa cútú xínehe-xi. <sup>3</sup>Te dàtnùní ní xiní tucu-í ingá espíritú xínú cuèchi núú-gǎ ní quexio-xi nehe-xi ì<sup>n</sup> tícúú ní cuáha mee-ni díhú<sup>n</sup> cuáá<sup>n</sup> te ñuhu vai dúsa sá sàhá<sup>n</sup> tnámí, te ní ngúnutñi espíritú-á<sup>n</sup> núú ndécú sǎ ní cuáha mee-ni díhú<sup>n</sup> cuáá<sup>n</sup> núú sácódó sǎ ndúú tǎhú Yá Ndióxi, te xíá<sup>n</sup> nútñi-xi ndàa núú-gǎ, te dúsa sá sàhá<sup>n</sup> tnámí-á<sup>n</sup> cahmi espíritú-á<sup>n</sup> núú sácódó sǎ ndúú tǎhú-gǎ-á<sup>n</sup> cuèndá ñúhmá dǔsa-á<sup>n</sup> cundíhi-xi nchaa tnúhu càhá<sup>n</sup> ñáyiú càhá<sup>n</sup> ndíhi ñaha xii-gǎ, nchaa ñáyiú cùu cuèndá-gǎ. <sup>4</sup>Te nùndaha espíritú-á<sup>n</sup> tícúú ñuhú dǔsa sá sàhá<sup>n</sup> tnámí càyú, te quène ñúhmá nútñi-xi núú Yá Ndióxi, te ñúhmá-ǎ<sup>n</sup> cundíhi-xi nchaa tnúhu càhá<sup>n</sup> ñáyiú càhá<sup>n</sup> ndíhi ñaha xii-gǎ, nchaa ñáyiú cùu cuèndá-gǎ. <sup>5</sup>Te ní quehe<sup>n</sup> espíritú-á<sup>n</sup> tícúú te ní dáchítú-xi

ñuhú yódó núú sácódó sǎ ndúú tǎhú Yá Ndióxi, te ní xíténuu-xi ñuyú, te òré duca<sup>n</sup> ní quide-xi te ní cáhá<sup>n</sup> víhí ñuhu, te ío dusa<sup>n</sup> ní quide-xi ñuyú, te ní sáá ndúté, te níhi víhi ní tnáa.

**Ndi ùsá espíritú ní tiú-xi  
ì<sup>n</sup> caa cútú xínehe-xi**

<sup>6</sup>Te ndi ùsá cue espíritú xínehe ì<sup>n</sup> caa cútú-ǎ<sup>n</sup> ní ngúndecu túha-xi cuèndá tiú-xi.

<sup>7</sup>Te espíritú díhna nuu ní tiú-xi cútú néhé-xí, te ñuyú-a ní ngoyo ñiñi dàcánuu-xi ndíhi ñuhú ndíhi níñí, te luha-ná te cuu dava ñuyú ní cáyú, te luha-ná te cuu dava tucu nchaa yutnu ò ñuyú ní cáyú, te luha-ná te cuu dava tucu nchaa cúhú ò ñuyú ní cáyú.

<sup>8</sup>Te espíritú cúú ùú ní tiú-xi cútú néhé-xí, te dàtná cáá ì<sup>n</sup> tìndúú cáá ì<sup>n</sup> sá ní ngava xítí làmár te nchicú<sup>n</sup> ñuhú, te luha-ná te cuu dava ndute làmár-á<sup>n</sup> ní nduu-xi níñí. <sup>9</sup>Te luha-ná te cuu dava nchaa quiti xíxúhu<sup>n</sup> xítí làmár-á<sup>n</sup> ní xíhí-güedi, te luha-ná te cuu dava nchaa bàrcú ní quee naa-xi xítí ndute.

<sup>10</sup>Te espíritú cúú ùní ní tiú-xi cútú néhé-xí, te ní ngava ì<sup>n</sup> chódíni cáhnú ndèè andiu ñuyú te nchicú<sup>n</sup> ñuhú-dí, te ñuhú-á<sup>n</sup> cáá dàtná cáá ñuhú ití. Te luha-ná te cuu dava nchaa yúte ní ngava chódíni-ǎ<sup>n</sup>, te luha-ná te cuu dava tucu nchaa núú quènihi ndute ní ngava-dí.

<sup>11</sup>Te chódíni-ǎ<sup>n</sup> nání-dí: Yúcú Úá. Te ndute xica nchaa yúte-á<sup>n</sup> ndíhi nchaa ndute quènihi-á<sup>n</sup> ní cuu úa-xi dàtná yúcú úa, te ío cuéhé ñáyiú ní xíhí sá dúcá<sup>n</sup> ní cuu úa ndute-á<sup>n</sup>.

<sup>12</sup>Te espíritú cúú cùmí ní dácàhá<sup>n</sup>-xi cútú néhé-xí, te luha-ná te cuu dava nchíanchii ñá túú ní dàyehé-xi, te duca<sup>n</sup> lùha-ná tucu cuu dava yóó ñá túú ní dàyehé-dí, te duca<sup>n</sup> lùha-ná te cuu dava tucu nchaa chódíni ñá túú ní dàyehé-güedi, te luha-ná te cuu dava nduu ñá túú ní dàyehé nchíanchii, te

duca<sup>n</sup> lùha-ná te cuu dava niú ñá túú ní dàyehé yóó ndihi nchaa chódíní.

<sup>13</sup>Te sátá dúcá<sup>n</sup> te ní xiní-í xícó ì<sup>n</sup> es-  
píritú xínú cuèchi núú Yá Ndiöxí núú  
táchí, te ní tecú dóho-í níhi càhá<sup>n</sup>-xi, te  
càchí-xi:

—Ío ndàhú ndoho nchaa ñáyiú xìn-  
decu ñuyíú òré ná dàcahá<sup>n</sup> úní-gá cue  
espíritú cúmání cútú xínehe-xi, chi sa xìn-  
decu túha-ná-xi sá dácàhá<sup>n</sup>-xi!— duha  
càchí espíritú-á<sup>n</sup>.

**9** Te espíritú cúú úhú<sup>n</sup> ní tiú-xi cútú  
néhé-xí, te òré-á<sup>n</sup> ní xiní-í ní quee  
ì<sup>n</sup> espíritú andiu te càa-xi datná cáá  
ì<sup>n</sup> chódíní, te ní ngava-xi ñuyíú, te  
ní níhí-xi ì<sup>n</sup> ndacaá néhé-xí cuendá  
nacaá<sup>n</sup>-xi yuyèhe yaú cùnú víhí. <sup>2</sup>Te  
ní nacaá<sup>n</sup>-xi yaú-á<sup>n</sup> te ní nguíta-xi ní  
quene ñúhmá dàtná quéné ñúhmá ì<sup>n</sup>  
xítnú cáhnú víhi, te ní quene táchí ní  
xítenuu-xi ñúhmá-á<sup>n</sup> te ní sadí-xi núú  
nchíanchii, te ní cunee ñuyíú. <sup>3</sup>Te  
xítí ñúhmá-á<sup>n</sup> ní quene tíca làngóstá,  
te ní xítenuu-dí ñuyíú, te déé<sup>n</sup>-güedi  
dàtná déé<sup>n</sup> nchacua. <sup>4</sup>Te ní ngúndecu  
ndihi-güedi tnúhu ndee ìní cuendá sá  
dándòho-güedi mee-ni ñáyiú ñá túú  
ndéè sèñá Yá Ndiöxí tneé-xi, te ñá túú  
nã cada-dí nchaa yutnu ndihi nchaa  
cúhú. <sup>5</sup>Te ñá túú tnúhu ndee ìní ndécú  
ndihi-güedi sá cáhní-güedi ñáyiú, chi  
mee-ni sã dándòho ñaha-güedi xíi-yu  
úhú<sup>n</sup> yóó. Te òré ní nguíta-güedi  
dándòho ñaha-güedi xíi-yu te tàhú  
tnúhú núú dáquëe-güedi iñu-güedi  
dàtná quidé-xí núú dáquëe nchacua  
iñu-güedi. <sup>6</sup>Te ñáyiú-á<sup>n</sup> xicá<sup>n</sup> táhü-yu  
sá ndíhi cuú-yu cuendá sá ïo ndòhó-yu  
dàquëe ñaha nchaa quiti-á<sup>n</sup> iñu-dí  
xíi-yu te ñá cuíní-xi cuú-yu, te ì<sup>n</sup> nduu  
ì<sup>n</sup> nduu sàni iní-yu cuú-yu te ñá túú  
cuíní-xi cuú-yu chi ñá túú tnúhu xihí sá  
cúú-xí-yu.

<sup>7</sup>Te nchaa tíca làngóstá-á<sup>n</sup>  
xíndáa-güedi dàtná ndáa nchaa cuáyú  
cue téé cuáhá<sup>n</sup> nàá, te díquí-güedi

ñùhu ì<sup>n</sup> sá cáá dàtná cáá còroná  
ní cuáha mee-ni díhú<sup>n</sup> cuáá<sup>n</sup>, te  
núú-güedi càa datná cáá núú cuè téé.  
<sup>8</sup>Te idi díquí-güedi càa datná cáá  
ìdi díquí ñáyiú díhí, te núhu-güedi  
càa datná cáá ñuhu ndicaha. <sup>9</sup>Te  
yidúcú<sup>n</sup>nuu-güedi ì<sup>n</sup> sá cáá dàtná  
cáá cáá, te ndíxí<sup>n</sup>-güedi quide-xi  
datná quidé-xí núú vèxi cuéhé víhí  
càrretá sá tãñuhu cuayú cuáhá<sup>n</sup>-güedé  
ndihi-güedi núú nàa-güedé. <sup>10</sup>Te ndéè  
iñu núú lùhmá-güedi dàtná ndéè  
iñu núú lùhmá nchacua, te iñu núú  
lùhmá-güedi-á<sup>n</sup> dáquëe-güedi ñáyiú  
dándòho ñaha-güedi xíi-yu, te duca<sup>n</sup>-ni  
càda-güedi dándòho ñaha-güedi xíi-yu  
ndéè xínu úhú<sup>n</sup> yóó. <sup>11</sup>Te nchaa tíca  
làngóstá-á<sup>n</sup> táxi tnúni ñáhá espíritú sá  
táxi tnúni yaú cùnú víhí, te espíritú-á<sup>n</sup>  
nání-xí Àbadón tnúhu hèbreú, te tnúhu  
grégú nání-xí Àpolión, te ndi ndúú  
tnúhu-á<sup>n</sup> quée-xí: Sá dánàa ñáyiú.

<sup>12</sup>Te tnúndòho-a cuu-xi tnúndòho  
díhna nuu, te vitna cúmání úú-gá.

<sup>13</sup>Te espíritú cúú iñú ní tiú-xi cútú  
néhé-xí. Te núú Yá Ndiöxí núnñi ì<sup>n</sup> sá ní  
cuáha mee-ni díhú<sup>n</sup> cuáá<sup>n</sup> núú sácódó sã  
ndúú tàhú-gã, te ndi cúmí xíquí-xi xìn-  
decu ì<sup>n</sup> caa ndíquí, te ní tecú dóho-í  
ní càhá<sup>n</sup> ì<sup>n</sup> sá ní càhá<sup>n</sup> nihnu ndi cúmí  
ndíquí-á<sup>n</sup>. <sup>14</sup>Te sá càhá<sup>n</sup> nihnu ndíquí-á<sup>n</sup>  
xãha<sup>n</sup>-xi xii espíritú cúú iñú sá ní tiú  
cútú-á<sup>n</sup>:

—Cuáhá<sup>n</sup> nandaxi-n ndi cúmí espíritú  
ndútú ndéu yúte càhnu nani Eúfratés —  
càchí sá càhá<sup>n</sup>-á<sup>n</sup> xãha<sup>n</sup>-xi xii espíritú-á<sup>n</sup>.

<sup>15</sup>Te sátá dúcá<sup>n</sup> te ní nandaxí ndi cúmí  
cue espíritú-á<sup>n</sup> cuendá cahni-xi cuéhé  
víhí ñáyiú, te sa yatni dàtná cuádava  
ñáyiú xíndecu ñuyíú cahni-xi, te duca<sup>n</sup>  
chi sa ndéu túha tnàhí cue espíritú-á<sup>n</sup>  
ndétú-xí sàá òré, àdi nduu, àdi yóó, àdi  
cuá duca<sup>n</sup> càda-xi cahni-xi ñáyiú. <sup>16</sup>Te  
ní xiní-í nchaa cue sandàdú cündíhi-xi  
xixódó-güedé cuáyú, te ní níhí-í tnúhu  
sá xínu úú ciendú millón-güedé.

17 Te duha xĩndáa cue cuàyú-á<sup>n</sup> ndihi cue tée yòdo ñaha-á<sup>n</sup> nĩ xini-í: Te cue té-á<sup>n</sup> yídücü<sup>n</sup> nuu ñ<sup>n</sup> sá yídücü<sup>n</sup> nuu pèchú-güedé, te luha ticuèhé te luha cuìi datná cuìi andiu, te luha cuàá<sup>n</sup>, te nchaa cuàyú-á<sup>n</sup> cáá díquí-güedi dàtná cáá díquí ndicaha, te yuhu-güedi quène ñuhu ndihi ñúhmá, ndihi àzufré nchìcú<sup>n</sup> ñuhú. 18 Te ío cuèhé ñáyiu ñuyúú nĩ xihí chi luha-ná te cudavá-yu nĩ xihí sá cuèndá ñuhú-á<sup>n</sup> ndihi ñúhmá-á<sup>n</sup> ndihi àzufré-á<sup>n</sup>. 19 Te ndihi núú lùhmá-güedi ndihi yuhu-güedi dándoho-güedi ñáyiu, te núú lùhmá-güedi nèhe-xi díquí còó, te diu-ni dàtná cáá còó cáá ñihí lùhmá-güedi.

20 Te nchaa dava-gá ñáyiu nĩ cácu ñá túú ni xihí núú nchàa tnúndòho-á<sup>n</sup> ñà túú nĩ cuìni-yu dàñá-yu ichi cuèhé ichi duha ndècú-yu, chi quide cahnu-ni-yu nchaa espíritú cündihi yucu ñávàha, ndihi nchaa sá càchí-yu cùu ndiòxí ní cadúha cue tée ñuyúú-a, te dava xíá<sup>n</sup> ní cuáha mee-ni díhú<sup>n</sup> cuàá<sup>n</sup>, te dava ní cuáha mee-ni díhú<sup>n</sup> cuixí<sup>n</sup>, te dava ní cuáha sá nání bròncé, te dava ní cuáha mee-ni yúú, te dava ní cuáha mee-ni yùtnu, te nchaa xíá<sup>n</sup> ñá túú cùtnuní núú-xi, te ni ñà túú tècú dóho-xi, te ni ñà ndácú-xí càca-xi. 21 Te ni sá sáhní tñahá-yu, te ni sá sáhní ndùu tñahá-yu, te ni sá ndècú-yu ichi díí ñní, te ni sá dúhú ndàchiu<sup>n</sup> tñahá-yu ñá túú ní cuìni-yu dàñá-yu.

**Ñ<sup>n</sup> espíritú xínu cuèchi núú  
Yá Ndiòxí néhé-xí ñ<sup>n</sup> librú**

**10** Te sáta dúcá<sup>n</sup> te ní xini tucu-í ñ<sup>n</sup> espíritú cùnùu xinu cuechi núú Yá Ndiòxí ní quee-xi andiu, te yìhi-xi xití vícò cuànguee-xi ñuyúú te ndàa díquí-xi ndècú ñ<sup>n</sup> cóó yáhnchí, te núú-xi súuní chàhnchí dàtná chàhnchí núú nchìcanchii, te ndi ndùú díhi<sup>n</sup>-xi càa datná cáá itá ñuhú. 2 Te nùndaha-xi ñ<sup>n</sup> librú lìhli ní nandicá, te sáhá cùha-xi ní

sani-xi núú ndute làmár, te sáhá dàtni-xi ní sani-xi núú ñuhu yìchí. 3 Te espíritú-á<sup>n</sup> ñihi vihi ní cáhá<sup>n</sup>-xi, te ní quide-xi dàtná quidé ñ<sup>n</sup> ndicaha oré cánásàa-di, te òré duca<sup>n</sup> ñihi vihi ní cáhá<sup>n</sup>-xi te úsá xito ní cáhá<sup>n</sup> ñuhu. 4 Te sáta ní yáha ní cáhá<sup>n</sup> ñuhu-á<sup>n</sup> úsá xito, te chido tnùn-í ñ<sup>n</sup> núú tütù nàcuáa ní cáhá<sup>n</sup>-xi ní cùu, te mei òré-á<sup>n</sup> ní tecú dóho-í ní cáhá<sup>n</sup> ñ<sup>n</sup> sá ní cáhá<sup>n</sup> andiu te càchí-xi:

—Vá chídó tnùn-n nàcuáa ní cáhá<sup>n</sup> ñuhu-á<sup>n</sup>, iní meé-ni-n ná cùhu<sup>n</sup> —duha càchí sá ní cáhá<sup>n</sup>-á<sup>n</sup>.

5 Te espíritú sá nùtni ñ<sup>n</sup> xio sáhá-xi núú ndute làmár-á<sup>n</sup> ndihi ingá xio sáhá-xi núú ñuhu yìchí-á<sup>n</sup> ní xini-í ní ndonehe-xi ndaha cùha-xi, 6 te càchí-xi:

—Yá Ndiòxí Yáá ndécú nchàa nduu nchaa quíú Yáá ní cadúha ñuyúú, ndihi andiu, ndihi làmár, ndihi nchaa sá ío, Yáá-á<sup>n</sup> náhá ndáá-gá sá yùhú càhá<sup>n</sup> ndáá-í, te vá cùyàa vihi 7 te cada-xi nchaa nàcuáa ndùu tnúhu ndùu yuhu ní cáhá<sup>n</sup>-gá, tnúhu ní xáha<sup>n</sup>-gá xii cue tée ní xinu cuechi núú-gá, cue tée ní xóo cáhá<sup>n</sup> tnúhu-gá ndéé sanaha, chi òré ná tìù espíritú cùú úsá cùtú néhé-xí, te òré-á<sup>n</sup> cada-xi nchaa nàcuáa ndùu tnúhu ndùu yuhu sá ní xáha<sup>n</sup>-gá xii nchaa cue té-á<sup>n</sup> —duha càchí espíritú-á<sup>n</sup>.

8 Te sáta dúcá<sup>n</sup> te ní tecú tucu dóho-í ní cáhá<sup>n</sup> tucu sá ní cáhá<sup>n</sup> andiu-á<sup>n</sup>, te càchí-xi xii-í:

—Cuàhá<sup>n</sup> te quehe<sup>n</sup>-n librú lìhli sá ní nandicá nùndàha espíritú-á<sup>n</sup>, espíritú sá nùtni ñ<sup>n</sup> xio sáhá-xi núú ndute làmár, te ñ<sup>n</sup> xio sáhá-xi núú ñuhu yìchí —duha càchí sá ní cáhá<sup>n</sup>-á<sup>n</sup>.

9 Te yùhú ní sáhá<sup>n</sup>-í núú ndécú espíritú-á<sup>n</sup> xicá<sup>n</sup>-í librú lìhli nèhe-xi-á<sup>n</sup>, te ní cachí-xi:

—Iha te caxi-n, te cuvídí yuhu-n dàtná cuvídí òré xihí-n ndùdí ñúñú, dico xití-n chi cada úa-xi —càchí-xi.

10 Te ní quehe<sup>n</sup>-í librú lìhli nùndaha espíritú-á<sup>n</sup> ní xexi-í, te yuhu-í ní quide

vídí-xi dàtná vídí ndudí ñúñú, dico sátá nǐ ngava-xi xití-í te ní quide úa-xi. <sup>11</sup> Te nǐ cachí tucu espíritú-á<sup>n</sup> xii-í:

—Dacuití cǎhá<sup>n</sup> tucu-n nàcuáa cǎchí Yǎ Ndiòxí cuèndá ñáyiú titní víhí nà-ció<sup>n</sup>, ndihí cuèndá ñáyiú titní víhí ñùú, ndihí cuèndá ñáyiú cǎhá<sup>n</sup> ndí díf<sup>n</sup> ndí díf<sup>n</sup> ñúú tñuhu, ndihí cuèndá cue téé yǐndaha ñáyiú.

### Cuèndá úú cue téé cǎhá<sup>n</sup> nàcuáa cǎchí Yǎ Ndiòxí

**11** Te ní ñhì-í ñ<sup>n</sup> tnyoo nàcuáa chicùhá-í ñ<sup>n</sup> sá chicùhá-í, te ní cǎhá<sup>n</sup> ñ<sup>n</sup> sá ní cǎhá<sup>n</sup>, te cǎchí-xi:

—Ndacuñí te chicùhá-n vèhe Yǎ Ndiòxí, te chicùhá tucu-n ñúú sácòdó sǎ ndúú tǎhú-gǎ, te cahu-n nǎ daha tñàhá ñáyiú chǐñuhu ñaha xii-gǎ xǐndecu. <sup>2</sup> Dico vá chicùhá-n ndàa quehé vehe-gǎ, chi xía<sup>n</sup> nǐ nduu cuèndá cue ñáyiú ñá túú cùu ñáyiú isràél, te ñáyiú-á<sup>n</sup> nduu nuu-nǎ-yu núú nǐ cuu ñúú-gǎ, te cadá-yu dàtná cǎchí iní mée-yu, te údico úú yóo duca<sup>n</sup> cadá-yu. <sup>3</sup> Te yúhú tendaha-í úú tñàhá cue téé cǎhá<sup>n</sup> yuhu-í nàcuáa cǎchí Yǎ Ndiòxí, te úxúú cièndú únídico nduu duca<sup>n</sup> cǎhá<sup>n</sup>-güedé yuhu-í cada-güedé ñùú-í, te cuihnu-güedé dóo tñúú sǎ sácuihnu cue ñáyiú ndihú iní-xi —duha cǎchí sá cǎhá<sup>n</sup>-á<sup>n</sup>.

<sup>4</sup> Te ndí ndùú cue téé-á<sup>n</sup> cúú-güedé dàtná úú yutnu òlívú sá xǐnutnǐ núú Yǎ Ndiòxí, ndihí dàtná úú sá ndéé dité-xi, sá yǐndòdo ñ<sup>n</sup> caa candíl núú dité-xi ndècu tucu núú-gǎ, te diu-gǎ cúú-gǎ Yaá yǐndàha ñuyúú. <sup>5</sup> Te ñáyiú na cǎni iní-xi ná cada ñaha xii-güedé te yuhu-güedé quene ñuhú cahmi ñaha-xi xii-yu, te duca<sup>n</sup> càda-güedé cahni-güedé nchaa ñáyiú na cùu úhú iní ñáhá xii-güedé. <sup>6</sup> Te ndí ndùú-güedé ndécú ndihí-güedé tñuhu ndee iní cada-güedé sá vǎ cúú<sup>n</sup> dǎú, te duca<sup>n</sup> càda-güedé ñini cǎhá<sup>n</sup>-güedé nàcuáa cǎchí Yǎ Ndiòxí, te ndacu-güedé nadatùu-güedé

ndute nduu-xi ñíñí, te ndacu-güedé dandòho-güedé nchaa ñáyiú titní núú tñuhu ndòho, te duca<sup>n</sup> càda-güedé ná daha xito cǎchí iní mée-güedé. <sup>7</sup> Te ná yáha sá cǎhá<sup>n</sup>-güedé nàcuáa ní cachí Yǎ Ndiòxí, te dàvá-á<sup>n</sup> quene ñ<sup>n</sup> quití déé<sup>n</sup> yàú cùnú víhí sǎ ïo nèhé cáá, te quití-á<sup>n</sup> ngüíta-di nǎá-di ndihí ndí ndùú cue téé-á<sup>n</sup> te cahni ñaha-di xii-güedé.

<sup>8</sup> Te yiqui cùnú cue téé-á<sup>n</sup> cautùu-xi ñ<sup>n</sup> tnuú ñúú cǎhnú ñùu ní sahani-güedé Xítóhó Jesucristú núú cùrúxí, te diu Yaá-á<sup>n</sup> cúú Xítóhó-ó ndihí-güedé, te cǎchí ñáyiú sá ñùú-á<sup>n</sup> cúú-xí dàtná ñúú Sòdomá ndihí nàció<sup>n</sup> Ègíptú. <sup>9</sup> Te úní nduu dava cautùu yiqui cuñú-güedé xía<sup>n</sup>, te ñáyiú nchaa nàció<sup>n</sup>, ndihí ñáyiú nchaa ñúú, ndihí ñáyiú cǎhá<sup>n</sup> ndí díf<sup>n</sup> ndí díf<sup>n</sup> ñúú tñuhu, ndihí ñáyiú xǐndecu nchaa xichi quini-yu yiqui cùnú-güedé, te vá dǎñǎ-yu nguíndüxi. <sup>10</sup> Te nchaa ñáyiú-á<sup>n</sup> nduu vétú iní-yu sá dúcá<sup>n</sup> cùú cue téé cǎhá<sup>n</sup> nàcuáa cǎchí Yǎ Ndiòxí-á<sup>n</sup>, te ïo cudí iní-yu, te nándi sá cuáha tǎhú tñáhǎ-yu sá cúdí iní-yu sá dúcá<sup>n</sup> nǐ xihí-güedé, te duca<sup>n</sup> chi diu-güedé ní quide ïo ní ndohó-yu. <sup>11</sup> Te sátá ná yǎhá úní nduu dava sá dúcá<sup>n</sup> cùú-güedé te Yǎ Ndiòxí dandòto ñaha-gǎ xii-güedé, te ndacóo-güedé, te nchaa ñáyiú na quini sá ndótó-güedé te yùhú víhí-yu. <sup>12</sup> Te ndí ndùú cue téé-á<sup>n</sup> tecú dóho-güedé cǎhá<sup>n</sup> ñ<sup>n</sup> sá cǎhá<sup>n</sup> ndéé andiu, te cúnaha-xi xii-güedé:

—Chí táquene iha —duha cúnaha sǎ cǎhá<sup>n</sup>-á<sup>n</sup> xii-güedé.

Te cue téé-á<sup>n</sup> quíhu-güedé ñ<sup>n</sup> xití vícò caa-güedé andiu, te nchaa ñáyiú cùu úhú iní ñáhá xii-güedé quini ñáhǎ-yu xii-güedé caa-güedé andiu. <sup>13</sup> Te òré-á<sup>n</sup> ñihí víhí tñáa ñuyúú, te úxí xichi cùu-xi ñúú núú cùndècu-güedé-á<sup>n</sup> te ñ<sup>n</sup> xichi ñúú-á<sup>n</sup> naa, te cuú úsá mǐl ñáyiú, te nchaa dava-gǎ ñáyiú cácu vǎ cùu yùhú víhí-yu, te cachí-yu sá ïo cǎhnu cuu Yǎ Ndiòxí Yaá ndécú andiu.

<sup>14</sup>Te tnúndòho-a cuu-xi tnúndòho cuu úú yáha, te vitna sa ndètu víí-nǎ tucu sáá tnúndòho cuu uní.

### Espíritú cúú ùsá tùu-xi cútú néhé-xí

<sup>15</sup>Te espíritú cúú ùsá ní tiú-xi cútú néhé-xí, te òré-á<sup>n</sup> ní tecú níhi ní cáhá<sup>n</sup> titní sá ní cáhá<sup>n</sup> andíu, te càchí-xi:

Nchaa sá cúú cuendá nchaa ñáyiú ñuyíú táxí tnùní-yu ní cùu ní nduu cuendá Tǎtá-ó Dútú Ndiòxí táxí tnùní-gá, Te tnàhá Yaá ní tendaha-gǎ ní sáhá<sup>n</sup> ñuyíú táxí tnùní-gá nchaa xǎá<sup>n</sup>,

te diu-gá taxi tnùní-gá ní caa ní qufhí<sup>n</sup>. Duha ní cáhá<sup>n</sup> nchaa sá ní cáhá<sup>n</sup>-á<sup>n</sup>. <sup>16</sup>Te ndí òcò cúmí cue téé sacuéhé xǎncóo núú xilé váha ní ngúíñí xítí-güedě núú Yǎ Ndiòxí, te ní nuu núú-güedě ndàa núú ñúhú te ní ngúíta-güedě chǎñùhu ñaha-güedě xii-gá, <sup>17</sup>te càchí-güedé:

Ío ndàcá<sup>n</sup> táhú-ndǐ núú yòhó Dútú Ndiòxí,

Yaá ndácú quide nchaandi túhú sá váha, te diu-ni-n ndècu-n ndéé cútñàhá ní ngáva ñuyíú, te diu-ni-n ndècu-n vitna, te diu-ni-n cùndecu-n ndéé núú cuàhá<sup>n</sup> núú vèxi,

te ío càhnu cuu-n te ní ngúíta-n ò-gá táxí tnùní-n.

<sup>18</sup>Te nchaa ñáyiú xǎndecu ñuyíú xǎcudéé<sup>n</sup>-yu núú-n,

te vitna ní sáá nduu dándohó-n-yu chi ñá túú cùu váha ín-n nǔú-yu,

te cada ndáá-n cuèchi nchaa ñáyiú sa ní xǎhí,

te ní sáá tucu nduu cuǎñaha-n sǎ ndúú táhú nchaa ñáyiú ní xinu cuechi nǔú-n ní cáhá<sup>n</sup>-yu tnúhu-n, ndíhi nchaa dava-gá ñáyiú cùu cuendá-n, chi ñáyiú-á<sup>n</sup> néhě-yu sá yǎñùhu núú-n,

te cuèi ñáyiú cùnnu ndíhi ñáyiú ñá túú cùnnu cuǎñaha-n sǎ ndúú táhǔ-yu,

te ní sáá tucu nduu dànaa-n nchaa ñáyiú sàhni tnaha ñáyiú-xi.

Duha càchí ndí òcò cúmí cue téé sacuéhé-ǎ<sup>n</sup> xǎha<sup>n</sup>-güedě xii Yǎ Ndiòxí.

<sup>19</sup>Te ní xiní-í ní nacaá<sup>n</sup> yuyèhe vehe Yǎ Ndiòxí andíu, te xítí vehe-gá-á<sup>n</sup> ní xiní-í ndécú càjá ñúhú sǎ yódó tnùnì nàcuáa ní cundáa cada-gá sá cúú-xí ñǎyiú, te òré-á<sup>n</sup> ní xiní-í ní sáá ndúté, te ní cáhá<sup>n</sup> ñúhu te ío dusa<sup>n</sup> ní quide-xi, te níhi víhi ní tnáa, te súúní càhnu dáú ñíñí ní cuu<sup>n</sup>.

### Cuendá ñí ñadìhí ndíhi cuendá ñí quítí déé<sup>n</sup> nání dràgón

**12** Te ío víhi ní quide-xi ñí sá ní quide-xi andíu, te ní xiní-í ñí ñadìhí te dóo ñhnu-á<sup>n</sup> quide-xi datná quidé-xí nǔú nchǎncanii, te ndàa núú sàhá-a<sup>n</sup> quide-xi datná quidé-xí nǔú yòó, te ñùhu ñí coroná díquí-a<sup>n</sup> te ndéé úxúú chódíní. <sup>2</sup>Te ñùhu déhe-a<sup>n</sup> te càna saa-a<sup>n</sup> sá quidé úhú ñáhá-xí xii-a<sup>n</sup> chi sa ndètu víí-nǎ cacu déhe-a<sup>n</sup>. <sup>3</sup>Te dǎtnùnì ní quide tucu-xi sá ní quide-xi andíu, te ní xiní-í ñí quítí càhnu quítí ticuehé, quítí déé<sup>n</sup> nání dràgón, te ndéé úsá díquí-dí ndíhi úxí ndíqui-dí, te ñí caa coróná ñúhú ñí caa díquí-dí-á<sup>n</sup>. <sup>4</sup>Te quítí-á<sup>n</sup> luha-ná te cuu dava nchaa chódíní dǎngòyo-dí ñuyíú ndíhi lúhmá-dí, te quítí-á<sup>n</sup> ní ngúnu tnǎ-dí núú ñaha ndètu víí-nǎ cacu déhe-xi-á<sup>n</sup> cuendá caxi-dí déhe-a<sup>n</sup> òré cacu ní cùu. <sup>5</sup>Te ñaha-á<sup>n</sup> ní cacu déhe-a<sup>n</sup> te téé cùu-dé, te té líhli-á<sup>n</sup> ò cunuu-dě taxi tnùnì-dé nchaa ñáyiú ñuyíú, te mee Yǎ Ndiòxí ní nacuaa ñaha-gǎ xii té líhli-á<sup>n</sup> cuendá cundecu ndíhi ñaha-dě xii-gá núú ndécú-gǎ táxí tnùnì-gá. <sup>6</sup>Te ñadìhí-á<sup>n</sup> ní xinu-a<sup>n</sup> cuáhá<sup>n</sup>-a<sup>n</sup> xítí yucu núú ní quide túha Yǎ Ndiòxí cundecu-a<sup>n</sup> cuendá xǎá<sup>n</sup> ñíhí-a<sup>n</sup> caxi-a<sup>n</sup>, te duca<sup>n</sup> ñíhí-a<sup>n</sup> sá cáxí-á<sup>n</sup> úxúú cièndú únídico nduu chi duca<sup>n</sup> nduu cundecu-a<sup>n</sup> xǎá<sup>n</sup>.

<sup>7</sup>Te sǎtá dúcá<sup>n</sup> te andíu ní xiní-í espíritú cùnnu xinu cuechi núú Yǎ Ndiòxí nání Mìguél, ndíhi nchaa dava-gá es-

píritú cündìhi-xi, te nchaa espíritú-á<sup>n</sup> nàá-xi ndìhi quiti déé<sup>n</sup> nání dràgón ndìhi nchaa espíritú cündìhi-di. <sup>8</sup> Te quiti-á<sup>n</sup> ñà túú ní ndàcu-di ndìhi nchaa espíritú cündìhi-di, te ñà túú ní ñihí-gá-di núú cündècu-di andiu ndìhi nchaa espíritú cündìhi-di-á<sup>n</sup>. <sup>9</sup> Te cue espíritú xínú cuèchi núú Yá Ndiòxí-á<sup>n</sup> ñí dánhá-á-xí quiti déé<sup>n</sup> nání dràgón-á<sup>n</sup> ndìhi nchaa espíritú cündìhi-di ñuyú, te quiti-á<sup>n</sup> cúú-dí mèi sàcuíhná àdi sá càchí-ó cùu yucu ñávàha, te diu xíá<sup>n</sup> ní dándàhú-xi ñáyiu ñihí ñuyú, te diu-ni xíá<sup>n</sup> ní nduu-xi cóó ní dándàhú-xi ñáyiu ndéé sanaha.

<sup>10</sup> Te ní tecú dóho-í ñfhi ní cáhá<sup>n</sup> tucu ñí sá ñí cáhá<sup>n</sup> andiu, te càchí-xi:

—Vitna te Yá Ndiòxí ní quide-gá ní ngúndecu ñáyiu ndìhi-gá, te ío càhnu cuu-gá, te ío tàxi tnuní-gá, te tnàhá Cristú Yáá ní tendaha Yá Ndiòxí ní quixi ñuyú-a ío tàxi tnuní-gá, te duca<sup>n</sup> chi sa ní xócuñí sàcuíhná sá sùúni nùnúu sacá<sup>n</sup> cuèchi núú Tátá-ó Dütú Ndiòxí cuendá nchaa ñáyiu ndècu ndìhi-o ichi-gá, te nduu nùu duca<sup>n</sup> sàcá<sup>n</sup> cuèchi-xi núú-gá cuendá-yu ni cùu. <sup>11</sup> Dico ní ndacú-yu ní cunúu-yu núú sàcuíhná sá dúcá<sup>n</sup> sàcá<sup>n</sup> cuèchi cuendá-yu-á<sup>n</sup> ní cùu, te duca<sup>n</sup> ní cunúu-yu sá cuendá Yáá cáá dàtná cáá ñí mbéé quiti ní dánicuehé-güedé, chi Yáá-á<sup>n</sup> ñí sati ñfhi-gá te ní xíhí-gá sá cuendá-yu, te duca<sup>n</sup> ní cunuu tucú-yu sá cuendá sá sàndáá iní ñàhá-yu xii Yáá-á<sup>n</sup>, te ñà túú ní yùhú-yu cuú-yu sá cuendá-gá. <sup>12</sup> Te vitna ío chí cúdíí iní nchaa nchòhó espíritú xínú cuèchi núú Yá Ndiòxí, ndìhi nchaa nchòhó ñáyiu ndècu andiu, dico ñndàhú ní cuu nchaa ñáyiu xíndecu ñihí ñuyú! Chi sùúni cùdéé<sup>n</sup> sàcuíhná ñí ngava-xi te nándi cada ñaha-xi xíi-yu, te duca<sup>n</sup> chi cùt-nuní iní-xi sá sàcú duha-ná nduu cudíi-xi cundecu-xi —duha càchí sá ñí cáhá<sup>n</sup> andiu.

<sup>13</sup> Te sátá ñí quee quiti déé<sup>n</sup> nání dràgón-á<sup>n</sup> andiu ñí ngava-di ñuyú quiti

cùu mei sàcuíhná-á<sup>n</sup>, te quiti-á<sup>n</sup> ñí chinchícu<sup>n</sup>-di ñadìhí ñaha ní cacu déhe téé-xi-á<sup>n</sup>. <sup>14</sup> Te ñadìhí-á<sup>n</sup> ñí nduu táhú-a<sup>n</sup> ní quene úú ndíxí-a<sup>n</sup>, te càa datná cáá ndíxí<sup>n</sup> ñí<sup>n</sup> yacòlo cahnu vihi cuendá ndava-a<sup>n</sup> nùhú-a<sup>n</sup> yucu núú ñí cachí Yá Ndiòxí cundecu-a<sup>n</sup>, te yàcá<sup>n</sup> cundecu-a<sup>n</sup> úni cuía dava cuendá sá vǎ ñihí ñàhá quiti déé<sup>n</sup> quiti nani dragón-á<sup>n</sup> te xíá<sup>n</sup> ñihí-a<sup>n</sup> sá cǎxí-á<sup>n</sup>, te quiti-á<sup>n</sup> cúú tucu-di datná ñí<sup>n</sup> cóó dèé<sup>n</sup>. <sup>15</sup> Te quiti-á<sup>n</sup> ñí quene cuéhé ndute yuhu-di, te ndute ní quene yuhu-di-á<sup>n</sup> ñí cuu-xi ñí<sup>n</sup> yúte, te duca<sup>n</sup> ñí quide-di cuendá ndute-á<sup>n</sup> cuidu-xi ñadìhí-á<sup>n</sup> ní cùu. <sup>16</sup> Te ñuhu yìchí ní chindee-xi ñadìhí-á<sup>n</sup>, chi ní ndátá te ní quee naa-ni ndute ní quene yuhu quiti-á<sup>n</sup>. <sup>17</sup> Te sá dúcá<sup>n</sup> ñí quide-xi xíá<sup>n</sup> ní cudéé<sup>n</sup> víhí quiti-á<sup>n</sup> nùú ñadìhí-á<sup>n</sup>, te ní xica-di cuáhá<sup>n</sup>-di núú xíndecu nchaa dava-gá cue déhe ñadìhí-á<sup>n</sup> cuendá nàá ndìhi ñaha-di, te ñáyiu-á<sup>n</sup> cúú-yu ñáyiu tnì nchaa tnúhu càhá<sup>n</sup> Yá Ndiòxí, te nchìcú<sup>n</sup> ñihnú-yu nchaa tnúhu sá càhá<sup>n</sup> váha cuendá Xítohó Jesucristú.

### Cuendá úú quiti

**13** Te yúhú ní ngúnu tní-í yuhu làmár, te ní xiní-í ní quene ñí<sup>n</sup> quiti te ndéé úsá díquí-di te úxí ndiquí-di, te núú ñí<sup>n</sup> ñí<sup>n</sup> ndiquí-di-á<sup>n</sup> ndécú ñí<sup>n</sup> caa coroná. Te ñí<sup>n</sup> ñí<sup>n</sup> díquí-di-á<sup>n</sup> ndèé tnúhu sá càhá<sup>n</sup> úhú-xi cuendá Yá Ndiòxí. <sup>2</sup> Te quiti-á<sup>n</sup> cáá-dí dàtná cáá cuíhí, te sáhá-di càa datná cáá sàhá óso, te yuhu-di càa datná cáá yùhu ndicaha. Te quiti déé<sup>n</sup> nání dràgón ní sàñaha-di tnúhu ndee iní xii quiti-á<sup>n</sup> cuendá taxi tnùní víhí-dí, te dràgón-á<sup>n</sup> ñí sàñaha-di nùú ndécú-dí tàxi tnuní-di xii quiti ní quene xití làmár-á<sup>n</sup>, te duca<sup>n</sup> ñí quide-di cuendá sá ñihí ndéé quiti-á<sup>n</sup> cunuu-di. <sup>3</sup> Te ñí<sup>n</sup> díquí quiti ní quene xití làmár-á<sup>n</sup> càhú víhí càa ní nícuéhé, te sa ndètu víí-nǎ cuú-di sànuu dico ní ndúha-di, te ñihí ñuyú ñí ñihí ñáyiu tnúhu sá dúcá<sup>n</sup>



nǐ cuu, te ío ní cuñúhu-yu te ní tuhá-yu quiti-á<sup>n</sup>. <sup>4</sup>Te nchaa ñáyiú-á<sup>n</sup> nǐ cachí-yu sá ío càhnu cuu quiti dée<sup>n</sup> quiti nàni dragón-á<sup>n</sup> cuendá sá nǐ sáñaha-di tnúhu ndee íni sá táxi tnùnǐ quiti ní quene xití lámár-á<sup>n</sup>, te ní nguíta-yu ní chiñuhú-yu quiti ní quene xití lámár-á<sup>n</sup>, te càchí-yu:

—Vá yõo ì<sup>n</sup> nǔtnahá ñáhá xii quiti-a, te ní vǎ yõo ì<sup>n</sup> ndacu nàá ndihi ñaha xii-di —cachí-yu.

<sup>5</sup>Te ní níhí-di tnúhu ndee íni sá càhá<sup>n</sup> úhú-di Yá Ndiõxí, te cada càhnu-di mee-di, te údico úú yóo duca<sup>n</sup> nǐ níhí-di tnúhu ndee íni-á<sup>n</sup> cunuu-di. <sup>6</sup>Te duca<sup>n</sup> nǐ quide-di ní cáhá<sup>n</sup> úhú-di Yá Ndiõxí ndihi cuendá nchaa sá quidé-gǎ, te diu-ni duca<sup>n</sup> nǐ cáhá<sup>n</sup> úhú-di núú ndécú-gǎ, te ní cáhá<sup>n</sup> úhú tucu-di nchaa ñáyiú ndècu ndihi-gá andiu. <sup>7</sup>Te duca<sup>n</sup> nǐ níhí-di tnúhu ndee íni sá nàá-di ndihi nchaa ñáyiú cùu cuendá Yá Ndiõxí, te duca<sup>n</sup> nàá ndihi ñaha-di xii-yu ndéé òré vá ndácú-gǎ-yu nàá ndihi ñáhá-yu xii-di, te tnàhá ní ngúndecu ndihi-di tnúhu ndee íni sá táxi tnùnǐ-di ñáyiú nchaa nà-ció<sup>n</sup>, ndihi ñáyiú nchaa ñuu, ndihi nchaa ñáyiú càhá<sup>n</sup> ndí díf<sup>n</sup> ndí díf<sup>n</sup> núú tnúhu, ndihi ñáyiú xíndecu nchaa xichi. <sup>8</sup>Te cue ñáyiú nihí ñuyíú nǐ cachí-yu sá ío càhnu cuu quiti-á<sup>n</sup>, te ñáyiú-á<sup>n</sup> cúú-yu ñáyiú ñá túú yòdo tnuní núú tütú Yaá cáá dàtná cáá ì<sup>n</sup> mbéé quiti ní dancuèhé-güedé Yaá ní xíhí ní cùu te ní ndoto. Te ndéé cútñahá ní ngáva ñuyíú sa yòdo tnuní ñáyiú nanhí tǎhú, dico ñáyiú càchí sá ío càhnu cuu quiti-á<sup>n</sup> ñà túú yòdo tnuní-yu núú tütú-gá.

<sup>9</sup>Te nchaa nchòhó ñáyiú xíndedóho chí cúndedóho váha nchaa nàcuáa cuáhá<sup>n</sup> tnúhu-á<sup>n</sup>. <sup>10</sup>Te nchaa ñáyiú na chíhi tnaha ñáyiú-xi vecaá te sáá nduu te quíhí<sup>n</sup>-yu tnàhá-yu vecaá, te nchaa ñáyiú sàhni tnaha ñáyiú-xi ndihi yuchí te diu-ni ndihi yuchí cuú-yu tnàhá-yu, te xíá<sup>n</sup> núú ío xìni ñuhu-xi sá ncháá ñáyiú

cùu cuendá Yá Ndiõxí cunduu càhnu íni-yu, te quíndáá íni ñáhá-yu xii-gá.

<sup>11</sup>Te ní xiní tucu-í ingá quiti ní quene-di núú ñuhu yìchí, te ndèé úú ndiqui-di te càa datná cáá ndiqui canerú, te càhá<sup>n</sup>-di dàtná càhá<sup>n</sup> quiti dée<sup>n</sup> nání dragón. <sup>12</sup>Te dàtná ndécú ndihi quiti ní quene xití lámár-á<sup>n</sup> tnúhu ndee íni sá táxi tnùnǐ-di duca<sup>n</sup> ndècu ndihi quiti ní quene ñuhu yìchí-á<sup>n</sup> tnúhu ndee íni taxi tnùnǐ-di cada-di núú quiti ní quene xití lámár-á<sup>n</sup>, te quiti ní quene ñuhu yìchí-á<sup>n</sup> nǐ quide yica-di sá ncháá ñáyiú xíndecu nihí ñuyíú chiñuhú-yu quiti ní quene xití lámár-á<sup>n</sup>, quiti càhú víhí ní tnahá ní nícuèhé te ní ndúha-di. <sup>13</sup>Te quiti ní quene xití ñuhu yìchí-á<sup>n</sup> nǐ quide-di tit-ní núú sǎ vǎ yõo tnàhí ndàcu cada, te nchaa ñáyiú ní xiní-yu sá ndéé andiu nǐ dǎngóyó-dí ñùhú ñuyíú. <sup>14</sup>Te sá dúcá<sup>n</sup> nǐ ngúndecu ndihi-di tnúhu ndee íni ní quide-di nchaa xíá<sup>n</sup> ní quide-di núú quiti ní quene xití lámár-á<sup>n</sup>, te sá dúcá<sup>n</sup> nǐ quide-di te xíá<sup>n</sup> ní dándàhú-di nchaa ñáyiú xíndecu nihí ñuyíú, te ní xáha<sup>n</sup>-di xii-yu sá ndúcú-yu ì<sup>n</sup> sá cáduhá-yu nàcuáa-ni càa nacuáa-ni ndùu quiti ní quene xití lámár-á<sup>n</sup>, quiti càhú víhí ní tnahá ní nícuèhé díquí-xi-á<sup>n</sup> nǐ quee machití te ñá túú ní xíhí-di chí ní xíndecu-ni-di. <sup>15</sup>Te quiti ní quene xití ñuhu yìchí ní ngúndecu ndihi tucu-di tnúhu ndee íni sá chíhí-dí íni sá nǐ cadúha-yu-á<sup>n</sup>, sá nǐ natavá-yu dàtná cáá quiti ní quene xití lámár-á<sup>n</sup>, te duca<sup>n</sup> nǐ quide quiti-á<sup>n</sup> cuendá cáhá<sup>n</sup> sá nǐ cadúha-yu-á<sup>n</sup>, te xíá<sup>n</sup> cada-xi cuú nchaa ñáyiú ñá túú ní cuíni chíñuhu ñaha xii-di. <sup>16</sup>Te quiti ní quene xití ñuhu-á<sup>n</sup> quidé-dí sǎ ncháá ñáyiú ngúndee ì<sup>n</sup> tnuní ndaha cùhá-yu àdi tneé-yu, te duca<sup>n</sup> nǐ quide-di cuèi ñáyiú cùnuu te cuèi ñáyiú ñá túú cùnuu, te cuèi ñáyiú cuica te cuèi ñáyiú ndàhú, te cuèi ñáyiú ñá túú dàná quee núú chíú<sup>n</sup> pàtróo<sup>n</sup>-xi, te cuèi nchaa ñáyiú dàná quee núú

chíu<sup>n</sup> pàtróo<sup>n</sup>-xi nchaá-yu duca<sup>n</sup> nĩ ngún-deé tnuní ñíí-yu. <sup>17</sup>Te ní quide-dí sá ncháá ñáiyu ñá túú ndèé tnuní ñíí-xi vá cúú cuáá<sup>n</sup>-yu sá càchí iní-yu te ní vǎ cúú dícó-yu ñ<sup>n</sup> sá cuíní-yu dícó-yu, te tnuní-á<sup>n</sup> cúú-xí ðùu quiti ní quene xití làmár-á<sup>n</sup> àdi númerú-dí. <sup>18</sup>Te xini ñuhu-xi sá ncháá ñáiyu ío váha cùtnuní iní-xi ío váha cuáha-yu cuendá nàcuáa quèè-xi númerú quiti-á<sup>n</sup>, te númerú-á<sup>n</sup> cúú-xí ñnú ciendú únídico ñnú, te cùu-xi cuendá ñ<sup>n</sup> ñáiyu ñuyíú.

### Cuendá ñ<sup>n</sup> ciendú údico cúmí mĩl ñáiyu

**14** Te sáta dúcá<sup>n</sup> te ní xiní-í Yaa cáá dàtná cáá ñ<sup>n</sup> mbéé quiti ní dánícuèhé-güedé nútñí-gá ñ<sup>n</sup> yucu ñuú nání Sìón ndécú àndiu, te nutñí-gá ndihi ñ<sup>n</sup> ciendú údico cúmí mĩl ñáiyu, te tneé-yu ndèé ðùu-gá ndihi ðùu tátá-gǎ Dútú Ndióxi. <sup>2</sup>Te ní tecú dóho-í ní quide-xi àndiu dàtná quidé-xí nǔú xíca cuèhé víhí ndùte, te quide tucu-xi datná quidé-xí òré níhi víhi cahá<sup>n</sup> ñúhu, te quide tucu-xi datná quidé-xí òré cuéhé víhí ñáiyu càni-yu àrpá. <sup>3</sup>Te ní tecú dóho-í xixita yuhu sǎ xítá yùhu núú Yaa núcòo núú xilé váha, ndihi núú ndi cùmí cue quiti xínutñí-á<sup>n</sup>, ndihi núú ncháa cue téé cùu sacuéhé xínucóo-á<sup>n</sup>, te xixita-xi ñ<sup>n</sup> ndudú sáá. Te mee-ni cuè ñáiyu ñ<sup>n</sup> ciendú údico cúmí mĩl-á<sup>n</sup> quèè díquí-yu ndudú-á<sup>n</sup>, te ñáiyu-á<sup>n</sup> cúú-yu ñáiyu ní dácǎcu nihnu ñaha Yaa cáá dàtná cáá ñ<sup>n</sup> mbéé quiti ní dánícuèhé-güedé núú ñáiyu ndècu ichi cuehé ichi duha xíndecu ñuyíú, te vá yòo ñ<sup>n</sup>-gǎ quèè díquí-xi ndudú sáá-ǎ<sup>n</sup> chi mee-ni ñáiyu ní cácu nihnu-á<sup>n</sup> quèè díquí-yu. <sup>4</sup>Te ñáiyu ní cácu nihnu-á<sup>n</sup> cúú-yu ñáiyu ñá túú ní xíndecu ichi díí iní, te cùu-yu ñáiyu càndoo canine iní-xi, te ndèni ní cuu cuáhá<sup>n</sup> Yaa cáá dàtná cáá ñ<sup>n</sup> mbéé quiti ní nícuèhé-á<sup>n</sup>, te duca<sup>n</sup>-ni ndèndaha ñàhá-yu xii-gǎ

cuáhá<sup>n</sup>, te ñáiyu-á<sup>n</sup> ní cácu nihnú-yu núú ncháa ñáiyu ñuyíú, ñáiyu ndècu ichi cuehé ichi duha, te ñáiyu ní cácu nihnu-á<sup>n</sup> cúú-yu ñáiyu díhna nuu ní nduu táhú Yǎ Ndióxi cuu cuendá-gǎ ndihi Yaa cáá dàtná cáá ñ<sup>n</sup> mbéé quiti ní dánícuèhé-güedé. <sup>5</sup>Te cúu-yu ñáiyu ñá túú càhá<sup>n</sup> ní ñ<sup>n</sup> tnúhu ndehnde, te càndoo canine iní-yu ndècùu-yu núú núcòo Yǎ Ndióxi táxi tnuní-gǎ.

### Cuendá úní cue espíritú xínú cuèchi núú Yǎ Ndióxi

<sup>6</sup>Te sáta dúcá<sup>n</sup> te ní xiní-í ñ<sup>n</sup> espíritú xínú cuèchi núú Yǎ Ndióxi xícó-xí cuǎdava àndiu, te ndècu ndihi-xi tnúhu sá càhá<sup>n</sup> nàcuáa naníhí tàhú-ó, tnúhu sá ñà túú tnàhí ndihi nihnu te tnúhu-á<sup>n</sup> danèhé espíritú-a<sup>n</sup> nchaa ñáiyu ndècu ñuyíú, ñáiyu nchaa nàció<sup>n</sup>, ndihi ñáiyu nchaa ñuú, ndihi nchaa ñáiyu càhá<sup>n</sup> ndí díí<sup>n</sup> ndí díí<sup>n</sup> núú tnúhu, ndihi ñáiyu xíndecu nchaa xichi. <sup>7</sup>Te níhi ní càhá<sup>n</sup>-xi te càchí-xi:

—Nchaa nchòhò ñáiyu ndècu ñuyíú canehe-ndo sǎ yínùhu núú Yǎ Ndióxi, te cachí-ndó sǎ ío càhnu cuu-gǎ chi sa ní sáá nduu càda ndáá-gǎ nchaa cuèchi-ndo, te chiñuhu-ndo-gǎ chi ðùu-gǎ ní cadúha-gǎ àndiu, ndihi ñuhu yichí, ndihi làmár, ndihi nchaa ndóhyo —duha càchí espíritú-á<sup>n</sup>.

<sup>8</sup>Te nchicú<sup>n</sup> tucu íngǎ espíritú xínú cuèchi núú Yǎ Ndióxi, te càchí-xi:

—Vitna ní naa ñuú Babiloniá ñuú ío cùnuu, te duca<sup>n</sup> ní naa chi cue ñáiyu ñuú-á<sup>n</sup> ní quidé-yu ní xíta nihnu nchaa ñáiyu nihí ñuyíú, chi ní sanu ichi ñàhá-yu ichi cuèhé ichi duha —duha càchí espíritú-á<sup>n</sup>.

<sup>9</sup>Te nchicú<sup>n</sup> tucu íngǎ espíritú xínú cuèchi núú Yǎ Ndióxi te níhi càhá<sup>n</sup>-xi, te càchí-xi:

—Nchaa ñáiyu chiñuhu ñaha xii quiti ní quene xití làmár, ndihi sá ní natava ñàhá-yu nàcuáa càa-di-á<sup>n</sup>, ñáiyu ní dàñá

mèe-xi ní ngúndeé tnuní ndahá-yu àdi tneé-yu, <sup>10</sup> ñáyi-u-á<sup>n</sup> sũúni dândoho ñaha Yá Ndiõxí xíi-yu chi ío cùdée<sup>n</sup>-gã, te duca<sup>n</sup> ïo dândõho ñaha-gá xíi-yu chi daquih<sup>n</sup> ñáhá-gã xíi-yu núú ñùhú núú ñùhú àzufré càyú-xi, te núú cuè espíritú xínú cuèchi núú-gã duca<sup>n</sup> dândoho ñaha-gá xíi-yu, ndihi núú Yàá cáá dàtná cáá ì<sup>n</sup> mbéé quiti ní dánicuèhè-güedé. <sup>11</sup> Te ni caa ni qufh<sup>n</sup> quene ñùhmá núú dúcá<sup>n</sup> cùndecú-yu ndohó-yu-á<sup>n</sup>, te cuèi nduu cuèi niú duca<sup>n</sup> ndòhó-yu. Te duca<sup>n</sup> ndòho nchaa ñáyi-u chĩñuhu ñaha xii quiti ní quene xití lámár, ndihi sá ñi natava ñáhá-yu nàcuáa càa-di-á<sup>n</sup>, te diu-ni ñáyi-u-á<sup>n</sup> cúú-yu ñáyi-u ní ngúndeé tnuní ndaha-xi àdi tneé-xi —duha càchí espíritú-á<sup>n</sup>.

<sup>12</sup> Te xíã<sup>n</sup> xíní ñùhu-xi sá ncháá ñáyi-u cùu cuendá Yá Ndiõxí cunduu càhnu iní-yu, chi diu-ní-yu cùú-yu ñáyi-u tñi nchaa tnúhu càhá<sup>n</sup>-gá, te ni yùhu ni iní-yu sàndáá iní-yu Xítóhó Jesucristú.

<sup>13</sup> Te sátá dúcá<sup>n</sup> te ní tecú dóho-í ní cáhá<sup>n</sup> ì<sup>n</sup> sá ñi cáhá<sup>n</sup> andiu, te càchí-xi:

—Chido tnùnì-n ì<sup>n</sup> núú tütú nàcuáa na càhá<sup>n</sup>-í-a. “Není vitna ío váha táhú nchaa ñáyi-u sàndáá iní tnúhu Xítóhó Jesucristú te xihí-yu” —duha càchí sá ñi cáhá<sup>n</sup>-á<sup>n</sup>.

Te Espíritú Yá Ndiõxí ní cáhá<sup>n</sup>-xi, te càchí-xi:

—Ndáá, chi ndetatú-yu chi ñá túú-gã nágá chiú<sup>n</sup> ndohó-yu cadá-yu, te Yá Ndiõxí sa nàha-gá nchaa nàcuáa ndùu chiú<sup>n</sup> ní quidé-yu —duha càchí Espíritú-gá.

### Nchaa sá cúú núú ñùhú

<sup>14</sup> Te sátá dúcá<sup>n</sup> te dàtnùnì ní xiní-í ì<sup>n</sup> vícò cuixí<sup>n</sup>, te núú vícò-ã<sup>n</sup> ñi xiní-í núcõo ì<sup>n</sup> Yaá, te càa-gá dàtná cáá ì<sup>n</sup> tée ñuyúú, te díquí-gã ñùhú ì<sup>n</sup> coroná ní cuáha mee-ni dñhú<sup>n</sup> cuáá<sup>n</sup>, te nùndaha-gá ì<sup>n</sup> yuchí ndíquí te súúni dée<sup>n</sup>. <sup>15</sup> Te ní xiní-í ì<sup>n</sup> espíritú xínú cuèchi núú Yá Ndiõxí ní

quee-xi xití vehe-gá, te níhi ní cáhá<sup>n</sup>-xi xãha<sup>n</sup>-xi xii Yaá núcõo núú vícò-ã<sup>n</sup>:

—Sa ní cuu nàquehndé-n nchàa sá ñi cuu ñuyúú ndihi yuchí ndíquí-n, chi sa ní cuu núcõo tnàha-xi —duha càchí espíritú-á<sup>n</sup> xãha<sup>n</sup>-xi xii Yaá-á<sup>n</sup>.

<sup>16</sup> Te Yaá núcõo núú vícò-ã<sup>n</sup> ñi dáyãha ndodo-gá yuchí ndíquí-gá núú ñuyúú ñi nataxi tnàha-gá nchaa sá ñi cuu.

<sup>17</sup> Te ní xiní tucu-í ingá espíritú xínú cuèchi núú Yá Ndiõxí ní quee-xi xití vehe-gá sá cáá àndiu, te nùndaha-xi tnahá-xi ì<sup>n</sup> yuchí ndíquí dée<sup>n</sup>. <sup>18</sup> Te ní xiní tucu-í ní quee tucu ingá espíritú xínú cuèchi núú Yá Ndiõxí núú nùtni núú sácõdó sã ndúú táhú-gã, te ndècu ndihi-xi tnúhu ndee ìní táxí tnùnì-xi ñuhú, te espíritú-á<sup>n</sup> ñihi ní cáhá<sup>n</sup>-xi xãha<sup>n</sup>-xi xii espíritú néhé yùchí ndíquí dée<sup>n</sup>-á<sup>n</sup>:

—Ngúita naquehndé-n ndihi yuchí ndíquí-n ndéhé yoho yàha stilé sá ìo ñuyúú chi sa ní cuu nàtehndé —duha càchí espíritú-á<sup>n</sup> xãha<sup>n</sup>-xi xii espíritú néhé yùchí ndíquí-ã<sup>n</sup>.

<sup>19</sup> Te espíritú néhé yùchí ndíquí-ã<sup>n</sup> ñi dáyãha ndodo-xi yuchí ndíquí-xi núú ñuyúú ñi nàquehndé-xi nchaa ndéhé yoho yàha stilé, te ní chihì-xi ì<sup>n</sup> xichi núú ñi chihì-xi cuendá xíã<sup>n</sup> quihni-xi quee ndudí-xi, te sá dúcá<sup>n</sup> ñi quide-xi xíã<sup>n</sup> cútnùnì iní-ó sã ìo cùdée<sup>n</sup> Yá Ndiõxí núú ñáyi-u ñuyúú. <sup>20</sup> Te ndéhé yoho yàha stilé-ã<sup>n</sup> ñi quihni-xi ì<sup>n</sup> xio yuhu ñùú, te ndudí ndéhé yoho yàha stilé-ã<sup>n</sup> ñi nduu-xi níñi te ní quee-xi núú quíhni ñihnu espíritú-á<sup>n</sup>. Te únì cièndú mìl mètre ní xica níñi-ã<sup>n</sup>, te dàtná ì<sup>n</sup> mètre dava ní sáá cuehnu níñi-ã<sup>n</sup> ñi xica-xi.

### Úsá tnúndõho

**15** Te ío vñhi ní quide-xi ì<sup>n</sup> sá ñi quide-xi andiu te ní cuñúhu vñhi-í, te ní xiní-í úsá tnàhá espíritú xínú cuèchi núú Yá Ndiõxí, te ì<sup>n</sup> ì<sup>n</sup> cue espíritú-á<sup>n</sup> ndécú ndihi-xi tnúhu ndee

iní dandòho-xi ñáyiú ñuyíú, te nà yáha nchaa tnúndòho-á<sup>n</sup>, te vá cúdée<sup>n</sup>-gã Yã Ndiöxí núú-yu dândoho ñaha-gá xíí-yu.

<sup>2</sup>Te ní xiní-í ì<sup>n</sup> làmár te ndute làmár-á<sup>n</sup> cáá dàtná cáá vîdriú, te dácánuu-xi ndihî ñuhú, te yuhu làmár-á<sup>n</sup> xînutnî nchaa ñáyiú ní ndacu ní dáquée tíhú ñáhá xii quitî ní quene xití làmár-á<sup>n</sup>, te duca<sup>n</sup> ní ndacú-yu ní dáquée tíhú-yu sá ní natava ñáhá-yu nàcuáa càa-di-á<sup>n</sup>, te duca<sup>n</sup> ní ndacu tucú-yu ní dáquée tíhú tucú-yu númerú-di sá cúú dàtná ðu-di, te nchaa ñáyiú-á<sup>n</sup> ní nduu táhú-yu núú Yã Ndiöxí àrpá xînehé-yu cuendá caní-yu. <sup>3</sup>Te xixitá-yu ndudú sá ní xita ndíi Moisés ndíi ní xinu cuechi núú Yã Ndiöxí ndée sanaha, te xita tucú-yu ndudú Yá cáá dàtná cáá ì<sup>n</sup> mbée quitî ní dánícuéhé-güedé, te càchí-yu:

Yòhò Dútú Ndiöxí ío càhnu cuu-n, chi quide-n nchaa sá vã yòo tnàhî ndàcu cada, te cùu-n Yáá ndácú quide nchaandi túhú sá vãha,

te ío ndáá quidé-n te ío ndáá càhá<sup>n</sup>-n, te yîndaha-n nchaa ñáyiú nihî ñuyíú.

<sup>4</sup>Te nchaa ñáyiú nêhé-yu sá yîñuhu núú-n,

te nchaá-yu càchí-yu sá ío càhnu cuu-n, chi ì<sup>n</sup>di díí-ni yòhò cúú-n Yáá ío váha quide ndáá,

te nchaa ñáyiú nihî ñuyíú nacaá-yu chiñuhu ñáhá-yu xii-n,

te duca<sup>n</sup> cadá-yu chi ndêhé-yu nchaa sá vãha quide-n.

Duha càchí ñáyiú-á<sup>n</sup> xixitá-yu.

<sup>5</sup>Te sátá dúcá<sup>n</sup> te ní xiní-í ní nacaá<sup>n</sup> yuyêhe vehe Yá Ndiöxí andiu, te xití vehe-gá-á<sup>n</sup> ndécú sã ndée tnúhu-gá.

<sup>6</sup>Te xití vehe-gá-á<sup>n</sup> ní quee úsá tnàhâ espíritú xínú cuèchi núú-gã, te ì<sup>n</sup> ì<sup>n</sup>-xi ndècu ndihî-xi tnúhu ndee ìní dandòho-xi ñáyiú, te xixihnu-xi mee-ni dóó vãha, te súuní vãha càndoo, te chàhnchí, te yîdúcú<sup>n</sup>nuu cínchú ní cuáha

mee-ni díhú<sup>n</sup> cuàá<sup>n</sup> pèchú ndi úsá cue espíritú-á<sup>n</sup>. <sup>7</sup>Te ì<sup>n</sup> quitî cúmí xînutnî núú núnñî xilé váha ní sãñaha-di ì<sup>n</sup> caa sá nàhá tícúú ní cuáha mee-ni díhú<sup>n</sup> cuàá<sup>n</sup> xii ì<sup>n</sup> ì<sup>n</sup> espíritú-á<sup>n</sup>, te xití nchaa tícúú-á<sup>n</sup> ñúhú ì<sup>n</sup> sá ñúhú te xíã<sup>n</sup> cútunî sá Yã Ndiöxí dandòho-gá ñáyiú ñuyíú, te ðiu-gá cúú-gã Yáá ndécú nchaa nduu nchaa quíú. <sup>8</sup>Te xití vehe-gá-á<sup>n</sup> ní chítú ñúhmá, te duca<sup>n</sup> ní quide-gá cuendá cut-nunî iní ñáyiú sá ío càhnu cuu-gá táxí tnúní-gá, te vá yòo ì<sup>n</sup> cuu quíhu xití vehe-gá-á<sup>n</sup> ndèé ndihî ndi úsá tnúndòho cada ndi usá cue espíritú-á<sup>n</sup> ñuyíú.

### Tnúndòho cada-xi ñuyíú

**16** Te sátá dúcá<sup>n</sup> te ní tecú dóho-í níhi ní càhá<sup>n</sup> ì<sup>n</sup> sá ní càhá<sup>n</sup> xití vehe Yá Ndiöxí, te xãha<sup>n</sup>-xi xii ndi usá cue espíritú-á<sup>n</sup>:

—Chí cuàhá<sup>n</sup> coyo-ndo sã ñúhú xití nchaa tícúú nêhé-ndó-á<sup>n</sup> núú ñuyíú, chi sá ñúhú-á<sup>n</sup> cúú-xí tnúndòho tendaha Yá Ndiöxí sá cúú-xí nchaa ñáyiú ñuyíú — duha càchí sá càhá<sup>n</sup>-á<sup>n</sup>.

<sup>2</sup>Te espíritú díhna ní sáhá<sup>n</sup>-xi ní coyo-xi sá ñúhú xití tícúú nêhé-xí-á<sup>n</sup> ñuyíú, te nchaa ñáyiú ñuhu tnunî quitî ní quene xití làmár ñáyiú ní chiñuhu sá ní natava ñáhá-yu xii-di, nchaa ñáyiú-á<sup>n</sup> ní quené-yu ndíhyî tēhyú te súuní dândoho ñaha-xi xíí-yu.

<sup>3</sup>Te espíritú cúú úú ní coyo-xi sá ñúhú xití tícúú nêhé-xí núú làmár, te ndute làmár-á<sup>n</sup> ní nduu-xi níñî te càa-xi datná cáá níñî ñáyiú sa ní xihî, te nchaa quitî ñuhu xití làmár-á<sup>n</sup> ní xihî-güedi.

<sup>4</sup>Te espíritú cúú únî ní coyo-xi sá ñúhú xití tícúú nêhé-xí nchaa yúte ndihî nchaa núú quenîhni ndute, te ndute nchaa yúte-á<sup>n</sup> ndihî nchaa ndute quenîhni-á<sup>n</sup> ní nduu-xi níñî. <sup>5</sup>Te sátá dúcá<sup>n</sup> te ní tecú dóho-í ní càhá<sup>n</sup> ì<sup>n</sup> espíritú xínú cuèchi núú Yã Ndiöxí, espíritú yîndaha ndute, te xãha<sup>n</sup>-xi xii Yá Ndiöxí:

—Yòhó Dútú Ndiòxí cúú-n Yàá quidé ndáá cuítí núu duha quide-n tendaha-n tnúndòho-a, te diu-ni-n cùu-n Yaá ndécú ndéé cútñàhá ní ngáva ñuyíú, te diu-ni-n cùu-n Yaá ndécú vitna te ñá túú tñàhí cuéchi-n. <sup>6</sup>Chi cue ñáyiú ñuyíú ní dácácã-yu níñí nchaa ñáyiú ní cáhá<sup>n</sup> tnúhu-n ndihi nchaa dava-gá ñáyiú cùu cuendá-n, te ní sahní-yu nchaa ñáyiú-á<sup>n</sup>, te vitna ní dátíú-n ndüte ní nduu-xi níñí te duca<sup>n</sup>-ni càa ndute-á<sup>n</sup> xíhí-yu, te duca<sup>n</sup> tàú-xi ndohó-yu cuendá sá ní sahní-yu cue ñáyiú cùu cuendá-n —duha càchí espíritú-á<sup>n</sup> xáha<sup>n</sup>-xi xii-gá.

<sup>7</sup>Te ní tecú tucu dóho-í ní cáhá<sup>n</sup> ì<sup>n</sup> sá ní cáhá<sup>n</sup> núu núnñi núu sácòdó sã ndúú tãhú Yã Ndiòxí, te xáha<sup>n</sup>-xi xii-gá:

—Ndáá sá yòhó Dútú Ndiòxí Yaá ndácú quide nchaandi túhú sá vãha dândoho-n ñáyiú nàcuáa tàú-xi cunduu —duha càchí sá càhá<sup>n</sup>-á<sup>n</sup> xáha<sup>n</sup>-xi xii-gá.

<sup>8</sup>Te espíritú cúú cùmí ní coyo-xi sá ñúhú xítí tícúú néhé-xí núú nchíanchii cuendá nchíanchii-á<sup>n</sup> cahmi-xi nchaa ñáyiú ñuyíú. <sup>9</sup>Te nchaá-yu ní ndoho vihi-yu ní cáyú-yu, te cuéi duca<sup>n</sup> ní ndohó-yu dico ñá túú ní cuíní-yu ndixi cuéchi iní-yu cuendá nchaa sá ñà túú vãha quidé-yu, te ni ñà túú ní càchí-yu sá ïo càhnu cuu Yá Ndiòxí chi da ní cáhá<sup>n</sup> úhú-yu cuendá-gá, te diu-gá cúú-gã Yaá duca<sup>n</sup> ní tendaha tnúndòho-á<sup>n</sup> sã cúú-xí-yu.

<sup>10</sup>Te espíritú cúú ùhú<sup>n</sup> ní coyo-xi sá ñúhú xítí tícúú néhé-xí núú ndécú quítí ní quene xítí làmár-á<sup>n</sup> táxí tnúní-dí, te nchaa núú táxí tnúní-dí ní cuu nee, te nchaa ñáyiú ñuyíú ndéé yàá-ná-yu nà-caxi nihnú-yu sá ndóhó-yu. <sup>11</sup>Dico ni dù-ca<sup>n</sup> ñá túú ní cuíní-yu dàñá-yu ni ì<sup>n</sup> sá cuèhé sá dúhá quidé-yu, chi da ní cáhá<sup>n</sup> úhú-yu cuendá Yã Ndiòxí Yaá ndécú àndiú sá cuendá sá dándòho ñaha ndíhyi tèhyú ndéé-yu-á<sup>n</sup> ndihi nchaa dava-gá sá yãha-yu.

<sup>12</sup>Te espíritú cúú ìñú ní coyo-xi sá ñúhú xítí tícúú néhé-xí xítí yúte càhnu nani Eúfratés, te ndute yúte-á<sup>n</sup> ní yíchí cuendá yãha cue tée yìndaha ñáyiú xìndecu ndàa xio nacuáa quène nchíanchii.

<sup>13</sup>Te ní xiní-í ní quee ì<sup>n</sup> espíritú cúndìhi yucu ñávãha yuhu quítí déé<sup>n</sup> nání dràgón, te ní xiní tucu-í ní quee tucu ingá espíritú cúndìhi yucu ñávãha yuhu quítí ní quene xítí làmár, te ní xiní tucu-í ní quee tucu ingá espíritú cúndìhi yucu ñávãha yuhu tée dándahú ñáyiú càchí sá càhá<sup>n</sup> tnúhu Yá Ndiòxí te ñá ndáa, te ndi núní espíritú-á<sup>n</sup> xìndáa-xi dàtná cáá làhvá. <sup>14</sup>Te ndi núní espíritú-á<sup>n</sup> quidé-xí sã vã yòo tñàhí ndàcu cada, te xica datacá-xi nchaa cue tée yìndaha ñaha xii ñáyiú xìndecu nihíi ñuyíú cuendá nàá-güedé mei ndúu cachí Yã Ndiòxí coo tnúndòho cahnu vihi-gá, te diu mee Yã Ndiòxí cúú-gã Yaá ïo càhnu cuu. <sup>15</sup>Te Yaá cúú Xitohó-ó ní cachí-gá: “Cunaha-ndo chi nduu ñà túú yìhi iní-ndó quixi-í núú ndécú-ndó, te cada-í dàtná quidé ñàdúhú. Te váha tãhú nchaa nchòhó ñáyiú xìndecu túha, chi cùu-ndo datná cue ñáyiú xìndecu túha xixíhnu-ni dóó-xi cuendá sá vã cúcàha<sup>n</sup> núú-yu dàtná cúcàha<sup>n</sup> núú cuè ñáyiú ñá túú nihnu dóó-xi, te duha càhá<sup>n</sup>-í cuendá sá nchòhó cundecu túha-ndo òré quexio-í”, duha càchí-gá. <sup>16</sup>Te ndi núní cue espíritú cúndìhi yucu ñávãha-á<sup>n</sup> ní dátacá-xi nchaa cue tée yìndaha ñaha xii ñáyiú, te ní taxi ndecu ñaha-xi ì<sup>n</sup> xichi núú nání Àrmagedón, duha nani xíá<sup>n</sup> tnúhu hèbreú.

<sup>17</sup>Te espíritú cúú ùsá ní coyo-xi sá ñúhú xítí tícúú néhé-xí núú tàchí, te ní tecú dóho-í níhi ní cáhá<sup>n</sup> Yaá núcòo núú xilé váha xítí vehe-gá, te càchí-gá:

—Xéhé-nã cúmãní te xínu cava nchaa tnúndòho tnúhu ndàhú —duha càchí-gá.

<sup>18</sup>Te sátá dúcá<sup>n</sup> te ní sáá nduté te ní cáhá<sup>n</sup> ñúhu, te súuní dùsa<sup>n</sup> ní quide-xi,

te níhi vihi ní tnáa ñuyú, te ndéé cút-nàhá ní ngúndecu ñáyiú ñuyú te vátá íí<sup>n</sup> xito-gá níhi tnáa dàtná ní quide-xi. <sup>19</sup> Te ñúú cáhnú ío cùnuu nani Babiloniá ní quée dava-xi ní cuu-xi úní xichi, te nchaa ñúú cáá ñihí ñuyú ní ngoyo nchaa vehe, chi Yá Ndiòxí ní ndacu iní-gá nchaa sá cuèhé sá dúhá quide nchaa ñáyiú ñúú Babiloniá-á<sup>n</sup>, te duca<sup>n</sup> ní quide ñaha-gá xií-yu chi ío cùdéé<sup>n</sup>-gá núú-yu. <sup>20</sup> Te nchaa tindúú ní ndónúhú-xí cuéi nchaa tindúú ñuhu yichí ndécú xití làmár. <sup>21</sup> Te ní xiní-í ní cuu<sup>n</sup> ñiñi nàhnu vihi ní ngaundodo-xi cue ñáyiú ñuyú, te nchaa ñiñi-á<sup>n</sup> vée-xi dàtná údico kílu, te cue ñáyiú ñuyú ní cáhá<sup>n</sup> úhú-yu cuèndá Yá Ndiòxí sá dúcá<sup>n</sup> ní dácúú<sup>n</sup>-gá ñiñi nàhnu vihi-á<sup>n</sup>, chi ní cuu-xi íí<sup>n</sup> tnúndòho cahnu vihi sá cúú-xí-yu.

**Ñadihí ndécú ichi díí iní**

**17** Te núú úsá espíritú néhé tícùú-á<sup>n</sup>, te íí<sup>n</sup>-xi ní quixi-xi núú ndécù-í, te càchí-xi xii-í:

—Néhe ná quíhí<sup>n</sup>-ó dànehé ñàhá-í xii-n nchàa tnúndòho sá ndóhó ñàdihí ñaha ndècu ichi díí iní, te ñaha-á<sup>n</sup> cúnùu-a<sup>n</sup> nucóo-a<sup>n</sup> núú ñúhú vihi ndute. <sup>2</sup> Te ñaha-á<sup>n</sup> ndécú díí iní-a<sup>n</sup> ndihi nchaa cue téé yindaha ñaha xii ñáyiú xíndecu ñihí ñuyú, te nchaa dava-gá ñáyiú ñuyú ío iní-yu nchìcú<sup>n</sup> nihnú-yu quidé-yu nchaa nàcuáa quide ñaha-á<sup>n</sup> — duha càchí espíritú-á<sup>n</sup>.

<sup>3</sup> Te órè duca<sup>n</sup> quide ñaha Espiritú Yá Ndiòxí xii-í nàcuáa càchí iní-xi, te íí<sup>n</sup> espíritú xínú cuèchi núú-gá ndécá ñaha-xi xii-í cuáhá<sup>n</sup> íí<sup>n</sup> xití yucu, te xití yucu-á<sup>n</sup> ní xiní-í íí<sup>n</sup> ñadihí yódó-á<sup>n</sup> íí<sup>n</sup> quiti ticuehé, te ndèé úsá díquí-di te úxí ndiqui-di, te ñihí-di ndèé tnuní-di mee-ni tnúhu sá càhá<sup>n</sup> úhú cuèndá Yá Ndiòxí. <sup>4</sup> Te ñadihí-á<sup>n</sup> níhnú-á<sup>n</sup> dóó murádú ndihi dóó tícuèhé, te mee-ni sá ní cuáha díhú<sup>n</sup> cuáá<sup>n</sup>, ndihi yúú vâha sá nání pèrlá, ndihi nchaa dava-gá núú yúú

vâha, mee-ni nchàa xíá<sup>n</sup> ní cuáha sá yíhí lôho-a<sup>n</sup>, ndihi sá ñúhú dúcú<sup>n</sup>-a<sup>n</sup>, ndihi sá ñúhú dúcú<sup>n</sup> ndáhá-á<sup>n</sup>, te nundaha-a<sup>n</sup> íí<sup>n</sup> tícùú ní cuáha mee-ni díhú<sup>n</sup> cuáá<sup>n</sup> te ñúhu mee-ni sá cuèhé sá dúhá, te xíá<sup>n</sup> cútùnì iní-ó sá cúú-á<sup>n</sup> íí<sup>n</sup> ñadihí ñaha ndècu ichi cuèhé ichi duha. <sup>5</sup> Te tneé-a<sup>n</sup> ndèé tnuní íí<sup>n</sup> tnúhu, te càchí-xi: “Ñúú Babiloniá ñúú ío cùnuu, cada iní-ndó sá cúú-xí mèi ñadihí-a, te diu ñadihí-a cùu-a<sup>n</sup> ñaha sanu ichi ñaha xii nchaa ñáyiú ñihí ñáyiú ndècu ichi díí iní, te nándi-gá nchaa sá cuèhé sá dúhá sànu ichi-a<sup>n</sup> nchaa ñáyiú cadá-yu”, duha càhá<sup>n</sup> tnúhu ndèé tnuní tneé ñadihí-á<sup>n</sup>. Te vá yó tècú tnuní ná cuèndá duca<sup>n</sup> càhá<sup>n</sup> tnúhu-á<sup>n</sup>. <sup>6</sup> Te ní cutnùnì iní-í sá díú ñaha-á<sup>n</sup> ní dácácá-á<sup>n</sup> níñi ñáyiú cùu cuèndá Yá Ndiòxí ní sahi ñaha-a<sup>n</sup> xí-yu, te ñáyiú ní xihí-á<sup>n</sup> cúú-yu ñáyiú ní cáhá<sup>n</sup> vâha cuèndá Xítoho Jesucristú, te sá dúcá<sup>n</sup> ní quide-a<sup>n</sup> te ní nduu-a<sup>n</sup> dàtná íí<sup>n</sup> ñáyiú quihu. Te ío ní cuñúhu-í sá dúcá<sup>n</sup> ní cuu ní xiní-í. <sup>7</sup> Te sátá dúcá<sup>n</sup> te espíritú xínú cuèchi núú Yá Ndiòxí-á<sup>n</sup> càchí tucu-xi xii-í:

—Vá ndèé dúcá<sup>n</sup> cuñúhu-n, chi vitna na càchí tnúhu-í xii-n nàcuáa quèe-xi cuèndá quiti ndèé úsá díquí-xi ndihi úxí ndiqui-xi-á<sup>n</sup>, ndihi nàcuáa quèe-xi cuèndá ñadihí ñaha yòdo ñaha xii-di-á<sup>n</sup>. <sup>8</sup> Te quiti ní xiní-n-á<sup>n</sup> cúú-dí íí<sup>n</sup> quiti sa ní xíndecu te vitna ñá túú-gá-di ndècu, te sáá nduu te quene-di yaú cúnú víhí sá ío nèhé cáá, te dàtnùnì sáá nduu te quíhí<sup>n</sup>-di núú ùhú núú ndáhú ní caa ní quíhí<sup>n</sup>, te cue ñáyiú xíndecu ñuyú cuñúhu vîhí-yu quiti-á<sup>n</sup> chi cùu-di íí<sup>n</sup> quiti sa ní xíndecu ní cùu te sáá nduu cùndecu tucu-di, te ñáyiú duca<sup>n</sup> cuñúhu ñaha xii-di-á<sup>n</sup> ñà túú yòdo tnuní-yu núú tûtú núú yódó tnuní cue ñáyiú naníhí tàhú, chi ndéé cút-nàhá vátá ngáva-gá ñuyú duca<sup>n</sup> sa yòdo tnuní cue ñáyiú naníhí tàhú.

<sup>9</sup>Te nchaa ñáyiú tècú tnùní xini ñuhu-xi cani váha iní-yu cuendá tnúhu-a. Te ndí úsá díquí quiti-á<sup>n</sup> cada iní-ó sá cúu-xí úsá tndúú núú núcóo ñadhí-á<sup>n</sup>. <sup>10</sup>Te ndí úsá díquí quiti-á<sup>n</sup> cada iní-ó sá cúu-xí úsá tnàhá cue tée yindaha ñaha xii ñáyiú, te úhú<sup>n</sup> cue tée-á<sup>n</sup> ñà túú-gá cúnúu-güedé vitna, te ñ<sup>n</sup> tée-á<sup>n</sup> cúnúu-dé vitna te ingá-dé vátá sàá-gá nduu cúnúu-dé, te na sàá nduu dùca<sup>n</sup> cunuú-dé te sacú-ni nduu cunuú-dé. <sup>11</sup>Te quiti ní xindecu ni cùu te ñá túú-gá-di ndècu vitna, cùu-di datná tée cùu uná yindaha ñaha xii ñáyiú, te ñ<sup>n</sup>-ni cùu-di ndihi cue tée úsá yindaha ñáyiú-á<sup>n</sup>, te quiti-á<sup>n</sup> sàá nduu cuíta nihnu-di quíhí<sup>n</sup>-di núú ùhú núú ndàhú ni caa ni quíhí<sup>n</sup>.

<sup>12</sup>Te ndí ùxí ndiqui quiti-á<sup>n</sup> cada iní-n sá cúu-xí ùxí tnàhá cue tée quindaha ñaha xii ñáyiú, dico vátá sàá-gá nduu cúnúu-güedé quindaha ñaha-güedé xii-yu. Te cue tée-á<sup>n</sup> ñíhí-güedé tnúhu ndee iní taxi tnùní-güedé ndihi quiti-á<sup>n</sup>, dico tnaa-ni taxi tnùní-güedé ndihi quiti-á<sup>n</sup>. <sup>13</sup>Te ndí ùxí cue tée-á<sup>n</sup> cuu ñ<sup>n</sup>nuu-güedé taxi tnùní-güedé, te chindee-güedé quiti-á<sup>n</sup> cuendá cuu ñ<sup>n</sup>nuu-güedé ndihi-di cuendá taxi tnùní-gá-di. <sup>14</sup>Te cue tée-á<sup>n</sup> nàá-güedé ndihi Yaá cáá dàtná cáá ñ<sup>n</sup> mbéé quiti ní dánícuèhé-güedé dico vá ndácú-güedé nàá-güedé ndihi-gá chi cuíta-güedé. Te ñiu-gá cúu-gá Yaá ío cúnúu taxi tnuní cuèi nchaa tée yindaha ñaha xii ñáyiú, te duca<sup>n</sup>-ni tàxi tnuní-gá cuèi nchaa dava-gá-yu. Te mee Yá Ndióxi ní cachí-gá nándi cùu nchaa ñáyiú cundecu ndihi Yaá cáá dàtná cáá ñ<sup>n</sup> mbéé quiti ní dánícuèhé-güedé-á<sup>n</sup>, te ñiu-ni ñáyiú-á<sup>n</sup> cúu-yu ñáyiú ní cáhá<sup>n</sup>-gá te cùu-yu ñáyiú quide ndáá ndécú ichi-gá —duha càchí espíritú xínú cuèchi núú-gá.

<sup>15</sup>Te ní cachí tucu espíritú-á<sup>n</sup> xii-í:

—Ndute ñuhu núú núcóo ñadhí ñaha ndècu ichi díí iní-á<sup>n</sup>, ndute-á<sup>n</sup> cada iní-n sá cúu-xí ñáyiú nchaa nàció<sup>n</sup>, ndihi ñáyiú nchaa ñuú, ndihi ñáyiú xindecu nchaa xichi, ndihi ñáyiú càhá<sup>n</sup> ndí díí<sup>n</sup> ndí díí<sup>n</sup> núú tnúhu. <sup>16</sup>Te dàtná ní cachí-í sá ndí uxí ndiqui quiti ní xini-n-á<sup>n</sup> cúu-xí ùxí tnàhá cue tée quindaha ñaha xii ñáyiú, te cue tée-á<sup>n</sup> cuu úhú iní-güedé ñadhí ñaha ndècu ichi díí iní-á<sup>n</sup>, te ni vā cādā cuendá ñáhá-gá-güedé xii-a<sup>n</sup>, te ndada ndàhú ñáhá-güedé, te dacàchi ñaha-güedé xii-a<sup>n</sup>, te cahmi ñaha-güedé. <sup>17</sup>Te mee Yá Ndióxi duca<sup>n</sup> dàcahá<sup>n</sup>-gá iní cue tée-á<sup>n</sup> cuendá cada-güedé nàcuáa cuini méé-gá, te xíá<sup>n</sup> núu cuu ñ<sup>n</sup>nuu-güedé cuendá cúnaha-güedé xii quiti-á<sup>n</sup> cada-di núú-güedé taxi tnùní-di, te duca<sup>n</sup>-ni càda-di núú-güedé taxi tnùní-di ndéé ná sàá nduu càda Yá Ndióxi nàcuáa ní cachí-gá. <sup>18</sup>Te ñadhí ñaha ní xini-n-á<sup>n</sup> cada iní-n sá cúu-á<sup>n</sup> ñuú cáhnú ñuú ío cúnúu, te ñuú-á<sup>n</sup> ndécú tée ío-gá cúnúu taxi tnuní nchaa cue tée yindaha ñaha xii ñáyiú xindecu ñuyú —duha ní cachí espíritú xínú cuèchi núú Yá Ndióxi xii-í.

### Ní naa ñuú Babiloniá

**18** Te duca<sup>n</sup> te dàtnuní ní xini tucu-í ingá espíritú xínú cuèchi núú Yá Ndióxi, te ndéé andiu nì dátàsa<sup>n</sup>-xi te ní dáyèhé-xi ñuyú, te espíritú-á<sup>n</sup> ío cúnúu-xi. <sup>2</sup>Te níhi ní cáhá<sup>n</sup>-xi, te càchí-xi:

—Ní sàá nduu nàa ñuú cáhnú ñuú cúnúu nani Babiloniá, te xíá<sup>n</sup>-nà natacá nchaa núú espíritú cündihi yucu ñávàha cundecu-xi, te vā queé-gá-xi xíá<sup>n</sup>, te ñiu-ni xíá<sup>n</sup> natacá nchaa quiti ndàva núú tàchí nchaa quiti ndehe quide, quiti ñá túú tnàhá iní ñáyiú te xíá<sup>n</sup>-nà cundecu-güedé. <sup>3</sup>Te duca<sup>n</sup> chi ñáyiú ñuú-á<sup>n</sup> sánú ichí-yu nchaa ñáyiú ñihí ñuyú ichi cuèhé ichi duha, te duca<sup>n</sup>-ni

xĩnchícú<sup>n</sup> nihnu nchaa ñáyiú ñuyúú xĩquidé-yu, te nchaa cue téé cùnūu yĩndaha ñaha xii ñáyiú, cue téé-á<sup>n</sup> cúú ñ<sup>n</sup>nuu-güedé ndihí nchaa ñáyiú ñuú-á<sup>n</sup> quidé-güedé ndihí-yu nándi sá cuèhé sá dúhá. Te nchaa ñáyiú dico nándi sá díco quèhe<sup>n</sup> ñáyiú ñuú-á<sup>n</sup> ïo cùu cuicá-yu, te duca<sup>n</sup> quèhe<sup>n</sup> nchaa ñáyiú ñuú Babiloniá-á<sup>n</sup> nchaa sá díco ñáyiú-á<sup>n</sup> cuendá xĩa<sup>n</sup> cãnehé-yu ndècú-yu ichi cuèhé ichi duha —duha càchí espíritú-á<sup>n</sup>.

<sup>4</sup>Te sátá dúcá<sup>n</sup> te ní tecú dóho-í ní cáhá<sup>n</sup> ñ<sup>n</sup> sá ní cáhá<sup>n</sup> andiu, te càchí-xi:

—Nchaa nchòhó ñáyiú cùu cuendá-í quee-ndo ñuú Babiloniá cuendá sá vã cùndècu-ndo tnahá-ndó ichi cuehé ichi duha dàtná ndécú ñáyiú ñuú-á<sup>n</sup>, te duca<sup>n</sup> te vã quini-ndó tnúndòho tnúhu ndàhú sá quíxí cùu xii ñáyiú-á<sup>n</sup>.

<sup>5</sup>Chi ío cuèhé cuèchi-yu ní cuu ndècu núú Yã Ndióxí, te mee-gã náhá-gã nàcuáa ndùu nchaa sá quidé-yu.

<sup>6</sup>Te nchòhó ñáyiú cùu cuendá-í, chí nánchòcáva dandòho-ndo ñáyiú-á<sup>n</sup> dàtná quidé mèe-yu dandohó-yu cue ñáyiú, te úú xito nanchòcáva-ndo dandohó-ndó-yu, te duca<sup>n</sup> càda-ndo cuendá ío-gá ndohó-yu. <sup>7</sup>Te ío quide cahnú-yu mèe-yu, te ío cùdí ñí-yu quidé-yu nchaa núú sá cuèhé sá dúhá, te sá dúcá<sup>n</sup> xidó-yu quidé-yu nchaa sá cuèhé sá dúhá ñuú xĩa<sup>n</sup> nchòhó ío dandòho-ndó-yu, te duca<sup>n</sup> chi ñáyiú ñuú-á<sup>n</sup> sání ñí-yu, te càchí-yu: “Nchúhú cúú-ndí dàtná ñ<sup>n</sup> ñádhí ñá túú quèé, ñaha ío cùnūu yĩndaha ñaha xii ñáyiú. Te duca<sup>n</sup> sãtnahá-xi cùu-ndí chi nchaa-ni nduu ío váha cùu ñí-ndí ndécú-ndí, te ni vã sàá ñ<sup>n</sup> nduu te ndihú ñí-ndí”, duha càchí ñáyiú ñuú-á<sup>n</sup>. <sup>8</sup>Te sá cuendá nchaa sá quidé-yu-á<sup>n</sup> ñuú xĩa<sup>n</sup> ñ<sup>n</sup>-ni ndùu sáá tnúndòho sá cúú-xí-yu, te ío ndohó-yu chi ñuú-yu coo tnamá, te coo cuèhé cahni ñaha-xi xií-yu, te ío ndihú ñí-yu, te cáyú ñuú-yu, te duca<sup>n</sup>

ndòhó-yu chi Dútú Ndióxí ío cùnūu-gá, te díu-gá duca<sup>n</sup> dandohó ñaha-gá xií-yu —duha càchí sá ní cáhá<sup>n</sup> àndiu-á<sup>n</sup>.

<sup>9</sup>Te nchaa cue téé cùnūu yĩndaha ñaha xii ñáyiú ío ndáhyú-güedé sá ndihú ñí-güedé òré ná quini-güedé quene ñúhmá cáyú ñuú cue ñáyiú Babiloniá, chi díu cue téé-á<sup>n</sup> cúú-güedé cue téé cùu ñ<sup>n</sup>nuu ndihí-yu quide-güedé nchaa núú sá cuèhé sá dúhá ndihí-yu, te duca<sup>n</sup> chi ío tnahá ñí-güedé cundecu-güedé ndihí-yu ichi díí ñí. <sup>10</sup>Te cue téé-á<sup>n</sup> xica-nã cundecu-güedé cundehe-güedé nàcuáa ndohó nchaa ñáyiú ñuú-á<sup>n</sup> sã yùhú-güedé nchaa tnúndòho-á<sup>n</sup>, te cachí-güedé:

—Ñdàhú nchòhó ñáyiú ñuú cáhnú ñuú cùnūu nani Babiloniá! Chi uu<sup>n</sup>ni ní sáá nchaa tnúndòho tnúhu ndàhú sá cúú-xí-ndó —duha cachí-güedé.

<sup>11</sup>Te nchaa ñáyiú dico nchaa sá nándihí ñáyiú ñuú Babiloniá tnahá-yu ío ndáhyú-yu sá ndihú ñí-yu chi vã yòo-gá cuaa<sup>n</sup> nchaa sá díco-yu. <sup>12</sup>Te díco-yu nchaa sá ní cuáha mee-ni díhú<sup>n</sup> cuáá<sup>n</sup>, ndihí nchaa sá ní cuáha mee-ni díhú<sup>n</sup> cuixí<sup>n</sup>, te dico tucú-yu sá ní cuáha mee-ni yúú vãha yúú nání pèrlá, ndihí nchaa dava-gá sá ní cuáha dava-gá yúú vãha, te díco-yu tnahá dóó sèdá, ndihí ñíngá núú dóó vãha sá nání línú, ndihí dóó murádú, ndihí dóó tícuèhé te mee-ni dóó vãha cùu-xi, te dico tucú-yu tnahá yutnu sá sàhá<sup>n</sup> tnámí, te dico tucú-yu sá ní cuáha sá nání mǎrřil, te dico tucú-yu sá ní cuáha mee-ni yutnu váha sá ïo ndèyáhu, te dico tucú-yu sá ní cuáha mee-ni càá, ndihí sá ní cuáha mee-ni sã nání bròncé, ndihí sá ní cuáha mee-ni yúú vãha yúú nání mǎrmól. <sup>13</sup>Te dico tucú-yu canèlá, ndihí yúcu sá sàhá<sup>n</sup> tnámí, ndihí dúsa sá sàhá<sup>n</sup> tnámí, ndihí yúcu sá nání mirrá, te dico tucú-yu ñíngá núú dúsa sá sàhá<sup>n</sup> tnámí nàni olivánú, te dico tucú-yu ndudí ndéhé yoho yàha stilé, ndihí acití yutnu nàni olívú, ndihí yuchi trúú váha,



te dico tucú-yu nchaa dava-gá núú tríú, te dicó-yu tnàhá mbéé, ndihi cuàyú, ndihi nchaa dava-gá quití tatá, te dico tucú-yu tnàhá carrètá, te dico tucú-yu tnàhá ñáyiú xínu cuechi, ñáyiú ñá túú tnàhí dàñá quee núú chíú<sup>n</sup> pàtróó<sup>n</sup>-xi. <sup>14</sup> Te nchaa ñáyiú dico-á<sup>n</sup> cũñàhá-yu xii ñáyiú ñúú Babiloniá:

—¡Nchaa sá ío cùdǎ íní-ndó cùndecu ndihi-ndo ni cuu vá ndácú-gǎ-ndó ñihí-ndó vitna, te nchaa sá sání íní-ndó sǎ ío váha càa ndecu ndihi-ndo ndihi nchaa dava-gá sá ndécú ndihi-ndo ní ndihi nihnu-xi vitna, te ni ì<sup>n</sup> nduu-gá vá ñihí-ndó ñi ì<sup>n</sup> xǎ<sup>n</sup> cundecu ndihi-ndo! —duha cũñaha ñǎyiú-á<sup>n</sup> xii-yu.

<sup>15</sup> Te nchaa ñáyiú ní cuu cuica ní xóo dico nándi nchaa sá ní xóo dico ní quehe<sup>n</sup> cue ñáyiú ñúú Babiloniá, nchaa ñáyiú-á<sup>n</sup> xica-ñǎ cundecú-yu cundèhé-yu sá yùhú-yu cuèndá nchaa tnúndòho sá yǎha cue ñáyiú ñúú-á<sup>n</sup>, te ío ndáhyú-yu sá ndìhú íní-yu sá dúcá<sup>n</sup> ndòho ñáyiú-á<sup>n</sup>. <sup>16</sup> Te cũñaha tùcú-yu:

—¡Ndàhú nchòhò ñáyiú xǎndecu ñúú cáhnú ñúú nání Babiloniá! Chi nchòhò cúú-ndó dàtná ì<sup>n</sup> ñadìhí ñaha nihnu dóo vǎha dóo muràdú, ndihi dóo tícuèhé, te mee-ni sǎ ní cuáha díhú<sup>n</sup> cuàá<sup>n</sup>, ndihi mee-ni sǎ ní cuáha yúú vǎha yúú nání pèrlá, ndihi sá ní cuáha dava-gá yúú vǎha sá ío vii ndǎa mee-ni nchaa xǎ<sup>n</sup> ní cuáha sá yǎhí lõho-a<sup>n</sup>, ndihi sá ñúhú dǔcú<sup>n</sup>-a<sup>n</sup>, ndihi sá ñúhú dǔcú<sup>n</sup> ndáhá-á<sup>n</sup>. <sup>17</sup> ¡Te uu<sup>n</sup>ni ní ndihi nihnu nchaandi túhú sá ndécú ndihi ñadìhí-á<sup>n</sup>, te duca<sup>n</sup> sǎtnahá-xi cùu nchòhó ní cùu! —duha cũñàhá-yu xii cue ñáyiú ñúú Babiloniá.

Te nchaa cue tée dàcaca barcú ndihi nchaa cue tée tàxi tnuní bàrcú-á<sup>n</sup>, ndihi nchaa ñáyiú ñúhu xití bàrcú-á<sup>n</sup>, ndihi nchaa dava-gá cue tée nándi chiu<sup>n</sup> quide ndecu lamár, nchaa ñáyiú-á<sup>n</sup> xica cùndecú-yu <sup>18</sup> te quiní-yu òré quene ñúhmá cǎyú ñúú cue ñáyiú Babiloniá, te ñihi cáhá<sup>n</sup>-yu, te cachí-yu:

—Ni ì<sup>n</sup> ñúú ñá túú nǔtnahá-xi ñúú Babiloniá —duha cáhá<sup>n</sup>-yu.

<sup>19</sup> Te nchaa ñáyiú-á<sup>n</sup> chidó-yu ñuhu díquǎ-yu, te ngúíta-yu ndáhí-yu sá ndìhú íní-yu, te ñihi cáhá<sup>n</sup>-yu, te cachí tucú-yu:

—¡Ndàhú nchòhò ñáyiú xǎndecu ñúú cáhnú ñúú nání Babiloniá! Chi ío cuica-ndo ní cùu, te diu-ndo ní quide ní cuu cuica nchaa ñáyiú ndecu ndihi barcú, te vitna uu<sup>n</sup>ni ní naa-ndo ndihi ñúú-ndó —duha cachí-yu.

<sup>20</sup> Te nchaa nchòhò ñáyiú ndecu andiu ío chí cùdǎ íní sá dúcá<sup>n</sup> dàndoho Yá Ndiòxí nchaa ñáyiú ñúú Babiloniá-á<sup>n</sup>, te diu-ni duca<sup>n</sup> chí cùdǎ íní nchaa nchòhò cue tée ní cachí Xítòhó Jesu-ristú cáhá<sup>n</sup> tnúhu-gá, te diu-ni duca<sup>n</sup> chí cùdǎ íní nchaa nchòhò cue tée càhá<sup>n</sup> tnúhu Yá Ndiòxí nàcuáa dàcahu íní ñáhá-gǎ xii-ndo, te diu-ni duca<sup>n</sup> chí cùdǎ íní nchaa dava-gá nchòhò ñáyiú cùu cuendá-gá cuèndá sá dúcá<sup>n</sup> dàndoho-gá nchaa ñáyiú ñúú-á<sup>n</sup>. Te duca<sup>n</sup> càda ñaha-gá xii cue ñáyiú-á<sup>n</sup> cuèndá nchaa sá quidé ñàhá-yu xii-ndo.

<sup>21</sup> Te sátá dúcá<sup>n</sup> te ní xiní-í ì<sup>n</sup> espíritú xínú cuèchi núú Yá Ndiòxí, te espíritú-á<sup>n</sup> ío ndee-xi te ní quehe<sup>n</sup>-xi ì<sup>n</sup> yúú cáhnú dàtná càhnu yódó te ní dáquèe-xi xití ndute lamár, te cachí-xi:

—Dàtná ní quide-í ní dáquèe-í yúú xití ndute duca<sup>n</sup> càda-xi ñúú cáhnú ñúú Babiloniá, chí ñáyiú ñúú-á<sup>n</sup> ío ndǎhi naá-yu ndihi ñúú-yu, te vá ì<sup>n</sup> nduu ì<sup>n</sup> quíú-gǎ quiní ñáhá ñǎyiú xii-yu. <sup>22</sup> Te ni ì<sup>n</sup>-gá ñáyiú càni arpá, te ni ì<sup>n</sup>-gá ñáyiú tǎú vílu, te ni ì<sup>n</sup>-gá ñáyiú tǎú cútú, te ni ì<sup>n</sup>-gá yaá vá cóo ñúú-á<sup>n</sup>, te ni ì<sup>n</sup>-gá cue ñáyiú xíní cada ì<sup>n</sup> núú chiu<sup>n</sup> vá cóo-gǎ, te ni vǎ yòo-gá canehe chiu<sup>n</sup> yúú cúú yódó mulínú. <sup>23</sup> Te ni ì<sup>n</sup>-gá ñuhú vá cùndecu ñúú-á<sup>n</sup>, te ni ì<sup>n</sup> nduu-gá vá cóo víco tnándaha, te ñáyiú ñúú-á<sup>n</sup> ñáyiú quide ndáhú cúú-yu ñáyiú ío-gá cuicá-yu dàcúxí ñáyiú quide ndáhú xǎndecu ñihí ñuyúú, dico nchaa-yu naá-yu

chi quide nduú-yu te ío dándahú-yu cue ñáyiú ñuyíú sǎ dúcá<sup>n</sup> quidé-yu.

<sup>24</sup>Te diu-ni ñuú-á<sup>n</sup> ñí dácácá-yu ñíñí cue tée ní cáhá<sup>n</sup> tnúhu Yá Ndiöxí, te diu-ni duca<sup>n</sup> ñí quidé-yu nchaa dava-gá cue ñáyiú cùu cuendá-gá, te diu-ní-yu quide xísahni tnàha ñáyiú ñuyíú —duha cächí espíritú-á<sup>n</sup>.

**19** Te sátá dúcá<sup>n</sup> te ní tecú dóho-í ñíhi ní cáhá<sup>n</sup> cuéhé víhí ñáyiú andiu, te cächí-yu:

¡Ío càhnu cuu Yá Ndiöxí!, chi diu-gá cúú-gǎ Yaá ní dácácu nihnu ñaha xii-o núú ùhú núú ndàhú, te ío cùnuu-gá, te mee-ni sǎ vǎha quide-gá,

<sup>2</sup>te mee-gǎ ío vǎha ndáá quidé-gǎ quidé ndáá-gǎ cuéchi nchaa ñáyiú, chi diu-gá ní dáquihí<sup>n</sup>-gǎ ñadìhí ñaha ndècu ichi díí ñí núú ùhú núú ndàhú,

chi diu-a<sup>n</sup> ní sanu ichi-a<sup>n</sup> ñáyiú ñuyíú ichi cuéhé ichi duha,

te duca<sup>n</sup> ñí dáquihí<sup>n</sup> ñáhá-gǎ xii-a<sup>n</sup> núú ùhú núú ndàhú chi nàchinaa-gǎ sǎ ñí sahani-a<sup>n</sup> cue ñáyiú ní xinu cuechi núú-gǎ.

Duha cächí-yu.

<sup>3</sup>Te cächí tucú-yu:

—¡Ío càhnu cuu Yá Ndiöxí!, chi nchaa nduu nchaa quíú duca<sup>n</sup>-ni quène ñúhmá núú ñúhú ñàha-á<sup>n</sup> càyú-a<sup>n</sup> —duha cächí-yu.

<sup>4</sup>Te ndí òcó cúmí cue tée cùu sacuéhé xíndecu-á<sup>n</sup> ñí ngüíñí xítí-güedé núú Yá Ndiöxí núú núcòo-gǎ táxí tnùnì-gǎ, te tnàhá cue quitì cúmí xínutñí-á<sup>n</sup> ñí ngüíñí xítí-güedè núú-gǎ, te cue tée-á<sup>n</sup> cächí-güedé ndihí cue quitì-á<sup>n</sup>:

—Sǎ ndáá sǎ ío càhnu cuu Yá Ndiöxí —duha cächí-güedé ndihí cue quitì-á<sup>n</sup>.

<sup>5</sup>Te sátá dúcá<sup>n</sup> te ní tecú dóho-í ní cáhá<sup>n</sup> ñí sǎ ní cáhá<sup>n</sup> mei núú nútñí xilé vǎha núcóo Yá Ndiöxí, te cächí sǎ cáhá<sup>n</sup>-á<sup>n</sup>:

Nchaa nchòhò ñáyiú xinu cuechi núú Yá Ndiöxí, diu-ni nchòhò ñáyiú nèhe sǎ yínùhu núú-gǎ,

cáhá<sup>n</sup>-ndó sǎ ío càhnu cuu-gǎ cuéi cùnuu-ndo àdi ñá túú cùnuu-ndo.

Duha cächí sǎ cáhá<sup>n</sup>-á<sup>n</sup>.

**Ñí vico cùu datná vico tnàndaha**

<sup>6</sup>Te sátá dúcá<sup>n</sup> te ní tecú dóho-í ní cáhá<sup>n</sup> cuéhé víhí ñáyiú andiu, te òré duca<sup>n</sup> ñí cáhá<sup>n</sup>-yu te ní quide-xi datná quidé-xí núú xicá cuéhé víhí ndùte, te ní quide tucu-xi datná quidé-xí òré càhá<sup>n</sup> ñíhi víhi ñúhu, te cächí-yu:

¡Ío càhnu cuu Dútú Ndiöxí Yaá cúú Tǎtá-ó! Te ío cùnuu-gǎ táxí tnùnì-gǎ, te quide-gǎ nchaandì túhu sǎ vǎha.

<sup>7</sup>Te ío chí ná cùdíí ñí-ó, te chí ná cächí-ó sǎ ío càhnu cuu Yá Ndiöxí,

chi vitna ní sǎá nduu càda Yaá cáá datná cáá ñí mbéé quitì ní dánícuèhé-güedé ñí vico, te cùu-xi datná vico tnàndaha.

Te nchaa ñáyiú cùu cuendá-gǎ sa ní ndihí-yu sa ndècu túha-yu cundecú-yu vico-á<sup>n</sup>, te cada ñí-ó sǎ ñáyiú-á<sup>n</sup> cúú-yu datná ñí ñadìhí xíchí tnàndaha ndihí-gǎ,

<sup>8</sup>te ñáyiú-á<sup>n</sup> ñí nduu táhú-yu cuihnú-yu dóó vǎha dóó chàhnhí sǎ ío vǎha càndoo.

Duha cächí-yu.

Te sǎ dúcá<sup>n</sup> ñí nduu táhú ñáyiú cùu cuendá Yá Ndiöxí dóó vǎha ñíhnú-yu, xíá<sup>n</sup> cùtnùnì ñí-ó sǎ cúú-yu ñáyiú quide ndáá núú-gǎ.

<sup>9</sup>Te ñí espíritú xínú cuèchi núú Yá Ndiöxí ní cachí tnúhu-xi xii-í, te cächí-xi:

—Chido tnùnì-n ñí núú tütú nàcuáa na càhá<sup>n</sup>-í-a: “Vǎha táhú nchaa ñáyiú ní cáhá<sup>n</sup> ñáhá Yáá cáá datná cáá ñí mbéé quitì ní dánícuèhé-güedé cundecú-yu vico, te vico-á<sup>n</sup> cúú-xí datná vico tnàndaha cada-gǎ”, te duha chido tnùnì-n chi tnúhu-a cùu-xi tnúhu ndáá tnúhu Yá Ndiöxí —duha cächí espíritú-á<sup>n</sup>.

<sup>10</sup>Te ní ngúíñí xítí-í núde espíritú-á<sup>n</sup> cuèndá chiñuhu-í-xi ni cùu, te ní cachí-xi:

—Vá dúcá<sup>n</sup> càda-n, chi tnàhá-í dicó xínú cuèchi-í núde Yá Ndiòxí dàtná quidé-n xínu cuechi-n núde-gá ndihi nchaa dava-gá ñáyiu ndècu ndihi-n ichi-gá, ñáyiu nchicú<sup>n</sup> nihnu quide ni yuhu ni iní nchaa nàcuáa càhá<sup>n</sup> Xítóhó Jesucristú, te núde xíá<sup>n</sup> càchí-í sá vâ dúcá<sup>n</sup> càda-n, chi mee Yá Ndiòxí chiñuhu-n — duha càchí espíritú-á<sup>n</sup>.

Te nchaa cue téè càhá<sup>n</sup> tnúhu Yá Ndiòxí càhá<sup>n</sup>-güedé nàcuáa ndùu tnúhu càhá<sup>n</sup> Xítóhó Jesucristú.

### Cuèndá Yáá yódó ì<sup>n</sup> cuayú cuixí<sup>n</sup>

<sup>11</sup>Te ní xiní-í nchí andiu, te ní xiní-í ní quee ì<sup>n</sup> Yáá yódó-gá ì<sup>n</sup> cuayú cuixí<sup>n</sup>. Te Yáá-á<sup>n</sup> nání-gá Yáá quidé ndáá cuiti, duha nani-gá. Te quide-gá nchaa sá càhá<sup>n</sup>-gá, te ío váha quide ndáá-gá cuèchi nchaa ñáyiu, te nchaa ñáyiu nàá ndihi ñaha xii-gá ío váha xiní-gá nàcuáa cada ñaha-gá xii-yu chi ío ndáá quidé-gá. <sup>12</sup>Te tinùu-gá dáyèhé-xi dàtná dáyèhé ñuhú, te tit-ní coróná ñuhú dīquí-gá, te nèhe-gá ì<sup>n</sup> sá ndèè dīu-gá, te vá yóo ì<sup>n</sup> cùnnumí iní-xi nása cuáhá<sup>n</sup> tnúhu-á<sup>n</sup>, chi ì<sup>n</sup> dīi dīi-ni mee-gá náhá-gá nàcuáa càhá<sup>n</sup>-xi.

<sup>13</sup>Te Yáá-á<sup>n</sup> níñn-í-gá ì<sup>n</sup> dóo ní cuu mee-ni níñn-í, te Yáá-á<sup>n</sup> càchí tnúhu-gá nchaa nàcuáa sàni iní Yá Ndiòxí, núde xíá<sup>n</sup> nání-gá Tnúhu Yá Ndiòxí. <sup>14</sup>Te sáta-gá nchicú<sup>n</sup> nchaa espíritú xínú cuèchi núde Yá Ndiòxí, te cue espíritú-á<sup>n</sup> cúu-xí dàtná sandadú, te xixihnu-xi dóo cuixí<sup>n</sup> dóo váha sá cándò, te xixódó-xi cuayú cuixí<sup>n</sup>. <sup>15</sup>Te yuhu Yáá yódónùu-á<sup>n</sup> quéné ì<sup>n</sup> yuchí cáhnú, te ndihi yuchí-á<sup>n</sup> dānicuèhé-gá nchaa ñáyiu xīndecu ñuyú, te ío dandòho ñaha-gá xii-yu, te dàtná quidé téè quihni ndéhé yoho yàha stilé duca<sup>n</sup> sātñahá-xi cada ñaha-gá xii-yu, chi ío dandòho ñaha-gá

xii-yu cuèndá sá ío cùdèé<sup>n</sup>-gá. Te mee-gá ío cùnnu-gá táxi tnùní-gá, te quide-gá nchaandi túhú sá váha. <sup>16</sup>Te sáta dóo níñn-í Yáá-á<sup>n</sup> ndihi núde tícacá<sup>n</sup>-gá yódó tnùní nàcuáa nani-gá, te duha càhá<sup>n</sup>-xi: “Tée ío cùnnu taxi tnùní ñáhá xii nchaa cue téè yīndaha ñaha xii ñáyiu ndihi nchaa dava-gá ñáyiu”, duha ndèè tnùní sáta dóo-gá-á<sup>n</sup> ndihi tícacá<sup>n</sup>-gá-á<sup>n</sup>.

<sup>17</sup>Te dàtnùní ní xiní-í ì<sup>n</sup> espíritú xínú cuèchi núde Yá Ndiòxí núnñi-xi núde nchī-canchii, te níhi ní càhá<sup>n</sup>-xi, te xāha<sup>n</sup>-xi xii nchaa quiti ndava núde tàchí:

—Nchaa nchòhó quiti ndàva, chí táquixi chi caxi-ndo nchaa sá ní quide túha Yá Ndiòxí, <sup>18</sup>chi caxi-ndo cùnñi nchaa cue téè yīndaha ñaha xii ñáyiu, ndihi cuñú nchaa cue téè tàxi tnùní ñáhá xii cue sandadú, ndihi cuñú nchaa cue téè ío ññi xīndáa, ndihi cuñú nchaa cuayú, ndihi cuñú nchaa cue téè ní xódó ñaha xii-güedi, ndihi cuñú nchaa dava-gá ñáyiu, ñáyiu ñá túu tnàhí ni dāná quee núde chíú<sup>n</sup> pàtróo<sup>n</sup>-xi, ndihi cuñú nchaa ñáyiu ní dāná ní quee núde chíú<sup>n</sup> pàtróo<sup>n</sup>-xi, ndihi cuñú nchaa ñáyiu cùnnu, ndihi cuñú nchaa ñáyiu ñá túu cùnnu, te nchaa cuñú-á<sup>n</sup> caxi-ndo —càchí espíritú-á<sup>n</sup> xāha<sup>n</sup>-xi xii nchaa quiti-á<sup>n</sup>.

<sup>19</sup>Te sáta dúcá<sup>n</sup> te ní xiní tucu-í quiti ní quee xití lámár, ndihi nchaa cue téè yīndaha ñaha xii ñáyiu, ndihi nchaa cue téè cùu sandadú-güedé ní nanñi tnàhá-güedé ndihi quiti-á<sup>n</sup> cuèndá cuu ì<sup>n</sup>nuu-güedé ndihi-di nàa-güedé ndihi Yáá yódó cuayú-á<sup>n</sup>, ndihi nchaa cue espíritú cúu sandadú ndihi-gá. <sup>20</sup>Te cue espíritú cúu sandadú ndihi Yáá-á<sup>n</sup> ní tnii-xi quiti-á<sup>n</sup>, ndihi téè ío dāndahú ñáhá xii ñáyiu càchí sá càhá<sup>n</sup> tnúhu Yá Ndiòxí te ñá ndàá sá càhá<sup>n</sup>-dé tnúhu-gá, te diu-ni téè-á<sup>n</sup> ní quide-dé titní núde sá vâ yóo tnàhí ndàcu cada núde quiti-á<sup>n</sup>. Te sá dúcá<sup>n</sup> ní quide téè-á<sup>n</sup> xíá<sup>n</sup> ní dāndahú-dé ñáyiu ní sándáa iní-yu ní queé-yu tnùní

quiti-á<sup>n</sup>, te ní chiñuhú-yu sá nǐ dándácú ñàhá-yu xii-dí, te cue espíritú-á<sup>n</sup> nǐ dáquëe-xi quiti-á<sup>n</sup> nǔú ñuhú núú ñuhú àzufré càyú-xi, ndíhi téé duca<sup>n</sup> dándahú ñàhá xii ñáyiú-á<sup>n</sup>, te xía<sup>n</sup> cuhu<sup>n</sup> téé-á<sup>n</sup> ndíhi quiti-á<sup>n</sup>, te ío ndoho-dé ndíhi-dí. <sup>21</sup>Te ndíhi yuchí cáhnú sǎ quéné yùhu Yaá yódó cuáyú-á<sup>n</sup> nǐ sahní-gá nchaa dava-gá cue téé cùndíhi quiti-á<sup>n</sup>, te nchaa cue quiti ndáva ní chítú xítí-güedi ní xexi-güedi cuñú nchaa cue téé-á<sup>n</sup>.

### Úxí ciëndú cuía

**20** Te sátá dúcá<sup>n</sup> te ní xiní-í ñ<sup>n</sup> espíritú xínú cuèchi núú Yǎ Ndiöxí ní quee-xi andiu, te nùndaha-xi ndacaá nacaá-xi yèhe ñ<sup>n</sup> yaú cùnú víhí nǔú cùndècu sácuihná, te nùndaha tucu-xi ñ<sup>n</sup> cadená cáhnú. <sup>2</sup>Te espíritú-á<sup>n</sup> nǐ tñi-xi quiti déé<sup>n</sup> nání dràgón, te diu-ni quiti-á<sup>n</sup> cúú-dí mèi yucu ñávàha sá nání sácuihná, te diu xǎ<sup>n</sup> ní nduu-xi cóo ndéé sanaha. Te espíritú-á<sup>n</sup> nǐ dácútú ñàha-xi xii-dí, te duca<sup>n</sup>-ni cùndutu-dí ndéé xínu úxí ciëndú cuía. <sup>3</sup>Te sátá nǐ dácútú ñàha espíritú-á<sup>n</sup> xii-dí te ní dáquëe ñaha-xi xii-dí yaú-á<sup>n</sup> chi diu yaú-á<sup>n</sup> tàù-dí quée-dí cundecu-dí. Te ní nacadí-xi yuyèhe yaú-á<sup>n</sup>, te ní tee-xi sèyú yuyèhe-á<sup>n</sup> cuendá sá và quéné-gǎ-dí dandàhú-dí cue ñáyiú ñuyúú, te xía<sup>n</sup> cundedí nihnu-dí ndéé xínu úxí ciëndú cuía. Te sátá ná yàha úxí ciëndú cuía-á<sup>n</sup> te nandáxí-dí te quene-dí yaú núú ñuhú-dí-á<sup>n</sup> caca cuu tnaa-dí ñ<sup>n</sup> úú nduu.

<sup>4</sup>Te dàtnùní ní xiní-í xínutnǐ titnǐ xilé váha, te xía<sup>n</sup> xínucóo nchaa ñáyiú ní ngúndecu ndíhi tñúhu ndee ñí cada ndáá cuèchi nchaa ñáyiú, te ní xiní-í xǐndecu tñàhá cue ñáyiú ní xehndé-güedé dúcú<sup>n</sup>-xi cuendá sá nǐ cáhá<sup>n</sup>-yu tñúhu Yǎ Ndiöxí, ndíhi cuendá sá nǐ cáhá<sup>n</sup> váha-yu cuendá Xítóhó Jesucristú. Te diu-ni ñáyiú-á<sup>n</sup> cúú-yu ñáyiú ñá túú ní chiñuhú-yu quiti ní quene xítí làmár-á<sup>n</sup>, te ní ñà túú ní chiñuhú-yu sá nǐ dándácú

ñáyiú ní natava ñàhá-yu xii-dí, te ní ñà túú ní dàñá-yu mèe-yu quée-yu tñuní quiti-á<sup>n</sup> chi ní tñéé-yu te ní ndàhá-yu ñá túú ní dàñá-yu quée tñuní-dí. Te ní xiní-í ní ndoto cue ñáyiú-á<sup>n</sup> cuendá tñàhá-yu cunúú-yu taxi tñuní-yu ndíhi Xítóhó Jesucristú úxí ciëndú cuía. <sup>5</sup>Te dava ñáyiú ní xíhí ñá túú ní ndotó-yu, chi ndéé yàha úxí ciëndú cuía te dàtnùní ndotó-yu. Te ñáyiú ní xiní-í ní ndoto-á<sup>n</sup> cúú-yu ñáyiú ní ndoto díhna nuu. <sup>6</sup>Te ío váha ní tñàhá nchaa ñáyiú ní nduu táhú ní ndoto díhna nuu!, chi cue ñáyiú-á<sup>n</sup> ío cùdíú-yu núú Yǎ Ndiöxí, te nchaa ñáyiú-á<sup>n</sup> và quíhí<sup>n</sup>-yu núú ùhú núú ndàhú, te ñáyiú-á<sup>n</sup> cúú-yu dútú ndécú-yu núú Yǎ Ndiöxí ndíhi núú Xítóhó Jesucristú, te ñáyiú-á<sup>n</sup> cùnúú-yu dàtná cùnù Xítóhó Jesucristú, te cunuu ndíhi ñàhá-yu xii-gá úxí ciëndú cuía.

<sup>7</sup>Te sátá ná yàha úxí ciëndú cuía-á<sup>n</sup> te sácuihná quee-xi núú yíndedí nihnu-xi-á<sup>n</sup>, <sup>8</sup>te ngúfta tucu-xi dandàhú-xi nchaa ñáyiú xǐndecu nihí ñuyúú, te cuèi ñáyiú ñuú Gög, te cuèi ñáyiú ñuú Mägóg duca<sup>n</sup> quíhí<sup>n</sup>-xi dandàhú ñàhá-xí xíí-yu, te datacá-xi nchaa ñáyiú cuendá nàá-yu, te cuéhé víhí-yu dàtná cuéhé ñuhu cúchí làmár. <sup>9</sup>Te nchaa ñáyiú-á<sup>n</sup> tñí<sup>n</sup>-yu ichi quíhí<sup>n</sup>-yu ñ<sup>n</sup> ichi sá cuàhá<sup>n</sup> núú cáá ñ<sup>n</sup> yodo cahnu vihi, te sáá-yu núú xǐndecu ñáyiú cùu cuendá Yǎ Ndiöxí, te ñáyiú-á<sup>n</sup> chidòcò-yu cue ñáyiú cùu cuendá-gá-á<sup>n</sup> ndíhi ñuú-yu, te ñuú-á<sup>n</sup> ío cùu ñí-gá, dico mee Yǎ Ndiöxí dangòyo-gá ñuhú cahmi-gá nchaa ñáyiú duca<sup>n</sup> chidoco ñaha xii ñáyiú cùu cuendá-gá-á<sup>n</sup>, te nchaa ñáyiú-á<sup>n</sup> cuú. <sup>10</sup>Te sácuihná sǎ dúcá<sup>n</sup> dándahú ñàhá xii ñáyiú chidoco ñàha xii ñáyiú cùu cuendá Yǎ Ndiöxí-á<sup>n</sup> dàquëe ñaha-gǎ xii-xi núú ñuhú núú ñuhú àzufré càyú-xi, te diu-ni xía<sup>n</sup> sa ñuhu quiti ní quene xítí làmár, ndíhi téé ní dándàhú ñáyiú ní xáha<sup>n</sup>-dè xíí-yu sá cáhá<sup>n</sup>-dé tñúhu Yǎ Ndiöxí te ñá ndàá

sá càhá<sup>n</sup>-dé tnúhu-gá, te xíá<sup>n</sup> cuhu<sup>n</sup>-xi ndoho-xi ni caa ni quíhí<sup>n</sup> ndihi quití ní quene xítí làmár, ndihi tée càchí sá càhá<sup>n</sup> tnúhu Yá Ndiòxí te ñá ndàá sá càhá<sup>n</sup>-dé tnúhu-gá.

### Cùndáá cuéchi ñáyiú

<sup>11</sup> Te ní xiní-í nútní ì<sup>n</sup> xilé váha xilé cuixí<sup>n</sup>, te núú xilé-á<sup>n</sup> núcõo ì<sup>n</sup> Yaá. Te ndèhe Yaá-á<sup>n</sup> nì ndónúhú àndiu ndihi ñuyú-a, te duca<sup>n</sup> ní ndónúhú-xí chi vá cùndècu-gá-xi. <sup>12</sup> Te sátá dúcá<sup>n</sup> te ní xiní-í nchaa ñáyiú ní xíhí ní cùu, ñáyiú cùnno ndihi ñáyiú ñá túú cùnno xínutnì-yu núú Yáá núcõo núú xilé váha-á<sup>n</sup>, te Yaá-á<sup>n</sup> cúú-gã Yá Ndiòxí, te òré-á<sup>n</sup> ní nandicá nchaa tutú núú yódó tnùnì nchaa nàcuáa ndùu sá ní quide ì<sup>n</sup> ì<sup>n</sup> ñáyiú-á<sup>n</sup>, te ní nandicá tucu ingá tutú núú yódó tnùnì nchaa ñáyiú ní naníhí tãhú, te nchaa ñáyiú ní xíhí ní cùu xínutnì-yu núú Yá Ndiòxí cundáá cuéchi-yu, te nchaa nàcuáa ndùu nchaa cuéchi-yu yòdo tnùnì núú nchaa tutú-á<sup>n</sup> duca<sup>n</sup> cùndáá. <sup>13</sup> Te nchaa ñáyiú ní xíhí xítí ndute làmár, ndihi nchaa ñáyiú ní xíhí núú ñuhu yìhí nchaa ñáyiú-á<sup>n</sup> cundáá cuéchi-yu nàcuáa ní quidè-yu ì<sup>n</sup> ì<sup>n</sup>-yu. <sup>14</sup> Te vitna te vá cùú-gã ñáyiú chi ñá túú-gã tnúhu xihí, te nchaa ñáyiú ñùhu núú ñùhú núú càyú ñáyiú-á<sup>n</sup> cùú-yu ñáyiú ní xíta nihnu ni caa ni quíhí<sup>n</sup>. <sup>15</sup> Te duca<sup>n</sup> chi nchaa ñáyiú ñá túú yòdo tnùnì núú tütú núú yódó tnùnì nchaa ñáyiú naníhí tãhú ní dáquëë ñaha Yá Ndiòxí xíi-yu núú ñùhú núú càyú.

### Andiu sàa ndihi ñuyú sáá

**21** Te sátá dúcá<sup>n</sup> te ní xiní-í andiu sàa ndihi ñuyú sáá, te andiu sá ndécú ðìhna ndihi ñuyú sà ndécú ðìhna ní ndónúhú-xí, te tnàhá làmár ní ndónúhú-xí. <sup>2</sup> Te yúhú té Juáá ní xiní-í ñuú Jerusalén sáá ní quee-xi núú ndécú Yá Ndiòxí, te ñuú-á<sup>n</sup> cúú-xí ñuú mée-gã, te ío vii càa chi càa datná cáá ì<sup>n</sup> ñadìhí

xíhí tnàndaha. <sup>3</sup> Te ní tecú dóho-í níhi ní cáhá<sup>n</sup> ì<sup>n</sup> sá ní cáhá<sup>n</sup> andiu, te càchí-xi:

—Chí cùndèdóho ì<sup>n</sup> tnúhu na càhá<sup>n</sup>-í-a: Yá Ndiòxí ndécú ndìhi-gá cue ñáyiú vitna, te duca<sup>n</sup>-nã cundecu ndihi ñaha-gã xíi-yu, te diú-yu cùú-yu ñáyiú cùu cuendá-gá, te vá ì<sup>n</sup> ndùu ì<sup>n</sup> quíú-gã te ðaña ñaha-gã xíi-yu. <sup>4</sup> Te mee Yá Ndiòxí cada-gá sá ñá túú tnàhí-gá ná caní iní-yu cundecú-yu, te ní vá quíní-gá-yu tnúhu xihí, te ní vá quíní-gá-yu tnúhu ndàhyú, te ní vá quíní-gá-yu tnúhu ndìhú iní-xi, te ní vá quíní-gá-yu tnúhu cùhú, chi nchaa sá ní xiní-yu ñuyú ðìhna vá quíní-gá-yu vitna —duha càchí sá ní cáhá<sup>n</sup>-á<sup>n</sup>.

<sup>5</sup> Te Yaá núcõo núú xilé váha-á<sup>n</sup> ní cachí tnúhu-gá xii-í, te càchí-gá:

—Yúhú quidè-í nàcuáa nduu saa nchaa sá cùndècu vitna. Te vitna chido tnùnì-n ì<sup>n</sup> núú tütú nchaa tnúhu sá ní cáhá<sup>n</sup>-í-a, chi nchaa tnúhu-a cùu-xi tnúhu ndáá cuítí —duha càchí-gá.

<sup>6</sup> Te dàtnùnì ní cachí tnúhu tucu-gá xii-í:

—Sa ní xínu cava nchaa chù<sup>n</sup> ní sani iní-í cada-í, te diu-ni yúhú cúú-í Yaá sa ndècu ndéé cùtnàhá ní ngáva ñuyú, te diu-ni-í cundecu-í ni caa ni quíhí<sup>n</sup>. Te nchaa ñáyiú cuínì tuha ñaha xii-í te cada iní-yu sá dàtná ndute cùu-xi sá cuãñaha tãhú-í xíi-yu candeca-xi iní-yu ni caa ni quíhí<sup>n</sup>. <sup>7</sup> Te nchaa ñáyiú na cùndee iní yáha nándi sá ná yáha-yu sá cuendá-í, te ñáyiú-á<sup>n</sup> nduu tãhú-yu cundecu váha-yu, te yúhú cuu-í Ndiòxí-yu, te duca<sup>n</sup> mée-yu cuú-yu déhe-í. <sup>8</sup> Te nchaa ñáyiú na yùhú ndoho cuendá-í quíhí<sup>n</sup>-yu núú ñùhú núú càyú ndihi ñáyiú ñá túú sàndáá iní ñáhá xii-í, ndihi ñáyiú quide nándi nchaa sá cuèhé sá dúhá, ndihi ñáyiú sàhni tnaha, ndihi ñáyiú ndècu ichi ðí iní, ndihi ñáyiú quide nduu, ndihi ñáyiú chìñuhu nchaa sá càchí-yu cùu ndiòxí ní cadúha cue tée ñuyú-a, ndihi ñáyiú dàcuan-dehnde, nchaa ñáyiú duca<sup>n</sup> xíquide-á<sup>n</sup>

cuíta nihnú-yu chi quíhí<sup>n</sup>-yu núú ñùhú núú ñùhú azufré càyú-xi —duha ní cáhá<sup>n</sup> Yá Ndióxi ní cachí tnúhu-gá xii-í.

### Ñúú Jerusalén sáá

<sup>9</sup>Te núú ùsá espíritú xínehe tícùú ñùhú tnúhu ndòho, te ì<sup>n</sup>-xi ní quixi-xi te càchí-xi:

—Taquixi, te na dànehé ñàhà-í xii-n nchàa ñáyiu cùu cuendá Yaá cáá dàtná cáá ì<sup>n</sup> mbéé quiti ní dánícuèhé-güedé, ñáyiu-á<sup>n</sup> cada iní-n sá cúú-yu dàtná ì<sup>n</sup> xíchí cuéché vitna tnándaha, te duca<sup>n</sup> càda iní-n sá cúú-yu chi cundecú-yu ndíhi-gá —duha ní cachí tnúhu espíritú-á<sup>n</sup> xii-í.

<sup>10</sup>Te òré quidé ñàha espíritú Yá Ndióxi xii-í nàcuáa càchí iní-xi, te espíritú néhé tícùú-á<sup>n</sup> ndécá ñàha-xi xii-í cuáaá ì<sup>n</sup> tìndúú dùcú<sup>n</sup>, te xiá<sup>n</sup> ní dánèhé núú ñàhá-xí xii-í ñúú Jerusalén te ñúú-á<sup>n</sup> ní quee-xi núú ndécú Yá Ndióxi, te ñúú-á<sup>n</sup> cúú-xí ñúú méé-gá. <sup>11</sup>Te ñúú-á<sup>n</sup> ìo càhnu cuu-xi chi duca<sup>n</sup> ìo càhnu cuu mee-gá, te dátasa<sup>n</sup>-xi dàtná dátasa<sup>n</sup> yúú vâha sá nání jâspé yúú cáá dàtná cáá vidriú sá túu ingá xio ndàa sáta-xi. <sup>12</sup>Te ní càndéé yuhu ñúú-á<sup>n</sup> sùúni dùcú<sup>n</sup> nchaa sá ñùhú dòco, te nchíí ùxúú yuyèhe-xi, te ndí tnahá ì<sup>n</sup> ì<sup>n</sup> yuyèhe-á<sup>n</sup> xíndecu ì<sup>n</sup> caa espíritú xínú cuèchi núú Yá Ndióxi. Te ndí tnahá ì<sup>n</sup> ì<sup>n</sup> yuyèhe-á<sup>n</sup> yódó tnùní ñúu ì<sup>n</sup> caa xichi cue ñáyiu isrâél. <sup>13</sup>Te úní yuyèhe-xi nchíí ndàa xio nacuaá quène nchíanchii, te úní tucu yuyèhe-xi nchíí ndàa nacuaá quée nchíanchii, te úní tucu yuyèhe-xi nchíí ndàa xio cuha nacuaá quène nchíanchii, te úní tucu yuyèhe-xi nchíí ndàa xio datni nacuaá quène tucu nchíanchii. <sup>14</sup>Te sá ñùhú dòco-á<sup>n</sup> chi ùxúú tnahá yúú cúú cìmentú-xi, te ndí tnahá ì<sup>n</sup> ì<sup>n</sup> yúú-á<sup>n</sup> ndèé ì<sup>n</sup> caa ñúu cue téé ní cáhá<sup>n</sup> tnúhu Yaá cáá dàtná cáá ì<sup>n</sup> mbéé quiti ní dánícuèhé-güedé, te ñúu mee-gá ní táuchíú<sup>n</sup>-gá ní cáhá<sup>n</sup>-güedé tnúhu-gá.

<sup>15</sup>Te espíritú sá càhá<sup>n</sup> ndíhi ñàha xii-í-á<sup>n</sup> néhé-xí ì<sup>n</sup> sá cání ní cuáha mee-ni dîhú<sup>n</sup> cuáá<sup>n</sup>, te ndíhi xiá<sup>n</sup> chícùhá-xi ñúú-á<sup>n</sup>, ndíhi sá ñùhú dòco ñúú-á<sup>n</sup>, ndíhi nchaa yuyèhe-xi. <sup>16</sup>Te ñúú-á<sup>n</sup> ì<sup>n</sup>-ni nèhe-xi cuendá quèhé<sup>n</sup>-xi ndíhi cuendá càni-xi, te espíritú-á<sup>n</sup> ní chícùhá-xi ndíhi sá néhé-xí-á<sup>n</sup> ñúú-á<sup>n</sup>, te nèhe-xi ócò úú cièndú mîl mètrú sá cání te ñúu-ni duca<sup>n</sup> nèhe-xi cuendá quèhé<sup>n</sup>-xi, te ñúu-ni duca<sup>n</sup> nèhe-xi sá dùcú<sup>n</sup> nchaa vehe càa ñúú-á<sup>n</sup>. <sup>17</sup>Te dàtnùní ní chícùhá-xi sá ñùhú dòco ñúú-á<sup>n</sup>, te xiá<sup>n</sup> néhé-xí ùnídico cúmí mètrú sá dùcú<sup>n</sup>, te ní chícùhá-xi dàtná chícùhá cue ñáyiu ñuyúú-a.

<sup>18</sup>Te sá ñùhú dòco-á<sup>n</sup> ní cuáha mee-ni yúú vâha yúú sá nání jâspé, te nihíí ñúú-á<sup>n</sup> cúú-xí mèe-ni dîhú<sup>n</sup> cuáá<sup>n</sup>, te càa datná cáá vidriú sá ìo vâha càndoo te túu ndàa ingá xio. <sup>19</sup>Te ndí ùxúú yúú cúú cìmentú sá ñùhú dòco-á<sup>n</sup> ndèé ndí dîí<sup>n</sup> núú yúú vii càa sáta-xi, te yúú dîhna ndèé mee-ni yúú vâha sá nání jâspé sáta-xi, te yúú cúú ùú ndèé tucu ingá núú yúú vâha sá nání zâfirú sáta-xi, te yúú cúú ùni ndèé tucu ingá núú yúú vâha sá nání ägatá sáta-xi, te yúú cúú cùmí ndèé ingá núú yúú vâha sá nání èsmeraldá sáta-xi. <sup>20</sup>Te yúú cúú ùhú<sup>n</sup> ndèé tucu ingá núú yúú vâha sá nání ònícé sáta-xi, te yúú cúú ìñú ndèé tucu ingá núú yúú vâha sá nání còrnalíná sáta-xi, te yúú cúú ùsá ndèé tucu ingá núú yúú vâha sá nání crìsólitú sáta-xi, te yúú cúú ùná ndèé tucu ingá núú yúú vâha sá nání bèrilú sáta-xi, te yúú cúú ì<sup>n</sup> ndèé tucu ingá núú yúú vâha sá nání tòpacíú sáta-xi, te yúú cúú ùxí ndèé tucu ingá núú yúú vâha sá nání crìsopásá sáta-xi, te yúú cúú ùxí ì<sup>n</sup> ndèé tucu ingá núú yúú vâha sá nání jàcintú sáta-xi, te yúú cúú ùxúú ndèé tucu ingá núú yúú vâha sá nání amatístá sáta-xi. <sup>21</sup>Te ndí ùxúú yuyèhe sá ñùhú dòco-á<sup>n</sup> cúú-xí mèe-ni yúú vâha sá nání pèrlá, te ndúu

n̄i yúú cúú ì<sup>n</sup> ì<sup>n</sup> yuyehe-á<sup>n</sup>. Te tnuú cáhnú ndècu xití ñúú-á<sup>n</sup> cúú-xí mèe-ni díhú<sup>n</sup> cuáá<sup>n</sup>, te càa-xi datná cáá vidriú sá t̄u ndàa ingá xio.

<sup>22</sup>Te ní xiní-í sá ñà túú vèhe núú chíñùhu ñáyiu Dútú Ndióxi cáá ñúú-á<sup>n</sup>, chi mee-ná Dútú Ndióxi Yaá quidé nchàa-ndi túhú sá vâha ndècu ñúú-á<sup>n</sup>, ndihi Yaá cáá datná cáá ì<sup>n</sup> mbéé quiti ní dánicuehè-güedé. <sup>23</sup>Te ñúú-á<sup>n</sup> ñà túú-gã xíní ñùhu-xi nchíanchii dayèhé-xi, te ni yóó ñà túú-gã xíní ñùhu-xi, chi mee-ná Yá Ndióxi dáyèhé-gá ñúú-á<sup>n</sup> ndihi Yaá cáá datná cáá ì<sup>n</sup> mbéé quiti ní dánicuehè-güedé. <sup>24</sup>Te cue ñáyiu nchaa ñúú cáá ñùyíú, ñáyiu ní naníhí tàhú x̄ndecu ñúú-á<sup>n</sup> dáyèhé-gá núú-yu, te nchaa cue téé ȳndaha ñaha xíi-yu nèhe-güedé sá ȳñùhu sá cúú-xí ñúú-á<sup>n</sup>, te quide cahnu ñaha-güedé xii-gá. <sup>25</sup>Te yuyèhe ñúú-á<sup>n</sup> ñà túú tnahí n̄andedí, te ñúú-á<sup>n</sup> ñà túú tnahí c̄ndiqui<sup>n</sup>. <sup>26</sup>Te nchaa ñáyiu nèhé-yu sá ȳñùhu sá cúú-xí ñúú-á<sup>n</sup> te quide cahnú-yu Yá Ndióxi. <sup>27</sup>Te ñúú-á<sup>n</sup> v̄á cúú c̄ndecu ni ì<sup>n</sup> ñáyiu ndècu ichi cuehé ichi duha, te ni ì<sup>n</sup> ñáyiu ndehnde, te ni ì<sup>n</sup> ñáyiu quide sá ñà túú c̄u vâha iní Yá Ndióxi v̄á cúú c̄ndecú-yu ñúú-á<sup>n</sup>, chi mee-ni ñáyiu naníhí tàhú ñáyiu yòdo t̄uní núú t̄utú Yaá cáá datná cáá ì<sup>n</sup> mbéé quiti ní dánicuehè-güedé, mee-ni ñáyiu-á<sup>n</sup> cundecú-yu ñúú-á<sup>n</sup>.

**22** Te sáta dúcá<sup>n</sup> te diu-ni espíritú-á<sup>n</sup> ní dánèhé núú ñáhá-xí xii-í yúte núú ñùhú ndüte candoo canine, te ndute-á<sup>n</sup> candeca-xi iní ñáyiu ni caa ni quíhí<sup>n</sup>, te ndute-á<sup>n</sup> quée-xí mèi núú núc̄o Yá Ndióxi ndihi Yaá cáá datná cáá ì<sup>n</sup> mbéé quiti ní dánicuehè-güedé. <sup>2</sup>Te cuádava tnuú cáhnú yâha xití ñúú-á<sup>n</sup> cáá ȳte-á<sup>n</sup>, te xio xio yuhu ȳte-á<sup>n</sup> níhnú ȳt̄nu cuu<sup>n</sup> sávidí-xi, te sávidí nchaa yutnu-á<sup>n</sup> cúú t̄ucu-xi sá cándèca iní ñáyiu ni caa ni quíhí<sup>n</sup>, te nchaa yutnu-á<sup>n</sup> cúú<sup>n</sup> sávidí-xi úxúú xito ì<sup>n</sup>

cúá chi ndi tnahá yóó cúú<sup>n</sup> sávidí-xi, te nchaa ndaha-xi c̄u-xi tátna sá cúú-xí nchàa ñáyiu. <sup>3</sup>Te v̄á yóo ì<sup>n</sup>-gá cada ì<sup>n</sup> sá ñà túú c̄u vâha iní Yá Ndióxi ñúú-á<sup>n</sup>. Chi ñúú-á<sup>n</sup> núc̄o mee Yá Ndióxi ndihi Yaá cáá datná cáá ì<sup>n</sup> mbéé quiti ní dánicuehè-güedé x̄taxi t̄n̄ni-gá, te nchaa ñáyiu x̄nu cuechi núú-gã cada cahnu ñahá-yu xii-gá. <sup>4</sup>Te nchaa ñáyiu-á<sup>n</sup> cundehe núú-yu Dútú Ndióxi, te t̄neé-yu cundeé ñu-gá. <sup>5</sup>Te ñúú-á<sup>n</sup> v̄á quini-gá-yu niú, te ni v̄á cánèhe chiu<sup>n</sup>-gá-yu ñuhú cutn̄ni núú-yu, te ni nchíanchii ñà túú-gã xíní ñùhu-xi dayehé ñúú-á<sup>n</sup> chi mee Dútú Ndióxi dáyèhé-gá, te ni caa ni quíhí<sup>n</sup> cunúú-yu cundecú-yu ñúú-á<sup>n</sup>.

**Sa ta c̄yatni nduu quixi tucu Xítohó Jesucristú**

<sup>6</sup>Te sáta dúcá<sup>n</sup> te ní cachí t̄núhu espíritú xínú cuèchi núú Yá Ndióxi-á<sup>n</sup> xii-í: —Nchaandi túhú t̄núhu-a c̄u-xi mee-ni t̄núhu ndáá cuiti. Te Yá Ndióxi Yaá dác̄ahu iní nchaa cue téé càhá<sup>n</sup> t̄núhu-gá n̄acuáa càhá<sup>n</sup>-güedé ní tendaha-gã ì<sup>n</sup> espíritú xínú cuèchi núú-gã ní quixi-xi ní dánèhé-xi nchaa ñáyiu x̄nu cuechi núú-gã nchaa n̄acuáa cada-gá, te v̄á c̄yâa-gá duca<sup>n</sup> càda-gá —duha càchí espíritú-á<sup>n</sup>.

<sup>7</sup>Te ní càhá<sup>n</sup> Xítohó Jesucristú, te càchí-gá:

—Ílo nd̄hi quixi tucu-í!

’iTe ío vâha tnahá nchaa ñáyiu t̄ni nchaa t̄núhu càhá<sup>n</sup> Yá Ndióxi yódó t̄n̄ni núú t̄utú-a! —duha càchí-gá.

<sup>8</sup>Te yúhú té Juáa ní tecú dóho-í nchaa n̄acuáa ní ngódó t̄n̄ni núú t̄utú-a, te ní xiní núú-í nchaa n̄acuáa cada-xi ndéé cuèé-gá. Te sáta dúcá<sup>n</sup> ní cuu te ní ngüñí x̄t̄i-í núú espíritú sá ní dánèhé núú ñáhá nchàa x̄á<sup>n</sup> cuendá chíñuhu-í-xi ni c̄u. <sup>9</sup>Te ní cachí-xi:

—Vá dúcá<sup>n</sup> càda-n, chi yúhú dicó xínú cuèchi-í núú Yá Ndióxi datná cúú yòhó

ndihi nchaa dava-gá ñáyi ndècu ndihi-n ichi-gá càhá<sup>n</sup>-ndó tnùhu-gá, ndihi nchaa ñáyi tnèi nchaa tnùhu ndèé núú tütú-a, te xíá<sup>n</sup> càchí-í sá vǎ dúcá<sup>n</sup> càda-n, chi mee Yá Ndióxi duca<sup>n</sup> chìnùhu-n-gá —càchí espíritú-á<sup>n</sup> xii-í.

<sup>10</sup> Te ní cachí tnùhu tucu-xi xii-í, te càchí-xi:

—Vá chidáhu-n nì ì<sup>n</sup> tnùhu Yá Ndióxi ndèé núú tütú-a, chi sa ní cuyatni cada-xi nchaa nàcuáa ndèé tnuní. <sup>11</sup> Te daña sǎ ncháá ñáyi ndècu ichi cuehé ichi duha na cundecu-ní-yu ichi-á<sup>n</sup>, te duca<sup>n</sup>-ni daña-n nchaa ñáyi quide nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyi quide váha te duca<sup>n</sup>-ni na càda váha-yu cundecú-yu, te nchaa ñáyi quide nchaa nacuáa cùu váha iní Yá Ndióxi te diu-ni duca<sup>n</sup> na càdá-yu cundecú-yu —duha càchí espíritú-á<sup>n</sup>.

<sup>12</sup> Te ní cachí Xítoho Jesucristú:

—Cundedóho-n tnùhu na càhá<sup>n</sup>-í-a. Ío ndíhi quixi tucu-í, te canehe-í nchaa sá ndúú tǎhú ñáyi quixi, te nàcuáa ndùu chiu<sup>n</sup> ní quidé-yu ì<sup>n</sup> ì<sup>n</sup>-yu te duca<sup>n</sup> cùnduu sá cuñaha-í nduu tǎhù-yu. <sup>13</sup> Te yúhú cùu-í Yaá sa ndècu ndéé cùtnàhá ní ngáva ñuyíú, te diu-ni-í cundecu-í ni caa ni quíhí<sup>n</sup> —duha càchí-gá.

<sup>14</sup> Te váha tǎhú nchaa ñáyi sa ní nduu ndoo ní nduu nine iní-xi, chi ñáyi-á<sup>n</sup> nǐ nduu tǎhù-yu quíhu-yu xití ñuú-á<sup>n</sup>, te caxí-yu sávidí yutnu nùtní-á<sup>n</sup> te xíá<sup>n</sup> candeca-xi iní-yu ni caa ni quíhí<sup>n</sup>. <sup>15</sup> Te ñuú-á<sup>n</sup> vǎ cùú quíhu ni ì<sup>n</sup> ñáyi ndècu ichi cuehé ichi duha, ni cuè ñáyi quide nduu, te ni cuè ñáyi ndècu ichi díí iní, te ni cuè ñáyi sàhni taha ñáyi-xi, te ni cuè ñáyi chìnùhu nchaa sá nǐ cadúha cue téé ñuyíú-a càchí-yu cùu ndióxi, te ni cuè ñáyi tnàhá iní dacuandehnde, te ni ì<sup>n</sup> ñáyi duca<sup>n</sup> xíquide vá ndúú tǎhù-yu quíhu-yu xití ñuú-á<sup>n</sup>.

<sup>16</sup> Te ní cáhá<sup>n</sup> tucu Xítoho Jesucristú, te càchí-gá:

—Yúhú Xítoho Jesucristú ní tendaha-í espíritú xínú cuèchi núu-í cuendá cachí tnùhu-xi xii-n nàcuáa ndùu tnùhu cùñaha-n xii nchaa ñáyi ndècu ndihi-n ichi-í dácuaa tnùhu-í ì<sup>n</sup> ì<sup>n</sup> ñuú. Te yúhú cùu-í mei ñàni tnàhá ndíi Davíí, te cada iní-n sǎ cùu-í dàtná ì<sup>n</sup> chódíní quiti quène datneé —duha càchí-gá.

<sup>17</sup> Te nchaa ñáyi cùu cuendá Xítoho Jesucristú Yaá cáá dàtná cáá ì<sup>n</sup> mbéé quiti ní dánucuhé-güedé, diu-ni ñáyi-á<sup>n</sup> cùu-yu ñáyi cada iní-ó sǎ cùu-yu ì<sup>n</sup> ñadíhí xichí tnàndaha ndihi ñaha xii-gá, te ñáyi-á<sup>n</sup> ì<sup>n</sup>-ni càhá<sup>n</sup>-yu ndihi Espíritú Yá Ndióxi, te xǎhá<sup>n</sup>-yu ndihi Espíritú-gá xii nchaa dava-gá ñáyi:

—Chí táquixi —cachí-yu xǎhá<sup>n</sup>-yu ndihi Espíritú Yá Ndióxi.

Te nchaa ñáyi duca<sup>n</sup> ndèdóho tnùhu-á<sup>n</sup> vitna, te xini ñuhu-xi duca<sup>n</sup> cáhá<sup>n</sup>-yu tnàhá-yu cùñàhá-yu xii nchaa dava-gá ñáyi-á<sup>n</sup>, te nchaa ñáyi cuini tuha ichi-gá te na quixí-yu, te dicó duca<sup>n</sup> cùu tǎhù-yu sá cándèca iní-yu ni caa ni quíhí<sup>n</sup>.

<sup>18</sup> Te nchaa nchòhó ñáyi ndèdóho nchaa nàcuáa càhá<sup>n</sup> tnùhu Yá Ndióxi ndèé núú tütú-a càhá<sup>n</sup>-í dóho-ndo. Te núu ì<sup>n</sup> ñáyi na còdo-gá tnùhu chido tnùn-í-yu núú tütú-a, te Yá Ndióxi ío dandòho ñaha-gá xii-yu chi yáha-yu nchaa tnúndòho yodo tnuní núú tütú-a te núu duca<sup>n</sup> na càdá-yu. <sup>19</sup> Te núu ì<sup>n</sup> ñáyi na chidáhu dava tnùhu Yá Ndióxi ndèé núú tütú-a te ñáyi-á<sup>n</sup> vǎ ndúú tǎhù-yu cundecú-yu ñuú-gá, te ni vǎ ndúú tǎhù-yu sá cándèca iní-yu ni caa ni quíhí<sup>n</sup> dàtná yódó tnùn-í núú tütú-a.

<sup>20</sup> Te Xítoho Jesucristú Yaá càhá<sup>n</sup> sá ncháá tnùhu-a cùu-xi tnùhu ndáá ní cáhá<sup>n</sup>-gá ní tecú dóho-í, te càchí-gá:

—Ndáá sá ío ndíhi quixi tucu-í —duha càchí-gá.



Te yúhú ní xáha<sup>n</sup>-í xii-gá:

—Duca<sup>n</sup> na cùnduu, taquìxi yohó Xítohó Jesucristú —duha ní xáha<sup>n</sup>-í xii-gá.

<sup>21</sup>Te Xítohó Jesucristú ío na chìndee chítúu ñaha-gă xii-ndo nchàa-ndo. Te

duca<sup>n</sup> na cùnduu. Te ío chí cádá ndèe iní-nă vitna.